



Digitized by the Internet Archive
in 2011 with funding from
University of Toronto

<http://www.archive.org/details/rpfranciscisuare07su>

R. P. FRANCISCI

SUAREZ

E SOCIETATE JESU

OPERA OMNIA.

TOMUS SEPTIMUS COMPLECTENS

COMMENTARIA AC DISPUTATIONES IN PRIMAM SECUNDÆ D. THOMÆ, DE GRATIA.

OPERIS DE GRATIA DIVINA TRIPARTITI PARTEM PRIMAM HIC REPERIES, CONTINENTEM PROLEGOMENA SEX,
DUOSQUE PRIORES DE NECESSITATE GRATIÆ AD HONESTA OPERA LIBROS,

CUM INDICIIS NECESSARIIS.

R. P. FRANCISCI

SUAREZ

E SOCIETATE JESU

OPERA OMNIA

EDITIO NOVA, A CAROLO BERTON,

CATHEDRALIS ECCLESIAE AMBIANENSIS VICARIO,

JUXTA EDITIONEM VENETIANAM XXIII TOMOS IN-F° CONTINENTEM, ACCURATE RECOGNITA,

REVERENDISSIMO ILL. DOMINO SERGENT, EPISCOPO CORISOPITENSI, AB EDITORE DICATA.

TOMUS SEPTIMUS.

7



PARISIIS

APUD LUDOVICUM VIVÈS, BIBLIOPOLAM EDITOREM,

Via vulgo dicta Cassette, 23.

MDCCCLVII.

THE INSTITUTE OF MEDICAL STUDIES
10 EGLINTON PLACE
TORONTO 6, CANADA.

DEC 23 1931

2967

AD LECTOREM.

Habes, rerum divinarum auscultator studiose, opus de Gratia, primam inter posthumas foeturam Patris Francisci Soarii, quam non educaverat tantum, sed suo ipse calamo tandem distinxit et compsit; habes, inquam, primum de GRATIA tertiumque volumen; nam secundum, quod in libertate creata, Deique auxiliis conciliandis ponitur universum, a suo auctore omnibus adornatum numeris, praeloque sepositum conservatur, ac Romanæ Sedis auctoritatem opperitur in dies; sic enim Soarii erga illam Sedem merita praclarissima, et Pontificis rescriptio paulo inferius subjicienda sperare nos jubent. Unum praeterea de Angelis prodibit volumen; de Opere, ut vocant, sex dierum, deque Anima alterum; quibus post olim editos de Deo uno ac trino libros, universa perficitur doctrina, quam sanctus Thomas in primam suæ Summæ partem contulerat. Adhæc multiplex justæ molis tractatio sequetur de humano fine ac voluntario, de bonitate malitiaque actuum humanorum, atque adeo de passionibus, virtutibus et peccatis; qua fiet ut primum quoque secundæ partis sancti Thomæ volumen locupletatum abeat, quando nihil pene ex illo enucleandum relinquitur, editis alibi de Beata Visione, de Legibus, deque Gratia egregiis monumentis. Jam ad duo de Religione ante evulgata totidem accedent, quæ diu multumque desiderantur. Suum deinde volumen jure vendicant perlectiones de Fide (additis quas olim Romæ, vel in Hispania, de Spe et Charitate publice dictaverat), qui fuit postremus sapientissimi Doctoris labor in hac Conimbricensis Academiæ primaria sede, cui duos ante obitum annos remiserat nuntium, ac si jam inde receptui caneret ad æternitatem. Denique non minoris expectationis opus pollicemur variis aggestum consiliis; utinam superessent omnia illa, quæ viginti fere per annos certatim poscentibus dedit. Neque vero prolem minus numerosam educere potuit, aut educare, foecundum adeo felixque ingenium, non alieno subsidio egentem, sed nativo procreatam, altamque marte, ut verius sanctiusque dixeris eam ex parentis sui mente natam, quam ex Jovis cerebro Minervam mentitur antiquitas.

Cæterum non illa solum quibus ultimam imposuerat Soarius manum, et Sacrae Inquisitionis judicio commiserat (nempe de Gratia, de Angelis, ac de Opere sex dierum), nihil temerata dabimus; sed in reliquis etiam quæ promisimus, nefas judicavimus filium abrumpere, aut aliunde quæsitâ miscere; quod ipsum optare neminem non videmus, vel quia nothos suppositosve foetus facile aspernamur, vel quia tanti auctoris cura etiam negligentior, multorum vigilias antevertit, cujus rei testem

non laudo alium, quam illas ipsas de Anima lucubrationes, quas operi sex dierum diximus adjiciendas. Eas enim quadragesimo quinto ante mortem anno (is erat ætatis illius vigesimus quintus) auditoribus propinaverat; opus certe hominis, qui jam tunc in scholis consensuisse videri poterat. Quod si ita est, ut plane sentimus, audentes prosequimur, et pollicemur nihil minus placituros, optime lector, quos paulo ante retulimus labores.

De præsentì opere dicere supersedeo, ne aut supervacaneæ commendationis incuser, aut videar (quod erit longe infelicius) non laudare opus, sed impari ingenio aut dictione deterere. Tam clarum est, tam late propagatum Francisci Soarii nomen; tanta nube testium longo ævo firmata operum dignitas et excellentia, ut certum in utroque secum afferant præjudicium; ac solo Soarii inscripto Epigrammate splendide commendentur, neque opus sit de prolis generositate sciscitari, ubi constiterit de parente. Unum illud egregio dolendum in opere, quod ad umbilicum usque non prodeat absolutum, cum medium omnino intercidatur. Ejus rei causam non aliunde melius intelligere licebit, quam ex epistola Summi Pontificis, auctoris encomiis non respersa modo, sed cumulata.



CARDINALIS BURGHESIUS

AD


PATREM FRANCISCUM SOARIUM

SUÆ SANCTITATIS NOMINE.

Admodum, Reverende Pater, acceptis binis ejusdem argumenti vestræ Paternitatis litteris, jussit me ei Sanctissimus Dominus nomine suo respondere, præstantiam ingenii vestræ Paternitatis et obsequium in Sedem Apostolicam plurimi se fecisse, eam paterna charitate, et amasse semper, et in posterum amaturum, cum ob præcipua in rempublicam christianam merita sua; tum quod honestissime de suis virtutibus sentit. Quod ad impressionem libri de GRATIA pertinet, nulla propter doctrinam orta est difficultas: existimat enim Sua Sanctitas eam non discrepaturam ab eruditione et doctrina tot librorum jamdudum in lucem a se editorum, qui omnium acclamatione excepti, egregie sustinent nomen et famam quam adepti sunt; sed omnis emanavit difficultas ob qualitatem quæ inibi disputatur materiæ; de qua ne alii etiam agerent qui de ea scripserant, efficaciterque pro facultate imprimendi institerant, gravissimis de causis pro nunc non modo cautum, sed strictim vetitum fuit. Si ulli tamen unquam potestas fiet hac de re libros promulgandi, in hoc etiam ostendet Sua Sanctitas, quanti vestram Paternitatem, ejusque virtutem æstimet: volet enim tunc, ut liber vestræ Paternitatis inter primos in lucem prodeat. Ergo cum hujusmodi occasio dabitur, non patiar studia mea a vestra posse Paternitate desiderari, cui divinæ Gratiae incrementum a Deo precor, et Suæ Sanctitatis nomine benedictionem impartior. Romæ, 26 aprilis, 1617.

Vestræ Paternitatis studiosus,

S. CARDINALIS BURGHESIUS.



TRACTATUS DE GRATIA DEI

SEU DE DEO SALVATORE,

JUSTIFICATORE, ET LIBERI ARBITRII ADJUTORE PER GRATIAM SUAM.

PROOEMIUM.

1. In superiori opere, quod de Legibus ac Deo legislatore inscripsimus, salutem hominis et operum ejus honestatem ac bonum meritum ex duobus principiis pendere diximus, lege nimirum ac gratia; illa, ut regula qua instruimur; hac, ut virtute qua juvamus. Et ideo, D. Thomæ vestigia sequendo, superiori operi hoc proxime annectimus. In illo enim, explicatis cæteris legibus, tandem ad legem gratiæ, quæ perfectio et consummatio legum omnium est, pervenimus: quam excellentiam ab ipsa gratia participat, quia legis notitia, nisi virtute gratiæ juvetur, parum prodesse, imo vero ad beatitudinem consequendam multum obesse potuisset. Nam ut Paulus dixit ad Romanos, cap. 7: *Concupiscentiam nesciebam, nisi lex diceret: Non concupisces; occasione autem accepta mandatum operatum est in me omnem concupiscentiam*, quia nimirum jubebat, et non juvabat ad vincendas concupiscentias, quod sola gratia Dei per JESUM Christum Dominum nostrum præstare potest. Convenientissimo igitur ordine hic tractatus præcedenti succedit, et veluti ejus complementum existit.

2. Similem autem tractationem inchoans D. Thomas in sua 1. 2. quæst. 109, illam sic inscripsit: *De exteriori principio humanorum actuum, scilicet gratia Dei*; quem titulum aliqui ex modernis scriptoribus mendosum esse existimant, quia gratia Dei non est principium extrinsecum humanorum actuum, ut existimavit Pelagius, ponens gratiam in sola lege et doctrina; sed est principium intrinsecum quod Spiritus Sanctus inspirat, et mentibus ac cordibus nostris infundit. Antiquiores vero expositores neque in verbis mutationem fecerunt, neque mendum aliquod adnotarunt. Solus Conradus, in principio quæst. 90 et 109, advertit et legem aliquam esse in corde et mentibus scriptam, et gratiam intus in animam infundi, et nihilominus, quia proveniunt a principio extrinseco, quod est Deus, ideo utrumque tractatum de legibus et gratia, de principiis extrinsecis appellari. Et fortasse brevitatis causa posita est in illo titulo particula illa, scilicet *gratia Dei*, quia statim in capite quæstionis latius erat explicanda his verbis: *Consequenter considerandum est de exteriori principio humanorum actuum, scilicet de Deo, prout ab ipso per gratiam adjuvamur ad recte agendum*; et in

capite quæstionis 90 dixerat D. Thomas : *Principium extrinsecus movens bonum ad est Deus, qui et nos instruit per legem, et juvat per gratiam.* Si ergo fortasse *gratiam Dei* in illo titulo exterius principium appellavit D. Thomas, non ideo fuit quia gratia non sit principium interne nos juvans, quod postea in tota doctrina luculentissime docet, sed quasi per denominationem extrinsecam, quia extrinsecus advenit, et quia est veluti instrumentum principalis agentis extrinseci : sicut potest impetus lapidi projecto immissus principium extrinsecum talis motus appellari : non enim est inusitata locutio. Ut tamen omnino a Pelagianis fugiamus, Deum extrinsecum principium seu motorem vel adiutorem ad opera gratiæ, gratiam vero, per quam nos juvat, internum principium earumdem operationum appellabimus : quamvis enim (ut videbimus) inter gratias aliquæ sint extrinsecæ, nihilominus quæ propriissime et quasi per antonomasiam, inter creata dona, gratiæ appellantur, nobis intrinsecus inhærent, et vel sunt opera, vel aliquo modo operationum principia, ut videbimus.

3. Ad tollendam ergo hanc vocum ambiguitatem, utrumque in nostra inscriptione et titulo expresse posuimus, Deum scilicet sanctificatorem, et gratiam ejus. Quibus etiam verbis proprium hujus doctrinæ objectum, seu materiam circa quam versatur, connexionem cum aliis Theologiæ partibus, et dignitatem ac excellentiam ejus indicavimus. Cum enim hæc doctrina sit pars unius scientiæ ac Theologiæ cujus adæquatum objectum est Deus, illum ut præcipuum objectum, et quasi proximum finem respicere necesse est, et quia non attingit illum secundum absolutam rationem, sed secundum respectum quemdam ad creaturas, illum nomine sanctificatoris explicamus. Illa enim voce respectus primi et principalis principii in supernaturali rerum ordine significatur. Et ita distinguitur hæc pars Theologiæ a cæteris, in quibus Deus vel secundum se, ut unus aut trinus, vel sub respectu creatoris et gubernatoris universi, vel ut ultimus finis, vel ut legislator consideratur, ut facile unusquisque per se poterit contemplari. Solum in nomine *Sanctificatoris*, cavenda est æquivocatio, si cum nomine *Redemptoris* confundatur. Hæc enim nomina proprie sumpta diversis rationibus Deo conveniunt : nam esse sanctificatorem ad Deum, ut Deus est, esse vero redemptorem ad ipsum, ut Deus homo est, spectat. Unde sanctificatorem esse, commune est tribus personis ; esse vero redemptorem, proprium incarnati Verbi. Illud etiam non solis hominibus, sed etiam Angelis, hoc vero solis hominibus, et non in omni statu, sed tantum naturæ lapsæ, Deus exhibet. In præsentem ergo, solum spectatur Deus ut sanctificator, id est, principalis auctor sanctitatis, gratiæ, reliquorumque donorum quibus intellectualem creaturam ad se, tanquam ad ultimum supernaturalem finem, convertit atque perducit. Contemplatio autem Dei ut Redemptoris ad ultimam Theologiæ partem spectat, ex qua solum nunc sumimus ac supponimus omnem gratiam Dei ex meritis Christi Domini nobis conferri, et sub eo respectu esse etiam gratiam Christi, ut paulo post videbimus.

4. Addidimus vero in illo titulo alteram particulam, *de gratia Dei*, tum ut a communi magisque usitata inscriptione non discreparemus ; tum etiam quia per

illum proxima materia, circa quam hæc doctrina versatur, innotescit. Gratia namque et ejus collatio est veluti fundamentum illius respectus a quo Deus extrinsece denominatur sanctificator, ideoque, cognita ipsa gratia, Deus sub ratione sanctificatoris cognoscitur, neque aliter cognosci aut explicari potest. Ex quo facile intelligi potest quam sit excellens, quamque propria Theologici instituti hæc doctrina. Primo quidem quia hæc gratia supernaturale donum est, quod nisi per divinum lumen fidei cognosci non potest. Deinde quia semen est gloriæ, et fons aquæ vivæ salientis in vitam æternam, quam homines infirmi et imbecilles, nisi per divinæ gratiæ virtutem comparare non valent. Denique quia ipsius Dei cognitio, quam Theologia præcipue intendit, per hanc gratiæ doctrinam magna ex parte perficitur. Unum enim ex præcipuis Dei operibus est, homines gratis et per gratiam suam justificare, teste Paulo ad Rom. 3, et ideo solus ipse sanctificator et justificator hominum appellatur, quia sicut solus potest homines beatos efficere, ita etiam solus potest eosdem sibi gratos reddere, juxta illud : *Gratiam et gloriam dabit Dominus*. Unde etiam fit ut per divinæ gratiæ cognitionem universa fere Dei attributa mirum in modum illustrentur. Deus enim, gratiam suam gratis donando, liberalitatem suam infinitam excellentiori modo quam per alia opera manifestat : dumque illam, prout vult, distribuit, absolutum se suorum donorum dominum ostendit, et quoniam non solum amicis sed etiam inimicis illam donat, eos de peccatoribus faciens sanctos, omnipotentiam suam, ut canit Ecclesia, ac misericordiam, parcendo maxime et miserando, manifestat. Ac denique dum per gratiam suam humanæ voluntati dominatur, ejusque salva libertate quo vult efficacissime pertrahit, summam sapientiam suam, ac potentissimam voluntatem notissimam facit.

5. Atque ex hoc objecto et materia habet imprimis hæc doctrina in Theologia singularem dignitatis gradum, quoniam et Deum sub excellenti quadam ratione primi principii, et benefactoris hominum contemplatur, et in explicatione illius doni, quo divinæ naturæ divinarumque virtutum participes efficimur, potissimum versatur. Et hinc magnam etiam utilitatem habet : ostendit enim nobis adipiscendæ beatitudinis viam, simulque infirmitatis nostræ nos monet, et ad divinum auxilium continuis precibus postulandum inducit. Est etiam Catholico Doctori hæc doctrina maxime necessaria ad resistendum hæreticis, qui innumeris erroribus et objectionibus veritatem catholicam obscurare et evertere conati sunt. Atque hinc tandem difficilis valde et scopulis plena est præsens disputatio, tum quia in rebus maxime divinis, et spiritualibus, et internis, quæ sub experimentum vix cadunt, internoscendis versatur; tum quia gratiæ efficacitatem et necessariam cum libertate arbitrii compositionem et concordiam inquirat, quod semper arduum et difficile judicatum est. Nam, ut dixit Augustinus : *Ipsa etiam ratio quæ de his rebus, a talibus quales nos sumus, iniri potest, quemlibet nostrum quærentem vehementer angustat, ne sic defendamus gratiam, ut liberum arbitrium auferre videamur; rursus liberum ne sic asseramus arbitrium, ut superba impietate ingrati Dei gratiæ judicemur* (l. 2 de Peccat. merit., c. 18). Quæ quidem obscuritas et difficultas mirum in modum aucta est, non

solum ex variis et extreme contrariis hæreticorum erroribus, sed etiam ex concertationibus inter Catholicos subortis : nam licet omnes media ac regia via incedere nitantur, quia tamen illam arctam et angustam hæretici reddiderunt, vix possunt iter peragere, quin ad dexteram vel ad sinistram declinare videantur.

6. Et hinc orta est hoc tempore celebris illa controversia, quæ a viribus liberi arbitrii et divinis auxiliis nomen obtinuit. De qua licet in aliis libris jam antea multa disputarim, in hoc ultimam ei manum imponere decrevi, tum quia a disputatione de gratia separari non potest, tum etiam quia post libros illos editos multi doctissimi viri illorum doctrinam evertere contrariamque modis omnibus persuadere conati sunt. Quorum præcipua scripta attente perlegi, nullo profecto contradicendi studio, sed summo veritatis intelligendæ desiderio : nihil tamen inveni quod vel a priori sententia nos posset dimovere, vel difficultatibus nostris satisfaceret, aut modum expeditum ad innumeros vitandos labyrinthos, et nodos nobis inextricabiles dissolvendos suggereret. Quam ob causam iterum eandem disputationem aggredi, et pro viribus difficultates omnes expendere decrevi. Unde fieri non poterit quin opus hoc fortasse plus justo crescat. Ut tamen lectori minus sit onerosum, illud in duas præcipuas partes dividemus. Prior erit de controversiis hujus temporis circa vires liberi arbitrii et auxilia gratiæ quibus ad bene operandum juvatur, ideoque pars hæc de actuali gratia inscribi poterit. Altera pars erit de gratia habituali, et causis ac effectibus ejus, sub quibus justificatio et meritum comprehenduntur. Atque ita in hac doctrina tradenda nihil vel parum a D. Thomæ ordine seu methodo discedemus ; nam in priori parte, cum infirmitate arbitrii necessitatem gratiæ, de qua D. Thomas quæst. 109 disputat, ostendemus ; explicando vero auxilia gratiæ, nonnullas divisiones ejus, quas divus Thomas, quæst. 111, tradit, et alias quæ a Theologis adduntur, pertractabimus. In altera vero, cætera, quæ D. Thomas in aliis quæstionibus disputat, eodem fere ordine locupletabimus.

7. Prius vero quam utramque partem aggrediamur, ut clarior et expeditior sit doctrina, nonnulla prolegomena præmittenda duximus, quibus et termini sine ambiguitate exponantur, et nonnulla necessaria fundamenta jaciantur. In primo itaque de natura et libero arbitrio, quod est gratiæ fundamentum, præcipua quædam principia et imprimis necessaria præmittemus. Et quoniam præcipue difficultates circa usum libertatis ex necessitate gratiæ vel motionis divinæ oriuntur, et hæc pendent ex modo præscientiæ quam Deus habet de futuro consensu liberi arbitrii, ideo secundum prolegomenum de præscientia Dei liberorum actuum sub conditione futurorum præmittemus ; nam per occasionem hujus concordie gratiæ cum libero arbitrio contentio de hac præscientia orta est, in qua necessarium nobis est sententiam nostram præmittere ac fundare, ne postea necessarium sit, vel ad aliam disputationem digredi, aut ex fundamento non probato ac defenso sæpissime loqui. Deinde vero tertio loco usum nominis *Gratia*, et varia membra seu significata illius exponemus, ut quasdam gratias vel faciliores, vel præsentī instituto minus convenientes, breviter expeditamus ;

aliarum vero, de quibus tractandum est, nomina in promptu sint, ut sine verborum ambiguitatibus pervia sit disputatio.

8. Quarto vero loco, quoniam humana natura in diversis statibus inveniri potest, in quibus non easdem vires habet, ideo consequenter varios status humanæ naturæ, ejusque liberi arbitrii exponemus. In quinto vero, errores omnes, qui in hac materia fuerunt, accurate referemus, quia eorum notitiam, non solum ad illos cavendos et impugnandos, sed etiam ad intelligenda Concilia et Patres, necessariam esse existimamus: quia cum Concilia et Patres, ad extirpandos illos errores, in sensu illis contrario locuti fuerint, sæpe fit ut, ex ignorance ipsorum errorum, sententiæ Patrum ad peregrinos sensus et ab illis non intentos detorqueantur. Unde tandem in sexto prolegomeno, Pontificum, Conciliorum et Patrum auctoritatem, qua potissimum in hoc opere nobis utendum est, proponemus. In toto vero hoc opere ab omni exaggeratione in nostris sentiis affirmandis, et ab omni censura in contrariis rejiciendis abstinemus. Quia vero in probationibus ex Conciliorum definitionibus, vel per illationem ad incommodum, videri possunt contrariæ sententiæ, vel ut definitionibus Conciliorum contrariæ, vel ut dogmata ex quibus errores contra fidem sequuntur, reprehendi, lectorem monemus id longe a nobis esse; id enim non ut censura vel iudicium de qualitate et gradu falsitatis contrariæ sententiæ accipiendum est, sed solum per modum argumentationis, cuius vis sæpe non potest aliter explicari.



INDEX

LIBRORUM ET CAPITUM

HUJUS VOLUMINIS.

PROLEGOMENUM I.

DE REQUISITIS AD FORMALEM LIBERTATEM, ET USUM LIBERUM.

- CAP. I. De nominibus naturæ et liberi arbitrii. 4
CAP. II. Quæ sint necessaria, ut potentia sit libera et libere operetur? 4
CAP. III. Utrum recte describatur potestas libera esse, quæ positis omnibus prærequisitis ad agendum, potest agere et non agere? 10
CAP. IV. Utrum voluntas exposita, cum omnibus prærequisitis ex parte intellectus ad libere volendum, possit a Deo ita moveri, ut ex necessitate, et non libere velit? 16
CAP. V. Quibus modis possit Deus facere ut voluntas necessario velit objectum actuali iudicio rationis indifferenter propositum? 24
CAP. VI. Quæ necessitas antecedens, vel consequens, seu in sensu composito vel diviso, repugnet libertati, aut illi non noceat? 33

PROLEGOMENUM II.

DE SCIENTIA QUAM DEUS HABET DE LIBERIS ACTIBUS SUB CONDITIONE FUTURIS, PRIUS RATIONE QUAM ABSOLUTE FUTURA COGNOSCAT.

- CAP. I. Sensu et statu controversiæ proposito, variæ sententiæ cum suis auctoribus referuntur. 46
CAP. II. Deum habere certam et infallibilem scientiam futurorum contingentium conditionatorum ex Scriptura, prout a Patribus intellecta est, ostenditur. 51
CAP. III. Plures ex Sanctis, et antiquis Patribus scientiam conditionatam in Deo cognovisse, præsertim Augustinum, et nullum eorum illam Deo negasse. 58
CAP. IV. Neque in Augustino, neque in aliis Patribus aliquid contra perfectionem divinæ scientiæ conditionatæ reperiri. 66
CAP. V. Deum habere conditionatam scientiam futurorum ante decretum liberum suæ voluntatis secundum rationis ordinem, nec posse talem scientiam in tali decreto fundari, ex eisdem Scripturæ et Patrum testimoniis ostenditur. 71
CAP. VI. Quid de hac scientia conditionata D. Thomas senserit? 79
CAP. VII. Ratione a priori ostenditur dari in Deo conditionatam præscientiam, et principali fundamento contrariæ sententiæ occurritur, veritasque talium propositionum declaratur. 85
CAP. VIII. Quæ decreta conditionata et libera Deo attribuebantur, et in illis non posse contingentia sub conditione futura prævideri? 96

- CAP. IX. Nonnullis objectionibus occurritur, earumque occasione doctrina data magis declaratur, et veluti in summam redigitur. 107
CAP. X. Alteri objectioni occurritur, et an scientia visionis sit causa futurorum, explicatur. 112

PROLEGOMENUM III.

DE COMMUNI RATIONE GRATIÆ, ET VARIIS MODIS SEU MEMBRIS AUT SIGNIFICATIS EJUS.

- CAP. I. An gratia, de qua in præsentibus agitur, sit donum Dei gratuitum? 130
CAP. II. Utrum omne donum gratuitum sit vera gratia Dei et Christi? 132
CAP. III. Utrum gratia non solum creatum donum, sed etiam increatum significet; nec solum internum, sed etiam externum? 136
CAP. IV. De divisione gratiæ in gratis datam, et gratum facientem. 142
CAP. V. Quot sint gratiæ gratis datæ; et quid unaqueque earum sit? 149
CAP. VI. Quotuplex sit gratia sanctificationis, seu gratum faciens; et de variis hujus gratiæ significationibus? 172

PROLEGOMENUM IV.

DE STATIBUS HUMANÆ NATURÆ.

- CAP. I. An possit homo in statu puræ naturæ creari in ordine ad finem supernaturalem? 179
CAP. II. Utrum potuerit homo in statu puræ naturæ creari in ordine ad naturæ integritatem; et consequenter an potuerit cum illa integritate creari? 186
CAP. III. Utrum status innocentie seu originalis justitiæ ultra statum puræ et integræ naturæ aliquid agat? 190
CAP. IV. Qualis sit gratiæ status, et quomodo cum aliis conjungi vel ab eis separari possit? 194
CAP. V. An status gratiæ et originalis justitiæ per eandem formam constituentur, ac subinde quomodo separari possint? 196
CAP. VI. Quis et qualis sit status hominis in natura lapsa? 199
CAP. VII. Utrum homo in statu naturæ lapsæ careat libertate, quam in sua pura natura haberet? 202
CAP. VIII. Utrum in statu naturæ lapsæ homo sit intrinsicè debilior ad operandum bonum, quam esset in statu puræ naturæ. 206
CAP. IX. Utrum in statu naturæ lapsæ debilior sit homo ad operandum, quam in pura natura, saltem ob causas extrinsecas? 213

PROLEGOMENUM V.

DE VARIIS ERRORIBUS DIVINÆ GRATIÆ CONTRARIIS.

CAP. I. De Judæorum errore circa Christi justitiam et gratiam.	220
CAP. II. De errore Pelagii contra divinam gratiam.	223
CAP. III. Circa dictum Pelagii errorem nonnulla dubia expenduntur.	228
CAP. IV. An Pelagius non solum auxilii gratiæ, sed etiam generalis Dei concursus necessitatem ad humanas actiones negaverit?	235
CAP. V. Quæ fuerit sententia errorve Semipelagianorum, et qui ejus auctores vel sectatores?	239
CAP. VI. Nonnullis dubitationibus propositis, Semipelagianus error amplius explicatur.	251
CAP. VII. De errore Lutheri et Calvinii et Sectatorum circa gratiam Dei et liberum arbitrium.	267

PROLEGOMENUM VI.

DE SCRIPTIS PROBATA DE GRATIA DOCTRINAM CONTINENTIBUS.

CAP. I. De auctoritate Pontificum Romanorum, qui gratiam defenderunt.	273
CAP. II. De censura Pii V et Gregorii XIII aliquarum assertionum, partim naturæ, partim gratiæ nimium tribuentium aut detrahentium.	283
CAP. III. De Concilio Diospolitano in Palæstina contra Pelagium pro gratia Dei congregato, ejusque actis et auctoritate.	293
CAP. IV. De Conciliis Africanis, et Ephesino, quæ contra Pelagium pro Dei gratia pugnarunt.	300
CAP. V. De aliis Conciliis contra reliquias Pelagianorum, et alios gratiæ hostes celebratis.	307
CAP. VI. De Patribus qui veram de gratia doctrinam nobis tradiderunt, et contrarias hæreses confutarunt.	311
CAP. VII. Continens Librum D. Augustini de Gestis contra Pelagium in Concilio Palæstino, per 22 capita distributum.	325

LIBER I.

DE NECESSITATE GRATIÆ AD PERFICIENDA OPERA MORALITER BONA ORDINIS NATURALIS, ET AD CONTRARIA PECCATA VITANDA.

CAP. I. Utrum homini ad quamlibet veritatem naturalem cognoscendam gratia necessaria sit in omni statu, præsertim naturæ lapsæ?	350
CAP. II. Utrum ad omnem moralem cogitationem rectam et honestam sit necessaria gratia?	363
CAP. III. Utrum homo lapsus possit honeste operari aliquando per quamcumque virtutem, sive naturæ, sive etiam gratiæ?	369
CAP. IV. Utrum ad omne bonum opus morale sit necessaria gratia sanctificans, et consequenter an existens in statu peccati mortalis possit interdum bene moraliter operari?	374
CAP. V. Quid Augustinus senserit de operibus factis ab homine in peccato, seu charitate carente?	380
CAP. VI. Utrum gratia fidei sit necessaria ad quodlibet opus moraliter bonum, etiam ordinis naturalis faciendum?	386
CAP. VII. De operibus infidelium quid Augustinus senserit.	393
CAP. VIII. Utrum interna gratia specialis, præter Dei concursus naturalem humanæ naturæ debitum, sit	

necessaria simpliciter homini lapsus ad honeste operandum?

402

CAP. IX. In nullo actu esse necessariam homini ad honestam operationem moralem ordinis naturalis specialem motionem, vel qualitatem ipsi voluntati a Deo impressam, quæ et physice actum efficiat, et voluntatem ad illum efficiendum omnino determinet.	419
CAP. X. Ad singula opera bona moraliter non esse necessariam cogitationem, vel inspirationem in sua entitate majorem, seu meliorem, quam sine auxilio gratiæ haberi possit.	422
CAP. XI. Proponitur tertia sententia, tertiusque modus explicandi auxilium gratiæ ad singula opera moralia necessarium.	424
CAP. XII. An cogitatio honesta, quæ habet effectum bonæ voluntatis, sit semper melior quam illa cogitatio, quæ illum effectum non consequitur?	428
CAP. XIII. An cogitatio honesta naturalis congrua, sit vera gratia in homine non elevato ad supernaturalem finem, sive in pura, sive in integra natura constituto absque peccato?	436
CAP. XIV. Objectionibus contra discursum capituli superioris satisfi.	442
CAP. XV. An cogitatio congrua ad bene moraliter operandum sit vera et supernaturalis gratia, respectu hominis ad finem supernaturalem elevati?	445
CAP. XVI. Proponitur contrariæ sententiæ fundamentum ex Patrum locutionibus desumptum, ut retorqueatur.	448
CAP. XVII. Ex eorundem Patrum sententiis, cogitationem naturalem congruam non esse verum gratiæ auxilium demonstratur.	449
CAP. XVIII. Destructio alterius sententiæ fundamenti, veritas amplius confirmatur.	454
CAP. XIX. Proponitur universalis objectio ex Patribus asserentibus nullum opus bonum posse fieri sine gratia.	456
CAP. XX. Patrum testimonia, quæ omnia bona opera gratiæ tribuunt, exponuntur.	460
CAP. XXI. Liberum arbitrium sine auxilio non nisi ad peccandum valere, quo sensu interdum a Conciliis vel Augustino dicatur.	470
CAP. XXII. Rationibus generalibus aliarum opinionum satisfi.	475
CAP. XXIII. Utrum ad singulas tentationes legi naturali repugnantes superandas, singulare gratiæ auxilium necessarium sit?	479
CAP. XXIV. Utrum ad vincendas singulas graves tentationes contra legem naturalem, in statu naturæ lapsæ, necessarium sit speciale gratiæ auxilium?	489
CAP. XXV. Utrum homo in statu naturæ integræ, totam naturæ legem in quacumque occasione, et omni tempore, sine auxilio gratiæ servare, omniaque gravia peccata vitare potuisset?	503
CAP. XXVI. Utrum homo lapsus possit omnia præcepta naturalia diu servare, vitando omnia peccata, et tentationes omnes illis contrarias, sine speciali auxilio gratiæ?	507
CAP. XXVII. Utrum ad servandam legem naturalem, et vitanda omnia peccata illi contraria longo tempore, sit necessaria habitualis gratia, vel fides, aut sufficiat auxilium actuale, et quale illud esse oportet?	511
CAP. XXVIII. Utrum homo in puris naturalibus conditus possit innocentiam diu conservare, non peccando mortaliter per vires rationis et liberi arbitrii, sine speciali Dei adjutorio?	521
CAP. XXIX. Utrum homo lapsus possit elicere, solis vi-	

- ribus liberi arbitrii, sine auxilio gratiæ, aliquem actum dilectionis Dei, saltem ut auctor est et finis naturalis?* 526
- CAP. XXX. *Utrum homo in aliquo statu possit diligere Deum auctorem naturæ amore benevolentia per liberum arbitrium, sine auxilio gratiæ?* 532
- CAP. XXXI. *Utrum diligere super omnia Deum, ut auctorem naturæ, sit actus ita in substantia et ordine suo supernaturalis, ut excedat vires naturales liberi arbitrii creati, et ideo sine auxilio gratiæ alias fieri non possit?* 538
- CAP. XXXII. *Utrum in statu naturæ lapsæ possit homo diligere Deum, ut auctorem naturæ super omnia, solis liberi arbitrii viribus absque speciali auxilio gratiæ, et sententia affirmans refertur, et fundatur?* 547
- CAP. XXXIII. *Refertur et fundatur opinio negans posse hominem lapsum diligere super omnia Deum ut auctorem naturæ, sine auxilio gratiæ.* 549
- CAP. XXXIV. *Exponitur ac defenditur mens D. Thomæ de auxilio gratiæ necessario ad dilectionem Dei in statu naturæ lapsæ.* 552
- CAP. XXXV. *Quæ gratia sit necessaria in statu naturæ lapsæ, ad diligendum amore naturali super omnia Deum, ut auctorem naturæ?* 560
- CAP. XXXVI. *Quid sentiendum sit de potestate hominis in puris naturalibus, ad amandum Deum finem naturæ super omnia?* 569
- CAP. XXXVII. *Utrum sit aliquis alius actus virtutis naturalis, seu acquisitæ, præter amorem Dei, qui propter difficultatem suam fieri non possit sine gratia in statu naturæ lapsæ?* 572
- CAP. XXXVIII. *Utrum homo lapsus, vel in puris naturalibus constitutus, naturales virtutes possit suis viribus sine auxilio gratiæ acquirere?* 579
- LIBER II.
- DE NECESSITATE GRATIÆ AD ACTUS DIVINI ORDINIS ELICIENDOS, SERVANDA SUPERNATURALIA PRÆCEPTA, ET PECCATA ILLIS CONTRARIA VITANDA.
- CAP. I. *Utrum gratia divinæ revelationis ad Deum in hac vita cognoscendum, sicut ad salutem oportet, fuerit necessaria?* 585
- CAP. II. *Utrum ad credendum revelatis specialis gratia Dei sit necessaria?* 590
- CAP. III. *Utrum ad initium fidei sit necessaria gratia?* 592
- CAP. IV. *An actus fidei sit in se, et in substantia supernaturalis, et tractatur prima sententia?* 598
- CAP. V. *Actum fidei et voluntatem credendi esse actus quoad substantiam supernaturales.* 603
- CAP. VI. *Actum fidei non esse tantum supernaturalem in suo fieri, sed in suo etiam esse.* 603
- CAP. VII. *Actum fidei non esse supernaturalem ex modo accidentali actus, solum extrinsece illum denominante.* 509
- CAP. VIII. *Actum fidei non esse supernaturalem ex accidentali modo intrinseco, seu illi inhærente, et vera assertio concluditur.* 614
- CAP. IX. *Fundamenti prioris sententiæ satisfi.* 617
- CAP. X. *Utrum possit homo assentiri mysteriis supernaturalibus revelatis a Deo, aliquo naturali assensu sine auxilio speciali gratiæ?* 620
- CAP. XI. *Utrum fides aliqua, quæ idem motivum credendi, eandemque rationem formalem objecti habeat cum fide infusa, possit haberi ex viribus naturæ sine auxilio gratiæ?* 629
- CAP. XII. *Utrum ad sperandum, sicut oportet, divinas promissiones, gratiæ auxilium requiratur, et quale, quæ ratione necessarium sit?* 640
- CAP. XIII. *Utrum ad amandum Deum amore concupiscentiæ, ut est summum bonum, et commodum hominis amantis, sit auxilium gratiæ necessarium?* 644
- CAP. XIV. *Utrum ad amandum Deum ut supernaturalem finem, et gratiæ auctorem, perfecta dilectione amicitia, auxilium gratiæ per se, et propter speciem et excellentiam talis amoris, sit necessarium?* 653
- CAP. XV. *Utrum ad amandum Deum auctorem gratiæ, amore etiam imperfecto, sit per se necessarium gratiæ supernaturalis auxilium?* 661
- CAP. XVI. *Utrum ad aliquos actus moralium virtutum sit per se necessaria gratia, eo quod in specie sua supernaturales sint?*
- CAP. XVII. *Utrum præter actum fidei, sint in intellectu speculativo aliqui actus supernaturales, propter quos gratia per se necessarium sit?* 669
- CAP. XVIII. *Quis sit actus sapientiæ specialiter Spiritui Sancto attributus?* 675
- CAP. XIX. *Quis sit actus intellectus dono Spiritus Sancti specialiter attributus?* 680
- CAP. XX. *Quis sit actus scientiæ dono Spiritus Sancti specialiter attributus?* 684
- CAP. XXI. *Quinam actus sint fortitudo, pietas, timor, et consilium, qui dono Spiritus Sancti specialiter tribuuntur?* 687
- CAP. XXII. *Utrum præter actus virtutum et donorum, sint alii actus supernaturales, ad quos sit specialis gratia necessarium, qui beatitudines, vel fructus Spiritus Sancti dicuntur?* 695
- CAP. XXIII. *Utrum ad servanda supernaturalia præcepta, quæ de internis actibus data sunt, vel ad non peccandum contra illa, sit gratia necessaria?* 703
- CAP. XXIV. *Utrum ad servanda præcepta supernaturalia de externis actibus, necessaria sit gratia?* 710
- CAP. XXV. *Utrum hominibus etiam justis sit necessaria nova gratia, ad exequenda media necessaria vel utilia ad æternam salutem consequendam?* 714

INDEX CAPITUM PROLEGOMENI PRIMI.

DE REQUISITIS AD FORMALEM LIBERTATEM, ET USUM LIBERUM.

- CAP. I. *De nominibus naturæ et liberi arbitrii.*
- CAP. II. *Quæ sint necessaria, ut potentia sit libera et libere operetur.*
- CAP. III. *Utrum recte describatur potestas libera esse, quæ positis omnibus prærequisitis ad agendum potest, agere et non agere?*
- CAP. IV. *Utrum voluntas exposita, cum omnibus prærequisitis ex parte intellectus ad libere volendum, possit a Deo ita moveri, ut ex necessitate, et non libere velit.*
- CAP. V. *Quibus modis possit Deus facere ut voluntas necessario velit objectum actuali iudicio rationis indifferenter propositum.*
- CAP. VI. *Quæ necessitas antecedens, vel consequens, seu in sensu composito vel diviso, repugnet libertati, aut illi non noceat.*



PROLEGOMENUM PRIMUM.

DE REQUISITIS

AD FORMALEM LIBERTATEM

ET USUM LIBERUM.

CAPUT I.

DE NOMINIBUS NATURÆ ET LIBERI ARBITRII.

1. Quia libera natura gratiæ fundamentum est, et gratia perfectio et sanitas est naturæ, ideo disputatio de gratia cognitionem aliquam talis naturæ supponit, propter quod solent gratia et natura seu liberum arbitrium, non tantum in disputatione ipsa, sed etiam in titulo totius operis conjungi, sicut Augustinus librum unum de *Natura et gratia*, et alium de *Gratia et libero arbitrio* scripsit. Propter hanc ergo causam, necessarium est in ingressu hujus materiæ supponere quid nomine naturæ et liberi arbitrii intelligamus. Nam philosophi in libris de physico auditu de natura disputant, prout principium est motus et quietis; in præsentem vero non in ea latitudine sumitur, sed prout dicitur per antonomasiam de intellectuali seu rationali natura, quæ principium est moralium operationum, quibus æterna beatitudo comparatur vel amittitur, ad quem finem sola intellectualis natura per gratiam ordinatur; et ideo dixit Augustinus, libr. 1 contra Julian., cap. 3, solam rationalem naturam esse gratiæ capacem. Loquitur autem de rationali prout intellectuales complectitur, quia tam angelica quam humana natura capax est divini gratiæ, quia utraque libera est. *Gratiam autem* (ut ait Bernard. de Gratia et libero Arbitr.) *nec dare potest nisi Deus, nec capere nisi liberum arbitrium*, id est, natura libera; illa enim indiget ut supernaturalem finem assequatur. Quia vero humana natura et nobis est magis familiaris, et pluribus titulis ac modis indiget gratia

quam angelica, ideo de rationali natura sermonem semper faciemus; doctrina vero facile poterit ad angelicam cum proportione applicari; nam ubi ratio diversitatis interverit, non difficile intelligetur, eamque indicare curabimus. Non loquimur autem nunc de natura humana prout a supposito distinguitur, nec de statu illo plus quam humano quem in divino Verbo per hypostaticam unionem obtinuit; nam prior naturæ speculatio metaphysica est, nihilque ad præsentem causam spectat; alterius vero mysterii consideratio altior est, quam suo loco pro viribus prosecuti sumus. In præsentem ergo natura humana, quatenus in persona creata capax est gratiæ, illaque ad bene operandum et ad suum finem consequendum indiget, consideratur.

2. Est autem ulterius advertendum gratiam perficere naturam, præcipue quatenus humanam ac liberorum actuum principium est. Unde fit ut liberum arbitrium et gratia tam sint habitudine et officio conjuncta, ut non possint disputatione sejungi, ut satis indicavit Augustinus, dicens: *Si non est Dei gratia, quomodo Christus salvat mundum; et si non est liberum arbitrium, quomodo judicat mundum; et libr. 3 Hypognostic., cap. 11: Neque gratia sine libero arbitrio facit hominem habere beatam vitam, nec liberum arbitrium sine gratia; et Bernardus, de Grat. et libero Arbitrio: Tolle liberum arbitrium, non erit quod salvetur: tolle gratiam, non erit unde salvetur.* Unde præcipua hujus materiæ difficultas in concilianda gratiæ necessitate ne efficacia cum libertate arbitrii posita est, et ignorantia hujus concordie fere omnium errorum, qui in

hac materia fuerunt, radix et origo fuit. Oportet ergo ante significationem gratiæ quid nomine libertatis et liberi arbitrii significetur præmittere.

3. *Triplex libertas, sed illa, quæ est a necessitate, est propria libertas moralis.*—Et imprimis præmittenda est distinctio triplicis libertatis, quam sic tradit Hugo Victorin., in Sum. sentent., tract. 3, capit. 9: *Est namque (ait) triplex libertas, a necessitate, a peccato, a miseria.* Nos vero aliter illa membra numeramus; est enim libertas a servitute, a coactione, et a necessitate, ex quibus sola hæc tertia est propria libertas moralis ad humanos actus laude et reprehensione, præmio aut pœna dignos necessaria: unde illa sola simpliciter nomen libertatis meretur; reliquæ enim eatenus libertates appellantur, quatenus alicui necessitati opponuntur. Servitus enim quamdam parendi necessitatem inducit, et ideo carentia servitutis libertas appellatur Roman. 8: *Liberabitur a servitute corruptionis.* Potest autem servitus esse vel peccati, vel pœnæ: sicque carentia culpæ et remissio pœnæ dici potest libertas quædam a peccato seu peccati servitute, juxta illud Roman. 7: *Cum servi essetis peccati, liberi fuistis justitiæ: nunc autem liberati a peccato, servi autem facti Deo, habetis fructum in sanctificationem;* et 2 Cor. 3: *Ubi spiritus Domini, ibi libertas.* Unde etiam Aug. 4 de Civit., cap. 2: *Bonus (inquit) homo, etiamsi serviatur, utique homini, liber est, scilicet a peccato; malus autem, etiamsi regnet, servus est, nimirum peccati.* Et ad eundem modum libro decimo-quarto de Civit., capit. decimo-quinto, dixit primum hominem peccando amisisse libertatem, quam concupivit. Non enim libertatem a necessitate concupierat, nam illam a principio habuit, et ita neque illam amisit, sed libertatem a subjectione appetiit, et hanc amisit, quia et peccati, et pœnæ, et miseriæ servus factus est, et contraxit concupiscentiæ inordinationem, et pugnam fomitis, quæ servitus quædam pœnalis est. Atque ad hanc significationem reducitur omnis carentia obligationis seu debiti, sive a lege, sive a quacunque alia causa proveniat: sic enim dispensatio vel exemptio a lege libertas quædam censetur; unde etiam privilegium nomine libertatis vocari solet; et cui aliquod debitum remittitur, liberari ab illo dicitur. Si quis autem recte consideret, tota hæc libertas supponit propriam libertatem a necessitate, quia non est capax propriæ servitutis culpæ aut pœnæ, præcepti

aut obligationis, nisi persona libera in agendo; ideoque sicut propria privatio supponit aptitudinem, ita servitus et obligatio supponunt personam aptam ad operandum cum indifferentia, et absque necessitate. Quia vero operationes a necessitate liberæ possunt esse sub jure alterius, vel sub aliquo onere et obligatione, ideo cum libertate a necessitate potest esse in operibus necessitas servitutis et obligationis, seu (quod idem est) potest quis per legem vel servitutem privari libertate illis contraria, et nihilominus retinere propriam operum libertatem.

4. *Coactum idem fere quod violentum.*—Coactum idem fere est quod violentum, utrumque enim est contra internum appetitum patientis vel operantis; sed violentum generalius dicitur de quocumque motu contrario appetitui, sive elicitō, sive innato, coactum vero proprie dicitur, quando appetitui elicitō et vitali repugnat, licet interdum soleant voces illæ confundi. Duo ergo ad coactum requiruntur, scilicet, ut ex necessitate fiat vel sustineatur, et quod sit contra internum affectum, et ita coactio est quædam necessitas, et aliquid ultra illam addit. Utrumque ex Aristotele, 3 Ethic., cap. 1, colligitur, dicente *violentum esse, quod est ab extrinseco, passo non conferente vim*, id est, resistente aliquo modo, ut omnes exponunt ex eodem Aristotele, 2 Ethic. ad Eud., cap. 8; quia si passum non resistat, motio non erit violenta, etiamsi ab extrinseco proveniat. Coactum ergo, ut tale est, non potest esse ab intrinseco, alioqui non esset contra propriam inclinationem; si autem est ab extrinseco, eo ipso necessarium est; quia libertas a necessitate non est in patiēdo, sed in agendo, ut infra probabo: ob hanc ergo causam et coactum includit necessarium, et quod non est a coactione liberum, ut tale est, non potest esse a necessitate immune. Propter alias vero conditiones non convertitur coactum cum necessario, multa enim necessaria sunt quæ contra internum appetitum non sunt, imo ex illo sæpe nascuntur. Et ob eandem rationem libertas necessitatem excludens universalior est libertate soli coactioni opposita; nam omnis libertas a necessitate est etiam a coactione exempta, non vero e contrario, ut per se notum est; dilectio enim Dei in patria a coactione libera est, non tamen a necessitate.

5. Libertas ergo a sola coactione tantum requirit carentiam violentiæ, ita ut motio quæ sic libera dicitur, contra internum appetitum

non sit, sive ex necessitate fiat, sive non. Talis autem motio, si sit voluntatis, dicenda est potius voluntaria quam libera. Hæ namque duæ proprietates in actibus voluntatis distinctæ sunt, et ideo nominibus etiam sunt distinguendæ, ne verborum ambiguitas disputationem reddat incertam. Potest ergo esse actus hominis voluntarius, ac subinde a coactione liber, qui tamen simpliciter liber a necessitate non sit, ut in amore quo Deus se amat, et quo Spiritum sanctum producit, et quo beati diligunt Deum, et in actibus indeliberatis voluntatis, et in affectibus appetitus sentientis videre licet. Ratioque satis constat ex dictis, his adjunctis quæ de ratione voluntarii Aristoteles et D. Thomas tradiderunt. Voluntarium enim dicitur quod est ab interno principio cum cognitione, quæ ratio tota potest in actu reperiri, quamvis ex necessitate fiat, quia sola necessitas non excludit cognitionem, nec conformitatem cum appetitu innato, vel elicitio. Unde etiam ortum habuit communis illa theologorum doctrina, voluntati in actibus elicitis non posse vim aut coactionem inferri, etiamsi necessitatem pati possit. Nam coactio excludit voluntarium, illi enim directe opponitur; non potest autem actus esse a voluntate et non esse voluntarius, quia non potest non esse a principio intrinseco cum cognitione, nec potest simul esse voluntarius et coactus, quia hæc duo opponuntur et immediatam contradictionem involvunt; necessitas autem non involvit illam oppositionem cum voluntario, quia necessitas ipsa potest esse voluntaria, seu interno appetitui conformis, ut dictum est.

6. *Duo advertenda quoad modum loquendi necessaria ad intelligendos Patres.*—*Primum.*—Duo autem in hoc sunt, quoad modum loquendi, advertenda, quoniam ad intelligendas sententias Patrum erunt necessaria. Unum est coactionem duplicem esse; unam simpliciter, quæ absolutam et inevitabilem necessitatem contra internum affectum infert; alia secundum quid, qualis est quæ per pœnas vel timores fit, quæ non absolutam necessitatem, sed secundum quid, scilicet, ad vitandum tale incommodum, inducit. Prior ergo coactio est quæ omnino repugnat actui elicito voluntatis, quia, eo ipso quod est elicitus, jam non est coactus; posterior autem coactio esse potest cum absoluta voluntate, imo et cum libertate, cum absolutam necessitatem non inducat, et ideo licet interdum coactio aut violentia vocetur, ut patet ex August., lib. 4 contra Gau-

dent., c. 25, et epist. 48, simpliciter et absolute coactio non est, sed alicujus mali prohibitio, ut dixit idem August. lib. 2 contr. Litt. Petilian., c. 83.

7. *Secundum quod est observandum.*—Aliud animadvertendum est, interdum voluntarium actum ita esse necessarium simpliciter, ut ipsa necessitas ab intrinseco sit, ac subinde conformis sit inclinationi et perfectioni naturali ipsius voluntatis; et tunc actus, licet sit necessarius, ita est voluntarius ut nullo modo dici possit violentus vel coactus, quia nullo modo repugnat interno appetitui, neque elicitio, quia actus, ut supponitur, voluntarius est, nec innato, quia ipsa necessitas non est etiam voluntati ejusve innatæ inclinationi contraria, ut supponitur. Et hoc modo amor Dei in beatis est necessarius sine ullo genere coactionis aut violentiæ, et affectus appetitus sentientis possunt in eodem ordine poni propter eandem rationem. Aliquando vero actus voluntarius potest esse necessarius tantum ab extrinseco efficiente, seu quasi impellente, et tunc licet actus sit voluntarius, et ideo non possit dici absolute coactus, nihilominus cum necessitas ipsa non sit conformis naturali conditioni et inclinationi voluntatis, eo quod sit tantum ab extrinseco, actus sic necessarius interdum solet aliquo modo violentus dici, saltem secundum quid, quia est contra modum connaturalem, et contra quemdam innatum appetitum. Et hoc modo necessitas immissa voluntati in actibus de se liberis vocari solet a Patribus coactio quædam; et e converso actus simpliciter liber vocari solet spontaneus et voluntarius, utique perfecte, et extrinsecam necessitatem interno appetitui seu inclinationi voluntatis repugnantem excludens.

8. *Liberum a necessitate dici solet, et de facultate operandi absque necessitate, et de ipsa actione.*—Liberum ergo in presenti vocatur quod a necessitate liberum est: dici autem solet et de facultate operandi absque necessitate, et de ipsa actione. Priori modo denominatur arbitrium liberum, quod dicitur esse *facultas voluntatis et rationis*, utique ad operandum cum indifferentia et dominio actionis, ita ut in manu ejus sit velle aut nolle exercere vel sustinere actionem. De quo dixit August., lib. 2 de Pecc. merit. et remis., c. 48, *esse voluntatis arbitrium, quod huc atque illuc liberum flectitur, atque in eis naturalibus bonis est quibus homo bene et male uti potest.* Atque, in hoc sensu, de fide certum est hominem esse hoc modo natura sua liberum, seu habere ali-

quam facultatem a necessitate liberam in operibus suis, non solum naturalibus, sed etiam supernaturalibus, ut aperte definit Concil. Trident., sess. 6, cap. 5, et can. 5 et 6; et Scripturis et rationibus probat late August. lib. de Grat. et lib. arbit., et latius moderni de hac materia scribentes, et nos brevius in libro 1 de Auxil., a princip. Præcipue vero videri possunt eruditæ disputationes Cardin. Bellarmini in tota controversia de Grat et liber. arbitr., cum Præfatione.

9. *Unde liber actus denominetur.* — Hinc etiam actus qui ab hac facultate libera procedit, liber denominatur: oportet autem ut ab illa, ut indifferens est, procedat. Non enim defuerunt aliqui moderni Catholici qui negaverint ad libertatem actus esse necessariam indifferentiam, seu carentiam necessitatis, sed satis esse carentiam coactionis: sed hæc sententia reprobata est inter assertiones Michaelis Baii, assertion. 30 et 41, et in lib. 3 ex professo refutabitur. Ut ergo actus sit vere liber, non satis est quod sit voluntarius, seu non coactus; sed etiam ut non sit necessarius simpliciter, ac proinde ut procedat a potentia libera, ut indifferentiam et libertatem retineat, ut in ipso usu et exercitio libera et integra potestate sua sinatur operari, ita ut in manu ejus sit inter contraria vel contradictoria eligere, vel operari aut non operari. Quia, ut actus sit liber, necessarium est ut procedat a facultate libera, ut libera est; non procedet autem a potentia libera, ut talis est, nisi expeditam habeat suam facultatem quoad utramque partem, utique operandi et non operandi. Quid enim proderit ad libertatem talis actus, quod potentia innata habeat indifferentiam, si in ipso usu impediatur? Quapropter, supposita distinctione data de duplici necessitate, altera ab intrinseco per naturalem determinationem potentiae ad unum, alia ab extrinseco per impulsu alicujus extrinsece agentis, prior repugnat non solum actui, sed etiam facultati liberi arbitrii, et ideo fieri non potest ut potentia libera tali necessitati subdita sit respectu ejusdem objecti, quia contradictionem involvit, ut per se notum est. Posterior autem necessitas non repugnat facultati liberæ, ut nunc suppono, et paulo post probabo; repugnat autem actui libero, quia, ut talis sit, oportet ut procedat a potentia, ut libera, vel quoad specificationem, vel saltem quoad exercitium, juxta modum quo actus liber fuerit, quia non habet quod sit liber, nisi per denominationem a suo proximo principio. At vero si actus procedat

a potentia necessitatem patiente, sive per intrinsecam necessitatem potentiae determinatæ ad unum, sive per extrinsecam necessitatem immisam potentiae de se liberæ, jam impeditur, et tollitur libertas actus; ita ut liber dici non possit, nec laude vel vituperio dignus, quia non procedit a potentia, ut libera est, nam ipsa non valet necessitatem illam auferre, vel prævenire, et ideo non potest illi imputari quod tali modo, et non alio operetur. Quam doctrinam satis clare docuit Concilium Tridentinum loco citato, et necessaria omnino est ad salvanda omnia quæ de humanis actionibus earumque libertate Scriptura docet. Ideoque censeo in hoc puncto non esse dissensionem inter Catholicos, licet in modo explicandi et defendendi hanc libertatem possit esse aliqua diversitas.

CAPUT II.

QUÆ SINT NECESSARIA UT POTENTIA SIT LIBERA, ET LIBERE OPERETUR.

In superiori capite, solum voces seu loquendi modos explicavimus, nunc vero aliquid de re ipsa addendum et fundandum est, ut postea, in gratiæ auxiliis explicandis et cum libertate arbitrii conciliandis, solide et efficaciter procedere possimus.

1. *Prima assertio.* — *De ratione potentiae formaliter liberæ, qua talis, est ut sit potentia activa.* — Primum igitur omnium statuimus, de ratione potentiae formaliter liberæ esse ut, quatenus talis est, sit potentia activa. Est certa et communis assertio, quam probare possumus, primo, ex Scriptura; ubicumque enim libertatem arbitrii declarat, verbis utitur ad propriam potestatem agendi pertinentibus; ut est illud Ecclesiast. 15: *Ad quod volueris porrige manum tuam; et illud: Quæ enim odit ne feceris; et illud cap. 31: Qui potuit facere mala, et non fecit.* Item illud Zachar. 4: *Convertimini ad me,* per quæ verba libertatis nostræ admonemur, ut Concilium Tridentinum dixit; nemo autem seipsum convertit nisi agendo. Simile est illud Apocalyps. 3: *Si quis aperuerit mihi januam, intrabo ad illum;* nam verbum *aperiendi* efficientiam includit. Ac denique 2 Petr. 2: *Satagite, ut per bona opera certam vestram vocationem et electionem faciatis;* et similia passim occurrunt. Secundo, id probamus ex Conc. Trid., sess. 6, cap. 5, ubi, cum dixisset homines vocari a Deo per gratiam, ut, *eidem gratiæ libere assentiendo et*

cooperando, in ipsum Deum concertantur, explicat illam liberam cooperationem dicens: Ita ut tangente Deo cor hominis per Spiritus sancti illuminationem, neque homo ipse nihil omnino agat, inspirationem illam recipiens, quippe qui et illam abjicere potest. Neque tamen sine gratia movere se ad justitiam coram illo libera sua voluntate posset; et ideo in can. 4 damnat dicentes liberum arbitrium nihil cooperari assentiendo Deo excitanti, aut nihil omnino agere, mereque passive se habere. Ergo, ex sententia Concilii, potentia passiva ad liberum usum non sufficit; est ergo libertas formaliter in potentia activa.

2. Tertio, idem probatur Patrum auctoritate; August., lib. 12 de Civit., c. 6 et 7, ubi, agens de causa actus mali, dicit ad voluntatem ipsam reduci tanquam ad causam efficientem et deficientem. Idemque docet lib. 1 de Liber. arb., a cap. 12, et l. 3, c. 1 et 2. Additque c. 3 *illud esse in potestate nostra, quod cum volumus facimus, quapropter nihil tam in nostra potestate quam ipsa voluntas est.* Quod repetit et confirmat libro 1 Retract., cap. 9 et 22. Non dicitur autem aliquid esse in potestate nostra propter potentiam passivam, sed propter activam, quam ipsum nomen potestatis significat. Unde idem Augustinus, libro 1 Retract., cap. 1, recognoscens verba quæ in quæst. 1 lib. 2 ad Simpl. posuerat: *Quamvis sit in cujusque potestate quid possit; ait ideo illa dixisse, quia non dicimus esse in potestate nostra, nisi quod cum volumus fit, ubi primum et maximum est ipsum velle. Sine ullo quippe intercallo temporis præsto est voluntas ipsa, cum volumus.* Unde etiam l. 83 Quæstionum, quæstione 8: *Moveri (inquit) per se animam sentit, qui sentit in se esse voluntatem: nam si volumus, non alius de nobis rult, et iste motus animæ spontaneus est; et quæst. 24: Nec peccatum, nec recte factum (ait) imputari cuiquam juste potest, qui nihil fecerit propria voluntate.* Et hoc modo ait utrumque esse in libero voluntatis arbitrio. Est ergo voluntas libera per potestatem activam, quam habet supra suos actus. Sic etiam dixit Damascenus, lib. 2 de Fide, cap. 25, ideo hominem esse liberi arbitrii, quia in sua potestate habet eas actiones quas libere operari dicitur; et ideo omnem deliberationem actionis causa suscipi; et addit in cap. 26: *In nostra potestate sunt ea quæ liberum nobis est facere vel non facere, et alia quæ prosequitur, per quæ omnia docet libertatem in nobis esse per activam potestatem.* Idem sumitur ex Anselmo, lib. de

Concept. Virg., cap 6; Bernard., lib. de Grat. et liber. arbit.; et citatur Nyssen., lib. 7 Philosoph., cap. 1 et 2; habet Nemesi, de Nat. hom., cap. 29, 39 et sequentibus.

3. Quarto, probatur ex scholasticis, et imprimis ex D. Thoma, 1 p., quæst. 82, art. 4, et quæst. 83, in corp. et ad 2. Item 1. 2, quæst. 9, art. 1 et 3, quibus locis ait voluntatem esse potentiam se et alias moventem per modum agentis, eandemque esse liberum arbitrium, quatenus ad utrumlibet potest seipsam movere. Idem habet quæstione 22 de Verit., art. 9, in corp., et ad 1, et quæstione vigesima-quarta, articulo quarto in corp., et ad 15, in qua solutione declarat expressius liberum arbitrium, ut tale est, esse potentiam non passivam, sed operativam. Idem tradit Capreolus 2, distinctione 24, quæstione 1, articulo 1, conclusione 5; et Scot. in 2, distinctione 25, in argumentis *Ad oppositum*, et in toto discursu quæstionis; Durand., distinctione 24, quæst. 2, num. 10, 19 et 34; Gregor., eadem distinctione, quæstione unic.; Henric., quodlib. 10, quæstione nona, ubi, parum a principio, ait voluntatem totam esse moventem et motam, sed moventem quatenus libera est, quæ libertas, ait, est formaliter in ipsa. Idem habet quodlib. 12, quæst. 17: *Ad hoc (inquit) quod aliquid dicatur esse vere ex libero arbitrio, oportet quod sit ab illo, ut a movente proximo, et sic voluntas est domina suorum actuum.* Bellarmin., lib. 3 de Grat. et lib. arb., cap. 10.

4. Tandem ratione declaratur, quam Scotus supra optime attigit: nam potentia libera est quæ in manu et potestate sua habet mutari, vel non mutari; nam hoc est esse dominam sui actus vel mutationis, in quo dominio libertas consistit. Hæc autem potestas non est in potentia passiva, ut passiva est; ergo oportet ut sit in potentia activa, quatenus activa est. Minor probatur, quia non est in potestate ac dominio patientis, ut tale est, quod patitur necne: hoc enim pendet ab agente, quia patiens ideo patitur, quia agens in illud agit. Actio enim infert passionem, et ordine naturæ vel rationis illam præcedit, et ideo talis est passio qualis est actio, et non e converso, loquendo causaliter et a priori. Ergo actio non est in potestate patientis, ut patiens est, id est, in dominio ejus, sed agentis; quia prius non est in potestate posterioris, sicut præceptum non est in potestate subditi, sed superioris; ergo etiam passio non est in potestate patientis, ut tale est, sed in

potestate agentis, quia posita actione necessario sequitur passio, et ideo eadem tantum potest passio esse aut denominari libera, in quantum actio fuerit libera; ergo utrumque est in potestate et dominio agentis; ergo libertas solum est in potentia activa, ut activa est. Quapropter, licet voluntas sit receptiva sui actus, et sub ea ratione sit potentia passiva, non est tamen libera, nisi quatenus potestatem habet eliciendi et non eliciendi actum suum, et in tantum receptio ejus potest esse libera ipsi voluntati, in quantum illum efficere est illi liberum: si enim ab alio agente reciperet actum, ipsa nihil efficiente ex parte sua, necessario illum reciperet: quod si esset in potestate alterius agentis non immittere in voluntatem talem actum, alteri agenti esset liber ille effectus, non ipsi voluntati. In potentia ergo passiva, ut passiva est, non est libertas.

5. *Obiectio.* — Dices: passum interdum determinat actionem agentis, vel ad illam confert, vel illam impedit; ergo eadem ratione potest ex parte potentiae passivae provenire, ut agens illam immutet vel non immutet; ergo etiam poterit libertas esse in potentia passiva, ut passiva est. Antecedens patet in causa superiori et universali necessario agente; determinatur enim ad hanc vel illam actionem ex parte passi, ut patet in sole exsiccante lutum et liquefaciente ceram. Item, in causis particularibus, actio est major vel minor, juxta dispositionem passi, et interdum omnino impeditur propter resistantiam ejus. Ac denique in moralibus et supernaturalibus, quando Deus infundit habitum voluntati, ipsa voluntas mere passive se habet, et nihilominus receptio est illi libera, quia ex ejus pendet dispositione.

6. *Responsio.* — Respondeo negando secundam consequentiam, quia passum, ut tale est, si sit omnino idem, non potest determinare actionem agentis, nec magis juvare vel impedire actionem unius agentis quam alterius: si vero sit diversum, seu diverso modo dispositum, tunc determinatio, resistantia, vel similis effectus, erit omnino necessarius, aut si participet aliquam indifferentiam, necessario pendebit aliquo modo ex potentia activa libera. Declaratur: nam si agens sit naturale et potens ad plures effectus efficiendos propter universalem virtutem, non potest circa idem passum eodem modo dispositum ad certum effectum determinari, nisi passum illius tantum sit capax. Nam si passum sit de se

indifferens ad plures, non est cur ab illo determinetur tale agens ad unam actionem potius quam ad aliam, ut recte notavit Scotus supra, § *Contra conclusionem*. Si autem passum sit capax unius tantum effectus, tunc determinabit quidem actionem agentis; determinatio autem erit omnino naturalis, seu necessaria, ut per se constat; et eodem modo si passum sit diverso modo dispositum, determinat quidem actionem talis agentis, necessitate tamen naturali, ut patet in illo exemplo de sole liquefaciente ceram, vel exsiccante lutum, utrumque enim facit necessitate naturali. Et ratio est, quia ex parte recipientis, ut sic, non provenit determinatio actionis, nisi propter incapacitatem naturalem, vel limitationem capacitatis ab aliqua dispositione proveniente, et ideo si limitatio illa vel dispositio naturalis sit, etiam determinatio est necessaria, nec potest ex parte passi esse libera. Idemque est de resistantia, vel impedimento, aut carentia illius proveniente ex naturali dispositione recipientis: intercedit enim eadem ratio. At vero si agens sit liberum, tunc potest determinare suam actionem, et consequenter etiam passionem circa idem passum de se indifferens et capax plurimum actionum. Et tunc quidem determinatio libera est, provenit autem ab eminentia potentiae activae, et dominio quod habet in suam actionem, nec potest aliunde provenire. Interdum etiam passio aliqua seu receptio potest pendere ex dispositione libera passi, et tunc licet receptio proxime non possit esse libera ipsi recipienti, quia ab illo non fit, remote potest denominari libera, quatenus ab ejus libera dispositione pendet: illa autem libertas in eo posita est, quod effectio talis dispositionis est libera, et ita semper manat ex potentia activa in qua residet; et hoc modo receptio primae gratiae sanctificantis potest dici homini libera remote, in quantum efficere contritionem est homini liberum, et in naturalibus potest dici esse homini liberum calefieri a sole, in quantum libere potest ad solem accedere, vel ab illo recedere. Propria ergo libertas semper est in potentia activa, ut activa est.

7. *Secunda assertio.* — *Indifferentia dominativa potentiae activae, ut activa est, ad formalem libertatem alicujus facultatis requiritur.* — Secundo, dicimus, et sequitur ex dictis, ad formalem libertatem alicujus facultatis requiri indifferentiam per eminentiam quamdam dominativam potentiae activae, ut activa est, tum ad varias actiones, tum ad exercen-

das vel non exercendas illas, aut simpliciter, aut in tali vel tali determinata specie. Ut hanc assertionem declarem, suppono sermonem esse de libertate creata, quæ primario consistit in ordine ad proprios internos actus ejusdem facultatis, scilicet, voluntatis, et illis mediantibus extenditur ad alias externas actiones: quod secus est in libertate divina, quæ immediate in actionibus seu effectibus extrinsecis exercetur: nam in Deo ad intra nulla effectio, vel receptio, seu additio libera esse potest, ut nunc suppono tanquam certum: cum proportione tamen potest assertio ad libertatem divinam applicari, ut facile consideranti patebit. Deinde suppono vulgarem distinctionem duplicis libertatis, quoad exercitium et specificationem, quarum prior consistit in potestate habendi et non habendi, posterior in potestate habendi hunc vel illum actum. Et illius facultatis conditio, quatenus illorum plurium actuum seu statuum capax est, indifferentia vocatur. Dico ergo hanc indifferentiam, ut sit veræ libertatis, debere convenire tali facultati per se, et ut potentia activa est.

8. Probatur primo de indifferentia quoad exercitium, quia imprimis ad illam necessaria est potentia activa. Hoc enim probant omnia adducta in præcedenti assertionem, et per se evidens est, quia nisi supponatur vis agendi in tali facultate, semper carebit actione, quia actio esse non potest, nisi ab habente vim agendi, eritque illa carentia, non per modum privationis, sed per modum simplicis negationis, sicut potest esse in qualibet re inepta ad agendum. Deinde probatur de potentia ad non agendum, quia, si potentia careat actione ex aliqua impotentia agendi, tunc non est libertas in carentia actionis, sed necessitas; quia impotentia æquivalet impossibilitati, et impossibilitas agendi æquivalet necessitati non agendi: ergo ut carentia actionis libera esse possit, supponit in ipsa facultate talem potentiam agendi, quæ vi sua possit non agere, non ex impotentia, sed ex eminentia virtutis, quam recte vocarunt theologi dominium actus. Carere enim actione ex impotentia non est dominium, cum de ratione domini sit potestas utendi et non utendi; ergo ut potentia vere sit domina sui actus quoad exercitium ejus, oportet ut non ex impotentia, sed ex interna et eminenti potestate actionem possit suspendere. Et ob hanc causam non potest talis indifferentia inveniri immediate in potentia passiva, ut passiva est, respectu passionis: quia

licet possit interdum pati, et interdum non pati, in utroque pendet ab agente. Unde si adsit agens, necessario patitur, vel absolute si agens sit naturale, vel ex suppositione actionis, si agens sit liberum et velit. Si vero agens absit, vel cohibeat actionem, tum etiam necessario non patitur, et ex quadam impotentia, quia ut passiva est, non potest se ad actum reducere.

9. Probatur deinde assertio de indifferentia quoad specificationem, ex dictis etiam in assertionem præcedenti, quia libertas est proprie et immediate conditio potentiæ activæ, ut activa est; ergo si talis indifferentia sit respectu plurium actuum, necesse est ut in tali facultate sit vis effectrix omnium illorum actuum: nam si tali virtute careat ad aliquem illorum efficiendum, respectu illius non erit libera, cum respectu illius non sit activa. Non sufficit autem, ad libertatem circa tales actiones, vis superior et quasi universalis effectiva plurium actionum vel effectuum, quia in agente naturali potest similis virtus inveniri, ut in sole, cujus virtus per eminentiam quamdam indifferens est ad plures effectus et actiones; ergo ad indifferentiam libertatis, ultra illam quasi universalem vim activam, necessarium est ut illa sit conjuncta cum quadam eminentia dominativa, ratione cujus potest inter ipsas actiones eligere, aut se ad hanc potius quam ad illam flectere. Propter quod merito dixit divus Thomas in 2, dist. 28, quæst. 1, art. 1: *Hominem non fore liberi arbitrii, nisi ad eum determinatio sui operis pertineret*. Et quæst. 22 de Veritat., art. 9, in fine corporis, dixit in potestate voluntatis esse ut objectum oblatum sibi acceptet, vel non acceptet, quia non est naturaliter determinata: et in solutione ad primum, addit *posse voluntatem directe seipsam immutare respectu aliquorum, cum sit domina suorum actuum*; et plura alia in lib. 3 afferemus: et idem sensit Scotus in 1, dist. 25, ad ult., et alii auctores allegati. Potestque comprobari omnibus Scripturæ et Patrum testimoniis, quæ in assertionem prima adduximus; nam ab omnibus indifferentia hæc per modum hujus domini declaratur: et si quis plura desiderat, legat Stapletonium, libro quarto de Justification., cap. 3; et Ruardum, art. 7, § *Est autem*, fere per totum; et Bellarminum, libro tertio de Libero Arbitrio, cap. 5.

10. *Tertia assertio.*—*Completa vis activa et dominativa requiritur in virtute libera.*—Dico, tertio, ad libertatem proximam et absolutam arbitrii, requiri ut virtus facultatis, in suo or-

dine causæ proximæ, habeat completam vim activam et dominativam illorum actuum, ad quos dicitur simpliciter et proxime libera. Hæc assertio sequitur ex præcedentibus, et probatur, quia alias, si facultas ipsa seu voluntas haberet vim agendi tantum dimidiatam et incompletam, non posset simpliciter velle aut nolle; ergo simpliciter non habebit in sua potestate activa suum actum; ergo nec habebit dominium ejus, neque proximam et absolutam libertatem. Et declaratur, quia si, proposito sufficienter objecto, voluntas non habeat sufficientem vim activam ad volendum vel nolendum tale objectum, sed tantum partialem seu inchoatam, erit in potentia passiva ad recipiendum complementum potestatis activæ; ergo ex ea parte qua est in potentia receptiva talis complementi virtutis activæ, non est libera, quia non habet illud complementum in sua potestate activa, sed in receptiva; ergo etiam non est proxime libera ad ipsum effectum, seu actum secundum, donec in sua virtute agendi compleatur. Unde est attente considerandum quod, licet potentia libera, etiam supposita integra libertate, possit (ut dixi) esse passiva, respectu actus secundi volendi aut nolendi, quia hæc potentialitas potest supponere in eadem facultate integram vim activam, nihilominus non potest esse integre libera, si sit in sola potentia passiva ad totam vel aliquam partem virtutis activæ suorum actuum, quia sine integra virtute activa nondum habet actum in manu sua. Ideoque optime D. Thomas, dicta q. 24 de Verit., a. 4, dixit liberum arbitrium in eo consistere, quod *non excedit vim potentiae*. Nam secundum hoc aliquid fieri dicitur, quod est in potentia facientis, quod de potestate operativa seu activa in solutione ad ultimum explicuit.

11. *Objectio.* — *Responsio.* — Dices ad libertatem necessarium non esse ut sola voluntas per se habeat integram vim activam sui actus etiam proximam: nam multi putant objectum, vel notitiam ejus concurrere active ad actus liberos voluntatis, et homo est simpliciter liber ad videndum, licet non habeat speciem vel lumen. Item ad actus supernaturales libera est voluntas, licet integram vim eliciendi illos sola per se non habeat. Respondeo ad primam partem, probabilius esse solam voluntatem esse principium proximum sui actus, et in hoc distingui ab intellectu, ut aperte sensit divus Thomas in loco proxime allegato de Verit. ad nono. Veruntamen licet contraria sententia supponatur, nihil obstat, quia,

juxta illam, consequenter dicendum erit voluntatem solam per se spectatam, et nondum conjunctam notitiæ objecti, non habere completam sed inchoatam libertatem, quod sine inconuenienti dici potest, quia in eo statu nihil potest eligere; comparata autem notitia objecti, habere completam libertatem, quia jam habet completam vim agendi et non agendi voluntarie, et per illam qualemcumque conjunctionem voluntatis cum notitia, seu objecto cognito, censetur completa virtus ejus activa in actu primo proxime requisito ad volendum vel nolendum. Ad secundam partem, dicitur hominem posse esse simpliciter liberum ad volendum vel desiderandum videre, quando non habet integram facultatem videndi, quia sine hac potest habere integram potestatem volendi aut concupiscendi; at vero ad videndum non habere proximam libertatem, quia oportet ut in potestate sua habeat acquirere complementum virtutis videndi, et necessarium est ut inde liberam suam actionem inchoet illam speciem procurando, et ita remote dicitur habere libertatem ad videndum, quatenus vim habet se movendi ad comparandum quidquid ad integram facultatem videndi illi deest.

12. Ad tertiam partem, dicimus doctrinam absolute intelligi de libertate naturali voluntatis secundum se spectatæ, in ordine ad actus ex natura rei sibi proportionatos; cum proportionem tamen applicandam esse ad actus supernaturales, ut postea videbimus, et nunc breviter explicatur. Nam voluntas sola per se sumpta non est proxime et simpliciter libera ad actus supernaturales, sed de se habet tantum quamdam inchoationem libertatis ad tales actus. in quantum habet aliquam vim activam innatam, vel naturalem, vel obedientialem, ad illos efficiendos, et est capax complementi illius virtutis: quamdiu vero illud complementum non habet actu, illa potentia remota est, et similiter libertas ad eosdem actus remota est, et incompleta. Et ideo D. Thomas, in dicto articulo de Veritat. ad nono, dixit liberum arbitrium, in ordine ad actum charitatis, dicere potentiam cum habitu infuso utique, vel aliquo alio principio quod suppleat vicem ejus. Quomocumque ergo voluntas supponatur habere integram vim agendi actum, sive per se sola, sive per aliquid jam illi additum, vel sufficienter conjunctum, esse poterit plene et sufficienter libera: quamdiu vero est in potentia tantum receptiva alienius virtutis proximæ, activæ, ac necessariæ ad ac-

tum eliciendum, nondum habet absolute et simpliciter liberam et proximam facultatem : unde D. Thomas, prima parte, quæstione octogesima-tertia, art. secundo, ad secund., dixit liberum arbitrium nominari facultatem, quia debet esse potestas expedita ad agendum : quomodo autem erit expedita, si non sit integra, vel integrata, ut ita dicam? Et hanc assertionem confirmant quæ adducit Bellarminus, libro 6 de Gratia et libero arbitrio, cap. decimo-quinto, assert. 1, 2 et 3; et Dried. in Concord., cap. 3, et Ruard., art. 7, quos allegat.

13. *Quarta assertio.* — *Libertas remota et proxima requirit indifferentiam potentiæ activæ.*—Ad majorem intelligentiam præcedentium conclusionum, dico, quarto, libertatem in actu primo esse posse remotam et proximam, et utramque requirere indifferentiam potentiæ activæ, servata proportione : nam remota libertas requirit indifferentiam potestatis activæ in facultate formaliter libera secundum se et nude spectata; proxima autem libertas in actu primo requirit indifferentiam activam in facultate ipsa agendi, expedita et proposita cum omnibus requisitis ad agendum. Divisio hæc ex generali doctrina potentiæ activæ nota est, eamque attigit Scot. in 4, dist. 49, quæst. 6, sub § *Dico ergo ex doctrina Aristotelis*, 9, *Metaph.*, cap. 12, ubi ait eum qui habet solam potentiam operativam, et non habet alia requisita ad operationem, solum secundum quid, et quantum est ex parte sui, esse potentem ad operandum. Sicut dicitur potens ad videndum qui habet visum, etiamsi lumine careat. Simpliciter vero dicitur potens, qui ita est dispositus ad operandum, ut sine immutatione ulla, vel in se, vel in passo, vel in objecto, vel in aliquo alio potest actionem emittere. Priorem itaque statum vocamus potestatis remotæ, posteriorem autem potestatis proximæ. Hi ergo duo status locum habent in potestate libera, ut per se notum est, et ipsi libertati recte accommodantur; nam qui dormit, libertatem habet in actu primo, remote tamen, quia multa immutatione indiget ut libertate utatur : qui vero vigilat et actu considerat volendum sit necne, dum nihil eligit, liber est tantum in actu primo, sed proxime, quia immediate, sine interventu alienjus actionis aut mutationis, potest velle vel nolle.

14. Atque hinc facile patet prior pars assertionis, nimirum in utroque statu requiri immunitatem a necessitate actionis, in ea potentia, quæ est formaliter libera, seu indiffe-

rentiam potentiæ activæ tali statui accommodatam. Quod quidem in statu remoto per se notum est : nam ideo qui dormit, vel non considerat, liber nihilominus est, quia voluntatem retinet, quæ de se est facultas potens operari sine necessitate. Si enim talem potentiam vel illam proprietatem ejus amitteret, jam nullo modo dici posset liber. Imo interdum non videtur esse satis solam potentiam retinere; nam puer, ante usum rationis, vel amens, non dicitur habere libertatem, etiamsi potentiam de se liberam habeat, quia est intrinsece impotens, et indispositus ad multa prævia et necessaria ad usum libertatis. Dicit tamen potest habere naturam de se liberam, vel habere libertatem in actu primo remotissimo. Qui autem est intrinsece aptus ad usum libertatis, non tantum ex parte voluntatis, sed etiam ex parte aliarum potentialium, et extrinseca dispositione organorum, licet actu sit impeditus, verbi gratia, per somnum, minus remotam facultatem habet utendi libertate, et ideo communi usu liber vocatur, quia et facultatem habet de se indifferentem ad agendum et non agendum, et intrinsece impeditus non est ad usum illius, licet quoad cætera requisita adhuc illa libertas remota sit.

15. *Cardo concordiæ gratiæ, et lib. arbit.*—Altera pars, de libertate proxima in actu primo et quasi immediato, est difficilior; est tamen verissima, et valde necessaria, et fortasse est quasi cardo totius concordiæ gratiæ cum libero arbitrio, et ideo diligenter probanda est. Primo ergo probatur, quia illa etiam est potestas vere libera; ergo in illo etiam statu retinere debet indifferentiam activam in operando, quia hæc est de intrinseca ratione libertatis, ut ostensum est. Secundo, quia alias nunquam potentia libera in actu primo remoto esset proxime libera ad agendum, vel non agendum, quod est contra omnem rationem potentiæ activæ, et plane contra usum libertatis. Explicatur sequela, quia potentia per se ac formaliter libera, in re non utitur nec valet uti sua libertate et indifferentia, nisi proxime disposita ex parte sua, et ex parte intellectus et objecti, et ex omni alia parte necessaria ad opus; ergo si postquam est proxime disposita, jam non manet cum plena indifferentia, profecto nunquam in re ipsa libere operatur, nec utitur innata libertate. Tertio probatur, quia libertas formalis et quasi essentialis voluntatis duplicem potestatem inadæquatam, seu ratione distinctam, includit circa idem objectum eodem modo hic

et nunc propositum: una est potestas volendi, alia est potestas non volendi, seu nolendi illud. Si ergo voluntas jam expedita et proxime disposita ad operandum circa tale objectum, non est indifferens ad utramque partem illius potestatis, sicut erat per se præcise, ac remote, et nude spectata; ergo ad unam partem illarum manebit proxime et simpliciter potens, ad alteram vero non nisi remote ac subinde proxime impotens; ergo de facto voluntas tunc non operatur tanquam domina utriusque potestatis, sed perinde se habet ac si alteram tantum potestatem haberet, ac proinde non libere operatur. Ut declarem et probem consequentiam, constituamus et consideremus voluntatem dicto modo proxime dispositam ac præparatam, seu applicatam ad primum usum libertatis suæ, prius natura quam libertate utatur. Aut ergo etiam tunc retinet indifferentiam ad utramque partem, et hoc est quod intendimus; aut alteram tantum potestatem exercere potest, verbi gratia, volendi, et tunc profecto sequitur ut sit hic et nunc simpliciter et proxime impotens ad nolendum, quia, ut posset nolle, deberet aliter præparari seu disponi, quod jam non est in potestate illius, nec antea fuit, quia nondum usa fuerat libertate sua, ut sapponitur: ergo illa libertas remota nunquam ad usum liberum applicatur. Atque hic discursus et assertio ex capite sequenti amplius confirmabitur.

CAPUT III.

UTRUM RECTE DESCRIBATUR POTESTAS LIBERA ESSE, QUÆ, POSITIS OMNIBUS PRÆREQUISITIS AD AGENDUM, POTEST AGERE ET NON AGERE.

1. *Verbum potest in sensu composito et diviso accipitur.* — Punctum hoc tractavi in l. 1 de Auxiliis, quia illius resolutionem et declarationem, ad intelligendum usum libertatis et concordiam ejus cum gratia, censeo esse valde necessariam, et ob eandem causam iterum hic præmittendum esse judicavi, quia nonnulli moderni, licet descriptionem, seu propositionem illam simpliciter negare non audeant, illam limitant variis modis, prout unicuique, ad proprias sententias in aliis punctis defendendas, commodum videtur. Has ergo limitationes hic expendere necesse est, ut postea cum solido fundamento procedere valeamus. Ut autem intelligantur limitationes, sciendum est verbum illud *potest*, in descriptione positum, duobus modis accipi solere, scilicet, in

sensu composito, vel diviso, id est, vel ut cum illis omnibus prærequisitis stare simul possit, tam agere quam non agere; vel ut, stantibus illis prærequisitis, potentia retineat integram libertatem suam, non tamen possit uti illa ad non agendum, nisi aliquod ex dictis prærequisitis auferatur.

2. *Prima limitatio aliquorum.* — Primus ergo modus interpretandi vel limitandi illam descriptionem est, ut, si verbum *potest* accipiat in sensu composito, limitanda sit ad prærequisita ex parte causarum secundarum, ut intellectus, objecti, et phantasie, et si quid est aliud simile, non tamen extendatur ad prærequisita ex parte Dei; tum quia prævius concursus est necessarius ex parte Dei, et tamen illo posito non potest voluntas agere et non agere, sed tantum agere; tum etiam quia voluntas, qua Deus vult liberum arbitrium operari, est necessaria, ut arbitrium operetur, et est ex prærequisitis, quia præcedit ipsum actum et determinationem voluntatis creatæ; et posita illa Dei voluntate, non stat voluntatem creatam liberam non operari; ergo necessario ab illa descriptione excipienda sunt prærequisita ex parte primæ causæ. Ita opinatur Alvarez, disput. 115; Ledesm., art. 10, § *Sed antequam*, post 7 concl., et alii.

3. *Secunda limitatio.* — Secundus modus limitandi descriptionem illam est, ut, si intelligatur de omnibus prærequisitis, tam ex parte Dei quam ex parte aliarum causarum, vel conditionum necessariarum, verbum *potest* accipiendum sit in sensu diviso, non in composito, respectu utriusque actus agendi et non agendi, etiam divisim seu sigillatim sumpti. Ita ut sensus sit, illam potentiam esse liberam, quæ, positis omnibus requisitis, adhuc in se retinet potestatem non agendi, etiamsi, stantibus illis omnibus prærequisitis, cum illis conjungi non possit ut non agat, sed oporteat aliquod ex illis prærequisitis auferri, ut potentia libera sua potestate non agendi utatur. Et simili modo, quando talis potentia non agit, aut non vult, potestatem retinet agendi, et ideo libera est; non potest tamen conjungere actionem vel volitionem cum solis illis prærequisitis quæ tunc concurrunt, quando non vult, nisi aliquid, quod deerat, addatur, et ordine naturæ seu causalitatis præcedat. Et hunc etiam modum dicendi approbant dicti auctores; in quolibet autem alio sensu illam descriptionem rejiciunt, quam etiam dicunt non esse ab Aristotele, D. Thoma, Magistro, vel aliquo gravi doctore traditam, sed ab Almain. et quibus-

dam Nominalibus inventam: et ita facile omnia contemnunt quæ de illa descriptione in libro 1 de Auxiliis diximus.

4. *Prima assertio.*—*Vera est definitio libertatis in titulo posita.* — Nihilominus iterum dicimus descriptionem illam optimam esse, et a gravissimis auctoribus traditam, vel eisdem, vel æquivalentibus verbis. Imo existimo, ante nuperas controversias circa auxilium efficax gratiæ exortas, descriptionem illam fuisse a doctoribus, et in scholis communiter probatam, ut affirmat Victor., Relect. de homine veniente ad usum rationis, quæst. 1, propos. 3, ubi etiam ipse illam supponit, licet ad usum liberi arbitrii amplius requirat. Eandem supponit tanquam communem Valent., 2 tom., disp. 8, quæst. 5, punct. 4, § 4, ubi ait in hoc consistere essentialiter libertatem actionis. Eandem ponit, ut receptam sententiam, Cordub. in lib. 1 Quæstion., q. 55, dub. 9 et 10; et sumitur ex Nemesio, lib. de Natur. hom., c. 35, dicente *esse autem liberum si, eisdem positis causis, in nobis esset aliquando appetere, aliquando refugere, etc.*; et ex Scot. 2, d. 25, q. unic., in fine; et ibi Gabr., n. 3, dub. 3 et 4, et in 1, d. 48, cap. 3; et ibi Occam. et quodl. 1, quæst. 16; et Marsil. 2, q. 16, art. 4; et Dion. Cist. 2, d. 25, art. 2, concl. 2, et art. 3, concl. 4; Henr. quodl. 1, quæstion. 16; Herv., quæst. 1; Sot., lib. 1 de Natur. et Grat., cap. 16, ubi ponit illam ut receptam definitionem liberi arbitrii. Et novissime consentit Curiel. Contr. 2, in Epist. 2 D. Petr., n. 234. Denique ex Aristotele ac divo Thoma paulo post illam comprobabimus. Ratio autem potissima est, quia per illa verba optime declaratur internum dominium voluntatis in actiones suas, et proxima potestas operandi et non operandi, vel operandi contrarium, quæ vix potest aliis verbis commodius explicari.

5. *Pronuntiata liberi arbitrii.*—*Dominium quid sit.* — Assumptum declaratur imprimis, per varias definitiones liberi arbitrii ab aliis traditas breviter discurrendo. Quinque sumi possunt ex Illustrissimo Bellarmino, lib. 3 de Gratia et liber. arbitr., et ipse addit sextam, quæ tamen proprie definitiones non sunt, sed quædam sunt simplices assertiones aliquarum proprietatum liberi arbitrii. Tale enim est quod liberum arbitrium sit *rationalis voluntas*, vel quod sit *potestas servandi rectitudinem propter ipsam rectitudinem*. Aliæ quodammodo involvunt definitum in definitione, ut cum dicitur arbitrium esse *liberum de ratione judicium*, ut ex philosophis refert D. Thomas

1. 2, quæstione 17, art. 1. ad 2, cum Magist. in 2, distinct. 25, in principio; vel esse *habitu animi liberum sui*, vel esse *consensum ob inamissibilem animi libertatem*, vel *liberam potestatem eligendi, aut acceptandi, et respiciendi*. Ut enim omittam alios defectus qui in his locutionibus, si ut propriæ definitiones accipiantur, notari possunt; quoties nomen *liberi* vel *libertatis* in definitione ponitur, definitio involvit definitum, et æque obscura manet, quia, cum liberum arbitrium definiendum proponitur, maxime declarari desideratur quid significet illud *liberum*, vel quid sit illa libertas, unde liberum denominatur; hoc autem in illis descriptionibus non declaratur, sed reperitur, et ideo dico in illis definitum involvi. E contrario vero, cum Magist. in 2, distinct. 24, dicit liberum arbitrium esse *facultatem voluntatis et rationis, qua bonum vel malum eligitur*, nec adæquate explicat facultatem illam, quia libertas non solum in electione, sed etiam in aliis actibus voluntatis, nec solum in electione inter bonum et malum, sed in electione inter plura bona exerceri potest: neque etiam declarat quid sit electionem, aut consensum, vel volitionem esse liberam, quod maxime desideratur. Unde D. Thom. 1. 2, q. 1, a. 1, non definiendo, sed asserendo, dixit *liberum arbitrium esse facultatem voluntatis et rationis*, et quasi tacite complens descriptionem, addidit illam facultatem esse *per quam homo est dominus suorum actuum*. Per hoc insinuans libertatem potentiæ consistere in dominio sui actus. Dominium autem est facultas utendi et non utendi, seu faciendi et non faciendi, et ideo moderni aliqui liberum arbitrium dicunt esse *facultatem voluntatis et rationis ad utrumlibet*, id est, agendum, vel non agendum, et agendum unum vel alterum. Quod quidem vere dictum est, et ex Aristotele desumptum, 9 Metaphysic., cap. 3, alias text. 12; et ex divo Thoma 1. 2, quæst. 6, art. 2, ad 2, et q. 13, et 1 p., q. 83; ut autem illud sit proprium liberi arbitrii, debet intelligi de potentia proxima, alias non erit illud proprium potentiæ formaliter liberæ; ergo ad hoc explicandum necessarium est addere particulam in dicta descriptione positam, *positis omnibus prærequisitis ad agendum*.

6. *Ex æquiparatione ad intellectum probatur.* — Utrumque declarare possumus, intellectum cum voluntate comparando; nam etiam intellectus habet facultatem agendi et non agendi, ut credendi et non credendi, vel etiam dissentendi et assentiendi, et nihilominus

non est formaliter liber, sicut voluntas : ergo necesse est hoc discrimen in definitione liberi arbitrii explicare, quod sine illis particulis non fit. Supponimus enim liberum arbitrium non esse plures potentias divisim sumptas, nec collectionem earum, sed unam solam, quæ sit domina suorum actuum : esse autem facultatem agendi unum et oppositum, vel agendi et non agendi, non uni tantum, sed multis potentiis convenit, ut dictum est de intellectu, et suo modo convenit etiam appetitui sensitivo, et multo magis voluntati : ergo, per hanc facultatem ad utrumlibet generatim et indistincte sumptam, non explicatur proprietas illius unicæ ac simplicis potentiæ, quæ est liberum arbitrium, nec propria ratio per quam in ratione potentiæ formaliter liberæ constituitur. Ergo, ad hoc explicandum, merito additur esse potentiam quæ habet facultatem agendi et non agendi, positis omnibus prærequisitis ad agendum. Per hanc enim ultimam particulam optime explicatur vis intrinseca liberæ potentiæ ad eliciendum, vel sustinendum actum sola sua potestate, et non ex defectu alicujus conditionis necessariæ ad agendum vel non agendum.

7. *Sola voluntas potest efficere et suspendere actum, positis omnibus requisitis.*—Unde, quia hic modus operandi soli voluntati convenit, ideo illa est formaliter libera, et liberum arbitrium. Intellectus autem non habet hanc facultatem intrinsecam ita indifferentem, ut sese possit determinare ad actum, vel suspendere illum, aut ad oppositum se determinare. Nam si objecti veritas sit evidens et sufficienter proponatur, ex necessitate naturali præbet assensum : si vero non sit evidens, sed probabilis, vel credibilis appareat, non potest sese determinare, nisi intercedente voluntate (ut in fide christiana certum est, et idem est cum proportionem in humana). Et tunc nunquam intellectus, positis omnibus requisitis ad agendum, potest agere et non agere, quia unum ex prærequisitis ad agendum, est ut moveatur a voluntate ; et, posita tali motione non potest non agere, illa autem non posita necessario non agit, non tam ex potentia non agendi quam ex impotentia agendi. Voluntas autem, positis omnibus requisitis ad agendum, sicut potest agere ex interna facultate, se determinando sine motione alterius potentiæ, ita ex eadem interna facultate potest non agere, suspendendo suum influxum ex interna vi et dominio, vel etiam ex eadem facultate aliud seu contrarium agendo, si ex parte objecti suffi-

cienspropositio ad utrumque facta sit. Per illam ergo particulam optime completur descriptio liberi arbitrii, non excludendo vel reprobando alias, sed explicando de qua potestate agendi intelligi debeant ut bonæ sint, utique de potestate proxima, quæ per se ad utramque partem flecti possit sine mutatione status, ut sic dicam, per quam scilicet mutationem impotens ad agendum vel non agendum fiat.

8. *Secunda assertio.*—*Descriptio libertatis in sensu composito est intelligenda.*—Secundo, hinc dicimus descriptionem illam in sensu composito esse intelligendam, sicut ab omnibus auctoribus qui illam attigerunt est intellecta. Et probatur facile, quia, positis omnibus prærequisitis ad agendum posse non agere in sensu diviso, id est, retinere potestatem ad non agendum, ablata aliqua conditione ex prærequisitis, non est proprium potentiæ liberæ, sed cuilibet naturaliter agenti convenit. Nam sol etiam ita illuminat, eum omnia requisita concurrunt, ut possit non illuminare, si fenestræ claudantur ; et oculus videt objectum imprimens speciem, et aptus est ad carentium visione, si auferatur species ; et intellectus ipse, dum credit a voluntate motus, potens est ad non credendum, si voluntas aut non moveat, aut in contrarium actum inclinet : non enim suam potentiam in actu primo, quam innatam habet ad utrumque actum, amittit, quando ad credendum per voluntatem applicatur : ergo, positis omnibus requisitis, est potentia non credendi vel dissentiendi in sensu diviso : ergo id non est satis ad potentiam formaliter liberam : vel dicendum est intellectum esse potentiam formaliter liberam, quod nec verum est, neque a dictis auctoribus admittitur : ergo, ut illis verbis formalis libertas voluntatis explicetur, necesse est ut in sensu composito accipiantur.

9. *Probatur ex voluntate beata.*—*Idem in brutis probatur.*—Idem argumentum sumi potest ex ipsamet voluntate ; nam in beatitudine, non libere sed necessario beatus amat Deum, quia, positis prærequisitis ad illum amorem, non potest non amare in sensu composito, et nihilominus ibi etiam retinet potestatem non amandi in sensu diviso : nam si visio ad illum amorem requisita auferatur, poterit voluntas ab illo amore cessare, sicut in Paulo contigit, si in raptu Deum vidit. Neque refert quod illa necessitas aliunde proveniat, nimirum ex vi objecti et visionis, quia nihilominus sub illa manet potestas ad non amandum in sensu diviso, et in hoc tantum

fit æquiparatio. Deinde voluntas in actibus indeliberatis, quales sunt etiam motus gratiæ excitantis, ex necessitate et sine libertate operatur: quia, positis præviis requisitis ad illum actum, non potest actum continere, cum tamen in sensu diviso possit ab illo cessare, ut constat. Quin potius etiam in brutis idem genus indifferentiæ inveniretur; possunt enim sponte sua et moveri et quiescere, et ad unam partem et ad oppositum moveri. Propter quod dixit Aristoteles, 8 Phys., text. 40, habere in seipsis moveri et non moveri, et ideo quando, positis omnibus requisitis, aliquid appetunt, potestatem retinent ad cessandum ab illo appetitu, et ad contrarium appetendum in sensu diviso, id est, si aliquid ex illis prærequisitis auferatur, vel aliud diversum adhibeatur. Et nihilominus quia, positis prærequisitis, ita ad unum determinantur ut in sensu composito, id est, illis stantibus, nec aliud appetere, nec ab illo appetitu cessare valeant, ideo sine libertate operantur. Unde D. Thom., q. 24 de Verit., art. 2: *In brutis (ait) est quedam similitudo liberi arbitrii, in quantum possunt agere, vel non agere unum et idem, secundum suum iudicium; sed quia eorum iudicium est determinatum ad unum, per consequens eorum appetitus et actio ad unum determinatur*: et in solut., ad 2 et 3, dicit esse in brutis quamdam indifferentiam actionum, quia eorum potentia motiva non magis inclinatur ex se ad unum motum quam ad alium, et idem suo modo esse in appetitu eorum, et tamen non esse libertatem, quia, posita apprehensione et iudicio phantasie, ad unum determinantur. Ex quibus verbis colligimus necessarium esse ad libertatem ut, stante eodem iudicio cum talibus prærequisitis, tam actio quam non actio sit in potestate agentis, nec satis esse quod in eo sit potestas ad agendum et non agendum, variato iudicio: nam hanc etiam potestatem habent bruta; eadem autem ratio est de cæteris prærequisitis, ut mox dicam.

10. *Ratio convincens.*—Ratio denique hanc partem convincit, quia non quælibet potestas agendi et non agendi ad libertatem sufficit, sed illa que est ex interna potestate, et eminenti virtute, ac dominio (ut in præcedenti capite declaravi); at vero ita operari positis omnibus requisitis ad agendum, ut solum possit facultas ab operatione cessare in sensu diviso, id est, sublato aliquo ex requisitis, non est potestatem ex interna potestate et dominio actionis: ergo non satis est ad libertatem. Minor

probat, quia tunc non cessatur ex potestate non agendi, sed potius ex impotentia agendi, quia nimirum nulla causa agere valet, nisi positus omnibus requisitis ad agendum. Et confirmatur, quia alias postquam voluntas, positus omnibus prærequisitis, velle incœpit, non poterit sua sponte ab actuali voluntate cessare, stantibus iisdem prærequisitis, sed oportebit aliquod illorum auferri ut ipsa cesset; hoc autem est et contra experientiam et contra usum libertatis: ergo. Sequela probatur, nam eadem est ratio de inceptione actus, et de perseverantia in illo: imo aliqui existimant magis necessariam esse continuationem quam incœptionem, saltem pro brevi morula, quod nec verum est nec nostra nunc refert: satis enim est quod æqualis ratio intercedat. Si ergo voluntas, stantibus omnibus prærequisitis ad perseverandum, potest sua sponte et interna vi ab amando cessare, componendo simul illam cessationem cum illis prærequisitis, eadem profecto vel majori ratione poterit non inchoare amorem, stantibus omnibus prærequisitis, negationem agendi cum eisdem prærequisitis simul componendo, vel si hoc posterius non potest, profecto nec illud prius potest. Unde ulterius confirmatur a contrario, quia si, positus illis prærequisitis, non relinquatur potestas non agendi in sensu composito, ergo ex potentia sic constituta cum omnibus prærequisitis necessario sequitur actio: ergo talis actio non est libera, cum ex necessitate sequatur ad potentiam antecedenter ad omnem usum libertatis ita dispositam, ut cum tali dispositione non possit actionem continere et sine illa præparatione non possit illam elicere.

11. *Ultima confirmatio, ex absurdo oppositæ sententiæ.*—Tandem confirmatur, quia ex altera sententiâ sequitur voluntatem nunquam habere potentiam proximam agendi et non agendi: consequens est contra libertatis usum: ergo. Sequela probatur, quia ut recte dixit Capr. in 2, distinct. 28, quæstion. 1., artic. 3, ad 2 et 3, contra quartam conclusionem, potentia in sensu diviso solum est potentia remota, et potentia proxima includit omnia requisita ad actum, ut supra ex Scoto retulimus. Et probatur clare, quia illa quæ dicitur potestas solum in sensu diviso, non potest immediate reduci ad actum, sed oportet ut præcedat aliqua dispositio aut mutatio, qua potentia reddatur proxima, acquirendo aliquid necessarium ad actum, vel tollendo impedimentum actus, ut homo carens lumine gloriæ dicitur potens ad videndum Deum, non in

sensu composito, sed diviso, id est ablata illa carentia, et ideo illa potentia est remota: idemque in universum invenietur in omni actu possibili in sensu tantum diviso. Si ergo voluntas, positis omnibus prærequisitis ad agendum, potest non agere tantum in sensu diviso, non est tunc potentia proxima ad non agendum, sed tantum potentia remota. Ete contrario, quando non habet omnia prærequisita ad agendum, non est potentia proxima ad agendum, sed tantum remota; nunquam ergo est potentia proxima ad agendum et non agendum, sed ad alterum tantum. Minor autem seu falsitas consequentis probatur, quia hoc modo tollitur in effectu verus usus libertatis: quia potestas remota revera non exercetur nec reducitur in actum, nisi in statu proximo constituta; ut potestas, quam habet album ut sit nigrum, non reducitur in actum nisi ablata albedine, et quamdiu illa potentia est sub albedine, non exercet actum alterius potestatis, et sic de aliis: ergo si voluntas nunquam est in potentia proxima ad utrumque actum agendi et non agendi, vel agendi hoc aut illud, nunquam exercet potestatem liberam, quia solum eam partem exercet ad quam proxime est præparata. Quod maxime urget rem moraliter considerando; quia non datur usus libertatis, nisi quando operanti imputari potest carentia actionis, et e converso: at vero ad hoc non satis est potentia remota, quæ non potest ad proximam reduci per ipsam voluntatem, qualis est illa potestas in sensu diviso; quia, positis omnibus prærequisitis ad agendum, quæ antecedunt libertatem, non est in potestate hominis cum illis componere carentiam actionis: ergo non potest illi imputari quod tunc non absteineat a tali actione: ergo nec actio ipsa illi potest tribui tanquam libera, id est, tanquam procedens ex dominio agendi et non agendi; ut ergo per illam descriptionem vera libertas explicetur, oportet ut in sensu composito intelligatur.

12. *Tertia assertio subterfugia præcludens.* — Dico, tertio, descriptionem intelligendam esse de omnibus prærequisitis, sive ex parte Dei, sive ex parte aliarum causarum, et nisi ita intelligatur non satis definiri libertatem, ut in actum liberum in ipso usu prodire possit. Hæc assertio solum ponitur propter priorem partem: nam de altera non est controversia. Est autem juxta mentem antiquorum doctorum, qui descriptionem illam tradiderunt, vel ut certam supposuerunt: quia nec Dei concursus aut voluntatem ab illa excipiunt, sed pu-

tant vel non pertinere ad illa prærequisita, vel, si aliquo modo pertinet, cum illa et aliis, ut antecedunt, posse componi tam agere quam non agere divisim sumpta, ut videre licet in Corduba supra, et aliis quos ipse refert; et propterea dicere etiam solet non posse eundem effectum esse simul evitabilem in ordine ad causam secundam, et inevitabilem in ordine ad primam, ut sensit Cajetan., 1 part., q. 21, art. 4; et Vualden., lib. 1 Doctrin. fidei, capit. 28; Occam in 1, distinction. 38, quæst. 1; Gregor., quæst. 22, art. 3; Gabr., art. secundo. Et propterea, cum tota controversia versetur circa concursus vel motionem divinam, in illa sola limitare generalem assertionem, videtur esse quædam petitio principii, vel aperta destructio, ac negatio illius axiomatis. Ratione idem ostenditur, quia omnia quæ generaliter diximus de prærequisitis ad agendum æque procedunt de omnibus et singulis prærequisitis, sive ex parte Dei, sive ex parte aliarum rerum vel causarum necessaria sint, et sive dicantur esse aliquid requisitum in ipsa voluntate, sive in intellectu, sive in alia quacumque re, quæ ipsam voluntatem moveat ad agendum, et sive talis motio dicatur esse propria causa efficiens volitionem, sive sit necessaria conditio sine qua non stet fieri talem actum, et, illa posita, stet non fieri, dummodo sermo semper sit de solis et propriis prærequisitis, id est, ita requisitis ut omnino præcedant aliquo modo causalitate, et ordine naturæ in causalitate fundato, usum liberum voluntatis: nam de concomitantibus quæ involvunt liberum usum non loquimur, ut capite sequenti declarabimus. Assumptum ergo sic declaratum probatur, specialiter de illo requisito ex parte Dei, quod a generali descriptione excipitur, et vocatur motio Dei. Nam si illa motio est unum ex prærequisitis, et simpliciter necessaria ut voluntas operetur, et illa posita non manet in voluntate potestas ad non operandum, nisi in sensu diviso, ergo, illo prærequisito posito, non est voluntas in potentia proxima ad non operandum, sed tantum in remota, quia oportet prius illam motionem auferri ab illo qui illam posuit: nam ipsa voluntas non potest illam auferre, quia sicut non fuit facta ab illa, ita neque ab illa pendet, nisi ut a subjecto recipiente, in ejus potestate non est duratio passionis, sicut nec inceptio ejus, ut cap. 2 probatum est: ergo illa potentia in sensu diviso non est potestas ad liberum usum sufficiens, quia liber usus non est nisi a potestate proxima, ut etiam probavi.

Ergo in voluntate sic mota non manet libertas non agendi, et consequenter neque ipsum operari liberum est. Et eadem ratione, quamdiu illa motio non datur voluntati, solum est in potentia remota, et ex parte receptiva ad agendum, quia oportet ut prius recipiat illam motionem, quæ non est in potestate ejus activa, sed receptiva tantum : ergo tunc non est in potestate libera non agendi, sed in necessitate et impotentia agendi. Ergo, ut salvetur libertas, etiam respectu divinæ motionis præviæ requisitæ, necessarium est ut, illa etiam posita cum aliis prærequisitis, maneat potentia in sensu composito ad agendum et non agendum.

13. *A simili confirmatio.* — Confirmatur et explicatur a simili de potentia, verbi gratia, scribendi, quæ est in manu : illa enim de se est etiam potentia non scribendi, et nihilominus libera non est, quia nec potest scribere sine actione voluntatis, nec, posita motione voluntatis, potest in sensu composito non scribere, licet in sensu diviso et remote possit, utique si voluntas motionem auferat : ergo, simili modo, si voluntas non potest velle nisi mota a Deo, et posita motione non potest cum illa componere carentiam volitionis, licet in sensu diviso, id est, ablata motione, possit non velle, non magis est potentia libera quam potentia motiva quæ est in manu. Simile est de intellectu quoad potentiam assentiendi et dissentendi per fidem : nam in hoc non est formaliter liber, quia nec assentit nisi motus a voluntate, neque si ab illa moveatur, potest non assentire in sensu composito, sed in diviso : quæ divisio (ut sic dicam) non est in ejus activa potestate. Ergo si ita comparatur voluntas hominis ad motionem Dei præviæ, ut sine illa non possit velle, et illa posita non possit non velle nisi in sensu diviso, qui non est in ejus potestate activa, profecto non est magis libera voluntas, quam intellectus, quia non potest ipsa active tollere motionem Dei, sicut non potest eam parere. Quid enim interest, quod una motio sit a voluntate creata, et alia ab increata? Profecto hæc magis officit libertati : quia motio voluntati increate efficacior est et intimior, magis que per se influens in effectum.

14. *Adversantium responsio.* — *Impugnatur.* — Respondent constituendo discrimen, quia voluntas creata, licet sit mota a Deo, retinet intrinsicam potestatem non eliciendi talem actum, si velit, quod non habet intellectus nec alia potentia naturaliter agens. Sed hoc

non potest satisfacere. Primo, quia illa potestas intrinseca ad non eliciendum actum, quæ dicitur manere in voluntate mota a Deo, vel est ad non eliciendum actum in sensu composito, id est, sustinendo actum non obstante motione, et illa simul stante : et in hoc sensu optimum est discrimen, tamen per illum datur nobis quod intendimus. Vel illa potentia est tantum in sensu diviso, et sic eadem profecto est in potentia motiva et in intellectu, quia si motio voluntatis cesset, ex intrinseca natura talium potentiarum est, ut actum non eliciant, quia natura sua ita subordinantur voluntati quoad tales actus, ut si ab illa non applicentur, illos non eliciant ; multo autem magis dicitur pendere voluntas hominis ab actuali applicatione et præmotione Dei : ergo sub illa motione non magis habet potentiam intrinsicam non volendi, quam intellectus vel manus sub motione voluntatis. Unde fit ut, sicut non posita motione voluntatis, non solum potest intellectus non assentiri vel manus non moveri, sed etiam necessario non assentit nec movetur, ita juxta illam sententiam, non posita motione Dei, voluntas necessario non vult ; ergo non vere dicitur in sensu diviso, id est, ablata motione, posse non operari, si velit ; sed dicendum est ablata motione necessario non operari. Nam sicut non potest componi carentia operationis cum motione, ita non potest componi operatio cum carentia motionis. Declaratur a simili ; nam, ablata cognitione, non recte dicitur voluntas posse ab intrinseco carere volitione, si velit, sed dicendum potius est non posse velle, et necessario non velle : sed non minus necessaria est (juxta illam sententiam) ad volendum motio Dei quam motio intellectus : ergo in illo sensu diviso, id est, si motio Dei desit, non habet voluntas potestatem non operandi, si velit, sed est in potentia necessario non volendi, quæ (ut supra dicebam) est quedam impotentia volendi. Quapropter illa particula *si velit*, nullo modo potest ibi locum habere, quia, ablata motione Dei, non potest homo velle : ergo cum dicitur *si velit*, ponitur conditio impossibilis. Aut enim illud *si velit* intelligitur de voluntate directe per actum positivum volendi suspendere alium actum, et hoc dici non potest, quia neque id est necessarium ad non agendum libere, ut est probabile, nec illud est possibile in illo sensu diviso, id est, ablata motione Dei : vel intelligitur de voluntate indirecta, et tunc supponi debet proxima potentia volendi, quæ non est sine motione

Dei, quia adhuc voluntas est ex parte in potentia tantum receptiva : ergo tunc non habet locum conditio *si velit*, quia non voluntarie, sed necessario caret voluntatis actu, quia a Deo non movetur.

15. Est igitur eadem ratio de quolibet requisito ex parte Dei, quæ est de aliis causis. Nam si tale est requisitum ex parte Dei, ut cum illo non sit potentia non agendi nisi in sensu diviso, revera non est potentia suspendendi volitionem per intrinsecum dominium in illam, sed per quamdam impotentiam, quia si auferatur illud requisitum, sine illo non potest velle, sicut non potest operari sine concursu Dei. Et similiter potentia illa in sensu diviso, etiamsi sit respectu præmotionis necessariæ ex parte Dei, est tantum potentia remota, quia debet prius auferri motio Dei, ut talis potentia reducat in actum non volendi, et auferre illam motionem non est in potestate ipsius voluntatis, quia ad illam solum passive se habet. Unde etiam hic habet locum illa ratio, quod nec possit imputari homini earentia volitionis, quando non recipit motionem Dei, quia ante motionem non est in potentia proxima, et non habet in sua potestate motionem, per quam in proxima potentia constituatur, sed solum est ad illam in potentia passiva, et ita non potest illi imputari, quod illam non habeat; et post motionem non potest voluntati moraliter tribui quod actum non suspendat, vel quod suum influxum non contineat, quia posita motione non potest, et illa motio ponitur sine influxu ejus. Ergo, ad veram libertatem salvandam, sensus compositus universaliter et sine exceptione necessarius est respectu omnium, quæ proprie sunt prærequisita ad agendum, sive ex parte causarum secundarum, sive ipsius Dei.

16. *Opposito fundamento fit satis.* — Ad fundamentum contrariæ sententiæ, negamus priorem partem de concursu prævio; sufficit enim simultanens, qui, ut in re ipsa datus, non est ex prærequisitis ad volendum, sed est concomitans, et cum illo involvitur usus libertatis. Ut vero est tantum in actu primo, est ex prærequisitis: verumtamen cum illo, in eo statu posito, seu oblato ex parte Dei, potest simul componi earentia actus ad quem supponitur concursus in actu primo oblatus. Et eodem modo dicendum est ad alteram partem de voluntate Dei. Concedimus enim aliquam voluntatem Dei esse præviam ad volitionem hominis, et nihilominus dicimus cum illa posse simul componi, tam non agere quam age-

re, quia non oportet ut sit voluntas absoluta, quod talis actus fiat et in rerum natura ponatur, ut recte dixit Soto 1 de Natura et gratia, cap. 16; sed sufficit voluntas concurrenti cum libero arbitrio hominis ad hunc vel illum actum, si ipse cooperari velit, quod semper relinquatur in manu et potestate ejus: unde merito graves theologi dixerunt, licet voluntas Dei ex æternitate antecedit, nihilominus volitionem ejus, ut determinatur ad volendum concurrere cum voluntate creata ad talem actum, non esse voluntatem præcedentem, sed concomitantem. Hæc autem concomitantia videtur consistere in objecto illius voluntatis divinæ, qua vult concurrere cum humana, quia per illam volitionem non vult actum voluntatis humanæ simpliciter et absolute, sed ut coëfficiendum ab eadem voluntate humana, et quasi sub conditione, si voluntas ipsa humana velit cooperari, et ideo talis voluntas Dei nihil operatur per se sola, neque prius quam voluntas creata simul efficiat; et ita facile intelligitur quomodo illæ duæ voluntates simul conjungantur ad eandem actionem; nam voluntas divina ex æternitate est quasi præparata, et habet applicatam potentiam suam ad coagendum cum voluntate humana. Unde quando in tempore voluntas humana pro libertate sua conjungitur divinæ, simul efficiunt.

CAPUT IV.

UTRUM VOLUNTAS EXPOSITA, CUM OMNIBUS PRÆREQUISITIS EX PARTE INTELLECTUS AD LIBERE VOLENDUM, FOSSIT A DEO ITA MOVERI UT EX NECESSITATE ET NON LIBERE VELIT?

1. *Quæstionis declaratio.*—Hujus quæstionis resolutio ad declarandam amplius rationem libertatis, et ad explicandam postea concordiam libertatis cum motionibus gratiæ multum conferre potest, et ideo illam hoc loco præmittere visum est. Loquor de voluntate habente ex parte intellectus actu propositum objectum eo modo, quo ad libere volendum necessarius sit, et ex natura rei sufficiat: nam si intellectus perturbetur, aut subito et sine sufficienti judicio ac deliberatione rapiatur, non est dubium quin voluntas possit ex necessitate sine libertate moveri, non solum miraculose aut per gratiam, sed etiam ex interno impetu, ut in motibus primo primis juxta communem doctrinam contingit. Deinde necesse est ut per integrum intellectus judicium

proponatur objectum de se indifferens, id est, quod nec repræsentetur clare ut summum bonum homini simpliciter necessarium, neque etiam ut bonum quod ad finem actu intentum simpliciter necessarium sit. Et per hoc excluditur tam absoluta necessitas ab intrinseco, quæ potest esse in actu voluntatis circa summum bonum clare visum, quam necessitas ex suppositione, quæ potest esse in volitione medii necessarii ex intentione finis, quamvis hæc non sit absoluta necessitas, nisi etiam intentio finis absolute necessaria sit. Denique per hoc excluditur omnis necessitas, quæ ab intrinseco ex natura illius provenit. Unde quæstio solum est de necessitate ab extrinseco, id est, an, stante tali iudicio rationis quo voluntas libere ex se moveretur, fieri possit ut, ab aliquo agente extrinseco, in tale objectum sic propositum ita impellatur, ut non libere sed necessario illud amet vel aversetur. Et quoniam de fide certum est nullam causam creatam spiritualem vel coelestem habere hanc vim in voluntatem, de solo Deo quæstio tractatur.

2. *Duplex necessitas.*—Distinguenda præterea est necessitas a coactione, nam, ut supra dixi, coactio addit ultra necessitatem, quod sit motus contra internum appetitum vitalem, et quia sub hac ratione repugnat actui voluntatis, cum intrinsece et per se voluntarius sit, ideo communiter docent theologi non posse voluntatem ad actus elicitos cogi : nam, eo ipso quod illos elicit, voluntarii simpliciter sunt, quia non potest velle quin velit, nec potest nolle quin implicite velit nolle. Denique distinguenda est necessitas quoad exercitium a necessitate quoad specificationem ; nam de hac posteriori nulla est quæstio, quia facile potest Deus necessitare voluntatem quoad specificationem, negando concursum ad omnem aliam speciem actu præter unam : sicut etiam dici potest necessitare voluntatem quoad individuationem, non offerendo concursum, nisi ad unum individuum. Et ratio est, quia hæc posterior necessitas non est absolute agendi aut volendi, sed conditionata agendi hoc, si voluntas agere velit ; unde absolute est necessitas non agendi aliquos actus, quæ facile potest esse in voluntate creata ex voluntate divina, non solum quoad has vel illas species actuum, sed etiam absolute ad omnes, quia potest Deus negare voluntati concursum ad omnem actum, et tunc ex necessitate nullum eliciet, sicut ignis ex necessitate non calefacit, Deo negante suum concursum. Eodem ergo

modo potest Deus, negando voluntati concursum ad alias species actuum, coartare illam ut solum in una specie possit elicere actum, si velit, et hoc est necessitare illam quoad specificationem : quæstio ergo nostra est de necessitate quoad exercitium.

3. *Prima opinio.*—Prima opinio negat posse Deum necessitare voluntatem, stante iudicio rationis, quo ita proponatur objectum ut voluntas, sibi relicta, illud amare vel non amare aut etiam odisse potuisset. Hanc sententiam intendit Bannez 4 part., quæst. 49, art. 10, dub. 1, in fine, § *Sed dices*. Nam, licet illam sub dictis specialibus verbis non tradat, comprehendit sub generalibus, quibus, ex eo quod libertas voluntatis oritur ex indifferentia iudicii rationis, sic infert : *Ex prædictis colligimus corollaria. Primum est : Quotiescumque actus voluntatis oritur ex prædicta radice iudicii, semper erit liber. Unde rursus colligo : Quidquid antecesserit, vel comitabitur, vel supervenerit ad actum voluntatis, si non tollat iudicium illud medii circa finem, non destruct libertatem operationis.* Ubi nihil excipit, etiamsi hæc a Deo proveniant, imo statim expresse ita rem explicat, et ex illo principio dissolvendas putat omnes difficultates, quæ in concordia libertatis nostræ cum providentia et gratia divina concurrere solent. Et hanc doctrinam secutus est Camellius in eodem art. 10, in Appendice de libero Arbitrio, concl. 2, et P. Alvarez, disput. 126, concl. 5, expresse declarans Deum non posse necessitatem inferre voluntati, stante iudicio rationis de se indifferente ; eandem sententiam tradere videtur P. Vasquez, 4 part., disput. 99, cap. 8, et alibi sæpe : excipit tamen voluntatem humanæ naturæ hypostatice unitæ Deo, et ex diverso fundamento procedit, ut videbimus.

4. Priores ergo auctores concedunt posse Deum, stante iudicio mentis ex se indifferente, ita præmovere voluntatem, et efficaciter ad unam partem determinare, ut illa non possit resistere ; nihilominus tamen dicunt non necessitare illam necessitate contraria libertati, ac proinde non posse illam necessitare : quia si posset, posset maxime illo modo : sed illo modo non necessitat : ergo. Minor probatur primo, quia, non obstante illa motione, actus elicitur a voluntate cum indifferentia rationis et iudicii : sed in hoc salvatur definitio libertatis ; ergo ille actus libere fit. Secundo, probatur idem, quia libertatem actu non excludit nisi necessitas absoluta : sed

illa necessitas non est absoluta et simpliciter, sed tantum secundum quid, et ex suppositione : ergo non repugnat libertati. Tertio, objectum voluntatis est bonum cognitum : ergo impossibile est voluntatem ex absoluta necessitate amare objectum non cognitum, ut necessarium bonum ex necessitate amandum : ergo quamdiu iudicium intellectus proponit objectum ut bonum indifferens, impossibile est quod voluntas medio illo iudicio tendat in illud objectum ex necessitate absoluta, et non libere. Quarto, voluntas cogi non potest ex sententia omnium theologorum; sed si necessitaretur, cogeretur : ergo nec necessitari potest. Probatur minor, quia illud cogitur quod contra inditam sibi naturam et conditionem movetur : sed si voluntas necessitaretur circa tale objectum sic cognitum, moveretur contra insitam sibi naturam et conditionem, ut constat, quia indita natura voluntatis est cum indifferencia et dominio moveri circa tale objectum : ergo. Major patet, quia quod est contra inditam proprietatem naturæ, est etiam contra inclinationem internam, ac proinde est violentum, seu coactum. Quinto, argumentari solent, quia non potest Deus facere ut potentia non libera ex natura sua libere per miraculum operetur ; ergo nec potest facere ut potentia natura sua libera necessario operetur : videtur enim eadem ratio et proportio.

5. *Confirmatur.* — Possumus in confirmationem hujus sententiæ afferre Augustinum, lib. 3 de Lib. arb., cap. 3, ubi inter necessitatem et voluntatem ita distinguit, ut neget fieri voluntate quod fit necessitate : *Si enim* (inquit) *necesse est ut velit, unde volet, cum voluntas non erit?* Et infra : *Voluntas igitur nostra nec voluntas esset, nisi esset in nostra potestate, porro quia est in potestate, libera est nobis.* Et infra : *Nec voluntas esse poterit si in potestate non erit, ergo et potestatis est præsciens.* Simili modo Bernard., lib. de Grat. et liber. arbitr., a principio, loquens de consensu voluntatis, ait : *Non cogitur, non extorquetur. Est quippe voluntatis, non necessitatis.* Et hoc ita esse verum ut aliud repugnet, indicat, dum subdit : *Alioqui si compelli valet invitus, violentus est, non voluntarius, ubi autem voluntas non est, nec consensus. Non enim est consensus nisi voluntarius, ubi ergo consensus, ibi voluntas; ubi autem voluntas, ibi libertas;* sentit ergo repugnare, esse voluntatis consensum, et esse necessarium. Denique allegatur D. Thomas in 1. 2, quæst. 17, art. 1, ad 2, et 1 part., quæst. 83, a. 1, quia his locis docet,

ideo voluntatem libere moveri, quia ratio potest diversas conceptiones boni et mali habere, et de objecto cum indifferencia quadam judicare. Ergo sentit, stante hac indifferencia iudicii, non posse actum voluntatis esse necessarium.

6. *Secunda opinio.* — At vero altera sententia P. Vasquez in hoc fundari videtur, quod voluntas habens præsens objectum indifferens, et ut tale iudicatum, non potest ab extrinseco ita determinari ad unum, ut resistere non possit et influxum suum cohibere. Hoc autem fundamentum non invenio ibi probatum, sed suppositum. Nam ex eo quod voluntas nostra necessitari non potest in via ab objecto, quamdiu usus rationis sine perturbatione manet, juxta doctrinam D. Thom. prima secundæ, quæst. 10, art. 2, infert immediate ille auctor, stante illo iudicio, non posse libertatem voluntatis impediri, quæ illatio nulla est, nisi supponatur tale impedimentum non posse ab extrinseca causa provenire. Videtur autem Vasquez hoc fundamentum supponere ex his quæ contra Gregorium dixerat, disputat. 88, cap. 5. Ibi autem non invenio probatum esse impossibilem omnem modum necessitandi voluntatem circa tale objectum, sed solum de facto non dari motionem prædeterminantem, quia si daretur, læderet libertatem, quod longe diversum est.

7. Posset autem suaderi hæc sententia isto modo, quia nulla prævia motio ex parte Dei intelligi potest, quæ talem necessitatem inferat voluntati. Aut enim illa motio esset res distincta ab ipsomet actu quem voluntas elicit, vel esset ipsemet actus secundum aliquam rationem spectatus : neutrum dici potest : ergo. Minor quoad priorem partem probatur, quia illa motio facta a solo Deo non potest esse nisi productio alicujus qualitatis, quæ insit voluntati per modum actus primi, quia cum ab illa non fiat, non potest esse actus secundus : sed talis qualitas non potest necessitare voluntatem ad actum secundum : tum quia non tollit dominium ejus, nec minuit potentiam agendi, et non agendi; tum etiam, quia, hac ratione, habitus infusi, quantumvis perfecti, non possunt necessitatem inferre voluntati circa objecta indifferencia, seu non simpliciter necessaria : ergo illo modo non potest voluntas necessitari a Deo. Altera item pars probatur, quia in ipso actu voluntatis, sive libero, sive necessario, nulla ratio considerari potest quæ a solo Deo fiat, ut nunc suppono : ergo talis motio, ut est a Deo, non est antee-

dens, sed concomitans, quia simul fit a voluntate: ergo semper ex hac parte est subjecta dominio voluntatis, quia semper est potens dare vel non dare suum influxum.

8. Verumtamen, quidquid sit de hujus sententiæ veritate, non video cur excipiat voluntatem creatam unitam hypostatice divinæ personæ. Primo, quia, si ratio facta est alicujus momenti, eodem modo procedit in voluntate Christi, quia, non obstante hypostatica unione, in intellectu Christi præsentatur objectum amabile quale ipsum est; et ideo si non est necessarium, judicatur indifferens, sine ulla mentis perturbatione, vel deceptione, aut inconsideratione: ergo voluntas etiam tendit in illud libere, quantum est in se, nec potest necessitari, vel per motionem distinctam ab actu, vel quæ sit idem cum illo, propter easdem rationes factas quæ eodem modo applicari possunt. Secundo, quia unio hypostatica per seipsam formaliter non est principium activum, aut motivum voluntatis, ut nunc tanquam certum suppono: ergo non potest necessitare voluntatem per seipsam: ergo si necessitat, oportet ut id faciat per aliquam mutationem factam in voluntate; ergo in illa etiam voluntate habet locum dilemma factum, vel si in illa non est efficax, neque in aliis erit. Unde accedit, tertio, quod nullum donum creatum potest tribui naturæ unitæ hypostatice Verbo, quod non possit tribui naturæ creatæ in propria persona existenti, neque actio ulla vel modus physicus operandi potest communicari naturæ assumptæ, qui non possit puris hominibus communicari, quia personalitas divina communicata naturæ creatæ, licet illam sanctificet et deificet quoad dignitatem personalem et substantialem, non dat capacitatem vel potestatem physice operandi, sed moraliter dignificat actiones: at vero modus operandi voluntatis libere vel necessario, est modus physicus et realis: ergo, si voluntas unita est capax necessariæ operationis, non obstante indifferencia objecti, etiam voluntas non unita illius erit capax: vel e contrario si in nostris voluntatibus id reperitur impossibile, non est cur hypostaticam unionem excipiamus. Itaque de priori opinione quid sentiam breviter in hoc capite explicabo, de posteriori autem in sequenti dicam.

9. *Vera sententia.* — Dico ergo Deum posse ita movere voluntatem, stante integro iudicio rationis de objecto ex se indifferente, seu non necessario, ut motu non libero sed sim-

pliciter necessario in illud feratur. Hanc assertionem expresse docuit D. Thomas, quæstione 22 de Veritat., articulo 8, ubi, in principio corporis, dicit posse Deum necessitare voluntatem, non cogere. Et aliis locis solum negat posse Deum cogere voluntatem, et sine alia limitatione adjungit posse illam immutare, et ab uno bono ad alium actum transmutare, prout voluerit, ut patet ex 1. 2, quæstione 6, articulo quarto, ad 1. Et sub illis verbis comprehendere potestatem necessitandi voluntatem sine coactione exponit Conradus in eadem 1. 2, quæstione 80, articulo tertio, ad 1, allegando priorem locum; et tanquam manifestum id supponit Capreolus 1, distinction. 45, ad 1, contra quintam conclusionem. Et hoc modo loquuntur multi ex scholasticis antiquis in 2, distinct. 25. Expresse vero id tradit Gabriel, art. 3, dub. 1, conclus. quarta; et Palac., disputat. unic., dub. ultim.; Ocham, quæstione 19, ad 2. Hi vero auctores in hoc fundantur, quod potest Deus solus efficere actum volendi in voluntate, quo ipsa velit necessario, etiamsi ipsum non eliciat. Quod fundamentum nos non admittimus, nunc vero necessarium non est de illo disputare. Unde sine illo fundamento tenet eandem sententiam Marsil. in 2, q. 16, art. 5, dub. penultim., conclus. 9 et 10; Scotus in 4, distinct. 49, quæst. 6, § *Dico ergo*; Almain., tractat. 1, Moral., cap. 2. Eandem opinionem tenet Sot., lib. 1 de Natur. et grat., cap. 16; Medina 1. 2, quæst. 6, art. 4, conclus. 1; Valent., disputat. 2, quæst. 1, punct. 3 ad 2, et quæst. 5, punct. 4; et optime Bellarmin., lib. 4 de Grat. et libero arbitrio, cap. 11, § *Tertio est observandum*, et latius cap. 14, in impugnatione tertiæ sententiæ, ubi expresse sententiam Bannez refert et confutat, illo innominato. Denique eandem sententiam sequitur dicens esse communem theologorum Cumel. in opusculis, tom. 3, discours. 2, assertion. 4; quamvis enim ibi duos modos involvat hujus necessitatis, scilicet, ex parte potentiæ vel objecti, utrumque tamen suis rationibus probat, licet non satis consequenter loquatur, ut ex alio loco allegato constat. Eandem sententiam tenet Cabrera, 3 part., quæst. 18, art. 4, disput. 1, in principio, ubi præter morem doctrinam nostram approbat, quam vero constanter in cæteris loquatur postea videbimus; et idem tenet Alexand. Pesant., 1 part., quæst. 19, art. 8, disput. 1, ubi contrariam sententiam dicit esse contra omnes theologos.

10. *Confirmatur ex Patribus.* — Secundo, possumus assertionem hanc ex Patribus hoc modo confirmare : nam hæretici, qui dixerunt Deum non solum posse, sed etiam semper necessitare voluntatem hominis in omnibus volitionibus suis, non negabant habere hominem iudicium rationis, quo cognoscat et discernat bonitatem uniuscujusque objecti, et an sit necessarium necne, sive in ratione finis, sive in ratione medii. Neque etiam dicebant Deum necessitare voluntatem auferendo illud iudicium, aut intellectum hominis perturbando, sed solum sua voluntate vel præscientia ita præmouendo voluntatem, ut illam necessario faciat operari, ut constat tam ex antiquis erroribus Manichæi, et Abailardi, quam ex novis Calvini, Lutheri, etc. At vero si, stante iudicio rationis integro, non posset voluntas necessitari per quaecumque motionem vel efficientiam Dei in ipsam, facillimum fuisset Patribus et Catholicis impugnantibus eos redarguere, eo quod per solam motionem extrinsecam dicerent voluntatem necessitari, cum, ea non obstante, ex iudicio rationis de se indifferente operetur, quod ad libertatem sufficit. At Patres nunquam ita respondent, vel impugnant errores illos, sed supponunt potius necessitandam fore voluntatem per talem motionem, si daretur, non obstante iudicio rationis. Et ideo negant dari talem motionem necessitantem, non quia impossibilis sit, sed quia Deus sapienti sua providentia ita gubernat, ut talem motionem (utique de lege ordinaria) illi non imprimat.

11. Atque hoc modo colligitur assertio ex Conciliis Tridentin. et Senon., definientibus contra Calvinum, qui prædicto modo erravit, et tamen Concilium Tridentinum, sess. 6, c. 5, et canon. 4, hunc errorem damnat, non quia ille modus necessitandi sit impossibilis, sed quia hæreticus ille asseruit de facto voluntates nostras ita semper moveri et operari. Et ideo Concilium, ad contradicendum illi errori, præter iudicium rationis, requirit ad usum libertatis, ut talis motio necessitans in voluntate non præcedat, et hoc est, quod ait : *Ita ut tangente Deo cor hominis, possit dissentire, si velit, et illam inspirationem, seu motionem abjicere.* Et Concil. Sen., decret. 15 fidei dixit : *Nec denique tale sit hujusmodi trahentis Dei auxilium, cui resisti non possit;* et hoc docet esse necessarium ut libero arbitrio non præjudicet; ergo senserunt Patres horum Conciliorum ad libertatem actus non sufficere iudicium rationis, sed impediri posse per motionem aliquam ex parte ipsius voluntatis. Potest

etiam sic induci Chrysostom., homil. 42 ad Popul. : *Nostras non prævenit voluntates, ne nostram temeret libertatem.* Ubi non negat prævenientem gratiam, ut postea videbimus, sed efficientiam ita prævenientem voluntatem, ut illam determinet necessario; et ex modo illo loquendi constat sensisse Chrysostomum non esse impossibile Deo prævenire illo modo voluntatem, sed ob convenientem providentiam non id facere. Sic etiam dixit Damascenus, lib. 2 de Fide, cap. 30, non prædestinare Deum seu prædefinire illa quæ in nobis sunt, *quia nec vitium (ait) admitti vult, nec virtutem affert,* utique necessitatem inferendo; ubi quidem negat Deum inferre hanc necessitatem, non quia non possit, sed quia non est consentanea providentiæ; ita enim de prædefinitione necessitante exposuit illum locum divus Thomas, 1 part., quæst. 23, art. 1, ad 1.

12. *Quid per imperium Dei intelligat dicit Hieronymus.* — Præterea Hieronymus, Epistol. 146 ad Damasum, de Fil. prodig., sic exponit dedisse Deum homini mentis propriæ libertatem, *ut viveret non ex imperio Dei, sed obsequio suo, id est, non ex necessitate, sed ex voluntate;* ubi per imperium Dei non intelligit legem, vel præceptum moraliter impositum, sic enim et falsa esset prior propositio negans, et inepta expositio subjuncta, quia tale præceptum non infert necessitatem, nec excludit libertatem. Loquitur ergo Hieronymus de illo absoluto imperio omnipotentis Dei, *quo ipse dixit, et facta sunt, ipse mandavit, et creata sunt.* Sentit ergo posse Deum hoc imperio voluntatem necessitare, non tamen facere *ut virtus haberet locum,* sicut statim subjungit. Est etiam optimum Augustini testimonium libr. 1 de Liber. arbitr., cap. 11, et lib. tertio, cap. primo, ubi ait naturam illam quæ hominis mentem excellit, non cogere, id est, *necessitare* voluntatem hominis ad libidinem; non quia non habeat potestatem illam cogendi, sed quia justa est; inferiorem autem naturam propter infirmitatem et impotentiam non posse voluntatem hominis servam libidinis facere. Ergo sentit Augustinus non deesse in Deo potentiam ad necessitandam voluntatem.

13. *Rationis probatio.* — Tertio, probatur assertio ratione fundata in omnipotentia Dei et in sententia Augustini in Enchirid., c. 98, dicentis posse Deum, quia omnipotens est, mutare voluntatem hominis, quando voluerit, et ubi voluerit: nam ad eandem omnipotentiam spectat posse illam mutare quomodo voluerit, si in modo nulla appareat implicatio

contradictionis; ergo non solum potest mutare voluntatem, servando ejus libertatem, sed etiam necessitando illam, et liberum usum impediendo. Probatur hæc ultima consequentia, quia nulla major repugnantia in uno quam in altero modo in tenitur. Imo difficilius videtur voluntatem mutare efficaciter, salva ejus libertate, quam eam necessitando: quia in priori modo oportet in eadem actione conjungere potestatem non agendi cum infallibilitate agendi, quod videtur difficile: in modo autem posteriori cessat illa difficultas, quia si motio inducit necessitatem, consequenter habebit infallibilem effectum. Aliunde vero, ex parte ipsius voluntatis creatæ, nulla est specialis repugnantia, quia, licet habeat duplicem potestatem, agendi scilicet et non agendi, potest per omnipotentiam Dei secundum alteram sinu operari, et secundum alteram impediri, ne suamet operationem possit suspendere; tunc autem operatio erit necessaria et non libera quoad exercitium, quia libertas in operatione non est sola entitas actus, vel modus intrinsecus ejus, sed est denominatio a potestate agendi et non agendi, utique ad utrumque expedita, seu non impedita; ergo tunc actus carebit tali denominatione, et consequenter erit necessarius: neque in eo quod Deus impediatur usum illius potestatis in voluntate creata, aliqua repugnantia cogitari vel inferri potest. Quia cum omnis potestas causæ secundæ sit subdita potestati causæ primæ, facile potest per illam impediri ne suamet potestate utatur, et oppositum videtur multum derogare omnipotentiae Dei et ejus eminentiæ super omnem potestatem creatam: unde hæc ratione potest efficacissime impedire ne voluntas velit, negando illi suum concursum, et consequenter necessitando illam ad non volendum; ergo etiam potest impedire usum potestatis ad suspendendum actum, et sic illam necessitare ad agendum.

14. *Solutione argumentorum conclusio probatur.* — Quarto, hoc possumus evidentius ostendere respondendo fundamentis aliarum opinionum, quod longe facilius est in priori quam in posteriori sententia. Nam prior supponit posse Deum, motione sua præveniente usum humanæ libertatis, ita efficaciter ac physice prædeterminare voluntatem hominis, ut non possit voluntas illi resistere: ex quo principio, ad hominem convincere possumus posse etiam necessitare. Primo, quia illud ipsum prædeterminare illo modo est necessitare, ut communiter sentiunt doctores hujus

temporis impugnantes Calvinum: tamen, quia hoc negant auctores illius sententiæ, et de illo est specialis controversia tractanda fuse lib. 5, ideo nunc hanc probationem omittimus. Secundo igitur ad hominem argumentor: nam voluntas, stante judicio integro intellectus, prius natura quam determinetur a Deo ad unum volendum, est de se indeterminata et indifferens ad plura, et nihilominus dicitur prædeterminari a Deo, simulque sub illa determinatione retinere suam indifferentem potestatem ad suspendendum actum quantum est ex se; ergo eadem ratione non repugnabit, quamvis voluntas, stante judicio intellectus, de se sit libera, nihilominus impediri omnino ab usu libertatis, et necessitari ad unum. Probatur consequentia, quia nulla est major repugnantia, quod facile ostendemus discurrendo per singulas probationes illius sententiæ.

15. Prima supponit novam et defectuosam definitionem actionis liberæ, scilicet, ut sit actio a voluntate elicitæ circa objectum per judicium rationis indifferens propositum. Nullus enim, quod ego viderim, ante Dominicum Bannez illam definitionem liberæ actionis tradidit. Nam de ipsa potentia in optimo sensu dici potest voluntatem esse liberam, quia operari potest cum indifferentia integri judicii rationis, quod erit verum, etiamsi voluntas necessitetur stante simili judicio, quia ipsa de se potens est ad operandum cum dominio circa tale objectum, etiamsi hic et nunc impediatur. Inde vero non sequitur talem potentiam nunquam posse impediri ab usu libero circa objectum judicatum de se indifferens, quia cum objectum sic judicatum non necessitet voluntatem, potest aliunde voluntas superari, et extrinseca necessitas illi imponi, ut ostensum est. Loquendo autem de actu, de quo argumentum procedit, nego definitionem actus voluntatis liberi esse, ut sit actus voluntatis cum judicio rationis indifferente elicitus. Nam licet hoc sit necessarium, non sufficit, quia illud judicium est origo libertatis in actu voluntatis; ergo non est ipsa formalis libertas ipsius actus. Antecedens est D. Thom., 4 part., quest. 83, et receptum in ejus schola, unde neque ab illis auctoribus negatur. Consequentia vero probatur primo, quia radix alicujus formæ non est ipsamet forma: nam idem non est radix sui ipsius. Secundo, quia in illo judicio duo possunt considerari, scilicet, actus et objectum ejus, ex quibus actus non est formaliter liber, sed naturalis, prout antecedit

voluntatem; ergo non potest esse forma denominans liberum actum voluntatis. Objectum autem illius iudicii, licet secundum se sit indifferens, non tamen esse potest forma a qua ipsum velle humanum denominetur liberum, quia formalis libertas non est proprietas objecti, sed est intrinseca proprietas hominis operantis voluntati inherens; ergo, præter indifferentiam objecti, quæ supponitur ut fundamentum libertatis, requiritur intrinseca indifferentia ipsius potestatis, et per habitudinem ad illam actus proxime denominatur indifferens, seu liber.

16. *In quo peccet primum argumentum.* -- Unde etiam de divina voluntate dixit D. Thomas in 2, d. 25, q. 1, artic. 1, ad 1, in Deo servari liberum arbitrium, quia ejus voluntas neque est natura sua determinata ad bona extra se, nec determinatur ab alio, sed a se. Sic ergo in voluntate creata ad libertatem actus non sufficit indifferentia objecti, nisi potentia ipsa, habens plenum dominium sui actus, eum integra et proxima potestate indifferente motum suum agere sinatur: sicut de causis secundis generatim dixit August., 7 de Civit., cap. 30, et de libertate ad peccandum, lib. 22, cap. 4, et in Enchirid., cap. 95 et 96. Nam hoc ad suavem et ordinariam providentiam Dei spectat. Inde vero non sequitur, stante tali iudicio rationis, Deum necessario sinere voluntatem operari, prout velit; potest enim non sinere, sed ita illam impedire ut unum tantum possit, et hoc est illam necessitare. Peccat ergo argumentum illud non distinguendo duplicem necessitatem, unam ab intrinseco, aliam ab extrinseco; argumentum enim probat actum a voluntate elicitum cum indifferentia iudicii, non esse necessarium ab intrinseco, ac subinde fore liberum, nisi ab extrinseco necessitas inferatur voluntati; hanc vero inferri non posse illo argumento non probatur.

17. *Solutio secundi.*—*Quæ sit necessitas absoluta.* — Ad secundum, quod illa necessitas non sit absoluta, sed ex suppositione, respondetur imprimis illa duo non semper repugnare; nam si suppositio antecedit omnem usum libertatis, et ex illa sequatur necessitas eum impotentia simpliciter resistendi, illa duo non repugnant simul, sed est necessitas absoluta, etiamsi sit ex suppositione; non enim dicitur necessitas absoluta, quia nihil supponat; imo nulla est necessitas in creaturis quæ causam aliquam non supponat unde oriatur: et ipsa necessitas, quæ est in

amore beatifico, est ex suppositione visionis Dei, et necessitas, quæ est in motibus gratiæ excitantis, supponit talem cognitionis modum, vel efficaciam virtutis divinæ ita animum moventis. Ergo necessitas non dicitur absoluta, quia nullam sui causam supponat, sed quia talis est ut excludat potestatem resistendi, præveniendo omnino liberum usum. Quod si fortasse nomine necessitatis absolutæ intelligatur necessitas ab intrinseco ex innata determinatione potentiæ ad unum, sic falsum est solam hanc necessitatem absolutam repugnare libertati quantum ad usum ejus, quia etiam necessitas ab extrinseco immissa illi repugnat: non enim est minor necessitas quæ ab extrinseco inferitur sine potestate resistendi, quam sit interna; imo illa prior ultra necessitatem aliquid de violentia participat. Quid enim prodest voluntati habere potestatem ad utrumlibet cum interna indifferentia, si in facto ipso non sinitur uti integra sua facultate, sed ad unum ab extrinseco ita necessitatur, ut non possit resistere, nec suo actui dominari?

18. *Responsio tertiæ.* — Ad tertium, de objecto cognito, respondetur, ut voluntas necessitetur a Deo, non oportere ut ipsa velit necessitari, sed solum quod necessitetur ut velit, sicut quando voluntas libere vult, non oportet ut modum ipsum libere operandi directe velit, sed ut in actu exercito libere velit. Unde fieri potest ut quis libere velit, et id ignoret, imo erret credens non libere operari, ut hæretici errant. Et similiter, e converso, potest quis a Deo necessitari ad volendum, ipso neque sciente, neque volente, sed solum directe volendo objectum propositum, et ideo nihil refert, quod objectum non supponatur cognitum vel iudicatum necessarium. Neque propterea voluntas feretur in incognitum, quia non fertur in necessitatem actus vel objecti, sed in ejus bonitatem. Neque etiam indifferentia cognita in objecto obstare potest necessitati actus ab extrinseca motione proveniente, quia licet sit indifferens iudicium objecti cogniti, per efficaciam extrinseci agentis impeditur voluntas, ne actum circa tale objectum suspendere possit, tendendo necessario in bonitatem objecti, nihil curando de indifferentia ejus.

19. *Retorquetur argumentum.* — Potestque hoc ad hominem confirmari et retorqueri argumentum contra dictos auctores: nam ipsi dicunt, stante indifferentia iudicii et indeterminatione innata voluntatis, voluntatem

prædeterminari absoluta prædeterminatione ad unum; contra quod idem fieri potest argumentum; quia voluntas non fertur nisi in bonum cognitum; ergo non potest prædeterminari, nisi bonum illud iudicatum sit ut determinate amandum; ergo, quamdiu iudicium est indifferens ex parte objecti, id est, proponens objectum ut aptum eligi vel respui, non potest voluntas ad unam partem prædeterminari; ergo erit impossibile, mediante illo iudicio, voluntatem tendere in illud bonum ex prædeterminatione: est enim eadem forma argumenti, et eadem ratio, neque immerito, quia illa prædeterminatio non est nisi vera necessitas. Nec possunt illi aliter respondere, nisi negando consequentiam, quia prædeterminatio non provenit ab objecto, sed aliunde, neque oportet cognosci ab eo qui prædeterminatur; idem ergo nos de necessitate dicimus.

20. Ad quartum respondet Bonavent. in 2, d. 25, art. 1, q. 5, et ibi alii communiter, licet voluntas ex necessitate fiat de nolente vel de non volente volens, non cogi absolute loquendo, quia eo ipso quod fit volens, jam non violenter fertur, sed voluntarie: quod simpliciter verum est. Nihilominus tamen illammet necessitatem, quatenus præternaturalis est, videtur esse aliqua ex parte violenta, quia privatur voluntas naturali dominio quod habet in suum actum, et impeditur ne uti possit naturali potestate suspendendi illum. Sicut etiam, si Deus illam necessitaret ad non volendum, negando illi concursum, vim quamdam illi inferret, negando illi quod secundum naturæ ordinem debitum est, contra naturalem illius inclinationem. An vero illa vis dicenda sit coactio, quia non est contra appetitum elicatum, et an sit dicenda violentia, quia fit a Deo, cui creatura subicitur secundum potentiam obedientialem, quæstiones sunt tantum de modo loquendi, et præsentis instituto nihil inserviunt, et ideo illas remitto in 1. 2, q. 6, art. 4, ubi tractari solent. Solumque adverte hujusmodi necessitatem solere a Patribus per verbum *cogendi* explicari, vel quia non est aliud verbum latinum quo proprius effectus ille explicetur, vel quia illa necessitas, nisi adhibendo vim aliquam, inferri non potest.

21. Ad quintum respondeo negando consequentiam, primo, quia potentia non libera in actu primo non potest fieri in se libera, et ideo non potest illi conferri ut libere operetur: nam actualis operatio libera essentialiter pendet a potentia formaliter libera, quoniam ac-

tualis libertas solum consistit in actus emanatione a potentia formaliter libera, et denominatione ab illa. E contrario vero potentia de se libera, retinens suam libertatem in actu primo, potest habere plures actus necessarios propter conditionem objecti, vel propter impedimentum ex defectu deliberationis, et ideo sine repugnantia potest necessitari, quia per hoc non mutatur natura ejus, sed tantum impeditur ne secundum suam integram potestatem operetur. Deinde explicatur hoc amplius, quia operatio, ut libere eliciatur, duas condiciones essentialiter requirit; una est, ut sit per se voluntaria, quia alias non posset potentia de se indifferens per illam determinari ad agendum, ut lib. 3 dicam; altera est, ut feratur in objectum cognitum cum indifferentia rationis. Hinc ergo fit ut inferiores potentiæ non possint elevari ad libere operandum, quia feruntur in objectum, vel omnino non cognitum, ut potentiæ mere naturales, vel non cognitum per rationem, ut potentiæ sensitivæ, vel quia actiones earum non sunt per se voluntariæ, ut reperitur etiam in intellectu. E contrario vero illæ duæ condiciones licet ex parte causæ secundæ sufficiant, oportet ut potentia ipsa sinatur connaturali modo operari; potest tamen in illo modo impediri, et ex hac parte non repugnat necessitari.

22. *Ad Patrum testimonia solutio.* — Unde facile respondetur ad testimonia Augustini et Bernardi; illi enim loquuntur de voluntate secundum se et secundum naturam suam spectata, secundum quam indifferens est in suis operationibus, ex qua indifferentia denominata est voluntas, quia quod vult, eligit et operatur, si facultas adsit. Et in hoc sensu de ipsa potentia dicitur illud; *Aut voluntas non est, aut libera dicenda est.* De actu vero non potest id dici, nisi per antonomasiam, quatenus nomine voluntatis significatur etiam voluntaria ac libera determinatio et electio, quæ nomine etiam consensus proprie significatur. Generalius autem loquendo, non est dubium quin possit esse volitio et voluntaria motio, quamvis non sit libera, ut patet in amore Dei erga seipsum, vel videntium ipsum, et in affectibus indeliberatis in hac vita elicitis, qui veri actus voluntatis et necessarii sunt: sicut ergo in his non repugnat interna necessitas cum voluntario, ita etiam potest esse necessitas ab extrinseco proveniens, cooperante tamen voluntate, a qua habet actus, ut sit intrinsece voluntarius, et consequenter vera voluntas. Ad D. Thomam respondetur, in illis locis assignare

radicem libertatis, non tamen dicere id satis esse ad libertatem formalem actus, nec dicere non posse hominem impediri ne cum tali iudicio libere velit, sed necessario. Neque ex illo principio id sequitur.

CAPUT V.

QUIBUS MODIS POSSIT DEUS FACERE UT VOLUNTAS
NECESSARIO VELIT OBJECTUM ACTUALI JUDICIO
RATIONIS INDIFFERENTER PROPOSITUM.

1. *Duo modi necessitatis secundæ sententiæ.* — In hoc capite de posteriori sententia in præcedenti capite relata dicendum est, ejusque fundamento est satisfaciendum; in quo recte sumebatur duos tantum esse modos quibus hæc necessitas possit a Deo immitti voluntati. Unus est per antecedentem mutationem factam in voluntate, distinctam realiter ab ipso actu amandi, seu volendi, qua ita voluntas impellatur in suum actum, ut necessario illum eliciat. Alter est, si Deus per seipsum immediate faciat voluntatem necessario velle, non per aliquid prævium distinctum ab ipso velle, sed per actionem ipsam imbibitam in ipso velle, quæ, ut est a Deo, habet rationem auxilii, seu concursus simultanei cooperantis cum ipsa voluntate. Ultra hos autem duos modos non potest alius cogitari, quia, præter antecedentem et comitantem motionem, solum potest dari aliqua motio subsequens ad operationem voluntatis; hæc autem, sive subsequatur tempore, sive tantum natura, non datur propter actum quem supponit, sed propter alium posteriorem effectum; quia talis motio subsequens jam supponit actum factum, et consequenter etiam supponit illum libere factum, si nulla alia mutatio præcesserit, quæ voluntatem necessitaverit. Ergo per motionem subsequentem non potest voluntas necessitari ad productionem sui actus. Dico autem *ad productionem*, quia licet actus libere sit productus, poterit per subsequentem motionem voluntas necessitari ad perseverandum in tali actu; tamen jam illa motio erit præcedens vel concomitans ad ipsam continuationem actus, et ita necessitas nunquam nisi ex antecedente vel comitante mutatione provenire potest. Utrumque autem modum istorum impugnavimus pro contraria sententia argumentando. Scotus vero in 4, distinct. 49, quæst. 6, § *Dico ergo*, significat priorem modum necessitandi voluntatem per aliquid illi impressum, quod non subdatur in usu potestati voluntatis, esse contra libertatem

ejus, *quia ipsa (inquit) non esset voluntas, nisi esset causa prior respectu habitus sui, et ita nata uti suo habitu, et determinare illum, etc.* Alterum autem modum admittit esse possibilem, *quia non est contra naturam potentiæ liberæ, quod impediatur ab actione, vel determinetur a causa priori se, cujusmodi est voluntas divina.* Nos autem credimus utrumque modum esse Deo possibilem, quia neuter sufficienter ostenditur impossibilis, quod satis est ut dicamus per divinam omnipotentiam fieri posse.

2. *Prima assertio.* — Primo ergo dicimus probabile esse posse Deum imprimere aliquid voluntati distinctum realiter ab actu volendi, necessitans illam ad volendum objectum, etiamsi, per iudicium rationis, ut ex se indifferens propositum sit. Hanc conclusionem in re ipsa (ut nobis videtur) admittunt auctores prioris sententiæ, capite superiori tractatæ, licet verbum necessitandi catholice negent. Fatentur enim posse Deum imprimere talem motionem præviam voluntati, quæ illius potestati non subjaceat, quantum ad usum, sed potius illam sibi subjiciat, et obsequentem faciat, ita ut non possit voluntas illi impressioni resistere, nec se continere quin velit, stante tali impressione, seu prævia motione; et nihilominus negant hanc esse necessitatem (ut sic rem explicem) voluntatis, sed vocant illam prædeterminationem. Nos tamen inter hæc duo nescimus distinguere, quod infra in lib. 3 et 5 late tractandum est, et ideo dicimus auctores illos in re ipsa admittere quod in hac conclusione nos intendimus, nimirum, possibilem esse præmotionem illam, licet in assertionem quoad verbum necessitandi non consentiant. Alii præterea doctores, qui negant dari de facto talem prædeterminationem, non negant esse possibilem, sed solum de facto dari, quia necessitaret voluntatem, quos nunc in librum quintum remitto. Probatur autem assertio, quia nulla apparet contradictio in hoc quod Deus imprimat voluntati aliquam entitatem, effectricem actus ejusdem voluntatis cum tam intrinseca et naturali determinatione ad exercitium actus, ut ei obsistere non possit voluntas; quæ est enim hæc repugnantia?

3. *Triplex excogitata repugnantia.* — *Solutio primæ difficultatis.* — Triplex certe tantum potest cogitari. Prima sit de genere vel specie talis entitatis, quia non apparet qualis esse possit; aut enim est pura motio, aut est qualitas; primum non est intelligibile, secundum autem videtur repugnare, quia talis

qualitas erit solum actus primus, et ita de se erit separabilis ab actu secundo, et consequenter non inferet necessitatem voluntati. Sed hæc difficultas facile solvitur; omïssa enim sententia dicentium esse posse puram motionem, quam infra lib. 3 reprobabimus, dicimus illam futuram esse qualitatem, et per modum actus primi, cum fiat a solo Deo, ut supponitur, et detur ad efficiendum actum secundum cum voluntate. Negatur autem inde necessario sequi esse separabilem ab actu secundo, quia ponitur esse determinata ad agendum ex intrinseca et efficacissima inclinatione, et ideo non separatur ab actu secundo, saltem positis omnibus requisitis ad agendum, ut jam explico.

4. *Secunda difficultas.*—Secunda difficultas esse potest, quia talis qualitas nec permanens esse potest natura sua, nec transiens, et ita nullo modo videtur possibilis, quia inter illa duo membra nullum est medium, opponuntur enim per immediatam contradictionem: voco enim qualitatem permanentem quæ sine actuali operatione perseverare potest in actu primo; transeuntem autem quæ solum, dum operatur, durat. Probatur ergo prior pars antecedentis, quia si illa sit qualitas permanens, non differet ab habitu, qui circa idem objectum et eundem actum versetur, quia erit qualitas de se permanens per modum actus primi, ac subinde difficile mobilis, sicut habitus definiri solet, et sumet speciem suam ab eodem actu et objecto; nihil ergo differet ab habitu; repugnat autem habitum necessitare voluntatem ad agendum; ergo e contrario repugnat talem qualitatem esse habitum; ergo et esse qualitatem permanentem. Altera pars probatur, quia illa qualitas, si detur, erit spiritualis, et non consistit in actuali operatione, nec pendet ab influxu potentie creatæ; ergo esse debet natura sua permanens: nam dependentia a sola voluntate Dei non obstat, quia omnes res permanentes illam dependentiam a Deo habent.

5. *Enodatur secunda difficultas.*—Sed hæc etiam difficultas non cogit. Nam imprimis defendi facile potest qualitatem illam posse esse permanentem aliquo modo, quia solum ponitur ut necessitet voluntatem, positus omnibus requisitis ad agendum, et ideo licet non possit separari ab actuali operatione, durante illa suppositione omnium prerequisitorum ad agendum, nihilominus esse poterit talis natura; ut per everet in potentia, quamvis auferatur, verbi gratia, objectum vel concursus Dei

simultaneus, et ideo ab actuali operatione cesset. In hoc enim nulla involvitur repugnantia, quia cum illa qualitas detur tanquam principium operationis, ab illa non pendet, per se loquendo, et alioqui quælibet qualitas, quamvis ab intrinseco determinata ad necessario agendum, potest cessare ab operatione ex defectu alicujus conditionis requisitæ, et nihilominus in suo esse perseverare, sicut patet in luce solis, imo et in lumine gloriæ, vel charitate patriæ, quæ omnino determinantur ad suos actus, et ex natura rei necessario illos eliciunt, et quasi necessitant potentias, ut secum illos coëfficiant; et nihilominus, si Deus negaret eis concursum ad efficiendum, cessarent ab operatione, et non propterea statim esse desinerent ex natura rei, et per locum intrinsecum, ut sic dicam. Ad hunc igitur modum potest illa qualitas esse permanens, et quasi habitus; distingueretur autem a propriis habitibus, qui nunc acquiruntur, vel infunduntur, in modo operandi et trahendi voluntatem, qui modus ad diversitatem essentialem et quasi genericam inter illas qualitates sufficit. Adde etiam alteram partem esse probabilem, quod sit illa qualitas natura transiens, id est, ex natura sua non postulans conservari in esse, nisi quamdiu potest operari, ad modum impetus lapidi impressi: quia licet in qualitate spirituali non tam facile hoc intelligatur, non tamen in eo apparet aperta repugnantia, propter quam dicamus non posse a Deo fieri qualitatem talis naturæ, ut sit veluti instrumentum conjunctum divinæ virtuti ad necessitandam voluntatem, quæ natura sua non postulet durare, nisi quamdiu ad illum effectum deservit.

6. *Tertia difficultas.*—Tertia difficultas est, quia per hanc qualitatem superadditam voluntati non minuitur in aliquo intrinseco potestas voluntatis; ergo non potest per illam auferri potestas et dominium voluntatis ad influendum in talem actum; ergo, quantumvis illa qualitas sit naturaliter determinata ad efficiendum talem actum, poterit voluntas non cooperari illi, et sua potestate uti ad suspendendum actum, ac subinde non privabitur sua libertate per talem qualitatem. Declaratur exemplo et confirmatur hæc ratio: nam inde theologo ostendunt, per multiplicationem peccatorum nunquam posse voluntatem privari potestate et libertate ad non consentiendum simulibus peccatis, quia peccata multiplicata non minuunt intrinsecam potentiam voluntatis per subtractionem (ut sic dicam) facultatis,

vel alienjus partis ejus, sed solum per additionem impediendi vel inclinationis. Ita ergo, in præsentia, argumentamur qualitatem creatam inditam voluntati non posse illam omnino privare libertate ad aliquem actum, quia non minuit illius potentiam, aliquid illi detrahendo, sed ad summum addendo inclinationem ad talem actum; tamen quia sub illa semper manet integra potestas voluntatis, semper etiam poterit suum influxum continere. Secundo confirmatur, quia actus qui fit a voluntate post inditam sibi talem qualitatem, est ejusdem rationis cum actu qui circa idem objectum fieri posset ab eadem voluntate, sine tali qualitate; ergo influxus voluntatis in ipsum est etiam ejusdem rationis; ergo non minus cadit sub dominium voluntatis; ergo cooperatio illius qualitatis non potest privare voluntatem usu libertatis suæ circa talem actum. Denique voluntas a solo Deo immutari potest in suo connaturali modo operandi; nam, quia a solo Deo creari potest, ideo illi soli subicitur in immediata transmutatione sua, ut sæpe divus Thomas repetit; ergo non potest qualitas creata immutare naturalem modum agendi voluntatis.

7. *Principium solutionis.* — Hæc quidem non earent probabilitate; nihilominus non satis ostendunt repugnantiam; quod satis est ut non facile asseramus divinam omnipotentiam non extendi ad imprimendam qualitatem voluntati, quæ illam sibi subiciat (ut sic dicam) in agendo, eamque secum rapiat ad determinatam actionem necessario exercendam, positis aliis requisitis, ex parte intellectus, et ex parte concursus divini, necessariis ad agendum. Potestque hoc in hunc modum declarari, quia virtus voluntatis ad sustinendum suum actum finita est; ergo potest vinci per contrariam virtutem efficaciorē, et trahi necessario ad consensum, non per diminutionem facultatis voluntatis in se spectatæ, sed per majorem efficaciam, sicut gravitas lapidis vincitur ab impetu, quando sursum projicitur, licet gravitas ipsa in se non minuatur. Non est autem cur repugnet qualitatem creatam participare hanc majorem vim supra voluntatem, cum vis ipsius voluntatis finita sit, ut dixi: nam cum tota essentia et perfectio creatæ voluntatis finita sit, omnem etiam ejus proprietatem et efficaciam finitam esse necesse est. Deus autem infinitis modis potest qualitatem imprimere voluntati, et illam efficere alterius rationis ab omni habitu, et a modo agendi voluntatis, et cum majori

ac majori efficacia in infinitum: non apparet ergo repugnantia quominus possit efficere qualitatem necessitantem voluntatem.

8. *Tertia difficultas solvitur.* — Et ita non procedunt objectiones in contrarium factæ. Ad primam enim negatur consequentia, quia licet tota potentia voluntatis in se maneat integra, tamen sub illa qualitate manet quasi ligata omnis alia potestas non agendi, vel agendi aliud impossibile cum effectu illius qualitatis, quia per illam superatur voluntas, et necessario ad secum cooperandum trahitur. Ad primam confirmationem negatur similitudo exempli, nam per multiplicationem peccatorum solum potest acquiri habitus in ipsa voluntate, qui semper subditur potestati ejus, etiamsi in infinitum augeatur, quia hæc est natura habitus; proportionatur enim actibus liberis, a quibus causatur, vel propter quos datur; secus vero esset de illa qualitate, quia ponitur esse alterius naturæ longe diversæ, et subdens sibi voluntatem in agendo. Unde ad secundam confirmationem respondetur actum ipsum, prout est qualitas quædam, esse posse ejusdem rationis, factum libere a sola voluntate, vel factum necessario ab eadem voluntate tali qualitate affecta: nihilominus tamen necessarium esse ut actio ipsa ad talem qualitatem sit distincta, sive specie, sive numero (hoc enim nunc non refert), quia dicit intrinsecam habitudinem ad diversum principium, quæ diversitas intelligi non potest sine distinctione in re inter ipsas actiones. Hæc ergo distinctio sufficit ut influxus voluntatis in una sit liber, et in altera necessarius, ut mox in simili explicabo. Ad ultimum respondetur voluntatem effective solum immutari a Deo, vel a seipsa, et hoc est quod divus Thomas et theologi docent; formaliter autem immutari potest a qualitatibus creatis illi immissis, et hoc modo immutari potest in modo agendi ab illa qualitate, et tunc etiam effective a solo Deo immutatur, quia solus Deus illam qualitatem imprimit. Ita ergo fit satis probabilis assertio posita. Obiter tamen adverto difficultates positas eodem modo procedere in qualitate seu motione prædeterminante, atque in necessitante, quia motio prædeterminans physice etiam extrahit voluntatem a sua naturali indifferentia: et ideo qui prædictis rationibus in eam sententiam ducitur, ut existimet non posse necessitari voluntatem per inhærentem qualitatem, profecto idem dicere cogetur de qualitate vel motione prædeterminante. Præsertim cum inter illa

duo distinguere difficillimum sit, ut postea videbimus.

9. *Secunda assertio.—Ratio conclusionis.*—Dico secundo : Deus etiam potest immediate per seipsum necessitare voluntatem ex parte ipsius potentiæ, nulla facta mutatione ex parte iudicii seu objecti, nec in aliis conditionibus physice vel moraliter requisitis ad libere volendum. Hæc assertio sumi potest ex divo Thoma, dicta quæstione vigesima-secunda, de Veritat., articulo octavo, quatenus ibi ait posse Deum immutare voluntatem ab una inclinatione actuali in aliam, vel per formam præviam voluntati inditam, vel per seipsum. Nam, ut dixi, cum absolute et sine restrictione de immutatione loquatur, recte potest intelligi de omni modo mutationis, sive liberæ, seu necessariæ. Et ita potest idem confirmari ex illo Proverb. vigesimo-primo : *Cor Regis in manu Dei est, et quocumque voluerit, tertet illud.* Quod testimonium ibi citat divus Thomas in argumento primo, et juxta doctrinam articuli illud exponit. Nam etiam illa verba Sapientis sunt absoluta, et sine limitatione sunt intelligenda, de quocumque modo quo Deus voluerit mutare voluntatem. Et sic etiam induci possunt quæ de omnipotentia Dei in voluntate immutanda tradit Augustin. in Enchirid., cap. nonagesimo-quinto usque ad nonagesimum-nonum. Ratio vero sufficiens illa est, quia quidquid Deus operatur per causas secundas, potest se solo operari, quod in genere efficientis causæ est in universum verum; sed dictum est posse Deum necessitare voluntatem media qualitate creata : ergo etiam sine illa poterit id facere sua efficacissima virtute increata. Probatur consequentia, quia licet in hoc sit diversitas, quod illa qualitas informet voluntatem, et consequenter determinet illam intrinsece in actu primo, quod non potest per seipsum facere vel supplere Deus, nihilominus illa informatio non est per se necessaria ad necessitatem actus secundi, quia talis necessitas provenit ab illa qualitate effective tantum, non formaliter. Et confirmatur ac declaratur : nam in qualitate creata duo intelligimus, scilicet, informare voluntatem et efficere actum tanto pondere et efficacia, ut secum ferat voluntatem : ex quibus illud primum non potest a Deo suppleri, hoc autem poterit potest efficacius fieri : voluntas autem per se non necessitatur ex primo, sed ex secundo ; necessitatur enim in ipsa actuali efficientia : hanc autem efficacius potest Deus per seipsum præstare quam per qualitatem :

ergo si per qualitatem impressam potest necessitare voluntatem, multo magis per seipsum.

10. *Secundæ assertionis probabilitas.*—Unde possumus ulterius addere quod, licet esset impossibilis qualitas inferens voluntati necessitatem, nihilominus Deus per suam voluntatem posset immediate illam inferre ; tum quia multa potest Deus facere in creatura per seipsum, quæ fortasse non potest facere per qualitatem creatam, vel per creaturam ; ut potest per se facere unionem hypostaticam, et gratiam habitualem, et fortasse non per creaturam, et (quod verisimilius est) saltem non potest facere qualitatem quæ habeat vim connaturalem ad similes effectus. Sicut etiam verisimile est posse Deum elevare immediate per seipsum creaturam, ut sit instrumentum creationis, et tamen non potest facere qualitatem, cui hoc sit connaturale. Sic ergo, licet admitteremus non posse dari qualitatem creatam inditam voluntati, quæ illam per vim sibi connaturalem sibi subjiciat, et privet sua libertate in agendo, nihilominus non esset neganda hæc efficacia divinæ voluntatis per seipsam, quia efficacia divinæ voluntatis longe altior est, nam est infinita simpliciter, et habet naturale dominium supremum in ipsam hominis voluntatem, et habet absolutam omnipotentiam ad omne id quod non repugnat, et in hoc nulla apparet repugnantia. Quia non minus subjicitur voluntas nostra voluntati divinæ, quam membra nostri corporis nostræ voluntati subduntur ; sed voluntas nostra habet efficaciam movendi ex necessitate manum quo vult, etiamsi nihil prævium in illam imprimat : ergo idem potest facere Deus per efficacem voluntatem suam circa hominis voluntatem. Item potest elevare creaturam seu creatam potentiam ad agendum aliquid supernaturale, nihil prævium illi imprimendo, sed tantum supernaturalem concursum simultaneum illi tribuendo, ut in materia de Sacramentis et de Incarnatione late dixi, et infra libr. 3 dicam : ergo eodem modo potest necessitare voluntatem, faciendo immediate ut modo præternaturali operetur.

11. *Duo hic habes.—Unum certum.—Alterum dubium.*—Sed difficultas est in explicando modo quo Deus potest hoc facere. In quo unum est certum, scilicet, necessarium esse ut Deus, efficaci et absoluta voluntate, excludente omnem conditionem contingentem ex parte voluntatis humane et antecedentem ad con-

sensum hominis, velit facere ut homo hic et nunc, et circa objectum sic propositum consentiat, seu talem actum voluntatis eliciat. Nullum enim aliud decretum voluntatis Dei potest habere efficaciam necessitandi voluntatem creatam, quia per nullum aliud applicat Deus omnipotentiam suam simpliciter et absolute ad operandum: ideoque de huiusmodi tantum decreto intelligunt theologi locutiones illas sacræ Scripturæ: *Nemo est qui possit resistere voluntati tuæ. Omnia quæcumque voluit Dominus, fecit. Operatur omnia secundum consilium voluntatis suæ*, et similes. Dubium vero est an hoc decretum, ut necessitet voluntatem, aliquid in illa efficiat, quod non efficit quando cum illa libere operante concurrit. Ratio dubitandi est, quia non potest intelligi quid aliud efficiat; supponimus enim nihil prævium efficere: ergo nihil facit nisi actum ipsum volendi; et non facit illum Deus solus (ut contra Nominales supponimus); ergo facit illum cooperando simultanee cum voluntate: at hoc ipsum facit, cum concurrit ad liberum actum voluntatis: neque etiam ipsi actus sunt diversi, quia actus liber et necessarius non sunt per se distincti in entitate, sed solum per denominationem a potentia: ergo in tali efficientia nihil diversum ex parte actus potest intelligi. In contrarium vero est, quia immutatio illa voluntatis humanæ in modo agendi est aliquis effectus ad extra: ergo non potest intelligi quod per divinam voluntatem fiat, quin aliquid ad extra operetur: at vero si in voluntate creata nihil diversum fit ab eo quod libere operando facit, nihil fit ad extra ex vi illius specialis voluntatis Dei, quod sine illa non fiat: ergo non potest per illam modus naturalis operandi voluntatis immutari: ergo nec potest voluntas humana per solam illam voluntatem divinam necessitari.

12. *Aliorum placitum de decreto conditionato et absoluto.* — In hoc puncto aliqui dicunt Deum duplici decreto voluntatis suæ posse concurrere cum humana voluntate ad agendum, scilicet per decretum concurrenti includens conditionem, si voluntas humana non resistat, seu si suum influxum adjuvat, vel per decretum omnino absolutum, quo vult absolute hominem in tali occasione consentire: et primum decretum dicunt sufficere ad liberam actionem nostræ voluntatis, quod etiam nos ut verum supponimus. De secundo vero, aiunt sufficere ut eo ipso nostram voluntatem necessitet, etiamsi per illud non aliter cum illa Deus concurret ad extra quam per

prius decretum, fere propter rationes factas. Quia actus liber et necessarius non necessario distinguuntur in sua entitate, vel modo reali intrinseco, ut patet in motu subito voluntatis, qui per solam advertentiam rationis fit liber: ergo similiter, ut noster actus sit necessarius, sufficet ut diverso modo a divina voluntate procedat: ergo, sine diversa mutatione physica in nostra voluntate, per solam mutationem moralem poterit per divinam necessitari, quia actus necessarius et liber non physice sed moraliter differunt. Secundo, quia actio facta in utroque casu a nostra voluntate est ab eodem principio, scilicet, voluntate nostra, Deo coagente, et tendit in idem objectum, ut supponimus, et in eundem terminum intrinsecum, qui est actus ipse, ut est qualitas quædam: ergo est una et eadem actio physice spectata, quia actiones non possunt distingui, nisi ex aliquo istorum principiorum: ergo nihil physice distinctum potest ibi inveniri ex parte Dei. Tertio, postquam voluntas libere elicit actum, potest necessitari ad perseverandum in illo, per solam voluntatem Dei absolutam, qua decernat non suspendere illum concursum, et suspendere omnem alium ad quemcumque actum, quo voluntas possit reniti: ergo tunc idem actus libere elicitus continuabitur necessario sine mutatione physica in voluntate facta; ergo idem posset ab initio fieri. Quarto, possumus hoc confirmare exemplo supra posito; nam potentiæ animæ nostræ natura sua subordinatæ voluntati, et non impeditæ, si voluntas nostra absolute velit, efficaciter ac necessario applicantur ad opus, non quia voluntas in illis vel in actionibus earum faciat aliquid distinctum ab his quæ naturaliter ab ipsis fieri possunt, sed tantum propter subordinationem et naturalem sympathiam inter ipsas: sed magis subordinatur nostra voluntas divinæ, magisque illi volenti obedit: ergo propter hanc solam subordinationem voluntas nostra necessario prodibit in actum, volente Deo efficaciter, etiamsi nihil novum et reale in nostra voluntate vel in ejus actione fiat.

13. *Refellitur.* — *Duplex decretum efficax distinguitur.* — Hanc vero sententiam censeo falsam et impossibilem. Et imprimis distinguere soleo in divina voluntate duplex decretum efficax: unum per modum intentionis tantum, seu interni propositi, nihil per se ipsum et immediate ad extra operans, quam voco internam prædefinitionem Dei; aliud per modum usus seu executionis, quia per illud

efficaciter Deus ad extra operatur quod vult, et immediate, quantum est ex parte voluntatis. Quam distinctionem aliqui ex modernis impugnare tentarunt, sed incassum et sine efficacia, ut in libro § iterum dicam. Loquendo ergo de primo decreto absoluto voluntatis Dei, certissimum mihi est non satis esse, ut actus voluntatis necessario fiat a nobis, quod a tali decreto procedat ex parte Dei; nam multi actus nostræ voluntatis sic prædefiniti a Deo fiunt a nobis libere et meritorie, ut capite sequenti attingam, et latius in lib. § dicam. Ergo solum illud decretum per se non sufficit ad necessitandam nostram voluntatem. Et ratio clara est, quia illud decretum per se non influit in nostram voluntatem, ut supponimus, sed ex vi illius Deus applicat media congruentia, ut nostra voluntas infallibiliter velit, et suum decretum impleatur, quod potest fieri absque necessitate voluntatis humanæ; ergo ex vi illius decreti non necessitatur voluntas. Ut ergo illa sententia aliquam speciem probabilitatis habeat, necesse est ut de posteriori decreto loquatur.

14. *Humana voluntas non mutatur solum extrinseca denominatione Dei.*—Verumtamen, etiam loquendo de potestate Dei absoluta, dico non posse voluntatem divinam necessitare humanam per solam extrinsecam denominationem, ac propterea necessarium esse ut aliquo reali vel physico modo Deus immutet voluntatem creatam, vel actionem ejus, ut faciat illam cum necessitate operari. Probatur primo a posteriori, quia si denominatio extrinseca sufficeret, quælibet prædefinitio Dei sufficeret ad necessitandam voluntatem humanam: consequens autem non est probabile nec verisimile, ut in lib. de Auxil. late dixi, et in lib. § iterum dicam: ergo nulla denominatio tantum extrinseca a divina voluntate absoluta sufficit ad illum effectum necessitandi voluntatem, nisi physica efficientia voluntatis divinæ in humanam intercedat. Major probatur, quia quælibet voluntas absoluta, qua Deus vult et prædefinit ut voluntas humana consentiat aut velit aliquid, denominat actum voluntatis humanæ absolute et efficaciter volitum a Deo, et infallibiliter futurum ex vi illius voluntatis divinæ: ergo si nulla alia efficientia necessaria est, omnis hujusmodi prædefinitio divina infert humanæ voluntati necessitatem, et tollit ejus libertatem.

15. *Argumentum a priori.*—Præterea probatur a priori, primo, quia actus nostræ voluntatis immediate denominatur liber per res-

pectum ad ipsam voluntatem hominis, ut est in proxima potentia volendi et non volendi, cum illa elicit actum: ergo quamdiu voluntas hominis elicit actum, habens utramque potestatem, seu utramque partem suæ potestatis agendi et non agendi expeditam, et proxime applicatam ad opus, actio ex illa manans non potest non esse libera, quia non potest non habere eundem respectum et eandem denominationem a tali potestate. At vero per solam voluntatem Dei extrinsecam, et nullum alium influxum tribuentem homini ad suam operationem præter illum quem ad libere operandum præbere solet, non mutatur nec impeditur potestas voluntatis nostræ, quantum ad illam utramque partem agendi et non agendi: ergo nec mutari potest denominatio actionis ex libera in necessariam. Ergo nunquam potest actio voluntatis humanæ esse necessaria, et non libera in se, propter solam denominationem extrinsecam ab actu voluntatis divinæ: ergo ut voluntas efficax Dei necessitet humanam, non satis est quod illam denominet volitam, sed necesse est ut aliquid ad extra efficiat in ipsam voluntatem.

16. *Excogitata responsio. — Instantia.*—Responderi potest voluntatem quidem divinam non necessitare creatam, nisi efficiendo in illam, non tamen efficere aliud quam ipsummet actum volendi ejus, neque efficere illum nisi per eundem concursum per quem efficit actum liberum, sed in hoc solum differre quod, per voluntatem absolutam et efficacem Dei, vehementius et immutabilius imprimatur voluntati humanæ ille concursus divinus, quam per ordinariam voluntatem qua Deus vult concurrere cum voluntate, quasi indifferenter et relinquendo illam ut libere cooperetur. Sed contra hoc insto, quia hoc totum non excedit denominationem extrinsecam, et ideo satis esse non potest vel ad necessitandam voluntatem, vel ad efficiendum ut ille concursus immutabilius vel firmiter voluntati imprimatur.

17. *Instantia probatur et explicatur.*—Probatur, quia si concursus Dei in sua entitate et modo intrinseco est omnino idem, quando procedit a voluntate absoluta seu determinata Dei, et quando a conditionata seu indifferente, ergo quod procedat ab hac vel illa voluntate, tantum est denominatio extrinseca respectu talis concursus; ergo per illam solam non potest vel firmiter adherere, vel fieri immutabilior. Secundo, id amplius explicatur, quia concursus Dei non potest firmiter vel immuta-

bilior fieri, nisi in quantum voluntas creata privatur potestate suspendendi suum influxum; sed hac potestate non potest privari per solam extrinsecam voluntatem Dei sine alio impedimento; ergo nec per concursum eundem, solum quia procedit a voluntate efficaci Dei. Major clara est; nam concursus qui nunc offertur vel datur nobis ad libere volendum, ideo dicitur indifferens vel mutabilis, stante eadem voluntate Dei, quia in nostra potestate est non adhibere nostrum concursum, sine quo divinus ille concursus nunquam potest in re ipsa poni: ergo non potest aliter fieri immutabilis ex parte hominis, vel omnino determinatus quoad exercitium, nisi privando voluntatem hominis potestate continendi suum influxum, vel (quod proinde est) impediendo illam ne tali potestate uti valeat: nam si voluntas hac facultate utatur, consequenter cessabit concursus Dei; ergo quamdiu voluntas potuerit suspendere concursum suum, non potest concursus Dei firmari (ut sic dicam) per solam voluntatem Dei. Minor autem probatur eodem argumento, quia voluntas creata non potest privari illa potestate proxima suspendendi suum influxum per solam denominationem extrinsecam voluntatis Dei; ibi autem nullum aliud impedimentum illi ponitur, nisi talis extrinseca denominatio. Nam si concursus Dei ad extra illi datus, præcise et prout intrinsece potest existere in ipsa voluntate, consideretur, in potestate voluntatis est non adungere illi suum influxum, et consequenter impedire ne illum recipiat: ergo ex parte rei quam in se voluntas recipit, nunquam impeditur ne possit suum influxum continere: ergo impeditur per solam denominationem extrinsecam additam, quod perinde est, et æque apparet impossibile.

18. *Expositio a simili.*—*Cur causæ secundæ egent concursu Dei.*—Tertio, declaro a simili, quia ignis habens virtutem calefaciendi intrinsece sufficientem et non impeditam, et passo disposito applicatam, cum aliis conditionibus requisitis ad agendum, et habens ex parte Dei concursum sufficienter paratum in actu primo, non potest impediri et contineri ne calefaciat, per solam Dei voluntatem extrinsecam, quantumvis efficacem vel absolutam concipiatur, quia illa voluntas, nisi ad extra aliquid mutet, non potest naturalem proprietatem ignis immutare aut impedire. Unde omnes doctores dicunt, posito igne cum omnibus requisitis ad agendum, non posse Deum actionem ejus impedire, nisi suspendendo

suum concursum: et e contrario inde colligunt ignem, solem et alias causas indigere concursu Dei ad agendum, quia potest illas privare actionibus suis, etiam positis omnibus aliis prærequisitis ad agendum, quod tamen non posset facere nisi suo concursu aliæ causæ indigerent. Quod non est contra efficaciam divinæ voluntatis; non enim pertinet ad hanc efficaciam simul velle vel facere repugnantia quæ involverentur, si Deus vellet dare igni concursum, et nollet ut ageret. Igitur hæc efficacia est virtualiter transiens, et ideo non convenit actui immanenti, ut pure immanens est, si nihil ad extra operatur juxta exigentiam effectus, ideoque si Deus absoluta voluntate vult ignem non agere, id efficaciter perficit, nolendo etiam absolute dare igni concursum necessarium ad agendum, vel aliud ex prærequisitis auferendo, vel aliquod aliud impedimentum apponendo, neque aliter intelligi potest efficacia talis voluntatis.

19. *Similia applicantur.*—*Implicatio.*—Sic igitur in nostro casu, cum voluntas humana, positis omnibus requisitis ad agendum, et habens ex parte Dei paratum concursum ad operandum, sit potens ad non agendum, non potest hac potestate privari seu impediri per solam extrinsecam voluntatem, quæ nihil amplius ponat, aut tollat ab ipsa hominis voluntate. Unde etiam repugnantiam involvit, quod Deus per suam voluntatem simul velit dare voluntati creatæ illum tantum concursum, cui ipsa potest ex innata facultate non cooperari, et consequenter impedire ne talis concursus ad extra fiat; et nihilominus simul Deus efficaciter velit ut eadem voluntas creata non possit in eo momento concursum suum suspendere, nullo alio impedimento in ipsa posito, neque aliter illam immutando. Et declaratur, quia si consideremus in Deo nunc duas voluntates, unam, qua vult offerre voluntati creatæ concursum ad volendum tale objectum si velit, et aliam absolutam, qua velit ut voluntas eadem creata non possit suspendere talem actum, vel ut infallibiliter æ necessario ex vi talis decreti non suspendat suum influxum, plane inveniemus non minus esse repugnantem quam illas quas circa concursum et carentiam actionis ignis explicuimus: perinde autem est dicere quod Deus velit necessitare voluntatem per solum concursum, cui potest voluntas creata vi sua naturali, qua non privatur, non adungere influxum suum. Declaratur tandem, quia voluntas humana, ad continendum suum in-

fluxum ne actio sequatur, non indiget concursu Dei, quia illud non est agere, sed non agere: suppono enim ad suspendendum actionem non esse necessarium ut voluntas positivo actu velit non agere, sed satis esse suspensionem actus voluntariam interpretative, ut communiter theologi docent: ergo non potest per solam Dei voluntatem extrinsecam impediri ne suspendat suum actum circa objectum de se indifferens; sicut ignis, si non indigeret concursu Dei ad agendum, non posset impediri ab agendo per solam voluntatem Dei extrinsecam, ut dixi: ergo sicut in igne est necessaria ablatio concursus ut privetur actione, positis cæteris prærequisitis, ita, e contrario, ut voluntas privetur libera suspensione actus, necesse est ut in se aliquam actionem vel concursum Dei recipiat, cui non possit resistere, nec cum illa suum influxum continere.

20. *Vera resolutio.* — *Voluntas necessitatur a Deo concursu alterius rationis.* — Dico ergo: quando Deus, efficaci et absoluta voluntate exequente et operante ab extra, vult hominis voluntatem velle objectum alias indifferenter propositum, efficere illum actum voluntatis humanæ quodam speciali concursu, alterius rationis et naturæ ab ordinario concursu simultaneo, in quo efficacius Deus applicat suam virtutem activam, et independentem (ut sic dicam) a libertate voluntatis creatæ. Quod a posteriori est signum evidens alicujus discriminis in re ipsa inter utrumque concursum: nam unus est talis ut voluntas per innatam libertatem possit illi non cooperari, alter vero talis est ut minime possit voluntas per innatam libertatem illi resistere. Sine hac enim diversitate non potest intelligi quod per unum necessitetur voluntas, et non per alium, ut probatum est, quia sola habitudo ad actus voluntatis ratione distinctos non potest sufficere, ut probatum est. Et potest de novo confirmari, quia vel habitudines ex parte ipsorum concursuum sunt reales, et in re ipsa diversæ, vel tantum sunt habitudines rationis aut extrinsecæ denominationes. Si primum detur, id est quod intendimus; si autem dicatur secundum, procedunt omnia dicta, quia id non satis est ad effectum physicum adeo diversum, qualis est privare voluntatem creatam dominio in suum actum et proxima potestate suspendendi influxum suum. Aliunde vero nulla est repugnantia nec difficultas in intelligenda distinctione talium concursuum, ut respondendo ad contraria argumenta patebit.

21. *Ad primum argumentum in numero duodecimo, respondetur.* — Ad primum respondetur duobus modis posse contingere actum, de se aptum fieri libere, fieri necessario; uno modo ab intrinseco, ex naturali modo operandi, nulla impressione facta ab extrinseco in ejus voluntate, sed ex intrinseca dispositione, vel indispositione prævia hominis operantis: alio modo stante eadem dispositione prævia de se sufficiente ad actum liberum, sed extrinseco agente necessitante. Inter quos modos est aliqua convenientia et aliqua differentia. Convenientia est, quod in utroque modo non potest actus liber transire in necessarium, vel e contrario, sine aliqua physica mutatione in ipso homine facta. Differentia vero est, quia, in priori modo necessitatis ab intrinseco, mutatio illa sufficienter fit ex parte intellectus; in posteriori autem modo oportet fieri in ipsa voluntate vel in actione ejus; et ideo, respectu voluntatis, actus liber et necessarius ab intrinseco possunt differre solum moraliter, quamvis ex parte intellectus supponant diversitatem physicam: actus autem liber et ab extrinseco tantum necessarius in seipsis differre debent, non tantum moraliter, sed etiam physice, saltem quoad actiones per quas fiunt.

22. *Doctrina responsi declaratur.* — Declaro singula, eorumque rationem reddo. Nam actus voluntatis nunquam est necessarius quoad exercitium, nisi quia voluntas privatur potentia proxima suspendendi influxum suum, vel (quod perinde est) impeditur omnino ne illa uti valeat. Hoc autem impedimentum, quando est ab intrinseco, non est nisi ex parte intellectus: nam si ratio sufficienter vigilet et proponat objectum, ex parte voluntatis non potest inveniri intrinsecum impedimentum, quod illam privet dominio sui actus, cum semper maneat integra virtus ejus, et objectum ejus supponatur illi sufficienter applicatum. Ergo ille diversus modus operandi, quando est ab intrinseco, ex diversa dispositione intellectus nascitur: ergo in intellectu necessario debet præcedere mutatio physica, quia major vel minor advertentia rationis, seu clarior vel obscurior cognitio non fit sine mutatione physica intellectus. Hæc autem mutatio in intellectu facta sufficit ut facultas voluntatis ad suspendendum actum suum sit expedita, vel impedita, et ideo, sine mutatione physica ex parte ipsius voluntatis, potest actus ex necessario fieri liber, et e converso, per solam moralem mutationem ex parte objecti provenientem. Patet hoc in exemplo posito de

motu subito voluntatis, qui necessario fit, et nunquam fiet liber, si ratio in eadem actuali dispositione duret; cum autem attendit, actus incipit esse liber sine mutatione physica in voluntate facta. Et ratio est, quia sicut voluntas non habet proximam potestatem operandi, nisi supposita cognitione objecti, ita non habet potestatem moralem et proximam suspendendi actum, nisi circa objectum sufficienter propositum, ut circa illud operetur, si velit; ideoque quamdiu in ratione deest huiusmodi advertentia, deest etiam in voluntate potestas suspendendi actum, et ideo actus fit necessario: posita autem advertentia, completur potestas proxima suspendendi actum; et ideo si homo illa non utatur, sed in actione perseveret, jam libere perseverat, sine mutatione physica in voluntate. Aliud exemplum clarum est in homine viatore eliciente libere amorem Dei ex charitate: nam ille actus non potest fieri necessarius ab intrinseco, sine aliqua mutatione physica ipsius hominis; illa vero necessario est in intellectu, scilicet, ut cognitioni abstractivæ Dei clara visio succedat: quia sola visio privat voluntatem potestate suspendendi actum illum amoris, et ideo potest ille amor fieri necessarius sine alia physica mutatione voluntatis.

23. *Respondetur in forma ad primum.*—At vero quando homo ex parte intellectus semper manet in eadem dispositione actualis iudicii et considerationis, cum qua voluntas nata est libere operari, non potest voluntas privari potestate proxima suspendendi actum suum, nisi intercedat aliqua intrinseca mutatio et physica in ipso homine, quia illa potentia physica est et intrinseca, et non potest aliter impediri, ut probatum est: ergo nec potest ab extrinseco necessitari nisi per aliquam actionem vel mutationem physicam, quia non necessitatur, nisi quatenus dicta potestate proxima suspendendi actum privatur, ut etiam ostensum est. Cum ergo talis mutatio non fiat in intellectu, ut supponitur, necesse est ut in voluntate, vel in actione ejus fiat. Est ergo vera et necessaria differentia, juxta quam ad argumentum negatur antecedens, si universaliter sumatur de omni actione libera et necessaria, quod solum differant moraliter; si autem sumatur indefinite, negatur illatio, quia ex particularibus non recte fit: nec exemplum quod adducitur de motibus subitis est simile, ut jam explicatum est.

24. *Secundi argumenti solutio.*—Ad secundum respondetur, cum voluntas a Deo neces-

sitatur dicto modo, actionem esse distinctam ab illa qua voluntas libere agere sinitur. Et quamvis ad utramque actionem concurrant tantum voluntas et Deus, tamen Deus influit longe diverso modo, et per virtutem suam efficacius applicatam, quod satis est ad actionis diversitatem. Cum enim Deus eminentissimam virtutem agendi habeat, potest, ad eundem effectum in termino producendum, magis vel minus influere pro sua libertate, et hoc satis est ut varietur actio quam efficit cum causa secunda, etiamsi fortasse actus seu qualitas per tales actiones producta eadem sit. Non est enim dubium quin una et eadem res possit per varias actiones seu dependentias fieri, vel numero, vel specie distinctas, quod in præsentia non refert, quia satis nobis est quod in ipsa actione sit aliqua diversitas, qualiscumque illa sit.

25. *Ad tertium.*—Ad tertium, dicimus potius inde confirmari assertionem, quia si homo libere elicit actum, ex vi illius actualis efficientiæ non privatur potestate suspendendi suum influxum, et ideo, sicut libere incæpit, ita libere continuat actum pro quocumque vel minimo tempore, ut plures et meliores theologi sentiunt contra Gregorium, ponentem necessariam continuationem actus pro aliqua morula, cujus assertio sufficienter improbatur illa ratione, quod voluntas, in instanti quo elicit actum, habet potestatem natura priorem ad non eliciendum illum; eliciendo autem actum non privatur illa potestate secundum se et in sensu diviso, et ideo, immediate post, et semper, potest illum actum suspendere: semper ergo durat libere, quamdiu voluntas non privatur illa potestate; non potest autem privari illa potestate per solam voluntatem extrinsecam Dei, nisi per eam aliqua mutatio in voluntate creata fiat, ut ostensum est: ergo non potest Deus necessitare voluntatem ad continendum actum, nisi aliquo modo mutet ipsam actionem, seu dependentiam, qua cum voluntate illum actum conservat.

26. *Ad quartum.*—Ad quartum, sumptum a simili ex subordinatione potentiarum animæ ad motionem voluntatis, respondetur negando similitudinem: nam, licet efficacia voluntatis divinæ longe major sit quam humanæ, et subordinatio ac subjectio huius voluntatis ad illam major sit quam subjectio potentie motivæ ad ipsam voluntatem creatam, nihilominus modus subjectionis et naturalis proprietatis potentie subjectæ sunt longe diversa, et inde provenit ut modus etiam movendi seu determinandi potentiam subjectam sit

longe diversus. Nam imprimis potentiæ animæ, quæ per voluntatem applicantur ad exercitium actus (ut notius cernitur in potentia loco motiva in membris corporeis existente), non habent internam vim suspendendi actum suum, positis requisitis ad agendum; sed habent quamdam naturalem impotentiam inchoandi seu exercendi suam actionem, nisi per appetitum seu voluntatem applicantur; et ideo cum applicantur, non privantur aliquo usu alicujus potestatis naturalis, sed solum veluti complentur in conditione quam naturaliter prærequirunt, ut operentur; et ideo ex hac parte non indigent aliqua immutatione in connaturali modo agendi. Voluntas autem humana habet innatam potestatem ad suspendendum suum influxum, nec potest necessitari, nisi impediatur ne illa potestate uti valeat, et consequenter ex ea parte a connaturali modo agendi extrahatur, si alioqui, ex parte intellectus, sit sufficienter exposita voluntas ad usum illius facultatis, et ideo ex hac parte est necessaria mutatio aliqua physica in ipsa voluntate, vel modo actionis ejus, ut per divinam voluntatem necessitetur. Et tunc major efficacia divinæ voluntatis non in eo posita est quod, nihil speciale ad extra agendo in voluntate hominis, illam ad præternaturali modo operandum cogat, hoc enim repugnantiam involvit; sed in eo posita est quod ita potest in voluntate operari, ut modum operandi illi connaturalem immutet, quod non potest facere voluntas creata in potentiis sibi subjectis.

27. *Aliud discrimen similitudinis.*—Deinde est alia differentia, quod subordinatio potentiæ, verbi gratia, motivæ ad voluntatem non provenit ex virtute per se agendi unius potentiæ in aliam, sed ex radicatione talium potentiarum in eadem anima cum tali consensione earum inter se, sicut etiam excitatur voluntas ad intellectus cognitionem sine efficientia per se et physica intellectus in voluntatem, sed per sympathiam. At vero subordinatio voluntatis creatæ ad divinam fundatur in virtute per se activa voluntatis divinæ, quia ibi non intercedit radicatio in eadem essentia, et consequenter nec modus ille consensionis inter voluntatem divinam et humanam invenitur sine propria efficientia physica. Sicut etiam fieri non potest ut scientia increata Dei excitet voluntatem per modum illius sympathiæ, quod in Christo omnes theologi docent, quia licet scientia increata Christi, et voluntas creata ejus sint in eodem supposito, non sunt

nec radicanur in eadem essentia et natura, sine qua radicatione non potest intelligi ille modus motionis, quia in illa intrinsece fundatur. Idem ergo est de motione voluntatis creatæ per divinam; debet enim esse effectiva et per se, et sine illa efficientia, mutationem aliquam in modo connaturali operandi voluntatis creatæ per divinam voluntatem fieri, intelligi non potest.

28. *Solvitur fundamentalis ratio dubitandi.*—Tunc vero superest solvenda ratio dubitandi, qua præcipue moti sunt qui negarunt posse Deum immediate per seipsum necessitare voluntatem creatam, stante indifferentia judicii, quia nihil præcedit in voluntate creata a solo Deo, ut supponitur, unde solum relinquitur concursus simultaneus, qui non videtur sufficere, cum ille in actionibus etiam liberis reperiatur. Dico tamen in ipso concursu simultaneo posse diversos gradus et modos inveniri, quia in hoc nulla ostenditur repugnantia, ut ostendi, et consequenter potest dari aliquis concursus, seu aliquis modus actionis Dei, qui ex parte humanæ voluntatis requirat concomitantiam necessariam, id est, non subjectam potestati naturali quam eadem voluntas habet ad suspendendum suum influxum, qui concursus sit extraordinarius, et non debitus voluntati, sed potius sit repugnans naturali ejus conditioni. Unde alius concursus Dei esse potest requirens concomitantem influxum voluntatis potestati ejus subjectum. Et per priorem poterit necessitari voluntas, licet cum posteriori libere operetur. An vero idem dicendum sit de quolibet auxilio gratiæ adjuvantis seu concomitantis, in libro 3 videbimus.

CAPUT VI.

QUÆ NECESSITAS ANTECEDENS VEL CONSEQUENS, SEU IN SENSU COMPOSITO VEL DIVISO, REPUGNET LIBERTATI, AUT ILLI NON NOCEAT.

1. Vera hujus divisionis et terminorum ejus intelligentia est maxime necessaria ad concordiam gratiæ cum libertate explicandam, et cum his, quæ diximus, connexa est, facileque ex illis intelligi potest, et ideo est hoc loco præmittenda. Prius vero supponemus ea, in quibus conveniunt auctores; deinde punctum controversiæ expendemus.

2. *Prima suppositio omnibus admittenda, quæ habet duas partes.*—*Prior pars suppositi.*—Primo ergo videtur certum et ab omnibus

admittendum, aliquam necessitatem operandi aliquem effectum, et impotentiam faciendi simul alium post aliquam suppositionem, posse consistere cum libertate tam potentiæ quam actus ejus; aliquam vero aliam necessitatem etiam ex suppositione repugnare libertati vel usui ejus. Hæc veritas sumitur ex Augustino, Anselmo, D. Thoma, et aliis auctoribus statim referendis. Et prior ejus pars notissima est; nam præscientia divina, prædestinatio, et voluntas Dei ex necessitate, inferunt effectum liberum præscitum, prædestinatum, aut absolute a Deo volitum, ita ut impossibile sit effectum sic præscitum aut prædestinatum non evenire: et tamen illa suppositio non obstat quominus actus præscitus libere fiat. Imo ex illa suppositione æque infertur, libere futurum esse, ac futurum esse, quia præscitum est ac prædestinatum est libere fieri, ideoque ad veritatem scientiæ et efficaciam prædestinationis non minus necessarium est ut libere fiat, quam ut fiat; quæ est doctrina Anselmi lib. de Concor., c. 1 et 2, in principio; et vulgaris apud D. Thomam 1 p., quæst. 19, art. 8, quæst. 22, art. 4, et 1 cont. Gent., cap. 85, et sæpe alias. Item, posita absoluta intentione finis, sequitur necessario electio medii unici et necessarii, et nihilominus illa necessitas stat simul cum libertate, si intentio libera sit. Denique voluntas, in eo momento in quo actum elicit, libere operatur, et tamen, dum operatur unum, non potest contrarium simul operari, nec in eodem momento non operari, utrumque simul ponendo, quia hoc involvit repugnantiam, et quia res, quando est, necesse est esse, ut Aristoteles dixit, 1 Periher., c. 6; ergo aliqua necessitas ex suppositione stat simul cum libertate.

3. *Secunda pars suppositi.* — Altera item pars probatur exemplis, quia beatificus amor in patria eam habet necessitatem quæ libertatem excludat, et tamen illa necessitas non est sine aliqua suppositione saltem visionis Dei. Item motus voluntatis, qui dicuntur primo primi, sunt necessarii simpliciter, id est, non liberi, quamvis non sine aliqua suppositione ex parte cognitionis illam necessitatem habeant. Et simili modo actus gratiæ excitantis sunt ita necessarii in nobis, ut non sint liberi, et tamen non fiunt necessarii, nisi ex aliqua suppositione diviniæ motionis, seu immissionis efficaciæ, vel ex parte subitæ apprehensionis. Ratio vero est, quia, non obstante naturali libertate, potest voluntas multis modis necessitari, ita ut non sinatur libere operari: ergo

potest aliquid supponi ad volendi actum, quod ejus libertatem impediatur; ergo est aliqua suppositio quæ tollat libertatem, et consequenter necessitas aliqua in sensu composito esse poterit contraria libertati.

4. *Secunda suppositio.* — Secundo, fatemur omnes distinctionem duplicis necessitatis in sensu composito et diviso, in legitimo sensu explicatam, optimam esse, et ad plures difficultates circa liberum arbitrium explicandas necessariam. Ita sumitur ex Augustino, Anselmo, et D. Thoma, locis infra citandis; nam licet verbis illis formalibus non utantur, rem eandem docent, et omnes antiqui et moderni theologi illa distinctione utuntur cum Magistro, in 1, d. 38 et seq. Dicit autem Ledesma, articulo 12, ad 9, modernos theologos, qui non sunt (ait) ex schola D. Thomæ, irridere illam distinctionem acceptam a Patribus et scholasticis, quos oportet venerari. Per quos modernos non nisi scriptores Societatis JESU intelligit, præcipue vero Molinam, Vasquez, et me, quos nominat. Sed nullum locum affert ubi illa distinctio, ut a Patribus et theologis data est, a nobis reprobetur. Imo citat loca in quibus illa utuntur, Molina in Concord., quæst. 14, disp. 38, in fine; Vasquez, 1 part., disp. 66, cap. 3; et Suar. disp. 14, sect. 9. Unde, quia aliquando reprobamus falsam aliquam explicationem illius divisionis, ideo nobis attribuunt quod illam rejiciamus, vel irrideamus, quod ego admonui libr. 1 de Auxil., cap. 3, num. 9 et 10, quem locum et verba mea refert dictus auctor, et nihil respondet. Quapropter, si non majori fundamento me vocat alienum a doctrina D. Thomæ quam illius distinctionis impugnatores, nihil profecto nomini nostro aut doctrinæ officere potest. De illa ergo distinctione absolute sumpta nulla est inter nos controversia, sed de vero sensu illius, ex quo ejus ratio pendet.

5. *Tertia suppositio.* — Tertio, addimus quod, licet duo actus inter se simul repugnent et sint impossibiles, nihilominus non repugnat unam et eandem facultatem simul esse potentiam ad utrumque actum, ita ut particula *simul*, non ad actus inter se componendos, sed ad potentiam simul utriusque existentem referatur. Ita est ab omnibus receptum, imo per se evidens: primo in potentiis receptivis; nam idem lignum habet potentiam, quæ simul est potentia, ad recipiendum calorem et frigus divisim, licet non possit simul utrumque recipere, et eadem materia simul est potentia ad omnes formas, licet non possit

pluribus formis simul informari. Secundo, in potentiis activis; intellectus enim simul habet vim activam assensus et dissensus, non tamen ut utrumque simul faciat, et idem est in voluntate vel potentia motiva secundum locum, servata proportione. Et ratio est, quia inter actus ipsos est repugnantia, in ipsa vero potentia nulla est oppositio: imo una eminens indivisibilis facultas potest esse capax vel effectrix utriusque actus per se ac divisim spectati.

6. *Quarta suppositio.*—*In quo posita sit difficultas.*—Atque hinc quarto supponimus, quando talis facultas capax contrariorum actuum, vel ad utrumque potens, unum illorum efficit vel recipit, non amittere potentiam illam quasi radicalem et fundamentalem, quam ad alterum actum habet; id est, quando intellectus, verbi gratia, credit, non amittit vires naturales quas habet ad dissentendum; illas enim retinet sub priori actu, licet non possit illas exercere, quamdiu priorem actum retinet. Et similiter superficies alba eandem potentiam integram retinet ad recipiendam nigredinem, quam ex se habet, licet illam exercere non valeat in ordine ad nigredinem, quamdiu albedine actuatur. Hoc ergo modo etiam de voluntate certum est, quando est sub uno actu, sub illo habere potestatem sibi innatam ad suspendendum talem actum, vel faciendum contrarium, etiamsi non possit hac facultate uti, simul perseverando in priori actu. Quando ergo actus sunt inter se repugnantes, potentia de se apta ad utrumque, et sub uno existens, ratione potestatis quam retinet, dicitur posse alium actum facere vel recipere in sensu diviso, quia si præsens actus auferatur, per eandem potentiam quam nunc habet, poterit recipere alium, non tamen in sensu composito, quia manens sub hoc actu non potest simul habere alium. Et in hac etiam explicatione sensus compositi et divisi nulla est contentio. Sed difficultas est quales debeant esse ipsi actus inter se repugnantes respectu ejusdem voluntatis liberæ, ut impossibilitas illa vel necessitas in sensu composito non repugnet libertati, vel quando actus erunt tales ut necessitas unius, proveniens ex suppositione alterius, libertati repugnet.

7. *Quinta et ultima suppositio certa.*—Ultimo, supponenda est doctrina Anselmi, quam etiam alii doctores negare non audent, quinvis aliter quam nos illam intelligant. Anselmus ergo, in lib. de Concordia, c. 1 et 2 sæpe, et lib. 2 *Cur Deus homo*, c. 18, duplicem dis-

tinguit necessitatem. *Unam* vocat *præcedentem, quæ facit rem esse: alteram subsequentem, quam facit ipsemet operans*, et priorem dicit repugnare libertati, non tamen posteriorem. Similique modo distingui potest duplex sensus compositus: unus, qui sit ex suppositione præveniente, alius, qui ex subsequenti; et quando necessitas est in sensu composito priori modo, per talem compositum sensum non salvatur libertas, quia illa suppositio inducit necessitatem simpliciter et libertati contrariam, juxta doctrinam Anselmi: quando vero suppositio est consequens, tunc optime accommodatur distinctio sensus compositi et divisi, quia necessitas in tali sensu composito non repugnat libertati, juxta eandem doctrinam. Idemque dicendum est de alia duplici necessitate consequentis et consequentiæ, quæ sumitur ex divo Thoma, 1 p., quæst. 14, art. 13, et quæst. 19, art. 8, in solutionibus argumentorum, et quæst. 22, art. 4, et quæst. 23, art. 2 ad 3; nam prior necessitas dicitur contraria libertati, quia est absoluta necessitas rei, posterior vero dicitur non tollere libertatem. Est autem notanda differentia, quia primum membrum est simpliciter et universaliter, et (ut sic dicam) positive verum. Secundum autem membrum solum negative et permissive, seu indefinite accipiendum est, ut sit verum. Aliqua enim necessitas consequentiæ repugnat libertati, qualis est hæc: Homo videt Deum: ergo amat illum. Sensus igitur illius membri est necessitatem consequentiæ non semper repugnare libertati, vel solam necessitatem consequentiæ non satis esse, nisi adjungatur necessitas consequentis. Et ideo membrum illud subdistinguendum est, juxta distinctionem Anselmi. Nam si consequentia est necessaria ex suppositione antecedente, repugnat libertati; si vero sit ex suppositione consequente, non erit libertati contraria. Totum ergo hoc negotium eo revolvitur, ut intelligamus quæ suppositio antecedens dicatur, quæ consequens, quod statim videbimus.

8. *Prima sententia.*—Prima ergo sententia est, nullam suppositionem inducentem necessitatem in sensu composito excludere libertatem ab actu, vel facere necessitatem simpliciter, præter illam, qua posita, voluntas ab intrinseco et natura sua determinatur ad unum, et ad exercitium actus; omnem vero aliam suppositionem, quantumvis antecedentem, et positam sine usu libertatis, ac inducentem necessitatem in sensu composito,

sen (quod idem est) habentem impossibilitatem cum carentia actus, non esse repugnantem libertati, aut facere necessitatem simpliciter, sed tantum secundum quid, seu necessitatem consequentis, seu consequentiæ. Priori modo determinatur voluntas in patria, media visione beatifica, et in via in motibus primo primis, vel in somno, pueritia, aut amentia, et ideo necessitatur simpliciter, quia, supposito tali modo cognitionis, naturaliter et ab intrinseco determinatur. At vero extra hunc modum suppositionis, nulla est necessitas simpliciter, quia nihil potest illo modo determinare voluntatem ab intrinseco, nisi ex parte intellectus præcedat iudicium determinatum, quia voluntas non movetur connaturali modo, nisi medio iudicio intellectus, et ideo non potest ab intrinseco ex parte sua determinari ad unum, nisi ex parte iudicii præcedat determinatio, vel ratione objecti, vel ratione modi proponendi illud; tum quia, sicut voluntas non fertur nisi in cognitum, ita non determinate fertur ab intrinseco, nisi in id quod determinate iudicatur ut omnino volendum; tum etiam quia indifferentia iudicii est radix indifferentiæ voluntatis: ergo si ex parte iudicii non præcedat determinatio, non potest voluntas ex se et ab intrinseco determinari. Unde ulterius inferunt hujus sententiæ auctores, ut supra dicere cœpi, nullam suppositionem antecedentem ex parte voluntatis, quæ iudicium rationis non immutat, inducere necessitatem contrariam libertati, quantumvis inducat necessitatem in sensu composito talis suppositionis. Ac tandem inferunt, ad libertatem actus sufficere potestatem non eliciendi illum in sensu diviso, id est, talem potestatem quæ licet, sub tali suppositione existens, non possit reduci in actualem suspensionem actus, de se tamen ad id sit potens, et, ablata suppositione, exerceri etiam possit. Hæc opinio manifeste sequitur ex alia opinione Bannez, quam tractavimus cap. 4. Eamque ex professo defendunt Alvar., disp. 94 tota, et disp. 22, ad 9, cum suis confirmationibus; et in 18, 23, 25 et 115; et Ledesm., dicta quæst. unic., art. 12, ad 9.

9. *Hujus sententiæ fundamenta.* — Fundatur hæc opinio præsertim in particularibus exemplis, primo de scientia Dei, vel prophetia, quæ est suppositio antecedens inferens necessitatem in sensu composito, et non tollens libertatem. Secundo, de voluntate Dei prædefiniēte, seu prædestinante, quæ etiam antecedit nostram voluntatem, et infert similem ne-

cessitatem, et non tollit libertatem. Tertio, de concursu prævio. Quarto, de auxilio efficaci prædeterminante, vel congruo. His exemplis addunt testimonia divi Thomæ, quia ubique ita expedit difficultates ex his principiis provenientes: de scientia, 1 p., q. 14, art. 13, ad 2 et 3, et q. 2, de Verit., art. 12, ad 4; de voluntate, 1 p., q. 19, art. 8, ad 3, et q. 22, art. 4; de prædestinatione, q. 23, art. 6, ad 3, et q. 6, de Verit., art. 3, ad 7 et 8; de concursu, 1. 2, q. 10, art. 4, ad 3; de auxilio efficaci, 1. 2, q. 112, art. 3. A priori non afferunt rationem, nisi quæ sumitur ex illo fundamento, quod stante iudicio rationis voluntas non potest necessitari. Item quia, non obstante quacumque suppositione extrinsecus proveniente, voluntas retinet potestatem simpliciter non eliciendi actum, si velit, quia integra ejus potestas manet sub illa suppositione: ergo hoc satis est ut actus sit liber, non obstante necessitate in sensu composito talis suppositionis.

10. *Secunda, et nostra sententia.* — *Prior pars evidens.* — Secunda vero sententia, quam nos amplectimur, est suppositionem inducentem necessitatem in sensu composito, si talis sit ut per usum libertatis fiat, vel illum usum liberum involvat, seu comitantem habeat, inducere tantum necessitatem consequentiæ et secundum quid, et ideo non pugnan- re cum libertate; si vero talis sit suppositio ut omnino antevertat usum libertatis, et necessitatem operandi in voluntatem inducat ex tali suppositione, et in sensu composito, ita ut impossibile sit componi simul in voluntate talem suppositionem cum carentia actus, talem suppositionem inducere necessitatem simpliciter et contrariam libertati. In priori parte hujus sententiæ nulla est controversia cum prioribus auctoribus; nam illam a fortiori admittunt. Et inductione est evidens, quia voluntas, in eo instanti in quo libere operatur, licet, prius natura quam eliciat actum, sit indifferens ad utrumque, et ideo neque actus nec carentia ejus habeat ullam necessitatem, tamen, supposito quod eliciat actum, jam non potest in eodem instante carere actu, sed habet illam necessitatem, de qua dixit Aristoteles, res, quando est, necesse est esse; illa ergo non repugnat libertati, cum in quocumque actu libero necessario inveniatur. Idem est de concursu Dei concomitante imbibito in actu libero nostræ voluntatis; nam si ille esse supponitur, impossibile est quin voluntas etiam humana operetur, quia involvit secum operationem

voluntatis, ut lib. 3 explicabitur; et ideo cum ille supponitur, eo ipso usus libertatis supponitur, ideoque necessitas composita inde secuta non repugnat actus libertati. Ratio denique in promptu est, quia usus libertatis non destruit libertatem respectu ejusdem; nihil enim destruit seipsum: ergo necessitas, quæ sequitur ex ipso usu libertatis, non potest esse contraria eidem libertati.

11. *Secunda pars, de qua controversitur.* — Posteriorem partem nostræ sententiæ, in qua est controversia, credimus esse de mente omnium illorum theologorum qui, ad libertatem actualem voluntatis, requirunt ut, positis omnibus prærequisitis ad agendum, possit agere et non agere, etiam in sensu composito, ut supra explicavi et allegavi; nam inde aperte sequitur, quoties suppositio omnino præcedit, et inter prærequisita ad agendum ponitur, et talis est ut, illa stante, voluntas tantum possit agere, vel tantum non agere compositive (ut sic dicam), illam suppositionem impedire usum libertatis in agendo vel non agendo. Deinde tribuimus eandem sententiam illis catholicis scriptoribus, qui hac ætate hæresim Calvinii impugnarunt, eo quod negaret libertatem nostrarum actionum, quamvis ille non aliam necessitatem tribuat actibus nostræ voluntatis, nisi ex quadam suppositione antecedente et extrinseca, et non immutante iudicium rationis. Neque illum errasse credunt, quia putaverit illam necessitatem sufficere ad tollendam libertatem, sed quia talem necessitatem induxerit, supponendo eam repugnare libertati. Id constat ex Stapletonio, Bellarmino, et aliis quos lib. 3 et 5 referemus. Denique, ex modernis auctoribus tractantibus præsentibus controversias de gratia, quæ inter Catholicos versantur, præter auctores Societatis, tenet hanc sententiam insignis theologus, et primarius in Salmanticensi Academia Joannes Alfonso Curiel, ad epist. 2 B. Petri, controvers. 2, alias 4, in ordine, præsertim num. 175, 178 et 180, ubi ad libertatem docet esse necessariam potestatem componendi, tam agere, quam non agere cum omni suppositione prævia et antecedente per modum principii. Item Lorca, quem etiam Alvar. allegat 1. 2, q. 111, art. 3 in fin., seu disput. 21 de Grat. in appendice, § ult., et Alexand. Pesant. 1 part., quæst. 19, art. 8, disp. 1, et Francisc. Diotallevi. in 1 p. sui opusc., cap. 3 et sequentibus.

12. *Probatio Anselmi.* — *Prima ratio Altar.* — Probaturque auctoritate Anselmi locis supra citatis, ubi, distinguendo duplicem

necessitatem antecedentem et consequentem, nostram sententiam docet; nam generaliter statuit necessitatem antecedentem repugnare libertati. Inde enim aperte fit necessitatem in sensu composito proveniente ex antecedenti suppositione, esse necessitatem simpliciter excludentem libertatem. Ad hoc vero testimonium respondet Alvar., dicta disp. 22, ad 9, duobus modis. Primus est, Anselmum per necessitatem antecedentem intellexisse necessitatem absolutam seu naturalem, quæ facit causam secundam operari sine proprio consensu, et absque propria deliberatione rationis. Idque ex eo colligit quod Anselmus ponit exemplum in motu cæli, qui est necessarius ex influxu causæ superioris. Per necessitatem autem consequentem dicit intellexisse Anselmum necessitatem consequentiæ. Et hanc expositionem exemplis a longe petitis suadere conatur; sed frustra, et ideo illa omitto. Sensus enim Anselmi non aliunde quam ex verbis ejus petendus est. Ipse autem quid intelligat per necessitatem consequentem his verbis declarat in d. c. 1 Concord. : *Cum dico: Si Deus præscit aliquid, necesse est illud esse futurum; idem est, ac si dicam: Si erit, ex necessitate erit; sed hæc necessitas non cogit, nec prohibet aliquid esse aut non esse: ideo enim quia ponuntur res esse, dicuntur ex necessitate esse.* Illam ergo vocat necessitatem consequentem, quæ sequitur ex ejusdem rei positione, quæ quidem vere dicitur esse necessitas consequentiæ, sed non cujuseumque consequentiæ, nec ex quocumque antecedente, sed ex illo in quo res ipsa supponitur esse, ita ut sit illatio quasi identica formaliter aut virtualiter, qualis est illa Aristotelis: *Res quando est, necesse est esse.* Unde subjungit idem Sanctus: *Nam cum dico: Si erit, ex necessitate erit; hæc sequitur necessitas, quæ rei positionem non præcedit.* Omnem ergo necessitatem quæ rei positionem præcedit, vocat antecedentem; quæ vero sequitur ex rei positione vocat consequentem.

13. *Aliter evolvitur doctrina beati Anselmi.* — Aliter etiam id declarat inferius, constituendo differentiam inter actum seu opus factum ex motione voluntatis, et ipsum actum elicito a voluntate libera, quia in actu elicito, ut est ipsum velle, invenitur tantum necessitas consequens, quia quod vult libera voluntas, potest non velle, et necesse est eam velle cum vult. Potest namque non velle, antequam velit, quia libera est, sed cum vult, non potest non velle, sed eam velle necesse

est, quoniam impossibile illi est id ipsum simul velle, et non velle. Ubi respectu ipsiusmet velle explicat necessitatem antecedentem et consequentem, ut illa sit consequens, quæ sequitur voluntatem jam volentem; antecedens vero, quæ præcedit, utique causalitate et natura, seu efficientia. Ideoque de actu imperato ait: *Bifariam est necessarium, quia et voluntate cogitur fieri, et quod fit, non potest simul non esse.* Quia motio manus est necessaria ex suppositione voluntatis, et ideo respectu potentiae motivæ est necessaria, non tantum necessitate consequente, sed etiam antecedente, quia volitio est suppositio antecedens respectu potentiae motivæ, quia est causa efficiens ejus, quæ posita necessario sequitur actio: et nihilominus respectu hominis illa actio est simpliciter libera, quia, ut subdit: *Has necessitates facit voluntatis libertas, quæ prius quam sint, eas cavere potest.* Ubi virtute definit illam necessitatem consequentem esse, *quam facit voluntatis libertas*, et sic iterum subdit non repugnare id, quod nulla necessitate cogente fit, necessario esse futurum *ea necessitate*, ait, *quam supra dixi fieri a libera voluntate.* Est ergo ex mente Anselmi necessitas consequens, quæ sequitur ex aliquo usu ipsius libertatis, et ideo dicitur fieri a libera voluntate. Antecedens ergo necessitas erit, quæ in voluntate fit, et ab ipsa libertate ejus non fit, sed antecedit usum libertatis ejus. Et eandem doctrinam habet dict. lib. 2 *Cur Deus homo*, c. 18, ubi generaliter dicit: *Est namque præcedens necessitas, quæ causa est, ut sit res: et est necessitas sequens, quam res facit.* Et infra necessitatem consequentem etiam vocat *nihil efficientem*, et e contrario necessitatem proveniente[m] ex priori causa, censet antecedentem et simpliciter absolutam.

14. *Argumentum ab adæquata divisione necessitatis.*—Frustra ergo limitatur doctrina Anselmi ad causam præmoventem naturaliter, id est, ad operandum sine cognitione rationis. Quod præterea confirmo, quia descriptio illa necessitatis consequentis, quod sit illa quæ a libera voluntate fit, est præcisa et adæquata: omnis ergo alia necessitas, quæ a libera voluntate non fit, comprehenditur sub alio membro necessitatis antecedentis, sive fiat cum cognitione rationis ejus cui operandi necessitas imponitur, sive absque illa; alias partitio non esset adæquata, contra sufficientiam doctrinæ, et contra mentem Anselmi. Unde in c. 2 ait *quædam præscita, et prædestinata a Deo non evenire ea necessitate quæ præcedit*

rem et facit: sed ea quæ rem sequitur, sicut supra (inquit) diximus. Ubi partitionem ponit ut adæquatam, et omnem necessitatem quæ ita præcedit rem, ut non supponat illam, sed tantum faciat, antecedentem esse docet, et a consequente illam distinguit. Secundo, quia alias esset impertinens illa distinctio ad rem de qua agebatur; tractat enim Anselmus de actibus voluntatis, qui cum iudicio rationis fiunt, et de his vult ostendere, habere quamdam necessitatem in præscientia et prædestinatione divina, cum qua consistit libertas, et respectu talium actuum illa distinctione utitur: ergo non loquitur tantum de necessitate naturali, quæ esse potest sine cognitione rationis, sed simpliciter de necessitate antecedente vel consequente tales actus, ut a libero arbitrio procedunt. Tertio, quia motivum ad illam expositionem, ex uno exemplo sumptum, debilissimum est; tum quia non est necesse exemplum esse simile in omnibus; tum etiam quia in locis proxime citatis ponit etiam exemplum in seditione futura et in peccato; tum denique quia in ultimo loco excludit a necessitate consequente non solum causam naturalem, sed absolute omnem causam efficientem, et necessitatem inducentem. Ideoque cum dixisset: *Quoniam vera fuit fides ejus* (id est Virginis), *necesse erat ita futurum esse sicut credidit*, subjungit: *Quod si te iterum perturbat quod dico: Necesse erat; memento, quia veritas fidei Virginis non fuit causa ut ille moreretur, sed quia hoc futurum erat, vera fuit fides.*

15. *Secunda evasio Altar.*—Addit vero prædictus auctor aliam expositionem, quam dicit esse forte clariorem; nimirum necessitatem ex voluntate Dei proveniente[m] non esse antecedentem, quia, licet antecedit causam secundam seu voluntatem creatam, non antecedit causam primam ejusque voluntatem, sed consequitur illam. Unde infert, sicut necessitas voluntatis hominis in suum actum non tollit libertatem actus ejus, sed facit; ita necessitatem proveniente[m] ex antecedenti influxu voluntatis divinæ non impedire libertatem, sed potius causare illam in ipsamet voluntate humana, quia vehementius influit et operatur quam ipsamet voluntas humana. Et ad hoc confirmandum inducit verba Augustini, libr. de Corrupt. et grat., capit. 14, ubi exaggerat potestatem voluntatis divinæ in humanam.

16. *Illæ expositio nihil præstat.*—In hac vero responsione neque expositio verborum

Anselmi, nec doctrina ipsa probari potest. Ratio prioris partis est, quoniam Anselmus aperte loquitur de necessitate antecedente, vel consequente respectu illius voluntatis, a qua debet actus libere vel necessario procedere. Unde in lib. de Concord. expresse loquitur de voluntate humana, cum dicit necessitatem consequentem esse quam ejusdem voluntatis libertas facit, antecedentem vero quam prior causa facit. Et sub priori causa Deum etiam includit, nam ob eam rem conatur etiam ex parte ipsius antecedentem necessitatem tollere. Ac propterea dicit scientiam et voluntatem Dei pertinere ad consequentem necessitatem, non quia respectu ipsius voluntatis divinæ necessitas illa sit consequens, sed quia ipsamet scientia Dei non antecedit simpliciter usum liberum ipsius voluntatis humanæ, sed illum includit. Et inde etiam dicit voluntatem Dei non inducere necessitatem antecedentem, *quia non prædestinat, nisi sicut est in præscientia*, ut expresse dicit in cap. 2. In altero vero loco lib. 2 *Cur Deus homo*, prius, c. 17, declarat quomodo Deus nihil ex necessitate simpliciter faciat, quia nulla necessitas præcedit ejus velle, sed ab ejus voluntate procedit. Postea vero, in c. 18, eodem modo cum proportionem loquitur de voluntate humana ut libere operante, et respectu illius vult necessitatem debere esse consequentem, ut cum libertate subsistat.

17. *Ratione fulcitur nostra sententia.*—Ratione item id convinci potest, qua simul improbatur illa doctrina in se spectata: nam actus hominis non est liber per ordinem ad voluntatem Dei, sed per ordinem ad voluntatem hominis, sicut non est vitalis actus hominis, quia procedit a Deo, sed quia procedit ab intrinseco principio vitæ hominis: ergo ut actus sit liber homini, oportet ut non sit necessarius eidem homini per necessitatem antecedentem liberum influxum ejus, nec satis est quod illa eadem necessitas sit consequens respectu Dei: inde enim solum fiet quod actio vel effectus sit liber Deo, non vero homini. Nam si necessitas est illi antecedens ex influxu Dei, jam ipse non ex sua libertate, sed ex innata necessitate operabitur, ne subinde non erit illi actio libera, sed Deo. Confirmatur, quia Deus potest necessitare voluntatem humanam, ut supra est ostensum, et tamen tunc etiam necessitas illa est consequens respectu voluntatis Dei; non enim fit nisi quia Deus vult; et nihilominus necessitat voluntatem hominis, quia illam antecedit: ergo ne-

cessitas in sensu composito, ex suppositione antecedente voluntatem hominis, licet consequatur voluntatem Dei, tollit usum libertatis in homine, licet illum in Deo supponat. Sicut etiam, e contrario, necessitas quæ est in amore beatorum in patria, est consequens respectu voluntatis Dei, nam ipse libere præbet concursus ad illum amorem, nec est illi necessarius ille concursus, nisi quia vult vel promittit illum dare, et ideo ipsi Deo effectus ille liber est; et nihilominus est necessarius homini amanti, quia respectu illius necessitas illa est antecedens, eo quod non fiat per liberam voluntatem, sed, positis omnibus prærequisitis ad amandum, ex necessitate sequitur. Ergo necessitas antecedens et consequens consideranda est respectu ejusdem voluntatis, cui effectus est liber vel necessarius, non respectu alienæ voluntatis. Neque ad hoc refert quod voluntas divina sit superior et efficacior, quia libertas non consistit in independentia aut efficacia, sed in indifferentia illiusmet causæ, quæ dicitur libere operari: unde si vehementia illa influxus divini tanta esset ut induceret in voluntate hominis necessitatem antecedentem, procul dubio usum libertatis ejus impediret. Sed mirabilis sapientia Dei est quod, licet vehementius influat, ita se accommodat, ut necessitatem antecedentem non inducat: imo sine tali necessitate voluntatem hominis mutari facit, prout vult. Et hæc est doctrina Augustini in citato loco, quam in libro quinto late tractabimus.

18. *Responsio Altar. improbatur.*—*Alv. responsio.*—Ex quo etiam facile improbatur alia responsio, quæ ex eodem auctore in eadem disput., ad 8, desumi potest, ubi, proposito simili argumento non fundato in Anselmi auctoritate, sed in ratione, quia si suppositio ita antecedit voluntatem, ut non sit in potestate ejus illam ponere vel tollere, et ex tali suppositione necessario sequitur actus, talis actus non potest esse liber; respondet hanc propositionem esse veram, quando suppositio se tenet ex parte alienius causæ creatæ distinctæ ab ipsa voluntate humana, non vero si se teneat ex parte primæ et universalissimæ causæ. Probatque hanc partem posteriorem exemplis, quia prædictio negationis Petri fuit suppositio antecedens, quam Petrus non potuit sua voluntate tollere aut ponere, et illa posita necesse fuit sequi negationem Petri, et nihilominus non abstulit libertatem. Similiter promissio conversionis gentium fuit suppositio antecedens eodem modo, quæ posita non

potuit non impleri, et non obstitit quominus conversio illa libere fieret. Rationem etiam adhibet, quia sola prima causa potest immutare voluntatem humanam efficaciter, et in seipsa, et servato modo operandi ejus naturali. Et ad hoc allegatur divus Thomas 1 p., q. 22, art. 4, et 3 contra Gent., c. 148. Juxta hanc doctrinam, posset ad Anselmum responderi, ejus distinctionem limitando, quoad membrum de necessitate antecedente, ut intelligatur, quando talis necessitas antecedens provenit a causa creata, non vero quando provenit a causa prima.

19. Sed neque expositio neque doctrina est probabilior quam præcedens. Nam imprimis Anselmus illis locis tractat de necessitate proveniente a Deo, nimirum a scientia, voluntate, vel prædestinatione Dei; et ad salvandam libertatem hominis, etiam respectu ipsius Dei, putat esse necessariam distinctionem illam de necessitate antecedente et consequente: ergo non habet locum in doctrina et mente Anselmi illa limitatio. Quin potius ipse aperte supponit, etiam respectu Dei, non subsistere libertatem cum necessitate antecedente, etiamsi a Deo ipso proveniat, ac subinde neque salvari libertatem per distinctionem sensus compositi includentis talem suppositionem antecedentem et a Deo ipso convenientem. Unde Wald., loco infra citando, recte intellexit Anselmum locutum esse de necessitate, quam ipse vocat *necessitatem extraneam voluntati*, quia provenit ab extrinseca causa, et maxime ait excludere necessitatem prævenientem, quæ a Deo possit provenire.

20. *Doctrina Alvar. est contra definitionem libertatis.* — Deinde doctrina ipsa impugnatur ex his quibus supra probavimus, ut operatio sit libera, necessarium esse ut, stantibus omnibus prærequisitis ad agendum etiam ex parte Dei, voluntas possit agere et non agere, et componere, tam ipsum agere, quam ipsum non agere cum omnibus illis prærequisitis. Nam ex illa doctrina necessario sequitur omnem suppositionem antecedentem, in sensu a nobis explicato, si necessitatem inducat, impedire usum liberum, etiamsi a Deo proveniat. Probatur, quia talis suppositio, si detur, erit unum ex prærequisitis ad agendum, et illoposito non poterit voluntas aliud agere, nisi id quod ex tali suppositione necessario sequitur; ergo illa necessitas, etiamsi a Deo proveniat, repugnabit libertati. Eo vel maxime quod, si necessitas illa antecedens repugnat libertati, est propter formalem repugnantiam

et contradictionem quam cum illa involvit, nimirum, quod voluntas subdatur illi suppositioni et actioni ex necessitate, et quod simul cum vera libertate et indifferentia talem actionem eliciat; ergo undecumque proveniat illa necessitas, sive a Deo, sive aliunde, repugnabit libertati, quia quod proveniat a Deo non tollit dictam repugnantiam, nec quidquam ad servandam libertatem refert. Unde recte Wald., l. 1 Doctrin. fid., c. 28, impugnando eandem doctrinam in quibusdam, qui dicebant necessitatem ab inferioribus causis repugnare libertati, non vero inditam a causa superiori, inquit: *Undecumque ab extra intuleris necessitatem quæ derogat potestati, statim præjudicas libertati.* Quod ex doctrina August., lib. 3 de Lib. arb., cap. 3, et aliorum Patrum confirmat.

21. *Alvar. ratio non cogit.* — *Quid ad angelicum doctorem, quid ad prædictionem dicamus.* — Neque ratio differentiæ, quam Alvarez adjungit, quidquam juvat; tantum enim probat solum Deum posse per se et directe immutare voluntatem: hinc autem non sequitur posse illam immutare, per motionem præviam necessitantem in sensu composito talis motionis, salva ejus libertate; nam, eo ipso quod sic movet, non sinit illam connaturali modo operari: et hoc confirmant quæ supra diximus de potestate Dei ad necessitatem inferendam voluntati. Unde, licet ad omnipotentiam et providentiam Dei pertineat ita disponere effectus liberos, ut et infallibiliter et libere eveniant, sicut ab ipso providentur, quod in citatis locis D. Thom. docet; non tamen pertinet ad ejus omnipotentiam vel providentiam facere, ut effectus eveniat ex necessitate antecedente simpliciter, et quod libere eveniat, neque in citatis locis D. Thom. hoc docet, neque docere potuit, cum repugnantiam involvat. Exempla vero de prædictione vel promissione Dei, eadem sunt quæ de præscientia et præfinitione, de quibus Anselm. expresse docet pertinere ad necessitatem consequentem, non ad necessitatem antecedentem, quod verissimum esse partim in Proleg. 2, partim in l. et 5 ostendemus.

22. *Ex Anselmo necessitas amica libertati et illi adversa adstruitur.* — Doctrina ergo generalis Anselmi, est necessitatem in sensu composito tunc solum recte componi cum libertate arbitrii, quando ipsa suppositio fit per usum liberi arbitrii, vel saltem illum supponit, aut concomitantem includit; necessitatem autem ex suppositione omnino antee-

dente ad usum liberi arbitrii, etiamsi dicatur ex suppositione et in sensu composito, esse necessitatem simpliciter, et non posse cum vera libertate componi. Atque ita intellexerunt et probarunt illam distinctionem Anselmi Alens., 1 p., quæst 24, membr. 4 et 5; Albert. in 1, d. 38, art. 4; Richard., q. 6, et gravissime omnium Wald., lib. 1 Doctrin. fid. antiq., c. 25, ubi etiam addit doctrinam illam Anselmi sumptam esse ex Augustino, l. 5 de Civit., cap. 10, ubi, licet non eisdem verbis, in sententia illam insinuat; distinguit enim duas necessitates; unam, quæ libertati repugnat, aliam, quæ optime cum illa subsistit. Priorem dicit esse illam quæ non est in nostra potestate, sub qua comprehendit Augustinus illam omnem quæ ab extrinseco provenit, etiam nobis nolentibus, quæ profecto pertinet ad antecedentem necessitatem. Unde sub alio membro comprehendere videtur Augustinus omnem necessitatem, quæ est sine extrinseca vi; nam duo exempla illius ponit, scilicet, necesse esse Deum semper vivere et omnia præscire, quorum prius est absolute necessarium, posterius tantum ex suppositione objecti. Et ideo, de hoc membro posteriori, ait Augustinus non repugnare libertati, quia quatenus suum objectum supponit, est in nostra potestate, et hoc est quod ait: *Non propterea nihil est in nostra potestate, quia Deus præscivit quid futurum esset in nostra voluntate. Non enim qui hoc præscivit, nihil præscivit. Porro si aliquid præscivit, profecto et illo præsciente est aliquid in nostra voluntate;* unde in fine concludit: *Non ideo homo peccat, quia Deus illum peccaturum præscivit, sed ideo non dicitur ipsum peccare dum peccat, quia Deus illum peccaturum esse præscivit, qui si nolit, utique non peccat, sed si peccare noluerit, etiam hoc ille præscivit.* Per quæ omnia aperte indicat necessitatem consequentem, id est, usum ipsiusmet libertatis supponentem. Deinde sic concludit Waldensis: *Necessitas ergo præcedens non compatitur arbitrii libertatem, et ideo ipsa non convenit humanis effectibus. Periculose ergo, ut mihi videtur, quidam magni viri necessitatem istam præcedentem ponunt in humanis operibus, etiam et quod fluat a voluntate Dei, maxime cum antiquis Patribus nihil consonans reperire possunt, cum conantur.* Quæ verba ideo dixit, quia non credidit aliter Wiclepho resistere, et valde notanda sunt hoc tempore ad tuendam fidei causam contra Calvinum.

23. *Non solum Anselmi, sed etiam solida doc-*

trina D. Thomæ nostra consolidatur. — Angelicus doctor omnino, ut nos, sentit cum Anselmo. — Eamdem doctrinam repetit et gravissimis verbis confirmat idem auctor, eodem lib. 1, cap. 28, ubi non solum Anselmo sed etiam D. Thomæ hanc sententiam tribuit, dicens: *Venerabilis Anselmus et S. Thomas clarissimo ore dicunt, non esse ibi necessitatem aliquam præcedentem, sed consequentem, quæ nihil efficit.* Quia vero nullum D. Thomæ testimonium in particulari allegat, nonnulla a nobis recensenda sunt, quia quod ille ibidem refert, hodie etiam fit, et D. Thomæ imponitur, *quod necessitatem ponat præcedentem, quæ rem obliget ad eventum.* Contrarium autem ipsum cum Anselmo docuisse ostenditur primo ex verbis ejus l. 1 Periher., lect. 15, in 1 §, ubi explicans axioma Aristotelis: *Omne quod est, quando est, necesse est esse,* dicit fundari in illo principio: *Impossibile est idem simul esse et non esse;* nam inde fit ut quod est, necesse sit esse quando est. *Et hæc est* (inquit) *necessitas non absoluta, sed ex suppositione.* Et inferius, in § 2, ait *illud quod non est absolute necessarium, fieri necessarium ex suppositione ejusdem.* Ex quibus colligo, juxta mentem ac sententiam D. Thomæ, verum sensum compositum, excludentem necessitatem absolutam contingentiae seu libertati contrariam, debere fundari in suppositione ejusdem rei, cui attribuitur necessitas, et virtualiter debere includere illud principium: *Impossibile est idem simul esse et non esse.* Ergo hic etiam sensus servandus est in sensu composito, in quo dicitur actus liber necessario evenire, utique ut in sua hypothesi includat actum ipsum libere factum vel futurum: quæ est necessitas consequens ab Anselmo tradita. Unde omnes theologi in hac materia utuntur sensu composito, in illo sensu in quo traditur ab Aristotele citato loco, et a D. Thoma exponitur. Atque ita colligimus, ex mente divi Thomæ (quamvis expresse eam ibi non declaret), omnem necessitatem, quæ non est ex suppositione ejusdem rei, sed ex alia priori, esse antecedentem et absolutam, seu simpliciter, quia non fundatur in illo principio: *Impossibile est idem simul esse et non esse;* quia si non supponitur res ipsa, sed causa rei, etiamsi posita causa non sequatur effectus, non sequitur idem esse et non esse: sed sequitur simul esse posse talem rem, quæ est causa, et non esse rem, quæ est effectus, quod longe diversum est. Unde idem D. Thom., l. 2 Physicor., lection. 15, in principio, distinguendo duplicem necessitatem,

absolutam, et ex suppositione, generaliter pronuntiat: *Quod necessitas illa quæ pendet ex causis prioribus, est absoluta*; quod in tribus causis, materiali, formali et efficiente declarat, et adjungit: *Quod autem habet necessitatem ab eo quod est posterius in esse, est necessarium ex conditione vel suppositione*, quæ est manifesta declaratio distinctionis Anselmi in sensu a nobis tradito.

24. *Male allegatus D. Thomas se explicat.*—Quia vero declarando illud prius membrum in causa efficiente, exemplum ponit in motu solis, respondent moderni qui se discipulos ejus maxime profitentur, illum loqui de causis naturalibus, seu inferioribus, non de causa prima. Sed hoc est imprimis contra generalitatem priorum verborum, quæ non limitantur propter unum exemplum, quia non oportuit in omnibus speciebus causarum efficientium exempla ponere, nam illud tanquam notius positum est. Deinde obstat vis rationis, quæ non est minor in prima causa quam in aliis, ut paulo antea dictum est. Præterea obstat definitio primi membri, quæ, ut sit adæquata, non admittit necessitatem secundi modi, nisi ubi non ex priori aliquo, sed ex posteriori sequitur. Unde illi doctores, ut suam opinionem D. Thomæ adscribant, illius doctrinam mutilant, et partitionem, vel declarationem ejus insufficientem reddunt. Accedit quod idem D. Thom., 3 p., q. 46, art. 1, cum dixisset *quamdam esse necessitatem ex aliquo exteriori, quod si sit causa efficiens vel movens, facit necessitatem coactionis*, ad excludendam hanc necessitatem a passione Christi, addit non habuisse illam ex parte Dei: ergo intelligit, sub illa violenta necessitate proveniente ex aliquo exteriori principio, includi etiam illam quæ a Deo provenire potest.

25. *Idem alibi.*—His consonat alia doctrina ejusdem Doctoris Sancti, quæst. 6 de Malo, art. unie., ubi generaliter docet, ad libertatem actus voluntatis quoad exercitium, necessarium esse ut ab extrinseco principio, etiam a Deo ipso, non necessitetur, utique ex aliqua suppositione antecedente et prævia; unde sic inquit: *Deus, cum omnia moveat secundum rationem mobilium, levia sursum, et gravia deorsum, etiam voluntatem secundum ejus conditionem, non ut ex necessitate, sed ut indeterminate se habentem ad multa*. In quibus verbis obiter notari potest, pro aliis quæstionibus postea tractandis, Deum, ratione concursus generalis et concomitantis, dici movere omnia; sic enim et non aliter movet le-

via sursum, et gravia deorsum: ita ergo ratione ejusdem concursus intelligendus est D. Thomas hic et in multis aliis locis, cum dicit Deum movere voluntatem. Item in hoc ipso movendi genere dicit movere voluntatem secundum ejus conditionem, in qua conditione illa duo, tanquam opposita, contraponit, scilicet, ut ex necessitate et ut indeterminate se habente, sentitque D. Thomas (quod ad præsens spectat), si motio etiam ipsius Dei præcedat determinando, induci sensum compositum repugnantem modo proprio operandi voluntatis, et consequenter inferri necessitatem simpliciter, et non tantum secundum quid.

26. *Nostra et Anselmi sententia ratione probatur.*—Tandem ratione declaratur, et sensus Anselmi, et nostra sententia, quia quando suppositio est antecedens in sensu dicto, id est, non facta per usum libertatis, sed præveniens illum, si effectus est necessario connexus cum tali suppositione, talis necessitas non est fundata in illo principio: *Impossibile est idem simul esse et non esse*, ut jam supra declaravi, quia non sunt idem id quod supponitur, et quod necessario sequi dicitur: ergo fundatur in alio principio, videlicet, impossibile est poni talem causam sic affectam, et ex illa non sequi talem effectum distinctum ab ea conditione vel affectione quæ in causa supponitur; ergo hæc non est necessitas sensus compositi de quo Aristoteles, et Anselmus, qui illum allegat, et D. Thomas qui illum exponit, et cæteri theologi qui illum sequuntur, locuti sunt: ergo illa non est necessitas tantum secundum quid, quæ dici solet consequentiæ, sed est necessitas simpliciter, et consequentis, quia est necessitas effectus ex sua causa, quæ est propria necessitas physica quæ in ipsa affectione rei invenitur: et non est tantum illationis, et quasi ex mentis comparatione, qualis est in necessitate ejusdem rei ex sui ipsius suppositione. Secundo, si suppositio illa antecedit omnino usum libertatis, in ejus positione non intervenit exercitium libertatis humanæ, nec etiam intervenit in emanatione effectus a tali suppositione, quia fit cum tanta necessitate, ut non subdatur dominio ejusdem voluntatis, nec ipsa possit illam dimanationem impedire: ergo ille effectus in re ipsa non fit cum usu libero voluntatis humanæ; ergo non est liber: ergo sensus compositus ex tali suppositione non sufficit ad salvandam libertatem.

27. *Exasio cum præclusionione ejus.*—Tertio, posita hujusmodi suppositione, voluntas, etiam

spectata prius natura quam operetur, tantum potest unum agere, illud, scilicet, quod ex tali suppositione sequitur cum necessitate quoad exercitium: ergo non agit ut potens agere et non agere, positis omnibus prærequisitis ad agendum. Nec satisfacit responsio quod voluntas etiam tunc agit, ut potens agere et non agere, quia sub illa suppositione retinet totam suam potestatem ad utrumque indifferentem, ut in quarta suppositione admisimus. Hoc, inquam, non satisfacit, quia ut in superioribus cum Scoto et Capr. dixi, illa potestas est ibi quasi sopita et impedita quoad omnia alia præter illud unum quod ex tali suppositione necessario sequitur, et ideo est tantum potentia remota ad plura, non vero est potentia proxima qualis ad usum libertatis requiritur, ut supra explicando descriptionem liberi arbitrii probatum est: ergo sensus compositus ex tali suppositione revera non salvat libertatem. Debet ergo in illo accipi suppositio consequens, non antecedens, in sensu a nobis declarato. Et e converso potentia in sensu diviso tunc deserviet libertati tuendæ, quando illa potestas intelligitur proxima in ipsa voluntate, prius natura quam se ad alteram partem determinet; tunc enim divisio ipsa, ut sic dicam, est in potestate simpliciter ipsius voluntatis; alias si divisio non est in potestate voluntatis, id est, si aliquid in illa ponitur quod ipsa impedire aut remove non potest, ut alterum ex duobus operetur, tunc sensus ille divisus inutilis est ad libertatem tuendam; nam in potentiis naturaliter operantibus talis potestas in sensu diviso reperiri potest, ut in superioribus etiam argumentatus sum.

28. *Opposita motiva declarantur.* — Neque contra hanc sententiam obstant motiva alterius opinionis: nam exempla quæ adducuntur, omnia involvunt suppositionem consequentem, non antecedentem. Nam scientia Dei, ut Anselm. docet, involvit rem esse futuram, et ita licet antecedit æternitate, non est suppositio antecedens, quia, secundum habitudinem quam dicit ad tempus in quo res est futura, non prius est quam sit verum rem esse futuram: imo ordine rationis supponit determinationem futuram per liberum usum libertatis, quia præscientia hæc futurorum, ut scientia visionis est, non est causa vel ratio quod res sit futura, sed pura intuitio rei futuræ, ut infra dicam, et ideo non mutat modum ejus, ut etiam dixit Aug. l. 3 de Lib. arb., a principio. Eademque ratio est de prophetia, cum hæc in præscientia Dei nitatur et

sit illa posterior. Secundum exemplum erat de voluntate Dei prædeterminante, seu prædefiniente, de qua in lib. 5 ex professo dicturi sumus. Nunc breviter cum Anselmo, libro de Concord., c. 2, dicimus: *Dubitari non debet, quia ejus prædestinatio et præscientia non discordant, sed sicut præscit, ita quoque prædestinat.* Et infra: *Sicut præscientia, quæ non fallitur, non præscit nisi verum, sed erit aut necessarium, aut spontaneum, ita prædestinatio, quæ non mutatur, non prædestinat, nisi sicut est in præscientia.* Itaque etiam voluntas divina, etiamsi sit absoluta, efficax et prædestinans, seu prædefinens, quatenus est de actibus liberis, et decernit non solum ut sint, sed etiam ut liberi sint, supponit aliquam præscientiam, saltem conditionatam, ipsius liberi usus voluntatis futuri cum solo concursu comitante, si cæteræ præviæ conditiones necessariæ ad volendum congrue voluntati præparentur; et quia voluntas illa prædefinens semper observat aliquo modo hunc respectum, ideo ex hac parte est suppositio consequens, et non antecedens. Et hoc modo efficacia divinæ voluntatis non obstat libertati voluntatis creatæ: imo illam munit et dirigit, ut in lib. 5 ex professo explicaturi sumus. Tertium exemplum erat de concursu prævio, quod dicimus falsum supponere, ut in l. 3, ad finem, ostendemus. Quartum erat de auxilio efficaci, ad quod dicimus, si intelligatur esse de se ita efficax, ut physice prædeterminet voluntatem creatam, falsum etiam supponere: si vero sit sermo de auxilio efficaci per vocationem congruam, sic non ita est suppositio antecedens, quin connotet habitudinem ad usum liberum præcognitum, ut aliquo modo, id est, sub conditione futurum, et ex eo capite non est suppositio antecedens, sed consequens, ut in libro quinto tractandum est.

29. *S. Thomas in oppositis etiam locis nobis favet.* — Nec D. Thomas, in locis quæ ibi allegantur, aliquid in contrarium docet. Quia potius in dicta quæst. 14, 4 p., art. 13, ad 2, ait præscientiam Dei non tollere libertatem actus futuri, quia respicit illum ut præsentem, et ita ut necessarium ea necessitate qua res, dum est, necesse est esse. Ubi aperte declarat necessitatem illam esse consequentem, et ex suppositione ejusdem rei, ut declaravimus. Et eandem doctrinam repetit in solutione ad 3, additque (quod notandum est) scientiam Dei esse extrinsecam rei scite, nullamque dispositionem ipsi inherenter illi imprimere, ideoque relinquere illam contingentem, sicut

est, et ita etiam illam intueri, ut simpliciter liberam seu contingentem, ut necessariam vero ea tantum necessitate qua res, quando est, necesse est esse.

30. *Obstaculum nullum nostræ sententiæ opponi potest ex libris D. Thomæ.* — Neque in quæstione de Veritate, ubi de eadem scientia Dei tractat, aliud docet. In aliis vero locis, ubi D. Thomas agit de voluntate divina, solum habet hæc verissimam doctrinam, quod efficacia vel efficientia voluntatis divinæ non infert necessitatem simpliciter causis secundis liberis, vel contingentibus, cum potius ipsa sit prima radix effectuum liberorum, et ex ipsius dispositione proveniant, quia non solum voluit tales effectus, sed etiam modum eorum, et ideo causas utrisque accommodatas præparavit, easque secundum modum illarum movet. Ex qua doctrina respondet, in illa quæst. 19, 1 part., art. 8, ad 3, ex voluntate Dei non sequi in actibus voluntatis creatæ necessitatem simpliciter, sed tantum secundum quid, et conditionatam, quia Deus non voluit eos habere majorem necessitatem. Idemque repetit in quæst. 22, art. 8 toto, et toto etiam art. 6, quæst. 23, ubi concordiam prædestinationis cum libertate remittit ad concordiam præscientiæ et voluntatis. Et fere idem habet dicta quæst. 6 de Verit., art. 12, ad 7, ubi etiam de prædestinatione agit, additque quod supra de scientia dixerat, et nobis postea inserviet, prædestinationem nihil ponere in prædestinato sicut nec præscientiam in præscito, et ideo non impedire quominus res secundum se contingens maneat contingens, etiamsi infallibiliter futura sit, sicut est prædestinata. Quamvis autem hæc omnia verissima sint, in eis non explicatur in particulari modus, quomodo efficacia divinæ voluntatis jungat illa duo, scilicet, quod effectus infallibiliter fiant, et eo modo fiant quo sunt voliti, scilicet, libere. Nos autem dicimus hæc conjungi media aliqua præscientia, et ea ratione non includere suppositionem omnino antecedentem, quod D. Thomas ibi non negavit, licet non expresserit; imo insinuat, dum eodem fere modo de voluntate ac de scientia loquitur, et eas conjungit. Sed hæc latius in librum 5 remittimus.

31. *D. Thomæ ex D. Thoma respondemus.* — Quæ vero ad concursum pertinent, in lib. 3 tractanda sunt. Nunc autem ad locum illum 1. 2, quæst. 10, art. 4, ad 3, respondemus D. Thom. loqui de Deo movente per concursum concomitantem, sicut paulo antea in simili notavimus ex quæst. 6 de Malo, et ex corpore ejusdem art. 4 idem colligi potest; dum enim ait ex causis necessariis *per motionem divinam* sequi effectus necessarios, per illam motionem divinam nihil aliud quam concursum comitantem intelligit, ut lib. 3 ostendam. Concursus autem simultaneus non est suppositio antecedens, sed comitans, et necessitas inde secuta, est tantum consequens, ut jam explicatum est. Alius vero locus de gratia efficaci, 1. 2, quæst. 112, art. 3, solum probat Deum interdum efficaciter intendere effectum pendentem ex libera cooperatione hominis, et habere modum quo ita moveat hominis voluntatem, ut infallibiliter et libere consensum ejus obtineat; quomodo autem id faciat Deus, D. Thomas ibi non exponit. Nos autem dicimus id non fieri per suppositionem inducentem antecedentem necessitatem, sed consequentem, media aliqua præscientia Dei, et ita doctrinam illam non repugnare alteri quam tradidimus; modum autem illum motionis in libro quinto explicaturi sumus.

32. *Ad argumenta a ratione petita.* — Ad rationes, respondetur priorem falsum supponere, quia formalis libertas non consistit in iudicio rationis, et illo stante voluntas necessitari potest simpliciter, ut supra ostendimus. Ad alteram vero rationem dicitur, posita antecedente suppositione, quæ necessitatem in sensu composito ejusdem suppositionis inducat, manere in voluntate potestatem remotam, qua potest actum suum non elicere, si talis suppositio auferatur; hæc autem potestas non satis est ut actus quem nunc facit sub tali suppositione sit liber, quia prius natura quam illum eliciat, est ita affecta, ut simpliciter non possit illum non elicere, ideoque talis necessitas antecedens simpliciter libertati repugnat. Sequebatur hic disserendum an in homine lapso sit ista libera facultas, et usus ejus; sed de hoc in Prolegomeno IV, cap. 7, et in lib. 5, cap. 4, dicemus.

INDEX CAPITUM PROLEGOMENI SECUNDI.

DE SCIENTIA, QUAM DEUS HABET DE LIBERIS ACTIBUS SUB CONDITIONE
FUTURIS PRIUS RATIONE QUAM ABSOLUTE FUTURA COGNOSCAT.

- CAP. I. *Sensu et statu controversiæ proposito, variæ sententiæ cum suis auctoribus referuntur.*
- CAP. II. *Deum habere certam et infalibilem scientiam futurorum contingentium conditionatorum ex Scriptura, prout a Patribus intellecta est, ostenditur.*
- CAP. III. *Plures ex Sanctis et antiquis Patribus scientiam conditionatam in Deo cognovisse, præsertim Augustinum, et nullum eorum illam Deo negasse.*
- CAP. IV. *Neque in Augustino, neque in aliis Patribus aliquid contra perfectionem divinæ scientiæ conditionatæ reperiri.*
- CAP. V. *Deum habere conditionatam scientiam futurorum ante decretum liberum suæ voluntatis, secundum rationis ordinem; nec posse talem scientiam in tali decreto fundari, ex eisdem Scripturæ et Patrum testimoniis ostenditur.*
- CAP. VI. *Quid de hac scientia conditionata D. Thomas senserit.*
- CAP. VII. *Ratione a priori ostenditur dari in Deo conditionatam præscientiam, et principali fundamento contrariæ sententiæ occurritur, veritasque talium propositionum declaratur.*
- CAP. VIII. *Quæ decreta conditionata et libera Deo attribuenda sint, et in illis non posse contingentia sub conditione futura præsciri.*
- CAP. IX. *Nonnullis objectionibus occurritur, earumque occasione doctrina data magis declaratur, et veluti in summam redigitur.*
- CAP. X. *Alteri objectioni occurritur, et an scientia visionis sit causa futurorum explicatur.*
-

PROLEGOMENUM SECUNDUM.

DE SCIENTIA

QUAM DEUS HABET DE LIBERIS ACTIBUS SUB CONDITIOE FUTURIS PRIUS RATIONE QUAM ABSOLUTE FUTURA COGNOSCAT.

CAPUT I.

SENSU ET STATU CONTROVERSIE PROPOSITO, VARIÆ SENTENTIÆ CUM SUIS AUCTORIBUS REFERUNTUR.

1. *Quare hic apponatur scientia conditionata.* — Quia in discursu hujus operis maximo usui nobis futura est ad concursum divinum, efficaciam vocationis, seu prævenientis auxilii, et divinam prædefinitionem explicandam et cum libertate arbitrii conciliandam, ideo ne ex fundamento nondum probato, vel non satis solido, procedere videamur, conabimur in præsentī ostendere hanc scientiam non esse Deo denegandam. Nam licet de hac eadem controversia ante viginti annos proprium opusculum scripserimus, quod paulo post in lucem prodiit, tamen postea moderni auctores, qui contendunt Deum ita movere causas secundas, etiam liberas, ad agendum, ut inevitabili quadam necessitate antecedente eas prædeterminet ad singulas actiones, totos nervos contenderunt ut hanc scientiam impugnarent et e medio tollerent, quia, illa sublata, convincere se putant, nec prævenientis gratiæ efficaciam, nec perfectam Dei providentiam, præsertim prædefinientem et prædeterminantem, posse subsistere: e contrario autem, illa scientia subsistente, omnia fundamenta suæ sententiæ facile convelli vident. Et ideo necessarium nobis hoc loco visum est sententiam quam veram credimus stabilire, ut postea de auxiliis gratiæ cum fundamento disputare possimus. Non disputabo autem hic omnia quæ de illa scientia in prædicto loco tractavi, sed quæ huic tantum loco fuerint necessaria, et in eo præcipue insistam, ut examinem quam sint firma et probabilia quæ postea de illa sententia scripta sunt.

2. *Prior sententia cum multiplici ejus varietate proponitur.* — Imprimis autem scire oportet modernos theologos, qui necessitatem physicæ prædeterminationis introducere cœperant, absolute et sine distinctione negasse hanc scientiam conditionatam, quam mediam etiam vocant, in Deo; et Scripturas omnes, ac sanctos qui de illa loquuntur, aliter interpretari conati sunt. Nunc autem illos inter se divisos esse reperio; nam primarii eorum magistri, qui de hoc puncto novissime et post multam inquisitionem et disputationem scripserunt, in sententias omnino contrarias abierunt. Nam D. Alvarez, l. 2 de Auxil., disp. 7, n. 8, supponit tanquam certum, et ex Scriptura et Patribus satis probatum, Deum cognoscere aliqua futura conditionata, quæ de facto neque futura sunt, neque conditio quam includunt eventura est aliquando. Addit tamen Deum non cognoscere hæc futura ante decretum aliquod liberum, sed præcedere secundum rationem quoddam decretum conditionatum in quo a Deo cognosci possint; ut in exemplo illo vulgari de prædictione Christi: *Si in Tyro et Sidone*, etc., dicit habuisse Deum in sua æternitate ante scientiam illius futuri effectus hoc decretum conditionale: Si ego decrevissem ut talia signa et virtutes fierent in Tyro et Sidone, ego efficaciter facerem ut Tyrii et Sidonii crederent; et in hoc decreto cognovit certissime illam conditionem: Si in Tyro et Sidone factæ essent tales virtutes, pœnitentiam egissent. Et hanc sententiam secuti sunt postea aliqui ex magistris et lectoribus ejusdem familiæ, qui proinde non negant absolute scientiam hanc conditionatam, sed cum addito, videlicet, non esse possibilem talem scientiam, ut priorem omni decreto libero Dei, quod sit efficax respectu talis effectus, licet de facto non sit effecturum illum, quia

non absolute ponitur, sed solum sub quadam conditione, quæ ex alio decreto Dei absoluto futura non est. Hanc opinionem, quoad hæc decreta conditionata, probabilem judicavit tandem Cumel., in tom. 2 Opusc., disp. 1, in secunda ejus parte, de modo cognoscendi hæc futura, conclusione quinta.

3. *Ledesma aliter sentit.*—*Cabrera cum ejus doctrinæ impugnatione.*—At vero P. Ledesma, in disp. 2 de hac scientia, 2 part. seu difficultate principali, concl. 2 et 5, non solum asserit superiorem sententiam esse falsam, sed etiam improbabilem, tam quoad assertionem talis scientiæ, quam quoad illum modum quo haberi ponitur in decreto conditionato. Quam sententiam docuerat prius F. Cumel., 4 part., q. 14, art. 13, disp. 8, concl. 3, in qua dixerat quod, licet Deus cognoscat futura absoluta in suo decreto ac prædefinitione, conditionata vero non sic cognoscere, quia nihil de illis decrevit: *Sed respondent* (inquit) *nonnulli quod, licet Deus illa non decreverit absolute, nihilominus decrevit sub conditione*; et addit: *Ridicula sane responsio, quæ Deum imperfectum reddit.* Eandem sententiam tenuit Cabrera, 3 part., disputatione 1, § 22, a numero 338, ubi multis argumentis scientiam mediam seu conditionatam impugnat, et in n. 349, refert illum modum cognoscendi in divina prædeterminatione sub conditione, et ait: *Sed responsio frivola est, et in Deo imperfectionem constituit.* Inferius vero, num. 363 et 364, dicit idem auctor scientiam horum futurorum sub conditione, infallibilem et probabilem secundum exigentiam causarum, posse communicari creaturæ, et fuisse in anima Christi. Quæ quo modo cohæreant non video; nam si Deus non habet illam, quomodo communicavit eam creaturis aut animæ Christi. Nam si solum contendit de nomine *scientiæ mediæ*, satis frivola disputatio est: præsertim quia rationes ejus ad rem ipsam evertendam tendunt, non nomen, maxime cum diserte neget habere Deum talem scientiam etiam in suo decreto conditionato. Fortasse tamen, cum dicit posse communicari creaturæ, et fuisse communicatam minime Christi scientiam *infallibilem et probabilem*, non intelligit duos cognoscendi modos, ut verba ipsa præferunt, unum infallibilem in se, et alium probabilem in causa; sic enim esset repugnantia in dictis quoad primum membrum; sed intelligit unammet cognitionem, quæ absolute sit tantum probabilis, seu conjecturalis in causis, infallibilis vero non quoad veritatem rei in se, sed

tantum quoad probabilitatem. Sed tam est improprie sensus, ut sit parum verisimilis. Alia etiam est notanda repugnantia in illo auctore; nam in n. 345 sentit potuisse Deum hæc futura cognoscere, *quia intellectus divinus prævidit ad quid divina voluntas se determinare debuisset.* Quod, ut recte advertit Ledesm., non est consequenter dictum, cum non sit minus indifferens divina voluntas prius ratione quam se determinet, quam voluntas humana. Eandem fere doctrinam tradit idem auctor in quæst. 18, 3 part., art. 2, disp. 2, § 8; nihil tamen addit.

4. *Cabezudo id in parte sentit.*—Cum his etiam sentit Cabezudo, 3 p., q. 62, art. 5, q. 2., quoad negandam scientiam hanc infallibilem; quoad decreta vero conditionata, nihil clare dicit: nam in solutione ad 12, exponendo verba Christi: *Si in Tyro et Sidone*, dicit per illa verba significasse Christum quid contineretur in dispositione causarum, nimirum, quod Judæi erant indigni auxilio efficaci, et pejores seu indigniores Tyriis et Sidoniis. In solut. autem 13, ait scivisse Christum quod si Tyrii et Sidonii illa exteriora reciperent, etiam reciperent auxilium efficax, in quo significat habuisse Deum illud conditionale decretum; quomodo enim posset illud aliter sciri. Non tamen propterea illi tribuo hanc opinionem, quia potuit illud dicere in sensuposito in priori solutione; nam prius dicit jam esse explicata illa verba, et juxta illa videtur intelligere quod Christus illud scivit non certo et in se, sed quantum erat ex minori repugnantia Tyrionum; vel etiam potuit sentire, ut ex Cabrera proxime retuli, scivisse Christum, posita illa conditione, habituros fuisse Tyrios auxilium efficax, non quia jam Deus id decrevit, sed quia tunc illud decrevisset. Ex professo etiam scripsit contra scientiam mediam, seu conditionatam, Ripa in 1 p., q. 14, art. 13, dub. ult., qui, nulla distinctione vel limitatione adhibita, negat Deum cognoscere talia futura, nullamque facit mentionem conditionalium decretorum. Scripsit etiam his diebus peculiarem relectionem Blasius Verdu, in qua plurimis et acerrimis verbis scientiam mediam insectatur, de conditionatis autem decretis nihil dicit. Affirmat quidem, in tertia concl., Deum sua scientia naturali, seu simplicis intelligentiæ, cognoscere determinate et infallibiliter consensum determinatum possibiliter in tali ordine et præviis, ita ut hæc determinata cognitio non sit præcise in natura arbitrii comprehensi, sed in prævenientia et

prævia fiat, et in propositum Dei efficax volens movendo, seu permittens. Hæc fere est assertio ejus, quam magis declarans ait : Itaque asserimus præcognosci infallibiliter possibilem alterum consensum ex vi cognitionis eorum, quibus circumvenitur arbitrium absque libertatis jactura. Dum autem hanc scientiam dicit esse omnino naturalem, sentit profecto hanc scientiam antecedere secundum rationem omne decretum liberum quod Deus ex æternitate habuerit, sed sufficere ut sub conditione supponatur inclusum in his quibus circumvenitur arbitrium.

5. *In quo convenient auctores hujus sententiæ.* — Quamvis autem hi auctores in modo negandi vel admittendi scientiam conditionatam futurorum contingentium inter se dissentiant, in uno puncto maxime conveniunt, nimirum, non posse scire Deum determinate ad quam partem inclinanda sit libere voluntas creata applicata ad agendum cum omnibus prærequisitis, nisi secundum rationem præcedat in voluntate Dei decretum determinandi illam, vel absolute, vel ex hypothesi, juxta scientiæ qualitatem. Et quoad hoc allegant Scotum pro hac sententia, eo quod in 1, dist. 39, dixerit Deum cognoscere futuros actus voluntatis humanæ in absoluto decreto voluntatis suæ; nam videtur ponere illum modum præsciendi futura, vel ut unicum, vel ut ante omnem alium necessarium, et quasi fundamentum aliorum, si qui sunt : nam si hoc verum est in præscientia absolute futurorum, procul dubio eadem est ratio cum proportionem de conditionatis. Et eodem modo potest pro eadem opinione allegari Richardus in 1, d. 38, art. 1, quæst. 5, quatenus etiam ait Deum cognoscere futura absoluta in decreto suæ voluntatis, licet prius admittat scientiam illam in præsentia æternitatis. Et eodem modo allegari possunt qui ejusdem sunt sententiæ in futuris absolutis. An vero constans sit illatio, infra videbimus. Solent etiam allegari Alensis et Albertus, sed immerito, ut dicam. Addunt præterea auctoritatem negativam antiquorum scholasticorum; tum quia apud illos nulla mentio talis scientiæ invenitur : imo semper, dum de præscientia Dei tractant, ad illam decretum divinæ voluntatis absolute præordinans ac prædefiniens effectum requirunt; tum etiam quia adæquate dividunt scientiam Dei in scientiam simplicis intelligentiæ, et visionis, et ad neutram pertinet hæc scientia futurorum sub conditione, sive media, sive conditionata ap-

pelletur. Unde dicti moderni magnis probris et conviciis in hanc scientiam invehantur; vocant enim illam falsam novitatem, inutilem, levissimam, improbabilem, evidenter contra Augustinum et divum Thomam, et quam omnes doctores antiqui negant, ait Alvarez, disputat. 120, num. 4, et nostra sententia certum est non dari. Et hæc exaggeratio est, ut opinor, unum ex potissimis fundamentis hujus sententiæ. Cui additur infamatio contrariæ sententiæ, dicendo illam fuisse inventum Pelagianorum et Semipelagianorum, qui illam invenerunt ad salvandam certitudinem divinæ providentiæ, quia necessitatem divini concursus et efficacia gratiæ negabant; hunc enim putant illi auctores esse potentiorum modum sententiæ suam persuadendi. Addunt vero aliud fundamentum ex philosophia vel dialectica mendicatum, scilicet, quod in illis propositionibus, ut antecedunt ratione decretum Dei liberum, non est determinata veritas, nec cogitari potest modus quo illa attingatur; ergo non possunt cadere sub scientiam, etiam Dei. Hoc vero fundamentum, cum aliis quæ alicujus momenti fuerint, postea expendemus; nam omnia quæ hinc inde coacervantur, qualia sint, et facile a quocumque medioeri theologo conspici potest, et in medium afferre prolixum et inutile judico.

6. *Altera sententia contraria et affirmans refertur.* — Secunda principalis sententia docet cognoscere Deum in sua æterna præscientia hæc omnia futura, prius ratione quam aliquid de rebus ad extra producendis libere decernat, non per conjecturam, nec cognoscendo solum inclinationem seu pronitatem voluntatis liberæ in actu primo completo constitutæ, cum omnibus undique prærequisitis ad agendum : sed infallibiliter et determinate præsciendo quam partem sua libertate eliget, si non impediatur. Dum autem dicitur debere in illa hypothesi supponi voluntatem cum omnibus prærequisitis ad agendum, imprimis supponitur concursus Dei generalis in illa hypothesi inclusus, ut ex parte Dei sufficienter oblatum, ac subinde supponitur decretum Dei liberum concurrenti, quantum in se est, cum voluntate : nam hoc est unum ex maxime requisitis ad potestatem simpliciter operandi, seu volendi, ut in libr. 4 et 5 latissime ostendimus; non potest autem prævideri actus futurus, nisi prævideatur potentia simpliciter cum omnibus prærequisitis ad agendum, ut est per se notum : sicut etiam non potest actus præ-

videri, quin in eo prævideatur futurus concursus simultaneus intime in illo inclusus. Non est tamen necesse ut supponatur decretum aliquod liberum, ut secundum rationem præexistens in voluntate Dei; hæc enim videntur ab auctoribus prioris sententiæ confundi, cum omnino sint distincta, et multum referat illa distinguere. Nam aliud est ponere in objecto scientiæ voluntatem liberam Dei, aliud supponere illam in ipso Deo, quasi subiecto; quis enim dubitet per scientiam simplicis intelligentiæ præscivisse Deum, in sua æternitate, prius ratione quam vellet creare mundum, se posse voluntarie ac libere creare mundum? Quomodo enim posset velle illud creare, nisi præsciret se posse id facere, et voluntatem suam esse efficacem, ut si voluerit ad id determinare, id faciat? Illa ergo præscientia includit in suo objecto volitionem liberam Dei sub illa conditione, si determinetur, licet nondum supponat illam determinatam. Sunt ergo illa duo valde diversa. Unde in præsentia sententia sensus est, prius ratione quam Deus supponatur habere in se decretum liberum ac determinatum, quod voluntas creata velit, præscire quid hæc voluntas in tali opportunitate aut circumstantiis volitura sit, si Deus etiam ipse, voluntate sua libera, offerat sufficientem ac necessarium concursum ex parte sua, etiamsi nondum intelligatur Deus habere tale decretum offerendi vel non offerendi concursum.

7. *Ab hinc quadraginta annis cæpit nostra sententia.*—Hanc sententiam sic explicatam docuerunt a quadraginta vel pluribus annis Patres Societatis, et plures ex illis qui, per Dei gratiam, et sanæ fidei, et prudentiæ, ac religionis, et non medioeris doctrinæ ac eruditionis nomen, et auctoritatem non modicam obtinuerunt. Tenet illam expresse Cardinal. Tolet., super Luc., c. 10, annot. 18; Bellarm., libr. 2 de Amiss. grat., c. 17, ad 1, et latius lib. 1 de Grat. et lib. arb., c. 12 et 13 et l. 4, c. 15; Fonseca, l. 6 Metaph., c. 11, quæst. 4, sect. 8; Molin. in Concord., disp. 17, ad art. 13; Valentia, 1 part., quæst. 14, art. 13, punct. 1; et ibi Vasq., disput. 67; Lessius, in Opusc. de Auxil., c. 19; Benedict. Percir., lib. 16 Genes, cap. 11, disp. 7, circa illa verba, *Non desistent a cogitationibus suis*; Maldonat. Matth. 11; et D. Barradas ad eundem locum, tom. 3, lib. 2, cap. 11; Albertinus, in suis Corol., in 3, q. 3, Theolog., dub. 1; Joan. Lorin., Actor. 16, ad vers. 6; quibus ego fidenter adhæsi.

8. *Viri gravissimi qui eandem amplectuntur sententiam.*—Nec vero in hac causa soli fuimus, alii enim gravissimi omnium ordinum viri, vel recentiores, vel æquales, eandem sententiam ut verissimam amplexi sunt. Imprimis Algarbi. Episcopus, tractat. de Auxil., disp. 2, p. 3, n. 23, et disp. 3, part. 4, n. 6; Diotalevius, in egregio opusculo de hac ipsa scientia. Et late Alexand. Pesantius, 1 p., quæst. 14, art. 13, præsertim disp. 3 et ult.; P. Lorca, theologiæ primarius Complutensis, 1. 2, tom. 1, disp. 4 de Actib. human., § *In secundo puncto*, circa finem; et Ludovicus Tæna, prius in eadem universitate primarius, super epist. ad Hebr., cap. 4, difficult. 6, num. 12; item Joann. Alphonsus Curiel., Salmanticæ insignis primarius theologus, in lib. Controversiar., in 7, alias 1, ad locum Sapient. 4: *Raptus est*, etc.; quamvis enim dubium se ostendat, et non parum fundamenta nostræ sententiæ enervare conetur, tandem eam ut probabiliorem eligit, et in hoc etiam dicitur mutasse sententiam, quod hætenus examinare non licuit. Ante hos vero docuit hanc sententiam Stapleton., in Antidot. Evangel., ad 11 cap. Matth., ubi etiam Molinam et Gregorium de Valent. honorifice allegat. Idem habet in Antid. ad epist. ad Roman., cap. 9, ad versic. 12, § *Deum altitudine*, etc. Eandem sententiam ex professo disputat et affirmat Alphonsus Mendosa, in Quodlib. 7, scholast.: *Nulla ratione (ait) neganda est Deo certa, infallibilis et determinata cognitio illorum eventuum conditionatorum, et oppositum qui asserunt, plurimum derogant thesauris sapientiæ et scientiæ Dei, et ipsius capacissimæ cognitionis immensitati.* Et licet postea, inter varios modos hujus scientiæ, illum de cognitione in prævio decreto referat, et ut probabilem relinquat, non simpliciter illum approbat, sed alium addit postea, et plures antea posuerat, et certum credit non limitari immensitatem divini intellectus ad prævium decretum. Eandem sententiam expresse tenet Corduba, dicto lib. primo suarum Quæstionum, quæst. 53, dub. 10, § *Sed nota*, 2, ubi ait Deum in æternitate sua non prius determinare suam voluntatem ad concurrendum in tempore cum voluntate creata ad talem actum particularem, quam prævideat quod nostra voluntas sic applicata et disposita se determinabit ad volendum vel nolendum, seu ad producendum hunc vel illum actum: *Tunc (ait) et non ante divina voluntas se determinat ad volendum ta-*

lem actum. At futura determinatio voluntatis nostræ ad talem actum eliciendum contingens est; ergo ex sententia hujus auctoris præscit Deus illud futurum contingens ante absolutum decretum suæ voluntatis. Et reddit rationem, quia alias non posset concordari libertas voluntatis cum concursu divino. Præterea eidem sententiæ subscripsit Cumelius, et quod attinet ad ipsam scientiam, tanta asseveratione illam affirmat, ut in 1 part., quæst. 14, art. 13, disput. 8, in concl. 1, dixerit non esse tutum negare infallibilem et certam cognitionem contingentium conditionatorum in Deo. A qua sententia non recessit in Opusc., nam in dicta disput. 1 secundi tomi, addit *neque esse tutum, neque ullo pacto ferendum*, præsertim de his conditionatis quæ in Scriptura revelata sunt.

9. *Soto secundæ sententiæ fauet.*— Ante hos etiam et ante nos omnes hanc sententiam tuetur Soto, libr. 3 Summular., c. 8, lect. 3, et illam ponit inter prima dialecticæ rudimenta, tanquam rem illo tempore communiter receptam, et extra controversiam existentem. Ita vero illam sententiam explicat, ut dicat in his conditionalibus esse veritatem cognoscibilem ab ipso DEO, non in vi illationis, sed solum ex eo quod de facto nunquam poneretur in re antecedens sine consequente. In quo plane supponit non cognosci in aliquo decreto vel priori influxu prædeterminante, nam tunc veritas illa esset tantum ex vi illationis, quod ipse negat. Nec refert quod de propositionibus promissivis sub conditione loquatur, quia in illis includitur hæc conditionalis, si ille impleset conditionem, iste impleteret promissum, quæ est mere conditionalis contingens, quam ait Soto solum Deum nosse an sit vera vel falsa, quando conditio non est implenda, imo, quod magis est, etiam quando conditio impleri non potest, ut aperte dicit in solutione ad primum, in fine.

10. *Driedo, et alii hac scientia utuntur ad explicanda divina auxilia.*— Præterea magis theologice hæc scientia conditionata futurorum, ad explicanda divinæ gratiæ auxilia, nostris temporibus usi sunt: Driedo in Concordia, p. 1, cap. 4, ad 3, ubi, exponendo verba quædam Ambrosii exponentis illa verba: *Miserebor, cui miserebor, hoc est: Misericordiam dabo, quem præscivi conversurum*; et illa: *Hoc est dare cui est dandum, et non dare cui non est dandum, ut illum vocet quem sciat obedire; illum autem non vocet quem sciat non obedire*, addit ipse Driedo: *Voluit Ambrosius obe-*

dientiam seu cordis conversionem prævisam a Deo, esse finem vocationis, perinde atque finis gratiæ seu vocationis est usus gratiæ. Et addit: *Quia rationabile ac decens est Deum dare gratiam ei quem novit bene usurum gratia, idcirco dare illi, est dare cui est dandum.* In quibus verbis supponit præscire Deum an homo sit bene usurus vocatione, priusquam velit dare illam, quod non potest esse nisi per scientiam conditionatam. Et similiter tractans inferius sententiam Aug., dicit *consensum liberi arbitrii esse ex motione Patris cælestis sic trahentis illum, qualiter aptum novit.* Quæ notitia conditionata etiam est, ut constat; nec ab illo auctore ponitur in prævio decreto Dei prædeterminante, nam illud sæpe negat, ut in libro quinto videbimus. Et ibidem paulo inferius ita exponit verba similia Chrysostomi, quem constat etiam apud adversarios illa decreta prædeterminantia ad extra liberum arbitrium non posuisse. Eodem modo hac sententia utitur Ruard., art. 7, ut latius in libro quinto videbimus, ne sæpius ejusdem auctoris verba repetamus. Et eadem ratione possunt pro hac sententia allegari omnes catholici doctores, qui putant omnem antecedentem necessitatem factam voluntati, repugnare libertati ejus, et nihilominus salvant gratuitam Dei electionem et prædestinationem, et gratiæ ac vocationis efficaciam; hæc enim sine hac prævia scientia conditionata subsistere non possunt, ut contra nos argumentando adversarii fatentur. Sic autem maxime potest allegari Waldens., in Doctrinal. fidei, cap. 23 et 25, ubi inter alia multa habet hæc notanda verba: *Certe ille qui facit concordiam in sublimibus, non faceret illam concordiam inter necessitatem, quam Augustinus appellat extrinsecam, et Anselmus præcedentem, et liberum arbitrium.* Eodem modo potest referri Roffens., art. 32, § *Nemo sane*, et sequentibus.

11. *Antiqui theologi qui pro hac sententia allegari possunt.*—Ex antiquis theologis, omisso pro nunc divo Thoma, cujus mentem in speciali capite investigabimus, allegari imprimis possunt omnes qui negant Deum cognoscere futura libera in efficaci proposito suæ voluntatis, ut sunt Marsil. in 1, quæst. 4; Ocham., dist. 38, quæst. 1; et ibi Gabr., q. 1, art. 2; et præsertim Greg., quæst. 2, art. 2, ubi, contra Scotum, dicit tolli libertatem, si futura contingentia cognoscuntur a Deo, ut determinate vera in suo decreto. Et addit, in omni signo quo cogitetur propositio de futuro ante decretum, esse determinate veram vel

falsam. Ex quo principio evidenter sequitur idem sensisse de illis futuris conditionatis, ut repræsentatis in intellectu divino per scientiam simplicis intelligentiæ ante omne decretum liberum. In quo fundamentum contrariæ sententiæ evertit, ut constat. Illa autem sententia inter antiquos theologos valde communis est, ut infra lib. 5 ostendemus, referendo illos qui negant dari causis secundis auxilium prævium prædeterminans illas, et simultaneum non putant dari ex absoluta efficaci voluntate antecedente, sed vel ex concomitante, vel ex voluntate includente aliquam conditionem. Favent etiam huic opinioni qui dicunt aliquam præscientiam ad prædestinationem supponi, ut Ægidius, in 1, d. 40, quæst. 2, art. 2. Id enim non videtur posse intelligi nisi de hac præscientia conditionata; nam absoluta vel sequitur prædestinationem, vel est ipsa prædestinatio. Et hoc modo merito potest pro hac sententia allegari Joannes Arboreus, tom. 1 Theosoph., lib. 3, cap. 11, ubi, exponens vocationem quæ ab Augustino vocatur *secundum propositum*, dicit: *Hoc propositum ad præscientiam et prædestinationem Dei pertinet, nec prædestinatit aliquem, nisi quem præscivit crediturum et secuturum esse vocationem.* Hæc enim præscientia, cum ponatur antecedere vocationem et propositum ejus, non potest esse nisi conditionata. Denique favent huic sententiæ qui dicunt effectum contingentem posse certo cognosci ab eo qui omnes causas comprehenderit, et omnia quæ possunt illas impedire vel non impedire: nam in hoc eadem est ratio de effectibus futuris in tempore, et de futuris possibiliter, ut est manifestum; tenet autem id Argent., in 1, d. 40, art. 3, ad 6, contra 1 concl., et alii, ut infra attingemus.

12. *Secunda sententia longe primam superat auctoritate.*—Hæc ergo sententia auctoritate theologorum, non solum recentiorum, sed etiam antiquorum scholasticorum, longe contrariam superat, dummodo contra illam non stet D. Thom., quod nunc supponimus, et infra ostendemus. Quapropter nullus potest illam novam vocare, nisi qui vel antiquos non legerit, aut de nominibus voluerit potius disputare quam de rebus. Fundamentum autem hujus sententiæ primario nititur in auctoritate Scripturæ et Patrum: quia vero auctores utriusque partis illos in suum favorem allegant, paulatim singula expendere necesse est, postea vero vim rationum expendemus. Quia vero auctores prioris sententiæ divisi sunt, nam, ut dixi, multi eorum simpliciter

negant talem scientiam certam, alii vero illam admittunt, limitant tamen illam ad modum habendi illam post decretum liberum, et in illo; ideo prius stabiliemus veritatem et certitudinem talis scientiæ, nihil enim supponere volumus, ne aliqua ex parte rem infectam relinquamus. Postea vero ostendemus modum illum talis præscientiæ in proposito, non solum esse alienum a Scriptura et Patribus, et sine fundamento excogitatum, sed etiam absolute impossibilem.

CAPUT II.

DEUM HABERE CERTAM ET INFALLIBILEM SCIENTIAM FUTURORUM CONTINGENTIUM CONDITIONATORUM, EX SCRIPTURA, PROUT A PATRIBUS INTELLICTA EST, OSTENDITUR.

1. *Probatur ex sacra Scriptura.*—Nihil fere possum in hoc capite addere his quæ de eodem argumento in l. 2 de Scient. Dei dixi, nec tamen omnia repetam, sed duo vel tria testimonia selectiora, quamvis vulgaria, accuratius ponderabo. Primum est illud Matth. 11, et Luc. 10: *Væ tibi Corozain, væ tibi Bethsaida, quia si in Tyro et Sidone factæ essent virtutes quæ factæ sunt in vobis, olim in cilicio et cinere pœnitentiam egissent.* In his enim verbis continetur quædam propositio de quodam futuro effectu sub conditione, qui nunquam de facto fuit, quia conditio illa impleta non est, et illa conditionalis propositio a Christo tanquam vera dicta est; fuit ergo certissima et infallibiliter vera: ergo Christus, qui illam protulit, habuit scientiam certam et infallibilem illius contingentis futuri sub conditione: ergo multo magis illam habet Deus. Et qua ratione unum cognoscit, cognoscit omnia similia, quia eadem est de omnibus ratio.

2. *Prima responsio.*—Ducæ sunt evasiones. Prima est, illum Christi sermonem non esse intelligendum tanquam propheticum et ex certa scientia profectum, sed altero e duobus modis. Primo, ut non sit propria locutio assertiva, sed tantum figurata ad exaggerandum delictum Judæorum, juxta quemdam vulgarem modum loquendi, quo solent homines exaggerare factum aliquod per comparisonem ad aliud minus proportionatum; ut ad exaggerandam ingratitude annui, dicere solemus: Si extraneo vel inimico id fecissem, magis gratus fuisset; et ad reprehendendum fidelis delictum: Paganus hoc

non fecisset, sicut dixit Paul. 1 Corint. 5 : *Invenitur inter vos fornicatio, talisque fornicatio, qualis nec inter gentes.* Ita ergo dici potest in præsentī. Quia non est novum in Scriptura accommodare interdum sermonem ad vulgarem modum loquendi hominum, ut late Riber., Amos 2, n. 19; Cantapretensis, lib. 9 Hypothypos., regul. 2. Et hic locus videtur aptissimus, cum Evangelista dicat ita fuisse locutum ad exprobandum Judæis. Et hanc expositionem inter alias ponit Jansenius in Concord., cap. 47; non approbat tamen illam, nec in ea figit pedem, sed ut tolerabilem permittit. Neque negat quin possint illa verba secundum veram et propriam præscientiam intelligi; imo refert illam ut expositionem Augustini, eamque laudat et defendit. Calvinus autem negavit constanter Christum locutum fuisse ex præscientia, sed *ad communem humanæ mentis captum* (ait) *sermonem suum accommodavit.*

3. *Secundo responsio.*—Alius modus exponendi est, ut, licet Christus, asserendo et affirmando id dixerit, non tamen ut certum et infallibile, sed quantum ex dispositione talium hominum conjectari poterat. Quam expositionem indicavit etiam Calvin. relatus a Stapletonio ibi, dicens : *Non disputat Christus quid præscierit Deus, sed quid facturi fuerint alteri, quatenus ex re ipsa percipi poterat.* Unde Hilar. ibi, canon. 11, quasi per paraphrasim dicens : *Fortē illis credendi fuisset affectus, si talium virtutum contemplatio contigisset.* Nam dicens *forte*, indicat non fuisse propheticam infallibilem revelationem ex præscientia. Quæ particula paulo post additur ab ipso Evangelista Matthæo in simili exprobratione, comparatione Sodomorum facta, et in græco eadem particula reperitur. Adduntque aliqui Christum non dixisse omnes Tyrios et Sidonios fuisse pœnitentiam acturos, sed absolute civitates illas, totum a parte nominans, quia plures essent credituri. Quod cum confuse tantum, et non de certis personis dixerit, certum esse poterat in causa et in dispositione illorum populorum, quia non erant male affecti erga Christum. Denique hæc expositio sufficit ad exprobrationem, quam Christus intendebat; hoc enim solo titulo eos exprobrare voluit, quod essent magis indispositi ad credendum quam essent Tyrii; et ideo dixit Tyrios et Sidonios levius esse puniendos quam Judæos, non certe quia credituri essent, quia propter futura, sub conditione tantum, nec augetur nec minuitur pœna : ergo id dixit

Christus, quia tunc Tyrii non erant tam male affecti; ergo in hoc tantum ponit vim exprobrationis, non in eo quod infallibiliter crederent. Et hæc expositio placet maxime pluribus ex modernis defensoribus primæ opinionis, secundo modo explicatæ. Et eam constanter defendit contra Stapletonium Curiel, ubi supra, n. 62 et sequentibus.

4. *Nulla necessitas ita explicandi.*—Hæ autem expositiones essent quidem tolerabiles si essent necessariae, et si essent consentaneæ, vel non contrariæ traditioni Patrum; neutrum autem in eis invenio, et ideo verba Christi simpliciter ut assertiva, et ut infallibiliter vera, et ut ex præscientia prophetica, accipienda judico. Nam imprimis quod nulla sit necessitas confugiendi ad figuratas locutiones, id est quod agimus, et in discursu probabitur, et id supponunt Patres locum interpretantes. Inter quos Augustinus, de Bono perseverant., c. 9, ubi arguens Semipelagianos dicentes, homines judicari secundum opera præscita sub conditione tantum et nunquam futura, sic infert : *Nec damnarentur Tyrus et Sidon, quamvis remissius quam illæ civitates in quibus non credentibus a Domino Christo mirabilia sunt facta : quoniam si apud illas facta essent, in cinere et cilicio pœnitentiam egissent, sicut se habent eloquia veritatis, in quibus verbis Dominus Jesus altius nobis mysterium prædestinationis ostendit.* In quibus verbis evidenter docet Augustinus, primo, illa verba Christi non fuisse vulgarem exaggerationem propter reprehensionem, sed fuisse *eloquia veritatis*, quæ non sunt nisi propria, et assertiva rerum verarum. Secundo, docet illa verba esse adeo certa et infallibilia, ut, si per pœnitentiam sic præscitam absolvendi essent peccatores Tyrii et Sidonii, procul dubio nec remissive punirentur : iudicium autem Dei non fit per conjecturas vel humanas præsumptiones, sed per certam et infallibilem scientiam; supponit ergo Augustinus talem fuisse illam scientiam, quam Christus habebat de tali pœnitentia. Tertio, inde colligit Augustinus prædestinationis mysterium, quod etiam non satis colligeretur, nisi præscientia illa esset certa, unde subjungit : *Si enim quaeratur a nobis cur apud eos tanta miracula facta sint, qui videntes illa non fuissent credituri, et apud eos facta non sint, qui crederent si viderent, quid respondebimus?* Ubi etiam pondero tam verum et certum fuisse Augustino Tyrios et Sidonios credituros fuisse, si talia vidissent, quam fuit certum Judæos au-

dientes non credidisse. Denique postea expressioribus verbis id Augustinus testatur, illa tamen in caput sequens reservo, quia prior est locus.

5. Hinc idem Augustinus, in Enchirid., cap. 95: *Tunc*, id est, in die iudicii (ait) *non latebit cur apud quosdam non factæ sunt virtutes quæ si factæ fuissent, egissent illi homines pœnitentiam; et factæ sunt apud alios, qui non fuerant credituri. Apertissime namque Dominus dicit: Væ tibi, Corozain etc.*, ubi verbum *apertissime* attentissime considerandum est, explicat enim quanta certitudine id crediderit Augustinus. Nec aliter videtur sensisse Ambrosius, nam eadem verba exponens in Luc. 10, ait: *Docet graviore pœnæ obnoxios fore, qui Evangelium non sequendum, quam qui legem judicaverint solvendam; eo quod Tyrus et Sidon, si tanta virtutum cœlestium vidissent miracula, non desperissent remedium pœnitentiæ.* Ubi considero Ambrosium, absque ulla hæsitatione vel formidine, verbis Christi innixum, dixisse quod Tyrii et Sidonii non desperissent pœnitentiam, si illis æque ac Judæis prædicata fuisset. Additque ideo Judæos gravius fuisse puniendos quam Tyrios et Sidonios, quia gravius peccabant non credendo, quam isti naturalem legem violando. Quam rationem habent etiam Hieronymus, Chrysostomus, et alii; omnes tamen indicant præcivisse Christum futuram pœnitentiam Tyriorum. Maxime vero id declarat Anselmus, juxta doctrinam Augustini, et ideo dicit, quamvis illos prævidebat Deus habiles ad conversionem, non fuisse injustitiam illis talem vocationem negare, quia alias erant peccatores et gentiles, quibus statuerat non prædicari Evangelium donec Judæis esset oblatum et ab eis repudiatum, et addit: *Sed quare Deus negat gratiam (utique abundantiore) libenter suscepturis et gratiæ consensuris, non est nostrum scire; supponens profecto Tyrios et Sidonios tales fuisse.* Eodem fere modo loquitur D. Thom. ibi allegans Augustinum, in dicto lib. de Prædest. sanctorum, ejusque doctrinam sequens. Item de certa et infallibili præscientia exponit illum locum Remigius, quem sequitur ibidem Abulensis, q. 48; et in 51 dicit: *Christus testatur hic quod, si Tyrii et Sidonii fuisset Evangelium prædicatum pœnitentiam egissent.* Et in 52, explicans particulam *forte*, positam in posterioribus verbis de comparatione Sodomorum, dicit, cum Remigio, positam esse ut indicaretur quod, licet Deus certo id præscierit, et non

sub dubio, non imponit hominibus necessitatem.

6. *Probatur secunda opinio.* — His addere possumus similem locum apud Ezech., c. 3: *Non ad populum profundi sermonis et ignotæ linguæ tu mitteris.* Et infra: *Et si ad illos mittereris, audirent te.* Ubi Hieronymus et Theodoretus illa verba interpretantur esse prophetice dicta, ex vera et infallibili præscientia Dei. Neque est cur in eis fingamus exaggerationem, aut figuratum et vulgarem loquendi modum. Denique ad utrumque locum potest accommodari regula Augustini de interpretatione Scripturæ, ut proprietates verborum et rigorosa veritas servetur, ubi vel auctoritas vel necessitas non cogit aliter interpretari. Hæc enim regula non solum intelligenda est de singularum dictionum proprietate, sed multo magis de totius sententiæ proprio et non figurato sensu litterali. Quod maxime locum habet ubi proprius et rigorosus sensus magis deservit intentioni loquentis, quam figuratus, ut in præsentibus considerare licet in verbis Christi; nam licet, juxta alios sensus improprios aliqualis exprobratio possit subsistere, multo est major et efficacior, si intelligamus Christum ex propria præscientia loqui, quia sic comparatio est ad confundendos et convincendos Judæos aptior. Denique hoc modo magis ostenditur in illis verbis divina Christi sapientia et potentia virtutis ejus magnumque mysterium gratiæ et prædestinationis ejus. Non est ergo in hoc testimonio a verborum proprietate et communi Patrum auctoritate recedendum, ut etiam moderni interpretes graviore communitate senserunt, Cajetanus, Maldonat., Toletus et alii.

7. *Hilarius et particula forte secundum Augustinum intelligenda.* — Neque aliud sensit Hilarius, sed particulam *forte* posuit, quia Matthæus illam posuerat; unde credendum est in eodem sensu illam posuisse; Matthæus autem non posuit illam propter dubitationem aut incertitudinem cognitionis. Primo quidem quia probabile est particulam græcam illi correspondentem *αὐτοῦ*, magis esse expletivam et confirmativam sermonis, quam dubitationis, ut late comprobatur ex Scriptura Salmeron., in Proleg. 16. Et quamvis possit etiam esse potentialis, et ideo ab interprete vulgato in illo loco per particulam *forte* translata fuerit, nihilominus servanda est regula Augustini, tract. 37 in Joan: *Forsitan, dubitationis verbum est, quando dicitur ab homine idco dubitante, quia nesciente; cum vero dicitur a Deo*

verbum dubitationis, cum Deum nihil utique lateat, illa dubitatione arguitur infidelitas, non opinatur dixinitas. Et idem notat idem August. in' Psal. 2, circa fin.; et Chrysost., hom. 78 in Matth.; et Hieronymus, et Theodoretus in dictum locum Ezechiel. 3, et Jerem. 26; et Gregor., hom. 9 in Ezechiel., ubi ait vocem illam dubitationis, usurpatam in eloquio divino, aliquod aliud mysterium significare, scilicet, vel libertatem arbitrii, vel quod præscientia Dei non imponat humanæ voluntati necessitatem, vel quod in paucis contingere debeat id quod prædicatur, vel quia non vult Deus homines in desperationem vel nimiam securitatem inducere, quæ omnia in præsentī optime possunt accommodari. Quomodoque ergo illa particula ab Evangelista posita sit, nullo modo significat dubitationem, aut conjecturalem sermonem. Neque etiam existimandum est, eo quod Dominus simpliciter de Tyro et Sidone locutus sit, non designando certas personas, eas non cognovisse, sed in confusa tantum cognitione persistisse: talis enim cognitio non caret imperfectione propter confusionem, nec potest esse omnino certa, cum in morali tantum conjectura fundetur: aut non tam erit cognitio effectus, quam dispositionis causæ. Quæ omnia repugnant vel perfectioni Christi, vel proprietati verborum ejus; nam de ipso effectu, et satis in particulari loquitur, cum et modum et tempus, seu accelerationem pœnitentiæ indicet, dicens: *Olim in cilicio et cinere pœnitentiam egissent.* Non potest ergo de certitudine illius prophetiæ dubitari, nec quod fuerit a propria et prophetica scientia profecta. De modo autem, quod pertinet ad aliam illorum verborum interpretationem, postea dicemus.

8. *Aliud principale testimonium.*—*Scientia conditionata allocutus Dominus David 1 Reg. 23.*—Secundum et potissimum fundamentum hujus veritatis sumitur ex responsione Dei, 1 Reg. 23. Cum enim David, fugiens Saulem, se in Ceilam recepisset, et Saul obsidere urbem et illum comprehendere deliberaret, consuluit David Dominum dicens: *Si tradent me viri Ceilæ in manus, et si descendet Saul, sicut audivit servus tuus, Domine Deus Israel, indica servo tuo. Et ait Dominus: Descendet. Dixitque David: Si tradent me viri Ceilæ, et viros qui sunt mecum, in manu Saul? Et dixit Dominus: Tradent.* Postea vero, fugiente David, nec Saul obsedit civitatem, nec Ceilitæ tradiderunt David. Fuit ergo illa revelatio pure conditionalis, duasque contingentes proposi-

tiones conditionales continuit. Una fuit: *Si David perseveraverit intra Ceilam, Saul descendet ad obsidendam civitatem.* Altera est: *Si Saul descenderit et obsederit civitatem, viri Ceilæ tradent David.* Optime ergo sciebat Deus veritatem illarum propositionum, alias non fuisset infallibile ipsius responsum.

9. *Prima responsio.*—Hunc locum, quamvis expressus satis videatur, duobus modis effugiunt auctores contrariæ sententiæ. Prior est, ut illis verbis nihil de futuro eventu reveletur, sed tantum de præsentī voluntate Saulis et Ceilitarum. Supponit enim hæc expositio David non interrogasse Deum de futuro eventu, sed de voluntate et deliberatione quam jam tunc habebant Saul et viri Ceilæ. Nam, ut ille fugeret, satis illi erat, certo scire quid machinabatur Saul, et quid cogitabant et secum jam statuebant cives circa traditionem ejus; quia vero neutrum sciebat, sed de adventu Saulis solum per famam audierat insidias ejus, ut ipse dixit consulendo Deum, et de consiliis secretis principum Ceilæ nihil nosse poterat, voluit de his per divinam revelationem certior reddi. Unde, cum Dominus respondit: *Descendet, tradent,* sensus est: Hoc molitur Saul, et hoc cogitant viri Ceilæ. Nec expositio caret auctore, nam paraphrasis chaldaica ita exponit interrogationes David: *Num cogitans descendere? num cogitantes tradere?* Et in responsione Dei addunt: *cogitat descendere, cogitant tradere.* Et Glossa Interlinear., ad verbum *tradent,* hanc habet Glossam: *In voluntate habent, ut tradent;* et Matthias Thoringis, replicator Lyræ, ibi annot. 1, etiam dicit Deum solum revelasse quæ Saul et Ceilitæ habebant in corde, quia putat illam conditionalem non esse veram.

10. *Responsio posita non est admittenda.*—Nihilominus censeo hanc expositionem probandam non esse, multam enim vim infert Scripturæ verbis. Si autem licet verba Scripturæ, propter privatas opiniones, additionibus et proprietatibus verborum corrumpere, nihil certum erit in ejus revelationibus et assertionibus; cum enim Scriptura expresse dicat interrogasse David: *Si descendet? Si tradent?* et Deum simpliciter et pleno ore respondisse: *Descendet, tradent,* quæ omnia sunt verba futuri eventus, quis audeat dicere Deum nihil de futuro eventu, sed solum de præsentī cogitatione aut deliberatione certiore fecisse David? Unde contra verba tam expressa nullius ponderis sunt Paraphrasis Chaldaica, vel Glossa interlin. Quod si addendo et impr-

priando aliquid interpretandum est, exponantur potius hoc modo illi auctores quam Scriptura. Cum enim significant revelasse Deum præsentem cogitationem et voluntatem, pie exponi debent, quod et voluntas præsens et perseverantia in illa usque ad effectum, si David non fugeret, fuerit revelata. Alioqui eorum expositio admittenda non est, quia multum repugnat veritati et proprio sermoni Scripturæ: quod generaliter reprehensibile est, quoties sine causa vel urgente auctoritate fit, ut sæpe diximus; maxime vero in historica narratione, quæ solet esse simplex et omnino propria.

11. *Litteralis ac propria expositio.* — Accedit quod ita intellexit verba illa Hieronymus, lib. Quæstion. in 1 Reg., ubi verbum Dei *descendet* exponit: *Ac si diceret: Si hic steteris, descendet.* Et in verbo *tradent*, ait: *Iste est sensus: Si descenderit Saul, et hic te inveniet, tradent.* Ex quibus Hieronymi verbis sumitur optimum argumentum; nam interrogatio David non solum de præsentis tempore, sed maxime de futuro, et addita vel subintellecta conditione, vel una, ut in prima interrogatione, scilicet: Si hic permansero, veniet Saul? vel duplici in altera interrogatione, videlicet: Si hic perseveravero, et Saul venerit, tradent me? At vero interrogatio de sola præsentis cogitatione aut voluntate non recipit conditionem, ut per se constat: ergo non fuit illa interrogatio David, et consequenter neque Deus in illo sensu respondit. Ejusdem sententiæ fuit Theodoret., lib. Quæstion. in 1 Reg., n. 54, ubi de David ait: *Divina Scriptura ostendit ejus pietatem, semper enim Deum sciscitans, et aciem instruebat, et quiescebat.* Et addit: *Cum itaque rescivisset Saulem accedere, etc., sciscitatus est num eum essent tradituri; et cum ex eo didicisset eos esse dedituros, migravit in alium locum.* Expressius Lyra Dei verbum *descendet* ita exponit: *Si manseris in civitate, descendet;* et verbum *tradent* ita: *Si manseris in civitate, et Saul illuc tenerit, tradent.* Itaque *conditionalis est vera, quævis neutrum contenerit.* Quam sententiam defendit ibi Burgensis, quia illa *conditionalis vera est et necessaria, ut subest scientiæ Dei, esto secundum se ex vi solius illationis non sit necessaria.* Et idem tanquam certum supponit ibi Abulens., quest. 13.

12. *Secunda responsio Scripturæ inepta.* — Alter modus fugiendi vim hujus loci est, David quidem interrogasse de futuris eventibus, et Deum de eisdem respondisse, non tamen ex

certa scientia, sed ex conjectura, non quod vel scientia Dei in se formaliter spectata sit tantum probabilis, nec dictum ejus in eo sensu accipiendum sit in quo sit fallibile, sed quod Deus evidentissime cognoscat præsentem dispositionem talium voluntatum, ratione cujus sunt magis propensæ in hunc effectum, et, quantum est ex vi illarum, verisimilius est illum effecturas quam alium, ita ut illud *verisimilius* ex parte objecti accipiatur, non ex parte scientis; et in simili sensu verba revelationis accipiantur, scilicet, *tradent*, subintelligendo, quantum ex proposito et dispositione talium voluntatum conjectari potest. Et suadent hanc expositionem aliis Scripturæ exemplis, in quibus Deus absolute loquitur, et tamen revelatio non est absoluta, sed subintellecta conditione, ut in Ninivitis Jonæ 4, et in Ezechia, cum illi Isaias, cap. 38, dixit: *Morieris.* Et idem in comminatoriis prophetiis invenitur, ut observat D. Thomas 2. 2, q. 171, art. 6, ad 2, et 1 part., quæst. 19.

13. *In quo conveniat secunda responsio cum prima; in quo differat.* — Hæc vero expositio partim convenit cum præcedenti, partim addit aliquid minus probabile. Convenit enim quatenus ait Deum certo non revelasse David, nisi præsentem actum vel dispositionem personarum; addit autem etiam revelasse tales homines in ea voluntate permansuros fuisse usque ad effectum, hoc tamen non absoluta assertionem, sed subintellecta limitatione, quantum ex dispositione causarum judicari poterat. Nos autem imprimis dicimus Deum nihil de præsentis dispositione illorum hominum habitatorum Ceilæ revelasse; præcise enim dixit: *Tradent;* et fieri poterat ut tunc non haberent tale propositum, nec aliam affectionem ad illum effectum vehementer inclinantem, et nihilominus postea ex sua libertate id facerent. Ergo, sine fundamento in revelatione vel in verbis Scripturæ, cogitatur quidquid de illo affectu dicitur. Deinde dicimus alienum valde esse a divina perfectione conjectura uti, et ex illa sola absolutum proferre sermonem; non enim *opinatur divinitas*, ut Augustinus dixit. Nec refert dicere illud non esse *judicium opinativum, sed certum de probabilitate effectus eventuri ex talibus causis;* nam, quod attinet ad imperfectionem cognitionis de tali effectus futuro, in idem redit, vel recurrendum est ad aliam responsionem, quod illa non est cognitio effectus ut futuri, sed tantum ut possibilis ex tali causa cum majori propensione, quod jam rejectum est, quia est contra veritatem

verborum, nisi illis magna vis fiat, et ad figuratos sensus transferantur. Limitare autem divinam scientiam ut non possit de tali effectu, ut futuro, nisi conjecturalem cognitionem assequi, multum certe derogat divinæ perfectioni, et ideo hanc etiam limitationem voluit excludere Augustinus, cum dixit: *Non opinatur divinitas.*

14. *Conjecturalis interpretatio contra veritatem, et proprietatem.* — Et præterea hoc etiam est contra perfectam veritatem Dei in loquendo, aut contra vim verborum dictæ revelationis: nam dubia pro certis affirmare contra veritatem est; ibi autem Deus simpliciter affirmavit, *Tradent*, et eo ipso quod ipse dixit, certum esse voluit: ergo proprie accipiendo illa verba, contra veritatem erant, si illa revelatio ex sola conjecturali cognitione oriebatur. Si autem, ad salvandam verborum veritatem, subintelligenda dicatur limitatio quantum est ex parte causarum, hoc ipsum est miserum refugium contra verborum vim et simplicem intellectum: unde non salvat simplicem veritatem. Quia absoluta locutio, quæ simpliciter sumpta est falsa, et solum per subintellectam additionem est vera, non est usurpanda a viro prudente, nedum ab ipso Deo, nisi vel consuetudo loquendi id habeat, vel aliqua specialis causa et necessitas id postulet; neutrum autem in præsentī invenitur.

15. *Confirmatio ex incommodis quæ sequuntur ex solutione.* — Et confirmatur, quia alias potuisset David dubitare, non obstante tali revelatione divina, an esset tradendus a Ceilitis, etiam veniente Saule, nec teneretur majorem fidem adhibere illi responso Dei, quam si a dæmone datum esset, quantum est ex parte cognitionis: utrumque autem videtur absurdum. Item fingamus in eo casu Ceilitas habuisse animum et dispositionem magis propensam ad non tradendum David, eumque postea expectasse, et non fugisse, tunc, si vera est illa interpretatio, potuisset contingere ut, expectante Davide et veniente Saule, viri Ceilæ, pro suo arbitrio, mutarent propositum vel affectionem, et traderent David, quia hoc non esset contra revelationem Dei in illo sensu factam. At profecto non immerito conqueri posset David quod esset a Deo deceptus, talisque eventus multum derogaret auctoritati Dei loquentis. Ergo non est verisimile aut Deum consulturum esse illo modo, si non speraret certam cognitionem, de futuro vel non futuro eventu sub tali vel tali conditione, recipere: aut Deum fuisse responsurum, si de re non si-

bi cognita loqueretur. Et simpliciter mihi videtur incredibile et Deo indignum, sentire, non posse illum absolutum ac certum responsum dare de tali eventu, si de illo interrogaretur. Est ergo illa expositio contra factum ipsum, prout a Scriptura refertur, et contra summam Dei perfectionem, considerando ipsam ut possibilem, quidquid fuerit de facto.

16. *Comminationibus objectis satisfi, et nostra sententia confirmatur adhuc.* — Neque sunt similia exempla de aliis revelationibus comminatoriis, vel tacitam conditionem includentibus; tum quia in comminationibus est ille valde usitatus modus loquendi, quasi per se et ex vi materiæ includens talem conditionem; tum etiam quia conditio subintellecta in aliis locutionibus non provenit ex impotentia (ut sic dicam) Dei ad certo cognoscendum id quod affirmat, sed ex ipsamet voluntate Dei ab ipsomet in aliis locis revelata. Ut in comminatione includitur conditio, Nisi pœnitentiam egeris, quam revelavit Deus aliis locis, promittendo pœnitentibus remissionem, et dicens per Jeremiam, cap. 18: *Repente loquar adversus gentem et adversus regnum, ut eradicem et destruiam et disperdam illud; si pœnitentiam egerit gens illa a malo suo, agam et ego pœnitentiam super malo, quod cogitaveram ut facerem ei.* Et similiter in prædictione mortis Ezechix, fuit conditio inclusa, Nisi aliud a Deo impetraveris, quæ conditio continetur in promissione Dei, quod exaudiet orantes ad se, quando et quomodo fuerit conveniens. Et ideo in illis et similibus revelationibus, nec periclitatur veritas vel auctoritas Dei, nec vis infertur verbis secundum communem loquendi modum; cujus signum est, quia, non obstante tali comminatione vel prædictione, potest qui audit, licite dubitare de eventu, juxta illud Ninivitarum apud Joannem: *Quis scit si convertatur, et ignoscat Deus.* Et ideo Ezechias, statim ac audivit verbum Prophetæ, oravit ad Dominum, non credens prædictionem ut absolutam et immutabilem; nam juxta alias promissiones ejusdem Dei credidit esse possibilem mutationem in effectu, seu in causis. At vero hæc non habent locum, ubi revelatio est absoluta et non includit tacitam conditionem pendentem ex alia promissione et voluntate Dei, sed solum ex illa conditione quæ in ea exprimitur; tunc enim non licet de tali revelatione dubitare, nec aliquid addere, solum eo prætextu quod Deus non potuerit certius illa cognoscere; hoc enim contra vim verborum est et contra usum

Scripturarum, ac proinde contra verborum vim et proprietatem.

17. *Egregius locus Jeremiæ 38 nostra probans.*—Tertio, expendi potest locus Jerem. 38, ubi variæ sunt prophetiæ prædictiones conditionales Jeremiæ ad Regem Sedeciam. Una est: *Si exieris ad principes regis Babylonis, vivet anima tua et civitas hæc non succendetur igni, et salvus eris tu, et domus tua; cumque rex respondisset: Sollicitus sum propter Judæos qui transierunt ad Chaldæos, ne forte tradar in manus eorum, et illudant me,* adjecit Jeremias similem prophetiam: *Non te tradent, utique Si exieris, etc.* In hoc ergo loco prædicuntur multi effectus contingentes, et pendent ex libertate Chaldæorum, et futuri sub conditione, quæ impleta non est, et ideo nunquam fuerunt. Profecto ergo est illa prophetia ex infallibili scientia Dei, et ad hoc significandum præmittit Jeremias: *Hæc dicit Dominus exercituum Deus Israel; et inferius, postquam dixit: Non te tradent,* subjungit: *Audi, quæso, vocem Domini, quam ego loquor ad te.* Unde in tam perspicuo sermone non habet locum aliquis tropus, nec interpretatio de prædictione conjecturali in dispositione humanæ voluntatis; tum quia voluntates Chaldæorum potius erant aversæ, et dispositæ ad occidendum Judæos; tum etiam quia alias non peccasset Sedecias non credendo, ac dubitando, et ob timorem ambiguum non exeundo. Atque ita hic locus videtur mihi convincere id quod nunc agimus, quod dari possit hæc scientia. Nam revera non potest ille locus non intelligi de vera, propria, et absoluta prophetia, quantum ad veritatem rei revelatæ; et ita plane exponunt Theodoret., divus Thomas, et Glossæ. Fortasse tamen quoad modum illius præscientiæ non convincit contra primam sententiam primo modo explicatam, de quo postea dicam.

18. *Nostra sententia pluribus aliis Scripturæ testimoniis probatur.*—Quarto, videtur satis efficax locus Actor. 22, ubi Paulus narrat vidisse se Dominum dicentem sibi: *Pestina, et exi velociter de Jerusalem, quoniam non recipient testimonium tuum de me.* Quæ verba evidenter includunt conditionalem propositionem: *Si Hierosolymis prædicaveris, non recipient testimonium;* cum enim Paulus inde exierit, et non prædicaverit, ille effectus nunquam fuit absolute futurus: ergo fuit revelatus sub conditione. Quis autem audeat dicere illam non fuisse veram et absolutam revelationem de tali effectu sub conditione fu-

turo, aut Christum fuisse ex conjectura, aut non ex certa scientia locutum? Quinto, facit illud Exod. 3: *Ego scio quod non dimittet vos rex Ægypti, nisi per manum validam.* Nam illa scientia de conditionali eventu erat, et ipsum verbum *scio* satis indicat cognitionem certam et evidentem, maxime conjunctum cum pronomine *Ego*, quod denotat illam scientiam esse divinam, ac proinde omnino infallibilem. Et ita exponit ibi Theodoretus, quæst. 8. Sexto, addi potest illud tertii Regum 11, ubi refertur Salomonem adamasse mulieres alienigenas *de gentibus, super quibus dixit Dominus filiis Israel: Non ingrediemini ad eas, neque de illis ingredientur ad vestras, certissime enim avertent corda vestra, ut sequamini deos earum.* In loco autem Exod. 34 solum dictum fuerat: *Nec uxorem de filiabus earum accipies filiis tuis, ne postquam ipsæ fuerint fornicatæ, fornicari faciant filios tuos in Deos suos.* In quibus verbis, per se spectatis, ut indicavit D. Thomas 1. 2, quæst. 105, a. 4, ad 6, solum significari videtur periculum et occasio moralis; tamen per hoc non excluditur quin fuerit tale illud periculum, ut in re ipsa ex illo esset futurus effectus, et ita in alio explicatur Deum certissima scientia novisse in pluribus et in quibus ille effectus, posita conditione, implendus esset. Fateor tamen posse illam certitudinem referri ad effectus et lapsus quos Deus, absoluta scientia, futuros esse ob similem occasionem præcognovit. Denique induci potest illud Matth. 24: *Nisi breviati fuissent dies illi, non fuisset salva omnis caro.* Cui consonat illud Isai. 1: *Nisi Dominus reliquisset nobis semen, sicut Sodoma et Gomorrha fuissetis.* Et similes sunt aliæ locutiones in Scriptura: sed non omnes æque urgentes.

19. *Judicium istius opinionis.*—Et ideo, illis non obstantibus, aliqui dicunt non probari hanc scientiam efficaciter ex Scriptura. Qui si per *efficaciter* intelligant, id est, non convinci rem esse de fide certam, recte dicunt, quia Scriptura non tam evidenter loquitur, quin aliquam evasionem patiat. Et cum Ecclesia nihil in hoc definierit, nec proprium sensum illorum testimoniorum declaraverit, per se non sufficiunt ad certam et infallibilem fidem faciendam. Si autem negare velint illa testimonia esse efficacia ad faciendam magnam fidem humanam, et intra latitudinem opinionis longe probabiliorum, immerito id dicunt; non video enim quæ majora testimonia, vel in numero, vel in ver-

horum proprietate et energia, ad veritatem aliquam, nondum de fide certam, persuadendam desiderari possint. Maxime cum ille sensus talium testimoniorum sit consentaneus expositionibus Patrum, qui illa exponendo attigerunt. Cumque opposita sententia nullum in Scriptura habeat fundamentum, ut etiam defensores ejus fatentur, negari non potest quin hæc sententia quam defendimus, valde probabiliter ex Scriptura colligatur. Accedit tandem quod contraria sententia nihil ex Scriptura, nisi quædam generalia principia, non ad suam opinionem suadendam, sed ad nostra fundamenta enervanda, potest inducere. Qualia sunt, quod Deus interdum sæpe loquitur de futuris effectibus juxta dispositiones causarum secundarum, etiamsi aperte id non explicet, ut notat D. Thomas, 1 part., quæst. 19, artic. 6, ad 2, ex Isai. 38, et 2. 2, quæst. 171, artic. 6, ad 2, ex Jonæ 3, et Jerem. 18. Et idem sumitur ex Jerem. 23; Ezechiele, secundo et tertio; Genes. 3; Exod. 23; Deuteronomii quarto et septimo. Unde suadere volunt omnia allegata testimonia posse hoc modo exponi: præsertim cum addatur particula *forte*, quæ, licet in aliquibus locis non sumatur in significatione propria, nihil vetat in aliis proprie sumi, et consequenter ita posse in prædictis locis exponi.

20. Sed hæc, quæ (ut dixi) generalia sunt, non recte applicantur. Ut enim verum sit Deum interdum loqui de futuris juxta dispositionem causarum secundarum, non est id pro libito applicandum ad quamcumque prædictionem fucturorum, alias destruitur certitudo prophetica, juxta doctrinam Augustini, libr. de Unitat. Eccles. capite 9, et lib. 3 de Doctrina Christiana, cap. 10. Oportet ergo et locorum circumstantias, et doctrinas, ac expositiones Patrum observare. Illum ergo modum loquendi observat Deus, vel in prophetiis comminatoriis, vel in effectibus qui a sua voluntate et ex aliis promissionibus ab ipso factis pendent, ut supra declaravi. Sæpe item invenitur ille modus loquendi in verbis Dei, quæ non continent revelationem, sed admonitionem, consilium, aut reprehensionem, ut in multis ex locis allegatis videre licet. Et in eis sæpe additur particula *forte*, in omni proprietate intellecta. Hæc autem non possunt accommodari ad testimonia a nobis adducta, tum quia in illis continentur revelationes divinæ cum absoluta asseveratione, et sine circumstantiis quæ subintellectam conditionem

vel improprietatem indicent. Nec particula *forte* semper addita est, et non est dubium quin sæpe adjungatur ubi de rebus certissimis et iudubitatibus sermo est, ut Psalm. 80: *Si populus meus audisset me, forsitan inimicos illorum humiliassem.* Et Jerem. 6: *Erudire, Jerusalem, ne forte recedat anima mea a te.* Et docent Patres supra citati, ex quorum doctrina hæc proprietates melius servatur in locis allegatis, ut ostensum est.

CAPUT III.

PLURES EX SANCTIS ET ANTIQUIS PATRIBUS SCIENTIAM CONDITIONATAM IN DEO COGNOVISSE, PRÆSERTIM AUGUSTINUM, ET NULLUM EORUM ILLAM DEO NEGASSE.

1. *D. Augustinus verbis probatur.* — Primum omnium tribuo sententiã hanc Augustino in lib. de Corrept. et grat., cap. 8, ubi, probans perseverantiam esse ex gratuito Dei dono, illos adducit in exemplum, qui, cum essent justi, *donum perseverantiæ non habent, sed ex bono in malum, deficiente bona voluntate, mutantur*; et addit: *Respondeant, si possunt, cur illos Deus, cum fideliter et pie ticerent, non tunc de vitæ hujus periculis rapuit, ne malitia mutaret intellectum eorum, et ne fictio deciperet animas eorum. Utrum hoc in potestate non habuit, an eorum mala futura nescivit? Nempe nihil horum nisi percersissime et insanissime dicitur.* In quibus verbis, illa, *an eorum mala futura nescivit?* evidenter de scientia conditionata intelliguntur, quia loquitur Augustinus de scientia, qua supposita, posset Deus, si vellet, rapere hominem, priusquam talia mala committeret, etiam in sensu composito talis scientiæ, sicut fecit cum illo de quo Sapient. 4 dictum est: *Raptus est, ne malitia mutaret intellectum ejus.* At vero, semel supposita in Deo scientia absoluta futurorum, non potest cum illa scientia locum habere antecedens mors, priusquam talia committantur peccata, quia supponitur jam prævisa vita usque ad illud tempus.

2. *Non de probabili conjectura, sed de certa scientia est locus citatus.* — Loquitur ergo Augustinus de scientia conditionata, et dici non potest ipsum loqui tantum de probabili conjectura ob pericula hujus vitæ; tum quia expresse interrogat *an eorum mala futura nescivit?* utique si viverent; de ipsis ergo futuris malis loquitur; tum etiam quia sola pericula vitæ præcognita, nisi etiam lapsus oc-

occasione illorum futurus prævideatur, non poterant esse sufficiens ratio rapiendi justum, priusquam malitia mutaret illum, alias omnes justi, statim ac justificantur, rapi debuissent, quia omnes in tali periculo versantur. Quod si hoc restringatur ad speciale periculum in quo lapsus probabilissima conjectura timeatur et in tali causa cognoscatur, sic non potest doctrina esse universalis: nam multi justii cadunt, qui non habent specialia pericula, sed facillime occurrentibus tentationibus cedunt. Ergo non præcedit illa conjectura specialis, quod essent lapsuri si viverent, nam multi, et fortasse plures similes, perseverant semper in gratia inter similia pericula, et similia etiam gratiæ prævenientis auxilia, ut inter religiosos maxime considerare licet; et nihilominus de illis verissime dicitur quod Deus, præsciens ipsorum lapsum, potuisset, si vellet, eos rapere, ne malitia mutaret intellectum eorum. Nam doctrina Augustini universalis est, et in omnibus qui de bono in malum mutantur, et ita pereunt, locum habet. Eo vel maxime quod est valde alienum a doctrina et mente Augustini, scientiam conjecturalem Deo tribuere, ut ex tract. 35 in Joannem allegavimus. Loquitur ergo de certa scientia talium futurorum, quæ sola et Deo digna est et propria; nam aliam conjecturalem in causa etiam dæmon habere potest; imo si de omnibus periculis vitæ sermo sit, etiam nos illam habemus. At Augustinus aliquam scientiam Deo attribuit singularem, et illi propriam, quæque ad altissimam ejus providentiam et prædestinationem sufficiat. Igitur de incertitia huic scientiæ contraria, æque ac de impotentia, ait Augustinus *nonnisi perverissime et insanissime Deo attribui*. In quo ego nihil ex me assero, sed solum quod Augustinus dicit refero; qui autem Deo illam nescientiam tribuunt, excogitent modum quo sub Augustini censura non comprehendantur, eum exponentes altero ex duobus modis quos impugnavimus.

3. *Augustinus constans semper fuit in conditionata scientia.* — Secundo, allego August. in Epi t. 49, quæst. 2, ubi, inquirens cur Incarnatio tali tempore facta sit, rationem reddit ex hac præscientia, dicens *tunc voluisse in hominibus apparere Christum, et apud eos prædicari doctrinam suam, quando sciebat et ubi sciebat esse qui in eum fuerant credituri*. Respondent aliqui retractasse Augustinum locum hunc in lib. de Prædest. Sanct., c. 9. Ego vero dico non solum non retractasse, sed

potius confirmasse. Sunt enim in hæc scientia duo distinguenda, quæ pro his quæ dicemus sunt valde notanda, scilicet, eam esse vel non esse, vel, supposito quod sit, ea uti ad reddendas rationes aliquorum effectuum providentiæ Dei: nam licet verissime Deo talis scientia tribuatur, errari potest in usu ejus. Augustinus ergo in posteriori loco retractat aliquo modo priorem, quoad usum illius scientiæ, non quoad existentiam ejus in Deo, imo, hanc iterum confirmat; verba enim ejus sunt: *Cernitisne me sine præjudicio latentis consilii Dei, aliarumque causarum, hoc de præscientia Christi dicere voluisse, quod convincendæ paganorum infidelitati, qui hanc obiecerant questionem sufficere videretur? Quid enim est verius quam præscisse Christum, qui, et quando, et in quibus locis in eum fuerant credituri?* In his ergo verbis recognoscit Augustinus Deum habere illam scientiam, et non solum verum id censet, sed etiam nihil verius judicat. Addit tamen potuisse etiam dici *tunc voluisse hominibus apparere Christum, et apud eos prædicari doctrinam suam, quando sciebat et ubi sciebat esse, qui electi fuerant in ipso ante mundi constitutionem*. Per quæ verba non reprobat priorem sententiam de scientia Dei conditionata, imo nec priorem rationem simpliciter retractat, sed aliam altiorem addit, causamque assignat cur illam omiserit.

4. *De veritate scientiæ conditionatæ, non de absoluto decreto sermo est.* — Hinc vero sumunt occasionem respondendi, admisisse quidem Augustinum in utroque loco illam scientiam, sed in posteriori loco declarasse talem scientiam fundatam fuisse in absoluto decreto voluntatis Dei, quo tales homines tali tempore futuros prædestinaverat. Sed de hoc puncto postea dicendum est; nunc enim non de modo, seu medio quo scientia illa videt futura, sed solum de veritate ipsius scientiæ tractamus. Expendimus autem alia verba in eadem epistola Augustini, quibus illa responsio accommodari non potest; subjungit enim: *His enim temporibus et his locis in quibus Evangelium non est prædicatum, tales omnes in ejus prædicatione futuros esse præsciebat, quales non quidem omnes, sed multi in corporali præsentia fuerunt, qui in eum, nec suscitatis ab eo mortuis credere voluerunt; et infra: Quid ergo mirum si tam infidelibus plenum orbem terrarum Christus prioribus sæculis rogerat, ut eis apparere aut prædicari merito nolle, quos nec verbis nec miraculis suis credituros esse præsciebat?* Et similia in fine repetit. At

de his dicere non possumus Christum noluisse venire, aut Evangelium prædicari, quando vel ubi sciebat esse, quos ipse ante mundi constitutionem ad non credendum elegerat; tum quia Deus non subtrahit illis auxilium qui non sunt illo bene usuri; tum etiam quia Deus ex se neminem eligit ad non credendum, vel ut damnetur; ergo saltem hæc præscientia mali usus gratiæ, si detur, non potest resolvi in electionem Dei, ut capite sequenti latius ponderabo.

5. *Responsio impugnatur.*—Scio non defuturos qui respondeant reduci in non electionem; itaque, eo ipso quod Deus scivit se non elegisse illos, scire potuit illos non consensuros, vel male usuros vocatione gratiæ. Sed hoc non potest satisfacere, quia si sit sermo de non electione mere negativa, illa non est decretum Dei liberum, sed carentia decreti liberi, quæ non est operativa ad extra: unde non potest efficaciter determinare liberum arbitrium, ut propterea in ea infallibiliter sciatur quid esset sub tali conditione futurum a libero arbitrio. Si vero sit sermo de positivo proposito non eligendi, illud etiam propositum, cum solum habeat pro objecto negationem alterius propositi Dei, nihil etiam ad extra operatur, quia per illud nihil ad extra vult Deus; solum ergo quasi formaliter excludit a voluntate divina liberam electionem talium hominum: ergo de se relinquit æque indifferens liberum arbitrium eorum; ergo non potest in tali decreto infallibiliter cognosci futura determinatio libera voluntatis hominis. Necesse est ergo ut dicant, eo ipso quod hominem non præligit, vel vult non præligere, velle efficaciter determinare illius voluntatem ad actum fidei vel pœnitentiæ contrarium, aut certe velle ex se non dare illi prædeterminationem ad volendum credere aut pœnitere, sine qua impossibile est ipsum credere aut pœnitere in sensu composito. Quot vero incommoda hinc sequantur, in capite sequenti insinuabo, et ex professo in libro 5 tractabo.

6. Tertio, affero Augustin. in libr. de Dno persever., cap. 9, quem locum cap. præced. tractavi, expendendo verba Matth. 11: *Si in Tyro et Sidone, etc.*, quæ de hac scientia manifeste exponit Augustinus; ultra id vero utitur ibi eadem scientia ad explicandum mysterium divinæ prædestinationis, et divinæ etiam permissionis circa multos, qui, cum uno tempore justi fuerunt, tandem damnantur; et imprimis de illis ait potuisse Deum,

vel non permittere ut ita tentarentur, vel per gratiam ita illorum voluntates munire, ut tentationes superarent. Deinde vero addit: *Ut ergo id non dicam, certe poterat illos Deus, præsciens esse lapsuros, antequam id fieret auferre de hac vita, ubi particula præsciens de conditionata scientia est intelligenda, scilicet, præsciens esse lapsuros si viverent, ut probavi; quia si præscientia absoluta supponatur, jam non potest retrocedi (ut sic dicam), auferendo de vita, antequam peccet, eum qui jam supponitur prævisus, et vivens, et peccans pro tali tempore. Deinde eandem præscientiam supponit ibi Augustinus, cum ait magna absurditate cogitari, *judicari homines mortuos, etiam de his peccatis quæ præscivit Deus perpetraturos esse si viverent*, ubi nunquam dicit Deum non habere illam scientiam, sed illam supponendo, illum abusum reprehendit.*

7. *Non explicatio Evangelii, sed sententia proponitur Aug.*—Neque solum scientiam ipsam supponit, sed etiam expressis verbis affirmat, et verbis Christi probat dicens: *Numquid possumus dicere Tyrios et Sidonios talibus apud se virtutibus factis credere noluisse, aut credituros non fuisse si fierent, cum illis ipse Dominus attestetur quod acturi essent magnæ humilitatis pœnitentiam, si in eis facta essent divinarum signa virtutum*; ubi jam non expendo sensum verborum Christi, sed solius Augustini sententiam propono; expresse enim testatur illum effectum sub tali conditione futurum infallibili scientia fuisse a Christo cognitum. Denique in capite decimo refert evasionem eorum qui dicebant præscivisse Deum non solum futuram fidem Sidoniorum, si vocarentur; sed etiam prævidisse postea negaturos fuisse fidem, et ne propterea gravius punirentur, ideo illos non vocasse. Ipse autem non negat talem scientiam, quod erat facillimum, si falsum esse crederet quod illi supponebant; non tamen id facit, sed acute replicat, si Deus ex tali præscientia non vocavit illos ne tandem gravius punirentur, eo ipso sequi Deum non judicare hominem ex malis quæ facturus absolute non est, licet de illo præsciat id fuisse facturum, si talis vel talis conditio permetteretur: et ita semper invenitur in illum talis scientiæ abusum, nunquam autem in ipsam scientiam.

8. *D. Augustinus eandem scientiam Deo prædestinanti ante decretum tribuit.*—Quarto, eandem scientiam attribuit Augustinus Deo in lib. de Grat. et lib. arb., cap. 23, ubi, in-

ter mysteria divinæ prædestinationis, ponit *illum baptizatum parvulum in hac vita relin- qui, quem præscivit Deus impium futurum; alium vero baptizatum rapi ex hac vita, ne ma- litia mutet intellectum ejus*: nam cum de illo priori dicit præscivisse Deum impium futu- rum, necesse est intelligi de præscientia ante- cedente deliberationem (ut sic dicam) an talis parvulus relinquendus sit in hac vita, necne? Nam priusquam Deus decrevisset illi vitam concedere, jam præsciebat illum futurum esse impium, alias nullum mysterium ad prædesti- nationem pertinens in eo inveniretur, quod Deus permetteret illum vivere, quia non cum præscientia peccati id decerneret, sed potius quasi ignorans pro illo signo, quid ille esset postea futurus: ita ut, respectu scientiæ Dei, quasi a casu sequatur peccatum ex tali vitæ concessione: ergo ut ibi sit admiratio prædesti- nationis, seu providentiæ divinæ, quam Augus- tinus suscipit, necesse est ut loquatur de præ- scientia antecedente, secundum rationem, de- cretum de concedenda vita tali puero: ergo necesse est ut de præscientia conditionata lo- quatur; quia ante decretum de vita tribuenda non potest ipsa vitæ diuturnitas seu duratio per absolutam scientiam prævideri, cum pen- deat ex decreto Dei: ergo multo minus pos- sunt per absolutam scientiam præsciri peccata in illo vitæ tempore committenda; ergo ne- cesse est loqui de scientia conditionata, utique sub illa conditione, si in vita conservetur, et cum his vel aliis auxiliis relinquatur.

9. *De præscientia certa, non de generali vel speciali periculo agit Augustinus.* — Neque etiam hic potest dici esse sermonem de præ- scientia periculi, et non ipsius impietatis futu- ræ, ut facile ostendi potest discursu facto in primo testimonio, quia, si sit sermo de gene- rali periculo cum quo omnes nascimur et vi- vimus, in eo nullum est peculiare mysterium, cum ratio generalis providentiæ postulet ut, non obstante illo periculo, homines juxta cur- sum et exigentiam generalium causarum vi- vere sinantur. Si vero sit sermo de speciali pe- riculo, illud non semper invenitur in omnibus baptizatis in pueritia, qui postea impie vivunt et moriuntur cum solis communibus occasio- nibus et periculis, et nihilominus in eis etiam habet locum admiratio Augustini, cur Deus, prævidens eorum impietatem futuram, reli- querit eos vivere: ergo necesse est ut loqua- tur de præscientia certa ipsorum malorum et effectuum in se, et non in solo antecedenti periculo. Omitto fugam illam alienissimam

esse a mente Augustini et aliorum sanctorum, qui ita loquuntur de hac præscientia Dei, sicut de præscientia omnium aliarum rerum abso- lute futurarum, ut in aliis locis citatis aperte declaravit Augustinus in tertio testimonio proxime citato.

10. *Augustinus variis in locis pro nobis est.* — Ultimo, addo omnia loca Augustini, in qui- bus vocationem efficacem congruam seu se- cundum propositum, altam, atque secretam per hanc conditionatam scientiam explicat, quia nimirum Deus prævidet quæ inspiratio seu vocatio tali voluntati ita congrua et apta sit, ut ab ea sit infallibiliter acceptanda. Illa enim præscientia conditionalis est manifeste, nam antecedit voluntatem dandi vocationem, ut ipsemet Augustinus supponit; unde neces- sario includit hanc conditionem, si hæc volun- tas ita vocata fuerit, consentiet, et ex suppo- sitione talis præscientiæ Deus vult dare talem vocationem. Hæc doctrina habetur sæpius re- petita et fuse declarata in Augustino, quæst. 2 ad Simplician.; de Prædestinat. Sanctor., cap. 16 et sequentib.; de Dono persever., c. 8 et 14; de Spirit. et litter., cap. 34; epist. 107, ante medium, et aliis locis in lib. 5 late trac- tandis.

11. *Curiel respondet et ad hominem objicit.* — Ad hæc testimonia respondet Magist. Curiel, negando hanc vocationem, ut congrua sit, fundari in dicta præscientia, quia infallibilitas consensus, futuri a voluntate sic vocata, non potest provenire ex directione talis scientiæ; quod probat ad hominem contra nos, quia fu- turum sub conditione non ideo est futurum, quia Deus illud novit, sed potius ideo Deus illud novit, quia ipsum futurum est, ut nos postea dicemus: ergo non potest consensus infallibiliter conjungi cum tali vocatione ra- tione præscientiæ, nec potest provenire ex su- bordinatione principii proximi, scilicet, liberi arbitrii sic vocati, ad directionem hujus scien- tiæ. Probat consequentiam, quia alias dabitur vitiosus circulus, quia infallibilitas futuri con- sensus sub conditione talis vocationis erit ratio vel conditio necessaria ut talis scientia sit in- fallibilis, et e converso infallibilitas futuri- tionis ejusdem consensus sub hac conditione provenit ex directione talis scientiæ: unde addit hic auctor illam infallibilitatem proveni- re, aut ex vocatione ipsa, et aliquo modo spe- ciali illius, aut ex efficaci voluntate vel in- tentione Dei habentis ita sibi subordinatam et subjectam humanam voluntatem, ut infalli- biliter obsequatur modo suo, et salva libertate.

12. *Scientia conditionata divinam etiam vocationem præcedit secundum rationem, quod non inficiatur Curiel.*—Sed imprimis undecumque talis infallibilitas proveniat, negari non potest quin, ex sententia Augustini in dictis locis, scientia conditionata talis consensus futuri a tali voluntate, si ei talis vocatio detur, omnino infallibilis et certa præcedat in Deo secundum rationem ad voluntatem dandi homini talem vocationem, quod nunc solum tractamus; nam de modo aut medio quo illa scientia potest esse infallibilis, postea dicturi sumus. Et quidem quod illa infallibilitas, si perfecta sit, ut in scientia Dei esse debet, talis ut implicet contradictionem illi subesse falsitatem, tanta (inquam) infallibilitas non potest in sola vocatione, sive sola, sive cum his vel illis conditionibus antecedentibus ad consensum fundari; quia esset infallibilitas in causa, quæ non potest non fundari in efficacitate vocationis et causæ ad determinandam antecedenter voluntatem ad unum, ita ut non possit resistere, et ita non potest non tollere libertatem, nec movere voluntatem modo suo, id est, modo libero, quia indifferentia libertatis cum tali determinatione antecedente repugnat, ut ex dictis in præcedenti prolegomeno convinci potest, et in libro quinto latius est ostendendum. Ubi etiam ostendemus, ex eodem principio, illam infallibilitatem futuri consensus, si talis vocatio detur, non posse fundari in proposito Dei antecedente, et omnino efficaci, quia, quomodocumque cogitetur infallibilis et inseparabilis consecutio humani consensus ex illo proposito divino, ex vi solius causalitatis et efficacitæ talis propositi divini, non potest talis consensus libere ab homine præstari, sed tantum voluntarie, quod, ut dixi, in dicto lib. 5 longo discursu probandum a nobis est, et in sequenti capite aliquid necessario erit dicendum.

13. *Augustinus locutus de scientia qua Deus infallibiliter omnes animarum eventus attingit, et gratis quod vult eligit.*—Relinquitur ergo necessario dicendum esse, locutum esse Augustinum de scientia per quam Deus veritatem ipsam in omnibus rebus infallibiliter attingit, quam intuens, gratis decernit dare suis electis vocationes illas quas prævidit habituras esse effectum, id est, habituras effectum inducendi voluntatem electorum ad consensum, si illis tribuantur. Neque video quam vim habet ad hominem contra nos objectio facta. Respondemus enim concedendo antecedens, nimirum, Deum scire illam conditionalem esse veram, quia vo-

luntas hominis cum tali vocatione ita determinanda est, et non e converso. Circa consequentiam autem advertimus committi æquivocationem, quam statim explicabo: nam licet consecutio nostri consensus non fundetur in illa scientia, nihilominus, in executione, verum est infallibilitatem divini propositi absolute posse fundari in illa scientia non tanquam in causa, sed tanquam in conditione necessaria, ut divina voluntas, nec feratur in incognitum, nec sine certo et infallibili medio absolute intendat aliquid; quod esset contra divinam sapientiam et prudentiam. Unde attente est cavenda æquivocatio quæ in argumento committitur, transeundo tacite a proposito absoluto Dei ad consensum humanæ voluntatis. Nos enim non dicimus consensum voluntatis humanæ infallibiliter esse conjungendum tali vocationi ratione præscientiæ, nam illa conjunctio semper supponitur futura ex parte objecti ex libera determinatione voluntatis creatæ cum divino auxilio in dicta conditione incluso. Sed dicimus ex parte voluntatis divinæ requiri cognitionem illius futuri sub tali conditione, et quod cognitio illa sit infallibilis, ut possit voluntas Dei determinari absolute ad volendum ut homo credat, et ut habeat auxilium cum quo efficaciter operaturus est. Quapropter cum in argumento subinfertur: Ergo non potest consensus infallibiliter conjungi vocationi ratione præscientiæ, nec ex directione illius, facile potest totum concedi, quia non est contra nos, nec ad causam refert, quia nihilominus potest illa præscientia esse necessaria ad directionem suo modo voluntatis divinæ, ut possit dare congruam vocationem cui vult, et quem vult præeligere ad credendum, verbi gratia, quia jam habet in sua præscientiâ medium infallibile, quo suum propositum exequi potest. Et ita nullus circulus committitur, quia infallibilitas futurationis nunquam in re provenit ab hac scientia; sed solum, secundum ordinem rationis, absolutum decretum Dei provenit ab hac scientia, tanquam a proponente voluntati divinæ objectum tali proposito accommodatum. Et hæc sine dubio fuit mens Augustini in citatis locis.

14. *Eadem veritas probatur ex aliis Patribus.*—Secundo, principaliter probatur eadem veritas ex aliis Patribus. Et imprimis assero quos supra citavi circa testimonium Matth. 11, quibus addo Prosperum ad Excerpta Genuens. respons. 8, ubi sic ait: *De Tyriis et Sidoniis quid aliud possumus dicere, quam non*

esse eis datum ut crederent, quos etiam credituros fuisse ipsa veritas dicit, si talia, qualia apud non credentes facta sunt, virtutum signa viderent; et subdit inferius: Nos autem, etiamsi rationem facti et profunditatem iudicii ejus penetrare non possumus, manifestissime tamen scimus et verum esse quod dixit, et justum esse quod fecit. Neque video quomodo ad tam clara verba Prosperi possint verisimiliter applicari evasiones quas supra circa ipsa Christi verba retulimus et refellimus. Et eodem modo possumus pro hac parte allegare Anselmum, Remigium et Abulens., Matth. 11, nam, exponentes verba Christi modo supra dicto, hanc scientiam in Deo esse supponunt. Item Anselmus, Matth. 6, exponens verba illa orationis Dominicæ, de hac scientia loquitur, cum ait Deum *per dulcedinem dare gratiam* (utique vocationis, vel auxilii) *ei quem scit non consensurum.* Simili modo Beda, Act. 16, reddit rationem cur Paulus et socii vetiti sunt prædicare verbum Dei in Asia, ut ibi dicitur: *Quia sciebat* (inquit) *contempturos verbum Dei;* et quod ad præsentem causam attinet, similem rationem reddit Eucumen. dicens: *Quia præscivit contra Spiritum sanctum pugnantium hæresim ibi esse dominaturam.* Et similem doctrinam habet Gregorius, homilia 12 in Ezechielem, et homilia 4 in Evang., et Origen., homil. 9 in Levit.

15. *Nemesius optime de conditionata scientia nos docet.*—Præterea Nemesius, lib. de Nat. hom., c. 44, § *Euripides*, in fine, uti Deum hac scientia ad perfectam providentiam satis aperte docet, dicens: *Providentia res humanas, non solum ex his quæ sensibus notantur, sed etiam ex sua et propria præcognitione, administrat.* Hoc autem intelligi de præcognitione conditionata declarat, dicens: *Cum enim Deus non nesciat bono viro expedire pauperem esse, ejusque sensum opes, si dentur, depravaturas, utiliter eum in paupertate sinit vivere. Ac qui opulentus est, sæpe importuniorem fore videns, si egeat (ad latrocinandum enim, aut alia quædam gratia facinora animum adjungeret), potiri illum opibus permittit.* Et concludit: *Nos enim nihil rerum venientium præsentientes, et ea quæ instant tantum expectantes, non recte de his quæ in rebus humanis eveniunt, judicamus. At Deo etiam futura tanquam præsentia sunt.* Quæ ultima verba de eadem præcognitione conditionata de qua expressè fuerat locutus, sine ulla tergiversatione intelligenda sunt, et de eadem ait longe et ab hominibus, et ideo nos sæpe amare illa et

procurare quæ habita futura nobis sunt in ruinam, quia præscire non possumus quid eventurum sit, si illa obtineamus, quæ conditionata scientia est; de Deo vero ait etiam hæc futura illi esse præsentia. Et revera hic videtur communis sensus et conceptus hominum, præsertim de Deo et de seipsis. Nam, quia fideles ignorant an divitiæ, vel scientia, vel dignitas, aut quid simile, illis futura sit occasio peccandi, ad Deum accedunt orantes, ut si ea de causa peccaturi sunt, talem statum vel conditionem ab eis avertat, supponentes profecto non ignorare Deum quid ipsi acturi sint, si in tali munere vel statu constituentur; neque ita orant præsumentes de Deo conjecturalem cognitionem, quam dæmon vel etiam ipse homo ex parte habere potest, sed magna fiducia orant, nihil de certissima præscientia divina dubitantes. De præscientia (inquam) quæ præcedit absolutam futurarum rerum dispositionem, et quæ potest esse ratio sic vel aliter de eventibus absolute futuris disponendi. Nam quia nos uti illa non possumus ad nostram providentiam, quia, ut dicitur Ecclesiast. 7: *Ignorat homo quid conducatur sibi in vita sua,* ideo ad Deum accurrimus, quem omnia talia futura scire non dubitamus. Inde enim videtur illa oratio profecta: *Cum ignoremus quid agere debeamus, hoc solum habemus residui, ut oculos nostros dirigamus ad te,* 2 Paralip. 20.

16. *Cyrilli subtiles quæstiones de præscientia conditionata.*—*D. Damascenus satis aperte de conditionata scientia loquitur.*—Præterea est egregium Cyrilli testimonium ad idem confirmandum, libro nono in Joanne, capite decimo, ubi varias movet quæstiones, cur Deus, futurorum præsciens, hoc vel illud faciat, quæ non possunt nisi de præscientia conditionata intelligi. Prima est: *Si omnia scire Christus creditur, cur Judam, qui futurus erat proditor, elegerit:* cui, multis aliis propositis, respondet: *Quia multa similia occurrunt, si de his quæ a Deo facta sunt ita velimus inquirere; unde ait: Quid enim prohibebit incusare Deum, ac dicere: Cur in regem Saullem elegisti, quem sciebas gratiam tuam esse sprethurum? Imo cur primum a terra hominem formasti, quem non ignorabas mandata tua non servaturum? Ascendet hæc oratio etiam in superiora. Cur enim Angelorum naturam creasti, cum ut Deus prævideris futurum nonnullorum rebellionem? Ad quas quæstiones non respondet negando talem scientiam in Deo, sed, illum supponendo, ex libertate arbitrii et aliis cau-*

sis divinæ providentiæ rationem reddendo. Illa autem præscientia non potest esse conjecturalis, vel in dispositionibus talium personarum. Quia in Angelis et primo homine erant optimæ dispositiones ad bonum potius quam malum eligendum, nec erat in eis aliqua prava dispositio, vel inclinatio ad malum, in qua talis conjectura fundari possit; fuit ergo præscientia certa veritatis futuræ et Deo præsentis. Atque eandem quæstionem de creatione malorum Angelorum cum præscientia peccati eorum movet D. Hieronym., dialog. 3 contra Pelagian., non longe a princip., et respondet: *Vis audire rationem: Deus præsentia judicat, non futura, nec condemnat ex præscientia, quem noverit talem fore, qui sibi postea displiceat.* Quæ profecto non nisi de conditionata scientia vera simpliciter esse possunt. Item, idem interrogat Damasc., dialog. contra Manichæos, parum ante medium, et respondet: *Eximia quædam ac singularis bonitas in causa fuit, cur eum procrearet. Sic enim secum locutus est: Quandoquidem iste malus futurus est, omniaque quibus eum afficio bona perditurus, egone quoque eum bono prorsus spoliabo ac delebo? Minime. Verum quamvis ipse improbus futurus sit, tamen eum non ita mulcabo, ut mei particeps non sit; verum bonum unum ipsi tribuam, nempe ut essentiæ ratione, me ipsi impertiam hocque nomine quod sit, in boni mei partem, vel invitus, veniat.* Per quæ verba evidenter affirmat Damasc. habuisse Deum hanc conditionatam præscientiam de peccato Angelorum, prius ratione quam haberet decretum creandi illos, et non obstante illa voluisse illos creare propter bonitatem suam, et quia non punit peccata priusquam fiant, nec decernit pœnam propter illa, donec absolute futura esse prævideat, nec ejus bonitatem malum vincere potest, ut idem Damasc. dixit lib. 4 de Fide, cap. 22. Et similis quæstio, tam de Angelo quam de homine in statu innocentia, tangitur a Gregorio Nysseño in Oration. catechetica, cap. 7; et nomine Chrysostomi in homil. de Adam et Eva, in tom. 1, ubi eandem præscientiam supponere videtur, quamvis non tam clare quin possit aliquis tergiversari. Denique similem quæstionem seu objectionem a Marcione refert Tertullianus, lib. 2 contra illum, cap. 5, et constanter contra illum hanc præscientiam cum bonitate et potentia Dei conjunctam docet, ostendens non esse contrarium divinæ bonitati, imo illi valde consentaneum, non obstante præscientia peccati futuri in homine,

si tali modo crearetur, illum creare, simul permittendo peccatum sub tali conditione prævisum; non potest enim totus ille discursus de alia præscientia intelligi. Unde, cap. 7, expresse dicit: *Sed etsi præscierat male hominem institutione sua usurum, quid tam dignum Deo, quam gravitas, quam fides institutionum qualiumcumque.*

17. Ad hæc vero testimonia respondet quidam vir doctus hos Patres non loqui de præscientia conditionata, sed de absoluta, quia hæretici, vel ethnici, quibus respondent, de hac scientia loquebantur; non enim erant tam subtiles ut de altera cogitarent, neque ad objectiones illorum erat necessaria; sic enim argumentabantur: Si Deus non præscivit peccatum Adæ, non est perfectus; si præscivit, non est Adæ imputandum peccatum, quia illud vitare non potuit; ita enim refert argumentum Hieronymus libro 3 contra Pelag., circa principium, et optime intelligitur de absoluta scientia visionis. Unde Sancti respondent habuisse Deum præscientiam, et nihilominus Adamo juste imputari, quia præscientia illi peccandi necessitatem non imposuit. Hæc vero responsio diminuta est, et licet alicui loco possit accommodari, non tamen omnibus. Tribus enim modis fit illa objectio vel quæstio. Primo, in sensu prædicto, in quo sine dubio loquitur Hieronymus; et sine dubio intelligitur optime de absoluta scientia, et ideo nos illo testimonio et similibus non utimur. Secundo, fit illa interrogatio de præscientia peccati antecedente voluntatem creandi, non vero de futuro in effectu, sed de possibili, id est, cur Deus, præsciens hominem peccare posse, illum creare voluit, et dare præceptum exponendo illum tali periculo, et non præveniundo illum ne peccare posset: et in hoc sensu tractat quæstionem Basil., hom. 9, ex variis, Quod Deus non sit auctor malorum, versus finem. Et sic etiam illa quæstio præsentis instituto non deservit, et ideo non allegavi illum locum Basili; et in eundem sensum trahi potest auctor homiliae de Adam et Eva. Tertio, movetur quæstio de præscientia peccati non tantum possibilis, sed etiam futuri, et quæ secundum rationem antecedit in Deo voluntatem creandi hominem, et dandi præceptum, ac permittendi peccatum, et in hoc sensu evidenter procedit quæstio de scientia conditionata, ut satis ostensum est, et prædictus auctor non negat; sed negat in hoc sensu esse vel propositam quæstionem ab ethnicis, vel admissam et tractatam a Patribus.

18. *Ethnici et hæretici proposuerunt quæstionem allatam, cui conditionata scientia Patres responderunt. — Evidenter constat ex verbis Cyrilli. — Contrarium autem constat evidenter ex verbis Marcionis apud Tertullianum in dicto eap. 7; sic enim objiciebat: Si Deus bonus, et præsciens futuri, et avertendi mali potens, cur hominem, et quidem imaginem et similitudinem suam, imo et substantiam suam per animæ scilicet sensum, passus est labi de obsequio legis in mortem, circumtentum a diabolo? Si enim et bonus, qui evenire tale quid nolle, et præsciens, qui eventurum non ignoraret, et potens qui depellere valeret, nullo modo evenisset quod sub his tribus conditionibus divinæ majestatis evenire non posset. Quod si evenit, absolutum est e contrario Deum neque bonum credendum, neque præsciens, neque potentem.* Ex quorum tenore verborum, constat ipsum loqui de præscientia peccati non possibilis tantum, sed etiam futuri, ut expresse dicit, et postea Tertullianus in toto discursu supponit et admittit. Item constat loqui de præscientia antecedente voluntatem creandi hominem, et permittendi peccatum ejus, quia ex illa præscientia, cum potentia et bonitate, inferebat hæreticus non debuisse Deum tale peccatum permittere. Unde ultimo constat illum non voluisse ex præscientia inferre peccatum fieri necessario, ac proinde non esse peccatum: sed potius supponendo illud esse malum et peccatum, inferebat, quandoquidem Deus illud non evitavit, cum posset et præsciret, illi esse imputandum, ac proinde non esse bonum. Et ad hunc sensum argumentationis respondet Tertullianus, Deum esse summum bonum, etiamsi, præsciens futurum peccatum, et potens illud impedire, voluerit illud permittere, quia non Deo, sed voluntati hominis imputatur. Similis quæstio est apud Damascenum in dicto Dialogo; nam objectio Manichæi erat. *Quid autem affers, cur Deus, cum diabolus malum fore prænosset, cum procreavit? Ubi constat non argumentari Manichæum ex præscientia contra libertatem arbitrii, sed contra bonitatem DEI volentis creare Angelum, quem præsciebat futurum malum; ergo loquebatur de præscientia antecedente voluntatem creandi Angelum.* Et in hoc sensu respondet Damascenus, non quidem quod præscientia non tollat libertatem, sed quia non judicavit expedire privare Angelum omni participatione bonitatis sue, etiamsi prævideret illum male fuisse illa usurum, ut in verbis supra relatis manifestum est. Denique apud Cyrillum evidenter

distinguuntur quæstiones, cur Deus elegerit Judam, quem præsciebat lapsurum; et cur Judæ ad culpam imputetur quod vi præscientiæ faciebat. Et nos non sumimus argumentum ex posteriori quæstione, sed ex priori, quam necesse est intelligi de præscientia antecedente electionem, ac subinde esse conditionatam. Nec potest solum intelligi de electione quoad executionem ejus in tempore factam, sed etiam de æterno proposito, quia non loquitur de malo, quod jam Judas commiserat quando vocatus est, sed de malo futuro post temporalem electionem, et ab æterno præviso ante propositum talis electionis, sub ea conditione quod, si eligeretur, tale malum esset commissurus. Præterquam quod ibi etiam adjungit Cyrillus interrogationem de Angelo et homine, cur creati sint, etiamsi præscirentur futuri mali? Et ratio interrogationis non est quia hoc repugnet libertati, sed quia repugnare videtur divinæ bonitati; et ideo dixit ibidem Cyrillus quod hujusmodi interrogationes sunt quædam accusationes contra Deum, cujus sapientiam et bonitatem defendit, quia ipse optime fecit constituendo Angelum et hominem liberum; unde libertatem supponit, neque illam defendit, quia argumentum non fiebat contra illam ex absoluta præscientia. De his ergo et similibus locis, quæ accurate distinguenda sunt, dubitari non potest, quin in eis sit sermo de præscientia conditionata.

19. *Tollitur admiratio de ethnicis et hæreticis cognoscentibus in Deo conditionatam scientiam. — Neque incredibile videri debet hæreticos scientiam illam cognovisse, in qua intelligenda et defendenda nunc tanto labore insudamus. Nam imprimis adversarii, ad infamandam hanc scientiam, dicunt ab hæreticis esse inventam, Pelagianis scilicet, vel saltem Semi-pelagianis; quid ergo mirum quod antiqui etiam hæretici illam agnoscere, et ex illa argumentari potuerint: quanquam nos non sensum hæreticorum propter eorum sententiam investigamus, sed ut inde sensus Patrum intelligatur, quia eandem scientiam futurorum, quam hæretici supposebant, admittunt, et, illa stante, objectionibus vel interrogationibus eorum respondent.* Deinde August., lib. 1 de Anima et ejus orig., eap. 12, refert Vincentium Victorem, contra quem scribit, in quodam libro disputasse *adversus eos qui dicunt: Cur Deus hominem faciebat, quem, utpote præsciens, sciebat futurum non bonum?* Quam quæstionem ille etiam Vincentius expediebat, non negando illum Dei scientiam, sed quia de

perfectis operibus debet Deus hominem judicare, non de præcognitis, nec fieri aliquando permis- sis. In quo sententiam ejus probat Augustinus, addens optimam rationem, quia alias Deus non natum judicaret si propterea creare noluis- set, quia non bonum futurum præscisset. Unde considerare licet idem in illa contingere, quod in aliis attributis Dei, in quibus distinguenda est cognitio an sint, a cognitione quid vel quo- modo sint: nam prior sæpe est facilis et vul- garis, etiam inter homines parum subtiles, vel etiam indoctos; posterior est alta, et subtilis, et a paucis obtineri potest. Quamvis ergo hæc præscientia conditionata, quoad modum suum, difficile intelligatur, et non sine multa doctri- na et subtilitate discernatur, nihilominus, quoad quæstionem seu cognitionem an sit, videtur esse valde communis et vulgaris. Et ad hunc modum locuti videntur de illa hære- tici, nescientes forte quid dicerent, nec discer- nentes inter præscientiam conditionatam et absolutam, et nihilominus verum dicentes, et in re ipsa de præscientia conditionata loquen- tes. Et, ut antea dicebam, etiam communis plebs fidelium sæpissime orat Deum, hanc scientiam necessario supponendo, quamvis de illa distincte et (ut ita dicam) in actu signato cogitare nesciat. Quin potius etiam, nostris temporibus, legimus in Japponia et India si- milis interrogationes ab ethnicis proponi præ- dicatoribus eis annuntiantibus nostram fidem, qui, veluti naturæ lumine ducti, cognoscunt vel supponunt Deum esse præscium omnium futurorum, sive absolute, sive ex aliqua hy- pothesi nondum intellecta ut de facto futura. Unde, quando interrogationes supponunt præ- scientiam conditionatam, facile declinantur, negando habere Deum talem præscientiam: nunquam autem id faciunt evangelici prædi- catores, magnum enim fuisset scandalum ho- minibus interrogantibus, neque etiam id fe- cerunt unquam Patres, ut vidimus.

CAPUT IV.

NEQUE IN AUGUSTINO, NEQUE IN ALIIS PATRIBUS
ALIQUID CONTRA PERFECTIONEM DIVINÆ SCIEN-
TIÆ CONDITIONATÆ REPERIRI.

1. *Proponuntur loca Augustini quæ appa- rent contraria.*—*De hæreticis qui conditionatæ scientiæ maxime suffragari videntur.*— Non obstantibus omnibus Augustini testimoniis, quæ in præcedenti capite adduximus, defenso- res contrariæ sententiæ proclamant hanc

scientiam rejectam esse ab Augustino et Prospero, tanquam fundamentum semipelagiani vel pelagiani erroris. Imo addunt aliqui etiam Arianos illam scientiam adinvenisse ad suum errorem explicandum, ex quadam Epis- tola Alexandri Episcopi Alexandrini, ad Alexandrum Episcopum Constantinopolita- num, ubi Alexander refert Christum factum esse filium Dei eximium per gratiam, esseque in nostra potestate filios Dei fieri, non aliter atque ille factus est: *Scriptum namque esse: Filios genui et exaltavi.* Et addit: *At cum il- lis objiceretur sententia quæ sequitur: Et ipsi spreverunt me, etc., aiunt Deum, cum præ- scientia et præensione, prænotuisse neutiquam ipsum aspernaturum, idcirco ex omnibus ele- gisse.* Sed si attente leguntur sequentia, et lo- cus Psalmi quem illi hæretici male allegabant, *Dilexisti justitiam, et odisti iniquitatem, pro- pterea unxit te Deus, etc.,* facile intelligitur locutos fuisse illos hæreticos de præscientia absoluta futurorum operum Christi. Sed, esto fuerint locuti de conditionata, quid nostra in- terest, qui non solum istis, sed etiam pluribus hæreticis notam fuisse hanc scientiam, ut dixi, supra demonstravimus, neque propter illam isti damnantur, sed quia illa male usi sunt. Nec est sanum consilium prudentis alias viri, ut scientiam consentaneam divinæ per- fectioni Deo negemus, ut hæreticis resistamus. Nam, sicut non sunt facienda mala ut eve- niant bona, ita non est neganda una veritas ut alia defendatur. Alioqui negetur scientia absoluta futurorum meritorum, quia Pelagiani dixerunt ex illa prædestinari homines: tollatur gratia efficax, quia Calvinistæ ad negan- dam libertatem illa usi sunt: essetque illud consilium potius adhibendum ad non introdu- cendam prædeterminationem physicam, pro- pter difficultatem maximam, quæ est in con- stituenda differentia inter illam et efficaciam motionis necessitantis, quam ponit Calvinus. Igitur, quidquid hæretici senserint, videamus an Augustinus, impugnando Semipelagianos, a priori sententia circa hanc scientiam recesserit. Unus enim vel alter locus est apud Augus- tinum, qui nonnullam difficultatem habeat, quia, contra Semipelagianos disputans, non solum videtur eos reprehendere quod hac scientia male uterentur, sed etiam quod ad suum tuendum errorem illam falso confingerent. Nam in lib. de Prædestinat. Sanctorum, cum in cap. 12 et 13 impugnasset tantum illius scientiæ abusum, in cap. 14 etiam ipsam scientiam refellere videtur; exponens enim

locum Sapient. 4 : *Raptus est, ne malitia mutaret intellectum ejus, ait : Dictum est enim secundum pericula vitæ hujus, non secundum præscientiam Dei, qui hoc novit quod erat futurum, non quod futurum non erat, id est, quod ei mortem immaturam fuerat largiturus, ut tentationum subtraheretur incertitudo, non quod peccaturus esset, qui mansurus in tentatione non esset.* Et lib. 1 de Origin. anim., cap. 12, similem tractans quæstionem, postquam argumentatus est contra abusum talis scientiæ, etiamsi illa daretur, auget responsionem, etiam scientiam ipsam refellendo, sic enim ait : *Quid quod ipsa exinanitur omnino præscientia, si quod præscitur, non erit? Quomodo enim recte dicitur præsciri futurum, quod non est futurum? Quomodo ergo puniuntur peccata, quæ nulla sunt, id est, quæ nec vita ista nondum incipiente commissa sunt ante carnem, nec morte præveniente post carnem?* Et simili modo videtur sensisse de hac scientia Prosper in Epistola ad Augustinum, ubi, referens ac reprehendens phantasiam Semipelagianorum, primum eos arguit quod gratiam, etiam prævenientem, in præsentibus meritis sub conditione futuris. Deinde addit : *Sed in tantum commentitiis meritis electionem Dei subjiciunt, ut quia præterita non extant, futura quæ non sint futura consingant, notoque apud illos absurditatis genere, et non agenda præscita sint, et præscita non acta sint.* Denique Damascenus, etiam contra Manichæos, in fine, de solis effectibus aliquando futuris dicit esse præscientiam : *Nam si facturi (inquit) non essemus, nec ipse quidem quod futurum non esset, pronosceret.*

2. *Æquivocatio præscientiæ tollitur, et quid sit verbum præsciendi explicatur, quomodoque ab Augustino acceptum hic.* — Respondetur totam hanc objectionem in æquivocatione unius vocis *præscientiæ* positam esse; nam quod ad rem attinet, veri simile non est illos Patres sibi fuisse contrarios, et Augustinum præcipue, uno verbo obiter dicto, voluisse destruere quod tam expresse tantaque asseveratione in aliis multi loci docuerat. Dicimus ergo verbum *præsciendi*, sumptum proprie et in rigore, dicere habitudinem ad rem in tempore futuram, dicit enim antecessionem æternitatis ad tempus. Ita docet Damascenus supra; delinens enim quid sit prænotio, ait : *Prænotio est quæ futura sunt, antequam in ortum procedant, nosse*; nam in verbo *prænosse* seu *præscire*, illa particula *pro* non dicit habitudinem ad alios actus vel ad res alias, sed ad objectum

ipsum præscitum. Unde dicit antecessionem secundum existentiam realem aliquam futuram, quæ in Deo est antecessio æternitatis ad tempus. De præscientia ergo in hac proprietate sumpta dixit Augustinus, in priori loco citato de Prædestinatione Sanctorum, sententiam illam Sapientis, *Raptus est, etc.*, intelligendam esse secundum pericula vitæ hujus, non secundum præscientiam, utique propriam, quæ est rerum aliquando futurarum; non excludit autem quin possit et debeat intelligi de his periculis vitæ, in quibus malitia mutaret intellectum hominis justi. Nam (ut jam dixi), si talia non sunt pericula, sola ratio periculi non esset sufficiens ad exaggerandam præmaturam mortem, ut specialem gratiam, præsertim in omnibus justis, qui in infantia aut pueritia, vel intra quodcumque breve tempus rapiuntur. Nam in istis non est tantum periculum quin, suppositis communibus auxiliis gratiæ, ex vi causæ et libertatis, sit æque contingens ad utrumlibet quod iste mutetur, vel quod perseveret et crescat in sanctitate. Ergo si anticipatio mortis solum est ex præscientia periculi, profecto etiam est eum contingentia majoris sanctitatis: ergo etiam erit contingens, quod illa mors vel majus bonum vel malum inpediat; ergo similiter est contingens et incertum an sit gratia necne; neque Deus ipse poterit hoc certo cognoscere ac determinate, quomodo talis homo vel puer vitam suam vel illius reliquum tempus esset instituturus. Multo ergo melius locus ille de certa cognitione malitiæ futuræ sub conditione intelligitur, et saltem Augustinus hanc intelligentiam non excludit, sed solum veram et propriam præscientiam, respectu eorum quæ nunquam futura sunt.

3. *Ex Augustino mens Augustini agnoscitur.* — *Præscientia operis nunquam futuri non sufficit ad meritum, vel demeritum.* — Potest autem hæc expositio suaderi, tum quia est necessaria ne Augustinus sibi ipsi contrarius sit, tum in aliis locis, tum in eodem libro in c. 9, ubi illam scientiam ipse supponit, ut vidimus, et in cap. 16 et sequentibus per illam explicat vocationem congruam: tum ex verbis quæ statim subjungit Augustinus : *Non secundum præscientiam Dei, qui hoc præscivit quod futurum erat, non quod futurum non erat, id est, quod ei mortem immaturam fuerat largiturus, ut tentationum subtraheretur incertitudo, non quod peccaturus esset, qui mansurus in tentatione non esset.* Quæ omnia pertinent ad præscientiam rerum quæ aliquando futura sunt.

Dices, juxta hanc expositionem, vitiosum et æquivocum esse processum Augustini contra Semipelagianos. Nam illi bene sciebant non præscire Deum aliquando esse futura opera, quæ puer mortuus in infantia operaretur, si viveret; ergo non recte contra illos argumentatur ex eo quod illa non sit vera præscientia, id est, absoluta. Respondeo in hoc errasse et propriam vocem ignorasse Semipelagianos, quia in operibus nunquam futuris rationem meriti et demeriti confingebant propter solam prænotionem eorum. Ad hoc ergo refellendum, ait Augustinus illam prænotionem non esse propriam præscientiam, quæ ad meritum vel demeritum sufficiat, quia meritum et demeritum actuale (ut sic dicam), id est, quod possit esse ratio fundandi præmium, vel pœnam per divinum judicium conferendam, non potest fundari in opere absolute tantum possibili, etiamsi cognoscatur ut futurum sub conditione, sed fundari debet in opere existente, vel saltem realiter futuro in aliquo tempore, quia si pœna vel præmium absolute dandum decernitur, etiam opus malum vel bonum absolute esse, vel futurum præsciri necesse est. Et ideo Semipelagiani, admittentes verum meritum in objecto talis cognitionis, in re ipsa affirmabant esse veram præscientiam rei aliquando futuræ, licet id forte ignorarent, et ideo merito redarguuntur ab Augustino, quod illa non sit præscientia proprie dicta, et ideo ad meritum non sufficiat. Et hoc est quod etiam ait in alio loco de Animæ origine: *Exinanitur omnino præscientia, si quod præscitur non erit. Exinanitur* (ait) non quoad omnem rationem scientiæ, sed quoad propriam rationem præscientiæ, quæ necessaria est ut in ejus objecto possit vera ratio meriti inveniri. Et ita etiam exinanitur quoad hoc, ut in illa possit ratio meriti fundari. Et ideo subdit: *Quomodo enim recte dicitur præsciri futurum, quod non est futurum.* Ubi pondo particulam *Quomodo recte dicitur*, per quam significat non improbari absolute, sed quatenus opus, per illam præscitum, tanquam aliquid revera futurum æstimetur, utpote præmio vel pœna dignum. Unde recte adjungit: *Quomodo ergo puniuntur peccata quæ nulla sunt?* id est (ut exponit), *quæ nunquam committentur post carnem*, utique morte præveniente. Intentio ergo Augustini in illis locis est illam scientiam non quidem non esse, sed esse quamdam simplicem intelligentiam, in cujus objectum nulla ratio meriti fundari potest, et ita non esse veram præscientiam, quæ interdum ad rationem

meriti et ad præmium anticipatum sufficit, interdum vero ad præjudicium et prædefinitionem alicujus pœnæ.

4. Et per hæc responsum est etiam ad Prosperum, quem alibi hanc scientiam conditionatam in Deo cognovisse jam ostendimus; in alio ergo non scientiam, sed abusum ejus reprehendit, fundandi nimirum in ea *commenditia merita*, ut recte vocat, *confingendo futura, quæ non sunt futura*, id est, affingendo illis meritum, ac si vere et absolute futura essent, cum tamen simpliciter futura non sint, etiamsi sub conditione sint futura. Et in eodem sensu insert tanquam absurdum, *quod non agenda præscita dicantur*, utique tanquam vera merita; ac subinde tanquam vere futura, ex quo etiam sequitur aliud absurdum, scilicet, *ut præscita non acta sint*: præscita nimirum sub eadem ratione, id est, ut vera merita, quia implicat sic præsciri, et non esse futurum aliquando, ut diximus. Damascenus autem nulla indiget expositione, quia ibi proposuit explicare proprietates harum vocum *prædefinitio*, *prænotio*, et aliarum: et prænotionem ita descripsit: *Prænoscere, est ea, quæ futura sunt, antea nosse*; ubi clare limitavit vocem illam ad scientiam quæ antecedit, duratione vel æternitate, rem in tempore futuram. De hac ergo præscientia loquens merito subjungit: *Si facturi non essemus, nec ipse quod futurum non esset, prænosceret.* Quanquam hæc verba, si recte spectantur, cum proportionem in scientia conditionata verum habent: nam si voluntas sub tali conditione posita hoc factura non esset, neque illud futurum sub conditione cognosceretur. Sensus tamen Damasceni est, quem diximus. Atque hæc nunc sufficiant de sententia Patrum: nam de mente divi Thomæ commodius dicemus, postquam alium sensum contrariæ sententiæ examinaverimus, quod in sequenti capite præstabimus.

5. *Augustinus adhuc videtur oppositus, at patet non esse, quia non de conditionata, sed de absoluta scientia loquitur.*—Sed adhuc nescio quo colore objicitur nobis Augustinus lib. de Prædestinatione Sanctorum, cap. 17, 18 et 19, quia in eis ex professo probat, contra Pelagianos et Semipelagianos, propositum divinum eligendi prædestinatos ad gloriam et sanctitatem non esse ex præscientia, sed potius præscientiam futuræ sanctitatis illorum esse subsecutam propositum, sic enim respondet ad quæstionem quam Prosper, in Epistola sua, ipsum interrogaverat. Adduntur etiam

verba Augustini in epist. 105, ubi tractans verba Joann. 6: *Sciebat Jesus qui essent credentes, et quis esset traditurus eum, inquit: Et ne quisquam existimaret credentes sic ad ejus præscientiam pertinere, sicut non credentes, id est, ut eis non fides daretur, sed tantum voluntas prænosceretur, mox adjecit: Nemo potest venire ad me, etc.* Et epist. 107, circa medium, ait Deum omnia opera sua futura in prædestinatione præcivisse. Sed hæc loca nullo probabilitatis colore ad præsentem causam accommodantur. Agit enim ibi Augustinus de absoluta præscientia meritorum, et probare vult sanctitatem, quæ a vocatione incipit, non dari ex meritis, sed ex gratia. Unde sic incipit: *Intelligamus ergo vocationem, qua fiunt electi, non qui eliguntur, quia crediderunt, sed qui eliguntur, ut credant; unde postea concludit: Electi sunt itaque ante mundi constitutionem, ea prædestinatione in qua Deus sua futura facta præscivit.* Loquitur ergo aperte de absoluta præscientia meritorum, quam sequi, non præcedere decretum electionis divinæ verissime docet. Idemque prosequitur capite decimo, ubi refert sententiam Pelagii dicentis prænovisse Deum, in sua æternitate, qui essent futuri sancti, et ideo eos elegisse. Et hoc impugnat ex verbis Pauli ad Ephes. 1 dicentis: *Elegit nos ut essemus sancti, non quia futuri eramus sancti, quod late prosequitur; et concludit: Elegit ergo nos Deus in Christo ante mundi constitutionem, prædestinans in adoptionem filiorum, non quia per nos sancti et immaculati futuri eramus, sed elegit prædestinavitque ut essemus, etc.* Et infra sic inquit: *Ex hoc proposito est illa electorum propria vocatio, quibus omnia operantur in bonum.* Quod propositum non est certe conditionatum, sed absolutum, quo Deus statuit sanctitatem, vel vocationem congruam ad illam, illis quos gratuito elegit, ex quo proposito non conditionata sed absoluta præscientia sequitur secundum rationis ordinem. De hac ergo scientia Augustinus ibi loquitur, nec de conditionata verbum ibi habet, multoque minus decretum conditionatum insinuat. In capite autem decimo-nono doctrinam quam contra Pelagianos tradiderat, contra Semipelagianos applicat. Hi enim dicebant Deum elegisse nos ut essemus sancti, quia prævidit nos ex nobis futuros esse credentes. Ipse autem urget contra illos eadem testimonia, etiam elegisse nos Deum ut essemus fideles, non quia prævidit credentes nostro arbitrio, sed ut sua gratia nos faceret creden-

tes, et ita in suo proposito et electione prævidit fidem nostram futuram, non ante illam.

6. *Instantia sumitur de proposita doctrina absolute scientiæ, ad conditionatam.*—Sed instare possunt, quia eadem ratio et proportio quæ est præscientiæ absolutæ ad decretum absolutum, est etiam præscientiæ conditionatæ ad propositum conditionatum; ergo, licet Augustinus in illis locis loquatur de scientia et decreto absolutis, inde sumitur efficax argumentum ad conditionata. Consequentia est clara, et antecedens probatur, quia ideo scientia absoluta supponit propositum, quia effectus præscitus debet esse effectus propositi; sed idem effectus etiam debet esse effectus propositi sub conditione: ergo est eadem ratio. Unde e contrario sequitur, si consensus, verbi gratia, fidei prævidetur sub conditione, si detur talis vocatio, et ante omne propositum Dei, etiam conditionatum, non prævideri ut effectum saltem physicum et proprium voluntatis Dei, ac subinde præciri ut effectum futurum ex sola voluntate hominis. Quod si hoc concedatur, sequitur ulterius Augustinum nihil contra Semipelagianos effecisse, quia ille bonus usus futurus erit physice a sola voluntate hominis credituri, et ita poterit esse meritum, et ratio totius prædestinationis.

7. *Rationis disparitas.*—Ad replicam respondetur imprimis non esse eandem rationem de præscientia absoluta et conditionata. Nam absoluta est de re futura in aliqua differentia temporis, et ideo necessario supponit in Deo liberum decretum proportionatum effectui præviso, quia non potest esse futurum, nisi per voluntatem aut cum voluntate Dei, et ita absoluta præscientia effectus absolute futuri necessario supponit in voluntate Dei determinationem ad talem effectum producendum. Futura autem sub conditione tantum, ut sic præcise spectata, non sunt de facto futura in aliqua differentia temporis, et ideo non necessario supponunt decretum cum actuali determinatione voluntatis Dei, quia illud futurum, ut sic, adhuc manet in statu possibilitatis. Secundo vero addimus hanc scientiam conditionatam necessario includere in objecto suo adæquato decretum Dei, non ut jam præexistens in voluntate Dei, sed ut comprehensum objective sub conditione illa sub qua futurum illud proponitur. Ut, verbi gratia, cum dicimus Deum præscire quod, si homo ita vocetur ad fidem, consentiet, non est sensus quod consentiet suis viribus solis, sed quod adjuncto tali vocatione, et cooperante etiam

physice gratia adjuvante, quæ cum illa offeratur, et concurrente etiam Deo per influxum generalem gratiæ. Conditio ergo hæc omnia includit, et consequenter includit propositum Dei dandi, vel offerendi hæc omnia cum ipsa vocatione, et tunc dicimus præscire voluntatem hominis etiam esse cooperaturam, et sic præscire Deum sub tali conditione consensum hominis.

8. *Nullum inconueniens sequitur ex nostra doctrina.* — Unde non sequitur cognoscere Deum illum consensum ut effectum voluntatis et non gratiæ, nam præscitur ut effectus futurus a voluntate præuenta et adjuata gratia. Nec etiam sequitur sciri ut effectum gratiæ, solum in genere causæ moralis, quia, licet futurus sit a gratia præueniente tantum moraliter, etiam præscitur esse futurus physice a gratia cooperante, seu adjuvante, quamvis non prædeterminante. Denique non sequitur inefficacem discursum Augustini ex testimoniis Scripturæ contra Pelagianos et Semipelagianos. Cum enim tam sanctitas ipsa quam initium sanctitatis vel fidei, vel voluntas credendi, sit effectus divinæ electionis et propositi, optime infertur non posse esse causam ejus, etiam ut prævisam, quia, ut prævisa per absolutam scientiam, procedit ex vocatione data ex proposito, atque ita supponit gratuitum Dei propositum: ut prævisa autem tantum sub conditione, non potest habere rationem meriti, ut in eodem libro late probat idem Augustinus contra Semipelagianos. Et præterea, etiam ut sic prævisa, voluntas credendi non prævidetur ut effectus solius liberi arbitrii, sed ut effectus vocationis dandæ ex proposito, non quia in Deo supponatur, sed in conditione ipsa includatur, ut declaravi. Unde tantum abest ut ex illa doctrina Augustini præscientia conditionata excludatur, ut potius necessaria consecutione inferatur. Nam in illis capitibus eo pervenit Augustinus contra dictos hæreticos, ut fides sit ex vocatione, et non e converso, et quod vocatio illa debeat esse ex proposito. In aliis autem locis ejusdem libri, et aliis supra allegatis, docet vocationem ex proposito esse illam quæ datur, prout Deus novit congruere homini vocato, ut vocantem non respuat: hæc autem præscientia conditionata est, et ante omne decretum Dei liberum præexistens in Deo, ut probavi: ergo, juxta discursum Augustini non repugnat hæc præscientia prædestinationi, sed ad illam est necessaria. De qua re dicemus plura in libro quinto, capite ultimo.

9. *Augustinus in duobus aliis locis de scientia Dei ex suppositione loquitur.* — Testimonia Augustini retorquentur. — Neque efficaciora sunt alia duo testimonia ex epistolis 105 et 107; nam evidenter in eis loquitur Augustinus de præscientia operum futurorum in tempore, atque adeo de præscientia absoluta, non de conditionata. Possumus autem illa testimonia retorquere, quatenus in eis, præsertim in priori, docet Augustinus bona opera quæ Deus, speciali gratia, facit in nobis, præsciri a Deo, supposita ejus electione, seu prædestinatione; opera autem mala non ita cognosci. Si enim hoc verum est in absoluta præscientia, etiam erit verum in scientia conditionata: ergo saltem illa non possunt cognosci in decreto absoluto ex parte Dei, licet sit ex parte objecti conditionatum: quia neutro modo potest Deus ex se velle, aut prædestinare peccatum. Nec valet distinctio de peccato pro materiali vel pro formali, quia Augustinus etiam de ipsa voluntate non credendi negat esse ex proposito Dei. Præterquam quod non potest habere locum illa distinctio ubi malitia est inseparabilis ab actione prædestinata, seu prædefinita, ut jam probatum est, et in libro tertio iterum est dicendum.

10. *Ante conditionatam scientiam pravi operis, vel in ipsa objective non datur in Deo decretum.* — Quocirca, ante præscientiam conditionatam futuri operis pravi, non solum non est necesse ut antecedit in Deo decretum in quo possit tale peccatum sic præsciri, verum etiam neque in conditione ipsa potest objective includi tale propositum. Quamvis enim necesse sit ibi includi aliquod decretum Dei, quia sine aliqua libera Dei determinatione non potest aliquis effectus esse futurus, nihilominus non potest illud decretum esse tale, ut in illo cognoscatur esse futurus, sive absolute, sive sub conditione, servata proportionem et partitionem, quia neque ante, neque post scientiam conditionatam, neque in ipsa, seu objecto ejus, potest dari decretum prædefiniens actum, sed permittens et offerens generalem concursum, in quo solo non potest cognosci futurus actus, nisi simul cognoscatur determinatio et cooperatio libera voluntatis hominis, ut præsens objective, vel simpliciter, vel sub conditione. In bonis autem licet ante scientiam conditionatam non possit antecedere propositum præfinitivum, et omnino absolutum ex parte Dei, ne libertas laedatur, tamen, supposita conditionata scientia, potest continue antecedere ante absolutam præscien-

tiam ejusdem futuri : quia cum sit de bono objecto, non repugnat Deo ; et cum supponat usum libertatis prævisum, non tollit illum, sed purificat conditionem, et illi accomodat vocationem per quam infallibiliter et libere compleatur, ut latius in libro 3 dicturi sumus.

CAPUT V.

DEUM HABERE CONDITIONATAM SCIENTIAM FUTURORUM ANTE DECRETUM LIBERUM SUE VOLUNTATIS, SECUNDUM RATIONIS ORDINEM, NEC POSSE TALEM SCIENTIAM IN TALI DECRETO FUNDARI, EX EISDEM SCRIPTURÆ ET PATRUM TESTIMONIIS OSTENDITUR.

1. *Assertio nostra.*—Non possumus ratione confirmare sententiam nostram, nec modum quo talis scientia in Deo est concipienda explicare, nisi prius hoc punctum, in quo ab auctoribus prioris sententiæ, qui nobiscum in asserenda ipsa scientia conveniunt, dissentimus, diligenter expendamus, quod maxime ex eisdem testimoniis Scripturæ et Patrum a nobis præstandum est, et obiter aliquas rationes attingemus. Dicimus ergo eisdem testimoniis, tam Scripturæ quam sanctorum Patrum, posse sufficienter probari hanc præscientiam, quæ in Deo est, non fundari in decreto libero Dei, sed esse priorem illo secundum rationem, vel etiam secundum illum modum dependentiæ vel independentiæ qui inter actus solum ratione distinctos inveniri potest, quia nimirum potest talis præscientia esse sine tali proposito, vel omnino, vel saltem sine illo, ut priori, in quo fundatur.

2. *Probat ex Evangelio.*—Hoc probamus primo ex verbis illis Christi : *Si in Tyro et Sidone, etc.* ; nam, supponendo quod sint dicta ex certa præscientia conditionata, ut illi auctores, cum quibus nunc disputamus, admittunt, nullum potest cogitari propositum Dei liberum, et secundum rationem antecedens, in quo illa nitatur. Respondent ante illam scientiam habuisse Deum propositum ex parte sua absolutum, et efficax, licet conditionatum ex parte objecti, dandi hominibus Tyri et Sidonis auxilium efficax ad agen-
dam penitentiam, si in eis talia signa fierent (quidquid tale auxilium efficax sit), et in illo proposito cognovisse illam conditionalem, quia ratione illius habebat infallibilem veritatem, neque aliter illam habere potuisset. Sed, ut omittam, tum quod tale propositum conditio-

natum et liberum in tali casu et materia gratis confingitur, tum etiam quod ille modus præscientiæ repugnat cum contingentia veritatis cognitæ, de quibus in discursu capituli generalius dicemus, specialiter repugnat illa responsio intentioni Christi in illo loco et circumstantiis prædictionis ejus. Quia sic immerito Christus exprobrasset Judæos comparatione Gentilium, si isti essent convertendi per aliud auxilium, quod non dabatur Judæis, sine quo non stabat Judæos converti : sic enim Judæi justam responsionem habuissent, qua reprehensionem declinarent, et causam disparitatis in ipsum Christum rejicerent. Quin potius dicere possent frustra et fiete tantam vim in signis et virtutibus posuisse, etiamsi conjunctas haberent inspirationes illis externis signis proportionatas, si alia Dei voluntas absoluta non accedat, per quam voluntas audientis determinetur, quia sine hac parum illa omnia valent, et hæc sine tot signis et virtutibus sufficeret.

3. *Nihil dandum ethnicis quod datum non sit Judæis.*—Igitur sistendum est in illis virtutibus et prævenientibus auxiliis quæ Judæis data sunt, ita ut illa verba Christi : *Si in Tyro et Sidone factæ essent virtutes quæ factæ sunt in te*, præcise et exclusive intelligantur ; nam si aliquid aliud et efficacius dandum Tyriis et Sidoniis Christus subiciit, non est sincere locutus, nec justam objurgationem Judæis objecit. Sed ad hoc etiam respondent objurgatos comparatione gentilium, non quia non fuisset tunc majus et efficacius internum auxilium dandum gentibus, sed quia Judæis indigniores ad illud recipiendum se reddiderunt. Hæc autem responsio textui aut intentioni Christi consentanea non est ; quia non de prioribus peccatis, sed de præsentis obduratione et incredulitate eos objurgabat : neque reprehendit Judæos propter præcedentia peccata, ut prius commissa, sed propter duritiam cordis, et firmam ad sua peccata adhesionem voluntariam, quam tunc habebant, et quam non habuissent Tyrii et Sidonii, si apud illos signa fierent. Præterquam quod illa evasio non potest accommodari ad auxilium efficax, quacumque ratione explicetur. Nam si consistat in physica Dei prædeterminatione, vel in sola absoluta Dei voluntate, neutra pendet ex dispositione hominis, ut libro 3 ostendemus, et ideo nec datur propter dignitatem hominis, nec propter indignitatem negatur. Et quamvis aliquod auxilium ex se efficax negaretur propter præcedens peccatum, hoc ipsum

revocandum erit, juxta illam sententiam, in præviam voluntatem et determinationem Dei, quam pro solo suo arbitrio facit; a qua semper sumi posset sufficiens excusatio talis exprobrationis, ut in libro 3 late dicemus. Si vero auxilium efficax consistit in vocatione congrua, hæc supponit scientiam conditionatam, ut in superiori capite dicebam, et quando vocatio non est efficax, id non provenit ex Deo, sed ex homine, et non provenit formaliter (ut sic dicam) ex præcedentibus malis meritis, sed ex actuali repugnantia quam homo præbet vocationi. Hanc ergo prævidit Christus non fuisse futuram in Tyriis et Sidoniis, et ideo vocationem, si daretur, futuram fuisse in illis congruam. Sed de his latius in citato loco libri 5, ubi Augustini et aliorum Patrum auctoritate vim et efficaciam hujus loci confirmabimus, et has evasiones vanas esse ostendemus.

4. *Secundo probatur ex veteri Testamento.*—Secundo, argumentamur ex alio principali loco et revelatione facta Davidi, 1 Regum 23, de adventu Saulis in Ceilam si David ibi expectaret, et traditione virorum Ceilæ si Saul veniret, supponendo, ut etiam dicti auctores nobiscum admittunt, illam fuisse revelationem certam et infallibilem, ex scientia certissima illarum conditionalium veritatum. Nam illa scientia non potuit fundari in decreto libero Dei, quandoquidem effectus non erat aliquando futurus vere, et secundum actualem existentiam, ut per se patet. Neque etiam potuit illa scientia supponere decretum conditionatum, quo nimirum Deus ex se simpliciter prædefinierat, ut si David expectaret, Saul veniret, et si Saul veniret, Ceilitæ traderent David. Nam, ut omittam alia quæ generatim dici possent de otiositate, ut sic dicam, et indecentia talium decretorum conditionatorum, quæ neque in Scriptura neque in effectibus divinæ providentiæ fundari possunt, in hoc particulari casu et similibus est specialis repugnantia et indecentia contra divinam bonitatem. Quia actiones illæ, vel Saulis veniendi ad capiendum David Ceilæ permanentem, vel Ceilitarum tradendi David in manus Saul, erant peccaminosæ et contra justitiam: ergo contra bonitatem Dei est dicere Deum ex se decrevisse movere Saulem et Ceilitas, vel excitando, vel prædeterminando voluntates eorum, sive ad volendum obsidere civitatem in oilium et comprehensionem David, sive ad volendum tradere David obsessum in manus injustissimi persecutoris.

5. *Assueta responsio.*—Respondere solent hoc non esse inconveniens respectu illarum actionum pro materiali, quia non oportet ut Deus illas præfiniat formaliter, quatenus peccaminosæ sunt, quod solum divinæ bonitati repugnat. Quia, ut dicti auctores censent, non solum sub conditione, sed etiam absolute prædefinit Deus omnes actiones liberas peccaminosas quæ in quovis tempore fiunt, et voluntatem creatam ad illas prædeterminat, prout actiones reales et liberæ sunt, licet non, ut sunt malæ seu deficientes. Nos vero imprimis credimus repugnare hoc maxime divinæ bonitati, quia cum malitia sit inseparabilis a tali actione hic et nunc circa talem materiam libere facta, impossibile est Deum ex se velle determinare voluntatem hominis hic et nunc ad talem actionem, circa talem materiam prohibitam, vel ex se rectæ rationi contrariam, qui consequenter et moraliter velit quidquid cum tali actione necessario conjunctum est. Nam etiam naturalis philosophia docet, qui dat formam dare consequentia ad formam, et moralis docet eum velle malitiam, qui vult actum a quo est inseparabilis malitia. Deinde credimus repugnare hoc Conciliis et Patribus, definientibus Deum non prædestinare actiones pravas. Nam Concilium Arausicanum, canone 25, anathema dicit in eos qui dicebant aliquos esse ad malum prædestinatos a Deo. Quod de malo culpæ intelligendum est, et de prædestinatione ad illas actiones, per quas, si fiant, inevitabiliter culpa committitur. Neque enim aliter poterat Deus homines ad malum prædestinare, nisi ad tales actiones eos prædestinando et preparando, et ideo Prosper, de ipsis actionibus et affectibus liberis, quibus homines peccant, dicit ad object. Vincent. cap. 6, quod, *sicut Deus non indidit malo Angelo illam voluntatem, qua in veritate non stetit, ita nec hominibus illum affectum quo diabolus imitentur, inseruit*; et c. 7, *nullo modo credendum esse hujusmodi homines in hanc desperationem ex Dei voluntate cecidisse*; et c. 10 inde probat Deum non esse auctorem alicujus malæ actionis, *quia ejus prædestinatio nunquam extra bonitatem, nunquam extra justitiam*. At certe actus peccati etiam pro materiali extra justitiam est: et infra alia afferemus.

6. *Lenius responsum recluditur et impugnatur.*—Solent autem adversarii, ad vitandam verborum invidiam, dicere præcognovisse Deum talem actum peccaminosum, si talis occasio occurreret, in sua permissione, seu in

proposito quod habuerat permittendi illum actum, et non dare auxilium efficax ad vitandum illum, si talis conditio impleteretur. Et rationem reddit Bannez, quia voluntas creata, nisi a Deo efficaciter determinetur ad bonum, infallibiliter deficiet circa quaecumque honestam materiam. Sed hæc responsio vel intelligitur de permissione mere negativa ex parte objecti talis divini propositi, id est, quod ad neutram partem velit de se determinare voluntatem, vel intelligitur de tali permissione, quæ supponat seu includat positivam determinationem ad actum repugnantem præcepto seu honestati. Si hoc secundum dicatur, hæc responsio non est alia a præcedenti, sed palliatur nomine permissionis, ne scandalizentur audientes, si dicatur Deum ex mera sua voluntate decrevisse determinare hominum voluntates ad actus peccatorum: unde illa quæ dicitur permissio respectu malitiæ, revera non est permissio, sed virtualis volitio. Nam Deus, juxta illum modum dicendi, non tantum decrevit non dare auxilium efficax ad honeste operandum, sed etiam decrevit dare motionem efficacem ad talem actum in tali materia, ex quo necessario resultat deformitas peccati: sequitur ergo per quamdam connexionem ac consecutionem ex illo decreto Dei: non est ergo sola permissio, sed virtualis prædefinitio ipsius malitiæ, et ideo mirum non est quod ex tali decreto seu permissione cognoscatur infallibiliter peccatum futurum. At vero talis modus decreti, sive nomine prædefinitionis, sive nomine permissionis significetur, repugnat profecto divinæ sapientiæ et bonitati. Sic enim dixit Prosper, sentent. 14 ad Gallos, *non esse catholicum dicere quod qui non credunt Evangelicæ prædicationi, ex Dei prædestinatione et constitutione non credunt*. Multo profecto pejus est dicere, qui volunt non credere, ex Dei prædestinatione et antecedente decreto efficaci habere illam voluntatem, etiamsi dicant malitiam illius voluntatis tantum esse permissam.

7. *Alterum distinctionis membrum refellitur.*—Si vero sit sermo de priori permissione negativa, imprimis etiam illud est falsum, et quod Deus, quando permittit peccatum, ex se definiat non dare homini auxilium per se efficax, et necessarium ad vitandum peccatum. Repugnat enim hoc sufficientiæ gratiæ et possibilitati non peccandi, et illi principio tradito a Patribus et Concilio Tridentino, quod Deus neminem deserit, nisi prius deseratur ab ipso. De quo specialiter videri potest Chry-

sost., homil. 67, in Joann., præter ea quæ in libris 3 et 5 de illo dicturi sumus. Deinde etiam, posito illo modo permissionis, non potest in illa cognosci quid faciet humana voluntas in tali eventu, sed solum quid non faciet. Probatur primo ad hominem, quia ut aliquid faciat, indiget prædeterminatione et prædeliberatione Dei; sed Deus per illam negativam permissionem non deliberavit dare prædeterminationem ad oppositum actum, neque ad alterum oppositorum, ut supponitur: ergo ex vi illius decreti non potest cognosci quid sit voluntas creata in tali occasione volitura. Secundo, argumentor simpliciter, quia vel Deus in illa voluntate permittendi sistit omnino in negatione, ita ut solum velit non determinare ad actum bonum neque ad malum, neque etiam offerre sufficientem concursum ad aliquem actum; et sic non solum non cognoscat in tali permissione aliquem actum futurum, sed potius cognoscat carentiam omnis actus, non ut contingentem, sed ut necessariam: et consequenter non cognoscat futurum peccatum, quia talis carentia in tali homine non erit culpabilis, cum non sit in illius potestate habere actum; vel Deus, permittendo, non se habet adeo negative quin, quantum est ex se, offerat concursum sufficientem quo voluntas aliquid velit arbitrato suo; et tunc impossibile est, in tali permissione præcise spectata, determinate scire quid volet illa voluntas, quia illud decretum permissivum Dei tam indifferens est, sicut ipsa voluntas hominis; sed in voluntate hominis id non potest cognosci, ut maxime adversarii concedunt: ergo nec in tali decreto.

8. *Magis impugnatur solutio facta.*—Et in hoc sensu falsum omnino est dicere voluntatem creatam infallibiliter determinari ad malum, nisi efficaciter prædeterminetur ad bonum: quia proinde est ac dicere voluntatem creatam, ex se et natura sua esse determinatam ad malum, quod secundum fidem dici non potest. Sequela patet, quia vel voluntas non prædeterminata potest se ad aliquid determinare, vel non potest. Si non potest, ergo, licet non prædeterminetur ad bonum, ex vi illius negationis non determinabitur ad malum, nisi ad illud prædeterminetur; sicut etiam e contrario, licet non prædeterminetur ad malum, non determinabitur ad bonum, nisi ad illud prædeterminetur: ergo de se est indifferens ad utrumque: neque in sola negatione prædeterminationis ad bonum potest esse certa determinatio ad malum. Vel potest voluntas si-

ne prævia determinatione ad aliquid libere determinari, et tunc, etiamsi non prædeterminetur ad bonum, poterit simpliciter ad illud determinari, et non ad malum, alias aperte sequitur illam de se esse ad malum determinatam, nisi per contrariam prædeterminationem detineatur, quod dici nullo modo potest, nec ratione creationis ex nihilo, quia est contra bonam naturæ institutionem : nec ratione peccati originalis in nobis, quia est incidere in errorem in præcedenti prolegomeno reprobatum, quod peccatum originale abstulit libertatem ad operandum bonum.

9. *Aliis Scripturæ testimoniis nostra sententia probatur.* — Tertio, possumus similem probationem sumere ex aliis testimoniis Scripturæ, quibus veritatem hujus scientiæ confirmavimus. Ex quibus tertium omitto, quia in illo facile dici potest decrevisse Deum lenire et mutare cor regis Babylonis, si Sedecias se illi dedisset : quamvis enim id probari non possit, neque etiam a nobis improbari potest, quia potuit Deus id decernere absolute, quia sine peccato fieri poterat, et postea posset idem facere, sine læsione libertatis, per aliquam motionem et cogitationem congruam. Omisso ergo illo loco, alter ex Actibus videtur satis efficax ; virtute enim continet conditionalem hanc propositionem a Deo revelatam : *Licet maneat et prædices in Hierusalem, non credent* ; hæc autem non potuit cognosci in decreto absoluto, quo Deus, ex se et ante omnem præscientiam, efficaciter decreverat ut illi non crederent, etiamsi illis Evangelium prædicaretur. Alioqui veritas illius conditionalis reduceretur in voluntatem Dei, ut in causam propriam et primariam, non in voluntates proprias talium hominum, atque ita vere dicere possumus : ideo Judæi Hierosolymis existentes non crederent, etiamsi Paulus illis prædicaret, quia Deus decreverat ut non crederent. Hoc autem nihil aliud est quam dicere homines ex Dei prædestinatione non credere, quod a Prospero in sentent. 14, ad cap. Gallor., supra citata, damnatum est. Non ergo ideo Deus vidit illos non fuisse credituros prædicanti Paulo, quia ipse facturus erat ut non crederent, etiamsi Paulus prædicaret : non credere enim aut nolle credere non est opus Dei, nec objectum dignum divini decreti absoluti ; prævidit ergo ante ullum tale decretum illos sua mera voluntate non fuisse credituros, si talis conditio poneretur.

10. *Dilutio impugnatur.* — Scio hic etiam esse dicturos antecessisse decretum, non quo

Deus voluit facere ut non crederent, sed quo voluit non facere ut crederent. Sed hoc vel nihil est, vel in idem revolvitur : nam si velle non facere ut credant, nihil aliud sit quam nolle dare extraordinarium auxilium, quod esset congruum, vel quod alio quovis modo faceret ut crederent, non esset tamen de se simpliciter necessarium ad credendum, sic facile admitti potest habuisse Deum tale decretum, tamen illud non sufficit ut in eo infallibiliter prævideret Deus illos homines non fuisse credituros prædicante Paulo, quia sine tali auxilio haberent homines sufficientem vocationem et auxilium, quo possent credere si vellent ; ergo etiamsi non essent habituri majus auxilium ratione prædicti decreti, et, illo stante, adhuc erat contingens et de se incertum an illi essent credituri necne : ergo in illo decreto non poterat incredulitas illorum infallibiliter prævideri. Declaratur, nam hæc conditionalis : Si Deus decrevit non dare copiosius auxilium ad aliquem actum quam sit ad illum necessarium, non fiet ; non est vera ex vi illationis, quia non repugnat fieri cum solis necessariis, et quia ex negatione causæ non adequate, seu non necessariæ non sequitur negatio effectus. Ergo si illud decretum solum est de non dando auxilio extraordinario, seu copiosiori quam sit necessarium simpliciter ad credendum, ex illo non inferitur per necessariam consequentiam negatio credendi : ergo nec potest in illo decreto infallibiliter videri. At si decretum illud fuit de non dando auxilio simpliciter necessario ad credendum, profecto illud decretum fuit faciendi, ut illi homines non crederent, quia negatio actus non fit per positivam actionem per se loquendo, et ex vi negationis, sed fit per ablationem causæ, vel influxus necessarii ad actum : ergo si Deus ex se supponitur habuisse decretum non dandi auxilium necessarium ad credendum, plane supponitur decretum quo statuit facere ut non crederent eo modo quo hoc factibile est. Quod si cum illa negatione jungitur voluntas non credendi, hæc non poterit prævideri in solo decreto pure negativo ex parte objecti, sed oportebit addere decretum determinandi voluntatem hominis ad volendum non credere, quod plus est quam velle facere ut non credant, et magis Deo repugnare in præcedenti testimonio declaratum est.

11. *Probatur nostra doctrina ratione ab auctoritate Patrum supra jam lata.* — Quarto, ad hunc modum induci possunt cætera testimonia, non solum quæ ex Scriptura, sed

etiam quæ ex Patribus allegavimus; possumusque omnia ad hoc argumentum reducere. Omnis conditionalis propositio de futuro actu libero est de actu malo aut de bono, et de utroque actu Deus habet talem præscientiam certam; sed malus non potest in decreto antecedente præsciri, et ut cognoscatur bonus, vel non est necessarium decretum, vel illudmet decretum, ne tollat libertatem, debet supponere conditionatam scientiam alterius veritatis. Majorem admittunt adversarii, cum quibus nunc disputamus, et probata est omnibus testimoniis in duobus præcedentibus capitibus adductis. Minor, quoad primam partem de actibus malis, probata est in secundo et tertio testimonio proxime ponderatis, quia tale decretum non potest esse mere permissivum, sed necesse est ut sit prædestinativum, vel, quod idem est, prædefinitivum, saltem ipsius actus qui vocatur materiale peccati, ut a me satis probatum est. Repugnat autem ut decretum Dei sit prædestinativum actus mali; nam prædestinatio mali, etiam pro materiali, non potest Deo tribui, ut probavi. Et addi potest alia sententia Prosperi sexta ad Gallos, in qua dicit non esse Catholicum, qui asserit *prædestinationem in homine operari, sive ad malum, sive ad bonum*. Nam prædestinatio semper in bono est, quæ peccatum *sola voluntate commissum, aut remittendum novit cum laude misericordiar, aut puniendum cum laude justitiæ*. Unde recte dixit Fulgentius, libr. 4 ad Monimum, c. 13: *Posset aliquod peccatum esse ex prædestinatione Dei, si posset aliquis homo juste peccare*. Quod eleganter prosequitur usque ad caput decimum septimum: et simili modo possemus nos dicere: Posset actus peccati ex prædestinatione Dei esse, si posset juste fieri; cum tamen inseparabiliter habeat adjunctam malitiam, nullo modo potest ex prædestinatione fieri, et consequenter nec in prævio decreto cognosci.

12. *Probatio ex argumento ad hominem.*— Et quamvis de hac re in libr. 3 et 5 ex professo dicturus sim, nunc ad hominem libet argumentari. Quia D. Alvarez, de hac ipsa scientia conditionata disputans, duplex Dei decretum distinguit, unum formale, et aliud virtuale: formale per se satis clarum est: virtuale vero esse dicit quod in alio virtute continetur, quia in objecto ejus virtute seu implicite clauditur, sicut in voluntate aut comediendi carnes in die veneris includitur virtute voluntas offendendi Deum. Cum ergo ipse supponat hæc decreta virtualia in Deo,

perfecto negare non potest quin, si Deus absolute prædefinit ac voluit ut, in tali oportunitate et occasione si occurreret homo, haberet consensum in objectum cui inseparabiliter est annexa malitia, negare non potest quin habuerit virtuale decretum ipsiusmet malitiæ, nam virtute continetur in illo objecto formaliter voluto. Admittere autem talem voluntatem in Deo, etiam virtualementem, ex certa scientia et cognitione omnium proprietatum quæ in illo objecto virtute seu implicite continentur, profecto multum derogat divinæ bonitati: non sunt ergo talia decreta circa tales actus malos in Deo admittenda. Et quod de actibus positivis dicimus, intelligendum etiam est de omissionibus actuum, etiam voluntariis ac liberis; quando tales sunt ut in individuo et libere cum tali scientia vel negligentia contra præceptum suo modo fiant, inseparabilem malitiam habent: tunc enim eadem ratio versatur, ut intuiti facile patebit.

13. *Urgemus adhuc ex Patribus.*— Hoc ergo fundamento firmissimo supposito, optime argumentamur ex testimoniis omnium Patrum, qui in Deo ponunt hanc scientiam conditionatam, etiam circa peccatum et actum malum, et circa omissiones etiam malas; non enim possunt talia testimonia intelligi de præscientia supponente decretum prædestinans hujusmodi actus, quia hoc et aliis eorum sententiis et veritati multum repugnat: ergo, sicut illa testimonia, cum aliis ex Scriptura adductis in capite secundo de actibus peccatorum, probant dari in Deo hanc scientiam, ita probant non fundari in antecedente decreto, quia permissivum purum non sufficit, nisi vel supponat aliunde eandem præscientiam, vel aliquam voluntatem absolutam ac prædestinantem includat, ut probavi. Similiter idem docet Augustinus ubicumque ait Deum velle hominem justum in vita conservare usque ad illud tempus in quo præseit eum peccaturum, et similia ponderata in capite præcedenti, in quatuor prioribus testimoniis Augustini. Nam illa præscientia non potest supponere decretum efficax ex parte Dei, etiam sub conditione ex parte objecti, quia eandem indecentiam et repugnantiam cum divina bonitate includit. Idemque est de illa præscientia, quod homo non sit consenturus licet vocetur, de qua loquitur Anselm., Matthæi sexto, quia etiam illa resistantia seu negatio consensus est peccaminosa, nec potest Deus ex se illam velle, maxime cum sit contraria generali ejus intentioni. Possumusque

in hunc modum hanc partem confirmare, primo, quia Patres admittunt et supponunt hanc conditionatam præscientiam peccati futuri sub conditione, etiam in electis, in quibus non permittit conditionem impleri, ne peccatum sub conditione prævisum impleatur, et hoc attribunt magnæ gratiæ Dei: ergo supponunt illud peccatum non fuisse futurum ex decreto ipsius Dei, sed ex pura fragilitate ipsius hominis, cui subvenit gratia: nam homo ex se non indigebat illa gratia, nisi a Deo ipso in illo conditionato discrimine (ut sic dicam) constitueretur. Unde, cum Deus in secundo illo signo determinat tollere homini vitam ne peccet, non tam illi gratiam concedit, quam impedit ne maleficium, quod erga illum cogitaverat, compleatur: quod est satis violentum remedium, magisque Deo dignum fuisset non imponere illi homini talem necessitatem peccandi, etiam sub conditione. Non est ergo ille modus providentiæ Deo consentaneus, ac subinde non est ille sensus Patrum, sed plane supponunt hominem ex se, et eum communi concursu de se indifferente, fuisse peccaturum, si viveret, et ideo ex misericordia præveniri, ut potius præmature moriatur quam postea peccet.

14. *Probatur magis et declaratur ex Augustino.*—Secundo, potest ulterius declarari, quia, sicut Deus multos rapit quos præscit fuisse peccaturos, si viverent, ita etiam multos in vitam conservat, præsciens similiter esse peccaturos, quod evidenter docet Augustin. in eisdem locis de Corrept. et grat., capit. 8, et de Dono persever., capite nono, et aliis: ergo, sicut primum cognoscit in decreto conditionato, ita etiam hoc posterius: ergo sicut Deus rapit illum ne cadat, ita hunc conservat ut cadat: hoc autem absurdissimum est, et contra Augustinum, libr. primo contra Julian., capit. octavo, in fine, dicentem: *Non ideo creat pecora in armentis et gregibus impiorum, ut dæmonibus immolentur, quamvis hoc eos noverit esse facturos.* Quod ideo verum est, quia Deus non decrevit ut impii immolarent pecora dæmonibus, nec facit ut id faciant: nam si hoc ex se et absoluta voluntate decrevisset, profecto etiam crearet armenta, ut illa sua voluntas impleteretur. Sic ergo nos dicimus, si Deus præsciret hominem, si vivat, commissurum esse actum peccati, quia ipse Deus ita determinavit sub eadem conditione, quando postea vult antecedens impleri, id est, hominem vivere, vellet ut homo ille cadat, et efficaciam sui primi decreti

in illo ostendat: est ergo indignum Deo talia decreta ipsi tribuere. Unde Augustinus in verbis citatis, quamvis de præscientia absoluta loqui videatur, tamen et supponere videtur conditionalem, qua Deus voluit creare armenta, etiamsi præsciret quod, si illa crearet, essent immolanda dæmonibus: et ipsam scientiam absolutam talium peccatorum supponit non esse in decreto, quo Deus ante illam præscientiam absolute decrevisset ut homines talia facerent. Nam si crederet in Deo esse tale decretum, non esset cur negaret, imo negare non posset Deum creare armenta talium hominum, ut materiam haberent ex qua suum primum decretum infallibiliter impleant.

15. *Conditionatum decretum repugnat divine bonitati et libertati, et menti sanctorum agentium, cur Deus, præsciens hominem vel Angelum peccaturum, ipsum creaverit.*—Tertio, sunt maxime ponderanda testimonia in quibus Patres rationem inquirunt cur Deus hominem, vel Angelum creavit, quem præsciebat peccaturum? Nam in tali præscientia fingi non potest antecedens decretum conditionale, in quo fundetur. Oportebit enim supponere Deum, prius ratione quam absolute decrevisset creare Angelum, secum ita stituisse, si talem Angelum vel hominem creaverit, illum peccare permittam, illa utique permissione quæ includat absolutum decretum determinandi voluntatem talis hominis vel Angeli ad actum habentem annexam inevitabiliter malitiam peccati. Hoc suppono tanquam manifestum in illa sententia, quia nullum aliud decretum cogitari potest in illa sententia, ex quo inferatur infallibiliter illa conditionalis illativa, seu ex vi illationis, ut in illa sententia supponitur necessarium. Talis autem cogitatio habet repugnantiam ad divinam bonitatem, quam satis ponderamus, et statim per se occurret cuilibet attente rem consideranti. Habet etiam difficultatem de necessitate peccandi, quæ inde sequitur, et est contraria libertati, ut ex prolegomeno præcedenti facile potest intelligi. Sed hæc prætereo, et in auctoritate Patrum insisto. Est enim illa cogitatio evidenter aliena a mente Sanctorum illam quæstionem vel rationem inquiringentium; nam si præscientia peccati sub conditione futuri supponit decretum illud, in quo ejus veritas et illatio fundatur, potius quærenda esset ratio cur Deus tale decretum habuerit; nam ibi esset tota ratio admirationis et difficultatis, et sine dubio esset maxima, et

judicio meo inexplicabilis, quomodo Deus, cum sit summe bonus et sapiens, sola libertate, et nulla occasione sumpta ex determinatione creaturæ, talem determinationem absolutam ex se habuerit. At Patres nullam quæstionem de hoc moverunt, nec rationem talis decreti dare tentarunt : ergo signum est illam præscientiam, quam supponunt, esse simplicem scientiam quasi naturalem in ordine ad decreta libera divina, quia ante illa supponitur, et ea non obstante decrevit Deus libere hominem creare, et illi præceptum imponere, et suæ libertati eum committere. Et hoc est primum decretum liberum, quod Sancti circa creationem hominis vel Angeli ponunt, et ideo de illo solo rationem reddunt, cur illa præscientia ei non obstiterit, quia malitia (inquiunt) hominis illo modo futura non potuit vincere bonitatem Dei, nec debuit puniri antequam fieret. Quæ rationes nullo modo accommodari possunt ad illud conditionatum decretum, ut constat : est ergo ille modus explicandi dictam præscientiam in illo casu alienus a mente dictorum Patrum, et per se incredibilis, cum nulla auctoritate nitatur, et sit de re obscurissima pendente ex sola libertate Dei, et habente alias difficultates et incommoda quæ insinuavimus.

16. *Præscientia quæ antecedit congruam vocationem est conditionata.* — Venio ad alteram partem de hac præscientia, prout a Patribus esse dicitur de bonis actibus sub conditione futuris. In quo imprimis consideranda est illa præscientia, quam sanctus Augustinus antecedere supponit ad congruam vocationem, nimirum, quia præscit Deus quis modus vocationis erit congruus alicui, ut vocantem non respuat. Quod etiam aliis locis allegatis dixit Chrysostomus, Deum aliquos ex gratia tunc vocare, quando eos scit obtemperaturos. Nam illa præscientia, ut ostendi, non potest esse absoluta, cum hæc sequatur ad propositum sic vocandi, ut constat : est ergo scientia conditionata, et non potest fundari in conditionato decreto. Primo, quia non fundant Patres congruitatem vocationis in decreto, sed in quadam attemperacione vocationis ad talem voluntatem taliter affectam, et tali tempore cum talibus circumstantiis præcognitam, quam Deus infinita sua sapientia intime prospiciens intuetur in tali opportunitate esse obtemperaturos, ut videre licet in Augustino loco allegatis, et præcipue in dicto capite de *Bono persever.*, ubi, ex eo quod Deus aliquos vocat, prout novit eis expedire, infert *esse in*

aliquibus naturaliter munus quoddam intelligentiæ quo præmoveantur ad fidem, si congrua suis mentibus vel audiant verba, vel signa conspiciant. In qua illatione aperte sentit veritatem illius conditionalis : *Si iste ita vocetur, consentiet*, non fundari in antecedenti decreto Dei prædeterminante; illud enim in quocumque homine cujuscumque conditionis vel ingenii semper erit efficax; sentit ergo Augustinus illam præscientiam nullum supponere decretum a quo habeat vocatio illam congruitatem, sed hanc sumi ex coaptatione ad tale ingenium cum aliis conditionibus, quibus perspectis, Deus sua infinita scientia veritatem futuri consensus intuetur.

17. *Ratione probatur, quod conditionata scientia nec conditionatum, nec absolutum decretum, supponat.*—Secundo, idem probamus ratione, quia hæc conditionata scientia, quam Augustinus et alii Patres supponunt ante vocationem, præcedit secundum rationem ad propositum absolutum dandi vocationem : ergo nullum aliud decretum supponit vel absolutum vel conditionatum. Major evidens est ex testimoniis, et statim amplius probabitur. Consequentia vero quoad priorem partem de decreto absoluto probatur, quia vel illud esset in Deo per modum intentionis dandi homini consensum liberum in fidem, vel quid simile : vel esset per modum executionis, ita ut eadem volitio sit effectio ipsiusmet consensus humani vel saltem motionis prædeterminantis ad illum. Prior actus non solum esse potest in Deo ante præscientiam absolutam futuri consensus, sed etiam est probabile semper præcedere in actibus bonis, et maxime in supernaturalibus, quia potest illos Deus prædefinire et prædestinare, antequam absolute præsciat illos esse futuros. Nihilominus tamen hæc prædefinitio Dei supponit præscientiam conditionatam in Deo, qua novit quod si hominem efficaciter moveat aut vocet tali modo, infallibiliter convertetur. Quam præscientiam negare non possunt adversarii, tum quia est per se necessaria ad talem actum intentionis absolutum prudenter habendum, quia nemo potest specialiter intendere seu absolute velle consequi aliquem finem, nisi media, quibus illum consequenturus est, habeat præcognita; unde ut intentio sit infallibilis, necesse est ut media præcognoscantur ut infallibiliter efficaciter ad consequendum finem : hæc autem præcognitio sistit in hac conditionali : Si usus fuero his mediis consequar finem; et in præsentem revocatur ad idem : Si ita hunc hominem

vocavero, consentiet : tum etiam quia dicunt auctores contrariæ opinionis consensum infalibilibiter sequi ex motione physice prædeterminante : ergo, antequam Deus habeat intentionem salvandi illum credentem, habet scientiam hujus conditionalis : Si dederò huic talem motionem, salvabitur, vel credet. Atque hinc facile probatur altera pars de decreto exequenti, quia omne volitum est præcognitum, etiam in Deo ; sed Deus vult dare illam vocationem vel motionem, ut congruam et efficacem ; ergo præcognovit illam ut talem : ergo, antequam velit illam dare, præscit quod, si illam dederit, habebit effectum ; quod, ut probavi, negare non possunt etiam adversarii : unde quoad hoc solum est differentia, quia nos ponimus illam scientiam non ex vi illationis ex tali conditione, ipsi autem debent illam admittere ex vi illationis. Et ita, quantum ad hoc punctum, revocatur dissensio ad quæstionem de prædeterminatione physica, tractandam in libro tertio, post medium, et latius in libro 5 per totum. Jam vero probatur prior consequentia quoad decretum conditionatum liberum, quod in Deo præcedere non debeat ad talem scientiam ; et primo in sententia adversariorum est evidens, quia scientia illa quam declaravi, habetur ex vi illationis ; unde pertinet ad scientiam simplicis intelligentiæ omnino necessariam : ergo nullum supponit decretum liberum ; sicut scientia hujus conditionalis : Si sol creatus fuerit, illuminabit ; vel : Si volnero creare mundum, incipiet esse, et quælibet similis, est in Deo ante omne decretum liberum : non est autem minus necessaria illa conditionalis, in vi illationis : Si dederò huic homini motionem prædeterminantem, consentiet : ergo etiam illa non supponit decretum liberum conditionatum, sed potius in suo objecto includit illud, non ut jam existens, quoad liberam determinationem cum respectu rationis, sed ut possibile nostro modo concipiendi : sicut intelligimus nunc fuisse in Deo possibile decretum liberum creandi alium mundum, quod de facto non fuit. In nostra vero sententia probatur, quia vocatio non habet quod sit congrua a physica prædeterminatione, neque ex immediata efficacia antecedente divinæ voluntatis : ergo congruitas vocationis, seu efficacitas ejus, ut possibilis, non pendet ex aliquo decreto libero Dei, etiam conditionato : ergo nec scientia de efficacia talis vocationis, si detur, supponit, secundum rationem, antecedens decretum conditionatum. Antecedens probamus, quia

ille modus efficaciæ repugnat libertati, juxta dicta in præcedenti prolegomeno, et latius dicenda in libro quinto. Consequentia vero prima est per se evidens, quia nihil aliud est scire hanc conditionalem esse veram : Si hæc vocatio detur, homo consentiet, quam scire hanc vocationem, cognitam ut possibilem, cognosci etiam ut efficacem possibiliter : ergo si vocatio non habet hanc efficacitatem ut possibilem a libero decreto Dei, sine illo et ante illud præscietur, quia omne quod est possibile præcognoscit Deus ante omne liberum decretum. Et nihilominus, in objecto illius scientiæ includitur aliquod decretum Dei sub conditione, non tamen prædeterminans physice, sed offerens concursum concomitantem, ut supra declaravi. Et ita quoad hanc partem etiam revocatur tota differentia opinionum ad controversiam de concursu Dei prævio, vel concomitante, et de præveniente gratia physice prædeterminante, vel moraliter alliciente et physice tantum cooperante, et consequenter erit differentia in decreto incluso in objecto illius scientiæ, seu in ipsa conditione, quale sit. Quod autem hoc decretum, ut in re ipsa existens, in Deo supponatur ad talem scientiam, in nulla sententia dici posse videtur.

18. *Pœnitentia, nunquam futura præscita, non potest fundari in aliquo decreto.* — Ultimo, possunt ponderari testimonia Patrum, quia sicut dicunt præscisse Deum hominem justum esse lapsurum, si vivat, et per mortem prævenire illum ne peccet, ita dicunt præscire Deum, hominem pravum fuisse acturum pœnitentiam si viveret, et nihilominus non vult concedere ei vitam, sed permittere ut in peccato moriatur. Illa enim præscientia conditionata de pœnitentia nunquam futura non potest fundari in decreto absoluto, ut per se constat : conditionatum autem ibi superflue fingeretur, et sane præter intentionem Patrum. Nam tale decretum solum esset hujusmodi : Si darem huic vitam, darem etiam pœnitentiam. Quia tale decretum nec continetur in aliqua universali promissione, vel ordinaria lege Dei, neque est necessarium secundum communem cursum providentiæ ad aliquem effectum ejus, neque habet aliquam utilitatem vel rationem : ergo et frustra ponitur, ac sine fundamento, et incredibile est Patres fuisse locutos de illa præscientia ex suppositione talis decreti liberi, cujus fundamentum, imo nec vestigium in Scriptura, vel in effectibus, aut revelationibus Dei invenitur. Quam rationem infra latius prosequemur, nunc enim solum ad

ponderanda testimonia Sanctorum illam attigimus.

CAPUT VI.

QUID DE HAC SCIENTIA CONDITIONATA DIVUS THOMAS SENSERIT.

1. *Primum argumentum contra nos : D. Thomas non agnovit scientiam conditionatam.* Nav., contro. 16, vel 56, paragr. 3, contra præscientiam futurorum conditionatorum. — Quoniam Auctores contrariæ sententiæ (ut solent auctoritate divi Thomæ imprimis muniuntur, ideo in potissimis punctis hujus materiæ et maxime controversis summa diligentia ejus mentem investigare conabimur. Primo ergo divum Thomam non agnovisse scientiam hanc conditionatam vel omnem, vel saltem, quæ divinum decretum antecedit, ex principiis ejus colligunt. Primo quia divus Thomas adæquate dividit scientiam Dei in liberam, et naturalem : sed hæc scientia conditionata nec libera dici potest, quia est in Deo sine decreto libero ejus, nec naturalis, quia simpliciter posset non esse in Deo si voluntas creata aliter esset volitura, ut posset etiam posita tali conditione : ergo est tertia scientia, quam divus Thomas non agnovit. Pro majori citatur divus Thomas, 1 part., quæst. 14, art. 9 ; 3 part. quæst. 10, art. 2, ad 2 et quæst. 13, art. 1, ad 2 ; libro 1 contra gent., cap. 66 et 69 in fine ; Quodlib. 3, art. 3 ; quæst. 8 de Verit., art. 4 ; quæst. 20, a. 4, ad 1 ; in 1, distinct. 38, quæst. 1 ; in 3, distinct. 14, quæst. 1, a. 2, quæstiune. 2 ; in 4, dist. 49, quæst. 2, art. 5.

2. *Secundo, quia futura conditionata non cognoscuntur in præsentia æternitatis.* — Secundo quia juxta doctrinam D. Thomæ nullus est modus, quo possit Deus habere talem scientiam. Probatur, quia 1 part., quæst. 14, a. 13, unicam tantum viam esse dicit, qua possit Deus cognoscere futura contingentia, scilicet in præsentia æternitatis ; sed conditionata futura non potest cognoscere in præsentia æternitatis, quia nunquam futura sunt, et æternitas non coexistit nisi his, quæ in aliqua differentia temporis existunt : ergo in doctrina divi Thomæ futura conditionata contingentia non possunt subesse certæ et infallibilis cognitioni. Minor cum consequentia videntur clara. Major patet ex divo Thoma, 1 part., q. 14, art. 13. Ubi distinguens duplicem statum futurorum, in se, et in causis suis, ait in causis nullo modo posse certo cognosci, sed

ad summum per conjecturam ; prout autem unumquodque illorum est actu in se ipso, sic subdi cognitioni certæ et infallibili, et quia ita attinguntur per æternum Dei intuitum, ideo certo præsciri, quia ejus æternus intuitus fertur super omnia, ut suæ æternitati præsentia ; in quo discursu manifeste omnem alium medium cognoscendi futura contingentia excludit. Idem docet 2. 2, quæst. 171, art. 6, ad 2, et lib. 1 contra gent., capit. 67, ubi in ratione prima hanc sumit propositionem : *Contingens certitudini cognitionis non repugnat, nisi ut futurum est, non autem ut præsens est.* Declarat autem solum esse præsens pro tempore pro quo est, quæ præsentia locum non habet in re nunquam futura, et in toto illo capite explicat præsentiam per actualem existentiam, quæ in futuris conditionatis, ut sic, non intervenit. Idem habet in 1, dist. 38, quæst. 1, art. 5, et quæst. secunda de Verit., art. 12. ubi generaliter concludit contingens, ut futurum est, per nullam cognitionem, etiam divinam, posse infallibiliter cognosci. Quod etiam tradit q. 16 de Malo, art. 7, et ubique addit particulam exclusivam dicens, non posse futura contingentia certo sciri, nisi tali modo, utique ut præsentia dicto modo : ergo.

3. *Confirmatur primo.* — Et confirmatur primo hoc testimonium D. Thomæ, quia, si semel admittatur præscientia hæc conditionata, aperte sequitur posse etiam absoluta cognosci alio modo quam per præsentiam æternitatis, nimirum in aliqua causa proxima vel remota, quod est contra eandem hypothesin positam in doctrina divi Thomæ. Sequela patet, quia si Deus, ante omne decretum liberum, per simplicem intelligentiam, videt hanc conditionalem esse veram : Si Petrus in tali occasione cum talibus circumstantiis constituatur, libere loquetur : et in posteriori signo addatur decretum liberum, quo vult Petrum constituere in tali occasione et circumstantiis, eo ipso videt Petrum libere esse locuturum in illis duabus præmissis sine discursu ex parte sua : ergo jam videt futurum absolutum alio modo quam per præsentialitatem existentie ejus. Idem argumentum potest contra me fieri : nam, supposita illa conditionali scientia, dico posse Deum prædefinire actum liberum futurum, saltem per modum intentionis absolute : ergo jam cognoscit Deus per absolutam scientiam in illo decreto Dei illum actum esse absolute futurum, cum tamen in illo signo nondum videatur illud futurum in se, ut præsens,

quia nondum intelligitur decretum absolutum Dei, quo et conditio verificetur, et fiat effectus, sine quo non potest talis effectus videri ut præsens in æternitate.

4. *Secundo confirmatur.*—Et confirmatur secundo, quia divus Thomas, 1 part., quæstion. 14, art. 13, ad secund., dicit veritatem conditionalis propositionis consistere in bonitate illationis : sed in istis conditionalibus propositionibus de quibus tractamus, illatio non est bona : nam si esset bona, esset necessaria ; et si esset necessaria, jam futurum non esset contingens, sed necessarium, quod est contra hypothesim, et contra contingentiam seu libertatem talium effectuum : ergo illæ propositiones vel sunt falsæ, vel saltem non sunt cognoscibiles ut veræ : ac subinde, juxta divi Thomæ principia, Deus non agnoscat illas, quia, sicut Deus non potest facere quod de se est impossibile, ita non potest scire quod de se non est cognoscibile, quia verum non est. Et hæc fere sunt testimonia quæ Thomistæ in hac causa allegant.

5. *Ultima.*—Tandem quod hæc præscientia saltem esse non possit ante decretum absolutum ex parte Dei cum conditione ex parte obiecti, probatur argumento jam supra facto, quia eadem est proportio futuri conditionati ad decretum conditionatum, quæ est futuri absoluti ad decretum absolutum ; sed futurum absolutum non potest a Deo sciri, nisi prævio absoluto decreto in voluntate Dei : ergo nec conditionatum sciri potest, nisi prævio conditionato decreto. Consequentia clara est, et major ex paritate rationis videtur nota. Minor autem probatur ex D. Thom. in 1, d. 39, q. 1, art. 1, ad 5, ubi, loquens de scientia absoluta futurorum contingentium, ait : *Scire secundum rationem sequitur voluntatem* ; et art. 2, ad 1, dicit quod scire Deum est subiectum voluntati ipsius, unde supponit illam.

6. *Vera assertio de conditionatis indicatur et supponitur ab angelico doctore, et nullibi illi refragatur.*—Nihilominus assero in doctrina D. Thomæ nihil inveniri huic sententiæ contrarium, imo interdum illam indicare vel supponere. Ut hoc ostendam, distinguo duo, quæ in hoc puncto semper sunt separanda, scilicet, an sit talis scientia in Deo, et quo modo seu quo medio sit. Priorem ergo partem, scilicet, non ignorasse D. Thomam hanc scientiam simpliciter, et quoad an est, colligimus ex 3 p., quæst. 1, art. 5, ad 2, ubi, tractans D. Thomas rationem Augustini, cur Christus

tali tempore voluit incarnari et Evangelium prædicari, quia præcivit tunc fuisse plures in eum credituros, illius occasione attingit etiam locum Matth. 11 de Tyriis et Sidoniis, et cum eodem Augustino, lib. de Don. persever., cap. 9, sentit verba illa Christi dicta fuisse per absolutam revelationem pœnitentiæ, quæ futura erat in Tyriis et Sidoniis, si conditio illa in eis fuisset impleta : et occulto iudicio divinæ prædestinationis tribuit quod, non obstante illa præscientia, non fuerint talia signa apud illos facta. Unde super caput Matth. 11, de propria præscientia exponit locum illum, unde infert ex illis Christi verbis convinci errorem dicentium non salvari, nisi eos quos Deus præcivit quia converterentur si prædicaretur eis : *Nam hoc* (inquit) *excludit dicens quod Tyriis et Sidoniis male erit*, utique, quamvis credituri essent si audissent, *quia non judicabit Deus illos ex his quæ facerent, sed ex his quæ fecerunt*, ut ibidem cum Augustino subjungit, supponens semper non deesse Deo talium operum scientiam, sed in ipsis operibus deesse rationem meriti et demeriti, nisi in aliqua differentia temporis futura sint. Potest etiam idem D. Thomas allegari in 3 p., q. 1, art. 3, ad 4, ubi dicit *prædestinationem supponere præscientiam futurorum*, quod de hac præscientia optime intelligitur ; nam absoluta præscientia futurorum potius sequitur ad prædestinationem, maxime juxta sententiam Thomistarum. Sed ille locus, ut ibi notavi, incertus est. Item allegatur D. Thomas in eadem quæst., art. 2 et 6, ubi rationem decreti quod Deus habuit, ut incarnatio nec statim in principio mundi fieret, nec in finem ejus reservaretur, sumit ex præscientia futurorum effectuum liberorum, qui essent in humano genere, si aliquo ex illis extremis temporibus Christus carnem assumeret vel non sumeret. Quæ præscientia sine dubio conditionata est, quia et præintelligitur ante decretum de tempore futuræ incarnationis, et sub conditione si tali vel tali tempore fiat, et multi ex illis effectibus de facto non evenerunt, quia conditio non est impleta ; verbi gratia, præcognovit Deus fidem esse penitus abolendam in mundo, si differretur incarnatio usque ad finem ipsius mundi, quod tamen postea non evenit, quia conditio impleta non est. Oportet etiam scientiam esse certam, alias providentia Dei, quæ in illa fundatur, non esset certa. Denique oportet præscientiam non esse confusam, sed distinctam et claram, et ideo determinate et in particu-

lari præscivit Deus in quibus et quomodo tales effectus evenirent, si incarnatio ante ea vel tardius fieret.

7. *Secundo probatur respondendo primæ objectioni.* — Secundo, probatur nihil esse in doctrina D. Thomæ quod huic scientiæ repugnet, quod fiet sufficienter respondendo ad primam objectionem contrariæ sententiæ, quæ in hoc sensu maxime procedit: reliquæ enim magis attingunt partem alteram de modo talis scientiæ. Primo ergo negamus reperiri in D. Thoma, in locis quæ ibi allegantur, divisionem scientiæ divinæ in naturalem et liberam: non enim in D. Thoma verba illa inveniuntur. Sed dividit D. Thomas illis locis scientiam Dei in scientiam simplicis intelligentiæ et visionis, sub quibus verbis in aliis locis quamplurimis eandem divisionem repetit, nunquam sub prioribus de scientia naturali et libera. Arguens autem nomina mutavit, ut aliquam speciem difficultatis haberet objectio, tacite supponens verba esse æquivalentia, cum tamen neque revera sint, neque ex doctrina divi Thomæ id probari possit. Admissa ergo divisione illa sub verbis D. Thomæ, negatur consequentia; nam illa adæquata est, et scientia conditionata, simpliciter loquendo, sub scientia simplicis intelligentiæ continetur, sive libera sive naturalis appelletur, quia scientia simplicis intelligentiæ formaliter non habet quod sit talis ex eo quod sit libera vel necessaria, sed ex eo quod est de rebus possibilibus, seu abstrahentibus ab existentia in aliqua differentia temporis futura, et ideo invenitur in Deo ante omne decretum liberum de rebus aliquando futuris. Et hoc totum convenit in conditionatam scientiam, quia licet per illam videatur effectus contingens non tantum ut contingens, sed etiam ut determinatus ad alteram partem ex hypothesisi, tamen quia illa hypothesis nondum supponitur futura ex aliquo decreto Dei, totum id manet sub esse possibili, et ideo tota illa cognitio ad simplicem intelligentiam pertinet. Unde neque illi doctores, qui admittunt hanc scientiam conditionatam saltem in decreto conditionato, loquuntur ad mentem divi Thomæ, dum dicunt talem scientiam esse scientiam visionis, quia D. Thomas nunquam ponit scientiam visionis circa res nunquam futuras, neque in ulla differentia temporis habituram existentiam, ut in locis citatis videri potest: ut vero hæc scientia esse potest de rebus nunquam de facto futuris, ut de penitentia Tyrionum, de traditione Cæliitarum, et similibus. Igitur ex divisione illa,

prout a D. Thoma traditur, nullum argumentum sumitur.

8. *Declaratur quomodo conditionata possit dici libera vel naturalis.* — Admissa tamen divisione sub illis verbis liberæ et naturalis, supponendum est scientiam Dei non posse dici liberam ex parte ipsius scientiæ, prout, nostro modo intelligendi, est quasi elicited actus a Deo, quia determinatio scientiæ Dei ad talem respectum, sub quo dicitur scientia hujus vel illius rei, non subditur libertati Dei, sed, supposito objecto, quasi resultat naturaliter. Quod ita declaratur ex his quæ in nobis accidunt; nam actus tantum duobus modis potest esse liber, scilicet, vel formaliter seu elicited, vel denominative ex imperio alterius actus: priori modo est liber actus voluntatis, non vero actus intellectus, sed ad summum posteriori modo. Sic ergo in Deo seclusa imperfectione elicitediæ seu efficientiæ actus, determinatio actus voluntatis Dei est per se formaliter libera, nam, proposito eodem objecto, potest per seipsam voluntas Dei ad illud determinari vel non determinari: intellectus vero non est sic formaliter liber, nec potest etiam determinari ex motione voluntatis suæ, quæ circa ipsum intellectum versetur, quasi applicando illum ad talem determinationem, quia cum omnis scientia Dei sit clara et evidens, et sit purissimus actus, neque quoad exercitium, neque quoad specificationem (ut more nostro loquamur), potest pendere ex motione voluntatis. Loquendo ergo de propria libertate actus ex parte operantis, nulla est in Deo scientia libera, sed ipsa etiam visionis est naturalis, non simpliciter, sed præsupposito objecto, sicut calefactio ab igne est naturalis, supposita tamen materia applicata, circa quam versari possit: et ita etiam non procedit argumentum. Quia vero objecta scientiæ divinæ quædam sunt necessaria, alia vero ex se non habent necessitatem, sed contingentiam, ideo ex parte objectorum admitti potest illa divisio. Inter objecta autem non necessaria, quædam sunt talia per solam determinatam habitudinem ad voluntatem creatam, nullo supposito decreto libero voluntatis Dei; alia pendent ex antecedente decreto libero voluntatis Dei. Potest ergo uno modo dici libera omnis scientia, cujus objectum de se non est necessarium, sed posset non esse, sive hoc habeat ex habitudine ad voluntatem creatam, sive ad voluntatem Dei, et sic omnis scientia contingentiam, sive conditionata, sive absoluta, dicitur contingens, et a naturali distinguetur. Potest item restringi no-

men scientiæ liberæ ad illam scientiam, quæ versatur circa objectum futurum, ex libero decreto Dei, quia proprie non dicitur alicui liberum, nisi quod aliquo modo pendet ex voluntate ejus quoad esse et non esse, et sic omnis scientia conditionata, quæ non pendet ex actuali decreto Dei libero, nec illud supponit, dicitur naturalis, id est, non libera, sed necessaria, saltem ex suppositione objecti, quod supponitur independentem a libero decreto Dei, quoad veritatem sub esse possibili; sicut creaturæ omnes sub esse possibili sunt seibiles independentem a decreto libero voluntatis divinæ; sub illis ergo contineri possunt et veritates necessariae et contingentes, et nihilominus omnium scientia est naturalis, et non libera ipsi Deo. Quæ doctrina in se vera est, et contra D. Thomam esse non potest, quia, ut dixi, nunquam distinxit scientiam Dei in naturalem et liberam, nec declaravit unde illæ denominationes sumendæ sint.

9. *Secunda obiectio retorquetur.* — Secunda obiectio retorqueri potest in eos qui dicunt prævidere Deum hæc futura in prædeterminatione voluntatis creatæ, facta a Deo per absolutum decretum: nam certe D. Thomas modum illum præcognoscendi futura contingentia nunquam docuit, nec antiqui Thomistæ ita interpretati sunt D. Thomam, sed ubique docent, secundum D. Thomam, non posse futura contingentia cognosci in causa, quantumvis præparata et disposita ad effectum, sed solum in præsentia ipsius actualis determinationis, ut patet ex Capreolo in 1, distinct. 38, quæst. 4, art. 2, per totum, præsertim ad argumentum Durand. contra 4 concl.; Cajetan., 4 part., quæst. 14, artic. 13, circa responsionem ad primum in fine; Hispalens. in 1, distinct. 38, quæst. 4, artic. 4, ad 7. Ubi Aquarius, in additionibus ad Capreol., conclus. 6, distinctius id tradit, omnes alios modos cognoscendi futura excludendo, affirmatque omnes Thomistas antiquiores ita sensisse. Imo etiam alii scholastici, qui sententiam illam D. Thomæ impugnarunt, intellexerunt D. Thomam ita illum modum elegisse, ut omnes alios rejiceret, et in hoc sensu illam impugnarunt, ut in Durando, Scoto, Aureol. et aliis, in 1, distinct. 38 et 39, videre licet. Hinc ergo argumentamur, quia cognoscere futura in decreto prædeterminante liberum arbitrium, non est cognoscere illa ut præsentia, sed ut futura, neque est illa cognoscere in se, sed in causa; utrumque autem repugnat certitudini cognitionis futurorum contingentium, juxta princi-

pia D. Thomæ; ergo. Minor auctoritate solanitur, et ideo videtur satis probata, et ex ipsis locis D. Thomæ, et ex aliis doctoribus. Major autem probatur, quia prius natura quam intelligatur effectus prodire a causa physice prædeterminata, cognoscitur in illa: ergo ut sic non cognoscitur ut præsens, sed ut futurus a tali causa; quia effectus non est præsens, donec a sua causa manet; tunc autem non cognoscitur, ut jam manans a causa: ergo ut emanaturus a causa sic affecta. Et inde etiam concluditur illo modo non cognosci effectum in se, sed in causa, quia nondum intelligitur emanasse a causa: ergo nec habere in se esse, ratione cujus possit in se cognosci: ergo in causa, ut ultimate completa, cognoscitur. Denique in conditionatis futuris id declaratur, quia juxta illam sententiam cognoscuntur in vi illationis, quia ex causa sic determinata necessario sequitur effectus, saltem necessitate consequentiæ, ut etiam adversarii loquuntur: ergo per talem scientiam non cognoscitur effectus contingens in se, sed in quadam causa cum qua habet necessariam connexionem et illationem: hoc autem, ut dixi, repugnat futuris contingentibus, juxta doctrinam D. Thomæ: et infra ostendemus esse in hac parte verissimam. Nam ille modus cognitionis rerum contingentia repugnat.

10. *Ad secundum respondemus futura contingentia conditionata esse præsentia æternitati.* — Quocirca ad argumentum, quatenus fit contra nos, respondemus doctrinam illam D. Thomæ nobis non repugnare: quia etiam futura contingentia sub conditione non præsciuntur a Deo in causa, nec ut futura, sed ut in se sunt aliquo modo æterna scientiæ Dei. Quando enim Deus, ante decretum liberum de vocando tali modo Paulo, præcognovit quod si Paulus sic vocaretur, esset consensurus, non id cognovit, quia viderit ex voluntate sic vocata necessario sequi consensum etiam necessitate consequentiæ, et ita nec cognovit illum effectum in tali causa, nec proprie ut futurum, sed cognovit ab illa voluntate emanaturum fuisse consensum, videndo objective ipsammet emanationem, tanquam præsentem: supponimus enim, cum Deus dicitur videre futurum contingens ut præsens, non intelligi de præsentia reali fundata in existentia actuali, quam res cognita extra Deum habeat, etiam in mensura æternitatis; id enim, etiam in absolutis, falsum censemus et alienum a mente divi Thomæ, ut Hispalensis supra recte etiam sensit: intelligitur ergo de præsentia

objectiva, quæ in hoc consistit, quod non cognoscitur effectus ut contentus tantum in causa, sed ut emanans ab illa pro sua duratione, quæ ita menti Dei præsentatur, ac si esset in re jam præsens. Et ad eundem modum res futura, etiamsi non absolute, sed tantum sub conditione sit futura. Nam videndo in exemplo adducto voluntatem Pauli ex hypothesi, seu conditionaliter ita constitutam et vocatam, videt ab illa dimanare consensum sub eadem hypothesi: et ita illemet consensus sic futurus videtur ut præsens et in se, non ut futurus et in causa, ut in sequenti capite latius exponemus. Unde non obstat quod hæc futura conditionata, vel nunquam sint futura, vel quod cognoscantur prius ratione quam sint absolute futura, quia nihilominus cognoscuntur, ut præsentia objective æternæ Dei cognitioni, quia non in causis, sed in seipsis cognoscuntur, et quia æternus intuitus omnia complectitur, ut in sequentibus explicabimus.

11. *Ad primam confirmationem respondetur.*—Ad primam confirmationem respondetur post scientiam conditionatam alicujus futuri, duplex decretum posse intelligi in divina voluntate, quo illa cogitio transeat in absolutam, ut in eadem confirmatione tangitur. Unum est decretum executivum, quo Deus vult purificare conditionem illam ut res illa sit absolute futura, ut, verbi gratia, dare vocationem per quam novit voluntatem esse convertendam si illi daretur, et tunc eo ipso videri talem conversionem in seipsa, et ut præsentem in æternitate, secundum illam existentiam quam suo tempore habitura est. Quia ex vi illius decreti vult Deus non solum dare homini omne auxilium prævium ad talem conversionem, sed etiam omnem concursum, seu actuale influxum cooperantem ex parte sua necessarium ad talem effectum, quem concursum simul cum influxu voluntatis hominis intuetur ut terminatum ad talem consensum, et ita illa cognitio est intuitiva talis effectus in seipso. Unde non est cognitio quasi per discursum virtualem, videlicet: Si iste homo ita vocetur, consentiet; sed vocabitur; ergo consentiet: quia illa minor videtur in se, quatenus ipsa vocatio cum omnibus aliis necessariis jam est determinata ad esse, et non potest videri sine termino simili modo præsentis: ergo illa cognitio non est extra modum intuitionis rei in se, ut præsentis æternitati.

12. *Posita conditionata, quæ per decretum intentionis determinantur, etiam ut sunt præ-*

sentia æternitati cognoscuntur.—Major difficultas est in alio decreto, quod, supposita illa præscientia conditionata, potest Deus habere per modum intentionis, volendo immediate et absolute ut homo consentiat, verbi gratia, volendo credere, ex qua intentione vult dare illi talem vocationem: nam illud decretum seu propositum dandi fidem prius est secundum rationem, quam voluntas executiva dandi vocationem: ergo in illo decreto scit Deus absolute effectum esse futurum, prius quam illum, ut absolute præsentem in æternitate intueatur, atque cognoscit prius futurum, ut futurum in causa, quam illum videat in re præsentem. Ad quod respondeo non posse negari hunc præscientiæ modum, non tamen ita esse in causa quin includat præsentiam in æternitate, quatenus illam supponit in præscientia conditionata, et ad illam dicit habitudinem virtualem. Non posset enim Deus habere tale decretum de futuro actu libero, nisi jam in thesauris sapientiæ suæ prænovisset vocationem, per quam potest infallibiliter executioni mandari, et ideo tale decretum dicit habitudinem ad illud objectum, ut jam conditionaliter præsens æternitati, et virtute includit voluntatem dandi talem vocationem et concursum, et ideo ille modus præscientiæ non excluditur ab illo modo, qui esse dicitur per præsentiam æternitatis, sed sub illo continetur, vel ad illum revocatur.

13. *Ad secundam respondetur.*—Ad secundam confirmationem, respondemus D. Thomam, in loco ibi allegato, non loqui de omni genere conditionalium propositionum, sed tantum de illis quæ fundantur in illatione, in quibus ad earum veritatem necessarium est ut illatio sit necessaria. Non negat autem D. Thomas posse esse aliud genus conditionalium propositionum, quarum veritas non pendet ex formali illatione, ut sic dicam, sed tantum ex materiali, id est, ex actuali emanatione, quam de facto talis actus haberet a tali potentia, si talis conditio supponeretur, etiamsi ex vi antecedentis causæ posset non emanare. In quo sensu habent illæ propositiones veritatem et possunt cognosci, ut in sequentibus dicemus. Nec D. Thomas ignoravit hoc genus conditionalium propositionum, cum saepe alias de illis loquatur magis in actu exercito, quam in actu signato, ut sic dicam. Unde fortius potest hæc objectio retorqueri in eos qui admittunt in Deo hanc scientiam conditionatam, volunt tamen semper fundari in vi illationis, et ab illa pendere dicunt veritatem propo-

tionis sic cognitæ, et ut bona sit illatio necessarium putant interponi et antecedere decretum Dei, in quo bonitas illationis fundetur. Nam ex dicta sententia plane sequitur hæc futura non præsciri ut præsentia, sed ut futura, et consequenter non cognosci ut futura contingentia, sed ut futura necessaria, quia cognoscuntur ex vi illationis necessariæ. Nec satisfacit vulgaris responsio, quod illa sit necessitas consequentiæ, quæ non repugnat contingentia; quia illud est verum, quando illatio fit ab aliquo posteriori, quod supponit jam factum contingentem effectum, ut: Si Deus scit, fiet. At vero quando illatio est ab aliquo priori et a causa præcedente, tunc necessitas consequentiæ redundat in necessitatem consequentis, et consequenter tollit contingentiam seu libertatem, juxta dicta in prolegomeno præcedente. Hoc autem modo ponitur necessitas illationis in his futuris, juxta dictam sententiam; nam bonitas, aut necessitas illius conditionalis illationis fundari dicitur in efficaci decreto et prædeterminatione divinæ voluntatis, quæ est causa efficacissima talis effectus futuri, tantam inducens antecedentem et causalem necessitatem, ut implicet contradictionem effectum non sequi posita tali causa: ergo in illis futuris est necessitas simpliciter, ac subinde non cognoscuntur ut futura contingentia, sed ut necessaria, quod est contra hypothesim, et contra libertatem, et ideo nunquam D. Thomas talem modum cognoscendi futura contingentia nos docuit, sed absolute rejecit omnem præscientiam futurorum contingentium in causa, ut visum est.

14. *Partim admittitur, partim proportio negatur in ultima confirmatione posita. — Propositio.*—Unde ad ultimam confirmationem respondemus admittendo ex parte proportionem inter scientiam absolutam et conditionatam in ordine ad decretum divinæ voluntatis, et ex parte negando illam. Duplex enim potest intelligi decretum voluntatis Dei ante præscientiam, scilicet, absolutum, quod solet dici prædefiniens vel prædestinans, et includens aliquam conditionem vel limitationem. Dicimus ergo ad neutram præscientiam supponi necessario decretum absolutum et efficax ex parte Dei, in quo effectus futurus cognoscatur. De scientia conditionata ita in argumento supponitur, et nos id jam diximus, et iterum dicemus. De absoluta vero alibi est a nobis late tractatum, ubi contra Scotum docuimus non posse voluntatem Dei absolutam esse adæquatam rationem præ-

sciendi omnia futura contingentia, neque primariam et per se sufficientem cognoscendi aliqua. Non quidem adæquatam, quia peccata futura cognosci non possunt in aliquo decreto absoluto voluntatis Dei, quod secundum rationem talem scientiam antecedit, quia Deus ex se nullum tale decretum habet circa peccata, nec ut peccata sunt, nec ut actus sunt, sed habet tantum voluntatem concurrenti ad illa, in qua voluntate per se spectata non potest cognosci effectum esse futurum, quia oportet simul cognoscere voluntatem humanam esse concursuram, quod in illo decreto Dei non est volitum, nec absolute definitum, et ideo non potest in illo cognosci. Neque etiam potest tale decretum esse prima et unica ratio cognoscendi aliqua futura, videlicet, actus bonos et supernaturales, quia licet hos possit Deus prædefinire, et, ea posita prædefinitione, infallibile sit effectum esse futurum, nihilominus non potest Deus talem actum prædefinire salva libertate, nisi supponeret conditionatam scientiam medii, per quod posset facere, ut ille effectus libere, et infallibiliter fiat. Et ita, ut paulo antea dicebam, illa præscientia non est in solo decreto per se spectato, sed ut dicitur habitudinem ad tale medium.

15. *Absoluta præscientia supponit decretum absolutum ut res sit, sed non ut in illo cognoscatur.*—Sic ergo ad argumentum negamus absolutam præscientiam futurorum contingentium supponere necessario decretum absolutum, in quo solo sufficienter habeatur. Nec D. Thomas in locis in argumento citatis id dicit. Aliud est enim quod præscientia absoluta futurorum supponat aliquod decretum liberum, aliud vero quod supponat decretum in quo solo nitatur. Primum est verum, quia sine futura efficientia Dei nihil potest esse futurum: efficientia autem Dei esse non potest nisi ex libero decreto voluntatis Dei, et ideo absoluta præscientia omnis futuri supponit aliquod decretum voluntatis Dei, et hoc solum est quod D. Thomas docet citatis locis. Secundum autem est falsum, nec dicitur a D. Thoma in illis locis, sed solum quod præscientia supponit aliquam voluntatem, quod universalius est, nam potest supponere volitionem non omnino absolutam, nec prædefinitivam, in qua sola non satis cognoscitur futurum, ut declaratum est. Et ideo D. Thomas sæpe distinguit in Deo ipso certitudinem præscientiæ a certitudine prædestinationis, seu prædefinitionis, et dicit omnia quæ præsciuntur a Deo, esse certa priori modo, non tamen

omnia posteriori modo, ut videre licet 1 part., quæst. 23, art. 7, et quæst. 6 de Veritat., art. 3. Et infra ostendemus non omnia præscita a Deo esse ab eodem prædefinita efficaciter ante præscientiam.

16. *Negata proportio.*—De alio vero decreto libero sufficiente ad agendum ad extra, licet non sit omnino absolutum seu prædefinitivum, dicimus versari discrimen inter scientiam absolutam et conditionatam, quia absoluta supponit in Deo aliquod hujusmodi decretum, ut dixi; conditionata vero minime. Et ratio est, quia scientia absoluta terminatur ad realem existentiam rei aliquando futuræ, et quia talis existentia pendet a voluntate Dei, vel per se efficiente, vel cum causa secunda concurrente; ideo necessario talis voluntas libera supponitur tali præscientiæ absolutæ. At vero scientia conditionata non dicit habitudinem ad effectum aliquando futurum, et ideo ex hac parte non pendet a decreto libero, quod in Deo supponat: sed dicit habitudinem ad effectum sub conditione futurum, ad quod satis est ut in conditione includatur decretum Dei, non quod jam sit, sed quod, si ex parte Dei ponatur, sufficiet ut voluntas humana operetur de facto, Deo cum illa concurrente seu cooperante. Quia ergo conditionalis nihil ponit in esse, ideo nec supponit in esse (ut sic dicam) decretum Dei, sed tantum in conditione illud involvit, ac proinde ex his quæ D. Thomas dicit de præscientia absoluta, non recte fit illatio ad conditionatam, quoad hanc partem, quia est ratio longe diversa, ut declaravi. Aliæ item difficultates possent hic objici in doctrina D. Thomæ, sed in sequentibus capitibus commodius examinabuntur.

CAPUT VII.

RATIONE A PRIORI OSTENDITUR DARI IN DEO CONDITIONATAM PRÆSCIENTIAM, ET PRINCIPALI FUNDAMENTO CONTRARIÆ SENTENTIÆ OCCURRITUR, VERITASQUE TALIUM PROPOSITIONUM DECLARATUR.

1. *Si in conditionatis propositionibus est veritas, illa sine dubio cognoscitur a Deo.*—Ut nostram sententiam ratione confirmemus, supponimus imprimis certum esse debere omnibus catholicis, quod si in his propositionibus conditionatis de futuro contingenti, est aliqua veritas determinata in alterutra parte contingentiæ, illam non ignorari a Deo. Ratio

est, quia omnis veritas de se scibilis est; objectum enim scientiæ est veritas; et e converso omne verum participat aliquo modo rationem entis, unde sub ea ratione scibile est. Si autem objectum est scibile, etiam scientia possibilis est, teste Philosopho, cap. de *Ad aliquid*, quia illa duo correlative dicuntur: imo scibile dicitur a scientia, quæ erga ipsum versari potest. Si ergo tale futurum est scibile, profecto etiam scientia de illo est possibilis; si autem illa scientia possibilis est, Deo maxime erit possibilis; tum quia si est possibilis illa scientia, aliqua perfectio est: ergo non potest Deo deesse; tum etiam quia sicut Deus est omnipotens, quia habet summam potestatem, ita est omnisciens, quia habet summam scientiam: ergo sicut potentia ejus se extendit ad omne possibile, ita et scientia ad omne scibile; ergo si hæc propositiones scibiles sunt, scientia illarum possibilis est Deo. Ac denique si Deo est possibilis talis scientia, actu ac necessario illam habet, supposita veritate et scibilitate objecti, quia, ut supra tetigi, scientia de se est perfectio necessaria et naturalis, quia non libere, sed ex necessitate terminatur ad omnia scibilia, supposita capacitate ex parte objecti: ignorantia enim vel nescientia cujuscumque rei scibilis imperfectio esset in Deo. In his ergo omnibus non est, nec potest esse dissensio. Tota ergo controversia ad hoc revocatur, ut videamus an illæ conditionales habeant determinatam veritatem scibilem?

2. *Prima opinio, quod non possit determinata veritas in conditionalibus, nisi in decreto antecedenti cognosci, proponitur.*—Primi ergo opinantes, qui hanc scientiam Deo negant, in hoc maxime fundantur, quod in illis propositionibus non est determinata veritas, nisi antecedit decretum Dei, quo causa determinetur. Et ideo qui negant tale decretum, consequenter absolute et simpliciter dicunt talia conditionata non cognosci certo, etiam a Deo; qui vero decretum conditionatum ponunt, saltem negant ante illud posse cognosci. Illud autem fundamentum, scilicet, in his propositionibus conditionalibus non esse determinatam veritatem, ita suadere videntur. Quia res, antequam fiat, non habet esse, nisi in causa sua: ergo nec potest habere esse futurum, nisi prout est in causa sua, quia esse futurum includit esse: ergo vel in se, vel in causa: non in se, ergo in causa. Et patet ex differentia inter rem futuram et presentem vel præteritam comparatam: nam res dicitur præsens propter esse quod in se jam habet,

præterita propter esse quod jam habuit in se, et quod jam fuit extra causas; futura vero nondum habuit esse in se, et ideo non potest denominari futura ratione proprii esse quod in se habeat: ergo solum quia habet esse in causa. Rursus non quodlibet esse in causa sufficit ut res dicatur futura, sed oportet ut habeat esse in causa determinata ad efficiendum; quia res etiam habet esse possibile in causa sua, et tamen non omne possibile est futurum, ut per se constat: ergo aliquid addit esse futurum ultra hoc, quod est habere esse in causa: nihil autem aliud addere potest, nisi determinationem causæ ad agendum: ergo si causa in qua res est possibilis, non sit determinata, sed indifferens, quia ipsa fuerit in illo statu, non potest effectus ejus determinatus esse futurus: ergo nec propositio significans illum esse futurum potest esse vera determinate: ergo nec scibilis. At vero per conditionales propositiones, de quibus tractamus, significatur effectus determinatus futurus a causa secunda de se indifferente et indeterminata: ergo nisi præcedat aliquod decretum causæ primæ, quo causa secunda esset determinanda in tali eventu, non potest illa propositio habere determinatam veritatem, ac proinde nec scibilis erit per certam et infallibilem scientiam: unde si tale decretum non datur, absolute nec erit talis scientia; si vero datur, saltem non erit antequam illud secundum rationem antecedit.

3. *Assertio nostra, quæ affirmat propositiones conditionatas habere veritatem cognitam a Deo ante decretum.*—Nihilominus dicimus in his propositionibus conditionatis conceptis ante liberum decretum Dei in ipso jam existens, esse determinatam veritatem, ratione ejus et scibiles sunt, et a Deo sciuntur, non in decreto suo, sed in seipsis. Hanc assertionem late tractavi in libro secundo de Scientia Dei, capite sexto et septimo, et nihil fere hic addendum occurrit. Quia vero moderni instant, et contendunt totam veritatem determinatam futurorum contingentium esse sumendam ex solo esse et determinatione quam habent in causa, ideo, ad hanc falsam apprehensionem excludendam, rem iterum breviter explicabo. Nam nobiscum in assertionem consentiens, id tetigit late et subtiliter Diotalevius in dicto Opuse., capite sexto, et brevius quidem, tamen etiam optime Pesantius l. p., quæst. 11, articul. 13, disputat. 5. Qui auctores recte judicant eandem omnino esse difficultatem

et rationem in præscientia Dei de futuris contingentibus absolute futuris, quæ est de conditionatis, et ideo et cognoscibilitatem ex parte objecti, et cognitionem ex parte Dei in futuris conditionatis ad instar absolutorum esse explicandam: quæ sententia mihi valde placet, videturque verissima, ut etiam in allegato loco dixi, et ideo, per discursum utriusque communem, rem totam breviter explicabo, et paritatem inter illa ostendam, et inde facile concludetur ratio a priori nostræ sententiæ, et oppositum fundamentum facile dissolvetur.

4. *Aliquid esse futurum proprie et formaliter quid sit.*—*Prima opinio.*—Primo ergo, ad explicandam veritatem harum conditionalium de futuro, declarandum prius est quid sit aliquid esse futurum proprie et formaliter. Aliqui enim dicunt esse futurum nihil aliud esse quam habere esse in causa aliquo modo determinata, et nondum habere vel habuisse illud in se. Hoc ultimum manifestum est ex distinctione futuri a præsentis et præterito, et inde sequitur, scilicet, quod sit esse in causa; quia esse futurum est aliquid esse; ergo debet esse alicubi: ergo vel in se, vel in causa: sed non in se, ergo in causa. Quia vero esse in causa, ut sic, sufficit ad esse possibile, non vero ad esse futurum, ut constat, quia multa sunt possible quæ non sunt futura, ideo additur, quod debet esse in causa determinata ad agendum. Nam, eo ipso quod causa est potens et est determinata ad agendum, effectus ejus futurus est. Quæ doctrina videtur sumi ex D. Thoma libro primo Periher., l. 15, circa finem, ubi docet futurum habere esse tantum in sua causa, et ideo si sit simpliciter determinata ad unum, effectum ejus posse dici simpliciter futurum: si vero sit magis proposita ad unam partem, effectum posse dici futurum, sed non cum omnimoda certitudine: si vero causa sit indifferens, et non magis determinata ad unam partem quam ad aliam, effectum non posse dici futurum, vel non futurum, sed possibilem. Sed licet verum sit effectum, antequam sit, non habere esse, nisi in causa, nihilominus formalis denominatio futuri non sumitur ex eo quod res habet esse in sua causa, quantumvis determinata. Probatur, quia hoc ipsum, scilicet, rem habere esse in causa, non est futurum, sed est præsens: ergo non potest in eo solo consistere formaliter ratio futuri. Item quia alias cognoscere aliquid esse futurum, nihil aliud esset quam cognoscere talem rem habere esse

in sua causa hoc vel illo modo determinata, quod dici non potest; alias, et Angelus posset cognoscere futura, quantum cognoscibilia sunt, quia potest comprehendere esse quod habent in causis, vel Deus non posset cognoscere futura contingentia cum certitudine, quia solum cognosceret habere esse in causa vel indifferente, vel ad summum inclinata ad unam partem, quod non satis est ad certam cognitionem, ut D. Thomas dixit, et per se constat. Denique, ex ipsarum propositionum seu locutionum distinctione, potest facile intelligi non esse formaliter idem, rem esse futuram, et habere esse in causa determinata; id enim non potest juxta illam sententiam intelligi de causa determinata in actu secundo, quia illa non est causa in potentia, sed in actu; intelligitur ergo de causa determinata in actu primo: sic autem esse causam determinatam, et effectum esse futurum non sunt formaliter idem; tum quia illæmet duæ propositiones non sunt synonymæ, ac proinde in ipsis significatis est aliqua diversitas; tum etiam quia prius natura habet res esse in causa determinata, quam sit futura; tum denique quia potest causa non esse determinata in actu primo, et effectus esse futurus: et e contrario potest causa secunda esse determinata simpliciter, et effectus non esse futurus, ut ex dicendis constabit.

5. *Secunda opinio de futuro refertur et impugnatur in futuris a causis naturalibus.*—Aliqui ergo addunt rem esse futuram, esse denominationem a voluntate efficaci Dei volente illam esse antequam sit, ita ut rem possibilem esse futuram formaliter nihil addat, nisi denominationem extrinsecam a voluntate Dei. Ita Alexander Pesanti., supra, et fundatur, quia res possibilis non incipit esse futura nisi per decretum liberum Dei: unde ipsum etiam futurum in causa naturaliter agente, ut, verbi gratia, solem cras esse oriturum, non est simpliciter futurum in sola virtute solis, nisi adjungatur decretum Dei concurrenti cum sole. Sed mihi etiam hæc sententia non satisfacit, univ ersaliter loquendo: nam licet possit aliquo modo habere locum in rebus futuris per efficientiam solius Dei, et in futuris a causis naturalibus, adjuncto decreto efficaci concurrenti Dei, et abdato omni impedimento, nihilominus etiam in his non videtur recte illo modo explicari formaliter ipsum esse futurum. Nam, formaliter et in rigore, aliud est esse volutum, et esse futurum, nam illud est prius, et ratio seu causa alte-

rius; præsertim si verum est potentiam Dei executivam esse ratione distinctam a voluntate. Item si loquamur de voluntate intentionis, per illam non potest dici res esse formaliter futura, sed magis remote, et quasi radicaliter. Præterea in effectibus, quos non Deus solus immediate, sed cum causis secundis facit, esse futurum non est a sola voluntate Dei, esto non sit sine illa: ergo licet demus rem esse futuram per denominationem a voluntate Dei, non esset ab illa sola, sed simul a concursa. Probatur, quia ab eadem causa habet res quod sit futura, a qua habitura est esse cum fuerit præsens: sed lumen, verbi gratia, cum est præsens, non habet esse a sola voluntate Dei, sed a sole simul cum voluntate Dei; ergo esse futurum in tali effectum non est denominatio a sola voluntate Dei, sed a tota causa.

6. *Secunda opinio refellitur in effectibus liberis.*—Maxime vero illa sententia est difficilis in effectibus liberis, supponendo, ut idem auctor supponit, voluntatem Dei non prædeterminare physice voluntatem creatam ad agendum, sed tantum concurrere concursu simultaneo, supposita sufficiente virtute in actu primo: nam hoc posito, ut consensus liber sit futurus, sufficit ex parte Dei voluntas concurrenti, et illud decretum non sufficit ut effectus sit futurus: ergo esse futurum talis actus non est denominatio ab illo decreto. Consequentia est clara, quia si illud esse futurum consistit in tali denominatione, debet esse, et inseparabile ab illa, et sufficienter ab eadem in ratione formæ dominantis. Quod ostenditur probando minorem. Nam voluntas Dei concurrenti cum voluntate libera relinquit illam indifferentem, et potentem ad agendum vel non agendum, etiam in sensu composito, et stante illo decreto Dei: ergo ex vi illius decreti nullus actus illius voluntatis habet quod sit futurus. Quod maxime videre licet in actu peccati, quem Deus ex se non absolute vult, et ideo non potest habere quod sit futurus per denominationem a voluntate Dei. Responderi potest, ex doctrina ejusdem auctoris, Deum prius ratione quam velit concurrere cum voluntate creatâ ad determinatum actum, et prius quam det illi determinatum concursum, prævidere ipsam voluntatem creatam ex se talem determinatum actum esse operaturam, et ideo accedente voluntate concurrenti, statim ab illa denominari, et esse rem futuram. Sed contra hoc est, quia sicut voluntas non potest actu operari sine con-

cursu Dei simul cum illa actu operante, ita non potest esse vel intelligi operatura, quin intelligatur habitura concursum Dei; ergo si præscitur operatura, absolute intelligitur habitura concursum Dei: et consequenter præintelligitur in Deo voluntas dandi concursum in tali tempore, etc. Si autem solum præscitur operatura sub conditione, in ipsa conditione includi necessario debet voluntas concurrendi: ergo servata proportione, nulla ratione potest esse prius, voluntatem hominis esse operaturam, quam esse habituram concursum Dei: ergo nec potest Deus prius præscire absolute illam esse operaturam, quam velit cum illa concurrere, cum ab illa voluntate debeat manare concursus, qui in futura operatione creature necessario imbibitur. Ergo decretum concurrendi Dei solum ac præcise spectatum nunquam denominat effectum liberum creature absolute futurum, nisi cum illo decreto jungatur determinatio creature in actu secundo futura: et hac ratione præscientia futuri actus peccati non potest haberi in sola voluntate Dei, sicut neque esse potest in sola voluntate creature: sed altior modus præscientiæ necessarius est, ut in libro primo de Scientia Dei latius diximus, et statim breviter attingemus.

7. *Resolvitur difficultas; futurum esse tendentiam ab esse in potentia ad esse in actu explicatur et probatur.* — Dico ergo esse rem futuram formaliter consistere in transitu quodam ab esse, quod habet in causa, ad esse, quod in seipsa aliquando habitura est; unde est quasi tendentia quædam ab esse in potentia ad esse in actu, quæ in re ipsa ponenda est. Loquimur enim de futuris realibus, et extra Deum, ut excludamus futura, quæ vel secundum ordinem nature considerari possunt in creatura pro eodem instanti prius natura quam velit, vel secundum rationem in decretis Dei liberis spectari possunt, de quibus cum proportione erit secundum ordinem rationis loquendum. Hæc ergo declaratio formalis rationis significatæ per propositionem de futuro probatur imprimis a sufficienti partium enumeratione, quia exclusis aliis declarationibus, nulla alia occurrere potest quæ formalem rationem futuri declaret. Deinde ex conceptu immediato, qui respondet propositioni significanti rem esse futuram; cum enim dicimus: Petrus peccabit, nihil aliud significamus, nisi peccatum quod secundum se est possibile huic voluntati, successu temporis vel tali tempore esse actu futurum in illa,

seu ab illa: ergo per hanc habitudinem, ut sic dicam, constituitur peccatum illud in esse futuri: idem autem est in reliquis: ergo formaliter in hoc consistit ratio futuri. Denique considerando futura in ordine ad cognitionem nostram, licet interdum ex cognitione causæ cum morali veritate affirmemus, illa esse futura ex cognitione causæ, nihilominus tunc certi omnino reddimur de veritate propositionis de futuro, quando, expectato eventu, videmus in actu positum, quod prius erat possibile, et futurum esse fuerat pronuntiatum; ergo omnes concipimus rationem futuri positam esse in illo transitu, et ab illo pendere realem (ut ita dicam) seu physicam veritatem propositionis de futuro. Nam si est illi conformis, est vera; sin minus, est falsa, qualemcumque fuerit esse, quod habeat in causa.

8. *Magis expenditur formalis ratio futuri.* — Quocirca esse quod effectus habet in causa, solum est fundamentum futuri esse, non ratio formalis ejus; esse autem actuale ipsius pro sua mensura, seu temporis differentia, est quasi terminus futuritionis; futuritio autem concipitur a nobis quasi habitudo quædam, seu transitus a tali fundamento ad talem terminum. Quia vero iste transitus non potest innotescere nobis, nisi per causas, ideo concipimus, et loquimur juxta exigentiam et dispositionem causæ, et hoc modo locutus est de futuris divus Thomas in dicta lect. 13, lib. 1 Periher. Unde cum ait rem quæ habet esse in causa de se propensa et determinata ad talem effectum, quamvis impediri queat, posse dici futurum; intelligit profecto quoad modum loquendi humanum sine mendacio, quam vocamus nos veritatem moralem seu formalem quoad intentionem loquentis ex humana conjectura. Nihilominus tamen id satis non est ad formale esse futurum, nec ad physicam et realem veritatem loentionis, quam etiam materialem solemus in scholis appellare, si in re ipsa, et cum effectu res non evenit, sicut prædicta erat. Et hoc modo dixit D. Thomas in 2, dist. 38, q. 1, art. 5, non posse hanc propositionem esse veram: Petrus curret, et quod Petrus deficiat a cursu, id est, quod cursus nunquam fiat, quia eo ipso propositio jam esset et fuisset falsa. Unde, ad tollendam æquivocationem, uti possumus distinctione frequenti apud eundem D. Thomam. Nam duobus modis dici potest aliquid esse futurum: uno modo, quia ita erit; alio modo, quia ita est ordinatum, vel dispositum in causis, licet fortasse

in re ipsa futurum non sit. Ita significat D. Thom. citato loco Perih. , et 1 part., quæst. 19, art. 7, ad 2, et clarius quæst. 12 de Verit., art. 10, ad 7, ubi ait : *Aliquid potest dici esse futurum non solum ex hoc, quod ita erit, sed quia ita est ordinatum in causis suis, ut sic sit futurum.* Et sic ait, quamvis medicus prædicat sanitatem futuram, licet postea impediatur, non dixisse falsum, quia ita erat in causis ordinatum. Et allegat Aristot., 2 de Generat., capit. 11, text. 64, dicentem fieri posse *ut is qui futurus est incedere, non incedat.* Sed, ut dixi, inter hæc duo illud est simpliciter et absolute futurum, quod tale dicitur, quia ita erit, et talia sunt omnia quæ Deus absolute et simpliciter revelat esse futura, ut : *Virgo pariet, Petrus peccabit.* Unde, ad veritatem talis propositionis de futuro, necessarium est ut res eveniat sicut futura esse cognoscitur aut dicitur. Aliud vero, quod est futurum tantum in ordine aliquarum causarum, quæ tamen impediendæ sunt, revera non est simpliciter futurum, sed tantum secundum quid, id est, quantum est ex vi talium causarum : unde prædictio illius in tantum est certa, in quantum non est absoluta, sed tacitam conditionem, vel limitationem includens, scilicet, erit quantum est ex præsentis dispositione causarum, vel nisi impediatur. Aut certe si est absoluta prædictio, non erit materialiter, seu realiter, ut sic dicam, vera ; et ideo nunquam esse poterit revelatio Dei, cujus veritas semper est, non tantum formalis, sed etiam materialis ; id est, non tantum non mentitur, sed etiam in re ipsa nihil falsum dicit, et in eo hæc duo coincidunt, quia semper ex certa scientia loquitur. In homine autem, qui sæpe simpliciter affirmat quod sibi tantum probabile aut verisimile est, locutio illa de tali futuro, si absoluta sit, poterit quidem dici vera formaliter, id est, juxta mentem loquentis, quia sic loquendo non mentitur, nihilominus tamen propositio ipsa in se falsa erit, quia non est conformis rei in se de qua absolute profertur, et sic sæpe contingit aliquem dicere falsum, et non mentiri. Et hæc de ratione formali futuri.

9. *Placitum aliquorum de additamento futuri contingentis, supra futurum ut sic, impugnatur. — Veritas declaratur.*—Secundo, declarandum est quid addat futurum contingens ultra rationem futuri. Aliqui existimant futurum contingens esse quod in se est indeterminatum, et indifferens ut eveniat vel non eveniat, vel æqualiter ad utramque partem, vel inæqua-

liter. Sed hoc vel non est verum, vel magna indiget declaratione et limitatione ; nam juxta illam rationem contingentis, sequitur contingens futurum revera non recte dici, nec esse futurum, quia si adhuc est in se indifferens ut postea sit vel non sit, profecto non magis dici potest futurum quam non futurum. Item illud futurum contingens est vere futurum, quod Deus præscit futurum esse ; sed illud quod Deus præscit esse futurum, non est indifferens ad non esse futurum, quia Deus definite judicat esse futurum et non esse futurum ; ergo ita jam est in se determinate verum ac futurum. Denique cum dicitur aliquid esse simpliciter futurum, significatur determinata habitudo esse potentialis ad esse actuale in aliquo tempore præsentialiter ponendum ; ergo quantumvis sit contingens, si vere futurum dicitur, secundum illam habitudinem dicit determinationem ad esse, et excludit negationem essendi universalem pro omni tempore futuro. Igitur cum futurum dicitur contingens, per hoc additum non excluditur vera et determinata ratio futuri, sed modus ejus declaratur. Addit ergo contingentia supra rationem futuri indifferentiam potentialem, non actualem in ratione futuri ; id est, per illam proprietatem significatur quod, licet ille effectus determinate futurus sit, nihilominus de se talis conditionis est, ut posset non esse futurus, quod provenit ex parte causæ quæ illum est effectura, nam talis est ut posset impedi, licet de facto non sit impedienda. Quod ita breviter et distincte explicatur. Nam futurum contingens non dicitur tale, quia erit vel non erit, hoc enim disjunctum non est contingens, sed necessarium et inevitabile ; oportet ergo alteram partem determinare ; ergo futurum contingens positivum dicitur quod erit, quamvis posset non esse ; negativum autem dicitur quod non eveniet, licet posset evenire.

10. *De ratione contingentis futuri est indifferentia in causa, et non in effectu futuro : determinatio e contra.* — Atque hinc intelligitur quæ indifferentia sit de ratione futuri contingentis, et quæ determinatio illi repugnet. Est enim de ratione ejus aliqua indifferentia in causa in actu primo præcise spectata, quæ dici potest indifferentia potentialis : quæ indifferentia aliter est in causa libera, aliter in causa naturaliter agente, ut statim dicetur, et ideo solet generali modo illa indifferentia explicari per hoc quod causa sit impedibilis, ne producat effectum ; nam tunc, licet habeat in potentia effectum, nihilominus carere potest

effectu, et ideo habet effectus hanc indifferentiam potentialem, ut possit esse futurus, et non esse. Non est tamen de ratione futuri contingentis indifferentia actualis in ipsa habitudine ad esse in se pro aliqua differentia temporis futuri; nam, ut dixi, in hoc habet determinationem, alioqui non est futurum. E contrario vero determinatio in causa, secundum se et in actu primo considerata, repugnat contingentiae futuri effectus, quia excludit indifferentiam illam a qua talis effectus contingens denominatur. Nam hæc contingentia in effectu revera non est modus realis intrinsecus ipsius effectus, sed est denominatio a tali causa, et indifferentia ejus; sicut libertas in actu voluntatis non est modus ejus intrinsecus, sed denominatio a tali principio habente talem indifferentem potestatem; ergo determinatio quasi potentialis in causa repugnat futuro contingentis; non vero repugnat illi determinationi actuali, quæ in ipsa habitudine ad terminum spectatur, ut declaravi, et intelligi potest in effectu contingentis præsentis: nam licet habeat determinationem actualem a causa, nihilominus est contingens simpliciter ex modo agendi, seu potestate causæ: jam ergo effectus futurus potest esse determinatus quoad actualem habitudinem ad esse actuale, etiamsi sit contingens in potentia, seu in modo agendi causæ.

11. *Aristoteles objicitur.* — *Solutio.* — *Erravit Aristoteles.* — Contra hoc vero objici potest doctrina Aristotelis, lib. 4 Perihier., cap. ult., dicentis in propositionibus singularibus de futuris contingentibus non esse determinatam veritatem et falsitatem, et ideo vel nullo modo cognosci posse, ut ea quæ sunt omnino indifferentia ad utrumlibet, vel solum per conjecturam, ut in his quæ ut plurimum eveniunt, vel ad quæ causæ magis inclinant. De hac sententia Aristotelis dixi in lib. 4 de Scientia Dei, cap. 2, et ingenue fassus sum me in hac parte ab Aristotele dissentire, quia ejus sententiam fidei veritati repugnare sentio. Postea vero Diotalevius Aristotelem ab errore excusare visus est, quia locutus est, inquit, de futuris contingentibus formaliter ut futura sunt, id est, ut habent esse in causis suis, et ex illis cognosci possunt: non enim potuit de illis secundum aliquam rationem præsentialem loqui, quia non potuit illam præsentiam ratione naturali assequi, quam nos fides illustrati vix possumus concipere.

12. *Suppositio falsa, licet consequens, ostenditur.* — Sed hæc interpretatio non decla-

rat quod Aristoteles non erraverit, sed quod ut homo erraverit, quia modum talis veritatis et præscientiæ ejus cognoscere non potuit. Supponendo enim futura contingentia non habere aliam veritatem, nisi quam habent in sua causa, et ex vi ejus, ut talem effectum in potentia continet, consequenter fortasse locutus est, dicens non habere determinatam veritatem, nec subjacere certæ cognitioni. Tamen in illa suppositione erravit, sive per impotentiam naturalem assequendi altiore cognitionem contingentium, sive ex quacumque alia causa, id enim parum refert, cum de errore constet, quia futura, ut dixi, non ex sola causa, sed etiam ex determinatione futura, et ex eventu rei per illam significatæ habent veritatem. Et licet antequam sint non habeant realem præsentiam in propria mensura, habent nihilominus aliquam præsentiam, vel realem objectivam, in mensura æternitatis; et ideo illa eadem prius significata, ut futura, absolute et determinate vera esse possunt per conformitatem ad suum terminum, etiamsi in causis, prout sunt tantum in potentia et actu primo, non habeant determinatam veritatem.

13. *Tria erronea ab Aristotele illata habes.* — Quod si Aristoteles illam præsentiam seu modum veritatis assequi non potuit, excusabitur ipse a culpa, sententiæ autem quas inde intulit non poterunt ab errore excusari. Nam imprimis intulit non esse alium modum veritatis in his propositionibus de futuris contingentibus, præter illam quæ ex suis causis, et ab esse in potentia, quod in eis habent, cognosci potest, quod absolute verum non est, ut declaravi, et aperte repugnat præscientiæ Dei de his contingentibus. Unde secundo intulit hæc contingentia non habere talem veritatem, quæ infallibili ac certa scientia cognosci possit. Nec limitat sermonem ad cognitionem humanam vel divinam, quia certe videtur intellexisse in tali propositione non esse veritatem certo cognoscibilem a quocumque, in quo sensu falsa est omnino locutio. Unde tertio probabilissimum est credidisse, nec Deum præscire in his futuris absolutam determinatam veritatem, ac subiinde Deum non præscire certo hæc futura priusquam fiant. Quod illi multi antiqui patres tribuerunt, et ex concessis a prædicto auctore necessario sequitur. Nam Aristoteles non cognovit futura posse cognosci ut præsentia, et in causis censuit non esse certo cognoscibilia; ergo inferre debuit neque a Deo ipso certo cognosci. Quamvis ergo Aristoteles recte philosophatus fuerit de his

futuris præcise spectatis in ordine ad solas causas et cognitionem quæ ex illis sumi potest, absolute de ipsis futuris non recte sensit. Negari enim non potest quin habeant in re determinatam veritatem, vel falsitatem de se certo et infallibiliter cognoscibilem, si ex parte intelligentis virtus intelligendi non desit, ut in dicto libro 1 latius dixi, et rationibus Aristotelis respondi.

14. *Veritas contingentis futuri non sumitur ex determinatione causæ in actu primo constitutæ.* — Ex hac autem doctrina Aristotelis, quam quoad hanc partem probat divus Thomas, colligimus, et tertio loco addimus, duobus principiis positis, veritatem determinatam, quæ inest propositionibus absolutis de futuro contingenti, non esse sumendam ex determinatione causarum, quasi in actu primo constitutarum ad agendum, sed aliunde. Loquor de determinatione in actu primo, ut excludam causam, ut jam determinatam in actu secundo, quia quando causa jam est vel cognoscitur in tali statu, effectus ejus, etiamsi sit contingens, non cognoscitur ut futurus, sed ut præsens, quia determinatio illa in actu secundo non est aliud quam ipsa actio per quam effectus accipit esse, et ideo sic spectatus jam non ut futurus, sed ut præsens consideratur, et ideo, ut sic, potest veritatem sumere a causa determinata in actu secundo, et in ipsa determinatione cognosci tanquam in via quæ in seipsa et tanquam præsens videatur. Futurum autem ut futurum ante hanc determinationem considerandum est, ac proinde solum spectatur in causa, ut constituta in actu primo, et sic dicimus non habere veritatem certam vel determinatam in illa. Et hoc optime probatur ratione Aristotelis, quia contingentia effectus futuri formaliter sumitur ex indifferentia causæ secundum se spectatæ: imo, ut dixi, effectum esse contingentem nihil addit, nisi denominationem a causa indeterminata ad unum, vel ad agendum, vel impedibile, ut dicunt. Item ob hanc causam non potest effectus contingens, ut futurus, certo cognosci in causa, vel ex causa, ut divus Thomas docet, 1 part., quæst. 14, art. 13, et in 1, d. 38, quæst. 1, art. 5, et quæst. 2 de Verit., art. 12, et quæst. 12, art. 1, et quæst. 16 de Malo, a. 7, et sæpe alias. Et hæc est potissima ratio ob quam solus Deus potest sua virtute futura contingentia certo cognoscere, juxta illud: *Assumptiæ nobis futura, et dicemus quia Dei est vis*; nimirum, quia cognoscere futurum tanquam præsens

transcendit potentialitatem creaturæ, et cognoscere futurum ex causa est impossibile, quando causa est indeterminata, ut in futuris contingentibus esse debet; ergo est contra rationem talis futuri quod habeat talem determinationem in causa. Denique quia in hoc maxime et quasi adæquate differt futurum contingens a necessario, quod hoc habet determinationem in causa, quam illud non habet.

15. *Contingentia effectus in causa naturali incenitur passive, in libera vero active.* — Ut autem hæc assertio melius intelligatur fiatque evidentior, oportet advertere effectus contingentiam inveniri tam in causis naturaliter agentibus, quam in liberis, diverso tamen modo. Nam in causa naturaliter agente effectus non est contingens quasi active respectu propriæ et proximæ causæ, ratione virtutis ejus, sed quasi passive ob imperfectionem ejus causæ, quæ impediri potest per aliam causam, vel rem aliam concurrentem, et ad impediendam virtutem alterius causæ, ne agat, sufficientem. In libera autem causa effectus est contingens per se, et ex interna virtute causæ, quia ita est sufficiens ad agendum, ut ipsa possit se impedire (ut locutus est Capreol. in 1, dist. 38, quæst. 1, art. 2), id est, ut valeat actum suum suspendere, et ad hunc vel oppositum determinare: quod etiam ex dictis prolegomeno præcedenti manifestum est.

16. *Effectus naturalis contingens.* — Et hinc sequitur alia differentia, quia effectus naturalis contingens habet in sua propria causa, per se, ac præcise sumpta, quamdam determinationem ad unum, ratione cujus in illa cognosci potest, ut certo futurus, certitudine quadam naturali, et includente conditionem hanc, nisi impedimentum aliunde interveniat. Unde si effectus comparetur non ad solam causam per se, ac præcise spectatam, sed cum omnibus requisitis ad agendum, in quibus includitur impedimentorum ablatio, et quod concursus Dei sit paratus: in toto illo cumulo causarum habet talis effectus omnimodam determinationem ad unum, quia hanc habet per se ex propria causa, contingentiam autem per accidens ex impedimentis vel effectibus aliarum causarum, quibus ablatis, ut in hypothesi supponitur, manet integra determinatio, et ideo poterit in illo toto causarum ordine cognosci certissime effectus futurus, quia licet respectu propriæ causæ sit contingens dicto modo, nihilominus non cognoscitur ut contingens, quia per concursum omnium causarum, et conditionum antecedentium ad talem

actionem tollitur contingentia effectus, et resultat necessitas. Unde si Deus velit absoluto decreto præfinitè auferre a tali causa omnia impedimenta, in illo etiam decreto posset infallibiliter scire talem effectum esse futurum; tunc vero jam non scit illum ut contingentem, sed ut necessarium.

17. *Effectus liber contingens.* — At vero effectus contingens ex libertate causæ non solum est contingens comparatus ad suam propriam et proximam et per se causam præcise spectatam, sed etiam in ordine ad totum cumulum causarum, vel conditionum necessariorum, vel de facto concurrentium ex parte actus primi ad talem effectum. Et ideo nunquam potest talis effectus habere absolutam determinationem in causa, ut est in actu primo, sive in ordine ad solam proximam causam per se, ut est per se notum, sine ordine ad totum cumulum causarum, conditionum, aut circumstantiarum ex parte actus primi concurrentium. Quia si effectus esset determinatus in actu primo in cumulo causarum, etc., jam ut sic non esset contingens, et consequenter nec liber; esset enim omnino necessarius in causa et positus omnibus prærequisitis ad agendum, quod repugnat libertati, ut ostensum est in superiori prolegomeno. Item in illo cumulo causarum necesse est includi voluntatem liberam; ergo non obstantibus omnibus quæ illi conjunguntur in actu primo, illa semper potest se impedire ne agat vel ne hoc agat, quia hoc habet per intrinsecam potestatem, vel si per conjunctionem aliarum conditionum aut causarum, quæ illi conjunguntur in actu primo, illa est privata hac potestate se impediendi, consequenter est privata libertate, et ita jam non contingenter operatur propria et perfecta contingentia libertatis. Unde concluditur effectum libere futurum non solum non posse cognosci cum certitudine in determinatione in actu primo, quam habeat in causa proxima, verum etiam nec in ea quam habeat in collectione omnium causarum ad illum concurrentium, prout in actu primo respectu talis effectus considerantur. Probat, quia illa causa adæquata, ut conflata ex omnibus concurrentibus, adhuc est indifferens, et retinet in se principium contingentia; ergo impossibile est in illa, quantumvis propensa, et inclinata sit in actu primo, infallibiliter cognosci effectum futurum, cum semper ab intrinseco possit talis effectus impedi per intrinsecam potestatem causæ proximæ, id est, potentia liberæ in illo cumulo causa-

rum inclusæ. Confirmatur, quia effectus futurus a causa naturali, etiam determinata ad unum, si impedibilis sit, non potest in tali causa certo sciri futurus, nisi aliunde præsciatur talem causam non fore impediendam: at vero in causa libera hoc non habet locum, quia virtus se impediendi est intrinseca, et inseparabilis ab illa, manente libertate; ergo quamdiu in illo causarum cumulo includitur voluntas libera, et salva relinquitur ejus libertas, nunquam potest in illa causa effectus esse omnino determinatus, ac proinde neque in illa infallibiliter cognosci, nisi aliunde præsciatur ipsam voluntatem non esse se impediendam.

18. *Futura contingentia absoluta habent determinationem suæ veritatis in causa libera determinata in actu secundo, et cognoscuntur per propositionem de inesse.* — Quarto, ex his concludo quoad contingentia absolute futura et libera, de quibus in præsentibus solum agimus, hæc, inquam, futura habere determinationem veritatis suæ ex actuali determinatione causæ liberæ, quam tali tempore habitura est in actu secundo, ad quam determinationem, ut suo tempore præsentem, dicit habitudinem propositionis illa, per quam eadem determinatio per modum futuri significatur; ita ut ille effectus non cognoscatur futurus a sua causa per modum illationis causalis, seu rationalis, quæ his verbis explicatur: Quia talis causa sic est in actu primo disposita, ideo talis actus erit; vel istis verbis: Hæc causa erit tali modo applicata vel præparata, ergo talis actus erit; sed cognoscitur per simplicem, vel copulativam propositionem de inesse, quæ his verbis significari potest: Causa hæc, seu voluntas tali tempore ita disposita hoc faciet, cujus propositionis veritas non in virtute causæ, sed in se cognoscitur. Et hoc est quod dixit D. Thomas, futura contingentia et maxime libera cognosci, ut præsentia in seipsis, non in causis. Sensus enim est, non cognosci ex eo quod in virtute causæ cognoscitur certa consecutio futuri effectus, sed quia prævidetur causa ut actu operans in tempore, quod est præsens æternitati, licet respectu prioris temporis sit futurum. Hæc autem præsentia secundum veram sententiam, non est per realem coexistentiam, quam res futura, antequam in suo tempore sit, habeat in æternitate; repugnat enim esse coexistentem alteri rem quæ in se nondum existit, ut in dicto libro latius dictum est; sed est illa præsentia objectiva respectu intuitus æterni divini intellectus.

19. *Numeri superioris doctrina est expressa S. Thomæ de modo quo futura a Deo in æternitate sua cognoscuntur.*—Quæ est satis expressa sententia D. Thomæ, 1 p., ubi supra, et 2. 1, q. 171, a. 6, ad 2, ubi sic ait: *Divina præscientia respicit futura secundum duo, scilicet, secundum quod in seipsis, in quantum, scilicet, ipsa præsentia intuetur, et secundum quod sunt in suis causis, in quantum, scilicet, videt ordinem causarum ad effectum.* Ubi in priori parte satis declarat illam præsentiam non esse per coexistentiam, sed per eminentiam divini intuitus, qui præsentia attingit ea quæ in se nondum sunt, ita nimirum ea videndo ex æternitate, sicut ea videt postea, quando jam actu fiunt. Quia Deus non aliter videt rem postquam est quam antea, *alias ex eventibus rerum aliquid accresceret divinæ cognitioni, quod repugnat immutabilitati Dei, ut recte argumentatur D. Thomas in 1, dist. 38, q. 1, art. 5.* Unde respectu divini intuitus non est antea, nec postea, sed semper est idem respectus in se omnino invariabilis, et ideo sicut rem existentem videt præsentem, ita etiam rem futuram præsentia intuetur, et hoc est esse præsentem æternitati, et ex hac præsentia sumitur infallibilitas cognitionis, non ex causis, ut prioribus sua causalitate. Unde in altera parte non dicit D. Thomas videri futura in suis causis *determinatis*, ut quidam male allegant, addendo particulam *determinatis*: nam D. Thomas præcise dicit *in suis causis*, et addit explicationem dicens: *In quantum videt ordinem causarum ad effectum: qui ordo in causis liberis potest esse propensionis seu inclinationis, non determinationis.* Et ideo subjungit: *Et quamvis contingentia futura, prout sunt in seipsis, sint determinata ad unum, tamen prout sunt in suis causis, non sunt determinata, quin possint aliter evenire.* Ex quo ulterius colligit priorem modum cognoscendi esse omnino certum et infallibilem quoad veritatem futuri eventus, posteriorem autem, licet sit infallibilis quoad cognitionem dispositionis et ordinis causarum, non tamen quoad veritatem futuri eventus, qui per propriam propositionem de futuro significatur, ut diximus. Et hæc nunc nobis sufficiunt de his contingentibus absolute futuris, quæ solum præmissa sunt, ut ab illis gradum faciamus ad futura conditionata, de quibus tractamus.

20. *Futura contingentia conditionata nec esse vera ex vi illationis, nec in tali illatione cognosci ostenditur.*—Quinto igitur ex dictis inferimus futura contingentia conditionata non

esse vera in vi illationis ex causa, neque in illa cognosci posse infallibiliter, ut determinate vera et certo futura, etiamsi talis causa integra futura esse supponatur. Hæc assertio est directe contra eos qui scientiam hanc conditionatam admittunt, non tamen nisi post decretum Dei absolutum ex parte sua, et conditionatum ex parte objecti. Nam hi consequenter dicere coguntur Deum cognoscere illa in vi illationis ex tali decreto, vel (quod perinde est) ex vi prædeterminationis futuræ in voluntate hominis ex tali decreto Dei, seu ex vi voluntatis humanæ, ut est sub decreto Dei, aut denique ex vi collectionis, seu conjunctionis utriusque voluntatis humanæ, et divinæ ad talem effectum producendum. Hæc enim omnia in idem redeunt, et æquivalentia sunt, quatenus eadem ratio in omnibus militat. Ad hoc enim tale decretum postulatur, ut ex illo infallibiliter inferatur sub conditione, quod Deus sub tali conditione decrevit: ergo, juxta illam sententiam, veritas illius conditionalis, quam non habet, nisi post decretum, in illatione fundatur, ac subinde quod talis effectus sit futurus ex illa hypothese, in causa cognoscitur. Contra hoc ergo probatur assertio ex dictis de futuris absolutis: nam hæc non possunt cognosci in causa, neque habere in illa determinationem; ergo neque poterunt conditionata sic cognosci. Patet consequentia, quia militant omnes rationes factæ, quia idem genus ordinis seu habitudinis habet causa actu existens ad effectum absolute futurum, quod habet causa sub conditione proposita aut concepta ad effectum ex illa futurum, si conditio impleta fuerit. Unde sicut in absolutis habitudo causæ ad effectum est indeterminata, et vel omnino indifferens, vel impedibilis etiam ab intrinseco in contingentibus liberis, ita prorsus est in conditionatis; sed propter eandem causam non possunt absolute cognosci certo ex vi causæ, sed ad summum conjecturaliter; ergo idem est de conditionatis. Atque ita tota doctrina, quam D. Thomas tradit de scientia futurorum contingentium de se generalis est, tam conditionatis quam absolutis: ratio etiam a priori sæpe tradita eadem est, quia talis necessitas illationis ex causa determinata ad unum tollit contingentiam; ergo conditionalis sic cognita non cognoscitur ut contingens, sed ut necessaria; ergo neque effectus contingenter vel libere esset futurus a tali causa, posita hypothese; hoc autem est contra id quod in disputatione tota supponitur, quodque est omnino certum,

scilicet, talia futura esse vere libera, et ut talia cognosci. Cum enim Christus prænovit Tyrios et Sidonios facturos fuisse pœnitentiam, si virtutes in illis fierent, sine dubio prænovit libere facturos fuisse pœnitentiam: et similiter de Saule præscivit Deus libere fuisse ascensurum Ceilam, si ibi permaneret David, et Ceilitas libere fuisse illum tradituros, et sic de aliis. Sequela vero sæpius est a nobis probata, quia illa necessitas, licet per conditionalem illationem explicetur, re tamen vera non est necessitas solius illationis ejusdem effectus ex seipso, ut est illa: Quod est, quando est, necessario est; nec est illationis prioris ex posteriori, ut: Si homo loquitur, vult loqui: sed est necessitas causalitatis, et ex priori, et antecedenti hypothese independente ab usu libertatis; talis autem necessitas illationis est necessitas simpliciter. Neque immorabor nunc in refutandis responsionibus, quia partim id actum est in prolegomeno præcedenti, partim fusius in libro 3 agendum est.

21. *Veritas in contingentibus conditionatis certa invenitur, et in vi actualis dimanationis a sua causa cognoscitur a Deo.* — Sexto, concludimus ex dictis nihilominus in his conditionatis contingentibus inveniri veritatem determinatam, quia non sumuntur in vi illationis, sed in vi actualis dimanationis effectus a sua causa, quæ, tali suppositione facta vel concepta, per modum præsentis cognoscitur ab illo intellectu, qui suo intuitu attingit tanquam præsentia ea quæ futura sunt. Hæc assertio tam est contra eosdem, quatenus negant hæc conditionata esse scibilia ante decretum absolutum ex parte Dei, quam contra alios, qui absolute negant talia conditionata cognosci a Deo, certa et infallibili cognitione. Probatur autem ex eadem proportione inter contingentia absoluta et conditionata. Intelligendum est enim quod, sicut in absolutis, causa existit in mente Dei, ita in conditionatis causa supponitur tanquam existens ex hypothese, et ut præsens in mente Dei ad modum existentis sub eadem hypothese, ut, in exemplo de David, supponitur David permanens intra Ceilam ita præsens in cognitione Dei ex hypothese, ac si futurum aliquando esset. Quod potest explicari ex modo quo nos solemus aliquid supponere, ut discurremus, vel inquiramus quod de illo consequenter dicendum esset. Deinde sicut in absolutis de causa existente vel præsentem in intuitu Dei ut existens, vere affirmatur in eadem mente Dei, talem effectum, libere esse dimanaturum ab illa, non quia in

virtute causæ hoc videat Deus, sed quia intuitu suo videt causam illam, tametsi liberam, tanquam influentem in illum effectum; ita in his conditionatis, de causa ex hypothese concepta ut præsentem sub tali existentia possibili, potest vere affirmari et cognosci in mente Dei, hunc determinatum effectum esse dimanaturum ab illa causa libere ex eadem hypothese, non quia in virtute causæ talis effectus determinate contineatur, aut videri possit, sed quia vere esset ad illum determinanda, et intuitus divinus propter suam infinitatem et immutabilitatem intuetur causam illam sic ex hypothese positam, tanquam præsentem influentem in hunc effectum et non in alium: ita ut propositio, quæ nostro modo concipiendi inde formatur, non sit hypothetica conditionalis propria et illativa, sed simplex et categorica, quæ dici recte potest de conditionato extremo: ergo sicut in futuris absolutis est veritas determinata per habitudinem immediatam causæ ad effectum de facto futurum, quem Deus propter vim infinitam intelligendi intueri potest, et ita infallibiliter præscire talia futura, ita in conditionatis contingentibus est veritas determinata per immediatam habitudinem causæ ad effectum ex hypothese futurum, quam Deus per modum etiam simplicis intuitus propter eandem infinitatem certo cognoscere potest. Probatur hæc consequentia, primo a paritate rationis et proportionis, quia de causa aliquando vere futura, non alia ratione futurum aliquod cognosci potest ab habente vim intelligendi et intuenendi futura, nisi quia talis causa in re ipsa in actu secundo futura est, qui actus non potest non esse certus et determinatus, et ita ad illum dicitur habitudinem propositio de futuro, ut sit vera, et ad eundem terminatur intuitus Dei æternus et infinitus; sed eodem modo causa ex hypothese proposita et apprehensa ac si futura esset, consequenter transitura esset in actum secundum, qui in re non posset esse, nisi certus et determinatus; ergo propositio de futuro dicens habitudinem ad talem effectum, in re erit vera, et a! eadem infinitatem et immutabilitatem intuitus divini pertinet, ut illam attingat. Et deinde sicut captum humanum superat intelligere quomodo divinus intuitus et intellectiva virtus hanc habeat efficacitatem in his conditionatis, ita plane in absolutis; neque est major difficultas in his quam in illis, si quis attente et considerate rem inspiciat; ergo sicut illud prius non negatur Deo, ita neque hoc posterius negari debet.

22. *Nulla est ratio cur Deo conditionata de-
negetur.* — Denique, ex hoc modo declarandi
veritatem objectivam quæ his conditionatis
futuris contingentibus inesse potest, et secun-
dum quam cognoscibiles sunt, satis constare
potest nullam implicationem contradictionis
assignari posse in hujusmodi objecto scibili,
vel in ejus scientia; ergo hoc satis est ut a
nullo recte de Deo sentiente negari debeat
aut possit hæc scientia. Consequentia hæc
probatum facile ex comparatione facta inter
omnipotentiam et omniscientiam Dei: æque
enim sunt infinita; ergo, sicut negari non de-
bet aut potest Deum posse aliquid quod repu-
gnantiam non involvit, ita nec potest negari
eum scire quiddam non implicat contradic-
tionem. Item ratione supra facta, quod si ob-
jectum est cognoscibile, scientia est possibi-
lis, et si est possibilis, inest Deo: at si objec-
tum illud esse potest verum sine repugnantia,
eo ipso cognoscibile etiam esse; ergo etiam
est possibilis ejus scientia, ac proinde Deo non
neganda. Denique talis scientia ex proprio
conceptu, si in ea non invenitur repugnantia,
præ se fert magnam perfectionem et dignissi-
mam Deo, multumque extollit capacitatem
(ut sic dicam) et amplitudinem divinæ intelli-
gentiæ ac scientiæ. Et ad extollendam divi-
næ providentiæ rationem et exactissimam pru-
dentiam in suis operibus est accommodatis-
sima; nam quo providentiæ ordo ac disposi-
tio, ex ampliori cognitione et præsentia futu-
rorum cujuscumque ordinis et rationis, cogi-
tari possint, eo prudentia excellentior et per-
fectior intelligitur: multum ergo pertinet
scientia hæc ad divinam perfectionem, si in
ea implicatio non invenitur, ut in antecedenti
sumebamus.

23. *Ex hac scientia extollitur divinæ provi-
dentive ratio.* — Illud autem antecedens vel ex
ipso credibile fit, quod talis scientia videtur
esse necessaria ad summam perfectionem pro-
videntiæ et prudentiæ, quæ in Deo semper cogi-
tanda est, et ideo dixit alicubi Augustinus
non posse Deum non scire varios et mirabiles
ac infinitos modos quibus voluntates humanas
moveat eo modo quo novit eis convenire ut
convertantur, neque etiam posse ignorare, si
aliquid tali vel tali modo fieri permittat et in-
fallibiliter esse eventurum, prius etiam ratione
quam illud permittat. Et præterea idem ante-
cedens ex discursu facto videtur satis perna-
deri, quia nulla repugnantia major potest as-
signari in futuris conditionatis quam in abso-
lutis, supponendo quod absoluta per se primo

non habent veritatem determinatam ex de-
creto prædeterminante, sed ex præsentia æter-
nitatis, ut D. Thomas docet, et rationes factæ,
tum de libertate, quæ aliter lædi videtur, tum
de malis actibus, quorum prima origo in di-
vinam voluntatem, juxta illam sententiam,
refunditur, videntur convincere. Secluso ergo
tali fundamento veritatis et præscientiæ futu-
rorum liberorum, nulla profecto major repu-
gnantia potest assignari in veritate et præ-
scientia futurorum conditionatorum, quam
absolutorum; at in absolutis nulla est, ut de-
claravimus ex fundamentis certissimis, maxi-
me in doctrina D. Thomæ; ergo.

24. *Repugnantia nulla in hac scientia os-
tenditur.* — Denique, ut probemus hanc scien-
tiam esse Deo possibilem sine repugnantia,
satis nobis est quod talis repugnantia non
ostendatur. Nam omnis scientia, ut talis est,
et per se spectata, aliquid perfectionis impor-
tat. Unde qui dicunt hanc scientiam non esse
in Deo, tenentur ostendere ipsam esse quid
impossibile et repugnans, et ideo non esse in
Deo: hanc autem repugnantiam nobis non
ostendunt, neque in ipsa scientia absolute,
nec in eadem ut independente a decreto præ-
determinante, seu a quocumque libero decreto
secundum ordinem rationis præexistente in
Deo; ergo. Minorem probamus nunc respon-
dendo ad fundamentum, seu difficultatem in
principio positam, nimirum, quod in his pro-
positionibus non possit esse determinata veri-
tas: procedit enim fundamentum illud ex
falsa apprehensione talium propositionum;
nam cogitantur ac si affirmarentur et cognitæ
essent in vi conditionalium, et ex sola neces-
saria connexionione cum tali causa posita ex hy-
pothesi in tali vel tali dispositione; in quo
sensu verum est non habere determinatam
veritatem, nec posse in vi illationis cognosci,
imo id nos maxime contendimus. Addimus
vero in alio sensu esse accipiendas, ut sint
tantum de conditionato extremo, de quo, per
modum categoricæ ac simplicis propositionis,
affirmatur vel negatur quid acturum sit vel
non sit, si supponatur esse præsens in hac vel
illa temporis differentia. Et sic dicimus in illis
esse determinatam veritatem, non minus
quam in propositionibus absolutis de futuro
contingenti, et veram contradictionem inter
eas fieri, ita ut necessario altera determinate
vera, altera determinate falsa esse debeat, ac
proinde possit per certam scientiam compre-
hendi, et pro certo præcognosci. Ad probatio-
nem autem, si contra hunc sensum procedat,

concedendum primum antecedens, nimirum rem, antequam fiat, non habere esse in se, sed in causa; et neganda consequentia, scilicet, non habere esse futurum, nisi prout illud esse est in causa. Nam licet verum sit illud ipsum esse quod nunc est tantum possibile et in causa, denominari futurum, et tale affirmari per propositionem de futuro, nihilominus non dicitur futurum prout est in causa, sed prout erit in se. Itaque ipsum esse possibile, quod res habet in causa, est quasi subjectum, quod denominatur futurum; non tamen est futurum, nec denominatur a modo essendi quem habet in causa, sed a modo essendi quem in se habebit a tali causa in aliqua futura duratione.

23. *Argumenta diluuntur. — Confirmatur ad hominem.* — Cum autem urgetur, quia illud esse futurum includit esse quod res futura, quamdiu est futura, non habet in se, sed in causa, respondeo includere illud esse ut subjectum denominationis futuri, non ut formam dominantem futurum, ut sic dicam, quia illud esse, prout est in causa, non est futurum, sed præsens. Forma autem illa a qua illud esse possibile in causa denominatur futurum, non est causa ipsa, vel determinatio ejus, ut toto illo argumento contenditur, nam hoc est tollere contingentiam effectuum, et libertatem causarum secundarum: nec est aliqua res actu existens, cum supponatur res futura in esse tantum possibili: est ergo habitudo quædam quam res, prout est in causa, habet ad seipsam ut erit præsens suo tempore. Qui ordo, licet secundum compositionem mentis nostræ sit aliquid rationis, in mente Dei est objectiva præsentia, quam illud esse habet in æternitate, ratione cujus veritas illa per modum præsentis cognoscitur, quamvis in ordine ad nos denominetur futura secundum varias temporis differentias. Dicitur hæc quidem in futuris contingentibus absolutis locum habere, et necessaria esse ut tanquam præsentia, salva contingentia, et non tanquam futura necessaria, potius quam ut contingentia, præsciantur; at vero futuris conditionatis non ita posse accommodari, quia in prioribus illa præscientia fundatur in existentia, quam res futura vere habebit in suo tempore, quod fundamentum in his conditionatis deest. Respondeo actualem existentiam, aliquando futuram, esse fundamentum veritatis absolutæ assertionis de futuro, eodemque modo servata proportionem existentiam actualem, quæ ex hypothesis esset futura, esse fundamentum veri-

tatis conditionatæ assertionis, et ideo utramque veritatem posse cognosci ad modum præsentis, quia Deus non accipit scientiam a rebus, ut ab actuali existentia objecti pendeat. Et revera etiam in futuris absolutis res, prius quam suo tempore et ad extra producat, non habet in se existentiam; sed intuitus divinus attingit illam, ut præsentem absolute; ita ergo in conditionatis attingit rem futuram per modum præsentis: unde illud discrimen valde materiale est respectu divini intuitus, et eminentis cognitionis ejus. Et potest hoc ad hominem confirmari contra eos qui saltem post decretum conditionatum Dei concedunt cognosci hæc futura; nam ut non videantur a divo Thoma discordare, simul docent cognoscere Deum illa ad modum præsentium, cum tamen divinum decretum conditionatum non det veram existentiam rei futuræ; satis enim censetur quod daret illam, si conditio impleteretur. Ita ergo nos dicimus quod etiam absque tali decreto, et ante illud, daret illam, si alia conditio impleteretur: nam illud licet non videatur in causa, videri potest in se propter eminentiam divini intellectus.

CAPUT VIII.

QUÆ DECRETA CONDITIONATA ET LIBERA DEO
ATTRIBUENDA SINT, ET IN ILLIS NON POSSE
CONTINGENTIA SUB CONDITIONE FUTURA PRÆ-
SCIRI.

1. *Status quæstionis.* — In superiori capite ostendimus posse in his futuris conditionatis esse determinatam veritatem, etiam ut obijciuntur intellectui divino, prius, secundum rationem, quam divina voluntas aliquod decretum liberum et conditionatum habeat, quod satis est ut præscientia talium futurorum Deo non negetur. Ex quo sufficienter improbat sententia generaliter negans Deo hujusmodi præscientiam; imo, ut dixi, hæc est sola ratio a priori hujus veritatis, quia si non ostendatur implicatio contradictionis in tali scientia, non est Deo neganda. Aliæ vero rationes quæ addi possunt ex utilitate vel necessitate talis scientiæ desumptæ, vel ad perfectissimam Dei providentiam, præsertim circa prædestinatorum electionem, liberorum actuum bonorum prædefinitionem, vel circa peccati permissionem cum infallibili eventu, vel denique ad explicandum auxilium efficax præveniens: hæc, inquam, rationes late in libro 2 de Scientia futurorum tractatæ sunt, quod ideo nunc facere omittimus, et quia hæc utilitas vel necessitas

hujus scientiæ præcipue probanda est ex his quæ postea, in libro 3 et 5, de Gratia efficaci, contra motionem physice prædeterminantem, et de permissione peccati contra prædefinitionem ejus dicenda sunt. Quia vero contra novam evasionem admittendi præscientiam horum futurorum sub conditione, ita tamen ut decreta conditionata præcedant, in quibus fundetur, pauca in aliis locis diximus, visum est in hoc capite inquirere an et quatenus talia decreta Deo tribuenda sint, ut ex discursu ejus constet sine fundamento illa confingi, quæ ad dictam scientiam fundandam inventa sunt.

2. *Primus modus conditionalis decreti in duplici conceptu acceptus.*—Primo igitur observare oportet duobus modis posse in Deo supponi conditionale decretum. Primo, ut conditio ponatur ex parte ipsius voluntatis divinæ, ita ut sensus non sit Deum habere vel habuisse tale decretum, sed quod haberet illud si talis vel talis conditio poneretur. Quod duobus modis potest concipi, scilicet, vel ponendo ipsum conditionatum decretum pro antecedenti, seu subjecto in conditionali propositione, vel ponendo illud ex parte consequentis seu prædicati. Exempla facile poni possunt in facto Tyrriorum, ut decretum conditionale tale sit: Si Deus decrevisset ut in Tyro signa talia fierent, illi agerent pœnitentiam; vel, e contrario: Si in Tyro et Sidone factæ essent virtutes, Deus decrevisset illorum voluntatem ad consensum determinare. In neutro enim modo enuntiandi tribuitur Deo de præsentia aliquod decretum quod jam habeat, sed affirmatur quod jam habuisset. Est tamen diversitas consideranda inter illos duos modos. Nam cum decretum ponitur sub conditione ex parte subjecti seu antecedentis, nullo modo attribuitur, vel affirmatur de Deo tale decretum, sed tantum affirmatur quid ex illo sequeretur, si poneretur. Et hoc modo describere potest tale decretum sub conditione suppositum ad cognitionem multarum conditionalium contingentium de voluntate creata, ut ex dictis facile patere potest, et statim magis explicabitur. Quando vero decretum ponitur ex parte prædicati, seu consequentis conditionalis, pertinet ad sola decreta divina, quatenus per modum futurorum secundum rationem cognosci possunt, de quibus nunc nihil disserere decrevi, quia ad punctum de gratia, quo tendimus, non referunt.

3. *Secundus modus conditionalis decreti.*—*Aliquorum placitum.*—Alio modo possunt decreta conditionata esse in Deo, ita ut conditio

solum ponatur in objecto, actus vero et actualis determinatio vere sit in Deo absolute et de præsentia, ut si intelligamus Deum intra se statuisset hoc modo: Decerno quod, si virtus et signa fierent in Tyro, darem Tyriis auxilium internum prædeterminans, aut majus vel specialius quam Judæis sum daturus. Et de his decretis conditionatis circa ea quæ nunquam futura sunt, aliqui putant esse impossibilia, quia neque in Deo possunt ponere mutationem, ut per se notum est, neque etiam in objecto faciunt mutationem, cum conditionalis nihil ponat in esse: impossibile autem videtur Deum habere decretum liberum sine aliqua mutatione, vel in ipso, vel in objecto voluto. Quia quando Deus habet decretum liberum, prius ratione intelligitur a nobis non volens, neque nolens, sed quasi indeterminatus, et in secundo signo rationis est volens per decretum suum; hoc autem intelligi non potest sine aliqua mutatione. Quod si hæc sententia vera esset, funditus rueret sententia ponens præscientiam conditionatam in decreto conditionato.

4. *Quid censendum.*—*Universalis conclusio.*—Sed nihilominus illam sententiam probare nunquam potui. Quia, sicut falsum censeo negare Deo præscientiam alicujus scibilis, sive absoluti, sive conditionati, ita non minus censeo absurdum negare Deo libertatem, seu potestatem volendi omne objectum volibile honeste, et secundum rectam rationem, ut nostro modo loquamur. Unde considero differentiam inter scire et velle, quod scire actualiter est ex perfectione simpliciter ac necessaria, supposita veritate scibili et ex parte objecti; at velle actu quodcumque objectum creatum amabile, etiam honestum, non pertinet ad perfectionem simpliciter, et nihilominus posse illud velle pertinet ad perfectionem potestatis liberæ: cum ergo objectum conditionatum de se amabile sit, secundum rectam rationem, et nos possimus illud velle, non est hæc potestas neganda Deo, qui non minorem habet libertatem in volendo, quam homo. Propter quod universaliter censeo posse Deum habere circa objecta creata honeste amabilia omnes actus liberos voluntatis, quos potest homo habere, seclusa imperfectione et mutatione in ipso Deo, quæ invenitur in homine, etiam per ellicientiam, et receptionem talium actuum. Nec videntur posse negari decreta omnia circa objecta conditionata sine multis incommodis. Nam Deus offert homini gratiam et remissionem peccati,

si convertatur, quod non potest intelligi sine actu positivo voluntatis Dei, nec dici potest sufficere actum quo vult Deus dare auxilium sufficiens ad conversionem, quia voluntas dandi gratiam disposito, seu si disponatur, distincta est a voluntate dandi auxilium; tum quia objecta sunt distincta, et posset Deus velle hoc secundum, et non velle, imo et nolle primum; tum etiam quia promittere gratiam homini, si disponatur, distincta promissio est a promissione auxilii; promissio autem in voluntate fundatur, et ab illa accipit vim obligandi. Similiter voluntas offerendi concursum generalem vel gratiæ, vel naturæ, etiam ad actum nunquam futurum, de objecto conditionato est, et non potest negari esse in Deo, quia certissimum est Deum de se talem offerre concursum, quia alias non daret auxilium sufficiens; non potest autem offerre sine actu voluntatis, quia libere offert. Unde non est necesse ut per omne decretum liberum Dei resultet semper mutatio physica in re volita, ut aliis locis late dixi; satis est enim quod resultet physica mutatio, vel moralis, vel objectiva, seu rationis, quatenus ex tali decreto habet res, ut objecta menti, aliam habitudinem ad esse existentiam, quam prius ratione ex sola possibilitate haberet. Sic enim per decretum quo Deus statuit non creare alium mundum possibilem, intelligitur habere ad suum esse relationem nunquam futuri immutabilem ac perpetuam. Admittimus ergo utrumque genus conditionati decreti posse esse in Deo; nunc breviter circa utrumque explicandum est, an sint de facto, et quatenus admittenda sint.

5. *Dubium de primo modo loquendi.* — De primo ergo genere decreti sub conditione, interrogari potest qua ratione possit in Deo concipi, ita ut ex eo possit a nobis formari conditionalis propositio de futuro contingenti, quæ sit determinate vera, et a Deo sciatur? Et ratio dubitandi est, quia illud non est, cum conditionalis nihil ponat in esse; ergo ex illo nihil determinatum potest cognosci. Item impossibile videtur Deum in seipso cognoscere vel apprehendere tale decretum sub conditione, cum semper cognoscat omnia decreta suæ voluntatis, tanquam præsentia. Sed nihilominus dicendum est et posse concipi in Deo, non solum a nobis, sed etiam ab ipso Deo, et illo posito ex hypothesis, aliquem effectum contingentem sciri etiam posse sub conditione futurum. Utrumque breviter declaratur, quia Deus prius ratione habet scientiam

simplicis intelligentiæ, quam habeat decreta libera, sive absoluta, sive conditionata ex parte objectorum. Probatur, quia in Deo naturalia seu necessaria sunt priora liberis, ut est vulgare apud theologos; scientia autem simplicis intelligentiæ naturalis est: ergo antecedit secundum rationem decreta libera, præterquam quod cognitio antecedit voluntatem circa idem; ergo cognitio creaturarum, quæ est per simplicem intelligentiam, antecedit omne decretum Dei liberum, cum tale decretum non nisi circa creaturam cognitam versari possit. In illo ergo signo rationis cognoscit Deus creaturas esse posibles, quocumque modo posibles cogitentur, sive per non repugnantiam ex parte ipsarum, sive per denominationem a sua potentia, quam per eandem scientiam comprehendit; ergo etiam per illam scientiam comprehendit decretum liberum creandi, saltem ut possibile; ergo per eandem scientiam præcognoscit aliqua futura conditionata, ponendo decretum in conditione, ut: Si decrevero creare mundum, fiet; Si decrevero ut Filius fiat homo, incarnabitur, et similia: nam hæc cognitio intrinsece connexa est cum priori cognitione comprehensiva omnipotentiam Dei, et modi operandi ejus circa omnes creaturas posibles.

6. *Effectus solius Dei et etiam causæ naturalis in ejusmodi decreto a Deo infallibiliter cognoscuntur.* — Addendum vero est non omnes effectus ejusmodi decreti posse infallibiliter cognosci in tali decreto sic conditionato. Nam quidam sunt effectus solius Dei, et illi optime cognoscuntur, quia voluntas Dei est sufficiens et adæquata causa talis effectus, et per decretum supponitur ex hypothesis determinata ad talem effectum, et ita infallibiliter et inevitabiliter infert effectum. Quapropter conditionales propositiones hujusmodi veræ sunt ex vi illationis. Neque hoc repugnat contingentiam talium effectuum in ordine ad voluntatem Dei, quia illa hypothesis supponit liberam determinationem Dei in suo decreto, et per conditionalem solum explicatur efficacia, et immutabilitas talis decreti, quæ non repugnat libertati; ideoque illa necessitas est puræ consequentiæ ex suppositione consequente ad usum libertatis, nam illum ponit in hypothesis; et ideo non repugnat libertati Dei, nec contingentiam effectuum ejus, ut ab illa tales denominentur. Denique licet illatio sit suppositio necessaria, semper pendet ex libertate Dei, et ideo effectus semper est absolute contingens. Alii vero sunt effectus quos non facit Deus so-

lus, sed cum causis secundis, quarum coefficientiam decretum aliquo modo includit. Et hi sunt in duplici genere, nam quidam sunt a causis naturaliter agentibus, et in his etiam facile intelligimus conditionalem de futuro certo et infallibiliter ex vi illationis, quia tales effectus vel non sunt contingentes respectu causæ proximæ, solumque habere possent indifferentiam seu contingentiam in ordine ad decretum; hoc autem in hypothesi supponitur, et ideo relinquitur illatio omnino necessaria. Vel certe si tales effectus habent aliquam contingentiam extrinsecam, quia causæ proximæ illorum possent ab aliis impediri, tunc oportebit in hypothesi includi decretum, et concurrendi, et auferendi omnia impedimenta, ut in superioribus declaratum est.

7. *Effectus creatus liber non cognoscitur a Deo in solo decreto concomitante, sed in se in actu secundo.*—*Quid aliena opinio, quid nostra asserit.*—Alii denique sunt effectus quos Deus facturus est cum causis secundis liberis, et in his etiam possunt illæ propositiones conditionales formari a nobis, et apprehendi ut representatæ objective in mente Dei in illo primo signo rationis. Sed de illarum veritate aliter iudicatum est, juxta sententiam admittentem decreta prædeterminantia actuum liberorum, vel juxta oppositam sententiam. Nam, juxta priorem, habent tales propositiones veritatem determinatam et infallibilem in vi illationis ex tali decreto, et ita Deus in illo primo signo rationis, et per solam scientiam simplicis intelligentiæ, ac mere naturalem, seu necessariam, cognoscit in tali decreto conditionali suæ voluntatis quidquid voluntates humanæ essent futuræ in omni occasione, si ipse tale vel tale decretum prædeterminans circa illas haberet, et quid non essent facturæ si tale decretum ipse non haberet. Unde cum illud decretum sit vera causa antecedens omnem aliam causam, videtur per illum modum omnis contingentia tolli respectu voluntatum creatarum, et poni in eis quoddam inevitabile fatum, solumque respectu divinæ voluntatis posse talia futura dici contingentia seu libera, quatenus hypothesi in qua ponitur tale decretum ex Dei libertate pendet. Ad evitandum ergo hoc inconveniens, nos talia decreta antecedentia omnem scientiam futurorum contingentium, tam absolutam quam conditionatam, non admittimus, sed solum concomitantia, seu offerentia concursum ex parte Dei, de quibus etiam possunt formari propositiones conditionales in mente Dei: Si ego decrevissem dare

concursum tali voluntati in tali occasione, hoc faceret; ut per se patet. Dicimus autem illas non habere veritates determinatas in solo decreto, neque in illo posse cognosci, quia effectus pendet ex alia causa indifferente, quæ propter tale decretum ad unum non determinatur. Unde etiam dicimus tales propositiones non esse determinatas in integra causa, prout scilicet ex voluntate creata et increata quasi conflatur, quia etiam tota illa est indifferens in actu primo, etiam ex parte voluntatis creatæ et conjunctæ, seu compositæ cum tali decreto, quia alias effectus non esset liber. Et nihilominus addimus habere tales propositiones veritatem determinatam, et habuisse illam in illo primo signo æternitatis, non in virtute seu actu primo suæ causæ, sed in se, et in ipsa determinatione in actu secundo, ita præsentate objective menti Dei, ut usque ad illam penetret æternus ejus intuitus, ut jam explicatum est. Et ad hunc modum sunt a Deo præscitæ omnes istæ conditionales in illo primo signo rationis, quod omnem liberam determinationem voluntatis divinæ ut exercitam et quasi in re positam antecedit. Et hæc de conditionatis decretis prioris ordinis.

8. *In secundo modo decreti conditionati dubium, et aliquorum placitum.*—Circa secundum autem genus decreti conditionati, quoniam talia decreta variis modis cogitari possunt, dubitari potest imprimis an possit cum probabilitate affirmari habuisse Deum ab æterno, circa omnem voluntatem creatam et creabilem, omnia decreta conditionata ratione distincta, vel, quod perinde est, unum simplex in finita virtute complectens, determinando modum quo moveret seu determinaret omnes et singulas voluntates possibles in omnibus actibus earum, et in omnibus circumstantiis et occasionibus quæ infinitis modis combinari possunt. Aliqui enim sentiunt habuisse Deum talia decreta. Potestque in hunc modum intelligi: nam post illud primum æternitatis signum, in quo Deus omnia possible, et omnia futura possibiliter (ut sic dicam) præscivit, in secundo signo, prius quam aliquid absolute vellet facere, habuit decretum quoddam liberum, absolutum ex parte actus, conditionem includens in objecto, per quod statuit apud se quid esset facturum circa omnem voluntatem creatam vel creabilem in omni possibili opportunitate. Quod decretum nos ratione distinguimus in ordine ad diversos actus vel voluntates, in se tamen unum simplicissimum est et infinitum, et

omnia conditionata, quantumvis infinitis et infinitis infinitis modis cognoscibilia, comprehendit. Atque hoc modo opinantur aliqui ex his qui nec Deo negare audent scientiam omnium contingentium futurorum sub conditione, nec volunt illam esse ante decretum liberum Dei. Nam hinc sequitur necessarium esse ponere in Deo talia conditionata decreta circa aliqua futura sub conditione, quæ de facto nunquam erunt: non apparet autem ratio admittendi hæc decreta circa quadam futura, potius quam circa alia; ergo admittenda erunt circa omnia possible. At vero possible ordine rationis priora sunt quam futura; ergo illud decretum conditionatum, adæquatum his omnibus conditionatis possiblebus, ratione antecedit absoluta decreta de futuris. Et confirmatur hæc ratio, quia si Deus non habeat tale decretum adæquatum, multas conditionales propositiones similes ignorabit, illas, scilicet, circa quas tale decretum non habuit, quod juxta illam etiam sententiam admittendum non videtur.

9. *Decretum virtute complectens infinita argumento rejicitur.*—Nihilominus hæc sententia parum probabilis apparet. Primo, quia de divinis decretis et voluntatibus liberis nihil asserere cum fundamento possumus, nisi quod vel revelatum est, vel ex revelatis, aut ex effectibus divinis sufficienter colligi potest; sed illud decretum liberum est, et neque est revelatum, neque ex revelatis aut aliis effectibus colligi potest; ergo non possumus cum probabilitate affirmare habuisse Deum tale decretum. Major certa est, quia decreta libera non ponunt in Deo perfectionem, et ideo ex perfectione divina infinita non innotescunt: nulla superest via illa cognoscendi, nisi vel revelationis, vel ex effectibus. Minor autem quoad revelationem certa est, vel ostendatur revelatio; quoad effectus vero patet; tum quia illud decretum nullum habet effectum ad extra, quia conditionalis nihil ponit in esse; tum etiam quia sine tali decreto per absoluta decreta sufficienter producit Deus res omnes quæ in aliqua temporis differentia fiunt; ergo ex effectibus non potest tale decretum vel probabiliter colligi.

10. *Adæquatum decretum circa conditionata possible iterum rejicitur.*—Unde argumentor secundo, quia tale decretum adæquatum, vel decreta ratione distincta circa omnia conditionata possible, sunt otiosa et sine ullo fructu; ergo frustra et sine probabilitate in Deo cogitantur vel finguntur. Antecedens pro-

batur, quia talia decreta nec Deo perfectionem addunt, nec in creaturis aliquid efficiunt, nec ad effectus divinæ providentiæ aut prædestinationis aliquid conferunt, sunt ergo prorsus inutilia et otiosa. Consequentia vero probatur, quia voluntas Dei est ordinatissima, et ideo nihil frustra vel otiose vult: nam si in homine prudenti reputarentur tales actus otiosi et vani, ac proinde alieni a recto usu prudentiæ, quomodo non est multo magis ita de Deo sentiendum? Confirmatur primo, quia Deus nihil vult circa creaturas, nisi ordinando illas in aliquem finem; at per illud decretum præcise spectatum in nullum finem creaturæ ordinantur: est ergo ille modus decernendi et volendi alienus a divina sapientia et prudentia. Confirmatur secundo, quia si Deus absolute decrevisset nihil creare, non haberet illud decretum conditionatum circa possible, quia esset vanum, sine fructu, et per se non pertinens ad perfectionem Dei: ergo non minus superfluum est tale decretum, licet sit conjunctum cum alio decreto absoluto. Patet consequentia, quia etiam hoc modo est otiosum et sine fructu. Dices: Eadem ratione probaretur scientiam omnium conditionatorum esse Deo otiosam. Respondetur negando consequentiam, quia scientia illa nunquam potest dici otiosa, aut infructuosa, tum quia omnis scientia per se ad perfectionem simpliciter spectat, et ideo talis scientia, ut supra dixi, est perfectio necessaria et mere naturalis, supposito objecto scibili; volitio autem seu determinatio libera non est perfectio Dei, et ideo non est illi tribuenda sine fructu: tum etiam quia alias in ordine ad perfectionem providentiæ est illa scientia utilissima, ut in omnibus possit Deus ex certa præscientia omnimoda, perfecta, et possibili disponere, quod non habet locum in illo decreto libero, ut ostensum est.

11. *Tertia superioris decreti impugnatio.*—Tertio, possumus argumentari, quia in actibus divini intellectus et voluntatis non invenitur ordo rationis prioris et posterioris, nisi quatenus ex parte objectorum invenitur aliquis ordo vel dependentia; sed inter decretum conditionatum et absolutum nullus talis ordo, nec fundamentum ejus invenitur: ergo sine fundamento assignatur talis ordo et fingitur decretum conditionatum, tanquam necessario præmittendum ante absolutum. Major supponitur ex communi sententia theologorum, quæ in hoc merito fundatur, quod decretum voluntatis in se simplicissimum est, et ideo

sicut in illo ex parte sua non est distinctio, ita neque ordo, neque debet a nobis gratis et sine fundamento cogitari, vel potius fingi: solum ergo potest in ordine vel dependentia obsectorum fundari. Probatur ergo minor, quia vel tale decretum conditionatum comparatur ad absolutum in ordine ad objecta diversa, videlicet, quatenus conditionatum est circa futura quæ nunquam erunt, et absolutum circa illa quæ aliquando erunt. Et sic nullus est ordo inter objecta illorum, ut per se patet, quia impertinenter se habent, nec futurum esse unius pendet ex esse possibili alterius, nec e converso: ergo neque inter tales actus est ordo. Vel illa decreta comparantur ad unum et idem futurum, quod prius sub conditione, postea absolute futurum decernitur, et sic minus potest ordo intelligi: nam licet possibile, ut sic, sit prius quam futurum, quia potest esse sine futuro, et non e contrario, tamen in futuro sub conditione non potest hic ordo considerari juxta illam sententiam: nam illa supponit quod res habeat utramque rationem futuri, tam conditionati quam absoluti a decreto divino: cum ergo utraque ratio futuri non sit nisi per denominationem a libero decreto Dei ita præfiniente, ut sit ordo aliquis in re ipsa sic vel sic futura, debet supponi ordo inter ipsa decreta; in decretis autem esse non potest nisi ratione obsectorum; ergo committitur circulus, et impossibilis ostenditur talis ordo. Quod etiam patet, quia neutrum decretum alterum necessario supponit, etiam secundum nostrum intelligendi modum; potest enim Deus habere unum decretum sine altero, et e contrario, ut facillime potest ab unoquoque considerari. Ergo frustra cogitatur ordo inter talia decreta. Præterquam quod frustra inducuntur etiam concomitanter circa eadem futura, ut alia argumenta ostendunt, et nunc amplius explicabitur.

12. *Idem quidem dicendum de decreto circa aliquos actus liberos sub conditione futuros.*—Potest enim ulterius dubitari, esto non asserimus habuisse Deum decretum conditionatum circa omnia futura possibilis, et sub omni conditione et combinatione possibili, an saltem haberit illud circa aliquos actus liberos sub conditione futuros. In qua interrogatione, supposita resolutione negativa dubii præcedentis, consequenter videtur dicendum non habuisse Deum talem actum circa creaturas racionales, seu voluntates tantum possibilis, id est, quæ nunquam futuros sunt. Probatur, quia osten-

sum est non habuisse tale decretum circa omnia possibilis præintellecta, et nondum absolute futura: ergo dicendum consequenter est circa nullam voluntatem consideratam tantum ut possibilem habuisse talem actum, ac proinde circa illas voluntates, quæ nunquam futuræ sunt, sed manserunt sub solo esse possibili, non habuisse Deum tale decretum. Probatur consequentia, tum quia eadem est ratio de singulis quæ est de omnibus simul sumptis; tum etiam quia rationes factæ in præcedenti puncto eandem efficaciam habent in singulis voluntatibus tantum possibilibus, ut facile consideranti et applicanti patebit. Superest ergo ut de voluntatibus hominum et Angelorum, qui creati vel creandi sunt, videamus. In illis autem duos actuum ordines distinguere possumus; unus est actuum liberorum, qui sunt aliquando futuri, quatenus prius ratione considerari possunt ut possibilis, quam ut absolute futuri: alius est actuum possibilium, qui absolute non sunt futuri, ut fuit Tyrriorum pœnitentia.

13. *Opinio aliquorum non habere Deum conditionale decretum circa ea, quæ aliquando futura sunt.*—*Rejicitur.*—De his futuris contingentibus quæ aliquando futura sunt, aliqui probant non habere Deum circa illa conditionatum decretum, quia hæc futura nunquam præsciuntur ut futura sub conditione: ergo neque sub conditione præfiniuntur. Antecedens probatur, quia ex æternitate præsciuntur absolute scientia simpliciter futura: ergo non possunt simul sub conditione præsciri, quia jam est purificata conditio. Prima vero consequentia probatur, tum a paritate rationis; imo, si præscientia, quæ est suo modo naturalis et necessaria, non datur conditionata circa talia absolute futura, multo minus dabitur conditionatum decretum, quod nec necessarium est, nec ad perfectionem per se pertinet: tum etiam quia si daretur tale decretum conditionatum, eo ipso posset in illo subsistere conditionata præscientia ejusdem futuri sic prædefiniti. Hoc vero fundamentum non est solidum. Nam antecedens ejus falsum est: supra enim ostendimus peccatum Adæ, v. g., prius fuisse sub conditione prævisum, si permitteretur, quam fuerit permissum, et consequenter prius etiam quam fuerit absolute prævisum, quia ante præscientiam absolutam præcedit voluntas permittendi. Et similibus exemplis, variisque testimoniis ostendimus supra circa eandem rem futuram præcedere in Deo secundum rationem conditionatam præscientiam ante ab-

solutam. Neque contra hoc obstat quod præscientia absoluta sit æterna, quia etiam præscientia conditionata æterna est, et in ipsa æternitate una scientia est prior ratione quam alia, quando ex parte objecti est fundamentum. Unde licet posterius ratione purificetur conditio, et ideo sequatur absoluta scientia, nihilominus prius ratione potest conditio intelligi ut nondum definita, vel impleta, et ideo esse potest locus conditionatæ præscientiæ, ut videre licet in futuris necessariis sub conditione: nam prius præsciuntur in objectis possibilibus, licet in alio signo rationis præsciantur absolute futura; ut, prius vidit quod, si sol crearetur, illuminaturus esset, et postea vidit solem illuminaturum. Idem ergo intelligitur facile etiam in contingentibus. Quapropter non repugnat, simul et ex æternitate habere Deum præscientiam conditionatam et absolutam ejusdem futuri conditionati. Imo semper, ante præscientiam absolutam, conditionata præcedit, quatenus ad simplicem intelligentiam pertinet et ante libera decreta præcedit, ut dictum est. Nihilominus tamen non est eadem ratio de decretis conditionatis; illa enim, cum nullo modo necessaria sint, sed libera, nisi ex effectu vel alio certo principio inferantur, non sunt gratis fingenda, ut dixi. Unde circa res absolute futuras non videntur admittenda decreta conditionata, cum absoluta sufficiant.

14. *Primus dicendi modus concedens conditionatum decretum.—Impugnatur.*—Verumtamen, hoc non obstante, in hoc puncto varii sunt dicendi modi. Nam qui putant præscientiam Dei de futuris actibus liberis præsupponere semper decretum prædefinens et præterminans talem actum, in quo fundetur, simulque admittunt Deum certo præscire hæc futura sub conditione, prius ratione quam illa cognoscat ut absoluta futura, consequenter dicunt habere Deum circa futura decretum conditionatum priusquam habeat absolutum: quod solum afferunt ne cogantur vel negare in his omnibus conditionatam præscientiam, vel illam sine prævio decreto admittere. Sed nihilominus rationes supra factæ contra hanc sententiam vim habent: quia revera otiosum est et inutile tale conditionatum decretum, si effectus futurus est per absolutum et prædefinitivum. Quod explicatur exemplo illo de peccato Adæ; nam postquam Deus per simplicem intelligentiam prænovit tale peccatum futurum fuisse in tali occasione, si ipse voluntatem Adæ ad materiale actum determinaret, et ita peccatum permetteret, statim decrevit

voluntatem Adæ sic determinare: ergo inutiliter et gratis fingitur ante hoc decretum absolutum habuisse Deum aliud conditionatum, quo statuit quod, si talis occasio occurreret seu poneretur in rerum natura, determinaturus esset voluntatem Adæ ad talem actum: quia in ordine ad providentiam Dei circa tale peccatum, nihil confert tale decretum, quia ex vi illius Deus nihil ad extra operatur: item quia nulla est ratio ordinis, etiam secundum rationem, inter decretum illud conditionatum et aliud absolutum, et concomitanter esse non possunt, quia, posito actu absoluto, purificatur conditio, et consequenter objectum decreti conditionati tollitur: item quia solum videtur fingi tunc tale decretum, ut possit præcedere conditionata præscientia ante decretum absolutum, seu ante permissionem absolutam talis peccati: hoc enim Patres supra allegati supponere videntur. At vero hoc est contra mentem eorundem Patrum, ut supra visum est; loquuntur enim de præscientia quæ præcedat omne decretum liberum Dei; alias frustra quererent cur Deus, præsciens futurum peccatum, illud permiserit, si jam illa præscientia esset ex priori permissione. Inde igitur potius probatur, illam præscientiam non fundari in decreto, quam quod sit tale decretum propter præscientiam: imo si præscientia illa non posset haberi nisi in simili decreto, tam esset impertinens illa præscientia quam ipsum decretum: quia ad nullum effectum providentiæ, nec ad conciliandam libertatem cum prædefinitione, nec ad reddendam rationem cur Deus permittat peccatum quod præsit futurum, deserviret. Ac denique, cum illud decretum ex parte Dei sit prædefinitivum, licet ex parte objecti conditionem includat, auget absurditatem quæ in eo cernitur, quod Deus ex se præfiniat actus malos, quasi non satis illi sit eos absolute decernere, sed etiam in illis sub conditione præfiniendis quasi complacere et otiose delectari. Quæ ultima ratio est propria malorum actuum; aliæ vero etiam in bonis locum habent: et ideo omne decretum prædefinitivum sub conditione circa actus liberos absolute futuros impertinens est, etiamsi ex decreto absoluto prædefiniente futuri esse supponantur.

15. *Proponitur secundus modus concedentium decretum conditionale simul cum absoluto.*—At vero aliqui auctores, licet negent facere Deum in nobis actus liberos per decreta prævia prædeterminantia, nihilominus ponunt in Deo duplex decretum, unum absolutum, et aliud

conditionatum, circa hos actus quos voluntas humana libere facit, vel est aliquando factura. Nam quia hi actus fieri non possunt sine concursu Dei simultaneo, necesse est ut ex parte Dei antecedit decretum et voluntas offerendi concursum hujusmodi: quam voluntatem dicunt esse generalem, nimirum offerendi concursum ad plures actus, inter quos potest voluntas in tali occasione deliberare seu eligere, quia hoc necessarium est ut homo sit potens ad quemlibet eliciendum, et consequenter est etiam ad actum liberum necessarium, unde etiam concludunt decretum illud voluntatis Dei esse conditionatum, quia non habet effectum, nisi cooperante libero arbitrio hominis, quæ est conditio intime inclusa objecto talis decreti: inde enim fit ut, licet hæc voluntas Dei ad plures actus divisim offerat concursum, unum tantum operetur. Ita ergo ad hos actus liberos decretum conditionatum antecedit. Quia vero conditionatum decretum non videtur sufficere ut effectus in re fiat, ideo dicunt dicti auctores necessarium esse aliud decretum absolutum et particulare, quo Deus simpliciter vult ut hic et nunc talis actus a tali voluntate circa tale objectum fiat. Quod decretum vocant concomitans, et non prædefinens, quia est de effectu simul efficiendo cum libero arbitrio, et non aliter, et quia non vult absolute Deus liberum arbitrium sic operari, nisi quia, supposito priori decreto conditionato et universali, prævidet liberum ipsum arbitrium fore ad illum actum determinandum, potius quam ad alium. Ita sentit Corduba, l. 1, q. 53, dub. 8, 9 et 10, et multi alii ex modernis.

16. *Explicatur secundus modus accipiendi decretum conditionatum.* — Ego tamen nunquam intelligere potui cur necessarium sit, vel quomodo satis intelligi possit, quod concursus Dei simultaneus procedat immediate ab hoc decreto particulari, quo Deus absolute vult istum actum fieri nunc a tali voluntate humana. Nam suppono priorem actum non ita esse, aut dici generalem, ut solum in confuso versetur circa actum liberum in communi, vel possibilem circa tale objectum hic et nunc, quia vel Deus non habet hujusmodi actus confusos, qui ex parte cognitionis seu apprehensionis objecti imperfectionem videntur supponere: vel certe quia talis actus non est necessarius, nec sufficit ex parte Dei ad agendum aliquid ad extra, cum actiones sint circa particularia, et ad illas etiam particularia decreta sufficiant: neque etiam ex parte

liberi arbitrii est necessarium tale decretum confusum, quia per decretum particulare sufficienter ei providetur, ut jam declaro. Dicitur ergo illud conditionatum decretum generale, quia per illud non offertur concursus ad unum tantum actum, sed ad plures, vel etiam ad omnes quos liberum arbitrium circa objectum sic propositum potest hic et nunc exercere; ad omnes (inquam) non in individuo possibles, sed in specie, non tamen confuse, sed in particulari ad determinatum et singularem actum sub speciebus singulis, ut ad talem actum amoris, odii, consensus, vel dissensus, et similes: per hoc enim non impeditur libertas, etiam quoad specificationem, cum voluntas maneat indifferens ad actus diversos et contrarios efficiendos. Imo per illud decretum quodammodo completur libertas, quia voluntas creata non potest ex sua sola libertate determinare individuationem sui actus, et ideo, ut operari possit et eligere, necesse est ut habeat paratum concursum ad determinatos actus in omnibus speciebus inter quas potest eligere. Sic ergo necessarium est decretum commune ad plures actus, licet sit etiam ad singulos in individuo. Est autem tale decretum quasi conditionatum, quia, ut salvetur libertas quoad exercitium, non determinatur tale decretum simpliciter ad agendum, sed coagendum, utique si arbitrium coagere voluerit.

17. *Non est necessarium aliud particulare decretum absolutum distinctum a supra dicto.* — Sic ergo explicato illo generali decreto conditionato, dico per se et ex vi concursus simultanei non esse necessarium aliud decretum absolutum particulare circa actum illum qui in tempore fit, vel futurus est a libero arbitrio creato. Primo, quia illud prius decretum etiam est particulare, ut declaravi; unde ex hac parte habet sufficientem determinationem ut operetur ad extra: neque enim obstat quod de se extendatur ad alios actus posibles, seu (quod perinde est) quod Deus habeat plura decreta similia ratione distincta, quibus offert concursum ad varios actus: nam potest nihilominus agere per unum potius quam per aliud, non ex parte ipsorum decretorum Dei, sed ex parte arbitrii creati, quod pro sua libertate uni decreto potius quam alteri cooperatur: ergo ex hac parte sufficit quodcumque ex illis decretis ad operandum ad extra. Aliunde vero non obstat quod sit conditionatum, quia quantum est ex parte Dei, est absolutum; quia revera Deus, quantum est ex se,

paratus est ad efficaciter concurrendum, tam ad hunc quam ad illum actum : ergo hoc satis est ut efficiat illum ad quem coagendum liberum arbitrium inclinatur. Et declaratur, nam si potentia executiva seu activa Dei ad extra est distincta ratione a voluntate, et per hanc applicatur ad agendum, per illum actum quasi conditionatum manet applicata, et exposita ad influendum ad talem actum, si ei voluntas creata adjungatur. Si vero ipsa voluntas est ipsa potentia immediate ad extra efficiens, satis illi est, ad efficiendum, ita velle sicut effectura est. At vero non est effectura actum liberum voluntatis creatæ se sola, sed simul cum voluntate creata, si ipsa velit : ergo satis est ut hoc ipsum velit, sicut revera illud vult per illud decretum conditionatum, quia per illud præcise vult coagere voluntati, licet non prædeterminando illam ad agendum : ergo illud idem decretum sufficit, ut voluntas Dei actum voluntatis humanæ efficiat, quando hæc ipsi adjungitur.

18. *Posterius decretum si daretur, obstaret libertati. — Tripliciter probatur. —* Unde etiam videtur concludi, non solum frustra poni aliud decretum ratione posterius et absolutum, sed etiam poni non posse, salva integra libertate creatæ voluntatis. Primo quidem, quia illud posterius decretum est simpliciter necessarium ad concursum ad extra præstandum, vel non est necessarium. Si necessarium non est, superflue ponitur. Si vero est necessarium, ergo per illud prius decretum non offertur sufficienter voluntati humanæ concursus necessarius ad alios actus quos non facit, et consequenter non libere illos omittit, sed ex defectu concursus. Sequela patet, quia non habet homo concursum quasi in actu primo, nisi quatenus illum habet paratum per voluntatem Dei ; ergo non habet illum sufficienter, donec per sufficientem Dei voluntatem sit oblatus, ita ut non sit necessarium expectare aliud decretum Dei, ut in re ipsa ponatur ad extra talis concursus, nec ut voluntas hominis illi cooperetur, si velit. Secundo, quia si illud decretum absolutum est necessarium, non erit in potestate hominis quod Deus habeat vel non habeat tale decretum, et consequenter cum illud non supponitur, neque etiam effectus ejus erit in hominis potestate. Hæc posterior sequela manifesta est. Prior vero probatur, quia, si esset in potestate hominis, maxime quia supponit in Deo præscientiam sub conditione illius actus in particulari, ad quem est determinanda vo-

luntas creata cum concursu oblato per prius decretum generale et conditionatum ; at hoc involvit repugnantiam in illa sententia ; ergo. Major patet ex ejusdem sententiæ declaratione. Minor probatur ex ejusdem principiis. Quia concursus non potest dari ad extra per conditionatum decretum, donec accedat absolutum : ergo nec potest sub conditione prævideri quid sit operatura voluntas, si illi offeratur concursus per solum conditionatum decretum, quia cum illo solo nihil potest operari ad extra, et, ut futurum sub conditione prævideatur, necessarium est ut ex parte causæ ponantur omnia necessaria ad effectum immediate influendum, quia debet prævideri effectus in se, et ut manans a causa, quod est impossibile, nisi supponatur quidquid necessarium est ad agendum ex parte causæ proximæ. Propter quod existimo, vel illum modum præscientiæ esse impossibilem, vel posterius decretum non esse necessarium ad concursum ad extra tribuendum. Unde argumentor tertio, quia tale decretum posterius vel non potest non esse prædefinitivum ac prædeterminativum voluntatis humanæ, vel non potest non esse aliquo modo conditionatum. Probatur, quia vel Deus per illud decretum non solum vult concurrere, sed etiam absolute vult ut voluntas hominis cooperetur, vel præcise vult concurrere, nihil de concursu voluntatis absolute disponendo, sed quasi permittendo. Priori modo decretum Dei est prædefinitivum, et non tantum concomitans, quia et est absolutum de actu ipso, et de ipsomet voluntatis humanæ conatu, et (ut ostendi) non potest esse ex præscientia ejusdem actus ut futuri sub conditione, nisi in ipsamet conditione hoc idem decretum prædefiniens includatur, quod et libertati repugnat, et a diæta auctoribus non conceditur. Posteriori autem modo decretum semper includit conditionem in objecto suo, utique concausationem liberi arbitrii, quam non determinat, sed suæ libertati permittit, et ita superfluum est tale decretum, quia quoad hanc partem coincidit cum priori decreto conditionato, solumque cum priori junguntur alia decreta, quibus concursus ad alios actus offertur, que non obstant quominus per illud prius decretum concursus ad extra non solum offeratur, sed etiam, comitante libero arbitrio, conferatur.

19. *Sufficit ad simultaneum concursum decretum quo Deus ad hunc actum in peculiari concurrat. —* Quapropter dicendum censeo,

propter solum simultaneum concursum non esse necessaria duo decreta, sed sufficere illud quo Deus, quantum est ex se, offert concursum voluntati ad hunc actum in particulari, licet simul offerat similem concursum ad alios actus. Imo credimus de actibus malis, etiam ut actiones reales sunt, non habere Deum aliud decretum magis absolutum quo illos esse velit, quia nec illos præfinit, neque in eis complacet simpliciter, sed tantum secundum quid, scilicet, prout ab ipso Deo sunt, seu quoad generalem concursum quem ad eos præbet : prout vero sunt ab homine, simpliciter displicent Deo, et illos ad pœnam ordinat. In quo est aliquod discrimen in bonis actibus : nam illos absolute vult Deus, saltem voluntate consequente et complacentiæ, et præsertim actus supernaturales et gratiæ. Nam præter voluntatem antecedentem, qua Deus non solum vult ad illos actus concurrere, sed etiam cupit illos fieri, et ideo illos consulit, inspirat, etc., habet erga illos absolutum complacentiæ affectum consequentem : nam videns liberum arbitrium cum gratia determinari ad actum bonum, in illo complacet non solum prout est a se, sed etiam prout est ab homine, seu quatenus in se est honestus, et suæ voluntati conformis. Et fortasse semper vel sæpius tales actus prædefinit per modum intentionis, licet non per modum executionis, ut libro 5 in fine explicabimus. Illa vero prædefinitio supponit scientiam conditionatam priorem omnino decreto prædefiniente sub eadem conditione ; quia tale decretum supervacaneum est, ut ostendimus ; cum nec ad præbendum concursum, nec ad alium effectum providentiæ circa tales actus sit necessarium. Imo neque esset possibile, salva libertate actus, ut dicto libro 5 ostendimus.

20. *Controversia præcipua in quo sit decreti.* — Superest dicendum de ultimo membro, scilicet, de voluntatibus creatis, vel aliquando futuri, quoad actus futuros sub aliqua conditione, qui nunquam futuri sunt, quia conditio nunquam est eventura, ut fuit pœnitentia Tyrionum, et traditio Ceilitarum, et similes, de quibus est præcipua controversia cum adversariis, qui propter Scripturæ testimonia fatentur habere Deum præscientiam talium futurorum certam et infallibilem ; et quia manifestum est Deum non habuisse circa hæc futura absoluta decreta, contingunt conditionata decreta prædefinitiva, et particularia circa talia futura : nullam vero illorum

decretorum rationem assignant, vel utilitatem ; sed, tantum a posteriori, quia Deus illa futura revelavit, fatentur illa prævidisse, et quia alias supponunt non posse futura præsciri, nisi in decreto prædefiniente, concludunt talium decretorum necessitatem. Vocatur autem tale decretum prædefinitivum, licet sit conditionatum, quia tale est ut, posita conditione, ex vi illius Deus efficaciter prædeterminaret voluntatem hominis ad talem actum, ut voluntatem Tyrionum ad pœnitentiam, si vidissent signa ; et voluntates Ceilitarum ad tradendum David, si Saul ascenderet, et civitatem obsideret.

21. *Multiplex decretorum conditionatorum acceptio.* — Nos vero dicimus distinguenda esse hæc decreta, et, ut doctrina sit generalis et integra, extendere possumus sermonem etiam ad effectus quos Deus esset factururus, si aliqua conditio impleteretur. Quædam ergo decreta conditionata esse possunt de rebus quas Deus esset factururus, si hoc vel illud accideret : alia de his quas homines libere essent facturi, si talis conditio poneretur. Item quædam ex his continentur sub generalibus legibus providentiæ diviniæ, ut particulare sub universali : alia vero cogitari possunt ita specialia, ut in generalibus principiis providentiæ, gratiæ vel naturæ non contineantur. Item conditio ipsa interdum talis est, ut a Deo solo sit implenda pro suo arbitrio, interdum ab homine futura postulatur. Exempla quoad decreta ipsius Dei, seu de effectibus quos ipse esset factururus, si talis conditio impleteretur, possumus adhibere ex Scriptura. Dicitur enim Psalm. 80 : *Si populus audisset me, Israel si in viis meis ambulasset, pro nihilo forsitan inimicos eorum humiliassem.* Ubi sub conditione asserit Deus quid ipse esset factururus, si populus Israel recte circa eum se gessisset : quæ prædictio potest fundari in generali lege providentiæ Dei, qua statuit et sæpe promisit illum populum ab inimicis defendere, si obedisset legi ejus. Particula vero *forsitan* non propter dubitationem addita est, sed forte ad denotandum illam conditionem debuisse perfecte impleri, ut locum haberet infallibilis ejus consecutio, ac promissionis adimpletio. Simili modo, cum Eliseus, 4 Reg. 13, dixit ad Joas, Regem Israel : *Si percussisses quinquies, aut sexies, sive septies, percussisses Syriam usque ad consumptionem,* prædixit sub illa conditione aliquid quod Deus factururus fuisset, si talis conditio fuisset impleta ; illa enim victoria divina virtute futura fuisset : illa ergo prædictio fun-

data sine dubio fuit in decreto conditionato Dei, quo id facere statuerat, si rex quinques, etc., percussisset terram. Quod decretum non potest dici esse contentum in aliqua lege, vel permissione generali Dei, ut per se notum est, sed videtur fuisse ex speciali providentia circa factum illud, ex solo consilio voluntatis suæ. Ille enim effectus sine dubio non erat per se connexus cum illa conditione, nec conditio illa perentiendi multoties quidquam conferebat ad effectum; voluit tamen Deus expectare tale signum aut symbolum, et non aliter conferre vires et potentiam ad consummatam victoriam obtinendam. Simili modo intelligi potest locus Jerem. 38, supra c. 2 allegatus: *Si profectus exieris ad principes regis Babylonis, vivet anima tua.* Ibi enim prædicatur aliquid quod Deus ipse promittebat, tanquam sua virtute et speciali auxilio ac providentia implendum; promittere autem illud voluit sub tali conditione ex sua speciali dispensatione, et non alio modo, ut rex ille se humiliaret, et ob alias causas Deo notas. Ad hoc denique genus pertinent conditionales omnes propositiones de futuro, quæ in promissionibus divinis sub conditione factis hominibus fundantur; ut: Si homo se disposuerit, Deus illi gratiam conferet; si oraverit sicut oportet, impetrabit, et similes.

22. *Horum decretorum revelatio necessitasque patet; quando non adimplentur, est ex defectu conditionis quæ ex parte hominis apponenda erat.*—De his ergo conditionatis decretis nulla nobis est controversia, tum quia sufficienter sunt revelata, tum etiam quia vel ad generalem, vel ad specialem providentiam gratiæ vel naturæ necessaria sunt. Unde, quando decreta sunt generalia, in multis habent effectum, quia in eis subsistit conditio; in aliis vero in quibus non impletur, Deus ex parte sua paratus est ex vi sui decreti effectum conferre, licet postea non faciat ex defectu conditionis, quod satis est, etiam in specialibus decretis, ut non sint otiosa aut superflua, sed ad ordinem providentiæ pertinentia. Ex quo etiam fit, quod attente considerandum est, in omnibus hujusmodi decretis conditionatis semper postulari conditionem ex parte hominis libere operantis vel cooperantis ad aliquem effectum, ut in exemplis allatis videre licet. Nunquam vero invenietur promissio effectus sub conditione pendente a solo beneplacito Dei, quæ ob defectum solius conditionis non impleatur; quia talis promissio vana esset et nullius utilitatis, quia sem-

per tota promissio pendet ex solo arbitrio promittentis, et ideo perinde est ac si non fieret; ut, si ego alicui promitterem: Si voluero, dabo tibi centum; vel si quis ita promittat: Si venero, hoc faciam, cum proposito nunquam veniendi, frustranea esset promissio, maxime si propositum illud esset immutabile. Ita ergo esset si Deus promitteret alicui, verbi gratia: Si te vocarem, prædeterminarem ad consensum, et alioqui haberet absolutum decretum nunquam vocandi; nam cum vocatio a sola Dei voluntate pendeat, et decretum illud sit immutabile, otiosa et frustratoria esset talis promissio; et similiter vanum est tale decretum conditionale, in quo possit talis promissio fundari, ideoque non est Deotribuendum: nam de illo omnes rationes paulo antea factæ procedunt.

23. *Decreta ex parte hominis in Ceilitis, etc., varie distincta.* — *Probatur non cognosci in tali decreto conditionato veritatem conditionatam.* — *Exempla vero quæ pertinent ad effectus contingentes quos ipse homo esset factururus, si talis conditio impleretur, manifesta sunt in pœnitentia Tyrriorum et facto Ceilitarum.* Inter quæ differentiam considero: nam in priori effectu conditio proxime pendebat ex divina voluntate, in posteriori vero ex humana, ut facile consideranti patebit. Ex qua differentia aliam infero: nam in priori effectu, qui futurus esset a voluntate hominis, si poneretur conditio pendens ex sola voluntate Dei, non potest veritas conditionata de futuro contingenti fundari in decreto prædeterminante conditionato Dei, quando tale futurum sub conditione nunquam est absolute futurum. Quia si Deus habuisset tale decretum conditionatum de prædeterminanda voluntate creata ad talem effectum, subsistente tali conditione, oportuisset ut ex vi talis decreti esset Deus paratus ad prædeterminationem illam conferendam; alioqui vanum et sine utilitate ulla esset tale decretum, ut in aliis argumentati sumus: at Deus in eo casu non est paratus ad dandum tale auxilium, quia, si esset paratus, daret illud, cum ab homine non pendeat; ergo nec habuit tale decretum. Item conditio illa, ut supponitur, pendet ex sola voluntate Dei, et alioqui Deus ex se decrevit non ponere talem conditionem, quia supponitur nunquam futura; ergo non potest paratus esse ad dandum aliud auxilium, quod illam conditionem impletam necessario requirit. Denique in facto Tyrriorum et Sidoniorum res aperte declaratur. Nam conditio sub qua præ-

dicta fuit eorum pœnitentia, fuit: *Si tales virtutes factæ essent in te*, quæ conditio ex sola Dei voluntate fuit dependens: at vero, per absolutum ejus decretum, præfinitum fuit ut tales virtutes in illis civitatibus non fierent; ergo Deus non habuit decretum determinandi ad pœnitentiam homines illarum civitatum, si tales virtutes in illis fierent. Probatur consequentia, quia tale decretum fuisset de re pendente a sola voluntate Dei, et sub conditione ab eadem voluntate sola pendente et ex decreto absoluto ejusdem voluntatis nunquam implenda; tale autem decretum conditionatum est prorsus otiosum et frustraneum, quia per illud revera nihil Deus contulit Tyriis, vel Sidoniis, nec paratus fuit conferre, nec continet promissionem ullam, nec sub ulla generalitate divinæ providentiæ, nec ad illam aliquid confert. Frustra ergo Deo tribuitur, nec potest fundari in Scriptura: nam considerando circumstantias illius particularis loci Matth. 41, potius illi repugnat, ut supra ostendi; in nullo vero alio Scripturæ loco simile aliquod decretum invenitur aut insinuatur, quod ego invenire potuerim.

24. *Quando conditio potest et debet ab homine poni, in actu peccati non invenitur decretum; aliter potest.* — At vero quando effectus futurus esset a voluntate hominis, et conditio etiam pendet ab hominis voluntate, distinguendum videtur inter effectum futurum a malo et peccaminoso actu voluntatis, vel a bono: nam in priori non potest futuritio conditionata fundari in decreto Dei conditionato, quia oporteret per tale decretum esse paratam divinam voluntatem ad inducendam voluntatem humanam ad actum malum, si talis conditio impleretur, ut jam declaratum est: hoc autem repugnat divinæ voluntati, sive illa inductio intelligatur per modum inspirationis, aut cogitationis a Deo immissæ, sive multo magis per modum physicæ prædeterminationis, ut libro 3 manifestum fiet; et talis est casus de Davide, et Saule, et Ceilitis, ut supra viduum est. At vero quando effectus contingens potest esse ab humana voluntate sine culpa, tunc non repugnat Deo tale decretum conditionatum, dummodo ad ordinem et consilia divinæ providentiæ aliquid conferat: quia tunc licet effectus esset futurus proxime ab humana voluntate, potest esse principaliter per operationem Dei facientis illam velle, sive per determinationem, sive per congruam inspirationem et cogitationem (hoc enim ad præsentem partem non refert), et ideo non repu-

gnat talem prædictionem in tali Dei promissione seu decreto sub conditione fundari. Exemplum adhibere possumus in aliis verbis sumptis ex Jerem. 38: *Si exieris ad principes regis Babylonis, non te tradent transfugis Judæis*; nam in eis prædicatur effectus pendens a voluntate principum Chaldæorum, et supponens conditionem pendentem a voluntate regis Sedeciæ, et nihilominus continent illa virtuale promissionem Dei, et consequenter ostendunt voluntatem Dei determinatam ad dirigendas voluntates Chaldæorum principum, si Sedecias ad illos exiret, ut infallibiliter illum non traderent Judæis. Tale ergo decretum conditionatum in Deo esse potest, et non est frustra, sed ad dispositionem suæ providentiæ pertinere potuit.

25. *Totius capituli summa.*—His ergo modis videntur vel admittenda vel rejicienda conditionata decreta libera in voluntate Dei, ita ut neque illa negentur quæ in Scriptura et ordine providentiæ fundantur, neque illa fingantur quæ utroque fundamento omnique utilitate carent. Unde tandem concluditur per hæc decreta conditionata non satis defendi præscientiam certam omnium futurorum sub conditione. Nam licet ea futura sub conditione, quæ pendent ex sola voluntate Dei, possint ex vi decreti conditionati præsciri, quia per ipsum decretum habent immediate quod essent futura, nihilominus alia futura, quæ proxime pendent a voluntate humana, et in Scriptura revelantur, non potuerunt præsciri ex vi talis decreti, quia ex aliis decretis Dei, vel ex rei inutilitate, et ex modo ipso loquendi Scripturæ satis colligitur Deum tale decretum non habuisse, ut explicatum est. Et de conditionatis decretis et de fundamentis scientiæ conditionatæ hæc nobis sufficere videntur. Nunc aliquibus objectionibus satisfaciendum superest.

CAPUT IX.

NONNULLIS OBJECTIONIBUS OCCURRITUR, EARUMQUE OCCASIONE DOCTRINA DATA MAGIS DECLARATUR, ET VELUTI IN SUMMAM REDIGITUR.

1. *Prima objectio.* — *Prima confirmatio.* — Probando sententiam nostram, præcipua fundamenta contrariæ sententiæ dissolvimus; ut vero nihil consideratione dignum prætermittamus, nonnullas alias objectiones proponemus, ex quarum solutione veritas ipsa magis elucecet. Prima objectio est, quia ex nostra sententiâ sequitur esse aliquam creatam veri-

tatem necessario futuram absque voluntate Dei: consequens videtur valde absurdum; ergo Sequela patet, quia si Deus ante omne suum decretum liberum prævidit Adam, constitutum in tali statu, et occasione, ac tentatione, fuisse peccaturum, talis effectus vere fuit futurus independentem a libertate Dei, quia ante omne decretum suum liberum fuit futurus, unde post talem præscientiam non potuit Deus impedire quominus, posita illa hypothese, peccatum illud esset futurum. Et idem est in omnibus similibus. Consequens autem hoc esse absurdum videtur ostendi, quia si hoc verum esset, non haberet Deus absolutum et universale dominium omnium futurorum eventuum, nec haberet omnipotentiam faciendi, ut a tali causa tali modo se habente proveniret vel non proveniret talis effectus, quia necessario eventurus est, qui per scientiam conditionatam prævisus est futurus. Unde confirmatur difficultas, quia sicut in absolute futuris verum est illud: *Omnia quaecumque voluit, fecit*, et e contrario etiam verum est nihil fieri vel futurum esse, nisi quod ipse vult aut libere permittit: ita in conditionate futuris verum esse debet, nihil fuisse vel esse posse sub aliqua conditione futurum, nisi quod ipse sub conditione, saltem libere, decernit aut permittit; est enim eadem proportionalis ratio, et utrumque pertinet ad supremam et universalissimam potestatem Dei: ergo non est illi denegandum. Præsertim quia nihil repugnat habere Deum hæc conditionata decreta, cum in ordine providentiæ sæpe sint necessaria, ut nos etiam fatemur: nam Deus offert generalem concursum, quo voluntas sæpe non est usura, quod non potest esse, nisi per conditionatum decretum, et similiter paratus est justificare peccatorem, quem nunquam justificabit, et sic de aliis.

2. *Secunda confirmatio.*—*Ultima confirmatio exemplo illustrata.*—Confirmatur secundo hæc difficultas, quia divina veritas est Deo ratio cognoscendi omnes veritates extra se, sicut divina bonitas est ratio volendi omnia bona extra se: non posset autem divina veritas esse ratio cognoscendi veritates has conditionatas, si illæ essent independentes a decreto Dei, quia tunc non haberent veritatem a Deo, et ita nec veritas Dei posset esse ratio cognoscendi illas: ergo impossibile est quod habeant veritatem cognoscibilem ante decretum Dei. Tandem confirmatur, quia si Deus cognosceret hæc contingentia, ut determinate vera, ante decretum voluntatis suæ, cognosceret illa ut ex

se omnino necessaria: vel revocanda erunt in aliquam aliam causam extrinsecam, et infalibiliter determinantem voluntatem hominis: consequens autem omnino est falsum: ergo. Sequela declaratur: nam constituamus, verbi gratia, Petrum et Paulum prævisos sub esse possibili cum tali vocatione et omnibus circumstantiis ejus, et ex vi libertatis de utroque prævideri in quodam priori signo rationis, posse consentire vel dissentire, in posteriori autem signo, et ante decretum Dei, Petrum videri consensurum, et Paulum non consensurum: peto unde provenire possit hæc diversitas; non enim ex Deo, cum supponatur non habuisse decretum; nec ex ipsis voluntatibus humanis, cum sint æque indifferentes de se; nec ex objecto, cum supponatur esse idem, et licet esset diversum, non efficaciter movet: ergo oportet id referre vel in aliquam constellationem, vel aliquid simile. Quam vero absurdum hoc sit facile patet, quia et repugnat libertati, cum illa necessitas sit antecedens, et quasi fatalis, cum non sit ex decreto Dei, nec ex decreto hominis libero, sed quasi ex naturali determinatione. Et in operibus pietatis repugnat maxime divinæ gratiæ, ut constat. Multa argumenta his similia ab auctoribus contrariæ sententiæ prolixè satis multiplicantur. Sed illa omitto, quia ex eisdem principiis et æquivocationibus terminorum procedunt; imo hæc etiam excusari possent, quia ex principiis positæ faciliè possunt a quocumque dissolvi: tamen, ut omnibus satisfaciamus, et majoris claritatis gratia, quæ diximus de veritate cognoscibili in his conditionatis, et modum præscientiæ illorum, quasi per recapitulationem, amplius explicemus.

3. *Primo animadvertendum, non esse necessarium quod decretum in conditione includatur, sed sufficere quod sit post vocationem.*—Multa ergo ex similibus argumentis ex eo procedunt, quia non distinguitur inter decretum Dei, ut præcedens ordine rationis in ipsomet Deo, vel ut objective inclusum in hypothese futuri eventus conditionati. Hæc autem diversa esse, et supra tactum est, et est per se manifestum. Nam Deus, per scientiam simplicis intelligentiæ, quæ omne decretum liberum præcedit, scit quod si ignis applicetur ligno, calefaciet illud: in ea vero hypothese necessario includitur decretum Dei volentis concurrere, quia sine illo non posset sequi talis effectus, etiam posita conditione; ergo in illa includitur: Si ignis applicetur, et Deus suum concursum non suspenderit; quæ non exprimitur, quia

supponitur quasi inclusa ex naturali debito. Et in operibus liberis, etiam gratiæ, præcognoscit Deus, per eandem scientiam, quod, si talis homo talem inspirationem, cum tali vel tali motione, tali tempore habeat, consentiet: quia scientia antecedit omne decretum liberum in Deo ipso, non tamen excludit decretum liberum ad modum possibilis, et inclusum in objecto. Et in hoc sub his verbis necesse est ut adversarii conveniant, quoniam talis præscientia necessaria est, ut Deus possit velle et eligere media efficacia prædestinationis. Sed differentia est in modo decreti vel motionis: nam adversarii volunt in illa hypothese debere includi motionem prædeterminantem voluntatem creatam, vel hanc conditionalem: Si ego voluero efficaciter talem voluntatem consentire, et ex hac voluntate illam vocavero, etc. Nos autem dicimus tale decretum, sic inclusum in illa conditione, non esse necessarium, sed sufficere decretum concurrenti simultaneous post talem vocationem, ita ut sensus conditionalis sit iste: Si dederò huic talem inspirationem, seu vocationem, et voluero illi offerre meum concursum, seu concomitans auxilium, talis actus sequetur. Unde fit nunquam talem actum cognosci futurum sub conditione, sine aliquo decreto libero Dei, etiamsi modo nostro cognoscendi et loquendi prius sit in Deo talis præscientia, quam sit quasi elicatum tale decretum liberum Dei.

4. *Secundo animadvertendum, inique inferri ex nostra doctrina futura præsciri absque dependentia decreti voluntatis Dei.* — Unde est, secundo, considerandum sæpe confundi decretum liberum Dei, generatim sumptum, cum decreto prædefiniente efficaciter seu prædeterminante: et quia dicimus Deum præcognoscere futura ante decretum prædeterminans, vel posse etiam esse futura sine tali decreto, statim infertur, vel nobis tribuitur, quod asseramus futura conditionata præsciri independenter a decreto voluntatis Dei; quæ non est bona illatio, quia est a particulari ad universale negative. Et defectus potest facile deprehendi, quia peccatum præscitur futurum non solum ante decretum prædeterminans, aut absolute prædefinientem, seu (quod idem est) prædestinantem etiam actum ipsius peccati, sed etiam præscitur futurum sine tali decreto, et tamen non erit futurum sine aliquo decreto voluntatis Dei, juxta illud Augustini in Enchirid., cap. 93: *Non fit aliquid, nisi Deus velit fieri vellet, vel sinendo ut fiat, vel ipse faciendo ut fiat, vel ipse faciendo.* Dicimus

ergo, ad cognoscenda futura conditionata, necessarium esse ut in ipsa conditione ponatur aliquod decretum Dei, non tamen ita absolutum ut prædeterminet voluntatem creatam; nam necessitas talis decreti repugnaret libertati voluntatis creatæ quoad usum liberum aliorum actuum, seu quoad liberam omissionem, vel (quod perinde est) quoad libertatem, nec non specificationem; et, respectu ejusdem actus futuri ex vi talis decreti, repugnaret libertati ejus quoad exercitium, neque præsciretur ut contingens, sed ut necessario consequens ex antecedenti suppositione. Præter absurditatem quæ de peccatis sequitur, quod in simili decreto præscirentur futura, saltem quoad ipsos actus a quibus est inseparabilis malitia, quæ quidem absurditas quanta sit sæpe inculcatur a nobis, et millies repetetur, ac latissime in discursu hujus operis tractabitur, quia res est summæ considerationis, et quæ huic materiæ magnam lucem affert.

5. *Tertia animadvertio de necessaria illatione actus liberi ex hoc decreto, ex qua duo incommoda sequuntur.* — Ex quo advertimus, tertio (quod supra jam tactum est), auctores contrariæ sententiæ reducere totam rationem præscientiæ divinæ circa futura contingentia ad necessariam illationem actus liberi ex hoc decreto divino prædeterminante: nam sine illo putant non posse esse veritatem determinatam in his propositionibus de futuro. Hoc enim est totum suæ sententiæ fundamentum in hoc puncto de præscientia conditionata. Unde duo ex illis sequuntur incommoda: unum in re ipsa, et contra doctrinam certam; aliud in sua schola, et contra principia in ea recepta ante hanc controversiam. Primum est, quod revera Deus non habet præscientiam contingentium, sed necessariorum, quia, ut illa futura præscire possit quæ ex se et in ordine ad causam proximam essent contingentia, facit ut necessario eveniant, ut sic illa præscire possit. Unde quidam ex dictis theologis non dubitavit dicere Deum non minus evidenter cognoscere futurum effectum in voluntate creata a se prædeterminata, quam in causa naturaliter agente: at hoc dici non potest: ergo neque primum audiendum est. Consequentia cum minori sunt notæ. Major autem satis probata est ex dictis in præcedentibus capitibus, junctis his quæ in præcedenti prolegomeno dicta sunt; et iterum est late probanda in libro 3. Secundum incommodum est, quod si vera est illa sententia, frustra laboravit D. Thomas in explicando modo quo

Deus præscit futura contingentia absoluta per præsentiam æternitatis, immeritoque dixisset non posse cognoscere illa in causa: nam licet non cognoscat in causa proxima nude sumpta, quia sic non est causa completa, cognoscit tamen in causa completa per determinationem impressam a causa prima, quam determinationem futuram esse in sua voluntate cognoscit. Nec esset ulla differentia in cognoscendis futuris, quæ a sola Dei voluntate pendent, et quæ pendent a voluntate creata; nam omnium cognitio ad solam Dei voluntatem resolvitur. Hæc autem omnia quam siut nova in doctrina D. Thomæ, ex locis supra allegatis et ex veteribus Thomistis, quos etiam allegavimus, satis constat.

6. *Quarta animadversio de distinctione determinationis in his contingentibus in se, vel in causa.* — Quarto, advertimus in his objectionibus et aliis quæ ab istis auctoribus fiunt, non distingui in his futuris contingentibus determinationem futuri effectus in causa, vel in se, quam nos etiam vocavimus determinationem in actu primo, vel in actu secundo. Hinc enim ex eo, quod effectus futurus non habet determinationem in actu primo in voluntate creata absque decreto prædeterminante, juxta eorum sententiam, inferunt non habere determinatam veritatem, quia, nimirum, supponunt nullam esse posse determinationem talis effectus, in qua veritas determinata propositionis de futuro nitatur. At vero divus Thomas in absolute futuris aliam determinationem effectus agnoscit, nimirum, præsentialem in æternitate, quæ non est in causa, sed in ipso effectui in seipso, et consequenter includit determinationem causæ ad illum producendum in actu secundo, ut præsentem æternitati, et, per ordinem ad illam determinationem et præsentiam, habent propositiones sub modo de futuro prolatae determinatam veritatem. Ad hanc autem determinationem actualem, etiam ut præsentem æternitati, non oportet supponere causam ad unum determinatam in actu primo; sed satis est supponere illam completam omni modo in actu primo, non ad unum tantum effectum, sed ad plures cum indifferentia; nam a tali causa potest prodire determinatus effectus pro ejus libertate, et de necessitate aliquis prohibet, considerando actum ut futurum, quamvis non hic vel ille determinate ex vi dispositionis causæ in completo actu primo, sed confuse aliquis: considerando autem actum ut præsentem æternitati, necessario futurus est certus

et determinatus actus in specie et individuo, et ad illum potest supponi concursus ex parte Dei ad hæc omnia determinatus, ac sufficiens, et simultaneus, qui satis est ut effectus possit esse determinate præsens æterno intuitu divinæ præscientiæ sine alia prædeterminatione quæ libertatem lædat. Et ideo D. Thomas illum modum cognitionis, ut necessarium ad salvandam libertatem et conciliandam cum illa præscientiam, excogitavit, vel potius ex antiquioribus Patribus hausit. Idem ergo modus determinationis intelligendus est in futuris conditionatis in ordine ad præscientiam; illa enim etiam potest intueri, ut præsentia ex hypothesi, seu ad modum præsentium, et potest intueri causam non solum quoad dispositionem et virtutem completam in actu primo, sed etiam quoad actualem habitudinem et determinationem per actualem influxum in talem effectum, quem Deus infinita efficacia intelligendi intueri potest per modum præsentis. Nam eadem est habitudo inter talem causam et actum ejus, apprehensis ut præsentibus, et in se existentibus ex hypothesi, quæ intelligitur esse inter illa, ut præsentia æternitati: nam etiam hæc præsentia est objectiva, et non est de re vere et realiter in se existente ab æterno, sed de re, quam Deus ita prorsus intuetur ac si vere in se existeret, vel sicut intuetur illam nunc quando in se jam existit, et ideo de illa intuetur non solum quid potest operari, sed etiam quid operatur, ex efficacia et infinitate sui æterni intuitus. Ex eadem ergo simili modo intuetur emanationem futuram talis effectus a tali causa supposita ex hypothesi per modum præsentis: nam est eadem ratio, et nulla major invenitur repugnantia. Et tota hæc excellentia cognitionis meritissime recognoscitur in infinitæ Dei scientiæ thesauro.

7. *Ad primam objectionem solutio est negativa sequela.* — His positis, facile est ad singulas objectiones respondere. Ad primam, in qua inferebatur aliquid esse futurum saltem sub conditione sine voluntate Dei, respondetur negando sequelam: quia licet illa scientia conditionata non supponat decretum aliquod liberum quasi præexistens in Deo, includit in ipsa hypothesi decretum liberum ponendum in re, ut ab illo esse possit effectus qui dicitur sub conditione futurus, quia ab illo essentialiter pendet. Quod necesse est fateantur qui dicunt Deum, per suam concursum, determinare voluntatem, quia consequenter negare non possunt quin Deus, per scientiam simplicis intel-

ligentiæ cognoscat, quod si voluntas hominis cum tali objecto et cognitione creetur, et ipse Deus velit cum illa concurrere ad talem actum, illum efficiet. Solumque est inter nos et ipsos differentia, quod ipsi dicunt illum concursum esse prævium, et prædeterminativum voluntatis creatæ, et ideo consequenter dicunt in illo, si dandus sit, cognosci infallibiliter futuram determinationem creatæ voluntatis: nos autem dicimus concursum non esse prædeterminantem, seu concomitantem, et ideo in decreto dandi illum, aut per modum illationis ex illo non cognosci liberam determinationem voluntatis futuram, sed cognosci in seipsa præsentialiter ex vi et efficacia divini intuitus. Unde si argumentum coaretetur ad voluntatem Dei prædeterminantem, ita ut illatio sit, sequi ex nostra sententia aliquid esse futurum sine voluntate Dei prædeterminante, concedimus sequelam: est enim consequens verissimum non solum in conditionatis futuris, sed etiam in absolutis, ut satis nos docent actus peccatorum, etiam ut tales actus sunt, et libere fiunt. Neque hoc est contra Dei omnipotentiam vel absolutum dominium, quia talis effectus non est futurus sine influxu omnipotentiae Dei, nec sine voluntate sua, qua vult et voluntatem creatam sinere libere operari, et cum illa concurrere. Possetque, si vellet, illum actum impedire, aliter se habendo cum voluntate creatæ. Si autem vult illam indifferentem sinere, necesse est ut, quod voluerit ipsa, operetur, et consequenter etiam necesse est ut ipse Deus præsciat, quid ipsa voluntas creatæ, sic constituta, operatura et volitura sit.

8. *Ad primam confirmationem, in conditionatis includi decretum, in absolutis præesse, respondetur.* — Unde facilis est responsio ad primam confirmationem: concedimus enim æquiparationem, quæ in illa fit inter futura absolute, vel sub conditione, quantum ad hoc quod, sicut nihil est absolute futurum, nisi quod Deus aut vult fieri, aut vult sinere ut fiat, ita in conditionatis nihil est futurum ex hypothesi, nisi quod Deus aut vellet fieri, aut vellet sinere ut fieret. Discrimen autem est, nam respectu absolute futurorum illud velle Dei supponitur præexistens in Deo ante præscientiam absolutam; respectu vero futurorum sub conditione non ita supponitur, sed solum includitur in conditione, tanquam conjungendum cum illa, si in re ipsa poneretur. Et ratio discriminis est clara, quia scientia absoluta terminatur ad effectum secundum actualem existentiam præsentem absolute æternitati

Dei, et ideo necessario supponit in Deo actuale decretum æternum, a quo dimanaturus sit concursus ad talem effectum. At vero conditionalis nihil ponit in esse; unde per scientiam illius non videtur effectus ut absolute futurus, sed tantum sub conditione, et ideo necesse non est ut decretum Dei in re ipsa supponatur, sed sufficit ut in conditione includatur. Quod vero in illa confirmatione additur, non repugnare quod sint in Deo aliqua decreta conditionata, jam declaratum est, in capite præcedenti, quatenus id verum sit, et quomodo id non sufficiat ut tota scientia futurorum sub conditione ad talia decreta conditionata, tanquam ad unicum et necessarium fundamentum, revocetur. Nam ut talia decreta, præcise spectata, sint ratio sufficiens præsciendi futura, oportet ut ex parte Dei sint absoluta et prædefinitiva, imo et efficaciter prædeterminativa voluntatis creatæ, ut in tali decreto possit esse infallibilis futura cooperatio creatæ voluntatis. At vero, respectu malorum actuum, non sunt possibile decreta prædeterminantia, quia repugnant divinæ bonitati et sapientiæ, sive illa sint absoluta ex parte objectorum, sive conditionata, quia eadem est utrorumque ratio, si ex parte Dei sint absoluta et prædeterminantia. Respectu autem bonorum actuum, repugnant talia decreta libertati ipsorum, si efficaciter sint prædeterminativa quoad executionem, ut supponitur. Si vero solum sint prædefinitiva secundum ordinem intentionis, necesse est ut supponant scientiam conditionatam, ne libertatem tollant, et ideo non possunt esse sufficiens talis scientiæ fundamentum. Quæ omnia infra, in libro 5, late probanda sunt de absolutis decretis, et ideo nunc longiori probationi superse-demus, supponendo, quod certissimum est, eandem in hoc esse rationem de decretis conditionatis quæ de absolutis. Accedit præterea quod multiplicatio talium decretorum conditionatorum supervacanea est et inutilis, ac otiosa et sine fundamento introducta, ut probavi. Sola ergo illa conditionata decreta admittenda sunt, quæ divinæ providentiæ, ut versatur circa res aliquando futuras, consentanea et utilia inveniuntur, et in generalibus principiis ejus fundari possunt. Hæc autem ita sunt conditionata, ut etiam ex parte Dei non sint omnino absoluta quoad executionem effectus et prædeterminationem causæ secundæ. Quod si, respectu contingentium absolute futurorum, aliqua sunt decreta simpliciter absoluta et prædefinitiva ex parte Dei, de se

includunt virtute conditionem, et ideo necesse est ut supponant illam quasi purgatam per scientiam conditionatam, ut simpliciter et absoluta esse possint, ut in libro 5, capite ultimo, latius declarabo.

9. *Ad secundam confirmationem, dicimus veritatem Dei esse rationem cognoscendi veritates creatas ex parte principii, non vero ex parte termini.* — Ad secundam confirmationem, respondetur duplicem posse distingui rationem cognoscendi, scilicet, vel per modum principii, vel per modum termini, seu ex parte cognoscentis, aut ex parte rei cognoscendæ. Dico ergo veritatem Dei esse rationem cognoscendi omnes veritates creatas et creabiles, ex parte principii, seu ex parte ipsius Dei, non vero ex parte termini, seu objecti ad quod ultimate (ut sic dicam) terminatur scientia Dei, ut est creaturarum scientia. Et sic, quamvis Deus per seipsum sciat omnia possibilea fieri ab ipso, nihilominus supponit ex parte objecti veritates necessarias, ut hominem esse animal rationale, et similia. Et similiter supponit illa scientia veritates possibileas, ut hominem posse peccare, aut bene agere. Et cum eadem proportionem, supponit veritatem cognoscibilem in futuris contingentibus, tam absolutis quam conditionatis, quamvis per seipsum et per suam veritatem in cognoscendo, id est, per suam infinitam et certissimam scientiam, et per suas ideas, ut rationes cognoscendi, omnem aliam veritatem intueatur. Cum vero obijcitur quia Deus non potest hoc modo per se cognoscere veritatem futuram, si ab ipso non pendeat, concedimus assumptionem: negamus autem subsumptionem, nimirum, futura conditionata non pendere a Deo, si non supponant in Deo decretum; satis enim est quod in conditione illud includant, quia propter essentialem dependentiam necessario includi debet, ut declaravi, neque oportet ut tale decretum sit prædeterminans, neque quod sit adæquata ratio veritatis futuræ, quando talis est ut non solum ab illo, sed etiam a libero arbitrio pendeat, tanquam a concausa simul in suo genere concursura, quæ dependentia, ut futura, non potest in solo decreto cognosci, sed in se, ut jam declaravi.

10. *Ad ultimam confirmationem sequela negatur.* — Ad ultimam confirmationem negatur sequela, nimirum, si Deus cognoscat talia futura ante suum decretum prædeterminans sub conditione, sequi, ut illa cognoscat, vel ut per se necessaria, vel ut futura ex aliqua alia causa extrinseca prædeterminante homi-

nis voluntatem. Neutrum enim sequitur; non quidem primum, quia, licet hæc sint contingenter futura, habere possunt determinatam veritatem, non quia per se necessaria sit simpliciter, sed quia ita futura est, unde ad summum resultat necessitas suppositionis, qua dicitur id, quod est, necessario esse: sic enim etiam quod futurum est, necessario erit. Neque etiam sequitur secundum, quia voluntas humana, ut se determinet, non indiget causa extrinseca determinante, neque alia extrinseca causa proprie et physice cooperante præter Deum: unde ad exemplum in argumento propositum de duabus voluntatibus, verbi gratia, Petri aut Pauli, conceptis sub esse possibili, et applicatis cum eisdem objectis et circumstantiis ad operandum, de quibus in quodam priori rationis signo æque præscitur posse consentire et dissentire, et in alio signo rationis posteriori de una præscitur esse consensuram, et de alia esse dissensuram, cujus diversitatis et præscientiæ ratio non creditur reddi posse, nisi ex aliqua causa extrinseca prædeterminante; verumtamen non ita est: aut enim postulatur ratio diversi eventus, aut ratio præscientiæ illius ex parte Dei. Prior ratio propria et proxima est liberum arbitrium, vel solum in malis, vel adjutum in bonis. Neque contra hoc obstat quod illæ voluntates in priori signo sint æque indifferentes: nam potius ex hac ipsa indifferentia nascitur, ut unus sic, alius sic operetur pro suo arbitrio, etiam cæteris omnibus antecedentibus existentibus paribus, quia hoc ipsum postulat libertatis dominium, ut in prolegomeno præcedenti ostensum est. Frustra ergo obijcitur vel cogitatur esse necessarium recurrere ad constellationem, vel individuationem seu complexionem; nam liberum arbitrium his omnibus dominari potest, si velit: ex intrinseca ergo potestate illius futura esse poterit illa diversitas. Supposito autem quod sit futura, non oportet ex parte Dei aliam rationem reddere, ut cognosci possit, nisi quia infinitam vim habet cognoscendi, et omnem veritatem in seipsa intuendi sine ullo discursu formali, vel virtuali, sed per solam simplicem veritatis contemplationem.

CAPUT X.

ALTERI OBJECTIONI OCCURRITUR, ET AN SCIENTIA VISIONIS SIT CAUSA FUTURORUM EXPLICATUR.

1. *Objectio contra præcedentem resolutionem.* — In fine hujus prolegomeni, necessarium vi-

sum est de causalitate præscientiæ divinæ circa futura contingentia pauca præmittere; tum quia resolutio hæc necessaria nobis erit ad auxilia divinæ gratiæ explicanda; nam hac ratione hoc tempore valde agitata est hæc controversia; tum etiam quia ad occurrendum objectioni quæ contra præcedentem resolutionem fieri potest, videtur necessaria. Nam perinde comparari debet scientia conditionata ad contingentia sub conditione futura, sicut comparatur præscientia absoluta ad res aliquando futuras: sed per absolutam præscientiam non prævidentur futura, nisi quatenus eadem scientia est causa illorum; ergo ut præsciantur futura sub conditione, oportebit ut eadem præscientia sit causa futuritionis illorum. At hoc esse non potest: ergo nec potest dari talis præscientia. Minor (cætera enim nunc supponuntur) probatur, tum quia Deus non habet causalitatem circa futura tantum sub conditione, cum illa revera futura non sint, et quatenus talia sunt, sub latitudine entium possibilium permaneant: tum etiam quia, licet in illis velimus conditionatam causalitatem considerare, hæc non potest scientiæ attribui, alioqui oportebit in ipsa hypothese seu conditione eandem scientiam involvere, sicut diximus in illa conditione includi decretum voluntatis Dei sufficientis ad causalitatem talis futuri: hoc autem est impossibile, alioqui circulus committeretur, seu sensus identicus fieret; perinde enim esset ac si diceretur: Si virtutes in Tyro fierent, et voluntas Dei cum præscientia futuri consensus concurreret, Tyrii pœnitentiam agerent. Hoc autem frivolum est et absurdum, ut constat: ergo repugnat dari talem scientiam, si ipsa scientia est causa futuritionis rerum. Ut hæc igitur objectio dissolvatur, necessarium est expendere an id quod supponit de causalitate scientiæ visionis verum sit. Et consequenter tractandum erit an hæc causalis propositio vera sit: *Quia Deus præscit hoc esse futurum, ideo futurum est.* Per occasionem vero, et quasi necessariam consecutionem, in fine videbimus an altera causalis vera sit: *Quia hoc futurum est, ideo Deus illud præscit.*

2. *Prima sententia.* — Est ergo prior sententia affirmans illam causalem: *Hoc est futurum, quia Deus præscit illud esse futurum, esse veram, quod est dicere, scientiam visionis, ut talis est, esse causam futuritionis vel præsentis objecti sui.* Hæc enim duo in idem redeunt, et ideo de illis indifferenter loquimur. Hanc sententiam defendunt hoc tempore moderni Thomæ supra allegati, eamque anti-

quis scholasticis tribuunt cum Magistro in 1, d. 39; et in speciali refertur Albert., art. 3; Bonaventura, art. 1, q. 1 et 2. Maxime vero probatur imprimis auctoritate D. Thomæ, 1 p., q. 14, art. 8 ad 1, ubi, referens Origenem dicentem: *Non propterea aliquid erit, quia id scit Deus futurum; sed quia futurum est, ideo scitur a Deo antequam fiat,* exponit priorem partem intelligendam esse, considerando rationem scientiæ non habentis adjunctam voluntatem; posteriorem autem partem accipiendam esse in ratione consecutionis, seu illationis, non secundum propriam rationem causalitatis. Et in solutione ad tertium, ait objectum scibile non comparari ad scientiam Dei, ut mensuram ejus, sed, e converso, scientiam Dei esse mensuram ejus, quia est scientia artificialis, quæ est mensura artefacti; et art. 16 dicit Deum de rebus a se factis habere scientiam practicam, quæ non est nisi scientia visionis.

3. Secundo, videtur hæc expressa sententia August.; nam lib. 6 de Trin., c. 10, et lib. 15, c. 13, expresse dicit: *Creaturas, non quia sunt, novit Deus; sed ideo sunt quia novit.* Et lib. 5 de Civit., c. 9, de creaturis ait: *Quidquid valent et quidquid facturæ sunt, certissime valent et facturæ sunt, quia valituras atque facturas ille præscivit, cujus præscientia falli non potest.* Similia fere verba habet Gregor., lib. 20 Moral., c. 23, alias 24, dicens: *Quæcumque sunt, non ab æternitate ideo videntur quia sunt, sed ideo sunt quia videntur.* Eandem sententiam videtur late docere Boetius, l. 5 de Consol. prosa ult., circa finem, ubi etiam Dion. Carthus. ita exponere videtur, et illius verba postea referemus.

4. *Fundatur opinio ratione præcipua.* — *Secunda ratio.* — *Tertia ratio.* — Tertio, suadet hæc sententia rationibus. Prima et præcipua est, quia scientia visionis non est speculativa, sed practica: ergo est causa rerum: consequentia clara est. Antecedens probatur, quia scientia simplicis intelligentiæ est tantum speculativa: ergo scientia visionis est practica: nam, sicut scientia visionis et scientia simplicis intelligentiæ adequate dividunt scientiam Dei, ita etiam practica et speculativa; et ideo si scientia simplicis intelligentiæ speculativa est, necesse est ut scientia visionis sit practica. Secundo probatur idem antecedens, quia scientia visionis non supponit objectum suum, sed illud operatur: ergo est practica. Consequentia clara est; antecedens vero probatur, quia scientia Dei non contemplatur res existen-

tes, nisi ut præsentis æternitati, et ut a se factas : ergo non possunt objecta illius scientiæ antecedere causalitatem ejusdem scientiæ; sed, causando illa, intuetur illa quasi terminum suæ causalitatis. Secunda ratio est, quia aliqua scientia Dei est causa rerum; sed scientia simplicis intelligentiæ non est causa rerum : ergo scientia visionis est causa illarum rerum quæ per illam videntur. Consequentia supponitur ex sufficientia partitionis divinæ scientiæ in visione, et simplici intelligentia. Major item ut certa relinquatur. Minor autem patet, primo, quia nulla scientia antecedens determinationem voluntatis Dei potest esse causa rerum, quia, ut sic, non est ordinata ad opus (hæc enim ordinatio per voluntatem fit), nec potest esse causa, nisi prout ordinatur ad opus. At vero scientia simplicis intelligentiæ, ut talis est, antecedit decreta libera divinæ voluntatis, ut per se constat : ergo, ut sic, non est causa. Et confirmatur primo, quia scientia, ut sit causa, debet esse practica, ut per se notum est ; at scientia simplicis intelligentiæ non est practica, sed speculativa, teste divo Thoma, 1 p., quæst. 14, art. 16, et ibi Cajet.; ergo. Et confirmatur secundo, quia scientia quæ est causa rerum, est libera; potuit enim non esse causa, sicut res potuerunt non esse : at scientia simplicis intelligentiæ non est libera, sed sola scientia visionis. Tertia ratio sit, quia, si scientia visionis non esset causa futuri, futurum esset causa scientiæ visionis. Hoc autem secundum dici non potest, quia temporale non potest esse causa æterni : ergo primum dicendum est. Major sumitur ex divo Thoma, quæst. 2 de Veritat., articul. 14; ubi simili discursu probat scientiam Dei esse causam rerum, quia omnis scientia vel est causa objecti, vel causata ab illo, vel utrumque ab uno tertio : scientia autem Dei nec ab objecto, nec ab aliquo tertio causatur, unde necesse est ut sit causa sui objecti : hæc autem ratio æque ad scientiam visionis applicari potest.

5. *Vera sententia.* — *Propositio.* — Nihilominus, dicendum est scientiam visionis, quatenus ratione distinguitur ab omni alia scientia Dei, ac præcise spectata secundum respectum quem scientia visionis, ut talis est, denotat, non esse causam objecti sui, sed supponere illud, ideoque, in rigore et proprietate causalis notæ, falsam esse illam propositionem : *Quia Deus præscivit hoc esse futurum, ideo futurum est.* Hanc sententiam docui prius in lib. 3 de Auxil., c. 13, n. 15, et in lib. 1 de Scient. Dei, cap. 5, n. 9, et postea in 1 p. l. 3

de Attributis Dei positivis, cap. 4, n. 10 et seqq., ubi auctoritate et ratione confirmata est: propter novas autem impugnationes aliquid addere necessarium visum est. Animadvertimus autem sermonem esse de scientia visionis, seu rerum existentium, aut futurarum, formalissime ac præcise, ut talis scientia est. Nemo enim dubitat quin scientia Dei sit causa omnium actuum futurorum, quatenus boni sunt; sed quia illa scientia, quæ in se unica et simplicissima est, sub diversis rationibus spectatur a nobis, ideo dicimus, præcise consideratam, ut est scientia visionis et intuitionis rerum, non esse causam, sed supponere causalitatem, et intueri quod ab ipsa media voluntate, et omnipotentia sua, factum est, juxta illud Genes. 1 : *Vidit Deus cuncta quæ fecerat, et erant valde bona.* Ex quo non immerito argumentari possumus, quia illud verbum non potest nisi de scientia visionis intelligi, et verbum *fecerat* satis aperte indicat illam visionem supposuisse res jam factas, ac proinde, ut talis visio est, non fecisse illas, sed eas, per omnipotentiam a voluntate applicatam et per alium modum scientiæ vel artis directam jam factas, vidisse, et in eis, tanquam bonis, complacuisse. At vero scientia quæ supponit rem factam non est causa ejusdem, quatenus talis scientia ejus est : ergo nec scientia visionis est causa rerum factarum.

6. *Patres aiunt res non esse futuras, quia Deus scit, etc., ubi causalitas negatur.* — Secundo, probatur auctoritate Patrum, dicentium res non esse futuras, quia Deus scit illas esse futuras: hæc enim negatio in nullo proprio sensu potest esse vera, si scientia visionis est causa futurorum; quia, si est causa, est vera, imo et realis ac physica causa; sed per illam causalem locutionem nihil aliud significatur, nisi hujusmodi causalitas : ergo Patres negantes illam propositionem causalem, dictam plane causalitatem negant. Sunt autem illi Orig., Hieron., Justin., Chrys., Beda, Cyrill. et Damasc., quos dicto l. 1 de Auxil., c. 13, retuli, ex quibus solius Damasc. verba hic expendere visum est. Ille, in Dial. contra Manich., prope finem, sic inquit : *Deus, ea quæ voluntarie a nobis futura sunt, hoc est, ea quæ in potestate nostra sita sunt, minirum virtutem ac vitium præsciens, ea demum definit quæ in arbitrio nostro minime consistunt. Ac quidem vis Dei præsciens a nobis causam haudquamquam habet; at vero, ut ea quæ facturi sumus præsciat, a nobis proficiscitur. Nam si facturi non essemus, ne ipse quidem quod futurum non*

esset, prænoscet. Et quidem Dei præscientia vera atque intiolabilis est; verum ipsa haudquaquam causa est cur omnino fiat id, quod futurum est; quin potius, quia hoc vel illud facturi sumus, idcirco prænoscit Deus. Quod testimonium adeo est expressum et luculentum, ut nec declaratione indigeat, nec tergiversationibus subesse posse videatur. Solum adverte eleganter declarasse Damascenum, Deum non accipere scientiam a rebus futuris, seu suæ æternitati præsentibus, sed ex se habere vim præsciendi, et nihilominus, quod illa scientia terminetur ad hoc vel illud objectum, a nobis pendere, quatenus in nobis est ponere vel non ponere objectum, ad quod terminanda est illa præscientia, et ideo voluntas nostra causa est, quod hoc vel illud futurum sit: *At quod prænoscit Deus* (ut infra repetit), *id vere præscienti ipsius potentiæ adscribendum est.* Et in hoc sensu diserte negat scientiam Dei, qua prænoscit futura, esse causam cur omnino fiat id quod futurum est. Ubi particula *omnino* emphasis habet, ad significandum scientiam Dei non esse causam determinantem talem eventum futurum, sed futuritionem ejus supponere. Et in eodem sensu subdit: *Quia hoc vel illud facturi sumus, ideo prænoscit illud Deus*, ubi causalis nota non dicit causam ex parte Dei, sed rationem vel conditionem, quæ supponi debet ex parte objecti.

7. *Eusebius plane vulgarem solutionem expellit.*—Similiter Eusebius, libro sexto de Præparat. Evangel., capite 9, ut declarat præscientiam Dei necessitatem actibus liberis non imponere, ita concludit: *Deus, cum uniuscujusque voluntatem prævideat, hunc perperam, illum recte acturum non ignorat. Non ergo præcognitio futurorum causa; nec enim ullo pacto ad peccandum Deus quemquam impellit, aut movet, sed e contra. Dicam enim, etiamsi absurdum multis fortasse videatur, id quod futurum est, causa est ut Deus eventurum illud prævideat: non ergo ideo fit quia præscitur, sed quia futurum erat, præscitur.* In quibus verbi profecto non habet locum vulgaris expantio, quod illa particula causalis solum significet consecutionem, seu illationem unius ex alio: tum quia si in hoc sensu loqui voluisset Eusebius, profecto non timuisset ne sua sententia multis fortitan absurda videri posset; tum etiam quia immerito negaret proteram partem, scilicet, rem fieri quia præscitur: nam ex unius illationem, certis inanim est rem esse futuram, si præscita est. Item in illo sensu etiam in peccatis vere diceretur:

Petrus peccabit, quia Christus prædixit; utique secundum necessariam illationem, seu consecutionem. At hoc etiam Eusebius negat: loquitur ergo in proprietate causali in aliquo sensu, et ideo, etiam ad probandum scientiam non esse causam, addit: *Non enim Deus quemquam ad peccandum movet aut impellit.* Et hunc modum concordandi præscientiam Dei cum libertate arbitrii, et declarandi quomodo Deus, licet præsciat peccatum futurum, non sit causa ejus, secuti sunt cæteri Patres, præsertim Hieronymus, dial. 3 contra Pelag., ubi contra Marcionem ait: *Non ideo peccavit Adam, quia Deus hoc facturum noverat, sed præscivit Deus, quasi Deus, quod erat propria voluntate facturum.* Et similiter dixit Leo Papæ, serm. 16 de Passione Domini: *Non impias furentium manus immisit in se Dominus, sed admisit, nec præsciendo quod faciendum esset, coegit ut fieret.*

8. *D. Cyrillus explicat optime in proditore Juda.*—Tertio, ad locum Cyrilli supra allegatum addi potest alius, ubi de Juda ait: *Non ideo quia de illo scriptum est quod periturus esset, propterea eo nequitia processit, etc.; verum quoniam malignitate sua periturus omnino erat, idcirco id omnino futurum esse Scriptura prædixit, quam falsum quidquam dicere impossibile est. Deus enim ipse per Scripturam loquitur, etc.* Quod prosequitur, ostendens plane idem esse de præscientia Dei. Et quamvis illi de peccatis loquatur, tamen, quia hoc fundat in ratione libertatis, scilicet, quia Deus, suo præjudicio ac præscientia, non determinat voluntatem liberam, sententia ejus in omnibus futuris locum habet, sicut illam tradiderat, lib. 9, c. 10. Et sic potest allegari quarto loco Gaudentius, tr. 3 in Exod. ad Neophit., ubi similiter ait: *Synagoga Judæorum quod erat crudeliter factura, prædictum est, quia prædictum est, non jussum. Nec ideo factum est, quia prædictum erat, sed ideo prædictum erat, quia erat futurum, ut præscientiam Deus in his, quæ per libertatem hominum futura erant, ostenderet.* In quo ultimo verbo declarat sententiam ad omnes actus liberos extendi, eandemque in divina præscientia locum habere.

9. *Augustinus explicat a simili ex homine præsciente futura, cujus præscientia non est causa rei futuræ: ergo.*—*Et ratio.*—*Impugnatio ex Augustino.*—Quinto, eodem modo divinam præscientiam explicat Augustinus, lib. 3 de Lib. arb., cap. 4, ubi ait necessariam connexionem, quæ invenitur inter præscien-

tiam Dei et rem futuram, non provenire ex eo quod scientia Dei est: nam si ponamus hominem esse qui præscit futurum, eadem necessitate inferretur eventurum esse quod præscitum est, et inde, e converso, colligit quod, sicut præscientia hominis non induceret necessitatem contrariam libertati, ita nec illam inducit præscientia Dei. Qui discursus efficax non esset si scientia futurorum Dei esset causa futuritionis illorum; nam tunc non esset bona æquiparatio ad præscientiam hominis, quia hæc non esset causa futuri præcogniti, ut per se constat. Unde longe alia connexio esset inter effectum futurum et præscientiam Dei, quam inter eundem et præscientiam hominis; nam illa esset causalis, ut sic dicam, et non ista; et consequenter illa necessitas, qua sequitur futurum ex præscientia Dei, non esset ex illa præscientia, ut præscientia est, sed ut præscientia Dei est, quia non omnis præscientia habet causalem connexionem cum re futura, sed sola præscientia Dei, et ita ruit tota responsio et declaratio Augustini. Igitur sententia ejus est quod, sicut præscientia hominis non est causa futurorum, etiamsi illa præscire ponatur, ita nec præscientia Dei, ut est scientia visionis futurorum, est causa illorum. Unde concludit: *Sicut itaque non sibi adversantur hæc duo, ut tu præscientia tua noveris quod alius sua voluntate facturum est, ita Deus, neminem ad peccatum cogens, prævidet tamen eos qui propria voluntate peccabunt.* Et infra subinfert: *Hinc ergo jam intellige qua justitia Deus peccata puniat, quia que novit futura non facit.* Dicit fortasse aliquis id esse speciale in peccatis, quia Deus illa non facit neque per scientiam visionis, neque per aliam, neque per voluntatem. Sed contra hoc est, quod prior discursus Augustini generalis est ad omnes actus liberos futuros, tam bonos quam malos, et ideo licet in malis ponat exemplum, non ideo coaretat sententiæ. Eo vel maxime quod statim argumentatur ab actibus bonis ad malos, quia Deus dat præmium bonis actibus, etiamsi præsciat illos; ergo etiam dabit supplicium pro malis, licet illos præsciat; supponens profecto ex vi præscientiæ futurorum non magis facere Deum bonos actus quam malos, licet per voluntatem et alias virtutes seu attributa sua efficiat bonos actus et non malos, ut mali sunt. Unde addo, ex vi discursus Augustini, Deum, præsciendo actum malum futurum, non magis efficere illum per ipsam præscientiam quoad actum materiale, quam quoad formalita-

tem peccati, quia etiam ad materiale actum non cogit præscientia nec inducit, sed illum supponit, et quasi extrinsece ad eum comparatur, sicut visio vel scientia hominis ad rem visam vel scitam: tum quia non aliter videt Deus malitiam peccati, quam videndo actionem ipsam cum objecto et modo, ac circumstantiis, quibus fit; nam inde videt malitiam resultare, et ideo intuetur: tum etiam quia alias non satis responderet dicentibus Deum, præsciendo peccatum, cogere ad illud; quia illi de actionibus ipsis loquebantur, et in eis ponebant necessitatem a præscientia proveniente, quam non aliter Augustinus excludit, nisi negando præscientiam esse causam actionis.

10. *Magis explicatur, et probatur ex D. Augustino.*—Atque similem doctrinam habet Augustinus lib. 3 de Civit., c. 10, ubi prius in generali loquitur, dicens *non propterea nihil esse in nostra voluntate, quia Deus præscivit quid futurum esset in nostra voluntate,* et postea subdit: *Nec enim ideo peccat homo, quia Deus illum peccaturum esse præscivit.* Ubi certe non solum de peccato pro formali, sed etiam de actione peccati loquitur: nam si de ipsa actione dici posset: Ideo Petrus negavit Christum, quia Christus id prædixit vel præscivit, consequens profecto esset, ut de peccato idem dici posset, cum talis actio hic et nunc libere facta non possit a malitia separari. Præter rationem factam, quod aliter non satisfaceret Augustinus difficultati, accedit quod idem sentit de voluntate non peccandi, eum adjungit: Etiamsi Deus præscierit hominem esse peccaturum, nihilominus si ipse nolit, non peccat, *sed si peccare noluerit* (inquit), *etiam hoc ille præscivit,* plane sentiens hoc etiam non fieri ex vi præscientiæ, sed supponi futurum, ut præsciatur, juxta regulam ejusdem Augustini libro 4 Genes. ad litter. cap. 32: *Neque enim cognitio fieri potest nisi cognoscenda præcedant.* Quæ regula, ut universalis sit, non de antecessione objecti secundum actualem existentiam, sed secundum veritatem et secundum esse objectivum intelligenda est. Et non in eo fundatur quod cognitio a rebus sumitur, quia hoc in solis hominibus verum habet, sed quia cognitio conformatur rei cognitiæ, ut vera sit, unde supponit in illa objectivam veritatem.

11. *Anselmus probat quia præscientia futurorum non est suppositio antecedens futurum, ut futurum.*—Sexto, addimus Anselmum, qui toto libro de Coneord. hoc præcipuum jacet

fundamentum concordiae, praescientiae, praedestinationis et gratiae cum libero arbitrio, quod praescientia futurorum non est suppositio antecedens futurum, ut futurum est, sed consequens illud. Declarat autem quid intelligat per antecedentem suppositionem, dicens *esse illam quae facit rem futuram*, ergo, ex sententia Anselmi, praescientia Dei non facit rem esse futuram, alioqui esset suppositio antecedens, quod ipse negat: ergo talis scientia non est causa futuri, ut futurum est: solum enim esse posset causa in genere efficientis, utique faciendo ut sit futurum: unde in actibus liberis futuris a Deo praescitis, ait solum esse necessitatem illam *quam ipsa voluntatis libertas facit*; unde concludit: *Haec omnia Deus, qui scit omnem veritatem, et non nisi veritatem scivit, sicut sunt spontanea vel necessaria videt, et sicut videt ita sunt*; et infra: *Quamvis necesse sit fieri quae praesciuntur, quaedam tamen praescita (scilicet futura libera) non eveniunt ea necessitate quae praecedit rem et facit*. In quibus verbis et in toto discursu illius operis hoc agit, ut a scientia visionis causalitatem rei futurae excludat, sed ad illam supponi doceat, tanquam veritatem, quae non aliunde habet necessitatem, quam ex eo quod futura esse supponitur. Atque eodem modo hanc praescientiam declarat Beda in lib. Var. Quaest., q. 13, ubi utitur exemplo scientiae, seu visionis hominis, quo usus est Augustinus: *Nam sicut homo, ait, videndo hominem jacentem, non facit illum jacere, ita nec Deus, praesciendo hominem operaturum, facit illum sic operari*: ergo sicut visio hominis non est causa effectus quem videt, ita nec ista scientia intuitiva est causa, ex horum Patrum sententia.

12. *Boetius in nostra est sententia, minime vero in opposita.* — Ultimo, quia non defuit theologus qui ausus fuerit dicere Boetium contrariam sententiam expresse docuisse, contrarium verisimium esse paulo diligentius ostendam. Ille igitur, l. 5 de Consolat., prosa 3, cum argumentum proposuisset ex praescientia futurorum contra libertatem, subiungit: *Neque enim illam probo rationem, qua se quidem credunt hunc questionis nodum posse dissolvere. Aiunt enim non ideo quid esse eventurum, quoniam id providentia divina futurum esse prospexit, sed e contrario potius, quoniam quid futurum est, id divinam providentiam latere non posse*. Deinde vero in tota illa prosa contra dictam responsionem argumentatur. Postea vero in prosa quarta ita res-

pondet in persona Philosophi: *Quaero cur illam solventium rationem minus efficacem putes, quae quia praescientiam non esse futuri causam necessitatis existimat, non impediri praescii arbitrii libertatem putat?* Postea vero rationem illam declarando et defendendo, ad hoc imprimis ita colligit: *Et enim, positionis gratia, ut quid consequatur advertas, statuamus nullam esse praescientiam; num quae ex arbitrio eveniunt, ad necessitatem coguntur?* In qua positione aperte supponit futurum non esse a praescientia, tanquam a causa, alias positio secum pugnaret, nihilque ad rem declarandam deserviret: quia vero non est causa, recte infert: *Statuamus iterum esse, sed nihil rebus necessitatis injungere: manebit, ut opinor, eadem voluntatis integra atque absoluta libertas*. Deinde quia ipse Boetius, quasi argumentando, vel subterfugiendo, dixerat in prosa 3 quod, licet praescientia non sit causa, inferet necessitatem, pergit philosophus sic urgendo: *Sed praescientia, inquires, tametsi futuris necessitas non est, signum tamen est ea necessario esse eventura*; contra quod replicat, quia *hoc modo, etiamsi praecognitio non fuisset, necessarios futurorum exitus esse constaret. Omne enim signum, quod sit, ostendit, non vero efficit quod designat*. Unde in toto discursu, ad salvandam contingentiam futurorum, supponit praescientiam non esse causam eventuum eorum, sed solum signum seu notitiam.

13. *Boetii mens amplius patebit.* — *Rebus omnibus modum constituere, non est causare res, sed a se scientiam rerum habere.* — Postea vero prosequitur declarando *quomodo earum rerum quae necessarios exitus non habent, possit esse certa praenotio*; et in summa in hoc rationem constituit quod *omne quod cognoscitur, non secundum sui vim, sed secundum potius cognoscentium comprehenditur facultatem*. Quod principium optimo discursu declarat tota illa prosa 4 et 5, et deinde in 6 ascendit ad divinam aeternitatem, ut inde colligat Deum omnia praenoscere modo suo et juxta suam vim et naturam, non secundum ordinem rerum cognitarum, ac proinde futura quasi jam gerantur in simili cognitione considerat. Qui sane discursus optimus est, et, si attente consideretur, non minus ad futura conditionata quam ad absoluta applicari potest. Deinde vero revertitur ad concludendum quomodo praescientia non laedat libertatem, quia sicut non causat, ita neque immutat quae videt. Sumitque argumentum ex nostra cognitione, dicens:

Quid igitur ut necessaria fiant quæ divino lumine lustrantur, cum nec homines quidem necessaria faciant, quæ vident? Quæ ratio nullius esset momenti, si præscientia, ut talis est, causa esset, sicut supra circa Augustinum dicebamus. Unde subiungit: Si est divini humanique præsentis digna collatio, utique vos retro hoc temporario præsentis quædam videtis, ita ille omnia suo cernit æterno. Quare hæc divina prænotio naturam rerum proprietatemque non mutat. Denique eandem concordiam præscientiæ cum libertate, distinguendo secundum necessitatem absolutam et conditionatam, seu consequentem et antecedentem, declarat, et tandem ita concludit: Quam comprehendendi omnia, videndique præsentia, non ex futurorum proventu rerum, sed ex propria Deus simplicitate sortitus est. Ex quo illud quoque solvitur quod paulo ante posuisti, indignum esse, si scientiæ Dei causam futura nostra præstare dicantur. Hæc enim scientiæ eis præsentaria notione cuncta complectens, rebus omnibus modum ipsa constituit, nihil vero posterioribus debet. Quæ cum ita sint, manet intemerata mortalibus arbitrii libertas. Ex quibus verbis colligere voluerunt Boetium tribuere præscientiæ causalitatem practicam, quia dicit rebus omnibus modum ipsam constituere. Sed non satis perspecto et considerato contextu et sensu loquentis hoc intulerunt. Non enim sibi est contrarius, nec uno verbo evertit quæ tam longo discursu confirmaverat. In his ergo verbis solum infert Deum non accipere scientiam a rebus; nam et scientiam et modum scientiæ ex se et ex sua simplicitate habet, et ideo non videt res successive, sicut illæ fiunt: Sed præsentaria notione cuncta complectens, rebus omnibus modum ipsa constituit. Non quia, quatenus scientia visionis, sit causa illarum; sed quia eadem est scientia quæ omnibus rebus modum imponit, dirigendo voluntatem, et quæ postea res intuetur: unde præsciendo et intuendo illas, non mutat modum quem circa unamquamque ordinavit. Vel certe ipsamet præscientia, ut talis est, constituere dicitur rebus modum, non contingentiæ vel necessitati, sed præsentialitatis æternæ. Illam enim quasi constituit vel complet Deus sua præscientia, et ideo nihil posterioribus debet. Et inde recte concluditur quod manet intemerata mortalibus arbitrii libertas, non quia præscientia, ut talis est, rebus conferat modum contingentiæ vel necessitati, sed quia non aufert, sed unamquamque rem videt, prout futura est, et illam non immutat: hic

enim sensus est consequens ad omnia quæ dixerat.

14. *Ratione theologica nostra probatur sententia.* — Tertio, principaliter argumentamur rationibus theologis fundatis in principiis, vel communibus theologorum, vel ab his cum quibus disputamus admissis. Prima ratio sit, quia Deus ita efficit res per intellectum et voluntatem, ut immediatius ad extra efficiat per voluntatem quam per intellectum, sive voluntas immediate per suum actum ad extra efficiat, sive per potentiam executivam ratione distinctam, quod ad præsens nihil refert: sed scientia visionis est ratione posterior quam voluntas illa per quam Deus ad extra operatur: ergo talis scientia non est causa rei ad extra, sed supponit jam productam per voluntatem, vel potentiam exequentem. Consequentia nota est, et minor maxime defenditur ab adversariis. Ut autem majorem probemus, supponimus sermonem esse de propria efficientia, ut distinguatur ab exemplari causalitate. Nam hoc posteriori modo potest scientia divina esse immediate causa operum Dei per suas ideas, seu exemplaria, quatenus per illa dirigit actiones omnipotentiae, ut effectus talibus exemplaribus conformes evadant, ut in Metaphys., disp. 30, sect. 17, declaravi. Sed illa causalitas est alterius rationis, et magis pertinet ad specificationem actus quam ad exercitium actionis, propriamque efficientiam, de qua loquimur. Sic ergo intellecta major probatur ex divo Thoma, 1 part., quæst. 19, artic. 4, ad 4, ubi ait *quod scientia et voluntas sunt causa ejusdem operis, sed scientia ut dirigens et voluntas ut imperans.* Et in hoc comparat Deum cum homine per artem operante, in quo ars, per quam concipitur forma operans, dirigit voluntatem; voluntas autem imperat, et movet potentiam exequentem. Constat autem in artifice humano voluntatem immediatius concurrere ad executionem operis quam artem. At vero in intellectu artificis, præter conceptionem formæ exemplaris, et judicium movens ac dirigens voluntatem, quod antecedit voluntatem ut exequentem, intelligi non potest alius actus intellectus posterior voluntate, qui habeat rationem causæ respectu exterioris actionis, seu executionis; sed post executionem sequitur in eodem artifice visio ipsius arte facti, quæ non est causa, sed pura cognitio.

15. *Applicatur ratio supra facta.* — Sic ergo in Deo servata proportione, scientia antecedit dirigendo voluntatem per modum prudentiæ

et artis, neque habet scientia alium immediatum influxum ad extra; sed ille est vel immediate a voluntate, vel ut movente, et applicante potentiam exequentem, si illa est ratione distincta, ut est satis probabile, et D. Thomas in illo loco indicat. Ergo scientia quæ subsequitur post talem influxum voluntatis et potentiæ, non est causa rei ad extra: talis autem est scientia visionis, ut constat. Eamdemque doctrinam tradit D. Thomas, 1 p., q. 25, a. 1, ad 4, ubi, ratione distinguendo illa tria, scientiam, voluntatem et potentiam, ait potentiam exequi quod voluntas imperat, et ad quod scientia dirigit; ubi etiam solum tribuit scientiæ in hac causalitate directionem voluntatis et potentiæ, quæ directio et remotior est quam voluntatis motio, et nullo modo tribui potest scientiæ visionis, quæ voluntatem jam directam supponit. Et quamvis divus Thomas ibi, quoad distinctionem potentiæ a scientia et voluntate, sub disjunctione addat: *Vel dicendum quod ipsa scientia, vel voluntas divina, secundum quod est principium effectivum, habet rationem potentiæ*, nunquam tamen tribuit scientiæ aliam causalitatem præter directionem: et in ipsomet ordine numerandi prius ponit scientiam quam voluntatem. Et postea, art. 3, ad 1, repetit quod in causalitate Dei potentia intelligitur ut exequens, voluntas ut imperans, intellectus ac sapientia ut dirigens. Unde etiam, secundum eam sententiam quæ potentiam exequentem ab aliis attributis non distinguit, probabilius tribuitur voluntati quam scientiæ. Quod etiam sensit ibi Cajetanus, dum ex illa solutione colligit *duobus modis sustineri potentiam activam in Deo, vel ut sit potentia executiva intellectus et voluntatis, vel ut sit ipsa voluntas consultæ, ut efficax effectivum*. Per quæ verba immediatam efficaciam ad extra tribuit voluntati consultæ, utique ab intellectu, in quo aperte sentit intellectum remotius concurrere. Quod etiam est consentaneum divo Thomæ in 1, distinct. 38, quest. 1, artic. 1, ut infra referam.

16. *Imperare intellectum res ad extra factas Thomistæ opinantur.*—*Horum impugnatio et secunda ratio.*—At vero, his non obstantibus, moderni Thomistæ contendunt ad effectus ad extra intellectum divinum non tantum concurrere dirigendo voluntatem et potentiam exequentem, sed etiam imperando: quod imperium dicunt esse actum intellectus ex divo Thoma, 1. 2, q. 17, et illud dicunt esse posterius actu voluntatis; a quo imperio dicunt immediate fluere effectus ad extra, et ita intel-

lectum esse ipsam potentiam exequentem per hoc imperium, juxta illud Genes. 1: *Fiat lux, fiant luminaria*, etc. Contra hanc vero responsionem argumentor secundo, quia imprimis difficillimum est explicare hunc actum imperii respectu rerum ad extra, qui sit distinctus a voluntate. Et ideo divus Thomas, in locis citatis, imperium Dei, prout est effectivum ad extra, tribuit voluntati. Deinde idem D. Thomas in 1. 2, loco citato, licet ponat imperium in intellectu respectu voluntatis, nihilominus in ordine ad executionem, non illi imperio, sed voluntati tribuit efficaciam immediatam per activum usum, quo et seipsam et alias potentias applicat ad agendum. Verumtamen de illo actu latius disputavi: nunc vero ulterius progredior, quia etiam, posito illo imperio ut immediate exequente actionem Dei ad extra, non potest negari quin illud imperium sit ratione distinctum a scientia visionis, et, quod ibi intervenit, sit prius illa. Primum videtur per se notum ex terminis, quia videre rem præsentem vel futuram non est imperare; ergo illa duo distinguuntur ratione cum magno fundamento in re. Antecedens patet, quia Deus videt per scientiam visionis decreta libera suæ voluntatis, et tamen non facit, neque imperat illa: ergo videre, ut sic, non est imperare, nec facere: ergo, licet jungantur, ratione semper distinguuntur: nam videre, ut sic, semper est ejusdem rationis seu modi circa omnia visibilia. Item est simile argumentum, quia Deus videt peccata, et non imperat illa: ergo, etiam in actibus bonis, videre illos, non est illos imperare, esto circa illos utrumque actum Deus habeat. Quia (ut dixi) videre, ut sic, ejusdem rationis est, tam in bonis quam in malis: et certe ex terminis, et ex ipso communi omnium hominum sensu, videre, non est imperare. At per scientiam visionis Deus tantum videt ea quæ sub illam scientiam, quatenus talis est, cadunt: ergo per illam scientiam, ut talis est, non imperat, ac proinde nec facit. Et confirmari optime potest ex Genes. 1, ubi prius dicitur: *Dixitque Deus: Fiat lux*, et postea subditur: *Et vidit Deus lucem, quod esset bona*, ubi imperare et videre tanquam distincta, saltem ratione, ponuntur, et imperare idem est quod facere aut efficaciter velle: videre autem idem est quod intueri rem factam, quod sine dubio ad scientiam visionis spectat, et ideo verbum *fiat* ponitur ut præcedens, verbum *vidit* ut subsequens, quia nimirum prius est rem facere, posterius vero rem factam intueri. Quam-

vis ergo hæc in Deo idem sint, tamen cum non sint synonyma, ratione saltem distinguuntur: fietque hoc ex sequenti discursu evidentius.

17. *Scientia simplicis intelligentiæ causat res ad extra per voluntatem applicata.*—Tertio igitur argumentor in hunc modum, quia Dens causat res ad extra per scientiam simplicis intelligentiæ, ut applicatam et determinatam per voluntatem: ergo non per scientiam visionis. Antecedens est expresse D. Thomæ, 1 p., quæst. 14, art. 8. Estque valde notandus discursus illius articuli ad veritatem quam tractamus intelligendam et suadendam. Ad declarandum enim quomodo scientia Dei sit causa rerum, hanc propositionem sumit: Sic scientia Dei se habet ad omnes res creatas, sicut scientia artificis se habet ad artificia: unde sicut scientia artificis seu ars est principium quo artifex ad extra operatur, ita scientia Dei est principium quo Deus res ad extra producit. Hæc autem æquiparatio evidenter procedit de scientia simplicis intelligentiæ; in illa enim sunt rationes omnium rerum, et illa est divina ars, non solum factorum vel fiendorum, sed etiam omnium factibilium. Quod evidenter etiam patet ex similitudine et discrimine quod statim D. Thomas adjungit inter formam naturalem et intellectualem: conveniunt enim, quia utraque operatur, prout inclinatur seu determinatur ad opus: differunt vero, quia forma materialis a natura inclinatur et determinatur, forma vero intellectualis determinatur per voluntatem. Et rationem addit, quia illa forma est indifferens ad opposita, et ideo nihil agere potest, nisi per appetitum determinetur. Ex quo discursu evidenter constat illam scientiam, de qua D. Thomas ibi loquitur, non esse scientiam visionis, sed esse scientiam simplicis intelligentiæ: tum quia scientia simplicis intelligentiæ est vere indifferens ad opposita, scientia autem visionis minime est indifferens, sed determinata ad ea quæ futura sunt: tum etiam quia ars illa, vel scientia, aut forma intelligibilis, quæ determinanda est per voluntatem, antecedere debet liberum decretum voluntatis, quo determinatur; sic autem præcedit scientia simplicis intelligentiæ, non autem scientia visionis, quia hæc sequitur decreta Dei libera, ut ipsi etiam docent: ergo scientia, de qua D. Thomas in illo articulo loquitur, et quæ per voluntatem determinatur, est ipsamet scientia simplicis intelligentiæ, quæ secundum se, et ut præcedit, ita vocatur;

ut vero determinata est, et applicata per voluntatem ad agendum, proprium nomen accipit, et scientia approbationis dicitur, ut ibidem D. Thomas notavit.

18. *Ratione ostenditur res Deum ad extra operari simplicis intelligentiæ scientia.*—Potest denique ratione ostendi antecedens in argumento assumptum, quia per illam scientiam Deus ad extra operatur, quæ est illi principium, quasi in actu primo ad operandum: sed hujusmodi principium ex parte intellectus est ipsa scientia simplicis intelligentiæ: ergo. Major patet, quia omnis res operatur per eam formam quæ illam constituit in actu primo ad agendum, ut inductione in omnibus agentibus constat, et ratione, quia inter principium agendi proximum et completum non mediat nisi actio: agens autem proprie agit per illam formam, a qua per se et immediate manat actio: illa autem forma est, quæ constituit agens in actu primo ad agendum. Minor vero, scilicet, in Deo hoc principium ex parte intellectus esse scientiam simplicis intelligentiæ, manifesta est; tum quia nunc Deus est sufficienter constitutus in actu primo ad producendum omnia possible, quæ nunquam actu producet: tum etiam quia artifex per ipsammet artis suæ conceptionem actualem est constitutus in actu primo sufficiente ex parte intellectus ad artificiose operandum, et tantum deest applicatio voluntatis et potentiæ executivæ, ut per illud principium ad extra operetur. Deus autem per scientiam simplicis intelligentiæ constituitur supremus artifex in actuali conceptione omnium faciendorum, et factibilium: ergo per illam scientiam est constitutus quasi in actu primo ad operandum ad extra. Unde propter hanc causam dixit D. Thomas 1 p., quæst. 14, art. 16, ad 1: *Scientia Dei esse causam rerum, quorumdam quidem actu, aliorum autem virtute, scilicet eorum quæ potest facere, et tamen nunquam faciet.* Hæc autem posterior scientia eorum quæ nunquam faciet, est scientia simplicis intelligentiæ; per illam ergo constituitur Deus ex parte intellectus in actu primo ad efficiendas creaturas possibile, et per eandem est causa earum quas aliquando facit. Et in quæst. 15, art. 3, ad 2, dixit idem Sanctus Doctor: *Eorum quæ neque sunt, neque erunt, neque fuerunt, Deum non habere practicam cognitionem, nisi virtute tantum.* Ergo scientia simplicis intelligentiæ, quæ talium rerum est, practica est, saltem virtute, id est, in actu primo et quantum

est ex se : ergo ipsa est principium operandi, et quando Deus vult aliquid operari, per illam, tanquam per principium agendi, illud operatur : et ideo D. Thomas, dicto art. 16, non absolute negat scientiam speculativam esse practicam, sed cum addito, scilicet, *Secundum quod scientia practica dicitur a fine*. Deus enim non habet illam scientiam propter operationem ad extra, tanquam propter finem, nec etiam per voluntatem suam ordinavit illam ad operationem, et secundum hanc rationem dicitur non esse practica. At vero secundum virtutem et vim causandi est maxime practica multo excellentius quam quælibet ars; unde cum denominatur practica ex applicatione voluntatis ad opus, nihil additur in ratione scientiæ nec in virtute causandi, sed additur quasi denominatio extrinseca ex actu voluntatis, quasi approbantis et eligentis operationem hujus effectus potius quam alterius. Tandem potest hæc doctrina confirmari ex doctrina ejusdem D. Thomæ in dicto art. 3, quæst. 13, ubi docet easdem ideas in mente divina esse principia cognitionis et factionis, et, ut sunt principia cognitionis, vocari rationes rerum; prout vero sunt principia factionis, vocari exemplaria, et ideo habere Deum rationes omnium rerum possibilium, exemplaria vero tantum earum rerum quas aliquando facit, vel facturum est. Ex hac enim doctrina aperte constat in intellectu divino idem esse principium faciendi res, et cognoscendi illas ut posibles sunt; nam rationes rerum sunt in scientia simplicis intelligentiæ; sunt autem de rebus possibilibus, et eadem dicuntur constitui in esse exemplarium, quando per voluntatem applicantur ad opus: ergo eadem in scientia simplicis intelligentiæ; ut applicata per voluntatem, est illa scientia per quam Deus ad extra operatur, et consequenter est causa omnium quæ fiunt, vel futura aliquando sunt. Et ita satis probatum est antecedens in ratione assumptum.

19. *Prima probatur consequentia et expenditur.* — Prima vero consequentia non minus evidenter ostendi potest, nimirum Deum non agere ad extra per scientiam visionis, ut talis est. Et primo, expendo ipsummet D. Thomam in dicto articulo 8, quæstion. 14, ubi querit an scientia Dei sit causa rerum; nam quia non agit de causa virtuali (ut sic dicam), id est, in actu primo, seu in potentia, sed de causa actuali, id est, actu agente, non dixit eandem scientiam simplicis intelligentiæ esse

causam, sed addidit: *Secundum quod habet voluntatem conjunctam*. Et addit: *Unde scientia Dei secundum quod est causa rerum, consuevit nominari scientia approbationis*, non dixit *visionis*, quod certe fuisset clarius et notius, si vel essent idem secundum rationem, vel si scientia visionis, ut sic, esset causa rerum. Ne autem in nomine scientiæ approbationis committatur æquivocatio, est advertendum scientiam, quæ approbationis dicitur, solum addere supra scientiam affectum aliquem voluntatis ad rem scitam: unde fit ut tam scientia simplicis intelligentiæ quam visionis possit scientia approbationis denominari. Sic enim dici potest Deus habere de seipso scientiam approbationis, quia complacet in se videndo se, et sic etiam scientia visionis, prout est de bonis quæ facit ipse Deus, potest dici approbationis, quia videndo opera sua complacet in illis, non jam affectu causativo et operativo, sed solum affectivo, et quasi cujusdam gaudii. Aliter vero se habet voluntas divina cum adjungitur scientiæ simplicis intelligentiæ, volendo et determinando quid ex his quæ per illam prænovit, factura est: tunc enim approbat id quod vult, per decretum quo vult illud efficere et causare, et tunc scientia sic terminata per voluntatem approbationis etiam dicitur, et in hoc sensu locutus est D. Thomas in dicto loco, cum dicit talem scientiam esse causam rerum, et sic etiam nos de illa in hoc discursu loquemur.

20. *Probatur consequentia, quod scientia visionis, etc. — Tertia probatio et declaratio — Objectioni fit satis, quartoque evidenter probatur consequentia. — Quinta probatio.* — Hoc ergo posito, probatur secundo prior consequentia, quia scientia approbationis est ratione distincta et prior quam scientia visionis; sed scientia Dei secundum quod est causa rerum, est scientia approbationis, ut D. Thomas expresse docuit, et reliqui theologi infra citandi; ergo. Major quoad priorem partem probatur, quia scientia approbationis ultra scientiam simplicis intelligentiæ non addit aliquid in ratione scientiæ, sed tantum addit applicationem et determinationem voluntatis, ut D. Thomas dixit; at scientia visionis, nostro modo intelligendi, addit aliquid pertinens ad cogitationem, nempe peculiarem respectum ad res creatas, ut visibiles intuitive secundum actualem et exercitam existentiam, et ex parte voluntatis per se nihil addit: ergo plane distinguitur ratione cum fundamento in re scientia visionis a scientia approbationis. Et

ita illas docte distinxit noster Ægidius a Præsentatione 1. 2, quæst. 2, art. 4, § 4: *Sed ut hæc melius intelligantur, advertendum est duplicem scientiam poni in Deo; unam visionis, quam vocant speculativam, alteram approbationis, quam practicam appellant, quia est rerum causa.* Neque propterea quis existimet diminutam reddi divisionem scientiæ in simplicis intelligentiæ et visionis; quia (ut dixi) scientia approbationis nihil addit scientiæ simplicis intelligentiæ, quod ad rationem scientiæ pertineat, sed solum aliquid pertinens ad rationem causæ, ac subinde pertinens ad voluntatem per denominationem ab actu illius, ut declaravi. Et hinc facile probatur altera pars ejusdem majoris, scilicet, quod scientia visionis sit ratione posterior quam scientia approbationis, quia scientia simplicis intelligentiæ prior est, ut constat, et immediate illi adjungitur voluntas ordinans et determinans in scientia tales ideas, ut sint exemplaria rerum futurarum, et per hoc ipsum quasi formaliter seu denominative transit prior scientia in scientiam approbationis et practicam, et nondum intelligitur scientia visionis, quæ ad res procedentes a scientia approbationis terminatur: est ergo posterior, et nullo modo potest esse causa. Tertio, potest idem declarari, quia scientia visionis, per se et proprie, non subiacet applicationi et determinationi liberæ voluntatis ex parte ipsius scientiæ, ut sic dicam, sed solum ex parte objecti, quatenus a voluntate Dei pendet ut res fiat vel non fiat; supposito enim quod sit futura, vel quod sit, non pendet ex voluntate Dei quin eam videat sicut est, vel futura est, sed necessario eam videt, et ideo Deus necessario videt mala, si futura sunt, et determinationes liberas ipsius voluntatis divinæ, quæ supponuntur quidem ex parte objecti, non ex parte scientiæ, quasi applicando illam: at vero scientia simplicis intelligentiæ ex parte ipsius Dei applicatur ad opus per voluntatem liberam, et ab illa quasi pendet, nostro modo loquendi, et per hanc applicationem scientia approbationis denominatur. Dices etiam scientiam simplicis intelligentiæ non pendere a voluntate in sciendo, sed in causando. Sed contra, nam hinc potius augetur vis rationis, iudicio meo, evidenter. Unde argumentor quarto: nam illa scientia quæ est causa rerum, in Deo supponitur ut necessaria in ratione scientiæ, et causæ in potentia, et applicatur per voluntatem in ratione causæ actualis ad extra, quia libere causatura est, et utrumque optime convenit in scientiam

simplicis intelligentiæ, ut est scientia simpliciter, et ars operativa, vel scientia approbationis, et causat in actu: at vero scientia visionis, ut talis est, non potest supponi in ratione scientiæ ante decretum liberum voluntatis, et illo decreto supposito, necessario sequitur: imo in illo præcipue habetur juxta aliam sententiam, et postquam completa est in ratione talis scientiæ, non potest per voluntatem applicari ad causandum suum objectum, quia jam non habet in illo quid causet: ergo talis scientia non potest esse scientia approbationis. Quinto, scientia approbationis prius ratione est scientia indifferens, quam per voluntatem determinetur et quasi approbetur in ordine ad causalitatem actualem: scientia autem visionis non est scientia indifferens, sed determinata ad id quod futurum est: et ita non est capax determinationis quam a voluntate recipiat, sed supponit determinationem factam a voluntate in objecto talis scientiæ, et postquam completa est in ratione talis scientiæ, non potest ulterius determinari vel applicari: ergo non est propria scientia approbationis, nec per voluntatem Dei constituitur in ratione scientiæ actualis.

21. *Sexto, probatur quia scientia visionis non est scientia practica.* — Unde argumentor sexto in hoc puncto, quia scientia approbationis, et quæ est causa rerum, est scientia practica: sed scientia visionis non est scientia practica: ergo. Major est D. Thomæ dicto art. 8 et 16, quæst. 14. Minor patet ex dictis, quia scientia Dei constituitur in esse practicæ ex parte finis per determinationem voluntatis, et, ut sic possit constitui, supponitur in esse scientiæ practicæ virtualiter, seu in potentia: utrumque enim probatum est manifeste ex doctrina divi Thomæ, et per se videtur clarum, quia nisi scientia supponatur tam in esse scientiæ quam in esse artis seu virtutis activæ in suo genere, quomodo poterit per voluntatem ad aliquid faciendum applicari? Non potest ergo practice applicari, nisi supponatur practica virtute. At scientia visionis non potest constitui per voluntatem in ratione practicæ actualiter, et ex parte finis, quia postquam scientia visionis in sua ratione completa est, nihil circa objectum ejus operandum relinquitur, nec potest amplius per voluntatem applicari: ergo in se nullo modo est practica in virtute, seu in actu primo, sed est quasi mera contemplatio rei factæ. Et ideo Patres supra citati merito illam comparant visioni nostræ, qua rem præsentem intuemur, quæ

non immutat rem visam, neque aliquid agit in illam. Et similiter D. Thomas rem hanc explicat exemplo artificis humani, qui per artem est potens ad agendum, per voluntatem applicat artem, ut actualiter operetur, dirigendo potentiam exequentem; postquam vero imaginem, verbi gratia, operatus est, videt et contemplatur illam, quæ visio nullo modo practica est, nec jam potest applicari, sed est mera contemplatio, et in sola cognitione sistit. Sic ergo scientia Dei simplicis intelligentiæ est ars, per quam Deus operatur; applicatur autem per voluntatem, et postquam sic applicata operata est, sive per se, sive per voluntatem, sive per potentiam executivam ratione distinctam, sequitur secundum rationis ordinem scientia visionis per modum intentionis simplicis: nullo ergo modo potest intelligi ut causa.

22. *Visionis scientia res præsentis æternitati videt, non facit.* — Quarta ratio principalis sumi potest ex alio principio maxime recepto præsertim in Schola D. Thomæ verissimo, si convenienter intelligatur, nimirum, Deum per scientiam visionis intueri res ut præsentis æternitati, quod etiam de præsentia secundum realem coexistentiam dicti moderni Thomistæ volunt intelligi; ergo coexistentia illa in æternitate supponitur ex parte rerum ad scientiam visionis Dei; ergo non facit illam, nec est causa illius, sed supponit illam et ratione illius omnes intuetur. Quod eodem modo procedit, etiamsi præsentia illa, ut prævia ipsi scientiæ, objectiva tantum sit in actu primo. Et declaratur ex discursu D. Thomæ in 1 p., q. 14, art. 13, ubi inquirat rationem ex parte objecti necessariam, ut Deus cognoscat futura contingentia; et quia non potest esse nisi res ipsa, vel prout est in causa, vel prout in se est, docet ad certam præsentiam non sufficere cognoscere contingentia in causis, sed oportere illa cognoscere in seipsis, et sic dicit Deum præscire futura, quia ejus intuitus fertur ab æterno supra omnia, prout sunt in sua presentia. Et addit: Unde manifestum est quod contingentia infallibiliter a Deo cognoscantur, in quantum subduntur divino conspectui secundum suam presentia. Ubi etiam Cajet., dub. 1 et 2, ait presentiam illam in æternitate abstrahere a presentia cogitativa formaliter loquendo, et supponit ad scientiam Dei, ut ex parte objecti sit capacitas terminandi scientiam certam et infallibilem, ut in § *Et confirmatur*, et nel 2 aperte declarat. Ergo, juxta D. Thomæ et an-

tiquorum Thomistarum doctrinam, scientia visionis, ut sic, non facit rem, sed factam intuetur: non est ergo causa propria futurorum. Et confirmatur, quia si hæc scientia esset causa, a qua habet res contingens ut sit futura, non oportuisset D. Thomam adeo laborare in explicanda ratione ex parte objecti qua possint hæc futura cognosci; unica enim esset ratio, scilicet, efficacia ipsiusmet scientiæ quæ facit ut futura, licet contingentia, infallibiliter eveniant. Si enim ego efficacia meæ visionis possem facere præsentem hic rem quæ Romæ existit, facile esset rationem reddere cur ego hic existens possem videre rem Romæ existentem, nimirum, quia, ut ego illam hic videam, non est necesse ut supponatur hic præsens, quia ego visione mea possum illam facere hic præsentem: ita ergo ratiocinandum esset in Deo. At vero nec D. Thomas nec fere ullus antiquorum theologorum hanc causam reddidit ob quam Deus præsciat futura, et revera non satis mente concipitur quomodo visio, ut visio intuitiva, faciat objectum suum esse.

23. *Ab arcana processione Verbi a Patre ex cognitione intuitiva ipsiusmet Verbi improbat contraria sententia.* — Potestque amplius declarari et urgeri hæc difficultas ex alia quam tractare solent theologi, de productione Verbi divini: quærent enim an procedat a Patre ex cognitione intuitiva sui ipsius, mirumque in modum laborant in explicando quomodo possit ex scientia intuitiva sui ipsius produci, et solum propter altitudinem mysterii, et quia productio illa mere naturalis est, credendo magis quam intelligendo, illam admittunt. Quomodo ergo credibile est, per scientiam visionis, per quam rem sibi præsentem intuetur, Deum facere illam sibi præsentem, ut eam intueatur? Vel quid est quod nos in has angustias cogat, cum sit in Deo alia scientia, per quam intelligimus rem fieri, et deinde sic factam per scientiam visionis videri? Tandem isto modo optime, et juxta sententias Patrum conciliantur futura contingentia cum divina præscientia, quia mera intuitio non mutat modum existentia vel effectiois rei vise: at vero si illamet scientia est causa futuri, vix potest intelligi concordia; quia scientia illa non est indifferens de se, sed determinata ad unum, nam per illam ex duobus contradictoriis, vel contrariis unum determinate futurum videtur; si autem hæc scientia facit objectum suum, non determinatur ab illo, sed determinat illud: repugnat autem actioni libere ab

extrinseco agente ad unum determinari, ut infra libro quinto ostendemus. Deinde, ut scientia Dei determinet effectum futurum, oportet illam esse determinatam: peto igitur unde scientia visionis determinetur ad faciendum ut hoc contingens potius quam oppositum sit ibi præsens. Aut enim habet hanc determinationem ex natura sua, et præcisa a voluntate; et sic omnia evenient ex necessitate quadam naturali, quia scientia illa necessario agit id ad quod est ex natura sua determinata. Aut habet illam determinationem a voluntate Dei, et hoc etiam dici non potest: tum quia voluntas divina non potest determinare intellectum ad actum scientiæ, nec quoad exercitium, quia est purus actus, nec quoad specificationem, quia est evidens cognitio: tum etiam quia sic voluntas divina media scientia visionis determinaret ad unum voluntatem creatam, et sic non libere nec cum indifferentia se determinaret. Concludimus ergo scientiam visionis, ut talis est, non esse causam futuri quod per eam videtur, ac proinde causalem illam falsam esse: Quia Deus videt hoc esse futurum, ideo futurum est, si in propria vi causalis accipiatur, licet in vi illationis optima sit consecutio.

24. *Scholastica veritas ab scholasticis confirmatur. — Principia verbis D. Thomæ confirmantur.* — Tandem possumus hanc partem auctoritate scholasticorum confirmare, quam in hunc ultimum locum reservavi, quia ex principiis et rationibus theologis mens theologorum in hoc puncto præcipue colligenda est. Et sic imprimis tribuimus hanc scientiam divo Thomæ, quia ex principiis ejus ita colligitur, ut non videantur aliter posse consistere, ut declaratum est de illo principio, quod futura præsciuntur a Deo, ut sunt præsentia æternitati, et ex illo, quod scientia simplicis intelligentiæ, ut transit in scientiam approbationis per determinationem voluntatis, est causa rerum. Item ex illo, quod illamet scientia simplicis intelligentiæ est de se practica virtualiter, et per adjunctam voluntatem constituitur practica actualiter, quod scientiæ visionis non competit. Item ex eo, quod illa scientia, quæ est causa rerum, supponitur voluntati operativæ, et habet illam adjunctam, ut applicantem illam ad opus, quod etiam non potest scientiæ visionis adaptari. Et hoc confirmant optima verba D. Thomæ in secundo, dist. 22, quæst. 1, art. 1. Sic enim ait: *Scientium est quod scientia secundum rationem scientiæ non dicit aliquam causalitatem, alias om-*

nis scientia causa esset, sed in quantum est scientia artificis operantis res, sic habet rationem causæ respectu rei operatiæ; unde sicut est causalitas artificis per artem suam, ita consideranda est causalitas divini scientiæ. Unde inferius colligit: *Quod principalitas causalitatis consistit penes voluntatem quæ imperat actum.* Et infra addit scientiam Dei esse causam bonorum, *secundum quod consequuntur formam divini artis, et finem, non tamen quod respectu horum dicat perfectam causalitatem, nisi prout illi adjungitur voluntas.* Quæ omnia et singula verba mirum in modum confirmant rationes a nobis factas, ac subinde assertionem. Nam prima propositio quam D. Thomas de scientia profert, potest sub eadem forma ad scientiam visionis applicari; nam scientia Dei secundum rationem scientiæ visionis non dicit aliquam causalitatem, alias omnis scientia visionis causa esset, quod falsum est, ut patet in scientia actuum liberorum ipsius Dei et scientia peccatorum. Ergo ut sit causa, oportet ut id habeat sub alia ratione, ex aliquo adjuncto: neutrum autem dici potest. De primo patet, quia si alia ratio cogitari potest, maxime ratio artis, ut in verbis proxime subjunctis addit D. Thomas; at ratio artis non convenit scientiæ visionis, ut videtur per se notum; tum quia ratio est naturalis Deo, et antecedit omnia decreta libera Dei; tum etiam quia scientia visionis terminatur ad ipsum arte factum. De secundo probatur ex ultimis verbis divi Thomæ, quia scientiæ ad causandum non adjungitur nisi voluntas Dei: at voluntas Dei, ut operativa et determinata ad operandum ad extra, non adjungitur scientiæ visionis, sed potius visio adjungitur illi, et supponit, ut etiam adversarii maxime contendunt et omnes fatemur, licet in diverso sensu, ut supra explicatum est: ergo nullo modo, secundum doctrinam D. Thomæ potest tribui scientiæ divini, ut est visio rei futuræ, quod sit causa cur illa futura sit. Neque D. Thomas in 1 p. aliud dixit, ut respondendo ad argumenta dicam.

25. *Magister probat visionis scientiam non esse causam factorum. — Gregorius et alii expressius docent.* — Præterea Magister, in 1, d. 38, cap. 4, sic ait: *Dicimus scientiam re præscientiam Dei non esse causam eorum quæ fiunt, nisi talem, sine qua non fiunt, si tamen scientiam ad notitiam tantum referamus.* Quæ verba simpliciter non nisi de scientia visionis vera esse possunt: nam licet de scientia simplicis intelligentiæ, ut separata a voluntate, verum habeant, quoad rationem causæ actua-

lis, nihilominus, in potentia et virtute etiam illa scientia secundum se, et ut est quædam ars, est causa, seu causativa; scientia autem visionis nec est ars, nec est aliud quam mera notitia; non est ergo causa, secundum Magistrum. Unde Sanctus etiam Bonaventura, ibi, a. 1, quæst. 1, ait posse sermonem esse de præscientia quantum ad rem significatam, prout illo nomine significatur, vel quantum ad rem ipsam secundum se, et priori modo dicit non habere rationem causæ, posteriori autem modo esse causam. At vero per præscientiam ut significatam illo nomine, non videtur nudum nomen intelligendum, sed res ipsa, ut subest alicui præcisæ rationi significatæ per nomen præscientiæ, quæ non est alia nisi scientia visionis. Nam quia hæc scientia in re non est alia, nisi ipsa scientia naturalis Dei, clarum est, rem importatam per illam vocem esse causam; tamen, ut est præscientia, seu scientia visionis, addit peculiarem respectum, et sub hac ratione, non habet rationem causæ, sed tantum scientiæ, Addit vero Bonaventura (quod pro præsentis controversia notandum est), respectu futurorum quæ Deus causat cum causa secunda, scientiam Dei, etiam prout est causa futurorum, non esse totam causam, sed simul cum causa secunda cui cooperatur. Unde fit solam præscientiam, etiamsi sub illa ratione causa esset, non tamen dici posse totam causam talium futurorum, seu futuritionis illorum, ut auctores contrariæ sententiæ intendere videntur. Expressius docet hanc sententiam Gregorius eadem distinct. 38, quæst. 2, art. 3, ad tertium principale, ubi dicit causalem hanc propositionem, quia Deus præscit, ideo res futuræ sunt, si sit causalis, et non æquivalens præcisè conditionali, absolute negandam esse, quia præscientia non est causa, et utitur exemplis Augustini et Boetii de scientia nostra et prædictione rei futuræ. Marsilius vero quæst. 40, articul. 2, in ultima ejus parte, licet non attingat in terminis questionem hanc de causalitate scientiæ visionis, tamen in suppositione 2 causalitatem tribuit scientiæ, quam vocat dispositionis seu approbationis, quam dicit supra scientiam simplicis intelligentiæ solam voluntatem addere, et postea subjungit præscientiam; et loquens de futuris a causa libera, dicit in suppositione quinta præsciari æternaliter *ex immensitate scientiæ divinæ providentis quid, qualiter, et quomodo, et quando cujuslibet creata voluntas se debeat bene et male determinare*. Quia ita se habet, ut sentit, scientia visionis ad futura

quæ videt, sicut scientia simplicis intelligentiæ ad possible, scilicet, ut pura scientia, et non ut causa: unde etiam comparat illam cognitioni nostræ respectu præsentium, in quibus per scientiam nostram nullam mutationem facimus. Eodem modo loquitur Ægidius in eadem dist., quæst. 1, ubi, inter alia, dicit Dei voluntatem esse immediatam causam productionis rerum, et scientiam non esse causam, nisi media voluntate, et prout per illam extenditur ad praxim, quæ non possunt scientiæ visionis applicari; et in d. 40, q. 2, a. 2, dicit præscientiam esse suppositionem consequentem, non antecedentem. Ex quo principio aperte sequitur non esse causam, ut supra declaratum est. Multoque magis idem sequitur ex sententia Durandi in eadem dist., quæst. 1, dicentis solam potentiam Dei executivam esse proximam causam effectuum, et illam proxime applicari a voluntate, scientiam vero solum remote concurrere, dirigendo per modum prudentiæ vel artis. Denique non immerito allegatur pro hac parte Alensis in 2, quæst. 24, memb. 2. Nam inquirens an præscientia Dei sit causa rerum, respondet, ut est scientia simplicis notitiæ, non esse causam; ut vero est approbata, ratione approbationis posse dici causam. Ex qua responsione constat, nomine præscientiæ non intelligere scientiam visionis, cum sub illa comprehendat scientiam simplicis intelligentiæ. Loquitur ergo absolute de scientia Dei, et illi, ut conjunctæ voluntati, tribuit totam causalitatem. Et similem doctrinam habet q. 32, membr. 3. Unde tacendo semper de scientia visionis, illam profecto omittit, tanquam omnino a causalitate alienam, et consequentem secundum rationem post totam causalitatem Dei circa id quod per illam præscitur. Imo si præscitum sit futurum a voluntate creata, non solam causalitatem voluntatis increatæ, sed etiam causalitatem creatæ voluntatis ut futuram, seu coexistentem æternitati, talis præscientia præsupponit. His addo Wald., libr. 1 Doctrin., cap. 23, num. 10, ubi, referendo Hieronymum, ait: *Non ex eo quod Deus scit futurum aliquid, ideo futurum est*. Et similiter huic sententiæ consentit Joannes Arbor. approbando dictum Orig., tom. 4 Theoph., l. 4, c. 11, circa finem. Denique ex modernis auctoribus præter nostros scriptores omnes, hanc sententiam constanter docet Ferdinand. Mascare., l. de Auxil., disp. 2, p. 6, n. 13; et Alexand. Pesant., l. p., q. 14, art. 8. Et eandem sententiam (quamvis punctum non disputet) supponit plane Diotalevi in

sua disp. de Scient. conditionata; in qua simul explicat rationem et modum cognoscendi omnia futura contingentia, etiam absoluta, semperque supponit res futuras secundum suum esse supponi ut productas ante scientiam visionis, quod esse non potest, si scientia visionis est causa earum. Imo in capit. 6, in propositione 3, de futuris contingentibus absolutis, docet præscientiam visionis horum futurorum adeo esse independentem, et quasi alienam a causalitate, ut si, per impossibile, actus voluntatis nostræ liber non penderet a divina voluntate, si Deus haberet eamdem perfectionem intelligendi quam nunc habet, eodem modo intuitus ejus æternus actum futurum videret, ut suæ æternitati præsentem; quam propositionem late prosequitur, et in doctrina Div. Thomæ putat esse verissimam. Ex illa vero aperte sequitur scientiam visionis, ut talis est, valde alienam esse a ratione causæ, et hoc sensisse illum auctorem, quod nunc solum intendimus, quidquid sit de illa hypothetica propositione.

26. *Optima ex superioribus illatio.* — Per hæc igitur existimo satis esse demonstratum, propositionem illam causalem, *Quia Deus præscit futura, ideo futura sunt*, intellectam de scientia visionis, ut talis est, falsam esse, idque magno pondere rationis et auctoritatis fundatum esse. De altera vero causali, *Quia res futura est, Deus illam præscit*, dicam in ultimi argumenti solutione. Solum ergo superest ut alterius sententiæ motiva expendamus.

27. *Ad primæ opinionis auctores.* — *Alberti sententia expenditur.* — Primum sumebatur ex auctoritate scholasticorum, ex quibus Magister et Bonav. nostræ sententiæ non repugnant, imo favent, ut ostendimus. Albertus autem in d. a. 4 obscurius loquitur; nam, distinguendo præscientiam a scientia, dicit, præscientiam esse causam aliquorum futurorum, quamvis non omnium, quia non est causa malorum, sed bonorum. Sed licet non cogamur ejus auctoritatem sequi, quia vero non loquitur expresse de scientia visionis, ut talis est, dicere possumus locutum esse de illa materialiter, ut est scientia approbationis. Eadem enim scientia simplicis intelligentiæ, adjuncta voluntate induit rationem scientiæ approbationis, et actualis causæ, per quam habet res quod sit futura, et inde resultat statim proprius respectus, secundum quem illa eadem scientia visionis appellatur. Illam ergo scientiam, ut jam est

sub voluntate, vocavit Albertus præscientiam. Sic enim distinxit: *Scientia Dei potest esse duplex, scilicet, simplicis notitiæ, et approbationis*; et priorem dicit non esse præscientiam, quia non respicit futurum, posteriorem autem sub præscientia comprehendi, et ideo illi causalitatem tribuit.

28. *D. Thomas sua ipsemet doctrina se explicat.* — De D. Thomæ autem sententia satis dictum est; quæ vero in contrarium inducuntur ex 1 p., q. 14, parum obstant illi parti seu propositioni quam nunc disputamus. Nam in art. 8, ad 1, in priori parte ejus, quia Origenes dixit scientiam Dei non esse causam futurorum, exponit eum locutum esse secundum rationem scientiæ, et addit: *Cui non competit ratio causalitatis nisi adjuncta voluntate*, et ita videtur exponere Origenem de scientia simplicis intelligentiæ. Sed quidquid sit de expositione Origenis (nam fortasse potius de scientia visionis, ut tali, locutus est), divus Thomas ibi non scientiæ visionis, sed scientiæ approbationis causalitatem futurorum tribuit. De altera vero parte illius solutionis infra dicam. In solutione vero ad tertium, de eadem scientia approbationis loquitur, de qua in articulo fuerat locutus; considerat enim illam ut artem per quam Deus operatur, non ut simplicem intuitionem rerum factarum. Et de eadem scientia loquitur in art. 16, cum dicit scientiam Dei esse practicam. Nam scientia visionis, cum supponat rem factam in æternitate, non potest esse practica respectu ejusdem, sed simplex intuitio, sicut est respectu malorum, in quo respectu eadem profecto est ratio etiam bonorum.

29. *Augustinum Magister explicat loqui de scientia simplicis intelligentiæ.* — Ad Augustinum, Magister et alii dicunt Augustinum esse locutum de scientia approbationis. Et in primo quidem loco non loquitur Augustinus de rebus futuris, sed de rebus creatis. Sic enim loquitur: *Non enim hæc quæ creata sunt, ideo sciuntur a Deo quia facta sunt, ac non potius ideo facta sunt, vel mutabilia, quia immutabiliter a Deo sciuntur.* Non ergo loquitur de rebus futuris ut futuris, sed materialiter (ut aliqui loquuntur) de rebus ipsis quæ aliquando fiunt. Unde non loquitur de scientia visionis, sed de scientia simplicis intelligentiæ, ut ex antecedentibus constat: loquitur enim de Verbo divino, quod est perfectum, et cui nihil deest: *Et ars quardam (ait) omnipotentis, atque sapientis Dei, plena omnium rationum incommutabilium*: et infra: *Ibi norit*

omnia Deus quæ fecit per ipsum, etc. Ipsam ergo naturalem scientiam Dei dicit esse causam per quam facit omnia. Atque eodem modo exponendum est quod in secundo loco ait de creaturis: *Ideo sunt, quia novit*, vel, *quia scivit, creavit*; semper enim de naturali scientia loquitur, unde addit: *Non enim nescivit quæ fuerat creaturus*. Loquitur ergo de illa scientia quæ supponitur ut necessaria ad creandum: intelligit autem esse causam de se in actu primo, in actu autem secundo adjuncta voluntate. Ac propterea Magister exponit: *Ideo sunt quia novit, id est, quia scienti placuit, seu quia sciens disposuit*. Scientia autem quam voluntas supponit ut de futuris disponat, scientia est simplicis intelligentiæ, non visionis. In tertio vero testimonio magis videtur loqui Augustinus de præscientia futurorum, nam et utitur præsciendi verbo, et præmittit verbum volendi; sic enim ait: *Voluntates nostræ tantum valent, quantum Deus eas valere voluit atque præscivit*. Posset tamen etiam exponi de scientia simplicis intelligentiæ, quæ lato modo solet etiam dici præscientia, quia etiam præcedit res, ut futuras, vel etiam quia præsupponitur voluntati. Unde, cum postea subdit voluntates nostras tantum esse valituras, quia Deus id præscivit, subintelligendum est, *et voluit*. Præscivit enim Deus vires omnes et virtutes quas illis conferre poterat, et tales ac tantas dare voluit, et ideo tantum valituræ sunt. Aut si velimus de propria præscientia causalem illam intelligere, non dicit causalitatem respectu rei in futuro esse, sed respectu certitudinis veritatis de futuro. Dixerat enim Augustinus: *Quidquid valent, certissime valent; et quidquid facturæ sunt, omnino* (id est indubitanter) *facturæ sunt*, quia ita præscitæ sunt, et præscientia Dei non potest non esse certissima, et ab illa recte denominantur res certissime futuræ; certitudo enim in rebus, formaliter loquendo, non est nisi denominatio ab aliqua certa scientia.

30. Ad verba Gregorii, aliqui respondent Gregorium non loqui de existentia rerum, sed de præsentia, ita ut sensus illius causalis sit, Deum non ideo cognoscere res, quia illi sunt præsentæ, sed potius, quia cognoscit illas, eas habere præsentæ præsentia utique objectiva, quam habent in æternitate. Docet enim ibi Gregorius in Deo non tam esse præscientiam futurorum quam scientiam: *Quia Deo, inquit, futurum nihil est, quia omne quod nobis fuit et erit, in ejus conspectu præteritum est*: et infra:

Præsciens dicitur, quamvis nequaquam futurum prævideat, quod præsens videt: et statim adjungit: *Nam et quæque sunt, non ab æternitate ejus ideo videntur quia sunt* (utique in sua reali existentia), *sed ideo sunt* (utique in æternitate præsentia) *quia videntur*. Qui est satis probabilis sensus, intelligendus tamen est de præsentia, ut ita dicam, actuali: nam aptitudinalis ex parte objecti supponitur, ut supra dixi. Dici etiam optime potest Gregorium solum voluisse docere, Deum non accipere scientiam a rebus, sed ex se, et ex sua infinitate et æternitate habere, ut omnia eodem modo intueatur, quia eadem scientia qua res omnes producit, easdem intuetur, et in hoc sensu dicit: *Ideo sunt, quia videntur*, non quia visio, ut visio, sit ratio causandi illas, sed quia eademmet scientia, quæ est visio, est causa illarum. De Boetio jam satis dictum est.

31. *Ad præcipuam rationem respondetur*. — Ad primam rationem, negatur antecedens et in contrarium retorquetur, quia scientia visionis, ut talis est, non est practica, sed speculativa, ut ostensum est, et ideo non est causa sui objecti, et per modum artis, quia supponit objectum factum per scientiam Dei, tanquam per artem rerum factibilium. Dico autem *sui objecti, et per modum artis*, quia si præscientia unius rei comparatur ad alium effectum, potest dici causa ejus, non immediata, nec per modum artis, nec ut proprium principium physicæ effectiois, sed remote, et per modum prudentiæ, vel potius experientiæ quæ interdum prudentiæ ministrat, ut nostro modo res divinas explicemus, subintelligendo semper imperfectionibus remotis. Sic enim præscientia peccati, verbi gratia, inducit iudicium, et consequenter voluntatem puniendi illud, et hac ratione illa scientia culpæ dici potest causa punitiois, neque ad hoc refert quod sit speculativa, quia, ut dixi, est per modum experientiæ, quæ ad praxim et prudentiam utilis est. Nam iudicium practicum in aliquo speculativo fundatur. Hic autem loquimur de scientia visionis respectu sui proprii objecti; illius enim non est causa, nec practica cognitio, sed mera intuitio. Ad probationem primam negatur assumptum, scilicet, scientiam simplicis intelligentiæ esse speculativam, et non practicam. Hæc enim posterior pars falsa est: nam si scientia simplicis intelligentiæ secundum se ac præcise spectetur, ut præcedit actum liberum Dei, sic est practica in actu pri-

mo, respectu effectiois ad extra, quia est ars rerum factibilium; omnis autem ars practica est, saltem in actu primo, seu virtute, ut D. Thomas dicit, quod perinde est: si vero consideretur ut substans voluntati liberæ exequenti productionem rerum ad extra, sic est practica in actu secundo, quia simul cum voluntate concurrit, dirigendo tanquam exemplar rei faciendæ. Altera vero probatio in æquivocatione versatur: nam ex scientia Dei absolute argumentatur ad scientiam visionis, quæ potest dici argumentatio ab universali ad particulare affirmative, seu ex puris particularibus, seu a materiali ad formale. Itaque in forma respondetur negando antecedens: nam scientia visionis supponit suum objectum, quod etiam probatione ibi addita convincitur, quia intuetur res ut præsentis æternitati, ac subinde ut factas in eadem æternitate; supponit ergo causalitatem earum, ad quam quidem suo modo operatur scientia Dei, non tam ut est visionis, sed ut est scientia approbationis. Quia tamen utraque scientia in re una est et indivisibilis, eadem scientia Dei, causando res, illas intuetur; nihilominus tamen illa duo respectus ratione distinctos dicunt, et ratio visionis supponit rationem causæ, non constituit.

32. *Ad secundam rationem solutio.* — *Ad primam confirmationem.* — *Ad secundam dupliciter respondemus.* — Secunda ratio ex dictis soluta est: jam enim ostendimus quo modo scientia simplicis intelligentiæ sit causa rerum, vel in virtute seu actu primo, si præcise spectetur, vel in actu secundo, si conjuncta voluntati in scientiam approbationis transeat. Unde licet scientia Dei adæquate dividatur in simplicis intelligentiæ et visionis, illud maxime verum est in ratione scientiæ: nam in ratione causæ actualis additur scientia approbationis; vel ipsamet scientia simplicis intelligentiæ subdividitur quasi duos habens status, ante vel post decretum liberum voluntatis. Ad primam vero confirmationem jam dictum est, ex eodem loco D. Thomæ ibi allegato, scientiam simplicis intelligentiæ ex se practicam esse virtualiter, seu in actu primo, compleri autem per voluntatem per quam ad operandum actu applicatur. Ad secundam confirmationem, dicimus primo, scientiam simplicis intelligentiæ non esse liberam in ratione scientiæ, esse autem liberam in ratione causæ, et hoc solum in illa confirmatione probari. Deinde addimus scientiam visionis neque in se esse formaliter liberam, cum non sit ac-

tus voluntatis, neque etiam denominative esse liberam ab actu voluntatis, quasi movente vel applicante intellectum ad illam scientiam, ut declaravi. Solum ergo dici potest libera quasi anteedenter, quia objectum circa quod versatur liberum est. Hic autem modus libertatis nihil confert ut possit esse causa rerum, quia potius supponit rem libere futuram, et inde, nostro modo loquendi, necessario quasi resultat respectus qui connotatur in scientia Dei, cum visionis appellatur: scientia autem que est libera in ratione causæ debet ita denominari a voluntate applicante illam ad causandum, quod optime convenit in scientiam simplicis intelligentiæ seu approbationis, non in scientiam visionis, ut declaravi.

33. *Capitis secunda pars, et in ea pro utroque ratio dubitandi proponitur.* — Tertia ratio postulat alteram partem, quam proposui de alia propositione, quia res sunt futuræ præsciuntur a Deo, an possit admitti in vi causalis, et non tantum in vi illationis. Nam divus Thomas supra simpliciter illam negat in priori sensu, et Origenem illo modo loquentem in posteriori sensu exponit. Augustinus etiam et Gregorius absolute illam negant, quos Magister in 1, d. 38, sequitur, et Albertus ibi a. 3. Et ducuntur quia omnis scientia Dei est increata, immutabilis et æterna, et ideo non potest habere causam, præsertim creatam, mutabilem et temporalem. At vero D. Hieronymus, Origenes, Damascenus, et alii Patres supra citati illam causalem simpliciter admittunt. Nec videntur sufficienter exponi secundum illationem tantum, ita ut causalis illa ad conditionalem reducat; nam in illo sensu etiam altera propositio, *Quia Deus scit rem futuram, ideo futura est*, esset admittenda, quia in sensu conditionali verissima est. At vero dicti Patres unam admittunt, et alteram negant: ergo loquuntur in sensu plus quam conditionato. Et ita illam admittunt Bonaventura, Gregorius, et alii doctores supra citati. Ratio autem reddi potest, quia per illam causalem propositionem, non denotatur causa physica scientiæ Dei, sed tantum ratio objectiva, quæ non repugnat Deo: nam etiam in scientia simplicis intelligentiæ, Deus scit tales creaturas, quia possibles sunt; et non ideo sunt possibles, quia scit illas. Et in divina voluntate etiam datur ratio objectiva; amat enim seipsum, quia est bonus, imo et creaturas amat propter bonitatem suam.

34. In hoc puncto, existimo controversiam esse in modo loquendi: nam posteriores auc-

tores solum intendunt ad scientiam visionis necessarium esse ut præsupponatur objectum scibile et verum, secundum aliquam determinatam veritatem; unde, quia hæc scientia est de rebus futuris, necessario supponere debet quod sint futuræ, quia, nisi hoc supponatur, non erit objectum scibile, et consequenter nec poterit esse scientia. Si autem id supponatur, necessario resultat talis scientia, ut nostro modo loquamur. Neque aliud genus causalitatis tribuunt futuris respectu scientiæ Dei; optime enim norunt nec Deum accipere scientiam a rebus sicut homines, neque fieri aliquod augmentum reale in scientia Dei ex eo quod res sint futuræ, sicut fit in Angelis, quando effectus contingentes vident: nam licet ab illis non accipiant scientiam, crescunt saltem in actuali scientia. Deus autem non ita, sed eadem simplicissima et naturali scientia, sine ulla additione reali, videt res, si supponantur futuræ; et sine ulla diminutione non videret illas, si non essent futuræ, ut recte attigit Hugo de Sancto Victore lib. 4 de Sacrament.,

p. 2, cap. 14, 16 et 18. Hæc ergo doctrina vera est, quam D. Thomas et alii Patres non negarent; sed quia illa nota causalis aliquid amplius indicare potest, modum loquendi simpliciter non approbant. Et in rigore melius dicitur rem esse futuram supponi ordine rationis ad scientiam visionis, vel ut conditionem necessariam, sicut dixit Magister, vel ut terminum, quo posito cum fundamento, resultat relatio; et ideo sicut in relativis non dicimus unum referri ad terminum, quia terminus existit, sed existente illo, aut non sine illo, ita in præsentis melius dicemus, ut Deus præsciat futura, necessarium esse ut supponantur futura: nam si non essent futura, non præscirentur, ut dixit Hugo supra. Et in hoc sensu reducitur illa causalis ad conditionalem, non quæcumque, sed talem, quæ fundetur in hypothesis necessario præsupponenda, et ideo altera causalis, *Quia Deus scivit, hoc erit*, etiam in hoc sensu non admittitur, quia scientia visionis nullo modo supponenda est ut res sit futura.

FINIS PROLEGOMENI SECUNDI.

INDEX CAPITUM PROLEGOMENI TERTII.

DE COMMUNI RATIONE GRATIÆ, ET VARIIS MODIS, SEU MEMBRIS,
AUT SIGNIFICATIS EJUS.

- CAP. I. *An gratia, de qua in præsentis agit, sit donum Dei gratuitum?*
- CAP. II. *Utrum omne donum gratuitum sit vera gratia Dei et Christi?*
- CAP. III. *Utrum gratia non solum creatum donum, sed etiam increatum significet; nec solum internum, sed etiam externum?*
- CAP. IV. *De divisione gratiæ, in gratis datam, et gratum facientem?*
- CAP. V. *Quot sint gratiæ gratis datæ; et quid unaquæque earum sit.*
- CAP. VI. *Quotuplex sit gratia sanctificationis, seu gratum faciens; et de variis hujus gratiæ significationibus.*

PROLEGOMENUM TERTIUM.

DE

COMMUNI RATIONE GRATIÆ

ET VARIIS MODIS, SEU MEMBRIS, AUT SIGNIFICATIS EJUS.

CAPUT I.

AN GRATIA, DE QUA IN PRÆSENTI AGITUR, SIT
DONUM DEI GRATUITUM?

1. Post explicationem liberi arbitrii, quod est veluti gratiæ fundamentum, duo de gratia ipsa præmittenda videntur. Unum est, quid nomine gratiæ in præsentī intelligatur, magis quid nomen significet, quam quid res ipsa sit, declarando. Aliud est, varia genera gratiarum distinguere; tum ut nonnullas gratias, quæ ad præsentem doctrinam non pertinent, separemus; tum etiam ut terminos varios explicemus quibus postea nobis utendum est, ut ita sit expeditior disputatio; tum denique ut hæreticorum deceptiones vitemus, qui sub variis hujus vocis amphibologiis suos errores introducere conantur.

2. *Quid hic nomine gratiæ intelligatur.* — Prima igitur vocis *gratiæ* etymologia ex eo sumpta videtur, quod gratis datur. Significavit hoc Aristoteles, libro 2 Rhetoric. ad Theodect., cap. 7, dicens gratiam esse, *per quam dicuntur rogati gratis aliquid facere, non pro re aliqua, neque ut sibi quidquam, qui faciunt, subveniant, sed ut cui faciant.* Et, quod caput est, hanc gratiæ proprietatem supponit Apostolus ad Roman. 11, cum dixit: *Si autem gratia, jam non ex operibus, alioquin gratia jam non est gratia, quia nimirum, si ex operibus esset, non gratis daretur, ac subinde gratia non esset: est ergo de ratione gratiæ ut gratis detur.* Unde etiam cap. 4 dixit: *Ei qui operatur, merces non imputatur secundum gratiam, sed secundum debitum, utique quia quod solvitur ut debitum, non gratis datur.* Unde etiam est illud Augustini, tractatu 3 in Joanne: *Quid est gratia? gratis data.*

Quid est gratia? donata, non reddita; et sermone 61 de Verb. Domini, cap. 1: Ideo gratia, quia gratis datur; et similia habet in Psalm. 49, in fine, et alibi sæpe, dicta testimonia Pauli expendens. Eamdemque gratiæ etymologiam notavit Isidor. libro septimo Etymolog., cap. 3, qui etiam ob hanc causam in Comment. ad lib. 1 Reg., cap. 10, gratiam lacti matris comparat: Quia lac, inquit, est in carne gratuitum, ubi mater non querit accipere, sed satagit dare: hoc mater gratis dat, et contristatur si desit, qui accipiat. Quomodo autem hæc etymologia, seu denominatio gratiæ, per quamdam excellentiam seu autonomasiam, in propriam Dei gratiam, de qua tractamus, conveniat, in discursu materiæ, et præsertim in libro 4 explicandum est.

3. *Gratia donum gratis datum, quod ad duo reducitur significanda.*—Ex hac etymologia, colligimus primum et quasi genericum gratiæ significatum, esse idem quod donum gratis collatum. Quia vero hæc dona multiplicia esse possunt, ideo diversa esse possunt genera gratiarum, de quibus ait Paulus 2 Corint. 9: *Potens est autem Deus omnem gratiam abundare facere in vobis;* et cap. 12: *Divisiones gratiarum sunt,* etc. Ad duo vero capita omnes gratiæ reducuntur, pertinentque ad duo prima significata ex tribus quæ posuit D. Thomas 1. 2, q. 110, a. 1. Primo enim gratia significat amorem; nam est primum donum quod ab aliquo alteri conferri potest; soletque non solum gratis exhiberi, sed etiam esse radix aliorum donorum ac beneficiorum quæ gratis donantur, ut ibidem D. Thomas notavit. Et sumitur ex illo Joan. 3: *Sic Deus dilexit mundum, ut filium suum unigenitum daret.* Hinc ergo nomen gratiæ significare solet in Scriptura amorem, ut in illis locis, in

quibus dicitur homo *invenisse gratiam apud Deum*, ut de Noe dicitur Genes. 6, et de Moyse Exod. 23, et de Virgine Luc. 1. Et in eis etiam in quibus unus homo dicitur gratiam apud alium invenire, ut Genes. 30: *Inveniam gratiam in conspectu tuo*; et Exod. 3: *Dabo populo huic gratiam coram Ægyptiis*; et apud Latinos sunt phrases similes in usu; sic enim dicitur quis inire gratiam cum aliquo, vel recipi, esse, aut restitui in gratiam illius, id est, in benevolentiam, vel amicitiam ejus. Secundo vero significat gratia dona quæ ex amore gratis dantur, quæ significatio est frequentissima in Scriptura; Ephes. 4: *Unicuique nostrum data est gratia secundum mensuram donationis Christi*; Rom. 5: *Non sicut delictum, ita et donum; si enim unius delicto multi mortui sunt, multo magis gratia Dei, et donum in gratia unius hominis Jesu Christi in omnes abundavit*; et cap. 12: *Habentes donationem secundum gratiam, quæ data est vobis*, etc.

4. *Id quod amorem gignit, analogice gratia vocatur.*—Occurrit autem notandum circa has duas significationes, ex prima ortum videri ut proprietas, vel conditio personæ, quæ illam reddit amabilem, seu illi amorem ac benevolentiam conciliat, gratia vocetur, ut pulchritudo, seu elegantia, et corporis ornatus gratia dici solet, juxta illud Proverb. ult.: *Fallax gratia, et rana est pulchritudo*, etc. Et similiter orationis venustas gratia vocari solet, juxta illud Ecclesiastici 6: *Verbum dulce multiplicat amicos, et lingua eucharis (id est, gratiosa) in bono homine abundat*; et Psalm. 44: *Diffusa est gratia in labiis tuis*. Cui consonat illud Luc. 4: *Mirabantur in verbis gratiæ quæ procedebant de ore ipsius*. Quamvis etiam possint verba gratiæ dici quæ aliis proficiunt, et ad eorum salutem sunt utilia, juxta illud ad Ephes. 4: *Sit sermo bonus ad edificationem fidei, ut det gratiam audientibus*. Hic autem locum habet differentia inter amorem divinum et humanum, quam D. Thomas supra notat, quod amor humanus supponit in objecto bonitatem quam amat, et ideo illa bonitas, seu pulchritudo quæ in una persona supponitur, ut alterius amorem sibi conciliet, non potest dici proprie gratia respectu illius, quia nullo modo est donum gratis ab illo collatum, sed solum ita vocatur per quamdam analogiam, quia est incentivum quoddam amoris et complacentiæ, quæ est quædam gratia proprie dicta in prima significatione superius posita. At vero

amor divinus non supponit objectum bonum, sed facit, ideoque donum illud quod hominem reddit amabilem Deo, propriissime dicitur gratia secundo modo supra posito, scilicet, quia est donum gratis a Deo collatum, de quo maxime intelligitur illud Joann. 1: *Plenum gratiæ et veritatis*; et illud: *Gratia et veritas per Jesum Christum facta est*, etc., et similia. Et hæc est gratia de qua potissime in hac materia tractamus, sub qua tamen multa comprehenduntur quæ in sequentibus distinguemus.

5. *Gratitudo gratia dicitur.*—Prius autem notare oportet tertium nominis gratiæ significatum a divo Thoma supra traditum, et a præcedentibus derivatum; nam quia beneficium gratis collatum gratia est, et beneficii acceptio gratitudinem postulat, ideo gratitudo etiam ipsa, seu gratiarum actio gratia vocata est, quasi gratia pro gratia. Atque hoc modo dixit David 2 Reg. 2: *Retribuet quidem vobis Dominus misericordiam et veritatem, sed et ego reddam gratiam*, etc. Et cap. 15: *Ostendisti gratiam et fidem*. Et hoc etiam modo videtur sumi a Paulo ad Coloss. 3, dicente: *In gratia cantantes in cordibus vestris Deo*, id est, in gratiarum actione, ut exponit Anselmus, et consonant D. Thom., et Adam. Item ex 1 Corinth. 10, ibi: *Si quid ego cum gratia participo*, id est, cum gratiarum actione. Et hinc ortum est illud Sophoclis: *Gratia gratiam parit*, quia beneficium gratis collatum gratitudinem postulat, et inde etiam apud Latinos ortæ sunt phrases illæ, *habere gratiam*, vel *referre*, aut *agere*. Et in eadem significatione ipsam virtutem gratitudinis gratiam appellavit D. Thomas 2. 2, quæst. 106, art. 1, cum Ciceron., lib. 2 de Invent., prope finem, et Augustino, l. 83 Quæstion., quæst. 31, ubi sic ait: *Gratia est, in qua amicitiarum et officiorum alterius memoria et remunerandi voluntas continetur*.

6. *Deus gratiam dare, sed accipere minime potest.*—Inter has vero gratiæ significationes, seu significata ipsa ad Deum comparata, est obiter notanda differentia, quod gratia, priori modo sumpta pro dono gratuito, habet locum in Deo active, non passive; accepta vero posteriori modo, habet locum in Deo passive seu objective, non active; id est, Deus potest gratiam facere, id est, gratuitum donum donare, non vero recipere. Prior pars prioris membri nota est, quia Deus est primum principium bonorum omnium quæ in omnibus aliis rebus inveniuntur, et consequenter est fons omnium

gratiarum, ut in sequentibus sæpius ostendetur. Posterior vero ejusdem membri pars etiam est certa: nam (ut ait Paulus ad Roman. 11) *Quis prior dedit illi, et retribuetur ei?* Nemo enim potest beneficium gratuitum facere Deo, sed obsequium pro priori beneficio accepto reddere. *Quoniam ex ipso* (ait Paulus), *et in ipso, et per ipsum sunt omnia.* Et ideo qui aliquid Deo tribuit, ab ipso habet ut tribuat, et consequenter non tribuit, sed retribuit, et propterea donum Deo collatum non potest habere rationem gratiæ quam homo Deo faciat, id est, beneficii gratuiti, sed retributionis, et obsequii debiti. Quia semper ad illum dicere possumus et debemus: *Tua sunt omnia, et quæ de manu tua accepimus, dedimus tibi,* 1 Paralip. 29. Item, benefactor, qui propriam gratiam facit, sub ea ratione superior est recipiente, nam est causa alicujus boni illius; Deus autem sub nullo respectu potest esse homine inferior: ergo non potest ab illo recipere beneficium, sed illi conferre. Denique ideo nulla est in nobis virtus quæ inclinet ad beneficium præstandum Deo, sed ad colendum, et honorandum, et gratias agendum illi debitas pro beneficiis acceptis: et eadem ratione ipsummet amorem, tanquam debitum illi reddimus, neque in divino obsequio potest unquam homo facere aliquid ultra debitum, saltem ob gratitudinem vel religionem. In quo multum semper differt inter Deum et hominem, etiamsi homo ut Dominus ad servum suum comparetur. Ac propterea Deus nunquam est capax recipiendi gratiam, sed præstandi.

7. *Gratitudinem Deus accipit, sed non dat.* — Et hinc facile probatur alterum membrum quoad utramque ejus partem. Prior enim, scilicet, Deum esse capacem gratiæ posteriori modo acceptæ, per se nota est, et ex dictis manet probata, quia illi maxime gratiæ debentur pro acceptis beneficiis, et ita hæc gratia ad Deum est unus ex potissimis actibus Religionis, ut suo loco diximus cum divo Thoma 2. 2, q. 83, art. 17, et quæst. 106, a. 1, ad 1. At vere e converso, seu active, Deus non est capax gratiæ, seu gratitudinis, aut gratiarum actionis, ut ex dictis etiam concluditur. Quia Deus non est capax gratiæ, id est, beneficii gratuiti recipiendi, ut ostensum est; ergo nec est capax gratitudinis, seu gratiarum actionis. Patet consequentia, quia ut D. Thom. dixit 2. 2, quæst. 110, art. 1, ad 1, ex beneficiis gratis ab uno exhibitis gratiarum actio in alio consurgit; ablato ergo fundamento,

et quasi objecto, non potest habere locum actus. Unde licet Deo aliæ virtutes tribuantur, ut misericordia, justitia, charitas, etc., gratitudo nunquam illi tribuitur, neque in Scriptura, neque a Patribus, neque a theologis. Unde fit, obligationem quam jurisperiti antidoralem vocant, non habere locum in Deo; illa enim ex beneficio accepto oritur, eique opponitur, et ideo *antidora* dicitur in l. *Sed et si*, 27, § *Consuluit*, ff. de Petit. hæred. Cum ergo Deus non sit capax beneficii recipiendi, nec antidoralem donationem facere potest, licet ut supremus gubernator præmia pro meritis retribuat, ut infra dicetur.

8. *In quo differant gratia et gratitudo.* — Denique animadverti potest quod, licet gratia, prout gratitudinem vel gratiarum actionem significat, non conveniat Deo, ut gratiam alteri exhibenti, sed homini Deo gratias agenti, nihilominus illamet virtus qua homo agit gratias Deo, et ipse actus hominis Deo gratias agentis, est donum Dei. Unde fit ut unum et idem donum, secundum diversos respectus, sit gratia in utraque significatione prædicta: nam ut est ab homine, et respicit Deum ut objectum, seu terminum ad quem tendit, est gratitudo, non Dei ad hominem, sed hominis ad Deum; ut vero est a Deo, ut a benefactore donante ipsamet gratitudinem ad ipsum, et est donum in homine receptum, habet rationem gratiæ Dei, id est, doni gratuiti a Deo collati. Hic ergo non consideramus gratiam prout gratitudinem, etiam ad ipsum Deum, significat; sic enim est peculiaris virtus, vel specialis actus virtutis religionis, de quo quatenus specialem rationem virtutis habet, in opere de Religionis virtute tractatum est: prout vero illa ipsa gratia in nobis est donum Dei, eadem ratio est de illa quæ de cæteris donis gratiæ, de quibus in præsentis est consideratio. Et ita gratia de qua tractamus recte dicitur donum gratis collatum.

CAPUT II.

UTRUM OMNE DONUM GRATUITUM SIT VERA GRATIA DEI ET CHRISTI.

1. *Ratio dubitandi.* — Ratio dubitandi est, quia omnia beneficia naturalia sunt dona Dei, ut per se notum est, et gratis conferuntur: nam in bonis naturalibus maxime locum habet illud: *Quis prior dedit illi, et retribuetur ei?* nam ante naturæ dona quæ per creationem inchoantur, nihil erat homo, unde nec poterat aliquid operari, nec mereri; ergo beneficia

naturæ gratis a Deo donata sunt; ergo sunt vera gratia. Nam sicut Paulus dixit: *Si autem gratia, jam non ex operibus*, ita nos e converso dicere possumus: Si non ex operibus, ergo ex gratia. In contrarium vero est, quia gratia condistinguitur a natura; beneficia autem naturalia sub natura comprehenduntur; ergo non sunt gratia. Item quia gratia Dei communicatur nobis per Christum, juxta illud ad Ephes. 1: *Benedixit nos omni benedictione spirituali in cœlestibus in Christo*. At vero beneficia naturalia non dantur nobis per Christum, quia, ut dixit Augustinus, epist. 105: *Christus non pro nullis, ut homines conderentur, sed pro impiis mortuus est, ut justificarentur*; ergo beneficia naturalia non dantur nobis a Deo propter Christum: ergo non sunt vera gratia Dei.

2. *Rationes quæ apparent ut natura gratia dicatur.* — Duo puncta in hac ratione dubitandi attinguntur. Unum est, an sub appellatione et significatione propria nominis gratiæ dona naturæ comprehendantur. Aliud est an omnis gratia Dei sit etiam gratia Christi, seu per Christum. Circa primum Pelagius, ut suum errorem occultaret, et gratiam, quam re ipsa negabat, verbis saltem confiteri videretur, ipsam naturam rationalem et liberi arbitrii donum, gratiam appellabat. Nec videtur hæc nominis gratiæ acceptio aliena a modo loquendi Scripturæ et Patrum, præsertim, si nomen gratiæ ad sola naturæ dona non limitetur, sed generatim extendatur ad omnia divinæ providentiæ beneficia. Sic enim dicitur Sapient. 16: *Propter hoc omnium nutrici gratiæ adseriebat*, ubi vel ipsam Dei providentiam, vel omne beneficium gratis ab illa proveniens nutricem gratiam Sapiens appellat. Unde etiam Augustinus distinguere solet duplicem gratiam, unam creationis, alteram salvationis. Sic enim dixit Ps. 144, in fine, *Deum gratia sua nos fecisse et refecisse*, quorum primum ad gratiam creationis, atque a deo ad naturalia beneficia, secundum ad gratiam sanctificationis, ac subinde supernaturalem pertinet. Sic etiam Hieronymus, epist. 139 ad Cyprian.: *Homo (ait) a principio conditionis sue Deo utitur adjutore, et cum illius sit gratia, quod creatus est, illius misericordia, quod subsistit, et vivit, nihil boni agere potest absque eo qui ita concessit liberum arbitrium, ut eam per singula opera gratiam non negaret*. Eandem divisionem indicavit idem Hieronymus, lib. 1 contra Pelagian., et Africani Patrum cum Augustino, in epist. 95, divisio-

nem illam insinuant, dum aiunt *beneficium creationis non improbanda ratione posse gratiam appellari*, quia, videlicet, omne liberale beneficium potest gratia vocari. Denique ita senserunt theologi qui gratiam in naturale et supernaturale donum distinxerunt, ut Richard. in 2, dist. 4, art. 2, quæst. 2; Bonavent. art. 1, q. 2; Gabr., quæst. 1, art. 2; Marsil. in 2, quæst. 4.

3. *Gratia solum significat superius donum naturam sanctificans.* — Nihilominus dicendum est, secundum Scripturarum usum, cum sermo est de gratia Dei quam ipse hominibus communicat, vocem illam non significare donum naturæ, seu libertatis naturalis, sed superius donum quo Deus sanctificat naturam, eique ad bene operandum et vincendum peccatum auxilium præstat. Hoc adnotarunt dicti Patres Africani cum Augustino dicta epist. 95, ut occurrerent Pelagio, qui, ad evertendam veram gratiam, solam naturalem libertatem beneficio Dei acceptam, vel legem etiam et doctrinam nomine gratiæ intelligebat, ut testis etiam est Hieronymus, dialog. 1 contra Pelagian., et epist. 193 ad Cyprian., in fine; et August., epist. 105 ad Sixtum, et 107 ad Vitalem; et lib. de Natur. et grat., cap. 11, 54 et 71; et lib. 1 de Grat. Christi, cap. 31, 37 et 47; et lib. 2 de Peccat. origin., cap. 8, 9, 16, 17 et 18; et optime lib. de Prædestinat. Sanctorum, c. 5, ubi sola illa dona quæ dantur ad discernendum bonos a malis, vult proprie ad gratiam pertinere, non vero illa quæ bonis et malis communia sunt. Sicque allegati Patres in hoc impugnant Pelagium, docentque communi usu Scripturæ gratiam Dei significare donum superadditum naturæ. Et ratio reddi potest; nam gratia dicta est quia gratis datur naturæ jam existenti; sed sola supernaturalia dona omnino gratis a Deo conferuntur comparatione naturæ; nam quæ naturalia sunt, illi aliquo modo sunt debita; ergo gratia proprie supernaturale donum significat.

4. *Gratia supponit naturam et est supra omne ejus debitum.* — Declaratur assumptum, nam, licet prima creatio, qua homo ex nihilo fit, ratione quadam generalissima dici possit donum gratuitum, tamen, secundum Scripturæ morem, gratia significat donum homini collatum, et ita in rigore illius creationem supponit; 1 Corinth. 1: *Gratias ago Deo semper pro vobis in gratia, quæ data est vobis in Christo Jesu*. Et ad Ephes. 1: *Gratificavit nos in dilecto filio suo*. Et ibidem hæc

gratificatio vocatur adoptiva filiatio, quæ quidem supponit personam, non facit. Quapropter gratia propriissime sumpta supponit personam, vel naturam cui fit, et ideo prima hominis creatio, secundum Scripturæ phrasim, non dicitur proprie gratia, quia nihil supponit, sed primum esse confert. Proprietates autem resultantes ex natura, et subsidia quæ ex vi ipsius naturæ illi debentur, gratiæ etiam in rigore non sunt, ut notavit D. Thomas 1. 2, quæst. 111, art. 1, ad 2, quia cum dentur ex aliquo debito naturæ, non omnino gratis dantur, quod etiam notavit Driedo, de Grat. et liber. arbit., tract. 2, c. 2, p. 1. Et eadem ratione concursus generalis Dei debitus libero arbitrio, et ipsius libertatis donatio, et conservatio, non veniunt nomine gratiæ, sed naturæ, ut bene considerarunt Soto lib. 1 de Natur. et grat., cap. 3, et Stapleton., lib. 4 de Grat. et liber. arbit., capit. 2, ex alio Augustini principio, quod hic concursus communis est bonis et malis: igitur gratia Dei simpliciter dicta, et theologico, vel potius apostolico more loquendo, donum supra naturam et super omne debitum naturæ collatum significat; quod per antonomasiam solet a Paulo donum Dei vocari, ut ad Ephes. 2: *Gratia estis salvati per fidem, et hoc non ex vobis, Dei enim donum est, ut ne quis gloriatur*, ut optime Augustinus exponit lib. de Grat. et lib. arbit., cap. 8.

5. *Secundum Scripturæ morem donum superius natura gratia dicit.*— Neque theologi antiqui, aut Patres priori loco citati, aliquid diversum ab hac doctrina senserunt, nec Pelagianis aliqua ex parte cesserunt. Aliud est enim loqui de gratia secundum Scripturæ morem, aliud vero secundum latinam et generalem nominis significationem. Hoc enim posteriori modo, verum est nomen gratiæ de se universaliter esse, quam sit priori modo quasi per antonomasiam sumptum. Et ita sumpta gratia in illa generalitate recte dividi potest in gratiam naturalem et supernaturalem, quia per hoc non tollitur vera gratia Dei et Christi, sed adstruitur: ita tamen ut liberalitas Dei in donis etiam naturæ recognoscatur, licet major in altioribus gratiæ donis intercedat. Pelagius autem loquebatur de gratia secundum morem Scripturæ, et illam volebat intelligi esse naturam ipsam gratis per creationem collatam, vel etiam ipsam arbitrii libertatem, vel ad summum legem aut doctrinam, vel remissionem peccatorum tantum, in quibus solis volebat gratiam Domini nostri

Jesu Christi, quæ in Scripturis prædicatur, consistere.

6. *Quæstioni satisfit in prima ejus parte.*— Igitur, ad hunc errorem vitandum, interrogationi propositæ simpliciter respondendum est, non omne Dei beneficium gratis collatum esse gratiam absolute dictam, de qua loquuntur Scripturæ, sed propriam gratiam esse beneficium naturæ superadditum, ipsique non debitum, per quam ultimam particulam excludimus a ratione gratiæ simpliciter dictæ tam naturam ipsam quam beneficia illi conjuncta, ut ipsi connaturalia, et secundum naturæ ordinem ei debita, ut jam declaravi. Et quod hæc significatio sit frequentissima in Scriptura, notissimum est, præsertim in novo Testamento, in quo gratia gratis dari dicitur in ordine ad vitam æternam consequendam: *Ut justificati gratia ipsius, hæredes simus secundum spem vitæ æternæ*, ad Tit. 3; et Act. 13: *Per gratiam Domini nostri Jesu Christi credimus salvari*. In veteri autem Testamento minus frequens est usus hujus vocis, quia tunc etiam rarior et occultior erat hæc gratia. Tamen ita etiam sumitur Ps. 73, cum dicitur: *Gratiam et gloriam dabit Dominus*; et Prov. 3: *Ipse deludet illusores, et mansuetis dabit gratiam*; vel juxta versionem 70: *Dominus superbis resistit, humilibus autem dat gratiam*. Quem locum ita etiam referunt Jacobus cap. 4, et Petrus 1 canonic., cap. 5, qui aperte de donis gratiæ supernaturalis, quibus Deo grati efficiuntur, loquuntur. Imo in allegato etiam loco Sapient. 16, nomen *nutricis gratiæ* non tam ordinariæ, generalive providentiæ, quam singulari benevolentiae amoris Dei, a quo supernaturalia beneficia procedunt, accommodatur. Loquitur enim Sapiens de operibus mirabilibus quæ Deus in favorem populi sui operatus est, et præsertim de manna, quod omnibus satisfacerebat, uniuscujusque voluntati deserviens. Quod certe ex naturali qualitate habere non poterat, sed quia nutrici gratiæ Dei, id est, singulari Dei dilectioni ac voluntati obediebat; unde subjungit: *Ut scirent filii tui, quos dilexisti, Domine, quoniam non natiuitatis fructus pascunt homines, sed sermo tuus hos qui in te crediderunt conseruat*. Nomen ergo gratiæ, in usu Scripturæ et Ecclesiæ, gratuitum donum ordinem naturæ superans, et a Deo gratis collatum ex speciali benevolentia significat.

7. *Supernaturale in substantia et in modo naturam superat.*— Addendum vero est duobus modis posse divinum donum seu benefi-

cium ordinem naturæ superare: primo, in se et absolute spectatum, quod solet dici in sua substantia vel entitate (qualiscumque illa sit) supernaturale, et hoc dicitur absolute supra naturam, quia per nullam vim connaturalem creaturæ fieri potest, cujusmodi est incarnatio, Eucharistia, virtus per se infusa, et similia. Secundo, potest dici beneficium supra naturam, quod secundum institutionem naturæ et communem cursum ac virtutem creaturæ causarum fieri non potest, confertur autem ex superiori Dei providentia, ut est sanitas miraculosa, virtus per accidens infusa, et similia. Et utrumque donum comprehenditur proprie nomine gratiæ, etiam secundum Scripturarum usum, ut ex dictis intelligi potest, et ex sequentibus capitibus evidentius fiet; et ideo etiam in propria gratia locum habet illa distinctio, quod quædam est gratia naturalis ordinis, alia supernaturalis, quia utraque esse potest beneficium naturæ non debitum, et a Deo gratis collatum, quod satis est ad rationem gratiæ. Unde e contrario quodcumque bonum, quod non solum in se naturale est, sed etiam ex solo cursu naturæ, semel dispositæ et institutæ, sequitur, gratia non est, quia inter dona ex vi naturæ debita computatur; sive tale bonum naturaliter inveniatur in tota aliqua specie, sive tantum in hoc vel illo individuo, supposita ejus completionem, et communi cursu naturalium causarum: nam hoc est satis ut tale bonum sit debitum tali individuo secundum communem cursum naturæ, ac proinde a Deo proveniat, ut auctore naturæ, non ut auctore gratiæ. Dicitur etiam potest talis proprietas debita simpliciter speciei, etiamsi non sit debita illi absolute in omni ejus individuo, et hoc est satis ut gratiæ nomen non mereatur, juxta Scripturæ phrasim, ut supra etiam Soto sentit. Quia quantum de ratione naturalis debiti participat, tantum a ratione gratiæ deficit, ut latius in lib. 1 et 2 exponemus.

8. *Opinio existimantium dari gratiam Dei, quæ non sit gratia Christi.*—Ultimo, superest exponendum alterum dubium propositum, videlicet, an omnia dona divina, quæ proprie sunt gratia Dei, sint etiam gratia Christi. Aliqui enim volunt gratiam Dei latius patere, et universaliorē esse, non solum de possibili, quod est certum, sed etiam de facto. Et ideo gratiam Dei distinguunt in aliam quæ simul est gratia Christi, seu per Christum, et aliam quæ est solus Dei sine respectu ad Christum, nam e contrario nulla potest esse gratia Christi, quæ

non sit principaliter gratia Dei, ut per se constat. Primum membrum certissimum est de tota gratia redemptionis hominum. Secundum autem modum gratiæ Dei, et non Christi, inductione ostendo. Primo, in Angelis. Secundo, in hominibus in statu innocentie. Tertio, in hominibus lapsis, quoad aliquas gratias quæ non conferunt ad salutem animæ, nec ad honestatem morum, sed vel ad scientiam naturalem, vel ad aliam utilitatem. Ut, si Deus peculiari gratia Aristotelem juvit, ut naturalem scientiam assequeretur, vel si artem pingendi specialiter Appellem docuit, vel quid simile; talis enim gratia, ut aiunt, non est data per Christum, quia non venit Christus ut boni philosophi vel artifices, sed ut boni et sancti homines efficeremur. Propter quod illa gratia quæ datur a Deo non ad recte vivendum, non datur per Christum, ut sentit Augustinus cum Patribus Africanis epist. 90, 91 et 105; et ideo, licet sit gratia Dei, non potest dici gratia Christi. Quarto, addere possumus ipsum Christum; nam gratiam Dei habuit quam ipse non meruit, et sic per Christum ipsum non fuit. Ex quo inferunt hujus sententiæ auctores, cum Concilia doctrinam de gratia tradunt, non loqui absolute de gratia Dei, sed de gratia Dei per Christum. Imo, ad limitandum sermonem Conciliorum et Augustini, illam distinctionem adhibent.

9. *Nostra sententia, qua fit satis secundæ parti, est, quia de facto omnis gratia per Jesum Christum D. N. datur.*—Nobis vero distinctio illa necessaria non videtur. Nam imprimis gratia per Christum non est alia, vel in suo esse, vel in sua efficacia, nisi gratia Dei, solumque per illam particulam *per Christum* denotatur habitudo ad Christum, tanquam ad causam meritoriam, propter quam illa gratia cæteris datur in laudem et gloriam Christi Domini, ut docuit Paulus ad Ephes. 1, et ad Colossens. 1, et 1 Corinth. 1: *Gratias (inquit) ago Deo meo semper pro vobis in gratia Dei, quæ data est vobis in Christo Jesu.* Deinde, quamvis de possibili verum sit potuisse Deum dare gratiam suam sine ullo respectu ad Christum, tamen de facto et secundum legem statutam verius esse credimus omnem gratiam per Christum dari, sive Angelis, sive parvis hominibus, in quocumque statu. Quod quidem de Angelis tractavi sufficienter in 1 tomo tertiæ partis, disp. 42. De hominibus vero in statu innocentie eodem tomo circa quæst. 1, art. 3. De hominibus autem lapsis quoad veram gratiam gratum fa-

cientem in eod. tom., disp. 41; et ex citato loco, 1 Cor. 1, evidenter convincitur.

10. *Gratia gratis data etiam per Christum donatur.* — Idemque censendum est de omni dono supernaturali et gratis collato, quod solet peculiari accommodatione gratia gratis data appellari, ut infra videbimus. Quia licet talis gratia non semper detur ad sanctificationem recipientis, satis est quod ad spiritualem Ecclesiæ Christi utilitatem vel splendorem, atque ad gloriam ejusdem Christi referatur, ut propter ipsius meritum dari censeatur. Maxime quia totum hoc donum non solum optime cadit per modum præmii sub infinitum Christi meritum, et sic excellentiori modo confertur, verum etiam comprehendere videtur sub perfecta exaltatione sui nominis, quam Christus per mortem sibi promeruit. Quoniam ad illam pertinet ut nulla gratia hominibus ab ipso redemptis communicetur, nisi per ipsum: nam hoc amorem hominum erga ipsum magis conciliat, nomenque ipsius gloriosius reddit. Et ita Ecclesia, quidquid a Deo petit, sive spirituale, sive temporale esse videatur, per Christum petit; supponit ergo omne simile beneficium Dei esse etiam per Christum. Denique certum est omne donum supernaturale vel supernaturali modo datum ordinari ad aliquam spiritualem utilitatem vel recipientis, vel aliorum, et aliter non contineri sub communi ratione gratiæ, sive gratis datæ, sive gratum facientis, ut infra videbimus: ergo omne tale donum non solum est gratia Dei, sed etiam est per Christum, juxta illud ad Ephes. 1: *Benedixit nos omni benedictione spirituali in cælestibus in Christo*; ergo omnis gratia Dei est gratia per Christum, et superflua est distinctio, præsertim respectu hominis in hoc statu naturæ lapsæ.

11. *De hypostatica unione quæ humanitati Christi gratia fuit, hic non est sermo.* — Quocirca mihi dubium non est, quin Augustinus, et concilia generatim et simpliciter loquantur de gratia, abstrahendo a particularibus opinionibus theologorum. Unde etiam in ipsis Angelis, et in statu innocentiae docent gratiam fuisse necessariam, ut postea videbimus. De gratia vero ipsi Christo data hic non est sermo, quia respectu Christi, simpliciter loquendo, et secundum primariam etymologiam gratiæ, sola gratia unionis fuit gratia, non tam Christo quam ejus humanitati facta; nam illi omnino gratis data est, ad illam altiori modo sanctificandam, et ad omnium salutem, et ita eminentissimo modo fuit gratia, et gratum faciens,

et gratis data. Illa autem supposita omnis alia gratia fuit connaturalis Christo, ideoque sub præsentis sermone non comprehenditur, quia magis data est Christo per modum naturæ quam per modum gratiæ.

CAPUT III.

UTRUM GRATIA NON SOLEM CREATUM DONUM, SED ETIAM INCREATUM SIGNIFICET, NEC SOLEM INTERNUM, SED ETIAM EXTERNUM?

1. *Prima gratiæ divisio, videlicet, in creatam et salvantem.* — *Secunda divisio substantialis gratiæ et supernaturalis modi.* — Explucimus quid gratia Dei et Christi sit, saltem quoad generalem descriptionem quid nominis; nunc quid sub illa generali ratione et significatione gratiæ comprehendatur declarandum superest, non tam de rebus ipsis exacte inquirendo, quod in discursu totius materiæ agendum est, quam verborum significationes quibus postea utendum est, distincte proponendo: quod per divisiones aliquas gratiæ, quæ a theologis traduntur, facilius expediemus. Prima divisio gratiæ esse solet in creatam et salvantem; sed hæc coincidit cum illa quæ, capite præcedenti, data est de gratia donorum naturalium, seu quæ secundum ordinem naturalem debentur, et gratia supernaturalium beneficiorum, quæ nullo modo naturæ debita sunt; priora enim ad gratiam creatam pertinent, posteriora ad salvantem, ut videre licet in epistolis August. 90, 91, 95 et 103. Ideoque in præsentis solum est sermo de gratia salvante, juxta ea quæ in superiori capite conclusimus, ubi etiam alteram divisionem, seu subdivisionem gratiæ salvantis insinuavimus: nam sub illa comprehenduntur non tantum dona in se supernaturalia, sed etiam omnia beneficia, quæ, licet in se naturalis ordinis sint, modo supernaturali, et ex providentia omnino gratuita et non debita conferuntur. Ut enim dixit Anselmus libro de Concord. part. 3: *Cum omnia subjaceant dispositioni Dei, quidquid contigit homini, quod adjurat liberum arbitrium ad accipiendam, vel servandam rectitudinem, suæ gratiæ imputandum est*, utique quotiescumque illud tale est, ut ex speciali Dei favore et dispositione proveniat, et non tantum ex generali cursu naturalium causarum, ut inferius in lib. 1 et 2 dicemus, ubi hanc partitionem latius explicaturi sumus. His ergo divisionibus prætermittis, duas alias in hoc capite tractandas proponimus.

2. *Tertia divisio creatæ et increatæ gratiæ.*

—Prior, seu tertia in ordine est, qua gratia in creatam et increatam dividitur. Quam quidem supponit Magister in 1, dist. 17, dum docet inter dona gratiæ charitatem esse donum increatum, alia vero esse dona creata, ubi aliqui theologi eandem distinctionem admittunt, licet in speciali opinione de dono charitatis a Magistro dissentiant expresse: Alens., 3 parte, quæst. 61, memb. 1, alias quæst. 69 memb. 1, art. 1; et Marsil. in 2, quæst. 17, art. 1; Dionys. Cisterciens., in 2, dist. 27, art. 1. Sumitur etiam ex D. Thom. dicta quæst. 110, art. 1, ubi amorem et benevolentiam Dei dicit esse primum gratiæ significatum, quia est primum donum gratuitum: amor ergo divinus, quo Deus nos diligit, erit gratia Dei; amor autem ille increatus est; erit ergo gratia increata. Ab illo autem amore procedere dicit in hominem aliquem effectum pertinentem ad gratiam creatam, ut ibi, et in art. 2 explicat. Eandem distinctionem ponit Abulens. Matth. 19, quæst. 178, ubi gratiam increatam dicit esse voluntatem Dei moventis hominem ad bonum. Latius prosequitur eandem distinctionem Gaspar Casal. lib. 1 de Quadripart. just., cap. 4; et Salmer., 1 tom. super epist. Pauli, lib. 1 Proëm., parte 2, disp. 7; Bellarm., lib. 1 de Gratia et liber. arbitr., cap. 2, in principio.

3. *Opinio prima.* — *Verum est dari increatam gratiam.* — In qua partitione nulla est difficultas quoad membrum de gratia creata, ut statim explicabitur, et ex discursu totius materiæ constabit. Aliud vero membrum aliqui non admittunt, et ideo improbant partitionem solum propter auctoritatem Augustini, libro de Prædestinat. Sanctor., cap. 10, distinguentis gratiam a prædestinatione, quia *prædestinatio est gratiæ præparatio*, quæ est æterna, *gratia vero ipsa donatio*, quæ temporalis est. Ibi enim significat Augustinus gratiam solum significare effectum Dei temporalem, et consequenter aliquid creatum. Sed nihilominus negari non potest quin nomine gratiæ dona etiam increata proprie significantur. Et imprimis omnes theologi ponunt gratiam unionis increatam in Christo; nam ipsamet personalitas divina gratia communicata humanæ naturæ gratia fuit infinita et increata, licet communicata non fuerit tunc aliquo dono creato unionis hypostatice. Hoc enim non excludit quin Verbum ipsum increatum humanitati unitum gratia verè et proprie dicatur. Et quamvis in præ-

senti de illa gratia non tractemus, sed de gratiis quæ personis creatis communicantur, nihilominus per quamdam proportionem ad illam intelligimus aliquid increatum donum posse in nobis veram habere rationem gratiæ.

4. *Trinitas sanctissima, et divinus Paracletus verè gratia est.* — Unde ipsa persona Spiritus Sancti, atque adeo tota Trinitas vera est gratia increata, quatenus peculiari modo justis confertur, juxta illud Joann. 14: *Ad eum veniemus, et mansionem apud eum faciemus*; et illud Roman. 8: *Charitas Dei diffusa est in cordibus nostris per Spiritum Sanctum, qui datus est nobis.* Ex quibus et aliis locis in lib. 12 de Trinit., cap. 5, ostendi justis non solum dari dona increata, sed etiam ipsammet personam Spiritus Sancti, qui donum Dei per antonomasiam appellatur, Actor. 8. Omne autem donum gratuitum propriissime appellatur gratia; ergo sicut illud donum increatum est, ita etiam est gratia increata. Quod his verbis tradidit Augustinus, serm. 61 de Verbis Domini, cap. 1: *Gratia quippe Dei, donum Dei est, donum autem maximum ipse Spiritus Sanctus est, et ideo gratia dicitur*; et Isidor., lib. 7 Etymolog., cap. 3, cum dixisset: *Spiritus Sanctus ideo donum dicitur, eo quod datur*, subdit inferius: *Ipse est gratia, quæ quia non meritis nostris, sed voluntate divina gratis datur, inde gratia nuncupatur.* Et de hac gratia increata specialiter loquitur Alensis supra. Unde licet Magister erraverit, negando charitatem creatam habitualement, tamen in hoc verum dixit, quod cum charitate creata etiam increata donatur. Sicut ergo persona Verbi est gratia increata, respectu humanitatis assumptæ, ita Spiritus Sanctus respectu justorum, diverso tamen modo: nam Verbum est gratia per unionem substantialem, Spiritus per accidentalem. Unde etiam Verbum personaliter et omnino proprie habet quod sit talis gratia, Spiritus autem Sanctus solum appropriate, nam commune est toti Trinitati justis donari, et in eis habitare.

5. *Amor, prædestinatio, et voluntas Dei rectè gratia dicitur.* — Deinde etiam ipsa voluntas Dei, amor et prædestinatio rectissime dicitur gratia increata et æterna. Ita sentit D. Thomas supra, et non est alienum a doctrina Augustini: nam ipse, hæres. 88, distinguit gratiam Dei, *qua prædestinati sumus in adoptionem filiorum, et qua erimur de potestate tenebrarum*, quarum prior increata est, posterior creata. Et eodem modo de gratia qua prædestinamur, loquitur idem Augustinus

eum aliis Patribus Africanis in epistol. 93. Idem probatur, quia amor Dei est summum Dei beneficium, et radix aliorum, ut sumitur ex illo Joann. 3: *Sic Deus dilexit mundum, ut filium suum unigenitum daret*; et ex illo Pauli ad Ephes. 2: *Deus, qui dives est in misericordia, propter nimium charitatem suam qua dilexit nos, cum essemus mortui peccato, contrivificavit nos Christo*. Quibus verbis ostendit ipsam Dei charitatem erga nos esse primum donum, et maxime liberale ex sola misericordia, juxta illud 1 Joan. 4: *Non quia nos prius dilexerimus Deum, sed quia prius ipse dilexit nos*: ipse ergo amor gratuitus Dei dici potest gratia. Possetque de hoc dono non male intelligi quod dicitur Sapient. 16, *gratiam Dei nutrire omnia*, nam amor Dei omnia fovet et nutrit; amor autem Dei in se increatum quid est. Et licet suo modo posset hæc significatio extendi ad amorem et providentiam naturalem, juxta dicta capite præcedenti, nihilominus proprie ac simpliciter dicitur de supernaturali. Et ita prædestinatio et electio Dei gratuita est maxima gratia increata: nam est singularis benevolentia gratuita Dei omnino indebita; nomen autem gratiæ maxime proprie benevolentiam gratuitam significat, juxta usum omnium Latinorum, et juxta D. Thomam et Theologos, ut dixi. Et ita D. Thomas, 3 p., q. 7, art. 13, ad 1, exponit Augustinum, lib. de Prædestinat Sanctor., cap. 15: *Quod gratiam nominet gratuitam Dei voluntatem gratis beneficia largientem*. Et similiter videtur D. Thomas exponere illud Pauli ad Ephes. 1: *Prædestinavit nos secundum propositum voluntatis suæ in laudem gloriæ gratiæ suæ*, id est, gratiæ voluntatis suæ; et clarius dicitur Rom. 4, *propositum gratiæ*; et cap. 11, *electio gratiæ*, id est, gratuita electio, ut ibi communiter exponitur. Illud vero ad Heb. 2: *Videmus Jesum gloria et honore coronatum, ut gratia Dei pro omnibus gustaret mortem*, omnino videtur intelligi de gratuito Dei et supernaturali amore, a quo provenit, ut Christus pro omnibus gustaret mortem. Præterea in superioribus ostendi, ubi-eumque in Scriptura dicitur aliquis invenisse gratiam apud Deum, per gratiam significari singularem Dei amorem et complacentiam, in aliquo omnino gratuitam, et ex benigna Dei voluntate conceptam, quæ complacentia in Deo aliquid increatum est, licet ponat in creatura effectum creatum, quo illam sibi gratiam reddit, ut tactum etiam est, et infra latius dicitur.

6. *Gratia creata in tempore datur. — Dubium de increata proponitur.* — Conclusio igitur nomine gratiæ, non solum creata dona, sed etiam increata significari. Inter quæ, ultra differentiam quam verba ipsa præ se ferunt, notari potest alia, quod dona creata omnia in tempore donantur, quia non possunt prius donari quam sint; non sunt autem nisi in tempore; ergo neque donantur nisi in tempore; ideoque omnis gratia creata temporalis est, utique quoad inchoationem; nam, quoad durationem in futurum, aliquæ gratiæ creatæ erunt æternæ, nam et ipsa vita æterna gratia appellatur ad Roman. 6. At vero gratia increata, licet in se sit æterna, in ratione gratiæ seu doni esse potest æterna et temporalis, quod breviter exponendum est, quia utrumque videtur difficile. Nam, considerata hujusmodi gratia, videtur non posse esse nisi æterna, quia quod est increatum, non accipit esse in tempore, unde non videtur esse posse temporale. Considerata vero ista gratia ex parte ejus cui donatur, videtur non posse esse nisi temporalis, quia ille cui donatur, non est nisi in tempore, et illa non habet rationem gratiæ, nisi cum fit, seu donatur.

7. *Increata gratia est æterna, quo solvitur dubium in prima ejus parte. — Secunda pars dubii explicatur de modo quo æterna gratia temporalis dicatur.* — Nihilominus certum est aliquam gratiam increatam esse æternam; nam dilectio Dei et prædestinatio inter has gratias increatas computantur, et tamen sunt gratiæ æternæ, dicente Paulo ad Ephes. 1: *Elegit nos in ipso ante mundi constitutionem, ut essemus sancti, et immaculati in conspectu ejus in charitate. Qui prædestinavit nos in adoptionem filiorum per Jesum Christum secundum propositum voluntatis suæ in laudem gloriæ gratiæ suæ*. Et Rom. 9, de Jacob ait: *Cum nondum nati fuissent, aut aliquid boni egissent, aut mali, etc.* (id est, ex æternitate), *Jacob dilexi*; fuit ergo æterna illa dilectio, quæ maxima fuit gratia. Neque hujus gratiæ æternitas repugnat ex parte ejus cui fit, quia non fit ad extra per realem inhesionem aut effectiorem, sed per solam objectivam terminationem, quæ licet dicat habitudinem ad rem in tempore futuram, non tamen supponit existentiam ejus in re, sed tantum in intellectu diligentis et prædestinantis. Deinde etiam est certum aliquam gratiam increatam esse temporalem, quoad talem denominationem. Quod a simili declarari potest in gratia unionis, quæ increata quidem est in

se, et tamen non nisi in tempore data est. Sic enim Spiritus Sanctus, licet in se sit æternus, non nisi in tempore datur, propter quod dicitur venire ad eum qui diligit, quod in tempore fieri incipit, et habitare in justis, non vero in peccatoribus, etiamsi imperfectam contritionem habere incipient, ut loquitur Concil. Trid., sess. 14, c. 4. Ergo Spiritus Sanctus, licet in se sit gratia increata, tamen ut peculiari modo donatur homini, illique conjungitur, est gratia in tempore communicata, ac subinde temporalis. Neque hoc repugnat æternitati ipsius doni, quia, licet ab æterno sit donabile (ut sic dicam), non nisi in tempore donatur, et sic habet rationem gratiæ temporalis.

8. *Primum discrimen inter duas gratiæ increatæ acceptiones. — Secundum discrimen. — Cum justificante datur increata. —* Et hinc colligimus primo, priorem gratiam increatam et æternam concedi homini sine mutatione aliqua in illo facta, posteriorem vero increatam gratiam non concedi homini in tempore sine intrinseca ejus mutatione, quia gratia ipsa increata non potest in se mutari, et ideo non incipit denuo habitare in homine, nisi per aliquam ejus mutationem: sicut gratia unionis non est in tempore facta humanitati Christi, nisi per mutationem aliquam in ipsa humanitate factam. Unde fit secundo, ut prior gratia increata in re ipsa ac duratione separetur a gratia creata, et illam antecedit, ac propterea esse possit gratia æterna. Posterior autem gratia increata non recipit propriam denominationem gratiæ, nisi ut conjuncta alicui gratiæ creatæ, seu mediante illa, quia increata persona vel divinitas ipsa nobis non datur denuo ut specialis gratia, nisi quatenus, mediante aliquo dono gratiæ creatæ, incipit novo modo esse in nobis, vel quatenus in ordine ad specialem effectum gratiæ nobis unitur, ut in dicto lib. 12 de Trin. explicavi, et in sequentibus iterum atque iterum occurret. Atque hinc fit tertio, ut quoties in Scriptura dicimur per gratiam justificari vel sanctificari, licet formaliter intelligendum sit de gratia increata, nihilominus non excluditur increata gratia, quæ simul cum creata datur, imo sæpe cum illa expresse conjungitur, ut ad Tit. 3, cum sit Paulus: *Non ex operibus justitiæ justificatus nos, sed secundum misericordiam, saltem nos fecit per lavacrum regenerationis et reformationis Spiritus Sancti, quem effudit in nos ab ipse (scilicet gratiam increatam) per Jesum Christum Dominum nostrum, ut justifi-*

cati gratia ipsius (utique creata), heredes simus secundum spem vitæ æternæ. Sic etiam ad Roman. 5 dicit: *Charitas Dei diffusa est in cordibus nostris per Spiritum Sanctum, qui datus est nobis.*

9. *Simpliciter nomine gratiæ, temporalis venit. —* Hinc denique fit ut, nomine gratiæ simpliciter dictæ, et quasi per antonomasiam significetur gratia temporalis, in qua significatione maxime usus est illa voce Augustinus, disputans de gratia contra Pelagianos, ut eam a prædestinatione distingueret. Nam quia prædestinatio et donatio gratiæ in re ipsa distincta sunt, ideo oportuit eas etiam vocibus discernere, ut de utraque clare et sine ambiguitate loqui possimus, et ideo licet prædestinatio ipsa generali modo gratia sit, nihilominus Augustinus ejus effectibus specialiter nomen gratiæ accommodavit et appropriavit, et in hoc sensu priori loco gratiam a prædestinatione, tanquam temporale quid ab æterno, distinxit: et de gratia in hac significatione in præsentibus tractamus. Nam de prædestinatione, electione, seu dilectione Dei æterna in proprio loco tractatum est, quamvis adeo sint illa duo conjuncta, ut dum altera ex professo tractatur, non possit alia omnino omitti, et ideo aliqua etiam in sequentibus de divinis prædestinationibus et æternis decretis attingemus, breviter tamen, et solum quatenus ad temporalem gratiam explicandam fuerit necessarium. Atque eodem modo agentes de gratia temporali, præcipue et quasi per se dicendum est de gratia creata tanquam de proprio, ac immediato hujus materiæ objecto, quia persona increata non habet prædictam gratiæ rationem, nisi veluti per denominationem extrinsecam a mutatione aliqua, quæ per gratiam in nobis fit, et ideo explicando mutationes gratiæ creatæ, quæ in nobis per Spiritum Sanctum fiunt, simul declarabimus quomodo ipse Spiritus Sanctus per modum doni increati moventis vel inhabitantis nobis tribuatur, præterquam quod, in dicto loco de Trinitate, tractando de missionibus Spiritus Sancti, explicuimus quomodo idem Spiritus Sanctus tanquam speciale gratiæ donum nobis in tempore donetur.

10. *Quanta gratiæ divisio in externam et internam. — Acceptio prima externæ gratiæ, prout distinguitur ab interna. —* Altera divisio gratiæ, seu quarta in ordine, est in gratiam internam et externam, quam partitionem cum precedente conjungimus, quia in aliquo sensu est illi æqualis, et ad illam magis explicandam intervi. Sumitur autem divisio hæc per re-

spectum ad ipsum hominem cui gratia fit, quia licet omnis gratia fiat in ordine ad aliquam internam perfectionem hominis, nihilominus non omnis gratia interne hominem afficit, et ideo recte dividitur gratia in externam et internam. Hæc autem voces varias habent significationes, juxta quas duobus modis accipi potest hæc divisio. Nam imprimis externa gratia dici potest omne donum Dei gratuitum conferens ad salutem, quod ipsi homini non inhæret; sicut in rebus humanis dicuntur bona externa pecuniæ, et alia bona fortunæ, quæ formaliter ipsum hominem non perficiunt: et sumpta hoc modo gratia externa, illi opponitur gratia, quæ ipsi homini inhæret, et consequenter illa sola gratia interna dici poterit. Atque ita in hoc sensu omnis gratia interna est creata, quia non potest homini inhære, nisi quod creatum est. Externa autem gratia distingui poterit in increatam et creatam. Increata enim, sive ex æternitate, sive in tempore data, homini non inhæret, et ita sub illo membro comprehenditur omnis gratia increata in superiori capite declarata. Sub creata vero gratia externa multa comprehenduntur, quæ statim enumerabimus.

11. *Secunda acceptio gratiæ internæ prout ab externa distinguitur.*—Alio modo potest dici gratia interna omnis et sola illa quæ et spiritualis est, et ipsi spirituali ac rationali animæ aut potentiis ejus intime unitur quovis modo, et sic etiam respective, ac servata proportione, gratia externa dicetur, quæ vel spiritualis non est, sed aliquo modo sensibilis, vel licet in se sit spiritualis, animæ hominis non infunditur, nec intime unitur. Et juxta hunc sensum sub utroque membro internæ gratiæ et externæ potest tam increata gratia quam creata reperiri. Et primo, inter increatas gratias, illæ quæ sunt æternæ, ut prædestinatio, electio, prædefinitio ac dilectio, licet in se maxime spirituales sint, et quodam modo sint intra hominem, quatenus sunt ipsa essentia Dei, quæ est intime in homine per essentiam, præsentiam et potentiam, nihilominus semper sunt gratiæ externæ, quia secundum propriam rationem non uniuntur ipsi animæ, neque dicunt respectum temporalem ad illam, unde illa etiam præsentia quasi localis, quam in anima habent, cum temporalis sit, veluti accidentaria est ad proprias earum rationes, et solum ratione identitatis cum essentia illis convenit: præterquam quod illa præsentia non pertinet ad dona gratiæ, sed omnibus rebus communis est.

12. *Spiritus Sanctus est gratia interna*

non inhærens, sed inhabitans, etc. — At vero illa gratia increata quæ in tempore homini datur, id est, ipse Spiritus Sanctus, quatenus est donum homini infusum, et incipiens esse in illo ut specialis habitator, rector, adjutor et motor, dici merito potest gratia interna, non inhærens, sed inhabitans, et intime assistens, quia non solum est in se spiritualis gratia, sed etiam intime penetrat spiritum hominis, eique specialiter unitur, juxta illud: *Qui adhæret Domino, unus spiritus est*, 1 Cor. 6. Et infra: *Membra vestra templum sunt Spiritus Sancti, qui in vobis est, quem habetis a Deo*; et cap. tertio: *Nescitis quia templum Dei estis, et Spiritus Dei habitat in vobis*; quod Rom. 8 et aliis innumeris locis Paulus repetit. Potestque duobus exemplis explicari. Unum de humanitate Christi, et divinitate illi personaliter unita, et prædestinatione, et dilectione æterna, qua fuit ille homo ad tantam gratiam electus. Nam gratia talis prædestinationis semper est gratia extrinseca illi humanitati, et nihilominus filiatio ipsa increata dici potest gratia illi intrinseca, quia illi est in tempore intime unita, non per inhærentiam, sed alio ineffabili modo. Secundum quam rationem ita persona Verbi est gratia specialis illius humanitatis, ut illa ratio gratiæ in personam Patris et Spiritus Sancti non conveniat, quia non sunt ita humanitati unitæ, licet mediate, et secundum aliam quamdam denominationem in illa peculiari modo habitent, qui est etiam modus quidam gratiæ, necessario tamen conjunctus cum gratia unionis. Ad hunc ergo modum ipsemet Spiritus Sanctus, ut nobis speciali modo datus, et unitus per gratiam, potest dici gratia interna, etiamsi increata sit, et nobis non inhæreat. Semper tamen est observanda inæqualitas in exemplo adducto: nam Verbum unitur humanitati substantialiter; Spiritus Sanctus autem unitur justis tantum accidentaliter; hoc tamen non obstat quominus in suo gradu ad gratiam internam sufficiat. Unde est aliud exemplum quoad hoc magis accommodatum, quia in beatitudine, eo modo quo vita æterna est gratia, et gloria est gratia consummata, non solum visio beatifica, sed etiam lumen gloriæ est quædam interna gratia, et pari modo ipsa essentia divina, quatenus unitur intellectui per modum speciei intelligibilis, potest dici gratia increata et interna, quia et est supernaturale ac increatum donum, et quodam intimo spirituali modo intellectui conjungitur ad se illi manifestandum, quæ unio accidentaliter est, et non per inhærentiam, sed

altiori modo, qui satis est ad rationem interioris gratiæ : idem ergo cum proportione intelligi potest in via de Spiritu Sancto, ac tota Trinitate in nobis per gratiam speciali modo inhabitante.

13. *Creata gratia interna est, quæ animæ ejusque potentiis spiritualibus hæret, at quævis alia externa dicitur. — Gradus primus externæ gratiæ. — Secundus gradus.* — Facilius utrumque membrum in gratia creata explicatur. In quo ordine illa maxime dicitur gratia interna, quæ vel substantiæ animæ, vel potentiis ejus spiritualibus, intellectui, scilicet, et voluntati inhæret. Quia illam spirituales esse oportet, ac subinde maxime internam, quia alias non posset in spirituali subjecto inesse. Neque etiam potest intelligi gratia creata, quæ ipsi animæ vel potentiis ejus, aliter quam per modum inhærentis formæ, uniatur. Atque hæc gratia est, de qua potissimum in hac materia disputatur, ideoque illam nunc esse supponimus, qualis autem et quotuplex sit, postea videbimus : in discursu vero materiæ hanc præcipue nomine internæ gratiæ intelligimus. Omnis autem alia gratia creata, quæ hoc modo rationali animæ, ut spiritualis est, non inhæret, dici potest gratia externa creata. In illa vero est magna latitudo, plures enim sunt gratiæ magis vel minus externæ. Et inter eas proxime videntur ad internas gratias accedere immutationes aliquæ supernaturales, quæ in sensibus internis, vel in appetitu sentiente possunt et solent fieri, ut infusio vel excitatio phantasmatum, vel specialis aliqua operatio ipsiusmet phantasiæ, seu cogitativæ potentiæ, aut affectio aliqua, vel delectatio sensibilis : hæc enim et proxime juvant ad actus mentis, et interna suo modo sunt, et ideo possunt etiam quodammodo gratiæ internæ vocari ; magis tamen ad externas pertinent, quia et spiritualia dona non sunt, et per sensus externos ac objecta sensibilia ordinariè comparantur. Unde secundum gradum in hoc ordine habent actus externorum sensuum, et species ad illos deservientes, quatenus ad bonos actus mentis et supernaturales ordinantur et conducunt, et ex providentiâ supernaturali proveniunt, nam, ut sic, beneficia sunt gratuita, et modo aliquo supernaturali, id est, naturæ non debito, nobis donantur, et ideo sub vera gratia comprehenduntur. Et licet, ut nobis inhærent, aliquem modum internæ gratiæ participare videantur, simpliciter sub gratia externa continentur, quia et in se materiales res sunt et sensibiles,

et a sensibus ac externis causis et objectis proxime procedunt.

14. *Tertius gradus.* — Atque hinc ulterius sub hac gratia externa comprehenduntur causæ et objecta externa quæ sensibus nostris exterioribus species tribuunt, quibus tandem animus ad res divinas et supernaturales excitetur, et sic externa prædicatio et propositio divinæ legis, vel doctrinæ fidei inter divinas gratias computanda est, juxta illud Psal. 118, Octon. 14 : *Lucerna pedibus meis verbum tuum, et lumen semitis meis, et in Octon. ult. : Judicia tua adjurabunt.* Quanquam enim Augustinus, lib. de Grat. Christi, et alibi sæpe, ut detegat tergiversationes Pelagianorum, gratiam a lege et doctrina distinguat, ostendatque, præter legem et doctrinam, esse necessarium spiritum gratiæ ipsiusque adjutorium, quia externa gratia sine interna non sufficit, ut late docet super Ps. 87, nihilominus non negat quin, loquendo generatim de gratia, etiam lex et doctrina, ejusque propositio speciali modo a Deo data et provisa, sint veræ gratiæ, licet externæ : unde idem Augustinus, lib. de Spirit. et litt., cap. 34, inter opera gratiæ ponit suasiones ad bonum per externa objecta visibilia, et per Evangelicæ exhortationes et mandata legis : et similem doctrinam habet lib. 83 Quæstion., quæst. 68, et quæst. 2 ad Simplician., et lib. 1 de Peccat., capit. 22, inter magna beneficia gratiæ computat, eo loco nasci, ubi quis possit in doctrina fidei erudiri. Et idem late prosequitur in id Ps. 134 : *Educens nubes ab extremo terræ.* Eamdemque doctrinam habet Prosper, contra Collator., cap. 14. Et ratio reddi potest, quia externum verbum Dei est veluti divinum instrumentum quo maxime ad interna gratiæ beneficia conferenda Deus utitur, ut eleganter idem Augustinus exponit lib. 30 Homiliar., in 36 ; et optime Chrysostom., lib. 4 de Sacerdotio post medium ; ergo ipsius etiam divini Verbi prædicatio quædam est beneficiorum gratiæ inchoatio, ac subinde vera gratia, licet externa. Unde est illud Gregor., Homil. 12 in Ezechiel. : *Magna omnipotentis Dei est gratia, cum inique agentibus durus a Doctoribus sermo increpationis profertur.* Et idem hanc vocat *gratiam doctrinæ*, et infra ait homines interdum privari hac gratia propter peccata sua, quod late prosequitur, tum ibi, tum etiam hom. 17 in Evang., et lib. 17 Moral., cap. 11 : *Hoc inquit quod Spiritus sanctus agit intrinsicè, nos exterius ministerio vocis adjutamur.*

15. *Quartus gradus.* — *Eucharistia cur*

bona gratia. — Unde etiam intelligimus, ad hoc genus gratiæ exterioris pertinere omnem effectum divinæ providentiæ supernaturalis ad salutem hominum ordinatum, seu institutum, sive in generali pro universitate hominum, sive in speciali pro alicujus privatæ personæ spirituali salute, aut commoditate, sive promovente bonum, sive removens malum. Et hoc modo ipsamet Christi redemptio potest externa gratia dici, juxta illud Isai. 52: *Gratis venundati estis.* Hæc autem tam excellens gratia est, ut gratiam unionis includat, et ex ea parte nec omnino externa sit nec omnino creata; dicitur autem externa, quatenus exterius consummata est, et visibiliter Verbum ipsum nobis apparuit, et creata dicitur quatenus in natura creata perfecta est. Et in eodem sensu Christus ipse est quædam gratia quam Deus nobis contulit: *Sic enim dilexit mundum, ut filium suum unigenitum daret,* Joan. 3. Dedit autem illum nobis, juxta illud Isai. 9: *Parvulus natus est nobis, et filius datus est nobis.* Sic etiam sacramenta ipsa sunt quædam gratiæ, quatenus eorum institutio fuit magnum beneficium gratuitum, in se continens salutarem gratiam. Maxime vero sacramentum Eucharistiæ per antonomasiam vocatur bona gratia, quia ipsum gratiæ auctorem in se vere ac realiter continet, et internam gratiam in nobis nutrit. Occasiones etiam bene operandi a Deo specialiter præparatæ inter has gratias externas merito computantur, quia licet nihil in homine formaliter ponant, neque interdum per se efficiant, juvant moraliter ad salutem, et ita rationem beneficii gratuiti participant. Ac denique etiam auferre occasiones peccandi, ut objecta quæ possent ad libidinem excitare, vel similia, gratiæ quædam sunt. Unde Augustinus, lib. 50 Homiliar., in 23, hæc gratiæ Dei tribuit dicens: *Regebam te mihi, servabam te mihi: ut adulterium non committeres, suasor defuit; ut suasor deesset, ego feci; locus, et tempus defuit; ut hæc deessent, ego feci:* Et concludit: *Agnosce ergo gratiam,* etc. Et similia habet in Soliloquiis, capit. 45 et 46. Hæc autem tanta varietas externarum gratiarum, ad præsentem materiam et considerationem, secundum proprias earum rationes, non pertinet; nam de Christo ejusque redemptione ac sacramentis ejus in propriis locis disputatur: hic ergo solum illas externas gratias attingemus, quæ internæ gratiæ annexæ sunt, et ad internos actus gratiæ aliquid conferunt et operantur.

CAPUT IV.

DE DIVISIONE GRATIÆ IN GRATIS DATAM ET GRATUM FACIENTEM.

1. *Quinta celebris gratiæ divisio, in gratis datam gratumque facientem.* — Alia est divisio celebris gratiæ, quæ in ordine potest esse quinta, in gratiam gratis datam, et gratum facientem, quam tradit D. Thomas 1. 2, quæst. 111, artic. 1, et nonnulli ex Scholasticis in 2, d. 28, licet non omnes in eodem sensu, ut jam dicam. Prius enim tollenda est vocum ambiguitas; videri enim potest unum divisionis membrum cum diviso converti. Dividitur enim donum gratiæ proprie sumptum respectu illius personæ cui datur, ut est specialis perfectio vel operatio ejus. De ratione autem talis doni est ut gratis detur, ut supra dictum est: ergo divisum ipsum cum altero membro recurrit. Item consequenter videri potest aut membra inter se opposita non esse, aut alterum membrum diviso repugnare, quia ea gratia quæ a gratis data distinguitur, non dabitur gratis, et ita non erit gratia. Sed hoc per solam vocum interpretationem facile dissolvitur. Est enim quædam gratia quæ hanc solam proprietatem gratiæ habet, quod gratis detur, et hæc per antonomasiam vocata est gratia gratis data, generali nomine (quod consuetum est) ad speciem minus perfectam specialiter applicato. Alia vero est gratia, quæ ita gratis datur, ut hominem Deo gratum et amabilem aliquo modo reddat. Hanc enim supra inter nominis gratiæ significationes posuimus, ut rei perfectio, quæ illi aliorum amorem et benevolentiam conciliat, gratia vocetur. Unde est illud Ecclesiast. 26: *Gratia super gratiam, mulier sancta et pudorata.* Illa igitur dona Dei quæ homini dantur, ut ipse bonus et sanctus fiat, et ita sit Deo gratus, per quamdam excellentiam sub gratia sanctificante, seu gratum faciente comprehenduntur, et a gratiis gratis datis distinguuntur, non quia ipsa non gratis dentur, sed quia non tantum ex eo capite habent rationem gratiæ, sed etiam ex alio nobiliori, a quo speciale nomen acceperunt. Atque ita neutrum membrum cum diviso convertitur, quia divisum est gratia, ut abstrahit a dono gratuito faciente vel non faciente hominem gratum; gratia vero gratis data specialiter dicitur donum, quod licet gratis detur, non reddit ex se personam gratum. Et hoc membrum opponitur alteri, non in hoc quod est gratis dari, nam in hoc sub diviso

conveniunt, ut objectio probat, sed in eo quod per se non reddit hominem gratum.

2. *Nonnullorum placitum de naturali dono liberaliter oblato.* — Hinc vero nonnulli theologi gratiam gratis datam vocant omne donum a Deo liberaliter datum, quod animam non sanctificat, etiamsi naturale sit, sicque naturales proprietates et virtutes, et concursus, etiam generalem ordinis naturalis, gratiam gratis datam appellarunt aliqui scholastici, ut Dionys. Cisterciens. in 2, distinct. 27, art. 1, in principio; et sic etiam Albert. in 2, distinct. 27 et 28, artic. 1, ad ult., distinguit gratiam gratis superadditam naturæ, a gratia gratis data cum natura, quarum prior supra naturam est; unde posterior esse non potest, nisi vel proprietas naturalis, vel generalis concursus ordinis naturalis. Imo etiam D. Thomas, ibi, quæst. 1. art. 3, voluntatem Dei gratis in nobis omnia causantem, etiam naturalia opera, gratiam gratis datam appellat. Et similiter Abulens., in cap. 19 Matth., quæst. 174, ad 1, dixit sine donis gratuitis, id est, superadditis naturæ, posse aliquid boni ab homine fieri, *non tamen sine Deo gratis donante*, quam etiam *gratiam* vocat, utique gratis datam, vel potius gratis dantem. Nonnulli vero ex modernis theologis, licet non omnia dona naturæ debita vocent gratias, nihilominus gratias gratis datas appellant omnia beneficia, quæ licet ordinis naturalis sint, modo præternaturali et non debito naturæ dantur, si non propter sanctitatem vel morum honestatem, sed propter aliam corporis commoditatem vel animi ornatum dentur, ut sunt sanitas extraordinario modo concessa, perfectio alienius artis aut scientiæ naturalis, peculiari auxilio data, etiamsi tantum propter privatam perfectionem, et non propter communem utilitatem detur. Nam publicæ utilitatis intentionem non putant semper, sed regulariter, esse ad gratiam gratis datam necessariam.

3. *Placitum aliorum de eo quod formaliter sanctificat, et non.* — Nos autem supponimus divinum hujus divisionis esse veram et propriam gratiam creatam. Unde ab utroque membro excludimus naturalia dona, naturæ aliquo modo debita, quia illa neque animam sanctificant, nec possunt dici simpliciter gratis data. Et hac ratione illa excludit ab hac divisione tota D. Thomas, dicta quæst. 111, artic. 1, ad 2. Deinde excludimus dona ordinis naturalis, si ad spiritualem salutem non ordinantur, etiamsi modo præternaturali seu naturæ non debito tribuantur. Ratio est, quia

etiam tale donum non meretur nomen gratiæ, secundum ecclesiasticum morem, juxta doctrinam Patrum Africanorum, dicentium in Epistol. 95 et 105 Augustini, veram gratiam solam esse illam, *qua prædestinati vocamur, justificamur*, etc. Omnis ergo gratia esse debet ex providentia supernaturali, ac subinde propter spiritualem finem, vel recipientis, vel aliorum. Unde addo (omissa potentia absoluta), secundum ordinariam providentiam, non dari hominibus naturale donum supernaturali modo, quod non propter spiritualem utilitatem, vel suam, vel aliorum detur. Ratio est, quia, quoties Deus sic operatur, non agit ut causa ordinis naturalis, sed supernaturalis; ergo propter finem supernaturalem; nam quæ a Deo sunt, ordinata sunt, et finis esse debet proportionatus principio; omne ergo supernaturale beneficium est propter spiritualem utilitatem, quæ si sit tantum propria recipientis, pertinebit ad auxilium gratiæ gratum facientis, ut mox dicemus: si vero sit ad bonum aliorum, pertinebit ad gratias gratis datas. Et ita illa sententia modernorum, loquendo secundum præsentem providentiam, falsum supponit; loquendo autem de potentia absoluta, etiam gratia data propter solam honestatem naturalem non esset gratum faciens, sed gratis data.

4. *Vera resolutio supponitur.* — Alii vero theologi, licet veram et supernaturalem gratiam hic dividi supponant, nihilominus nimis restringunt gratiam gratum facientem ad solum illud donum, quod formaliter justum et charum hominem Deo reddit, sive sit charitas, sive alia forma gratiæ: omne autem donum supernaturale quod potest esse in peccatore, vel quod non formaliter sanctificat animam, vocant gratiam gratis datam. Ita loquitur de his gratiis Bonavent. in 2, distinct. 26, dub. 2 litterali, et clarius distinct. 28, art. 2, q. 1; et Marsil. in 2, q. 47, art. 1, notab. 1. Et hunc modum loquendi magna ex parte secutus est Vega, q. 6 de Justificat., quamvis fateatur, in usu Conciliorum et Augustini, gratiam sanctificationis plura complecti. Quod nos etiam nunc supponimus, et capite sexto id ostendimus: ac propterea dicimus sub gratia gratum faciente, quæ eadem est cum gratia sanctificationis, non solum habitum charitatis vel gratiæ, sed plura dona comprehendi, quæ ad suam sanctificationem homini tribuntur. Hinc ergo D. Thomas alio modo illam divisionem explicavit, cumque secuti sunt ejus expostores 1. 2, quæst. 111, art. 1; et Bellarm.,

lib. 1 de Grat. et lib. arbit., cap. 2; et sine dubio ad rationem ac sufficientiam divisionis reddendam, et ad usum terminorum, in hac materia aptior existit.

5. *Donatur gratia, vel in ordine ad se, vel in ordine ad alium.* — Advertendum est ergo ex D. Thoma, dicto loco, omnem veram et supernaturalem gratiam dari hominibus, vel ad sanctificationem ejus cui datur, vel ad utilitatem utique spiritualem aliorum. Nam quia homo non sanctificatur, nisi quatenus Deo conjungitur et unitur, et si adultus sit, non salvatur sine cooperatione propria, ideo ad hominis salutem primum omnium necessaria est gratia, quæ ipsum hominem Deo jungat, eumque ad se sanctificandum juvet, et hæc tota gratia dicitur sanctificans, justificans, seu gratum faciens, de qua frequens est sermo in Scriptura, ut Actor. 15: *Per gratiam Domini nostri Jesu Christi credimus salvari*; et Roman. 3: *Justificati gratis per gratiam ipsius*; et ad Ephes. 4: *Benedixit nos omni benedictione spirituali*; et infra: *Ut essemus sancti, et immaculati in conspectu ejus in charitate*; et infra: *In laudem gloriæ gratiæ suæ in qua gratificavit nos in dilecto filio suo*; et ad Tit. 3: *Ut justificati gratia ipsius, hæredes simus secundum spem vitæ æternæ*. Quia vero suavis providentia Dei quosdam homines per alios ad fidem et salutem promovet, ideo quibusdam peculiare gratias confert ad aliorum utilitatem, quem finem principaliter respiciunt, etiam si accipientes per illas non sanctificentur, et hæc vocantur gratiæ gratis datæ, de quibus loquitur Paulus 1 Corint. 12: *Divisiones gratiarum sunt, idem autem Spiritus*; et infra: *Unicuique autem datur manifestatio spiritus ad utilitatem*; et ad Roman. 12: *Habentes donationes secundum gratiam, quæ data est nobis, differentes, sive prophetiam, etc.* Et de eodem genere gratiæ videtur esse sermo 1 Petr. 4, cum dicitur: *Unusquisque autem sicut accepit gratiam, in alterutrum illam administrans, etc.*

6. *Prima differentia utriusque gratiæ.* — Atque ex his nonnullas convenientias et differentias inter has gratias colligere possumus. Primo enim conveniunt, quia utraque est aliquid supernaturale, seu præternaturali auxilio divino in nobis factum, ultra omne id quod sola natura quasi debitum postulat. Hoc jam probatum est, quia hoc pertinet ad propriam rationem gratiæ. Secundo conveniunt, quia utraque gratia datur propter spiritualem salutem, vel propriam, vel aliorum: quia hoc

necesse sarium est ad veram rationem gratiæ, ut declaratum est; et quia Deus omnia convertit ad se, et ita quando supernaturaliter operatur, propter se ut finem supernaturalem operatur. Tertio conveniunt, quia utraque propter Christum datur. De sanctificante seu gratum faciente id certum est, ut supra tetigimus: non videtur tamen minus certum de gratis data, quia hæc datur propter spiritualem utilitatem Ecclesiæ, pro qua Christus mortuus est, ut illam exhiberet sine macula et ruga; ergo meruit illi omnem gratiam, quæ propter ejus utilitatem alicui conceditur.

7. Differunt autem imprimis hæc gratiæ ex fine, quia una ad privatam sanctitatem, alia ad communem utilitatem per se primo ordinatur. Nam sicut in corpore humano quædam potentiæ ordinantur ad bonum habentis, aliæ ad speciei conservationem, seu individuorum propagationem, vel sicut in membris corporis aliquæ sunt facultates unicuique parti deservientes ad propriam utilitatem, aliæ vero quibus quædam membra in alia influunt ad eorum utilitatem, ita in corpore Ecclesiæ quædam gratiæ dantur ad singularum personarum sanctificationem, aliæ vero ad sanctificationem totius Ecclesiæ, et ut quædam membra aliis prodesse possint: priores ergo sub gratia gratum faciente comprehenduntur, posteriores nomen gratiæ gratis datæ retinebunt. Atque ita illa duo membra ex fine potissimum distinguuntur, quia gratia gratum faciens ad recipientis bonum, gratis vero data ad aliorum utilitatem confertur. Quod docuit Clemens Roman., libro 8 Constitut., cap. 1, dicens hæc charismata prius data esse Apostolis, deinde aliis esse communicata, *non quidem ad illorum utilitatem, qui charismata illa operantur, sed ut qui non credunt ad credendum adducantur*; et infra: *Neque enim expellendis demonibus utilitas nostra agitur, sed eorum qui ab eis eripiuntur*; et addit ideo dixisse Christum, Luc. 10: *Nolite gaudere quod spiritus subjiciuntur vobis, sed gaudete quod nomina vestra scripta sunt in cælo*. Nam illud (inquit) *fit potestate Dei, hoc efficitur nostra in Deum benevolentia et studio, atque adjurante Deo*. Addendum vero est gratiam gratum facientem ita dari in bonum recipientis, ut possit etiam et debeat in aliorum utilitatem redundare et exerceri: et e converso gratiæ gratis datæ licet ad aliorum utilitatem dentur, nihilominus qui eas recipit, potest et debet, per earum usum, propriam spiritualem utilitatem et profectum procurare. Sed hoc perti-

net ad secundariam, et quasi extrinsecam intentionem et diligentiam hominis operantis; secundum fines autem proprios, et quasi intrinsecos ipsarum gratiarum sumitur distinctio data modo explicato, et a D. Thoma intento.

8. *Secunda differentia.* — *Sanctificans gratia justis, alia peccatoribus etiam datur.* — Ex hac differentia oritur secunda, scilicet, quod gratiæ gratis datæ communes sunt peccatoribus et justis, gratia vero gratum faciens propria est justorum. Primum enim, quod gratiæ gratis datæ possint esse in justis, manifestum est; illas enim habuerunt, et Christus, et Apostoli, et insigniores Sancti, quamvis non omnibus justis etiam perfectis conferantur, quia non est necesse ad communem Ecclesiæ utilitatem ut justii omnes ministrent aliis, vel ut per specialem gratiam ad operandum ad aliorum utilitatem subleventur. Nam ut ait Clemens: *Non est necesse omnes fideles expellere demones, aut suscitare mortuos, aut linguis loqui, sed eos qui, causa quapiam utili, charismate dignati sunt ad aliorum salutem.* Imo addit August. lib. 83 Quæst., quæst. 79: *Ideo non omnibus sanctis ista tribuuntur, ne perniciosissimo errore decipiantur infirmi existimantes, in talibus factis majora dona esse, quam in operibus justitiæ, quibus æterna vita comparatur.*

9. *D. Thomæ auctoritate probatur gratiam gratis datam in peccatoribus esse posse.* — Deinde quod istæ gratiæ possint esse in peccatoribus, docet D. Thom. 2. 2, quæst. 172, art. 4, ubi de Prophetia specialiter loquitur; in solutione vero ad primum, ad operationes virtutum et ejectionem dæmonum id extendit ex sententia Hieronymi, Matth. 7. Idemque confirmat de gratia miraculorum in quæst. 178, articulo 2. Et eandem doctrinam habet Gregorius, homilia 17 in Ezechiel., in fine, ubi id confirmat ex verbis Christi Matth. 7: *Multi dicent mihi in illa die: Domine, Domine, nonne in nomine tuo prophetavimus, et dæmonia eiecimus, et in nomine tuo virtutes multas fecimus? Et tunc confitebor illis, quia nunquam novi vos; discedite a me, qui operamini iniquitatem.* Simili modo induci possunt verba Pauli 1 Corinth. 13: *Si linguas hominum loquar, et Angelorum, etc., et habuero prophetiam, si habuero omnem fidem, ita et montes transferam, charitatem autem non habuero, nihil sum.* Ubi Paulus supponit posse aliquem habere predictas gratias gratis datas, et carere charitate, ne subinde esse in peccato, quibus verba ad hoc propositum uti-

tur Anastasius Sinait., lib. 6 Examer., in fine, dicens non in ejectionis dæmonis vel miraculis faciendis Deum perfectionem hominis definire, sed in charitate, quæ sine illis signis, et hæc sine illa esse possunt. Exemplis idem etiam ostenditur, in Caipha Joann. 44, et in Balaam, qui, cum esset ariolus et idololatra, nihilominus donum habuit prophetiæ, ut patet Numer. 22, 23 et 24. Ex quo loco ulterius potest colligi, non solum sine gratia gratum faciente, sed etiam sine fide posse aliquem prophetare, vel miracula facere, vel dæmones expellere in honorem nominis Christi, ut tradit Augustinus lib. 83 Quæst., quæst. 79, et videri potest Maldonat. Matth. 7, in fine.

10. *Stabilitur ratiõne id ipsum.* — Ratio vero est, quia opera spectantia ad gratias gratis datas non pertinent per se ad voluntatem, nec illius rectitudinem postulant, et ideo non pendent ex se a gratia gratum faciente; possunt ergo separari ab illa, et a peccatoribus fieri, si Deus velit: nam cum hoc in re ipsa non involvat repugnantiam, neque indecentiam aliquam, potest a Deo pro suo beneplacito fieri. Assumptum declaratur imprimis in prophetia, in qua duo possunt considerari, scilicet, vel exterior prædictio, vel interior cognitio rei futuræ, ex quibus illud prius, si a posteriori separatur, potest fieri non solum ab homine pravo et infideli, sed etiam ab homine actu peccante, et ex infidelitate proferente illa eadem verba quibus, nesciens et nolens, prophetat. Ita enim in Caipha contigit; illa enim verba *Expedit*, etc., in sensu quem ipse intendebat, erant verba odii, et invidiæ, et infidelitatis, qua profitebatur Christum esse purum hominem et malefactorem, et nihilominus in sensu intento ab Spiritu Sancto erant prophetica, et ex speciali directione Spiritus Sancti. Et ita erat aliqualis gratia, licet in illo ordine minima, ita ut non propria prophetia, sed instinctus propheticus appelletur a D. Thoma 2. 2, q. 78, a. 4. Interior item et vera prophetia, cum ad intellectum speculativum pertineat, per se non requirit bonitatem accipientis, imo aliquando fieri potest sine consensu voluntatis ejus, quia intellectus cogitur ad assentiendum, et interdum lingua ad loquendum, sicut de Balaam dicit Abulensis, Numer. 24, q. 3. Quod si cognitio prophetiæ est evidens, ut est probabile, non requirit voluntatem nec rectitudinem ejus, ac prout nec gratiam gratum facientem. Præterea in operatione virtutum seu miraculorum id patet, quia in miraculo Deus est qui prin-

cipaliter operatur; potest autem Deus uti instrumento quo voluerit, etiamsi sit homo peccator vel infidelis, sicut utitur homine peccatore vel infideli, sacramentum Baptismi ministrando. Et idem in cæteris gratiis gratis datis potest simili discursu facile ostendi.

11. *Opponitur objectio. — Solutio. —* Dices recte hac ratione probari, hoc ex parte rei non repugnare; videtur autem non esse consentaneum sapienti providentiæ Dei: nam ipse has gratias Ecclesiæ snæ contulit ad fidem confirmandam, ut patet Marci ultimo; hæc autem fidei probatio et confirmatio enervatur, si per malos vel infideles talia signa Deus efficiat. Item Ecclesia ex miraculis a Sanctis factis argumentum sumit ad eorum sanctitatem probandam; hoc autem argumentum fallax est, si a malis possunt miracula fieri. Hanc objectionem accurate tractat et dissolvit Anastasius Nissenus, in Quæstionibus Scripturæ, q. 23, tomo primo Biblioth., et imprimis ait miracula non esse certa signa sanctitatis hominis operantis illa; et inter alia affert quod Judas etiam signa efficiebat, et dæmones cum aliis Apostolis eiciebat. Et Saul, etiam postquam malus esse cœpit, prophetabat; non ergo sufficiunt signa sine morum sanctitate, ideoque Christus dixit: *Ex fructibus eorum cognoscetis eos*, Matth. 7. Neque Ecclesia sola miracula considerat ad sanctitatem alicujus probandam, sed proprie vitam et mores, quibus si miracula jungantur, sunt magnum signum probitatis vitæ. Nam, licet Deus secreto consilio interdum per hominem hypocritam miraculum faciat, vel extraordinarium beneficium concedat, id rarum est; ordinarie vero non nisi per justos et bonos talia signa operatur, et ideo, quando vita non discordat, non solum vitam bonam, sed etiam excellentem gradum sanctitatis indicant, præsertim si frequentia sint, et aliunde nullum indicium deceptionis, aut simulationis conjunctum habeant.

12. *Amplius idem Anastasius explicat. —* Unde ulterius addit allegatus Pater, quando contingit signum fieri, aut beneficium sanitatis, vel aliud simile extraordinario modo per hominem peccatorem obtineri, tunc fidem potius ejus qui accedit, quam ejus ad quem accedit, signum operari, ideoque accurate discernendum esse, et ex aliis indiciis observandum cui sit miraculum attribuendum. Et simile est, quod sæpe miraculum fit ad confirmandam sanctitatem operantis, et tunc non fiet ab homine peccatore, quia Deus non præ-

bet testimonium falsitati: aliquando vero fit ad confirmationem fidei et doctrinæ, et tunc nunquam quidem fiet in confirmationem falsæ doctrinæ: fieri tamen poterit ab homine peccatore, quia tunc non operatur ad ostensionem suæ justitiæ, sed ut minister verbi ad confirmationem ejus, sicut de Juda dicebamus. Denique advertit, quando signa fiunt ab homine infideli vel hæretico, ordinarie, ac fere semper, non esse vera, sed apparentia, vel talia quæ naturali virtute dæmonum fieri possunt, ut variis exemplis Anastasius confirmat. Quod non solum non derogat firmitati fidei, sed potius ad ejus probationem et solidiorem confirmationem a Deo permittuntur. Ideoque nunquam talia sunt vel apparent, quin, si attentam mente et recta fide considerentur, cum omnibus circumstantiis quibus fieri solent, eorum falsitas et deceptio percipi possit, ut in signis Magorum Ægypti videre licet. De qua re videri etiam possunt quæ in secundo tomo tertiæ partis, disput. 31, sect. 2, tractavi.

13. *Propria solum justorum est gratia gratum faciens. —* Superest dicendum de altera parte assignatæ differentiæ, nimirum, quod gratia gratum faciens propria sit justorum; quod ex terminis videtur manifestum, quia formalis effectus non separatur a forma; sed gratia dicitur gratum faciens, quia formaliter reddit hominem gratum Deo, quod est esse justum: ergo hæc gratia est ita propria justorum, ut extra illos reperiri non possit. Ut hoc autem explicetur, et in vero sensu accipiatur, objicitur contra illud, quia sequitur multas esse gratias quæ non sunt gratis datæ, nec gratum facientes, quod est contra sufficientiam prædictæ divisionis. Sequela probatur, quia fides et spes mortuæ, sunt quædam gratiæ, et non sunt gratis datæ, quia dantur singulis ad eorum utilitatem, et non tantum aliorum: nec etiam sunt gratum facientes, quia sunt in peccatoribus: ergo vel gratia gratum faciens non est propria justorum, vel divisio adæquata non est. Idemque argumentum sumi potest ex omnibus donis gratiæ, quæ non ad communem utilitatem, sed propriam et privatam singulis peccatoribus conferuntur.

14. *Tria docet Sotus, quibus haud esse adæquatam superiorem divisionem significat. —* Ad hoc, qui gratiam gratum facientem ad habituales gratias sanctificantem contrahunt, cum alias etiam dicant, gratiam gratis datam, esse illam quæ ad aliorum utilitatem datur, necesse est ut fateantur divisionem non esse

adæquatam. Unde Soto, lib. 2 de Natura et gratia, cap. 3, in principio, tria in hoc puncto dicit. Primum est, unam esse specialem gratiam, quæ ab effectu denominatur gratum faciens, quia nos formaliter reddit Deo gratos, reliquas vero retinere genericum nomen gratiæ gratis datæ. Secundum est, gratias gratis datas, quæ distinguuntur a gratum faciente, esse illas, quæ ad aliorum utilitatem dantur, possuntque esse in malis hominibus. Tertium est, concursus gratiæ, vel subsidia gratiæ prævenientis, licet inter gratias gratis datas connumerentur, habere tamen peculiare nomen auxilii specialis, seu gratuiti. In quo significat, si gratia gratis data in sua proprietate, et ut adæquata illi fini communis utilitatis sumatur, divisionem non esse adæquatam, sed addendum esse tertium membrum auxilii specialis. Sed hoc non placet; tum quia D. Thomas illam divisionem nobis tradidit ut adæquatam, distinguendo membra per oppositionem contradictoriam, inter quæ medium non datur, qualia sunt, gratum facere, vel non facere, supposita generica ratione doni gratuiti. Idemque est, si distinguantur per positivos fines utilitatis propriæ, vel aliorum, quia inter hos etiam fines non est facile medium invenire, cum non detur gratiæ donum propter nullius utilitatem: tum etiam quia alias, neque addito illo membro auxilii specialis, solvitur difficultas tacta de fide et spe mortuis. Præterquam quod ipsum auxilium speciale commune est utrique gratiæ: nam interdum datur ad opera gratiæ gratis datæ, interdum vero ad opera gratiæ gratum facientis, ut per se constat.

15. *Solutio: omnia donata in ordine ad propriam justificationem sub gratia sanctificante veniunt.* — Dico ergo gratiam gratum facientem, ut est membrum adæquatam illius divisionis, non coartari ad solam formam perfecte justificantem animam, et excludentem statum peccati mortalis, sed includere omnia dona gratiæ, quæ homini in ordine ad propriam sanctificationem conferuntur: hanc enim Concilia Milevitan., Arausican. et Tridentinum, necnon etiam Augustinus et alii Patres gratiam sanctificantem, seu sanctificationis vel justificationis appellant; eadem autem est gratia gratum faciens, quæ sanctificans seu justificans: ergo gratia gratum faciens omnia illa complectitur. Et hoc probat ratio facta de adæquata oppositione membrorum dictæ divisionis, ex eo quod gratia in propriam vel aliorum utilitatem datur seu recipitur, alte-

rum enim horum in omni dono gratiæ reperitur, ut notum est. Ad difficultatem autem propositam respondetur, cum gratia gratum faciens dicitur esse propria justorum, aut non posse simul esse cum peccato mortali, intelligendam esse differentiam, vel de utraque gratia collective sumpta, aut comparando maximum, ad maximum utriusque membri, non vero applicando differentiam ad singulas gratias utriusque ordinis, vel denique intelligendam esse hanc proprietatem gratiæ gratum facientis cum proportionem accommodatam. Itaque omnes gratiæ gratis datæ tales sunt, ut etiam summa et perfectissima illarum possit esse in homine peccatore: gratia autem gratum faciens, vel tota collective sumpta, vel id quod est supremum et maximum in illa, non potest esse in peccatore, ut patet, saltem de charitate et habituali gratia (loquimur enim ex natura rei, quidquid de absoluta potentia sit), quamvis necessarium non sit, ut singulæ gratiæ sub hoc membro contentæ repugnent cum peccato, et ita cessat objectio facta. Addimus vero etiam in hoc esse differentiam, quod gratiæ gratis datæ sicut omnes non perficiunt justificationem, ita singulæ non inchoant vel promovent illam, nec propter hunc finem dantur; dona vero gratiæ gratum facientis, sicut perfectam justitiam conferunt, si sint consummata, ita singulæ aliquo modo inchoant justitiam, et ita non sunt, nisi in homine, vel simpliciter justo, vel habente aliquod justitiæ fundamentum, vel initium: et ita fides secundum se est donum gratiæ gratum facientis, quia est fundamentum justitiæ: imo et vocatio ad eundem ordinem gratiæ pertinet, quia est exordium justitiæ, et sic de cæteris.

16. *Tertia differentia non necessaria.* — Atque ex his facile potest ferri iudicium de aliis differentiis quæ inter hæc membra solent assignari. Tertia est, quod gratia gratum faciens datur per modum habitus, seu qualitatis permanentis, gratia vero gratis data per modum actus, seu motionis transeuntis; quæ differentia tribuitur divo Thomæ in locis statim citandis. Verumtamen difficile est differentiam illam accommodare; nam si utrumque membrum sumatur distributive, seu exclusive, falsum vel incertum invenitur: si vero sumatur indefinite seu permissive, utrumque erit verum, nulla tamen erit differentia. Utrumque breviter declaro, quia de gratia gratum faciente sumpta, per autonomasiam, pro forma gratiæ justificantis, verum est esse permanentem per

modum habitus, et hoc est quod docet D. Thomas 1. 2, quæstion. 110, articulo 2 et 3. Non est autem verum quod omne donum gratiæ sanctificantis sit habitus; nam etiam actualia auxilia et eorum actus sunt gratiæ suo modo gratum facientes, saltem inchoative, seu dispositive, ut jam declaravi. E contrario vero communiter receptum est aliquas gratias gratis datas non infundi per modum habitus, ut de prophetia et operatione virtutum testatur divus Thomas 2. 2., quæst. 171, art. 2, et quæst. 178, art. 2, ad primum; quod vero nulla illarum sit habitus, non est certum; imo contrarium fortasse est probabilius, ut ex capite sequenti patebit. Quapropter incerta est hæc differentia, et non necessaria.

17. *Quarta differentia non placet.*—Quarta differentia assignatur, quia gratia gratum faciens unius tantum est rationis seu speciei; gratiæ autem gratis datæ plures sunt. In qua differentia hæc posterior pars certa est ex Paulo 1 Corinth., decimo secundo, et capite sequenti declarabitur. Prior autem pars licet a multis scholasticis, etiam antiquis, supra allegatis asseratur, supponit tamen gratiam gratum facientem, ut est membrum illius divisionis, solum accipi pro habituali gratia sanctificante, quod nos non admittimus; et ideo non putamus differentiam hanc, eo modo quo assignatur, esse necessariam. Nam etiam sub gratia gratum faciente includuntur plura dona specie distincta, quæ capit. 6 recensebimus, et pro loci opportunitate breviter explicabimus. Solum in hoc potest assignari discrimen, quod gratiæ gratis datæ ita sunt inter se diversæ, ut neque sint inter se connexæ, neque una ad alteram ordinetur, ut patet de prophetia, et operatione miraculorum, et in cæteris fere est eadem ratio; nam licet omnes ad fidem aliquo modo ordinentur, non tamen inter se, quia una non est propter aliam, per se loquendo. At vero dona gratiæ gratum facientis aliquam connexionem vel habitudinem inter se observant: nam imprimis omnia respiciunt gratiam illam, quæ per autonomiam dicta est gratum faciens, estque forma quedam simplex reddens animam Deo gratam et acceptam. Nam omnes aliæ gratiæ illius ordinis, vel sunt aliquales dispositiones ad illam gratiam, vel sunt quasi potentiæ vel operationes ejus, aut auxilia, vel concursus illi debiti, connaturalitatis debito, et ita secundum habitudinem omnes illæ gratiæ una dici possunt, non tamen essentia et specie, ut postea late videbimus.

18. *Quinta differentia: altioris ordinis est sanctificans gratia, quam gratis data.*—Denique hinc potest facile assignari et explicari quinta differentia, quia gratia gratum faciens altioris ordinis et perfectionis est, quam gratis data. Ita docet D. Thomas dicta quæstion. 111, art. 5, et optime probat ex Paulo 1 Corinth. 12, ubi, postquam de gratiis gratis datis locutus fuerat, subjungit: *Adhuc excellentiorem viam vobis demonstro*, utique viam charitatis, quæ est gratum faciens, de qua statim cap. 13 sermonem inchoat. Et idem sentit August. dict. quæst. 79, in l. 83 Quæstionum, ubi dicit non omnibus justis fidelibus concedi gratias gratis datas, ne in errorem, quem perniciosissimum vocat, inducantur, existimantes *in talibus factis majora bona esse, quam in operibus justitiæ, quibus æterna vita comparatur*; et subjungit: *Propterea Dominus prohibet hinc gaudere discipulos*, cum ait Luc. 10: *In hoc nolite gaudere, quoniam spiritus subjiciuntur vobis, sed in hoc gaudete, quoniam nomina vestra scripta sunt in cælis*; ubi etiam indicat rationem ex fine sumptam, quam D. Thomas confirmat; quia gratia gratum faciens immediate nos conjungit ipsi summo bono et fini ultimo, quod non præstat gratia gratis data: ergo illa est nobilior. Item illa est major participatio divinitatis, juxta illud 2 Petr. 1: *Magna et pretiosa nobis promissa donavit*, etc. Denique secundum rectum ordinem charitatis, magis tenemur amare et procurare gratiam gratum facientem, quam gratis datam; ergo signum est esse meliorem. Dices: gratiæ gratis datæ ordinantur ad bonum commune, quod est divinius quam proprium ad quod ordinatur gratia gratum faciens. Respondet optime D. Thomas gratiam gratum facientem immediatius ordinari ad ipsum bonum per essentiam, quod est Deus, eique immediate homines conjungere, et inde habere majorem perfectionem.

19. *Dubitatur an hoc sit intelligendum conferendo gratias gratis datas cum gratiis gratum facientibus.*—Sed quæret aliquis an hoc intelligendum sit comparando has gratias solum ex genere suo, vel etiam comparando singulas unius ordinis ad omnes alterius ordinis. Nam in priori sensu resolutio posita clara est et indubitata, quia id quod perfectissimum est in ordine gratiæ gratum facientis, sine dubio est perfectius et melius quam omnis gratia gratis data, quantumvis in illo ordine perfecta cogitetur. Nam virtus charitatis est major omnibus, ut convincit testimonium Pauli, et

de gratia per se ac formaliter sanctificante idem probat testimonium Petri et ratio facta; et hoc satis est, ut gratia gratum faciens dicatur ex suo genere perfectior. At vero si comparatio fiat inter singula, videtur res esse dubia, quia non videtur major fides quam prophetia, quoad internam cognitionem: imo si prophetia sit per lumen supernaturale evidens, videtur perfectior, quia excedit in claritate, et in certitudine non est minus perfecta; unde si sit obscura, saltem erit æqualis, vel fortasse in essentia non distincta a fide. Imo inter ipsas gratias gratis datas numeratur fides, quæ videtur aliquam perfectionem addere communi fidei, quæ sub gratia gratum faciente continetur. Item suscitatio mortui esse potest opus gratiæ gratis datæ, et tamen videtur esse perfectius quam multæ operationes vel motiones gratiæ gratum facientis.

20. *Diluitur, quia in genere moris semper sanctificans præcellit; item in physico, quidquid de uno vel altero actu sit.* — Dicendum autem videtur hanc ipsam comparisonem posse fieri, vel in perfectione pertinente ad genus moris, vel tantum in genere entis. Priori modo, omnia et singula dona gratiæ gratum facientis meliora sunt, quam opera gratiæ gratis datæ secundum se spectata, quantumvis in suo ordine magna videantur. Probatur ratione facta, quia dona gratiæ gratum facientis de se et ex intentione dantis referuntur ad uniendam animam cum Deo, quod est optimum in genere moris; gratiæ autem gratis datæ de se non hoc conferunt: imo si interdum habent aliquam perfectionem moralem, est in quantum ab aliqua virtute vel actione gratiæ gratum facientis procedunt, vel imperantur. Declaratur etiam in illa comparatione fidei et prophetiæ; nam si prophetia sit evidens, ut sic, non habet assensum liberum, sed necessarium, et propterea in genere moris melior est fides, per quam libere captivatur intellectus in obsequium Christi. Si vero cognitio prophetica sit obscura, assensus ejus erit voluntarius, et ex eo capite habet moralem perfectionem a pia voluntatis affectione, quæ ad ordinem gratiæ gratum facientis pertinet. Causa autem exterior prophetiæ propter Ecclesiæ utilitatem (idemque est de sermone scientiæ, sapientiæ, etc.) in tantum habet moralem perfectionem, in quantum ex charitate imperatur, vel alia virtute morali religionis, vel misericordiæ, etc. Et ita, in genere moris, in summi actu gratia gratum faciens semper habet primatum. Si vero comparatio præcise fiat in

genere physico, aut entis, sic, licet gratia gratum faciens ex genere excedat, non est inconueniens quod aliquis actus gratiæ gratis datæ sit perfectior, quam aliquis actus gratiæ gratum facientis; ut, actus evidens prophetiæ, quam actus obscurus fidei, vel quidpiam simile; nihil enim occurrit cur hoc repugnet, et ratio facta id confirmat.

CAPUT V.

QUOT SINT GRATIÆ GRATIS DATÆ, ET QUID UNÆQUEQUE EARUM SIT?

1. *Intentio.* — De his gratiis non est iterum a nobis in discursu hujus materiæ tractandum, et ideo visum est operæ pretium aliquam earum notitiam legentibus hoc loco tribuere, quasdam earum, quæ faciliores sunt, integre declarando; alias vero, quæ longiores requirunt disputationes, quantum ad usum et cognitionem earum fuerit opportunum, breviter explicando, magis exactam illarum cognitionem in alia loca Theologiæ, ad quæ proprie pertinent, remittendo. D. Thomas ergo, in dicta quæst. 111, art. 4, novem gratias gratis datas ex Apostolo colligit 1 Corint. 12, in illis verbis: *Alii per spiritum datur sermo sapientiæ, alii sermo scientiæ secundum eundem spiritum, alii fides in eodem spiritu, alii gratia sanctorum, alii operatio virtutum, alii prophetia, alii discretio spirituum, alii genera linguarum, alii interpretatio sermonum. Hac autem operatur unus atque idem spiritus, dividens singulis prout vult.*

2. *Prima sententia de sermone sapientiæ, et scientiæ.*—Prima itaque gratia vocatur *sermo sapientiæ*, secunda, *sermo scientiæ*, de quibus in particulari tractat D. Thomas 2. 2, quæst. 177. Et imprimis potest de illis quæri an immediate versentur circa cognitionem, vel circa sermonem? Prima sententia utramque refert ad cognitionem. Ita videtur D. Thomas interpretari has gratias in 1. 2, dicta quæst. 111, art. 4, ubi per sapientiam intelligit cognitionem divinorum, conclusionem ex principiis eliciendo: per scientiam vero cognitionem eorundem per effectus, exempla, etc. Et in assertione consentit Ambrosius ibi, licet aliter explicet singula membra: nam per sapientiam intelligit prudentiam, *Non ex litteris, sed ex coruscatione Spiritus Sancti, ut cor habeat illuminatum et prudens, et discernat quæ vitanda sunt, quæ sequenda.* Sermonem autem scientiæ dicit esse scientiam

rerum divinarum. Nec videtur ab hac sententia alienus August., lib. 13 Confess., cap. 18, dum ita exponit: *Alii datur sermo sapientiæ, tanquam luminare majus propter eos qui perspicuæ veritatis luce delectantur. Alii autem sermo scientiæ, tanquam luminare minus; et infra: Sermo scientiæ, qua continentur omnia sacramenta, quæ variantur temporibus, tanquam luna, et ceteræ notitiæ donorum, quantum differunt ab illo candore sapientiæ, quo gaudet prædictus dies; ubi aliter quidem explicat sapientiam quam Ambrosius; in hoc vero convenit cum illo, quod has gratias ad cognitionem refert. At vero, juxta hanc sententiam, hæc duo non pertinent ad gratias gratis datas, sed magis ad dona Spiritus Sancti, quæ sunt gratiæ gratum facientes, ut postea videbimus: unde August., in lib. 12, 13 et 14 de Trinitate, nihil fere distinguit inter sapientiam et scientiam, prout inter dona Spiritus Sancti et inter gratias gratis datas numerantur.*

3. *Secunda sententia.* — Secunda sententia est Chrysostomi, qui, homilia nona in 1 ad Corinthios, scientiam videtur referre ad solam cognitionem mysteriorum fidei, quam communiter habent fideles, *qui non possunt docere, facile aliis enuntiare, quæ sciunt.* Sapientiam vero addere peritiam docendi, qualem Paulus, Joannes et alii Apostoli habuerunt, et ita pertinere proprie ad sermonem, licet etiam in mente perfectiorem cognitionem supponat. Unde Theophyl. ibi sequens Chrysostomum, ait: *Sapientia namque docet, perspicuitas quædam existens, quæ operta recludit, obscuraque clara reddit.* Theodoretus autem eandem sententiam sequens utramque hanc gratiam in cognitione ipsa supernaturali ponit, quæ tunc vocatur scientia, quando ad prædicandum aliis non sufficit: tunc vero sapientia, quando potens est ad docendum alios, concionandum, etc. Et in eadem sententia est Oecumenius. Verumtamen in hoc etiam deficit hæc sententia a nostro instituto, quia juxta illam sermo scientiæ non pertinebit ad gratias gratis datas: quia non dabitur ad aliorum utilitatem, imo nec distinguetur a fide, quia scientia divinorum, quam communiter habent fideles idiotæ, non est nisi cognitio fidei.

4. *Tertia sententia.* Est ergo tertia sententia D. Thomæ in 2. 2, ubi supra, qui has gratias per se primo dicit dari ad prædicanda et docenda mysteria fidei, unde utramque sub una generali ratione comprehendit, quam vo-

cat gratiam sermonis, per quam *Deus dat verbum evangelizantibus virtute multa*, Psalm. 67. Et videtur hæc expositio imprimis valde consentanea verbis Pauli; non enim dixit: *Alii datur sapientia, alii scientia*; sed *Alii sermo sapientiæ, et sermo scientiæ*, ubi juxta proprietatem verborum, non sapientiam vel scientiam, quæ in cognitione consistunt, sed sermonem earum vocat gratiam, quando fit ex speciali dono Spiritus Sancti, et cum de utraque eodem modo loquatur, non est cur una ad loquelam, alia ad cognitionem referatur. Unde Hieronymus ibi: *Sermo (inquit) sapientiæ est, sapienter, apte, atque rationaliter loqui*; et infra: *Qui ex dono habet sapientiæ, sine suo conatu loquitur et labore*, etc. Et infra de sermone scientiæ ait: *Ut sciat legis mysteria explanare.* Secundo, est optima ratio divi Thomæ, quia gratiæ gratis datæ dantur ad aliorum utilitatem; unus autem homo prodest aliis in spiritualibus medio sermone, qui ut sit efficax ad instruendum, delectandum et movendum hominem, necessarium est peculiare auxilium Spiritus Sancti, cujus divinum verbum est instrumentum: ergo merito inter gratias gratis datas ponitur gratia sermonis, utique ad convenienter et apte loquendum de divinis ad aliorum utilitatem. Quare eandem expositionem Anselmus primo loco ponit, licet alias adjungat. Et eandem sequitur ibi Salmeron, Cajetanus et alii. Potest tamen hæc posterior D. Thomæ sententia ita cum priori conciliari, ut, quia humana locutio non fit sine conceptione mentis, per has gratias intelligatur etiam cognitio mentis dirigi, quantum necesse est ad convenientem sermonem sapientiæ et scientiæ, ut statim amplius explicabitur.

5. *Quæ diversitas sit inter prædictas duas gratias.* — Ulterius enim interrogari potest quomodo illæ duæ gratiæ differant; nam D. Thomas in 1. 2, ubi supra, nullam distinctionem declarat, imo de illis tanquam de una gratia sermonis loqui videtur. Ipsa tamen verba Pauli cogunt, ut distinctionem aliquam in illis cognoscamus, juxta sententiam Augustini, libro duodecimo de Trinitate, capite decimo quarto, dicentis: *Ubi Paulus dixit, Alii quidem per Spiritum datur sermo sapientiæ, alii sermo scientiæ secundum eundem Spiritum, hæc utique duo sine dubitatione distinguit, licet non ibi explicet quid intersit, et unde possit utrumque dignosci.* Quod iterum repetit libr. 13, cap. 19, et libr. 14, cap. 1. Hæc vero distinctio inter has gratias, ut ad sermo-

nem spectant, supponit distinctionem donorum scientiæ et sapientiæ, de quibus postea in libro 2 et 6 dicendum est. Nam sermo sapientiæ vocatur sermo aptus ad explicandam mentis sapientiam, sermo autem scientiæ erit aptus ad explicandam mentis scientiam.

6. *Amplior expeditio.* — Unde, si sapientia et scientia mentis distinguantur, tanquam scientia æternorum et temporalium, vel tanquam cognitio per æternas causas, seu propria fidei principia, et per effectus, exempla, et alia similia inferiora, seu temporalia media; sermo etiam sapientiæ dicetur specialis favor Spiritus Sancti, quo dirigit linguam hominis ad explicanda altiora, seu diviniora mysteria fidei; scientiæ autem sermo, quo lingua dirigitur ad explicanda inferiora et temporalia mysteria. Vel etiam sermo sapientiæ et scientiæ dici possunt auxilia, quibus lingua vel calamus Doctoris Ecclesiæ a Spiritu Sancto specialiter gubernatur, ita ut illi occurrant verba apta ad explicanda eadem mysteria per sua propria principia, et rationes divinas, vel per exempla et effectus, etc. Et fortasse ob hanc causam divus Thomas, 1. 2, has gratias in ipsa cognitione declaravit et distinxit, quia inde tanquam ex radice habent distinctionem suam, neque sermo ipse dirigi potest, nisi media cognitione. Sed in hoc est diversitas, quod hæc directio, ut ad gratiam gratis datam pertinet, licet immediate versetur circa mentem, semper id est in ordine ad sermonem, quia per illas gratias nec datur, nec per se intenditur, ut ille cui talis gratia datur, doctior aut sapientior fiat, sed ut ea quæ scit vel sapit ita concipiat ut convenienter ad aliorum utilitatem illa exprimere valeat. Possent etiam istæ due gratiæ distingui ad modum doctrinæ sacræ speculativæ et affectivæ, ita ut gratia sermonis scientiæ sit auxilium ad recte docendam doctrinam fidei, illuminando tantum intellectum: sermo autem sapientiæ sit auxilium ad docendum movendo affectum.

7. *Quomodo dentur hæ gratiæ.* — *Nostra opinio.* — Tertio, inquiri potest an hæ gratiæ transiunt tantum dentur, vel permanenter, per modum effectus. Quidam dicunt esse habitus, sine ulla probatione, sed quia videntur supponere has gratias in cognitione consistere, et ita non videntur illas distinguere a sapientia et scientia, quæ sunt dona Spiritus Sancti. Nos vero supponimus ita ab illis distingui, sicut gratias gratis datas a gratum facientibus. Deinde supponimus dari per se primo propter convenientem usum locutionis et sermonis:

unde inferimus non dari per habitus, sed per actualem Spiritus Sancti motionem. Quod declaro per illa verba Sapientis, Proverb. 16: *Hominis est animam præparare, et Domini gubernare linguam*; quorum simplex et literalis sensus (licet interdum Augustinus aliter exponat) est, hominem posse apud se disponere, cogitare, ac præparare quæ locuturus est, non tamen id satis esse ut apte et convenienter loquatur, nisi Dominus specialiter linguam dirigat, quia ejus est linguam gubernare, vel, ut Hebræa habent, quia a Domino est responsio linguæ, id est, quia Deus suo auxilio facit, ut sermo apte menti et præparationi hominis respondeat. Hæc autem gubernatio linguæ non potest homini tribui per habitualia dona, quia totum id, quod est in habitu, vel memoria, pertinet ad illam priorem partem, *hominis est præparare animam*, quæ non sufficit ut lingua et actualis sermo apte respondeat, nisi Dominus dirigat illam; hæc ergo directio est per actualem Dei motionem, vel directe excitando mentem, et faciendo ut verba apta occurrant, et modi loquendi congruentes, et efficaces, vel auferendo impedimenta quæ mentem distrahere, aut perturbare possent. Quod si hoc divinum regimen etiam in ordinariis sermonibus humanis, vel semper, vel frequenter necessarium est, multo certe magis in sermonibus divinis, et in eis præcipue quæ ad aliorum spiritualem fructum ordinantur. Gratia ergo gratis data, ad sermonem pertinens, per quam Deus gubernat linguam Doctoris, vel prædicatoris Evangelii, est gratia actualis.

8. *Objectio.* — *Dilutio.* — Dices: hæc gratia actualis supponit habituales scientiam vel sapientiam illius doctrinæ, quæ per sermonem scientiæ vel sapientiæ tradenda est. Respondeo illam scientiam vel sapientiam interdum esse posse acquisitam ex principiis fidei cum humana diligentia, sicut nunc acquiritur scholastica theologia, vel positiva. Et quamvis hæc non acquiratur sine speciali auxilio gratiæ, illud vel reducitur ad auxilium gratiæ gratum facientis, quatenus de se est auxilium ad quandam bonam et piam operationem, ut in lib. 1 videbimus; vel, si detur ad proficiendum in illa doctrina in ordine ad aliorum utilitatem, erit gratia gratis data, et ad fidem reducetur, ut statim dicam. Interdum potest illa scientia et sapientia consistere in donis Spiritus Sancti valde perfectis, quæ in se sunt dona gratiæ gratum facientis, usus autem illorum ad aliorum utilitatem potest ad gra-

tias gratis datas pertinere. Denique potest illa esse aliqua scientia per accidens infusa, quæ si ad aliorum utilitatem detur, reducetur ad fidem, ut statim dicam. Quamvis ergo gratiæ sermonis supponant aliquem habitum gratiæ, non videntur formaliter conferri per habitus, sed per actualem motionem et directionem Spiritus Sancti. Unde hæc gratiæ non sunt supernaturales in substantia sua, sed in modo, ut indicavit D. Thomas dicta quæst. 177, artic. 1, ad 1, ubi ait per has gratias Spiritum Sanctum perfectiori modo facere, quod ars posset naturaliter operari.

9. *Placitum primum de tertia gratia, fides.* — Tertia gratia gratis data a Paulo numerata est fides; quam idem D. Thomas variis modis explicare visus est. Nam in prima secundæ, quæst. 111, art. 4, nihil aliud per fidem intelligit, nisi certissimum assensum principiorum fidei catholicæ, quem in Evangelico Doctore supponi oportet. Quam interpretationem sequitur Lyra, 1 Corinth. 12, et juxta illam hæc gratia non est distincta a fide infusa et catholica; nam tota certitudo fidei, quantumcumque magna cogitetur, ad eandem virtutem fidei spectat: hoc autem videtur inconveniens, quia hæc fides donum est gratiæ gratum facientis, ut capite præcedenti declaravi. Dici vero potest non esse inconveniens aliquem gradum perfectionis simul esse gratiam gratum facientem, et gratis datam, diversis respectibus: vel melius fortasse dicetur illam certitudinem non esse in formali assensu credendi, sed in alia cognitione antecedente, vel comitante ipsum, ut mox explicabo.

10. *Secundum placitum.* — At vero idem S. Doctor, in secunda secundæ, quæst. 178, art. 1, ad 5, videtur hanc fidem exponere de fide miraculorum, quæ fuit sententia Chrysostomi et Græcorum, 1 Corinth. 12, et habetur in Commentariis Hieronymo et Ambrosio attributis, et eam sequitur Cajetan., et Salmeron ibi, et Vasquez prima secundæ, in notat. ad dictum artic. Quia de eadem fide videtur loqui Paulus cap. 13, cum ait: *Si habuero omnem fidem, ita ut montes transferam, etc.* Item quia hæc fides distincta est a fide dogmatum, per quam justificamur, ut infra tractando de justificatione videbimus: ergo non pertinet ad gratiam gratum facientem: ergo ad gratis datam. Responderi vero potest, illam fidem esse quidem gratiam gratis datam, comprehendere autem sub operatione virtutum et sanctorum: unde huic expositioni obstare

videtur quod juxta illam, fides non fuisset distinguenda ab operatione virtutis. Ad hoc vero respondet tacite D. Thomas supra, quod sicut sermo scientiæ et sapientiæ distinguuntur a fide, quia, licet ab illa procedant, sunt gratiæ externæ ad propagationem fidei internæ ordinatæ: ita operatio virtutum ponitur ut distincta gratia exterior, quia, licet a fide procedat secundum quamdam rationem et perfectionem ejus, aliunde ad illius confirmationem ordinatur, et propriam gratiam requirit, quæ licet per fidem impetretur, diversum auxilium est, et ideo ponitur specialis gratia. Imo talis fides abstrahit ab operatione signi externi, nam per illam impetrari possunt alia extraordinaria dona, etiam interna.

11. *Tertium placitum.* — *Quartum.* — Alii per fidem intelligunt fidei constantiam. Ita dicit Cajetanus in 2. 2, loco citato circa dictam solutionem, ad 5 D. Thomæ quem interpretatur. Et fuit expositio Glossæ interlinearis, et sequitur Anselmus ibi, qui clarius exponit quid per constantiam fidei intelligat, dicens: *Alii fides, id est, constantia fidei, ut quamvis alios prædicando nesciat instruere, tamen recte, et firmiter credat, nulloque metu, vel pudore fidem suam ore confiteri omittat.* At enim hæc constantia fidei non ad gratias gratis datas, sed maxime ad gratum facientem pertinet, quia per se non ordinatur ad aliorum utilitatem, et ad propriam sanctitatem maxime necessaria est. Alii per fidem sermonem fidei exponunt, quæ fuit altera expositio glossæ interlinearis, et illam tertio loco posui, tom. 1, in 3 part., disp. 21, sect. 2, et explicari esse peculiare Spiritus Sancti donum, quo ministri Ecclesiæ, vel alii etiam fideles, qui apti non sunt ad publice docendum, vel prædicandum doctrinam fidei, juvantur ad instruendos alios in fide, doctrinam fidei simpliciter proponendo, et accommodate, ut ab ignorantibus etiam et rudibus percipi possit. Nam quod hic modus auxilii gratuiti possibilis sit, et Ecclesiæ utilis, non videtur dubium: potest ergo optime sub nomine fidei comprehendere; quamvis verum sit Paulum in hac tertia gratia non loqui de sermone fidei, ut in duabus prioribus, sed de fide. Nihil tamen vetat et in prioribus comprehendere, non solum sermonis directionem, sed etiam quidquid interius necessarium est ut sermo exterior dirigatur, et in hac tertia gratia sub fide intelligi quidquid ad illam simpliciter aliis tradendam, etiam in modo illam exterius proponendi et explicandi, utile est.

12. *Quintum.* — Præter hos quatuor modos explicandi hanc gratiam fidei, occurrunt duo alii, qui videntur probabiles, licet ab aliis auctoribus non tradantur. Unus est, ut per hanc fidei gratiam intelligamus non simplicem fidei assensum, vel aliquam intrinsecam, et quasi intensivam certitudinem ejus, sed quasi extensivam perfectionem cognitionis fidei quoad modum concipiendi, persuadendi, et defendendi doctrinam fidei. Nam hæc fidei perfectio nomine fidei vel plenitudinis fidei significari optime potest et intelligi, ut cum de Stephano Actorum 6 dicitur: *Elegerunt Stephanum virum plenum fide, et Spiritu Sancto*, etc. Estque hujusmodi instructio in fide Ecclesiae valde utilis; imo necessaria in ministris verbi Dei, et quamvis studio et diligentia humana acquiri possit, tamen illa potest parum prodesse, nisi speciali auxilio Spiritus Sancti juvetur, quod auxilium ad gratiam gratis datam pertinet. Et sæpe Spiritus Sanctus hanc perfectionem vel sine humano studio, vel ultra vires illius confert, interdum fortasse per modum habitus, sæpius vero juxta occurrentes occasiones per actualia auxilia. Quod frequentius contingit, quando ratio fidei reddenda est, vel sapienter ac erudite illam confiteri oportet, juxta promissionem Christi: *Cum autem tradent vos, nolite cogitare quomodo aut quid loquamini, non enim vos estis qui loquimini, sed spiritus Patris vestri, qui loquitur in vobis*, Matth. 10. Atque ad hunc sensum trahi potest sententia Glossæ et Anselmi, ut per hanc fidem intelligatur constantia in fidei confessione, ut non tantum intelligatur quoad moralem perfectionem (ut sic dicam) constanter et fortiter perseverandi in confessione fidei, sed quoad modum confitendi fidem cum singulari eruditione et doctrina imbibita in ipsa confessione fidei. Non oportet tamen limitare hanc gratiam hoc modo intellectam ad tempus seu occasionem confitendi fidem coram tyranno, optime enim ampliari potest ad omnem occasionem confitendi, vel proponendi fidem altiori modo, quoniam sine tali gratia posset homo id facere per eam doctrinam vel eruditionem, quam sua diligentia et industria posset acquirere, vel jam habet acquisitam. Hoc enim totum optime comprehenditur sub nomine fidei, ut dixi, et sæpe esse potest necessarium, ad Ecclesiam commodum, ut per specialem gratiam gratis datam conferatur.

13. *Sextum.* — Ultimo, explicari potest hæc gratia de fide particularium revelatio-

num, quæ personis aliquibus Ecclesiae privatim fiunt. Non est enim dubium quin tales revelationes sæpe fiant, ut nunc supponimus, et supponit Concilium Tridentinum, session. 6, capit. 12, et canon. 16; nec minus certum est, vel quoties fiunt, vel frequentius, propter aliquam communem Ecclesiae utilitatem fieri; pertinent ergo ad gratias gratis datas: ergo merito dici possunt ad gratiam fidei pertinere, cum tales revelationes ad aliquam fidem pertineant. Quam fidem theologi privatam vocant et multi illam a fide catholica secundum essentiam distinguunt: unde oportet ut inter gratias gratis datas comprehendatur. Et licet verius sit talem fidem, quoad ipsum habitum, qui est principium assentiendi rei sic revelatæ, et quoad assensum, non esse specie distinctam a fide catholica, nihilominus, ratione materiae et specialis revelationis, est quædam manifestatio Spiritus ad utilitatem, unde merito censi debet specialis gratia gratis data. Video dici posse talem fidem sub prophetia contineri; nihilominus tamen multis modis potest hæc fides a prophetia distingui, ut ex declaratione ipsius gratiæ prophetiæ constabit. Igitur omnes isti modi explicandi hanc gratiam fidei probabiles sunt, nam in omnibus illis considerari potest aliquid gratiæ specialis peculiari titulo ad fidem pertinens, et ad communem utilitatem per se primo ordinatum, et sub aliis gratiis gratis datis non comprehensum. An vero Paulus hæc omnia, vel quid illorum præcipue intenderit, incertum esse credimus.

14. *Fides hæc in actu consistit.*—Unde, si inquiratur an hæc gratia fidei sit habitus, vel auxilium, seu motio actualis et transiens, juxta varias explicationes traditas diversimode respondendum erit, ut lector facile ex dictis poterit intelligere. Absolute autem loquendo, videtur dicendum fidem, ut habet peculiarem rationem gratiæ gratis datæ, in actuali motione Spiritus Sancti consistere: nam licet fortasse habituale lumen fidei, vel habituales species, vel habitus aliquis scientiæ seu doctrinæ sacræ usu comparatus possit esse principium hujus actus fidei quoad substantiam, nihilominus talis actus non habet rationem gratiæ gratis datæ, nisi in quantum ex speciali motione Spiritus Sancti accipit aliquem peculiarem perfectionis modum, aut quia ex peculiari revelatione procedit, ut in ultima explicatione, vel quia cum singulari certitudine, fiducia, aut meliori modo concipiendi et proponendi res fidei exercetur, ut

in aliis explicationibus declaratum est. Quomodo vero aliqui habitus possint etiam inter gratias gratis datas numerari, et ad hanc reduci, dicam in sequentibus.

15. *Gratia sanitarum et operatio virtutum proponuntur sub gratia faciendi miracula a D. Thoma.* — *Convenientia et discrimen.* — Quarto loco ponit Paulus gratiam sanitarum, et in quinto operationem virtutum, quas duas sub gratias faciendi miracula comprehendit D. Thomas 2. 2, quæst. 178. Quia collatio sanitatis non pertinet ad gratiam, nisi quatenus aliquo modo virtutem naturalem superante fit: quia aliter facta neque est proprium opus Dei, neque ad confirmandam fidem potest esse efficax, cum etiam peritus medicus possit sanitatem efficere, et multo magis dæmon interdum possit veram sanitatem ita conferre, ut facta miraculose appareat, cum tamen miraculum non sit, quia per solam virtutem causarum naturalium, scientia et virtute dæmonis applicatarum, fiet. Vera igitur gratia sanitatis miraculose operatur sanitatem: ergo comprehenditur sub generali gratia faciendi miracula. Operatio autem virtutum, si in tota sua generalitate sumatur, idem est quod gratia miraculorum. Nam, ut ibi dicit D. Thomas, art. 1, ad 3, miracula dicuntur virtutes, quæ fiunt per virtutem superantem facultatem causarum naturalium: ergo operatio virtutum et miraculorum eadem est: ergo comprehendit sub se operationem miraculosam sanitatis. Duobus autem modis possunt considerari hæc opera: primo, ut sunt prodigia quædam, seu effectus supernaturales in modo quo fiunt; et hoc modo non distinguitur gratia sanitatis ab aliis miraculis formaliter, seu in communi ratione operis superantis naturam, sed materialiter in re effecta, vel secundum magis et minus in excessu naturalium facultatum. Secundo modo, considerari possunt in ratione signi, seu in utilitate quam habent ad confirmandam fidem: et in hoc gratia sanitarum hoc habet speciale, quod, præter operationis seu effectus admirationem, confert utilitatem recipientibus, et ex hac parte animum conciliat et affectum inducit, quod multum ad doctrinam suadendam iuvat.

16. *Obstaculum.* — *Respondetur tripliciter.* — Dices: etiam expulsio dæmonis est magnum beneficium et utilitas ejus a quo ejicitur, et resuscitatio mortui est multo majus bonum quam sanitas, et tamen hæc non separantur ab operatione virtutis, sed in eis maxime ponunt

exempla Oecumenius, Ambros., Anselm. et Hieronymus ibi. Veruntamen necesse non est exactam rationem in his omnibus servare, nam fortasse Paulus sine speciali mysterio illa enumeravit, quæ tunc occurrerunt, et ad rem conferebant, et sufficiebant, etiamsi potuissent aliis modis commemorari. Dici vero potest sub gratia sanitarum comprehendendi omnia beneficia corporalia, quibus homo a quacumque vexatione vel miseria corporis liberatur, et ita ibi comprehendendi etiam resuscitationem mortuorum, et expulsionem dæmonum: sub operatione autem virtutum indicari supplicia, vel nocumenta visibilia, quæ miraculose interdum operatur fidei magister, ut ad verbum Petri mortui sunt Ananias et Saphira, Actor. 5; et ad verbum Pauli excæcatus Elimas, Actor. 15, ut Chrysostomus et Græci ibi interpretantur. Verisimilius autem est gratiam sanitarum solum significare quod verbi proprietates præ se fert, curationes miraculosas a morbis corporis, sub operatione autem virtutum omnia alia opera miraculosa, quæ aliquo modo supernaturalia sint, et vel circa homines, vel circa res alias sensibiles fiant, Apostolum comprehendisse, solumque sanitatem ab aliis operibus distinxisse, et in propria specie (ut sic dicam) illam nominasse, quia et frequentior, et notior, magisque sensibilis existit.

17. *Alia discriminis ratio inter hæc.* — Potest item alia ratio reddi, quia gratia sanitarum interdum permanenter, et per modum habitus, solet aliquibus concedi, ut habet Ecclesiæ traditio et morale experimentum; operatio autem aliarum virtutum vel signorum non ita conceditur, sed transeunter in occurrentibus occasionibus, prout Deus vult. In qua differentia est advertendum, duobus modis posse intelligi has gratias dari per modum habitus seu permanenter: uno modo, physice, ac per se, quod tunc fieret quando daretur homini aliqua permanens qualitas, quæ esset principium per se sanationis, vel operationis miraculosæ; alio modo potest id intelligi tantum moraliter, seu ex decreto, ac stabili deputatione Dei. Non est ergo differentia illa priori modo intelligenda, quia neutra istarum gratiarum potest illo modo dari permanenter, ut D. Thomas dicto art. 1 docet, et in loco statim citando late disputatum a nobis est. Intelligitur ergo posteriori modo, quia Deus aliquibus concedit gratiam conferendi sanitatem, vel indefinite, vel in aliquibus specialibus morbis, ut decreverit, ad tactum illorum, vel aliam

similem actionem, sanitatem mirabiliter operari. Itaque licet virtutem intrinsicam non conferat, paratus est ad præbendum semper auxilium necessarium ad talem effectum: ad alia vero miracula facienda non solet esse ita paratus, nec in arbitrio hominis illa constituere. Non quia hoc repugnet, sed quia noluit Deus, neque necessarium reputavit hanc gratiam illo modo puris hominibus præbere. Dico autem *puris hominibus*, quia Christo, ut homini, seu humanitati ejus, etiam hoc modo data est permanenter operatio virtutum, quia libera sua voluntate poterat miracula operari, quoties opportunum judicaret, et ad hoc semper habebat paratum necessarium divinitatis concursum, etiamsi humanitati nulla esset qualitas permanens indita, quæ physicum principium esset miraculorum, ut in 1 tom. 3 part., disput. 3, sect. 2 et sequentibus late tractatum est.

18. *Objectio ex sacra Scriptura.*—Dices non tantum gratiam sanitarum, sed etiam miraculorum, communicatam esse permanenter, saltem posteriori modo supra declarato, Apostolis, et primis prædicatoribus fidei. Nam, Luc. 9, Christus Dominus, etiam ante mortem suam, convocatis duodecim Apostolis, dedit illis virtutem et potestatem super omnia dæmonia, et ut languores curarent; et Matth., cap. 10, addit dixisse Christum ad Apostolos: *Infirmos curate, mortuos suscite, leprosos mundate, dæmones ejicite, gratis accepistis, gratis date.* Ubi liberalis usus illius potestatis et gratiæ illis commendatur: ergo supponitur accepisse illos illam gratiam gratis datam permanenter, et suo arbitrio subjectam. Et hoc significavit Petrus, Actor. 3, cum dixit claudo: *Argentum et aurum non est mihi; quod autem habeo, hoc tibi do: in nomine Jesu Christi surge, et ambula.* Quæ verba plena sunt dominii, et permanentis potestatis. Item hæc potestas data videtur Moysi ad mirabilia facienda, Exod. 3 et 4, eodem permanenti modo; nam usus ejus positus fuit in ejus libera facultate, et ideo dixit ad illum Deus: *Vade, ut omnia ostensa, quæ posui in manu tua, facias coram Pharaone.*

19. *Responsio.*—Respondeo, negari non posse quin aliquo modo fuerit operatio virtutum posita in potestate et arbitrio Apostolorum: nam sicut Moysi data est ad stabilendam legem veterem, et educendum populum de Ægypto, majori ratione, excellentior ac major potestas faciendi miracula data est Apostolis ad fidem Evangelicam in mundum introdu-

cendam, et ideo de illis scriptum est Marc. ultim: *Euntes prædicaverunt ubique, Domino cooperante, et sermonem confirmante sequentibus signis.* Nihilominus tamen semper usus illius potestatis pendebat ex actuali motione prævia Spiritus sancti: non enim poterant Apostoli miracula facere pro arbitrio suo, sine ulla limitatione, sed quando judicabant miraculum fore opportunum, et conveniens ad utilitatem Ecclesiæ, et confirmationem fidei; ideoque non inter fideles, sed inter infideles miracula faciebant, ut nomine Augustini notatur in libro Quæst. novi Testament., quæst. 63. Unde, quoties faciendum erat miraculum, oportebat ut Spiritus Sanctus mentes eorum specialiter moveret ad judicandum miraculosum effectum expedire, ut dixit D. Thomas dicta quæst. 178, artic. 1, ad 1, tam generaliter, quam in particulari de Apostolis loquens. Hanc vero ipsam Spiritus Sancti motionem quasi ex certa lege et promissione habebant, quoties occasio illam postulabat.

20. *Enucleatur amplius, et cum alio discrimine.*—Hæc vero tam permanens gratia, et frequentia miraculorum, in principio Ecclesiæ fuit necessaria, postea vero cessavit, quia, confirmata fide, jam non est ita necessaria, licet in corpore Ecclesiæ suo modo permaneat, non quidem in determinatis personis, sed quibus talis actualis gratia conceditur, quando et quomodo Spiritus Sanctus vult, ut notavit Augustinus, libr. de Utilit. credend., cap. 16, et libr. de Vera relig., cap. 25, et libr. 1 Retract., cap. 13 et 14, et optime libr. 22 de Civitat., cap. 5 et 8; et D. Gregorius, homil. 29 in Evangel. In hoc autem ipso potest aliquod discrimen inter gratiam sanitarum et operationem virtutum agnosci, quia gratia sanitarum permanens per modum habitus usque nunc durare videtur in Ecclesia, et interdum communicari aliquibus certis personis, non autem potestas faciendi miracula, fortasse quia effectus illius gratiæ non solum animis, sed etiam corporibus utilis est, et ad multorum hominum fragilitatem sublevandam vel adjuvandam conveniens, quamvis hæc, quæ ad factum pertinent, ex libera Dei voluntate pendeant. Multa alia, quæ de hac operatione miraculorum desiderari poterant, in dicto 1 tom., in 3 part., disput. 31, a nobis fuisse tractata sunt; de fide autem miraculorum, quæ cum hac gratia vel coincidit, vel conjuncta est, dicemus aliqua, de justificatione tractantes, et plura, Deo dante, in tractatu de virtute fidei.

21. *Prophetia propriissime, proprie, et minus proprie accepta.* — Sexta gratia ab Apostolo posita, est prophetia, quæ est una ex potissimis et antiquissimis gratiis gratis datis, et qua Deus maxime usus est ad fidem suam stabiliendam. Disputatio autem de hac gratia latior est quam de cæteris, eamque tradit D. Thomas 2. 2, a quæst. 171 usque ad 175. Nos vero in tractatum prædictum de virtute fidei illam disputationem reservamus: prophetiam enim cum fide in scholastica doctrina conjungere soleo, tum quia multum cum illa convenit, et ad instar illius explicanda est; tum etiam quia fides ipsa per prophetiam maxime tradita et confirmata est. Nunc autem, ut hujus gratiæ notitia habeatur, nonnulla breviter advertemus. Primum, prophetiam hic proprie sumi pro cognitione per divinam revelationem habitam de rebus abditis et occultis, quæ naturaliter ab homine cognosci non possunt, ut sunt futura contingentia, et ea maxime quæ ex libera Dei aut hominis voluntate pendent. Solet enim vox *prophetiæ*, vel *prophetæ* latius in Scriptura sumi. Interdum enim prophetare idem est quod concionari, seu interpretari mysteria ad ædificationem fidei, ut 1 Corinth. 14. Aliquando vero prophetare, idem est quod divinas laudes in spiritu canere, quomodo multi intelligunt ea quæ de Saul inter Prophetas psallente narrantur, 1 Reg. 10 et 19. Propriissime vero prophetia est futurorum præcognitio, et aliquando extenditur ad præterita, quorum nec memoria nec certa signa extabant, et ad præsentia loco distantia et occulta, et ad internas cordium cogitationes: ita ut proprius propheta sit, qui divinitus cognoscit ea quæ longe distant a sensu et naturali cognitione hominum, et ea potest prædicere. Et de hac prophetia loquitur Paulus ex omnium sententia, et maxime de præcognitione futurorum, ut mox amplius explicabimus. Et ita intellexit hanc gratiam D. Thom. 1. 2, et 2. 2, locis allegatis, et super Paulum, ubi etiam expositores omnes.

22. *Apprehensio revelati et assensus intus illustratus, prophetiæ partes.* — Secundo, adverte ad hanc gratiam duo requiri: unum est apprehensio, seu conceptio rei quæ per prophetiam cognoscenda est; aliud est assensus, et judicium de veritate rei sic propositæ, seu apprehensæ. Ad primum necessaria est revelatio veritatis prophetandæ, quam necesse est fieri per aliquas species intelligibiles, et per locutionem internam, quæ in mente fiat, sive incipiat a sensibus, sine non. Ad secun-

dum vero, id est, ad assensum, necessarium est lumen internum, vel virtus aliqua quæ juvet intellectum ad præbendum assensum veritati revelatæ. Supponimus enim hunc assensum supernaturalem esse, quia excedit omnem naturalem rationem cognoscendi, et ideo per virtutem supernaturalem fieri necesse est. Utrumque igitur horum ad hanc gratiam necessarium est, quia posterius necessario pendet a priori, nemo enim potest judicium de re aliqua ferre, nisi illam, et rationem, seu medium assentiendi illi, sufficienter apprehendat: prius autem, licet separari possit a posteriori, ad hanc gratiam non sufficit, quia prophetia non consistit tantum in sola apprehensione, sed etiam cognitionem et judicium rei revelatæ requirit: et ideo neque Pharaon, Genes. 41, neque Nabuchodonosor, neque Balthazar, Daniel. 2, 4 et 5, veri prophetæ fuerunt, licet aliquam inchoationem prophetiæ habuerint, neque etiam Caiphæ, Joann. 11, dicens verba habentia sensum propheticum quem non intelligebat, propriam gratiam prophetiæ habuit, sed quemdam instinctum ejus, ut supra attigimus. Quæ est sententia Augustini, l. 12 Genes. ad litt., capite nono; Epiphani., contra hæres. 48; Gregorii, lib. 11 Moral., cap. 12; et D. Thomæ 2. 2, quæst. 171, art. 1 et sequentibus, et quæst. 173, articul. 3 et 4.

23. *Non est habitus propheticus.* — Vera sententia, quam de fide esse dicit Curiel, l. 2, controver. in 1. — Tertio loco, ex his potest breviter colligi quid sentiendum sit in dubio hujus loci proprio, an hæc gratia sit habitus, aut saltem sit permanens ad modum habitus, vel solum sit per modum transeuntis motionis. In quo vera et recepta sententia est, non dari per modum habitus nec permanenter, sed solum quamdiu durat actualis locutio, et motio Spiritus Sancti. Ita docet D. Thom. 2. 2, quæst. 171, art. 2; et late Abul. 1 Reg. 10, quæst. 5, et Matth. 23, quæst. 59; et Scholastici communiter, et aliqui eorum censent esse hanc sententiam de fide certam. Quia Scriptura sæpissime docet prophetam non habere vim prophetandi, neque cognitionem ad hoc sufficientem, nisi quando Spiritus Domini ei actu loquitur, et inspirat; ergo supponit non habere cognitionem propheticam quasi habitualement, quia cognitionem habitualement habet homo in manu sua, habitus enim utimur, cum volumus. Antecedens autem patet ex variis locis Scripturæ, in quibus docemur prophetas non semper potuisse

assequi veritatem, nec respondere ad interrogata, donec vel Deus illis loqueretur, vel ipsi consulerent Dominum, ut Exod. 33; libro 1 Reg., capit. 16; libro 2, capite 19; libro 4, capite 3; Daniel., 2 et 4, et in aliis locis. Propter quæ loca et similia, tradunt etiam sententiam hanc Hieronymus in capite 28 Jerem., et in 35 Ezechiel., et epistol. 123 ad Damas., quæstion. 3; et Gregorius, homil. 1 in Ezechiel. et libr. 2 Dialog. capite 21.

24. *Quatuor distinguenda.* — Ut autem, et certitudo hujus veritatis, et efficacia fundamenti ejus clarius innotescat, duo, quæ diximus esse ad prophetiam necessaria, distinguenda sunt, scilicet, locutio seu revelatio Dei, quæ in mente prophetæ fit per conceptus apprehensivos veritatis propositæ, et assensus, vel virtus assentiendi, seu lumen, quod ad assentiendum præbetur. Deinde oportet distinguere statum prophetæ, vel antequam revelationem habeat, vel postquam illam semel accepit. Idem loqui possumus, vel de eadem materia prophetiæ semel revelata, vel de aliis. Denique distinguere oportet de prophetia per cognitionem, et assensum obscurum et certum, vel per assensum non solum certum, sed etiam evidentem, saltem in attestante. His positis, aliquæ sunt assertiones certæ, et aliquæ esse possunt sub opinione.

25. *Purus homo non habuit propheticum habitum.* — Primo, certum est, nullum purum hominem habuisse cognitionem propheticam in habitu vel in manu sua, priusquam actualem revelationem et motionem acciperet, per inspirationem ac locutionem divinam. Hoc maxime affirmant Hieronymus et Gregor., et ex dictis Scripturis aperte habetur. Loquor autem de puro homine ad excipiendum Christum Dominum, qui ex vi unionis habuit etiam in via scientiam beatam et inditam, per quam cognovit omnes veritates revelabiles hominibus per prophetiam, et ita potuit ex propria habituali seu permanente scientia prophetari, nulla expectata revelatione, vel locutione divina. Et ita illum expresse excipit Hieronymus, de quo plura in dicto tom. 1, in 3 p., dep. 21, section. 1, diximus. Alii vero homines, cum non habeant connaturalem cognitionem rerum illarum circa quas propria prophetia versatur, non possunt inchoare propheticam cognitionem, nisi a revelatione et locutione divina. Unde, si qui forte in Scriptura vocantur prophete, priusquam actualement revelationem recipiant, non ita vocantur quia jam tales erant, sed, secundum anticipationem

et præordinationem divinam, quia jam a Deo ad tale munus designati sunt. Et hoc modo de Jeremia dicit Deus Jerem. 1: *Priusquam te formarem in utero novi te, et Prophetam in gentibus dedi te*, ut exponit D. Thom., dicta quæst. 171, art. 2, ad 2. Quando vero nobis non constat de tali præordinatione vel designatione divina, non vocatur aliquis propheta, donec incipiat Deus ad eum loqui: et sic de Samuel dicitur 1 Reg. 3: *Cognovit universus Israel, quod fidelis Samuel Propheta esset Domini, scilicet, quoniam revelatus fuerat Dominus Samueli*. Maxime vero dicebantur eo tempore aliqui Prophetæ, quasi permanenter in habitu, non quia locutionem Dei semper audirent, aut prophetiam semper actu reciperent, sed quia frequenter ad eos Deus loquebatur, et inde credebantur esse a Deo quasi ad illud munus deputati, quod insinuat in loco proxime allegato, cum additur: *Crevit autem Samuel, et Dominus erat cum eo*; et infra: *Et addidit Dominus, ut appareret Samueli in Silo*, etc.

26. *De fide est, nullum ad libitum et ad quodvis occultum cognoscendum prophetandi habitum accepisse.* — Secundo, est certum nullum Prophetam (Christum semper excipio) quantumvis insignem, et in statu vel munere prophetandi constitutum, et qui plures propheticas revelationes acceperit, ita recepisse in habitu donum prophetiæ, ut quamcumque rem occultam cognoscere, aut de illa suo arbitrio prophetare posset. Hanc etiam censeo de fide certam, quia evidenter colligitur ex Scriptura et Patribus allegatis, et quia nullus Prophetarum fuit, vel Apostolorum, qui non multa ignoraverit, præsertim cogitationes cordium, et futuros eventus, ex divina dispositione, vel libertate arbitrii pendentes. Ratio etiam est clara, quia res istæ quæ per prophetiam cognoscuntur, non sunt inter se connexæ, ut, revelata una, aliæ necessario revelentur, neque omnium præcognitio aut revelatio est singulis Prophetis necessaria; ergo talis cognitio habitualis non est cur omnibus vel alicui particulari Prophetæ conferatur.

27. *Tertium assertum.* — Tertio, dico maxime certum esse Prophetas non habuisse hanc habitualement vim prophetandi de quamcumque re occulta, quia, non obstante divina revelatione unius, vel aliquarum rerum occultarum, de aliis nullam habebant divinam locutionem, vel testificationem, et consequenter carebant propositione et apprehen-

sione objecti, a qua cognitio prophetica inchoanda est. Hoc probat ratio facta; ideo enim multa a Prophetis ignorabantur, quia nec naturaliter illa cognoscere poterant, neque illis revelabantur. Unde dixit Elisæus, 4 Reg. 4: *Dominus celavit a me, et non indicavit mihi*; et capit. 3, cum prius ignoraret quid responderet Regibus, jussit adduci psalterem: *Cumque caneret psalteres* (ait Scriptura) *facta est super eum manus Domini, et ait: Hæc dicit Dominus*; nihil ergo aliud fuit, fieri super Elisæum manus Domini, nisi Deum loqui ad illum, nam ideo statim ipse dicere potuit: *Hæc dicit Dominus*, et simili modo ideo antea ignorabat quid diceret, quia Dominus ei non loquebatur. Et similiter, 1 Reg. 16, cum esset Samuel missus a Deo ad unguendum in regem aliquem ex filiis Isai, antequam Deus de aliquo locutus esset, interrogavit de Eliab: *Num coram Domino est Christus ejus?* conjectans forte, ex vultu et statura ejus, illum esse a Deo electum, et ideo dixit illi Deus: *Ne respicias vultum ejus, neque altitudinem stature ejus, etc.*; ac subinde de cæteris intellexit non fuisse electos, quia nihil de illis a Deo audivit, donec de Davide dixit illi Deus: *Surge, unge eum, ipse est enim*. Et idem observari potest in cæteris Scripturæ locis. Denique cognitio prophetica nititur essentialiter in testificatione divina, juxta illud 2 Petr. 1: *Non voluntate humana allata est aliquando prophetia, sed Spiritu Sancto inspirati locuti sunt sancti Dei homines*; et illud Paul. ad Heb. 1: *Olim Deus loquens Patribus in Prophetis*. Et ipsimet Prophetæ sæpe id testantur, et in hoc distinguunt veros a falsis Prophetis, ut patet Jerem. 23, 26, etc.; ergo si Deus non loquitur ad Prophetam de omnibus rebus occultis, propter unius vel alterius revelationem, non potest in illo permanere habitualis cognitio omnium rerum occultarum, ita ut in potestate illius sit illas cognoscere, vel de omnibus prophetare.

28. *Lumen ad assentiendum esse aliquid permanens probabile est.* — Dico quarto: non est certum, principium assentiendi, et judicandi esse veram rem conceptam per revelationem propheticam, non esse aliquod habituale lumen; sed potius est probabile aliquando saltem esse lumen permanens, vel præexistens ante revelationem propheticam, vel in illa infusum. Et imprimis quod non sit certum, hoc lumen non esse habituale, probatur, quia ex ignorance quam Prophetæ habent de his re-

bus occultis, de quibus non habebant revelationem, non colligitur non habuisse lumen habituale de se sufficiens ad assentiendum, et judicandum de illis, si revelarentur; sed ad summum probant non habuisse species illarum rerum, vel non habuisse medium sufficienter propositum, quo de illis possent judicium ferre; nullum autem est aliud principium, ex quo possit colligi caruisse etiam habituali lumine sufficiente ad tale judicium ferendum, si divina locutio seu revelatio proponeretur. Explicatur a simili, nam in lege veteri aut naturæ fideles ignorabant communiter mysterium Trinitatis, quia illis non erat revelatum, neque propositum, et nihilominus habebant habituale lumen fidei de se sufficiens ad cognoscendum et credendum illud mysterium, si sufficienter proponeretur; ergo ex ignorance vel carentia revelationis non recte inferitur carentia habitualis luminis. Et nunc parvulus baptizatus, educatus in sylvis, perveniens ad usum rationis carebit notitia actuali et cognitione fidei, et nihilominus retinebit habitum fidei; ergo ex sola ignorance non recte colligitur carentia habitualis luminis.

29. *Confirmatur.* — Et confirmatur hæc pars, probando alteram de probabilitate hujus luminis. Nam cum omnes Doctores catholici fateantur, assensum propheticum esse certum, dubitant tamen an sit evidens vel obscurus, et quidam affirmant esse evidentem, alii esse obscurum. Ego vero utriusque generis esse posse propheticam revelationem sentio: et quibusdam personis, vel de quibusdam rebus fieri revelationem cum evidentia veritatis revelatæ; in aliis vero fieri sine evidentia veritatis cum sufficienti propositione ad certum assensum. Censeoque hæc duo genera prophetiæ esse inter se specie distincta, et illam, quæ est evidens, esse etiam specie distinctam a cognitione fidei infusæ: alteram vero, quæ est obscura, non differre specie a fide, sed in materia, vel in modo accidentario revelationis. Quæ nunc suppono, et probationem in proprium tractatum de fide remitto. Jam ergo probatur intentum, quia si Prophetam non cognoscit evidenter rem sibi revelatam, non indiget alio lumine ad assentiendum, nisi lumine fidei; at hoc lumen habituale est; sed est probabile illam cognitionem sæpe esse obscuram, et ejus assensum non esse specie diversum a fidei actu; ergo etiam est probabile, lumen illud, quo Prophetam utitur, habituale esse ac permanens, solumque indigere actuali

motione gratiæ auxiliantis, et revelationis gratis datæ per infusionem, vel compositionem. aut aliam similem motionem specierum intelligibilium, per quam res sufficienter proponatur, tanquam a Deo testificata, uti, verbi gratia, cum Deus dixit Abrahæ: *Suspice cælum, et numera stellas, si potes, sic erit semen tuum*, valde probabile est illam fuisse obscuram, licet propheticam revelationem, cui Abraham præbuit assensum per habituale lumen fidei, quod jam habebat cum actuali auxilio et revelatione. Et ita hoc lumen communiter supponebatur in Prophetis ante actualem revelationem, posset vero primo infundi, si homini non habenti fidem talis fieret revelatio, qua ad assentiendum efficaciter induceretur, et tunc transacta revelatione actuali lumen permaneret, quia de se est habitus permanens, ut constat. Neque contra hoc obstat quod prophetia sit gratia actualis, quia illud lumen, ut permanens, sine actuali revelatione non habet rationem prophetiæ, nec per se ordinatur ad aliorum utilitatem, ut magis statim explicabimus.

30. *Habituale lumen non infunditur ad evidentem assensum propheticum.* — At vero, si prophetia fiat per revelationem et cognitionem evidentem, vel quoties ita fit, tunc cessat ratio facta, quia talis cognitio non fit per lumen fidei, et tunc probabilissimum est, verumque esse existimo, ad talem assensum et cognitionem non infundi habituale lumen, quod transacta revelatione et cognitione actuali, per modum habitus permaneat. Hoc non potest efficaciter probari ex Scriptura et Patribus; tum propter dicta, quia ex Scriptura et Patribus solum probatur, Prophetas non accipere cognitionem aliarum rerum, præterquam earum quæ actualiter eis revelantur; quod vero illarum rerum, de quibus semel illuminantur, non retineant lumen per modum habitus, nullibi in Scriptura, vel Patribus, quod ego sciam, legitur; tum etiam quia Scriptura et Patres eodem modo loquuntur de Prophetis, sive obscuram, sive evidentem notitiam recipiant. Neque etiam ratione convinci potest, quia non repugnat tale lumen esse evidens et esse permanens, licet non sit lumen gloriæ, sicut est lumen scientiæ infusæ abstractivæ. Nilominus sententia communis probabilior est, et ratio ejus reddi potest ex differentia inter utrumque genus prophetiæ, quia quando est obscura, in substantia est cognitio fidei, et ideo lumen, a quo procedit, est habituale, non quia hoc per se sit neces-

sarium ad propheticam cognitionem ex generali ratione sua, sed quia alioqui lumen illud de se tale est, et essentialiter pertinet ad ordinem gratiæ gratum facientis. At vero quando cognitio Prophetæ est evidens, non est a lumine fidei, nec ab aliquo habitu, qui per se pertineat ad ordinem gratiæ gratum facientis, et ideo non fit per aliquod principium creatum permanens per modum habitus, quia solum datur ad aliorum utilitatem, et ideo tantum datur in ea occasione et opportunitate, in qua ad hujusmodi finem illius usus necessarius est. Unde quia ille usus non est ordinarius, sed raro et juxta dispositionem divinæ providentiæ confertur, ideo congruentius est ut ad illum habituale lumen non infundatur.

31. *Explicatur et roboratur iterum.* — Accedit quod tale lumen esset quædam scientia per se infusa: hæc autem secundum ordinariam legem non infunditur permanenter viatoribus, sed ad summum in quodam raptu, vel actuali mentis elevatione, quod etiam est utilius ad ostendendam gratiam Dei, et conservandam hominis utilitatem. Ac denique Deus non infundit scientiam ex parte luminis, nisi etiam infundat species, et usum talis luminis homini concedat, sicut in scientia Christi videmus, quia opera Dei perfecta sunt et utilia. Cum ergo Deus non concedat Prophetæ permanenter reliqua requisita ad usum illius luminis, ut declaratum est, credendum est neque ipsum lumen permanenter tribuere. Statim vero occurrebat tractandum an illud lumen actuale, quod in actu prophetiæ cognitionis confertur, sit aliquid creatum distinctum ab ipso actu quo Prophetæ videt clare rem sibi revelatam: vel sit tantum speciale auxilium Dei, seu ipsemet actus, ut ab ipsa virtute Dei immediate procedens. Item, si est aliquid creatum distinctum ab actu, an sit transiens cum actu ex natura sua, vel solum quia Deus non vult amplius illud conservare. Sed hæc dubia ejusdem rationis sunt cum similibus, quæ de aliquibus motibus gratiæ sanctificantis infra tractanda sunt, et ideo illa nunc omittimus: nam si in prophetia aliquid habent speciale, ad proprium tractatum de fide et prophetia spectat.

32. *Aliquid per modum habitus manet in Prophetæ, peracta revelatione.* — Ultimo, dicendum est, post acceptam revelationem propheticam, et transactam actualem cognitionem, et judicium de illa, manere in Prophetæ aliquid per modum habitus, quo possit eandem rem cognoscere, eique assentire cum

voluerit. Hoc ostendit experientia, nam Prophetæ recordabantur eorum quæ prophetaverant, et postquam ea verbo prædicaverant, poterant ea scribere. Imo interdum, priusquam verbis illa proferrent, eorum revelationem accipiebant, et post aliquod tempus illa enuntiabant; ut, verbi gratia, cum Genes. 59 dixit Jacob filiis suis: *Congregamini, ut annuntiem quæ ventura sunt vobis in diebus novissimis*, certe est valde verisimile jam antea habuisse cognita quæ postea illis prædixit; et 1 Reg. 9 expresse dicitur de Samuele: *Dominus autem revelaverat auriculam Samuelis ante unam diem, quam veniret Saul, dicens: Hac ipsa hora quæ nunc est, cras mittam virum ad te*, etc., et quia his verbis non revelaverat ei personam in particulari, de altera die additur: *Cumque aspexisset Samuel Saulem, Dominus dixit ei: Ecce vir quem dixeram tibi*. Retinebat ergo Samuel in memoria revelationem sibi factam, et ideo prævenit interrogationem Saul, dicens: *Omnia quæ sunt in corde tuo, indicabo tibi*, usque ad illud: *Et cujus erunt optima quaque Israel? nonne tibi, et domui Patris tui?* et postea dixit: *Ecce quod remansit, pone ante te, et comede, quia de industria serratum est tibi*; ostendens, ex præcedenti revelatione jam antea operatum fuisse, et postea indicavit ei verbum Domini, quod antea audierat, et mente ac fide retinebat. Et similiter 3 Reg. 14, Alias Prophetæ prius edoctus est a Domino, quam ad illum accederet uxor Jeroboam, et postea illi futura prædixit. Non est ergo dubium quin revelationes prophetiæ non sint ita transeuntes, quin aliquo modo in Prophetæ durent, et transacto actu permanent, tum quoad memoriam verborum, vel signorum quæ Prophetæ vidit vel audivit, tum quoad intelligentiam significationis eorum, tum denique quoad fidem, vel assensionem veritatum sibi revelatarum.

33. *Objectio. — Solutio.* — Dices assertionem hanc repugnare superioribus, quia non potest prophetia permanere quoad hæc omnia in mente Prophetæ, sine aliqua forma in illo relicta per modum habitus, et consequenter prophetia non erit tantum motio transiens, ut dictum est. Respondeo, sicut visio vel auditio est aliquid actuale, quia non manet per modum habitus, et nihilominus relinquit aliquid in memoria, quo recordamur vidisse vel audisse, et hæc memoria esse potest ratio seu medium credendi, vel assentiendi rem esse aut fuisse, vel futuram esse talem, qualem

illam vidimus vel audivimus; ita propria gratia prophetiæ, cum in actuali revelatione ac locutione ex parte Dei et auditione ex parte hominis consistat, non habet esse permanens per modum habitus, sed cessat eo ipso quod cessat illa visio vel auditio, quam tempore prophetiæ homo percipiebat, et nihilominus potest inde manere in mente aliquid per modum actus primi, ac subinde per modum habitus, quo Prophetæ postea recordatur revelationis sibi factæ. Ut autem intelligatur quid illud sit, tria illa distinguenda sunt, scilicet, memoria signorum aut verborum, itemque memoria significationis eorum, et firmus assensus veritatis revelatæ. Hæc enim distincta sunt: nam imprimis sicut potest quis videre res significatas, vel audire verba, et non intelligere quid significent, sicut accidit Pharaoni, Genes. 41, et aliis Regibus, Daniel, 2, 4 et 5, et postea recordabantur signorum sine intelligentia; ita, licet in ipsa visione data esset intelligentia signorum, posset postea manere memoria materialium signorum, et non significationis eorum: in Prophetis autem utrumque in memoria permanet, ut ex assensu facile probatur. Nam in Prophetæ manet memoria revelationis sibi factæ, quæ ad cognoscendam et credendam veritatem sibi revelatam sufficiat, ut probatum est: ad hoc autem necesse est, recordari non tantum materialium signorum, sed etiam significationis eorum: nam per hanc significationem et cognitionem ejus, mente concipitur veritas quæ credenda est: ergo hæc tria manent in memoria Prophetæ.

34. *Memoria signorum materialis et formalis manet.* — Primum ergo, scilicet, memoria signorum, manet per species impressas relictas in mente ex vi signorum aut verborum præcedentium, quæ species vim habent representandi illa signa non tantum materialiter, ut res sunt, sed etiam formaliter, ut signa sunt, et ideo per easdem species permanent secundum, scilicet, memoria rerum per talia signa representatarum: sicut enim ego, audiens verba alterius ænigmatica, et interpretationem eorum ab ipso mihi traditam, postea recordor non tantum verborum materialium, sed etiam significationis eorum; vel sicut Apostoli audientes parabolam a Christo, et significationem ejus ab ipso declaratam, utrumque memoria retinebant, ita Prophetæ, verbi gratia, Daniel, cap. 7, vidit quatuor bestias, etc., et postea significationem et interpretationem audivit: *Hæc sunt quatuor*

regna, etc. ; ita postea tam bestiarum formas et numerum, quam interpretationem, et significationem eorum recordabatur, nimirum, per species impressas ab illis imaginibus quas viderat, et a verbis quæ audierat, quæ species, supposita priori ostensione, naturaliter fieri poterant, quia imagines illæ sensibiles, licet modo supernaturali essent formatae, naturalis ordinis erant, et poterant sui speciem relinquere, et idem est de quocumque mentis conceptu quoad illam primam apprehensionem, seu repræsentationem.

35. *Judicium de signorum veritate fit vi luminis intellectualis in Propheta permanentis.* — At vero tertium, quod est iudicium, et assensus de veritate signorum in tali significatione, et, quod perinde est, de veritate talis rei revelatae per talia signa in tali significatione sumpta, hoc, inquam, tertium necesse est fieri vi alicujus luminis intellectualis permanentis in Propheta, ut per se manifestum est. Et quidem si cognitio prophetica a principio fuit obscura, consequenter etiam fuit in virtute luminis fidei, ut dixi, et ita facile intelligitur, per quod lumen postea Propheta eidem revelationi fidem habeat, nimirum per efficaciam ejusdem luminis fidei ; sicut Isaias, verbi gratia, qui per revelationem propheticam prius credidit Christum nasciturum ex Virgine, postea toto suæ vitæ tempore per eandem fidem id credidit, prædicavit, ac scripsit. Si vero illa revelatio et cognitio, in eo momento in quo facta est, fuit evidens in seipsa et in suo ordine, postea non potest esse ita evidens, quia non causatur ab eisdem signis, vel effectibus evidenter cognitis, sed fit mediis quibusdam speciebus abstractivæ et imperfecte repræsentantibus priora signa, et eorum effectus ; sicut si Paulus vidit divinam essentiam in raptu, licet postea retinuerit aliquam memoriam eorum quæ viderat, et illa vera esse judicaret, non tamen poterat hoc iudicium esse ita evidens, sicut fuit prior visio : et nos, cum recordamur aliquid oculis vidisse, non habemus tam evidentem cognitionem rei visæ, sicut in ejus præsentia. Et hinc fit hanc cognitionem non manere in Propheta ex vi ejusdem luminis evidentis, quod prius fortasse habuit, quia ille actus, quem postea habet, est longe alterius rationis et speciei. Et hinc confirmatur quod supra dicebamus, illud lumen, quando est evidens, non esse permanentis : sicut Paulus, post raptum, non assensit rebus, quas viderat, per lumen gloriæ, sed per aliud inferius princi-

pium : ita ergo est in prophetis quoad hoc genus prophetiæ. Si autem quæeratur a quo principio sit ille actus ex parte luminis intellectus, respondeo duobus modis haberi posse. Primo ab ipso naturali lumine intellectus adjuto memoria prioris evidentis cognitionis, et inde eliciente quasi assensum theologicum virtute hujus syllogismi : quod Deus semel revelat, semper ita est, vel futurum est, sicut cognitum fuit per evidentem revelationem ; sed hoc mihi revelatum fuit : ergo ita est, vel ita futurum est. Secundo, potest ille assensus esse postea assensus fidei, quia jam est obscurus, et potest immediate inniti auctoritate Dei, attestantis eo tempore aut modo quo non est evidens ejus attestatio. Atque hæc nunc de hac gratia sufficient.

36. *Discretio spirituum declaratur primo modo a D. Thoma.* — Septima gratia gratis data ponitur a Paulo, discretio spirituum, quæ duobus præcipue modis exponitur. Primus est, ut hæc sit cognitio cogitationum cordium. Ita exponit D. Thom. 1. 2, dicta q. 111. art. 4 ; dicit enim hanc gratiam, et præcedentem, ordinari ad confirmationem doctrinæ fidei, *manifestando ea quæ solius Dei est scire. Et hæc* (inquit) *sunt contingentia futura, et quantum ad hoc ponitur prophetia, et etiam occulta cordium, et quantum ad hoc ponitur discretio spirituum.* Potest hæc sententia suaderi, quia hæc cognitio sine dubio est ex gratia quæ aliquibus communicatur, et non propter sanctificationem eorum, quia ad hoc per se non confert : ergo ad utilitatem aliorum ; est ergo gratis data. Et optime ac satis proprie significatur illis verbis, *Discretio spirituum*, quia nomine spirituum significari solent in Scriptura, interni motus animi, juxta illud : *Probate spiritus, an ex Deo sint*, 1 Joann. 4 ; nullo autem modo melius discernuntur spiritus, quam ipsos internos cordis motus cognoscendo. Objici vero potest, quia hoc modo discretio spirituum sub prophetia comprehenditur, ut ex generali ratione prophetiæ supra data constat, et omnes communiter docent. Respondetur autem, sicut gratia sanctorum distinguitur ab operatione virtutum ob specialem considerationem, etiamsi alias sub generali ratione gratiæ miraculorum comprehendi posset : ita hic, licet revelatio cogitationum cordis posset comprehendi sub generali appellatione prophetiæ, nihilominus, per antonomasiam, prophetiam dictam esse de cognitione futurorum, nam hæc solet communi usu maxime significari nomi-

ne prophetiæ, et specialiter positam esse discretionem spirituum, quia magnam vim habet ad commovendum hominem, et ad persuadendum illi, si occulta cordis ejus in confirmationem doctrinæ ipsi revelentur, ut 1 Corinth. 14 idem Paulus (quamvis alia de re agens) significavit.

37. *Notatur discrimen inter discretionem spirituum et prophetiam.* — Hæc ergo interpretatione supposita, licet hæc gratia dicto modo sit distincta a præcedenti, multum cum illa convenit, et juxta ea quæ diximus explicanda est. Solum est notandum discrimen, quia prophetia de futuris contingentibus, vel non est evidens, vel ad summum potest esse evidens in testificante, juxta probabilior sententiam. Hæc autem discretio spirituum, quæ per cognitionem internarum cognitionum datur, potest esse certa, non solum per revelationem obscuram, neque solum evidens in attestante, sed etiam per claram intuitionem cognitionum cordium, quæ revelantur. Nam cum illæ cogitationes sint jam existentes in seipsis, solumque sint occultæ, vel ex defectu principiorum cognoscendi, specierum scilicet, et luminis, vel in nobis ex dependentia cognitionis nostræ a phantasmatis, potest facile hæc impotentia suppleri per infusionem specierum et luminis, vel per auxilium Spiritus Sancti, quo intellectus hominis, etiam conjunctus, elevetur ad intellectualiter operandum sine dependentia a phantasmatis: hoc enim facile posse a Deo fieri, tanquam manifestum suppono. Unde etiam fit, ut hæc cognitio hoc modo communicata facile possit infundi per modum habitus, quia non pendet ex locutione et testificatione divina actuali, sed ex speciebus et lumine, quæ postulent concursum, et auxilium connaturale ad operandum circa talia objecta sine dependentia a phantasmatis; hæc autem principia facile possunt communicari a Deo per modum habitus, sicut data sunt animæ Christi Domini per scientiam infusam. Atque hoc modo de aliquibus sanctis refertur, habuisse virtutem habitualement cognoscendi aliorum cogitationes pro arbitrato suo, vel, quod majus est, ad intuendum, an anima alterius sit in statu gratiæ vel culpæ, quæ profecto, si datur, major discretio spirituum est quam sit in cognitione cogitationum. Sed hæc quæ ad factum pertinent incerta sunt, et fortasse probabilius est nemini extra Christum datam esse hanc gratiam per modum habitus, licet aliquibus tam frequenter data fuerit, ut quasi

in habitu illam habuisse viderentur; sed revera non videtur fuisse absolute in eorum potestate, quia nec est verisimile potuisse videre omnes omnium cogitationes, nec etiam aliquas suo arbitrio sine ullo prævio recursum ad Deum per orationem, vel mentis elevationem, quasi expectando ab ipso illam cognitionem, quæ ad ejus gloriam et aliorum utilitatem magis expediret.

38. *Modus secundus explicandi.* — Altera explicatio hujus gratiæ est, ut sit peculiare donum Spiritus Sancti, ad discernendum inter varios motus, a quo spiritu proveniant, male, an bono, quando vel ad mores, vel ad doctrinam excitamur, sive interius et invisibiliter, sive exterius per homines docentes aut consulentes, vel per Angelos sensibiliter loquentes vel apparentes. Ita exponit hanc gratiam Chrysostom., dicta homil. 29, dicens: *Quid est discretiones spirituum? Nosse quis sit spiritualis, et quis non spiritualis, et quis impostor.* Et sequuntur Theophylactus, Theodor. et OEcumen., et idem habent commentaria Hieronymi et Ambrosii. Item Glossa ordinariæ et interlineariæ, et Anselmus, et divus Thomas ibi, et Salmer., disp. 20 in illam epistolam. Et sane hic videtur sensus ad litteram a Paulo intentus; quia hæc etiam gratia valde necessaria est Ecclesiæ Dei, nam, ut Anselmus dixit, *discretio difficillima est*, quia nimirum Angelus malus transfiguratur se in Angelum lucis, et ideo *discerni non potest*, sine dono Spiritus Sancti, ut idem Anselmus ait.

39. *Christiana prudentia potest haberi hæc discretio.* — Nihilominus tamen advertere oportet, duobus modis posse hanc discretionem fieri, uno modo per humanam, vel potius christianam prudentiam, utendo regulis ab Ecclesia traditis vel probatis ad discernendos malos spiritus a bonis. Nam si hoc non caderet sub diligentiam humanam, non moneret Paulus: *Omnia probate, et quod bonum est tenete, ab omni specie mala abstinete vos*; et Joann., 1 canonic., cap. 4: *Nolite omni spiritui credere, sed probate spiritus, an ex Deo sint.* Hæc autem probatio et discretio, ut dixit etiam Anselmus, non est difficilis, quando doctrina, consilium, vel internus impulsus discordat a communi et orthodoxa regula fidei et morum. Nam hæc regula quoad doctrinam est Ecclesia Catholica, vel Scriptura sacra, ut ab Ecclesia recepta, et intellecta, vel traditio Apostolica eodem modo ab Ecclesia probata: in moribus vero est, vel eadem fidei doctrina, vel recta ratio, quæ a Catholica fide non dis-

cordat. Unde quando per hanc regulam potest verus Doctor a seductore, vel bonus spiritus aut impulsus a malo discerni, illa sufficit, nec tunc est necessaria specialis gratia gratis data, sed fides cum auxilio gratiæ gratum facientis sufficit, quod auxilium erit necessarium majus aut minus, juxta majorem vel minorem gravitatem tentationis aut periculi, considerata etiam conditione personæ, aliisque circumstantiis.

40. *Quando res est anceps, humana etiam diligentia est opus.* — Vide quos refert Lorin., 1 Joan. 5, in princ., et quæ late tradit Salmer. eodem loco. — At vero, quando spiritus non discordat manifeste a regula fidei et rectæ rationis, sed res est anceps et involuta, tunc habet locum quod prius dixit Anselm., discretionem hanc esse difficillimam; nihilominus tamen tunc etiam est diligentia adhibenda ex parte hominis, ut probet spiritus et motiones internas, vel consilia externa, an ex Deo sint. Neque expectanda semper est specialis gratia gratis data, hanc enim non promisit Deus omnibus, nec semper illam præbet, sed quibus et quando vult: et nihilominus omnes possunt cum morali et practica certitudine prudenter dijudicare, et discernere inter hos spiritus. Neque Deus ad hoc negat auxilium sufficiens, si homo, cum divina gratia, quod in se est faciat, et ideo ad discernendum inter hos spiritus, non solum inter verum et falsum, bonum et malum (quod ordinarie minus est difficile), sed etiam inter bonum et melius, inter securum et periculosum (quod est difficilius), variæ regulæ traduntur a doctis et spiritualibus viris, quas præ manibus habere oportet eos, qui aliorum sunt duces et magistri; indocti enim in hujusmodi eventibus aliorum consilio debent uti ad discernendos spiritus. Hæc ergo discretio spirituum ad gratiam gratis datam per se non pertinet.

41. *Propria discretio spirituum gratis data speciali Spiritus Sancti instinctu fit.* — De judicio discernendi prima questio ejusque responsio. — Alio igitur modo fieri potest hæc discretio per speciem in tactum et motionem Spiritus Sancti, et hæc est propria gratia gratis data, de qua Paulus loquitur, quæ non omnibus datur, sed solet dari aliquibus spiritualibus, et sanctis viris ad discernendum spiritus, non solum in se ipsis, sed etiam in aliis, ad communem Ecclesiæ utilitatem, et eos, qui hanc gratiam habent, videtur vocare Paulus spirituales viros, 1 Corinth. 14,

cum ait: *Si quis videtur Propheta esse, aut spiritualis, cognoscat quæ scribo vobis, quia Domini sunt mandata.* Consistit ergo hæc gratia in peculiari motione Spiritus Sancti ad discernendum, per judicium rationis rectum, inter spiritum bonum et malum. De hoc autem judicio multa quæri possunt, quæ ad hujus gratiæ intelligentiam videri possunt necessaria, ea tamen breviter percurram. Primo, inquiri potest quæ sit propria materia hujus gratiæ, quidve nomine spirituum significetur. Ad priorem partem, respondeo materiam hujus gratiæ esse omnem humanæ mentis excitationem, impulsum, aut motionem inducentem ad aliquid credendum vel agendum, quod in specie ita apparet verum, ut sit incertum, vel tale apparet bonum, ut occultum sit vel dubium, an sit vere bonum, vel tantum apprens; vel, si constet esse verum, an ad aliquam falsitatem ordinetur; vel denique, si sit indifferens, an ad aliquid turpe viam sternat. Nam si materia inspirationis aut motionis sit clara, vel in falsitate contraria fidei, vel in turpitudine rationi aut fidei contraria, non habet locum propria gratia discretionis spirituum, quia per regulas certas et notas potest dijudicari; oportet ergo ut materia sit occulta et dubia, sub qua comprehenduntur privatæ revelationes, apparitiones, aut visiones sensibiles, vel imaginariæ, et novæ doctrinæ, præsertim occulte traditæ; item internæ motiones et inspirationes quæ ad aliquid extraordinarium vel superstitiosum, sub specie religionis, incitant, vel ad aliquid supra vires hominis sub fiducia alicujus miraculi vel extraordinarii auxilii, vel ad aliquam mutationem a bono et perfecto statu, sub specie majoris perfectionis, vel e contrario moventes sub specie boni et pietatis ad aliquid impediens perfectionem, et similia, quæ quotidie hominibus probis et Deo servientibus eveniunt, et in eis discernendis auxilii sunt. Quia et bono spiritu divino, scilicet, vel Angelico, vel immediate, vel homine aliquo intercedente, vel a malo spiritu dæmonis per se etiam, vel per mundum, et pravos homines loquente, provenire possunt. Et isti sunt spiritus inter quos hæc gratia discernit, dijudicando inter verum Angelum lucis et Satanam, qui se in eum transfiguratur, et per judicium discernendo, a quo horum spirituum motio, revelatio, impulsus, vel alia similis inspiratio procedat; hæc ergo est materia, et hoc hujus gratiæ munus.

42. *Secunda questio cum rationibus dubi-*

tandi de evidentia et certitudine de iudicio discretionis. — Secundo, inquiri potest quale sit hoc iudicium, per quod hæc discretio fit, id est, an sit omnino evidens vel obscurum, certum vel incertum, fallibile vel infallibile. Et quidem non videtur esse evidens, quia nec habetur per evidentiam rei in se, seu in causa, quia per hanc evidentiam non conceditur clara visio illius spiritus a quo talis effectus procedit, sive bonus, sive malus sit, ut est per se manifestum: nec etiam per evidentiam ab effectu, vel ab aliquo signo, quia supponimus talem esse effectum, ut causa sit occulta: nam si ex signis vel effectibus posset evidenter cognosci, non esset ad tale iudicium specialis gratia gratis data necessaria. Unde etiam constat talem evidentiam non esse naturalem. At vero neque supernaturalis est, quia esset per scientiam infusam: hæc autem secundum ordinariam providentiam hominibus viatoribus non communicatur: non est ergo illud iudicium evidens. Unde consequenter fieri videtur non esse certum, quia alias esset assensus fidei, cui proprium est esse certum et obscurum; non videtur autem esse assensus fidei, quia vel esset assensus fidei catholicæ, vel quidam assensus propheticus; neutrum autem dici potest cum probabilitate. Videtur ergo concludi esse assensum obscurum et incertum, ac subinde fallibilem, quod videtur etiam inconveniens, tum quia non est consentaneum infallibili veritati, et auctoritati Spiritus Sancti moventis hominem ad hoc iudicium; tum etiam quia tale iudicium esset conjecturale; hoc autem sine speciali gratia potest humano discursu comparari.

43. *Duplici conclusione quæstio solvitur.* — In hoc puncto, dico breviter hoc iudicium non esse evidens, ut rationes factæ probant. Deinde assero illud iudicium non esse formaliter et proprie certum ex motivo, seu ratione assentiendi; quando autem in re ipsa est ex motione Spiritus Sancti, esse certum materialiter, vel potius infallibile ex materiali objecto, et directione Spiritus Sancti. Probatur et declaratur hoc ex quadam doctrina D. Thomæ 2. 2, quæstione 171, art. 5, ubi ait Prophetas quædam cognoscere per expressam revelationem, et tunc recipere veram gratiam prophetiæ, de cuius ratione est, ut nitatur in divina veritate et auctoritate; alia vero cognoscere per instinctum divinum sine expressa revelatione. In priori ergo cognitione (ut idem Sanctus docet), certissimus est Propheta de veritate revelata, quia certissime cognoscit Deum esse

qui revelat et testificatur: in posteriori autem non est ita certus, quia non est certus Spiritum Sanctum esse qui illum instigat et dirigit: quia ille instinctus est quid imperfectum in genere prophetiæ, et solum est a Deo effective, non objective, et ita non certo cognoscit Propheta Deum esse qui instigat: unde fit ut nec de rebus iudicium certum proferat, nec infallibile, quia interdum in his decipi contingit, teste Gregorio, hom. 1 in Ezechiel., et Richard. Viet., 2 part., cap. 33, in Cantic. Hanc ergo doctrinam in præsentī applico: quia hæc discretio spirituum non pertinet ad expressam prophetiam, ut probat objectio facta: ergo ad instinctum quemdam Spiritus Sancti, qui non cognoscitur cum certitudine a recipiente, quia non fit illi revelatio expressa, quod Spiritus Sanctus sit, qui movet: alioqui jam esset expressa revelatio et prophetia, quod non ita esse patet, quia qui discernit hoc modo spiritus, neque fide certa credit Deum esse qui ipsum movet ad ita iudicandum, nec illud proponit alteri ut de fide credendum. Hoc ergo modo dicimus, illud iudicium non esse formaliter certum, quia ex parte objecti et rationis assentiendi non nititur in Dei testimonio, nec in alio medio infallibili, sed in conjecturis, et regulis prudenter applicatis ad talem materiam cum talibus circumstantiis.

44. *Confirmatur.* — Et confirmatur, quia per talem gratiam gratis datam, nunquam fit discretio spirituum sine discursu ex generalibus principiis fidei applicatis magna diligentia et circumspectione omnium circumstantiarum, simul etiam invocata Spiritus Sancti directione et impulsu, ut constat ex usu, et ex his quæ de hac probatione spirituum viri experti et eruditi tradiderunt: ergo signum est non fieri hanc discretionem per revelationem expressam, sed per instinctum, interveniente, ex parte medii et rationis assentiendi, cognitione et iudicio ex effectibus, signis, et aliis conjecturis: ergo tale iudicium ex vi sui formalis objecti nunquam est certum et infallibile. In hoc vero aliqui constituunt discrimen inter eum qui de se, vel de alio iudicat. Nam discretio spirituum minus certa est in iudicio ferendo de his quæ in alio fiunt, quam de his quæ aliquis in se experitur, quando alioqui lumen et ars, seu peritia discernentis spiritus est eadem, vel æqualis. Ita notat Gerson., 1 part., tractatu de Probat. Spirit., alfab. 17, litt. R et S, quia nemo certo cognoscit in alio, infallibili certitudine, illa quæ in seipso potest per experimentalem notitiam deprehendere:

unde infert posse aliquem certum iudicium ferre probando proprium spiritum, quando, per *inspirationem intimam et internum saporem, ac spiritualem dulcedinem vel illustrationem, a montibus æternis effugantur tenebræ omnis dubietatis*; non tamen posse ita experiri motionem alterius, et ideo neque posse per infallibile iudicium probare spiritum in alio. *Sed requiritur, ait, donum Spiritus Sancti, quod Apostolus nominavit discretionem spirituum.* Existimo tamen utrumque esse intelligendum de quadam morali certitudine, seu infallibilitate, quæ, cæteris paribus, est major per propriam experientiam in seipso quam in alio. Adverto tamen affectum ad res proprias posse aliquo modo flectere vel inclinare intellectum ad unam partem, et ex hac parte regulariter securius probari spiritus, per alium quam per seipsum.

45. *Quid sit materialiter certum explicatur.* — Addidi vero hoc iudicium, quando est ex motione gratiæ, esse infallibile materialiter (ut sic dicam), quia Spiritus Sanctus non movet speciali instinctu, nisi ad id quod in re verum est aut bonum, vel melius aut magis homini conveniens, secundum ordinem providentiæ suæ, et ideo quoties in re ipsa discretio fit per gratiam gratis datam, iudicium ex parte principii moventis est infallibile, ac subinde materialiter certum: quamvis ipsum hominem nunquam reddat simpliciter certum, quia nunquam omni certitudine assequitur, vel cognoscit, iudicium esse ex directione et motione Spiritus Sancti. Atque ita non est contra veritatem aut auctoritatem Spiritus Sancti, quod iudicium, procedens ex gratuita motione illius, secundum se ac ex formali motivo spectatum, infallibile non sit; quia ille assensus, ita formaliter spectatus, non nititur in auctoritate Spiritus Sancti, sed in aliis motivis et conjecturis, quas ex parte potentiæ juvat instinctus Spiritus Sancti, et tunc satis est quod ex ea parte, assensus sit in re ipsa infallibilis, quia si ex tali motione procedat, nunquam potest esse falsus. Et in hoc differt hic assensus, ab illo qui per solum discursum et conjecturas comparari potest. Præterquam quod ipsa directio et instinctus Spiritus Sancti efficit majorem certitudinem moralem, vel faciendū ut signa et indicia plura et majora occurrant, vel ut melius et modo magis congruenti ad inducendum intellectum considerentur.

46. *Hæc gratia non est habitualis.* — Ex quibus etiam facile intelligitur non communi-

cari hanc gratiam per modum habitus, quia, licet lumen habituale et scientia, vel experientia, multum possint ad hanc discretionem conferre, non erit ex peculiari gratia gratis data, nec participabit inde certitudinem aliquam, vel infallibilitatem, nisi actualis motio Spiritus Sancti intercedat, ut ex dictis satis declaratum est. Unde etiam colligi facile potest hanc gratiam regulariter non tribui malis, imo nec quibuscumque mediocriter bonis, sed viris spiritualibus ac sanctis, quoniam Spiritus Sanctus, qui suaviter omnia disponit, non præbet hanc gratiam, nisi his qui possint per aliquam experientiam spiritualium rerum de qualitate spiritus conjecturam facere. Quamvis autem hoc regulare sit, interdum potest Spiritus Sanctus, ad ostensionem potentiæ et gratiæ suæ, donum hoc etiam peccatori homini conferre, et fortasse interdum id facit propter bonum aliorum, maxime quando, ratione muneris vel doctrinæ, hæc discretio per eum fit, qui bonus vel spiritualis reputatur, etiamsi apud Deum talis non sit.

47. *Linguarum donum utile in exordio nascentis Ecclesiæ.* — Octava gratia vocatur a Paulo *genera linguarum*; communiter vero donum linguarum appellatur. De quo dono scimus communicatum esse Apostolis in die Pentecostes, et aliquibus aliis fidelibus per aliquod tempus in principio nascentis Ecclesiæ, Actor. 2 et sequentib. Utilitas autem vel necessitas ejus præcipua fuit, ut Apostoli et eorum discipuli sine impedimento possent ubique prædicare, et ab omnibus nationibus intelligi: consequenter vero, quia Ecclesia ex omnibus gentibus congreganda erat in ejusdem mystici corporis unitatem, convenientissimum fuit ut doctores ad cæteros loqui, et se invicem intelligere possent, ut sic facilius et melius in unam societatem egerentur. Denique inde etiam factum est, ut Spiritus Sancti gratia, et fidei veritas plurimum confirmaretur, et quasi publice innotesceret.

48. *Hoc donum vel potest fieri infundendo loquenti ignotas linguas, quasi loquatur regionibus diversis, vel ut uno idiomate ab omnibus percipiatur.* — Duobus autem modis cogitari potest hæc gratia communicari fidelibus: uno modo, ex parte audientium, alio modo, ex parte loquentium. Prior erit si prædicator, una tantum verborum prolatione, et in solo idiomate proprio loquens, simul ab omnibus audientibus diversarum linguarum intelligatur. Quod potest dupliciter accidere, scilicet, vel quia omnes verba ejusdem idiomatis

audientes significationem eorum percipiunt, vel quia, licet concionator unius lingue verba proferat, in auribus audientium multiplicantur, quia quando ad singulorum aures verba perveniunt, in unoquoque imprimuntur species verborum audientis, non vero loquentis, et, quot sunt auditores diversi idiomatis, tot effectus seu conceptus diversarum rationum generat idem verbum in auribus et mentibus eorum. Et ita quidquid in hac gratia est supernaturale, fit ex parte audientium, non ex parte loquentium. Alter principalis modus est, si loquenti infundantur species et notitiæ diversarum linguarum, deturque ei facultas loquendi in omnibus illis, non simul, et ejusdem vocis formatione (id enim impossibile est simul fieri in ore loquentis), sed successive, et juxta occurrentes occasiones. Et in hoc modo gratia conceditur loquenti: ex parte autem audientium, nullum est miraculum vel supernaturale opus, quia tunc loquente predicatore in una lingua, qui illam norunt, naturaliter intelligent; alii vero non percipient sensum, donec in eorum lingua loquatur.

49. *Contra primum modum dubium.* — Dubium ergo est quo istorum modorum communicetur hæc gratia. Priori modo exponit Carthusian., Actor. 2, et probari potest ex Cypriano, vel Auctore de Cardinal. Christi operibus, capite ultimo, de Spiritu Sancto, dicente: *Spiritus Sanctus ad instar prioris sæculi universitatem fidelium unius labii esse voluit, ut quorum erat cor unum et anima una, una esset et lingua, nec posset impedire intellectum credentium aliqua diversitas verborum, sed evangelica doctrina propria lingua prolata ad omnium auditum eandem efficiantiam obtineret.* Quod magis exponens, posteriorem partem prioris modi indicat, dicens: *Hi omnes dum Hebræa lingua Apostoli prædicarent, locutio Judaica enuntiationis articulos cursu consueto evolvens, nullo exponebatur interprete, sed verborum per Spiritum Sanctum inerat virtus et gratia, ut habitantes Pontum et Asiam, suam esse dicerent linguam quam audiebant,* alludens ad verba illa Lucæ, Actor. 2: *Quomodo nos audimus unusquisque linguam nostram, in qua nati sumus?* Et iterum: *Audiebat unusquisque lingua sua illos loquentes.* Et infra: *Audimus eos loquentes nostris linguis magnaia Dei.*

50. *Amplius improbatum prima explicatio primi modi.* — Ex quibus verbis evidenter refellitur primus modus priori modo explicatus; nam apertissime dicitur non omnes

audivisse eandem linguam, et illam intellexisse, sed singulos audivisse linguas suas: ergo non erat hæc gratia interna in mentibus audientium, sed exterius erat varietas verborum in auribus eorum, quibus verbis auditis, sine nova gratia singuli intelligere poterant significationem verborum, quæ audiebant. Et ita etiam exponit hæc gratiam Basilius, Seleniciæ Episcop., in serm. de Innocent., apud Sur., die 28 decembris, ubi ita explicat hoc donum: *Quando rore spiritus, qui e cælis fluxerat, in lingua Apostolorum accepto, congregatarum gentium auribus distribuit oris operationem, uniuscujusque vocem ad omnium gentium sensus accommodante, et adaptante gratia: adeo ut fluentum sermonis quod profundebatur ex labris, fieret familiare omnium auribus a Spiritu Sancto, transformato in id quod erat cognatum vocis uniuscujusque eorum qui audiebant.* Eandemque sententiam indicat Oecumenius, Act. 2, dicens, Apostolos novisse quæ dicerent, quibus autem linguis dicerent non novisse, sed unosquosque audientium scivisse quod sua lingua loquerentur. Quod profecto, si verum est, inde proveniebat, quia loquens unum idioma sibi notum proferebat quod in auribus audientium multiplex fiebat. Et ita videtur accidisse quando Petrus, unica concione, tria millia audientium diversarum linguarum et nationum convertit, Actor. secundo; quomodo enim id fieri poterat, nisi quia una vocis prolatione loquentem omnes in suis linguis audiebant et intelligebant?

51. *Approbatum secundus modus explicandi hæc gratiam gratis datam.* — Posterior autem modus intelligendi hoc donum ex parte loquentium, est magis probatus et receptus, nimirum in hoc consistere, ut uni eidemque personæ detur omnium linguarum peritia, et facultas illa utendi. Hanc sententiam ita docet D. Thomas in 2. 2, quæst. 176, art. 1, ut in solutione ad secundam, priorem omnino rejicere videatur; et sequitur Cajetan., Actor. 2; et Viguer., in Institut., capit. 9, § 1, vers. 8. Eundem modum approbant Beda et Glos., Actor. 2; et Anselmus, 1 Corinth. 12; Nazianzenus item, oratione 44, expressius dubium tractans, et duos illos modos conferens, posteriorem præfert. Et potest probari primo ex Actor. 2, ubi homines plurimum linguarum dicebant: *Audimus eos loquentes nostris linguis magnaia Dei:* nam, ut notat Nazianzenus, illa verba *nostris linguis*, non cum solo verbo *Audimus*, sed cum participio *loquentes* conjungenda sunt, ita ut ideo isti audirent suis

linguis, quia Apostoli eorum linguis loquebantur. Et ita videtur intellexisse illa verba Ecclesia, cum in officio Pentecostes canit: *Loquebantur variis linguis Apostoli magnalia Dei*. Idem sentit Cyprianus in Expositione Symboli, in principio, ibi: *Ut loquelis diversis, variisque loquerentur*; et Augustinus, tract. 32 in Joan.: *Omniū* (inquit) *linguis locuti sunt*. Et cum postea interroget: *Quare nunc nemo baptizatus loquatur linguis omnium gentium*, respondet: *Quia jam ipsa Ecclesia omnium gentium linguis loquitur*. Sicut ergo nunc Ecclesia illis loquitur, ita primitus singuli eisdem loquebantur, ut idem diserte exponit, sermon. 11 de Verb. Domin., capit. 17, et sermon. 59, cap. 7, et sermon. 9 de Verb. Apostoli, capit. 3. Et idem aperte docet Chrysostomus, homilia 35 in 1 ad Corinth., et homil.: *Quod Christus sit Deus*. Præterea hoc videtur de se expresse affirmare Paulus, 1 Corinth. 14, dicens: *Gratias ago Deo meo, quod omnium vestrum lingua loquor*. Idemque de aliis fidelibus ejus temporis supponit, cum ait: *Volo autem omnes vos loqui linguis*; et c. 12, vocat hoc donum *genera linguarum*; tum quia per illud datur recipienti ut multis linguis loquatur; tum etiam quia non est donum audientium, sed loquentium, quibus datur ut variis linguis loquantur. Et fortasse ob hanc causam dixit Hieronymus ad Ephes. 4: *Quod in fabricatione turris linguarum unitas scissa in Actibus Apostolorum portendebat dona linguarum*; et Sophon. 3, non longe a fine: *Apostoli* (inquit) *univrsis linguis locuti sunt, et, veteri errore sublato, unum confessionis redditum est labium*; et ad hunc modum loquuntur fere alii Patres in sermonibus de Spiritu Sancto, seu de Pentecoste.

32. *In quo consistat donum linguarum.* — Quocirca, in hoc puncto, certum mihi videtur hoc donum linguarum consistere in facultate divinitus alicui data ad loquendum variis linguis, quas antea ignorabat. Hoc probant omnia posteriori loco adducta, quia neque Scriptura, neque Patres possunt proprie et sincere aliter explicari. Item ratio Nazianzeni fundata in verbis Pauli est optima, quia, si gratia hæc solum operaretur in audientibus, non fuisset data Apostolis, nec fidelibus, qui Spiritum Sanctum recipiebant, et linguis loquebantur, sed audientibus, quod est contra vim verborum Scripturæ. Item est optima ratio D. Thomæ, quia hæc donum non fuit necessarium tantum, ut auditores intelligerent prædicatores loquentes, sed etiam ut prædicatores in-

telligerent alios, etiam infideles, sibi loquentes, quia ad illorum conversionem non solum erat necessarium ad illos loqui, sed etiam interrogationibus eorum respondere, difficultates solvere, et confessiones audire; ergo hoc donum per se, et proxime (ut sic dicam) instruit accipientem, seu docentem, licet propter aliorum utilitatem detur. Augetur hæc ratio, quia hoc donum non solum dabatur in principio Ecclesiæ propter disciplinam audientium, sed etiam propter societatem et unitatem fidelium, ad quam necessarium erat, ut secum conversari, et mutuo intelligere ac loqui possent. Unde obiter colligitur donum hoc, licet ad loquendum detur, immediate tribui ad cognoscendum non res, sed verba et significationes eorum, quia datur ad loquendum humano et rationali modo, in quo ex præcognitione assumuntur verba quæ sint notæ, seu signa conceptuum et rerum, quas exprimere volumus. Propter quod verisimile non est quod OEcumenius ait, Apostolos non cognovisse in qua lingua singulis loquerentur, alias non humano et rationali modo loquerentur ad illos, nec potuissent unicuique loqui modo illi accommodato, et prout singulis expedire judicabant, quod imperfectissimum est, et alienum a suavi Spiritus Sancti providentia et efficacitate.

33. *Prior modus, licet Scripturæ incongruus, possibilis, et Petri concioni accommodari potest.* — Ex dictis ergo duobus modis posterior certus est, et nullo modo negandus, sive prior admittatur, sive non. Non est enim dubium quin etiam ille prior modus fuerit possibilis; non est tamen sufficiens vel ad intelligendam Scripturam, vel ad finem et effectus hujus gratiæ. Crediderim etiam illum priorem modum primo modo explicatum nunquam fuisse in usu, quia nullum est fundamentum ad id affirmandum, et quia alias hæc gratia ante fidem communicaretur infidelibus, ut concionantem possent intelligere: unde etiam posteriorem modum declaratum, arbitror regulariter non fuisse in usu fidelium in primitiva Ecclesia, quia nec illius ordinaria necessitas apparet, neque ex his quæ de hoc dono traduntur colligi potest. Quod autem in aliquo casu raro, seu extraordinario, illud etiam donum, seu miraculum factum fuerit, facile defendi potest. Et de illa prima concione Petri Apostoli videtur esse verisimile. Quamvis dici possit, vel illa tria millia hominum fuisse ex Judæis habitantibus Jerusalem et per Judæam, qui linguam hebræam vel syriacam

(si forte illa concionatus est Petrus) intelligebant; vel non fuisse omnes conversos in una concione facta in eodem loco, et in eadem hora, sed in diversis, factis in diversis locis civitatis, et distinctis horis dici, et fortasse non in eadem, sed in distinctis linguis, nec forte per solum Petrum, sed etiam per alios Apostolos, quia Scriptura solum dicit: *Et appositæ sunt in die illa animæ circiter tria milia*. Verisimile enim est non solum Petrum, sed etiam alios Apostolos, eodem die aliquos convertisse, quia de omnibus dicitur: *Nonne isti qui loquuntur Galilæi sunt?* etc., et de omnibus dicebant: *Audivimus eos loquentes magnalia Dei*. Possunt ergo illa verba de conversione trium millium hominum referri ad conciones omnium Apostolorum eo die factas. Præterquam quod idem Petrus potuit, in illa concione, nunc in una lingua loqui, nunc in alia, prout audientibus expedire prospiciebat. Propter quæ non cogimur illum priorem modum exponendi hanc gratiam, etiam in illo facto, admittere: nihilominus tamen satis probabile est hoc fuisse concessum Petro in illa concione, ad faciliorem modum prædicandi simul diversarum linguarum hominibus, et fortasse, in aliis opportunitatibus, simile miraculum factum est per Apostolos, vel alios Evangelii prædicatores. Nam hoc etiam, nostra ætate, vel non multum ante illam, aliquibus sanctis viris esse concessum testantur Bozius, lib. 6 de Signis Ecclesiæ, cap. 5, et Lorin., Actor. 2.

54. *Gratia hæc priori modo explicata non conceditur per modum habitus, sed per mutationem tantum in verbis factam.*—Ex his facile responderi potest interrogationi, an hoc donum datum fuerit per modum habitus, vel per modum actus? Dicendum est enim, si aliquando concessum est illo priori modo, scilicet, ut una vox loquentis a multis in diversis idiomatibus audiatur, id nunquam esse concessum per modum habitus, sed solum per actualem Dei mutationem in verbis factam, quando ad aures audientium perveniebant, quia nullus habitus vel facultas loquentis potest habere tam mirabilem virtutem, ut est per se notum; unde non minus certum est tale opus non posse fieri ex habitu, quam alia miraculosa opera. Proprium autem donum linguarum, quod a nobis explicatum est, facile dari potest per habitum per accidens infusum; nam sicut habitus unius linguæ usu acquiritur, ita potest a Spiritu Sancto per accidens infundi; eadem autem ratio est de multis, seu

de omnibus linguis, quæ de una. Ac denique ita de facto esse datum in primitiva Ecclesia docet D. Thom. 2. 2, quæst. 176, art. 2, ad 3, idque recte colligit ex verbis Pauli citatis, 1 Corinth. 14: *Gratias ago Deo meo, quod omnium vestrum linguis loquor*, id est, scio et valeo loqui, non enim tunc omnium linguis actu loquebatur. Neque hoc indicat majorem perfectionem in illo dono, ut recte ibidem attingit D. Thomas, sed potius, quia est inferioris ordinis, et actio ejus, supposito habitu, est mere naturalis, et ad ordinarium convictum et societatem hominum inservit, ideo data est per modum habitus. Nunc vero, quia non est tanta necessitas, fortasse non ita infunditur, licet per occasionem interdum transitorie et per modum actualis motionis aliquando concedatur.

55. *Duo modi gratiæ interpretationis sermonum, de vocibus et sententiis, cum exemplis in primo modo.*—Nona gratia, gratis data, vocatur ab Apostolo *interpretatio sermonum*, de qua, quid sit et quomodo etiam a præcedentibus differat, variis modis exponitur. Duo autem modi videntur esse præcipui et probabiliores. Unus est, ut interpretatio sermonum ad significationem verborum referatur; alius est, ut de sensibus et mysteriis in verbis inclusis intelligatur. Priori modo interpretari sermonem, est verba unius idiomatis per alterius verba exponere, quod potest fieri vel scripto, vel voce. Priori modo, vocamus septuaginta interpretes, eos qui vetus Testamentum ex lingua Hebræa in Græcam primitus traustulerunt; posteriori modo vocamus confessionem per interpretationem, illam quæ fit ab homine cujus linguam confessor ignorat, intercedente alio, qui verba pœnitentis in idioma confessoris transferat. Sic ergo interpretatio sermonum est ad utilitatem fidelium necessaria, et fuit etiam in primitiva Ecclesia, primo, ad interpretandas epistolas, vel canonicas quas Apostoli scribebant, vel alias quæ ad ædificationem Ecclesiarum ad illas mittebant Episcopi, ut Clemens, Ignatius, et similes. Secundo, ad interpretandam concionem in una lingua factam, aliquibus fortasse adstantibus qui linguam illam non intelligebant.

56. *Objectio.*—Dicet fortasse aliquis, propter neutram causam fuisse illo tempore necessariam hanc interpretationem, quia donum linguarum erat tunc commune toti Ecclesiæ; dabatur enim non tantum doctoribus, sed universis fidelibus: ergo omnes intelligebant quæcumque linguam; ergo non indigebant

illa interpretatione. Antecedens colligitur ex Actor. 10, ubi, prædicante Petro gentibus congregatis cum Cornelio, *cecidit Spiritus Sanctus super omnes* visibiliter; *audiebant enim* (ut subjungitur) *illos loquentes linguis, et magnificantes Deum*: et similiter cap. 19, cum Paulus venisset Ephesum, et quosdam baptizari jussisset, *cum imposuisset illis manus Paulus, venit Spiritus Sanctus super eos, et loquebantur linguis, et prophetabant*. Et conjectura fit verisimile illud antecedens, quia donum linguarum non dabatur tantum ad loquendum, sed etiam ad intelligendum, neque dabatur solum propter doctrinam, sed etiam propter societatem et unionem; ergo non dabatur solis prædicatoribus, sed etiam cæteris fidelibus, ut se invicem intelligere, et in unum melius sociari possent.

57. *Solutio*.— Respondeo negando assumptum; nam potius videtur certum etiam in primitiva Ecclesia plebem christianam communiter non habuisse donum linguarum, neque omnes linguas intellexisse. Id aperte probatur ex Paulo 1 Corinth. 12 dicente: *Numquid omnes Apostoli? numquid omnes Prophetæ? numquid omnes Doctores? numquid omnes virtutes? numquid omnes gratiam habent curationum? numquid omnes linguis loquuntur? numquid omnes interpretantur?* Ubi de dono linguarum dicit non fuisse omnibus commune, eodem modo quo nec cæteræ gratiæ. Quod si non fuit commune omnibus quoad locutionem, profecto neque quoad intelligentiam, quia eadem est utriusque ratio; imo primo ac per se dabatur propter sermonem. Et ideo in cap. 14 monet Paulus eum qui habet donum linguarum, ut illo non utatur ad loquendum linguam quam audientes communiter non intelligunt, quia hoc jactantiæ potius et vanitatis esset quam utilitatis, et confusionem potius quam ædificationem pareret, non solum apud infideles, sed etiam apud fideles inruditos, quos ibi *idiotas* vocat, ut Anselmus, D. Thomas et Cajetanus indicant; et Theodoretus addit laicos eo nomine appellasse. Supponit ergo non omnes fideles intellexisse tunc peregrinas linguas, et ideo necessarium fuisse illis loqui in propria lingua, vel interpretari alienam, si aliquid in ea dicebatur vel legebatur.

58. *Responditur locus sacre Scripturæ*.— Unde, licet in dictis locis Actor. 10 et 19 donum linguarum datum fuerit aliquibus ad sermonem Petri, vel manus imponente Paulo, non inde sequitur datum esse omnibus fide-

bus, neque id commune fuisse in omni baptis-
mate, vel omni manuum impositione, sed in aliquibus occasionibus, juxta divinæ providentiæ dispositionem, et occurrentes occasiones; ut, in priori casu, id concessum videtur Cornelio et sociis ad confirmandam vocationem gentium, quia tunc primum cœpit illis ex professo prædicari Evangelium. In alio vero casu id fuit opportunum ad ostendendam virtutem baptismi Christi, et differentiam ejus a baptis-
mate Joannis, et ad confirmandos fideles in fide Spiritus Sancti. Et fortasse etiam tunc non omnibus indiscriminatim datum est linguarum donum, sed his qui postea futuri erant doctores, vel pastores populorum, et spirituales viri dicebantur, ut notat Irenæus lib. 5, cap. 6. Neque denique tale donum necessarium fuit dari omnibus plebibus fidelium propter ecclesiasticam societatem et unitatem, quia hæc unio, et societas proxime (ut sic dicam) et per se fit inter fideles et pastores seu prædicatores eorum, et in illis uniuntur plebes spirituali seu ecclesiastica unitate. Neque nationes diversæ habent inter se aliam humanam societatem, sed aliquam communicationem, vel per litteras, vel quando unus in alieno solo peregrinatur, propter quam non erat necessarium hoc donum, alias etiam hodie dandum esset; non datur autem quia sufficit interpretatio, vel humana eruditio; præterquam quod illa communicatio naturalis est, et non perficitur per dona gratiæ.

59. *Secunda objectio*.— *Respondetur, et ostenditur quid peculiare sit in hoc dono*.— Hinc vero potest secundo objeci, quia interpretatio sermonum in illo sensu non est gratia distincta a dono linguarum, sed est quidam usus ejus, qui naturaliter sequitur, seu fieri potest, si habituale donum supponatur: sicut, comparata per infusionem Spiritus Sancti peritia linguarum, loqui illis, vel eas intelligere, non est specialis gratia, sed usus connaturalis prioris gratiæ; ergo nec interpretatio sermonum in eo sensu erit specialis gratia. Propter hoc dicendum videtur, interpretationem hanc sermonum non esse simplicem et puram versionem unius linguæ in aliam, sola industria humana factam, supposita utriusque linguæ notitia, sive acquisita, sive per accidens infusa: sic enim argumentum convincit non esse specialem gratiam. Addit ergo hoc donum peculiare auxilium, ad servandam fidelitatem et assequendam veritatem sensus, ita ut verba in aliam linguam translata eandem sententiam referant. In hoc enim errare facile potest etiam

is qui utriusque linguæ habet peritiam, et ideo ultra donum linguarum utilissima esse poterat specialis gratia interpretandi sermonem, ne in his quæ ad mysteria fidei pertinebant, in interpretatione erraretur. Cum enim in congrua interpretatione necessarium sæpe sit, non verbum de verbo transferre, sed sensum observare, ut late Hieron., epist. 101, docet, ideoque difficile sit in hujusmodi interpretatione sensum et veritatem absque ullo errore attingere, multoque difficilins in rebus divinis, et maxime in Scriptura sacra, ubi et ordo verborum et verba ipsa mysterium habent, ut ibidem dixit Hieronymus; merito ad hujusmodi interpretationem specialis gratia gratis data, a notitia idiomatum distincta, desideratur. Quæ gratia tunc erit maxima, quando ita direxerit mentem transcribentis, ut infallibiliter a mente Spiritus Sancti, seu principalis auctoris nunquam discrepet, ut aliqui putant datum esse in Scriptura septuaginta interpretibus, vel vulgato interpreti. Pertinet etiam ad hanc gratiam, ut interpretatio non solum vera sit et fidelis in sensu, sed etiam ut sit clara, quantum ad utilitatem audientium necesse fuerit; maxime in concionibus ad populum locum habere potuit in primitiva Ecclesia, et nunc etiam concedi credimus, præsertim inter eos qui circa infidelium conversionem occupantur.

60. *Secundus modus est ad abstrusa subtilius et distinctius interpretanda.* — Venio ad alium modum hujus interpretationis, qui non sistit in idiomate verborum, nec est propter illos qui idioma ignorant, sed datur ad docenda mysteria quæ in verbis latent, et sæpe non intelliguntur ab his qui significationem verborum non ignorant, vel certe datur ad explicandas profundius vel distinctius res per verba significatas. Et de hac interpretatione sermonis putamus loqui Paulum in dicta numeratione gratiarum, et 1 Corinth. 14, ubi hoc genus interpretationis prophetiam lato modo vocat, et illam præfert dono linguarum, quia est cognitio rerum, et non tantum significationis verborum, et est utilior accipienti et Ecclesiæ, ut late declarat divus Thomas 2. 2, quæst. 176, art. 2; et per se manifestum est, hanc scientiam seu peritiam necessariam esse in Ecclesia; multi enim norunt optime latinam linguam, qui non possunt Scripturam sacram, etiam latine scriptam, in proprio sensu exponere, vel ad ædificationem fidelium interpretari, sed peculiari studio et doctrina ad id opus est. Hoc ergo dabatur olim pastoribus et doc-

toribus Ecclesiæ per gratiam interpretationis sermonum, et fortasse aliquibus sanctis postea dati est, absque humano eorum studio, ut de Bernardo et similibus creditur, et frequenter concedi creditur aliis concionatoribus, doctoribus et scriptoribus ecclesiasticis, non ut humanam diligentiam in suis ministeriis temere omittant, sed ut in illa proficere et ea convenienter uti valeant. Et de hac gratia aliqui intelligunt verba Pauli, 1 ad Timoth. 4: *Noli negligere gratiam quæ in te est, quæ data est tibi per prophetiam, cum impositione manuum presbyterii.* Nam hoc genus gratiæ et prophetiæ, quatenus ad cognitionem et intelligentiam pertinet, concedi solet per modum habitus, vel, licet detur immediate ad actus, per illos acquiritur habitus, qui postea ad eandem interpretationem juvat.

61. *Ultima objectio.* — Una superest objectio, quia Apostoli habebant donum linguarum, et erant sapientissimi in intelligentia et interpretatione Scripturarum, et mysteriorum fidei, et nihilominus indigebant interpretibus; nam Petrus Marco interprete utebatur, teste Papia apud Euseb., 1. 3 Hist., c. 1, et l. 5, c. 8, ex Iren., 1. 3, c. 1. Idemque habet Hieron., de Scriptorib. Ecclesiasticis, in Marco, Epist. 150, ad Hedibiam, quæst. 11, ubi similiter dicit Titum fuisse interpretem Pauli; ergo illa interpretatio aliquid aliud erat præter translationem ex uno idiomate in aliud. et præter expositionem doctrinæ fidei, vel Scripturæ, nam ad hæc non indigebant Apostoli interprete. Ad hoc tacite respondet Hieronymus supra dicens de Paulo, *quod, licet haberet scientiam sanctarum Scripturarum, et sermonis diversarumque linguarum gratiam possideret, divinorum sensuum majestatem digno non poterat Græci eloquii explicare sermone,* et ad hoc, ait. *habebat Titum interpretem, sicut Petrus Marcum;* quæ doctrina Hieronymi declarari potest ex altera divi Thomæ 2. 2, quæst. 176, art. 1, ad 1, dicentis, *Paulum et Apostolos instructos fuisse in linguis omnium gentium, quantum requirebatur ad fidei doctrinam, sed quantum ad quædam, quæ superadduntur humana arte ad ornatum, et elegantiam locutionis, Paulum instructum fuisse in propria lingua, non in aliena.* Ergo hæc ratione potuit uti eloquentia Græca ad interpretanda divina mysteria.

62. *Secunda solutio.* — *Tertia solutio.* — Et juxta hanc sententiam Hieronymi hæc interpretatio reducitur ad priorem modum; nam ejusdem rationis est, in eadem lingua

eamdem sententiam simplicibus verbis dictam, elegantioribus interpretari, quod ab una lingua in aliam transferre. Adde vero hunc etiam usum interpretationis potuisse habere locum in Apostolis: nam in una concione Paulus, verbi gratia, in una tantum lingua concionabatur, et contingere poterat ut multi audientes linguam illam ignorarent; propter illos ergo utilis esse poterat interpres, ut eis in propria lingua concionem declararet et Apostoli laborem levaret. Denique etiam, quoad rerum ipsarum et mysteriorum interpretationem, poterat Paulus indigere interprete, non quia non posset ipse copiose et perfecte omnia exponere, sed quia poterat, uno contextu et stylo sermonis, alta et profunda mysteria prædicare, quæ non omnes audientes percipere aut penetrare potuissent; munus autem interpretis postea esse potuit ad captum singulorum ea distribuere et magis accommodare, ne Apostolum postea in hoc occupari oporteret. Qui plura de hoc puncto desiderat, legat Baronium, t. 1, anno Domini 45, n. trigesimo secundo, et sequentibus. Nobis enim hæc satis fuerit dixisse de novem gratiis gratis datis, a Paulo numeratis, quæ visum est hoc loco expedire, quia in hac materia nihil amplius de illis dicturi sumus.

63. *Ratio D. Thomæ de numero harum gratiarum congrue eas declarat, licet non cogat, nec plures, nec pauciores esse.* — Solum superest advertendum, circa numerum harum gratiarum, D. Thomam, in dicto art. 4, accurate studuisse rationem illius numeri reddere, ac si gratiæ gratis datæ neque plures, neque pauciores numerari possent. Verumtamen licet illa congruentia, quam adducit, optime declaret quam convenienter et apposite potuerit Apostolus gratias illas distinguere, et tanquam sufficientes numerare, nihilominus non cogit dicere, aut illas omnes necessario esse distinguendas, aut non posse vel easdem in plures distinguere, vel illis alias adjungi. Nam idem D. Thomas, in 2. 2, ad pauciora membra illas revocare videtur, nimirum prophetiam, donum linguarum, gratiam sermonis et gratiam miraculorum. Imo etiam Paulus, in eodem capite, sub uno Doctorum nomine eos comprehendit, qui sermonem scientiæ vel sapientiæ, vel fidem habent. Et sub nomine Prophetarum videtur etiam discernentes spiritus complecti. Abunde vero ex variis interpretationibus istarum gratiarum, quas retulimus, non obscure colligitur, sub aliquibus earum plures contineri, quæ ut distinctæ pos-

sunt recenseri. Nam gratia sapientiæ et scientiæ, ut ad cognitionem spectat et ad aliorum utilitatem datur, posset distingui a gratia sermonis utriusque membri; et singuli modi fidei quos explicuimus, quatenus et in se veri sunt et distincti, licet æquivoce nomine fidei significantur, possent in plures gratias distinguere, si propria singulis nomina imponerentur. Gratiam item sanitatum paulo post vocavit Paulus gratiam curationum, quia varia sunt dona curationum, et cuidam datur virtus contra unam morbi speciem, alteri contra aliam, et ab hac gratia et ab operatione virtutum potestas ejiciendi dæmones separari posset, cum in Ecclesia unus gradus ministrantium exorcistarum nominetur. Ac denique eadem interpretatio sermonum varios modos complectitur, qui fere solo nomine conveniunt, et re ipsa distinguere possunt.

64. *Ordinis, non baptismatis et confirmationis character est gratia gratis data.* — Præter hæc item multa sunt alia dona supernaturalia, quæ per se non dantur propter sanctitatem recipientis, sed propter Ecclesiæ utilitatem, quæ sub prædictis non videntur comprehendi, cum tamen illas esse gratias gratis datas negari non posse videatur, cum illis definitio hujus gratiæ conveniat; hujusmodi imprimis est character ordinis. Nam character baptismi merito ad gratiam sanctificantem reducitur, quia non ordinatur per se ad aliorum utilitatem, sed ad propriam sanctificationem, saltem ut potentia ad recipiendam illam per sacramenta. Idemque cum proportionem de characterem sacramenti confirmationis dici potest; datur enim solum in ordine ad fidei confessionem, ad quam unusquisque debet esse armatus et paratus, non propter aliorum utilitatem, sed propter propriam sanctificationem, et quasi ex personali debito pugnandi pro fide. Character autem ordinis solum datur ad utilitatem Ecclesiæ, propter ministeria spiritualia et publica in illa necessaria, quæ maxime ordinantur ad publicum Dei cultum et ad fidelium sanctificationem. Est enim ille character potestas quedam activa supernaturalis; ergo est gratia, nam gratis datur. Et licet detur certa lege recipienti tale sacramentum, et consensum seu intentionem postulet recipiendi sacramentum, hoc nihil derogat rationi gratiæ, nam gratia sacramentalis vera gratia est; imo maxime gratuita, cum detur præter opus operantis, etiamsi detur ex lege volenti recipere sacramentum. Non datur autem illa potestas ordinis in bo-

num recipientis, sed propter utilitatem fidelium; optime ergo dici potest gratia gratis data.

65. *Jurisdictionis potestas etiam gratis data gratia est. — Item clavis scientiæ.* — Secundo, idem dici potest de potestate jurisdictionis, præsertim in foro interno: nam illa est supernaturale donum gratuitum ad fidelium spirituale commodum ordinatum. Neque est necesse ut ad confirmationem fidei conferat, quia Paulus non dixit has gratias dari solum ad confirmationem fidei, sed absolute *ad utilitatem*: ergo satis est quod data sit propter fidelium sanctificationem. Fateor autem hæc dona, quæ ad sacramenta ministranda Ecclesiæ relicta sunt, posse ad gratiam sanctificantem reduci, quatenus, et adjunctum habent ex vi sacramenti ordinis auxilium gratiæ sanctificantis, ut digne ministrentur, et ad causas gratiæ sanctificantis pertinent, quæ causæ sub illo respectu ad ordinem gratiæ gratum facientis revocantur, ut infra videbimus. Tertio, dici potest gratia gratis data, illa quæ datur Pontifici, aut generali Concilio ab ipso approbato, ad definiendas res fidei, quæ in Pontifice clavis scientiæ appellatur. Nam illa sine dubio est supernaturale donum, gratis datum propter Ecclesiæ utilitatem. Potest autem non immerito reduci ad gratiam prophetiæ, vel interpretationis sermonum: nam si interpretatio Scripturæ non authentica, sed utilis Ecclesiæ, facta ex speciali auxilio, est gratia gratis data, cur non multo magis erit ex gratia authentica interpretatio? Erit ergo vel interpretatio sermonum, vel participatio quædam prophetici spiritus, seu instinctus.

66. *Aliæ gratiæ gratis datæ.* — Quarto, Paulus, in eodem cap. 12, iterum recensens dona data Ecclesiæ, ponit *Apostolos, opitulationes, gubernationes*, et licet non dicat hæc pertinere ad gratias gratis datas, simul illa conjungit cum aliis gratiis gratis datis, ut sunt, *Prophetæ, Doctores, virtutes, gratia curationum, genera linguarum, et interpretatio sermonum*, quæ superioribus conjunctæ eundem numerum novenarium reddunt; cum tamen illa tria priora non videantur a gratiis gratis datis omnino condistincta, nec sub priori novenario comprehensa. Nam licet idem Apostolus in principio capitis tria distinxerit, scilicet gratias, ministeria et operationes, nihilominus hæc (ut notat Chrysostomus, homil. 29) nominibus distinguuntur, non rebus, *nam ministratio, inquit, donum est gratuitum, sed significatum nomine laboris, ne*

fortasse doleat, qui illud non recipit. Idemque de operatione subjungit, adducens illud Galat. 2: *Qui operatus est Petro in Apostolatu, operatus est mihi inter gentes.* Igitur, ex sententia Chrysostomi, Apostolatus etiam est charisma, seu donum gratuitum, ac subinde gratia gratis data: nam sine dubio propter utilitatem Ecclesiæ datum est. *Opitulationes* videntur esse curationes infirmorum, distributiones eleemosynarum, et similia ministeria, quæ sine jurisdictione exercentur, et illis Ecclesiæ membra invicem juvantur, et quatenus ex dono gratuito Spiritus Sancti fieri possunt, inter charismata a Paulo numerantur. Denique *gubernationes* sunt ministeria ex jurisdictione speciali concessa Ecclesiæ ad spiritualem suam gubernationem, quæ jurisdictio donum gratuitum est, et ad communem utilitatem. Sunt ergo istæ suo modo gratiæ gratis datæ Ecclesiæ, quamvis in priori enumeratione omissæ sint, vel quia specialiter gratiarum nomine illæ tantum operationes significatæ sunt, quæ in ipso opere vel modo operandi aliquid habent supernaturale, vel quia non pertinent ad ordinariam gubernationem Ecclesiæ, sed extraordinarie pro re nata, et juxta occasiones occurrentes conferuntur.

CAPUT VI.

QUOTUPLEX SIT GRATIA SANCTIFICATIONIS, SEU GRATUM FACIENS, ET DE VARIIS NOMINUM HUIUS GRATIÆ SIGNIFICATIONIBUS.

1. *Titulus quæstionis enodatur.* — Gratia gratum faciens propter excellentiam suam simpliciter nomen gratiæ obtinuit, et in ea potissimum significatione in titulo hujus tractatus sumitur, est enim proximum objectum ejus ac primum. Sub hac autem generali appellatione multa gratiarum genera continentur, quæ, licet in discursu hujus materiæ tractanda et explicanda sint, hic sunt saltem quoad nominum significationem distinguenda, ut de rebus ipsis distincte disputare, et uniuscujusque gratiæ necessitatem, essentiam, causas et effectus, ac proprietates explicare valeamus. Nam de hac gratia in sua generalitate sumpta non possunt hæc omnia, nisi valde confuse et imperfecte, declarari.

2. *Sermo de creata gratia, curque creata nuncupetur.* — Solum ergo, in communi, supponimus loqui nos de gratia gratum faciente, quæ in anima aliquid creatum sit, eique inhæreat. Creatum appellamus, licet per propriam crea-

tionem ex nihilo non fiat, sed aliquo modo sit ens participatum a natura, et persona increata distinctum, et animæ inditum, sive in essentia, sive in potentiis, de hoc enim postea videbimus. Ita enim supra, divisionem gratiæ in creatam et incretam variis Scripturæ testimoniis probando, dari nobis creatam gratiam, quæ nobis intrinseca sit, et non tantum extrinseca, ostendimus. Et ex eisdem locis illam ad ordinem gratiæ gratum facientis maxime pertinere convincitur; nam per illam dicimur fieri sancti, et Spiritum Sanctum nobis infundi, ut ad recte operandum adjuvemur. Et simili modo hanc gratiam probant omnia Scripturæ, Conciliorum et Patrum testimonia, quæ docent gratiam Dei, qua sanctificamur, et ad operandam justitiam juvamus, nobis donari, infundi, in nobis fieri, augeri: nam hæc vel non habent locum, nisi in rebus creatis, ut fieri, augeri; vel saltem sine creatis donis fieri non possunt, ut donari, infundi; vulgaria loca sunt ad Romanos 5, ad Ephes. 1 et 4, 2 Corinth. 1, et similia, quæ postea suis locis tractabimus, et optima sunt verba illa Psalmi 50: *Cor mundum crea in me, Deus*, quibus David et gratiam sanctificantem postulabat, et per quamdam creationem dandam esse supponebat. Et ideo Paulus, ad Ephes. 4, hominem justum *novum hominem* vocat, *qui secundum Deum creatus est*.

3. *Actualis et habitualis gratia sub sanctificante et gratum faciente a Patribus explicatur.* — Hoc ergo supposito, gratia hæc gratum faciens, in habitualement et actualem distinguuntur. Nam, ut supra dixi, gratia sanctificans, quæ eadem est quæ gratum faciens, utrumque genus donorum includit. Dicunt vero aliqui, nunquam Augustinum vel alios Patres antiquos contra Pelagianos de gratia disputantes, per gratiam intellexisse habitualement, *sed* auxiliantem tantum, quia de hac fuit illis contentio cum Pelagio, non de habituali gratia, ut significat Augustinus epistol. 105, dicens non satis esse si Pelagius admittat gratiam remissionis peccatorum, quia per hoc non posset defendere gratiam sine meritis, quia nec ipsa remissio datur sine aliquo merito. Alii vero scholastici, ut supra retuli, solum gratiam habitualement volunt esse gratum facientem, qui consequenter illam distinctionem non admitterent, utique sub illo divisione. *sed* hæc diversitas est in non verborum, nam rem ipsam, id est, verumque genus illius gratiæ nullus Catholicus negat, sive hoc sive illo nomine illam appellet. Nos autem addimus,

etiam quoad usum verborum, utramque gratiam a Patribus antiquis esse traditam, et sub gratia sanctificante, quæ eadem est cum gratum faciente, comprehensam. Eademque doctrina sumitur ex D. Thoma, quæst. 27, de Verit., art. 5.

4. *Remissio peccatorum ad sanctificantem pertinet.* — Et imprimis manifestum est remissionem peccatorum ad gratiam sanctificantem pertinere: illam autem vocat gratiam remissionis peccatorum Augustinus dicta epistola 105, et eam distinguit a gratia fidei, in hoc quod gratia fidei non cadit sub meritum, quia non supponit aliam fidem, per quam impetretur: at vero gratia remissionis peccatorum cadit sub aliquod meritum, quia per fidem impetratur. Per hanc autem gratiam remissionis peccatorum, sanctificantem intellexisse Augustinum, ex eodem sumi potest, primo *Retract.*, capit. 24 et 25, ubi recognoscens quod in epistolis ad Rom. et ad Galat. exponendo illa Apostoli verba, *Gratia vobis et pax*, dixerat *gratiam esse in dimissione peccatorum, pacem vero in reconciliatione Dei*, seu *gratiam esse, qua nobis condonantur peccata, ut reconciliemur Deo, pax autem, qua reconciliamur Deo*, adjungit: *Sic accipiendum est, ut tamen sciamus etiam utrumque ad generalem Dei gratiam pertinere*. Per hanc autem generalem gratiam sine dubio intelligit sanctificantem gratiam, de qua illi erat cum Pelagio contentio, et ad illam maxime pertinet pax reconciliationis cum Deo, ut est per se notum: ergo ad eandem spectat gratia remissionis peccatorum, et per utramque significatur habitualis gratia, quia illa duo, scilicet, remissio peccatorum et reconciliatio cum Deo, licet distinguantur tanquam duo beneficia, revera sunt ab una gratia sanctificante, quæ præcise concepta in ordine ad illos duos effectus illas duas denominationes recipit.

5. *Augustinus aperte et eleganter de habituali loquitur.* — Unde in eadem expositione inchoata epistolæ ad Rom., idem Augustinus subjungit: *Cum enim, per gratiam remissis peccatis, absumptæ fuerint inimicitie, restat ut pace adhæreamus illi a quo nos sola peccata dirimebant*. Illam vero esse unam gratiam, et illam esse habituale donum, paulo inferius declarat. Quærens enim rationem cur Paulus dixerit: *Gratia vobis, et pax a Deo Patre nostro, et Domino Jesu Christo*, et Spiritum Sanctum omiserit, ait: *Non mihi alia ratio videtur, nisi ut ipsum donum Dei Spiritum Sanctum intelligamus. Gratia porro et pax,*

quid aliud est quam donum Dei, unde nullo modo dari hominibus gratia potest, qua liberamur a peccatis, et qua reconciliamur Deo, nisi in Spiritu Sancto. Igitur longe aliter posuit Augustinus gratiam remissionis peccatorum quam Pelagius; tum quia Pelagius per gratiam remissionis non intelligebat donum aliquod infusum, sed extrinsecam condonationem peccatorum, sicut Augustinus indicat lib. de Grat. et lib. Arb., c. 14, ejus contrarium ipse docet; tum etiam quia, licet illam vocaret gratiam, ponebat aliquod ejus meritum in solis liberi arbitrii viribus fundatum, et ita non poterat in remissione peccatorum salvare veram rationem gratiæ: Augustinus autem, licet ponat aliquod meritum hujus gratiæ, docet illud esse fundatum in priori gratia, et ideo non esse gratiæ contrarium. Et ita Patres disputantes cum Pelagio de gratia, et contententes non dari ex merito, etiam de hac gratia disputarunt. Si ergo Patres sub gratia sanctificante veram gratiam remissionis peccatorum comprehendunt, negari non potest quin habitualia dona sub illa gratia complectantur, quod pluribus in lib. 6, cap. 1, comprobabimus. Hæc enim solum hic præmitto, ut constet quid sit apud Augustinum gratia remissionis peccatorum, quod eodem fere modo exposuit D. Thom. 1. 2, quæst. 110, art. 1, ad 3.

6. *Actuales gratiæ sub gratum faciente continentur.* — Deinde, non minus certum est in usu Sanctorum Patrum, sub gratia sanctificationis, seu gratum faciente, comprehendere actuales gratias quibus ad remissionem peccatorum obtinendam, et ad rectam operationem homo juvatur. Id constat imprimis ex Concilio Milevitano, capit. 3, dicente: *Quicumque dixerit, gratiam Dei, in qua justificamur per Jesum Christum Dominum nostrum, ad solam remissionem peccatorum valere, quæ jam commissa sunt, non autem ad adjutorium, ut non committantur, anathema sit.* Et in cap. 4 declarat ad eandem gratiam pertinere omnia auxilia quæ, vel ad fidei veritatem cognoscendam, vel ad Deum diligendum, nobis donantur: et in cap. 5 similiter definit gratiam justificationis esse necessariam, ut præcepta implere possimus, quod maxime propter actuales gratias dictum esse, ex dicendis in lib. 1 et 2 constabit. Et eadem repetuntur in Concilio Africano sub Bonifacio, canon. 78, 79 et 80. Et ex Concilio Carthagin. referuntur et approbantur in epistol. Cœlestini I ad Episcop. Gall., capit. decimo. Sic in epistol. 90, inter

epistolas Augustini, quæ est Concilii ejusdem Carthag. ad Innoc. Papam, *gratiam, qua Christiani sumus*, complecti dicunt omnia auxilia quibus ad bene operandum juvamus; constat autem *gratiam qua Christiani efficiamur*, maxime illam complecti, quæ nos Deo gratos reddit. Et in epistol. 95, quæ est quinque Episcoporum cum Augustino, ad eundem Innoc., eandem vocant, *gratiam qua justificamur ab iniquitate, et qua salvamur ab infirmitate*; et infra dicunt ad hanc gratiam spectare, *quidquid per subministrationem Spiritus Sancti pertinet ad concupiscentias, tentationesque vincendas, quem ditissime effudit in nos, qui ascendit in colum, et captivam duxit captivitatem, et dedit dona hominibus.* Dat autem Christus per subministrationem Spiritus Sancti non tantum habitualia dona, sed etiam auxilia omnia, quibus contra concupiscentias dimicamus; omnia ergo illa ad gratiam pertinent, qua justificamur. Et in hac significatione loquitur Augustinus de divina gratia in omnibus suis operibus, ut legenti facile constabit. Recte ergo hæc gratia in habitualem et actualem dividitur; utraque enim necessaria est ad nostram justificationem, et illam Deus operatur inchoando vel perficiendo illam. Unde si nomen gratiæ gratum facientis quasi collective sumatur, utrasque gratias complectitur, tanquam partes illius collectionis: si vero proprius sumatur, ut generale nomen sub se plura dona complectens, sic per modum generis in species, in habitualem et actualem gratiam dividitur, et in hac significatione in presenti sumitur.

7. *Subdivisio gratiæ sanctificantis in gratiam viæ et patriæ.* — Uterius vero utrumque membrum breviter subdividendum est. Et primo, gratia sanctificans dividi solet in gratiam viæ et patriæ, seu inchoatam et consummatam, quæ divisio utriusque membro præcedentis divisionis accommodari potest. Nam omnia dona gloriæ, gratiæ quædam sunt, et ad omnia et singula potest accommodari illud Rom. 6: *Gratia Dei vita æterna*; et si respective ad dona viæ comparentur, se habent ut perfecta et consummata respectu eorum quæ inchoata fuerant vel ex parte data. Sic comparatur visio Dei ad fidem et cognitionem viæ, juxta illud 1 Corinth. 13: *Ex parte cognoscimus, cum autem venerit quod perfectum est, eracuabitur quod ex parte est.* etc. Sic etiam possessio beatitudinis comparatur ad spem; et charitas patriæ, licet sit eadem in substantia, in statu, modo et gradu est consummata respectu sui, prout in via fuerat inchoata. Nam hic

semper est imperfecta, ibi autem erit plena, juxta illud ad Philipp. 3 : *Non quod jam acceperim, aut quod jam perfectus sim, sequor autem si quo modo comprehendam.* Eademque ratio est de cæteris actibus et donis, seu virtutibus, et de ipsa gratia habituali, quæ ibi et non antea consummabitur. Ad quam consummationem omnes hujus vitæ gratiæ et ministeria conferuntur, dicente Paulo ad Ephes. 4 : *Ipsè dedit quosdam Apostolos, etc., ad consummationem Sanctorum in opus mysterii, in ædificationem corporis Christi, donec occurramus omnes in virum perfectum,* etc. Verumtamen, licet gratia consummata in suo esse sit perfectior respective, nihilominus ratio gratiæ simplicius et perfectius invenitur in gratia viæ; quia gratia patriæ jam est corona justitiæ, et inde habet rationem gratiæ, quod ex meritis fundatis in gratia viæ procedit, et ideo de illa exponit Augustinus illud Joan. 1, *Gratiam pro gratia,* tract. 3 in Joan., et in Enchir., c. 7; de Grat. et lib. arb., cap. 8; et de Corrept. et grat., c. 13. Et hinc nomine gratiæ simpliciter intelligitur gratia viæ, et gratia patriæ gloria vocatur, juxta id Psalm. 83 : *Gratiam, et gloriam dabit Dominus.* Atque ita de gratia nunc loquimur, nam ea quæ sunt propria gratiæ consummatæ, in tractatu de Beatitudine considerantur.

8. *Gratia quæ est in essentia animæ et in potentia ejus.* — Gratia igitur viæ habitualis dividi potest in eam quæ est in essentia animæ, et eam quæ est in potentiis. De priori intelligi optime possunt illa testimonia : *Justificati gratis per gratiam ipsius,* Roman. 3; et : *In laudem gloriæ gratiæ suæ, in qua gratificavit nos in dilecto filio suo,* ad Ephes. 1. De posteriori sunt illa testimonia, Roman. 5 : *Charitas Dei diffusa est in cordibus nostris;* et ad Ephes. 1 : *Gratia estis salvati per fidem, et hoc non ex vobis, donum enim Dei est.* Sed quia utriusque ordinis testimonia sunt ambigua, et varias habere possunt expositiones, ideo subdivisio hæc, et illud primum membrum præcedentis divisionis in libro 6 ex professo nobis probanda sunt. Nunc solum advertimus longe certius esse, gratiam gratum facientem habitualiter infundi, quam quod aliquod donum in essentia animæ immediate recipiatur, vel (quod perinde est) quod sit distinctum ab habitibus virtutum, quæ sunt proxima principia operationum : id tamen nunc tanquam probabilius supponimus : et juxta hanc hypothèsim semper loquemur. Nam, hac subdivisio-
ne supposita, illa gratia quæ in essentia animæ immediate infunditur, quasi per an-

tonomasiam inter scholasticos, et præsertim in schola divi Thomæ, nomen gratiæ sanctificantis, seu gratum facientis, obtinuit, ut ab aliis habitibus per se infusis, qui virtutes vel dona vocantur, distinguatur. Nam quia illa gratia perfectior cæteris censetur, et nomen sanctificantis gratiæ perfectionem magnam indicat, ideo simpliciter dictum ad perfectissimum gratiæ donum significandum accommodatum est, et in hac significatione frequentius et ordinarie in hoc tractatu loquemur; cætera vero de hac divisione in dictum librum 6 remittimus.

9. *Actualis gratia sanctificans sunt actus supernaturales, et Dei concursus ad illos requisitus.* — Gratia item gratum faciens actualis multipliciter subdividi potest. Primo quidem, seu proxime illam partimur in actus supernaturales, et auxilia seu motiones Dei, quibus nos ad illos efficiendos promovet. Supponimus enim dari in nobis aliquos hujusmodi actus supernaturales. Ex qua hypothèsi duo manifeste inferuntur : unum est, illos esse dona Dei non debita naturæ. Unde dixit August., in Enchir., c. 7, Deum præmium his actibus dando, *remunerare dona sua,* quod latius confirmat lib. de Grat. et lib. arb., c. 6; sunt ergo gratiæ, et sub gratum faciente continentur, ut dixi, quia per illos justitia vel acquiritur, vel augetur, et consequenter sunt gratiæ actuales, quia non permanent, nisi dum fiunt. Aliud quod infertur, est hujusmodi actus non posse fieri sine speciali seu aliquo modo supernaturali auxilio Dei, quia si opus supernaturale est homini, profecto vires ejus naturales superat; ergo oportet ut per auxilium Dei defectus ille suppleatur : ergo etiam illud auxilium est gratia aliquid ad propriam sanctificationem conferens, ac subinde sub generali gratia gratum faciente contenta. Distinguitur autem hæc gratia ab ipso actu, vel tanquam via ad illum, vel saltem ut motio influens in illum, et ideo non transcendit ordinem gratiæ actualis; recte igitur actualis gratia in illa duo membra distinguitur.

10. *Prima partitio actualis gratiæ.* — *Secunda.* — *Tertia.* — Ulterius vero gratia hæc actualis, ut ad actus ipsos pertinet, multiplex est, et breviter notari possunt tres præcipuæ partitiones. Prima est, quia duobus modis esse potest actus supernaturalis, scilicet in sua entitate, et dicitur supernaturalis quoad substantiam, vel solum in modo quo fit, nimirum, quia tunc fit per speciale Dei auxilium, quando per naturales causas vel fieri non posset,

vel infallibiliter non fieret, quam partitionem in toto lib. 1 et 2 explicaturi sumus. Secunda est, quia hi actus interdum sunt perfecte humani et liberi, et sufficienti consideratione rationis elicit; alii vero sunt sine libertate facti ex necessaria motione Dei, et absque sufficienti consideratione et deliberatione hominis elicit, ad eum modum quo contingit esse in nobis motus cogitationum vel appetitionum indeliberatos ac naturales, qui dicuntur primo primi. Priores actus perfecte humani spectant proprie ad primum membrum gratiæ actualis, quod supernaturales actus continet; tum quia isti sunt proprie et perfecte nostri, quia illorum sumus domini; tum etiam quia alii actus necessarii sub auxiliis actualibus continentur, et ita semper loquemur. Quia, licet in illis actibus naturalibus distingui possit, et ratio actus vitalis integri et consummati in sua ratione, et ratio viæ seu tendentiæ ad illum, illa distinctio solum est physica, et ad moralem gratiæ considerationem parum confert. Tertia veluti subdivisio illius membri supernaturalium actuum humanorum esse potest, quia quidam illorum antecedunt habitualement justitiam vel tempore vel saltem natura, alii subsequuntur; priores solent esse dispositiones ad justitiam, posteriores vocantur fructus justitiæ, et ita uno vel altero modo ad gratiam sanctificantem pertinent. His addi possunt divisiones secundum varias virtutum species, de quibus in libro secundo dicendum est.

11. *Multiplex actualis auxiliatricis gratiæ acceptio.* — Tandem hæc etiam gratia actualis, ut de auxiliis dicitur, multiplex est; tamen, quia illorum auxiliorum varietas in libro 3 et sequentibus ex professo tractanda est, hic tantum ad usum nominum præ oculis habendum tria breviter prænotabimus. Primum est, novem esse præcipuas voces, quibus hæc actualis gratia nomenclari solet. Primo enim dicitur hæc gratia vel motio *præveniens*, quia tempore vel natura præcedit vel meritum, vel actum, vel influxum liberi arbitrii, et ita hominem prævenit, et in idem redit, si vocetur *præmotio* gratuita, sive auxilium *præmovens*, nam commune est omni actuali gratiæ spiritualiter movere animam; ideo enim actualis dicitur, quia in actuali motione consistit: cum ergo dicitur præmotio, significatur antecessio temporis, vel naturæ, quam etiam nomen *præveniens* significat. Secundo, dicitur *concomitans*, seu *comitans*, quia simul cum ipso libero arbitrio influit in actum, et ab aliquibus vo-

cari solet *auxilium simultaneum*. Tertio, dicitur *subsequens*, quia supponit vel aliam gratiam, vel aliquem actum liberum ex gratia factum, ratione ejus datur. Quarto, vocatur *excitans*, quia hominem non attendentem, et quasi dormientem a somno excitat, mentem actualiter illuminando, vel cor ejus tangendo. Quinto, dicitur *adjurans*, quia ipsum hominem, ut actu operantem, juvat. Sexto, dicitur *operans*, quia solus Deus per illam in homine operatur, solus, inquam, id est, sine libera hominis cooperatione. Septimo, dicitur *cooperans*, quia cum ipso libero arbitrio actu operatur. Quibus adduntur nomina gratiæ sufficientis et efficaciæ, quæ easdem gratias significant, easque fere omnes subdividere possunt: et nunc perfunctorie possunt ita exponi, ut sufficiens dicatur ratione virtutis et potestatis quam habet ad operandum: efficax vero ratione actualis effectationis, quam vel ex se, vel ex modo quo datur, infallibiliter habet. Ratio autem prædicti numeri non est alia, nisi quia illæ voces sunt usitatæ a Patribus, ad significandas gratias actualium auxiliorum, et illæ sufficienter significant omnes divinas motiones necessarias ad opera gratiæ, saltem sub generalibus rationibus et habitudinibus earum, ut in libro quarto, capit. tertio, dicturi sumus.

12. *Admitti non debet vox nisi quæ aliquam ex dictis significet vel in Patribus sit.* — Quamobrem non sunt facile aliæ voces in hac materia admittendæ vel introducendæ, nisi aliquas species prædictarum motionum significant, et in usu Sanctorum Patrum inveniuntur. Sapissime enim significantur aliquæ ex prædictis gratiis nomine *vocationis*, *illuminationis*, *inspirationis*, et *tactus cordis*, ut in Concilio Trident., sess. 6, et in Arausicano et aliis videre licet; sed per hæc omnia significantur eadem gratiæ quæ secundum alias considerationes aut respectus dicuntur prævenientes, excitantes, aut operantes. Nam gratia actualis movet hominem ad sanctam voluntatem et operationem; unde necesse est ut ab intellectu incipiat, ut recte notavit Augustinus de Prædestin. Sanctorum, c. 2, et quæst. 2 ad Simplician. ; et ideo prima gratia, quæ hominem prævenit et excitat, recte dicitur vocatio, quia hominem vocat ad bene operandum; et dicitur illuminatio, quia aliquid manifestat intellectui, et omne quod manifestatur lumen est, ut dixit Paulus, et ab Augustino supra et sæpe vocatur sancta cogitatio. Inspiratio vero dicitur, vel quia venit ab Spiritu Sancto, qui

ubi vult spirat, vel quia voluntatem etiam excitat et movet, unde actus cordis merito appellatur: nomine enim cordis voluntas significari solet, juxta illud: *Diliges Dominum Deum tuum ex toto corde tuo*, quamvis possit etiam ad totam mentem et intellectum referri, juxta illud: *Ut quid cogitatis mala in cordibus vestris?*

13. *Cur prædeterminatio dictis non jungatur.* — His aliqui addunt gratiam *præoperantem*, solum quia illa voce semel usus est Prosper in epistol. ad Augustinum; sed illa coincidit cum gratia operante, et illa particula *præ* solum indicat operantem gratiam esse etiam prævenientem, ut infra suo loco dicam. Addunt præterea nomen *prædeterminantis* gratiæ, seu auxilii; nos vero nunc ab hac voce abstinemus, quia nec in Scriptura vel Conciliis, nec in Augustino, aut aliis Patribus, vel antiquis theologis illam invenimus, ad significandam aliquam gratiam usurpatam. Et potest esse ambigua, nam prædeterminatio interdum significat externum propositum personæ prædeterminantis, et sic in donis gratiæ pertinet potius ad gratiam prædestinationis, vel electionis Dei, quam ad internam gratiam, de qua nunc agimus. Potest etiam significare internum impulsus immissum voluntati ad determinandam illam, et sic potest vox illa falsum sensum inducere, ut in libro quinto videbimus.

14. *Præparantis et prædefinientis vox excluditur.* — Facilius admitti posset vox *præparantis* gratiæ, quia frequenter Augustinus utitur in hac materia illis verbis, quæ secundum Septuaginta leguntur Proverb. 8: *Præparatur voluntas a Domino*, utique per gratiam; datur ergo gratia præparans. Sed hæc etiam vox ambigua vel multum generalis est, quia interdum significat præparationem extrinsecam, quæ fit per propositum Dei, et sic dixit Augustinus de Dono persever. c. 14: *Prædestinatio est præscientia, et præparatio beneficiorum Dei*; et in hoc sensu non spectat ad gratiam, de qua loquimur, sed ad gratiam increatam et extrinsecam. Alio modo significat *præparatio* intrinsecam subjecti dispositionem et præparationem, et sic multis etiam modis potest voluntas per gratiam præparari. Interdum enim ita præparatur, ut ipsa se præparet, et tunc illa vox non tam significat auxilium, quam actum humanum perfectum, quo voluntas se disponit cum Dei auxilio ad ulteriorem gratiæ perfectionem. Aliquando vero præparatur a solo Deo, et tunc gratia præparans eadem est, quæ gratia præveniens aut excitans, vocando, illuminando,

etc. In hac vero significatione vox illa præparantis gratiæ usitata non est. Idemque fere est de gratia *prædefinitionis*, quam aliqui inter auxilia ponunt, imo et prædestinationem et præscientiam. Sed hæc non pertinent ad gratiam intrinsecam et creatam, de qua nunc tractamus: nec proprie dicuntur auxilia, quia per se non operantur in nobis, nec nobiscum, ut postea videbimus. *Concursus* etiam divinus, qui ad hæc opera datur, inter has gratias actualis numeratur, quod in bono sensu verum est, et sub adjuvante gratia comprehenditur. Quomodo autem intelligendum sit, in fine libri tertii dicemus.

15. *Hoc auxiliantis gratiæ donum est supernaturale in substantia, vel in modo.* — Secundo, circa idem genus gratiæ actualis et auxiliantis, et omnia membra ejus, quæ explicuimus, oportet advertere, sicut de actibus ipsis diximus quosdam esse in entitate supernaturales, alios in modo, ita etiam hoc donum gratiæ auxiliantis esse posse vel in se supernaturale absolute, vel solum ratione ordinis, seu modi, scilicet, quia in entitate sua naturalis est ordinis, datur tamen per modum beneficii gratuiti. Et primum dici potest supernaturale quoad substantiam, maximeque datur ad opera supernaturalis ordinis, quæ supernaturalia quoad substantiam esse dicuntur. Secundum dici potest supernaturale quoad modum, daturque maxime ad actus morales in substantia etiam sua naturales, licet interdum dari etiam possit, ut aliquo modo juvans ad actus per se infusos efficiendos. Quæ partitio veram doctrinam continet: non possumus autem hoc loco illam exacte declarare, præsertim quoad membrum primum ejus, quia pendet ex cognitione ipsorum actuum, qui supernaturales quoad substantiam dicuntur, de quibus in secundo libro dicturi sumus, et ideo in tertio libro illud genus auxilii exacte declarabimus. In altero vero membro, solum est cavendum ne illud genus auxilii cum motionibus vel concursibus Dei mere naturalibus confundatur contra dicta in secundo capite hujus prolegomeni.

16. *Motio naturalis gratia dicitur cum non debito modo confertur.* — Ut ergo hoc explicemus, advertimus tertio, ut motio ordinis naturalis inter auxilia gratiæ computetur, imprimis necessarium esse ut non sit debita naturæ ex vi naturalis dignitatis, seu conditionis sue, et consequenter neque ex vi naturalis providentiæ Dei secundum legem ordinariam ipsi naturæ consentaneam, quia, ut dixi, quidquid hujusmodi est, non perti-

net ad ordinem gratiæ, sed naturæ; nec potest secure dici gratiam sanctificantem vel gratum facientem aliquo modo esse debitam naturæ; proprium autem auxilium gratiæ inter gratias gratum facientes computatur, ut ostendimus; oportet ergo ut non sit naturæ debitum. Deinde, et consequenter, necessarium est ut, vel in re, vel in modo aliquid in illo præstando Deus exhibeat, præter id quod pertinet ad communem cursum naturæ, id est, ultra virtutem et efficaciam causarum secundarum, prout cursus et actus suos facere sinuntur cum generali concursu Dei. Nam quid-

quid hoc præciso modo fit, in substantia et in modo mere est naturale, et fit ex virtute et concursu debitis naturalibus causis, in quo nihil gratiæ invenitur. Ergo ut motio aliqua ordinis naturalis gratia sit, oportet ut aliquid speciale Deus in ea conferat, vel mutando communem causarum ordinem, vel illas aliter applicando quam per se possent, vel alio simili modo non debito concurrente in ordine ad supernaturalem finem. Tunc autem ratio gratiæ sufficienter in tali motione salvari potest. Quod ex dicendis in libro primo clarius intelletur.

FINIS PROLEGOMENI TERTII.

INDEX CAPITUM PROLEGOMENI QUARTI

DE STATIBUS HUMANÆ NATURÆ.

- CAP. I. *An possit homo in statu puræ naturæ creari, in ordine ad finem supernaturalem?*
 CAP. II. *Utrum potuerit homo in statu puræ naturæ creari, in ordine ad naturæ integritatem, et consequenter an potuerit sine illa integritate creari?*
 CAP. III. *Utrum status innocentie seu originalis justitiæ, ultra statum puræ et integræ naturæ aliquid addat?*
 CAP. IV. *Qualis sit gratiæ status, et quomodo cum aliis conjungi vel ab eis separari possit?*
 CAP. V. *An status gratiæ, et originalis justitiæ per eandem formam consti-*
tuantur, ac subinde quomodo separari possint?
 CAP. VI. *Quis et qualis sit status hominis in natura lapsa?*
 CAP. VII. *Utrum homo in statu naturæ lapsæ careat libertate, quam in sua pura natura haberet?*
 CAP. VIII. *Utrum in statu naturæ lapsæ homo sit intrinsece debilior ad operandum bonum, quam esset in statu puræ naturæ?*
 CAP. IX. *Utrum in statu naturæ lapsæ debilior sit homo ad operandum, quam in pura natura, saltem ob causas extrinsecas?*

PROLEGOMENUM QUARTUM.

DE

STATIBUS HUMANÆ NATURÆ

CAPUT I.

AN POSSIT HOMO IN STATU PURÆ NATURÆ CREARI,
IN ORDINE AD FINEM SUPERNATURALEM?

1. *Status quid hic sit, et quomodo in civili et canonico jure usurpetur.*— Explicatis nominibus gratiæ et liberæ naturæ, varios ejusdem naturæ status distinguere necesse est, quoniam licet talis natura semper ope gratiæ indigeat, multo vero magis, pluribusque titulis ac modis in uno quam in alio statu, ut omnes fere theologi animadverterunt. Prius vero declarare oportet quid nomine status in præsentī significetur. Aliter enim hæc vox in moralibus seu civilibus rebus, aliter in præsentī accipitur. Status enim in jure civili significare solet conditionem personæ, prout est sui juris vel alieni, servus vel ingenuus, quomodo sumitur in titulo ff. de Statu hominum. In jure autem ecclesiastico, et Theologia morali, status significare solet rationem aliquam vivendicium obligatione aliqua vel immobilitate, sicut appellatur status matrimonii, vel religionis, aut episcopatus, ut videre licet in D. Thom. 2. 2, quæst. 183 et sequentibus. In præsentī vero, non hiis modis proprie sumitur, sed per quamdam proportionem, ut dicit conditionem seu modum esse habendi totius humanæ naturæ in ordine ad unum ultimum finem, secundum divinæ providentiæ ordinem. Et sic potest accommodari definitio Scoti in 4, distinct. 3, quæst. 3, artic. ult. : *Status est stabilis permanentia, legibus divinarum sapientiarum firmata.*

2. *Via et patriæ status.* — *Status naturæ integræ et lapsæ.* — *Status puræ naturæ.* — Sicque in genere duplex distinguuntur a theologis status humanæ naturæ, scilicet, viæ et termini, id est, status hujus vitæ, qui est beatitudinis

acquirendæ, et status patriæ, qui est beatitudinis jam possessæ, et per antonomasiam nomen status meretur, quia solus ille est, omnium bonorum aggregatione, perfectus, ut Boetius dixit, solusque perfectam immutabilitatem possidet. De illo vero in præsentī non tractamus, quia ad materiam de Beatitudine spectat. Agimus ergo de statu viæ, quem antiqui theologi in duos tantum distinxerunt, nimirum naturæ integræ et lapsæ, ut ex D. Thoma 1. 2, quæst. 109 tota, Gabriele in 4, dist. 1, q. 2, et aliis sumitur. Verumtamen hæc divisio data est de statibus quos, in diversis temporibus, de facto habuit humana natura; supponimus autem neutrum illorum esse statum puræ naturæ. Nam, ut infra contra hæreticos et aliquos catholicos ostendemus, uterque illorum aliquid addit ultra id quod pura humana natura ex se postulat; et ideo Cajetan. et moderniores theologi tertium considerarunt statum, quem pure naturalium appellarunt, qui, licet de facto non fuerit, ut suppono, et infra juxta sanam doctrinam ostendam, cogitari tamen potest ut possibilis, et illius consideratio ad aliorum intelligentiam necessaria est, quia revera hic status est veluti aliorum fundamentum; ideoque de illo in primis dicendum est; postea vero de aliis duobus, et de variis membris in quæ subdividi possunt, disseremus.

3. *Unum positivum, alterum negativum status puræ naturæ postulat.*— Status ergo puræ naturæ duo includit et requirit: alterum positivum, nimirum, ut in eo habeat natura humana cum perfectione essentiali omnes naturales facultates et concursus ac providentiam Dei sibi naturaliter debitam; alterum negativum, ut, videlicet, nihil habeat naturæ superadditum, ei non debitum, sive malum, sive bonum, hoc est, ut nec peccatum habeat, nec,

quod est consequens, reatum pœnæ, neque etiam affecta sit aliquibus gratiæ donis, aut perfectionibus naturæ non debitis. Quod ergo spectat ad priorem partem de positiva perfectione, nulla est quæstio, clarum est enim posse hominem cum omni perfectione suæ naturæ debita creari; imo in omni ejus statu hanc perfectionem habere supponitur, ut per se notum est, et in sequentibus sæpius dicitur. Disputatio ergo est de altera parte negativa, ab illa enim natura denominatur pura, puritas enim solam negationem dicit.

4. *Potest homo in pura natura condi a Deo sine peccato, et ita futurus est si immediate creetur ab ipso.* — Et de hac etiam parte, ut clarum statuimus posse hominem creari purum a peccato, quin potius necessario talem esse futurum, si immediate a Deo creatus sit, et ab alio homine peccatore originem non trahat, nec ipse se peccatorem constituat. Quia non potest Deus esse auctor peccati, et ideo concedendo naturam non infundit culpam, sed necessarium est ut vel ab alia radice infecta derivetur, ut contingit in peccato originali, vel a voluntate ipsa creata nascatur: quod an possit contingere in ipso instanti creationis, alia quæstio est, quæ de angelis tractari solet, et de homine a Deo creato disputari potest. Sed ad præsens non refert, quia cum de potestate tractamus, ut homo possit purus a culpa existere, satis est, quod possit a Deo immediate creari, et in illo statu in quo creatur non peccare, quod etiam de facto ita accidisse certissimum est. Imo etiam probabilius est aliter fieri non posse, secundum convenientem providentiam, et maxime in homine, qui in momento non deliberat.

5. *De quo procedat questio explicatur, et duplex donum natura superans.* — Superest ergo inquirendum de puritate naturæ quoad carentiam donorum supra ordinem talis naturæ existentium, an, scilicet, potuerit homo in tali puritate naturæ creari? Ubi etiam non est quæstio de absoluta Dei potentia, sic enim clarum est hoc non repugnare, cum Deus, absolute loquendo, libere conferat hujusmodi dona: sed quærimus de ordinata potestate operante, et providente tali naturæ, juxta id quod naturaliter exigit. Dona vero quæ supra ordinem talis naturæ esse dicimus, duplicia cogitari possunt, quædam perficientia hominem solum in ordine ad connaturalem finem, et ad operationes ordinis naturalis, et de his dicemus capite sequenti. Nam per talia dona constituitur status integræ naturæ, de

quo statu in dicto capite tractaturi sumus, et ideo ibi etiam videbimus an possit homo in statu connaturali esse sine talibus donis, et consequenter inde constabit quomodo status integræ naturæ a pura natura differat. Alia vero sunt dona perficientia hominem in ordine ad supernaturalem finem, et ad operationes supernaturales, qualia sunt propria dona gratiæ, et virtutum infusarum, etc., et de carentia horum donorum in præsentī tractamus. Non est autem limitanda quæstio ad solum tempus creationis, seu inceptions hominis, sic enim clarum est posse hominem creari sine his donis; imo ita creatum esse dixerunt aliqui, quod in sequentibus videbimus: sed vel amplianda est quæstio ad totum tempus, seu statum hujus vitæ, vel intelligenda est de potestate proxima et cum sufficienti providentia ad comparanda hæc dona. Dico autem proxima, quia capacitas remota, quæ obedientialis dicitur, inseparabilis est ab humana natura, juxta doctrinam Augustini de Prædestinatione Sanctor., cap. 5. Proximam autem potestatem vocamus illam quæ includit media necessaria et convenientia ab obtinendam aliquando herum donorum perfectionem, operationes, ac finem. Et ita quærimus an possit humana natura ita pura creari, ut his donis supernaturalibus, et potestate proxima ad illa comparanda, omnino careat.

6. *Pro parte negativa rationis momenta.* — Ratio autem dubitandi est, quia non potuit Deus non condere hominem propter ejus ultimum finem; sed hic finis in se supernaturalis est; ergo non potuit hominem condere sine ordinatione ejus ad finem supernaturalem; ergo nec sine gratia, ac proinde non in puris naturalibus. Major per se nota videtur, quia nihil Deus potest agere, nisi propter finem, quæ intentio finis sistere debet in aliquo ultimo, qui est ipsemet Deus, nam omnia operatur propter semetipsum, et ideo *alpha* et *omega* dicitur. Minor autem probatur, quia finis ultimus hominis est beatitudo ejus; beatitudo autem est visio beata, quæ supernaturalis est, ut nunc ex fide suppono, et traditur prima parte, quæst. 12, et 1. 2, quæst. 3. Consequentia autem videntur claræ, quia non potest homo creari propter illum finem, nisi recipiat media quibus illum consequi possit; illa autem media sunt dona gratiæ. Et augetur difficultas ex opinione multorum theologorum asserentium habere hominem appetitum naturalem et innatum ad videndum clare Deum. Quam docuit Scotus in quæstione 1 Prologi,

§ *Ad primum licet procedat*, et in 4, distinct. 49, quæst. 9 et 10; Durand., quæstione octava; Palud., quæstione septima, articulo primo; Major, quæstione 6; et latius Soto, quæstione 2, artic. 1, § *Nihilominus prima conclusio*, et lib. 1 de Natur. et Grat., cap. 4; et favet interdum D. Thomas, ut 1 part., quæst. 1, art. 2, quæst. 3, art. 8, et quæst. 5, art. 3, ad 3. Ex hac ergo opinione sequitur non potuisse hominem etiam de potentia absoluta creari sine appetitu innato seu pondere naturæ ad videndum Deum; nam hic appetitus seu pondus naturæ non est in re aliquid distinctum ab ipsa natura, non ergo potest condi natura sine illo. Item non est distinctum aliquid a capacitate naturæ; capacitas autem illius finis seu visionis non est separabilis a natura, ut dixi. Denique, ex hac intrinseca capacitate hominis nascitur, ut extra Deum non satiatur, nec quiescat, juxta illud Augustini, 1 Confession., cap. 1: *Fecisti nos, Domine, ad te, et inquietum est cor nostrum, donec perveniamus ad te*; ergo non potuit homo condi, nisi ordinatus ad illum finem, quem propterea Scotus naturalem vocat: ergo nec condi potuit (saltem juxta debitam institutionem naturæ) sine gratia necessaria ad illum finem; non ergo in puris naturalibus.

7. *Nonnulli errores referuntur, et machinata opinio.*—Possent in hoc loco referri variæ sententiæ, vel hæreticorum, vel catholicorum, ex quibus sequitur non solum posse hominem in puris naturalibus creari, sed etiam de facto creatum esse, vel in principio, vel etiam nunc creari sen generari, ut Pelagiani, negantes gratiam et originale peccatum, necessario dicere debuerunt. Sed has sententias omitto, quia in sequentibus capitulis ex professo tractandæ, et pro hujus loci opportunitate refutandæ sunt. Illis ergo sentiis prætermisissis, cogitari potest alia extreme contraria, nimirum, servata providentia humanæ naturæ debita, non potuisse hominem in puris naturalibus creari, etiam in ordine ad supernaturalem finem. Quam quidem non invenio ab aliquo auctore catholico expresse traditam. Inter assertiones autem Michaelis Baji, aliquas invenio ex quibus colligi potest illum sensisse vitam æternam esse homini connaturalem, et quasi jure naturæ debitam. Hinc enim dixisse videtur ad meritum vite æternæ non esse necessariam gratiam adoptionis, sed solum ut homo legit opera faciat, ut in 6 Prolegom., cap. 2, patebit in ejus propositione 14 et sequentibus, ubi non solum id affirmat, sed etiam dicit ad

Pelagianum errorem pertinere, gratiam adoptionis postulare. Et videtur deceptus quibusdam locis Augustini, in quibus reprehendit Pelagianos, qui dicebant parvulis esse necessarium baptismum ad gratiam adoptionis, non ad remissionem peccati; nam, eos impugnando, significavit Augustinus, parvulis, si peccato carerent, per se et natura sua vitam æternam deberi. Unde idem diceret de quocumque adulto, si in pura natura absque peccato crearetur. Videatur Augustinus lib. 6 contra Julian., cap. 4, alias cap. 9 et 10.

8. *Ex principio quodam probari potest.*—Præterea videtur hæc sententia sequi ex alio principio a nonnullis scholasticis admissio. Principium illud est, quod beatitudo æterna, propter quam homo est creatus, est naturalis finis ultimus ejus, quod Scotus et alii, ut dixi, senserunt. Nam inde sequi videtur Deum clare visum esse unicum finem ultimum ejusdem naturæ humanæ; nam finis ultimus esse non potest, nisi unus. Distingui vero solet finis ultimus quoad consecutionem, vel quoad intentionem, seu appetitionem, et ita dicitur esse duplex quoad consecutionem, quia unus naturaliter, alter non nisi supernaturaliter, obtineri potest, licet uterque sit naturalis quoad appetitionem. Sed in hoc duplicem repugnantiam invenio, una est, duplicem esse finem ultimum quoad appetitionem. Nam si appetitus naturæ humanæ non sistit in aliquo bono naturali, sed ultra tendit ad supernaturale, profecto nullum naturale bonum est finis ultimus ejus: nam finis ultimus includit negationem tendentiæ in ulteriorem finem, alioqui alter finis non est ultimus, si ibi non sistitur. Et sumitur aperte ex Aristotele, 1 Ethicor., capite septimo, dicente felicitatem non appeti propter aliud, sed tantum propter se. Altera repugnantia est, quod finis, supernaturalis quoad consecutionem, sit naturalis quoad appetitionem; cum appetitus naturalis non fundetur nisi in naturali potestate, ut in Metaphysica latius tractatur, et in materia de Beatitudine dictum est. Unde si beatitudo patriæ est naturalis quoad tendentiam et intentionem naturalis appetitus, etiam erit naturalis quoad aliquam perfectionem naturalem. Ex quo fit, ut supra argumentabamur, non potuisse hominem non creari propter illum finem, et sub providentia illi beatitudini proportionata, quæ est providentia gratiæ.

9. *Æterna vita, ad quam homo est creatus, supernaturalis est.*—Nihilominus suppono beatitudinem æternam, propter quam homo

creatus est, et quæ illi promittitur, ut merces meritum, simpliciter et absolute supernaturali esse. Hoc existimo esse necessarium fundamentum ad evertendum errorem Pelagii, et ad reddendam solidam rationem plurimum dogmatum de divina gratia. Et ita censeo esse certum, et sufficienter probari ex verbis Pauli, 1 ad Cor. 2, et Isai. 64: *Oculus non vidit, DEUS, absque te, quæ præparasti expectantibus te*; vel ut ait Paulus, 1 Cor. 2: *Nec oculus vidit, nec auris audivit, nec in cor hominis ascendit, quæ præparavit Deus iis qui diligunt illum*. Hoc enim bonum, quod Deus hominibus præparavit, non est nisi æterna felicitas, quæ in Scriptura, Matth. 25, Marc. 10, et Luc. 18, et sæpe alibi, et in Symbolo, dicitur *vita æterna*; illa ergo supra naturam hominis est, et ex supernaturali providentia præparatur. Deinde hæc felicitas in clara Dei visione posita est, ut constat ex 1. 2, quæstione 3. At visio Dei clara supernaturalis est, ut passim traditur in Scriptura, sufficitque illud 1 ad Timoth. 6: *Lucem habitat inaccessibilem, quam nemo hominum vidit, sed nec videre potest*, utique suæ naturæ viribus, ut late tractavi 1 part., tractat. 1, libr. 2, capit. 8. Idemque est certissimum de amore patriæ, nam si amor viæ supernaturalis est, a fortiori patriæ, quia est ejusdem charitatis, quæ nunquam excidit, 1 ad Corinth. 13, et in eo ordine est perfectissimus, ut constat. Illa ergo beatitudo supra naturam hominis existit, ut est quædam formalis hominis perfectio, et consequenter etiam, ut est finis ultimus, supernaturalis est: nam beatitudo et finis ultimus idem sunt.

10. *D. Thomas naturalem et supernaturalem finem docet.* — Hinc divus Thomas variis in locis duplicem finem ultimum hominis distinguit, unum naturalem, ad quem tendit homo ex vi et impetu suæ naturæ; alium excedentem naturam, ad quem ordinatur homo per gratiam; ita habet 1 parte, quæstione 23, artic. 1, loquens de Angelis, et 1. 2, quæst. 5, art. 5, et quæst. 62, art. 13, et quæst. 109, art. 5, ad 13. Unde Thomistæ communiter hanc distinctionem admittunt, Cajet., 1 p., quæst. 62, art. 1, et Soto, lib. 1 de Natura et grat., cap. 3, et in 4 dist., 49 quæst., art. 2, concl. 3, quatenus dicit aliquam beatitudinem naturalem viribus naturæ comparari posse. Idem indicat Scot., quæst. 3 Prologi, ad argumenta primæ quæstionis in fine. Ratio vero ejusdem distinctionis ex fundamento posito reddenda est. Quia necesse est omnem natu-

ralem substantiam habere aliquem finem ultimum connaturalem in quem tendat, qui finis in natura intellectuali vocatur beatitudo. Quod etiam naturales philosophi agnoverunt, præsertim Aristoteles, libr. 1 et 10 Ethicorum: ergo, cum visio beata non sit hujusmodi finis naturalis respectu hominis, ut ostensum est, necessarium est dari aliquem alium finem naturalem talis naturæ. Quis autem ille sit, et an in hac vita, vel solum in futura obtineri possit, non est tractandum hoc loco, cum in materia de Beatitudine proprium habeat.

11. *Ordinatio beatitudinis supernaturalis est.* — Atque ex his principiis ulterius sequitur, sicut cœlestis beatitudo est supernaturalis, ita ordinari hominem ad illam consequendam, non esse ex naturæ debito, sed ex gratuita dilectione et voluntate Dei. Et hoc significavit nobis Paulus 1 ad Timoth. 2, dicens: *Deus vult omnes homines salvos fieri*; illam enim voluntatem pertinere ad gratuitum amorem Dei omnes Patres intelligunt: unde proprii effectus ex illa voluntate procedentes ad gratiam spectant, ut est illud Joann. 1: *Illuminat omnem hominem venientem in hunc mundum*: et illud Roman. 8: *Quos prædestinavit, hos et vocavit; quos vocavit, hos et justificavit*, etc.; et ad Ephes. 1: *Elegit nos, ut essemus sancti et immaculati*. Ratio vero clara est, quia si finis non est debitus etiam debito proportionis, seu connaturalitatis; neque ordinatio ad talem finem potest esse debita, quia est ejusdem rationis, et (ut sic dicam) accipit speciem a fine. Item quia si ordinatio ad finem esset debita naturæ, etiam media essent debita, quia vel in eis consistit talis ordinatio, vel ex vi illius debentur; ergo talia media non essent gratia, prout de illa loquuntur Scriptura et Concilia, quia gratiæ repugnat tale debitum, ut supra dixi, ex divo Thoma 1. 2, quæst. 111, art. 1, ad 2.

12. Tandem, ex eodem principio, sequitur adoptionem hominis ad vitam æternam esse gratiam respectu hujus naturæ secundum se spectatæ, et sine peccato. In quo graviter erravit Michael Bajus, qui contrarium videtur posuisse, ut suæ doctrinæ fundamentum, ut ex ejus propositionibus infra referendis manifeste colligitur. Veritas autem illius consequentis aperte colligitur ex Paulo in locis citatis, et ad Roman. 6, dicente: *Gratia Dei vita æterna*; et capit. 8: *Qui spiritu Dei aguntur, hi sunt filii Dei*, utique adoptivi, non naturales, ac proinde per gratiam, non per naturam, et de illis subdit: *Si filii, et hære-*

des, utique vitæ æternæ; et propterea ad Ephes. 1, ipse Spiritus Sanctus dicitur *pignus hereditatis nostræ*, quia, scilicet, illa non est hæreditas naturæ debita, sed gratiæ, juxta illud ad Tit. 3: *Ut justificati gratia, ipsius heredes simus, secundum spem vitæ æternæ*. Igitur sola natura, etiam sine peccato creata, non esset per se hæres vitæ æternæ, nisi ei addatur adoptionis gratia, sicut etiam nunc justificatio non tantum aufert peccatum, sed etiam confert gratiam, per quam justificati adoptantur, ut postea videbimus. Neque in hoc Augustinus unquam Pelagianos reprehendit, sed in eo quod, cum concederent parvulos indigere baptismo propter adoptionem, nihilominus negabant indigere baptismo propter remissionem peccati; unde, in citato loco, partem illam expresse approbat, et solam secundam reprehendit, et ex illa eos redarguit, quia, si parvuli non nascerentur in peccato, non esset cur eis denegaretur adoptio, quam Deus de se paratus est omnibus dare.

13. *Prima assertio*. — His positis, dicendum est primo, de facto nullam creaturam intellectualem fuisse aut extitisse unquam in puris naturalibus conditam, cum solo ordine ad conaturalem finem, imo neque esse posse secundum legem ordinariam a Deo statutam. Totam assertionem existimo certam, ejusque primam partem probo inductione. Nam Angeli creati fuerunt in gratia juxta doctrinam Patrum, præsertim Augustini, 12 de Civit., cap. 9, ubi de Deo creante Angelos dicit: *Simul erat in eis condens naturam, et largiens gratiam*. Quod etiam habet fundamentum in Scriptura, et latius tractatur 1 part., quæstione 62, articulo 3. De natura vero humana idem ostenditur, quia in Adamo statim in creatione sua gratiam recepit, et non obscure docuit Concilium Tridentinum, sess. 5, in decreto de Peccato originali, dum ait *Adamum, peccando, amisisse sanctitatem, et justitiam, in qua constitutus fuerat*. Quamvis enim non dicat fuisse in illa constitutum a primo instanti creationis, tamen recte colligi potest, cum non sit major ratio de uno tempore, seu momento, quam de alio. Et idem confirmant verba Sapientis, Ecclesiastes 7: *Fecit hominem rectum*, ut sensit Augustinus de Corrept. et grat., c. 10; et latine divus Thom., 1 p., quæst. 95, art. 1. Ratio vero potest breviter reddi, quia ut alias dixit Ambrosius: *Nescit tarda molimina Spiritus Sancti gratia* — unde cum in instanti fiat, non oportuit differri, sed in ipso instanti creationis dari. De cæteris vero hominibus non oportet

probationem addere, quia et in peccato concipiuntur, ut est de fide, et nihilominus in eo statu ad hoc ordinantur, ut et illius peccati remissionem et supernaturalem finem assequi possint: unde qui ab illo peccato præservatus est, ut Beatissima Virgo, gratiam simul cum natura adeptus est.

14. *Certum angelos et Adam conditos in gratia, certius vero non fuisse in puris naturalibus conditos*. — Addo præterea, licet satis certum sit Angelos et primum hominem creatos fuisse in gratia, longe tamen certius esse, non fuisse creatos in puris naturalibus in ordine ad ultimum finem, quia esto non habuissent in primo instanti gratiam habitualem, nihilominus negari non potest fuisse creatos ad finem supernaturalem consequendum, ac subinde habuisse paratum auxilium, et cum illo potentiam proximam ad consequendam gratiam, se disponendo ad illam. Unde saltem indubitatum est non solum sanctos Angelos, ante terminum patriæ, sed etiam Angelos malos, priusquam peccarent, habuisse gratiam, qua potuissent, et non peccare, et gloriam mereri, si voluissent, sicut boni fecerunt. Et similiter de Adamo, certius est habuisse gratiam ante lapsum, quidquid fuerit de primo instanti creationis; id enim evidentius testatur Concilium Trid., dicta sess. 5, et traditur latius 4 part., quæst. 95.

15. *Secunda additi pars probatur ratione*. — Atque hinc manifesta est ultima pars assertionis. Quia in primis Deus nullam creaturam intellectualem condidit, nisi propter æternam beatitudinem, ut suppono ex propria materia, tanquam de fide certum. Hoc autem ipso talis creatura non creatur in puris naturalibus, quia elevatur ad finem altiorem quam suæ naturæ debeatur. Deinde omnis creatura intellectualis, quam Deus immediate condidit, in gratia creata est; dona autem Dei sunt sine pœnitentia, ut inquit Paulus, Roman. 11; et ideo nulla creatura semel habens gratiam, illa privatur a Deo, nisi peccando se illa privet: unde est illud axioma catholicum: *Justus non describitur a Deo, nisi prius ipse deserat Deum*; non potest ergo esse transitus a statu gratiæ ad statum puræ naturæ, sed solum ad statum culpæ. Rursus etiam e converso nec a statu culpæ transiri potest ad statum puræ naturæ. Nam licet de absoluta Dei potentia id non repugnaret (juxta Scoti sententiam et multorum), tamen de lege ordinaria, de qua loquimur, id fieri non potest, quia Deus non remittit culpam mortalem, nisi infundendo gratiam

juxta illud : *Justificati gratis per gratiam ipsius*, ad Roman. 3, et desinit Trid., sess. 6, c. 7. Igitur de lege ordinaria non potest esse creatura rationalis, nisi vel in gratia, vel in peccato; non ergo in puris naturalibus.

16. *Secunda assertio, homo potuit a Deo in puris condi naturalibus.* — Secundo, dicendum est potuisse Deum creare hominem in puris naturalibus respectu finis ultimi, non immutando naturam ejus vel aliquid ei naturaliter debitum negando. Assertio, ut opinor, communis est theologorum, licet eam magis supponant quam disputent, distinguendo varios status humanæ naturæ, et illos inter se conferendo, ut ex discursu sequentium capitum patebit. Præsertim vero attingit assertionem Cajetan. 1. 2, quæstione 83, articulo 3, et quæstione 109, articulo primo, et ibidem Medina in præfat. ad Materiam de Gratia, et dicta quæstione 83, art. 3, ubi etiam Conrad., et Soto 1 de Natur. et grat., capit. 3, et communiter recentiores. Et primo, potest generaliter ostendi, quia quidquid Deus contulit homini ultra puram naturam est gratia; ergo potuit illam non dare, servatis alias legibus naturæ; ut enim recte dixit Cyril., lib. 1 in Joann. c. 13 : *Creatura, cum serca sit, nutu solum et voluntate Patris ad supernaturalia elevatur.*

17. *Discursu probatur.* — Deinde probatur ratione, quia cum finis ultimus hominis duplex sit, ut diximus, potuit Deus creare hominem ad solam beatitudinem naturalem, nihil præcipiendo, vel promittendo de supernaturali, nec de mediis quæ ad illam conferunt; sed si ita fecisset, non ordinasset hominem ad supernaturalem finem, neque ob eam rem aliquid denegaret homini debitum naturæ ejus; ergo ex hac parte non repugnabat creati hominem in puris naturalibus. Consequentia evidens est ex dictis. Major etiam per se nota videtur, quia nihil est quod potuerit necessitatem Deo imponere ad elevandam naturam hominis ad finem supernaturalem, eo ipso quod ipsam creabat. Quamvis enim necessario creet illam propter aliquem ultimum finem, quia, cum perfectissimo modo operetur, omnia quæ creat, in aliquem finem ordinat (nam in hoc consistit ratio providentiæ ejus, et cum in finibus non procedatur in infinitum, necesse est in aliquo ultimo sisti), nihilominus non oportet ut ille finis ultimus sit supernaturalis, quia naturalis sufficit. Et similiter, licet Deus, creando intellectualem naturam, illam faciat propter seipsum, non tamen ex necessitate propter se clare visum, nam etiam om-

nia alia propter seipsum operatur, unumquodque secundum suam capacitatem. Potest autem Deus perficere solam capacitatem naturalem, si velit, et nihil conferre quod in sola capacitate obedientiali habeat fundamentum; ergo licet Deus necessario creet hominem propter ultimum finem, potest in fine naturali sistere.

18. *Tunc non crearetur homo in ordine ad finem supernaturalem.* — *Nec Deus faceret contra naturæ debitum.* — Superest probanda subsumpta propositio, quæ duas continet partes: una est, in eo casu non creari hominem in ordine ad supernaturalem finem, quæ est per se evidens, quia non crearetur propter illud obtinendum, non enim illi provisum esset de mediis quibus illum consequi posset. Altera pars erat nihil facturum Deum, præter id quod humanæ naturæ est debitum, etiamsi ad visionem beatam illam non ordinasset, quod sane certissimum esse censeo, et necessarium contra Pelagii errorem fundamentum. Quia gratia non est naturæ debita, ut recte D. Thomas dixit, quia alias sub beneficio creationis comprehenderetur, contra Augustinum, et alios Patres Epist. 93, et alia supra dicta, et multa quæ de hac re in sequentibus afferemus; sed ordinari ad æternam vitam supernaturalis beatitudinis est gratia et omnis gratiæ radix in suo genere; ergo non potest esse naturæ debita; ergo licet humana natura illa careret, nulla re sibi debita privaretur. Minor (cætera enim clara sunt) probatur primo ex illo Roman. 3 : *Gratia Dei vita æterna*; nam si ipsa vita est gratia, ordinari ad illam gratia est. Imo est gratia per Christum: tum quia ibi additur *in Christo Jesu Domino nostro*; tum etiam quia est quædam benedictio spiritualis circa bona cœlestia; omnis autem talis benedictio in Christo data est, ut dicitur Ephes. primo: gratia autem quæ per Christum data est, non est naturæ debita, ut supra vidimus. Ratione etiam patet, quia homo non ordinatur ad finem supernaturalem, nisi per actum divinæ voluntatis, quo vult naturæ humanæ providere de mediis, vel efficacibus, vel saltem sufficientibus ad vitam æternam consequendam; sed omnia illa remedia non sunt debita naturæ, sed pura gratia, ut infra ostendemus; ergo licet Deus omnia illa negaret, non negaret humanæ naturæ aliquid ei debitum; at tunc illam non ordinaret in illam beatitudinem; ergo illam creando sine tali ordinatione non ageret contra debitum naturæ.

19. *Dubio fit satis, et confirmationi.* — Ad

rationem dubitandi patet responsio ex dictis. Nam est quidem verum, hominem non posse connaturali modo creari, nisi propter aliquam beatitudinem, et finem ultimum; negamus vero necessario fuisse creandum propter beatitudinem, quæ consistit in visione clara Dei, nam illa supernaturalis est, et non deest alia beatitudo naturalis, propter quam homo in pura natura creari posset, ut ex 1. 2, q. 3, suppono. Ad replicam autem seu confirmationem de appetitu naturali ad videndum Deum, qui illum admittunt fortasse responderent non posse quidem hominem creari sine illo appetitu, tamen ex vi illius non recipere aliquid, præter puram naturam, quia ille appetitus naturalis est; et licet satiari non possit nisi supernaturaliter, non esse necessarium ut Deus satiet omnem appetitum naturæ, quando est ad objectum quod naturaliter comparari non potest.

20. *Impugnatur.* — Hoc vero (mea sententia) non dicitur consequenter; tum quia appetitus naturalis non est frustra, et ideo ad auctorem naturæ pertinet providere media quibus ille appetitus satiari possit; ergo hoc genus providentiæ esset debitum tali naturæ; tum etiam quia ille appetitus est ad bonum; ergo ad finem, quia bonum simpliciter, id est, propter se diligibile, cum fine convertitur: constat autem illud bonum esse propter se diligibile; imo esse ultimum ad quod omnia debent referri: ergo illud bonum esset finis ultimus unicus talis naturæ, quia in illo solo quiesceret appetitus naturalis talis naturæ: ergo non ordinari ad illum, esset contra providentiam connaturaliter debitam tali naturæ. Responderi potest finem dicere ordinem ad media, et licet illud bonum sit quoddam appetibile naturale, non tamen esse finem naturalem, quia media non sunt naturalia. Sed in hoc cernitur repugnantia: nam si bonum propter se appetibile est naturale, eo ipso postulat media consentanea eodem modo ipsi naturæ, id est, naturaliter appetibilia ab ipsa, et consequenter debita ex naturali exigentia et recto ordine naturæ.

21. *Vera revolutio.* — *Non datur visionis beatæ naturalis appetitus.* — Respondeo igitur non dari in homine talem appetitum naturalem innatum, seu pondus naturæ, ut placeat D. Thoma, ubicumque distinguit duplicem ultimum finem hominis, naturalem et supernaturalem, nam unus ex alio sequitur, ut statim ostendam. Ideoque sumitur ex eodem D. Thoma, quæst. 22 de Veritat., art. 7; Capreol., quæst. 1 Prologi; Cajetan., 1

part., quæst. 1, art. 1, et quæst. 12, art. 1; Ferrar., 1 Contra gent., cap. 5, latius lib. 3, cap. 51; Medin. 1. 2, quæst. 3, art. 8. Et ratio a priori est, quia in homine non est potentia activa nec passiva naturalis ad visionem ipsam beatam, neque ad gratiam, respectu cujus illa visio est finis connaturalis; appetitus autem naturalis sequitur ex potentia naturali, nam obedientialis non sufficit, est enim quasi potentia neutra. Quis enim dicat naturam humanam habere appetitum ad unionem hypostaticam, etiamsi habeat capacitatem obedientialem ejus? Ergo eadem ratione non habet anima humana naturalem appetitum ad gratiam sanctificantem; ergo neque ad virtutes per se infusas; ergo nec ad actus earum, multoque minus ad actum visionis Dei, qui est supremus finis ultimus connaturalis gratiæ. Confirmatur, quia non appetit homo naturaliter modum cognoscendi angelicum, scientiam per se infusam abstractivam Dei vel aliarum rerum: ergo minus appetet naturaliter modum cognoscendi divinum, ut est per visionem beatam. Consequentia videtur a fortiori evidens. Antecedens autem patet, quia non minus repugnat animæ humanæ angelico modo intelligere, quam corpori humano volare; sicut ergo corpus non appetit naturaliter volatum, ita nec anima angelicam intelligentiam.

22. *Ab inconvenienti explicatur.* — Declaratur tandem ab inconvenienti illato: aut enim humana natura habet aliquem finem ultimum præter visionem beatam, atque adeo omnino naturalem, vel non habet illum. Si habet talem finem naturalem, profecto in illo sistit appetitus naturæ, quia natura non tendit ultra ultimum terminum suum. Et ideo non videntur mihi consequenter loqui Scotus, Soto, et alii, qui, ponentes talem appetitum, admittunt illam distinctionem duplicis finis ultimi. Si autem non habet homo finem ultimum naturalem præter visionem beatam, profecto creari non posset connaturaliter, nisi cum sufficiente ordinatione ad illum finem, ut mihi satis probant rationes factæ. Propter quas censeo non satis consequenter loqui, qui ponentes illum appetitum, negant esse homini connaturaliter debitum creari propter illum finem: hoc autem concedere, censeo esse magnum inconveniens, et ideo talem appetitum dari nego.

CAPUT II.

UTRUM POTUERIT HOMO IN STATU PURÆ NATURÆ
CREARI, IN ORDINE AD NATURÆ INTEGRITATEM,
ET CONSEQUENTER AN POTUERIT SINE ILLA IN-
TEGRITATE CREARI.

1. *Prima opinio de integritate naturæ.* — Hæc duo inter se sunt connexa, et ideo simul tractanda sunt, ab integritate naturæ initium sumendo. De qua tres possunt cogitari sententiæ. Prima est, integritatem naturæ nihil aliud esse nisi substantiam naturæ cum omnibus facultatibus corporis et mentis sine ulla diminutione, vel in numero, vel in perfectione intensiva illarum. neque in aliqua alia conditione quæ ex natura rei ex hominis essentia manet; et consequenter non posse hominem in pura condi natura, quin statum etiam integræ naturæ recipiat. Ita opinatur Durand., in 2, distinct. 28, q. 1, unde concludit, eo ipso quod homo sine gratia, vel culpa, aut pœna creetur, in statu puræ naturæ constitui, quod ad intrinsecam compositionem et perfectionem naturæ spectat. Et suaderi hoc potest, quia omnis res in pura natura sua constituta necessario habet integritatem suæ naturæ; ergo et homo, nam est eadem ratio in illo quæ in aliis. Antecedens patet inductione in angelis, cœlis, brutis, elementis, etc.; et ratio est, quia natura pura in qualibet re includit essentiam, et facultates omnes naturæ debitas absque ullo defectu: ergo est integra natura. Quæ ratio etiam in homine locum habet, quia loquimur de homine adulto et in perfecta ætate constituto, ut possit ratione uti; ille ergo in pura natura includit corpus integræ quantitatis cum omnibus membris, et organis, ac facultatibus externis et internissensuum, et cum sanitate, et viribus corporis, et ex parte animæ non recipit diminutionem, nec in substantia, nec in potentiis; ergo si homo habet puram naturam, necessario habet etiam integram naturam. Et confirmatur ex ipso nomine, quia si homo in puris naturalibus non habet integritatem naturæ, ergo habet naturam non integram: ergo diminutam, et quasi maneam, quia si est non integra, aliquid necessarium ad integritatem illi deest, et hoc est esse maneam et diminutam; at hoc repugnat puræ naturæ, quia si natura est pura, habet omnia naturalia siue diminutione, et solum excludit ea quæ supra naturam sunt: ergo.

2. *Censura dictæ opinionis.* — Hæc opinio singularis est inter theologos catholicos, et simpliciter falsa, si recte, et juxta communem usum et sensum theologorum, terminis utamur. Quod ideo adverto, quia quæstio potest in uno sensu esse de re, et in alio de solo nomine. Ad quod explicandum, suppono statum integræ naturæ includere omnia quæ status puræ naturæ, scilicet, animam cum suis spiritualibus potentiis, et corpus integrum cum omnibus facultatibus sensitivis, et earum naturalibus inclinationibus, cum dispositione corporis et organorum ad liberum illorum usum. Ex qua compositione humanæ naturæ nude spectata oritur, necessitate quadam naturali, illa difficultas in operatione virtutis, quæ ex rebellionem inferioris appetitus, et ex corporis infirmitate nascitur, quam nos experimur, et de qua Apostolus conqueritur ad Roman. 7. Igitur quæstio de nomine erit, an natura humana sic condita, cum ista contrarietate et repugnantia appetituum, sit dicenda integra propter integritatem, ut sic dicam, corporis et animæ, quoad vires omnes et facultates connaturales, vel potius sit dicenda non integra propter imperfectionem illam connaturalem repugnantiam appetituum carnis et spiritus. In quæstione igitur de voce non est immorandum, nam constat naturam sic conditam posse vocari integram, id est, non monstrosam, neque imperfectam privative (ut sic rem explicem) id est per carentiam perfectionis debitæ naturæ, etiamsi negative sit imperfecta, id est, sine perfecto ordine, et concordia potentiarum et appetituum, ejus natura illa est capax, licet non sit illi debita. Et hoc solum probat ratio, et fundamentum pro sententia Durandi propositum.

3. *Status integræ naturæ proprie in appetitus subjectione sistit.* — Nihilominus tamen, præter hunc statum, consideratur in homine alius, in quo, ultra omnes naturales facultates, habeat homo quamdam specialem perfectionem, quæ consistit in carentia fomitis et effrænatae concupiscentiæ, seu in perfecta subjectione appetitus sentientis ad rationalem, ita ut inferior appetitus contra superiorem moveri, aut rationem prævenire non permittatur. Et hic status vocatur proprie integræ naturæ, secundum theologorum usum, ut constat ex Cajetano, Conrado, Medina, et aliis in principio hujus materiæ; et Soto, l. 1 de Nat. et Grat., c. 5. Nam quia humana natura pure spectata, prout capite præcedenti proposita est, quasi divisa est in suis naturalibus affectibus ad diversa tendentibus, et quasi manea

ad recte ambulandum in suis moribus, ideo, quando in suis propriis facultatibus internam pacem et concordiam recipit, quasi integrari censetur, et ita perfici ut convenienter in moribus progredi possit. Ac proinde vox illa, *status integræ naturæ*, accommodata visa est ad illam perfectionem significandam.

4. *Primi parentes integræ naturæ statum assecuti in conditione sua.*—*Ex Patribus hoc late confirmat Concilius in Thesaur. tom. 1, art. 3.*—De illo autem statu supponimus non solum esse possibilem, quod videtur per se notum, cum nullam involvat repugnantiam, sed etiam datum esse primis parentibus in sua creatione, ut theologi statim allegandi communiter sentiunt, cum D. Augustin., lib. 14 de Civitat., cap. 10 et 17, et lib. 4 contra Julian., cap. 13, et aliis locis, quæ statim referam; in quibus docet primos parentes non sensisse, nec sentire potuisse motum libidinis ante peccatum, eamque perfectionem (quod pertinet ad rationem status) semper conservaturos fuisse, si non peccarent. Idque aperte docet Concilium Trident., sess. 5, ubi in hoc sensu definit concupiscentiam ortam fuisse ex peccato, et ita exponit Paulum, qui interdum appellat concupiscentiam peccatum, *quia ex peccato est, ait Concilium, et ad peccatum inclinat.* Habetque hæc veritas fundamentum in Scriptura, Ecclesiastic. 5: *Deus fecit hominem rectum*, quod de rectitudine removente concupiscentiam exposuit Hieronymus, lib. 4 contra Jovinian.; et Sap. 2 dicitur: *Creavit Dominus hominem inextermabilem.* Item de perfectione ac virtute ejus multa dicuntur Eccles. 17. Et Genes. 2, de eisdem primis hominibus dicitur non vidisse se esse nudos, donec peccarunt, non quia cæci essent, sed *quia non tangebantur illo visu*, ut recte dixit August. lib. 9 Genes. ad litter., cap. 10, et lib. 11, cap. 31; et Gregor., lib. 26 Moral., cap. 12, alias 13. Ratio autem in primis est, quia voluit Deus perfectionem illam hominibus a se conditis conferre, et ita genuit sapientissimum artificem, sicut postea eandem perfectionem contulit humanitati Christi Domini, et B. Virgini in Conceptione sua, propter singulares eorum dignitates, ut alibi dictum est.

5. *Sine profata integritate potuit homo a Deo condi.*—Præterea, supposita dicta vocis significatione, non minus clarum est potuisse Deum humanam naturam sine illa integritate creare, ut cæteri theologi affirmant, et Durand. tæc non negat. Quia integritas naturæ, dicto modo explicata, est donum re ipsa distinctum

ab essentia hominis, et ab omnibus physicis facultatibus ejus: ergo potuit a Deo condi cum suis membris et facultatibus omnibus naturalibus, sine illo dono, quia nulla potest ostendi repugnantia. Item nunc de facto creantur homines sine illa integritate in pœnam culpæ: ergo etiam absque culpa posset Deus hominem sine illo dono creare. Probatum consequentia, quia vel illud donum non est connaturale homini, nec suæ naturæ debitum, vel etiamsi sit, Deus, ut supremus dominus, posset hominem cum illo defectu creare, sicut etiam posset cæcum vel claudum condere.

6. *De quæstione res.*—De homine igitur sic condito sine speciali dono integritatis, duo interrogari possunt, quæ ad rem maxime spectant. Unum est, an talis homo censerî posset integer, seu habere integritatem naturæ, saltem quoad vires sufficientes ad servandam constanter et perseveranter totam legem naturæ. et ad vitandum, etiam collective, omnem lapsum contra illam, saltem gravem, seu delibatum. Et in hoc sensu loquitur aperte Durandus loco allegato, dum ait hominem conditum in sola natura, sine culpa vel gratia, habere naturam integram, etiam ad dictum effectum servandi constanter totam legem naturæ, suis naturalibus viribus, quod variis rationibus suadere nititur. In hoc vero sensu resolutio illa falsa est, ut bene notavit Henric. quodl. 6, quæstione undecima, quia in homine sic condito esset eadem repugnantia concupiscentiæ quæ nunc est, cum qua non potest homo integre operari bonum sine superiori adjutorio; ergo talis homo non potest dici integer, seu in statu naturæ integræ, secundum illum respectum. Consequentia nota est ex declaratione facta. Minor autem ostendetur late in libro sequenti, ubi solvemus rationes Durandi. Et de Majori dicemus infra in hoc libro, eamque (ut existimo) non negaret Durandus, quia illa repugnantia appetituum tam intrinsece sequitur ex naturalibus conditionibus eorum non impeditis, sicut corruptibilitas sequitur ex mixtione elementorum, vel sicut fames et sitis sequitur ex corpore humano mortali. In quæstione igitur hoc sensu proposita, nulla superest difficultas quæ ad hunc locum pertineat.

7. *An innocens in pura natura condatur.*—*Secunda opinio cum suo auctore et fundamento.*—Ex hac vero resolutione, sequitur altera interrogatio magis hujus loci propria, videlicet, an homo innocens sine illo dono integritatis conditus, et alias etiam carens gratia et ordina-

tione ad supernaturalem finem, censendus sit creatus in statu puræ naturæ, vel potius in statu naturæ quasi monstrosæ; et e converso, an homo habens dictam naturæ integritatem posteriori modo explicatam, possit vere dici habere puram naturam; quod est querere an illa integritas sit humanæ conditioni naturalis, et ideo non excedat puram naturam. In qua quæstione fuit secunda sententia Michael Baji, qui, inter alia quæ de gratia docuit in quodam art. 26, sic ait: *Integritas primæ conditionis non fuit indebita humanæ naturæ, sed naturalis ejus conditio.* In quibus verbis aperte sentit naturæ integritatem, humanæ naturæ secundum se spectatæ debitam esse. Unde ultima ejusdem auctoris propositio fuit: *Falsa est Doctorum sententia asserentium primum hominem potuisse a Deo creari et institui sine justitia naturali.* Per quam naturalem justitiam intelligit non solum innocentiam a peccato; de hac enim nemo dixit potuisse hominem sine illa condi a Deo in prima institutione, cum potius omnes doceant non potuisse creari in statu culpæ, ut supra dixi; intelligit ergo naturæ integritatem, sine qua putat non potuisse naturam humanam institui, saltem secundum legem naturæ debitam. Fundamentum ejus esse potuit, quia sine dicta integritate non posset homo, alias carens etiam donis gratiæ, servare legem naturalem, vel honeste vivere: ergo non potuit naturali et debito modo sine illo dono creari. Probatur consequentia; tum quia cuiusque naturæ debetur illa integritas quæ ad actum sibi connaturalem præstandum necessaria est: tum etiam quia alias necessitas illa peccandi, quæ ex tali defectu oriretur, in Deum, talis naturæ auctorem, refunderetur, quod esse non potest: ergo est debitum naturæ hominum, ut creetur cum integris viribus quibus possit vincere peccatum et servare legem naturæ. Alias Deus deficeret in necessariis, et illi tribueretur culpa, quia necessitatem illius cum natura contulisset: quia homo sine integritate naturæ non habet vires sufficientes ad vitandum peccata; ergo integritas hæc est debita ipsi naturæ. Unde ob hanc causam dicitur homo læsus in naturalibus, quando illud donum amisit. Confirmatur, quia hoc est medium necessarium ad beatitudinem hominis naturalem assequendam: ergo debetur tali naturæ.

8. *Tertia et vera opinio, status integræ, diversus a puræ naturæ statu: donum ille, et in hoc potuit etiam homo creari.* — Sed nihilominus est tertia et vera sententia, donum spe-

cialis integritatis naturæ non esse connaturale homini, ideoque et statum hominis in natura integra diversum esse a statu puræ naturæ, et in hoc statu potuisse hominem sine tali naturæ integritate creari. Prima pars mihi certa est; prius vero quam probetur, alia terminorum æquivocatio auferenda est. Solet enim interdum vocari naturale quidquid homo habet simul cum natura, juxta illud: *Erasmus natura filii iræ*, et sic dici potest integritas naturæ fuisse connaturalis Adamo, quia fuit illi concreata. At nunc non ita loquimur, quia hoc modo etiam gratia potest dici connaturalis Angelis, et primo homini, neque, proprie loquendo, vocatur naturale quidquid naturæ datur in instanti creationis, nisi aliquo modo ex vi ipsius naturæ detur. Alio item modo solet dici naturale quidquid perficit naturam in ordine ad naturales actus, vel ad supplendum aliquem defectum naturalem. Quo sensu solet interdum integritas naturæ, seu originalis justitia, dici naturalis, ut notavit Vega, lib. 2 in Trident., cap. 12, quia naturales quosdam defectus supplebat et sanabat, quod facere potuisset sine elevatione naturæ humanæ ad finem supernaturalem, vel ad proprium ordinem gratiæ, ut statim dicam. Et neque hoc modo hic sumitur illa vox *naturale*; sed quatenus tertio ac propriissimo modo naturale dicitur quod ex principiis naturæ oritur, eive debetur secundum connaturalem ordinem et providentiam, et hoc sensu dicimus donum illud integrans naturam non fuisse naturale.

9. *Patres, et scholastici passim nostram conclusionem docent.* — Atque ita conclusio posita a theologis communiter recipitur. D. Thom., 1 part., quæst. 95, art. 1, indicat rationem a posteriori, quia si illud donum naturale esset, post peccatum mansisset, quia peccatum non tollit naturalia dona, teste Dionys., cap. 4 de Divin. nominibus; divo Thoma 1. 2, quæst. 85, artic. 6, et quæst. 89, art. 3 et 4, contra Gent., cap. 52, ubi significat esse doctrinam fidei. Idei sumitur ex eodem, 1 part., quæst. 100, artic. 1; et in 2, distinct. 20, quæst. 2, artic. 3; et quæst. 4 de Malo, art. 2, ad secundum, et quæst. 5, art. 1, ad 13. Idem sentiunt Scot. in 2, distinct. 29, § *Ad primum argumentum*; et Gabr., dist. 30; et ibi Durandus in dist. 20, quæst. 5; Marsil. in 2, quæst. 18; Capreol., distinct. 30, quæst. 1, art. 2; Cajetan., Soto et omnes Thomistæ. Estque sententia Patrum, quos late refert Bellarmin., lib. 1 de Statu primi hominis, cap. 5. Interdum enim donum illud vocant *cæleste donum*, ut C^Y-

sostomus, homilia 15 in Genes.; aliquando vocant *gratiam*, ut Cyrill., 1 in Joannem, capite nono, et sumi potest ex Ambros., libr. de Paradis., cap. 5 et 14. Clarius ex Augustin. 4 contra Julian., cap. ultimo, dicente: *Gratia magna erat, quod terrenum et animale corpus bestialem libidinem non habebat. Qui ergo restitutus gratia, non habebat in nudo corpore quod puderet, spoliatus gratia sensit quod operire deberet.* Et 1 Retract., cap. 5, contrarios effectus naturales vocat. Tandem contraria sententia reprobata est a Pio V et Gregor. XIII, in Bulla contra Michaellem Bajum.

10. *Ratiocinatione ex appetitu et voluntate roboratur.* — Ratione tandem declarari potest, quia potentiæ ex quibus nascitur difficultas et repugnantia, sunt homini connaturales, voluntas nimirum, et sentiens appetitus: ex hominis enim essentia, quatenus ex spiritu et carne constat, naturaliter dimanant, ideoque necessarium est hominem in omni statu utraque facultate præditum esse. Hæ autem potentiæ inclinationes habent naturales, ex quibus difficultas bene operandi et repugnantia oritur, quam describit Apostolus, Rom. septimo; ergo repugnantia illa est tam connaturalis homini, sicut corporis corruptibilitas, vel sicut difficultas et lassitudo in motu progressivo, quæ ex corporis gravitate nascitur. Præterea homini naturale est, ut a sensu cognoscere incipiat; appetitusque sensitivus hoc habet peculiare, quod naturaliter movetur ab objectis sensu perceptis, et ex natura rei nihil potest inveniri in homine, quod inclinationem ejus tollat, aut minuat, neque etiam per aliquid connaturale homini potest impediri appetitus inferior, ne superiorem præveniat, quia est naturale agens et naturaliter immutatur: ergo donum impediens hos motus non potest esse naturale.

11. *Ampliatur adhuc duobus modis.* — Declaratur præterea, quia duobus modis intelligi potest appetitum fuisse frenatum; primo, quia præveniebatur ne objecta illi occurrerent quæ illum possent ad malum incitare, vel quia præsentando objecto detinebatur, ne exiret in actum, donec voluntas vellet. Prior modus plane non cadit sub humanam providentiam, cum antecedit deliberationem et cognitionem rationis, quæ incipere debet a sensibus. Et ideo divus Thomas prima parte, questione nonagesima-quarta, articulo quarto, ad quintum, et questione nonagesima-septima, articulo secundo, ad quartum, agens de re simili, illam tribuit divinæ providentiæ peculiari,

quæ nulla probabili ratione dici potest debita naturæ, cum valde extraordinaria sit. Alter vero modus omnino est præter naturam, nam solum esse potest, vel quia DEUS negat concursum appetitui, ne moveatur (quod constat esse præter naturam), vel (quod difficilius est) quia infundit appetitui qualitatem aliquam vel habitum, qui ipsum impediatur ne moveatur donec ratio præcipiat. De quo habitu etiam controvertitur an possibilis sit, ut in prima parte disputatur, et in tertia parte aliquid tetigimus tractando de Sanctificatione Beatæ Virginis: esto vero sit possibilis, sine dubio neque ex natura nascitur, ut per se constat, neque naturæ debitus esse potest: cum modus ille operandi ex necessitate naturæ, stante sufficiente motione objecti, naturalis sit. Est ergo donum illud supra naturam in sensu explicato. Et confirmatur, quia alias natura humana nunc esset monstrosa, quia careret perfectione debita suæ naturæ: consequens est falsum, quia Deus ordinarie non punit peccata tollendo proprietates naturales, utique statuta lege, et ordinaria ac universali, juxta sententiam Dionysii supra allegatam, et communiter receptam, de qua iterum in capite nono hujus libri dicemus. Ergo concupiscentia hæc, et fomes quem patimur, licet sit pœna peccati, non est aliquid monstrosum in humana natura; ergo nec opposita perfectio est illi debita.

12. *Duæ aliæ conclusionis partes ratione probantur.* — Atque hinc facile probantur aliæ duæ partes hujus sententiæ, nimirum, statum integræ naturæ diversum esse a statu puræ naturæ, quia includit omnia quæ ad naturam pertinent, et addit aliquid ei non debitum. Et hinc etiam fit ut illi status ita sint separabiles, ut possit homo in statu puræ naturæ, et sine prædicta integritate creari, quia carentia illius integritatis præcise spectata non est contra naturæ puritatem; cum non privet illam aliqua perfectione connaturali, seu naturæ debita. Et, illa ablata, haberet homo in pura natura creatus duplicem appetitum sibi connaturalem; sine illis enim vel nullo modo existere potest, vel non nisi monstrose et præter naturam, ut ex dictis patet: potest autem Deus creare hominem sine tali defectu, ut per se constat, et sine dono superaddito, et naturæ non debito, quia hoc pendet ex sola liberalitate Dei; ergo homo sic conditus esset in pura, et non in integra natura.

13. *Fundamenti oppositi solutio.* — Ad fundamentum autem contrariæ sententiæ, con-

cesso primo antecedente, nimirum, hominem destitutum naturæ integritate non posse viribus suis totam naturæ legem sine lapsu servare, negatur consequentia, videlicet donum integrans naturam esse naturæ debitum. Quia in physico rigore solum debentur naturæ intrinsicæ facultates cum generali concursu causæ primæ influentis in causas secundas, et cum illis juxta exigentiam illarum et generalis ordinis universi. Quod autem in tali natura sic composita, nempe humana ex corpore et spiritu constante, inde oriatur naturalis repugnantia inter facultates appetendi quasi contrarie in suis motibus, naturalis hominis imperfectio est, quam non tenetur auctor naturæ tollere, vel impedire, et ideo non potest esse tali naturæ debitum, ut Deus illos motus impediatur vel quod naturales inclinationes auferat, sed potius postulat ordi- mere naturalis ut generalem concursum illis appetitibus non deneget, suosque motus illos agere sinat. Sicut habere corpus corruptibile et morti obnoxium, imperfectio quædam est, ita vero naturam consequens, ut status immortalitatis, quem homo habuit ante peccatum, non potuerit esse connaturalis, nec ex naturæ debito, sed potius ex liberalitate Dei præter debitum naturæ.

14. *Primæ, et secundæ probationi satisfi.* — Unde, ad primam consequentiæ probationem, respondetur debitum quidem esse unicuique naturæ principium, et concursum consentaneum actibus naturalibus, non tamen esse debitum ut tollantur omnia impedimenta quæ ex aliarum causarum communi cursu accidere possunt. Unde ad alteram probationem, respondetur negando sequelam, nam licet ex illo intrinseco defectu naturæ contingat sequi peccatum, non potest Deo attribui, quia illa occasio mere naturalis est; consummatio autem culpæ semper est voluntaria et libera proximo operanti, a Deo autem non est intenta, sed juste permissa, quia non tenetur omnes defectus creaturarum supplere aut impedire. Ideoque merito dixit Augustinus, 1 *Retract.*, capite nono, licet ignorantia et difficultas essent a principio in natura, non ideo Deum culpandum, sed laudandum fuisse. Eo vel maxime quod homo sic institutus, cum solis auxiliis naturæ debitis, interdum ac sæpe posset honeste operari, licet non semper, ut libro sequenti dicam. Quia vero per donum integritatis, quando datur, natura ipsa juvatur, et aptior redditur ad ipsas naturales actiones perficiendas, ideo homo, quan-

do tale donum semel acceptum peccando amisit, dicitur fuisse in naturalibus læsa, ut cum Beda theologi loquuntur, et infra explicabimus.

15. *Solutio brevis confirmationis.* — Ad ultimam autem confirmationem, quæ attingit difficultatem, quomodo posset homo in puris naturalibus conditus naturalem beatitudinem assequi, non possumus hoc loco ex professo satisfacere, nam pertinet ad materiam de Beatitudine, 1. 2, quæstione quinta, et ideo breviter dico integritatem naturæ non fuisse medium simpliciter necessarium ad naturalem beatitudinem consequendam. Nam imprimis in anima separata posset beatitudo illa obtineri ab aliquibus, qui in hac vita non peccarent, ut maxime essent, qui ante usum rationis decederent. Pro adultis vero in hac vita peccantibus posset Deus modum aliquem illi statui proportionatum, quo a culpa liberarentur, statuere, ut attingi in materia de Pœnitentia, et in discursu præsentis libri iterum occurret. Denique posset etiam Deus tunc juvare homines ad non peccandum per moralia auxilia non attingentia supernaturalem ordinem. Quod si tunc ita se gereret DEUS cum humana natura, non proprie extraheret illam ultra statum puræ naturæ, quia neque ordinaret illam ad finem supernaturalem, neque propriam gratiam illi donaret, quia hæc non reputatur talis, nisi in ordine ad veram sanctitatem et supernaturalem beatitudinem obtinendam, nec denique daret illi integritatem naturæ, ut dixi. Illa igitur esset quædam moralis providentia consentanea naturæ rationali, quæ mutabilis est, non solum physice, sed etiam moraliter. Neque posset dici illa providentia debita ex parte ipsius naturæ, sed solum veluti ex naturali misericordia Dei, quia talis natura esset indigens, et omnino divinæ Sapientiæ ac liberalitati consentaneum esset, ut illi provideret. Atque hinc posset definiiri alia quæstio de statu puræ naturæ in ordine ad auxilia gratiæ ad operationem honestam aliquando perficiendam: quæ pendet ex dicendis in libro sequenti, et ideo breviter in sequenti capite illam expediemus, graviolem disputationem in librum sequentem remittendo.

CAPUT III.

UTRUM STATUS INNOCENTIÆ SEU ORIGINALIS JUSTITIÆ, ULTRA STATUM PURÆ ET INTEGRÆ NATURÆ ALIQUID ADDAT ?

1. *Varii modi assignandi discrimen inter originalem justitiam et naturæ integritatem.*

—Explicuimus quomodo status integræ naturæ a statu puræ naturæ differat; nunc, ad perfectam ejusdem status cognitionem, oportet de justitia originali aliquid dicere, et illam cum integritate naturæ comparare. Suppono autem statum innocentiae et originalis justitiae, juxta usitatam horum verborum significationem, eundem esse, ut mox declarabo. De comparatione autem illius ad statum integræ naturæ videtur esse aliqua controversia inter theologos. Aliqui enim non distinguunt statum integræ naturæ ab statu innocentiae vel originalis justitiae, ut constat ex divo Thoma 1. 2, q. 109, art. 1 et 2; et Soto, libro primo de Natur. et Grat., cap. 5 et 6, quem alii sequuntur. Alii vero, distinguentes hos status, dicunt statum originalis justitiae solum addere, ultra naturam integram, pactum et promissionem Dei transfundendi in posteros donum illud integritatis naturæ, si primus homo, qui illud recipit, illud peccando non amitteret. Ita ut status ille dicatur integræ naturæ respectu cujuscumque personæ cum ea perfectione conditæ, etiamsi pro se tantum illud donum accipiat; originalis vero justitia dicatur solum quando datur veluti pro toto genere, seu per originem transfundenda, si per primum recipientem steterit. Sed hæc differentia parva est, et valde extrinseca, nam, in ordine ad effectus, privilegium (ut sic dicam) idem est, et solum differt in ordine ad subjecta quibus conceditur; secundum quam duplicem habitudinem, seu considerationem, potest quidem integritas naturæ vocari personalis, si pro una tantum persona detur, ut fuit in Beata Virgine, et potest dici originalis, si pro tota progenie concedatur; proprie autem non dicitur status naturæ, nisi quatenus pro ipsa specie aliquo modo conferatur, saltem sub conditione non peccandi. Hoc autem modo etiam justitia illa quam originalem vocamus, posset concedi uni personæ pro ipsa tantum, vel simul pro posteritate, et ita nulla relinquitur distinctio, nisi in nomine. Aliter ergo Cajetanus, in dicto articulo secundo, distinguit inter dictos status, quia justitia originalis addit supra integritatem naturæ indefectibilem ordinem, et corporis sub anima, et inferioris appetitus sub superiori, quamdiu superior est subditus Deo. Quod amplius non declarat. Duas tamen videtur in illis verbis includere conditiones status originalis justitiae: una est, quia solum est datus sub illa conditione, ut solum duraret quamdiu voluntas servaret debitam subjectionem ad Deum,

et in hac non credo differre ab statu integræ naturæ, nam hæc etiam data est de facto sub eadem conditione, quantum ad durationem ejus: de possibili autem posset Deus utrumque statum donare sine tali limitatione. Altera conditio est, quod justitia originalis includebat indefectibilem ordinem corporis sub anima, quam integritas naturæ non includit. Et differentia vera mihi videtur, longiori tamen declaratione indiget.

2. *Primus innocentiae modus.* — *Alter excellens innocentiae modus.* — Ut ergo rem totam explicem, adverte imprimis duobus modis posse aliquem statum dici innocentiae, seu justitiae originalis, quos oportet distinguere, ne propter solam vocum ambiguitatem controversia oriatur, ut illos distinxit Henricus, quodlib. 6, quæst. 11. Primo enim innocentia, ut sic, tantum significat carentiam culpæ, et hoc modo omnis persona a Deo immediate creata, in statu innocentiae creatur, et quia talis innocentia ex tali origine et emanatione a Deo provenit, qui non potest esse auctor peccati, ideo innocentia illa dici potest originalis. In hac ergo significatione homo proxime creatus a Deo, sive in natura integra, sive in pura natura, dici potest creatus in innocentia originali, et quamdiu non peccaverit, dici potest in illa innocentia originali stare, seu permanere. Eademque innocentia dici potest, quædam originalis justitia non supernaturalis, sed naturalis, quatenus rectus ordo, quem natura bene instituta ad suum habet auctorem, quamdam participationem, seu imaginem justitiae præ se fert. Jam vero altiori modo sumitur innocentia seu justitia originalis, a qua status innocentiae seu originalis justitiae denominatus est. Per innocentiam enim intelligimus non solum carentiam culpæ præteritæ vel præsentis, sed etiam futuræ, quantum est ex vi status, qui sub tali conditione et perfectione consideratur, ut sit aptissimus ad innocentiam servandam, et secum nullam culpam compatiatur, imo nec defectum aliquem ex his qui nunc sunt effectus culpæ. Et hic status per antonomasiam vocatur status innocentiae, vel etiam dicitur status justitiae originalis: justitiae quidem, vel quia innocentia est quædam justitia, ut dixi, vel quia talis status semper supponit supernaturalem justitiam, ut mox dicemus: originalis autem, quia et in ipsa origine concreata fuit cum homine, et quia si homo in illo statu perseverasset, justitia illa per originem ad posteros dimanasset.

3. *Prima excellentia homini collata in statu innocentiae est erroris immunitas.* — Ad considerandum autem hunc statum in humana natura, occasionem sumpserunt theologi ex his quæ Deus contulit primo homini a se condito, quæ in prima parte latius considerantur; hic autem breviter supponenda sunt, ut quæstio proposita intelligi ac definiiri possit. Dicimus ergo, præter perfectiones spirituales supernaturalis ordinis quas Deus primo homini a se creato contulit, et præter scientias naturales vel alios habitus ordinis naturalis quos infudit per accidens, seu præter naturalem modum productionis quem postulant, quatuor proprietates alias seu prærogativas illi contulisse. Prima est immunitas ab errore seu deceptione, quamdiu non peccaret. Hoc non ut certum, sed ut probabilius asserimus cum D. Thoma, 1 part., quæst. 94, artic. 4, ubi Cajetanus et alii, et nonnulli ex scholasticis in 2, distinct. 23, ubi Bonavent., quæst. 2; Durand., quæst. 3. Estque clara sententia Augustini lib. 3 de Lib. arbit., cap. 18, ubi sic inquit: *Illam enim peccati pœna justissima, ut qui recte facere, cum posset, noluit, amittat posse cum velit: nam sunt revera omni peccanti animæ duo ista pœnalia, ignorantia et difficultas.* Idem sumitur ex eodem Augustino in Enchirid., cap. 24. Ratio vero reducenda est in dispositionem divinæ providentiæ, quæ illum statum cum tanta perfectione constituere voluit, ut homo pœnale aliquid non pateretur, priusquam culpam aliquam committeret; error autem et deceptio, imo et ignorantia eorum quæ sciri debent, malum quoddam pœnale est.

4. *Excellentia secunda, immunitas a peccato veniali, et incompatibilitas cum lethali.* — Secunda prærogativa sub eadem probabilitate est, immunitas a culpa veniali et incompatibilitas cum mortali. Declaratur, quia ille status non tollebat possibilitatem peccandi mortaliter, ut est de fide certum, et effectus ostendit: non poterat tamen durare cum illo, quia per peccatum mortale amissus est, et per quodlibet aliud grave amitteretur, ut nunc supponimus, licet aliqui aliud senserint, quibus in prima parte responsum et satisfactum est. Sic ergo dicimus statum illum fuisse incompatibilem cum peccato mortali. Per veniale autem non est verisimile fuisse perendum illum statum, et ideo probabilius credimus statum illum fuisse immunem a culpa veniali, id est, non potuisse hominem sic conditum venialiter peccare, nisi prius peccando

mortaliter statum illum amitteret. Quæ est sententia D. Thomæ 1. 2, quæst. 89, art. 3, ubi interpretes, et nonnulli scholastici in 2, distinct. 21. Et sumitur ex August., 14 de Civit., cap. 10 et sequentibus, usque ad 27. Ratio vero propter dictam providentiam divinam est, quia si homo peccasset venialiter, eo ipso esset dignus aliqua pœna; ergo vel omnino amitteret illum felicem statum propter solum peccatum veniale, quod durissimum est, vel durante statu pœnalitatem aliquam esset luiturus, quod statui repugnat.

5. *Tertia excellentia, immortalitas.* — Tertia immunitas est a morte, quia si homo illum statum non amitteret, non moreretur. Et hæc est certa de fide, ut sensit August., Epist. 103 et 106, et de Fide ad Pet., cap. 25, et fere in omnibus libris contra Pelagium, qui oppositum errorem docuit, contra quem dixit etiam Prosper, lib. 1 de Vocat. gent., cap. 7: *Inde tracta mortalitas, inde multiplex corporis animique corruptio.* In Concilio Milevit. et Araus. damnatus est, et in Tridentino, sess. 5, quæ definiunt mortem esse pœnam peccati, juxta comminationem a Deo factam Genes. 2. Et ideo per peccatum introducta est mors in orbem terrarum, teste Paulo ad Roman. 5, et 1 Corinth. 15. Et explicatur optime Sapient. 1, ubi hac ratione dicitur: *Deus mortem non fecit, quia non fecit peccatum, per quod solum introducti potuit; ergo status hominis ante peccatum fuit a morte immunis; ergo hæc immunitas pertinuit ad statum innocentiae, ut latius D. Thomas, 1 part., quæst. 97, art. 1, et alii scholastici in 2, distinct. 21.*

6. *Excellentia quarta, non dolor, non tristitia.* — Qui etiam addunt, neque vestigium mortis (ut sic dicam) fuisse in illo statu, id est, neque dolorem, neque tristitiam, neque passionem aliquam ex his quæ malum supponunt. Quæ est quarta prærogativa illius status, non quidem tam certa, sicut præcedens, longe tamen probabilior quam contraria, ut sumi potest ex Augustino locis citatis, et lib. 6 Genes. ad litteram, a cap. 19, et Bernard., serm. 1 de Annuntiat., et serm. ad Milites templi, cap. 11. Ratio autem est eadem, quia hæc omnia sunt mala pœnæ, quæ ex suavi Dei ordinatione in natura intellectuali supponunt culpam: unde Ecces. 7 omnes humanæ miseriæ peccato tribuuntur; illi autem affectus quaecumque ratione affligentes animum, merito inter humanas miseras computantur. De his autem immunitatibus seu effectibus originalis justitiæ, quomodo et per quæ dona

fierent, longa est disputatio, sed illa ad primam partem proprie pertinet; in præsentem autem loco sufficit quod illi omnes effectus sine aliquo dono superante naturam fieri non poterant, ut per se ex sola ipsorum enarratione est manifestum, et ex dictis in duplici præcedenti capite sufficienter probari potest: nam quæ ibi dicta sunt cum proportionem possunt in præsentem applicari.

7. *Multum differt status justitiæ originalis a statu puræ naturæ.* — *Assertio prima.* — His ergo positus, facile est positam quæstionem definire; dicendum enim est primo, statum justitiæ originalis multum differre a statu puræ naturæ. Patet, tum quia includit integritatem naturæ; tum etiam quia omnes effectus, seu privilegia numerata nullo modo possunt dici connaturalia homini; quia nec ex principiis naturæ oriuntur, neque sunt debita puræ naturæ ac nude spectatæ. Neque in hoc apparet difficultas. Solum invenio Henricum, dicta quæst. 11, qui æquiparare voluerit statum puræ naturæ, et statum justitiæ originalis in mortis immunitate, quia homo in statu justitiæ originalis non erat ita immortalis, ut non posset mori, sed ita ut posset non mori, non peccando, peccando autem fieri posset mortalis: hoc etiam est tribuendum homini in pura natura, quia non peccando posset non mori, neque moretur si non peccaret, quia non posset pœnam incurre sine culpa. Sed hoc non recte dicitur; tum quia, licet homo in pura natura existens non peccaret, posset mori, imo necessario moretur, nisi per aliquod donum vel providentiam naturæ non debitam præservaretur; neque tunc mors esset pœna, sed esset defectus quidam naturalis, sicut fames et sitis; tum etiam quia, ut idem Henricus fatetur, homo relictus in pura natura, non ita posset conservare innocentiam naturalem, quin aliquando graviter caderet, et sic etiam non posset non mori ex vi naturæ, etiamsi ad mortem necessarium esset peccatum. In statu autem justitiæ originalis constitutus, homo posset nunquam peccare per vires liberi arbitrii, teste Anselmo, de casu Diaboli, c. 2, et dicitur latius in sequentibus, et ita simpliciter posset non mori ex vi talis justitiæ. Est ergo in his magna differentia inter utrumque statum.

8. *Originalis justitiæ status statum naturæ integræ includit, et in quibusdam suprat.* — *Assertio secunda.* — Dico secundo: status innocentie seu originalis justitiæ statum integræ naturæ includit, et illi aliqua privilegia

superaddit, et ita in ordine ad effectus physicos multum differunt; in ordine autem ad moralem potestatem bene operandi, fere nihil aut parum differunt. Priorem partem docet Cajetanus, dicta quæst. 109, art. 2, § *Ad evidentiam*, quem moderni sequuntur. Et est clara ex dictis. Constat enim integritatem naturæ, quæ in superioribus explicata est, esse separabilem ab his privilegiis justitiæ originalis, quæ in hoc capite proposuimus. Imo, de facto, Beatissima Virgo habuit illam integritatem naturæ per carentiam fomitis, et tamen non habuit omnia dicta privilegia, nimirum ea quæ pertinent ad immortalitatem et ad impossibilitatem pœnarum corporalium: quod suo modo etiam in humanitate Christi Domini inventum est; et ratio est, quia isti effectus reipsa distinguuntur, et ideo possunt separari. Unde etiam ex privilegiis originalis justitiæ potest unum et non aliud communicari, juxta dispositionem divinæ providentiæ: et ita potest quis constitui in statu inchoato, vel dimidiato justitiæ originalis, sine complemento illius, quia nullam involvit repugnantiam, et potest habere congruentem rationem, ut in eisdem exemplis Christi et Virginis videre licet: semper tamen originalis justitia, imo et singula privilegia ejus supponunt naturæ integritatem, non quia impossibile sit Deo hæc privilegia communicare sine integritate naturæ: sed quia hætenus factum non est, neque attento convenienti rerum ordine videtur fieri posse consentaneæ ad rerum naturas, et ideo dici potest suo modo impossibile, secundum ordinariam legem. Et ita videbimus in sequentibus neminem, qui non fuerit factus a fomite immunis, præservatum esse ab omni culpa, etiam veniali, et consequenter nec a corporis mortalitate, et aliis imperfectionibus. Sic ergo constat statum originalis justitiæ supponere, seu includere statum integræ naturæ, addere vero prædicta privilegia, et effectus eorum, quos constat esse physice et reipsa diversos a sola naturæ integritate, prout supra explicata est.

9. *Secunda assertionis pars probatur.* — Posterior pars assertionis declaratur imprimis ex communi modo loquendi theologorum, qui de statu naturæ integræ et originalis justitiæ, tanquam de uno, frequentius loquuntur, ut patet ex D. Thoma, quæstione centesima nona; Solo, et aliis allegatis. Quod quidem esse non potuit quia non intellexerunt illos effectus esse distinctos et separabiles, sed quia vel considerarunt omnes esse necessarios ad

perfectam naturæ integritatem, et ita illam confundunt cum originali justitia, quod pertinet tantum ad usum vocum, vel quia in ordine ad potestatem moralem operandi bonum, eadem videtur esse ratio utriusque status, quod magis pertinet ad rem ipsam, et ideo amplius declarandum est. Nam imprimis sicut status naturæ integræ præcise spectatus non includit necessario ordinem ad finem supernaturalem, ita neque status originalis justitiæ: posset enim Deus omnia dicta privilegia conferre homini non elevato ad supernaturalem finem, ut per se notum videtur. Deinde, sicut in natura integra non posset homo efficere supernaturales actus sine gratia superioris ordinis, ita neque in statu originalis justitiæ, ut docent theologi, divus Thomas supra, et alii cum Magistro in secunda, distinctione vigesima-nona, capite primo, et in sequentibus videbimus.

10. *Moralis potestatis in utroque statu adhuc quasi identitas declaratur.* — Et eadem ratione, sicut potest esse homo integer dicto modo sine gratia sanctificante, ita etiam potest esse in statu innocentiae seu originalis justitiæ. Imo ita de facto fuisse censuerunt theologi allegati capite quinto; decepti tamen sunt, quia si integritas naturæ sine gratia sanctificante communicata non est, ut ostendimus, multo minus originalis justitia, cum hæc non detur sine integritate naturæ. Denique, sicut homo in natura integra potest bene moraliter operari, cavendo omnia peccata, non solum mortalia, sed etiam venialia collective, ita idem potest in originali justitia. Quanquam in hoc potest constitui aliqua differentia; tum secundum majorem aut minorem facilitatem; nam hæc videtur esse major in homine habente omnia privilegia justitiæ originalis, quia ex parte intellectus et corporis est melius dispositus, ut ex dictis constat: tum secundum quemdam ordinem, quia homo in solo statu integræ naturæ existens posset prius venialiter peccare, quam mortaliter, quia nihil haberet quod illum impediret præternaturaliter, et ex natura rei id non repugnat, et ita posset facilius peccare; homo vero in originali justitia constitutus, non posset prius venialiter peccare quam mortaliter, ut supponitur ex speciali dono, et ideo facilius etiam posset non inchoare peccatum. Propter hæc ergo dixi esse inter hos status parvam, aut nullam differentiam quoad moralem potestatem, et ob eandem causam in sequentibus de illis ut de uno loquimur, quia in ordine ad absolu-

tam gratiæ necessitatem, eandem rationem induunt.

CAPUT IV.

QUALIS SIT GRATIÆ STATUS, ET QUOMODO CUM ALIIS CONJUNGI VEL AB EIS SEPARARI POSSIT?

1. *Duo gratiæ status, extrinsecus et intrinsecus.* — Status gratiæ duobus modis accipitur. Primo large, quatenus naturæ addit solam ordinationem ad gratiam internam, seu ad finem ejus, per sufficientia media, divina providentia præparata: nam hæc ordinatio gratia quædam est, et supernaturale beneficium ratione finis supernaturalis. Est autem gratia extrinseca tantum, quia per se nihil formaliter in homine ponit, licet radix omnis gratiæ intrinsecæ dici possit. Alio autem modo magis proprio dicitur status gratiæ, ille qui per intrinsecam formam inhærentem personæ et sanctificantem illam constituitur. Priori modo improprissime dicitur ille status gratiæ, quia secun- dum illum loquendi modum diceretur esse in statu gratiæ, etiam homo ille qui est in peccato, si ordinatus est ad supernaturalem finem, quod tamen non est in usu, quia status ille solum dicit extrinsecam ordinationem generalem Dei, et non petit intrinsecam formam, vel perfectionem personæ, quæ ad bene operandum vires præbeat. Proprius autem gratiæ status intrinsecam formam requirit, quam per autonomasiam gratiam sanctificantem appellamus, cum donis quæ illam consequuntur, de quibus postea dicemus: sed licet hoc verum sit, nihilominus illa duo membra quasi per analogiam distinguimus, ut proposita quæstio plene possit explicari.

2. *Improprius status cum statu puræ omnino naturæ compatibilis non est, bene tamen cum statu vivæ.* — Comparando igitur priorem modum status ad alios supra numeratos, imprimis inveniemus eum omnibus conjungi posse, præterquam cum natura omnino pura. Dixi omnino puram, quia potest esse pura ab integritate, et a justitia originali, et donis supernaturalibus gratiæ, et a culpa, et nihilominus esse ordinata ad finem supernaturalem per alia media, seu auxilia divinitus præparata, licet nondum sint collata, quia in hoc nulla est repugnantia. De facto autem nunquam ita inventa est, ut ex dictis facile constare potest, et magis ex sequentibus patebit. At vero in aliis omnibus statibus humanæ naturæ inveniri potest hæc elevatio, et de

facto invenitur in statu viæ. Quia et homo in natura integra ordinatus fuit ad illum finem, et post lapsum non amisit illam habitudinem, et ideo medium redemptionis, quo posset, non obstante communi lapsu, finem illum consequi. Deus illi misericorditer providit. Et inde est, ut dicebam, ut homo lapsus, etiam dum jacet sub peccato, illum statum retineat, quia semper potest comparare gratiam, quamdiu in hac vita durat. Deinde manifestum ex dictis est puram naturam separabilem esse ab hoc statu, quia potuit ad supernaturalem finem non ordinari, ut satis in capite tertio probatum est. An vero idem dicendum sit de natura integra, vel in originali justitia constituta, videndum superest.

3. *Prima sententia affirmans statum gratiæ debitum statui naturæ integræ.* — In hoc enim puncto aliam invenio Michaelis Baii propositionem, ordine 21, in qua sic inquit: *Humanæ naturæ exaltatio et sublimatio in consortium divinæ naturæ debita fuit integritati primæ conditionis, ac proinde naturalis dicenda est, non supernaturalis*, ubi manifeste sentit naturæ integræ debitum esse statum gratiæ, ac proinde non potuisse ab illo, saltem secundum legem ordinariam, separari. Fundamentum autem quo ductus fuerit, apud ipsum non legi, quia nec ejus opera videre potui, nec ab aliis refertur. Quare suspicor auctorem illum sensisse gratiam esse humanæ naturæ debitam, si per aliquod peccatum non impediatur: unde per integritatem primæ conditionis nihil aliud intellexisse videtur, quam naturæ innocentiam, cui sensit esse connaturalem elevationem ad divinæ naturæ consortium. Potest etiam pro hac opinione adduci D. Thomas, 4 part., quæst. 95, art. 1, ubi probat hominem primum fuisse in gratia creatum, quia per gratiam subdebatur superior voluntas Deo, et inferior appetitus superiori, in qua subjectione integritas naturæ consistit. Nam hinc sequitur integritatem illum fuisse effectum gratiæ, ac subinde non posse ab illa separari. Est tamen discrimen, quia juxta hanc sententiam divi Thomæ non erit gratia debita integritati naturæ, ut Bains dicebat, sed potius integritas erit debita gratiæ in ipsa naturæ institutione eidem collata. Utroque autem modo sequi videtur statum integræ naturæ non esse separabilem a statu gratiæ.

4. *Opposita et vera sententia.* — Nihilominus contraria sententia omnino vera et certa est, que sumitur ex doctoribus præcedenti

capite allegatis, præsertimque ex Cajetano et modernis, in 1. 2, question. 109, in princip.; et ex Alense, et aliis quos statim referam. Ad illam igitur explicandam, statuo imprimis statum integræ naturæ, vel originalis justitiæ, ut supra explicatus est, per se non ordinare vel sublevare hominem ultra naturalem finem, sed solum addere donum liberaliter datum ultra totam naturæ debitum, conferens rectitudinem quamdam in ordine ad honestatem, et consummatam perfectionem naturalem. Hæc assertio communis est apud auctores allegatos et statim referendos, et quoad utramque partem facile potest ex dictis probari. Ratio ergo prioris partis est, quia per hoc donum solum subvenitur illi imperfectioni et infirmitati, quæ nascitur ex naturali inclinatione appetitus sentientis, et ex naturali modo cognoscendi hominis, incipiendo a sensibilibus objectis, quæ naturaliter movent sentientem appetitum, et ex aliis corporis defectibus; sed tota hæc imperfectio potest impediri, sanari, ac componi sine ordinatione hominis ad finem supernaturalem: ergo integritas naturæ, per se ac præcise spectata, non includit illam ordinationem. In hoc ergo convenit status naturæ integræ precise sumptus cum statu puræ naturæ, quod uterque includit debitum ordinem ad Deum, ut finem naturalem, neuterque eorum ordinationem hominis ad ulteriorem finem requirit.

5. *Status gratiæ intrinsecam habitudinem ad Deum dicit, secus naturæ integræ.* — Et hinc infertur statum integræ naturæ distinctum esse a proprio statu gratiæ, et separabilem ab illo. Probat, quia status gratiæ intrinsece includit habitudinem ad Deum, ut supernaturalem finem: imo et proportionem intrinsecam connaturalem ad visionem ejus: sed status naturæ integræ per se non postulat illam habitudinem, nedum intrinsecam proportionem: ergo non requirit statum gratiæ: unde etiam constat esse separabilem ab illo, quia est inferioris ordinis, et non est unde habeat talem connexionem cum statu superioris ordinis. Adde statum gratiæ posse separari ab statu integræ naturæ, ut patet in hominibus justis, qui sunt in hoc statu naturæ lapsæ. Eademque, vel majori ratione, potuisset Deus, si voluisset, creare hominem innocentem, et in statu gratiæ, et sine integritate naturæ, id est, cum fomite et concupiscentia naturali, non pœnali, quia perfectio gratiæ per se non requirit illam integritatem, tum quia est diverſi ordinis et rationis, tum

quia in homine ex Adamo genito sine illa invenitur. Nec etiam imperfectio fomitis necessario supponit culpam aut carentiam gratiæ, sed, ut naturalis proprietatis, relinqui a principio posset in homine justo. Totum ergo hoc pendet ex libera Dei voluntate ac dispositione; ergo a fortiori e contrario separari potest status naturæ integræ a statu gratiæ.

6. *Quid non vere nonnulli senserint.* — *Veritas.* — Quin potius de facto separatum fuisse in Adamo in initio suæ creationis multi theologi docuerunt, ut Alens., 2 part., quæst. 91, memb. 1, art. 3, et 4 part., quæst. 4, membr. 7, artic. 3, ad argumenta; Altisiodor., lib. 2 Summæ, cap. 3, quæst. 2; Bonavent., in 2, distinct. 29, art. 2, quæst. 2, et ibi Scot., et Marsil., in 2, quæst. 16, artic. 6. Hugo autem Victor., lib. 1 de Sacrament., part. 6, cap. 17, in fine, rem dubiam esse censet, etiam de toto tempore illius status ante peccatum Adæ, licet in cap. 10 aperte dixisset Adam in primo statu habuisse charitatem. Quod est omnino certum, ut supra dixi. Unde etiam multo probabilius est a principio fuisse conjunctos illos status naturæ integræ et gratiæ, quia nulla est necessaria mora, et quia hoc magis decet divinam liberalitatem, et quia ipsa integritas naturæ propter faciliorem gratiæ custodiam data est, et quia omnia quæ Scriptura dicit de creatione primi hominis magis huic parti favent, ut tradit D. Thomas 1 part., quæst. 95, ubi de hoc latius. Et ita etiam sentiunt Hieronym., lib. 1 contra Jovin.; Augustin., 4 de Civitat., cap. 11 et 27, et lib. de Correctione et grat., cap. 10.

7. *Dupliciter lapsa Baio respondetur.* — Ad fundamentum autem quod Baius insinuare diximus, respondemus imprimis falsum esse naturam integram ultra naturalem perfectionem humanæ naturæ nihil addere, nisi carentiam culpæ, seu innocentiam; hanc enim habere potest etiam pura natura: integra vero addit speciale donum continens inferiorem appetitum sub superiori, ut declaratum est. Deinde dico falsum etiam esse, naturæ humanæ innocenti, sive integræ, sive non integræ, deberi sublimationem in consortium divinæ naturæ: nam hæc est mera gratia longe altioris ordinis, quæ mere gratis, et ultra omne naturæ debitum data est, et ideo nec naturalis dici potest, nec habere connexionem connaturalitatis, ut sic dicam, cum ipsa natura, quantumque intra suum ordinem immaculata seu perfecta sit. Ad D. Thomam capite sequenti respondebimus.

CAPUT V.

AN STATUS GRATIÆ ET ORIGINALIS JUSTITIÆ PER EANDEM FORMAM CONSTITUANTUR, AC SUBINDE QUOMODO SEPARARI POSSINT?

1. *Dubitandi ratio sumitur ex dicto Thoma.* — Huic quæstioni occasionem nobis præbuit divus Thomas supra allegatus, in 1 part., quæst. 95, art. 1, ubi sentit rectitudinem status originalis justitiæ fuisse gratiæ sanctificantis effectum. Nam hæc gratia est forma proprium gratiæ statum formaliter conferens; ergo una est, eademque forma utrumque illum statum constituens: quomodo ergo poterunt inter se separari, cum forma non possit suo adæquato effectu carere? Quam difficultatem attingens Soto, libr. 1 de Natura et gratia, cap. 5, in eam inclinat sententiam, quæ affirmat gratiam non distingui a justitia originali, ac subinde ipsammet gratiam sanctificantem formaliter contulisse primo homini integritatem naturæ. Ex quo plane sequitur eandem esse utriusque status formam, solumque differre, quia gratia quando dabat naturæ integritatem, erat *robustior et fortior* (ut ait) quam nunc sit, quando solum confert sanctitatem sine integritate.

2. *Impugnatur Soto.* — Hæc vero sententia (nisi fortasse abutatur vocibus in significatione neque usitata, neque ab auctore suo declarata) intelligi sane non potest; quia effectus formalis formæ, neque impeditur, neque variatur, manente eadem forma informante subjectum. Cum ergo gratia nunc sit in nobis, totamque suum formalem effectum nobis conferat, et non det integritatem, profecto nunquam potuit illam formaliter dare. Neque verba illa *robustior* aut *fortior* possunt aliquid significare formaliter existens in gratia primi hominis, ratione cujus potuerit formaliter conferre illum effectum. Nam in simplici qualitate, qualis est gratia sanctificans, intelligi non potest alius vigor nisi intensio, neque aliud robur intrinsecum, nisi quod nascitur ex majori intensione et radicatione in subjecto; sola autem major intensio non sufficit ad illum effectum formalem, ut constat. Eo vel maxime quod gratia sæpe intensior est in homine nunc lapsa, quam fuerit in primo homine ante peccatum, juxta illud: *Ego veni ut vitam habeant, et abundantius habeant.* Declaratur tandem, quia vel loquimur de gratia prout præcise est in essentia

animæ, et sic impossibile est ut formaliter det integritatem : nam hæc integritas formaliter est in potentiis, seu ad illas pertinet : gratia vero, ut sic spectata, totum suum formalem effectum habet in sola animæ essentia, quia ibi inhæret, et consequenter totam entitatem suam ibi habet collocatam. Vel loquimur de gratia, prout includit habitus infusos operativos, et ab illa manantes, et sic etiam integritatem dare non potest, etiamsi illi habitus in potentiis sint : quia illi habitus solum elevant potentias ad novum genus operationum superantium totum ordinem naturæ. Et inde est ut nunc etiam in nobis tales habitus, licet interdum sint valde intensi, formaliter non dimittant appetitum passionem, ut nunc suppono : ergo multo minus poterunt formaliter dare naturæ integritatem.

3. *Gratiæ status est basis cui a'iquid addit integræ naturæ status, quod declaratur et probatur.* — Vera igitur sententia est, statum gratiæ secundum legem Dei ordinariam comparari ad statum innocentie, seu integræ naturæ, tanquam fundamentum ejus, statum vero innocentie formaliter aliquid addere ultra statum gratiæ, quod per se ac formaliter in hoc non includitur, nec per dona gratiæ sanctificantis confertur. Hanc sententiam sumo ex D. Thoma, 1 part., quæst. 100, artic. 1, ad 2, et 1 p., quæst. 2, artic. 2 ; et Cajetan., 1 part., quæst. 95, art. 1, ubi hoc modo intelligit D. Thomam, ibi, qui in eodem sermone exponendus est ubicumque de hac materia loquitur, ut in prima parte, quæst. 97, et l. 2, quæst. 83, et in 2, distinct. 32. Et declaratur breviter, nam licet integritas nature formaliter consistat in aliqua perfectione quam gratia formaliter non confert, nihilominus Deus non dedit perfectionem illam alicui homini, nisi justo et sibi grato, ut inductione constat, juxta superius dicta, tam in primis parentibus, quam in Christi humanitate, et B. Virgine. Non legimus enim nec credimus donum illud communicatum esse alteri homini viatori ; omnes autem illi cum dono illo sanctificantem acceperunt : ergo agnoscitur, ex lege ordinaria, seu definita Dei providentia, hæc duo habere aliquam connectionem inter se : ergo oportet intelligere gratiam esse aliquo modo fundamentum alterius status, seu perfectionis. Probatur hæc ultima consequentia : primo, quia recta naturæ constitutio postulat ut prima ejus institutio et ordinatio sit in finem ultimum et supremum ; talis autem ordinatio respectu finis superna-

turalis, propter quem natura humana instituta est, per gratiam perficitur, et intrinsece constituitur : ergo inter omnes perfectiones superantes naturam, quas Deus homini contulit in sua creatione, gratia fuit tanquam fundamentum cæterarum. Confirmatur, nam juxta doctrinam Augustini et D. Thomæ in statu innocentie hic ordo constitutus est, ut pars inferior esset per eam subjecta superiori, et superior Deo, ita ut non posset inferior insurgere contra superiorem, nisi hæc avertetur a Deo : ergo primum fundamentum illius status, et a quo omnia pendeant, erat perfecta conversio et subjectio ad Deum : hæc autem fit per gratiam : ergo illa erat fundamentum reliquorum. Denique illa integritas data non est tanquam debita naturæ : ergo data est ut gratiæ inserviret, et naturam illi perfecte obedientem redderet : ergo.

4. *Originalis justitiæ gratia fundamentum est, sed non ex necessitate.* — Unde ebiter intelligitur non dici gratiam fundamentum originalis justitiæ, quantum ad propriam perfectionem suam, vel quia talis perfectio physice resultat ex gratia, vel quia ei connaturaliter debeatur. Nam licet utrumque horum de habitibus per se infusis sentiri possit probabiliter, non vero de illa naturæ perfectione, quia est diversi ordinis, solumque ob indigentiam subjecti simul data est cum gratia. Et ideo in angelis non habuit locum, quamvis in eis gratia cum omnibus proprietatibus sibi connaturalibus perfecta fuerit. Dicitur ergo fundamentum originalis justitiæ, vel integritatis nature, quia secundum convenientem ordinem supernaturalis providentiæ divinæ illo modo dari debuit, ut satis explicatum manet : unde gratia respectu originalis justitiæ dici potest fundamentum non necessitatis, sed congruitatis. Nam licet humana natura non esset per gratiam ad consortium divinæ nature sublimata, nec subjecta Deo, ut fini supernaturali, nihilominus esse posset recte ordinata et subjecta Deo, ut auctori et fini naturali, quæ subordinatio satis esset ut nature integritas et immunitas a corporis defectibus ei addi posset. Nunc vero, quia ad ulteriorem finem creata est, debuit primo conjungi per gratiam, ut huic tanquam primo fundamento omnis alia perfectio adderetur.

5. *Secunda assertionis pars probatur.* — Atque hinc facile patet altera pars assertionis, nimirum, statum innocentie addidisse perfectionem formaliter distinctam a gratia, quod satis etiam probant quæ contra Sotum dixi-

mus. Ab effectu etiam id patet, et optime declaratur, quia in nobis est gratia sine illa perfectione, quam addebat originalis justitia, quia nimirum fundamentum interdum esse potest sine superaddita perfectione. Id autem in nobis contingit, non quia dona Dei sint cum pœnitentia, sed quia illa est justa pœna originalis peccati; Deus enim non nisi innocentibus perfectionem illam communicare justissime decrevit.

6. *Solvitur ratio dubitandi cum altera quæstione.* — Ex quo facile expeditur ratio dubitandi supra tacta, et resolvitur alia quæstio, quæ solet fuisse tractari, et videtur esse de nomine, an justitia originalis includeret formaliter gratiam. Duobus enim modis potest accipi originalis justitia. Primo, ut includebat totam rectitudinem hominis, et in se, quoad omnes potentias et partes suas, et in ordine ad Deum, ut finem ultimum ejusdemque ordinis, et hoc modo sine dubio justitia includebat gratiam, tanquam basim et radicem omnium illorum honorum. Alio vero modo sumi potest justitia originalis præcise pro illa integritate seu perfectione, quam addebat ultra gratiam, et sic clarum est non includere illam formaliter, sed fundari in illa, ex ordinatione divina potius quam ex intrinseca rei natura. Unde fit consequens idem esse dicendum de omnibus donis et virtutibus per se infusis, quæ gratiam sanctificantem consequuntur tanquam proprietates ejus, elevantes potentias hominis ad finem et actus superioris ordinis; quam elevationem, ut dixi, status naturæ integræ per se et intrinsece non requirit: ergo nec justitia originalis formaliter includit hos habitus, vel eorum aliquem. Et hoc modo locuti sumus de hac justitia capite precedenti, et loquimur in sequentibus, sicut etiam videtur loqui D. Thomas, quoties declarat quid possit natura integra absque gratia. Et idem sentit Cajetanus, prima parte, quæst. 95, art. 4.

7. *Justitia originalis latius, non stricte, appellatur gratia.* — Jam vero solum erit de nomine quæstio, an justitia originalis dicenda sit gratia, necne? Unde dicendum est breviter hoc donum per se non esse gratiam simpliciter dictam, prout dicit ordinem ad gloriam, seu supernaturalem sanctificationem, latius vero posse dici gratiam, id est, gratuitum donum non debitum naturæ. An vero hoc donum consisteret in aliquo habitu per accidens infuso, vel in qualitate aliqua inherente habente virtutem præternaturalem continentis appeti-

tum, vel solum in speciali protectione Dei, vel multa ex his includeret, in prima parte, tractatu de Statu innocent., dictum est.

8. *Convenientia puræ, et integræ naturæ status.* — Unde tandem infero homines, in statu integræ vel puræ naturæ, convenire in necessitate et indigentia gratiæ ad efficiendos actus supernaturales, non solum collective, sed etiam distributive, id est, quoad singulos, quia in neutro statu includit vires supernaturales, nec per se postulat principium intrinsecum supernaturalium actuum, nec auxilium aut providentiæ ordinis supernaturalis. Uterius etiam conveniunt illi duo status in æqualitate virium per se ad efficiendos quoscunque actus bonos ordinis naturalis, quia facultates intrinsecæ et per se seu physice requisitæ ad hujusmodi actus, sunt eadem in utroque statu. Nam integritas naturæ non addit novam naturalem facultatem, sed ad summum facilitatem utendi facultate naturali, et ablationem aliquorum impedimentorum. Ex quo non sequitur augmentum potestatis per se, et quasi physice in operando, sed tantum sequitur major potestas per accidens per ablationem impedimentorum, quæ moraliter esse potest absolute major ad constantius et perseverantius operandum, ut in sequenti libro latius explicabitur.

9. *Quæstio, et pars affirmans proponitur.* — Unde occurrebat statim hic quæstio, an saltem gratia adjuvans ab bene operandum moraliter, sit necessario conjuncta cum statu justitiæ originalis, seu integræ naturæ. Theologi enim, qui docent naturam intellectualem, eo ipso quod libera est, et prævia cogitatione honesta et congrua indiget ad recte operandum, indigere auxilio speciali divinæ gratiæ ad singulas operationes honestas recte efficiendas, si consentaneæ ad naturalem conditionem talis naturæ, et ad perfectionem divinæ providentiæ loqui velint, fateri profecto debent non potuisse naturam humanam, sive integram, sive integritate carentem, creari modo connaturali, nisi sub providentiâ gratiæ auxiliantis, etiamsi talis gratia in sua substantia et gradu supernaturalis non sit. Quia non potuit Deus, juxta debitum providentiæ modum, hominem creare omni auxilio, necessario ad bene operandum, destitutum; si ergo tale auxilium est vera gratia, necessitate quadam debiti connaturalis connexa est creatio talis naturæ cum providentiâ gratiæ: ergo non potuit in dictis statibus creari sine aliquo gratiæ adjectione seu provisione.

10. *Negativa pars quæstionem solvit.* — Ego vero fundamentum illud falsum esse censeo, ideoque absolute assero potuisse naturam humanam creari, seclusa speciali providentia alicujus propriæ gratiæ; maxime vero in natura integra, quia sufficiens principium est ad operandum multo tempore honeste, sine peccato, cum communi cursu naturæ sic institutæ, et cum concursu primæ causæ. Nam, seclusa integritate, specialior providentia Dei esset necessaria ad constanter honeste operandum; tamen etiam illa non mereretur propriam gratiæ appellationem, ut capite sequenti attingam, et in sequenti libro latius dicetur; ibi enim fundamenta et principia utriusque sententiæ expendenda sunt, et ideo nunc longiori hujus puncti disputatione supersedeo.

CAPUT VI.

QUI ET QUALIS SIT STATUS HOMINIS IN NATURA LAPSA?

1. *Homo a lethali culpa duntaxat lapsus denominatur.* — Supponimus hominem non denominari lapsum, nisi ab aliqua culpa, seu peccato, quia sola culpa aufert innocentiam ab homine, et constituit illum in quodam deteriori statu quam in prima sua conditione habuerit, et ideo per solam culpam tolli dicitur. Imo non quælibet culpa appellatur simpliciter lapsus hominis, seu constituit illum in statu naturæ lapsæ, sed talem esse oportet, ut per illam avertatur a Deo, ultimo fine suo, indignusque ipsius amicitia ac æterna beatitudine fiat, quod facit solum peccatum mortale. Veniale enim, sicut non est peccatum, nisi secundum quid, ita non esset sufficiens ad hunc statum naturæ lapsæ constituendum: status ergo naturæ lapsæ idem est quod status ex peccato contractus.

2. *Naturæ lapsæ status inveniri potest in homine, qui jam conditus fuisset in quocis statu ex prædictis.* — Unde fit hunc statum non tantum in homine ordinato ad finem supernaturalem, vel prius creato in justitia seu integritate naturæ, sed etiam in homine creato in pura naturalibus inveniri posse, quia peccare potest, ut per se constat. Tunc autem homo lapsus post statum puræ naturæ non differret a seipso in amissione alicujus doni superantis naturam, sed tantum in additione culpæ, et obliquitate rectæ rationis, ut capite sequenti declarabimus. Potest etiam alia conditio in eo notari, quod ille lapsus ho-

minis, in pura natura constituti, esset personalis tantum, non capitalis, seu totius naturæ, quia hoc requirit aliquem statum ultra exigentiam naturæ. Quin potius hæc proprietas etiam in homine constituto in natura integra, sive ordinato, sive non ordinato ad finem supernaturalem, inveniri posset. Denique posset reperiri in una, vel altera persona humana, et non in aliis. Quia si solum conderetur homo ut privata persona, lapsus ejus esset personalis tantum, sicut in angelis uniuscujusque lapsus personalis tantum fuit. In hoc ergo differt lapsus Adami ab illo quem in tali homine considerare possumus, quia lapsus Adæ non tantum fuit personalis, sed etiam capitalis, quia fuit in illo non tantum ut persona privata, sed etiam ut in capite totius naturæ, ita constituto ex speciali ordinatione divina, et ideo lapsus ejus fuit lapsus totius humanæ naturæ. Atque hoc modo sumitur in hæc materia, quoties de homine lapsso sermo est.

3. *Lapsus totius humanæ naturæ quis dicitur.* — Præterea, considerandum est hominem constitutum in natura lapsa hoc posteriori modo, et prout de facto talis status introductus est, dupliciter spectari posse, primo, secundum illum statum, in quo relictus est ex vi peccati originalis, vel solius, vel cum aliis personalibus culpis; secundo, ut jam est sanatus per gratiam. Nam sicut supra distinximus statum gratiæ, ita hic distinguere possumus statum naturæ lapsæ. Duobus enim modis dicitur esse homo in tali statu; primo, quia secundum præsentem justitiam est in statu peccati, sive actualis, sive habitualis, vel originalis: secundo, quia propter peccatum præcedens caret originali justitia et integritate naturæ, licet fortasse secundum præsentem justitiam sit in statu gratiæ, et hæc posterior acceptio est maxime usitata, et in sequentibus illa frequenter utemur, distinguendo hominem lapsum, in peccatorem et justum; hæc enim distinctio locum non haberet, si status naturæ lapsæ semper includeret statum peccati vel culpæ in homine permanentis. Non ergo illum includit, sed defectum integritatis naturæ, qui ex culpa aliquo modo propria præce serit.

4. *Orbatus fuit Adam, et posteri ob lapsum, omnibus prærogativis status originalis justitiæ, et gratiæ etiam.* — Omissis ergo pro nunc statu naturæ lapsæ jam reparatæ per gratiam, de quo postea late dicendum est, de ipso statu naturæ lapsæ secundum se unum est certum, nimirum, ex vi hujus lapsus, tam primum

hominem, quam ejus posteros omnes mansisse privatos omnibus donis status justitiæ originalis, quæ supra enumeravimus, et a fortiori gratia et sane itate, quantum erat ex vi originis. Quod est de fide certum, et definitum in conciliis Milevit. et Arausic., ac præsertim in Trid., sess. 5, et latius traditur a doctoribus in materia de peccato originali, et maxime videri potest Augustinus, libris cont. Pelagian., et libr. 13 de Civit., cap. 13 et 14, et libro decimo-quarto, capite decimo et sequentibus; Prosper, libro primo de Vocation. gent., capite septimo; Fulgentius, libro de Incarnation. et grat., capite decimo-tertio; divus Thomas prima secundæ, quæstione octogesima-prima, et sequentibus, et ibi interpretes omnes, et alii scholastici cum Magistro, in 2, distinctione decima-octava, trigesima, etc.

5. *Peccato originis non Adamus sed posteri fide spoliati fuerunt.* — Estque valde notandum hoc peccatum originis, non solum sanctitate, sed etiam fide, posteros Adæ privasse; sic enim concipiuntur nunc ex vi originis, qui ex Adamo ordinario modo generantur, ut nunc tanquam certum supponimus, et colligitur ex eisdem Conciliis. An vero ipse Adam fidem etiam peccando perdidit, nec refert nec pertinet ad hunc locum. Fulgentius autem supra simpliciter affirmat. Et Prosper, contr. Collat., capit. decimo-nono et vigesimo-primo, et alii quos refert Pereira libro sexto in Genes., disputatione de decept. Adæ, putant habuisse actum fidei contrarium. Quod tamen in Scriptura non legitur, nec ex ea colligitur, et potius in Paulo legimus Adam non fuisse seductum, prima ad Timotheum secundo, et de sola Evâ id affirmatur, 2 Corinthiorum undecimo. De cujus deceptiōe adhuc dubitari potest an fuerit per propriam infidelitatem, sed in primam partem remittimus. Et id de ipso Adam probabiliter credimus, quoad suam personam non fuisse privatum fide propter peccatum, quia non peccavit errando contra fidem, et per alia peccata actualia non amittitur fides semel habita, quoad posteros vero totam gratiam ipsamque fidem amisit, vel potius, ne ipsis infunderetur, obicem posuit.

6. *Comparatio status lapsæ cum statu puræ naturæ.* — Ex his ergo facile declarari potest quomodo hic status naturæ lapsæ ad reliquos ejusdem naturæ status comparetur. Et primo, si comparetur cum statu puræ naturæ, constat ex dictis non differre in penali aliqua privatione intrinseca, seu alicujus boni intrinseci,

quia peccatum non diminuit bonum mere naturale per se, et intrinsece, sed per accidens, vel impediendo bonum aliquod juvans naturam, vel pravum habitum inducendo, juxta doctrinam divi Thomæ 1. 2, quæstione octogesima-quinta, articulo primo et secundo; et Alensis, secunda parte, quæstione nonagesima quinta, et aliorum doctorum in 2, distinctionibus trigesima-tertia et trigesima-quinta. Et ratio clara est, quia peccatum non potest intrinsece immutare, augere, vel minuire naturales vires animæ, ut capite sequenti magis declarabo. Igitur in statu puræ naturæ peccatum actuale, quamdiu duraret, per se impediret rectam operationem, et hominem a Deo averteret; postquam vero cessaret, relinqueret voluntatem moraliter aversam a Deo, non tamen impediret boni operationem, sed ad summum posset nonnullam difficultatem afferre circa aliquod bonum, generando habitum inclinantem ad contrarium malum, vel, quantum in se erat, morale impedimentum apponendo divinis beneficiis, si quæ fortasse liberaliter in eo statu conferrentur, quæ omnia ex dicendis in capite sequenti declarabuntur amplius.

7. *Gratiæ et naturæ lapsæ status comparantur.* — Secundo, est etiam facilis comparatio, si status naturæ lapsæ ad statum gratiæ comparetur. Nam si natura sumatur et spectetur ut jacens et durans in peccato in quod lapsa est, et comparetur ad proprium et intrinsecum statum gratiæ, sic formaliter opponitur illi, nec potest simul esse cum illo, ut infra tractabitur, et sic dicitur homo nunc concipi et nasci in statu naturæ lapsæ, id est, peccati. Si vero comparetur ad statum gratiæ late sumptum pro extrinseca ordinatione ad finem supernaturalem, sic status naturæ lapsæ non repugnat cum tali statu, ut patet in eodem infante genito in natura lapsa, qui nihilominus nascitur in statu ordinationis ad gratiam et gloriam. Et ratio est, quia homo non privatur propter peccatum mediis de se sufficientibus ad gratiam et gloriam consequendam, neque talis pœna imposita est a Deo pro lapsu naturæ secundum ordinariam legem, licet de potentia absoluta imponi potuerit. Unde ulterius, si natura dicatur lapsa præcise propter defectum integritatis ex peccato contractum, sic non repugnat status naturæ lapsæ cum statu gratiæ, etiam intrinseco et proprio; sic enim puer baptizatus in statu quidem gratiæ constitutus est, et nihilominus simul esse dicitur in statu naturæ lapsæ, quia licet sit sanatus quoad infirmitatem culpæ, non est redintegratus (ut sic dicam)

quoad læsionem naturæ : et ratio propria est, quia status naturæ lapsæ, hoc posteriori modo sumptus, non est status culpæ, sed fomitis, et pœnæ contractæ ex culpa, et ideo non repugnat esse simul cum statu gratiæ. Quapropter status naturæ lapsæ, sicut et integræ, recte in duos subdividi potest, videlicet in statum naturæ lapsæ sanatæ per gratiam, vel jacentis sub lapsu, ut bene notavit Moliua in Concord. quæst. 14, art. 13, disp. 3.

8. *Integræ naturæ status lapsæ comparatur. — Et quid de potentia absoluta dicendum.* — Tertio, intelligitur ex dictis quomodo comparetur status naturæ lapsæ ad naturam integram, seu in justitia originali constitutam. Dicendum est enim, imprimis de potestate absoluta, potuisse integritatem naturæ manere quoad compositionem potentiarum inter se, amissa innocentia, et recto ordine voluntatis ad Deum. Eademque ratione potuisse manere in homine lapsu omnia privilegia originalis justitiæ, non manente formali ratione justitiæ, quatenus per peccatum corrumpitur. Probat, quia nulla est repugnantia. Nam illa læsio naturæ vel privilegiorum amissio non sequitur ex peccato formaliter, imo nec proprie effective, ut per se constat, sed sequitur ut pœna digna talis culpæ : non cogitur autem Deus talem pœnam imponere, et multo minus cogitur statim illam exequi : ergo posset conservare illa dona, non obstante culpa.

9. *De ordinaria lege, naturæ integræ et lapsæ status nunquam simul steterunt.* — Ad id vero ulterius, de facto, et secundum legem ordinariam, in natura lapsa nunquam statim illum permansisse. Quæ sententia sumitur ex libro Augustino, libro de Correctione et gratia, capite 11 ; D. Thoma, 1 parte, quæstione 100, articulo primo et secundo. Probat, quia, amissa gratia, amittitur etiam status ille secundum ordinariam legem ; sed per naturæ lapsum amissa est gratia, ut constat : ergo amittitur etiam status naturæ integræ et originalis justitiæ. Major constat ex dictis, quia ostensum est gratiam fuisse fundamentum justitiæ originalis et integritatis naturæ ; ablato autem fundamento, ruit reliqua que super illud edificata sunt. Unde quoad integritatem naturæ est optima congruentia, quia qui deserit Deum peccando, et non obediendo ei, jure deserit, ut caro et portio inferior, spiritus ac pars superiori non obediat ; sed natura peccando amittit rectum ordinem ad Deum, neque illi perfecte subditur : merito ergo amittit integritatem et perfectam subjectionem

sui appetitus inferioris ad superiorem et ad rationem ; et inde etiam extenditur congruentia ad originalem justitiam, tum quia hæc supponit naturæ integritatem, ut dixi, et ideo, hæc amissa, etiam illa perditur : tum etiam quia per peccatum, fit homo reus pœnæ et doloris, quæ repugnant cum statu originalis justitiæ, ut etiam declaratum est.

10. *Objectio de Eva lapsa in integritate stante, usque ad lapsum Adami.* — Contra hoc vero est vulgaris objectio, quia Eva peccando non statim amisit originalem justitiam ; imo in illa jam lapsa mansit naturæ integritas et originalis justitia. Probat, quia illa peccavit prius quam Adam ; et tamen in illo tempore intermedio inter suum et peccatum Adæ non sensit concupiscentiam, nec erubuit quod nuda esset, nec aperti sunt oculi ejus, ut suam nuditatem videret : ergo signum est permansisse tunc in naturæ integritate. Et similiter non sensit calorem vel frigus, vel aliam alterationem carnis passibilis : ergo signum est etiam retinuisse justitiam originalem, quia hi sunt effectus proprii talis doni et status. Antecedens patet, quia si sensisset hujusmodi novos effectus, evidenter agnovisset suum lapsum et deceptionem, et non esset ultra progressa ad invitandum virum. Propter hoc Abulens., in e. 3 Genes., quæst. 6 et 7, et Catherin., opuse. de Peccat. orig., censent personalem lapsum potuisse simul esse et fuisse cum donis integræ naturæ et justitiæ originalis, seclusa gratia. Idem in re tenet Cajetan., 1 parte, quæst. 93, art. 1, licet aliis verbis. Dixit enim Evam, peccando ante Adam, non statim amisisse justitiam simpliciter, id est, totaliter, amisisse autem quoad aliquid. Quod non amplius explicat, significat autem amisisse quasi jure et debito, quia statim meruit illam amittere, de facto tamen non statim illi ablatam esse, donec Adam peccavit.

11. *Negativa responsio.* — *Ad singula respondetur in forma.* — Nihilominus magis placet sententia proposita, et consentaneæ ad illam, respondeo Evam, statim ac peccavit, amisisse originalem justitiam et naturæ integritatem, ac subinde statim habuisse naturam læsam, sicut et lapsum. Ad argumentum autem respondeo, non oportuisse ut statim sentiret inordinatos motus naturæ lapsæ, quia non semper homo illos sentit aut experitur, qui vel non semper eorum occasiones sese offerunt, vel non valet hi attendere. Deinde dico verisimile esse habuisse statim Evam aliquos motus appetitus sentientis magis inordinatos quam integritas

naturæ permetteret. Potuit enim statim sentire, et fortasse sensit voluptatem majorem in aspectu cibi, majoremque illius concupiscentiam, præsertim quia jam, per internam superbiam, similitudinem Dei et scientiam boni et mali inordinate desideraverat, nam hæc ipsa animi affectio appetitum etiam inferiorem magis inclinabat. Non tamen advertabat Eva hunc motum esse effectum lapsæ naturæ, quia vel quibus donis antea esset prædita, vel unde illi motus provenirent, ignorabat, vel certe quia de hoc non cogitavit, neque reflexe (ut sic dicam) ad motus attendit, ut eorum radicem investigaret. Et ob eandem causam potuit facile non erubescere, nec videre nuditatem suam prius quam vir eaderet, quia interjectum tempus breve fuit, et in eo solum de marito invitando et inducendo ad esum cibi cogitabat. Et optimum argumentum est, nam statim experiri potuit se esse deceptam a serpente, quia nullam scientiam boni vel mali per esum cibi adeptam est, et tamen id non consideravit, sed solum ad virum se convertit, et de illo invitando sollicita fuit.

CAPUT VII.

UTRUM HOMO IN STATU NATURÆ LAPSÆ CAREAT LIBERTATE, QUAM IN SUA PURA NATURA HABERET?

1. *Questio explicatur quæ contra hæreticos procedit.* — Quæstiones in hoc et sequenti capite tractandæ, ad explicandas vires liberi arbitrii in homine lapsæ necessariae sunt, quod in lib. 2 fuse tractaturi sumus, et ideo in præsentem illas præmittimus. Potest autem voluntas hominis lapsi comparari, et ad voluntatem hominis in statu innocentiae seu integræ naturæ, et ad statum puræ naturæ. Item potest fieri comparatio, vel in absoluta libertate, vel in viribus et perfectione ejus: et hanc quidem posteriorem quæstionem cum Catholicis tractabimus, hic solum priorem cum hæreticis disputamus; et ideo addidi in titulo quæstionis, an homo nunc careat libertate, quam in pura natura haberet: quia non inquiri de illa quam in statu naturæ integræ habuit, id est, de perfecto statu libertatis sine ullo corporis gravamine, vel impedimento concupiscentiae. Sic enim certum est, ex dictis et ex fidei principiis, hominem lapsam carere illis prærogativis (ut sic dicam) et viribus libertatis quas in statu innocentiae haberet, ac subinde vires liberi arbitrii ad operandum bonum de-

bilitas esse plurimum in humana natura per lapsum Adæ, et originale peccatum. Solus enim Pelagius, et ejus sectatores, qui peccatum originale negarunt, et Adamum in pura natura creatum esse asseruerunt, consequenter etiam dixerunt nullo modo fuisse debilitas in posteris Adæ vires ad operandum bonum, ut capite 12 dicam, et constat ex Augustino, lib. de Nat. et grat., c. 19, ubi errorem illum impugnans ex illo Ps. 40: *D mine, miserere mei, sana animam meam, quia peccavi tibi*, ait: *Quid sanatur, si nihil est vulneratum, nihil sauciatum, nihil debilitatum, atque vitiatum?* Et hic error Pelagii damnatus est in Concil. Arausic., c. 1; Trid., sess. 5, decreto de Peccat. orig.; Valent., cap. 6; sequiturque ex principio fidei, quod peccatum originale transfunditur ad posteros; per illud enim peccatum natura infirmior facta est, et consequenter imbecillior, ut recte dixit Chrys., homil. 30 ad Popul., juxta verbum Christi Matth. 9: *Non est opus valentibus medico, sed male habentibus*, quod explicans addit: *Non veni vocare justos, sed peccatores.* Solum ergo superest quæstio de substantia seu indifferentia libertatis, an manserit in homine lapsæ, saltem secundum intrinsecam rationem, secundum quam est naturalis homini, essetque in homine in pura natura.

2. *Primus sensus erroris.* — In hoc ergo puncto valde errant hujus temporis hæretici. Nam Lutherani dicunt, per peccatum Adæ, non solum diminutam fuisse, sed etiam omnino perditam naturalem hominis libertatem, præsertim ad operandum bonum. Quem errorem Calvinus et alii secuti sunt, ut late refert Bellarminus, l. 4 de Statu primi hominis, in prin., et latius in Præfat. ad lib. de Grat. et lib. arb. Duobus autem modis hæc sententia intelligi posset. Prior erit, si supponatur humana natura ex vi suæ essentiae et facultatum naturalium non habere libertatem, recepisse autem illam per dona status innocentiae, et ideo amittendo illa dona per peccatum, etiam libertatem amisisse. Juxta quam intelligentiam non sequeretur hominem per peccatum factum esse deterioris conditionis, quoad libertatem, quam esset in natura pura, sed potius rediisse ad naturalem conditionem quam ex se haberet si per justitiam non fuisset in pura lapsa immutatus. Verumtamen non est hic sensus hæreticorum, ut ex his plane constat, quæ idem auctor refert, et supra attigimus: nam illi potius sentiunt hominem in sua creatione in pura natura fuisse conditum, unde cum

dicant fuisse tunc liberum, aperte concedunt libertatem esse proprietatem naturalem homini non lapsi. Deinde illa positio in illo sensu repugnantiam involvit. Qui enim fieri potest ut animal natura sua non liberum, per dona superaddita fiat liberum? Profecto non minus id repugnat quam animal, natura sua irrationale, fieri ratione utens per dona superaddita, vel quam brutum elevari ad libere operandum. Et præterea contra suppositionem illam superest tota disputatio pro naturali et intrinseca hominis libertate, quæ hic tractanda non est, sed supponenda, tanquam omnibus nota.

3. *Mens secunda ejusdem erroris ab hæreticis intenta improbat.* — Alius igitur modus asserendi errorem illum, et fortasse ab hæreticis intentus, est hominem natura sua esse liberum, et ita fuisse conditum, et peccando amisisse arbitrii libertatem naturalem. Juxta quam propositionem, aperte sequitur, in natura lapsa, non solum esse debiliores vires quam in pura natura, sed etiam nullas esse ad opera humana seu moralia efficienda, nedum bona, quia sine libertate nullum est morale opus, neque homini imputari potest quidquid facit. Hic autem error damnatus est in Concil. Trid., sess. 6, c. 5., et est non solum contra Sacram Scripturam, Patres omnes, et experientiam, et contra omnia quibus libertas naturalis arbitrii ostendi solet, sed etiam contra evidentem rationem naturalem, qua facile ostendi potest illam mutationem, vel transformationem, seu metamorphosin hominis per peccatum, esse impossibilem. Quia duobus modis potest intelligi hominem peccando amisisse liberum arbitrium, scilicet, ab intrinseco vel ab extrinseco.

4. *Primus modus amittendi libertatem impugatur.* — Prior modus erit, si quis fingat ipsas potentias hominis fuisse ita per peccatum intrinsece mutatas, vel debilitatas, seu impositas, ut nec bene nec libere operari valeant. Quod sensit Lutherum refert Stapleton. 1. 2 de Corrupt. nat., cap. 3. Verumtamen talis mutatio potentiarum intelligi non potest, cum illæ naturaliter dimanent ab anima. Nisi quis forte afferat hominem peccando factum esse amentem ex aliqua læsione plantæ. Nam in anima secundum se non potest intelligi talis mutatio, quia nec substantia animæ, nec voluntas, nec intellectus diminui possunt in entitatibus suis, quæ indivisibiles sunt, ut est per se clarum, et iterum statim ostenditur. Idemque est de potentis

sensuum interiorum et exteriorum, si secundum suas substantias considerentur. Si ergo supponamus homines post peccatum habere integros sensus, et organa illorum apta, et recte disposita ad suas operationes præstandas sine ulla læsione interna in organorum dispositione, et sine impedimento extrinseco, intelligi non potest quin talis homo lapsus ratione utatur, sicut illa uti posset in pura natura, quia habet eandem virtutem connaturalem: unde consequenter fit ut etiam utatur libertate, quia hæc intrinsece sequitur ex usu rationis, quatenus naturalis est homini: ergo non potuit homo intrinsece ita mutari ut hanc libertatem amitteret, nisi per dementia ex læsione organorum sensuum proveniente; hanc autem fingere in homine lapso satis magna dementia esset, indigens magis sensu et experientia, quam rationis discursu.

5. *Secundus errandi modus in tollenda libertate ejusque appendices.* — Ab extrinseco autem posset amitti hæc libertas, si Deus statuisset non relinquere hominem in manu consilii sui, nec præbere concursum aptum ad usum libertatis, sed motionem ita impellentem, ut necessitatem illi inferat ad singulos actus. Et hoc videntur sentire Calvinus et qui eum sequuntur. Nam hinc eo progrediuntur, ut Deum faciant omnium peccatorum auctorem, et alia proferant absurda: et ideo in hoc errore refutando immorari nunc non oportet, nam postea, disputando de efficacia gratiæ, id præstabimus, quantum pro præsentia materia necessarium est, et in opere, de Auxiliis satis multa de hoc puncto diximus. Hic solum animadvertendum occurrit, etiam supposito illo errore, quod Deus ab extrinseco necessitatem inferret humanæ voluntati in singulis actibus illius, non recte dici humanam naturam lapsam pati hanc necessitatem ratione peccati, aut in hoc esse deterioris conditionis, quam in puris naturalibus esset, quia eandem necessitatem extrinsecam in illa subitura esset. Probatur, quia si vera esset talis necessitas, ex efficacia divine voluntatis, et ex dependentia voluntatis humanæ in omnibus actibus suis, a motione divine voluntatis proveniret; at hæc necessitas eadem esset in puris naturalibus, quia esset eadem dependentia: ergo.

6. *Libertas arbitrii per peccatum non perditur.* — *Refutatur.* — Quocirca, sicut fingi non potest quod talis dependentia voluntatis humanæ a divina in operando sit penalis, sed naturalis et necessaria, etiam in statu integræ

naturæ, illa cogitari non potest quod, ex hac parte, amissa sit libertas arbitrii per peccatum. Unde, non solum respectu puræ naturæ, verum etiam nec respectu naturæ integræ, invenitur talis mutatio in natura lapsa. Fortasse tamen hæretici in hoc constitunt discrimen, quod, licet in omni statu voluntas humana ex necessitate operetur propter divinam motionem, nihilominus, si esset pura vel integra, semper determinaretur ex necessitate ad bonum. Per lapsum autem meruit necessitari semper ad peccandum, nisi propter Christum interdum necessitetur ad bonum. Sed neque mihi constat hanc fuisse mentem hæreticorum, neque aliquid confert ad eorum excusationem. Nam, præter errorem contra libertatem arbitrii, et contra Dei bonitatem, convinci potest contradictionis et falsitatis. Quia, juxta illum errorem, voluntas humana in omni statu operatur cum necessitate ex motione Dei: ergo voluntas etiam Adami sic mota est, ut peccaret: ergo non ratione peccati necessitatem illam passa est, sed ut peccaret, cum adhuc esset innocens, mota est a Deo ad peccandum ex necessitate: ergo falso fingitur et inconstanter, illam necessitatem ad malum esse pœnam peccati. Quod autem talis necessitas non sequatur ex dependentia voluntatis humanæ a divinæ, et quod talis motio repugnet divinæ sapientiæ et bonitati, etiam in pœnam peccati, in sequentibus ostendetur, nam de hoc puncto plura in capite 17 dicemus.

7. *Quid in has angustias hæreticos induxerit non apparet.* — Neque video quid potuerit hos hæreticos in hunc errorem inducere, nisi spiritus contradicendi et inducendi homines in desperationem virtutis. Nam alioqui error ille repugnat omni rationi naturali ac morali philosophiæ; et non habet fundamentum, nec vestigium ejus in Scriptura, sed potius illi evidenter repugnat. Nam, de mutatione facta in natura humana per communem lapsum ejus solum legimus Ecclesiastes 7: *Deus fecit hominem rectum, ipse autem se immiscuit multis questionibus.* Et ad Roman. 5 et 8 legimus mortem introductam esse per peccatum, et idem de concupiscentia sumimus ex 6 et 7 ad Romanos. Ex his autem nulla apparenti ratione potest colligi amissio libertatis, ut per se patet, et Concilia ac Patres docuerunt. Nihil ergo video quod pro illo errore posset ita apparenter induci, ut speciali responsione indigeat.

8. *Objectio ex Patribus.* — Posset tamen

quis objicere aliquos Patres dicentes, per peccatum amisisse hominem similitudinem ad Deum, ratione ejus dicitur factus ad imaginem ejus; nam hæc imago maxime in libertate arbitrii consistit: ergo amisit homo libertatem arbitrii. Primam propositionem affirmat Augustinus 6 Genes. ad litter., cap. 27 et 28. et lib. 83 quæst., q. 67, et lib. contra Adimant., cap. 5; et Origen., hom. 1 in Genes. Posteriores autem propositionem tradidit Damascenus, libr. 2. cap. 12; et Bernard., tract. de Libero Arbitrio. Unde Augustinus sæpe indicat per peccatum Adæ amissam fuisse libertatem, nam lib. de Nat. et grat., c. 65, tractans locum Hieronymi, l. 2 contra Jovin., dicentis Deum nos condidisse liberi arbitrii compotes, ut neque ad virtutem, neque ad vitia necessitate trahamur, exponit Augustinus Hieronymum loqui de libero arbitrio quale fuit in homine a Deo condito, non quale relictum est per peccatum. Et in lib. proposit. epistol. ad Rom., cap. 17: *Liberum inquit) arbitrium perfecte fuit in primo homine, in nobis autem ante gratiam non est liberum arbitrium, ut non peccemus, sed tantum ut peccare nolimus.* Et lib. 14 de Civit., c. 11: *Arbitrium voluntatis tunc est vere liberum, quando vitiiis peccatisque non servit. Tale datum est a Deo, quod amissum, nisi a quo potuit dari, non potest reddi.* Et est sententia 52 apud Prosperum. Quin etiam ad 5 objectionem Vincent. dixit: *Liberum arbitrium libertatem, quam libertate perdidit, nisi Christo liberante, non recipit.* Multa etiam in hanc sententiam habet Fulgentius lib. de Incarn. et grat., cap. 19, dicens: *Ex quo primus homo voluntarie naturam suam vitiarit, et oppressit infirmitas, nisi divinæ gratiæ medicamento præventum in unoquoque homine sanetur, atque adjuretur indesinenter liberum arbitrium, est quidem liberum, non tamen sanum, etc.* Statim autem exponit esse liberum a justitia, id est, carens illa, unde inquit: *Quanto magis a bonitate, rectitudine, sanitate, justitiæque liberum, tanto magis malitiæ, perversitatis, infirmitatis, atque iniquitatis mortifera servitute captivum, et cætera quæ in eandem sententiam late prosequitur.*

9. *Responsio.* — Sed, quod ad Origenem attinet, facile concedi posset in illa sententia errasse, hunc enim errorem in eo notavit Epiphanius in epistola ad Joannem Hierosolymitanum Episcopum; Augustinus autem ipse se explicuit libro primo *Retract.*, cap. 26, non ita id esse accipiendum, quasi totum amiserit

homo, quod haberet imaginis Dei; quod magis explicans libro 2, cap. 24, ait: *Non sic accipiendum est, quasi in eo (utique in homine) nulla (supple, imago) remanserit, sed quod tam deformis, ut reformatione opus haberet.* Et ita sicut non amisit imaginem, ita nec liberum arbitrium, licet vires et robur ejus amiserit. Et ita etiam posset exponi Origenes loco citato, nam verba ejus sunt: *Ad hujus (id est, Verbi divini) imaginem factus est homo, et propterea Salvator noster, qui est imago Dei, misericordia motus pro homine, qui ad ejus similitudinem factus fuerat, videns eum, deposita sua imagine, maligni imaginem induisse, ipse, imagine hominis assumpta, venit ad eum, etc.* Dici enim potest homo *deposuisse imaginem Dei*, non quia illam destruxerit, sed quia illam deformavit.

10. Addi etiam potest a multis distingui imaginem a similitudine; nam ad imaginem dicitur homo factus ratione intellectualis naturæ, et convenientiæ cum Deo in gradu intellectuali, et consequenter in ratione et libertate, ut communiter Patres exponunt. Similitudo autem refertur ad gratiam, per quam imago ipsa ellicitur Deo similior, ut sensit Magister in 2, distinctione decima-sexta, et sumitur ex Dionysio, 2, c. 2 de Ecclesiastica Hierarchia, in principio, dicente: *Hoc omnes coramur, ut per gratiam similes Deo efficiamur.* Et auctor libri de Ecclesiastic. dogmat., cap. ultimo, hoc significavit, cum dixit *similitudinem in moribus imitari.* Sic ergo dici potest amisisse similitudinem Dei, quia gratiam amisit, et consequenter imaginem deformasse, privando illam divina forma, et aliis donis quæ illam comitabantur. Ex quo habemus hominem non amisisse libertatem quam in pura natura haberet, sed amisisse supernaturales vires ejus, quibus etiam in pura natura careret. Et hoc est quod, uno verbo, dixit Prosper libro primo de Vocat. gent., cap. 7: *Cum homo spoliaretur, non voluntate, sed voluntatis sanitate privatus est: idem lere lib. contra Collat., c. 19.*

11. *Solutio omnium Patrum.* — Augustini sententia de libero arbitrio hominis, post lapsum, tam est clara, et sæpe ab ipso repetita, et tollente observata, ut impudentissimum sit, propter unum aut aliud verbum episcopi, illam velle obtrudere ac pervertere. Id constat ex toto libro de Gratia et libero arbitrio, Epistola quadragésima-sexta, et quadragésima-septima, ut alia loca omittam. Cum ergo dicitur liberum arbitrium hominis lapsi, ante

gratiam non esse liberum, æquivocatio est in voce *liberum*. Aliquando enim opponitur servituti, et hoc modo dicitur liberum arbitrium hominis lapsi non esse liberum sine gratia, quia est servus peccati, ut loquitur Augustinus in ultimo loco. Et de eadem potest intelligi Prosper, et apertius Fulgentius. Hinc etiam liberum interdum opponitur necessitati peccandi, non in singulis actibus, sed absolute, et disjunctim, seu confuse; et hoc modo dicitur homo lapsus, gratia destitutus, non esse liber ut nunquam peccet, et de hac necessitate loquitur Augustinus in prioribus locis: illa vero necessitas non excludit propriam libertatem indifferentiæ, quæ opponitur determinationi ad unum in singulis actibus definite sumptis, ut dicemus late in libro secundo. Hæc autem libertas indifferentiæ est, quæ constituit liberum arbitrium, vere liberum pro singulis actibus, et de hac nunquam Augustinus vel alii Patres dixerunt esse per peccatum amissam. Unde Bernardus, libro de Gratia et libero Arbitrio, distinguens propriam libertatem a necessitate, et libertatem a servitute peccati, dicit Christum venisse, ut nobis conferret hanc posteriorem libertatem, quam amiseramus peccando, non priorem, quæ per peccatum non amittitur, nec amitti potest: *Manet enim (inquit) libertas voluntatis, ubi est captivitas mentis, tam plena quidem in malis quam et in bonis, sed in bonis ordinatior;* et infra: *Sive Dei simus, sive diaboli, non tamen similiter desinimus esse nostri. Manet enim libertas arbitrii, per quam manet, et causa meriti.* In sermone autem octogesimo-primo in Cantic., latius declarat, cum libertate naturali, quæ post peccatum mansit, contractam esse quamdam necessitatem peccandi, nisi gratia subveniat, quia corpus, quod corrumpitur, aggravat animam, etc. Et de hac necessitate loquitur, ut dixi, Augustinus. Sæpe etiam dicitur homo amisisse libertatem ad amandum super omnia Deum, et alia supernaturalis justitiæ opera facienda, quia nimirum amisit ipsam justitiam, quæ est principium talium operum, et factus est indignus omnibus donis ejus, sine quibus illam operari non potest: et ideo in eo statu non est liber ad tales actus, quia est impotens. Hæc autem libertas recuperatur per gratiam Christi quæ dat potestatem bene operandi, ut in discursu materiae videbimus. Et hæc nunc sufficiant contra hæreticos.

CAPUT VIII.

UTRUM IN STATU NATURÆ LAPSE HOMO SIT INTRINSECE DEBILIOR AD OPERANDUM BONUM, QUAM ESSET IN STATU PURÆ NATURÆ?

1. *Prima sententia.* — Sequitur controversia cum Catholicis, in qua fuit sententia Gregorii, naturam lapsam per peccatum factam esse magis propensam ad malum, debilioremque ad bonum, etiam morale, et naturæ consentaneum, quam esset in pura natura. Ita tenet Gregorius in secunda, distinctione trigesima, quæstione prima, articulo secundo, ad tertium. Fundatur præcipue in illa communi sententia theologorum, quam acceperunt ex Ambrosio, libro septimo in Lucam; Augustino, libro de Natura et Gratia, capite septimo; Beda, in capite decimo Lucæ; qui, circa parabolam de illo qui descendebat ab Jerusalem in Jericho, dicunt naturam humanam per peccatum fuisse spoliatam gratuitis, et vulneratam in naturalibus, quod non esset verum, nisi in viribus ipsis aliqua diminutio facta esset. Videturque hæc opinio originem ducere ex alia ejusdem auctoris, et aliorum quorundam, dicentium per originale peccatum imprimi homini quamdam morbidam qualitatem. Nam si hoc verum est, mirum non erit quod qualitas illa possit ad malum inclinare, et boni operationem difficiliorem reddere. Videtur autem interdum Augustinus ita loqui de languore et mala qualitate hominis lapsi, ut patet ex libro primo de Nuptiis, capite vigesimo-sexto, et libro sexto contra Julianum, capite septimo.

2. *Recentiorum tutamen.* — Hanc opinionem aliqui moderni theologi tentant defendere, non quidem ex illo principio morbidæ qualitatis, sed ex alio. Asserunt enim humanæ naturæ vires, ad bonum morale et naturale præstandum, debiliores esse in natura lapsa, quam essent in pura natura, solum quia nunc est aversa a Deo, et vere in peccato, quod non haberet in pura natura. Ita tenet novissime P. Didac. Alvar. in opere de Auxiliis, libro sexto, disputat. 45 et 47, dicitque quamplurimos Thomistas illam sententiam docere, licet eos non referat. Tribuit etiam S. Thomæ 1. 2, quæst. 85, articulo primo, quia dicit naturalem inclinationem hominis ad bonum rationis, humanæ naturæ proportionatum, minui per peccatum. Probat primo ex Conciliis Arausie. et Trident., dicentibus hominem,

per peccatum originale, secundum animam et corpus fuisse in deterius commutatum; et ex Patribus asserentibus fuisse non tantum gratuitis privatum, sed etiam in naturalibus vulneratum. Quæ ait non intelligi sufficienter per comparisonem ad vires hominis, quas habet in statu innocentie ratione justitiæ originalis, sed intelligenda necessario esse etiam comparatione puræ naturæ et virium ejus, quia alias nullum vulnus in se suscepisset humana natura per peccatum, nec homo relictus esset semivivus, quia in pura natura nullum esset vulnus, nec homo in eo statu constitutus dici posset semivivus relictus, licet concupiscentiæ rebellionem haberet.

3. *Probatur secundo præfata sententia.* — Secundo probat, quia peccatum diminuit naturalem inclinationem hominis ad bonum rationis, humanæ naturæ proportionatum: ergo idem fecit peccatum originale in nobis; ergo in hoc statu sunt vires arbitrii debiliores quam in pura natura. Antecedens est D. Thomæ, dicta quæst. 85, artic. 1 et 2, et commune Theologorum ibi, et in 2, dist. 24 et 35, et videtur experientia hoc constare. Consequentia probatur, quia peccatum originale est verum peccatum, et ita non est minor ratio de illo quam de aliis. Possumusque consecutionem illam ita declarare, quia si homo conditus in puris naturalibus postea peccaret, debiliior fieret post peccatum ad operandum bonum morale, quam antea fuisset, juxta dictum axioma; sed ita homo nascitur nunc in peccato originali, sicut ille homo maneret tunc in peccato habituali, transacto actuali: ergo.

4. *Tertia probatio.* — Tertio probat, quia per originale peccatum aversa est natura humana a suo ultimo fine, non tantum supernaturali, sed etiam naturali; ergo facta est debiliior ad bene operandum. Antecedens probatur, quia homo, ad supernaturalem gratiæ finem ordinatus, non potest averti a Deo, ut fine gratiæ, seu supernaturali, quin avertatur consequenter ab eodem, ut est finis naturalis: nam oppositum involvit repugnantiam. Consequentia vero probatur, quia præcipua bonitas moralium operum pendet ex ultimo fine, tanquam a prima regula bene operandi, et ideo necesse est ut voluntas aversa a tali fine debiliior facta sit ad bene operandum, sicut intellectus male instructus circa prima principia, et quasi aversus ab illis, minus bene dispositus est ad discurrendum circa verum. Quarto, probat inductione, quia homo in puris naturalibus posset diligere Deum, ut

auctorem, super omnia, saltem aliquo actu vel momento, et vincere quamcumque tentationem gravem modico tempore: homo autem lapsus hæc non potest; ergo signum est debiliorem esse factum.

5. *Communis et vera sententia.* — Nihilominus, communis et vera sententia est, naturales vires hominis vel liberi arbitrii, quoad gradum, seu perfectionem quam in statu puræ naturæ haberent, non fuisse diminutas in natura lapsa ex vi solius peccati originalis, sed solum quoad robur et integritatem quam a justitia originali accipiebant. Hæc sine dubio est sententia D. Thomæ, et communis antiquorum theologorum, ut statim declarabo. Eam vero distinctius, quam cæteri, explicaverunt Conradus et Cajet. 1. 2, quæst. 85, art. 3, et quæst. 109, art. 2, § *Secundum dubium*, quos secutus est Soto, libr. 1 de Natur. et grat., c. 13; et Medin. 1. 2, quæst. 85, artic. 3. § *Secundo infertur*, qui eam sumit ex D. Thoma ibi, additque hanc esse veram divinamque theologiam, quam docent universi theologi. Eamdem optime docet Marsilius in 2, quæst. 18, art. 1. Idem tenet Gregorius de Valent., 2 tom., disp. 6, quæstione 15, puncto 1, qui addit Scotum in 2, distinctione 29, quæst. unic., in fine, et distinctione 33, quæstione 1; Gabriel, in 2, distinctione 35, articulo 3, dubio 3; Durandus, in 2, distinctione 20, quæstione 5, capite 2, et distinct. 30, quæst. 1, art. 1. Isti autem auctores in tantum hanc docent sententiam, in quantum dicunt corruptionem, seu lesionem factam per peccatum originis in humana natura, tam quoad supernaturalia quam quoad naturalia, non esse factam per ablationem alicujus perfectionis naturalis, nec per inductionem alicujus vitiosæ qualitatis, sed per ablationem donorum, quæ, tam ad elevandam dictam naturam ad supernaturalia, quam ad roborandum et componendam illam in naturalibus, divinitus illi erant superaddita. Ex hoc enim principio satis clare infertur vires, quæ homo habens in pura natura, non fuisse per peccatum diminutas. Et idem sentiunt Cardinalis Bellarminus, libr. 4 de Stat. primi hominis, cap. 3; Albert. Pagni, controvers. 4; Vega, libr. 2 in Trident., cap. 6 et 11, et libr. 3 in Trident., cap. 11; Ruard., art. 2 contra Luther. 1. 1 in Seno, libro 1 de Grat. et liber. arbitrii, cap. 3, p. 4, et tract. 4, cap. 1; Episcopus Lucensis, Ferd. Vellozillo, in Adversariis Theolog., quæst. 9, ad 1 tom. D. Chrysostomus.

6. Atque eodem modo, sine dubio, est hæc sententia D. Thomæ; nam 1 part., quæstion. 95, artic. 1, ait naturalia mansisse in homine integra post peccatum, et in hoc æquiparat hominem angelis lapsis, de quibus dixit Dionysius, capite 4 de Divinis nominibus, in eis naturalia mansisse integra post peccatum. Respondent non dicere D. Thomam naturalia mansisse integra quoad omnia, sed cum moderatione, scilicet, *quoad bonum primum naturæ, quod est esse, vivere et intelligere*. Ita enim expouit Dionysium idem D. Thom. 1. 2, quæstion. 85, articulo 1, ad 1. At vero divus Thomas, in citato loco, prima parte, expresse loquitur de bono illo, quod consistebat in perfecta subjectione corporis ad animam, et inferioris appetitus ad superiorem, probatque non fuisse naturalem, quia alias permansisset post peccatum, juxta sententiam Dionysii: ergo intelligit illam de omni bono naturæ. Idemque argumentum fieri potest de quocumque bono, in quo dicitur natura humana diminuta per peccatum, nimirum inferendo non esse naturæ debitum; nam si fuisset, permansisset, juxta regulam Dionysii. Et potest hic sensus illius regulæ confirmari, quia, juxta usitatum loquendi modum in doctrina tradenda, indefinita locutio sine ulla exceptione æquivalet universali: alioqui ambiguus esset sermo, et voluntariis tergiversationibus expositus: Dionysius autem absolute dixit naturalia mansisse integra post peccatum: ergo intellexit tam de ipsa natura quam de omnibus quæ intrinsece fluunt ab ipsa natura, seu naturali vinculo sunt illi connexa. Et ita illud axioma intellexerunt, et secuti sunt Scholastici communiter. Et præterea non est major ratio de vita ipsa et vi intelligendi, quam de quacumque alia vi naturaliter operandi, ut in discursu monstrabimus. Nec D. Thomas aliam declarationem adhibuit in illa solutione ad primam, nam se remittit ad illud primum bonum naturæ, de quo in corpore articuli locutus fuerat, sub quo dicit includi *principia naturæ, et proprietates, et potentias animæ, et alia hujusmodi*. Et præterea in eodem articulo primo, secundo et tertio, declarat corruptionem naturæ solum factam esse per ablationem donorum dantium naturæ integritatem, quam ex se non haberet, sicut mortalitas corporis etiam inducta est per solam justitiæ originalis amissionem, et quæstione octogesima-septima, articulo septimo, dicit hominem amisisse justitiam originalem, *et sur natura fuisse relictum*. Quod, quæro, est relictum esse naturæ, nisi relictum esse cum omnibus viribus et

perfectionibus, quas, seclusa justitia originali, humana natura ex se, seu ex naturali conditione postulat, et habere potest? Hæc autem omnia et sola sunt quæ homo in pura natura posset habere : ergo, ex sententia D. Thomæ, in hoc est æqualitas inter hominem lapsum et purum.

7. *Ex Conciliis et Patribus probatur.* — Unde ulterius potest hæc veritas ex Conciliis et Patribus, eodem argumentandi modo, probari. Ubique enim mutationem, in Adamo et in naturæ integritate per peccatum factam, et ad nos simul cum culpa per originem transfusam, positam fuisse docent in amissione illius doni, naturæ humanæ, ultra omnem perfectionem ei debitam, auctori, quo bene in se constituta et ordinata, recte ac constanter bonum posset operari. Ita exponit mutationem illam, seu vulnerationem naturæ, Concilium Tridentinum, sessione quinta, in decreto de Peccato originali dicens: *Primum hominem Adam, cum mandatum Domini in paradiso fuisset transgressus, statim sanctitatem et justitiam, in qua constitutus fuerat, amisisse.* Et inde concludit incurrisse iram et indignationem Dei, mortem et captivitatem sub potestate dæmonis, ac denique hoc modo, *secundum corpus et animam, in deterius commutatum fuisse.* Tota ergo illa commutatio posita fuit in amissione sanctitatis, et justitiæ, et perfectionum, quæ ab illis proveniebant, quibus omnibus etiam homo in puris naturalibus caruisset. Et hæc ratione dixit optime Chrysostomus homil. de Cruce Domini, tomo tertio, hominem, peccando, privatum esse donis quibus antea ornatus fuerat, et relictum esse nudum. Unde exponendo illud : *Adam ubi es?* ait : *Non quod ignoraret Deus, sed quia post persuasionem diaboli, qui ei promiserat deitatem, et invenit nuditatem, dicit ei, Ubi es? Hoc est, de qua dignitate ad quale dedecus deductus es? Quia manducasti de ligno scientiæ boni et mali, remansisti homo, utique nudus, seu nudatus, propter prævaricationem, ut statim subiungit.* Et sic etiam, homilia decima-sexta in Genes. : *Cognoverunt, ait, quod nudi essent. Nudati, propter peccatum, supernæ gratiæ amictu, et sensibilis suæ spoliationis sensum acceperunt.* Idem, homilia decima-septima late; et Ambrosius, libro secundo de Jacob et vita beat., capite quinto, dixit fuisse Adam spoliatum, atque ita fuisse nudum inventum; idem, libro de Elia et Jejun., capite quarto, et de Isaac et Anima, capite quinto; Augustinus, libro nono Genes. ad litter., capite decimo, et libro undecimo, ca-

pite trigesimo-primo, ubi etiam, per ablationem et desertionem divinæ gratiæ, explicat defectum lapsæ naturæ; et Prosper contra Collat., capite decimo-nono: *Natura humana (inquit), in prima prævaricatione, nec substantiam amisit, nec voluntatem, sed lumen, et decorem virtutum quibus fraude incidentis exuta est.*

8. *Ratio conclusionis.* — Tandem probatur hæc sententia ratione. Prima sit, quia intrinseca diminutio perfectionis aut virium alicujus rei, vel naturæ aut potentiæ, solum potest duobus modis fieri. Unus est, per subtractionem alienjus realis ac physicæ perfectionis talis naturæ, sive illa sit ablatio integra alicujus qualitatis, sive remissio, sive nimia intensio per quam ægritudo fiat, seu similis convenientis dispositionis aut temperamenti dissolutio. Alter modus esse potest per additionem alicujus habitus, vel qualitatis disconvenientis naturæ, inclinantis illam ad malum ejus, vel quid simile: in homine autem lapsa, neutrum horum reperitur, comparatione facta ad hominem in puris naturalibus: ergo nullo modo habet diminutas vires ad bene operandum, magis quam essent in homine puro. Major traditur a divo Thoma, prima parte, quæstione quadragesima octava, articulo-quarto, in corp. et ad 3, et 4. 2, quæstione octogesima-quinta, articulo primo et secundo, ubi duobus tantum modis ait posse peccatum diminueri bonum naturæ, scilicet, per subtractionem et per appositionem. Et per se videtur evidens non posse ultra hos modos alium realis mutationis cogitari, quia sunt immediate oppositi, cum omnis mutatio, aut positiva, aut privativa seu ablativa necessario futura sit. Unde fit aliquem ex illis necessarium esse ut vires minuantur, quia intelligi non potest ut natura vires amittat, vel in totum, vel in partem, sine aliqua sui mutatione. Et ideo merito docuerunt Concilia Adamum, peccando, in deterius fuisse commutatum, ut Concilium Tridentinum, sessione quinta, dixit. Deinde, quia vires illæ reales sunt et physicæ: nam est realis potestas operandi, vel resistendi contrario; ideo diminutio illarum etiam fieri debet per mutationem physicam et realem: ergo per subtractionem, vel additionem alicujus rei, vel realis modi, ut intensionis vel realis proportionis ac perfectionis: ergo sine aliqua hujusmodi mutatione non potest intelligi diminutio virium bene operandi.

9. *Diminutio in natura humana per peccatum in aliqua naturali perfectione facta non*

fuit. — Probantur jam singulæ partes minoris propositionis. Et primo, per peccatum non esse factam in homine diminutionem per subtractionem alienjus perfectionis, quæ in puris naturalibus in eo inveniatur, facile ostendi potest. Quia nec substantia animæ, nec intellectus, nec voluntas, nec aliæ facultates naturales per subtractionem diminui possunt in seipsis, quia indivisibiles sunt, et remitti non possunt. Nec etiam fieri potest in aliqua forma intrinsece eis inhærente, quia in puris naturalibus nulla talis forma est in substantia animæ, vel ejus potentiis; nam de intellectu dixit Aristoteles esse tanquam tabulam rasam, et idem est cum proportione de cæteris. Et ideo, licet ab homine propter peccatum subtractæ fuerint multæ formæ accidentales perfectiores et ornantes animam et potentias ejus, illa subtractio non fuit diminutio in his quæ ad statum puræ naturæ, sed ad statum gratiæ et innocentæ pertinerent. Deinde neque corpus in suo temperamento, aut organis sensuum, vel aliarum virium naturalium, ex vi solius peccati originalis, alterationem aliquam passum est, per quam vires ejus ad aliquid operandum diminutæ fuerint, vel immutatæ, in debita proportione et dispositione accommodata ad operandum eo modo quo pura natura postulat. Quia, licet corpus hominis factum mortale sit, et consequenter etiam suo modo alterabile sit effectum, tamen ipsum peccatum per se non habet vim ad talem alterationem in corpore efficiendam, ut est per se notum, et statim in simili puncto declarabitur.

10. *Deus nec etiam nequam spiritus relatum diminutionem facit* — Nec probabiliter cogitari potest Deum ipsum, vel per se, vel per angelos malos, talem mutationem in Adamo in penam peccati effecisse, et quotidie facere in hominibus ex Adamo nascentibus; hoc enim nec in Scriptura, nec in doctrina Ecclesiæ habet fundamentum, nec ratione aliqua probabiliter ostendi potest: et ideo nec ab aliquo assertum scio, et si temere dicatur, contemnendum est. Unde hic est verus sensus illius axiomatis, quod naturalia manserunt integra post peccatum, utique quoad omnes naturales facultates, perfectiones, dispositiones, ac proprietates corporis et animæ, quæ natura humana, spectata in sua pura essentia, continet formaliter, vel per naturalem emanationem ab illa profluunt, vel tanquam prævie dispositiones tali naturæ convenienter necessario appropinquunt, et per generalin cursum cau-

sarum cum divino concursu fieri solent. Nam hæc etiam Deus lege ordinaria non immutat propter peccatum originale, sed *solem suum oriri facit super bonos et malos, et pluit super justos et injustos.* Constat igitur, in natura lapsa, non fuisse diminutas vires naturales ad operandum bonum per subtractionem alienjus physicæ seu realis perfectionis, quæ ad puram naturam pertineat.

11. *Qualitas facultates naturales minuens addita minime est.* — Deinde probatur altera pars minoris, nimirum, diminutionem hanc non esse factam per additionem alienjus qualitatis, vel entitatis positivæ, quia nec fingi potest qualis sit, nec unde proveniat, seu quam habeat causam efficientem extra Deum. Quia nec ex natura intrinsece nascitur, ut discursus in præcedenti puncto factus probat. Neque peccatum illud actuale, quod fuit in Adamo, potest esse causa physica talis qualitatis, quia jam præterit, et nunquam habuit illam virtutem, ut per se constat. Neque etiam nascitur ex peccato originali, prout existit in unoquoque homine, quia illud peccatum non est res positiva, sed mera privatio: unde illa opinio de qualitate morbida, ut impossibilis, incredibilisque, ac sine fundamento ficta, antiquata est, et ab omnibus relicta. Quia si illa qualitas credebatur esse ipsum peccatum originale, talis opinio necessario faciebat Deum auctorem peccati, præter alia absurda, quæ inde inferri facile possunt. Si vero fingatur ut pœna peccati, effectio illius nulli causæ creatæ attribui potest, ut dixi; nihil enim est, vel extra hominem, vel in homine, quod possit esse principium efficiens illam positivam entitatem, quam nunc impugnamus. Neque etiam ipsi Deo attribui potest; tum quia nullo fundamento Scripturæ vel Patrum hoc nititur; tum etiam quia non solet Deus, propter alia peccata, tales qualitates infundere: tum denique quia talis effectus non est consentaneus divinæ sapientiæ et bonitati. Probatur hoc ultimum, quia talis qualitas non posset esse, nisi pravus habitus inclinans ad malum (quid enim aliud excogitari potest?) infundere autem hujusmodi habitus, non est bonitatis Dei, qui *intentator malorum est.* Et hic possunt applicari testimonia Sanctorum, dicentium Deum non operari positive et directe, ad hominum obdurationem, seu excacationem, sed tantum permissive, negando aliqua dona sua; ut in lib. 2 de Auxiliis late tractavi. Denique, propter hanc causam dixerunt theologi, supra allegati, hominem lapsum, et constitutum in pura

natura, solum differre ut nudum et spoliatum, seu per modum negationis et privationis, quia in re ipsa eandem naturam uterque habet, et sub carentia eorundem donorum gratuitorum; sed hæc carentia, in pura natura, fuisset mera et perpetua negatio, in natura vero lapsa est privatio donorum, quæ aliquando habuit hæc natura in suo capite.

12. *Objectio.* — *Solvitur primo.* — *Solvitur secundo.* — Ad hanc rationem responderi potest, juxta fundamentum prioris sententiæ, vires hominis lapsi fuisse diminutas, non tantum per subtractionem donorum, sed etiam per additionem quamdam, non alienius rei physiciæ, sed per additionem ipsiusmet peccati quoad culpam, quia ipsum peccatum per se sufficit difficiliorem reddere operationem virtutis, et ita diminuit vires ad operandum bonum, et vitandum malum, impedimentum quoddam apponendo. Sed hoc facile improbat, primo, quia peccatum originale nihil positivum est, sed mera privatio, quoad formalem rationem culpæ, ut constat ex divo Thoma 1. 2, quæstione 82, articulo tertio, et ex iis quæ ibi tractantur; ergo additio talis culpæ non est additio alienius rei, sed potius ablatio. Nec etiam illa privatio potest formaliter diminuere naturales vires operandi, quia nihil naturale subtrahit, sed tantum gratiam et justitiam; ergo propter solam additionem talis culpæ non potuerunt diminui vires naturales, magis quam futuræ essent in pura natura. Secundo, peccatum originale in sola aversione a Deo consistit, et non addit conversionem ad bonum commutabile, sicut peccatum actuale, ut expresse tradit D. Thomas, quæst. 5 de Malo, art. 2, et quæst. 24 de Verit., art. 12, ad 2, et suo loco ostendendum est. Ergo per se ac formaliter non auget difficultatem bene operandi intra ordinem naturæ, quia nec minuit inclinationem ad bonum honestum, cum non minuatur potentias ipsas in se, nec auget inclinationem ad contrarium, quia hæc non augetur nisi per conversionem positivam ad aliquod bonum inferius et commutabile. Unde etiam de peccato actuali dixit D. Thomas, supra dicta quæstione 85, non minuere bonum naturæ per solam privationem, sed addendo aliquam inclinationem virtuti contrariam, quando, scilicet, aliquem habitum inducit. Et similiter peccatum omissionis, si esset purum, non minueret bonum naturæ quoad vires operandi, sed in tantum minuit, in quantum includit aliquem actum, qui male afficit potentiam; ergo peccatum originale,

quod nec actum in nobis includit, nec voluntatem convertit ad creaturas, magis quam ex natura sua esset, non potest per se solum minuere vires naturales, aut difficiliorem reddere operationem virtutis, quam in pura natura futura esset.

13. *Exemplo declaratur et probatur.* — Denique, peccatum etiam mortale actuale, si nihil positivum post se relinqueret, non redderet difficiliorem operationem virtutis. Explicatur in exemplo supra posito, de homine creato in puris naturæ ibus, et postea semel tantum peccante mortaliter: nam si, transacto illo peccato, nullum habitum in voluntate vel in appetitu, nullamve pravam dispositionem positivam relinqueret, neque in intellectu vel phantasia aliquam speciem vel memoriam peccati præteriti, quæ posset postea affectum excitare, nullo modo per illud peccatum semel commissum, naturæ bonum quoad vires operandi bonum naturale minueretur, vel difficilius redderetur, quia peccatum præteritum, si nullam pravam dispositionem reliquit, non potest obstare aliquid, neque impedimentum apponere. Nec satis est quod relinquat maculam, vel reatum, vel aversionem habituales. Nam hæc omnia moralia tantum sunt, per quamdam habitudinem rationis seu moralem ad peccatum commissum et non retractatum: illa autem moralitas non minuit physicas vires operandi, nec impedimentum aut difficultatem per se potest afferre, quia neque est activa, neque inclinatur aliquo modo ad opus, dum habitum vel dispositionem realem post se non relinquit.

14. *Altera ratione proposita conclusio probatur.* — Ultimo, argumentor in hunc modum, quia omnis difficultas interna bene operandi ex peccato originali suborta, provenit, vel ex ignorantia intellectus, vel ex concupiscentia fomitis, vel ex corporis mortalitate, seu corruptibilitate, sed hæc tria non sunt majora in natura lapsa, quam essent in pura natura, licet diversam originem in hoc statu habeant, quam in illo. Ergo nec difficultas bene operandi est major, sed solum erit ex diversa radice, et sub distincta ratione. Major clara est ex doctrina divi Thomæ 1. 2, quæstione octogesima-quinta, articulo tertio, et ex præsentis discursu magis constabit. Minor probatur quoad singulas partes, et primo, de ignorantia, quia per peccatum originale nulla ignorantia pravæ dispositionis in nos transfunditur, sed sola ignorantia negationis et privationis, quatenus nascimur sine fide, et sine

ullo habitu per se vel accidens infuso, et sine ulla specie, vel principio cognoscendi præter nudam potentiam intelligendi; eandem autem ignorantiam, vel nescientiam haberet homo creatus in puris naturalibus: ergo in hoc est æqualitas. Eademque considerari potest ex parte sensuum vel objectorum, quatenus ex illis cognitionem et scientiam sumimus: nam in utroque statu esset eadem sensuum dispositio, idemque objectorum sensibilium influxus: ergo in his omnibus non est major causa ignorationis vel erroris, in uno statu quam in alio. Secundo, de concupiscentia idem facile probatur, quia nunc per peccatum originale solum ablati sunt omnes habitus, et omnia Dei auxilia, quibus appetitus sensitivus, vel continebatur, ne rationem præveniret, vel confortabatur per majorem inclinationem ad bonum honestum additam potentiæ per habitus virtutum et donorum, sine quibus nunc concipimur: ipsa vero facultas appetitus, sive irascibilis, sive concupiscibilis in se immutata non est, nec intensior, aut remissior facta, neque illi sunt additi aliqui habitus pravi, vel augentes inclinationem ad sensibilia, ut probant rationes supra generaliter factæ de additione positiva, et supponunt omnes theologi supra allegati, et specialiter D. Thomas, quæst. 4 de Malo, artic. 2, præsertim ad 4. At vero, in pura natura, idem esset appetitus sensitivus, eademque carentia donorum omnium, ac subinde eadem inclinatio ad sensibilia objecta, idemque modus naturaliter operandi, et præveniendi rationem, per motionem talium objectorum, a quibus humana cognitio in utroque statu incipit: ergo neque ex una parte major esse potest difficultas in utroque statu, neque major rebellio carnis ad spiritum, si respectu ejusdem personæ habentis eandem complexionem, seu idem temperamentum fiat comparatio, et nulla in utroque supponatur conductio, vel æqualis. Denique, idem fieri potest discursus de corporis mortalitate, vel passibilitate. Nam hæc, sine dubio, non est major in lapsa natura, quam est in pura: quia in utroque statu est eadem compositio corporis humani ex inferiori materia contrariis qualitatibus affecta, et ex partibus heterogeneis, et interno calore agente in humidum, etc., ex quibus mortalitas et passibilitas corporis proveniunt; et in neutro statu habet, vel majorem causam corruptionis, vel majorem resistantiam, aut defensionem a contrariis. Ergo ex nullo istorum capitum potest esse major difficultas, vel minor facultas ope-

randi bonum in statu naturæ lapsæ, quam in puris naturalibus inveniretur.

15. *Erasio.* — *Præcluditur.* — *Læsio libertatis respectu naturæ integræ et non naturæ puræ.* — Dicit aliquis non solum ex his capitibus provenire difficultatem operandi studiose, sed etiam ex intrinseco defectu ipsius voluntatis, ut libera est. Dicit enim Concilium Arausic., cap. 1, animæ libertatem læsam fuisse in homine per peccatum primi parentis, et damnat dicentes illæsam permansisse; et c. 25 dicitur *liberum arbitrium fuisse viribus attenuatum et inclinatum.* Quod etiam tradit Tridentinum, sess. 6, c. 1. Igitur ipsa læsio liberi arbitrii per se sufficit ad minuendas vires bene operandi; licet in aliis tribus non sit major læsio quam esset in pura natura. Sed contra hoc est, quia, præter formalem culpam quæ inest animæ, quod ad vires operandi attingit, non magis fuit per peccatum vulnerata voluntas quam intellectus vel appetitus, proportionem servata per comparisonem ad uniuscujusque facultatis objectum et actus: omnes enim vulneratæ fuerunt per solam subtractionem originalis justitiæ, juxta doctrinam D. Thomæ 1. 2, quæstione 85, art. 3, et probant rationes supra factæ. Quocirca libertas voluntatis non aliter læsa est intrinsece circa boni operationem, nisi quia fuit privata charitate, et virtutibus inclinantibus ad bonum; ex parte item intellectus diminuta est libertas, quasi in radice, quatenus mens hominis privata est sapientia et prudentia; ex accidenti autem læsa est libertas ex parte concupiscentiæ, quæ sibi relicta, et ablato freno justitiæ, difficiliorem multo reddidit usum libertatis, ad resistendum malo et sequendum bonum. Tota autem hæc læsio libertatis est per comparisonem ad naturam integram, et justitia vestitam, non vero per comparisonem ad naturam puram et nudam. Eandem enim carentiam perfectionis haberet illa natura in intellectu et voluntate, et eandem effrenatam concupiscentiam, quam nunc habet lapsa natura. Ergo neque propter illam lesionem libertatis potest esse discrimen inter utrumque statum. Quod, amplius respondendo ad argumenta aliarum opinionum, confirmabitur.

16. *Ficte superadditur qualitas.* — Igitur ad Gregorii fundamentum, quatenus in secunda opinione repetitur, statim respondebimus: quatenus vero inmittitur in positione morbidae qualitatis, vel alicujus habitus pravi superadditi potentis animi, jam responsum est fictam esse et improbabilem operationem de-

lam; nec divus Augustinus, in locis ibi allegatis, aliquid de tali qualitate docuit, sed ipsam originalem culpam animi vitium appellat, et interdum ipsam potentiarum deordinationem vocat animi infirmitatem, et effrænem concupiscentiam ac motus ejus noxiam qualitatem et languorem animi appellat, ut constat ex libro decimo-quarto de Civitat., capite decimo-nono.

17. *D. Thomæ inique opposita opinio tribuitur.* — Ad fundamenta vero secundæ opinionis, dico imprimis, immerito sententiam illam tribui D. Thomæ, cum non solum ex aliis locis, quæ allegavimus, sed etiam ex illo eodem, in quo pro illa opinione citatur, contrarium facile ostendi possit. Nam imprimis in illo articulo primo, quæstione octogesima-quinta, 1. 2, non tractat in particulari de peccato originali, sed in genere de peccato quærit, an diminuatur bonum naturæ. Distinguit autem triplex bonum naturæ, quæ sunt, natura ipsa et proprietates quibus constituitur, inclinatio ad virtutem, et donum justitiæ originalis, quatenus perficiebat naturam. Et de primo negat diminui per aliquod peccatum, de ultimo affirmat tolli omnino per peccatum primi parentis. De medio vero, seu inclinatione virtutis, ait diminui per peccatum, quod statim explicat de peccato actuali, dicens: *Per actus enim humanos fit inclinatio ad similes actus*, etc., quæ ratio solum in peccato actuali locum habet. Neque enim peccatum originale aliquem actum humanum includit, neque aliquis dicet peccatum originale inducere inclinationem ad similes actus, utique peccato actuali Adæ, cum nec filii Adæ illum actum, vel similes exerceant, neque habitum aliquem per peccatum originale acquirant.

18. *Angelicus Doctor amplius explicatur.* — Imo, nec de peccato actuali, utrumque spectato, D. Thomas loquitur, sed quatenus potest inducere habitum ad similes actus inclinantem, ut ex citatis verbis constat, et aperte ipse declarat in solutione ad 3, dicens, per peccatum diminui bonum naturæ, quatenus per actiones voluntarias causatur aliquid, vel auferitur ab homine sic operante, *ut supra* (inquit) *dictum est cum de generatione habituum ageretur.* Et apertissime, in solutione ad 4, dicit *peccatum diminueret bonum naturæ formaliter, in quantum pertinet ad inordinationem actus; sed quantum ad inordinationem agentis* (inquit), *oportet dicere quod talis inordinatio causatur per hoc, quod in actibus animæ est aliquid activum, et aliquid passivum, etc.*

Non potest autem dici in peccato originali esse aliquid activum, cum sit mera privatio quasi habitualis; ergo non potest diminueret bonum naturæ, quantum ad inordinationem agentis, illud minus potens vel habile reddendo ad naturale bonum operandum. Et eodem modo explicat hanc diminutionem in art. 2 et in 3, ubi, in solutione ad 2, specialiter ait *malitiam, quæ numeratur inter vulnera ex peccato inducta, non sumi pro ipso peccato* (utique formaliter), *sed pro quadam pronitate voluntatis ad malum, secundum quod dicitur, Genes. 6: Proni sunt sensus hominum ad malum ab adolescentia sua.* Quæ pronitas non est nisi concupiscentiæ, vel etiam voluntatis, prout natura sua inclinatur etiam ad sequendum appetitum, quæ inclinatio pronior relicta est per peccatum, non per additionem, sed per subtractionem, ut supra dictum est, et in eodem articulo divus Thomas docet, dicens, in tantum naturam esse vulneratam, in quantum fuit justitia destituta, nam *ipsa* (inquit) *destitutio vulneratio dicitur naturæ.*

19. *Concilia et Patres explicantur loqui de destitutione justitiæ originalis.* — Et per hæc verba divi Thomæ satisficit primæ probationi, ex Conciliis et Patribus desumptæ, quatenus dicunt fuisse hominem vulneratum, etiam in naturalibus, et debiliorem factura in corpore et animo: utrumque enim est verum ratione illius destitutionis, seu ablationis justitiæ, quam dixit D. Thomas esse vulnerationem naturæ. Et ratio metaphoriæ est clara ex dictis; nam justitia originalis pacem et unionem inter appetitus hominis constituebat, quæ unio per peccatum dissoluta est, ablata justitia, et ita factum est vulnus in natura, sicut fit in corpore per dissolutionem continui. Atque eodem modo fuit læsus homo in naturalibus, non quia donum amissum fuerat naturale, sed quia naturalem defectum auferebat, seu illi subveniebat. Item eodem modo fuit liberum arbitrium læsum, vel extenuatum, et totus homo secundum corpus et animam in deterius commutatus, quia in utraque parte et potentiis ejus vulneratus est.

20. *Metaphorice locutiones explicantur, vulneratus, semivivus, etc.* — Ad instantiam autem quæ fiebat, quia in pura natura non esset vulnus, nec homo esset semivivus relictus, respondetur de his vocibus metaphoricis ita loquendum esse, sicut theologi loquuntur de illis, *nudus vel nudatus, privatus vel non habens.* Nam homo, in statu puræ naturæ, eandem carentiam indumenti justitiæ, quam ha-

bet nunc homo lapsus, haberet, ac subinde eandem nuditatem : quia vero in statu puræ naturæ illam semper habuisset, non diceretur nudatus, sed nudus, nunc autem dicitur nudatus, quia fuit aliquando vestitus. Et similiter nunc dicitur privatus, tum propter eandem rationem, tum etiam quia censetur habere proximam capacitatem illius justitiæ, juxta divinæ providentiæ institutionem : in pura vero natura solum dici posset carere, vel non habere justitiam, quasi per simplicem negationem, et remotam capacitatem. Sic etiam tunc eandem quidem dissolutionem, seu divisionem inter appetitus haberet ; illa vero non habuisset rationem vulneris, quia nunquam habuit contrariam unionem, et quasi copulationem : vulnus autem dicit proprie relationem ad præcedentem unionem. Nam significat terminum vulnerationis, vulneratio autem non fit nisi per actionem, qua dissolvuntur, quæ prius unita fuerant. Et eadem ratio est de metaphora semivivi. Nam propter vulnera dicitur homo sauciatus, *et semivivus relictus*, quia etiam vox illa *relictus*, declarat, prius habuisse hominem plenioris et sanioris vitam, quam per culpam et subsequentiâ vulnera ita perdidit, ut semivivus relictus esse dicatur, quod non haberet locum in homine creato in puris naturalibus, quia nec in illo præcessisset illa vitæ perfectio, neque peccatum ex vi illius status. Quod manifeste constat in corporis mortalitate, quæ certe non est major in natura lapsa quam in pura, et tamen nunc habet rationem vulneris, et ratione illius potest dici homo semivivus relictus, etiam in corporali vita, quia, ut dixit Gregorius, vita, sub tali corruptionis onere, mors est potius dicenda quam vita : in pura autem natura, nec haberet rationem vulneris, nec dici posset homo, propter inflictas plagas, semivivus esse relictus, sed esse creatus semivivus, vel quid simile.

21. *Satisfit secundæ probationi.* — Ad secundam probationem, jam dictum est, peccatum actuale minuire bonum naturæ, etiam potest, per additionem pravi habitus vel dispositionis, et non alio modo, et in le potius convinci peccatum originale solum, seu per seipsum, non posse talem diminutionem efficere, et ita, declaratione ibi facta recte perpensa, ut jam illam etiam expendimus, contrarium concluditur. Ad tertiam probationem dico imprimis valde probabile esse, peccatum originale contractum ex Adamo, sicut non convertit hominem ad bonum commutabile, juxta senten-

tiam divi Thomæ, ita nec avertere a bono incommutabili, ut est finis naturalis, quia hæc aversio non potest fieri per puram privationem, sed per contrariam conversionem. Et ita non procedit argumentum, quia dicitur peccatum originale solum avertere a Deo fine supernaturali, et ita non minuire naturalia, quantum ad id quod ex se habent, sed solum quoad perfectionem quæ ex conversione ad Deum finem supernaturalem, et dona gratuita quæ ratione illius dabantur, illis adjungebantur. Ut vero ab hac disputatione nunc abstrahamus, dato antecedenti, scilicet, quod peccatum originale avertat etiam a fine naturali, negatur consequentia, quia illa aversio non est aliqua forma physica, nec privatio realis alicujus perfectionis, connaturalis naturæ, sed est vel quædam relatio ad præcedentem actum pravum, vel moralis quædam habitudo, et quasi denominatio ab illo, quæ moralitas, licet hominem reddat invisum Deo, et odio dignum, non tamen auget vel minuit per se inclinationem ad bonum vel malum, sed solum quatenus habitum vel realem aliquam dispositionem relinquit, ut satis explicatum est. Ad ultimam probationem negatur antecedens, quia in eo assumitur quod probandum erat : unde dicimus, vel in utroque statu posse hominem actum dilectionis elicere, et gravi tentationi ad breve tempus resistere, vel in neutro posse : quid autem horum verius sit, in sequenti libro disputabitur.

CAPUT IX.

UTRUM IN STATU NATURÆ LAPSÆ DEBILIOR SIT HOMO AD BONUM OPERANDUM, QUAM IN PURA NATURA, SALTEM OB CAUSAS EXTRINSECAS ?

1. *Duo externi auxilii modi, de quibus inquiri potest, explicantur.* — Præter intrinsecas vires quibus homo indiget ad bene operandum in quocumque statu naturæ, requiritur etiam auxilium aliquod extrinsecum, saltem ex eo quod causa creata et finita est, ideoque ex eo capite potest fieri per peccatum debilius ad operandum, licet intrinsece non minuitur. Potestque illud auxilium duplex cogitari, unum per se influens cum homine in opus ejus, aliud per accidens, tanquam removens prohibens. Prius necessarium est homini, saltem ex eo capite quod causa secunda et particularis est, quæ non potest, sine influxu aliarum causarum, et præsertim primæ, operari, et, quatenus est causa indifferens et libera, censetur pecu-

liari modo indigere hoc auxilio, ut videbimus. Posterior autem modus esse etiam potest vel necessarius, vel utilis, quia causa finita et libera potest multis rebus extrinsecis impediri, et ideo, si impedimenta extrinseca multiplicentur, vel minuantur causæ removentes illa, potest ex hoc capite fieri homo debiliior ad operandum, etiamsi internæ vires ejus diminutæ non sint. Videndum igitur superest an aliquo ex his duobus modis homo, in statu naturæ lapsæ, deterioris conditionis factus sit, quam in statu puræ naturæ esset futurus.

2. *Recentiorum opinio refertur.* — Circa priorem modum, moderni quidam opinantur, hominem lapsum esse impotentiorum ad operandum bonum, quam esset in puris naturalibus, non per intrinsecum augmentum, vel diminutionem alicujus facultatis naturalis, vel additionem alicujus qualitatis, quæ non esset in homine in pura natura constituto; sed per mutationem moralem in ordine ad providentiam Dei, sine qua non potest homo bonum aliquod libere operari. Explicaturque in hunc modum, quia in neutro statu potest homo aliquid bene operari sine præveniente cogitatione accommodata ad bene operandum, quæ, cum præcedat voluntatem, non potest esse libera, neque est in potestate hominis, et ideo ab extrinseco per divinam providentiam provenire debet. Hæc igitur cogitatio esset debita naturæ puræ per modum providentiæ vel concursus naturalis, vel saltem non esset indebita, sed esset beneficium consonum innocenti naturæ: et ideo ex hac parte homo in pura natura esset absolute potens ad aliquod morale bonum operandum. In statu autem naturæ lapsæ, censent sic opinantes esse in hoc debiliorem factum.

3. *Fundamentum rationis.* — Ratio est, quia talis cogitatio congrua per peccatum fit homini indebita; imo, ex vi peccati, debitum est homini, ut tali cogitatione privetur, et de facto privaretur illa in pœnam peccati, nisi per gratiam redemptionis obtineretur; ergo ex hac parte impotentior est ad operandum bonum homo lapsus, quam purus. Antecedens patet, quia homo lapsus ex vi primi peccati constitutus esset in termino damnationis, nisi repararetur per Christum; sed damnatus in pœnam peccati privatus manet omni cogitatione congrua ad honeste operandum; ergo et homo lapsus ex vi talis status caret cogitatione necessaria ad operandum bonum, et ex hac parte est impotentior. Potestque hoc confirmari ex Augustino, libro Propositionum in epistol. ad

Roman., ubi in 18 dicit: *Liberum arbitrium perfectum fuit in primo homine, in nobis autem ante gratiam non est liberum arbitrium, ut non peccemus.* Clarius Fulgentius, libro de Incarnatione et gratia, cap. 13: *Peccans ille qui sine peccandi necessitate creatus est, in eo quod animæ sanitatem delinquendo perdidit, etiam cogitandi quæ ad Deum pertinent amisit protinus facultatem.* Et infra: *Exspoliatus vestimento fidei, carnaliumque concupiscentiarum vulneribus sauciatus, sic jacuit oppressus ditione peccati, ut nullatenus aliquod bonæ voluntatis initium habere potuisset, nisi hoc, Deo gratis donante, sumpsisset.* Idemque videtur sumi posse ex Prospero, libro primo de Vocatione gentium, capite septimo.

4. *Opposita opinio vera.* — Nihilominus dicendum est hominem, in natura lapsa, non minus habilem esse ad bene operandum, cogitandum, et judicandum de agendis, ex parte divinæ providentiæ generalis, et naturæ consentaneæ, quam esset in statu puræ naturæ, si in eo conderetur. Ita sentiunt communiter theologi capite præcedenti allegati, dum indistincte de utroque statu loquuntur, et quidquid in uno admittunt, alteri tribuunt. Significat D. Thomas 1. 2, tota quæst. 109. Clarius vero in 2, distinct. 28, quæst. 1, art. 1 et 5; et ibi Ægilius, dubio primo, quæst. 1, post secundum articulum; et Gabriel, art. 2, conclus. 1; Medin. 1. 2, quæst. 109, art. 1, conclus. 1; Valentia, disp. 8, quæst. 1, punct. 2, in ultima parte ejus; Bellarmin, lib. 3 de Gratia et libero arbitrio, cap. primo et secundo; Stapleton., lib. 2 de Justification., cap. ultim., et alii, quos libro sequenti referemus. In quibus adverte duo. Unum est, nullum eorum facere differentiam inter hominem lapsum, et conditum in pura naturæ; sed omne id quod est possibile, per naturæ vires, homini non lapso, in pura natura, putant esse possibile homini lapso: metiuntur enim facultatem naturalem hominis lapsi, ex facultate naturali hominis in pura natura conditi. Aliud est, nullum eorum differentiam constituere inter facultatem internam hominis secundum se spectatam, vel ut subest providentiæ Dei; sed quidquid potest homo per intrinsecam facultatem, simpliciter dicunt posse, supponentes non deesse possibilitatem ex parte providentiæ Dei.

5. *Auctoritas indicatur.* — Possumus præterea ex Patribus multa congerere, in quibus non aliter loquuntur de homine lapso, quam natura rationalis secundum se spectata exigat, sed illos omitto; tum quia a dictis auctoribus,

præsertim Bellarmino, Staplet. et Valent., late referuntur; tum quia in sequentem librum propriam de hac re disputationem reservamus, ubi inquirimus quid illud sit, quod homo in utroque illo statu naturaliter possit; hic enim solum generatim tractamus. an idem possit, quidquid illud sit. Solum, noto verba Prosperi dicto libro primo de Vocatione gentium, cap. 7, ubi, post explicatum miserum statum hominis lapsi, subdit: *Quia etsi fuit, qui naturali intellectu conatus sit vitii reluctari, hujus tantum temporis vitam steriliter ornavit, ad veras autem virtutes æternamque beatitudinem non profecit.* In quibus verbis, solum pondero illa *naturali intellectu*, nam aperte supponunt, honesta cogitatione, seu judicio morali, id posse hominem lapsum, quod homo purus per naturalem potest, ac denique aliquid posse, licet parum. Idem sumi potest ex Augustino, ut respondendo ad argumenta dicam. Item testimonia præcedenti puncto adducta hoc etiam confirmant.

6. *Nostra ratio.* — Ratione probatur hæc sententia, quia, si facultas intrinseca hominis lapsi et puri ad moralia opera eadem est, etiam ex parte Dei modus providentiæ est æqualis, ac subinde facultas quasi proxima, et, ut subest providentiæ Dei, erit æqualis. Posterior consequentia evidens est. Prior vero probatur, quia Deus non punit peccatum, etiam originale, negando homini providentiam naturalem. Nam illud axioma theologorum supra positum, naturalia mansisse integra post peccatum, non magis verum est de naturalibus intrinsecis ex parte hominis, quam de naturalibus seu connaturalibus ex parte divinæ providentiæ; quia hæc servant inter se proportionem, neque Deus, propter peccatum, relinquit naturam sine concursu proportionato ac debito tali nature. Et confirmatur primo: nam, licet peccatum de se sit dignum tali vel tali pœna, tamen de facto non omnis naturæ incommoditas possibilis est pœna peccati, sed hoc pendet ex lege Dei, ejusque voluntate libera, taxante talem vel talem pœnam pro culpa. Posset enim Deus juste in nihilum reducere peccatorem, vel illum morte afflicere statim ac peccat, vel privare non rationis, vel haluta fidei, etiamsi peccatum non sit illi contrarium, sed tantum demeritorium ejus; et tamen, secundum legem ordinariam, non sunt hæc pœnæ correspondentes peccatis, quia Deus illas non taxavit. At vero non potest cum fundamento affirmari, ut sine Deum pro pœna originali peccati, ut homo nunquam habere

possit cogitationem honestam et congruam ad bene operandum naturaliter; ergo id asserendum non est, neque est credibile. At vero, seclusa pœna, in reliquis omnibus est æqualitas inter hominem lapsum et purum, quoad facultatem operandi, de qua tractamus, et quoad Dei influxum, ut auctores etiam contrariæ sententiæ supponunt, et videtur per se notum; ergo simpliciter sunt æquales.

7. *Amplius fulcitur ratio facta.* — Minor principalis rationis, in qua vis ejus consistit, patet primo, quia talis pœna nec in Scriptura habet fundamentum, nec in Conciliis aut Patribus explicatur, neque (quem ego viderim) ab aliquo theologorum antiquorum docetur; ergo non potest cum fundamento asseri. Ea enim, quæ pendent ex libera Dei dispositione, et ex effectibus non possunt investigari, non possunt sine gravi auctoritate affirmari. Præsertim quod talis pœna valde aliena videtur ab ordinatione divinæ providentiæ, et a statu in quo homines lapsi generantur. Quamvis enim per originale peccatum reatum æternæ damnationis incurrerint, non tamen nascuntur damnati; ergo ex vi peccati originalis non nascuntur obstinati in malo; ergo nec ex vi peccati originalis incurrunt pœnam privationis communis providentiæ, et naturalis adjutorii necessarii ad habendam honestam cogitationem, ita congruam ad honeste operandum sicut illam habere possent in statu purorum naturalium, si in eo creati fuissent. Et confirmatur, quia alias sequiter infantes, qui sine baptismo seu in peccato originali decedunt, ita futuros esse obstinatos in malo, ut nunquam possint habere honestas operationes, nec cogitationem congruam ad illas. Probatur sequela, quia nullo illi modo participant redemptionem Christi; ergo luunt omnem pœnam peccati originalis absque ulla remissione; sed privatio omnis boni honesti, et concursus congrui ad illud cogitandum et exequendum, est pœna originalis peccati, ut illa sententia dicit; ergo illi infantes sunt omnino privati tali concursu, et habent impossibilitatem talis cognitionis et operationis honestæ. Consequens autem est per se incredibile, et videtur contra bonitatem Dei, quia cum illi infantes non patiantur pœnam ignis juxta probabiliorem sententiam, nec vivant in aliorum damnatorum societate et tormentis, nihil esse videtur quod possit eorum voluntatem ita prave disponere, ut incapax sit honestæ motionis et cogitationis congruæ ad illam habendam. Unde non videtur possibile illa obstinatio, nisi ex speciali provi-

dentia, et industria ex parte Dei, quod a divina bonitate plane videtur alienum. Quæ ratio etiam nunc in viatoribus habet non parvam vim, ut in sequenti libro latius dicam.

8. *Secundo confirmatur, oppositum fundamentum destruendo. — Erasio. — Prima confutatio.* — Atque hæc assertio magis confirmabitur respondendo ad fundamentum contrariæ sententiæ. Negamus enim privationem cogitationis congruæ esse pœnam inflictam et impositam propter originale peccatum. Aliud enim est, peccatum illud de se potuisse esse dignum illo nocimento; aliud vero est de facto esse pœnam inflictam seu designatam pro illa culpa. Nam primum solum dicit potentiam, quæ latius patet, et fortasse totum id cadit sub gravitatem peccati originalis, quæ illud solum constituit capax talis pœnæ. Secundum autem dicit actum, scilicet, quod de facto omnis homo incurrat talem pœnam, nisi propter Christum remittatur: et hoc censeo esse falsum, et sine fundamento assertum, et alienum a recto ordine providentiæ Dei, ut probavi. Unde multo magis falsum censeo, quod in probatione dicitur, hominem, ex vi peccati originalis, nasci in termino damnationis, nisi per Christum eripiatur: nascitur enim in reatu damnationis, non in proprio statu seu termino; nec per redemptionem Christi liberantur homines a termino damnationis, si jam in illo sunt constituti, sed liberantur a reatu, et a via qua ad talem terminum pervenitur. Quod si propositio non sit absoluta, sed tantum conditionalis, scilicet, quod homines ex vi peccati originalis constituerentur in termino damnationis, nisi per Christum redimerentur, dicimus imprimis hoc parum referre ad causam, quia per illam conditionalem non explicatur præsens providentia, sed quæ fuisset, si aliter res instituerentur. De facto ergo homo lapsus non nascitur in termino damnationis, sed in statu viæ. et ideo ex vi peccati originalis non incurrit illam pœnam, quæ magis pertinet ad terminum ultimæ rigorosæ damnationis, quam ad statum viæ.

9. *Secunda confutatio erasionis.* — Deinde, dico assertionem illam conditionalem non posse nisi divinando affirmari, nullo enim fundamento nititur. Nam, licet Deus decrevisset non redimere homines per Christum, posset illos, licet lapsos, creare in statu viæ, et non in termino damnationis, et providere illis aliud genus remedii, quo possent ab illo statu liberari. Et licet nullum daret medium ad expellendum originale peccatum, et recuperandum

statum gratiæ, posset illos in hoc mundo multiplicare, et conservare; et secundum naturam viverent, et tunc non negaret illis concursum ad bene operandum, vel congrue de honesta operatione cogitandum. Neque hoc esset contra reatum originalis peccati, neque aliquam remissionem pœnæ illi debitæ contineret, ut in infantibus decedentibus in peccato originali explicavi, et ad sapientiam et bonitatem Dei pertinere ostendi. Unde ultimo addo, si mente cogitemus divinam institutionem et ordinationem circa humanum genus, ut conditum in Adamo in innocentia statu, sub tali lege et pacto, ut illum pro se et posteris conservare posset vel amittere, dicendum esse, ante absolutam præscientiam peccati Adami, et ex vi illius providentiæ et institutionis, nihil decrevisse Deum circa modum puniendi genus humanum si in parente suo recidisset, præter id quod in Genesi legimus: *In quocumque die comederis ex eo, morte morieris*; sub qua pœna includitur privatio justitiæ originalis quoad omnes immunitates ejus, et felicitatis status, ac loci quem tunc homo possidebat, ut rei probavit eventus. Quidquid autem ultra hoc dicitur de pœna definitiva, et statuta ratione illius lapsus, gratis et sine fundamento dicitur.

10. *Siquis rationis explicatur posita doctrina.* — Ex quo ulterius ad hoc magis explicandum, distinguere possumus in mente et providentia divina circa genus humanum quemdam veluti ordinem per signa rationis, ut est frequens apud theologos. Prius enim, secundum rationem, intelligimus voluisse Deum creare homines in primo parente cum talibus donis, tali pacto, et præcepto, sub promissione, et comminatione conditionalis, si perseverasset, vel caderet, et neutrum horum intelligitur prævisum absolute ante illud decretum, etiamsi sub conditione prævideretur. In secundo ergo signo, intelligimus præscientiam peccati, et in tertio decretum redemptionis. Dico ergo in illo primo signo nondum disposuisse Deum de hominibus, si in statum peccati inciderent, quod procreandi essent in statu termini, seu damnationis desperatæ et ultimæ; sed vel statuisse potius ut procrearentur viatores, vel saltem pro illo signo neutrum statuisse. Quod enim in illo signo non decreverit Deus ut, si homines caderent, eo ipso nascerentur in termino damnationis, certissimum est. Nam si esset id decretum, non potuisset mutari; at de facto non ita creantur; ergo non fuit contrarium dispositum, seu positive decretum in illo signo; ergo necessario

dicendum est, vel in illo signo nihil de hoc decrevisse Deum, vel, si quid decrevit, statuisse potius ut, non obstante peccato, crearentur homines viatores, licet de modo illis providendi pro tali statu nihil in illo signo definitum intelligamus usque ad decretum redemptionis.

11. *In omni eventu homines futuri erant viatores.* — Ex his autem duobus, verisimilius est statuisse jam Deum in illo signo, ut in omni eventu homines in hoc mundo pro aliquo tempore versarentur viatores, sive caderent, sive non; tum quia hoc est magis consentaneum conditioni humanæ naturæ, quæ non adhæret immobiliter suis electionibus, sed facile mutatur; tum quia in omni eventu, sive innocentiae, sive lapsus, producendi erant homines via et ordine naturali, ut in hoc mundo crescerent et multiplicarentur, illique præessent, eoque fruerentur pro tempore consentaneo statui in quo permanerent. Ita enim futurum erat ex vi primi decreti, etiam in statu innocentiae, si duraret; idem ergo cum proportionem credendum est fuisse decretum pro statu peccati originalis, si eveniret, quia est eadem ratio, et quia generalis ratio providentiæ divinæ circa totum universum id postulat.

12. *Ex allatis quid concludatur.* — Unde ulterius ex hoc discursu concludimus, quod, licet Deus post prævisum originale peccatum statuisset non redimere homines per Christum, vel omnino illos non restituere ad felicitatem supernaturalem, neque ad gratiam, nihilominus (quantum cogitari potest) non crearet illos destitutos debita et convenienti providentiæ naturali, neque hoc esset debitum originali peccato; sed potius illos relinqueret in hoc mundo tanquam viatores in ordine ad conservationem et propagationem naturæ, et ad comparandam in hoc mundo Dei cognitionem et virtutem, et consequenter ad obtinendum post mortem, saltem in anima separata, aliquam statum naturalem, vel felicem in suo ordine et gradu, vel saltem carentem speciali dolore, et pœna sensus, si nova peccata non committerent. Ergo ex vi talis providentiæ non privaret illos omni cogitatione honesta, nec obduraret illos, vel quasi obstinatos in malo illos crearet. Non hoc nullo modo consentaneum est hominum conditioni, neque est pœna imposita propter originale peccatum, nec divinæ providentiæ consentanea. Ergo nunc de facto quod ratio illa servat Deus cum homine illam providentiæ motum, ac subtile ex parte divinæ providentiæ naturæ ita potens est

homo lapsus in moralibus operibus, sicut esset in statu puræ naturæ.

13. *Ad Augustini et Fulgentii verba responsio.* — Neque contra hoc obstat aliquid locus ex Augustino citatus ex Proposit. 18 ad Romanos, nam post illa verba: *In nobis ante gratiam non est liberum arbitrium, ut non peccemus, addit, sed tantum ut peccare nolimus*, ubi desiderium aliquod, seu affectum non peccandi tribuit homini ante gratiam, licet efficaciam et potestatem non peccandi homo lapsus non habeat ante gratiam nec per illum affectum illam possit emereri. At ille affectus non peccandi honestus est, et ex cogitatione pravitatis peccati, vel honestatis virtutis procedit, et quando procedit, cogitatio talis congrua est; ergo intellexit Augustinus talem etiam cogitationem haberi posse ante gratiam. Quod autem Augustinus ait, ante gratiam non esse hominem lapsum liberum ad non peccandum, non ideo dictum est, quia homo nunc sit minus liber quam esset in puris naturalibus, sed quia est impotens, sine gratia, ad exequendam illam libertatem, non peccando simpliciter et omnino, quam impotentiam haberet homo, etiam in puris naturalibus; gratia vero dat hanc potestatem, et ideo dicitur quasi restituere illi libertatem. Ad Fulgentium autem, respondeo, loqui de facultate cogitandi ea quæ ad Deum pertinent, id est, quæ ad veram pietatem erga Deum, et sanctitatem spectant; talis enim cogitatio sine gratia haberi non potest. Signum autem hujus sensus est, tum quia non loquitur solum de cogitatione congrua, sed absolute de cogitatione sufficiente eorum quæ ad Deum pertinent: tum quia statim addit: *Oblitus est enim manducare panem suum, et spoliatus vestimento fidei, etc., ut nullatenus bonæ voluntatis initium habere potuisset, nisi hoc, gratis Deo donante, sumpsisset.* Constat enim, secundum modum loquendi Sanctorum, bonam voluntatem simpliciter non dici, nec fieri, nisi per veram sanctitatem; et initium bonæ voluntatis idem esse quod initium salutis, quod supernaturale est, ut infra videbimus. Denique ita concludit: *Et ideo a justitia factus est alienus, qui sponte dominio est iniquitatis addictus.* De qua re latius in sequenti libro dicturi sumus.

14. *Obstantia externe duo.* — Superest dicendum de alio modo difficultatis, provenientis ex causis extrinsecis impediuntibus facultatem bene operandi, vel non removensibus causas, aut occasiones male operandi. Et in

his causis potest magna varietas cogitari, quæ ad duo capita revocatur, quæ sunt mundus et dæmon : tres enim numerari solent hostes animæ, ex quibus isti duo sunt; tertius vero est concupiscentia, quæ ad internas hominis vires pertinet : recte igitur omnia extrinseca impedimenta ad illa duo capita reducuntur. Sub mundo autem comprehenduntur et pravi homines, et mala eorum consilia, vel exempla, et cætera objecta sensibilia concupiscentiam excitantia. De hoc autem toto capite nihil est quod dicamus, nam ex illo præcise spectato, et secluso alio de infestatione dæmonis, nulla differentia potest inter statum puræ naturæ et lapsæ cum fundamento constitui. Nam in puris etiam naturalibus futuri essent pravi homines, eorumque prava consilia, et exempla. An vero in hoc statu major fuerit morum corruptio, majorve Dei ignoratio, quam futura in statu purorum naturalium, nullus potest, nisi divinando, affirmare. Quia nec revelatum est, nec probabili conjectura potest defini, cum ostensum sit, in pura natura futuram esse tantam promptam ad malum, tantamque internam infirmitatem, quantam nunc in lapsa natura experimur.

15. *In quo superat lapsa puram naturam.*— Quin potius, si consideremus paternam traditionem quæ, in hoc statu naturæ lapsæ, melior et sapientior esse potuit quam in statu puræ naturæ, ex ea parte minor esse debuit cæcitas et corruptio in hoc statu naturæ lapsæ quam in pura natura. Nam in præsentis statu, Adam, etiam post peccatum, majorem habuit Dei et moralium virtutum cognitionem, quam si in puris naturalibus conditus fuisset, et ideo melius potuit filios instruere in Dei cognitione et moribus, quam si fuisset in pura natura conditus, etiamsi in illa nondum peccasset; ergo ex hac parte aliquod majus auxilium habuit natura humana, ut non tam facile depravaretur, quam habuisset in illo statu, in quo primus homo in puris naturalibus conderetur, et ab eo sic creato cæteri procrearentur. Quocirca, si, non obstante Adami instructione, atque etiam ejus vita honesta et justa post lapsum et pœnitentiam, posterius facile declinaverunt, unusquisque in viam suam, et fere omnes exæcati sunt, multo facilius et generalius credendum est, id fuisse in pura natura eventurum. Ex hoc ergo capite, vel non est differentia, vel, si aliqua est, in natura pura esset major quædam facilitas peccandi. Est autem valde notandum quod, si quæ major occasio vel facultas bene operandi ex hac parte inve-

niri potuit in hoc statu, non proveniat ex natura, sed ex reliquiis gratiæ, vel gratuitorum donorum, quæ post peccatum in natura lapsa relictæ fuere, ut fuit cognitio Dei et virtutum communicata Adamo, et memoria promissionum, et communicationum Dei, et prioris status, et præteriti lapsus, quæ in eo mansit, et vocatio ad pœnitentiam et virtutem, quæ illi postea data est, et promissio Christi cum spe redemptionis ejus, quæ omnia per traditionem ad posteros dimanarunt. Et ita persistendo præcise in naturalibus nullum inter hos status discrimen in hac parte invenitur.

16. *Homo peccato torquentis dæmonis captivus factus.*— De altero vero capite, quo dæmonum impugnationem continet, unum est certum, nimirum, hominem per lapsum, præter amissionem gratiæ et justitiæ, peculiarem dæmonis servitutem contraxisse, et sub ejus captivitate et potestate speciali titulo redactum esse. Ita de Adamo definit Concilium Trident., sess. 6, cap. 5, dicens : *Cum morte incurrisse captivitatem sub ejus potestate, qui mortis habebat imperium, hoc est, diaboli.* Et de omnibus Adæ posteris ait, sess. 6, cap. 1 : *Servierant peccato sub potestate diaboli, ac mortis.* Hoc autem intelligi potest de dæmone, vel ut tortore, vel ut tentatore, et sub utraque ratione est intelligendum; nam ita videtur esse a Concilio intellectum. Nam homo peccando factus est reus æternæ pœnæ, ac subinde sub jure dæmonis constitutus, ut, si in hac vita culpam non expiaverit, sub ejus potestate in æternum permaneat, et puniatur. Ex hoc autem præciso respectu non contraxit homo novum impedimentum ad bene operandum in hac vita, neque propensionem aliquam aut incentivum mali, quia reatus pœnæ neutrum ex his effectibus inducit. Neque etiam ad hoc refert, quod executor illius pœnæ futurus sit dæmon, ut per se constat.

17. *Aliud servitutis genus cum objectione.*— Præter hoc vero servitutis genus, fuit etiam homo obnoxius persecutioni et tentationibus dæmonis in hac vita. Nam, licet permissio tentandi hominem non sit dæmoni facta ratione peccati, antea enim illum tentavit, nihilominus quia illum tentando vicit, jus quoddam, vel potius licentiam obtinuit liberius tentandi illum, et homo in pœnam justam, quoad hoc, etiam potestati dæmonis traditus, seu permissus est. Atque ex hoc capite, verisimile est difficiliorem esse homini lapsu bonam operationem, etiam moralem, et naturalis ordinis, quam si esset innocens, et in puris

naturalibus. Hæc autem comparatio, si attente res consideretur, neque cum sufficienti fundamento, neque cum debita proportionem fieri potest; quis enim dicere potest, si homo crearetur in puris naturalibus, an pugnaturus esset cum dæmone, vel dæmon permittendus esset illum tentare? Nam hoc providentiæ genus videtur esse superioris ordinis, et ad puram naturam non pertinere. Eademque ratione, incertum est, si in illo statu Deus illam pugnam permetteret, quale adjutorium proportionatum

daturus esset homini, non solum omnino liberaliter, sed etiam ex titulo naturalis providentiæ, creaturæ rationali in tali statu et discrimine constitutæ consentaneæ. Unde, proportionem servata, fortasse nulla est etiam in hoc differentia: si tamen aliqua est, illa magis est ex modo providentiæ pertinentis ad ordinem supernaturalem, et ad gratiam, et justitiam Dei in illo ordine operantis, quæ ex sola statuum differentia oritur, ideoque nihil ad præsentem disputationem conducit.

FINIS PROLEGOMENI QUARTI.

INDEX CAPITUM PROLEGOMENI QUINTI

DE VARIIS ERRORIBUS DIVINÆ GRATIÆ CONTRARIIS.

CAP. I. *De Judæorum errore circa veram Christi justitiam et gratiam.*

CAP. II. *De errore Pelagii contra divinam gratiam.*

CAP. III. *Circa dictum Pelagii errorem nonnulla dubia expenduntur.*

CAP. IV. *An Pelagius non solum auxilii gratiæ, sed etiam generalis Dei concursus necessitatem ad humanas actiones negaverit?*

CAP. V. *Quæ fuerit sententia errorve Semipelagianorum, et qui ejus auctores, vel sectatores?*

CAP. VI. *Nonnullis dubitationibus propositis, Semipelagianus error amplius explicatur.*

CAP. VII. *De errore Lutheri et Calvinii et Sectatorum circa gratiam Dei et liberum arbitrium.*



PROLEGOMENUM QUINTUM.

DE VARIIS ERRORIBUS

DIVINÆ GRATIÆ CONTRARIIS.

CAPUT I.

DE JUDÆORUM ERRORE CIRCA VERAM CHRISTI JUSTITIAM, ET GRATIAM.

1. *Prolegomeni partitio.* Explicatis statibus humanæ naturæ, quorum cognitio ad intelligendam gratiæ necessitatem in præsentī statu visa est necessaria, nunc notitiam præcipuorum errorum, qui contra gratiam Dei et Christi fuerunt, præmittere opportunum judicavi, ut facilior paretur via ad Scripturas, et testimonia Conciliorum et Patrum intelligenda, quæ sunt hujus materiæ fundamenta. Tria ergo videntur esse errorum capita circa gratiam divinam, nimirum Judæi, Pelagiani, quibus Semipelagianos, tanquam Pelagianorum reliquias, adjungo, et Lutherani, sub quibus comprehendimus omnes hujus temporis sectarios, eisque antiquos hæreticos Manichæos, et similes qui arbitrii libertatem ac subinde gratiæ fundamentum negarunt, conjungimus. De his ergo tribus capitibus sigillatim dicemus; postea vero scripta canonica, vel ecclesiastica, quæ contra illos auctoritatem habent, proponemus.

2. *Primus Judæorum error.* — Judæos igitur non solum in sua duritia perseverantes, sed etiam in Christum jam credentes, de illius gratia male sensisse, ex Actibus Apostolorum, et epistolis Pauli manifestum est. Notavitque Tertullianus, contra Judæos in princip., et Augustinus, epist. 95, dicens, de Judæis dictum esse: *Ignorantes Dei justitiam, et suam volentes statuere, justitiæ Dei non sunt subjecti. Quia per legem justificari se arbitrabantur, sufficiente sibi ad eam custodiendam libero ar-*

bitrio, hoc est, justitia sua prolata ex natura humana, non donata ex gratia divina, propter quod justitia Dei dicitur; et similia habet sermone 13, de Verb. Apost., capit. 4. Duo autem præcipui errores in eis distingui solent: unus fuit, gratiam Christi ad salutem non sufficere sine legis veteris observatione. Quem errorem etiam aliis Christianis ex gentibus conversis persuadere cœperunt, primum Antiochiæ, deinde in Galatia, et aliis fortasse locis. Qui autem ita sentiebant ante Concilium Apostolorum, Actor. 15, non erant hæretici, quia nondum erat veritas satis declarata, et ab Ecclesia definita. Qui vero post illud Concilium in eadem sententia pertinaces fuerunt, in hæresim lapsi sunt. Cujus defensorem præcipuum fuisse Cherintum, hæreticum hebræum, eumque maxime excitasse turbas contra Petrum et Paulum, pro defendenda observantia legis veteris (de quibus, Actor. 15 et 21), auctor est Epiphanius contra hæres. 24.

3. *Impugnatur a Paulo ad Galat. 1.* — Ad impugnandum autem errorem hunc, principaliter scripsit Paulus epistolam ad Galat., ut in initio expositionis ejus Hieronymus et Augustinus, et post illos reliqui expositores adnotarunt, et ex initio ejusdem epistolæ satis constat. *Miror (ait) quod sic tam cito transferimini ab eo, qui vos vocavit in gratiam Christi, etc.* Erat enim error ille gratiæ Christi contrarius, quia Cherintus et alii prædicabant fidem Christi, cum tota lege evangelica, non sufficere ad salutem, sed necessariam esse circumcisionem cum aliis veteris legis observantiis, eo quod putarent legem perpetuam esse, ejusque opera per se, et sine Christo potuisse justificare. Inde eum inferebant,

etiam post Christi adventum illam efficaciam et necessitatem obtinuisse, quia non ex Christo, nec propter Christum, sed ex se, et ex libertate operantis illam habebant. Paulus autem, e contrario, demonstrat legem illam per se salutem non contulisse, nec potuisse homines justificare, neque ad hoc fuisse datam, sed propter transgressionem, ut sub illa tanquam sub pædago continerentur homines, donec veniret semen, qui est Christus. Atque in hoc sensu distinguit sæpe ibi Paulus fidem a lege, dicens in cap. 2: *Non justificari homines ex operibus legis, sed per fidem Jesu Christi*; et capit. 3: *Ex fide justificat gentes Deus*. Per fidem enim non tam actum credendi, quam doctrinam fidei evangelicæ creditam et observatam intelligit. Et ideo ait in eodem cap. 3: *Priusquam veniret fides, sub lege custodiebamur, conclusi in eam fidem, quæ revelanda erat*. Fides enim quæ revelatur, non est nisi doctrina, seu verbum fidei, ut idem Paulus ait ad Romanos 10, quod etiam in cap. 1 vocat *Evangelium*, dicitque esse *virtutem in salutem omni credenti*.

4. *Apost. ad Galatas cum de lege loquitur, de Mosaica; cum de fide, de lege evangelica creditam, et observatam intelligit.*—Hoc ergo maxime est præ oculis habendum in hac materia, ut intelligamus, quoties in illa epistola Paulus distinguit legem a fide, non de omni lege, nec de solo actu credendi loqui. Nam per legem, solum legem veterem intelligit, et ita cum exciuit necessitatem operum legis, solum loquitur de propriis operibus legis veteris, prout ab illa necessitate aliquam, vel specialem obligationem habebant. Per fidem autem intelligit totam evangelicam doctrinam, et illam dicit justificare, non ut creditam solum, sed ut creditam, et observatam, seu opere completam. Et utrumque satis explicuit in cap. 3 ejusdem epistolæ ad Gal. dicens: *Qui in lege justificamini, a gratia excidistis; nos enim spiritu ex fide spem justitiæ expectamus. Nam in Christo Jesu neque circumcisio aliquid valet, neque præputium, sed fides quæ per charitatem operatur*; et infra: *Vos in libertate vocati estis /ratria, utique a jugo legis veteris, ut declarat subiungendo, Tantum ne libertatem in occasione delicti carnis, sed per charitatem servite iusticiam*. Si ergo scopus illius epistolæ præ oculis habeatur, non erit difficile uti in vero sensu testimonio ejus in hac materia, quod nunc nobis propositum est.

5. *Judæorum alter error.* — Alter Judæorum error fuit, gratiam Evangelii non esse

communem omnibus gentibus, sed specialiter datam esse Judæis propter legis veteris observationem. Ideoque gentes non esse Judæis in Christi Ecclesia æquiparandos, sed hos esse illis præferendos. Ita colligitur clare ex discursu Pauli in epistola ad Rom., ut ibi expositores, et Patres notant, et singulariter Augustinus in expositione inchoata illius epistolæ, in cujus initio sic ait: *In epistola, quam Paulus Apostolus scripsit ad Romanos, quantum ex ejus textu intelligi potest, quæstionem habet talem, utrum Judæis solis Evangelium Domini nostri Jesu Christi venerit propter merita operum legis, an vero nullis operum meritis præcedentibus, omnibus gentibus venerit justificatio fidei, quæ est in Christo Jesu*.

6. *In quo distinguantur prædicti errores.* — *Ratio dubitandi.* — Quæri vero non immerito potest, an hic error sit distinctus a præcedenti; non enim parum hinc pendet intelligentia utriusque epistolæ ad Romanos et ad Galatas, quæ in hac materia de Gratia maxime necessaria est. Videri autem potest, non esse distinctos errores, sed unum, quia non potuerunt aliqui Judæi asserere, gentes non esse ad gratiam Evangelii admittendas, etiamsi circumcidi vellent, et eum effectum prius circumciderentur. Quia quilibet gentiles poterant fieri proselyti, si vellent, et ab ipsis Judæis non solum admittebantur, sed etiam inducebantur, ut ex Matth. 23 constat. Deinde etiam erat certum, illos proselytos servantes legem numerari inter filios Abrahæ, et ideo ad illos etiam pertinere promissiones Abrahæ factas; ergo negare non poterant gentiles circumcisos admittendos esse ad Evangelium; ergo solum potuit esse controversia, an gentiles essent capaces gratiæ evangelicæ absque circumcissione vel solum mediante illa. Et in hoc errarunt illi contra quos scripsit Paulus in epist. ad Galat.; ergo non potuit esse alius error, quem impugnat in epistola ad Romanos. Quia Judæi, qui insultabant contra gentiles, et negabant illis esse communicandam gratiam Evangelii, necessario id intelligebant de gentibus in præputio manentibus; nam si circumciderentur, jam illos inter Judæos computabant. Et hoc videtur sensisse Hieronymus in Prefatione epistolæ ad Galatas, cum dicit eandem esse utriusque epistolæ materiam, et in utraque antiquæ legis cessationem, et novæ introductionem specialiter contineri, solumque differre, quod in epistola ad Romanos *altiori sensu, et profundioribus Paulus usus est argumentis*.

7. *Errorum illorum convenientia.* — In hoc

puncto dicendum breviter est, errores illos parum quidem in re ipsa differre quoad ea, quæ in ipsis vel negantur, vel allirantur, nihilominus vero multum distare, vel in fundamentis, vel etiam in primaria utriusque erroris intentione et assertione. Declaratur: nam probabilius videtur, ut discursus factus ostendit, nullos Judæorum in Christum credentium absolute et simpliciter dixisse, non esse concedendam gentibus salutem, aut gratiam Evangelii, aut vocationem ad Christi Ecclesiam, sed tantum sub ea conditione, *nisi circumcidantur*, vel (quod idem est), *si in præputio mancant*. Quod quidem de primo errore manifestum est ex Actor. 15 et 21, et epistola ad Galat., in quibus locis præcipue fit illius mentio. De hoc vero posteriori constare potest ex Act. 40 et 41, nam cum in priori capite narrasset Lucas visionem Petri, et initium prædicationis Evangelii ad Gentes in Cornelio, et qui cum eo audiebant a Petro verbum Dei, quando Petro adhuc loquente, *cecidit Spiritus Sanctus super eos*, additur: *Et obstupuerunt ex circumcissione fideles, qui venerant cum Petro, quia et in nationes gratia Spiritus Sancti effusa est*. Existimabant ergo Judæi, etiam Christiani et fideles, usque ad illud tempus, gratiam Christi non fuisse communicandam gentibus, utique in præputio manentibus: unde additur c. 41, cum Petrus ascendisset Hierosolymam, eosdem qui ex circumcissione erant, adversus illum disceptasse dicentes: *Quare introisti ad viros præputium habentes, et manducasti cum illis?* Non ergo scandalum patiebantur in hoc, quod ad homines ex gentibus natos accederet, sed *ad præputium habentes*; si enim circumciderentur, non scandalizarentur. Atque ita utrique Judæi putabant, sine circumcissione non posse gentiles salvari, neque ad pœnitentiam vel Evangelium recipi; cum illa vero posse, et consequenter circumcissionem cum Evangelio esse conjungendam, neque fidem Christi sine circumcissione sufficere ad salutem: sic ergo in re ipsa, et in assertionibus, vel negationibus suis multum conveniebant.

8. *Eorundem diversitas*. — Potuit autem esse diversitas, quia hi posteriores putabant non esse prædicandum Evangelium gentibus nondum circumcisis, sed prius fuisse inducendos ad circumcissionem, et postquam essent circumcisi, illis fuisse prædicandum Christum et Evangelium. Et hoc significatur Actor. 41, cum dicitur eos, qui dispersi fuerant a tribulatione, quæ facta erat sub Ste-

phano, perambulasse usque ad Antiochiam: *Nemini loquentes verbum, nisi solis Judæis*. Moveri autem potuerunt, quia putabant Christum, ejusque gratiam solis filiis Abrahæ fuisse promissam, filios autem Abrahæ esse debere, aut naturales, et ab eo originem ducentes, aut saltem adoptatos per circumcissionem, ideoque nemini fuisse Christum prædicandum, vel baptismum Christi conferendum, priusquam circumcideretur. Potuitque hic error in hoc sensu intellectus perseverare in Judæis qui Romæ habitabant, quando Paulus ad Romanos scripsit.

9. Alii vero, qui priorem errorem Galatis persuadebant, fortasse non negabant, gentibus, etiam non circumcisis, prædicari posse Evangelium, sed solum contendebant non esse separandum a circumcissione, sive simul, sive quocumque ordine Evangelium cum lege, et baptismus cum circumcissione jungantur. Actor. enim 15, Judæi, qui Antiochiam pervenerant, et viderant Ecclesiam ex gentibus congregatam (ut dicitur c. 14), non reprehenderunt Paulum, aut Barnabam, eo quod gentes præputium habentes baptizassent, sed solum superseminarunt zizaniam dicentes: *Nisi circumcidamini secundum morem Moysi, non potestis salvari*. Et postea, in Concilio Apostolorum, iidem Judæi solum dicebant: *Quia oportet circumcidi eos, præcipere quoque servare legem Moysi*. Et in eodem errore perseverabant illi de quibus dictum est Paulo, Actor. 21: *Vides, frater, quot millia sunt in Judæis, qui crediderunt, et omnes æmulatores sunt legis?* Imo, ex his quæ ibi subjunguntur, colligi potest aliud discrimen. Nam priores, quos in epistola ad Romanos Paulus impugnat, omnibus hominibus dicebant, legem esse necessariam, neque gratiam Christi sine illa sufficere. Alii item legis æmulatores, licet fortasse in principio idem dicerent, postea ad hoc pervenisse, et hoc tantum contendisse videntur, ut saltem a Judæis conversis ad fidem lex observaretur, ut ibi significatur, cum ad Paulum ita Judæi loquuntur: *Audierunt autem de te, quia discessionem doceas a Moyse eorum, qui per gentes sunt, Judæorum, dicens non debere eos circumcidere filios suos*, ubi ostenditur, non de gentibus, sed de solis Judæis æmulationem fuisse.

10. *Potissimum discrimen errorum*. — Denique potissimum discrimen, quodque nostro instituto magis deservit, esse videtur in fundamento et intentione erroris. Nam isti æmulatores legis, et defensores primi erroris, præ-

eipue intendebant legem observandam esse a Christianis, vel omnibus, vel saltem ex Judæis conversis ad fidem, quia credebant legem illam latam esse a Deo, ut per se sufficientem, ac necessariam ad salutem, ac subinde ut perpetuo duraturam, et obligaturam. Ideoque, licet admittendum crederent Evangelium, non tamen ut per se sufficiens, saltem Judæis, neque ut excludens legem, sed ut miscendum cum illa, seu conjungendum.

11. Alii vero fautores posterioris erroris præcipue nitebantur in merito operum suorum, dicebantque solis Judæis communicandam esse Christi gratiam, quia per justitias suas et observationem legis, illi soli eam meruerant, gentiles vero utpote idolorum cultores, tanto bono esse indignos. Et hoc discrimen maxime ostendit discursus Pauli in epist. ad Galatas et ad Roman.; nam in epist. ad Galatas præcipue confutat priorem errorem, ostendendo legem veterem non propter se, nec in perpetuum datam esse, sed tantum ut pædagogum, ad separandum populum illum a gentium ritibus, et idololatria, *donec veniret semen, quod est Christus*. In epistola vero ad Romanos, præcipue confundit Paulus præsumptionem Judæorum, demonstrando gratiam Christi non dari ex operibus legis, sed ex sola Dei misericordia. Et quia gentiles etiam contemnebant Judæos eo quod Christum crucifixissent, illorum etiam peccata et morum corruptionem Paulus commemorat, ut eos etiam humiliet et confundat. Et hæc occasione de peccato originali, quod totam naturam humanam infecit, omniumque peccatorum ejus origo fuit, doctrinam tradit, ut ita concludat, omnes indiguisse redemptione Christi, ejusque gratiam omnibus gratis offerri.

12. *Ab his duobus erroribus univèrsi pullularunt.* — Atque ita in priori errore duo sunt proprie et directe contra gratiam Christi. Unum est, legem ante Christi adventum per se justificare, et ad salutem sufficientem fuisse. Alterum, etiam post Christi adventum esse necessariam, saltem Judæis, ac subinde salutem Christi non sufficere illis ad salutem. Quod potuit a Judæis cogitari, vel quia de Christi redemptione, ejusque sufficientia non recte sentiebant, vel quia putabant legem illam datam esse a Deo ut perpetuo servaretur. Et quod hoc posterius fundamentum, impugnatur hæc error in materia de Legibus. Quod præter vero, in materia de Incarnatione multa contra illam dicuntur, et in sequentibus impugnabitur. Alii vero Judæi non solum erru-

bant, asserentes legem potuisse per se justificare, sed etiam quia credebant legem sibi datam esse ex meritis suorum parentum, et Evangelium ipsis tantum esse missum propter suum meritum. Unde in hoc posteriori errore multi contra divinam gratiam continentur, a quibus orti sunt omnes, qui postea inventi sunt, ut videbimus. Primus est, gratiam Dei propter opera nostra dari: secundus est, homines posse totam legem implere suis viribus, ut gratiam consequantur. Unde sequitur tertius, hominem non indigere gratiæ adjutorio ad bene operandum, sicut oportet ad justitiam apud Deum obtinendam, cum quo alius connectitur, nimirum gratiam Dei et Christi non esse adjuvantem, seu auxiliantem ad recte vivendum, sed vel ad remissionem peccatorum, vel ad justitiæ incrementum. Imo addit Chrysost., hom. 6 in epist. ad Rom., Judæos errasse, dicentes gratiam Christi non esse sibi necessariam, quia in sola lege satis justificabantur. Quod intelligendum existimo de Judæis non conversis ad Christum, sed in sua perfidia obduratis. Judæi enim facti Christiani non potuerunt negare gratiam Christi; potuerunt autem errare destruendo rationem gratiæ, suis meritis illam tribuentes, quod præcipue confutare intendit Paulus in dicta epistola: inde vero ulterius dicit sequi, gratiam Christi necessariam non fuisse, si ex lege esset justitia, ac subinde gratis Christum mortuum esse, ut ad Galatas 2 scribit. Et ita omnes prædicti errores ex dictis epistolis Pauli sufficienter confutantur, ut postea videbimus: nunc enim hæc solum præmittimus, ut origo errorum in hac materia, et prima occasio Paulo oblata ad gratiam Dei prædicandam, præ oculis habeatur.

CAPUT II.

DE ERRORE PELAGII CONTRA DIVINAM GRATIAM.

1. *Error Pelagii.* — Post Judæos, primus qui inter hæreticos male de gratia Dei sensit, fuit Pelagius, circa annum Domini quadringentesimum; de illo enim ait Vincentius Lyriensis, cap. 24: *Quis unquam ante profanum illum Pelagium tantam virtutem liberi præsumpsit arbitrii?* etc.; et cap. 9 i elagianos introduxerat dicentes: *Nobis uertoribus, nobis principibus, nobis expositoribus, damnate quæ tenebatis*, etc. Et idem sentit Augustinus, lib. de Heresib., in 88, et lib. de Bono persever., cap. 24, et sæpe alius. Verum hoc de tota Incarn-

resi intelligendum est; nam inchoationem ejus præcessisse sentit Hieronym. in Proœm. Dialog. contra Pelagium; dicit enim illum Joviniani hæresim excitasse. Additque ibidem, Evagrium eodem laborasse errore, et Rufinum adjungit lib. 4 in Jerem., in Præfat., et sumitur ex August., lib. 2 de Peccat. orig. De quibus videri potest late Baron., anno 410, n. 6 et sequentibus. Addi etiam potest ex Clemente Alexand., lib. 3 Strom., in principio, Basilidem Valentinum, et Marcionem dixisse, fidem esse naturalem, ac subinde hominem per naturam salvari, contra quos ipse arguit more Pauli, quia sic supervacua fuisset adventus Salvatoris. Verumtamen hic error illis temporibus, vel non satis fuit declaratus, vel statim extinctus est. Pelagius vero principaliter eum docuit, et ex professo declaravit, ac persuadere conatus est, et ideo illi tanquam auctori tribuitur. Et quamvis fuerit Pelagius natione Britannicus, professione tamen monachus in Oriente fuit, ibique cœpit hæresim seminare, ut ex Chrysostomo colligi potest, qui epist. 4 ad Olympi., in ultimis verbis sic ait: *De Pelagio monacho magno dolore affectus sum. Cogita igitur quot, quantisque coronis digni sunt, qui forti animo in acie steterunt, cum viros tam pie ac sancte tantaque cum tolerantia viventes abripi atque in fraudem impelli rideamus*, ubi de Pelagio, tanquam de homine in illis regionibus cognito, et fama virtutis illustri loquitur, errorem autem ejus non declarat. Ex Oriente vero in Occidentem transiens Pelagius, habens socium Cœlestium, et fautorem Julianum, Romæ suum errorem seminare cœpit, ut late Baron., anno 411, num. 52, ex Augustino, lib. de Peccat. orig., c. 21, et alibi sæpe.

2. *Error Pelagii exponitur ex Faust. et Augustino.* — Quis autem fuerit error Pelagii, summam comprehendit Faust., lib. 4 de Gratia Dei, cap. 1, his verbis: *Dicit Pelagius quod, ad obtinendam salutem, natura hominis sibi sola sufficiat.* Distinctius Augustinus, lib. de Hæresib., in 88, ait Pelagium et Cœlestium adeo fuisse inimicos gratiæ Dei, per quam diffunditur charitas in cordibus nostris, et fides per dilectionem operatur, ut sine hac posse hominem credant facere omnia divina mandata. Unde inferius ait, licet Pelagius postea coactus fuerit gratiam Dei fateri, non tamen veram gratiam, neque veram ejus necessitatem unquam fuisse confessum: nam solum liberum arbitrium vocabat gratiam necessariam ad bene operandum. Addebat vero

adjuvantem gratiam, qua facilius posset liberum arbitrium bonum velle, non sine qua non posset illud et velle, et perficere. Et illam præterea gratiam, qua liberum arbitrium ad facilius bene operandum juvatur, tantum dicebat esse divinam legem et doctrinam, quæ ad hoc tantum datur, ut discamus quid facere et sperare debeamus, non vero ut quæ didicerimus esse faciendæ, per donum Spiritus Sancti faciamus. Hæc fere ibi Augustinus, qui fusius refert errores Pelagii in epist. 106, in duodecim propositiones illos distinguens, quæ in Concilio Palæstino damnatæ fuerunt. Multæ autem ex illis propositionibus ad præsentem materiam directe non spectant, ut infra referendo Acta illius Concilii adnotabimus.

3. *Articuli quidam ex damnatis a Concilio Palæstino, unde Pelagii error aperitur.* — Nunc vero, ut radicem et sensum illius erroris aperiamus, imprimis notandi sunt quatuor primi articuli, in quibus ait Adamum non contraxisse pœnam mortis ex peccato, sed ex se, et a principio fuisse mortalem, in quo plane significat idem sensisse de concupiscentia, aliisque defectibus, ut sunt fames, sitis, et similia, quæ homini connaturalia sunt, ideoque nullum ex his defectibus credit contraxisse Adamum peccando, præter aversionem et inimicitiam Dei, cum reatu pœnæ vitæ futuræ, nisi resipuisset. Unde secundus articulus, in dicto Concilio relatus, est, Adamum peccando, sibi, non posteris, nocuisse. Et consequenter dicebat in tertio, infantes nunc nasci in eo statu, in quo Adam creatus fuit; et in quarto, mortem in nobis non esse pœnam culpæ, sed conditionem naturæ. Ex quibus persuasum semper mihi habui, Pelagium nihil altius de humana natura, vel de statu, virtutibus, aut actibus ejus in hac vita cogitasse, quam de pura hominis natura philosophus quispiam gentilis, recta ratione utens, cogitare potuisset; exceptis nonnullis Dei beneficiis, sub quibus, abutendo nomine gratiæ, et adjutorii divini, errorem suum occultabat, ut sunt lex, revelatio, seu doctrina. Et ideo, ad intelligendum hunc errorem, et Pelagii tergiversationes cavendas, duo sunt distincte explicanda: unum est, quam gratiam vere et in re ipsa negaverit; aliud est, quam gratiam verbis admiserit, seu sub quibus verbis errorem suum occultare studuerit. Ut autem illud prius explicemus, omnia gratiæ dona ad tria capita revocemus, quæ sunt actus, habitus, et auxilia, de quibus suo ordine dicemus.

4. *Supernaturales actus negavit, vel ignoravit Pelagius.* — Primum ergo Pelagius, quantum ex dictis colligi potest, vel negavit, vel omnino non agnovit, fieri a nobis virtute divinæ gratiæ aliquos actus liberos vere supernaturales, id est, vires naturales liberi arbitrii superantes. Ita sumitur ex citato loco Augustini, hæres. 88, ubi ait asseruisse Pelagium, posse hominem solis viribus liberi arbitrii, sine fide, vel charitate infusa, implere omnia præcepta, quantum ad salutem necessarium est, et sufficit: ergo censuit omnes tales actus esse omnino naturales, etiam ipsos actus fidei, pœnitentiæ, vel amoris, quibus justificamur, et a fortiori omnes alios, ac subinde nullum esse supernaturalem. Deinde id colligitur ex septimo articulo Pelagii damnato in Concilio Palæstino, qui erat, *gratiam Dei non dari ad singulos actus, nisi constituendo gratiam in libero arbitrio, lege, vel doctrina.* In quo supponit, posita lege, vel objecto per doctrinam, omnem actum a solo arbitrio fieri, ac subinde omnino esse naturalem. Quod etiam plane ostendit articulus undecimus, in quo *negabat esse liberum arbitrium, si Dei indiget auxilio.* Credidit ergo repugnare, actum liberum talem esse, ut a solo libero arbitrio viribus suis fieri non possit, quod est negare, posse actum liberum esse supernaturalem. Unde, quia præcepta Dei non sunt de impossibilibus actibus, ideo consequenter asserere debuit, neque fidei revelationem, neque præceptum Dei, quantumvis ultra vel supra naturam additum videntur, obligare ad actum vires naturales liberi arbitrii superantem.

5. *Ignoravit item sanctificationem internam.* — Ex quo ulterius colligo, probabiliter non agnovisse Pelagium internam animi renovationem, et sanctificationem per habituales gratiam, præsertim quoad virtutes infusas. Nam hæc dona habitualia propter actus supernaturales dantur, et ideo ablatis actibus reliqua tolli necesse est. Unde, licet non legamus Sanctos Patres cum Pelagio de his donis expresse contendisse, vel quia doctrina de his donis non erat tunc ita declarata, ut contraria tanquam hæretica damnanda esset, vel quia Pelagius de his donis expresse non tractavit: nihilominus, ex principis ejus, ut dixi, satis colligitur non agnovisse, imo supponisse nulla talia dona nobis communicari. Et hinc in Adamo ante peccatum nullum Dei donum agnovit, præter naturalia: ideo enim dixit, non nunc generari in eodem statu, in quo

Adam fuit conditus. Deinde licet in parvulis non negaverit gratiam adoptionis, propter quam illis est necessarium baptisma, teste August., lib. 6 contra Julian., cap. 5, alias 9, tamen et in adultis non putavit hanc esse gratiam, sed præmium meritorum; neque in parvulis videtur credidisse illam adoptionem per internam et inhærentem gratiam fieri. Hinc denique, loquendo sæpe de gratia Dei, ad alias improprias et generales significationes gratiæ divertitur. Veram autem gratiam supernaturalem et infusam nunquam confitetur, ut ex sequentibus amplius patebit. Unde August., lib. de Gratia Christi, c. 2, ait sensisse Pelagium, nos salvari adjutos, *non aliqua subministratione virtutis, sed viribus propriæ voluntatis.*

6. *Et auxilium Dei gratuitum ad singula opera bona supernaturalia.* — Tertio, hinc concluditur negasse Pelagium omnem veram gratiam interius juvantem, seu auxiliantem, quæ necessaria sit, ut principium, vel adjutorium proprium efficiendi actus bonos, et Deo gratos, vel meritorios apud Deum, aut aptos ad hominem justificandum et sanctificandum. Quia cum tales actus liberi sint, censuit etiam esse naturales, ut dixi, et consequenter negavit ad illos esse necessarium auxilium aliquod extra liberum arbitrium; imo putavit repugnare cum arbitrii libertate. Hoc enim argumento maxime contra Augustinum utebatur, quia si gratia prævenit liberum arbitrium, et ex nolentibus volentes facit, destruitur libertas arbitrii, ut idem Augustinus sæpe refert lib. 2 contra duas epistolas Pelagianor., cap. 5, et lib. 4 contra Julian., cap. 8. Unde non solum prævenientem gratiam, sed absolute necessitatem divini auxilii libertati arbitrii repugnare sensit, ut ex art. 10 Concilii Palæstin. supra probatum est, et refert etiam Hieronymus epistola ad Ctesiph. Atque ita constat, negasse Pelagium omnem veram gratiam Dei, saltem ut ad salutem necessariam. Quod addo, quia inter alias novas controversias orta questio est, an Pelagius tandem admiserit aliquam veram gratiam internam auxiliantem, saltem ad facilius operandum, de quo puncto statim dicam. Prius enim oportet cætera, quæ proposuimus, integre explicare; nam si fortasse aliquam veram internam gratiam auxiliantem agnovit, in eo non erravit, nec propterea reprehensus est, sed quia de necessitate talis gratiæ non catholice sensit, ut dicam.

7. *Atque adeo negavit illud auxilium requiri ad mandata servanda, lectionesque supe-*

randus. — Et orationis necessitatem. — Ad id igitur in hoc tertio puncto, non solum errasse Pelagium circa veram gratiam interius auxiliantem, quia negavit necessitatem ejus ad singula opera, ut dixi, sed etiam quia eandem negavit dari ad servanda omnia mandata, et ad vincendas omnes tentationes, ideoque, in art. 11 relato in dicto Concilio Palæstin., aiebat, *victoriam nostram non ex Dei adjutorio esse, sed ex libero arbitrio.* Quibus verbis simpliciter adjutorium gratiæ negare visus est. Notat autem Augustinus, dicta hæres. 88, illum postea a fratribus increpatum, quod nihil tribueret adjutorio gratiæ Dei, dixisse, *ad hoc illud dari hominibus, ut quæ facere jubentur per liberum arbitrium, facilius possint implere per gratiam;* ubi, dicendo *facilius*, ut ponderat idem Augustinus, satis indicavit se sentire non esse necessariam. Idemque testatur sæpe Augustinus contra Pelag., ut lib. 2 contra duas epist. Pelag., cap. 8: *Pelagius, ait, facilius dicit impleri, quod bonum est, si adjuret gratia. Quo additamento significat, hoc se sapere, quod etiamsi Dei defuerit adjutorium, potest, quamvis difficilius, implere bonum per liberum arbitrium.* Idem lib. 1 de Gratia Christi, cap. 7, et epist. 103, 106 et 107. Item ex hoc principio, negavit necessitatem orationis ad vincendas gravissimas etiam tentationes, aut sine peccato vivendum, vel de commissis pœnitendum, ut intelligimus ex Concilio Milevitano, cap. quinto; African., cap. 80; et Augustin. dicta epistola centesima-sexta.

8. *Gratiam quoque in superna entitate et in esse causæ negavit.* — Unde fit ut etiam erraverit negando adjutorium gratiæ, quoad verum esse supernaturalis gratiæ et causæ, vel, ut ita dicam, quoad veram gratiæ entitatem et causalitatem. Patet, quia non intellexit dari adjutorium quo voluntas possit aliquid supra suas vires operari, nec in substantia actus, nec in modo, sed ad summum, ut facilius possit, qui modus non est supernaturalis, sed ex multis causis naturalibus provenire potest, nimirum ex habitu acquisito, seu consuetudine, ex meliori dispositione, vel temperamento corporis, ex bono aliquo consilio, vel morali exhortatione, etiam humana, ex bono exemplo, et aliis hujusmodi causis. Unde fit, ut negaverit etiam Pelagius verum auxilium supernaturale internæ gratiæ excitantis; tum quia, ut dixi, nullam veram supernaturalem gratiam agnovit; tum etiam quia putavit repugnare libertati internam motionem illam prævenientem, et ad volendum inducentem, quia talis induc-

tio non fieret sine coactione, aut necessitate repugnante libertati. Et in hoc sensu dixit Augustinus, lib. 2 contra duas Epistol. Pelagian., cap. 5 et sequentibus, doctrinam Pelagii fuisse *gratiam adjuvare uniuscujusque bonum propositum, non tamen reluctanti studium virtutis immittere.* Aliudque illius fundamentum fuisse dicit, *quia personarum acceptio non est apud Deum.* Et lib. 4 contra easdem epist., cap. 19, clarius dicit: *Vos autem in bono opere sic putatis adjuvari hominem Dei gratia, ut in excitanda ejus ad ipsum bonum opus voluntate, nihil eam credatis operari.* Quocirca, licet fortasse Pelagius aliquando confessus fuerit, Deum juvare, vel etiam excitare voluntatem aliquo peculiari modo providentiæ suæ, nunquam tamen intellexisse videtur, illud fieri per internam excitationem elevantem voluntatem supra suas vires naturales. Alioqui tale auxilium esset simpliciter necessarium ad tale opus præstandum, quod ille non admittebat. Sic ergo dicimus negasse Pelagium auxilia gratiæ, tam quoad esse seu entitatem, quam in ratione causæ, seu principii naturalibus.

9. *Denique gratiam sub ratione doni gratuiti sustulit.* — Tandem vero addimus etiam negasse veritatem auxilii gratiæ in ratione doni gratuiti, seu in propria denominatione gratiæ. Probat, quia a principio docuit *gratiam propter merita nostra dari.* Hic enim est octavus articulus ejus in dicto Concilio Palæstinico damnatus. Quem etiam refert Augustinus dicta epistola 106, et quamvis subdole illum retractaverit in dicto Concilio, re tamen vera semper illi adhæsit, ut ex eodem Augustino colligitur epistol. 36, 37, 105 et sequentibus, et lib. 4 de Grat. Christi, c. 31, ubi de Pelagio dicit: *Quamlibet sentiat gratiam, ipsis Christianis secundum merita dari dicit,* et cap. 37, et toto lib. 2 de Peccat. orig., cap. 5, et aliis locis frequenter hoc repetit. Et lib. 2 contra duas Epist. Pelagian., cap. 8 et 9, idem colligit ex alio Pelagianorum principio, quod initium salutis sit ex nobis, *ut hujus capti meritum (inquit) perficiendi gratia consequatur.* Ex quo principio alibi, contra Julianum, lib. 1, c. 18, et lib. 4, cap. 3, infert hominem esse priorem in dando, ut retribuatur ei: *Eoque modo (inquit) gratia non sit gratia, quia non est gratuita.* Et lib. 3 Hypognostic., et epist. 107, et et aliis locis frequenter hoc repetit, ut in cap. etiam 2 notavimus. Et ideo diximus ita Pelagium admisisse adjutorium gratiæ, ut in illo rationem gratiæ, id est, gratuiti doni, unde gratia nomen accepit, destrueret, quia docebat

esse ex meritis, ac proinde non esse adiutorium gratuitum.

10. *Vocem gratiæ malitiose usurpabat subintelligendo naturalem libertatem, et quæ ad ipsam concurrunt.* — Superest ut aliud quod proposuimus, explicemus, nimirum, quibus modis vocabulo gratiæ ad errorem suum occultandum abuteretur. In principio enim palam, et sine fuco, gratiæ adiutorium simpliciter negavit; postea vero, a Palæstinis Patribus constrictus, et (ut Augustinus sæpe ait) timore compulsus, ne in ipsum anathema diceretur, gratiam confiteri cœpit; sub ea tamen voce, naturalia quædam dona, quatenus ex Dei beneficio nobis conferuntur, intelligebat. Et primum omnium naturale donum libertatis, cum cæteris quæ ad usum illius facultatis natura concessit, ut est vis intelligendi, consulendi, et cum ratione judicandi, gratiam appellabat, teste Augustino, epistola nonagesima-quinta, et dicta hæres. 88, et Hieronymo epistola centesima-trigesima-nona, et aliis locis citatis supra capite secundo. Et de hac sola gratia intelligebat, dari sine præcedentibus meritis, et ab illa esse potestatem bene operandi. Hanc vero fraudem esse Scripturæ contrariam, et patefactam a Patribus ita damnatam esse, in dicto capite secundo diximus. Addiditque postmodum Pelagius, hanc (ut sic dicam) naturalem gratiam juvari, etiam per gratiam illi superadditam, ac divinitus concessam. Illam vero gratiam esse divinam legem; quæ est veluti lucerna viam ostendens, quæ de se juvat liberum arbitrium ad bene operandum. Postea vero, cum argueretur quod gratiam in sola lege poneret, ipse respondit (ut est apud Augustinum, lib. 4 de Gratia Christi, capite secundo), *Christum ad non peccandum nobis dedisse adiutorium, quia juste vivendo, justeque docendo, nobis reliquit exemplum*; et capite 7 refert Pelagium dicentem: *Nos imperitissimi homines putant, injuriam divinæ gratiæ facere.* Et infra: *Quam nos (utique gratiam) non, ut tu putas, in lege tantummodo, sed et in Dei adiutorio esse confitemur.* Explicando vero hujusmodi adiutorium, subjungit: *Adjurat enim nos Deus per doctrinam et revelationem suam, dum cordis nostri oculos aperit, dum nobis, ne presentibus occupemur, futura demonstrat, dum diaboli pandit insidias, dum nos multis rursi et ineffabili dono gratiæ celestis illuminat.* Ubi, ut Augustinus statim notat, licet adiutorium gratiæ Dei, multis verbis ornare et commendare videatur, solum revelationem et doctrinam per gratiam intelligere

declaravit. Et ideo a Patribus damnatur, non quia hæc dona gratiam vocaret: ut enim supernaturaliter data sunt, inter dona gratiæ merito computantur: sed quia præter hæc nullam gratiam interius adjuvantem admittebat. Et simili modo his addebat promissionem futuræ gloriæ, ut in eodem lib. 40, cap. 40, Augustinus refert, et per illam dicebat *operari Deum in nobis, velle quod bonum est, et velle quod sanctum est, dum nos tantummodo præsentia diligentes futuræ gloriæ magnitudine et præmiorum pollicitatione succendit.* Contra quod ait August. cap. 11: *Nos eam gratiam volumus isti aliquando fateantur, qua futuræ gloriæ magnitudo non solum promittitur, sed etiam creditur et speratur.*

11. Denique gratiam remissionis peccatorum agnovisse, ac ita nominasse colligi imprimis potest ex cau. 3 Concil. Milevitan., in quo damnantur dicentes, *Gratiam Dei, in qua justificamur per Jesum Christum Dominum nostrum, ad solam remissionem peccatorum valere, quæ commissa sunt, non in adiutorium, ne committantur.* Est autem ille canon contra Pelagianos: ergo fatebatur Pelagius remissionem peccatorum sub nomine gratiæ. Præterea refert de illo August., Epist. 94, dixisse: *Necessariam nobis esse remissionem peccatorum, quia ea, quæ a nobis in præteritum malefacta sunt, infecta facere non valemus, cavendis autem futuris peccatis sine adiutorio gratiæ Dei humanam sufficere voluntatem.* Ergo ad remissionem præteritorum peccatorum gratiam necessariam esse fatebatur, alias non haberet locum distinctio, seu contrapositio; et Epistol. 93, sic ait: *Sive dixerit gratiam esse liberum arbitrium, sive gratiam esse remissionem peccatorum, sive gratiam esse legis præceptum, nihil eorum dicit, quæ per subministrationem Spiritus Sancti pertinent ad concupiscentias, tentationesque vincendas;* ubi, licet magis supponendo quam asserendo loqui videatur, et ideo possit quis locutionem illam ut conditionalem, non ut absolutam assertionem interpretari, tamen verisimile non est alia de causa Augustinum in illis tribus exempla posuisse, nisi quia illis omnibus tergiversationibus Pelagius utebatur: et, cum de primo et tertio exemplo constet, a Pelagio fuisse usurpata, non est cur de secundo dubitemus. Prasertim cum in dicto libr. de Grat. Christi, cap. 2 et 37, expresse dicat August. de Pelagio: *Et si gratium Dei, qua Christus venit in mundum peccatores salvos facere, in sola remissione peccatorum constituat.* Denique idem Augustinus,

in Epistol. 103 contra eundem Pelagium, argumentatur non potuisse per gratiam remissionis peccatorum se excusare, aut tueri gratiam sine meritis, quia etiam remissio peccatorum, non sine merito aliquo datur, nam per fidem obtinetur: quam fidem non ponebat Pelagius esse ex gratia, sed ex libero arbitrio; et ideo longe inferius in eadem Epistola subjungit Augustinus contra Pelagium: *Ab originali, vel actuali peccato non liberat, nisi gratia per Jesum Christum Dominum nostrum, non solum remissione peccatorum, sed prius ipsius inspiratione fidei, et timoris Dei, etc.*; unde in dicto Concilio Palæstino, duodecimus articulus Pelagii refertur: *Quod pœnitentibus venia non datur secundum gratiam et misericordiam Dei, sed secundum meritum et laborem eorum, qui per pœnitentiam digni fuerint misericordia.* In quo articulo videntur contraria, seu repugnantia contineri, quia in eo remissio peccati negatur, et affirmatur dari ex misericordia, et consequenter negatur et affirmatur esse gratia: hoc tamen inde provenit, quod Pelagius etiam dona non gratis data, nec in priori gratia fundata gratiam vocabat, ut visum est, et ita in præsentem remissionem peccati negat esse gratiam, id est, sine merito datam, et nihilominus vocat misericordiam, ac subinde gratiam, quia licet præcedat meritum, nihilominus est peculiare beneficium Dei misericordia collatum. Veruntamen etiam hoc modo abutebatur nomine gratiæ; tum quia ubi meritum præcedit non fundatum in priori gratia, nulla vera ratio gratiæ relinquitur, ut ostensum est.

CAPUT III.

CIRCA DICTUM PELAGII ERROREM NONNULLA DUBIA EXPENDUNTUR.

1. *Primum dubium.*— *Apparet supernaturalem beatitudinem Pelagium novisse.*— Quamvis omnia quæ de hoc errore diximus, ex Augustini locis sumpta sint, in aliis tamen ejusdem Augustini locis inveniuntur aliquæ Pelagianorum locutiones, quæ superius dictis contradicere videntur; ex quibus nonnullæ insurgunt difficultates, quas expendere, et ad veritatem in omnibus tenendam necessarium est, et ad doctrinam postea tradendam et confirmandam erit utilissimum. Est ergo prima dubitatio, quid Pelagius senserit de gratia, ut gloriam interdum significat, id est, an senserit beatitudinem illam, ad quam creati sumus, esse beneficium Dei omnino supernaturale, et conse-

quenter an cognoverit, fuisse peculiare ac gratuitum beneficium Dei, ordinari et elevari ad talem beatitudinem, ac proinde ordinationem illam fuisse veram gratiam, licet extrinsecam, sicut est divina prædestinatio ac supernaturalis providentia. Nam ex proxime dictis, videtur colligi, Pelagium non ignorasse hominem esse creatum ad supernaturalem beatitudinem, quam in regno cœlorum expectamus. Quid enim aliud est, quod ait, *Deum futuræ gloriæ magnitudine, et præmiorum pollicitatione nos ad virtutem accendere?* Gloriæ namque magnitudo non est, nisi in supernaturali beatitudine: alludere enim visus est in verbis illis ad illa Pauli: *Quod momentaneum est, et leve tribulationis nostræ, æternum gloriæ pondus operatur in nobis.* Deinde Pelagius distinguebat regnum cœlorum a vita æterna, dicebat enim parvulos non baptizatos consequenturos quidem esse vitam æternam, non tamen regnum cœlorum ingressuros, ut testis est Augustinus, Hær. 88, et Ep. 106, post medium, et l. 1 de Peccatorum merit. et remiss., cap. 18 et 20, ne verbis Christi contradicere videretur, dicentis Joann. 3: *Nisi quis renatus fuerit ex aqua et Spiritu Sancto, non potest introire in regnum Dei:* unde videtur Pelagius per vitam æternam, naturalem felicitatem intellexisse; per regnum autem cœlorum, supernaturalem beatitudinem; quo enim alio modo illa duo distinguere valebat? Unde videtur sensisse humanum genus in primo parente fuisse ad regnum cœlorum ordinatum, et per illius peccatum, clausum fuisse non solum Adæ, sed etiam posteris: per Christum autem fuisse omnibus reseratum, ad hunc tamen effectum baptismum applicari; et ideo aiebat baptismum omnibus ætatibus necessarium esse, ut refert Augustinus, lib. 2 contra duas Epistolas Pelagianorum, cap. 5; et libro de Origin. anim., capite nono, et libro tertio, capite decimo-tertio. Ergo in cognitione beatitudinis supernaturalis, et in ordinatione gratuita humanæ naturæ ad illam, non videtur errasse Pelagius.

2. *Oppositum ex ejus dictis urgetur.*— In contrarium vero est, quia si Pelagius cognovit duplicem hominis beatitudinem, naturalem et supernaturalem, necesse est ut cognoverit vitam illam, quam habituri sunt homines in regno cœlorum, naturales eorum vires excedere, et consequenter visionem beatam esse actum supernaturalem: hoc autem difficile creditu est; nam si cognovit hominem esse capacem supernaturalis visionis, quomodo ne-

gare potuit hominem in hac vita esse capacem supernaturalium actuum, et mediorum quibus illum finem promereri et obtinere valeat? Vel si hanc etiam capacitatem cognovit, cur necessitatem talium actuum negasset, vel cur tam acriter contra gratiam Dei pugnasset?

3. *Resolutio dubii.* — In hoc puncto, breviter dico mihi incertum esse, quid Pelagius per regnum cœlorum a vita æterna distinctum intellexerit; nam quod attinet ad verba, non minus in illa distinctione erravit, quam in negando originali peccato, quia Scriptura non minus docet Christi redemptionem esse necessariam ad vitam æternam obtinendam, quam ad ingrediendum in regnum cœlorum, juxta illud Joann. 6: *Qui manducat meam carnem, et bibit meum sanguinem, habet vitam æternam;* et illud: *Nisi manducaveritis carnem Filii hominis, et biberitis ejus sanguinem, non habebitis vitam in vobis.* Vita ergo æterna non minus divina et supernaturalis est, quam regnum cœlorum: imo non est alia vita, nisi qua in regno cœlorum beate vivitur, ut late per Augustinum, l. 1 de Peccat. mer., c. 18 et 20. Quod vero ad rem spectat, necessarium est ut per vitam æternam, quam Pelagius a regno cœlorum distinguebat, et beatam esse dicebat, intellexerit naturalem quamdam beatitudinem, ab omni pœna et dolore, seu læsione corporis aut animi immunem; in qua honeste, et secundum rectam rationem naturalem, homo perpetuo vivere, et suis viribus naturalibus recte uti possit et usurus sit, sine aliquo proprio dono gratiæ: hoc enim est quod Pelagius præcipue intendebat, quia naturam humanam in parvulis integram et innocentem esse putabat, ideoque non esse sua naturali felicitate privandam. Imo non defuerunt aliqui Catholici, qui simile vitæ genus parvulis sine baptismo decedentibus non negarunt, etiamsi peccatum originale, et pœnam damni in eis perpetuo manentem cum fide Catholica confiteantur: de quo puncto nunc non tractamus, quia cum illa moderatione non est contrarium gratiæ Dei; an vero alio rationibus damnandum sit, vel suaderi possit, in materia de Peccato originali dicendum est.

4. *Cœlorum regnum in quo ab æterna vita distinguere potuit Pelagius.* — Hinc vero sit consequens, ut Pelagius intellexit, in regno cœlorum habituros esse homines altioris felicitatis modum, et genus quoddam vitæ superantis naturalem hominis facultatem. Nam si supra naturam non esset, non minus danda esset parvulis propter integritatem, et inno-

centiam naturalem, quam alia vita beata, ut ipse putabat. Quid autem ille senserit de vita illa regni cœlorum, mihi non constat. Cogitare namque potuit, regnum illud differre ab altera vita beata, primum in situ loci, quia illud regnum vere supra cœlos erit, hæc autem vita erit in terra; deinde in majori Dei cognitione, et amore per speciales illustrationes, et revelationes, et consequenter in excellentia voluptatis et gaudii, et in societate angelorum, et similibus. Existimare autem potuit, hæc omnia ibi etiam fieri per solam applicationem obsectorum seu doctrinam, et revelationem tantum: actus autem ipsos semper esse naturales, et ita media hujus vitæ, qualia ipse cogitabat, esse proportionata illi fini. Vel denique si credidit felicitatem regni cœlorum in visione Dei clara consistere, eamque esse homini supernaturalem, existimare potuit, ideo illum actum esse posse supernaturalem, quia necessarius est et quasi a Deo immixtus, actibus autem liberis credidit repugnare conditionem illam. Unde quia vita illa cœlestis per actus liberos ab adultis hominibus comparanda est, ideo existimavit, non per actus altioris gratiæ, sed per solas vires liberi arbitrii obtineri.

5. *Secundum dubium.* — Aliud dubium circa doctrinam Pelagii est, quomodo potuerit gratiæ necessitatem negare, cum concesserit per gratiam conferri nobis, ut possimus bene operari, licet non detur, ut velimus, vel ut faciamus. Nam illa gratia, quæ dat posse, necessaria profecto est ad operandum, quia potestas operandi necessaria omnino est ante operationem, ut per se constat: ergo si Pelagius gratiæ necessitatem negavit, non potuit admittere gratiam dantem posse bene operari: vel e converso si hanc concessit, illam necessariam esse ad operandum concessisse oportet. Quod autem Pelagius concesserit gratiam dantem posse, testari videtur Augustinus libro de Gratia Christi, cap. 5, ubi, distinguens tria in nobis, scilicet, posse, velle et agere, ait Pelagium admisisse gratiam, quæ adjuvet possibilitatem voluntatis atque operis, non vero quæ ipsam voluntatem et actionem juvet, id est, ipsum velle, aut agere. Nam, secundum Pelagium, ait: *Posse Deus posuit in natura, velle, et agere nostra esse voluit, et ideo non adjuvat, ut relinamus; non adjuvat, ut agamus; sed tantummodo adjuvat, ut velle et agere ruleamus;* et cap. 14 sic argumentatur contra Pelagium: *Si tantum posse nostrum hac gratia juraretur, ita diceret Dominus: Omnis qui audivit a Patre, et didicit, potest venire ad me: non autem sic*

dixit, sed omnis, qui audit et didicit, venit ad me. In quo argumento plane supponit Augustinus, Pelagium confessum esse gratiam, quæ dat posse. Imo, in cap. 47, dicit in hoc esse totam differentiam inter se et Pelagium: nam *si consenserit* (inquit) *nobis, non solum possibilitatem in homine etiamsi nec velit, nec agat bene, sed ipsam quoque voluntatem, et actionem divinitus adjuvare, ut sine illo adiutorio nihil bene velimus, et agamus, etc., nihil de adiutorio (quantum arbitror) interno controversiæ relinquatur.*

6. *Sententia modernorum in hoc secundo dudio.* — Propter hæc aliqui moderni dicunt, licet Pelagius in principio hæc gratiam dantem posse non cognoverit, tandem disputationibus Augustini et aliorum Patrum commotum, admisisse gratiam internam dantem posse, quam dicunt esse internam excitationem voluntatis. Et ita distinguunt tres status hujus erroris sub eodem Pelagio. Primus est, in quo absolute gratiam negavit; secundus, in quo verbis illam admisit, sed male illam explicabat modis supra declaratis; tertius, in quo tandem confessus est veram gratiam internam dantem posse, non tamen velle, aut agere, id est, ut ipsi videntur explicare, dantem sufficiens, non tamen efficax auxilium.

7. *Vera resolutio.* — Nihilominus dicendum censeo Pelagium semper negasse veram gratiam, quæ det nobis posse bene operari, aut malum vitare. Probatur primo, quia nunquam Augustinus, in citatis locis, dixit, Pelagium admisisse gratiam quæ tribuat posse; sed solum dixit concessisse gratiam *quæ juvet possibilitatem voluntatis, atque operis*: longe autem minus est juvare possibilitatem, quam dare, ut ex terminis constat; et similiter dicit Augustinus, dicto cap. 5 de Grat. Christi, posuisse Pelagium gratiam, *quæ tantummodo adjuvet, ut velle et agere valeamus*; et semper ita loquitur in discursu illius libri, nunquam vero dicit Pelagium admisisse gratiam, quæ nobis det posse operari: quin potius, in cap. 14 ait *Pelagium in natura posuisse posse venire, et addit, vel etiam, ut modo dicere cæpit, in gratia, qualemlibet eam sentiat*; non vero ait Augustinus Pelagium retractasse unquam priorem assertionem, sed addidisse nescio quam gratiam, quæ potestatem jam in natura existentem juvaret: unde statim contra Pelagium probat, *non tantum posse nostrum per gratiam juvari.*

8. *Corroboratur.* — Denique Pelagius nunquam recessit ab illa sententia, qua dixit gra-

tiam, qualiscumque illa sit, tantum dari, ut facilius homo operetur, quod de ipso Pelagio etiam auctores prioris sententiæ fatentur: at vero gratia, quæ tantum dat facilius operari, distinguitur ab illa quæ dat posse, ut supponit Augustinus argumentando contra Pelagianos, libro secundo contra duas Epistolas Pelagianorum, capite octavo, et aliis locis supra citatis. Et eodem modo scholastici in hoc distinguunt habitus dantes facilius operari ab habitibus dantibus posse operari; nam priores non sunt necessarii ad operandum, et ita non dant posse, posteriores vero sunt per se necessarii, nisi aliunde suppleantur, et ideo dant posse; vel si desint, loco illorum requiritur aliquod auxilium, quod det posse. Et ratio facta id convincit, quia si auxilium tantum est ad facilius, non est necessarium simpliciter: ergo sine illo potest fieri opus: ergo tale auxilium supponit posse, seu potestatem agendi: ergo non dat posse. Ergo Pelagius, qui solum posuit gratiam juvantem ad facilius, non potuit ponere gratiam dantem posse; unde etiam ostenditur non admisisse Pelagium verum auxilium sufficiens gratiæ, quod omnibus vel offertur, vel datur, secundum doctrinam fidei, quia illud auxilium ita est sufficiens, ut sit etiam necessarium ad posse, quia sine illo non solum difficilius, sed etiam impossibilis esset operatio pietatis.

9. *Tertium dubium.* — Hinc veronascitur tertia difficultas, quomodo potuerit Pelagius admittere adiutorium ad posse, et non ad velle, vel operari: quia illud auxilium tantum credidit adjuvare ad facilius; non potest autem intelligi, quomodo sic adjuvet ipsum posse, quin adjuvet velle et agere, quia non adjuvat ipsum posse, nisi quia, cum tale auxilium supponat integram potestatem, conjunctum cum illa fit unum principium facilius operans, et ita quando ab illo fit, opus facilius fit: ergo non potest tale auxilium juvare ipsum posse, quin juvet ad facilius volendum, vel agendum: hoc autem est juvare ad velle, et agere. Sicut habitus acquisitus, qui dat potentiæ facilitatem operandi, adjuvat illam ad facilius assentiendum, vel resistendum tentationi, etc. Accedit quod ipse Augustinus, libro secundo contra duas Epistolas Pelagianorum, capite octavo, inquit expresse: *Pelagius enim facilius dicit impleri quod bonum est, si adjuvet gratia*: implere autem quod bonum est, non fit per solum posse, sed per velle et agere: ergo, secundum Pelagium, facilius homo vult et agit, si adjuvet gratia. Ergo illo modo quo Pelagius

posuit adiutorium gratiæ, non tantum illud posuit ad posse, sed etiam ad velle et agere.

10. *Quid sentiant recentiores in hoc tertio dubio.* — Propter hoc dicunt prædicti moderni, omne illud adiutorium, quod datum voluntati potest in ea manere quasi in actu primo sine consensu libero, et actione ejus, vocari ab August. auxilium ad posse tantum, quia potest esse sine actu secundo illius potestatis, seu voluntatis: auxilium autem ad velle, esse illud tantum quod infallibiliter secum affert velle. Quod ideo dicunt, ut suadeant totam controversiam Augustini cum Pelagianis tandem revocatam esse ad quæstionem de auxilio efficaci, nam Pelagiani semper illud negarunt, etiam si admitterent, ut aiunt, verum auxilium sufficiens, et aliqui eorum, post Pelagium, etiam faterentur ad aliquid esse necessarium. Quæ sententia, intellecta generatim de auxilio efficaci, potest habere fundamentum in August. dicto lib. de Gratia Christi, cap. 41, dum sic de Pelagianis loquitur: *Nos eam gratiam volumus aliquando fateantur, qua futuræ gloriæ magnitudo, non solum promittitur, sed etiam creditur, et speratur, nec solum revelatur sapientia, sed etiam et amatur, nec suadetur solum omne quod bonum est, verum et persuadetur;* quod certe pertinet ad gratiam efficacem: unde subiungit: *Quorum autem sit fides et quibus persuadeatur ut ad eum veniant, satis ipse demonstravit, ubi ait: Nemo venit ad me, nisi Pater, qui misit me, traxerit eum:* et concludit: *Hanc debet Pelagius gratiam confiteri, si vult non solum vocari, verum etiam esse Christianus.*

11. *Vera sententia.* — Dico vero imprimis, licet daremus hanc fuisse Augustini mentem, nihil obstare opinionibus variis catholicorum de auxilio efficaci, quia inter catholicos recte sentientes, non est controversum an efficax auxilium detur volentibus, et credentibus, sed quale illud auxilium sit. E converso autem, licet controversia Augustini cum Pelagianis fuisset de auxilio efficaci, non tamen fuit de modo intelligendi et explicandi tale auxilium: de quo in illis locis Augustinus non tractat. Unde addo nec Pelagium, neque Augustinum in illo sensu fuisse locuto, quem illi moderni intendunt, de efficacia gratiæ de se inducentis et determinantis voluntatem, quia nec de hoc erat controversia, nec Augustinus cum fundamento diceret non posse aliquem esse Christianum, nisi gratiam illam confiteatur. Itaque Pelagius idco dixit, gratiam juvare ipsum posse tantum, et non velle, vel agere, quia

solum putavit esse quamdam gratiam extrinsecam applicantem objectum, et ostendentem illud, non tamen dantem ipsi voluntati virtutem volendi, vel agendi aliquid, vel dantem aliis potentiis vim agendi et operandi. Et ita gratia, secundum Pelagium, non influit in ipsum velle, vel in actionem ipsam liberam, non solum quando voluntas non vult consentire, sed etiam quando vult, et operatur, quia sola sua innata potestate agit, et vult. Et hac ratione, dicebat illam gratiam non juvare ipsum velle, juvare autem posse, quia juvat ad facilius apprehendendum objectum, vel applicandam materiam, circa quam possit voluntas per se operari, si velit. Augustinus autem contra illum contendit, veram adjuvantem gratiam dare vires voluntati ad volendum, et ita cum voluntas pie vult, gratiam juvare ipsum velle, quia in illud influit inducendo et juvando voluntatem. Hoc est enim quod in dicto libro de Gratia Christi, cap. 47, concludit Augustinus: *Si ergo consenserint nobis, non solum potestatem in homine, etiamsi nec velit, nec agat bene, sed ipsam quoque voluntatem, et actionem divinitus adjuvare, ut sine illo adiutorio nihil bene velimus, et agamus, eamque esse gratiam Dei per Jesum Christum Dominum nostrum, in quo nos sua, non nostra, justitia justos facit, ut sit vera nostra justitia, que nobis ab illo est, nihil de adiutorio gratiæ Dei (quantum arbitror) inter nos controversiæ relinquetur.* Controversia ergo inter illos erat, an gratia juvet ipsum velle et agere, hoc enim negabat Pelagius; si autem id concederet, consequenter dicere debuisset voluntatem, quando vult, et quoties vult, indigere hoc adiutorio ad ipsummet velle, et gratiam non solum dare posse, sed etiam velle, et ita nulla controversia relinqueretur.

12. *Quartum dubium.* — *Quid de illo sentiant iidem moderni.* — Ut autem hoc amplius declaratur, quarta dubitatio tractanda est, nimirum, an Pelagius posuerit illud gratiæ adiutorium per verum, et internum auxilium gratiæ excitantis voluntatem, vel cooperantis eum illa. In quo puncto, moderni allegati affirmant Pelagium tandem confessum esse veram internam gratiam per Spiritus Sancti inspirationem, et illuminationem intellectus, et excitationem voluntatis. Idque colligunt ex his que de Pelagio Augustinus refert in libro de Gratia Christi; nam cap. 7 refert Pelagium dixisse: *Nos Dei gratiam non in lege tantummodo, sed et in Dei adiutorio esse confitemur;* explicando autem hoc adiutorium addidisse:

Adjurat enim nos Deus per doctrinam et revelationem, dum cordis nostri oculos aperit, dum futura demonstrat, dum diaboli pandit insidias, dum nos multiformi et ineffabili dono gratiæ cœlestis illuminat. In quibus verbis videtur clare confiteri Pelagius gratiam divinæ illuminationis internæ; nam oculi cordis, non nisi interna illuminatione, aperiuntur; et ineffabile donum gratiæ cœlestis illuminantis, non est nisi interna illuminatio. Et c. 10 refert, ex Pelagio, operari in nobis velle bonum Spiritum Sanctum, *dum nos præmiorum pollicitatione succendit, et cum revelatione sapientiæ in desiderium Dei stupentem suscitât voluntatem, et dum nobis suadet omne quod bonum est, ubi aperte confiteri videtur internam excitationem et suasionem.* Et cap. 24, supponere videtur Pelagium admisisse, fieri in nobis veras revelationes. Et cap. 41 ait Augustinus, Pelagium posuisse gratiam in lege ac doctrina, *quam nobis fatetur, ait, Sancto Spiritu revelari, propter quod et adorandum esse concedit.* Utique, quia, ut Deus, interius loquitur, inspirat, et revelat. Unde infra refert, per orationem petendum esse, ut nobis *doctrina, divina etiam revelatione, aperiatur.* Propter hæc ergo censent dicti auctores, Pelagium saltem in fine ita sententiam correxisse, ut in explicanda interna gratia præveniente, vera et sufficiente, nihil a catholica doctrina discrepaverit, præter hoc quod illam non posuerit ut necessariam, sed tantum ad facilius operandum, aut volendum. Potestque hæc sententia juvari verbis Augustini, Epist. 107, versus finem: *Quomodo dicitur gratia Dei in natura esse liberi arbitrii, vel in lege atque doctrina, cum et istam sententiam Pelagius ipse damnaverit, procul dubio confitens gratiam Dei ad singulos actus dari, eis utique qui jam libero arbitrio utuntur.*

13. *Modernorum illorum interpretamentum Pelagii, nihil facit ad controversiam cum illo.* — De hac vero interpretatione sententiæ Pelagii imprimis dicimus, esto ita sit, nihil ad controversias de gratia, quæ nunc sunt inter catholicos, salva fide, referre: neque inde veram intelligentiam, et explicationem catholicæ doctrinæ de auxiliis gratiæ impediri. Nam si Pelagius veram internam gratiam prævenientem fassus est, in eo non fuit hæreticus, nec erravit; neque enim necesse est ut omnia quæ hæretici dicunt, falsa sint, vel erronea; sufficit enim unus error contra fidem cum pertinacia ad constituendum hæreticum. Erit ergo Pelagius hæreticus, quia negavit necessitatem illius gratiæ, vel quia cooperantem non admisit,

non quia veram excitantem fassus est, si illam, saltem ut utilem, cognovit. Deinde addimus, ex verbis citatis et relatis ex Augustino, non colligi Pelagium cognovisse gratiam internam, quæ legem et doctrinam excederet: imo verisimilius esse illam ignorasse, seu negasse. Quod nullo modo melius quam verbis ejusdem Augustini probamus. Ille enim in multis libris contra Pelagium nos admonet, caute esse legenda verba Pelagii, *qui tanto fallit occultius, quanto ea exponit versutius.* Nam sub ambigua generalitate gratiæ, quid sentiret, abscondebatur, et sub encomiis gratiæ invidiam fugiebat, ut ait idem Augustin. dicto libro de Gratia Christi, cap. 37, et lib. 2 de Peccato origin., cap. 8, 9, 16 et 17; et lib. de Grat. et lib. arbit., cap. 11.

14. *Notanda verba Augustini.* — Et quod amplius est, hoc ipsum in eisdem locis in contrarium allegatis adnotavit Augustinus; nam in dicto libro de Gratia Christi, cap. 2, dicit, licet Pelagius professus aliquando fuerit, gratiam ad singulos actus dari, nihilominus nunquam id de vera interna gratia, quæ datur per administrationem spiritus internam, id intellexisse; sed, quia in singulis momentis et actibus potest homo juvari memoria exempli, et remissionis præteritorum peccatorum, et promissionis æterni præmii, in quibus ille gratiæ adiutorium constituebat, ideo aiebat ad singulos actus posse juvare. Et in capit. 7, post verba Pelagii, ex illismet colligit Augustinus, *eum illam gratiam confiteri, qua demonstrat et revelat Deus, quid agere debeamus, non qua donat et adjurat, ut agamus.* Et in cap. 10 convincere vult, ex verbis Pelagii, cum non admisisset aliam gratiam præter doctrinam, quia *ad doctrinam pertinet etiam quod sapientia revelatur, ad doctrinam pertinet cum suadetur omne quod bonum est.* Et cap. 13 habet verba notanda: *Si gratia doctrina dicenda est, certe ita intelligatur, ut altius, et interius credatur, Spiritum Sanctum illam infundere, non solum per eos, qui plantant et rigant extrinsecus, sed etiam per se ipsum, qui incrementum ministrat occultius, ita ut non ostendat tantummodo veritatem, sed etiam impertiat charitatem.* Et ideo Augustinus, in eodem lib., cap. 31 et 41, ex illa eadem Pelagii confessione, quod Spiritus Sanctus nobis legem et doctrinam revelat, concludit ipsum in lege et doctrina constituisse illud auxilium, quo possibilitatem naturalem perhibebat adjuvari. *Quia nunquam recedit ab illa verborum ambiguitate, quam discipulis suis ita possit exponere, ut*

auxilium gratiæ credant, qua naturæ possibilitas adjuvetur, nisi in lege atque doctrina.

15. *Excitantem gratiam Pelagius semper negavit.*— Præterea, lib. de Prædestin. Sanctor., cap. 1, referens Augustinus Massilienses agnovisse veram excitantem gratiam, dicit, in eo a Pelagio discessisse: ergo sentit Pelagium illam etiam veram gratiam negasse. Denique, in l. 1 contra duas Epistol. Pelagianorum, cap. 18, cum Julianus dixisset *hominem propria voluntate, aut bonum facere, aut malum: in bono vero opere a Dei gratia semper adjuvari, in malum vero diaboli suggestionibus incitari*, illum acute redarguit Augustinus dicens: *Vos in bono opere sic putatis adjuvari hominem gratia Dei, ut in excitanda ejus ad bonum opus voluntate nihil eum credatis operari, quod satis ipsæ tua verba declarant. Cur enim non dixisti hominem, Dei gratia, in bonum opus excitari, sicut dixisti in malum, Diaboli suggestionibus, incitari?* Ergo ex sententia Augustini, Pelagiani nullam ponebant gratiam, per quam Deus ad excitandam voluntatem ad bonum operetur. Quocirca, licet Pelagius fateretur dari hominibus divinam revelationem, sive externam, sive internam, eamque nomine gratiæ, illuminationis, et aliquando excitationis, vel suasionis appellaret, nihilominus veram internam gratiam excitantem, quam peculiari modo et proprietate inspirationem et illuminationem appellamus, nunquam agnovit, nec confessus est.

16. *Præter donum revelationis, necessarium est donum bonæ voluntatis quod Pelagius negabat.*— Quod ut intelligatur, oportet advertere, nomine revelationis solum comprehendere sufficientem objecti credendi propositionem, quæ, sive per externam prædicationem et operationem, sive per solam internam fiat, inter dona gratiæ computanda est. Est tamen donum pertinet ad legem, vel doctrinam, præter quod requiritur donum voluntatis bonæ, per quam et celestis doctrina discitur, ut sic dicam, seu recipitur, et lex impletur. Pelagius ergo admittit primum donum, et in illo solo ponebat gratiam Dei, sive illud nomine legis, sive nomine doctrinæ, aut revelationis, aut illuminationis cordis, vel adjutorii gratiæ significaret. Et de hoc convincitur ab Augustino in locis allegatis. Unde nemo negat admisisse Pelagium, revelationem divinam fidei, tam externam, quam internam, quatenus se tenet ex parte objecti, et pertinet ad illius applicationem, seu sufficientem propositionem. Nam hæc revelatio, non solum in angelis, sed etiam

in hominibus, qui ante Christi adventum immediate a Deo didicerunt, necessaria fuit. Postquam autem novissime locutus est nobis in Filio, raræ sunt hujusmodi revelationes mere internæ, præsertim ad communem fidem pertinentes, nam verbo suo Christus fidem tradidit, et Apostolicam Ecclesiam docuit, et per Ecclesiam singulos fideles instruit, et Ecclesiæ definitio virtutem habet cujusdam revelationis.

17. *De dono illo bonæ voluntatis, id est, gratia excitante et auxiliante, agitur contra Pelagium.*— Parum vero refert ad gratiæ auxiliantis necessitatem, quod revelatio fidei tantum interius, vel per sensus exteriores fiat; semper enim præter revelationem objecti, necessaria est nova gratia juvans intellectum ad doctrinam revelatam convenienti modo concipiendam, et cum inclinatione, et affectione voluntatis acceptandam, et suscipiendam, et hanc vocavit Augustinus gratiam, per quam sanctificamur et justificamur, et qua Deus in nobis facit bonas voluntates. Eamque distinxit in excitantem et adjuvantem, ut infra videbimus, ubi etiam ostendemus, hanc ipsam gratiam posse esse non tantum efficacem, sed etiam sufficientem; et utramque esse necessariam ultra doctrinam et revelationem ex parte objecti. In quo etiam Pelagius erravit, nam solam revelationem et doctrinam dicebat sufficere, ut possit homo credere et bene operari, si velit. Aiebat enim, ut refert Augustinus Epist. 107, *per legem suam, et per Scripturam suam Deum operari, ut velimus*; et infra: *Operatur quippe ille, dicens, quantum in ipso est, ut velimus, cum nobis nota fiunt ejus eloquia; sed, si eis acquiescere nolumus, nos, ut operatio ejus nihil in nobis prosit, efficiamus.* Solam ergo notitiam eloquiorum Dei putabat esse sufficientem gratiam, ut homo posset credere, et operari quodcumque bonum, si velit: aliam ergo gratiam, quæ sit propria gratia internæ vocationis, et inspirationis, non agnovit, neque ut necessariam, neque ad facilius volendum, nec dari posse putavit, vel sine læsione libertatis, vel sine acceptione personarum.

18. *In scriptis Pelagii prædictæ gratiæ mentio non fit.*— Denique, ex scriptis Pelagii, quæ Augustinus aliquando commemorat, solum habemus Epistolam ad Demetriadem, que in 2 tom. operum Augustini in Appendice est 17, et in illa magis quam in aliis libris visus est Pelagius gratiam confiteri, ut ex eodem Augustino sumitur, lib. 1 de Gratia Christi, cap. 22, 27 et 37, usque ad 40. Et nihilominus, in illa Epistola, nullum verbum inveni-

tur, in quo veram et internam gratiam adjuvantem aut moventem declaret, aut satis indicet. Nam imprimis totus in hoc incumbit, ut vini naturæ in virtutum actibus ostendat, ut ex cap. 4, 18 et aliis colligitur; et ideo cap. 16 reprehendit eos qui dicunt: *Non possumus, homines sumus, fragili carne circumdamur, quia Deus impossibilia non jubet, nec quispiam melius quid possimus, intelligit, quam qui ipsam virtutem nobis nostri posse donavit.* Deinde cum multa documenta ad perfectionem comparandam Demetriadi tradat, sæpè inculcat Scripturarum scientiam, et lectionem, præceptorum Dei memoriam et considerationem. Unde cap. 23 sic inquit: *Quæ paranda sunt memoriæ penitus insere, eaque jugi meditatione conserua, quæ maturanda sunt frequenter revolue, ut divinum hoc studium et cælestis schoia, et mores simul virginis ornent, et sensum, tradantque tibi cum sapientia sanctitatem.* Quod totum pertinet ad doctrinam, et studium humanum, supposita revelatione per Scripturas. Quo etiam pertinet illud cap. 26: *Propter quod maxime sanctarum tibi Scripturarum studium,* etc. Ad auxilium autem per exempla pertinet illud cap. 23: *Nunc te ordo instruat cælestis historie;* et infra: *Nunc angelica, et apostolica perfectio te Christo in omnium morum sanctitate conjungat.* Cap. autem 38 addit: *Ne dicas, grandis labor est, sed respice quod promissum est.* Quæ documenta, recte intellecta et servata, bona quidem sunt; tamen quod in eis humana industria et diligentia sufficere credatur, hoc in eis reprehenditur: unde vix necessitatem, vel utilitatem orationis inter illa documenta posuit, nam licet semel aut iterum orationem consulat, utilitatem tamen ejus non in petitione divini auxilii, sed in illo studio divinæ doctrinæ, vel recordatione præceptorum, aut promissionum Dei constituit. Unde in cap. 25 ait resistendum esse diabolo, faciendo Dei voluntatem, ut divinam mereamur gratiam, qua facilius nequam spiritui, auxilio Sancti Spiritus, resistamus. Explicans autem hoc auxilium in c. 27 ait: *Tunc senties quantum ad ejus amorem adjuvet te sapientia, et quantum sit in te divinæ legis auxilium,* in quibus omnibus nullum indicium veri interni auxilii reperitur.

19. *Verbotenus Pelagius circa efficacem magis quam circa sufficientem gratiam erravit, et re ipsa utramque sustulit.* — Atque ex his etiam intelligitur quod, licet in specie verborum Pelagius magis erraverit circa efficacem gratiam auxiliantem, quam circa sufficientem; in re

tamen æque in utranque impegisse, et utramque de medio sustulisse. Efficacem enim gratiam, *qua Deus ita interiorius suadet, ut persuadeat, vel ita movet sensum, ut accommodet assensum,* quam Augustinus vocat efficacem, altam, et secretam; hanc, inquam, gratiam efficacem omnino Pelagius negavit, non solum ut necessariam, sed etiam ut possibilem, quia putavit esse contrariam libertati; gratiam autem sufficientem verbis admittere visus est, quatenus dicebat Deum, sua revelatione, doctrina, vel lege, suadere hominem, et sufficienter ostendere viam salutis, ut possit homo consentire, si velit, vel dissentire, si nolit. Unde ut absolute velle possit, nihil aliud, præter legem et doctrinam, requirebat, et ita in re ipsa veram gratiam sufficientem internam negabat, nam hæc non est lex, nec doctrina, sed divina inspiratio, et spiritualis illuminatio, ut recte docuit Concil. Trident., ut infra videbimus.

20. *Dubiolum.* — Accedit quod etiam de illa qualicumque gratia, quam putabat Pelagius esse sufficientem, non credidit esse necessariam, sed tantum utilem. In quo non immerito aliquis hæere poterit, si illa gratia non erat aliud quam revelatio objecti fidei, vel divinæ legis, quomodo potuerit Pelagius negare esse necessariam; quid enim magis necessarium ad credendum, quam veritatis credendæ revelatio, vel magis necessarium ad bonum operandum, quam notitia legis? Sed esto verum sit non ignorasse Pelagium revelationem esse necessariam ad credendum, et notitiam legis ad servandam illam, nihilominus existimo dixisse illam gratiam esse tantum datam, ut homo facilius possit legem naturalem servare, et non peccare, et esse sanctus et innocens, quia licet nullam revelationem haberet homo, ac proinde non crederet, posset per rationem naturalem Deum cognoscere, et licet non haberet divina præcepta positiva specialiter tradita, posset, ut putabat, servare naturalem legem, per quam justificaretur apud Deum, quia *factores legis justificantur,* ad Rom. 2. Et consequenter, per easdem vires naturales, posset consequi vitam æternam: nam hæc promissa est servantibus mandata, 1 Matth. 19. Ad hos ergo effectus dicebat, etiam illam suam gratiam non esse necessariam, sed ad facilius operandum juvare. Et præterea, licet revelationem putaret necessariam ad credendum, et notitiam legis divinæ ad illam servandam, præter illam, nullam aliam gratiam requirebat, vel ut homo possit, vel ut velit credere, aut servare legem; imo neque de

facto putat dari aliam gratiam ad fidem, vel legis divinæ observationem etiam facilius præstandam, præter revelationem et doctrinam, ut declaratum est. Atque in his consistere videtur proprius error Pelagii contra divinam gratiam; in quo vero etiam cum Semipelagianis senserit, in cap. 16 explicabo.

CAPUT IV.

AN PELAGIUS NON SOLUM AUXILII GRATIÆ, SED ETIAM GENERALIS DEI CONCURSUS NECESSITATEM, AD HUMANAS ACTIONES NEGAVERIT?

1. *Pars negans suadetur.* — *Primo confirmatur.* — *Secundo confirmatur.* — Quæstionem hanc apud antiquos doctores disputatam non invenio, moderni vero illam agitare cœperunt. Et quanquam per se spectata ad disputationes de gratia pertinere non videatur, ad intelligendum quo sensu Patres, loquentes contra Pelagium, generales aliquas locutiones proferant, conferre potest, et ideo breviter inquirenda est. Et imprimis nullum apparet sufficiens fundamentum, ut hunc errorem Pelagio tribuamus. Nam D. Augustinus, accurate referens illius errores, nunquam dixit Pelagium, generalem Dei efficientiam cum omnibus causis negasse: ergo non est cur dicamus illam negasse; ergo neque verisimile est illam in operibus liberi arbitrii negasse. Antecedens notum erit legenti Augustinum lib. de Hæres., in 88, ubi dicit Pelagium negasse veram gratiam, qua salvamur, concessisse vero gratiam liberi arbitrii, seu creationis, et sub ea errorem suum occultare voluisse, ut latius dicit Epist. 95 et 103. Unde in Conciliis etiam nunquam de hoc errore damnatus est, sed solum quod veram gratiam, quæ per Christum datur, negasset. Consequentia prima probatur, quia si in hoc Pelagius errasset, neque Augustinus omisit, neque Concilia sine damnatione relinquerent. Specialiter autem probatur secunda consequentia, quia non est major ratio dependentiæ a concursu Dei in aliis agentibus aut facultatibus creatis, quam in creata voluntate: ergo si Pelagius in cæteris causis seu effectibus Dei concursum non negavit, non est verisimile specialiter in operibus liberi arbitrii negasse. Eo vel maxime quod Augustinus nec generaliter de omnibus causis secundis, nec specialiter de voluntate creata hunc errorem in Pelagio notat. Et confirmatur, quia Augustinus alio loco illum errorem sine ulla mentione Pelagii confutat, ut libr. 5 Genes. ad

litter., cap. 20. Ex quo etiam constat antiquiorem esse errorem Pelagii, et ab illo diversum; unde confirmatur, quia licet Durand. in eo errore fuerit in 2, distinct. 1, quæst. 5, nec Pelagianus propterea censetur, nec simpliciter hæreticus: ergo error ille nec fuit Pelagii, nec est damnatus a Conciliis inter Pelagii errores. Tandem confirmatur, quia alias, ex definitionibus Conciliorum contra Pelagium, non habemus veræ gratiæ necessitatem, omnes enim eludi possent, de adjutorio Dei per generalem concursum illas interpretando.

2. *Pars affirmans auctoritate fulcitur.* — At vero contrarium tenet et Bellarm., l. 4 de Grat. et lib. Arb., cap. 4; et Abul., Matth, 19, q. 178, ad 6, non solum docet Pelagium negasse necessitatem generalis concursus Dei ad bona opera liberi arbitrii, sed etiam illum concursum comprehendere nomine gratiæ, ut etiam ait q. 179, ad 7, quia gratis a Deo datur, unde sentit Concilia definitiva contra Pelagium, nomine gratiæ, hunc etiam concursum comprehendere. Omissa vero nunc hac posteriori parte, priorem indicat etiam Paulus Oros., Apolog. de Lib. arb., circa medium, dum ait Pelagium constituisse gratiam in solo libero arbitrio generaliter hominibus concessa, et de aliis causis dixisse, *Deum custodire naturam, quam semel bene disposuit, et elementariis cursibus constitutis, inde facere Deum, quæ facit.* Citatur etiam Hieron., qui in Epist. ad Ctesiph. his verbis refert Pelagii errorem: *Dei est gratia, quod propriæ nos condidit voluntatis, et libero arbitrio contenti sumus, neque ultra ejus indigemus auxilio, ne si indigerimus, liberum frungatur arbitrium.* Et infra dicit: *Dei potentia factos se esse jactant, qui nullius ope indigent.* Et iterum ait, Pelagianos ita posuisse gratiam in libero arbitrio, *ut non, per singula opera, Dei nitamur et regamur auxilio:* ubi nomine auxilii etiam generalem concursum comprehendere videtur, ac subinde asserere, illum etiam Pelagium negasse. Nam statim inducit Pelagium sacrilege (ut ipse ait) interrogantem: *Numquid si voluero curvare digitum, movere manum, ambulare, etc., semper mihi auxilium Dei erit necessarium?* Similem interrogationem habet l. 1 contr. Pelag., circa principium, cui cum Atticus, id est, Hieron., respondisset: *Juxta meum sensum non posse, perspicuum est, scilicet, hominem movere manum, aut calammum temperare sine adjutorio Dei;* replicat Crisobul., id est, Pelagius: *Si absque Deo, et nisi per singula ille me jecerit, nihil possum agere, nec pro bonis me operibus*

juste coronabit, neque affliget pro malis, sed in utroque suum, vel recipiet, vel damnabit auxilium. Ubi clare loquitur de auxilio bonis et malis operibus communi, quod non est, nisi generalis concursus. Objiciente autem Attico *non ita esse datum nobis liberum arbitrium, ut per singula opera Dei tollatur adminiculum,* respondet Critobul.: *Non tollitur Dei adiutorium, cum creaturæ in semel dati liberi arbitrii gratia conserventur.* Ex quibus verbis satis constat, negare Pelagium omnem alium Dei concursum, præter liberæ voluntatis conservationem.

3. Præterea, Augustinus nonnullis in locis vult, etiam bona opera naturalia divino adiutorio esse tribuenda: imo, licet male ab homine fiant, quatenus ipsa in se bona sunt, Deo auctore fieri. Sic l. 4 contr. Julian., c. 3, circa finem, cum dixisset misericordiam Dei per se ipsam naturali compassione bonam esse, illo tamen bono male uti qui infideliter utitur, et hoc bonum male facere, qui infideliter facit, adjungit: *Etiam ipsa opera quæ faciunt infideles, non ipsorum esse, sed illius qui bene utitur malis, ipsorum autem esse peccata, qui bona male faciunt.* Talia autem opera, ut bona sunt, non sunt a Deo, nisi per generale auxilium, seu concursum: ergo sentit Augustinus Pelagianos negasse talia opera esse a Deo, ac subinde negasse generalem Dei concursum. Et circa principium ejusdem capituli, agens de naturalibus virtutibus, et facultatibus bonis, dicit ad Julianum: *Quanto satius hæc ipsa in eis dona Dei esse fatereris, cujus occulto iudicio alii tardissimi ingenii, et ad intelligendum quodammodo plumbei, alii obliquosi, alii acuti, memoresque nascuntur, etc., quæ prosequitur ut concludat: Quanto ergo tolerabilius illas, quas dicis in impiis esse virtutes divino muneri potius, quam eorum triluceres tantummodo voluntati?* Priora vero bona naturæ non alia ratione sunt dona Dei, nisi propter generalem concursum: ergo saltem hoc modo vult Augustinus concludere contra Julianum virtutes morales esse dona Dei; ergo supponit Julianum negasse, hoc etiam modo esse a Deo, sed a nostra sola voluntate. Confirmatur hoc ex eodem Augustino, Epistol. 130 dicente: *Licet Polemones, hortatu Xenocratis, a vitio libidinis revocatus, non Deo fuerit acquisitus, sed tantum a dominatu luxuriæ liberatus, tamen ne ipsum quidem, quod in eo melius factum est, humano operi tribuerim, sed divino. Ipsius namque corporis, quod est infimum nostrum, si qua bona sunt, sicut forma, et vires, et sa-*

lus, et si quid ejusmodi est, non sunt, nisi a Deo creatore, ac perfectore naturæ; quanto magis animi dona donare nullus alius potest. Hæc autem corporis bona a Deo solum sunt per generalem concursum: ergo hoc saltem vult concedi Augustinus de bonis moribus naturalibus: ergo e converso hoc etiam videntur negasse Pelagiani, dixisseque Deum esse factorem humanæ naturæ, non vero perfectorem. Et hoc etiam indicat libr. de Grat. Christi, cap. 3 et 6, ubi refert Pelagium solam possibilitatem dixisse habere nos a Deo, non voluntatem, vel actionem, quia non credebat Deum esse cooperatorem nobiscum.

4. *Ratione etiam fulcitur.* — Ratione potest hæc sententia suaderi, quia hoc est consentaneum generalibus verbis Pelagii, et aperte sequitur ex fundamento erroris ejus. Utrumque ostenditur ex decimo ejus articulo, damnato in Concilio Palæstino: *Non est liberum arbitrium, si Dei indiget auxilio.* Hæc enim verba absoluta et indefinita, liberum arbitrium, tam in rebus divinis, quam in moralibus, et naturalibus operans, comprehendunt, imo tam bene quam male operans: ergo in omnibus negavit necessitatem auxilii divini, et nomine *auxilii* omnem Dei influxum, omnemque cooperationem, etiam per generalem concursum, comprehendit, quia in naturalibus, et præsertim in malis, nullum aliud auxilium creditur necessarium: unde cum in eodem articulo subjungit: *Quoniam in propria voluntate habet unusquisque facere, vel non facere;* exclusivam notam subintellexisse videtur, utique in sola propria voluntate, quæ in suo velle libero non potest ab alio dependere, nam hic sensus necessarius est, ut ex illa causali propositione altera pars inferatur: unde fundamentum illius fuit, dependentiam ab auxilio alterius, etiam ipsius Dei, repugnare libertati arbitrii. Quod fundamentum, si verum esset, æque procederet in omnibus operibus voluntatis, etiam naturalibus et malis, quia, servata proportionem, similis est dependentia naturalium voluntatum a concursu generali, dependentiæ supernaturalium a concursu gratiæ: unde fere eadem difficultas in conciliando usu libero morali cum præscientia, et providentia, et concursu generali, quæ in concordia gratiæ cum libero arbitrio invenitur, ut postea videbimus: ergo si Pelagius, hac difficultate superatus, negavit gratiam, ne libertatem negaret, eadem etiam negavit concursum generalem cum libero arbitrio, ne illud in naturalibus actibus tollere videretur.

5. *De cæteris etiam causis secundis sensisse Pelagius videtur non egere concursu primæ.* — Hinc ergo ulterius potuit, et debuit Pelagius progredi, et eandem independentiam a Dei concursu in actionibus naturalium causarum ponere. Nam, licet ratio libertatis in aliis non inveniatur, aliunde potest sufficiens æquiparatio fieri. Si enim voluntas creata, etiamsi sit causa secunda, non pendet in sua operatione ab actuali influxu causæ primæ in suam actionem, recte sequitur causam secundam, habentem proximam virtutem sufficientem in suo ordine ad suum effectum, posse illum efficere sine actuali concursu causæ primæ in eandem actionem, quia, licet voluntas propter usum libertatis putetur magis indigere hac exemptione (ut sic dicam), si tamen illam habet, non est quia est libera, sed quia virtutem habet sufficientem ad suam actionem; unde non minus in naturalibus actibus, seu necessariis, quam liberis illam habebit: ergo etiam aliæ causæ secundæ, licet naturaliter agant, quia virtutem proximam sufficientem habent in suo ordine, eandem independentiam habebunt: ergo verisimile est ita de omnibus causis secundis Pelagium sensisse, earum nimirum actiones non esse immediate a Deo, sed tantum mediate, quatenus dedit virtutem agendi, et illam conservat; sicut Durandus sensit.

6. *Didaci, Alvarez et aliorum opinatio de Pelagio in hoc puncto.* — In hoc puncto, dicunt aliqui Pelagium ad actus ordinis naturalis non negasse influxum Dei cooperantis, seu concurrentis cum causis secundis, propter ea quæ priori loco posuimus. Addunt vero negasse, esse necessarium Dei adiutorium, quo præmoveret et operatur, seu præoperatur, ut operemur, ita enim loquuntur. Et hoc posterius colligunt ex verbis Hieronymi in dicta Epistola ad Ctesiphont., ubi Pelagium introducit adversus Deum se extollentem, et dicentem: *Recede a me, quia mundus sum, non habeo te necessarium: dedisti enim mihi semel arbitrii libertatem, ut faciam quod voluero; quid rursum te ingeris, ut nihil possim facere, nisi tu in me tua dona compleveris?* Intelligunt enim his verbis voluisse negare Pelagium, non concursum concomitantem, sed quoddam prævium adiutorium, quo Deus virtutem creati arbitrii, etiam in naturalibus, complet, et applicat ad exercitium actus. Et ad hunc sensum trahunt verba Hieronymi.

7. *Ita fellitur.* — Veruntamen, si solum illud complementum ad actus naturales negasset Pelagius, non esset cur in eo reprehenderetur,

quia verum quidem est illam præviam applicationem, seu complementum, non esse necessarium in causis secundis naturaliter operantibus ut principalibus causis proximis suorum effectuum, nam ad illos habent sufficientem et completam virtutem in suo ordine causarum secundarum, solumque indigent generali influxu et cooperatione Dei, ut in lib. 1 et 2 de Auxiliis, ex professo probavimus, et infra in libro tertio iterum dicemus. Nec etiam voluntas ratione suæ libertatis indiget illo complemento, ex parte suæ virtutis naturalis ad actus illi proportionatos, quia neque propter libertatem habet in suo ordine virtutem minus completam, quam aliæ causæ naturaliter agentes, nec illud complementum per modum applicationis ad exercitium inservit usui libertatis, sed potius illum impedit, ut eodem libro dicemus. Nec ex verbis Pelagii, quæ Hieronymus refert, sensus ille colligitur, ut statim ostendam. Neque testimonia Scripturæ, quæ Hieronymus inducit ad illud dictum Pelagii impugnandum, illi sensui deserviunt, ut est illud Psalm. 24: *Oculi mei semper ad Dominum, quoniam ipse exellet de laqueo pedes meos*; et Jeremiæ illud capite decimo: *Non est in homine via ejus, et a Domino gressus ejus dirigentur*, ut etiam dicitur Psalmo 36. Hæc enim et similia a nemine intelliguntur de complemento virtutis ad agendum, quo indigeant causæ secundæ, sed de peculiari gubernatione divina, qua omnia quæ creavit, gubernat et administrat, et specialiter res humanas regit, aut prævenit, ordinando, aut permettendo, et cum omnibus, juxta operis qualitatem, concurrente. Et hæc est maxima dependentia, propter quam oramus, et petimus ut nos Deus regat, et dirigat maxime in operibus bonis, et in cavendis malis, eorumque occasionibus, et causis etiam extrinsecis præveniendis, et tollendis. Hoc autem genus providentiæ, et dependentiæ nostrarum actionum ab illa necessarium omnino est, sive illud adiutorium, seu prævium complementum virtutis naturalis ponendum sit, sive non. Nam etiamsi illud admitteretur, daretur per modum generalis concursus, et tanquam debitus singulis agentibus, hoc vel illo modo applicatis; unde non aliter esset necessaria oratio propter illud, quam propter concursum concomitantem, neque magis propter unum quam propter aliud diceretur Deus actiones nostras dirigere aut regere. Denique ad hoc regimen necessarium non est illud genus auxilii per modum complementi virtutis propriæ, ac per se, et physice activæ in naturali-

bus, sed ut intrinsecum, et connaturale ipsis causis secundis, earumque virtutibus dari potuit.

8. *Quæstionis expeditio.* — Mihi ergo imprimis videtur, si Pelagius negavit necessitatem auxilii divini, physice et proprie coefficientis in nobis, vel nobiscum actus naturales, non aliud quam concursum generalem ad actus naturales liberi arbitrii negasse; neque hoc esse alienum a verbis ejus, licet incertum. Probo singulas partes, et primam quidem ex dictis probatam suppono, quia ad singulos actus ordinis naturalis voluntatis non est necessaria alia efficientia Dei, propria, et per se ipsam voluntatem, vel actum ejus, præter efficientiam Dei cum voluntate ejusdem actus et actionis, in qua consistit concursus generalis, et simultaneus: ergo si Pelagius aliquam talem efficientiam negavit esse necessariam ex parte Dei, de illo concursu intellexit. Quod etiam indicant verba quibus Hieron., Dialog. 4 cont. Pelag., parum a principio, hanc eorum argumentationem refert: *Si in hominibus ille cooperatur, non est meum, sed ejus, qui adjuvat, etc.*, ubi verbum cooperandi auxilium simultaneum indicat. Et ex parte sequenti hæc confirmabitur.

9. Altera ergo pars probatur, quia Pelagii verba: *Nisi tu in me tua dona compleveris*, non solum intelliguntur de complemento virtutis in actu primo, ut sic dicam, sed maxime de complemento donorum in actu secundo, seu per actualem efficientiam ipsiusmet voluntatis seu volitionis: nam alia verba, *Recede a me*, omnino remouent Deum tanquam necessarium ut voluntas compleatur, sive in virtute volendi, sive in ipso velle. Item illa, *Non habeo te necessarium*, conjuncta sequentibus, *ut faciam quod voluero*, plane excludunt omnino Deum, sive ut cooperantem, sive ut consummatorem virtutis volendi. Nam si Pelagius crederet ad volendum esse necessarium Deum, saltem ut coagentem voluntati, non posset absolute dicere Deo: *Recede a me*; aut, *non habeo te necessarium*; aut, *quid rursum te ingeris*? Ergo cum Hieronymus tradat Pelagium ita exclusisse necessitatem divini auxilii, ut verba illa virtute saltem protulerit, profecto non est improbabile ita sententiam illius intellexisse. Et ita, cum subdit Pelagium quasi irridendo dixisse: *Si voluero curvare digitum, movere manum, etc., semper mihi auxilium Dei necessarium erit?* de omni auxilio etiam per modum generalis concursus id intellexisse videtur: unde in Epist. ad Demetriad. ait *homines sine Deo*

operando, virtute ostendere, quales a Deo facti sunt, quasi sola sua virtute sine ullo Dei concursu id faciant. Eodem modo August., dicta Epist. 406, circa finem, refert hunc errorem: *Non esse liberum arbitrium, si Dei indiget auxilio, quoniam in propria voluntate habet aliquis facere, vel non facere.* Inferius vero contra Pelagium ipse subdit: *Fateatur esse liberum arbitrium, etiamsi divino indiget adiutorio.* Et lib. de Gratia Christi, cap. 3, de Pelagio inquit: *Voluntatem, et actiones nostras esse asserit, atque ita nobis tribuit, ut non, nisi a nobis, esse contendat.* Et in cap. 6 ait Pelagium negasse Deum cooperari homini, cum operatur. Idem significat Paulus Orosius, lib. de Arbitrii libertate, quem contra Pelagium Augustini et Hieronymi temporibus scripsit: nam circa medium illius ait, illum negasse non solum illam gratiam quam Deus largitur Ecclesiæ suæ, sed etiam generalem cooperantem gratiam, quam Deus quotidie, per dies et momenta, cunctis et singulis ministrat; ita enim appellat generalem concursum. Denique D. Thom., etiam in 2, distinct. 28, quæst. 1, artic. 3, in corp., ait, si gratia sumatur pro divina voluntate gratis in nobis omnia bona causante, non posse hominem sine illa implere præceptum, etiam quoad substantiam. Quod intelligit D. Thom. de concursu Dei generali, ut in art. 1 aperte declaraverat. Et tamen subdit in eodem art. 3: *Et ideo Pelagius erravit, qui simpliciter impleri præcepta legis posse sine gratia posuit.* In quibus verbis aperte sentit Pelagium etiam concursum Dei generalem negasse: unde probabilis satis est hæc sententia. Est tamen incerta, tum propter argumenta priori loco posita, tum quia ille error Pelagii non confutatur a dictis Patribus, ostendendo necessitatem generalis concursus Dei, sed ostendendo dependentiam liberarum actionum a regimine divinæ providentiæ gratuita et voluntatis circa singula opera: potuit autem Pelagius negare necessitatem hujus specialis auxilii, etiamsi generalem concursum non negaverit. De hoc ergo puncto, et quid Pelagius de generali concursu senserit, nihil definite asserimus, quia, ut dixi, non satis constat, neque etiam ad veram doctrinam de gratia tradendam censeo esse necessarium.

10. *Regula ad Sanctos Patres exponendos, dum de gratia loquuntur contra Pelagium.* — Ne tamen aliquisumat occasionem errandi in exponendis Patrum vel Conciliorum definitionibus, adverto eos, dum contra Pelagium pu-

gnant pro necessitate gratiæ, de propriissima gratia, ut est supernaturale donum, non debitum naturæ, loqui, non proprie ac per se de concursu generali. Hoc patet ex dictis supra cap. 3, et ex testimoniis Scripturæ, quæ contra Pelagium Patres et Concilia adducunt. Quapropter, si generalius interdum exponantur, ita sunt accommodanda concursui generali, ut gratia propria non excludatur. Hoc declaro ex D. Thom. in 2, d. 28, quæst. 1, art. 1, ad 3, ubi, tractans verba Augustini, *Nemo potest aliquod bonum velle, nisi iuretur a Deo*, l. 1 ad Bonif., cap. 3, illa imprimis explicat de adjutorio generalis concursus, dicens: *Quod Deus non tantum nos jurat ad bene agendum per habitum gratiæ, sed etiam interiorius operando in ipsa voluntate sicut in qualibet re operatur*, licet postea etiam explicet de auxilio gratiæ et bono meritorio. Idemque D. Thom., Joann. 15, lect. 1, cum partitione accommoda exponit verba illa: *Sine me nihil potestis facere. Opera enim* (inquit) *nostra aut sunt virtute naturæ, aut ex gratia divina. Si virtute naturæ, cum omnes motus naturæ sint a verbo Dei, nulla natura ad aliquid faciendum moveri potest sine ipso. Si vero virtute gratiæ, cum ipse sit auctor gratiæ, nullum opus meritorium sine ipso fieri potest.* Et aliqui theologi ita intellexerunt canon. 7 Concil. Araus., ut ibi Carranza refert in Summa Conciliorum, quod ille non reprobatur, licet aliam expositionem magis probet, de quo canone infra videbimus.

11. *Exemplo probatur prædicta regula.* — Possumus etiam in exemplum afferre decimam propositionem in Conc. Palæstin. definitam contra Pelagium, *liberum esse arbitrium, etiamsi divino indigeat adjutorio*: illa enim universalis est, et cum proportione ad naturale et supernaturale adjutorium in diversis operibus liberis applicanda; tum quia verba generalia sunt; tum etiam quia propositio facta est in sensu contrario et proportionato ad repellendam propositionem Pelagii. Præterea Hieronymus supra, contra Pelagium objicit verba Jacobi 4: *Ecce nunc qui dicitis: Hodie et crastinum ibimus in illam civitatem, etc.*, pro eo, ut dicatis, *si Dominus voluerit*, ubi clare loquitur Jacobus de dependentia, quam a Dei voluntate et providentia habemus, etiam in naturalibus operibus, quæ solum ex generali concursu, ac providentia pendent. Sic etiam dicere solent Patres, pluviam esse donum Dei, juxta illud: *Et pluit super justos et super impios*, cum tamen donum illud ordinarie

sit ex generali providentia, et cum generali concursu causarum, licet interdum ac sæpe possit ex speciali Dei voluntate fieri, etiam cum immutatione generalis concursus causarum. Quoties igitur verba Patrum generalia sunt, cum proportione possunt ad actus naturales et supernaturales, et concursum generalem vel specialem applicari. Quando vero de auxilio gratiæ tractant, cum proprietate de vera gratia et speciali beneficio intelligenda sunt, juxta superius dicta. Idemque est quando in particulari loquuntur de Spiritu Sancti inspiratione, illuminatione, vocatione, vel similibus terminis, qui speciales modos, seu species propriæ gratiæ significant, ut in concursu materiæ latius dicemus.

CAPUT V.

QUÆ FUERIT SENTENTIA ERRORVE SEMIPELAGIANORUM, ET QUI EJUS AUCTORES VEL SECTATORES?

1. *Unde sumpserint Semipelagiani errandi occasionem, narratur.* — Proponitur eorum error. — Hujus erroris notitiam primi omnium Prosper Aquitanus, et Hilarius Arelatensis in Epistolis ad Augustinum, nobis tradiderunt. Cum enim Augustinus, in libris contra Pelagium pro gratia Dei pugnando, non solum necessariam esse ad pie et sancte vivendum, sed etiam omnino gratis dari, nullumque humanum meritum illam antecedere docuisset, eo tandem pervenit, ut ad solam divinam electionem et prædestinationem totum humanæ salutis negotium revocare videretur. Unde factum est ut aliqui occasionem sumpserint errandi, et dicendi per prædestinationem, et reprobationem sublatum esse liberum arbitrium, et ideo solam gratiam sine diligentia, vel labore ex parte hominis, sufficere ad illius salutem. Aiebant enim, nec pie viventibus prodesse opera, si reprobatum sint, nec prava opera obesse peccantibus, si sint prædestinati, ut refert Sigibert. in Chron. ann. 415, ubi etiam ait hos sumpsisse occasionem errandi ex scriptis Augustini contra Pelagianos. Hanc ergo hæresim, quæ Prædestinatorum dicta est, simul cum Pelagiana abhorrentes multi catholici in Gallia, ut mediam viam inter utramque tenerent, necessarium putarunt aliquid tribuere soli libero arbitrio, in quo prædestinatio totusque gratiæ effectus iurtium et fundamentum haberet: unde qui sic senserunt, cum in aliis a Pelagio discede-

rent, in hoc illi adhæserunt, quod initium gratiæ sit ex libero arbitrio, ac subinde quod prima gratia ex aliquo merito liberi arbitrii proveniat. Ideoque, licet ad perfectam salutem consequendam, et ad proficiendum in bonis operibus gratiam esse necessariam admitterent, nunquam tamen eo pervenerunt, ut eam gratis dari concederent, sed ex aliquo bono usu liberi arbitrii, quem ponebant, vel in naturali affectu credendi, vel in desiderio salutis, vel in aliqua humana oratione, vel alia simili humana diligentia, inquisitione, aut labore, ut sumitur ex Epistolis Hilarii et Prosperi ad Augustinum, et ex eodem Augustino, libro de Prædestinatione Sanctor., ubi prius narrat ea in quibus isti a Pelagio discrepabant, confitendo lapsum humani generis in primo parente, et necessitatem redemptionis per Christum et gratiæ ejus ad veram justitiam recuperandam, ejusque opera perficienda. Postea vero lapsum eorum ac convenientiam cum Pelagio in hoc tantum ponit, quod ponentes initium fidei ex nobis esse, necessario conviucuntur dixisse, gratiam propter humanum meritum dari.

2. *Cur Semipelagiani dicantur reliquæ Pelagianorum, quos etiam simpliciter Pelagianos vocat D. Thomas.* — Hinc ergo isti dicti sunt Semipelagiani, vel reliquæ Pelagianorum, quia partim a Pelagio discedebant, partim cum illo sentiebant, et ita ab illo exorti sunt, quia particulam erroris ejus retinuerant. Cum enim Pelagius negaret necessitatem auxilii gratiæ ad quæcumque salutis opera, multo magis negavit esse necessarium ad initium salutis. Et ideo D. Thomas hos Semipelagianos, sub communi nomine, Pelagianos appellat, 2. 2, quæst. 6, art. 1, et 3 Contra gentes, cap. 152, in fine, ubi dicit Pelagianos possuisse initium fidei ex nobis. Et 1 part., q. 23, art. 5, addit Pelagianos possuisse initium bene faciendi ex nobis, consummationem autem ex Deo. Idem lib. 3 Contra gentes, cap. 149, in fine, ubi ait Pelagianorum errorem fuisse, auxilium merentis gratiæ esse ex merito nostro, ac proinde initium justificationis esse ex nobis, consummationem autem ex Deo. Quibus locis Pelagianorum nomine Semipelagianos sine dubio comprehendit: imo de illis præcipue loquitur, ut ipse distinctius explicat quodl. 2, art. 7, dicens: *Pelagius docuit hominem non indigere auxilio Dei ad bene operandum, sed tantum lege ac doctrina. Quia vero hoc nimis parum ridebatur, ideo postea Pelagiani posuerunt, quod initium boni operis est*

homini ex se ipso. Et infra concludit: *Ad Pelagianum errorem pertinet dicere, quod homo possit se ad gratiam præparare sine auxilio gratiæ.* Et propterea dixit Augustinus se impugnasse hunc errorem, prius quam Semipelagiani exorti essent, nimirum in lib. 1 ad Simplician., quæst. 2, ut ipse refert lib. de Prædestinatione Sanctor., cap. 4. Quod etiam præstiterat in Epist. 47, quæ præfigitur lib. de Corrept. et grat., quem commemorat Prosper in sua Epistola, et idem Augustinus lib. de Bono persev., cap. 21, ubi mentionem etiam facit Epistol. 105 et 106, et concludit: *Unde recolant, adversus hæresim Pelagianam jam ante aliquot annos ista dicta esse, atque conscripta, quæ nunc eis displicere mirandum est.*

3. *Semipelagianismum ortum fuisse, ante Massilienses, suadetur.* — Quapropter merito dici potest fontem hujus erroris fuisse Pelagium; quia vero ille nunquam docuit errorem illum ab aliis separatim, ideo quæri potest quis primo fecerit discessionem illam a doctrina Pelagii, illum tantum articulum retinendo, quod est quærere quando post Pelagium Semipelagianismus cœperit, et a quibus. Videri enim potest multo ante tempora Massiliensium, quorum perturbationes referunt Prosper et Hilarius, incœpisse. Nam Augustinus, in Epistol. 105 (quæ, ut notavimus, antiquior est), sic de quibusdam Pelagianis scribit: *Jam conclamantium religiosorum et piorum vocibus pressi, ita fatentur, ad habendam vel faciendam justitiam, ditinuit hominem juvari, ut sui præcedat aliquid meriti, etc., suo pulantes præire merito illum, de quo audiunt, quis prior dedit illi, et retribuetur ei.* Et lib. 2 contra duas Epistolas Pelagianorum, qui etiam est antiquior, cap. 28 et sequentibus, de auctoribus illarum Epistolarum Cœlestino scilicet et Juliano, sensisse indicat gratiam dari ad perfectionem boni operis, dari tamen gratiam illam propter initium boni propositi, quod est a solo libero arbitrio. Et eodem modo lib. 4 contra Julian., cap. 3, eum reprehendit, quod dixerit hominem juvari per gratiam ad capessendam perfectionem: *Utique (ait) volens intelligi, cum per se incipere sine gratia, quod perficit gratia.*

1. *Non admittitur prædicta suasio loquendo de propriis Semipelagianis.* — Existimo nihilominus hos antiquos Pelagianos, etiamsi fortasse, vel in re, vel saltem in modo loquendi, sententiam Pelagii moderati sint, longe a posterioribus Semipelagianis distasse. Nam

illi non discesserunt a præcipuis erroribus Pelagii, videlicet, homines non nasci in peccato originali, esse æque potentes ad legem servandam, sicut fuit Adam ante peccatum, posse suis viribus esse perfectos, et similia, quæ in eis impugnat Augustinus libris contra Julian. et contra duas Epistol. Pelagian., et lib. de Perfect. Justit., a quibus tamen erroribus posteriores Semipelagiani longe abfuerunt. Imo etiam de illa gratia, quam ad perfectionem operum admittebant Julianus, vel Cœlestinus, non constat qualis fuerit, neque an illam ut necessariam postularent, nam de hoc etiam dubius est Augustinus, ideo enim dicto lib. 2 contra duas Epistol. Pelagian., cum retulisset illos docuisse perficiendi gratiam consequi ad meritum bene incipiendi, addit conditionalem, *si tamen hoc saltem volunt*. Et infra, cum dixisset Pelagium admisisse gratiam solum ad facilius, adjungit: *Sed istis permittamus, cum suo libero arbitrio esse liberos, vel ab ipso Pelagio*, quia fortasse aliquam necessitatem gratiæ agnoverunt, saltem ad perfectionem operum. Non tamen id asserit, sed permittit, et sub dubitationis voce, *fortasse*. Itaque isti primi sectatores Pelagii, non Semipelagiani, sed Pelagiani habiti sunt.

5. *Videri potius Semipelagianismum a Vitali inchoatum.*—Vide Baron., ann. 419, n. 54, et ann. 426, n. 24. — Magis videtur semipelagianismum inchoasse Vitalis ille contra quem August., Epistol. 107, scripsit. Ille enim, in cæteris a Pelagio discedens, solam fidem dicebat esse ex libero arbitrio, et non ex motione gratiæ, neque esse donum Dei, sed esse in nobis a nobis, id est, a propria voluntate, quam Deus non operatur in nobis, qui est proprius Semipelagianorum error. Sed imprimis mihi non constat, quando ille Vitalis fuerit, vel Augustinus illam epistolam scripserit. Deinde, licet verisimile sit, ante libros de Prædestinatione Sanctorum fuisse scriptam, tamen in ea Augustinus, referens illum Vitalis errorem, non affirmat illum discessisse a Pelagio, sicut de Semipelagianis dicit in principio libri de Prædest. Sanctor. Denique ille Vitalis in Africa errare cepit, et fortasse illius error statim condemnatus est, ideoque, licet affinis fuerit errori Semipelagianorum, inter eos non numeratur, sed initium hujus sectæ Gallis, seu Massimianibus tribuitur, et ab eo tempore cepisse creditur, quo in Gallia turbati carperunt quidam catholici et presbyteri, et contra Augustini doctrinam insurgere, ut ex citatis Epistola Hilarii,

et Prosperi constat. In eis tamen nomina personarum tacentur; dicit tamen Prosper *claros et egregios omnium virtutum studiosos viros fuisse*. Et adjungit: *Ad auctoritatem talia sentientium non sumus pares*, etc. Nihilominus ex his quæ vel historiæ referunt, vel in aliquorum libris reperiuntur, solet hic error aliquibus gravibus auctoribus tribui, quibusdam jure, ac merito, aliis vero sine causa: et ideo ut veritas magis elucescat, et error ipse magis intelligatur, operæ pretium duxi, de præcipuis sectatoribus, vel auctoribus hujus erroris aliquid in particulari dicere, præcipue de Cassiano et Fausto, quorum scripta habemus, ex quibus etiam verus erroris sensus melius colligi potest.

§ De Joanne Cassiano.

6. *Cassianum a nota Semipelagianismi eximunt aliqui.* — Primus hujus doctrinæ auctor vel defensor, est Joannes Cassianus, qui eodem tempore vixit quo perturbationes illæ in Gallia ortæ sunt, et in favorem hujus doctrinæ scripsisse videtur in lib. 12 de Institut. renunc., cap. 11 et sequentibus et collat. 13, a c. 8, per multa capita, quæ impugnat Prosper lib. contra Collatorem. Nihilominus tamen non desunt qui Cassianum ab errore vindicare studuerint. Nam Gennadius, in lib. de Vir. illustr., quem paulo post illa tempora scripsit, agens de Cassiano, scripta ejus narrat et laudat, nullumque in eis errorem notat. Postea vero, c. 84, sic de Prospero scribit: *Legi et librum adversus opuscula suppresso nomine Cassiani, quæ Ecclesia Dei salutaria probat, illa infamat nociva. Re enim vera Cassiani, et Prosperi, de gratia et libero arbitrio, sententiæ in aliquibus inteniuntur contrariæ*. Ubi aperte sententiam Cassiani sententiæ Prosperii præferre videtur. Cassianum vero ab erroneo sensu excusare studuit Henricus Cuykins, in quibusdam annotationibus ad illum, quæ habentur in editione Antuerpiæ, ann. 1578. Nam in secunda, quæ est ad lib. 12 de Institut., c. 14, quod Cassianus dicit, nostrum esse, bonæ voluntatis occasionem Deo præbere, ut sua munera largiatur, Henricus exponit eum loqui de hominibus jam fidelibus, qui, fide et auxiliis gratiæ a luti, eam occasionem Deo præbent, et ita possunt explicare alia loca. In annotat. autem 20, quæ est ad collat. 13, cap. 8 et sequentibus, fatetur doctrinam hæreticam continere, excusat autem Cassianum, quod illam non assererit, sed tantum retulerit. At vero

Petrus Ciacon., in annotationibus ad eundem Cassianum additis in editione romana ann. 1588, doctrinam etiam illius collationis excusat, dicens intelligendam esse de dispositione remota ad gratiam, eredens non pertinere ad errorem Semipelagianorum, talem dispositionem ex viribus naturæ admittere. Et potest hoc suaderi ex verbis ejusdem Cassiani, qui in collat. 13, cap. 3, sic inquit: *Ex dictis colligitur, non solum actuum, verum etiam cogitationum bonarum ex Deo esse principium, qui nobis et initia sanctæ voluntatis inspirat, et virtutem, atque opportunitatem eorum, quæ recte cupimus, tribuit peragendi*; et cap. 6 pronuntiat, *fragilitatem humanam nihil, quod ad salutem pertinet, per se solam, id est, sine adjutorio Dei, posse perficere.*

7. *Cassianus revera Semipelagianus.* — Nilominus negari non potest Cassianum fuisse unum ex præcipuis illius erroris defensoribus. Per quod non intendimus ejus damnare vel onerare personam, nondum enim erat illa sententia hæresis vel erroris damnata ab Ecclesia, ut Prosper in fine libri contra Collatorem aperte docet, Cassianumque inter catholicos numerat. Solum ergo de doctrina ipsa tractamus. Libros itaque illos semper fuisse de Pelagiana doctrina infamatos, præter Prosperum, constat ex diligentia Eucherii, Victoris et Cassiodori in illis expurgandis, quæ refert Baron. ann. 433, n. 27 et sequentibus, et attingit Ado in Chron. ann. 425, ubi monet opera Cassiani cautissime esse legenda, præsertim de Gratia et libero arbitrio. Indicat autem Baron., num. 30, libros Cassiani, prout nunc circumferuntur, esse satis purgatos, et inde fuisse deceptos qui Romæ voluerunt excusare Cassianum, putantes nunquam fuisse morbosum librum illum, qui nunc sanus apparet. Verumtamen non ita sensit Dionysius Carthus., qui in sua paraphrasi, totam illam partem collationis 13 expunxit, et sanam doctrinam loco illius posuit. Unde, licet forte opera illa aliis pluribus in locis fuerint expurgata, et emendationes, vel non admissæ vel non retentæ fuerint, prout nunc geruntur morbosa sunt, ut Prosper ostendit. Eritque perspicuum consideranti varios ejus loquendi modos, qui in Semipelagianis a Conciliis notantur et damnantur.

8. *Mens Cassiani detegitur.* — Nam Cassianus semper requirit gratiam ad perfectionem et consummationem justitiæ, non ad initium; item ad eandem perfectionem requirit nostrum laborem cum gratia, tamen ante gratiam admittit etiam nudum laborem humanum,

quem ipsemet ita explicat, *id est, sine adjutorio Dei*, dict. lib. 12, cap. 11, et de hoc labore semper loquitur, cum dicit illum non sufficere ad perfectionem acquirendam sine Dei adjutorio, neque esse condignum ad præmium gratiæ obtinendum. Unde similiter de eodem labore dicit esse aliquale meritum primi auxilii gratiæ, et occasionem quam Deus expectare solet ad gratiam inchoandam. Et sic ait cap. 14: *Sicut conatus humani non sufficiunt per se ad perfectionem capessendam, ita laborantibus tantum atque suadentibus misericordiam gratiamque conferri.* Et infra subjungit gratiam dari petentibus, pulsantibus et quærentibus, quia licet nostra petitio non sit condigna, *miseri cordia Dei præsto est, occasione sibi tantummodo a nobis bonæ voluntatis oblata.*

9. *Excusatur Cassianus, sed frustra.* — Dices, in cap. 6 confiteri Cassianum, neque hos ipsos nostros conatus ad bonum posse nos efficere, *sine divinæ protectionis auxilio, inspirationisque ejus, et castigationis, atque exhortationis gratia, quam cordibus nostris, vel per alium solet, vel per semetipsum nos visitans, clementer infundere.* Sed audi quomodo, c. 18, gratiam hanc interpretetur, dicit enim gratias esse Deo agendas, non solum pro aliis donis naturæ, gratiæ, aut scientiæ, *sed etiam pro his quæ erga nos quotidiana ejus providentia conferuntur. Quod, scilicet, ab adversariorum nos insidiis liberat, quod cooperatur nobis, ut carnis vitia superare possimus, quod a periculis nos etiam ignorantes protegit, quod a lapsu peccati communit, quod adjuvat nos, et illuminat, ut ipsum adjutorium nostrum (quod non aliud quidam interpretari volunt, quam legem) intelligere et agnoscere valeamus.* Ubi expendo verba illa in parenthesi posita, nam videntur continere doctrinam pelagianam, et tacite approbare, dum non reprehenditur; vel certe videtur ibi Cassianus tacite carpere Augustinum, qui ita interpretari solet similia verba Pelagii, per quod satis indicat Cassianus se non aliter illam gratiam intellexisse, quam Pelagius intelligebat.

10. *Ex variis capitibus collat. 13 contincitur.* — Sæpius vero in collat. 13 eandem doctrinam inculcat, licet aliis verbis ambiguis illam interdum occultare nitatur. Unde, cap. 7, incipiens ordinem divinæ providentiæ in exhibenda gratia explicare, ait: *DEI benignitas, cum bonæ voluntatis in nobis quantulumcumque scintillum emicuisse perspexerit, vel quam ipse, tanquam de dura silice nostri cordis excusserit, consovet eam, et excuscat, suaque inspiratione*

confortat; et cap. 8: *Cum in nobis ortum quemdam bonæ voluntatis inspexerit, illuminat eam confestim, atque confortat, incrementum tribuens ei, quam vel ipse plantarit, vel nostro conatu viderit emersisse.* Ubi expresse initium bonæ voluntatis dicit præcedere ante divinam illuminationem et inspirationem, et sæpe saltem esse a nobis, non a Deo. Unde cap. 9, conciliando varia Scripturæ loca, in eis dicit commendari gratiam, et libertatem arbitrii: *Et quod etiam suis interdum motibus homo ad virtutum appetitus possit extendi, semper vero a Domino indigeat adjuvari.* Et infra dicit initium bonæ voluntatis interdum oriri ex naturæ bono, quod beneficio creatoris accipimus, et quod gravius est, ita exponit illud Pauli ad Rom. 7: *Velle adjacet mihi, perficere autem non invenio.*

11. *Rursum convincitur ex capite undecimo.*

— Præterea, capite undecimo expresse proponit quæstionem, utrum, quia bonæ voluntatis initium habuerimus, misereatur nostri Deus; an quia Deus miseretur, consequamur bonæ voluntatis initium. Et in summa respondet, interdum nos incipere et mereri gratiam, interdum Deum misericordia sua prævenire nos. Et prioris membri exempla ponit in Zachæo et latrone, qui, *desiderio suo vim quamdam regnis cælestibus inferentes, specialia vocationis monita prætenerunt.* Et circa finem ait: *Cum viderit nos Deus ad bonum velle deflectere, occurrit, dirigit et confortat*; et ita exponit illud Psalm. 49: *Intoca me in die tribulationis tuæ,* etc.; et illud Isai. 30: *Ad vocem clamoris tui statim ut audierit, respondebit tibi*; ac si hæc promissiones factæ sint invocationi paræ humanæ, ac tandem subjungit: *Etsi nos nolle, vel inte-
puisse, perspexerit, adhortationes salutiferas admocet cordibus nostris, quibus voluntas nostra, vel confirmetur, vel reparetur in nobis*; sentiens in his adhortationibus consistere gratiam, qua interdum Deus nostras prævenit voluntates.

12. Capite vero duodecimo addit tertium exemplum prioris membri, de David, quando cogitavit, et in suo corde de templo Deo ædificando tractavit, 3 Reg. 8. Nam illam cogitationem et voluntatem bonam fuisse, clarum est. Probat autem non fuisse ex inspiratione Dei, cum ipse negaverit effectum ejus, unde concludit *et bonam ex homine fuisse.* Et infra, ut iterum probet voluntatem nostram interdum prævenire Deum, inducit illa Scripturæ loca: *Mane oratio mea præveniet te,* Psalm. 18, et similia; et in cap. 13 addit quartum exemplum de penitentia David, quam significat

fuisse ex sola libertate arbitrii, præmissa tantum admonitione Prophetæ, *quæ divinæ* (inquit) *dignationis fuit gratia*; et cap. 14 adjungit quintum exemplum Job, de quo ait, *non Dei, sed suis viribus vicisse Dæmonem.* Imo addit etiam fidem centurionis dicentis: *Domine, non sum dignus,* etc., non fuisse Christi donum, sed bonus liberi arbitrii usus, quia alias non fuisset dignus laude, nec dixisset illi Dominus: *Non inveni tantam fidem,* sed: *Nemini dedi tantam fidem.* Similique ratione subjungit fidem Abrahæ, quam Deus probare voluit præcepto sacrificandi filium, non fuisse illam quam ei Dominus inspiraverat, sed illam quam vocatus semel, et illuminatus a Domino, per arbitrii libertatem poterat exhibere, et similia repetit in cæteris capitibus, usque ad finem collationis.

13. *Concluditur Cassianum non solum tenuisse, sed ampliasse semipelagianismum.* — Ex quibus evidentissimum est, in collatione illa non solum tradi Semipelagianorum doctrinam, sed etiam multum extendi et ampliari. Primo, quia non solum imperfecta fides, sed etiam perfectissima, ut fuit centurionis et Abrahæ, nec solum imperfectum desiderium, sed etiam efficax voluntas, qualis fuit in Zachæo procurante videre Jesum, et in David volente ædificare templum Domino, gratiæ subtrahitur, et libero arbitrio tribuitur. Deinde, quia etiam perfecta pœnitentia, et proxima dispositio ad peccati remissionem, qualis in David et latrone fuit, naturali libertati adscribitur. Tertio, quia etiam gravissimæ et multiplicis ac diuturnæ tentationis perfecta victoria, qualis fuit in Job, ab homine solo fuisse dicitur, et non a Dei gratia, nisi hoc solum, quod Deus non permisit illam fuisse majorem, vel quia, ut ait, *hoc tantum procuravit Deus, ne violentissimus inimicus animam ejus mentem faciens, et impotem sensu, impari eum atque iniquo certaminis pondere prægravaret.* Quæ omnia revera sunt absurdissima, et ideo, in eis interpretandis, et ad probabilem sensum revocandis, frustra laborat Ciacon. in Annotationibus ad Cassianum. Neque minus incongruæ sunt expositiones Scripturæ, quibus testimonia, quæ de orationibus Sanctorum loquuntur, de humanis invocationibus Cassianus intelligit, et quæ desideria, et bonas voluntates ex fide, ac promissione divina procedentes in hominibus commendantur, ex gratia propria esse negat, solum quia a voluntate libera procedunt, quæ ratio et frivola est, et totum Pelagianum errorem exsuscitat.

14. *Error Gennadii imponentis Ecclesiæ quod scripta Cassiani probavit.* — Nec denique minus frivola est illa conjectura, quod Deus voluntatem ædificandi templum Davidi non inspiraverit, quia illius executionem negavit, cum frequenter soleat Deus propositum sanctum, vel desiderium perfectum inspirare propter bonum ejus meritum, licet propter alias rationes providentiæ suæ nolit ejus effectum, ut in Abrahamo videri potest. Nullo ergo modo excusari potest illa doctrina. Quapropter, licet Gennadius recte censuit in eo, quod dixit, Prosperi et Cassiani contrarias esse sententias; graviter vero peccavit dicens Ecclesiam, scripta Cassiani, tanquam salutaria, probasse, et Prosperum illa infamasse. Nam Gelasius Papa, in suo decreto de libris authenticis, opuscula Cassiani inter apocrypha ponit, non ob aliam causam, nisi quia in his quæ ad liberum arbitrium et gratiam pertinent, a Prospero reprehenditur, ut notavit Trithemius in Cassiano. Immerito ergo dicit Gennadius, Ecclesiam scripta Cassiani, præsertim in hac parte, probasse. Potuitque Gennadius facile habere notitiam decreti Gelasii, cum eodem tempore vixerit, et ad eum scripta sua miserit, ut postea attingemus. Erravit etiam graviter Gennadius Prosperum infamando, quod Cassianum infamaverit, cum ipsemet fateatur sententias Prosperi et Cassiani, de gratia et libero arbitrio, in aliquibus inveniri contrarias. Nam hinc fateri cogitur Prosperum nihil de Cassiano dixisse, quod Cassianus ipse in scriptis suis publice non prodiderit; Prosper autem, impugnando quod falsum et Ecclesiæ noxium judicavit, non Cassianum infamavit, sed sanæ doctrinæ consuluit.

15. *Rejicitur excusatio Henrici pro Cassiano.* — Neque excusari potest Cassianus, eo quod in Collationibus non ex propria sententia locutus fuerit, sed Chæremonis doctrinam retulerit, ut Henricus insinuat; tum quia, si hæc excusatio locum haberet, nihil ex sententia Cassiani in omnibus collationibus Patrum haberemus, quod est contra communem sensum; tum etiam quia vel in hoc esset valde reprehendus Cassianus, quod doctrinam falsam retulisset, sine ulla lectoris admonitione, si eam periculosam vel perniciosam esse credidisset. Tacuit ergo quia illam probavit; imo suam fecit, ut satis in fine collationis indicavit, dicens, *hoc nos B. Chæremôn confirmatos cibo laborem fecit tam invii itineris non sentire*; tum etiam quia doctrina illius collationis consonat cum doctrina ejusdem Cassiani in libris

de Institutis renuntiant., et utrobique eodem loquendi modo semper utitur, quod *gratia adjuvet conatus nostros*, quo etiam utitur in Præfatione ad decem primas collationes, et in præfatione ad septem sequentes ait eas scribere, *ut illis ea, quæ de perfectione in præteritis opusculis obscurius forsitan erant comprehensa, vel prætermissa, suppleantur*. Quibus verbis aperte declarat se totam illam doctrinam ut propriam tradere, et ideo merito dixit Prosper, contra Collator., cap. 2, in illa collatione virum quemdam sacerdotalis ordinis Abbatem quemdam introducere de grâtiâ Dei et libero arbitrio disserentem, *cujus se ostendit per omnia prolasse, ac suscepisse sententiam*.

16. *Ciaconii quoque excusatio exploditur.* — Nec denique alia excusatio Ciaconii locum habet, aut permittenda est, quia jam ostendimus non solum circa dispositionem remotam, sed etiam circa proximam, qua remissio peccatorum obtinetur, Cassianum errasse; item, quia ad errorem Semipelagianorum pertinet, admittere aliquam naturalem operationem bonam, sola liberi arbitrii facultate factam, quæ sit dispositio remota ad gratiam sanctificantem, et consequenter sit proxima ad aliquam auxiliantem, ut postea videhimus. Ad verba autem quæ ex Cassiano citavimus, respondet Prosper, cap. 4 et sequentibus, cito auctorem definitionis suæ oblitum a sententia discessisse, vel certe quod prius generaliter dixerat, postea ad partem, seu ad quosdam coaretasse; vel etiam dici potest, ibi ambigue et latenter loqui de inspiratione, adjutorio, et protectione divina, sub illis comprehendens doctrinam, et admonitionem, et quancumque extrinsecam exhortationem, vel custodiam, nam ita rem fere postea declarat, ut vidimus.

17. *Chrysostomus et Marcus Semipelagiani non fuere.* Putant vero aliqui Cassianum hujusmodi doctrinam ex Chrysostomo, præceptore suo, desumpsisse, volentes eandem Chrysostomo attribueri. Et quia Marcus Eremita, ejusdem temporis auctor, ejusdemque Chrysostomi discipulus fuit (teste Nicephoro, lib. 14 Hist., cap. 53), socium et sectatorem ejusdem doctrinæ illum efficiunt. Sed hos duos Patres ab hac nota vindicavimus, et, ex eorum libris, longe ab hac doctrina fuisse ostendimus in prima parte, tract. 2, lib. 2, cap. 8. Aliqui vero, licet de Chrysostomo recte sentiant, nihilominus auctorem operis imperfecti, quod sub nomine Chrysostomi circumfertur, suspectum tenent, quia in homil. 18 et 32 in Matth., videtur locutionem Semipelagianorum imitari,

dicens, gratiæ adjutorium dari *orantibus et pulsantibus, id est, opera orationibus addentibus*, etc. Sed ille, in hom. 18, aperte loquitur de orantibus et operantibus ex fide et gratia, ut patet ex illis verbis: *Deinde, si opera justitiæ non facis, id est, non impulsas, nec orare ex fide potes*, et alia, quæ columna tertia prosequitur, per quæ exponenda sunt quæ in homil. 32 dicit circa illa verba: *Non omnes capiunt hoc verbum, sed quibus datum est*.

18. *Neque Vincentius Lirinensis*. — Solet præterea Cassiano annumerari Vincentius Lirinensis, catholicus scriptor, et Cassiano æqualis, et in monasterio insulæ Lirinensis insignis monachus, ac validissimus contra hæreticos disputator, ut de illo Gennadius scribit. Unde aliqui existimarunt hunc esse Vincentium illum cui Prosper respondet in libro ad objectiones Vincentianas: et ideo unum esse crediderunt ex his qui in Gallia contra doctrinam Augustini cum Massiliensibus disseruerunt. Sed hæc suspicio imprimis nullum habet in opusculo Vincentii Lirinensis, *Contra profanas vocum notitates*, quem solum ex scriptis ejus habemus, fundamentum. Nam potius in cap. 34 vehementer damnat Pelagium, eo quod necessitatem gratiæ juvantis nos in singulis actibus negaverit, et capite ultimo iterum in eum invehitur, ibique magna cum veneratione recipit epistolam Cœlestini, quæ contra Semipelagianos, et in defensionem Augustini scripta est, ut postea videbimus. Deinde, ex libro Prosperi, colligi non potest quis fuerit ille Vincentius, a quo objectiones quas refutat Vincentianæ nominatæ sunt; cur ergo suspicabimur illum fuisse insigniorem Vincentium, qui eo tempore vixit? Maxime cum Prosper in præfatione dicat eum confinxisse quarundam blasphemiarum proligiosa mendacia, eaque Augustino et Prospero, ad invidiam concitandam, tradidisse: quod certe incredibile est de Vincentio Lirinensi, qui vir religiosissimus fuisse perhibetur, et dicto libro suo talem se ostendit. Quapropter Baron., ann. 431, n. 188, Vincentium Lirinensem ab hac nota vindicat, asseritque illum cui Prosper respondet, esse alium presbyterum ejusdem nominis Gallum, quem Gennadius fere eodem tempore vixisse refert, et in *Palmarum* scripsisse. Sed hoc etiam mihi est incertum, quia nec Gennadius nec Trithemius id indicant, et potuit esse eodem tempore in Gallia alius presbyter ejusdem nominis, qui inter catholicos scriptores non numeratur; parumque interest indicare quis ille Vincentius fuerit, dummodo gravissimo scrip-

tori contra hæreticos talis injuria non inferatur.

§ De Fausto.

19. *Qui Faustum excusent*. — Superest dicendum de Fausto, Rhegiensi Episcopo, qui septuaginta fere annis post Cassianum vixit, duosque libros de gratia et libero arbitrio scripsit, quorum doctrinam expendere oportet, ut magis hunc errorem penetremus. Aliqui ergo Faustum excusare, et libros ejus ad catholicum sensum trahere, conati sunt. Nam Gennadius, illi æqualis, in libr. de Vir. illustr. de Fausto dicit, scripsisse egregium opus de gratia Dei, qua salvamur, et libero humanæ mentis arbitrio, quo salvamur: *In quo opere (ait) docet gratiam Dei semper invitare, et præcedere, et juvare voluntatem nostram. Et quidquid ipsa libertas arbitrii pro labore piæ mercedis acquisierit, non esse proprium meritum, sed gratiæ donum*. Et infra de illo dicit: *Viva voce egregius doctor, et creditur, et probatur*. Deinde Trithemius de Fausto ait, prius fuisse Pelagiano errore fœdatum, postea vero a Fulgentio conversum scripsisse volumen egregium de gratia Dei, quod inter opera ejus circumfertur. Unde videtur loqui de hoc volumine quod nunc habemus in duos libros divisum, quia nec aliud circumfertur, nec illius mentionem in antiquis doctoribus invenimus. Censuit ergo Trithemius illum librum esse catholicum, et auctorem, quando illum scripsit, a Pelagianis omnino discessisse. Quod vero refert, Faustum prius fuisse Pelagianum, et a Fulgentio ab errore revocatum, unde sumpserit, invenire non potui.

20. *Aliorum excusatio*. — De libris item Fausti recte videntur sensisse collectores Bibliothecæ Sanctorum Patrum, nam illos posuerunt in quarto tomo, inter tractatus contra hæreses, et consequenter etiam Faustum inter catholicos Patres recensent. Et in Chronologiis ecclesiasticis, aliquando solet inter scriptores catholicos et ecclesiasticos recenseri, ut videre licet in primo tomo Canisii, in principio. Denique Driedo, de Captivitat. et redempt. gen. hum., tract. 4, c. 2, part. 4, Faustum et ejus libros ab errore defendere conatur. Quia non contra Augustinum scripsit, ut quidam illi tribuunt, nam illum cum magna reverentia allegat lib. 1, cap. 6, et lib. 2, cap. 7, ubi et beatissimum appellat: sed scripsit contra Lucidum presbyterum Gallum, qui, ex doctrina Augustini male intellecta, varios errores hausserat, nimirum, hominem sola gratia salvari

sine voluntaria obedientia, vi solius prædeterminationis; imo et peccatores eodem modo damnari vi præscientiæ et reprobationis; et similia, quæ in tomo 4 Bibliothecæ Sanctorum, ante libros Fausti præferuntur. Contra illos ergo errores scripsit Faustus, prius damnans Pelagium, et postea errorem extreme contrarium; ipse autem media via incedere proficitur, necessitatem gratiæ prædicando, et illi necessitatem laboris et obedientiæ adiungendo, quamvis labor hic et obedientia non sit, nec fuerit in lege naturæ sine occulto aliquo auxilio gratuito, ut Driedo Faustum interpretatur.

21. *Verisimilitas prædictæ excusationis.* — Videturque hæc excusatio fieri verisimilis ex multis verbis ejusdem Fausti, nam imprimis, in epistola ad Lucidum, cui Concilium quoddam Episcoporum subscripsit, inter alia dicit: *Nos autem, per illuminationem Christi veraciter et confidenter asserimus, et eum qui perit per culpam, saluum potuisse esse per gratiam, si gratiæ ipsius famulatus, laboris obedientiam non negasset.* Ubi famulatum gratiæ appellat subjectionem debitam gratiæ, et ita ponit obedientiam hominis, ut subsequentem et cooperatricem gratiæ; unde subjungit: *Nos igitur per medium, Christo duce, gradientes, post gratiam, sine qua nihil sumus, laborem officiosæ servitutis asserimus;* et infra: *Qui hanc veritatis mensuram, gratia præcedente, et conatu assurgente, non sequitur, dignus erit ut a sacris liminibus arceatur.* Deinde quod, ad confirmandam hanc doctrinam, Faustus scripserit, colligitur ex præfatione operis, quam vocat professionem suæ fidei ad Leontium, ubi inter alia dicit: *Studium asserendæ gratiæ competentem et salubriter suscipit, qui obedientiam famuli labori adiungit, tanquam si patrono, vel domino inseparabiliter pedisequus minister inhæreat, quod multis et elegantibus verbis, et exemplis declarat.*

22. *Probatum amplius eadem verisimilitas.* — *Celebris sententia, et notanda pro Fausto.* — Denique, in utroque libro, et absolute gratiam prædicat necessariam, et illi primatum tribuit; ergo per illud prius discernitur a Pelagio, et per posterius a Semipelagianis. Prima pars constat ex libr. 1, capit. 1, ibi: *Ego arbitror quod libertus arbitrii sibi sola sufficere sine gratiæ præsidio non potuerit, etiam antequam privilegium illius transgressio violaret.* Altera vero pars patet ex eodem libr., cap. 5, ibi: *Opera legis evacuantur, quæ secundum litteram sunt, et ea quæ post gra-*

tiam, comitante gratia, gerenda sunt, asseruntur; et cap. 6: *Vide quomodo ad gratiæ donum semper adiungit laboris obsequium;* et cap. 11: *Qui vel initium operis sibi præsumit arrogare, vel finem, ad illum merito dicitur: Nisi Dominus ædificaverit domum, in vanum laboraverunt qui ædificant eam.* Quæ verba ipsam prorsus Augustini doctrinam continere videntur; et cap. 13 habet illam celebrem sententiam, *gratiam neminem deserere, nisi prius deseratur ab homine,* et cap. 15 sunt valde notanda illa verba: *Adverte, quia hoc ipsum ad baptismum venire et desiderare salutem jam fidei est.* Nam ita videtur interpretari alia, quibus dicere solet, desiderantibus et pulsantibus adiutorium gratiæ dari, utique desiderantibus ex fide; et cap. 17 ait, Deum omnes per gratiam vocare, et attrahere etiam resistentes, utique quantum est in se: *Licet enim* (inquit) *non omnes obedientiam exhibituros esse prænosceret, omnibus tamen et velle et posse donaverat.* Quibus verbis fatetur et velle et posse in bonis operibus pietatis esse ex gratia, licet velle possit per liberum arbitrium impediri, sicut etiam potest præstari. Unde subjungit: *Hoc loco sollicitius requiratur, utrum quisque attrahi velit, an nolit,* utique cum effectu: *Si non vult absolute, attrahentis benevolentiam non meretur, si autem vult, ecce jam cum Deo hominis consensus operatur:* et infra: *Sicut gratiæ est, quod attrahitur, ita obedientiæ probatur esse quod sequitur:* et lib. 2, cap. 2: *De suo* (ait) *est, quod dat gratiam; de tuo est, quod prænoscit offensam;* et cap. 5: *Quod credunt, gratiæ largitas est, quod professionem creditis non accommodant, mentis improbitas est.* Ac denique c. 8: *Nihil hic (ut opinor) redolet, cum et hoc ipsum incessabiliter asseram, quod Deo ipsam debeam voluntatem, præsertim cum in omnibus ejus motibus ad opus gratiæ referam vel inchoationis initia, vel consummationis extrema;* et infra: *De Dei bonitate est, quod vocatur, de propria voluntate, quod promptus obsequitur.* Quæ sane omnia videntur habere catholicum sensum, ac subinde per illa satis auctorem illum ab erroris nota liberari.

23. *Vera censura de Fausto.* — Nihilominus libri Fausti suspecti semper in Ecclesia fuerunt; statim enim ac scripti fuere, ab orthodoxis Patribus impugnati sunt, quia, licet in eis Faustus profiteatur se media via inter Pelagium et Lucidum incedere; nihilominus a Pelagio non omnino recedit, sed cum Semipelagianis plane sentit. Unde Ado, in Chron.,

ann. 492, in fine : *Faustus* (inquit) *apud regem Galliae Episcopus, Pelagianum dogma destruere conatus, in errorem labitur : unde qui ejus sensus in hac parte catholicos prædicant, sicuti Gennadius, omnino errant : quia nimirum, ut subjungit, ita liberum Christianum arbitrium docere conatur, ut illuminatio ejus, virtus, et salus non a Christo, sed a natura sit.* Et statim refert contra eum scripsisse lucidissima fide Beatum Avitum, Viennensem Episcopum, ejus redarguendo errorem, et Joannem Antiochiæ presbyterum. Sed et eodem tempore multi contra libros Fausti scripserunt, inter quos primo loco ponit Cæsarium Baronius, ann. 490, num. 12 et sequentibus. Sed de hoc opere Cæsarii dicam latius infra cap. 23. Scripsit etiam Fulgentius, ut ibidem ex Isidoro, libro de scriptoribus ecclesiast., cap. 13, referam : unde constat etiam Isidorum eandem opinionem de Fausto et ejus libris habuisse.

24. Præterea, inter opera Fulgentii, extat liber Petri Diaconi, de Incarnat. et Grat., in cujus cap. ultim. sic inquit : *Anathematizamus simulque Julianum, et qui illis similia sapiunt. Præcipue libros Fausti Galliarum Episcopi, qui de monasterio Lirinensi protectus est, quos contra prædestinationis sententiam scriptos esse, non dubium est. In quibus non solum contra Sanctorum Patrum, sed etiam contra ipsius Apostoli traditionem veniens, humano labori subjungit gratiæ adjutorium : atque totam omnino evacuat Christi gratiam, antiquos Sanctos non ea gratia qua nos, secundum quod docet Beatissimus Petrus Apostolus, sed naturæ possibilitate, salvatos impie profitetur.* Fulgentius autem, in sequenti libro de Incarnat. et Grat., licet a cap. 42 usque ad finem, veram de gratiæ initio doctrinam confirmet, et fere omnes sententias et argumenta Fausti proferat et impugnet, de illo autem, vel illius libris nullam mentionem facit; tacite tamen Petro consentire videtur.

25. *Maxentius in Fausti doctrinam intehitur.* — Maxime vero contra illos libros Fausti involvitur Joannes Maxentius, in responsione ad epistolam Hormisdæ Papæ ad Possessorem, sub finem, ubi assumit onus probandi illos libros esse hæreticos, idque late ostendit eo fere modo quo nos statim ideam præstabimus. Interim adverte Maxentium, in hac parte, non esse magnæ auctoritatis; tum quia, licet non in hoc puncto, ipse tamen inter hæreticos Scythiæ monachos eutychniana hæresi infectos cenetur; tum etiam quia illam epistolam

Hormisdæ, sub prætextu quod ejus non esset, vehementer impugnat. Quem tamen prætextum vanum esse, et fictum, aut per affectatam ignorantiam prætextum, existimat Baronius, late ostendens Epistolam illam fuisse Hormisdæ, et vix potuisse illis temporibus Maxentium de hoc dubitare, quia totius causæ et aliarum epistolarum Hormisdæ notitiam habebat, ut late prosequitur ann. 520, num. 22 et sequentibus.

26. *Maxentius Hormisdæ imponit.* — Et quod mirandum est, Hormisdæ audet Maxentius facere Pelagianum, quia dixit in illa epistola : *Nos fixis decet insistere vestigiis, proficiemus inter adversantes propriis bonis, si erroribus non involvamus alienis.* Nam quia dixit, *propriis bonis*, arguit illum Maxentius ac si dixisset, *propriis viribus*, sic inquit : *Superbissimæ pelagianæ perfidiæ involutum erroribus te cunctorum oculis anteponis, qui inter adversantes non Dei munere, sed propriis bonis proficere posse tumida elatione confidis, quia si propriis bonis, non Dei auxilio, proficere posset humana natura, nunquam oraret Propheta : Perfice gressus meos, et cætera quæ late prosequitur.* Quibus manifeste falsum sensum imponit Hormisdæ; ille enim non dixit, *propriis bonis*, ad divinum auxilium excludendum, sed ut illa bona ab erroribus alienis distingueret; sic enim ait, *proficiemus propriis bonis, si erroribus non involvamus alienis.* Propria enim bona appellat fidem veram et sanctitatem, quæ bona propria dicuntur, non quia a nobis sint, sed quia a Deo donata sunt nobis, et in illis proficimus, dum tentati alienis erroribus, illis non involvimur. Hoc autem nunquam dixit Hormisdæ posse sine gratia Dei fieri : unde cum subdit : *Probat enim virtutis suæ validum robur, qui, cum impellitur, non moxetur, non naturæ, sed fidei virtutem, et robur commendat, in quo possumus omnia tela nequissimi ignea extinguere,* ut ad Ephes. sexto, Paulus dixit.

27. *Hormisdæ libros Fausti non recipit.* — Denique, in fine Epistolæ, cum consultus Hormisdæ de Fausti libris illos non recipiat, et doctrinam, quam Ecclesia de gratia recipit, in libris Augustini contineri dicat, audet Maxentius auctorem Epistolæ reprehendere, eo quod libros illos ut hæreticos non damnet. Verumtamen vel hoc ipso conjectare posset, responsionem illam pontificiam fuisse, non privati doctoris, qui in re obscura et ambigua facile profert sententiam. Hormisdæ vero pontificia auctoritate solum respondet, illos Fausti libros

non esse in auctoritate habendos, quia in his in quibus discordant a doctrina Ecclesiæ, quæ in Synodis, et in libris Augustini habetur, probandi non sunt, et quia in hoc saltem suspecti sunt, ideo Ecclesia Romana eos non comendat. In quo etiam alludit Hormisda ad decretum Gelasii, qui, in suo decreto de librorum ecclesiasticorum auctoritate, libros Fausti inter apocryphos numerat.

28. *Error Fausti concluditur ex illis scriptis.* — Ex his ergo intelligitur, illos libros semper fuisse, vel damnatos, vel valde suspectos: et profecto qui illos attente legerit, facile intelliget, auctorem eorum Semipelagianorum errore infectum fuisse. Nam, licet ambiguus et æquivocis locutionibus studeat Faustus occurrere sensum suum erroneum, ut ex allegatis in principio constat, tamen in multis aliis manifeste se prodit, quod initium fidei vel salutis tribuat libero arbitrio, et illi veram gratiam subjungat, tanquam subsequentem bonum et meritorium usum liberi arbitrii, non tanquam præcedentem. Sic, cap. 7 cum dixisset: *Tempus gratiæ quo redempti sumus, merita hominum non expectavit, opera penitus non quæsit*, statim adjungit: *sola Deus fidei nostræ devotione contentus fuit*, ubi non potest loqui de devotione, quæ sit ex gratia, alias etiam priora verba de meritis et operibus ex gratia factis intelligenda essent, et sic hæreticum esset dicere, Deum, tempore gratiæ, opera (utique ex gratia facta) non requirere; unde consequenter adjungit: *Justum ex fide vivere asseruit, quia ei fidem et justitiam quærenti, contulisse se meminit*: et infra circa id Pauli: *Inquirentibus se remunerator sit*, inquit: *Sicut ad Dominum largitio remunerandi, ita ad hominem devotio respicit inquirendi*; et in fine: *Fidem, inquit, expectat a parvulis* (id est a nondum justificatis); *opera etiam cum fide a confirmatis requirit, ita tamen ut credulitatis affectum proficientibus augeat, et laborantibus adjutor quotidianus adsistat*. Unde credulitatis affectum sentit præcedere gratiam fidei, et laborem humanum gratiam operum, quod capite nono confirmat, et capite decimo magis exponit, dicens dedisse Deum homini libertatem, ut si malam vellet appetere, sibi esset permissum: *Si autem bonum cuperet, actionem et perfectionem ejus a conditore deposceret, ad mercedem vero illius officiosa devotio pertineret. Et ideo hominis formator et rector bonæ voluntatis homini deputavit usum, sibi reseravit effectum*, ubi initium ponit in boni cupiditate, cujus bonum usum soli libero arbitrio,

Deo autem perfectionem et consummationem tribuit, et in eodem sensu dicit inferius: *Orantibus, et vigilantibus, misericordiæ benignitate succurritur, quæ utique pulsantibus, magis ex devotione, id est, ob bonum affectum, quam ex prædestinatione deferitur*, ubi incipit impugnare gratuitam prædestinationem, illam enim vult esse ex merito solius liberi arbitrii, quod hic vocat ex devotione. Et ita gratiæ et prædestinationi solum tribuit effectum et consummationem, ut repetit capite undecimo, circa finem; et clarius capite duodecimo, de filio prodigo loquens, ait: *Sicut sui criminis est, quod longe pii parentis refugit oculos, ita suæ est devotionis, quod per insitum sibi bonum deliberans, et adsurgens, ad paternos recurrit amplexus*, ubi particula, *per insitum bonum*, satis declarat quo sensu devotionem appellet affectum ex sola libertate procedentem, quod iterum atque iterum repetit.

29. *Quod recte dicere Faustus videbatur, male explicat.* — Potest autem quemquam decipere, quod in eodem loco hæc verba interponit: *Gratia, quæ pulsaverat peregrinantem, ipsa suscipit revertentem*, et ita videtur fateri, gratiam præire, quod capite septimo multis verbis astruere videtur. Verumtamen ibidem suum sensum aperit, omnemque ambiguitatem tollit, et nomine gratiæ pulsantis, vel attrahentis solam externam prædicationem et doctrinam, seu objecti propositionem intelligit, ut patet ex illis verbis Fausti: *Quid est autem attrahere, nisi prædicare, nisi Scripturarum consolationibus excitare, increpationibus deterere, desideranda proponere, intentare metucunda, judicium comminari, præmium polliceri?* Ubi aperte non aliter gratiam prævenientem, quam Pelagius interpretatur; unde subjungit: *Sicut gratiæ est, quod ultrahitur, ita obedientia probatur esse quod sequitur*. Ubi dupliciter errat, nam veram gratiam interiori attrahentem non agnoscit, et ad obediendum externæ prædicationi voluntatem per se sufficere sentit, saltem inchoative, ut sic dicam, *ut per quamdam voluntatis ansulam* (sicut subjungit) *comprehendi et attrahi valeat* (utique cum effectu) *qui vocatur*: et in eodem sensu dicit in eodem capite: *Assistenti, et vocanti Domino, servulus manum fidei, qua attrahatur, extendit, et dicit: Credo, Domine, adjuva infirmitatem meam*. Ubi hunc ordinem constituit inter gratiam et liberum arbitrium, ut præcedat vocatio aliqua per externam prædicationem, vel alio simili modo, et tunc intelligitur Deus, non ut adjuvans, sed ut assistens, et quasi expectans, ut

deinde incipiat homo credere imperfecte, et invocare sua libertate, ac tandem Deus incipiat per gratiam ad profectum adjuvare: unde subjungit: *Et ita se duo ista conjungunt; attrahentis virtus, et obedientis affectus: quomodo si æger aliquis assurgere conatur, et facultas animum non sequatur, et propterea sibi porrigi dexteram deprecetur, clamat voluntas, quia sola per se elevari nescit infirmitas, ita Dominus incitat volentem, attrahit desiderantem, erigit adjuvantem.* Imo, cum statim explicet attractionem non esse nisi prædicationem, ut antea retuli, videtur indicare etiam prædicationem ipsam esse ex merito aliquo propriæ voluntatis desiderantis, et invocantis. Verumtamen vel duplicem attractionem ponit, aliam externam tantum, et sufficientem ad volendum per solam libertatem, saltem imperfecte; aliam perfectiorem, et cum effectum, et hanc dicit esse ex humano merito: vel certe potius sentit attractionem illam externam interdum dari etiam indignis, et sine prævio merito, interdum vero dignis ex merito humano, quod præcedit aliquando ante prædicationem Evangelii, vel revelationem supernaturalem, per bonum usum legis naturæ.

30. *Tam multa inculcat Faustus pro semipelagianismo, ut illum pie exponere non liceat.* — Atque hanc eandem doctrinam magis inculcat, et declarat toto libro secundo. Nam, in capite tertio, ex professo probat prædestinationem esse ex præscientia alienius meriti humani, et ideo ait, *voluntatem esse, quæ meretur auxilium, sicut voluntas est, quæ operatur delictum,* et in capite quarto eundem ordinem inter usum libertatis et gratiæ ponit, et ideo inter alia dicit: *Ad obedientiam pertinet labor, fructus autem laboris ad gratiam,* ubi necesse est loqui de obedientia, quæ viribus propriis fit, cum illam a gratia distinguat. Et capite sexto, post multa que de prædestinationis causa tradit, de Abel dicit in fine: *Sed et Abel dicere studuit placere conspectibus per insitum a Deo generatim bonum, id est, per propria merita voluntatis affectum,* et cap. 7 dicit, *legem naturæ esse primam gratiam, per quam nulli re titula salutis intraverunt, per Christum ad vitam perstrata perducendi.* Loquiturque de hominibus, qui fuerunt ante legem scriptam; et item consequenter sentit de his quibus nondum fuit exterius prædicata fides. Unde generaliter ait: *Nisi voluntariam devotionem, et istius rei quereret, remuneratio non homini non deferret, et nisi ei aliquid proprium, unde posset placere, tribuisset.* Ac de-

nique, capite vigesimo-sexto, inter alia dicit: *Hoc solum nostrum est, ut qui pro fragilitate idonei non sumus, saltem quærendi, et pulsandi importunitate placeamus.* Hoc autem vocat nostrum, quia nos ad id sumus idonei, utique absque gratia; unde addit tandem notanda verba, *nisi fuerit obedientiæ præmissæ devotio, gratiæ vilescit oblatio.* Ex quibus locutionibus, si una tantum vel altera in hoc opere inveniretur, posset pie ad bonum sensum trahi, explicando, verbi gratia, necessitatem laboris et obedientiæ, de illa quæ cum Dei adjutorio præstatur. Verumtamen in tanta multitudine sententiarum, et tot modis illas explicandi contra doctrinam Augustini, nulla pia interpretatio locum habet; præsertim, quia simul conatur ille auctor refellere testimonia Scripturæ, quæ veritatem fidei confirmant, ad peregrinos et erroneos sensus illa detorquendo, ut postea confirmando fidei doctrinam attingemus.

31. *Adducta pro Fausto solvantur.* — Quapropter, in prioribus locis, quæ in contrarium adduximus, prima verba Epistolæ, quæ sunt a toto Concilio probata, catholicum possunt habere sensum, et in illo credendum est, fuisse a Patribus Concilii ibi subscribentibus recepta, ut Baronius recte notavit. In aliis vero, quæ sunt propria Fausti, sub nomine gratiæ comprehendit externam prædicationem, revelationem, doctrinam, imo etiam legem naturæ, ut vidimus. Et ita quoties dicit initium bonæ voluntatis esse ex gratia, vel a Deo esse inchoationis initia, et consummationem, et gratiam esse quæ attrahit, et ante obedientiam præcedit, et similia; solum loquitur de gratia externa per legem, vel doctrinam, aut prædicationem; ita enim se in aliis locis declarat, nec in alio sensu potest consecutio doctrine consistere. Et ita etiam notavit Maxentius in dicta responsione circa finem.

32. *Faustus fidei consonat in voce, dissonat in sensu.* — Unde, licet in eisdem libris reperiantur eadem voces quibus catholica fides utitur, nimirum, gratiæ vocantis, attrahentis, adjuvantis, ac cooperantis, nihilominus eorum significatio et usus longe sunt diversa. Nam per vocationem, solam externam prædicationem, vel objecti propositionem, aut naturalis legis dictamen, aut aliquid simile intelligit, ut ipse explicat, et hanc interdum primam gratiam, et attractionem. Per adjutorium autem gratiæ, vel cooperationem, intelligit gratiam aliquam subsequentem ad humanum meritum, et promoventem aliquo modo liberum ar-

bitrium ad ulteriorem perfectionem. Ac proinde, in capite decimo, libro secundo, sic inquit: *Ipsum adjutorii vocabulum duos indicat, operantem et cooperantem*; quæ verba inveniuntur etiam in Augustino, sed in sensu longe diverso. Augustinus enim gratiam ipsam esse vult operantem, et cooperantem simul cum libero arbitrio, ut infra suis locis ostendemus. Faustus vero per operantem intelligit hominem, et cooperantem vult esse Deum, vel gratiam, non simul, sed post hominis prævium meritum: unde post dicta verba *operantem, et cooperantem*, subjungit: *Potentem, et promittentem, pulsantem, et aperientem, querentem, et retribuentem*. Et ita neque gratiam veram operantem agnoscit, nec cooperantem ad idem omnino opus, vel ad eundem hominis affectum, sed cooperantem vocat, licet detur ad novum effectum, solum quia subjungitur priori actioni, et merito hominis, ut illum ad ulteriorem perfectionem adjuvet. De quo etiam subsequenti adjutorio, quale sit, nunquam satis ab illo auctore explicatur, ut sequenti capite dicam. Et hætenus de hujus erroris auctoribus, quorum sententias fuse explicare volui, ut plena notitia ipsius erroris habeatur, quam his temporibus existimo necessariam, et ideo in capite sequenti pluribus modis erit locupletanda.

33. *De hoc errore notantur Sulpitius et Gennadius, sine sufficienti tamen fundamento.* — Præsertim vero lectorem admonitum velim, nonnullos alios ejusdem temporis illustres viros hoc errore aliquando maculatos existimari, fortasse sine causa, vel sine sufficienti probatione. Unus est Severus Sulpitius, qui vitam B. Martini, et alia insignia opera scripsit, et inter sanctos recensetur die 29 januarii in Martyrologio romano, quia Gennadius, in Catalogo virorum illustrium, de illo in fine dicit, in senectute fuisse a Pelagianis deceptum, postea vero resipuisse, et pœnitentiam usque ad mortem egisse. Cui fidem præbet Baronius ann. 431, num. 189 et sequentibus. Sentit autem non toto errore Pelagii fuisse infectum, sed tantum doctrina semipelagiana denigratum: simulque conjectat, auctoritate Epistolæ a Cælestino conscriptæ contra obtretractores Augustini fuisse commotum, et ita ad saniorum mentem rediisse. Ego vero in hac re valde sum dubius, rationem autem meæ dubitationis statim aperiam. Alius enim a scriptoribus ecclesiasticis de hoc errore suspectus esse dicitur, Gennadius, ut sæpius idem Baronius testatur ann. 433, numer. vigesimo-octavo, ubi Gennadium vocat ejusdem farinae cum

Cassiano; et numer. trigesimo, dicit Gennadium æque Pelagianum Cassianum excusare, et Prosperum damnare. Idemque colligi potest ex eo quod Faustum etiam et ejus libros laudat, ut mox videbimus; item ex eo quod, in eodem libro de ecclesiasticis scriptoribus, Rufinum vehementer laudat, et in fine illum Hieronymo præfert, cum tamen etiam ipse Rufinus de pelagiana hæresi suspectus sit, et ideo opera ejus inter apocrypha a Gelasio censentur, quia hoc in eis Hieronymus annotavit. Unde tandem affirmat Baronius, ann. 490, numer. quadragesimo-quinto, Gennadium fuisse unum ex Gallicanis presbyteris, de quibus Prosper et Hilarius apud Cælestinum conquesti sunt, propter Semipelagianorum doctrinam contra Augustinum. Idemque affirmat auctor censuræ ad librum de Ecclesiasticis dogm., in 3 tom. operum Augustin., in Append., in princip. Qui etiam addit, etiam in illo libro haberi nonnulla, in quibus latet semipelagiana doctrina, et ideo caute legenda esse.

34. *Argumentum cur Severus inter Semipelagianos annumerari non debet.* — Hinc ergo dubium mihi oritur de his quæ Gennadius de Sulpitio Severo refert; qui enim fieri potest ut Severum deceptum dixerit, sequendo errorem quem ipse approbabat? aut quomodo in laudem illius ponit, quod peccatum illud pœnitentia delere studuerit, cum ipse in Cassiano et Fausto illud peccatum non damnaverit, sed defenderit? Respondebit forte aliquis cum Baronio, in posteriori loco allegato, Gennadium ipsum etiam resipuisse, quia ipse, in ultimo capite sui libri de Scriptoribus ecclesiasticis, de se refert, inter alia opera scripsisse librum quemdam de sua fide, eumque ad Gelasium Pontificem misisse, quod est signum fidelis et catholici scriptoris. Imo, conjectat Baronius illum librum fuisse, qui nunc extat de Ecclesiasticis dogmatibus, et a Gelasio fuisse correctum et emendatum, et auctorem in meliorem frugem fuisse mutatum, factumque plene Catholicum, et ad Massiliensem episcopatum promotum. Nam Adrianus Papa, in epistola ad Carolum Magnum pro defensione secundæ Synodi Nicenæ, in capit. quinquagesimo-quinto, illum sub nomine Sancti Gennadii, Episcopi Massiliensis, allegat.

35. *Refutatio erasionis.* — Sed hoc imprimis non expendit difficultatem; nam certe, si Gennadius Semipelagianus fuit, in eodem errore perseverabat, quando librum de viris illustribus scripsit, quandoquidem Cassianum, Faustum, et alios illius erroris sectatores de-

fendit; quomodo ergo in eodem opere Severum Sulpitium ejusdem erroris notat, illumque laudat quod tandem resipuerit? Deinde, caput illud ultimum de viris illustribus, in quo dicitur Gennadius de se loqui, deest in eo libro prout habetur in fine primi tomi operum sancti Hieronymi. Præterea auctor censuræ ad lib. de Ecclesiast. dogmat. in tertio tomo operum Augustini, negat Gennadium fuisse Episcopum, sed tantum presbyterum. Quod si in hoc major fides adhibenda est epistolæ Adriani, ut revera est, potius ex illa colligitur Gennadium nunquam fuisse Pelagianum, quia, si fuisset hæreticus, etiamsi resipuisset, non tanto honore ab Adriano Papa ad fidei dogma confirmandum allegaretur. Fieri ergo potuit ut ea quæ de Cassiano et Fausto scripsit, non per errorem in doctrina, sed per ignorantiam facti dixerit, quia in bono sensu illorum sententias et loquendi modos interpretatus est. Cum enim nunc aliqui catholici id facere tentaverint, et non propterea in hæresis suspicionem veniant, quid mirum quod idem potuerit Gennadio accidere?

36. Et sane ita de illo sentire videtur Platina, cum in vita Symmachi circa finem dicit: *Hujus (id est Symmachi) tempore Ecclesiam Dei multum juvit Gennadius Massiliensis Episcopus, qui, diligens Augustini imitator, et librum de dogmatibus composuit, et quid cuique ad salutem necessarium esset, declaravit.* Quod si hoc verum est, facile expenditur dubitatio posita; nam fortasse Severus Sulpitius, a Pelagianis deceptus, aliquo tempore ipsorum errores aperte professus est. Si vero fateamur Gennadium aliquando aperte contra Augustinum, cum Semipelagianis, sensisse, necessario fatendum est, eum de Severo loquitur, graviorem in illo errorem Pelagianum notare, quam in Massiliensibus fuerit. Veruntamen etiam illa narratio de Severo mihi est valde incerta, quia in Martyrologio Romano, die vigesima nona januarii, Sulpitius Severus, discipulus sancti Martini, et Episcopus Bituricensis, inter Sanctos numeratur, et virtutibus ac eruditione conspicuus dicitur, nullaque lapsus illius fit mentio. At vero, in die vigesima-sexta ejusdem mensis, dicitur *ejus vitam et mortem pretiosam gloriosis miraculis commendari.* Unde Guibertus Abbas, in Compendio Apologiæ pro Severo, dicit *nuquam, nisi in solo Gennadio legi, fuisse Severum a Pelagianis seductum, qui nescio, utrum hoc ipse alicubi legerit, an ex sola fama, quæ facta infectaque docet, didicerit.* De his ergo duobus,

Severo et Gennadio, nihil certo statuere possumus, nisi quod in catholica doctrina decesserint; quales autem aliquando fuerint, ad doctrinam postea tradendam non refert.

CAPUT VI.

NONNULLIS PROPOSITIS DUBIIS SEMIPELAGIANUS ERROR AMPLIUS EXPLICATUR.

1. *Præcipuus error, ac cæterorum origo.* — Primus ac præcipuus error Massiliensium, ac cæterorum fundamentum fuit: *Gratiam Dei secundum merita hominum dari*, ut ex Augustino, libr. de Prædest. Sanctor., Prospero et Hilario, in epistolis ad ipsum sumitur, et optime declaravit idem Prosper in epistola ad Ruffinum, initio. Unde operæ pretium est exponere, in quibus actibus liberi arbitrii illud meritum ponerent; quale et quam necessarium existimarent esse illud meritum ad gratiam obtinendam, quid comprehenderent sub illa gratia, quæ propter tale meritum datur; ac subinde an sincere et proprie nomine gratiæ uterentur, vel etiam palliate Pelagianorum more, quæ omnia sequentibus dubiis explicatius disseremus.

In quibus actibus, seu in quo usu liberi arbitrii hoc meritum Semipelagiani collocaverint.

Dubium 1.

2. *Prima sententia in proposito dubio.* — Aliqui existimant posuisse hoc meritum in sola voluntate credendi, quam a solo libero arbitrio esse credebant, vel etiam in fide quadam imperfecta et naturali, quæ statim ex illa voluntate efficaci oriretur. Ita significat Augustinus, libr. de Prædestinatione Sanctorum, ubi, hac ratione, totam disputationem contra Semipelagianos ad hoc reducit, ut fidem et initium fidei non ex solo libero arbitrio, sed ex gratia Dei esse ostendat, ac proinde, si quod est in fide meritum, non esse mere humanum, sed esse ex gratia. Neque etiam ipsam fidem voluntatemve credendi esse posse ex merito humano, tum quia alias non esset gratia, tum etiam quia ipsa fides est omnis meriti initium, et consequenter fidei initium est initium totius gratiæ et sanctificationis, ut idem Augustinus dixit epist. 107, in fine.

3. *Secunda sententia tenenda.* — Sed, quamvis verum sit Semipelagianos posuisse hoc meritum in voluntate credendi, et fide naturali, non tamen in sola illa. Quia Augustinus non

ponit exclusivam, licet disputationem ad illud caput, tanquam ad principale, revocet, quia, illo secluso, facile cætera riuunt: et alii Patres alios actus numerant, qui, etiam in his quæ, ex Cassiano et Fausto retulimus, evidentissime continentur. Sic enim aiunt, *desiderantibus, petentibus, pulsantibus, et quærentibus gratiam dari*. Et ideo Concilium Arausie., canone tertio, specialiter loquitur de invocatione humana; et canone quarto, de voluntate salutis, quæ gratiam præcedat; et canone sexto: *Si quis sine gratia Dei, credentibus, volentibus, desiderantibus, vigilantibus, studentibus, quærentibus, pulsantibus, etc.*, quæ omnia recenset, quia in his omnibus illud meritum gratiæ ponebant Semipelagiani, quæ interdum a Cassiano explicantur, interdum sub nomine *laboris humani* omnia comprehenduntur, ut constat ex libro decimo secundo, de Institution. renuntiant., capit. decimo quarto; et Prosper, in dicta epistol. ad Rufinum, ex sententia Semipelagianorum, ait Deum expectare homines, *quo unusquisque secundum voluntatis suæ motum, si quæsierit, inveniat; si petierit, recipiat; si pulsaverit, introeat*; et infra: *Ut qui voluerint credant, et qui crediderint, justificationem merito fidei et bonæ voluntatis accipiant*.

4. *Ulterior interrogatio in ipso dubio principali. — Responsio.* — Sed quæri ulterius potest, an isti posuerint hoc meritum in his operibus tantum quæ ante justificationem usque ad fidem præcedunt, vel etiam in omnibus bonis actibus, aut operibus, vel laboribus, post quameumque gratiam, vel justificationem factis, etiamsi sola facultate liberi arbitrii, absque cooperatione gratiæ, efficiantur? Respondetur dubium non esse quin de omni bono usu naturali liberi arbitrii, sive antecedit, sive comitetur, sive sequatur fidem, non tantum imperfectam, sed etiam perfectam in suo genere, locuti fuerint. Nam de antecedentibus et comitantibus res est clara, de subsequentibus autem patet in primis exemplis a Cassiano adductis. Nam in hoc ordine ponit pœnitentiam David, qui jam fidem habebat, et satis perfectam, et robustam, idemque censet de voluntate adificandi templum, quam David habuit, non solum post fidem, sed etiam post justitiam. Idemque constat ex exemplo de victoria Job, et similibus. Deinde probatur, quia Cassianus, in illis locis, non solum tractat de gratia quæ datur post fidem, ad primam justificationem consequendam, sed etiam de adjutorio gratiæ necessario ad perfectionem spiritualem in castitate, et in omni

genere virtutis, et pace, ac munditia cordis obtinenda, et hoc etiam adjutorium dicit dari hominibus ex merito laboris humani; manifestum autem est hunc laborem exhiberi a viris, non tantum jam perfecte credentibus, sed etiam justis, et ad perfectionem tendentibus. Præterea, idem aperte tradit Faustus, libro primo, capite septimo, et aliis, ejus verba jam retulimus. Ratio denique suaderi potest, quia, si voluntati hominis nondum illuminati per fidem, vel nondum confirmati per perfectam fidem, tantam vim et facultatem tribuebant, quomodo non majori ratione eandem, vel ampliozem admitterent in voluntate, et opere hominis jam quidem credentis, vel justis, propriis tantum liberi arbitrii viribus operantis.

5. *Objectio.* — Dices, licet fortasse hoc dixerint Massilienses, in eo non errasse, neque illud pertinere ad reliquias Pelagianorum. Nunc enim opinio aliquorum theologorum est, bona opera moralia, quæ a justis fieri possunt ex solis viribus liberi arbitrii, meritoria esse gratiæ, seu augmenti ejus, quæ opinio non erronea, sed probabilis reputatur. Respondeo, quidquid sit de censura illius opinionis, de qua inferius suo loco dicemus, in duobus præcipue errasse Massilienses. Primo, quia multa præclara opera dicebant fieri posse per solas vires liberi arbitrii, quæ revera etiam a credentibus, vel a justis, sine speciali Dei favore et gratia, fieri non possunt, ut sunt pœnitentia de peccato, quæ veniam statim obtineat, victoria gravissimæ et perseverantis, imo etiam multiplicis tentationis, vigiliis, jejuniis, et orationibus perseveranter insistere, et similia. Secundo, quia, his operibus ex libero arbitrio factis, non ratione fidei, vel gratiæ in persona existentis, sed solum ratione boni usus naturalis libertatis, meritum donorum gratiæ tribuebant. Ita ut intuitu solus hujusmodi usus Deus ulteriorem gratiam concedat. Utrumque enim aperte sumitur ex sententiis Cassiani et Fausti allegatis, et utrumque ad reliquias Pelagii pertinet, ut postea ostendemus. Præterquam quod etiam est falsum dicere, opera mere humana ex solis viribus liberi arbitrii facta in homine fidei vel justo esse meritoria gratiæ, ut in fine hujus operis tractabitur.

6. *Ultima interrogatio in eodem dubio principali. — Responsio prima.* — Tandem vero in hoc puncto interrogari potest, an Massilienses posuerint etiam hoc meritum in operibus vel affectibus supernaturalibus, non quatenus sunt ex gratia, sed quatenus sunt ex conatu liberi

arbitrii. Aliqui enim theologi etiam hunc numerant inter errores Semipelagianorum. Referunt enim, eos dixisse, in ipsomet consensu libero, quem nostra voluntas præbet gratiæ vocanti, licet ad illum gratia etiam comitanter concurrat, tamen nostrum conatum et influxum liberum esse natura priorem, et illum expectare Deum, ut per gratiam suam adjuvet voluntatem nostram ad consentiendum, et ita etiam quoad hoc posuisse initium salutis ex nobis, quia initium illius consensus est a nobis, et ratione illius, ut præcise est a libero arbitrio, Deum hominem dicebant adjuvare. Et hoc modo intelligendum putant canonem quartum Concilii Arausicani, ubi damnantur dicentes, *Deum expectare voluntatem nostram, ut a peccato expurgemur*. Et eodem modo intelligent Semipelagianos subjecisse gratiam libertati, et fecisse illam pedissequam liberi arbitrii in concursu, quem ad eundem supernaturalem actum habent. Ac denique sic etiam interpretabuntur, quod Prosper in epistol. ad Augustinum eosdem dixisse refert: *Libertatem tunc iurandam Dei auxilio, si, quod Deus mandat, elegerit*; et quod subjungit: *Obedientiam esse priorem, quam gratiam*; et quod ait Hilarius: *Neque alicui operi curationis eorum adnumerandum putant, exterrita, et simplici voluntate ægrotum velle sanari*.

7. *Rejicitur responsio*. — Verumtamen hæc tam subtilis distinctio, et speculatio non habet fundamentum, vel in dictis Cassiani aut Fausti, vel in his omnibus quæ ex Concilio Arausicano, aut ex sanctis Augustino, Prospero aut Hilario de hoc errore colligi possunt, sed potius contrarium; quia Concilium Arausicanum, canonibus tertio, sexto, septimo et sequentibus, per initium salutis aut fidei, non explicat solum concursum, vel conatum voluntatis cum operante et cooperante gratia, sed aliquem actum, vel affectum humanum sine his gratiis factum, qualis est invocatio humana, desiderium aliquod salutis, electio, labor, et similia; et e contrario, in canone quinto, per initium fidei intelligit *credulitatis affectum*, qui ex inspiratione divina concipitur. Neque comparat in eodem actu conatum voluntatis ad concursum Dei, sed unum actum ad alium, vel alios distinctos, et damnat dicentes actum naturalibus viribus factum, esse rationem obtinendi gratiam, aut fidem. Neque damnat dicentes talem actum fieri sine concursu Dei, aut prius elici a voluntate, quam fiat a Deo, quia, nimirum, neutrum legimus dixisse Massilienses, sed damnat eos qui, cum dicerent

tales actus fieri solis viribus liberi arbitrii (quod non excludit generalem concursum Dei), dicebant esse causam et principium salutis, et fidei, seu gratiæ, quæ esset res distincta a tali actu, et effectus illius meriti.

8. *Secunda responsio*. — Et ideo etiam Concilium Tridentinum, sessione sexta, capite quinto, volens tradere doctrinam contrariam Semipelagianorum errori, docet initium salutis sumi a vocatione antecedente omnia merita, et re ipsa distincta a concursu libero voluntatis. Ponebant ergo Massilienses hoc principium, vel meritum in aliquo actu, qui a vobis fiat cum solo Dei concursu, nec comparabant illa duo inter se, nec de hoc fuit unquam controversia inter illos et Patres. Quod etiam aperte ostendunt verba Augustini, libro de Prædestinatione Sanctorum, capite secundo, quibus explicat punctum controversiæ, in quo Galli nondum a Pelagianis discedebant. Et ex verbis Prosperi et Hilarii, qui semper referunt hujusmodi actus, *velle credere, credere, invocare, velle sanari*, et similia, quæ significant actus ipsos, quos dicebant fieri a libero arbitrio sine adjutorio gratiæ, et in illis ponebant tale meritum; et gratiam retributam talibus actibus ponebant in alio nobiliori effectum, vel dono ab ipsis actibus distincto, ad quod recipiendum dicebant præparari voluntatem, prioribus actibus naturaliter elicitis. Et hoc ipsum evidenter declarant Cassianus et Faustus in suis sententiis, et quidquid aliud eis attribuitur, voluntarie excogitatum est.

9. *Præcedens responsio acceptatur et probatur*. — Unde etiam constat neque Massilienses ita distinxisse in ipso voluntario consensu conatum liberi arbitrii a cooperatione Dei, ut illum dicerent esse priorem et rationem alterius, et ideo illum vocaverint initium salutis ex parte nostra. Nam, præterquam quod nihil tale in eorum scriptis reperitur, nec de illis relatum invenitur, illud ipsum etiam ipsi naturali lumini rationis repugnat, ut infra suis locis ostendemus, ideoque, sine magno fundamento et evidentia verborum illis attribuendum non esset. Quocirca, a Patribus non arguuntur dixisse initium salutis vel fidei esse ex nobis, quia dicerent influxum liberi arbitrii in consensum, esse priorem cooperatione Dei, sed quia dicebant illum actum fieri a nobis, id est, sine prævia interna gratia, et inspiratione ac illuminatione divina præparante voluntatem. Et e contrario Concilium Tridentinum, per initium salutis, non expli-

enit cooperationem Dei ad illum consensum, sed vocationem per tactum Dei, et præviā illuminationem, et inspirationem. Et ob eandem causam, Augustinus sæpe docet Deum inchoare nostram salutem operando in nobis sine nobis, quod facit per veram et internam vocationem omnino gratuitam, et omne meritum nostrum antecedentem, quam non admitterebant Massilienses, et ideo errabant. Ergo in illo prævio merito, quod ponebant, multo minus ponebant propriam cooperantem gratiam, sed solum generalem influxum naturæ. Ac proinde non ponebant tale meritum in actu libero in re ipsa facto ex gratia, sic vel sic considerato, sed in solis quibusdam bonis actibus mere naturalibus. Et hoc modo subiciebant gratiam bono usui libertatis, puro (ut sic dicam), id est, omnem influxum gratiæ in re ipsa excludentem, seu mero conatui humano, id est, non elevato per ullam gratiam ad superiorem ordinem, qualis est conatus quem voluntas adhibet in actibus, quos sine cooperante gratia non facit.

10. *Quo sensu Semipelagiani locuti sint, atque a Concilio Arausicano damnati.* — Denique, hinc intelligitur quo sensu dixerint, Deum expectare voluntates nostras, et quo etiam sensu id a Concilio Arausicano damnatur. Intelligebant enim Deum expectare voluntatem hominis, ut se præparet suis viribus, ut ad fidem, vel pœnitentiam vocetur per gratiam, vel (quod gravius) ut ipsam salutem gratiæ et perfectionem recipiat. Et hoc est quod damnatur in dicto canone quarto Concilii Arausicani. Cum enim intenderet reliquias Pelagianorum extinguere, ut infra videbimus, in sensu illis contrario loqui debuit. Et hoc etiam manifestat Concilium in omnibus canonibus sequentibus. In quibus eisdem verbis quibus Semipelagiani suum declarabant errorem, illum damnat, et contrariam veritatem docet. Quocirca, sicut Semipelagiani hinc constituentes hominem cum nudo libero arbitrio, et inde Deum largitorem totius divinæ gratiæ a prima usque ad ultimam, dicebant expectare Deum, ut homo inchoet bonum opus liberi arbitrii prius quam ipse incipiat opus gratiæ; ita Concilium in eodem sensu damnat dicentes, Deum expectare hominis voluntatem, ut a peccato purgari velit, docetque Deum incipere infundendo spiritum gratiæ, et per illum voluntatem salutis in homine efficiendo: quod pertinet ad primam vocationem prævenientem consensum, non ad cooperationem ipsius consensus.

11. *Salus a Deo manat; illi homo respondet.* — Quod etiam patet ex testimoniis Scripturæ, quibus suam doctrinam confirmat. Unum est illud: *Præparatur voluntas a Domino.* Quod de præparatione quam solus Deus facit, intelligit Augustinus, quæstione secunda, ad Simp. Nam *hominis etiam est præparare cor*, ut dicitur Proverb. decimo sexto; unde nobis dicitur: *Præparate corda vestra Domino*, 1 Reg. septimo; hæc autem præparatio secunda fit ab homine cum Deo, et gratia ejus cooperante; illa vero prior, quæ antecedit, fit a solo Deo per gratiam excitantem, seu vocationem, ut ibidem ait Augustinus, et libro de Prædestinatione Sanctorum, capite sexto, et decimo sexto, et contra duas epistolas Pelagianorum, capite octavo et nono, et libro secundo de Peccator. merit. et Remiss., capite decimo octavo. De hac ergo præparatione per solam Dei prævenientem gratiam loquitur illud Concilium, cum docet Deum non expectare hominem. Aliud testimonium est illud ad Philippens. secundo: *Deus est qui operatur in vobis, et velle, etc.*, quod etiam facit Deus per congruam vocationem, ut eisdem locis Augustinus exponit; præsertim dicta quæstione secunda ad Simpli.; itemque libro de Bon. pers. capite decimo tertio, et libro de Grat. et liber. Arbit., capite decimo sexto, et decimo septimo. Hominem ergo nondum vocatum non expectat DEUS, ut illum vocet (ut infra, contra hunc errorem Semipelagianorum, ostendemus, nunc enim solum illum explicamus); hominem autem jam supernaturaliter excitatum et vocatum expectat Deus, ut libere consentiat, et ad ulteriorem gratiam se disponat, ut infra, cum de gratia efficaci tractaverimus, declarabimus et ostendemus.

Quam gratiam intellexerint Semipelagiani dari nobis a Deo, intuitu boni usus naturalis libertatis. Dubium 2.

12. Circa secundum principale dubium de entitate, videlicet prædictæ gratiæ, Augustinus, libro de Prædestinatione Sanctorum, capite secundo, solum refert ex sententia Pelagianorum, fidem inchoari a nobis ex nobis, ex merito autem illius initii augeri a Deo. Et de hoc ipso augmento non explicat quale sit, potest autem intelligi, vel de augmento essentiali, vel intensivo, vel etiam de perfectione, quam accipit fides ex conjunctione charitatis; Prosper autem, in epistola ad Ruffin., justificationem absolute ponit sub illo merito, ex

sententia Massiliensium : *Ut qui voluerint, inquit, credant, et qui crediderint, merito fidei et bonæ voluntatis justificationem accipiant.* Per justificationem autem intelligere videtur, non solum sanctificationem per infusionem gratiæ habitualis, et remissionem peccatorum, sed etiam totum progressum a fidei conceptione usque ad illum terminum, et ita includit tam habituum infusionem, quam donationem actuum supernaturalium, et auxiliorum quæ ad illos actus necessaria sunt. Et ita in alia epistola ad Augustinum : *Ad hanc, inquit, gratiam, qua in Christo renascimur, per naturalem facultatem petendo, quærendo, pulsando perveniri dicunt :* et in sequentibus dixisse refert, se *auxilium gratiæ, et salvantem gratiam merito suæ credulitatis accipere.* Idemque sentit Hilarius dicens : *Ut eo merito, quo crediderint, se posse sanari, et voluerint, et ipsius fidei augmentum, et totius sanitatis suæ consequantur effectum :* et infra : *Ut adjuvetur qui cœperit velle.* Omne ergo genus gratiæ, sive habitualis, sive actualis, seu auxiliantis huic merito tribuisse videntur. Quod etiam ex sententiis Cassiani et Fausti non obscure sumitur, cum etiam totam perfectionem spiritualem huic humano merito supponere videantur. Nam, licet fateantur sine gratia Dei non posse comparari, sentiunt tamen præire semper laborem humanum, et gratiam subsequi, ut ulterius homo semper progrediatur.

13. *Dupliciter intelligi potest gratiam conferri humano merito, ut volebant Semipelagiani.* — Quocirca, in hoc dubio exploratum quidem videtur Semipelagianos totam gratiam subjecisse aliquo modo humano labori, eoque merito ; de modo autem quo id intellexerint, non ita constat. Duobus enim modis intelligi potest, aliquam gratiam dari merito illius humani affectus, aut fidei, vel operis, scilicet, vel proxime, vel saltem remote, seu partim proxime, partim remote. Loquendo ergo posteriori modo, clarum est totam salutem nostram potuisse Semipelagianos in illo vel ab illo merito humano, quia per illud sufficienter distinguebant prædestinatos a reprobis, ut constat ex citatis epistolis ; ergo sentiebant totam salutem dari aliquo modo propter illud meritum : ergo vel proxime, vel saltem remote, et radicaliter. Deinde hoc ut minimum probant testimonia adducta. Ac tandem declaratur, quia dicebant per voluntatem credendi, verbi gratia, acquiri fidem aliquam inchoatam, et propter hanc tribui perfectionem fidei, et per hanc impetrari auxilium ad ulteriorem

perfectionem ; ergo ita progrediendo, tota salus, et omnes gratiæ ad illam necessariæ ab illo humano merito proveniunt.

14. *Num iidem posuerint singula dona gratiæ dari proxime pro aliquo merito humano.* — Difficultas autem est, an etiam senserint, omnia et singula gratiæ dona proxime, et immediate dari propter aliquod humanum meritum. In quo puncto mihi non est certum quid illi senserint, vel an omnes in eadem sententia quoad hoc punctum convenerint. Hinc enim difficile creditu videtur, eos asseruisse, vel primam gratiam sanctificantem cum remissione peccatorum, et aliis virtutibus, et donis infusis dari proxime et immediate propter aliquem laborem humanum, seu propter actum mere naturalem, et solis viribus liberi arbitrii factum, vel actus ordinis supernaturalis omnes dari immediate propter aliquod bonum meritum naturale ; ergo non oportet hæc illis attribuere, cum ea non expresserint, nec necessario ex eorum dictis sequantur : satis enim est quod dixerint mereri homines auxilia supernaturalia, vel aliquod primum, quo bene operando supernaturaliter, ulteriora auxilia, et dona consequantur. Sed, licet ex vi meriti primi auxilii gratiæ quod ponebant, nihil aliud consequi, aut necessarium esse videatur, nihilominus, eorum scripta attente considerando, multo plura dona gratiæ, censebant retribui labori et merito humano. Nam imprimis Cassianus, ut vidimus, propter pœnitentiam conceptam ex solo bono usu liberi arbitrii, censuit retributam fuisse Davidi peccati sui remissionem ; et latroni, propter naturalem fidem statim repromissum esse paradysum ; et Abraham, propter fidem quam per libertatem arbitrii exhibuerat, justificatum esse. Et ita quoad remissionem peccatorum, verisimile est eos sensisse, immediate obtineri per naturalem pœnitentiam, ex solo bono usu liberi arbitrii conceptam. Quid autem illi de habitibus infusis senserint, an scilicet infundantur cum remissione peccatorum et cum interna animæ renovatione ; quidve de actibus supernaturalibus existimaverint, an scilicet necessarii sint, necne, exploratum non est, nec illis temporibus expresse controvertebatur, et ideo de his certo dicere non possumus, an crediderint, hæc dari propter tale meritum. Solum enim peccatorum remissionem, et gratiæ adjutorium aperte dixerunt dari propter tale meritum. Hoc autem non tantum intelligebant de uno primo auxilio, per quod reliqua obtinebant, sed etiam de

multis aliis, quæ per vitæ decursum possunt homines usu suæ libertatis, suoque humano labore, ad perseverandum et crescendo in justitia promereri.

15. *Probabile est censuisse singulis gratiæ donis respondere proportionatum meritum humanum.* — Atque ita non cuilibet actui, seu merito humano omnia dona gratiæ immediate attribuerunt, neque in solo uno actu, vel in illis solis qui antecedunt perfectam fidem, ponebant hoc meritum, sed per totam vitam durare posse, et debere censebant. Unde consequenter (ut opinor) sentiebant, singulis gratiæ donis correspondere proportionatum meritum humanum; ut, verbi gratia, propter naturalem voluntatem credendi dari fidem, seu auxilium ad credendum, vel propter voluntatem credendi cum fide imperfecta, quæ ad illam voluntatem necessario sequitur, dari perfectam fidem, seu augmentum fidei; per invocationem autem humanam dari id quod petitur, et propter desiderium salutis dari auxilium, saltem ad inchoandam illam, et propter aliud simile desiderium progrediendi, dari adjutorium aliquod illi proportionatum, et per conatum humanum ad resistendum tentationi, dari auxilium ad victoriam illius perfecte obtinendam, et sic cum proportione de cæteris virtutibus singulis. Quæ omnia facile sibi persuadebit, qui ea quæ ex Cassiano et Fausto capite præcedenti, retulimus, attente legerit. Hac enim ratione dicunt, petenti (utique per invocationem humanam) dari quod petitur, pulsanti aperiri, quærentem invenire, et similia; ut declarent humano merito respondere effectum seu premium, labori et industriæ humanæ proportionatum. Sic etiam Cassianus, dicta collatione, cap. octavo: *Cum Deus in nobis ortum quemdam bonæ voluntatis inspexerit, illuminat eam confestim, atque confortat, et incitat ad salutem incrementum, tribuens ei quam ipse plantavit, vel nostro conatu viderit emersisse.* Ubi non solum loquitur de hominibus ante fidem, vel justitiam, sed generaliter de omnibus, et unicuique initio bonæ voluntatis suum augmentum, et peculiare adjutorium quasi pro mercede correspondere sentit, et capite 11, circa finem, et fere in omnibus capitibus sequentibus multa similia repetit. Et similiter Faustus, libro primo, capite septimo, dicit Deum expectare ab incipientibus fidem, a proficientibus opera, utique humana, *ita tamen ut credulitatis affectum proficientibus augeat, et laborantibus adjutor quotidianus adsistat.* Ubi hoc meritum et quotidianum esse supponit, et per

partitionem illam cum proportione remunerari significat. Quod etiam in sequentibus capitulis et locis supra designatis prosequitur, et declarat.

Cujusmodi intelligerent Semipelagiani esse illud adjutorium gratiæ, quod ratione proprii laboris confertur homini? Dubium 3.

16. *Prima interrogatio in hoc tertio dubio principali.* — *Secunda interrogatio.* — *Tertia interrogatio.* — Hinc vero nascitur tertium principale dubium, de qualitate, ut ita loquamur, prædicti adjutorii gratiæ, in quo multa interrogari possunt. Primum, an illud sit aliquod beneficium gratiæ, quod a solo Deo fiat in homine bene utente sua libertate sine nova cooperatione ejusdem hominis vitali (ut sic dicam), sive libera, sive naturali, et necessaria; an vero sit aliquis actus perfectus, seu perfectior, quam fuerit prior, qui a nobis fit? Deinde si tale donum consistit, vel semper, vel aliquando, in actu secundo et perfectiori, qui a nobis fiat, an ille sit in se, ac proprie liber, vel necessario sequatur ex priori actu, ac subinde non sit liber nova libertate, sed tantum per denominationem a libertate prioris boni usus, ratione ejus perfectior ille actus confertur? Denique, si actus ille ad quem juvatur homo ratione prioris meriti, non tantum sit intellectus, aut voluntatis perfectius operantis, sed etiam liber, an adjutorium, quod ad illum confertur, sit per modum auxilii tantum sufficientis, quod suo effectu privari solet, an per modum auxilii efficaciis, quod infallibiliter suum effectum consequitur? Quæ omnia, si a nobis exacte, et cum sufficienti fundamento, resolvi et affirmari possent, utilissimum quidem esset; tum ad cavendum ipsum errorem in tradenda vera de gratia doctrina; tum ad illum certius et efficacius impugnandum; difficile tamen id est, neque a Cassiano aut Fausto hæc satis explicantur, neque etiam a Patribus distincte referuntur. Nihilominus tamen quod conjectura assequi possum, breviter explicabo.

17. *Interrogationi primæ fit satis.* — Quod ergo ad primam interrogationem attinet, existimo Cassianum et alios sensisse, mercedem proximam, et immediatam hujus laboris humani sæpe esse aliquod supernaturale beneficium, quod a Deo solo fit in homine, vel circa hominem, sic bene de se merentem, licet possit etiam frequenter esse aliqua perfectior actio, quæ ab ipso homine fiat, peculiariter adjuto et moto a Deo. Prior pars ostenditur im-

primis in remissione peccatorum, quam sentit Cassianus interdum dari propter bonum usum naturalis libertatis, in detestatione vel dolore de peccatis commissis; nam remissio illa beneficium est a Deo solo concessum, supposita hominis dispositione. Unde, si cum remissione peccati intellexit infundi justitiam et renovationem internam per habitualia dona infusa, consequenter etiam dicere debuit dari hæc omnia intuitu boni affectus naturalis, ac subinde hoc præmium laboris a solo Deo fieri in nobis, sine nobis post tale meritum, quia illa dona a solo Deo fiunt. Et certe non est alienus ab hoc sensu Faustus, l. 1, c. 12, ubi de filio prodigo loquens, ait: *Sicut sui criminis est quod longe pii parentis refugit oculos, ita suæ est devotionis, quod, per insitum sibi bonum deliberans, et assurgens, ad paternos refugit amplexus, sed gratia, quæ pulsaverat peregrinantiem, suscipit revertentem.* Nam, ut jam admonui, nomine gratiæ pulsantis, solam vocationem externam intelligit, post quam sequitur bonus usus liberi arbitrii, ratione cujus Deus suscipit hominem revertentem, jubet ferre stolam primam, et induere illum, quæ internam renovationem significant.

18. *Item tentationes a Deo præveniri, ne vincant, propter laborem Cassianus et Faustus dicebant.*—Præter hæc autem intrinseca dona, sunt beneficia magis extrinseca, quæ a Deo sine nobis circa nos fiunt, et ad gratiæ adjutorium suo modo pertinent, de quibus isti etiam sentiebant dari a Deo intuitu humani meriti. Hujusmodi sunt, prævenire et præcavere ne nobis tentationes, vel occasiones peccandi occurrant, quæ nos vincerent, nisi averterentur, aut e contrario externas occasiones bene operandi nobis providere, et impedimenta auferre, ac similia, quæ sine dubio magna sunt divinæ providentiæ beneficia, quæ hominem præveniunt sine illius cooperatione, vel recogitatione. Et hæc dicebant etiam dari in retributionem boni usus liberi arbitrii, ad perfectam castitatem, vel similes virtutes acquirendas, ut constat ex Cassiano, dicto libro duodecimo, capite 16, et tota collat. 13. Idemque ex Fausto sumitur. Et in hoc certe loquuntur consequenter; tum quia si Deus propter hoc humanum meritum confert interna dona, quid mirum si hæc etiam externa conferat beneficia? Tum etiam quia ipsi dicebant, Deum conferre bene inchoanti pugnam sua libertate, adjutorium necessarium ad consequendam victoriam, vel laboranti, ad progrediendum et perseverandum, vel ad effectum et consummationem consequendam; sed

ad hos fines necessaria est illa Dei protectio; ergo consequenter asserebant hanc dari homini, propter prædictum bonum usum libertatis.

19. *Item augmentum virtutum etiam suo labori attribuunt.*—Jam vero non solum hæc bona extrinseca, neque sola intrinseca, quæ dantur per modum actus primi, sed etiam actus secundos, et vitales, eorumve perfectionem, et consummationem propter hujusmodi meritum dari, illos auctores credidisse, ex eorumdem verbis colligere possumus. Nam dicebant propter affectum fidei, vel fidem imperfectam, dari homini fidei augmentum et perfectionem. Quod certe non intelligebant de augmento habitus fidei, quia nec de illo aliquando loquuntur, nec illum genitum aut infasum supposebant per solum affectum credendi, vel fidem imperfectam; intelligebant ergo de fide actuali, quam dicebant firmiorem et perfectiorem fieri per gratiæ adjutorium, quam per solas vires liberi arbitrii fieri potuisset; ergo intelligebant aliquem actum perfectioris fidei, vel saltem aliquam actualem perfectionem fidei dari intuitu prioris boni usus libertatis naturalis. Idemque cum proportione censi potest in aliis actibus virtutum, præsertim, spei, charitatis, pœnitentiæ et religionis, et in victoriis tentationum. Deinde Cassianus, dicta collatione, cap. 7, dicit *quantulumcumque scintillam ex corde nostro emicuisse conspexerit, eam confovet, suaque inspiratione confortat*; et cap. 8, cum ortum bonæ voluntatis inspexerit, *illuminat eam confestim*; inspiratio autem et illuminatio actus vitales sunt intellectus, et voluntatis; sentit ergo Deum infundere aliquos similes actus intuitu præcedentis humani meriti. Verum quidem est hos auctores valde ambigue et æquivoce his verbis uti; verisimile nihilominus est eos, quando loquuntur de propria gratia, quam Deus præbet ultra proprias vires liberi arbitrii, et ultra bonum illarum usum, et propter illum, proprie etiam loqui de inspiratione et illuminatione. Et idem sentit Faustus, cum ait propter bonum affectum dari actionem bonam, et propter bonum desiderium dari effectum, et complementum ejus, quod sæpe in aliquo perfecto actu dilectionis, vel contritionis, aut alio simili consistit. Et hæc de prima interrogatione.

20. *Interrogationi secundæ satisfi.*—Circa secundam vero supponere oportet, per divinam gratiam interdum fieri in nobis aliquos actus vitales intellectus et voluntatis, sine no-

his moraliter et libere operantibus, quos prævenientem inspirationem et illuminationem appellamus; præter hos vero dari in nobis actus gratiæ liberos et morales, seu perfecte humanos. Supponendum item est, secundum ordinariam Dei providentiam, priores actus non liberos antecedere, et inducere posteriores, si voluntas nostra non resistat, quod pro sua libertate facere potest, et ideo priores actus dantur per modum auxilii seu adjutorii gratiæ ad posteriores actus, ut infra suis locis operosius explicaturi sumus. De priori ergo genere actuum facile credi potest, admissum esse a Massiliensibus cum eadem proprietate et perfectione talium actuum, quod nos agnoscimus, hæc tantum interveniente differentia, quod fides docet dari hos actus sine prævio merito solius liberi arbitrii; isti autem dicebant, dari quidem in nobis tales actus gratiæ ad nos juvandos, sed intuitu alicujus præcedentis boni usus nostræ naturalis libertatis. Ita enim loquitur Cassianus de illuminatione et inspiratione, quæ datur a Deo, aliquid boni in nobis vidente, quod, ut dicebam, non est cur ad improprios sensus transferatur. De posteriori autem genere actuum non possum certo affirmare, nec satis conjectare, quid senserint isti auctores; nunquam enim declarant dari hoc adjutorium ad novos actus humanos, et liberos perfectiores eliciendos; sed generatim dicunt dari ad augmentum perfectionis, et ad effectum salutis obtinendum, quod potest intelligi de perfectione, et effectum quem operatur Deus in nobis, sine novo actu libero nostro; ut, verbi gratia, quia cogitare potuerunt illam eandem fidem, quæ ut erat tantum ex discursu, et effectum naturali, erat imperfecta, accedente Dei illuminatione et inspiratione formaliter perfici sive per concomitantiam illius adjutorii, sive per aliquam perfectionem, quæ inde naturaliter ac necessario resultat in actum fidei, qui antea erat imperfectus; idemque cum proportionem in cæteris bonis actibus existimare potuerunt. Et hoc certe insinuat Faustus, libro primo, capite nono, cum de Deo dicit: *Bonæ voluntatis homini deputavit usum, sibi reservavit effectum.* Nam sicut primum soli homini, ita secundum soli Deo tribuit.

21. *Perfectionem humano labori adjunctam ex gratia a solo Deo fieri putabant Semipelagiani.* — Imo, in hoc maxime videntur errasse hi auctores, quia non intellexerunt eundem actum posse esse a voluntate libera, et a gratiæ adjutorio necessario ad illum actum efficiendum, ideo enim prærequirunt aliquem

bonum usum solius voluntatis, in quo salvetur libertas. Ergo intelligebant perfectionem, quæ adjungitur ex gratia, jam non fieri a nobis propria libertate, sed a solo Deo adjungi, nobis vero solum attribui, quatenus per priorem bonum usum liberum illam comparamus. Et ob hanc causam nullo modo admittere volebant prævenientem gratiam, qua Deus facit ut velimus, et in hoc reprehendebant doctrinam Augustini, tanquam libertati contrariam, ipsi vero aiebant, ut constat ex Prospero, Hilario, et eorum scriptis, relictam esse libertatem, qua quis possit obedire, vel aliter se præparare, ut libere, et ex proprio merito, salus unicuique conferatur. Quod sane non solum in uno, seu primo actu, modo jam explicato, sed etiam in toto progressu virtutis, vel perfectionis intellexisse videntur. Nam homo, sic adjutus et confortatus a Deo, in priori actu facilior redditur ad secundum in alia opportunitate libere eliciendum, tunc autem etiam sua libertate incipiet alium usum sui arbitrii, quem Deus majoribus beneficiis perficiet, vel majorem aliquam suavitatem, aut illuminationem addendo, vel alio simili modo, et ita potest procedi in toto discursu spiritualis vite. Et hoc certe significare videtur Prosper, cum in illa epistola ad Augustinum de Semipelagianis scribit: *Ad gratiam qua in Christo renascimur, pervenire hominem dicunt per naturalem facultatem, petendo, pulsando, quærendo, ut ideo accipiat, ideo inveniat, ideo introeat, qui bono naturæ bene usus, quia ad istam saltantem gratiam initialis ope gratiæ meruit pervenire,* ubi initialem gratiam, eis condescendens, ut infra dicam, vocat ipsam libertatem, sub gratia vero salvante includit non tantum habitualement, sed maxime gratiam auxiliantem, nec solum primam, sed omnem, quæ ad salutem adjuvat, ut expressius declaravit Hilarius supra dicens: *Ut eo merito, quo voluerint, etc., totius sanitatis suæ consequuntur effectum.* Tota autem sanitas animæ non obtinetur nisi multis actibus, et toto vite progressu. Ergo in toto illo ita componebant Semipelagiani gratiam cum libertate, ut in singulis actibus utilibus ad salutem, antecedit actus sola libertate factus, et illi, ac propter illum, adjungatur gratia, qua perficiatur a solo Deo, et fiat aptior et utilior ad salutem.

22. *Liberos actus cum adjutorio gratiæ agnovisse Massilienses indicium aliquod est.* — Verumtamen, licet hic modus explicandi sensum hujus erroris, tam in Cassiani, et Fausti verbis, quam in his, quæ referunt Prosper, et Hilarius, magnum habeat fundamentum, nihil

lominus non omnino convincimur ad credendum, eos non agnovisse actus liberos intellectus, vel voluntatis factos libere a voluntate cum adjutorio gratiæ, distinctos ab illis actibus liberis mere humanis, in quibus meritum præcedens gratiam collocabant. Potuerunt enim, cum dicebant, augeri fidem propter meritum boni affectus ad illam, vel propter fidem imperfectam, intelligere, propter illud meritum elevari et confortari hominem per gratiam ad efficiendum libere meliorem actum fidei, quam possit solis viribus liberi arbitrii facere, et sic de reliquis virtutibus, seu actibus earum, tam in initio sanctificationis, quam in progressu ejus. Nunquam enim invenimus, aut legimus hoc ab eis fuisse expresse negatum, neque ex eorum dictis videtur necessario sequi. Nam licet posuerint prævium bonum usum solius libertatis aut gratiam, fortasse non fuit, quia putaverint, non posse actum esse liberum, si ad illum eliciendum est necessaria gratia, sed quia non esset justa nec rationabilis distributio gratiæ, nec discretio inter salvandos et non salvandos, nisi illud meritum præcederet. Nam contra rationem putabant, eam partitionem, vel distributionem pro sola Dei voluntate esse factam, ut Augustinus vult. Si autem dicatur, talem libertatem remansisse, qua sola possit quis saltem velle bonum incipere: *De compendio* (aiebant) *rationem reddi electorum, et rejectionem, in eo, quod unicuique meritum propriæ voluntatis adjungitur*, ut Hilarius refert. Et simili modo, ait Prosper, ideo Massilienses negasse, Dei voluntatem merita hominum prævenire, ne cogerentur concedere, Deum sola sua voluntate inter salvandos, et reprobos discrevisse. Eamdemque rationem multis verbis inculcat Faustus, lib. 2, cap. 7 et 26, quæ supra retulimus. Quod si verum est Massilienses agnovisse actus humanos et liberos perfectioris rationis, seu ordinis gratiæ, dicendum est illos consequenter existimasse, hos actus esse posteriores bono usu solius liberi arbitrii, et ratione illius dari prædictos actus, non immediate et in se, sed media aliqua illuminatione et inspiratione, qua excitetur et elevetur potentia ad talem actum, quasi in præmium prioris boni usus naturalis arbitrii. Quod per se clarum est; magis autem explicabitur in sequenti dubio.

Senserintne Semipelagiani gratiæ adjutorium pro humano labore collatum, esse sufficiens tantum, an etiam efficax? Dubium 4.

23 et 24. *Tertia interrogatio, quæ quartum*

principale dubium constituit, satisfi.— Statim enim occurrit tertia interrogatio supra proposita num. 16, quod merito esse potest quartum principale dubium in hoc capite, nimirum, cum Semipelagiani dixerint adjutorium gratiæ ad perfecte operandum dari ex merito humano, an id intellexerint de auxilio sufficiente tantum, vel etiam de efficaci, id est, an senserint in præmium proprii laboris dari auxilium quod semper habeat effectum, vel quod possit effectu frustrari? In quo aliter loquendum est, juxta priorem modum explicandi istorum sententiam, de actibus per gratiam perfectis, aliter vero juxta posteriorem. Et ideo ut utrumque breviter declarem, suppono sententiam Massiliensium fuisse omnibus hominibus, præsertim adultis, de quibus nunc loquimur, dari gratiam, et auxilium sufficiens, ut omnes possint salvari, verumque sit, *Deum velle omnes homines salvos fieri*. Et quamvis in hoc ab aliquibus reprehendantur, et Augustinus interdum aliter conetur explicare illa verba, *Deus vult omnes homines salvos fieri*; nihilominus illa sententia, per se spectata, et quoad illum articulum, errorem non continet, sed potius vera est, licet in modo illam intelligendi et explicandi possit error misceri, ut in libro de Prædestinatione late dixi, et infra suo loco attingam. Isti autem Semipelagiani in hoc errabant, quod hoc auxilium sufficiens non ponebant in aliqua vera gratia, sed partim in naturali lege et libertate, partim in externa lege, prædicatione, seu doctrina, ut capite præcedenti, in sententiis Cassiani et Fausti, notatum est, et infra in ultimo dubio magis explicabo. Unde hoc auxilium sufficiens fatebantur dari dignis et indignis, ac subinde non dari ex aliquo merito humano, sed ex liberali beneficio Dei. Quod præcipue intelligendum est quoad legem naturalem et liberam volendi facultatem. Nam quoad divinam revelationem, et legem, ac doctrinam, seu prædicationem Evangelii, dicebant dari propter meritum humanum, et non negari, nisi propter aliquem malum usum libertatis, vel in re existentem, vel a Deo prævisum, saltem sub conditione, nimirum, quia cognovit Deus quod, licet aliquibus prædicaretur Evangelium, non essent credituri. Quamvis enim Cassianus et Faustus hoc posterius non ita expresse attingant, a Prospero et Hilario refertur, et ab Augustino in citatis locis impugnatur. Quia vero totum hoc genus auxilii sufficientis non est vera gratia, de qua tractamus, et qua evidens est non dari ex merito sive in re futuris, sive sub

conditione prævisis; tum quia indifferenter omnibus offertur, quantum est ex parte Dei; tum quia ad indignos pervenit, et interdum ac sæpe, ad illos qui restituri sunt, et aliquando non datur illis qui credituri essent, ut latius in materia de prædestinatione diximus.

25. *Auxilium gratiæ ponebant Semipelagiani efficiæ, et necessarium respectu proxime præcedentis meriti.* — Hoc ergo supposito, si loquamur de adjutorio gratiæ in superiori sensu explicato, id est, quod datur ad perficiendum actum, cujus intuitu datur, secundum Massiliensium sententiam, et consequenter adjuvat ad bonum usum ejusdem libertatis in futurum, sic duplicem respectum oportet in tali adjutorio distinguere: unus est ad præsentem actum, qui et est meritum talis auxilii, et per ipsum perficitur; alius est ad futuros usus liberi arbitrii. Priori respectu intelligebant Semipelagiani dari per modum auxilii, non solum efficaciæ, sed etiam necessario habentis suum effectum, propter quem proxime datur. Hoc ex dictis probatum relinquitur, quia tale auxilium secundum Semipelagianos vi sua perficit actum independentem a novo consensu voluntatis, et ideo dicebant hominis esse bonum velle, Dei autem esse perficere, seu dare effectum voluntatis bonæ; et hominem, eo merito quo voluerit, consequi suæ voluntatis effectum, utique solius Dei munificentia et largitione. Aiebant etiam per illud meritum interdum conferri ipsam peccati remissionem, et animæ salutem, vel perfectionem absque novo usu liberi arbitrii; hæc autem non dantur nisi per efficaciam divinæ voluntatis.

26. *Idem auxilium forte putabant esse tantum sufficiens respectu futuri boni usus libertatis.* — Si vero tale adjutorium consideretur per respectum ad futurum tempus, id est, ad perseverandum in illo bono usu libertatis, similes bonos affectus liberos concipiendo, vel ab uno ad alium progrediendo, sic existimo posuisse illud adjutorium ut sufficiens, non ut efficiax; quamvis in manu et potestate voluntatis esse crederent, pro sola sua libertate, illum effectum, seu novum bonum opus præstare. Utrumque facile patet. Primum quidem, quia illi audire non poterant Augustinum, dicentem Deum, voluntate sua, et vocatione occulta atque secreta, convertere hominis voluntatem quo voluerit et quando voluerit, quia putabant esse libertati contrarium; ergo consequenter, in sua sententia loquendo, non poterant admittere tale adjutorium, datum etiam ex priori proprio merito, quod de se futurum

bonum usum liberæ voluntatis secum efficaciter traheret. Secundum autem est valde consequens ad illorum sententiam dicto modo explicatam, quia putabant illum etiam bonum usum liberi arbitrii solis intrinsicis viribus ejus fieri, et per gratiam solum juvari, ut perseveranter, vel sine impedimentis fiat; ergo, posita sufficientia ex parte auxilii, dicere cogebantur solum arbitrium viribus suis posse præstare effectum ejus. Et ita Semipelagianorum doctrina, in hac parte, communis Pelagianis fuit, Deum non operari ut velimus, nisi quantum in se est, voluntatis autem solius esse, vel irritam facere Dei gratiam, vel effectum per eam intentum consequi, ut sumitur ex epistola 107 Augustini in principio, et ex aliis locis citatis.

27. *Massiliensium mens de auxilio præveniente et sufficiente ad virtutum actus efficiendos.* — Quocirca, etiamsi admittamus, ex sententia Massiliensium, illud auxilium, quod datur ex prævio humano merito, dari nobis ut per illud perfectiores actus fidei vel alterius virtutis libere efficiamus, dicendum est illos etiam esse locutos de auxilio sufficiente, non de efficaci per se, et natura sua, ita ut non possit frustrari voluntatis effectum, sed solum in dicto sensu, quod liberum arbitrium potest per illud auxilium operari, si velit, et interdum operatur, et interdum non operatur, pro sua libertate; et quando non operatur, non consequitur salutem, quia solum illud prius meritum humanum, sine novo usu perfectiori libertatis ad illam non sufficit; et ita gratia data ratione talis meriti, fit irrita ob defectum liberi arbitrii. Si autem liberum arbitrium cum illa gratia cooperetur, salutem consequitur, quæ tribuitur priori merito, tanquam primæ radici, et causæ ex parte hominis; proxime vero tribuitur posteriori actui libero, quia per se, ac perfectius ad salutem operatur. Atque hanc fuisse mentem Gallorum, facile patet ex dicto principio, quod semper constanter negarunt illud genus gratiæ prævenientis, quæ ita faciat nos velle, ut non possimus ei resistere, quia credebant illud repugnare libertati: ergo si credebant adjutorium dari ad novos actus liberos efficiendos, etiam supernaturales, necesse est ut admiserint tale auxilium solum ut sufficiens ex parte sua, ita tamen ut cum illo, et bono usu liberi arbitrii, contingat consequi salutem; tum quia in universum ita sentiebant de quolibet genere auxilii sufficienter excitantis voluntatem; tum etiam quia, propter hanc causam, dicebant illud prius meritum sufficere ad totam salutem, et ad discer-

nendum salvandum a reprobis, utique si per liberum arbitrium non steterit. Quantum vero in hac sententia sic explicata Semipelagiani erraverint, postea videbimus.

An Semipelagiani putarint meritum humanum necessario præcedere gratiam? Dubium 5.

28. *Partem affirmantem docuisse Semipelagianos in hoc dubio.* — Quantum dubium sit, an ex Semipelagianorum sententia hoc prævium meritum humanum sit omnino necessarium ad gratiam, ita ut Deus nulli suam gratiam communicare incipiat, nisi prius in illo tale meritum bonæ voluntatis inveniat. In quo dubio, quantum ex citatis epistolis, et ex principiis hujus erroris colligi potest, videntur sane auctores ejus credidisse, nemini adulto dari gratiæ adjutorium ad salutem necessarium, nisi ex merito præcedente liberi arbitrii. Prosper enim ait eos dixisse *ad hanc gratiam pertinere per naturalem facultatem, etc., ut ideo accipiat, etc., quia naturali bono bene usus, ad istam salvantem gratiam initialis gratiæ ope meruit pervenire.* Ubi initialem gratiam appellat, vel naturalem libertatem, ut supra vidimus, vel certe legem et doctrinam, ut statim dicam. Gratiam autem salvantem appellant illam quæ datur per veram Spiritus Sancti infusionem, et ad hanc posteriorem obtinendam, videntur sensisse viam necessariam esse meritum humanum, et per hoc distingui dignos electione ab indignis; unde addebant, *omnes per evangelicam prædicationem vocari, ut qui voluerint (utique sola libertate naturali), fiant filii Dei; qui noluerint, fiant inexcusabiles, quia bonitas Dei neminem repellit a vita, sed indifferenter universos vult salvari;* et infra: *Quantum ad Deum (dicebant) omnibus paratam esse vitam æternam, quantum ad arbitrii libertatem, ab his apprehendi, qui auxilium gratiæ merito credulitatis acceperint.* Intelligebant ergo non aliter accipi hoc auxilium; et ideo etiam dicebant necessarium esse, ut obedientia voluntatis gratiæ adjutorium præcedat. Et eodem fere modo sentit Hilarinus, eos non aliam rationem reddidisse, cur gratiæ adjutorium quibusdam conferatur, et non aliis, nisi quia in uno præcedit hoc meritum, et non in alio. Et inconveniens magnum esse putabant, hanc decretionem in solam voluntatem divinam referre, etiam ex parte eorum quibus gratia datur; ideoque, quando non poterant rationem reddere ex merito in tempore existente et antecedente, recurrerant ad prævi-

sum futurum, saltem sub conditione, si fortasse nunquam absolute futurum sit.

29. *Ex verbis Cassiani et Fausti doctrina eadem haud obscure sumitur.* — Denique, expressis verbis hoc tradit Cassianus, lib. 12 de Institut. renuntiant., cap. 14, ubi loquens de humanis conatibus et meritis, ait: *Non mea, sed seniorum sententia definitio, perfectionem quidem sine his omnino capi non posse, his autem solis sine gratia Dei posse eam a nemine consummari;* ubi aperte sentit, sicut per solam gratiam salus potest consummari, ita solis conatibus liberi arbitrii posse perfectionem et sanctitatem inchoari; unde subjungit: *Ut enim dicimus conatus humanos apprehendere eam (utique perfectionem) per seipsos sine Dei adjutorio non posse; ita pronuntiamus laborantibus tantum, ac desudantibus (utique per seipsos) misericordiam Dei, gratiamque conferri.* Ubi etiam notanda est particula exclusiva *tantum*. nam ex illa constat postulasse hunc laborem humanum, ut necessarium ad gratiam obtinendam. Et hoc modo infra dicit, *petentibus, pulsantibus, et quærentibus dari Dei misericordiam,* et concludit: *Præsto est namque occasione sibi tantummodo a nobis bonæ voluntatis oblata.* Hanc ergo semper ut necessario præviam requirit. Et eodem modo loquitur Faustus in multis verbis supra citatis, quæ repetere non est necesse. Præcipue vero necessitatem indicant illa verba: *Nisi fuerit obedientis prævisa devotio, gratiæ rilescit oblatio.*

30. *Contrarius sibi apparet Cassianus, ac adeo partem negantem in proposito dubio etiam tradidisse.* — Nilominus contrariam sententiam tradere videtur idem Cassianus, collatione 13, a capite 12 usque ad finem, præsertim cap. 13, ubi ait *nonnunquam Deum conatus bonæ voluntatis ab homine vel exigere, vel expectare, ne otioso vel dormienti videatur dona sua conferre,* ubi particula *nonnunquam* excludit necessitatem; et cap. 15 et 17 addit inscrutabilia esse Dei judicia, et varia, *nam quosdam volentes ad augmentum provehit, alios etiam nolentes attrahit,* etc. Et ita non omnibus, neque semper sentit esse necessariam proprii arbitrii dispositionem, ut meritum ad gratiam obtinendam. Unde Prosper, cap. 5 contra Collat., in hoc specialiter Cassianum reprehendit, quod utroque pede claudicat, nec catholicam doctrinam teneat, nec cum hæreticis consentiat: *Illi enim (aut) in omnibus justis hominum operibus libere voluntatis tuentur exordia, nos bonarum cogitationum ex Deo semper credimus prodire principia;* et cap. 13 et sequentibus, et 33 et

ex definito Dei decreto, ac subinde ex lege statuta, ac promissione, esse necessariam connexionem inter tale meritum et gratiam, ita ut omni habenti tale meritum talis gratiæ portio seu merces sit repromissa. Probatur primo ex verbis Prosperi in dicta epistola; cum enim dixisset, ex istorum sententia: *Gratia Creatoris ita esse naturam humanam institutam, ut per discretionem boni et mali, ad cognitionem Dei, et obedientiam mandatorum suam possit dirigere voluntatem, et ad Christi gratiam petendo, pulsando, possit peruenire, et ideo accipiat, quia bono naturæ bene est usa*, subjungit: *Propositum autem vocantis gratiæ in hoc omnino definiunt, quod Deus constituerit nullum in regnum suum, nisi per sacramentum regenerationis, assumere, et ad hoc salutare donum omnes homines vocari voluerit, ut qui voluerint (utique credere), fiant filii Dei; qui non crediderint, pereant: ut Dei bonitas in hoc appareat, quod neminem repellat a vita*. Et infra dicit, *quantam quis habet facultatem ad malum, tantam habere ad bonum, parique momento animum moveri ad vitia et virtutem; quam (aiebant) bona appetentem gratia Dei forteat, mala sectantem damnatio justa suscipiat*. Tantam ergo sentiebant esse connexionem et consecutionem inter gratiam et bonum usum liberi arbitrii, quantam inter malum usum et pœnam: unde infra subjungit: *Quantum ad Deum pertinet, omnibus paratam vitam æternam; quantum ad arbitrii libertatem, ab his eam apprehendi, qui Deo sponte crediderint, et auxilium gratiæ merito credulitatis acceperint*. Utrumque ergo censebant æqualiter esse stabilitum ac promissum certa lege Dei: at vita æterna sub conditione meritorum omnibus est promissa, certa Dei lege; ergo pari modo censebant gratiæ auxilium promissum esse bonæ voluntati naturali. Et cætera quæ ibi refert eundem sensum plane confirmant.

35. Nec minus idem ostendunt quæ refert Hilarius, ut ex illis verbis patet: *Quod dicitur, crede et salvus eris, unum horum exigi asserunt, aliud offerri, ut propter id quod exigitur, si redditum fuerit, id quod offertur, deinde tribuatur*. Ecce pactum expressum, et promissio sub conditione fidei, seu bonæ voluntatis credendi, vel salutis. Deinde ex hac certa lege rationem reddunt inter electos et rejectos, et nolunt reddi ullo modo ex sola Dei voluntate. Unde ait: *Nec ad incertum voluntatis Dei duci se voluit, unde eis quantum putant, ad obtinendum, vel amittendum, evidens est quæcumque*

initium voluntatis, etc.; ergo ex duobus æque bene incipientibus libero arbitrio, non datur uni gratia, alteri negatur, ex incerto divinæ voluntatis; ergo ex certa lege datur. Tandem certum est in Scriptura promissam esse fidei et orationi impetrationem, et pœnitentiæ peccatorum remissionem, et ita ex certa lege conferri; at vero isti Semipelagiani loca illa Scripturæ intelligunt de fide propriis viribus concepta, vel saltem inchoata, ut vidimus, et de oratione humana, seu solis viribus humanis facta, ut ex Concil. Arausic., can. 5 et 6 aperte colligitur. Et similiter Cassian., dicta Collat. 13, c. 13, de David inquit: *Quod peccatum suum humiliatus agnoscit, proprie libertatis est opus; quod vero sub brevissimo temporis puncto indulgentiam tantorum criminum promeretur, Domini miserentis est donum*. Ergo, ex istorum sententia, retributio talis voluntatis ex certa et infallibili lege conceditur.

36. *Ad semipelagianismum quoque spectat asserere quod datur quibusdam gratia pro merito humano, quibusdam non datur*. — Adde vero nihilominus, licet forte aliqui ex Massiliensibus dicerent, non semper, neque omnibus habentibus tale meritum humanum, dari gratiam, aliquibus autem vel sæpe illam dari intuitu talis meriti, et in aliquam ejus retributionem, semper hoc ad reliquias Pelagianorum pertinere. Ita probat late Prosper contra Collat. 13, cap. 33 et sequentibus. Breviter autem patet, quia qui ita senserint, necesse est ut fateantur, et naturam de se habere vires ad promerendam aliquo modo gratiam, et gratiam aliquando et aliquibus, licet non semper, nec omnibus, propter humanum meritum dari, et initium salutis in aliquibus esse a libero arbitrio, et non a gratia: et similiter in multis gratiam esse pedisequam, non ducem liberi arbitrii, quæ omnia ad errorem Pelagii pertinent, et in Semipelagianis, quocumque sensu, quo in præsentī dubitatione locuti fuerint, damnata sunt. Nam divina Scriptura non de quibusdam, sed de omnibus ait: *Quis prior dedit ei, et retribuatur illi?* et: *Quid habes quod non accepisti?* et: *Sine me nihil potestis facere*, et similia quæ late Augustinus expendit libro de Prædestinatione Sanctorum, et Prosper supra, et tractabimus late inferius de auxiliis prævenientibus disserendo, ubi etiam ostendemus rationem gratiæ destrui vel in omnibus, vel in pluribus, aut in paucis, si eis dicatur gratia dari propter tale meritum. Et ita facile expediuntur conjecturæ in contrarium positæ.

De quo genere meriti Semipelagiani loquerentur. Dubium 7.

37. *Quod de merito de condigno locuti non videantur.* — Propter ultimam vero conjecturam in fine n. 33 adductam, propono dubium septimum: An Massilienses sententiam suam de merito perfecto, seu de condigno, vel de imperfecto, quod impetratorium, vel de congruo appellari solet, intellexerint? Illos enim non fuisse locutos de merito de condigno, colligi imprimis potest ex illis verbis, quæ de Massiliensibus profert H Iarius in sua epistola: *Nec negari gratiam, si dicatur talis voluntas præcedere, quæ tantum medicum quærat, non autem quidquam ipsa jam valeat.* Quasi dicat tam exiguum esse illud meritum, ut rationem gratiæ in præmio non excludat; igitur non censebant illud esse meritum de condigno. Multo vero clarius id tradere videtur Cassianus, lib. 12 de Institut. renuntiant.; nam postquam cap. 11 multa in hanc sententiam dixit, cap. 13 adjungit: *Quantuslibet jejuniorum, vigiliarum, ac lectionis labor fuerit impensus, condignus esse non poterit, qui hæc virtute sui laboris obtineat. Nunquam enim divinum munus labor proprius, humanæ compensabit industria, nisi desideranti fuerit divina miseratione concessum.* Et addit cap. 14: *Dicimus secundum Salvatoris sententiam, dari quidem petentibus, et aperiri pulsantibus, et a quærentibus inveniri, sed petitionem, et inquisitionem, et pulsationem nostram non esse condignam, nisi misericordia DEI id, quod petimus, dederit, vel aperuerit cum pulsamus, vel illud quod quærimus fecerit inveniri. Præsto est enim occasione sibi tantummodo a nobis bonæ voluntatis oblata, ad hæc omnia conferenda.* Ubi aperte et condignitatem operis aut meriti negat, et solum per modum occasionis a Deo expectari profitetur. Unde in Collat. 13, cap. 13, ait *Deum occasiones quærere, quibus humanæ segnitæ torpore discusso, non irrationabilis munificentia suæ largitas videatur, dum eam sub colore cujusdam desiderii ac laboris impartit, et nihilominus gratia Dei gratuita perseveret, dum exiguis quibusdam, parvisque conatibus tantam immortalitatis gloriam, tanta perennis beatitudinis dona inæstimabili tribuit largitate.*

38. *Suasio opposita ex Cassiano.* — In contrarium vero est, quia meritum gloriæ est meritum de condigno; at vero Semipelagiani ita loquuntur de hoc merito laboris, seu conatus humani, respectu gratiæ, sicut de merito glo-

riæ per hujus vitæ opera et labores: ergo. Minor patet ex Cassiani verbis dicto lib. 12, cap. 11; rationem illius meriti, ejusque exiguitatem reddens, inquit: *Quia totius bonitatis effectus ab illius profluit gratia, qui tantam perennitatem beatitudinis, et immensitatem gloriæ exiguæ voluntati brevique ac parvo cursui nostro multiplicata largitate donavit.* Et cap. 15 refert et approbat suorum ducum et spiritualium magistrorum submissionem animi, ac humilitatem. Nam, licet laborum meritum necessarium esse dicerent, illud tamen magis gratiæ quam laboribus suis tribuebant: *Et idcirco (ait) futuræ vitæ stipendia non operum sperare se merito, sed misericordia Domini proclamabant, nihil sibi de tanta circumspeditione cordis aliorum comparatione donantes, quippe qui hanc ipsam non suæ industriæ, sed gratiæ divinæ adscribebant.* Ubi eadem regula metiuntur meritum stipendii vitæ futuræ, et meritum perfectionis, et gratiæ in præsentī vita. Et ita in Collat. 13, cap. 13, explicat exiguitatem illius meriti humani laboris, vel desiderii respectu gratiæ, ex Pauli testimoniis dicentis: *Quod in præsentī est momentaneum et leve tribulationis nostræ supra modum in sublimitate (vel ut ipse legit), absque comparatione, æternum gloriæ pondus operatur in nobis,* 2 Corinth. 4, et illud Romanor. 8: *Non sunt condignæ passionis hujus sæculi, etc.,* unde subiunxit: *Quantumlibet ergo enisa fuerit humana fragilitas, futuræ retributioni par esse non poterat, nec ita laboribus suis divinum imminuet gratiam, ut non semper gratuita perseveret.* Æqualem ergo rationem meriti ponebant in proprio labore liberi arbitrii, respectu gratiæ et gloriæ; at respectu gloriæ meritum perfectum, quale esse potest in homine puro: ergo idem ponebant in libero arbitrio respectu gratiæ. Accedit non minorem rationem debiti, nec minorem connexionem cum præmio in uno, quam in alio merito possuisse; sicut ergo unum est meritum justitiæ, ita et alterum ex eorum sententia.

39. *Incerta est in præsentī dubio Semipelagianorum mens, verisimilius tamen non agnovisse in merito humano condignitatem.* — Sed, in hoc dubio, incertum mihi est quid de illo merito gloriæ senserint Semipelagiani; fortasse enim nullam veram condignitatem in illo ponebant, sed acceptationem Dei, eamque vocabant gratiam et misericordiam, quia est supra valorem operis et qualisicumque laboris humani, etiamsi interdum tantus vel tam diuturnus sit, ut sine Dei gratia perfici non pos-

sit. Unde Gennadius, in Vita Fausti refert eum docuisse: *Quidquid libertas arbitrii pro labore piæ mercedis acquisierit, non esse proprium meritum, sed gratiæ donum.* Et idem Faustus, in Epist. ad Lucidum: *Totis (ait) viribus desudantes, ne gratia evacuetur in nobis, quidquid de manu Domini susceperimus, donum pronuntiemus esse, non pretium, scientes laboris ipsius fructum officii rem esse, non meritum.* Sive autem ita senserint de merito gloriæ, sive non, certum est multo minorem rationem meriti cogitare potuisse in illo (ut sic dicam) initiali merito primæ gratiæ auxiliantis, quam in merito laboris postea perfecti per gratiam, quia illud primum erat mere humanum, ac subinde maxime imperfectum: hoc vero est nobilioris ordinis ratione gratiæ, et ideo, si hoc posterius dicebant non esse ex condignitate, sed ex acceptatione, multo magis illud prius. Quapropter verisimilius absolute videtur non posuisse meritum de condigno in illo initio gratiæ, sed imperfectum et exiguum, quod Deo tantum quamdam occasionem gratiæ suæ communicandæ tribuat. Sic enim de illo merito loquebantur Pelagiani, et poterant etiam impetratorium vocare, ut interdum loquitur Augustinus epist. 105, quia per invocationem humanam, gratiam etiam impetrari dicebant. Unde erat illud meritum aliquo modo simile illi, quod nunc de congruo appellamus, de quo infra suis locis dicemus. Quomocumque vero illi intellexerint dari gratiam propter tale meritum, errarunt, et eorum sententia damnata est, ut infra suo loco videbimus.

Quo pacto Semipelagiani rationem gratiæ, quam verbis profitebantur, cum suo illo merito humano conciliarent, præsertim addendo etiam cogitationes sanctas a DEO esse.
Dubium 8.

40. *Ad primum dubii propositi punctum.*—*Prima conciliatio.*—*Refellitur tripliciter.*— Octavum et ultimum dubium est, quomodo cum illo humano merito veram gratiæ rationem Massilienses componerent, ac subinde an uno vel multiplici sensu de gratia loquerentur. Et huc etiam difficultas alia spectat, quomodo, non obstante illo merito, dicerent, non solum opera, sed etiam voluntates, et cogitationes sanctas ex Deo habere principium, qui nobis intum sanctæ voluntatis inspirat. Circa primum punctum, tres modos invenio, quibus Semipelagiani meritum illud cum gratia con-

ciliare cupiebant. Primus est, distinguendo inter opera et affectum salutis, et dicendo affectum non computari inter opera, ideoque, licet auxilium ad operandam salutem detur ex merito illius affectus, nihilominus verum esse ad omnia salutis opera esse necessariam gratiam. Sic de illis refert Hilarius: *Neque alicui operi curationis eorum annumerandum putant, exterrita, ac supplicii voluntate unumquemque ægrotum velle sanari.* Sed hæc sola evasio sufficere non poterat, propter multa. Primo, quia negari non potest quin desiderium salutis sit aliquod liberum opus voluntatis, et ad salutem non solum utile, verum etiam necessarium. Secundo, quia illud desiderium supponit bonam et sanctam cogitationem; ergo si ille affectus non est ex gratia, multo minus sancta cogitatio, quæ antecedit, erit ex gratia; hoc autem repugnat alteri eorum assertioni, qua dicebant non tantum omne opus bonum, sed etiam omnes sanctas cogitationes esse ex gratia. Tertio, quia, esto desiderium illud non annumeretur operibus salutis, nihilominus, si ob meritum ejus datur gratia ad cætera opera seu cogitationes, jam illa non est gratia, quia si ex meritis, jam non est gratia. Neque refert quod Paulus non dixerit: *Si ex meritis*, sed: *Si ex operibus*; tum quia solum loquitur de operibus, ratione meriti quod in eis esse potest; tum etiam quia opera vocat omnes actiones humanas, ut sunt a solo libero arbitrio.

41. *Secunda conciliatio Semipelagianorum.*—*Rejicitur dupliciter.*— Addebant ergo alium modum expediendi has difficultates, extenuando illud meritum, quod alioqui ita magnificabant, ut primariam rationem salutis obtinendæ, et distinguendi salvandos a damnandis in illo merito ponerent. Nihilominus tamen dicebant meritum illud adeo esse exiguum, ut rationem gratiæ in auxilio, quod propter illud datur, non impediret. Ita ostendunt verba Hilarii: *Nec negari gratiam (supple, dicunt) si præcedat hominis voluntas, quantum medicum querat, non tamen ipsa quidpiam in ea, scilicet sanitate, valeat.* Idemque colligi potest ex multis aliis, quæ in proxime præcedenti dubio allegavimus. Nihilominus hæc etiam evasio satisfacere non poterat. Primo, quia permissio et non concessio, quod aliquo modo rationem gratiæ tuerentur; nullo modo salvare poterant aliam assertionem, qua dicebant omnem sanctam operationem et cogitationem ex Deo habere principium, nam illud qualecunque meritum in aliqua bona

actione vel operatione fundatum est, et aliquam sanctam cogitationem supponit, Deus autem nec illius operationis, nec cogitationis dicitur esse principium, ex Semipelagianorum sententia. Secundo, quia revera quaecumque fingatur illud meritum, si non est fundatum in gratia, destruit rationem gratiæ in illo præmio, seu auxilio quod propter illud datur, ut recte tradit Augustinus libro de Prædestinatione Sanctorum, capite secundo, et infra late suo loco tractabimus.

42. *Tertia excogitata conciliatio.*— Tandem tertiam rationem cogitarunt, dicentes illud meritum non excludere rationem gratiæ, quia etiam illud fundatur in gratia liberalis ac gratuitæ vocationis. Atque ita propositionem alteram etiam explicabant, et conciliabant, dicentes gratiam esse initium sanctæ operationis et cogitationis, quia ante omnia præcedit gratuita vocatio. Unde dicebant illos prædestinasse Deum, *quos gratis vocatos dignos futuros electione prævidit*, ut refert Prosper in epistola ad Augustinum; ratione ejus etiam dicebant, *ad incipiendum, proficiendum, et ad perseverandum in bono, necessariam esse homini Dei gratiam*, ut refert Prosper in epistola ad Ruffinum in initio, et latius contra Collat., cap. 3, ubi, ex verbis Cassiani, vocationem illam declarat per illa verba: *Cogitationum bonarum ex Deo esse principium, qui nobis initia sanctæ voluntatis inspirat*. Et infra: *Nostrum vero est, ut quotidie attrahentem nos gratiam Dei humiliter subsequamur*, etc. Quæ verba ipse laudat, et *definitionem catholicissimam appellat*, utique si in vero et legitimo sensu traderetur. Sic enim Augustinus quæst. 2 ad Simplic., rationem gratiæ revocat ad gratuitam vocationem. Et lib. de Prædestinatione Sanctorum, et epist. 105, fatetur nos per fidem mereri remissionem peccatorum, neque id repugnare gratiæ, quia ipsa fides est donum Dei, a divina vocatione procedens, licet sine liberi arbitrii cooperatione non habeatur.

43. *Rejicitur tertia conciliatio.*— At vero Semipelagiani in sensu longe diverso loquebantur. Illam enim gratiam, seu vocationem antecedentem bonæ voluntatis et sanctæ cogitationis initium, solum censebant esse prædicationem, aut legem, quam sufficere dicebant, ut voluntas pro sola libertate sua inciperet velle, credere, et desiderare salutem. Et ita nullum verum auxilium gratiæ ad illud meritum ponebant, ideoque neque in vero sensu dicebant, initium sanctæ cogitationis, et bonæ voluntatis esse ex Deo auxiliante per gratiam,

nec veram rationem gratiæ in primo Dei auxilio salvabant, quia meritum illud non procedebat ex vera gratia interna. Ita verborum ambiguitatem aperuit Prosper dicta epistola ad Ruffin., ubi non de Pelagianis tantum, sed de Semipelagianis loquens ait: *Sed in hac professione quomodo raris iræ moliantur irrepere, ipsa Dei gratia raris misericordiæ revelavit. Intellectum est enim, saluberrimeque perspectum, hoc tantum eos de gratia confiteri, quod quædam libero arbitrio sit magistra, sequæ per cohortationem, per legem, per doctrinam, per creaturam, per contemplationem, per miracula, perque terrores extrinsecus iudicio ejus ostendat, quo unusquisque secundum voluntatis suæ motum, si quæsierit, inveniat; si petierit, recipiat; si pulsaverit, introeat*. In quibus verbis indicat Semipelagianos posuisse gratiam illam externam, non solum pro initio salutis, sed etiam pro toto progressu, quod est valde probabile, juxta modum explicatum in dub. 3 et 4. Multo autem certius est, hoc sensisse de illa gratia, quam dicebant esse initium primi humani meriti. Unde idem Prosper, in epistola ad Augustinum, sic inquit: *Quidam vero horum in tantum a pelagianis semitis non declinant, ut cum ad constituendam eam Christi gratiam, quæ omnia præveniat merita humana, cogantur, ne, si meritis redditur, frustra gratia nominetur: ad conditionem hanc velint uniuscujusque hominis pertinere, in qua eum nihil prius merentem, quia neque existentem, liberi arbitrii et rationalem gratia creatoris instituat, ut per discretionem boni et mali, et ad cognitionem Dei, et ad obedientiam mandatorum ejus possit suam dirigere voluntatem, atque ad hanc gratiam, qua in Christo renascimur, pervenire*. Et infra expresse declarat, illam vocationem, quam ponebant Semipelagiani, fuisse, *vel per legem naturalem, vel per scriptam, vel per evangelicam prædicationem*. Idemque valet quod Hilarius refert, eos asseruisse, *inutilem esse exhortandi consuetudinem, si nihil in homine remansisse dicatur, quod correctio valeat excitare. Quod quidem inesse naturæ sic confitentur, ut hoc ipso, quod ignorantia veritas prædicatur, ad beneficium præsentis gratiæ referendum sit*. Nullam ergo aliam internam gratiam, nec altiore excitationem præcedere sentiebant. Quod etiam ex verbis Cassiani et Fausti in præcedenti capite animadvertimus.

44. *Semipelagiani cum Pelagianis contemisse in æquivocatione gratiæ.*— Ex quibus omnibus manifestum est Massilienses ambigue

et æquivoce usos fuisse nomine gratiæ, et in hoc (inter alia) non omnino ab errore, seu fraude Pelagianorum discessisse, quod libertatem ipsam, vel legem, aut doctrinam gratiam vocarent, et sub hac gratiæ appellatione meritum gratiæ pure humanum introducere vellet: *Ut unusquisque bono naturæ usus ad salvantem gratiam, initialis gratiæ merito perveniat*, sicut de illis Prosper refert. Atque ita per initialem gratiam salvabant, et rationem, seu appellationem gratiæ in salvante gratia; et alteram assertionem, quod initium omnis boni sit ex Deo. Sed frustra, et fraudulenter. Quia nec sola illa naturalis, vel externa gratia tollit, quin homo suis solis viribus gratiam salvantem mereatur, et consequenter desinat esse gratia; nec initium totius salutis reducit in Deum, ut salutis operatorem, sed ut auctorem, vel doctorem, aut legislatorem naturæ. Atque ita satis hic error et omnes ejus latebræ investigatæ et explicatæ videntur.

45. *Recensentur et alio remittuntur cætera quæ in semipelagianismo notantur.* — Præter ea, vero, quæ animadvertimus, solent alia multa in his Massiliensibus notari, quæ nos omittimus, quia vel ad materiam de Prædestinatione pertinent, et ibi tractata sunt, vel ad semipelagianismum non spectant, nisi fortasse ab ipsis fuerint male intellecta, quod postea videbimus. In priori ordine ponimus omnia quæ tradunt de causa prædestinationis, ex parte hominis sola sua libertate operantis, vel ex parte operum, quæ nunquam erunt, et sub conditione prævidet Deus esse futura, si hoc vel illud fieret; et si quæ sunt similia. In posteriori ordine numeramus, quod dixerint hominem, per lapsum, non amisisse judicium rationis inter bonum et malum, neque omnino amisisse facultatem naturalem bene operandi. Item in natura hominis esse innata quædam virtutis semina, quæ ad perfectionem, nisi per gratiam, pervenire non possunt. Hæc enim recte intellecta, catholicam doctrinam continent; an vero in eorum intelligentia aliquid exceperint Massilienses, non potest hoc loco expendi, donec res ipsæ tractentur. Aliqui etiam reprehendunt Semipelagianos, eo quod dixerint, Deum præscire omnia, non tamen omnia prædestinare, et præscire futura libera, quia futura sunt; non autem ideo esse futura, quia Deus illa futura præscivit. Sed hæc non pertinent ad semipelagianismum, sed ad doctrinam Patrum, quæ Ecclesia recipit, ac veneratur, ut ubi est a nobis ex professo tractatum, et in sequentibus per occasionem attin-

gemus. Et ideo de hoc errore, quatenus ad præsens spectat, hæc sufficiunt.

CAPUT VII.

DE ERRORE LUTHERI, ET CALVINI, ET SECTARIORUM, CIRCA GRATIAM DEI ET LIBERUM ARBITRIUM.

1. *Veterem Prædestinatorum hæresim Novatores excitarunt.* — Notavimus in cap. 5, sub finem vitæ Augustini, vel paulo post ejus tempora, subortam fuisse hæresim Prædestinatorum, qui, sub nomine et specie gratiæ, fatalem quamdam necessitatem in humanis actionibus introducebant, dicentes, nec bona opera quidquam prodesse, nec mala obesse ad salutem, quia prædestinatio DEI sola, quos elegit, salvat, et quos rejicit, damnat, quidquid homines operentur. Et hunc errorem ortum esse ex falsa intelligentia doctrinæ Augustini, ibi etiam retulimus, sumique potest ex epistola 46 Augustini, quam scripsit ad sedandam turbationem in quodam monasterio ortam, eo quod quidam sic prædicarent gratiam, ut libertatem et judicium Dei secundum nostrorum operum qualitatem negarent. Referunt item Prosper et Hilarius, in principio turbatos fuisse Massilienses, quia credebant, vel timebant, hoc incommodum sequi ex doctrina Augustini; unde credibile est Faustum, et alios ex Gallis, sub colore impugnandi hunc errorem, doctrinam Augustini impugnasse. Hanc igitur hæresim hujus temporis novatores excitarunt, et cum Prædestinatorum insania in assertionem conveniunt, licet ex diversis principiis, et cum admixtione plurium errorum, quos in præsentem præmittere et explicare necessarium est; nam catholica veritas inter hos extremos errores versatur, et ideo inter eos caute incedere necesse est. Quia, ut dixit Augustinus in principio libri de Gratia et libero Arbitrio, et lib. 2 de Peccat. merit. et remiss., cap. 18, et tota epist. 46, obscurissima est de gratia et libero arbitrio questio, et cum magno periculo in alterutram partem declinatur, ideoque tam qui negant liberum arbitrium, ut gratiam defendant, quam qui e converso pro libero arbitrio contra gratiam pugnant, diligentissime cavendi sunt, et media via incedendum est, quam veritas catholica profitetur.

2. *Primus error, ejusque fautores.* — Primum ergo fundamentum Novatorum est, post peccatum non mansisse in homine liberum ar-

bitrium. Qui error negantium liberum arbitrium longe est antiquior. Nam et a philosophis, et a Simone Mago duxit originem, et illum postea Priscillianistæ secuti sunt, et alii, præsertim vero Manichæi, ut Augustinus refert hæresi 46, et Chrysostomus, hom. 45 in Joann., et attingit Hieronymus in principio Dialogorum contra Pelagian. Illi tamen antiqui non negabant liberum arbitrium titulo defendendi gratiam, nec quia per peccatum amissum esse putarent, sed quia vel de providentia Dei, vel de hominis natura male sentiebant. Aiebant enim quorundam hominum voluntatem natura sua esse ad malum et peccatum determinata; aliorum, ad bonum et virtutem; nam quosdam a malo principio, alios a bono creatos esse sorgebant. At vero Novatores, sub specie tuendi gratiam, libertatem negant. Cum Pelagianis enim in hoc principio conveniunt, quod gratia repugnet libertati. Unde, sicut Pelagiani, sub specie defendendi libertatem, gratiæ necessitatem negabant, et defensores gratiæ Manichæos vocabant, ut testatur Augustinus, lib. 2 contra duas epistol. Pelag., in princ., lib. 3, cap. 9, et lib. 4, c. 12; ita Lutherani, sub colore defendendi gratiam, negant libertatem, et defensores liberi arbitrii Pelagianos appellant. Ac denique, ut supra, cap. 10, notavi, non ponunt hanc carentiam libertatis ut naturalem, sicut Manichæi, sed ut effectum peccati; nam per originale peccatum putant humanam naturam esse perditam. Et nihilominus isti hæretici hanc necessitatem potissime referunt in divinam prædestinationem, et efficacem motionem, sine qua nihil censent posse efficere voluntatem nostram, quæ duo, ut supra etiam notavi, inter se non consonant. Nam si Dei prædestinatio et providentia necessitatem inducit libertati contrariam, eandem profecto induxit in Adamo, imo etiam in Angelis. Quia prædestinatio, aut motio divina non est per peccatum introducta, sed per se requiritur ob perfectionem divinæ providentiæ, et dependentiam naturæ creatæ a Deo. Ideoque, si prædestinatio, aut motio divina necessitatem illam inducit, non id facit in pœnam peccati, sed ex vi et efficacia sua, quam ex sua natura, et perfectione ac potestate habet: ergo non minorem necessitatem induceret in statu innocentie, et inposuit Adamo ante peccatum, et Angelis, quam nunc inferat hominibus. Ergo frustra dicitur libertas per peccatum fuisse amissa.

3. *Proponitur modus quo necessitatem arbitrii Lutherus astruebat, et expugnatur.* — *In-*

theri error, ejusque explicandi modus absurdissimus.—Verumtamen, in hac ipsa necessitate asserenda, non omnino novi hæretici inter se consentiunt: Lutherus enim, super Psal. 5, dixit, ideo voluntatem ex necessitate moveri, quia non agit suos motus, sed velut inanime quoddam illos recipit, ipsa passive tantum se habente. Quod profecto, si ita esset, naturale esset voluntati; ideo enim sic moveretur, quia esset potentia passiva, non activa, et quia non haberet alium motorem proportionatum, nisi Deum: nam si ipsa esset natura sua productiva suorum motuum, non privaretur a Deo suo naturali modo agendi. Atque ita fit, etiam ante peccatum fuisse voluntatem hominis passivam, ac proinde caruisse libertate. Nisi forte Lutherus finxerit voluntatem, quæ antea erat suorum motuum effectrix, per peccatum amississe suam activitatem, et ex potentia activa transmutatam esse in pure passivam. Quod quam sit absurdum, et præter captum humanum, per se statim apparet, et ex dictis in tertio prolegomeno satis constat. Potuit vero etiam dicere Lutherus, voluntatem nostram talem habere naturam, ut utroque modo possit moveri, scilicet, vel efficiendo motus suos, vel illos ab extrinseco agente recipiendo: et ante peccatum permissam esse priori modo operari, post peccatum vero, licet utramque facultatem in se retinuerit, nihilominus in pœnam commissi criminis solum passive moveri, nec aliter operari permitti, et ita libertatem peccando amississe. Sed hic error, etiam sic explicatus, est per se absurdissimus, quia, præterquam quod modus ille recipiendi sine activitate interna, repugnat motibus vitæ, quia homo vere intelligit, afficitur, timet, etc., quæ sine efficientia interna intelligi non possunt; licet daremus modum illum, de potentia Dei absoluta, esse possibilem, est nimis violentus et monstrosus, et contra regulam illam, quod naturalia non sunt ablata, aut impedita propter peccatum, quam supra, prolegomeno tertio, ostendimus. Et præterea, in motionibus peccaminosis, repugnat modus ille bonitati et justitiæ divinæ; in bonis autem repugnat cum capacitate præcepti, consilii, meriti. Et præterea, si, hoc non obstante, talis motio salutem afferret, tunc immerito vocaretur pœna peccati, sed potius insignis gratia et favor; præter alia quæ, in sequentibus, contra totum hunc errorem dicemus.

4. *Proponitur modus Calvinii.* — At vero Calvinus, lib. 2 Institut., c. 5, § 14, non negavit voluntatem humanam, etiam post pec-

catum, suos motus efficere, amando, volendo, et libenter seu voluntarie operando; dixit tamen, ad illas actiones ita moveri a Deo, et ad unum determinari, etiam quoad exercitium operis, ut ex absoluta necessitate tales motus operetur voluntas; ideoque, licet libertatem admittat a coactione, non tamen propriam libertatem a necessitate. Et hanc sententiam secutus est Kemnicius; imo, juxta illam Lutherum explicare conatus est, teste Stapleton., lib. 4 de Liber. arbit., cap. 1. Cur autem hunc modum necessitatis, magis post peccatum in voluntate humana ponant, quam ante illud, non invenio a Calvino vel aliis explicatum, ipsos enim legere non libuit, neque ab aliis relatum reperio. Fingere autem potuerunt non quamenique prædestinationem Dei, vel motionem efficacem ejus inducere hanc necessitatem, sed specialem aliquam, qua Deus uti voluit post peccatum. Nam prius nondum talis modus prædestinationis aut motionis efficaciis fuerat inductus.

5. *Prædictus modus refellitur.*—Hæc autem fictio vana cogitatio est, quæ nullo potest niti fundamento. Nam, si efficacia divinæ motionis, et prædestinationis, vel præscientiæ, non inducit hanc necessitatem ex natura sua, et ratione suæ perfectionis, unde ostendi potest magis inducere illam in hoc statu post peccatum, quam antea, vel in natura humana potius, quam in angelica? Et ideo omnes hæretici, qui, ob divinam præscientiam, providentiam aut prædestinationem, libertatem abstulerunt, ut Manichæi, Priscillianistæ, Albigenes et Wiclephus, simpliciter rerum contingentiam negarunt, et in omni creatura, et in omni statu, et in omni tempore necessitatem introduxerunt, et consequenter mentiti sunt, quia de omnibus est eadem ratio. Accedit, quia illa differentia inter Lutherum et Calvinum, nullius momenti est ad morales et humanas actiones tuendas, et ad salvanda merita et demerita, præcepta et prohibitiones, præmia et pœnæ; nam, licet physice differant actio et passio, si actio non est libera, ita est ad omnem moralem proprietatem inepta, sicut sola passio. Unde eadem argumenta fiunt contra Calvinum, quia si Deus ita necessitat voluntatem, ut illam agere compellat, in malis Deus erit auctor peccati, quod consequenter admittit Calvinus, cum antiquis hæreticis et Lutero; in bonis autem non tribuetur laus vel meritum boni operis homini operanti, sed Deo moventi. Quod si talis motio spectetur, ut dicitur afferre homini commodum, sic non poterit vere

dici infundi propter peccatum, etiam quoad illum modum necessitatis. Latiusque contra hunc errorem in discursu materiæ pugnandum est.

6. *Aliorum Novatorum positiones variæ, et damnatæ.*—Alia item differentia inter modernos hæreticos in hoc puncto est, quod plures eorum dicunt, homines per peccatum amisisse libertatem in omni materia, tam politica seu humana, quam morali, et tam in naturali quam in supernaturali, seu pertinente ad salutem æternam, et meritum gloriæ. Item tam in actionibus bonis quam in malis, seu peccatis, quæ Deo indifferenter attribuunt, ut est vulgare in sectariis, ex Lutero a. 36 a Leone X damnato; et l. de Servo arb.; Calvin., l. 2 Inst., c. 36, et l. 3, c. 3; Melanethon, de Lib. Arb., et super Rom. 4. Alii vero (qui molliores Lutherani appellantur, ut Stapleton. refert) in malis operibus admittunt libertatem, in bonis autem illam negant, vel universe vel saltem in operibus gratiæ, et salutis, et maxime in prima conversione ad Deum. Nam, in operibus quæ sunt fructus justitiæ, et procedunt a voluntate jam sanata per justitiam, aliqui ex moderatioribus Lutheranis, aliquam libertatem agnoscunt, in prima autem conversione omnes negant. In hac autem varietate illud imprimis advertendum occurrit, qui ex Novatoribus libertatem in malis actibus permittunt, loqui videri tantum de libertate intra species mali, seu inter particulares actus malos. Nam, loquendo de malo in genere, eorum doctrina est, ita fuisse voluntatem hominis per peccatum originale depravatam, ut nihil omnino bonum agere possit, et nullam in partem se posse movere, quin peccet. Igitur, ex sententia istorum, non est in nobis libertas ad malum in genere, sed necessitas, quam scholastice vocare possumus quoad specificationem. Igitur qui in malis libertatem admittunt, loqui videntur de libertate in eligendo, vel exequendo hoc, vel illud malum. Et isti consequenter attribuunt necessitatem illam originali peccato, libertatemque illam dicunt, mansisse in natura ex ea parte, qua non fuit omnino per peccatum destructa; et in hac quidem posteriori parte non errant admittendo aliquam libertatem, in priori tamen contra fidem loquuntur: imo etiam contra rationem naturalem, ut supra cap. 10 tactum est, et in sequentibus latius ostendemus. Et simili ratione, qui libertatem aliquam in bonis inferioris ordinis, seu politicis cognoscunt, in eo non errant, quia illa naturalis est, et dicere possunt, solum peccatum illam prorsus abolere non potuisse; in

eo vero quod libertatem in aliis materiis negant, prorsus errant.

7. *Præcipua eorum positio sive error.* — *Consulatur.* — Præcipuus autem eorum error est, quod libertatem ad opera salutis negant, decepti nonnullis Augustini locis supra indicatis, in quibus ita loqui videtur, sed in sensu longe diverso. Mens enim et ratio Augustini fuit, quod peccatum privavit hominem omni gratia, et indignum reddidit omni supernaturali auxilio, sine quibus subsidiis non potest nostra voluntas salutem operari, et ideo neque libertatem habet ad illa opera præstanda: nam libertas potentiam ad operandum includit. Quæ quidem ratio procedit de voluntate hominis lapsi non sanata, nec reparata, vel adjuncta per gratiam, continetque verissimam doctrinam, quam contra Pelagianos catholica fides docet, ut postea dicemus. Isti autem sectarii addiderunt, per peccatum ita periisse libertatem ad hæc salutis opera, ut, nec per gratiam Dei, possit homo lapsus talia opera libere efficere. Quomodo autem talis defectus libertatis ex peccato originali contrahatur, non invenio ab eis explicatum, nec video qua rationis umbra niti possit. Nam hic defectus potius pertinet ad gratiæ impotentiam, quam ad corruptionem voluntatis. Si enim, non obstante peccato, voluntas aliquid intra ordinem naturæ libere potest operari, quod per gratiam non possit elevari ad aliquid libere operandum, potius est defectus et impotentia ipsius gratiæ quam voluntatis. Vel certe si hæc impotentia ex eo nascitur, quod voluntas non habet vim aliquam naturalem ad opera salutis sua virtute efficienda, et ideo oportet ut, cum elevatur a Deo, necessitetur: profecto eadem impotentia seu necessitas esset ante peccatum, quia in omni statu voluntas creata est per se impotens ad illas actiones, nullamque naturalem vim ad illas inchoandas habet; ergo, etiamsi fingatur in voluntate talis ac tanta impotentia, ut etiam per gratiam vinci non possit sine ablatione libertatis, non potest dici ex peccato contracta.

8. *Alia hæresis refertur.* — Et fortasse ob hanc causam alii Lutherani, magis moderati, posuerunt hanc necessitatem in sola prima conversione, quia ante illam voluntas est nuda, et destituta omni virtute supernaturali, et ideo putant non posse elevari a Deo ad talem mutationem primam efficiendam, nisi per motionem aliquam, quæ illi necessitatem imponat, et quia illa nuditas et carentia omnis virtutis supernaturalis orta est ex peccato, ideo conse-

quenter dicent necessitatem hanc ortam esse ex peccato. Quia vero, ad opera obedientiæ et sanctitatis, quæ post justitiam fiunt, jam habet homo intrinsicam virtutem gratiæ talium operum effectricem, ideo in talibus operibus admittunt, ut virtute ipsius gratiæ libere fieri possint. Unde necesse est ut, qui ita senserint, non ponant necessitatem illam in prima conversione ex sola prædestinatione, aut voluntate extrinseca Dei, neque ex adjutorio cujuscunque gratiæ, sed tantum ex illa peculiari motione, qua indiget voluntas carens habitibus gratiæ, ut ad conversionem in Deum sublevetur. Et isti minus quidem errant quam cæteri, tamen etiam in hæresim damnatam incidunt, ut postea videbimus.

9. *Redarguuntur Novatores.* — Ex his autem omnibus colligere possumus Novatores, negando arbitrii libertatem, et fingendo monstrosam, per originale peccatum, naturæ corruptionem, eo tandem pervenisse, ut veram gratiam salvantem, verumque gratiæ adjutorium negaverint: hoc enim ex illo plane consequitur. Quia, ut dixit Augustinus, epist. 46: *Tolle liberum arbitrium, et non erit quod salvetur; tolle gratiam, et non erit unde salvetur.* Cum ergo isti tollant liberum arbitrium, penitus destruunt subjectum indigens, vel capax salutis; ergo necesse est ut gratiam, etiam salvantem, tollere cogantur, quamvis verbis illam fateantur. Pro gratia enim salvante ponunt non imputationem peccatorum, et imputativam Christi justitiam. Re tamen vera etiam hæc non erat necessaria, saltem pro peccatis actualibus, si homo non est liberi arbitrii, quia eo ipso necesse est ut peccatum illi non imputetur, non ex gratia, seu liberalitate, sed ex justitia, et naturali necessitate, quia actio non libera non potest operanti ad culpam imputari. Gratiam autem adjuvantem diserte negavit Calvinus, teste Staplet. Reprehendit enim Catholicos, eo quod dixerint gratiam Dei ad studium sanctitatis homines adjuvare. Unde etiam dicit, *non fuisse CHRISTUM missum, ut ad justitiam consequendam vel perficiendam nos juvet, sed ut ipse sit nostra justitia*, ut Apostolus dixit. Et hoc etiam sequitur ex negatione liberi arbitrii; nam ut Augustinus dixit: *Nemo juvatur, nisi qui aliquid sponte conatur*, lib. 2 de Peccat. merit., c. 5; et ideo dixit epist. 89, q. 2, *non tolli liberum arbitrium, quia juvatur, sed ideo juvari quia non tollitur.* Et ratione declaratur, quia si dicatur voluntas hominis mere passive se habere in operibus pietatis, profecto ad illa non coope-

ratur: ergo neque a Deo juvatur, sed Deus solus illa per se facit. Si autem voluntas physice operatur, non tamen libere, sed ex necessitate, etiam hoc modo ipsa moraliter non operatur, et consequenter nec juvatur, sed velut inanime instrumentum ad agendum applicatur.

10. *Error intolerabilis eorumdem.* — His accedit alius intolerabilis error istorum, circa divinam gratiam: non solum enim negant, fieri per gratiam posse, ut homo libere operetur, sed etiam dicunt hominem lapsum, nullum opus posse per gratiam facere, quod sit undique bonum, seu quod peccatum non sit, vel mortale, ut rigidiores volunt, vel saltem veniale, ut molliores interpretantur. Quod aliqui dixerunt solum de homine nondum justificato, alii vero etiam de justificato idem sentiunt. Sed fortasse in re non discrepant. Nam opera ipsa in utroque statu sentiunt esse mala et peccata, quia causam hujus malitiæ dicunt esse concupiscentiam, quæ etiam post justificationem manet; volunt tamen, ante justificationem opera omnia, et esse peccata, et ad peccatum imputari: post justificationem vero, licet peccata sint, propter fidem tamen justificantem non imputari. Atque in hoc sensu consequenter dicunt, per originale peccatum amisisse hominem libertatem bene operandi, quia ita factus est impotens ad omne opus bo-

num, ut etiam post regenerationem et justitiam per nullam adjuvantem gratiam possit bonum opus perficere. Quia concupiscentia contracta per peccatum omnia opera ex necessitate commaculat.

11. *Ex prædicto errore consecutio non minus damnanda.* — Unde etiam intulerunt non posse hominem, in hac vita, implere præcepta, etiam per gratiam, ac subinde præcepta Dei homini in hoc statu imposita, esse illi simpliciter impossibilia, quia nec per naturæ lapsæ vires, nec per gratiam, quæ concupiscentiam non tollit, impleri possunt. Quod vult esse extra controversiam Calvinus in Instit. lib. 2, c. 7, et fuit doctrina Lutheri, quam Melancton et alii secuti sunt. Præter hos sunt multi alii Lutheranorum errores, qui non circa vires liberi arbitrii, vel necessitatem gratiæ, sed specialiter circa justificationem, et necessitatem operum versantur, et ideo inferius in propriis locis eos referemus, et impugnabimus. Possent etiam hoc loco referri articuli quidam Michaelis Baii, quorum notitia in hac materia necessaria est; tamen quia ille vir catholicus fuit, et non cum pertinacia erravit, ideo non est inter hæreticos recensendus, sed in capite secundo sequentis prolegomeni, ejus assertiones simul cum Bulla Pii V et Gregorii XIII referemus.

PINIS PROLEGOMENI QUINTI.



INDEX CAPITUM PROLEGOMENI SEXTI

DE SCRIPTIS PROBATAM DE GRATIA DOCTRINAM CONTINENTIRUS.

- CAP. I. *De auctoritate pontificum romanorum, qui gratiam defenderunt.*
- CAP. II. *De censura Pii V et Gregorii XIII aliquarum assertionum, partim naturæ, partim gratiæ nimium tribuentium aut detrahentium.*
- CAP. III. *De Concilio Diospolitano in Palæstina contra Pelagium pro gratia Dei congregato, ejusque actis et auctoritate.*
- CAP. IV. *De Conciliis Africanis, et Ephesino, quæ contra Pelagium pro Dei gratia pugnarunt.*
- CAP. V. *De aliis Conciliis contra reliquias Pelagianorum et alios gratiæ hostes celebratis.*
- CAP. VI. *De Patribus qui veram de gratia doctrinam nobis tradiderunt et contrarias hæreses confutarunt.*
- CAP. VII. *Continens Librum D. Augustini de Gestis contra Pelagium in Concilio Palæstino, per 22 capita distributum.*



PROLEGOMENUM SEXTUM.

DE SCRIPTIS PROBATAM

DE GRATIA DOCTRINAM CONTINENTIBUS.

CAPUT I.

DE AUCTORITATE PONTIFICUM ROMANORUM, QUI GRATIAM DEFENDERUNT.

1. *Loci Scripturæ in quibus gratia commendatur, ab Ecclesia explicandi.* — Quamvis certissimum sit veram de gratia doctrinam ex Scripturis divinis sumendam esse, nihil de illis præmittendum censuimus; tum quia, teste Innocentio, epistola 93 inter epistolas Augustini: *In omnibus divinis paginis, voluntati liberæ non nisi adjutorium Dei legimus esse nectendum, eamque nihil posse cælestibus auxiliis destitutam.* Et similiter Augustinus, Ps. 70, in principio: *In omnibus (inquit) Scripturis Sanctis, gratia Dei, quæ liberat nos, commendat s nobis, ut commendatos habeat nos.* Tum etiam quia hoc melius ipso usu ostendetur, singula dogmata de gratia Scripturis confirmando. Generatim ergo solum adverte, et Veteri Testamento maxime commendari gratiam in Psalmis, ut observat Innocentius Papa, epist. 30 inter suas epistolas, quæ est 91 inter epistolas Augustini, ubi, expendens verba Psalm. 26: *Adjutor meus esto, etc.*, inquit: *Adjutorem suum, et assiduum adjutorem Deum invocat, neque illi sufficit, assiduum, sed ne illum derelinquat, orationibus pronus exoptat, et per corpus omne Psalterii hoc, et prædicat, et clamat.* Idemque frequenter in suis libris contra Pelagium Augustinus inculcat, et in toto fere octavo tomo, in quo Psalmos exponit. In novo autem Testamento, licet frequenter divina gratia commendetur, maxime vero a Christo Domino, Joan. 6, 15 et seqq., ut ibi Augustinus et sæpe alibi exponit; et a Paulo in suis epistolis, ut ait Hermida Papa, epist. 67, ad Possessorem, in

ultimis verbis; specialiter vero in epist., ad Rom., teste Augustino, ep. 103, in principio, et in epist. ad Galat., ut supra ex doctrina ejusdem Augustini, c. 13, tactum est. Quia vero, et in his epistolis quædam sunt difficilia intellectu, quæ perversi homines depravant, ut Petrus dixit, maxime propter dogmata de fide, operibus et gratia; et in cæteris etiam Scripturis magna est obscuritas, propter quam illis hæretici abutuntur, necessaria est auctoritas Ecclesiæ, quæ Scripturas declaret, et errorum tenebras depellat, ideoque de hac potissimum auctoritate dicemus, quæ ex decretis Pontificum et Conciliorum, et doctrinis Sanctorum Patrum sumenda est, de quibus suo ordine dicemus.

2. *Innocentii I doctrina et defensio de gratia.* — Et quidem, ante exortam Pelagii hæresim, Apostolica Sedes nihil specialiter de divina gratia definivit, aut declaravit, sed de illa locuti sunt Pontifices, eo modo quo Paulus loqui solet. Pelagius vero errorem suum tempore Innocentii I seminare cepit, et ideo Innocentius etiam fuit primus qui veritatem catholicam contra illum stabilivit. Nam, cum Africana Concilia contra Pelagium et Celestinum decrevissent, ab Innocentio postularunt ut, auctoritate Apostolicæ Sedis, catholicam doctrinam confirmaret, et exortam hæresim damnaret, quod ipse gravissime et vigilantissime præstitit, *ad omnia rescribendo, eo modo quo fas erat, et oportebat Apostolicæ Sedis Antistitem,* ut de illo scripsit Augustinus epist. 106 ad Bonif., habenturque hæc decretalia responsa Innocentii in epist. 31, 32, 33 et 34 ejusdem Innocentii, et in epist. 91, 93, 96 et 97 inter epist. Augustini. In illis autem epistolis nihil aliud docuit Innocentius, nisi quod

antiquitus Apostolica Sedes, et Romana, cum cæteris, tenet perseveranter Ecclesia, ut ait Augustinus l. 1. 1. contr. Julian., c. 4. Unde, licet ibi non omnes errores Pelagii distincte referat et damnet Innocentius, nihilominus generatim approbat Africanorum Episcoporum doctrinam, docetque capitalia dogmata de peccato originali, et de necessitate gratiæ ad salutem et redemptionem a peccato, et ad recte et sancte vivendum, et operandum, servandaque præcepta, et tentationes superandas, per quæ dogmata. totum errorem Pelagii, prout tunc prædicari cœperat, sufficienter damnavit.

3. *Ut fidei definitio accipienda est illa doctrina Innocentii.* — Tradit autem Innocentius illam doctrinam, ut ad fidem catholicam pertinentem, et ideo sententiam damnationis fert absolute in contrariam doctrinam, in personam autem Pelagii non omnino absolute, sed sub conditione, si contrariæ doctrinæ pertinaciter adhereret, ut constat in epist. 32, seu 93. Nam quia tunc fama erat, fuisse Pelagium absolute in quodam Concilio Palæstino, quia in eo errorem sibi objectum, vel damnaverat, vel damnare simulaverat, vel ab eo se purgaverat, licet Innocentius valde suspicaretur, non ex corde, sed fide et dolose Pelagium fuisse conversum, nihilominus quia nondum causam examinaverat, noluit de sententia Orientalium ferre iudicium, ut in epist. 33, seu 96, ipse significat, et notat Augustinus l. 2 de Peccato originali, cap. 8. Est ergo illa doctrina Innocentii tanquam fidei definitio suscipienda. Et ita illa utuntur Patres, præsertim Augustinus citatis locis, et l. 1. Retract., c. 50, et aliis locis statim citandis; et Prosper contr. Collat., cap. 10, ejus verba paulo post referam. Et optime Hieronymus, in epist. 8 ad Demetriad., quam, ut contra Pelagium, qui eam suis pulsaverat litteris, præmuniret, inter alia inquit: *Quia vereor, imo rumore cognori, in quibusdam adhuc vivere, imo et pullulare venenata plantaria* (id est, dogmata Origenis in Pelagio) *illud te pio charitatis affectu præmonendum puto, ut Sancti Innocentii, qui Apostolicæ Cathedræ, et supra dicti viri (utique Anastasii) successor et filius est, teneas fidem nec prægrinam quamvis tibi prudens, callidaque ridearis) doctrinam recipias.* Et eodem sensu doctrinam illam sequentes Pontifices confirmarunt.

4. *Zosimus lenis a principio, semper zero constans adversus Pelagium.* — Innocentio successit Zosimus, qui, in principio sui pontificatus, cum Cælestio et Pelagio lenius egisse vi-

sus est. Nam et Cælestium coram audivit, et a Pelagio litteras accepit, et libellos sen professiones suæ fidei ab utroque recepit, in quibus se Catholicos simulabant, et si quid per ignorantiam errassent, in omnibus se correctioni Sedis Apostolicæ submittebant, ideoque damnari tunc non potuerunt. Quæ notat Baronius, ann. 417, num. 18 et seq., et indicantur ab Augustino, lib. 6 contr. Jul., cap. 12, ubi ait *Zosimum egisse prius lenius cum Cælestio, quia se, si quid displiceret, paratum esse dixerat corrigi, et Innocentii litteris consensurum esse promiserat.* Atque hac Pontificis lenitate ita Pelagiani abusi sunt, ut Zosimum in errorem suum aliquando consensisse, et pueros sine peccato nasci sensisse, objicere ausi fuerint. Propter quod cum Zosimus postea, et illos jam convictos, et ipsorum errores aperte damnasset, cum prævaricatorem appellabant, ut Augustinus refert lib. 1 contra Jul., cap. 4, lib. 2 contra duas epistolas Pelagianorum, cap. 3, ubi Zosimum ab hac calumnia vindicat, ostenditque, *Quod interea lenius actum est cum Cælestio, servata duntaxat antiquissimæ et robustissimæ fidei firmitate, correctionis fuisse clementissimam suasionem, non approbationem exitiosissimæ pravitatis.* Et quia ab eodem Zosimo Pelagius et Cælestius postea damnati sunt, *paululum intermissæ, jam necessario proferendæ rationem severitatis, non prævaricationem prius cognitæ, vel noxam cognitionem veritatis fuisse.* Unde Baronius, ann. 417, a num. 18, ubi varias Zosimi epistolas refert, quibus hoc confirmat, quæ tamen in tomo Epistolarum non habentur.

5. *Zosimus cum Innocentio concinit in doctrina fidei.* — Ex hac igitur facti narratione fit manifestum, Zosimum eandem doctrinam de originali peccato, ac gratiæ necessitate, cum Innocentio tradidisse, eosdemque errores, ipsumque Pelagium et Cælestium ut hæreticos econdemnasse, ut Augustinus in citatis locis testatur, et lib. 2 de Peccato originali, cap. 7 et 8, et lib. 2 Retract., cap. 50; et Paulin. Diac., in libel. ad Zosimum, quem refert Baronius, ann. 412, num. 22 et seq., et ann. 418, num. 11 et seq.; et Prosper in Chron. et contra Collat., c. 10 dicens: *Africanorum Conciliorum decretis beatæ recordationis Papa Zosimus sententiæ suæ robur adnexuit, et ad impiorum detractionem gladiis Petri dexteris omnium armavit Antistitum.* Denique refert Gemadius, de Viris illustribus, cap. 43, decretum damnationis in Pelagium, quod Innocentius scriptum reliquerat, a Zosimo fuisse latius promulga-

tum. Et non solum Pelagium et Cœlestium, verum etiam Julianum, eorum sectatorem præcipuum, cum illis damnasse, ex Augustino sumimus lib. 1 contra Julian., cap. 4, dicente ad Julian.: *Sed de hoc (id est Zosimo) interim taceo, ne animum, quem sanare potius cupio quam irritare, laudibus tui damnatoris exulcerem.* Refert item Augustinus, epist. 103, fuisse litteras ab Apostolica Sede ad Africam missas de Pelagii et Cœlestii damnatione, quæ quidem non extant, certum est autem a Zosimo Papa fuisse conscriptas. Aliæ autem litteræ (si tamen sunt aliæ) ejusdem Pontificis, datæ ad universam Ecclesiam, a Patribus commemorantur, quarum etiam exemplaria non habemus; ex illis autem referuntur illa verba Zosimi: *Nos autem, instinctu Dei (omnia enim bona ad auctorem suum referenda sunt, unde nascuntur), ad fratrum coepiscoporum nostrorum conscientias universa retulimus.* Quæ verba valde commendarunt Africani Patres in rescripto ad Zosimum, quod refert et laudat Prosper diet. cap. 10, contra Collat., et probatur a Cœlestino in epist. ad Episcopos Galliæ, c. 8. Illius etiam epistolæ Zosimi, alia verba referendo, meminit Augustinus, lib. 2 de Peccato origin., c. 21, et ep. 157, versus finem. etiam Posidius in vita Augustini, c. 18.

6 *Bonifacius similiter suorum antecessorum doctrinam tradidit per Augustinum.* — Post Zosimum sedit in Apostolica Sede Bonifacius, cujus etiam tempore Julianus, Episcopus Capuanus, pelagianæ hæresis defensor ac propugnator, illam, et verbis, et scriptis defendere, et præcipue Augustini doctrinam impugnare, vel potius calumniari progressus est. Bonifacium autem, licet in eum, vel duces illius novam damnationis sententiam non tulerit, neque aliquid contra illum errorem, aut pro gratia Dei per seipsum scripserit, nihilominus et constanter ei restitit, et per Augustinum (ut sic dicam) contra illum scripsit. Sic enim de illo scribit Prosper contra Collat., cap. 41: *Sacra memoria Bonifacius Papa, quando piissimorum Imperatorum Catholica devotione gaudebat, contra inimicos gratia Dei non solum Apostolicis, sed etiam regis utebatur edictis, et quocumque esset delinquis, adversus libros lapsos Pelagianorum B. Augustini Episcopi responsa precebat.* Cum enim tunc Julianus pelagianus duas epistolas contra sententiam catholicam scripsisset, et alteram Romam, alteram Thessalonicam misisset, et utraque ad romanum Bonifacium pervenisset, eum per Alypiam Augustino misit, postulans ut ille re-

sponsum daret, quod ipse accuratissime et copiosissime præstitit in quatuor libris contra duas epistolas Pelagianorum, quos ad Bonifacium inscripsit. Quæ omnia ex eodem Augustino discimus in eorundem librorum cap. 1. Quia ergo Augustinus catholicam veritatem satis illustraverat, ac propugnauerat, satis fuit Bonifacio sine nova scripture Augustini doctrinam tacite probare. Quia Julianus novam hæresim non induxerat, et a Zosimo jam damnatus fuerat, ut supra diximus, nova etiam ejus damnatio necessaria non fuit. Unde, quamvis ipse Julianus non satis rem fuisse discussam conquereretur, et ad Concilium generale provocaret, superbia ejus irrita et contempta est, ut Augustinus contra duas illius epistolas, lib. 4, capite ultimo, his verbis memoriæ prodidit: *Verum istorum superbia, quæ tantum se extollit adversus Deum, ut non in illo velit, sed potius in libero arbitrio gloriari, hanc etiam gloriam captare intelligitur, ut propter illos Orientis et Occidentis Synodus congregetur. Orbem quippe catholicum quoniam, Domino eis resistente, pervertere nequeunt, saltem commovere coguntur, cum potius vigilantia et diligentia pastoralis, post factum illis compositens sufficiensque judicium, ubicumque isti lupi apparuerint, contereudi sunt, sive ut sanentur atque mutantur, sive ut, ob aliorum salutem atque integritatem, vitentur.* Quibus verbis contestatur Augustinus, quod valde notandum est, ad definiendam doctrinam fidei, et hæresim pro universa Ecclesia damnandam, necessarium non esse generale Concilium, ubi Apostolicæ Sedis judicium interponitur.

7 *Cœlestinus deinde gratiam contra Pelagium defendit.* — Bonifacio successit Cœlestinus, cui, ad Catholicæ Ecclesiæ præsidium (Prosper, capite illo 41), *multa Dominus gratiæ suæ dona largitus est.* Et quamvis, præcipue contra Nestorium, ejusque blasphemias in Christum, et ejus Matrem, laboravit, nihilominus, quantum occasio tulit, gratiam Dei contra Pelagium defendit. Nam imprimis, in Concilio Ephesino, quod contra Nestorium congregavit, etiam contra Pelagium decretum est, ut cap. 20 videbimus. Deinde, eum Pelagius insulam Britannicæ patriam suam, suo errore inficere coepisset, missis Paladio diacono, et Germano Episcopo, insulam a pelagiano errore purgavit, et ad catholicam fidem reduxit, ut refert Prosper contra Collat., cap. 43, et in Chronic. Præterea, eum Cœlestius iterum audiri postularet, quæ nondum causa sufficienter esset excusa, eum totius Italiæ fruibus

jussit extrudi, adeo et prædecessorum suorum statuta (ait Prosper), et decreta Synodalia inriolabiliter serranda censebat: ut quod semel meruerat abscindi, nequaquam admitteret retractari. Denique, non Pelagianos tantum, sed reliquias etiam Pelagianorum omnino extinguere et abolere curavit, et in hunc finem scripsit epistolam octavam ad Episcopos Galliae, ut ex ejus initio colligitur. Refert enim Cælestinus Prosperum et Hilarium ad se recurrere de perturbatione contra Augustini doctrinam a quibusdam presbyteris in Gallia mota, conquerentes; quam perturbationem, non aliam nisi Semipelagianorum fuisse manifestum est. Et fortasse, quia Cassianus, et cum eo aliqui ejusdem ordinis presbyteri, præcipui fautores turbationis erant, ideo Cælestinus presbyteris, potius quam Episcopis, rumores illos attribuit, quamvis Episcopos reprehendat, quod tantam presbyterorum audaciam non comprimerent.

8. *Pars prima Epistolæ Cælestini refertur, et approbatur.* — Quoniam vero, auctoritate et doctrina hujus epistolæ sæpius in sequentibus usuri sumus, duas illius partes distinguere necesse est, quia non æque indubitatae auctoritatis a multis censentur. Prior pars continet imprimis reprehensionem, quam diximus, quæ, licet præcipua intentione in illos presbyteros tendat, qui contra lumen Ecclesiæ, Augustinum, et contra ejus de gratia doctrinam insurgere, et nova dogmata effutire audent; ad Episcopos nihilominus proxime dirigitur, eo quod, presbyteris inordinate loquentibus, ipsi tacerent, et potestate sua in illos non uterentur. Postea vero Augustinum ejusque doctrinam valde commendat, dicens a prædecessoribus suis inter præcipuos magistros habitum fuisse, eumque nunquam alicujus sinistrae suspicionis saltem rumorem aspersione. Et hanc partem illis verbis concludit: *Deus vos incolumes custodiat, fratres charissimi.* Quæ videtur esse totius epistolæ conclusio, et de hac parte certissimum est fuisse a Cælestino scriptam; nam et in tomo primo Conciliorum, et in primo tomo Epistolarum Pontificalium habetur. Et de eadem loquitur Photius in Biblioth., cum ait scripsisse Cælestinum ad Episcopos Galliarum de fide sancti Augustini. Eandem allegat Vincentius Lirinensis contra profanarum vocum novit., capite ultimo, illam maxime laudans sententiam, qua Cælestinus statuit *ut desincret novitas incessare vetustatem.*

9. *Petulantiam hæreticorum refert Prosper,*

qui, post approbationem Pontificis, reprobare ausi sunt. — Eandem refert Prosper contra Collat., cap. 21, ubi adjungit, non obstante illa Pontificis laudatione librorum Augustini, detractores ejus eam interpretari, et limitare voluisse, ut de anterioribus libris Augustini, non de posterioribus, de quibus erat controversia, sit intelligenda. Per posteriores autem libros, intelligit libros de Prædestinatione Sanctorum et de Bono perseverantiæ. Hos enim in fine vitæ Augustinus scripsit, eosque maxime Semipelagiani detestabantur, et calumniabantur; per anteriores vero libros, intelligere videtur Prosper libros de Peccatorum meritis, et alios similes. Hanc vero perversam interpretationem validissima ratione Prosper confutat. Quia, licet libri Augustini, quos de Gratia scripsit, varii sint, omnium eorum, maxime quos post exortam hæresim pelagianam scripsit, doctrina eadem est: *Nam in anterioribus libris idem doctrinæ spiritus, eademque prædicationis forma præcessit, quæ in posterioribus magis magisque roborata, et variis modis contra diversas quotidie intentas hæreticorum tergiversationes explicata est, nunquam tamen sibi dissona aut discors invenitur:* quapropter ait: *Apostolica Sedes, quod a præcognitis sibi non discrepat, cum præcognitis probat, et quod judicio jungit, laude non dividit.* Accedit quod Augustinus, in eisdem libris de Prædestinatione et Perseverantia, priores libros suos allegat, et eandem doctrinam continere ostendit, ut quæst. 2 ad Simplicianum, epist. 105 et 106, libros contra duas epistolas Pelagianorum; imo etiam in libris non scriptis contra Pelagianos, sed contra Manichæos, de libero Arbitrio, eandem doctrinam contineri ostendit, licet non ita explicatam, quia occasio scribendi id non postulabat. Denique, si quid dissonum a posteriori doctrina ante Pelagium exortum Augustinus dixerat, ut de initio fidei, in Proposit. circa epistolam ad Romanos, ibi illud advertit, et corrigit: ergo in reliquis omnibus non novam de Gratia, vel Prædestinatione doctrinam tradit, sed antiquam defendit.

10. *Amplius, prima pars epistolæ Cælestini probatur ex Prospero.* — Præterea, ex eodem Prospero colligitur, ipsum, et Hilarium præcipue, accessisse ad Cælestinum, ut agerent pro his libris Augustini, qui a Gallis calumniabantur: ergo, licet Cælestinus libros illos in epistola non expresserit, pro illorum defensione præcipue scripsit, ut hoc modo verum sit, quod de Cælestino ait Prosper: *Per hunc*

tirum intra Gallias istis ipsis qui sanctæ memoriæ Augustini scripta reprehendunt, maleloquentiæ est adempta libertas, quando consultantium actione suscepta, et librorum, qui errantibus displicebant, pietate laudata, quid oporteret de eorum auctoritate sentiri, sancto manifestavit eloquio. Unde etiam verisimile non est Cœlestinum istorum posteriorum librorum Augustini non habuisse notitiam; tum quia Prosper ait *pro illis actum esse*, utique a se et Hilario; tum etiam quia Augustinus quadriennio ante accessum Prosperi et Hilarii, ad Cœlestinum libros illos ultimos scripserat. Ergo dubitandum non est quin illos in sua epistola Cœlestinus comprehenderit; præsertim cum ipsum Augustinum, ejusque doctrinam, et fidem simpliciter approbet, et ab omni sinistra suspicione immunem pronuntiet. Quem vero sensum habeat hæc approbatio, statim dicemus.

11. *Altera pars epistolæ a Prospero, consensu Cœlestini, videtur addita* — Altera vero pars illius epistolæ capita quædam, in quibus doctrina de gratia catholica contra Pelagianos tenenda traditur, continet, quæ videntur potius epistolæ adjuncta, quam ab auctore epistolæ conscripta; tum quia, post illam epistolæ clausulam: *Deus vos incolumes custodiat, fratres charissimi*, quasi novum opusculum includuntur hoc modo: *Quia nonnulli, qui catholico nomine gloriantur, etc.*; tum etiam quia, ex modo loquendi, intelligimus scriptorem illius partis non fuisse Cœlestinum, nec aliquem Romanum Pontificem, ut patet ex illis verbis: *Quia nonnulli, etc., ea tantum probare profitentur, quæ sacratissima Petri Sedes per ministerium Præsulum suorum sanxit, necessarium sibi inquirere quid Romanæ Ecclesiæ rectores, de hæresi quæ eorum tempore exorta fuerat, judicaverint*. Hæc enim non videntur verba Romani Antistitis; non enim de Romana Sede, tanquam de propria loquitur, nec Romanos rectores vocat prædecessores suos, prout Pontifices consueverunt, nec tanquam habens ad delinendum auctoritatem loquitur. Quapropter aliqui censent illa capita fuisse a Prospero collecta, et illi epistolæ adjuncta, a qua sententia non longe abest Baron., ann. 431, num. 185, et est certe verisimile, inducenturque in illis verba: *Magistris nostris, tanquam necessariam modum excesserint, obloquantur*. Hæc enim verba in gratiam Augustini dicta sunt, magisque reddent Prosperum quam Cœlestinum. Quamvis credendum videatur Prosperum, non sine scientia et consensu Cœ-

lestini, id fecisse, et ideo etiam pars illa Cœlestini auctoritatem semper obtinuisse videtur: cujus magnum argumentum est, quod Petrus diaconus, gravis auctor, qui non multis annis post Cœlestinum, librum de Incarnatione et Gratia ad Fulgentium scripsit, in cap 8, illam epistolam, usque ad ultimas ejus regulas, nomine Cœlestini allegat.

12. Utrumque vero sit, doctrina in illis capitibus contenta, certa fide tenenda est, sive fuerit a Cœlestino specialiter approbata, et denuo confirmata, sive non. Quia, licet sint collecta a Prospero, non ejus tantum auctoritate, sed Pontificum ac Conciliorum, a quibus desumpta sunt, nituntur, ut facile intuenti patebit. In eis enim solum continentur sequentes assertiones. Prima est, de corruptione humanæ naturæ per originale peccatum. Secunda, neminem posse ab illa miseria, nisi per gratiam Christi liberari. Tertia, liberum arbitrium hominis lapsi, etiam per gratiam renovati, ad vincendas concupiscentias carnis et diaboli insidias non sufficere, nisi per quotidianum adjutorium Dei perseverantiam in bono acceperit. Quarta, neminem nisi per Christi gratiam libero bene uti arbitrio. Quæ sumptæ sunt ex duabus epistolis prius Innocentii. Quinta est, omnia merita Sanctorum ad Deum esse referenda, quia nemo ei placet, nisi ex eo quod ipse donaverit. Sexta, ita Deum in cordibus hominum, et in ipso libero arbitrio operari, ut sancta cogitatio, pium consilium, omnisque bonus voluntatis motus ex Deo sit, quia per illum aliquid possumus, sine quo nihil boni possumus. Et hæc duæ ex epistola Zosimi referuntur. Septima est, gratiam Dei, qua justificamur per Jesum Christum, non ad solam remissionem peccatorum, sed etiam in adjutorium, ut non committantur, valere. Octava est, hanc gratiam non in sola doctrina consistere, quæ ostendit quod agere aut vitare debeamus, sed etiam præstare ut quod faciendum cognovimus, etiam facere diligamus. Nona est, gratiam non solum dari ut facilius, sed simpliciter, ut possimus divina implere mandata. Et hæc tres allegantur ex Concilio Carthag., cap. 3, 4 et 5; additur vero, eas fecisse suas Romanos Pontifices, dum illas approbarunt. Quæ vero deinde adduntur in capite penultimo et ultimo illius partis, non tam novum dogma continent, quam probationem superiorum ex moribus, ac ritibus, seu traditionibus Ecclesiæ. In fine vero adduntur verba sequentia: *Profundiores vero, difficilioresque partes incurrentium questionum, quas latius*

pertractarunt, qui hæreticis restiterunt, sicut non audemus contemnere, ita non necesse habemus adstruere. Quia ad constituendam gratiam Dei, cujus operi ac dignationi nihil penitus subtrahendum est, satis sufficere credimus quicquid secundum prædictas regulas Apostolicæ Sedis nos scripta docuerunt, ut prorsus non opinemur catholicum, quod apparuerit præfixis sententiis contrarium. Quæ verba valde consideranda sunt, tum ut ab illis regulis nullo modo, directe vel indirecte, recedatur; tum etiam ut in hac materia, neque facile aliquid damnetur, quod illis regulis non fuerit contrarium, nec de fide esse prædicetur quod in illis non fuerit contentum, nisi postea inveniatur definitum.

13. *Sixtus III, hostis acerrimus Semipelagianorum extitit, et liber Pelagianismæ consonus falso illi adscribitur.* — Defuncto Cælestino, Sixtus Pontifex in ejus locum susceptus est, de quo, cum esset presbyter, rumor a Pelagianis sparsus est, quod eæ sectæ magnus patronus existeret. Verumtamen rumores illos falsos esse, ita dictis, et factis, seu scriptis ostendit, ut quominus in Sede Petri collocaretur, nihil ei obstiterint. Nam scriptis suis Pelagianos exagitavit, et gratiam Dei defendit, ut Augustinus, receptis ab eo litteris, his verbis ad eundem rescribit epist. 104: *Quid gratius legi vel audiri potest, quam gratiæ Dei tam pura defensio adversus inimicos ejus, ex ore ejus qui eorumdem inimicorum magni momenti patronus ante jactabatur.* Et in epist. 105 ad eundem de ipso refert, primum omnium (utique ex Romano clero) anathema contra Pelagium pronuntiasse, dicens: *Tristes eramus nimis, cum fama jactaret inimicis gratiæ Christi te favere. Sed ut hæc tristitia de cordibus nostris tergeretur, primo te priorem anathema eis in populo frequentissime pronuntiasse eadem fama non tacuit. Deinde, cum litteris Sedis Apostolicæ de illorum damnatione ad Africam missis, tu quoque litteræ consecutæ sunt, quæ, tametsi breves erant, tuum tamen rigorem adversus eorum errorem satis indicabant.* Constat igitur, ante assumptionem ad Pontificatum, Sixtum pro gratia Dei pugnasse, et contrarium errorem damnasse. Unde ita colligit Prosper contra Coll., cap. 44: *Confidimus Domini protectione præstandum, ut quod operatus est in Innocentio, Zosimo, Bonifacio, et Cælestino, operetur et in Sixto, et in custodia gregis Domini hæc sit pars gloriæ huic reservata Pastori, ut sicut illi lupus ategere manifestos (Pelagianos),*

ita d pellit occultos, id est, eorum reliquias. Et adjungit: *Illo auribus suis doctissimi senis (id est Augustini) insonante sermone, quo collaborantem suum hortatus est, dicens: Sunt quidam justissime damnati, etc.* Et ita effectus probavit, nam hic etiam Pontifex, quamdiu vixit, Pelagianos ita repressit, ut Juliano, jactatissimo pelagiani erroris assertori, spem correctionis præferenti, nullum aditum patere permiserit, ut refert Prosper in Chron.: *Et ita (inquit) catholicos omnes dejectione fallacis bestiarum gaudere fecit, quasi tunc primum superbissimam hæresim apostolicus gladius d. truncasset.* Neque a Sixto jam Pontifice plura contra hanc hæresim facta, vel scripta esse invenimus aut legimus. Imo graviter et docte admonet Hieronymus, epist. ad Ctesiphont., cavendam esse imposturam Rufini, qui librum Sixti Pithagorei, in qua multa Pelagio consona inveniuntur, Sixti Pontificis Romani nomine prænotavit, *ut qui philosophi esse nesciunt (inquit) bibant, sub martyris nomine, de calice Babylonis.* Quæ inscriptio decipere potuit Augustinum, ut aliqua verba ejus libri Sixti Pontificis aliquando esse credidisset, non tamen potuit illum in errorem inducere, sed verba ipsa pie interpretatus est lib. de Natura et Grat., cap. 64. Postea vero, forte admonitus scriptis Hieronymi, errorem in persona recognoscit, lib. 2 Retract., cap. 42. Notat etiam Baron., tomo 5, in ultimis fere verbis, tres fuisse libros hæc fraude attributos Pontifici, scilicet, de Divitiis, de Operibus fidei, et de Castitate, quos ipse ibi probat pelagiana hæresi esse infectos, et neque a Gemadio, neque ab aliquo antiquo scriptore, Sixto esse attributos.

14. *Leo pelagianam hæresim ricit.* — Tandem, in Apostolica Sede post Sixtum sedit Leo Magnus, cujus tempore, et diligentia, pelagiana hæresis pene extincta fuit. Nam Leonem contrivisse Pelagianos testatur Prosper in Dimid. temp., cap. 6, ipsumque Prosperum multum in eo negotio illi inservisse affirmat Photius in Bibliotheca, et videtur ipsemet Prosper in citato loco indicare, cum dicit: *In Italia quoque nobis apud Campaniam constitutis, dum venerabilis, et Apostolico honore nominandus, Leo Papa Manichæos subverteret, et contereret Pelagianos, et maxime Julianum, etc.* Cum enim Prosper esset natione Aquitanus, et fuerit etiam Episcopus Rhexiensis, verisimile est, non alia occasione versatum eo tempore in Italia, et specialiter in Campania, ubi Julianus fuerat Episcopus, nisi quia ad hoc ministerium fuit a Leone vocatus, ut Juliano et sectatori-

bus ejus resisteret. Imo diutius Prosperum cum Leone commoratum, illique in fidei negotiis expendendis inservisse, ex Gennadio de viris illustribus sumimus, et ex Trithemio, qui de Prospero ait: *Hic B. Leonis Pape magnus quondam notarius fuit, et multas in ejus persona epistolas dictavit.*

15. *Leonis scripta quibus doctrinam de gratia defendit.* — Quid autem Leo contra Pelagianos fecerit, vel pro gratia Dei scripserit, non invenimus, præter epistolam ejus 74, alias 76, et alias 89, in tomo primo Epistolarum Pontif. ad Nicetam, Aquileien. Episcopum, aliam ad Metropolitanum Venetiæ, ut idem Leo refert in epistola sequenti in eodem tom. 3, et est 83 in tom. 2 Conciliorum, et in aliis operibus 85, et est quædam summa et confirmatio præcedentis. Ibi ergo graviter reprehendit Leo quosdam Episcopos, qui conversos a Pelagiana et Cœlestiana hæresi, sine expressa retractatione et detestatione erroris sui, ad communionem admittebant. Præcipitque ut nulli in posterum recipiantur, nisi prius *damnent apertis professionibus sui erroris auctores, et quidquid in doctrina eorum universalis Ecclesia exhorruit, detestentur, omniaque decreta synodalia, quæ ad decisionem hujus hæreseos Apostolicæ sedis confirmavit auctoritas, amplecti se, apertis, ac propria manu subscriptis protestationibus eloquantur.* Quibus paucis verbis, totam doctrinam de Gratia prædecessorum suorum Leo suam fecit, et itidem præcipua eorum dogmata, et fundamenta sub brevi compendio prosequitur. Insinuatque non ita fuisse extinctum Pelagii errorem, quin multi latenter illi adhererent, saltem quoad illud principium, quod gratia ex meritis nostris datur, et quoad Semipelagianos, contra quos etiam scripsi se creditur quasdam ecclesiasticas definitiones, ut jam explicabimus.

16. *Opinio existimans Concilium Arausicanum secundum a Leone congregatum.* — Multorum enim opinio fuit, opera Leonis congregatum fuisse, ipso vivente, Concilium secundum Arausicanum, ad reliquias Pelagianorum evertenda. Ita habetur in præfat. ad libros de Prædestin. Sanctorum Augustini, ante epistolas Prosperi et Hilarii, in editione Antuerpiana anni 1576, ubi prius refertur sinistra interpretatio Semipelagianorum ad epistolam Cælestini, et quomodo, illa non obstante, libro illo de Prædest. Sanctorum insertantur, et additur: *Quo comperto, Leo Pontifex, qui tertius a Cælestino, Sixto in Pontificatu successerat, in Arausicana circum-*

te Concilium celebrari jussit, quod est ejus nominis secundum, in quo renodata, et iterato confirmata est catholica et apostolica eademque Augustini de gratia et libero arbitrio doctrina, canonibus ipsis ex B. Augustini libris passim decerptis. Idem sentit Auctor epistolæ ad Lectorem, præfixæ operibus Prosperi Duaci, editis anno 1577, ubi notat Prosperum non interfuisse, nec subscripsisse in Synodo Arausicana, licet in Vasensi et Carpentoracensi (inter quas fuit Arausicana) subscripsisse reperiat, causam vero esse conjectat: *Quod capitula, ad Synodum Arausicanam a Leone transmissa, ejusdem Leonis jussu Prosper conceperat, sicut etiam Gennadius scribens de eo ait.* Hæc ibi, et in fine adjungitur operibus Prosperi dicta Synodus, et dicitur: *Circa tempora Leonis Pape, etc.* Et idem habetur in fine septimi tomi divi Augustini, et secundo tomo Conciliorum, in collectione Surii; et omnes significant, fuisse hoc Concilium secundum Arausicanum celebratum paulo post primum, circa annum Domini 444, vel 443, ut vult Onuphrius.

17. *Opinio Baronii haud certa.* — Nihilominus, Baronius ann. 463 constituit illam synodum, non sub Leone, sed sub Hilario, illius successore, anno ejus 3, ea præsertim conjectura motus, quod illi synodo præfuit, et primus subscripsit Cæsarius, Arelatensis Episcopus, eum tamen in priori synodo Arausicana primus subscripserit Hilarius, Arelatensis Episcopus, et postea per aliquot annos vixerit, et habuerit duos successores, Ravennium et Eonium, ante Cæsarium. Sed hæc conjectura est satis incerta, quia, ea non obstante, invenitur idem Cæsarius subscripsisse in Synodo Arelatensi 3, quæ etiam tempore Leonis celebrata est, et non desunt qui Eonium Arelatensem post Cæsarium constituent, cum inveniantur epistola Gelasii Pape ad ipsum scripta. Quod si dicatur in his mendium aliquod irrepsisse, ut Baronius interdum ait, idem profecto dici poterit in altera subscriptione Cæsarii, vel certe hoc satis est ut conjectura sit incerta. Eo vel maxime quod Leo Papa per decem vel undecim annos supervixit Hilario Arelatensi, unde, licet illi duo Episcopi ante Cæsarium successerint, fieri potuit ut Cæsarius fuerit Episcopus Arelatensis, vivente Leone, nam de Ravennio et Eonio non constat quantum vixerint. Atque ita licet daremus, conjecturam probare non fuisse Arausicanum Concilium circa initium Pontificatus Leonis, ut alii volebant, potuit esse circa finem.

18. *Baronius opinionem variat.* — At vero idem Baronius, in Appendice ad Annales Eccles. (habetur in fine tomi 10), non solum communem opinionem, sed etiam priorem suam retractat, docetque Arausicanam synodum secundam celebratam esse sub Felice IV, et anno Pontificatus ejus 4, qui fuit 529 Domini. Unde censet communem opinionem errasse anteposendo Concilium illud 86 annis, ipsum vero errasse 66 annis. Moveturque tum eodem argumento de Cæsario, quem illo postremo tempore, non priori, vixisse ibi sentit; tum etiam quia Liberius ille Galliæ præfectus, cujus fit mentio in illo Concilio, quia illius occasione coactum est, illique subscripsit, vixit et gubernavit Galliam tempore Athalarici regis, qui tempore Felicis IV regnavit. Sed, quia prolixum esset conjecturas omnes quæ hic cogitari possunt, expendere, nolimus de sententia hac definitum iudicium ferre. Solum dicimus, ut illa subsistere possit, oportere in Conciliis illorum temporum multa mutare, quæ cum illa stare non possunt. Oportebit enim dicere, etiam Concilium Arelatense III non esse factum sub Leone Papa, anno Domini 458, prout in tomo 2 Conciliorum significatur. Probat, quia ibi subscripsit etiam Cæsarius, quem Baronius ait pervenisse usque ad annum Domini 554. Unde non potuit præsidere Concilio Arelatensi tempore Leonis, alias necesse est ut in episcopatu vixerit per centum annos, quod incredibile est: vel si id creditur, cur non potuit etiam præsidere Concilio Arausicano tempore Leonis? Idemque argumentum sumitur ex Concilio Carpentoracensi et Vasensi, quæ ante dictum Arelatense celebrata sunt, et in eis etiam Cæsarius præsedisse, et Prosper subscripsisse invenitur. At de Prospero etiam in Arausicano subscripsisse, affirmat Baronius (quod ego non invenio); dicit tamen non fuisse illum Prosperum Aquitanicum, qui tempore Leonis vixit, sed alium. At idem dicam de Cæsario et Liberio. In re igitur adeo incerta, satius videtur nihil in recepta Chronologia immutare, et præsertim quia tempore Felicis quarti nullam legimus de gratia fuisse controversiam, neque illo tempore semipelagianismum revixisse. Nimisque sero remedium fuisset adhibitum, si post tot annos canones illius Concilii editi vel promulgati fuissent. Eo vel maxime quod verisimillimum est a Prospero fuisse elaboratos, et ex Augustini sententiis ac verbis concinnatos, juxta modum scribendi Prosperi in hac materia.

19. *Synodus secunda Arausicana Leonis nixa pontificia auctoritate.* — Quapropter, quidquid de exacta ratione temporis sentiatur, negari profecto non debet principalem auctoritatem canonum illius Concilii, et in ejus auctoritate potissimum fundantur, esse Leonem Papam. Nam Patres illius Concilii, in ejus initio, profitentur se viti auctoritate Sedis Apostolicæ, his verbis: *Unde et nobis, secundum auctoritatem et admonitionem Sedis Apostolicæ, justum et rationale visum est, ut pauca capitula ab Apostolica Sede nobis transmissa, quæ ab antiquis Patribus de cæteris scripturarum voluminibus in hac præcipue causa collata sunt, ad docendos eos qui aliter quam oportet sentiunt, ab omnibus observanda proferre. et manibus nostris subscribere deberemus. Quibus lectis, qui huc usque non sicut oportebat, de gratia et libero arbitrio credit, ad ea quæ fidei catholicæ conveniunt, animum suum inclinare non differat.* Ergo verisimilius est Leonem potius quam Felicem vel Hilarium fuisse illum Apostolicæ Sedis Antistitem, qui Episcopos Galliæ monuit, et ad eos canones dictos misit; tum quia de Leone legimus Pelagianos contrivisse, de Felice vero ant Hilario nihil contra eos egisse legimus, neque mirum, quia tempore etiam Leonis creduntur extincti; tum etiam quia, ex ipsis canonibus, liquet quamdam Augustini doctrinæ summam, et compendium, et sententias eisdem verbis coagmentatas continere. Unde sit per se credibile Prosperum, insignem Augustini discipulum et sectatorem, jussu Romani Pontificis eos elaborasse ac conscripsisse. At Prosper non legitur in hujusmodi ministerio inservisse, nisi Leoni: ergo magna conjectura est Leonem fuisse illius causæ patronum et architectum.

20. *Non obstat, etiamsi Synodus usque ad Hilarium vocata non sit.* — Hoc ergo posito, parum refert quod promulgatio illorum canonum, facta ab Episcopis Gallis in Arausicano conventu, fuerit facta vivente Leone, vel ejus successore Hilario, vel postea sub Felice. Præsertim quia non videntur illi Episcopi ad illam promulgationem auctoritate apostolica vocati; imo neque ad id muneris ex primaria intentione coacti, sed ad alium finem, et per occasionem id etiam egisse, ut ipsi his verbis indicant: *Cum ad dedicationem Basilicæ, quam illustrissimus Præfectus et Patricius, filius noster Liberius, in Arausica civitate fidelissima devotione construxit, Deo propitiante, et ipso invitante contenissemus, et de rebus quæ*

ad ecclesiasticam regulam pertinent, inter nos fuisset oborta collatio, pervenit ad nos esse aliquos qui, de gratia et libero arbitrio minus caute, et non secundum fidei catholicæ regulam, sentire velint. Unde et nobis, etc., ut supra relatam est. Videtur ergo Leo Papa misisse canones illos ad Episcopos Galliæ, non autem eis præcepisse ut ad illorum promulgationem vel subscriptionem convenirent, sed ut unusquisque in sua diœcesi eos servaret, et ut Semipelagianos iterum pullulare non permitterent. Ideoque fieri potuit ut, alia necessitate non cogente, de concilio ad illum finem congregando non tractaverint; occasione autem illius conventus oblata, ibique nova notitia repullulantis erroris comparata, ad illum iterum extirpandum, illo convenientissimo remedio usi fuerint, nam fortasse canones illi et eorum auctoritas ad omnium notitiam non pervenerant. Et ita, licet forte dilatio illa fuerit usque ad tempora Hilarii, aut forte major, non refert.

21. *Hilarius, Simplicius et Felix Pontifex post Leonem, in suis epistolis de gratia, ut superiores Pontifices sentiunt.*—Post Leonis tempora, per aliquot annos cessasse videntur in Ecclesia publici rumores pelagianæ hæresis, quamvis illius reliquæ per plures annos non omnino sopitæ et extinctæ fuisse videantur. Nam tempore Leonis, sine dubio jam vivebat Faustus in monasterio Lyrinensi, quia paulo post Leonem mortuus est Prosper, cui in Episcopatu successit Maximus, Abbas Lyrinensis monasterii, in cuius locum Faustus Abbas ejusdem monasterii factus est, et intra breves annos, mortuo Maximo, Faustus ad eundem Episcopatum Rhégiensem assumptus est, et in eo usque ad Felicem Papam et ultra vixit. Fuit autem Faustus, ut vidimus, semipelagianismi fautor et doctor, habuitque in Gallia plures eorum consentientes, vel discipulos. Et nihilominus ab Hilario vel Simplicio, Leonis successoribus, nihil contra illum factum aut scriptum legimus. Et causa forte fuit, quia ita simulate ac latenter eum introducebat errorem, ut neque publice profiteretur doctrinam Augustini reprehendere, neque a multis deprehenderetur; unde fieri potuit ut ad aures doctorum Pontificum non pervenerit. De Felice autem Pontifice, qui Simplicio successit, refert Baronius rejectis ac reprobatis scripta Fausti de gratia et libero arbitrio, et veram de gratia doctrinam confirmasse. Quia Cæsarius Arelatensis eodem tempore librum de Gratia scripsit, eumque ad Felicem Pontificem

misit, qui sua epistola illum probavit, teste Gennadio de Viris illustribus, c. 86. Conjectat autem Baronius librum illum Cæsarii fuisse contra Faustum scriptum, et inde concludit confirmationem libri Cæsarii fuisse reprobationem librorum Fausti, et totius semipelagianismi. Sed hæc minus certa sunt, quia nec librum Cæsarii habemus, nec epistolam Felicis, nec dictum Gennadii est satis firmum, ut infra cap. 21 iterum dicam. Et ideo de Hilario, Simplicio et Felice, post Leonem Pontificibus, nihil aliud certo affirmare possumus, nisi catholicam de gratia doctrinam, quam semper Ecclesia Romana docuit, professos fuisse, et juxta illam, sicut antiquiores Pontifices, in suis epistolis semper locutos fuisse.

22. *Gelasii gesta et scripta in gratiæ tutelam.*—Gelasius autem, variis modis, et Pelagianum, ac reliquias ejus iterato damnavit, et sanam doctrinam de gratia erudite docuit. Nam imprimis, in Decreto de libris authenticis, seu in cap. *Sancta Romana*, libros Ruffini, quia nimium favebat libero arbitrio, et libros Cassiani et Fausti, quia gratiam deprimebant, inter apocryphos numerat. Et libros Hieronymi, Augustini et Prosperi approbat et honorifice commendat. Deinde, cum suo tempore non tantum semipelagianismus occulte serperet, sed etiam integer pelagianismus in provinciis Dalmatiæ et Piceni, a quodam imperitissimo homine Seneca vocato, denuo renovari et introduci cœpisset, hæc occasione oblata, Gelasius vigilantissime obstitit ne malum cresceret, et contra ipsum errorem eruditissimas epistolas scripsit. Nam in epist. 3 ad Honorium, admonet illum sibi esse nuntiatum, *in regionibus Dalmatiarum quosdam recidiva Pelagianæ pestis zizania seminasse, etc.* Et de ipso errore statim subdit: *Estque error ipse nefarius, tanto perniciosior ad subrependum, quanto ad sullendum verisimilitudinis colore versutior;* et infra subjungit: *Ab Apostolica dudum Sede, per B. memoriæ Innocentium, ac deinde Zosimum, Bonifacium, Celestinum, Sixtum et Leonem, continuis et incessabilibus sententiis fuisse prostratum.* In epistola vero quinta ad Episcopos, per Picenum, refert, Senecam quemdam, rudem et impium hominem, in illa provincia eandem hæreim iterum induxisse, præsertim tres ejus errores, videlicet, infantes non concepiti originali peccato, eodemque sine baptismo decedentes non damnari, sed vitam æternam consequi, et hominem per liberum arbitrium, bono suffragante nature, beatum ellici. Quos

errores ipse postea confutat, et illa duo præcipua hujus doctrine fundamenta, quod gratia non detur ex meritis, et quod præcedat libertatis bonum usum, sitque principium salutis ex illa, non ex nobis, late confirmat. Post illas etiam epistolas adjungitur, in eodem tomo epistolarum, tractatus quidam Gelasii, in cujus prima parte multa de gratia Christi erudite tradit, specialiter vero tractat quæstionem illam, an in hac vita contingat aliquem vivere sine peccato, aut sine peccati fomite, cujus sententiam suo loco referemus.

23. *Summus Pontifex Hormisda palam et libros Augustini ad Hilarium et Prosperum et gratiam defendit.* — Post Gelasium, doctrinam catholicam de gratia confirmavit Hormisda papa (nam de Anastasio II, de Symmacho, qui inter eos fuerunt, nihil invenimus). Hormisda vero, in epist. 67 ad Possessorem, occasione interrogationis ejus de libris Fausti, breviter definitiones priorum Pontificum amplectitur et confirmat: tum in eo quod Fausti libros inter apocryphos rejecit, *quia eos in auctoritate Patrum examen catholice fidei non recepit*; quod propter decretum Gelasii de libris Ecclesiasticis dixisse videtur: tum etiam in eo quod *fixu* dicit esse a Patribus, *quæ fideles sequi debeant, instituta, a quibus qui exorbitat, errat.* Quæ regula, cum in tota materia fidei certissima sit, in hac specialiter ab Hormisda commemorari videtur, propter illa quæ de gratia Pontifices definierunt; unde subjungit: *De arbitrio libero et gratia Dei, quod Romana, hoc est, catholica sequitur, et asserret Ecclesia, licet in variis libris B. Augustini, et maxime ad Hilarium et Prosperum, possit cognosci, tamen in scriniis ecclesiasticis expressa capitula continentur, quæ si ibi desunt, et necessaria creditis, destinabimus, quanquam qui Apostoli verba diligenter considerat, quid sequi debeat, evidenter cognoscit.* In quibus verbis illa notanda sunt, *et maxime ad Hilarium et Prosperum.* Agebat enim ibi Hormisda de doctrina necessaria ad cavendum semipelagianum errorem, qui in libris Fausti defenditur, quæ doctrina in illis libris Augustini maxime continetur; et ideo Hormisda de illis maxime locutus est. Simulque videtur illis verbis occurrere Semipelagianis. Illi enim libros Augustini de Prædestinatione et de Perseverantia volebant includi sub generali laudatione librorum Augustini a Cælestino scripta, quia illos non expresserat, ut supra retuli; Hormisda vero, ut tergiversationem eorum damnaret, dixit catholicam doc-

trinam de Gratia in illis libris Augustini maxime contineri; illos enim, et non alios, ad Hilarium et Prosperum Augustinus scripsit.

24. *Canones Leonis ab Hormisda referuntur, qui sunt secundi Concilii Arausicani.* — Deinde, adverto capitula illa in scriniis ecclesiasticis contenta, de quibus Hormisda loquitur, non videri esse alia nisi canones a Leone ad Episcopos Galliæ, qui in Concilio II Arausicano postea convenerunt, missos. Nam per se credibile est illos in scriniis ecclesiasticis conservatos esse, ac subinde de illis loqui Hormisdam, quia nullibi reperimus alia capitula de hac materia specialiter a Sede Apostolica edita, et ad alias Ecclesias missa. Nam, licet plures epistolæ decretales eandem doctrinam continentes a Pontificibus scriptas sciamus, et non paucas illarum habeamus, non tamen scimus, nec habemus alia capita quæ a Sede Apostolica emanaverint, et doctrinam de Gratia, præsertim contra Semipelagianos, contineant, præter canones illius Concilii Arausicani; et ideo, sine dubio, est vehemens conjectura de illis esse locutum. Nec de auctoritate hujus epistolæ dubitare jam licet, cum, ex veteri codice Vaticano, cum aliis editam habeamus, præter alia quæ in illius defensionem congerit Baronius, anno 250, n. 22 et sequentibus.

25. *Tranquillitas divinæ gratiæ.* — Ex his ergo omnibus, satis constat quam constanter Romani Pontifices hæreticis male de gratia Dei sentientibus restiterunt, quamque manifeste et luculenter gratiam Dei prædicarunt. Post dictorum autem Pontificum tempora, usque ad Lutherum, non invenimus aliquid denuo ab Episcopis Romanis de gratia traditum, quia necessarium non fuit, cum Ecclesia in magna concordia, quantum ad catholicam de gratia doctrinam, generatim loquendo, fere toto illo tempore vixerit. Quod si interdum contrarius error reviviscere cepit, statim per eandem Romanam Ecclesiam sopitus est, sicut in Oriente contigit tempore Gregorii. Nam, cum Joannes, Patriarcha Constantinopolitanus, pelagianam doctrinam inducere tentaret, statim Gregorius ejus errorem detexit, et expugnavit libro sexto, epistola tertia, et aliis, quæ capite vigesimo indicabimus. In Occidente vero, cum in Scotia eadem hæresis reviviscere inciperet, Severini et Joannis Pontificum tempore, statim recognita auctoritate Ecclesiæ Romanæ dissipata est, ut auctor est Beda, libr. 2 Histor. Anglic., c. 19, ubi, ex epistola Joannis IV ad Episcopos Sco-

tiæ, hæc refert notanda verba: *Cognorimus quod virus Pelagianæ hæreseos apud vos denuo reviviscit, quod omnino hortamur ut a vestris mentibus hujusmodi tenentum superstitionis facinus auferatur. Nam qualiter ipsa quoque execranda hæresis damnata est, latere vos non debet, quia non solum per istos ducentos annos abolita est, sed et quotidie a nobis perpetuo anathemate sepulta damnatur, et hortamur ne quorum arma sepulta sunt, eorum apud vos cineres suscitentur.* Postea vero duo præcipua dogmata contra Pelagium confirmat, nimirum, dari peccatum originale, et necessariam esse gratiam ad vitanda peccata. Et ita finita omnino fuit antiqua contentio cum Pelagianis, et ideo sequentes Pontifices usque ad nostra fere tempora nihil de gratia scripserunt, nisi fortasse obiter, et per occasionem. Sic enim Leo IX, in epistol. ad Petrum Antiochenum suam fidem profitendo, inter alia dicit: *Deum prædestinasse solummodo bona, præscribere autem bona, malaque. Gratiam Dei prætereire, et subsequi hominem, credo et profiteor, ita tamen ut liberum arbitrium rationali creature non denegem.*

26. *Iterum rediit doctrina de gratia.* — Post exortos vero Lutheranos et Calvinistas, necessarium fuit supremo Ecclesiæ Pastori eis resistere, veramque de gratia doctrinam iterum tradere et amplius explicare. Quod imprimis fecit Leo X articulos Lutheri damnando, et postea Paulus III et Pius IV, Concilium Tridentinum cogendo et confirmando. Est autem advertendum priores Pontifices, quando occasione Pelagiani erroris de Gratia scripserunt, præcipue, et quasi ex instituto gratiæ necessitatem, et gratuitam ejus donationem tradidisse ac definitivisse. Contra excessum vero eorum qui gratiam ita exaggerabant, ut liberum arbitrium tollerent, ex professo non definiunt, quia nec ea res tunc agebatur, nec necessaria erat, quoniam libertas arbitrii contra Manichæos satis erat a veteribus pugnata, et contra Priscillianistas a Leone Papa, epistol. 91, alias 93, et in tomo Pontif. Epistol., epistola quarta, capite undecimo, qui necessitatem operum, non ex gratia, sed ex meritis ponebant. Pelagiani vero potius pro libertate pugnabant. Quia vero negabant posse gratiam cum libero arbitrio conciliari, et ex libertatis assertionem gratiæ negationem inferre, Leo noster Pontifex legati, præsertim Innocentius, Zosimus et Celestinus, docuerunt gratiam cum libertate posse, et debere conjungi. Nunc vero, quia non negatione

gratiæ, sed potius illius exaggeratione negatur liberum arbitrium, ideo a posterioribus Pontificibus, et præsertim a Concilio Tridentino ex instituto damnata est illa nimia et erronea gratiæ exaggeratio, et declarata ac definita concordia inter gratiam et liberum arbitrium, ut capite vigesimo dicam. Non defuerunt tamen in his temporibus qui (sine pertinacia hæretica) doctrinam ad utrumque errorem claudicantem introducere tentaverint, quibus novissime Apostolica Sedes per Pium V et Gregorium XIII se opposuit, quorum censuram hoc loco inserere, quia in sequentibus sæpius est usui futura, necessarium duximus, ut facilius, ab omnibus hujus nostri laboris studiosis, sciri et legi valeat ac intelligi.

CAPUT II.

DE CENSURA PII V ET GREGORII XIII ALIQUARUM ASSERTIONUM, PARTIM NATURÆ, PARTIM GRATIE NIMIUM TRIBUENTIUM, AUT DETRAHENTIUM.

1. Fuit nostris temporibus, in Lovaniensi academia, doctor quidam catholicus et eruditus, cujus nomen, cum Pontifices silentio præterierint, libenter tacerem, nisi jam ex aliorum libris et scriptis esset notissimum, scilicet, Michael Baius. Ille igitur, in aliquibus libris quos de charitate et rebus aliis scripsit, varios articulos, seu assertiones posuit, in quibus nunc ad pelagianismum, nunc ad lutheranismum, et calvinismum inclinavit. Cumque esset expectatæ probitatis et doctrinæ, ut in Bulla significatur, facile potuit auctoritate sua plures in suam sententiam ducere, et academiam illam catholicam et insignem corrumpere, aut perturbare. Cui malo ut occurrerent, dicti Pontifices hanc Bullam ediderunt, in qua et assertiones Baii referunt, et illas adhibita generali censura reprobant, et sub gravissimis pœnis prohibent, cui censure auctor, ut catholicus, paruit, et turbatio tota sublata est. Tenor autem Bullæ est qui sequitur:

BULLA PII V ET GREGORII XIII, IN QUA NONNELLÆ PROPOSITIONES, DE VIRIBUS NATURÆ ET GRATIÆ, DAMNANTUR.

2. *Gregorius Episcopus, servus servorum Dei, ad futuram rei memoriam. Provisionis Nostræ debet provenire subsidio, ut ea quæ a prædecessoribus Nostris emanarunt, suadente maxime fidei catholica consecratione, ubicumque opus est, producantur: quare Nos tenorem*

litterarum felicitatis recordationis Pii Papæ V, prædecessoris nostri, in ejus registro reperitum, describi, et præsentibus annotari fecimus, qui talis est: Pius Episcopus servus servorum Dei, ad futuram rei memoriam. Ex omnibus afflictionibus quas in hoc loco a Domino constituti, tam luctuoso tempore sustinemus, ille animum nostrum excruciat dolor, quod religio Christiana tantis jam pridem turbinationibus agitata novis quotidie propositis opinionibus conflictetur, Christique populus antiqui hostis suggestionibus dissectus in alios atque alios errores passim et promiscue deferatur. Quantum vero ad Nos attinet, totis viribus conamur, ut illi simul atque prosiliunt, penitus opprimantur. Magno etenim mœrore afficimur, quod plerique, spectata aliis probitatis et doctrinæ, in varias sententias offensionis et periculi plenas, tum verbo, tum scriptis prorumpunt, deque eis etiam in scholis invicem controversantur, cujusmodi sunt sequentes:

Prima. *Nec primi hominis adhuc integri merita recte vocantur gratia.*

2. *Sicut opus malum, ex natura sua, est mortis æternæ meritorium; sic bonum opus, ex natura sua, est vitæ æternæ meritorium.*

3. *Et bonis Angelis, et primo homini, si in statu illo permansissent usque ad ultimum vitæ, felicitas esset merces, et non gratia.*

4. *Vita æterna homini integro et Angelo promissa fuit intuitu bonorum operum; et bona opera ex lege naturæ ad consequendam illam per se sufficiunt.*

5. *In promissione facta Angelo et primo homini, continetur naturalis justitiæ constitutio, qua pro bonis operibus sine alio respectu vitæ æternæ justis promittitur.*

6. *Naturali lege constitutum fuit homini ut, si in obedientia perseveraret, ad eam vitam pertransiret, in qua mori non posset.*

7. *Primi hominis integri merita fuerunt primæ creationis munera, sed, juxta modum loquendi sacræ Scripturæ, non recte vocantur gratia, quo fit ut tantum merita, non et gratia debeant nuncupari.*

8. *In redemptis per gratiam Christi nullum inveniri potest meritum bonum, quod non sit gratis indigno collatum.*

9. *Dona concessa homini integro et Angelo, forsitan non improbanda ratione possunt dici gratia, sed quia secundum usum Scripturæ nomine gratiæ tantum ea munera intelliguntur, quæ per Jesum male merentibus et indignis conferuntur, ideo neque merces quæ illis redditur, gratia dici debet.*

10. *Solutionem pænæ temporalis, quæ, peccato dimisso, sæpe manet, et corporis resurrectionem proprie, non nisi meritis Christi adscribendam esse.*

11. *Quod pie et juste in hac vita mortali usque ad finem conversati vitam consequimur æternam, id non proprie gratiæ DEI, sed ordinationi naturali statim initio creationis constitutæ justo DEI judicio deputandum est.*

12. *Nec in hac retributione bonorum ad Christi meritum respicitur, sed tantum ad primam justificationem generis humani, in qua lege naturali institutum est, ut justo Dei judicio obedientiæ mandatorum vita æterna reddatur.*

13. *Pelagii sententia est: Opus bonum citra gratiam adoptionis factum, non est regni cælestis meritorium.*

14. *Opera bona a filiis adoptionis facta non accipiunt rationem meriti, ex eo quod sunt per spiritum adoptionis inhabitantem corda filiorum Dei, sed ex eo quod sunt conformia legi, quodque per ea præstatur obedientia legi.*

15. *Opera bona justorum non accipient, in die judicij, ampliorem mercedem quam justo Dei judicio merentur (aliis, mererentur) accipere.*

16. *Dicit rationem meriti non consistere in eo quod qui bene operatur, habeat gratiam, et inhabitantem Spiritum sanctum, sed in eo solum quod obedit divinæ legi: quam sententiam sæpius repetit, et multis rationibus probat fere toto libro.*

17. *In eodem libro sæpius repetit quod non est vere legis obedientia, quæ fit sine charitate.*

18. *Dicit sentire cum Pelagio, qui dicunt esse necessarium, ad rationem meriti, ut homo per gratiam adoptionis sublimetur ad statum Deificum.*

19. *Dicit opera catechumenorum, ut fidem, et pœnitentiam ante remissionem peccatorum factam, esse vitæ æternæ merita, quam vitam non consequentur catechumeni, nisi prius præcedentium delictorum impedimenta tollantur.*

20. *Videtur insinuare quod opera justitiæ et temperantiæ, quæ Christus fecit, ex dignitate personæ operantis non traxerint majorem valorem.*

21. *Nullum est peccatum ex natura sua veniale, sed omne peccatum meretur pœnam æternam.*

22. *Humanæ naturæ sublimatio et exaltatio in consortium divinæ naturæ debita fuit integritati primæ conditionis, et proinde naturalis dicenda est, et non supernaturalis.*

23. *Cum Pelagio sentiunt, qui textum Apostoli ad Romanos 1: Gentes quæ legem non habent, naturaliter quæ legis sunt, faciunt: intelligunt de gentibus fidei gratiam non habentibus.*

24. *Absurda est sententia eorum qui dicunt hominem, ab initio, dono quodam supernaturali et gratuito, super conditionem naturæ fuisse exaltatum, ut fide, spe et charitate Deum supernaturaliter coleret.*

25. *A vanis et otiosis hominibus, secundum insipientiam philosophorum, excogitata est sententia: hominem ab initio sic constitutum, ut per dona naturæ superaddita fuerit largitate conditoris sublimatus, et in Dei filium adoptatus.*

26. *Et ad pelagianismum rejicienda est illa sententia. Omnia opera infidelium sunt peccata, et philosophorum virtutes sunt vitia.*

27. *Integritas primæ creationis non fuit indebita humanæ naturæ exaltatio, sed naturalis ejus conditio: quam sententiam repetit, et probat per plura capitula.*

28. *Liberum arbitrium, sine gratia et Dei adjutorio, non, nisi ad peccandum, valet.*

29. *Pelagianus est error dicere quod liberum arbitrium valet ad ullum peccatum vitandum.*

30. *Non solum fures hi sunt et latrones, qui Christum viam et ostium veritatis et vitæ negant, sed etiam quicumque aliunde quam per Christum in viam justitiæ, hoc est, ad aliquam justitiam, conscendi posse dicunt, aut tentationi ulli sine gratiæ ipsius adjutorio resistere posse hominem, sic ut in eam non inducatur, aut ab ea superetur.*

31. *Charitas perfecta, et sincera, quæ est ex corde puro, et conscientia bona, et fide non ficta, tam in catechumenis, quam in pœnitentibus potest esse sine remissione peccatorum.*

32. *Charitas illa, quæ est plenitudo legis, non est semper conjuncta cum remissione peccatorum.*

33. *Catechumenus juste, recte et sancte vivit, et mandata Dei oberrat, et legem implet per charitatem, ante obtentam remissionem peccatorum, quæ in baptismi lavacro demum percipitur.*

34. *Distinctio illa duplicis amoris, naturalis,*

¹ In exemplari quod refert Lorca, dicitur, aut tentationi universaliter; sed antiquum exemplar, quod Romæ habui ante triginta annos, habet, aut tentationi ulli, et ita etiam habetur in exemplari adjuncto ad librum P. Vasquez in epistola Pauli. (Not. Suarez.)

quo Deus amatur ut auctor naturæ, et gratuiti, quo Deus amatur ut beatificator, vana est et commentitia, et ad illudendum sacris Litteris, et pluribus veterum testimoniis excogitata.

35. *Omne quod agit peccator vel servus peccati, peccatum est.*

36. *Amor naturalis, qui ex viribus naturæ exoritur, ex sola philosophia, per elationem præsumptionis humanæ cum injuria Crucis Christi defenditur a nonnullis doctoribus.*

37. *Cum Pelagio sapit, qui boni aliquid naturalis, hoc est, quod ex naturæ solis viribus ortum ducit, agnoscit.*

38. *Omnis amor creaturæ rationalis, aut vitiosa est cupiditas qua mundus diligitur, quæ a Joanne prohibetur; aut laudabilis illa charitas, qua per Spiritum Sanctum in corde diffusa, Deus amatur.*

39. *Quod voluntarie fit, etsi in necessitate fiat, libere tamen fit.*

40. *In omnibus suis actibus peccator servit dominanti cupiditati.*

41. *Is libertatis modus, qui est a necessitate sub libertatis nomine, non reperitur in Scripturis, sed solum libertatis a peccato.*

42. *Justitia qua justificatur per fidem impius, consistit formaliter in obedientia mandatorum, quæ est operum justitia, non autem in gratia aliqua animæ infusa, qua adoptatur homo in filium Dei, et secundum interiorem hominem renovatur, ac divinæ naturæ consors efficitur, ut sic per Spiritum Sanctum renovatus, deinceps bene vivere, et Dei mandatis obedire possit.*

43. *In hominibus pœnitentibus ante sacramentum absolutionis, et in catechumenis ante baptismum, est vera justificatio, separata tamen a remissione peccatorum.*

44. *Operibus plerisque que a fidelibus fiunt, ut mandatis Dei pareant, cujusmodi sunt, obedire parentibus, depositum reddere, ab homicidio, a furto, a fornicatione abstinere, justificantur quidem homines, quia sunt legis obedientia, et vere legis justitiam, non tamen iis obtinentur incrementa virtutum.*

45. *Sacrificium Missæ non alia ratione est sacrificium, quam generali illa, qua omne opus, quod fit, ut sancta societate Deo homo inhercat.*

46. *Ad rationem et definitionem peccati non pertinet voluntarium, nec definitionis questio est, sed causæ et originis, utrum omne peccatum debeat esse voluntarium.*

47. *Unde peccatum originis vere habet ratio-*

nem peccati sine ulla relatione et respectu ad voluntatem a qua originem habuit.

48. *Peccatum originis est habituali parruli voluntati voluntarium, et habitualiter dominatur parrulo, eique non gerit contrarium voluntatis arbitrium.*

49. *Et ex habituali voluntate dominante fit ut parvulus, recedens sine regenerationis sacramento, quando usum rationis consecutus erit, actualiter Deum odio habeat, Deum blasphemet, et legi Dei repugnet.*

50. *Prava desideria quibus vere non consentit, et quæ homo invitus patitur, sunt prohibita præcepto: Non concupisces.*

51. *Concupiscentia, sive lex membrorum, et prava ejus desideria, quæ inviti sentiunt homines, sunt vera legis inobedientia.*

52. *Omne scelus ejus est conditionis, ut suum auctorem, et omnes posteros eo modo inficere possit, quo infecit prima transgressio.*

53. *Quantum est ex vi transgressionis, non tantum meritorum malorum a generante contrahunt, qui cum minoribus nascuntur vitiiis, quam qui cum majoribus.*

54. *Definitiva hæc sententia, Deum homini nihil impossibile præcepisse, falso tribuitur Augustino, cum Pelagii sit.*

55. *Deus non potuisset talem ab initio creare hominem, qualis nunc nascitur.*

56. *In peccato duo sunt: actus et reatus; transeunte autem actu, nihil manet, nisi reatus, sive obligatio ad penam.*

57. *Inde in sacramento baptismi, aut sacerdotis absolutione, proprie reatus peccati duntaxat tollitur, et ministerium sacerdotis solum liberat a reatu.*

58. *Peccator penitus non vivificatur ministerio sacerdotis absolventis, sed a solo Deo, qui, penitentiam suggerens et inspirans, vivificat eum et resuscitat, ministerio autem sacerdotis solum reatus tollitur.*

59. *Quando per eleemosynam, aliaque pietatis opera Deo satisfacimus pro pœnis temporalibus, non dignum pretium Deo pro peccatis nostris offerimus, sicut quidam errantes autumant, nam alioqui essemus, aliqua saltem ex parte, redemptores, sed aliquid facimus, cujus intuitu Christi satisfactio nobis applicatur et communicatur.*

60. *Per passiones sanctorum indulgentiis communicatas, non proprie redimuntur delicta, sed per communionem charitatis, nobis eorum passiones impertiuntur, ut digni simus qui pretio sanguinis Christi a pœnis pro peccatis debitis liberemur.*

61. *Celebris illa doctorum distinctio, divinæ legis mandata bisariam impleri, altero modo quantum ad præceptorum substantiam tantum, altero quantum ad certum quemdam modum, videlicet, secundum quem valent operantem perducere ad regnum æternum, hoc est, ad modum meritorium, commentitia est et explodenda.*

62. *Illa quoque distinctio, qua opus dicitur bisariam bonum, vel quia ex objecto et omnibus circumstantiis rectum est et bonum, quod moraliter bonum appellari consuevit, vel quia est meritorium regni æterni, eo quod fit a viro Christi membro per spiritum charitatis, rejicienda putatur.*

63. *Similiter illa quoque distinctio duplicis justitiæ, alterius, quæ fit per spiritum charitatis inhabitantem, alterius, quæ fit ex inspiratione quidem Spiritus Sancti cor ad penitentiam excitantis, sed nondum cor inhabitantis et in eo charitatem diffundentis, qua divinæ legis justificatio impletur, odiosissima et pertinacissima rejicitur.*

64. *Denique et illa distinctio duplicis vivificationis, alterius, qua vivificatur peccator, dum ei penitentia et vitæ novæ propositum per Dei gratiam inspiratur, alterius, qua vivificatur vere, et palmes vitæ in Christo efficitur, commentitia judicatur, et Scripturis minime congruens.*

65. *Non nisi pelagiano errore admitti potest usus aliquis liberi arbitrii bonus, sive non malus, et gratiæ Christi injuriam facit, qui ita sentit et docet.*

66. *Sola violentia repugnat libertati hominis naturali.*

67. *Homo peccat etiam damnabiliter, in eo quod necessario facit.*

68. *Infidelitas pure negativa, in his quibus Christus non est prædicatus, peccatum est.*

69. *Justificatio impii fit formaliter per obedientiam legis, non autem per occultam communicationem, aut inspirationem gratiæ, quæ per eam justificatos faciat implere legem.*

70. *Homo existens in peccato mortali sive in reatu æternæ damnationis, potest habere veram charitatem, et charitas etiam perfecta potest consistere cum reatu æternæ damnationis.*

71. *Per contritionem, etiam cum charitate perfecta, et cum voto suscipiendi sacramentum conjuncta, non remittitur crimen extra casum necessitatis aut martyrii, sine actuali susceptione sacramentorum.*

72. *Omnes omnino afflictiones justorum sunt ultiones peccatorum ipsorum, unde Job et Mar-*

tyres, quæ passi sunt, propter sua peccata passi sunt.

73. *Nemo, præter Christum, est absque peccato originali; hinc Beata Virgo mortua est propter peccatum ex Adamo contractum, omnesque ejus afflictiones in hac vita, sicut et aliorum iustorum, fuerunt ultiones peccati actualis, vel originalis.*

74. *Concupiscentia in renatis relapsis in peccatum mortale, in quibus jam dominatur, peccatum est, sicut et alii habitus pravi.*

75. *Motus pravi concupiscentiæ sunt, pro statu hominis vitiiati, prohibiti præcepto: Non concupisces; unde homo dissentiens, et non consentiens, transgreditur præceptum: Non concupisces, quamvis transgressio in peccatum non deputetur.*

76. *Quamdiu aliquid concupiscentiæ carnalis in diligente est, non facit præceptum: Diliges Dominum Deum tuum ex toto corde tuo.*

77. *Satisfactiones laboriosæ justificatorum non valent expiare de condigno pœnam temporalem restantem post culpam condonatum.*

78. *Immortalitas primi hominis non erat gratiæ beneficium, sed naturalis conditio.*

79. *Falsa est doctorum sententia, primum hominem potuisse a Deo creari et institui sine iustitia naturali.*

3. *Quas quidem sententias, stricto coram nobis examine ponderatas, quanquam nonnullæ aliquo pacto sustineri possent in rigore, et proprio verborum sensu ab assertore intento, hæreticas, erroneas, suspectas, temerarias, scandalosas et in pias aures offensionem immittentes, respectite, et quæcumque super his verbo scriptoque emissa, præsentium auctoritate damnatas, circumscribimus, et abolemus, deque eisdem, et similibus posthac quoquo pacto loquendi, scribendi, et disputandi facultatem interdicens. Qui secus fecerint, ipsos omnibus dignitatibus, gradibus, honoribus, beneficiis et officiis perpetuo privamus: atque etiam inhabiles ad quæcumque decernimus, vinculoque anathematis eis impermandamus, a quo nullus Romano Pontifice inferior valeat ipsos, excepto mortis articulo, liberare. Ceterum, ut jam commoti his de rebus tumultus et contractu odia facilius comprimi possint, simulque aimarum saluti plenius consulatur, dilecto filio nostro Antonio, tituli S. Bartholomæi in Insula Presbytero-Cælesti, Granvellano nuncupato, per apostolica scripta mandamus, ut ipse, quid ad perpetuam dictorum sententiarum et scripturarum validitatem, quid ad arcenda hujusmodi prolo-*

quia et disputationes; quid denique ad unionem et pacem cum communi omnium et Ecclesie catholice satisfactione componendam facto opus sit, imprimis diligenter expendat. Deinde, in his omnibus quæ pro communi salute, tranquillitate et honore optima judicaverit, salta semper ecclesiastica potestate, et perpetua unitate, etiam per alium, seu alios, fide, doctrina et religione præstantes ocius exequatur, faciatque quidquid decreverit, iniolate ab omnibus observari, contradicentes quoslibet per censuras et pœnas prædictas, ceteraque juris et facti remedia opportuna, appellatione postposita, compescendo, invocato etiam ad hoc, si opus fuerit, auxilio brachii secularis, non obstantibus, quod forsitan aliquibus ab Apostolica sit Sede indultum, quod interdicti, suspendi, vel excommunicari non possint per litteras Apostolicas, non facientes plenam, et expressam de verbo ad verbum dicti indulti prius mentionem, et quibuslibet aliis privilegiis, exemptionibus, indulgentiis, ac litteris Apostolicis, specialibus, vel generalibus, quoruncumque tenorum existant, per quæ præsentibus non expressa, vel totaliter non inserta, effectus præsentium impediri valeat quomodolibet, vel differri, et de quibus quorumque totis tenoribus de verbo ad verbum habenda sit in nostris litteris mentio specialis. Nulli ergo omnino hominum liceat hanc paginam nostræ damnationis, circumscriptionis, abolitionis, interdicti, decreti, mandati, privationis, et innodationis infringere, vel ei ausu temerario contraire: si quis autem hoc attentare præsumpserit, indignationem omnipotentis Dei, et B. Petri et Pauli, Apostolorum ejus, se noverit incursum. Dat. Romæ apud S. Petrum anno Incarnationis Dominicæ MDLXVII, VII Kalendas octobris, Pontificatus nostri anno II. Cæterum, volumus ut earundem litterarum tenori hic conserto illa ipsa omnino fides adhibeatur, ubicumque et quomodocumque, sive in judicio, sive alibi ille fuerit exhibitus, vel ostensus, sicuti illius originalibus litteris prædictis adhiberetur, si ipsæ exhiberentur, vel ostenderentur. Nulli ergo hominum omnino liceat hanc paginam nostræ voluntatis infringere, vel ei ausu temerario contraire. si quis autem hoc attentare præsumpserit, indignationem omnipotentis Dei, ac B. Petri et Pauli, Apostolorum ejus, se noverit incursum. Dat. Romæ apud S. Petrum, anno Incarnationis Dominicæ MDLXXIX, IV Kalendas februarii, Pontificatus nostri anno VIII.

4. *Notabile circa assertiones relatas. — Circa materiam hujus decreti, advertendum*

est, ex his assertionibus quæ in eo notantur, plures non spectare ad præsentem materiam, nam multa in eis attinguntur de peccatis, alia de sacramentis, de sacrificio Missæ, de charitate, de pœnitentia, satisfactione, et remissione peccatorum, de legibus, seu præceptis, quæ in suis materiis ex professo tractanda sunt. Aliæ item, quæ ad præsentem spectant, multiplices sunt, multæ enim attingunt materiam de merito, aliæ materiam de justificatione, aliæ denique ad vires liberi arbitrii et gratiæ, vel naturæ in diversis ejus statibus: et hæc sine dubio sunt aliarum radix et origo; hujusce materiæ vera fundamenta convellunt; propter quod necessarium fuit in superioribus aliquas ex eis attingere, et in sequenti libro et in reliquis omnes fere in disputationem venient. Quamobrem in hujusmodi propositionibus, notare oportet quasdam esse quæ contra gratiam nimium favent naturæ innocenti, et nondum per peccatum maculatæ; aliæ sunt quæ nimium exaggerant corruptionem in humana natura per ejusdem naturæ peccatum factam, et inde libertatem arbitrii in statu naturæ lapsæ nimium deprimunt, et gratiæ necessitatem ultra veritatem exaggerant.

5. *Quid de propositionibus, quæ contra gratiam nimium facebat naturæ, loqueretur Baius.* — Prioris ordinis sunt septem primæ propositiones, in quibus plane supponitur vitam æternam esse angelo et homini connaturalem, et debitam ex vi solius naturæ, et operum ab illa suis viribus operante procedentium, si peccatum non intercedat, et naturam ipsam tanto bono et meritis ejus indignam reddat. Et in hoc sensu Baius dicebat bonum opus, utique procedens a natura innocente, natura sua esse meritorium vitæ æternæ, æque ac malum opus natura sua est meritorium mortis æternæ. Atque hinc inferebat in Angelis sanctis gloriam esse mercedem, non gratiam, quia neque in se est gratia, cum detur ex meritis, nec procedit ex gratia, quia pro bonis operibus naturæ secundum se spectatis, et sine alio respectu, merces illa promissa est. Unde etiam dicebat promissionem illam non gratiam, sed justitiam naturalem continere, ac proinde merita illa non recte vocari gratiam, sed tantum merita. Quæ omnia eodem modo de primo homine, si in statu integræ naturæ perseveraret, asserebat; et consequenter addebat promissionem vitæ, in qua mori non posset, factam primo homini sub conditione perseverantiæ in Dei obedientia, fuisse ex lege naturæ, non gratiæ. Et huc spectat quod dicit

in 22, exaltationem ad consortium divinæ naturæ fuisse debitam integritati primæ conditionis, ac proinde naturalem dicendam esse, non supernaturalem.

6. *Falsa propositione aliam falsam moderari conatur.* — Et quamvis in 9 propositione hanc doctrinam videatur auctor moderari dicens *dona collata angelo et homini, forsitan non improbanda ratione dici gratiam*, per hoc tamen non recedit a priori erronea doctrina; imo aliam introducit satis falsam et periculosam. Primum patet ex illis verbis: *Non improbanda ratione*, etc., quibus alludit ad modum loquendi Patrum Africanorum, in epist. 95 Augustini dicentium, dona creationis non improbanda ratione gratiam posse appellari: et sic etiam dixit Baius in sua propositione septima, merita primi hominis, in natura integra, fuisse primæ creationis munera, juxta usum vero Scripturæ non recte vocari gratiam. Cum ergo postea dicit, in 9 propositione, dona illius status *non improbanda ratione vocari gratiam*, intelligit aperte de illa ratione qua dona creationis gratia vocantur. Ergo per hoc non receditur ab illo errore quo, secluso peccato, nulla vera gratia in natura innocente recognoscitur. Secundum patet, quia in illa 9 propositione dicitur, in sacra Scriptura non vocari gratiam, *nisi ea munera quæ per Jesum male merentibus et indignis conferuntur*. Quod falsum omnino est, et multorum errorum fundamentum. Nam Scriptura vocat gratiam omne donum naturæ non debitum, et gratis, seu sine merito, vel non ex operibus datum. Alioqui et beati Angeli non ex Deo, sed a se haberent quod essent sancti, et in illis locum non haberet quod Paulus ait: *Quis enim te discernit? quid habes, quod non accepisti?* atque ita possent non in Domino, sed in se gloriari, quasi non acceperint, quod omnino falsum est, ut egregie docet Augustinus, lib. 12 de Civit., cap. 9, eademque absurda cum profectione in primo homine, si perseverare voluisset, sequuntur. Ex illo etiam fundamento evertitur totus ordo supernaturalium donorum gratiæ, quia ratio gratiæ nec requirit talia dona, nec per se illis convenit, sed solum ob indignitatem contrariam (ut sic dicam), id est, ex culpa contractam, et in suscipiente tale beneficium inventam. Atque hinc ortæ sunt assertiones 22 et 24, in quibus dicitur dona integritatis naturæ non fuisse supernaturalia, sed naturæ debita, et 25, in qua tanquam absurda rejicitur sententia catholica, docens primum hominem fuisse exaltatum donis super-

tit in 27, et per plura capita sui libri, ut in ea dicitur; ac denique 78 et 79, in quibus dicit, non potuisse hominem creari sine iustitia naturali, ac subinde in mortalitatem illius status non fuisse gratuitum beneficium, sed naturalem conditionem. De quibus magna ex parte in tertio prolegomeno dictum est, et de cæteris in discursu operis suis in locis dicemus.

7. *Propositiones exaggerantes corruptionem in humana natura factam.* — *Mendum 26 assertionis ratione tollitur.* — In posteriori ordine ponimus omnes illas propositiones, in quibus affirmat, vel non posse fieri obedientiam legis sine charitate, vel non posse aliquod bonum opus fieri in statu infidelitatis, aut peccati, aut sine auxilio gratiæ, aut liberum arbitrium hominis lapsi non nisi ad peccandum valere, cujusmodi sunt propositiones 17, 26, 28 et sequentes, fere usque ad 40; et 65, cum aliquibus sequentibus. Oportet autem circa 26 notare aliquod mendum irrepsisse videri in verbis ejus, sic enim habet: *Et ad pelagianismum rejicienda est illa sententia: Omnia opera infidelium sunt peccata, et philosophorum virtutes sunt vitia.* Non est enim verisimile ita fuisse a Baio scriptum aut probatum. Primo, quia illæ duæ sententiæ non sunt pelagianæ, nec commendant liberum arbitrium, sed potius deprimunt, nec repugnant gratiæ, sed ejus necessitatem exaggerant. Quapropter sunt potius pelagiano errori extreme contrariæ, et ideo summa contentione impugnabantur a Pelagianis, contententibus infideles per liberum arbitrium perficere multa bona opera sine ullo peccato, et acquirere veras virtutes, ut constat de Juliano apud Augustinum, lib. 4 contra ipsum, c. 3, et sæpe alias. Neque verisimile est, aut hoc ignorasse Baium, aut contra Augustinum sine fundamento pronuntiare voluisse. Secundo, quia Baius non intendit damnare, sed potius probare illas sententias, ut ex 17, 23, 28, 29, et aliis multis similibus patet; ergo non potuit asserere, esse ad pelagianismum rejiciendas, alias vultem hoc titulo illas damnaret. Et ita potius ipsum Baium damnari a Pontifice, quod diceret opera infidelium esse peccata, dixit Vasquez l. 2, disp. 191, cap. 2. Unde suspicor in illa propositione hypothetica deesse negationem aliquam, seu verbum negandi, sententiamque Baii fuisse, quam de Suetariis hujus temporis refert Bellarminus lib. 5 de Gratia et liber. Arbitr., capit. 9, pelagianum esse, negare omnium infidelium opera esse peccata. Et ita consonat huic propositioni quod idem

Baius ait in 23: *Cum Pelagio sentire qui textum Apostoli Rom. 2: Gentes quæ legem non habent, naturaliter ea quæ legis sunt, faciunt, intelligunt de gentibus fidei gratiam non habentibus.* Quasi dicat Pelagianum esse affirmare, infidelem naturaliter facere eâ quæ sunt legis naturæ, quia hæc non fiunt nisi per bona opera, ut ipse sentit in propositione 54 et aliis. Ergo in propositione 23 sensit ad pelagianismum pertinere negare omnia infidelium opera esse peccata. Ergo non potuit dicere ad pelagianismum pertinere, id affirmare. Denique, hac ratione illa propositio inter damnatas ponitur, ut suo loco in sequentibus dicemus.

8. *Dubium circa pontificiam censuram.* — Præterea circa censuram pontificiam, advertendum est, valde generalem esse, ideoque ambiguum esse quomodo ad singulas assertiones sit applicanda. Sex enim membra censura continet, nam dictas assertiones dicit esse hæreticas, erroneas, suspectas, temerarias, scandalosas, et in pias aures offensiones immittentes; additurque *respectivè*, quia non omnes partes censuræ in singulas assertiones cadunt, sed cum proportionem, et proportionata distributionem. Quomodo ergo constabit quali censura unaquæque assertio digna sit? Nam si uniuscujusque arbitrio hoc committitur, videtur multum minui hujus decreti et censuræ auctoritas. Nihilominus dicendum est Apostolicam Sedem non tam fuisse sollicitam de illa particulari applicatione censuræ quoad speciem, vel gradum ejus, quam de exterminanda et abolenda tota illa doctrina, sicut statim fecit, illam damnando, et in posterum interdicens. Ad hunc autem finem sufficiens fuit illa generalis censura, licet plura membra contineat, quia quælibet nota illarum sufficit ut doctrina ipsa circumscribatur, etiamsi propria nota et censura uniuscujusque propositionis per regulas Theologiæ ad singulas applicanda doctoribus Theologiæ permittatur. Neque est novus hic modus damnandi pravam aliquam doctrinam, quæ plures partes continet. Nam simili modo damnavit Leo X articulos Lutheri in sua Bulla, et Conc. Constant. articulos Joannis Wiclef, et Joannis Hus, scilicet 8 et 15.

9. *Alterum dubium perspicue proponitur.* — Sed inquireret aliquis utrum omnes propositiones quæ in hac Bulla notantur, censeri debeant notatæ aliqua parte hujus censuræ, saltem auctori, seu minima, vel liceat aliquas ex illis excipere, et tanquam probabiles, vel etiam probabiliore defendere? Ratio dubitandi est, quia nonnullæ ex illis propositionibus sunt

multorum Theologorum gravium et antiquorum; non est autem verisimile Pontifices, graves et receptas opiniones Theologorum tam severa involvere censura; et ideo nonnullæ ex illis propositionibus etiam nunc defenduntur a modernis gravibus Theologis. Exempla sunt primo, in propositione 23, quæ habet, cum Pelagio sentire, qui locum Pauli ad Romanos 2 intelligunt de gentibus nondum ad fidem conversis. Quod si hæc propositio damnatur a Pontifice, consequenter approbatur illa expositio, et reprobat contraria, quæ est Augustini in multis locis. Secundo, in 28 dicitur: *Liberum arbitrium sine gratia Dei non nisi ad peccandum valet*. Hæc autem non videtur potuisse in illa damnatione includi, cum similis habeatur in canone 22 Concilii Arausicani, qui videtur desumptus ex Augustino, tract. 5 in Joannem, in principio, et ex Prolegom. librorum de Doctrina Christiana; et similem habet Prosper in lib. Sentent., in 121 et 323. Tertium exemplum est de hac sententia: *Liberum arbitrium non valet ad aliquod peccatum ritandum*, quæ habetur propositio vigesima nona. Quartum est de illa: Homo potest resistere alieni tentationi sine gratiæ divinæ adjutorio, quæ habetur in 30. Quintum sit de illa: Nullum bonum morale, seu naturale, potest fieri per vires naturæ sine gratia, quæ habetur ex propositione 30, 35, 36, 37 et 61, nam hæc omnes propositiones probabiliter defenduntur a gravibus Theologis, et non est verisimile fuisse sub censura comprehensas. Sextum exemplum esse potest de illa opinione, quod Beata Virgo contraxerit peccatum originale ex Adamo, quam habet hic auctor propositione 69, et est ab Ecclesia permissa, ejusque censura prohibita.

10. *Dubii secundi resolutio.* — *Damnationis sensus.* — Nihilominus contrarium suadent et verba Pontificis et gravis ratio. Nam imprimis Pontifex, his verbis absolutis et illimitatis, profert censuram: *Quas quidem sententias, etc.*, quæ verba ita indistincte prolata omnes assertiones comprehendunt sine ulla exceptione. Alias magnam occasionem errandi nobis præberent. Accedit quod Pontifex ipse excludit exceptionem, et responsum ad contraria exempla indicat, dum ait: *Quancumque nonnullæ aliquo pacto sustineri possint, in rigore tamen, et proprio verborum sensu ab auctoribus intento, tales, vel tales, etc.* Ergo nullam illarum prout ibi continetur, et in proprio, et rigoroso sensu permittit excipere. Unde subjungit distributionem: *Quæcumque super his*

verbo aut scripto emissa damnamus. Ratio etiam hoc suadet, quia injustum fuisset in tanta multitudine sententiarum, aliquam veram, vel probabilem, aut nulla censura dignam involvere: sicut enim bonum ex integra causa, malum ex quocumque defectu, ita injusta esset et falsa damnatio, si vel in una propositione ex damnatis locum habere non posset, quia quoad illam universalis damnatio falsa esset et iniqua. Præsertim quia propositiones illæ ex libris integris auctoris excerptæ sunt; cur ergo aliqua illarum excerpta fuisset, et aliis annumerata, nisi censura digna fuisset? Denique alias inefficax, et fere inutilis redditur sententia Sedis Apostolicæ, ejusque auctoritas in omnibus enervatur, quia unicuique licebit quam velit excipere, eo prætextu quod a gravibus Theologis defenditur; cum tamen Pontifex non tantum de illis omnibus, sed etiam de similibus, posthac quoquo pacto loquendi, aut scribendi vel disputandi (utique defensionis causa) facultatem omnibus interdicit.

11. *Theologus quidam de quibusdam interpretantibus Bullam.* — Non omittam autem advertere, in Præfatione quadam ad hanc Bullam, a quodam Theologo adnotatum esse, nonnullas ex dictis propositionibus Baii a posterioribus Theologis ad sensus a Baio non intentos iniquissime retorqueri. Quia cum libros Baii, ex quibus fragmenta illa propositionum decerpta sunt, eis legere non licuerit, non potuerunt ex totius doctrinæ tenore ac ductu, et ex præcedentium, ac consequentium serie verum Baii et Pontificum sensum assequi. Atque ita, sola conjectura ducti, Baium in nonnullis opinionibus, de quibus nec uno quidem loco potest esse suspectus, fuisse judicaverunt. Unde factum consequenter esse necesse est, ut multas propositiones, seu opiniones, aut veras, aut saltem multum probabiles, a Pontificibus damnatas esse judicaverint, quod nimis absurdum, ac incredibile est, imo impossibile. Hactenus auctor illius præfationis.

12. *Præmonitio ratione fundata.* — Hæc vero adnotatio, ad introducendas, vel tuendas quasdam opiniones circa necessitatem gratiæ, et vires liberi arbitrii, et circa naturalem Dei amorem, ac res similes, viam parat, de quibus postea dicturi sumus, an per hanc Bullam aliquid eis derogatum sit. Nunc vero præmonendum lectorem putavimus, ut a legitima hujus decretalis censure interpretatione non aberret. Nam revera adnotatio illa, seu prævia cautio, nec verbis, nec fini, aut gravitati hujus Bullæ consentanea videtur. Quia imprimis

Pontifices, aperte et sine distinctione, declarant, illas sententias *in rigore, et proprio verborum sensu ab assertoribus intento*, tali censura dignas esse. Quæ verba, si attente spectentur, duo continent: unum est, assertiones illas in proprio verborum sensu esse tali censura dignas; aliud est, illum sensum fuisse ab assertoribus intentum: hic enim est simplex et proprius illorum verborum sensus, et quicumque alius excogitetur, fructum hujus definitionis evacuat. Quoniam alias unicuique liberum erit, proprium sensum, tanquam ab auctore intentum, illis verbis affingere, et illi accommodare iudicium Pontificis, ut propriam opinionem verbis magis consentaneam ab illa censura liberet: et ita declaratio illa Pontificia inutilis fiet, quia non ad certam doctrinam confirmandam, sed ad excitandas verborum contentiones deserviet. Quod quidem ita esse, ratio sequens magis declarabit. Nam si sensus omnium illarum sententiarum ab assertore intentus, non posset ex verbis ipsis a Pontificibus relatis satis colligi, sine operum ejusdem assertoris integra lectione, et antecedentium ac consequentium nova collatione, consequenter etiam ipsa Pontificia decisio sine eadem diligentia certo colligi non posset, quia nescimus quo sensu illas sententias damnaverit: at vero lectio illorum librorum nobis est prohibita, ut ex eodem Brevis, in quo talia scripta damnantur, constat: ergo interclusa est nobis via, et ratio assequendi proprium sensum ab illo assertore intentum, et a Pontificibus damnatum, et sic non possemus ex illa Bulla firmum argumentum contra aliquam opinionem sumere, etiamsi in illis assertionibus et proprio earum sensu contineri videatur. Consequens est absurdum, utpote scopo, et gravitati tanti decreti repugnans. Atque etiam est contra morem posteriorum auctorum, qui ad confirmandas non solum catholicas, sed etiam variores theologicas opiniones, auctoritate illarum Bullarum utuntur, ut videre licet in Cardinali Bellarmino, lib. 5 de Justific., cap. 12, et 1. 3; P. Azor, tom. 1, lib. 4, cap. 29, in fine; P. Vasquez, 1. 2, q. 191, cap. 2, ubi, reprobantem sententiam assertentem in infidelibus esse posse aliquid bona opera, addit: Et quod caput est, opposita sententia videtur esse damnata in Bulla edita a Pio V et Greg. XIII. Similia habet disp. 216, cap. 1, et q. 113, ad art. 7 divi Thomæ, Lores in 1. 2, tom. 2, sect. ult., disp. 3, memb. 4, et disp. 6.

13 Ex his ergo concludo propositiones has in proprio sensu, quem verba ipsarum præ se

ferunt, damnatas esse, illumque sensum non aliunde quam ex verborum proprietate regulariter sumendum esse. Dico autem *regulariter*, quia si verba sint ambigua, vel duplicem sensum proprium admittant, tunc necessarium est aliis uti indiciis ad definiendum sensum, in quo damnata est propositio. Duo autem indicia videntur esse præcipua; unum est, si verba in una significatione referant sensum non discrepantem a doctrina Ecclesiæ et Theologorum, in alio vero novam et inusitatam doctrinam contineant, tunc enim manifestum est damnatam esse propositionem, prout continet peregrinam et inusitatam in Ecclesia doctrinam, non vero in altero sensu a Catholicis recepto. Alterum indicium est, si unus sensus cohæreat cum aliis assertionibus in eadem Bulla damnatis, non vero alter, tunc enim clarum etiam est propositionem in priori sensu assertam fuisse, ac proinde in eodem damnari. Et hanc conjecturam maxime spectandam, et præ oculis habendam, moneo. Existimo enim tanta consideratione et æquitate assertiones has ex libris illius Doctoris decerptas fuisse, ut, si non tantum singulæ, sed omnes etiam simul spectentur, facile possit intelligi sensus, in quo ab auctore assertæ fuerunt; neque sic decerptas, et a contextura librorum avulsas, alium referre sensum, præter illum qui fuerit ab auctore intentus, quique etiam, collatione facta ad antecedentia et consequentia, in ipsis operibus recto iudicio colligi posset. Alioquin non fuisset æqua censura ad assertorem relata, et ad opera ejus, si assertiones damnandæ tali modo verbisque ita præcisè formarentur, ut alium sensum præ se ferrent, quam in contextu ipso operis vel sermonis continerent. Quod est incredibile, et ab Ecclesiæ usu et sincero iudicio alienum. Magnumque hujus veritatis argumentum est, quod neque ipse Michael Baius de tali damnatione conquestus est, quod propositiones ita essent ex suis libris decerptæ, ut in verborum proprietate, et solitarie sumptæ, alium sensum redderent, quam in libri contextura ipse intendisset, neque specialem illis declarationem adhibuit, sed ut catholicus, et obedientiæ filius sententiam mutavit. Ita ergo de his assertionibus iudicandum censeo, estque generalis doctrina servanda in similibus censuris interpretandis, ut in damnatione articulorum Joannis Wiclephi, Joannis Hus, Lutheri, et similibus; nam et ratio facta æque in his omnibus procedit, et ex dictis exemplis ea, que in præsentî diximus, non parum confirmantur.

14. *Oppositis exemplis satisfi.* — Ad exempla ergo in principio objecta, generatim respondemus propter illa fortasse dixisse Pontificem, nonnullas ex illis propositionibus aliquo pacto sustineri potuisse, utique per se sumptas: nihilominus tamen de illis etiam intelligendum est, in rigore verborum et in sensu ab auctore intento sub eadem comprehendi censura. Quis autem sit hic sensus in singulis, et in quo alio possent aliquæ a censura excusari, in discursu materiæ per occasionem tractandum erit. Nunc vero generatim dici potest, has propositiones, quæ non apparent ita damnabiles propter nudam doctrinam, propter acerbitatem et audaciam qua Baius suas opiniones adstruebat, et contrarias notabat, rejectas esse a Pontifice, saltem ut scandalosas, quia illa Baii immodica exaggeratio scandalum generabat; quæ regula recte quidem ad primum exemplum accommodatur. Merito enim, tanquam temeraria et scandalum patiens, damnatur propositio dicens, Pelagianam esse expositionem testimonii Pauli de gentibus nondum conversis ad fidem, cum a Patribus, et expositoribus catholicis, vel probetur, vel non damnetur; licet aliis etiam modis locus ille exponatur. Item quia Baius non damnabat expositionem, nisi quia Pelagianum esse putabat dicere, gentiles ethnicos posse aliquid boni naturalis facere, quod esset *naturaliter ea quæ legis sunt facere*, saltem ex parte, seu aliqua lege, et in aliquo actu ejus: temerarium autem erat et scandalosum, sententiam illam pelagianam existimare, et ideo, saltem quoad hanc notam et acerbitatem, a Pontifice damnatur. Hæc vero regula solum potest accommodari illis propositionibus quæ cum simili audacia et acerba nota proferuntur, non vero aliis quæ simpliciter asseruntur, ut sunt fere in aliis exemplis. Imo, neque illa regula ad omnes propositiones similes et hypotheticas extendenda est, sed consideranda est etiam doctrina; nam sæpe etiam in illam cadet censura; ut, v. g., in decima-octava propositione dicitur, *sentire cum Pelagio, qui dicunt, esse necessarium ad rationem meriti ut homo per gratiam adoptionis sublimetur ad statum Dei-ficem*. Quæ quidem propositio non solum damnabilis fuit propter exaggerationem insolentissimam, sed etiam propter doctrinam, quamvis simpliciter proferretur.

15. *Concilii Arausicani testimonio cum nonnullis solutio applicatur.* — Unde, ad exemplum secundum, fateor illam propositionem simpliciter prolatam comprehendi sub hac censura,

et nego esse eandem in Concilio Arausicano, cujus rei expositionem remitto in librum sequentem. Idemque respondeo ad tertium exemplum. Ad quartum vero, dici potest in illa propositione plures partes contineri, et necessarium non esse ut propter omnes damnetur, præsertim quia illa propositio ex hypotheticis est, et cum intolerabili temeritate incipit: *Non solum hi fures sunt et latrones, etc.*; sed de hac propositione, quæ ad victoriam tentationum pertinet, in sequenti libro disputaturi sumus, ubi plura de hoc exemplo dicemus. In quem locum etiam quintum exemplum remittimus, non enim desunt qui propositionem illam simpliciter, ut in rigore verborum sonat, a Pontifice fuisse rejectam putent.

16. *Ad ultimum solutio.* — *Unumque attente notandum.* — Ad ultimum exemplum, dico propositionem illam non damnari propter nudam assertionem de conceptione B. Virginis in originali peccato, sed propter generalem modum asserendi omnes afflictiones, quas in hac vita B. Virgo passa est, fuisse ultiones peccati actualis, vel originalis, in hoc æquiparando Virginem cæteris sanctis. In hac enim assertionem, simul cum præcedenti sexagesima octava, imprimis temere dictum est, omnes afflictiones justorum et martyrum, et ipsius etiam Job, fuisse ultiones peccatorum suorum, quia non solum sine fundamento asseritur, sed etiam Scripturis repugnat. Nam, licet peccatum originale fuerit aliquo modo origo et causa omnium pœnalitatum hujus vitæ, quatenus constituit hominem in statu passibili, non tamen omnes afflictiones hujus vitæ sunt propriæ pœnæ illius peccati, præsertim postquam justis remissum est. Neque etiam sunt pœnæ actualium peccatorum: nam multæ afflictiones ordinantur a Deo, vel permittuntur speciali providentia, non propter peccata commissa, sed vel ad probationem patientiæ, sicut Tobiae dictum est ab Angelo, et a fortiori contigit in Job, vel propter gloriam Dei, ut de cæco dixit Christus Joann. 9, ubi (ut Augustinus et Chrysostomus advertunt) discipulos instruit, non omnes calamitates corporum esse pœnas peccatorum, quod etiam docuit Hieronymus, epistola trigesima-tertia, ad Castrut., et contrarium putare stolidum esse ait Ambrosius, epist. 45, libro 5. Deinde, multo magis damnabile est hoc attribuire Beatissimæ Virgini, et, quod gravius est, sub disjunctione de illa dicere, *propter peccatum actuale, vel originale*, quasi in dubium revocando an peccatum actuale commiserit. Merito ergo illa

propositio, ut jacet, damnata est, etiamsi simpliciter affirmare B. Virginem originale peccatum contraxisse, damnabile non sit. Et hoc est attente in nonnullis aliis propositionibus considerandum, quæ plures partes involvunt, nam licet una pars præcise sumpta forsan non esset digna censura, prout ibi asseritur et aliis conjungitur, damnabilem propositionem constituit.

CAPUT III.

DE CONCILIO DIOSPOLITANO IN PALÆSTINA CONTRA PELAGIUM PRO GRATIA DEI CONGREGATO, EJUSQUE ACTIS ET AUCTORITATE.

1. Post auctoritatem Pontificum, dicendum sequitur de Concilio quæ doctrinam de gratia et libero arbitrio contra hæreticos nobis tradiderunt. Et imprimis occurrit Palæstina synodus, quam Diospolitana vocat Hieronymus, epistol. 79 ad Alypium, et Augustinus, a Diospoli, civitate Palæstinæ, in qua fuit congregata, ut notat Baron., ann. 411, num. 19, ejusdemque sæpius meminit Augustinus, vocatque Episcopalia gesta in Syria Palæstinæ celebrata, lib. 2 *Retract.*, cap. 47. Sumimus autem ab illa initium; tum quia prima omnium de persona Pelagii judicium tulit, licet ante illam alia fuerit in Cœlestium Carthagine congregata, ut capite sequenti videbimus; tum etiam quia hujus Concilii Acta in tomis Conciliorum non habentur, et ideo curandum nobis est ex variis scriptoribus, et præsertim ex Augustino, illa colligere, quia, ad melius intelligendos errores Pelagii, et veram doctrinam, quam Patres illius Concilii confirmarunt, operæ pretium erit. Cum ergo Pelagius, ut cap. 13 vidimus, in Oriente hæresim suam seminare incepisset, a fratribus catholicis, qui in ejus doctrina scandalum patiebantur, ad Episcopos delatus est; et hac occasione congregata est in Syria Palæstinæ hæc synodus, cui interfuerunt quatuordecim Episcopi, quorum nomina recenset Augustinus lib. 1 *contra Julian.*, cap. 5.

2. *Orosius Concilio absuit Palæstino.* — Addit P. Gabriel Vass., t. p. tomo 1, disp. 191, cap. 9, et l. 2, in Prefatione ad Acta illius Concilii, illi synodo interfuisse Paulum Orosium, ut ipse inquit testatur in *Apologia de Libero Arbitrio*. Mirum est autem quod Augustinus nunquam hoc insinuaverit, cum ad causam multum referret. Imo, in d. cap. 47 *Retract.*, notat catholicos fratres, qui libellum

contra Pelagium dederant, Concilio non adfuisse, quia ad ejus diem occurrere non potuerunt. Quod aliis etiam multis locis notat, ut excuset Episcopos illius Concilii de absolutione Pelagii, quod maxime declaravit in libro de Gestis Pelagii, quem in fine hujus Prolegomeni editum dabimus; ibi enim in cap. 1 hæc habet verba: *Sed hoc Episcopi Græci homines et ea verba per interpretem audientes discutere non curarunt, hoc tantum intuentes, quid ille qui interrogabatur, sensisse se diceret; et iterum infra: Quod indiscussum iudices reliquerunt latini sermonis ignari, et ejus, qui causam dicebat, confessione contenti. Præsertim ubi ex adverso nullus adstat, qui, verba libri ejus exponendo, aperire interpretem cogeret, atque unde fratres non frustra moverentur, ostenderet.* Sentit ergo aperte Augustinus in illo Concilio nullum latinum hominem catholicum, et eruditum, gratiæque defensorem, vel Pelagii impugnatorem, adfuisse. Quod verum non esset, nec conjectura Augustini momentum ullum haberet, si Paulus Orosius illi synodo interfuisset, cum et Latinus esset, ac Hispanus, et non solum catholicus et doctissimus, sed etiam Hieronymi et Augustini studiosissimus discipulus, et Pelagii insectator acerrimus; ergo, illo præsentem, vix possent illi Episcopi Orientales aliquam de absolutione Pelagii excusationem habere. Unde Baronius, anno 416, num. 4, licet dicat Orosium eo tempore fuisse in Palæstina, et vidisse celebratam synodum Diospolitana, non tamen dicit illi interfuisse, sed potius significat, illo mense decembri, in quo synodus agebatur, illum fuisse cum Hieronymo, ad quem missus ab Augustino fuerat, et ibi seivisse quid actum esset in Concilio; hæc enim verba sunt Baronii: *Orosius profectus in Palæstinam ad sanctum Hieronymum, cum ibi esset, et mense decembris celebratam viderit synodum Diospolitana, in qua scisset Pelagium, cum decepisset intolucro verborum Episcopos, ab eisdem fuisse absolutum, et in communionem acceptum, ipse hoc ipso anno, etc.* Denique non videntur necessariae conjecturae, nam ipse Augustinus, dicto libro de Gestis Pelagii, cap. 13, alia 16, sic inquit: *Quid dixit Episcopus Joannes de absentibus fratribus nostris, sive Episcopis Herotho et Lazaro, sive de presbytero Orosio, sive de aliis, etc.*, ubi aperte inter eos qui ab illo Concilio abentes fuerant, Orosium numerat.

3. *Verba Orosii explicantur.* — Quocirca, cum idem Orosius in *Dialogo de Libero Ar-*

bit., in principio, refert se in conventu Episcoporum Palæstinæ, præcipiente Joanne, consedisse, et ab eis rogatum fuisse ut, si quid super hæresi Pelagii et Cœlestii in Africa gestum esse cognosceret, fideliter ac simpliciter indicaret, etc., profecto non loquitur de Concilio Diospolitano, sed alio conventu facto, non Diospoli, sed Hierosolymis, ut ipsemet Orosius his verbis declarat: *Iatebam in Bethleem traditus a Patre Augustino, ut timorem Domini discerem, sedens ad pedes Hieronymi, inde Jerusalem vobis accersentibus vocatus adveni, dehinc in conventum vestrum*, etc. Et statim exposuisse dicit in illo conventu, quid Concilium Carthaginense (utique primum) egisset contra Cœlestium, quidque Augustinus contra Pelagium scripsisset. Et nihilominus subjungit (quia hæc absente Pelagio agebantur) Joannem Episcopum ut Pelagius intromitteretur petisse, et illum intromissum in consessu Presbyterorum sedere præcepisse. Deinde solum refert ibi tractatum esse cum Pelagio de una assertionem, scilicet, quod doceret *hominem posse esse sine peccato, et mandata Dei facile custodire, si velit*. Quam propositionem Pelagius se asseruisse fatebatur, et Joannes pro illo quodammodo causam agebat, eum excusans, quod dicebat posse hominem esse sine peccato, non sine adiutorio Dei. Cumque Orosius et alii non acquiescerent, tandem omnes convenerunt *ut ad Beatum Innocentium, Papam Romanum, fratres et epistolæ mitterentur, universi quod ille decerneret secuturi, et ut Pelagius, imposito sibi eatenus silentio, conticesceret, et ut nostri* (id est, ipse Orosius cum sociis), *ab insultatione confusi convictique, Joanni temperarent*, et ita fuit conventus dissolutus. Quæ acta longe diversa sunt a gestis Diospolitanae synodi, ut paulo post videbimus; nam ibi multo plura a Pelagio asserta tractata sunt, et non est negotium ad Innocentium remissum, sed ab ipso Concilio expeditum.

4. *Dioecæsanæ synodus fuit ea cui adfuit Orosius*. — Accedit quod in eo conventu cui adfuit Orosius, præsidebat Joannes Episcopus, quantum ex narratione ejusdem Orosii colligi potest; in synodo autem Diospolitana videtur potius præsedisse Eulogius, quem Augustinus supra his primo loco numerat, et in secundo Joannem. Quod etiam sentit Baronius, dicto anno 415, n. 49, dicens Eulogium illum fuisse Episcopum Casariensis Ecclesiæ, totius provinciæ Palæstinæ Metropolitanum, et secundum ordinem fuisse Joannem, Episcopum Hierosolymitanum. Imo etiam suspicor conven-

tum illum Hierosolymitanum non fuisse provinciale Concilium, sed vel dioecæsanam synodum, vel privatam congregationem, seu consultationem factam a Joanne cum aliquibus presbyteris Hierosolymitanis, convocato simul Orosio, et fortasse aliquibus presbyteris catholicis, qui semper causam damnationis contra Pelagium urgebant. Cujus rei conjectura imprimis est, quia Orosius nullius alterius Episcopi, præterquam Joannis, mentionem facit, et in singulari numerat Episcopum, cum rationem reddit, cur Pelagius permissus sit conventum ingredi, *quod præsens*, ait, *ab Episcopo rectius crederetur consultandus*. Et quoties in plurali loquitur, tantum nominat sacerdotes, ut in principio: *Beatissimi sacerdotes*, vel presbyteros, ut infra, cum ait: *Episcopus Joannes hominem laicum in consessu presbyterorum, reum hærescos in medio catholicorum sedere præcepit*; et infra: *Tunc idem Episcopus nobis omnibus ait*. Quæ omnia et similia plane indicant nullum alium ibi adfuisse Episcopum, ac proinde illum fuisse privatam conventum clericorum cum Episcopo suo, vel ad summum dioecæsanam synodum. Cujus rei magnum etiam indicium est, quod illius conventus nulla facta est mentio in historiis, ejus rei non potest esse alia ratio, nisi quia non fuit Concilium Episcoporum.

5. *Conventus clericorum, quando factus, ubi Orosius interfuit*. — Quando vero, vel qua occasione congregatus fuerit ille conventus, incertum est. Videri autem potest factus post Diospolitanae synodum, in majorem Pelagii satisfactionem. Nam ille Joannes Hierosolymitanus multum diligebat Pelagium, eique favebat. ut ex Actis ab Orosio narratis manifeste colligitur, et indicat Augustinus epistola 252 ad eundem Joannem, dicens illi: *Pelagium quem audio quod multum diligis, hanc illi, suggero, exhibeas dilectionem, ut homines qui eum noverunt et diligenter audierunt, non ab eorum sanctitatem existiment falli*; et iterum infra: *Si diligitis Pelagium, diligit vos etiam ipse, imo magis seipsum, et non vos fallat*. Cum ergo hæc esset communis opinio et fama de Joanne, qui magnæ erat auctoritatis, credibile profecto est ejus etiam favori attributam esse absolutionem Pelagio concessam in Diospolitana synodo, et ob eandem causam fratres illos, qui contra Pelagium libellum dederant, et synodo interesse non potuerant, post dissolutam synodum, coram Joanne iterum atque iterum contra Pelagium instasse, et hac occasione adfuisse tunc Hierosolymis Pelagium,

et vocatum fuisse a Joanne Orosium, et novam de tanto negotio consultationem fecisse. Ac denique inde etiam videtur factum ut, cum inter se convenire non possent Episcopus et presbyteri, non ad Episcoporum synodum, cum jam facta esset, sed immediate ad Sedem Apostolicam negotium remiserint. Quæ sane conjectura, priusquam attente legissem Augustinum in dicto libro de Gestis Pelagii, valde arridebat. At postea in dicto libro hæc verba animadverti: *Merito, quod Gesta indicant, etiam hoc usus est testimonio sanctus Joannes, Hierosolymitanæ Antistes Ecclesiæ, sicut interrogatus, quæ apud illum ante judicium gesta fuerint, a Coepiscopis nostris qui simul in illo judicio præsidebant, ipse narravit*, ubi aperte dicit ante judicium Diospolitano aliqua fuisse gesta circa causam Pelagii apud Joannem, nimirum, in aliquo privato consessu clericorum coram Episcopo Joanne, quem fuisse eundem quem Orosius commemorat, verisimile est. An vero duo fuerint, unus ante, et alius post Concilium Diospolitano, incertum est. In aliquo autem hujusmodi adfuisse Orosium, et non in dicto Concilio, satis certum videtur.

6. *Palæstina Synodus fisiones Pelagii non cognovit.* — In illa ergo Palæstina Synodo, causa Pelagii acta est coram solis Orientalibus Episcopis, sine præsentia alicujus Presbyteri catholici et Latini, qui et verba Pelagii sincere interpretari, et simulationes ejus detegere posset. Et inde factum est ut illius synodi Patres, licet de gratia bene sentirent, et in fidei doctrina nihil erraverint, nihilominus in facto pertinente ad personam Pelagii, et ad crimen hæresis illius, ab illo decepti fuerint, et ideo absolverint, quem si probe cognoscerent, condemnare debuissent. Et ita defendit Acta illius Synodi Augustinus in multis libris contra Pelagium, præsertim libro 1 de Gratia Christi, cap. 3 et sequentibus, et dicto libro de Peccato originali, cap. 8, 9, 11 et 14, et epist. 105, 106 et 107; et Prosper contra Collat. cap. 10, ubi per ironiam dicit: *Erraverunt Orientales Episcopi, in quorum judicio Pelagius eos, qui dicunt gratiam Dei secundum meritum nostrum dari, et catholicus posset videri, anathematizare compulsus est.* Et in carmine de Ingratis, c. 2, ait post Solem Romanam Episcopo Orientis cœcitate Pelagium *Commotum damnare suum, nisi corpore Christi abjungi, et sancto mallet grege dissociari, etc.*, quæ prosequitur: et in eodem non locutus est Hieronymus, dicta epist. 79, cum dicit de Pelagio: *Quidquid in illa miserabili Synodo Diospolitana dixisse se*

denegat, in hac aperte confitetur. Miserabilem enim vocat, non quia in fide erraverit, sed quia per errorem facti absolvendo Pelagium, in sinistram aliquam suspicionem venire potuit. Hæc autem omnia melius ex Actis ejusdem Concilii constabunt, si illa habuerimus, et ideo sicut Augustinus multo tempore illa desideravit, et petivit, ut constat ex dicta epist. 252, et ex libro quem postea de illis edidit; ita etiam nostra ætate, aliqui diligentes et eruditi viri illa inquisierunt, et ediderunt. Nam P. Vasq., in fine suæ 1. 2, illa typis mandari fecit, quæ dicit habuisse ex codice antiquo monasterii montis Cassini ab Antonio Aquinate, viro Theologo et illustri. Eadem vero omnino sunt quæ refert Cardinalis Baronius in dicto ann. 413, n. 21 et sequentibus, dicitque se ea invenisse in collectione Cresconii recitata post epistolam Aurelii, Episcopi Carthaginensis, ad Episcopos provinciæ Bizacenæ. Quæ hic referre ad legentium utilitatem et commoditatem visum est.

ACTA CONCILII PALÆSTINI.

Incipiunt capitula excerpta ex Gestis habitis contra Pelagium hæreticum, et alia de libellis ejus, quæ in Palæstina Synodo sibi objecta damnare compulsus est.

Quod ad Jerusalem volentem colligere filios suos Dominus clamat, hoc nos clamamus adtersus eos qui filios volentes Ecclesiæ colligi nolunt: nec saltem post judicium, quod de ipso Pelagio factum est, collegerunt: de quo damnatus exiisset, nisi objecta contra Dei gratiam dicta, quæ obscurare non potuit, ipse damnasset. Præter illa enim, quæ quoquo modo potuit, ausus est qualicumque ratione defendere, objecta sunt quædam, quæ nisi remota omni tergiversatione anathematizaret, ipse anathema sit factus.

Primo objectum est enim, cum diceret Adam mortalem factum; qui sive peccasset, sive non, mortuus esset.

Secundo, quod peccatum ipsius ipsum solum læserit, et non genus humanum.

Tertio, quod infantes nuper nati, in illo statu sint in quo Adam fuit ante prævaricationem.

Quarto, et quod per mortem, vel prævaricationem Adæ non omne genus humanum moriatur; et quod non per resurrectionem Christi omne genus humanum resurgat.

Quinto, infantes, etiamsi non baptizentur, vitam æternam habere possunt.

Sexto, et dicentes baptizatos, nisi omnibus abrenuntiant, si quid boni nisi fuerint facere,

non reputari illis, nec eos habere posse regnum Dei.

Septimo, et gratiam Dei, atque adiutorium non ad singulos actus donari, sed in libero arbitrio esse, vel in lege, atque doctrina.

Octavo, et gratiam Dei secundum merita nostra dari.

Nono, et filios Dei non posse vocari, nisi omni modo absque omni peccato fuerint effecti.

Decimo, et non esse liberum arbitrium, si Dei indigeat auxilio, quoniam in propria voluntate habet unusquisque facere aliquid, vel non facere.

Undecimo, et victoriam nostram non esse ex Dei adiutorio, sed ex libero arbitrio.

Duodecimo, et quod pœnitentibus venia non detur secundum gratiam et misericordiam Dei, sed secundum merita et laborem eorum, qui per pœnitentiam digni fuerint misericordia.

Hæc omnia Pelagius sic anathematizavit (quod satis Gesta ipsa testantur), ut nihil ad ea quoquo modo defendenda disputationis attulerit. Unde fit consequens ut quisquis sequitur Episcopalis auctoritatem iudicii, et in ipsius Pelagii confessione tenere debeat, quæ tenuit Catholica Ecclesia.

Postea subjunguntur ea quæ Synodus circa præcitatos errores statuit, quæque Pelagium confiteri, et priores errores detestari coegit, ut anathema effugeret.

SERIES ACTUUM PALÆSTINÆ SYNODI.

Primo, quod Adam, nisi peccasset, non fuisset moriturus.

Secundo, quod peccatum ejus non ipsum solum læserit, sed et genus humanum.

Tertio, quod infantes nuper nati, non sint in illo statu in quo Adam fuit ante prævaricationem.

Quarto, ut ad ipsos etiam pertineat quod breviter ait Apostolus : Per unum hominem mors, et per hominem resurrectio mortuorum, et sicut in Adam omnes moriuntur, ita et in Christo omnes vivificabuntur (1 Cor. 15).

Quinto, quod infantes non baptizati non solum regnum cœlorum, verum etiam vitam æternam non habere possint.

Sexto, ut confiteatur, divites baptizatos, etiamsi divitiis suis non careant, et sint tales, quales ad Timotheum describit Apostolus, dicens : Præcipe divitibus hujus mundi non superbe sapere, neque sperare in incerto divitiarum suarum, sed in Deo vivo, qui præstat nobis omnia abundanter ad fruendum : divites sint in operibus bonis, facile tribuant, communicent, thesaurizent sibi fundamentum bonum in futu-

rum, ut apprehendant vitam æternam (1 Tim. 6), non eos regno Dei posse privari.

Septimo, ut fateatur gratiam Dei et adiutorium etiam ad singulos actus dari, eamque non dari secundum merita nostra.

Octavo, ut revera sit gratia, id est, gratis data per ejus misericordiam, qui dixit : Misereor, cui misertus ero, et misericordiam præstabo, cui misertus fuero.

Nono, ut fateatur filios Dei vocari posse, illos qui quotidie dicunt : Dimitte nobis debita nostra, quod utique non veraciter dicerent, si essent omnino absque peccato.

Decimo, ut fateatur esse liberum arbitrium, etiamsi divino indigeat adiutorio.

Undecimo, ut fateatur, quando contra tentationes, concupiscentiasque illicitas dimicamus, non ex propria voluntate, sed ex adiutorio Dei provenire victoriam, non enim aliter verum est quod Apostolus ait : Non volentis, neque currentis, sed miserentis est Dei.

Duodecimo, ut fateatur, secundum gratiam, et misericordiam Dei veniam pœnitentibus dari, non secundum merita eorum ; quemadmodum etiam ipse pœnitentiam donum Dei dixit Apostolus, ubi ait : Ne forte det illis Deus pœnitentiam. Hæc omnia simpliciter sine ullis fateatur ambagibus.

Si quis contra auctoritatem catholicam, et ipsius Pelagii expressa ecclesiasticis gestis verba consentit, atque in illa quæ his sunt contraria veraciter credit, anathema esse tenendum est ; nisi quæ illis contraria sunt fido corde teneantur, et aperta confessione promantur.

7. Quædam illius consumma. — Ubi latebat B. Augustini liber. — Hæc sunt, quæ tanquam acta illius Synodi referuntur. Sed si quis attente illa consideret, revera non sunt propria Concilii Acta, sed excerpta quædam ex ipsis Gestis, ut ex inscriptione ipsa constat, quæ sic habet : *Incipiunt capitula quædam excerpta ex Gestis.* Deinde ex verbis illis, quæ in fine errorum Pelagii habentur, scilicet : *Hæc omnia Pelagius anathematizavit, quod satis constat ex Gestis.* Denique quia, præter titulum, omnia quæ hic referuntur fere ad litteram desumpta sunt ex Augustino, epist. 109 circa finem, ab illis verbis : *Quod ad Jerusalem, etc., usque ad illa : Et aperta confessione promantur.* Quæ brevius etiam recitavit lib. 2 de Peccato orig., cap. 11, præmittens in cap. 10 se id facere, ne pigeat lectorem ad ipsa Gesta recurrere, vel si ea non habet, etiam cum labore perquirere. Unde non est dubium, quin alia fuerint propria gesta illius Concilii, quæ ad manus Au-

gustini devenerunt, quandoquidem ex ipsis hæc capitula decerpit. Et illa sine dubio sunt, de quibus peculiarem librum scripsit Augustinus, ut ipse commemorat, lib. 2 *Retract.*, cap. 47, dicens: *Cum in manus nostras eadem Gesta venissent, scripsi de his librum, ne illo velut absoluto, eademque quoque dogmata putarentur iudices approbasse, quæ ille, nisi damnasset, nullo modo ab eis, nisi damnatus existet. Hic liber sic incipit: Posteaquam in manus nostras.* Hic vero liber Augustini hactenus in operibus ejus non invenitur: nuper autem in bibliothecis magni Florentiæ Ducis, et Monasterii, seu Abbatiae Sancti Bartholomæi Tesularum Canonicorum regularium Lateranensium, repertum esse scimus, ejusque integrum exemplar a quodam erudito viro, et omni fide digno accepimus. Qui liber eundem habet titulum, idemque initium, quod ab Augustino designatur, ejusque stylus, et dicendi ratio ita præ se fert ingenium, et linguam Augustini, ut nullum legenti dubium relinquat, quin ille idem sit, qui et ab Augustino, citato loco, et a Possidio in indiculo operum Augustini inter ea numeratur. Et quoniam, quod ego sciam, hactenus typis mandatus non est, et ad controversias, et disputationes hujus materiæ esse potest utilis, ideo in fine hujus Prolegomeni tanquam appendicem illum ponemus, nunc vero ut Acta Concilii Palæstini, quæ inquiremus, sola et sine interruptione legantur, hic ex eodem Augustini libro ea, omissis ejusdem Augustini notationibus, continuata serie referemus.

ACTA SYNODI DIOSPOLITANÆ.

De libello quem dederunt Sancti Patres, et Coepiscopi nostri Gallienus et Lazarus, recitata sunt objecta Pelagio.

PRIMA PROPOSITIO PELAGIO OBJECTA. — RESPONSIO PELAGII.

Primum est, quod in libro suo quodam scribit, non posse esse sine peccato, nisi qui legis scientiam habuerit.

Quo recitato synodus dixit: *Tu hoc edidisti, Pelagi? At ille respondit: Ego quidem dixi, sed non sicut illi intelligent. Non dixi non posse peccare, qui scientiam legis habuerit, sed adjutori per legis scientiam ad non peccandum, sicut scriptum est: Legem in adjutorium dedit illis.*

DEFINITIONES SYNODI.

Hoc audito, synodus dixit: *Non sunt aliena ab Ecclesia quæ dicta sunt a Pelagio.*

2. *Adjecit Episcopalis synodus, et ait, legatur et aliud capitulum; et lectum est in eodem libro suo, potuisse omnes voluntate propria regi.*

Quo lecto, Pelagius respondit: *Et hoc dixi propter liberum arbitrium, cui Deus adjutor est eligenti bona; homo vero peccans, ipse in culpa est quasi liberi arbitrii.*

Quo audito, Episcopi dixerunt: *Neque hoc alienum est ab Ecclesiastica doctrina.*

3. *Item recitatum est quod in libro suo Pelagius posuit, in die judicii iniquis et peccatoribus non esse parcendum, sed æternis eos ignibus exurendos.*

Respondit Pelagius hoc secundum Evangelium se dixisse, ubi dicitur de peccatoribus: *Isti ibunt in supplicium æternum, justi autem in vitam æternam.* Et addidit Pelagius: *Et si quis aliter credit, Origenista est.*

Non potuit autem iudicibus evangelica et dominica displicere sententia, et ideo dixerunt non esse alienum ab Ecclesia, quod Pelagius dicebat, eam sententiam intelligentes de peccatoribus in mortali peccato decedentibus, quorum pænæ æternæ sunt, non temporales, ut volebat Origenes. Quid autem offenderit fratres in hac sententia Pelagii, in Augustino videri potest.

4. *Objectum est et illud Pelagio, tanquam in suo libro scripserit, malum nec in cogitationem tenere.*

Respondit autem: *Hoc non ita posuimus, sed dixi, debere studere Christianum, ne male cogitet. Quod Episcopi approbarerunt.*

5. *Recitatum est aliud, quod in suo libello scripsit: Regnum cælorum etiam in Veteri Testamento promissum.*

Ad quod Pelagius: *Hoc et per scripturas proflare possibile est, hæretici autem in injuriam veteris Testamenti hoc negant. Ego vero Scripturarum auctoritatem secutus dixi, quoniam in Propheta Daniele scriptum est: Et accipient Sancti regnum Altissimi.*

Qua ejus accepta responsione, Synodus dixit: *Neque hoc alienum est a fide ecclesiastica.*

6. Post hæc objectum est quod Pelagius in eodem suo libro dixerit posse hominem, si velit, esse sine peccato, et quod scribens ad riduam adulatorie dixit: *Inteniat apud te pietas, quæ nusquam intenit, locum; inteniat ubique peregrina in te sedem justitia; veritas, quam jam nemo cognoscit, domestica tibi, et amica fiat, et lex Dei, quæ ab omnibus prope hominibus contemnitur, a te sola honoretur; et iterum ad ipsam: O te felicem et beatam, si justitia, quæ*

in cœlo tantum esse credenda est, apud te solam inveniatur in terris. Et in alio ad ipsam libro, post Orationem Domini et Salvatoris nostri, docens quemadmodum debeant sancti orare, ait: Ille ad Deum digne eleuat manus, ille orationem bona conscientia effundit, qui potest dicere: Tu nosti, Domine, quam sanctæ et innocentes, et mundæ sint¹ ab omni molestia, et iniquitate, et rapina, quas ad te extendo manus, quemadmodum justa, et munda labia, et ab omni mendacio libera, quibus offero tibi deprecationem, ut mihi miserearis.

Ad hoc autem Pelagius respondens ait: Posse quidem hominem sine peccato esse, et Dei mandata custodire, si velit, diximus. Hanc enim possibilitatem Deus illi dedit. Non autem diximus, quod inveniatur aliquis ab infantia usque ad senectam, qui nunquam peccaverit, sed quoniam a peccatis conversus, proprio labore, et Dei gratia possit esse sine peccato. Nec per hoc tamen in posterum inconversibilis. Reliqua vero, quæ subjecerunt, neque in libris sunt, neque talia unquam diximus.

His auditis, Synodus dixit: Quoniam negas te talia scripsisse, anathematizas illos qui sic tenent? Pelagius respondit: Anathematizo, quasi stultos, non quasi hæreticos, si quidem non est dogma. Deinde judicaverunt Episcopi dicentes: Nunc, quoniam² anathematizavit Pelagius insertum stultiloquium, recte respondens hominem, cum adiutorio Dei, et gratia posse esse sine peccato; respondeat et ad alia capitula.

7. Sequuntur objecta Pelagio quæ in doctrina Pelagii discipuli ejus referuntur inventa. Adam mortalem factum; qui, sive peccaret, sive non peccaret, moriturus esset.

8. Quoniam peccatum Adæ ipsum solum læserit, et non genus humanum.

9. Quoniam lex sic mittit ad regnum, quemadmodum Evangelium.

10. Quoniam ante adventum Christi fuerunt homines sine peccato.

11. Quoniam infantes nuper nati in illo statu sint, in quo Adam fuit ante prævaricationem.

12. Quoniam neque per mortem, vel prævaricationem Adæ, omne genus hominum moriatur, neque per resurrectionem Christi omne genus hominum resurgat.

13. Posse hominem sine peccato, si velit, esse.

14. Infantes, etsi non baptizentur, habere vitam æternam.

15. Divites baptizatos, nisi omnibus abrenuntient, si quid boni nisi fuerint facere, non reputari illis, neque regnum Dei posse eos habere.

Ad hæc sibi objecta, Pelagius ita respondit: Posse quidem hominem sine peccato esse, dictum est superius de eo. Quod fuerint ante adventum Domini homines sine peccato, dicimus et nos, quoniam ante adventum Christi vixerunt quidam sancte et juste, secundum Scripturarum sanctarum traditionem. Reliqua vero, et secundum ipsorum testimonium, a me dicta non sunt, pro quibus ego satisfacere non debeo, sed tamen ad satisfactionem sanctæ Synodi anathematizo illos qui sic tenent, aut aliquando tenuerint.

Post hanc ejus responsionem Synodus dixit: Ad hæc dicta capitula sufficienter et recte satisfecit³ præsens Pelagius, anathematizans ea quæ non erant ejus.

16. Objectum est Pelagio quod diceret Ecclesiam hic esse sine macula et ruga.

Sed ad hoc objectum vigilantibus circumspicione respondit: Dictum est a nobis ita, quoniam lavacro ab omni macula et ruga purgatur Ecclesia, quam velit ita Dominus permanere.

Ad quod Synodus dixit: Hoc et nobis placet.

17. Deinde objecta sunt de Cælestio, quid in unoquoque capitulo contineat magis secundum sensum quam secundum verba, quæ quidem ille latius exequitur; sed tunc subicere omnia, qui libellum adversus Pelagium dederunt, se non potuisse dixerunt: ergo in primo capitulo libri Cælestii hoc scriptum esse posuerunt, quoniam plus facimus, quam in lege et Evangelio jussum est.

Ad quod Pelagius respondet: Hoc quasi nostrum posuerunt, dictum est vero a nobis secundum Apostolum de virginitate, de qua Paulus dixit: Præceptum Domini non habeo. Synodus dixit: Hoc et Ecclesia recipit.

18. Hinc jam objiciuntur Pelagio alia Cælestii capitula capitalia: In tertio, scilicet, capitulo scripsisse Cælestium, gratiam Dei et adiutorium non ad singulos actus duri, sed in libero arbitrio esse, vel in lege ac doctrina.

19. Et iterum Dei gratiam secundum merita nostra dari. Quia si peccatoribus illam det, videtur esse iniquus. Et his verbis intulisset,

NOTÆ SUAREZ.

¹ Alias sunt.

² Alias propria voce.

³ Alias satisfecit.

propterea, et ipsa gratia in mea voluntate posita est, sive dignus fierem, sive indignus.

20. Si enim per gratiam omnia facimus, quando vincimur a peccato, non nos vincimur, sed Dei gratia, quæ voluit nos adjuvare omni modo, et non potuit.

21. Et iterum ait: Si gratia Dei est quod vincimus peccata, ergo ipsa est in culpa, quando peccato vincimur, quia omnino custodire nos non potuit aut noluit.

Ad ista Pelagius respondit: Hæc utrum Cælestii sint, ipsi viderint qui dicunt ea Cælestii esse. Ego vero nunquam sic tenui, sed anathematizo qui sic tenet.

Synodus dixit: Receptit te sancta Synodus ita verba reprobata condemnantem.

22. In sexto capitulo Cælestii libri, positum objectum est, filios Dei non posse vocari, nisi omnimodo absque peccato fuerint effecti.

23. In septimo capitulo, oblivionem et ignorantiam non subiacere peccato, quoniam non secundum voluntatem veniunt, sed secundum necessitatem.

24. In decimo capitulo, non esse liberum arbitrium, si Dei indigeat auxilio, quoniam in propria voluntate habet unusquisque aut facere aliquid, aut non facere.

25. In duodecimo capitulo, victoriam nostram non ex Dei esse adiutorio, sed ex libero arbitrio, quod inferre dictum est ex his verbis: Nostra est victoria, quoniam propria¹ voluntate arma suscipimus, sicut e contrario nostrum est, quando vincimur, quoniam armari propria voluntate contempsimus.

26. Et de Apostolo Petro posuit testimonium, dixitque nos esse consortes naturæ, et syllogismum facere dicitur, quoniam si anima non potest esse sine peccato, ergo et Deus subjacet peccato, cujus pars, hoc est, anima, peccato obnoxia est.

27. In tertio decimo capitulo dicit, quoniam propter vitia venia non datur secundum gratiam, et misericordiam Dei, sed secundum merita et laborem eorum, qui per penitentiam digni fuerint misericordia.

Illa recitatis Synodus dixit: Quid ad hæc quæ lecta sunt capitula dicit præsens Pelagius monachus? Hoc enim reprobata sancta Synodus, sancta Dei catholica Ecclesia.

Pelagius respondit: Iterum dico, quia hæc et secundum ipsorum testimonium non sunt mea, pro quibus, ut dixi, satisfactionem non

debeo; quæ vero mea esse confessus sum, hoc² recte esse affirmo; quæ autem dixi non esse mea, secundum iudicium sanctæ Ecclesiæ reprobato; anathema dicens omni contravenienti sanctæ catholicæ Ecclesiæ doctrinis. Ego enim in unius substantiæ Trinitatem credo, et omnia secundum doctrinam sanctæ catholicæ Ecclesiæ; si quis vero aliena ab hac sapit, anathema sit.

SENTENTIA CONCILII.

Synodus dixit: Nunc, quoniam satisfactum est nobis, responsionibus præsentis Pelagii monachi, qui quidem piis doctrinis consentit, contraria vero Ecclesiæ fidei reprobata et anathematizata, communionis Ecclesiæ eum esse catholicæ confitemur.

8. Non negata a Pelagio, sed illi objecta notanda sunt.—Hæc est series Actorum illius Concilii, quantum ex allegato libro Augustini colligere potui. Ex quibus imprimis intelliget lector, vera esse quæ de erroribus Pelagii supra c. 13 diximus, nam omnes illi quos ibi recensuimus, in his Actis continentur, quamvis nonnulli alii hic commemorantur, qui ad doctrinam de gratia non spectant, et ideo magna ex parte omissi sunt ab Augustino in aliis locis, in quibus errorum Pelagii mentionem fecit. Oportet autem advertere, in discursu objectionum factarum a censoribus Pelagii, et responsionum ejus, ad cognoscendos errores Pelagii contra divinam gratiam, non tam esse habendam rationem eorum quæ Pelagius dixisse negat, quam eorum quæ illi objecta sunt; quoniam evidentissimum est subdole multa negasse, quæ et antea dixerat, et postea pertinaciter docuit, ut Augustinus illum convincit, et constat ex his quæ recensentur a numero 7 usque ad 14, in quibus continentur errores circa effectus peccati Adæ, et originale peccatum, et corruptionem in humana natura per illud peccatum factam, quæ Pelagius anathematizavit, et negavit se illa dixisse, cum tamen illud fuerit semper quasi fundamentum hæresis ejus. Idemque cerni potest in erroribus 18 et sequentibus usque ad 27. Ideoque licet in 18 illi fuerit objectum quod dixerit cum Cælestio, gratiam Dei non ad singulos actus dari, sed in libero arbitrio esse, vel in lege, ac doctrina; et ipse postea propositionem illam cum aliis generaliter neget et anathematizet, et consequenter verum gratiæ spiritum confi-

¹ Alias ex propria.² Alia hæc.

teri videatur, ut illum redarguit Augustinus; nihilominus putandum non est illum a priori errore et amphibologia verborum recessisse, cum ipsarum rerum eventus, tam in hoc errore quam in aliis, contrarium evidenter ostenderit, ut ex superius dictis manifestum est. Ideo merito dixit Augustinus, lib. 2 de Peccato originali, cap. 8: *Pelagius fefellit iudicium Palæstinum, et propterea ibi videtur esse purgatus: Romanam vero Ecclesiam, ubi eum esse notissimum scitis, fallere usquequaque non potuit, quamvis et hoc fuerit utrumque conatus, sed, ut dixi, minime valuit: et Beda, lib. 1 in Esdras, cap. 4, sic inquit: Pelagius, in Concilio Palæstino, hæresim suam, qua gratiam Dei acerrime impugnabat, confessione et scripto, non ex animo anathematizavit, ne ipse, a catholicis sacerdotibus anathematizatus, locum docendi in Ecclesia, ac suum errorem seminandi facultatem amitteret.*

9. *Duo distinguenda: Palæstini Concilii Patres de gratia recte sensere. — De iudicio circa Pelagii personam, etc.* — Tandem in illo Concilio duo sunt accurate distinguenda: unum pertinet ad doctrinam ipsam secundum se, aliud ad Pelagii damnationem, vel absolutio-nem. Quoad primum, satis manifestum ex Actis est, quam sincere de gratia Dei scripserint Patres illius Concilii; quod quidem divus Augustinus in toto illo libro enixe defendere ac ostendere conatur; non quia Concilium illud, licet in doctrina errasset, præiudicium posset catholicæ veritati asserre, cum fuerit tantum provinciale, sed quia revera non erravit, sed constantissime docuit fidei dogmata, et contraria anathematizavit. Et hoc exponere magni momenti ab Augustino reputatum est; tum propter auctoritatem Provincialis Concilii, quæ, licet non sit infallibilis, est magna, ut eapite sequenti dicemus; tum etiam quia illorum Patrum iudicium ostendit consensum antiquissimum universalis Ecclesiæ, tam orientalis quam occidentalis, in vera doctrina de gratia Dei tradenda; ideo enim insurgentem hæresim statim illi Episcopi communi consensu damnarunt, quia contrariam doctrinam, ut in Scriptura expressam, et a suis Patribus receptam, tanquam catholicam tenebant. Circa factum autem ad personam Pelagii pertinens, videri possunt Patres illius Concilii simplicius ac brevius processisse, quam negotii gravitas postularet, nam sine ullo examine fidem illius dictis adhibebant, etiam in his quæ ad dicta vel facta præterita pertinebant. Sed in hoc facile potest ab hominibus errari, quia non ad

doctrinam, sed ad prudentiam et humana iudicia pertinet. Nemo tamen propterea iudicare audebit Patres illius Concilii imprudenter egisse, quia vel assumpserunt onus iudicandi de doctrina, non tamen de persona, nisi quatenus in illo Concilio pertinaciam ostenderet, vel potuerunt legitimæ rationes tunc occurrere, quæ ad suaviter procedendum eum Pelagio eos moverint, si secum in doctrina consentiret. Et ita Augustinus ubique illos Patres in facto excusat, in doctrina vero plurimum laudat, atque commendat.

CAPUT IV.

DE CONCILIIIS AFRICANIS ET EPHESINO, QUÆ CONTRA PELAGIUM PRO DEI GRATIA PUGNARUNT.

1. Post Palæstinos Episcopos, primum omnium fuerunt solliciti pro gratia Dei tuenda contra Pelagium, Episcopi Africani, qui varia Concilia provincialia in hunc finem congregarunt; et occasio fortasse fuit, quia sicut Pelagius in Oriente, ita Cœlestius in Africa, priusquam in aliis locis, suum errorem seminare cœpit, et forte apertius ac liberius quam Pelagius, ut ex Actis Synodi Palæstini nuper relatis conjectare licet; et quamvis non omnium Conciliorum Africanorum Acta vel Canones habeamus, omnia nihilominus, quorum memoriam invenimus, recensebimus, ut de serie ac traditione omnium temporum magis constet. Primum ergo fuit quoddam Concilium Carthaginense, quod paulo ante Diospolitannum congregatum creditur; illius tamen exemplar non extat, illud vero indicant Patres Africani in Epist. ad Innocent., quæ est 90 apud August., eum dicunt: *Factum est ut recensendum peteremus, quid ante ferme quinquennium super Cœlestii nomine hic apud Ecclesiam Carthaginensem fuerit agitatum, utique in alio Concilio, quod primum omnium super hac causa congregatum esse dicimus. Cujus definitio seu iudicium statim in summa refertur in eadem Epistola, cum adjungitur: Quo recitato, sicut ex sequentibus advertere poterit Sanctitas Tua, quamvis iudicatio manifesta constaret, quia illo tempore Episcopali iudicio excisum hoc vulnus tantum ab Ecclesia rideretur, nihilominus tamen communi deliberatione censuimus, hujusmodi persuasionis auctores anathematizare, nisi hæc apertissime anathematizaverint.*

2. *Dogmatis, non dogmatizantis in primo Concilio Carthaginensi est censura. — Verba*

secundi Concilii Carthaginensis. — Ex quibus verbis intelligi potest, in illo primo Concilio non fuisse actum contra personam Cœlestii, sed contra pestiferum dogma, hoc enim indicant verba illa : *Quamvis illo tempore Episcopali judicio excisum hoc vulnus tantum ab Ecclesia videretur* ; nam *vulneris* nomine hæreticum dogma significatur, et illa dictio *tantum* excludit auctores erroris, ideoque subditur, nihilominus in posteriori Concilio deliberatum esse, *hujusmodi persuasionis auctores anathematizare*. Supponitur ergo in priori Concilio non esse actum contra auctores, sed contra dogma ipsum ; nam quia tunc auctores aperte non prodebantur, convenientius iudicatum est errorem damnare, et de persona tacere, sicut Augustinus lib. 2 *Retract.*, cap. 33, de seipso contra illam hæresim scribere incipiente, ait : *In his autem libris tacenda adhuc arbitratus sum nomina eorum, sic eos facilius posse corrigi sperans* ; unde cum paulo post ibidem subdit Cœlestium, Pelagii discipulum, *jam propter tales assertiones apud Carthaginem in Episcopali judicio excommunicationem meruisse*, non loquitur, ut existimo, de hoc primo Concilio, sed de secundo, a quo missa fuit illa Epist. 90 ad Innocentium ; ibi enim anathematizatus fuit Cœlestius, non in priori Concilio, ut ex dictis verbis constat ; nec refert quod de illo Episcopali judicio, in quo excommunicatus fuit Cœlestius, ait Augustinus, *ubi ego non interfui*, quia etiam hoc convenit illi posteriori Concilio ; nam inter patres qui, in principio illius Epistolæ, ut auctores ejus recensentur, non numeratur Augustinus. Numerantur autem solum 67 Episcopi in primo tomo Conciliorum inter Epist. 24 et 25 Innocent., et in primo tomo Pontifical. Epist. post 30. In operibus autem Augustini numerantur 68 addito quidem Quodvultdeo ; apud Baronium autem, anno 416, num. 5, leguntur 77. Sed opinor litteram mendosam, nam pro sexaginta scriptum est septuaginta. Itaque Augustinus ibi non interfuit, sed in Concilio Milevitano, paulo post congregato, ut videbimus ; neque de primo Concilio Carthaginensi aliquid aliud scriptum, vel memoria proditum, præter ea quæ in dicta Epistola referuntur, neque alibi mentionem ejus fieri reperimus.

3. *Secundum Concilium Carthaginense et ejus gesta referuntur.* — *Baronii sententia.* — Secundum Concilium Carthaginense, congregatum contra eundem errorem, est illud ipsum quod Epistolam illam ad Innocentium scripsit, quæ inter Epistolas Augustini est 90, quod

anno 416 coactum esse, optime conjectat Baron. eodem anno in principio. Unde etiam recte colligit prius Concilium, de quo diximus, anno 412 celebratum fuisse. Hujus autem Concilii gesta non extant, præter dictam solum Epistolam, et fragmenta quædam quæ refert Augustinus, lib. 2 de Peccato originali, cap. 2 et sequentibus, quæ desumpsisse dicit *ex gestis Ecclesiasticis Carthaginensibus*. Quamvis autem Baronius illa gesta tribuat priori Concilio Carthaginensi, mihi potius videntur ad hoc posterius pertinere ; nam in illis nihil aliud agitur nisi de coarguenda et vincenda persona Cœlestii, quod in posteriori potius Carthaginensi Concilio, quam in priori, factum esse jam ostensum est : unde, ex sequentibus capitulis, conjectare licet paulo post illud Concilium Cœlestium Romam adiisse, ut absolutionem a censura sibi in eodem Concilio imposita impetraret ; id enim sine dubio post hoc posterius Concilium, quod in fine Pontificatus Innocentii coactum est, contigit ; nam et hoc Concilium ad Innocentium de persona Cœlestii scripsit, non autem illud prius. Item, quia Cœlestius jam non cum Innocentio, sed cum ejus successore Zosimo, de obtinenda absolutione egit, quam tamen obtinere non potuit, etiamsi Innocentii litteris ausus non fuerit resistere, ut ibidem Augustinus, cap. 7, dicit. In hoc ergo Concilio, præcipue de damnatione Cœlestii actum est, et contra illum duo præcipua dogmata fidei videntur fuisse stabilita, quæ in fine illius Epistolæ 90 recapitulantur. Unum est, naturam humanam ad vincenda peccata et servanda divina mandata sibi sufficere non posse sine vera gratia Dei, qua Christiani sumus, et quam orando petit Ecclesia, et Sanctorum orationibus, evidenter declaratur. Aliud est de peccato originali, ratione cujus etiam parvuli baptizantur in remissionem peccatorum. Quæ duo principia totum Pelagii errorem radicitus evellunt.

4. *Milevitanum Concilium quo tempore celebratum.* — Tertium principale Concilium eodem fere tempore, id est, eodem anno, et post paucos menses (ut recte deducit Baronius) in Africa congregatum, fuit Concilium Milevitanum, cujus et canones habemus in primo tomo Conciliorum, et Epistolam ad Innocentium quæ est 92 Augustini. Est autem advertendum, in primo tomo Conciliorum solum referri Acta unius Concilii Milevitani, quod celebratum dicitur anno Domini 402, et in eo ponuntur in principio novem canones ad materiam de Gratia pertinentes, et deinde alii

practici, seu morales adjunguntur. Recte tamen et erudite advertit Baronius, Concilium illud Milevitanum, quod ad Innocentium Pappam Epistolam synodalem scripsit, adeo antiquum esse non posse, quia Concilium Milevitanum, quod ad Innocentium scripsit, post secundum Concilium Carthaginense, in præcedenti paragrapho relatam, celebratum est, ut ipsummet in sua Epistola declarat, quam ita concludit: *Hæc ad sanctitatem tuam de Concilio Numidiæ scripta direximus imitantes Carthaginensis provinciæ Episcopos nostros, quos ad Sedem Apostolicam, quam beatus illustras, de hac causa scripsisse comperimus.* Præcesserat ergo Carthaginense, quamvis per breve tempus, ut inde fit verisimile, quod utriusque Concilii Epistolam, simul, et per eundem nuntium accepit Pontifex, ut ipse in responsione ad Concilium Milevitanum testatur. At Concilium Carthaginense non potuit celebrari anno Domini 402, quia, ut supra vidimus, ante quinquennium fuit aliud Concilium Carthaginense celebratum, contra errores Pelagii et Cœlestii, quod non potuit contingere quinquennio ante annum 402, id est, anno Domini 397, quia tunc nondum fuerat exortus pelagianus error, aut vix nomen Cœlestii hæresiarchæ auditus fuerat, ut ex historiis est notissimum, et supra est notatum. Ergo nec Concilium hoc Milevitanum potuit anno illo 402 celebrari.

5. *Ex Baronio constat duo fuisse Concilia Milevitana.* — Unde colligit Baronius duo fuisse Concilia Milevitana coacta, unum illo anno 402, aliud post quatuordecim annos, ut ipse late probat, dicto anno 402, 412 et 416; nam quod aliquod Concilium Milevitanum fuerit anno 402, vel circa, celebratum, negari non potest. Ita enim habetur in omnibus editionibus Conciliorum, et Baronius id ut certum supponit, et colligit ex anno consulatus imperatorum Theodosii et Honorii, qui in principio signatur, idemque potest ostendi ex Concilio Africano, ubi compendium hujus Concilii Milevitani ponitur post caput vigesimum quintum. Et inde etiam intelligi potest nihil in illo Concilio actum esse de gratia Dei, vel de erroribus Pelagii, quia ibi nulla ejus rei mentio fit, sed solum confirmantur Acta præcedentium synodorum, et quædam causæ episcopales tractantur, et aliquæ leges ecclesiasticæ præscribuntur, quæ omnia cum his quæ de Concilio Milevitano referuntur in tomo primo Conciliorum optime consonant, seclusis canonibus de gratia Dei definientibus, qui (ut sta-

tim videbimus) in eodem Concilio Africano alteri posteriori Concilio Milevitano tribuuntur; quod etiam confirmatur optime illa conjectura, quod, eo anno 402, vix pelagiana hæresis pullulare incœperat; non est ergo verisimile tunc fuisse editos canones Milevitanos contra Pelagium.

6. *Diversitas utriusque Concilii.* — Hinc ergo aperte concluditur, post illum primum Milevitanum Concilium fuisse aliud congregatum, quod Epistolam synodalem ad Innocentium scripsit, nam illa Epistola scripta est post seminatam in Africa per Cœlestium pelagianam hæresim, et sex fere annis post primam synodum Carthaginensem contra eandem Cœlestii doctrinam congregatam. Unde probabilissime conjectat Baronius, fuisse hoc Concilium Milevitanum coactum anno Domini 416, quod etiam ex Consulibus notatis in Epistola Innocentii ad idem Concilium optime confirmat. Deinde, Episcopi qui illam Epistolam scripserunt, non sunt iidem qui priori Concilio Milevitano adfuerunt; nam in priori dicitur adfuisse Xantippus, Numidiæ Primas; in hoc vero posteriori alius fuit Primas Numidiæ, et Sylvanus nominatur. Item in priori numeratur Nicetius, Mauritanie Primas; de illo vero nulla mentio fit in posteriori Concilio. Unde conjectare possumus Valentinum, qui secundo loco in Epistola ponitur, fuisse tunc Mauritanie Primatem. Denique in priori Concilio, primo loco recensetur et loquitur Aurelius Carthaginensis, tanquam Concilio præsidens; in hoc vero posteriori ponitur Sylvanus primo loco, et deinde Valentinus, et postea Aurelius, unde colligi videtur (licet oppositum dicat Baronius) Aurelium in hoc Concilio non præsedisse; quod maxime confirmat superscriptio responsalis Epistolæ Sancti Innocentii, quæ sic habet: *Innocentius Sylvano seni, Valentino et cæteris, etc.* Non est enim verisimile omittendum fuisse Aurelium, sed potius in præcipuo loco numerandum, si esset superior cæteris, et præses Concilii; unde ille Aurelius, vel non erat famosus Carthaginensis Episcopus, nec ille interfuit huic Concilio posteriori, vel certe aliqua speciali ratione alii duo Primates Numidiæ et Mauritanie ei tunc prælati sunt; cum autem hanc rationem vix cogitare possim, ad illud prius majori conjectura ducor.

7. *Dubium.* — *Baronius affirmat. Oppositum arridet.* — Unde ulterius dubitari potest an hoc Concilium posterius fuerit generale totius Africae, sicut fuit prius, ut ex Actis ejus constat. Baronius enim, anno 402, num. 55, affirmat,

et ideo consequenter dicit utrique unum eundemque Aurelium præfuisse, quod adeo clarum censet, ut nulla probatione id confirmet. Ex Actis autem videtur satis probabiliter sequi contrarium, quia in posteriori Concilio Milevitano non præfuit Aurelius, ut ostensum est; ergo signum est non fuisse generale totius Africae, nam eadem fuisset præsidendi ratio, cum Aurelius Carthaginensis adhuc viveret, et prærogativa illi præsidendi in Conciliis generalibus totius nationis Africanæ, etiamsi extra Carthaginem fierent, non esset variabilis, sed dignitati semper adhæreret. Deinde, potest hoc confirmari ex his quæ paulo ante, cum eodem Baronio, diximus de Concilio Carthaginiensi, quod proxime, et eodem anno celebratum est; quia non omnes Episcopi, qui uni Concilio adfuerunt, in alio inventi sunt; ergo signum est neutrum illorum fuisse generale totius nationis, sed prius fuisse coactum ex Episcopis solius regionis Carthaginensis, seu totius territorii Primatus Carthaginensis Ecclesiæ; aliud vero ex Episcopis Numidiæ et Mauritaniae. Consequentia per se clara est. Antecedens vero probatur ex citatis verbis Epistolæ Concilii Milevitani ad Innocentium: *Hæc ad Sanctitatem Tuam de Concilio Numidiæ scripta direximus, imitantes Carthaginensis provinciae Episcopos nostros*, etc. Nam his verbis clare significant, et in præcedenti proximo Concilio Carthagine coacto solum adfuisse Episcopos Primatus Carthaginensis, et illos non adfuisse in hoc Concilio Numidiæ, seu Milevitano, ac subinde non fuisse generale totius Africae.

8. *Provinciale fuisse amplius probatur.* — Deinde, cum ostensum sit hæc duo Concilia eodem anno fuisse celebrata, non est verisimile Episcopos omnes, qui Carthagine fuerant congregati, iterum Milevium cum cæteris convenisse; quin potius, cum in Epistola Carthaginensis Concilii sexaginta septem Episcopi numerentur, in altera Concilii Milevitani solum sexaginta unus recenseantur, verisimile non est plures Episcopos in aliquo illorum Conciliorum interfuisse quam ibi numerentur, cum præterea, et sine adjectione alienius particulæ in hanc alios omitti, illi numerentur; neque sit ulla ratio, vel indicium ad fingendam in aliquo illorum Conciliorum majorem Episcoporum multitudinem. Inter Episcopos autem utriusque Concilii magna est varietas in nominibus, et in personis aliquibus cognoscitur aperta differentia; nam Augustinus non fuit in Concilio Carthaginiensi, adfuit autem in Milevitano, utrumque videtur clarum de Alipio, et

Possidio, et per se est credibilius de omnibus, quorum nomina sunt diversa. E contrario vero, licet aliqui in nomine conveniant, non est necesse ut conveniant in persona, sicut de Aurelio supra dicebamus; nam qui primo loco ponitur in Epistola Carthaginensis Synodi, fuit sine dubio Primas Carthaginensis Ecclesiæ; qui autem tertio loco ponitur in altera Epistola, non videtur fuisse tantæ dignitatis, sed aliquis Episcopus provinciae Numidiæ, qui postea cum Augustino, et aliis tribus Episcopis ejusdem provinciae scripserunt familiarem Epistolam ad eundem Innocentium, quæ est 95 inter Epistolas Augustini. Hæc ergo duo Concilia, Carthaginense et Milevitanum, non videntur fuisse generalia totius Africae, sed provincialia, ut significant aperte dicti quinque Episcopi in dicta Epistola 95 Augustini ad Innocentium, dicentes: *De Conciliis duobus provinciae Carthaginensis atque Numidiæ, ad Tuam Sanctitatem a non parvo Episcoporum numero scriptas litteras misimus*, etc. Ita ergo apertius constat differentia inter duo Concilia Milevitana; nam prius generale fuit totius Africae, posterius autem provinciae Numidiæ.

9. *Difficultas proponitur.* — Ex quibus tandem concluditur octo illos canones de gratia Dei, qui ex Concilio Milevitano referuntur, non fuisse editos in priori Concilio Milevitano, anno 402, prout in primo tomo Conciliorum referuntur, quia nihil de gratia Dei nec de errore Pelagii in eo actum est, ut vidimus, et recte probat Baronius. Unde fieri videtur consequens ut illi canones fuerint in hoc posteriori Concilio Milevitano confecti, ut concludit idem Baronius anno 416, num. 10. Occurrit vero in hoc puncto non prætermittenda difficultas, quia in Concilio Africano sub Bonifacio, et post Synodum 7, Carthagine celebrato, ante cap. 76 hic titulus proponitur: *Concilium contra heresim Pelagii et Cælestii*, etc., et statim subjungitur: *Gloriosissimis Imperatoribus Honorio XII et Theodosio VII, Augustis Consulibus, kalendis Maii Carthagine in secretario basilicæ Fausti, cum Aurelius Episcopus in universali Concilio consedisset, adstantibus diaconis, placuit omnibus Episcopis (quorum nomina et subscriptiones indictæ sunt) in sancta Synodo Ecclesiæ Carthaginensis constitutis, ut quicumque dixerit, Adam primum*, etc., et subjunguntur consequenter octo illi canones, qui nunc habentur in Concilio Milevitano veteri (ut sic dicam); ergo illi canones non in aliquo Concilio Milevitano, sed in aliquo Carthaginiensi editi sunt: nam licet Conci-

lium illud, quod universale dicitur, utique totius Africae, dici etiam possit Concilium Carthaginense, id est, Carthagine celebratum, nihilominus non fuit aliquod ex duobus supra memoratis, sed quoddam aliud generalius tempore Zosimi congregatum, quod Africanum appellat Augustinus Epistola quadragesima septima, ubi dicit Concilium illud ad Zozimum Papam scripsisse, et ab illo habuisse rescriptum ad totius Orbis Episcopos missum, cuius idem Augustinus meminit Epistola 157, et de eodem Concilio loquitur Prosper ad 8 objectionem Gallorum, cum ait: *Et cum ducentis quatuordecim sacerdotibus, quorum constitutiones contra inimicos gratiae Dei totus mundus amplexus est, veraci professione, quemadmodum ipsorum habet sermo, dicamus, Gratiam DEI per JESUM CHRISTUM Dominum nostrum non solum ad cognoscendum, verum etiam ad faciendum justitiam nos per singulos actus adjuvare.* In neutro enim priorum Conciliorum tantus fuit numerus Episcoporum. De eodemque Concilio loquitur libro contra Collatorem, capite decimo, cum ait: *Erraverunt ducenti quatuordecim sacerdotes, qui in Epistola, quam suis constitutionibus prætulerunt, ita Apostolicæ Sedis Antistitem, B. Zosimum sunt allocuti: Constituimus in Pelagium, atque Cælestium, etc.* Priora enim Concilia Carthaginensia et Milevitana non potuerunt ad Zosimum scribere, cum vivente Innocentio inchoata et finita sint, et ad illum scripserint. Hoc ergo fuit aliud Concilium tempore Zosimi congregatum, quod ad Zosimum scripsit, ut ex testimonio Prosperi satis probatur, licet Epistola non extet. Cum autem ait Prosper Patres illius Concilii Epistolam illam *suis constitutionibus* prætulisse, per constitutiones illos canones octo contra Pelagium intelligere videtur, quos Zosimus probavit, ut infra in eodem libro, cap. 41, significavit, dicens Zosimum machinas Pelagianorum fregisse, *Quando Africanorum Conciliorum decretis sententiæ suæ robur adnexuit.* Denique quod illud Concilium Carthaginense fuerit, et sub eisdem Consulibus, expressius tradidit idem Prosper in Chronico, dicens: *Quibus Consulibus, Concilio apud Carthaginem habito, ducentorum decem et septem Episcoporum ad Pontificem Zosimum synodalia decreta perlata sunt, quibus probatis, per totum mundum hæresis pelagiana damnata est.* In quo parva est diversitas in numero Episcoporum, sed facile potuit mendum in altero loco irrepere, et fortasse hunc numerum ducentorum decem et septem Episco-

rum quispiam sumpsit ex Concilio Africano, ubi in Epistola ad Bonifacium totidem numerantur, sed illud fuit aliud Concilium Carthagine etiam celebratum tempore Bonifacii, in quo multa ex prioribus Conciliis Africanis recapitulata sunt.

10. *Prima difficultatis solutio.* — Ad hanc difficultatem, imprimis dicimus parum referre, ad illorum canonum auctoritatem, quod in Milevitano vel Carthaginensi Concilio sint editi, dummodo constet in aliquo legitimo Concilio decretos fuisse; imo, cum dictum Carthaginense Concilium nationalè seu generale totius Africae fuerit, major aliqua inde illis accrescit auctoritas, cum dixerimus Milevitanum tantum fuisse provinciale, quamvis addita confirmatione Apostolicæ Sedis utriusque Concilii sit æqualis certitudo. Accedit quod doctrina illorum canonum eadem est cum doctrina Epistolæ Milevitani Concilii ad Innocentium, et tota reducitur ad explodendos errores, quibus et peccatum originale, et necessitas gratiæ negatur, et extollitur potestas liberi arbitrii ad vivendum sine peccato, et ita commendatur status hominis post lapsum Adæ, ut in eo dicantur esse homines ita innocentes, ut non possint veraciter dicere: *Dimitte nobis debita nostra;* e contrario vero status hominis ante peccatum ita deprimitur, ut in eo asseratur fuisse mortalis, etiam ante peccatum. Solum ergo est diversitas, quia in Epistola solum doctrina vera traditur; in illis vero canonibus contrarii errores distincte refelluntur, et anathemate feriuntur.

11. *Secunda solutio.* — Adde denique fieri potuisse ut illi canones prius fuerint editi in Concilio Milevitano provinciali, et postea fuerint repetiti in Concilio Carthaginensi, quod sentit Baronius anno 418, num. 24, et videtur indicari a Prospero, supra dicente Zosimum sententiæ suæ robur *Africanorum Conciliorum decretis adjunxisse;* ideo enim videtur loqui in plurali, quia decreta illa in duobus Africanis Conciliis edita vel probata fuerant. Sed in illa locutione non solum illa Concilia, sed etiam superiora comprehenduntur. Nec satis ostendi seu probari potest, illos canones in aliquo Concilio Milevii coacto, fuisse primum editos; nam sicut prius irrepsit error inserendo illos canones in Concilio Milevitano primo, seu antiquo, ita nunc incertum est ex quo alio Concilio Africano desumpti sint, ut ibi insererentur. Aliunde vero, testimonio Concilii Africani, habemus illos fuisse in Concilio Carthaginensi lectos et probatos,

et ex modo quo id refertur, ibi etiam fuisse editos significatur. Quod autem prius jam fuerint editi in alio Concilio Milevitano, nullibi asseritur, nisi ubi per errorem inserti sunt. Est autem probabilis conjectura, errorem illum inde ortum fuisse, quod duo Concilia ejusdem nominis ac civitatis, et sub eodem Pontifice coacta, facile potuerunt per ignorantiam in unum confundi, et illi dictos canones attribui; unde, cum postea intellectum sit duo fuisse Milevitana Concilia, et non fuisse in antiquiori editos, per conjecturam posteriori attributi sunt. Sed, ut dixi, hoc non minuit istorum canonum auctoritatem; satis enim est si constat ab aliquo Concilio provinciali vel nationali editos, et a Pontifice confirmatos fuisse.

12. His vero non obstantibus, aliqui moderni illorum canonum auctoritatem in dubium revocarunt. Primo, quia non satis constat fuisse in aliquo Concilio editos, ut ex discursu facto colligitur, unde suspicantur, vel omnes, vel aliquos eorum, ex Gennadio, libro de Ecclesiast. dogmat., fuisse desumptos, et per errorem alicui Concilio attributos. Secundo, quia, etiam de confirmatione Sedis Apostolicæ non constat. Nam Concilium Milevitanum solum legitur confirmatum in Epistola vigesima quinta Innocentii ad illud. At Innocentius non confirmat illos canones, neque illorum mentionem facit; sed confirmat in speciali duos articulos, unum de peccato originali, alium de necessitate divini auxilii ad vitanda peccata, de quibus solis idem Concilium, scribens ad Innocentium antecedentem Epistolam, mentionem fecerat; et quamvis in Epistola Cælestini Papæ, capite tertio, dicatur Apostolicam Sedem confirmasse definitiones Conciliorum Africanorum contra Pelagium, et in sequentibus capitibus aliqui ex dictis canonibus referantur, non tamen omnes, sed quinque primi; omittatur autem alii tres, qui magis in dubium revocantur.

13. Sed hæc novitas nullatenus audienda est, est enim sine fundamento ad introducendam speciem opinionem circa impeccantiam justorum excogitata. Non potest tamen a gravi temeritate exuari; nec est major ratio dubitandi de tribus ultimis decretis quam de primis; tum quia omnes habentur in dicto Concilio Africano, et non est major ratio tribuendi Gennadio hoc quam illos; tum etiam quia communis consensus et traditione recepta sunt, et ab omnibus theologis ut infallibilis auctoritatis allegantur: tum præterea, quia

frustra et sine ullo fundamento tribuuntur Gennadio, cum potius ex discursu illius libri, a capite vigesimo quarto per multa, doctrinam illam ex Epistola Cælestini et ex Conciliis Africanis, et ex Augustino decerptam esse manifeste constet: tum denique quia Augustinus sæpe totam doctrinam illorum canonum, ut definitam in Conciliis Africanis nobis tradit, ut patet ex libro de Bono perseverant., capite secundo, et ex Epistola nonagesima quinta, quæ est quinque Episcoporum ad Innocentium; et de tribus ultimis canonibus specialiter videbimus in libro nono, capite octavo. Quocirca, licet non omnino sit certum, in quo Concilio Africano illi canones editi sint, satis est quod constet fuisse in aliquo, seu in altero ex duobus editos, vel certe quod prius in Milevitano editi sint, et postea in Africano pleniori, et præsidentibus legatis Apostolicis fuerint confirmati. Ex quo etiam, et ex Prospero, satis de confirmatione constat; et quando de expressa confirmatione non constaret, satis essent perpetua traditione, et generali consensu canonizati.

14. *In tribus Conciliis Carthaginensibus et quarto Milevitano vera de gratia doctrina contra Pelagium stabilita est. — Africanum additur.* — Ex his ergo habemus quatuor Concilia, tria Carthaginensia, et unum Milevitanum, in quibus vera de gratia doctrina contra Pelagium definita est; quibus addi potest quintum sub Bonifacio, quod generale nomen Africani retinuit, licet Carthagine etiam fuerit coactum, ut tradit Baronius anno 419, num. 59. Nam in eo, præsentibus etiam legatis Apostolicis, priora decreta lecta et confirmata sunt. Et de illo videtur loqui Augustinus Epistol. 47, cum post Concilium sub Zosimo addit: *Et quod posteriori Concilio plenario totius Africæ contra ipsum errorem breviter constituimus.* Quibus omnibus (ut visum est) accessit semper Apostolicæ Sedis auctoritas, quæ, prædicta approbando Concilia, eorum sententias suas fecit, ut dixit Cælestinus (vel certe Prosper) in Epistola ad Episcopos Gallie, cap. 23.

15. Et ob hanc Africanorum Episcoporum in detestando illo errore sedulitatem, et fidem cum Apostolica Sede unionem, merito scripsit idem Prosper in carmine de Ingratis, cap. 2:

*Tu causam fides flagrantius Africa nostra
Exqueris; tecumque sumum jungente viorem
Juris Apostolice subis, fera viscera belli,
Confusus, et lato præteritis limite victos,
Convocare tu de cunctis uribus almi*

*Pontifices, geminoque senum celeberrima cætu
Decernis quod Roma probet, quod regna sequantur.
Nec sola est illic synodorum exerta potestas :
Ceu quos non possent ratione evincere nostri,
Vi premerent : discussæ artes, virusque relectum est
Hæretici sensus : nullumque omnino relictum,
Docta fides quod non dissolveret, argumentum.
Condita sunt, et scripta manent, quæ de cataractis
Æterni fontis fluxere undante meatu,
Et tercentenis procerum sunt edita linguis.*

Et infra :

*An alium in finem posset procedere sanctum
Concilium, cui dux Aurelius, ingeniumque
Augustinus erat, etc.*

In quibus dum geminum cœtum commemorat, loqui videtur de duobus Conciliis quæ ad Sedem Apostolicam scripserunt, Carthaginensi et Milevitano : in quorum altero dux, id est, præses fuit Aurelius ; in altero vero Augustinus, licet non dux jurisdictione et dignitate, fuit tamen ingenio, magisterio et doctrina. Vel certe quia numerum trecentorum procerum indicat in his Conciliis adfuisse, fortasse ab illis verbis, *Condita sunt*, etc., loquitur de tertio Concilio Carthaginensi ampliori, et nationali, in quo et scripta leguntur præcipua decreta contra Pelagium, Præsidente Aurelio et præsentate Augustino, tanquam totius cœtus ingenio. Ponit autem trecentorum numerum, vel ratione carminis ponendo numerum magnum certum pro incerto, vel perfectum pro imperfecto, quomodo numerus excedens ducentennum trecentenus dici potest ; vel quia, præter 214 Episcopos, verisimile est ibi adfuisse plures sacerdotes, qui numerum illum explerent, vel denique quia cum illis 214 Patribus conjungit præteritorum Conciliorum Patres, qui in eandem doctrinam conspiraverant, vel forte jam in Concilio Milevitano eosdem canones ediderant, ut diximus.

16. *Ephesinum Concilium sequitur relata.* — His Africanis Conciliis adjungimus Ephesinam Synodum, quæ paulo post tempora illorum Conciliorum celebrata est, sub annum Domini 430, et una ex quatuor primis generalibus fuit, et in ea superiorum Conciliorum doctrina confirmata est, et Pelagii hæresis damnata, Deo ita providente ad majorem Pelagii et Cœlestii confusionem, ne illorum damnationi universalis Concilii auctoritas deesse videretur. Quoniam vero synodus Ephesina non contra Pelagium, sed contra Nestorium celebrata est, ut intelligatur quid, et qua occasione contra Pelagianos egerit, sciendum est ex Cassiano, libro quinto et septimo de Incarnatione, Nestorianam hæresim in Pelagio prius

fuisse conceptam, et e converso errorem Pelagii ex Nestoriano fuisse deductum. Refert enim Cassianus Pelagium sensisse, Christum prius fuisse purum hominem, et ob vitæ innocentiam, quam suo arbitrio sine ullo peccato conservavit, deificatum fuisse, indeque progressum Pelagium esse, ut diceret, etiam alios homines sine peccato vivere posse, si velint. Idemque sensit Prosper in epitaphio Nestorianæ et Pelagianæ hæresis, ante earmen de Ingratis dicens :

Nestoriana lues successi Pelagianæ.

Quæ tamen est utero prognerata meo.

Infelix miseræ genitrix, et filia natæ,

Prodivi ex ipso germine, quod peperit.

Nam fundare arcem meritis prior orsu superbis,

De capite ad corpus ducere opus volui.

17. *Hæreticorum errores ab Ephesino Concilio anathematizantur.* — Nestoriani Pelagianis favebant. — Hinc ergo factum est ut, cum ante Ephesinam Synodum Julianus et alii Pelagiani ab Ecclesia essent ejecti, Constantinopolim ad Nestorium migraverint, graves querelas contra Cœlestinum Papam ferentes, qui a Nestorio benigne recepti sunt, ut constat ex Epistolis quas pro illis ad Cœlestinum scripsit, et ex rescripto Cœlestini ad ipsum, in quo eum ut hæreticorum factorem reprehendit, apud Baronium, ann. 430, num. 3, u que ad 24. Perseverantibus ergo Nestorianis in sui erroris pertinacia, etiam Pelagianis consentire cœperunt, saltem quoad articulum de originali peccato et de primi parentis lapsu, atque ita Pelagiani et Nestoriani Episcopi se mutuo fovebant. Quamobrem, in fine Concilii, post Nestorianorum damnationem, etiam Pelagiani Episcopi et eorum errores specialiter damnati sunt, ut in Epistola synodica Concilii Ephesini ad Cœlestinum Papam, quæ est 12 inter Epistolas synodales Cyrilli, et habetur in novo Concilio Ephesino, tom. 4, cap. 17, his verbis declarant illius synodi Patres : *Porro autem, perlectis iis in sancta Synodo, quæ de impiorum Pelagianorum, Cœlestii, Pelagii, Juliani, Perfidii, Flori, Marcellini, Oxentii, reliquorumque eadem cum illis sentientium depositione a Pietate Tua istic decreta et constituta sunt, judicavimus et nos quoque ea solida firmaque permanere debere, sumusque omnes ejusdem sententiæ.* Et hac ratione dixit Gregorius, libr. 5, epistol. 44, alias cap. 114, in Ephesina Synodo damnatum fuisse Pelagium ; et libr. 7, epistol. 47, inde coarguit quorundam hæreticorum calumniam, qui Acta Ephesinæ Synodi, insertis quibusdam capitibus hæresis Pela-

gianæ, corrumpere tentarunt, dicens: *Cum Pelagius et Cælestius in eadem Synodo damnati sint, quomodo poterant illa capitula recipi, quorum damnantur auctores?* Prosper etiam, in dicto epitaphio, una sententia utramque hæresim in illa synodo fuisse extinctam dicit, dum Nestorianam hæresim introducit dicentem:

*Me tamen una dedit victam sententia letho:
Illa volens iterum surgere, bis cecidit,
Mecum oritur, mecum moritur, mecumque sepulchrum
Intrat, et inferni carceris ima subit.*

CAPUT V.

DE ALIIS CONCILIIS CONTRA RELIQUIAS PELAGIANORUM, ET ALIOS GRATIE HOSTES CELEBRATIS.

1. *Arausicanum Concilium, ejus doctrina, atque confirmatio.* — Quamvis Pelagianus error, tantæ molis auctoritate prostratus, ac pene extinctus videretur, nihilominus, ut in superioribus vidimus, occasione alterius Prædestinatorum erroris extreme contrarii, iterum commenta mali sopita resurgere in Semipelagianis cœperunt, ut dixit Prosper de Ingratis, initio. Contra has ergo Pelagii reliquias Concilium Arausicanum in Gallia, copiosius doctrinam de gratia, et præsertim de illius necessitate ad initium salutis et fidei declaravit, editis 25 decretis, seu canonibus, ex quibus duo priores continent veram doctrinam de lapsu primi hominis et peccato originali contra Pelagium. A tertio autem canone damnatur sub anathemate Semipelagianus error, sub eisdem fere verbis quibus a Cassiano et Fausto explicatus est; et hac occasione, plures sententiæ de necessitate prævenientis et comitantis gratiæ, et de fragilitate liberi arbitrii ad bonum operandum, traduntur, quæ virtute totam doctrinam de gratia et libero arbitrio continent. Quamvis autem hoc Concilium provinciale sit, et non legamus fuisse confirmatum subsequente (ut sic dicam) approbatione, nihilominus canones illi infallibilem fidei auctoritatem continent, quia antecederent (ut sic dicam) fuerunt auctoritate Pontificia confirmati, vel potius editi. Nam, ut Patres illius Concilii professi sunt, illi canones non fuerunt ab ipsis facti, vel inventi, sed ab Apostolica Sede fuerunt ad illos transmissi, ut ejusdem Sedis auctoritate et admonitione promulgarentur; et hac ratione, Concilium illud antecederent ab Apostolica Sede confirmatum dici potest. Cætera vero quæ ad illud Concilium ejusque Canones spectant, supra cap. 4, tractando de Leone Papa, dicta

sunt. Peculiares vero difficultates quæ circa nonnullos ex illis canonibus insurgere possunt, in discursu materiæ de gratia tractabuntur.

2. *Concilium Arausicanum et Synodus Valentina Prædestinatorum iterum damnarunt hæresim.* — Non solum autem Semipelagianorum error, sed etiam aliqua ex parte hæresis Prædestinatorum in illo Concilio damnata est, dum in canone ultimo definitur, nullum esse prædestinatum ad malum, et quemlibet baptizatum posse, per Christi gratiam, quæ ad salutem pertinent operari, si velit, et debere id facere, si salvari velit. At vero hac definitione et aliis non obstantibus, hic error Prædestinatorum vel postea durasse, vel post aliquos annos repullulasse videtur; nam illius occasione censetur congregatum Concilium Valentinum in Gallia, anno Domini 855, in quo vera doctrina de gratia, et de præscientia ac prædestinatione Dei traditur, quia in his omnibus Prædestinati errabant. Imo illo tempore quidam Scoti hæresim illam renovare tentabant, quos leves homines non pauci sequebantur, ut in capite sexto ejusdem Concilii insinuatur, et ad resistendum illis renovata etiam est ibi vera de gratia doctrina, brevissime tamen, et quasi remissive ad priorem Patrum et Conciliorum decreta, sic enim dicitur in capite sexto: *Item de gratia, per quam salvantur credentes, et sine qua rationalis creatura nunquam beate vixit, et de libero arbitrio per peccatum in primo homine infirmato, sed per gratiam Domini Jesu in fidelibus ejus redintegrato, et sanato, id ipsum constantissime et fide plena fatemur, quod sanctissimi Patres auctoritate sanctarum Scripturarum tenendum nobis reliquerunt. Quod Africana, quod Arausicana Synodus professa est, quod Beatissimi Pontifices Apostolicæ Sedis tenuerunt.* Similia fere habentur de præscientia et prædestinatione in capite primo, ubi dicitur: *De præscientia Dei et prædestinatione, et de quæstionibus in quibus fratrum animi non parum scandalizati probantur, illud tantum firmissime tenendum credimus, quod ex maternis Ecclesiæ visceribus nos hausisse gaudemus.* Quod in cap. 2 et 3 magis in particulari declaratur, ut postea in suis locis adnotabimus. Quocirca, licet hoc Concilium, eo quod provinciale tantum sit, et non sit a Pontifice confirmatum, per se certam fidem non faciat, tamen, quantum priorum Conciliorum et Pontificum definitionibus adherendum esse statuit, eorum infallibilem auctoritatem participat, in aliis

vero magnam habet auctoritatem, licet non fidei, ut in sequenti puncto explicabimus.

3. *Moguntinum Concilium, damnataque ab eo.* — Prius enim advertere oportet ex Baronio, eodem anno 855, in principio, et ann. 448, numer. 3 et sequentibus, auctorem, seu instauratorem diætæ hæresis Prædestinatorum fuisse Gothesealcum, contra quem ante paucos annos congregatum fuerat Concilium quoddam Moguntinum tempore Rabbani, in quo Concilio ille damnatus et perpetuo carceri addictus est; verisimileque est in eodem Concilio doctrinam de gratia iterum confirmatam et modo ad illam hæresim extirpandam accomodato renovatam esse. Acta vero illius Concilii non extant, et ideo nihil amplius de illo affirmare possumus. Meminit autem illius Concilii Trithe-
mius, in *Chronic. Monasterii Hirsaugiensis*; et ex illo Surius, tomo tertio Conciliorum, post synodum secundam Moguntinam, sub eodem Rabbano; et Baronius, anno 848, ex Franco-
rum Annalibus a Pithæo editis; et ex Hinc-
maro, in Epistola ad Nicolaum Papam. Ex quo etiam refert aliquos articulos erroneos illius hæretici: *Primus est, quem antiqui Prædestinati (ait) etiam dicebant, quod, sicuti Deus quosdam prædestinavit ad vitam æternam, ita etiam alios ad mortem æternam prædestinavit.* Quem errorem imponebant etiam Augustino Massilienses, quibus respondet Prosper ad objectionem 14 et 15 Gallorum, et notat Fulgentius libro primo ad Monimum, capite ultimo. Alter error notatur ab eodem Hincmaro in Gothesealeo, nam aiebat *quod Deus non vult omnes homines salvos fieri*, etc. De quo etiam notabant Augustinum Semipelagiani. Verumtamen illa propositio æquivoca est; et si intelligatur de voluntate beneplaciti omnino absoluta, seu efficaci, non est error, sed vera sententia, et in hoc sensu locutus est Augustinus, ubi aliquando verba Pauli dicentis, *Deus vult omnes homines salvos fieri*, de solis prædestinatis exposuit. Alio vero modo potest illa propositio negativa intelligi de omni Dei voluntate, etiam antecedente, seu conditionata, ita ut sensus sit, quod Deus non vult omnes homines salvos fieri, quantum est ex parte sua: et in hoc sensu propositio illa hæretica est, in quo videtur ille hæreticus locutus.

4. *Tertia hæresis damnata ab eodem Concilio Valentino, et censura alterius explicatur.* — Colligi autem potest hic sensus ex alio ejus errore, quo asserebat: *Quod Jesus Christus, Dominus noster et Salvator, non fuit crucifixus, neque mortuus est pro redemptione to-*

tius mundi, id est, pro redemptione et salute omnium, sed tantum pro his qui salvantur. — Quæ est manifesta hæresis, ut ex toto novo Testamento constat, et in materia de Incarnatione latius tractatur. Fundatur autem hic error in priori, nimirum, quod nullo modo voluerit DEUS salvare eos qui de facto non salvantur: nam quos DEUS salvare voluit, illos CHRISTUS redemit. Sicut autem ille in præcedenti puncto erravit, non distinguendo in Deo duplicem voluntatem, ita in hoc posteriori deceptus est, non distinguendo redemptionem quoad efficaciam, vel quoad sufficientiam, seu quoad generalem oblationem a Christo factam, quantum erat ex parte suæ voluntatis et Dei. In hoc autem puncto notandum est caput 4 diæti Concilii Valentini, ubi tanquam error in quibusdam notatur, quod dicerent *Christum mortuum fuisse, etiam pro illis impiis qui, a mundi exordio usque ad passionem Domini, in sua impietate mortui, et æterna damnatione puniti sunt*; et subjungit Concilium: *Illud nobis simpliciter ac fideliter tenendum ac docendum placet, juxta Evangelicam et Apostolicam veritatem, quod pro illis hoc datum pretium tenemus, de quibus ipse Dominus noster dicit: Oportet exaltari filium hominis, ut omnis qui credit in ipsum non pereat, sed habeat vitam æternam. Et Apostolus: Semel Christus oblatus est ad multorum exhauriendum peccata.* Verumtamen illi contra quos hoc Concilium loquitur, non tantum de sufficientia, sed etiam de efficacia loquebantur; credentes obtulisse Christum sanguinem suum, ut impios jam damnatos a pœnis inferni liberaret, et ita de facto eos redemisse, et ab inferno eduxisse; et ideo dicit Concilium hoc esse contra illud Propheticum: *Morsus tuus ero inferne*, quia vocabulum, *morsus*, significat non omnes mortuos fuisse per Christum ab inferno liberandos, sed tantum fideles et justos: unde, sequenti ratione, cætera quæ dicit Concilium illud, de efficacia mortis Christi intelligenda sunt.

5. *Senonense Concilium Pelagium, ejus reliquias, et Lutherum damnat.* — Tertia synodus provincialis quæ, nostris temporibus, contra hæreses in illis serpentes tradidit, modoque magis accomodato ad illas hæreses confutandas declaravit, est Concilium Senonense, in Gallia celebratum anno 1528, contra *insurgentem Lutheranam hæresim*, ut in initio ejus dicitur; unde primario intendit Concilium illud defendere liberum arbitrium, quod Lutherus (in hoc imitans Manichæum) auferre conatus

est. Quia vero Pelagius, ut idem Concilium in Præfatione dicit, *Erravit consimiliter, dum aliud extremum secutus, ad vitam beatam comparandam, minime necessariam putat divinam gratiam, sed ad id sufficere censet liberum arbitrium, si modo adsit divinæ legis cognitio, ideo Concilium adjecit. Porro talia deliramenta respuens Ecclesia catholica hæc tria ad salutem requiri docet: fidem, bona opera, et divinam gratiam, neque absque his patere homini adulto viam salutis. Accedentem siquidem ad Deum oportet primum divinæ gratiæ munere adjutum credere, deinde bonis operibus intendere, in quibus efficiendis et liberum arbitrium operatur, et gratia. Quapropter, qui hominem bene operari, et salutem consequi arbitratur absque gratia, aut primatum boni operis libero arbitrio adscribit, non gratiæ, Pelagianus censendus est.* In quibus verbis licet Pelagius tantum nominetur, etiam Semipelagiani et Lutherani comprehenduntur et damnantur, dum et fides ipsa dicitur esse gratiæ donum, et præter fidem opera necessaria esse docentur, quæ et a libero arbitrio, et a gratia, primo tamen, et principaliter a gratia procedant. Quomodo autem hæc duo, gratia nimirum et voluntas libera, in operibus salutis efficiendis conveniant, declarat copiose et mirabiliter idem Concilium, inferius, in decretis fidei, capite decimo-quinto, qui locus est unus ex præcipuis et maxime notandis in hac materia; illum tamen inferius, disputando de auxiliis gratiæ, ex professo tractabimus.

6. *Temeritatis nota detractoribus illius Concilii inuritur.* — Quia vero aliqui minus deferre solent hujus Concilii auctoritati, eo quod provinciale sit, et ab Ecclesia Romana non fuerit confirmatum; addendum hic est, licet non sit hæreticum sentire aut dicere, Concilium illud in aliquo dogmate errasse, aut falsum esse aliquid ab ipso definitum seu tanquam catholicum dogma declaratum, nihilominus non posse talem assertionem illi Concilio injuriosam a temeritatis nota excusari. Primo quidem, quia si Concilium provinciale legitime in suo ordine et gradu congregatum sit ex catholicis Episcopis, debitamque subjectionem ad Ecclesiam Romanam profiteatur, et recta intentione ac debito modo procedat ad fidei declarationem aut defensionem, juxta principia ab Ecclesia catholica recepta, talis Concilii auctoritas magnam per se affert probabilitatem, quæ cujuslibet privati doctoris auctoritati præferenda sit. Nam, cum Christus promiserit, ubicumque fuerint duo

vel tres congregati in nomine ejus, adfuturum ipsum in medio eorum, credendum profecto est, licet Spiritus Sanctus non assistat Concilio Provinciali ut infallibiliter veritatem definiat, specialius juvare plures Prælatos et Doctores congregatos recta intentione, et in nomine ejus, ipsoque Spiritu Sancto specialiter invocato procedentes, quam quemlibet privatum doctorem, vel etiam plures casu in eandem sententiam convenientes. Deinde augeri potest Provincialis Concilii auctoritas ex numero, qualitate et doctrina Patrum in illo convenientium, et ex majori concursu doctorum hominum omni diligentia veritatem inquirentium. Nam, licet in Spiritus Sancti auxilio præcipue fidendum sit, nihilominus ipsemet Spiritus Sanctus, etiam ex parte nostra, cooperationem et diligentiam requirit. Propter quod Act. 15 ab ipsis Apostolis magnam conquisitionem factam esse legimus. Denique multo magis Concilii provincialis auctoritas augetur, quando ejus doctrina nunquam in suspicionem erroris in Ecclesia venit, sed potius usu ipso, et tacito quodam universalis consensu, probata est. Tunc enim temerarium profecto esset proprio ac privato judicio tali Concilio contradicere, ut pie, ac docte notavit Cardinalis Bellarm., l. 2 de Conciliis, c. 10, in fine; nec dissentit Cano, l. 5 de Locis, c. 4, concl. 6. Et ratio est, quia jam auctoritas talis Concilii universalis Ecclesiæ auctoritate multum roborata est. Et hoc modo Concilia provincialia in magna veneratione habita semper sunt, ut constat ex litteris synodicis Theodori, Patriarchæ Hierosolymitani, quæ referuntur in 7 Synodo, action. 3 in fine, et a tota Synodo probantur.

7. *Magna auctoritas Senonensis synodi ostenditur.* — In his autem omnibus prædicta Senonensis Synodus valde commendatur. Nam imprimis non ex una tantum provincia, seu metropoli, sed ex pluribus nationis Gallicæ et Germanicæ congregata videtur. Nam in ea præsedit Cardinalis Antonius a Prato, Senonensis Archiepiscopus, qui Galliæ et Germaniæ Primas dicitur. Unde verisimile est, pro causa tam gravi, plures Episcopos ex illis nationibus congregasse, quamvis neque nomina neque numerus eorum in Actis illius Concilii referantur. Deinde Concilium illud, vel totum vel pro majori parte, Parisiis celebratum est, ut constat ex primo generali decreto ejus in fine, et ex ultimo capite, et conclusionetotius Concilii. Unde clara conjectura sumitur, præter Episcopos adfuisse ibi omnes graves Theologos Parisiensis Acade-

miae, seu Collegii Sorbonici, et ad singula decreta fidei conficienda consilio et doctrina cooperatos fuisse, sicut credendum est ad morales constitutiones edendas jurisperitos Doctores adjuvisse. Hac enim ratione, in praedicto decreto generali, ait dictus Antonius Cardinalis: *Duximus habito suffraganeorum nostrorum consensu, ac multorum divini et humani juris interpretum consilio, his tantis periculis salubriter et celeriter providendum.* Ex hac ergo parte, Concilium illud magna pollet humana auctoritate; aliunde vero ex illius actis, verbis ac progressu, constat legitima auctoritate, et ex gravissima et honestissima causa fuisse congregatum, et magna prudentia et pietate, et debita subiectione ad Romanam Ecclesiam et antiqua Concilia ac decreta processisse; ergo credendum omnino est non defuisse illi singulare Spiritus Sancti auxilium, ut praesertim in doctrina fidei a veritate non aberraret. Denique, cum illud Concilium fere ante nonaginta annos fuerit celebratum, et per universam Ecclesiam divulgatum, in magna auctoritate, et sine ulla suspicione erroris apud catholicos semper fuit; et, quod caput est, Concilium Tridentinum quod post viginti annos celebratum est, in sess. 6 (quam dieto tempore absolvit), virtute approbat totam doctrinam de Gratia, quam Concilium Senonense traderat, quia eandem fere magis explicatam ac locupletatam docet ac definit. Igitur temerarium profecto esset in hac parte aliquid in illo Concilio reprehendere, vel ab ejus sententiis discrepare.

8. *Moguntinum ultimum Concilium.* — Quarto, his accedit Synodus Moguntina ultima, anno 1549, sub Sebastiano Archiepiscopo celebrata. Nam in priori parte, quae est de doctrina fidei, per decem prima capita catholicam de gratia doctrinam optime complectitur, priusque contra Pelagium, deinde contra Lutherum, nulla eorum facta mentione, definit; et ad illius auctoritatem fere applicari possunt quae proxime de Senonensi diximus. Est autem advertendum Concilium Senonense congregatum fuisse ante Concilium Tridentinum, anno scilicet 1528; Moguntinum vero post sessionem 6 Concilii Tridentini celebratum est, anno videlicet 1549, quo tempore Concilium Tridentinum intermissum fuerat, cum sessio 6 anno 1547 fuisset celebrata, licet nondum confirmata esset. Hinc ergo hujus Concilii auctoritas in hac parte maxime probata est, quod Concilium Tridentinum imitatum est, ejusque doctrinam in summam redegit. Quocirca, sicut Concilium

Senonense virtute est a Tridentino approbatum, quia eandem doctrinam tradidit et illustravit, ita Moguntinum dici potest in hac parte antecesserit a Tridentino probatum, quoniam ab illo doctrinam suam hausit, ideoque illius etiam auctoritate, tanquam certa, utemur.

9. *De institutione a Concilio promissa, sed non edita, et de ejus auctoritate.* — *De Enchiridio.* — *De Antididagmate.* — Est autem animadvertendum in aliquibus libris huic Concilio adjungi opus inscriptum: *Institutio ad pietatem Christianam.* Verumtamen opus illud non fuit a Concilio editum, nec probatum, sed (ut in eadem inscriptione dicitur) solum fuit institutio illa in Concilio provinciali promissa. A quo autem postea fuerit edita, ignoramus. Unde certum est solum habere privati scriptoris auctoritatem. Idemque observandum est circa quoddam Enchiridion fidei editum in Episcopatu Coloniensi, quod ab aliquibus modernis Theologis sub nomine Concilii Coloniensis allegari solet, eumque in illo multa de gratia et justificatione hominis tradantur, ea Concilio Coloniensi attribuunt. Re tamen vera illa non est doctrina alienius Concilii Coloniensis, sed privati scriptoris auctoritatem habet, eamque non magnam; quia in expurgatorio Romano et Hispano, sub nomine Enchiridii christianae institutionis dicitur falso esse impositum Concilio Coloniensi, et in multis ad gratiam et justificationem pertinentibus expurgatur. Similique modo, etiam opus aliud quod *Antididagma* inscribitur, et a Canonicis Coloniensibus scriptum esse dicitur, privatam omnino auctoritatem habet, et utrumque opus in nonnullis rebus a multis reprehenditur, ut postea videbimus. Ideoque neque institutio Moguntina, neque Enchiridion Coloniense, illis Conciliis in tomis Conciliorum adjuncta sunt, neque in duobus modernis Conciliis Coloniensibus, quae in quinto tom. Conciliorum habentur, aliqua doctrina de gratia traditur.

10. *Omnia amplectitur Tridentina Synodus.* — Post dicta ergo Provincialia Concilia (Moguntino excepto), celebratum est Concilium Oecumenicum Tridentinum, quod in sess. 5, 6 et 14, copiosius et distinctius quam praecedentia Concilia, doctrinam de gratia et libero arbitrio tradidit ac definivit. Cum enim Concilium hoc errores omnium haeticorum, antiquos et novos perspectos habuerit, tam copiose, erudite et distincte catholicam doctrinam tradit, ut et errores omnes damnet ac penitus extirpet, et quidquid praecedentia Concilia, et

antiqui Patres ac Pontifices de gratia et libero arbitrio, deque hominis justificatione tradiderunt, gravissime ac sapientissime confirmet. Est autem animadvertendum, Concilium hoc, in sua doctrina tradenda, optimo ordine processisse; nam prius, in sessione quinta, doctrinam de peccato originali et humanæ naturæ corruptione, seu in deterius mutatione per Adæ peccatum, primum contra Pelagianos, et consequenter etiam contra Lutheranos proponit. Deinde vero in sess. 6, de Reparatione hominis lapsi, et consequenter de naturæ impotentia et gratiæ necessitate ad bene ac sancte operandum, et ad veram justitiam coram Deo obtinendam, catholicam doctrinam tradit. Ac tandem in sess. 14, quomodo possit justitia, semel habita, et per actualia peccata postea perditâ, iterum recuperari docet; ideoque in his omnibus locis veram de gratia et sanctificatione hominis doctrinam inculcat, sed præcipue, magisque ex instituto, illam in sess. 6 tradit. Quia vero contra Pelagium ejusque reliquias multa decreta canonica jam antea edita fuerant, et novi hæretici innumeros errores circa Dei gratiam, et hominis libertatem, ac veram justificationem, remissionem peccatorum, operumque necessitatem, ac meritum multiplicaverant; ideo contra antiquos hæreticos tribus tantum canonibus, et totidem fere capitulis doctrinam prius præstringit: postea vero per plura capita, et alios triginta canones, tam copiose, distincte et efficaciter novos hæreticos insequitur, ut omnes eorum hæreses damnet et evertat. Quæ omnia ex discursu totius materiæ evidentiora fient; nam hujus Concilii decretis nostram doctrinam præcipue confirmabimus, et in illis elucidandis, et juxta veram Concilii mentem exponendis, totis viribus incumbemus. Conduceret autem non parum ad ipsius Concilii intelligentiam, integra ejusdem Synodi acta inspecta habere; illa tamen hæcenus typis mandata non sunt, neque manu scripta ad manus nostras pervenerunt.

CAPUT VI.

DE PATRIBUS QUI VERAM DE GRATIA DOCTRINAM
NOBIS TRADIDERUNT, ET CONTRARIAS HÆRESSES
COMPUTAVERUNT.

1. *Patres ante Pelagium pauca de gratia tradidere.*— Quoniam vera doctrina de gratia inter hæreses contrariis versatur, quarum altera liberum arbitrium, alia gratiam, ejusve necessitatem negat, ideo advertere oportet

hæresim negantem libertatem arbitrii, antiquiorem multo esse errore Pelagii negantis gratiæ necessitatem. Unde factum est ut Patres qui Pelagium præcesserunt, sæpe de libertate arbitrii ex professo disputent, et contrarias hæreses impugnent; de gratia vero Dei pauca tradant, et non ex instituto, sed obiter, et quasi aliud agentes. Et ideo Pelagiani, multoque magis Semipelagianii, Augustino objicere solebant, quod novam doctrinam, et non solum antiquis Patribus vel contrariam, vel saltem invisam, verum etiam ab ipso antea non traditam, ad impugnandum Pelagium induceret. Ita refert Hilarius, Epist. ad Augustinum dicens: *Ad summam, fatigatis omnibus nobis, ad id prosecutio eorum, vel potius querela convertitur, consentientibus etiam his qui hanc definitionem improbare non audent, ut dicant, quid opus fuit hujusmodi disputationis incerto tot minus intelligentium corda turbari? Neque enim minus utiliter sine hac definitione, aiunt, tot annis a tot tractatoribus, tot præcedentibus libris, et tuis, et aliorum, tum contra alios, tum maxime contra Pelagianos (qui enim hæc dicebant, Semipelagianii erant) catholicam fidem fuisse defensam.*

2. Eadem fuit Prosperi intentio in Epistola sua, cum dixit: *Illud etiam qualiter diluatur, quæsumus, patienter insipientiam nostram ferendo, demonstres, quod retrac'tatis priorum de hac re opinionibus, pene omnium par invenitur et una sententia qua propositum et prædestinationem Dei secundum præscientiam receperunt; et ob hoc Deus alios vasa honoris, alios contumeliæ fecerit, quia finem uniuscujusque præviderit, et sub ipso gratiæ adjutorio, in qua futurus esset voluntate, et actione præscierit.* Nam licet hæc verba de prædestinatione potius quam de gratia scripta sint, nihilominus quæstiones de gratia et prædestinatione inter se connexæ habitæ sunt, ut quæ de gratia tota, seu de initio ejus dicuntur, de prædestinatione dicta esse credantur, et e converso: nam Augustinus unum ex alio colligere visus est et ab uno ad aliud sæpe transitum facere visus est argumentando, ac subinde, ex eisdem Scripturæ testimoniis, ambas de gratia et prædestinatione quæstiones definire; et ideo Semipelagianii a tota illa doctrina abhorrebant, et tanquam novam vitandam censebant. Quod his verbis testatur Prosper Epistola ad Rufinum: *Ab hac autem confessione gratiæ Dei ideo quidam resiliunt, ne cum eam talem confessi fuerint, qualis divino eloquio prædicatur, et qualis opere suæ potestatis agnoscitur, etiam hoc necesse ka-*

beant confiteri, quod ex omni numero hominum per sæcula cuncta natorum certus apud Deum desinitusque sit numerus prædestinati in vitam æternam populi, et secundum propositum Dei vocantis electi. Quod quidem tam impium est negare, quam ipsi gratiæ contraire. Cum ergo idem de gratia quod de prædestinatione sentiant Semipelagiani, in utraque Augustini sententiam, tanquam novam, respuebant. Unde Prosper, in priori Epistola, ita de eisdem Semipelagianis ad Augustinum loquitur: *Scripta Beatitudinis tuæ validissimis et innumeris testimoniis divinarum Scripturarum proferimus, ac secundum formam disputationum tuarum aliquid etiam ipsi quo concludantur adstruimus: obstinationem suam retustate defendunt. Et ea quæ, de Epistola Beati Apostoli Pauli Romanis scribentis, ad manifestationem divinæ gratiæ prævenientis electorum merita proferuntur, a nullo unquam Ecclesiasticorum ita esse intellecta, ut nunc sentiuntur, affirmant.*

3. *Tria tempora perspicuitatis causa distinguuntur.*— Ut ergo Augustini doctrinam ab hac calumnia vindicemus, ostendamusque quanti sit ponderis in hac materia ejus auctoritas, tria tempora distinguere oportet, scilicet, ante Pelagium, exorto et durante Pelagio ejusque reliquiis, et post Pelagium ejusque hæresim prorsus extinctam: et de singulis temporibus his breviter explicandum est quid Patres illorum temporum de gratia senserint, quidve de illa scriptum reliquerint. De Patribus primi temporis, quod attinet ad controversiam de causa vel merito divinæ electionis aut prædestinationis ex parte hominis prædestinati, in lib. 3 de Auxiliis, c. 18, ostendi, licet quæstio illa ante Augustinum non fuerit ex professo a Patribus tractata, quia temporum occasio illam non postulavit, nihilominus nihil Patres antiquos docuisse sententiæ Augustini contrarium. Quia ubi requirere videntur præscientiam meritorum ad prædestinationem, loquuntur de prædestinatione ex parte ultimi effectus ejus, qui est collatio gloriæ. Ubi autem de primo effectum, qui est Dei vocatio, vel de toto negotio salutis loquuntur, illud referunt in gratuitam Dei voluntatem, ut ibi adnotavi. Hoc autem multo certius est de controversiis ad gratiam Dei spectantibus.

4. *Patres antiquiores Pelagio non Augustino contrarii: sed vera gratiæ fundamenta jecerunt.*— Unde duo dicenda sunt de Patribus Pelagio antiquioribus. Unum est, licet ex professo de gratia Dei non disputaverint, quia nondum in Ecclesia controversia illa exorta

erat, nihilominus nihil doctrinæ Augustini de gratia Dei contrarium docuisse, neque ullo modo Pelagii, aut sectatorum ejus, seu Semipelagianorum opinionibus fuisse. Aliud est, in his quæ illi antiqui Patres, vel exponentes Scripturam, vel populum docentes, vel per aliam occasionem de gratia breviter docuerunt, virtute contineri veram doctrinam de gratia, quam postea Ecclesia contra hæreticos declaravit. Utrumque horum ostendi late in lib. 2 de Prædest., cap. 8, tum variis conjecturis, tum nonnullis Patrum testimoniis, tum ex dictis Pontificum, tum ex ejusdem Augustini responsionibus. Quibus nunc addo Paulum Orosium, lib. Apolog. contra Pelagium, in principio dicentem: *Patres, et qui jam quiescerunt martyres, et concordēs, Cyprianus, Hilarius, et Ambrosius, et quibus etiam nunc permanere adhuc in carne necessarium est, qui sunt columnæ et firmamenta Ecclesiæ catholicæ, Aurelius Augustinus et Hieronymus, multa jam adversus hanc nefariam hæresim absque designatione nominum hæreticorum scriptis probatissimis ediderunt.* Sed de Hieronymo et Augustino statim dicemus; de aliis vero antiquioribus intelligendum est, ut diximus, scripsisse contra Pelagium, non per se et ex professo contra illum disputando, sed veritatem illi errori contrariam docendo, quod de illis tribus Patribus, quos Orosius commemorat, in dicto capite 8 breviter ostendimus. Nunc vero, præter ea quæ, ex Cypriano, breviter contra Semipelagianos refert Augustinus, libro de Prædestinatione Sanctorum, cap. 14, ex libro de Mortalitate, et 1. de Bono perseverant., cap. 2 et 19, ex libro de Oratione Dominicæ., et ex lib. 3 ad Quirin., cap. 4; præter hæc, inquam, addenda nobis est epistola secunda ejusdem Cypriani, quæ de gratia Dei inscribitur, ubi inter alia, cum de conversione sua, et de efficacia baptismi erga se multa dixisset, notandam sententiam profert, dicens: *In proprias laudes odiosa jaclatio est, quamvis non jaclatum possit esse sed gratum quidquid non virtuti hominis adscribitur, sed de Dei munere prædicatur, ut jam non peccare, esse cæperit fidei, quod ante peccatum est, fuerit erroris humani. Dei est, inquam, omne quod possumus.*

5. *Cypriani Ambrosiique de gratia verba.*— Præterea id comprobare possumus alia insigni Ambrosii sententia in epist. 37, lib. 5, ubi de epistola Pauli ad Ephesios ait: *Nulla epistola tantum benedictionis increpuit in plebem Dei, quantum ista, in qua non solum benedictos nos a Deo, sed in omni benedictione bene-*

dictos, et spiritali, et in cœlestibus significavit divinæ locuples gratiæ testis, et prædestinatos nos in adoptionem filiorum, in filio quoque Dei nos cumulat gratia. Et infra: Sorte nos in ipso constitutos, ut quæ sunt legis implerentur in nobis, et quæ gratiæ. Specialius vero tam præparationem, seu præventionem, quam cooperationem divinæ gratiæ, verbis (ut sic dicam) Augustinianis declarat lib. 4 in Lucam, circa illa verba: *Visum est et mihi*, sic dicens: *Non ipsi soli visum est, non enim voluntate tantum humana visum est, sed sicut placuit ei (inquit) qui in me loquitur Christus, qui, ut id quod bonum est nobis quoque bonum videri possit, operatur. Quem enim miseratur, et vocat. Et ideo qui Christum sequitur, potest interrogatus, cur esse voluerit Christianus, respondere: Visum est mihi. Quod cum dicit, non negat Deo visum, a Deo enim præparatur voluntas hominum. Ut enim Deus honoretur a Sancto, gratia Dei est. Et tract. in Symbol. Apostol., cap. 4, inde divinitatem Spiritus Sancti ostendit, quod ubi vult, in quos vult, et quantos vult, et quantum vult inspirat sua propria voluntate. Repletque gratia sua quos vult, et quantos vult et quantum vult sua propria voluntate. Quæ verba sunt profecto valde notanda pro gravioribus quæstionibus de efficacia divinæ gratiæ, et de divina electione ac prædestinatione.*

6. *Nazianzeni jucundissima de gratia loca.* — Neque multum dissimilia sunt verba Nazianzeni, orat. 44 in sanctum Pentecostem, ubi hanc habet invocationem: *Ad Spiritus mysteria explicanda, Spiritus ipse mihi adsit, tantamque dicendi facultatem tribuat, quantam cupio; aut si non tantum, at certe quæ huic festi celebritati par sit. Ac profecto aderit heriliter, non serriliter, nec jussum aut imperium expectans. Spirat enim ubi vult, et super quos vult, quando et quantum. Sic nos Spiritu afflatus, et cogitamus, et loquimur. Unde idem Nazianzenus, orat. 19, § Sed inter omnia, enumeratorum varias Sanctorum virtutes, nimirum patientiam Job, Moyse mansuetudinem, et similes, hæc verba interponit: Pro ea, scilicet gratia, quam quisque a Deo consecutus est. Quibus verbis et gratiæ necessitatem, et efficaciam, et voluntarium Dei distributionem docuit, ut ibi Elias notavit. Alium præterea locum ex dicta orat. 44 ponderavit August., lib. de Bonorum perfect., cap. 19, quem his verbis refert: *Unius Deitatis, quæro vos, confitemini Trinitatem. Si vero aliter vultis, dicite unius esse naturæ, et Deus vocem dari vobis a**

Sancto Spiritu deprecabitur, id est, rogabitur Deus ut permittat vobis dari vocem quæ, quod creditis, confiteri possitis. Dabit enim, certus sum. Qui dedit quod primum est, dabit et quod secundum; qui dedit credere, dabit et confiteri. Unde colligit Augustinus sententiam Nazianzeni esse, non tantum fidei confessionem, sed etiam fidem ipsam, quæ est justitiæ fundamentum, esse donum Dei. Verumtamen locus ille aliter legitur in nova Billii translatione, scilicet: *Trinitatem, o tiri, unius Deitatis esse fateamini; aut si magis placeat, unius nature; atque hanc vocem (Deus) a Spiritu vobis postulabimus, dabit enim profecto secundum, qui dedit primum.* Juxta quam lectionem, per primum non intelligit fidem, nec per secundum confessionem fidei, sed per primum et secundum, intelligit unum et alterum modum confitendi Trinitatis fidem. Illi enim ad quos loquebatur, ab Arianis jam dissentiebant, et Trinitatem unius naturæ, seu Deitatis, esse fatebantur, adhuc tamen Trinitatem unum Deum esse, dicere verebantur. Ait ergo Gregorius sperare se, ut qui primum dedit, si in eo perseverent, det etiam secundum: quem sensum etiam ibi Nicetas notavit. Nihilominus tamen etiam hoc modo Nazianzenus ibi fatetur, fidem esse donum Dei; nam cum dicit, confiteri Trinitatem esse unius Deitatis atque unum Deum, donum Dei esse, non intelligit solum de confessione vocis, sed maxime de confessione mentis, hanc enim persuadere conabatur; ergo illam præcipue intelligit donari a Deo, et deinde modum etiam concipiendi et explicandi tale mysterium.

7. *Insignis locus omnes adversarios gratiæ confundens.* — Est etiam insignis locus apud eundem Nazianzenum orat. 31, paulo post medium, ubi, tractans illa verba Matth. 19: *Non omnes capiunt verbum hoc, sed quibus datum est, dicit: Cum audis Quibus datum est, adde: Volentibus datum est, utque vis qui eum animi propensione sunt. Etenim cum illud audis: Non est volentis, neque currentis, sed miserentis Dei, idem tibi existimandum censeo. Quoniam enim nonnulli sunt qui, ob recte facta ita animis offeruntur, ut id totum sibi ipsis adscribant, nec quidquam Creatori, et sapientiorum auctori, ut bonorum omnium suppeditatori acceptum ferant, his verbis docet Paulus, quod ipsum recte velle, divino auxilio indigeat; imo, ut rectius loquar, voluntas quoque ipsa, et electio eorum quæ recte et cum officio conjuncta sunt, divinum quoddam beneficium est, atque a Dei benignitate manans. In quæ senten-*

tia optime convenit Nazianzenus eum Augustino, et non solum Pelagium, sed etiam Semipelagianos confundit. Addit tamen statim Gregorius expositionem illius testimonii Pauli: *Non est volentis*, id est, non est solius volentis, sed etiam Dei miserentis. Quæ expositio Augustino non probatur in quæstione secunda ad Simplicianum. Tamen, quidquid sit de expositione verborum Pauli (quod postea videbimus), in dogmate nulla est diversitas, nam quod Nazianzenus ait, velle nostrum non ita esse solius Dei, quin etiam sit ipsius hominis, certissimum est, et fatetur idem Augustinus supra, et in Enchiridio, cap. 32, et lib. 1 de Doctrina Christiana, cap. 23. Quod vero Augustinus magis explicavit, velle nostrum tribui etiam Deo soli, quia non solum adjuvat, sed etiam præparat voluntatem, hoc non negavit Nazianzenus, sed indicavit potius, cum, non contentus dixisse quod velle nostrum Dei auxilio indigeat, addidit: *Imo, ut rectius loquar, voluntas ipsa, et recta electio a Dei benignitate manat*, significans non solum cooperationem, sed etiam initium bonæ voluntatis a Deo esse. Unde postea adjungit: *Ita quoniam velle quoque ipsum a Deo est, optimo jure totum Deo assignavit.*

8. *Optatus explicatus etiam facit.* — Præterea, Optatus Milevitanus, Augustino etiam antiquior (ut ex eodem Augustino constat, l. 2 de Doctrina Christiana, cap. 40, ubi eum tanquam jam mortuum allegat), Optatus (inquam), lib. 2 contra Parmenianum, versus finem, eundem locum Pauli tractans, partim gratiæ suffragari videtur, partim refragari. Dum enim Parmenianum reprehendit quod Donatianos defenderet, qui sibi sanctitatem, et innocentiam tribuebant, inquit: *Joannes Apostolus profiteri non audent innocentiam, qui ait: Si dixerimus quia peccatum non habemus, nos ipsos decipimus, et veritas in nobis non est.* Et adjungit: *Hoc qui dixit, sapienter se ad Dei gratiam reservavit. Est enim Christiani hominis quod bonum est velle, et in Deo, quod bene voluerit, currere, sed homini non est datum perficere, ut post spatia que debet homo implere, restet aliquid Deo, ubi deficienti succurrat, quia ipse solus est perfectio, et perfectus solus Dei filius Christus; ceteri omnes imperfecti sumus, quia nostrum est velle, nostrum est currere, Dei perficere; unde Beatus Apostolus Paulus ait. Non est volentis, neque currentis, sed Dei miserentis;* ubi aliam expositionem horum verborum Pauli indicat, nimirum, velle et currere posse ab homine in hac vita fieri, perve-

nire autem ad terminum, et ad perfectionem carentem omni macula, non esse opus hominis, sed solius Dei, nec vitæ præsentis, sed futuræ. Prætermissa vero nunc expositione, quod ad doctrinam attinet, cum dicit velle et currere esse hominis Christiani, non intelligit esse solius hominis, sed cum adjutorio gratiæ, quod Christianis hominibus etiam viatoribus datur, et ideo etiam dixit, hoc velle, et currere, esse in Deo, et peccati carentiam gratiæ Dei reservari.

9. *D. Ephrem nondum ortum Pelagium confutavit.* — Præterea Sanctus Ephrem, qui multo ante Pelagium scripsit, multa in suis operibus de divina gratia tradit, quæ cum definitionibus ab Ecclesia postea factis mire consentiunt. Nam in primo tomo, opuse. 33, de Timore animi, omnia tribuit divinæ gratiæ, et amicorum preces postulat: *Ut divina (inquit) gratia in anima mea resplendeat, mentemque tenebris circumfusam illuminet, promptusque ac dignus efficiar, precibus vestris mediantibus, qui penitentiam agam, et veniam merear.* Et infra: *Exhilarant unde divinæ gratiæ, jubarque Sancti Spiritus nostra pectora, faciuntque, ut anima repente omnium rerum terrenarum, cupiditatumque carnalium, ac noxiarum obliviscatur; forent igitur unde divinæ gratiæ intellectum simul et animam;* ac deinde comparat animam gratia affectam horto suavissimos fructus ferenti: *Ita enim (ait) et divinæ gratiæ fructus, ac medicamenta nobis splendorem, dulcedinem lætitiæque præbent,* quod late prosequitur. Et inferius, opuse. 37, integrum habet tractatum, seu concionem de divina gratia, in qua variis modis ejus necessitatem tam ad vincendas tentationes, quam ad bene operandum declarat, et inter alia dicit: *Instar matris ubera præbebit tibi, et velut infantem ab insidiatoribus custodiet te, tanquam parrulum incautum gubernabit te, et in virum perfectum te formabit.* Quibus verbis initium et consummationem, ac proinde totum virtutis progressum gratiæ tribuit. Rursusque sermone 1 de Compunct., inter alia dicit: *Quanta nobis quotidie pro sua bonitate largiatur Deus, sedulo consideremus universi, semper ejus gratia corda nostra visitat, et si locum sibi paratum invenerit, ingreditur.* Et infra: *Cum ad nos visitandos gratia ingredi cupiat, cum introeundi et quiescendi in nobis, sicut solebat, non invenit locum, illico recedit. Verumtamen cor nostrum dulcedine luminis sui pulsat, ut respiscat, et intromittatur ipsa, ut sic lucis dulcedine allectus homo ipsam inquirat; nequit enim*

penitus nos gratia deserere; a propria enim ipsius benignitate eo adigitur, ut omnium nostrorum misereatur. Similia multa habet in tomo 2, in opuse. de Agone, seu luctamine spirituali, circa finem, ubi inter alia inquit: *Facta est gratia tua seruo tuo refugium, et virtus, gloriatio, et protectio, et esca spiritualis suavitatis et lumine plena.* Et in tomo 3 in sermone ascetico de Vita religiosa, versus finem, inter alia inquit: *Absque gratiæ adminiculo non procalet cor Deo placere viribus suis, rerum ut ipsi placeat, ab eo accipit, et ex ejus vino potum eidem offert,* etc. Et plura habet similia in sermone de Muliere peccatrice.

10. *Sequitur Macarius.* — Macarius item Ægyptius, qui fere æqualis fuisse creditur Ephrem, integram fere scripsit homiliam de gratia Dei, quæ est 17 ex quinquaginta, quæ in tomo secundo Bibliothecæ nomine ipsius habentur, et e græco in latinum translata dicuntur ex Bibliotheca Regia Gallicana; ibi ergo inter alia in principio dicit: *Ob id quod homo transgressus est mandatum, diabolus operuit uniuersam animam caliginoso velamine, rerum postea accessit gratia, et exiuit plane velamine illo,* etc. Et infra: *Quemadmodum sine aqua piscis vivere non potest, nec ambulare quis sine pedibus, aut absque oculis videre lumen, vel loqui cum lingua careat, aut audire sine auribus, sic sine Domino Jesu, et efficaciu diuinæ virtutis, non potest quisquam cognoscere mysteria, aut sapientiam Dei, aut esse dicitur et Christianus.* Nam qui ducuntur, et reguntur secundum interiorem hominem a potentia diuina, ii sunt sapientes, milites fortes, et philosophi Dei. Multaque similia ex antiquis Patribus refert Cocceius, lib. 1 Thesaur., a. 4, in quibus oportet ut prudens lector advertat, inter ea quæ de gratia Patres dicunt, etiam de libero arbitrio miscere sermonem, et interdum aliquas proferre sententias, quæ, nisi in debito sensu accipiantur, cum locutionibus Semipelagianorum affinitatem habere videri possunt. Veruntamen Patres eo tempore simpliciter et fidenter loquebantur, quia nondum Semipelagianum exorti erant, neque pravus illorum sensus in suspensionem venerat. Re tamen vera nonquam illi Patres tribuunt soli libero arbitrio meritum gratiæ, neque bonum ac pium illum usum a gratia separant, sed solum docent cum gratia esse necessarium, ut ex aliis eorum verbis et sententiis manifeste constat, et in dicit. cap. 8, lib. 2 de Prædest., latius explicauimus.

11. *De secundo tempore, et auctoritate Hieronymi et Augustini.* —

Orosius in apolog. contra Pelagium. — Sequitur dicendum de secundo tempore, in quo Pelagius errorem suum contra diuinam gratiam seminare cœpit, contra quem eodem tempore duo Ecclesiæ lumina, quæ tunc erant columnæ et firmamenta Ecclesiæ, Hieronymus et Augustinus, ut Orosius dicit, pro diuina gratia pugnarunt et accuratissime scripserunt. Quorum virorum tanta fuit semper auctoritas in hac præsertim materia, ut ad obturanda hæreticorum ora sufficiat. Unde, Gelasius in epist. 5 ad Episcopos per Picenum contra novum quemdam hæresis Pelagianæ prædicatorem, sic inquit: *Adhuc majus scelus accrescit, ut sub conspectu et præsentia sacerdotum, beatæ memoriæ Hieronymum atque Augustinum, Ecclesiasticorum lumina Magistrorum, musca moritura, sicut scriptum est, exterminans oleum suauitatis, lacrare contenderet.* Unde idem Gelasius Papa, in cap. *Sancta Romana*, non solum Hieronymi opuscula ab Ecclesia Romana recipi, sed etiam in materia de gratia et libero arbitrio, ea se dicit sentire quæ Hieronymus sentit; et libros Rufini, qui a sententia Hieronymi in hoc discrepant, hoc maxime titulo suspectos habet, et apocryphos reputat. Ante Gelasium etiam Paulus Orosius, cum ipsomet Pelagio in sacerdotum conventu disputans, horum duorum virorum auctoritate maxime illum confundit, dicens: *Hoc Augustinus Episcopus scriptis suis, sicut audistis, exhorruit: hoc in ipsius nunc Pelagii scriptis sua responsione condemnat. Hoc et B. Hieronymus, cujus eloquium uniuersus Occidens, sicut ros in tellus expectat, in epistola sua, quam ad Ctesiphontem scripsit, condemnavit. Similiter, et in libro quem nunc scribit, collata in modum dialogi altercatione, confutat.*

12. *Quæ contra Pelagianos Hieronymus docuit.* — Ex quibus verbis intelligimus, primum opus a Hieronymo scriptum contra Pelagianos fuisse epistolam ad Ctesiphontem, postea vero dialogos contra eosdem elaborasse, eo tempore quo Orosius apud ipsum Bethleem hospes erat, et ad pedes ejus sedens (ut ipse ait) timorem Domini disciebat. Et quamvis Orosius unum tantum videatur dialogum contra Pelagianos commemorare, tamen sub illo totum dialogorum opus comprehendit. Quorum mentionem facit idem Hieronymus in Proem. lib. 4 in Jerem., ubi de Pelagio ait: *Non solum in Occidentis, sed et in Orientis partibus sibilare, et in quibusdam insulis, præcipueque Sicilia et Rhodi maculare plerosque, et crescere per dies singu-*

los, dum secreto docent, et publice negant. Cui respondere, diu tacens, et dolorem silentio devorans, crebra fratrum expostulatione compulsus sum : nec tamen hucusque prorupi, ut auctorum nomina ponerem, malens eos corrigi quam infamari. Nec enim hominum, sed erroris inimicus sum ; qui mihi ut vicentationis et genuinum sui doloris illiderent, veteres magistrorum suorum calumniis concinnantes, in tantum clingues et miseri demonstrati sunt, ut ne maledicere quidem suis verbis potuerint. Quorum, tunc temporis editis adversus eos libris, naviæ confutatæ sunt ; quos qui legere voluerint, liquido perdebunt canes eos, juxta Isaiam, esse mutos, qui latrare nesciant, habentes quidem voluntatem et rabiem mentiendi, sed artem fingendi et latrandi non habentes. Quibus loquar compendio. Aut bona sunt quæ docetis, aut mala. Si bona, defendite libere ; si mala, quid occulte miseros jugulatis errore ? Ac tandem, in fine, sub conditione novum opus promittit, dicens : *Verum hæc in proprio, nisi cre tacuerint, opere plenius exequemur.* Denique Prosper, lib. de Ingratis, cap. 2, inter Patres qui, post Apostolicam Sedem et Palæstinam Synodum, Pelagianam doctrinam confutarunt, ponit Hieronymum, de quo ita honorificentissime scribit.

*Tunc etiam Bethlei præclari nominis hospes,
Hebræo simul, et graio, latioque venustus
Eloquio, morum exemplum, mundi que magister
Iheronymus libris valde excellentibus hostem
Dissecuit : noscique dedit quo turbine verum
Vellent exortæ lucem obscurare tenebræ.*

13. *Atticus ore hostes contricit, non scripto.* — Prins vero quam de Augustino dicam, adverto Prosperum eo loco, statim post Hieronymum, ponere Atticum Constantinopolitanum inter præcipuos gratiæ Dei defensores contra Pelagium, ejus meminit etiam Cælestinus Papa, in epist. ad Nestor., apud Baron., anno 430, num. 14, his verbis : *Sanctæ recordationis Atticus, Catholicæ fidei magister et veræ, beati Joannis in ista successor, eos (id est Pelagianos) ita persecutus est, pro re communi, ut iis nec standi illic copia præstaretur.* Et infra dicit, tunc Atticum ad Romanam sedem misisse, quæ contra Pelagianos ab ipso acta fuerunt. Sed hæc Acta non exstant, nec scripta aliqua hujus sancti viri contra Pelagium ; imo, verisimile est illum non scriptis, sed sermonibus Pelagianam hæresim impugnasse, potestate autem sua et virtute illius auctores vel defensores Constantinopoli eiecisse, hoc enim significat Prosper supra dicens :

*Quid loquar, et curam magna quam gessit in urbe
Constantinopoli, docto bonus ore sacerdos
Atticus, antiqua legatos hæreticorum
Confutando fide ?*

Ubi pondero verba illa, *docto ore* ; indicant enim non scriptis, sed disputationibus et concionibus veram de gratia doctrinam defendisse. Quod ideo obiter adverto, ut constet in Oriente non solum Hieronymum ibi hospitem tantum ac peregrinum, sed etiam doctores ipsos Græcos et orientales in eandem doctrinam tanquam fidem antiquam conspirasse ; ut merito Cælestinus in citata epistola dixerit, *eodem tempore Orientem et Occidentem telis unitatis, Pelagium et Cælestium, et suæ doctrinæ sequaces, profligasse.* Quibus consonant quæ Prosper in eodem carmine refert, et Ephesum, et Siciliam, sed præcipue Africam contra Pelagianos pugnasse, et inter omnes præcipue Augustinum, de quo hæc subjungit :

*Augustinus erat, quem Christi gratia cornu
Uberiore rigans, nostro lumen dedit ævo,
Accensum vero de lumine : nam cibus illi,
Et vita, et requies Deus est : omnisque voluptas
Unus amor Christi est, unus Christi est honor illi ;
Et dum nulli sibi tribuit bona, fit Deus illi
Omnia : et in sancto regnat sapientia templo.*

14. *D. Augustinus mire in confutando Pelagio ejusque sequacibus a suo discipulo Prospero commendatur.* — Unde idem Prosper, in epistola ad Rufinum, in principio, cum Sedem Apostolicam et Concilia Pelagium damnasse retulisset, subjungit : *Beatissimus quoque Augustinus, præcipua utique in hoc tempore portio Domini sacerdotum (has hæreticorum versutias) copiose et pulchre in multis voluminum disputationibus destruxit, utpote, inter multa Dei dona, quibus illum abundantissime Spiritus veritatis implevit, habens etiam hanc scientiæ et sapientiæ ex Dei charitate virtutem, ut non solum istam adhuc in suis detractionibus palpitantem, sed etiam multas prius hæreses invicto verbi gladio debellaret.* Et in fine epistolæ sic monet Rufinum : *Tu autem, dilectissime et reverendissime mihi præter, si vere de his quæstionibus instrui desideras, sicut desiderare te convenit, ipsis beati Augustini disputationibus cognoscendis impende curam, ut in confitenda Dei gratia desinatissimam ac saluberrimam Evangelicæ, Apostolicæ que doctrinæ intelligentiam consequaris.* Denique statim in proœmio ad objectiones Gallorum : *Sanctæ (inquit) memoriæ Augustinus contra Pelagianos, inimicos gratiæ Christi et liberi arbitrii decomptores, per multos annos apostolice asse-*

ruit litterisque mandavit. Ubi unica illa voce, *apostolice*, auctoritatem librorum Augustini in hac materia eximie commendavit.

15. *Explicatur Prosper in eo quod dixit Augustinum apostolice scripsisse.*—Non tamen dicit Augustinum apostolice scripsisse, quia vel scriptor canonicus fuerit, vel quia infallibilem habuerit Spiritus Sancti assistentiam in scribendo, sicut Apostoli habuerant; hoc enim alienum a sensu Prosperi et totius Ecclesiæ est; sed dicit apostolice scripsisse, vel quia suam de Gratia doctrinam ex Apostolo Paulo præcipue sumpsit, et validissimis ejus testimoniis illam confirmavit; vel certe quia tam vere ac fideliter de gratia scripsit, ut Apostolica Sedes Augustini doctrinam in his quæ ad dogmata pertinent, suam effecerit ac probaverit. Nam Cœlestinus Papa, in epistola ad Episcopos Galliæ, ut supra vidimus, Augustini doctrinam valde commendat: *Quem nullum unquam sinistræ suspicionis saltem rumor aspersit.* Et illi epistolæ adjunguntur capitula ex Augustini doctrina desumpta, quæ tanquam veram et certam ac necessariam de gratia doctrinam continentia omnibus proponuntur. Et similes sunt canones Concilii Arausicani, a Leone Papa (ut creditur) missi, et auctoritate Apostolica confirmati, nam omnes etiam illi ex Augustini doctrina sumpti sunt. Et de illis loqui videtur Hormisda Papa in epistola 67 ad Possessorem, eum dicit in Seriniis Ecclesiasticis contineri expressa capitula, in quibus expresse continetur quid Romana, hoc est, catholica Ecclesia de gratia et libero arbitrio sentiat; ubi etiam addit eandem doctrinam ex variis libris Augustini, et maxime ad Prosperum et Hilarium, id est, de Prædestinatione Sanctorum et dono perseverantiæ, posse cognosci. Quæ magna laus est doctrinæ Augustini. Denique Joannes II, in epistola ad Illustres quosdam Senatores, non de gratia, sed de mysterio Incarnationis, contra Nestorium et Eutychem disputans, allegaturus Augustinum præmittit: *Item Sanctus Augustinus, cujus doctrinam secundum prædecessorum nostrorum statuta, Romana sequitur et seruat Ecclesia.* Ubi univèrse de Augustini doctrina loquitur, intelligit autem de doctrina dogmatica, non quæ ad fidei mysteria explicanda et confirmanda pertinet. Hinc vero colligere nobis licet, hoc maxime habere verum in doctrina quam Augustinus de gratia tradidit: nam illius ænetum judiciumque secuta Romana Ecclesia, inimicos gratiæ Christi prorsus evertit, et de illis triumphavit.

16. *Objectio.* — At vero forte aliquis objiciat, hinc sequi, totam Augustini sententiam de gratia esse de fide, neminemque posse in re aliqua in hac materia ab Augustino discedere, quin a doctrina certa et catholica deviare censeatur. Respondeo imprimis hoc non simpliciter sequi de tota doctrina, sed de illa quam Ecclesia probavit ac definivit; tum quia in dicta epistola Cœlestini, post capitula omnia doctrinam fidei continentia, adjungitur: *Profundiores vero difficiliioresque partes incurrentium quæstionum, quas latius pertractarunt, qui hæreticis restiterunt, sicut non audemus contemnere, ita non necesse habemus astruere.* Et redditur optima ratio: *Quia ad confitendum gratiam Dei, cujus operi ac dignationi nihil penitus subtrahendum est, satis sufficere credimus, quidquid secundum prædictam regulam Apostolica nos scripta docuerunt.* Et simili modo Leo Papa, dum certas regulas seu capitula misit ad Episcopos Arausicani Concilii, quæ ex libris Augustini decerpit, eo ipso ostendit nolle se totam doctrinam de gratia indiscriminatim definire, seu tanquam de fide probare, sed ea tantum quæ præscriptis verbis ac certis canonibus digesta misit. Hinc vero colligere possumus, quidquid Augustinus de gratia docet, quod cum illis Ecclesiæ definitionibus sit necessario connexum, omnino sequendum, et tanquam certum tenendum esse. Quia totum illud, licet non expresse, virtute est ab Ecclesia probatum. Unde, si connexio sit evidens et necessaria, etiam doctrina erit certa, saltem in ratione conclusionis theologicæ: si vero sit tantum probabilis, in eo etiam gradu erit semper Augustini doctrina præferenda, tanquam definitionibus Ecclesiæ magis consentanea, ut mox dicemus.

17. *Vestigii Augustini in hac materia omnino incurrendum.* — Etenim ulterius addimus, quidquid in hac materia Augustinus ut certum affirmat, et ad dogmata fidei pertinens, a quolibet prudente et erudito theologo esse tenendum ac defendendum, etiamsi non certo constet esse ab Ecclesia definitum; tum quia, cum Ecclesia tantum in hac materia detulerit Augustino, ut ejus doctrinam in damnandis erroribus gratiæ Dei contrariis secuta fuerit, magna esset temeritas privati doctoris, qui Augustino, aliquid de gratia Dei tanquam orthodoxum docenti, contradicere auderet. Præsertim cum tot annis, tanta sapientia, tanto ingenio, tanta diligentia et instantia, et, quod caput est, tot Dei donis et auxiliis præditus, pro divina gratia tuenda et explicanda labo-

raverit. Unde a fortiori fit, credendum omnino esse nihil in doctrina de gratia Augustini inveniri, quod sano modo intelligi non possit, ita ut saltem probabile sit, et catholicæ doctrinæ non adversetur. Hoc magis in particulari constabit ex discursu materiæ; nunc in generali ex eisdem principiis eademque Ecclesiæ auctoritate probatur. Nihil enim tam admirandum et suspiciendum Ecclesiæ reddidit Augustinum, quam de gratia doctrina; at si in ea tradenda et explicanda aliquando fuisset in errorem lapsus, multum labefactaretur ejus auctoritas, immeritoque Ecclesia tam fidenter judicium ejus in hac doctrina tradenda fuisset secuta, quod impium esset cogitare. Unde tandem concludo, non tantum in rebus quas Augustinus certas existimat, sed etiam in his omnibus quæ simpliciter tanquam vera et probabiliora constanter et ubique amplectitur, sententiam ejus esse præferendam, nisi communis Patrum, vel Ecclesiæ auctoritas obstare videatur, quod raro, vel nunquam continget. Nam si alicubi id occurrerit, explicandus erit Augustinus potius quam reprobandus.

18. *Doctrina Augustini in quæstione de prædestinatione quam vim habeat.* — Adverto tamen hæc solum nunc a nobis tradi circa doctrinam de gratia, neque oportere ad quæstiones de prædestinatione illa extendere, nam propter illas creduntur posita in epistola Cælestini verba illa: *Profundiores autem quæstiones*, etc. Distinguenda igitur sunt in materia de prædestinatione duo quæstionum genera; quædam sunt necessario connexa cum doctrina de gratia, ut, an prædestinatio fundetur in bono usu solius liberi arbitrii, an primum gratiæ auxilium sit ex gratuita prædestinatione, et similes. Aliæ vero sunt quæ non tam necessariam connexionem habent cum principiis de gratia ab Ecclesia definitis, ut an electio prædestinatorum ad gloriam sit ex prævisis meritis, vel an præscientia conditionata boni usus liberi arbitrii cum gratia ad prædestinationem supponatur, et similes. In prioribus ergo quæstionibus, sententia Augustini in materia prædestinationis tam certa est, sicut doctrina gratiæ, propter connexionem. In quæstionibus vero posterioris generis, non potest esse tam certa, propter contrariam rationem, et quia Ecclesia directe et per se nihil fere de prædestinatione definiivit, nisi in generali, quod detur, et quod sit de bonis, non de malis, et quod in particulari sciri non possit, nisi per divinam revelationem. Nihilominus tamen etiam in his posterioribus de prædestinatione

quæstionibus, auctoritas Augustini maxima est, propter alias rationes supra factas, et ideo semper a nobis cæteris præferetur.

19. *Opera Augustini in quibus de gratia agit.* — Opuscula autem Augustini de hac materia quamplurima sunt, et omnibus fere nota. Inter ejus vero epistolas, præcipue observandæ sunt 47, 89, 92, 94, 95, 105, 106, 107 et 143; item in tertio tomo, liber de Spirit. et litter., et in quarto, liber 1 ad Simplie., quæstione secunda, quam ipse commendat in libro de Prædestinatione Sanctorum, capite quarto, et de Bono persever., capite vigesimo. In septimo vero tomo, tota posterior pars ejus, quæ incipit a libris de Peccator. merit. et remiss. usque ad finem, est de hac materia. Ex illis vero opusculis antiquiora sunt contra Pelagium, Cælestinum, Julianum, et alios, qui integrum Pelagii errorem sequebantur; contra quos scribere incœpit in libris de Peccator. merit. et remiss., nulla personarum facta mentione, quia nondum publice notæ erant, ut ipse dicit libro 2 *Retract.*, cap. 33; postea vero non solum doctrinam impugnavit, sed etiam personas, ut caverentur, reprehendit, et damnavit, et ad eorum scripta et objectiones respondit usque ad librum de Correptione et gratia. Ultima vero opuscula, quæ sunt de Prædestinatione Sanctorum et Bono perseverant., a Prospero et Hilario excitatus, contra Semipelagianos peculiariter scripsit. Et ideo illi duo libri, quos in ultima senectute scripsit, quasi testamentum Augustini habentur, et quamdam majorem auctoritatem habent; tum quia post summam et diuturnam diligentiam, et meditationem illius materiæ fuerunt elaborati; tum etiam quia, sicut error ille subtilior erat, ita majori quodam acumine sunt conscripti. In cæteris autem tomis 8, 9 et 10, sæpissime digreditur Augustinus ad confutandos Pelagianos, et veram de gratia doctrinam tradendam, exponendo psalmos, tum in tractatibus super Joannem, tum etiam in Concionibus ad populum, ex quibus omnibus, suis locis, quæ opportuna judicabimus, afferemus. Et quia liber de Gestis Pelagii, ex quo Acta Synodi Palæstinæ supra decerpsimus, nobis etiam usui futurus est, et typis non est mandatus, cum revera sit Augustini, illum tanquam appendicem ad hunc primum librum, ad communem utilitatem evulgabimus.

20. *Hispanus Orosius sequitur.* — De Hilario. — Post Hieronymum et Augustinum, ponimus Paulum Orosium, ejusdem temporis

scriptorem, quem tanquam eruditissimum virum laudat Gelasius Papa in cap. *Sancta Romana*, et præter Iustoriam contra Paganos, alium librum contra Pelagium de libero arbitrio et gratia edidit. Fuit autem Orosius Hispanus Presbyter, qui a quibusdam Hispaniæ Episcopis missus est ad Augustinum, ut contra Priscillianistas et Origenistas doctrinæ auxilium ab eo postularet, ut constat ex eodem Augustino, libro 2 *Retract.*, capite 44, et ex libello Augustino oblato ab eodem Orosio, qui præfertur libro ejusdem Augustini contra Priscillianistas, in quo interrogationibus Orosii Augustinus respondit. Illa vero oblata occasione, Augustinus Orosium ad Hieronymum misit, ut ipse testatur in epistola 102, in fine dicens, misisse ad Hieronymum consultatoriam quamdam disputationem de origine animæ: *Occasionem quippe (ait) cujusdam sanctissimi et studiosissimi juvenis Presbyteri Orosii, qui ad nos ab ultima Hispania, id est, ab Oceani littore, solo sanctarum Scripturarum ardore inflammatus advenerat, amittere nolui, cui ut ad illum (id est, Hieronymum) quoque pergeret persuasi.* Unde idem Orosius, in dicto libro de Libero arbitrio, circa initium, sic inquit: *Latebam ego in Bethleem, traditus a Patre Augustino, ut timorem Domini discerem, sedens ad pedem Hieronymi.* Hac ergo occasione, non solum Pelagii, qui tunc in Oriente versabatur, et omnium quæ ibi contra illius errores, salva ejus persona, acta sunt, magnam habuit notitiam, sed etiam in Africam rediens, quæ gesta in Oriente fuerant Episcopis narrans, et allatis epistolis confirmans, occasionem præbuit cogendi Africana Concilia contra Pelagium, et ipse postea de eadem causa opus proprium scripsit.

21. Paulo post illa tempora, vivente adhuc Augustino, Pelagianis devictis, Semipelagianisque insurgentibus adversus Augustinum, Hilarius, Arelatensis Episcopus, et Prosper, Aquitanus, contra illos pro gratia Dei et pro Augustini doctrina pugnare coeperunt. Ex Hilario vero nullum opus de gratia, vel contra Pelagium extat, præter epistolam ad Augustinum, quæ habetur in optimo tomo ante libros de Predestinatione Sanctorum. Extat alia epistola Hilarii ad Augustinum, quæ est 88 inter epistolas Augustini, in qua illum excitat ad scribendum contra Pelagi errores, qui tunc in Sicilia detentum coeperant: ejus petitioni Augustinus in epistola octogesima nona satisfacit. Veruntamen an ille Hilarius

unus et idem fuerit, vel distincta persona, mihi exploratum non est. Nam quod diversi fuerint, videtur fieri verisimile; tum quia hic ex Gallia, ille ex Sicilia scripsit ad Augustinum; tum etiam quia Hilarius Siculus multo ante Arelatensem ad Augustinum scripsit: ille enim scripsit in principio pelagianæ hæresis, quando Pelagius Romæ detectus hæreticus in Siciliam abiit, et inde in Palæstinam; at vero Hilarius Arelatensis post decem vel plures annos scripsit ad Augustinum, fere jam extincta Pelagiana hæresi, et Semipelagianismo inchoante; tum denique quia Hilarius ille qui epistolam 88 scripsit ad Augustinum, aperte significat se non cognovisse de facie Augustinum; alter vero Hilarius, in sua epistola, Augustini discipulum se aliquando fuisse et cum eo conversatum esse aperte testatur, doletque quod *a presentia Augustini exulare coactus fuerit, ubi salubribus ejus uberibus nutrietur.* Fateor tamen hæc indicia non cogere ut duos Hilarios illos fuisse dicamus. Nam potuit idem, licet esset Gallus, in juventute Siciliam adire, ibique aliquandiu inhabitare, et inde Augustinum consulere circa errores Pelagianorum, postea vero, recepto Augustini responso, desiderio audiendi illum in Africam transire, et aliquo tempore sub disciplina Augustini versari, ac tandem in patriam redire, ibique pro gratia Dei contra Semipelagianos pugnare, et ea occasione ad Augustinum scribere. Denique verisimile est alia opera in eadem causa scripsisse. Nam de illo refert Ado in Martyrologio, die 3 Maii: *Fuisse magnum Doctorem, et præclarissimum virum, et scripsisse varia opera ingenio immortalis ad multorum utilitatem.* Idemque fere habet Gennadius in libro de Viris illustribus in Hilario. Unde cum illo tempore defensio gratiæ contra Semipelagianos maxime esset necessaria, verisimile est multa ex illis operibus de hoc argumento fuisse, quamvis cum multis aliis exciderint.

22. *Prosper et opera ejus.* — Prosperi autem præter epistolam, quam cum Hilario ad Augustinum scripsit, de qua multa in superioribus dicta sunt, alia multa opera de gratia Dei habemus, in quibus præcipue Semipelagianos exagitat, sed obiter et a fortiori Pelagianos convincit et confundit, nimirum libros duos de *Vocat. gent.*, qui falso antea tribuebantur Ambrosio, libros quatuor *Responsionum* ad objectiones contra Augustinum, Gallorum, Vincentii, Gennentium et Cassiani; item duas epistolas, unam ad Rufinum, alte-

ram ad Demetriadem, et librum sententiarum, quas ex Augustini scriptis collegit, et carmen breve, quod epitaphium Pelagianæ hæresis inscribit, et aliud prolixius de Ingratis. Præter alia quæ, ut minister Apostolicæ Sedis, cum Cœlestino præsertim et Leone I, in defensionem Augustinianæ doctrinæ de gratia contra Pelagium, magno fidei zelo, magnoque ingenio et diligentia elaboravit. Semperque fidelissimus Augustinianæ doctrinæ defensor ac sectator fuit, ut ipse in Præfatione Responsonum ad Gallos, et in epistola ad Rufinum, et sæpe alias, et verbis confitetur, et factis exequitur.

23. *Auctoritas Prosperi.* — Quapropter, inter omnes Patres qui post exortos Semipelagianos pro gratia Dei scripserunt, Prosper maximam auctoritatem post Augustinum obtinuit, et sane merito. Tum quia eodem tempore, et a principio illius erroris, contra illius auctores adhuc viventes, Cassianum et Vincentium, scripsit, et acerrime magnoque ingenio et verborum pondere disputavit. Tum etiam quia Augustino valde affectus, et in ejus doctrina plurimum versatus, non solum a vestigiis ejus non recedit, verum etiam illius affectum et ingenium quodammodo videtur induisse; tum denique quia per plures annos huic studio et defensionem totus incubuit, idque (ut ipse testatur in Præfatione ad objectiones Vincentianas) ex *Apostolicæ Sedis auctoritate*, quod munus magna fidelitate et diligentia exercuit. Accedit quod ipsis Pontificibus maxime probatus fuit. Nam prius simul cum Hilario Cœlestinum adiit, ut Augustinum propugnaret, et in ejus defensionem epistolam a Cœlestino ad Episcopos Galliæ obtinuit, in cujus initio Cœlestinus ipse studium Prosperi et Hilarii laudat, et in fine quædam capitula de gratia illi epistolæ adjunguntur, quæ a Prospero edita esse creduntur, et vel ab ipso Cœlestino simul fuerunt probata et missa, vel tacito consensu Ecclesiæ ita probata sunt, ut certam auctoritatem obtinuisse videantur; postea vero Leoni papæ in conscribendis epistolis decretalibus operam dedisse, plures auctores referunt. Unde, ut supra dicebam, Canones Concilii Arausicani opera ejusdem Prosperi conscripti creduntur, quod etiam stylus eorum suadet. Denique Gelasius Papa, in cap. *Sancta Romana*, opera Prosperi, inter ea quæ Ecclesia recepit, numerat, eumque virum religiosissimum appellat.

24. *De Cæsario ejusque operibus, et auctoritate.* — Quamvis autem tempore Leonis Pa-

pæ, seu Prosperi, qui sex annis post Leonem mortuus est, Semipelagianus error extinctus esse legatur, nihilominus tamen sopitus potius quam radicitus evulsus fuisse videtur. Nam statim Faustus, Prosperi in Regiensi Episcopatu successor, verbis et scriptis errorem illum defendere aggressus est, ut supra vidimus. Hac ergo occasione plures alii Patres illius temporis egregia opera de divina gratia ediderunt. Et imprimis refertur Cæsarius Arelatensis, de quo Baronius anno 490, num. 12 et seqq., ait scripsi-se librum de gratia et libero arbitrio, ut ipse conjectat, occasione librorum Fausti, et ad confutandos illos; refertque Gennadium, ita de Cæsario, cap. 86 de *Viris Illustribus*, scribentem: *Cæsarius, Arelatensis Episcopus, doctrina celebris, sanctitate conspicuus, ad Felicem, Romanum Pontificem, de Gratia et libero arbitrio librum scripsit, quem agnitum ipse Felix non solum probavit, sed, et scripta de eo Epistola, confirmavit, vulgandumque ubique curavit: non extat ille quidem, sed quantus fuerit, ex Romani Pontificis addita illa epistola (quod de aliis hactenus non meminimus factum) possumus opinari. De eo enim apud Gennadium, hæc leguntur: Cæsarius, Arelatensis urbis Episcopus, vir sanctitate et virtute celebris, scripsit egregia et grata valde, et monachis necessaria opuscula. De gratia quoque et libero arbitrio edidit testimonia, divinarum Scripturarum et sanctorum Patrum judiciis munita, ubi docet nihil hominem de proprio agere aliquid boni posse, nisi eum divina gratia prævenierit. Quod opus etiam Papa Felix per suam epistolam roboravit, et in latius promulgavit.* Quod quidem caput in catalogo Gennadii, qui in fine tomi primi operum Hieronymi habetur, non extat, et ideo minus certum est, licet absque dubio ex alia editione Baronius illud retulerit. Item quod ibi Baronius conjectat factum esse sub Felice III, postea in Appendice ad tomum decimum, dicit factum esse sub Felice IV, fere post quadraginta annos. Quare non potuit ille liber scribi a Cæsario contra Faustum, quia jamdiu præcesserat, et verisimilius est eo jam tempore fuisse mortuum. Multoque minus id consistere poterit, si verum est quod Trithemius putat, Cæsarium Arelatensem, Ecclesiasticum scriptorem, anno Domini 670 floruisse, quod secuti sunt auctor summæ chronograph., in primo tomo operum Canisii, et auctor præfationis ad Homilias Cæsarii, in tomo secundo Biblioth.; et sane consequenter, nam si illæ homiliæ Cæ-

sarii sunt, necesse est post 600 annum floruisse; nam in 42 allegat Gregorium et Isidorum. Sed cum ex Concilio Arelatensi 3, in quo Cæsarius præsedet, constet illum vixisse tempore Leonis, et ex Concilio Agathensi, cui etiam præfuit, pateat vixisse sub Symmacho, inter quos Felix III vixit, verisimilius est misisse librum, quem de gratia scripsit, ad Felicem III, qui usque ad 491 vixit, quo tempore scripsit etiam Faustus, et ita optime potuit Cæsarius primus omnium de gratia contra Faustum scripsisse; ejus tamen opus, licet Trithemius dicat extare, ad nostra tempora non pervenit.

25. *De Fulgentio, ejus operibus et auctoritate.* — Opus Fulgentii, quod post Augustinum et Prosperum maximam auctoritatem habet. — Idem nobis contingit de libris septem quos Fulgentius contra Faustum scripsit, ut in vita ejus, cap. 28, Felicianus Episcopus, ejus successor, refert, cujus verba, quia rationem optimam scribendi contra Semipelagianos declarant, hic adnotabo; ait enim: *Ita erat notior omnibus gentibus, ut duo libri quos Faustus, Episcopus Galliarum, contra gratiam subdolo sermone composuit, fatens occulte Semipelagianis, sed catholicis tamen volens videri, Constantinopoli offensi, a plurimis fratribus ad Beatum Fulgentium probandum dirigerentur; quibus, ne occultum serperet virus, septem libris ipse respondit, plus laborans exponere quam contincere, quia dubios sermones ejus exponere, hoc erat delirantis argumenta contincere. Magnus plane hujus operis labor, mercedem debitam cito suscepit, protinus est longissimæ captivitatis catena disrupta. Quos libros se vidisse et legisse testatur Isidorus, de Viris Illustribus, cap. 44, dicens: Fulgentius Afer, Ecclesiæ Ruspensis Episcopus, in confessione fidei clarus, in Scripturis divinis copiosissime eruditus, in loquendo quoque dulcis, in dicendo ac disserendo subtilis, scripsit multa. Et quibus legimus de gratia Dei, libero arbitrio libris responsionum septem, in quibus Fausto, Galliarum Regiensi vobis Episcopo, Pelagianæ pravitati consentienti respondens, obicitur ejus profundam destruere calliditatem. Præter hos etiam referuntur alii libri de gratia scripti a Fulgentio, addit enim Isidorus: Extant et duo ejusdem libri de veritate prædestinationis ad Episcopos missi, in quibus demonstratur, quod gratia Dei in hominibus voluntatem humanam præterit, et quod Deus quosdam, prædestinationis suo munere justificans, præcligit, quosdam*

vero in suis reprobis moribus, occulto quodam judicio, derelinquit. Et fortasse de eisdem libris loquitur Felicianus dicto cap. 28, cum inquit: *Testimonia quoque prædestinationis et gratiæ differentias cupientem nosse, salubriter disputans, docuit.* Sed neque hi libri extant, nisi forte illi contineantur in libro 1 ad Monimum, qui totus est de Prædestinatione et gratia. Præterea, in epistolis suis doctrinam catholicam de gratia sæpe inculcat, præsertim in epist. 2 ad Gallam, cap. 20 et 21, et epist. 3 ad eandem, cap. 3, 20 et sequentibus, et epistola 4 ad Probam, fere per totam, præcipue cap. 2 et 8. Proprie vero et ex instituto disputavit de gratia contra Semipelagianos, in lib. de Incarnat. et gratia ad Petrum, a cap. 12, quod opus unum est ex præcipuis contra Semipelagianos, et post Augustini et Prosperi opera, maximi ponderis et auctoritatis mihi esse videtur, et ita illius sententiis frequenter utemur. Quamvis enim liber ille Fulgentio adscribatur, quia (ut creditur) ab illo fuit conscriptus, quod et stylus, et eruditio illius ostendit, nihilominus sub nomine quindecim Episcoporum, qui in ejus initio nominantur, missus est, unde ab omnibus fuit probatus, ut dici posset quamdam Concilii provincialis vim et auctoritatem habere.

26. *De Petro Diacono, ejusque scriptis.* — *Maxentius quid scripserit.* — Fuerunt autem illi Africani Episcopi ad scribendum provocati et rogati a Petro Diacono, cum aliis viris Catholicis Orientalibus, qui ex Oriente Romam missi fuerant, ut fidem suam de incarnatione et gratia contra Nestorianos et Pelagianos profiterentur. Qui cum jam Romam pervenissent, utile et necessarium judicarunt ad Africanos Episcopos suam fidem de iisdem mysteriis mittere, et ab eis in eadem causa responsum postulare. Et hac occasione, Petrus Diaconus, qui inter eos vel præcipuus vel doctor fuisse videtur, scripsit librum de Incarnatione et gratia, qui ante libros Fulgentii inter opera ejus habetur, in cujus tribus ultimis capitibus vehementer exagitat Semipelagianos, ut in superioribus attigimus, et veram de gratia doctrinam sapienter exponit ideoque inter graviores antiquos de gratia scriptores hic Petrus numeratur. Atque hi fuisse videntur antiqui Patres, quos omnes in secundo ordine supra posito collocamus, quia Pelagianis et Semipelagianis insurgentibus vel pullulantibus retiterunt, et contra illos scripserunt. Atque hos aliqui annumerant Joannem Maxentium, Orientalem Monachum, qui in prima

sua professione fidei, et in responsione ad epistolam Hormisdæ ad Possessorem, orthodoxe doctrinam de gratia explicat, et Semipelagianos acriter insectatur. Sed hic auctor a nobis prætermittitur; tum quia non catholicus, sed Eutychemus fuisse creditur; tum etiam quia in illa responsione ad Hormisdam graviter peccat contra Hormisdam Pontificem, licet in doctrina de gratia revera non erret, ut in superioribus, tractando de libris Fausti, satis adnotatum est.

27. *Ultima Patrum S.S. manus qui gratiam tuentur.* — *De Isidoro.* — *D. Damasceni locus insignis.* — *Venerabilis Bedæ disputatio.* — Post illa vero antiqua tempora, in quibus controversia cum Pelagianis vixit, multi etiam gravissimi Patres eandem catholicam de gratia doctrinam, quidam quidem breviter et per occasionem in scriptis suis tradiderunt, alii vero ex professo propria de divina gratia opuscula reliquerunt. Inter priores ponimus imprimis Isidorum, qui, præterquam quod inter hæreses Pelagianam numerat, quia liberum arbitrium gratiæ præferret, et Fulgentium et alios Patres contra Pelagium scribentes mirifice laudat, in libro secundo Sentent., c. 5 et 6, et in libro de Different. Spiritual., cap. 27, summam catholicam doctrinam de gratia et prædestinatione colligit. Illa vero loca quoad aliqua verba expositione indigent, quam postea suis locis trademus. Deinde notari potest insignis locus Damasceni libro secundo de Fide, cap. 29 et 30, ubi doctrinam de præscientia, prædestinatione et gratia breviter complectitur. Beda etiam, in Præfatione ad Cantica, egregiam habet disputationem contra Julianum Pelagianum, qui eo prætextu librum Canticorum exposuerat, ut ab humano amore et fœda voluptate illum discerneret, cum tamen revera ad suum errorem confirmandum id fecisset. Et in reliquis operibus suis, passim sententiis Augustini utitur, et eodem modo Scripturas exponit quæ de gratia Dei loquuntur.

28. *D. Thomas D. Augustini defensor.* — In posteriori ordine ponimus imprimis Anselmum, in libro de Concord. prædestinationis et gratiæ cum libero arbitrio, præter ea quæ, in aliis opusculis et in expositionibus Epistolarum Pauli, consentanea ad Augustinum docet. Deinde Bernardus, lib. de Grat. et liber arbit., ut alios plures omittam, quos late refert Coecius, tomo primo Thesaur., libro primo, articulo quarto. Solum hoc loco D. Thomam adjungimus, quia sicut in explicandis fidei mys-

teriis, cæteris scholasticis theologis antefertur, et primis Ecclesiæ Doctoribus comparatur; ita in illustrandis difficillimis de gratia et libero arbitrio controversiis, ipsi Augustino eum supparem reputamus. Nam et illius doctrinæ sectator est ac defensor acerrimus, et in rebus obscuris et ambiguis, mentis ejus est diligentissimus indagator et fidelissimus interpres. Quapropter, cum in aliis lucubrationibus nostris ac theologicis disputationibus, D. Thomam semper tanquam primarium ducem et magistrum habuerimus, ejusque doctrinam pro viribus intelligere, defendere ac sequi conati fuerimus, in præsentī opere, multo majori studio et affectu id præstare curabimus; speramusque cum divino auxilio consecuturos esse, ut a vera ejus mente atque sententia, in nulla re gravi aut alicujus momenti discedamus; non ex nostro capite, sed ex antiquis ejus expositoribus ac sectatoribus, et ubi illi defuerint, ex variis ejusdem locis inter se collatis eam eliciendo. Quia vero, ut homines, interdum ab scopo errare possumus, quidquid in hoc opere dixerimus, Apostolicæ Sedis iudicio humiliter subijcimus.

CAPUT VII.

DE LIBRO D. AUGUSTINI DE GESTIS CONTRA PELAGIUM IN CONCILIO PALÆSTINO, PER 22 CAPITULA DISTRIBUTO.

Monitum lectorem volumus opus hoc de Gratia, editione posthumum, multo ante annum 1614 scriptum fuisse ab auctore: quod ergo hodie Augustini operibus Parisiis excussis prædicto anno 1614, liber de Gestis Pelagii insertus circumferatur, neque veritatem elevat eorum quæ hoc in capite præfatur Suarins, neque deprimit utilitatem, sed potius mutam sibi Parisiensis Conimbricensisque editiones auctoritatem conciliant. — (Notas omnes ad calcem paginarum rejecimus, et quasdam addidimus. — *Edit.*)

De Actis in hoc Concilio multo tempore fuisse Augustinum sollicitum, eaque vehementer desiderasse et petiisse, ex epist. ejus 252 ad Joannem Hierosolymitanum manifestum est: tandemque illa obtinuisse, et super illa librum quemdam ad venerabilem Senecam Aurelium scripsisse, ipse testatur lib. 2 de Peccat. orig., cap. 14, et in lib. 2 Retract., cap. 47, ubi causam addit, *ne illo (id est Pelagio) quasi absoluto, eadem quoque dogmata putarentur judices approbasse, quæ ille nisi damnasset, nullo modo, nisi damnatus, cævisset*. Hic ergo liber hactenus desiderabatur, quia inter opera Augustini typis mandata non continetur, ante paucos vero annos primum in-

ventus est in Bibliotheca manuscripta Abbatiae Sancti Bartholomaei Fesularum Canonicorum Regularium Lateranensium, et postea alius liber omnino similis inventus dicitur Florentiae in Bibliotheca magni Ducis, ut a viro quodam nobili, docto, ac fide dignissimo accepi, de cuius manu exemplar habui, quod fidelissime transcripsi. Cumque illum attente legissem, non solum ex indiciis ac conjecturis probabilibus, et ex gravi hominis auctoritate, sed etiam ex phrasi et discursu libri, et Augustini opus esse, ejusque ingenium prae se ferre, et doctrinam continere, manifeste comperi. Et quoniam ad hujus nostri operis perfectionem, utilissimum ac fere necessarium esse existimamus, et an ab aliis promulgandus sit ignoramus, illum hoc loco praemittendum duximus, nihil omnino de verbis Augustini immutando. Quia vero in eodem exem-

plari variae interdum lectiones notabantur, quae nobis magis placuerit in textu ponemus; alias, ubi res clara videbitur, omitemus; ubi vero fuerit dubia, in marginem rejiciemus; et cur unam prae aliis eligamus, interdum proferemus. Ubi depravatus videbitur textus, nihil immutabimus, illius tamen correctionem quam aptiorem judicaverimus, adnotabimus. Simili ratione, cum in eodem exemplari liber hic in capita divisus sit, et divisio non videatur ab Augustino facta, quia, multis in locis, minus apta minusque rationi consentanea nobis visa est, alio commodiori modo capita dividemus, semper tamen antiquam divisionem in margine adnotabimus. Ac denique, ubi opportunum videbitur, breve aliquod scholium, litteris A, B, etc. indicatum, ad majorem rei declarationem, aut confirmationem adjiciemus. Liber igitur sic habet.

D. AUGUSTINI HIPPONENSIS EPISCOPI

LIBER AD S. EPISCOPUM AURELIUM

¹ DE GESTIS PELAGII CONTRA ADVERSARIOS GRATIAE DOMINI NOSTRI JESU CHRISTI.

Postquam in manus nostras ², sancte Papa Aureli, Ecclesiastica gesta venerunt, ubi Pelagius ab Episcopis 14 provinciae Palaestinae catholicus est pronuntiatus, cunctatio mea terminum accepit, quo disserere aliquid plenius atque fidentius de ipsa ejus defensione dubitabam. Hanc enim jam in quadam chartula quam mihi ipse miserat, legeram. Sed, quia ejus cum illa nullas a se datas litteras sumpseram, verebar ne aliquid alter in meis verbis inveniretur, quam legeretur in Episcopalibus gestis; atque ita forsitan negante Pelagio quod ipse mihi illam chartulam miserit, quoniam facile convinci uno teste non posset, ego potius ab illis qui ei neganti faverent, aut suppositae falsi-

tatis, aut (ut mitius dicam) temerariae credulitatis arguerer. Hunc ergo pertractato ³, quae gesta testantur, jam quantum mihi videbar, utrum pro se ille sic egerit dubitatione sublata, profecto, et de ipsius defensione, et de hoc opere nostro Sanctitas Tua, atque omnis qui legerit, facilius et certius judicabit.

CAPUT I.

DE PRIMA PROPOSITIONE PELAGIO OBJECTA.

Primum itaque Domino Deo, rectori custodique meo, ineffabiles ago gratias, quod me, de sanctis fratribus et Coepiscopis nostris, qui in ea causa judices considerunt, opinio non fe-

NOTAE SUAREZ.

¹ Ita habet exemplar. Possidius vero in indiciis ita scribit: *Contra gesta Pelagii liber unus*. At liber non est contra Gesta, sed contra Pelagium. Unde Augustinus, lib. de Peccato Orig., c. 14. titulum indiat *de gestis Palaestinis*, et in idem redit, quod ait in c. 47, l. 2. Retinet: *Cum in manus nostras eadem gesta*

venissent, scripsi de his librum, etc.

² Sine dubio haec lectio preferenda est, quia altera (*re tractas*) intentioni Augustini nihil inservit, ut facile consideranti constabit.

³ Mendosus videtur locus, legendumque videtur: *Hoc ergo pertractato vel peracto, quod Gesta testantur, vel Illis pertractatis, etc.*

fellit. Responsiones enim ejus non immerito approbaverunt, non curantes quo modo ea quæ obiciebantur in opusculis suis posuerit, sed quid de his in præsentī examinatione responderit. Alia est enim causa fidei non sanæ, alia locutionis incautæ. Denique ¹ in his quæ de libello quem dederunt Sancti Patres, et Coepiscopi nostri, Galienus et Lazarus, qui, propter gravem (sicut postea probabilius comperimus) unius eorum ægritudinem, præsentēs esse minime potuerunt, recitata sunt objecta Pelagio, illud est primum quod in libro suo quodam scribit: *Non posse esse sine peccato, nisi qui legis scientiam habuerit.* Quo recitato, Synodus dixit: Tu hoc edidisti, Pelagi? At ille respondit: Ego quidem dixi, sed non sicut illi intelligunt, non posse ² peccare, nisi qui scientiam legis habuerit, sed adjuvari per legis scientiam ad non peccandum, sicut scriptum est: Legem in adjutorium dedit illis. Hoc audito, Synodus dixit: Non sunt aliena ab Ecclesia quæ dicta sunt a Pelagio.

Plane aliena non sunt quæ respondit; illud vero quod de libro ejus prolatum est, aliud sonat. Sed hoc Episcopi Græci homines, et ea verba per interpretem audientes, discutere non curarunt, hoc tantum intuentes quid ille qui interrogabatur, sensisse se diceret, non quibus verbis eadem sententia in libro ejus scripta diceretur. Aliud est autem hominem per scientiam legis ad non peccandum adjuvari, et aliud est non posse esse sine peccato, nisi qui scientiam legis habuerit: cum videamus, exempli gratia, et sine tribulis areas triturrari, quamvis adjuvent, si adsint: et sine pædagogis posse pueros pergere in scholam, quamvis ad hoc non sint inutilia pædagogorum adjuncta: et multos ab ægritudine sine medicis convalescere, quamvis manifesta sint adjutoria medicorum: et aliis ³ sine cibis pane homines vivere, quamvis panis adjutorium valere plurimum non negetur. Et alia multaque, nobis tacentibus, cogitanti facile occurrunt. Profecto admonemur adjutoriorum genera esse duo; alia quippe sunt sine quibus illud ad quod ad-

juvant effici non potest, sicut sine navi navigat nemo, nemo sine voce loquitur, nemo sine pedibus graditur, nemo sine luce intuetur, et multa hujus modi: unde est etiam illud, quod nemo sine Dei gratia recte vivit. Alia vero sunt adjutoria, quibus sic adjuvamus, ut, etiam si desint, possit alio modo fieri, propter quod ea requirimus, sicut illa sunt quæ commemoravi: tribula ad fruges terendas, pædagogus ad puerum ducendum, medicamentum ⁴ humanitate confectum ad recipiendam salutem, et cuncta talia.

Quærendum est igitur ex quo duorum istorum generum sit talis scientia, id est, quomodo adjuvet ad non peccandum? Si eo modo ut sine illa hæc non possit impleri, non solum Pelagius verum respondit in iudicio, sed etiam verum scripsit in libro. Si vero eo modo ut adjuvet quidem, si adfuerit, possit tamen illud ad quod juvat alio modo fieri, etiamsi ista defuerit; verum quidem respondit in iudicio, quod merito Episcopis placuit, adjuvari hominem ad non peccandum legis scientia, sed non verum scripsit in libro, non esse hominem sine peccato, nisi qui scientiam legis habuerit, quod indiscussum iudices reliquerunt, latini sermonis ignari, et ejus qui causam dicebat confessione contenti, præsertim ubi ex adverso nullus adstaret, qui verba libri ejus exponendo aperire interpretem cogeret, atque unde fratres non frustra moverentur, ostendere. Paucissimi quippe sunt legis periti, multitudinem autem membrorum Christi usquequaque diffusam, et legis tam profundæ ac multiplicis imperitam, simplicis fidei pietas, et spes firmissima in Deo, et charitas sincera commendat, quæ, his donis prædita, gratia Dei se confidit a peccatis posse mundari.

⁵ Ad hoc si forte Pelagius responderet, hanc ipsam se dixisse scientiam legis, sine qua non potest homo liber esse a peccatis, quæ per doctrinam fidei a neophytis atque in Christo parvulis traditur, qua etiam baptizandi catechizantur, ut symbolum noverint: non quidem ista intelligi solet, quando habere quisquam

NOTÆ SUAREZ.

¹ Licet superius, cap. 21, Acta Concilii, ut non interrupta sed continuata serie haberentur, recitaverimus, ut sic melius intelligerentur, nihilominus hic omitti non potuerunt, ut integrum opus Augustini traderemus, ejusque sententia in singulis capitibus melius perciperetur.

² Vide commentar. in tomo 28. (Not. Edit.)

³ Legendum arbitror, *et aliis cibis sine pane posse homines vivere*; nam si sententia esset, posse homines solo pane sine aliis cibis vivere, subdendum consequenter esset, quamvis aliorum ciborum adjutorium valere plurimum non negetur. Alias discursus non subsistet.

⁴ Forte, *humana arte.*

⁵ Illic incipiebat caput 2.

scientiam legis dicitur, sed illa secundum quam legis periti appellantur. Verumtamen, si hæc verba, quæ pauca numero, sed magna sunt pondere, et more omnium ecclesiasticorum fideliter baptizandis intimantur, scientiam legis nuncuparet, asserens de hac re dixisse, non esse sine peccato, nisi qui scientiam Dei habuit, quæ necesse est ut tradatur credentibus, antequam ad ipsam remissionem veniant peccatorum, etiam si circumdaret eum non disputantium, sed vagientium baptizatorum multitudo innumerabilis parvulorum, qui non verbis, sed ipsa innocentiae veritate clamarent, quid est, quid est, quod scripsisti, non posse esse sine peccato, nisi qui scientiam legis habuerit. Ecce nos grex magnus agnorum sine peccato sumus, et legis tamen scientiam non habemus.

Nempe isti cum saltem, lingua tacente, tacere compellerent, aut forte etiam confiteri, vel nunc se ab illa perversitate correptum, vel certe hæc se quidem, et ante sensisse, quod nunc in ecclesiastico dixit examine, sed ejus sententiæ non se circumspecta verba possuisse, et ideo fidem suam esse approbandam, librum emendandum. Est enim, ut scriptum est, qui labitur in lingua, et non in corde. Qui, si diceret, vel si dicat, quis eisdem verbis incautius negligentiusque conscriptis, non facillime ignoscat, cum sententiam quam verba illa continent non defendat, sed cum discat, quam veritas probat? Hoc etiam pios judices cogitasse credendum est: si tamen hoc quod in libro ejus latino est diligenter interpretatum, satis intelligere potuerunt; sicut ejus responsionem græco eloquio prolatam, et ob hoc facile intellectam, alienam non esse ab Ecclesia judicaverunt. Sed jam cætera videamus. Adjecit enim Episcopalis Synodus, et ait.

NOTÆ SUAREZ.

¹ Hic incipiebat caput 3.

² Hæc forte quipiam ex mente Augustini collizat, quem Deus agit, non cum indifferentia agere, neque cum potestate non agendi, et resistendi motioni Dei. Hunc vero sensum excludit particula *vix*, quæ potius denotat eum, qui a Deo agitur, aliquid agere, licet non a se, sed ex motione Dei. Unde de illo qui, sic motus, bonum diligit, ait paulo inferius Augustinus: *Non solum voluntas id agit, sed divinitus adjuratur*. Et rursum inferius: *Se Spiritu Dei agi, et regi gratulantur*. Idem ergo est a Deo agi, quod regi, ac subinde sicut qui regitur aliquid agit, ita qui agitur. Quod alibi

CAPUT II.

DE SECUNDA PROPOSITIONE OBJECTA PELAGIO.

¹ Legatur, et aliud capitulum; et lectum est, in eodem libro suo, potuisse omnes voluntate propria regi. Quo lecto, Pelagius respondit: Et hoc dixi propter liberum arbitrium, cui Deus adjutor est eligenti bona; homo vero peccans, ipse in culpa est, quasi liberi arbitrii. Quo audito, Episcopi dixerunt: Neque hoc alienum est ab ecclesiastica doctrina.

Quis enim condemnaret liberum arbitrium, vel negaret, cum quo Dei adjutorium prædicatur. Quapropter et sententia respondentis merito Episcopis placuit. Et tamen illud, quod in libro ejus positum est, Omnes voluntate propria regi, fratres qui noverant quid adversus Dei gratiam isti soleant disputare, procul dubio debuit permovere; sic enim dictum est: *Omnes propria voluntate regi*, tanquam Deus neminem regat, et frustra scriptum sit: *Salvum fac populum tuum, et rege eos, et extolle illos usque in sæculum*. Ne remaneant utique, si voluntate propria sine Deo reguntur, velut oves non habentes pastorem; quod absit a nobis. Nam procul dubio plus est agi, quam regi; qui enim regitur, aliquid agit, et a Deo regitur, ut recte agat. Qui autem agitur, agere aliquid ipse vix ² intelligitur, et tamen tantum præstat voluntatibus nostris gratia Salvatoris, ut non dubitet Apostolus dicere: *Quotquot spiritu Dei aguntur, hi filii sunt Dei*. Nec aliquid in nobis libera voluntas melius agere potest, quam ut illi se agendo ³ commendet, qui male agere non potest, et hoc cum fecerit, ab illo se ut faceret adjutam non dubitat, cui dicitur in Psalmo: *Deus meus, misericordia ejus præveniet me*.

diserte Augustinus explicuit dicens sermone 13 de Verbis Apostoli: *Quotquot Spiritu Dei aguntur, hi filii Dei sunt. Dicit mihi aliquis: ergo agimur, non agimus. Respondeo: imo et agis, et ageris, et tunc bene agis, si a bono ageris. Spiritus enim Dei, qui te agit, agentibus adjutor est: ipsum nomen adjutoris præscribit tibi, quia et tu ipse aliquid agis. Nemo adjuratur, si ab illo nihil agatur; quotquot enim spiritu Dei aguntur, hi filii sunt Dei, non littera, sed spiritu, non lege præcipiente, mimante, promittente, sed spiritu exhortante, illuminante, adjurante.*

³ Forte agenda.

Denique, in illo libro ubi illa capitula Pelagius scripsit, huic positioni, qua dixit, omnes voluntate propria regi, et suo desiderio unumquemque dimitti, subiecit aliquid de testimonio Scripturarum, quo satis appareat non se sibi hominem regendum debere committere. Ait enim de hoc ipso Sapiaientia Salomonis: *Sum quidem et ego mortalis homo similis omnium, ex genere terreno illius qui prior factus est; et cætera usque ad eum capituli finem, ubi legitur: Unus ergo omnibus introitus ad vitam, et similis exitus. Propter hoc optari, et datus est mihi sensus, et innocavit, et venit in eum spiritus sapientiæ? Nonne luce clarius apparet quemadmodum iste, considerata miseria fragilitatis humanæ, non est ausus se regendum sibi committere, sed optavit, et datus ei sensus, de quo dicit Apostolus: Nos autem sensum Domini habemus, et invocavit, et venit in eum spiritus sapientiæ? Hoc enim spiritu, non viribus propriæ voluntatis reguntur et aguntur, qui filii sunt Dei.*

Nam et illud quod posuit de Psalmo in eodem capitulorum libro, ut quasi probaret omnes voluntate propria regi: *Dilexit maledictum, et veniet ei, et noluit benedictionem, et elongabitur ab eo; quis nesciat, hoc non vitium esse naturæ, sicut eam condidit Deus, sed voluntatis humanæ, quæ recessit a Deo? Veruntamen si non dilexisset maledictionem, et voluisset benedictionem, et in hoc ipso voluntatem suam divina gratia negaret adjutam; ingratus atque impius sibi regendus dimitteretur, ut sine rectore Deo præcipitatus, non se a seipso regi potuisse poenis experiretur. Sic etiam in illo testimonio, quod in eodem libro eidem titulo subdit: *Apposuit tibi aquam et ignem; ad quod vis porrige manum tuam. Ante hominem bonum et malum, vita et mors, quod placuit dabitur illi,* manifestum est quod si ad ignem manum mittit, et malum ac mors ei placet, id voluntas hominis operatur; si autem bonum et vitam diligit, non solum voluntas id agit, sed divinitus adjuvatur, sufficit enim sibi oculus ad non videndum, hoc est, ad tenebras; ad videndum vero lumine suo non sibi sufficit, nisi illi extrin-*

secus adjutorium clari luminis præbeatur.

Absit autem ut ii qui secundum propositum vocati sunt, quos præseivit et prædestinavit conformes imagini filii sui, suo ut pereant desiderio permittantur. Hoc enim patiuntur vasa iræ, quæ perfecta sunt ad perditionem, in quorum etiam ipsa perditione notitas facit Deus divitias gloriæ suæ in vasa misericordiæ suæ. Propter hoc enim cum dixisset: *Deus misericordia ejus præveniet me,* continuo subiecit: *Deus meus demonstrabit mihi inimicis meis.* Illis ergo sit ¹ quod scriptum est: *Tradidit illos Deus in desideria cordis eorum;* non autem sic prædestinatis, quos regit spiritus Dei, quoniam inanis non est vox eorum: *Ne tradas me, Domine, a desiderio meo peccatori.* Quandoquidem, et contra ipsa desideria sic oratum est, ut diceretur: *Aufer a me concupiscentias ventris et desideria concubitus, ne apprehendant me.* Præstat hoc Deus illis quos subditos regit, non autem illis qui se idoneos ad seipsos regendos putant, et præsidenti cervicæ propriæ voluntatis illum dedignantur habere rectorem.

Quæ cum ita sint, filii Dei qui hoc noverrunt, et se Dei spiritu regi et agi gratulantur, quomodo ² moveri potuerunt, cum audirent vel legerent a Pelagio scriptum, omnes voluntate propria regi, et suo desiderio unumquemque dimitti? Et tamen quia, interrogatus ab Episcopis, quid mali sonarent illa verba persensit, responditque hoc se dixisse propter liberum arbitrium, continuo subjiciens: Cui Deus adjutor est eligenti bona, homo vero peccans, ipse in culpa est quasi liberi arbitrii; hanc quoque sententiam pii judices approbantes, quam incaute vel quo sensu illa in libro ejus verba sint posita, considerare vel quærere noluerunt; sufficere existimantes ita eum confessum esse liberum arbitrium, ut eligenti bona Deus esset adjutor, peccans vero esset in culpa, ad hoc sibi sufficiente propria voluntate. Ac per hoc Deus regit, quibus adjutor est eligentibus bona; et ideo bene ³ regunt, quidquid regunt, quoniam ipsi reguntur a bono.

NOTÆ SUAREZ.

¹ Alias *fit*.

² Ita plane legendum est, non *moneri*, prout addebatur in margine. Deest tamen negatio; dicendum est enim, *quomodo non moveri potuerunt?* nam sensus Augustini est, merito moveri potuisse.

³ Ita legendum est in utroque loco, non *regit*, prout in margine addebatur. Nam sensus Augustini est, eos qui regunt, quidquid regant, id est, sive alios, sive seipsos, ideo bene regere, quia Deus eos regit, eisque est adjutor, ut eligant bona.

CAPUT III.

DE TERTIA PROPOSITIONE PELAGII.

Item recitatum est quod in libro suo Pelagius posuit, in die iudicii, iniquis et peccatoribus non esse parcendum, sed æternis eos ignibus exurendos. Quod adeo fratres moveat, ut obijciendum putaretur, quod ita dictum est, tanquam omnes peccatores æterno essent supplicio puniendi, non eis exceptis qui fundamentum habent Christum, quamvis superædificent ligna, fœnum, stipulam, de quibus dicit Apostolus: Si cujus opus exustum fuerit, detrimentum patietur, ipse autem salvus erit, sic tamen quasi per ignem. Sed cum respondisset Pelagius, hoc secundum Evangelium se dixisse, ubi dicitur de peccatoribus: *Isti ibunt in supplicium æternum, justi autem in vitam æternam*, nullo modo potuit Christianis iudicibus Evangelica et Dominica displicere sententia, nescientibus, quid in verbis de libro Pelagii prolatis moverit fratres, qui disputationes ejus vel discipulorum ejus audire consueverunt, quando, his absentibus, qui libellum contra Pelagium sancto Episcopo Eulogio dederunt, nullus urgebat, ut peccatores per ignem salvandi ¹ a peccatoribus æterno supplicio puniendis aliqua exceptione distingueret, et eo modo intelligentibus iudicibus cur fuerit illud objectum, si nollet distinguere, merito culparetur.

Quod autem addidit Pelagius: Et si quis aliter credit, Origenista est; hoc acceperunt iudices, quod revera in Origene dignissime detestatur Ecclesia; idem ² quod etiam illi, quos Dominus dicit æterno supplicio puniendos, et ipse Zabulus, atque angeli ejus, post tempus licet prolixum, purgati liberabuntur, et sanctis cum Deo regnantibus societati beatitudinis adhærebunt. Hoc ergo Synodus dixit, alienum non esse ab Ecclesia, non secundum Pelagium, sed potius secundum Evangelium, quod tales iniqui et peccatores æternis ignibus exurentur, quales tali supplicio dignos iudicat Evangelium, et quod detestabiliter cum Origene sentiat, qui dixerit aliquando eorum finire posse supplicium, quod Dominus dixit æternum.

De illis vero peccatoribus, quos dicit Apos-

tolus, exusto eorum opere, tanquam per ignem salvos futuros, quoniam nihil Pelagio de his evidenter objectum est, nihil judicaverunt. Quapropter, qui dicit iniquos, et peccatores, quos æterno supplicio veritas damnat, aliquando inde posse liberari, non inconvenienter Pelagius eum Origenistam vocat; sed rursus, qui nullum peccatorem in Dei iudicio misericordia dignum existimat, quod vult, ei nomen imponat, dum tamen et hunc errorem Ecclesiastica veritate non recipi intelligat, iudicium enim sine misericordia fiet illi qui non fecit misericordiam. Quomodo autem fiat hoc iudicium, difficile in Scripturis sanctis comprehendi potest.

³ Modis enim multis significatur quod uno modo futurum est: namque aliquando dicit Dominus, adversus eos quos in suum regnum non recipit, ostium se clansurum, clamantibusque illis et dicentibus: Aperi nobis, in nomine tuo manducavimus et bibimus, et cætera quæ illos dicere scriptum est, se responsurum: Nescio vos, qui operamini iniquitatem. Aliquando jussurum se commemorat, ut qui noluerunt eum regnare, sibi adducantur et interficiantur coram illo. Aliquando venturum se dicit cum Angelis suis in majestate sua, ut congregentur ante eum omnes gentes, et dividat eas, et alios ponat ad dexteram quorum bona opera commemorat, et reportet in vitam æternam; alios ad sinistram, quibus bonorum sterilitatem imputans, eos æterno igne condemnet. Aliquando servo nequam, pigro, qui pecuniam ejus neglexit impendere, vel etiam hominem inventum iu convivio, non habentem vestem nuptialem, jubet, ligatis manibus et pedibus, mitti in tenebras exteriores. Aliquando, susceptis quinque prudentibus, ostium contra stultas alias quinque virgines claudit. Hæc, et si quid est aliud, quod in præsentiam non occurrit, de iudicio dicuntur futuro, utique non in uno, vel quinque, sed in multis exercendo. Nam si unus esset qui de convivio, quod non habebat vestem nuptialem, in tenebras iussus est mitti, non continuo sequeretur, et diceret, *Multi enim sunt vocati, pauci vero electi*, cum potius, uno projecto atque damnato, multi in domo remansisse videantur. Sed de iis omnibus ⁴ non quantum satis est disputare per-

NOTE SCARIZ.

¹ Edit. Paris. operum S. August. legit *salvandos*. (Not. Edit.)

² Forte *id est*.

³ Hic incipiebat caput 4.

⁴ Forte *nunc*, vel dele *non*, num destruit sensum.

longum est. Hoc tamen breviter possum dicere. sine præjudicio (quod in pecuniariis rationibus dici solet) mollioris disquisitionis, unum aliquem iudicii modum, qui est inscrutabilis nobis¹, servat, duntaxat in præmiis et pœnis diversitate meritorum, multis per Scripturas sanctas significari modis. Quod autem huic causæ, de qua nunc agitur, satis est: si dixisset Pelagius omnes omnino peccatores æterno igne et æterno supplicio puniendos, quisquis iudicium id approbasset, in seipsum primitus sententiam protulisset. Quis enim gloriabitur se mundum esse a peccatis? Quia vero nec omnes dixit, nec quosdam, sed nec indefinite posuit, et hoc secundum Evangelium se dixisse respondit, vera quidem sententia Episcopali est confirmata iudicio. Sed adhuc aliud sentiat Pelagius, non apparet, et, post hoc etiam Episcopale iudicium, non impudenter inquiritur.

CAPUT IV.

DE PROPOSITIONE QUARTA PELAGIO OBJECTA.

Objectum est illud Pelagio tanquam in suo libro scripserit, malum nec in cogitationem venire. Respondit autem: Hoc non ita posuimus, sed diximus debere studere Christianum ne male cogitet. Quod, sicut decuit, Episcopi approbaverunt. Quis enim dubitat malum cogitari non oportere? Et revera² in suo libro ad malum, cuius ita legitur, nec cogitandum, quod in hac intelligi solet, malum ne cogitari debere quidem. Hoc autem qui negat, quid aliud dicit, quam debere cogitari malum? Quod si verum esset, non diceretur in laude charitatis: *Non cogitat malum*. Venire tamen in cogitationem justorum atque Sanctorum, Deo notum probe asseritur, quia cogitatio vocari solet, ³ cum aliquid in mentem venit, etsi consensus non sequatur; cogitatio vero, quæ culpam contrahit, et merito prohibetur, con-

sensione non caret. Potuit ergo fieri ut mendosum codicem legerent, qui hoc ita objiciendum arbitrati sunt, tanquam Pelagius dixerit, malum nec in cogitationem venire, quod malum est. Quæ sententia profecto absurdissima est, cum enim mala reprehendimus, nisi cogitata verbis, enuntiare non possumus; sed illa, ut diximus, culpabilis appellatur cogitatio mali, quæ consensionem trahit; cum ergo et hanc Pelagii responsionem iudices approbassent,

CAPUT V.

DE QUINTA PROPOSITIONE OBJECTA PELAGIO.

Recitatum est aliud quod in suo libello scripsit, Regnum cœlorum etiam in veteri Testamento promissum. Ad quod Pelagius: Hoc et per Scripturas probare possibile est; hæretici autem in injuriam veteris Testamenti hoc negant. Ego vero Scripturarum auctoritatem secutus, dixi: Quoniam in Propheta Daniele scriptum est: *Et accipient sancti regnum Altissimi*. Qua ejus accepta responsione, Synodus dixit: Neque hoc alienum est a fide Ecclesiastica.

Numquidnam ergo fratres nostros, ut etiam hoc inter cætera objicerent, sine causa verba ista moverunt? Non utique, sed veteris Testamenti nomen modis duobus dici solet; uno modo, secundum divinarum Scripturarum auctoritatem, alio secundum ⁴ vulgarissimam consuetudinem. Paulus namque Apostolus dicit ad Galatas: *Dicite mihi* (⁵ inquit) *sub lege volentes esse, legem non* ⁶ *vidistis? Scriptum est enim quod Abraham duos filios habuit, unum de ancilla, alterum de libera, quæ sunt allegoria* ⁷; *hæc enim sunt duo testamenta, unum quidem in servitutem generans, quæ est Agar. Sina enim mons est in Arabia, quæ conjuncta est ei quæ nunc est Jerusalem, serviens cum*

NOTE SUAREZ.

¹ Locus videtur corruptus, et videtur legendum, *quem Deus serrat duntaxat in præmiis, et pœnis pro diversitate meritorum retribuendis multis per scripturas sanctas significari modis*. (Edit. Paris. legit serrata.—Not. Edit.)

² Hæc clausula corrupta videtur, et forte sic est restituenda: *Et revera in suo libro ita legitur malum nec cogitandum, quod in hoc sensu intelligi solet, malum nec cogitari quidem debere*. Unde intelligitur, quam puro, et sincero affectu veritatis Augustinus procedat, interpretando

in bono sensu propositionem hominis hæretici, ubi verba commode id patiebantur, et nihilominus exensat delatores Pelagii, ut statim subjungit.

³ Alias etiam cum.

Vide comment. in tomo 28. (Not. Edit.)

⁴ Alias additur loquendi.

⁵ Superfluit.

⁶ Alias audistis?

⁷ Alias in allegoria. Melius per allegoriam, ut habet vulgata.

filiis suis; quæ autem sursum est Jerusalem, libera est, quæ est mater nostra. Cum ergo vetus Testamentum ad servitutem pertineat, unde etiam dictum est: *Ejice ancillam et filium ejus, non enim hæres erit filius ancillæ cum filio meo Isaac;* regnum autem cœlorum ad libertatem, quomodo etiam regnum cœlorum ad vetus pertinet Testamentum?

Sed quoniam, ut dixi, etiam sic solemus loqui, ut Scripturas omnes legis, et Prophetarum, quæ ante incarnationem Domini, ministrante auctoritate canonica, continentur, nomine Testamenti veteris nuncupemus, quis Ecclesiasticis litteris, vel mediocriter eruditus non¹ ignorat,² Scripturis illis promitti potuisse regnum cœlorum, sicut etiam illud Testamentum novum, ad quod pertinet regnum cœlorum? Certe enim in illis litteris apertissime scriptum est: *Ecce dies veniunt, dicit Dominus, et consummabo domui Israel, et domui Jacob testamentum novum, non secundum testamentum quod disposui Patribus eorum, in die qua apprehendi manum eorum, ut educrem eos de terra Ægypti.* Hoc enim factum est in monte Sina. Tunc autem Daniel Prophetam nondum erat, qui dixit: *Accipient sancti regnum Altissimi.* His enim verbis præmium non³ veteris, sed novi Testamenti prophetabat, sicut ipsum Christum venturum iidem prophetæ prænuntiaverunt, cujus sanguine dedicatum est Testamentum novum, cujus Testamenti ministri Apostoli facti sunt, dicente Beatissimo Paulo: *Qui idoneos nos fecit ministros novi Testamenti, non littera, sed spiritu, littera enim occidit, spiritus autem vivificat.*

In illo vero Testamento, quod quippe vetus dicitur, et datum est in monte Sina, non invenitur promitti apertissime, nisi terrena felicitas. Unde illa terra, qua⁴ est populus introductus, et per eremum ductus, terra promissionis vocatur, in qua pax et regnum, et ab inimicis victoriarum reportatio, et abundantia filiorum, aut fructuum terrenorum, et si qua hujusmodi, sunt promissa veteris Testamenti: quibus etsi figurantur ad novum Testamentum pertinentia spiritualia, tamen qui propter illa terrena suscipit legem Dei, ipse est hæres veteris Testamenti: ea quippe secundum vetus Testamentum promittuntur, atque tribuntur, quæ secundum hominem veterem concupiscuntur. Quæ autem illic ad novum Testamentum pertinentia figurantur, novos homines quærunt. Neque nesciebat enim quid loqueretur tantus Apostolus, qui duo testamenta in ancilla et libera, allegorica significatione, distincta esse dicebat, veteri filios carnis, i ovo filios promissionis attribuens: *Non qui filii carnis (inquit) hi filii Dei, sed filii promissionis deputantur in semine.* Filii ergo carnis pertinent ad terrenam Jerusalem, quæ servit cum filiis suis, filii autem promissionis ad eam quæ sursum est, liberam matrem nostram in cœlis æternam. Unde perspicitur qui ad regnum terrenum, et qui pertineant ad regnum cœlorum. Istam⁵ distinctionem, qui etiam illo tempore pro Dei gratia intelligentes, filii promissionis effecti sunt, novi Testamenti hæredes in occulto Dei concilio deputati sunt, etiamsi vetus Testamentum, pro temporum distributione divinitus datum populo veteri, congruenter ministraverunt.

NOTE SUAREZ.

¹ Vide comment. in tomo 28. (Not. Edit.)

² Melius ita.

³ Si quis attente consideret principia et errores Pelagii, non immerito verebitur ne aliquis error lateat sub verbis ejus, quæ in hoc capite expenduntur. Duobus enim modis intelligi potest regnum cœlorum esse promissum in veteri lege; uno modo, ut promissio facta intelligatur in virtute legis scriptæ, seu veteris Testamenti, id est, operibus legis factis virtute liberi arbitrii, et consequenter, ut intelligatur promissum tanquam conferendum in statu illius legis. Alio modo, potest intelligi esse promissum ut conferendum in statu novi Testamenti, et ratione operum, que tunc fieri poterant virtute gratiæ, que in fide Christi conferebatur. Prior sensus hæreticus est, posterior

catholicus et verus, ut partim in materia de Incarnatione dictum est, partim in sequentibus dicitur. Pelagius vero, cum peccatum originale neget, et meritum tribuat operibus liberi arbitrii ex sola virtute et merito illius, consequenter cogitare potuit, et fortasse cogitavit, præmium regni cœlorum neque pertinuisse ad vetus Testamentum sicut ad novum, imo etiam neque ad legem naturæ, sicut ad legem gratiæ. Augustinus vero, licet hoc recte præviderit, et hanc ipsam distinctionem in ea, quam aliis verbis declarat, intendat, nihilominus Pelagio non tribuit errorem, quem suis verbis non satis explicuit, sed veritatem ipsam secundum se spectatam declarat. Et ita est facilis tota doctrina Augustini in hoc capite.—⁴ In quam.

⁵ Videtur deesse *juxta*, vel quid simile.

Quomodo ergo non merito commoverentur filii Jerusalem in cœlis æternæ, cum ista discretio apostolica atque catholica Pelagii verbis videretur auferri, et Agar quomodo Saræ crederetur æquari? Ille igitur hæretica impietate Scripturæ veteris Testamenti faciat injuriam, qui eam ex Deo bono summo, et vero fronte sacrilegæ impietatis negat, sicut Marcion, sicut Manichæus et si qua alia pestis hoc sentit. Quapropter ut, de hac re, quod sentio qua possum brevitate complectar, sicut veteri testamento, si esse ex Deo bono et summo negaretur, ita et novo fit injuria, si veteri æquetur. Sed cum Pelagius respondisset, cur dixerit in veteri Testamento promitti regnum cœlorum, Danielis Prophetæ commemorans testimonium, qui Sanctos accepturos regnum Altissimi apertissime prophetavit; non esse alienum hoc a fide catholica, merito judicatum est; non secundum illam distinctionem qua in monte Sina promissa terrena ad vetus Testamentum proprie pertinere monstrantur; nec tamen improbe, secundum hanc loquendi consuetudinem, qua universæ Scripturæ canonicæ ante incarnationem Domini¹ ministratæ, veteris Testamenti appellatione censentur. Non enim aliud est regnum Altissimi, quam Dei regnum, aut quisquam contendere audebit, aliud esse Dei regnum, aliud regnum cœlorum.

CAPUT VI.

DE SEXTA PELAGII PROPOSITIONE, ET ALIIS ILLIS ANNEXIS.

Post hæc objectum est quod Pelagius, in eodem suo libro, dixerit posse hominem, si velit, esse sine peccato, et quod scribens ad viduam, adulatorie dixerit: Inveniat apud te pietas, quæ usquam invenit, locum; inveniet, ubique² peregrinante sed me justitia; veritas, quam jam nemo cognoscit, domestica tibi, et amica fiat; et lex Dei, quæ ab omnibus prope hominibus contemnitur, a te sola honoretur: et iterum ad ipsam: O te felici-

cem et beatam, si justitia, quæ in cœlo tantum esse credenda est, apud te solam inveniatur in terris. Et in alio ad ipsam libro, post orationem Domini et Salvatoris nostri, docens quemadmodum debeant sancti orare, ait: Ille ad Deum digne elevat manus, ille orationem bona conscientia effundit, qui potest dicere: Tu nosti, Domine, quam sanctæ, et innocentes, et mundæ³ sint ab omni⁴ molestia, et iniquitate, et rapina, quas ad te extendo manus; quemadmodum justa, et munda labia, et ab omni mendacio libera, quibus offero tibi deprecationem, ut mihi miseraris.

Ad hoc autem Pelagius respondens, ait: Posse quidem hominem sine peccato esse, et Dei mandata custodire, si velit, diximus. Hanc enim possibilitatem Deus illi dedit. Non autem diximus quod inveniatur aliquis ab infantia usque ad senectam, qui nunquam peccaverit, sed quoniam, a peccatis conversus, proprio labore et Dei gratia posse esse sine peccato. Nec per hoc tamen in posterum inconvertibilis. Reliqua vero, quæ subjecerunt, neque in libris nostris sunt, neque talia unquam diximus. His auditis, Synodus dixit: Quoniam negas te talia scripsisse, anathematizas illos qui sic tenent? Pelagius respondit: Anathematizo quasi stultos, non quasi hæreticos, siquidem non est dogma. Deinde judicaverunt Episcopi dicentes:⁵ Nunc quoniam anathematizavit Pelagius insertum stultiloquium, recte respondens, hominem, cum adjutorio Dei et gratia, posse esse sine peccato, respondeat et ad alia capitula.

Numquid hic poterant judices vel debebant incognita et incerta damnare, quando nemo contra aderat, qui ea, quæ ad viduam reprehensibilia scripta dicebantur, Pelagium scripsisse convinceret, ubi profecto parum esset codicem ferre, et de scriptis ejus⁶ hæc legere, nisi et⁷ testes adhiberentur, si illa scripta sua esse, etiam cum recitarentur, negaret? Verumtamen in his quoque fecerunt judices quod facere potuerunt, interrogantes Pelagium, utrum anathematizaret illos qui talia sentiunt qualia se negavit scripsisse, siye dixisse; quos

NOTÆ SUAREZ.

¹ In originali legebatur *ministrante*, et hæc alia lectio addebatur in margine. Sed sine dubio hæc proprium sensum continet, altera nullum congruum reddit; alibi etiam legitur *stante*.

² Alias *peregrinans te*. (Vide p. 297 lectio-

nem edit. Paris.—*Not. Edit.*)

³ Alias *sunt*.

⁴ Alias *malitia*.

⁵ Alias *propria voce anathematizavi*.

⁶ Alias *hoc*.

⁷ Alias *quia*.

ille ¹ se tanquam stultos anathematizare respondit. Quid amplius de hac re iudices, adversariis absentibus, quærere debuerunt?

An et illud fortasse tractandum est, utrum recte dictum sit, non tanquam hæreticos, sed tanquam stultos anathematizandos, qui ita sentirent, quoniam dogma non esset? Sed ab hac quæstione non levi, ubi quæritur quatenus sit definiendus hæreticus, recte se in præsentia iudices abstulerunt ². Non enim si quisquam, verbi gratia, dixerit aquilarum pullos, paterno ungue suspensos, et radiis solis oblatos, si oculis palpitaverint, tanquam adulterinos in terram luce quodammodo convincente dimitti, si forte hoc falsum est, hæreticus iudicandus est; et hoc quia in hominum doctorum litteris invenitur, fama que vulgatum est, nec stulte dici putandum est, etiam si verum non est, nec fidem nostram, propter quam fideles vocamur, aut creditum lædit, aut creditum juvat. Porro, si ex hoc venit ³, quod contenderit, animas rationabiles inesse volucris, ex eo quod in eas revolvantur: tunc vero, tanquam hæretica pestis ab auribus animoque pellenda est, agendumque et demonstrandum, etiam si hoc de aquilis verum est, sicut multa mira ante oculos nostros de apibus vera sunt, longe tamen ab huiusmodi irrationabilium animantium, quamvis ⁴ mirabili sensu, distare rationem, quæ non hominibus et pecoribus, sed hominibus angelisque communis est. Multa vero etiam stulta dicuntur ab imperitis et vanis, nec tamen hæreticis, qualia sunt eorum qui de alienis artibus quas non didicerunt, temere iudicant, aut immoderato et cæco affectu, vel laudant quos diligunt, vel vituperant quos oderunt, et quidquid aliud in consuetudine sermonis humani non statuto dogmate, sed passim, ut ad tempus occurrit, per stultitiæ levitatem, vel ore profertur, vel stylo etiam litterisque committitur.

Multos denique iis paululum admonitos talia dixisse mox pœnitent, ⁵ ita eo ⁶ non placito quodnam fixa retinebant, sed quasi undecumque rapta, et non ⁷ considerata. Vix est autem carere istis malis, et quis est qui non labitur lingua, et offendit in verbo? Sed interest quantum, interest unde, interest postremo utrum admonitus corrigat, an pertinaciter defendendo etiam dogma faciat, quod levitate, non dogmate dixerat. Cum igitur omnis hæreticus et consequenter stultus sit, non tamen omnis stultus continuo sit appellandus hæreticus, recte iudices insertum stultiloquium propria voce Pelagium anathematizasse dixerunt, quia et si hæresis esset, procul dubio et stultiloquium est. Proinde, quidquid illud sit, generalis vitii nomine appellaverunt. Utrum autem ex aliquo dogmate ista sint dicta, aut vero non fixa placitaque sententia, sed facile emendabili vanitate, quoniam ille qui audiebatur, quomodo dicta essent, sua esse negaverat, discutiendum in præsentia non putarunt.

Nos sane, cum hanc Pelagii definitionem in illa, quam prius accepimus, chartula legeremus, aderant quidam sancti fratres qui se Pelagii libros exhortatorios, vel consolatorios ad quamdam viduam conscriptos, ejus nomen non est expressum, se habere dixerunt, et admonuerunt requirendum, utrum illic ista, quæ sua negavit, essent forte conscripta, quoniam hoc et ipsi se ignorare asserebant. Tunc vero cum iidem libri ab exordio legerentur, quæsitæ et inventa sunt. Affirmabant autem illi qui protulerant codicem, ante quatuor ferme annos se istos tanquam Pelagii libros habere cœpisse, nec unquam utrum ejus essent, ab aliquo se audisse dubitari. Considerantes itaque optime nobis servorum Dei cognitam fidem de hac re non posse mentiri, restare videbatur ut Pelagium potius in episcopali iudicio crederemus fuisse menti-

NOTÆ SUAREZ.

¹ Alias *ibi*.

² Alias *abstinuerunt*.

³ Locus hic mendosus apparet, et verbum illud *venit*, vix legi poterat, sensus tamen esse videtur; licet ad hæresim non pertineat illam proprietatem a pulis trahere, si tamen quis contendat id provenire ex eo quod animam rationalem habeant, id ad hæresim spectaret. Alias, pro dictione *venit*, legitur *sentis*.

⁴ Alias *similis*.

⁵ Alias *ita et non placito quondam fixi reti-*

nebant.

⁶ Hic locus subobscurus est, et lectiones additæ in margine obscuriorem illum reddiderunt; erit autem facilis, si ubi dicitur, *ita eo*, legamus, *ita ea*, nam sensus est, multos, de iis in quibus errabant, ideo facile pœnitere si admonerentur, quia *ea*, id est, errores illos non placito fixo, id est firmo et deliberato assensu retinebant, sed, etc.

⁷ Alias *desiderata*.

tum, nisi fieri potuisse cogitaremus, etiam ante annos tam multos aliquid sub ejus nomine, non tamen ab illo conscriptum. Neque enim isti eosdem libros ab ipso accepisse, vel quod ipsius essent, audivisse dicebant. Nam et mihi quidam fratres nostri nonnulla opuscula sub meo nomine in Hispaniam venisse dixerunt, quæ quidem ab eis, qui alia nostra legissent, non agnoscerentur, ab aliis tamen nostra esse crederentur.

CAPUT VII.

EXPENDITUR EADEM SEXTA PROPOSITIO PELAGII,
ET QUA GRATIA, ET QUOMODO DETUR HOMINI
SINE PECCATO VIVERE.

Illud sane quod Pelagius suum esse confessus est, adhuc latebrosus est; sed puto quod in istorum gestorum consequentibus partibus elucebit. Ait enim: posse quidem esse sine peccato, et Dei mandata custodire, si velit, diximus¹; hanc possibilitatem Deus illi dedit; non autem diximus quod inveniatur aliquis, ab infantia usque ad senectam, qui nunquam peccaverit, sed quoniam a peccatis conversus, proprio labore et Dei gratia possit esse sine peccato, nec per hoc tamen in posterum inconvertibilis. In his verbis quam dicat Dei gratiam prorsus latet; et iudices quidem catholici nullam aliam intelligere potuerunt, nisi quam nobis plurimum Apostolica doctrina commendat. Hæc est enim qua nos liberari posse speramus de corpore mortis hujus per Jesum Christum Dominum nostrum.

² Sed pro qua impetranda oramus ne intremus in tentationem; hæc gratia non est legis scientia, sed ea est de qua dicit Apostolus: *Non irritam facio gratiam Dei, nam per legem justitia; ergo Christus gratis mortuus est.* Et ideo non est littera occidens, sed spiritus vivificans; scientia quippe legis sine gratia spiritus operatur in homine omnem concupiscentiam. *Peccatum enim* (inquit) *non cognori, nisi per legem, nam concupiscentiam nesciebam, nisi lex diceret: Non concupisces: occasione autem accepta per mundatum, operatum est in me omnem concupiscentiam.* Neque³ ista dicendo

legem vituperat; imo etiam laudat, cum dicit: *Lex quidem sancta, et mandatum sanctum, et justum, et bonum. Quod ergo bonum est, inquit, mihi factum est mors? absit, sed peccatum, ut appareat⁴ peccatum, per bonum mihi operatum est mortem.* Et iterum legem laudat dicendo: *Scimus enim quod lex spiritualis est, ego autem carnalis sum, renundatus sub peccato; quod enim operor, ignoro. Non enim quod volo, hoc ago; sed quod odi, illud facio; si autem quod nolo, hoc facio, consentio legi, quoniam bona est.*

Ecce jam legem monuit⁵, laudat, eique consentit, hoc est, eam bonam esse consentit, quoniam quod illa jubet, hoc et ipse vult, et quod illa vetat et damnat, hoc et ipse odit, et tamen quod odit, hoc facit. Inest ergo legis sanctæ scientia, nec tamen sanatur vitiosa concupiscentia. Inest voluntas bona, et valet operatio mala. Hinc est quod, duabus inter se legibus colluctantibus, dum legi mentis lex repugnat in membris, et captivat sub lege peccati, a confitente exclamatur, et dicitur: *Infelix ego homo, quis me liberabit de corpore mortis hujus? Gratia Dei per Jesum Christum Dominum nostrum.*⁶ Non ergo natura quæ, sub peccato venundata, et vitio sauciata, redemptorem salvatoremque desiderat, nec legis scientia, per quam sit⁷ concupiscentiæ cognitio, non evictio⁸, liberat a corpore mortis hujus, sed gratia Domini per Jesum Christum Dominum nostrum. Ita est non natura moriens, nec littera occidens, sed spiritus vivificans.⁹ Jam enim habebat naturam cum voluntatis arbitrio, nam dicebat: *Velle adjacet mihi; sed non habebat naturam cum sanitate sine vitio, nam dicebat: Scio quod non habitat in me, hoc est, in carne mea, bonum.* Jam habebat cognitionem legis sanctæ, nam dicebat: *Peccatum non cognovi, nisi per legem.* Sed non habebat vires agendæ perficiendæque justitiæ, nam dicebat: *Non quod volo, ago; sed quod odi, hoc facio; et perficere bonum non invenio.* Ideo nec voluntatis arbitrium, nec legis præceptum, unde liberaretur de corpore mortis hujus, quia utrumque jam habebat, aliud in natura, aliud in doctrina, sed gratiæ Dei pos-

NOTE SUAREZ.

¹ Alias *Diximus enim*, quæ marginalis lectio necessaria non est, nec locum declarat, sed supplendum videtur, vel repetendum verbum *ait*.

² Hic incipiebat caput 7.

³ Alias *ita*.

⁴ Alias *apparet*.

⁵ Alias *novit*.

⁶ Hic incipiebat cap. 8.

⁷ Alias *fit*.

⁸ Alias *e vitio*.

⁹ Hic incipiebat cap. 9.

cebat auxilium per Jesum Christum Dominum nostrum.

¹ Hanc itaque gratiam, quam in Catholica Ecclesia notissimam noverant Episcopi, crediderunt Pelagium confiteri, cum audirent eum dicere, hominem a peccatis conversum, proprio labore et Dei gratia posse esse sine peccato. Ego autem, propter illum librum quem mihi refellendum servi Dei dederunt, qui discipuli ejus fuerunt, et cum eundem Pelagium valde diligenter, ejus esse dixerunt, ubi, hac quæstione sibi proposita, quia hoc in eo jam plurimos offenderat, quod adversus Dei gratiam loqueretur, apertissime ² expressit hanc se dicere Dei gratiam, quod possibilitatem non peccandi natura nostra, cum conderetur, accepit, quoniam condita est cum libero arbitrio. Propter hunc ergo librum ego, plurimi autem fratres propter ejus disputationes, quas dicunt sibi esse notissimas, adhuc sumus de istorum verborum ejus ambiguitate solliciti, ne forte quid in ea lateat, atque se hoc dixisse sine præjudicio sui dogmatis exponat postea discipulis suis, ita disserens: Dixi quidem proprio labore et Dei gratia posse hominem esse sine peccato, sed quam dicam gratiam optime nostis, et legendo recolere potestis, ³ sic quod ea ⁴ in qua creati sumus a Deo cum libero arbitrio. Atque ita dum eum credunt Episcopi eam dixisse gratiam, non qua homines creati sumus, sed qua in novam creaturam adoptati, hanc enim apertissime gratiam divina Scriptura commendat, ignorantes hæreticum tanquam Catholicum absolverint.

Suspectum enim me facit illud, quod cum in eodem libro, cui respondi, apertissime dixerit, Abel justum nunquam omnino peccasse, modo ait: Non autem diximus quod invenitur aliquis ab infantia usque ad senectam, qui nunquam peccaverit, sed quoniam a peccatis conversus, proprio labore et Dei gratia possit esse sine peccato. Abel quippe justum non a peccatis conversum, in cætera vita dixit factum esse sine peccato, sed quod peccatum ullum nunquam fecerit. Unde si ille ⁵ ipsius liber est, profecto ex ipsa responsione emendandus est.

Nolo enim eum dicere modo fuisse mentitum, ne forte quod in libro illo scripserit se dicat oblitum. Proinde cætera videamus; ea quippe consequuntur in ecclesiasticis gestis, quibus, adjuvante Domino, possumus ostendere, etiam Pelagio, sicut nonnullis videtur, in illa examinatione purgato, et certe apud judices duntaxat homines absoluto, hanc talem hæresim, quam ulterius progredi, et in pejus profiteri ⁶ nolumus, sine dubio esse damnatam.

CAPUT VIII ⁷.

DE SEX ALIIS PROPOSITIONIBUS OBJECTIS PELAGIO, EX DOCTRINA CŒLESTII ET QUIBUSDAM ALIIS.

Hic ⁸ enim sequuntur objecta Pelagio, quæ in doctrina Cœlestii discipuli ejus referuntur inventa.

1. Adam mortalem factum, qui sive peccaret, sive non peccaret, moriturus esset.

2. Quoniam peccatum Adæ ipsum solum læserit, et non genus humanum.

3. Quoniam lex sic mittit ad regnum, quemadmodum Evangelium.

4. Quoniam ante adventum Christi fuerunt homines sine peccato.

5. Quoniam infantes nuper nati in illo statu sint ⁹, in quo Adam fuit ante prævaricationem.

6. Quoniam neque per mortem, vel prævaricationem Adæ, omne genus hominum moriatur, neque per resurrectionem Christi omne genus hominum resurgat. Hæc ita objecta sunt, ut etiam apud Carthaginem a Sanctitate Tua ¹⁰ et ab aliis tecum Episcopis dicerentur audita atque damnata. Ubi quidem, ut recolis, cum ipse non fuisset, postea cum venissem Carthaginem, eadem gesta recensui, ex quibus aliqua memini, sed nescio utrum ejus ¹¹ hæc omnia teneantur. Quid autem interest utrum aliqua ibi non sint forte commemorata, et ideo nec damnata, cum constet esse damnanda.

7. Deinde objecta sunt et alia quedam capitula, commemoratione mei nominis interposita, quæ mihi de Sicilia missa fuerant, cum

NOTÆ SUAREZ.

¹ Hic incipiebat caput 10.

² Alias ostendit.

³ Alias sit.

⁴ Adde natura sit.

⁵ Alias ipse.

⁶ Alias proficere.

⁷ Hic incipiebat caput 11.

⁸ Alias hæc.

⁹ Alias fecit.

¹⁰ Id est, ab Aurel.

¹¹ Editio Paris. legit eis. (Not. l'edit.)

ibi fratres catholici hujusmodi quæstionibus turbarentur, quibus per librum ad Hilarium ¹ scriptum, qui ea mihi epistola sua consulens miserat, satis sufficienter, ut mihi videtur, respondisse ². Ista sunt autem, posse hominem sine peccato, si velit, esse; infantes, etsi non baptizentur, habere vitam æternam; divites baptizatos, nisi omnibus abrenuntient, si quid boni visi fuerint facere, non reputari illis, neque regnum Dei posse eos habere.

Ad hæc sibi objecta (sicut Gesta testantur) Pelagius ita respondit, posse quidem hominem sine peccato esse. Dictum est (inquit) superius de eo. Quod fuerint ante adventum Domini homines sine peccato, dicimus et nos, quoniam ante adventum Christi vixerunt quidam sancte et juste secundum Scripturarum Sanctarum traditionem. Reliqua vero, et secundum ipsorum testimonium, a me dicta non sunt, pro quibus ego satisfacere non debeo; sed tamen, ad satisfactionem sanctæ Synodi, anathematizo illos qui sic tenent, aut aliquando tenuerint ³. Post hanc ejus responsionem, Synodus dixit: Ad hæc quæ dicta capitula ⁴ sufficienter et recte satisfecit præsens Pelagius, anathematizans ea quæ non erant ejus.

Videmus igitur, et tenemus non solum a Pelagio, verum etiam a sanctis Episcopis, qui illi judicio præsidebant, mala perniciosissima hujus hæresis esse damnata. Adam mortalem factum, quod ut plenius exponeretur, quomodo dictum sit, additum est, qui sive peccaret, sive non peccaret, moriturus esset. Quod peccatum ejus ipsum solum læserit, et non genus humanum. Quod lex sic mittat ad regnum, quemadmodum et Evangelium. Quod infantes nuper nati in illo statu sint, in quo Adam fuit ante prævaricationem. Quod neque per prævaricationem Adæ omne genus hominum moriatur, neque per resurrectionem Christi omne genus hominum resurgat. Quod infantes, etsi non baptizentur, habent vitam æternam. Quod divites baptizati, nisi omnibus abrenuntient, si quid boni ⁵ visi fuerint facere, ne illis reputetur, neque regnum Dei possint habere. Hæc certe omnia judicio illo Ecclesias-

tico, anathematizante Pelagio et Episcopis interloquentibus, constat esse damnata. His autem quæstionibus, et istarum sententiarum ⁶ contentiosissima, assertionibus jam usquequaque ferventibus, multorum fratrum perturbabatur infirmitas. Unde coacti sumus sollicitudine charitatis, quam erga Ecclesiam Christi per gratiam Christi nos habere convenit, etiam ad beatæ memoriæ Marcellinum, qui eos quotidie disputatores molestissimos patiebatur, et me per litteras consulebat de quibusdam istarum quæstionibus, scribere ⁷, et maxime de baptismo parvulorum, de quo etiam postea, te jubente in Basilica majorum ⁸, gestans quoque in manibus epistolam gloriosissimi martyris Cypriani, et de hac re verbum ejus recitans, atque pertractans, ut error iste nefarius de quorundam cordibus auferretur, quibus persuasa fuerunt quæ in his gestis videmus damnata, adjunctus orationibus tuis, quantum potui, laboravi. Hæc sunt quæ nonnullis fratribus quidam talia sentientes ita persuadere conabantur, ut de Orientalibus comminarentur Ecclesiis, quod si ⁹ qui hæc tenerent, eorum ¹⁰ possent judicio condemnari. Quatuordecim Antistites Orientalis Ecclesiæ in ea terra, cui Dominus præsentiam suæ carnis exhibuit, Pelagium non absolverent, nisi ea tanquam fidei catholicæ adversa damnaret. Unde si propterea est iste absolutus, quod anathematizaverit talia, procul dubio illa damnata sunt, quod multo cumulatius atque clarius in consequentibus apparebit.

Unde nunc duo illa videamus, quæ noluit anathematizare Pelagius, quia etiam sua esse cognovit, sed ut illud, quod in eis offendeat, auferret, quomodo ea sentiret, exposuit. Posse ¹¹ quidem hominem sine peccato esse, dictum est superius. Dictum sane, et nos meminimus: sed ideo mitigatum, et a iudicibus approbatum, quod addita est Dei gratia, quæ in illis ¹² capitulis tacebatur. De hoc autem altero, quemadmodum responderit, diligentius intuendum est. De illo autem, inquit, quod fuerint ante adventum Domini homines sine peccato, dicimus et nos, quoniam ante adventum Christi

NOTÆ SUAREZ.

¹ Est epist. 89.

² Alias *respondi*.

³ Alias *tenuerant*.

⁴ Adde *continent*.

⁵ Alias *nisi*.

⁶ Alias *et contentiosissima*, et adde *defensione*, vel *propugnatione*, vel quid simile.

⁷ Utique libros de Peccatorum merit. et remiss.

⁸ Alias *Majorini*.

⁹ Alias *ni*.

¹⁰ Alias *eorum*.

¹¹ Alias *inquit*.

¹² Alias *nullis*.

vixerunt quidam sancte et juste, secundum sanctarum Scripturarum traditionem. Non est ausus dicere, dicimus et nos, quoniam ante adventum Christi fuerunt homines sine peccato, cum hoc illi de Cœlestii dictis fuisset obiectum; sensit enim quam esset periculosum et molestum, sed ait, dicimus et nos, quoniam ante adventum Christi vixerunt quidam sancte et juste. Quis hoc negaverit? Sed aliud est hoc, et aliud fuisse sine peccato, quia et illi sancte justeque vivebant, qui veraciter tamen dicebant: *Si dixerimus quia peccatum non habemus, ipsi nos seducimus, et veritas in nobis non est*; et hodie multi juste, sancteque vivunt, neque tamen in oratione mentiuntur, cum dicunt: *Dimitte nobis debita nostra, sicut et nos dimittimus debitoribus nostris*. Hoc ergo iudicibus placuit, quemadmodum ipse ¹ diceret asseveravit Pelagius, non quemadmodum obijciebatur dixisse Cœlestius. Nunc ea quæ restant pertractemus.

CAPUT IX².

DE ALIA PROPOSITIONE OBJECTA PELAGIO, QUOD ECCLESIA HIC SIT SINE MACULA, ET RUGA.

Objectum est Pelagio, quod diceret Ecclesiam hic esse sine macula et ruga; unde etiam Donatistæ diuturnum nobiscum habuerunt in nostra collatione conflictum, sed illos de permissione malorum hominum, tanquam palea cum frumentis, propter aræ similitudinem, potius urgebamus. Qua similitudine etiam istis respondere possumus, nisi Ecclesiam in solis bonis vellent fortasse intelligi, quos nullum omnino asserunt habere peccatum, ut possit Ecclesia hic esse sine macula et ruga. Quod si ita est, eadem repeto quæ paulo antea memoravi: quomodo sunt membra Ecclesiæ de quibus verax clamat humilitas: *Si dixerimus quoniam peccatum non habemus, ipsi nos seducimus, et veritas in nobis non est?* vel quomodo id quod cum ³ Dominus docuit, orabit Ecclesia: *Dimitte nobis debita nostra, si in hoc seculo est Ecclesia sine macula et ruga?* Postremo ipsi de seipsis interrogandi sunt,

utrum necne fateantur aliqua se habere peccata. Quod si negabunt, dicendum est eis quod seipsos decipiant, et veritas in eis non sit. Si autem peccatum se habere fatentur, quid aliud quam de ruga vel macula fatebuntur? Non sunt ergo isti Ecclesiæ membra, quia illa est sine macula et ruga, hi autem cum macula et ruga.

Sed ad hoc obiectum vigilantanti circumspectione respondit, quam sine dubio Catholici iudices approbaverunt. Dictum est, inquit, a nobis scilicet ita, quoniam lavacro ab omni macula et ruga purgatur Ecclesia, quam velit ita Dominus permanere. Ad quod Synodus dixit: Hoc et nobis placet. Quis enim nostrum negat omnium in baptismo peccata dimitti, et omnes fideles sine macula et ruga de lavacro regenerationis ascendere? Aut cui Christiano catholico non placet, quod et Domino placet, idque futurum est, ut Ecclesia permaneat sine macula et ruga? Quandoquidem id nunc agitur Dei misericordia et veritate, ut ad illam perfectionem, ubi sine macula et ruga in æternum mansura est, Sancta Ecclesia perduceret ⁴? Sed inter lavacrum ubi omnes præteritæ maculæ rugæque tolluntur, et regnum ubi sine macula et ruga perpetuo manebit Ecclesia, tempus hoc medium est orationis, ubi necesse est dicat: *Dimitte nobis debita nostra*. Propter hoc obiectum, eos dicere hic esse Ecclesiam sine macula et ruga; utrum per hanc sententiam auderent prohibere orationem, qua diebus et noctibus veniam peccatorum jam baptizata sibi postulat Ecclesia. De qua ⁵ medio tempore inter remissionem peccatorum, quæ fit in lavacro, et permansionem sine peccatis, quæ futura est in regno, cum Pelagio nihil est actum, nihil ab Episcopis pronuntiatum, sed tantum hoc, quod breviter significandum putavit, non se ita dixisse, ut videbatur obiectum. Cum hoc ⁶ (ait) dictum est vobis, sed ita, quid voluit videri, nisi non ita, quemadmodum dixisse, ab his qui objecerant, credebatur. Quid tamen secuti sunt ⁷ iudices, ut dicerent sibi hoc placere, id est baptismum, quo abluitur a peccatis, et regnum, ubi permanebit sine peccatis sancta, quæ nunc mundatur, Ecclesia, satis, quantum existimo, apparet.

NOTÆ SUAREZ.

¹ Melius *se dicere*.² Hic incipiebat cap. 12.³ Forte *eam*.⁴ Forte *perducatur*.⁵ Forte *quo*.⁶ Alias *cum enim ait, dictum est a nobis, scilicet, ita*.⁷ Alias *sint*.

CAPUT X ¹.DE QUADAM OBJECTIONE FACTA PELAGIO EX LIBRO
QUODAM CŒLESTII.

Deinde objecta sunt de libro Cœlestii, quid in unoquoque capitulo contineat magis secundum sensum quam secundum verba, quæ quidem ille latius exequitur ², sed tunc subjicere omnia, quæ ³ libellum adversus Pelagium dederunt, se non potuisse dixerunt. Ergo in primo capitulo libri Cœlestii hoc scriptum esse posuerunt, quoniam plus facimus, quam in lege et Evangelio jussum est. Ad quod Pelagius respondit: Hoc quasi nostrum posuerunt: dictum est vero a nobis secundum Apostolum de Virginitate, de qua Paulus dixit: *Præceptum Domini non habeo*. Synodus dixit: Hoc et Ecclesia recipit.

Legi ego quo sensu id Cœlestius in libro suo posuerit, non ⁴ tamen eum suum esse negat. Dixit enim hoc, quo videlicet persuaderet, tantam ⁵ nos habere per naturam liberi arbitrii non peccandi possibilitatem, ut plus etiam quam præceptum est faciamus; quoniam perpetua servatur a plerisque virginitas, quæ præcepta non est, cum ad non peccandum præcepta implere sufficiat. Quod autem a Pelagio responsum est, ut approbarent iudices, non sic acceperunt, tanquam omnia legis et Evangelii præcepta custodiant, qui virginitatem, quæ præcepta non est, insuper servant, sed ad hoc tantum, quod plus est virginitas, quæ non est præcepta, quam conjugalis pudicitia, quæ præcepta est: custodire istam quam illam utique plus est, cum tamen neutrum eorum habeatur sine gratia Dei. Quandoquidem Apostolus de hac re loquens, ait: *Volo autem omnes homines esse, sicut meipsum, sed unusquisque proprium donum habet a Deo, alius sic, alius autem sic*; et ipsi Domino cum dixissent discipuli: *Si ita est causa hominis cum uxore, non expedit nubere*, vel quod latine melius dicitur, *non expedit ducere*: *Non* (inquit) *omnes capiunt verbum hoc, sed quibus datum est*. Hoc ergo Episcopi Ecclesiam recipere pronuntiarunt, quod plus sit virginitas perseverans, quæ præcepta non est, quam

nuptiarum castitas, quæ præcepta est. Quo autem sensu illud Pelagius sive Cœlestius dixerit ⁶, iudices nescierunt.

CAPUT XI ⁷.DE ALIIS CAPITALIBUS OBJECTIONIBUS EX LIBRO
CŒLESTII EXCERPTIS.

Hinc jam objiuntur Pelagio alia Cœlestii capitula capitalia, et sine dubitatione damnanda, quæ nisi anathematizasset, cum his sine dubio damnaretur. In tertio capitulo scripsisse Cœlestium, gratiam Dei, et adiutorium non ad singulos actus dari, sed in libero arbitrio esse, vel in lege, ac doctrina. Et iterum Dei gratiam secundum merita nostra dari, quia si peccatoribus illam det, videtur esse iniquus. Et his verbis intulisset ⁸, propterea et ipsa gratia in mea voluntate posita est, sive dignus fierem, sive indignus. Si enim per gratiam omnia facimus, quando vincimur a peccato, non nos vincimur, sed Dei gratia, quæ voluit nos adjuvare omnimodo, et non potuit. Et iterum ait: Si gratia Dei est quando vincimus peccata; ergo ipse est in culpa, quando a peccato vincimur, quia omnino custodire nos aut non potuit, aut noluit.

Ad hæc ita Pelagius respondit: Hæc utrum Cœlestii sint, ipsi viderint, qui dicunt ea Cœlestii esse; ego vero nunquam sic tenui, sed anathematizo qui sic tenet. Synodus dixit: Recipit te sancta Synodus, ita verba reprobam condemnantem.

De his certe omnibus, et Pelagii eadem anathematizantis manifesta responsio est, et Episcoporum ista damnantium absolutissima judicatio. Utrum ea Pelagius, an Cœlestius, an uterque, an neuter illorum, an alii, sive cum ipsis, sive sub nomine illorum senserunt, sive adhuc sentiant, sit dubium, vel occultum, satis tamen hoc iudicio declaratum est, esse damnatum, et Pelagium simul fuisse damnandum, nisi hoc etiam ipse damnaret. Nunc certe post hoc iudicium, quando contra huiusmodi sententias disputamus, adversus damnatam hæresim disputamus.

Dicam etiam aliquid latius. Superius metuebam, cum diceret Pelagius, adjuvante gratia Dei, posse esse hominem sine peccato, ne

NOTE SUAREZ.

¹ Ille incipiebat cap. 13.

² Alias *exequitur*.

³ Edit. Paris. legit *qui*. (Not. Edit.)

⁴ Alias, *si tamen eum suum esse non negat*.

⁵ Alias *tantum*.

⁶ Alias *dixerunt*.

⁷ Ille incipiebat cap. 14.

⁸ Alias *intulisse*.

forte eandem gratiam possibilitatem diceret esse naturæ a DEO conditæ cum libero arbitrio, sicut in libro est, quem tanquam ejus accepi, cui respondi, et eo modo nescientes iudices falleret. Nunc vero ¹ anathematizat eos qui gratiam DEI, et adjutorium, non ad singulos actus dicunt dari, sed in libero arbitrio esse, vel in lege atque doctrina; satis evidenter apparet, eam illum dicere gratiam, quæ in CHRISTI Ecclesia prædicatur, quæ subministratione Sancti Spiritus datur, ut ad nostros actus singulos adjuvemur: unde et oramus semper adjutorium opportunum, ne inferamur in tentationem. Nec illud metuo, ne forte ubi dixit non posse esse sine peccato, nisi qui scientiam legis habuit, atque id ita exposuit, ut ad non peccandum in legis scientia poneret adjutorium, eandem legis scientiam DEI gratiam velit intelligi. Ecce anathematizat qui hoc sentiunt, ecce nec naturam liberi arbitrii, nec legem, atque doctrinam vult intelligi gratiam, qua per actus singulos adjuvamur. Quid ergo restat, nisi ut eam intelligat, quam dicit Apostolus subministratione Spiritus Sancti dari? de qua dicit Dominus: *Nolite cogitare quomodo aut quid loquamini, dabitur enim vobis in illa hora quid loquamini, non enim vos estis qui loquimini, sed Spiritus Patris vestri, qui loquitur in vobis.* Nec illud metuendum est ne forte, ubi ait omnes voluntate propria regi, idque exposuit ideo se dixisse, propter liberum arbitrium, cui DOMINUS adiutor est eligenti bona, etiam hic per naturam liberi arbitrii, et per doctrinam legis adiutorem dixit. Cum enim recte anathematizaverit eos qui dicunt gratiam DEI, et adjutorium non ad singulos actus dari, sed in libero arbitrio esse, vel in lege ac doctrina, profecto Dei gratia vel adjutorium ad singulos actus datur, excepto libero arbitrio, et lege atque doctrina; ac per hoc singulos actus a Deo regimur, quando recte agimus; nec frustra orantes dicimus: *Itinera mea dirige secundum verbum tuum, ne dominetur in me omnis iniquitas.*

Sed quod ita ² sequitur, me rursum sollicitat. Cum enim de quinto capitulo libri Celestii huic fuit objectum, quod affirmant, unumquemque hominem omnes virtutes posse habere et gratias, et auferant diversitatem gratiarum, quam Apostolus docet, Pelagius res-

pondit: Dictum est a nobis, sed maligne et imperite reprehenderunt; non enim auferimus gratiarum diversitatem, sed dicimus donare DEUM ei, qui fuerit dignus accipere, omnes gratias, sicut Paulo Apostolo donavit. Ad hoc Synodus dixit: Consequenter et ecclesiastico sensu et ipse sensisti de dono gratiarum, quæ in Sancto Apostolo continentur. Hic dicit aliquis: Quid ergo sollicitat? An tu negabas ³ omnes virtutes et gratias fuisse in Apostolo? Ego vero, si illæ accipiuntur omnes, quas uno quodam ipse Apostolus commemoravit loco, quas et Episcopus intellexisse arbitror, ut hæc approbarent, et pronuntiarent sensu ecclesiastico dictum, non eas ⁴ dubito habuisse Apostolum Paulum. Ait enim: *Et quosdam quidem posuit DEUS in Ecclesia, primo Apostolos, secundo Prophetas, tertio Doctores, deinde virtutes, deinde donationes sanitatum, adjutoria, gubernationes, genera linguarum.* Quid ergo? dicemus quod hæc omnia non habuit Apostolus Paulus? Quis hoc audeat dicere? Nam, eo ipso quod Apostolus erat, habebat utique Apostolatam. Sed habebat et prophetiam. An non prophetia ejus est? *Spiritus enim manifeste dicit, quia in novissimis temporibus recedent quidam a fide, intendentes spiritibus seductoribus, doctrinis demoniorum.* Præterea ⁵ erat et Doctor gentium in fide et veritate; et operabatur virtutes et sanitates: nam mordentem viperam manu excussit illæsa, et paralyticus ad verbum ejus, restituta continuo salute, surrexit. Adjutoria, quæ dicat, obscurum est, quoniam vis hujus verbi late patet. Quis tamen huic et istam gratiam defuisse dicat, per cuius laborem salutem hominum sic constat adjutam? Quid vero ejus gubernatione præclarius est? Quando et per eum Dominus tunc tot Ecclesias gubernavit, et per ejus Epistolas nunc gubernat? Jam genera linguarum, quæ illi deesse potuerunt, cum ipse dicat, *Gratias Deo, quod omnium vestrum linguas loquor?* Quia ergo istorum omnium nihil Apostolo defuisse credendum est, propterea responsionem Pelagii, omnes gratias ei donatas esse dicentis iudices approbaverunt.

Sed sunt et aliæ gratiæ quæ hic commemoratæ non sunt. Neque enim, quamvis esset Apostolus Paulus multum excellens membrum

NOTÆ SUAREZ.

¹ Forte *anathematizans.*² *Alia ista.*³ *Alia negalis.*⁴ *Alia eos.*⁵ *Alia nempe.*

corporis CHRISTI, nullas plures et ampliores gratias accepit ¹ ipsum totius corporis caput, sive in carne, sive in anima hominis, quam creaturam suam Verbum Dei in unitate personæ suæ, et nostrum caput esset, et corpus ejus essemus, assumpsit. Et revera esse possent in singulis omnia, frustra de membris corporis nostri ad hanc rem data similitudo videretur. Sunt enim quædam communia omnibus membris, sicut sanitas, sicut vita. Sunt autem alia etiam in singulis propria, unde nec auris sentit colores, nec oculus voces, propter quod dicitur: *Si totum corpus oculus, ubi auditus? Si totum auditus, ubi odoratus?* Quod quidem non ita dicitur, tanquam impossibile Deo sit, et auribus præstare sensum videndi, oculis audiendi. Quid tamen faciat in Christi corpore, quod est Ecclesia, et quam diversitatem Ecclesiarum, velut per membra diversa, ut essent dona etiam singulis propria, significaverit Apostolus, incertum ² est. Quapropter, et qua causa hi ³ qui illud objecerunt, auferri noluerunt distantiam gratiarum, et qua causa Episcopi, propter Paulum Apostolum, in quo dona omnia, quæ loco uno commemoravit, agnoscimus, id quod respondit Pelagius potuerunt approbare, jam clarum est. Quid est ergo, unde me de hoc capitulo sollicitum factum esse prædixi? hoc videlicet, quod ait Pelagius, donare Deum ei qui fuerit dignus accipere omnes gratias, sicut Paulo Apostolo donavit. Nihil essem de hac ejus responsione sollicitus, nisi quod attinet ad hanc causam, cujus maxime cura gerenda est, ne scilicet, gratia Dei, nobis tacentibus et tantum malum dissimulantibus, oppugnetur.

Cur ergo non ait donare Deum, cui voluerit, sed ait donare Deum ei qui fuerit dignus accipere omnes gratias? non potui ⁴ cum legerem, non esse suspectus. Ipsum quippe gratiæ nomen, et ejus nominis intellectus aufertur, si non gratis datur, sed eam, qui dignus est, accipit. An forte quis dicit Apostolo me facere injuriam, quia eum gratia dignum fuisse non dico, imo tunc facio et illi injuriam, et mihi pœnam, si quod ipse dicit, non credo. An ille gratiam non ita definivit, ut eam sic gratis appellatam, quo daretur, ostenderet? Nempe

ipse dixit: *Si autem gratia, jam non ex operibus, alioquin gratia jam non est gratia.* Unde ita dixit: *Ei autem qui operatur, merces non imputatur secundum gratiam, sed secundum debitum.* Quisquis ergo dignus est; debitum est ei; si autem debitum est, gratia non est; gratia quippe donatur, debitum redditur; gratia ergo donatur indignis, ut reddatur debitum dignis; ipse autem facit, ut habeant quæcumque redditurus est dignis, qui ea quæ non habebant, donavit indignis.

Hoc forte dicit: Ego non ex operibus, sed ex fide dixi Apostolum dignum fuisse cui tantæ illæ gratiæ donarentur. Non enim opera quæ bona ante non habuit, sed tamen fides ejus hoc meruit. Quid enim? putamus quod fides non ⁵ operaretur? imo ipsa veraciter operatur, quæ per dilectionem operatur. Quantumlibet autem opera infidelium prædicentur, ejusdem Apostoli sententiam veram novimus, et invictam: *Omne quod non est ex fide, peccatum est.* Ideo vero ipse dicit, non ex operibus, sed ex fide nobis justitiam deputari; cum potius fides per dilectionem operetur, ne quisquam existimet ad ipsam fidem meritis operum perveniri, cum ipsa sit initium unde bona opera incipiant, quoniam, ut dictum est, quod ex ipsa non est, peccatum est. Hinc et Ecclesiæ dicitur in Canticum canticorum ⁶: *Venies, et transies ab initio fidei.* Quapropter, quamvis bene operandi gratiam fides impetret, ipsam certe fidem ut haberemus ⁷, nulla fide meruimus, sed in ea nobis danda, in qua Dominum sequeremur, misericordia ejus prævenit nos. An ipsam nobis nos dedimus, et ipsi nos ipsos fideles fecimus? Prorsus etiam hic clamabo, *Ipse fecit nos, et non ipsi nos.* Nihil ⁸ vero aliud Apostoli illa doctrina commendat, ubi ait: *Dico autem per gratiam Dei, quæ data est mihi, omnibus qui sunt in vobis, non plus sapere quam oportet, sed sapere ad temperantiam, sicut unicuique Deus partitus est mensuram fidei.* Hinc est quippe et illud: *Quid enim habes quod non accepisti, quando et hoc accepimus, unde incipit quidquid in nostris actibus habemus boni.*

Quid est ergo quod idem dicit Apostolus: *Bonum certamen certavi, cursum consummavi, fidem servavi, de cætero superest mihi corona*

NOTE SUAREZ.

¹ Forte legendum *quam ipsum*, etc.

² Alias *certum*.

³ Alias *his*.

⁴ Alias *potuit*.

⁵ Alias *operatur*.

⁶ Alias *veniens et transiens ab initio fidei*.

Non tamen satis apparet, quem Canticorum locum allegare voluerit Augustinus.

⁷ Alias *habemus*.

⁸ Alias *nisi*.

justitiæ, quam reddet mihi Dominus in illo die justus iudex. An hæc non redduntur dignis, sed donantur indignis? Hoc qui dicit, parum considerat coronam reddere non potuisse digno, nisi gratia data esset indigno. Ait enim: *Bonum certamen certari.* Sed idem ipse ait: *Gratias Deo, qui dedit nobis victoriam per Dominum nostrum Jesum Christum.* Ait: *Cursum consummari.* Sed idem ipse ait: *Non volentis, neque currentis, sed miserentis est Dei.* Ait: *Fidem servari.* Sed ipse idem ait: *Scio enim cui credidi, et certus sum quia potens est depositum meum servare in illum diem; id est, commendatum meum.* Nam codices nonnulli non habent *depositum*, sed, quod est planius, *commendatum*. Quid autem commendamus Deo, nisi quod oramus ut servet, in quibus et ipsa ¹ est fides nostra. Nam quid aliud Apostolo Petro Dominus commendavit, orando? Unde illi ait: *Ego rogari pro te, Petre, ne deficiat fides tua; nisi ut ejus Deus servet fidem, ne tentationi cedendo deficeret.* Quocirca, o beate Paule, magnæ gratiæ prædicator, dicam, neque timeam (quis enim mihi minime succensebit ista dicenti, quam tu, qui dicenda dixisti, et docenda docuisti) dicam, inquam, neque timeam, redditur quidem meritis tuis corona sua, sed Dei dona sunt merita tua. Redditur ergo debitum præmium Apostolo digno, sed ipsum ² Apostolum indebitum gratia donavit indigno. An hoc me dixisse pœnitebit? Absit: ejus enim testimonio ab hac invidia defensabor, neque me quisquam vocabit audacem, nisi qui fuerit ausus ipsum vocare mendacem. Ipse clamat, ipse testatur, ipse, ut in se dona Dei commendat, neque in seipso, sed in Domino gloriatur.

Non solum nulla se habuisse dicit merita bona, ut Apostolus fieret, sed etiam mala merita sua dicit, ut Dei gratiam manifestet, et prædicet: *Non sum* (inquit) *idoneus vocari Apostolus.* Quod quid est aliud quam, non sum dignus? Nam hæc plerique codices Latini habent. Hoc est nempe quod querimus, nempe isto munere Apostolatus illæ omnes gratiæ continentur. Non enim ³ decebat aut oportebat Apostolum non habere prophetiam, aut non esse doctorem, aut non clarescere virtutibus donationibusque sanctorum, aut adjutoria non præbere, aut Ecclesias non gubernare, aut linguarum generibus non excellere. Omnia hæc

unum nomen Apostolatus amplectitur; ipsum igitur consulamus, ipsum potius audiamus. Dicamus ei: Sancte Paule Apostole, Pelagius monachus dignum te dicit fuisse, qui acciperes omnes gratias Apostolatus tui; tu ipse quid dicis? *Non sum*, inquit, *dignus vocari Apostolus.* Itaque, ut deferam honorem Paulo, Pelagio magis de Paulo credere audebo, quam Paulo? Non faciam; me namque potius onerabo, quam illum honorabo, si fecero.

Audiamus etiam cur non sit dignus vocari Apostolus: *Quia persecutus sum*, inquit, *Ecclesiam Dei.* Si sensum sequeremur, quis non istum a Christo damnandum censeret, potius quam vocandum? Quis ita diligit prædicatorem, ut non detestetur persecutorem? Optime ergo ipse, atque veraciter: *Non sum*, inquit, *dignus vocari Apostolus, quia persecutus sum Ecclesiam Dei.* Faciens igitur tantum mali, unde meruisti tantum boni? Audiant respondentem omnes gentes: *Sed gratia Dei sum id quod sum.* Numquid aliter est gratia commendata, nisi quia est indigno data? *Et gratia ejus*, inquit, *in me vacua non fuit.* Hoc etiam aliis præcipit, ut etiam arbitrium voluntatis ostendat, ubi ait: *Præcipientes autem et rogamus, ne in vacuum gratiam Dei suscipiatis.* Unde autem probat quod gratia ejus in eo vacua non fuit, nisi ex eo quod sequitur: *Sed plus omnibus illi laboravi?* Proinde non laboravit ut gratiam acciperet, sed accepit ut laboraret: atque ita, unde ad accipienda debita præmia fieret dignus, gratiam gratis accepit indignus. Nec ipsum sane laborem sibi ausus est arrogare. Cum enim dixisset: *Plus omnibus illis laboravi*, continuo subjecit: *Non ego, sed gratia Dei mecum.* O magnum gratiæ præceptorem, confessorem, prædicatorem. Quid est hoc: Plus laboravi, non ego? Ubi sese extulit aliquantum voluntas, ibi continuo vigilavit pietas, et tremuit humilitas, quia se agnovit infirmitas.

CAPUT XII.

REDARGUITUR PELAGIUS EX COMMENTARIIS EJUS IN PAULUM.

Merito (quod gesta indicant) etiam hoc usus est testimonio sanctus Joannes, Hierosolymitanæ Antistes Ecclesiæ, sicut interrogatus, apud illum ante judicium gesta fuerint, Coepis-

NOTE FINALES.

¹ Alias *ipais*.

² Locus obscurus. Forte legendum: *Meri-*

tum vel Apostolo.

³ Alias *dicebat*.

copis nostris, qui simul in illo iudicio præsidebant, ipse narravit. Ait enim tunc quibusdam susurrantibus, et dicentibus quod sine gratia Dei diceret Pelagius posse hoc perfici, ¹ id est, quod superius dixerat, esse posse hominem sine peccato: culpam, inquit, super hoc etiam intuli, quia et Apostolus Paulus multum laborans, sed non secundum suam virtutem sed secundum gratiam Dei dixit: *Amplius illius omnibus laboravi, non ego autem, sed gratia Dei mecum*; et iterum: *Non est volentis, neque currentis, sed miserentis Dei*. Et illud: *Nisi Dominus ædificaverit domum, in vanum laboraverunt, qui ædificant eam*. Et alia multa similia diximus, inquit, de Scripturis Sanctis. Illis autem non suscipientibus quæ dicebantur a nobis de Sanctis Scripturis, sed adhuc susurrantibus, dixit Pelagius: Et ego sic credo; anathema sit, qui dicit absque adjutorio Dei posse hominem ad profectum omnium venire virtutum.

² Hæc narravit Episcopus Joannes audiente Pelagio, qui posset honorifice dicere: Fallitur Sanctitas Tua, non bene meministi, non dixi ad hæc testimonia, quæ de Scripturis commemorasti: Ego sic credo; quoniam non ea sic intelligo, quod gratia Dei sic laboret cum homine, ut quod non peccat, non volentis, neque currentis, sed miserentis sit Dei.

³ Sunt enim quædam expositiones Epistolæ Pauli, quæ scribitur ad Romanos, quæ ipsius Pelagii esse dicuntur, ubi hoc quod scriptum est: *Non volentis, neque currentis, sed miserentis est Dei*, non ex persona Pauli asserit dictum, sed eum voce interrogantis, et redarguentis usum fuisse, cum hoc diceret, tanquam hoc dici utique non deberet. Non ergo, cum Episcopus Joannes plane istam sententiam Apostoli cognovit, eamque ideo commemoravit, ne Pelagius sine Dei gratia non peccare quemquam putaret: et dixit, respondisse Pelagium: Et ego sic credo; neque cum hoc præsens audiret, respondit: Non sic credo; oportet, ut illam expositionem perversam, ubi hoc non ⁴ sensisse Apostolum, sed potius redarguisse intelligi voluit, ut suam neget, aut corrigere, atque emendare non dubitet.

Nam quidquid dixit Episcopus Joannes de

absentibus fratribus nostris, sive Coepiscopis Herote ⁵ ac Lazaro, sive de presbytero Orosio, sive de aliis, quorum ⁶ ibi non sunt nomina expressa, credo, quod intelligat ad eorum præjudicium non valere. Si enim præsentibus essent, possent eum fortasse (absit ut ita dicam) convincere de mendacio, sed commemorare quid forte fuisset oblitus, aut in quo eum fefellerit Latinus interpres, et si non studio mentiendi, certe alienæ linguæ minus intellectæ nonnulla difficultate. Præsertim quia non ⁷ in gestis agebatur, quæ, improbi ne mentiantur, boni autem ne aliquid obliviscantur, utiliter instituta sunt. Si quis autem memoratis fratribus nostris ex hoc aliquid quæstionis intulerit, eosque ad iudicium Episcopale revocaverit, sibi ut poterunt, aderunt: nobis hic laborare quid opus est, quando ne ipsi quidem iudices, post Coepiscopi nostri narrationem, aliquid inde pronuntiare voluerunt?

Cum ergo Pelagius præsens ad illa testimonia Scripturarum dixisse, se ita credere, tacitus agnoverit; ⁸ quominus illud Apostoli testimonium paulo superius recolens, et inveniens eum dixisse: *Non sum dignus vocari Apostolus, quia persecutus sum Ecclesiam Dei, sed gratia Dei sum id quod sum*; non vidit, non se dicere debuisset, cum ageretur de abundantia gratiarum, quas idem accepit ⁹ Apostolus, dignum fuisse qui acciperet, cum ipse se non solum dixerit, sed et aliam causam reddens, probarit indignum, et eo ipso gratiam vere gratiam commendaverit? Sed si forte illud jamdudum a sancto Joanne narratum cogitare vel meminisse non potuit, recentissimam suam responsionem respiceret, et quæ paulo antea de Cœlestio sibi objecta anathematizaverit, adverteret. Nempe enim inter illa est quod objectum est, dixisse Cœlestium, Dei gratiam secundum merita nostra dari. Si ergo veraciter hoc Pelagius anathematizavit, quid est quod dicit gratias omnes Apostolo secundum merita datas? An aliud est dignum esse accipere, aliud secundum meritum accipere, et potest aliqua subtilitate disputationis ostendere dignum esse aliquem, sed non mereri?

Veruntamen Cœlestius, vel quis alius, cuius omnes superiores anathematizavit senten-

NOTE SUAREZ.

¹ Alias *idem*.

² Hic incipiebat cap. 15.

³ Hic incipiebat cap. 16.

⁴ Alias *fuisse*.

⁵ Alias *Herothe, Herode, Aterothe*.

⁶ In Epist. Concilii Carthag. ad Innoc.

⁷ Fortasse legendum: *Hæc in gestis agebantur*, alias locus est obscurus.

⁸ Edit. Paris. legit *quomodo*. (Not. Edit.)

⁹ Alias *apostolum*.

tias, nec de hoc verbo eum nebulas ostendere¹, atque in eis latere permittit. Urget enim, et dicit: Et ipsa gratia in mea voluntate posita est, sive dignus fuerim, sive indignus. Si ergo hoc recte a Pelagio veraciterque damnatum est, ubi dicitur Dei gratiam, secundum merita, et dignis dari, quo corde cogitavit, quo ore protulit, quod ait: Dicimus donare Dominum ei qui fuerit dignus accipere omnes gratias? Quis non, ista si diligenter adverterit, fiat de illius responsione vel defensione sollicitus?

Cur ergo, ait aliquis, hoc iudices approbaverunt? Fateor, idem jam ipse ambigo. Sed nimirum, aut breve dictum eorum audientiam aut intentionem facile subterfugit, aut aliquo modo id recte posse accipi existimantes, cujus de hac re confessiones liquidas sibi habere videbantur, pene de uno verbo nihil ei controversiam commovendam² putarunt. Quod et nobis forsitan contigisset, si cum eis in illo iudicio sedissemus: si enim pro eo quod positum est *dignus*, positum esset prædestinatus, vel aliquid ejusmodi, nihil certe scrupuli tangeret atque angeret animum: et tamen si dicitur eum, qui per electionem gratiæ justificatur, nullis quidem præcedentibus meritis bonis, sed destinatione dignum vocari, sicut electus vocatur, utrum vel certe, vel minima offensione intelligentiæ, dici possit, difficile judicatur. Nam quantum ad me attinet, ab hoc verbo facile transirem, nisi me liber ille, cui respondit, ubi omnino nullam dicit Dei gratiam, nisi naturam nostram cum libero arbitrio, de ipsius Pelagii sensu sollicitum redderet, ne forte hoc verbum non de negligentia locutionis, sed de diligentia dogmatis curarit³ miscere. Jam ea quæ restant novissima ita iudices commoverunt, ut ante responsionem Pelagii damnanda censerent.

CAPUT XIII.

DE ALIIS OBJECTIONIBUS FACTIS PELAGIO EX LIBRIS
CELESTII.

Nam in sexto capitulo Celestii libri positum objectum est, filios Dei non posse vocari, nisi omnimodo absque peccato fuerint effecti: nude secundum ipsum dictum est, neque Apostolum Paulum esse filium Dei, qui dixit: *Non*

quod jam acceperim, aut quod jam perfectus sim. In septimo capitulo oblivionem et ignorantiam non subjacere peccato, quoniam non secundum voluntatem eveniunt, sed secundum necessitatem, cum David dicat: *Delicta juventutis meæ ne memineris, et ignorantiam meam;* et cum in lege sacrificia pro ignorantia sicut pro peccato offeruntur. In decimo capitulo, non esse liberum arbitrium, si Dei indigeat auxilio, quoniam in propria voluntate habet unusquisque aut facere aliquid, aut non facere. In duodecimo capitulo, victoriam nostram non ex Dei esse adjutorio, sed ex libero arbitrio, quod inferius⁴ dictum est his verbis: *Nostra est victoria, quoniam propria voluntate arma suscipimus, sicut e contrario nostrum est, quando vincimur, quoniam armari propria voluntate contempsimus.*

Et de Apostolo Petro posuit testimonium, divini nos esse consortes naturæ, et syllogismum facere dicitur, quoniam, si anima non potest esse sine peccato, ergo et Deus subiacet peccato, cujus pars, hoc est anima, peccato obnoxia est.

In tertio decimo capitulo dicit: Quoniam pœnitentibus venia non datur secundum gratiam et misericordiam Dei, sed secundum merita et laborem eorum, per pœnitentiam digni fuerint misericordia.

His recitatis, Synodus dixit: Quid ad hæc, quæ lecta sunt capitula, dicit præsens Pelagius monachus? Hoc enim reprobant sancta Synodus, et sancta Dei Catholica Ecclesia. Pelagius respondit: Iterum dico, quia hæc et secundum ipsorum testimonium non sunt mea; pro quibus, ut dixi, satisfactionem non debeo; quæ vero mea esse confessus sum, hæc recte esse affirmo: quæ autem dixi non esse mea, secundum iudicium sanctæ Ecclesiæ reprobato, anathema dicens omni contravenienti sanctæ Catholice Ecclesiæ doctrinis. Ego enim in unius substantiæ Trinitatem credo, et omnia secundum doctrinam sanctæ Catholice Ecclesiæ; si quis vero aliena ab hac sapit, anathema sit.

Synodus dixit: Nunc quoniam satisfactum est nobis persecutionibus præsentis Pelagii monachi, qui quidem piis doctrinis consentit, contraria vero Ecclesiæ fidei reprobant et anathematizat, communionis Ecclesiæ cum esse catholice confitemur.

NOTÆ SUAREZ.

¹ Alias *obtendere.*² Alias *exomendum.*³ Alias *inserere.*⁴ Alias *inferre dictus.*

CAPUT XIV.

MINUS SINCERE PELAGIUM SIBI OBJECTIS SATIS-
FECISSE.

Si ista sint gesta, quibus amici Pelagii gaudent eum esse purgatum, nos, quoniam erga se nostram quoque amicitiam,¹ probatis etiam familiaribus Epistolis nostris, atque in hoc iudicio recitatis, quas² insertas continent gesta, satis probare curarit, salutem quidem ejus in Christo cupimus et optamus, de ista vero ejus purgatione, quæ magis creditur quam liquido demonstratur, gaudere temere non debemus. Neque hoc dicens iudicium arguo, vel negligentiam, vel conniventiam³, vel, quod ab eis longe abhorrere certissimum est, impiorum dogmatum conscientiam; sed eorum iudicio pro merito approbato, atque laudato, Pelagius tamen, apud eos quibus amplius certiusque⁴ notus est, non mihi videtur esse purgatus. Illi enim tanquam de ignoto iudicantes, his præsertim absentibus qui contra eum libellum dederant, hominem quidem diligentius examinare minime potuerunt; hæresim tamen ipsam, si eorum sequantur iudicium qui pro ejus perversitate certabant, penitus peremerunt. Illi autem qui bene sentiunt quæ Pelagius docere consuevit, sive qui ejus disputationibus restiterunt, sive qui ex ipso errore se liberatos esse gratulantur, quomodo possunt eum non habere suspectum, quando ejus non simplicem confessionem præterita errata damnantem, sed talem defensionem legunt, quasi nunquam aliter senserit, quam isto iudicio in ejus est responsionibus approbatum.

Nam, ut de me ipso potissimum dicam, ipsius⁵ absentis et Romæ constituti Pelagii nomen cum magna ejus laude cognovi. Potestæ cœpit ad nos fama perferre, quod adversus Dei gratiam disputaret, quod licet dole-rem, et ab eis mihi diceretur, quibus crederem, ab ipso tamen tale aliquid, vel in ejus aliquo libro nosse cupiebam, ut si inciperem redarguere, negare non posset. Postea vero quam in Africam venit, me absente, nostro,

id est, Hipponensi littore exceptus est, ubi omnino, sicut⁶ comperi a nostris, nihil ab aliquo hujusmodi auditum est, quia et citius quam putabatur, inde profectus est. Postmodum ejus faciem Carthagine, quantum recolo, semel vel iterum vidi, quando circa collationem, quam cum hæreticis Donatistis habituri eramus, occupatissimus fui. Ille vero etiam ad transmarina properavit. Interea, per ora eorum qui ejus discipuli ferebantur, dogmata ista fervebant; ita ut Cœlestius ad Ecclesiasticum iudicium perveniret, et reportaret dignam sua perversitate sententiam. Salubrius sane adversus eos agi putabamus, si, hominum nominibus tacitis, ipsi refutarentur, et redarguerentur errores, atque ita metu potius Ecclesiastici iudicii corrigerentur homines, quam ipso iudicio punirentur. Nec libris igitur adversus mala illa disserere, nec popularibus tractatibus cessabamus.

CAPUT XV.

QUO MODO PELAGIUS QUESTIONEM DE GRATIA SIMULATE SOLVERET, ET CONTRARIUM ERROREM ANATHEMATIZARET.

Cum vero mihi etiam liber ille datus esset a servis Dei bonis, et honestis viris, Timasio⁷ et Jacobo, ubi apertissime Pelagius objectam sibi a seipso, tanquam ab adversario, unde jam grandi invidia laborabat, de Dei gratia quæstionem, non aliter sibi solvere visus est, nisi ut naturam cum libero arbitrio conditam Dei diceret gratiam, aliquando id⁸, quod tenuit, nec aperte ei conjungens legis adjutorium, vel remissionem etiam peccatorum: tum vero, sine ulla dubitatione, mihi claruit quam esset Christianæ salutis venenum illius perversitatis inimicum; nec sic tamen operi meo, quo eundem librum refelli, Pelagii nomen inserui, facilius me existimans profuturum, si, servata amicitia, adhuc ejus verecundiæ parcerem, eum⁹ litteris jam parcere¹⁰ non deberem. Hinc est quod nunc moleste fero, in hoc iudicio dixisse illum quodam loco: Anathematizo illos qui sic tenent, aut aliquando te-

NOTE SUAREZ.

¹ Edit. Paris. legit *prolati*. (Not. Edit.)

² Alias *quasi incertas*.

³ Alias *cohibentiam*.

⁴ Alias *arctius*.

⁵ Alias *privs*.

⁶ Alias *sicut nostis*.

⁷ *Timasio* vel *Primasio*.

⁸ Alias *idque tenuiter*.

⁹ Alias *cujus*.

¹⁰ Alias *parcere*.

nuerunt; suffecerat dicere: Qui sic tenent, ut eum crederemus esse correctum; cum vero addidit: Aut aliquando tenuerunt, primum, quam injuste damnare immeritos ausus est, qui illo, qui sive aliis, sive ipso doctore, didicerant, errore caruerunt? Deinde quis eorum, qui eum ista non solum aliquando tenuisse, verum etiam docuisse noverunt, non immerito suspicetur simulate anathematizasse qui hæc tenent, cum eodem modo anathematizare non dubitavit, qui hæc aliquando tenuerunt, in quibus eum ipsum recordabantur magistrum? Ecce (ut alios taceam) Timasium et Jacobum, quibus oculis, qua fronte conspiciet suos, aut dilectores, aut aliquando discipulos, ad quos librum ¹ scripsi, ubi libro ejus respondi. Qui certe quemadmodum mihi rescripserint, tacendum et prætereundum non putavi, sed exemplum litterarum subter annexui.

CAPUT XVI.

EPISTOLA TIMASHI ET JACOBI AD AUGUSTINUM.

Domino vere beatissimo, et merito venerabili Patri Episcopo Augustino, Timasius et Jacobus in Domino salutem. Ita nos refecit et recreavit gratia Dei ministrata per verbum tuum, ut prorsus germane dicamus: *Misit verbum suum, et sanavit eos.* Domine beatissime, et merito venerabilis Pater, sane ea diligentia ventilasse sanctitatem tuam textum ejusdem libelli reperimus ut ad singulos apices responsa debita ² stupeamus, sive in his quæ refutare, detestari ac fugere deceat Christianum, sive in illis in quibus non satis invenitur errasse, quamvis nescio qua calliditate in ipsis quoque gratiam Dei credidit supprimendam. Sed unum est quod nos in tanto beneficio afflicti ³, quia tarde hoc tam præclarum gratiæ Dei munus effulsit. Si quidem contingit abentes fieri quosdam, quorum cæcitati tam perspicua veritatis illustratio deberetur: ad quos, etsi tardius, non diffidimus, propitio Deo, eandem gratiam pervenire, qui vult omnes homines salvos fieri, et ad agnitionem veritatis venire. Nos vero, etsi olim spiritu charitatis ⁴, qui in te est, docti, subjectionem ejus abjecerimus erroris, in hoc etiam nunc

gratias agimus, quod hæc, quæ ante credidimus, nunc aliis aperire didicimus, viam felicitatis uberiore sanctitatis tuæ sermone pendente ⁵. *Et alia manu*, incolumem beatitudinem tuam, nostrique memorem misericordia Dei nostri clarificet in æternum.

CAPUT XVII.

PELAGIUM URGET UT EX CORDE RESIPISCAT.

Si ergo et iste confiteatur ita in hoc errore se fuisse aliquando, ut hominem præoccupatum, sed nunc anathematizare, qui hæc tenet, quisquis ei non gratularetur, tenente jam illo viam veritatis, ipse amitteret viscera charitatis. Nunc vero, parum est quod se non confessus est ab ea peste liberatum, sed anathematizavit insuper liberatos, qui eum sic diligunt, ut etiam ipsum cupiant liberari, in quibus et isti sunt, qui benevolentiam suam erga illum significaverunt, his ad me datis litteris suis. Nam et ipsum præcipue cogitabant, cum dicerent hoc se affici, quod tarde illum librum scripserim. Siquidem contingit, inquiunt, absentes fieri quosdam, quorum cæcitati ista tam perspicuæ veritatis illustratio deberetur, ad quos etsi tardius, inquiunt, non diffidimus, propitio Deo, eandem gratiam pervenire. Nomen quippe, vel nomina ipsi quoque adhuc tacenda putaverunt, ut vivente amicitia error potius moreretur amicorum.

At nunc si Pelagius Deum cogitat, si non est ingratus ejus misericordiæ, qui eum ad Episcoporum judicium propterea produxit, ut hæc anathemata defendere postea non auderet, jamque detestanda, et abjicienda cognosceret, gratus accipiet litteras nostras, quando expresso nomine ulcus sanandum potius aperimus, quam illas ubi eum dolore ⁶ facere timeremus, tumorem, quod nos pœnitet, augeamus. Si autem mihi fuerit iratus, quam inique irascatur, attendat, et ut vincat iram tandem aliquando Dei postulet gratiam, quam in hoc judicio confessus est singulis nostris actibus necessariam, ut veram consequatur, illo adjuvante, victoriam. Quid enim ei prosunt tantæ ejus laudes in Epistolis Episcoporum, quas pro se commemorandas, vel etiam

NOTÆ CAPELLÆ.

¹ Utiq; librum de Natur. et grat.² Alia reddita.³ Utiq; dolore, vel forte, affligit.⁴ Alia claritatis.⁵ Alia presidente.⁶ Alia dolorem.

legendas, atque allegandas putavit, quasi cum ¹ hæc perversa sentiret ², omnes, qui vehementes et quodammodo ardentibus ad bonam vitam exhortationes ejus audiebant, facile scire potuerunt ³?

CAPUT XVIII.

EPISTOLA AUGUSTINI AD PELAGIUM, CUM ILLIUS DECLARATIONE.

Et ego quidem, in Epistola mea quam protulit, non solum ab ejus laudibus temperavi, sed etiam, quantum potui, sine ejus ⁴ commotione quæstionis, de Dei gratia recte sapere admonui. Dixi enim ⁵ quippe in salutatione Dominum, quod epistolari more etiam non Christianis quibusdam scribere solemus, neque id mendaciter, quoniam omnibus ad salutem, quæ in Christo est, consequendam, debemus quodammodo liberam servitatem. Dixi dilectissimum, et nunc dico, et si iratus ⁶ fuerit, adhuc dicam; quoniam, nisi erga eum dilectionem tenero, illo irascente, ipse mihi magis nocebo. Dixi desideratissimum, quoniam valde cupiebam eum præsentem aliquid colloqui; jam enim audiebam, contra gratiam, qua justificamur, quando hinc aliqua commemoratio fieret, aperta eum contentione coerceri ⁷. Denique, litterarum ipsarum brevis textus hoc indicat. Nam cum egissem gratias, quod me scriptis suis exhilarasset, certum faciendo de sua salute, ac suorum, quos utique si correctos volumus, etiam corporali salute salvos velle debemus; mox et bona optavi a Domino retribui. non ad salutem corporis pertinentia, sed ea potius quæ putabat esse, vel forte adhuc putat in solo arbitrio voluntatis, et propria potestate posita. Deinde, quia litteris suis, quibus respondebam, talia quædam in me bona multum benigneque laudaverat, etiam ibi petivi ab eo ut pro me oraret, quo potius a Domino talis fierem, qualem me esse jam crederet, ut eum sic admonerem, contra quem ⁸ ille sapiebat, ipsam quoque justitiam quam in me laudandam putaverat, non esse volentis, neque currentis, sed miserentis Dei. Hoc est

totum, quod brevis illa Epistola mea continet, eaque intentione dicta est, nam ita se habet:

DOMINO DILECTISSIMO ET DESIDERATISSIMO FRATRI PELAGIO AUGUSTINUS, IN DOMINO SALUTEM.

Gratias ago plurimum, quod me litteris exhilarare dignatus es, et certum facere de salute vestra. Retribuet tibi Dominus bona, quibus semper sis bonus, et cum illo æterno vivas in æternum, domine dilectissime, et desideratissime frater. Ego autem, etsi in me non agnosco præconia de me tua, quæ tuæ benignitatis epistola continet, benevolo tamen animo erga exiguitatem meam ingratus esse non possum. Simul admonens ut potius ores pro me, quo talis a Domino fiam, qualem me jam esse arbitraris; *et alia manu*, memor nostri, incolumis Domino placeas, domine dilectissime, et desideratissime frater.

In ipsa quoque subscriptione quod posui, ut Domino placeat, magis hoc esse significavi in ejus gratia, quam in sola hominis voluntate, quando id nec hortatus sum, nec præcepi, nec docui, sed optavi. Quemadmodum vero si hortarer, aut præciperem, vel docerem, pertinere hoc et ad liberum arbitrium demonstrarem, nec tamen Dei gratiæ derogarem: ita quia optavi, Dei quidem commendavi gratiam, non tamen arbitrium voluntatis extinxit. Ut quid ergo in hoc judicio protulit hanc epistolam? secundum quam si ab initio sapuisset, nullo modo fortassis, licet a bonis fratribus, sed tamen perversitate dispositionum ⁹ ejus offensis, ad episcopale judicium vocaretur. Porro autem, sicut ego rationem de hac mea epistola reddidi, ita de suis, si esset necesse, redderent ¹⁰ quorum allegant, dicentes, vel quid putaverint, vel quid ignoraverint, vel qua ratione scripserint. Proinde Pelagius, de quorumlibet Sanctorum amicitia se jactaverit, quorumlibet de suis laudibus litteras legerit, quolibet purgationis suæ gesta protulerit, nisi ea quæ contra Dei gratiam, qua vocamur, et justificamur, posuisse in litteris suis idoneorum testium fide probatur, confessus anathematizaverit, ac

NOTÆ SUAREZ.

¹ Alias *eum*.² Alias *sentire*.³ Alias *potuerint*.⁴ Alias *ullius*.⁵ Alias *cum*.⁶ Alias *virtus*.⁷ Alias *conari*.⁸ Alias *quod*.⁹ Alias *disputationum*.¹⁰ Videtur supervacaneum *quorum allegant*.

deinde contra hæc ipsa scripserit, et disputaverit, nequaquam his, quibus plenius notus est, videbitur esse correctus.

CAPUT XIX.

FALSO GLORIATUR PELAGIUS IPSIUS DOGMA, POSSE NON PECCARI PER HUMANUM LABOREM, FUISSE APPROBATUM.

Jam enim quæ post hoc judicium consecuta sunt, quæ hanc suspicionem magis augeant, non tacebo. Pervenit in manus nostras nonnulla epistola, quæ ipsius Pelagii diceretur scribentis ad amicum suum quemdam presbyterum, qui eum litteris (sicut eadem epistola continet) benigne admonerat ne per ejus occasionem aliquis a corpore Ecclesiæ separaretur. Ibi, inter cætera quæ inserere longum est, nec opus est, ait Pelagius: Quatuordecim Episcoporum sententia, nostra definitio comprobata est, qua diximus, posse hominem sine peccato esse, et Dei mandata facile custodire, si velit. Quæ sententia (inquit) contradictionis nos¹ confusione perfudit, et omnem in malum conspirantem societatem ab invicem separavit. Sive ergo istam epistolam vere scripserit, sive sub ejus nomine a quocumque conficta sit, quis non videat quemadmodum hic error, et de judicio ubi convictus atque damnatus est tanquam de victoria gloriatur? Sic enim posuit hæc verba, quemadmodum leguntur in libro ejus, qui Capitulorum vocatur, non quemadmodum objecta sunt in judicio, vel etiam responsione repetita. Nam et illi qui objecerunt, nescio qua injuria² minus posuerunt verbum, de quo non parva est controversia. Posuerunt enim eum dixisse, posse hominem, si velit esse sine peccato; de facilitate nihil est dubium³. Deinde, ipse respondens ait, posse quidem hominem esse sine peccato, et Dei mandata custodire si velit, diximus, neque ipse dixit, facile custodire, sed tantummodo custodire. Ita alio loco inter illa de qui-

bus Hilarius me consuluit, atque rescripsi, sic objectum est, posse hominem esse sine peccato, si velit. Ad quod ipse ita respondit, posse quidem hominem sine peccato esse, dictum est superius. Neque hic ergo vel eis qui objecerunt, vel ab ipso qui respondit, additum est, facile.

Superius etiam in narratione S. Joannis Episcopi, ita commemoratum est. Illis, inquit, instantibus et dicentibus, quia hæreticus est, dicit enim, quoniam potest homo, si voluerit, esse sine peccato, et de hoc interrogantibus nobis eum, respondit: Non dixi quoniam recepit natura hominis, ut impeccabilis sit; sed dixi quoniam qui voluerit pro propria salute laborare, et agonizare, ut non peccet, et ambulet in præceptis Dei, habere eum hanc possibilitatem a Deo. Tunc quibusdam susurrantibus, et dicentibus, quod sine Dei gratia, dicente Pelagio, posse⁴ hoc perfici, ⁵ culpam, inquit, superintuli, quia et Apostolus Paulus multum laborans, sed non secundum suam virtutem, sed secundum gratiam Dei, dixit: Amplius omnibus illis laboravi, non ego autem, sed gratia Dei mecum, etc., quæ jam commemoravi. Quid sibi ergo vult, quod in hac epistola ita gloriari ausi sunt, ut non solum possibilitatem non peccandi, sed etiam facultatem, sicut in libro Capitulorum ejusdem Pelagii positum est, judicantibus quatuordecim Episcopis se persuasisse jactarent, cum toties eadem edicta gestis, atque repetita, nusquam hoc habere inveniantur? Quomodo enim etiam ipsi defensionem et responsionem Pelagii non est hoc verbum contrarium, cum et Episcopus Joannes sic eum apud se respondisse⁶ dixerit, ⁷ et cum vellet intelligi, posse non peccare, qui voluerit pro salute sua laborare, et agonizare, et ipse jam ⁸ gestis agens, seque defendens, proprio labore et Dei gratia dixerit hominem esse posse sine peccato? Quomodo ergo facile sit, si laboratur ut fiat? Puto enim, omnem sensum hominum nobiscum agnoscere quod, ubi labor est, facilitas non est. Et tamen in ⁹ epistola carnalis ventosita-

NOTÆ SUAREZ.

¹ Legendum cum Ed. Paris. os. (Not. Edit.)
² Alias incuria.
³ Alias dictum.
⁴ Alias posset.
⁵ Verbum obscurum est, nam verbum, inquit, ad Joannem referendum esse, et discursus Augustini indicat, et ex Dialogo Pauli Orosii comprobatur. Quid autem significave-

rit, dicens: *Culpam superintuli*, non intelligitur, et forte legendum: *Culpavi (inquit) et superintuli*, et sic consonant quæ infra dicit Augustinus.

⁶ Alias disserit.

⁷ Alias ut eum.

⁸ Alias in.

⁹ Forte delenda particula in.

tis et elationis volat, et gestorum tarditate procurata, celeritate præcedens, in manus hominum prævolat, ut quatuordecim Episcopis Orientalibus placuisse dicatur, non solum posse esse hominem sine peccato, et Dei mandata custodire,¹ nec nominato Deo juvante, sed tantum, si velit, ut videlicet tacita, pro² qua vehementissime pugnabatur divina gratia, restet, ut in sola epistola legatur infelix, et se ipsam decipiens velut victrix, humana superbia. Quasi non hoc se dixerit culpasse Joannes Episcopus, et velut giganteos montes adversus supereminentiam gratiæ cœlestis stratos³ tribus divinorum testimoniorum, tanquam fulminum, ictibus dejecisse.

At vero cum illo etiam cæteri Episcopi iudices, vel mente, vel ipsis auribus ferrent Pelagium dicentem: *Posse quidem hominem sine peccato esse, et Dei mandata custodire, si velit, diximus*; nisi continuo, sequeretur: *Hanc enim possibilitatem Deus illi dedit* (quod nesciebant illi eum dicere de natura, non de illa, quam in Apostolica prædicatione noverant, gratia); ac deinde conjungeret: Non autem diximus quod inveniatur aliquis ab infantia usque ad senectam, qui nunquam peccaverit, sed quoniam a peccatis conversus, proprio labore et Dei gratia possit esse sine peccato. Quod etiam sua sententia declararunt dicentes eum recte respondisse hominem, cum adiutorio Dei et gratia, posse esse sine peccato. Quid aliud metuentes, nisi ne hoc negando, non possibilitati hominis, sed ipsi Dei gratiæ facere videretur injuriam. Nec tamen definitum est quando fiat homo sine peccato, quod fieri posse, adjuvante Dei gratia, judicatum est. Non est, inquam, definitum utrum in hac carne concupiscentiæ adversus spiritum, fuerit, vel sit, vel futurus sit aliquis jam ratione utens, et voluntatis arbitrio, sive in ista frequentia hominum, sive in solitudine monachorum, cui non sit jam necessarium non propter alios, sed etiam propter seipsum dicere in oratione: *Dimitte nobis debita nostra*; an vero tunc perficiatur hoc donum, quando similes ei erimus, quando videbimus eum sicuti est; quando dicetur, non a pugnantis: *Video aliam legem in membris meis repugnantem legi mentis meæ*;

sed a triumphantibus: *Ubi, mors, victoria tua? Ubi est, mors, aculeus tuus?* Quod non inter catholicos et hæreticos, sed inter catholicos ipsos fortasse pacifice requirendum est.

Quomodo igitur credi potest Pelagium (si tamen hæc epistola ejus est), et Dei gratiam, quæ neque natura est cum libero arbitrio, neque legis scientia, neque tantum remissio peccatorum, sed ea quæ in singulis nostris est actibus necessaria, veraciter fuisse confessum, et veraciter anathematizasse quisquis contraria⁴ ista sentiret, quando in epistola sua, et facilitatem posuit non peccandi, de qua nulla in hoc judicio quæstio fuit, quasi judicibus etiam de hoc verbo placuerit, et gratiam Dei non posuit⁵, quam confitendo et addendo, pœnam ecclesiasticæ damnationis evasit?

CAPUT XX.

REDARGUITUR ET CONVINCITUR PELAGIUS, QUOD
ERRORES CŒLESTII FICTE ANATHEMATIZA-
VERIT.

Est et aliud quod silere non debeo; in chartula defensionis suæ, quam mihi per quemdam earum nostrum⁶ Hipponensem civem, Orientalem autem diaconum, misit, fecit aliquid, quod aliter se habeat, quam gestis Episcopilibus continetur; quod autem habent gesta longe melius est, ac firmitus, et omnino enodatus pro Catholica veritate contra illius hæresis pestem. Nam cum eandem chartulam legerem, priusquam ad nos gesta venissent, nesciebam ea ipsa verba posuisse, quibus cum ibi⁷ adesset, usus est in judicio; pauca enim, et non multum aliter se habent, de quibus non nimis curo.

Molestè autem ferebam quod aliquarum sententiarum Cœlestii, quas cum gestis anathematizasse perspicuum est, servasse sibi defensionem potest videri. Nam earum quædam sua negavit esse, dicens tantummodo pro eis non se debere satisfactionem, anathematizare autem in eadem chartula voluit, quæ ista sunt: *Adam mortalem esse factum, qui⁸ sive peccaret, sive non peccaret, esset moriturus; quod pecca-*

NOTÆ SUAREZ.

¹ Ed. Par. addit *sed et facile custodire.* (Not. Edit.)

² Alias *do.*

³ Alias *structos.*

⁴ Alias *contra.*

⁵ Alias *posueris.*

⁶ Alias *restrum.*

⁷ Alias *sibi.*

⁸ Alias *quod.*

tum Adæ solum ipsum nocuerit, et non genus humanum; quod lex sic mittat ad regnum cælorum, quemadmodum et Evangelium; quod infantes nuper nati in illo statu sint, in quo fuit Adam ante prævaricationem; quod neque per mortem, vel prævaricationem Adæ omne genus humanum moriatur, neque per resurrectionem Christi omne genus humanum resurgat. Infantes, etiamsi non baptizentur, habere vitam æternam. Divites baptizatos, nisi omnibus abrenuntiaverint, si quid boni videntur facere, non illis reputari, neque habituros illos regnum cælorum. Ad ista quippe in chartula illa ita respondit: Hæc omnia, secundum ipsorum testimonium, a me dicta non sunt, nec pro eis debeo satisfactionem. In gestis autem ad eadem ipsa ita locutus est: Secundum ipsorum testimonium a me dicta non sunt, pro quibus ego satisfacere non debeo; sed tamen, ad satisfactionem sanctæ Synodi, anathematizo eos qui sic tenent, aut aliquando tenuerunt.

Cur ergo non ita et in illa chartula scriptum est? non multum, ut opinor, atramenti, nec litterarum, nec moræ, nec ipsi¹ chartulæ, si ita fieret, impenderetur. Sed quis non credat, id fuisse procuratum, ut tanquam pro gestorum illorum breviatione ista charta usquequaque discurreret, ubi non putaretur, non² esse ablatam quamlibet earum sententiarum defendendi licentiam, quod ei tantummodo objectæ, nec ei³ approbatæ fuissent, non tamen anathematizatæ, atque damnatæ?

Postea etiam de libro Cœlestii capitula sibi objecta in eadem chartula multa congressit, neque his intervallis, quæ continent gesta, duas responsiones, quibus eadem in capitula anathematizavit, sed unam simul omnibus subdidit. Quod studio brevitatis factum putarem, nisi plurimum ad id, quod nos movet, interesse perspicere, ita enim clausit: Iterum dico, quoniam ista et secundum eorum testimonium non sunt mea, pro quibus, ut dixi, satisfactionem non debeo; quæ autem mea esse confiteor, hæc recte me dicere affirmo; quæ autem dixi mea non esse, secundum iudicium sanctæ Ecclesiæ reprobæ, anathema dicentis omni contravenienti sanctæ et catholi-

cæ Ecclesiæ doctrinis, similiter et his qui falsa fingentes nobis calumniam commoverunt. Hunc ultimum versum non habent gesta, sed nihil ad rem, de qua solliciti esse debemus. Sint enim prorsus anathema, et hi qui, falsa fingentes, eis calumniam commoverunt.

Sed cum primum legi: Quæ ante dixi mea non esse, secundum iudicium sanctæ Ecclesiæ reprobæ, nesciens, quoniam hic tacitum est, et gesta non legeram, nihil aliud existimavi, quam eum fuisse pollicitum, hoc se de his sensurum capitulis, quod Ecclesia non jam iudicasset, sed quandoque iudicaret, et ea se reprobaturum, quæ illa non jam reprobasset, sed quandoque reprobare, ut huc pertinent etiam quæ⁴ adjungit, anathema se dicente⁵ omni contravenienti, vel contradicenti sanctæ Catholicæ Ecclesiæ doctrinis. Verumtamen, ut gesta testantur, jam de his Ecclesiasticum iudicium ab Episcopis quatuordecim factum erat, secundum quod iudicium se dixit, ista omnia reprobare, et anathema dicere his qui, talia sentiendo, contra iudicium veniunt, quod jam factum fuisse gesta indicant. Jam enim dixerant iudices: Quid ad hæc, quæ lecta sunt capitula, dicit præsens Pelagius, monachus. Hæc enim reprobat sancta Synodus, et sancta Dei Catholica Ecclesia.

Sed hoc qui nesciunt, et istam chartam legunt, aliquid illorum licite posse defendi, tanquam non fuerit iudicatum catholicæ contrarium esse doctrinæ, paratumque se Pelagius dixerit, id de his rebus sapere, quod Ecclesia, non iudicavit, sed iudicaverit. Non ita⁶ sic scripsit, tamen de qua nunc agimus chartula, ut cognosceretur,⁷ quod habet gestorum fides, omnia scilicet illa dogmata, quibus eadem hæresis proserpebat, et contentiosa convalescebat audacia, Ecclesiastico iudicio præsidentibus quatuordecim Episcopis esse damnata. Quam rem, si ut est, innotescere timuit, se potius corrigat, quam nostræ, licet seræ, vigilantie qualicumque succenseat. Si autem hoc eum timuisse⁸ falsum est, et sicut homines suspicamur, ignoscat, dum tamen ea quæ gestis, quibus auditus est, anathematizata et reprobata sunt, de cætero oppugnet, ne parcendo

NOTE SUAREZ.

¹ Alias *ipsius*.² Alias deest particula *non*.³ Alias *eius*.⁴ Alias *ut ad hoc pertineret etiam, quod*.⁵ Alias *dicere*.⁶ Alias *itaque*.⁷ Est tamen obscurus locus, et videtur corruptus, forteque sic legendus: *Nam ita ipse scripsit in ea, de qua nunc agimus, chartula. Et postea supplendum: Et animadvertens a nobis est, ut cognosceretur, etc.*⁸ Alias *tenuisse*.

illis, non solum hæc antea credidisse, sed credere videatur.

CAPUT XXI.

CONCLUSIO ET SCOPUS TOTIUS LIBRI.

Proinde istum librum in tam gravi et grandi causa, non frustra fortasse prolixum, ob hoc ad tuam Venerationem scribere volui, ut, si tuis sensibus non displicuerit, auctoritate potius tua, quæ longe major est, quam nostræ exiguitatis industria, quibus necessarium existimaverit, innotescat, ad eorum vanitates contentionesque opprimendas, qui putant, absoluto Pelagio, iudicibus Episcopis Orientalibus illa dogmata placuisse, quæ adversum Christianam fidem et gratiam, qua vocamur et justificamur, perniciosissime pullulantia, Christiana semper veritas damnat, et istorum etiam quatuordecim Episcoporum auctoritate damnavit, quæ simul et Pelagium, nisi ab eo essent anathematizata, damnasset. Nunc jam quoniam reddidimus homini curam fraternæ charitatis, et de illo, ac pro illo nostram sollicitudinem fideliter promisimus¹, videamus breviter, quomodo possit adverti, etiam illo (quod clarum est) apud homines absoluto, hæresim tamen ipsam, divino iudicio semper damnabilem, etiam iudicio quatuordecim Episcoporum Orientalium esse damnatam.

CAPUT XXII.

QUOMODO POTUERINT, ABSOLUTO PELAGIO, DOGMATA ILLI OBJECTA DAMNARI ?

Hæc est illius iudicii postrema sententia. Synodus dixit : Nunc, quoniam satisfactum est nobis prosecutionibus² præsentis Pelagii monachi, qui quidem piis doctrinis consentit, contraria vero Ecclesiæ reprobatur et anathematizatur, communionis Ecclesiasticæ eum esse et catholicæ confitemur. Duo quædam satis perspicua de Pelagio monacho sancti Episcopi iudices suæ sententiæ brevitate complexi sunt. Unum quidem piis eum consentire doctrinis. Alterum autem Ecclesiæ fidei reprobare et anathematizare contraria. Propter hæc duo, communionis Ecclesiasticæ et Catholicæ pro-

nuntiatus est. Quibus ergo verbis ejus interrim, quantum homines in præsentia de manifestis iudicare potuerunt, utrumque claruerit, omnia breviter recapitulando videamus. In his enim sibi objectis, quæ sua non esse respondit, dictus est reprobare et anathematizare contraria. Breviter ergo totam istam causam ita si possumus, colligamus. Quoniam necesse erat impleri, quod prædixit Apostolus Paulus : *Oportet et hæreses esse, ut probati manifesti fiant in vobis*; post veteres hæreses multæ etiam modo hæreses, non ab Episcopis, seu presbyteris, vel quibusque clericis, sed a quibusdam veluti monachis³, quæ contra Dei gratiam, quæ nobis est per Jesum Christum Dominum nostrum, tanquam defendendo liberum arbitrium, disputant et conantur Christianæ fidei fundamentum⁴ evertere, de quo scriptum est : *Per unum hominem mors, et per unum hominem resurrectio mortuorum. Sicut enim in Adam omnes moriuntur, sic etiam in Christo omnes vivificabuntur*. Et in actibus nostris Dei adiutorium denegant, dicendo, ut non peccemus, impleamusque justitiam, posse sufficere naturam humanam, quæ condita est cum libero arbitrio, eamque esse Dei gratiam, quia sic conditi sumus, ut hoc voluntate possimus, et quod adiutorium legis, mandatorumque suorum dedit, et quod ad se conversis peccata præterita ignoscit. In his solis esse Dei gratiam deputandam, non in adiutorio nostrorum actuum singulorum. Posse enim hominem esse sine peccato, et mandata Dei facile custodire, si velit.

Ista hæresis, cum plurimos decepisset, et fratres, quos non deceperat, conturbaret, Cælestius quidam, talia sentiens, ad iudicium Carthaginensis Ecclesiæ perductus, Episcoporum sententia condemnatus est. Deinde post aliquot annos, Pelagio, qui magister ejus perhibebatur, cum ista hæresis fuisset objecta, ad Episcopale iudicium etiam ipse pervenit. Recitatisque omnibus quæ in libello contra eum dato Heros et Lazarus, Episcopi Galli, posuerant, illis quidem absentibus, et de ægritudine unius eorum excusantibus, Pelagium ad omnia respondentem, quatuordecim Episcopi provinciæ Palæstinæ, secundum responsiones ejus, alienum a perversitate hujus hæresis pronuntiarunt; eam tamen hæresim sine ulla dubitatione damnantes. Approbaverunt enim, se-

NOTÆ SUAREZ.

¹ Alias *prompsimus*.

² Alias *persecutionibus*.

³ Adde *inventæ sunt* vel quid simile.

⁴ Alias *firmamentum*.

undum quæ ille ad ea quæ objecta sunt respondebat, adjuvari hominem per legis scientiam ad non peccandum, sicut scriptum est: *Regem in adiutorium dedit illis*. Non tamen ex hoc eadem ¹ legis scientia illam Dei gratiam esse judicaverunt ², de qua scriptum est: *Quis te liberabit de corpore mortis hujus? gratia dei per Jesum Christum Dominum Nostrum*. Nec ideo dixisse Pelagium omnes voluntate sua regi, ut non eos regeret Deus. Respondit enim hoc se dixisse propter liberum arbitrium, cui Deus adiutor est eligenti bona, hominem vero peccantem ipsum esse in culpa quasi liberi arbitrii. Approbaverunt etiam iniquis et peccatoribus in die iudicii non esse parcendum, sed æternis eos ignibus puniendos, quoniam hæc ille secundum Evangelium dixisse respondit, ubi scriptum est: *Isti ibunt in supplicium æternum, justi autem in vitam æternam*. Non tamen dixerat, omnes peccatores ad æternum pertinere supplicium, ut merito contra Apostolum dixisse videretur, qui quosdam salvos ait futuros: *Sic tamen quasi per ignem*. Regnum Cælorum ideo approbaverunt etiam in veteri Testamento esse promissum, quoniam testimonium dedit de Propheta Daniele, ubi dictum est: *Et accipient sancti Regnum Altissimi*. Hoc loco, vetus Testamentum intelligentes ab illo appellatum, non illud solum quod factum est in monte Sina, sed scripturas omnes canonicas ante adventum Domini administratas. Posse autem hominem esse sine peccato, si velit, non sic approbatum est, quomodo ab illo in libro suo positum videbatur ³, tanquam hoc in sola potestate esset hominis per liberum arbitrium; hoc quippe arguebatur sensisse, dicendo: Si velit; sed quomodo ⁴ nunc ipse respondit; imo quomodo id brevius, et fortius iudices Episcopi sua interlocutione commemoraverunt, hominem cum adiutorio Dei et gratia posse esse sine peccato. Nec tamen definitum est quando istam perfectionem Sancti assecuturi ⁵ sunt, utrum in corpore mortis hujus, an quando absorbebitur mors in victoriam.

Ex his etiam quæ Cælestium dixisse vel scripsisse, tanquam dogmata discipuli ejus, sunt objecta ⁶ Pelagio, sua quædam et ipse co-

gnovit, sed aliter se quam objiciebatur ⁷ sensisse respondit. Hinc est illud, quod ante Christi adventum vixerunt quidam sancte et juste, Cælestius autem dixisse perhibebatur, quod sine peccato fuerint. Item objectum est, dixisse Cælestium, Ecclesiam esse sine macula et ruga. Pelagius autem dixit, dictum a se quidem, sed ita, quoniam lavacro ab omni macula et ruga purgatur Ecclesia, quam ⁸ velit Dominus ita permanere. Item illud dictum a Cælestio, quoniam plus faciamus, quam in lege et Evangelio jussum est. Pelagius autem de virginitate se dixisse respondit, de qua Paulus dicit: Præceptum Domini non habeo. Item objectum est affirmare Cælestium, unumquemque hominem posse habere omnes virtutes et gratias, ac sic auferri diversitatem gratiarum, quam Apostolus docet. Pelagius autem respondit non se auferre gratiarum diversitatem, sed dicere, donare Deum ei, qui fuerit dignus accipere, omnes gratias; sic Paulo Apostolo donavit.

Has ex nomine Cælestii quatuor sententias non sic approbaverunt Episcopi iudices, sicut eas Cælestius sensisse dicebatur, sed sicut de his respondit Pelagius. Videtur enim quod aliud sit sine peccato esse, aliud sancte ac juste vivere, sicut etiam ante adventum Christi quosdam vixisse Scriptura testatur. Et quamvis non sit hic Ecclesia sine macula et ruga, tamen eam et lavacro regenerationis ab omni macula rugaque purgari, et etiam ita velle Dominum permanere: nam et ita permanebit, quia sine macula et ruga, utique in æterna felicitate, regnabit. Et quod perpetua virginitas, quæ præcepta non est, sine dubio plus sit quam conjugal pudicitia, quæ præcepta est, quamvis in multis virginitas perseveret, qui tamen non sunt sine peccato. Et quod omnes eas gratias, quas loco uno commemorat, habuit Apostolus Paulus, quas tamen eum dignum fuisse accipere, aut non secundum merita, sed potius secundum prædestinationem aliquo modo intelligere potuerunt: ipse enim dicit, Non sum dignus, vel, Non sum idoneus vocari Apostolus; aut eorum intentionem subterfugit verbum, quod Pelagius, quemadmodum posuerit, ipse viderit.

NOTÆ SUAREZ.

¹ Alia eandem legis scientiam.

² Alia approbaverunt.

³ Alia redebitur.

⁴ Alia tunc.

⁵ Alias assecuti.

⁶ Alias objiciebantur.

⁷ Alias objiciebantur.

⁸ Alias quia.

Hæc sunt in quibus Episcopi Pelagium pronuntiaverunt piis consentire doctrinis. Nunc similiter, recapitulando illa paulo attentius, videamus quæ illum contraria reprobare et anathematizare dixerunt. In hoc enim potius hæresi ita consistit ¹. Exceptis ergo illis, quæ in adulatione nescio ejus viduæ in libris suis posuisse dictus est, quæ ille neque in libris suis esse, neque talia unquam se dixisse respondit, et eos qui talia saperent, non tanquam hæreticos, sed tanquam stultos anathematizavit; hæc sunt quibus hæresis illius dumeta pululare, imo jam sylvescere dolebamus: Adam mortalem factum, qui, sive peccaret, sive non peccaret, moriturus esset. Quod peccatum Adæ ipsum solum læserit, non genus humanum. Quod lex sic mittat ad regnum, quemadmodum et Evangelium. Quod infantes nuper nati in illo statu sint, in quo Adam fuit ante prævaricationem. Quod neque per mortem vel prævaricationem Adæ omne genus hominum moriatur, neque per resurrectionem Christi omne genus hominum resurgat. Quod infantes, etsi non baptizentur, habeant vitam æternam. Quod divites baptizati, nisi omnibus abrenuntient, si quid boni visi ² fuerint facere, non eis imputetur, neque regnum Dei possunt habere. Quod gratia Dei et adjutorium, non ad singulos actus detur, sed in libero arbitrio sit, et in lege atque doctrina. Quod Dei gratia secundum merita nostra detur, et propterea et ipsa gratia in hominis sit posita voluntate, sive dignus fiat, sive iudignus. Quod filii Dei non possunt vocari, nisi omnino absque peccato fuerint effecti. Quod oblivio et ignorantia non subjaceat peccato, quoniam non eveniat secundum voluntatem, sed secundum necessitatem. Quod non sit liberum arbitrium, si indigeat auxilio Dei, quoniam propriam voluntatem habeat unusquisque aut facere aliquid, aut non facere. Quod victoria nostra ex Dei non sit adjutorio, sed ex libero arbitrio. Quod ex illo quod ait Petrus, divinæ nos esse consortes naturæ, consequens sit, ut ita possit esse anima sine peccato, quemadmodum Deus. Hoc enim in undecimo capitulo libri, non quidem habentis auctoris sui titulum, sed qui perhibetur esse Cœlestii, his verbis positum ipse legi. Quomodo quispiam, inquit, illius rei consor-

tium suscepit, a cujus statu et virtute esse extraneus definitur? Ideo fratres, qui hæc objecerunt, sic eum intellexerunt, tanquam ejusdem naturæ animam et Deum, et partem Dei dixerit animam. Sic eum ³ acceperunt, quod ejusdem status, atque virtutis eam esse cum Deo senserit ⁴. In extremo autem objectorum positum est, quod pœnitentibus venia non detur secundum gratiam et misericordiam Dei, sed secundum meritum et laborem eorum, qui per pœnitentiam digni fuerint misericordia.

Hæc omnia, et si quæ argumentationes ad ea confirmanda interpositæ sunt, sua negantem et anathematizantem Pelagium judices approbaverunt. Et ideo pronuntiaverunt eum contraria Ecclesiasticæ fidei reprobando et anathematizando damnasse. Et per hoc quomodolibet ea Cœlestius posuerit, aut non posuerit, vel Pelagius senserit, aut non senserit, tanta mala tam novæ hujus hæresis illo Ecclesiastico judicio damnata gaudeamus, et Deo gratias agamus, laudesque dicamus.

De his autem, quæ post hoc judicium ibi a nescio quo cuneo perditorum, qui valde in perversum perhibentur Pelagio suffragari, incredibili aulacia perpetrata dicuntur, ut Dei servi, et ancillæ Domini, ad curam sancti Hieronymi presbyteri pertinentes, sceleratissima cæde afficerentur, Diaconus occideretur, ædificia monasteriorum incenderentur, vix ipsum ab hoc impetu atque incursu impiorum, in Dei misericordia turris munitior tueretur, tacendum nobis potius video, et expectandum quid illie fratres nostri Episcopi de his tantis malis agendum existiment, quibus eos dissimulare posse quis credat? Impia quippe dogmata hujusmodi hominum a quibuslibet Catholicis, etiam qui ab illis terris longe absunt, relarguenda sunt, ne ubique nocere possint quo pervenire potuerint. Impia vero facta, quorum coentio ad episcopalem pertinet disciplinam, ubi committuntur, ibi potissimum a præsentibus, vel in proximo constitutis, diligentia pastoralis et pia severitate plectenda sunt. Nos itaque, tam longe positi, optare debemus his causis talem illie finem dari, de quo non sit necesse, ubilibet ulterius judicare; sed quæ nobis potius prædicare conveniat; ut

NOTÆ SUAREZ.

¹ Alias *consentit*: sed legendum *hæresis ista consistit*.

² Alias *nisi*.

³ Alias *enim*.

⁴ Alias *senserint*.

animi omnium, qui illorum scelerum fama usquequaque volitante graviter vulnerati sunt, Dei misericordia consequente sanentur. Unde nam hujus libri terminus iste sit, qui, ut spero, tuis sensibus placere meruerit, adjuvante Domino utilis erit legentibus, tuo, quam meo

nomine commendatior, et tua diligentia plurimis notior.

Explicit liber sancti Augustini ad sanctum Aurelium Episcopum de gestis Pelagii hæretici, contra adversarios gratiæ Domini nostri Jesu Christi.

FINIS PROLEGOMENORUM.



INDEX CAPITUM LIBRI PRIMI

DE NECESSITATE GRATIÆ AD PERFICIENDA OPERA MORALITER BONA ORDINIS NATURALIS,
ET AD CONTRARIA PECCATA VITANDA.

- CAP. I. *Utrum homini ad quamlibet veritatem naturalem cognoscendam gratia necessaria sit in omni statu, præsertim naturæ lapsæ?*
- CAP. II. *Utrum ad omnem moralem cogitationem rectam et honestam, sit necessaria gratia?*
- CAP. III. *Utrum homo lapsus possit honeste operari aliquando per quamcumque virtutem, sive naturæ, sive etiam gratiæ?*
- CAP. IV. *Utrum ad omne bonum opus morale sit necessaria gratia sanctificans, et consequenter an existens in statu peccati mortalis possit interdum bene moraliter operari?*
- CAP. V. *Quid Augustinus senserit de operibus factis ab homine in peccato, seu charitate carente?*
- CAP. VI. *Utrum gratia fidei sit necessaria ad quodlibet opus moraliter bonum, etiam ordinis naturalis, faciendum?*
- CAP. VII. *De operibus infidelium quid Augustinus senserit?*
- CAP. VIII. *Utrum interna gratia specialis, præter Dei concursum naturalem humanæ naturæ debitum, sit necessaria simpliciter homini lapsu ad honeste operandum?*
- CAP. IX. *In nullo actu esse necessariam homini, ad honestam operationem moralem ordinis naturalis, specialem motionem, vel qualitatem ipsi voluntati a Deo impressam, quæ et physice actum efficiat, et voluntatem ad illum efficiendum omnino determinet.*
- CAP. X. *Ad singula opera bona, moraliter non esse necessariam cogitationem, vel inspirationem in sua entitate majorem, seu meliorem, quam sine auxilio gratiæ haberi posset.*
- CAP. XI. *Proponitur tertia sententia, tertiusque modus explicandi auxilium gratiæ, ad singula opera moralia necessarium.*
- CAP. XII. *An cogitatio honesta, quæ habet effectum bonæ voluntatis, sit semper melior, quam illa cogitatio, quæ illum effectum non consequitur?*
- CAP. XIII. *An cogitatio honesta, naturalis, congrua, sit vera gratia in homine non elevato ad supernaturalem finem, sive in pura, sive in integra natura constituto absque peccato?*
- CAP. XIV. *Objectionibus contra discursum capitis superioris satisfi.*
- CAP. XV. *An cogitatio congrua, ad bene moraliter operandum, sit vera et supernaturalis gratia, respectu hominis ad finem supernaturalem elevati?*
- CAP. XVI. *Proponitur contrariæ sententiæ fundamentum, ex Patrum locutionibus desumptum, ut retorqueatur.*
- CAP. XVII. *Ex eorundem Patrum sententiis, cogitationem naturalem congruam, non esse verum gratiæ auxilium, demonstratur.*
- CAP. XVIII. *Destructo alterius sententiæ fundamento, veritas amplius confirmatur.*
- CAP. XIX. *Proponitur universalis obiectio ex Patribus asserentibus, nul-*

- lum opus bonum posse fieri sine gratia.
- CAP. XX. Patrum testimonia, quæ omnia bona opera gratiæ tribuunt, exponuntur.
- CAP. XXI. Liberum arbitrium sine auxilio non nisi ad peccandum valere, quò sensu interdum a Conciliis, vel Augustino dicatur?
- CAP. XXII. Rationibus generalibus aliarum opinionum satisfit.
- CAP. XXIII. Utrum, ad singulas tentationes legi naturali repugnantes superandas, singulare gratiæ auxilium necessarium sit?
- CAP. XXIV. Utrum, ad vincendas singulas graves tentationes contra legem naturalem, in statu naturæ lapsæ, necessarium sit speciale gratiæ auxilium?
- CAP. XXV. Utrum homo in statu naturæ integræ, totam naturæ legem in quacumque occasione, et omni tempore, sine auxilio gratiæ servare, omniaque gravia peccata vitare potuisset?
- CAP. XXVI. Utrum homo lapsus possit omnia præcepta naturalia diu servare, vitando omnia peccata, et tentationes omnes illis contrarias, sine speciali auxilio gratiæ?
- CAP. XXVII. Utrum, ad servandam legem naturalem et vitanda omnia peccata illi contraria longo tempore, sit necessaria habitualis gratia, vel fides, aut sufficiat auxilium actuale, et quale illud esse oporteat?
- CAP. XXVIII. Utrum homo, in puris naturalibus conditus, posset innocentiam diu conservare, non peccando mortaliter, per vires rationis et liberi arbitrii, sine speciali Dei adjutorio?
- CAP. XXIX. Utrum homo lapsus possit elicere, solis viribus liberi arbitrii, sine auxilio gratiæ, aliquem actum dilectionis Dei, saltem ut auctor est, et finis naturalis?
- CAP. XXX. Utrum homo in aliquo statu possit diligere Deum, auctorem naturæ, amore benevolentis per liberum arbitrium, sine auxilio gratiæ?
- CAP. XXXI. Utrum diligere super omnia Deum, ut auctorem naturæ, sit actus ita in substantia, et ordine suo supernaturalis, ut excedat vires naturales liberi arbitrii creati, et ideo sine auxilio gratiæ alias fieri non possit?
- CAP. XXXII. Utrum in statu naturæ lapsæ possit homo diligere Deum, ut auctorem naturæ, super omnia, solis liberi arbitrii viribus, absque speciali auxilio gratiæ? Et sententia affirmans refertur, et fundatur.
- CAP. XXXIII. Refertur, et fundatur opinio negans posse hominem lapsum diligere super omnia Deum, ut auctorem naturæ, sine auxilio gratiæ.
- CAP. XXXIV. Exponitur, ac defenditur mens D. Thomæ de auxilio gratiæ necessario ad dilectionem Dei in statu naturæ lapsæ.
- CAP. XXXV. Quæ gratia sit necessaria, in statu naturæ lapsæ, ad diligendum amore naturali super omnia Deum, ut auctorem naturæ?
- CAP. XXXVI. Quid sentiendum sit de potestate hominis in puris naturalibus, ad amandum Deum, finem naturæ, super omnia?
- CAP. XXXVII. Utrum sit aliquis alius actus virtutis naturalis, seu acquire, præter amorem Dei, qui propter difficultatem suam fieri non possit sine gratia, in statu naturæ lapsæ?
- CAP. XXXVIII. Utrum homo lapsus, vel in puris naturalibus constitutus, naturales virtutes possit suis viribus, sine auxilio gratiæ, acquirere?

LIBER PRIMUS.

DE NECESSITATE GRATIÆ

AD PERFICIENDA OPERA MORALITER

BONA ORDINIS NATURALIS, ET AD CONTRARIA PECCATA VITANDA.

PRÆLUDIUM.

1. *Duplex necessitas, videlicet per se, aut in ordine ad aliquem finem.* — Incipimus tractare quæstionem, an gratia sit, quæ a Theologis omnibus, præsertim divo Thoma et interpretibus 1. 2, quæst. 109, ex illius necessitate inquiritur. Duobus autem modis aliquid esse solet necessarium; uno modo per se et absolute, alio modo in ordine ad aliquem finem: in præsentibus ergo supponitur, gratiam non esse priori modo necessariam, nec quæstionem in hoc sensu tractari. Quia gratia, si increata sit, subea ratione est aliquid liberum in Deo, et consequenter non potest esse absolute necessaria, quia quod est liberum, non est necessarium. Si vero sit creata, eo ipso absolute necessaria non est, quia nulla creatura est per se necessaria. Neque etiam est gratia simpliciter necessaria humanæ naturæ absolute spectatæ, quia non est proprietas necessario consequens illam, et quia sine illa esse potest et conservari. Necessitas ergo gratiæ consideranda est in ordine ad aliquem finem, et in hoc sensu quæstio tractatur.

2. *Posterius illud necessitatis genus subdividitur.* — Ulterius vero hæc etiam necessitas duplex distingui solet, scilicet absolute et simpliciter, quæ sola est vera necessitas; et æqualem quid, seu ad melius esse, quæ proprius est utilitas: quam divisionem aliis verbis tradit August. libro de Gestis Palæstin., c. 1. Igitur in præsentibus, priori modo præcipue a Theologis sumitur; tum quia ex necessitate absoluta efficacius concluditur existentia gra-

tiæ; quia divina providentia non deest hominibus, in his quæ simpliciter necessaria sunt ad finem consequendum; utiliora vero non semper confert: tum etiam quia sub necessitate simpliciter includitur utilitas, non autem e converso. Unde, si gratia est simpliciter necessaria, etiam erit utilis, et dari poterit, vel ex ordinaria providentia, vel ex Dei liberalitate, et ita explicata necessitate, a fortiori utilitas gratiæ declarabitur.

3. *Ad finem hominis supernaturalem, tum etiam ad naturalem, gratiæ necessitas.* — Hoc libro 1, de necessitate gratiæ ad opera naturalia agendum. — Præterea, oportet recolere quod supra tradidimus, duplicem esse finem hominis, naturalem scilicet, et supernaturalem; respectu enim utriusque necessitas gratiæ spectari potest: nam ad utrumque consequendum potest esse gratia necessaria. Est autem consentaneum intellectuali naturæ, ut per operationes liberas et morales finem suum assequatur, nam hæc tantum operationes dicuntur in homine viatore proprie humanæ, seu hominis, ut homo, vel ut intellectualis est, sub qua ratione in finem sibi proprium tendit, et ideo non nisi per huiusmodi operationes illum assequitur. Unde fit necessitatem gratiæ, in ordine ad finem ultimum hominis consequendum, eandem esse enim necessitate gratiæ ad bona opera exercenda, quibus finem illum consequi possit, et vitanda mala quibus illum potest amittere. Quia igitur (ut supra dixi) finis ultimus duplex est, naturalis,

scilicet, et supernaturalis, et utrique respondent consentaneæ operationes, ulique naturalis ordinis, vel supernaturalis, ideo gratiæ necessitas spectari potest, vel in ordine ad operationes naturalis ordinis, vel supernaturalis. Et quoniam utraque necessitas copiosam habet materiam, et longe diversa principia, ideo distincte tractanda est, et incipiendo a notioribus, in hoc libro dicemus de necessitate gratiæ ad opera naturalia; in sequenti vero de ejusdem necessitate ad opera supernaturalia. Omnia vero moralia opera ad actus intellectus, et voluntatis revocantur; de his ergo dicemus, et quia radix hujus necessitatis non est eadem in omnibus statibus superiori libro explicatis, ideo de singulis dicere necessarium erit.

4. Denique, quoniam hos actus sæpe naturales vocabimus, ne in nomine sit ambiguitas, oportet advertere hic non sumi naturale, ut opponitur libero, sed ut a supernaturali distinguitur; nam potius supponimus hos actus morales liberos esse; dicuntur autem naturales, tum ex regula naturalis luminis rationis, cui conformari debent; tum ex materia in qua versantur, quia naturaliter cognosci potest; tum ex motivo, quod naturæ proportionatum esse solet; tum ex principio proximo, a quo per se fiunt, quod est potentia naturalis.

CAPUT I.

UTRUM HOMINI AD QUAMLIBET VERITATEM NATURALEM COGNOSCENDAM GRATIA NECESSARIA SIT IN OMNI STATU, PRÆSERTIM NATURÆ LAPSE?

1. *Veritas naturalis quæ?* — *Prima opinio.* — Duplex est cognitionis species; quædam speculativa, quæ in sola veritatis contemplatione et cognitione sistit, alia practica, quæ ad opus refertur inclinando et inducendo affectum: in præsentī de priori tractamus; de posteriori vero capite sequenti dicemus. Vocamus autem in præsentī naturalem veritatem, omnem illam quæ ad ordinem naturæ spectat, et per se loquendo, sine revelatione speciali, ministerio sensuum acquiritur, et per species rerum quæ illis obijciuntur, proportionem habet cum lumine naturali intellectus, et sub objecto illi proportionato comprehenditur. De hujusmodi ergo veritatibus fuit quorundam opinio negans, posse hominem præsertim lapsum sine gratia aliquam ex his veritatibus pure et sine errore consequi. Refert D. Thomas in secunda, distinctione vigesima-octava, quæstione prima,

articulo quinto; tribuitur etiam Gregorio et Capreolo, qui in alio sensu locuti sunt, quam ex eorum principiis hoc etiam sequi videatur, ut postea videbimus. Fundamentum hujus sententiæ esse potest, primo, quia cujuscumque veritatis cognitio est donum Dei, alias haberet homo unde gloriari posset, contra Paulum, 1 ad Corinth. 4: *Quid habes quod non accepisti? si autem accepisti, quid gloriaris, quasi non acceperis?* Secundo, quia concilium Milevit., cap. 4, indicat scientiam esse donum Dei, et affert illud Psal. 93: *Quis docet hominem scientiam;* et Arausic., cap. 22, ait: *Tam veritatem, quam justitiam esse ab illo fonte, quem in eremo sitire debemus.* Tertio, quia homo lapsus contraxit ignorantiae vulnus, ut ait D. Thom. 1. 2, quæst. 85, art. 3, cum Beda, Luc. 10; et August., lib. 1 Retr., cap. 9, et l. 22 de Civit., cap. 22; ergo minus potest veritatem naturalem cognoscere, quam in pura natura; ergo nullam veritatem potest per se cognoscere. Quarto, quia alias, sicut homo posset unam veritatem cognoscere, posset omnem, atque ita semper attingere veritatem, ita ut nunquam erret, quia non est major ratio de una veritate quam de omnibus. Consequens autem videtur plane falsum; ergo omnino dicendum est non posse hominem sine gratia Dei ullam veritatem cognoscere.

2. *Opinio secunda, de gratia Dei et Christi distinguens.* — Secunda opinio est aliorum qui distinguunt inter gratiam Dei et gratiam Christi, et affirmant sine gratia Christi posse hominem scire, seu cognoscere non tantum singulas, sed etiam omnes veritates naturales collective sumptas, ut aiunt, et sine errore; negant autem sine gratia Dei posse vel unam veritatem cognoscere, etiamsi mere speculativa et naturalis sit. Unde, juxta hanc sententiam, gratia Dei necessaria est ad omnes et singulas veritates cognoscendas; gratia autem Christi, neque ad omnes neque ad singulas. Ratio prioris partis est quia, ut homo perveniat in cognitionem cujuscumque veritatis, necesse est ut convenienti modo præveniatur, et excitetur ab objectis et aliis causis, ita ut inducant hominem in veram cognitionem, et non in errorem; potuissent autem hujusmodi causæ ita homini occurrere, ut essent inducentes in errorem, neque est in manu hominis prævenire, ut hoc vel illo modo objecta occurrant; ergo semper est deputandum gratiæ Dei, quod hujusmodi causæ priori et non posteriori modo offerantur. Probat consequentia, cætera enim clara sunt, quia respectu Dei ille effectus

non casu evenit, nec sine divīna operatione et voluntate, quia est opus providentiæ ejus, et non est debitum naturæ hominis : nam posset relinqui, ut deciperetur, maxime post originale peccatum, quod de se dignum est hujusmodi pœna : ergo est beneficium gratiæ, juxta superius dicta de hujus vocis significatione.

3. Fundamentum vero alterius partis hujus sententiæ est, quia hæc gratia non datur nobis propter Christum, atque ita non est gratia Christi : assumptum probatur, quia tantum illa gratia datur nobis propter Christum, pro qua obtinenda ille mortuus est : illa vero non est talis, quod probo, quia Christus non est mortuus, ut philosophi vel mathematici efficeremur, sed ut sanctificaremur et glorificaremur, juxta modum loquendi Augustini, epistola 105. Illa vero gratia non datur ad salutem animæ, sed tantum ad aliquam veritatem philosophicam vel mathematicam, aut aliam hujusmodi cognitionem : ergo talis gratia non est ex Christo, neque pertinet ad ordinem gratiæ sanctificantis, sed est quædam gratia gratis data a Deo sine intuitu meritorum Christi. Quæ ratio non solum probat de gratia necessaria ad singulas veritates, sed etiam ad omnes similes collective sumptas, et ideo non solum singulæ, sed etiam omnes potuerunt sine gratia Christi cognosci, non vero sine gratia Dei. Nam si una vel altera non potest cognosci sine gratia Dei, multo minus omnes.

4. *Non est sermo hic de gratia sanctificante, sed de auxiliante.* — Ut autem veram et communitatem sententiam declarem, suppono hic non esse sermonem de habituali gratia, quæ sanctificat hominem, quia per se evidens est illam non esse necessariam ad effectum de quo nunc tractamus, quia hic nullo modo attingit illum ordinem, neque per se requirit amicitiam cum Deo. Et hoc maxime probat testimonium Augustini, 1 Retract., cap. 4, quod adducit D. Thomas 1. 2, quæst. 109, art. 1, in argum. *Sed contra*, ubi retractat quod dixerat libr. 1, c. 9, c. 2, in princip. : *Deus, qui non nisi mundos rerum scire voluisti.* Hoc ergo non approbat in dicto loco, quia *responderi potest, quod non mundos multa scire vera* : sicut philosophi, non solum injusti, sed etiam infideles, ut Aristoteles, et similes, multa vera cognoverunt sine gratia sanctificante. Verisimile autem est eos fuisse a Deo peculiariter adiutos ad istarum veritatum cognitionem, quamvis sanctificantem gratiam non haberent. Est ergo questio de gratia auxiliante, quæ, ut nunc breviter suppono, duobus modis ju-

vare potest, scilicet, vel tanquam principium physicum, et per se, nostri actus, ut juvat lumen fidei ad suos actus; vel tanquam principium accidentarium physice, per se autem morale, vel, ut sic dicam, artificiale, sicut magister juvat discipulos ad sciendum. Hæc autem posterior duobus modis adhiberi potest, scilicet, vel tantum extrinsece, ut fit per humanam doctrinam, et per applicationem sensibilium objectorum, vel etiam interius peculiari modo illuminando, vel phantasmata dirigendo, vel ipsum intelligibile objectum melius applicando.

5. *Prima et communis assertio.* — *Probatur assertio ex Paulo.* — *Nominalium opinio rejicitur.* — Dico primo : Ad cognoscendas veritates naturales divisive seu sigillatim sumptas, non est necessaria specialis gratia Dei vel Christi, etiam in statu lapsæ naturæ. Hæc est communis sententia, ut referam latius in sequentibus; et sine dubio est sensus D. Thomæ locis citatis. Nam, licet dicat esse necessarium auxilium Dei moventis ad singulas veritates cognoscendas, per illud auxilium intelligit concursum generalem Dei, ut Cajetanus et alii omnes intelligunt, quia loquitur de auxilio necessario ex vi essentialis dependentiæ in operando causæ secundæ a prima; illud autem non est nisi concursus generalis, qui, ut datur ad actiones naturales, non est gratia, ut constat ex dictis in præcedenti libro, capit. 1, et in sequentibus hoc latius ostendetur. Probatur ergo conclusio primo ex Paulo, ad Rom. 1 et 2, dicente etiam de Deo multa naturaliter cognosci posse, ut Patres ibi interpretantur; nec refert quod ibidem ait Paulus : *Quod notum est Dei, manifestum est in illis, Deus enim illis manifestavit.* Dicitur enim illis manifestasse non speciali revelatione, aut gratia, sed per creaturas, ut cum Glossa exponit D. Thom. ibi, et in 2, dist. 28, quæst. 1, artic. 3, ad 2; sic etiam Psalm. 18, dicitur : *Cæli enarrant gloriam Dei*; et Actor. 14 : *Non sine testimonio reliquit semetipsum, benefaciens de cælo, dans pluvias et tempora, etc.*; et Sapient. 13 : *A magnitudine speciei et creatura cognoscibiliter poterit creator horum videri.* Propter quæ graviter a theologis reprehenditur opinio aliquorum Nominalium, negantium naturalem cognitionem Dei, saltem quoad aliqua attributa ejus, quæ Paulus *notum Dei* appellat. De qua re in Metaph. disput. 28 et 29 dictum est, et trahi solet in principio primæ partis; et late Cardin. Bellar., lib. 4 de Grat. et Libero arbitrio, cap. 2. Igitur cum de Deo ipso na-

turaliter et sine gratia cognosci possit aliqua veritas, multo magis de aliis rebus poterit. Præterea sumitur hæc sententia ex variis locis Augustini, 1 Confess., cap. 7, et de Spirit. et litt., cap. 12, et Serm. 55 de Verbis Domini. Sed optimus locus est libr. 4 ad Simplician., quæst. 2 circa finem, ubi ait non solum bonum ingenium, sed etiam honestas et utiles disciplinas interdum comparari ante gratiam salutarem, id est, ante primam gratiam Dei excitantem et adjuvantem : quidquid autem antecedit hanc primam gratiam, per vires naturales fit, quia ante primam gratiam auxiliantem non est alia prior; ergo.

6. *Et ratione.* — Tertio argumentor, quia homo, in puris naturalibus conditus, naturaliter posset singulas veritates cognoscere; ergo etiam potest nunc homo lapsus. Consequentia nota est ex dictis in præcedenti libro, ubi ostendimus hominem in natura lapsa habere æquales vires naturales cum homine in pura natura. Antecedens autem videtur quidem per se manifestum, quia unaquæque res habens vires naturales, quas naturaliter postulat, potest efficere actionem sibi connaturalem, quia, ut operatio talis sit, oportet ut naturales vires non excedat. Item quia objecta sensibilia, ex quibus naturales veritates cognosci possunt, per ordinarium cursum causarum naturalium possunt homini offerri mediis sensibus, et intellectus agens potest naturaliter efficere species proportionatas huic cognitioni, et intellectus possibilis habet naturalem vim effectivam illius cognitionis, et naturalem capacitatem ejus; ergo habet homo naturalia principia sufficientia ad talem actum; ergo ad illum non est simpliciter gratia necessaria.

7. Quidam vero modernus scriptor differentiam in hoc constituit inter naturam lapsam et non lapsam, quod non omnes veritates naturales, quæ sunt proportionatæ humano intellectui in natura non lapsa, sunt proportionatæ intellectui hominis lapsi. Rationem reddit, quia in statu naturæ lapsæ intellectus est vulneratus, et ideo non habet proportionem cum omni cognoscibili per naturam, quod seus est in homine non lapsa : unde fit ut homo, in natura lapsa (ex illius auctoris sententia), non possit cognoscere omnes veritates naturales proportionatas naturali intellectui humano per se spectato et secluso peccato originali, non tantum omnes collective, quod est clarum, ut statim dicam, verum etiam nec divisive, seu singulatim sumptas : et in hoc

constituit differentiam inter hominem in statu naturæ integræ et lapsæ, quod homo in natura integra potest cognoscere omnes veritates divisive, licet non collective; in lapsa vero natura neque primum potest. Et licet eandem differentiam expresse non constituat inter hominem lapsum et hominem in pura natura, tamen idem de illis intelligit, quia fundamentum ejus ibi habet locum. Nam etiam in pura natura homo non haberet intellectum vulneratum, sicut ipse prius dixerat. Hæc vero doctrina ex eisdem principiis rejicitur facile, quia homo lapsus easdem habet vires intellectus, quas homo purus haberet, ut supra ostensum est : unde omnes veritates, quæ, singulatim sumptæ, essent proportionatæ naturali ingenio hominis in pura natura, sunt nunc etiam proportionatæ homini lapsa. Et ratio in promptu est, quia homo, per lapsum, nullum habitum erroneum aut pravum in intellectu acquisivit, nec intellectus ipse in se fuit diminutus, nec lumen ejus remissum, nec sensus exteriores vel interiores fuerunt perturbati, aut aliquo modo impediti, ne ita possint ministrare intellectui, sicut in pura natura valent : ergo omnia objecta proportionata intellectui humano ante peccatum, sunt etiam proportionata post peccatum; nulla ergo est in hoc differentia, sed in utroque statu potest omnes has veritates singulatim sumptas naturaliter cognoscere. Neque obstat vulnus ignorantiae, quia hoc tantum positum est in privatione fidei, et omnium donorum gratiæ ad intellectum pertinentium, et in privatione omnium donorum vel auxiliorum, quibus specialiter juvaretur homo in statu naturæ integræ, etiam ad cognoscendas veritates naturales. His autem omnibus careret etiam homo in pura natura; sed tunc illa carentia esset negatio pura, nunc vero est etiam privatio, et ideo nunc est vulnus, et tunc non esset; non tamen propterea nunc magis impedit vel minuit vires, ut latius in libro primo declaratum est.

8. *Primæ assertionis amplior declaratio.* — Denique assertio declaratur in hunc modum, quia vel gratia esset necessaria ut principium physicum et per se talis actus, vel solum ex parte objecti applicando illud, aut tollendo impedimenta, aut alio modo illustrando objectum; nihil autem horum est verisimile; ergo. Probat minor quoad priorem partem, quia in intellectu humano est ex parte potentiae sufficiens vis activa in ratione principii proximi et physici talis actus, et licet indi-

geat concursu objecti per speciem, illam potest naturaliter acquirere, ut constat; alio autem principio non indiget. Nam, licet juvari possit per habitum, illud adiutorium non est simpliciter necessarium, ideoque secundum connaturalem modum operandi non supponitur habitus ad talem actum, sed potius e converso; quia talis habitus non comparatur ut homo possit, sed ut facilius hoc præstet, ideoque necessaria non est aliqua alia virtus activa, quæ absentiam habitus suppleat. Non potest ergo cogitari aliquod principium physicum, quod sit necessarium intellectui ad eliciendum illum actum per modum causæ proximæ, nam de concursu causæ primæ nunc non dubitamus. Altera vero pars de gratia quasi per accidens adjuvante subdistingui potest: nam vel hæc est aliqua gratia interna, et hæc sine dubio necessaria non est, quia neque revelatio divina, neque aliqua interna illuminatio, quæ per objecta sensibilia fieri non possit, necessaria est, quia hæc supernaturalia sunt, modus autem cognoscendi naturales veritates est connaturalis homini; vel est solum exterior gratia, seu specialis providentia, quæ tollat impedimenta, et offerat convenientia objecta; et hoc etiam dici non potest, quia communis actio causarum secundarum, si Deus illarum motus ordinarium cursum tenere sinat, et cum eis concurrat, de se sufficere potest ad hujusmodi objecta proponenda, et impedimenta non semper occurrunt: ergo nulla gratia est simpliciter necessaria. Quod magis respondendo ad argumenta declarabitur.

9. *Secunda assertio etiam communis, quod nec collectio omnium veritatum, nec sine aliquo errore, haberi queat absque gratia.* — Dico secundo: Ad cognoscendas omnes veritates naturales collective sumptas, et præsertim ad eas cognoscendas sine admixtione erroris, vel deceptionis, aliqua gratia, vel specialis directio, et protectio Dei in statu naturæ lapsæ necessaria est. Assertio communiter recepta est, et nullus potest de ea dubitare, qui fragilitatem hominis lapsi, et impedimenta corporis ad actiones mentis consideraverit. Unde potest probari primo experientia, quia adhuc non est inventus homo qui omnes scientias naturales simul fuerit adeptus, vel sine falsis opinionibus, tam in naturalibus quam in moralibus. Quod argumentum non tantum probat hoc non posse fieri per solas vires nature, sed etiam ordinarie non dari gratiam quæ ad effectum hunc sufficiat. Ratio autem prioris partis, seu de omnium veritatum eu-

mulo est, quia hæc veritates sunt innumeræ: imo in mathematicis in infinitum semper augeri possunt. Item nonnullæ illarum sunt difficillimæ ad inveniendum, et multæ indigent multo tempore et labore, et alioqui vita hominis brevis est, magnamque illius seu temporis partem sibi vendicant ea quæ sunt vitæ, vel proximis, vel communitati necessaria, et ultra hæc multa quotidie occurrunt extraordinaria impedimenta: ergo, pensatis omnibus, non potest homo suis viribus, et industria, vel diligentia omnes veritates assequi, etiam naturales. Ratio autem alterius partis de carentia erroris est, quia homo, discursu suo naturali, pauca cognoscit evidenter, et quamplurima probabiliter, seu verisimiliter, et regulariter per solam rationem probabilem et auctoritatem humanam profert definitum iudicium; ergo tale iudicium est expositum de se falsitati; ergo naturaliter fieri non potest, quin in tanta multitudine iudiciorum non sæpe erret, nisi superiori auxilio custodiatur: maxime, quia sæpe falsa sunt probabiliora veris.

10. *Falso citantur auctores quidam contra assertionem.* — Contra hanc assertionem referri solent divus Thomas, 2, distinct. vigesima-octava, articulo quinto; et ibi Durand., quæstione prima; et Cajetan. 1. 2, quæstion. 109, articulo primo; et ibi Medina dub. primo. Verumtamen divus Thomas et Durandus nihil contra hanc assertionem docent: tum quia non loquuntur de cognitione omnium veritatum naturalium collective sumptarum, et sine errore, sed indefinite de veritatibus naturalibus, vel ad summum distributive, et divisive de quacumque: tum etiam quia non loquuntur generatim de quacumque gratia, sed de lumine infuso, vel de habitu superaddito naturæ; nos autem non requirimus hanc gratiam, etiam ad omnes has veritates cognoscendas, sed aliquod speciale auxilium providentiæ Dei. Medina vero tantum abest quod repugnet, ut potius in eodem primo dubio ad secundum expresse dicat, necessarium esse speciale auxilium ut homo cognoscat veritates naturales sine admixtione erroris. Solus Cajetanus videtur posse in contrarium induci, quia dicit hominem peccando non incurrisse vulnus ignorantie quoad cognitionem speculativam virtutum naturalium; sed in hoc Cajetano non assentimur, ut infra dicam.

11. *De statu etiam puræ naturæ procedit assertio.* — Ex quo colligitur conclusionem hanc etiam in pura natura habuisse locum, quia

ratio facta, et principium supra positum, quod in illo statu non haberet homo majores vires ad cognoscendum, quam nunc habet, eodem modo procedunt. Dices : ergo necessaria fuisset homini gratia in illo statu, ut in naturalium veritatum cognitione non erraret : ergo danda illi fuisset ex vi providentiæ tunc debite, quod repugnat superius dictis. Probatur autem consequentia, quia pertinet ad providentiam auctoris naturæ, ut illi non desit in necessariis sibi in tali ordine et statu. Respondeo nihilominus negando secundam consequentiam, quia non oportet talem hominem in hac vita vel nunquam decipi, vel omnia naturalia cognoscere. Sed contra, quia homo habet naturalem appetitum ad cognoscendam veritatem, et hæc omnia naturalia : ergo posset hic appetitus satiari in homine existente in pura natura, alias videretur natura deficere in necessariis. Respondeo appetitum naturalem proxime esse ad singulos actus, et consequenter ad collectionem. Unde satis est ut quilibet actus possit naturaliter haberi, et ut successio eorum duret, et consequenter scientia rerum naturalium augeatur, quantum et vitæ humanæ conditio tulerit, et naturales causæ ministraverint. Sicut materia prima est capax omnium formarum, et tamen naturaliter non omnes recipit, neque simul, neque successive.

12. *Ratio pro assertionem prima non repugnat contra secundam.* — Tandem objici potest ratio facta in priori assertionem, nam videtur huic repugnare, quia lumen naturale est de se principium sufficiens scientiæ necessariæ tum ad totam hanc veritatum collectionem assequendam, tum etiam ad contrarium errorem vitandum. Respondetur non esse parem rationem in collectionem, quæ est in singulis, quia licet ex parte principii per se, quod est lumen intellectuale, sit æqualis ratio, ex parte phantasmatum, seu propositionis objectorum, et impedimentorum quæ occurrere possunt, est valde diversa, quia circa unum vel alium actum facile occurrit commoditas habendi illum, et impedimenta non in singulis occurrunt, quod secus est in tota collectionem, ut per se constat. Et ex eadem radice provenit, ut omnem omnino vitare errorem difficillimum, et humano modo impossibile sit, etiam si in singulis illa difficultas non occurrat.

13. *Procedit similiter de statu gratiæ post lapsum.* — Secundo, ex dictis constat etiam hominem lapsum, in statu gratiæ constitutum, non posse per vires naturæ hanc perfectionem

cognitionis naturalis assequi : quia gratia sanctificans, nec per se auget virtutem naturalem cognoscendi, neque prædicta aufert impedimenta. Unde nec ordinaria providentia, vel auxilium gratiæ ad hoc sufficit, nisi homo alio extraordinario et accommodato modo adjuvetur. Quod satis experientia constat : et ratio est eadem, quia gratia sanctificans, etiam cum ordinario auxilio, non sanat omnes infirmitates naturæ, neque aufert totum ignorantiae vulnus, et (ut supra dicebam) ex se non dat facilitatem ad actus ordinis naturalis, sed elevat potentias ad superiores actus. Manet ergo nunc in homine justo eadem impotentia ad consequendas omnes veritates naturales, quæ in homine puro, vel in homine in peccato originali aut mortali existente invenitur.

14. *Status innocentiae donum gratuitum continebat quoad carentiam omnis erroris, quoad collectionem vero omnium veritatum etiam naturalium res incerta est, verisimiliorque pars negativa.*—Sed quid de homine in statu innocentiae vel naturæ integræ? Respondeo : quod attinet ad carentiam erroris, jam supra diximus habuisse privilegium, ut, durante illo statu et justitia, decipi non posset per assensum falsum, quod privilegium ostendimus fuisse gratuitum, ac subinde gratiam. Quod vero attinet ad cognitionem omnium veritatum naturalium collectivè, incertum est an Deus omnibus hominibus in eo statu daret omnes scientias harum veritatum infusas per accidens, ut vocant; eas enim dedisse Adamo probabile est, de posteris autem ejus nihil est certum; tamen si eas haberent per infusionem, scirent quidem omnia saltem in habitu, non tamen sine dono gratuito quoad modum habendi illas, sicut verisimilius est animam Christi Domini novisse omnia, etiam naturalia, a principio conceptionis. Si vero homines tunc non haberent has scientias infusas, sed oporteret, propria industria inquirendo, vel ab aliis discendo, eas acquirere; multo quidem plura cognoscere possent tunc homines, quam nunc valeamus, vel quam homines in pura natura, quia non haberent corruptibilis corporis et hujus vitæ impedimenta, et a parentibus per traditionem et disciplinam possent amplius juvari; nihilominus verisimile est non potuisse unum hominem etiam in eo statu omnes scientias naturales simul perfecte assequi, quia in eis quodammodo in infinitum procedi potest, et tempus viæ non esset tunc diuturnum, ut credi potest, et homines etiam tunc indigerent cibo, et somno, et exercitatio-

ne corporis, maxime vero si in Dei contemplatione et rerum æternarum meditatione exercerentur; hæc autem omnia speculationem, præsertim rerum inferiorum, impediunt. Unde D. Thom. 1 p., quæst. 101, articulo primo, solum dicit homines in statu innocentiae non fuisse nascituros perfectos in scientia: *Sed eam (ait) processu temporis absque difficultate acquisivissent, inteniendo vel addiscendo.* Et ad 3 ait, potuisse in eo statu plenius scire universalia principia juris et aliarum rerum; de plenitudine autem scientiarum nihil dicit. Alia vero ratio est de anima separata; si enim inveniretur sine peccato, et in pura natura, credibile est habituram fuisse omnem naturalem scientiam per species, quasi connaturaliter inditas, de quo alias.

15. *Tertia assertio: non solum gratia Dei, sed Christi dicenda est, quæ datur ad veritates naturales cognoscendas, vel errores vitandos.*—Dico tertio: quoties gratia specialis ad veritates naturales cognoscendas, vel deceptionem in ea materia vitandam, datur, propter Christum datur, unde non solum est gratia Dei, sed etiam gratia Christi. In hac assertione de facto loquimur, non de possibili; hoc enim posteriori modo rem considerando, manifestum est posse Deum hanc gratiam sine respectu ad Christum donare, sicut et quamcumque aliam. Unde in statu puræ naturæ, id est, in quo humana natura non esset ordinata ad finem supernaturalem, nec alia dona supernaturalis gratiæ reciperet, posset Deus illi conferre hoc donum scientiarum, vel auxilium speciale ad naturales veritates cognoscendas: et tunc non esset ex gratia Christi. Imo neque esset proprie gratia supernaturalis ordinis, sed esset donum gratuitum, et liberale ultra naturæ debitum, ordinatum tamen ad perfectionem mere naturalem, sicut de integritate naturæ supra dicebamus. Et similiter in statu innocentiae potuit hoc donum dari sine respectu ad Christi meritum. Prout nunc vero datum est, vel dandum esset, si status ille duraret, ita de illo dono vel speciali auxilio censendum est, sicut de gratia sanctificante, et de tota originali justitia; tum quia esset velut pars, seu proprietas quedam justitiæ originalis; tum etiam quia in eo statu datum est in ordine ad finem supernaturalem, et ut de se utile, et conferens ad perseverandum et proficiendum in sanctitate supernaturali, ut mox explicabo. Ideoque qui censent gratum in illo statu non esse datum per Christum, idem dicent de hoc dono: ego vero con-

trarium censeo probabilius de prima gratia Adæ, et de tota justitia quæ in illo statu data est, vel danda fuisset, si durasset, ut in tertia parte probavi, et ideo consequenter idem existimo de hoc dono, servata proportionem ad præsentem statum.

16. *Assertio procedit in præsentem in ordine supernaturalis finis, quidquid sit, si ad talem finem homo non conderetur.*—Loquendo ergo de facto, et de præsentem statu naturæ lapsæ, adverto ulterius, donum illud dupliciter posse considerari, videlicet, in ratione gratiæ gratis datæ, vel in ratione auxilii, quod reduci possit ad ordinem gratiæ gratum facientis. Primum habet tale donum quasi ex se, quia donum hoc, seu speciale auxilium ad has veritates cognoscendas non est naturæ debitum, ut supra probatum est; est ergo gratia; et de se non est gratum faciens, ut proxime diximus: imo ex vi proprii et immediati effectus non perficit hominem in ordine ad supernaturalem sanctitatem; ergo ex se non spectat ad ordinem gratiæ gratum facientis; ergo est gratia gratis data. Nihilominus tamen potest pertinere ad illum ordinem ex relatione conferentis, quia, videlicet, ad hoc illud donat, ut per illud crescat recipiens in sanctitate, vel facilius peccata vitando, vel ex creaturarum cognitione Deum magis laudando et amando. Sic enim etiam bona temporalia eadunt sub meritum, et inter auxilia gratiæ interdum computantur. Dico ergo, sub utroque respectu dari hanc gratiam propter Christum, et verisimilius esse semper dari propter alterutrum, vel propter utrumque.

17. *Auxilium de quo loquitur assertio dari per Christum, etiam in ratione gratiæ gratis datæ, probatur.*—Primum patet, quia Christus Dominus non tantum meruit nobis gratiam sanctificantem, sed etiam gratis datam, ut clarum et certum est de dono linguarum, gratia sanctorum, et similibus. Responderi potest hoc esse verum de illis gratiis gratis datis, quæ ad commune Ecclesiæ bonum ordinantur, non vero de gratiis privatis (ut sic dicam). Sed contra: nam etiam donum scientiarum dari potest propter commune bonum Ecclesiæ; imo existimo, si alicui datum est, propter hunc finem maxime collatum esse. Exemplum esse possunt in dono scientiæ, vel artis dato Beseleel et Ooliab, Exod. 35 et sequentibus, et de scientia infusa Salomoni, 3 Regum 3, ubi videri potest Abulens., q. 10. Item aliquibus Sanctis verisimile est datum esse speciale auxilium ad scientias naturales

perfectius addiscendas, propter bonum commune Ecclesiæ; imo de Aristotele aliqui existimant specialiter fuisse a Deo adiutum in ordine ad bonum Ecclesiæ futurum. Quin etiam in universum credibile est hujusmodi dona, quæ supernaturali modo dantur, licet in se sint naturalia, semper dari propter altius bonum et commune, sicut de illuminatione cæci nati Christus dixit. Ergo longe verisimilius est talia dona semper propter Christum dari, quia semper fiunt propter finem gratiæ, et propter hominum salutem, præsertim ea quæ supernaturali modo fiunt. Unde Paulus ad fideles dicebat 1 Cor. 3: *Omnia vestra sunt, vos autem Christi, Christus vero Dei*, sentiens omnia hæc dona ad Christi gloriam nobis dari, licet cum Christo ipso omnia ultimate ad gloriam Dei referantur: ergo etiam in genere meriti omnia dantur propter Christum.

18. *Probatum a fortiori dari etiam in ordine ad sanctitatem recipientis.* — Et hinc facilius probatur pars altera, quia omne auxilium speciale datum in ordine ad majorem sanctitatem recipientis, est ex meritis Christi, ut in tertia parte late probatum est; sed hoc donum, sub illo respectu spectatum, est auxilium speciale ad propriam sanctificationem ordinatum; ergo est ex meritis Christi. Confirmatur, quia omnis occasio bene operandi specialiter a Deo provisa in ordine ad salutem æternam, est gratia per Christum; sed illud auxilium est plus quam occasio bene operandi, et, ut supponitur, datur propter propriam sanctificationem, et ut per illud homo excitetur ad majorem Dei amorem et laudem; ergo est ex Christo. Denique confirmatur, quia quidquid in hoc genere desiderari potest, recte et convenienter per Christum petitur: sic enim Ecclesia pluviam et salutem per Christum petit, supponens hæc omnia, ut cadunt sub providentiam supernaturalem, cadere etiam sub Christi merito. Neque obstat quod homo interdum male utatur simili gratia Dei, quia hoc non impedit quin per Christum, et propter finem supernaturalem detur, ut per se constat, et solvendo argumenta magis patebit.

19. *Ad primum fundamentum positum in numero primo.* — *Ad secundum.* — *Ad tertium.* — Ad primum ergo fundamentum prioris opinionis, quia de illo testimonio Pauli multa in sequentibus dicturi sumus, nunc dico breviter nihil esse in homine quod non sit a Deo, non tamen omnia eodem modo, nam quædam sunt ab illo ut auctore gratiæ, quædam ut auctore naturæ sine speciali liberalitate ultra naturæ

debitum, et talis esse potest cognitio unius vel alterius veritatis. Ad secundum dicitur Concilia Milevit. et Arausic. loqui tum de cognitione practica et operativa boni, tum de cognitione aliquo modo supernaturali ad veram justitiam necessaria, vel utili, ut in sequentibus ostendetur. Ad tertium respondetur ignorantia vulnus non abstulisse potentiam cognoscendi veritates omnes naturales, sed abstulisse tum supernaturalem cognitionem, tum etiam speciale auxilium, seu privilegium recte cognoscendi, datum in statu innocentia ultra meram possibilitatem naturæ: unde hoc vulnus non reddit hominem lapsum impotentiorum ad cognoscendum quam esset in pura natura; sed nunc est vulnus ignorantia, quod tunc esset pura nescientia, vel difficultas sciendi homini connaturalis.

20. *Rejicitur Cajetani distinctio.* — Addit Cajetanus, quæst. 109, art. 1, vulnus ignorantia fuisse respectu cognitionis practica, non vero speculativa. Sed neque est distinctio necessaria, neque bona, quia, ut statim ostendam, hoc vulnus non impedit, quominus etiam aliquas veritates practicas morales et ordinis naturalis cognoscere possimus absque gratia, licet non omnium collectionem; ergo est aequalis ratio in veritate practica et speculativa. In neutra enim ablata est omnino per vulnus ignorantia veritatis cognitio, quatenus per discursum naturalem in uno vel alio actu comparari potest, licet in utraque, propter impedimenta corporis et animi, non possit pura et plena esse talis cognitio: ergo non solum est hoc vulnus in intellectu practico, sed etiam in speculativo. Confirmatur: nam approbare falsa pro veris pœna est peccati, teste Augustino supra, ubi universaliter loquitur, ac proinde etiam in speculativis; ergo vulnus ignorantia omnem errorem et difficultatem sciendi ex peccato contractam comprehendit. Sed objicit Cajetanus quia D. Thomas, dicta quæst. 85, art. 3, dicit vulnus ignorantia esse in intellectu in quo est prudentia, ille autem est intellectus practicus. Respondeo non loqui D. Thomam reduplicative aut exclusive. Nam etiam dicit vulnus malitia esse in voluntate, in qua est justitia, et non ideo dicit esse in solis operibus justitia. Item infra dicit vulnus ignorantia sequi ex peccato: *In quantum ratio per peccatum hebetatur ad unum, præcipue in agendis*; non ergo in solis illis. Et lib. 4 contra Gent. 52, absolute dicit debilitatem rationis et difficultatem in cognitione veri ad hoc vulnus pertinere. Constat autem

ex dictis hanc difficultatem et debilitatem etiam in speculativis post peccatum inveniri. Item 1 p., quæst. 94, art. 1, et quæst. 101, art. 1, ait hominem in statu naturæ integræ juvandum fuisse per originalem justitiam ad cavendos errores, etiam in scientiis speculativis, et ad earum perfectionem. Ergo earum imperfectiones et errores, quæ nunc patiuntur, ex originali peccato provenerunt, ac proinde ad vulnus iguorantiæ pertinent. Et hinc responsum est ad quartum; jam enim facilis est differentia inter singulas veritates per se spectatas, et omnium cognitionem; est enim longe difficilior cognitio omnium quam singularum, quia impedimenta, quæ in discursu vitæ offeruntur, non in singulis actibus occurrunt.

21. *Prima pars fundamenti secundæ sententiæ solvitur.* — Ad fundamentum secundæ sententiæ, quoad priorem ejus partem de providentia necessaria, ut homo possit quamcumque veritatem cognoscere, respondeo illam providentiam pertinere ad ordinem naturæ, non gratiæ, etiam ordinis naturalis (ut alii loquuntur), quia revera non est gratuita omnino, sed naturæ debita, et quoad aliquas veritates est physice necessaria, præsertim ad illas quæ in individuo per experientiam cognoscuntur; ut hunc esse hominem, aut ignem, et similia. Illa ergo cognitio non est donum gratiæ. Alias nullum est donum naturæ, quod gratuitum non sit, et gratia dici debeat, etiam corporis sanitas et integritas membrorum, et similia, quæ neque adversarii concedent, sunt enim absurda. Sed de hac re latius in sequentibus capitibus dicam.

22. *Solvitur secunda pars dicti fundamenti.* — Ad alteram partem, in qua supponitur nihil nobis Christum meruisse, nisi illud pro quo mortuus est, respondeo falsum esse quod assumitur: nam Christus Dominus multa habuit merita per alios actus distinctos a morte, et ex se independentes ab illa. Item meruit Angelis, etiamsi proprie non sit mortuus pro illis, et idem est de gratia Adami in statu innocentie. Addo etiam per ipsam mortem aliqua potuisse Christum mereri, propter quæ sola non moreretur, neque nunc proprie dici potest propter illa mortuum esse. Sicut sibi meruit per mortem exaltationem nominis sui, quamvis propter suam gloriam mortuus non sit. Nam illa particula *propter*, dicit et occasionem, et proprium motivum ex quo orta est mors Christi. Sic autem occasio tantum sumpta est ex lapu hominis, et propria ratio motiva fuit redemptio ejus, non vero

exaltatio nominis Christi, quam aliis actibus potuisset mereri, et de facto etiam meruit, licet ex ordinatione divina speciali modo illam per mortem meruerit. Postquam enim illa mors propter alium peculiarem finem ordinata est, meritum ejus valere et ordinari potuit ad plures alios effectus gratiæ, qui per se fieri possent, etiamsi peccatum hominis et mors Christi non intercederet. Sic ergo dici potest de illa gratia gratis data ad veritates cognoscendas, maxime quia, ut dixi, hæc ipsa gratia non datur sine aliqua relatione ad spiritualem salutem lapsorum hominum, quod satis est ut possit esse effectus redemptionis et mortis Christi.

CAPUT II.

UTRUM AD OMNEM MORALEM COGITATIONEM RECTAM ET HONESTAM SIT NECESSARIA GRATIA?

1. *Expeditur sensus quæstionis.* — Hæc quæstio tractari solet de cognitione practicæ vera in moralibus actionibus, et in re idem est sensus; tamen, quia sub quæstione est, an voluntas possit moveri ad actum honestum per solum judicium practicum, vel etiam per cognitionem speculativam, ideo non usi surus illa voce, ut ab hac quæstione abstraheremus. Est ergo sensus quæstionis, an sine gratia possit intellectus judicare vel cognoscere atiquid eo actu qui movere et inducere voluntatem ad actum moraliter bonum efficiendum sufficiat? Hunc ergo actum vocamus cogitationem rectam et honestam, quæ ita denominatur, non quia in se habeat formalem bonitatem moralem, hoc enim ad voluntatem spectat, sed quia applicat objectum modo sufficienti, ut voluntatis actus honestus sit.

2. *Prima opinio proponitur et exponitur.* — *Ejus primum argumentum ex Scriptura.* — De hoc igitur actu est prima opinio, affirmans esse gratiam Dei necessariam ad quamcumque cognitionem hujusmodi, etiamsi sit de objecto et actu mere naturali. Ita tenet Greg. in 2, dist. 28, quæst. 1, art. 2, concl. 2, et d. 29, quæst. 1, art. 2; Capreol., dist. 28, art. 3, ad argument. contr. 1 concl., et in hoc sensu dicunt, ad cognitionem practicam, esse necessariam gratiam. Non enim loquuntur de practico in omni materia, nam in materia artis constat posse haberi cognitionem veram per solas vires naturales; nam est eadem ratio quæ de cognitione speculativa. Loquuntur ergo de practico in materia morali. Item non loquuntur de hac cognitione universali, prout habetur

per synderesim et philosophiam moralem, nam illa etiam æquiparatur speculativæ cognitioni, quia revera speculativa est. Loquuntur ergo de cognitione morali in particulari, et cum omnibus circumstantiis, prout necessaria est ad honeste operandum. Et hoc sensu tenuit eandem sententiam Gaspar Cassalius, lib. 1 de Quadrip. justit., cap. 32. Probatur autem primo hæc sententia ex illo 2 Cor. 3: *Non sumus sufficientes cogitare aliquid ex nobis quasi ex nobis, sed sufficientia nostra ex Deo est.* Et Psal. 93: *Deus scit cogitationes hominum, quia vanæ sunt;* illæ scilicet, quas ex se et sine gratia habent; et Gen. 6: *Videns autem Deus quod cuncta cogitatio hominis intenta esset ad malum omni tempore.* Unde 2 Paralip. 20, dicitur: *Cum ignoremus quid agere debeamus, hoc solum habemus residui, ut oculos nostros dirigamus ad te.*

3. *Secundum, ex Conciliis. — Tertium, ex Patribus. — Quartum, ex variis rationibus.* — Secundo afferuntur loca Conciliorum supra citata, quia de practica cognitione loqui videntur. Dicit enim Concil. Milevit., cap. 4: *Utrumque esse donum Dei, et scire quid agere debeamus, et diligere ut faciamus.* Similia habet Arausicanum, cap. 9 et 22, ubi non solum justitiam, sed etiam scientiam quæ illam generat, dicit esse ex gratia. Tertio, eodem modo loquitur sæpe Augustinus, præsertim ep. 105: *Nemo (inquit) recte sapit, recte intelligit, nisi qui donum intellectus et consilii acceperit.* Similia habet lib. 1 de Gratia Christi, cap. 28, et sæpe alias. Expressiusque videtur hoc docere de homine lapsa Fulgent., lib. de Incarn. et Grat., c. 12 et 13; ait enim *hominem, peccando, facultatem recte cogitandi amisisse.* Quarto adducuntur variæ rationes sumptæ ex necessitate orationis, et ex difficultate operandi bonum, de quibus latius in sequentibus. Una ergo tantum videtur ratio propria hujus loci, quia talis cogitatio honesta est actus prudentiæ; non potest autem homo suis viribus sine divina gratia esse prudens, juxta verba divinæ Sapientiæ, Proverb. 8: *Meum est consilium, mea est prudentia;* ergo nec talem cogitationem habere.

4. *Secunda opinio distinguens de cogitatione seu judicio practico, et imperio. — Tertia opinio distinguens de cogitatione sufficiente et congrua. — Quarta opinio utramque cogitationem æquiparans.* — Secunda opinio referri potest quorundam, qui in intellectu practico distinguunt duos actus, unum judicii de re agenda, au expediat necne; alium imperii,

quo intellectus efficaciter movet voluntatem, ut velit, dicuntque actum judicii posse haberi sine speciali gratia, non solum proprie supernaturali, sed etiam ordinis naturalis, juxta explicationem superius datam, et propter rationes capite præcedenti adductas. De actu vero imperii contrarium docent, nimirum, non posse sine gratia haberi. Moventurque fortasse, quia existimant voluntatem non posse efficere actum honestum per solam naturalem motionem, et ideo inferunt tale imperium debere esse ex gratia, quia, posito tali imperio, necessario sequitur actus honestus voluntatis. Neque multum ab hac differt aliorum opinio, quæ hic potest tertio loco referri. Aliter enim distinguunt de cogitatione practica honesta; nam quædam est tantum sufficiens ad voluntatem honestam; alia vero est etiam congrua. Inter quas hoc differt, quod prior, licet possit de se inducere voluntatem ad honestum actum, cum effectu illum non obtinet, posterior vero semper illum conjunctum habet. Priorem igitur cogitationem dicunt posse haberi sine gratia, propter dicta in capite præcedenti. Posteriorem autem dicunt necessario esse ex gratia, seu esse gratiam saltem ordinis naturalis, quia non est debita naturæ. Aliqui tandem eo progressi sunt, ut neque honestam cogitationem solum sufficientem dicant esse posse in homine lapsa sine gratia Christi, quia omnis talis cogitatio de se potest esse initium salutis, quod sine gratia Christi esse non potest.

5. *Vera solutio communisque sententia.* — Vera tamen resolutio hujus quæstionis eadem est quæ præcedentis, in superiori capite tractatæ. Unde dicendum est primo, unam vel alteram, atque adeo singulas practicas cogitationes honestas, et sufficientes ad actus bonos de objectis proportionatis naturali lumini, regulariter haberi posse absque speciali gratia. Hæc est communis sententia in 2, dist. 28, ubi Bonnav., art. 2, q. 3; Albert., Scot., Richard. et Durand., q. 1; Gabr., art. 2, concl. 1; Ægid., dub. 2; Soto, lib. 1 de Natur. et Grat., cap. 20, et lib. 3, cap. 4; Vega, in Opusc. de Justificat.; Dried., de Captivit. et Redempt. gen. hum., tract. 2, cap. 1; Bellarm., lib. 5 de Grat., et lib. 4, cap. 1 et 2. Et sine dubio est sententia D. Thomæ in dicto art. 1, quæst. 109, ut ibi docent fere omnes, et ex art. 2 idem aperte sumitur, ut videbimus in sequentibus. Et probatur primo ex illo Psalm. 4: *Quis ostendit nobis bona?* scilicet, quæ agenda sunt, et respondet: *Signatum est super nos lumen vultus tui, Domine.* Quod licet varie soleat exponi,

tamen de naturali lumine intelligit ibi August., et Cyrill., libro primo in Joann., cap. 4, et alii: Necesse est autem ibi sermonem esse de agendis in particulari; nam parum prodesset generalis cognitio, si non posset ad particularia descendere, cum actiones in particulari fiant. Et eodem modo recte probatur hæc veritas ex Paulo ad Romanos 1 et 2 dicente gentes naturaliter facere ea quæ legis sunt, et habere rectum dictamen conscientiæ de his quæ agenda sunt; dictamen enim conscientiæ practicum est, et non posset accusare hominem, nisi esset honestum; sed de hoc loco, et quid nomine *Gentium* ibi intelligatur, infra tractandum est. Quod vero subdit ibi Paulus: *Gentes fuisse inexcusabiles, quia cum cognovissent Deum, non sicut Deum glorificaverunt*, de infidelibus necessario intelligendum est, et tamen de illis docet habuisse cognitionem sufficientem ad id faciendum. Deinde hanc sententiam docent communiter Patres in his locis, et Hieronymus, epistola 151 ad Algasiam, quæst. 8; Ambros., 1 de Abraham, capite secundo, loquens de Rege Ægypti, qui ex dictamine naturali non est ausus attingere uxorem Abrahamæ. Idem Chrysostomus, homilia 54 in Genes.; August., enarrat. in Psalm. 57; Prosp., contra Collat., cap. 22, ubi admittit prædictum sensum verborum Pauli, dicitque *talem cogitationem ex naturæ a Deo conditæ superesse reliquiis*. Et plura afferemus in sequentibus.

6. *Probatur primo. — Secundo.* — Rationes ad hoc probandum in primis adduci possunt omnes propositæ in capite præcedenti, concl. 1; nam hæc etiam cogitatio practica est proportionata lumini rationis, et ex objectis naturali et ordinario modo propositis per naturalem discursum accipi potest; cur ergo ad omnes et singulos hujusmodi actus est necessaria gratia? Deinde argumentor ex principio ibi posito: nam hoc universale principium, *Honorandi sunt parentes*, sine gratia cognosci potest, quia, ut ibi dixi, illa cognitio ex modo suo speculativa est et naturalis; ergo quando in particulari occurrit occasio hic et nunc honorandi parentem, potest idem intellectus sine nova gratia dictare illud esse faciendum, quod dictamen practicum est, et ad bene operandum sufficiens. Probatur consequentia, tum quia ex illo principio, applicata materia, seu objecto, illud dictamen particulare necessario sequitur; tum etiam quia nulla difficultas vel impedimentum cogitari potest, quod semper et ubique occurrat, et reddat illam cogitationem impossibilem sine gratia.

7. *Probatur tertio.* — Unde argumentor tertio inquirendo, si gratia est necessaria, qualis illa sit; aut enim est gratia interior, sive per modum principii physici, sive per modum specialis illuminationis, vel est tantum gratia exterior, quæ versatur circa propositionem objecti et ablationem impediendi. Primum membrum elegisse et asseruisse videntur Gregorius et Capreolus, sed revera probabile non est, ut rationes factæ hic et capite præcedenti demonstrant, et late probandum est in sequentibus. Aliud vero membrum affirmant moderni defensores tertiæ opinionis, quod de cogitatione sufficiente, vel solum de efficaci et congrua intelligi potest. De hoc posteriori sensu dicam infra; nunc de sufficiente verisimile non est ad illam esse necessariam specialem providentiam circa hæc exteriora objecta et quoad singulos actus, quia communis cursus causarum secundarum non impeditus sufficit ut occurrant talia objecta, quæ talem cogitationem excitare possint. Si vero ordinariam providentiam, gratiam appellent, abutuntur nomine gratiæ, et occasionem præbent Pelagianis eludendi omnia argumenta quæ contra illos ex Scriptura sumuntur, ut in superioribus tactum est, et in sequentibus latius dicemus. Nulla ergo superest vera gratia, quæ ad singulas cogitationes hujusmodi necessaria esse possit.

8. *Probatur quarto.* — Tandem argumentor, quia sequitur hominem non præventum gratia Dei non posse peccare in his moralibus, quæ pertinent ad legem naturæ; consequens est valde absurdum; ergo. Sequela patet, quia qui non potest habere cogitationem necessariam ad operandum bonum, non poterit illam habere ad cavendum malum; ergo non potest peccare, quia, licet contingat facere quod malum est, non poterit illi imputari ad peccatum. Probatur hoc ultimum, quia tunc haberet homo ignorantiam invincibilem, vel inconsiderationem inevitabilem ejus boni quod operaturus est; hæc autem ignorantia vel inconsideratio culpam excusat; ergo. Major patet, quia qui caret gratia necessaria ad habendam cogitationem rectam, non potest ipsam cogitationem habere, quia non habet in potestate sua gratiam necessariam ad habendam illam; qui autem non potest habere talem cogitationem, habet ignorantiam, vel inconsiderationem invincibilem; ergo non potest peccare. Dices habere hominem gratiam illam in potestate sua, et illi imputari, si non habeat. Sed hoc imprimis non habet locum in pura natura, in qua

nulla gratia ex necessitate homini præparatur, seu offertur. Deinde non potest intelligi illa potestas in hoc genere gratiæ, quia si cogitatio illa esset gratia, esset prima gratia movens, quæ si actu non datur, non est in hominis potestate, neque illi offertur. Item prima illa cogitatio omnino prævenit voluntatem; quomodo ergo erit in hominis potestate? Denique quid potest facere homo ut illam habeat? Maxime enim necessarium esset vitare peccatum; at vero ad hoc ipsum requiritur prævia cogitatio honesta et sufficiens; ergo ad hanc non potest homo libere præparari.

9. *Amplius explicatur et persuadetur assertio.*— Unde intelligi non potest ut homo habeat libertatem ad peccandum et non peccandum, quin habeat cogitationem sufficientem ad habendum aliquem actum voluntatis honestum, saltem hunc: *Nolo peccare*: vel, *Volo non me præcipitare, sed rem magis considerare*. Qui actus honestus est, et necessarius ad non peccandum, supposita actuali occasione peccati, haberi autem non potest sine prædicta cogitatione; ergo illa haberi potest sine gratia, alias homo non præventus aliqua gratia peccare non posset. Hoc autem consequens falsum esse patet, primo in homine in puris naturalibus, cui nulla esset danda gratia, ut supra probatum est; ergo non esset capax peccati, quod dicere absurdum est. Secundo, patet etiam nunc in infidelibus nondum gratia præventis, nam illi etiam tunc peccare possunt. Nec dici potest eos peccare, quia ponunt obstaculum gratiæ, non enim ponitur obstaculum nisi peccando; prius autem quam peccent, necessarium est ut habeant potentiam peccandi, et consequenter bene cogitandi; hanc vero non habent sine gratia, juxta illam sententiam; ergo nec potentiam peccandi habere possunt.

10. *Assertio secunda avertens secundam opinionem et confirmans præcedentem assertionem.*— Dico ergo secundo: intellectus humanus potest virtute naturali habere omnem actum practicum necessarium, et sufficientem ad aliquem effectum voluntatis, moraliter et secundum rationem naturalem honestum. Hanc conclusionem pono, tum ad improbandam secundam opinionem supra relatam; tum etiam ad magis confirmandam præcedentem assertionem. Probatur ergo primo, quia in intellectu naturaliter præcedere potest cognitio, et judicium de re agenda in particulari, et hic et nunc secundum rectam rationem appetenda; sed hic actus sufficit ut actus voluntatis sit rectus et honestus, si vo-

luntas velit illi objecto et judicio conformari; ergo. Probatur minor contra illam secundam opinionem: nam si aliquid ultra requiritur ex parte intellectus, maxime imperium; sed hoc non distinguitur a judicio practico in particulari dictante quid agendum sit; ergo. Probatur minor, primo, quia in intellectu non est actus dirigens voluntatem, nisi per modum cognitionis et judicii; voluntas enim solum requirit prævium intellectum, ut ostendat objectum, et quidquid aliud fingitur, et sine fundamento excogitatur, et concipi non potest, ut 1. 2, q. 17, ostenditur, et in lib. 1 de Prædestinatione, c. 16, multa de hoc dixi.

11. *Speciali ratione excluditur in præsentem imperium.*— Et præterea occurrit hic specialis ratio, quia si imperium ponitur præter judicium, solum est ut, illo posito, voluntas non possit resistere, sed inevitabiliter obediat; hoc autem poni non potest ad primum actum voluntatis; ergo saltem respectu illius potest præcedere sufficiens judicium, ut ille primus actus voluntatis honestus sit, quod satis est intentioni nostræ, præsertim quia ex illo primo actu sequi potest imperium ad secundum actum, si necessarius sit. Major constat ex assertionem opinionis contrariæ, et quia, seclusa illa necessitate, omnino superfluum est tale imperium. Minor autem probatur, quia alias destruitur libertas voluntatis. Nam si imperium antecedit primum actum voluntatis, non potest ipsum esse liberum, sed necessarium, quia actus intellectus non est liber, nisi ex motione voluntatis, quæ motio ante primum actum voluntatis esse non potest, ut constat. Per quid enim moveret? Ergo si, posito illo imperio, voluntas ex necessitate obedit, perit libertas; ergo ad primum actum voluntatis, ad intentionem scilicet liberam alienius finis, non est necessarium tale imperium. Inde autem facile probari potest, neque ad subsequentes actus esse necessarium, quia sufficit judicium participans vim movendi ex præcedenti actu voluntatis; sed de hoc plura in citatis locis. Denique addo in hoc puncto, esto esset necessarium tale imperium, non minus haberi posse ex vi naturalis luminis, quam ipsum judicium, quia neque ex parte objecti, seu materiæ circa quam, neque ex circumstantiis, neque ex motivo imperandi magis excederet naturales vires, quam ipsum judicium, imo, nec dari posset tale imperium, nisi juxta mensuram cognitionis, et judicii; ergo omnibus modis stat veritas assertionis contra secundam opinionem.

12. *Secundo, probatur assertio contra quartam opinionem.* — Secundo, probatur assertio contra quartam opinionem, quia ut cogitatio intellectus sit practice recta et honesta ex parte sua, satis est quod sit sufficiens ad inducendam voluntatem in actum honestum; ut autem ad hoc sit sufficiens, non oportet ut voluntas actu eliciat volitionem honestam; ergo potest intellectus naturali virtute habere actum practicum honestum, et de se sufficientem ad inducendam voluntatem. Major constat, quia ut actus intellectus sit practicus, non est necesse ut voluntas actu operetur, hoc enim pendet ex libertate ejus; satis ergo est quod de se moveat, proponendo opus in particulari, et modum quo fieri debet; ergo si hoc fiat circa materiam rationi naturali consentaneam cum debitis circumstantiis, ille actus ex parte intellectus erit honestus et practice verus. Et inde etiam facile probatur minor, quia (ut paulo antea dicebam) iudicium præcedens (extra visionem beatam) non imponit necessitatem voluntati, quod pro comperto habent Theologi, saltem de necessitate quoad exercitium: ergo stat optime iudicium intellectus ex se esse sufficiens ad inducendam voluntatem in actum honestum, et nihilominus voluntatem non velle: erit ergo (ut sic dicam) cogitatio aliqua honesta sufficiens ad movendum, licet non actu efficaciter moveat. Atque hoc sufficit ad probationem conclusionis, et novam improbationem prioris opinionis, quia non videtur posse negari quin cogitatio saltem sufficiens possit haberi sine speciali gratia.

13. *Tertia assertio quæ militat contra tertiam opinionem. Ejus probatio.* — Dico tertio: non solum cogitatio sufficiens ad bonum actum voluntatis potest haberi sine propria gratia, sed etiam cogitatio congrua. Hanc assertionem pono contra tertiam opinionem; ejus autem probatio maxime pendet ex dicendis de gratia necessaria ad bonos actus morales voluntatis. Nam omnis cogitatio de operatione honesta, quæ cum effectu sit causa ejus, et illam fieri faciat, est cogitatio congrua; sed operatio honesta potest interdum fieri sine gratia, ut ostendam; ergo et cogitatio congrua haberi potest sine gratia. Item cogitatio congrua non addit aliquid cogitationi sufficenti ex parte intellectus, nec ex parte sensuum, aut ex parte corporis, ut infra ostendam, sed addit solum respectum ad bonum effectum, seu opus cum effectu obtinendum; sed in operibus moralibus naturalis ordinis,

quod hæc cogitatio habeat talem effectum, sæpe pendet ex solo usu liberi arbitrii naturalis; ergo per solum usum liberi arbitrii cogitatio potest fieri congrua: ergo sine gratia potest esse congrua. Dices: illa cogitatio, licet in sua substantia et congruitate viribus naturæ fiat, nihilominus opportunitas et occasio habendi illam, ut præparata per divinam providentiam, est beneficium gratuitum, et ut sic est quædam gratia. Respondeo non esse præparatam per speciales causas ad hunc effectum a Deo destinatas, sed per generalem providentiam et cursum ejus, Deo ordinante singula, et ad ea cooperante; et ideo, licet illud sit quoddam morale beneficium ordinis naturalis, non tamen esse proprium beneficium gratiæ. Sicut etiam providentiæ divinæ beneficium est, ut causæ et circumstantiæ concurrentes in generatione Petri tales sint, ut in corporis membris vel in potentiis integer et perfectus generetur; possent enim causæ aliter disponi: nemo autem illud computabit inter beneficia gratiæ, sed inter beneficia naturæ: nisi addatur alius respectus ad supernaturalem finem, qui non est intrinsecus, nec per se necessarius, ut constat. Idem ergo est in cogitatione illa de qua tractamus, ut magis ex infra dicendis comprobabitur.

14. *Assertio quarta: natura lapsa eget speciali auxilio ad cognoscendas omnes veritates prudentiales particulares.* — Dico quarto: ad cognoscendas omnes practicas veritates morales, et judicandum de agendis in particulari sine lapsu et errore, necessaria est homini lapsu aliqua gratia, quæ gressus ejus dirigat. Hæc est communis et certa doctrina. In hoc enim sensu docent Theologi, ad cognoscendas omnes has veritates seu ad collectionem omnium, necessariam esse gratiam, et probabitur latius c. 26, ubi ostendemus, ad vitanda omnia peccata contra legem naturæ, necessariam esse gratiam; nam est eadem ratio de lapsu voluntatis et intellectus practici: quia, regulariter saltem, non cadit voluntas, nisi precedente defectu in intellectu practico. Item quæ adduximus in simili conclusione precedentis capituli, hanc probant a fortiori, quia vulnus ignorantie plus læsit intellectum practicum, quam speculativum, et quia omnes difficultates quas patitur intellectus humanus in cognitione speculativa, occurrunt in cognitione practica, cum hæc frequentius ex speculativa pendeat. Et augetur hic difficultas ex parte affectus, qui sæpe obscurat iudicium intellectus: nam qualis unusquisque est, seu qualem

habet affectum, talis finis seu actio sibi videtur, ut Aristoteles scribit.

15. *Enucleatur assertio.* — Locutus sum autem in assertionem de cogitationibus practicis in particulari, quia de principiis practicis seu moralibus in universali non est ita certa conclusio. Aliqui enim existimant posse omnia talia principia naturaliter et absque auxilio gratiæ cognosci sine ignorantia vel errore: quia talis cognitio universalis non est proprie practica, sed potius speculativa, quatenus ab affectu non pendet, ideoque ex hac parte non est difficilior, quam speculativa. Aliunde vero ex genere suo et materia est minus difficilis, et minus ampla, seu pauciora principia completens, quam naturalis philosophia, mathematica et metaphysica. Quæ sententia probabilis erit, si de solis principiis per se notis, et de aliquibus veritatibus illis proxime conjunctis intelligatur. Si vero ad omnes morales veritates, quæ ex illis principiis elici possunt, extendatur, multo probabilius videtur non posse omnes integre et sine errore, absque auxilio gratiæ, cognosci. Quia etiam illæ sunt satis multæ, et inter eas plures sunt valde obscuræ et difficiles sub naturali tantum lumine spectatæ, ut, in materia justitiæ, usuram esse intrinsece malam, vindictam propria auctoritate esse injustam, mendacium semper esse peccatum, etiamsi sit maxime officiosum, et propter vitandum quodcumque malum. In materia castitatis, fornicationem simplicem esse grave peccatum. In materia matrimonii, pluralitatem uxorum esse per se malam, vel non posse dissolvi, etiam ex mutuo consensu. Item, circa modum amandi et honorandi Deum, multa occurrunt satis obscura et difficilia in solo naturæ lumine, et fere in omni materia virtutis plura similia inveniuntur. Unde nullus philosophus naturalis fuit, qui omnia moralia sine defectu vel lapsu cognoverit. Ergo signum est etiam in illis positam conclusionem locum habere.

16. *Proxime dicta valent in pura natura et in lapsu.* — Hæc autem doctrina tam de homine in pura natura, quam de homine lapsu proponitur, quia in utroque locum habet ratio facta. Neque est mirum quod humana natura ex propria conditione naturali hunc habeat defectum, etiam absque occasione culpæ, quia ex se imperfecta est, et ex contrariis composita. Nec etiam est illi debitum ex vi providentiæ naturalis, ut talis imperfectio impedatur, vel ut ab auctore suo ita juvetur, vel dirigatur, ut nunquam practice erret in moralibus, quia

Deus, ut est auctor et provisor naturæ, solum debet concursum necessarium singulis facultatibus naturalibus, juxta earum capacitatem: quia si imperfectæ sint, potest permittere illas imperfecte operari, et si contrariæ sint, potest similiter sinere ut se impediant, et interdum deficient. Quod si vellet aliquid amplius juvare hominem in pura natura institutum, id est, sine ordine ad finem et dona supernaturalis ordinis, id quidem facere posset per extraordinariam providentiam ejusdem ordinis naturalis, non tamen debitam, sed gratis datam, satis vero divinæ liberalitati et sapientiæ consentaneam.

17. *Quid in natura integra.* — De statu vero innocentiae alia est ratio, nam in illo non posset esse proprie ignorantia, utique de his quæ unusquisque scire debet, et multo minus potuisset homo decipi in his veritatibus moralibus, quam in speculativis, nisi amittendo statum. Verum est tamen illud non fuisse sine speciali dono Dei, non debito naturæ secundum se spectatæ. Poterat autem illud donum dici quasi connaturale illi statui: ad illius enim perfectionem et quasi ordinariam legem pertinebat specialis Dei providentia, qua fiebat ut objecta externa convenienter et sine occasione erroris ex parte eorum proponerentur, quo beneficio supposito, existentibusque integris facultatibus animæ, et bene dispositis quoad omnia organa sensuum, et observato prudenti modo in ferendis de rebus judiciis, facile fuisset homini non decipi in his quæ naturali virtuti intellectualis luminis subjacerent.

18. *Ad primum argumentum prioris opinionis in numero secundo.* — Ad primum argumentum prioris sententiæ respondeo Paulum, cum ait: *Non sumus sufficientes cogitare aliquid ex nobis*, præcipue loqui de cogitatione sancta, quæ ad veram justitiam et sanctitatem per se conferat, ut ex antecedentibus et sequentibus aperte constat; dixerat enim: *Fiduciam autem talem habemus per Christum ad Deum.* Et tunc addit: *Non quod sufficientes simus cogitare aliquid*, utique ex quo talis fiducia nascatur, unde subjungit: *Sed sufficientia nostra ex Deo est, qui et idoneos nos fecit ministros*, etc., ubi aperte loquitur de providentiæ gratiæ, et de Deo, ut illius auctore; et ad hoc allegatur hic locus in Conc. Araus. 2, can. 7, et exponitur ab Aug., lib. 1 de Prædest. Sanct. c. 2, ut latius dicitur in sequentibus. David autem, in Ps. 93, loquitur de peccatoribus, et præsertim de infidelibus qui de providentiæ et scientiæ male sentiunt et tales cogitationes eorum dicit esse vanas;

non tamen dicit nullam habere posse honestam et rationi consentaneam. Et similiter locus Genesis exponi potest de cogitatione propria hominis, quam Hæbrea lectio vocat *Figmentum cogitationis hominum*. Hæc enim in malam partem accipitur, sicut voluntas propria, et ideo mala dicitur: vel certe facilius dicitur, ibi per amplificationem universaliter affirmari quod ut plurimum accedit, ad significandam naturæ humanæ corruptionem. Sicut ibidem dicitur: *Omnis quippe caro corruperat viam suam*; cum tamen Noe et nonnulli alii essent justi. Verba autem Paralipomenon sunt Josaphat orantis ad Deum, ut se et suos ab hostibus liberaret, quibus sine speciali Dei protectione resistere non poterant. Unde ipse dixit: *In nobis non est tanta fortitudo ut resistere possimus huic multitudini, quæ irruit super nos*. In illa ergo occasione merito dixit: *Cum ignoramus quid agere debeamus*, etc. Inde tamen non fit ut semper id ignoremus.

19. *Ad secundum ex Conciliis.*—*Ad tertium ex Patribus.*—Ad secundum eadem est responsio quæ ad verba Pauli; nam Concilium Milevitanum evidenter loquitur de supernaturali cognitione, et de operibus supernaturalis justitiæ: nam in canone 3 dixerat, gratiam sanctificantem esse necessariam ad salutem, et statim subdit, capite 4, eandem gratiam esse necessariam non solum ad cognoscendum quid agere oporteat per revelationem et intelligentiam mandatorum, sed etiam ad volendum. Loquitur ergo de pia voluntate quæ ad justitiam confert, et de cognitione illi proportionata. Et eodem modo loquuntur Concilium Arausicum et Augustinus, ut etiam infra magis constabit. Adde præterea (quod supra dixi) etiam cogitationem honestam naturalem, præcipue referendam esse in Deum, aliquando quidem tanquam in auctorem gratiæ, quia peculiari modo ad illam adjuvat in ordine ad finem supernaturalem; per se autem, et ex necessitate solum esse ab illo ut ab auctore naturæ. Possunt etiam aliqua testimonia, et præsertim illud Fulgentii, intelligi de necessitate gratiæ ad procedendum sine errore et sine defectu in his actibus et judiciis, juxta ultimam conclusionem positam, ut infra latius dicemus.

20. *Ad quartum ex ratione.*—*De aliis sententiis.*—Ad ultimam rationem, respondetur aliud esse habere unum vel alium actum prudentiæ naturalis, aliud prudentem fieri. Primum dicitur esse possibile absque gratia, unde vero non sequitur secundum,

quia ad prudentiam comparandam necessarius est affectus valde moderatus constanter, et quasi permanenter; necessarium etiam est frequenter et ordinarie, et in difficultibus etiam occasionibus prudenter operari, quod sine gratia fieri non potest, juxta conclusionem ultimo loco positam, et juxta ea quæ in capite ultimo hujus libri dicemus. Ad fundamentum secundæ opinionis, quod positum est in distinctione imperii a judicio, jam responsum est, tam negando assumptum, loquendo de judicio practico et in particulari, quam negando consequentiam, quia, etiamsi imperium esset actus distinctus, nulla esset ratio ob quam semper vires naturales superaret. Ad tertiam vero opinionem, respondetur imprimis, licet cogitatio congrua absolute non sit debita huic vel illi personæ, simpliciter esse debitam naturæ, et hoc satis esse ut non sit gratia. Deinde dicitur, licet cogitationem esse congruam non sit debitum, quia hoc pendet ex libero usu hominis, esse tamen debitum cuicumque ut possit suam cogitationem efficere congruam per naturalem facultatem, si cogitatio naturalis sit, et hoc est satis ut talis cogitatio non sit gratia, et sit possibilis sine gratia. Ad ultimam denique sententiam, negamus cogitationem honestam mere naturalem esse posse initium salutis; idem enim est initium salutis, quod initium fidei vel justificationis; initium autem fidei non sumitur a cogitatione naturali, sed ab Spiritu Sancti illuminatione et inspiratione, ut tradit Concil. Arausic., cap. 4 et 5; initium vero justificationis sumitur a vocatione, ut docet Concil. Trid., sess. 6, cap. 3, et inferius latius tractabitur.

CAPUT III.

UTRUM HOMO LAPSUS POSSIT HONESTE OPERARI
ALIQUANDO PER QUANCUMQUE VIRTUTEM, SIVE
NATURÆ, SIVE ETIAM GRATIÆ.

1. *Præsentis quæstionis ratio et declaratio.*—Priusquam de necessitate gratiæ ad recte operandum disseramus, visum est operæ pretium de sufficientia gratiæ (ut sic dicam), ad operationem undique honestam eliciendam, dicere, quia si per gratiam non possent bona opera fieri, non solum necessaria esse non posset, verum etiam superflue daretur hominibus. Per actionem autem honestam illam intelligimus quæ ex objecto, seu fine, et aliis circumstantiis bona est: nam si aliquam habeat circumstantiam malam, jam erit mala, et ideo

facile poterit ab homine fieri, etiam sine gratia, et in peccato existente : loquimurque indifferenter in quocumque actu bono, cujuscumque ordinis vel gradus sit. Ac denique tractamus de homine lapsa, quia de nullo alio statu hominis dubitatum est etiam ab hæreticis. Nam de statu primæ institutionis generis humani, seu innocentiae et integræ naturæ, certissimum est potuisse recte operari saltem cum gratia ; an vero etiam sine illa, postea dicemus. In statu autem puræ naturæ vix habet locum quæstio, quia in illo supponitur non dari gratia ; tamen si daretur, eadem ratio esset de illo quæ de statu naturæ lapsæ, juxta superius dicta, et infra ostendemus, etiam sine gratia potuisse hominem in eo statu bene aliquid operari. Igitur tantum de homine lapsa dicendum superest. Et loquimur indifferenter de gratia, sive sit sanctificans, sive auxilians, sive utraque simul, ita ut sensus sit : an homo lapsus, sive justus, sive peccator, possit cum quocumque auxilio gratiæ bonum aliquid operari ?

2. *Et agitur solum contra notissimos hæreticos asserentes omnia nostra opera esse peccata.* — De hac ergo quæstione in hoc sensu proposita nulla est controversia inter catholicos, nec existimo fuisse cum hæreticis usque ad tempora Lutheri, qui dixit hominem in natura lapsa, quantumvis sanctum et justum, et a Deo adjutum, nihil operari posse quod peccatum non sit. Ita Luther., Calvin. et Melanct. et Kemni. relati a Bellarmin., lib. 5 de Gratia et Liber. arbitr., cap. 4, et lib. 4 de Justific., a cap. 10 ; Veg., lib. 11 in Trid., a cap. 9 ; Castr., verb. *Opera*, hæres. 1 ; Soto, lib. 3 de Nat. et grat., a cap. 3 ; Rossen., art. 31 et 32, contra Luther. Idem senserunt Jacob., Proposit., et alii plures apud Prateol. Est autem advertendum hos hæreticos interdum dicere, nullum opus hominis justis seu fidelis esse peccatum, item omnia esse peccata : sed utrumque in sensu hæretico, non inter se contrario. Dicunt enim opera ipsa revera in se mala et peccata esse ; si tamen ab homine fidei fiant, cum firma fide et fiducia quod a Deo non imputantur, nihil nocere, nec tanquam prava computari ; et ideo dicunt non esse peccata in his qui talem fidem habent ; in aliis vero qui illam fidem non habent (quos et peccatores et infideles esse reputant), omnia opera, quantumcumque Deo adjuvante fiant, et esse peccata, et imputari. Omisso vero errore de non imputatione, de quo infra in materia de justificatione redibit sermo, generalis eorum sen-

tentia est, omnia opera lapsorum hominum, quomodocumque fiant, in se esse vera peccata.

3. *Primum eorum fundamentum ex Scripturis male intellectis.* — *Secundum fundamentum ex Patribus.* — *Tertium fundamentum ex ratione.* — *Illatio eorundem hæreticorum.* — Fundatur primo in quibusdam Scripturæ testimoniis male intellectis, ut est illud Ecclesiast. 7 : *Non est homo justus in terra, qui faciat bonum, et non peccet ;* Psal. 13 : *Non est qui faciat bonum, non est usque ad unum,* et similia. Secundo addunt testimonia Patrum, in judicio Dei nullam esse justitiam humanam puram et laudabilem, nisi Deus sua pietate conniveat, ex August., lib. 9 Confess., c. 13, lib. 3 contra duas epist. Pelag., c. 7 ; Greg. 9 Moral., c. 44, et lib. 35, c. ult. ; Bernard., serm. 5 de verbis Isaiaë, et serm. 4 de omnibus Sanctis. Tertio addunt rationem, quia homo peccando amisit potestatem operandi cum illa integritate, et rectitudine naturæ, quam habebat in sua prima conditione ; ergo necessario semper peccat. Probatum consequentia, quia habet præceptum operandi in illa integritate, primo quia hoc habuit a principio, et non debuit ab illo eximi peccando ; secundo, quia præceptum, *Non concupisces*, etiam motus fomitis prohibet ; tertio, quia nunquam potest homo lapsus diligere Deum super omnia, prout illi præcipitur, sine cujus præcepti observatione nihil boni agere potest. Inde illationem faciunt, hominem, peccando, amisisse liberum arbitrium ad bene operandum, quia non est in libertate, seu potestate ejus, non sentire et pati effrænatae concupiscentiæ motus. Et inde fit ut nihil agere possit sine aliqua circumstantia prava, vel quia non potest diligere Deum super omnia ratione fomitis, et ita semper operatur ex inordinata concupiscentia, atque adeo peccaminose, vel quia semper a fomite retardatur, ne convenienti modo et secundum virtutem operetur. Unde, quia gratia hujus vitæ nunquam tollit fomitem, nunquam sufficit ad bene operandum sine peccato. Hic vero error non solum impiissimus est, sed etiam stultissimus ac vanissimus, ex sola malitia excogitatus, ut homines de bonis operibus non sint solliciti, sed contenti ea fide qua credunt sibi non imputari peccata, illa licentius committant.

4. *Prima assertio ; definitur in Tridentino, et a Leone X contrarius error damnatur.* — Dicendum est ergo gratiam aliquam Dei esse sufficientem, ut homo lapsus faciat aliqua bona

opera sine ulla malitia vel culpa. Est assertio de fide, definita in Conc. Trident., sessione 6, can. 7, quoad opera quæ ante justificationem fiunt; et 18, 22 et 25, quoad opera justorum, quibus possunt et legem implere, et in gratia perseverare, et sæpe sine culpa etiam veniali operari. Leo etiam X damnavit articulos 31, 32 et 37 Lutheri huic dogmati contrarios. Præterea Scriptura passim consulit bona opera, et laudat illa, præsertim in justis, et pro illis præmium promittit; supponit ergo esse possibile, saltem per gratiam; Job. 1: *In omnibus his non peccavit Job*, etc.; Psal. 118: *Beati immaculati in via, qui ambulant in lege Domini*; et toto Psal. 1 et 14, et aliis passim. Et in veteri Testamento multi laudantur ut justis, et bene operantes saltem per fidem, quorum præcipuos recenset Paulus ad Hebr. 11. Præterea in novo Testamento dicit Christus, Matth. 5: *Sic luceat lux vestra coram hominibus, ut videant opera vestra bona*. Et 2 Pet. 1: *Salutate ut per bona opera certam vestram vocationem et electionem faciatis. Hæc enim facientes non peccabitis aliquando*. Et 1 Corinth. 3, præcipit Paulus ut unusquisque videat quomodo superædificet, quia uniuscujusque opus manifestum erit: *dies enim Domini declarabit*. Supponens posse esse bonum dignumque mercede, et malum igne dignum; et capite septimo: *Si acceperis uxorem, non peccasti*. Certe in illo maxime actu videtur posse habere locum fomes, et ideo addit: *Si nupsit virgo, non peccabit, tribulationem autem carnis habebunt hujusmodi. Ego autem vobis parco*. Si ergo ille actus fieri potest sine peccato, quomodo non alii? Unde statim subdit de virginibus: *Qui non jungit, melius facit*. Ad Ephesios quarto, et Psal. 4: *Irascimini, et nolite peccare*; et Timoth. 4, de se ait Paulus: *Bonum certamen certavi, fidem servavi, in reliquo reposita est mihi corona justitiæ*. Quomodo hæc vera esse possunt sine bonis operibus? Et tamen eandem coronam justitiæ promissam esse dicit omnibus diligentibus Deum. Ex Patribus multa congerere supervacaneum duco, quia in singulis fere eorum paginis hæc veritas invenietur, et præsertim apud Augustinum, libro de Gratia et libero arbitrio, et aliis contra Pelagianos; et Hieronymum, dialogo contra eodem, et in sequentibus sæpe afferemus Patrum sententias, quæ hoc supponunt vel affirmant.

5. *Prima ratio pro assertione*.—Ratio autem potest reddi multiplex. Prima, quia homo lapsus tenetur observare præcepta et vitare peccata, ergo est hoc illi possibile, saltem de quolibet

in particulari. Antecedens quoad priorem partem supponimus ex tota Scriptura sacra, et consensu totius Ecclesiæ, ipsaque ratione naturali evidenti, et late probatum est in materia de Legibus. Altera vero pars sequitur ex priori, quia servando legem, vitatur peccatum, omne enim peccatum est contra legem; ergo si tenemur servare legem, etiam vitare peccata. Imo, eo ipso quod ratio dictat aliquid esse peccatum, dictat esse vitandum. Consequentia vero est etiam evidens, quia neque lex obligat ad impossibile simpliciter, ut in tractatu de Legibus etiam ostensum est, nec imputari potest ad culpam quod vitari non potest, saltem per Dei gratiam, ut etiam est per se notum, quia quod non est in hominis potestate, neque humanum opus est, nec morale, et ideo culpa esse non potest, ut in materia de peccatis latius traditur.

6. *Secunda ratio a priori*.—*Tertia ratio ab incommodis*.—Secunda ratio a priori est, quia homo lapsus per originale peccatum non amisit naturalem rationem, nec voluntatem, neque factus est omnino incapax divini luminis et adjutorii; cur ergo non poterit operari honeste et secundum rectam rationem, sive libertate sua, sive per vires divinæ gratiæ? Nulla certe verisimilis ratio reddi potest, quia nec concupiscentia, nec dæmon, nec quælibet objecta occurrentia possunt absolutam necessitatem inferre voluntati, et licet possint magnam difficultatem, et interdum moralem impotentiam ingerere, potentior est divina gratia omnibus viribus creatis. Et declaratur, quia homo peccando solum amisit divinam gratiam et amicitiam, et alia dona originalis justitiæ, quibus ad bene operandum juvabatur; sed Deus potest vel illa restituere, si velit, vel aliis modis æquivalentibus, vel efficacioribus hominem juvare. Hoc enim negare est contra omnipotentiam Dei, et contra infinitam Christi redemptionem, et contra omnem rationem; ergo. Tertio, possunt aliæ rationes ab incommodis sumptæ multiplicari. Nam si homo semel lapsus amplius non potest bene operari, jam est obstinatus in malo, incapaxque omnis meriti; non ergo habet locum novum judicium de operibus ejus. Item non poterit in hac vita inquam mundari a peccato, et ita vel nullus esset homo justus, vel simul esset homo justus et peccator; quæ omnia et similia sunt absurdissima, et contra expressas Scripturæ.

7. *Secunda assertio: possibile est homini bene sæpe operari*.—Unde addere secundo

possumus, non solum esse possibile homini aliquod bonum interdum facere, sed etiam semper bene operari, vitando simpliciter omnia peccata, præsertim mortalia. Hoc a nobis nunc traditur de potestate absoluta, ita ut gratiam includat. Et ita est certissima conclusio quoad constantem boni operationem, vitando saltem mortalia peccata. Est enim satis clare definita in dicto Conc. Trid., sess. 6, canon. 16, 18 et 22, et probatur infra tractando de perseverantia justorum. Unde sic concluditur ratio, nam certum est posse Deum justificare hominem lapsum, priusquam per proprium actum peccet, ut de facto sanctificat infantes omnes qui baptizantur; potest etiam hominem semel justificatum perpetuo in gratia sua conservare; ergo potest facere ut semper bene operetur, quantum necesse est ad conservandam gratiam; ergo ad non peccandum mortaliter. De continuo autem modo bene operandi, vitando etiam omnia venialia, licet sit certum esse possibile ex gratia, absolute loquendo, nihilominus etiam est certum, secundum legem ordinariam, non esse simpliciter possibile sine speciali privilegio; utrumque enim definit dictum Concilium supra can. 23, et infra late lib. 8 tractabitur. Nunc enim solum ostendere volumus, in toto hoc genere operationis, non esse repugnantiam simpliciter, ac subinde per aliquas vires gratiæ esse possibile, sive illæ vires conferantur aliquibus, vel ex lege communi, vel ex privilegio, sive neutro modo dentur.

8. Quod autem id non repugnet, probant rationes factæ in priori assertionem cum proportionem applicatæ. Quibus addimus, posse Deum sanare hominem lapsum non solum a culpa, sed etiam ab infirmitate fomitis, tollendo illum, vel impediendo omnes concupiscentiæ motus rationem prævenientes. Quid enim repugnat? Imo id jam fecisse in beatissima Virgine in secundo tomo tertiæ partis ostendimus; ergo saltem hoc modo potest homo lapsus semper bene operari sine ullo lapsu actuali, etiam levi, ut de beatissima etiam Virgine tenet Ecclesia. An vero fieri possit ut, non ablato vel impedito fomite, homo innocenter vivat, etiam quoad carentiam venialis peccati disputari posset, et infra suo loco tractabitur. Nunc breviter dico id non ita repugnare, quin per potentiam divinæ gratiæ fieri possit, quia nulla implicatio contradictionis ostendi potest. Nihilominus tamen non credimus id esse factum, neque esse satis consentaneum rebus ipsis, aut suavi provi-

dentia Dei, quia difficillimum est voluntatem et rationem præveniri ab inordinatis concupiscentiæ motibus, et nihilominus ita semper et continue resistere, ut nunquam vel leviter labatur, neque deliberate, neque per aliquam surreptionem, et ideo si Deus vult hanc vim bene et constanter operandi homini lapsu conferre, id facit impediendo, vel auferendo fomitem.

9. *Ad fundamenta hæreticorum in numero primo.* — *Ad primum ex Scriptura.* — Ad primum testimonium, respondetur Sapientem non dixisse nullum esse justum qui non semper peccet, sed qui non peccet, utique interdum, aut sæpius, sicut alibi scriptum est: *Septies in die cadit justus*, Proverborum 24; et alibi: *Non est justus qui non peccet*, 3 Reg. 8, 2 Paralip. 6; vel sicut dicitur: *Non justificabitur in conspectu tuo omnis vivens*, Psal. 141; vel sicut ait Joannes: *Si dixerimus quia peccatum non habemus, etc.*, 1 canonic., capitulo primo. Quæ omnia solum significant nullum esse qui non aliquando et sæpius peccet, interdum graviter, interdum leviter; inde vero non fit ut in omnibus operibus peccet. Nec etiam sequitur quin per gratiam Dei possit fieri, ut homo in hoc statu naturæ lapsæ nunquam peccet, licet sine speciali privilegio nemini de facto id concedatur.

10. *Locus Psalmi decimi tertii late explicatur, cum expositione etiam Augustini.* — *Ad secundum fundamentum ex Patribus.* — Ad testimonium Psal. 13, partem illam, *Non est usque ad unum*, Augustinus exponit, id est, *præter unum Christum*: et ita videri potest locus difficilior, quia exceptio firmat regulam in contrarium. Sed illa posita expositione, adhuc dici posset non esse sermonem de actibus, sed de personis, quia nullus est qui bonum integre faciat, et qui non sæpius peccet, juxta priorem interpretationem. Quæ regula, quantumvis universalis, nunquam excludit speciale privilegium. Nam Christus non ex privilegio, sed natura sua exemptus est ab illa regula, et ideo illa exceptio non excluderet aliam de speciali privilegio. Verumtamen licet doctrina sit vera, non est sensus Davidis; sed sensus est, *non est neque unus*; hæc enim est proprietas sermonis hebraici, ut notant Genebrar. et Jansen., et contextus ipse postulat. Nihilominus tamen etiam in hoc sensu verum est illa verba, *non est qui faciat bonum*, non intelligi de omnibus et singulis actibus, sed de personis, id est, non est qui faciat bonum, id est justitiam, ita ut sit vere justus. Sic autem potest illa exaggeratio in-

telligi per hyperbolem, ad significandum rarissimos fuisse justos. Sicut Genes. 6 dicitur : *Omnis quippe caro corruerat viam suam*; et tamen Noe familia justorum erat. Addo etiam non loqui Davidem de omnibus hominibus, sed de stultis et impiis dicentibus in corde suo: Non est Deus; vel existimatione, ut athei; vel opere et affectu, ut impii et iniquissimi, de quibus in toto illo Psalmo loquitur, ut Basilii, Theodoretus et alii exponunt. Ad secundum fundamentum ex Patribus, dicendum eos tantum velle justitiam apud humanum iudicium puram, sæpe talem non esse apud divinum, vel in se, quia re vera pura non est, vel in ordine ad finem supernaturalem, cum sit humanis tantum viribus exercita.

11. *Ad tertium fundamentum ex ratione.* — Ad rationem, respondetur integritatem naturæ non esse necessariam ad bonum aliquod opus faciendum, quod nulla circumstantia vitietur. Nam imprimis præceptum illud conservandi justitiam originalem in nobis vane et sine fundamento fingitur; imo neque in ipso Adamo fuit distinctum ab aliis præceptis, et præsertim ab illo quo prohibebatur comedere de ligno scientiæ, sub tali comminatione, vel a lege charitatis, qua tenebatur, et diligere Deum super omnia, et habere curam salutis suæ et suæ posteritatis. Postquam vero illa integritas per Adæ peccatum amissa est, neque carentia ejus imputatur nobis ad specialem culpam, præter originalem contractam ex peccato Adæ, ut fuit peccatum capitis, quod fuit solum peccatum edendi de ligno vitæ; neque etiam tenemur speciali præcepto ad recuperandum illum statum, seu naturæ integritatem, id enim non est in manu nostra, et præceptum non datur de re impossibili, neque ratio ulla, vel testimonium, aut vestigium talis obligationis dari potest: unde Christus Dominus, Matth. 19, simpliciter dixit: *Si vis ad vitam ingredi, serva mandata*, utique omnia, quia *qui in uno offendit, factus est omnium reus*: ergo non censuit esse nunc præceptum redeundi ad statum innocentie, alias vel dixisset viam salutis esse impossibilem, aut falso dixisset necessarium esse servare omnia mandata ad salutem consequendam.

12. *Secunda ratio exponitur.* — *Probatio de dilectione Dei solvitur.* — Ad primam ergo probationem illius præcepti, quod in consequentia argumenti dari inferebatur, nego habuisse homines omnes in statu integræ naturæ hujusmodi præceptum speciale, quia in se non ha-

buerunt, cum in illo statu non fuerint, neque in Adamo, ut declaravi; et licet habuissent illud in Adamo, fuisset tantum negativum, scilicet, nihil agendi, quo illum statum perderent; illo autem semel amisso, jam non potest obligare præceptum negativum, quia materia ejus non extat, et ad præteritum non est potentia. Neque affirmativum datur recuperandi illum statum in hac vita, vel aliquid agendi pro illo acquirendo, quia totum hoc impossibile est et alienum ab ordinatione divina. Ad secundam probationem negatur antecedens, est enim hæreticum, quia præcepta non dantur de motibus non liberis, ut tales sunt: sensum ergo præcepti, *Non concupisces*, explicavit Sapiens, Ecclesiast. 18, dicens: *Post concupiscentias tuas ne eas*, ut notavit Augustinus, lib. 1 contra Julian., cap. 3, dicens inutile fuisse futurum Sapientis consilium. *Si jam quisque reus est, quod tumultuantes, et ad malum trahere nitentes sentit concupiscentias.* Eodemque modo exposuit Paulus ad Rom. 6, dicens: *Non regnet peccatum in vestro mortali corpore ad obediendum concupiscentiis ejus*; ut exposuit idem Augustinus, lib. 1 de Nuptiis, cap. 26; et æquivalent verba Petri, 1, cap. 2: *Obsecro vos abstinere a carnalibus desideriis*, ut notavit Clemens Alexand., lib. 3 Stromat., cap. 6. Accedit quod non semper neque omnibus momentis motus concupiscentiæ insurgunt, ideoque etiamsi mali essent, dum actu infestant et turbant, posset homo interdum bene operari, dum quiescunt. Similiter respondetur ad tertiam probationem de dilectione Dei super omnia, primo, falsum esse non posse hominem lapsum in hac vita diligere Deum super omnia, cum hoc ei præcipiatur, et ad veram justitiam sit necessarium, quam homo in hac vita obtinere potest, ut infra dicetur. Unde David, Psalm. 118, beatos vocat omnes qui in toto corde suo exquirunt Deum; et Ezechias de hoc laudatur, Isai. 31; et Joannes, 1 canonic., cap. 2, ait: *Qui servat verbum ejus, vere in hoc charitas Dei perfecta est.* Et idem supponit Christus, Joann. 14 et 15, et Paulus, 1 Corinth. 13, et passim in Scriptura traditur, et infra ostendetur, saltem per gratiam Dei posse hanc dilectionem haberi. Addimus vero nunc, etiam sine tali dilectione posse interdum esse opera bona, ut de peccatore et infideli mox dicemus.

13. *Hæreticorum illatio falsa.* — Ad illationem autem hæreticorum, dicitur tam falsum esse consequens, quantum est antecedens. Nam, licet homo non sit liber ad non sentien-

dum concupiscentiæ motus, potest esse liber ad non peccandum, quia est liber ad non consentiendum illis, et secluso aliquo consensu illi non sunt peccata. Et quamvis interdum operetur homo, instante et repugnante concupiscentiæ motu, non ideo peccat, imo fortasse plus meretur et melius operatur, quia inordinatam concupiscentiam vincit ac superat. Nec propterea impeditur quin actu possit diligere Deum super omnia, quia hic amor non postulat ut hos motus non sentiamus, sed ut illis non consentiamus, ideoque potius ex tali amore provenit ut homo resistat concupiscentiæ, etiamsi omnino illam cohibere non possit ne motum aliquem inordinatum exercent. Neque etiam ex tali motu, licet actu infestet, sequitur necessario prava circumstantia in opere de se bono, quia voluntas pro sua libertate, et præsertim cum divina gratia, potest nullam talem circumstantiam admittere; imo interdum majori conatu et puriori intentione operari. Et quanquam interdum remissior sit operatio, non ideo fit mala, cum non teneamur cum certa quadam animi contentione operari. Igitur talis concupiscentiæ motus non potest alium bonum actum inficere; tum quia non est circumstantia ejus, sed tantum concomitantur se habet; tum etiam quia non est voluntarius, ut supponitur.

CAPUT IV.

UTRUM AD OMNE BONUM OPUS MORALE SIT NECESSARIA GRATIA SANCTIFICANS, ET CONSEQUENTER AN EXISTENS IN STATU PECCATI MORTALIS POSSIT INTERDUM BENE MORALITER OPERARI.

1. *Aperitur questio.* — Cum dictum sit lapsum hominem posse interdum bene moraliter operari, declarandum superest quibus viribus id possit, vel quam necessaria sit gratia ad hujusmodi opus, quæ controversia his temporibus valde disceptata et agitata est, et ideo diligentius est tractanda; incipimusque a statu naturæ lapsæ, tanquam nobis notiori, postea vero ad cæteros status doctrinam aecommodabimus. Loquimurque non de collectione bonorum actuum, nec de continuatione illorum sine defectu, nec de omnibus et singulis actibus etiam perfectissimis, sed tantum indefinite, an saltem aliquis actus bonus, etiam minimus, virtutis saltem acquisitæ, possit a peccatore fieri, vel e contrario universalis sit questio, distributio autem cadat super gratiæ necessitatem,

scilicet, an gratia sit necessaria ad omnia et singula opera bona, etiam minima et naturalis ordinis, quæ nunc moralia simpliciter vocamus. Denique in hoc capite specialiter tractamus de gratia sanctificante, de aliis vero donis, vel gratiæ auxiliis dicemus in sequentibus.

2. *Hæreticorum error cum suis fundamentis in questione præsentis.* — Hæretici ergo superiori capite allegati, qui negant posse hominem lapsum aliquid boni operari, a fortiori id ipsum dicunt de homine lapsa, et in statu peccati existente. Nam de illo non solum dicunt semper peccare, sed etiam peccatum semper illi imputari. Procedunt autem in suis principiis erroneis, putant enim hominem justificari per solam fidem particularem, qua credit firmiter sibi non imputari peccata, et solam incredulitatem huic fidei contrariam putant esse peccatum, ita ut imputetur; et ideo consequenter dicunt hominem, si sit in statu peccati, necessario carere illa fide, et consequenter omnia ejus opera, quæ mala esse supponunt, illi etiam imputari. Nec aliam rationem novam habent ad hoc commentum asserendum. Illa vero duo fundamenta hæretica sunt, et stultissima. Nam primum de malitia omnium operum moralium hominis lapsi jam reprobatur est. Aliud vero de fide particulari, et non imputatione peccatorum, postea confutandum est, et ideo nulla ratio eorum superest, quam proponamus.

3. *Item Hus error refertur in Concilio Constantiensi.* — Aliter docuit hunc errorem Joan. Hus, dicens omnia opera peccatoris esse peccata, quia peccatum in operante manens omnia ejus opera maculat. Ita refertur in Concilio Constantiensi, sess. 15, estque art. 16 illius, et cum aliis articulis damnatur. Afferturque solent ad confirmationem hujus erroris duo præcipue Scripturæ testimonia. Unum est Isai. 1: *Quo mihi multitudinem victimarum, etc.* Et infra: *Ne offeratis ultra sacrificium frustra, incensum abominatio est mihi, usque ad illud: Cum multiplicaveritis orationem, non exaudiam, manus enim vestrae sanguine plenæ sunt, ubi Deus has omnes operationes de se bonas detestatur, solum quia a peccatoribus etiam fidelibus fiebant.* Aliud testimonium est Matt. 7: *Non potest arbor mala bonos fructus facere;* nam voluntas a Deo aversa mala arbor est; ergo non potest facere fructum bonæ operationis.

4. *Idem error attribuitur quibusdam Catholicis.* — Ex scholasticis antiquis, refertur pro hac sententia Dion. Cistereiens. a Vega, lib. 1 in Trident., cap. 21; tribuit enim illi, quod

dixerit nullum præceptum posse impleri ab homine in peccato mortali existente. Non tamen designat locum, nec ego invenio. Quin potius, idem Dion., in 2, dist. 25, quæst. 1, art. 2, refert opinionem cujusdam Bravardini, qui dixit quemlibet actum deliberatum voluntatis creatæ existentis in peccato mortali, esse malum, eamque impugnat. Pro illa tamen sententia pugnat vehementer Catharin., in cap. 3 Gen., circa verba illa: *Adam, ubi es?* quatenus contendit non posse actum esse moraliter bonum, nisi et ab habitu virtutis procedat, et in Deum super omnia dilectum ab ipsomet operante referatur, vel actu, vel virtute; et his duabus rationibus maxime sententiam illam confirmat, nimirum, quia existens in peccato mortali, nunquam potest operari propter finem debitum. Tenetur enim referre omnia opera sua in Deum super omnia dilectum, quod in eo statu facere non potest, cum Deum non ita diligat. Item quia tenetur operari ex habitu virtutis, et ideo si actus non a virtute eliciatur, non erit absolute bonus, seu virtuosus, quia caret perfectione sibi debita. Assumptum probat, quia homo ab initio sic conditus fuit, ut justitiam habere posset, et deberet, et consequenter ex illa operari: unde, sicut homo nunc nascitur in peccato, quia caret justitia quam habere deberet, ita quoties sine justitia operatur, licet bonum videatur operari, peccaminose operatur, quia non sicut debet operatur.

5. *Baius ad eundem errorem accedit.* — Ad hanc sententiam accessit Michael Baius; nam inter ejus articulos in Bulla Pii V, 33 est: *Omne quod agit peccator, aut servus peccati, peccatum est.* Item, in propositione 50 et 51, dicit motus concupiscentiæ etiam involuntarios esse peccata, et in 74 addit in homine etiam renato, et in peccatum lapsa, concupiscentiam esse peccatum; et in 75 ait eundem motum esse transgressionem legis: *Non concupisces.* Et in 40 addit: *Peccator in omnibus suis actibus servit dominanti cupiditati.* Quibus omnibus propositionibus recte perpensis, et inter se collatis, aperte constat Baium in hoc puncto non differre ab hæreticis. Accedit altera ejus propositio, quæ est 38, et sic habet: *Omnis amor creaturæ rationalis, aut vitiosa est cupiditas, qua mundus diligitur, qua a Joanne prohibetur, aut laudabilis charitas, qua per Spiritum Sanctum in corde diffusa Deus adoratur.* Quæ videtur esse basis ejus doctrine totius: nam, subnunciendo peccatorem non diligere Deum illa laudabili cha-

ritate, plane sequitur eum semper operari prava, quia omnis hominis operatio est ex aliquo amore; ergo in peccatore est ex vitiosa cupiditate a Joanne reprehensa; ergo est peccatum. Advertendum autem ulterius est hunc auctorem habere aliam sententiam singularem, scilicet, posse interdum hominem habere veram gratiam et charitatem infusam, et nihilominus simul esse in peccato, ut habet in proposit. 30, 31, 32, 71, etc. Ratio ergo illa maxime habet locum in peccatore carente charitate; quid vero senserit de hominibus charitatem habentibus, dicam in sequentibus.

6. *Prima propositio catholica.* — Veritas ergo catholica in duabus propositionibus consistit. Prima est: homo existens in peccato mortali potest habere multos actus bonos, qui nullo modo peccata sint. Quæ assertio nunc ponitur abstrahendo ab actibus factis per auxilium gratiæ, vel sine illo. Et sic conclusio est de fide definita in Concilio Tridentino, session. 6, can. 7, ubi anathemate ferit dicentes omnia opera, quæ ante *justificationem fiunt, esse peccata.* Nam ante justificationem homo in peccato existit, quia vel in peccato est conceptus, si nondum ab originali justificatus est, vel in peccato actuali, seu habituali perseverat, si justitiam baptismalem amisit, et iterum justificatus non est: neutrum enim peccatum tollitur, nisi per justificationem, ut idem Concilium ibidem docet, cap. 7, et session. 5. Posset autem quis fugere, dicendo Concilium non definire talia opera esse posse bona, sed tantum non omnia esse peccata, quod esset verum, si aliqua essent indifferentia, licet non omnia essent bona. At hoc alienum est a mente Concilii, sed loquitur juxta communem sensum, in quo non dicitur de aliquo opere non esse peccatum, nisi quando bonum est, quia moraliter non habetur ratio operum indifferentium, quæ in individuo vel nulla vel rara sunt. Eo vel maxime quod id maxime dicit Concilium propter dispositiones ad gratiam, quas bonas esse oportet, et in eodem sensu de illis statim definit, non peccari in illis propter vehementiorem conatum, cum tamen cap. 7 docuisset tales dispositiones esse bonas, et quo ferventiores sunt, magis prodesse. Quod iterum docet session. 14, cap. 4, et canon. 5. Idemque sumitur ex Concilio Araugicano, capite quarto, quinto et sequentibus, ubi docet initium bonæ voluntatis, et alios bonos affectus, quibus homo paulatim ad justitiam perducitur, esse Spiritus Sancti dona, et ex Spiritu Sancti auxilio tanquam

bona opera, licet fiant ab homine adhuc peccatore.

7. *Probat ex Scriptura.*—Unde potest eadem veritas probari ex omnibus illis Scripturæ locis, in quibus peccatores invitantur ad hujusmodi actus, quibus possint a Deo aliquid boni vel meliorem statum impetrare, vel ad illum aequaliter disponi. Sic oratio non tantum justis, sed etiam peccatoribus utilis est. Omnibus enim proponitur oratio Dominica, qua petant: *Dimitte nobis debita nostra*, et alia bona. Et similiter Christus omnes indifferenter hortatur ad orandum, etiam peccatores, et specialiter id significat Lucæ 11 et 18, ut latius dixi lib. 1 de Orat., cap. 12 et 25. Idem de eleemosyna dicit Christus-Luc. 11: *Date eleemosynam, et ecce omnia munda sunt vobis*; ubi ad peccatores loquitur, ut constat ex contextu, et ex omnibus Patribus, et non significat eleemosynam sufficere ad justitiam, sed multum præparare ad illam, sicut Tobia 4: *Eleemosyna a morte liberat.*

8. *Amplius probatur.*—Unde Actor. 10 dixit Angelus Cornelio: *Orationes tuæ et eleemosynæ tuæ ascenderunt in memoriam in conspectu Dei.* Et tamen eo tempore nondum Cornelium fuisse justum, sentiunt Chrysost., hom. de Fid. leg. naturæ et Spiritu Sancto, in tom. 3, ubi opera illa Cornelii dicit fuisse bona, sed mortua; idem oratione de Anima, tom. 3. Sequuntur Theophylact. et Oecumen., Actor. 10, qui etiam sentiunt neque fidem habuisse tunc Cornelium, sed usum tantum rectum legis naturæ. Augustinus item, licet credat Cornelium jam habuisse fidem Dei, sentit nihilominus nondum fuisse justificatum, in epist. 57, quæst. 2. Nam cum dixisset Deum non inhabitare ut in templo, nisi in his quos eruit a potestate tenebrarum, et transfert in regnum Filii charitatis suæ, addit nihilominus aliquid virtutis interdum operari in his in quibus nondum sic habitat, in exemplumque horum posteriorum adducit Cornelium. Et quæst. 2 ad Simpl., de eodem ait fuisse tunc fidem in Cornelio: *Sed non tantam, quæ sufficeret ad regnum cælorum.* Idemque significat lib. de Prædestinatione Sanctorum capite 7.

9. *Cornelii exemplum ad alia perutile expenditur.*—Exemplum hoc de Cornelio aptum quidem non est ad assertionem confirmandam, est enim valde incertum ad rem certam comprobendam; quia vero ad multa alia quæ in discursu materiæ occurrent utile est, breviter expendendum est. Tria enim tempora in Cornelio distinguenda sunt. Primum est, quando

ei Angelus apparuit; secundum est, quando Petrus ad illum venit, eumque veluti catechumenum in fide instruxit; tertium, quando baptizatus est. De hoc ergo tertio, certum est recepisse gratiam Baptismi, ac subinde fuisse justificatum secunda, vel (ut sic dicam) tertia justificatione. De secundo etiam tempore certum est fuisse fidelem et justificatum, cum statim ante Baptismum Spiritum Sanctum visibiliter receperit. Illa vero duo tempora non referunt. Sed difficultas est de primo tempore, et videtur res ambigua, nam quod tunc non fuerit justus plane sentiunt Chrysost. et Oecum., et indicat Augustinus citatis locis, et maxime quæst. 33 in Num., ubi dicit, veniente Petro, fuisse Cornelium mundatum per Spiritum Sancti adventum. Nihilominus probabilius censeo ipsum fuisse justum, quando Angelus ei locutus est. Nam quod habuerit fidem negari non potest, cum orationes funderet, sicut oportet, quod non fit sine fide, ut lib. 1 de Orat. ostendi, et Augustinus probat ex illo Pauli Roman. 10: *Quomodo invocabunt eum in quem non crediderunt?* Et notat D. Thom. 2. 2, quæst. decima, art. 4, ad 3. Quod autem illa fides jam esset viva, probatur primo, generali et (ut sic dicam) juridica ratione, quia non est cur credatur fuisse mortua; ergo præsumendum potius est fuisse vivam. Antecedens probatur, quia ex parte fidei jam sufficienter credebatur ad justificationem, quia non erat tunc necessaria explicata fides Christi gentibus, cum nondum illis prædicaretur Evangelium; unde si qui erant inter Gentiles credentes in verum Deum, justitiæ fontem, per illam disponi poterant, et ita justificari; ergo nec ex parte voluntatis credendum est aliquid necessarium ad justitiam ei defuisse. Probat hæc consequentia, tum quia unusquisque præsumitur bonus, si non probetur malus.

10. *Cornelius jam justus erat, cum ei Angelus apparuit, juxta D. Lucam.*—Maxime quia verba Lucæ hoc satis clare indicant, nam illum vocat *religiosum*, id est, ex fide verum Deum colentem, *timentem Deum*, id est, illum non offendentem, ille enim est verus timor Dei, qui homines ab illius offensione continet, et ita etiam videtur jam vox illa communi usu usurpata. Addit præterea audivisse ab Angelo, *eleemosynas suas et orationes ascendisse in memoriam Dei.* utique ut illi placitas, quod non haberent, nisi essent ab homine justo. Imo illud testimonium eum tam singulari favore et providentia concessum, satis profecto indicat non parvam hominis pietatem et justitiam.

Accedunt verba dicta Petro in visione : *Quod Deus purificavit, tu commune ne dixeris*; et maxime dicta ab ipso Petro ipsi Cornelio, postquam visionem ejus audivit : *In veritate comperi quia non est acceptor personarum Deus, sed in omni gente, quæ timet eum et operatur justitiam, acceptus est illi*. Sentit ergo Cornelium jam fuisse acceptum Deo, jamque fuisse operatum justitiam; hoc est autem esse justum.

11. *In idem consentiunt Patres.* — Neque ab hac sententia alienus est Chrysost. ibi hom. 12 dicens : *Sic et dogmata, et vita illius recta fuerunt*, utique ante Angeli visionem. Apertius Beda, ibi dicens per fidem bene operatum esse, et placuisse Deo, et apud illum Evangelii prædicationem meruisse. Sumpsitque ex Gregorio, quem refert in hom. 19 in Ezechiel., ubi declarat quod hom. 9 obscurius dixerat, antequam Cornelius fidelis esset, per bona opera meruisse audiri; per fidelem enim intelligit ibi Christianum, seu explicite credentem in Christum et baptizatum. Ita etiam de Cornelio videtur sensisse Hieron. ad Galat. 3, in principio; dicit enim consecutum esse spiritum per fidem et legem naturalem, sicut antiquos fideles. Nec Augustinus alienus est ab hac sententia, nam lib. 1 de Baptism., cap. 8. solum dicit a Petro didicisse fidem Christi; et lib. 4, cap. 21, clarius comparat Cornelium catechumeno *divina charitate flagranti*, eumque dicit, *ante Baptismum Spiritu Sancto fuisse repletum*. Sed hæc ad secundum tempus referri possunt. At inferius addit : *Non improbamus justitiam hominis, quæ prius esse cepit, quam conjungeretur Ecclesiæ, sicut esse cæperat justitia Cornelii, priusquam ipse esset in plebe Christiana*; loquiturque ante adventum Petri, nam subdit : *Quæ neque si improbaretur, dixisset ei Angelus : Acceptæ sunt elemosynæ tuæ, etc., neque si sufficeret ad capessendum regnum cælorum, ut ad Petrum mitteret moneretur*. Ubi non dicit fuisse necessarium ad justitiam, vel remissionem peccatorum, sed ad capessendum regnum cælorum, quia per se erat necessarius Baptismus, et jam venerat tempus quo gentibus prædicari oportebat.

12. *Pro eodem alia Augustini loca.* — Et hunc esse sensum Augustini patet ex dicta quest. 2 ad Simplician., ubi ait in Cornelio ante Baptismum non fuisse fidem quæ sufficeret ad regnum cælorum, et idem dicit de catechumeno, et tamen constat ante Baptismum fuisse Cornelium justum, ut ipse etiam affirmat quest. 84 in Levit., et 33 in Num., et

idem sæpe contingit in catechumenis, et in lib. 50 hom., in 45, alias 19, in appendice dicit : *Jam Deus mundaverat Cornelium, quando Petro in visione dixit : Quod Deus purificavit, tu commune ne dixeris*. Dicit autem mundasse secundum certum quemdam modum, quem modum ipse non explicat; videtur tamen intelligendus, vel quia justificatus fuit quasi in voto Baptismi, saltem implicito, ut exposuit D. Thomas 3 part., quæst. 69, art. 4, ad 2; vel quia illa non erat justificatio omnino perfecta quoad plenitudinem gratiæ, et remissionis pœnæ, sicut postea perfecta fuit per adventum Spiritus Sancti et per Baptismum, et ita potest facile aliis locis exponi.

13. *Faret etiam Cyprianus; et Tertullianus.* — Præterea favet huic sententiæ Cyprianus in lib. de Orat. Domini, versus finem, cum ait orationem Cornelii ex merito ejus ascendisse ad Deum, quia *cito orationes ad Deum ascendant, quas apud Deum merita nostri operis imponunt*. Et comparat illas orationes eum orationibus Saræ et Tobiæ, et verba Angeli loquentis ad Cornelium, eum verbis Angeli loquentis ad Tobiam, Tobiæ 12. Denique in eadem sententia videtur fuisse Tertullianus, lib. adversus Psychicos, cap. octavo, in fine, ubi laudans jejunium ait : *Cur triste, quod salutare? Docuit Dominus adversus diriora dæmonia jejuniis præliandum. Quid enim mirum, si eadem operatione spiritus iniquus educitur, qua sanctus inducitur. Denique ut in centurionem Cornelium, necdum tinctum, dignatio Spiritus Sancti cum charismate insuper prophetiæ festinasset, jejunia ejus legimus exaudita*. Ubi constat loqui de illo, etiam pro illo tempore quo illi apparuit Angelus, illam enim visionem vocat charisma prophetiæ, et tunc dicit jam festinasse ad illum Spiritum Sanctum.

14. *Confirmatur aliter prædicta prima propositio.* — Ex illo ergo exemplo nihil in præsententi probatur; Chrysostomus autem, et alii, qui existimant jejunia et orationem Cornelii mortua fuisse, recte confirmant assertionem; supponunt enim in homine non justificato posse esse opera bona, licet mortua; nam si non sint bona, non erunt mortua, sed mortifera, et ita ex appellatione hæc operum mortuorum etiam confirmatur assertio: constat enim dari talia opera, non solum ex communi consensu Theologorum, sed etiam ex toto cap. 2 et 3 Apocal., ubi id notat Ambrosius, cap. 3, dicens : *Qualibet bona mortua sunt, si charitas defuerit*. Idem significat Augustinus, lib. 4 de Gratia Christi, cap. 6, dicens opera

bona sine charitate facta non imputari; addit vero: *Si tamen bona dicenda sunt.* Quod infra explicabitur. Imo hic videtur esse sensus Pauli 4 Corinth. 13, dicentis: *Si dederò in cibos pauperum*, etc. Et ita communiter exponitur.

15. *Rursus aliter confirmatur.* — Præterea est aliud principium, unde veritas eadem confirmatur, scilicet, posse aliquem servare multa præcepta, licet unum transgrediatur, ut indicavit Jacob. cap. 2, dicens: *Qui totam legem servaverit, offendat autem in uno, factus est omnium reus.* Utique quoad inimicitiam cum Deo, non quoad malitiam; ergo inimicus Dei potest aliqua præcepta servare; ergo et opus bonum facere, nam qui male operatur, jam transgreditur aliquod præceptum. Sic etiam dixit Basilius, hom. 7 in divites avaros, multos esse qui cætera præcepta servant et elemosynas non faciunt, et subdit: *Quid his cætera virtutum diligentia prodest? Non propterea regnum Dei consequentur.* Erant ergo peccatores multas virtutes operantes. Ratio denique assertionis est, quia potest peccatum esse habitualiter in anima, et non influere in actum, qui postea fit, sicut potest quis habere habitum intemperantiæ, et actum aliquem temperantiæ facere, et sic de aliis; ergo non est cur homo peccator non possit bonum opus facere. Item in puris naturalibus id posset, ut suppono, et peccatum habituale non minuit vires, ut probavi, nec influit in actum, quia hoc pendet ex libertate voluntatis; ergo.

16. *Secunda propositio.* — Secunda propositio est, gratiam habitua'em, vel charitatem, non esse necessariam ad omne opus bonum. Est directe contra Baium, et quidem etiam contra Catharinum. Et videtur mihi æque tradita in Tridentino. Nam opera ante justificationem intelliguntur a Concilio, esse illa quæ fiunt ante infusionem virtutum et donorum, sine quibus non fit justificatio. Item quia hæc dona non dantur sine remissione peccati, ut infra ostendemus. Ratio autem propria est, quia duobus modis potest cogitari status gratiæ necessarius ad omne opus bonum, vel in ratione principii efficiens, vel in ratione finis, qui est principium quasi morale bene operandi; nec potest cogitari alia ratio necessitatis, quia solum impedimentum fomitis non obstat pro singulis operibus, ut dixi, et per se clarum est, et sæpe in sequentibus dicitur. Sed ex neutro capite illorum datur talis necessitas; ergo. Probatur minor quoad primam partem, quia gratia et sanctitas infusa non est principium efficiens per se requisitum ad bona

opera omnia; dantur enim bona opera ordinis naturalis, quæ non procedunt ab habitibus infusis; ergo propter illa non sunt per se necessarii. Item talia opera possunt esse in homine in puris naturalibus, et in quo non essent tales habitus. Et nunc homo justificatus potest facere talia opera non utendo habitibus infusis. Dantur præterea opera bona supernaturalia, quæ per auxilium et motionem Dei fieri possunt sine habitu, ut de metu gehennæ et de contritione imperfecta Tridentinum supra definiit. Et sic etiam communiter Theologi distinguunt opus procedens ab Spiritu Sancto movente et nondum inhabitante, vel procedens ab inhabitante Spiritu Sancto, et est distinctio conformis Augustino, ut infra suo loco videbimus; ergo propter efficientiam boni operis non semper est necessaria gratia habitualis. Altera vero pars de finali causa, probabitur plenius in sequentibus. Nunc probatur breviter, quia non est de necessitate boni operis ut fiat propter Deum summe dilectum per infusam charitatem, nullum enim est de hac re datum præceptum, ut probat D. Thom. 1. 2, quæst. 100, art. 10, et nos tradidimus in lib. 2 de Legibus, et patet breviter, quia tale præceptum, nec positivum est, quia nullibi scriptum aut traditum invenitur; nec naturale, quia nec mera ratio naturalis id dicit, cum non cognoscat dilectionem infusam, nec ipsam etiam naturalem dilectionem Dei super omnia, ut circumstantiam omnium bonorum præcipiat, ut paulo post ostendam. Nec etiam ratio fide illustrata illud dicit, quia etiam homo justificatus ad hoc non semper obligatur, ut est notum apud omnes, et ex sequentibus evidentius constabit.

17. *Rejicitur quædam expositio loci Isaia.* — Superest ad hæreticorum duo fundamenta seu loca adducta num. 3 respondere. Et imprimis ad locum Isaia, aliqui volunt, in sacrificio et solemnitatum celebratione, necessariam circumstantiam ad bonitatem moralem esse, ut sacrificans in gratia sit, propter sanctitatem operis, quod ad Deum placandum, vel gratificandum, vel aliquid ad eo impetrandum offert. Sed hoc, licet locum habeat in sacrificio legis gratiæ propter singularem ejus sanctitatem, non tamen in sacrificio communi, et ex natura rei. Nam in oratione de qua est eadem ratio, non est necessaria illa circumstantia, ut l. 1 de Orat., c. 24 et 25, dixi; nec est ulla ratio unde illa specialis necessitas in sacrificiis legis veteris inveniatur. Vera ergo responsio est, ibi non reprehendi sacrificia, sed sacrificantes, quia, sacrificiis contenti, alia

bona opera omittebant, totamque sanctitatem suam in illis sacrificiis collocabant, ut late dixi tom. 3, disp. 73, sect. ult.; et possemus nunc addere, juxta frequentem doctrinam Augustini, non placuisse Deo illa sacrificia, quia non fiebant ex amore justitiæ, sed spiritu servili, et pure propter vitandam aliquam pœnam, sine cujus timore non fierent. Nam lib. 1 contra duas epist. Pelagianor., cap. 9, dicit Augustinus Paulum, quamvis de se dicat secundum justitiam legis fuisse sine querela, nihilominus potuisse non placere Deo in illis operibus, quia spiritu servili illa faciebat; ergo multo magis id credibile est de illis magnis peccatoribus, quorum sacrificia Deus abominatur. Nihilominus tamen, si illa sacrificia offerrentur a peccatoribus sana intentione, et cum debitis circumstantiis, non essent mala, nec displicerent Deo ratione sui, vel in ordine ad aliquod supplicium, licet ratione personæ non essent accepta, nec fortasse fructuosa. Quod etiam per quamdam exaggerationem, et ad incutiendum timorem, potuit illis verbis indicari.

18. *Secundus locus ex Matthæo explicatur.* — Ad testimonium Matth. 7, generalis responsio esse potest, sensum illius pronuntiati Christi Domini: *Non potest arbor bona, etc.*, esse formalem, quia si ut bona operetur, facit fructus bonos, et non malos; et e converso. At vero si arbor sit libera, ut est homo, quia semper habet naturam bonam, potest, licet malus sit, non operari ut malus, sed ut habet voluntatem et rationem de se bonam. In particulari vero, juxta circumstantias loci, applicanda erit regula seu responsio ad varias arbores; ut in dicto loco Matth. 7 sermo est de fide, seu doctrina, et bona arbor dicitur sana doctrina; mala vero, doctrina hæretica seu falsa: tractat enim Christus de veris et falsis prophetis, et quia hi solent operari juxta fidem suam, ideo de illis dicitur ex fructibus esse cognoscendos, quia fieri non potest quin sæpe operentur juxta fidem suam, et tunc ex mente mala oriuntur actiones malæ, et ex bona bonæ. Aliquando vero arbor bona dicitur homo ratione voluntatis bonæ, et mala arbor ratione voluntatis vitiosæ, ut in simili loco Matth. 12 ait Christus: *Aut facite arborem bonam, aut facite arborem malam*, supponens hoc esse in libertate voluntatis, et tunc etiam optime applicatur regula, et ita eadem voluntas, quæ diversis rationibus bona et mala est, potest nunc bene, nunc male operari.

19. *Replicatur.* — *Solutio.* — Dices: ergo simpliciter verum non est arborem malam non

posse bonos fructus facere, nec etiam est verum ex fructibus cognosci talem arborem, quia potest esse mala, et non ut mala operari. Respondet Maldonat. ibi, impossibile ibi sumi pro difficili, et illud signum esse probabile, et moralem conjecturam, non evidens principium, quod est probabile. Dicit etiam potest illud *non potest*, non referri ad singulos actus, sed ad integritatem vitæ vel doctrinæ. Nam falsus propheta multa vera docebit; tamen si tota doctrina inspiciatur, semper aliquid falsum miscebit. Item hypocrita sæpe bene operatur et vere; tamen si observetur, tandem exhibebit fructum suæ hypocrisis. Et similiter, in nostro puncto, peccator interdum bene operari poterit; tamen si in eo statu perseveret, fructum malum proferet; et ratio est, quia licet causa libera possit diversis modis operari, tamen si male affecta sit, non poterit se continere, quin interdum ita operetur.

20. *Ad utrumque Catharini fundamentum responsio.* — Ad Catharinum respondemus falsum esse utrumque ejus fundamentum. Et de primo quidem, scilicet, de circumstantia ultimi finis, sæpius in sequentibus capitulis dicendum est; nunc breviter dicimus, ad bonitatem actus, non esse necessarium, ut fiat ab homine referente sua opera in Deum super omnia dilectum, per proprium actum præsentem, vel præteritum; alioqui peccaret etiam baptizatus et justus aliquid operans ante actum dilectionis Dei super omnia; peccaret etiam denuo peccator, qui ante justificationem et dilectionem Dei super omnia, attritionem, aut alium similem actum pœnitentiæ, orationis, vel eleemosynæ efficeret. Unde necessarium non est, ad bonitatem moralem actus, quod homo habitualiter diligat Deum super omnia, alias eadem absurda sequerentur; ratio vero est, quia talis relatio seu circumstantia nec ex natura rei necessaria est, nec per legem Dei positivam invenitur præcepta; sufficit enim ut actus sit de bono objecto propter honestatem ejus, et quod in eo finis ultimus non constituatur, nec alia prava circumstantia addatur, ut sit bonus simpliciter, et ut per se tendat in Deum ultimum finem, licet ab operante aliter non referatur. Alterum fundamentum ad Lutheranorum errorem accedit: nam ex illo inferri potest, vel omnia opera hominis lapsi esse peccata, vel saltem omnia opera hominis nondum justificati. Respondetur ergo, licet carentia justitiæ, id est gratiæ habitualis, aliquo modo voluntaria, sit peccatum, nihilominus non temper peccare, qui aliquo tem-

pore permanet in illo statu, et ideo non etiam peccare, etiamsi in illo statu aliquid boni operetur. Adde etiam justum sæpe operari bonum non ex habitu, quia potest esse justus non habens habitus acquisitarum virtutum, et operari actus ad illas tantum pertinentes; illi ergo actus non erunt ex habitu acquisito, quia non est; neque ex infuso, quia non est principium talium actuum: ergo etiam illi actus essent mali, quod absurdissimum est. Possunt autem illi actus dici fieri cum habitu gratiæ, seu infuso; hæc autem nec est propria circumstantia talis operis, nec conditio ad bonitatem ejus necessaria, quia nulla lege præcipitur, ut dictum est.

21. *Ad Baium responsio.* — Ad Baium etiam ex dictis facilis est responsio: nam imprimis distinctio illa de peccatore simul justificato, vel carente justitia, ut erronea rejicienda est, quia non datur talis status, veram justitiam cum mortali peccato conjungens, et est impertinens, quia ostensum est etiam sine habitu gratiæ posse peccatorem interdum bene operari. Deinde omnes propositiones relatæ ante ultimam, ex dictis explosæ sunt, gravissimosque continent errores, et plane voluntarios sine ullo fundamento. Ultima etiam, seu 38 propositio, quod duplex tantum sit amor, vitiosus, vel charitatis, falsa est quoad exclusionem, datur enim etiam amor naturalis Dei. Item amor spei, seu sanctæ concupiscentiæ ejusdem Dei, item amor boni honesti, vel in genere, vel in particulari, et omnes isti amores ex genere suo boni sunt, et possunt esse in peccatore sine circumstantia mala.

CAPUT V.

QUID AUGUSTINUS SENSERIT DE OPERIBUS FACTIS AB HOMINE IN PECCATO, SEU CHARITATE CAARENTE.

1. *Contra superioris capituli doctrinam varii Augustini loci.* — *Primus locus.* — *Secundus locus.* — Contra doctrinam capituli superioris afferri possunt multa ex Augustini doctrina, in quibus Baius suam sententiam fundat, quæ, quia difficultate non carent, et ad sequentia possunt esse utilia et necessaria, diligentius tractanda sunt. Primo ergo ob stare videtur quod in lib. 1 *Retract.*, cap. 13, ait: *Quantum est quod valet voluntas sub dominante cupiditate, nisi forte, si pia est, ut oret auxilium?* Sentit ergo impiam nihil boni posse, unde addit: *In tantum libera est, in quantum liberata est, et in tantum appellatur voluntas.*

Quid est autem esse liberatam, nisi esse justificatam, loquitur enim Augustinus de liberatione a peccato; unde subjungit: *Alioquin potius cupiditas quam voluntas appellanda est, dicitque hoc esse vitium a quo non sanamur, nisi gratia Salvatoris.* Et propterea solent ex hoc loco Augustini referri hæc verba: *Voluntas, sine charitate, non nisi vitiosa cupiditas, quæ in illo formaliter non invenio, licet aliquid simile significaverit lib. 3 de Doct. Christ., cap. 10, de quo loco inferius dicam.* Secundo, lib. de Morib. Ecclesiæ, cum cap. 14 dixisset, esse beatum, nihil aliud esse quam *inhærere summo bono, quod est Deus solus, cui inhærere non valemus, nisi dilectione, amore, charitate,* subjungit, cap. 13: *Quod si virtus ad beatam vitam nos ducit, nihil omnino esse virtutem affirmarem, nisi summum amorem Dei.* Et hinc virtutes omnes morales per Dei amorem postea definit.

2. *Tertius locus difficilis.* — *Quartus locus, sive argumentum ex ejusdem Augustini doctrina.* — Tertium et difficile argumentum est, quia interdum indicat Augustinus non posse esse opus bonum, quod sine charitate fit, ut lib. de Gratia et libero arbitrio, cap. 18, sic ait: *Præcepta charitatis tanta et talia sunt, ut quidquid se putaverit homo facere bene, si fiat sine charitate, nullo modo fiat bene.* Et lib. 1 de Gratia Christi, cap. 26: *Quod boni faceremus, nisi diligeremus?* Et infra: *Ubi non est dilectio, nullum bonum imputatur, nec recte bonum opus vocatur, quia quod non est ex fide, peccatum est.* Ubi consecutio litteræ petit, ut fidem vivam intelligat, et ideo subdit: *Et fides per charitatem operatur.* Et simili modo videtur loqui Prosper ad Demetrianum, non longe a fine, dicens: *Amare aliquid, quod non ex opere, et Spiritu Dei sit, non est casta dilectio.* Aliud etiam argumentum difficilins sumi potest ex doctrina Augustini, qui non aliter sentit de bonis operibus fidelium peccatorum, quam de bonis operibus infidelium; sed in infidelibus nullum agnoscit simpliciter opus bonum: ergo nec in fidelibus peccatoribus. Hoc autem argumentum pro capite 7 omitemus, quia ibi ex professo de infidelibus tractandum est, et consequenter dicemus an vera sit æquiparatio inter infideles et fideles peccatores quoad facultatem operandi bonum, et quomodo intelligenda sit.

3. *Pro locis Augustini exponendis notatio.* — Ad priora igitur testimonia, primum generatim dico, duo præsertim intendere Augustinum in sua doctrina, cum de operibus bonis

loquitur : unum est, hominem non adjutum divina gratia vix, aut nullo modo posse aliquid facere quod simpliciter bonum sit, id est, quod nulla malitia careat. An hoc intelligendum sit cum rigorosa distributione, ita ut nihil omnino possit homo facere sine gratia, quod peccaminosum non sit, dicemus postea cap. 6 et 7. Hic enim non est necessarium, quia de homine peccatore et fideli nunquam cum tanto rigore loquitur Augustinus. Aliud est, opus quod non fit propter Deum, vel ex charitate Dei, non mereri nomen virtutis aut boni simpliciter. In quo loquendi modo, aliud est opus non habere bonitatem aliquam sine admixta morali malitia, aliud est non mereri nomen boni simpliciter, seu quasi antonomastice. Nam hic posterior loquendi modus non in hoc fundatur, quod necesse sit, opus habere aliquam moralem malitiam, ut illi non tribuatur nomen boni, aut virtutis simpliciter, sed satis est ut opus non sit fructuosum ullo modo ad veram beatitudinem, ita ut neque proxime, neque remote ad illam conferat, neque ex se conferre possit, nisi aliqua bonitas altior illi addatur. Et hanc interpretationem sumo ex D. Thoma 1. 2, quæst. 65, art. 2, ubi Cajetanus recte illam explicat, dicens secundum moralem philosophiam censi virtutes, quæ, sub lumine supernaturalis sapientiæ spectatæ, non censentur virtutes simpliciter, nisi ultra suum gradum sublevantur; idem enim est de operibus bonis. Et quamvis D. Thomas non alleget prædicta loca Augustini, tacite illa exponit, et in fine ita declarat durio rem locutionem quam Augustino tribuit, circa illud : *Quod non est ex fide, peccatum est*, dicenti : *Ubi deest agnitio veritatis, falsa est virtus*; intelligit enim D. Thomas per falsam virtutem, non quæ sit ficta virtus, seu per hypocrisim, sed quæ est quasi umbra et nihil respectu Christianæ virtutis; sicut aurichaleum, respectu auri, licet verum metallum sit, et suum valorem habeat, comparatione auri dicitur falsum aurum. Sicut etiam Paulus dixit eleemosynam sine charitate nihil esse, licet morali modo aliquid sit. Hoc autem modo in multis locis esse locutum Augustinum sentit idem D. Thomas 2. 2, quæst. 23, art. 4, 7 et 8, et ex dicendis hic et sequenti capite planum fiet.

4. *Ad primum locum Augustini.* — In primo igitur loco, cum Augustinus interrogat: *Quantum est*, etc., non indicat nihil omnino esse quod voluntas peccatoris potest, sed parum esse, ac fere nihil, nisi per gratiam saltem moventem et auxiliantem juvetur, per quam

ait saltem orare posse, ut cætera possit. In quo potius indicat aliquid posse, etiamsi nondum per inhabitantem gratiam justificata sit. Unde cum ait : *Si pia est*, non oportet intelligi, id est, Si sancta est, sed simpliciter, Si ad pietatem evecta est, sive per integram sanctificationem, sive saltem per fidem. Nam per fidem potest orare, et, ut Augustinus in aliis locis docet, impetrare a Deo ut sanctificationem, quam per eandem fidem inchoaverat, ipsemet perficiat. Nam infideles, respectu fidelium, etiam peccatorum, solent impii vocari; omnes autem qui per fidem cultum veri Dei profitentur, pii censentur, imo etiam sancti in Scriptura interdum appellantur. Et eodem modo, per *voluntatem liberatam*, potuit intelligere Augustinus vel voluntatem jam sanctificatam et a servitute peccati plene liberam, vel etiam liberatam ex parte quoad illuminationem fidei, quæ licet non tollat culpam, liberat a cœcitate et ignorantia, quæ nunc est vulnus peccati. Et ideo recte dicit : *Voluntatem in tantum esse liberam*, utique a servitute, et vulnere peccati, *in quantum est liberata*, scilicet, vel inchoate, vel integre, et tanto etiam est validior, quanto magis liberata est. Quod autem ait voluntatem nullo modo liberatam potius vocari cupiditatem quam voluntatem, non est ita intelligendum, quasi voluntas a concupiscentia necessario feratur, neque quia non possit aliquid boni contra illam interdum agere, sed quia tam parum id est, ut quasi nihil quoad denominationem reputetur. Quando enim duo contraria mixta sunt in eodem subjecto, illud simpliciter denominat quod in potestate et actione aliud vincit. Sic ergo de voluntate non sanata et concupiscentiæ effrenatæ conjuncta Augustinus philosophatur.

5. *Ad secundum locum Augustini.* — In secundo autem loco evidenter loquitur de appellatione virtutis in significatione a nobis in secunda notatione declarata, neque aliter possent subsistere definitiones virtutum moralium, quas ibi tradit, ut per se notum erit intuenti. Alluditque illo loco ad verba Pauli 1 ad Corinth. 13 : *Charitas patiens est, benigna est, omnia suffert*, etc. Quæ omnia de operatione per imperium intelliguntur, ideoque Augustinus virtutes morales, Christianas et fructuosas per ordinem ad imperium charitatis, delimit, illudque ad earum absolutam perfectionem et fructuosam requirit. Et ita exposuit D. Thomas 2. 2, quæst. 23, art. 4, ad 1, et art. 7 ad 1. Simili fere modo potest exponi locus Prosperi, nam *casta dilectio* vocari potest illa que est

ex pura charitate, et propter Deum, et videtur ita se exponere Prosper, cum subdit: *De hac charitate sine dubio Apostolus loquebatur, et ipsius proprietates subtilissimis discretionibus explicabat, dicens: Si linguis hominum loquar, ubi constat sermonem Pauli esse de propriissima et supernaturali charitate. Specialiter autem vocat Prosper hanc dilectionem castam, quando excludit humanam præsumptionem, qua quis sibi attribuit talem dilectionem, et non gratiæ divinæ, et sic ait: Amare aliquid non ex Spiritu Dei, scilicet gratiæ, non esse castam dilectionem. Et sufficere tentatori castas et sublimes animas hac tentatione violasse.*

6. *Ad tertium et quartum locum Augustini ut quidam respondeant.* — Circa tertium et quartum locum paululum immorandum est, quia nonnulli exponunt Augustinum, ut in illo et similibus locis, per charitatem intelligat amorem honesti, quia honestum est, sive bonum virtutis ad Deum, sive ad proximum, sive ad opera pertineat. Hoc colligunt ex eo quod in eodemmet loco dicit Augustinus: *Gratia nos efficit legis dilectores, lex sine gratia prævaricatores* Ergo sentit idem esse operari ex charitate, quod operari ex dilectione legis, quæ eadem est cum dilectione virtutis. Videturque multum indicare hunc sensum Augustinus, l. 4 contra duas epistolas Pelagianorum, cap. 9, ubi solum illud opus bonum esse dicit, quod fit ex amore justitiæ, seu ex voluntate bene faciendi. Hanc ergo voluntatem vocavit alibi charitatem. Et hoc etiam modo distinguit operationem ex amore ab operatione ex timore omnino servili, quod continet manum, ut animum non avertat, quia si impune posset, contra legem faceret. Similia habet l. 2 contra easdem epistolas, c. 9, et l. de Spir. et Litt., c. 32. Quod si hæc expositio Augustini vera est, facile explicantur loca citata, nam sensus erit, nullum esse bonum opus, nisi quod fit ex amore honesti, seu virtutis, nam si fiat propter bonum non honestum, eo ipso opus virtutis non est.

7. *Non placet responsio prædicta.* — Verumtamen hæc expositio nullo modo accommodari potest priori testimonio, ex lib. de Gratia et libero arbitrio. Nam cap. 16, incipiens de charitate loqui, ita explicat quid per charitatem intelligat, dicens: *Istam charitatem, id est, divino amore ardentissimam voluntatem commendans Apostolus dicit: Quis nos separabit a charitate Christi, etc.* Et de hac consequenter explicat totum cap. 13 primæ ad Cor., et illud ad Galat. 1: *Per charitatem servite invicem;*

et id ad Coloss. 3: *Super omnia autem charitatem habentes, quod est vinculum perfectionis;* et alia quamplurima Sripturæ loca, in quibus evidenter sermo est de propria virtute charitatis, et de præceptis ejus diligendi Deum et proximum, et statim incipit in cap. 17 dicens: *Hæc omnia præcepta dilectionis, id est, charitatis, quæ tanta et talia sunt, ut quidquid se putaverit homo facere bene, si fiat sine charitate, nullo modo fiat bene. Hæc ergo præcepta charitatis inaniter darentur hominibus non habentibus liberum arbitrium; sed quia per legem dantur, et lex, sine gratia, littera est occidens, in gratia vero spiritus vivificans, unde est in hominibus charitas Dei et proximi, nisi ex ipso Deo?* Ergo, ex hoc contextu, planum est Augustinum ibi loqui de propriissima et formalissima charitate, suprema virtute Theologica. Quidquid ergo sit de aliis locis, de quibus statim, huic non potest accommodari illa expositio.

8. *Neque ei faret alter Augustini locus.* — Neque juvat, quod infra dicit Augustinus, *Gratiam nos efficere legis dilectores.* Quia vel gratia includit charitatem, quæ nos facit legis dilectores, imperando ejus observationem, vel si gratia pro auxilio gratiæ sumatur, dicitur nos facere legis dilectores, quia facit ut bene, id est, ex dilectione Dei præcepta servemus, juxta illud Joannis 14: *Si quis diligit me, sermonem meum servabit;* et iterum: *Si diligitis me, mandata mea servate.* Ubi constat aliud esse diligere, aliud præcepta servare, licet plenitudo legis dicatur esse dilectio, vel quia in illa virtute continetur, vel causaliter, quia dilectio secum affert observantiam præceptorum; et ideo e contrario dicitur supra: *Qui habet mandata mea, et servat ea, ille est qui diligit me;* ex effectu radicem colligendo, ut explicuit Joann., 1 canonic., cap. 5, dicens: *In hoc cognoscimus quia diligimus natos Dei, cum Deum diligamus, et mandata ejus faciamus;* ut Augustinus etiam eodem loco explicuit; in illo ergo loco, cum dicit, quod sine charitate fit non bene fieri, necessario exponendum est juxta secundum documentum supra positum, ut Theologico et Christiano modo intelligatur, id est, non fit perfecte et fructuose, plus enim est, quod Paulus de operibus sine charitate factis dicit, nihil prodesse, imo et nihil esse.

9. *Neque item locus alter.* — Neque magis potest illa expositio quadrare alteri loco ex lib. 1 de Gratia Christi. Nam in principio illius capituli conatur adducere Pelagium, ut fa-

teatur charitatem esse ex gratia Dei, et affert illud: *Scientia inflat, charitas ædificat*, 1 Cor. 8, ubi Paulus de propria charitate loquitur, neque enim ab illo vox illa aliter sumitur, unde subjungit: *Si quis diligit Deum, hic cognitus est ab eo*. De eadem ergo loquitur Augustinus, ut etiam consequenter satis explicat, dicens: *Tunc scientia non inflat, quando charitas ædificat. et cum fit, utrumque donum Dei est, unum minus, alterum majus*: alludens ad locum Pauli 1 Corinth. 13, ubi charitatem præfert fidei. Deinde, ut probet hanc charitatem nulla merita antecedere, addit: *Nam quæ merita bona tunc habere poteramus, quando Deum non diligebamus?* Loquitur ergo de charitate, quæ in Dei dilectione consistit, et affert locum 1 Joan. 4, ubi de eadem charitate et dilectione Dei aperte loquitur. Post hæc vero immediate interrogat Augustinus: *Quid autem boni faceremus, nisi diligeremus?* Quis ergo credat in his verbis loqui de alia dilectione quam in omnibus præcedentibus? Accedit quod infra in confirmationem adducit Pauli verba ad Gal. 5: *Fides per dilectionem operatur*; quæ de propria charitate sine dubitatione intelliguntur. Denique concludit: *Ac per hoc gratiam Dei, qua charitas Dei diffunditur in cordibus nostris per Spiritum Sanctum qui datus est nobis, sic confiteatur*, etc. Quid clarius? Si enim Augustinus ipse sic explicat charitatem, de qua tractat, et in prioribus et posterioribus verbis de illa loquitur, negari non potest quin etiam, in illa interrogatione, de eadem dilectione loquatur.

10. *Vera responsio ad locum Augustini.* — Quo sensu supposito, potest hic locus exponi juxta duo documenta in principio posita. Nam primo per illam interrogationem non est necesse significari nihil boni fieri sine charitate, sed parum fieri: nam statim etiam interrogat: *Aut quomodo bonum non facimus, si diligimus?* Et tamen non omnis qui diligit, semper bonum facit; tamen quia leve malum est, quod diligens perseverando in dilectione facit, et bona magna facere potest, quantum est ex vi charitatis, ideo locum habet illa interrogatio. Vel etiam potest secundo modo exponi satis ad mentem Augustini in illo loco, ut, *quid boni, idem sit quod quid fructuosum, et conferens ad vitam beatam*. Nam expresse infra concludit: *Sic confiteatur gratiam, qui teraciter vult illam confiteri, ut omnino nihil boni sine illa, quod ad pietatem pertinet, teramque justitiam, fieri posse non dubitet*. Illa enim limitatio et determinatio: *Quod ad pietatem, etc.*, non sine

causa additur ab Augustino, sed ut restringat sermonem ad opera bona, quæ justitiam apud Deum continent, quæ facile concedere possumus, vel non esse in peccatore, si sermo sit de justitia, ut meritum perfectum includit, vel si aliquo modo sit, esse modo imperfecto, et ita etiam esse ex aliquo imperfecto amore, vel ejus inchoatione, aut pia supernaturali affectione. Unde etiam notari potest non dixisse Augustinum ibi, sine charitate nullum bonum opus esse, sed *nullum bonum imputari, nec recte bonum vocari*. Utique quoad fructum, et secundum Theologicam existimationem, ut in secundo puncto notavi. Probatio autem, quam affert Augustinus, *Quia omne quod non est ex fide peccatum est*, habet specialem difficultatem, quam capite sequenti tractabimus; nunc enim, licet fateamur non esse efficacem, nihil præsentis instituto obstabit.

11. *Difficultas.* — *Solutio, ac pro solutione notatio.* — Sed, licet propter hæc testimonia non admittatur illa expositio, videndum est an phrasis illa, et locutio de charitate in illo sensu sit admittenda in aliis locis Augustini, nam in sequentibus sæpe necessitas hujus resolutionis occurret. Respondeo igitur nunquam Augustinum vocare charitatem, communem amorem operandi bene propter honestatem cujuscunque virtutis, sive naturalis sit, sive supernaturalis. Ut hoc probem, suppono charitatis nomen et tribui dilectioni Dei ad nos, et nostri ad Deum, et hic de priori non tractari. Notare autem oportet non omnem amorem Dei ad nos, vocari in Scriptura charitatem, sed illum quo nobis confert supernaturalia bona, vel ad illa nos diligit, ut ad Ephes. 2: *Propter nimium charitatem suam, qua dilexit nos, Deus Filium suum misit*; Rom. 3: *Commendat charitatem suam Deus*, etc.; et Jerem. 3: *In charitate perpetua dilexi te, ideo*, etc.; et 1 Joan. 4, cum dixisset: *Deus charitas est*, subdit: *In hoc apparuit charitas Dei in nobis, quoniam Filium suum unigenitum misit*. Et ita nunquam charitas tribuitur Deo respectu irrationalium, sed tantum respectu intellectualium, et maxime hominum, ut legenti Scripturam facile constabit.

12. *Quisnam amor in nobis sit charitas.* — Simili ergo modo charitas, ut est in homine, non solet in Scriptura significare, præsertim in novo Testamento, nisi dilectionem super-naturalem vel ad Deum, vel ad proximum, ut constat fere ex omnibus Epistolis Pauli: *Charitas DEI diffusa est in cordibus nostris*, Rom. 5; *Major horum est charitas*, etc., 1

Corinth. 13, et sic de aliis. Item ex tota 1 et 2 Epist. Joannis, et 1 Petri 4, ac Prov. 10 : *Charitas operit multitudinem peccatorum*. Itaque semper sumitur pro speciali dono et supernaturali; et ad summum extenditur ad significandum effectum, vel signa hujus dilectionis, ut observationem mandatorum, 1 Joan. 5 : *Hæc est charitas Dei, ut mandata ejus custodiamus*. Dixerat autem : *In hoc cognoscimus quia diligimus natos Dei, cum Deum diligamus, et mandata ejus faciamus*. Sic etiam Joan. 15 dicitur : *Majorem charitatem nemo habet, quam ut, etc.*, ubi martyrium vocari videtur charitas magna tanquam signum, et effectus ejus. Et sic etiam eleemosyna solet vocari charitas, Hebræor. 10, 2 Thessal. 1, et 1 Joan. 3. Sed in his omnibus nota est vulgaris analogia, qua nomen rei solet tribui effectui, signo, vel imagini ejus, proprie vero charitas supernaturalem et specialem Dei amorem, vel propter Deum, significat in divina Scriptura.

13. *Respondetur jam ad præcedentem difficultatem; primo ex ratione.* — Hinc ergo primam rationem sumo, quia illa acceptio charitatis pro communi dilectione veræ virtutis non est usitata in Scripturis; ubique enim pro dilectione supernaturali Dei aut proximi sumitur, et si aliquando attribuitur observationi præceptorum, vel actibus aliarum virtutum, ex circumstantia litteræ constat intelligi causaliter, seu imperative, vel tanquam signo, ut est vulgaris et communis sensus tam Patrum et interpretum, quam Scholasticorum, et specialiter D. Thomæ 2. 2, quæst. 23, art. 1, juncto 4. Deinde non invenimus aliquem ex Patribus usum esse nomine charitatis in alia significatione, neque apud antiquos Scholasticos talis distinctio in nomine charitatis invenitur; ergo non est verisimile Augustinum alicubi esse locutum de charitate in illa acceptione. Præsertim cum neque alii auctores ita Augustinum intellexerint, neque ipse Augustinus alicubi hoc significaverit; imo ubicumque de charitate loquitur, semper adjungat Scripturæ testimonia, quæ de propriissima et formali Dei vel proximi dilectione loquuntur, et non de quacumque dilectione, sed de supernaturali et infusa, ut patet libro de Nat. et Grat., cap. 42, et 15 de Trin., cap. 18, et sæpe alias.

14. *Secundo ex ipso Augustino.* — Præcipue vero lib. 3 de Doctr. Christiana, cap. 10. sic ait : *Charitatem voco motum animi ad fruendum Deo propter ipsum, et se, atque proximo propter Deum*. Et tamen ibidem dicit

Scripturam nihil præcipere, nisi charitatem. Non quia omnia præcepta sint formaliter de charitate, sed quia omnia in charitate radicantur, ut alibi dixit Gregorius. Et tract. 87 in Joan., ait idem Augustinus : *Charitas est fructus noster, hac diligimus Deum, hac diligimus invicem*. Et infra : *Unde Apostolus Paulus, cum contra opera carnis commendare fructum spiritus vellet, a capite hoc posuit: Fructus (inquit) spiritus est charitas; ac deinde cætera, tanquam ex isto capite exorta, et religata contexuit*. Et infra concludit : *Merito ergo Magister dilectionem sic sæpe commendat, tanquam sola præcipienda sit, sine qua non possunt prodesse cætera bona, et quæ non potest haberi sine cæteris bonis, quibus homo efficitur bonus*. Ubi adverte non dixisse, sine qua non possunt esse, sed non possunt prodesse; et cum dicit *solam charitatem præcipi*, non excludere cætera præcepta, quia exclusiva non excludit concomitantia, sed exaggerare excellentiam charitatis, et virtutalem continentiam omnium, quia, ut dicitur Sapient. 6., *Dilectio custodia legum est*. Sic etiam lib. 14 de Civ., cap. 7, dicit expresse, in Scriptura dilectionem seu amorem Dei et proximi propter Deum, charitatem vocari, quæ facit voluntatem bonam, et subdit infra : *Amor inhians habere quod amatur, cupiditas est; id autem habens, coque fruens lætitia; fugiens, quod ei adversatur, timor est; idque si acciderit sentiens, tristitia est*. Quod ideo adverte non esse novum apud Augustinum, loquendo de propria et vera charitate, eam tribuere suis effectibus, non quia illos proprie significet, sed locutione causali, quia in eis virtute continetur.

15. *Exponitur locus Augustini ex libro primo contra duas epistolas Pelagianorum allatus numero 6.* — Unde non erit, ut opinor, difficile inde ostendere nullum esse apud Augustinum locum, ubi nomine charitatis in illa alia significatione utatur. Nam imprimis in illo cap. 9, lib. 1 contra duas epist. Pelagianorum, non utitur nomine *charitatis*, sed *dilectionis, et delectationis justitiæ, et voluntatis beneficiendi, etc.*, quam distinguit a voluntate faciendi opus de se bonum et præceptum, ex timore servili et serviliter (ut aiunt), qualis est, quando non fieret præceptum, si posset impune. Ideoque facile concedi posset illum amorem justitiæ esse generalem affectum justitiæ prout est universalis virtus, et propter ipsam æquitatem et honestatem. Illa vero voluntas esse potest in peccatore, et videtur

esse actus in substantia naturalis, de se non pertinens ad specialem virtutem, si abstracte sumatur. Si autem sit particularis affectio ad honestatem hujus vel illius virtutis, ad specialem virtutem pertinebit, et tunc solum erit proprius charitatis, quando bonitas divina fuerit immediata ratio movens ad talem affectum seu dilectionem. Unde posset etiam ille amor justitiæ intelligi de affectu ad justitiam infusam, quæ consistit in amicitia cum Deo, quæ est charitas, juxta vulgarem sententiam Augustini: *Inchoata charitas, inchoata justitia est*, etc., de Natur. et Grat., c. 70. Et ita videtur exponere hunc amorem justitiæ idem Augustinus libr. de Spirit. et Litter., cap. 32, dicens: Illi qui sub lege sunt, et timore pœnæ justitiam suam facere conantur, non faciunt *Dei justitiam, quia charitas ea facit, qua non libet, nisi quod licet*. Et in fine capituli addit: *Hanc esse charitatem, per quam fides operatur et quam Deus diffundit in cordibus*. Sic ergo ille amor justitiæ erit vera charitas, quia ipsa charitas se ipsa diligitur, si perfecte diligatur, juxta doctrinam D. Thom. 2. 2, quæst. 35, art. 3, ubi etiam addit omnes virtutes posse ex charitate diligi, ut sunt aliquo modo bonum divinum et in Dei gloriam redundant. Sic ergo amor justitiæ erit charitas, quia est quidam Dei amor; talis autem amor, proprie ac formaliter sumptus, non est necessarius ad bene operandum, ut infra contra Gregorium ostendemus.

16. *Exponitur locus alter ex libro secundo ejusdem Augustini eodem numero sexto adductus.* — In altero vero capite 9, lib. 2 contra easdem epistolas, expresse dicit Augustinus cupiditatem boni esse bonam, et subdit probationem dicens: *Quid enim est boni cupiditas, nisi charitas?* Boni autem cupiditas non videtur esse aliud quam intentio boni honesti, seu desiderium recte operandi, et hanc vocat Augustinus charitatem. Sed imprimis dico Augustinum ibi etiam loqui de propria et specifica charitate infusa, loquitur enim de illa de qua Joannes, 1 canonic. cap. 4 (quem allegat), dicit: *Charitas ex Deo est*, de qua statim subdit: *Et omnis qui diligit, ex Deo natus est*. Quod non convenit nisi dilectioni infusæ ac perfectæ ipsius Dei. Unde nihil vetat quominus per cupiditatem boni ibi intelligamus cupiditatem summi boni, quod est DEUS, et talis cupiditas recte dicatur charitas, quia *cum Deus amatur ardentè, tunc certò et constanti gradu in ipsam vitam et beatissimam pergitur*, ut idem Augustinus dixit lib. de Morib.

Ecc. cap. 14. Et explicari potest ex his quæ ibidem, cap. 25, addit: *Summum bonum appetere est bene vivere, et nihil est aliud bene vivere, quam toto corde, tota anima, tota mente Deum diligere*. Sic ergo boni cupiditas idem est quod summi boni appetitio, per quam super omnia amatur, et hoc modo talis boni cupiditas proprie dicitur charitas. Præterea, si boni cupiditas latius sumatur pro cupiditate boni honesti, sic non dicitur illa cupiditas esse charitas, quia illa affectio universalis sit propria charitas, quasi formaliter et adæquate, sed quia in ipsa charitate per excellentiam et antonomasiam invenitur illa affectio et cupiditas boni; et quia charitas ipsa est virtualis affectio ad omne verum bonum honestum, et radix ejus. Nam sicut in aliis locis dicit solam charitatem præcipi, et non excludit alia, ita hic, licet charitatem nominet, non excludit alios actus concupiscendi bonum, sed illum ponit ut fundamentum omnium, et inter omnia eminentem.

17. *Pars altera loci explicatur.* — Quod vero inferius ait Augustinus: *Quando incipit fieri bonum, non amore justitiæ, sed timore pœnæ, nondum fieri bene*, facillimum est, quocumque modo ex supra dictis ibi sumat amorem justitiæ, sive universaliter pro amore honesti, sive per antonomasiam pro amore justitiæ apud Deum, quæ est charitas. Nam aperte loquitur de timore omnino servili, qui non excludit pravum affectum voluntatis, et ita non sufficit ad bene operandum. Si autem loquamur de timore pœnæ moderato et honesto, ille sine dubio sufficit ad bene moraliter operandum, licet non ad bene, id est, perfecte et meritorie per se, et quasi propria virtute. Ad alium denique locum, ex libro de Spirit. et Litter. jam responsum est, et ostensum, ibi etiam loqui Augustinum de vera et singulari charitate infusa, et merito illi tribuere affectum justitiæ, quia loquitur de justitia perfecta, et apud Deum, ut explicatum est. Alia vero difficultas restabat circa hæc loca Augustini, quia videtur omnia opera humana quasi adæquate dividere in ea quæ fiunt ex amore justitiæ, vel timore pœnæ omnino servili, seu in ea quæ fiunt ex propria charitate, et ex inordinata concupiscentia, cum tamen hæc non sint adæquate. Sed de hoc puncto dicemus melius in capite septimo.

CAPUT VI.

UTRUM GRATIA FIDEI SIT NECESSARIA AD QUODLIBET
OPUS MORALITER BONUM, ETIAM ORDINIS NATU-
RALIS FACIENDUM?

1. *Consulatur auctor in tractatu de fide.*—De necessitate fidei ad opera supernaturalis ordinis in libro sequenti dicturi sumus; quia vero etiam ad opera moraliter tantum bona ab aliquibus reputata est fides necessaria, saltem mortua, licet viva necessaria non sit, ideo quæstionem hanc proponimus, quæ in re coincidit cum alia quæ in materia de fide tractari solet, scilicet an omnia opera infidelium sint peccaminosa; illius tamen fundamentum proprium est hujus materiæ, et ejus resolutio necessaria ad sequentia, et ideo hic expedienda est. Duo ergo genera infidelium distinguere possumus; unum cognoscentium et colentium unum verum DEUM per lumen naturæ vel traditione humana cognitum, ut sunt pagani, et potuerunt esse aliqui naturales philosophi, et in hoc ordine Judæos et hæreticos numeramus; aliud ignorantium verum DEUM et vel idola colentium, ut gentes, vel nullum cultum Religionis habentes, ut Athei. Juxta hæc ergo duo genera infidelium duplex fuit in hoc puncto sententia.

2. *Prima sententia Hæreticorum, et aliorum, etc.*—Prima est nullum infidelem, etiam cognoscentem Deum, posse actum bonum efficere, sive per vires naturæ, sive per auxilium gratiæ. Hæc sententia tribuitur Leonensi in sermone quodam de Adventu, quem videre non potui. Ex Scholasticis vero nullus tam generaliter loentus est, præter Michaëlem Baium, cujus 26 propositio fuit: *Omnia opera infidelium sunt peccata, et virtutes philosophorum sunt vitia.* Lutherus autem, et sequaces a fortiori, hoc dicunt, eum de fidelibus, imo et justis id asserant. Fundari potest in illo Pauli Roman. 14: *Omne quod non est ex fide, peccatum est.* Quod de fide, Theologica virtute, et de omni opere facto ab homine illam non habente, sæpe intelligit Augustinus, cujus sententiam, et aliorum qui illum secuti sunt, capite sequenti expendemus. Citatur etiam pro hac sententia et expositione Gregor. Nyssen., lib. de Perfecti hominis Christiani forma. Sed in eo quo utor non inveni librum sub hoc titulo, sed tantum epistolam ad Harmonium sub titulo, Quid nomen vel professio Christiana sibi velit, ubi nihil de hoc dicit. Additur præterea illud ad Titum 1:

Infidelibus nihil est mundum. Et ad Hebr. 11: *Sine fide impossibile est placere Deo; ergo nec bonum opus est, quia si opus esset bonum, placeret Deo.*

3. *Rationes quæ excogitari possent pro prædicta sententia.*—Rationem pro hac sententia tam late sumpta nullam fere invenio, quæ in homine infideli agnoscente Deum locum habeat, et non in fideli peccatore: nisi fortasse quod infidelis non potest ullo modo diligere DEUM propter seipsum, fidelis autem peccator potest aliquo modo diligere DEUM propter se, saltem amore affectivo imperfecto, quod satis est ut referat suum opus in Deum modo sufficiente ad bonitatem moralem operis; infidelis autem id non possit. Alia item ratio posset excogitari, si quis diceret Deum, ratione fidei, præparare fidelibus etiam peccatoribus auxilia seu cogitationes congruas ad bene operandum, quas non præparat infideli, quamdiu fide caret.

4. *Secunda sententia Gregorii duo dicit.*—*Primum dictum libenter admittitur.*—*Secundam vero probat ipse Gregorius.*—Secunda sententia distinguit infideles agnoscentes, et ignorantes Deum, duoque affirmat. Unum est, infideles cognoscentes DEUM posse habere opera moraliter bona, saltem ex aliquo speciali auxilio Dei. Aliud est, infideles omnino ignorantes verum Deum, nullum opus morale omni ex parte bonum facere posse. Hæc fuit sententia Gregorii, in secunda, distinct. 39, quæst. 1, art. 2, corol. 3, cujus primum dictum nos libenter admittimus, quod infra probabimus. Secundum autem probatur ab eodem Gregorio, quia sine intentione bona non est opus bonum, et multo minus cum mala; sed in hujusmodi infideli non potest esse intentio bona; imo semper est mala; ergo et operatio semper est mala. Major constat ex illo Luc. 11: *Si oculus tuus fuerit simplex, totum corpus tuum lucidum erit; si autem nequam fuerit, etiam corpus tuum tenebrosum erit.* Ubi nomine oculi intentio significatur, ut omnes exponunt. Et ratio est, quia in moralibus finis dat speciem actui, et consequenter etiam bonitatem et malitiam, ut Gregorius supra late probat conclusione secunda, et nos nunc clarum et verissimum supponimus ex 1. 2.

5. *Prosequitur probando Gregorius.*—Probatur ergo minor quoad priorem partem, quia finis bonus requisitus ad bonitatem actus moralis non solum debet esse proximus, sed etiam ultimus, imo hic potissime, quia est causa prima in illo genere, et ideo maxime influit juxta

doctrinam D. Thom. 1. 2, quæst. 1, art. 4 et 5. Sed infidelis ignorans Deum non potest habere ipsum pro ultimo fine; ergo nec potest habere in suis operibus bonum ultimum finem. Consequentia clara est, quia ultimus finis honestus hominis tantum est Deus: nam summa perversitas est finem ultimum in creaturis constituere, quia creaturis utendum est, non fruendum, ut sæpe docet Augustinus, de Doctrina Christiana lib. 1, cap. 4, 5 et 22, et lib. 9 de Trinit., cap. 8, et lib. 83 Quæst., 30, et lib. 11 de Civit., cap. 25. Minor autem probatur, quia infidelis ignorans Deum non potest aliquod opus suum referre in Deum tanquam in finem, quia intentio, seu relatio in finem supponit cognitionem. Ex qua probatione obiter constat Gregorium loqui de relatione in finem facta per proprium actum ipsius operantis, sive relatio illa fiat per actum, qui simul sit cum opere relato, quæ solet dici relatio formalis, sive per præcedentem, quæ solet dici relatio virtualis, et in hoc sensu intelligit quod in majori sumit, relationem in ultimum finem bonum, esse necessariam ad bonitatem operationis. Quæ potest in eodem sensu suaderi, tum ex doctrina Augustini in locis proxime citatis, quia quoties aliquid amatur propter se, ita ut neutro modo ex dictis referatur in alium ulteriorem finem, eo ipso amatur ut finis ultimus, quia in eo sistit intentio operantis, et non ultra tendit; sed hoc modo amare creaturam perversum est; nam est illa frui. Item quia est illi attribuere quod est proprium Dei: solus enim Deus est ultimus finis verus, sicut solus est prima causa. Item quia alias liceret amare famam, divitias et voluptates propter se, et non referendo illas in alium finem meliorem, quod est omnino falsum. Sequela vero patet, quia magis distat qualibet creatura a Deo, quam illa bona fortunæ distent a bonis honestis creatis; ergo si licet bona creata honesta propter se diligere, non referendo illa in Deum, licebit quodlibet bonum creatum diligere propter se, non referendo illud in aliud bonum creatum.

6. *Prima assertio vera sententiæ, et Theologorum communis.* — Probatur primo ex doctrina Pontificum. — Secundo probatur ex Scriptura, exemplo centurionis. — Nihilominus dicendum est primo: ad bene operandum moraliter, et secundum rectam rationem, sine ulla prava circumstantia, non est simpliciter necessaria fides, ideoque infideles bene possunt interdum bene moraliter operari. Hæc est communis sententia Theologorum, et

certa divi Thomæ 2. 2, quæstione 10, articulo quarto, et ibi Cajetani et omnium; Magistri in 2, dist. 41, ubi Scolastici; Marsil., 1, quæst. 20, art. 3; Capr. in 2, dist. 28, quæst. 1, artic. 3, ad 8, cont. 2 conclus. Ubi idem admittit Gregor., quæst. 1, art. 3, ad 9; Soto, lib. 1 de Nat. et Grat., cap. 19 et 20; Vega, lib. 6 in Trident., cap. 11, et latius cap. 40. Probarique potest ex doctrina Pontificum contra Baium, nam, licet solum damnent affirmativam propositionem: *Omnia infidelium opera sunt peccata*, tamen loquuntur in eodem sensu in quo supra explicui Concilium Tridentinum, nam est eadem ratio. Deinde probari potest ex Scriptura, exemplo centurionis cujus eleemosynæ Deo placebant, antequam esset fidelis, ut Chrysostomus, Theophylactus et Oecumenius, capite 3 citati, exponunt. Verumtamen exemplum non probat, quia longe verius est ut supra dixi, Cornelium tunc fuisse fidelem: valet tamen argumentum ad probandam assertionem testimonio dietorum Patrum; supponunt enim fieri potuisse ut illa opera essent bona, et Deo placentia, etiamsi ante fidem essent facta. Item ad Roman. 1, dicitur philosophos fuisse inexcusabiles non servantes legem naturæ, unde fit potuisse aliquid boni sine fide facere, ut late deducit Fulgentius, lib. de Incarn. et grat., cap. 26. Loquitur tamen de cognoscentibus Deum. Et hoc modo posset afferri exemplum de obstetricibus, Exod. 1, quæ ex pietate et timore Dei reservarunt infantes Hebræorum, quorum opus in hoc bonum fuisse sentit Gregor., lib. 18 Moral., cap. 2; et D. Thom. 1. 2, quæst. 114, art. 10, ad 2, et 2. 2, quæst. 110, art. 3, ad 2. Et licet dicatur de illis feminis, timuisse Deum, non constat fuisse fideles; imo potius verisimile est fuisse idololatrias, sicut erant Ægyptii, et coluisse plures deos, licet forte aliquo modo unum creatorem cognoscerent, vel ex conversatione cum Hebræis, vel ex motione interna Dei, qui horrorem eis immisit tanti facinoris, et timorem mortis, si illud committerent, ut Abulensis conjectat. Et licet hoc sit incertum, nam a fieri potuit ut vere crederent in Deum, tamen nihil etiam repugnat ita accidisse, ut sine fide vera illud bonum opus facerent, propter quod temporale præmium a Deo receperunt, ut Scriptura significat.

7. *Probatur et exemplo Rahab.* — Simile exemplum est de facto Rahab recipientis exploratores. Nam, licet Paulus, Hebr. undecimo, illam numeret inter credentes, deo

*Fide Rahab meretrici non periit cum incredulis, excipiens exploratores cum pace, nihilominus verisimile est quod ait D. Thomas, Matth. 1, illam fuisse idololatram, quando excepit exploratores, et postea per eos divina gratia adjutam credidisse. Prius ergo bonum opus vel hospitalitatis vel defensionis innocentum operari potuit, quam fidem conciperet. Præterea Daniel consilium dedit Nabuchodonosor, ut eleemosynis redimeret peccata sua, Daniel. 4. Et licet verisimile sit illum jam concepissem fidem Dei, ut ex cap. 3, in fine, colligitur, fieri nihilominus potuit ut illa non esset firma et infusa fides, sed aliqualis opinio, et hæc suppositione data, adhuc consilium Danielis erat optimum, et supponebat tales eleemosynas potuisse honeste fieri. Imo et ita accidisse sentit auctor Imperfecti, homil. 26 in Matth., in fine, dicens: *Si Rex ille idolorum cultor poterat eleemosynis peccata redimere, cui non prosunt eleemosynæ?**

8. *Probatur tertio ex ratione.* — Unde possumus generale argumentum facere, nam pagani et hæretici, qui sine vera fide Deum cognoscunt, recte et sancte consulere possumus ut a Deo lumen veritatis postulent, et ut eleemosynas faciant, ut a Deo misericordiam impetrent. Item isti infideles incitari recte possunt et debent, ut parentes honorent, justitiam faciant, et alia præcepta naturalia servant; ergo possunt illa honeste facere, alias ad malum inducerentur. Denique sicut peccatores fideles ordinarie non excitantur immediate et subito ad veram contritionem, sed paulatim per dispositiones remotas, ita et infideles non immediate et subito moventur ad voluntatem credendi efficacem, quæ statim impetret actum fidei infusæ, sed paulatim etiam per dispositiones remotas trahuntur ad fidem per aliqua opera libera intellectus et voluntatis, ut per aliquam persuasionem de Deo, et de animæ immortalitate, per piæ affectionem ad honestatem et pietatem, etc.; ergo, sicut necessarium est in peccatore fidei, ut possit bonos actus efficere quibus paulatim disponatur, ita suo modo in his infidelibus, etiamsi tales actus fiant per gratiam auxiliantem, nunc enim abstracte loquimur de bonis actibus, quocumque auxilio fiant. Ratio vero a priori est, quia fides non est circumstantia boni operis moralis, nec cognitio ejus est necessaria ad proponendum objectum talis operis, vel finem honestum ejus, quia non oportet ut objectum moralis operis sit supernaturale, nec supernaturaliter cognitum. Quæ

est enim hæc necessitas? Et hoc ex sequenti assertione evidentius fiet, ubi etiam ex Patribus illam confirmabimus.

9. *Assertio secunda. Excluduntur probationes aliquot, quæ pro re afferri possent.* — Dico secundo: non solum sine fide, sed etiam sine Dei veri cognitione potest infidelis bonum aliquem moralem actum perficere sine ulla circumstantia mala, licet raro fortasse id faciat. Hæc sententia minus certa est quam præcedens, quia neque ex Scriptura aliquid de hoc certum habemus, neque in Conciliis. Nam Trid., sess. 7, canon. 7, solum damnat dicentes omnia opera quæ ante justificationem fiunt, esse peccata. Ubi per justificationem sine dubio non intelligit totum cursum justificationis a prima vocatione usque ad gratiæ sanctificantis infusionem, quia de tempore ante vocationem nunquam Concilium tractavit, nec erat necessarium ad doctrinam fidei, sed tantum docuit in capite quinto exordium justificationis a vocatione sumendum esse, et postea cap. 7 nullam mentionem facit operum ante vocationem ad fidem, sed tantum dixit: *Disponuntur autem ad ipsam justitiam, dum excitati et adjuti fidem ex auditu concipientes, libere moventur in Deum credentes*, etc. Deinde, licet Pius et Gregorius damnent universalem propositionem Baii, *Omnia infidelium opera esse peccata*, subsistere potest doctrina Pontificum, etiamsi isti infideles ignorantes Deum nullum bonum opus facere possent, quia ut illa universalis assertio falsa sit in quocumque gradu, satis est quod in eodem gradu sit verum, infideles cognoscentes Deum, posse sine peccato operari, vel, clarius loquendo, posse aliqua bona operari.

10. *Quæ soleant pro assertionem adduci ex Scriptura.* — Solet autem hæc assertio suaderi ex Genes. 12, ubi Pharaon restituit Abrahæ uxorem suam, quod fuit bonum opus ex dictamine rationis naturalis, ut sentit Ambrosius lib. 6 de Abraham, cap. 2; tamen locus non cogit, nam idem Ambrosius significat non caruisse Pharaonem aliqua cognitione et timore Dei. Adduci etiam solet factum quorundam Gentilium, de quibus dicitur, 2 Reg. 17, obtulisse David et sociis ejus frumentum et alia necessaria, ex pietate naturali, ut indicant illa verba: *Suspicati enim sunt populum fame et siti fatigari in deserto*. Deinde faciunt generalia verba Pauli ad Roman. 2: *Gentes quæ legem non habent, naturaliter ea quæ legis sunt, faciunt*. Nam multi ea extendunt etiam ad idololatrias verum Deum ignorantes, ut Ori-

gen. lib. 2, ibi; Chrysost., hom. 5, et Græci. Item Hieronym. ibi, et multi alii. Et quamvis nonnulli expositionem non admittant quoad Pauli sensum, doctrinam tamen non negant.

11. *Quæ ex Patribus.* — Pro eadem sententia referri potest Gregorius Nazianz., orat. 28 post suum reditum, quatenus ibi dicit homines fide carentes interdum propter hominum gloriam, interdum ductu naturæ, virtutem operari: nam in his posterioribus verbis videtur plane virtutem sine malo fine agnoscere, nam ductus naturæ non est mala circumstantia operis. Sicut alter Gregor. dixit hom. 27 in Evang.: *Sunt nonnulli qui proximos diligunt propter affectum cognationis et carnis, quibus in hoc sacra eloquia non contradicunt; sed aliud est quod sponte impenditur natura, aliud quod ex charitate.* Quasi dicat illud opus prius malum non esse, sed bonum, licet sit minus perfectum. Et uterque indifferenter loquitur de hominibus, in quibus tales affectus esse possunt, sive fidem habeant, sive non, et sive Deum cognoscant, sive ignorent. Et eodem modo accipiendum est quod dixit Chrysost., hom. 67 ad popul., initio: *Nec malus potest omnino malus esse, sed evenit ut et aliquid habeat boni, utique operis: nam subdit: Neque bonus esse omnino, sed et nonnulla solet habere peccata.* Et infra ait malum hic accipere illorum paucorum bonorum retributionem.

12. Præterea idem Chrysost., hom. de Fide et lege naturæ et Spiritu Sancto, circa principium: *Offendes (inquit) multos qui, quamvis sermonem veritatis non acceperint, et foris sint, operibus tamen pietatis (ut apparet) sunt conspicui; intenes viros misericordes, compatientes, justitiæ tacantes; sed nullos facientes fructus operum, quia nesciunt opus veritatis. Nam et hæc sunt opera bona. At necessarium est ut præcedat opus summum.* Per quod intelligit opus fidei, utique vivæ, ut statim exponit. Quia vero ibi addit Chrysost.: *Nihil extra fidem bonum, solet hic locus in contrarium citari, sed immerito; jam enim supra explicuit per opera bona intelligere bona fructifera: nam de operibus infidelium dixerat: Non facere fructum, utique spirituales: unde etiam subjungit: Steriles mihi videntur qui operibus bonis florent, et Deum pietatis ignorant, reliquiis mortuorum pulchre quidem indutis, sensum autem pulchrorum non habentibus. Quæ enim utilitas animæ mortuæ, Deo quidem mortuæ fide et ratione, bonis autem operibus restituit?* Et ex sequentibus est hic sensus evidentior. Sic etiam

auctor Imperfecti in Matt., hom. 26: *Gentiles (ait) humanitatis causa recipiunt peregrinos, licet non propter Christum.* Et infra dicit infidelem interdum operari bonum, cujus præmium accipit, non in alia vita. *Quia naturali bono motus fecit bonum, non propter Deum.* Quæ sunt optima verba contra Gregorium. Hieronymus etiam ad Gal. 4, non longe a fine, ait: *Multi absque fide et Evangelio Christi, vel sapienter faciunt aliqua, vel sancte, ut parentibus obsequantur, ut inopi manum porrigant, non opprimant vicinos, non aliena diripiant.* Videri tamen potest loqui de cognoscentibus Deum, quia prius dixerat: *Natura omnibus Dei inesse notitiam.* Sed revera generaliter loquitur, etiam de illis qui non credunt in eo, sine quo esse non possunt, ut infra dicit, et exempla quæ adducit, plane in omnibus locum habent; unde cum ait *omnibus inesse notitiam Dei natura,* si de vero Deo intelligatur, potentiam potius dicit quam actum: nam constat non omnes homines habere veri Dei cognitionem; et cap. 5, ait: *Quomodo fides sine operibus mortua est, sic absque fide, quamvis bona opera sint, mortua computantur.* Idem affirmat Ezech. 29, in fine, ubi de omnibus infidelibus aliqua ex parte legem naturalem implentibus loquitur.

13. *Ratione tandem probatur assertio, a posteriori imprimis. Deinde a priori.* — *Opus ex ratione naturali factum non necessario viliatur ex circumstantia.* — Ratione potest imprimis hæc sententia probari a posteriori eodem modo quo præcedens, quia alias nunquam potest gentilis ignorans Deum induci ad aliquid operandum, etiam in ordine ad fidem consequendam, quia semper induceretur ad malum. A priori vero evidens ratio est, quia homo habens perfectum usum rationis naturalis, etiamsi omnino Deum ignoret, potest operari aliquod bonum ex genere, ut dare eleemosynam, obedire parentibus, etc.; sed non necessario apponit malam circumstantiam, vel caret necessaria circumstantia ad bonitatem operis; ergo potest facere opus simpliciter bonum. Consequentia et major sunt notæ. Probatum ergo minor quoad priorem partem, quia cum homo sit liber, nihil est quod illum cogat ad circumstantiam pravam actui de se bono adjungendam. Præsertim si a Deo aliquo modo juvetur ut id non faciat, nunc enim abstracte loquimur de infideli operante, sive cum solo concursu generali, sive cum aliquo speciali; ergo, absolute loquendo, potest talis homo operari honeste, non addendo pravam cir-

cumstantiam. Deinde inductione ostenditur, quia de nulla circumstantia prava in particulari id potest cum probabilitate affirmari, ut facile posset per singulas discurrere ostendi. Sed quia de cæteris res est clara, id solum probatur de circumstantia personæ operantis, et de fine: nam si aliqua mala circumstantia esset necessaria, maxime altera ex his, nam de aliis nulla ratio dubitandi occurrit. De persona ergo operante patet; quia si ex parte illius daretur mala circumstantia, maxime quia est infidelis, et infidelitas est magna deformitas: at hæc conditio personæ operantis non est necessaria circumstantia operationis ejus, sed tantum concomitanter se habet, quia licet sit infidelis, non operatur ut infidelis, neque ex aliquo errore, sed ut naturali ratione utens. Sicut de peccatore fideli dicendum etiam est, licet malitiam habitualis peccati habeat, illam non esse circumstantiam boni actus, quia nullo modo in illum influit. Ex hoc ergo capite non datur necessario mala circumstantia.

14. *Neque necessario vitiatur ex fine.* — Et hinc facile etiam probatur altera pars de fine, quia licet aliquis sit infidelis, non necessario refert actum ad finem infidelitatis, ut recte dixit D. Thomas supra, sumens argumentum a contrario. Nam fidelis non necessario refert omnem actum suum ad finem fidei: ergo neque infidelis ad finem infidelitatis. Et declaratur amplius: nam licet infidelis sit idololatra, fieri potest ut nullum habuerit actum universalem, quo retulerit omnia in idolum, nam hic actus liber est, et nihil est quod necessitet gentilem ad habendum illum. Quin etiam fieri potest ut non diligat idolum super omnia, sed modo imperfecto et humano, vel tantum ex aliquo timore illum colat, vel etiam fieri potest ut sit in alio peccato mortali, quo aliquam creaturam diligat plus quam verum Deum, et plus quam idolum: ergo tunc non referet omnia sua opera in idolum, nec etiam referet in objectum talis peccati, quia non formaliter illud diligit super omnia, sed tantum imputative, neque habuit unquam formalem actum, quo omnia sua opera in illud retulerit. Sicut fidelis peccator, licet conversus sit ad creaturam, non tamen omnia propter illam operatur, neque talem relationem unquam habuit, et ideo operari potest sine formali vel virtuali relatione ad objectum sui peccati: idem ergo est de infideli, in quo talis relatio non præcessit. Veruntamen etiamsi præcesserit, non satis est, quia præcedens relatio universalis in aliquem finem non dat

cumstantiam sequenti operi, nisi influat in illud per moralem aliquam connexionem cum illo, ita ut actio præsens pendeat aliquo modo ex fine præcedentis relationis; nam si non pendet ab illo fine, ergo ille finis non est causa ejus: ergo non est finis: ergo non est circumstantia: ergo non dat malitiam præsentis actui, quantumvis finis ipse in se malus sit, quia in actum non influit. Necessaria est ergo connexio per virtutem aliquam relictam in aliqua intermedia motione, ut ex 1. 2 suppono, et in 3 tom. 3 p., disp. 13, sect. 3, id breviter attingi. In præsentem autem, licet talis relatio universalis præcesserit, fieri potest ut nulla ejus memoria postea occurrat, nec maneat aliquis effectus ejus, in cujus virtute, vel ex cujus motione fiat; ergo fieri potest actus, cujus ille malus finis circumstantia non sit. Sicut justus, qui prius retulit omnia opera sua in Deum, cum postea venialiter peccat, nullo modo ex vi prioris intentionis operatur; ergo non repugnat infidelem habere actum bonum, cui circumstantiam pravam positive (ut sic dicam) non adjungat.

15. *Prosecutio instituti superioris.* — Quod vero possit etiam talis actus fieri sine omissione circumstantiæ alicujus bonæ, et ad absolutam honestatem actus necessariæ, probatur, quia si actus sit ex objecto bonus, potest etiam propter honestatem ejusdem objecti fieri; ergo si non referatur ad extrinsecum finem pravum, eo ipso habet intrinsecum finem bonum et honestum: ergo ex parte finis non caret aliqua honesta et debita circumstantia; sed ex aliis circumstantiis nulla fingi potest necessaria ad honestatem actus, et quæ illi necessario desit: ergo nulla est ratio cogitandi talem malitiam in tali actu ex defectu honestæ circumstantiæ necessariæ. Prima pars antecedentis per se manifesta est, quia honestas objecti est bonitas sufficiens ad movendam voluntatem. Unde si actus consideretur, ut per naturalem rationem fieri potest, poterit etiam voluntas libera propter illam moveri ad operandum, et tunc objectum illud dicitur finis intrinsecus operis, quia per se movet ad sui amorem, et non ex ordinatione ad alium finem, et ita formaliter propter se diligitur, et non propter aliud. Prima vero consequentia, in qua sola est difficultas, probatur, quia species actus, quæ sumitur ex objecto honesto, seu fine intrinseco, quatenus honestus est, species est honesta, et veræ virtutis moralis, ut ex 1. 2 suppono, et sumitur ex Aristotele, lib. 2 Ethic., cap. 4; et aliunde nullum est præcep-

tum referendi omne tale bonum in alium finem meliorem, seu altiore, etiam ultimum, quia nulla ratione vel testimonio ostendi potest tale præceptum : quia relatio formalis seu actualis necessaria non est, ut Gregorius fatetur : nec de virtuali datum est præceptum, præter præceptum diligendi Deum super omnia, quod non obligat pro semper, et ideo priusquam per proprium actum impleatur, potest aliud opus fieri, quod ex objecto bonum sit, et neque illi amori sit contrarium, nec per illum referatur, quia non præcessit; vel certe, licet præcesserit, et per illum actum fuerit impletum naturale præceptum, potest nihilominus talis actus postea non influere in bonum opus subsequens, et ita nihil ad bonitatem ejus conferre. Confirmatur etiam ab inconvenienti, quia alias etiam fideles et justi frequenter peccarent ex defectu talis relationis, quod est absurdum, et sine majori probatione non est admittendum : et ex responsione ad argumenta Gregorii hoc magis constabit. Igitur ex parte finis non caret talis actus aliqua circumstantia necessaria ad absolutam bonitatem moralem. De aliis vero circumstantiis res est clara, et non indiget probatione, quia nec Gregorius, nec aliquis catholicus de illis dubitat; contra hæreticos vero dicentes deesse circumstantiam necessariam integritatis naturæ, jam satis dictum est, nam est merum commentum sine fundamento.

16. *Ad primum testimonium adductum numero secundo ex Rom. 14. — Rejicitur expositio.*— Superest ut argumentis aliarum opinionum respondeamus; et in priori proponebantur imprimis verba Pauli : *Omne quod non est ex fide, peccatum est.* Circa quæ (omitto sensum Augustini, nam de illius sententia in sequenti capite dicam) duo explicanda sunt; unum est, quid ibi significet *fides*; aliud est, quid sit *non esse aliquid ex fide*. De utraque enim parte duæ sunt expositiones. Prior intelligit vocem *fides*, de propria fide, seu credulitate; negationem autem intelligit, non mere negative, sed contrarie, id est, quod repugnat fidei, vel quod ex infidelitate nascitur, peccatum est. Quem sensum videtur ibi probare Hieronymus, et D. Thomas non improbat. Et in eo testimonio illud nihil obstat nostræ sententiæ; quia infidelis, etiamsi negative non operetur ex fide Christiana, potest non operari contra fidem, ut quando dat eleemosynam. Expositio tamen non quadrat intentioni Pauli, ut statim dicam. Et assertio ipsa limitatione indiget : quia aliquid potest

fieri in se quidem fidei contrarium, quod, si ignoranter fiat, peccatum non sit; ut, si infidelis invincibiliter putet usuram vel fornicationem non esse malam, et putet sine peccato fieri posse, aliquid quidem aget contra documenta seu præcepta fidei, et tamen non peccabit. Oportet ergo intelligi, vel quia opus a fide dissonans in se peccatum est, sive imputetur operanti, sive propter ignorantiam non imputetur : vel quia sermo est de opere repugnante fidei ipsius operantis, et cognoscentis per fidem opus esse contrarium divinis mandatis. At vero, Cajetanus ibi intelligens locum Pauli negative ut sonat, et de propria fide, restringit sermonem ad opera fidelium, et quæ debent per fidem regulari, quia materia subjecta talis erat : et sic etiam sententia est vera, quia opera, quæ ex fide pendent, ex illa regulari debent; quia si non ita fiunt, non possunt recte fieri; tamen non est ad mentem Pauli, ut constabit.

17. *Vera expositio.*— *Fides est conscientiae dictamen.*— Alia ergo et vera expositio est, ut fides ibi non credulitatem tantum, sed dictamen conscientiae significet. Hanc enim esse Pauli mentem ex discursu capitis facile intelliget, qui illud attente legerit. Nam in toto illo agit de modo sequendi dictamen conscientiae sine lapsu proprio, et sine aliorum offensione, sumpta occasione a controversia quæ tunc erat inter Judæos et gentes ad fidem conversos, circa legalium observationem, præsertim in usu ciborum prohibitorum in lege veteri; unde in principio sic incipit : *Infirmum in fide assumite, non cum disceptationibus cogitationum* : ubi *infirmum in fide*, videtur vocare Judæum jam credentem in Christum, nondum tamen satis instructum de cessatione legis, qui dici potest infirmus in doctrina fidei, vel quia aliquid in ea ignorabat, vel quia per errorem habebat timorem, vel scrupulum conscientiae, quia putabat sibi non licere quod jam non erat sibi prohibitum. Et de illo sic infirmo subdit Paulus : *Qui infirmus est, olus manducet* ; id est, abstineat juxta legem, unde consequenter dicit inferius : *Scio et confido in Domino Jesu, quia nihil commune (id est, prohibitum, vel immundum) per ipsum, nisi ei qui existimat quid commune esse, illi commune est.* Et postea monens Christianos gentiles, qui sciebant et credebant legem jam non obligasse, ut sua bona conscientia uterentur, sine offendiculo infirmorum fratrum, adjungit : *Omnia quidem sunt munda, sed natum est homini qui per offendiculum*

manducat. Ac tandem pro gentibus concludit : Tu fidem habes ? penes te metipsum habe coram Deo. Pro Judæis vero : Qui autem discernit (id est, quosdam cibos reputat mundos, et alios immundos) si manducaverit (utique immundos), damnatus est, quia non ex fide ; id est, non secundum conscientiam : et tunc subjungit : Omne autem quod non est ex fide, peccatum est. Constat ergo nomine fidei conscientiam significasse ; et significatio derivata est ex illa, qua fides pro fidelitate sumitur : nam operari contra conscientiam, videtur esse infidelitas quædam moralis, seu practicum mendacium ; et e converso, qui secundum conscientiam operatur, fideliter et veraciter se gerit. Atque hoc modo altera particula non ex fide, non solum contrarie, sed etiam negative, ut sonat, accipi potest, quia tenemur non solum non agere contra conscientiam, sed etiam non operari, nisi ex certa conscientia ; unde qui sine illa, vel cum conscientia dubia operatur, eo ipso male agit, propter periculum cui se exponit. Et hæc expositio communior est Patrum, præsertim Chrysostomi et Græcorum in Paulo, et Anselmi, et habetur etiam in Commentariis Ambrosii, et magis probat eam D. Thomas.

18. *Ad secundum testimonium ex epistola ad Titum eodem numero secundo allatum. — Ad primam et secundam rationem respondetur. — Ad rationem Gregorii. — Ad secundum testimonium ex Epist. ad Tit. 1, respondetur Paulum loqui de operibus quæ infideles, ut infideles sunt, operantur. Dixerat enim fideles non debere intendere fabulis et mandatis hominum aversantium se a veritate. Quod clarè intelligit, quando mandata ex tali errore procedunt, nam statim capite tertio admonet fideles omnes obedire principibus et potestatibus, licet tunc essent infideles, ut statim indicat, et ad Romanos 13. Item Petrus, 1 epist., cap. 2, servis præcipit obedire dominis, etiam discolis, utique quatenus possunt non male præcipere. Cum ergo Paulus ait non esse attendendum mandatis hominum aversantium se a veritate, intelligit quando aliquid secundum illam aversionem præcipiunt ; ergo in eodem sensu subdit : Omnia munda mundis ; coinquinatis autem et infidelibus nihil est mundum, quando, scilicet, secundum suam sectam et pravum errorem operantur ; et ideo addit : Sed inquinata est eorum mens, et conscientia. Sicut etiam non sunt omnia munda mundis, nisi formaliter, id est, quando munda conscientia, et ex illa operantur. Atque ita expo-*

suit Hieronymus ibi ; et D. Thomas ibi, et ad Rom. 14, in fine, atque etiam Augustinus, 31 contra Faustum, cap. 4. Alter vero locus Pauli : Sine fide impossibile est placere Deo, præcipue intelligitur de persona, quæ non potest esse grata Deo, neque non aversa ab illo, sine fide. Si vero extendatur ad singula opera, intelligitur opera sine fide facta non placere Deo in ordine ad meritum gloriæ, neque ad veram justitiam consequendam. Rationes denique pro illa opinione factæ nullius momenti sunt. Ad primam enim nego non posse infidelem diligere aliquo modo Deum propter se, ut auctor est naturæ, ut in sequentibus ostendemus. Nego item illum amorem esse necessarium ad bonam operationem, ut contra Gregorium statim dico. Ad secundam vero, dicitur esse gratis excogitatum, et sine fundamento, quia Deus de se nemini negat auxilia consentanea naturæ, sed solem suum oriri facit super bonos et malos, et pluit super justos et injustos. Præsertim quia, ut infidelis ducatur ad fidem, sæpe expedit ut habeat congrua auxilia, quibus aliquid in ordine ad illum finem operetur, quod esse debet bonum et non malum, ut constat.

19. Ad rationem Gregorii responsio patet ex probationibus nostræ assertionis. Ostensum est enim actum moralem viribus naturæ factum posse habere bonum finem intrinsecum ; nam hic est idem, quod objectum actus propter se intentum ; potest autem tale objectum esse intentum propter solam honestatem. Ostensum etiam est posse non habere malum finem extrinsecum, quia hoc pendet ex intentione operantis, quæ libera est, et potest illam non habere, neque formalem, ut per se patet, neque habitalem, quia potest vel non præcessisse talis intentio mali finis, vel, licet præcesserit, potest non influere in actum præsentem, imo per illum interrumpi. Sicut in homine justo, qui prius habuit voluntatem operandi semper propter Deum, et postea peccat venialiter, tale peccatum non refertur in Deum virtute prioris intentionis, sed potius per illud interrumpitur ; ita ergo e converso accidere potest in bono opere præsentem respectu prave intentionis universalis præcedentis. Neque etiam ille actus erit malus ex defectu relationis ad bonum finem ultimum, quia esto nec formaliter, nec virtute referatur ab operante, refertur (ut ita dicam) naturaliter, id est, actus ipse honestus natura sua tendit in Deum, et hoc sufficit ut actus sit honestus. Quia nec ex natura rei est necessaria alia re-

latio operantis per actum præsentem vel præteritum; nec etiam est specialiter præcepta. Nam quod Paulus dixit 1 Cor. 10: *Omnia in Dei gloriam facite*, vel est consilium, vel impletur faciendo opus de se tendens in gloriam Dei, saltem ut est auctor naturæ, quale est omne opus ex objecto honestum, etiamsi fortasse operans hoc ipsum ignoret, quia naturalis relatio non requirit cognitionem operantis, quia non est nisi intrinseca habitudo, et quasi innatus appetitus ejusdem actus.

20. *Quæ Gregorius in contrarium urgebat, dissolvuntur.* — Neque contra hoc urgent probationes Gregorii. Ad primam enim, simpliciter negatur objectum honestum propter se amatum, eo ipso quod ab operante non refertur ad ulteriorem finem, amari ut ultimum finem, sed solum sequitur amari proxime propter seipsum, quod potest sine peccato et sine deceptione fieri circa objectum creatum, quatenus per se honestum est et rationali naturæ conveniens; ut autem hoc magis declaretur, adverte duobus modis posse finem dici ultimum, negative, scilicet, et positive. Priori modo dicitur ultimus, quando ita sistit actus in tali objecto, ut non ultra tendat in verum ultimum finem, qui est DEUS, non solum per relationem formalem, vel virtuales operantis, verum etiam nec per naturalem tendentiam ipsius operis. Et hoc modo potest peccatum veniale dici sistere in suo objecto, tanquam in ultimo fine, saltem ipsius operis, quia talis actus nullo modo tendit in Deum, nec est ordinabilis in ipsum ut in ultimum finem, quod de bono opere dici non potest, ut declaratum est. Alio modo dicitur ultimus finis positive, quia non solum ipse non refertur in alium, sed omnia referuntur in ipsum, et hoc modo intendere objectum creatum ut ultimum finem, turpe est et grave peccatum: hoc tamen multo minus convenit actui morali, qui versatur circa objectum honestum propter seipsum, quia ex vi talis actus nec diligitur super omnia, neque etiam alia omnia diliguntur propter ipsum, ut facile constat ex ordinario modo operandi. Si autem contingeret talem relationem addi ab ipso operante, tunc actus fieret malus; nimirum si aliquis ita amaret objectum creatum, etiam honestum, tanquam summum bonum, et in illo ultimum finem constitueret. Quod in ipsis etiam virtutibus moralibus pravum est, ut recte docet Augustinus, libro decimo nono de Civitat., capit. vigeimo quinto, et serm. 13 de Verbis Apost., capit. 7. Quibus locis reprehendit Stoicos tan-

quam superbos et elatos, eo quod in suis virtutibus moralibus, seu in seipsis secundum rationem operantibus, suam beatitudinem constituerent, contempto summo bono quo solo beati esse possunt: et ideo dicit eorum virtutes non fuisse veras virtutes, sed potius vitia, quia inordinate suos actus et eorum objecta diligebant. Hic autem modus constituendi ultimum finem in objecto honesto non contingit ex eo solum quod propter se diligitur, nam revera ita diligibile est secundum rectam rationem, ut idem Augustinus tradit lib. 83 Quæstionum, quæst. 30 et 31; sed necesse est ut adjungatur actus quo vel excludatur relatio ad ulteriorem finem, vel quo bonum illud æstimetur, et ametur tanquam summum, et sufficiens ad propriam beatitudinem, omni alio superiori contempto. At vero si talis actus non intercedat, et bonum virtutis propter se simpliciter ametur et fiat, prout ratio dictat, intrinsece includit quasi naturalem habitudinem ad Deum ultimum finem, ut dictum est, et bene Augustinus dicta quæstione trigesima.

21. *Ad confirmationem.* — Et hinc etiam patet responsio ad confirmationem ultimam; negatur enim sequela, scilicet, posse quodlibet bonum creatum diligi propter se, sine aliqua culpa; sunt enim multa objecta creata quæ per se spectata non sunt honesta, ac subinde nec propter se diligibilia, ideoque inordinatum est talia propter se diligere, et hujusmodi sunt fama, divitiæ, et cætera. Neque in hoc fit recte comparatio inter bona creata inter se collata, vel cum Deo: quia licet in gradu bonitatis (ut sic dicam) magis distet quodlibet bonum creatum ab increato quam ab alio creato, nihilominus, in ratione boni honesti, et propter se diligibilis, majorem convenientiam habet aliquod bonum creatum cum Deo, quam cum alio bono creato: et ideo potest honeste diligi propter se unum bonum creatum, et non aliud, etiamsi neutrum possit diligi ut ultimus finis simpliciter et positive, seu super omnia, quia hoc est proprium boni increati.

CAPUT VII

DE OPERIBUS INFIDELIUM QUID AUGUSTINUS SENSERIT?

1. *Ex variis locis Augustini ostendi videtur ipsum pulasse omnia infidelium opera esse peccata.* — Multi et graves auctores affirmant Augustini sententiam fuisse, nullum opus bonum morale posse bene et honeste fieri sine fide,

ideoque omnia opera hominis infidelis, quantumvis bona ex objecto videantur, esse peccata; et revera sunt varia loca difficillima, in quibus hanc sententiam tradere lateque confirmare videtur. Præcipuus est in lib. 4 contra Julianum, cap. 3, ubi latissime hoc punctum tractat, sæpeque repetit virtutes, quæ in infidelibus esse videntur, non esse veras virtutes, et bona opera non bene ab eis fieri, et ideo simpliciter bona non esse, sed mala et peccata. Idem habet lib. 5 de Civit., cap. 12, et lib. 19, cap. 25, et lib. 13 de Trinit., cap. ult., ubi negat esse veras virtutes morales, nisi ad fidem referantur, quæ per charitatem operatur; et addit etiam illas non esse tales in hac vita, quin aliqua remissione indigeant; et lib. de Continentia, c. 13: *Absit (ait) ut continentiam, de qua Scriptura dicit esse Dei donum, etiam eos habere dicamus, qui continendo, vel erroribus serviunt, vel aliquas minores cupiditates ideo vincunt, ut alias expleant, quarum granditate vincuntur.* Idem sentit lib. 1 de Nupt., cap. 3, ubi negat pudicitiam conjugalem inter infideles conjuges esse bonam, et quod amplius est, negat esse Dei donum. Idem lib. 1 de Gratiâ Christi, cap. 26; latius Præfat. in Psalm. 31, ubi inter alia dicit: *Ha opera quæ dicuntur bona ante fidem, quamvis videantur hominibus laudabilia, inania sunt. Ita mihi videntur esse, ut celerrimus cursus præter viam; et infra, circa finem: Crede in eum qui justificat impium, ut possint et bona opera tua esse bona; nam nec bona illa appellaverim, quæ non prodeunt de radice bona; et infra: Attenduntur opera tua, et inveniuntur omnia mala, utique ante fidem; et infra: Nam quia fidem præcesserunt, nec bona vocanda sunt.*

2. *Et ex variis ejus principiis idem concludi videtur.* — Secundo, potest ostendi hanc fuisse mentem Augustini ex fundamentis ejus. Quæ primo sumuntur ex locis Scripturæ supra tractatis, videlicet ad Rom. 14: *Omne quod non est ex fide, peccatum est.* Quod de propria fide Theologali ubiquè intelligit, sentiens nullum actum simpliciter bonum fieri sine fide; imo e contrario actum sine fide factum semper esse peccatum. Item ad Hebr. 11: *Sine fide impossibile est placere Deo.* Quod de actibus sine fide factis interpretatur, et inde colligit non posse esse bonos, quia non possunt Deo placere, nam omne bonum et honestum placet Deo. Et Matth. 7: *Non potest arbor mala bonos fructus facere.* Nam per arborem malam intelligit voluntatem impiam, a qua nihil boni prodire potest; talem autem dicit esse voluntatem ho-

minis infidelis. Quartus est Matth. 6: *Lucerna corporis tui est oculus tuus; si oculus tuus fuerit nequam, totum corpus tuum tenebrosum erit.* Subjungit enim Augustinus infidelem habere oculum nequam, quia habet pravam intentionem in suis operibus.

3. *Et ex plerisque rationibus quas conficit.* — *Prima ratio.* — Et ex hoc ultimo loco sumitur prima ratio, qua utitur frequentius Augustinus, quia, ut opus sit bonum, non satis est quod sit de objecto bono, sed oportet ut etiam sit propter bonum finem; sed infidelis non habet bonam intentionem in suis operibus, ergo. Majorem probat multis modis, præsertim contra Julianum: *Nam ad veram virtutem (ait) non tantum intuendum est quid agitur, sed causa quærenda est cur agatur, quia virtus a vitio magis sine distinguitur quam officio.* Quod tanquam omnino verum supponimus. Minorem autem probat, vel quia infideles et gentiles, dum videntur operari virtutem, semper ducuntur aliqua humana concupiscentia, ut appetitu gloriæ, sicut de Romanis ait in libris de Civitate, vel affectu avaritiæ, vel timore alicujus pænæ temporalis, ut in libro de Continentia et sæpe alias dicit; vel quia infideles operantur in cultum et honorem suorum deorum; vel denique quia, licet demus operari interdum virtutem propter seipsam, etiam *illud est superbum*, ait in ultimo loco de Civitate, quia per talem virtutem non servitur Creatori.

4. *Secunda ratio.* — *Tertia.* — *Quarta.* — Atque hinc oritur altera ratio, quam sæpe etiam urget, quia opus hominis infidelis saltem caret fine debito, et ideo malum est; sic ait contra Julianum: *Virtutes, si quæ videntur esse in infidelibus, non esse veras, quia non ad suum referuntur auctorem.* Imo addit illis *utentes malos fieri, vel in hoc ipso peccantes, quod fidem non habentes, ad illum finem ista non referunt, ad quem referre debuerant: et similiter, lib. 5 de Civit., cap. 12: Non esse veram virtutem, nisi quæ refertur in illud bonum, quo melius non est.* Unde tertiam rationem insinuat contra Julianum, quia opus sine fide factum nec refertur in Deum, nec ei tribuitur: ergo non potest esse bonum, quia illud operans, in se, non in Domino, de illo gloriatur, eoque ipso malum est opus. Quarta ratio Augustini est, quia omnia opera infidelium sunt sterilia et infructuosa: ergo non sunt bona. Antecedens constat, quia tale opus non potest dare vitam, nec ad illam conferre, quia *justus ex fide vivit.* Unde nec justitiam dare potest, nec facere bonum operan-

tem; ergo est sterile opus: ergo non est bonum, quia fieri non potest (inquit contra Julianum) ut steriliter boni simus; et ideo, quidquid steriliter sumus, boni non sumus. Ubi talem rationem insinuat, quia homo tenetur nunquam steriliter operari, et ideo quoties steriliter operatur, non bene operatur.

5. Quinta ratio. — Quinta ratio, quam maxime urget in libro 1 de Nupt. et Concup., cap. 12, et dicto libro contra Julianum, quia non potest esse pudicus veraciter qui non propter Deum verum fidem connubii seruat, tacite inde inferens eandem esse rationem de quocumque bono opere morali. Antecedens probat, quia non potest corpus esse pudicum, quando animus a Deo fornicatur; sed animus infidelis a Deo fornicatur, juxta illud Psalm. 72: *Perdidisti omnes qui fornicantur abs te*; ergo non potest infidelis esse veraciter pudicus. Probatur consequentia, quia pudicitia est in animo, et animus fornicarius non potest esse pudicus. Ergo (ait Augustinus) *aut in animo fornicante pudicitia esse potest, aut in infideli pudicitia esse non potest*. Unde cum primum censetur omnino absurdum, secundum approbat.

6. Et ex nonnullis Patribus doctrine ipsius studiosis. — Tertio, principaliter ostenditur hanc fuisse mentem Augustini, quia ita intellexerunt posteriores Patres illius sectatores, imprimis Prosper, l. 1 de Vocat. Gent., c. 7, alias 3, ubi sic ait: *Et si fuit qui naturali intellectu conatus sit vitiiis reluctari, hujus tantum temporis vitam steriliter ornavit, ad veras autem virtutes, eternamque beatitudinem non profecit. Sine cultu enim veri Dei, etiam quod virtus videtur esse, peccatum est, nec placere ullus DEO sine DEO potest. Qui vero DEO non placet, cui, nisi sibi et diabolo placet?* Et libro cont. Collat., c. 22: *Nihil boni operis procedit ex mortuis, nihil justitiae procedit ex impiis*; et infra loquens de infideli, ait: *Bonis suis male utitur, in quibus sine cultu veri Dei impietatis immunditiasque convincitur, et infra ait: Nullum esse bonae voluntatis motum, nisi quem creaverit diffusur per Spiritum Sanctum charitatis affectus, quia sine fide impossibile est placere Deo, et omne quod non est ex fide, peccatum est, et in Christo Jesu neque circumcisio aliquid valet, nec nova creatura, sed fides, quae per dilectionem operatur*. Idem cap. 28 adhibet illam rationem: *Quia in his studiis (utique virtutum) non Deo, sed diabolo serviunt, utique infideles*; unde concludit *in impiorum animis omnia opera esse immunda, atque pollutata*. Fulgentius etiam, libro de Iucrat. et

Grat., cap. 52, sentit ante fidem non esse bona opera, et allegat illa duo loca: *Sine fide impossibile est placere Deo*; et: *Quod non est ex fide, peccatum est*.

7. Oppositum tamen revera sensisse Augustinum quatuor motivis ex ipso petitis ostenditur. — Primum motivum quod in contrarium allata ex Augustino de quolibet peccatore etiam fidei absurde procederet. — Idque sive consideretur utrorumque operantium indignitas. — His vero non obstantibus, persuaderi non possum Augustinum in ea fuisse sententia, propter ea quae subjiciam. Primo, quia Augustinus eodem modo loquitur de peccatoribus omnibus quo de infidelibus, et rationes ejus aequae de illis procedunt; sed non est verisimile sensisse omnia opera hominis in peccato existentis esse peccata, cum hic sit magnus error, et contrarium ipse saepe doceat, ut cap. 5 visum est; ergo nec de infidelibus id docuisse credendum est. Consequentia est clara, quia in eisdem locis de utrisque loquitur, et non potuit in eo sensu loqui de his, et in alio de illis. De minori autem satis dictum est in cap. 4 et 5. Probatur ergo major, nam in dicto capite 3 contra Julianum, generaliter ait: *Absit ut in aliquo sit vera virtus, nisi vere sit justus*. Et inferius, absolute negat veram virtutem, veram sapientiam, veramque justitiam esse posse in infidelibus impiis, et in hominibus diabolo mancipatis, quales sunt omnes in peccato mortali existentes; et in fine addit *sine Dei amore nihil esse bonum*. Quod si quis respondeat ibi per amorem Dei non intelligere Augustinum charitatem, sed amorem honestatis et justitiae cujuscumque propter rectitudinem ejus, sic friget ejus discursus tam in infidelibus, quam in fidelibus peccatoribus, quia etiam in infidelibus potest esse amor boni honesti propter honestatem et aequitatem naturalem, ex conformitate ad rectam rationem: ergo est par ratio in utrisque.

8. Sive fines propter quos operantur. — Denique ratio etiam sumpta ex fine aequaliter in utrisque procedit, nam etiam fidelis existens in peccato non operatur propter DEUM, quantum est ex formali vel virtuali intentione sua, quia non diligit DEUM. Quod si quis respondeat posse diligere aliquo modo imperfecto, contra hoc est, quia si ille modus tantum est implicitus in intentione boni honesti, etiam hoc modo possunt diligere Deum infideles; si vero sit sermo de amore formali ipsius Dei, vel intentione colendi DEUM, vel placendi illi, hae imprimis non est necessaria ad hominum opus, ut supra probatum est, et deinde etiam

potest esse in infidelibus, saltem hæreticis et paganis, ac philosophis verum Deum agnoscantibus. Denique si ratio illa Augustini, quod virtutes etiam propter se intentæ sunt superbæ, ita intelligenda est, ut amor virtutum moralium, temperantiæ, misericordiæ, et similibus, propter seipsas, non sit bonus, etiam in homine fideli talis amor erit malus, et tales virtutes Christiani hominis dicendæ erunt, *Servire temporalibus commodis, aut nulli volentes servire, ac propterea vanos esse, et non veras virtutes, quia veræ virtutes Deo servire debent, et propter ipsum operari*, sicut de virtutibus infidelium loquitur Augustinus; at incredibile est ita illum sensisse de talibus virtutibus Christianorum; ergo in alio sensu loquitur etiam de infidelibus. Idemque argumentum fieri posset de alia sententia quam ibi habet Augustinus, scilicet, quia si virtutes non prosunt ad beatitudinem veram, quam fides per Christum promittit, non sunt veræ virtutes; quod etiam in peccatore Christiano procedit, quia etiam non prosunt peccatori suæ virtutes. Quod si dicatur non prodesse actu ex impedimento personæ, de se autem fructuosas esse, et hanc esse mentem Augustini, contra hoc est, quia idem omnino est de virtutibus infidelium.

9. *Secundum motivum etiam ab absurdo, quia ex illa sententia inferretur sensisse Augustinum, esse infidelem incapacem bene operandi, etiam ex auxilio gratiæ.*—Secundo moveor, quia sequitur ex illa sententia, Augustinum sensisse hominem carentem fide, esse incapacem boni operis, etiam per auxilium gratiæ Dei inspirantis bonum et adjuvantis; consequens est incredibile: ergo. Minor videtur per se nota, quia ubique Augustinus magnifice sentit de divina omnipotentia ad trahendam hominis voluntatem, quo voluerit, quando voluerit, et quomodo voluerit, et eodem modo sentit de efficacia divinæ gratiæ: ergo non potuit sentire adeo esse infirmam et imbecillum, ut non possit hominem infidelem inducere ad aliquid bonum operandum, etiamsi in infidelitate sua permaneat. Et præterea est optima ratio, quia alias nunquam posset Deus hominem infidelem movere specialiter ad aliquid operandum, etiam in ordine ad fidem, ut paulatim illum ad eam perducat, quia moveret illum ad opus pravum: consequens est per se absurdum, et valde alienum a doctrina Augustini. Denique statim afferemus loca in quibus Augustinus contrarium expresse docet. Probatur ergo sequela, quia si homo perma-

net in infidelitate, etiamsi moveatur a Deo specialiter ad eleemosynam faciendam, nunquam illam faciet propter DEUM; quia ignorat se moveri a DEO, vel etiam ipsum Deum; ergo non bene operabitur. Item semper animus ejus fornicatur a DEO: ergo licet moveatur ad servandam pudicitiam conjugalem, nunquam erit vere pudicus. Item etiamsi ex tali auxilio operetur, ejus opus erit sterile in ordine ad veram felicitatem consequendam, ad summumque deserviet ut minus puniatur infidelis in die judicii, quod non satis esse ad opus bonum indicat eodem loco Augustinus: ergo si verba ejus in hoc rigore sumantur, ut talia opera moraliter bona non sint, et ad hoc tendant rationes ejus, dicendum est idem sensisse de operibus infidelium factis ex auxilio gratiæ, quod, ut dixi, et falsum et incredibile est.

10. *Tertium motivum etiam ab absurdo, quia enerves essent Augustini rationes pro affirmante sententia, ut jacet.*—Solvitur ratio prima, secunda, tertia. — Tertio moveor, quia si sententia illa in eo sensu accipitur, rationes Augustini frivolaæ sunt, et tanto ingenio indignæ. Et imprimis loca Scripturæ parvi momenti sunt, jam enim in capite quarto ostendimus verum sensum illorum longe alium esse. Deinde prima ratio capite præcedenti soluta est, ibi enim declaravimus quæ intentio bona sit necessaria et sufficiens ad moralem honestatem boni operis, et quomodo esse possit in infideli, etiam non cognoscente DEUM. Neque oppositum probat inductio Augustini, quia imprimis non est necesse ut operetur propter idolum, ut supra declaravi. Deinde intentio vanæ gloriæ, vel alterius similis cupiditatis inordinatæ, licet fortasse sæpius moveat infideles, non habet necessariam connexionem cum infidelitate; imo nec necessarium est ut semper intercedat intentio commodi temporalis proprii, sed potest honestas virtutis sufficienter movere. Quin etiam, si intentio sit alienjus commodi temporalis, non ideo opus ex necessitate malum est, quia potest illa commoditas esse conveniens naturæ propter seipsam, et per rectam rationem regulari, quod satis est ut possit honeste intendi ut proximus finis per se diligibilis, et ut actio per se tendat in Deum, licet ab operante non referatur; et ita solvuntur secunda et tertia ratio de carentia relationis in debitum finem, vel in Deum, quia non debetur actioni morali aliud genus relationis operantis in beatitudinem, vel in DEUM, vel in alium extrinsecum finem, quan-

do intrinsecus est per se appetibilis secundum rectam rationem.

11. *In carentia relationis in Deum non est superbia.* — Quod autem Augustinus significat, talem voluntatem esse superbam, simpliciter intellectum, incredibile est et alienum a sententia Augustini, sæpe docentis esse honestum, propter honestatem vel propter observantiam legis operari. Neque ulla umbra superbiæ in hoc ostendi potest, quia, quod operans illud non referat in Deum, potest esse ex ignorantia, vel sola incogitantia, sine ulla specie superbiæ. Quod autem homo sibi tribuat tale opus, et de illo in se gloriatur, etiam non est necessarium, quia potest nihil de hoc cogitare, neque etiam scire vel inquirere qua virtute naturali aut divina tale opus fiat. Et quando in hoc homo aliquid erraret, vel peccaret, esset per se novum peccatum, habens pro objecto, et materia circa quam versatur, aliud opus bonum, non tamen esset circumstantia ejus, et ita non tolleretur ab illo bonitatem, ut ex generali doctrina de bonitate moralium operum constat.

12. *Solvitur quarta ratio.* — Quarta item ratio de operis sterilitate, si intelligatur de sterilitate actuali (ut sic dicam) in ratione meriti vitæ æternæ, aut alicujus gratiæ supernaturalis, falsum est quod assumit, sive intelligatur de merito condigni, sive de congruo, quia neutrum meritum actuale est de necessitate boni operis moralis virtutis acquisitæ, seu ordinis naturalis; quia hæc ratio meriti est superioris ordinis, unde ex natura rei non requiritur ad bonitatem moralem ordinis naturalis, neque etiam datum est divinum præceptum speciale operandi semper cum aliquo tali fructu, vel merito boni operis; nulli enim tale præceptum scriptum legitur, vel traditum refertur; et quamvis tale præceptum datum esset, posset ignorari invincibiliter, maxime ab infidelibus, et ita, illo non obstante, possent interdum sine morali defectu operari. Si vero intelligatur ratio de sterilitate potentiali, ut sic dicam, quæ intelligitur esse in opere, quod non tantum non prodest ad vitam, verum nec prodesse potest, hæc sterilitas non invenitur nisi in operibus malis, quæ a Theologis dicuntur mortifera, late sumpto vocabulo, ut comprehendat etiam venialia peccata.

13. *Quomodo infidelium opera honesta sterilitate carcant.* — Nam si opus tantum est mortuum, licet tunc ex accidente impedimento non prohit, de se posset prodesse, ideoque non potest dici sterile saltem quoad po-

testatem seu capacitatem. In hoc autem sensu facile negabitur omnia opera infidelium esse sterilia, quia possunt esse aliqua bona, quæ de se possent esse utilia ad vitam æternam, si aliæ conditiones concurrerent. Imo etiam de facto possunt aliqua esse talia, ut remote saltem ad fidem disponant, vel aliquod impedimentum removeant, quæ non est parva utilitas. Denique, si talia opera sint ordinis naturalis, ut habeant proportionatam honestatem, satis est quod sint de se consentanea naturali felicitati, et apta ut in gloriam Dei, auctoris naturæ, redundent, ac denique ut sint convenientia naturæ rationali, quatenus recta ratione utitur. Nam propter hanc etiam rationem sufficienter sunt laude digna, et apta ad aliquod meritum, nisi aliud obstat, juxta doctrinam divi Thomæ, prima secundæ, quæstione vigesima secunda; ergo talis actus non est ita sterilis ut propterea possit malus reputari.

14. *Solvitur quinta.* — Quinta denique ratio æque procedit in fidei peccatore ac in infidei, quia omnis peccatus mortaliter dici potest fornicari a Deo, et illa phrasi utitur Scriptura respectu omnium peccatorum, et maxime fidelium, qui magis tenentur fidem Deo servare. In omnibus vero ratio illa mirabilem continet verborum æquivocationem, quia ex significatione propria *animi fornicarii* fit transitus ad metaphoricam, et ita syllogismus fit in quatuor terminis. Alia est enim carnalis fornicatio, alia spiritualis. Prior est in animo et corpore impudico carnaliter, id est, committente talem speciem intemperantiæ. Posterior vero fit per omne peccatum mortale, quo peccans ita conjungitur creaturæ, ut propter illam deserat DEUM. Priori ergo fornicationi carnali opponitur pudicitia etiam corporalis, et hoc modo verum est in animo carnaliter fornicante, pudicitiam illi oppositam esse non posse. Alteri vero fornicationi spirituali non semper opponitur pudicitia corporalis, sed spiritualis, quæ dici potest innocentia, aut munditia quedam apud DEUM. Et ideo non repugnat animum esse fornicarium hoc modo spirituali, respectu Dei, et nihilominus esse pudicum corporaliter respectu conjugis. Sic ergo idololatra est fornicarius Deo, quia illi fidem non servat, et potest servare uxori torum inviolatum et fidelem, et sic esse corporaliter pudicum. Et declaratur, nam licet omne vitium sit contrarium DEO, non omne vitium est omni virtuti contrarium; ergo licet animus per unum vitium fornicetur contra Deum, potest in alia virtute non offendere Deum, vel proxi-

mun; ergo licet homo sit fornicarius Deo per infidelitatem, vel simile vitium spirituale, potest non carnaliter fornicari, neque in illa materia temperantiæ Deum offendere.

15. *Quartum motivum directe ostendens ex locis Augustini, ipsum non tenuisse illam sententiam affirmantem.* — Quarto moveor, quia in multis locis Augustinus admittit aliquod bonum opus in homine infideli, licet dicat illud esse Deo, ut principali auctori, tribuendum, quod nunc non refert, quia non tractamus quibus viribus possit fieri talis actus ab infideli, sed absolute an interdum fiat? Probatur ergo assumptum, primo, ex libro primo de Gratia Christi, capite vigesimo quarto, ubi verba illa, Esther decimo quinto: *Convertitque Deus spiritum Regis in mansuetudinem* (quæ dicta sunt de Assuero gentili et idololatra), intelligit de efficacia divinæ potestatis, *ad operandum in cordibus hominum, non solum veras revelationes, sed etiam bonas voluntates*; ut in fine capitis concludit. Inde vero non satis probatur illum affectum Assueri fuisse bonum ex omnibus circumstantiis, sed ex objecto solum. Potest enim Deus efficaciter convertere voluntatem hominis ad objectum bonum, etiamsi præsciat hominem adhibiturum in suo affectu malam circumstantiam. Est autem verisimile in illo casu nullam fuisse ex parte Assueri, gratisque et temere judicaretur ab aliquo, in eo actu peccasse.

16. *Probatur secundo.* — Secundo, idem probatur ex Augustino, epistola 130, ubi de quodam Polemone gentili, prius ebrioso et luxurioso, dicit, persuasione Xenocratis philosophi, mutatum esse ad temperantiam et continentiam servandam, et in hoc fuisse meliorem factum, licet verum Deum non cognosceret: *Nam si illum cognosceret, et pie coleret* (ait Augustinus), *continentia illa non tantum ad hujus vitæ honestatem, sed etiam ad futuræ immortalitatem illi valuisset.* In quo aperte significat illam continentiam vere fuisse bonam et honestam, licet ad meritum æternæ vitæ non valeret.

17. *Probatur tertio.* — Tertius et similis locus est apud Augustinum, libro de Patientia, cap. 26, ubi dicit, si quis Schismaticus, ne abneget Christum, multa patiat, nullo modo culpandum esse, nam illa patientia laudabilis est, et ad tolerabilius judicium sustinendum deservit, licet non ad vitam æternam: et ita exponit Paulum, 1 Corinth. 13; et idem intelligit de hæretico qui per errorem separatur ab Ecclesia, et tamen aliquid credit pro

quo patitur, ut capit. 27 declarat. Et adeo censet illam qualemcumque fidem, quam retinet, et patientiam moriendi pro illa esse bonam, ut dicat *esse donum Dei*, non quale est in justis, sed quale esse potest in malis, ut capite vigesimo octavo declarat: hæreticus autem infidelis est; ergo in infideli potest esse opus bonum saltem ex dono Dei. Et quamvis hæreticus Dei cognitionem habeat ex revelatione aliquo modo derivatam, nihilominus eadem ratio erit de infideli cognoscente verum DEUM quocumque modo. Imo etiam potest in quocumque infideli versari quæstio similis illi quam ibi tractat Augustinus, scilicet, si quis, non habens cognitionem veri DEI, tormenta sustineat, ne fornicetur, vel ne falsum testimonium dicat, an illa patientia laudanda sit; nam sine dubio est laudanda, nam ille prudenter eligit mortem propter luxuriam vel injustitiam vitandam, cum eligat minus malum ad vitandum majus. Unde consequenter potest etiam quæri an illa patientia sit donum Dei, et juxta principia Augustini, ibidem affirmandum est; ergo doctrina illa in omni homine recta ratione utente, quantumcumque infideli, locum habet.

18. *Probatur quarto.* — Quartus et notandus est locus in l. de Spiritu et Litter., c. 27, ubi tractans Augustinus locum Pauli ad Rom. 2, *Gentes quæ legem non habent, naturaliter ea quæ legis sunt, faciunt*, prius illum interpretatur *de gentibus jam conversis ad Christum*, et postea subdit: *Si autem hi qui naturaliter ea quæ legis sunt, faciunt, non sunt habendi in numero eorum quos Christi justificat gratia, sed in eorum potius, quorum etiam impiorum, nec Deum verum pie veraciterque colentium, quædam tamen facta, vel legimus, vel novimus, vel audivimus, quæ secundum justitiæ regulam non solum vituperare non possumus, verum etiam merito, recteque laudamus.* Ubi licet quoad locum Pauli loquatur sub conditione, et priorem sensum ibi magis probet (de quo postea), tamen quoad rem ipsam aperte fatetur in his impiis inveniri quædam opera laudanda, et nullo modo vituperanda, ac proinde omni ex parte bona; subjungit vero statim: *Quamquam si discutiatur quo fine fiant, vitæ invenientur quæ justitiæ debitam laudem defensionemque mereantur.* Verumtamen etiam hæc verba nostram sententiam confirmant; ex illis enim habemus, solum ex parte finis ponere Augustinum defectum in operibus infidelium de se et ex objecto bonis; et illum defectum ponere non ut perpetuum et infal-

libilem, sed ut ordinarium et regularem. Ad quod expendimus illam particulam *vix*; et cap. 28 non improbat dictam expositionem dictorum verborum Pauli, scilicet, in hominibus impiis non esse deletam naturam: *Et ideo dici posse, etiam in impietate vitæ suæ facere aliqua legis, vel sapere.* Præterea expendi potest quod idem Augustinus ait lib. de Bono conjug., cap. 6: *Conjugalis concubitus, filios procreandi gratia, non habet culpam.* Quam sententiam generaliter profert, et vera est tam in infidelibus quam fidelibus; possunt autem conjuges infideles, etiamsi Deum ignorent, propter illum finem coniungi, et ille finis sufficiens est ad honestandum illum actum, ut ex ipso Augustino, dicto capite 3 contra Julian. in fine, sumitur; ergo nihil repugnat, ex sententia Augustini, fieri talem actum ab infidelibus sine ulla culpa. Denique lib. 3 Hypognost. (si Augustini sit opus), c. 4, generaliter docet posse hominem infidelem per lumen rationis aliqua opera hujus vitæ facere, non tantum mala, sed etiam bona: et circa illa verba Psalmi 38: *Passer invenit sibi domum, et turtur nidum, etc.*, docet Paganos extra Ecclesiam aliqua bona opera facere.

19. *S. Augustinum sibi contrarium non fuisse in præsentī questione.*— *Pro Augustini mente propositiones ex ipso observandæ.*— *Prima propositio et ejus sensus.*— Quid ergo in aliis locis Augustinus sensit? vel quomodo sibi contrarius non est? Ut hoc explicemus, imprimis præ oculis habendus est scopus Augustini in hujusmodi disputatione, qui fuit occurrere Pelagianis, qui, ut gratiæ Dei necessitatem negarent, vires naturæ extollebant, et ad hoc inducebant exempla Gentilium et Philoſophorum, quos, solo lumine naturæ ductos, excellentia virtutum opera exercuisse, et veras ac perfectas virtutes habuisse, dicebant. Augustinus autem, ut eos ad veram mentem reduceret, quando eum eis disputat, in contrarium extremum inclinare videtur, et interdum veras virtutes in eis fuisse negat; interdum vero dicit nihil boni operari, et aliquando etiam semper peccare, aut totam eorum vitam esse peccatum: nunquam vero aliquid bonæ operationis moralis in eis admittit. Ut ergo mentem ejus explicemus, aliquæ propositiones ejus notandæ sunt et sigillatim explicandæ. Prima est, in gentilibus seu infidelibus non fuisse veras virtutes; quod duobus modis potest intelligi. Primo, ut loquatur de veris virtutibus more christiano et theologico, id est, utilibus ad veram felicitatem con-

quendam, ut supra explicavi. Hic autem sensus indicatur ab eodem Augustino, dicto capite tertio contra Julian., dum ait: *Si ad consequendam veram beatitudinem, quam nobis fides per Christum promittit, nihil prosunt homini virtutes, non sunt veræ virtutes.* Et postea, referens definitionem virtutis ex Cicer., lib. 2 de Invent.: *Virtus est habitus, naturæ, modo, et rationi consentaneus*; subjungit: *Sed quid sit consentaneum liberandæ ac beatificandæ naturæ mortalium, nescierunt.* Et hanc expositionem habet D. Thomas 1. 2, quæst. 65, art. 2, ubi ita exponit quamdam sententiam quæ habetur in libro sententiarum Prosperi, estque 106: *Ubi deest agnitio æternæ et incommutabilis veritatis, falsa virtus est, etiam in optimis moribus.* Additque D. Thomas vocari falsam, non quia actum vere bonum non efficiat, sed quia ad vitam æternam non conducit: et eandem fere doctrinam habet D. Thomas 2. 2, quæst. 23, art. 7, et est communis in schola ejus, imo etiam inter scholasticos.

20. *Alter ejusdem propositionis sensus.*— Alter vero Augustini sensus esse potuit, in infidelibus non esse veras virtutes, etiam intra latitudinem virtutum acquisitarum, quia nunquam possunt pervenire ad statum moraliter necessarium ut aliquis bonus habitus, vel bona dispositio, nomen absolutum veræ virtutis mereatur, ut in capite ultimo hujus libri latius explicabo. Et hunc etiam sensum indicat Augustinus in aliis sententiis suis: et ideo Julianum dicentem posse infideles per liberum arbitrium, esse misericordes, modestos, castos et sobrios, reprehendit, quia non solum affectum, sed perfectionem virtutis illis tribuebat. Virtutem ergo veram appellat quæ tam perfecta est, ut simpliciter talis possit denominari, et hanc negat Augustinus infidelibus, non tamen omnem affectum, inchoationemque virtutis. Et ideo etiam ait virtutes infidelium, *utcumque fiant, illis tantum describunt, ut minus puniantur in die judicii.* In his enim verbis aliquas virtutes admittit in infidelibus; et dicendo: *Utcumque fiant*, plane intelligit, sive cum integra bonitate ex objecto et circumstantiis, sive cum aliquo defectu ex parte finis, indicans utrumque modum esse possibilem, modo statim explicando.

21. *Secunda propositio quæ dupliciter expeditur.*— Secunda sententia Augustini est, infidelem nihil boni operari. Hæc autem potest imprimis exponi moraliter et regulariter, ut statim dicam in simili: et ideo Augustinus

adjungit, quod si forte talia opera sint in infidelibus, etiam sunt tribuenda divino muneri, saltem ut alia bona naturalia, ut bonum ingenium, memoria, lenis natura, et alia, quæ dicto capite tertio enumerat. Secundo, et maxime ad mentem Augustini, dicimus eum loqui de bono pietatis, quod ad æternam felicitatem aliquo modo conferat. Hoc diserte exposuit dicto capite tertio contra Julianum, circa finem, dicens: *Quoniam concedis opera infidelium, quæ tibi videntur bona, non tamen eos ad salutem æternam perducere: scito nos illum bonum hominum dicere, illam voluntatem bonam, illud opus bonum, sine DEI gratia quæ per unum mediatorem datur, nemini posse conferri; per quod solum homo potest ad æternum DEI donum regnumque perducere; et cum infra dixisset: Sine amore creatoris, nullum bene uti creaturis,* subjungit: *Hoc ergo amore opus est, ut bonum beatificum sit.* Dices omne opus bonum eo ipso esse opus pietatis, et sanctum, et de se conducere ad vitam æternam. Respondeo falsum hoc esse, et contra intentionem Augustini, tum loco citato, tum aliis multis, quæ in sequentibus capitibus afferemus, ubi hæc interpretatio amplius tractanda est, et illa limitatio operis boni declaranda. Non enim sine causa vel mysterio a Patribus additur, esset autem superflua et nullius momenti, si omne opus bonum naturaliter, seu moraliter, eo ipso esset opus pietatis, in ordine ad felicitatem supernaturalem.

22. *Tertia propositio.* — *Prima ejus expositio.* — *Non admittitur.* — Tertia sententia Augustini est: *Omnia opera infidelium esse peccata, vel, omnem infidelium vitam peccatum esse, ut habetur dicta sententia 106 Prosperi, quæ tribus modis solet exponi?* Primo, ut intelligatur de peccato late sumpto, pro actu facto in pessimo statu, in quo nihil potest prodesse ad vitam æternam. Ita respondent nonnulli. Sed mihi non placet, tum quia est nimis improprius et inusitatus modus loquendi: tum quia sæpe Augustinus satis declarat se loqui de proprio peccato, quia loquitur de actu, vel habente pravam circumstantiam, vel carente circumstantia debita, et in hoc ponit maxime malitiam talium actuum, quæ sufficit ad constituendum illud malum et verum peccatum, et interdum etiam dicit, non esse a Deo, sed a demone, quod non potest, nisi ratione propriæ malitiæ moralis dici. Denique cum Paulus dixit: *Omne quod non est ex fide, peccatum est,* certe de proprio peccato est locutus; at Augustinus illo testimonio utitur ad

suam sententiam confirmandam; ergo eodem modo de peccato loquitur.

23. *Secunda expositio ex dicto Thoma.* — Est ergo secunda responsio, Augustinum in his propositionibus loqui de infidelibus, ut infideles sunt, operantibus, id est, non ex regula rectæ rationis, sed ex regula erroris sui. Ita exponit D. Thom. 2. 2, quæst. 40, art. 4, ad 1, et quæst. 23, art. 7 ad 3. Quæ expositio certe non est aliena a mente Augustini; nam in dicto cap. 3 contra Julianum, versus finem, dicenti Juliano: *Si gentilis nudum operuerit, numquid quia non est ex fide, peccatum est?* respondet: *Prorsus quantum non est ex fide, peccatum est,* et declarat, *non quia per se ipsum factum peccatum est, sed de tali opere non in Domino gloriari, solus impius negat esse peccatum,* ubi solum expendo illam negationem, in quantum non est ex fide, ab ipso explicari, non per solam negationem, sed per aliquam contrarietatem et circumstantiam actus ex infidelitate causatam. Unde inferius iterum dicit: *Quod si et ipsa (misericordia) per seipsam naturali compassione opus est bonum, etiam isto modo, bono male utitur, qui infideliter utitur, et hoc bonum male facit, qui infideliter facit.* Notanda est particula *infideliter*, quæ sensum reddit formalem de infideli, ut infidelis est, operante. Atque hoc magis declarat subjungens: *Ex quo colligitur, etiam ipsa bona opera (utique ex genere) quæ faciunt infideles, non ipsorum esse, sed illius qui bene utitur malis: ipsorum autem esse peccata, quibus et bona male faciunt, quia ea non fideli, sed infideli, hoc est stulta, et noxia faciunt voluntate.* At dici non potest, ea quæ fiunt ex ductu solius rationis naturalis recte judicantis, *fieri stulta, vel noxia voluntate;* ergo loquitur Augustinus de infidelibus, ut tales sunt, operantibus.

24. *Tertia expositio ex Vega, quæ præcedentem reddit probabilior.* — Hæc autem D. Thomæ expositio fiet probabilior, si addamus aliam, quam Vega, dicta quæst. 13, insinavit, et aliquid auctoribus contrariæ sententiæ concedamus. Nimirum, sensisse Augustinum, regulariter ac fere semper infideles operari ex infidelitate sua, vel ex aliqua prava intentione, ex ipsa infidelitate, vel occasione ejus concepta. Quia cum habeant naturalem rationem valde infirmam de se, et per errorem et falsas traditiones debiliorem factam; et aliunde temporalia et sensibilia objecta sint propinquissima, et maxime moveant, inde fit ut ordinarie ex sola inordinata concupiscentia,

et non ex pura regula rationis, operentur. Hoc autem modo intellecta, sententia Augustini reducitur ad quæstionem de facto potius quam de jure, vel de potestate (ut sic dicam); non enim voluit Augustinus fidem esse simpliciter necessariam ad bene operandum; nec teneri homines aliquo jure operari cum circumstantia aliqua honesta, quæ ex fide, vel ex cognitione Dei pendeat, et hanc voco quæstionem de jure; sed ad summum voluit eos, qui carent hac cognitione, esse ita prave dispositos, ut vix aliquid boni faciant. Et quia parum ac rarum quasi nihil reputatur, moraliter loquendo, ideo interdum cum illa exaggeratione vel absoluta negatione loquitur. Tamen hanc esse mentem suam aperte constat ex loco allegato de Spirit. et Litter., ubi addidit illam particulam, *vix inveniuntur*, quæ æquivalet illi: Raro inveniuntur, vel, pauci sunt qui recto fine operentur. Idem constat ex aliis locis, in quibus necesse est ut aliquam exceptionem faciat ex illis regulis generalibus; ergo intellexit illam cum moderatione dicta. Atque eodem modo intelligendus est Prosper, qui phrasim Augustini imitatus est. Faciliusque exponitur Fulgentius, qui ad summum loquitur juxta secundam Augustini propositionem.

25. *Juxta datam expositionem vitantur absurda adducta a numero 7.* — Tandem juxta hanc interpretationem, vitantur incommoda quæ contra Augustinum objiciebamus. Nam in comparatione quæ fit inter infidelem et fidelem peccatorem, est quidem æquiparatio in hoc, quod uterque male operabitur, si quatenus talis est, id est, vel ex errore suo, vel ex prava affectione sua operetur. Discrimen vero inter eos erit, quia fideles, licet peccatores, facilius et frequentius possunt et solent bene operari quam infideles, ut per se constat, et ideo, quoties videtur Augustinus damnare omnia impiorum opera, potius de infidelibus quam de fideiibus loquitur. Et ita etiam loqui videtur Hieron., Aggosi 1, circa id: *Seminastis multum, et tulistis parum.* Aliud item incommodum de incapacitate infidelium ad operandum bonum ex divina gratia facile evitatur, juxta interpretationem positam, quia Augustinus non loquitur de impossibilitate infidelium ad bene operandum, sed de morali difficultate, et de raro non, et ita verum est infidelem magis esse indigentem, quam fidelem peccatorem, ad recipiendum gratiæ auxilium, rariusque illud recipere. Solet autem Augustinus interdum indicare ante fidem nullum gratiæ auxilium homini dari, sed a fide incipere, ut

epist. 105; tamen sub fide comprehendit omnia quæ ad fidem ordinantur, et sunt quasi remotæ dispositiones ad fidem: non enim ignorabat infidelem prius vocari a Deo quam credat, et illam vocationem ad auxilium gratiæ pertinere; et per illam posse infidelem aliquid bene operari. Hoc autem non potest dici rarum aut insolitum, sed tam est usitatum, quam conversio ipsa adultorum infidelium ad fidem.

26. *Item a falso sensu salvæ manent allatæ Scripturæ in n. 2.* — Præterea expositiones quas tribuit Scripturæ locis, quæ allegat, Augustinus, quidquid sit, an proprium ac litteralem sensum contineant (non enim cogimur omnes illas expositiones sustinere), saltem non continent falsam doctrinam, quod satis nobis est ut locus Rom. 14, sic de fide Theologici, seu Catholici, ut Augustinus sentit, exponatur; intelligitur non tantum negative, sed contrarie, ita ut, *esse non ex fide*, idem sit quod esse ex infidelitate, vel esse dissentaneum fidei. Quod si negative sumatur, erit id verum moraliter tantum, et, regulariter loquendo, juxta ea quæ diximus. Illud autem ad Heb. 11: *Sine fide impossibile est placere Deo*, applicatum ad opera singula (ut interdum Augustinus vult), exponendum est juxta secundam ejus propositionem, de beneplacito Dei in ordine ad finem supernaturalem, et ad veram justitiam coram ipso, et in ordine ad verum meritum. Quod si extendatur ad omnem modum placendi Deo per modum dispositionis ad justitiam, vel aliquale meritum de congruo, extendendum etiam est illud *sine fide*, ad omne id quod fit sine auxilio ordinato ad fidem, seu sine vocatione ad fidem, ita ut sine fide fieri dicatur quidquid fit sine initio fidei. Quamvis autem quod fit sine fide, non placeat Deo aliquo modo ex prædictis, non ideo displicet tanquam malum, neque omnino non placet, ut indifferens, sed potest placere ut honestum naturaliter, et in suo ordine. Tertius locus de arbore mala, Matth. 7, si de voluntate impia intelligatur, ut Augustinus sæpe vult, formaliter intelligendus est de illa, ut impia est, operante; vel si absolute de illa voluntate intelligatur, limitanda est dicto modo, ut scilicet regulariter intelligatur; multi enim graves expositores ita putant esse intelligendum illum locum, de impossibili pro difficili, ut supra vidimus. Denique in quarto loco de oculo sinistro, seu nequam, Matth. 6, verum quidem est oculum esse intentionem, et ab intentione iniqua non prodire actionem bonam, sed inde non proba-

tur infidelem nunquam habere intentionem bonam sufficientem ad operis alienius honestatem. Quando ergo hoc subsumit Augustinus, intelligendus est morali modo, seu distributione regulari, et ut plurimum, sicut dictum est.

27. *Item procedunt priores duæ Augustini rationes in numeris 3 et 4. — Procedit etiam tertia, in eodem numero 4. —* Et ita etiam constat sensus duarum primarum rationum Augustini; procedunt enim, moraliter ac regulariter loquendo, non vero de absoluta necessitate, quia nulla est talis, ut ostendi. Probationes vero Augustini in prima ratione adductæ ad summum probant ordinariam facti contingentiam. Quod vero dicit in ultima, esse superbum operari virtutem moralem propter seipsam, moderandum est, et intelligendum (ut supra dixi), de his qui in tali operatione constituebant ultimum finem, et beatitudinem, sicut multi Theologi dicunt Angelum peccasse, ita appetendo suam beatitudinem naturalem, ut omnem aliam contempserit, et ita seipso contentum, in superbiam elatum, Deum et alia superiora bona despexisse. Ita enim Philosophi Stoici sensisse videntur, contra quos ibi Augustinus agebat, ut ibi late Ludovius Vives exponit. Et sic etiam accommodanda est tertia ratio Augustini; dicitur enim infidelis operari sine fine debito, quia regulariter illum excludit, vel in modo operandi, ponendo in suo opere ultimam perfectionem, vel extrinsecum finem pravum adhibendo; sed hæc ad summum procedunt quoad usum et regulariter, non vero quoad potestatis defectum, vel absoluta necessitate, et idem est sensus tertiæ rationis.

28. *Procedit et quarta, in eodem numero 4. — Procedit tandem quinta, in eodem numero 4. —* Quarta autem ratio Augustini videtur procedere juxta sensum secundæ propositionis ejus, quam proposuimus; nam operatio sterilis ad vitam æternam non semper est peccatum proprie sumptum, potest autem dici non bona theologicæ, id est, carens bonitate quam debet habere ut aliquid æstimetur, unde a Paulo, 1 Corinth. 13, *nihil* esse dicitur. Neque Augustinus unquam dixit teneri homines ex proprio præcepto, nunquam steriliter operari in prædicto sensu, neque revera datur tale præceptum, nec potest eum fundamento fingi. Potest vero illud *steriliter* distingui, scilicet, vel negative tantum de facto, vel etiam de possibili, quod est esse infructuosum contrarie; priori modo potest actus esse non malus, licet sit sterilis de facto, ex aliis conditionibus

operantis: posteriori autem modo dicitur opus sterile, cui repugnat esse fructuosum ad vitam æternam, et hoc modo omne opus malum infructuosum est, quia solum ratione malitiæ potest illam repugnantiam habere. Non est autem necesse ut omne opus infidelis sit infructuosum hoc posteriori modo, nisi forte regulariter, ut dictum est. Quinta vero ratio Augustini, ne apertam æquivocationem committat, quam probat objectio facta, intelligenda est de vera pudicitia in sensu explicato in propositione prima; sic enim vera pudicitia, etiamsi corporalis sit, debet esse conjuncta cum spirituali, qua anima Deo conjungitur ut summo bono, in quod omnia refert, et ideo repugnat veram pudicitiam esse in animo fornicante a Deo, etc.

CAPUT VIII.

UTRUM INTERNA GRATIA SPECIALIS, PRÆTER DEI CONCURSUM NATURALEM HUMANÆ NATURÆ DEBITUM, SIT NECESSARIA SIMPLICITER HOMINI LAPSO AD HONESTE OPERANDUM?

1. *Præmittitur ex supradictis nullam requiri habituales gratiam per se infusam ad honestam actionem. — Neque infusam per accidens. —* Propono quæstionem hanc de homine lapso, quoniam de aliis statibus nulla esse potest difficultas, supposita resolutione quam de homine lapso trademus. Igitur de homine in hoc etiam statu constituto, duo possumus ex dictis in præcedentibus capitulis tanquam certa colligere: unum est, nullam gratiam infusam per modum habitus esse necessariam ad honestam operationem. Patet, quia ostensum est, neque fidem, neque charitatem requiri; sed ante hos habitus, vel sine utroque illorum nullus est habitus infusus operativus, ut per se notum est; ergo nullus talis habitus necessarius est ad bene operandum. Deinde est ratio a priori, quia, propter actum, solum potest requiri habitus proportionatus et ejusdem ordinis; ergo propter actum honestum ordinis naturalis non potest esse necessarius habitus infusus. Unde etiam fit, neque necessarium esse habitum per accidens infusum ad moralem actum bonum, quia potius ex natura rei talis habitus generatur per actus, et alius modus infusionis extraordinarius est, et quasi miraculosus.

2. *Præmittitur item neque esse ad id necessariam gratiam actualem, supernaturalem in sua substantia. —* Aliud quod ex dictis colligi-

tur, est ad opus bonum morale non esse necessarium auxilium ordinis supernaturalis quoad substantiam suam. Id constat, quia ante revelationem fidei nullum datur homini tale auxilium, et ante illam potest bene operari. Item quia nulla potest ostendi ratio talis necessitatis; unde quæ ostendunt habitus infusos non esse necessarios, probant nullum principium supernaturale esse necessarium. Superest ergo dicendum de auxilio naturali extraordinario, seu non debito, quod aliqui vocant gratiam ordinis naturalis. Potestque ad varias opiniones explicandas subdistingui. Nam quoddam auxilium potest intelligi, quod non solum sit in se quid reale, et additum præter omnia naturalia, sed etiam sit per modum principii physici actus moralis boni. Aliud vero esse potest speciale auxilium, quod in se sit realiter ac physice aliquid supra omnem influentiam primæ causæ, tamen ad actum non juvet, nisi per modum principii moralis. Denique aliud esse potest, quod, licet physice et in se non sit aliquid majus quam per ordinarias causas secundas evenire possit, nihilominus, in ratione beneficii, et in opportunitate temporis pro quo confertur, sit speciale auxilium, et vere supernaturale, non quoad substantiam, sed quoad modum.

3. *Multorum opinio.*—His ergo modis multiplicatæ sunt opiniones in hoc puncto; prius vero quam speciatim illos referamus, quæstio generatim tractanda est. Est itaque multorum opinio, nullum opus morale bonum posse fieri ab homine lapsa sine speciali auxilio gratiæ. Pro hac sententia relatos invenio apud Vasquez l. 2, disp. 190, c. 2; Leonar. Aret., Dialog. de Morib.; Jacomel., lib. adversus fratrem Medensem, cont. error. 17; Anton. Panthus., lib. de Prædestinat. et Gratia, c. 6, post medium, et lib. de Liber. arb., c. 6, post medium; Franc. Romanus, libr. de Liber. et necessit. oper., verit. 14 et 15, et verit. 22. Hanc item sententiam ita generatim sumptam latissime defendit Gasp. Casal., libro primo de Quadrip. justit., cap. 10, et a capit. 20 usque ad 40, nunquam vero explicat modum illius gratiæ. Idem tenet Cathar., Genes. 3, circa id: *Viceritque Dominus Adam*, etc. Rationes autem ejusmodi tendunt, ut probent non posse hominem, justitia seu habitu virtutis et charitate carentem, bene moraliter operari, quod supra cap. 4 impugnavimus, et Catharino sufflenter respondimus. Eandem sententiam sequuntur Gregorius et Capreolus, et nonnulli alii, variis tamen modis illam de-

fendunt, et ideo illos postea referemus. Nos enim prius contra dictam sententiam generatim veritatem trademus, postea vero per omnes modos auxiliorum gratiæ, qui a variis auctoribus excogitati sunt, discurrendo, singulas opiniones confutabimus, et generalem conclusionem confirmabimus, tandemque generalia fundamenta omnibus contrariis opinionibus communia proponemus et expendemus.

4. *Assertio.*—*Potest homo lapsus sine auxilio speciali aliquando bene moraliter operari.*—Dicimus ergo posse hominem lapsum in uno vel alio actu, bene moraliter operari, sine speciali auxilio gratiæ. Explicatur assertio, nam imprimis plus est bene moraliter operari, quam actum moralem de se bonum facere, hoc enim posterius fit per actum ex genere suo, ut aiunt, seu ex objecto bonum, etiamsi non recta intentione fiat, et ideo nemo unquam dubitavit quin talis actus possit viribus naturæ fieri, nam etiam a pessimis hominibus fieri potest. At vero, ut quis bene moraliter operetur, necessarium est ut actum faciat undique honestum ex fine, seu motivo, et omnibus circumstantiis, et de hoc actu procedit assertio. Unde fit ut assertio locum habeat tam in actibus præceptis lege naturali vel humana, quam in non præceptis; plus enim requiritur ad bene moraliter operandum quam ad servandum præceptum naturale, vel humanum. Præceptum enim servari potest per actum de se bonum; imo aliquando per indifferentem, etiamsi ex aliqua circumstantia peccaminose fiat, ut suppono: unde si liberum arbitrium potest facere actum undique bonum, a fortiori poterit facere actum impletivum naturalis præcepti. Rursus actus bonus latius patet quam actus præceptus: sæpe enim homo potest bene moraliter operari, nullo urgente præcepto, et illum etiam modum operandi assertio complectitur, quia eadem est utriusque ratio, neque carentia præcepti auget difficultatem bene operandi. Quod si non de absoluto præcepto, sed de conditionato tractemus, sic in opere bene facto aliquod servatur præceptum, quia licet homo interdum non teneatur absolute aliquid operari, verbi gratia, elemosynam facere, si tamen illam facere velit, tenetur debito modo illam præstare; et ita quoties homo bene moraliter operatur, aliquod naturale præceptum observat, et ita utrumque in assertionem includitur. Quæ etiam intelligitur per se loquendo, et consideratis viribus liberi arbitrii, et intrinseca conditione status lapsæ na-

turæ, nullaque tentatione extrinsecus urgente, nam quid de tempore tentationis dicendum sit, postea videbimus.

5. *Primo, auctoritate Scholasticorum firmatur assertio.* — Conclusio ergo sic declarata communis est discipulorum D. Thomæ 1. 2, quæst. 109, art. 2 et 3, ubi Conr., Cajet., Medin. et Valent. et Soto, l. 4 de Natur. et Grat., cap. 20. Alii Scholastici illam tenent in 2, dist. 28, Albert., Scot., Durand., Gabr. et Carthusian. Idemque tenent moderni scribentes de gratia et libero arbitrio contra hæreticos, quos cum multis aliis retuli in 1 p., l. 2 de Prædest., c. 9, 11 et 12., et infra tractando de victoria tentationum, alios referam. Et in illis oportet advertere aliquos eorum, sub nomine gratiæ, dicere, requiri gratiam ad singula opera moralia; sed loquuntur late de nomine gratiæ, prout significat etiam generalem concursum primæ causæ, vel quodlibet beneficium generalis providentiæ Dei. Quomodo loquitur Bonavent. in 2, d. 28, art. 3, quæst. 2, et ibi Albert., art. 1. Eodemque modo loquitur Marsil. in 1, q. 20, art. 1, et 2, q. 17 et 18, art. 1, et Dionys. Cistere. 1, d. 17, q. 1, art. 2, et in 2, d. 27, q. 1, et Abulensis. in cap. 9 Matthæi., q. 174, ut facile legenti, et consideranti horum auctorum verba patebit, nam plane fatentur ad ejusmodi opus morale non requiri auxilium, quod sit præter naturæ debitum.

6. *D. Thomam quidam in contrarium citant.* — De D. Thomæ autem sententia, licet antiqui Scriptores, et plures ex modernis, non dubitaverint, nonnulli ex recentioribus illum in contrariam sententiam adducere conantur, quia valde generaliter, ac proinde ambigue utitur nomine *auxilii Dei moventis*, sub qua voce in 1. 2, quæst. 109, art. 1 et 2, dicit, ad omnem veri cognitionem et boni etiam naturalis amorem honestum, esse necessarium auxilium Dei. Quod aliqui de speciali gratiæ auxilio interpretantur; tum quia in artic. 6, 7 et 8 dicit cum hoc auxilio posse hominem præparari ad gratiam, resurgere a peccato, et perseverare sine peccato, si natura esset integra; tum etiam quia 2. 2, quæst. 130, art. 1, ad 3, dicit ideo non esse præsumptionem intendere cogitare et facere bonum, quia id possumus cum auxilio divino, et loquitur de speciali, nam fundatur in testimonio Pauli, quod in argumento adduxerat: *Non sumus sufficientes cogitare aliquid ex nobis*, 2 Corinth. 3; tum præterea quia 2. 2, quæst. 136, art. 3, ad 2, ait bonum politicæ virtutis esse commensuratum naturæ humanæ, et ideo fieri posse sine auxi-

lio gratiæ gratum facientis, *licet non absque auxilio gratiæ Dei*; tum denique quia, quæst. 14 de Veritat., ad actus voluntatis bonos dicit non esse necessariam gratiam habitualem, sed requiri gratuitam, prout dicit, internam Dei motionem.

7. *Sed immerito.* — Sed nihilominus mens D. Thomæ clara est, docet enim posse aliquod opus bonum fieri cum solo concursu Dei generali. Nam 1. 2, quæst. 109, art. 2, dicit naturam humanam, ad volendum quodcumque bonum, indigere auxilio divino ut primo movente: *Sicut* (inquit) *dictum est*, utique art. 1, ubi illud auxilium exposnerat de concursu Dei, quo omnis causa creata ad agendum indiget, et in artic. 3 eodem modo loquitur de eodem auxilio, et illud distinguit ab omni dono gratuito superaddito naturæ, et ab auxilio gratiæ naturam sanantis, quod non solum habitualia dona gratiæ, sed etiam dona actualia includit. Idemque in cæteris articulis illius quæstionis considerari potest. In articulo autem sexto, ubi, distinguendo auxilium ab habitu, dicit, ut homo se præparet ad habitum gratiæ recipiendum, non indigere alio habitu, sed auxilio, non dixit præcise, *auxilio Dei moventis*, sed addidit, *auxilio gratuito Dei moventis interius, seu inspirantis bonum propositum*, ut significaret sermonem esse de auxilio altiori quam sit concursus generalis, utique naturæ non debito, sed supernaturali, et interiori a Spiritu Sancto inspirato. Quibus verbis significare solent Patres auxilium supernaturale gratiæ, ut infra videbimus. Et articulo septimo expresse loquitur de auxilio gratiæ: loquitur enim in illa quæstione striete et proprie de gratia supernaturali, prout ratio disputationis proprie exigebat. Unde in articulo octavo, iterum loquens de concursu generali, non vocat illum auxilium gratiæ, sed vocat *auxilium Dei in bono conscrvantis, quo subtracto, etiam ipsa natura in nihilum decideret*: ac tandem in articulo nono et decimo, ultra auxilium gratiæ habitualis, aperte distinguit auxilium actuale necessarium ex ratione generali concursus divini, de quo in primo et secundo articulo locutus fuerat, et auxilium gratiæ ex speciali ratione necessarium, de quo ibi loquitur. Itaque in illa quæstione, ubi D. Thomas rem ex professo tractavit, satis clara est ejus sententia.

8. *Satisfit locis citatis ex 2. 2.* — In priori autem loco 2. 2, quæst. 130, art. 1, ad 3, generatim loquitur de opere virtutis, seu de actu bono, ideoque, si utrumque in sua genera-

litate accipiatur, debet cum proportione intelligi, nam ad actum bonum naturalem sperandum est auxilium naturale generalis concursus; ad bonum vero supernaturale, auxilium divinum supernaturale. Si autem loquatur de bono meritorio, ut testimonium Pauli exigit, et est usus Sanctorum, ut infra videbimus, nihil locus ille ad præsentem quæstionem pertinet. In altero vero loco, ex quæst. 136, probabile est usum esse vulgari modo nomine *auxilii gratiæ Dei*, prout comprehendit etiam auxilium generale, ut de usu multorum Scholasticorum diximus, et expresse distinxit idem D. Thom. in 2, distinct. 28, art. 1, ad 1, et art. 3. Dicit etiam probabiliter potest D. Thomam, in illo articulo tertio, argumento secundo, objecisse de quibusdam gentilibus *qui sine gratia Dei multa mala tolerarunt, ne patriam proderent, vel aliquid inhonestum committerent*; et ideo respondisse, tolerasse illa sine gratia habituali, non vero sine auxilio gratiæ etiam proprie sumptæ, non quia tale auxilium necessarium sit ad singula opera bona, etiam minima, sed quia est necessarium saltem ad opera insignia, et ad vincendas difficiles tentationes, seu difficultates, ut postea dicemus.

9. *Suffragatur etiam in locis aliis.* — Adde eundem D. Thomam, 2. 2, quæst. 10, art. 4, dicere infideles non posse facere bona opera, quæ sunt ex gratia, scilicet, opera meritoria; posse tamen aliquantulum facere bona opera, *ad quod sufficit bonum naturæ, quod in eis non est totaliter corruptum.* Et inde concludit non peccare infideles in omnibus suis operibus. Unde necesse est ut in prioribus verbis loquatur de bono opere bene facto, quia si non bene fieret, jam esset peccatum. Et in eodem sensu dicit in solut. ad 3, posse infideles per rationem naturalem facere aliquod opus de genere honorum. Denique in quæstione de Veritate, aperte docet concursum Dei generalem posse ad aliquem actum bonum sufficere: declarat autem in voluntate esse hoc auxilium necessarium, non solum ex parte potentiæ, sed etiam ex parte objecti excitantis, quod etiam dixerat in 1. 2, quæst. 109, art. 2, ad 1; et est clarum; neutrum autem excedit necessitatem generalis concursus, ut in sequentibus latius explicabimus. Quibus addi etiam potest quod D. Thom., Joan. 13, lect. 4, tractans illa verba: *Sine me nihil potestis facere*, distinguit in nobis duplicia opera, alia quæ fiunt virtute naturæ, alia quæ fiunt virtute gratiæ, et priora dicit non fieri sine Verbo influente generali

concursu; posteriora vero non fieri sine Christo, ut est auctor gratiæ, et concludit: *Et ita manifestum est, quod nullum opus meritorium sine ipso fieri potest*; sentiens opus bonum mere naturale, et non meritorium sub illa regula non comprehendi, etc.

10. *Secundo affirmatur assertio auctoritate Patrum.* — Est etiam hæc sententia valde communis apud sanctos Patres: nam qui Augustinum præcesserunt, passim ita loquuntur, ita ut interdum limitatione et expositione indigere videantur, ut ex his quæ diximus in lib. 2 de Prædestin. facile intelligi potest; ex Chrys., homil. 67 ad popul., et homil. 26 in Matth. in Imperfecto; et Hieron. scribente etiam contra Pelagianos, lib. 3 circa finem, et in cap. 1 et 3 ad Galat.; ex Augustino vero, et Prospero, ac Fulgentio multa in sequentibus afferemus. Et videri potest Gregor., hom. 27 in Evang., et Damasc., lib. 3 de Fid., cap. 14. Denique ex Conciliis etiam et Scriptura idem deduxi in lib. 2 de Prædestinat., cap. duodecimo et sequentibus, additis etiam variis discursibus et rationibus, tum a priori ex ipsa rei natura, et intrinseca facultate naturali naturæ humanæ, quæ post peccatum non fuit destructa, neque in internis potentiis diminuta, sed tantum privata possibilitate quam per gratiam et iustitiam ante peccatum habebat; tum etiam a posteriori, ex variis incommodis quæ ex contraria sententia sequuntur, quæ omnia hoc loco repetere supervacaneum est. Ut tamen ibi dictis aliquid addamus, libet hoc loco quemdam locum Pauli ibi etiam tractatum hic diligentius et accuratius expendere; tum quia fundamentalis est in hac materia; tum etiam quia occasione illius ostendemus quam recepta inter antiquos Patres, quamque rationi consentanea sit hæc sententia.

11. *Quid pro eadem assertione ex Scriptura probari possit.* — Primum autem omnium adverte ex Scriptura solum posse efficaciter probari, homines quantumvis peccatores, infideles et impios, interdum boni aliquid moralis et naturalis operari. Hoc enim convincunt ea quæ de operibus infidelium cap. 6 adduximus. Et probant optime verba Christi Matth. 5: *Si dilexeritis eos qui vos diligunt, quam mercedem habebitis, nonne et ethnici hoc faciunt?* Ubi necesse est sermonem esse de dilectione bona, nam dilectio male exhibita eo ipso non est digna mercede; ita, ut argumentum sit efficax, oportet ut illa dilectio etiam in ethnicis bona sit, seu esse possit: alias nec argumentum cogeret, nec recte dicerentur

ethnici idem in eo genere facere, quod fideles etiam naturaliter faciunt. Et hoc ipsum significavit Christus Luc. 11, dicens : *Si vos, cum sitis mali, nostis bona data dare filiis vestris*, utique ex affectu naturæ et ductu rationis sine ulla turpitudine, nam si de largitione turpiter facta sermo esset, nihil mirum esset quod fieri possit ab hominibus, licet sint mali. Hoc etiam supposuit Petrus, cum dixit : *Servi, subditi estote dominis, non tantum bonis et modestis, sed etiam discolis*, 1 Petr. 2; nam licet domini infideles et ethnici, de quibus præcipue loquebatur Petrus, non sint boni apud Deum, in modo humaniter tractandi servos possunt esse boni, et per actus morales naturæ consentaneos et simpliciter bonos seu honestos id præstare.

12. *Quid ex illa probari nequeat.* — Non possumus autem ex Scriptura efficaciter probare infideles et pravos homines hæc opera facere solo generali concursu, et sine aliquo majori adjutorio Dei, quia hoc in illa non expresse negatur. Sed imprimis satis nobis est, quod neque oppositum affirmetur, sed absolute talia opera dicantur fieri, etiam ab ethnicis : unde qui dixerit tale adjutorium semper et ad singula opera illis datum esse, oportet ut aliunde id nobis persuadeat, alioqui merito verba Scripturæ, ut simpliciter sonant, accipimus. Præsertim quia Christus, in verbis supra citatis, dixit talia opera etiam ab ethnicis fieri, ut significaret illa opera esse infimi ordinis, et apud Deum non esse digna supernaturalis mercedis, quod adversarii non concedunt etiam de his operibus ex gratia factis. Accedit quod gratiæ auxilium ordinarie non conceditur infidelibus ad communia vitæ humanæ opera : hæc autem moralia opera, præsertim mere humana, seu inter homines, ut est obedientia ad parentes, amor ad filios, misericordia ad pauperes, sæpe possunt ab ethnicis bene fieri per ordinarium cursum providentiæ Dei. Denique ad hoc ponderari potest verbum illud *naturaliter*, in verbis Pauli Rom. 2 : *Gentes quæ legem non habent, naturaliter ea quæ legis sunt, faciunt* : nam idem videtur esse naturaliter, quod vi naturæ et sine speciali ope gratiæ aliquid facere.

13. *Tractatur ad rem præsentem proxime citatus locus Pauli, ac primo quoad illa verba* : Gentes quæ legem non habent. — Habet tamen locus hic varias interpretationes, quas hoc loco pro viribus expendam. Tria enim in illo loco indigent explicatione. Primum, de quibus *gentilibus* Paulus loquatur; secundum,

quid nomine *legis* intelligat; tertium, quid sit *naturaliter facere ea quæ sunt legis*?

14. *Quid nomine legis Paulus intelligat.* — Et incipiendo a secundo, certum est nomine *legis* ibi intelligi, vel legem scriptam, seu veterem, vel in universum legem Dei positivam. Nam clarum est Paulum non excludere legem naturalem, nullæ enim sunt gentes quæ hanc legem non habeant, neque peccari potest sine hac saltem lege, nam ut capite 4 addit Paulus : *Ubi non est lex, neque prævaricatio*, ubi legis nomen latius accipit, pro quacumque lege; in capite autem secundo, pro lege extrinsecus addita internæ legi naturali. Quomodo Augustinus, serm. 25 in Psalm. 118, illa duo loca Pauli inter se conciliat, et cum verbis ejusdem Psalmi : *Prævaricantes reputati omnes peccatores terræ*. Simpliciter autem considerando contextum Pauli in illo cap. 2, de lege scripta plane loquitur; æquiparat enim ibi Judæos et gentes, in hoc quod utrique judicandi sunt a Deo secundum opera sua, etiamsi Judæis data esset lex, utique scripta, et non gentibus : *Quia qui sine lege peccaverunt* (scilicet scripta), *sine lege peribunt, et qui in lege peccaverunt, per legem judicabuntur*. Eodem ergo sensu adjungit : *Cum enim gentes quæ legem non habent, etc.*; et ita exponit ibi Chrysost., homil. 6; Theophyl. : *Gentes, inquit, legem non habentes : qualem? scriptam*; Theodor. : *Gentes, ait, ante legem Mosaicam*; OEcum. : *Qui lege pedagogico non egent*. Et Orig., lib. 2 in ad Rom., significat sermonem esse de lege Moysi non ceremoniali, sed morali, seu decalogi, nam opera hujus legis scripta sunt in cordibus hominum. Eandem expositionem habent Anselmus, D. Thomas, et alii Latini, et habetur in commentariis Ambrosio attributis, circa illa verba : *Qui sine lege peccaverunt*; sine lege, inquit, Moysi. Addit vero Augustinus, dicto serm. 25 in Psalm. 118, secundum hoc quod dictum est : *Qui sine lege peccaverunt*, dictum etiam esse : *Cum gentes, quæ legem non habent*. Quamvis autem hæc sit proprietas verborum Pauli, nihilominus sententia ex paritate rationis in omni lege positiva Dei locum habet; nam etiam illi qui nullam hujusmodi legem habuerunt, sine lege peccaverunt, et potuerunt etiam naturaliter ea quæ legis sunt facere, ut in sequenti puncto dicemus.

15. *Prima veraque expositio, sub nomine gentes, intelligi quibus lex Moysi data non fuit.* — Ex his colligere possumus circa primum punctum, cum Paulus dixit : *Gentes quæ legem non habent*, omnes illos homines in hac

appellatione videri comprehendisse, quibus lex Moysi data non est, nam omnes illi sunt gentes, id est, incircumcisi, et sunt legem Mosaicam non habentes, de qua, ut diximus, proprie locutus est Paulus. Sed cum sub tam generali gentium appellatione varii gradus seu ordines gentium distingui possint; quidam enim sunt gentes infideles et idololatræ, qui et ante legem, et cum lege, et nunc etiam post legem durant; alii fuerunt gentes fideles et iusti, qui et ante legem, et cum lege Moysi ante Evangelium fuerunt; alii denique sunt gentes fideles, et Christiani, quales jam erant multi tempore Pauli, et postea creverunt, et durant in Ecclesia ex gentibus congregata; dubitant aliqui an tam ampla vocis *Gentes*, expositio sit admittenda; an potius de aliquo gradu istorum Paulus in particulari loquatur.

16. *Secunda expositio Augustini et aliorum, de gentibus in lege gratiæ.* — Est ergo secunda expositio Augustini, de Spirit. et Litter., capit. 26 et 27, de gentibus ad fidem Christi conversis locum hunc intelligi. Sequitur Prosper contra Collator., cap. 22, et Fulgent. de Incarnat. et Grat., cap. 25. Et quod gravius est, ibi significat solos Semipelagianos locum illum de gentibus infidelibus intellexisse; sequitur Beda, Rom. 2. Eademque expositio habetur in commentariis Ambrosio attributis. Et significant Anselm. et D. Thom. ibi, et 1. 2, quæst. 109, art. 4, ad 1; et hanc interpretationem sequuntur graves moderni expositores Pauli, Adamus et alii, et ex parte Tolet. et Salmeron infra citandi. Pereira vero, disp. 9 in illud cap., eam vocat *solidiorem, sublimiorem, tutiorem, magisque theologiam*, quamvis non ita illam approbet quin aliam infra tradendam, libenter amplectatur. Turrian. vero, in lib. 7 constit. Clementis, cap. 34, hanc absolute tradit.

17. *Eorum fundamentum.* — *Alterum argumentum pro eodem intellectu.* — *Tertium argumentum.* — *Quartum argumentum.* — Fundatur autem hæc expositio in aliis verbis Pauli, quæ proxime præcedunt in eodem loco: *Non enim auditores legis iusti sunt apud Deum, sed factores legis justificabuntur.* Unde colligitur illos gentiles, qui naturaliter ea quæ legis sunt faciunt, et faciendo justificari; ergo non possunt esse infideles, quia sine fide impossibile est placere Deo, et quia per fidem homines justificantur: unde Tolet sumit aliud argumentum et sit secundum. Nam Paulus loquitur de gentibus servantibus totam legem naturæ, quod nemo præstare potest sine fide, et gratia Christi;

ergo loquitur de gentibus conversis ad Christum. Major probatur primo, quia non dicitur quis facere quæ legis sunt, eo quod unam vel aliam particulam legis servet, si in aliquibus, et maxime si in pluribus legem violat: secundo, quia de his gentibus, quæ naturaliter ea quæ legis sunt faciunt, statim subjungit Paulus: *Qui ostendunt opus legis scriptum in cordibus suis, testimonium reddente illis conscientia ipsorum, et inter se invicem accusantibus, ac defendentibus in die, cum judicabit Deus occulta hominum.* Quibus verbis ostendit, illos gentiles sic facientes quæ legis sunt, testimonio conscientiæ posse defendi apud Deum in die iudicii; non poterunt autem sic defendi, nisi qui totam legem servaverint; ergo de his loquitur Paulus. Tertio fundari potest hæc sententia in aliis præcedentibus verbis: *Gloria et honor omni operanti bonum, Judæo primum, et Græco;* et ad hoc probandum inducit alia verba: *Gentes quæ legem non habent,* etc. Ergo loquitur de gentibus quæ apud Deum gloriam et honorem merentur, istæ autem non sunt nisi fideles. Quarto, post prædicta verba, circa finem capituli, ab illis verbis: *Si præputium justitias legis custodiat,* aperte loquitur Paulus de gentibus credentibus; ergo et in prædicta sententia; nam in eodem sensu illa voce utitur. Antecedens patet, quia multa illis tribuit, quæ sine fide et gratia Christi fieri non possunt, ut sunt legem consummare, et esse in abscondito spirituales Judæum, et habere spirituales circumcisionem, et laudem non ex hominibus, sed ex Deo.

18. *Prædictus intellectus per se probabilis, rationes tamen universaliter probant de gentibus non idololatriis.* — Hæc expositio probabilis est; si tamen rationes ejus attente considerentur, non probant Paulum tantum loqui de gentibus conversis ad fidem Christi post inchoatam Evangelii prædicationem, sed generatim de gentibus iustis, et justificatis per fidem, quales fuerunt multi ante legem Moysi, et post datam legem ante adventum Christi, et post Christi adventum, ante auditum Evangelii; talis fuit Cornelius, et potuerunt esse alii multi; nam de illis verum est esse justificatos per fidem, et meruisse gloriam et honorem apud Deum, et conservasse totam legem, et testimonio conscientiæ posse in die iudicii defendi apud Deum. Ergo ex vi illarum rationum non possunt restringi verba Pauli ad gentiles baptizatos, seu conversos ad fidem Christi. Responderi potest ex Augustino, ex illis verbis: *Qui ostendunt opus legis scriptum in*

cordibus suis, colligi, sermonem esse specialiter de gentibus conversis ad Christum, quia illud est privilegium legis Evangelicæ, quæ promissa fuit in cordibus imprimenda, Jerem. 31. Sed hoc non cogit, nam illa verba Pauli optime intelliguntur de lege naturali scripta in cordibus ipso naturali lumine, atque ab ipso Deo, ut auctore naturæ; lex autem nova altiori modo prædicta est, ut scribenda in cordibus spiritu Dei vivi, per infusionem fidei et gratiæ, ut dicitur 2 Corinth. 3; unde Cardinalis Tolet. ibi omnino censet non esse restringenda illa verba ad gentiles factos Christianos, sed extendenda ad omnes gentes quæ quocumque tempore fideles fuerunt, non tamen ad infideles et idololatrias, propter prioris expositionis fundamenta.

19. *Tertiu expositio Salmeronis de gentibus viventibus secundum legem naturæ.* — At vero Salmeron., disput. 18 in ad Rom., excludendos etiam credit gentiles conversos ad fidem Christi, ac proinde Paulum loqui de gentibus qui, tempore legis naturæ vel Moysi, servabant legem naturæ, fide tamen et gratia adjuvi. Et ita excludit gentes infideles propter fundamenta primæ sententiæ. Christianos vero ex gentibus venientes excludit, quia tales gentes non possunt dici non habere legem, cum Paulus dicat: *Gentes quæ legem non habent.* Assumptum patet, quia licet non habeant scriptam, habent Evangelicam, quæ positiva divina est, ratione cuius dici non potest de Christianis: *Qui sine lege peccaverunt, sine lege peribunt.* Et plures alias conjecturas ad hoc adducit, quæ vel inefficaces sunt, vel nimium probant, ut est illa, quam ex proprietate illius vocis *naturaliter* sumit, quia non gratiam, nec fidem, sed facultatem naturalem significat. Nam si hæc ratio urget, etiam probat non esse ibi sermonem de fidelibus gentibus cujuscumque ætatis, et per fidem seu gratiam operantibus; sed de illa particula postea dicendum est. Denique adducit pro hac sententia Anselmum ibi; ille vero, licet interdum loquatur de gentibus reformatis per fidem et gratiam, nunquam vero excludit Christianos. Citari etiam potest Theod., qui locum interpretatur de iis qui ante legem Mosaicam fuerunt: *Et piis* (ait) *usi sunt rationibus.* Iudicat etiam Athanas. vel auctor quæstion. ad Antioch., quæst. 124, dicens: *Græcum vero non dicit idololatriam, sed piium, qui colat quidem Deum rerum, neque credat in Christum, neque veterem legem teneat, sed sine lege Deum colat, servetque virtutem aliquam.*

20. *Quarta expositio Origenis et aliorum Græcorum Patrum, de gentibus infidelibus.* — Quarta sententia est contraria omnibus præcedentibus, nimirum, Paulum loqui de gentibus infidelibus et idololatriis. Hanc expositionem tradit expresse Orig., lib. 2 in Epist. ad Rom., paulo ante medium, ubi inter alia exponens illud: *Gloria et honor, et pax omni operanti bonum, Judæo primum, et Græco*, subjungit: *Quod, ut ego capere possum, de Judæis et gentibus dicit, utrisque nondum credentibus.* Quod de Judæis imprimis declarat, et deinde addit: *Sed et Græcus, id est, gentilis, qui cum legem non habeat, ipse sibi est lex, ostendens opus legis in corde suo, et naturali ratione motus (sicut videmus nonnullos in gentibus), vel justitiam teneat, vel castitatem, vel prudentiam, temperantiam, modestiamque custodiat, iste licet a vita alienus videatur æterna, quia non credit Christo, et intrare non possit in regnum cælorum, quia renatus non est ex aqua et Spiritu Sancto, videtur per ea que dicuntur ab Apostolo, bonorum operum gloriam et honorem, et pacem perdere penitus non posse.* Et paulo inferius ait legem, quæ facit ut omnis homo qui peccat in legem peccet, esse legem naturalem, et hanc esse legem scriptam in cordibus omnium hominum. De illa vero statim subdit, maxime convenire cum Evangelii lege, ubi cuncta referuntur ad naturalem æquitatem. Sentiens quidem altiori modo esse ipsam naturalem legem impressam in cordibus Christianorum per Dei Spiritum, et per illum impleri perfecte, non tamen excludens priorem sensum planum verborum, quem antea posuerat. Chrysostomus etiam, homil. 5, aperte exponit illa verba de homine sola ratione naturali utente, etiamsi fidem non habeat; sic enim ait: *Per naturæ autem verbum, naturales intelligit cogitationes ac ratiocinationes;* et infra: *Ostendent* (inquit) *opus legis scriptum in cordibus suis, simul attestante ipsorum conscientia, sufficit enim loco legis conscientia et cogitatio, utique naturalis, ut dixerat; unde subjungit: Per hæc rursus ostendit Deum sic hominem finxisse, ut possit per se virtutem intelligere, ac vitium declinare.* Intelligit ergo per gentes, homines sola ratione naturali utentes, etiamsi fidem non habeant; et ita intellexit Chrysostomum Theophylactus, et de naturalibus cogitationibus exposuit, nulla facta fidei mentione. Eodemque fere modo loquitur Oecumen., et in eundem sensum possunt facile accipi verba Athanasii supra citata, nam per piium hominem non videtur intelligere homi-

nem justum vel fidelem, sed quovismodo cognoscentem vel colentem Deum, et aliquid boni facientem, ut indicant verba illa: *Serretque virtutem aliquam.*

21. *Suffragantur eidem expositioni Latini Patres.* — Ex antiquis etiam Latinis Patribus ita hunc locum intellexisse videtur Tertull., lib. de Coron. milit., cap. 6, dicens: *Quæris igitur Dei legem? habes communem hanc in publico mundi, in naturalibus tabulis, ad quas et Apostolus solet provocare, ut cum, ad Romanos natura facere dicens nationes ea quæ sunt legis, et legem naturalem suggerit, et naturam legalem.* Ubi nationum nomine profecto intelligit gentiles omnes ethnicos, et cum dicit Paulum ibi provocare ad naturales tabulas, plane sentit loqui de gentibus, quæ sola ratione naturali ducuntur, etiamsi fidem non habeant. Favet etiam Cyr., lib. 3 ad Quir., cap. 99, quatenus verba illa: *Qui sine lege peccaverunt, sine lege peribunt,* intelligit de his qui ante legem peccaverunt, qui profecto potissime sunt gentes infideles. Paulum autem nomine gentium necessario comprehendere etiam illos qui sine lege peccaverunt, statim ostendam. Ambrosius item, lib. 5, Epist. 41, verba illa, *ostendunt opus legis scriptum in cordibus suis,* de lege naturali in cordibus non tam scripta, quam innata intelligit: *Quæ, inquit, non aliqua percipitur lectione, sed profluo quodam naturæ fonte in singulis exprimitur, et humanis ingeniis hauritur;* et similia multa habet lib. de Fuga sæculi, cap. 3; ergo consequenter intelligit Paulum de gentibus hac lege utentibus, etiamsi adminiculum fidei non habeant.

22. *Commentaria quoque nomine Ambrosii.* — Auctor etiam commentariorum Ambrosio attributorum, licet circa hæc verba primam sententiam sequatur, attamen paulo superius circa illa verba: *Quicumque sine lege peccaverunt, sine lege peribunt,* hanc ultimam aperte docet his verbis: *Non credentes gentiles duplici genere sunt rei, quia neque legi datæ per Moysen assenserunt, neque Christi gratiam receperunt, ideo dignum est ut pereant.* Exponit ergo dicta verba de gentibus non credentibus; est autem evidens de eisdem esse sermonem in verbis aliis quæ nunc tractamus, ut statim ostendemus; eo vel maxime quod idem auctor in eandem sententiam incidit, dum adjungit: *Igitur qui sine lege peccat, peribit: et qui sine lege legem servat, justificabitur. Justitiam naturaliter servans, custos legis est. Si enim justo non est lex posita, sed injustis, qui non peccat,*

amicus legis est: huic sola fides deest, per quam fiat perfectus, quia nihil illi proderit apud Deum, abstinere a contrariis, nisi fidem in Deum acceperit, ut sit justus per utramque, quia illa temporis justitia est, hæc æternitatis. Ubi plane docet eundem gentilem infidelem, qui peccando sine lege peribit, non peccando et faciendo opera legis justificari, justitia temporali, non æterna et apud Deum, quæ sententia coincidit cum sensu aliorum verborum Pauli, quæ nunc tractamus.

23. *Et Hieronymi.*—Hieronymus præterea, ad 24 cap. Isai., in princip.: *Audiant (inquit) Judæi qui se solos legem accepisse gloriantur, quod universæ primum gentes, totusque orbis naturalem acceperit legem;* et subdit inferius: *De qua Apostolus loquitur: Cum enim gentes quæ legem non habent, etc.,* ubi tacite exponit Paulum loqui de gentibus quæ a principio et ante legem fuerunt, et quæ per totum orbem fuerunt, sive fidem haberent, sive non haberent. Et evidentius Matth. 22 exponens verba illa, *Ite ergo ad exitus viarum: Gentilium (inquit) populus non erat in viis, sed in exitibus viarum,* ubi loquitur aperte de gentibus non conversis, sed infidelibus, de quibus movet quæstionem: *Quomodo in his qui foris erant inter malos, et boni aliqui sint reperti?* Et respondet: *Hunc locum plenius tractat Apostolus ad Romanos, quod Gentes naturaliter facientes ea quæ legis sunt, condemnent Judæos, qui scriptam legem non fecerint;* et addit: *Inter ipsos quoque ethnicos est diversitas infinita, cum sciamus quosdam esse proclives ad vitia, et ruentes ad mala, alios ob honestatem morum virtutibus deditos:* exponit ergo Paulum de gentibus ethnicis, quæ vox infideles significat. Quomodo autem cætera quæ Hieronymus indicat intelligenda sint, postea videbimus, nunc enim solam expositionem verborum Pauli ponderamus. A qua etiam non discrepat idem Hieronymus, vel auctor commentariorum, quæ nomine ejus inter illius opera feruntur, in eodem loco ad illa verba: *Naturaliter ea quæ legis sunt, faciunt,* addens: *Sive de his dicit qui naturaliter justi fuerunt ante legem, sive etiam qui nunc boni aliquid operantur.* Ubi per hos posteriores non intelligit justos, ac subinde nec fideles, sed ethnicos, qui boni aliquid operantur, et vel utrosque, vel certe maxime posteriores nomine gentium comprehendendi indicat.

24. *Augustinus etiam non est ab eodem intellectu alienus.* — Neque Augustinus ab hac sententia omnino fuit alienus, ut Cardinal.

Tolet. bene supra notavit : nam dicto libro de Spirit. et Litter., cap. 28, sic inquit : *Verumtamen, quia non usque adeo in anima humana imago Dei terrenorum affectuum labe detrita est, ut nulla in ea velut lineamenta extrema remanserint, unde merito dici possit, etiam in ipsa impietate vitæ suæ facere aliqua legis, vel sapere. Si hoc est, quod dictum est, quia gentes quæ legem non habent, hoc est, legem Dei, naturaliter quæ legis sunt, faciunt, et quia hujusmodi homines ipsi sibi sunt lex, et scriptum opus legis habent in cordibus suis, id est, non omnimodo deletum est, quod ibi per imaginem Dei, cum crearentur, impressum est : etiam sic illa differentia non perturbabitur, qua distat a veteri Testamentum novum, eo quod per novum scribitur lex Dei in corde fidelium, quæ per vetus in tabulis scripta est : hoc enim illic scribitur per renovationem, quod non omnimodo deletum est per vetustatem.* Ubi licet non simpliciter affirmet, sed sub conditione loquatur, nihilominus clare sentit hanc expositionem congrue posse sustineri, nihilque omnino errori Pelagii favere. Quod docte notavit Staplet., lib. 2 de Justific. seu de corrupt. naturæ, cap. 14, ubi hanc dicit esse communem aliorum Doëtorum, maxime Græcorum, sententiam. Eodemque fere modo Prosper cont. Collat., cap. 22, utramque expositionem sub conditione ponit, dicens : *Si de his Apostolus loquitur, qui ex gentibus sunt vocati, et sunt credentes, etc., nihil inde Pelagianos sumere posse. Si vero (subdit), quod magis vult hic disputator intelligi, de illis ista dicuntur, qui alieni a gratia Christiana, quædam ad similitudinem legalium mandatorum proprio judicio faciebant, etc., quis ambigat hanc sapientiam humano generi ad temporalis vitæ utilitatem ex natura a Deo conditæ superesse reliquis.* Utrumque ergo sensum admittit, et ab errore liberum esse ostendit; neque discrepat Anselmus in Paulum, nam licet dicat gentes non salvari, nisi per gratiam, non tamen dicit Paulum loqui de solis Gentilibus, qui salvantur, sed de omnibus, qui lege naturæ per rationem gubernantur; neque etiam D. Thomas in Paulum, in ultima expositione, alienus est ab hoc sensu quantum ad hanc partem, ut statim explicando partientiam *naturaliter* ostendemus.

25. *Pavent denique Pius V et Gregorius XIII.* — Denique huic sententiæ non parum faverunt Pius V et Gregorius XIII, eam defendentes ab iniqua censura Michaelis Baii. Hic enim, in sua proposit. 23, temere dixit cum Pelagio sentire,

qui hunc locum Pauli de gentibus fidei gratiam non habentibus intelligunt. Dicti autem Pontifices non minus hanc propositionem quam cæteras, tanquam censura dignam, rejiciunt; in quo licet non approbent illam expositionem, eam tamen ab omni suspitione erroris Pelagii et sectatorum ejus liberam esse decernunt; quapropter non parum etiam excessit quidam eruditus D. Thomæ expositor, qui post illam Pontificum defensionem, ausus est dicere hanc expositionem nullum ex antiquis Patribus habere, præter Cassianum, collat. 13, c. 12. Nam per hoc significatur expositionem hanc ortam esse ex Pelagiano errore, quod sane, si verum esset, non parvam invidiam et suspitionem illi conciliaret. Si tamen dictus auctor omnia quæ ex Patribus adduximus attente considerasset, non tam facile propositionem illam negativam, difficillimam probationem habentem, protulisset, neque expositioni huic tam gravem notam inussisset; neque potest defendi testimonio Fulgentii supra relato, nam ille non reprehendit Cassianum, quod primus vel solus illam expositionem invexerit, sed quod illa contra divinam gratiam abusus fuerit. Melius ergo Benedict. Pereir., disp. 8, in cap. 2 ad Rom., post illud decretum Pii V, dixit de hac expositione : *Est vera et catholica, et ab omni hæreticæ falsitatis non modo labe, sed etiam specie remota*; et addit etiam esse textui consentaneam, sicut etiam censuerunt Cajetanus, Soto et Catherinus.

26. *Predicta quarta expositio ita est accipienda de gentibus infidelibus, ut non excludat fideles extra legem Moysis.* — Cum ergo doctrina quam expositio recte intellecta continet, omnino catholica sit, et suspitione careat, mihi etiam videtur esse maxime consentanea contextui, verbis et intentioni Pauli. Ita vero illam intelligendam existimo, ut non putetur Paulus de solis gentilibus fide carentibus loqui, sed tantum illos non excludere, loquique indefinite et absolute de gentibus, et de illis dicere, ductu naturæ facere ea quæ legis sunt, sive fidem habeant, sive non habeant, ac proinde verba illa etiam de gentibus ethnicis vera esse et intelligi, licet facilius etiam possint de gentibus credentibus, sive ante, sive post Evangelium, vera esse. Ut autem hunc sensum ex contextu ostendamus, discursum Pauli advertere oportet. Dixit enim Deum retribuere unicuique secundum opera sua, tribulationemque et angustiam esse in omnem animam operantis malum, honorem vero et gloriam super omnem operantem bonum, tam Judæum quam gentilem, et

utrumque probaverat illis verbis : *Non enim est acceptio personarum apud Deum.*

27. *Id ostenditur ex ipso Pauli contextu.* — Hoc autem probat alia causali, duas partes continente, videlicet : *Quicumque enim sine lege peccaverunt, sine lege peribunt ; et quicumque in lege peccaverunt, per legem judicabuntur.* Hæc ergo duo rursus probat duplici causali propositione sequente, et incipit a posteriori parte dicens : *Non enim auditores legis justi sunt apud Deum, sed factores legis justificabuntur.* Ad justitiam enim non satis est habere legem, vel recipere illam, sed necesse est illam servare ; et ideo qui legem habent, et illam non servant, per illam judicabuntur. Deinde probat priorem partem, simulque tacite objectioni respondet, dicens : *Cum enim gentes quæ legem non habent, etc.* Objici enim poterat, qui fieri posset, ut quispiam sine lege peccet, cum peccatum sit prævaricatio a lege, et ubi non est lex, nec possit esse prævaricatio a lege, ut idem Apostolus statim cap. 4 dixit. Respondet ergo gentes, licet legem non habeant, utique scriptam, vel naturæ additam, non omnino carere lege, quia naturalem habent. Hoc autem probat, quia *gentes quæ legem non habent, naturaliter ea quæ legis sunt faciunt, et per hoc ostendunt habere legem in cordibus scriptam.* Intellegit autem facere ea quæ sunt legis, ex testimonio conscientiæ, ut statim declarat, id est, faciunt judicantes se ad id teneri, et contrarium esse malum, quod testimonium est judicium manifestum legis in corde scriptæ. Et hanc expositionem significat Anselmus in suo commentario, et Salner., disput. 18, et magis in eo sensu persistit Pereir., disputat. 8. Toletus autem, annotat. 12, hanc connexionem refert, non tamen approbat, nullam vero rationem alienjus momenti contra illam objicit, nec meliorem sensum inducit. Imo postea in commentario ex parte illam sequitur, dicens respondere Paulum illis verbis ad tacitam objectionem, quomodo possint Gentiles sine lege perire. Addit vero etiam per illa verba explicare Paulum quomodo possint Gentiles esse factores legis, si non fuerint auditores. Sed hoc licet in se verum esse possit, non tamen videtur intentum a Paulo, quia ipse antea non dixerat Gentiles esse factores legis, aut justificari, quia cum ageret de lege scripta, ut ostendi, per auditores vel factores legis Judæos tantum intellexit. Multoque minus verisimile est Paulum illis verbis : *Cum gentes quæ legem non habent, etc.*, probare gentes etiam justificari, implendo legem naturalem, et a Deo esse eter-

na gloria efficiendas, quia nihil horum in verbis illis Pauli continetur, nec ipse illa infert, sed solum quod hujusmodi gentes habeant legem scriptam in cordibus ; igitur illud tantum voluit illis verbis Paulus comprobare.

28. *Concluditur tandem verba illa, Gentes, quæ legem non habent, excludere solum eos quibus lex Moysis data est, ac adeo primam expositionem stare.* — Quo sensu supposito, qui mihi videtur simplicissimus, et maxime consentaneus litteræ et discursui Pauli, inde ulterius ostendo, cum Paulus ait : *Gentes quæ legem non habent, naturaliter ea quæ legis sunt faciunt*, non loqui tantum de gentibus credentibus, sed in universum de gentibus, etiamsi fideles non sint, sed sola ratione naturali ducantur. Nam illa verba priora, *quicumque sine lege peccaverunt, sine lege peribunt*, comprehendunt gentes fide carentes, in quibus eadem obiectio locum habebat, quomodo scilicet peccare possint, si legem non habeant. Ergo ut ratio Pauli sit plena et adæquata, oportet ut ostendat, etiam illos non omnino carere lege, quia naturalem habent ; ergo illos etiam comprehendit sub illis verbis, *gentes quæ legem non habent, etc.* Item de his etiam gentibus verum est, *quod ipsi sibi sunt lex, et habent opus legis scriptum in cordibus suis, testimonium illis reddente conscientia ipsorum*, etc. Ergo de illis etiam intelligendum illud est : *Gentes quæ legem non habent, naturaliter ea quæ legis sunt faciunt.* Etenim si Paulus hoc intelligeret de solis operantibus per spiritum fidei, replicari contra illum posset, illos solos qui fidem habent ostendere opus legis scriptum in cordibus suis, ac subinde eos qui nec legem scriptam, nec fidem habent, non posse peccare, quia legem non habent, neque foris, neque intus. Ergo vel claudicat probatio Pauli, si Gentiles infideles ab illa probatione excludantur, vel illi etiam non includuntur sub priori regula : *Qui sine lege peccaverunt, sine lege peribunt.* Accedit quod Paulus argumentum sumere voluisse videtur ab his quæ præ manibus haberentur, et clara essent, et omnibus nota. Multo autem notius erat omnibus gentiles, qui tunc erant ethnici, et similes, qui fuerant durante lege Moysi, ductu rationis fecisse ea quæ lex jubebat, utique quoad moralia, quam quod essent aliqui fideles qui hoc ipsum facerent ; ergo non est verisimile arctasse sermonem ad gentiles fideles, sed omnes comprehendere. Denique verba ipsa simpliciter sumpta in sua proprietate hunc sensum postulant, ut patet ex illa determinatione nega-

tiva, *gentes quæ legem non habent*, quæ amplissima est, et omnes comprehendit, et ex illa voce *naturaliter*, quam mox tractabimus; ergo non est cur extra sensum hunc proprium verba trahantur vel limitentur, cum nulla sit necessitas, ut respondendo ad fundamenta contraria patebit.

29. *Satisfit argumentis in numero 17.* — Ad primum enim sumptum ex prioribus verbis, *factores legis justificabuntur*, respondemus verbum *justificandi* æquivocum esse; tres enim illius verbi significationes ibi D. Thomas notat; significat enim vel exequi opus justitiæ, vel declarari seu probari justum, vel justum fieri, seu comparare justitiam; addi etiam potest quarta significatio, scilicet justum esse, vel supponi, ex Augustino, dicto lib. de Spir. et Litter., cap. 26. Sed hæc ad duas primas significationes a D. Thoma positas reducitur, quamvis justificari interdum idem sit quod in justitia crescere, juxta illud: *Qui justus est, justificetur adhuc*, Apoc., cap. 22, num. 11; atque omnes hæc significationes locum habere possunt in prioribus verbis Pauli, non vero in posterioribus, quæ nunc tractamus. In prioribus enim verbis loquitur Paulus de Judæis, et potest optime intelligi de implentibus non unum vel aliud præceptum legis, sed simpliciter totam legem, ibi enim nomen *legis* quasi collectivum est, et totam legem complectitur; unde non dicitur *factor legis*, qui unum vel aliud præceptum legis servat, sed qui totam legem observat. Et talis dicitur justificari, vel quia justitiam exequitur, ut D. Thomas vult, vel quia operibus suis se justum ostendit et probat, et ideo vere talis ab aliis reputatur; vel quia justus esse supponitur, quia non posset totam legem servare, nisi esset justus, ut ait Augustinus; vel certe quia per opera legis ex gratia Dei facta consequitur justitiam, vel quoad augmentum ejus, si jam erat justus, vel quoad infusionem justitiæ sanctificantis, disponendo se proxime, vel remote, per gratiam auxiliantem ad illam recipiendam. At vero de gentibus quæ legem non habent, et naturaliter ea quæ legis sunt faciunt, non dixit Paulus justificari per talia opera, sed solum *ostendere legem in cordibus scriptam*, quod longe diversum est; neque eos vocat *factores legis*, nec tales in rigore dici possunt, nisi totam legem observent, quod sine gratia facere non possunt: et tunc etiam justificabuntur modis explicatis. Secus vero est si aliqua tantum faciant quæ lex naturæ jubet, et alia transgrediantur, tunc enim nec factores sunt

legis, nec simpliciter justificari dici possunt, sed ad summum dici poterunt secundum quid justificari primo modo, id est exequi justitiam, non infusam, sed naturalem, nec integram, sed ex parte, seu in aliqua materia, et consequenter etiam dici possunt justificari secundo modo, non simpliciter, sed secundum aliquid, quia in eo quod bene operantur, reputantur justus, id est, immunes a peccato in tali opere, non in persona.

30. *Ad secundum argumentum et ad primam propositionis majoris probationem.* — Unde ad secundum argumentum negatur major, et ad primam probationem negatur assumptum. Quia (ut bene notarunt Cajetan., Pereir. et alii) Paulus non dixit: *Omnia ea quæ legis sunt faciunt*; sed indefinite dixit, *ea quæ legis sunt*, quod verissime dicitur de his qui aliqua legis præcepta observant, licet alia transgrediantur: unde considerandum est plus significari per illud verbum *factores legis*, quam per hæc, *ea quæ legis sunt faciunt*: quia nomen *legis*, absolute et collective positum, totam legem per modum unius complectitur, et ideo non dicitur in rigore factor legis, nisi qui totam implet; at vero cum quis dicitur facere ea quæ sunt legis, locutio non est ita absoluta, nec quasi collectiva de tota lege, sed indefinita de præceptis legis, et ideo verissime dicitur de illo qui aliqua quæ sunt legis facit, licet non faciat omnia. Neque verum est hos, qui ea quæ legis sunt naturaliter faciunt, justos esse, aut iram Dei effugere, *aut tanquam legis factores justificari*, aut prædicta verba ad probationem vel illius prioris sententiæ, *factores legis justificabuntur*, vel alterius, quod justus gloria a Deo coronabuntur, esse inducta. Nihil enim horum colligi potest ex verbis Pauli. Evidenter enim inducit illa verba: *Gentes quæ legem non habent, naturaliter ea quæ legis sunt faciunt*, solum ut ostendat, gentes non omnino carere lege, et suis actibus ostendere se habere illam scriptam in cordibus. Quod plane ostendunt, non solum qui totam legem observant, sed etiam qui aliqua præcepta ejus faciunt; nec de justificatione per talia opera aliquid ibi Paulus dixit, ut declaravimus, neque etiam de eorum remuneratione aliquid dicit, ut ostendemus. Quapropter sensus hic de indefinita locutione Pauli non solum consentaneus est verbis ejus, sed etiam intentioni Pauli magis deservit. Nam hoc modo fieri potest ut idem gentilis, qui est transgressor legis, aliqua faciat eorum quæ lex jubet, et hæc faciendo ostendat legem

scriptam in corde, et testimonium contra se ferat, quod non omnino careat lege, licet scriptam non habeat, ac proinde merito damnetur propter ea quæ contra legem naturalem facit.

31. *Ad secundam ejusdem majoris probationem.* — Et hinc ad secundam ejusdem majoris probationem facilis est responsio. Nam etiam in gentibus infidelibus testimonium reddit illis conscientia ipsorum, et in eis inveniuntur cogitationes invicem accusantes et defendentes, quæ etiam ipsos accusabunt vel excusabunt *in die, quando Dominus judicabit occulta cordium*. Nam licet in illo judicio, gentilis in sua infidelitate mortuus non possit defendi seu excusari quoad omnes actiones suas, nec quod simpliciter caruerit peccato, potest tamen excusari quoad aliquas. Nam conscientia immediate accusat actum quod bonus sit vel malus, ut docet D. Thom., 1 part., quæst. 79, art. 13; et ita etiam homo damnandus in die judicii poterit per conscientiam excusari, quod in uno vel alio actu non peccaverit, quia per ignorantiam invincibilem fecit, vel quod minus peccaverit, quia cum paucioribus pravis circumstantiis deliquerit, vel quod bene moraliter egerit in aliquibus actibus propter quos non damnabitur, sed minus punietur, licet propter illos actus præmium in illo judicio non sit recepturus. Quod aperte docuit Augustinus, lib. 4 cont. Julian., cap. 3, exponendo eadem verba Pauli, et nostram expositionem secundo loco ponendo ait: *Aut si fidem non habent Christi, profecto nec justi sunt, nec Deo placent, cum sine fide impossibile sit placere Deo, sed ad hoc eis in die judicii cogitationes suæ defendent, ut tolerabilius puniantur, quia naturaliter quæ legis sunt, ulcumque fecerunt, scriptum habentes in cordibus opus legis hæcenus, ut aliis non facerent, quod perpeti nollent: hoc tamen peccantes, quod homines sine fide, non ad eum finem ista opera retulerunt, ad quem referre debuerunt.* Sed hoc ultimum, licet sæpe contingat, non est semper necessarium, ut supra dixi. Ideoque si contingat aliquid sine peccato ab his fieri, solum excusabit illos conscientia ab omni pœna propter talem actum, et ita tolerabilius punientur pro omnibus vitæ suæ actibus, licet pœna aliis actibus debita inde non minuat.

32. *Ad tertium argumentum. Origenis responsio non potest sustineri.* — Ad tertium argumentum, sumptum ex verbis illis: *Gloria, honor et pax omni operanti bonum*, quia non possunt de gentibus infidelibus vera esse, Origenes

supra, intelligens etiam hæc verba de gentibus non credentibus, consequenter respondet, si illi aliquid boni operentur, licet vitam æternam non assequantur, nihilominus *bonorum operum gloriam et honorem, et pacem penitus perdere non posse*. Quia (ut infra dicit) sicut is qui malum operatur, condemnari meretur, ita si operetur bonum, aliquam remunerationem accipiet. In qua expositione imprimis consideranda est doctrina, quia, ut vera sit, debet intelligi de aliqua remuneratione temporali, et ita verum est, omnes, qui aliquid boni operantur, etiamsi alioqui mali sint, non privari aliquo temporali præmio, nam omne opus bonum eo ipso meritorium est, etiam apud Deum, juxta doctrinam D. Thom., 1. 2, quæst. 21, art. 3. Ideoque verisimile est Deum omni operanti aliquod bonum, dare aliquod præmium, vel in futura vita, vel in præsentem, quando vel opus, vel persona non est capax melioris præmii. Unde August., 5 de Civit., cap. 12, censet Romanos augmentum imperii, gloriam, honorem, ac pacem temporalem suæ reipublicæ propter bona opera a Deo accepisse, etiamsi illa non simpliciter bona, sed ex objecto tantum, et non ex fine operantium esse viderentur. Non potest autem dici juxta doctrinam fidei, infideles vel alios peccatores habituros aliquod præmium in die judicii, vel in vita futura, propter bona opera quæ in illo statu operantur. Quapropter non videtur illa doctrina posse præsentem loco Pauli accommodari, nam aperte loquitur de præmio æterno in extremo judicio Dei conferendo. Ait enim: *Thesaurizas tibi iram in die iræ, et justi judicii Dei, qui reddit unicuique secundum opera ejus, iis quidem qui secundum patientiam boni operis, gloriam et honorem, et incorruptionem quærent, vitam æternam, etc.*, ubi aperte loquitur de ultima retributione, et de gloria et honore æternæ beatitudinis, quia non datur vita æterna querenti gloriam humanam et temporalem, sed divinam et æternam, et ideo illi statim adjunxit *incorruptionem*. Ergo cum infra dicit: *Gloria, et honor, et pax omni operanti bonum, Judeo primum et Græco*, de eadem gloria loquitur, et de retributione faciendâ in eodem ultimo judicio, ut exposuit Augustinus, Epist. 47.

33. *Vera responsioni via munitur.* — Fatemur ergo Paulum ibi loqui de præmio æternæ gloriæ, cujus excellentes proprietates illis verbis indicat: *Gloriam, honorem, incorruptionem, et pacem*. Sed adverte non dicere hoc præmium dari omni operanti bonum, sed iis

qui quærunt vitam æternam suis operibus. Illic enim est sensus valde probabilis illorum verborum: *Iis qui, secundum patientiam boni operis, gloriam, et honorem, et incorruptionem quærunt vitam æternam*, ita ut accusativus *vitam æternam* cum verbo *quærunt* construatur, alii vero accusativi, *gloriam, honorem, et incorruptionem*, cum verbo *reddet*, quod præcessit; ut sensus sit, iis qui, secundum patientiam boni operis, quærunt vitam æternam, reddet gloriam, honorem et incorruptionem. Ita construunt et exponunt Hieronym., Ambros., OEcumen., Anselm. et divus Thom. ibi, et Gregor. 28 Moral., cap. 13, alias 6. Quamvis licet legamus et exponamus, ut Chrysostomus, et Græci multique Latini volunt, quærentibus gloriam, honorem, et incorruptionem per patientiam boni operis, daturum Deum vitam æternam, idem significari debet, licet diversis verbis. Necessario enim id intelligendum est de quærentibus gloriam et honorem immortalem, ac verum, qui non est, nisi apud Deum, et in æterna beatitudine; nam quærentibus per sua opera temporalem gloriam, non dat Deus vitam. Atque ita etiam exponunt Chrysost., Theophyl. et Theodor.; unde in re idem sensus redit, nam idem præmium, seu terminus, aut finis bonorum illis verbis significatur, generalius nominibus gloriæ, honoris et incorruptionis, specialiusque nomine vitæ æternæ.

34. *Concluditur responsio.* — Non ergo cui-cumque operanti bonum, sed operanti illud ob supernaturalem finem, ait Paulus redditurum Deum vitam æternam. Postea vero cum dicit: *Gentes quæ legem non habent, naturaliter ea quæ legis sunt facere*, non dicit ea facere quærando per illa vitam æternam, aut gloriam, qua Sancti fulgebunt, sicut sol, sed naturaliter facere, quia rationi sunt consentanea. Et ideo licet in utroque loco Paulus loquatur de gentibus in communi, tamen in priori gentes non credentes comprehenduntur sub his qui operantur malum, quia licet aliquid boni operentur, non tamen cum conditionibus ad illud præmium requisitis, malum autem est ex quoemque defectu. Et ob eandem causam, necesse non est ut omnes qui aliqua legis naturalis opera faciunt, præmium illud consequantur, quia, ut bene Cajetanus notavit, non dixit Paulus meritorie facere, sed tantum simpliciter facere. Et quamvis illa regula generalis vera sit, quod Deus reddit unicuique secundum opera sua, nihilominus non propter omnia bona opera dat præmium vitæ,

seu gloriæ æternæ. Nam multa opera bona moraliter possunt esse etiam in fidelibus; imo etiam in justis, quæ non remunerantur illo præmio, ut infra suo loco videbimus. Idemque est de operibus supernaturalibus factis extra statum gratiæ, et de factis a justis, qui postea in gratia non perseverant. Unde etiam pondero verbum illud Pauli, *per patientiam boni operis*; per hunc enim loquendi modum, ut Patres exponunt, circumscripsit et comprehendit debitum modum operandi, ut tandem opus sit dignum præmio. Oportet enim ut sit cum patientia, in vincendis difficultatibus bene operandi cum debitis circumstantiis, et perseverando sine lapsu usque ad finem, alias non obtinebitur præmium. Gentes autem fide carentes non possunt hoc modo mereri *secundum patientiam boni operis*, et ideo licet possint aliquid boni secundum rationem operari, non tamen possunt consequi præmium eorum, qui, secundum patientiam boni operis, vitam vel gloriam æternam quærunt. Ergo priora verba Pauli non obstant quominus posteriora de gentibus etiam non credentibus intelligantur. Nec obstat quod in verbis intermediis absolute dixit Paulus: *Gloria, honor et pax omni operanti bonum*, quia hæc intelligi debent juxta præcedentia, quorum fere sunt repetitio, et ita *operari bonum* intelligitur perfecte, et sicut oportet. Quamvis per accommodationem possit cum proportionem applicari ad omnem operantem bonum quodcumque, quia etiam ille aliquid præmium, saltem temporale recipiet, quod videtur voluisse Origenes. Imo et Hieronymus, in cap. 66 Isai., ubi vulgata habet: *Judæi primum, et Græci*, ipse legit, et *ethnici*, indicans illa verba etiam in ethnicis verificari, quod debet quidem intelligi quoad pœnam et damnationem proprie et simpliciter, quoad præmium vero solum secundum quid, et per quamdam proportionem, seu accommodationem.

35. *Ad quartum argumentum.* — Ad quartum, respondeo illa quidem quæ in fine capitis dicit Paulus, a solis credentibus et gratia Dei adjunctis impleri posse, inde tamen solum concludi. Paulum in hoc capite loqui de gentibus absolute, prout a Judæis distinguuntur, in quibus et credentes et non credentes comprehenduntur. Ideoque in discursu capitis, quædam interdum illis tribuit, quæ non nisi per spiritum gratiæ fieri possunt. Interdum vero tribuit aliquid quod ductu rationis fieri contingit, sicut etiam cap. 4 multa alia dixerat de gentibus, quæ non nisi ab infidelibus et

iniquissimis gentilibus commissa fuerunt. Cum ergo nomen gentium commune et indifferens sit, in unaquaque propositione poterit juxta prædicatum determinari, an tantum ad infideles, vel tantum ad fideles determinetur, vel potius utrisque juxta mensuram et capacitatem suam conveniat.

36. *Tractatur particula tertia naturaliter ex loco Pauli in numero 13; prima interpretatio vocis naturaliter ex Augustino et aliis.*—Hoc ergo modo satis probabile fit, verba illa Pauli etiam in gentibus ethnicis locum et veritatem habere, nondum tamen ostensum est illo testimonio probari, posse hominem aliquod opus simpliciter bonum sine gratia facere: quia gentilis etiam infidelis potest interdum auxilium gratiæ ad bene operandum recipere. Et ideo necessarium est (quod tertio loco proposuimus) particulam illam *naturaliter* ponderare et explicare. Tribus enim modis potest et solet explicari verbum illud. Primo, Augustinus, lib. 4 contra Julian., cap. 3, ita id exponit: *Ideo naturaliter et sine lege, quia de illis loquebatur qui ex gentibus venerunt ad Evangelium, non ex circumcisione, cui lex data est, et propterea naturaliter, quia ut crederent, in eis est correcta natura.* Et idem latius declarat lib. de Spir. et Litter., cap. 26; et sequitur Prosper, dict. cap. 22 contra Collat., et latius Fulgent., dict. cap. 25, ubi sic incipit: *De his igitur in quibus natura divino sanatur munere, ut in Deum credant, quique gratis per fidem justificati, etiam ad bene operandum auxilium gratiæ subsequentis accipiunt, Apostolus loquitur. Cur autem dicat hominem naturaliter credere, licet ei divinitus donetur, ut credat, in c. 22 et 23 declarat, dicens credere vocari naturale, quia homo naturaliter est capax fidei, et quia fides datur ut per eam humana natura ex vetustate renovetur. Ad hunc modum accedere videtur auctor comment. Ambr., dicens gentes, *duce natura, credere in Deum et Christum*, quod fortasse dixit, quia licet credere sit supernaturale, ad illud pervenitur prævio judicio, quod talis fides sit consentanea rationi, vel quod tales res sint credibiles, quod judicium multi putant esse ex dictamine rationis naturalis.*

37. *Est probabilis, sed inadæquata et duriuscula.*—Quæ quidem expositio est probabilis propter auctoritatem tantorum Patrum, potestque accommodari ad gentes fideles, et credentes in Deum et Christum, non tamen potest esse adæquata, cum ostenderimus Paulum de gentibus etiam non credentibus loqui.

Deinde est nimis dura, quia quod per gratiam fit, valde improprie dicitur fieri naturaliter, quia per gratiam reformatur natura, vel quia natura ex se est capax gratiæ, alias etiam Judæi dici possent naturaliter fecisse quæ legis erant, seu fuisse factores legis, quia non implebant legem nisi adjuti gratia reformante naturam, cujus erant naturaliter capaces; et nunc dici possemus diligere Deum super omnia naturaliter, etiam dilectione charitatis, quia etiam illa dilectio fit a natura reformata per gratiam. Et præterea in Græco pro *naturaliter* legitur *φύσει*, id est natura. At Paulus, in illa Epistola, naturam prorsus a gratia distinguit, ut naturæ infirmitatem et gratiæ necessitatem ostendat: ergo difficile creditu est, nomine naturæ ad opus gratiæ significandum usum fuisse; nam in rigore idem est natura aliquid fieri, quod facultate naturali, vel (ut Syriaca vertit) *ea natura sua, quisque facit.* Quia tamen Augustini expositio valde probabilis est, posset ad hanc ultimam objectionem responderi, non esse mentem Augustini, ibi sumi nomen *naturæ* pro gratia, nec tribui effectum supernaturalem gratiæ ipsi naturæ, sed solum dici hominem naturaliter implere ea quæ sunt legis naturæ, quia ipsa natura est principium talis operis, licet natura infirma id non possit præstare, nisi sanata per gratiam, ut magis in sequentibus expositionibus declarabitur.

38. *Secunda interpretatio communis.*—Altera ergo expositio, valde communis, est, idem significare ibi *naturaliter facere*, quod facere ductu naturæ, id est, per naturales *cogitationes et ratiocinationes*, ut dixit Chrysostomus, seu *rationibus a natura ductis*, ut dixit Theophylactus, vel, ut Oëcum., *naturæ ratiocinationibus ad boni operationem utentes*; denique per legem naturalem omnibus hominibus communem, siue legis scriptæ adminiculo, ut sentit Hieronymus, Epistol. 151 ad Algas., quæst. 8, et idem sentiunt Anselm., D. Thom., Cajetan. et alii in Paulum. Juxta hanc ergo expositionem, illud *naturaliter* non significat idem quod solis naturæ viribus, ac proinde non opponitur gratiæ, aut illam negat, vel excludit, sed solum affirmat regulam talis operis esse dictamen rationis naturalis, ut dixit Lyranus. Atque hac ratione etiam hoc modo non probatur illis verbis, quod intendimus, nimirum posse aliquid bonum opus morale fieri sine viribus gratiæ. Nam ea quæ fiunt naturaliter quoad regulam rationis naturalis, possunt fieri ex gratia, imo etiam sæpe

non possunt observari sine gratiæ auxilio, ut postea videbimus. Atque ita multi ex auctoribus explicantibus vocem *naturaliter* hoc secundo modo, nihilominus dicunt loqui Paulum de gentibus gratia adjutis.

39. *Queritur juxta prædictam interpretationem, cui gratiæ contraponatur vox naturaliter. — Responsio prima confutatur. —* Quæret vero aliquis quænam sit hæc gratia quam vox *naturaliter* non excludit. Nam in illa explicanda etiam est varietas in hac sententia. Anselmus enim ibi ait: *Naturaliter quidem, sed non nisi per gratiam et fidem, quæ renovat imaginem Dei.* At vero hæc additio et confundit hanc expositionem cum præcedenti, et supra dictis repugnat, quia si fides est necessaria ut gentilis sic naturaliter operetur, nunquam poterit de gentili infideli verum esse quod Paulus ait, ea quæ legis sunt facere; quod est contra dicta, et incidit in priorem expositionem. Deinde probatur, quia si fides est necessaria ad hunc modum implendi legem naturalem, jam tunc non operatur homo ductus ratione naturali, nec lege naturali ut per solam rationem naturalem manifestata, sed ductus spiritu fidei, et in virtute illius ut manifestantis illam legem, quod est contra Chrysostomum et alios hujus expositionis auctores, imo et contra vim argumentationis Pauli, ut supra argumentabamur. Præterea, quod Paulus ibid. subdit: *Testimonium illis reddente conscientia ipsorum,* non solum est verum de conscientia fide illustrata, sed etiam de conscientia per naturalem rationem concepta. Quis enim neget gentiles infideles accusari et excusari conscientia, ut ita dicam, mere naturali? Vel quod eadem conscientia accusabit illos in die judicii, vel etiam excusabit modo supra dicto? Ergo, ad illum modum naturaliter operandi ex dictamine propriæ conscientiæ, non est necessaria fides, sed ex parte intellectus ratio naturalis sufficit; ergo de isto modo operandi naturaliter Paulus loquitur.

40. *Altera responsio. — Refellitur. —* Aliter dici potest, quamvis illud verbum naturaliter non requirat fidem, nihilominus non excludere necessitatem alienjus gratiæ, etiam ex parte intellectus, qua ratio ipsa divinitus excitetur et juvetur, saltem providendo, ut cogitatio illa accommodata sit ad movendum affectum. Quia non potest humanus affectus, præsertim in homine lapsa, ad bonum moveri, nisi divinitus excitetur. Et ideo Nazianz., orat. 31, numer. 7, possibilitatem hominis naturalem comparat silici, qui, nisi perentia-

tur, ignem non producit. Et Prosper., contr. Collat., comparat ferro ignito, *qui flammam boni desiderii non elicit, nisi spiritu gratiæ exciteletur*; excitatur autem per rationem; ergo necesse est ut ipsa ratio dirigatur et præveniatur, ut ita judicet, sicut ad movendum affectum oportet. Sed imprimis hoc non habet fundamentum in verbis Apostoli, qui solum loquitur de naturali lege impressa cordibus, non per gratiam, sed per conditionem naturæ, et per hanc dicit moveri hominem ad operandum ea quæ sunt legis, et ideo naturaliter ea facere. Deinde quod statim addit: *Testimonium perhibente conscientia ipsorum,* profecto intelligitur de naturali dictamine conscientiæ, quod potest haberi ex vi luminis naturalis sine ulla prævia excitatione gratiæ, ut paulo antea declaravi: illud autem dictamen sufficit, quantum est ex parte intellectus, ad operandum aliquid secundum legem naturalem, quia per illud dictamen sufficienter applicatur, et quia illud dictamen sufficit ad accusandum eum qui contra illud operatur. Denique, ad formandum hoc conscientiæ dictamen, non requiritur semper supernaturalis excitatio, sed sufficiunt naturales cogitationes, quæ ex objectis occurrentibus excitantur; quod vero talis cogitatio sit congrua in ordine ad naturalem effectum, non addit illi aliquam peculiarem proprietatem, quam necesse sit a gratia provenire, ut in sequentibus capitibus ostendemus. Ergo cum Paulus dicit gentes naturaliter operari ea quæ legis sunt, si illud *naturaliter* referatur ad intellectum, ideo dictum est, quia lumen rationis, naturali modo operans, ad hoc sufficit, et ita plane intellexerunt Græci Patres supra allegati, et multi ex Latinis; et Hieronymus, Epist. 151 ad Algas., quæst. 8, ubi ex hoc loco probat legem naturalem scriptam in cordibus, et dantem testimonium conscientiæ: *Quæ (inquit) omnes continent nationes, et nullus hominum est, qui hanc legem nesciat*; et sequitur D. Thom. 1. 2, quæst. 91, art. 2, in argumento *Sed contra.*

41. *Tertia responsio. — Non admittitur. —* Alio ergo modo exponitur illud *naturaliter*, ut intelligatur ex parte intellectus, non excludat autem gratiam ex parte affectus. Priorem enim partem de intellectu indicant Græci; posteriorem vero addit ibi D. Thom. dicens: *Et tamen non excluditur, quin necessaria sit gratia ad movendum affectum.* Et sequitur Cathar. in id Genes. 3: *Adam, ubi es?* Ratio autem reddi potest, quia longe difficilius est velle aut operari bonum, quam cognoscere

esse faciendum. Quæ sententia non est aperte contra Paulum, quia non excludit expresse necessitatem gratiæ. Cum vero Paulus simpliciter dixerit, *naturaliter quæ legis sunt, faciunt*, qui dixerit hoc *naturaliter* intelligi ex parte intellectus, et non ex parte voluntatis, oportet ut illud probet; alioqui si eadem ratio ex parte utriusque potentiæ reperitur, merito de utraque intelligimus Paulum, qui non de potentiis, sed de homine simpliciter loquitur, et ideo ex vi absolutæ locutionis utramque potentiam excludit: præsertim quia (ut dixi) Paulus loquitur etiam de infidelibus Gentilibus, quibus ante fidem et voluntatem credendi, probabile est nullam infundi gratiam, vel gratiæ auxilium ipsi voluntati, nisi in ordine ad concipiendum affectum credendi, quod est initium omnis alterius bonæ et piæ voluntatis. Vel certe si interdum aliquod aliud auxilium datur infideli, illud est extraordinarium beneficium, non ex ordinaria providentia, ut infra videbimus; at operari bonum morale aliquando ex dictamine naturalis conscientiæ contingit gentibus etiam infidelibus ex ordinaria providentia, et ideo naturalis conscientia eos juste accusat, si non faciant. Nec Nazianzenus supra citatus aliquid contra hoc dicit, imo hoc confirmat, dum ait rationem esse quæ aptitudinem naturæ excitat, ut natura in opus procedat, et quoad hoc comparat naturam silici, rationem ferro excitanti, seu percipienti. Prosper vero loquitur de pio desiderio, ut postea videbimus.

42. *Quarta et vera responsio.* — Superest ergo ultima expositio illius vocis *naturaliter*, ut simpliciter, et, ut sonat, intelligatur, id est, ductu naturæ, et per vires ejus, et ordinariam providentiam secundum naturæ concursum illi debitum. Et ita intellexerunt illum locum Scholastici communiter, et consonant alii Patres, nec dissentit Augustinus in locis allegatis, et quoad doctrinam ipsam inferius ostenditur. Solum superest alia evasio, etiam in doctrina ejusdem Augustini, quia licet Paulus dicat gentes naturaliter facere ea quæ legis sunt, hoc sufficienter intelligitur quoad substantiam operis, vel præcepti; nam gentilis datus elemosinam revera facit aliquid quod lex naturalis dicitur, et implet illam legem, etiam si non bene nec recta intentione id faciat. Paulus autem solum dixit gentiles facere ea quæ sunt legis, non vero dixit bene ea facere. Unde August., dicto lib. 4 contra Julianum, cap. 3, cum dixisset, licet gentiles interdum sine fide et gratia naturaliter faciant quæ legis

sunt, et ideo excusari possint in die judicii, ut tolerabilius puniantur, adjungit: *Hoc tantum peccantes, quod homines sine fide non ad eum finem hæc opera retulerunt, ad quem referre debuerunt.* Possumusque hoc confirmare ex alio loco Pauli ad Rom. 4: *Si Abraham ex operibus justificatus est, habet gloriam, sed non apud Deum, ubi ex operibus intelligit non facta ex gratia, et illa dicit non habere gloriam apud Deum, quia non sunt simpliciter bona, nec bene fiunt, et ideo solum apud homines merentur laudem propter apparentem bonitatem.*

43. *Præcluditur proxima evasio.* — Verumtamen jam in superioribus ostensum est non oportere ut infidelis malum finem vel aliam pravam circumstantiam operi suo adjungat, quando aliquid boni ex genere operatur, vel, quod perinde est, quando aliquid naturale præceptum implet, licet id sæpe et ordinarie contingat, ut fortasse Augustinus voluit, et explicasse videtur dicto lib. de Spir. et litter., cap. 27, addendo particulam *vix*, ut, cum Stapletonio, cap. 7, num. 24, notavimus, et ponderat etiam Valent., disput. 8, quæst. 1, punct. 2. Quare, cum Paulus simpliciter dicat gentiles interdum naturaliter facere quæ legis sunt, gratis limitatur ejus sermo ad observationem legis quoad substantiam, non quoad bonum modum moralem. Præsertim cum fere eadem sit utriusque ratio, nam si sit sermo de omnibus præceptis legis naturæ, non potest gentilis naturaliter omnia facere quæ sunt legis, etiam quoad eorum substantiam; si vero sit sermo de uno vel alio opere, sicut non excedit facultatem naturalem unum vel aliud opus quoad substantiam facere, ita nec in uno vel alio opere debitum moralem modum tenere, et pravas circumstantias vitare. Et aliunde etiam conscientia naturalis accusat pravam modum, et potest etiam illum interdum excusare; non est ergo cur sententiam Pauli limitemus.

44. *Verba alia Pauli non obsunt, sed prosunt vera responsioni.* — Neque obstant alia verba cap. 4, imo potius juvant; nam cum Paulus ait opera solius naturæ, etiamsi bona sint, habere gloriam, sed non apud Deum, revera loquitur de bonis et honestis operibus secundum naturalem rationem factis, ut exponunt Chrysost., homil. 8, Oecum., suo cap. 5; Theod. et Theophyl., Ambros., Anselm., divus Thom., et Iustus Cajetan. et Toletan.; et Salmer., disputat. 30, et sequuntur Turrian. et Staplet. locis supra citatis. Qui omnes di-

cunt Paulum loqui de bonis operibus quæ Abraham ante fidem habuit, virtute quadam naturali, quæ apud Deum non erant meritoria, nec poterant justificare, et ideo dicuntur non habere gloriam apud Deum, licet alioqui apud homines essent digna laude, non falsa, sed ea quæ ex natura rei bonitatem quamcumque operis moralis comitatur, ut tradit D. Thom. 1. 2, quæst. 21, artic. 2. Est enim homo dignus laude, eo ipso quod bene operetur, nam si operatio sit ex sola natura, licet libere fiat, laus illa pertinere potest ad quamdam gloriam humanam, non tamen ad habendam gloriam apud Deum, et ita verba illa assertionem nostram potius confirmant quam oppugnant.

45. *Comprobatur jam assertio hujus capituli posita in numero 4, ex loco Pauli hactenus explicato. — Confirmatio assertionis ex Rom. 2.* — Juxta hanc ergo satis probabilem, ac receptam, valdeque planam, verbisque Pauli coherentem expositionem, multum quidem suadet ac confirmatur assertio posita. Quæ simul auctoritate Patrum comprobata est; omnes enim qui hanc expositionem approbant et præferunt aliis, a fortiori doctrinam ipsam tanquam veram supponunt. Augustinus vero, qui alteram expositionem anteponit, fatetur hanc expositionem esse probabilem, et sine ulla suspitione Pelagiani erroris defendi posse, quod esse non posset, nisi doctrina ipsa vera esset. Augustinum item in hoc sicut in aliis imitatus est Prosper. Fulgentius vero licet in eo capite, ubi exponit locum Pauli, nihil de hujus nostræ expositionis probabilitate dixerit, nihilominus statim, capite 26, doctrinam ipsam confitetur; nam loquens de iniquis hominibus qui, vel cognoscentes Deum, non sicut Deum illum glorificent, et qui in operibus suis aliquid bonitatis servant, ad finem vero charitatis illud non referunt, adjungit: *Quibus aliqua quidem bona, quæ ad societatis humanæ pertinent æquitatem, inesse possunt, sed quia non charitate Dei fiunt, prodesse non possunt.* Præterea obiter auctoritate Pontificia ostensum est nullam in hac expositione esse suspitionem Pelagiani erroris. Quod iterum confirmarunt iidem Pontifices Pius et Gregorius, damnando 29 propositionem Baii, in qua dicebat: *Pelagianum esse errorem dicere quod liberum arbitrium valet ad ullum peccatum vitandum,* et 36, in qua dicebat, *cum Pelagio sentire qui boni aliquid naturalis, hoc est, quod ex solis naturæ viribus ortum ducit, agnoscit.* Cum enim istæ propositiones Baii

sint hypotheticæ, Pontifices, illas rejiciendo, in rigore potuerunt illas damnare solum propter excessum notandi doctrinam illam Pelagiani erroris. Ergo ut minimum decernunt Pontifices nostram sententiam esse ab omni suspitione Pelagianismi immunem. Hoc autem satis est ut sit contrariæ præferenda, et tanquam simpliciter vera defendenda, cum alias sit magis consentanea Scripturis et Patribus, et ratione fere evidenter ostendatur, ut statim dicemus.

46. *Et ex censura contra propositiones Baii.* — Accedit quod idem Michael Baius, in propositione 37 simpliciter, et sine censura vel alia exaggeratione docet, omnem amorem naturalem creaturæ rationalis, qui non est ab Spiritu Sancto infundente charitatem, esse vitiosam cupiditatem, quod et in aliis propositionibus, præsertim 34 et 35, judicaverat; et tamen Pontifices eadem generali censura illam doctrinam condemnarunt; ergo ad minimum censent hanc nostram sententiam esse adeo probabilem, ut temerarium vel scandalosum sit, ut peccaminosum damnare omnem naturalem voluntatis affectum, seu amorem, qui ex gratia Spiritus Sancti non proficiscatur, in quo sine dubio multum huic sententiæ favent. Quod etiam inde confirmatur, quia, cum idem auctor proposit. 28 sine censura etiam vel exaggeratione dixerit: *Liberum arbitrium, sine gratiæ Dei adjutorio, non nisi ad peccandum valet,* sub eadem censura a Pontificibus rejicitur, quia revera his temporibus propter Lutheranorum errores talis loquendi modus Catholicos offendit. Ergo virtute approbant contradictoriam propositionem, scilicet, liberum arbitrium sine gratiæ adjutorio aliquid potest facere, quod peccatum non sit. Ex quo facile infertur posse etiam aliquid facere, quod bonum morale sit. Neque audienda est evasio quorundam dicentium, ad tuendam sententiam Pontificum, satis esse quod possit liberum arbitrium facere aliquid indifferens. Hoc (inquam) frivolum valde est, quia secundum Augustini et D. Thomæ sententiam communius a Theologis probatam, non datur in voluntate libere operante actus indifferens in individuo, et ideo, secundum veram Theologiam, recte sequitur, si liberum arbitrium potest sine gratia non male operari, posse etiam bene. Et quamvis hæc illatio non sit evidens propter contrariam opinionem de actu indifferente in individuo, quæ non caret sua probabilitate, nihilominus verisimile non est Pontifices damnassem illam propositionem Baii, fundatos in tali opinione

de indifferente actu possibili, vel propter illius probabilitatem.

47. *Confirmatur deinde argumentando ab actu indifferente.* — Præterea est manifesta ratio, quia si liberum arbitrium sine adiutorio gratiæ valet ad faciendum actum qui peccatum non sit, sed indifferens, etiam valere poterit ad faciendum aliquem actum moraliter bonum; quia, si potest facere actum indifferentem, ergo potest velle aliquid indifferens sine malo fine, et sine mala circumstantia; nam si actus in specie indifferens fieret propter malum finem, jam non esset in individuo indifferens, sed malus; ergo etiam poterit facere actum ex objecto bonum sine pravo fine; ergo potest facere actum bonum moraliter. Probatur consequentia, quia si voluntas potest pro sola libertate velle objectum indifferens, propter aliquam naturalem commoditatem indifferentem, cur non poterit velle objectum honestum propter naturalem honestatem. At vero actus ex objecto bonus, et carens malo fine, simpliciter est bonus; nam in aliis circumstantiis, minus periculi deformitatis vel malitiæ invenitur; ergo si liberum arbitrium potest non facere actum malum propter indifferens objectum, poterit etiam facere actum bonum propter objectum moraliter bonum, nullam ei addendo circumstantiam malam.

48. *Et ratione a priori.* — Et hinc concluditur ratio a priori hujus veritatis, quia talis actus non est per se impossibilis libero arbitrio gratia destituto, nec semper est in individuo propter extrinseca impedimenta adeo difficilis, ut ad vincendam difficultatem sit semper, et in singulis hujusmodi actibus, adiutorium gratiæ necessarium: ergo non est cur interdum fieri non possit a libero arbitrio sine adiutorio gratiæ. Antecedens quoad priorem partem evidens est, quia talis actus est in substantia naturalis, quia est de objecto materiali et formali proportionato, et inclinationi, ac viribus naturalibus liberi arbitrii; et cognitio talis objecti, iudiciumque conscientiæ sufficiens ad talem actum efficiendum etiam est naturale, et proportionatum naturali homini intellectus, ac principii quæ homo ex objectis sensibilibus, et per species ab illis acceptas naturaliter cognoscere potest; ergo ex nullo capite actus ille est per se impossibilis naturalibus viribus liberi arbitrii. Altera vero pars non indiget probatione, quia experimento satis constat: sequuntur enim contingit nullam occurrere difficultatem peculiarem in exercendo aliquo actu virtutis, vel misericor-

diæ ad inopem, reverentiæ, vel obedientiæ ad parentes, etc. Imo interdum homo, vel ex generali conditione naturæ, vel ex peculiari et individua inclinatione, vel ex consuetudine et bona educatione, est satis propensus in hujusmodi actus, et alioqui cum impedimenta sint accidentaria et contingentia, non semper occurrunt. Ergo nulla ratio reddi potest tantæ impotentiae vel difficultatis in omnibus et singulis actibus hujusmodi, ut nunquam possit aliquis sine auxilio speciali gratiæ per liberum arbitrium fieri.

49. *Ac denique argumentando ab statu naturæ integræ ad lapsam.* — Atque hic discursus probat generaliter tam in statu naturæ lapsæ, vel puræ, quam in statu integræ naturæ, de quo assertio multo magis communis et recepta, et cum majori ampliatione, ut in sequentibus videbimus. Nunc vero quoad præsens punctum de aliquo vel aliquibus actibus, ab statu naturæ integræ ad lapsam sumitur efficax argumentum, quia difficultates et impedimenta bene operandi, quæ ex lapsu naturæ humanæ ortæ sunt, non semper et in singulis actibus operis difficultatem adeo augent, ut propter illam solam necessarium simpliciter sit auxilium gratiæ ad singula moralia opera ordinis naturalis, ut ostensum est. Quia vero hic discursus diversis modis eluditur, juxta diversos modos explicandi auxilium gratiæ ad hos actus necessarium, ex quibus etiam ortum est, ut aliqui non tantum in statu naturæ lapsæ, sed etiam integræ, imo non solum in humana natura, sed etiam in Angelica, auxilium gratiæ ad singulos bonos actus requirant: ideo ad plenioris assertionis probationem, et ejus discursus confirmationem per singulos modos et opiniones affirmantes necessitatem talis auxilii discurrendum est, et quam sine fundamento loquantur, ostendendum.

CAPUT IX.

IN NULLO STATU ESSE NECESSARIAM HOMINI AD HONESTAM OPERATIONEM MORALEM ORDINIS NATURALIS SPECIALEM MOTIONEM, VEL QUALITATEM IPSI VOLUNTATI A DEO IMPRESSAM, QUE ET PHYSICE ACTUM EFFICIAT, ET VOLUNTATEM AD ILLUM EFFICIENDUM OMNINO DETERMINET.

1. *Prima sententia et opinio tractatur.* — Primus modus explicandi gratiam necessariam ad singula bona opera moralia, fuit Gregorii 2, dist. 28, quæst. 4, concl. 4 et 3, maxime ad 12, qui dixit, existente cogitatione et judi-

cio practico hominis de objecto bono honesto præsentato voluntati, non posse hominem solo libero arbitrio cum concursu generali Dei se determinare ad bonum illud bene seu virtuose volendum, sed necessariam esse specialem Dei motionem gratis a Deo impressam voluntati, quæ sit qualitas quasi transiens, vel alia similis entitas quæ et physice cum voluntate talem actum efficiat, et voluntatem ipsam ad illum studiose præstandum juvet atque determinet, ita ut sine illo adiutorio non possit voluntas facere talem actum, et ibi posito non possit aliter operari. Distinguit autem Gregorius hanc motionem a generali concursu; tum quia non est generalis, sed specialis tantum ad opera bona et libera; tum quia in re ipsa concursus non distinguitur ab actione creaturæ, hæc autem motio est res ab illa distincta; tum quia per solum concursum facit Deus actum liberi arbitrii, non tamen determinat voluntatem creatam, nec facit ut faciat, ut patet in actibus malis: per hanc autem motionem determinat voluntatem hominis ad actum bonum, et facit ut faciat illum. Unde concludit hanc motionem non esse debitam, quia non est simpliciter necessaria ad operandum, ac subinde esse specialem gratiam. Nam Deus solum debet generalem concursum; ergo quando addit hanc motionem, gratis illam confert tanquam speciale donum; est ergo gratia et speciale beneficium, saltem quoad modum. Atque hanc opinionem secutus est Capreol. in eadem dist. 28, art. 1, concl. 2, et art. 3, ad argumenta contra illam; et Hispalens., art. 3, notab. 1 et 2. Videturque idem sequi Dionysius Cistere., in 1, dist. 17, quæst. 1, art. 1, concl. ultim., latius in 2, dist. 25, quæst. 1, art. 2; dicit enim liberum arbitrium non sufficere ad aliquam bonam actionem, sicut sufficit ad malam, sed indigere speciali auxilio; non vero explicat modum istius auxilii, refert tamen Gregorium, et ita videtur ejus sententiam sequi. Quam etiam tenet Major 2, dist. 28, q. 1, concl. 2 et 3, ubi eodem modo loquitur. Sic etiam refertur pro hac sententia Romæus, libro de Libert. oper., verit. 14 et 15, et alii, qui, ut opinor, in aliis sensibus locuti sunt, ideoque eorum sententiam in sequentibus capitulis tractabimus.

2. *Ratio propria pro sententia proposita.* — Habet hæc sententia quædam fundamenta cæteris opinionibus, quas non probamus, communia, quæ ab auctoritate sumuntur, eaque post nostræ sententiæ confirmationem, et alia-

rum opinionum confutationem, expendemus. Unica ergo videtur esse ratio Gregorio maxime propria, quæ jam est tacta in superioribus; quia non potest actus esse bonus, nisi in debitum finem referatur; non potest autem referri in finem sine gratia; nam debitus finis est, ut propter gloriam Dei fiat, ad Coloss. 3; hic autem finis naturam superat: ergo. Atque hæc ratio habet fundamentum in Augustino, lib. 1 de Gratia Christi, capite vigesimo sexto.

3. *Rejicitur dicta sententia.* — *Primo, quia destituitur auctoritate.* — *Secundo, quia destituitur ratione.* — Hæc vero sententia communiter refellitur ab auctoribus quos in sequentibus capitulis referam; et mihi displicet, falsaque videtur. Primo, quia rem occultissimam et obscurissimam affirmat sine ullo auctoritatis vel antiquitatis fundamento, quod vel ex Scholasticis Theologis, qui Gregorium præcesserunt, vel ex Augustino, aut aliis Patribus, vel Conciliis sumi possit. Quod patet: nam etiam ad actus supernaturales talem modum gratiæ non requirunt, sed excitantem et adjuvantem gratiam, quæ longe diversæ sunt; ergo multo minus ad naturales. Consequentia evidens est; de antecedenti vero multa dicenda sunt infra, tractando de gratia efficaci. Secundo, destituta est illa opinio omni ratione fundata intrinseca natura rei. Quæ enim reddi potest causa hujus necessitatis magis ad actum bonum, quam ad actum malum? Nam hæc causa non potest sumi ex subordinatione, quam voluntas nostra habet ad Deum, tanquam causa secunda ad primam; nam eandem subordinationem et essentiali dependentiam habet in eliciendo actu malo, quam habet in eliciendo bono, juxta catholicam doctrinam Theologorum omnium, uno excepto Durando, cujus sententia tanquam erronea rejicitur in 1. 2, quæstione 79. Neque potest illa causa sumi ex libertate et indifferentia voluntatis, ratione ejus videatur indigere determinari ad aliquid definite volendum; nam eandem indifferentiam et libertatem habet respectu actus mali, et tamen ad illum determinatur cum vult sine determinante extrinseco secundum Gregorium; ergo est par utriusque ratio. Nec denique reddi potest causa ex ipsa differentia actuum; quia, licet sit unus melior alio, tamen uterque continetur sub naturali ordine, et habet talem proportionem ad naturales vires voluntatis, ut non excedat illas in ratione principii proximi; alioqui non esset actus naturalis, de quo tractamus, sed supernaturalis; nam in hoc fere consistit

ratio supernaturalis actus, ut infra videbimus. Neque video quod aliud caput excogitari possit unde illa differentia nascatur; ergo nulla ratione fundatur.

4. *Tertio, ab inconvenienti duplicis difficultatis.* — *Prima difficultas.* — *Secunda difficultas.* — Tertio, habet illa sententia duas difficultates, quas in hac materia sæpe inculcare soleo, et in sequentibus late urgebo. Prima est, quia si illa motio est necessaria ad volendum bene, et alicui non datur, ut non raro evenit, quomodo, quæso, habet libertatem ad talem bonum actum eliciendum? Nam si ego non habeo necessaria principia volendi, nec est in manu mea ut obtineam principium aliquod necessarium ad talem actum, profecto nec velle possum, neque simpliciter potestatem habeo, multoque minus moralem; in eo autem, quod non possum, liber non sum, quia libertas dicit potestatem ad utrumque. Nec responderi hic potest, licet non habeam illam motionem, posse illam habere, et per me stare quominus habeam. Quid enim faciam, ut habeam motionem quæ mihi non datur? Maxime enim deberem aliquid boni facere; at vero ad illud indigeo ipsa vel alia motione, juxta hanc sententiam; at nulla datur, ut supponimus: erit ergo impossibilis homini et actus bonus, et motio ad illum, quando ex se Deus illam non dat, ut plane contingit in omnibus qui actu peccant. *Secunda difficultas* est, quomodo is cui datur hæc motio, habeat libertatem quoad exercitium in actu illo efficiendo? Quia nec impedire potest motionem, si Deus illam dat, nam in illa recipienda mere passive se habet, neque, illa recepta, potest non agere, nec suspendere influxum suum, utrumque enim Gregorius fatetur. Ex illis autem duobus principii sequitur necessitas simpliciter, quia est inevitabilis per liberum arbitrium, et antecedens cooperationem ejus. Quæ nunc sufficiat attigisse, infra enim in graviori disputatione de gratia efficaci copiosius tractanda sunt.

5. *Veri sententia insinuat.* — Concludo igitur voluntatem humanam posse bene moraliter intra ordinem naturæ operari, sequendo dictamen aliquod rationis naturalis, sine speciali principio physico addito naturalibus potentibus hominis, et distincto a generali Dei concursu. Hæc est communis sententia Theologorum, quos infra referam, et, iudicio meo, convincitur secunda et tertia ratione contra Gregorium factis. Eamque latius probavi, 1 part., tract. 2, lib. 2, cap. 13; et ideo nihil addere necessarium iudico, præsertim quia ex

dicendis contra alias sententias hæc pars amplius confirmabitur.

6. *Ad rationem pro Gregorio in numero 2.* — Neque ratio Gregorii vim habet, quia illi satisfactum est in capitibus præcedentibus, ubi ostendimus relationem ad finem supernaturalem, vel supernaturaliter cognitum, non esse necessariam ad honestatem moralem operis naturalis ordinis. Imo nec propria relatio operis in Deum, formaliter, vel virtute, facta per actum elicitum ipsius operantis, necessaria est ad honestatem moralem operis, et licet esset, posset intra ordinem naturæ sufficere, ut dixi. Alia vero Gregorii argumenta aliis opinionibus communia sunt, et in sequentibus tractabuntur, ut dixi.

7. *An prædicta motio sit possibilis, et utilis, esto de facto non detur.* — *Respondetur affirmative, si motio ponatur subjecta usui libero.* — *Secus vero si ita subjecta non ponatur.* — Quæri autem potest an illa motio quam ponit Gregorius, esto necessaria non sit, possit a Deo cum utilitate accipientis tribui. Respondeo duobus modis cogitari posse motionem illam, primo, subjectam libero usui voluntatis, secundo ita dominantem voluntati, ut illi non possit resistere. Priori modo non videtur dubium quin sit possibilis et utilis. Possibilis quidem, quia nulla ostenditur repugnantia seu implicatio contradictionis, sive talis impressio fiat per modum habitus, sive per modum qualitatis transeuntis, ut est vulgaris opinio, de qua nunc non disputo, in sequentibus enim locus commodior occurret. Utilis autem erit talis motio, quia inclinabit voluntatem ad honestum, et augebit efficacitatem ejus, et non tollet libertatem, quia ponitur subjecta usui ejus, quæ subjectio in hoc consistit, ut, illa posita, sit in manu voluntatis elicere vel non elicere actum ad quem illa inclinatur. Cum enim illa ponatur distincta ab actu, et principium ejus, nihil obstat quominus, illa posita, non sequatur actio voluntatis, propter libertatem ejus. Gregorius vero alio modo posuit motionem illam, scilicet, ut necessariam ad bonum opus, et ut necessitatem quamdam compositam (ut vocant) et antecedentem, inferentem voluntati, quia, illa motione posita, necesse est ut consentiat. Hoc autem modo censeo illam non esse possibilem cum utilitate morali, quia censeo tollere libertatem a qua omnis moralis utilitas pendet, ut constat. Motionem autem illam inferentem necessitatem antecedentem, libertatem tollere, probatum est in tertia ratione contra Gregorium, cui nihil hactenus

responsum est, quod intelligi satis possit, ut iterum in sequentibus ostendam. An vero sit possibilis talis motio, saltem tollendo libertatem actus et moralem utilitatem, necessitatem inferendo voluntati, in prolegom. 1, c. 4 et 5 disputatum est.

CAPUT X.

AD SINGULA OPERA BONA MORALITER NON ESSE NECESSARIAM COGITATIONEM, VEL INSPIRATIONEM IN SUA ENTITATE MAJOREM, SEU MELIOREM, QUAM SINE AUXILIO GRATIÆ HABERI POSSET.

1. *Opinio contraria assertioni tituli.* — Tractanda sequitur altera opinio, quæ ad omnes et singulos actus morales naturalis ordinis requirit specialem gratiæ motionem divinitus adlitam intellectui, vel voluntati, ultra omnem cogitationem et præviam motionem quæ per causas naturales fieri possit. In quo convenit hæc sententia cum præcedenti, et præterea in hoc quod ponit hanc motionem ut distinctam ab actu libero voluntatis consentientis, et a concursu generali Dei, qui in ipso actu essentialiter includitur, et non censetur pertinere ad gratiam, sed esse debitum naturæ. Differt autem hæc sententia in multis a præcedenti. Primo, quia ponit hanc præviam motionem in aliquo actu vitali intellectus vel voluntatis, quæ sit vel cogitatio boni honesti, vel aliqua specialis illuminatio circa talem cogitationem, vel suavitas aliqua indita voluntati per modum simplicis affectus. Gregorius autem non ponebat motionem vitalem (ut sic dicam) sed impulsum quemdam a solo Deo voluntati, sine efficientia ejus, impressum. Secunda differentia est, quia Gregorius ponebat illum influxum ut per se efficientem physice actum bonum voluntatis; hæc autem opinio non tribuit hanc physicam efficientiam illis actibus præviis, quia censet voluntatem cum concursu generali esse sufficiens principium physicum talis actus, sed requirit illam motionem ut moraliter inducentem et attrahentem voluntatem. Tertio differunt, quia hæc opinio non dicit voluntatem determinari omnino ab illa motione ex natura ejus, sicut Gregorius de sua motione fingebat.

2. *Opinio explanatur.* — Hanc ergo specialem motionem moralem requirit hæc opinio ad singulos actus bonos, quia, licet præcedat in intellectu aliqua naturalis cogitatio boni honesti, particularis et practica, a sensibilibus objectis cum concursu generali Dei excitata,

et de se alliciens voluntatem ad tale bonum amandum, nunquam voluntas talem amorem vel actum bonum sine aliqua morali culpa eliciet, nisi Deus speciali modo, et ultra naturalem activitatem externorum objectorum intellectum illuminet aut dirigat, vel efficacius excitet, vel voluntati specialem boni dilectionem, vel affectionem imprimat, et tollat impedimenta quæ determinationem voluntatis possent impedire. Et ideo vocat hæc opinio hanc motionem specialem gratiam adjuvantem, necessariam ad singulas operationes honestas, ita ut voluntas, si illa gratia careat, infallibiliter peccet. Dici autem potest illa gratia naturalis in substantia, seu ordinis naturalis; tum quia per se nec ad supernaturalem finem ultimum, aut proximum, neque ad supernaturalem actum ordinatur; tum etiam quia non repugnaret fieri per causas naturales, si ad illum effectum fuissent dispositæ et applicatæ. Et nihilominus vocari potest gratia supernaturalis quoad modum, quia et datur sine proprio debito, quod in ipsa natura vel in dispositione causarum naturalium præcedat, et consequenter datur modo præternaturali, quia tunc non occurrebant causæ secundæ a quibus effici posset. Neque est dubium quin hoc genus gratiæ sit possibile, et si detur, fore valde utile ad bene operandum; quod vero sit etiam necessaria ad singula bona opera moralia in præsentis statu naturæ lapsæ, prædicta opinio affirmat; intelligi autem debet, nisi Deus altiore modum auxilii et gratiæ ad eadem opera efficienda conferre velit, ut per se clarum est.

3. *Tribuitur Marsilio, sed immerito.* — Hæc sententia tribui solet Marsilio 1, quæst. 20, art. 3. Sed si attente legatur in dubio 1 tota concl. 4, præsertim in versiculo *Ad hanc rationem*, et tota concl. 5, solum requirit illud speciale auxilium ad operandum honeste semper vel regulariter, et vincendum graves tentationes, non vero ad singula opera. Imo, respondendo ad rationem quamdam factam contra necessitatem talis auxilii, inquit: *Quamvis ita sit, sicut assumitur quoad aliqua, scilicet, quod Deus, dando naturam animæ intellectivæ, simul dat lumen naturale ad desiderandum, et assentiendum vero, et inclinationem ad bonum, Deo dirigente per influxum communem, etc.* Post peccatum vero (dicit infra) non sufficere hunc influxum communem, quia natura lapsa non est tam potens in naturalibus sicut integra: *Alias (inquit) posset nunc resistere omni tentationi, sicut antea poterat.* Non ergo

loquitur de singulis operibus, nec totus discursus ad hoc deducit.

4. *Tribuitur Clithor. et Roffen., qui tamen explicantur.* — Magis videtur huic sententiæ assentire Clithor. in Damasc., l. 2 de Fid., c. 30. Dicit enim cum Leonardo Aretino, Dial. de Moribus, quem citat, *omne opus bonum a Deo esse ut præcipuo auctore.* Quod sane, cum distributione accommodata, verissimum est; postea vero videtur explicare de Deo ut specialiter illuminante et adjuvante per gratiam. Idem clarius Roffen., art. 36 contra Luther., § *Neutrum sane potest*, et § *Verbosus*, et § *Quantum*; quia putat alias sequi posse hominem sine gratia per solum liberum arbitrium ad gratiam præparari, saltem remote et de congruo. Quod tamen non sequitur, ut 1 p. dixi, et in sequentibus latius est ostendendum.

5. *Tribuitur denique Castro; cujus mens aperitur.* — Eandem sententiam sequitur Castro contr. Hær., verb. *Gratia*, hær. 1, ubi hanc conclusionem 3 ponit, quam catholicam appellat: *Liberum hominis arbitrium, ex sola sua potestate, addita etiam illi communi, et generali Dei concausatione, non potest sine aliquo Dei speciali auxilio bonum aliquod operari: quoniam semper circa illud præcedit quædam munitio et attractio, aut inspiratio, vel aliquod donum naturæ superadditum, quod ipse Deus, quibus illi placet, donat;* ubi sine dubio loquitur de singulis operibus, et videtur etiam loqui de homine simpliciter, et in quocumque statu, nam ratio ejus ita procedit. In probationibus autem confuse valde loquitur, nam æque procedunt de supernaturalibus, vel meritoriis operibus, quam de naturalibus. Unde non improbabiler dici potest, solum de prioribus sententiam protulisse; tum quia viro sapienti mens censetur esse consentanea probationibus; tum quia solum docere intendit, quod catholicum est et necessarium ad confutandum errores, alias immerito conclusionem illam catholicam vocaret; tum quia in discursu declarat liberum arbitrium non posse sine speciali Dei motione operari aliquid vere bonum, in quo videtur alludere ad modum loquendi Augustini supra indicatum, et interius amplius explicandum. Et, ne quis dicat, per *vere bonum*, solum intellexisse opus ita bonum, ut nullam habeat circumstantiam malam, inferius ait sine gratia non posse hominem bonum opus facere, *quod ad vitam perducatur æternam.*

6. *Testimonia sacra pro hac sententia, quia generaliter loquuntur, hic non urgent.* — Ratio

propria sumpta ex difficultate ad bonum in natura lapsa. — Fundamentum hujus sententiæ sumitur præcipue ex testimoniis Augustini, et Patrum, ac Conciliorum quæ post illum de hac materia locuti sunt: hæc vero, quia generaliter pro omnibus sententiis, quæ diversis modis hoc speciale auxilium requirunt, afferuntur, postea tractabuntur. Ratio vero sola est quæ resultat ex difficultate bene operandi post peccatum originale, quæ partim oritur ex fomite et concupiscentia, quæ semper infestat; partim ex ignorantie vulnere, ratione ejus homo vel ignorat quid agere expediat, vel leviter illud considerat, cumque objecta sensibilia et corporalia bona propinquius et vehementius moveant, difficillimum est, practice, recte et efficaciter judicare, et imperare operationem honestam, et puram ab omni macula; ideoque nisi Deus specialiter regat et dirigat gressus hominis, et illum ad bene operandum adjuvet, nunquam poterit actum undique bonum efficere. Aliæ rationes quæ hic afferri possent, communes sunt aliis opinionibus, et ideo illas nunc differo.

7. *Præcedens ratio consequenter valet in statu puræ naturæ.* — *Et in homine justo in statu naturæ lapsæ; non vero in statu naturæ integræ.* — Ex hoc vero fundamento, sequitur, auctores hujus sententiæ idem esse dicturos, si consequenter loquantur, de homine in statu purorum naturalium creato, quia in illo, per se loquendo, non esset minor ignorantia, nec major difficultas ex parte concupiscentiæ, ut supra probatum est: procederet ergo tunc eadem ratio, eademque necessitas locum haberet. Procedit etiam illa sententia non tantum in homine lapsa in statu peccati originalis aut mortalis existente, sed etiam in homine lapsa justificato, quia soli habitus infusi parum vel nihil minuunt difficultatem fomitis, nec juvant ad illam vincendam, nisi actu operentur, vel aliquod actuale auxilium illis addatur. Secus vero esset in statu naturæ integræ vel justitiæ originalis, sive includentis gratiam, sive non includentis, quia donum justitiæ originalis vel integritatis tolleret dictam difficultatem, et ita cessaret ratio facta, et consequenter necessitas quæ ex sola illa oriri dicitur. Nam si affirmatio est causa adæquata affirmationis, negatio erit negationis, quod a fortiori constabit ex dicendis.

8. *Vera sententia cum suo fundamento.* — Nihilominus dico, sicut in titulo aperni, non esse necessarium tale auxilium speciale dicto modo explicatum ad omnes et singulas operationes

bonas bene moraliter faciendas, absque ulla circumstantia mala; imo e contrario posse hominem lapsum, per rationem et liberum arbitrium, cum communi concursu Dei, sine alio auxilio specialis inspirationis aut majoris motionis quam sit naturæ debita, aliquod opus morale simpliciter honestum operari. Hæc est communis sententia aliorum auctorum, quos supra retuli, et videtur mihi omnino vera. Fundamentum est, quia prædicta sententia ratione est destituta, et nulla supernaturali auctoritate fulcitur; hæc autem assertio et ratione naturali efficaciter ostenditur, et est magis consentanea Scripturæ et Patribus; ergo. Minor quoad priorem partem probatur, quia unum opus morale honestum non excedit lumen rationis naturalis, nec efficacitatem naturalem voluntatis liberæ; ergo possunt tales potentie convenienter et recte intra ordinem naturalem operari, cum communi influenza primæ causæ. Antecedens evidens est. Consequentia vero probatur, quia non semper, in omni tempore, loco, et occasione occurrunt impedimenta quæ cogant, vel rationem ad judicandum præctice, vel voluntatem ad eligendum cum aliquo defectu erroris, vel malitiæ, ut explicabitur respondendo ad fundamentum contrariæ sententiæ.

9. *Primo confirmatur. — Secundo confirmatur.* — Atque hæc ratio valde confirmatur in homine in puris naturalibus, quia incredibile est non posse in illo statu facere aliquod opus naturæ suæ proportionatum, cum omnes res naturales hoc possint cum generali concursu; ergo eum eodem concursu idem posset homo: tum quia non est pejoris conditionis; tum etiam quia ille status non ita postularet gratiam, sicut honestam operationem, quia operatio est debita secundum intrinsicam facultatem et inclinationem naturæ; gratia vero minime, sed extrinsecus advenit, non solum quando est supernaturalis ordinis, sed etiam ut esse potest speciale donum non debitum naturæ, illi additum intra eundem ordinem, ut ex dictis in proleg. 4 constat. Deinde potest idem confirmari ex dictis, c. 1 et 2, de cognitione veri speculativi et præctici. Nam rationes quæ probant aliquam veritatem naturalem, tam præctice quam speculativam, posse cognosci per naturales vires intellectus, cum proportionem probant bonitatem aliquam honestam ordinis naturæ posse fieri per naturales vires voluntatis, quantum est ex parte difficultatis. Quia licet regulariter frequentius occurrat difficultas in operando

bonum, quam in cognoscendo verum, non tamen semper; imo aliquando difficilius est cognoscere aliquod verum, quam aliquod bonum operari, et nihilominus vis rationis et diligentia humana interdum superat illam difficultatem in veri cognitione; ergo etiam poterit superare aliquam, quæ sæpe levis est, in volitione alicujus honesti boni.

10. *Tertio confirmatur ex opposito fundamento in numero 6 ejusque solutione.* — Ultimum confirmatur ex fundamento contrariæ sententiæ, ejusque responsione. Nam difficultas fomitis quæ in eo consideratur, non est talis quæ singulos actus reddat moraliter impossibiles; ergo non potest inducere necessitatem gratiæ ad singulos actus. Antecedens videtur evidens ipsa experientia, præsertim si sumamus actus honestos parum aut nihil repugnantes appetitui, ut sunt, verbi gratia, honorare aliquando parentem, dicere aliquam veritatem, parvam eleemosynam facere, et similes. Et licet appetitus repugnet, non semper cum vehementi affectu magnave repugnantia: aliunde vero etiam voluntas habet naturalem et majorem inclinationem ad honestum: ergo, pensatis omnibus, nulla est ibi impossibilitas moralis. Immerito autem quæritur cur debeat voluntas ferri in objectum honestum. Quia honestas est ratio sufficiens, et si attente consideretur, ut potest, multum movet voluntatem. Prima autem consequentia probatur, quoniam illa duo correlativa sunt. Quia necessitas adjutorii specialis fundari non potest, nisi in impossibilitate actus respectu principii tali adjutorio destituti. Igitur licet illud genus gratiæ utilissimum sit, et ad supernaturales actus necessarium, respectu naturalium non habet necessariam connexionem quoad singulos actus. Quod autem hæc sententia sit etiam doctrinæ Patrum consentanea, in sequentibus ostendetur.

CAPUT XI.

PROPONITUR TERTIA SENTENTIA, TERTIUSQUE MODUS EXPLICANDI AUXILIUM GRATIÆ AD SINGULA OPERA MORALIA NECESSARIUM.

1. *Vasquez nove explicat gratiam necessariam ad singula operu moralia.* — Post auctores in tribus præcedentibus capitibus allegatos, P. Vasquez l. 2, disp. 190, latissime defendit sententiam asserentem esse necessarium proprium auxilium gratiæ, per Christum datum, ad singula moralia opera naturalis or-

dinis. Et quamvis pro sua sententia referat omnes auctores a nobis pro aliis opinionibus relatos, ipse tamen novo quodam modo explicat hanc gratiam, quem ab alio antiquiore scriptore traditum non invenio. Nam ipse non requirit in voluntate gratiam aliquam, vel motionem, seu actionem specialem Dei ad talem actum voluntatis, præter concursum generalem, quia imprimis refutat motionem determinantem a Gregorio propositam. Deinde nec aliud principium per se physicum, præter voluntatem, docet esse necessarium, quia voluntas habet sufficientes vires causæ proximæ et principalis respectu talis actus. Neque etiam postulat affectum aliquem simplicem, quem præcedere in voluntate simpliciter necessarium sit; et merito, quia cum voluntas per se sit sufficienter proportionata tali actui, potest illum immediate efficere, si objectum illi convenienter sit, per cogitationem et iudicium intellectus, propositum.

2. *In cogitatione sancta gratiam prædictam ponit.* — Totam ergo hanc gratiam ponit in cogitatione sancta, seu boni honesti: nam hæc necessario præcedere debet actum honestum voluntatis, cum nihil sit volitum, quin præcognitum: ideoque non est in hominis voluntate illam sibi præparare, cum antecedit hominis voluntatem, ideoque debet ab extrinseco agente provenire, a solo autem Deo præparari potest, et ideo illi tribuenda est. Quod etiam cognovisse videtur Aristoteles, lib. 7 Ethic. ad Eudemum, circa finem, ubi quærit an fortuna causa sit ut quid et quando oporteat, concupiscatur. Respondetque affirmando, et declarando causam illius fortunati effectus non esse nisi Deum. Et primum probat, dicens: *Neque enim consultans consultavit, et hoc consultavit, sed principium est quoddam, neque cogitans cogitavit id prius cogitare, atque in infinitum ejusmodi fiat progressio. Neque igitur considerandi junctum principium, neque considerandi consilium. Quid igitur aliud, nisi fortuna.* Secundum autem probat dicens: *Patet autem sic esse, quemadmodum in universo est, et vicissim cuncta in illo, moventur enim omnia ab inexistente in nobis numine. Rationis autem non ratio, sed præstantius quoddam est principium, quid autem scientia præstantius est, nisi Deus.*

3. *Et quæ sit prima in quovis opere honesto.* — Ex quibus verbis intelligi potest hoc procedere de prima tantum cogitatione, a qua consultatio de actu honesto efficiendo incipit, sive in principio rationalis vite, seu usus rationis, sive in cujusque diei initio, vel quotiescunque

homo aut a somno excitatur, aut de quacunque speciali deliberatione incipit cogitare; talis enim prima cogitatio revera non est in potestate voluntatis, et ideo necesse est ut a principio extrinseco proveniat, ut cum Aristotele docuit D. Thom. 1. 2, q. 9, art. 4. Nam intellectus potest moveri sine prævia motione voluntatis, voluntas autem, non potest moveri sine prævia cognitione intellectus, et inter cognitionem et volitionem non potest esse processus in infinitum, ideoque necesse est sistere in prima cogitatione, quæ non sit a voluntate. Post primam autem cogitationem sufficientem, ut voluntas libere moveatur, jam tunc potest homo seipsum movere ad aliam cogitationem, vel iudicium, et consequenter ad alios actus bonos; nihilominus tamen, quia in hujusmodi progressu prima cogitatio præit primam voluntatem, et hæc prima voluntas applicat intellectum ad secundam cogitationem, ex qua nasci potest secundus actus voluntatis, et sic deinceps; ideo omnes hujusmodi actus intellectus et voluntatis, tandem ad Deum tanquam ad primum motorem reducuntur. Et simili ratione, si prima illa cogitatio pertinet ad Dei gratiam, etiam secunda bona cogitatio, licet proxime sit ex applicatione voluntatis, nihilominus etiam est ex gratia, quia illa prima voluntas, quæ applicat intellectum ad cogitationem sanctam, donum gratiæ est, et ideo secunda etiam cogitatio est gratia pro gratia, et sic de cæteris. Ideoque dicti auctores totam hanc rationem gratiæ ad primam cogitationem sanctam, quæ in nostra potestate non est, revocant.

4. *Potest tamen mediantibus causis secundis immitti.* — Secundo, est considerandum non esse necessarium ut Deus immediate per se ipsum illam primam cogitationem immittat: nam potius in his actibus ordinis naturalis id rarum est, quia ordinarie hos naturales effectus operatur Deus per causas secundas, quando commode fieri potest. Regulariter vero potest hæc bona cogitatio honesta et naturalis excitari per objecta sensibilia, naturale lumen intellectus moventia mediis sensibus; ipsa vero objecta interdum sensibus externis occurrunt per ordinarium cursum rerum, et causarum naturalium, et interdum per homines vel Angelos possunt applicari; aliquando fieri potest hæc motio, media sola imaginatione, mota a phantasmatibus internis, excitatis etiam, seu applicatis, vel per Angelos, vel per aliam causam naturalem humores corporis moventem, ut idem Vasquez generaliter explicat 1. 2,

disp. 38, c. 3. et specialiter de honesta cogitatione in dicta disp. 190, c. 12. et in disp. 189, c. 15 et 16. Quia vero et cursus ipse causarum secundarum, et ordo, ac dispositio earum, a quo procedit hæc excitatio intellectus ad honestam cogitationem, provenit etiam ex dispositione divinæ providentiæ, et non fit sine actuali influxu ipsius Dei, ideo illi tanquam primario fonti illa cogitatio tribuitur. Hæc autem necessitas tota reducitur ad generalem concursum primæ causæ cum secundis, et ad providentiam etiam generalem Dei circa res omnes universi. Unde etiam fit ut illa prima cogitatio honesta, in sua entitate naturalis sit, et per ordinarium cursum naturæ cum generali influxu et providentia fiat, nihilque aliud requirit, nisi aliquid aliud speciale in ea inveniatur.

5. *Item potest sancta cogitatio non esse effectiva aliquando.* — Unde est tertio considerandum, non ad omnem honestam cogitationem proponentem objectum voluntati, ut recte velit, sequi statim actum voluntatis bonum et studiosum, sed interdum sequi, interdum non sequi, pro libertate voluntatis: unde fit ut cogitatio honesta interdum esse possit congrua, interdum non congrua: congrua vocatur, quando habitura est effectum bonæ voluntatis; non congrua vero, quando stante illa non sequitur effectus. Unde fit ut ad eliciendum actum bonum moraliter, non quælibet honesta cogitatio satis sit, sed requiratur congrua et accommodata, ut cum effectu determinet liberum arbitrium de se indifferens. Nam cum contingit habere cogitationem honestam, et sufficientem ad operandum bonum, et non velle illud, ut diximus, profecto ad operandum cum effectu bonum actum necessaria est cogitatio congrua. Talis autem cogitatio est donum Dei, quia non potest in nobis fieri sine operatione divina, et non est donum naturæ debitum, quia multis non datur sine ullo miraculo, et nihil immutando naturalem ordinem; ergo est donum Dei gratis datum, et hoc est gratia.

6. *Fundamentum primum et naturale, quod ex dictis elicitur.* — Fundamentum præcipuum ex ipsa rei natura sumptum, et quasi necessario discursu elicitum, est illud quod ex ipsa declaratione opinionis statim patet. Et declaratur amplius ex differentia quam D. Thom. quæst. 14 de Verit., art. 14, considerat inter agentia naturalia et libera; quod naturalia sunt determinata ad unum, et ideo ex parte Dei solum requirunt ad suas actiones Dei cooperationem per generalem concursum, seu influentiam in ipsummet effectum, et actionem

naturalis agentis. Agentia vero libera et rationalia, quia indifferentia sunt, indigent ante suam actionem, et præter concursum ad illam, aliqua causa movente voluntatem, quæ causa necessario esse debet extrinseca ipsi voluntati, quia ejus motio antecedit omnem voluntatis actionem; ergo talis causa non est nisi Deus, vel immediate movens mentem, vel saltem per causas externas. Ulterius vero motio illa antecedens, etiam est (ut sic dicam) indifferens, saltem generatim sumpta, quia interdum est congrua, interdum non congrua; quod autem talis vel talis sit, non provenit ex industria, seu electione ipsius hominis bene operantis, quia illa motio antecedit ejus voluntatem, et consequenter industriam et electionem ejus, nec etiam provenit casu, saltem respectu Dei; ergo provenit ex divina providentia, ita ordinante causas secundas, ut homines congrue moveant ad operandum bonum recte et omnino honeste. Hæc autem providentia non est homini debita ex vi creationis, quia, salvo creationis beneficio, et toto ordine naturalis providentiæ, posset homo nunquam excitari congrue, sed ad summum sufficienter: ergo talis cogitatio est beneficium divinum non debitum, sed præter debitam providentiam, et hoc est beneficium gratiæ.

7. *Fundamentum secundum et Theologicum.* — Huic autem fundamento additur aliud Theologicum, quod in hac materia primum est, et prædictum auctorem induxit ad illum modum gratiæ admittendum. Illud vero est, quia necessario fateri debemus omne opus bonum morale, cujuscumque ordinis, gradus, seu qualitatis existat, esse ex gratia Dei, et in natura lapsa esse ex gratia Redemptionis Christi: sed pro singulis bonis operibus moralibus ordinis naturalis, non invenimus, nec cogitari potest alius modus gratiæ, qui verisimili ratione ostendatur necessarius, ut probant adducta contra priores sententias: ergo necessario est dicendum, et illam cogitationem congruam esse veram gratiam, et esse necessariam ad bene operandum. Consequentia cum minori patet ex dictis. Major autem probatur multis testimoniis, et rationibus ex illis deductis, quæ in sequentibus capitulis expendemus, ut illis etiam satisfaciamus; quia nonnulli juniores conqueruntur, quod in 1 p., quasi illorum testimoniorum efficacitatem timendo, unico fere verbo illa expediturimus.

8. *Funditur prædictæ gratiæ necessitas ad varias naturas et status.* — Ex hac vero as-

sertione sic explicata, inferunt primo defensores ejus esse necessariam hanc gratiam specialem ad omnia opera moralia: non solum in homine lapsa, sed etiam in puris naturalibus, et in homine lapsa sanato per gratiam habitualem, et in statu naturæ integræ et originalis justitiæ, imo etiam in Angelica natura. Ratio est, quia fundamentum necessitatis hujus gratiæ commune est omni naturæ intellectuali creatæ, et locum habet in omni statu ejus: quia illud fundamentum non est nisi necessitas præmotionis voluntatis liberæ, quæ moveri potest cogitatione congrua et incongrua, quæ indifferentia et necessitas communis est omni naturæ rationali, et omni ejus statui, nec potest determinari quoad congruitatem antecedentis cogitationis, nisi a Deo, seu per ejus providentiam, quæ nulli naturæ vel statui viatoris est debita. Quia semper rationalis natura in omni statu est capax cogitationis congruæ et incongruæ, et non potest alterutram sibi eligere, vel præparare; ergo gratis a Deo donatur, et ita est gratia.

9. *Intercedit tamen discrimen.* — Constituitur autem differentia imprimis inter naturam rationalem ordinatam a Deo ad finem supernaturalem, vel tantum ad finem proportionatum naturæ. Quia si natura recipiens illud beneficium cogitationis congruæ non sit ordinata ad supernaturalem finem, cogitatio quidem illa erit gratia gratis data, distincta a beneficio creationis, quia non est debita ratione illius. Est tamen naturalis, quia neque in se, neque per ordinem ad finem ultimum, vel ad aliquem effectum excederet naturalem ordinem, sed solum in ratione indebiti beneficii, et ideo dicitur gratia naturalis. At vero in natura ordinata ad finem supernaturalem, et maxime in justificata, illa cogitatio esset gratia supernaturalis, simpliciter loquendo, non ratione substantiæ nec alicujus entitatis, aut modi physici, ut ex dictis est evidens, quia in sua entitate vel modo intrinseco nihil habet, quod non pertineat ad ordinem naturæ, et per naturales vires intellectus moti per species naturales fieri possit; sed dicitur supernaturalis gratia quoad quemdam moralem modum: tum quia datur in ordine ad salutem æternam, et supernaturalem finem; tum quia esse potest principium vel supernaturalis meriti, si sit in homine justo, vel aliqualis initii, et dispositionis ad gratiam supernaturalem, si sit in homine peccatore. Quæ differentia, et ratio ejus, tam in Angelo creato in pura natura propter suum finem naturalem, vel ordinato

ad supernaturalem beatitudinem, quam in homine existente in natura integra pura ex parte finis, vel ordinato ad eandem supernaturalem beatitudinem, et creato in supernaturali justitia, vel sine illa, intercedit; ut facile constat ex dictis.

10. *Prosecutio discriminis.* — In homine autem lapsa, prout nunc nascitur ex Adamo, semper illa cogitatio congrua habet rationem gratiæ supernaturalis, quia talis homo, licet sit injustus, ordinatus est ad finem supernaturalem, et ita omnis talis cogitatio propter eundem finem datur, et habitura est effectum conferentem aliquo modo, sive per modum meriti, sive per modum remotæ dispositionis ad consecutionem illius finis, vel supernaturalis salutis. Ultra hanc vero rationem gratiæ est alia specialior in homine lapsa, quæ neque in statu puræ, vel integræ naturæ, vel innocentiae, neque in Angelis invenitur. Nam per originalem lapsum tota natura humana facta est indigna omni cogitatione congrua bene operandi, et constituta est de se in termino damnationis, ubi nihil bene operaretur, nisi per gratiam Redemptoris præventa esset, ne in termino illo relinqueretur. Et ideo auxilium talis cogitationis non tantum ad gratiam Dei, sed etiam ad gratiam redemptionis pertinet, quia nisi propter Christum remitteretur illa pœna, vel indignitas ex originali peccato contracta, non daretur talis cogitatio. Atque ita et in ratione gratiæ est specialior, quia non solum est concessio beneficii indebiti, sed etiam est remissio supplicii debiti, seu concessio boni, cujus carentiam homo merebatur: et in ratione etiam beneficii supernaturalis est specialius, quia est fructus redemptionis, quæ maxime supernaturalis est, et ideo omnis gratia Christi, quæ nunc datur hominibus, supernaturalis censetur.

11. *Non intelligitur de lapsis Angelis discrimen proxime datum.* — Hæc autem differentia quæ in homine lapsa consideratur, in Angelo locum non habet, quia post lapsum redemptionem non habuit, sed ad terminum damnationis immediate post lapsum transivit, in quo termino nullam congruam cogitationem bene operandi habet, quia nihil boni operatur, ut suppono. Posset autem differentia illa locum habere, et considerari in homine lapsa, post puram tantum vel integram naturam, id est, in homine non ordinato ad finem supernaturalem, sed ad solum finem naturalem, qui post statum in quo conditus est, mortaliter peccavit: ille enim etiam fieret indignus omni

bona cogitatione congrua ad honeste operandum, consequenter loquendo in illa sententia, quia est eadem ratio. Et ideo cogitatio congrua, si postea illi daretur, esset specialis gratia intra ordinem naturalem, quia non solum esset non debita, sed potius ejus carentia esset debita, et præterea de se ordinaretur ad remissionem prioris culpæ, et esset aliqualis via, vel dispositio ad illam, et ita esset gratia aliquo modo non naturalis, quia remissio peccati mortalis de se est opus non naturale; unde beneficium illud in se naturale, ordinatum ad finem aliquo modo supernaturalem, etiam esset specialior gratia in ratione supernaturali, quam si daretur homini puro, vel integro nondum lapso. Et hætenus de hac opinione quoad exactam declarationem ejus.

CAPUT XII.

AN COGITATIO HONESTA QUÆ HABET EFFECTUM BONÆ VOLUNTATIS, SIT SEMPER MELIOR QUAM ILLA COGITATIO QUÆ ILLUM EFFECTUM NON CONSEQUITUR.

1. *Deus excitat cogitationem congruam mediante objecto honesto.* — Quia superior opinio multa ineludit, ex quibus aliqua vera esse censemus, alia distinctione indigere, alia vero non placent, et inter ea quedam possunt de solis vocibus, alia de re ipsa dissensionem continere; ideo, priusquam in principali puncto nostram sententiam proponamus, operæ pretium duximus omnia prædicta diligenter expendere, et non solum rem, sed etiam verba et eorum usum exponere, quoniam ad intelligendam doctrinam Patrum et Conciliorum de necessitate gratiæ multum referre existimamus. Cum ergo præcedens opinio totam necessitatem gratiæ in cogitatione honesta, naturali et congrua constituat, de illa prius in hoc capite considerabimus, qualis in se sit, et quomodo a Deo procedat, quatenus congrua est: in sequenti autem videbimus an veram rationem gratiæ habeat, vel habere possit. Primo ergo certum esse statuimus, Deum non solum operari ad actus honestos naturales voluntatis, cooperando eum illa, id est, concurrando ad ipsammet actionem volendi honestam, per modum causæ primæ, sed etiam antecedenter, movendo voluntatem medio objecto honesto, per convenientem cogitationem proposito. Itaque, sicut infra de operibus propriis gratiæ supernaturalis, dicemus requiri ad illam excitans et cooperans auxilium, ita

cum proportionem intelligi debet, ad honestum velle, necessarium esse et convenientem concursum, et præviam motionem medio intellectu, per cogitationem ejus.

2. *Id ostenditur auctoritate.* — Hoc aperte tradit D. Thomas quæst. 109, art. 1, et q. 24 de Verit., art. 14; Capreol. in 2, distinct. 29, art. 1; Hispalens., distinct. 28, quæst. 1, a. 3, notab. 2 et sequentib.; et Abulens. in cap. Matth. 19, quæst. 178, ad 6. Ubi recte advertit illa duo, scilicet, cooperationem et præmotionem Dei ex diversis principiis esse necessaria, et ideo etiam diverso modo in Deum reduci. Nam cooperatio Dei est necessaria ob dependentiam essentialem, quam omnis entitas participata habet ab ente per essentialitatem; et hinc est, ut illa cooperatio necessario sit immediate ab ipso Deo in genere causæ primæ, quia dependentia illa essentialis dicit immediatam habitudinem ad Deum. Unde etiam fit ut necessario conveniat omnibus et singulis bonis operibus voluntatis. At vero præmotio Dei, quæ est per cogitationem honestam, non fundatur in essentiali dependentia actuum voluntatis a Deo, sed in naturali ordine facultatum intellectus et voluntatis, qui provenit ex naturali conditione voluntatis, quæ non potest moveri, nisi ab objecto præcogitato ab intellectu.

3. *Motio prævia cogitationis ad actus voluntatis, tam in bonis quam in malis actibus reperitur.* — Ex quibus intelligitur necessitatem hujus motionis præviæ respectu actus voluntatis ultra intrinsecum concursum cooperantem Dei, non esse propriam actuum bonorum, sed in malis etiam reperiri. Quia etiam volitio turpis procedit ex cogitatione aliqua quæ voluntatem inducat ad talem actum; nam voluntas non minus in malis actibus quam in bonis pendet a cogitatione intellectus, quia non magis potest ferri in malum non præcogitatum, quam in bonum. Hæc vero intervenit differentia, quod cogitatio excitans ad actum moraliter bonum, esse debet de bono honesto, sub tali ratione boni, cogitatio vero excitans ad pravum actum est de malo sub ratione alicujus boni inferioris; neque necesse est ut turpitudine annexa actualiter consideretur; quia voluntas non fertur in malum sub ratione mali, neque actus ejus est pravus solum, quando fertur in objectum consideratum ut pravum, sed satis est ut feratur in objectum quod est pravum, sive actu consideretur ut tale, sive non, considerari autem possit, et ex negligentia vel industria omittatur, ut liberius possit voluntas in illud ferri.

Atque ex hac differentia nascitur ut cogitatio bona movens ad honestum actum tribuatur Deo, tanquam auctori ejus, quia non solum ad eam concurrat ut prima causa, sed etiam illam per se intendit, et per suam divinam providentiam causas ita disponit, ut illam bonam cogitationem excitent, et cum illa etiam per se concurrat ad movendam voluntatem ad bonum actum, quia illa etiam motio bona est, et per se ab honesta cogitatione causatur. Cogitatio autem turpis, licet etiam sit a Deo, ut prima causa concurrente ad illam, non tamen illi tribuitur ut auctori, quia non est ab eo intenta, nec propter illam alias causas disponit, sed permittit eam sequi, licet prævideat consecuturam ex talibus causis propter alios fines ita dispositis. Multoque minus est a Deo illa cogitatio, ut movens ad malum, seu motio ejus ad malum, quia revera non movet ad malum, ut tale est, sed ad bonum, quod solum est a Deo; reliqua vero quæ ex defectu hominis inde sequi possunt, tantum sunt a Deo permissa.

4. *Cogitatio honesta est peculiare Dei beneficium.* — Ex quo ulterius sequitur cogitationem honestam esse peculiare Dei beneficium, non solum quia per generalem concursum ab eo fit, sed etiam quia ipse providit, et disponit causas ex quibus illa sequitur, hoc etiam ab eo intendente et volente. Quod non solum est verum quando illa cogitatio habitura est effectum bonæ voluntatis, sed etiam quando illum non est consecutura. Quia excitari ad bonum, et se commodum est homini, et ipsamet cogitatio honesta per se est magna perfectio hominis; ergo est beneficium Dei, a quo conferatur, sive habitura sit ulteriorem effectum quem bonus ex se cupit, sive ex parte recipientis impediendus sit talis effectus, hoc enim Deo non tribuitur. Item homo de se expositus est et malis et bonis cogitationibus; quod autem potius ad bonas quam ad malas moveatur, magnum bonum illius est; sed hoc provenit ex divina providentia ita causas adaptante et disponente: ergo est Dei beneficium peculiare. At vero sit majus beneficium, quando cogitatio est congrua, quam cum est tantum sufficiens, paulo post dicam.

5. *Sive cogitatio sit intellectus, sive etiam sensus.* — Hinc vero inferimus hoc genus beneficium Dei non solum habere locum in voluntate, et actibus ejus; sed etiam in intellectu, non tantum practico, sed etiam speculativo. Nam etiam intellectus est ex se expositus ut ad veram et falsam apprehensionem, et ad cogitationem

intensam vel remissam, et ad verum vel falsum assensum moveatur; et ex causis a divina providentia dispositis provenit, ut uno modo potius quam alio moveatur; ergo speciale Dei beneficium est quod potius ad verum et cum intensione et efficacia moveatur, quam alio modo. Quin potius non solum in superioribus potentiis, sed etiam in inferioribus, potest cum proportionem considerari hujusmodi beneficium. Nam licet appetitus sensitivus non sit liber, est tamen capax diversorum actuum convenientium vel inconvenientium naturæ hominis quoad corporalem vitam, vel statum ejus, et ad illos affectus movetur per phantasiam. Unde fit ut non tantum pendeat in actibus suis a Deo quoad concomitantem concursum, sed etiam quoad præviā motionem phantasie, quæ etiam excitatur per exteriora objecta, et causas secundas cum quibus etiam concurrat Deus, non solum intrinsece cooperando, sed etiam sua providentia ita illas disponendo et ordinando, ut inde etiam tanquam a prima radice proveniant motiones sensuum externorum et internorum, et ipsius appetitus, convenientes non solum ad virtutem vel scientiam, sed etiam ad vitam et salutem, et ad convenientem corporis et animi dispositionem. Ergo, quoties causæ ita occurrunt ut ad convenientes affectus moveant potius quam ad alios, in Dei beneficium est referendum. Addo etiam, servata proportione et ratione, simile genus beneficium posse considerari non solum in motionibus animi, sed etiam in ipsa hominis generatione, complexione, constitutione, ut omittam etiam in brutis animalibus et rebus aliis spectari posse. Quia quidquid boni creature provenit, et per quascumque causas proveniat, est beneficium Dei: ergo quotiescumque causæ secundæ possunt diversis modis occurrere, et disponi ad agendum in aliud subjectum, convenienter, vel inconvenienter illi, in Dei etiam beneficium referendum est, quod potius ad convenientem effectum, seu motionem fuerint per divinam providentiam dispositæ, quam ad oppositum.

6. *Id ostenditur ex Augustino.* — Quam doctrinam indicavit Augustinus lib. 4 contra Julian., cap. 3, parum a principio, ubi Juliano, dicenti gentiles ex se habuisse veras virtutes morales, primum negat illas habuisse, de quo supra dictum est: deinde addit, etiamsi illas habuissent, Deo potius quam ipsis esse tribuendas. Argumentaturque in hunc modum: *Sub Dei occulto judicio neque injusto, alii facti, alii tardissimi ingenii, et ad intelligendum*

quodammodo plumbei, alii obliuosi, alii acuti, memoresse nascuntur, alii natura leues, alii leuissimis causis ira facillima arduentes, alii inter utrosque mediocres; alii ita frigidi, ut uix omnino moueantur, alii libidinosissimi, etc., nec eorum quæ commemorari aliquid instituto ac proposito, sed natura. Unde medici audent ista tribuere temperationibus corporum, quod etsi probari sine ulla quæstione potuisset, numquid sibi quisque corpus condidit, et hoc ejus tribuendum est uoluntati, quod mala ista naturalia magis minusue patiatur? Nec fas est ut ei qui se finxit, quis dicat: Quare me fecisti sic? Unde concludit: Quanto ergo tolerabilius, illas quas dicis in impiis esse uirtutes, diuino muneri, quam eorum tantummodo tribueres uoluntati. Igitur, ex sententia Augustini hoc genus beneficii diuini, non solum in bonis moralibus, et liberis actibus uoluntatis, sed etiam in aliis bonis naturalibus ex diuina providentia prouenientibus, inuenitur. Semper tamen hæc interuenit differentia, quod naturalia bona ita sunt a Deo, ut non possint ipsi recipienti nullo modo attribui; actus autem uirtutum, licet sint Dei beneficia, etiam ipsi operanti tribuuntur, quia in illorum determinatione suas habet partes, licet non nisi auctore Deo ita operetur. Et in his non uidetur esse dissensio inter nos et dictos auctores.

7. *Proponitur præcipua quæstio hujus capituli.*— Ulterius uero inquirendum superest, an cogitatio honesta, ex hoc præcise quod habitura est effectum, ac subinde sit efficax seu congrua, sit majus Dei beneficium quam similis cogitatio sufficiens, et ex objecto æqualis. Debet autem fieri præcisa comparatio, nam in eo in quo cogitatio est congrua, adjungitur cogitationi honestus actus uoluntatis, qui non est in alio in quo cogitatio est tantum sufficiens. Unde clarum est illum, in quo cogitatio habet effectum bonæ uoluntatis, recipere a Deo majus uel plura beneficia, quia cogitatio simul cum uoluntatis actu honesto, est majus beneficium Dei quam sola cogitatio in alio, quia etiam actus uoluntatis est beneficium Dei, cum ab ipso Deo libere fiat in suo genere. Præcise igitur comparando cogitationes, dicunt aliqui non esse majus Dei beneficium, cogitationem efficacem seu congruam, quam suffICIENTEM seu incongruam. Ratio est, quia cogitatio non habet de se quod sit congrua, sed ex eo quod uoluntas se illi accommodat ei que obedit: ergo illa cogitatio non est congrua, prout antecedit actum uoluntatis, sed ex conjunctione illius: ergo secundum se non est majus

beneficium, sed solum prout illi conjungitur actus uoluntatis.

8. *Ratio quoad denominationem efficacis.*— Idemque est de altera denominatione, si cogitatio illa dicitur efficax, quia duobus modis potest ita denominari. Primo, ratione efficacitatis in actu primo, scilicet, quia potest generare in uoluntate actum honestum, et hoc etiam habet cogitatio sufficiens, unde in hoc sunt æquales. Alio modo potest cogitatio dici efficax in actu secundo, id est influens, seu actualiter efficiens in uoluntate actum honestum, et sic denominatio illa, qua cogitatio dicitur efficax, extrinseca est respectu intellectus, et proueniens ab actu uoluntatis: ergo non addit nouum uel majus beneficium, nisi quatenus actui intellectus conjungitur actus uoluntatis: ergo in præciso actu intellectus, nullus est excessus. Idem patet ex actu cogitationis non habentis effectum bonæ uoluntatis, nam id non prouenit ex aliquo defectu ipsius, sed præcise ex uoluntatis defectu: unde illa cogitatio non potest dici incongrua de se, sed ex sola denominatione uoluntatis, non se accommodantis illi: hoc autem est quid posterius et accidens tali cogitationi: ergo non diminit rationem beneficii in illa secundum se ac præcise spectata. Idemque est de denominatione efficacis, nam illa de se est efficax quoad potestatem, quia hoc necessarium est ut sit sufficiens: quod autem actu non efficiat, solum est carentia denominationis cujusdam extrinsecæ, quæ non diminit bonitatem uel æqualitatem beneficii ex parte ipsius.

9. *Confirmatur ex hypothesi impossibili.*— Et confirmatur, nam si fingamus Deum, in eo signo in quo disponit causas secundas tali modo, ut in duobus hominibus causent illam cogitationem, non præscire in uno esse habituram effectum bonæ uoluntatis, et non in alio: tunc non possemus intelligere uni facere majus beneficium quam alteri ex vi præcisæ cogitationis, quia æquale bonum uult utrique conferre, et paratus est cum utroque concurrere ad ulteriorem actum uoluntatis, si uterque uelit, et de utroque nescit in illo signo quid operaturus sit. At multi censent Deum in eo signo nondum habere illam præscientiam, quia esset conditionata de futuris contingentibus, quam alioqui negant: ergo saltem in illa sententia non est majus beneficium una cogitatio quam alia. Et ulterius adhuc posita illa scientia, non uidetur augeri beneficium, quia ratio beneficii sumitur ex uoluntate dantis et bonitate rei datæ; sed præscientia non facit rem esse ma-

jorem vel minorem, neque etiam auget Dei voluntatem, quia Deus æquale bonum vult utrique dare efficaciter, scilicet, talem cogitationem, et de se utrique etiam cupit bonam voluntatem, et paratus est cum utroque ad illam concurrere : ergo quod præsciatur effectus futurus in uno, et non in altero, non auget beneficium in ipsa præcisa cogitatione, sed ad summum in additione alterius effectus, honestæ utique voluntatis.

10. *Opinio secunda affirmativa.*— Alii vero in alio extremo sentiunt cogitationem congruam si exactam præcise, semper esse in se majus beneficium, quia, etiam ut antecedit actum voluntatis, aliquid in se habet ratione cujus est congrua, quod deest alteri cogitationi, quæ incongrua reputatur. Quia semper cogitatio congrua, vel est cum majori claritate, conatu, aut advertentia, vel est magis expedita, et libera a contrariis impedimentis, quia, scilicet, contingit haberi eo tempore quo non occurrit aliquid excitans ad contrarium affectum, neque diminuens mentis attentionem, nec retardans affectum voluntatis, vel certe est magis accommodata complexioni hominis, ex qua proportione fit interdum ut cum illa insurgat aliquis motus naturalis affectionis, qui multum juvet ad voluntatis deliberationem, et ita semper includit conditionem aliquam quæ augeat in illa rationem beneficium.

11. *Ejus fundamentum.* — Fundamentum hujus sententiæ est, quia fieri non potest ut, stante æquali consideratione boni honesti et mali contrarii, et æque ablati omnibus impedimentis ad bene eligendum, unus homo honeste eligat, et alter prave, vel unus et idem homo in uno tempore prave eligat, et in alio bene : ergo semper cogitatio antecedens actum honestum voluntatis est major in aliqua reali conditione antecedente, sive sit intensio, sive ablatio impedimenti, sive aliquid simile, et ita semper est majus beneficium. Antecedens probatur, quia alias posset quis peccare voluntate, nullo defectu erroris vel inconsiderationis præcedente in intellectu : consequens est falsum; ergo. Sequela patet, quia is qui ita cogitat honestum ut illud eligat, non habet errorem nec inconsiderationem defectuosam in intellectu : ergo si cum simili cogitatione omnino æquali potest male eligere, cum id facit, eligit per voluntatem male, sine prævio defectu intellectus. Falsitas autem consequentia probatur, tum quia est contra Aristotelem, 7 Ethic., capit. 2 ; et Augustinum, libr. 2 de Peccator.

merit. et remiss., cap. 17 ; et D. Thomam 1. 2, quæst. 77, articul. 2 ; tum etiam quia videtur contra naturam voluntatis, quia nata est moveri ac regulari per intellectum : ergo fieri non potest ut erret, vel deficiat, si intellectus non errat vel deficit ; item quia voluntas, sicut non fertur in aliquid, nisi sub ratione boni, ita nec fertur in unum præ alio, nisi sub aliqua ratione majoris boni ; ergo fieri non potest ut, cum eadem cogitatione intellectus, modo unum eligat, modo aliud.

12. *Opinionis mediæ et veræ assertio prima : cogitatio congrua non superat necessario incongruam physice.* — Inter has sententias mihi media placet. Dico enim imprimis, cogitationem congruam honesti, ut antecedit usum liberum voluntatis, non semper excedere incongruam in aliqua reali conditione, vel positiva, vel formali ipsius actus, qualis est intensio, attentio, claritas, etc., vel privativa, seu ablativa alicujus impedimenti, ut est carentia concomitantis cogitationis prævæ, vel considerationis alicujus majoris difficultatis, vel quid simile. Probatur, quia sine ulla differentia in his omnibus potest eadem cogitatio nunc esse congrua, et postea, vel in alio homine esse non congrua, id est, in uno habere effectum, et non in alio. Probatur ex ipsa libertate voluntatis, quæ aliter salvari non potest. Nam posita in Petro cogitatione honesta, sufficiente ad eligendum bonum cum illa, nullaque conditione addita, vel mutata, poterit Petrus bonum eligere, et bene, quia alias cogitatio non esset sufficiens in suo genere ad talem effectum, ut supponitur. Item, quia si aliquid ultra requiritur, vel illud est in potestate voluntatis, et ab ejus libertate pendet, vel non. Primum dici non potest, quia hic agimus de prærequisitis ad primam voluntatem liberam, et de cogitatione sufficiente, ut antecedit omnino usum liberæ voluntatis ; si vero dicatur secundum, sequitur illam cogitationem esse insufficientem ad volendum, nec posse voluntati imputari, si non velit, quia non habet omnia prærequisita ut velle possit : igitur quoties cogitatio honesti est sufficiens ad actum honestum, voluntas potest cum effectu honeste velle. Peto ergo ulterius an, stante illa cogitatione, possit etiam voluntas non velle. Nam si non potest non elicere actum honestum cogitationi conformem, profecto, ex suppositione talis cogitationis, necessario illum eligit : ergo cum cogitatio ipsa necessaria sit, ut supponitur, actus etiam voluntatis erit simpliciter necessarius, et ita de truntur libertas. Ergo

fatendum est posse voluntatem cum eadem omnino cogitatione nunc velle, cum qua prius noluit, et e contrario: ergo eadem omnino cogitatio, seu æqualis, potest esse alicui congrua, vel incongrua, pro sola libertate voluntatis volentis hoc vel illud, cum solo generali Dei concursu (loquimur enim nunc intra ordinem naturæ); nam si voluntas consentit, cogitatio est congrua; si dissentit, denominatur incongrua.

13. *Probatur etiam de diversis in eodem tempore.* — Unde simili modo argumentor, comparando duos æquali cogitatione excitatos, et cum eisdem impedimentis, vel æqualiter carentes talibus impedimentis. Nam si alter illorum, ductus ab illa cogitatione, recte operatur quia vult, etiam potest alius non operari quia non vult; ponatur ergo in esse hoc quod possibile est, quia nullum inde sequetur inconveniens vel impossibile; ergo tunc erit una cogitatio congrua, et altera incongrua, nulla præcedente conditione reali, in qua una alteram excedat. Confirmatur, primo, quia stante in me cogitatione honesta, etiam intensa, possum ego non operari pro mea libertate; sed hoc non tollit ab alio habente similem cogitationem, potestatem consentiendi illi, et bene operandi; ergo stat ut, altero non operante, alter operetur cum æquali cogitatione; ergo stat ut cogitatio æqualis in uno sit congrua, in altero vero incongrua. Confirmatur secundo, quia si necessarium est ut is qui elicit actum honestum voluntatis semper cogitationem habeat majorem vel meliorem quam alius, qui non vult; interrogo an illud in quo prior excedit, sit necessarium simpliciter ad talem actum voluntatis, vel non sit? Nam si est necessarium, profecto is cui non datur, non potest habere voluntatem honestam, quia deest illi aliquid necessarium, quod non est in potestate ejus; nam cogitatio prima quæ antecedit voluntatem, non est in potestate hominis, et ad primam cogitationem revocanda est disputatio, ut dixi. Si vero ille excessus, qui esse dicitur in illa cogitatione, non est necessarius ad talem actum voluntatis, ergo sine illo esse potest; ergo præcedentibus æqualibus cogitationibus in duobus, potest unus habere actum voluntatis honestum, quamvis alius non habeat, et consequenter ex duabus cogitationibus æqualibus potest una esse congrua, altera incongrua.

14. *Probatur ulterius utrumque simul, id est, de eadem cogitatione pro diversis durationibus, vel de diversis pro eadem.* — Denique

declaratur in hunc modum assertio, sive pro una persona in diversis temporibus, sive pro diversis personis in eodem momento. Nam duobus modis potest unusquisque excitari bona cogitatione, scilicet, vel sola illa sine alia opposita sollicitante in contrarium, vel simul a contraria. Quando fit priori modo, voluntas quidem non potest immediate uti libertate quoad specificationem exercendo actum contrarium, quia non potest ad hoc moveri, nisi prævia cogitatione contraria; potest tamen uti libertate quoad exercitium, et ita potest vel affici, vel non affici secundum illam cogitationem, pro sua libertate, quod satis est ut illa eadem cogitatio possit congrua et incongrua fieri. Item potest, stante illa cogitatione, vel statim consentire, sine majori deliberatione ex parte intellectus, vel etiam potest applicare intellectum, ut de contrario cogitet, et ut ab illa cogitatione bona avertatur, et sic etiam contrarium actum habere. Et hoc satis est ut eadem cogitatio nunc sit congrua, et postea, vel in alio fiat incongrua sine inæqualitate in prima cogitatione naturali, quæ sola consideratur ut præveniens beneficium, ex Dei providentia proveniens. Quando autem prima cogitatio honesta simul concurrat cum alia contraria, dicunt aliqui, si voluntas immediate eligat, necessario sequi efficacior, vel suæ dispositioni magis accommodatam, vel magis expressam; posse tamen non immediate eligere, sed avertere mentem a cogitatione efficaciori, et tunc sequi alteram, applicando, si opus fuerit, magis intellectum ad considerationem ejus. Sed imprimis hoc sufficit ut eadem vel æqualis cogitatio in uno sit congrua, et non in alio, etiamsi in utroque efficacior de se sit quam opposita, quia potest unus immediate eligere secundum illam, alius autem avertere mentem, et ita tandem eligere contrarium. Unde etiam fit ut congruitas cogitationis non possit esse mere naturalis, sed pendens ex libertate voluntatis, quia quantumcumque honesta cogitatio naturalis sit efficax et accommodata voluntati, potest voluntas non statim eligere, sed avertere mentem ab illa cogitatione, et ad contrariam efficaciam illam applicare, et sic tandem oppositum eligere. Et præterea ille modus libertatis et necessitatis gratis ponitur in voluntate. Cur enim libera est immediate quoad exercitium, non obstante efficaciori cogitatione, et non etiam quoad specificationem, si simul habet sufficientem cogitationem ad oppositum? Item si est libera, ut sine novo dicta-

mine avertat intellectum a cogitatione efficaciori, et applicet ad minus efficacem magis perficiendam, multo magis id poterit facere cum novo dictamine de hac ipsa applicatione, etiamsi remissum sit : quod si potest voluntas illud sequi, quasi eligendo illam applicationem vel aversionem intellectus, cur non poterit immediate, etiam inter objecta proposita eligere quod voluerit ?

15. *Probatur tandem assertio ostendendo voluntatem sequi posse cogitationem minus efficacem.* — Quapropter longe probabilius est libertatem voluntatis ad hoc extendi, ut, positis objectis seu mediis omnino æqualibus et æque consideratis, possit voluntas pro sua libertate unum assumere, et aliud relinquere; ergo ex actu voluntatis bono non potest inferri inæqualitas in cogitatione, quæ ex parte intellectus præcedat. Consequentia evidens est. Antecedens autem videtur nobis necessarium ad veram tuendam libertatem, et dominium voluntatis in actus suos. Nam si, posita ex parte intellectus meliori repræsentatione objecti, voluntas, si operatur, necessario fertur in illud, et quando est æqualitas ex parte intellectus, suspensa manet, neque aliquid velle potest pro sua libertate, profecto nunquam est libera ex intrinseco dominio. Quod si dicatur esse libera, solum quia potest applicare intellectum ad cogitandum unum magis quam aliud, profecto necesse est ut hoc etiam faciat sub aliqua ratione boni, quam oportet esse aliquo modo cognitam, et tunc redibit quæstio, an illa ratio boni efficacius proponatur, vel major iudicetur, et an hoc sit liberum vel naturale; et sic vel totum fit ex naturali connexionem cum aliquo principio naturali, et destruitur libertas, vel sistendum est in indifferentia libertatis ad eligendum inter ea quæ non proponuntur ut necessaria, etiamsi magis vel minus utilia, vel magis aut minus efficaciter cogitentur. De qua re iterum redibit sermo disputando de auxiliis gratiæ.

16. *Secunda assertio : Superat tamen semper cogitatio congrua incongruam moraliter.* — Dico secundo, nihilominus fatendum est esse peculiare Dei beneficium recipere cogitationem naturalem honestam tempore opportuno, quando habitura est bonæ voluntatis effectum, etiamsi non ex majori efficacia sua, neque ex aliqua conditione antecedente, sed voluntate libere cooperante cum generali Dei consensu, illum effectum habeat. Hæc assertio tractanda est infra latius, de vocatione congrua inter auxilia gratiæ; nunc per æquiparationem ad

illam probari potest, quia vocatio congrua est majus Dei beneficium quam sufficiens tantum; ergo similiter cogitatio congrua in ordine naturali. Nam licet fortasse in aliquo sit major ratio de auxiliis gratiæ, quia sunt magis gratuita, et ex peculiari ordine prædestinationis proveniant, nihilominus licet invenitur aliqua ratio æqualis, quæ ad aliquod augmentum beneficii sufficiat. Probatur, quia respectu scientiæ divinæ non provenit contingenter, id est, casu, illa inæqualitas in effectu bonæ voluntatis; suppono enim Deum optime præscire quis sit operaturus bene cum tali cogitatione hic et nunc excitata, et quis non sit operaturus cum alia, licet omnino æquali, quod in 1 part. monstratum est, tractando de scientia futurorum contingentium, et infra necessario attingetur. Deinde illa inæqualitas in effectu non provenit sine divina voluntate, quæ illis duobus non æqualiter favet; nam in altero permittit incongruitatem, in altero affectat, et vult congruitatem; ergo est major quidam affectus ex parte voluntatis Dei respectu illius, qui congrue excitatur per cogitationem illam; ergo hoc respectu illa cogitatio est majus beneficium in illo. Quia, ut divus Thomas 2. 2, quæst. 106, art. 5 et 6, ex Seneca tradit, beneficii quantitas non ex sola rei magnitudine, sed maxime ex animo donantis attenditur; itemque ex opportunitate, et occasione in qua donum confertur. Sicut elemosyna rei minutæ solet ex circumstantiis magna censi, ut idem D. Thom. tradit 2. 2, quæst. 32, art. 3, ad 3. Ita ergo in præsentem, licet cogitatio in se æqualis sit, vel fortasse minor, tamen quia in meliori opportunitate, et ex majori affectu datur, ideo simpliciter majus beneficium censetur. Dico autem semper talem cogitationem esse majus Dei beneficium, non vero dico esse majus auxilium, quia hoc necessarium non est, quia non semper magis excitat voluntatem, nec est in se quid melius, aut pauciora habet impedimenta, ut ex priori conditione constat.

17. *Solvitur primæ sententiæ argumentum, in num. 7. — Ad confirmationem in num. 9.* — Ad fundamentum ergo primæ sententiæ, respondeo dupliciter posse cogitationem congruam considerari, scilicet, secundum ordinem executionis vel intentionis, seu prout in re ipsa habet et exercet congruitatem suam, vel prout illam prehabet in præscientia et in affectu Dei immittentis, seu operantis talem cogitationem. Priori modo, vera sunt omnia quæ in argumento assumuntur. Nam revera cogitatio per

se spectata, et ut antecedens omnino liberum usum voluntatis, non est congrua efficaciter, et est congrua sufficienter, ut ibi recte probatur. Nihilominus tamen in eo qui prævidet quæ cogitatio habitura est effectum, et cui est accommodandum liberum arbitrium, si in tali occasione vel tempore detur, talis cogitatio est antecederet congrua in præscientia et intentione donantis, et ideo potest dari ex meliori affectu, et ut majus beneficium: unde, ad confirmationem, fatemur sine hac præscientia non posse intelligi hanc inæqualitatem in tali beneficio; posita autem præscientia optime intelligi. Et ad replicam, respondetur ex parte doni satis esse quod detur in meliori opportunitate, et quando majorem fructum allaturum est, ut ex eo capite beneficium censeatur majus, quando illam et oportunitas et utilitas est prævisa et intenta: unde ex parte affectus etiam est excessus, cum Deus hanc etiam commoditatem intendat in uno, et non in altero. Nec refert quod Deus ex se vellet, ut etiam in alio cogitatio esset congrua, et paratus sit suum ad hoc præstare concursus ex vi generalis providentiæ et intentionis, quam Deus habet perducendi homines ad finem suum. Hoc (inquam) non obstat, quia Deus non sistit in universali intentione, sed ad singularia omnia descendit, distinctissime volendo et distribuendo dona sua, et ideo dum eligit illarum rerum et causarum dispositionem, quæ cum effectu huic magis debet congruere quam alteri, efficaciore et gratiori affectu illum diligit, quamvis antecedenti voluntate alium æqualiter diligat; hæc enim duo inter se non repugnant, ut constat.

18. *Ad fundamentum secundæ opinionis in num. 10.* — Ad fundamentum alterius sententiæ, respondetur, licet ordinariæ cogitatio congrua ad aliam non congruam comparata, major sit in aliqua proprietate sua, vel in earentia impedimentorum, nihilominus non esse id simpliciter necessarium, ut probavi, sed ex sola libertate voluntatis posse contingere ut uni sit congrua hic et nunc cogitatio quæ alterum non movet, et consequenter non est illi congrua. Ad probationem autem dicitur falsum esse assumptum. Non est enim impossibile simpliciter, cum æquali cogitatione in uno tempore honeste velle, et in alio turpiter, cum dominium voluntatis in hoc consistat, ut possit suo arbitratu eligere inter ea quæ necessaria non judicantur. Et ad inconveniens, quod possit esse defectus in voluntate, sine defectu in intellectu, responderi potest imprimis, mo-

raliter id non accidere, quia voluntas semper avertit considerationem intellectus, quando vult præcipitari, ut facilius operetur, et sine conscientie reprehensione, et hoc forte voluerunt Doctores ibi allegati. Nihilominus tamen absolute non repugnat, stante integra consideratione intellectus, voluntatem ferri in minus bonum, ut in delectabile, omisso honesto.

19. *Respondetur etiam aliter.* — Deinde potest negari sequela. Quia nunquam est prava electio voluntatis sine aliquo defectu in intellectu, quia semper deest aliqua perfectior consideratio, quæ tunc adhibenda esset ad continendam voluntatem in officio, vel ad minus deest judicium practicum, *Hoc faciendum est*, vel judicium actuale comparativum, *Hoc præ illo eligendum est*; hic autem defectus intellectus non semper est radix defectus voluntatis, sed potius ipsa voluntas est causa formalis, vel virtualis ejus, quia non vult applicare intellectum, vel potius avertit illum. Et ita si sermo sit de defectu antecedente, et omnino naturali seu involuntario, sic verum est non oportere ut talis defectus præcedat in intellectu ante defectum voluntatis, neque in illo sensu loquuntur auctores allegati. Neque refert quod voluntas nata sit regulari per intellectum, quia non ita regulatur ut obediat despotice, sed politice, et ideo potest non conformari superiori regulæ intellectus, sed inferiori. Quia licet hoc videatur voluntatis propensioni contrarium secundum unam rationem, secundum aliam est illi conforme, quam voluntas pro sua libertate sequi potest. Neque etiam oportet ut voluntas cogatur eligere majus bonum, etiamsi non possit aliquid velle nisi sub ratione boni, quia cum eligit unum præ alio, non oportet ut id faciat sub ratione melioris simpliciter, sed sub ratione facilioris aut magis delectabilis, vel alia simili; vel certe ad illam comparisonem sufficit ut hoc velle possit, quia in eo aliquam boni rationem invenit; et aliud possit non velle, quia sibi necessarium esse non judicat.

20. *Primum corollarium: honesta cogitatio sufficiens est necessaria antecederet ad actum voluntatis.* — Ex his sequitur primo, cogitationem honestam sufficientem ad movendam voluntatem ad actum honestum, esse necessariam ad omnem voluntatis actum, necessitate antecedente; cogitationem autem congruam, ut talis sit, solum esse necessariam necessitate consequente, seu concomitante: quos terminos infra latius declarabimus. Nunc breviter: antecedens necessitas est illa quæ est ex parte cause ad opus necessaria; necessitas vero

consequens est illa quæ sequitur ex suppositione ipsiusmet operis, quæ etiam potest dici concomitans, quatenus simul est cum ipso opere. Dico ergo ad honestum velle necessariam esse cogitationem honestam sufficientem necessitate antecedente, quia talis cogitatio est causa sine qua talis actus esse non potest, et non habet ab ipso actu voluntatis vim sufficientem movendi ad illum, sed hæc supponi debet aliunde in ipsomet intellectu; est ergo illa necessitas antecedens. Hæc autem necessitas (ut in simili tetigit Augustinus, lib. de Corrept. et Grat., cap. 11 et 12) non est necessitas ut actus voluntatis sit, id est, inferens necessario actum honestum voluntatis, alias tolleretur ejus libertatem, cum talis cogitatio sit antecedenter necessaria: sed est necessitas ut actus voluntatis esse possit, seu sine qua esse non potest, et ideo, stante illa cogitatione, potest non sequi actus voluntatis, quamvis hic sine illa esse non possit, et quoad hoc dicitur illa necessitas antecedens.

21. *Congrua vero est necessaria consequenter.* — Altera vero pars probatur, quia cogitatio congrua non est necessaria ut actus esse possit, sed est necessaria ut actus sit, illumque infallibiliter infert, neque ab eo separatur. Nam eo ipso quod voluntas non sequitur cogitationem, hæc non est congrua neque efficax: igitur si cogitatio est congrua, infert statim effectum bonæ voluntatis. Hanc ergo necessitatem dicimus esse consequentem, non antecedentem, quia cogitatio non constituitur in esse congruæ, nisi quia voluntas ex sua libera determinatione illi conjungitur; est ergo congruitas consequens actum voluntatis, non antecedens illum. Item licet cogitatio congrua sit causa actus, non tamen est causa quia congrua est; sed potius, quia est causa non solum in actu primo, sed etiam in actu secundo, ideo congrua nominatur; hæc autem est necessitas consequens, seu concomitans. Denique si talis cogitatio, ut congrua, esset necessaria necessitate antecedenti, tolleretur libertatem voluntatis, quia præveniret consensum ejus, et necessario inferret illum. Est ergo hæc necessitas consequens, sive consideretur in re ipsa, seu in executione, sive in præscientia Dei: nam Deus præcitat cogitationem esse congruam, quia habitura est effectum, cooperante libera voluntate, non quia secundum se spectata illa cogitatio necessario inferat talem voluntatem. Et in hoc convenit nobiscum Vasquez in 1. 2, loco citato, licet in 1. p. aperte supponat in cogitatione congrua necessitatem anteceden-

tem, ponendo in illa aliquam conditionem antecedentem, in qua excellere debet cogitationem quæ congrua non est.

22. *Secundum corollarium: voluntas sine cogitatione congrua potest bene agere in sensu diviso, non in composito.* — *Probatur de diviso.* — Secundo, sequitur ex dictis, simpliciter et proprie loquendo, posse hominem bene moraliter operari sine cogitatione congrua, licet secundum quid, et in sensu composito, dicatur non posse bene operari sine cogitatione congrua. Prior pars ex dictis facile probatur, quia non est necessaria cogitatio congrua, ut aliquis possit bene operari: nam ad hoc satis est cogitatio bona sufficiens, ut ostensum est; ergo absolute verum est hominem sine cogitatione congrua posse bene operari. Item homo non habens cogitationem congruam cum sufficiente, est proxime liber ad bene operandum; ergo est etiam potens, quia sine potestate non est libertas; ergo simpliciter potest bene operari. Item homo, cum sola cogitatione honesta sufficiente, peccat contra illam operando; ergo poterat, non sic, sed honeste operari; ergo sine cogitatione congrua simpliciter potest. Item qui habet cogitationem honestam sufficientem, potens est facere ut illa sit congrua, alias congruitas non esset conditio consequens, sed antecedens; sed non aliter potest facere cogitationem illam congruam, nisi consentiendo illi; ergo hoc etiam potest, licet id non sit facturus. Denique hinc sumitur ratio a priori, quia posse est prius quam operari; unde vere aliquid possumus, licet id non simus facturi; ergo licet homo non sit consensus cogitationi honestæ, simpliciter et propriissime potest illi consentire; ergo sine cogitatione congrua potest bene operari.

23. *Probatur de composito.* — Altera vero pars etiam constat, quia non possunt simul ista duo conjungi, scilicet, quod homo bene operetur, et cogitationem congruam non habeat, quia ipsa bona operatio est effectus cogitationis honestæ, per cujus causalitatem constituitur in esse congruæ: ergo in sensu composito repugnat bene operari sine cogitatione congrua, quia sensus compositus cadit in prædictam conjunctionem incongruitatis cogitationis cum effectu bonæ operationis, sicut dicimus repugnare prædestinatum damnari, vel reprobum salvari, in sensu composito, id est, repugnare illa simul conjungi. Hæc igitur due partes manifeste sunt ex dictis, neque in illis potest esse controversia, nisi de nomine.

24. *Quandam in uno vel altero predictorum*

sensuum intelligentur sacra testimonia. — Nilominus, ad intelligendum Patres et Concilia, ac divinam Scripturam, multum refert diligenter advertere, quando in uno vel alio sensu loquantur. Existimo vero, quotiescumque homo dicitur impotens ad aliquid operandum sine tali cogitatione aut auxilio, sermonem esse de impotentia simpliciter, et in priori sensu diviso ac proprio, nisi ex circumstantiis locutionis aliud manifeste constet. Nam homo non dicitur impotens, nisi ex defectu virium et propriæ facultatis: nam ex eo solum quod sit male operaturus, vel quod prævideatur male operaturus, non dicitur impotens ad bene operandum: dicitur ergo impotens ex defectu virium. Et ideo propter defectum solius cogitationis congruæ, non potest homo dici simpliciter impotens ad bene operandum, quia cogitatio congrua non dat vires bene operandi, ut congrua est, sed solum ut honesta et sufficiens est. Atque eadem ratione quoties agitur de necessitate divini auxilii ad bene operandum, necessitate (inquam) fundata in hominis fragilitate vel impotentia, talis necessitas antecedens esse solet, et non tantum consequens, et impotentia illa esse solet in sensu diviso proprio, et non in sola suppositione aliqua consequente: quia hæc non sufficit ut homo denominetur impotens, sicut declaratum est. Quæ omnia notanda sunt pro his quæ dicemus, et ex discursu materiæ fient clariora.

CAPUT XIII.

AN COGITATIO HONESTA NATURALIS CONGRUA, SIT VERA GRATIA IN HOMINE NON ELEVATO AD SUPERNATURALEM FINEM, SIVE IN PURA, SIVE IN INTEGRA NATURA CONSTITUTO ABSQUE PECCATO?

1. *Assertio prima. Cogitatio congrua de qua tractatur non excedit ordinem ipsius naturæ puræ.* — *Id ostenditur ex parte finis.* — *Item ex parte objecti, etc.* — Ut distinctius procedamus, per singulos hominis status breviter discurremus, incipiendo a statu puræ naturæ, quia cum illo maxime videtur gratia repugnare; quæ vero de illo statu dixerimus, a fortiori habebunt locum in statu integræ naturæ non elevatæ ad finem supernaturalem, ut per se notum est, et ex dicendis patebit. Duobus autem modis dici potest gratia respectu naturæ, uno modo, quia est supra ordinem naturæ, alio modo quia est supra debitum naturæ. Priori modo, manifestum est cogitationem

congruam honestam, solum secundum conformitatem ad rationem naturalem respectu hominis in statu puræ naturæ non esse gratiam supra ordinem naturæ. Probatur, quia homo in pura natura non esset ordinatus ad finem supernaturalem: ergo nec cogitatio illa daretur illi in ordine ad illum finem; ergo ex parte finis non esset supra ordinem naturæ. Nec etiam ex parte objecti, vel regulæ, vel effectus, vel modi esset supra eundem ordinem: ergo nullo modo. Probatur minor quoad omnes partes, quia objectum talis cogitationis esset bonum honestum ordinis naturalis, id est, consentaneum naturæ rationali secundum solam perfectionem naturalem spectatæ, unde regula proxima illius objecti esset recta ratio naturalis, radicalis vero et remota esset ipsa natura rationalis: effectus vero esset actus quidam voluntatis honestus pertinens, secundum speciem et substantiam suam, ad ordinem virtutum acquisitarum, quæ ad ordinem naturæ pertinent. Denique nullus modus excedens ordinem naturæ in tali cogitatione spectari potest, quia neque modus intensiōis, expressiōis, aut claritatis, quia supponimus in his omnibus non excedere vires et efficacia itatem naturalis luminis intellectus. Neque etiam modus causalitatis, quia etiam supponimus fieri per causas secundas naturales sine aliqua peculiari mutatione in illarum cursu aut dispositione facta, et Deum cum illis tantum generali influenza concurrere sine alio specialiori modo: ergo non superest modus quo illa cogitatio supra naturæ ordinem reputari possit.

2. *An vero prædicta cogitatio sit supra debitum naturæ? affirmat Vasquez.* — At vero de gratia supra naturæ debitum controversia est. Nam Vasquez plane sentit etiam tunc talem cogitationem futuram fuisse veram gratiam. Sufficiensque argumentum esse creditur, quia hæc cogitatio congrua non omnibus datur: quod autem est naturæ debitum omnibus datur: ergo hæc cogitatio non est naturæ debita: ergo est gratia, quatenus gratia significat omne donum naturæ non debitum. Item si Deus daret homini cogitationem sufficientem tantum, satisfaceret naturæ debito: ergo si præparat congruentiorem gratiam, facit ultra naturæ debitum. Unde consequenter infert hoc genus gratiæ esse necessarium ad operandum quodlibet opus honestum, non solum in pura hominis natura, sed etiam in statu naturæ integræ, etiamsi absque gratia sanctificante et absque ordinatione ad finem supernaturalem intelli-

gatur. Idemque consequenter dicit in Angelica natura secundum se spectata, propter indifferentiam cujuscumque creatæ naturæ intellectualis ad cogitationem congruam et incongruam, quia Deus satisfaceret, ut sic dicam, suo muneri creatoris, dando cogitationem sufficientem; ergo, si det congruam, facit specialem gratiam ultra talis naturæ debitum.

3. *Secunda assertio: Cogitatio congrua non est supra debitum naturæ. — Probatur primo non esse supra debitum humanæ speciei. —* Nihilominus censeo respectu puræ naturæ hoc donum cogitationis congruæ non esse computandum extra beneficia creationis, id est, extra illa dona quæ ad primam creationem consequuntur quasi ex naturali debito: ac subinde non esse propriam gratiam, etiam naturalis ordinis, et supra omne naturæ debitum. Probatur et declaratur in hunc modum, quia hoc debitum potest considerari, vel in ordine ad naturam specificam, vel in ordine ad individua sub specie contenta; utroque autem modo cogitatio congrua est interdum debita naturæ; ergo. Minor probatur imprimis respectu specificæ naturæ, quia omnibus aliis speciebus rerum debitum est tale genus divinæ providentiæ, quo interdum opera connaturalia convenienter ac recte secundum capacitatem suam naturalem faciunt; ergo idem est debitum humanæ seu intellectuali naturæ; sed operatio recta et consentanea tali naturæ, est operatio honesta; ergo est illi debita naturalis providentiæ, qua interdum talem operationem perficiat.

4. *Pergit probatio arguendo ab aliis speciebus ad humanam. —* Probatur prima consequentia; tum quia alias inferior esset intellectualis creatura, quacumque alia minus perfecta in obtinenda ab auctore suo providentiæ ad rectam operationem necessaria, quod incredibile et præter omnem rationem videtur; tum quia etiam inferiores naturæ habent quamdam indifferentiam ad rectam et obliquam, seu defectuosam operationem suæ capacitati consentaneam, quæ quidem non est indifferentia libertatis, sed capacitatis, seu naturalis contingentie ex vario concursu causarum et impedimentorum provenientis; sic enim animal interdum potest recte videre, interdum oblique, et bene ambulare, aut claudicare, et sic de aliis; ergo si propter indifferentiam non est debita naturæ intellectuali recta operatio, etiam inferioribus naturis non erit debita, nam quod illa indifferentia sit libertatis, vel naturalis contingentie, parum

refert, quia semper determinatio ad rectum actum potius quam ad obliquum pendet ex libera Dei providentiæ ita disponente seriem causarum, ut tandem sequatur operatio recta potius quam obliqua. Si ergo respectu aliarum rerum, non obstante illa varietate eventuum possibilium, ipsa ratio sapientis et debitæ gubernationis universalis postulat ut causæ universales et ordo rerum universi ita disponantur, ut in unaquaque natura possint esse, et de facto inveniantur operationes naturæ convenientes, recto et debito modo factæ, cur non idem dicetur respectu intellectualis naturæ secundum se spectatæ?

5. *Item pergit arguendo a sufficiente ad congruam. —* Declaratur præterea in hunc modum, quia naturæ humanæ debita est cogitatio honesta sufficiens ad recte operandum; ergo et congrua. Antecedens probatur, quia alias nunquam imputaretur homini, si non recte operaretur, nec esset illi debita facultas proxima ad eligendum libere inter honestum et turpe, quod manifeste repugnat ordini consentaneo divinæ providentiæ, quam nobis proposuit Sapiens, Ecclesiast. 15, dicens: *Ante hominem vita, et mors, bonum, et malum, quod placuerit ei dabitur illi, quoniam multa sapientia Dei*; repugnat etiam cum proxima libertate naturali, quam homo habet ad peccandum. Quia nisi homo habeat considerationem actualem boni honesti sufficientem ad volendum illud, vel saltem illam habeat in manu sua, si velit attendere, non habet libertatem proximam ad peccandum, quia non potest sufficienti consideratione eligere inter bonum et malum, neque habere proximam indifferentiam ad utrumque; ergo si homini non est naturaliter debita cogitatio honesti sufficiens ad movendum affectum, vel, quod perinde est, non sit homini naturaliter debitum auxilium sufficiens ad habendam talem cogitationem, etiam proxima libertas ad peccandum non erit naturalis voluntati, nec poterit in illa inveniri, nisi supposito aliquo dono gratuito, et non debito naturæ. Consequens est absurdum, et a nullo doctore catholico, quod ego sciam, assertum est. Unde cum Pelagius sapiens contenderit hanc libertatem esse homini naturalem, in hoc nunquam illi Patres contradixerunt, sed illi libertati gratiam qua gubernetur necessariam esse adjunxerunt: ideoque semper reprehenderunt Pelagium, quod nomine gratiæ ipsum liberum arbitrium intelligeret. Supponebant ergo esse in ipsa natura quiddam ad illam libertatem necessarium est, saltem

ad eligendum inter bonum et malum proportionatum naturæ, inter quæ unum est cogitatio honesta sufficiens. Unde etiam Vasquez, disp. 189, c. 15, n. 126 et 127, fatetur cogitationem honestam sufficientem ad movendam voluntatem non esse donum gratiæ, sed naturæ saltem intra gradum minimum, licet de qualibet alia vehementiori seu majori dicat esse donum gratiæ, etiamsi congrua non sit; quamvis in disp. 190, n. 419 et sequentibus, rationes afferat ad probandum cogitationem congruam esse veram gratiam, quæ si essent validæ, etiam de sufficienti procederent. Sed profecto hoc potius ostendit illas esse invalidas, quod infra etiam expendemus. Nunc ergo satis probatum est honestam cogitationem sufficientem tantum, non esse gratiam, sed debitam humanæ naturæ.

6. *Probata sufficiente, probatur jam congrua.* — Jam vero probatur prima consequentia, nempe idem esse de cogitatione congrua, quia si cogitatio sufficiens debita est humanæ, seu intellectuali naturæ, vel est debita sufficiens tantum, seu incongrua, vel sufficiens congrua, vel sufficiens indifferens, seu in communi. Primum incredibile est, nam contra omnem rationem est cogitare, homini in natura pura debitam esse providentiam, qua semper infallibiliter peccet, licet possit non peccare. Quæ enim ratio talis debiti vel determinationis cogitari potest? Secundum etiam non dicitur, quia plus est quam id quod intendimus, et nulla ratione fulcitur; imo aperte repugnat cum ordinaria Dei providentia, quam experimur. Tertium ergo necessario dicendum est. Posita autem illa generali et quasi indifferente provisione causarum, veluti naturali necessitate sequitur ut cum illa cogitatione sufficiente aliquæ voluntates liberæ bene operentur, et faciant illam congruam, quia non est morale ut quamplurimæ causæ, de se indifferentes ad hoc vel illo modo operandum, semper eodem modo determinantur, et pejorem partem semper eligant sine ulla exceptione. Ergo eo ipso quod tali naturæ specificæ debetur sufficiens cogitatio honesta, et quod ex parte Dei non impediatur, sed libere operari sinatur, naturaliter sequitur ut interdum effectus bonæ voluntatis sequatur talem cogitationem; ergo etiam est debita huic naturæ illa providentia, ex qua cogitationes congruæ interdum consequantur.

7. *Confirmatur proxima probatio.* — Confirmatur, nam sicut congrua cogitatio potest separari ab aliquo homine, ita et sufficiens; nam absolute non repugnat hominem aliquem

nunquam excitari ad cogitationem honestam, etiam minimam; sed hoc non sufficit ut cogitatio honesta sufficiens sit propria gratia, cum sit naturale beneficium manans ex creatione naturæ sub tali ordine naturalium constitutæ: ergo idem cum proportionem est de congrua cogitatione. Unde constat sub beneficio creationis comprehendi non solum ea quæ, a natura semel creata, separari non possunt sine miraculo, vel sine quadam veluti violentia naturali, sed etiam quæ secundum ordinarium causarum secundarum cursum possunt ab ea fieri, et sæpe fiunt cum generali primæ causæ influxu. Hac enim ratione, cogitatio sufficiens saltem minima comprehenditur sub beneficio creationis, quia solo cursu et viribus naturæ interdum sequitur cum generali concursu, supposita prima rerum dispositione in ipso universo, et partibus ejus, quæ etiam pertinet ad beneficium creationis, ut de facto collatum est; quia non aliter conjuncta est naturaliter cogitatio honesta, etiam tantum sufficiens, cum beneficio creationis et ordine universi; nam, absolute loquendo, posset Deus aliter res disponere, quo posito talis cogitatio non excitaretur, ut jam satis explicuimus. Eodem autem modo sequi potest, et frequenter sequitur cogitatio vehementior quam minima, et nihilominus sine fructu, seu non congrua. Et similiter frequenter contingit ut cogitatio sit congrua, licet alioqui sit in se minus vehemens, vel etiam minima, et in his omnibus semper sistitur intra ordinem naturæ; ergo sub beneficio creationis omnes istæ cogitationes bonæ comprehenduntur.

8. *Probatur secundo principaliter assertio, loquendo adhuc de humana specie.* — Ultimo declaratur res tota, quia considerata pura natura humana sub sola generali providentia naturæ consentanea, hujusmodi cogitationes congruæ natæ sunt sequi ex generali cursu et occurso rerum et causarum secundarum, tum naturaliter, tum libere agentium cum generali concursu primæ causæ, quia talis effectus non transcendit virtutem talium causarum, nec potest fingi ratio ob quam ex illis sequi non possit, et sæpe sequatur. Atque hic effectus ad primam universi totiusque naturæ institutionem, et causarum ordinem, et continuam successionem a Deo libere factam, et conservatam reducitur. Effectus autem qui, ex naturali cursu et operatione talium causarum in unaquaque rerum specie sequi potest, cum solo generali concursu Dei, dici potest et debet tali naturæ debitus, saltem secundum ratio-

nem specificam; ergo etiam cogitatio congrua computari debet inter effectus naturales tali speciei debitos. Probatur consequentia, primo, quia prima institutio universi sub tali ordine rerum et causarum, licet non possit esse alicui debita, sicut neque creatio, quia nihil supponit, nihilominus non est beneficium gratiæ, sed naturæ, nec est aliquid distinctum a beneficio creationis, et quidquid postea ex illis causis sequitur, licet conservationem et generalem Dei concursum libere a Deo dandum includat, nihilominus non est gratia a beneficio creationis distincta, sed sub illo includitur, quia provenit ex solo influxu, et ordine naturali debito rebus sic institutis, et intra illum ordinem proceditur usque ad cogitationem congruam; ergo etiam illa provenit ex beneficio creationis, cum aliis naturaliter consequentibus ipsum. Secundo, quia licet Deus sola libertate elegerit hunc ordinem rerum et causarum naturalium potius quam alium, non poterat (quantum prudenter cogitari potest) eligere aliquem ordinem causarum universi, sub quo humanam naturam crearet, ex quo non sequerentur multæ cogitationes honestæ, ex quibus aliquæ fierent congruæ, si ab ipso Deo specialiter non impedirentur, quod fieri nunquam potest; ergo licet hæc vel illæ cogitationes congruæ non sint debitæ puræ naturæ, nihilominus, confuse loquendo, debitum illi est, ut interdum habeat tales cogitationes, sub quocumque providentiæ ordine instituantur.

9. *Probatur deinde assertio per respectum ad individua, ac primum Angelica.* — Venio ad alteram partem de comparatione hujus beneficii ad individuas personas; et imprimis initium sumo ab Angelica natura. Nam si vera est sententia D. Thomæ, dicentis in unaquaque specie Angelica tantum esse unum suppositum, et cogitatio congrua pro aliqua occasione, vel momento debita est unicuique speciei Angelicæ, necessario fit consequens ut sit etiam debita illi Angelo, qui unicus in sua specie creatus est. Deinde etiamsi plures vel omnes Angeli essent ejusdem speciei, est per se valde credibile, et consentaneum alteri opinioni D. Thomæ, et communi Theologorum, debitum illi esse ex providentia naturali, ut saltem prima cogitatio naturalis, et antecedens omnem usum libertatis Angelicæ congrua sit ad honeste volendum. Quia proprium est Angelicæ nature ut primam cogitationem habeat immediate a Deo movente, tanquam a proxima et principali causa. Quia prima co-

gitatio Angelica neque ab intrinseca voluntate esse potest, neque intellectus Angelicus potest ab alia causa extrinseca immediate moveri, nisi a Deo, ut nunc suppono; decet autem maxime ut prima cogitatio data ab ipsomet auctore naturæ, cum ipsa natura, sit congrua ad recte operandum. Et hoc est consentaneum communi opinioni affirmanti Angelum, in primo instanti suæ creationis, peccare non posse, licet ponatur in pura natura creatus; illius enim opinionis fundamentum quod (iudicio meo) probabilius excogitari potest, esse debet, quod cum Angelus tunc a solo Deo moveatur immediate, debet moveri per cogitationem congruam, ne defectus ad aliam cogitationem consequens, in Deum aliquo modo refundi posse videatur. Ergo, juxta hanc probabilissimam doctrinam, aliqua cogitatio congrua debetur unicuique Angelorum ex vi suæ creationis, et convenientis providentiæ ad illam consequentis.

10. *A cogitatione sufficiente debita singulis Angelis arguitur ad congruam in plerisque, sicut in numero 6 arguebat r.* — Ulterius vero sive Angeli sint plures in una specie, sive tantum in uno genere, et licet nulli eorum sit debita cogitatio congrua, etiam in primo instanti creationis, saltem debetur omnibus cogitatio sufficiens: et inde naturali quadam necessitate sequitur ut in multis eorum, vel fere in omnibus, sit congrua, sistendo in ordine naturali, propter rationem factam. Quia illa congruitas consummatur per usum liberum, et in Angelis in pura natura spectatis longe facilius est honestus usus, quam turpis, adeo ut multi crediderint eos esse impeccabiles in naturalibus puris; ergo ex sufficiente motione facta in omnibus, evidens fere est, in multis, vel in pluribus futurum esse bonum consensum liberum, et consequenter cogitationem esse congruam, et ut talem a Deo prævideri et donari. In quo quidem majus confert beneficium illis qui consensuri prævidentur, tamen illud non est distinctum a beneficio creationis, sed consequens illud eo ipso quod Deus vult talem Angelum creare. Quia neque Deus debuit negare cogitationem consentaneam naturæ talis Angeli, eo quod præviderit illam futuram esse congruam; hoc enim non erat consentaneum bonitati Dei; nec illa congruitas orta est ex alio beneficio quam ex libertate recepta munere creationis, et bono usu ejus præviso, ut futuro ex eadem libertate naturali, supposita tali cogitatione, etiam naturali; ergo ad talem voluntatem honestam

tam nulla propria gratia in Angelica natura præcedit.

11. *Probatum similiter assertio per respectum ad individua humana primorum parentum.* — Præterea, si consideremus humanam naturam etiam puram ut a Deo creatam, semper quidem necessarium fuit in aliquo determinato individuo a solo Deo immediate fieri, ut est per se notum, quia nec primus homo potest esse non factus, nec ab alio priori generari, eum non possit esse prior primo, neque in infinitum procedi, nec etiam potest per alias causas secundas produci; debet ergo hæc natura in aliquo determinato individuo immediate a Deo creari, in quocumque statu fiat. Item considerata talis naturæ conditione, necessario creari debuit in ætate adulta, ut posset seipsum regere, nutrire et conservare. Unde hoc etiam potest dici debitum tali naturæ et tali individuo ejus, supposito quod Deus velit illum potius immediate creare quam alium, quod, licet sit peculiare beneficium, illi potius quam aliis factum, non est tamen distinctum a beneficio creationis. Ad hoc autem beneficium, est ulterius consequens ex naturali providentia, vel debita, vel certe valde consentanea ipsi naturæ secundum se spectatæ, ut talis homo creetur cum aliqua cogitatione congrua honesta, ut in illo momento, in quo a Deo creatur, bonus esse incipiat, propter rationem in Angelis factam, quæ in homine videtur esse magis necessaria, quia infirmior est, et ad intelligendum tardior, et in illo initio est sub auctoris sui providentia tanquam infans sub cura parentis, et ideo ad providentiam Dei spectat, non solum honestam, sed etiam congruam cogitationem illi immittere, sive per se et immediate, sive creando illum sub tali rerum dispositione, et objectorum applicatione, in qua ad hujusmodi cogitationem excitaretur.

12. *Progreditur probatio.* — Denique, cum Deus conderet hujusmodi hominem, ut per eum conservaretur diu species humana, ultra sociam ad generandum necessariam, debuit etiam necessario creari sub aliqua serie, et ordine causarum universi, apta ad conservationem tam speciei, quam individuorum per continuam seriem generationum; et ideo totum hoc dici potest naturæ debitum, et sub beneficio creationis comprehensum. Ergo licet dispositio rerum et causarum universi varia et multiplex esse potuerit, et Deus pro sua libertate hanc potius quam aliam elegerit; nihilominus, hæc electione supposita, talis dispositio,

et quidquid ratione illius quasi naturali consecutione a Deo fit, ad beneficium creationis spectat: quia neque excedit ordinem creationis et conservationis naturæ, nec potest aliter a Deo fieri creatio, quam eligendo libere unum dispositionis modum, ex variis et infinitis quos posset efficere, et ideo electio ipsa dici potest quodammodo debita, et licet determinatio ad hunc vel illum modum sit Deo voluntaria et libera, semper tamen sistit inter res ejusdem ordinis; ideoque semper dispositio universi, quam Deus eligit, pertinet ad universale beneficium creationis.

13. *Item quoad individua quædam alia.* — Hinc ergo ulterius progrediendo ad reliquos homines qui ex illis primis succederent, in illis quidem cessat illa ratio de prima cogitatione immediate a Deo recipienda, quia non immediate ab ipso producuntur, nec in ætate adulta, sed paulatim post generationem ad usum rationis perveniunt, et ab objectis tunc occurrentibus excitari incipiunt. Unde si causæ et res universi suum cursum naturalem agere sinantur sub generali providentia Dei, fieri potest ut in quibusdam hominibus cogitatio sit turpis, vel ut sit honesta, interdum incongrua, et interdum congrua: quia ex vi causarum tam naturalium quam liberarum hæc omnia sunt contingentia, et ideo, ablato omni impedimento ex parte Dei, et relictis rebus omnibus cum generali influxu primæ causæ, non semper fieret ille effectus moralis cogitationis uno modo, quia contingentia ipsa hoc non patitur, moraliter ac naturaliter loquendo. Ergo ex vi illius ordinis causarum cum generali concursu, aliquæ essent in hominibus cogitationes congruæ, essentque in his hominibus potius quam in illis, non ex aliqua speciali providentia, aut causalitate Dei, sed ex vi ordinis causarum, supposita prima illarum dispositione, et adjuncto libero usu humanæ voluntatis: ergo cogitatio congrua, in quocumque homine existeret, licet esset divinum beneficium, non esset distinctum a beneficio creationis. Probatum hæc ultima consequentia (cætera enim omnia ex dictis satis sunt nota), quia, supposita prima rerum institutione et dispositione causarum universi, reliqua omnia naturali cursu sequuntur cum solo generali influxu Dei, usque ad talem cogitationem honestam sufficientem in tali vel tali persona excitatam, et ideo talis cogitatio debita est naturæ: quæ omnia satis constant ex dictis. Rursus vero quod talis cogitatio sufficiens huic sit congrua, ex ejus libero usu cum generali

concurso Dei tantum provenit, ut etiam probatum est, et ille concursus etiam est naturæ debitus : ergo talis cogitatio congrua etiam est debita, supposita prima institutione.

14. *Oppositio solvitur. Quod sequitur ex creatione non est distinctum beneficium ab ipsa. — Prima confirmatio solutionis.* — Dices, supposita præscientia Dei de congruitate futura talis cogitationis, fuisse speciale Dei beneficium, et naturæ non debitum, creare res sub tali dispositione et ordine. Respondeo concedendo totum, et addendo illud beneficium non esse ita distinctum a beneficio creationis, quin sit cum illo connexum, quia jam probatum est liberam Dei electionem de tali ordine rerum et causarum universi, potius quam alterius, esse beneficium speciale, non tamen distinctum a beneficio creationis, et ideo quidquid est debitum, ex suppositione illius primæ dispositionis, et quidquid naturali consecutione inde sequitur, non est beneficium distinctum a beneficio creationis, quantumvis speciale esse videatur. Si ergo generalis illa universi dispositio ad generale beneficium creationis pertinet, etiam conservatio ac cursus ejus sunt debita, facta priori suppositione, et inde etiam per naturalem connexionem sequuntur reliqui effectus in tali persona usque ad talem cogitationem cum tali usu libertatis : ergo omnia illa continentur sub beneficio creationis. Et confirmatur primo, quia ipsamet generatio talis hominis, potius quam alterius, est speciale beneficium Dei, comparatione facta ad alium hominem possibilem, qui posset generari, et de facto generaretur, si Deus a principio universi causas aliter disposuisset; nunc autem non generabitur aliquando : et nihilominus generatio talis hominis non est beneficium non comprehensum in beneficio creationis, quamvis supponat primam rerum institutionem, et dispositionem libere factam a Deo, qui optime novit inde eventurum, ut tandem generetur talis homo : ergo idem est de effectu bonæ cogitationis futuræ congruæ in tali homine, qui prævidetur bene usus tali cogitatione.

15. *Secunda confirmatio. — Tertia confirmatio.* — Confirmatur secundo, exemplo supra allato ex Augustino, quia ex simili causarum serie, et naturali vel libero earum cursu suæ naturæ relicto, et supposita prima institutione, sequitur ut tali homo generetur in optima constellatione, et consequenter cum optima complexione, sanitate, et integritate membrorum, et dispositione sensuum apta ad ingenii

acumen, etc. Et nihilominus hæc omnia, licet specialia sint, comprehenduntur sub beneficio creationis, quia licet potuerit Deus ordinem naturæ alio modo instituere, quo posito contrarii effectus fortasse sequerentur, et ideo illa dispositio rerum ita nunc facta et relata ad alios effectus prævisos in tali persona fuerit speciale beneficium ejus, nihilominus totum id comprehenditur sub beneficio creationis, prout de facto collatum est : ergo idem est de cogitatione, et de quocumque alio simili effectu. Et ideo dici cum probabilitate non potest, bonam indolem, vel ingenium ad virtutem aptum, esse donum gratiæ indebitæ naturæ, vel individuo : ergo nec cogitatio pendens ex solis causis naturalibus potest dici gratia dicto modo, solum quia dictam institutionem libere et cum præscientia Dei factam supponat ; est enim eadem ratio. Confirmatur tertio, quia alias etiam bruto fieret gratia, cum causæ ita cum illo concurrunt, ut sit perfecta et non monstrosa generatio.

16. *Quorundam responsio prima ad supra dicta proxime. — Rejicitur.* — Ad hæc vero et similia duobus modis solet responderi. Primo, gratiam supponere subjectum cui fiat, et ideo supponere etiam subjectum consummatum, et perfectum suis omnibus potentiis, ideoque beneficia quæ pertinent ad productionem perfectam et consummatam subjecti non vocari gratiam, secus vero esse de actionibus quæ jam perfectum supponunt. Sed hoc imprimis est ad libitum uti vocibus ad fugiendas difficultates. Si enim nomen gratiæ in illa amplitudine sumatur, non est cur magis supponat rem cui fit quam nomen beneficii, cum gratia non sit, nisi beneficium gratuitum, seu beneficium non debitum, et possit beneficium non debitum fieri rei quæ per illud fit. Sicut prædestinatio, seu æterna electio Dei est gratia, licet non supponat rem esse, sed tantum esse possibilem, et sit ratio ordinandi illam, ut sit. Deinde, esto nomen gratiæ in aliquo usu magis proprio et rigoroso supponat rem cui fit, cur supponet illam consummatam et perfectam in omnibus potentiis, etc., cum hæc supponant existentiam substantiæ, et possint impediri, sitque beneficium speciale, quod non impediantur, quod certe negari non potest? Unde si esset etiam indebitum secundum naturæ ordinem, sine dubio esset gratia, ut opponitur debito naturali. Denique homo, ad generandum, supponitur omnino perfectus in suis potentiis, et nihilominus potest monstruose generare, vel aliter operari propter impedi-

menta occurrentia; ergo ablatio illorum impedimentorum ex providentia Dei est gratia respectu illius, non minus quam sit respectu hominis cogitatio bona sine impedimentis bonæ operationis. Et quod de actione generandi dicimus, potest etiam considerari in actibus immanentibus, vel quasi immanentibus brutorum, ut in motu perfecto sine claudicatione, vel visione, aut æstimatione sine deceptione, et similibus.

17. *Responsio secunda.*—Alia responsio est, distinguendo inter gratias physicas seu naturales, et morales, et concedendo gratiam physicam posse esse communem brutis, non vero moralem. Sicut de homine etiam dicunt, ad quaecumque veram cogitationem speculativam Physicæ vel Metaphysicæ, indigere gratia physica, non vero morali, quæ ad solos morales actus requiritur. Sed non est contendendum de vocibus ad libitum excogitatis. Non est enim dubium quin possit Deus physica beneficia, ultra naturæ debitum, quibus voluerit conferre, et tunc quæstio erit de nomine, an illa omnia sint vocanda gratiæ. Nos vero dicimus gratiam in usu sanctorum Patrum nunquam hoc modo sumi. Propterea enim dixit Augustinus solam intellectualem naturam esse gratiæ capacem, lib. 4 contra Julianum, cap. 3. Item dicimus Deum ordinaria providentia sua non conferre brutis beneficia non debita secundum naturalem cursum causarum universi, et ideo non posse talia beneficia gratiam vocari. Quod si interdum Deus aliquid circa res naturales ultra cursum naturæ operatur, id semper est in ordine ad bonum hominum, et respectu illorum est gratia non tantum physica, sed etiam moralis, quia ex parte Dei ad bonos eorum mores ordinatur. Naturales vero effectus, et actiones eorum quæ nullo modo excedunt ordinarium cursum naturæ, licet sint Dei beneficia, non sunt gratiæ, neque physicæ, neque morales, quia nullo modo excedunt naturale debitum, et sicut in aliis rebus hoc verum est, ita etiam in homine in pura natura spectato, sive cogitatio, vel actio ad scientiam puram pertineat, sive ad honestos mores naturales; rationes enim factæ universales sunt.

CAPUT XIV.

OBJECTIONIBUS CONTRA DISCURSUM CAPITIS SUPERIORIS SATISFIT.

1. *Obiectio prima.*—Præcipua obiectio sumitur ex fundamento contrariæ sententiæ,

quod ita fere exponitur. Qui negat cogitationem congruam esse gratiam, consequenter tollit divinæ providentiæ attribui concursum illum causarum secundarum, ex quo solet provenire cogitatio ita congrua, ut nullum impedimentum illi occurrat, quod effectum bonæ voluntatis valeat impedire. Consequens est absurdum, et in atheismum inclinat, ergo. Sequela probatur. Nam si hæc motio et applicatio causarum, et remotio impedimentorum non fit sine Deo, omnia providente ac disponente, quomodo negari potest congruam cogitationem esse a Deo specialiter provisam et ultra omne debitum creationis et conservationis? Quia posset Deus, salva rerum creatione et conservatione, aliter res disponere, ut ex eis congrua cogitatio non proveniret: nunc autem, ex voluntate efficaci dandi talem cogitationem congruam et bonam operationem ad illam consequentem, talem rerum et causarum ordinem disposuit; ergo vel non potest negari hunc effectum esse ex gratia, vel negandum est esse ex divina providentia.

2. *Confirmatur primo.*—Confirmatur primo, quia si cogitatio congrua esset debita, omnibus daretur, ita enim nos de vocatione congrua argumentamur in libro secundo de Prædestin., cap. 2, num. 5; non datur autem omnibus, ut constat; ergo non est debita; ergo est gratia saltem ut significat favorem ultra beneficium creationis. Confirmatur secundo, quia alias etiam posset homo sine gratia servare totam legem naturæ, et Deum super omnia diligere, et quaecumque gravissimam tentationem superare, quia ad hæc omnia sufficit cogitatio congrua. Denique confirmatur, quia eodem modo inferri posset, in ordine actuum supernaturalium vocationem congruam non esse majorem gratiam quam incongruam, nec gratiam efficacem quam sufficientem, nec donum perseverantiæ quam auxilium quo datur posse perseverare, quæ omnia sunt absurda, ut constat, et contra nostram sententiam. Sequelæ vero patent, quia omnia illa proveniunt ex congruitate vocationis, quæ congruitas non addit etiam in ordine supernaturali speciale donum physicum, nam in re congruitas etiam in illo modo consummatur per bonum usum liberi arbitrii cum adiutorio ejusdem gratiæ, qui bonus usus quasi naturaliter sequitur in aliquibus ex prioribus gratiis.

3. *Solvitur obiectio.*—Prima obiectio nihil nos movet, quia contra nos non procedit, quia fatemur tunc vocationem esse peculiare Dei beneficium, quamvis propria gratia non sit.

Et licet posset aliquo modo urgere illos qui in hoc genere providentiæ non agnoscunt speciale Dei beneficium, nihilominus illis etiam immerito imponitur, vel suspicio atheismi, aut quod tam male sentiant de providentia Dei, ut illa reprehensione sint digni. Nam illi, aut in eo fundantur quod negant habere Deum, ante suam providentiam, præscientiam futurorum contingentium conditionatorum, aut in hoc quod Deus non præfinit speciali et efficaci modo actum bonum moralem in particulari, sicut nec malum, sed solum intendit bonum, quantum est ex se; malum autem solum permittit, et postquam prævidet absolute unum vel alterum, in bono complacet, et non in malo. At vero prius fundamentum, negans scientiam conditionatam, licet falsum sit, a multis theologis defenditur, qui non negant providentiam divinam circa omnes actus in particulari, licet illam non satis perfectam, et divinæ sapientiæ consentaneam explicare possint. Secundum item fundamentum a multis etiam theologis defenditur, non solum in actibus ordinis naturalis, sed etiam in supernaturalibus, et licet in istis sententia illa non solum non possit probari, verum etiam nec tolerari, ut infra dicam, in præsentem non habet tantam absurditatem. Quia non est improbabile Deum non præfinire omnes et singulos actus morales in particulari et in seipsis, sed solum in causis sufficientibus; et consequenter non aliter velle cogitationem, futuram alieni congruam ex libero bono usu ejus, quam aliam de se omnino æqualem, futuram in alio tantum sufficientem ex libera repugnantia ejus. Quia utramque vult Deus ex antecedenti tantum voluntate, et ut uterque homo bonum operetur, et ex voluntate dandi utrique talem cogitationem propter illum finem, et prævidendo in altero congruitatem, et acceptando illam, et in altero repugnantiam, et permitiendo illam. Quam differentiam solam non existimant hi auctores sufficere ad inæqualitatem beneficii, cum per Deum non steterit quin alterius cogitatio etiam esset congrua, quam ipse etiam æque libenter acceptaret. Et per hunc modum putant sufficienter salvari perfectam Dei providentiam omnium et singulorum actuum in particulari.

4. Neque contra hunc dicendi modum aliquod probat prædicta objectio, tum quia fieri potest ut cogitatio non congrua neque careat impedimentis antecedentibus unum libertatis, et ut habeat concursum causarum æque favorabilium, ac cogitatio congrua, et ita non

negatur, quin hæc omnia proveniant ex perfectissima providentia Dei. Congruitas autem, vel incongruitas, juxta hanc sententiam, est ex providentia antecedente tantum, et quasi conditionata, vel permissiva, consequenter vero ex providentia approbativa unius, et non alterius, quod non censetur sufficere ad inæqualitatem beneficii. Contra hanc ergo opinionem solum urgere potest ratio, quam nos in secunda assertionem fecimus, quæ supponit scientiam futurorum contingentium sub conditione, qua supposita, non potest negari quin præparatio cogitationis congruæ sit ex voluntate Dei absoluta et efficaci; unde fit ut sit speciale beneficium, procedens ex quadam majori Dei benevolentia, et ita hoc damus illi objectioni, quæ aliud non probat.

5. *Cogitatio congrua etiam ex prævisione præparata, non est nova gratia a beneficio creationis.* — Neque inde sequitur beneficium illud esse gratiam propriam et distinctam a beneficio creationis, quia per naturalem connexionem sequitur ex creatione rerum, et ex illarum prima dispositione ad creationem universalem pertinente, cum naturali cursu causarum secundarum sub generali influentia primæ causæ, ut ex discursu paulo antea facto manifestum est. Unde etiam non negamus potuisse Deum aliter res omnes, et causas universi creare, conservare, ac disponere, prævidendo inde non eventuram cogitationem congruam talibus personis, sed incongruam. Inde vero solum sequitur, beneficium ipsum universalis creationis et dispositionis universi, favorabiliorem nunc fuisse talibus hominibus quam in alio casu fuisset, quod nos concedimus. Negamus vero inde sequi aliquod beneficium gratiæ non debitum creationi, nam ex suppositione illius generalis beneficii creationis reliqua consequuntur, ut debita naturæ in individuo, ut satis explicatum est. Neque est novum distinguere, intra latitudinem beneficii creationis, unum favorabilius alio sine propria gratia, nam id satis clare docuit Augustinus dicto lib. 4 contra Jul., c. 13, et in aliis donis naturæ extra cogitationem congruam, non solum in hominibus, sed etiam in inferioribus rebus manifeste comprobatur.

6. *Ad primam confirmationem in num. 1.* — Unde ad primam confirmationem, respondetur in naturalibus donis non esse bonam illationem illam: *Non omnibus datur talis perfectio, ergo est gratia, tanquam donum non debitum*, ex vi creationis et dispositionis universi, ut patet clare in acumine ingenii, in longitu-

dine vitæ, et similibus. Ratio vero est, quia licet talis cogitatio non sit absolute debita tali personæ, id est, nulla suppositione facta, tamen, supposito solo universali beneficio creationis (licet favorabiliori), debita est talis cogitatio ex solo generali cursu causarum secundarum cum communi etiam concursu causæ primæ. Et hoc modo dixi lib. 2 de Prædestinat., c. 15, n. 17, non esse necessarium ut talis cogitatio congrua ex speciali auxilio Dei proveniat, quia generale sufficit, supposita prima rerum creatione, et generali causarum universi dispositione ac conservatione. At vero in vocationibus gratiæ supernaturalis (de quibus in illo cap. 2 de Prædestinat. loquebamur), optima est illa consecutio: Non omnibus datur vocatio congrua; ergo non est debita, sed est gratia specialis. Ratio differentiæ est, quia vocatio supernaturalis non provenit ex causis naturalibus, sed ex speciali dispositione divina supra totum naturæ ordinem. Imo etiam ordinarie non provenit ex sola providentia generali in ipso ordine gratiæ, sed ex speciali et nova gratia. Et licet interdum provenire possit ex generali providentia gratiæ, et tunc possit dici debita ex suppositione talis generalis dispositionis causarum gratiæ, nihilominus jam supponit specialem favorem, non tantum creationis, sed gratiæ, et postea est debita tanquam gratia pro gratia, et non tam est debita ipsi recipienti, quam divinæ prædestinationi et ordinationi. Propter quod in illo ordine gratiæ etiam vocatio tantum sufficiens, licet omnibus detur, est vera gratia, quia licet sit aliquo modo debita ex generali providentia gratiæ, supposita dispositione causarum generalium ad ordinem gratiæ pertinentium, nihilominus datur tanquam gratia pro gratia, et ita non est debita recipienti, quia non est debita ex vi naturæ, etiam supposita priori ordinatione divina, sed est debita priori gratiæ divinæ præordinationis talis naturæ ad supernaturalem finem. Et per hoc etiam responsum est ad tertiam confirmationem, ut latius infra explicaturi sumus, tractando de gratia sufficienti et efficaci. Ubi propter hanc causam dicemus, vocationem congruam semper esse majorem gratiam in ratione beneficii gratuiti, non tamen semper esse majus auxilium, quia non semper dat majores vires, sed interdum solum excedit, quia in meliori opportunitate datur.

7. *Ad secundam confirmationem in eod. n. 2.* — *Uno e duobus modis moralis cogitatio est congrua.* — Ad secundam confirmationem negatur sequela, nimirum, posse hominem sine

gratia servare diu totam legem, aut opera difficiliora ordinis naturæ sine ulla gratia facere. Et ad probationem, scilicet, quia hæc omnia fiunt per cogitationem congruam, respondeo, vel notabilem æquivocationem in hoc committi, vel qui sic argumentatur non satis sentire de gratia Dei necessariæ ad hujusmodi effectus arduos intra ordinem naturæ. Duplíciter enim intelligi potest aliquam cogitationem moralem esse congruam, uno modo sine peculiari favore Dei prævenientis actum liberum voluntatis, vel præparantis intellectum ut congrue voluntatem moveat, sed relinquentis illum, ut secundum communem cursum causarum naturalium moveatur, et prævidentis fore ut eum illa sola cogitatione voluntas recte moveatur, et consequenter cogitationem futuram esse congruam. Alio modo, potest cogitatio fieri congrua ex speciali favore et protectione Dei, ut, si prævideret Deus voluntatem hominis relictam cum sola cogitatione bona, nata excitari a talibus causis occurrentibus, non esse consensuram, ac subinde talem cogitationem non esse futuram congruam, ideoque ipse provideat modum quo illa cogitatio efficacior fiat, vel interius specialiter excitando, vel rein aliquam præter communem cursum exterius applicando, et ita prior congruitas potest dici consequens, posterior vero etiam antecedens bonum usum liberi arbitrii.

8. *Prior modus non est gratia.* — *Nec sufficit ad vincendas omnes tentationes etiam contra legem naturæ.* — Nos ergo supponimus priorem modum cogitationis congruæ sufficere ad aliquod opus bonum morale, commune, et facile præstandum, et ideo dicimus illam cogitationem congruam non recte vocari gratiam. Si igitur arguens putat similem cogitationem congruam sufficere ad vincendam gravem tentationem, vel ad amandum Deum super omnia, vel talem cogitationem posse esse continue congruam ad naturalem legem totam servandam, sine alio auxilio gratiæ Dei, non satis sentit de gratia ad hos effectus morales necessaria, et dum verbis confiteri videtur gratiam esse necessariam ad hos effectus, reipsa negat. Quia necessitas gratiæ in illis occasionibus, est ut suppleat defectum virium liberi arbitrii. At vero si cogitatio sit congrua priori tantum modo, non fit congrua per speciale auxilium gratuitum, sed per solum bonum usum libertatis; hoc autem est absurdum, quia liberum arbitrium solis viribus suis cum generali influentia non potest semper, vel in

illis occasionibus bene uti tali cogitatione, ejus contrarium objectio supponit, et ideo dicit posse Deum prævidere tales cogitationes futuras esse congruas sine novo auxilio gratuito, quæ præscientia plane supponit arbitrium cum sola communi influenza bene esse usurum tali cogitatione, non obstante objecti vel occasionis arduitate. Hoc autem nos falsum esse censemus, et infra probabimus. Et ideo negamus sequelam argumenti, quia non sunt æquales naturales vires voluntatis in ordine ad omnes actus liberos etiam naturales, et ideo neque idem modus cogitationis congruæ in omnibus sufficit.

9. *Admisso duplici illo modo cogitationis congruæ, arguens æquivoce procedit.*—At vero si arguens admittat duos illos modos cogitationis congruæ, æquivocationem committit in probatione sequelæ; nam licet semper bona operatio procedat ex cogitatione congrua, tamen una prævidetur futura congrua sine aliquo speciali auxilio gratiæ, alia vero non item; et prior sufficit ad communia opera, posterior vero est necessaria in arduis, quia nisi Deus specialiter præparet vocationem, et illam accommodet voluntati, in illis deficiet, et ita cogitatio mere naturalis semper esset incongrua, quæ omnia in sequentibus amplius declarabuntur.

CAPUT XV.

AN COGITATIO CONGRUA AD BENE MORALITER OPERANDUM, SIT VERA ET SUPERNATURALIS GRATIA RESPECTU HOMINIS AD FINEM SUPERNATURALEM ELEVATI ?

1. *Omnis moralis operatio videtur gratia in quocumque elevato ad supernaturalem finem.*—Hactenus de pura et integra natura dictum est, nunc de natura humana ad supernaturalem finem elevata aliquid addere necesse est. Quia in illa specialis ratio versatur, eo quod moralis ejus operatio, licet in se naturalis sit, ad supernaturalem finem ordinari et utilis esse potest, et quantum est ex parte divinæ voluntatis ac providentiæ, propter illum finem tribuitur. Quoad hoc ergo in hujusmodi homine elevato ad finem supernaturalem, omnis bona operatio moralis aliquo modo supernaturalis est; ergo saltem hac ratione non poterit sine gratia fieri. Quæ ratio procedit in homine ad finem supernaturalem ordinato, in quocumque statu consideretur, id est, sive fingatur creatus sine ullo dono intrinseco operante

naturam, sed cum sola ordinatione ad supernaturalem finem ultra puram naturam, sive spectetur in natura integra sine supernaturali justitia sive cum gratia et justitia, sive in homine lapsa permanente in peccato, vel jam justificato. In omnibus enim his statibus sola ordinatio actus moralis ad finem supernaturalem, facit illum aliquo modo supernaturalem, ac subinde gratia indigentem. In homine vero lapsa, præter dictam rationem, potest considerari alia contracta ex indignitate peccati, de qua in posteriori parte hujus capituli dicemus; prius de sola ordinatione ad finem supernaturalem dicendum est.

2. *Ex relatione operantis, et intentione Dei opus morale ad supernaturalem finem ordinari potest.*—Et pro resolutione, adverto duobus modis posse opus bonum morale esse ordinatum ad finem supernaturalem: uno modo, ex relatione aliqua ipsius operantis; alio modo, ex sola relatione et intentione Dei. Ut actus sit ordinatus priori modo ad supernaturalem finem, non satis est ut ipse homo operans sit a Deo creatus propter illum finem, sed necesse est ut, per aliquem priorem actum ipsiusmet hominis, subsequens actus moralis, vel formaliter, vel saltem virtualiter in illum finem ordinetur. Quia actus ipse moralis, per se et natura sua spectatus, non tendit in supernaturalem finem, sed ad summum in naturalem beatitudinem hominis, seu in Deum, ut est auctor et finis naturæ; ergo non potest in supernaturalem finem tendere, nisi vel ab aliquo extrinseco agente, vel saltem ab ipsomet operante per alium actum, vel virtutem ejus, in talem finem ordinetur; ergo, si operans non habuit alium actum, quo talem moralem actum retulerit in supernaturalem finem, non potest dici in eum finem relatus, ut procedit a proximo operante, sed ad summum per denominationem ab intentione seu ordinatione Dei.

3. *Assertio prima.*—*Ad referendos actus bonos moraliter in finem supernaturalem, requiritur gratia.*—*Probatur.*—Dico ergo primo, cum actus bonus moraliter ita fit ab homine ordinato ad finem supernaturalem, ut ab ipsomet homine in eundem finem referatur, tunc necessarium est auxilium gratiæ ad illum actum, ut spectatum sub illa relatione, quia relatio illa aliquid est supernaturale, seu a forma supernaturali provenit; voluntas enim operandi propter supernaturalem finem supernaturalis est; ergo ad illam relationem necessaria est gratia. Hæc autem gratia non est sola co-

gitatio congrua naturalis necessaria ad tale opus morale, sed est auxilium supernaturale necessarium ad priorem actum, quo homo se et actus suos etiam naturales in Deum, finem supernaturalem, refert. Sicut ad actum studendi aut sciendi logicam propter Dei gloriam, necessaria est gratia, non tamen alia quam ea quæ ad illam relationem postulatur, nam opus ipsum quod tali relationi substernitur a natura esse potest, saltem ubi specialis difficultas non occurrit. Non procedit autem conclusio de actu morali, acquisito, ut talis est, quia non sumitur ut pure moralis, sed ut affectus circumstantia supernaturali, ad quam gratiæ auxilium postulatur, et sic magis pertinet hæc assertio ad necessitatem gratiæ ad opera supernaturalia, de qua in sequenti libro dicturi sumus, quam ad necessitatem gratiæ ad opera moralia naturalia, ut talia sunt, de qua in præsentia tractamus.

4. *Assertio secunda, bipartita de homine non ordinante opus morale ad finem supernaturalem, cum ipse sit a Deo ordinatus.* — *Probatur prima pars.* — Dico ergo secundo: ut opus morale studiose fiat ab homine ordinato ad finem supernaturalem, non ordinante opus in illum finem, non est necessarium proprium auxilium gratiæ, nec vera gratia intrinseca, sed ad summum extrinseca prædestinatio, seu præordinatio extrinseca Dei, quæ potest dici extrinseca gratia, quatenus ad supernaturalem providentiam spectat. Probatur prior pars, quia hoc opus non est melius neque difficilius in homine ordinato ad finem supernaturalem, quam in non ordinato: ergo non requirit majores vires, ut fiat ab homine in illo statu quam in isto, quia vires ad operandum solum postulantur propter excellentiam vel perfectionem effectus: ergo sicut in uno statu non requiritur auxilium gratiæ ad tale opus in omni suo individuo, ita neque in alio, nam auxilium gratiæ solum est necessarium, ubi vires naturales non sufficiunt. Consequentia sunt claræ, et anteedens etiam videtur notum ex dictis. Quia licet homo sit conditus propter supernaturalem finem, opus morale non ordinatur ab ipso homine in eum finem, nec formaliter, nec virtute, ut supponitur; ergo ille finis personæ non est ullo modo circumstantia operis: ergo nullam honestatem vel difficultatem illi adjungit. Non est ergo ad illud necessarium auxilium gratiæ, et consequenter neque vera gratia interna, quia sufficit cogitatio honesta moralis, quæ non est gratia, etiamsi sit congrua, ut in præcedenti capite declaratum est.

5. *Objectio, ejusque solutio.* — Dices: illa cogitatio congrua in tali homine ordinatur ad supernaturalem finem, et ex hac parte gratia dici debet. Respondeo imprimis fortasse non esse necessarium ut talis cogitatio, vel opus ab illa procedens, ordinetur etiam a Deo ipso ad finem supernaturalem, quia fieri potest ut tale opus nullam utilitatem afferat operanti ad supernaturalem finem, quia nec est meritum ejus etiam imperfectum, neque dispositio ad gratiam, etiam remota, ut infra dicemus. Et ideo fieri potest ut, etiam quatenus est a Deo, non proveniat ex intentione finis supernaturalis, sed tantum ex generali fine providentiæ naturalis, ut Deus, tanquam prima causa, inferiores causas suos naturales motus, tam liberos quam necessarios, agere sinat. Dices: semper talis actus affert aliquam utilitatem ad finem supernaturalem, quia saltem removet impedimentum quod tunc per aliquod peccatum addi posset. Respondeo hanc utilitatem communem esse actibus indifferentibus et indeliberatis, imo et naturalibus, ut somnus etiam removet pro tunc impedimentum novi peccati et tamen non propterea est necessaria gratia ad hæc omnia. Neque etiam est necesse ut illa qualiscumque utilitas sit intenta propter supernaturalem finem, sed tantum prævisa ex generali cursu naturæ, et admissa per divinam voluntatem ex generali etiam intentione providentiæ suæ. Quod maxime verum esse potest, quando in effectu nihil est profuturum tale opus ad finem supernaturalem, quia nimirum, licet pro tunc impediatur adjectionem impedimenti, nihilominus nihil conferet ad aliquam gratiam obtinendam, neque ad eum finem ordinatur.

6. *Probatur secunda pars, seu declaratur exemplis.* — Addo vero ulterius, licet Deus det talem cogitationem congruam, et bonum opus morale ab ea manans propter supernaturalem finem, inde solum probari posteriorem partem assertionis, videlicet illud beneficium, provenire ex prædestinatione, vel providentia supernaturali, quæ dici potest extrinseca gratia, sine alio interno auxilio gratiæ a quo actus fiat. Declaratur imprimis exemplis: nam etiam creare naturam propter finem supernaturalem et conservare illam propter eundem finem, est beneficium aliquo modo superans naturam, et tamen non propterea dicemus influxum quo Deus conservat naturam, esse gratiam, sed solam illam ordinationem ad supernaturalem finem a quadam extrinseca gratia provenire. Et simili modo bona complexio, ingenium,

conveniens educatio, imo et origo ex talibus parentibus in tali loco vel tempore, sunt media conducentia ad salutem, ac subinde sunt ex divina prædestinatione et electione ordinata: et tamen in se non sunt gratiæ, sed solum, per denominationem extrinsecam, ab electione et prædestinatione gratuita; ita ergo est in præsentem: pro quo discursu videri possunt quæ dixi lib. 3 de Prædest, cap. 7.

7. *Auxilium speciale quodnam sit.* — Unde non potest talis cogitatio dici auxilium gratiæ in tali homine; quia auxilium gratiæ, seu speciale, esse debet principium aliquod addens vires ad operandum, vel saltem specialis Dei cooperatio, quo naturam ad operandum magis adjuvet, quam ei ex providentia consentanea naturæ debeatur. At vero in eo casu in quo loquimur, Deus non adjuvat speciali modo ad talem cogitationem vel operationem, sed solum intra ordinem naturalis concursus seu auxilii, eligit illum modum et ordinem quem homini scit esse magis accommodatum, eumque ad finem superiorem ordinat: ergo non confert majus auxilium, sed ad summum majus beneficium, intrinsece naturale, supernaturale vero solum per denominationem extrinsecam a prædestinatione vel ordinatione supernaturali. Et potest hoc declarari, quia etiam inter supernaturales vocationes, vel prævenientes gratias, congrua vocatio vel excitatio non semper est majus auxilium, licet sit majus beneficium, et simpliciter major gratia, non physice, sed moraliter, ut infra ostendemus; ergo a fortiori in præsentem cogitatio naturalis, ex eo quod congrua sit, vel quod ad finem supernaturalem ordinetur, non est in se majus auxilium, esto possit vocari gratia per extrinsecam denominationem a supernaturali relatione prædestinationis, ut in prima etiam parte loco allegato dixi.

8. *Assertio tertia, de cogitatione congrua a Deo data homini etiam lapsi propter finem supernaturalem, propter quem tamen homo non operatur.* — *Probatur ratione.* — Dico tertio: cogitatio congrua ad bene moraliter operandum in uno vel alio actu, sine relatione ad finem supernaturalem propria ipsius operantis, etiam in homine lapsi, non est auxilium gratiæ Dei vel Christi, quamvis ex intentione Dei propter finem supernaturalem detur. Probatur, quia in homine lapsi solum additur demeritum peccati originalis; sed hoc non satis est ut illa cogitatio sit in tali homine speciale auxilium gratiæ; ergo. Probatur minor, primo, quia cogitatio sufficiens ad simile bonum in tali

homine non est specialis gratia vel auxilium; ergo neque congrua. Consequentia probatur ex dictis, quia cogitatio congrua ultra sufficientem non addit rationem specialis auxilii, ut ostensum est. Item quia congruitas in executione consummatur per bonum usum liberi arbitrii, maxime in his operibus naturalibus; in præordinatione autem, seu prævia providentia Dei, non requirit aliquid speciale præter communem cursum causarum, quem Deus immutare non debuit propter originale peccatum. Primum vero antecedens et ab adversariis conceditur, et videtur per se evidens, quia illa cogitatio sufficiens per generalem concursum naturalem habetur, et ex communi ordine providentiæ necessario sequitur; peccatum autem originale non meruit carentiam naturalis concursus Dei, nec immutationem generalis providentiæ, ut supra tactum est, et videtur per se notum.

9. *Confirmatur primo, ex eo, quod congrua cogitatio non sit per Christum.* — Declaratur præterea, nam si ponamus Deum, post peccatum originale prævisum, non decrevisse humanam naturam redimere per Christum, vel alio modo, sed tantum relinquere homines in via, tunc non mansissent obstinati in malo propter peccatum originale solum, nec privati omnibus cogitationibus honestis, vel sufficientibus, vel congruis; ergo quod nunc non priventur illis, non est proprius effectus redemptionis Christi, quia non est remissio alicujus poenæ propter peccatum originale debitæ. Dicere autem ex vi peccati originalis relinquentiam fuisse naturam in malo obstinatam, ac subinde in termino damnationis, et nullo modo in via, improbable est, ut supra dixi, et contra conditionem naturæ humanæ, quæ in hoc distinguitur ab Angelica, quæ statim per unum actum constituitur in termino, ut est vulgare.

10. *Confirmatur secundo, ex eo quod carentia cogitationis congruæ non proveniat ex originali.* — Et explicatur amplius, quia etiam nunc anime puerorum sine remissione peccati originalis decedentium, non sunt obstinatæ in malo, nec privantur cogitationibus naturalibus honestis, et sufficientibus, et congruis, ut suppono tanquam certum, ex communi sententia; ergo signum est non esse illam poenam præcisè et quasi positive impositam propter originale peccatum, quia illis infantibus nulla ex parte remissum est originale peccatum, aut poena ejus, neque Christi redemptio illis est applicata efficaciter per aliquod me-

dium ; ergo talis cogitatio in illis, neque est gratia, neque effectus redemptionis Christi. Ergo idem est dicendum de illis hominibus non baptizatis qui, pervenientes ad usum rationis, incipiunt habere cogitationem bonam et honestam, vel sufficientem, vel congruam, nam est eadem ratio, et consequenter idem erit in reliquis, præcise sistendo in entitate et intrinsicis conditionibus talis cogitationis. Nam si addatur relatio et utilitas aliqua ad finem supernaturalem, secundum id erit effectus redemptionis, et rationem gratiæ participabit solum per extrinsecam denominationem, ut explicavi ; hoc autem eodem modo contingeret absque peccato originali, quod ad rationem gratiæ attinet.

11. *Confirmatur tertio, ex locutionibus Patrum contra Pelagium.* — Unde confirmatur tandem, quia, licet daremus hanc cogitationem habere aliquam rationem gratiæ in homine lapsa, quatenus daretur cum remissione alicujus pœnæ, adhuc non esset gratia auxilians, de qua tractamus et tractant Patres, quando contra Pelagium requirunt gratiam bene operandi; sed pertineret ad gratiam, quam Augustinus vocare solet remissionis peccatorum, nam sub illa includitur omnis gratuita remissio tam culpæ quam pœnæ. Quod vero non esset gratia auxilians, patet argumentis factis, quia etiam cogitatio sufficiens non esset gratia auxilians, licet esset cum remissione alicujus pœnæ, et quia congruitas non addit per se aliquid auxilii prævenientis vel adjuvantis, et in cogitatione morali nullum principium adjuvans supponit præter id quod mere naturale est, sive in facultate intrinseca, et concursu illi debito, sive in applicatione et excitatione obsectorum per communem cursum causarum cum generali concursu, supposita prima institutione generali, quæ neque pertinet ad auxilium speciale, etiamsi sit aliquod beneficium, vel gratia extrinseca quæ antecedit peccatum originale, nec propter illud immutari debuit.

CAPUT XVI.

PROPONITUR CONTRARIÆ SENTENTIÆ FUNDAMENTUM EX PATRUM LOCUTIONIBUS DESUMPTUM, UT RETORQUEATUR.

1. *Proponitur fundamentum adversariorum.* — Hactenus ratione et discursu tantum egimus contra tertiam sententiam supra relatam; quia vero illa præcipue fundatur in locutioni-

bus Augustini, et aliorum Patrum, vel etiam Conciliorum, quæ illum postea imitata sunt, ideo locutiones illas in hoc capite objiciemus, in sequentibus vero non solum illi sententiæ non favere, sed potius illam improbare ostendemus. Proprium igitur illius sententiæ fundamentum, ex Augustino sumptum, est, ipsum, ad confutandos Semipelagianos, reduxisse initium bonæ operationis ad sanctam cogitationem, quam dicit esse specialem gratiam, et inde concludit omne opus bonum esse ex gratia. Talem autem cogitationem specialem gratiam esse, solum ostendit Augustinus ex illo principio, quod non est in potestate nostra illam nobis procurare, ideoque a Deo debeat præparari; sed omnis cogitatio boni honesti inducens cum effectu ad honestum actum virtutis moralis, est hujusmodi, ut constat ex dictis, nam loquimur de prima cogitatione; ergo ex sententia Augustini omnis talis cogitatio sancta, etiam in ordine moralis boni consentanei lumini naturæ, est vera gratia, et ratione illius omnis actus moralis pendet essentialiter a gratia.

2. *Pro adducto fundamento.* — *Primus locus ex Augustino.* — Prima propositio assumpta probatur ex variis locis Augustini. Primus est lib. 2 contra duas epistolas Pelagian., cap. 8, ubi inde probat nihil boni posse ab homine perfici, vel inchoari, quia nec cogitatio talis boni, quæ necessario præcedit omnem bonum affectum, haberi potest a nobis ex nobis, sed ex Deo, dicente Apostolo 2 Corinth. 3: *Non sumus sufficientes cogitare aliquid a nobis quasi ex nobis, sed sufficientia nostra ex Deo est.* Et eodem fere modo ponderat eadem verba libro de Gratia et libero arbitrio, cap. 7, et de Bono persever., cap. 8. Et illis adjungit verba Ambrosii, libro de Fuga sæcul., cap. 7: *Non est in potestate nostra cor nostrum, et nostræ cogitationes.* Quæ verba iterum refert cap. 19, et illis addit: *Nec ipse facta et dicta præterit, non enim est dictum factumque hominis, quod non ex cordis cogitatione procedat.*

3. *Secundus locus ex eodem Augustino.* — Alter principalis locus apud Augustinum est in lib. 2 de Peccator. merit., cap. 18, ubi initium pravæ voluntatis ait esse, quia bonum vel latet, vel non delectat: unde e contrario initium bonæ voluntatis esse dicit ipsius boni notitiam, et de illo voluptatem, et, quia delectatio supponit cognitionem, fit ut ad cognitionem totum hoc initium revocetur. Subjungit autem, et ad hoc probandum inducit illud Jeremiæ 10: *Scio, Domine, quia non est in ho-*

mine via ejus, nec viri est ut ambulet et dirigat gressus suos. Quod profecto maxime dictum videtur, propter prævias cogitationes bonas, quas sibi ipse homo præparare non potest, nisi prius Deus incipiat. Estque similis locus Augustini in quæst. 2, lib. 1 ad Simpliæ. circa finem, ubi, ut ostendat initium boni esse ex Deo, ait: *Quis habet in potestate tali viso attingi mentem suam, quo ejus voluntas moveatur ad fidem?* Et eodem modo dicere posset quo ejus voluntas moveatur ad bonum actum, et addit: *Quis autem omnino amplectitur aliquid quod eum non delectet? Aut quis habet in potestate ut ei occurrat, quod eum delectare possit.* Et post multa concludit: *Restat ergo ut voluntates eligantur, sed voluntas ipsa nisi aliquid occurrerit, quod delectet, atque invitet animum moveri nullo modo potest. Hoc autem, ut occurrat, non est in hominis potestate.*

4. *Tertius locus ex ipso etiam Augustino et Patribus aliis.* — Præterea faciunt illa testimonia, in quibus Patres aiunt omnes cogitationes bonas esse a Deo et ex gratia. Augustinus, vel potius Gennadius, de Eccles. dogmat., cap. 82: *Mulæ cogitationes (inquit) non semper a dæmone sunt, bonæ autem semper sunt a Deo.* Et serm. 171 de Tempore, habet Augustinus dignam illo sententiam: *Quidquid boni cogitaverit homo subito corde percussus, sciat quia hospes veniat illi de celo: quem hospitem paulo superius gratiam esse explicaverat.* Deinde Fulgentius, l. de Incarnat. et Grat., cap. 12, 13 et 19, dixit per gratiam Christi fieri, *ut sanctæ cogitationis possibilitatem recuperemus, quam in primo homine perdidimus.* Et Prosper contr. Collat., cap. 10, et ad objectionem 8 Gallorum, ait a ducentis quatuordecim Sacerdotibus definitum esse, *gratiam Dei per Jesum Christum non solum ad cognoscendam, sed etiam ad faciendam justitiam per actus singulos adjuvare,* et a Concilio Africano traditum esse, *utrumque Dei donum esse et scire quid facere debeamus, et diligere ut faciamus.* Quæ verba habentur in Concilio Milevitano, cap. 4, et in African., cap. 79, et fere similia habentur in Arausic., cap. 7, ubi definit, *per naturæ rigorem nihil boni cogitare homines posse, ut expedit, id est, ita ut ad aliquid boni operandum sufficiat;* et cap. 9 ait: *Diavoli est mueris cum et recte cogitamus, et pedes nostros a falsitate et injustitia tenemus.* Quæ est etiam 22 sententia Augustini apud Prosperum; ergo ex sententia Patrum omni honesta cogitatio est gratiæ donum per Christum, ac subinde altera hæc ratio ad

omne opus bonum est aliqua gratia necessaria.

5. *Quartus locus ex Patribus nonnullis ac Pontificibus.* — Tertio, faciunt testimonia quæ probant illam cogitationem dari nobis ex meritis Christi: quæ sumi possunt ex Epistolis apud Augustinum, a 90 usque ad 105. Ibi enim docent Augustinus et Africani Patres, et consentiunt Pontifices, ad vincendas tentationes, et vitando peccata etiam contra legem naturæ, et ad bene sancteque vivendum, esse necessariam Christi gratiam; sed illa cogitatio congrua et honesta, quæ est efficax ad aliquod virtutis opus, etiam est efficax ad vitandum peccatum et vincendam aliquam tentationem; ergo est ex Christi meritis; ergo est vera gratia. Hæc ultima consequentia probatur, quia Christus non meruit nobis dona naturæ, seu creationis, sed gratiæ, quia, ut ait Augustinus, Epist. 105: *Christus non pro nullis ut homines conderentur, sed pro impiis mortuus est ut justificarentur.*

CAPUT XVII.

EX EORUMDEM PATRUM SENTENTIIS, COGITATIONEM
NATURALEM CONGRUAM NON ESSE VERUM GRATIÆ
AUXILIUM DEMONSTRATUR.

1. *Assertio.* — *Probatur primo.* — Verumtamen, si quis attente legat has Patrum sententias, et alias in quibus Pelagium reprehendunt quod solam libertatem, legemque, vel doctrinam, gratiam appellaret; facile intelliget quam sit interpretatio hæc a sensu Patrum aliena. Dico ergo, ex sententia Patrum, cogitationem honestam mere naturalem, et ex cursu naturalium objectorum per lumen rationis naturalis conceptam, etiamsi habeat actum voluntatis consequentem, et ideo congrua sit, non esse veram gratiam qua nostra justificatio fit, vel inchoatur. Probatur primo, quia *beneficium creationis, licet non contemnenda ratione possit dici gratia,* non tamen est illa gratia de qua Scriptura loquitur, et de qua dicit Paulus: *Non irritam facio gratiam Dei, nam si per legem justitia, ergo gratis Christus mortuus est,* ad Galat. 2. Sed hæc cogitatio honesta comprehenditur sub gratia creationis; ergo. Major est Concilii Carthag. Epist. ad Innoc., 95 inter Epistolas Augustini, et satis declarata est in proleg. 3. Minor probata est fere in precedentibus capitibus, declaraturque in hunc modum: nam gratia creationis intelligi potest, vel solum benefici-

cium creationis præcise sumptum, vel ut includit quidquid est ex natura rei debitum, seu consequens ad ipsam creationem. Pelagius ergo, cum dicebat posse hominem suo arbitrio et labore juste vivere, adjutum gratia, per gratiam intelligebat, non solum creationem animæ, sed etiam potentiarum ejus, et conservationem cum communi influentia et providentia, et si forte generalem concursum Dei non negabat, etiam illum sub gratia illa comprehendebat. Nam, ut referunt Patres Concilii Carthaginens. dicta Epist. 95 ad Innocent., per *gratiam* intelligebat illam qua datum est nobis non solum ut homines essemus, sed etiam ut sentiremus et intelligeremus, quæ et bonis et malis communis est; ergo sub hac gratia etiam illam cogitationem comprehendebat, non quidem ignorans in creatione sic sumpta includi plura beneficia inter se distincta, et separabilia invicem, quod est per se evidens, sed omnia comprehendens sub gratia naturali (ut sic dicam) seu creationis, quia omnia pertinent ad beneficia suo modo naturæ debita, et quæ viribus naturæ comparantur, supposita generali dispositione causarum universi. Item supra ostensum est, sub libertate proxima ad peccandum includi cogitationem honestam saltem sufficientem; hanc ergo comprehendebat Pelagius sub nomine gratiæ, et Patres sub beneficio liberi arbitrii, quia libertatem ad peccandum sub creatione comprehendebant; ostendimus autem eandem esse rationem de congrua cogitatione, quæ de sufficienti; ergo.

2. *Probatur secundo.* — Secundo, principaliter idem ostenditur hoc modo: nam Pelagiani et Semipelagiani admittebant beneficium generale collatum omnibus in dispositione causarum naturalium, et in generali doctrina, et prædicatione fidei miraculis confirmata, et consequenter ignorare non poterant cogitationes honestas ex his objectis, vel causis extrinsecis, in hominibus insurgentes, in quibusdam habere effectum bonæ voluntatis, in aliis autem non habere, ac proinde tales cogitationes in quibusdam esse, in aliis non esse congruas. Dicebant præterea, ratione illius generalis beneficii creationis et dispositionis rerum, illam bonam voluntatem esse ex gratia communi, quæ in uno homine effectum habet propter bonum usum libertatis, in alio vero male operante illum non habet propter malum usum ejusdem libertatis. Neque etiam ignorabant Deum prævidisse hanc varietatem eventuram in diversis voluntatibus, et nihilominus talem dispositionem rerum voluisse. Et ita sub illa

gratia comprehendebant illam cogitationem quæ habitura est effectum; et fortasse non negarent in eo qui bene operaturus est, esse majus quoddam beneficium Dei et gratiam in suo ordine. Nihilominus tamen, quia non admittebant gratiam internam dantem vires voluntati, et speciali Dei beneficio immissam, de errore ac deceptionis calumnia redarguuntur a Patribus: ergo ex sententia Patrum cogitatio illa naturalis non est vera gratia, quæ ad bonam voluntatem ab eis postulatur. Consequentia quidem per se evidens est, et ex Patrum sententiis statim clarior fiet.

3. *Progreditur secunda probatio quoad Pelagium.* — Assumptum vero quoad Pelagium et damnationem ejus, constat ex supra dictis, Proleg. 5, cap. 3, de errore Pelagii, et ex epist. 90 et sequentibus inter Epistolas Augustini, et specialiter ex Augustino lib. 1 de Grat. Christi, fere per totum, cujus varia loca ibi expendimus. Item ex Prospero, epistol. ad Ruffin., in principio, ubi in summa dicit gratiam tantum positam esse a Pelagio ut *magistram liberi arbitrii per cohortationem, per legem, per doctrinam, per creaturas, per contemplationem, etc.* Quid est, quæso, contemplatio, nisi bona cogitatio ex illis causis suborta? Hanc ergo etiam comprehendit sub gratia a Pelagio admissa, quam etiam dicebat esse ut *Doctorem, cui circa omnes homines per universum mundum commune et generale sit studium, ut qui voverint*, utique bonum vel malum amplectantur. Pelagius ergo, teste Prospero, cogitationem illam honestam, ex naturali lumine cum communi cursu objectorum et causarum secundarum subortam, etiam cum ad effectum bonæ operationis pervenit, ac subinde congrua est, gratiam appellabat; et nihilominus statim subdit sedem Apostolicam, Concilia Africana et Augustinum versutiam Pelagii deprehendisse et reprobasse. Idem ostendi potest ex Paulo Orosio in suo dialogo, circa medium, ubi, inter alia, dicit Pelagium posuisse gratiam in *solo naturali bono, et in libero arbitrio, et in hoc ordine quem natura bene instituta custodit.* Nam *hoc modo Deus, elementariis semel cursibus constitutis, facit inde quæ facit.* Ex quibus verbis constat omnem cogitationem honestam quæ ex ordinario et naturali cursu causarum oriri potest, comprehensam fuisse a Pelagio sub gratia. Et addit Orosius in hoc errasse, quod non cognoverit altiore gratiam quam Deus communicat altiori largitate.

4. *Progreditur deinde quoad Semipelagianos.* — Deinde Semipelagianos etiam illud genus

gratiæ admisisse, et eo colore errasse, clarissime colligitur ex Prospero, Epistol. ad Augustinum de erroribus Semipelagianorum, de quibus sic inquit: *Cum ad confitendam Christi gratiam, quæ omnia præcæniat merita humana, cogantur, ad conditionem hanc velint uniuscujusque hominis pertinere, in qua eum nihil prius merentem, quia neque existentem, liberi arbitrii et rationalem gratia creatoris instituat, ut per discretionem boni et mali, et ad cognitionem Dei, et ad observationem mandatorum ejus suam possit dirigere voluntatem.* Ex quibus verbis aperte constat Semipelagianos cogitationem naturalem discernendi bonum et malum, quæ cum effectu dirigat voluntatem ad bene operandum, sub gratia creationis comprehendisse. Idemque sumitur evidentius ex eodem Prospero, capit. 28 contr. Collator., ubi contra Cassianum sic inquit: *Denique, ut videretur aliquid gratiæ tribuisse, ad perfectionis, ait, incrementum semina hæc pervenire non poterunt, nisi opitulatione Dei fuerint excitata, ut, scilicet, opitulatio Dei sit cohortatio atque doctrina, mens autem, quæ virtutum est opulenta seminibus, utatur facultate quam possidet: ad hoc tantum juranda, ut earum virtutum apprehendat culmina quarum sibi scit inesse principia.* Præterea Hilarius, Epistola ad Augustinum, de Semipelagianis refert posuisse in bona voluntate naturali initium salutis ante gratiam, additque eosdem etiam dixisse, prædicari Evangelium his gentibus potius quam aliis, quia prævidit Deus qui essent credituri. Ex quibus colligimus posuisse Semipelagianos cogitationem naturalem congruam ad obtinendum bonum effectum, et illius occasionem a Deo esse prævisam cum præscientia congruitatis, seu effectus futuri, et illam fuisse sufficientem ad aliquod meritum, quod non excluderet rationem gratiæ. Unde verisimile est etiam illam cogitationem inter gratias computasse.

5. *Probatur tertio.* — Tertio, declaratur idem ex alia communi Patrum doctrina; nam cogitatio illa, quantumvis honesta, quæ ita est naturalis, ut per solas causas naturales, seu per objecta ordinario cursu naturæ sensibus occurrentia, et per naturale lumen intellectus comparari potest, profecto non excedit rationem legis aut doctrinæ; ergo non est illa gratia divinæ illuminationis et inspirationis quam Sancti ad bene vivendum requirunt. Consequentia evidens est, quia Patres postulavit ad bene vivendum talem gratiam quæ aliquid sit ultra doctrinam et legem, et det

vires ad legem implendam, et ad amandum quod per doctrinam cognoverimus. Antecedens autem probatur, primo, quia in cognitione quæ per solam inventionem acquiritur, creaturæ aliaque objecta extrinseca, a quibus, mediis speciebus sensibilibus, intellectus doctrinam accipit, habent locum præceptoris docentis scientiam vel prædicationem Dei proponentis, juxta illud Psalm. : *Cæli enarrant gloriam Dei,* etc.; et: *Non sunt loquelæ, neque sermones, quorum non audiantur voces eorum;* et postea: *Lex Domini immaculata convertens animas,* etc. Quod de lege naturali, quæ per creaturas cognosci potest, optime intelligitur, et hoc confirmat illud Pauli ad Roman. 1: *Revelabitur ira Dei super omnem impietatem et injustitiam eorum qui veritatem Dei in injustitia detinent, quia quod notum est Dei, manifestum est in illis, Deus enim illis manifestavit,* utique docendo illos veritatem per creaturas. Nam, ut subdit: *Invisibilia ipsius per ea quæ facta sunt, intellecta conspiciuntur;* et infra: *Ita ut sint inexcusabiles.* Quatenus ergo intellectum instruunt, ad doctrinam pertinent; quatenus vero inexcusabiles reddunt eos, qui cum cognovissent Deum, non sicut Deum glorificaverunt, legem profecto ostendunt.

6. Atque hoc recte declarant Augustini verba libr. 10 Confessionum, c. 6, dicentis: *Cælum et terra, et omnia quæ in eis sunt, ecce undique mihi dicunt ut te amem, nec cessant dicere omnibus, ut sint inexcusabiles. Altius tamen tu misereberis cui misertus eris et misericordiam præstabis cui misericors fueris. Alioquin cælum et terra surdis loquuntur laudes tuas.* Ergo tota illa cogitatio, seu inventio per creaturas, ad doctrinam tantum et legem spectat. Idem ergo est de omni alia cogitatione boni honesti ex objectis occurrentibus vi naturalis luminis desumpta; nam ex parte objectorum excitantium intellectum tantum pertinet ad doctrinam et legem: unde, quantumvis illa cogitatio futura sit congrua, non est a Deo ut adjuvante naturam ad bene operandum, neque ut subministrante vires volenti, sed ut a docente hominem per creaturas, et per easdem legem naturalem promulgante vel applicante; ergo illa cogitatio non habet rationem veræ gratiæ quam Scripturæ et Sancti docent, sed palliatæ gratiæ, quam Pelagius prædicabat; vel certe quando illa cogitatio congrua existit, potius dici potest doctrina, vel lex congruo tempore lata, seu applicata, quam gratia congrua.

7. *Probatur quarto.* — Quarto probatur,

quia hæc cogitatio honesta moraliter sæpissime, seu a pluribus acquiritur vel excitatur, non per inventionem, sed per disciplinam humanam, docente vel exhortante alio homine, et cum tali cogitatione sæpe contingit hominem ab alio edoctum vel excitatum operari aliquod bonum morale per liberum arbitrium, ac proinde esse congruam sine alio interiori spiritu gratiæ; sed tunc talis cogitatio tantum habet rationem doctrinæ, seu disciplinæ, aut exhortationis humanæ; ergo non est vera gratia Christiana de qua Patres loquuntur. Major est clara ex dictis in capitibus præcedentibus; tum quia illa cogitatio de se est sufficiens ad actum naturalem, qui per se tantum pendet a libero arbitrio, et ideo moraliter necessarium est ut ex multis et pene infinitis hominibus habentibus talem cogitationem, aliqui consentiant illi pro libertate sua, saltem aliquando et in rebus facilioribus; tum etiam quia cogitatio illa per disciplinam acquisita, ejusdem rationis et virtutis est cum simili cogitatione per propriam inventionem comparata: ergo æque potest esse congrua, nam æque potest voluntas libera illi consentire. Unde cum frequentius et in pluribus hominibus talis cogitatio excitetur per doctrinam et vocem humanam, etiam inter infideles, nam inter illos etiam filii a parentibus instruuntur ipsos honorare, veritatem loqui, et similia, fit ut hæc cogitatio congrua sæpissime per doctrinam humanam sufficienter excitetur. Et hinc sufficienter probatur subsumpta propositio: nam quidquid resultat in mente audientis ex vi solius vocis hominis instrumentis, vel proponentis, aut consulentis alteri circa operationem virtutis, habet tantum rationem doctrinæ, aut legis propositæ, vel ad summum humani ejusdam adjutorii moralis, ex quo aperte concluditur, ut sic non pertinere ad internam spiritus gratiam. Unde ulterius concluditur idem esse dicendum de cogitatione, quasi per inventionem excitata: nam in se ejusdem rationis sunt, et uterque modus acquirendi illam est naturalis et humanus, et a divina providentia ordinatus, differentia vero inter illos valde accidentaria est ad rationem gratiæ.

8. *Probatur quinto.* — Quinto, hoc aperte confirmant verba Pauli, 1 ad Corinth. 3: *Neque qui plantat est aliquid, neque qui rigat, sed qui incrementum dat, Deus.* Unde colligunt Patres, quidquid exterius fit per homines (et idem est de quibuscumque creaturis) ad cogitationem vel operationem boni, solum esse plan-

tare et rigare, et ita non pertinere ad propriam internam gratiam, quæ dat vires operandi, nam incrementum dat solus Deus. Ergo moralis cogitatio naturalis, quantumvis congrua, quatenus est ab objectis extrinsecis, vel ab hominibus, tantum ab eis plantatur vel rigatur: ergo ut sic non est gratia, sed doctrina, vel propositio legis. Quatenus autem interius fit a Deo, non fit per influxum gratiæ, sed per generalem concursum primæ causæ, in quo differt multum a sancta cogitatione, quæ pertinet ad proprium et internum gratiæ auxilium: ergo etiam sub illa ratione talis cogitatio non est gratiæ inspiratio, sed est donum quoddam naturale. Neque vero, etiam ut est congrua, est a Deo per specialem efficientiam gratuitam, quia illa congruitas non semper est aliquid speciale in ipsa cogitatione, sed est quasi actualis influxus in effectum bonæ actionis voluntatis, vel denominatio a tali influxu, qui etiam non fit a Deo, nisi per generalem concursum primæ causæ, et ideo nullo modo est speciale auxilium, licet sit speciale beneficium intra latitudinem beneficii creationis, ut supra explicatum est.

9. *Probatur sexto.* — Sexto, testimonium hoc et omnes rationes factæ confirmantur valde verbis Augustini et aliorum quinque Episcoporum in epist. 95 ad Innocent., ubi sic urgent Pelagium: *Illam confiteatur apertissime gratiam, quam doctrina Christiana demonstrat et prædicat esse propriam Christianorum, quæ non est natura, sed qua salvatur natura, non auribus sonante doctrina, vel aliquo adjumento visibili, sicut plantatur quodammodo et rigatur extrinsecus, sed subministratione spiritus, et occulta misericordia, sicut facit ille qui dat incrementum Deus.* Ubi ponderanda sunt illa verba, *non auribus sonante doctrina, vel aliquo adjumento visibili*: nam ibi comprehendit duos modos recipiendi per creaturas cogitationem sanctam seu honestam, scilicet, per inventionem propriam, vel per disciplinam, de quibus in tertia et quarta ratione diximus. Est autem sciendum non repugnare quin per doctrinam extrinsecus vel per aliquod visibile adjumentum vera interna gratia sanctæ cogitationis excitetur in nobis: nam potius hic est ordinarius modus internæ vocationis Dei, per verbum Evangelicæ prædicationis, vel per exempla, aut alia sensibilia objecta ad pietatem moventia; utrumque enim modum attingit Augustinus de Bono persever., cap. 14, dicens, *habere aliquos in ipso ingenio divinum naturaliter munus intelligen-*

tiæ, quo moreantur ad fidem, si congrua suis mentibus vel audiant verba, vel signa conspiciant. Utroque ergo modo potest divinitus immitti sancta cogitatio. Quod latius declarat Prosper contra Collat., cap. 14 et 30, enarrans varios modos quibus Deus trahit corda hominum per creaturas visibiles, vel per verbum prædicationis, aut lectionis, aut alios affectus; in his autem omnibus ait, *operari unum et eundem spiritum sine cujus interna actione nihil exteriora objecta perficerent*. Igitur ex horum Patrum sententia nunquam erit vocatio, seu cogitatio gratiæ, si interius nihil operetur Deus, præter id quod per solum naturale lumen intelligentiæ concipi, cogitari et judicari ab homine potest cum solo generali influxu Dei: quia tunc extrinseca objecta vel verba plantant et rigant, incrementum autem dant virtus naturalis luminis, ut causa proxima principalis, et Deus, ut causa prima, et creator ac moderator naturæ. Et ideo dixerunt dicti Patres gratiam, qua salvatur natura, debere fieri subministratione spiritus, et occulta misericordia, ut patet ex Augustino, lib. 1 de Grat. Christi, cap. 24, et fere per totum, et lib. 1 contr. duas epist. Pelag., cap. 34 et 35; Prosper l. 1 de Vocat. Gent., c. 2, et ad 5 c. Gallorum, et cap. 13 et 14 contra Collat. Cum ergo cogitatio illa naturalis, quamvis congrua, fiat priori tantum modo sine alia occulta misericordia, vel ministratione spiritus, proculdubio non est ex vera gratia salvante, seu per se conferente ad æternam salutem, de qua loquuntur Patres, cum dicunt ad singula bona opera gratiam spiritus esse necessariam.

10. *Probatur septimo.* — Septimo hoc confirmat Augustinus, frequenter docens in vanum ædificare externum prædicatorem, nisi Deus interius ædificet singulari modo et auxilio. Sic loquitur de omnibus operibus gratiæ, et de ipsa fide, lib. de Prædest. Sanct., c. 7, dicens: *Si ad ædificium pertinet fides, in vanum laborat prædicando ædificans fidem, nisi eam Dominus miserando intus ædificet*. Idemque a fortiori intelligit de quolibet bono opere qui proficiatur ex gratia, et ad ædificium salutis pertinet. Unde inferius, cap. 8, explicans vocationem congruam gratiæ per modum doctrinæ, inquit: *Valde remota a sensibus carnis est hæc schola, in qua Pater auditur, et docet ut veniatur ad Filium*, et infra: *Multos te ire videmus ad Filium, quia multos videmus credere in Christum, sed ubi aut quomodo a Patre audierint hoc et didicerint, non videmus; nimirum gratia ista secreta est, et occulte hu-*

manis cordibus divina largitate tribuitur. Profecto hæc et similia nullo modo applicari possunt naturali cogitationi, quæ vi tantum externorum objectorum aut signorum, naturali virtute intellectus, cum solo Dei generali concursu excitatur. Quoniam cogitatio illa, quam sensibilia objecta vel voces excitant, non potest dici valde remota a sensibus, sed potius cum illis ex natura rei conjuncta, nec illam, vel per illam solam ædificat Deus speciali auxilio interno, sed solo generali concursu primæ causæ; nec denique dici potest gratia talis cogitationis alta et secreta; aut ignotum esse, ubi aut quomodo Pater illam doceat, vel immittat, cum constet per sola sensibilia objecta, et generali modo operando illam tribuere. Ergo cogitatio sancta, ad quam Augustinus disputationem de gratia, seu initium justificationis revocat, altioris rationis est, et peculiarem internam Dei operationem postulat, præter externam doctrinam, et cogitationem, quæ ex vi illius cum solo generali concursu interius resultat. Unde est illud Augustini, libro de Gratia Christi, cap. 13: *Hæc gratia, si doctrina dicenda est, certe sic dicatur, ut altius et interius eam Deus cum ineffabili suavitate credatur infundere, non solum per eos qui plantant et rigant, sed etiam per seipsum*. Ergo e contrario cogitatio, quæ fit per eos solum qui plantant et rigant exterius, neque altiori modo a Deo interius fit, quam concurrente cum naturali lumine intellectus generali modo, non potest dici gratia, sed mere naturalis doctrina; et in toto illo capite et sequenti, imo fere in toto illo libro explicat veram gratiam per interioriorem motionem Dei, quam exteriora objecta per se non possent efficere, ut per hoc detegat versutiam Pelagii.

11. *Probatur octavo.* — Octavo, ab inconvenienti ostendere possumus cogitationem illam congruam non esse veram Christi gratiam, de qua Patres loquuntur, quia alias sequeretur posse hominem mereri de congruo fidem, vel primam gratiam internam et supernaturalem, per opus bonum morale factum ex illa cogitatione congrua naturali, quia si illa est vera gratia, jam est opus gratiæ, et consequenter potest fundare meritum alterius gratiæ. Posset quidem negari illatio, ut infra videbimus, tamen nunc ad hominem argumentamur. Nam id consequenter concedit Vaquez locis citatis. Consequens autem esse alienum a sententia Augustini, et vix posse a Semipelagianorum sententia re ipsa a nobis distingui, hec verbis differre videatur, infra disputando de auxiliis

gratiæ, ex professo tractandum est. Nunc vero declaratur ex verbis Pauli 1 ad Thessal. 2: *Gratia estis salvati per fidem, et hoc non ex vobis, donum enim Dei est (utique ipsa fides), non ex operibus, ut ne quis gloriatur; ubi a fide distinguit opera quæ a fide non procedunt, nam quæ procedunt a fide, jam non sunt ex nobis, cum fides sit Dei donum: ergo opera quæ procedunt ex cogitatione honesta naturali, censet Paulus esse ex nobis, et non esse meritoria salutis, ne quis possit in seipso gloriari; talia autem opera, si fiant, non possunt non esse ex cogitatione congrua; quia eo ipso quod habet effectum, est congrua: ergo (teste Paulo) non est gratia, nam si esset gratia, qui in illa gloriaretur, non in se, sed in Deo gloriaretur. Et simili ratione non potest fundare meritum gratiæ, alias haberet homo unde in se gloriaretur, cum illud meritum non sit ex vera gratia, sed ex opere humano; et hic est sine dubio sensus Pauli, ut ipsum exposuit Augustinus de Prædest. Sanctor., cap. 7.*

12. *Confirmatur ex Concilio Arausicano.* — Potestque optime confirmari ex Cone. Arausic., cap. 16, dicente: *Nemo ex eo quod videtur habere, gloriatur tanquam non acceperit, aut ideo se putet accepisse, quia littera extrinsecus, vel ut legeretur, aperuit, vel ut audiretur, insonuit.* Cogitatio ergo, quæ naturaliter excitatur per extrinseca objecta aut verba, non computatur a Concilio inter dona gratiæ accepta divinitus ultra naturam, sed inter ea quæ homo habet a natura; et ideo si quis in tali cogitatione gloriatur, et in ea fundet meritum, non gloriatur in acceptis, nec recte dicit accepisse, utique per gratiam, quod non altiori modo habet; et quia illa cogitatio non excedit rationem legis aut doctrinæ, ut supra dicebamus, ideo Concilium suam sententiam probat dicens: *Nam sicut Apostolus ait: Si per legem justitia, ergo gratis Christus mortuus est.* Et in eodem sensu addit in cap. 21: *Sicut Paulus dixit: Si ex lege justitia, etc., sic et his qui gratiam, quam commendat et præcipit fides Christi, putant esse naturam, verisimile dicitur: Si ex natura justitia, ergo gratis Christus mortuus est; ubi nomine naturæ videtur intelligere naturalem legem, ut naturali ratione propositam, sic enim distinguit naturam a lege, atque ita sub natura comprehendit non solum substantiam et potentiam, sed etiam actum vel cogitationem naturalem, per quam lex naturæ proponitur, sive sufficiens tantum sit, sive etiam congrua, nam loquitur de natura ut includit observationem legis, quod non fit*

sine aliquo actu seu effectu bonæ voluntatis, cui necessario correspondet cogitatio congrua. Hic vero occurrebat objectio, quia hinc sequitur ante fidem vel voluntatem credendi, vel sanctam cogitationem supernaturalem, quod credere oporteat, nullam antecedere veram gratiam: unde ulterius sequitur ante fidem nullum antecedere posse meritum, etiam imperfectum et de congruo alicujus præmii supernaturalis. Sed hanc objectionem in prædictum locum de auxiliis reservamus. Nunc fatemur ante primam cogitationem supernaturalem, id est, quæ communi concursu naturæ haberi non possit, nullam esse gratiam supernaturalem, neque illius meritum; quæ autem, et qualis illa sit, ibi declarabimus.

CAPUT XVIII.

DESTRUCTO ALTERIUS SENTENTIÆ FUNDAMENTO, VERITAS AMPLIUS CONFIRMATUR.

1. *Loci in capite 16 contra nos non militant.* — Ultimo confirmatur hæc nostra sententia, et antiquorum Patrum esse ostenditur eisdem testimoniis quæ in argumentis capite ante præcedenti factis in contrarium objiciebantur, quod in hunc modum propono et declaro. Nam prima cogitatio sancta, quæ est prima gratia in toto ordine justificationis, et quæ non potest cadere sub aliquod meritum, quia est inchoatio vel fundamentum totius meriti, est cogitatio fidei, vel generandæ, quia ad fidem introducendam per se ordinatur, vel exercendæ, quia ab ipsa fide elicitur, ut contingit in homine baptizato, cum primum incipit de divinis rebus per fidem cogitare: et de hac prima cogitatione loquuntur Patres, quoties contra Semipelagianos ostendere volunt initium justificationis et fidei non posse cadere sub meritum; ergo non solum immerito allegantur, quod asserant cogitationem naturalem honestam, quantumvis congruam, esse gratiam inchoantem justificationem, verum potius contrarium ex illis testimoniis suffieienter ostenditur. Consequentia quoad priorem partem manifesta est, quia naturalis cogitatio, quantumvis honesta et congrua, neque est cogitatio fidei, neque est supernaturalis, id est, quæ viribus naturæ elici non possit. Nam cogitatio honesta præcisa congruitate naturalis est, ut etiam auctor contrariæ sententiæ fatetur, et in capite 2 hujus libri ostensum est. Congruitas autem non addit cogitationi entitatem aliquam, nec realem modum intrinsecum, ratione cujus

requirat supernaturales vires ut eliciatur, ut in superioribus capitibus late ostensum est. Altera vero consequentis pars, etiam est evidens, quia non est duplex cogitatio prima, quæ sit vera gratia, et possit esse fundamentum meriti, nec possit cadere sub meritum, quia repugnantiam involvit. Si enim duplex esset talis cogitatio, neutra per se esset prima, sed ex accidenti contingeret nunc ab una incipere, et nunc ab altera; ergo quælibet illarum posset cadere sub meritum, quoties altera præcederet; ergo si aliqua est sancta cogitatio quæ nunquam possit cadere sub meritum, illa est unica tantum, seu unius rationis, et omnia alia quæ illam antecedit, non est cogitatio vere sancta, id est, inchoans veram sanctificationem et justitiam apud Deum; et ita Patres citati semper loquuntur de hac cogitatione tanquam de una, et unico justificationis initio.

2. *Speciatim jam expeditur locus Augustini adductus in numero 2.* — Superest ut probemus minorem propositionem in principali argumento subsumptam, quam ostendo, discurrendo per testimonia in objectionibus allegata. Nam in primo citatur Augustinus libr. 2 contr. duas Epistol. Pelagian., cap. 8, ubi probare intendit Deum non solum perficere, sed etiam incipere in nobis omne opus bonum, ex Paulo ad Philippens. 1, et addit: *Loquimur enim nunc de boni cupiditate, quam si volunt a nobis incipere, a Domino perfici, videant quid respondeant Apostolo dicenti: Non quia idonei sumus cogitare aliquid a nobis quasi ex nobis, sed sufficientia nostra ex Deo est.* 2 ad Corinth. 3; ubi duo ponderanda sunt; unum est quid Augustinus intelligebat per boni cupiditatem, quod ipse statim cap. 9 declarat, dicens: *Quid est enim boni cupiditas, nisi charitas, de qua sine ambiguitate Joannes Apostolus loquitur, dicens: Charitas ex Deo est.* Qui locus evidenter intelligitur de charitate infusa; de hac ergo loquitur Augustinus, et de cogitatione quæ possit esse initium ejus, que non est nisi cogitatio supernaturalis et fidei. Alterum ponderandum est testimonium Pauli, quo Augustinus suam sententiam confirmat: *Non sumus sufficientes cogitare aliquid ex nobis, etc.* Nam hæc eadem verba alibi locis Augustinus explicat de cogitatione supernaturali et fidei, præsertim lib. de Predestin. Sanctor., cap. 2, dicens: *Quod ergo pertinet ad religionem atque pietatem, de qua loquebatur Apostolus (utique in citato loco, quem proxime allegaverat), non sumus sufficientes credere aliquid, quasi ex nobismetipsis,*

quod sine cogitatione non possumus, sed sufficientia nostra, qua credere incipiamus, ex Deo est. Per pietatem autem et religionem aperte intelligit Augustinus Religionem Christianam, quæ in fide fundatur, de qua etiam, et de cogitatione per quam fides inchoatur, in verbis proxime præcedentibus locutus fuerat, et vocaverat: *Gratiam, quæ non datur secundum aliqua merita, sed efficit omnia bona merita;* et exemplo conversionis Pauli illam declaravit.

3. *Prædictus locus ab ipso etiam Augustino exponitur.* — Et eodem modo exponit idem testimonium libro de Bono persever., cap. 8, ubi ait a Deo habere homines potestatem ut fiant filii Dei: *Ab ipso quippe accipiunt eam (utique potestatem), qui dat cordi humano cogitationes pias, per quas habeat fidem quæ operetur per dilectionem;* ubi clare loquitur de his cogitationibus interius in corde infusis, et ad fidem pertinentibus, et adjungit: *Ad quod bonum sumendum et tenendum, et in eo perseveranter usque in finem proficiendum, non sumus idonei cogitare aliquid quasi ex nobismetipsis, sed sufficientia nostra ex Deo est, in cujus est potestate cor nostrum et cogitationes nostræ.* Et similiter dicto libro de Gratia et libero arbitrio, cap. 7, exponit eundem locum de cogitatione, quæ est fundamentum meriti supernaturalis, quod semper reducit ad fidem, vel sanctam fidei cogitationem, quod etiam in toto illo libro præcipue intendit, ut ex cap. 5 et sequentibus facile intelligi potest. Et eodem modo intellexerunt verba illa Prosper, lib. 1 de Vocat. gent., cap. 24, dicens: *Item idem (scilicet Apostolus) in secunda ad Corinthios, dicit quod nec ad cogitandum quidem quod spirituale est, idonei simus, nisi per gratiam Dei;* et Fulgentius, libro de Incarnat. et Gratia, cap. 17; nam cum dixisset Deum justificare impium et infidelem, gratia suæ bonæ voluntatis fidem quæ per dilectionem operatur inspirando, subdit: *Vide quod ad bene cogitandi attinet facultatem testatur Apostolus, quia non sumus sufficienter cogitare aliquid a nobis quasi ex nobis, etc.,* ut alios expositores in eundem locum omittam.

4. *Expeditur deinde locus alter ejusdem Augustini adductus in num. 3.* — Præterea in l. 2 de Peccat. merit., c. 17, etiam loquitur Augustinus de divina gratia adjuvante, sine qua homo facere non potest quod justum est, opus autem justum intelligit quod ex charitate Dei fit. Unde etiam tractat de gratia Dei, qua homo potest vivere sine peccato, quæ certe non

est naturalis cogitatio congrua, sed specialis excitatio et directio Dei, per quam dirigit gressus hominis, et hanc dicit esse *medicinam quæ cælitus venit, et gratiam claram, t in Christo manifestam*; cum ergo addit, *per hanc gratiam manifestari bonum quod latebat, et suare fieri quod non delectabat*, loquitur de bono sanctitatis et justitiæ coram Deo, et de suavitate quam efficit charitas, ac subinde de manifestatione per sanctam cogitationem divinitus infusam, et ad fidem pertinentem. De qua evidentius loquitur in dicta quæst. 2 ad Simplicianum, cum ibi expresse declarat loqui de cogitatione *qua voluntas hominis morceatur ad fidem*. Præterquam quod in tota illa quæstione præcipue agit de gratuita Dei electione et vocatione, et de initio fidei ante omne meritum, ut ipse etiam affirmat libro de Prædestinatione Sanctorum, cap. 4; unde etiam in eadem quæstione ostendit nullum posse esse meritum ante sanctam cogitationem ad fidem inducentem: de hac ergo loquitur in ea quæstione, quoties de prima sancta cogitatione loquitur, et de illa dicit quod gratia Dei inspiratur, et quod per eam ad Deum proficimus, quibus modis solet ab Augustino vera et interna gratia supernaturaliter indita declarari.

5. *Expediuntur adducta in num. 4.* — Atque eodem modo exponendæ sunt aliæ locutiones quibus absolute dicitur omnis cogitatio a Deo proficisci. Quanquam si sermo sit ita generalis, ut est in verbis Gennadii, possit recte intelligi cum partitione accommoda; nam omnis quidem cogitatio bona a Deo est; tamen ea quæ naturalis tantum est, procedit a Deo ut auctore naturæ, per generalem concursum et providentiam; quæ autem est vera gratia, altiori modo et magis liberali a Deo existit, et ad altioris sanctitatem ex se ordinatur, et ideo simpliciter divina et sancta vocatur. Quo modo interdum D. Thomas explicat Scripturam dicentem hominem nihil boni posse facere sine Deo, sub eadem distinctione, ut si bonum sit naturale, non fiat sine Deo generaliter concurrente; si vero sit altius bonum, non fiat sine Deo per gratiam operante, ut latius capite sequenti videbimus. Ordinarie vero loquuntur Patres de cogitatione data homini a Deo ultra communem concursum naturæ, et de illa loquitur aperte Augustinus in citato sermone 171, ut patet ex verbis antecedentibus, et ex proprietate illorum verborum: *Quidquid boni cogitaverit homo subito corde percussus*, utique per internam inspirationem ab Spiritu Sancto infusam.

6. *Ad Fulgentium et Prosperum.* — Et de hac etiam loquitur manifeste Fulgentius, ut patet, quia loquitur de sancta cogitatione qua per fidem incipimus liberari a peccato, vel ad illius remissionem obtinendam disponi. Et hoc modo ait in cap. 12: *Per gratuitam gratiam Christi datum esse humano generi, ut etiam cogitationis sanctæ, amissa pridem in homine primo, per hominem secundum reciperetur facultas*. Hæc autem facultas non est naturale lumen intellectus, neque objectum extrinsecum occurrens, quod possit honestam cogitationem excitare, nam hæc non fuerunt amissa per peccatum: est ergo fides, vel quoad habitum, vel quoad auxilium, quod illam in nobis inchoat. Denique eodem sensu loquitur Prosper, nam illa cognitio vel scientia, de qua Prosper et alia testimonia ibi citata loquuntur, et per Christum dari dicunt, non est cognitio mere naturalis, sed divinitus infusa, quæ est fidei, vel quæ dat fidei initium, ut aperte sumitur ex Prospero contra Collator., cap. 29, et Fulgentio, lib. de Incarnat. et Grat., c. 26 et 27, in principio.

7. *Expediuntur tandem adducta num. 5.* — Et hinc etiam constat cætera testimonia, quæ in ultima objectione proponebantur, recte intelligi de hac eadem cogitatione ad fidem pertinente, nam illa maxime per Christum datur. Non nego tamen quaecumque bonam cogitationem, etiam naturalem, dari propter merita Christi, si aliquo modo ad vitam æternam conducat, sive per se, sive per accidens removendo prohibens, seu impediendo peccatum, quia talis cogitatio in prædestinatis est effectus prædestinationis, in reprobis vero potest esse effectus generalis providentiæ supernaturalis, et ideo etiam est effectus prædestinationis Christi, juxta ea quæ dixi 1 part., lib. 3 de Prædestinat., et 1 tom. 3 partis, disputat. 41. Neque inde sequitur talem cogitationem esse proprium auxilium gratiæ, quia Christus Dominus non solum meruit nobis propria dona gratiæ, sed etiam dona naturæ, prout ad spirituales salutem conferre quoquo modo possunt, ut eisdem locis tractavi.

CAPUT XIX.

PROPONITUR UNIVERSALIS OBJECTIO EX PATRIBUS
ASSERENTIBUS NULLUM OPUS BONUM POSSE FIERI
SINE GRATIA.

1. *Collectio ratiocinationis, quod ad singula opera moralia non requiratur gratia.* — Hactenus nostram sententiam stabilivimus, et per

cæteras sententias discurrendo, quasi a sufficienti partium enumeratione ejusdem probationem hunc fere in modum conclusimus: Ad singula opera bona moralia ordinis naturalis, non est necessaria gratia, quæ sit peculiaris motio, vel determinans voluntatem, vel dans illi physicas vires necessarias ad talem actum, vel quæ sit perfectior aut excellentior cogitatio, quam per lumen naturale intellectus mediis sensibus per communem cursum causarum et objectorum naturalium possit excitari eum generali concursu; neque est cogitatio congrua, quæ ratione solius congruitatis sit vera gratia supernaturalis, aut verum auxilium gratiæ; ergo nulla gratia vera est simpliciter necessaria ad quemlibet hujusmodi actum. Et procedendo in hoc discursu, ad propria fundamenta singularum opinionum responsum est. Nunc ad alia quæ omnibus opinionibus communia sunt, superest respondendum. Et in hoc capite duplicis generis testimonia afferemus, eisque capite vigesimo et vigesimo-primo satisficiemus; tum in 22 rationes expendemus.

2. *Primum genus testimoniorum pro adversariis, probantium quodvis opus morale fieri non posse absque gratia speciali.* — *Ex Scriptura.* — *Ex Concilio Arausicano et summis Pontificibus.* — Primo ergo afferri solent testimonia Scripturarum, Conciliorum definitiones, et sanctorum Patrum testimonia. Ex Scriptura vero afferuntur vulgaria loca, in quibus dicitur nihil nos posse sine gratia, ut Joann. 15: *Sine me nihil potestis facere*; et ad Philip. 1: *Confidens hoc ipsum, quoniam qui cepit in vobis opus bonum, ipse perficiet*; et cap. 2: *Deus est qui operatur in vobis velle et perficere.* Ad Ephes. 2: *Creati in operibus bonis.* Jacobi. 1: *Omne datum optimum, et omne donum perfectum desursum est.* Omnis autem actus undique studiosus inter hæc dona computatur. Definitiones autem Conciliorum præcipue sunt Concilii Arausicani, dicentis cap. 9: *Dirini est muneri cum et recte cogitamus, et pedes nostros a solitudine et injustitia tenemus. Quoties autem bona agimus, Deus in nobis atque nobiscum, et opere noster, operatur.* Et cap. 18: *Debetur merces bonis operibus si sunt, sed gratia præcedit, et facit.* EA 20: *Multa in homine bona sunt, quæ non facit homo, nulla vero facit homo bonus, quæ non Deus præstat, ut faciat homo.* EA cap. 25: *Hoc salubriter cogitemus et credamus, quod in omni opere bono nos non incipimus.* Hoc etiam spectat quod dicit Innocent., Epistol. 26 ad Concilium Carthag.:

Voluntati liberæ non nisi adjutorium Dei esse nectendum, eamque nihil posse cælestibus præsidiiis destitutam. Et Cælestin., Epistol. 1 ad Episcop. Galliæ, cap. 7, *sine cælesti auxilio nihil boni nos posse, ait, et quod nemo nisi per gratiam libero bene utatur arbitrio.* quod refert ex Innoc. supra, et alia ex Zosimo, et Concilio Africano in cap. 8.

3. *Ex Augustino et Hieronymo.* — Quæ sententiæ et similes frequentissimæ sunt apud Augustinum; imo ab eo sumptæ sunt, ut videre licet lib. 2 contra duas Epistol. Pelag., cap. 8; de Spirit. et Litter., cap. 28; epistol. 106, ubi adeo necessariam dicit esse gratiam ad singula opera, *ut propterea dixerit Paulus: Non ego, sed gratia Dei mecum, quia nihil boni ageret, si gratia eum non juvaret.* Et epistol. 107, circa med. et circa finem, ait gratiam non tollere liberum arbitrium, sed potius per eam, *ad bona eligenda fieri liberum.* Unde serm. 13 de verbis Apostoli: *Adjutorium, ait, Spiritus Sancti prorsus si defuerit, nihil boni agere poteris.* Similia multa habet lib. 4 contr. Julian., cap. 3, ubi inter alia docet ante gratiam nihil boni in homine reperiri. Et quod gravius est, lib. de Hæres., cap. 28, et in libr. de Gestis Concilii Palæstini contra Pelagian. sæpe, et præsertim in ultimo capite, et in epistol. 106 et 107, et aliis locis maxime probat resolutionem Orientalium Patrum, qua damnarunt negantes gratiam Dei ad singula opera esse necessariam. Cui resolutioni concordat Hieronymus, libro contra Pelagium, versus finem, contra Pelagium dicens: *Qua sententiæ temeritate auferes omne Dei præsidium, dum gratiam ejus non ad singula refers opera, sed ad conditionis, ac legis, et liberi arbitrii potestatem.* Multaque habet similia in epistol. ad Ctesiphontem. Et his etiam consenserunt alii Patres, horum vestigia senti.

4. *Ex Prospero.* — Et imprimis Prosper, Epistol. ad Rufin., ait liberum arbitrium hominis non renati, id est, nondum per gratiam salvatum, sibi que permissum, non nisi in suam perniciem moveri. Et ad 3 objectionem Gallor. ait: *Sicut bona opera ad inspiratorem eorum Deum, ita mala ad eos sunt referenda, qui peccant.* Et lib. contra Collator. hoc præsertim conatur ostendere, initium omnis bonæ voluntatis esse ex Deo. Unde in cap. 3 sentit non posse hominem bonum aliquod facere: *Nisi prius per divinam illuminationem bonorum conatum acceperit facultatem*; et in c. 19: *In natura humana post peccatum, ait, quid remansit, nisi quod ad temporalem pertinet ri-*

tam, quæ tota est damnationis et pænæ? Unde in cap. 22 addit: Nihil boni operis ex mortuis, nihil justitiæ procedit ex impiis, tota ipsorum salus gratia est. Ideoque contra Casianum subjungit: Quid iste impiam infidelium libertatem naturalibus instruit bonis, et propriis vult justificare principiis? Quibus verbis tacite infert Prosper, si aliquod bonum opus fieri potest sine gratia, justificationem fieri vel inchoari propriis naturæ principiis, et addit: Quasi ullus sit bonæ voluntatis motus, nisi quem creaverit diffusæ per Spiritum Sanctum charitatis afflatus; et cap. 28 reprehendit dicentes sine ullo opere gratiæ naturaliter omni animæ semina inesse virtutum, quia de istis seminibus volunt ostendere, quædam germina præcedentium Dei gratiam pullulare meritorum. Si autem virtutum semina naturaliter non insunt homini, profecto neque aliquod opus potest a sola natura proficisci.

5. *Ex Fulgentio.* — In eandem sententiam Fulgentius, de Incarnat. et Grat., cap. 16: *Quomodo (inquit) de possibilitate solius liberi arbitrii (si non præveniatur a gratia Dei) quantumcumque sibi bonæ voluntatis exordium repromittit? Et capit. 19, liberum arbitrium dicit, quamdiu per gratiam non liberatur, captivum esse, et servum peccati, et subinfert: Quamdiu est peccati servus, non nisi ad serviendum peccato reperitur idoneus; et infra addit: Nemo potest habere bonam voluntatem motu proprio, nisi mens ipsa, id est, interior homo noster renoretur ac reformetur ex Deo. Idem sensit Petrus Diacon., de Incarnat. et Grat., cap. 6, dicens sine gratia posse hominem cogitare, et velle humana, non tamen divina; et infra addit fidem esse omnium bonorum fundamentum et originem; et cap. 8, ait: In bonis quibusque voluntatis humanæ singulis motibus magis illius valere non dubitemus auxilium. Idem Paul. Oros., in dialog. de Liber., art. 6. Addo Cyrillum Alexand., lib. 9 in Joannem, cap. 45, dicentem: Impossibile est quidquam boni a nobis peragi, nisi gratia Spiritus munitis.*

6. *Ex Anselmo.* — Anselmus etiam, lib. de Concord., part. 3, colum. 4, dicit: *Cum omnia subjaceant dispositioni Dei, quidquid contingit homini, quod adjuvat liberum arbitrium, ad accipiendum vel servandum hanc de qua loquimur rectitudinem, suæ gratiæ imputandum est. Et in fine illius partis ait voluntatem hominis, per Adæ peccatum ita deseruisse affectionem justitiæ, et captivam factam esse affectionis proprii commodi, ut nihil possit ex se*

velle, nisi ex illa affectione, ac proinde non possit opus aliquod honestum sine gratia facere, nam ad opus honestum necessarium est velle rectitudinem propter seipsam, quod non potest talis voluntas sine gratia. In eandem sententiam subseribit Bernard., lib. de Grat. et liber. arbitr., ubi, cum dixit: Velle inest nobis ex libero arbitrio, adjungit: Non dico velle bonum aut velle malum, sed tantum velle: velle enim bonum profectus est, velle malum defectus, velle vero simpliciter ipsum est quod vel proficit, vel deficit. Porro ipsum ut esset, creans gratia fecit; ut proficiat, saltem gratia facit; ut deficiat, ipsum se dejicit. Itaque liberum arbitrium nos facit volentes, gratia benevolos. Ex ipso nobis est velle, ex ipsa bonum velle. Quod latius prosequitur, et iterum concludit: A Deo igitur velle, quomodo et timere, quomodo et amare accepimus in conditione naturæ, ut essemus aliqua creatura. Velle autem bonum, quomodo et timere Deum, et amare Deum accepimus in visitatione gratiæ, ut simus Dei creatura. Et in serm. 1 de Annuntiat.: Necessesse est (ait) primum omnium credere, quod remissionem peccatorum habere non possis, nisi per indulgentiam Dei; deinde quod nihil prorsus habere possis operis boni, nisi et hoc dederit ipse; et infra: De operibus bonis certum omnino est quod nemo hæc habeat a se ipso. Et assertit difficilem probationem, quam statim proponam. Denique Joannes Maxentius, in prima Fidei Catholicæ professione, in fine, sic inquit: Liberum arbitrium naturale ad nihil aliud valere credimus, nisi ad discernenda tantum et desideranda carnalia, seu sæcularia, quæ non apud Deum, sed apud homines possunt fortassis videri gloriosa. Ad ea vero quæ ad vitam æternam pertinent, nec cogitare, nec velle, nec desiderare, nec perficere posse, nisi per infusionem et inoperationem intrinsecus Spiritus Sancti. Et ideo, in responsione ad Hormisdam Papam, impugnans Semipelagianos, præcipue Faustum, sentit ante fidem non posse in nobis præcedere aliquod bonum opus quod sit a natura. His addi potest Isidorus, lib. de Differentiis spiritualibus, cap. 27, ubi etiam dicit initium boni operis semper esse ex gratia. Idem latius lib. 2 Sententiarum, cap. 5.

7. *Secundum Genus testimoniorum pro iisdem adversariis, probantium per vires arbitrii non nisi peccatum fieri.* — Ultimo, ne aliquis has Patrum sententias ad aliquod speciale genus boni limitare velit, ut hoc modo non omne opus bonum morale sub illis concludatur, addimus alias, in quibus expresse Patres exclu-

dunt omne opus morale ab illo genere operum, quæ a solo libero arbitrio sine gratia fieri possunt. Affirmant enim nihil nisi peccatum ab arbitrio humano suis viribus relicto fieri posse; ergo excludunt omne opus bonum, eujuscumque ordinis vel generis sit. Consequentia evidens est, quia nullum opus potest esse peccatum, et esse opus bonum eujuscumque generis vel ordinis. Nam bonum ex integra causa, et malum ex quocumque defectu: ergo si omne opus, solis viribus arbitrii factum, est peccatum, nullum opus bonum eujusvis ordinis, ab eo factum, solis viribus, sine auxilio gratiæ, potest esse bonum. Ergo e converso ad quodeumque bonum opus efficiendum indiget auxilio gratiæ.

8. *Ex Concilio Arausicano.*—Probatur ergo antecedens, primo, ex Concilio Arausico., c. 22, dicente: *Nemo habet de suo, nisi mendacium et peccatum.* Estque sententia 323 apud Prosperum, in libr. Sententiarum Augustini, et desumpta creditur, vel ex tract. 5 in Joan., ubi Augustinus ait: *Tunc ea quæ dicimus, et nobis et vobis utilia sunt, quando ab ipso Domino sunt. Quæ autem ab homine sunt, mendacia sunt. Sicut ipse Dominus dixit: Qui loquitur mendacium, de suo loquitur; nemo habet de suo, nisi mendacium et peccatum. Si quid autem homo habet veritatis atque justitiæ, ab illo fonte est, ad quem debemus sitire in hac eremo.* Vel ex prologo librorum de Doctrina Christiana in fine, ubi ait: *Nemo debet aliquid habere quasi suum proprium, nisi forte mendacium; nam esse verum ab illo est qui ait: Ego veritas.* Sic etiam dixit idem Augustinus in expositione Psalm. 142, in principio: *Rectus eris, quando quod male feceris, tibi, quod bene feceris, Deo imputaveris; et infra: Ad me enim cum respicio, nihil aliud mecum quam peccatum invenio.* Idem sermon. 43 de Verbis Apost., cap. 10: *Nisi ille regat, cadis, nisi ille regat, jaces;* et cap. 11, agens de adjutorio Dei, ait: *Prorsus si defuerit, nihil boni agere poteris. Agis quidem illo non adjuvante libera voluntate, sed male. Ad hoc idonea est voluntas tua, quæ vocatur libera, et male agendo fit damnabilis ancilla. Cum dico tibi: Sine adjutorio Dei nihil agis, nihil boni dico, nam ad male agendum habes sine adjutorio Dei liberam voluntatem;* et epistol. 89, quest. 2: *Valet liberum arbitrium ad opera bona, si divinitus adjuvetur. Desertum vero divino adjutorio, qualibet scientia legis excellat, nullo modo habebit justitiæ soliditatem, sed inflationem impiæ superbior.* Et Epistol. 106 improbat Pelagium, eo quod di-

ceret potestatem voluntatis aliquantum ad non peccandum valere. *Quod si ita est* (inquit), *nullus locus adjutorio gratiæ reservatur, sine qua nos dicimus ad non peccandum nihil voluntatis arbitrium valere.* Denique lib. 2 de Peccat. mer. et remiss., cap. 18, tradens adæquatam divisionem voluntatis in bonam et malam, dicit bonam semper esse Deo tribuendam, et solam malam propriæ libertati.

9. *Ex eodem Prospero.*—Eodem modo hanc rem explicarunt Prosper, dicta sentent. 323, et epistol. ad Ruffin., circa medium: *Multa laudabilia atque miranda possunt in homine reperiri, quæ sine charitatis medullis habent quidem pietatis similitudinem, sed non habent veritatem.* Et in fine, agens de libero arbitrio impiorum: *Quod, inquit, cum solum esset, sibi que permissum, non nisi in suam perniciem movebatur, ipsum enim se excæcaverat, et ipsum se illuminare non poterat. Nunc autem* (id est, post justificationem) *idem arbitrium conversum est, et non exersum, datumque est ei aliter sapere, aliter agere, etc.* Et ad 3 objectionem Gallorum, tantum duo genera operum distinguit, bonorum et malorum, et bona ad inspiratorem eorum Deum, mala ad eos qui peccant, dicit esse referenda. Similiter Fulgentius, dicto lib. de Incarnat. et Grat., c. 19: *Homo, quamdiu est peccati servus, non nisi ad serviendum peccato reperitur idoneus.* Et similiter Bernard., dicto serm. 4 de Annuntiat.: *Certum est, ait, ad suam originem universa, quantum in eis est, tendere, et in eam semper partem esse procliviora; sic et nos, qui de nihilo creati sumus, constat, quia si nobis ipsis relinquimur, in peccatum semper (quod nihil est) declinamus.*

10. Simili modo Anselmus, dicto libr. de Concordia, in 3 ejus parte, circa finem, voluntatem dixit sibi relictam semper operari ex affectu commodi, potius quam ex affectu justitiæ. Et quamvis ibi dicat affectionem commodi non esse semper malam, intelligit quidem ex specie sua esse indifferentem. Et ita in individuo, si non operetur aliquo modo ex affectu justitiæ, saltem ut imperante, vel ordinante affectum commodi, semper erit mala, quia juxta veriorum sententiam non datur opus perfecte humanum, et liberum indifferens in individuo, et præsertim secundum partitionem Augustini dicto lib. de Peccator. merit., c. 18. Unde etiam Maxentius supra, libero arbitrio sibi permissio sola opera carnalia tribuit, quibus solum opponit opera quæ ad vitam æternam pertinent, id est, quæ a gratia fiunt,

sentiens illa sola esse bona, nam certe carnalia et sæcularia opera non sunt bona. Præterea D. Gregor., lib. 22 Moral., cap. 10, alias 5, in fine, de sanctis viris sic loquitur: *Quidquid sibi mali inesse cogitant, de mortali propagine sentiunt meritum; quidquid vero in se boni inspiciunt, immortalis gratiæ agnoscunt donum*, etc. Nec inter hæc duo medium constituit. Richard. autem Victorin., tract. 1 de statu interioris hominis, p. 1, c. 33, tria genera operum distinguere videtur, scilicet, bonum, quod est ad meritum; et malum, quod est ad reatum; et aliud, quod neque est ad meritum, neque ad reatum, quod ipse vocat commodum, et posset etiam vocari indifferens. Et ita non videtur agnovisse bona opera moralia, quæ solo arbitrio fieri possint, nam ea quæ sunt ad meritum, expresse dicit non posse fieri sine gratia.

CAPUT XX.

PATRUM TESTIMONIA QUÆ OMNIA BONA OPERA GRATIÆ TRIBUUNT, EXPONUNTUR.

1. *Ad prædicta testimonia generalis responsio, quod solum contra Pelagium militent, a quo longe abest nostra sententia.* — Ut vero apertissime constet hæc omnia testimonia nihil nostræ, vel potius communi et antiquæ sententiæ officere, præ oculis habendum est illa omnia dicta esse contra Pelagium, ut ex dictis in proleg. 6, circa Conciliorum et Patrum testimonia, constat, et ex sequentibus fiet etiam manifestum. Ostensum autem a nobis est sententiam Theologorum, quod aliquod bonum opus morale fieri possit viribus liberi arbitrii sine gratia, nihil commercii habere cum errore Pelagii. Imo etiam monstravimus id fuisse a Pio V et Gregorio XIII virtute declaratum; dum enim propositiones Baii 23, 36 et alias, in quibus notam illam illi sententiæ inurere tentavit, omnino reprobantur, atque damnantur, satis clare significarunt neque sententiam, quam defendimus, ad Pelagium pertinere, neque sanctorum Patrum mentem fuisse aliquid contra eam docere. Et magna quidem ratione; nam cum, post illas Patrum sententias ac definitiones, ab scholasticis Doctoribus, sanctitate et sapientia insignibus, sententia illa communi fere consensu recepta, et tot sæculis ab Ecclesia non solum tolerata, sed etiam longe probabilior existimata fuerit, verisimile non est aut ad Pelagium accedere, aut a Patribus discordare. Hæc enim duo in

hac materia conjunctissima sunt; et ideo qui putant illa testimonia nostræ sententiæ esse contraria, consequenter putant nostram sententiam Pelagii errorem involvere, quod Pontifices saltem ut scandalosum et temerarium damnant. Et e converso, quam certum est nostram sententiam esse omnino tutam, et ab illo errore liberam, tam est certum illa testimonia frustra contra eam coacervari.

2. *Ad testimonia primi generis superiori capite a n. 2 adducta, responsio D. Thomæ.* — Ad priorem ergo partem testimoniorum, paucis quidem verbis respondet D. Thomas, quæst. 24 de Veritate, art. 14, ad argumenta secundo loco proposita, dicens: *Ad ea quæ sunt in contrarium, patet solutio, quia vel procedunt de bono meritorio, vel ostendunt quod sine operatione Dei homo nullum bonum facere potest.* Quæ verba duas repositiones continent, vel unam bimbrem; nam testimonia illa vel loquuntur de opere bono generaliter, et sine ulla determinatione seu limitatione, et sic non possunt omnia intelligi de gratia proprie dicta, nec de Deo auctore gratiæ, sed abstracte etiam et generatim: quia omne opus bonum in Deum tanquam in principalem auctorem, provisorem et cooperatorem refundi debet, sed non omne opus bonum eodem modo. Nam si bonum opus sit pure ac præcise ordinis naturalis, est a Deo ut auctore naturæ, et ab ejus gratuita providentia et influentia, et ita est a gratia generatim seu large dicta, hoc est (ut Sancti loquuntur), a gratia condente, non a gratia salvante. Si vero opus bonum sit altioris ordinis, seu attingat aliquo modo finem supernaturalem, vel ab ipsomet operante ad illum ordinetur, tunc non fit sine proprio auxilio gratiæ salvantis, proceditque a Deo, ut auctore principali gratiæ, et a Christo, ut redemptore vel justificatore.

3. *Quæ licet in se vera, non tamen omnibus testimoniis satisfacit.* — *Responsionis D. Thom. pars restrictior eligitur, quod prædicta testimonia procedant de opere modo aliquo supernaturali.* — Quæ doctrina verissima est, quam aliis etiam locis insinuavit D. Thomas, ut Joann. 15, lect. 1, et 1. 2, quæstione 109, articulo 1, ad 1, et in 2, distinct. 28. Ut tamen notavit Conrad. 1. 2, quæstione 107, articulo secundo, circa argumentum *Sed contra*, non potest hæc responsio ad omnia testimonia accommodari, quia licet nonnulla possint abstracte et generatim intelligi de divina influentia, præscindendo a naturali vel gratuita, et a gratia proprie vel large sumpta; nihilominus in multis

clarum est sermonem esse de gratia propria, et salvante seu auxiliante per Christum. Imo frequentius ac fere semper loquuntur Patres de proprio influxu et auxilio gratiæ in locis citatis, ut attingendo singula statim patebit. Ideoque Doctores communiter aliam partem responsionis D. Thomæ secuti sunt, ut Sancti in locis allegatis, non de quocumque actu bono, sed cum aliqua determinatione restringente actum ad habentem vel participantem aliquo modo bonitatem supernaturalem, locuti sint. Ita Cajetan., dicta quæstione 109, artic. 2, dub. 3, et ibid. Conrad.; Soto lib. de Natur. et Grat., capite 21; Veg., opuseul. de Justification., quæst. 12; Ruard., articul. 7 de Justification., § *Et quia articulus*; Roffen., articulo 36, § *Augustinus plane*; et Osius in Confess., capit. 73, parum a princ.; Dried., libr. 1 de Grat. et liber. arbitr., tract. 2, capit. 2, part. 2, in principio; Stapleton, libr. 2 de Corrupt. naturæ, capit. 12 et 13. At vero isti auctores variis modis explicant limitationem hanc vel quasi specificationem bonorum actuum, de quibus Sancti loquuntur, cum gratiæ auxilium ad illos efficiendos requirunt; et non omnes possunt ad omnia testimonia applicari, nisi vel ad eundem sensum reducantur, vel non singuli modi ad omnia testimonia applicentur, nam id fieri non poterit, sed singula singulis juxta illorum exigentiam. Quod breviter ostendemus per singula verba Doctorum discurrendo.

4. *Modum illum supernaturalem explicant aliqui ut sit opus meritorium. Suadetur explicatio.*— Primus ergo modus explicandi dicta testimonia, est ut loquatur de opere meritorio. Ita D. Thomas locis citatis, quem sequuntur Conrad. et alii moderni expositores, et Stapleton., dicto capit. 10, ex parte; Almain., tractat. 1 Moral., capite 16, in fine; et Torren. in Confess. August., lib. 2, cap. 3, § 10. Potestque sumi ex Cœlestino Papa, epistol. ad Episcop. Galliæ, capite octavo, dicente: *Quod omnia studia et omne opera ac merita Sanctorum ad Dei gloriam laudemque referenda sunt, quia nemo aliunde ei placet, nisi ex eo quod ipse donaverit.* In qua sententia aperte sermo est de operibus quæ ita Deo placent, ut sint etiam sancta merita. Et id illius probationem inducitur altera sententia Zolimi Papæ in epistola ad totum orbi Episcopos: *Nos autem instinctu Dei omnia enim bona ad auctorem suum referenda sunt, unde nascuntur) ad Fratrum et Coepiscoporum nostrorum conscientias universa retulimus.* Quæ verba Patres Africani

venerati sunt valde, et ideo sic dicta fuisse intellexerunt, ut ibidem refertur, *quia preparatur voluntas a Domino, et ut boni aliquid agant, paternis inspirationibus suorum ipse tangit corda fidelium,* ubi aperte loquuntur Patres Africani de operibus procedentibus a fide, et a gratia interna superioris ordinis, quam iidem Patres vocant *subministrationem Spiritus, et occultam misericordiam,* epist. 95 ad Innocent.

5. *Suadetur amplius.*— Unde subjungunt in priori loco probationem ex illo Roman. 8: *Quotquot spiritu Dei aguntur, hi sunt filii Dei. Ut nec nostrum (aiunt) deesse sentiamus arbitrium, et in bonis quibusque voluntatis humanæ singulis motibus magis illius valere non dubitemus auxilium.* In qua verborum serie imprimis manifestum est, in illorum fine vocari absolute bonos voluntatis motus, qui in principio dicti fuerunt bona studia, et merita Sanctorum, ad quæ *Deus preparat voluntates suorum tangendo corda fidelium.* Deinde pondero particulam illam *Fidelium,* quia per illam indicatur tantum de illorum bonis operibus similes sententias esse intelligendas. Non quia in infidelibus nulla possint esse bona opera, sed quia non sunt in illis bona merita. Quod apertius explicatur in eadem epistola Cœlestini, c. 12, his verbis: *His Ecclesiasticis regulis, et ex divina sumptis auctoritate documentis, ita adjuvante Domino confirmati sumus, ut omnium bonorum affectuum, atque operum, et omnium studiorum, omniumque virtutum, quibus ab initio fidei ad Deum tenditur, Deum fateamur auctorem.* In quibus verbis supponitur quidem, etiam ante initium fidei posse esse aliquos bonos voluntatis affectus et opera, alias non fuisset necessaria illa restrictio *ab initio fidei,* et nihilominus de his quæ sunt ab initio fidei, dicitur Deus speciali modo auctor, utique ut est auctor gratiæ et donorum supernaturalium. Quia videlicet illi tantum boni affectus et opera, quæ sunt ab initio fidei, sunt meritoria. Unde subjungitur: *Et non dubitemus ab ipsius gratia omnia hominis merita proveniri, per quam fit ut aliquid boni, et velle incipiamus et facere.* Ubi etiam constat idem vocari simpliciter bonum, quod vocatum fuerat meritum.

6. *De quo merito intelligatur dicta explicatio.*— *Qui restringant ad meritum de condigno.*— *Id probari videtur ex Augustino.*— Hæc autem interpretatio intelligi potest, vel de rigoroso merito de condigno, vel generatim de quovis merito perfecto vel imperfecto, seu de congruo

aut impetratorio, dummodo sit verum meritum alienjus gratiæ vel doni supernaturalis. Aliqui ergo restringunt illas locutiones ad prius rigorosum meritum. Pro qua sententia allegari possunt, qui dicunt Sanctos non appellare simpliciter bona merita, nisi illa quæ ex charitate fiunt, quia opus bonum sine charitate mortuum est, et ideo nihil reputatur, juxta modum loquendi Pauli 1 Corinth. 13. Et ideo, quando Sancti loquuntur de operibus bonis, quæ fieri non possunt sine gratia, illa intelligunt quæ in charitate fiunt, ac subinde sunt propriissime meritoria. Quod sentiunt Almain. et Torrens. supra, et pro eadem sententia citatur Soto supra ad 2; sed ibi agit de victoria tentationum, de qua postea videbimus, neque idem sentit de quolibet bono opere, ut constat ex solut. ad 3. Potest tamen illa interpretatio confirmari ex Augustino, lib. 2 contra duas Epistolas Pelagian.; nam cap. 8 dicit, ad incipiendum opus bonum et ipsam boni cupiditatem, opus Dei esse necessarium, quoniam si boni cupiditas inciperet sine gratia, illa esset meritum gratiæ, et sic gratia non esset gratia. Et tamen addit cap. 9: *Quid est boni cupiditas, nisi charitas?* Ergo loquitur de merito perfecto in charitate.

7. *Item ex eodem Augustino in locis aliis.*—Præterea, lib. de Grat. et liber. arbitr., cum cap. 7 multa de charitate magna et parva dixisset, addit in 18: *Hæc omnia præcepta dilectionis, id est, charitatis, quæ tanta et talia sunt, ut quidquid se putaverit homo facere bene, si fiat sine charitate, nullo modo fiat bene.* Et ideo ait non posse bene fieri sine gratia, quia *charitas ex Deo est, et quia Deus præparat voluntatem, etc.*, ut capit. 17 latius dixerat. Item epistola 106, in princip., cum dixisset: *Opera ex gratia, non ex operibus gratia*, rationem adjungit: *Quoniam fides, quæ per dilectionem operatur, nihil operaretur, nisi ipsa dilectio Dei diffunderetur in cordibus nostris per Spiritum Sanctum, qui datus est nobis. Nec ipsa fides esset in nobis, nisi Deus unicuique partiretur mensuram fidei.* Quæ ratio supponit bona opera supponere fidem per charitatem operantem; unde inferius adjungit: *Si quis dixerit quod gratiam bene operandi fides mereatur, negare non possumus; imo vero gratissime confitemur. Hanc enim fidem volumus habeant, qua impetrent charitatem, quæ sola vere bene operatur.* Et serm. 13 de Verb. Apost., cap. 5, ait charitatem nobis dari, ut possimus bonam operationem habere.

8. *Atque ex ejus asseclis Prospero et Ful-*

gentio.—Unde Prosper et Fulgent. per omnia Augustiniani, ita etiam videntur bonum opus explicare. Prosper enim, epistol. ad Ruffin., circa medium, tractans locum Pauli 1 Corinth. 13, ubi scientiam, studia et labores sine charitate nihil prodesse testatur, adjungit rationem: *Quia multa laudabilia, atque miranda possunt in homine reperiri, quæ sine charitatis medullis habent quidem pietatis similitudinem, sed non habent veritatem.* Et contra Collator., cap. 22: *Quasi ullus sit (inquit) bonæ voluntatis motus, nisi quem creaverit diffuse per Spiritum Sanctum charitatis afflatus.* Fulgentius vero, libr. de Incarnat. et Gratia, cap. 26, in eadem sententiam sic inquit: *Quod si quibusdam cognoscentibus Deum, nec tamen sicut Deum glorificantibus, cognitio illa nihil profuit ad salutem, quomodo hi poterunt justi esse apud Deum, qui sic in suis moribus atque operibus bonitatis aliquid servant, ut hoc ad finem Christianæ fidei charitatisque non referant? Quibus aliqua quidem bona, quæ ad societatis humanæ pertinent æquitatem, inesse possunt; sed quia non charitate Dei fiunt, prodesse non possunt.* Potest denique hæc interpretatio fundari in illa Theologica et Augustiniana doctrina, quod charitas est forma omnium virtutum, et quod sine charitate nulla est vera virtus, ut in ep. 52 late Augustinus ostendit, nam in eodem sensu, et in eodem locutionis genere, sine motionem vel aliquo influxu charitas nullus est actus veræ virtutis, et consequenter neque est simpliciter bonum. Ergo cum Patres dicunt ad bona opera requiri gratiam, recte de opere simpliciter bono, id est, charitate formato, ac subinde meritorio de condigno intelligi possunt.

9. *Prædicta explicatio de opere bono, id est, meritorio de condigno, non quadrat omnibus testimoniis.*—At vero licet hæc interpretatio ad aliqua loca sanctorum Patrum accommodari possit, ut ea quæ allegavimus convincere videntur; nihilominus in omnia testimonia superius adducta nullo modo convenire potest. Quia evidens est, cum Augustinus et alii Patres dicunt esse gratiam necessariam ad omnia opera, non semper loqui de gratia habituali seu santificante, nec de gratia dilectionis Dei super omnia, sed absolute de auxilio gratiæ, quod non solum ordine naturæ, sed etiam tempore potest præcedere charitatem. Sic enim Concilium Arausicanum definit, ad voluntatem credendi esse necessarium gratiæ auxilium, et Tridentinum, sess. 6, cap. 3, dixit sine auxilio non posse fieri actus, qui sunt dispositiones ad gratiam justificationis, utique habitualem. Et

Augustinus sæpissime probat initium fidei et salutis esse ex inspiratione Spiritus Sancti, cum tamen certum sit initium fidei, et voluntatem credendi posse tempore præcedere charitatem. Præterea non solum docent Patres contra Semipelagianos, non posse hominem solis viribus liberi arbitrii mereri de condigno primam gratiam, sed etiam nec de congruo, nec merito impetratorio; ergo cum dicunt nullum opus bonum fieri posse sine gratia, non possunt loqui semper de solo bono opere meritorio de condigno, alias ex vi talium definitionum posset præcedere sine gratia opus meritorium primæ gratiæ saltem de congruo, quod quam sit falsum inferius videbimus. Denique, juxta illam interpretationem, non esset definitum, ad omnes actus bonos, qui justificationem et infusionem charitatis præcedunt, esse necessarium gratiæ auxilium, quod esse falsum per se notum est. Ut ergo verum sit Patres tractantes de necessitate gratiæ ad actus bonos, interdum specialiter loqui de actibus bonis ex charitate, vel in charitate factis, ut Pelagium, dicentem simpliciter omnes actus justitiæ posse fieri solis viribus liberi arbitrii, ex re clariori evidentius convincant; nihilominus dici nullo modo potest generaliter de illis solis actibus loqui Patres ubicumque ad bene operandum gratiam exigunt, ac defendunt, ac subinde per bonum opus non possumus universe interpretari opus meritorium de condigno.

10. *Vera intelligentia Patrum de quovis merito, modo sit ex auxilio supernaturali.* — Alio ergo modo intelligenda est illa sententia divi Thomæ et communis, de opere meritorio abstracte, sive de condigno, sive impetratorio, sive de congruo, sive quovis alio nomine vocetur, dummodo sit meritum alicujus auxilii, seu doni supernaturalis, quod per modum præmii aliquo modo debiti propter tale opus conferatur. Et hoc modo est illa expositio verissima, et valde consentanea locutionibus Sanctorum. Nam, ut vidimus in multis locis, includunt sub illis operibus quæcumque perfecta merita ex charitate facta. Deinde in aliis multis explicant se loqui de bonis operibus quæ ex fide fiunt, vel sunt initium ipsius fidei, et ipsamnet fides. Hoc constat primo ex verbis allegatis ultimo loco ex Epistola Cœlestini, ibi, *Ab initio fidei*, quod inclusive intelligendum est quoad ipsum fidei initium, ut ex re ipsa et ex aliis locis constat. Virtute autem excludit quicquid antecedit illud initium; quia non sine causa restringit sermonem ad opera facta ab initio fidei; et hanc fuisse mentem Augustini,

quamvis sufficienter probetur eodem testimonio Cœlestini, quod Prosperi etiam esse multi censent, qui Prosper optime intellectam habuit Augustini mentem, ostendi etiam potest ex variis Augustini locis.

11. *Probatur ex D. Augustini locis.* — Primo, ex quæstione secunda ad Simplicium, in principio, ubi ait Paulum præferre fidem operibus: *Non ut opera extinguat, sed ut ostendat non esse opera præcedentia gratiam, sed consequentia.* Quomodo autem opera gratiam consequantur explicans, addit: *Ut, scilicet, non se quis arbitretur ideo percepisse gratiam, quia bene operatus est, sed bene operari non posse, nisi per fidem perceperit gratiam.* Ecce illud intelligit esse bene operari, quod est ex fide; et infra dicit: *Cornelium jam credidisse, cum se dignum majori rocatione eleemosynis et orationibus præbebat;* et infra: *Neminem posse bene operari, nisi justificatus ex fide,* quod intelligo de justificatione saltem inchoata: unde infra dicit: *Nisi vocando præcedat misericordia Dei, nec credere quisquam potest, ut ex hoc incipiat justificari, et accipiat facultatem bene operandi;* unde concludit: *Ergo ante omne meritum est gratia,* ubi et *facultatem bene operandi,* fidem ipsam appellare videtur, et quod prius vocaverat *bene operari,* postea vocat *meritum;* et inferius addit: *Unde admonemur nec ipsis operibus misericordie quemquam oportere gloriari, et extolli, quod eis quasi suis Deum promeruerit, quandoquidem ipsam misericordiam ille præstitit, qui misericordiam præstabit, cui misericors fuerit.* Ut autem declaret se loqui de misericordia ex fide operantis, subjungit: *Quod si eam (id est, misericordiam) credendo se meruisse quis jactitat, noverit eum sibi præstitisse, ut crederet, qui miseretur inspirando fidem.* Hinc etiam lib. de Spirit. et Litter., capit. 33, tractans verba Pauli ad Ephes. 2: *Deus qui operatur in vobis velle et operari,* dicit: *Hæc gratia jam est quam fides impetrat, ut possint esse hominis opera bona;* addit tamen, *quæ per dilectionem operatur,* sed subintelligi debet, *illa maxime;* et infra subjungit: *Quisquis crediderit, habebit ex ejus gratia opera bona, ex quibus bonis æternis satietur.* Hæc enim sunt formalia verba Augustini, licet, brevitatis causa, multa intermedia ommissa sunt, quæ sensum non mutant.

12. *Loca alia.* — Præterea, lib. 15 de Civit., cap. 20, ait non esse opus bonum *nisi quod procedit ex fide summi Dei,* quod necesse est intelligi de opere meritorio, ne omnia opera infidelium putentur esse peccata, ut supra

dictum est. Et similem doctrinam habet lib. de Continent., cap. 12, unde in Epistol. 107, prius dicit, dæmonem, quos ex gentibus decipere amplius affectat, aliqua velut opera bona de quibus laudentur habere sinere, omnibus autem modis curare, ut non credant, ne per talia opera, vel Deo placeant, vel ad Salvatorem valeant pervenire. Ubi opera antecedentia fidem non appellat simpliciter bona, non quia mala sint, ut supra vidimus, sed quia ad meritum coram Deo nihil valent; ergo e converso bona opera appellat, quæ possunt habere aliquod meritum saltem ex fide. Unde paulo inferius subjungit: *Quapropter, ut Deum credamus, et pie vivamus, non est volentis, neque currentis, sed Dei miserentis*, utique vocando homines ad fidem, ut statim exponit, et in fine Epistolæ concludit: *Hæc et alia testimonia divina, quæ commemorare longum est, ostendunt Deum gratia sua auferre infidelibus cor lapideum, et prævenire in hominibus bonarum merita voluntatum*. Ubi quod sæpe dixerat de necessitate gratiæ ad singula bona opera explicat per *bonarum merita voluntatum*, quæ a fide incipiunt, et ideo dicit ad hunc effectum auferre Deum infidelibus cor lapideum; et in fine de Pelagianis ait: *Illi quippe omnia ad fidelem piamque vitam hominum pertinentia ita tribuunt libero voluntatis arbitrio, ut habenda ex nobis, non a Domino putent esse poscenda*. Ergo in contrario sensu dicunt Patres fidelia (ut sic dicam) et pia opera ex gratia esse. Et statim addit de Vitali, ad quem scripsit: *Tu autem (si ea quæ de te audio vera sunt) initium fidei, ubi est etiam initium bonæ piæque voluntatis, non vis donum esse Dei*. Ecce clare vocat bonam voluntatem, illam quæ ab initio fidei incipit, nam de illa erat controversia cum Semipelagianis, nam de aliis religiosæ vitæ operibus, quæ procedunt ex fide, jam illi fatebantur esse ex gratia, ut ibidem adjungit.

13. *Item loca alia*. — Simili modo idem Augustinus, in toto libr. de Prædestin. Sanctor., in eodem sensu de bonis operibus loquitur. Cum enim in illo libro præcipue intendat contra Semipelagianos ostendere initium salutis aut fidei non esse ex nobis, reducit omne meritum ad fidem tanquam ad fundamentum, et ostendit nec fidem nec fidei initium, quod est sancta et supernaturalis cogitatio, esse in nobis, nisi ex dono Dei, et ita concludit nullum meritum apud Deum esse in nobis, nisi ex præveniente et adiuvante gratia, et ex eodem principio infert nullum bonum opus esse in nobis nisi ex gratia, quæ illatio non

esset bona, nisi per bonum opus intelligeret illud quod etiam est bonum meritum apud Deum. Quod verbis satis expressis ipse in cap. 2 declaravit, dicens: *Quod ergo pertinet ad Religionem atque pietatem, de qua loquebatur Apostolus, si non sumus idonei cogitare aliquid, quasi ex nobismetipsis, sed sufficientia nostra ex Deo est, profecto non sumus idonei credere aliquid quasi ex nobismetipsis*. Et inde concludit in omni opere bono, et incipiendo, et perficiendo, sufficientiam nostram ex Deo esse; et in cap. 7 addit ideo justificari hominem ex fide, et non ex operibus, *quæ ipsa prima datur, ex qua impetrentur cætera, quæ proprie opera nuncupantur, in quibus justus vivitur*, justitia utique supernaturali et divina, hæc enim est quæ in fide fundatur. Sic etiam dixit de Bono persever., cap. 13: *Quod attinet ad pietatis viam et rerum Dei cultum, non sumus idonei cogitare aliquid tanquam ex nobismetipsis, sed sufficientia nostra ex Deo est*. Et cum eadem proportionem loquitur de operibus bonis, quia *cogitantes* (inquit) *credimus, cogitantes loquimur, cogitantes agimus*. Ergo per bona opera intelligit illa quæ ad pietatis viam verumque Dei cultum spectant, quæ etiam sunt bona merita.

14. *Item alia ex eodem*. — Eodemque fere discursu utitur libr. de Grat. et liber. arbitr., cap. 7, ubi primum supponit bona merita esse Dei dona, hoc autem probat fere hoc modo, quia bona merita sunt bona opera, quæ non essent bona, nisi illa præcessissent cogitationes bonæ, de quibus ait Apostolus: *Non sumus sufficientes cogitare aliquid ex nobis*, etc. Ergo per bona opera intelligit illa quæ in supernaturalibus cogitationibus fundantur, et ideo sunt bona merita; de quibus infra, in eodem capite, dicit Paulum *dixisse: Non ex operibus, non quia evacuavit opera bona, sed quia opera sunt ex fide, non ex operibus fides, ac proinde ab illo sunt nobis opera justitiæ, a quo est fides, quia justus ex fide vivit*. Ergo apud Augustinum, cum agit de necessitate gratiæ, idem sunt bona opera quod bona merita apud Deum, et ideo etiam sæpe illa vocat opera pietatis et opera justitiæ, quas particulas sæpe addit ad suam mentem declarandam. Ut, præter citata loca, videre licet in eodem libro de Gratia et liber. arbitr., cap. 17, ibi: *Sine illo vel operante, ut velimus, vel cooperante, cum volumus, ad bona pietatis opera nihil valemus*. Et lib. 2 contra duas Epistol. Pelagianor., cap. 5, dicens liberum arbitrium hominis lapsi *ad bene pieque vivendum non valere*; et

libr. de Gratia Christi, cap. 26 : *Gratiam Dei sic confiteatur, qui vult veraciter confiteri, ut omnino nihil boni sine illa, quod ad pietatem pertinet, veramque justitiam, fieri posse non dubitet.* Et similia fere verba habet epistol. 106.

15. *Accedunt denique alia non vulgaria. — Opus bonum simpliciter, secundum Augustinum, est quod ex fide procedit.* — Unde quia omne meritum apud Deum, ex sententia Augustini, fundatur in fide, ut cap. 14, versus finem, probatum est, et latius in sequentibus dicetur, ideo solum illud opus bonum, quod ex fide procedit, solet ab Augustino bonum simpliciter vocari, de quo multa supra diximus, tractando de operibus infidelium. Et eadem ratione, serm. 13 de verbis Apostol., cap. 12, ait, cum dixit Christus *sine me nihil potestis facere*, locutum esse de bonis operibus, id est, *de sarmentorum et palmitum fructibus*, id est, de operibus in Christo factis, et fructuosis ad vitam æternam. Idemque habet de Spirit. et litter., cap. 29, dicens : *Deus operatur in homine per fidem Jesu Christi, qui finis est ad justitiam omni credenti*, id est, *per spiritum incorporatus factusque membrum ejus, potest quisque illo incrementum intrinsecus dante operari justitiam, de cujus operibus etiam ipse dixit. Sine me nihil potestis facere.* Denique disertis verbis hoc explicat l. 4 contra Julian., c. 3, in fine ; nam cum ille diceret opera bona fieri ab infidelibus, licet sine fructu vitæ æternæ, ipse ad illum sic loquitur : *Quoniam saltem concedis opera infidelium, quæ tibi eorum videntur bona, non tamen eos ad salutem sempiternam regnumque perducere ; scito nos illud bonum hominum dicere, illam voluntatem bonam, illud opus bonum, sine Dei gratia quæ datur per mediatorem Dei et hominum, nemini posse conferri, per quod solum homo potest ad æternum Dei donum regnumque perducere.*

16. *Ita Augustinum commentati sunt Prosper et Fulgentius.* — Eodem modo Augustinum intellexerunt, et sententiam suam explicarunt Prosper et Fulgentius ; ille enim ad capitula Gallorum, respons. 8, sic inquit : *Cum duceatis quatuordecim Sacerdotibus, quorum constitutionem contra inimicos gratiæ Dei totus mundus amplexus est, veraci professione quemadmodam ipsorum habet sermo dicimus gratiam Dei per Jesum Christum Dominum, non solum ad cognoscendam, verum etiam ad faciendam justitiam nos per actus singulos adjurare, ita ut nihil sanctior, veroque pietatis sine illa habere, cogitare, aut agere valeamus ;*

ubi non solum dictam limitationem expresse adhibet, et optime explicat, sed etiam ab Africanis Patribus ita fuisse declaratam illam sententiam, significat. Fulgentius vero, libr. de Incarnat. et Gratia, cap. 19, apertius hoc explicat, dicens : *Quod libertas (utique a peccato) quæ non ex humano arbitrio nascitur, sed gratuita Dei miseratione confertur, a bona voluntate sumit exordium, et per fructum sanctificationis in vita æterna plenum sui sortitur effectum ;* ubi aperte declarat per bonam voluntatem intelligi illam quæ ad sanctificationem aliquo modo confert, et de hujus bonæ voluntatis exordio, c. 16, locutus fuerat : et similiter, in c. 21, in eodem sensu dixit *neminem sine gratia aliquid boni velle, quod pertinet ad vitam æternam.* Quod etiam Augustinus dixerat epist. 47, scilicet, neminem debere tantum tribuere libero arbitrio, ut sine gratia Dei valeat aliquid facere, *ut ad bonum sempiternum perveniat.* Nam illud opus dicitur valere ad vitam æternam, seu bonum sempiternum, quod vel illud præmium potest immediate mereri, vel saltem mediate, utique merendo vel impetrando alia media, quibus ad illam vitam pervenitur, ut Fulgentius dicto cap. 19 exposuit.

17. *Assentitur Petrus Diaconus.* — Atque eodem modo dixit Petrus Diaconus, lib. de Incarn. et Grat., c. 6, dicens : *Per gratiam dari homini ea cogitare et desiderare quæ pertinent ad vitam æternam ;* et addit : *Sine hac igitur gratia potest quidem cogitare et desiderare humana, non autem potest cogitare aut velle seu desiderare divina.* Omnia enim quæ ad vitam æternam prosunt, merito divina vocantur ; opera autem moralia, etiamsi honesta sint, si ad æternam vitam nec ordinantur nec prosunt, inter bona mere humana merito computantur : et similiter in c. 7 loquitur de *bono velle, quod pertinet ad vitam æternam ;* et c. 8, ad idem adducit verba supra citata ex Coelestino Papa de Bonis meritis, quæ ipse per errorem confundit cum verbis Innocentii in epist. ad Concilium Milevitanum. In eodem præterea sensu dixit Anselm., lib. de Concordia, p. 3 : *Liberum arbitrium naturale sine adjutorio gratiæ nihil valet ad salutem ;* et paulo inferius : *Corda, inquit, humana sine doctrina, sine studio, sponte quasi germinant cogitationes et voluntates, nihil utiles saluti aut etiam noxias ; illas vero sine quibus ad salutem animæ non proficimus nequaquam sine generis sui semine, et laboriosa cultura concipiunt et germinant ;* et de his infra intelligit illud : *Neque qui pluntur est aliquid,*

neque qui rigat, sed qui incrementum dat Deus. Quibus addi potest Isidor., l. 2 Sentent., c. 3, ubi cum dixisset : *Omnia bona a Deo nobis gratia proveniente donantur*, statim reddit rationem : *Nam nihil boni operis dedimus, per quod confessionem fidei mereremur* ; ubi aperte loquitur de opere meritorio, et illud simpliciter vocat bonum opus, et inde probat non posse antecedere fidem, quia non potest esse meritum ejus, et hoc est initium boni operis, quod negaverat esse posse sine gratia in libro secundo Differentiarum, c. 32 ; nam inferius in 33 dicit *bona opera inchoari ex fide*, quia ante fidem nihil potest homo operari, quod pertineat ad salutem.

18. *Probatur deinde dicta vera intelligentia ex Conciliis memoratis.* — Deinde, quod maxime considerandum est, hanc limitationem addiderunt, et addendo approbaverunt sacra Concilia. Arausicanum, can. 7 : *Si quis per naturæ vigorem bonum aliquid, quod ad salutem pertinet vitæ æternæ, cogitare ut expedit, aut eligere, etc.* Ubi duplicem limitationem adhibet, una est, ut bonum cogitandum vel faciendum ad salutem pertineat vitæ æternæ, alia est ut tale bonum cogitetur, eligatur, aut fiat, *ut expedit*, id est, propter illum finem, et modo illi consentaneo. Et ad tale bonum requirit Concilium *illuminationem et inspirationem Spiritus Sancti* : quæ verba nec significant impulsam determinantem voluntatem, neque naturalem cogitationem, sed altiore internam gratiam, ut supra tactum est, et infra tractando de auxiliis latius ostendetur : et in eodem sensu addiderat idem Concilium, in can. 6, particulam illam : *Sicut oportet*, et in cap. 23 ita inquit : *Ut nullus aut diligere Deum sicut oportet, aut credere in Deum, aut operari propter Deum, quod bonum est, possit, nisi gratia ei et divina misericordia prævenierit* ; et in omnibus his locis juxta hunc sensum explicat omnia testimonia divinæ Scripturæ. Constat autem ex dictis nihil aliud per illas particulas voluisse Concilium Arausicanum, nisi limitare prædictam sententiam, juxta sensum ab Augustino explicatum. Unde Concil. Tridentin., session. 6, canon. 3, addendo illam particulam *sicut oportet*, totam doctrinam et explicationem Concilii Arausicani complexum est : et ideo can. 2 solum definit gratiæ auxilium non solum esse necessarium ut homo facilius possit juste vivere, et vitam æternam promereri, sed simpliciter ut possit, nam sub *justa vita*, et *merito vitæ æternæ*, includit omne bonum opus meri-

torium aliquo modo spiritualis gratiæ. His addendum est Concilium Moguntinum sub Sebastiano, in Decretis fidei, capit. 5, ubi de hominibus lapsis dicit : *Per libertatem arbitrii (quæ exigua et infirma in his residet) nondum adjuti gratia Dei, ea quæ sunt Spiritus, et ad salutem conferunt, nec agnoscere, nedum appetere queunt.*

19. *Adversariorum evasio tripartita.* — Ad hæc tandem omnia dicunt contrariæ sententiæ defensores, omnia opera moralia esse opera pietatis, quia hæc ratione opera misericordiæ vocantur communiter pietatis opera, ut tradit Augustin. 10 de Civit., cap. 1, et ideo serm. 43 ad Fratres in eremo, sub nomine pietatis omnes virtutes morales enumerando, quinque pietatis gradus complectitur. Item dicunt omnia opera bona moraliter esse meritoria, quia hæc est proprietas intrinsece annexa bonitati morali ; et esse meritoria apud Deum, quia sunt illi placita, non enim potest non placere illi quod honestum est ; et ad illum pertinet, unicuique reddere secundum opera sua. Unde etiam dicunt hæc opera conferre ad salutem æternam, vel per se, propter rationem proxime factam, vel saltem per accidens, removendo peccata, quia saltem dum fiunt, impediunt ne homo peccet, quod aliqua est utilitas ad salutem, et ideo Job 28 dicitur, recedere a malo, pertinere ad sapientiam, seu intelligentiam.

20. *Excluditur prima evasio, ex Augustino.* — Respondetur Patres, in citatis locis, cum loquuntur de operibus pietatis et veræ religionis, loqui de Religione Christiana, seu de pietate, quæ a fide divina et supernaturali sumit initium, ut manifeste patet ex illis verbis Augustini in epist. 107 : *Quapropter ut in Deum credamus, et pie vivamus, non est volentis, etc.* ; et illis : *Omnia ad fidelem piamque vitam pertinentia* ; et evidentius ex illis : *Initium fidei, ubi est etiam initium bonæ piæque voluntatis* ; item ex verbis ejusdem in dict. c. 2 de Prædest. Sanctor. : *Fides, unde pietas exordium sumit, donum Dei est, etc.* Quocirca licet opera misericordiæ soleant more vulgi opera pietatis appellari, quia specialiter a Deo commendantur, ut August., dict. c. 1, l. 10 de Civit., dicit, nihilominus propria ratio pietatis consistit in vero cultu Dei, ut idem Augustinus tradit l. 12 de Trinit., c. 14, et l. 14, c. 1 ; et lib. 4 de Civit., cap. 23, et l. 5, c. 13 et 20 ; et ideo in eodem lib. 10, c. 6, dicit ipsam misericordiam, quæ hominibus præstat, si propter Deum non fit, non esse sacrificium : et quamvis non negemus posse dari

aliquam pietatem naturalem et honestam ad verum Deum, ut auctorem naturæ, nihilominus Augustinus, et cæteri Patres loquentes ad fideles et instruentes illos in ordine ad finem supernaturalem, illam vocant simpliciter pietatem ad Deum, quæ in fide fundatur, ut patet ex eodem Augustino, epist. 29, et lib. 2 de Civit., c. 39, et aliis locis allegatis.

21. *Duobus aliis locis Augustini firmatur.* — Et in præsentī materia, evidentius constat Patres et Concilia in hoc sensu loqui de operibus pietatis, quæ propterea etiam vocant opera justitiæ, quæ in fide fundantur. Ad quod ostendendum possent multa ex Augustino adduci, duo vero tantum loca indicabo; unus est libr. de Spir. et litter., cap. 28, ubi, cum de Gentilibus et Judæis dixisset: *Nam et ipsi homines erant, et vis illa naturæ inerat eis, qua legitimum aliquid anima rationalis et sentit et facit;* subjungit: *Sed pietas, quæ in aliam vitam transfert beatam et æternam, legem habet immaculatam convertentem animas, ut ex illo lumine renorentur, fiatque in eis: Signatum est super nos lumen vultus tui, Domine;* in quibus verbis pietatem seu piam vitam distinguit ab operatione quæ ex vi luminis et rationis naturalis legitime fieri potest, in hoc quod per pietatem pervenitur ad beatitudinem et vitam æternam, ad quam lex sola naturæ perducere non potest. Alter et optimus locus est epistol. 130, ubi loquens de quodam Polemone gentili, qui ex luxurioso fuerat continens factus, non dimissa gentilica superstitione, inquit: *Polemo ergo, si, ex luxurioso continens factus, ita sciret cujus esset hoc donum, ut eum abjectis superstitionibus gentium pie coleret, non solum continens, sed etiam veraciter sapiens, et salubriter religiosus existeret, quod ei non tantum ad præsentis vite honestatem, verum et ad futuræ immortalitatem valeret.* In quibus verbis aperte distinguit continentiam quæ potest esse in homine gentili, ab illa quæ cum vera pietate et religione potest esse conjuncta, et priorem dicit tantum valere ad honestatem hujus vitæ, posteriorem vero etiam ad æternam vitam; hæc ergo est sine dubio mens Augustini. Sermo autem 45 ad Fratres, etc., non creditur esse Augustini, et nihilominus potest exponi, quod latiori modo de pietate locutus sit: præterquam quod omnes illi modi pietatis, qui ibi numerantur, intelligi possunt de similibus actibus Christiano modo factis, et in fide fundatis.

22. *Excluditur secunda evasio.* — Ad secundam partem, respondetur actum bonum mo-

raliter mere naturalem placere quidem Deo auctori naturæ, sicut illi placent cætera bona naturalia, unumquodque juxta gradum suum. Et simili modo probabile est talem actum esse de se meritorium alicujus præmii ejusdem ordinis, et hoc ad summum suaderi objectione seu evasione proposita. At vero talis actus per se spectatus non ita placet Deo, ut ad remunerationem aliquam supernaturalem illum acceptet, quia de se non habet cum tali præmio proportionem. Sicut enim dixit Paulus ad Hebr. 11: *Sine fide impossibile est placere Deo,* utique in ordine ad veram justitiam et æternam vitam, ita et nos dicere possumus, opus quod non est ex fide, non posse placere Deo, utique perfecto modo jam explicato. Unde licet Paulus in illis verbis de persona tantum loqui videatur, nihilominus ad actus personæ illa verba extendit Prosper contra Collator., c. 22, dicens: *Quasi ullus sit bonæ voluntatis motus (utique meritorius), nisi quem creaverit diffusa per Spiritum Sanctum charitatis afflatus, sine fide enim impossibile est placere Deo.*

23. *Excluditur tertia evasio.* — Ad ultimam denique partem respondetur impræmis bonum opus mere naturale, præsertim solis viribus arbitrii factum, per se non conferre ad remissionem præcedentium peccatorum, neque ad spiritualem animæ salutem, neque ad vitam æternam, quia neque hominem ad hæc bona disponit, neque illa meretur aut impetrat, ut latius infra contra Semipelagianos dicetur. Per accidens autem negare non possumus actum bonum pro eo tempore quo fit juvare, impediendo ne homo actu peccet, hoc tamen non solum per actum bonum, sed etiam per actum indifferentem (si forte detur) fieri potest, imo etiam per somnum, et aliis modis fieri contingit: et ideo nullum inde argumentum sumitur, illud esse opus gratiæ; alioqui omnia media quæ impediunt actuale peccatum, essent proprii effectus gratiæ, et ita neque opus indifferens fieri posset sine gratia. Et quamvis Augustinus gratiæ Dei imputandum dicat quod plura peccata non committimus, id intelligendum est de gratia ejusdem providentiæ et protectionis extrinsecæ, quæ supernaturalis providentiæ erit, imo etiam prædestinationis medium, quando ad effectum consequendæ salutis ordinata fuerit, et aliquo modo conduxerit. Sic enim jam diximus, bonum actum moralem posse interdum esse effectum prædestinationis, etiamsi absque auxilio gratiæ fiat. Patres ergo loquentes de actibus conducentibus ad salutem et vitam æter-

nam, sine dubio loquuntur de actibus per se influentibus (ut sic dicam) seu tendentibus in illum finem, ut ex his quæ diximus satis est manifestum, et ideo actus mere naturales sub illis verbis non comprehendunt.

24. *Ad auctoritates allatas cap. 19, a numero 2 usque ad 6.* — Ex his ergo satis responsum est ad testimonia Scripturæ, Conciliorum et Patrum; nam quæ in aliquibus locis sine limitatione vel declaratione dicere videntur, per alia, in quibus per determinationem et expositionem addunt, interpretanda sunt. Non enim poterant in singulis locis eadem verba repetere, nec necessarium erat; tum quia ex totius doctrinæ serie, et ex testimoniis Scripturæ quæ allegant, id facile poterat intelligi; tum etiam quia loquuntur ad fideles et credentes in Christum, et eos docent quibus viribus et auxiliis vitam æternam veramque justitiam consequenturi sint, et quam gratis eis conferatur gratia qua salvantur. Neque oportet ad singula testimonia in particulari respondere, quia omnium est eadem ratio, et si in nonnullis eorum aliqua superest difficultas, pertinet ad alteram partem testimoniorum, de quibus statim dicemus sequenti capite.

25. *Prædictæ auctoritates nobis potius favent.* — Unde ultimo inferre possumus prædicta testimonia non solum receptam sententiam non expugnare, verum potius confirmare. Nam Patres non frustra neque sine magna causa addunt limitationes illas: *Sicut oportet, ab initio fidei, opus pietatis, justitiæ, vel religionis, vel conducens ad vitam æternam, vel ad salutem, aut remissionem peccatorum, aut denique opus meritorium.* Nam si per hæc omnia solum voluissent excludere ne opus habeat circumstantiam malam, supervacanea profecto fuisset tanta diligentia, et tam accurata et repetita circumspexio; quia loquendo de actibus simpliciter bonis eo ipso intelligendi erant saltem de actibus nullam habentibus malitiam ex aliqua circumstantia, quia hoc est de ratione operis simpliciter boni, nam malum est ex quocumque defectu. Eo vel maxime quod non tantum loquuntur de actibus bonis, sed etiam illos distinguunt a malis et peccaminosis. Ergo etiam hoc titulo essent superflue omnes illæ declarationes et modificationes actuum bonorum, si nihil aliud dicere voluissent, nisi quod ad actum bonum ex objecto et circumstantiis sit gratia necessaria; ergo sine ullo dubio declarare voluerunt se postulare gratiam ad actus peculiare, ad æternam salutem conferentes. Quod in aliis locis apertissime

declarant, dicentes se loqui de actibus a fide procedentibus, vel per charitatem operante, vel vi sua impetrante. Ergo tacite, vel (ut sic dicam) per argumentum e contrario, vel ab speciali, supponunt opera bona inferioris ordinis et modi posse esse interdum a libero arbitrio sine gratia.

26. *Confirmatur Concilio Tridentino.* — Et inter alia non parum nostram sententiam juvat, quod in sess. 6, canon. 1, dicit Concilium Tridentinum, per opera hominis, quæ vel per humanæ naturæ, vel per legis doctrinam absque gratia fiunt, non posse illum justificari. Nam Concilium supponit talia opera fieri posse, ita ut non sint peccata, alias superflua esset definitio; ergo sentit, licet possint esse bona, non esse ad justificandum sufficientia, et hoc modo directe contradicit Pelagio, contra quem canon ille editus est. Et in eodem sensu dixerat in cap. 8, ideo dici hominem gratis justificari, quia nihil eorum quæ justificationem præcedunt, sive fides, sive opera, justificationem promeretur, ubi probabile est loqui Concilium de toto negotio justificationis ab initio usque ad consummationem ejus. Et nihilominus supponit ante totam justificationem posse præcedere opera, utique bona, nam de malis quis diceret esse meritoria justificationis? Merito ergo asserimus ex mente Conciliorum et Patrum posse dari aliqua talia opera, ante illud auxilium gratiæ, quod Patres requirunt ad singula opera justificationis, vel, quod idem est, ab initio fidei.

CAPUT XXI.

LIBERUM ARBITRIUM SINE AUXILIO NON NISI AD PECCANDUM VALERE, QUO SENSU INTERDUM A CONCILIIIS VEL AUGUSTINO DICATUR?

1. *Satisfit aliis testimoniis allatis cap. 19 a num. 7.* — *Falsa est in rigore illa propositio: Liberum arbitrium de se nihil valet, nisi ad peccandum.* — Superest ut ad alteram partem testimoniorum, quibus in cap. 19, a num. 7 usque ad finem, contra prædictas interpretationes instabatur, respondeamus. Summa vero omnium erat, quia Patres non solum dicunt liberum arbitrium indigere gratia ad bene operandum in singulis actibus, sed etiam affirmant peccare in singulis, si solum et sine auxilio gratiæ relinquatur. Ad quod imprimis dicimus sententiam hanc, liberum arbitrium hominis post lapsum suis viribus relictum non nisi ad peccandum valere, in rigore et pro-

prietate intellectam falsam simpliciter esse, et non posse ab ullo Theologo defendi. Nam eandem affirmavit Michael Baius in 28 assertionem, his verbis : *Liberum arbitrium, sine gratiæ Dei adjutorio, non nisi ad peccandum valet.* Et tamen Pins et Gregorius Pontifices eam simpliciter reprobant, et sub censura sua generali comprehendunt : quia juxta intentionem auctoris in proprietate verborum asserebatur; nec dici potest reprobata esse, eo quod cum aliqua exaggeratione aut censura, quæ aliis scandalum afferre posset, ab auctore proferretur; nam ex tenore verborum constat simpliciter et sine ulla censura contrariæ sententiæ proponi; et nihilominus tanquam falsam et censura dignam cum aliis refutari. Et revera multum favet hæreticis hujus temporis, qui nimiam quamdam et monstrosam corruptionem in humana natura lapsa confingunt; nam inter alia dicunt hominem lapsum et gratia destitutum semper peccare, nihilque agere posse, quod malum moraliter non sit, non solum quia malo fine positive, aut saltem privative, id est, non propter debitum finem operetur, ut quidam Catholici docuerunt (quos ipsi male curiosos vocant), sed etiam propter depravationem naturæ. Quæ tamen nimia depravatio falso conficta est, et nec in Scripturis vel Patribus fundamentum habet, et contra omnem rationem est, ac plane inintelligibilis. Alioqui etiam homo in pura natura eandem haberet depravationem, quod est contra bonitatem naturæ et auctoris ejus. Consecutio autem tenet ex superius dictis, ubi ostendimus non minores esse vires liberi arbitrii in natura lapsa quam in pura, nec in statu et potestate bene vel male operandi inter se differre. Item ex illa assertionem sequitur omnia infidelium opera esse peccata, quod facile hæretici concedunt; imo idem dicunt de homine in statu peccati existente; quam vero utrumque falsum sit supra est ostensum.

2. *Prima expositio juxta quam dicta propositio admitti potest, non tamen universim.* — Cum ergo hæc ita sint, credendum sine dubio est Augustinum et sequaces, in locis allegatis, non fuisse in hoc sensu locutos, ut quidquid liberum arbitrium sine auxilio gratiæ operatur aut operari potest, eo ipso vere ac proprie peccatum sit. Prima ergo expositio est, ut tale opus dicatur peccatum, non quia veram malitiam moralem habet, sed quia nullum meritum vel utilitatem habet ad vitam æternam, in quo multum a bonitate Christiana deficit, et propter hunc defectum large vocatur peccatum,

quia in hoc æquiparatur peccato. Ita respondent Soto, Vega, Ruard. et Osius supra; quæ expositio non est contemnenda, nam et aliquibus locis adaptari potest, et habet aliquod fundamentum in Augustino dicente : *Impius, etsi bona videatur facere, tamen quia facit sine fide, nec bona rocanda sunt,* Præfat. ad Psalm. 31, in fine; et multa similia habet in locis allegatis hic, et supra cap. 7, tractando de necessitate fidei ad bonos actus morales. Nihilominus, si generatim intelligatur et tanquam adæquata tribuatur, non nobis supra placuit, tractando de actibus infidelium, propter motiva ibi proposita.

3. *Secunda expositio quæ simpliciter sustineri potest.* — Alia ergo expositio ex ibidem dictis desumi potest, opera sine gratia facta non solum inutilia esse ad vitam æternam, sed etiam raro esse omni ex parte bona, et præsertim ex intentione finis, et maxime in infidelibus, et ideo ab Augustino prætermitti in enumeratione et partitione operum liberi arbitrii, quia quæ tam rara sunt et tam parvi momenti, tanquam nulla reputantur. Per hoc tamen non excludit Augustinus quod aliis locis fatetur, posse esse in homine omni gratia carente aliquod opus morale in suo ordine simpliciter bonum; sed quia illud rarum est, et ad disputationem contra Pelagianos nihil refert, illud prætermittit. Unde cum Augustinus, vel alii Patres, ex doctrina ejus, dicunt simpliciter omnia opera liberi arbitrii sine gratia facta esse peccata, intelligunt regulariter loquendo. Quæ responsio sustineri potest, et illustrari his quæ dicto cap. 7 de mente Augustini circa actiones infidelium diximus: et præcipue ex libr. de Perfection. just., cap. 19, et lib. de Spirit. et Litter., cap. 28, ubi ait in homine carente superiori lumine vix inveniri honestum opus ex fine, nam particula *vix* indicat esse rarum, non tamen nullum.

4. *Tertia expositio etiam probatur.* — Tertia expositio esse potest, Patres loqui juxta materiam subjectam, et errorem quem impugnant. Pelagius enim censebat hominem suis viribus posse ita operari, ut et veram justitiam et vitam æternam consequatur. Patres ergo, cum illum impugnant, de homine loquuntur ut tendente ad vitam æternam, et de operibus ejus ut conducentibus ad illum finem, vel ab illo avertentibus, aut retardantibus; et quia hæc non fiunt nisi per opera justitiæ et gratiæ, vel per peccata, ideo non considerant medium inter opera conducentia ad illum finem, et ab illo avertentia. Et ita comparando hæc duo

extrema, dicunt non habere liberum arbitrium de se, nisi peccatum, quia si quid boni operatur in ordine ad illum finem, non suis viribus absque Dei gratia id facere potest. Per hoc autem non intendunt excludere a voluntate humana absolute spectata omne aliud genus operis. Nam etiam adversarii admittunt in voluntate actus indifferentes, quorum ratio non habetur, quia nec conferunt, nec impediunt vitam æternam: idem autem est de bonis operibus mere naturalibus, nam in ordine ad illum finem quasi indifferentia reputantur.

5. *Quarta expositio.* — Addo vero ulterius, quoties Patres distinguunt actiones liberi arbitrii in bonas et malas, et dicunt bonas referendas esse in Deum, malas ipsi libero arbitrio tribuendas; partitionem ita posse accipi, ut sit adæquata, nimirum, si sensus illius sit omnem actionem bonam in Deum tanquam in principalem auctorem esse referendam, malam vero non in Deum, sed in solum liberum arbitrium, quia liberum arbitrium virtutem bene agendi ex Deo habet, ex se autem deficit, juxta illud: *Perditio tua ex te, tantummodo ex me auxilium tuum.* Cum ergo Augustinus ait liberum arbitrium ex se non habere nisi mendacium et peccatum, non ideo dicit, quia homo nihil per naturales vires liberi arbitrii agere possit nisi mendacium et peccatum; sed quia peccandi defectum ex se habet, et non a Deo, qui solum malitiam permittit; quod vero aliquid boni operari valeat, a Deo habet, et non sine auxilio et positiva Dei providentia id facit.

6. *Differentia Concilii Arausicani ab errore Baii.* — Et in hoc est notanda differentia inter canonem 22 Concilii Arausicani, et articulum 28 Michaelis Baii. Concilium enim dixit *Neminem habere de suo nisi mendacium et peccatum*, addendo enim illam particulam *de suo* (quam etiam addidit Augustinus in locis allegatis, et hbr. de Perfection. justit., capit. 12), per illam insinuavit se loqui de libero arbitrio per se spectato, et quasi condistinguendo illud a Deo. Et sic dicit a se tantum habere peccatum, quia peccatum, ut peccatum est, non est a Deo, sed a solo homine. Imo etiam quod liberum arbitrium sit defectibile, seu peccandi principium, non habet ex illo quod a Deo recipit, sed ex eo quod habet a se, nempe, quod sit ex nihilo, nam inde habet ut peccare possit, sicut dixit Augustinus 12 de Civitat., capit. 1; et capit. 6 ex professo probat peccatum non habere aliam causam, nisi voluntatem creatam, non quatenus a Deo bona est, sed qua-

tenus ex nihilo facta est. Idemque habet Greg. lib. 25 Moral., cap. 4. Et consequenti ratione, quod liberum arbitrium actu peccet, illi soli tribuitur, non Deo, quia Deus nullo modo est auctor malitiæ, nec vult illam, licet ab homine fieri permittat. Hac ergo ratione dicitur homo non habere de suo nisi mendacium et peccatum; quæ ratio non habet locum in bonis actibus, cujuseumque ordinis sint, ut statim dicemus. At vero Michael Baius alio sensu dixit liberum arbitrium sine gratiæ adjutorio non nisi ad peccandum valere, quia scilicet voluntas humana, etiam per illam bonitatem et libertatem naturalem quam a Deo habet, non potest aliquid boni operari, cum concursu Dei, et ideo abstulit illam particulam *de suo*, et de libero arbitrio simpliciter locutus est. Et hac ratione propositio Baii a Pontificibus rejecta est, etiamsi propositio Concilii sit verissima.

7. *Suadetur primo dicta expositio quarta, ex D. Thoma cum Augustino.* — Ex qua sic intellecta consequenter sequitur, quidquid liberum arbitrium operatur, quod peccatum non sit, non habere illud de suo, sed a Deo, cui principaliter tribuendum est omne bonum. Non oportet tamen hoc universaliter intelligere ex parte boni, et contracte ac limitate ex parte Dei, videlicet, sententiam illam explicando de omni bono actu, tam naturali quam supernaturali, et de Deo per gratiam Christi auxiliante, id enim nunquam ita dixerunt vel explicarunt Patres. Loquendo ergo, ut supponimus, de omni bono, cum partitione accommoda Deo tribuendum est, nam bona opera naturalia tribuuntur Deo ut auctori naturæ, per se loquendo, supernaturalia vero ut auctori gratiæ. Sic D. Thom. in 2, d. 28, q. 1, art. 1, ad 3, explicando locum Augustini, l. 1 contra duas epist. Pelag., c. 3, ubi dicit Deum esse adiutorem ad omne bonum, respondet vel intelligi de bono meritorio, vel, si de bonis naturalibus actibus voluntatis intelligatur, etiam Deum juvare ad illos, *interius operando in ipsa voluntate sicut in qualibet re operatur, et exterius occasiones et auxilia præbendo ad bene agendum, nam sine his omnibus nullus benefacere potest.* Et ita sentit mentem Augustini esse, omnia bona opera esse ex Deo, vel per auxilia naturalis seu generalis providentiæ, si opera sint inferioris ordinis, vel per auxilia gratiæ, si altiora sint.

8. *Secundo ex aliis locis Augustini.* — Quam sententiam aperte satis docuisse videtur Augustinus in epist. 130, ubi agens de Polemone

gentili, qui ex luxurioso continens factus est, non dimissa superstitione gentili, ait nihilominus illam continentiam fuisse donum Dei: *Quidenim superbius (ait) vel ingratius cogitare potest humana recordia, si putaverit, cum carne pulchrum faciat Deus hominem, animo castum ab homine fieri?* In qua comparatione indicat, sicut pulchritudo corporis est donum Dei, ut auctoris naturæ, ita continentiam illam fuisse a Deo ut auctore et provisoro naturæ: unde addit: *Polemo, si, de luxurioso continens factus, ita sciret cujus esset hoc donum, ut eum abjectis superstitionibus gentium pie coleret, non solum continens, sed etiam veraciter sapiens, et salubriter religiosus existeret, quod ei non tantum ad præsentis vitæ honestatem, verum etiam ad futuræ immortalitatem valeret.* Per hæc significans illam continentiam non valuisse Polemoni ad aliquid spiritualis salutis, sed tantum ad hujus vitæ honestatem, ac proinde non fuisse donum Dei tanquam veram gratiam, sed tanquam beneficium naturale generalis providentiæ.

9. *Sicque alibi idem Augustinus. — Erasmo enervatur. — Accedit Concilium Moguntinum.* — Eandemque sententiam satis clare docet lib. 4 contra Julian., c. 3, dicens: *Ex quo colligitur etiam ipsa bona opera, quæ faciunt infideles, non ipsorum esse, sed illius qui bene utitur malis.* Quod si quis dicat Augustinum ibi loqui de bonis operibus ex genere, etiamsi non bene fiant, inde a fortiori sumimus argumentum: nam si illa opera quæ simpliciter non sunt bona, sed tantum secundum quid, dicuntur esse opera Dei, quantum ad illud bonitatis quod participant, multo magis si aliquod opus simpliciter bonum a gentili fiat, illud erit Deo tribuendum, et utrumque erit a Deo auctore naturæ majus vel minus beneficium in illo ordine conferente. Eo vel maxime quod Augustinus non negat tale opus posse esse simpliciter bonum in gentili, licet non sit bonum bonitate meritoria et Christiana, ut sæpe dictum est. Denique in hoc videtur dixisse Concilium Moguntinum novissimum in primo decreto fidei: *Hunc Deum conditorem, conservatorem, et gubernatorem esse rerum omnium, in pœnis et vindictis justum simul et misericordem, in donis liberalem, omnis quidem boni, sed nequaquam mali culpæ auctorem;* ubi aperte loquitur de omni bono, tam naturæ quam gratiæ, et de Deo ut governatore in utroque ordine, ac subinde singula bona esse a Deo gubernante naturam, vel in ordine ad connaturale bonum, vel in ordine ad super-

naturale, servata uniuscujusque boni proportionem. Hoc ergo modo, quando Patres dicunt hominem de se nihil posse per liberum arbitrium, nisi peccatum, nam omne bonum a Deo habet, non ideo significant arbitrium sine vera gratia Christi nullum bonum actum agere posse, sed significant non ita illum habere a se sicut peccatum: quia illum habent ex Dei beneficio non tantum creantis naturam, vel docentis per creaturas, ut dicebat Pelagius, sed etiam in particulari omnia providentis, et interioris etiam operantis, saltem per generalem concursum, quod negabat Pelagius. Hæc ergo interpretatio, licet non possit ad singula testimonia accommodari, quia sæpe Patres loquuntur de propria dependentia a Deo, ut operante per auxilia supernaturalia gratiæ, nihilominus habet locum in aliis, ubi generalius loquuntur. Præsertim vero accommodatur optime hæc interpretatio ad loca Augustini, ex quibus notavimus potuisse desumi canonem 22 Concilii Arausicani, scilicet tract. 5 in Joan., Prol. de Doct. Christ., Exposit. in Psal. 142, et serm. 13 de Verb. Apost.

10. *Ultima expositio est de libero arbitrio ex se malo, id est, naturaliter inconstante in bono. — Suadetur ex Concilio Arausicano.* — Ultimo occurrit addendum divisionem illam voluntatis in bonam bonitate supernaturali, et malam simpliciter, aliquando tradi potius de ipsa potentia liberi arbitrii, seu de ipso homine, quam de actibus voluntatis, et sic esse adæquatam loquendo de lege, et secundum statutam Dei providentiam; omnis enim voluntas aut est bona per gratiam, aut mala, si careat gratia. Nam quia nunc voluntas instituta est, ut Deo per gratiam et virtutes infusus uniat, non potest esse simpliciter bona, si illis virtutibus careat, quia bonum ex integra causa, et quia non potest carere gratia et virtutibus, nisi voluntarie, vel voluntate propria, vel saltem primi parentis; ideo non potest fieri quin illa carentia in ea peccatum sit, et consequenter in eo statu voluntas sit mala. Et ita loquendo de voluntate ipsa, non est medium inter voluntatem bonam, utique bonitate gratiæ et supernaturali, et voluntatem malam simpliciter, sive malitia opposita bonitati supernaturali, sive etiam naturali. Atque ita in ipsa potentia est illa divisio adæquata, licet in actu ejus non sit, nam inter actum bonum meritorie, et actum malum simpliciter seu peccatum, datur medium, nimirum actum bonum non meritorie gratiæ, et adhi volunt dari etiam actum indifferentem. Hinc

autem fit ut actus procedens a voluntate mala, sua sola virtute operante, non possit esse ita bonus ut faciat ipsam voluntatem bonam, vel illam simpliciter bonam denominet, quia non potest voluntas se suis viribus facere bonam, quod maxime Patres contra Pelagium intendunt. Ille enim, quia negabat originale peccatum, non putabat voluntatem esse malam ex earentia gratiæ, in qua nascitur, et ideo aiebat suis viribus fieri posse bonam. Patres autem, cum ex Paulo didicissent omnes nos nasci natura filios iræ, secundum fidem docent non posse hominem ita suis viribus operari bonum, ut suam voluntatem faciat bonam, nisi per Dei gratiam justificetur, et ideo semper voluntatem hominis esse malam, si neque in Christo renascatur, neque per ejus gratiam, sed solis viribus liberi arbitrii operetur. Et ita dicunt non posse per se bene operari, ita scilicet ut bonus fiat, neque ita ut perseveranter bene operetur et integre, ac subinde semper peccare, non tamen pro semper, ut sic dicam, id est, non in singulis actibus, sed in tali statu, et in multis actibus, et fortasse frequentius. Quomodo aliqui exponunt illud Pauli: *Sine fide impossibile est placere Deo*, utique personam, vel vitam, quia nec potest quis sine fide aut a se excludere peccatum, aut sine peccato vivere, quamvis necesse non sit ut in singulis actibus Deo displiceat. Sic potest intelligi quod Arausicanum Concilium dixit, *Non habere hominem de suo, nisi peccatum*; quia sibi relictus, et gratia destitutus, non potest non esse in peccato, licet non semper novum faciat peccatum.

11. *Item ex locis quibusdam D. Augustini.* — Sæpe etiam juxta hanc doctrinam loquitur Augustinus, ut epistol. 47 dicens: *Quantum potuimus, egimus cum istis, et vestris, et nostris fratribus, ut in fide sana catholica perseverent. Quæ neque liberum arbitrium negat, sive in vitam malam, sive in bonam: neque tantum ei tribuit, ut sine gratia Dei valeat aliquid, sive ut ex malo convertatur in bonum, sive ut in bono perseveranter proficiat, sive ut ad bonum sempiternum perreniat.* Nam si recte verba attendantur, solum requirit Augustinus gratiam ut necessariam, quoad operandum bonum, ut sit conferens ad sempiternum bonum obtinendum, quoad exclusionem vero mali, ut homo vel a seipso excludat peccatum, et de peccatore fiat justus, vel ut a sua vita excludat, quoad fieri possit, peccatum, perseveranter bene vivendo; non tamen requirit gratiam tanquam simpliciter necessariam ad sin-

gula peccata in singulis temporibus et occasionibus vitanda. Præterea, juxta hanc doctrinam recte intelliguntur illa verba serm. 13 de Verbis Apostoli: *Nisi ille regat, cadis*, utique aliquando, sæpe et frequentius, non tamen semper et in singulis actibus, si locus ille de regimine per gratiam intelligatur. Nam si latius sumeretur, ut includeret etiam regimen generalis providentiæ, sic posset etiam de singulis actibus liberis intelligi, et ad naturales vel supernaturales cum proportionali partitione accommodari. Prior tamen est sensus Augustini, juxta testimonia Scripturæ quæ allegat, et discursum quem sequitur. Hoc autem supposito sensu, quod subdit: *Agis, illo non adjurante, libera voluntate, sed male*, necessario intelligendum est dictum per amplificationem, propter id quod frequentius accidit juxta secundam expositionem superius positam. Quod vero dicit epistol. 89, liberum arbitrium, gratia non adjutum, non habere justitiæ soliditatem, sed inflationem impiæ superbiæ, optime intelligitur; quia per se non potest habere veram justitiam; potest autem habere, et frequentius habet impiam superbiam, quod non obstat quominus in uno vel altero actu possit non peccare. Et similiter quod ait in epistola 106 de potestate ad non peccandum, intelligendum est de non peccando simpliciter, id est, constanter, et per totam vitam, hanc enim potestatem tribuebat Pelagius libero arbitrio; dicebat autem *aliquantum* hoc esse in potestate voluntatis, non quia esset potestas ad unam vel aliam occasionem peccandi, sed quia solam voluntatem difficulter hoc posse dicebat, cum gratia vero facilius, et hoc sensu ait Augustinus ad non peccandum nihil voluntatis arbitrium per se valere.

12. *Ponderantur alia Augustini verba.* — Maxime vero hæc ultima interpretatio videtur sensum Augustini attingere in cap. 18, lib. 2 de Peccator. merit. et remiss., in quo omnia illa, quæ Augustinus dicit, ut ostendat quidquid boni est in voluntate nostra, esse ex Deo non tantum ut creante naturam et voluntatem, sed alio specialiori modo quo mala opera voluntatis non sunt a Deo, possunt quidem, juxta doctrinam præcedentis responsionis, intelligi de omnibus operibus bonis, tam ordinis naturalis quam supernaturalis, quia omnia sunt accepta a Deo, vel ut auctore naturæ vel gratiæ. Hoc enim et non aliud in rigore probat discursus Augustini, ut patet ex illis verbis: *Nam si nobis libera quaedam voluntas ex Deo*

est, quæ adhuc esse potest vel bona, vel mala, bona vero voluntas ex nobis est, melius est quod a nobis quam quod ab illo est. Quæ illatio fundatur in eo quod antea dixerat, præter liberum arbitrium esse in nobis voluntatem bonam, quæ jam in eis bonis est, quorum esse usus non potest malus, et ideo dicit esse quid melius, ac subinde: *Nisi ex Deo, nobis esse non posse;* hoc autem dici potest de qualibet virtute morali, et de quolibet actu morali intrinsece honesto, nam ita est bonus, ut malus esse non possit, et ideo sine dubio a Deo est, ut a principali auctore, et longe aliter quam sint actus mali; nam licet quoad bonitatem materialem etiam a Deo fiant, longe tamen aliter quam actus boni naturales, ut supra diximus. Quamvis autem probabilis sit hæc interpretatio, nihilominus probabilius est Augustinum, in illa priori parte illius capituli, loqui de voluntate bona per veram justitiam apud Deum, et de voluntate mala per carentiam ejus, seu per malitiam illi justitiæ contrariam. Nam testimonium Pauli. in quo fundatur argumentum ejus, de bonis supernaturalibus proprie intelligitur. Procedit autem prius Augustinus argumentando contra Pelagium, etiam permissa suppositione ejus, nimirum quod detur in homine voluntas libera prius in quodam statu neutro, in quo nec bona sit, nec mala dicto modo apud Deum, quæ potest suis operibus fieri bona vel mala. Nam hoc etiam posito, necesse est ut, cum fit bona, a Deo recipiat illam bonitatem justitiæ apud ipsum, quæ melior est quam ipsa voluntas, ne Deo tribuamus bonum quod minus est, et negemus quod est melius. Postea vero aliter arguit destruendo suppositionem Pelagii, cum ait: *Quamquam voluntas, mirum est si possit in medio ita consistere, ut nec bona nec mala sit.* Et ita non loquitur de actu, sed de voluntate ipsa, seu de homine, probatque non posse esse in statu medio, quia non potest esse nisi justus vel injustus. Et ita per voluntatem bonam intelligit voluntatem justam apud Deum, et bonitatem ejus vocat ipsam justitiam, ut patet ex verbis illis: *Restat ut bonam voluntatem habeamus ex Deo, alioqui nescio, cum ab eo justificamur, quo alio munere ipsius gaudere debeamus.* Et infra voluntatem bonam esse declarat, quæ ad Deum se convertit, utique conversione perfecta et secum afferente justitiam; et ita ex illo non colligitur liberum arbitrium gratia destitutum semper operari malum, seu peccatum, sed tantum tempore esse malum, id est, in statu peccati et averſionis a Deo.

13. *Juxta exposita ex D. Augustino, procedit etiam Prosper, illo c. 19, n. 9, adductus.*— Denique eisdem modis seu regulis intelligendi sunt Patres qui secuti sunt Augustinum, nam sicut ejus doctrinam, ita etiam verba et sensus imitati sunt. Cum ergo Prosper ait quæ fiunt sine charitatis medullis, habere pietatis similitudinem, non veritatem, non dicit non habere bonitatem moralem, sed non habere pietatem, quæ vox significat bonitatem altioris ordinis, ut jam declaravimus. Imo potius dicit non habere pietatis veritatem, quod potest intelligi de pietate ex fide, non quacumque, sed viva et efficaci ad proprium meritum vitæ æternæ. In quo sensu non solum dici potuit illa sententia de bonis actibus moralibus sine auxilio gratiæ factis, sed etiam de actibus procedentibus ab auxilio supernaturali factis ab homine non habente charitatem; nam sicut illi actus dicuntur mortui, ita etiam dici possunt non habere pietatis veritatem. Cum autem dicit Prosper liberum arbitrium solum non nisi in suam perniciem moveri, non ideo dicit quia semper et in omni opere peccet, sed quia potest facere, et frequentius facit ea quæ sibi sunt in perniciem, et si aliquando quidpiam boni naturalis facit, nihil sibi ad salutem prodest, et ideo subdit: *Ipsam enim arbitrium se excæcaverat, et se illuminare non poterat.* Quam expositionem necessario acceptare debent qui in hujusmodi arbitrio opera indifferentia admittunt, nam illa etiam non sunt in perniciem, licet inutilia sint. Quod autem in c. 3 ad Gallos, distinguit Prosper opera in bona tantum et mala, et bona tribuit Deo, mala autem libero arbitrio, intelligi potest juxta dicta in quarta expositione; quia vero dicit bona opera referri ad inspiratorem eorum Deum, videtur mihi probabilius loqui de bonis operibus meritoriis et gratiæ, et omisiſse opera naturalia, vel bona, vel indifferentia, aut quia rara sunt ante omne auxilium gratiæ, aut quia sunt inutilia, et (ut ita dicam) nihil pertinentia ad finem supernaturalem, neque ad illum conducentia, neque illum impediencia. Denique quod prius allegatum fuerat ex capite decimo-nono, contra Collator., in humana natura post peccatum nihil remansisse, nisi quod ad temporalem vitam pertinet, recte intelligitur ut, sub his quæ ad temporalem vitam pertinent, comprehendantur etiam quæ ad meram bonitatem moralem pertinent; sic enim Augustinus, epistol. 130, dixit continentiam hominis gentilis ad præsentis vitæ honestatem pertinere. Quod etiam sensit idem

Augustinus, de Spirit. et Litter., cap. 27, dicens talia opera esse laude digna, seu merito laudanda. Imo idem Prosper contra Collator., cap. 26, dixit: *Illa corporis et animi bona, quæ manent in homine post prævaricationem, præsentem vitam honestare, non tamen æternam conferre*: ergo sub bonis temporalibus hujus vitæ comprehendit etiam actus moraliter bonos. Et simili modo intelligendum est quod in cap. 22 dicit, actus justitiæ et prudentiæ, qui ad gubernandam rempublicam etiam in hominibus alienis a gratia Christiana inveniuntur, ex naturæ a Deo conditæ reliquiis superesse in humano genere ad temporalis vitæ utilitatem. Ad illam enim multum sine dubio conferunt morales actus acquisitarum virtutum. Quia vero de hac temporalis vita addit Prosper: *Quæ tota est damnationis et pœnæ*, id intelligendum est, vel per amplificationem, quia sine gratia fere nihil est in ea boni, etiam moralis, et si quid est, neque a damnatione liberat, nec minuit pœnam, et ideo tota vita hominis lapsi et gratia destituti dicitur esse damnationis et pœnæ; vel quia si aliquid boni habere potest quod non sit culpa nec pœna, tam parvum est et leve, ut pro nihilo reputetur. Eo vel maxime quod bonum opus morale, quatenus bonum est, non possit dici pœna hujus status; tamen quatenus fit sine ullo merito gratiæ vel gloriæ, et sine ulla relatione ad supernaturalem finem, aliquid participat de misera conditione præsentis status, nam verisimile est in statu innocentia nunquam fuisse hominem tam imperfecte operaturum. Denique quod cap. 27 ejusdem libri videtur Prosper negare, mansisse in homine post peccatum naturalia semina virtutum, vel cum proportione intelligendum est de virtutibus quibus ordinatur homo ad vitam æternam, vel certe intelligit non manere naturaliter semina virtutum, quæ adolere possint, seu fructificare in vitam æternam, nisi per gratiam Dei sublevantur; ejus contrarium Cassianus et Semipelagiani docebant.

14. *Similiter Fulgentius ibid.* — *Item et Bernardus ibid.* — Simili modo intelligendus est Fulgentius; nam omnia quæ dicit de bona voluntate et ejus initio, intelliguntur de bona voluntate sufficiente ad meritum, seu initium justitiæ apud Deum, juxta ea quæ circa priora testimonia diximus; quæ vero dicit de impotentia vitandi peccatum per liberum arbitrium sub statu peccati, intelligitur non quoad singulos actus, sed quoad ipsum statum, et hoc modo dicit: *Quamdiu homo est peccati servus,*

non nisi ad serviendum peccato reperitur idoneus, quia nec potest ab illo statu sua se virtute eximere, nec potest non servire peccato; quia licet fortasse unum vel alium actum virtutis faciat, fere in reliquo vitæ cursu servit peccato. Atque in eodem fere sensu dixit Bernard., serm. 4 de Annuuntiat., hominem sibi relictum in peccatum semper declinare. Illud enim *semper* non est rigorose intelligendum *pro semper* (ut sic dicam), id est, in omnibus et singulis actibus; sed, vel dixit *semper*, quia non contingit hominem sibi relictum vivere sine peccato, vel quia tam frequenter peccat, ut tota vita possit peccaminosa vocari. Et hic sensus constat ex ratione quam adhibet, scilicet, quia universa, quantum in eis est, ad suam originem tendunt, et in eam semper partem sunt procliviora. Hæc enim ratio ostendit frequentius hominem sibi relictum operari juxta defectuosæ originis propensionem, non tamen semper, et in omnibus actibus necessario ita operari. Quod vero in alio loco de libero arbitrio dixit, liberum arbitrium proficere per gratiam salvantem, deficere autem per seipsum, intelligendum est ut sit adæquata partitio de libero arbitrio quoad statum suum, non quoad singulos actus, juxta ultimam responsionem datam, quia semper aut per gratiam proficit, aut jacet sub peccato, quamvis in illo statu sibi relictum non semper in singulis actibus peccet. Vel certe, si illa duo membra ad singulos actus referantur, dicitur deficere, quoties sibi relictum operatur, non semper proprio defectu culpæ, sed defectu ordinis et utilitatis ad suum verum ultimum finem.

15. *Item Anselmus in num. 8 — Mens Petri Diaconi, cap. 19, num. 5, citati.* — Partitio autem Anselmi de operatione ex affectu commodi, vel ex affectu justitiæ, si in illa duo illi termini, *commodum*, et *justitia*, in sua generalitate sumantur, esse poterit adæquata. Videtur autem intelligere veram et perfectam justitiam apud Deum, et sic verum est neminem operari ex affectu justitiæ sine gratia. Nihilominus tamen operatio ex affectu commodi proprii non semper est peccatum, ut ipsemet Anselmus dixit; imo potest esse honesta, si recta ratione reguletur. Et ita operatio ex affectu commodi non solum includit actiones peccaminosas et indifferentes, sed etiam actiones morales honestas, quibus commoditas propria secundum regulam rectæ rationis intenditur, etiamsi non fiant propter Deum perfecte dilectum, quæ est propria affectio justitiæ. Altera præterea partitio Petri Diaconi, dicen-

tis hominem sine gratia posse cogitare et velle humana, non tamen divina, in eodem sensu et eum adæquatione accipienda est. Nam per *divina* sine dubio intelligit omnia quæ ad Deum finem supernaturalem conducunt, nam de his bonis ibi loquitur, quæ in fide Christi fundantur, et quæ per revelationem et infusionem Spiritus Sancti cognoscuntur et amantur. Sub *humanis* autem comprehendit bonos etiam morales actus: nam illi et humanis viribus proportionati sunt, et ex rationibus humanis, quamvis rectis et honestis, fiunt, sicut Concil. Arausic., can. 3, invocationem Dei, sine gratia factam, humanam vocat, et canon. 6, labores, vigiliis et studia, solo libero arbitrio facta, vocat obedientiam humanam.

16. *Item Maxentius ibid.* — Difficilius quidem ad hunc sensum trahuntur verba Joann. Maxentii, cujus auctoritas, licet magni facienda non sit, quia, ut creditur, vir non fuit catholicus, sed schismaticus, nihilominus in hac materia non est contemnenda, quia in illa non erravit, sed secutus est Augustinum, ut in 1 lib. dixi. Ille igitur duo tantum genera operum distinxit. Quædam, quæ ad vitam æternam pertinent, quæ sine dubio sunt aliquo modo supernaturalia, et ideo dicit, *non fieri, nisi per infusionem et operationem intrinsecus Spiritus Sancti*: quæ verba internam et supernaturalem gratiam significant, ut supra ostensum est. et ex Conc. Arausic., can. 3, 6 et 7, imo ex verbis antecedentibus et subsequentibus ejusdem Maxentii satis constat. Ab his autem operibus solum distinguit opera quæ carnalia vel sæcularia appellat, et ad illa sola præstanda dicit valere liberum arbitrium: unde videtur præterisse bona opera moralia, quia hæc non proprie dicuntur carnalia aut sæcularia. Quod si fortasse ita est, non est credendum id fecisse quia nulla omnino esse possint tali opera, sed quia et parva et rara sunt, et quia in ordinem ad finem supernaturalem neque promunt, neque obsunt, ut diximus. Verisimilius autem est etiam hæc opera *sæcularia* vel *carnalia* vocasse, non quia ex affectu carnis temper procedant, sed quia ex se solum hoc est tant hæc vitam mortalem, sicut etiam ob hanc rationem inter bona temporalia computantur.

17. *Item Gregorius, ibid.* — *Item Richardus, ibid.* — Denique, cum Gregorius ait Sancto sibi tribuere mala quæ faciunt, bona autem divise gratiæ, absque dubio loquitur de bonis ad vitam æternam conducuntibus, hæc enim sunt quæ sancti viri, divina gratia præventi et

adjuti, faciunt, de quibus ipse ibi loquebatur. Hisque opponit mala quæ ab eodem fine aliquo modo avertunt. De bonis autem mere naturalibus et solo arbitrio factis mentionem non facit, non quia in sanctis viris nulla esse possint, sed quia ibi non assumpsit provinciam dividendi exacte opera quæ in hominibus esse possunt, sed solum monere voluit sanctos viros, quomodo circa bona et mala opera, quæ vitam æternam merentur vel impediunt, se gerere, et sentire debeant. At vero Richardus sub illa partitione non tantum videtur comprehendere opera libera, sed etiam mala quæ necessario patimur: nam sub illis ponit concupiscentiam, de qua dicitur: *Quod nolo malum, id ago*; nihilominus tamen, quatenus illa partitio pertinere potest ad opera libera, sub tertio membro operum quæ nec sunt ad reatum, nec ad meritum, non solum indifferentia, quæ fortasse in individuo nulla sunt, sed multo magis bona honesta pure humana comprehendit, ut patet ex testimonio quod in exemplum adducit ex verbis Christi: *Si vos, cum sitis mali, nostis bona dare filiis vestris*. Hoc enim potius est ex objecto bonum quam indifferens. Atque ita Richardus potius doctrinam datam confirmat.

CAPUT XXII.

RATIONIBUS GENERALIBUS ALIARUM OPINIONUM SATISFIT.

1. *Primum adversariorum argumentum.* — Prima ratio, quam Gregorius Arimin. proposuit, omnibusque contrariis sententiis favere potest, sumitur ex æquiparatione actus boni et mali, quia si actus bonus cum solo generali concursu fieri potest, sequitur non aliter neque amplius operari Deum in actu voluntatis honesto, quam in malo, quia ad utrumque concurrat ut causa universalis; ergo si non plus habet in actu bono, est æqualitas: consequens autem videtur damnari ab Augustino, lib. 1 de Grat. Christi, c. 25, et lib. 2 de Peccat. merit., c. 18, et aliis locis frequenter. Et patet, quia bonum opus verissime tribuitur Deo, non autem malum; ergo aliquid amplius habet Deus circa bonum actum; illud ergo est gratia. Respondetur in aliquo servari similitudinem, non vero in omnibus, et ideo simpliciter negandam esse sequelam: est enim similitudo in hoc, quod sicut Deus non determinat phylice voluntatem ad malum sola sua actione, sive activitate ejusdem voluntatis, ita

nec determinat ad bonum, quia utraque est determinatio libera. Item in actibus mere naturalibus servatur in hoc æquiparatio, quia ad utrosque actus physice concurrit Deus solo concursu generali ex necessitate. Nihilominus est diversitas, quod in bonis actibus per illum concursum Deus attingit physice bonum actum, quatenus bonus est, id est, efficiendo ipsam honestatem; in peccato vero, licet efficiat actum, non efficit malitiam ejus, quæ privatio moralis est. Deinde est in morali modo differentia, nam actum bonum efficit Deus intendendo illum, malum autem permittendo. Denique est etiam diversitas in morali causalitate, nam actum bonum vel præcipit, vel consulit, vel approbat, vel etiam ad illum excitat; malum autem minime, sed tantum non impedit, nec negat concursum suum, et ideo simpliciter est auctor actus boni, non mali.

2. *Argumentum secundum.* — Secunda ratio quæ objicitur est, quia, si posset homo aliquid boni moralis sine gratia operari, haberet aliquid unde posset in se, et non in Domino gloriari; consequens est contra illud Pauli 1 ad Cor. 4: *Quid habes quod non accepisti? si autem accepisti, quid gloriaris, quasi non acceperis?* Ubi Paulus reprehendit eos qui suis viribus aliqua bona tribuebant, et ita de illis gloriabantur, ut aliis præferri vellent. Paulus autem eos redarguit, quia nihil habebant quod non accepissent, utique per dona gratiæ, de quibus a principio capituli locutus est; ergo sentit esse contra beneficium gratiæ, gloriari de aliquo bono actu, tanquam non accepto per gratiam. Et confirmatur hæc ratio ex Concilio Arausicano, canone 16, dicente: *Nemo ex eo quod videtur habere, gloriatur, quasi non acceperit, aut ideo se putet accepisse, quia littera extrinsecus, vel ut legeretur apparuit, vel ut audiretur insonuit; quasi tacite exponat istud vocari a Paulo acceptum, quod per gratiam accipitur, et nihil boni esse in homine, de quo ut non sic accepto possit gloriari.* Hinc etiam dixit Augustinus, lib. 1 ad Simplicium, q. 2, ante medium: *Unde admoneamur nec de ipsis operibus misericordiæ quemquam oportere gloriari et extolli, quod eis, quasi suis, Deum promeruerit, quandoquidem, ut haberet ipsam misericordiam, ille præstitit, qui misericordiam præstabit, cui misericors fuerit: et statim subjungit verba Pauli: Quid habes quod non accepisti?* Et eadem applicat ad opus continentiæ, ut nemo de illo gloriatur, quasi non acceperit, et generaliter illud pro omni bono opere urget lib. 2 de Peccator.

merit., cap. 18, et de Dono perseverant, c. 4 et 7, ubi allegat Cyprianum dicentem: *In nullo gloriandum, quia nostrum nihil est, idque ex illo testimonio confirmantem lib. 3 ad Quirin., capite quarto.* Unde est etiam illud Gregor., lib. 22 Moral., cap. 5, alias 10, in fine: *Ego mea opera tanquam mea non profero, quia auctoris sui gratiam negare convincitur, quisquis sibi tribuit quod operatur.*

3. *Duplex solutio.* — Ad hæc vero omnia respondere possumus, juxta doctrinam datam in capite præcedenti, Paulum loqui de donis supernaturalibus, ut evidenter ex contextu constat, et similiter Patres loqui de bonis operibus meritoriis aliquo modo salutis, ut eadem loca exponendo ibidem ostendimus. Gloriari ergo de his bonis tanquam non acceptis per gratiam, superbiæ et arrogantæ est, et si per judicium intellectus fiat, supponit ille affectus Pelagianam hæresim. Qui autem existimat moralem actum naturalis ordinis posse fieri sine auxilio gratiæ, non tribuit naturæ aliquid ad quod ipsa non sufficit, neque dat homini occasionem gloriandi se in aliquo bono supernaturali, tanquam in non accepto per veram gratiam, et gratis donatam, quod Paulus et alii Sancti proprie reprehendunt. Dico vero ulterius, etiam de bonis naturalibus non debere nec posse hominem gloriari tanquam de non acceptis, quia a Deo manant, ut auctore naturali, et licet per se non pertineant ad gratiam salvantem, pertinent ad gratiam creantem, conservantem et providentem, ideoque magna esset arrogantia et ingratitude gloriari de bonis naturalibus, ut de pulchritudine, ingenio, scientia, et similibus, tanquam de non acceptis, nam omnia hæc, et similia, tanquam Dei dona recognoscenda sunt, ut recte argumentatur August., 4 contra Jul., capite 3. Quod si hoc verum est in bonis naturalibus, quibus possumus bene aut male uti, multo magis id verum erit de actu morali bono, qui intrinsece includit bonum moralem usum, ut in simili argumentatur August., l. 2 de Peccator. merit., c. 18. Atque ita etiam in his bonis actibus eum proportionem dici potest homini: *Quid gloriaris, quasi non acceperis,* si non recognoscat habere illum actum ex Deo influente in illum, ut fortasse Pelagius sensit, vel etiam si non recognoscat peculiare Dei beneficium esse, quod oblata fuerit occasio congrua ad similem actum exercendum; non est autem necesse quod recognoscat illud tanquam beneficium gratiæ, sed naturæ, ut ex Augustino, epist. 130, ponderavimus. Quod si quis recognoscens hæc

beneficia divina simul intelligat illud opus factum esse a suo libero arbitrio, hæc non est vana gloriatio, nisi homo in aliquo excedat, vel tribuendo sibi plus aliquid quam revera habeat, vel exponendo se periculo alicujus elationis, aut, inter tot peccata quæ quotidie committit, propter unum minimum opus se extollendo, vel sibi propter talem actum meritum primæ gratiæ tribuendo. De qua re et et simili objectione iterum dicturi sumus infra tractando de efficaci auxilio.

4. *Argumentum tertium.* — Tertia ratio, quam magni faciunt auctores contrariæ sententiæ, est quia orandus est Deus ut nos adjuvet in singulis actibus moralibus, ut honeste et sine ulla malitia unumquemque faciamus : quis enim hoc audeat negare? At vero ex oratione colligitur clare necessitas gratiæ ad illum effectum, seu actum ad quem postulatur; ergo. Minor constat ex Conciliis et Patribus, qui hoc argumento maxime utuntur ad probandam gratiæ necessitatem. Dicitur forte non esse necessarium petere auxilium pro singulis actibus moralibus, sed solum esse utile ut melius, ut securius fiant, et ut Deus non permittat occurrere impedimenta bene operandi, quæ contingentia sunt, et facile occurrere possunt. Sed contra hoc obstat, quia hæc responsio videtur favere Pelagio, qui dicebat gratiæ auxilium non conferre posse bene operari, sed facilius operari, unde consequenter diceret orationem esse utilem ad bene operandum, non tamen necessariam, et per illam peti auxilium, non ut necessarium, sed ut utile, et ad melius et facilius posse. Patres autem impugnant Pelagium dicto argumento, quia nemo ab alio postulat quod per seipsum facere vel habere potest, et inde concludunt nos indigere gratia ad singulos actus bonos, non solum ut facilius illos faciamus, sed absolute ut illos faciamus, imo etiam ut illos facere possimus. Quod argumentum sæpissime repetit Augustinus, maxime vero illud prosequitur ep. 107, et Hieronymus contra Pelagium, et illud etiam urgent Patres Concilii Carthag. in epist. ad Innoc., et appobat Innocentius in rescripto. Ergo eadem ratione idem dicendum est de adjutorio necessario ad singulos actus morales.

5. *Responsio.* — Respondeo imprimis veram et Christianam orationem, de qua Patres loquuntur, esse tantum illam quæ ex fide procedit. Nam sicut ostensum est capite precedenti, nos loqui de operibus pietatis, ita etiam loquuntur de oratione pia, cujus prima conditio

est ut a fide procedat, sicut ostendi t. 2 de Relig., tract. 1, l. 1, c. 24, et sufficienter ostenditur ex Paulo ad Rom. 10, dicente: *Quomodo invocabunt in quem non crediderunt?* Unde colligit August., de Prædest. Sanctor., cap. 7, orationes Cornelii, quæ ascenderunt in conspectum Dei, Actor. 10, non esse fusas sine aliqua fide: *Nam quomodo (inquit) invocabat in quem non crediderat?* Concilium etiam Arausican., cap. 3, petitionem non ex fide factam invocationem humanam vocat, non orationem, et definit illam non impetrare gratiam, sed potius gratiam facere ut Deus invocetur a nobis, utique sicut oportet, et per veram orationem, idemque de petitione et pulsatione apud Deum dicit in canon. 6.

6. *Progreditur cæpta solutio.* — Ex quo fundamento infero, si loquamur de homine, vel in pura natura spectato, vel nunc fide et omni supernaturali gratia carente, in illo non habere locum argumentum factum, quia in illo vel non potest esse ulla invocatio veri Dei, quia forte illum non agnoscit, vel si eum aliquo modo cognoscat, poterit ad summum humano modo invocare illum, quæ invocatio per se nihil valet ad aliquam gratiam impetrandam a Deo, ut Concilium Arausicanum definit. Unde ad summum valere posset ad obtinendum aliquod beneficium naturale, non ex promissione aliqua Dei, nulla enim est facta tali invocationi, ut dicto libro de Relig. latius dixi, nec esse potest debita ex sola naturali providentia, quam solum Deus exhibet, vel suo modo debet, antequam gratis conferat gratiam. At vero, loquendo de homine fidei, ille quidem jam potest orare Deum, ut in singulis operibus bene se gerat; si autem ad hoc veram gratiam postulet, jam non postulat tantum ut bene moraliter et humano (ut sic dicam) modo bona opera faciat, sed etiam ut modo Christiano, et in ordinem ad vitam æternam fructuose illa faciat, et ideo de illa petitione etiam non procedit ratio facta, nam de illis actibus fatemur esse ad singulos gratiam necessariam. Et sine dubio de hac oratione Sancti loquuntur, et ita est a nobis orandus Deus, si fideliter et sicut oportet oretur: ideoque ex tali oratione recte colligunt Sancti necessitatem gratiæ ad singulos actus bonos meritorios, et ordinatos ad vitam æternam; inde autem non potest argumentum extendi ad actus mere naturales.

7. *Objectio.* — *Dissolvitur.* — Dicit aliquis etiam posse fideles petere a Deo bonos actus mere naturales, et hoc satis esse ut ex tali oratione colligamus gratiam esse necessariam ad

singulos hujusmodi actus, propter eandem rationem, quia nemo petit id quod per se facere potest. Antecedens patet, quia possumus et Christiana oratione a Deo petere salutem, scientiam, pluviam, et alia bona temporalia; ergo et virtutes morales acquisitas, et actus earum, in illis præcise sistendo. Respondeo concedendo hanc orationem esse possibilem, et in rigore non esse peccaminosam, quia tacite includit conditionem, vel moderationem, ut talia bona vel prosint, vel saltem non obsint vitæ æternæ, quæ conditio facilius includitur in petitione honorum actuum moralium naturalium, nam illi de se non possunt obesse vitæ æternæ, esto ad illam positive non conducant. Esset tamen ille modus orationis imperfectus, quia non parva imperfectio est sistere in bono non fructuoso ad vitam æternam. Imo existimo talem orationis modum non esse in usu fidelium credentium per sua opera se consequenturos vitam æternam. Nullus enim est qui cupiat bene operari, qui non simul eadem opera sibi ad salutem proficere maxime desideret: unusquisque autem petit id quod desiderat. Quamvis autem demus petitionem talium honorum operum posse fieri, ex illa non licet inferre esse necessariam gratiam ad talia opera sic facta; tum quia illa oratio non est necessaria, et est valde imperfecta; tum etiam quia per illam orationem non id petimus ut bonum gratiæ, sed ut bonum naturæ. Sicut quando petimus pluviam, vel sanitatem, non petimus in rigore gratiam, sed naturalia beneficia. Quod si in eogenere petimus aliquid ultra concursum debitum ex generali providentia, non postulamus illud ut simpliciter necessarium ut effectus fieri possit, sed quatenus potest esse necessarium ut effectus fiat, ut in dicto libro de oratione latius explicui, et ad presentem materiam possunt ibi dicta melius et facilius applicari.

8. *Locupletatur proxima solutio.* — Nam licet gratia vel extraordinarius favor non sit simpliciter necessarius ad singulos actus honestos, considerando rem ipsam secundum se, nihilominus nullus est actus ad quem, ut in individuo recte fiat, non possit esse necessaria gratia, vel specialis favor, secundum divinam præscientiam. Quia licet possit homo cum solo ordinario concursu Dei, hic et nunc elicere bonum actum in quacunque designata occasione, nihilominus contingere potest ut Deus præsciat hominem cum his solis subsidiis non esse bene operaturum, nisi amplius adjuvetur. Cum ergo homo nesciat quando et quomodo

occurrere possit illa necessitas, merito semper petit auxilium etiam tanquam necessarium, ut effectus certo fiat, quia contingere potest ut sit necessarium ad facere, licet non sit ad posse. Eo vel maxime quod, licet homo possit unum vel aliud actum facere, tamen, si cum sola illa generalitate relinquatur, fere semper faciet male, et vix aliquando bene, et ideo etiam intra ordinem naturæ postulandum est auxilium Dei, ut necessarium simpliciter ad bonos mores absolute loquendo, et ad singulos actus contingenter, modo explicato.

9. *Argumentum quartum.* — Quarta ratio adjungi solet, quia ex nostra sententia sequitur non debere nos agere gratias Deo, quando bonum aliquod morale ex solo naturali motivo honesto facimus: consequens est falsum; ergo. Sequela patet; nam pro his quæ in potestate nostra sunt, et nostra virtute facimus, non est quod alteri gratias agamus. Et ideo Patres ex obligatione gratias agendi Deo pro fide, vel bonis moribus, necessitatem gratiæ colligunt, ut patet ex Augustino, epist. 107, et libro de Prædest. Sanctor., cap. 19; et Prosp., lib. 1 de Vocatione gent., cap. 23, alias 8. Minor autem et repugnat gratitudini Deo debitæ pro bonis omnibus, quorum ipse est auctor, et Paulo dicenti 1 ad Thessal. 5: *Sine intermissione orate, in omnibus gratias agite*, et ad Ephes. 5: *Gratias agentes semper pro omnibus.* Et est contra Augustinum, qui lib. 2 Confess., c. 7, non minus gratias Deo agit pro peccatis non commissis, quam pro remissione eorum quæ commisit: *Gratiæ (inquit) tuæ deputo, quod peccata mea tanquam glaciem solcisti; gratiæ tuæ deputo et quæcumque non feci mala, quid enim non facere potui, qui etiam gratuitum facinus amari. Et omnia mihi dimissa esse fateor, quæ mea sponte feci mala, et quæ, te duce, non feci.* Si ergo pro peccato non commisso gratiarum actio debetur, multo magis pro quocumque actu virtutis naturalis, quia hoc aliquod majus beneficium est, quia dum fit, non solum peccatum vitatur, sed etiam aliquid boni fit.

10. *Soluitur.* — Hoc vero argumentum idem fere est cum præcedenti, et ita eandem habet solutionem. Nam gratiarum actio pars quædam est orationis generaliter sumptæ; si vero sit sermo de oratione prout specialiter significat petitionem, sic oratio respicit beneficium faciendum, gratiarum actio jam factum. Nam, ut recte dixit Augustinus supra, dicta epist. 107: *Qui est orandus ut faciat, illi est gratiarum actio reddenda cum fecerit*; et ita Pau-

us interdum pro infidelibus orat, ut convertantur, 2 ad Thes. 3; interdum gratias agit pro his qui jam crediderunt, ad Ephes. 1. Sicut ergo diximus quodcumque opus bonum morale, etiam naturale, esse beneficium Dei, ut gubernatoris naturæ providentis occasiones bene operandi, et ad bonum opus cooperantis, saltem generali concursu, ita pro quocumque simili opere gratiarum actio Deo debita est. Et ita simpliciter negatur sequela argumenti, quia non solum pro bonis gratiæ, sed etiam pro bonis naturæ, gratiæ Deo debentur, quamvis pro prioribus bonis multo ampliores et excellentiores debeantur, ut reete declarat August., lib. 5 de Civit., cap. 31, et lib. 1 Confess., cap. ult. Neque huic gratiarum actioni obstat quod opus fiat sine auxilio gratiæ, satis est enim quod non fit sine auxilio et providentia Dei.

11. *Promovetur solutio.* — Quando autem Sancti ex gratiarum actione colligunt auxilium gratiæ, loquuntur de operibus quæ ad providentiam naturalis ordinis non pertinent, ut est fides, et quæ ad illam consequuntur; quod aperte constat ex Augustino et Prospero in locis citatis. Unde etiam loquuntur de gratiarum actione ex eadem fide profecta, quæ altioris ordinis est, ut dixi, quam quæ pro naturalibus bonis debetur, et lumine naturæ cognosci potest. Cum autem Paulus pro omnibus dicit esse gratias agendas, generaliter loquitur tam de bonis naturæ quam de bonis gratiæ, ut per se manifestum est. Et similiter Augustinus, cum gratiæ deputat omne peccatum non commissum, vel generatim loquitur de gratia, prout comprehendit omne liberale beneficium Dei; non enim tunc contra Pelagianos disputabat, ut eum eo rigore de gratia Dei loqueretur; imo verisimile est. cum illa scripsit, nondum Pelagianos fuisse exortos, quantum colligi potest ex lib. 2 Retract., c. 6. Vel certe specialiter loquitur de illis peccatis quæ post vocationem, et ex illa tanquam ex radice et fonte, non commisit, ut indicant illa verba: *Omnia mihi dimissa esse fateor, quæ te duce non commisi*: ponderanda est enim illa particula, *te duce*, quæ proprie significat peculiare gratiæ regimen, quod a vocatione incipit, ut est vulgare apud ipsum Augustinum.

12. *Tria alia argumenta propugnatur tribus sequentibus capitulis resolvenda.* — Præter hæc argumenta, sunt alia ab incommodis; quia, si morale opus bonum fieri potest sine gratia, etiamsi tentatio urgeat fieri etiam poterit sola libertate, quia tentatio non mutat speciem

actus, nec motivum operandi, sed solum addit aliquam difficultatem, quæ non reddit actum simpliciter impossibilem. Item si vel unus actus bonus fieri potest sine gratia, eadem ratione quilibet actus ordinis naturalis, quantumvis excellens, poterit fieri sine gratia, quia nunquam superat facultatem naturalem voluntatis, licet fortasse difficilius fiat. Denique infertur, qui sua potestate facit unum opus bonum, eadem posse facere omnia, quæ longo tempore occurrunt, sine defectu, quia sicut singula, ita etiam omnia subsunt eidem facultati, et sunt ejusdem ordinis, et non simul, sed sigillatim, et successu temporis occurrunt. Hæc vero argumenta postulant graves quæstiones, quæ in sequentibus tractandæ sunt.

CAPUT XXIII.

UTRUM AD SINGULAS TENTATIONES LEGI NATURALI
REPUGNANTES SUPERANDAS, SINGULARE GRATIÆ
AUXILIUM NECESSARIUM SIT ?

1. *Capitis materia.* — In superioribus simpliciter locuti sumus de bonis actionibus moralibus, et indefinite diximus posse interdum sine auxilio gratiæ fieri, quod maxime loem habere potest ubi peculiaris difficultas in opere non invenitur, et ideo nunc inquirendum superest quid dicendum sit quando illa occurrit. Non loquimur autem de difficultate quæ est quasi per se in actu qui naturæ ordinem transcendit, et supernaturalia præcepta concernit (nam hic solum de his quæ ad naturæ ordinem pertinent disputamus), sed agimus de difficultate quasi per accidens ex tentatione occurrente proveniente. Est enim tentatio, quoties eo tempore quo bonum faciendum est, occurrat motivum aliquod humanum ab illo bono animum avertens, vel, cum malum vitandum est, instat aliquod incentivum, quod ad illud faciendum inducit, et quia hæc omnia contingenter et accidentarie occurrunt, ideo difficultatem hanc accidentariam voco. Quæ considerari potest, vel in quocumque actu bono determinate in quovis gradu occurrat, vel prout in aliquibus specialiter invenitur cum magno excessu seu gravitate, vel denique prout in multis actibus per longum temporis cursum inveniri potest. Et in universum omnis difficultas boni operis, quæ oritur ex concupiscentia, et corruptione naturæ lapsæ, potest dici per accidens, quia revera est actui extrinseca, et aliquo modo ex tentatione provenit. Aliquando vero crescit ex actus excel-

lencia, ut in amore super omnia Dei auctoris nature, vel in exponenda vita pro republica, et de his omnibus dicemus; a generalioribus autem incipimus, ut expeditior et facilius sit doctrina.

2. *Notatur primo.*— *Tentatio levis ac gravis, quæ.*—Est igitur imprimis animadvertendum inter tentationes, quasdam esse leves, alias autem graves seu gravissimas, et vehementes. Non dicuntur autem graves ex materia, id est, quia inclinant ad peccatum leve, vel grave, quia hæc distinctio (quamvis alias dari posset) in præsentibus non deservit; dicuntur ergo tales ex modo, juxta illud Pauli 1 Cor. 10: *Tentatio vos non apprehendat, nisi humana: fidelis autem Deus, qui non patietur vos tentari supra id quod potestis*, ubi tentationem levem (juxta Chrysostomum, Theodoretum et Theophylactum) vocat humanam, id est, homini fragili attemperatam, et indicat esse alias graviores et gravissimas, cum ait Deum non permittere ut sint supra vires. Igitur tentatio levis dicitur quæ, vel ex parte intellectus parvam vel inefficacem habet suasionem, vel ex parte appetitus debilem inclinationem, vel etiam est levis quæ ad momentum seu brevissimo tempore durat, quamvis alioqui intensa seu vehemens videatur; gravis autem dicitur quæ pertinaciter suadet multo tempore, constanter ac moleste, poteritque hoc titulo gravis censi, etiamsi pro singulis temporibus non sit admodum vehemens, dummodo aut suasio sit per se magna, aut cum passione aliqua et inclinatione sit conjuncta. Hi autem gradus tentationum non possunt certa regula vel gradu definiri, sed prudenti arbitrio pensandi sunt, et maxime considerandi sunt per comparisonem ad eum qui tentatur. Nam aliqua tentatio erit gravis uni, quæ alteri esset levis, propter varias eorum complexiones, ingenia, mores, vel doctrinam, quæ omnia ponderanda sunt.

3. *Notatur secundo.*— *Tentandi et tentantium varietas.*—Præterea, modi tentationum varii sunt; communiter vero ad tria genera reducuntur, quæ a tribus animæ inimicis proveniunt, carne, mundo, et dæmone: ex quibus prima dici potest ab intrinseco, aliæ duo ab extrinseco, scilicet, secunda ab hominibus, tertia a dæmonibus: ab Angelis enim Sanctis vel Deo nulla est tentatio inducens ad malum, teste Jacobo, c. 1; sed sola illa tentatio, quæ probationis vel tribulationis dicitur, a Deo est. Igitur tentatio quædam est veluti ab intrinseco, et quasi connaturalis, ut est illa quæ nascitur ex complexione et appetitu hominis,

mediis tantum his sensibilibus objectis, quæ vitare non possumus, de qua Paulus: *Sentio aliam legem in membris meis repugnantem legi mentis meæ*, etc. Alia est tentatio quæ a mundo esse dicitur, id est, quæ nascitur ex consortio aliorum hominum per mala consilia, vel prava exempla. Tertia denique oritur ab extrinseco, ut a dæmone, quæ dici potest quodammodo ultra, vel præter naturam, quia hoc bellum cum dæmonibus non est mere naturale, sed ex altiori providentia, aut permissione divina introductum. De quo Paulus loquitur dicens: *Non est colluctatio nobis adversus carnem et sanguinem*, etc., ad Ephes. 6.

4. *Notatur tertio.*— *Tentationes vincendi modi varii.*—Deinde oportet præmittere variis modis posse tentationem vinci. Primo, non solum non peccando, sed etiam proficiendo aliquo modo in ordine ad salutem et vitam æternam, qui est proprius victoriae modus, ut notarunt D. Thom. in 2. dist. 28, q. 1, a. 2, ad 6, et ibi Bonav. et Richar., qui volunt hanc solam esse propriam victoriam tentationis, et illam solam hac voce debere significari, juxta Aug. lib. 21 de Civ., c. 16, dicentem: *Tunc victa vitia deputanda sunt, cum Dei amore vincuntur*. Secundo modo contingit superari tentationem, nihil omnino peccando, neque in ordine ad salutem proficiendo, sive quia homo negative se habet suspendendo actum (ut quidam fieri posse existimant), sive, quod magis morale est, eliciendo actum ordinis naturalis propter aliquam honestatem moralem tentationi contrariam, quod D. Thom. supra dicit proprie esse resistere potius quam vincere, quo modo loquendi, brevitatis causa, utemur, licet communiter uterque modus superandi tentationem victoria ejus vocetur. Est vero tertius modus vitandi unius peccati tentationem, incidendo in aliud peccatum, ut cum quis vincit tentationem avaritiæ ex affectu luxuriæ, aut quid simile. Et de hoc tertio modo nulla est controversia, quia Deus non juvat ad peccandum, et quia illa revera non est victoria peccati, quia non vitatur, ut vitetur malitia, sed ut ad aliud pravum obtinendum conducat. Unde optime dixit Aug., l. 3 cont. duas epist. Pelag., c. 4: *Cardinalis cupiditas qua peccatum augetur, cupiditate alia non sanatur*. De primo vero modo vincendi tentationem controversia olim fuit cum Pelagianis, ut jam dicam, nunc vero nulla est inter Catholicos, igitur de secundo modo est noster in præsentibus sermo.

5. *Notatur quarto.*— *De tentatione perturbante omnino judicium non agitur.*— Unde

supponendum est ulterius quæstionem solum procedere, quando tentatio non perturbat rationem, ita ut impediatur libertatem sufficientem ad peccatum mortale. Nam si tanta sit perturbatio rationis, ut libertas tollatur, contingere quidem poterit ut homo non possit vitare illum actum materialem, ad quem tentatio inclinatur, juxta doctrinam D. Thomæ 1. 2, quæst. 80. a. 3. Tunc autem tollitur potentia peccandi, et non habet locum quæstio. Interdum vero contingit auferri libertatem perfectam, seu necessariam ad peccandum mortaliter, relinqui tamen aliquam, quæ satis sit ad peccatum veniale, quod ex subreptione vocant, et tunc quodammodo aufertur potestas saltem moralis vincendi omnino tentationem illam, et ideo illos indeliberatos actus hic non consideramus, sed tantum illos quos, non obstante tentatione, potest animus cum sufficienti deliberatione vel committere, vel vitare.

6. *Notatur quinto de cujus gratiæ necessitate procedat quæstio.* — Denique cum de necessitate gratiæ inquirimus, non limitamus sermonem ad gratiam habitualementem et sanctificantem: quia inter catholicos extra controversiam est, hanc gratiam non esse necessariam ad singulas tentationes vincendas. Nam sicut supra ostendimus posse hominem sine hac gratia aliquod bonum opus facere, ita est certum posse aliquam tentationem vincere, nam est eadem ratio, ut etiam ex dicendis constabit, et ideo quæstio de proprio gratiæ auxilio proposita est.

7. *Errorem Pelagii in hac materia quoad duo constat fuisse damnatum.* — Fuit autem in hac materia error Pelagii, qui absolute asseruit victoriam tentationum non adjutorio divino, sed libero arbitrio esse tribuendam. Qui error simpliciter damnatus fuit in Concilio Palæstino, et in Milevitano, cap. 3, et Arausiano, c. 9, ut in proleg. 5 satis ostensum est. Quo autem sensu damnatus fuerit, inter catholicos disputatur. Duo vero sunt extra controversiam: unum est errasse Pelagium, quia putavit victoriam quarumcumque tentationum per quodcumque vitæ tempus, et, ut loquitur Hieronymus, dialog. 2, cum absoluta inpeccantia, esse in potestate solius liberi arbitrii. Secundum est, quia ponebat illam victoriam non solum quantum ad carentiam culpe, sed etiam quantum ad fructum salutis, ex ceteris viribus liberi arbitrii. Quoad hæc ergo duo, certum est damnatam esse illum hæresim, et de primo puncto dicemus capite sequenti. Pro secundo vero faciunt adducta in c. 13, et

in libro sequenti jacienda sunt fundamenta illi errori contraria; nunc opiniones inter catholicos tractandæ sunt.

8. *Inter catholicos 5 opiniones affirmantur.* — Prima opinio est, hominem sine adjutorio gratiæ nullam omnino, etiam minimam, tentationem posse ita vincere, quin aliquo modo peccet. Ita tenent Gregorius et omnes qui negant posse fieri bonum opus sine auxilio gratiæ, et est plane consequens, quia vincere hoc modo tentationes, bonum opus est, quia sine aliquo opere seu positivo actu moraliter non fit. Unde si victoria sine ulla culpa obtinetur, oportet ut per actum bonum fiat, vel fieri possit, quia vel non datur actus indifferens in individuo, vel per illum solum raro vincitur tentatio ad peccatum inducens. Deinde sæpe tentatio est contra affirmativum præceptum, quæ non potest vinci sine actu consentaneo præcepto; ergo si quis non potest facere actum illum simpliciter, et sine ulla tentatione spectatum, multo minus poterit facere urgente tentatione. Itaque illi auctores consequenter loquuntur. Refertur etiam pro hac parte Petrus Soto in Instit. Sacerd., lect. 16 de Pœnit.; sed ibi de hac re non disputat; unum autem verbum quod incidenter dicit, eundem sensum habet quem sententiæ Patrum statim referendæ, et in sequentibus, tractando de amore Dei, id explicabimus. Adducitur etiam Abulens. in c. 19 Matth., q. 178, sed ille disputat hanc materiam late a quæst. 174 per sequentes, et sine dubio eandem doctrinam docet, quam infra trademus: interdum vero communem cursum et auxilium providentiæ generalis lato modo vocat gratiam, quia liberaliter datur, distinguendo tamen illam ab speciali gratia, quæ docetur necessaria ad salutem, ut supra etiam notavimus. Cardinalis etiam Bellarm. videtur huic sententiæ annuere lib. 5 de Liber. arbit., c. 7, licet prius concesserit posse fieri actum bonum moralem sine gratia; sed ipse alia via procedit, de qua in fine dicemus.

9. *Arguitur pro opinione hac, primo ex Scriptura.* — Fundamenta hujus sententiæ sunt ejusdem generis cum his quæ adduximus in precedenti controversia. Nam imprimis afferuntur loca Scripturæ in quibus victoria tentationum Deo adscribitur; Psal. 27: *In te eripiar a tentatione*; et Psal. 29: *Avvertisti faciem tuam a me, et factus sum conturbatus*. Item illa in quibus oratur Deus pro victoria tentationum, quæ oratio est frequentissima, præsertim in Psalmis, et Christus Dominus

illam posuit in sua formula orandi, Matth. 5 : *Et ne nos inducas in tentationem.* Quam exponens Cyprian. de Orat. Dominica, dixit id fecisse Christum ne possit homo in aliquo superbi- re. Unde Luc. 22, et Matth. 26, monuit idem Dominus : *Vigilate et orate, ut non intretis in tentationem.* Quæ verba expendens Hieronym. contra Pelag., dialog. 2, ait : *Si libertas arbitrii satis esset ad vincendam tentationem, non fuisse Christum dicturum : Vigilate et orate, sed : Attendite et resistite per liberum arbitrium.* Præterea de tentationibus carnis dicit Paulus Roman. 7 : *Sentio aliam legem in membris meis; et infra : Quis me liberabit a corpore mortis hujus? Gratia Dei per Jesum Christum.* De tentationibus mundi solet intelligi illud 1 Corinth. 10 : *Fidelis Deus, qui non patietur vos tentari supra id quod potestis, sed faciet cum tentatione proventum, ut possitis sustinere,* utique tyrannorum et mundi persecutiones, et tentationes ; et sic etiam dicitur 1 Joan. 5 : *Hæc est victoria quæ vincit mundum, fides nostra.* De tentationibus vero dæmonis dicitur 1 Pet. 4 : *Cui resistite fortes in fide;* et ad Ephesios 6 : *Induite vos armaturam Dei, ut possitis stare adversus insidias diaboli,* etc.; et infra : *In omnibus sumentes scutum fidei, in quo possitis omnia tela nequissimi ignea extinguere.*

10. *Secundo, arguitur ex Pontificibus et Conciliis.*— Secundo, in eandem sententiam allegantur Pontifices et Concilia : nam Innocent. 1, in epist. 25 ad Concilium Carthaginens., et 26 ad Milevitano., alias 91 et 93 inter epistolas August., inter alia inquit : *Nisi magnis precibus gratia in nos implorata descendat, nequaquam terrenæ labis et mundani corporis vincere conemur errores, cum pares nos ad resistendum, non liberum arbitrium, sed Dei solum facere possit auxilium ;* et infra de Christo Domino ait : *Quamvis hominem redemisset a præteritis ille peccatis, tamen sciens iterum posse peccare, ad reparationem sibi, quemadmodum posset illum et post ista corrigere, multa servavit, quotidiana præstans illi remedia : quia nisi freti confisique nitamur, nullatenus vincere poterimus errores. Necesse est enim ut quo auxiliante vincimus, eo iterum non adjuvante vincamur.* Quæ verba allegat Cælestinus in sua epistola, cap. 6, ex eis colligens neminem sine Dei adjutorio idoneum esse ad vincendas quotidianas carnis et dæmonis tentationes, et cap. 9 cum dixisset *superbum esse, ut quidquam sibi humana natura præsumat,* ut maxime hoc propter victoriam tentationum dictum

intelligatur, subjungit loca Pauli allegata, Ephes. 6. et Rom. 7. Idem Concilium Carthaginense, in epistola ad Innocent., 90 apud Augustinum, de Pelagianis dicit, e medio tollere illam partem orationis Dominicæ : *Et ne nos inducas in tentationem,* si absque auxilio gratiæ tentationes vinci possunt. Idem sumi potest ex Concilio Milevitano cap. tertio, quatenus damnat dicentes gratiam non dari in adjutorium ad cavenda peccata, nam peccata non caventur, nisi tentationes vincendo. Sic etiam Conc. Arausican., cap. 4, dixit : *Divini esse muneris, quoties pedes nostros a falsitate et injustitia tenemus, quod profecto facimus quoties alicui tentationi resistimus ;* et cap. 14 : *Nullus miser de quacumque miseria liberatur, nisi qui Dei misericordia prævenitur.* Concilium item Palæstinum damnavit propositionem Cælestii, quod victoria peccatorum, quando illa non committimus, non sit ex gratia, sed ex libero arbitrio.

11. *Tertio, ex Patribus.*— Tertio his accedunt testimonia Patrum, et ex antiquioribus Cyprianum et Hieronymum jam retulimus, quibus addo Basilium in Moral., regul. 62, c. 3 et 4, in singulis tentationibus ait gratiæ auxilium esse postulandum ; et de eodem argumento habet integram homiliam, post librum de Baptismo, quod sine divina virtute et gratia resistere Satanæ non possit quisquam. Item Chrysostomus, licet alias multum tribuat libero arbitrio circa operationem moraliter honestam, de victoria tentationum dicit totam esse tribuendam Deo, homil. 62 ad Popul. ; et homil. 24 in 1 ad Corinth., interrogans ad quas tentationes sit necessaria gratia, respondet : *Ad omnes, ut ita dicam.* Et Theophylact. ibi : *Quævis tentatio vires nostras exuperat, nisi ille auxilietur nobis.* Item Ambros., in Ps. 43, circa id : *Quoniam humiliasti nos in loco afflictionis : Quis (inquit) est tam fortis ut nequaquam in tentatione morceatur, nisi Dominus adjutor ei assistat.* Quod majori cum exaggeratione dixit Augustinus sermone decimo tertio de Verbis Apostoli, c. 9 : *Hæc est (inquit) malitia nostra, in hoc agone cum confligimus, Deum habemus spectatorem ; in hoc agone cum laboramus, Deum poscimus adjutorem ; si enim non ipse nos adjuvat, non dico vincere, sed nec pugnare poterimus.* Idem late confirmat epist. 89, quæst. secunda, princip., urgens varia Scripturæ loca, præcipue illum 1 Corinth. 10 : *Faciet cum tentatione proventum, ut possitis sustinere. Ut quid (inquit) dixit Deum facere, si hoc sine ipsius adjutorio in nostra*

est potestate? Idem habet cum aliis Patribus Concilii Milevit., in epist. 82 ad Innocent., et cum aliis quatuor Episcopis, epist. 63 ad eundem, ubi *ad tentationes concupiscentiasque vincendas*, ait esse necessariam gratiam, qua per subministrationem Spiritus et occultam misericordiam conferat ille qui dat incrementum, Deus; et ibidem declarat hanc gratiam esse necessariam ad singulas tentationes vincendas. Et quod gravius est, in epist. 106, dicit ad vitandum peccatum nihil voluntatis arbitrium valere sine gratia. Eandemque doctrinam repetit lib. 1 de Gratia Christi, cap. 26, 27 et 47; et lib. 1 de Perfect. justitiæ, respons. 9, et lib. 50 Homil., hom. 23, et in Soliloq., c. 15 et 16, ubi eleganter describit modum divini auxilii in vincendis tentationibus; et cum illo Prosper contra Collator., præsertim cap. 35; et Paulus Orosius, lib. de Liber. arbitr., contra Pelag.; Greg., lib. 9 Moral., c. 29, alias 37, et in Ps. 3 Pœnit.; Cyrill., lib. 9 in Joan., c. 45, in fine.

12. *Rationes pro eadem opinione summam attinguntur.* — Rationes vero pro hac sententia sumuntur, vel ex necessitate orationis, vel ex gratiarum actione quæ Deo agenda est in victoria cujuscumque tentationis, etiam minimæ, vel ex arrogantia, quia alias haberet homo unde gloriari posset. Item quia si homo per se posset aliquam tentationem vincere, posset etiam quamlibet licet gravem, imo et omnes quovis tempore, quia omnes sunt ejusdem ordinis, et omnes vincuntur per actus ejusdem rationis, et ex illis circumstantiis solum additur difficultas, quæ non reddit effectum impossibilem, sed difficilem. In explicanda vero propria ratione ex qua hæc necessitas oritur, invenitur diversitas inter auctores quoad tres modos de bonis actionibus supra explicatos, quos hic non est necesse repetere. Additur vero hic quartus modus, qui hoc modo explicatur. Nam si tentatio est gravis, eo ipso vinci non potest sine gratia; si vero est levis, hoc ipsum est gratia Dei; ergo semper victoria tentationis est gratia, vel consequenter (ut sic dicam) vel antecedenter facta comparatione ad tentationem. Et ideo dixit Ambros. lib. 4 in Luc., circa id: *Et consummata omni tentatione: Non debemus tentationes sæculi pro malis timere, sed magis rogare, contemplatione conditionis humane, ut eas tentationes subeamus, quas ferre possimus.* Et huic etiam spectat dictum August. cap. superiori tractatum, ex lib. 2 Conf., cap. 7, gratiæ Dei tribuendum esse omne peccatum quod non committimus; quia si ejus occasio, vel tentatio occurrit, gratia Dei

facit ut vincatur; si vero non occurrit, gratia Dei facit ut non veniat; et lib. 10, c. 31: *Ebriosus* (inquit), *nunquam fui, sed ebriosos a te sobrios factos ego novi; ergo a te factum est ut hoc non essent qui nunquam fuerunt, a quo factum est, ut hoc non semper essent qui fuerunt.* Idem, lib. 50 Homil., in 23, c. 6: *Hic multa commisit, et multorum debitor factus est. Ille gubernante Deo pauca commisit. Cui deputat ille quod dimisit, huic et iste deputat quod non commisit. Adulter non fuisti in illa tua vita præterita plena ignorantia, nondum illuminatus, nondum bonum malumque discernens, nondum credens in illum qui te nescientem regebat. Hoc tibi dicit Deus tuus: Regebam te mihi, servabam te mihi. Ut adulterium non committeres suasor defuit: ut suasor deesset ego feci. Locus et tempus defuit: et ut hæc deessent, ego feci. Affuit suasor, non defuit locus, non defuit locus, non defuit tempus, ut non consentiret, ego terrui. Agnosce ergo gratiam ejus, cui debes et quod non admisisti. Mihi debet iste quod factum est, et dimissum vidisti, mihi debes et tu quod non admisisti. Nullum est enim peccatum quod fecit homo, quod non possit facere alter homo, si desit rector, a quo factus est homo.*

13. *Secunda opinio negativa et vera.* — Nihilominus dicendum est non esse necessarium speciale gratiæ auxilium, ad quaecumque tentationem in particulari vincendam, quia homo sua libertate utens potest vincere singulas tentationes seu quancumque illarum secundum se spectatam. Hanc assertionem in specie docent Bonavent. in 2, dist. 28, art. 2, quæst. 2; Ægid., dub. 4 et 5, § *Ad primum*: et ibi etiam Gabriel, et melius lect. 78 in canonem, dub. 5; Henricus, quodlib. 5, q. 20; et ex modernis Soto 1, lib. de Natur. et Grat., cap. 21 et 22; et Vega, opuse. de Justificat., quæst. 12 et 13; Medina in 1. 2, locis citatis, et quæst. 10, art. primo, eamque supponit Ruardus, Stapletonius, et alii capite sequenti citandi.

14. *Locus ex Paulo citari solitus pro hac sententia non urget.* — Probari potest primo ex illo Pauli 1 ad Cor. 10: *Fidelis Deus, qui non patitur vos tentari ultra id quod potestis*, quia nimirum succurrit per gratiam, ubi natura non sufficit; ergo supponit Paulus aliquid nos posse, nam dicit: *Ultra id quod potestis.* Ergo saltem minores et leves tentationes possumus aliquo modo superare, saltem non consentiendo. Sed hic locus non concludit, quia Paulus non dicit ultra id, quod potestis per li-

berum arbitrum : unde optime intelligitur ultra id quod potestis ejusdem adjutorio; sicut Concilium Trident., cum, sess. 6, c. 11, dixit: *Deus impossibilia non jubet, sed jubendo monet, et facere quod possis, et petere quod non possis, et adjutus ut possis*, non supponit in primo membro hominem per se et sine gratia posse facere aliquid quod jubet Deus : nam quod ait, *Facere quod possis*, potest optime intelligi per gratiam aliquam jam acceptam, quæ in principio solet dari parva, ut per illam possimus majorem mereri, seu impetrare. Et hoc videtur sentire Concilium, cum supponat hominem jam esse in statu in quo possit petere et impetrare, quod sine aliqua gratia, saltem fidei et spei, facere non potest. Et in hoc sensu locutus est Augustinus cujus est illa sententia, libro de Natura et Grat., c. 43. Ita ergo recte exponi potest Paulus loco allegato, sumique potest ex Prosper. contr. Collat., cap. 35. Quapropter ex Scriptura non potest efficaciter probari assertio, quia licet Scriptura dicat posse hominem vincere tentationem, numquam declarat posse aliquando id facere per solas vires liberi arbitrii. Licet ex alio loco ad Rom. 1 possit id probabiliter colligi, ut capite seq. notabimus.

15. *Patres atque Concilia huic sententiæ non adversantur.* — Similiter neque ex Conciliis vel Patribus potest sufficienter probari. Potest tamen efficaciter probari non esse contra eorum doctrinam, imo ab eis interdum indicari. Primum probatur ex Bulla sæpe allegata Pii V et Greg. XIII; nam inter propositiones Michaelis Baii trigesima est: *Non solum fures hi sunt et latrones, qui Christum viam et ostium veritatis et vitæ negant, sed et quicumque aliunde quam per Christum in viam justitiæ, hoc est, ad aliquam justitiam conscendi posse dicunt, aut tentationi ulli sine gratiæ ipsius adjutorio resistere hominem posse, sic, ut in eam non incidat, aut ab ea superetur.* Hæc ergo propositio inter alias damnatur a dictis Pontificibus, in quo aperte declarant et definiunt, sententiam illi assertioni contrariam, scilicet, posse liberum arbitrium resistere alicui tentationi sine speciali gratia, ad Pelagianismum nullatenus pertinere. Quamvis enim dici possit Pontifices non damnasse assertionem propter doctrinam, sed propter modum proponendi illam et exaggerationem, quidquid de hoc sit (quod non constat), hoc satis est ut Pontifices declaraverint sententiam propositam nullatenus ad Pelagianum errorem declinare. Nam si hæc doctrina

ad Pelagianismum aliquo modo pertineret, injuriosa esset gratiæ Christi, ac proinde non immerito dici posset fur et latro qui illam doceret; ergo Pontifices damnantes hanc censuram, evidenter affirmant in hac doctrina nullam esse suspicionem Pelagiani erroris. Ergo consequenter etiam docent, Concilia et Patres, loquentes contra Pelagium, non esse ita intelligendos ut huic sententiæ contrarii sint. Idemque consequenter est de Scripturis dicendum, majori ratione. Et hoc satis est ad magnam hujus sententiæ probabilitatem, nam seclusa auctoritate contraria, ratio sufficienter illam convincit, ut statim videbimus.

16. *Imo illam indicant.* — Accedit, ut dicebam, quod ipsimet Patres aliis locis generales locutiones moderantur, et hanc sententiam indicant. Et imprimis ponderari potest modus ille loquendi Chrysostomi supra citati, ex hom. 24 in 1 ad Corinth., videlicet: *Ad omnes tentationes, ut ita dicam; nam illa correctio, ut ita dicam, posita videtur ad declarandum illud esse dictum cum quadam exaggeratione, quia pauca et levia potest homo in hoc genere, et, quod amplius est, sine victoria in ordine ad salutem æternam, nisi adsit gratia.* Ita invenio locum hunc ab aliquibus ponderatum, et fortasse aliqua translatio antiqua (originalem enim linguam consulere non potui) illo modo vertebat. Gentianus autem aliter illa verba interpretatur, scilicet, ad omnes tentationes, ut semel dicam, et ita potius illa verba continent absolutam affirmationem et distributionem, eodemque modo videtur illa legisse, et imitatus esse Theophylactus. Addit autem statim Chrysostomus alia verba, quibus magis suam mentem declarat; distinguit enim ex mente Pauli duplices tentationes, leves, quas, ut ipse exponit, Paulus humanas vocat, et graves, quæ nostram superant potestatem: ita de his posterioribus absolute sentit, non posse vinci sine auxilio gratiæ; de humanis vero dicit: *Neque humanas licet facile ferre absque divino auxilio.* Significans in his, in rigore, non deesse potestatem libero arbitrio ad illis aliquando resistendum. Præterea Hieronymus, lib. 3 contra Pelagianos, qui dicebatur post peccatum mansisse in homine libertatem, ut ad bonum et malum possit extendere manum, ipse respondet: *Hoc et nos dicimus, posse hominem non peccare, si velit, pro tempore, pro loco, pro imbecillitate corporea, quamdiu intentus est animus, etc.* Et infra: *Humana conditio, si paululum se remiserit, discit fragilitatem suam, et multa se non posse cognoscit.* Ubi sentit non

omnino nihil posse liberum arbitrium: nam licet multa non possit, tamen pro tempore et loco aliquid leve et fragilitati accommodatum illi concedit, sicut inferius iterum repetit: *Hoc est quod tibi in principio dixeram, in nostra esse positum potestate, vel peccare, vel non peccare, etc*; et infra: *Sed hoc pro modo, et tempore, et conditione fragilitatis humanæ, nec, quia ad breve possum, cogis me, ut possim jugiter.* Ex Augustino etiam ponderari potest quod libro de Perfect. justit., cap. 2, ratiocin. 3, ait: *In natura vitiosa parum esse ad non peccandum voluntatis arbitrium.* Ubi *parum* dixit, quasi limitans quod alibi dixisse videtur, liberum arbitrium hominis lapsi ad non peccandum nihil valere: nam hoc non de singulis momentis, occasionibus et actibus intelligendum est, sed simpliciter ad non peccandum, id est, ad servandam innocentiam. Alioqui vero ait *parum* valere, quia ad summum in uno vel alio actu potest tentationem levem ita vincere, ut non peccet.

17. *Concluditur confirmatio ex Pontificibus citatis.* — Atque hinc potest assertio confirmari, quia Pius V et Gregorius XIII etiam rejiciunt vigesimam-octavam propositionem Baii, *liberum arbitrium sine adjutorio gratiæ non, nisi ad peccandum, valere.* Ad quam videtur proxime accedere qui negat posse liberum arbitrium aliquam levem tentationem vincere, quia vix occurrit tempus vel occasio operandi cum perfecta libertate, ubi necesse non sit aliquam vel levem tentationem vincere, ut opus liberum honeste et sine ulla malitia fiat. Quia vel dæmon perpetuo vigilat, vel materia virtutis seu operationis repugnat concupiscentiæ, vel certe quia fere semper occurrit finis aliquis humanus movens ad operandum propter ipsum potius quam propter virtutem. Si ergo per originale peccatum tam infirmum factum fuisset liberum arbitrium, ut nullam vel minimam tentationem naturali virtute vincere posset, utique ad non peccandum, non esset vitiosa hominis natura, sed extincta, ut in simili argumentatur Prosper contra Collat., c. 22. Ut ergo simul cum Pelagianis Lutheranorum extremum vitemus, convenienter dicitur, sicut non est extinctum liberum arbitrium quoad bonum operandum, ita ut nullum bonum naturaliter facere possit, nec quoad malum vitandum, ut non nisi peccare possit, ita neque est extinctum quoad resistendum tentationibus, ideoque aliqua saltem levis vi suæ libertatis vincere potest.

18. *Prima ratio pro eadem opinione negante.*

— Ultimo possumus argumentari ratione a priori, quæ eadem fere est quæ de bona operatione, et dupliciter etiam potest explicari. Primo generatim et ostensive, quia victoria unius tentationis levis, prout præcise necessaria est ad non peccandum, seu non consentiendum, aut resistendum tentationi, solum addit supra actum bonum nonnullam difficultatem moralem; propter illam autem non est simpliciter necessarium auxilium gratiæ: ergo simpliciter ille effectus cadit sub potestatem physicam et moralem liberi arbitrii cum solo concursu generali. Consequentia nota est. Major declaratur, quia occurrente morali occasione faciendi eleemosynam, siue ulla tentatione ex parte dæmonis, vel alienius hominis, neque etiam ex interna concupiscentia, ut facile continget in homine naturaliter propenso ad liberalitatem et compassionem, tunc bonus actus dici potest non solum possibilis, sed etiam facilis, secundum rectam rationem et libertatem arbitrii. Addamus ergo tali homini proponi finem faciendi illud opus, ut videatur ab hominibus, quæ est tentatio quædam non retrahens ab opere, sed inclinans ut male fiat, quæ inclinatio non solum non cogit, sed etiam potest esse valde remissa; ergo solum potest nonnullam et parvam difficultatem bene operandi facere; ergo tentatio solum addit actu bono nonnullam difficultatem. Et quod in hoc exemplo declaratum est, intelligi potest in tentatione, quæ fit per contrariam suasionem, vel per aliquam repugnantiam appetitus, quæ parva interdum esse potest, et nihilominus est aliqua tentatio parvam adjungens difficultatem.

19. *Progreditur ratio.* — Quod vero hæc difficultas (quod in minori sumebamus) non necessario postulet auxilium gratiæ ut vincatur, præcise quoad resistendum tentationi, probatur, quia hæc resistentia sufficienter fit, vel eodem actu bono naturali, quem voluntas potest facere sua facultate naturali, vel nolendo extrinsecum finem pravum occurrentem, quod non minus est in libera facultate voluntatis. Et ex parte intellectus potest etiam esse naturalis consideratio confortans voluntatem adversus oppositam suasionem, vel repugnantiam. Neque in tali resistentia intervenit aliquid supernaturale, vel in substantia, vel in modo, quia supponimus ex nullo motivo supernaturali id fieri, quo posito nullus modus supernaturalis ibi cogitari potest, quia sola libertas actionis, cum consideratione ad illam necessariam, non excedit naturalem modum operandi, ut per se notum est, et ex dictis de

operatione boni actus satis convincitur. Denique parva illa difficultas parum etiam obesse potest, quia multo majores difficultates solet homo vincere sua libertate, et quia honestas actus tentationi contrarii attente considerata potest plus movere quam levis tentatio; potest autem saltem pro brevi tempore ita considerari honestas non obstante tentatione, cum levis tentatio fere nihil perturbet.

20. *Secunda ratio impugnans modos omnes fundandi necessitatem de qua disputatur.* — *Impugnatur primus modus.* — Secundo, argumentari possumus discurrendo per omnes modos quibus hæc gratia, necessaria ad vincendam quaecumque tentationem, explicari potest. Nam imprimis tres modi supra tractati de actibus bonis, eisdem rationibus refelluntur. Nam quod attinet ad motionem determinantem, quam Gregorius ponebat, profecto argumenta contra illam facta eodem modo in presenti urgent. Quia loquimur de resistentia tentationis libera, et cum dominio voluntatis; ostendimus autem, posita tali determinatione, jam non libere operari vel resistere eum qui illam recipit, et e converso qui non recipit illam non posse resistere, si ad resistendum illa necessaria est. Præterquam quod nulla ratio talis determinationis, quæ sit specialis pro tempore levis tentationis, nec auctoritas in qua fundetur, reddi potest. Unde etiam concluditur, ad hunc effectum non esse necessariam gratiam per modum principii physici adjuvantis voluntatem, per se efficiendo eum illa, quia ille effectus non est proprius alicujus virtutis per se infusæ; ergo neque est ab aliquo speciali auxilio, seu principio, quod alicujus virtutis vel habitus infusi activitatem suppleat; ergo nulla ratio relinquitur ob quam novum principium physicum additum voluntati necessarium sit, etiamsi illud non ponatur tanquam determinans voluntatem ad exercitium actus.

21. *Impugnatur secundus.* — Secundo, dici potest necessaria gratia moraliter adjuvans voluntatem, quæ sit superioris ordinis, et consistat, vel in inspiratione supernaturali quoad substantiam, vel excedat vires intellectus et voluntatis, vel causarum omnium a quibus naturaliter excitari possunt. Et hic etiam modus rejicitur, quia licet hæc gratia possit esse utilissima, et in urgentibus occasionibus necessaria, ut statim dicam, tamen ubi levis est tentatio, non est tanta necessitas, quia inest in libertate absoluta potestas, quæ illo tempore sine magna difficultate possit ad actum reduci, cui potestati repugnat illa necessitas; quia ne-

cessitas non opponitur difficultati, præsertim parvæ, sed impossibilitati, unde necessitas excludit potestatem ad oppositum, etiam cum nonnulla difficultate; ergo si, absque tali auxilio, voluntas pro sua libertate est physice et moraliter potens ad operandum, non obstante illa difficultate, profecto tale auxilium non est necessarium; vel si illud est necessarium, voluntas non est potens, cujus contrarium probat ratio facta. Nam sine illa difficultate parvæ tentationis voluntas potest cum effectu facere talem actum, ut supra de bono actu simpliciter sumpto ostensum est; sed illa parva difficultas non facit impossibile id quod antea erat possibile; ergo.

22. *Impugnatur tertius.* — Tertius modus est de gratia, quæ dicitur esse per modum congruæ cogitationis. Sed hic etiam refellitur, quia illa cogitatio, ut supra late argumentatus sum, non semper excedit generalem ordinem providentiæ, nec est vera gratia de qua Sancti et Concilia loquuntur. Hic vero specialiter considerandum est etiam auctores contrariæ sententiæ negare non posse, cogitationem sufficientem ad vincendam talem tentationem posse sine gratia haberi; alioqui per solam potestatem naturalem, et seclusa gratia, non haberet quis libertatem ad peccandum, quia non haberet sine gratia potestatem ad resistendum tali tentationi; ergo simpliciter verum est sine gratia alicujus specialis cogitationis habere hominem potestatem ad vincendam tentationem. Sicut in supernaturalibus, qui gratiam habet sufficientem ad vincendam tentationem, simpliciter potest illam vincere, etiamsi non habeat efficacem; ergo idem est in presenti cum proportione; ergo si illa sufficientia non est per gratiam, sed per naturam, absolute potest homo vincere talem tentationem. Quod autem de facto non vineat illam tentationem, nisi habeat cogitationem congruam, cum illa congruitas sit omnino consequens, et pendens ex solo usu naturalis libertatis, et alioqui non sit necesse ut illa cogitatio proveniat ex speciali Dei providentiâ, sed ex generali cursu naturalium causarum provenire possit, non solum non pertinet ad speciale auxilium gratiæ, verum etiam nec ad speciale beneficium gratiæ, sed naturæ. Ergo neque isto modo vere defenditur necessitas auxilii gratiæ ad vincendas singulas tentationes.

23. *Impugnatur quartus de tentatione levi.* — Quartus modus, quo victoria tentationis semper dicitur tribuenda gratiæ, est, quia semper est beneficium gratiæ quod tentatio sit

levis, vel non gravior. Nam si Deus permitteret, dæmon urgentius tentaret; ergo quod Deus id non permittat, beneficium gratiæ est: ergo illi debet imputari victoria; ut si, duobus inter se pugnantibus, tertius impediatur alterum illorum ne tot armis vel tot viribus contra alterum utatur, et ideo alius vincat, profecto iste qui vincit, illi tertio, qui dicto modo eum juvit, debet tribuere et acceptam referre victoriam. Sed imprimis non video cur hoc titulo dicatur gratia necessaria ad singulas tentationes vinceudas, et non ad singula bona opera. Nam vel bonum opus fit urgente tentatione, et sic includit victoriam tentationis, et consequenter non fiet sine gratia juxta dictam sententiam: vel fit bonum opus, quando nulla tentatio in contrarium pulsatur, et hoc ipsum etiam erit ex gratia, ac subinde tale opus non fiet sine aliqua gratia. Quia si moderari tentationem, seu non permittere ut sit gravior, est gratia Dei, profecto major erit gratia facere vel non permittere ut in tali occasione ulla pulset tentatio, quia sicut dæmon est paratus ad tentandum gravior, ita est paratus ad semper tentandum, et præcipue illis temporibus in quibus homo potest occasionem bene operandi habere: ergo, e contrario, si hoc non obstat quominus opus bonum fieri possit sine gratia, nec etiam obstabit quominus possit alicui tentationi resisti sine gratia. Nam si quis dicat carentiam tentationis solum per accidens se habere ad bonum opus tanquam removementem prohibens, per se autem fieri per vires liberi arbitrii, et ideo illi tribui sine viribus gratiæ; similiter in præsentibus dicetur carentiam gravioris tentationis solum esse remotionem impedimenti; per se autem talis ac tanta tentatio, que sola nunc instat, sola libertate superatur, sine alia gratia adjuvante; ergo simili ratione dicendum est talem ac tantam tentationem posse vinci sine gratia, et ad hoc sufficere vires liberi arbitrii, undecumque illa tentatio habeat, ut tanta et non major sit. Deinde esto illud censendum sit peculiare beneficium Dei, tamen si gratia dicenda est, non est gratia interna divinæ inspirationis et adjutorii, sed est quedam gratia externæ protectionis; huc autem agamus de priori gratia, de qua loquuntur Patres, quando disputant contra Pelagium, ut maxime videri potest in epist. 93 Augustini, et illam requirunt ad victoriam tentationum, et hoc sensu dicimus illud non posse intelligi de omnibus et singulis tentationibus, etiam levis; unde si attente considerentur, hæc sunt distincta dona, seu beneficia, adjuvare

ad vincendum, et prævenire ne sit pugna, vel ne tam gravis sit; sicut donum innocentiae et donum remissionis peccati utrumque est donum gratiæ, tamen distinctum, ita etiam non pulsari tentatione, vel illam vincere, postquam vexat, distincta sunt dona gratiæ: quod autem sit levis tentatio, et non gravis, quando est ex gratia, pertinet ad primum genus gratiæ non permittendi tentationem, non autem proprie ad victoriam tentationum, de qua nunc tractamus, et ad quam diversa gratia requiritur, quando necessaria est.

24. *Levis tentatio ex causis naturalibus etiam venire potest.* — Præterea assero etiam illud genus protectionis seu providentiæ Dei, quo fit ut tentatio sit levis, licet semper sit ex beneficio providentiæ divinæ, non esse necessarium ut semper in particulari sit ex speciali providentiâ gratiæ, sed interdum sufficere generalem providentiæ cursum. Quod ita declaro, nam vel loquimur de tentatione proveniente tantum ab intrinseco cum objectis sensibilibus ordinario cursu humanarum rerum occurrentibus, vel specialiter consideramus tentationes dæmonis, et vires ejus ad tentandum, quibus humanæ non possunt comparari, Job. 41. Priori modo potest facile evenire sæpeque contingere ut tentatio occurrens sit levis. Nam interdum accidere potest ut nulla sit, quia non occurrit nisi objectum honestum, et fieri potest ut non repugnet sensui: ergo eadem ratione potest contingere ut ex vi naturalium causarum levis tentatio sit, et non major. Denique non est cur hoc repugnet, quia isti effectus in se contingentes sunt, et æque provenire possunt ex communi cursu causarum cum generali concursu Dei, unde licet non eveniant sine præscientia, et approbatione, vel permissione Dei, nihilominus ex generali providentiâ sufficienter eveniunt.

25. *Tentatio non semper est a dæmone.* — Si autem loquamur de tentatione dæmonis, de qua maxime videntur loqui alii auctores, imprimis illud tentationis genus, ut supra dicebam, quasi præternaturale est; unde si homo in puris naturalibus consideretur, vel non videretur subjiendus illis tentationibus, quia tunc tam quoad malum quam quoad bonum, deberet constitui in pura natura; vel certe, si Deus etiam tunc permitteret pugnam alicujus hostis invisibilis, deberet etiam providere adjutorium proportionatum, ut custodiam angelorum, vel aliquid simile: atque ita utrumque pertinet ad generalem providentiâ illius status. Nunc vero, quia homo est elevatus ad

ordinem gratiæ, major fortasse licentia data est dæmoni ad tentandum, ut virtus gratiæ magis innotescat: et fortasse in natura lapsa liberius permittitur dæmon homines tentare in pœnam originalis culpæ, et ideo quoties Deus specialiter prohibet illum ne vehementius tentet, beneficium gratiæ est per Christum collatæ. Nihilominus non videtur hoc speciale beneficium in omnibus tentationibus necessarium. Quia non est cur cogitemus vel dicamus dæmonem, in singulis momentis et occasionibus, inducturum esse hominem in gravissimam tentationem, nisi a Deo speciali gratia impediatur. Nam imprimis Deus non inducit dæmonem positive ad tentandum, quia hoc non est consentaneum bonitati divinæ, propter quod intentator malorum dicitur; unde etiam non inducit ut tentet hoc vel illo modo, sed tantum permittit. Deinde verisimile est in hac permissione esse aliquam universalem limitationem ex generali providentia, ex qua non permittitur dæmon facere suo arbitrio quidquid potest, alias magna ex parte posset ordinem universi perturbare; ergo etiam ex hac generali providentia potest sæpe evenire ut non graviter tentet, absque speciali beneficio gratiæ. Imo talis esse potest dispositio hominis, et occasio operandi occurrens, ut non valeat dæmon, etiamsi velit, graviter tentare hominem in illa materia, supposita sufficienti advertentia rationis, quia nimirum tale objectum cum his circumstantiis non potest graviter excitare hominem.

26. *Imo nec omnis a dæmone est gravis.* — Ac denique accidere potest ut ipsemet dæmon sua libertate et prava intentione temperet aliquando, et ablineat a gravi tentatione, ut hominem eo gravius peccare faciat, quo liberius ceciderit, vel certe ut permittendo nunc aliquam victoriam, in elationem vel aliam graviolem culpam inducat, vel ut hominem securum reddat, et ita vel facilius postea illum decipiat, vel in statu alienius peccati quietus permaneat. Qua ratione dixit Gregorius, 24 Moral., cap. 7, alias 12: *Dæmon eos pulsare negligit, quos quieto jure possidere sentit.* Quamvis ergo hæc moderatio tentationis sæpissime sit speciale beneficium gratiæ, semperque esse possit, ideoque semper postulandum sit, nihilominus in aliquibus actibus et occasionibus potest evenire ex generali providentia qua Deus relinquit dæmonem pro suo arbitrio et malitia operari, et prævidet illum non nisi tali modo tentaturum, et ideo non esse hominem in tali occasione superaturum.

Relinquitur ergo ut nullum gratiæ auxilium sit semper et in singulis tentationibus necessarium ad tentationi resistendum, quia, præter dictos modos, nullus alius excogitatus est, nec facile fingi potest.

27. *Ad rationes tactas in num. 9, 10 et 11.* — *Prima solutio.* — *Secunda.* — Fundamentum contrariæ sententiæ auctoritatibus Scripturæ, Conciliorum et Patrum præcipue nititur, quæ eosdem sensus habent quos cap. 17 et 18 dedimus similibus sententiis, quibus ad bene operandum gratia requiritur. Primo ergo dicendum est frequentissime loqui de victoria Christiana (ut sic dicam), seu ad vitam æternam comparandam fructuosa. Quod quidem legenti singula testimonia facile constabit, tum quia disputant contra Pelagium, qui hanc etiam victoriam tentationum soli libero arbitrio tribuebat; tum etiam quia eisdem locis et eodem modo de bona operatione et de victoria tentationis loquuntur; tum denique quia sæpe requirunt auxilium fidei, imo et charitatis. Unde est illud Augustini lib. de Perfect. justitiæ, c. 2: *Potest homo, si Deus adjuvet, cui dicitur: Adjutor meus esto, ne derelinquas me; non utique ad corporalia bona capessenda, et mala cavenda, sed ad gerendam perficiendamque justitiam, propter quod dicitur: Et ne nos inducas in tentationem.* Nomine autem justitiæ intelligit Augustinus illam quæ est apud Deum, et in fide fundatur, ut sequentia verba indicant: *Adjuratur autem, si invocat, si credit,* etc., et in dicto c. 18 hoc latius ostendimus. Secundo, dicimus plures ex illis locutionibus Patrum esse indefinitas, ex quibus non licet colligere universalem sermonem ita rigorosum, ut ad omnes et singulas cujuscunque gradus tentationes vincendas extendatur; satis enim est si plures earum et frequentius sine gratia vinci non possint. Sic Cyrillus, dicto lib. 9 in Joan. c. 48, cum dixisset impossibile esse, nisi gratia spiritus munitos, perturbationes animi superare, statim addit: *Neque acres diaboli laqueos eritare,* ubi addendo illam particulam *acres*, satis indicavit non loqui de omnibus animi perturbationibus, aut tentationibus, etiam levibus.

28. *Solutio proxima promovetur.* — Quin potius addo ulterius, etiamsi interdum videantur simpliciter loqui de universis tentationibus, recte intelligi morali modo de tentationibus alienius gravitatis et momenti, quia quæ leves sunt, quasi nihil moraliter reputantur, vel quia etiam in his vincendis, si homo suæ libertati et humanæ diligentiae permittatur,

frequentius est negligens, et labitur potius quam resistat, ideoque moralis sermo moraliter intellectus verus esse potest, etiamsi interdum non desit potestas in voluntate ad aliquam tentationem vincendam. Unde quod interdum etiam dicunt Patres, præsertim Innocentius et Cœlestinus in dictis epistolis, indigere nos singulis temporibus et momentis auxilio gratiæ, ne tentatione vincamur, eodem morali modo intelligi potest, quia frequentissime in ea necessitate versamur. Quamvis etiam dici possit in singulis momentis nos indigere hoc auxilio, non quia in singulis ita tentemur ut sine auxilio non possimus stare, sed quia semper ita tentari possumus, et ideo semper nobis necessarium est paratum habere Dei auxilium. Sicque dixit Gregor. in Ps. 3 Pœnit., in fine: *Quia sancta anima omni tempore intelligit sibi imminere pericula, etiam momento temporis non potest esse secunda, et ideo Deum precatur ut nec ad horam ab illa discedat.*

29. *Solutio tertia.* — Addi præterea potest sæpe dicere Patres non posse nos victoriam tentationis obtinere nostris viribus, quia non valemus ita constanter resistere, quin si tentatio aliquantulum duret, cadamus, vel graviter vel leviter, pro materiæ qualitate. Et ideo licet aliquantulum resistamus, non potest appellari victoria; sicut qui cum hoste congregatur, licet semel aut iterum illum percutiat, si tandem ab illo occidatur, non victor sed victus absolute censetur. Ita ergo dicitur homo non posse tentationes vincere sine gratia, quia non potest sine peccato in tentationibus persistere. Et ita videntur loqui sæpe Patres impugnantibus Pelagium, qui aiebat liberum arbitrium ita posse vincere tentationes, ut nunquam peccet, ut videre licet in Hieronymo, dial. 3 contr. Pelagian.; et Augustino, lib. 1 de Gratia Christi, c. 26 et sequentibus. Et hoc videtur expressius extendere ad leviores tentationes Prosper contra Collator., c. 35, ubi ait etiam ad leviores tentationes vincenda esse gratiam necessariam: nisi forte leviores vocet, non quæ absolute leves sunt, sed quæ comparatione facta ad tentationem Jobi, de qua ibi tractabat, tales sunt, quamvis per se et absolute spectata graves esse possint. Tandem vero dicimus etiam cujuscunque tentationis victoriam, licet interdum sine propria gratia obtineatur, referendam esse in Deum, saltem ut auctorem, et gubernatorem, et providorem naturæ; tum quia si victoria illa fit per actum bonum, ille principaliter est ab auctore na-

turæ, ut supra diximus; tum etiam quia ex Dei providentia provenit, ut tentatio in tali occasione occurrat, in qua simul possit homo et sufficienter advertere, et illi resistere prius quam angeatur. Et juxta hunc etiam sensum videntur aliquando, licet rarius, loqui Patres, præsertim Hieronymus, et Paulus Orosius contra Pelagianos.

30. *Ad rationes alias summam tactas in numero 12.* — Et hinc facile respondetur ad rationes sumptas ex oratione, gratiarum actione, et ex arrogantia, seu vana gloriatione cavenda. Nam hæc omnia eadem rationem habent in victoria unius tentationis, quæ in effectione unius boni operis, et ideo applicanda sunt quæ diximus capite præcedenti, nec ea repetere necesse est. Ad aliam vero rationem, sumptam ab incommodis de victoria gravium tentationum vel omnium, negatur utraque sequela, quia illa difficultas, licet non reddat effectum physice impossibilem, reddit moraliter, ut in sequentibus capitulis fuse explicabimus. Ad ultimam vero rationem, quod semper est gratia non gravius tentari, jam dictum est hanc non esse propriam gratiam auxiliantem, de qua loquimur, et ideo, non obstante illo favore, verum esse talem tentationem sic occurrentem vinci per libertatem, resistendo sine auxilio gratiæ. Et præterea dictum est illum favorem non semper esse beneficium gratiæ, sed interdum ex generali providentia cum præscientia Dei provenire. Quod optime quadrat loco Ambrosii. Et similiter, cum Augustinus quidquid non peccamus Deo tribuit, in hac amplitudine loquitur de beneficio Dei, sive sit beneficium propriæ gratiæ, sive generalis providentiæ. Cujus signum est, quia non solum fidelibus, sed etiam infidelibus, dicit actu conferri hoc beneficium, ut patet ex dicta hom. 23. Et ita intelligenda sunt quæ ex illa recitavimus, neque enim aliter sensum commodum habere posse videntur.

CAPUT XXIV.

UTRUM AD VINCENDAS SINGULAS GRAVES TENTATIONES CONTRA LEGEM NATURALEM IN STATU NATURE LAÏCÆ, NECESSARIUM SIT SPECIALE GRATIÆ AUXILIUM.

1. *Scisipelagianorum hæresis.* — *Dissentient Catholici.* — Hic tractanda est opinio extreme contraria alteri, quam capite præcedenti impugnavimus: illa enim aiebat nullam omnino tentationem, etiam in materia morali et naturali, posse vinci sine gratia; hæc vero as-

serit nullam esse adeo gravem in tali materia, quæ per se, et sigillatim spectata, non possit vinci per liberum arbitrium absque auxilio gratiæ in statu lapsæ naturæ; de hac enim præcipue agimus, nam de integra dicemus in capite sequenti. De statu autem in puris naturalibus fere eadem est ratio, ut sæpe dictum est. Hanc ergo sententiam tenuerunt Semipelagiani, ut constat ex Cassiano, coll. 13, c. 14, ubi de tentationibus Job specialiter loquitur: et eandem sequuntur aliqui Catholici, diverso tamen modo, nam Semipelagiani victoriam etiam perfectam talis tentationis, et fructuosam ad vitam æternam, dicebant obtineri posse per solum arbitrium sine auxilio gratiæ, in quo merito damnantur cum Pelagianis: at vero Catholici solum dicunt posse liberum arbitrium resistere huic tentationi, ita ut non peccet, etiamsi in hoc nihil mereatur, absque auxilio gratiæ. Et ita tenet hanc sententiam Ruard. art. 7 cont. Luth., § *Tractantur*, vers. *Hæc confirmantur*, et Staplet., l. 2 de Justif., c. 4 et 13. Tribuitur etiam Molinæ in concordia, q. 14, art. 4, disp. 19. Sed ille forsitan non discrepat a communi sententia, ut infra videbimus. Solet etiam allegari D. Thom. 1. 2, q. 109, art. 4 et 8, quia in priori dicit posse hominem implere mandata legis naturalis quoad substantiam actus sine gratia, et quia in posteriori dicit posse hominem sine gratia vitare singula peccata contra legem naturæ. Sed immerito allegatur D. Thomas, quia in priori loco dicit indefinite posse hominem præcepta naturalia aliquando servare; in posteriori vero, licet dicat singula præcepta posse impleri sine gratia, non tamen dicit in omni occasione et omni tempore, nec considerat ibi vim tentationis, sed solam qualitatem præcepti et substantiam actus, et eodem modo loquuntur Thomistæ his locis. Magis videtur favere D. Thom. 1. 2, q. 77, art. 7, et q. 80, art. 3, quatenus docet nullam tentationem concupiscentiæ aut dæmonis tollere libertatem sufficientem ad non consentiendum. Sed aliud est loqui de libertate, aliud de absoluta potestate ad resistendum tentationi, ut infra videbimus. Indicat eandem sententiam Richardus, 1. 2, dist. 28, art. 2, quæst. 2 et 3; re tamen vera in quæst. 2 solum tractat de evitando peccato per se, et præcise, non spectata vi tentationis, de qua tractat in quæst. 3, et solum indefinite concludit posse hominem sine gratia vincere aliquam tentationem, ut patet ex corpore quæstionis, et ex fine solutionis.

2. Magis favet huic opinioni Ægidius in 2,

dist. 28, quæst. 1, art. 4, post dub. 1 litterale ad 1, ubi sic inquit: *Quantumcumque delectatio sensibilium nobis connaturalis inclinât ad illicita, non obstante hujusmodi inclinatione, si ex toto conatu volumus illa agere, possumus recte illa facere, sed non omnia, nec diu possumus consistere tali conatu sine gratia nos adjuvante.* Guillelmus etiam de Rubione in eadem dist., § *Quantum ad tertium*, non solum ait posse hominem resistere cuicumque tentationi contra præceptum negativum sine gratia assistente, sed etiam sine prima causa generaliter influente, quia ad resistendum tali tentationi satis est non agere, quia non agendo servatur præceptum negativum, ad non agendum autem neque concursus generalis necessarius est. Si quis autem velit positive resistere, volendo non agere contra tale præceptum, dicit tunc quidem necessarium esse generalem concursum, non tamen gratiæ assistentiam. Unde idem consequenter sentit de quacumque tentatione contra præceptum naturale affirmativum, ob eandem rationem. Multi etiam Theologi in illa dist. 28, dixerunt posse hominem per solas vires liberi arbitrii servare omnia præcepta naturalia, et vitare omnia peccata illis contraria, diu ac perseveranter, seu collective, ut aiunt, qui profecto merito possunt pro hac sententia citari; tum quia id fieri non potest sine victoria plurium tentationum gravium, quæ in diuturno tempore deesse non possunt; tum etiam quia difficilius est longo tempore inter ordinarias tentationes sine peccato vivere, quam uni gravi tentationi minori tempore resistere. Quantum vero isti auctores decipiantur postea videbimus. Alii etiam Theologi, qui simpliciter dicunt posse hominem per liberum arbitrium servare singula præcepta naturalia, et vitare omnia peccata illis contraria divisim sumpta, licet non conjunctim, solent pro hac sententia allegari, sed de illis infra dicam. Solet denique pro hac sententia citari Anselmus, libr. de Liber. arbit., cap. 5 et 6, cujus mentem postea expendemus.

3. *Fundatur sententia.* — Ratio hujus sententiæ est, quia, posita quacumque tentatione gravi cum advertentia rationis, homo consentiendo peccat mortaliter, si materia etiam gravis sit; ergo potest et physice et moraliter ex vi liberi arbitrii illi tentationi non consentire saltem non peccando, quod nunc solum intendimus. Probatur consequentia, quia illa potestas in libertate, necessaria ad peccandum graviter, includitur. Unde Aug., l. 3 de Libero

arbitrio, et de Spirit. et Litter., c. 3: *Illud (inquit) est in nostra potestate, quod, si volumus, facimus.*

4. Ad rationem hanc responderi solet posse nos quidem, quoties tentamur, non peccare, quia gratia Dei præsto adest; et id possumus simpliciter, quod per amicos, ut aiunt, possumus. Hæc vero responsio impugnatur, quia gratia non habet necessariam connexionem cum natura hominis secundum se spectata, posset enim condi in pura natura; tunc ergo non haberet paratam gratiam, quia illi non debetur; et supponimus nihil ei dari, nisi quod est debitum, et nihilominus in illo statu haberet libertatem ad peccandum etiam graviter, non obstante quacumque tentatione; ergo etiam tunc haberet libertatem ad non peccandum; ergo etiam haberet potestatem resistendi; at tunc non haberet illam ex gratia, quia tunc non esset illi præparata; ergo ex vi solius libertatis. Atque hæc ratio eandem vim nunc habet in homine lapsa, si supponamus eum habere invincibilem ignorantiam gratiæ, et per illam nondum esse præventum, nam ille homo, si tentetur, potest simpliciter non peccare, et tamen neque actu habet auxilium gratiæ, nec potest aliquid facere, quo illud obtineat, quia non potest se præparare ad primam gratiam auxiliantem, ut nunc suppono; ergo illa potestas est ex sola libertate.

5. *Confirmatur primoproxima impugnatio.* — *Confirmatur secundo.* — Et potest hoc confirmari ex Paulo ad Rom. 1, dicente gentiles fuisse inexcusabiles, etc., et reddit rationem solum, *quia cum cognovissent Deum, non sicut Deum glorificaverunt;* ergo perfectum iudicium rationis naturalis cum libertate voluntatis reddit hominem inexcusabilem, quoties in materia naturali, non obstante quacumque tentatione, labitur, ut ibi exponit Chrysost., hom. 3, et docet Iren., lib. 4 contra Hæres., c. 9, et sentit Aug., Concion. 25 in Ps. 118. Ergo illud etiam sufficit ad potestatem resistendi, nam si hanc homo non haberet, profecto esset excusabilis. *Confirmatur secundo*, quia tentatio non infert voluntati necessitatem quoad exercitum; ergo simpliciter potest suspendere actum; hoc autem sufficit ad vitandam tentationem, saltem quando est contra præceptum negativum. Et quamvis necessarium esset elicere aliquem actum voluntatis, sufficeret naturalis, et juxta probabilem opinionem sufficeret indifferens, vel ad summum honestus naturaliter, seu moraliter; sed hic actus potest haberi sine gratia, ut diximus: ergo.

6. *Confirmatur tertio.* — Præterea potest confirmari ex Augustino de Spirit. et Litter., cap. 14 et 17, dicente legem, sive naturalem, sive scriptam, positam sine spiritu gratiæ, esse legem peccati et mortis, quia obligat et non dat vires, neque etiam aufert potestatem peccandi: imò efficitur occasio multiplicandi peccata, quia arbitrium, posita lege, per se sufficit ad peccandum, etiamsi gratia careat, ut aliis locis Augustinus tradit, præsertim de Gratia et libero arbitrio, cap. 2, et contra duas epist. Pelagian., capite 5, Epistola 95, et 13 de Civ., cap. 5. Quæ omnia procedunt etiam eo tempore quo legis observatio est gravis et difficilis, propter tentationes vel alia impedimenta occurrentia: tum quia tentatio non aufert legis obligationem; tum etiam quia lex non est occasio peccandi, vel virtus peccati, ut loquitur Paulus, quando facile servari potest; tunc enim voluntas sine speciali gratia ad illam observandam sufficeret: ergo maxime tempore tentationis fit lex mortis, si spiritus gratiæ desit. Ergo tunc etiam est in homine absoluta potestas ad servandam legem et non peccandum, et consequenter etiam ad vincendam tentationem, quia nisi hanc potestatem habeat, nec potestatem peccandi habere posset. Accedit quod homo lapsus, jam justificatus, etiamsi non habeat specialem gratiæ motionem, potest per solum liberum arbitrium vincere similem tentationem, quia in illo jam est sanata natura per habituales gratias: ergo idem poterit absque illa gratia. Probatur consequentia, quia sola habitualis gratia, si actu non operetur et moveat, non auferit nec minuit difficultatem quæ in vincenda tentatione intervenire potest.

7. *Confirmatur quarto.* — Quarto, confirmatur hæc sententia vulgari argumento, quia homo sæpe, propter honorem vel aliam concupiscentiam humanam, libera voluntate et sine gratia, eligit difficiliora quam sit interdum gravis tentatio, et ita illam difficultatem vincit; cur ergo non ita poterit vincere gravem tentationem contra præceptum naturale. Simile argumentum est, quod hæreticus mortem sustinet, vel pro suo errore, vel etiam pro aliqua veritate Catholica, quam retinet; unde sicut primum facit sine gratia, ita et secundum; cur ergo non poterit idem facere Catholicus pro eadem Catholica veritate? Quod si id faciat, vincet profecto tentationem gravem sine gratia. Ultimo, afferri potest argumentum Rubeni supra, quia ad vincendam tentationem gravem, sæpe non est necessarium aliquid agere, sed solum non agere, ut quando

tentatio est contra præceptum negativum : ergo tunc neque generalis concursus necessarius est : ergo multo minus erit necessarium speciale auxilium.

8. *Vera sententia et communis.* — Nihilominus dicendum est, ad vincendas graves tentationes et unamquamque earum, necessarium esse speciale gratiæ auxilium; liberum namque arbitrium illo destitutum sine dubio succumbet. Ex antiquis Theologis, pauci sunt qui assertionem hanc distincte explicaverint, aut asseruerint, illam tamen satis indicat Bonaventura in 2, dist. 28, art. 2, quæst. 2, et ibi Aureol., quæst. unic., art. 2; Vega clarius et fusius, quæst. 12 de Justificat., et sequentibus; Soto, lib. 1 de Gratia, cap. 21, ad 2; Medina 1. 2, quæst. 10, art. 3, et quæst. 109, art. 2, ad 4; Bellarm., lib. 5 de Justificat., c. 5 et 7; Valentia., 2 part., disput. 8; et jam est inter Theologos hæc sententia communiter recepta. Ut autem distincte et sine æquivocatione probetur, advertere oportet variis modis posse nos loqui de una, seu de singulis tentationibus. Primo, de singulis in specie, ut de tentatione concupiscentiæ, avaritiæ, etc. Et in hoc sensu est conclusio longe certior, ut sentiunt auctores allegati. Quia de tentatione contra castitatem id affirmant, et colligunt ex Sap. 8: *Nemo potest esse continens, nisi Deus dederit*, juxta expositionem Augustini, qui vult ibi esse sermonem de castitate et de dono gratiæ, lib. de Continent., cap. 4, et epist. 89, 95 et 130. Et magis favet illud ad Roman. 7: *Quis me liberabit a corpore mortis hujus?* Præterea de rectitudine vel peccato linguæ idem colligitur ex Jacobo, cap. 3, dicente: *Linguam nemo hominum domare potest*, ut expendit Paulus Oros., lib. de Lib. arbit., et tradit Augustinus, lib. de Nat. et Grat., cap. 15 et 16. Potest etiam dici una tentatio quasi collective, quæ in uno certamine posita est. Quomodo Prosper, contra Collator. cap. 32 et sequentibus, loquitur de tentatione Job tanquam de una, et gravissime et merito reprehendit Cassianum, quod victoriam illius tentationis nudo libero arbitrio tribueret. Sic de una tentatione loquendo, certissima est assertio, quia illa revera non est una tantum, sed collectio plurium, de qua re in capite sequenti dicturi sumus.

9. *De una atque individua tentatione proprie hic sermo est.* — Proprie igitur una tentatio dicitur, quæ determinate et in individuo una, seu continua est, et in hoc sensu intelligitur assertio, quia non solum ad integram victoriam ejus cum spirituali fructu et merito,

sed etiam ad resistantiam et carentiam lapsus, auxilium gratiæ Dei necessarium est. Quæ assertio non potest quidem ex Scriptura vel Patribus efficaciter probari, quia omnia quæ in illius confirmationem adduci possunt, in his quæ in præcedenti capite pro sententia priori allata sunt, continentur, et responsiones quas de levibus tentationibus dedimus, ad graves etiam applicari possunt. Nam Patres fere semper generatim loquuntur: unde sicut ad leves tentationes requirunt gratiam, ut cum fructu vincantur, ita etiam dici potest de gravibus: vel sicut in illis loquuntur de victoria integra quæ hominem servet non tantum ab hoc vel illo peccato, sed simpliciter a peccato, ita de gravibus dici potest, ut latius et discurrendo per aliqua testimonia prosequitur Molina in d. disp. 19, membr. 5.

10. *Suadetur primo ex 1 Cor. 10.* — Nihilominus duo possunt in prædictis testimoniis ponderari, quæ non parum favent huic sententiæ. Unum est testimonium illud Apostoli 1 ad Corinth. 10: *Fidelis Deus, qui non patietur vos tentari ultra id quod potestis*, nam inde intulit Chrysostomus, hom. 24, esse aliquas tentationes quæ ferri non possunt, utique sine auxilio et ope Dei: ergo hoc maxime dictum est propter graves tentationes. Hæc posterior consequentia nota est. Prior vero, quam intulit Chrysostomus, probatur, quia si Deus pateret seu permetteret, gravius tentaretur homo quam posset sustinere; ergo, remota speciali providentia Dei, tentatio potest esse tam gravis ut non possit homo sua facultate sola illi resistere. Quod si quis objiciat, eum Paulus dicit *ultra id quod potestis*, non intelligere de potestate per solum liberum arbitrium, sed per gratiam adjutum, juxta doctrinam Prosperi contra Collator., cap. 35, hinc fortius sumitur argumentum. Quia si aliqua tentatio potest esse tam gravis, ut liberum arbitrium, etiam adjutum aliquo minori auxilio gratiæ, non possit illam sustinere, nisi amplius juvetur, a fortiori poterit aliqua tentatio, etiam minus gravis, superare vires liberi arbitrii gratia destituti. Aliter vero dici potest Paulum non loqui determinate de una et eadem tentatione, sed simpliciter dicere: *Non patietur vos tentari*, utique tot tentationibus et tam continuis, ut sit ultra id quod potestis. Sed licet hæc expositio probabilis sit, nihilominus magis respexisse videtur Paulus ad acerbitatem tentationis; præmiserat enim: *Tentatio vos non apprehendat* (vel apprehendit), *nisi humana*, id est parva; ergo huic opponit tentationem quæ

est supra id quod homo potest. Et de hac præcipue intelligi potest oratio Dominica : *Ne nos inducas in tentationem* ; per illam enim non tam petimus ut non tentemur, quam ut non destituamur gratia necessaria ut a tentatione non superemur ; et sic etiam dixit Christus : *Vigilate, et orate, ut non intretis in tentationem*. Ex quibus locis, et ex aliis supra citatis, valde probabiliter colligitur esse aliquem modum tentationis etiam unicæ et singularis, quam sine auxilio gratiæ evadere non possumus, juxta illud Psal. 17 : *In te eripiar a tentatione*.

11. *Secundo, ex Conciliorum et Patrum locutionibus*.—Secundo, potest in locutionibus Conciliorum et Sanctorum ponderari, quod interdum sunt universales negativæ de omnibus et singulis tentationibus, ut est illud Theophylact., 1 ad Cor. 14 : *Quævis tentatio vires nostras exuperat, nisi ille auxilietur nobis* ; ubi Œcumen. : *Quævis tentatio vos everteret, nisi Christus auxiliaretur*. Ut omittam similes locutiones Augustini, Prosperi, imo et Pontificum et Conciliorum supra relatas, quas necesse est saltem de gravioribus tentationibus intelligi. Nam si quælibet tentatio gravis posset sine gratia sola libertate vinci, profecto neque in rigore, neque moraliter tales locutiones absolutam veritatem continerent. Accedit quod Chrysostomus, dicta homil. 24, de humanis tentationibus dixit, non facile posse vinci sine gratia, per humanas intelligens leviores ; ergo de gravioribus intellexit simpliciter vinci non posse absque gratia. Et Cyrillus, dicto libro nono in Joan., capite 45, de *acrioribus* tentationibus locutus est, cum dixit non posse evitari sine gratia. Denique Patres scribentes contra Pelagium ita exaggerant fragilitatem hominis lapsi ad cavenda peccata, ut interdum dicant nihil in hoc posse, alibi vero parum posse : resistere autem gravi tentationi, ita ut homo non peccet, nec nihil profecto, nec parum est. Ergo ex mente Sanctorum Patrum non est tanta fortitudo seu potestas in libero arbitrio hominis lapsi.

12. *Ratio quorundam pro eadem sententia ab invicem modo*.—Rationem vero abinconveniēti aliqui sumunt, ex eo quod si in vincendis tentationibus nullæ determinate occurrerent, quæ propter gravitatem suam per liberum arbitrium vinci non possent, nulla esset etiam multitudo tentationum, etiam confuse seu collective sumpta, quam non posset homo sua libertate elugere absque peccato, et ita posset homo longo tempore servare totam legem na-

turæ, et cavere omnia peccata illi contraria, sola libertate, sine auxilio gratiæ, quod juxta sanam doctrinam admitti nullo modo potest, ut infra videbimus. Sequela probatur, quia in tota collectione non includuntur nisi singulæ tentationes, et non occurrunt simul, sed successive, et victoria primæ tentationis non auferit libertatem circa secundam ; imo nec minuit, sed potius auget potestatem, quia primus actus bonus inclinatur ad secundum, et ideo ulterius procedi potest a secunda tentatione ad tertiam, et sic usque ad ultimam. Idem argumentum fieri potest de temporis duratione, et facile applicari potest.

13. *Est tamen invalida*. — Hæc vera ratio, licet in forma argumentandi habeat apparentem difficultatem, tamen revera est invalida, ut in Dialogis contra Pelagianos sæpe inculcat Hieronymus, et exemplis potest breviter declarari ; quia leves tentationes sigillatim vincere possumus, et tamen totum cumulum earum per longum tempus non possumus ita superare, ut non interdum leviter cadamus. Unde certum est non posse nos sine auxilio gratiæ vitare diu omnia peccata venialia collective, etiam deliberata : imo nec cum generali gratia, nisi specialior detur : et nihilominus singula per se sumpta vitare possumus, vel per libertatem in materia naturali, vel per commune adjutorium gratiæ in quacumque materia. Illa ergo consequentia in materia morali defectuosa est, quia difficultas collectionis habet diversam rationem, ut infra explicabo, et intelligi potest ex verbis Christi Domini Matt. 18 : *Necesse est ut veniant scandala*, quod verum est, licet nullum scandalum in particulari de necessitate veniat, sed libere : est ergo in illo objecto confuso quidam necessitatis modus, etiamsi in nullo singulari actu inveniatur. Et similiter dixit Luc., c. 17 : *Impossibile est ut non veniant scandala*, quod de nullo singulari dici poterat. Ita ergo in præsentī responderi posset.

14. *Instant iidem pro ratione prædicta*. — Sed instant secundo, quia impossibilitas illius generis tantum est quædam difficultas moralis, quæ si non reperitur cum eadem impossibilitate in aliquibus actibus singularibus, nunquam dabitur in tota collectione, seu multitudine tentationum : ergo, ut sit impossibile resistere omnibus tentationibus sine gratia, oportet ut sit eodem modo impossibile resistere alicui vel aliquibus tentationibus certis ac definitis : ergo maxime hoc dicendum est de gravibus tentationibus. Assumptum de-

claratur et probatur, quia gratia non datur ad illud objectum confusum, neque ad collectionem, nisi quantum datur ad hunc vel illum actum in particulari : ergo nunquam datur ut necessaria ad tale objectum confusum, nisi fateamur dari actus in particulari, quos liberum arbitrium per se, et sine gratia præstare non potest : ergo illi maxime sunt quando tentationes graves occurrunt, etiam sigillatim sumptæ.

15. *Hæc etiam instantia invalida est.* — Verumtamen prior illatio patitur eundem defectum quem prior objectio, et eisdem exemplis everti potest. Nam etiam est impossibile vincere tentationes omnes leves collective, seu vitare simpliciter peccatum, seu innocentiam vitæ constanter servare sine gratia, etiamsi in discursu illius temporis non occurrat gravis tentatio determinata, propter quam gratiæ auxilium necessarium sit. Ergo non recte probatur ex illo principio necessitas gratiæ ad singulas tentationes graves. Et ratio a priori est, quia, seclusa difficultate gravis tentationis particularis, in ipsa perseverantia bene vivendi et constanter vincendi omnes tentationes ordinarias, et frequenter occurrentes, quas leves appellamus, est quædam moralis impossibilitas, propter quam superandam est necessarium speciale auxilium, ut capite sequenti videbimus, ideoque necessitas ad singulas graves tentationes per se non colligitur ex necessitate ad omnes simul, licet fortasse per quamdam proportionem explicari debeat, ut dicemus.

16. *Primum punctum ad solidam probationem : Quæ gratia sit necessaria.* — Ut ergo rationem propriam assertionis explicemus, prius declarare necesse est quæ sit hæc gratia quam dicimus esse necessariam; deinde vero quæ sit et unde oriatur necessitas illius, et inde facile constabit quomodo hæc necessitas non obstat naturali libertati. Primum ergo supponimus hanc gratiam non debere cogitari, qualem illam ponebat Gregorius, ad bonos actus, seu ad omnes tentationes vincendas, quia rationes supra factæ necessitatem talis motionis universaliter improbant. Deinde statuimus hanc gratiam non esse necessariam per modum principii physici, et per se concurrentis ad eliciendum actum quo vincenda est tentatio, hoc enim etiam probant rationes factæ in superiori capite, quia actus ille ordinis est naturalis, et non includit in objecto aliquid quod per se et physice excedat naturalem facultatem voluntatis. Unde etiam fit ad hunc effectum non esse necessariam gratiam habitualem, seu

sanctificantem. Probatur, quia nec ex natura rei ac per se necessaria est, quia habitus gratiæ operativi solum sunt necessarii ad actus supernaturales quoad substantiam eliciendos, ut postea videbimus. Nec etiam est necessaria gratia sanctificans ex aliqua ordinatione divina, qua statuerit non dare simile auxilium ad vincendam gravem tentationem homini in peccato existenti. De tali enim lege divina non constat, neque aliquo iudicio aut auctoritate ostendi potest, nec est verisimilis, quia multa alia beneficia gratiæ confert Deus peccatoribus; et frequenter supponunt Theologi disputantes de martyrio, posse hominem existentem in peccato resistere tyranno cogenti illum negare fidem, quæ gravis tentatio est. Item quia alias, quoties homo vinceret tentationem gravem, posset scire se esse in gratia tam certo, quam certus fuerit de resistentia tentationis sine peccato. Deinde incredibile est peccatorem non posse vincere tentationem gravem, nisi prius justificetur, cum possit interdum facere aliquem actum difficilem virtutis, ut dare vitam pro patria, ex honestate et pietate naturali.

17. *Non tamen sufficit extrinseca Dei providentia.* — Nihilominus tamen addo ulterius hanc gratiam non sufficienter explicari per providentiam extrinsecam antecedentem, qua Deus non permittit tentationem esse majorem. Quia jam supponitur tentatio esse gravis; ergo licet Deus præscierit hominem fuisse vincendum a graviori, et ideo illam non permiserit, nihilominus si præsentem tentationem vincit sine alio adjutorio gratiæ, jam illa victoria tribuitur soli libero arbitrio, et ita plane sequitur liberum arbitrium solis suis viribus naturalibus vincere tentationem gravem. Quod maxime cernitur in gravitate tentationis quasi intensiva, nam gravitas quasi extensiva, quæ ex duratione acerescit, optime potest a Deo præveniri, non permittendo hominem diutius tentari; tunc vero si per durationem non pervenit ad statum gravis tentationis, in hac sola negatione gratia illa consistit; non erit tamen proprium auxilium ad vincendam gravem tentationem. Quia, ut supra dicebam, victoria propria est in resistentia quæ fit supposita tanta et tali tentatione. Unde eum Cassianus, collatione 13, cap. 14, de Job dixerit vicisse tentationem sua libertate, et nihilominus addiderit gratiam non in totum illi defuisse, explicaveritque illam gratiam per hoc solum quod Deus non permisit eum tentatione plus urgeri, quam ab eo præviderit propria virtute potuisse superari; in hoc graviter reprehenditur a Pros-

pero contra Collator., cap. 35, quod victoriam tribuisset soli libertati, et ideo ait verius dicturum fuisse Deum non permisisse tentationem crescere ultra virtutem, quam ipse ad vincendam illam dederat.

18. *Nec sola congrua cogitatio excitata naturaliter.* — Hinc præterea addo non satis explicari hanc gratiam per solam cogitationem congruam, si talis sit cogitatio quæ per externam objectorum propositionem mere naturalem, id est, cum solo concursu et generali providentia Dei comparari possit, sive talis cogitatio omnino libertatis usum antevertat, et ex sola extrinseca providentia adveniat, sive aliqua ex parte libera sit, quia nimirum ad illam consummandam et perficiendam potuit voluntas applicare intellectum, et cum effectu applicuit. Probatur primo ex supra dictis, quia illa cogitatio revera non est gratia, et ita si illa sufficit ad vincendam tentationem gravem, sine gratia vincitur, atque ita veritas de necessitate gratiæ ad hunc effectum, quando illo solo nomine defenditur, potius eluditur quam defendatur. Deinde suppositis quæ diximus, est evidens argumentum, quia eadem cogitatio necessaria est ad vincendas minimas tentationes; ergo nulla est differentia, et consequenter ex parte Dei non esset necessarium majus adjutorium ad vincendas graves quam ad vincendas leves tentationes, quod est contra sententiam omnium qui specialiter requirunt gratiam ad vincendas graves tentationes. Unde etiam multi Theologi talem constituunt differentiam moralem et notandam, quod in levi tentatione non tenetur homo ex præcepto ad orandum et petendum auxilium, in gravi autem tentatione tenetur; ergo aliquid amplius ex parte Dei requiritur.

19. *Item probatur exemplo.* — Denique hoc etiam convincit exemplum positum de Job, nam Cassianus fatebatur illum habuisse cogitationem congruam ex divina providentia, quam ipse gratiam appellabat, quod patet, quia dicebat non fuisse permisum tentari ultra quam vincere poterat, scilicet, efficaciter, et cum effectu, sicut fecit, et sicut Deus prævidet futurum. Et nihilominus, ex sententia Prosperi, non gratiæ, sed viribus liberi arbitrii tribuebat victoriam, et ideo Prosper illam quidem providentiam requirit ad gratiam efficacem, ita tamen ut supponat vires datas a Deo, et non solam libertatem. Locutus autem sum de cogitatione mere naturali, quæ per causas naturales excitari vel per propriam hominis industriam comparari possit; tum

quia de hac tantum procedunt rationes factæ et omnia superius dicta; tum etiam quia si Deus peculiari modo excitet mentem plus quam naturaliter possit, ut hoc modo det vires sufficientes ad vincendam tentationem, jam illa cogitatio non est mere naturalis, sed præter, vel supra naturam, et sic esse poterit vera gratia. Et nihilominus de tali cogitatione, non recte dicitur dare vires ad vincendam tentationem, quia est congrua: nam potest dare has vires, et non esse congrua, sed tantum sufficiens; multi enim non resistunt gravi tentationi, qui possent resistere, etiam per vires gratiæ sufficientis. Et quamvis verum sit nunquam de facto vinci tentationem, nisi quando illa cogitatio congrua est, hoc tamen non est intelligendum de congruitate, quæ consistit in sola conformitate ad usum liberum futurum, sed de congruitate quæ provenit ex illa peculiari motione vel excitatione quam Deus addit ultra causas naturales, a quo habet illa cogitatio ut sit speciale gratiæ auxilium, licet etiam fuerit speciale beneficium dare illud in eo gradu et modo quo præscitur habiturum effectum et conformitatem cum futuro usu libertatis.

20. *Auctoris judicio, quæ gratia sit necessaria.* — Dico ergo hanc gratiam consistere in aliqua interna motione Dei aliquo modo supernaturali, qua juvat imbecillitatem nostram, ut tali tentationi valeamus resistere; nam quæ hæcenus diximus, hoc saltem necessarium esse ostendunt, ut sit verum auxilium gratiæ. Quod autem hoc sufficiat, probatur a sufficienti partium enumeratione, nam suppositis quæ diximus, nihil aliud superest quod esse possit. Deinde ita loquuntur Episcopi Africani in epistola 95 Augustini ad Innocentium, et Innocentius in Rescript., et Cælestinus in epist. 1 ad Episc. Galliæ, ad finem, et in universum hoc vocant Concilia adjutorium Dei, quod per internas illuminationes et inspirationes datur, ut declarat Augustinus, l. 2 de Peccat. merit. et remiss., cap. 17, et aliis locis supra allegatis. Est ergo hæc motio, ut hic breviter dicam, vel illuminatio intellectus, qua melius et fortius representatur objectum quam per communem cursum causarum possit, vel motus aliquis voluntatis, quo Deus facit suavem illam resistantiam, vel terret ab illo malo, ut Augustinus dixit in hom. 23, ex 50. Dixi autem motionem dari debere aliquo modo supernaturalem, quia ad effectum de quo tractamus, non semper est necesse ut sit supernaturalis in euitate sua, quia effectus non est adeo excellens.

Sufficit ergo ut modo supernaturali conferatur; consistit autem ille modus in hoc quod talis ac tanta consideratio, vel affectio, aut inordinatio, in tali occasione et puncto, fieri non posset per communem cursum naturalium causarum, vel per humanam industriam ejus, qui tentationem patitur, comparari. Et ideo illa motio habet veram rationem gratiæ, præsertim si detur in ordine ad finem supernaturalem, sicut nunc datur.

21. *Secundum punctum: Unde dicta necessitas.—Placitum Baii in hoc secundo puncto.—Exploditur.* — Sed statim occurrit secundum punctum propositum. Nam licet per se satis notum sit hoc genus motionis divinæ esse possibile et utilissimum, quod autem sit necessarium, et videtur cum naturali libertate pugnare, et alioqui nulla sufficiens ratio tantæ necessitatis apparet. Duo igitur extrema in hac necessitate explicanda invenio. Primum est eorum qui dicunt hanc necessitatem provenire ex absoluta impotentia liberi arbitrii ad resistendum tali tentationi, in quoecumque puncto et momento urgeat. Ita fuit opinatus Michael Baius, qui consequenter asserebat, deficiente spiritu gratiæ, necessitari voluntatem ad consentiendum tali tentationi. Soletque pro hac sententia referri Gregorius in 1, dist. 1, quæst. 2, art. 2, ad tertiam quamdam probationem. Sed ille loquitur de motibus doloris aut tristitiæ qui per modum passionum excitantur in voluntate ex notitia objecti nocivi præsentis, non vero loquitur de libero consensu volendi vel nolendi. Refertur etiam Medin. 1. 2, quæst. 10, artic. 3, in fine. Sed ille non dicit aliquando passionem vehementem inferre necessitatem voluntati, ut consentiat vel dissentiat absolute, sed ait esse posse tam vehementem passionem, ut sit necessarium auxilium speciale ad vincendam illam, quod longe diversum est. Ideoque absolute dicit assertionem ibi a D. Thoma positam esse de fide, scilicet, nullam passionem quantumvis vehementem necessitare voluntatem, si iudicium rationis non absorbeat. Unde nullum invenio auctorem catholicum qui aperte dixerit gravem tentationem necessitare voluntatem ad actum peccati. Neque ullo modo id sustineri potest, tum quia nullum objectum creatum necessitare potest voluntatem, si ratio vigilare possit, quia semper invenire potest rationem nolendi illud; tum etiam quia licet tentatio sit gravis, si homo consentiat, peccat; ergo signum est non necessitari.

22. *Erasio Baii. — Censura allatæ erasionis et impugnatio.* — Respondet Baius negando

consequentiam, quia homo culpa sua incidit in illam necessitatem, et ita intelligit necessitatem peccandi esse per originale contractam, ut interdum loquitur August., lib. de Perfect. justitiæ, ratiocinat. 9, cap. 4, et lib. 7 de Natura et gratia, cap. 22 et 28, et simili modo loquitur Prosper, lib. 3 de Vita contemplativa, cap. 2, et contra Collator., cap. 19, in diverso tamen sensu. Illa itaque sententia gravem continet errorem, videlicet, posse esse peccatum, quod necessario fit, hoc enim consequenter ille auctor concedebat; damnatur autem a Pontificibus Gregorio XIII et Pio V in Bulla contra illum. Item sequitur ex illa sententia, motus primos concupiscentiæ esse peccata, etiam non consentiente voluntate; quod ille concedebat, quia licet necessarii sint, ex peccato Adæ trahunt originem. Illud autem in Concilio Tridentino, sessione 6, et a dictis Pontificibus damnatum est, et a Theologis antea rejectum cum Augustino dicente, libro de Duabus animab., cap. 12: *Peccati reum teneri aliquem, quia non fecit quod facere non potuit, summæ iniquitatis et insanix est.* Et lib. Retract., cap. 9: *Malum quod caveri non potest, peccatum non est.* Neque satis est quod illa impotentia fuerit per originale contracta. Quia si illa talis est ut in præsentis tempore et occasione tollat libertatem actus qui nunc sine libertate fit, non potest esse novum peccatum, id est (ut tollatur quæstio de nomine) non potest imputari ad novam culpam propter præcedentem actum, ut ex materia de peccatis nunc suppono, et ex sententia Augustini 22 contra Faust., cap. 44, dicente: *Qui in ebrietate committit incestum, culpandum esse non quantum incestus, sed quantum ebrietas meretur,* consideratis utique omnibus circumstantiis quibus commissa est. At vero in præsentis quando homo lapsus consentit alicui tentationi, novum peccatum committit et novam pœnam meretur; imputatur ergo ex præsentis libertate, non ex præterita, quæ in Adamo fuit, alioqui non esset peccatum, sed pœna peccati.

23. *Arbitrium etiam sine gratia libere peccat.* — Oportet ergo hanc impotentiam voluntatis ad resistendum tentationi gravi talem esse, ut libertatem ad peccandum non excludat, etiamsi liberum arbitrium omni auxilio gratiæ destituatur, quod est in tota hac disputatione præ oculis habendum, ne in æquivoco laboretur, et difficultates eludantur potius quam solvantur. Et ideo non recte defenditur libertas in hac materia naturali, etiam urgente tentatione, per hoc quod voluntas potest

consentire tentationi sua libertate, et resistere per auxilium gratiæ, quia per hoc non salvatur libertas naturalis, posita tentatione. Nam si necessaria est gratia ut potentia in illa occasione maneat libera ad dissentiendum; ergo remota gratia, et posita tentatione, non erit voluntas libera ad dissentiendum: ergo necessitabitur quoad exercitium. Item tunc remoto auxilio gratiæ non peccaret voluntas consentiendo tentationi, quia necessitaretur omnino ad consensum, et ita auxilium gratiæ non esset necessarium ad non peccandum: imo talis auxilii denegatio certior esset peccati excusatio. Hæc autem omnia sunt contra intentionem Pauli et Sanctorum Patrum, dicentium legem siue gratia angere potius peccatum quam tollere vel impedire, ut in argumentis primæ sententiæ dicebamus. Unde nullo modo negari debet quin homo, consentiendo tali tentationi, peccet juxta materiæ qualitatem, quamvis cum solo concursu generali relinquatur, quia simpliciter libere cedit tentationi, cum tentatio non necessitet voluntatem quamdiu iudicium rationis non absorbet, ut est communis Theologorum consensus cum D. Thoma 1. 2, quæst. 10, art. 2 et 3, et est sententia Anselmi loco supra citato; et illam etiam probant Augustini testimonia adducta in prioris sententiæ confirmationem. Eodemque modo ait libr. de Spirit. et Litter., cap. 31, non obstante extrinseca vi aut suasionem, esse in potestate voluntatis facere et non facere. Idemque q. 24 in Numer. Ita ergo defendenda est necessitas gratiæ ad vincendam gravem tentationem, ut ante gratiam supponatur vera libertas ad peccandum, ideoque dum liberum arbitrium tentatione vincitur, peccare, licet absit gratiæ auxilium. Et hic revera est sensus Patrum, alioqui non satis contradicerent Pelagio, nec postularent auxilium ad non peccandum, sed ut non necessitetur voluntas. Quod etiam satis probant omnia quæ adduximus.

24. *Placitum aliorum in eodem puncto.* — Hinc ergo dixerunt alii hanc necessitatem gratiæ ad vincendam tentationem gravem non esse impotentiam antecedentem in voluntate, sed consequentem et coexistentem in Dei præscientiæ, id est, indigere voluntatem tali auxilio, non quia absolute non potest tentationem vincere, sed quia adeo debilis est ad præstandum id quod potest, ut Deus præsciat non esse id facturum, nisi juxta, quæ est necessitas vel impossibilitas consequens. Vel, ut alii loquuntur, non est necessitas quæ opponatur voluntati in libertate ad resistendum, sed

efficaciæ actualis resistantiæ, quia licet liberum arbitrium sufficiat, de facto non est id effecturum, nisi Deus auxilio gratiæ illi subveniat; et quia hoc præscivit Deus, ideo in ejus præscientiæ auxilium illud necessarium est. Atque hoc modo dicunt, liberum arbitrium non posse sine tali auxilio tentationem vincere.

25. *Rejicitur primo.* — Hæc vero sententia, dum studet in concordiam redigere libertatem arbitrii cum hac necessitate, revera destruit assertionem positam, quam ipsamet certam esse asserit. Probatur assumptum, quia ex illo responso sequitur liberum arbitrium per se et sine gratia sufficere simpliciter ad vincendam tentationem gravem: ergo simpliciter potest, sive sit effecturum, sive non, quia potestas solum dicit principium sufficiens. Sicut homo habens auxilium gratiæ sufficiens, simpliciter potest, licet non habeat efficax. Sic enim illa necessitas juxta hanc sententiam non excludit sufficientiam; ergo est principium sufficiens in solo libero arbitrio ad vincendam gravem tentationem, antequam intelligatur habere auxilium gratiæ: ergo est simpliciter potens. Consequens autem est contra assertionem, in qua non de actu tantum, sed de potestate tractamus. Est etiam contra Concilia, et Patres contententes, contra Pelagium, liberum arbitrium, ad resistendum tentationibus ita ut non peccet, nihil vel parum posse.

26. *Rejicitur secundo.* — Præterea est in illo modo explicandi hanc impotentiam alia difficultas, quia si liberum arbitrium simpliciter est potens, et antecedenter nullo modo est impotens ad vincendam tentationem sine auxilio gratiæ, absque fundamento dicitur nunquam id facturum, et Deum ita præscire, et consequenter gratis et sine fundamento ponitur illa impossibilitas consequens. Probatur assumptum, quia si principium est simpliciter sufficiens ad talem effectum absque gratia, ergo simpliciter possibile est et contingens, ex tali causa prodire talem effectum; ergo etiam potuit contingere ut Deus præsciverit voluntatem in tali occasione suæ libertati relictam non fuisse consensuram pro sua libertate, quæ ad hoc erat sufficiens; ergo necessitas illa non est universalis, neque ulla ratione vel fundamento ostendi potest infallibile esse ut nunquam contingat oppositum; ergo nec est necessarium ut Deus præsciat nunquam illam sufficientiam transitoriam esse in efficaciam, ex sola libertate voluntatis, si revera illi nude sumptæ non deest potestas sufficientis ad illum usum.

27. *Erasio de cogitatione congrua rejicitur.* — Hic vero occurrunt auctores ponentes hanc gratiam in sola cogitatione congrua, et habente congruitatem ex sola præscientia, propter futurum effectum, quam supra etiam congruitatem tantum consequentem appellavimus. Occurrunt (inquam) et fatentur posse quidem contingere ut liberum arbitrium restitutum sit in aliqua occasione, per vires solius liberi arbitrii honesta aliqua cogitatione naturali excitati, et tunc id præscire Deum; et nihilominus resistantiam illam non fieri sine gratia, quia jam illa cogitatio est congrua, et gratis datur. Verumtamen jam revolvimur in id quod sæpe dictum est, hoc modo defendi gratiam nomine, non re, neque secundum mentem Patrum, sed magis Cassiani et sequacium, quia illa cogitatio sola, si est mere naturalis, et ex generali eursu causarum, non est gratia, sed doctrina congrua, et consequenter si eum illa sola potest cum effectu vincere tentatio, licet hoc Deus præsciat, profecto scit vincendam esse viribus naturæ, non gratiæ, sicut Prosper dixit contra Cassianum. Si vero cogitatio illa aliquid amplius habet ex speciali adjutorio Dei, ruit responsio, nam hujus gratiæ necessitas inquiritur. Et præterea habet hic locum argumentum supra factum, quod hæc præscientia etiam in minimis tentationibus, et in quocumque bono actu habet locum, et ita nulla differentia inter graves et leves tentationes constituitur, nisi forte quod frequentius id contingit in levibus quam in gravibus, quod pertinet ad majorem vel minorem difficultatem, non ad majorem impotentiam. Item est simile argumentum, quod non solum in statu naturæ lapsæ, sed etiam in natura integra, imo et in natura Angelica habet locum illa præscientia, et consequenter illa necessitas seu impotentia; nihil ergo erit peculiare quoad hoc in homine lapsæ; quod dici non potest juxta doctrinam Augustini, lib. de Corrept. et grat., cap. 11 et 12, et juxta ea quæ dicemus capite sequenti.

28. *Decisio auctoris in dicto puncto 2.* — Dico ergo necessitatem divini auxilii ad vincendas tentationes graves in natura lapsa provenire ex aliqua impotentia liberi arbitrii in tali statu constituti. Quæ quidem non est impotentia physica ad volendum vel nolendum, contra tentationem, seu ad continendum actum volendi, quem tentatio extorquere conatur. Alias tentatio tolleret libertatem, et induceret necessitatem quoad exercitium, durante judicio rationis, quod est impossibile, et con-

tra dogma receptum in Theologia. Est ergo illa impotentia moralis, id est, debilitas quædam mentis et voluntatis ad constanter operandum, proveniens radicaliter ex peccato originali, et proxime ex tribus defectibus, infirmitate, et ignorantia, et captivitate relictis ex peccato. Nam appetitus vehementer inclinatur ad sensibilia, quæ ex se fortius et facilius movent, tanquam magis propinqua et proportionata sensui. Intellectus vero suis viribus relictus vix consequitur, et remisse ac tarde considerat superiores rationes, quibus voluntas movenda est ad tentationem sine peccato superandam. Quibus duobus impedimentis adjungitur instigatio dæmonis, cui fortasse, ratione lapsus humanæ naturæ, major quædam licentia in homines data est. Ex his ergo omnibus præsertim simul sumptis, quando graviter urgent, oritur in homine quædam impotentia resistendi constanter tentationi, nisi a superiori juvetur. Ita rem hanc explicat Bellarm., lib. 3 de Grat. et lib. arb., c. 3, ad 3, in prima solutione, quæ sine dubio melior est. Sic sentit Vega, dicta q. 12, et in re idem dicit Molina.

29. *Stant Patres pro decisione.* — Estque consentaneum antiquis Patribus, qui et libertatem ad non peccandum urgente tentatione in voluntate, etiam carente spiritu gratiæ, admittunt, et impotentiam resistendi simul illi tribunt, ut constat ex locis Chrysostomi et Prosperi supra adductis. Et in hac debilitate ex peccato originali contracta fundantur, quoties dicunt si Deus in tentatione hominem deserat, necessario ruere, ut ex Innocentio supra retuli, et idem habet Gregorius in Psalm. 3 Pœnitent., in fine. Item non solum in homine destituito gratia, sed etiam in minus adjuto quam gravitas tentationis requirat, eandem impotentiam agnoscent, ut ex Prospero, c. 35, contra Collator., supra notavimus, et sumitur ex illo dogmate, quod etiam homo justificatus non potest cum communi auxilio constanter resistere tentationibus, præsertim gravibus. Quod tradit Cælestinus dicta Epistola, cap. 6, ubi licet indefinite loquatur de tentationibus, tamen indicat in singulis saltem gravibus esse auxilium necessarium, et ideo quotidianum requiri, esseque postulandum, sicut in oratione Dominica petitur.

30. *Objectio contra decisionem.* — *Solutio ex Anselmo non satisfacit.* — Contra hanc vero explicationem obstat, quia quod non est physice impossibile, sed tantum moraliter, non est simpliciter impossibile, sed potius difficile,

unde contingere potest contrarium interdum evenire. Ita enim Aristoteles, 1 de Cœlo, c. 11, distinguit impossibile dupliciter dici, aut quia fieri non potest, aut quia non facile, nec cito, nec bene fieri potest. Illud autem dicitur impossibile priori modo alicui causæ, quod in ejus potentia physica non continetur. Quando ergo talis potentia non deest, licet dicatur moraliter impossibile, revera solum est difficile, et ideo oppositum interdum evenire non simpliciter repugnat: ergo si impotentia voluntatis ad vincendam tentationem gravem solum est moralis, solum est difficultas quædam. Quod quidem, coactus vi argumenti, videtur fateri Anselmus, libro de Libero Arbitrio, cap. 6, et libro de Concordia, p. ult., versus finem. At vero hoc nullatenus videtur concedendum, quia inde sequitur aliquando posse totam aliquam tentationem gravem vinci, ita ut homo non peccet, sed integre servet præceptum, sine auxilio gratiæ: sequitur etiam gratiam non esse necessariam simpliciter, ut possit vinci tentatio, sed ut facilius possit: utrumque autem videtur accedere ad Pelagianum errorem, esseque parum consentaneum Conciliis et Patribus damnantibus Pelagium. Quamvis enim non expresse loquantur de singulis et determinatis tentationibus, etiam gravibus, nihilominus si omnia quæ dicunt attente considerentur, illas etiam includi censent sub impotentia liberi arbitrii lapsi ad vincendas tentationes.

31. *Vera solutio.* — Dico ergo etiam in latitudine impotentia moralis aliquid esse posse de objecto simpliciter impossibili, id est, quod nunquam contingat a tali causa sibi permessa evenire. Unde non semper impossibile physice et moraliter in hoc distinguuntur, quod illud nunquam evenit, hoc autem interdum accidere contingit; sed formalis differentia in præsentia materia est quia ad primum impossibile non est in agente potentia physica: ad posterius autem impossibile non deest physica potentia, et nihilominus effectus seu objectum tot potest esse difficultatibus affectum, ut nunquam fiat a tali potentia uniformiter et sine defectu, nisi vel potentia juvetur, vel difficultates tollantur. Et quando tale est hoc impossibile ut nunquam a tali causa sic affecta eveniat, dicitur simpliciter impossibile respectu illius, quia absoluta possibilitas non dicitur respectu cause physice nude sumptæ, sed ut spectatæ cum circumstantiis, sine quibus nunquam ita operabitur.

32. *Exemplis declaratur.* — Possumus exem-

plis rem hanc declarare. Primum sit supra positum, quia, juxta Christi sententiam, impossibile est quin scandala aliquando eveniant. Cum autem scandalum non detur nisi per actionem liberam et peccaminosam, ut verba a Christo subjuncta declarant: *Væ autem homini illi per quem scandalum venit*; fit ut non desit potentia physica ad vitandum quodlibet scandalum; ergo necessitas illa per quam veniunt scandala, et impotentia illi opposita, est tantum moralis, et nihilominus talis est ut nunquam deficiat. Hieronymus etiam, in epist. ad Ctesiphontem, illud censet esse simpliciter impossibile, cujus oppositum nunquam evenit, etiamsi per actus physice possibles et liberos evitari posset, ut est hominem nunquam peccare. Quod repetit Hieronymus, lib. 3 contra Pelagian., parum a principio, exemplisque confirmat, dicens: *Hoc et nos dicimus, posse hominem non peccare, si velit*; ecce physicam potestatem; de morali vero impotentia subjungit: *Pro tempore, pro loco, pro imbecillitate, etc.*, usque ad illud: *Sic humana conditio, si paululum remiserit, discit fragilitatem suam, et multa se non posse cognoscit.* Ecce impossibilitatem moralem, de qua iterum in fine, cum dixisset, *in nostra esse potestate peccare, vel non peccare, ad bonum vel malum extendere manum*, subdit: *Nec quia ad breve possum, utique etiam moraliter, coges me ut possim jugiter, utique moraliter; possum jejunare, vigilare, etc.; numquid in perpetuum?* Sic ergo multa absolute seu indefinite sumpta sunt simpliciter impossibilia, non quia desint causæ physice a quibus provenire possunt, sed quia nunquam a talibus causis integre, ut sic dicam, et totaliter eveniunt, propter inconstantias earum, vel impedimenta quæ in una vel alia occasione non desunt. Sicut etiam non deest in manu potentia physica, ut, describendo circulum, perfectum illum faciat, nunquam tamen ita illum perficit, nec est possibile simpliciter loquendo, quin in una vel alia parte deficiat: item non est impossibile physice loquendo, sæpius jactatis talis seu tesseriis, eosdem semper numeros reddere, seu eandem figuram; est tamen moraliter impossibile simpliciter; id est, quod nunquam ita contingat, quia conditio rei contingentis et fortuitæ id non patitur.

33. *Applicatio exemplorum.* — *Suadet experientia.* — Ad hunc ergo modum dicimus esse moraliter impossibile vincere tentationem gravem sola libertate in hoc statu nature lapsæ, quia licet libertas non deit, etiamsi gratia

deserat hominem, nihilominus ita impotens est ad sic resistendum gravi tentationi, ut non contingat constanter et sine peccato id facere. Quod imprimis colligimus ex testimoniis adductis, nam hæc doctrina majori ex parte auctoritate nititur: deinde accedit experientia et communis omnium fidelium sensus. Quis enim est, qui in seipso non experiatur quam facile tentationibus succumbat, præsertim gravibus, si suis viribus relinquatur? Aut quis est qui adeo de se præsumat, ut in tentatione gravi, si illam vincere cupit, non statim ad Deum recurrat, et auxilium tanquam sibi necessarium ad resistendum postulet? Denique potest ratione declarari, quia licet voluntas libera sit, pendet tamen multum in usu libertatis ex consideratione et attentione intellectus, et ex inferioris appetitus affectione, quæ multum movet, et post se trahit voluntatem, et hinc fit ut, urgente tentatione, et homine sibi relicto, vel intellectum non satis applicet ut attendat et consideret, sicut moraliter necessarium est ad resistendum, vel certe ut, licet aliquando attendat, non multum in eo iudicio instet, sed tepide se gerat, propter impetum passionis, et aliquando potest tanta esse passio, ut etiam contra actuale dictamen rationis voluntas eligat. Gravis autem tentatio omnibus his modis solet urgere, et ideo si instet, infallibiliter hominem gratia non adjutum dejiciet.

34. *Progreditur explanatio, quod momentanea tentatio non sit gravis.* — Explicabiturque hoc facilius, et melius, si attendamus omnem tentationem gravem includere aliquam temporis moram et perseverantiam, nam si uno tantum momento temporis tentatio duret, non æstimabitur simpliciter gravis, quantumvis intensa videatur, dummodo potestatem, et physicam et moralem, considerandi et deliberandi relinquat. Nam si hanc potestatem auferat, vel perturbando usum rationis, vel omnino præveniando ejus advertentiam, vel saltem impediendo perfectam deliberationem et moralem potestatem illam habendi, in his casibus non poterit quidem voluntas tentationi resistere, contra illam actu absoluto nitendo; verum in hoc vel nihil peccabit, vel saltem non graviter, quia sine potestate morali deliberandi, motus voluntatis non potest esse peccatum mortale; sed vel erit motus primo primus, si nulla adsit advertentia, nec potestas deliberandi, et ita nullum erit peccatum, vel ad summum erit motus secundo primus, et culpa venialis, si aliqua adverten-

tia rationis intercedat sine potestate morali sufficienter advertendi et deliberandi. In præsentem autem agimus de tentatione quæ relinquit sufficientem advertentiam rationis ad plane deliberandum, si homo velit mentem applicare, et de hujusmodi tentatione dicimus tollere potestatem moralem illi resistendi sola libertate, sine auxilio gratiæ, quamvis non tollat libertatem ad non consentiendum pro quolibet determinato instanti illius temporis in quo tentatio durat, quandoquidem, in quocumque momento homo consentiat, graviter peccat, ut ostensum est. Et ideo talis tentatio non tollit potestatem physicam vel moralem pro singulis instantibus, quia in nullo illorum necessitatur voluntas quoad exercitium, ut est etiam probatum. Nec impotentia moralis potest spectari respectu alicujus instantis determinati; tum quia nulla est proprietas in voluntate, unde illa impotentia proveniat pro singulis instantibus per se consideratis; tum etiam quia alias in tali casu, auxilio gratiæ destituta, non peccaret mortaliter cedendo tentationi, quia ad peccandum mortaliter necessaria est potentia moralis vitandi peccatum, saltem pro eo tempore vel momento in quo peccatur, quia debet actus esse humanus.

35. *Gravis tamen potentiam moralem resistendi superat.* — At vero respectu totius tentationis, licet potentia physica non desit, nihilominus de potentia morali est longe diversa ratio, quia liberum arbitrium natura sua est valde mutabile, et ideo tentatio et passio contraria faciunt ne perseveranter possit attendere quantum oportet ad resistendum. Atque hæc necessitas sufficit ut simpliciter non possit homo totam illam tentationem vincere. Atque hunc modum explicandi hanc impotentiam colligo ex Basil., homil. *Quod sine divina gratia resistere Satanae nemo possit*, quæ habetur post librum de Baptismo, ubi in principio sic ait: *Frustra inflati putant libero se arbitrio peccati occasiones inanire posse, quod per solum crucis mysterium cassatur. Liberum enim illud quod in potestate hominis est arbitrium, in eo situm est ut velis vel nolis resistere diabolo; non enim ut omnino hoc possis potentiam habes, qua affectionibus carnis domineris. Nisi enim Dominus custodierit civitatem, etc.*, quod late prosequitur semper ostendens impossibilitatem hanc consistere in constantia et perseverantia resistendi. Hoc videntur sensisse omnes Theologi, qui asserunt posse hominem servare vi libertatis quodcumque præceptum legis naturæ, et vitare peccatum illi contra-

rium ad breve tempus, licet non omnia, neque longo tempore, et locuti sunt indistincte, sive tempore tentationis, sive extra tentationem urgentem, quia ratio libertatis, in qua nitebantur, æque procedit in omnibus peccatis in particulari sumptis in utroque tempore. Sed est valde considerandum unum tempus esse breve, quando non est tentatio vehemens, quod erit longum ad perseverandum, interveniente forti tentatione, et ideo, licet modico tempore vel pro certis instantibus possit arbitrium resistere, nihilominus si tentatio ita duret ut simpliciter æstimari possit gravis, non poterit liberum arbitrium sine gratiæ auxilio illi simpliciter et sine lapsu resistere, quod in sequentibus capitibus, tractando de multitudine præceptorum, et de dilectione Dei, amplius explicandum est.

36. *Ad oppositæ sententiæ auctores, n. 1, 2.* — Tandem ex his non erit difficile ad ea quæ in favorem contrariæ sententiæ adduximus respondere. Nam ex auctoribus qui pro illa allegantur, illi valde errarunt qui absolute asseruerunt posse hominem lapsum vivere longo tempore sine peccato mortali contra legem naturalem, solis viribus liberi arbitrii, contra quos cap. 20 disputavimus. Illi vero qui dixerunt posse hominem vincere tentationem gravem sine gratia, locuti sunt de tentatione gravi intensive (ut sic dicam), nulla alia duratione in ea spectata, quam nos simpliciter gravem non reputamus, vel locuti sunt comparatione tantum facta ad singula momenta determinate sumpta, non vero de victoria totius tentationis simpliciter et absolute, ut clarius quam alii Molina declaravit. Anselmus autem, si attente legantur quæ in utroque loco dicit, loquitur de libero arbitrio non nudo, sed ut adjuto per gratiam ad operandum bonum, et ideo nihil ad præsentem causam facit.

37. *Solutio rationis oppositæ in num. 3, et confirmationum in num. 5 et 6.* — Ad rationem autem principalem, respondetur eam solum probare, etiam scilicet auxilio gratiæ, manere liberum arbitrium ad non peccandum tempore tentationis; non tamen probat habere etiam potestatem ad constanter et strenue dimicandum toto tentationis tempore; et hoc etiam solum probant tres confirmationes ibi adductæ, et quæ in illis ostentantur. Solum quod in fine tertie confirmationis dicitur, de homine existente in gratia habituali, declaratione indicet, nam in illo etiam est libertas contra tentationem, non tamen moralis potestas pro

gravi tentatione, nisi actualiter juvetur, ut infra tractabitur. Quomodo autem hæc impotentia moralis non repugnet libertati, jam declaratum est, quia non consideratur respectu determinati effectus, vel momenti, pro quo necessitetur voluntas, sed absolute respectu totius tentationis confuse sumptæ, cum tamen libertas non confuse sed in puncto definito exerceatur. Unde hæc impotentia non est per determinationem potentiæ ad unum, quæ opponitur libertati, sed per inconstantiam et infirmitatem operantis, quæ non libertati, sed constantiæ et fortitudini opponitur.

38. *Solvitur num. 7.* — Ad ultimam confirmationem respondetur negando consequentiam; est enim valde diversa ratio inter motiva sensibilia et humana quæ interdum homo sibi proponit, ad toleranda alia mala, vel superandas difficultates, propter talia bona vel obtinenda vel conservanda, et ea motiva quæ idem homo, suo discursu, et sine juvamine gratiæ, ad vincendam tentationem inducentem ad peccatum, potest efficaciter considerare et sibi proponere. Quam differentiam notavit Aug. lib. de Patientia, c. 17; cum enim in 16 eandem objectionem fecisset, respondit: *Qui hæc dicunt, non intelligunt, et quemque iniquorum tanto esse ad quæcumque mala perferenda duriores, quanto in eo major est cupiditas mundi, et quemque justorum tanto esse ad quæcumque mala perferenda fortiores, quanto in eo major est charitas Dei. Sed cupiditas mundi initium habet ex arbitrio voluntatis, progressum ex jucunditate voluptatis, firmamentum ex vinculo consuetudinis: charitas autem Dei diffusa est in cordibus nostris per Spiritum Sanctum, etc.* Et hinc infert patientiam mundi esse ex nobis, patientiam vero justorum esse ex Deo: et inde sumptus videtur can. 17 Concilii Arausiacani 2: *Fortitudinem gentium mundana cupiditas, fortitudinem Christianorum charitas Dei facit, etc.* Sic ergo nos dicimus victoriam tentationis vel alicujus mali propter aliud temporale bonum posse esse ex nobis, quia cupiditas illius boni ex nobis incipit et humana consuetudine radicitur; victoriam autem tentationis solum propter non peccandum non posse esse ex nobis, quia affectus ille non peccandi non potest esse in nobis perfectus et efficax, nisi ex Spiritu Sancto.

39. *Instantia contra proximam solutionem.* — *Diluitur.* — Dicit forte aliquis, licet affectus efficax non peccandi simpliciter non possit esse nisi ex charitate, nihilominus affectum non peccandi in hac occasione et hoc genere

peccati esse posse, absque charitate, et absque alio motivo supernaturali, ex solo affectu aliqujus naturalis virtutis, ut castitatis, vel justitiæ, qui potest a nobis esse, sicut dictum est de bono actu naturali; ergo quoad hoc procedit objectio, et discrimen non assignatur. Respondeo etiam in hoc versari eum proportionem discrimen positum, quia affectio voluntatis ad temporalia et sensibilia bona propter humanum commodum incipit a cupiditate sensibili, et fit suavis ex dilectione etiam sensibili, et ideo facile firmatur consuetudine, nam, ut dixit idem Augustinus eodem libro, cap. 24: *Quando voluntas sua cupiditate rapitur, quanto jucundius aestimat quod habere vel consecrare appetit, tanto tolerabilius perferat quod minus sibi est ad perferendum, quam aliud ad patiensdum. Quidquid enim (inquit) illud est, ex creatura est, cujus nota voluptas est, quodammodo enim familiari contactu, atque connexu ad experiendam ejus suavitatem adjacet amanti creaturæ amata creatura: et prosequitur in e. 25, dicens: Voluntas autem creatoris, de qua scriptum est: El torrente voluptatis tue potabis eos, alterius generis est, etc.* Idem ergo nos dicimus de voluntate vitandi peccatum in gravi tentatione ex affectu honestatis; nam talis affectio non incipit ex sensu, nec voluntas honestatis sensu percipitur, imo ordinarie sensui repugnat, et ideo rara est talis affectio ex vi solius naturæ, et non firmatur consuetudine, nec fit suavis sine interventu auxilii gratiæ, ac proinde per se non sufficit ad vincendam gravem tentationem sine ejusdem gratiæ auxilio: et hanc rationem indicavit sæpe Augustinus, ut videre licet lib. 2 de Peccator. merit., cap. 17, et lib. 2 contra duas epist. Pelagian., capit. nono, et de Spirit. et litter., capite tertio.

40. *Solvitur deinde eadem quarta confirmatio quantum ad exemplum de hæretico.*—Denique ad exemplum de hæretico qui mortem sustinet pro aliqua veritate fidei quam suo modo credit, respondeo, etiamsi fortasse id faciat ex libertate sua, absque auxilio gratiæ, nullum inde argumentum sumi ad eum qui, cum sit catholicus, martyrium sustinet pro eadem veritate. Alioqui illo argumento probaretur non solum posse liberum arbitrium sine gratia vincere tentationem gravem contra præceptum naturale, sed etiam contra præceptum supernaturale, quod Pelagianum est. Est autem clarum discrimen, nam hæreticus ita moritur pro veritate fidei quam credit, sicut pro suo errore, et ita non suffert mortem pro veritate catholica, ut catholica est, sed ut

ab ipso creditur propter aliqua humana motiva, vel propter pertinaciam in proprio iudicio, quod præfert aliis humanis incommodis, etiam morti, propter firmatam consuetudinem, etiam pravam ex parte modi, licet ex parte materiæ contingat non esse malam. Catholicus autem, quando pro una veritate moritur, virtute totam fidem catholicam profiteatur, quia non potest id facere sine firmo affectu supernaturali ad catholicam veritatem. Et ideo hic fere versatur idem discrimen, quod proxime ex Augustino notatum est; unde addimus, si contingat hæreticum ex aliquo pio affectu ad Deum, vel ad aliquam rem divinam, mori pro aliqua veritate fidei quam credit, etiam illud non facere sine auxilio speciali gratiæ, quia et illud habere potest, licet sit hæreticus, et ille affectus concipi non potest ex sola ratione et libertate humana: et sic dixit Augustinus, lib. de Patient., cap. 27, *si hæreticus credat, qui negaverit Christum, æterno supplicio esse puniendum, et pro ista fide supplicium perferat, bene agere; ac proinde, ait, negandum non est hoc esse donum Dei.* Quale autem sit hoc donum non declarat, sed solum ait: *Intelligendum est alia esse Dei dona filiorum illius Jerusalem, quæ sursum libera est, mater nostra,* in quo significat non esse auxilium supernaturalis ordinis, licet sit supra communem cursum naturæ, et ex speciali providentia datum.

41. *Solvitur denique quantum ad argumentum Rubionis.*—Ad ultimam confirmationem, imprimis nego posse aliquam tentationem gravem, etiam contra præceptum negativum, vinci sine actu positivo voluntatis volentis non facere id ad quod tentatio inducit; tum quia probabile est non posse dari puram omissionem perfecte voluntariam sine actu positivo, quod saltem moraliter verum est; tum maxime quia tempore gravis tentationis, si voluntas nolit superari, necesse est ut aliquid faciat, vel directe se opponendo tentationi per affectum contrarium, vel recurrendo ad Deum per orationem, vel applicando intellectum ad sanctas cogitationes quæ contineant affectum, ne tentationi consentiat. Alioqui si voluntas tunc veluti dormitaret et nihil ageret, eo ipso videretur se morali periculo exponere, et consequenter peccaret. Præterquam quod videtur plane impossibile habere tunc firmum affectum resistendi et non consentiendi, et nullo modo illum explicare aut exercere. Igitur talis resistentia non fit sine auxilio generali, et ita cessat objectio. Secundo, responderi potest dando

vel permittendo antecedens, nimirum, quod voluntas possit resistere solum non agendo; quo posito, necessario sequitur ut possit resistere sine concursu generali requisito ad volendum, vel positive nolendum, quia ad non agendum, ut sic, non est necessarius concursus generalis: nam potius ad non agendum necessaria est carentia actualis concursus, cum ille nihil aliud sit quam eadem actio, ut a Deo procedens. Hoc ergo permisso, adhuc neganda est consequentia, quia auxilium speciale, necessarium ad vincendam tentationem, est antecedens seu præveniens voluntatem, ut non consentiat. Unde si voluntas non consentiat, positive volendo non operari, tunc speciale auxilium ad non consentiendum prius datur quam concursus generalis ad illam voluntatem, ideoque licet fingamus voluntatem contineri per puram suspensionem actus, adhuc necesse est ut præcedat auxilium speciale, quod absolute datur ad confortandum hominem ne consentiat, quocumque modo id facere, seu non facere possit aut debeat. Illud autem auxilium potest esse sine concursu, aut per aliam negationem, scilicet, non permittendo ut tentatio crescat, vel etiam per positivam actionem ex parte intellectus, immittendo efficacem aliquam considerationem, quæ contineat voluntatem, vel in voluntate ipsa immittendo timorem, vel quid simile quod non sit proprius actus humanus, sed quasi passio quædam immissa a Deo apta ad continendam voluntatem, quocumque modo consensum suum contineat.

CAPUT XXV.

UTRUM HOMO, IN STATU NATURÆ INTEGRÆ, TOTAM NATURÆ LEGEM IN QUACUMQUE OCCASIONE ET OMNI TEMPORE, SINE AUXILIO GRATIÆ SERVARE, OMNIAQUE GRAVIA PECCATA VITARE POTUISSET?

1. *Questionis sensus.* — Supponimus questionem esse de lege mere naturali, et de modo implendi illam contentaneo rationi tantum naturali, ut excludamus omnem modum supernaturalem, qualis est, implere ex claritate, vel meritorie, vel alio simili: in modo autem illo, quem naturalem vocamus, includimus non solum agere bona, sed etiam bene moraliter ex circumstantiis ex eadem lege naturæ ad honestatem actus necessarius. Unde non tractamus de victoria tentationum perfecta et fructuosa ad vitam æternam, sed solum de sufficienti ad non peccandum, quam alii re-

sistentiam appellant: sic igitur tria in titulo quæstionis includimus, scilicet, facere quæ lex naturalis jubet, et non peccare contra illam longo tempore, et omnes tentationes illo tempore occurrentes vincere. Quia vero hæc videntur involvere perseverantiam, est consequenter advertendum nunc non esse sermonem de perseverantia in gratia, neque de dono ad hoc requisito, sed solum de perseverantia in honestate naturali. Et quia hæc quæstio in omnibus statibus naturæ humanæ locum habet, et in singulis habet proprias difficultates, sigillatim de illis tractatur.

2. *Negativa opinio.* — Igitur de homine in natura integra dixerunt aliqui non potuisse longo tempore vitare omnia peccata contra legem naturæ sine superaddito auxilio gratiæ. Solet pro hac sententia referri Gregorius in 2, distinct. 29, quæst. 1, artic. primo; tamen si attente legatur in fine conclusionis secundæ, respondendo ad objectionem incidentem, et conclusione 3, aperte docet contrarium. Dicit enim in illo statu non fuisse illam motionem necessariam, quam in homine lapsa posuerat in distinct. 28. Addit vero indignuisse gratia habituali hominem in illo statu, etiam ad servandam legem naturæ; quod potest habere sensum bonum, ut infra dicam. Refertur etiam Abulensis in capite decimo-nono Matthæi, quæst. 178; tamen, ut supra dixi, ille ambigue utitur nomine gratiæ actualis, et potius videtur in sententiam extreme contrariam inclinare, ut de homine lapsa dicam. Proprie ergo sententiam hanc videtur docere Capreolus in secunda, distinct. 29, quæst. 1, art. 1, conclus. 3 et 4, respondendo ad argumenta contraria; et Hispalensis ibid., artic. 3, notab. sexto; qui hanc gratiam in illo statu explicare videntur per specialem inspirationem et illuminationem, non per physicam motionem supra impugnatam. Hos auctores imitari profitentur aliqui Moderni, sed revera solum in voce cum illis conveniunt, quia tantum requirunt congruam cogitationem, alioqui mere naturalem.

3. *Ejus fundamentum.* — Fundamentum hujus sententiæ præcipue sumitur ex Concilio Arausic., capit. 29, dicente etiam in statu innocentie indignuisse hominem gratia ad perseverandum. Idem supponit Gelasius Papa, in scripto contra Pelagianam hæresim, quod habetur tom. 4 Epistol. Pontific., inter epist. 5 et 6 Gelasii, ubi sic inquit: *In ipsis primis hominibus, dum sua nimium felicitate confidunt, et tantam Dei gratiam in vacuum reci-*

pientes, non orando, quod utique nusquam fecisse referuntur, nec de perceptis gratias referendo, nec ut eadem intemerata durarent, simpliciter implorando, incolumes constare nequiverunt. Idem tradit Augustinus epist. 106, et libro de Corrept. et grat., cap. 11 et sequent., et lib. de Natur. et grat., cap. 48, quod etiam sentit Prosper contra Collator., cap. 18, dicens tale recepisse Adamum liberum arbitrium, *ut si auxiliantem sibi Dominum non desereret, posset in bonis quæ naturaliter acceperat perseverare, quia vellet*, ubi auxiliantem Dominum requirit. Imo in hoc etiam loquendi modo Faustus imitatus est Augustinum, lib. 1 de Grat. et lib. arb., cap. 1.

4. *Secundum.*—Secundo, quia alias potuisset Adam vincere tentationem serpentis suo libero arbitrio, absque auxilio gratiæ; consequens est falsum; ergo. Sequela probatur, quia præceptum illud naturale erat, id est de actu, vel potius omissione et abstinence mere naturali. Minor colligitur ex Gelasio Papa, in loco allegato, quatenus dicit fuisse Adamo necessariam orationem ad vincendam illam tentationem, et ideo eccidisse quia, de se confisus, ad Deum non recurrit. Eandem gratiam postulat Augustinus in Enchirid., c. 106, et epist. 106, et 14 de Civit., cap. 27, et simili modo loquitur de casu Angelorum, libro 12, c. 19.

5. *Tertium.*—Tertio, quia quantumcumque esset natura integra, semper ex parte intellectus esset exposita variis cogitationibus quæ interdum poterant efficacius ad malum quam ad bonum inclinare, et consequenter poterat habere adjumentam sufficientem inconsiderationem ad peccandum. Eæ autem cogitationes non sunt in potestate hominis etiam in natura integra, quia antevertunt libertatem; unde nisi esset aliquis qui illas dirigeret, interdum in una vel alia occasione ad peccatum traherent; ergo necessaria erat gratia Dei humanas cogitationes dirigentis et gubernantis.

6. *Assertio communis affirmans.*—Nihilominus assero in integra natura potuisse hominem facile dinque servare totam legem naturæ, absque ullo lapsu illi soli contrario. Hæc est communis sententia Theologorum in 2, dist. 14, ubi Magister, c. 4. et D. Thom., q. 1, art. 4, ad 1; Bonav., art. 1, q. 2; Rich., a. 1, q. 1, et alii tum ibi, tum etiam dist. 28, præsertim Durand., quæst. 3, et Gab. Item Aleus., 2 p., quæst. 90, in 2. Sumitur etiam aperte ex D. Thom., d. q. 109, art. 4 et 8. Cajet. et Conr., et aliis ejusdem locis; Soto, 1 de Nat. et

grat., c. 6; Vega, l. 12 in Trident., c. 21; et Bell., l. 1 de Grat. primi hominis.

7. *Ejus prima probatio.*—Probatur primo, quia difficultas vel impossibilitas servandi legem naturæ absque gratia quæ nunc est, ex peccato originali orta est; ergo in statu naturæ integræ non fuisset, nam si affirmatio e t causa affirmationis, etiam negatio negationis. Agimus enim de causa adæquata. Sic enim recte inferimus secundum fidem, in statu innocentiae fuisse potestatem nunquam moriendi, quia mors per peccatum introducta est, ad Roman. 5. Antecedens autem habetur ex Concilio Arausicano, capite ultimo, ubi dicitur per peccatum fuisse ita attenuatum et inclinatum liberum arbitrium, ut neque diligere Deum sicut oportet, neque propter Deum operari possit. Maxime vero id docet Augustinus, lib. de Perfect. just., capit. 4, respons. 9, et lib. de Corrept. et grat., cap. 10, ubi ait facile fuisse homini in illo statu perseverare sine peccato; et c. 11 dicit non indignisse illo adjutorio quo indiget, qui nunc clamat: *Quis me liberabit a corpore mortis hujus*; et c. 13 dicit amissam quodammodo fuisse libertatem non peccandi, quæ tunc erat: *Et id o*, ait, *majoribus donis remansit a iuranda infirmitas*; et lib. de Bono persever., capite 7, clare constituit differentiam, quia tunc posset non peccare per liberum arbitrium, quod nunc non potest, et lib. de Natura et grat., c. 50 et 55, et lib. 14 de Civitate, c. 11, et lib. 1 Hypognotic., in eodem sensu dicit amissam esse per peccatum Adæ possibilitatem non peccandi. Similem doctrinam habent Prosper ad 5 object. Vincentian., et in libro Sentent., regul. 152; Fulgent., lib. de Incarnat. et grat., cap. 12 et 13; et Bernard, libro de Grat. et liber. arbit. Quæ quidem omnia, licet variis modis ab aliis auctoribus explicentur, revera non possunt habere alium legitimum et accommodatum sensum; quia libertas ad non peccandum in quocumque actu per se spectato, vel in quocumque determinato momento, non est amissa per peccatum, nec necessitas opposita est contracta per illud: ergo oportet intelligi de necessitate respectu totius legis, et de impotentia ad vitandum omnia peccata contra illam, vel vincendas similes tentationes absque gratia; ergo erat illa potestas ante peccatum in libero arbitrio, saltem respectu legis naturalis.

8. *Secunda probatio.*—Ratione probatur tam assertio quam hæc doctrina Patrum, quia in natura integra non deficiebat principium

per se necessarium ac sufficiens ad servandam totam legem naturæ, et deinde non erant impedimenta quæ notabiliter difficilem redderent illam observantiam absque peccato pro diuturno tempore; ergo erat simpliciter possibilis per vires liberi arbitrii. Consequentia profecto per se nota videtur, quia quod per se et ex propriis principiis est possibile, et ex impedimentis aut hostibus extrinsecis non fit nimis difficile aut grave, facile potest non solum fieri, sed etiam durare, et longo tempore frequentari; talis autem erat in illo statu observantia mandatorum naturalium, et victoria tentationum, seu peccatorum contra illa, ut in antecedente sumptum est; ergo de illatione dubitari non potest. Major item evidens est, quia tota lex naturæ observatur per actus naturalis ordinis, quorum principium per se sufficiens ex parte intellectus est naturale lumen rationis, quod in illo statu erat perfectum, et ex parte voluntatis est naturalis facultas, et libertas ejus; ergo ex hac parte non erat defectus. Minor autem probatur, quia imprimis, neque ex parte fomitis, neque ex corruptione corporis esset tunc infirmitas illa quæ nunc ingerit maximam difficultatem honeste operandi. Deinde ex parte intellectus non esset propria ignorantia, nam hæc etiam est poena peccati. Et quamvis esse posset aliqua inconsideratio actualis, liberum tamen et facile esset homini non consentire, vel operari sine plena advertentia, quia non moveretur cum animi perturbatione, neque haberet motus involuntarios trahentes ad objectum malum non satis consideratum; ergo nihil erat intrinsicum quod magnam ingereret difficultatem. Extrinseca vero suggestio demonis, si persisteret in sola materia naturali, non posset magnam difficultatem inferre, cum non posset perturbare appetitum velphantiam absque voluntatis consensu, neque etiam considerationem intellectus impedire, si homo vellet attendere, proæ facile potest. Multoque minus potest demon hominem positive decipere ante culpam, et in Prologon. 4 dictum est. Ac denique factum posset tunc demon hominum per suggestionem tentare, non vero passionem aliquam excitare, aut aliam internam difficultatem ingerere.

9. *Adversarietate.* — *Reiectio quadrupliciter.* — Dicit ergo aliquis quod, licet ex objectis concupiscentie non possent tunc tentationes, vel difficultates graves bene operandi, nihilominus ex objectis spiritualibus esse posset gravissima tentatio superbiæ, quæ sola supera-

ret omnes quæ nunc sunt. Ita enim dixit Joannes Vincent., in relectione de Gratia Christi, q. 6, et ex hoc principio deduxit, durante statu innocentie, plures fuisse homines damnandos quam salvandos; ergo eadem ratione inferri potest non potuisse homines in eo statu omnes similes tentationes vincere per liberum arbitrium sine auxilio gratiæ. Sed imprimis non recte id colligitur ex perfectione hominis in illo statu. Alias posset etiam inferri plures fuisse Angelos reprobos quam salvos, quia major superbiæ occasio erat in Angelis, quam in hominibus integris. Deinde sententia illa est aperte contra D. Thom., 1. p., q. 95, a. 4, ad argumenta, ubi absolute dicit fuisse in illo statu multo facilius vincere quameumque tentationem quam in hoc. Præterea non semper major excellentia infert majorem superbiæ tentationem, si lumen sit majus, et affectus sit pacatus, ut fuisset in integritate naturæ: optimumque exemplum habemus in B. Virgine. Denique persistendo in objectis mere naturalibus, non apparet unde insurgeret tunc major superbiæ tentatio quam nunc patimur; imo neque æqualis, quia licet bona naturalia tunc essent majora, etiam auctor illorum melius cognosceretur, et facilius sine ulla perturbatione consideraretur. Hæc ergo tentatio non multum impediret tunc possibilitatem non peccandi contra legem naturalem.

10. *Alia aliorum erasio.* — *Impugnatur.* — Aliter alii respondent ad priorem rationem, recte quidem probare non fuisse futuram in natura integra necessitatem antecedentem peccandi interdum ex defectu principii sufficientis, etiam pensatis omnibus impedimentis; nihilominus tamen fuisse futuram necessitatem aliquam consequentem in aliqua occasione, in qua vidit Deus hominem non fuisse usurum sua possibilitate. Verumtamen hæc responsio satis impugnata est ex dictis in capitibus precedentibus. Nam illa necessitas tantum consequens non excludit absolutam potestatem, de qua disputamus. Et præterea gratis asseritur debuisse hujusmodi necessitatem intervenire in omnibus hominibus illius status, ut respondendo ad tertium argumentum iterum dicam. Denique, quamvis Adam fuerit tentatus in ea occasione, in qua Deus præscivit illum concupiscentiam, non ideo dici potest illum non valuisse resistere, sive per libertatem solam, sive per gratiam sufficienter adjuvantem. Ergo similiter licet in homine creato in integra natura sola, sine alia gratia, vel cognitione supernaturali, Deus præsciret peccatum

fuisse in tali occasione per liberum arbitrium, non inde infertur non potuisse resistere; imo potius sequitur potuisse, saltem physice: et quia de multis etiam potuit Deus præscire non fuisse peccaturos in simili occasione, recte etiam colligitur omnes potuisse etiam moraliter sine ulla propria gratia adjuvante omnia peccata legi naturali contraria vitare.

11. *Ad primum fundamentum in num. 3.* — Argumenta vero in contrarium facilem habent solutionem. Nam testimonia quæ in primo afferuntur, tractant de adiutorio necessario ad perseverandum in gratia; quod nos fatemur, etiam in illo statu, verum gratiæ adiutorium esse debuisse; quale autem futurum esset seu sufficeret, suo loco dicemus. Hic vero agimus de sola observantia præceptorum naturalium, de qua est longe dissimilis ratio. Nam perseverantia in gratia non fit sine aliquo effectu supernaturali, ad quem est necessaria gratia, sola autem observatio legis naturalis et carentia culpæ contrariæ non includit effectum supernaturalem, et ideo propriam gratiam non requirit. Si autem sermo esset de influxu Dei moventis seu concurrentis, et de beneficiis Dei ex generali ordine provenientius, sic verum est, etiam in statu integræ naturæ, perseverantiam in quocumque bono, et victoriam eujuscumque mali, Deo, ut principali auctori, esse tribuendam, ut sæpe dictum est.

12. *Ad secundum in num. 4.* — Ad secundum de tentatione Adami ejusque victoria, imprimis dico præceptum impositum Adæ, licet materialiter (ut sic dicam) et ex parte rei præceptæ fuerit de actione quadam, seu omissione naturali, seu corporali, nihilominus formaliter fuisse supernaturale, quatenus pendebat ex fide, et obedientia debita Deo, ut gubernanti naturam supernaturali modo, et ex hac parte non poterat servari sine gratia. Deinde tentatio illa non fuit primo et per se de solo esu cibi prohibiti, sed de appetitu similitudinis divinæ in scientia boni et mali; imo etiam involvebat tentationem circa fidem debitam verbis Dei et ejus comminationi, ideoque mirum non est quod ad vincendam illam tentationem fuerit necessaria gratia. Neque illud pertinet ad rem de qua tractamus, quia tentatio illa ad superiorem ordinem gratiæ, quem demon per illam evertere conatus est, pertinuit. Accedit quod Patres ibi citati de perseverantia in gratia loquuntur, seu ad retinendam justitiam, ut Augustinus loquitur: et similiter loquuntur de perfecta victoria, et ad vitam æternam

fructuosa, ut patet ex verbis Augustini, d. c. 27, l. 14 de Civit.: *Adam sic erat institutus, ut si de adiutorio Dei fideret, bonus homo malum angelum vinceret: et infra: Meritum bonum habens in adjuta voluntate recta, malum vero in deserente Deum voluntate perversa, quia et ipsum confidere de adiutorio Dei non posset sine adiutorio Dei.*

13. *Ad tertium in num. 5.* — Ad tertium, concedimus potuisse hominem in natura integra habere cogitationem inclinantem ad peccatum contra legem naturalem, proveniente, vel ex suggestionem dæmonis, vel alterius hominis, vel ex aliquo objecto externo excitante illam. Verumtamen talis cogitatio, quantumvis esset de se intensa et fortis, posset facile per bonum usum libertatis repelli, vel ad considerationem meliorem intellectum applicando, vel per voluntatem objectum pravum sic presentatum respuendo, quia ante aliquem prævum voluntatis consensum non poterat passio vel concupiscentia inordinata insurgere, quæ illum voluntatis liberæ usum difficilem nedum impossibilem redderet; nec refert quod talis cogitatio antevertere posset usum libertatis etiam in illo statu, quia anteverteret sine passione appetitus, et ideo semper maneret integra facultas voluntatis ad sustinendum actum et applicandum intellectum ad saniolem cogitationem, et ita semper maneret integra potestas vitandi similia peccata.

14. *Procedit proxima responsio.* — Verumtamen hoc non obstante, concedimus potuisse hominem in illo statu et occasione consentire malæ cogitationi pro sua libertate. Hinc vero non sequitur fuisse gratiam necessariam in eo statu ad tale peccatum vitandum, non solum semel, sed etiam semper in una et eadem persona, quia ille affectus erat contingens, et fortasse in paucioribus, quantum erat ex parte causarum, ideoque facile potuisset in una et eadem persona, vel etiam in multis nunquam evenire; quia semper non solum physica potestas, sed etiam moralis integra perseverabat. Probabile autem est in magna hominum multitudine nunquam fuisse defuturum aliquem qui a tali bono deficeret, et ita respectu totius multitudinis hominum probabile etiam est fuisse necessarium speciale gratiæ et providentiæ adiutorium, ut ex magna hominum multitudine nullus naturalem legem unquam violaret. Et hoc ad summum illa ratio suadet, estque valde consentaneum mutabilitati humanæ, libertati suæ commissæ, etiam cum illa integritate, quæ non excludebat contingentiam ad quam veluti

necessitate quadam illa varietas in affectibus sequi solet.

CAPUT XXVI.

UTRUM HOMO LAPSUS POSSIT OMNIA PRÆCEPTA NATURALIA DIU SERVARE, VITANDO OMNIA PECCATA, ET TENTATIONES OMNES ILLIS CONTRARIAS, SINE SPECIALI AUXILIO GRATIÆ?

1. *Exponitur quæstio. — Qui affirmantem partem tradant.* — Sermo est de peccatis mortalibus vitandis, nam de venialibus, res est certissima, etiam cum ordinario auxilio gratiæ, non posse omnia simul vitari, ut in libris sequentibus dicemus. Præterea tractatur quæstio præcipue de adiutorio actuali Dei, quoniam illud est quod proxime dat vires ad operandum; an vero habitualis etiam gratia necessaria sit, in fine capitis dicemus. Aliqui ergo ex Scholasticis antiquis dixerunt posse liberum arbitrium vitare sine gratia omnia peccata contra legem naturæ, etiam collective sumpta. Ita loquuntur Durand., in 2, d. 28, quæst. 3 et 4, et Gabr., q. 1, et Scotus, quæst. unica, quos aliqui interpretantur de gratia habituali, ita ut non excludant necessitatem auxilii actualis. Verumtamen frustra ita excusantur, quia licet indistincte de gratia loquantur, et principaliter de habituali quæstionem proponere videantur, nihilominus in discursu necessitatem omnis gratiæ excludunt, et soli naturali libertati post deliberationem intellectus hunc effectum tribuunt; ut patet ex discursu Scoti contra sententiam D. Thomæ, et ex Gabriele, qui non solum dicit gratiam non esse necessariam, sed etiam sufficere naturales vires: et idem sentit Durandus. Rationes etiam quibus hi auctores utuntur, eo tendunt ut non sit major gratia ad collectionem necessaria, quam ad singulos actus, ut maxime in Scoto videre licet: constat autem eos non postulare gratiam actualem ad singulos actus. Eandem sententiam tenet Almainus, tractat. 1. Moral., cap. 16. Nam licet indistincte tractet de actibus bonis, in ultimis verbis loquitur de omnibus, et Scotum sequitur. Abulens. etiam in q. 178, in c. 19 Matt., dum non majorem gratiam requirit ad collectionem quam ad singulos actus, in hanc sententiam inclinat, quamvis, ut dixi, ambigue de gratia loquatur; sicut etiam D. Thom., in 2, dist. 28, quæst. 1, art. 2 et 3, ubi hanc sententiam probasse videtur.

2. *Quibus Scripturæ locis suadeant. — Ratio.* — Solent ad hanc sententiam addendam quædam Scripturæ testimonia induci, quæ parum

momenti habent. Unum est illud ad Rom. 2: *Naturaliter ea quæ legis sunt faciunt.* Sed jam supra dixi Paulum non dicere facere omnia, sed indefinite, seu confuse, satisque vera erit propositio si aliqua faciant. Aliud testimonium est illud 1 ad Corinth. 10: *Fidelis Deus,* etc. Sed hoc potius probat dari nobis adiutorium gratiæ, ut possimus. Aliud est illud Deut. 30: *Mandatum, quod præcipio tibi, non supra te est.* Sed quia ibi est sermo de præcepto dilectionis, dicam de illo commodius in cap. 29. Præter hæc testimonia afferuntur rationes sumptæ ex possibilitate mandatorum naturalium, et ex libertate arbitrii, et præcipue urgetur illa ratio c. 18 insinuata, quia ex discursu per singulos actus et occasiones, in quibus vitari potest peccatum, concluditur tota collectio; quæ omnia in superioribus tacta et soluta sunt, et in capite sequenti, dicendo de homine in puris naturalibus, aliquid addemus.

3. *Quo pacto sibi contrariæ objectioni occurrant.* — Quod si contra sententiam hanc obiciantur Conciliorum decreta damnantium Pelagium, eo quod diceret posse hominem sola libertate absque auxilio gratiæ totam legem servare, et sine peccato diu vivere, responderi potest primo loqui Patres de tota lege, quæ ad vitam æternam consequendam necessario servanda est. Hæc autem lex non solum moralia præcepta legis naturæ, sed etiam fidei, spei, charitatis, et pœnitentiæ includit, et totam illam sic intellectam dicebat Pelagius posse absque gratia servari, et omnia peccata ac tentationes omnes contra illam vitari seu superari posse; hoc ergo est quod damnant Concilia et Patres; non vero quod sola lex naturalis, quantum ad moralia secundum se spectata, possit absque gratia servari. Secundo et consequenter responderi potest Pelagium asseruisse non solum posse liberum arbitrium sua virtute vincere omnes tentationes quoad vitandum longo tempore peccatum, sed etiam quoad consequendum fructum vite æternæ, et hoc etiam modo posse totam legem naturæ servare non solum quoad substantiam, sed etiam quoad modum, id est, meritorie et ex charitate, et hoc etiam est quod Patres et Concilia damnant. Dicti autem Scholastici expresse distinguunt observationem quoad substantiam tantum vel etiam quoad modum, et priorem tantum tribuunt libero arbitrio, et ita rejiciunt errorem Pelagii: eorum ergo sententia prædicti definitionibus non damnatur nec comprehenditur.

4. *Vera sententia negans.*—Nihilominus vera sententia est hominem lapsum, gratiæ viribus destitutum, non posse longo tempore resistere omnibus tentationibus, nec vitare omnia peccata mortalia contra legem naturalem, atque adeo necessariam esse illi gratiam ad observanda omnia præcepta legis naturæ, etiam quoad substantiam eorum. Ita docet D. Thom. 1. 2, q. 109, art. 4 et 7, et quæst. 14 de Verit., art. 12; Cajetan., Conrad., et alii scribentes in 1. 2, ubi supr. Magist. in 2, d. 26, 27 et 28, ubi frequentius Theologi, Bonav., Ægid., Richard., Greg. et Capreol.; Henric., quodlib. 5, q. 20, et quodlib. 6, q. 41; Soto, 1 de Natur. et grat., c. 22; Veg., q. 13, de Justific., et l. 12 in Trid., c. 21 et 22, et omnes moderni qui contra Lutheranos scribunt.

5. *Probatur primo Pauli testimoniis.*—Probatur primo ex Paulo, nam ubi docet necessitatem gratiæ ad vincenda peccata et servandam legem, sæpe mentionem facit legis naturalis, et difficultatem et impossibilitatem servandi illam magna ex parte constituit in lege fomitis et concupiscentiæ, quæ certe præceptis moralibus et naturalibus resistit. Hoc videre licet in epist. ad Rom., præsertim a c. 3, unde c. 7 ait: *Sentio aliam legem in membris meis repugnantem legi mentis meæ*; per legem mentis plane intelligens legem naturalem; unde quod addit: *Et captivum me ducentem in legem peccati*, etiam intelligitur de peccato legi naturali contrario, nam lex peccati, quæ est fomes, ad hoc proxime inclinatur. Ac tandem exclamat: *Quis me liberabit?* etc., et respondet: *Gratia Dei per Jesum Christum Dominum nostrum*; præterea, c. 8, subjungit: *Quod impossibile erat legi, in quo infirmabatur per carnem.* Nam hæc infirmitas carnis observantiam legis naturalis proxime impedit, et ob hanc causam solet Paulus dicere legem fuisse occasionem peccati. Imo 1 ad Cor. 13 ait: *Virtus vero peccati lex*, et subjungit: *Deo autem gratias, qui dedit nobis victoriam per Jesum Christum*, attribuens gratiæ victoriam concupiscentiæ: et in eodem sensu dixit 2 ad Cor. 3: *Littera occidit, spiritus autem vivificat*, per litteram legem intelligens, per spiritum gratiam, ut late exponit Augustinus toto lib. de Spirit. et litter.

6. *Alia ejusdem testimonia ab Augustino exposita.*—Unde c. 14 et sequentibus optime declarat prædictas sententias Pauli intelligi non solum de lege veteri, sed etiam de lege naturali, docens ad quamlibet earum implendam esse impotens liberum arbitrium post lapsum,

auxilio gratiæ destitutum. Primo, quia sæpe reducit Paulus impotentiam illam ad legem, *Non concupisces*, prout generaliter includit omnem concupiscentiam irrationalem, et hoc modo attribuit gratiæ Christi victoriam concupiscentiæ. Secundo, quia quod Paulus dixit ad Galat. 2: *Si ex lege justitia, ergo gratis Christus mortuus est*, non minus concludit, si addas: *Si ex lege naturali justitia*, ergo gratis Christus mortuus est, quam si de lege veteri illud intelligas. Tertio, quia Paulus in epistola ad Romanos non solum Judæis, sed etiam gentibus ostendere voluit gratiam Christi esse necessariam, et ideo utrosque convincit quod suam legem observare non valuerint, sed peccatis et concupiscentiis corruptissimi fuerint; ergo necesse est ut, sub lege, non solum scriptam, sed etiam naturalem comprehenderit, quoties dicit legem non justificare, vel hominem per se non sufficere ad implendam legem. Eandemque doctrinam habet August. epist. 86, q. 2, et lib. de Natur. et grat., cap. 2 et sequentibus, et libr. de Grat. Christi, c. 8, et de Grat. et lib. arb., cap. 4, et sæpe alias, et expresse Hieronymus, epist. ad Ctesiphontem, parum a medio.

7. *Probatur secundo Conciliorum Patrumque testimoniis.*—*Concilia de Ethnicis etiam verba faciunt.*—Hinc etiam efficaciter probatur nostra sententia testimoniis Conciliorum et Patrum, quæ supra, cap. 22, generaliter adducta sunt ad probandum victoriam tentationum esse ex gratia. In illis enim (ut ibi etiam diximus) saltem docent Concilia non posse liberum arbitrium hominis lapsi, inter tot peccandi occasiones quot in hac vita occurrunt, se immunem a peccato servare, etiam in his quæ sæpe ad legem naturæ spectant; tum quia ad hæc maxime inclinatur concupiscentia, et infirmitas ex peccato relicta, ex qua hujus auxilii necessitatem colligunt, ut capite præcedenti allegavi; tum etiam quia loquuntur eodem sensu quo Paulus, ut ex verbis eorum intelligi potest. Nam Concilium Palæstinum, in undecimo articulo, cogit Pelagium fateri victoriam tentationum ex adjutorio Dei provenire, ut supra relatum est ex Augustino, epist. 406; loquitur autem illud Concilium de victoria quoad vitandum peccatum, ut constat ex illius gestis ab Augustino relatis in proprio libro., a. 21 a nobis relato supra prol. 6, cap. 3, et ex Concil. Milevit., cap. 3, ubi docet gratiam esse necessariam ad non peccandum. Verum est hæc Concilia non dicere expresse esse necessariam ad non peccandum contra legem naturalem; nihilominus tamen mul-

tum favent huic sententiæ; tum quia non loquuntur de solis fidelibus, sed etiam de infidelibus, qui ordinarie non peccant, nisi contra legem naturalem, et in illis maxime locum habent prædictæ definitiones; tum etiam quia fundantur sæpe illa Concilia, non in hoc quod peccata aliqua sunt contra legem supernaturalem, sed in lapsu naturæ humanæ, et in infirmitate quam inde contraxit ad non peccandum, et ad resistendum dæmoni, etiam in his rebus et materiis quæ sunt contra legem naturalem, et concupiscentiæ sensibili conformes. Et hoc modo confirmat eandem veritatem Concilium Trident., sess. 6, cap. 11 et 13; et Hieronym., Dialog. 3 contra Pelagian.; Aug., epist. 143, et lib. de Grat. et lib. arb., cap. 11 et sequent. usque ad 16; et optime Prosper, lib. 2 de Vocat. gent., cap. 28, alias 9, in fine; et Fulg., lib. de Incarnat. et grat., cap. 16.

8. *Rejicitur prima evasio in num. 3. — Rejicitur secunda ibid.* — Atque ex his satis impugnata et explosa est prior evasio in favorem prioris sententiæ. Nam ostensum est, licet interdum Patres loquantur de lege tota, ut includit præceptum fidei et charitatis, nihilominus etiam loqui sæpe de illa parte illius legis quæ pertinet ad solam legem naturalem; imo interdum non de illa integra, sed etiam de particulari præcepto ejus, ut de castitate, fortitudine, et similibus. Et simili modo redarguitur ex dictis posterior evasio, quia Paulus, Pontifices, Concilia et Patres citati non solum loquuntur de observatione legis per bonos actus, in quibus locum habere posset interpretatio de bonis actibus pietatis, vel habentibus modum consentaneum fini supernaturali, sed loquuntur etiam de necessitate gratiæ ad non peccandum contra legem naturalem, ut ostendimus, et specialiter sumitur ex epistola Concilii Carthaginensis ad Innocentium, et ex rescripto Innocentii, et Concilio Milevitano, capite tertio, et ex locis Hieronymi et Augustini, et aliorum Patrum; requirunt enim gratiam ad servandam legem nature, ita ut sufficiat ad non peccandum contra eandem legem naturalem; ad hoc autem sufficienter actus naturales, quibus fiat substantia præcepti, vel omittatur quod lex vetat.

9. *Probatur tertio ex orationibus omnium fidelium.* — Confirmari præterea potest hæc veritas ex communi consensu fidelium, quem in suis orationibus declarant, a Deo petendo ne peccatis vel tentationibus etiam contra legem naturalem consentiant, ut patet ex oratione Dominica, quam Cyprianus et alii ita

exponunt: ergo omnes sentiunt se indigere auxilio gratiæ ad non peccandum contra legem naturalem et vincendas tentationes illi contrarias. Quo argumento utuntur Augustinus, Prosper, Fulgentius, Hieronymus, et Africanus Patres, et Pontifices in locis et epistolis sæpe citatis. Habetque argumentum hoc peculiarem vim in præsentis puncto; tum quia ex oratione recte colligitur necessitas: ergo oportet ut hæc gratia sit necessaria saltem ad integram observantiam præceptorum, vel, ut dici solet, ad totam collectionem actuum, quando ad singulos necessaria non est; unde supra dicebamus ideo in singulis esse orandum, quia saltem in singulis est periculum, et incertum est ubi erit necessitas; ergo signum est, saltem ad totam collectionem, omnino esse gratiam necessariam; tum etiam quia non solum gratia, sed etiam oratio necessaria est et in præcepto, ut possimus sine peccato perseverare; ergo signum est per illam postulari gratiam necessariam ad talem effectum, sicut supra de gravibus tentationibus argumentabamur. Quod si quis objiciat hanc rationem non habere locum in infidelibus, cum orare non valeant quamdiu infideles sunt, dicendum est imo hac ratione probari, eos in illo statu non posse implere totam legem naturalem, quia nec orare possunt, sicut oportet, ad obtinendum auxilium quo legem impleant; neque hoc est inconveniens, quia ex parte Dei paratum habent auxilium, et illis non deest libertas in singulis actibus qua possint legem implere.

10. *Probatur quarto ratione.* — Tandem ratio propria hujus necessitatis est quæ de tentationibus gravibus data est. Nam ex illa resolutione sequitur hæc quam nunc tradimus; quia tentationes graves contra præcepta legis naturæ non possunt homini mortali in hac vita deesse longo tempore, nisi peculiari Dei auxilio protegatur; sed non potest homo sine gratia vel unam gravem tentationem ita vincere, ut peccatum sola libertate evitet: ergo multo minus poterit totam legem naturalem diu sine peccato servare. Verumtamen, licet hæc ratio plane convincat, supposita conditione generali presentis vitæ, quæ est inter graves tentationes versari, nihilominus non est adæquata. Nam licet in longo tempore non occurreret ulla tentatio tam gravis quæ per liberum arbitrium vinci non posset, nihilominus inter ordinarias tentationes occurrentes, militans homo per solum liberum arbitrium et rationem naturalem, sine auxilio gratiæ non pos-

set diu omnes illas vincere quia sæpe peccaret, et ita nec posset totam legem naturalem in illo tempore servare, nec omnia peccata contra illam vitare, ut notavi c. 18. Et ratio est, quia licet tunc non esset in singulis peccatis vitandis absoluta impossibilitas moralis, esset nihilominus non parva difficultas, in his maxime in quibus tentatio saltem mediocris urget; et inde insurgeret impossibilitas simpliciter, licet moralis, in perseverantia et uniformitate operandi longo tempore cum eadem integritate cavendi malitiam et operandi honestatem. Unde ratio facta de unaquaque gravi tentatione cum proportionem et majori vi potest hic applicari; quia multitudo et varietas occasionum et tentationum mediocrium, quæ longo tempore occurrunt, magis auget difficultatem constanter operandi honeste, et sine lapsu toto illo tempore, quam unius et ejusdem tentationis acerbitas continua per aliquod mediocre tempus eandem difficultatem ingerat, quia illa diuturna perseverantia et circumspectio in tanta rerum difficultum varietate magis repugnat mutabilitati et infirmitati liberi arbitrii, effrenatæ concupiscentiæ conjuncti. Ergo si victoria unius tentationis gravis superat moraliter vires liberi arbitrii, magis illas superat diuturna illa innocentia inter tot tentationes, etiam mediocres, de qua ratione dicemus iterum capite sequenti.

11. *Excluditur objectio.* — Dices: Ergo saltem ille homo, qui nec mediocres tentationes contra legem naturalem multo tempore pateretur, posset sola potestate liberi arbitrii peccata omnia contra legem naturæ vitare, eamque integre servare. Respondeo, data hypothesis, et loquendo de solis peccatis mortalibus, posse sine incommodo consequens admitti, quia causa adæquata illius impotentia est, quod præcepta legis naturæ non implentur, nec peccata contra illam vitantur, sine bello et pugna contra tentationes, præsertim internæ concupiscentiæ vel superbiæ, quas dæmon sua industria auget: ergo, cessante hac causa, nihil mirum est quod cesset actus. Illa tamen hypothesis supponit singularem gratiæ protectionem, sine qua impossibile est homini mortali et ratione utenti sine tentationibus vivere, et ita illa observatio legis naturæ et peccatorum fuga non esset sine gratiæ Dei protectione, quam donum perseverantiæ etiam includit. Dixi autem, *loquendo de peccatis mortalibus*, quia licet nulla esset tentatio graviter vel mediocriter inducens ad peccatum mortale, etiam inter leves tentationes contra præcepta,

non posset homo suis viribus diu abstinere a venialibus negligentis et defectibus qui sunt veluti connaturales homini mortali, et respectu talium peccatorum nunquam deesse possunt graves, imo et gravissimæ tentationes, ut in libro sequenti latius dicturi sumus. Et ita nihil superest respondendum ad fundamenta contrariæ sententiæ, præter ea quæ capite sequenti addemus.

12. *Quam certa sit sententia comprobata.* — Solet autem interrogari quam sit certa hæc assertio. In quo omnes Theologi, præsertim moderni, docent esse certam et indubitam, quia contrarium multum accedit ad errorem Pelagii. Difficultas autem est an simpliciter sit de fide; aliqui enim affirmant, propter testimonia Pauli et Conciliorum quæ adduximus. Ita sentit Medina ad art. 4 et 8 divi Thomæ supra citatos, quem nonnulli moderni imitantur. At vero Soto, dicto cap. 21, non putat esse de fide, quia testimonia adducta habent aliquam interpretationem non omnino improbabilem, et sequitur Torens., libro 2 Confessionis Augustinianæ, cap. 3; et indicat etiam Valent., 2 tom., disput. 8, quæst. 1, puncto 5, § 2, quia solum ut opinionem Theologicam illam tradit. Et mihi etiam videtur non esse simpliciter de fide, quia non invenio expressam et specificam Ecclesiæ definitionem hujus dogmatis sub his terminis propositi, scilicet de observatione omnium præceptorum legis naturæ solum quoad vitanda peccata illis contraria. Definitiones autem generales supra adductæ habent evasiones supra etiam positas, quæ licet sufficienter refellantur, non tamen ita evidenter, ut certum de fide sit, hoc particulare dogma sub illa generali definitione contineri. Ideoque satis est dicere doctrinam hanc esse conclusionem Theologicam adeo certam, ut contraria non solum jam temeraria sit, sed etiam errori proxima. Supererat hoc loco cum Lutheranis disputandum, an homo lapsus possit cum Dei gratia servare præcepta moralia, nullum grave peccatum contra illa committendo. Sed in hoc nulla est controversia inter catholicos, nam fides docet non solum possibile, sed etiam facile esse vitare omnia hæc peccata per auxilium divinæ gratiæ, et juxta mensuram ejus servare præcepta; contra hæreticos vero contrarium sentientes videri possunt Bellarmin., lib. 4 de Justificat., a cap. 10 usque ad finem, et Valent., 2 tom., disput. 8, quæst. 1, punct. 5, § 3; et Stapleton., de Justificat., lib. 6 de Perfect. justitiæ, et in sequentibus aliqua de hoc puncto

dicemus, de dono perseverantiæ disputando in libro decimo.

CAPUT XXVII.

UTRUM, AD SERVANDAM LEGEM NATURALEM ET VITANDA OMNIA PECCATA ILLI CONTRARIA, LONGO TEMPORE, SIT NECESSARIA HABITUALIS GRATIA, VEL FIDES, AUT SUFFICIAT AUXILIUM ACTUALE, ET QUALE ILLUD ESSE OPORTEAT?

1. *Præmittitur imprimis, ac probatur requiri actuale auxilium.* — In hoc puncto suponimus necessariam esse gratiam actualis auxilii, vel motionis divinæ per internam aliquam inspirationem et illuminationem, ita ut sine hoc auxilio nec gratia ipsa habitualis sufficiat. Probatur primo, quia de hac gratia maxime loquuntur Concilia et Sancti in præsentia materia, ut supra ostensum est, et in testimoniis allegatis videre licet. Secundo, quia etiam in homine justificato, ultra habitualement gratiam, requiritur speciale auxilium divinæ motionis et protectionis, ut homo custodiat integre totam legem naturæ, non solum quoad modum supernaturalem seu meriti, sed etiam quoad vitandum omnem lapsum, ut aperte tradit Cœlestinus in Epist. ad Gallos, cap. 6, dicens: *Hominem etiam baptismatis gratia renovatum idoneum non esse ad superandas diaboli insidias, et superandas carnis concupiscentias, nisi per quotidianum Dei adjutorium perseverantiam bonæ conversationis acceperit.* Idem sumitur ex Concilio Tridentino, dicto cap. 11 et 13, et infra tractando de dono perseverantiæ dicetur; ergo a fortiori requiritur actuale auxilium ad prædictum effectum in quolibet homine non justificato. Tertio, quia quæ homines inducunt ad peccandum contra legem naturæ, actu movent et impellunt, vel suadent, quia sine his non est propria tentatio quæ actu fiat, quia non nisi per hujusmodi actus animæ infertur. Ergo e contrario soli habitus non satis juvant ad vincendam tentationem sine actuali motione et influxu divinæ gratiæ.

2. *Prima illatio ex dictis.* — *Secunda.* — Et hinc obiter infertur gratiam necessariam ad hunc effectum non posse esse solam habitualement, quia hæc non dat vires, nec per se inclinatur ad actus naturales. Dicitur: sanat animam; ergo hoc satis est ut det vires bene operandi. Respondeo: formaliter sanat animam in ordine ad Deum tollendo culpam, non tamen sanat lesionem inductam per fomitem et

effrænata concupiscentiam, et ita non tollit per se proxime infirmitatem bene et constanter operandi, sed indiget auxilio actuali. Secundo, infertur hanc gratiam necessariam ad hunc effectum non posse consistere in sola cogitatione honesta per ordinarias causas et objecta naturalia excitata, quæ tantum consequenter fit congrua per habitudinem ad futurum consensum, quem liberum arbitrium suis viribus præstabit. Quia, ut ostendi, illa non est gratia internæ inspirationis et illuminationis; imo nec est propria gratia, aut beneficium quod rationem legis et doctrinæ naturaliter debitæ et comparatæ excedat. Item quia omnes rationes factæ in superioribus capitibus hic procedunt, quia illo modo nec infirmitas naturæ agnoscitur, nec Pelagio contradicitur, quia non ponitur necessitas peccandi, quæ ex peccato originali manet, et sit antecedens in ipsa causa defectibili et infirma, sed ad summum ponitur necessitas consequens in præsentia Dei, quæ etiam in natura integra esse potuisset.

3. *Dubium primum in titulo positum, an requiratur etiam gratia habitualis.* — *Prima sententia affirmans.* — *Ei favere videtur Augustinus.* — His ergo positis, primum dubium est utrum gratia habitualis sit etiam necessaria ad prædictum effectum. In quo prima sententia est affirmans. Videturque esse D. Thomæ 1. 2, quæst. 109, art. 4 et 8; requirit enim gratiam habitualement sanantem naturam, ut homo possit omnia præcepta implere et omnia peccata vitare. Tenet Vega, quæst. 13 de Justificat., ubi etiam addit non sufficere auxilium supernaturalis ordinis, si gratia sanctificans et charitas desit. Et hanc sententiam nunc frequentius sequuntur Theologi. Videturque sumi ex Augustino de Spirit. et litter., cap. 14 et sequentibus, ubi expresso probat fidem, quæ per dilectionem operatur, esse necessariam ad servanda omnia præcepta decalogi, et sine hac gratia etiam legem decalogi esse litteram occidentem; at fides, quæ per charitatem operatur, est fides viva per charitatem, quæ non est sine gratia sanctificante; ergo hanc gratiam vult esse necessariam ad servandum decalogum. Et idem sentit lib. 1 de Grat. Christ., cap. 8, ubi ait ad legem implendam necessariam esse gratiam et justitiam, quæ, Deo donante, diligendo teneatur; et de Corrupt. et grat., cap. 2, similiter requirit charitatem; et in Epist. 95, cum aliis Episcopis scribit, ad non peccandum non satis esse liberum arbitrium, nisi juvetur per gratiam,

quam dixerat non esse legem, sed *gratiam qua justificamur ab iniquitate, et qua salvamur ab infirmitate*. Multaque alia de illa gratia dicit, quæ non nisi in gratiam sanctificantem conveniunt.

4. *Item Concilia.* — Præterea hunc modum loquendi Augustini imitantur Concilia; nam Patres Carthagin., epist. 90, *per gratiam, qua Christiani sumus, dicunt liberum arbitrium a concupiscentiarum dominatione liberari*. Concilium etiam Milevit., cap. 3, dicit gratiam Dei in qua justificamur, dari non solum in remissionem peccatorum, sed etiam in adiutorium, ut non committantur; et in canone 4 explicat modum quo adjuvat, præstando nimirum *ut quod faciendum noverimus, etiam facere diligamus*, et addit inferius: *Ut ædificante charitate, scientia non possit inflare*; ubi satis declarat gratiam illam esse justificantem, quia charitatem includit; et cap. 5 definit gratiam justificationis esse ad hunc effectum simpliciter necessariam. Concilium etiam Arausic., cap. 13, dicit arbitrium voluntatis in primo homine infirmatum, nisi per gratiam baptismi non posse reparari.

5. *Prima ratio pro eadem sententia.* — *Secunda.* — Ex quibus verbis cæterisque testimoniis hæc sumitur ratio, quia infirmus, nisi prius sanitatem recuperet, non potest firmiter et constanter ambulare; ergo nec liberum arbitrium per peccatum infirmatum potest constanter bene operari, servando totam legem, et vincendo concupiscentias et tentationes omnes, omniaque peccata contraria vitando, nisi prius sanetur; non sanatur autem, nisi per gratiam sanctificantem, ut dixit Concilium Arausicanum: ergo neque potest illa omnia perficere sine tali gratia. Secunda ratio sit, qua utitur D. Thomas; nam homo carens gratia sanctificante est in peccato mortali; ergo non habet cor suum firmatum in Deo tanquam in ultimo fine; ergo non potest constanter bene uti creaturis, nec convenienter ordinare omnes actiones suas, ita ut in illis non sæpe cadat, et ad creaturam potius quam ad Deum tanquam ad ultimum finem convertatur. Quia ad finem ultimum regulari debent actus humani, ut boni sint; qui autem ab illo fine est aversus, non potest bene et constanter illa regula uti, et ideo necesse est ut sæpe deficiat, faciendo actus illi fini contrarios: et hoc confirmat illud Gregorii, homil. 11 in Evangel.: *Peccatum, quod per penitentiam non deletur, suo pondere in aliud trahit*: et auctor Imperfecti in Matth., homil. 37: *Si semel (ait) pec-*

cantes obligaverimus nos operibus diaboli, jam nostra virtute exadere non possumus: sed sicut navis, fracto gubernaculo, illuc ducitur ubi tempestus voluerit, sic et homo, divinus gratiæ auxilio perduto per peccatum, agit quod non vult (id est velle debet), sed quod diabolus vult.

6. *Tertia ratio.* — Tertia ratio esse potest, quia qui implet totam legem naturalem justus est apud Deum; ergo gratiam sanctificantem habet: ergo e contrario qui hanc gratiam non habet non servat legem totam naturalem, ac subinde hæc gratia est necessaria ad non peccandum diu contra illam legem. Antecedens sumitur ex illo Pauli ad Romanos secundo: *Factores legis justificabuntur*, quod exponens Augustinus de Spirit. et litt., capite vigesimo-sexto, dicit *non esse ita intelligendum, tanquam per opera, non per gratiam justificentur, sed ita intelligendum esse, factores legis justificabuntur, ut sciamus aliter eos non esse factores legis, nisi justificentur, ut non justificatio factoribus accedat, sed ut factores legis justificatio præcedat*. Loquitur autem aperte de lege naturali; et potest declarari, quia si in Decalogo considerentur præcepta primæ tabulæ, includunt dilectionem Dei super omnia, quæ non est sine gratia sanctificante; si vero spectentur præcepta secundæ tabulæ, includunt amorem proximi, juxta illud Roman. 13: *Non adulterabis, non homicidium facies, etc., in hoc instauratur: Diliges proximum tuum sicut te ipsum*. Hæc autem dilectio sine vera charitate perfecte haberi non potest, quia ut ibidem dicitur: *Qui diligit proximum, legem implevit, et dilectio proximi malum non operatur*.

7. *Secunda sententia negans.* — Nihilominus multi Scholastici docuerunt ad solius legis naturalis observationem quoad omnia ejus præcepta quoad substantiam, et ad vitandum longo tempore peccatum contra illam vincendo omnes tentationes occurrentes, non esse necessariam gratiam sanctificantem, sed sufficere divinum auxilium. Ita sentit Richard. 2, d. 28, art. 1, quæst. 3, ubi hanc gratiam vocat gratiam datam, distinguitque illam tam a generali concursu, quam a gratia gratum faciente. Non tamen satis explicat an loquatur divisive tantum de præceptis legis nature, vel etiam collective, utrumque vero insinuat: et idem sentit Bonav. ibi, art. 1, q. 3, et art. 2, q. 2; Marsil. in 2, q. 18, art. 2, per varias conclusiones, in quibus confuse de præceptis naturalibus et supernaturalibus loquitur. Item Abulens., in cap. 19 Matth., quæst. 178 et 179, qui in hoc excedit, quod per gratiam

gratis datam nihil aliud quam motionem Dei per generalem concursum et ordinariam providentiam videtur intelligere. Illum tamen moderni aliqui Theologi imitantur.

8. *Ejus fundamentum.* — Fundamentum generale hujus sententiæ esse potest, quia gratia habitualis per se non dat vires necessarias ad efficiendos actus quibus lex naturalis servatur, et consequenter nec ad vitanda peccata vincendo tentationes; ergo nec est ad hunc effectum simpliciter necessaria. Antecedens declaratur, quia gratia habitualis, vel est in essentia animæ, et illa non est operativa, saltem ut proximum principium et virtus operandi, et ita per se non dat vires; vel sunt alii habitus infusi fidei, charitatis, et isti, licet dent vim ad efficiendos actus supernaturales, tamen ad eliciendos actus naturales non sunt necessarii; lex autem naturalis tota actibus naturalibus sufficienter impletur; ergo neque illi habitus gratiæ sunt necessarii ad prædictos effectus. Ergo nullo modo est necessaria gratia habitualis ad prædictos effectus. Probatur consequentia, quia non dantur alii habitus gratiæ, per se loquendo. Quamvis enim habitus acquisiti possint per accidens infundi, et sic vocari gratia habitualis, tamen neque illi sunt necessarii, neque ita ordinarie infunduntur, neque pertinent ad habituales gratiam, de qua est sermo, quæ omnia per se notissima sunt. Neque etiam habitus solent requiri, nisi propter suos actus, neque hic possunt alio titulo postulari, cum de necessitate gratiæ ad bene operandum tractemus. Et confirmatur, quia de facto Deus confert hoc adiutorium per actuales motiones quæ non juvantur per se ab habitibus, et dari possunt a Deo, etiam illis qui non habent habitus gratiæ; quid enim repugnat? Ergo per illas motiones gratuita potest homo peccator carens gratia servare diu omnia præcepta legis naturæ, sine novo peccato, et sine acceptione gratiæ habitualis, quia potest nullos supernaturales actus efficere, sine quibus gratia habitualis vel remissione peccati non comparatur, ut postea videbimus.

9. *Accedit quod in contrarium allegata numer. 3 et 4 facile explicantur.* — Accedit quod testimonia in contrarium adducta non omnino cogunt. Primo, quia aliud est loqui de gratia sine qua homo non salvatur, aliud de gratia sine qua non impletur lex naturalis: nam licet prior includat posteriorem, quia nemo salvatur nisi per gratiam juvetur ad vitanda peccata, tamen e converso non est necesse ut, qui

juvetur ad legem solam naturalem servandam, salvetur. Patres autem, cum explicant se loqui de gratia justificante, loquuntur de priori gratia, sine qua homo non salvatur, non tamen dicunt illam esse necessariam ad implendam solam legem naturæ; non sufficit enim ad salutem legem naturalem servare, nisi servetur etiam lex fidei et charitatis. Unde cum Augustinus loquitur de præceptis Decalogi, ibi includit amorem charitatis Dei super omnia: unde secundo dici possunt multa intelligi de observatione præceptorum perfecta et ex dilectione Dei; sic enim loquitur Augustinus in prioribus locis, et Concilia Carthaginense et Milevitanum. Arausicanum vero solum dicit non reparari liberum arbitrium lapsum absque gratia baptismi, quod verum esset, etiamsi absque illa gratia ei daretur ut totam legem naturalem servaret, quia hoc, ut dixi, ad absolutam reparationem liberi arbitrii non satis est. Denique etiam si loquantur de observatione legis naturalis quoad substantiam, et vitando culpam, sub gratia justificationis includunt, non solum habitus, sed etiam motiones gratiæ, et omnes inspirationes et illuminationes quæ ad justitiam coram Deo obtinendam, servandam, vel promovendam nobis conferuntur. Hæ autem motiones non solum dantur hominibus justis, sed injustis et peccatoribus, et ideo per illas solas potest homo juvari ad non peccandum longo tempore, etiamsi habitus gratiæ non habeat, et nihilominus dicitur juvari per gratiam justificationis, quia ad illam pertinent dicta auxilia, etiamsi per se sola hominem non sanctificent. Et tunc etiam dicitur hic effectus fieri per gratiam sanantem, non quoad ablationem culpæ jam commissæ, sed quoad reficiendas aliquo modo vires liberi arbitrii, quæ licet non sit sanitas perfecta, est inchoata, et via ad consummatam, ideoque sub gratia sanante comprehenditur.

10. *Confirmatur primo superior explicatio.* — Et confirmantur hæc omnia, primo quia non aliter loquuntur Concilia de victoria omnium tentationum seu peccatorum committendorum, quam de gravi tentatione superanda; sed dici non potest ad gravem tentationem superandam esse necessariam habituales gratiam, et Concilia sufficienter explicantur de motione actuali gratiæ, ut supra e. 18 ostensum est; ergo idem est dicendum de vitandis peccatis longo tempore contra legem naturæ. Confirmatur secundo, quia alias homo in puris naturalibus non potest servare præcepta omnia

naturalia longo tempore, quia per vires naturæ non posset, et gratiam sanctificantem non haberet. Consequens autem est falsum, ut supponimus, et infra dicetur; ergo necesse est per motiones divinas posse hominem in eo statu perficere hunc effectum: idem ergo nunc est dicendum.

11. *Tertia sententia affertur.* — Propter quas duas rationes dixerunt aliqui non solum non esse necessariam gratiam habituales ad hunc effectum, verum etiam nec interna auxilia proprie supernaturalia in sua entitate, qualia ad actus fidei, spei et charitatis dantur, esse necessaria, sed sufficere motiones ordinis naturalis datas modo præternaturali, id est, ultra vires naturales tam ipsius hominis, quam omnium causarum naturalium quæ illum tunc possent ad servanda naturalia præcepta excitare, sicut de gravi tentatione in eodem capite decimo-octavo dicebamus. Est enim eadem ratio, quia hic effectus non requirit principia supernaturalia quæ per se ac physice efficiant actus necessarios ad servandam legem naturæ, sed solum requirit ut moraliter moveant et fortiter, et ut mentem illuminent, ac suavem reddant operationem virtutis; hæc autem omnia per dietas motiones extraordinarias sufficienter fieri possunt. Et confirmatur hoc, quia in homine infideli potest Deus hunc facere effectum, et tamen in illo locum non habent motiones supernaturalis ordinis, quæ a fide incipiunt, ut supra vidimus; ergo fieri potest sufficienter per extraordinarias motiones ordinis naturalis.

12. *Nota pro decisione.* — In hoc puncto, distinguendum est, aliud esse loqui ex natura rei, aliud ex lege Dei. Natura spectanda est juxta qualitatem et conditionem propriam illius effectus, et internam deordinationem hominis lapsi, et improprietatem ac insufficientiam quam ex se habet ad perficiendum suis viribus talem effectum; nam illud adjutorium infimi ordinis, quod fuerit sufficiens ad suppleendam illam imbecillitatem liberi arbitrii, dicetur ex natura rei sufficiens. Deus autem sua voluntate potuit statuere non facere illum effectum per tale auxilium, quod infimum vocare possumus, sed per aliud perfectius. Item potuit statuere non dare hoc adjutorium, nisi habenti hunc vel illum statum, aut gratiæ et justitiæ, aut fidei, aut aliquid simile, et quidquid hoc modo fuerit necessarium, dicetur tale non ex se, sed ex lege Dei.

13. *Assertio prima.* — Dico ergo primo: Si res hæc ex natura rei et internis principiis

consideretur, nec gratia habitualis, nec fides, nec motio supernaturalis in substantia est necessaria ad hunc effectum, sed sufficit gratia motionis divinæ, quæ licet sit ordinis naturalis, supernaturaliter confertur. Hanc assertionem mihi probant fere omnes rationes factæ pro secunda sententia, et præsertim duæ confirmationes ultimæ in numero 10, cum alia quam in fine numeri 11 tradidimus, quod infidelibus posset hæc gratia præstari; illud enim verum est de potentia absoluta et de intrinseca necessitate divini auxilii, sola indigentia talis causæ, et natura talis effectus spectata, quidquid sit de potentia ordinaria, juxta legem a Deo statutam. Dices: ergo ex natura rei sufficeret etiam sola cogitatio congrua ad prædictum effectum. Respondeo negando sequelam, quia, ut supra dixi, si cogitatio dicatur congrua mere consequenter ex cooperatione, seu assensione liberi arbitrii ad cogitationem mere naturalem, et comparatam per ordinarium cursum causarum naturalium, cum solo naturali influxu Dei, talis cogitatio nec est gratiæ beneficium, multoque minus est gratiæ auxilium. Unde impossibile est dari talem cogitationem quæ de se et sine alio adjutorio Dei sit congrua ad servanda omnia præcepta naturalia longo tempore sine peccato. Alias revera talis effectus fieret solis viribus liberi arbitrii, nam ipsum solum est quod reddit talem cogitationem congruam. Item si talis cogitatio, seu potius cogitationum multitudo, in quibusdam est congrua, quia consentiunt illi, in aliis qui non consentiunt erit sufficiens; ergo illi per se habent sufficientes vires ad illum effectum, quod est contra Concilia, quæ non solum requirunt gratiam ut fiat talis effectus, sed etiam ut fieri possit, et ut homo ad id sufficiat. Si autem cogitatio hæc, ut sit congrua ante assensionem liberi arbitrii, requirat aliquam specialem motionem, tunc, etiamsi non sit congrua, esse poterit gratia sufficiens ad illum effectum, nam congruitas, per se loquendo, non addit sufficientiam, seu vires operandi, sed efficientiam actualem; ergo cogitatio congrua priori modo spectata non est sufficiens, imo nec esse potest; posteriori autem modo sumpta non est necessaria, et quando est congrua, non habet ex congruitate vim sanctificandi et sanandi liberum arbitrium, sed potius quia est fortior motio quam per naturam esse possit; et ideo semper, quantum est ex parte Dei, est accommodata ad illum effectum, et si arbitrium cooperari velit, erit etiam congrua.

14. *Secunda assertio bipartita.* — Ostenditur prior pars. — Dico secundo: quamvis non repugnet hanc gratiam sufficientem ad vitanda diu omnia peccata contra legem naturæ dari infidelibus, nihilominus valde probabile est ex lege Dei non dari nisi solis credentibus, seu fidelibus. Prior pars nota est ex præcedenti assertionem, et ex confirmationibus quibus illam suasimus. Et quia nulla implicatio contradictionis in hoc ostendi potest, quia nulla est connexio per se et ex natura rei necessaria inter illud genus auxilii et fidem; quia omnis illuminatio mentis, quæ per illud auxilium confertur, est inferior fide; fieri enim potest per motiva honesta et cogitationes a malo retrahentes, fortiores quidem et frequentiores quam per naturales vires vel causas fieri possent, non tamen in assensu fidei fundatas. Et ex parte affectus dari similiter posset hoc adjutorium per affectiones et voluptates, vel terrores proportionatas dictæ illuminationi absque superiori fide; ergo absolute non repugnat adjutorium hoc dari infidelibus.

15. *Posterior pars probatur primo* — Nihilominus probatur altera pars, quia gratia, quam Scriptura et Patres docent necessariam esse ad vitanda peccata, et resistendum temptationibus contra legem naturæ, est gratia fundata in fide; ergo requirit fidem; ergo, saltem ex lege Dei, non datur nisi fidelibus. Consequentia sunt per se evidentes. Antecedens patet ex discursu Pauli in epist. ad Rom.; nam, ut ostendat fidei necessitatem, declarat prius omnes gentes et Judæos plenos peccatis fuisse, quia illi, sua naturali sapientia et libertate de lege sua confisi, concupiscentias vincere non valuerunt, et inde concludit fidei necessitatem ad vitanda peccata contra legem naturæ; unde in c. 3 subinfert: *Ubi est ergo gloriatio tua? Exclusa est. Per quam legem? Factorum? Non, sed per legem fidei*; id est, ait August. de Spirit. et litter., c. 13: *Quod operum lex minando increpat, hoc fidei lex credendo impetrat*: et infra: *Legem operum dicit Deus: Fac quod jubet; legem fidei dicitur Leo: Da quod jubes*. Denique fides gratiam includit, quia ea ipsa que non poterant impleri per legem, per fidem impleta sunt, ut ait idem August. lib. Proposit. in epist. ad Rom., in 19; ergo gratia per quam servanda est lex naturalis, est gratia fidei, seu fundata in fide, aut per fidem impetrata: et de hac loquitur Paul. ad Rom. 7, dicens: *Quis me liberabit de corpore mortis hujus? Gratia Dei per Jesum Christum*, quæ autem ut hæc gratia declarat statim cap. 8 dicens:

Lex spiritus vitæ in Christo Jesu liberavit me a lege peccati et mortis. Lex autem Spiritus vitæ eadem est quæ lex fidei, quæ per internam virtutem Spiritus concupiscentias vincit; unde etiam dixit idem Paulus ad Galat. 3: *Conclusit Scripturæ omnia sub peccato, ut promissio ex fide Jesu Christi daretur credentibus*: sub promissione enim non tantum intelligenda est æterna hæreditas, vel perfecta sanctitas, sed etiam fortitudo et virtus ad vincenda peccata, et ideo ipsemet Christus Dominus dixit Joann. 15: *Si quis in me non manserit (utique per fidem), mittetur foras, sicut palmes, et arescet, peccata utique multiplicando*.

16. *Probatur secundo.* — Deinde assertionem hanc confirmant Patres Africani in Epistolis sæpe citatis, nam in 90 dicunt per gratiam illam, qua Christiani efficiuntur, vere liberari liberum arbitrium, ne concupiscentiis obediat. Gratia autem prima, qua Christiani efficiuntur, et fundamentum christianæ justitiæ, est fides; et non obedire concupiscentiis, est legem naturæ servare; ergo auxilium necessarium ad legem naturæ sine peccato servandam supponit fidem, et in ea fundatur. Idemque probant alia testimonia, quæ supra in prima opinione adduximus; tandem idem indicant Patres, quando dicunt veram gratiam auxiliantem ad sancte vivendum et cavenda peccata incipere a vocatione ad fidem, ut tradit Concilium Arausic. cap. 4 et ult.; Augustinus, epist. 103, et sæpe alias; Prosper contra Collator., c. 22, 26 et 29; Fulgent. de Incarnat. et grat., cap. 16 et 17.

17. *Probatur tertio.* — His testimoniis addi possunt optimæ congruentiæ, propter quas expedire potuit Deum hanc legem statuere. Prima, quia decrevit Deus ut gratia, quæ dat vires ad liberandum arbitrium a servitute concupiscentiæ, non daretur hominibus nisi propter Christi merita; ergo non debuit etiam dari nisi media fide Christi explicita vel implicita; ergo non datur nisi fidelibus ex lege ordinaria. Secunda, quia ad manifestationem gratiæ Dei, et ad superbiam hominum reprimendam, oportuit ut agnoscerent sine fide et gratia Christi non posse legem, sive naturalem, sive scriptam, servare, nec diu a peccato abstinere, quam rationem indicat sæpe Paulus in locis citatis. Tertia, quia motiva fidei sunt fortiora ad continendum hominem a peccatis, sive timore terreatur, sive amore inducatur, et ideo de lege ordinaria motiones et auxilia, quibus ad illum effectum juvatur, sunt in fide fundata, unde est illud Petri: *Cui resistite fortes in*

fide. Quarta, quia licet auxilium bene operandi et cavendi peccata ex gratia futurum sit, tamen Deus sua lege statuit ut hæc gratia per orationes impetraretur, et non daretur, saltem abundanter, et plene ad vitanda peccata mortalia, nisi petentibus congruenter; at vero oratio impetrans non fit nisi ex fide: ergo eadem lege Dei cautum est ut tale auxilium non nisi credentibus detur.

18. *Tertia assertio.* — Dico tertio: probabilius etiam est ex lege Dei non dari auxilium hoc proxime sufficiens ad vitanda omnia peccata longo tempore, nisi hominibus justificatis; atque hoc modo gratiam habitualē esse necessariam ad vitanda diu peccata contra legem naturalem, non ut proximum auxilium ad id necessarium, sed ut principale fundamentum et ratio obtinendi tale auxilium. Sic explicatam amplectimur primam sententiam; quæ licet non sit tam certa, sicut præcedens assertio, est nihilominus longe probabilior, eamque valde persuadent testimonia in illius confirmationem adducta. Quibus non fit satis responsionibus adductis in num. 9, quia licet uni vel alteri loco possint aliquæ earum adaptari, non tamen omnibus simul sumptis. Nam sæpe requirunt charitatem Dei veram et infusam, non solum ut perfecte et cum fructu homo servet legem naturæ, sed etiam ut simpliciter eam servet, ita ut contra illam non peccet: unde Augustinus, libr. de Catechiz. rudib., cap. ult., dicit: *Non implere legem, nisi qui Dominum acceperit Spiritum Sanctum, Patri et Filio æqualem.* Accipitur autem Spiritus Sanctus per gratiam habitualem, et per infusionem charitatis; ergo, ex sententia Augustini, ut homo impleat legem, necessarius est internus habitator Spiritus Sanctus, qui hominem justum in suis actionibus regat. Verum est tamen Augustinum in hoc ultimo loco, et de Spirit. et Litter., cap. 26, et sæpe alias, tractare de tota lege prout includit perfectum Dei amorem et proximi: quo modo clarum est non posse totam legem sine gratia habituali impleri; quia nemo diligit Deum super omnia, ita ut impleat charitatis præceptum, quin habeat gratiam habitualem; quia in principio, seu in prima infusione, sequitur ad illam dilectionem tanquam ad ultimam dispositionem; postea vero, ut homo diu servet omnia præcepta, necesse est ut talis observatio ab Spiritu Sancto inhabitante procedat; unde in rigore non satis probatur assertio ex illo loco, et similibus, quia non agimus de observatione totius legis, ut includit præcepta

fidei et charitatis, sed præcise de lege naturali.

19. *Alia quorundam probatio pro assertione tripliciter rejicitur.* — Instant vero aliqui, quia etiam lex naturalis præcipit suo modo diligere Deum super omnia, quod sine gratia impleri non potest; ergo hoc satis est ut gratia sit necessaria ad implendam totam legem naturæ. Sed neque hæc ratio sufficiens est, quia etiam incertum est an ad hanc dilectionem sit necessaria, quod mox disputabimus. Secundo, quia licet demus requiri gratiam, eadem ratione dicitur sufficere gratiam auxilii sine gratia sanctificaute. Tertio, et maxime, quia illud præceptum, cum sit affirmativum, non obligat pro semper; imo potest transigi longum tempus pro quo non obliget; ergo pro illo tempore sine gratia poterit observari lex naturalis, non eliciendo in toto illo tempore dilectionem Dei super omnia, neque aliquid contra illam peccando. Hoc ergo erit satis ut dicatur homo posse implere totam legem naturalem longo tempore sine gratia, quantum necesse est ad vitanda omnia peccata longo tempore, quod solum in præsentī tractamus. Hic enim non inquirimus an omnes et singuli actus legis naturalis possint fieri sine gratia, neque an omnes actus quos lex naturalis præcipit possint fieri sine gratia, nam hoc esset confundere quæstionem de necessitate gratiæ ad dilectionem Dei naturalem vel alios actus difficiles, cum quæstione de necessitate gratiæ ad non peccandum longo tempore contra legem naturalem: quod fieri non debet. Nam si in illo sensu tractetur quæstio, ut includatur in ea dilectio Dei, et supponatur haberi non posse sine gratia, non solum erit verum, hominem non posse diu servare totam legem naturæ sine gratia, verum etiam nec brevissimo tempore, quia in illo non potest juxta illam sententiam dilectionem Dei habere sine gratia. Non debet ergo misereri quæstio de dilectione Dei; sed, quidquid de illa sit, probandum est non posse hominem diu esse constantem in observatione legis naturalis, utique exequendo præcepta omnia affirmativa, quæ pro illo tempore obligaverint, et, quod caput est, non violando præcepta ejus negativa, in quo Paulus, et ex illo Augustinus et alii Patres difficultatem hujus observantiæ posuerunt, reducendo illa præcepta ad illud generale: *Non concupisces.*

20. *Legitima probatio ex divina dispositione sumpta, ac in Patribus ex Scripturis fundata.* — *Prima congruentia dicte dispositionis.* —

Aliter ergo ex illis locis colligimus assertionem, nimirum, quia licet hæc observatio legis naturæ, cavendo diu illa peccata, non includat formaliter actum charitatis Dei, ita ut necessarium sit, per proprium et formalem actum elicitedum, Deum super omnia diligere intra illud tempus, nihilominus protectio et auxilium Dei necessarium ad illam observationem legis naturalis non datur nisi illi in quo Spiritus Sanctus per gratiam inhabitat. Hoc autem præcipue credimus, quia Patres in locis citatis ita sentiunt; si omnia loca, ut dixi, simul sumantur, et inter se conferantur. Et similiter id insinuat Scriptura in locis allegatis; et ostendit experientia, quia nemo, etiam fidelis in peccato mortali jacens, diu ab aliis peccatis abstinet, vel contra omnes concupiscentias fortiter dimicat. Cum autem hoc non fuerit necessarium ex natura rei, solum possumus hujus divinæ dispositionis congruentes rationes reddere. Prima est, quia hæc protectio Spiritus Sancti, qua homo custoditur ut concupiscentias vincat et non peccet longo tempore, est insignis beneficium, quo sunt indigni etiam fideles qui in statu peccati mortalis permanent, et alioqui est paternalis providentia quasi conaturalis gratiæ Dei, quæ homines filios Dei constituit: ergo illis solis promissa est, et solis illis datur, juxta illud Pauli ad Romanos 8: *Qui spiritu Dei aguntur, hi sunt filii Dei*. Dicuntur agi spiritu Dei, non solum qui justificantur, sed etiam qui ita reguntur ab ipso, ut peccata omnia vitare possint: unde verba illa Christi supra allegata: *Si quis in me non manserit, mittetur foras, et arescet*, non tantum intelliguntur de iis qui per infidelitatem a Christo separantur, sed etiam de illis qui dilectionem ejus deserunt, et per fidem vivam in ipso non manent, nam illi etiam mittuntur et arescunt non tantum in fine, cum desperanter separabuntur, si in illo statu perseverent, sed etiam statim ac per peccatum separantur a Christo, quia extra protectionem singularem ejus fiunt, et in dies magis ac magis arescunt, si in eo statu perseverent.

21. *Altera congruentia.* — *Tertia congruentia.* — Altera congruentia est, quam insinuat D. Thomas, quia is qui nec actu nec habitu diligit Deum, est de se valde indispositus, ut a concupiscentiis et aliis occasionibus peccandi diu abstineat, et ideo, nisi penitentiam agat, non se disponit ad recipiendum auxilium quo a Spiritu Sancto contra tentationes carnis et demonis protegatur; quæ ratio elucidatur optime verbis Pauli ad Rom. 8: *Qui secundum*

carnem sunt, quæ carnis sunt sapiunt; qui vero secundum spiritum, quæ sunt spiritus sentiunt: unde infra concludit: *Qui in carne sunt Deo placere non possunt*. Omnes autem qui carent Dei gratia in carne sunt, juxta ejusdem Pauli sententiam, qui adjungit: *Vos autem in carne non estis, si tamen spiritus Dei habitat in vobis*. Declarari præterea potest in hunc modum: nam ut quis possit diu a peccatis mortalibus cavere, necesse est (moraliter loquendo) ut habeat firmum propositum nunquam peccandi mortaliter; nam qui non est hoc generali proposito munitus, et, in singulis occasionibus, privatis motivis et rationibus ducitur, vix potest in singulis prævalere, nedum contra omnia quæ varia et multiplicia sunt constans esse, ut eleganter describit Cyprian. libr. de Mortalitat., non longe a principio. Oportet ergo habere confirmatum per propositum contra omne peccatum, quod sine gratia non fit, ideoque illud habere non potest qui in aliquo peccato jacet; ergo ob eandem pravam dispositionem non datur ei specialis protectio Spiritus Sancti, qua concupiscentiis omnibus resistat, et non peccet contra totam legem naturalem; sicque procedit dictum Gregorii: *Peccatum, quod per penitentiam non deletur, suo pondere in aliud trahit*.

22. *Dubium alterum principale ex postrema tituli parte.* — *Quorumdam responsio et probatio.* — Ex his ergo colligitur ad hujusmodi effectum necessariam esse fidem et charitatem, saltem habitualement, et ultra habitus gratiæ necessarium esse actuale auxilium Dei regentis et protegentis justum. Declarandum vero superest an necessarium sit ut hoc auxilium actuale sit supernaturalis ordinis, vel sufficiat ordinis naturalis. Aliqui existimant necessario requiri auxilium supernaturalis ordinis, ac proinde in substantia sua supernaturale: nam ex secula assertionem id colligi videtur: quia requiritur auxilium fidei, seu ex fide; hoc autem auxilium supernaturale est, sicut et fides est supernaturalis: ergo etiam auxilium necessarium ad servanda præcepta legis naturæ est auxilium supernaturale. Idem argumentum sumitur ex eo quod Patres requirunt gratiam justificantem, quæ vox, ut extenditur ad auxilia actualia, non significat nisi motiones illas quæ ad actus justitiæ supernaturalis excitant et adjuvant.

23. *Expenditur dicta probatio, et præcipua ex parte rejicitur.* — Verumtamen observare oportet aliud esse loqui de principio proxime adjuvante ad observationem præcepti natura-

lis, aut resistendum tentationi illi contrariæ : aliud vero esse loqui de via seu ratione obtinendi tale auxilium. Ratio ergo facta solum probat hoc posteriori modo requiri gratiam vel auxilium gratiæ ordinis supernaturalis, quia obtinendum est, mediante fide impetrante, et ratione filiationis divinæ, quam gratia habitualis confert. Hinc autem non sequitur auxilium ipsum, quod immediate datur ad illum effectum, necessario habiturum esse supernaturalitatem ejusdem ordinis. Nam multa per fidem impetramus, quæ ordinis naturalis sunt, ut sanitatem, scientiam, et multa etiam beneficia justis conferuntur, quia justis sunt, quæ similiter naturalia sunt, juxta illud: *Non vidi justum derelictum, nec semen ejus querens panem.* Maxime vero impetrantur hæc vel ratione prioris gratiæ donantur, quando ad finem ejusdem gratiæ utilia sunt, vel esse possunt, et ad illum finem ordinantur. Sic ergo potest impetrari per fidem auxilium quod et sit gratia, quia gratis datur, et aliquo modo supernaturale, quatenus est effectus fidei et orationis, et nihilominus sit naturalis ordinis, quia ad effectum propter quem datur, ut proximum principium, non est majus necessarium. Nam si singuli actus propter quos datur considerentur, motio naturalis ad illos sufficit, ut supra probatum est; si vero attendatur collectio et multitudo similium actuum, ad illam multiplicatio et collectio similium motionum et auxiliorum propter eandem rationem satis erit. Et si per fidem vel gratiam sanctificantem obtineantur, habebunt omnia quæ Concilia requirunt, nam et sunt auxilia ex fide, et ad gratiam justificationis pertinent, quatenus non peccare contra legem naturæ magna pars est justitiæ; ergo talia auxilia sufficiunt, nec habemus fundamentum propter quod amplius requiramus.

24. *Vera decisio superioris dubii.* — Dico ergo, ut hæc observatio legis naturalis et victoria tentationum contra illam fiat cum aliquo fructu vel merito conferente aliquo modo ad vitam æternam, necessarium esse auxilium supernaturalis ordinis, saltem quoad modum seu circumstantiam aliquam operationis. Quod non solum est verum de longo tempore, sed etiam de brevi; imo non solum de collectione actuum, sed etiam de singulis, quia in singulis reperitur illa proprietas seu conditio propter quam tale auxilium est necessarium, ut in tractatu de merito late dicitur. At vero si auxilium solum inducat ad observandam legem naturalem, quoad substantiam, et ad cavendam

culpam contrariam, constat ex dictis ex natura rei sufficere auxilium ordinis naturalis datum ultra ordinem et virtutum causarum naturalium. Unde non video cur non possit tale auxilium per fidem impetrari, et interdum habere suum effectum in homine justo; poterit ergo etiam ex lege sufficere. Verisimile autem est regulariter hoc fieri per auxilia superioris ordinis; tum quia sunt magis proportionata ipsi gratiæ et fidei; tum quia sunt efficaciora et magis fructuosa; vel certe, quia hæc auxilia ad totam collectionem non dantur, nisi adjuvando ad singulos actus, verisimile est totum hoc adjutorium nunc ex his nunc ex illis conflare. Nam fidelis justus interdum implet naturale præceptum, vel vincit contrariam tentationem ex consideratione tantum honestatis naturalis, et affectione illi proportionata, et tunc verisimile est juvari solis auxiliis naturalis ordinis: aliquando vero et sæpius justus resistit tentationibus, sumendo sentum fidei, seu fortis factus in fide, et motus altioribus et æternis motivis, et tunc recipit auxilia divini ordinis. Dat ergo Deus hæc auxilia, vel prout vult, vel prout prævidet magis expedire illi quem a peccatis præservare vult. Quæ doctrina consentanea est Augustino: nam in libris contra Pelagium præcipue loqui videtur de auxiliis supernaturalibus in substantia, in aliis vero locis non semel alia commemorat quæ, licet in se naturalia sint, a Deo occultis suis modis procurantur, quorum exempla videri possunt l. 9 Confess., cap. 8, 9 et 10.

25. *Hæc proxima decisione aliæ subcriuntur difficultates.* — *Prima difficultas.* — Sed oriuntur ex dictis difficultates quibus satisfacere necesse est. Prima est, quia ex dictis sequitur, non solum ad omnes tentationes vincendas, sed etiam ad singulas graves necessariam esse fidem, et, quod difficilius est, gratiam justificantem: consequens non est ereditabile; ergo. Sequela probatur, quia eisdem modis loquuntur Patres, et eandem gratiam requirunt ad tentationes graves sine lapsu tolerandas et superandas, quam postulant ad vivendum diu sine peccato: imo vix de his loquuntur separatim, sed promiscue tanquam de uno dogmate, seu tanquam de eadem necessitate: ergo si propter illa testimonia requirimus fidem et sanctitatem personæ ad cumulum tentationum, idem de gravi quacumque tentatione sentire debemus. Minor autem probatur, quia sequitur infideles ac peccatores non posse lege ordinaria vincere tentationes graves, nisi vel illi ad fidem veniant, vel hi ad pœnitentiam et

remissionem peccatorum disponantur: utrumque autem est creditu difficillimum, quia non est verisimile negare Deum auxilium tam frequenter necessarium omnibus his hominibus. Imo nonnulla leguntur exempla ex quibus contrarium intelligimus; nam de quodam infideli Polemone refert Augustinus, ep. 130, fuisse sermone Xenocratis a dominatu luxuriæ liberatum: *Quod* (ait Augustinus) *non humano operi tribuerim, sed divino*: ubi licet expresse non asserat illud factum esse a Deo speciali munere gratiæ, nihil tamen prohibet fieri potuisse ut Deus, per sermonem Xenocratis, excitaverit peculiari modo mentem Polemonis ut a vitio illo emendaretur; et libr. de Patient., cap. 27, dicit esse donum Dei, quando hæreticus pro veritate aliqua fidei mortem sustinet. Quod multo certius est de fideli peccatore qui rapitur ad martyrium priusquam habeat tempus considerandi suum statum, aut se ad justitiam disponendi.

26. *Secunda difficultas.*—*Tertia.*—*Quarta.*—*Secunda* et similis difficultas est, quia sequitur infideles carere auxilio sufficienti ad non peccandum longo tempore, et consequenter esse illis simpliciter impossibile servare omnia præcepta, et nihilominus propter eorum transgressionem damnari, quod durum est. Idemque sequitur de fideli peccatore, qui longo tempore jacet in peccato. Unde sequitur aliud incommodum, scilicet, teneri eum qui peccat statim agere pœnitentiam de peccato commisso, alioqui peccatum novum committeret, quia se exponit periculo novi peccati. Tertia est, quia videtur in hoc aliqua differentia constituenda inter peccatorem fidelem et infidelem; nam infidelis non habet principium impetrandi a Deo auxilia, et ideo mirum non est si illis careat; fidelis autem, etiamsi sit in peccato, habet principium illa impetrandi, quia ad hoc sufficit fides mortua; ergo licet infidelis careat his auxiliis, peccator fidelis, si velit, poterit illis non carere. Ultima difficultas est, quomodo hæc doctrina in statu puræ naturæ locum habere potuisset, cum tamen eadem videatur esse ratio de homine in illo statu, quæ de homine lapso.

27. *Respondetur generaliter ad positas difficultates, imprimis quoad infideles.*—Ad has difficultates dicendum imprimis est de infidelibus, nullum esse inconveniens quod careant omnibus propriis auxiliis prævenientis et adjuvantis gratiæ, in ordine ad bene moraliter operandum et vincenda tentationes, non solum quoad omnium collectionem longo tem-

pore, sed etiam quoad singulas graves; tum quia his gratis indigni sunt; tum etiam quia in istis primum gratiæ initium est per vocationem ad fidem, et donec huic vocationi respondeant, non recipiunt specialia auxilia ad vitanda alia peccata, vel ad bene operandum; neque hinc sequitur aliquod absurdum, quia nihilominus illi sunt liberi et absolute possunt tentationi non consentire, saltem potentia physica et morali pro singulis actibus, vel momenti, et ideo peccant in particulari actu, licet respectu collectionis seu perseverantiæ necessitate quadam etiam morali peccent. Quamvis autem hoc regulariter ita sit, nihilominus probabile est, et pie credi potest, Deum interdum juvare specialiter infidelem ad aliquam gravem tentationem vincendam, quia hoc est consentaneum misericordiæ Dei, et nullo sufficienti testimonio ostenditur lex illa adeo immutabilis, ut non liceat credere interdum Deum præter illam operari ex altissimo consilio providentiæ vel prædestinationis. Quoties enim id fecerit Deus, vel erit in ordine ad salutem ipsius infidelis, si est ex electis, ut illa via minus sit indispositus ad fidem, et tunc illa gratia ad vocationem ad fidem quodam modo pertinet, vel erit propter aliquod commune bonum Ecclesiæ, ut, in exemplo de hæretico, quem Deus juvat, ut pro veritate fidei moriatur, credibile est id facere Deum propter honorem ipsius fidei, vel propter fidelium salutem, ut tali exemplo confortentur. Sicut etiam dixit Augustinus, lib. de Gratia Christi, cap. 24, Deum speciali auxilio convertisse voluntatem Assueri in favorem Esther, et filiorum Israel; illud ergo auxilium datum est infideli regi in gratiam fidelium.

28. *Limitantur proxime dicta pro infidelibus.*—Adde vero hoc non esse extendendum ad auxilium quo longo tempore vitantur peccata, et vincuntur tentationes contrariæ legi naturali, nam hoc donum nemini credo communicari ante fidem, et in hoc constituo differentiam inter auxilium ad singulas graves tentationes vincendas, vel ad omnes superandas et non peccandum longo tempore, quod prius interdum datur sine fide, posterius vero nunquam. Et ita, quoad hanc partem, ad primum dubium respondeo negando sequelam. Et quamvis hæc differentia non tradatur expresse a Patribus, non tamen negatur: imo in illis habet fundamentum; quia ad vincendas concupiscentias simpliciter, ita ut in peccatum mortale hominem non pertrahant, requirunt expresse et frequentius auxilium ex fide; de

gravibus autem tentationibus nunquam hoc in particulari dicunt. Paulus etiam sæpe docet infideles semper esse oneratos peccatis; quod autem nunquam juventur ad unam gravem tentationem vincendam non dicit. Habet etiam illud discrimen fundamentum in ipsa re, quia longe excellentius donum est diuturna vita innocens a peccato, quam victoria unius vel alterius tentationis gravis: et infidelis ipse multo est indignior priori dono, magisque indispositus ad illud recipiendum, et vix potest expedire ad fidei honorem vel commune bonum, ut sine fide communicetur alicui vitæ innocentia, et ita non est utriusque doni eadem ratio.

29. *Deinde respondetur ad easdem difficultates quoad peccatores fideles, quibus magis auxiliatur Deus quam infidelibus.* — At vero de fidei existente in peccato longe aliter censeo quoad multa, nam imprimis multo frequentius et facilius potest habere auxilium necessarium ad vincendam gravem tentationem in particulari quam infidelis, propter illam rationem quod per fidem et rationem potest impetrare tale auxilium, etiamsi ad remissionem peccati non se disponat; et ideo dixi in tom. 4 de Pœnit., disput. 15, sect. 6, in homine existente in statu peccati raro esse necessarium medium ad vincendam tentationem gravem, contritionem elicere, et se proxime disponere ad justitiam, quia impetrando auxilia actualia, potest per illa vinci tentatio, nisi tam extraordinaria sint, ut propria justorum esse censeantur, qualia possunt existimari, quæ ad martirium constanter subeundum requiruntur.

30. *Promovetur proxima responsio.* — Deinde potest fidelis, etiamsi gratia et charitate careat, aliquo tempore vitare omnia peccata contra legem naturalem, imo et contra supernaturalia præcepta, per auxilium divinum actuale sine infusione habituum, dummodo pro eo tempore specialis obligatio diligendi Deum super omnia aut habendi contritionem non occurrat. Hoc mihi etiam probant rationes in secunda assertionem adductæ; probant enim aliquid amplius posse fidelem, etiamsi peccator sit, quam infidelem, in hoc negotio resistendi tentationibus tam carnis quam dæmonis, nam fides de se est quasi proximum principium hujus resistentiæ, juxta illud Petri: *Cui resistite fortes in fide*, et illud Pauli: *In omnibus sumentes scutum fidei*. Ergo aliquo majori tempore potest fidelis peccator sine novo peccato perseverare, si recte velit, sicut facile potest, fide sua uti; tum considerando altiores ratio-

nes ad non peccandum, etiam contra legem naturalem, quas infidelis non assequitur; tum orando et petendo auxilium per fidem et per Christum, quod infidelis facere non potest. Quocirca, licet hoc tempus pro quo fidelis peccator potest totam legem servare per auxilium gratiæ, absolute spectatum, breve aut mediocre dici possit, comparatione vero facta ad infidelem, est multo longius; e contrario vero comparatione facta ad fidelem justum est breve tempus.

31. *Et adhuc magis justis quam injustis fidelibus.* — Atque ad eundem modum intelligenda est tertia assertio posita. Nam in ea ulterius considerandum est hominem etiam justificatum, simpliciter et absolute non posse perseverare diu sine peccato, cum solis ordinariis auxiliis gratiæ, ita ut illa inoraliter satis sint ad perseverandum cum effectu, nisi Deus majora subministret, quæ non negat justo facienti quod in se est per generalia gratiæ auxilia, ut infra videbimus. Et nihilominus per illa ordinaria auxilia aliquo tempore potest totam legem sine lapsu servare, quod quidem tempus, in se quidem, et comparatum ad totam vitam, seu ad tempus illud pro quo sunt necessaria specialiora auxilia, breve est et modicum, et nihilominus comparatum ad tempus pro quo fidelis existens in statu peccati sine novo peccato conservari potest, longum est, quia uberiora sunt auxilia ordinaria fidei vivæ quam mortuæ, ut per se notum est.

32. *Respondetur jam specialiter ad primam difficultatem in n. 25. — Ad secundam in n. 26, quoad primam partem.* — Et per hæc satis responsum est ad tres priores difficultates. Nam ad primam jam ostensum est non esse eandem omnino rationem de resistentia unius gravis tentationis, quæ est de perseverantia diuturna sine peccato, ideoque licet fateamur communi lege non dari infidelibus gratiam necessariam ad vincendas singulas tentationes graves, nihilominus vel ex pura misericordia Dei circa particularem personam, vel ex aliis universalis providentiæ rationibus, interdum illis credimus dari simile auxilium sufficiens vel efficax ad resistendum alicui tentationi. Ad secundam etiam, quoad eam partem quæ ad infideles pertinet, jam ostensum est quomodo, non obstante defectu talis auxilii, peccent interdum succumbendo tentationi; tum quia in eo actu et momento quod id faciunt, sufficienti libertate physica et morali id faciunt; tum etiam quia si vellent ad fidem disponi-

possent, quia paratum a Deo habent auxilium. Quæ posterior ratio in eis qui habent aliquam fidei notitiam et vocationem, locum habet; ad eos vero, qui habent ignorantiam invincibilem fidei, recte accommodari non potest; prior ergo ratio sufficit.

33. *Et quoad secundam. — Ad tertiam et quartam difficultatem, quid. —* Ad alteram vero partem de fidelibus peccatoribus, dico posse aliquo tempore mediocri per auxilia gratiæ sine peccato conservari; et ideo non tenentur statim ac semel peccant pœnitentiam agere peccati commissi, ne se exponant morali periculo aliud committendi. Nam tale periculum non statim instat, neque certo sciri potest quando incipit esse necessaria gratia ad non peccandum; imo in particulari actu et tempore fere semper potest præsumi non esse tale periculum morale ex illo capite, et ideo nunquam propter illum titulum obligat præceptum pœnitentiæ, nisi alioqui gravissima tentatio simul urgeat, ut in dicta disput. 15 de Pœnitentia, sect. 5, dixi. Et eadem ratione non potest fidelis fieri certus quod sit in statu gratiæ, eo quod aliquo tempore conscientiam peccati mortalis non habuerit; tum quia illud tempus in quo potest homo fidelis extra statum gratiæ conservari sine novo peccato mortali, non est certum ac definitum, nec fortasse in omnibus hominibus est æquale, nam pro diversitate statuum et multitudine, vel paucitate occasionum vel tentationum occurrentium potest hoc tempus esse longius in uno homine quam in alio; tum etiam quia nunquam homo est satis certus quod in toto aliquo tempore non peccaverit mortaliter, saltem per consensum vel culpabilem negligentiam; semper enim occurrunt dubia vel scrupuli, quæ sufficiunt ut homo de sua gratia non sit certus, ut in sequentibus ex professo dicemus. Quod vero spectat ad tertiam difficultatem, jam explicatura est discrimen inter fideles et infideles, quod in illa desiderabatur. Quarta vero declarationem longiorem postulat, quam in sequenti capite trademus.

CAPUT XXVIII.

UTRUM HOMO IN PURIS NATURALIBUS CONDITUS
POSSET INNOCENTIAM SIC CONSERVARE, NON
PECCANDO MORTALITER PER VIRES RATIONIS ET
LIBERI ARBITRII, SINE SPECIALI DEI ADUCTORIO?

1. *Prima ratio pro affirmativa parte. —* Ratio dubitandi posita est in capite superiori, quia ex resolutione præcedenti sequitur homi-

nem, etiam creatum in puris naturalibus, et suis viribus commissum, non posse diu vitare peccatum contra legem naturæ: consequens est falsum; ergo. Sequela probatur ex alio principio posito in Proleg. 4, quod homo lapsus non habet nunc majorem defectum virium liberi arbitrii, quam haberet in pura natura; ergo si hæ vires nunc non sufficiunt ad vitandum peccatum dicto modo, neque in pura natura sufficerent. Falsitas autem consequentis probatur. Primo, quia alias in illo statu naturæ esset homini simpliciter impossibile servare legem naturæ, quia sine gratia non posset, et gratiam non haberet: consequens autem videtur contra illud dogma a Hieronymo et Augustino traditum, et Concilio Tridentino, sess. 6, cap. 11, confirmatum, Deus impossibilia non jubet.

2. *Confirmatur primo institutum. —* Responderi potest argumentum recte probare observantiam uniuscujusque præcepti sigillatim sumpti esse possibilem, saltem in singulis individuis occasionibus, nihilominus tamen servare totam collectionem fuisse absolute impossibile in illo statu. Sed contra; nam sicut est alienum a divina providentia uno præcepto mandare rem impossibilem, ita etiam videtur contra eandem prudentem providentiam imponere homini tot præcepta, ut impossibile simpliciter ei sit illa omnia implere, et non providere modum quo implere possit, quia non solum quælibet lex, sed etiam onus legum debet esse portabile. Et confirmatur, quia repugnat auctori naturæ ordinare aliquid ad finem naturalem, et non dare potestatem ad consequendum illum; si autem homo purus non posset ita servare legem naturalem, quin aliquando graviter peccaret, non posset naturalem beatitudinem assequi, damnandus enim esset juxta legem justitiæ divinæ propter tale peccatum: esset ergo miserabilior cunctis creaturis, nam reliquæ omnes possunt ad illos fines propter quos creantur, pervenire

3. *Confirmatur secundo. — Confirmatur tertio. —* Præterea augetur difficultas illo vulgari argumento, quod si talis homo haberet libertatem et vires ad servanda singula præcepta, procedendo ab una in aliam occasionem, servando præceptum et vitando peccatum, posset etiam totam collectionem exequi. Quia collectio nec tota simul occurrit, nec simul servatur, sed successive, faciendo unum actum post alium, et posterior seu secundus, et tertius actus optime fieri potest, non obstantibus præcedentibus; imo potest ab illis juvari ratione

consuetudinis, et licet novæ difficultates possint occurrere, nunquam reddunt actum in particulari impossibilem; ergo nec collectio tota impossibilis est. Confirmatur hoc, quia in puris naturalibus non essent tam graves difficultates et tentationes in singulis actibus, sicut nunc sunt; tum quia non esset natura corrupta per peccatum, et ideo non esset adeo infirmata; tum maxime quia tunc non essent tentationes dæmonis, quæ nunc reddunt observationem legis naturalis difficiliorem in singulis, et in omnibus sine gratia Dei impossibilem.

4. *Assertio prima negans.*—*Unde probetur.*—*Differentia prima inter hominum lapsum et puræ naturæ non obstat assertioni.*—Nihilominus dicendum est imprimis hominem in illo statu, per solas vires naturales rationis et libertatis, secluso omni peculiari adjutorio Dei, non potuisse diu servare totam naturalem legem absque gravi lapsu. Hæc assertio sequitur ex doctrina data, nam in libro præcedenti dictum est non esse infirmiore hominem lapsum, quoad vires intrinsecas facultatum naturalium, et quoad repugnantiam et dissidium earum inter se, quam esset homo in pura natura, et hic dictum est ex hac infirmitate provenire, ut non possit homo lapsus servare diu omnia præcepta naturalia sine lapsu; ergo eadem impotentia esset in homine puro. Potest autem duplex differentia inter hos status considerari, ratione quarum videri potest majorem esse impotentiam hominis lapsi quam puri. Prima est ex parte difficultatis quæ provenit ab extrinseco ex tentatione dæmonis, quia hæc non videretur futura in pura natura, quia, ut supra dicebam, videtur præternaturalis, vel certe si in eo statu Deus permetteret extrinsecas tentationes, eadem ratione ex vi suæ providentiæ conferre deberet adjutorium etiam extrinsecum, et proportionatum utique, per honorum Angelorum protectionem, qua fieret homo potens ad resistendum et pugnandum cum extrinseco inimico. Ad hoc vero respondemus, etiamsi hoc totum concedatur, nihilominus ex vi intrinsecæ repugnantie corporis et appetitus, et ex defectu naturalis cognitionis, et aliis imperfectionibus quasi inseparabilibus ab humana conditione et societate, sequi prædictam impotentiam, etiamsi extrinseca impugnatio deesset, quamvis hinc multum augeatur. Sicut enim in naturalibus ex compositione ex contrariis sequitur corruptibilitas, cui naturaliter resisti non potest in moralibus ex compositione contrariorum, ita affectuum sequitur infirmitas moralis,

cui resistere humano modo impossibile est.

5. *Nec obstat secunda differentia.*—Alia differentia est, quod nunc homo lapsus est vere et proprie in inimicitia Dei, et indignus omni extraordinario adjutorio ejus, et ideo de se est impotens omni modo, id est, tam ab intrinseco quam ab extrinseco ad servandam totam legem; at vero homo purus non esset inimicus, neque indignus positive (ut sic dicam), sed tantum non dignus peculiari aliqua ratione, vel merito. Verumtamen etiam ex hac doctrina non excluditur impotentia intrinseca, sed ad summum inferitur potuisse tunc hominem sine impedimento habere adjutorium Dei, quod est probabile, ut jam dicam. Adverto autem circa hanc differentiam aliud esse loqui de cognitione honesta necessaria et sufficiente ad operandum cum effectu aliquem actum honestum moralem, aliud vero esse loqui de peculiari favore et adjutorio ad servandam totam legem naturæ; nam prior cognitio provenire potest ex ordinario cursu naturalium causarum, et ideo per originale peccatum non contraxit homo debitum carendi illa cogitatione, quia non amisit ea quæ omnino naturalia sunt; illa autem providentia est omnino naturalis, sicut quod sol oriatur super bonos et malos. Nec refert quod talis cogitatio interdum congrua sit, nam eadem ratio est de illa, si per eundem cursum naturalium causarum provenit; quia illa efficitas seu congruitas in effectu est ex honore usu liberi arbitrii, quem Deus non impedit propter præcedentem culpam. Igitur quoad hujusmodi cogitationem non procedit differentia posita inter hominem lapsum et purum, procedit ergo quoad peculiare adjutorium necessarium ad continuam observationem præceptorum; nam illud includit aliquas motiones interiores, quæ licet quoad substantiam naturales esse possent, per ordinarias causas non fierent, nisi Deus peculiari modo de illis provideret. Igitur quoad hoc adjutorium verum est in homine lapso peculiarem indignitatem hujusmodi gratiæ, quæ in homine puro non esset, inveniri.

6. *Tertia differentia posita ab Alzar., lib. 4 de Auxil., disput. 45, 47 et 54, exertit assertionem.*—Tertiam differentiam inter utrumque statum constituit quidam modernus scriptor, ut in Proleg. allegavi, docens absolute non esse æquales vires internas ad operandum bonum etiam naturale, et vitandum malum contrarium, in homine lapso et puro, sed majores futuras fuisse in homine puro. Quo fundamento

posito, ruit discursus a nobis factus, et consequenter dicere quis potest hominem in puris naturalibus posse solis viribus liberi arbitrii servare diu totam legem naturæ absque peccato, et vincere omnes tentationes, quæ naturaliter occurrere possent, etiam gravissimas. Probatur sequela, quia imprimis hæc assertio non est formaliter contra omnia Concilia et Patres, quia de homine lapsa loquuntur, et ideo definitiones eorum extendi non debent nec possunt ad hominem in meliori statu constitutum, in quo non haberet infirmam nec vulneratam naturam. Deinde si semel admittimus hominem in puris naturalibus habiturum majores vires, profecto non est unde illas metiri possimus aut limitare, ut ad alios effectus sint majores, non vero ad effectum servandi totam legem naturalem absque peccato; ergo consequenter loquendo potest optime etiam hæc differentia constitui inter utrumque statum. Tandem confirmatur ad hominem, quia idem auctor ait hominem in puris naturalibus potuisse diligere Deum super omnia viribus liberi arbitrii, licet in natura lapsa non possit: ergo eadem ratione posset perseverare sine peccato longo tempore in uno statu, licet non possit in alio.

7. *Et tamen idem auctor assertionem negare non audeat.*—At nihilominus idem auctor nunquam ausus est simpliciter concedere, posse hominem in puris naturalibus servare diu omnia præcepta naturalia sine peccato viribus solius liberi arbitrii, sed in prioribus disputationibus quas indicavi, punctum hoc præmittit; in disputatione vero 54, in quadam solutione ad 2, solum ait quod in puris naturalibus posset homo servare brevi aliquo tempore omnia mandata naturalia, sicut posset diligere Deum super omnia pro eodem tempore. Unde sentit in natura lapsa nec pro brevi tempore posse hominem servare omnia mandata naturalia, quod profecto absolute falsum est, et præter mentem omnem Theologorum, qui de homine lapsa solum controvertunt an longo tempore possit omnia præcepta servare, supponentes brevi tempore posse, et id esse extra controversiam constitutum. Si ergo homo in puris naturalibus majores habet vires, plus etiam in hoc genere poterit, ac subinde non tantum brevi tempore, sed etiam longo posse et omnia præcepta servare.

8. *Subterfugium præcluditur.*—Video dici posse in ea sententia quæ nos supra de fidei et infidei peccatore dicebamus, breve et longum tempus dici posse et absolute et compa-

rate, et ita in statu puræ et lapsæ naturæ solum brevi tempore posse hominem suis viribus servare omnia præcepta, tamen comparate multo minori seu breviori tempore id posse nunc hominem in lapsa natura, quam in pura natura, et e converso in pura natura posse vitare omnia peccata longo tempore, comparatione facta ad hominem lapsum, licet in se tempus illud breve esset, et absolute, et comparatione ad eundem hominem aliquo modo a Deo adjutum. Verum tamen licet, supposito illo discrimine, hæc subterfugia probabiliter excogitari possint, nihilominus qui discrimen illud confingit vel admittit, nullam rationem reddere potest cur homo purus sit potentior lapsa in tanto gradu, vel quoad talem aut talem effectum longi temporis, intra ordinem naturalium effectuum persistendo. Quapropter solidior et omnino vera doctrina est, intrinsece non esse potentior hominem in uno statu quam in alio; atque ita conclusionem positam niti a paritate rationis in doctrina Conciliorum et Patrum, et firma ratione de repugnantia concupiscentiæ, et corporis imbecillitate, quæ in statu puræ naturæ æquales essent. Atque ita in hoc puncto docent Sot. 4 de Nat. et Grat., c. 4; et Medin. 1. 2, q. 109, a. 2, dub. penult., et alii.

9. *Assertio secunda, difficultatibus initio positis non nihil concedens.*—Propter objectiones vero in principio factas, verisimiliter censeo pertinuisse ad indigentiam illius status, si Deus in illo hominem constitueret, ut sua liberali providentia illi conferret aliqua auxilia in substantia quidem naturalia, in modo autem ultra communem causarum naturalium cursum collata, quibus posset homo, si vellet, totam legem naturalem diu servare, omniaque peccata illi contraria vitare. Quod quidem non esset auxilium gratiæ, prout nunc datur, id est, nec in substantia, nec ex parte finis, quia non transcenderet finem et honesta motiva naturalia, esset tamen speciale beneficium in ordine providentiæ naturalis. Ab hac assertionem non dissentit Medina supra; quia sensus non est naturam humanam habituram fuisse integritatem in illo statu, quod Medina impugnat, et merito, sicut nos in Prol. 4 late fecimus; sed sensus est daturum fuisse Deum aliquas motiones providentiæ suæ, quibus illam hominis naturalem imbecillitatem juvaret; et sic suadent assertionem rationes in principio factæ.

10. *Accedunt etiam suasiones.*—Item est valde consentanea divina sapientiæ et providentiæ. Quia ad auctorem nature pertinet ita

suis creaturis providere, ut finem suum assequi possint, et licet illud adjutorium in rigore esset ultra concursum naturæ debitum, non esset ultra providentiam consentaneam, tum magnificentiæ et providentiæ Dei, tum excellentiæ humanæ naturæ pure ac præcise spectatæ. Sic enim homo in puris naturalibus majorem dependentiam in omnibus actionibus suis a Deo recognosceret. Item posset ab illo petere et suo modo orare excitationem bonarum cogitationum et affectuum, præcipue in necessariis occasionibus et temporibus opportunis, sicut petere posset pluvias et alia bona temporalia. Item quia consentaneum est ut Deus unicuique naturæ provideat juxta modum suum, et ut rationalium creaturarum majorem curam habeat, etiam intra ordinem providentiæ naturalis, quam brutorum. Item hoc modo homines haberent unde magis timerent et amarent Deum, si crederent non solum illis providere per causas secundas, conservando ordinem earum quem semel constituit, sed etiam aliquando vel eas aliter applicando per se, vel per Angelos, vel immediate internas hominum species frequentius et efficacius excitando. Denique ad excellentiam naturæ humanæ pertinet ut Deus immediate erect animam, ubi virtus ipsius naturæ deficit; et universo providet Deus movendo aquam sursum ad replendum vacuum; cur ergo idem Deus, ut auctor naturæ, non præberet homini indigenti hoc altius providentiæ genus, præbendo illi adjutorium prout expedire censeret? Unde illud adjutorium non esset tam propria gratia, sicut nunc est simile auxilium datum homini lapsio. Nam hoc auxilium, prout nunc datur fidelibus, etiam peccatoribus, ordinarie est supernaturale, vel saltem per media supernaturalia obtinetur, nimirum, fidem, et orationem ex illa, ut dictum est. In statu autem puræ naturæ, tale auxilium solum daretur per inspirationes, cogitationes affectionesque honestas liberaliori modo immissas, utique ultra communem cursum externarum causarum.

11. *Respondetur tacite interrogationi de discrimine auxilii infidelium, et status naturæ puræ.* — Quod si nunc consideretur tale auxilium respectu infidelium, jam dictum est nunquam eis dari. Veruntamen licet daretur, haberet in eis majorem rationem gratiæ, quia ratione peccati originalis indigni sunt etiam illa gratia; in statu autem purorum naturalium ex parte hominis non esset illa indignitas seu demeritum talis beneficii, quod nunc est ratione culpæ originalis, et ideo quidquid

nunc datur ultra generalem concursum, peculiarem rationem gratiæ habet. Secundo, quia tunc non daretur illud adjutorium in ordine ad supernaturalem finem, sed tantum propter beatitudinem naturalem; nunc autem omne auxilium speciale datur propter supernaturalem finem. Tertio, fieri potuit ut in illo statu adjutorium illud non omnino gratis daretur, sed juxta hominis dispositionem et cooperationem, nam ratio præmii et meriti, ut sumitur ex D. Thom. 1. 2, q. 21, etiam in ordine providentiæ naturalis locum habet, sicut culpa et supplicium. Deinde esset aliqua proportio inter naturale opus honestum et hoc naturale adjutorium, et ideo verisimile est quod Deus non daret illud nisi hominibus bene utentibus prioribus occasionibus bene operandi, quas ipse naturalium causarum cursus offerret. Quod tamen nunc locum non habet, sed prima auxilia omnino gratis dantur, quia vel supernaturalia sunt, et naturalia opera non habent cum illis proportionem in ratione meriti vel dispositionis, ut infra dicitur; vel si auxilia sint ordinis naturalis, opera ipsa moralia hominis lapsi et infidelis deficient a propria ratione meriti propter personæ indignitatem, quod non haberent opera hominis in pura natura, priusquam peccaret, ut notavit Medina loco allegato.

12. *Ad primam rationem in num. 1.* — Atque ex his facilis est responsio ad priores rationes dubitandi. Ad primam enim recte ibi dictum est quodcumque præceptum naturale esse per se possibile, quod satis est ut ejus transgressio ad peccatum imputetur. Quæ est expressa responsio Hieronymi tractantis de homine lapsio in dicto dialog. 1, contra Pelagian. Est autem quoad hoc eadem ratio de homine puro. Unde quod Augustinus dixit libr. de Correction. et Grat., cap. 11: *Si adjutorium quo posset permanere si vellet, vel angelo, vel homini, cum primum facti sunt, defuisset, quia non talis natura facta erat, ut sine divino adjutorio posset permanere si vellet, non utique sua culpa cecidisset.* Hoc (inquam) intelligendum esse existimo de adjutorio ad vitandum illud speciale peccatum, in quod lapsi fuerunt; si enim non haberent adjutorium quo illud vitare possent, si vellet, non libere peccassent, ac proinde nec peccassent. Non est autem eadem ratio de adjutorio sine quo non potest homo vitare peccatum longo tempore, etiamsi velit vel desideret, quia licet homini in principio denegaretur tale adjutorium, nihilominus maneret liber in singulis actibus, et potens aliquo

modo sufficienti ad vitandum unumquemque lapsum, ideoque illi imputaretur. Verumtamen, quia, non procedente ex parte hominis culpa, illa esset nimis dura et insuavis providentia Dei, ideo primum hominem a se creatum per donum justitiæ originalis adjuvit, et dedit illi absolutam potestatem ad servandam naturalem legem quocumque tempore: et verisimile est, si creasset hominem sine illo dono in pura natura, adjuturum fuisse illum alio ad non peccandum contra legem naturæ, et ut id simpliciter posset longo tempore.

13. *Ad replicam in num. 2. — Ad primam confirmationem in eodem num. 2.* — Unde ad replicam de multitudine præceptorum, dicendum est illud onus non esse ab extrinseco superadditum naturæ humanæ; sed esse veluti proprietatem consequentem naturam, quam Deus impedire non debuit. Oritur autem a natura hominis secundum eam partem qua spiritualis est, respectu ejus, secundum se considerata, facile esset omnia illa præcepta servare; tamen quia illa spiritualis pars corruptibili corpori conjungitur, inde nascitur difficultas in ea lege servanda. Quapropter sicut mirabilis est compositio ex rebus adeo distantibus et quasi contrariis, ita mirandum non est quod in ea natura sint multa præcepta naturalia cum interna difficultate ad illa observanda, quæ, nisi per majus adjutorium auctoris naturæ, quam sit solus concursus universalis, servari non possent. Idemque fere est de consecutione beatitudinis naturalis, de qua procedebat prima confirmatio, ad quam per secundam assertionem responsum est.

14. *Ad secundam in num. 3.* — Ad ultimam vero confirmationem, quæ procedere potest contra utramque assertionem, aliqui respondent, deficiente illo peculiari adjutorio Dei, necessarium esse ut homo perveniat interdum ad occasiones certas, in quibus non possit legem naturæ servare sola arbitrii libertate. Sed licet hoc verum sit quando interveniunt determinatæ tentationes graves, tamen quando illæ deficiunt, id non est necessarium, et nihilominus etiam tunc esse adjutorium necessarium ad servandam totam legem naturæ longo tempore et sine lapso gravi. Et ideo respondere potest primo, negando consequentiam: est enim a divisa seu determinata designatione singulorum ad confusam collectionem, quæ non est formalis, nec bona, ut cum Hieronymo in Dialogo contra Pelagian. supra exemplis monstratum est. Et ratio etiam est respectu facti, quia impossibilitas quæ reperitur

in tota collectione, est diversæ rationis a possibilitate quæ in singulis actibus vel momentis determinate sumptis reperitur. Et ideo non sunt contrariæ, neque ab una ad alteram est bona illatio. Nam potentia vitandi singula peccata provenit ex naturali indifferentia liberi arbitrii, quæ non tollitur ab objecto creato cum quibuscumque determinatis circumstantiis per rationem applicato; impotentia vero respectu collectionis provenit ex impedimentis occurrentibus, et inconstantia naturali, ac mutabilitate liberi arbitrii. Et hinc fit ut, licet unaquæque occasio servandi præceptum et possibilis et facilis appareat, nihilominus in illarum continuatione et frequentia est peculiaris difficultas, quæ naturaliter superari non potest, et hæc omittitur et non consideratur in argumento, et ideo collectio non recte fit.

15. *Progreditur proxima responsio secundæ confirmationi. — Ad tertiam confirmationem.* — Neque obstat quod unus actus bonus, quo præceptum impletur vel vitatur peccatum, de se inducat dispositionem ad alium similem; tum quia in ipsis tentationibus et occasionibus est varietas, ideoque sæpe dispositio relicta ex uno actu non juvat in alia occasione occurrente; tum etiam quia multo major est difficultas quæ ex mole corporis et fatigue sensuum est, et naturali quodam tædio persistendi in eodem modo operandi nascitur; tum denique quia illa dispositio, quæ per unum vel alterum actum inducitur, debilissima est et parum juvat, et ipsamet infirmitas et fragilitas humana, si gratia destituatur, non sinit illam dispositionem crescere, nam statim per plures actus perdit quod per unum acquisierat, ut de acquisitione virtutum paulo inferius dicemus. Aliter etiam posset in forma responderi, negando antecedens cum proportionem sumptum; cum enim dicitur: Post primum actum vitandi peccatum, potest homo facere secundum, et, post secundum, tertium, et sic deinceps; licet hoc antecedens sit verum de potentia physica et morali præcise spectata in ordine ad unumquemque actum determinate, non tamen simpliciter est verum respectu potentiæ morales considerata in ordine ad totam illam actuum successionem; secundum quam potentiam, totum id quod in antecedenti sumitur, non potest simpliciter fieri, quia in aliquo necessario deficiet, licet non possit designari aliquis definitus actus, vel determinatum tempus, pro quo illa necessitas reperatur. Et ita quod mente cogitatur proponiturque ut constanter faciendum, per successionem unus post aliud, non

potest in re executioni mandari cum illa uniformitate, nisi flexibile arbitrium et tot hostibus circumseptum adiutorio gratiæ confortetur. Tertia confirmatio solum ostendit difficilius adhuc nunc abstineri a peccatis sine gratia quam fieret in pura natura; non tamen ostendit illud tunc fuisse moraliter possibile.

CAPUT XXIX.

UTRUM HOMO LAPsus POSSIT ELICERE SOLIS VIRIBUS LIBERI ARBITRII, SINE AUXILIO GRATIÆ, ALIQUEM ACTUM DILECTIONIS DEI, SALTEM UT AUCTOR EST ET FINIS NATURALIS.

1. *Introducitur quæstio. Prima notatio duplicis considerationis de Deo.* — Diximus de bonis actibus quibus ex accidenti aliqua difficultas adjungitur; nunc dicendum sequitur de nonnullis qui, præter dicta impedimenta, ex objecto gravem aliquam difficultatem habent. Inter quos primum locum tenet amor Dei, propter excellentiam objecti, et ideo de illo specialiter movent quæstionem D. Thom., dicta quæst. 109, art. 3, et cæteri Theologi in 2, dist. 28. Ut autem clarius procedamus, oportet supponere communem distinctionem de Deo, ut prima causa naturalis est, et finis ultimus connaturalis homini, ut in pura sua natura spectato; vel ut est auctor supernaturalis et gratiæ, ac objectum beatitudinis supernaturalis. Nam priori modo censetur Deus bonum naturale hominis, ac proinde per se loquendo naturaliter diligibilis, posteriori autem modo spectatur Deus ut bonum excedens hominis naturam, ac proinde illi supernaturale. In præsentibus ergo non tractamus de amore Dei, ut est supernaturale bonum hominis, nam de hoc dicturi sumus in libro sequenti; nunc autem supponimus illum amorem non pertinere ad ordinem naturæ, ideoque non posse fieri sine auxilio gratiæ, saltem si perfectus sit; an vero aliquis imperfectus ejusdem materialis objecti sine viribus gratiæ haberi possit, ibi disputabitur. Hic ergo solum de Deo, ut auctore naturæ, ejusque amore tractamus.

2. *Secunda notatio duplicis amoris, perfecti et imperfecti, et utriusque explicatio.* — Deinde prætermittenda est distinctio hujus amoris Dei, nam generatim loquendo potest esse aut perfectus aut imperfectus, sub qua verborum generalitate multæ distinctiones hujus amoris comprehenduntur. Quia in hoc amore multæ perfectiones spectari possunt, et ob carentiam cujuscumque illarum potest dici amor imper-

fectus, quia imperfectum dicitur ex quocumque defectu, ideoque potest hic amor multipliciter esse imperfectus. Prima igitur perfectio hujus amoris est ut sit benevolentia, quo amore amatur Deus propter seipsum, id est, vult homo Deo aliquod bonum, solum ut ei bene sit, vel ut Deo placeat, aut in ejus gloriam redundet. Ab hac autem perfectione deficit amor concupiscentiæ, quo diligit homo Deum sibi, ut ipse homo bene sit, de qua divisione dicemus statim plura et alia capite sequenti. Deinde amor, ut sit perfectus, debet esse absolutus, ut explicatur hac voce, *Volo obedire Deo*, vel gloriam ejus quærere; imperfectus autem erit, si solum in actu conditionato consistat, qui explicatur verbo *vellem*. Altera perfectio amoris est, si non solum sit absolutus, sed etiam super omnia appetitive, ut aiunt, id est, ut per amorem ita voluntas feratur in rem amatam, ut propter nullam aliam velit ab ea dimoveri: unde e converso amor Dei qui non attingit hunc gradum, dicitur simpliciter imperfectus. De hac partitione dicemus in cap. 35, ubi etiam de perfectione intensionis et imperfectione remissionis: item de perfectione constantis amoris, qui etiam efficax dici solet, et de imperfectione inconstantis seu inefficacis amoris, aliquid attingemus. Denique ad perfectionem amoris et maxime Dei, pertinet ut sit simpliciter bonus moraliter: nam si aliquam moralem malitiam habeat adjunctam, non solum imperfectus erit, sed etiam vix nomen amoris Dei merebitur. Quapropter eum in præsentibus capite de amore Dei loquamur, abstrahendo ab aliis perfectionibus vel imperfectionibus, quoad hanc ultimam non abstrahimus, sed loquimur de amore Dei omnino puro et honesto; nam si aliquis est amor Dei impurus et malus, ille non solum non fit per auxilium gratiæ, sed potius non magis est a Deo quam cætera peccata. Talis autem erit si quis velit honorare Deum, ut ab eo auxilium et favorem ad suas concupiscentias explendas vel vindictam de inimico sumendam obtineat, de quo pravo amore recte intelligitur quod Augustinus dixit libro Octoginta trium quæstionum, quæst. 30, perversum esse uti rebus quibus fruendum est.

3. *Prima sententia negans.* Illis positis, fuit quorundam sententia nullum amorem Dei, sive perfectum, sive imperfectum, sive naturalem, sive supernaturalem, posse haberi sine auxilio gratiæ. In qua sententia cum exaggeratione asserenda excessit Baius in opere de Charitate, ex quo in assertionibus supra Pro-

leg. 6, cap. 2, relatis, et a Pontificibus damnatis, notatur 34, in qua refellitur distinctio duplicis amoris, naturalis videlicet, quo Deus amatur ut auctor naturæ, et gratuiti quo Deus amatur ut beatorum est, quam distinctionem dicit esse vanam et commentitiam, et ad illudendum sacris litteris et plurimis veterum testimoniis excogitatum. Et in 36 dicit amorem naturalem (utique Dei) qui ex viribus naturæ exoritur, e sola philosophia, per elationem præsumptionis humanæ cum injuria Crucis Christi defendi a nonnullis Doctoribus. Ac denique in 38 generaliter sic inquit: *Omnis amor creaturæ rationalis aut vitiosa est cupiditas, qua mundus diligitur, quæ a Joanne perhibetur; aut laudabilis illa charitas, qua per Spiritum Sanctum in corda diffusa, Deus diligitur.* Si ergo præter charitatem Dei nullum studiosum amorem ille auctor agnoscebat, consequenter etiam respectu ipsius Dei nullum admittebat amorem, præter charitatem, quæ non viribus liberi arbitrii, sed per solam infusionem Spiritus Sancti sit.

4. *Ejusdem sententiæ in universum spectatæ fundamentum primum ex Scriptura.*—Fundamentum hujus sententiæ in generali sumitur primo ex Scriptura, in quo non fit mentio alterius amoris Dei, nisi charitatis, quæ dicitur esse ex Deo, 1 Joan. 4; et a Deo Patre, ad Ephes. 6; et per Spiritum Sanctum diffundi, ad Roman. 5; et ad Galat. 5 inter fructus Spiritus numeratur. Neque in divina Scriptura reperitur alia dilectio Dei commendata, nisi quæ est charitas; unde sub hac voce comprehenditur quæcumque dilectio Dei, sive ut finis naturalis, sive ut supernaturalis. Et ideo impletio præceptorum moralium, quæ est proprius effectus dilectionis Dei, etiam ut est auctor naturæ, tribuitur charitati, 1 ad Corinthios 13: *Charitas patiens est, benigna est, etc.* At nulla charitas, sive perfecta, sive imperfecta haberi potest sine auxilio gratiæ, quia simpliciter in Scriptura tribuitur Spiritui Sancto. Unde sicut fides, sive inchoata, sive perfecta, non est ex viribus naturæ, sed ex auxilio gratiæ, quia simpliciter dicitur esse donum Dei, ita majori ratione de charitate seu dilectione dicendum est.

5. *Secundum fundamentum ex Concilio Arausicano, adducto ab Augustino, tractat. 102 in Joann., et libro 17 de Civitate Dei, cap. 4.*—Secundo, adduci possunt Concilia, præsertim Arausicanum, canon. 25 dicens: *Prorsus donum Dei est diligere Deum*, ubi particula *prorsus* excludit omnem distinctionem dilec-

tionis Dei, nam quæcumque illa sit, Dei donum esse dicitur, et subjungit rationem, quia Spiritus Patris et Filii infundit charitatem cordibus nostris. Quæ ratio confirmat quod dicebamus, omnem Dei dilectionem esse aliquam charitatem. Et non parum juvat quod idem Concilium ait canon. 11: *Nemo quidquam Domino recte voverit, nisi ab illo acceperit.* Si enim recte vovere Deo sine ejus auxilio nemo potest, multo minus poterit recte amare Deum. Favet etiam Concilium Milevit., c. 4, dicens: *Utrumque donum Dei est, et scire quid facere debeamus, et diligere ut faciamus.* Et Concilium Trident., sess. 6, cap. 7, etiam initium dilectionis Dei inspirationi Spiritus Sancti tribuit.

6. *Tertium fundamentum ex Augustini doctrina.*—Præterea variis modis ostendi potest hanc esse Augustini sententiam, nam imprimis canones citati Concilii Arausicani sumpti sunt ex Augustino, ut notatum est. Deinde in multis locis supra citatis c. 9, significat quod Bains dicebat, omnem affectum qui non est ex charitate esse vitiosum, seu vitiosam cupiditatem. Unde lib. 11 de Civit., cap. 9, dicit omnes bonos motus, et rectos affectus amoris proximi, de sancta charitate venire; ergo multo magis sentit quemcumque affectum erga Deum ex charitate provenire, ac proinde non nisi ex gratiæ auxilio haberi posse. Hinc etiam lib. 4 contra Julian., c. 3: *Amor, inquit, Dei quo pervenitur ad Deum, non est nisi a Deo;* et statim explicat se loqui de amore creatoris. Quid est autem creator, nisi auctor naturæ? Et similiter serm. 15 de Verb. Apost. dixit: *Deus non amatur, nisi de Deo.* Item lib. de Grat. et liber. arbitr., cap. 17, dicit etiam parvam charitatem esse ex auxilio gratiæ; et cap. 18 docet charitatem, seu dilectionem quæ præcipitur illo præcepto: *Diliges Dominum Deum tuum, etc.*, esse ex dono Dei: illo autem præcepto, cum naturale sit, non tantum præcipitur dilectio Dei auctoris supernaturalis, sed etiam auctoris naturæ: unde ait, *præcepto admonitum esse liberum arbitrium, ut quæret Dei donum;* et subjungit: *Quod quidem sine suo fructu prorsus admoneretur, nisi prius acciperet aliquid dilectionis, ut adli sibi quæreret, unde quod jubebatur impleret;* quibus verbis aperte docet etiam imperfectam dilectionem, qua ad perfectam tenditur, esse donum Dei. Ac denique epist. 107 habet illam celebrem sententiam: *Liberum arbitrium ad diligendum Deum primi peccati granditate perditimus;* ubi non dicit ad diligendum su-

per omnia, vel ad diligendum hoc vel illo modo aut titulo, sed simpliciter ad diligendum Deum. Dicit autem amissum esse liberum arbitrium ad diligendum, utique suis viribus, nam cum gratia liberi sumus ad diligendum Deum.

7. *Quartum fundamentum ex ratione.* — Ratio etiam pro hac sententia addi potest, quia nullus actus pietatis fieri potest sine auxilio gratiæ, ut supra ostensum est; sed omnis dilectio Dei est actus pietatis erga Deum, nam est quidam Dei cultus, teste Augustino, epistola 29 ad Hieronymum. Item quia unit animam Deo; ergo non potest haberi sine dono gratiæ. Et confirmatur, quia omnis dilectio Dei quantumvis imperfecta, est dispositio ad perfectiorem, et consequenter vel proxime vel remote est dispositio justitiæ: ergo non potest haberi viribus naturæ, juxta ea quæ contra Semipelagianos libro sexto dicemus. Quibus tandem addi potest quod Augustinus, Prosper et Fulgentius, quoties admittunt aliquod bonum opus quod possit fieri ab homine lapsa sine gratia, semper id explicant de operibus quæ versantur circa bona temporalia hujus vitæ, et illos etiam imitatur D. Thomas, dicta quæst. 109, artic. 2. In quo plane significant in operibus pertinentibus ad Deum, et præsertim in amore ipsius, liberum arbitrium per se nihil posse.

8. *Primus specialis modus ejusdem sententiæ asserendæ et suadendæ.* — *Rejicitur.* — Præter hæc fundamenta, quæ generalia sunt, possunt alia specialiora cogitari juxta varios modos quibus hæc sententia defendi potest, quos oportet distinguere, et eorum fundamenta expendere, ut de tota sententia judicium ferre possimus. Primus modus asserendi hanc sententiam est, quia nullus dari potest actus amoris Dei, qui sit in substantia sua, vel simpliciter naturalis. Et hoc modo videtur tenuisse hanc sententiam Michael Baius, qui propterea distinctionem illam amoris Dei in naturalem et supernaturalem tam acriter rejecit. Quid vero in hanc sententiam Baium impulerit, non satis scio, quia opera ejus legere non potui, et ex his quæ in dictis assertionibus referuntur, solum conjectare possum illum fuisse quibusdam testimoniis Augustini male intellectis hallucinatum, de quibus et in sequentibus capitibus dicemus. Unde vix aliquod hujus sententiæ probabile fundamentum invenio; potest tamen utcumque suaderi in hunc modum, quia omnis amor Dei est aut concupiscentiæ aut benevolentiae: prior licet

naturalis esse possit, non tamen bonus et honestus, ac proinde non est amor Dei, de quo tractamus: posterior vero est semper supernaturalis, ut aliqui volunt: ergo nullus superest amor Dei honestus, qui naturalis sit. Sed hoc etiam fundamentum parvi momenti est, nam utraque pars minoris est falsa.

9. *Communis doctrina contra Durandum, posse Deum honeste amari amore concupiscentiæ.* — *Durandi motivo satisfit.* — De amore enim concupiscentiæ, licet Durandus in 1, distinct. 1, quæst. 2, et in 3, distinct. 26, quæst. 2, et distinct. 29, quæst. 2, num. 6, senserit non posse habere Deum pro immediato objecto, si rectus et honestus sit, quia per talem actum amaretur Deus propter creaturam, scilicet, propter ipsum hominem amantem, quod inordinatum est; nihilominus vera et communis sententia Theologorum est, posse Deum honeste amari amore concupiscentiæ, quod aperte supponit D. Thomas 2. 2, quæst. 17, artic. 8, et probat egregie Cajetan. ibi, artic. 5, quia Deus ipse est summum bonum nostrum, quod solum potest nos beatos reddere: unde etiam est denarius diurnus, seu summum præmium nostrorum meritorum, et merces nostra magna nimis: amor autem quo nobis amamus verum bonum nostrum de se rectus est et honestus; hic autem est amor concupiscentiæ: ergo hic amor etiam de DEO ex genere suo honestus est. Et confirmatur, quia spes ad amorem concupiscentiæ pertinet, ut D. Thomas supra affirmat, et sumitur ex Augustino in Enchirid., cap. 8, dicente: *Spes non nisi bonarum rerum est, nec nisi futurarum, et ad eum pertinentium, qui earum spem gerere perhibetur.* Ergo quidquid honeste speratur, honeste etiam amatur amore concupiscentiæ: nam talis amor est fundamentum spei. *Qui enim sperat* (ut D. Thomas ait), *aliquid sibi obtinere intendit*: ergo etiam illud sibi amat. Speramus autem Deum ipsum studiose et per virtutem theologiceam; ergo etiam sancte illum nobis amamus. Neque in hoc est aliqua inordinatio, quia quando Deum nobis amamus, non amamus illum propter nos, tanquam propter finem, sed potius amamus illum ut ultimum finem nostrum, et nos ipsos amamus, ut in illo simus beati, seu ut illo tanquam ultimo fine perfruamur, et ita non utimur Deo, sed fruimur, ut latius in materia de Spe tractandum est. Ex hoc ergo capite non repugnat amorem Dei esse naturalem, si aliunde Deus spectetur ut bonum naturale, seu proportionatum naturæ humanæ secundum se,

nam sic erit etiam objectum proportionatum naturalis amoris concupiscentiæ, quem omnes alii Theologi admittunt. De amore autem benevolentiae Dei, quod ex suo genere naturalis esse possit, in capite sequenti ostendemus.

10. *Rejicitur amplius idem specialis modus multipliciter.* — Est ergo illa sententia ita explicata omni probabili fundamento destituta, ideoque falsa est et incredibilis. Primo, quia distinctio illa duplicis amoris Dei naturalis et supernaturalis, communis est omnium Theologorum, ut videbimus, et Pontifices damnantes 34 propositionem Baii illi distinctioni contrariam, illam distinctionem tuentur saltem a censura Baii, qua reprobata, distinctio satis manet auctoritate omnium Theologorum comprobata. Præterquam quod per se bona statim apparet, si termini intelligantur. Nam Deus ratione naturali cognoscitur, ut summum hominis bonum, sine quo non solum non potest homo bene esse, verum etiam nec esse; ergo cognoscitur ut bonum proportionatum naturæ humanæ; ergo ut naturaliter amabile saltem ipsi homini; nam, ut Aristoteles dixit, amabile bonum, unicuique autem proprium; Deus autem ita est commune omnium bonum, ut sit etiam proprium et speciale hominis, etiam secundum puram naturam spectati; ergo aliquis amor Dei potest esse homini naturalis, quia si objectum est ejusdem ordinis cum potentia, non est cur non etiam actus esse possit. Deinde si in intellectu potest esse actus naturalis cognitionis Dei, cur non poterit etiam esse naturalis affectus? Atque ita D. Thom. 2. 2, quæst. 171, art. 2, ad 3, dixit amorem et cognitionem Dei, ut relucet in speculo creaturarum, esse naturales quoad substantiam.

11. Atque hæc omnia de amore recto et honesto procedunt, ac vera sunt. Primo, quia altera propositio Baii, quod omnis amor creaturæ rationalis vel est charitas, vel vitiosa concupiscentia, si intelligatur de charitate infusa, incredibile est et intolerabilis; quia amor parentum mere naturalis non est vitiosa cupiditas, neque etiam amicitia humana recta ratione moderata, et similes affectus, etiamsi non sint ex charitate, vitiosi non sunt. Secundo, quia ille amor est consentaneus propensione naturali voluntatis perfectissimæ in suo genere, quæ vocari solet amor metaphoricus, quem omnes in voluntate supponunt, tanquam naturalem, quia natura sua ita est ad eum propensa, ut extra illum quiescere non possit, juxta illud Augustini, lib. 1 Confes.,

cap. 1: *Fecisti nos, Domine, ad te, et inquietum est cor nostrum donec perueniamus ad te.* Ergo amor elicited ex vi hujus propensionis per se et ex genere suo honestus est. Dari ergo potest aliquis actus amoris Dei naturalis et honestus, sicut etiam potest dari actus cultus Dei honestus et naturalis, est enim eadem ratio. Ergo ex hac parte non repugnat aliquem honestum amorem Dei, solius liberi arbitrii viribus fieri posse.

12. *Secundus specialis modus proponitur.* — Alius modus defendendi illam sententiam esse potest ex illo principio, quod nullum bonum voluntatis fieri potest sine prævia cogitatione congrua, quæ ad auxilium gratiæ pertineat: ergo multo minus amor Dei, qualiscumque sit, dummodo sit rectus et honestus, fieri poterit sine cogitatione congrua gratis data, quia ille amor, etiamsi imperfectus sit, est quoddam bonum opus voluntatis, et ex suo objecto et genere excellentius quam sint boni actus virtutum moralium. Sed hic modus explicandi hanc sententiam et fundamentum ejus facile refellitur ex dictis supra de eodem principio generali. Fatemur enim talem amorem nunquam esse posse sine cogitatione congrua. Verumtamen cogitatio illa naturalis est, et, per solas vires naturalis luminis intellectus, ex creaturis, cum communi concursu Dei et causarum secundarum comparari potest, ut in capite primo et secundo hujus libri ostensum est, et in sequenti etiam capite in puncto difficiliore ostendetur. Quod autem illa cogitatio sit congrua, ex bono usu libertatis habetur, etiamsi Deus nihil speciale addat illi cogitationi præter id quod ex principiis naturalibus eum generali concursu habet; ergo talis cogitatio non pertinet ad proprium auxilium gratiæ, et ita in hoc actu amoris procedunt omnes rationes, quas de bono actu morali adduximus.

13. *Tertius modus.* — *Refellitur.* — Tertio modo potest hæc sententia intelligi et fundari, quia licet aliquis amor Dei ordinis naturalis sit, et ideo, quantum est ex se, naturalibus viribus fieri possit, si natura humana esset integra, nihilominus in natura lapsa fieri non potest absque auxilio gratiæ propter concupiscentiam et alia impedimenta quæ ex peccato contraximus. Et certe si testimonia Augustini aliquid huic sententiæ faverent, hæc explicatio et ratio ac modus fundandi illam sententiam magis esset illi consentanea, ut patet ex illa sententia, in qua dicit per peccatum primi parentis amissam esse libertatem ad amandum

Deum. Nihilominus tamen fundamentum hoc, licet quoad amorem Dei perfectum et super omnia (de quo forte Augustinus loquitur) magnam habeat probabilitatem, ut cap. 31 videbimus, tamen loquendo absolute de amore Dei quocumque, parum est verisimile, nihilque profecto urget; tum quia repugnantia concupiscentiæ et alia impedimenta orta ex peccato, non in omnibus temporibus et actibus nos infestant, ut supra de boni operatione in genere dicebamus; tum etiam quia aliquis potest esse amor Dei tam facilis et suavis cognoscenti ipsum, ut fere sine ulla extrinseca difficultate fieri possit, ut est simplex complacentia qua quis amat Deo felicitatem ejus, vel amor concupiscentiæ qua volo Deum esse, ut sicut me creavit me conservet, et omnia mihi commoda per causas secundas efficiat: in hoc enim et similes actus nulla fere difficultas ex lapsa natura redundat. Cum ergo naturales sint, et cogitatio ad illos prævia et necessaria sit etiam naturalis, et a causis extrinsecis et naturalibus excitari possit, cur non poterit aliquis ex dictis actibus per vires arbitrii sine speciali auxilio gratiæ fieri?

14. *Secunda sententia affirmans et communis.* — Unde probetur primo. — Probatur secundo ex Scriptura. — Quia ergo prædicta opinio rationis caret fundamento, et auctoritates quæ in ejus favorem adducuntur, neque in generalitate loquuntur, nec in dicto sensu intelligendæ sunt, ideo est communis Theologorum opinio, posse hominem lapsum aliquem amorem Dei auctoris naturæ, saltem imperfectum, naturaliter et viribus liberi arbitrii facere. Ita tenet D. Thom., q. 109, art. 3, et reliqui Theologi, quos in duobus capitibus sequentibus referemus, et mihi videtur vera sententia et sufficienter probata discursu facto a sufficienti partium enumeratione. Ulterius vero persuaderi potest ex illo Pauli ad Rom. 4, ubi de gentibus ait: *Quod notum est Dei, manifestum est in illis, Deus enim illis manifestavit, utique per creaturas, ut omnes exponunt, et subdit inferius esse inexcusabiles, quia cum cognovissent Deum, non sicut Deum glorificaverunt.* Supponit ergo potuisse per illam cognitionem, aliquo modo, glorificare Deum, quia, si non potuissent, profecto excusabiles essent. Et quamvis Paulus non dicat potuisse sine auxilio gratiæ, tamen cum loquatur de gentibus infidelibus, et eos convincere velit quod graviter peccaverint male utendo naturali cognitione Dei, profecto illam cum libertate arbitrii sufficientem esse supponit, ut excusari

non possint. Et idem indicavit Actorum decimo-quarto, ubi cum dixisset Deum in præteritis generationibus dimisisse gentes ingredi vias suas, subjungit: *Et quidem non sine testimonio reliquit semetipsum, benefaciens de cælo, dans pluvias et tempora, etc.* Nam licet hoc testimonium non sit satis ad salutem, est tamen satis ut homines non possint excusari, et ut ipsis et non Deo imputetur, *si perierint nationes quas Deus fecit*, ut dicitur Sap. 12, ut late prosequitur Prosper in lib. 4 de Conversion. gentium, cap. 5 et 6, et in epist. ad Ruffin., circa medium. Quamvis ergo illa cognitio neque ad salutem neque ad initium salutis sufficiat, satis est ut homo per aliquem affectum saltem imperfectum ad Deum assurgere possit, et ad aliquam glorificationem Dei, et gratiarum actionem propter beneficia recepta, quæ gratiarum actio sine aliqua dilectione benefactoris non existit.

15. *Probatur tertio Patribus.* — Potestque hoc confirmari ex Basilio in regulis fusius disputatis in responsione ad interrogationem secundam, dicente: *Simul atque constitit homo, insita ei naturalis etiam quædam rationis est via, quæ in seipsa amandi necessitudinis initia continet.* Et infra: *In ipso, ait, ortus nostri initio vim quamdam nanciscimur, per quam nostra sponte ad ipsum diligendum impellimur.* Ubi licet de appetitu innato loqui videatur, tamen inde colligitur etiam aliquis elicitus saltem imperfectus, et plane omnia, quæ longo discursu ibi prosequitur, de amore elicitoprocedunt. Quod etiam dixit Greg., homil. 27 in Evangel.: *Sunt nonnulli qui diligunt proximos, sed per affectum cognationis et carnis, quibus in hac dilectione sacra eloquia non contradicunt, sed aliud est quod sponte impenditur naturæ, aliud quod præceptis Dominicis ex charitate debetur obedientiæ.* Hoc, inquam, æque potest ad Deum accommodari, nam amor proximi, teste Gregorio, etiam honestus, potest esse naturalis, nam si non esset honestus, illi sacra eloquia contradicerent; ergo etiam amor Dei potest esse naturalis, nam sicut proximus amari potest ex affectu cognationis, ita Deus potest diligi ex naturali vinculo, et conjunctione (ut sic dicam) quam cum illo habemus per naturalem emanationem et dependentiam ab ipso. De illo autem amore proximi sentit Gregorius posse haberi sine influxu gratiæ, nam de illis qui sic proximum diligunt, subjungit: *Illa sublimia dilectionis præmia non assequuntur, quia dilectionem suam non spiritualiter, sed carnaliter impen-*

unt. Cur ergo aliquis amor Dei non poterit etiam haberi per vires liberi arbitrii, cum Deus cognosci possit, ut majus et magis necessarium bonum, et in se pulchrius et nobis commodius, et alioqui possit esse talis amor cui affectus concupiscentiæ non resistant, ut explicatum est?

16. *Probatur quarto ratione a priori.*—Denique ratio a priori est eadem quam de bono morali actu supra fecimus. Nam Deus, sicut sub aliqua ratione veri est objectum naturale intellectus, ita sub aliqua ratione boni est objectum voluntatis humanæ, et illa ratio potest in Deo naturaliter cognosci, quia non solum cognoscimus naturaliter Deum esse, sed etiam esse benefactorem nostrum: ergo etiam aliquis amor Dei est homini naturalis. Deinde talis amor est bonus ex objecto, ut per se constat, et ex fine, quia quo Deus magis ut finis diligitur, eo melius diligitur, neque aliqua alia circumstantia mala illi ex necessitate adiungitur: ergo potest homo, per se loquendo, suis viribus naturalibus aliquem actum huiusmodi amoris erga Deum elicere, nisi aliunde impediatur, quod valde accidentarium est. Unde hæc ratio primo ac evidentius concludit de homine in statu innocentiae, seu integræ naturæ. Deinde habet magnam vim in statu puræ naturæ, quia non est verisimile tam miseram et imbecillum esse humanam naturam in sua pura conditione spectatam, ut nullo modo posset suis viribus auctorem suum diligere. Denique procedit etiam in homine lapsio; tum quia in viribus comparatur homini in pura natura condito; tum etiam quia (ut supra dicebam) impedimenta quæ hunc amorem reddunt difficilem, neque in omni amore neque in omni tempore occurrunt: ergo.

17. *Ad primum fundamentum in num. 4.*—Ad testimonia Scripturæ imprimis responderi potest Scripturam semper postulare ab homine dilectionem Dei ex charitate, per quam vocem proprie significatur dilectio supernaturalis et infusa, ut tradit D. Thom. 1. 2, q. 26, art. 3, et magis explicat 2. 2, q. 3, art. 1, quia charitas significat dilectionem et amicitiam non quancumque, sed excellentem et fundatam in singulari communicatione divinæ beatitudinis. Quia ergo divina Scriptura per dilectionem Dei promovere intendit homines ad illam beatitudinem, ideo de dilectione charitatis semper loquitur. Et quamvis non semper illa voce utatur, sed etiam nomine amoris aut dilectionis Dei aut proximi, nihilominus quedam loca ex aliis explicando, satis intelligitur hic

sensus ejus, seu quod veluti per antonomasiam loquatur de dilectione, quæ per se confert, et necessaria est ad vitam æternam. Et ideo prædicta testimonia parum ad præsentem quæstionem spectant.

18. *Ad secundum fundamentum in num. 5.*—Eadem fere responsio locum habet in Conciliis, et Augustino; loquuntur enim absque dubio de amore infuso, qui est charitas: tum quia supra ostendimus, cum loquuntur de bona operatione, seu voluntate, loqui de illa quæ per se conducit ad vitam æternam: ergo multo magis, cum loquuntur de amore Dei, loquuntur de amore per se conferente ad vitam gratiæ et æternæ beatitudinis, ad quam naturalis amor etiam Dei nihil confert, sed amor superioris ordinis: tum etiam, quia ipsa Concilia addiderunt illam particulam, *Sicut oportet ad justificationem*, ut patet ex Conciliis Arausicano et Tridentino, locis citatis: addendo autem illam particulam, potius significant aliquem inferiorem amorem Dei sine auxilio gratiæ fieri posse: addo etiam Concilium Trident., dicta sess. 6, c. 6, addidisse ex parte objecti illam particulam: *Illumque* (id est Deum) *tanquam omnis justitiæ fontem diligere incipiunt*, per quam particulam limitat dilectionem ad eam quæ ad Deum, ut auctorem gratiæ et supernaturalis justitiæ, se extendit: tum denique quia in cap. 5 late ostensum est Augustinum, in locis allegatis, loqui de vera charitate infusa. Ubi etiam explicavimus quo sensu intelligat affectum qui non est ex charitate esse vitiosum: loquitur enim non de affectu ad Deum, sed generatim, et intelligit vel esse vitiosum, id est, mutilum, non semper, sed frequentius; vel esse vitiosum, id est, inutilem et infructuosum, ut ibi latius declaravimus.

19. *Ad tertium fundamentum in num. 6.*—Unde quod allegatur ex l. 14 de Civit., omnes bonos motus esse ex charitate, plane intelligitur de bonis motibus conferentibus ad vitam æternam. In loco autem contra Julianum, ipsemet declarat sermonem esse de amore Dei, *quo pervenitur ad Deum*. Nec refert quod de Deo creatore loquatur, nam Deus, etiam ut creator, diligitur charitate infusa, ut nunc tanquam clarum suppono. Et eodem modo loquitur, in dicto sermone 43 de Verbis Apost., de amore charitatis: nam Patribus familiare est, nomine dilectionis Dei simpliciter prolato perfectam dilectionem charitatis significare, sicut Bonavent. lib. de Diligendo Deo scripsit, et idem August., in lib. de Disciplina Christian.,

cap. 5, cum interrogasset, *Quid est charitas?* absolute respondet, *dilectio*. Unde, de eadem propria charitate loquendo, verissimum est quod ait Augustinus in alio loco, de Gratia et libero arbitrio, non solum magnam, sed etiam parvam seu imperfectam charitatem esse ex speciali infusione Spiritus Sancti. De dilectione autem illa, qua Deus præcipitur diligere ex toto corde, infra dicetur. Tandem de eadem dilectione charitatis intelligenda est celebris illa sententia Augustini: *Liberum arbitrium ad diligendum Deum primi peccati granditate perdidimus*, intelligitur enim ad diligendum sicut oportet. Ad hoc autem amissimus non solum facilitatem, sed etiam potestatem, quia et charitatem habitualement perdidimus, quæ dat potestatem sic amandi, et indigni facti sumus omni auxilio quo valeat illa potestas suppleri. Gratia autem Salvatoris restituit nobis illam potestatem, et ita etiam restituit libertatem respectu talis amoris. Quod si quis velit sententiam illam etiam ad amorem naturalem Dei extendere, non in quolibet, sed ad summum in amore super omnia permitti potest; quo autem sensu id intelligi debeat infra dicetur.

20. *Ad quartum fundamentum in num. 6.*— Ad rationes etiam ex eadem doctrina facilis est responsio; nullus enim amor Dei naturalis, etiam in illo ordine perfectissimus, est meritorius gratiæ, nec propria dispositio ad illam, nec unit animam Deo, sicut oportet, et ideo non computatur inter illa opera pietatis quæ ad propriam religionem et justitiam infusam spectant, de quibus est sermo cum dicitur nullum opus pietatis fieri posse sine auxilio gratiæ. Nam si loquamur de pietate prout significat quemlibet cultum Dei, vel parentum honorem, sic constat aliqua opera pietatis esse naturalia, et per discursum rationis fieri posse. Quod vero ultimo loco addebatur ex Patribus, qui dum concedunt aliqua bona opera libero arbitrio, id declarant de operibus moralibus ad hanc temporalem vitam pertinentibus, hoc, inquam, facile habet responsum, quia id non faciunt ad limitandam sententiam, sed ut exempla adhibeant in rebus, aut facillioribus, aut etiam frequentioribus. Accedit quod homo gratia destitutus, si aliquid boni operatur erga Deum, id ordinarie facit intuitu alienius boni hujus vitæ.

CAPUT XXX.

UTRUM HOMO IN ALIQUO STATU POSSIT DILIGERE DEUM AUCTOREM NATURÆ AMORE BENEVOLENTIÆ PER LIBERUM ARBITRIUM, SINE AUXILIO GRATIÆ?

1. *Expediuntur, vel alio remittuntur quæstiones nonnullæ affines.*— In hoc capite tractanda est sententia Patris Vasquez 1. 2, disput. 195, c. 2, ita distinguentis amorem concupiscentiæ et benevolentiae Dei, ut priorem dicat semper esse naturalem, posteriorem vero semper supernaturalem in substantia sua, id est, qui suapte natura superioris ordinis principium et habitum per se infusum, postulet. Utramque autem harum partium intelligit, sive amor versetur circa Deum, ut finem naturalem, sive ut supernaturalem. Quod ergo attinet ad priorem partem, libenter illam admittimus quoad amorem concupiscentiæ Dei, ut est finis naturalis, illam enim omnes Theologi supponunt, et probant ea quæ capite præcedenti dicta sunt, et a fortiori illam confirmabunt quæ in præsentem dicemus. Quod vero spectat ad amorem concupiscentiæ Dei, ut est finis supernaturalis, illa sententia valde difficilis nobis est, dicemus autem de illa in libro sequenti, quia ad illum spectat. E converso autem in posteriori parte de amore benevolentiae, facile admittimus, si talis amor sit de Deo sine supernaturali, esse ordinis supernaturalis in sua substantia et principio; id vero etiam hic omittimus, quia ad librum sequentem pertinet.

2. *Circa præsentem quæstionem sententia Vasquez negans.*— Solum ergo hic tractamus de amore benevolentiae Dei, ut est auctor et finis naturalis. De illo dictus auctor affirmat esse in substantia sua supernaturalem, ita ut neque homini in ullo statu, neque Angelo possit esse naturalis, nec per principia naturalia elici possit. Cujus sententiæ meminit D. Thom. quodlib. 2, art. 8, præsertim ad 3. Videturque fuisse opinio Alex. Alens., in 2 p., q. 30, memb. 1, § 2, in solutionibus priorum argumentorum, maxime ad 1 et ult. Citatur etiam pro hac sententia Albert., 2 p., tract. 4, q. 14, memb. 4, art. 2. Sed hoc opus Alberti non habeo, nec videre potui. Citatur etiam Alti-siod., l. 2 summ., tract. 1, c. 4. Sed ibi contrarium docet, licet in c. 6 male id explicet, ut infra dicam. Item adducitur Scotus, sed ille potius vix cognoscit actum amoris Dei in se supernaturalem, ut infra ostendam. Præterea ex

modernis allegatur Bannez 2. 2, q. 23, art. 1. Sed ille dicit amorem Dei naturalem non sufficere ad amicitiam cum Deo, non tamen negat esse benevolentiam. Refertur etiam Bel-larm., lib. 6 de Grat. et lib. arbitr. Sed ille de solo amore super omnia disserit. Denique citatur Alphonsus Vives, Philipp. 2 cont. Lutherum, quem videre non potui.

3. *Probatur primo auctoritate negativa.*—*Accedit ratio prima.*—*Ratio secunda.*— Pro hac sententia imprimis sumitur argumentum negativum ex Scriptura et Patribus, quia ubique commendant et laudant maxime amorem Dei propter seipsum, et illum absolute dicunt esse amorem charitatis Dei, nunquam vero distinguunt inter Deum dilectum, ut finem naturalem vel supernaturalem. Specialiter vero Augustinus in id Psal. 53: *Voluntarie sacrificabo tibi*, ait amorem gratuitum ad Deum esse quo propter se, et non propter aliud diligitur; ergo talis amor non potest esse naturalis. Nam ibidem dixerat amari Deum ex charitate. idem esse quod *gratuito amari*. Deinde adduntur rationes. Prima est, quia amor benevolentiae est amor amicitiae; amicitia autem cum Deo est charitas, nec potest esse naturalis inter hominem et Deum, ut cum Aristotele sentit D. Thom. 2. 2, quaest. 23, art. 1, ubi omnes interpretes idem docent: ergo neque benevolentia ad Deum potest esse naturalis, ac subinde nec sine gratia Christi potest haberi. Secunda ratio est, quia talis benevolentia est supra inclinationem naturae, quia natura inclinatur ad bonum, ut sibi conveniens; unde est illud Aristotelis, l. 8 Ethicor. ad Nicomach., cap. 2: *Amabile bonum, unicuique autem proprium*, et inde etiam appetibilia ad alterum dicuntur oriri ex appetibilibus ad se ex 9 Ethic., capit. 8; ergo amare Deum propter se in eo sistendo, quod est benevolentiae proprium, non ex natura, sed ex gratia oriri potest.

4. *Ratio tertia.*— Tertia et praecipua ratio est, quia amor benevolentiae ad Deum tantum unus esse potest; sed certum est quemdam amorem benevolentiae ad Deum esse supernaturalem et charitatis, quae sine Spiritu Sancto haberi non potest; ergo nullus superest amor benevolentiae Dei mere naturalis. Consequentia quidem evidens est, supposita minori, quae nunc supponitur. Major ergo probatur, quia tunc amatur ex benevolentia Deus, quando propter suam intrinsecam bonitatem amatur, illam ei volendo, et alia propter illam; ergo haec bonitas Dei est quae amori benevolentiae

speciem tribuit. At illa Dei bonitas unica est; ergo tantum esse potest una species illius amoris, quia actus sumit speciem ab objecto formalis, quod in voluntate est motivum volendi, seu bonitas, propter quam res amatur. Nec refert quod talis bonitas possit cognosci diversis modis, quia cognitio diversa, si applicat eandem rationem amandi, non variat speciem amoris, quia solum est conditio sine qua non. Sicut fides et visio clara non variat speciem charitatis, sed est eadem in via et in patria.

5. *Ratio quarta.*— Quarta ratio sumitur ab incommodis; unum est, quia sequeretur hominem existentem in statu peccati mortalis posse ex benevolentia diligere Deum, quod absurdum videtur; nam talis amor est amicitiae, vel ad illam pertinet: unde tolleretur peccatum, quod est inimicitia ad Deum, et cum amicitia esse non potest. Augeturque difficultas per aliud incommodum, quia si amor benevolentiae Dei posset esse naturalis, etiam amor super omnia esse posset naturalis: consequens est falsum; ergo. Sequela probatur quia diligere Deum super omnia, nihil aliud est quam diligere illum propter suam bonitatem, praecise quatenus est suprema bonitas excedens omnem aliam; hoc autem habet amor Dei, eo ipso quod est pura benevolentia ipsius; ergo. Unde sequitur tertium inconveniens, quia talis amor esset proxima dispositio ad gratiam et justitiam, quia nulla potest esse propinquior quam sit amor Dei super omnia, vel per se spectatus, vel adjuncto dolore de peccatis ex eodem amore, qui facile posset eisdem naturae viribus concipi, si amor ille naturalis esset.

6. *Sententiae affirm. et communis assertio prima.*— Nihilominus assero dari posse in hominibus aliquem amorem benevolentiae Dei naturalem in substantia sua, seu in ordine suo. Haec est sententia D. Thom. in dicto Quodlibet., et in presenti materia, q. 109, art. 3; et idem docuit de Angelis in 1 p., q. 60, art. 5 in corpore, et ad 3. Et illam ex professo docuit Alens., 2 p., quaest. 90, memb. 1, art. 1, in solut. argumen., tractans de statu primi hominis ante peccatum; ubi videtur priorem sententiam retractasse. Eandem docet expresse de Angelis Albert., de quatuor cor. q., p. 1, q. 5, art. 17. Ac denique est communis Theologorum quos in capite sequenti referam. Nam etiam illi qui dicunt amorem super omnia esse ultra vires naturales hominis lapsi, non negant in unum omnem amorem benevolentiae esse naturalem. Item omnes admittunt distinctionem illam duplicis amoris Dei, natu-

ralis et infusi, ut cadit in amorem benevolentia, ut ex ibidem dicendis patebit. Ideoque existimo in eodem sensu Baium illam distinctionem negasse, ac proinde non parum favere nostrae sententiae Pontifices in Bulla saepe allegata. Ex Scriptura vero, Conciliis et Patribus non potest haec sententia probari, quia illi indistincte loquuntur de amore Dei, et directe solum docent non posse haberi sicut oportet sine auxilio gratiae, ut vidimus. Quid autem dicendum sit de amore Dei qui non attingit gradum illum vel modum, per illam particulam, *Sicut oportet*, explicatum, et qualis possit ille amor esse, non definiunt, sed disputationi Theologorum relinquunt.

7. *Ratione probatur assertio.* — Probatur ergo ratione assertio, quia vel hic amor excedit ordinem naturae ex eo praecise quod benevolentia est, vel quia Dei est; neutrum dici potest; ergo. Probatur minor quoad priorem partem; quia amicitia inter homines honesta naturalis est, quam cognoverunt et commendarunt omnes Philosophi; haec autem amicitia includit amorem benevolentiae; nam qui amat alterum in suum proprium commodum, tantum deficit a virtute et perfectione amicitiae, quantum ab amore concupiscentiae trahitur, ut dixit D. Thom. 1. 2, quaest. 26, art. 4, ad 3. Imo Aristoteles, 8 Ethicorum, cap. 3 et 4, dixit solam benevolentiae amicitiam esse per se ac simpliciter amicitiam, alias vero esse per accidens et secundum quid. Haec autem amicitia maxime est consentanea naturae rationali ex inclinatione ac dictamine ejus, ac proinde est simpliciter naturalis; ergo et amor benevolentiae, quo nectitur, naturalis est. Confirmatur experientia, nam mater amat filium amore benevolentiae, quamvis nullum commodum ab illo expectet: ergo benevolentia, ut sic, neque est contra, neque supra inclinationem naturae. Imo ait D. Thomas pertinere ad rectitudinem naturae, quia non esset bene instituta, nisi hanc inclinationem haberet. Et declarari potest, quia natura humana socialis est, et ad suam conservationem humana societate indiget: non potest autem humana societas etiam in naturalibus recte subsistere, si omnes seipsos tantum amarent propter se: ergo inclinatio ad amandos alios ex benevolentia est naturalis. Denique etiam in rebus inanimatis est quaedam participatio hujus inclinationis, sicut est in sole ad illuminandum, et bruta etiam illam participant. Unde recte notavit D. Thomas in illo Quodlibeto, ad ultimum, licet inclinatio ad recipiendum sit na-

turalis pertineatque ad amorem concupiscentiae, nihilominus inclinationem ad agendum, licet ad amorem benevolentiae pertineat, non minus naturalem esse; ergo praecise ex illa ratione generali non est hic amor supra inclinationem naturae.

8. *Deinde ostendendo talem benevolentiam, nimirum erga Deum, non esse ultra inclinationem naturalem.* — Quod autem ex tali objecto seu termino benevolentiae, nimirum, quod sit Dei, non habeat benevolentia esse supra inclinationem naturae, probat D. Thomas, ex eo quod Deus est bonum universale et quasi commune, seu quasi bonum totius, unde sicut pars naturaliter inclinatur ad bonum totius propter ipsum, interdum etiam cum noعنmento proprio, ita voluntas naturaliter inclinatur ad Deum propter seipsum tanquam universale bonum, de qua ratione latius in capite sequenti. Nunc aliter probari potest, quia divina bonitas cognosci potest naturali lumine tanquam summa in ordine naturae, et propter se amabilis: ergo ratio ipsa naturalis dicitur esse honestum amare Deum propter se, id est, velle illi bonum, solum ut ei bene sit, quod est amare ex benevolentia: ergo hic amor est ordinis naturalis, et voluntas, quantum est ex se, potest ex naturali virtute et propensione illum elicere, quia haec propensio libera voluntatis est veluti adaequata rationi seu dictamini naturali.

9. *Adversariorum responsio expugnatur.* — Unde contrariae sententiae auctores non potuerunt vim hujus rationis effugere, nisi negando hoc dictamen, *Auctor naturae est propter se diligendus*, esse posse ex mera ratione naturali. Sed hoc incredibile est, et nulla ratione ab adversariis ostenditur. Deinde evidens est Deum esse summum bonum: ergo evidens est esse honestum et rationi consentaneum, et complacere de bonis ejus intrinsicis, velleque vel gaudere quod illa habeat, et optare illi bona extrinseca honoris et laudis, non alia ratione, nisi quia illorum dignissimus agnoscitur: ergo isti affectus de se maxime naturales sunt, eum tamen ad amorem benevolentiae pertineant, ut per se notum est. Et declaratur amplius, quia creatura rationalis cognoscit naturaliter Deum, auctorem suum, esse dignum hoc amore; nam de homine studioso et bono cognoscit esse amabilem hoc benevolentiae amore: ergo eadem rationalis creatura judicat naturaliter creatorem ita esse a se diligendum per benevolentiam, quia neque in hoc invenit repugnantiam, neque aliquid discrepans; imo

maxime consentaneum rectæ rationi : ergo affectus benevolentiae consentaneus huic iudicio, ex suo genere et objecto naturalis est, potestque per illud iudicium, quantum in ipso est, sufficienter excitari. Idemque argumentum potest de Angelis fieri, de quibus incredibile est non posse virtute naturali hoc agnoscere, et amare : et tamen dicti auctores eodem modo coguntur loqui de Angelis quo de hominibus, quia Angelus etiam est capax charitatis, et amicitiae supernaturalis ad Deum, ex quo principio inferunt benevolentiam ad Deum non cadere sub dictamine rationis naturalis, nec sub facultate naturali voluntatis.

10. *Confirmatur tandem expugnatio.* — Denique confirmatur, quia ratio naturalis dictat colendum esse Deum, et gratias illi esse agendas, ut supra ex Paulo dicebamus, et videtur esse consensus Theologorum omnium : nam prima tria præcepta Decalogi moralia et naturalia sunt, quatenus circa Deum auctorem naturæ versari possunt, alias idololatria non esset contra præceptum naturale. Si ergo cultus Dei est de se ordinis naturalis, quia est ex dictamine rationis naturalis, a fortiori dicendum idem est de amore benevolentiae Dei. Probatur consequentia, quia verus cultus nititur in excellentia et dignitate personæ secundum se spectatæ sine ordine ad bonum colentis, per se loquendo, et ita in hoc æquiparatur amori benevolentiae, et ut recte fiat, in illo fundatur. Maxime vero gratiarum actio vel gratitudo videtur intime includere benevolentiae amorem. Nam licet amare aliquem propter respectum ad futura beneficia sit concupiscentiæ, tamen amare propter beneficia jam recepta, quod est gratitudinis, ad benevolentiam pertinet. Quia in hac actione gratiarum jam non respicitur commodum proprium, tanquam motivum proximum ejus, sed solum ut fundamentum quasi remotum, proxime autem ad illum movet benevolentia alteri debita illo titulo. Sicut ergo aliqua gratitudo ad Deum naturalis est, ita etiam aliqua benevolentia.

11. *Assertio secunda bipartita.* — *Ostenditur prius pars assertionis.* — Ex hoc infero, et dico secundo, hominem in statu innocentiae, seu integræ naturæ, potuisse habere hunc amorem absolute perfectum sua perfectione naturali per liberum arbitrium, sine speciali auxilio gratiæ. In natura autem lapsa (idemque est de pura) posse illum habere pro aliquo tempore et aliquo modo, seu in aliquo gradu imperfecto, etiam intra terminos naturalis amoris. Prior pars de homine in natura inte-

gra sumitur ex sententia communi Theologorum cum D. Thom. d. q. 109, art. 3, ubi ait hominem in statu naturæ integræ potuisse diligere super omnia Deum, ut auctorem naturæ, ut capite sequenti exponemus, ubi etiam explicabo quid sit diligere Deum super omnia; nunc satis est illis verbis explicari summam perfectionem substantialem (ut sic dicam) quam habere potest amor Dei naturalis absolute perfectus; et ideo si homo in illo statu potuit habere amorem super omnia, potuit etiam habere amorem simpliciter perfectum naturali perfectione, sicut in conclusione dixi. Sequitur denique hæc assertio ex priori, suppositis quæ supra dicta sunt de statu integræ naturæ. Nam ostensum est hunc amorem esse ordinis naturalis, et ex motivo naturali; sed ratione perfectionis naturalis non transcendit hunc ordinem naturalem; ergo etiam cum illa perfectione est de se actus naturalis et commensuratus viribus voluntatis. Sed in statu innocentiae nulla erat difficultas operandi, quidquid esset commensuratum viribus voluntatis; ergo.

12. *Ostenditur posterior pars.* — *Ex primo modo.* — Altera vero pars de homine lapsa declaratur, quia amor benevolentiae potest esse duplex, scilicet, imperfectus et perfectus. Asseritur ergo posse hominem lapsum saltem imperfectam benevolentiam erga Deum, ut auctorem naturæ, habere sine gratiæ auxilio. Probatur, quia talis actus est naturalis, et de se non excedit vires naturales voluntatis, ut ostensum est; ergo ex hac parte possibilis est. At vero in usu seu exercitio illius, non semper et in omni occasione occurrunt impedimenta quæ illum actum nimis reddant difficilem, etiam in hoc statu naturæ lapsæ, quia non semper graves tentationes occurrunt, neque infirmitas moralis corporis, vel fomitis concupiscentiæ semper actu movet: ergo neque semper impedit: ergo neque ex hac parte est moraliter impossibilis talis actus sine auxilio gratiæ: ergo est simpliciter possibilis. Et declaratur amplius, quia hic actus imperfectæ benevolentiae non habet formalem repugnantiam cum omnibus peccatis, nec includit observantiam omnium præceptorum: ergo non est cur non possit interdum fieri solis viribus liberi arbitrii. Consequentia patebit ex capite sequenti, quia nulla alia difficultas invenitur in amore super omnia. Antecedens autem patet, quia duplici modo potest esse imperfectus hic amor benevolentiae Dei; primo, ex parte objecti adæquati quasi naturalis, secundo, ex

modo ipsius actus. Priori modo est imperfecta illa benevolentia Dei quæ est per modum simplicis complacentiæ de bonis internis Dei : nam potest homo velle Deo bona illa quæ in se habet, et de illis complacere, et nihilominus velle in aliis rebus appetitum suum explere : ergo actus ille nec opponitur omnibus peccatis, nec habet unde sit semper valde difficilis : imo de se videtur suavis et facilis. Similis est actus quo quis vult Deo propter seipsum honorem et gloriam, quæ per cognitionem illius veram et religionem illi exhibetur, non tamen vult in omnibus illi obedire ; quia hæc duo non repugnant, et tamen illa sine dubio quædam benevolentia Dei est.

13. *Ex secundo modo.* — Posteriori modo est imperfectus actus benevolentiae, qui licet ex parte objecti se extendat ad omne bonum divinum, in modo volendi est imperfectum desiderium, non absolutum decretum, sed per simplicem complacentiam, seu actum conditionatum : Vellem Deo placere in omnibus ; hic enim quidam affectus benevolentiae est, non tamen movet efficaciter ad observantiam omnium præceptorum, sed potius cum illo potest esse peccatum etiam actuale. In hoc ergo actu cessat illa difficultas, ac subinde non est cur repugnet ut sine auxilio interdum eliciatur. Quod enim Vasq., disp. 194, n. 36, objicit, per hæc verba, *Vellem*, etc. non significari actum qui in præsentia habeatur, sed qui haberetur, si talis conditio impleretur, falsum est, quia etiam illo verbo explicatur præsens affectus inefficax, et conditionata voluntas, qualis fuit in Christo, quando orabat : *Pater, transeat a me calix iste*, et quando voluit latere et non potuit, ut late ostendi 1 tomo de Incarn., disp. 38, sect. 2. Et similem voluntatem habet piger, cum ita vult ut nolit, propter quod de eo dicitur Prov. 13 : *Vult et non vult*. Similemque actum nolendi habet qui præ timore projicit merces in mare invitus, ut dicitur, secundum quid ; sicque interdum fidelis negat Christum in tormentis, quem nollet negare : in illo ergo est voluntas inefficax honorandi Christum, quæ illi peccato non satis opponitur. Sic igitur etiam circa Deum, ut objectum naturale, potest esse talis amor.

14. *Ad primam probationem in contrarium in num. 3.* — Superest ut ad argumenta respondeamus ; et imprimis ad auctoritatem negativam Scripturæ, Conciliorum et Patrum, jam supra responsum est Scripturam præcipue instruere homines ad diligendum Deum ex fide, et sicut oportet ad vitam æternam, et

ideo fere semper indifferenter loqui de charitate et de dilectione Dei perfecta, quæ est dilectio Dei ut finis supernaturalis, et ideo semper tribuit gratiæ amorem Dei, et præcipue illum qui ad benevolentiam spectat. Nunquam tamen Scriptura negat Deum, sicut potest per rationem cognosci, debere etiam diligi naturali dilectione benevolentiae : imo id interdum significat, ut ex Paulo adduxi. Eademque est responsio ad Concilia et Patres : nam sicut supra ostendimus, cum loquuntur de bonis operibus, ordinarie loquuntur de illis quatenus ad salutem conferunt ; ita multo majori ratione tractant de amore fructuoso et in fide fundato, quam verus amor fundatus in sola ratione naturali et rarus est, et per se non inferens salutem. Et hoc modo loquitur Augustinus in loco ibi allegato. Cum enim David dicebat : *Voluntarie sacrificabo tibi*, certe de sacrificio ex vera fide et voluntate specialiter a Deo donata loquebatur, et illud exponit Augustinus de sacrificio laudis, juxta illud Psal 49 : *Sacrificium laudis honorificabit me*. Et similiter exponit tale sacrificium voluntarie offerri, quando gratis amatur quod laudatur. Unde ait : *Laudetur voluntate, ametur charitate, gratuitum sit, et quod amatur et quod laudatur*. Ubi gratuitum amorem sine dubio appellat amorem propter solam Dei bonitatem, consentaneè ad verba sequentia : *Et confitebor nomini tuo quoniam bonum est*. Talem autem gratuitum amorem dicit esse amorem charitatis, non quia nullum vestigium illius amoris (ut sic dicam) possit esse in natura, sed quia ad perfectum amorem seu laudem ex illo profectam fideles exhortabatur. Et ita etiam divus Thom., 1 parte, q. 60, art. 5, ad quartum, tacite exponit Aug., 12 de Civit. Dei, cap. 9, dicentem dilectionem Dei in principio creationis etiam Angelis fuisse infusam per Spiritum Sanctum, qui datus est eis. Dicit enim loqui de dilectione perfecta Dei, ut est objectum beatitudinis supernaturalis.

15. *Ad primam rationem in eodem num. 3.* — Ad primam rationem respondetur fundari tantum in verbi æquivocatione : nam amicitia interdum late sumitur, ut distinguitur ab amore concupiscentiæ, et sic omnis amor benevolentiae potest dici amicitiae, sicut supra illos amores distinximus cum communi doctrina. Aliquando vero significat peculiare vinculum inter amicos, et ut sit perfecta et simpliciter ita nominetur, ultra benevolentiam requirit plures condiciones, scilicet, quod mutua sit, et cum redamatione quæ non lateat

amicos, et ut inter eos sit conveniens proportio et communicatio, ut Aristoteles tradit lib. 8 Ethicorum, cap. 2 et sequentibus. Loquendo ergo de amicitia hoc posteriori modo, verum fortasse est inter Deum et hominem in puris naturalibus non potuisse veram amicitiam intercedere, quod disputatur latius in tractatu de Charitate, ad præsens enim nihil refert. In hoc ergo sensu, dato antecedente, negatur consequentia; Aristoteles enim, 9 Ethicorum, c. 5, dixit benevolentiam quidem esse similem amicitiae, non tamen esse amicitiam, quia nimirum benevolentia potest consistere in simplici actu voluntatis sine aliis conditionibus amicitiae, et ita posset esse ad Deum in homine in puris naturalibus. Vide D. Thomam 2. 2, q. 27, art. 2.

16. *Ad secundam rationem ibid.*—Ad secundam rationem respondet D. Thom., 1 parte, quæst. 60, art. 5, ad 1, et clarius 2. 2, quæst. 26, art. 3, ad primum et secundum, illa axiomata præcipue procedere in bonis particularibus, non vero respectu boni universalis, in quo totum bonum continetur, et a quo omne bonum particulare pendet, ut est Deus. Unde cum dicitur amabile bonum, unicuique autem proprium, dupliciter id potest intelligi, primo, quod semper ratio amandi aliquod bonum sit quia est proprium, ita ut necesse sit naturalem amorem semper reflecti, et terminari ad ipsum amantem, et hic sensus est falsus, et alienus a mente Aristotelis, cum ejus doctrinæ repugnet, ut ostensum est. Secundo, intelligi potest neminem amare bonum alicui, nisi illum cui bonum amat, tanquam quid proprium et sibi conjunctum, et quasi unum secum reputet; et sic verum est unumquemque amare bonum proprium, sic enim mater amat filium, et unusquisque amat sibi conjunctos, vel sanguine, vel consuetudine, vel similes, etc. Et sic etiam amor naturalis tendit ad Deum, qui ita est commune bonum, ut uniuscujusque sit magis quam proprium, propter dependentiam quam ab ipso habemus. Aliud vero axioma, quod amabilia ad alterum procedunt ex amabilibus ad se, alium sensum habet, nimirum, benevolentiam quam exhibemus aliis commutari, et quasi habere pro regula benevolentiam ad seipsum, nam illa bona debemus aliis velle quæ nobis rationaliter cupimus. Et hæc regula vera est inter personas particulares, sicut de amore ad proximum dicitur, debere unumquemque proximum diligere sicut seipsum. Et in hoc sensu loentus est Aristoteles; illa vero regula non habet locum, ut

dixit D. Thomas, in Deo, qui est universale bonum, nam ibi potius dilectio ipsius Dei est regula diligendi seipsum, ut amor sit honestus, et secundum rectam rationem naturalem. Et hinc etiam est ut possit hic amor Dei esse benevolentiae, imo et super omnia intra latitudinem amoris naturalis, ut in sequenti capite dicam.

17. *Ad tertiam rationem in num. 4, respondetur primo ex sententia aliorum.*—Tertia ratio non potest in præsentem plene et exacte dissolvi, quia in ea petitur, qualis sit differentia inter amorem Dei naturalem et infusum, quæ pendet ab exacta cognitione utriusque extremi; nondum autem tractavimus de amore infuso, et ideo usque ad librum sequentem non possumus discrimen illud perfecte declarare. Nunc solum advertimus Altisiodorensem, citato loco, cap. 6, concedere amorem charitatis et naturalem esse ejusdem speciei quoad substantiam et entitatem actus, quam sententiam amplectuntur Scotus, Durandus, Gab., et multi alii Scholastici antiqui; imo etiam Cajet. et Soto, in locis allegandis in duobus capitibus sequentibus. Juxta quam sententiam, si vera esset, facilis esset responsio ad argumentum: nam ex unitate objecti formalis solum potest inferri unitas specifica utriusque amoris quoad substantiam actus, et nihilominus poterit servari discrimen inter amorem infusum, et acquisitum, secundum aliquem alium modum, ut dicti auctores volunt. Alii vero, e contrario, putant actum naturalem et supernaturalem posse esse in substantia sua specie diversos, etiamsi idem habeant objectum formale, prout ex motivo amandi sumitur, quia possunt differre ex modo tendendi, seu ex principiis proximis a quibus procedunt.

18. *Respondetur secundo ex sententia auctoris.*—Hos autem modos dicendi refero, non quia mihi probentur (illos enim in libro sequenti refellam), sed ut declarem, quamvis ad fidem spectet dari actum aliquem charitatis Dei, qui per vires liberi arbitrii fieri non possit sine auxilio gratiæ; nihilominus ad doctrinam fidei non pertinere quomodo ille actus, vel in entitate, vel in objecto formali distinguatur a dilectione Dei naturali. Nos autem admittimus distinguere, et in specie ac substantia suæ entitatis, et in objecto formali. Quod quidem in actu naturali benevolentiae imperfecto, comparato ad amorem charitatis super omnia, facillime intelligitur, quia simplex affectus et voluntas conditionata specie differre

potest a voluntate efficaci et perfecta, ex modo tendendi, etsi circa idem bonum versentur. Item facile intelligitur benevolentia naturalis ad Deum, quo ametur Deo aliquod bonum ordinis naturalis, ut, verbi gratia, laus ex sola ejus naturali cognitione profecta, vel quod hoc modo colatur et honoretur ab hominibus, quod objectum, ut ratione naturali regulatum, naturale est, et distinctum ab objecto charitatis infusæ; hoc ergo satis nunc est ad distinctionem hujus amoris, quantum ad defensionem assertionis positæ desiderari potest: nam de distinctione harum dilectionum, si utraque sit super omnia, multo plura dicenda sunt in libro sequenti.

19. *Ad quartam rationem in num. 5.* — Quarta ratio sumebatur ab incommodis. Et imprimis dico nullum esse inconveniens, quod peccator et infidelis, si verum Deum aliquo modo cognoscat, illum etiam amet aliquo affectu benevolentia imperfecto et diminuto. Imo credimus id esse frequentissimum, quia talis amor per se non repugnat eum statu peccati, non est enim amicitia, sed simplex quædam benevolentia, de qua recte potest intelligi illud Matth. 7: *Non omnis qui dicit mihi: Domine, Domine, intrabit in regnum cælorum, sed qui facit voluntatem Patris mei*, etc. Deinde neque secundum inconveniens in rigore sequitur, scilicet, quod amor Dei super omnia sit etiam naturalis: nam potest dari amor benevolentia supernaturalis, qui non sit super omnia, sed solum affectivus, vel diminutus, ut sequenti capite explicabo, et latius in libro sequenti. Idemque cum proportione verum est in amore naturali, nam ex eo quod imperfectus actus sit possibilis per vires naturæ, non sequitur etiam perfectum esse possibilem. Veruntamen etiamsi illatio non sit bona, nihilominus credimus consequens esse verum, nimirum, dari posse actum naturalem dilectionis Dei super omnia, ut capite sequenti ostendemus. Unde ad tertium inconveniens negatur sequela, quia propria dispositio ad gratiam est infusa dilectio charitatis, quæ est longe excellentior, non autem naturalis dilectio, quæ intra ordinem benevolentia imperfecta est, hujus autem rationem in cap. 36 reddemus.

CAPUT XXXI.

UTRUM DILIGERE SUPER OMNIA DEUM UT AUCTOREM NATURÆ SIT ACTUS ITA IN SUBSTANTIA ET ORDINE SUO SUPERNATURALIS, UT EXCEDAT VIRES NATURALES LIBERI ARBITRII CREATI, ET IDEO SINE AUXILIO GRATIÆ ELICI NON POSSIT?

1. *Exponitur quæstio.* — Hæc quæstio communiter tractatur solum de amore benevolentia; habet tamen etiam locum in amore concupiscentia Dei; nam quidam, ut refert D. Thom., Quodlib. 1, art. 8, dixerunt posse hominem diligere Deum plusquam seipsum, ac proinde super omnia, amore concupiscentia; licet non benevolentia seu amicitia. Eademque opinionem de Angelis refert idem D. Thom. 1, q. 60, art. 5. Prius vero tractabimus quæstionem de amore benevolentia, juxta usitatum et difficiliorem magisque necessarium sensum, et in fine pauca de amore concupiscentia addemus. Oportet autem advertere non esse eandem quæstionem an actus hujus dilectionis naturalis sit, et an possit fieri a libero arbitrio sine gratia, in hoc vel illo statu: nam, ut ex superioribus capitibus constat, aliqui actus sunt ordinis naturalis qui, propter difficultates occurrentes, interdum a libero arbitrio fieri non possunt sine gratia; quam supra vocavimus impossibilitatem moralem seu accidentalem: nam si actus naturalis non sit, tunc erit per se et physice impossibilis libero arbitrio gratia destituto, et hoc est quod in præsentibus inquirimus.

2. *Opinio statuens omnem amorem Dei super omnia esse supernaturalem.* — *Prima ratio pro prædicta opinione sumpta ex Aristotele.* — Prima sententia est, hujusmodi actum dilectionis esse in se omnino supernaturalem. Ita videntur sensisse illi Theologi, qui (ut D. Thomas refert) dixerunt etiam Angelum non posse viribus naturalibus diligere Deum super omnia, etiam ut auctorem naturæ; non enim alia ratione moveri potuerunt, nisi quia illum actum tantæ perfectionis esse putaverunt, ut omnem ordinem naturalium rerum excedat; et videtur D. Thom. referre voluisse Alensem in 2 p., q. 30, memb. 1, a. 2, § 2, præsertim ad 2, ubi et de Angelis et de dilectione naturali super omnia loquitur; et pro eadem sententia referuntur alii pro prima opinione allegati capite præcedenti; eam tamen præcipue defendit Vasquez disp. 190, per totam, et disp. 195, c. 2 et 5. Fundamentum ejus est,

quia non possunt distingui duæ dilectiones benevolentiae Dei super omnia, una supernaturalis, et alia naturalis; sed est certum esse quamdam dilectionem Dei super omnia supernaturalem, et per se infusam, quam charitatem appellamus; ergo nulla est dilectio Dei super omnia naturalis. Major probatur primo eisdem argumentis, quibus capite præcedenti probatur non dari duplicem benevolentiam Dei naturalem et supernaturalem, sed illis jam ibi satisfactum est. Nunc vero specialiter probare oportet illud, *super omnia*, addere actui perfectionem excedentem ordinem et vires naturæ, ac proinde amorem ita perfectum, quocumque modo nitatur in bonitate Dei propter seipsam, non posse esse naturalem. Probatur autem primo ex Aristotele, l. 9 Ethic., c. 8, ubi quæstionem similem proponit, utrum oporteat seipsum amare maxime, an aliquem alium, et in summa concludit amore honesto studiosum hominem seipsum magis diligere, nam licet studiosus multa faciat in gratiam amicorum, aut patriæ, semper id facit quia sibi honestum est, et ita illo etiam amore seipsum maxime diligit. Et inde sumptum est illud axioma, quod amabilia ad alterum regulantur ex amabilibus ad se, cui consonat illud aliud ex lib. 8 Ethic., c. 2: *Amabile bonum, unicuique autem proprium*. Ex hoc ergo principio colligitur, amare Deum propter seipsum et super omnia, esse supra naturalem inclinationem hominis vel Angeli, quia juxta naturalem inclinationem mensura amoris sumitur ab ipso diligente, ut in unoquoque genere illud amet quod sibi bonum est, vel honestum, vel delectabile, vel utile; ergo impossibile est ut naturaliter inclinetur ad amandum aliquid supra seipsum: ergo talis amor, etiam respectu Dei, excedit vires ejuseumque voluntatis creatæ, quia vires naturales appetitui seu inclinationi naturali commensurantur.

3. *Secunda ratio*. — Secunda ratio sit, quia si amor Dei super omnia naturaliter concipi posset ex cognitione bonitatis Dei, ut auctoris naturæ, etiam proposita bonitate Dei, ut auctoris gratiæ, posset voluntas suis viribus prodire in actum dilectionis Dei super omnia propter eandem bonitatem, et ita amor etiam perfectissimus charitatis Dei posset viribus naturæ fieri, quod est contra fidem. Probatur sequela, quia quo bonitas Dei proponitur ut excellentior, eo magis movet ad sui amorem. Nec refert quod Dei bonitas, ut est principium gratiæ, proponatur nobis per fidem, et sit supernaturalis; quia si bonitas Dei ad Deum ip-

sum comparetur, non est supernaturalis ipsi, sed maxime connaturalis: si tamen nobiscum conferatur, quacumque ratione spectetur, etiam ut est principium naturalium rerum, infinite superat et excedit humanam naturam: ergo si, hoc non obstante, possumus diligere Deum super omnia dilectione naturali, propter bonitatem ejus inferiori modo (ut ita dicam) spectatam, poterimus etiam naturali dilectione illum diligere propter eandem bonitatem excellentiori modo consideratam, quia hæc major excellentia non retardat affectum, sed potius magis impellit.

4. *Ratio tertia*. — *Quarta*. — Tertia ratio sit, quia sequitur talem actum dilectionis, vel esse sufficientem dispositionem ad gratiam, vel saltem posse esse in homine simul cum peccato mortali: utrumque autem est inconveniens: ergo. Sequela patet, quia si talis actus est naturalis, poterit esse in homine peccatore, vel etiam in infideli qui Deum cognoscat ut auctorem naturæ et summum bonum in illo ordine, quia quilibet actus naturalis potest fieri sine gratia, saltem habituali. Vel ergo talis homo eliciens illum actum per illum justificatur, et sic actus ille erit ultima dispositio ad gratiam, quod dici non potest: vel non justificatur, et sic permanebit homo simul in peccato, et diligens Deum super omnia, quod videtur absurdum; nam amor Dei super omnia est perfecta amicitia ad ipsum; non potest ergo simul esse cum peccato, quod inimicum Deo hominem constituit. Unde addi potest confirmatio, seu quarta ratio, quia sequitur hominem, etiam in statu naturæ lapsæ, posse viribus solius liberi arbitrii diligere super omnia Deum, ut auctorem naturæ, quia ex parte actus non est repugnantia, unde neque ex parte voluntatis est impotentia per se, id est, earentia physicæ facultatis, seu activitatis; difficultas autem accidentaria ex impedimentis extrinsecis non semper occurrit: ergo poterit homo in hoc statu interdum suis viribus elicere hunc actum, quod non videtur concedendum.

5. *Communis, et vera assertio distinguens amorem Dei super omnia in naturalem et supernaturalem*. — Nihilominus contraria sententia est communis Theologorum: distinguunt enim duplicem dilectionem Dei super omnia, unam Dei ut naturaliter cogniti; alteram Dei ut per fidem revelati; vel unam Dei ut auctoris naturæ, et ultimi finis proportionati naturæ; et aliam Dei ut auctoris gratiæ, et ultimi finis excedentis naturam; et priorem

dicunt esse naturalem, posteriorem vero infusam et supernaturalem. Ita docet D. Thomas 1. 2, q. 109, art. 3, et tractando de Angelis, 1 parte, quæst. 60, artic. 5, et Quodlib. 1, articul. 8. et aliis plerisque locis; et sequuntur omnes Thomistæ, Conrad., Cajetan., Medina, et alii, dicto artic. 3; et Soto, lib. 1 de Natur. et Grat., cap. 22; et ex antiquis Theologis eandem distinctionem et doctrinam tradidit Altisiodor., lib. 2 Summ., tract. 1, cap. 4, et Alensis, vel sibi contrarius, vel se magis declarans, secunda parte, quæst. 31, memb. 3, et latius quæst. 91, memb. 1, artic. 1, ad septimum; Bonavent., in 2, distinct. 3, art. 3, quæst. 1, ad 3; et Richard., ibi, articul. 7, quæstione 1, in corpore et ad 1, et dist. 28, art. 1, quæst. 1; et idem tenent Scotus in 1, dist. 17, q. 2, et in 2, dist. 28, q. 1, et communiter alii Scholastici, quos capite sequenti referemus, quia non solum dicunt hunc amorem esse naturalem, sed etiam elici posse sine auxilio gratiæ ab homine in natura lapsa. Eandem sententiam late docet Antonin., 4 part., titulo 6, capitulo 3, § secundo, tertio et quarto; Abulensis, capitulo decimo nono Matthæi, quæstione 177. Et hanc sententiam veram existimo: nam licet a Patribus non tradatur, non est tamen illis contraria, ut capite præcedenti tactum est, et colligi potest ex Bulla supra citata Pii V, quatenus ab oppugnatione Baii defendit distinctionem duplicis amoris Dei, naturalis et supernaturalis. Nam licet ibi non addatur particula *super omnia*, nihilominus Baius præcipue in hoc amore illam distinctionem reprobabat; ideo enim dicebat hunc amorem Dei naturalem non defendi sine injuria crucis Christi. Deinde, quoties Patres dicunt amorem charitatis esse consentaneum naturali inclinationi voluntatis, quia natura sua est propensa ad Dei amorem, indicant prædictam distinctionem, et esse aliquem amorem Dei metaphoricum, innatum ipsi voluntati per naturale pondus ad Deum, et consequenter esse aliquem amorem elicitem Dei naturalem, et commensuratum huic appetitui innato voluntatis: nam cum voluntas sit universalis appetitus perfectus et vitalis, potest per actum elicitem naturalem amare quidquid metaphorice amat per naturalem inclinationem.

6. *Probatur primo.* — Et hinc ulterius infertur hunc actum naturalem amoris Dei esse posse super omnia, quia est conformis et quasi adæquatus naturali appetitui voluntatis; sed naturalis appetitus, seu pondus voluntatis ad

Deum super omnia tendit; ergo et actus ipse naturalis dilectionis. Et hoc discursu sæpe utitur D. Thom. in citatis locis, 2. 2, quæst. 26, art. 4, ubi minorem propositionem ostendit, tum ex rectitudine naturalis inclinationis, nam cum sit data ab auctore naturæ, esse debet optimo modo instituta; tum etiam exemplo, quia manus movetur naturaliter ad defendendum caput, etiam cum periculo suo; ergo signum est inclinari magis ad universale bonum totius quam ad proprium; ergo cum Deus sit universale bonum, voluntas magis inclinatur ad illud quam ad reliqua. Scoto vero et aliis non placet illud exemplum, quia ille motus manus non est ex impetu naturæ, sed ex motu voluntatis vel appetitus media phantasia. Sed hoc non ignoravit D. Thomas; tamen quia illa motio valde naturalis est, inde recte intulit illam esse secundum inclinationem partis ad bonum totius. Atque hæc ratione dicitur amor charitatis esse consentaneus naturæ, quia non destruit inclinationem ejus, quod faceret (ut notavit Alens.) si natura inclinaret ad diligendum se plusquam Deum, et charitas ad diligendum Deum plusquam se. Non ergo ita est, sed utraque est ad Deum super omnia, et in hoc est charitas conformis naturæ, quamvis altiori modo illam elevet ac perficiat. Et hæc ratione dixit Basilus, in regulis fusius disputatis, interrogat. 2, in natura esse vim insitam, quæ in seipsa amandi necessitudinis initia continet. Et inde etiam infert Bernardus, in lib. de Diligendo Deum, inexcusabilem esse omnem infidelem, si non diligit Deum ex toto corde, quia *clamat innata et nota rationi justitia, quia ex toto se illum diligere debet, cui se totum debere non ignorat.*

7. *Probatur secundo.* — In quibus verbis alia ratio communis in hac materia indicatur, quia præceptum diligendi Deum super omnia est præceptum morale, pertinens ad legem naturæ; ergo actus ille, de quo datur tale præceptum, naturalis est, quia lex naturalis non datur de supernaturalibus actibus. Neque locum habet communis responsio, ut actus præcipiatur, satis esse ut sit possibilis per gratiam, quia quod per amicos possumus simpliciter possumus. Hæc, inquam, responsio non recte in præsentem accommodatur, quia nondum inquirimus quibus viribus possit fieri talis actus, sed cujus ordinis et naturæ ipse sit. Sic autem evidens est naturalia præcepta non dari de actibus excedentibus naturæ ordinem et physicam virtutem (ut ita rem declarem) naturalium potentiarum, quia lumen naturale nihil

de his actibus assequi potest, nec de illis aliquid dictare, præcepta autem naturalia sunt ex dictamine rationis naturalis.

8. *Altera resolutio.* — Sed forte quis dicat rationem naturalem dupliciter considerari, scilicet, vel per conformitatem ad puram naturam rationalem, vel per conformitatem ad naturam rationalem elevatam per gratiam; præceptum autem hoc non esse naturale priori modo, sed tantam posteriori, id est, non dictari per nudam rationem fundatam in solo lumine naturali intellectus, sed per rationem, ut elevatam et illustratam lumine fidei. Sed hæc doctrina, quatenus negat esse hoc præceptum naturale, etiam per comparisonem ad puram naturam rationalem, est contra communem sententiam Theologorum, et contra sententias Patrum, quas adduximus, et sine dubio est falsa; tum quia incredibile est hominem, vel Angelum in pura sua natura creatum, non fuisse habituros præceptum diligendi Deum propter se et supra seipsum, quia hic amor est debitus Deo, et ratione suæ eminentissimæ bonitatis, et ratione creationis, præsertim quia nos fecit ad imaginem et similitudinem suam; tum etiam quia hoc præceptum est fundamentum omnium præceptorum Decalogi, et maxime necessarium ad instituendam moralem vitam honestam; at præcepta Decalogi continent legem mere naturalem, etiam per comparisonem ad puram naturam rationalem, ut est indubitatum apud omnes, et fere per se notum; ergo etiam præceptum diligendi Deum super omnia est naturale ejusdem ordinis. Consequentia optima est, quia alias in pura natura, ablato illo fundamento, non subsisterent alia præcepta. Major item facile probari potest, quia, sicut præcepta secundæ tabulæ Decalogi fundantur in amore proximi, ita præcepta primæ tabulæ fundantur in amore Dei. Deinde ipse amor proximi, et præceptum ejus, in amore Dei fundatur; imo in ipsismet præceptis moralibus amor Dei imbitur. Ideo enim transgressiones talium præceptorum sunt peccata mortalia, quia Dei amorem excludunt. Unde si in pura natura non esset præceptum dilectionis Dei super omnia, nullum esset peccatum mortale, præsertim contra proximum, quia nec contineret odium Dei, neque a Deo averteret. Et ideo etiam dixi sine præcepto dilectionis Dei non posse moralem vitam recte institui, quia non possent cætera præcepta moralia habere integram et perfectam vim obligandi; hæc autem omnia valde sunt contraria ipsi nature rationali, secundum se ac

pure sumptæ; ergo e contrario fatendum est aliquam dilectionem Dei super omnia esse de præcepto legis mere naturalis, ac proinde aliquam talem dilectionem esse actum naturalem.

9. *Pro tertia ratione formanda exponitur particula super omnia.* — *Prima expositio.* — Ultimo, ut rem ipsam et rationem magis a priori explicemus, declarare oportet quid significet illa particula, *super omnia*, vel quid addat amori benevolentiae Dei minus perfecto. Nam cum ostensum sit amorem benevolentiae Dei ex vi hujus præcise rationis non esse supernaturalem actum, si illud quod addit particula, *super omnia*, non est aliquid supernaturalis ordinis, profecto non est cur talis amor naturalis esse non possit. Particulam ergo illam, *super omnia*, declaravi quantum valui in tom. 4 de Pœnitentia, disput. 3, sect. 9, et disput. 4, sect. 4, et quæ ibi de contritione diximus, ad amorem cum proportionem applicari possunt. Potest ergo dici vel cogitari amorem Dei dici super omnia, ratione intensionis, quia est maxima, vel respectu conatus possibilis voluntati, sicut de contritione opinatus est Adrianus, vel respectu cujuscumque amoris creaturæ, sicut de eadem contritione Bonaventura, Petrus Soto, et alii opinati sunt. Verumtamen, si intelligatur hoc esse necessarium ad amorem super omnia, falsa est sententia, quia verus amor Dei etiam ex charitate neque excessum in intensione, neque certum aliquem gradum intensionis requirit, vel ex natura sua, vel ex obligatione alicujus præcepti, ut ibi late probavi. Deinde, quia hæc intensio, licet necessaria non sit amori ut sit super omnia, non tamen illi repugnat, ut per se constat, etiam tunc non extrahit actum ab ordine suo, quia non est altioris ordinis intensio actus quam entitas ejus. Quapropter licet daremus amorem constitui super omnia per gradum intensionis, sive absolutum, sive comparatum, non inde fieret ut dilectio sit supernaturalis actus, quia illa intensio, ut dixi, esset ejusdem ordinis cum substantia actus, et voluntas posset totum suum conatum ad illam adhibere, vel in amore aliarum rerum minorem conatum apponere.

10. *Secunda expositio.* — *Non placet.* — Alio ergo modo communiter explicatur illa particula, ut denotet excessum amoris non intensivum, sed appetitivum, ut vocant, id est, ut Deus ametur tanquam bonum, quod in majori pretio et æstimatione habetur, quam cætera omnia quæ amantur. Quæ expositio, genera-

tim sumpta et recte intellecta, vera est. Oportet tamen exponere quando amor censeatur tendere in Deum cum illo pretio et æstimatione. Videtur enim non posse haberi ille modus amoris super omnia, sine actuali consideratione intellectus conferentis bonum divinum cum aliis, et præponentis illud cæteris, idque offerentis voluntati tanquam diligibilius reliquis, et consequenter ex parte etiam voluntatis necessarium esse ad amorem super omnia, ut voluntas actu feratur in Deum, ut comparatum ad reliqua bona, proponendo illum cæteris omnibus præferre, et quodlibet malum pati ne ab illo separetur. Sed licet hic modus amandi non sit impossibilis, imo possit esse utilis ad exercendum et perficiendum amorem, nihilominus affirmari non potest esse necessarium ad amorem super omnia. Quia nullum nobis datum est præceptum faciendi hujusmodi comparisonem, neque ex natura rei est necessaria, quia unusquisque actus vel habitus potest perfecte tendere in objectum suum absolute et simpliciter propositum. Imo sæpe talis consideratio et collatio potest avertere voluntatem, et ideo interdum est cavenda propter periculum, ut in dicto loco de Pœnitentia latius dixi. In præsentī vero addo, etiamsi in dilectione super omnia Dei, ut auctoris naturæ, illa comparatio expresse fiat intra terminos naturalis cognitionis, inde etiam non elevari actum ad ordinem supernaturalium actuum, quia licet illa comparatio explicite non sit necessaria, virtute includitur in amore super omnia modo statim explicando, et ideo illud explicitum non addit aliquid supernaturale supra implicitum. Item quia ex vi naturalis rationis comparatio illa fieri potest, vel ad omnia bona creata, quæ naturaliter cognosci possunt, vel ad mala illi amori contraria, et hoc satis est ad naturalem amorem super omnia Dei, ut est finis naturæ; ergo etiam sic explicando particulam, *super omnia*, nihil supernaturale additur actui amoris.

11. *Tertia expositio.* — *Esto admittatur, non obstat assertioni.*—Est ergo tertia expositio, ut amor Dei dicatur super omnia appetitive, quando amor tendit in Deum propter solam bonitatem ejus, complacendo in illa ex solo affectu ad eundem Deum, quia cum bonitas illa superet omnia bona, si in illa sola nitamur ad amandum Deum et complacendum in illo, eo ipso talis amor est super omnia ex vi sui objecti formalis. Sicut assensus fidei propter auctoritatem Dei, eo ipso est supra omne credibile ex vi objecti, et adoratio Dei

propter excellentiam ejus supra omne adorabile ex vi objecti, licet actuales comparationes non fiant. Qua explicatione admissa, etiam particula, *super omnia*, potest non addere aliquid supernaturale, nam etiam bonitas Dei, ut auctoris naturæ, et ut relucet per creaturas, est excellens quædam bonitas de se sufficiens ad firmandum affectum in Deum supra omne amabile præter ipsum, vel ipsi repugnans; amor autem naturalis Dei fundatur in bonitate Dei sic spectata, quæ sub tali ratione sub naturali objecto adæquato voluntatis continetur; ergo modus ille, *super omnia*, non magis est supernaturalis quam sit ratio illa motiva seu objectiva amandi Deum propter se, et complacendi in ipso.

12. *Expenditur dicta expositio, et ostenditur nec omnem amorem benevolentiae esse super omnia.* — Verumtamen in illa explicatione superest scrupulus, quia ille modus complacendi in bonitate, et de bonitate Dei, invenitur in amore benevolentiae Dei, qui non est super omnia. Unde duplex solet distingui, et merito, amor Dei; unus affectivus tantum, quo voluntas complacet in Deo propter suam infinitam bonitatem et perfectionem, vultque et gaudet tantam bonitatem inesse Deo; non tamen extenditur hic amor ad omnia quæ amanda sunt Deo, et propter Deum. Alius est amor qui obedientialis dicitur, quia non solum vult Deo bonum quod in se habet, sed etiam vult Deo placere in omnibus, et consequenter vel formaliter vel virtute fugit quidquid divinæ bonitati, voluntati, aut honori contrarium est. Primus ergo amor revera est benevolentia ad Deum, quia vult Deo bonum propter se; est etiam aliquo modo summus amor, utique objective, ut aiunt, quia vult Deo summam quandam bonitatem, et ita dici etiam potest aliquo modo super omnia, quatenus nullus potest esse amor benevolentiae, qui rei amatae tantam vel talem bonitatem velit, et ita homo per illum amorem vult Deo majorem bonitatem quam cæteris rebus. Et nihilominus amor ille non est simpliciter super omnia, quia potest esse simul cum peccato mortali; imo etiam cum actuali affectu contrario Deo et amicitiae ejus. Et ideo licet ille amor sit benevolentiae, non potest dici amor amicitiae, quia per se non excludit neque vitare facit omnem offensam rei amatae, quod ad amicitiam spectat.

13. *Quæ sit proprie amor Dei super omnia.* — Igitur amor super omnia Dei esse debet amor obedientialis, quo voluntas velit Deo non solum bonitatem quam in se habet, sed

etiam propter illam velit Deo placere in omnibus, et fugere omnia contraria, solum ut ei complaceat; nam hic amor imprimis nititur in summa Dei bonitate propter seipsam, et ita ex hac parte est summus. Deinde complectitur omne bonum divinum, non solum intrinsecum, sed etiam extrinsecum, et ex hac parte est etiam super omnia, videlicet, quæ possint Deo displicere, aut ab illo quacumque ratione avertere. Denique de se est amor amicitiae, quia perfecte unit voluntatem amantis voluntati Dei, et de se excludit omnem Dei offensam, saltem gravem, quod ad amicitiam necessarium est et sufficit. Et hac ratione talis amor habet repugnantiam cum actuali affectu peccati, et includit formalem vel virtuales voluntatem servandi mandata, juxta verbum Christi, Joan. 14: *Qui diligit me mandata mea servabit*, cum similibus; unde etiam ad hunc amorem super omnia necessarium est ut sit per absolutum decretum, seu propositum voluntatis, quod explicatur hac voce: Volo Deo omne bonum ejus, seu illi placere in omnibus, quia sola velleitas vix meretur nomen amoris, præsertim ubi actus perfectus est in potestate voluntatis. Sic ergo satis explicatum est quid sit amorem esse super omnia, seu quid per particulam illam importetur.

14. *Ex proxima veraque expositione quousque ratio tertia formari debeat pro assertionne.* — Ex hac vero declaratione, non minus concluditur ratio intenta quam ex aliis, si advertamus illam particulam, *super omnia*, non esse cum æqualitate accipiendam in amore infuso, et naturali, sed cum proportione; nam in utraque includit omnia quæ repugnant tali dilectioni; tamen respectu dilectionis naturalis omnia illa continentur in naturali ordine; supernaturalis autem dilectio includit absolute omnia, cujuscumque ordinis sint. Quod declaratur in hunc modum, quia dilectio naturalis Dei super omnia includit voluntatem servandi omnia præcepta, non simpliciter, sed naturalis ordinis, et consequenter de se tantum vult vitare omnia mala contraria his præceptis, quia illa sola naturaliter apprehendi possunt, ut amori Dei contraria; at vero dilectio supernaturalis includit voluntatem servandi omnia præcepta, etiam supernaturalia, et ita universalius est super omnia. Deo ejusve voluntati contraria. Hinc ergo intelligitur particulam, *super omnia*, ut pertinet ad naturalem dilectionem, non includere aliquid excedens ordinem rerum naturalium, nec superans vires, seu potentiam physicam liberi arbitrii creati, quia totum hoc,

scilicet, servare omnia præcepta naturalis ordinis, et nihil in toto naturali ordine amare, quod a Deo possit avertere, hoc, inquam, totum naturalis ordinis est, et de se potest cadere sub absolutum propositum voluntatis creatæ, si alia impedimenta extrinseca non obsistant; ergo talis amor simpliciter naturalis esse potest.

15. *Primum corollarium.* — *Amor amicitiae naturalis est super omnia secundum quid, supernaturalis autem simpliciter.* — Hinc vero obiter intelligitur hanc dilectionem super omnia, quæ tantum naturalis est, comparata ad dilectionem charitatis, non simpliciter (ut ita dicam) esse super omnia, sed secundum quid, quia cum sit inferioris ordinis, non extenditur ad ea quæ sunt superioris ordinis, sed tantum ad ea quæ sunt ordinis naturalis. Amor autem infusus, cum sit superioris ordinis, complectitur omnia, etiam quæ sunt naturalis ordinis, quatenus possunt a Deo quocumque modo avertere, vel ad ipsum ordinari, et in hoc sensu dico hunc amorem esse super omnia simpliciter, illum vero secundum quid. Quod est in hac materia valde notandum, quia hinc expediuntur facile multa quæ in objectionibus tanguntur, ut statim videbimus.

16. *Secundum corollarium.* — *Angelus et homo, in statu integræ naturæ, possent illum amorem naturalem naturaliter elicere.* — *Improbatur vero quoad demones.* — Ex dictis etiam concluditur tam Angelum, in sua pura natura, quam hominem, in statu innocentiae et integræ naturæ, potuisse viribus liberi arbitrii sine auxilio gratiæ hunc actum dilectionis Dei naturalis elicere, cum omni perfectione illi ex natura sua debita. De Angelis id docet D. Thom. 4 p., q. 60, art. 5, in corpore, et specialiter explicat ad 4, et eum sequuntur ibi fere omnes expositores, et communiter Theologi in 2, dist. 3 et 4; Altisiod., lib. 2 Sum., tract. 4, cap. 4 et 6; Alens., 2 p., q. 31, memb. 2. Et ratio est clara ex dictis, quia actus ille connaturalis est Angelo, et ipse habet naturalem propensionem ad illum, et sufficientem virtutem physicam ad eliciendum illum, ut causam proximam principalem, quæ omnia constant ex dictis. At vero in Angelo, ex natura rei, nullum erat extrinsecum impedimentum, neque etiam intrinsecum, quod exercitium et usum talis actus redderet difficilem, nedum moraliter impossibilem; quia Angelus neque habet internum bellum concupiscentiæ, neque aliæ difficultates quæ occurrunt hominibus in Angelis locum habent; ergo ex nullo capite est illi necessarium

auxilium gratiæ ad talem actum eliciendum. Imo sunt qui dicant adeo esse naturalem hunc actum Angelo, ut sit etiam illi necessarius quoad exercitium. Ex quo aliqui addunt etiam in Angelis malis esse hunc amorem. Sed hoc posterius improbable est de amore amicitiae, quidquid sit de amore concupiscentiæ. Cum enim amor amicitiae et super omnia includat voluntatem placendi Deo in omnibus, et servandi ejus præcepta, quomodo potest in dæmonibus manere? Quamvis ergo illi Angeli velint Deum, quatenus sine illo ipsi esse non possunt nec operari, nullo vero modo illum diligunt ex benevolentia naturali, cum potius illum odio habeant. Neque est aliquid quod cogat dicere illum amorem naturalem esse necessarium quoad exercitium, etiam in Angelis bonis, seu non malis, attenda sola rei natura, quamvis, secluso impedimento peccati et obstinationis, verisimile sit raro aut nunquam ab illo actu cessare, de quo in propria materia latius.

17. *Rursus id ostenditur de homine in dicto statu.*—*D. Thomas explicatur.*—De homine in natura integra idem docuit divus Thomas, dicta q. 109, a. 3, ubi ait potuisse hominem in natura integra diligere Deum super omnia sine gratia, licet non sine auxilio Dei moventis. Quod aliqui exponunt sine gratia habituali, non vero sine auxilio speciali per motionem gratiæ. Sed hanc expositionem jam supra exclusimus, et ostendimus D. Thomam excludere omnem gratiam, vel (ut ibi loquitur) omne gratuitum donum. Quæ vox in rigore comprehendit quaecumque motionem gratiæ. Omnem ergo illam excludit, et solum generalem concursum, quem nomine auxilii Dei moventis intelligit, requirit. Et in hoc puncto est hic sensus manifeste necessarius, tum quia D. Thomas ibi commemorat doctrinam de Angelis, quibus hominem in natura integra in hoc æquiparat; tum etiam quia in hoc constituit differentiam inter hominem integrum et lapsum: si autem autem homo integer indigeret speciali auxilio, nullum esset discrimen, quia etiam homo lapsus potest elicere hunc actum sine habitu gratiæ, cum auxilio speciali. Atque ita intellexerunt et secuti sunt D. Thomam Conrad., Cajet., Medin. et Valentia, et idem docent Bonavent. 2, d. 3, art. 3, q. 1, et d. 29, q. 1, ad 2; Alens. 2 p., q. 96, memb. 1, et reliqui Theologi communiter, quos in sequenti capite latius allegabimus. Hoc etiam probat ratio facta de Angelis, quam D. Thomas paucis verbis complectitur, quia diligere Deum est quiddam connaturale

homini: homo autem in statu naturæ integræ poterat operari, virtute suæ naturæ, bonum quod est sibi connaturale, absque superadditione gratuiti doni, et ideo non indigebat tali dono ad diligendum Deum naturaliter super omnia, sed id virtute suæ naturæ facere poterat. Quæ ratio immediate concludit quoad intrinsecam facultatem et potentiam physicam, supponit autem in eo statu non fuisse futura impedimenta, quæ nunc sunt in natura lapsa, et ideo simpliciter de potestate physica et morali recte concludit. De homine vero in natura lapsa, atque etiam in pura, est specialis difficultas, quam in sequenti capite commodius tractabimus.

18. *Contra probatam assertionem immerito citantur Gregorius, Abulensis et Virresius.*—Contra hanc vero assertionem citatur Gregor., in 2, d. 29, q. 7, in princip., conclus. 2, quatenus ait Adam non potuisse facere opus morale bonum sine auxilio speciali. Citatur et Abul. Math. 19, q. 177 et sequentibus, et Alphonsus Virvesius, contra Luther., Philippica 5. Verumtamen Gregorius, paulo post, explicat illud auxilium non distingui a donis quibus natura integra et vires ejus illæsæ constituebantur. Qua expositione non contentus, paulo infra addit gratiam habitualement, dicitque fuisse sufficientem absque alio speciali auxilio ad bene operandum, unde in illo statu non postulat illam specialem motionem qua Deus applicet voluntatem ad volendum bene, quam in statu naturæ lapsæ requirit, ut ibidem exponit. Cur vero postulet habitum gratiæ, si illa non influit in actum, nec Deus per specialem motionem, non video; cum habitus ipsi, præsertim infusi, non operentur, parum aut nihil juvent. Solum ergo potuit requiri gratia in illo statu, quatenus fundamentum fuit justitiæ et integritatis naturæ, ut supra vidimus, et ita revolvimur in priorem expositionem, quæ fuit Magistri. Nos autem non negamus adjutorium illorum donorum, sed dicimus ultra illa non fuisse necessariam specialem gratiæ motionem, quod etiam Gregorius fatetur. Abulensis autem loquitur de auxilio generali, ut sæpe dixi, et fortasse de eodem loquitur Virvesius, quem videre non potui, quamvis horum auctoritas, etsi contrarium sentirent, receptissimæ assertioni obstare non posset.

19. *Assertio altera de amore concupiscentiæ.*—Ultimo, ex dictis concluditur posse liberum arbitrium per se spectatum, et sine impedimento peccati, diligere Deum super omnia,

etiam amore naturali concupiscentiæ, eo modo quo ille amor esse aut dici potest super omnia. Hoc ex hypothesis probatur facile, quia longe difficilior est amare Deum amore amicitiae quam concupiscentiæ : ergo si liberum arbitrium, non infirmatum per peccatum, potest naturaliter amare Deum per benevolentiam, perfecto modo et super omnia, a fortiori poterit amorem naturalem concupiscentiæ Dei habere perfecto modo, ac proinde super omnia, quantum amor ille capax fuerit.

20. *Quomodo et super omnia et in concupiscentia amor esse possit.* — Difficultas autem est in explicando quomodo amor ille possit esse super omnia. Et ratio difficultatis est, quia amor concupiscentiæ ad Deum est amor benevolentiae hominis ad seipsum, et ita illo amore magis se amat homo quam Deum, quia in omni concupiscentia plus amatur persona cui concupiscitur bonum, quam ipsum bonum concupitum : quia cui bonum amatur, simpliciter et per se amatur ; ipsum autem bonum quod illi amatur, non simpliciter, sed solum ut sit bonum alterius. Unde D Thom. 1. 2. q. 26, art. 4, illum vocat amorem simpliciter, hunc secundum quid.

21. *Vera resolutio datur et declaratur.* — Nihilominus dicendum est etiam amorem concupiscentiæ Dei esse posse in suo genere super omnia. Ita refert D Thom., 1 p., q. 65, art. 5, et dicto Quodlibet. 1, art. 8, et quoad hanc partem non improbat. Et ex parte idem sentit Alensis, 2 part., quæst. 30, memb. 1, art. 2, § 2. Et declaratur breviter, nam imprimis si comparatio fiat ad omnia alia bona quæ homo sibi concupiscit, magis debet diligere Deum amore concupiscentiæ quam cætera bona, quia Deus est majus bonum hominis, quam cætera bona creata, etiam ipsi homini intrinseca, quia non solum bonum divinum nobilius in se est, sed etiam est majus bonum ipsius hominis, quia neque ipsum esse posset esse bonum hominis, nisi Deus ipse esset ejusdem hominis bonum. Deinde homo amat sibi Deum tanquam ultimum finem quo frui appetit, non autem sic appetit cætera bona ; imo nec seipsum, quia magis vult Deo frui quam se, si recte amat Deum etiam amore concupiscentiæ, et sub hac ratione etiam diligit homo Deum hoc amore plus quam se. Atque hinc habet etiam hic amor aliam perfectionem, propter quam potest dici super omnia, si sit efficax, nam secum affert intentionem efficacem acquirendi beatitudinem, quæ in Deo consistit : unde etiam includit voluntatem ab-

solutam servandi præcepta Dei, et cavendi peccata quæ ab illo avertunt, quamvis non propter ipsum, sed propter bonum appetentis ; hoc autem satis est ut in suo ordine talis amor sit super omnia, id est, super omnia bona, quæ illi bono beatifico etiam intra naturalem ordinem possent repugnare.

22. *Ad difficultatem in num. 20.* — Neque obstat quod homo diligat Deum sibi, et propterea dici possit eo amore plus se diligere quam Deum. Quia, ut Alensis supra dixit, illa non est duplex dilectio, sed una, quæ simul ad Deum et hominem terminatur, et ideo non recte fit comparatio, nam respectu utriusque potest dici maxima in suo ordine, scilicet, respectu Dei, ut boni concupiti, et, respectu sui, ut subjecti cui concupiscitur illud bonum. Et hanc etiam responsionem attigit D. Thom. 1. 2, q. 2, art. 7 ad 2, unde ex illa comparatione solum concluditur per illum actum hominem amare se amore amicitiae, Deum vero solo amore concupiscentiæ, quod non est inconveniens, quia satis est quod alio actu perfectiori possit homo diligere Deum amore amicitiae, et quod id faciat quando oportuerit, neque enim tenetur semper perfectissimum amorem exercere. Præterea, quia eo modo quo potest fieri comparatio, illa doctrina D. Thomæ, quod amor benevolentiae est amor simpliciter, et concupiscentiæ secundum quid, habet locum in bonis creatis, non vero in bono increato, quod est Deus, ut dixi disp. 23 Metaphysicæ, sect. 2, n. 8 ; et idem dixit Medina 1. 2, q. 2, a. 7, in fine. Ratio autem optima est, quia quando homo amat Deum sibi, licet in uno genere referre videatur Deum ad se, non tamen ut ad finem, sed ut ad subjectum perficiendum tali bono, ut recte notavit Cajet. 2. 2, q. 17, art. 5 ; et nihilominus eodem amore virtute refert homo seipsum ad Deum tanquam ultimum finem quo frui appetit, quæ habitudo multo perfectior est, et ideo etiam illo amore magis diligitur Deus simpliciter loquendo. Quæ omnia cum proportionem applicata in naturali amore concupiscentiæ Dei locum habent.

23. *Ad primam rationem adversariorum in num. 2.* — *Instantia excluditur.* — Superest ut ad rationes contrariæ sententiæ in principio factas respondeamus. Ad primam, jam capite præcedenti ostensum est illud dictum Aristotelis habere locum in bonis privatis, seu respectu amicorum, qui sint particulares personæ, non vero respectu Dei, cujus amor esse debet regula et mensura cujuscumque amoris creaturæ, etiam sui ipsius. Et quamvis verum

sit fieri non posse quin talis amor Dei, et quidquid ex illo fit, non sit per se honestum, ac proinde sit etiam magna perfectio ipsius diligentis, nihilominus hæc ipsa perfectio non est directe amata per talem amorem, sed quasi reflexe, saltem virtualiter, quatenus qui directe amat aliquod bonum, necessario amat ipsum amorem, ideoque hoc non impedit, quominus Deus ipse per talem amorem directe propter se diligatur. Instabit forte aliquis, quia si ille amor non esset honestus, non ita amaretur Deus; ergo non magis diligitur Deus quam honestas talis amoris. Hæc vero objectio etiam fieri potest contra amorem charitatis, est autem parvi momenti, quia conditionalis illa est ex hypothesis impossibili, quæ destruit objecti diligibilitatem; nam si amor super omnia Dei non esset essentialiter honestus, nec Deus esset ita diligibilis secundum rectam rationem, et ideo conditionalis illa nihil obstat quominus talis amor Dei sit super omnia, quia potius hinc habet quod sit honestissimus, et quod hæc perfectio ab ipso inseparabilis sit.

24. *Ad secundam rationem in num. 3.* — Ad secundam rationem, quæ est Scoti, respondetur negando consequentiam quæ ex parte objecti fiebat, a Deo cognito ut auctore naturæ, ad Deum cognitum ut auctorem gratiæ. Quæ illatio, si esset alicujus momenti, potius probaret dilectionem charitatis non esse in sua specie vel substantia supernaturalem, quam quod dilectio Dei, ut auctoris naturæ, supernaturalis sit, et ad hoc inducitur argumentum illud ab Scoto, ut libro sequenti videbimus, ad quem locum hæc difficultas magis spectat. Defectus autem illationis est, quia quando Deus proponitur amandus ut auctor et finis supernaturalis, non proponitur sub ratione excellentioris boni ejusdem ordinis, sed sub ratione boni alterius ordinis, et principium a quo, ut sic spectato, natura non pendet, neque cum illo habet necessariam connexionem aut communicationem talis ordinis, et ideo natura per se est insufficientis ad Deum sub tali ratione propositum amandum, præsertim propter se et super omnia. Quod a posteriori declaratur, quia amor Dei sub tali ratione includit propositum servandi omnia præcepta supernaturalia, quod est omnino supra vires naturæ, ut postea latius dicemus. Atque ita cognitio Dei per fidem, vel per rationem naturalem, multum confert ad distinctionem harum dilectionum, non tam propter diversum modum cognoscendi evidentem vel obscurum, sed propter diversam rationem objecti, quam fides

credit, et ratio non potest attingere. Et ob eandem rationem, quamvis bonitas vel perfectio Dei, quomodocumque apprehensa et ad Deum comparata, ipsi connaturalis sit, nihilominus, comparata ad nostram voluntatem, sub una ratione pertinente ad auctorem gratiæ, est bonum illi supernaturale; sub alia vero pertinente ad auctorem naturæ, est bonum in suo genere nobis connaturale, quia licet infinite excedat nostram naturam, hæc nihilominus habet quamdam intrinsecam necessitudinem cum illo, quia est quædam participatio illius, et ab illo essentialiter pendet, et ad illum tanquam ad ultimum finem naturaliter propendet, quæ conjunctio est sufficiens fundamentum ad naturalem amorem, nam servatur sufficiens proportio inter objectum et potentiam, ut satis declaratum est.

25. *Ad tertiam in num. 4.* — Ad tertiam rationem, in qua iterum infertur illud inconveniens de dispositione ad gratiam et remissionem peccati, iterum etiam negatur consequentia. Nam quoad eam partem de remissione peccati, imprimis non habet locum in Angelis, in quibus nulla fuit unquam peccatorum remissio. Neque etiam habet locum in homine innocente, sive in natura integra, sive in puris naturalibus, quia licet diligeret Deum super omnia, non se disponderet ad remissionem peccati, cum supponatur illud non habere. Quid autem de homine lapsa respondendum sit, capite sequenti dicam. De dispositione autem ad gratiam facile reddi potest ratio, cur illatio non valeat, quia gratia est supernaturalis forma, hæc autem dilectio est actio aut qualitas naturalis, atque ita est inferioris ordinis; dispositio autem ad formam debet esse ejusdem rationis cum forma, et ideo illa dilectio nullo modo est dispositio proportionata ad gratiam. Et declaratur amplius, quia illa dilectio sistit in Deo ut fine naturali, et radicatur in naturali essentia animæ media voluntate; at gratia est quasi nova natura seu forma altiori modo participans divinam naturam, et ipsa est radix altioris amoris media altiori virtute, quæ est charitas, ideoque amor ille naturalis nullo modo est dispositio ad hujusmodi formam. Alia vero difficultas de homine lapsa in sequenti capite tractabitur.

CAPUT XXXII.

UTRUM IN STATU NATURÆ LAPSÆ POSSIT HOMO DILIGERE DEUM, UT AUCTOREM NATURÆ, SUPER OMNIA, SOLIS LIBERI ARBITRII VIRIBUS, ABSQUE SPECIALI AUXILIO GRATIÆ, ET SENTENTIA AFFIRMANS REFERTUR ET FUNDATUR.

1. *Arguitur pro affirmante parte.* — Hoc est præcipuum punctum hujus controversiæ de dilectione Dei naturali, ratioque dubitandi oritur ex dictis : nam in homine lapsō liberum arbitrium est sufficiens principium physicum talis actus, et aliunde potest ad illum sufficienter excitari per media naturalia aliquo tempore, et occasione, in qua non occurrant impedimenta, quæ illum actum reddant impossibilem ipsi voluntati ; ergo simpliciter potest per voluntatem liberam effici sine speciali auxilio. Diximus enim tantum duobus modis posse aliquem actum esse impossibilem libero arbitrio sine auxilio gratiæ, scilicet physice, propter defectum propriæ virtutis per se ac physice efficientis : vel moraliter, propter magnam difficultatem ortam ex tentationibus et impedimentis occurrentibus : ergo si utraque impotentia cessat in actu dilectionis, nullo modo erit impossibilis, ac subinde absolute fieri poterit viribus naturæ. Jam ergo probatur antecedens, cujus prior pars nota etiam est ex dictis, quia ille actus dilectionis in se spectatus naturalis est, et ideo ad illum efficiendum non deest virtus physica in humana voluntate ; unde illam habuit in statu innocentiae ; ergo eandem retinet in statu naturæ lapsæ, quia voluntas in sua integritate integra mansit, et ideo quoad intrinsecas et physicas vires non fuit imminuta, ut proleg. 4 ostenditur : ergo non deest in homine lapsō sufficiens principium physicum talis actus. Et tale probatur altera pars de sufficienti excitativo ; tum quia hujusmodi est naturalis cognitio Dei, quæ ex creaturis desumi potest, ut ex Paulo, Actor. 14, et Rom. 1, supra ostendimus ; tum etiam quia dictamen hoc, *Deus est diligendus super omnia*, naturale est et naturalem obligationem inducit : ergo de se etiam sufficienter movet ; tum denique quia in statu innocentiae hoc fuit sufficiens ad excitandum : ergo etiam nunc de se sufficit, si extrinseca impedimenta non obsint. Denique probatur ultima pars antecedentis ex ipso rerum eventu, non enim semper et in omni brevissimo tempore occurrunt graves tentationes et impedi-

menta, imo aliquando potest homo lapsus vacare naturali considerationi bonitatis Dei et beneficiorum ejus, et nihil actu sentire quod impediatur excitationem amoris ejus : ergo tunc saltem poterit voluntas pro sua libertate in talem actum prodire.

2. *Arguitur amplius.* — Augetur difficultas, quia non est minus potens homo in natura lapsa quam esset in puris naturalibus ; sed in puris naturalibus posset sola libertate Deum super omnia diligere : ergo etiam nunc. Minor probatur, quia tunc haberet homo obligationem sic diligendi Deum : ergo posset, et non per auxilium gratiæ, quia in illo statu non daretur : ergo sua facultate cum concursu generali. Quia præceptum non datur nisi de actu simpliciter possibili. Item quia homo tunc veniens ad usum rationis posset honeste instituere vitam suam, alias miserimus esset sine culpa, quod repugnat suavi et sapienti providentiæ : ergo posset sibi proponere Deum ut ultimum finem, in eumque omnes actiones suas dirigere, et proponere illi placere in omnibus : nam sine hoc proposito non potest esse recta vitæ institutio : ergo totum id per vires liberi arbitrii ac rationis naturalis facere potuisset ; in illis autem includitur hic amor super omnia : ergo. Confirmatur tandem, quia anima pueri decedentis in solo originali peccato potest diligere Deum auctorem naturæ super omnia, et tamen est in statu naturæ lapsæ : ergo et nunc homo potest, quia est eadem ratio : solum enim est differentia, quod in anima separata cessant concupiscentia et alia impedimenta ; sed hæc differentia non pro omni tempore versatur, ut jam proposui.

3. *Prædictæ parti affirmanti subscribunt quidam.* — Propter hæc et alia multi graves Theologi huic subscripsere sententiæ, affirmantes posse nunc hominem diligere Deum auctorem naturæ amore benevolentiae perfecto, et super omnia. Ita tenent, ex discipulis D. Thom., Cajetan., tom. 1 opusc., tractat. 4, q. 1, qui etiam in hoc excedit, quod nihil distinguit ex parte Dei, sed absolute circa Deum, tam ut naturalem quam ut supernaturalem finem, talem amorem quoad substantiam concedit. A qua sententia non recedit Soto, l. 2 de Natur. et Grat., c. 14, ubi generaliter ait omnem actum qui per gratiam fieri potest, posse a peccatore fieri per vires naturæ quoad substantiam actus. Et sic etiam in 4, dist. 17, q. 5, ad 1, idem affirmat de contritione quoad substantiam actus cum proposito placendi Deo in omnibus. Neque ab illa sententia discrepant

Cano, relect. de Pœnit., p. 5, § *Tertio etiam*, et nonnulli alii Thomistæ quos infra referam. Hujus sententiæ fuit Henric., quodlib. 4, q. 11, circa finem, ubi expresse dicit posse hominem, non solum in statu naturæ integræ, sed etiam in statu naturæ corruptæ, diligere Deum dilectione naturali benevolentis et super omnia.

4. *Eisdem accedit Scotus.* — Scotus etiam multis in locis eandem docet sententiam. Nam in 1, d. 17, q. 1 et 2, supponit actum charitatis esse naturalem quoad substantiam, et posse fieri a sola voluntate tanquam a principio activo proximo cum generali concursu, quamvis non possit sic fieri cum quadam speciali perfectione quam habet ab habitu charitatis, de quo postea dicetur libro sequenti. Et quamvis verum sit ibi non excludere verbis expressis speciale auxilium (quomodo illum excusare voluit Vega, lib. 6 in Trident., cap. 28, et quæst. 10 de Justific.), nihilominus aperte sentit fieri a sola voluntate ut principio proximo, nam excludit omne principium proximum coagens cum voluntate, præter habitum: et plane docet illum actum esse naturalem in substantia sua, et in 2, d. 28, in resolutione quæstionis sentit præceptum illud, *Diliges Dominum Deum tuum*, posse impleri per liberum arbitrium, quamvis non sine gratia, quæ consequatur ad illam dilectionem tanquam ad proximam dispositionem, non vero tanquam principium ipsius dilectionis. Sed illo etiam loco non excludit expresse auxilium speciale. Verumtamen si titulus quæstionis et intentio ejus attente consideretur, aperte loquitur de libero arbitrio propriis tantum viribus operante. Et in 4, d. 14, q. 2, § *De secundo principali*, in simili quæstione, de dispositione ad gratiam habitualem et remissionem peccati, dicit fieri *ex naturalibus cum communi influentia*. Quod ægre exponitur de communi influentia gratiæ, quæ est per auxilium speciale; tum quia nunquam talem sensum indicavit; tum quia tunc non recte diceretur actus fieri ex naturalibus, nam potius fit ex gratuitis. Ac denique quodlib. 17, § *De tertio*, juncto § *Contra conclusionem*, dicit dilectionem naturalem, et charitativam Dei non differre specie in substantia sua, et naturalem vult fieri per vires naturales, quamvis de charitativa, ut talis est, fateatur non posse fieri sine influxu habitus. Quo sensu dicit, in principio illius quodlibeti, non posse voluntatem elicere actum perfectissimum circa ultimum finem ex se, seu per solam naturam, ut in libro sequenti latius tractabimus.

5. *In eadem parte asserenda excedunt alii.* — Et in hac sequuntur Scotum Gabriel, in 3, d. 27, art. 3, dub. 2, proposit. 1, quam in 3 et 4 in sensu dicto satis declarat. Idem Aliaco, ibi; et Almain., q. 1, dub. 2, proposit. 1, et tract. 2 Moral., c. 9; et Ant. Andr. 2, d. 28, q. 1. Qui auctores excedunt, tum quia non solum admittunt naturalem Dei dilectionem super omnia fieri posse ab homine peccatore, sed etiam quia idem censent de dilectione charitatis Dei, ut est auctor gratiæ, quoad substantiam ejus; et præterea censent talem dilectionem per naturam factam, esse sufficientem dispositionem ad gratiam. Quæ omnia quam sint falsa, in libris sequentibus videbimus. Nunc solum ex his auctoribus referimus quod ad præsens punctum pertinet. Et cum illis citatur Major, in 2, dist. 1, q. 5, dub. 3, in fine; sed nihil ibi invenio, nec sententia illa consonat cum doctrina ejusdem Major. 2, d. 28, q. 1.

6. *Pro eadem faciunt Durandus et alii.* — Præterea tenent eandem sententiam Durand. in 3, d. 29, q. 2, n. 13 et sequentibus, distinguens duplicem dilectionem amicitis et super omnia erga Deum, naturalem et supernaturalem; et dicens priorem esse ex præcepto naturali, ac proinde fieri posse ab homine lapsa ex solis naturalibus juxta generalem regulam quam posuerat in 2, d. 28, q. 4; et in 1, d. 17, q. 2, ad 1 et 2, dicit charitatis habitum non esse necessarium ad substantiam actus dilectionis Dei, sed ad meritum de condigno; dixerat autem in argumento *Sed contra*, n. 4, omnem actum qui fit sine gratia et charitate esse mere naturalem, quod postea non reprobat, sed admittit. In eadem sententia esse videtur Marsil., in 2, q. 18, art. 2, in confirmatione secundæ conclusionis, ubi de Philosophis ait potuisse ratione naturali cognoscere Deum esse super omnia diligendum, et huic cognitioni voluntatem etiam absque gratia conformare: nisi forte de sola habituali gratia loquatur, juxta ea quæ ex alio loco statim referemus. Thomas etiam de Argentina, in 3, d. 29, q. 1, a. 2, dub. ult., docet quidem dari posse dilectionem Dei naturalem amicitis super omnia, ad quam non sit necessaria charitas; nunquam tamen satis declarat an fieri possit sine auxilio gratiæ, præsertim ab homine lapsa; in hoc tamen sensu procedere videtur. Multo vero clarus et liberius id docet Adam. in 1, d. 1, q. 10, ad argum. contra 1 concl.; imo addit illam dilectionem naturalem esse ejusdem speciei cum dilectione charitatis, li-

cet non sit ita perfecta. In quo sensit cum Scoto et aliis supra citatis, et antea id docuit Altisiod. supra, c. 6.

7. *Quibus fundamentis nitatur.* — Fundamenta denique horum auctorum sunt quæ in principio tetigimus, et quæ præcedenti capite, ad probandam dilectionem naturalem, allata sunt. Nam semel admissa possibili dilectione naturali, consequi necessario putant etiam homini lapsio esse possibilem. Adli tandem potest hanc sententiam nullo modo favere errori Pelagii, si secludamus ea quæ Scotus, Gabriel, et alii addere videntur de sufficienti dispositione ad gratiam et remissionem peccati, vel de merito talis dilectionis, vel de identitate specifica hujus naturalis dilectionis et infusæ charitatis, de quibus postea dicemus. His (inquam) seclusis, longe abest hæc opinio ab errore Pelagii. Nam Concilia ipsa quæ definiunt ad diligendum Deum esse necessariam gratiam, non simpliciter loquuntur, sed cum illo addito, *Sicut oportet*, ut sæpe ex Concilio Arausicano et Tridentino notavimus, quod videntur apposuisse ut ab hac opinione Theologorum abstraherent; sentiunt ergo illam nihil habere commune cum errore Pelagii. Quod si ita est, cum videatur ratione urgenti probari, videtur probabilior judicanda. Idemque argumentum ex Bulla Pii V et Gregorii XIII sumi potest.

CAPUT XXXIII.

REFERTUR ET FUNDATUR OPINIO NEGANS POSSE HOMINEM LAPSUM DILIGERE SUPER OMNIA DEUM, ET AUCTOREM NATURÆ, SINE AUXILIO GRATIÆ.

1. *Opinio tuta negans.* — Nihilominus securi et sana sententia est, quæ negat hominem in statu naturæ lapsæ posse, absque auxilio gratiæ, diligere super omnia Deum ut auctorem naturæ, illa nimirum dilectione qua posset diligere in natura integra sine speciali auxilio. Ita docet D. Thom., dicta quæst. 109, artic. 3, et sequuntur ibi Cajetan., Conrad., Medin., Valent., et alii recentiores. Eandemque opinionem se defendere profitetur Solo in locis allegatis. Tenuit etiam Vega, quæst. 10 de Justif., 10, d. 1; latius Bellarm., lib. 6 de Grat. et lib. arb., cap. 7 et 8. Et ex antiquis, Bonav. 2, d. 3, art. 1, q. 3 ad 1; Aigid. 2, dist. 28, quæst. 1, art. 4, dub. ult. litterali in resolutionibus argumentorum; et ibi Richard., art. 1, q. 1; Abulens., in c. 19 Matth.; inchoat etiam Mar. il. in 1, q. 20, art. 3, concl. 5

tota, quatenus de philosophis dicit potuisse ex auxilio gratuito Deum super omnia amare, ubi videtur auxilium illud ut necessarium postulare, licet non satis declaret.

2. *Quibus testimoniis alii utantur pro hac sententia.* — Ad confirmandam autem hanc sententiam afferuntur varia Scripturæ, et Conciliorum, et Patrum testimonia, in quibus dilectio Dei dicitur esse donum ejus, et idem quod charitas. Dicitur item dilectio esse plenitudo legis, etiam naturalis, ut constat Roman. 13; impletio autem legis naturalis est donum Dei, nec esse potest sine gratia, ut supra vidimus: ergo et dilectio est donum gratiæ Dei. Unde Augustinus, Fulgentius, Prosper, et alii Augustini sectatores damnant dicentes dilectionem Dei posse esse ex nobis, et non ex Deo, ut patet per August., de Grat. et lib. arb., c. 18; 12 de Civit., cap. 9, et lib. 21, cap. 16; 4 contra Julian., cap. 3; tract. 102 in Joan. Loquuntur autem Augustinus et alii Patres de hominibus in hoc statu naturæ lapsæ viventibus, et ideo in hoc puncto habent majorem vim hæc testimonia.

3. *Infirma sunt in præsentia.* — Sed revera hoc genus probationis est infirmum in præsentia; tum quia omnia illa testimonia reduci debent ad sensum Conciliorum Arausicani et Tridentini, in quibus additur illa particula *sicut oportet*, qua omnia illa testimonia enervantur, quia dilectio naturalis, quantumvis sit efficax et super omnia, non est sicut oportet. Et sæpe ostensum est Scripturam et Patres loqui, in prædictis locis, de dilectione Dei perfecta, et quæ sit super omnia simpliciter et in omni ordine. Unde loquuntur de actu dilectionis quo possit homo justificari, seu præparari ut justitiam consequatur, ut expresse dixit Concilium Tridentinum cum Arausicano. Item loquuntur de dilectione quæ implet totam legem Christi vel Dei, quæ non solum includit præcepta naturalia, sed etiam supernaturalia, ad quæ dilectio naturalis non extenditur; et ideo dicebamus supra, esse secundum quid super omnia; dilectionem autem infusam esse simpliciter super omnia, quia omnia complectitur. Unde non refert quod dilectio dicatur esse plenitudo legis etiam naturalis; tum quia dilectio infusa illam etiam implet, licet non solum; tum etiam quia implet illam non solum quoad substantiam, sed etiam quoad modum fructuosum ad vitam æternam, quomodo etiam loquuntur Patres de impletione legis et bonis operibus, ut supra visum est. Adde quod Patres non tantum de amore hominis lapsi, sed

etiam de amore Angelorum et Adami ita loquuntur; in illis autem non possunt intelligi nisi de amore charitatis, ut supra notatum est: ergo signum est eodem modo de nobis loqui.

4. *Alrar. lib. 6 de Aux., disp. 51, num. 7, pro enervatis testimoniis occurrit inefficaciter.* — Instant vero aliqui quia Pelagius, quando dixit dilectionem super omnia Dei haberi posse ex viribus naturæ, de dilectione naturali loquebatur, nunquam enim dixit dilectionem supernaturalem, aut quæ elicitur ab habitu infuso, posse fieri per naturam, quia hoc neque a Patribus refertur, neque cadere potest in mente alicujus: loquebatur ergo de dilectione naturali, et in hoc improbatur a Conciliis et Patribus: ergo de eadem dilectione naturali Patres loquuntur. Respondetur facile Pelagium directe errasse circa dilectionem, quæ in re est supernaturalis, existimavit enim illam esse omnino naturalem, et ideo illam soli libero tribuit arbitrio, et in hoc damnari a Patribus, qui proinde loquuntur de dilectione supernaturali. Declaratur hoc, nam Pelagius asseruit, ad amandum Deum, etiam sicut oportet ad salutem, sufficere vires liberi arbitrii, ac proinde dilectionem illam esse naturalem. Patres autem definiunt ad diligendum Deum, sicut oportet ad salutem, esse necessariam gratiam, in quo etiam docent illam dilectionem esse supernaturalem; ergo in ipsa damnatione Pelagii de dilectione supernaturali loquuntur, nam dilectio sicut oportet supernaturalis est. Vel aliter, dicebat Pelagius dilectionem illam Dei, quæ est charitas, quæ in cordibus diffunditur per Spiritum Sanctum, esse naturalem, quia nullam credebat esse supernaturalem; ergo in re ipsa asserebat dilectionem infusam, ac proinde supernaturalem, fieri viribus naturæ, nesciens quidem quid diceret. Et ita convincitur a Patribus non posse illam dilectionem fieri viribus naturæ, id est, esse naturalem, si quidem infunditur nobis a Deo per Spiritum Sanctum, qui datus est nobis; loquuntur ergo de dilectione charitatis et supernaturali. Omissa ergo auctoritate, rationibus agendum est quæ vel simpliciter ex natura rei, vel ex aliis principiis fidei procedant.

5. *Rationes etiam nonnullæ parum firmæ excluduntur.* — Quidam ergo rationem sumunt ex eo quod talis amor esset actus pietatis, qui non potest fieri sine gratia: item ex eo quod talis dilectio disponderet ad gratiam, vel proxime, vel saltem remote, quia qui sic diligeret Deum, profecto quodammodo obligaret

illum, saltem ex gratitudine, ut illi daret dona gratiæ, et hoc est esse dispositionem saltem remotam ad justitiam; sed hæ rationes sæpius refutatae sunt. Nam prior vel equivocationem committit, vel coincidit cum posteriori; jam enim supra dixi actum pietatis ad quem dicitur esse necessaria gratia, non denominari a particulari virtute pietatis ad Deum, quæ est religio, ejus actus potest etiam esse naturalis, et interdum fieri absque gratia; sed denominari a pietate prout dicitur de Religione Christiana in fide fundata, seu prout significat quidquid ad veram sanctitatem et justitiam coram Deo pertinet. Unde si dilectio naturalis Dei super omnia dicatur actus pietatis priori modo, parum refert; negatur enim consequentia; si vero sumatur posteriori modo, negatur assumptum, quod est idem cum fundamento posterioris rationis. Unde ad illam negatur sequela, talis enim dilectio nec proxime disponit ad gratiam habitualem, quia non convertit perfecte animum ad Deum ut supernaturalem finem, nec includit voluntatem servandi omnia præcepta etiam supernaturalia: neque etiam disponit remote ad eandem gratiam, quia ad nullam gratiam actualem disponit proxime, nec illam meretur etiam de congruo, quia est ordinis inferioris, et nullo modo elevat hominem ad superiorem finem. Nec Deus tenetur propter illum actum tale præmium retribuere, nec titulo gratitudinis quæ in Deo locum non habet, ut in proleg. 4, cap. 2, dixi, nec titulo justitiæ aut fidelitatis, quia illud non promisit, nec ex congruente providentia, quia hæc potius postulat ut operi naturali retributio ejusdem ordinis respondeat, non vero ut supernaturalis ordo in tali homine inchoetur. Accedit quod si illæ rationes essent validæ, etiam in Angelo in principio suæ creationis, et in homine in natura integra locum haberent, quia etiam illi indignerunt gratia ad opera pietatis, et licet non indigerent dispositione ad remissionem peccati, potuissent tamen disponi per talem dilectionem ad auxilia primæ gratiæ recipienda, quod æque falsum est in illis ac in nobis.

6. *Alia quoque ratio non admittitur.* — Alia ratio afferri solet, quæ supra tacta est, scilicet, quia homo lapsus, est aversus a Deo et conversus ad bonum commutabile; ergo non potest suis viribus elicere actum dilectionis super omnia, alias vel maneret simul aversus et conversus, vel per illum actum tolleretur aversio et culpa. Sed hæc ratio ex una parte non

est universalis, quia saltem sequitur hominem lapsum jam justificatum posse postea diligere Deum super omnia solis viribus liberi arbitrii, sine auxilio gratiæ, quod tamen falsum est, juxta hanc sententiam quam tractamus, quæ simpliciter loquitur de homine lapsa viatore, in quocumque statu sit, sive in peccato, sive in gratia, ut ex sequentibus patebit. Aliunde vero illa ratio nimium probaret, si valida esset. Sequeretur enim peccatorem, etiam per auxilium gratiæ actualis, non posse elicere actum hunc dilectionis naturalis super omnia, nam idem inconueniens sequitur, scilicet, vel manere simul aversum et conversum, vel per talem actum statim remitti peccatum, quod dici non potest. Item sequitur animam separatam pueri decedentis sine baptismo, non posse diligere Deum ut auctorem naturæ super omnia, quod esse falsum infra ostendam. Et sequela facile patet eodem modo, quia est in peccato, et consequenter aversa a Deo; ergo non potest suis viribus converti, alias vel viribus suis justificabitur, vel simul erit conversa et aversa. Unde dicendum est, quomodocumque contingat, peccatorem habere talem actum, per illum quidem non justificari, nec tolli maculam culpæ ullo modo, et ita, non obstante illa actuali et physica conversione, manere habitualem et moralem aversionem, quia illa conversio est imperfecta et diminuta, et neque est per se sufficiens ad tollendam moralem seu habitualem aversionem peccati, neque illam meretur ullo modo, nec Deus illam promisit sic diligenti. Et patet a simili, nam qui peccavit accipiendo alienum, conversus manet ad bonum commutabile; et nihilominus potest postea actu naturali averti ab illo bono creato et nihilominus moraliter manet semper conversus, donec remittatur peccatum. Denique illa ratione non declaratur quomodo vires liberi arbitrii ad eliciendum illum actum diminutæ sint per peccatum, quia sola macula culpæ illas non minuit, ut in primo libro ostensum est.

7. *Ratio D. Thomæ.* — Aliam ergo rationem reddit D. Thomas, dicto art. 3, quia in natura lapsa appetitus rationalis sequitur bonum privatum propter corruptionem naturæ; ergo non potest diligere Deum super omnia propter seipsum, nisi prius sanetur per gratiam. Quæ conclusio probari potest, quia natura infirma prodire non potest in actionem perfectissimam nisi prius sanetur; dilectio autem Dei est perfectissima actio. Ex quo dicendum videtur probari gratiam habitualem esse necessariam ad

hanc dilectionem in natura lapsa, quia natura non sanatur, nisi per hanc gratiam, et ita concedunt aliqui; sed oppositum probatum est et statim iterum dicitur. Unde melius respondebitur negando sequelam, quia licet sanitas corruptæ naturæ perfecte fiat per gratiam habitualem, quæ delet culpam, nihilominus sanitas inchoata, quæ vires reficiat, seu defectum virium suppleat, potest dari per solum actuale auxilium sine habitu gratiæ, quia habitus per se parum aut nihil juvat ad naturales actus; ergo de hac sanitate ad summum procedit ratio, et ita illam tacite interpretantur Richard. supra, et Conrad. in dict. art. 3. Aliud vero obstare videtur efficaciam hujus rationis, nam licet natura lapsa propensa sit ad bonum privatum ratione appetitus sensitivi, nihilominus per liberum arbitrium non semper appetit illud bonum, sed potest conformari dictamini rationis naturalis. Sic enim potest homo lapsus restituere alienum per solam arbitrii libertatem, etiamsi illud non pertineat ad bonum privatum, id est proprium, nec sit secundum propensionem appetitus, sed illo potius repugnante. Ergo idem dici poterit de dilectione Dei; illa ergo ratio, licet ostendat illum actum esse difficilem in natura lapsa, non tamen esse impossibilem per arbitrii libertatem; præsertim quia brevi tempore fieri potest, et transire; hæc autem modo non repugnat naturam ægram efficere actum perfectum per facultatem, quæ, non obstante ægritudine, in se integra mansit, solumque facta est impotens ad usum ejus perfectum ratione aliquorum impedimento- rum quæ non semper occurrunt.

8. *Magis accepta ratio ex qua præcedens con- valescit.* — Denique ratio magis recepta in hoc puncto, et quæ præcedentem magis explicat, est, quia dilectio Dei super omnia in unoquoque ordine includit observationem omnium præceptorum illius ordinis; ergo dilectio super omnia Dei, ut finis naturæ, est plenitudo totius legis naturalis et omnium præceptorum Decalogi, prout ad ordinem naturæ præcise spectant, juxta illud Pauli ad Rom. 13: *Non occides, non adulterabis, non furtum facies, in hoc verbo instauratur, Diliges proximum tuum*, quod a fortiori verum est de dilectione Dei; ostendimus autem supra non posse hominem lapsum sine auxilio gratiæ servare totam legem naturalem; ergo multo minus poterit Deum super omnia diligere, quia in hoc eminentiori modo observantia totius legis naturalis continetur. Et confirmatur, quia amor super omnia vincit omnia peccata mortalia, vel

in effectu, si occurrant quando ipse durat, vel in affectu, quia includit propositum de se efficax vitandi omne id quod tali amori est contrarium: at vero impossibile est homini lapsu vincere omnia peccata legi naturæ contraria sine speciali gratiæ auxilio, ut supra ostensum est; ergo impossibile etiam illi est suis viribus habere dilectionem Dei victricem omnium talium peccatorum, vel in effectu, vel etiam in affectu, per propositum efficax cavendi illa, quia non potest homo efficaciter et naturaliter proponere id, quod est sibi naturaliter impossibile. Et declaratur amplius, quia dictum est supra non posse hominem lapsum vincere tentationem gravissimam sine auxilio gratiæ; ergo nec potest sine gratiæ auxilio habere propositum efficax vincendi similem tentationem: ergo multo minus potest diligere Deum super omnia, nam amor Dei includit non solum propositum vincendi unam vel alteram, sed etiam absolute vincendi omnes tentationes repugnantes tali amori, imo et vitandi perpetuo omnes occasiones et voluptates quæ possunt hominem inducere in similem tentationem, eumve in morali periculo peccandi mortaliter constituere.

CAPUT XXXIV.

EXPONITUR AC DEFENDITUR MENS D. THOMÆ DE AUXILIO GRATIÆ NECESSARIO AD DILECTIONEM DEI IN STATU LAPSI NATURE.

1. *Difficile dubium contra ultimam rationem superioris capituli.* — Ex fundamentis hujus sententiæ, sola ultima ratio est probabilissima, eamque maxime intendit D. Thom. in dicto art. 3, juncto art. 8, et ita videtur eum exponere Cajetan., dicto art. 3; Soto, lib. 1 de Natur. et Grat., c. 22; et illa utuntur alii moderni Thomistæ. Sed adhuc non quiescit mens, quia licet ratio illa recte probet non posse hominem lapsum suis viribus esse ita constantem et perseverantem in hac dilectione, quin aliquando contra illam peccet, non tamen probat non posse hominem pro brevi tempore, vel pro aliquo momento exercere talem actum, qui sit absolutus proposito et affectu, quamvis postea non sit futurus efficax in effectu. Accedit quod tentatio vel difficultas gravis quæ possit talem actum impedire, nec semper actu occurrit in præsentī, ut est per se manifestum, quia sæpe potest aliquis, quando nulla tentatione pulsatur, de Deo cogitare et se ad Deum diligendum excitare; nec possibilis tentatio

gravis aut difficultas, futura in perseverantia illius amoris, cogitatur explicite, quoties ille amor exercetur, nulla enim ratione hoc est necessarium, quia, ut supra dicebam, non est necesse facere explicite comparisonem, sed solum absolute velle placere Deo in omnibus propter bonitatem suam. Ex quo resultat ratio sæpe a nobis facta, quia actus hic secundum se naturalis est, ut in præcedenti capite dictum est: ergo in ratione et voluntate hominis lapsi est tota virtus per se necessaria ad eliciendum hunc actum cum concursu generali Dei, quia naturalis virtus potentiarum non est diminuta per peccatum, ut supra etiam dictum est. At vero impedimenta quæ possent hanc virtutem impedire, ne efficiat talem actum, non semper occurrunt, ut ostensum est: ergo non semper est impossibilis talis actus: ergo potest aliquando elici ab homine lapsu ex solis naturalibus, sine auxilio gratiæ. Confirmatur, quia ut amor sit super omnia, satis est quod, quamdiu durat, faciat servare omnia præcepta; sed homo potest servare omnia præcepta naturalia pro aliquo brevi tempore sine auxilio gratiæ: ergo pro eodem poterit habere talem actum dilectionis.

2. *Prima sententia: rationem D. Thomæ intelligi de amore super omnia perfecto, quod proxima difficultas solum convincit, non autem de imperfecto.* — Prædicta tamen sententia per imperfectum amorem non debet intelligere carentem supernaturalitate. — Propter hanc difficultatem, nonnulli Theologi, etiam ex discipulis D. Thomæ, concedunt posse hominem lapsum diligere aliquo modo super omnia Deum ut finem naturæ, suis naturalibus viribus, quamvis amor ille semper sit imperfectus et inefficax, quamdiu ab auxilio speciali non procedit, et ita D. Thomam interpretantur de amore super omnia perfecto et efficaci, ne illi contradicere videantur. Ut autem non reducatu controversia ad sola verba, oportet distinguere de qua perfectione vel imperfectione actus sit sermo: jam enim supponimus omnem amorem Dei mere naturalem, quantumcumque in suo ordine super omnia et efficax sit, simpliciter esse imperfectum comparisone facta ad amorem charitatis; non possunt ergo dicti auctores loqui de hac imperfectione. Sic enim etiam homo in statu integræ naturæ et Angeli non potuerunt diligere Deum super omnia, nisi imperfecto amore: oportet ergo ut loquantur de imperfectione opposita perfectioni quam hic amor intra suum ordinem habere potest. Verumtamen etiam intra illum ordi-

nem potest actus multipliciter esse imperfectus, et a perfecto distingui.

3. *Nec item carentem absoluto proposito.* — Primo enim dici potest amor imperfectus, quia non habetur per actum absolutum, *Volo* placere Deo in omnibus, sed per actum conditionatum seu simplicem affectum, *Vellem*. Et hoc modo vix est qui dubitet posse hominem lapsum amare Deum affectu inefficaci, seu conditionato, desiderando placere ei super omnia, ut expresse tradunt Medina et alii infra referendi. Nec invenio aliquem contradicentem, præter unum, P. Vasquez, cui jam satis responsum est. Sed hic amor non potest dici super omnia, quia una ex conditionibus, ad amorem super omnia requisitis, est ut voluntas toto suo affectu feratur in Deum, præferendo illum rebus omnibus amicitiae ejus repugnantibus; qui autem solum conditionate vellet placere Deo, eo ipso non amat illum, præferendo illum omnibus, nam aliquid subtrahit, ratione cujus conditionem apponit. Unde quoad hoc applicari potest vulgaris objectio, quod is qui tantum vellet, sed de præsentis non vult placere Deo in omnibus, eo ipso non amat Deum super omnia, non quia nullum affectum habeat ad Deum, nam revera cupit et desiderat ipsum amorem Dei super omnia, non tamen exercet illum, licet exerceat alium imperfectum ad Deum et amorem ejus.

4. *Nisi tantum illo quod extenditur ad vitanda venialia.* — Secundo, dici potest amor super omnia imperfectus quoad extensionem aliquam ex parte objecti. Sic enim Cajetanus, dicto articulo, amorem Dei super omnia distinguit: unum esse dicit quo amans tantum refert in Deum omnia referibilia in ipsum; alium, quo simpliciter omnia in Deum refert; inter quos ponit discrimen, quod prior consistere potest simul cum aliqua actuali culpa, saltem veniali, licet non cum mortali; posterior vero utramque omnino expellit, quia nulla culpa est referibilis in Deum. Unde prior amor imperfectus dici potest respectu secundi ex parte objecti, quia non refert in Deum omnia simpliciter, seu non vult Deo placere in omnibus, sed cum quadam limitatione, scilicet in omnibus sine quibus non potest amicitia subsistere, non vero excludit omnia quibus potest amicitia tepescere, vel augmentum ejus retardari. Proprius autem diceretur, priorem amorem tantum referre in Deum omnia, quæ ex necessitate simpliciter (ut sic dicam) referenda sunt in ipsum, ut amicitia possit subsistere: posterior autem amor absolute refert in Deum

omnia, quia in omnibus, etiam minimis, cupit placere Deo. Et ita, quantum in se, vult ut nihil fiat ab homine quod non sit referibile in ipsum, quod tamen prior amor permittit.

5. Hac ergo distinctione posita, quæ optima est, et in amore etiam charitatis locum habet, dicere quis potest hominem in natura lapsa posse diligere Deum auctorem naturæ super omnia, et propriis viribus, priori amore imperfecto, propter rationem supra positam; non tamen posteriori amore perfecto, quia in homine lapsa non potest esse amor qui excludat omnia peccata venialia. In quo servatur differentia inter hominem integrum et lapsum, nam homo integer, cum facile posset omnia peccata venialia vitare pro sua libertate, pro eadem poterat posteriori modo perfecto auctorem naturæ diligere. Nec videtur Cajetanus ab hac sententia alienus, sic enim inquit: *Licet homo in statu naturæ corruptæ, quantum est ex sufficientia sua, possit ex puris naturalibus diligere Deum super omnia referibilia in ipsum, quæ tunc sunt in sua potestate, ut ratio probat, non tamen potest diligere Deum super omnia simpliciter, quia non potest non peccare, utique saltem venialiter; hunc enim sensum postulat ille discursus et modus, quo solvit rationem dubitandi a se positam, scilicet, quod homo in hoc statu potest ex suis naturalibus cognoscere Deum ut super omnia diligendum, tanquam auctorem et finem naturæ, et ideo potest etiam suis viribus per dilectionem huic cognitioni se conformare. Ipse autem respondet concedendo illationem solum cum illo addito, ut possit homo diligere Deum super omnia referibilia in ipsum, de quo amore dixerat repugnare cuicumque peccato mortali, quia cum illo amore Dei non potest aliqua creatura amari ut ultimus finis. Ergo cum dicit alium amorem, quem vocat super omnia simpliciter, non posse haberi ab homine lapsa per vires naturales, quia non potest vitare omne peccatum, necesse est ut id dicat ratione venialium, alioqui nec discursus subsistit, nec consentaneè loquitur. Nec mirum est quod Cajetanus hic admittat priorem amorem super omnia in homine lapsa, cum id ex professo doceat in opusculis, ut allegavi.*

6. *Predicta tamen expositio non est ad mentem D. Thomæ.* — Hac vero sententia, cujuscumque sit, non est ad mentem D. Thomæ, nec vera, nec sibi constans. Probatur primo, quia D. Thomas eam dilectionem naturalem Dei super omnia, quam negat posse fieri ab homine lapsa non sanato per gratiam, conce-

dit fieri posse ab hominē sanitatem gratiæ consequenti : sed homo etiam justificatus non potest vitare omnia peccata venialia : ergo nec potest diligere Deum super omnia simpliciter, sed tantum quoad referibilia in ipsum, ut loquitur Cajetanus; ergo de homine nondum sanato per gratiam negat D. Thomas posse diligere Deum super omnia, etiam quoad referibilia in ipsum. Deinde, sicut homo lapsus non potest suis viribus vitare omnia peccata venialia, ita nec potest eisdem viribus vitare omnia mortalia; ergo si propter priorem impotentiam non potest diligere Deum super omnia illo secundo modo perfectiori, etiam propter posteriorem impotentiam non poterit diligere Deum priori modo, seu quoad omnia referibilia. Neque refert quod impotentia vitandi peccata venialia sit major quam in mortalia, quia cum utraque sit impotentia simpliciter, magis vel minus nihil variat, nam etiam inter venialia major est impotentia vitandi quædam quam alia. Unde si propter impotentiam vitandi venialia non potest homo suis viribus diligere Deum super omnia perfecto modo, ideo est, quia non potest absolute velle quod sibi est impossibile; ergo eadem ratione non potest amare priori modo, quia non potest absolute velle omnia mortalia peccata vitare, quia hoc etiam est simpliciter impossibile per vires naturæ. Et ita incidimus in fundamentalem rationem supra adductam pro sententia D. Thomæ. Et sine dubio omnes, qui illam sententiam tuentur, de illo naturali amore Dei loquuntur, qui mortalem lapsum contra divina præcepta naturalia excludat, etiamsi non omnia venialia vincat, et illum putant esse impossibilem per vires naturæ. Imo et Cajetanus ipse in fine illius dubitationis illum amorem, quo in statu naturæ corruptæ nihil contra Dei amicitiam admittimus, Deumque diligimus super omnia, solum quoad referibilia in ipsum, tribuit gratiæ sananti naturam per charitatem, intelligitque hoc esse necessarium etiam respectu præceptorum tantum naturalium. Quomodo autem hoc cohæreat cum his, quæ prius dixerat, non satis video.

7. *Alii exponunt rationem D. Thomæ de amore perfecto, id est, qui cum effectu vitat mortalia, non de alio quantumvis absoluto, qui brevi succumbat.* — Tertio modo dicitur naturalis amor perfectus, vel imperfectus quoad efficaciam. Et sic distinguunt aliqui duplicem Dei dilectionem; una est quæ in affectu et proposito, etiam absoluto, vult placere Deo in omnibus, et servare mandata ejus, et nihilominus

non est efficax, quia neque in effectu postea servat præcepta, neque sola sufficit ad resistendum omnibus contrariis quæ in discursu temporis occurrunt; alia vero dilectio Dei est non tantum in affectu, sed etiam in effectu, quia et amat placere Deo, et id facit in omni occasione, contraria impedimenta superando. Prior dilectio consistit in uno simplici actu, qui in momento aut brevissimo tempore habetur ac transit; posterior vero non consistit in solo simplici actu, sed includit successionem plurimum formalium vel virtualium, quibus cum effectu mandata servantur. Priorem ergo dilectionem vocant aliqui imperfectam et inefficacem, et de illa affirmant posse fieri ab homine lapsa sine auxilio gratiæ respectu Dei finis naturalis, et quando tentationes et difficultates extrinsecæ absunt, et hoc modo expediunt difficultatem supra propositam. Posteriorem vero dilectionem vocant perfectam et efficacem, quam potuit homo habere in statu innocentiae, non vero in natura lapsa. Et ita interpretantur D. Thomam, quia hoc solum probat ratio ejus, prout supra explicata est.

8. *Molina proxime datam expositionem amplectitur.* — Atque hoc tandem modo putant posse Theologos conciliari, exceptis illis Doctoribus qui dicunt posse hominem lapsum servare diu omnia præcepta naturalia propriis viribus, nam illi utramque dilectionem viribus liberi arbitrii concedunt, quod absurdissimum et perniciosissimum est. Cum illa ergo distinctione et moderatione amplexus est illam sententiam Molina in Concordia, quæst. 14, art. 13, disput. 14, memb. 3, quæ in illo ab aliquibus modernis Theologis inter alias notata et exaggerata est. Sed profecto non fuit Molina primus neque ultimus qui illam tenuit opinionem. Nam (ut Cajetanum et alios antiquiores omittam, qui simpliciter et sine distinctione admittunt dilectionem naturalem super omnia in homine lapsa viribus naturæ operante, qui non possunt cum majori moderatione explicari) eandem fere distinctionem retulit Soto, lib. 1 de Natura et Grat., cap. 22, quam non reprobatur, sed potius declarat et confirmat. Neque etiam negat hominem lapsum posse diligere Deum priori modo viribus naturæ, sed potius illum simplicem actum admittit, quamvis neget illum esse vocandum amorem super omnia. Sic enim inquit: *Hoc argumento conficiunt nonnulli posse a nobis diligere Deum super omnia naturaliter. Quod revera et absonum est Christianis auribus, et præter rationem collectum. Nam es'io haberi ille actus naturaliter*

possit, etiam ab eo qui est in peccato mortali, nequaquam dicendus est amor Dei super omnia. Non ergo dissentit in re, nam actum admittit, etiam absolutum, nam his verbis illum explicaverat: *Volo Deo in omnibus et per omnia placere*. Negat tamen illi actui denominationem seu conditionem super omnia, quia non excludit quidquid est contrarium divinæ amicitiae.

9. *Soto parum sibi cohærens impugnatur.* — Infra vero ait non posse hominem lapsum naturaliter omnia uno actu mentis velle referre in Deum, siquidem absque speciali auxilio non potest non incidere in culpam, quæ sit contra divinam amicitiam. Sed neque istud secundum cum priori satis cohæreret, neque illa ratione recte probari videtur. Nam eo modo quo vult aliquis illo actu placere Deo in omnibus et per omnia, eodem modo vult omnia referre in ipsum, saltem prout id esse potest in præcepto, vel ut ad placendum Deo fuerit necessarium, quia hoc includitur in universali objecto illius actus: ergo sicut absoluto affectu amat Deum, ita etiam in affectu omnia refert ad ipsum. Quod vero qui sic amat, necessario aliquando postea peccet suis viribus relictus, pertinet ad effectum, non vero tollit quin ille affectus fuerit universalis, etiam quoad referendum in Deum omnia, referibilia. Imo quia peccatum contra legem naturæ, postea commissum, est contrarium illi priori actui amoris, et virtualis retractatio illius, inde satis colligitur illum amorem virtute comprehendisse relationem omnium referibilium in Deum. Denique hæc relatio continetur in substantia amoris Dei super omnia, cum proportione ad genus amoris naturalis et supernaturalis; sed idem Soto, lib. 2, cap. 14, in fine, dicit, quemcumque actum potest habere homo qui est in gratia, eundem posse etiam elicere peccatorem ex puris naturalibus, quoad substantiam operis, et affirmat se pro viribus hoc probasse priori libro, cap. 20 et duobus sequentibus; ergo non potuit consequenter negare posse peccatorem ex puris naturalibus diligere Deum eo amore quo referat omnia in ipsum, quia hoc ad substantiam actus pertinet. Cur ergo ille simplex actus amoris non dicetur super omnia, licet fortasse sit inefficax.

10. *Eandem illam expositionem approbasse Medina ostenditur.* — Præterea, ab eadem sententia non videtur discrepare Medina, dicta quæst. 109, art. 3. Nam de dilectione naturali loquens in 2 conclusionem de homine condito in puris naturalibus, ait posse aliquo modo dili-

gere Deum super omnia. Hoc autem explicat et probat, quia in primo instanti usus rationis potest se convertere in Deum, et proponere studiose agere, quæ verba absolutum actum significant, quem statim explicat, dicens: *In eodem instanti potest habere hunc actum efficacem, Volo placere Deo et in nullo displicere*. Et nihilominus in 3 conclusione addit non posse talem hominem diligere Deum dilectione perfecta. Per dilectionem autem perfectam declarat illam quæ servat omnia præcepta. Nec potuit aliam perfectionem intelligere, quia si prior est ejusdem objecti et cum eadem universalitate, et efficax, ut ipse ait, id est, *absoluta*, ut Molina loquitur, quæ alia perfectio illi addi potest, nisi perseverantiæ et actualis efficaciam? Unde ratio qua ibi probat talem dilectionem non posse esse perfectam, vel intelligenda est de hac perfectione, vel nullius est momenti; sic enim argumentatur: Voluntas efficax finis includit voluntatem efficacem mediorum quæ sunt necessaria ad finem; ergo si homo diligit Deum super omnia (utique perfecte), consequens est quod possit omnia præcepta adimplere sine gratia. Hæc autem ratio solum probat posse hominem implere omnia præcepta quamdiu dilectio illa durat, vel si in illa perseveret, ex quo ad summum colligitur illam dilectionem per solas vires naturæ non posse esse perseverantem diu, quia etiam impletet cum effectu omnia præcepta, quod facere non potest. Ergo solum hoc addit hæc dilectio perfecta supra aliam, et si plus intendatur, illa ratione nullo modo probatur, quia voluntas efficax finis solum includit voluntatem efficacem mediorum, quamdiu durat; potest autem mutari, et tunc poterunt etiam media contemni; loquitur ergo de dilectione quæ sit stabilis et perseverans. Et ita in virtute ponit eandem distinctionem et easdem assertiones. Easdemque statim etiam ponit de homine lapsa, quas necesse est eodem modo intelligere, cum ipse alias doceat, vires liberi arbitrii easdem esse in homine lapsa, quæ in puris naturalibus fuissent.

11. *Ad eam quoque Bannez accessit.* — Eodem fere modo loquitur de puero perveniente ad usum rationis Bannez 1. 2, quæst. 10, art. 1, dub. 2, ad 4, ubi ait non esse impossibile homini, in statu naturæ corruptæ, per vires ejusdem naturæ implere præceptum naturale convertendi se in Deum, proponendo per totam vitam secundum rectam rationem agere, idque volendo, quantum in se est. Hæc autem conversio continet amorem Dei super omnia,

nam præceptum naturale de hoc amore datur, et illa conversio est ad Deum ut ad ultimum finem, et cum amore obedientiali, cum dicatur includere dictum propositum recte vivendi : ergo est amor Dei super omnia per unum actum simplicem, qui in uno instanti esse dicitur. Addit vero idem auctor illud propositum revera inefficax esse propter naturæ corruptionem. Non potuit autem intelligere esse inefficax, quia sit tantum per modum velleitatis, seu voluntatis conditionatæ, quia præceptum naturale non est de hujusmodi velleitate, quæ vix meretur nomen amoris Dei, sed de vero amore per absolutam voluntatem, cum vero proposito illi placendi, nam illa velleitas revera non est verum propositum, neque ita solet appellari. Loquitur ergo de inefficacia quoad effectum, ut statim ipse declarat, dicens non posse hominem lapsum, per totam vitam neque per longum tempus, sine gratia omne bonum morale adimplere. Videtur ergo juxta prædictam distinctionem loqui, et simplicem actum absolutum amoris Dei et propositi, dicto modo inefficacis, admittere in homine lapsu suis viribus operante.

12. *Similiter Cumel.* — *Ac tandem Lorca.* — *Data expositio Molinæ nec notam quidem improbabilitatis meretur.* — Idem sumi potest ex Cumel. 1. 2, quæst. 109, art. 4, disp. 2, concl. 2, quatenus ait posse hominem non tantum potentia physica, sed etiam morali implere omnia præcepta pro brevi tempore, prout in eo occurrunt, etiam in natura lapsa, quia alias non tantum læsa, sed extincta esset per peccatum, et addit omnes Theologos ita sentire. Cum ergo dilectio naturalis Dei non censeatur impossibilis homini lapsu, nisi propter observantiam omnium præceptorum naturalium quam includit, juxta prædictam sententiam non erit impossibilis pro illo brevi tempore, pro quo observatio omnium mandatorum impossibilis non est. Præsertim quia illo eodem tempore potest occurrere præceptum naturale amoris Dei sufficienter propositum per rationem naturalem. Denique novissime Lorca 1. 2, disp. 5, de Grat., circa finem, fatetur, præmissa præfata distinctione amoris, nullo argumento probari dictum simplicem actum esse impossibilem, ideoque *satis probabile* existimat hunc posse elici sine speciali Dei auxilio, quamvis dilectio diuturna et effectiva impossibilis sit, et de hac posteriori dilectione D. Thom. interpretatur. Et in quæstionis decisione sentit, sub illa generali regula multorum Theologorum, quam D. Thomas etiam

art. 4 docet, scilicet, hominem lapsum posse singula præcepta legis naturæ uno vel alio actu pro parvo tempore implere, sub hac, inquam, regula etiam præceptum amandi Deum comprehendi. Non est ergo singularis illa opinio Molinæ, neque potest ulla censura notari; imo nec improbabilis judicari.

13. *Ad mentem tamen D. Thomæ non esse probatur primo.* — Nihilominus tamen in eam sententiam induci non possum, ut existimem illam fuisse mentem D. Thomæ; nam imprimis non sine causa distinctas quæstiones proponit, unam de dilectione, et alteram de observantia præceptorum legis. Et in hac posteriori utitur illa restrictione de observatione præcepti quoad substantiam actus, vel quoad modum, qua non utitur in priori quæstione, sed absolute definit non posse hominem in natura lapsa ex solis naturalibus diligere Deum super omnia; ergo intelligit specialem impotentiam habere hominem circa dilectionem naturalem Dei super omnia, nam illam nec quoad substantiam potest homo lapsus efficere sine gratia. Loquitur ergo de quolibet actu dilectionis singulari et divisim sumpto, et non tantum conjuncto cum diuturna observantia omnium mandatorum, alioqui nulla esset differentia inter dilectionem et observantiam mandatorum, neque potuisset quæstiones illas distincte tractare.

14. *Probatur secundo.* — *Tertio.* — Quod etiam confirmari potest ex simili quæstione, quam de Angelis movet 1 p., q. 60, art. 5, an naturali dilectione diligant Deum plus quam se, et respondet affirmando, idque probat, tum ex morali præcepto diligendi Deum supra se; tum ex inclinatione naturali voluntatis. Ibi enim evidenter loquitur de dilectione, ut est singularis actus, ad quem est specialis et maxima inclinatio voluntatis, et de quo datur speciale præceptum, et qui in momento fieri potest, ut factus est ab Angelis. In prædicto autem art. 3, doctrinam quam ibi tradit, explicat per aliam quam de Angelis tradiderat, et illam applicat ad hominem in natura integra, et ab illa excipit hominem lapsum: ergo sicut affirmat Angelum vel hominem integrum posse elicere suis viribus specialem actum dilectionis Dei super omnia, ita id negat de homine lapsu. Denique ubicumque D. Thomas aliis locis hanc quæstionem tractat, de singulari actu dilectionis loquitur, ut videre licet quodlib. 1, art. 8; in 2, d. 28, q. 1, art. 2, et d. 33, quæst. 2, art. 2, ad ult.; ergo immerito ille articulus tertius ad sensum peregrinum et plane violentum traducitur. Etenim

talem esse istiusmodi sensum ratione etiam ostendere possumus.

15. *Probatur quarto.* — Ratio autem est quia diversa sunt operari bonum et perseverare in bene operando, et ideo, licet ad perseverandum requiratur gratia, non ideo dici potest etiam ad operandum requiri, quia perseverare difficilius est quam operari; ita ergo aliud est diligere, aliud in dilectione perseverare; nec quia ad perseverandum in dilectione sit necessaria gratia, bene inferretur esse necessariam ad diligendum, sed aliunde hoc probari necesse est. At vero dilectio quæ vocatur efficax in effectu, quia in re ipsa potest consequi effectum servandi omnia præcepta longo tempore, non est sola dilectio, sed est dilectio cum perseverantia. Quomodo enim dilectio faciet servare præcepta longo tempore, nisi ipsa dilectio eodem tempore perseveret? Ergo quamvis homo non possit hanc dilectionem facere per vires naturæ, non sequitur non posse diligere, sed non posse perseveranter diligere, quod longe diversum est. D. Thomas autem in illo articulo, et alii Theologi in hoc puncto non tractant de necessitate gratiæ ad perseverandum in dilectione, sed ad diligendum.

16. *Probatur quinto.* — Et confirmatur ac declaratur a simili, nam simpliciter verum est fidelem, per ordinarium auxilium gratiæ, posse diligere super omnia, et vera dilectione charitatis Deum ut supernaturalem finem, quia potest simplicem actum hujus dilectionis elicere, quamvis illa dilectio cum solo illo auxilio non sufficiat ad servanda omnia præcepta, et vitandum omne peccatum longo tempore, quia auxilium ordinarium gratiæ, quod sufficit ad sic diligendum, non sufficit ad perseverandum diu in tali dilectione, nisi amor et specialior protectio Dei in natura lapsa homini conferatur. Ergo similiter, si vires naturæ sufficiunt ad eliciendum unum actum omnino absolutum dilectionis Dei super omnia, quamvis per solas illas sine majori auxilio non possit homo perseverare in illo amore, servando diu totam legem, nihilominus simpliciter dicetur amare Deum super omnia per vires naturæ. Deinde in supernaturali amore unus actus dilectionis absolutus est etiam efficax de se ad servandam totam legem, quantum est ex parte sua, et efficaciter avertit voluntatem a peccato, et convertit ad Deum, nam propterea est sufficiens dispositio ad justitiam; ergo similiter actus naturalis dilectionis est de se efficax, si simpliciter absolutus, est enim eadem pro-

portio. Et ratio utriusque est, quia amor non denominatur efficax observatione totius legis, quia illam de facto operetur multo tempore, quia neque amor supernaturalis hoc semper facit, et multa efficaciter proponimus, quæ postea non facimus. Dicitur ergo efficax, non quia facit, sed quia de se aptus est facere, seu non in effectu, sed in affectu, et quia ille actus, quamdiu durat, non admittit secum aliquid contrarium divino præcepto; ergo si homo potest viribus naturæ talem actum elicere, simpliciter dicendum est posse diligere Deum super omnia per vires naturæ. Et hoc est quod D. Thomas et alii auctores negant.

17. *Vera resolutio difficultatis positæ in num. 1.* — Igitur defendendo secundam opinionem superiori capite contentam, quæ sine dubio probabilior est, ad difficultatem positam contra principale fundamentum ejus, dicendum est non solum non posse hominem lapsum viribus naturæ cum effectu perseverare longo tempore servando mandata, sed etiam non posse uno simplici actu, qui brevi tempore vel etiam in momento haberi potest, absolute et de se efficaciter velle diu servare omnia mandata. Et inde est ut non possit simili actu omnino absoluto et efficaci diligere Deum super omnia, quia hic amor vel formaliter vel virtute illud propositum includit. Ratio autem prioris partis est, quia eo ipso quod diuturna observatio totius legis naturalis, prout in executione successive fit, est impossibilis per vires naturæ, etiam simul apprehensa per modum unius objecti amandi, seu proponendi, est objectum simpliciter impossibile viribus naturæ: quia voluntas non potest per vires suas naturales efficaciter velle quod præstare per easdem vires est sibi impossibile, efficaciter, inquam, etiam ex parte affectus, et per propositum absolutum, ut sumitur ex doctrina Aristot., 3 Ethic., cap. 2, et D. Thom. 1. 2, quæst. 13, art. 5, et in libro sequenti in multis actibus supernaturalibus declarabitur, et aliquid etiam in capite sequenti dicemus. Igitur ex impossibilitate executionis, quæ dici potest effectiva, oritur impossibilitas objectiva respectu propositi omnino absoluti. Et inde consequenter est ut, supposita fragilitate hominis lapsi ad servandum diu integram legem naturalem, sit impossibilis absoluta dilectio Dei super omnia per easdem vires naturales, quia quod non potest fieri sine gratia non potest etiam sine gratia absolute et efficaciter proponi. Ex quo intelligitur facile differentia inter statum na-

turæ integræ, et lapsæ, et quomodo aliquid potuerit voluntas per vires naturales in illo statu quod in præsentī non potest, cum tamen voluntas in sua entitate diminuta non sit, et consequenter nec virtus ejus naturalis activa fuerit remissa. Dicendum est enim hoc provenire ex mutatione objecti, et ex diminutione potentiæ executivæ, saltem ex parte impedimentorum: nam in Adamo objectum illud, servandi semper omnia naturalia præcepta, proponi voluntati poterat ut possibile et facile per vires naturæ, quia nulla erant impedimenta; nunc autem factum est impossibile propter contrariam rationem; illud autem objectum, ut sæpe dictum est, includitur in amore absoluto, et super omnia; sine limitatione enim extendi debet ad placendum Deo semper et in omni occasione, etc.

18. *Objectio contra proximam resolutionem.* — Dices: ergo homo viribus naturæ solum poterit diligere Deum per velleitatem quamdam placendi illi, non vero per actum aliquem, vel propositum, quod hoc verbo explicetur, *volo*; consequens autem videtur falsum, et contra experientiam, quia non solum fideles peccatores, sed etiam impii, Judæi, Pagani, vel gentiles qui verum Deum agnoscunt, illum interdum diligunt majori amore. Cujus signum est, quia sæpe ex tali amore moventur ad aliqua opera bona moraliter: velleitas autem non movet ad opus, sed absoluta intentio. Neque dicere possumus cum fundamento illos infideles habere hujusmodi amorem per auxilia gratiæ, quia hæc incipiunt a fide, ut supra diximus, illi autem solum motivo et affectu naturali ducuntur.

19. *Ejus enodatio.* — Respondetur ad argumentum negando sequelam; nam inter illam velleitatem et absolutum amorem super omnia potest dari aliquis amor medius (ut sic dicam). Nam potest esse amor Dei absolutus, non tamen universalis, sed particularis. Sicut fidelis peccator vult honorare Deum, credendo in ipsum et illi soli cultum tribuendo, quamvis non velit male parta restituere, et sæpe ex affectu ad Deum odit blasphemiam, vel in se, vel in alio, quamvis non amet Deum integre (ut sic dicam) et universaliter. Aliquem ergo hujusmodi amorem Dei possunt habere infideles, et ex illo moveri ad aliquod opus bonum, quamvis in peccatore fideli sæpius ille amor, licet imperfectus, sit ex gratia, et ideo perfectior. Deinde etiam in amore universali potest inveniri medium inter puram velleitatem et amorem omnino absolutum. Nam potest esse vo-

luntas per modum propositi ex parte absoluti, et ex parte conditionati, absoluti quidem, quia revera est per modum intentionis inducentis ad opus; conditionati vero, quia non omnino excluditur aliqua veluti limitatio seu determinatio modificans actum.

20. *Simili alia doctrina locupletatur.* — Ad hunc modum explicui in lib. 4 de Prædestin., cap. 2, voluntatem quam Deus habet salvandi reprobos, quam dixi esse per modum intentionis inducentis ad conferenda media sufficientia ad salutem, et nihilominus non esse voluntatem omnino absolutam de salute reprobos, sed cum hac modificatione, *quantum in me est*, quæ includit hanc conditionem, *si ipsi velint*. Et fere ad eundem modum explicui actum pœnitentiæ in tom. 4, disput. 3, sect. 3. Ita ergo in præsentī potest intelligi dilectio Dei aliquo modo absoluta, licet aliqua ex parte conditionem includat, qualis explicatur per hæc verba, *volo, vel propono facere quod in me fuerit, ad placendum Deo, vel id procurare, quantum potuero*. Nam hic actus non includit repugnantiam, et de se movet ad observationem mandatorum; non potest tamen dici simpliciter absolutus, nam illa modificatio involvit hanc conditionem, *si potuero*. Et ideo fortasse hic actus non repugnat haberi, licet raro et difficulter, per vires naturæ; non potest tamen dici absolutus amor Dei super omnia.

21. *Item exemplo alio.* — Potestque hoc magis explicari exemplo voluntatis, seu propositi vitandi omnia peccata venialia per totam vitam, quod per ordinarium auxilium gratiæ potest justus habere. Nam illud propositum, prout est simplex actus qui in instanti fit, est quidem aliquo modo absolutum, quatenus revera homo vult adhibere diligentiam et facere quod potuerit, et ad id movetur ex vi talis actus, et nihilominus non potest esse omnino absolutus, nam cum includat omnia peccata venialia tam ex surreptione quam deliberata, ejus executio est simpliciter impossibilis justo per ordinaria auxilia gratiæ, et ideo semper includit hanc modificationem, *quantum in me fuerit*, quæ includit conditionem, *si potuero*, per quam suo modo tollitur impossibilitas in objecto. Ita ergo intelligi potest amor naturalis Dei, qui inducat hominem ad proponendum servare legem naturæ quoad potuerit, non vero omnino absolute et efficaciter.

22. *Eadem mens videtur fuisse Molinæ, Bannez et Medinæ.* — Et fortasse non aliud dicere voluit Molina, et expressius Bannez indicavit

licens non esse impossibile quod homo nitatur t proponat, *quantum in se est*. Et eandem particulam addidit Medina dict. art. 3, ad 5. Verumtamen quod ipsi dicunt, posse hominem ethnicum in primo instanti usus rationis habere illum amorem et propositum per vires naturæ, saltem cum illa determinatione, quantum in me est, physice quidem verum est, moraliter vero non credo esse ita possibile ut ad effectum pervenire valeat et in re ipsa exereri. Quia ad hujusmodi actum concipiendum, præsertim ex pura benevolentia Dei, magna cognitio Dei magnaque consideratio bonitatis eius requiritur, quam vix potest homo longo tempore obtinere, nedum in primo instanti usus rationis: quin potius etiam post multum tempus usus rationis existimo esse posse rarissimum illum actum per solas vires liberi arbitrii, quia licet perveniri possit ad illud iudicium satis clarum, et de se practice inducens affectum, nihilominus ex parte appetitus sit semper actus ille moraliter impossibilis vel difficillimus, quia postulat affectum multum liberum a passionibus, quod profecto esse non potest post multum tempus usus rationis, nisi fuerit gratia præventus. Atque ita concludimus amorem absolutum simpliciter, esse simpliciter impossibilem ex parte objecti; amorem vero secundum quid absolutum, id est, includentem illam limitationem, in reliquis vero universalem et super omnia, esse difficillimum, et ideo vel nunquam vel rarissime solis naturæ viribus adhiberi posse.

23. *Instantia*. — Adhuc vero superest una difficultas et instantia, quia prædicta ad summum procedunt, quando is qui Deum diligit cognoscit imbecillitatem suam ad servandam semper naturalem legem, et impotentiam inde provenientem actu considerat. Sæpe autem contingere potest ut aliquis hanc impotentiam ignoret, imo existimet se posse voluntatem illam erga Deum servare, et præcepta omnia legis naturæ suis viribus custodire, si velit; quid enim mirum si hoc existiment Pagani, quandoquidem Judæi et Pelagiani in hoc fuerunt errore? Imo aliqui etiam Catholici et Theologi existimarunt, loquendo de sola lege naturali, hunc non esse errorem: ergo qui ita existimaverit, poterit simpliciter habere illum amorem et propositum sine ulla conditione vel limitatione. Quin potius, etiam sine errore sola inconsideratio illius difficultatis, inducentis in objecto moralem impossibilitatem, sufficit ut voluntas feratur in illud absolute, et sine ulla conditione, quia tunc objectum solum of-

fertur tanquam bonum et possibile, non cogitando de difficultate, nec discernendo an illa possibilitas sit tantum physica, vel etiam moralis. At vero in his qui amant Deum per simplicem et momentaneum actum, vel proponunt in generali honeste vivere, regulariter intercedit hæc inconsideratio, ferunturque ex sola pulchritudine vel honestate objecti: ergo.

24. *Solutio*. — Respondeo in priori casu, de ignorantia per errorem, amorem habere quidem formam et speciem absoluti actus, re tamen vera semper involvere conditionem quæ illum inefficacem reddit. Declaratur, quia ideo talis actus tunc videtur habere formam absoluti, quia operans putat conditionem ex parte objecti necessariam ad talem actum in re subsistere, et ita semper includit dependentiam a tali conditione, ideoque cum vere et in re ipsa non sit impleta, actus semper est virtute conditionatus et inefficax. Idemque est, servata proportione, in alio casu de inconsideratione, quia sicut amat et proponit propriis viribus, ita ex parte objecti includit respectum ad proprias vires, atque ita semper includit virtualement conditionem. Quod non invenitur in actu supernaturalis amoris Dei, nam sicut concipitur ex viribus gratiæ, ita ex parte objecti, et quoad executionem ejus, habet respectum ad vires gratiæ, quæ ex parte Dei semper dantur sufficientes etiam moraliter, omnibus ex vera charitate diligentibus ipsum.

25. *Ulterior solutio*. — Ex quo tandem considerari potest alia ratio inefficiæ in illo actu amoris naturalis, quantumvis ex errore vel inconsideratione per modum absoluti concipiatur, semper enim est de se infirmus ac debilis ad vincendas difficultates. Ideo enim quis in talem amorem prorumpit, quia vel non intelligit vel non cogitat quam arduum habeat objectum, ex quo fit ut, occurrente postea difficultate, facile a tali proposito recedatur, quia revera qui sic afficitur nunquam voluit Deum talibus difficultatibus præponere, sicut qui vult aliquid per ignorantiam non censetur id voluisse, quia ignorantia involuntarium causat. In quo etiam diversa est ratio de amore charitatis, nam ille fundatur in fide et spe divini auxilii de se sufficientis ad superandas difficultates amori contrarias, et ideo etiam comparando unum simplicem actum amoris ad alium, multo efficacior est amor infusus in suo ordine, quam amor naturalis in suo, quia et ex perfectione sua longe potentior est ad vincenda contraria, et ex parte objecti executio est illi possibilis ratione auxilii divini illi

quasi connaturaliter debiti, quod non habet amor naturalis, ut explicatum est.

26. *Extenduntur dicta ad amorem concupiscentiæ.* — Unde ulterius si quis consideret rationem ob quam dicimus hunc amorem non posse fieri viribus naturæ, intelliget assertionem non solum esse veram de amore benevolentiae, sed etiam de amore concupiscentiæ Dei, ut est nostrum bonum beatificum naturale, si sit in sua specie perfectus, et super omnia, modo in capite præcedenti explicato. Probatur, quia etiam hic amor includit propositum servandi omnia præcepta naturalia, et vitandi omnia peccata auctori naturæ contraria. Quia licet non includat hoc propositum sub ratione tam perfecta quam est ratio amoris benevolentiae, nihilominus absolute includit illud, sicut intentio efficax finis propositum mediorum includit. Quia observantia omnium præceptorum naturalium est medium necessarium ad consequendum bonum sic amatum, non enim potest esse beatus, etiam naturaliter, qui auctorem suum offensum habuerit: ergo eadem ratio impotentiae est in homine lapsa, ex parte hujus propositi ad hunc amorem, quæ est ad amorem benevolentiae. Probatur, quia difficultas illius propositi non est posita in hoc quod sub hac vel illa ratione magis vel minus perfecta habeatur, sed in substantia (ut sic dicam) absoluti propositi, quia executio ejus quoad observanda omnia præcepta, etiam quoad substantiam eorum, est impossibilis homini lapsa per vires naturæ, et ideo talis executio objective proposita est objectum impossibile, ac subinde incapax naturalis propositi absoluti. Hæc autem ratio eodem modo procedit in tali proposito, sub quacumque ratione naturali proponatur. Ob hanc ergo causam credimus assertionem propositam tam esse veram de amore concupiscentiæ Dei super omnia, quam benevolentiae. Et licet auctores hoc diserte non explicaverint, tamen vel indistincte loquuntur, vel qui unum affirmant, aliud non negant, uno vel alio excepto, qui alio fundamento ducitur, scilicet, quod omnis amor benevolentiae sit supernaturalis, quod supra refutatum est.

CAPUT XXXV.

QUÆ GRATIA SIT NECESSARIA IN STATU NATURÆ LAPSÆ AD DILIGENDUM, AMORE NATURALI SUPER OMNIA, DEUM UT AUCTOREM NATURÆ?

1. *Prima opinio.* — Duas difficultates in cap. 32, num. 1 et 2, insolutas reliquimus,

quibus in hoc et sequenti capite satisfaciendum est. In priori postulatur utrum, ad habendum hunc actum in hoc statu, necessaria sit habitualis gratia sanans naturam quoad ablationem culpæ. Ita enim nonnulli affirmant, credentes esse sententiam D. Thomæ, dicta q. 109, art. 3, quoniam dicit hominem in statu naturæ corruptæ ab hac dilectione deficere, nisi sanetur per gratiam Dei. Gratia autem sanans naturam non est nisi gratia habitualis. Potestque hoc quoad mentem Divi Thomæ confirmari, quia eadem gratia requiritur ad diligendum Deum super omnia, quæ ad servanda omnia præcepta naturalia longo tempore, juxta dicta in capite præcedenti; sed D. Thomas, in artic. 4, docet non posse hominem implere omnia mandata sine gratia sanantē, et clarius art. 8 dicit non posse vitare omnia peccata sine gratia habituali sanante; idem autem est vitare peccata, et servare præcepta, quia non peccatur nisi contra præceptum, unde nec vitantur peccata, nisi servando mandata; ergo cum D. Thomas dicit requiri gratiam sanantem ad servanda omnia mandata, de gratia habituali loquitur; ergo in eodem sensu dicit requiri gratiam sanantem ad diligendum Deum. Secundo potest eadem mens D. Thomæ colligi ex dicto art. 4, ad 3, quatenus dicit non posse hominem lapsum implere præceptum de dilectione Dei ex puris naturalibus, secundum quod ex charitate impletur, quod interpretandum videtur casualiter, scilicet, quia illud præceptum naturale non impletur in hac vita, nisi secundum modum charitatis; sed ad implendum quodlibet præceptum secundum modum charitatis est necessaria gratia habitualis, quæ a charitate non separatur: ergo eadem gratia requiritur in hoc statu ad diligendum super omnia Deum, etiam ut finem naturæ. Atque ita sentit Conrad. in dicto artic. 3, et iusinant alii recentiores Thomistæ, et plures Theologi, licet ex aliis principiis, ut statim referam.

2. *Prima opinio astruens amorem prædictum, etc.* — *Ejus fundamentum.* — *Reprobatur dicta opinio cum fundamento ejus.* — Ut fundamentum et veritatem hujus sententiæ expendamus, oportet advertere duobus modis cogitari posse hanc dilectionem non posse elici ab homine lapsa sine gratia habituali, scilicet, vel consequenter, ordine saltem naturæ, licet concomitanter duratione temporis, vel antecederent, sive ordine temporis, sive saltem naturæ. Priori modo existimarunt aliqui Theologi antiqui necessario esse conjunctam habi-

nalem gratiam cum hac dilectione, quia est efficiens dispositio ad gratiam, et ita si non præcedit gratia, saltem consequitur ad illam. Hæc sententia tribuitur Scoto locis citatis cap. 32. Verumtamen cum Scotus, in tali dilectione, ut sit ultima dispositio ad gratiam, certam quamdam durationem ejus requirat, potius supponit in tempore breviori posse dilectionem illam esse sine habituali gratia. Tribuitur etiam Cajetano a nobis etiam citato in cap. 32, num. 3. Sed ille potius docet expresse posse hunc amorem aliquo tempore esse informem, id est, non formatum charitate, et consequenter sine gratia. Magis inclinant in hanc opinionem Gabriel et Almainus, qui, cum dicant illum amorem esse sufficientem dispositionem, et certam ejus durationem, ut intensionem non postulent, consequenter dicere coguntur illum actum non esse sine habituali gratia. Verumtamen fundamentum hujus sententiæ reprobum est et erroneum, quia de fide certum est nullum actum solis viribus naturæ elicibilem esse sufficientem dispositionem ad gratiam, ut infra ostendemus. Et hinc aperte concluditur, ratione concomitantiae, seu necessariæ consecutionis, non esse necessariam gratiam habitualem ad habendum hunc actum, quia nulla alia ratio illius concomitantiae cogitari potest, præter rationem dispositionis ultimæ.

3. *Est vero falsa dicta opinio, esto dicatur elicitum amorem naturalem cum auxilio specialiter elici.* — Dices hoc recte concludere contra prædictam opinionem, quæ asserebat illum actum dilectionis Dei fieri viribus naturalibus: posse autem aliquem dicere illum actum elicibilem per auxilium gratiæ esse sufficientem dispositionem ad habitualem gratiam, et ita nunquam separari ab illa, saltem consequenter: sic enim hæc sententia non repugnat alteri dogmati, quod actus elicibilis solis viribus naturæ non est sufficiens dispositio ad gratiam. Respondeo etiam in hoc sensu illam sententiam non esse probabilem, sed omnino falsam: suppono enim sermonem esse de actu dilectionis naturalis, ut per se et ex natura sua elici potest per solas vires liberi arbitrii, licet ex accidenti, in natura lapsa, vulnera et impedimenta ejus hoc impediunt. Unde etiam supponimus sermonem esse de dilectione, quæ præcisè terminatur ad Deum ut auctorem naturæ, et solum includit observantiam præceptorum naturalium. Quod adverteo, quia potest aliter dici, in hoc statu dilectionem Dei, etiam ut est auctor naturæ, nun-

quam elici nisi per actum verum charitatis, et sub altiori ratione, qui modus dicendi est omnino distinctus ab opinione quam nunc tractamus, et paulo post examinabitur, a num. 13.

4. *Assertio contra præcedentem opinionem. — Probatur primo. — Secundo. — Tertio.* — His ergo positis, dico talem actum, etiam ut elicibilem per auxilium gratiæ, non esse dispositionem, præsertim ultimam ad habitum gratiæ, saltem per se loquendo et extra sacramentum. Hoc enim nunc satis est ut talis actus etiam sic factus non habeat necessariam conjunctionem cum habitu gratiæ, ut per se constat. Probatur autem assumptum, quia infra ostendam primo, nullum actum naturalem habentem eam tantum perfectionem quæ de se viribus naturæ fieri potest, esse dispositionem ad gratiam, solum quia fit ex aliquo auxilio gratiæ, quia extrinsecum principium efficiens, si non reddat actum in se meliorem et perfectiorem, non reddit illum magis aptum ut ad gratiam disponat. Secundo, magis in particulari, quia illa dilectio non convertit hominem ad Deum secundum supremam rationem ultimi finis supernaturalis, et consequenter non potest esse fundamentum propriæ amicitiae divinæ, quæ in supernaturali communicatione fundatur. Item non includit propositum servandi omnia præcepta supernaturalia, et consequenter nec dolorem de peccatis contra eadem præcepta, neque de aliis ut avertunt a fine supernaturali, et ideo non potest esse sufficiens dispositio ad justitiam, seu gratiam habitualem, neque ad remissionem peccati, quod a Deo ut fine supernaturali hominem avertit. Tertio, probatur ex Concilio Tridentino, sess. 6, cap. 6, ubi, describens dispositionem ad justitiam, amorem Dei auctoris supernaturalis justitiæ requirit, et sess. 14, cap. 4, dicit tunc contritionem ad justificationem sufficere, quando est charitate formata. Igitur manifestum est dilectionem Dei in se naturalem, quantumvis ex auxilio gratiæ procedat, non esse dispositionem ultimam, ac proinde hoc titulo non habere consequenter seu concomitantem gratiam habitualem sibi conjunctam.

5. *Secunda opinio Alvarez, requirens ad prædictum amorem gratiam habitualem. Primus modus explicandi hanc opinionem.* — Alii ergo dixerunt gratiam habitualem esse necessariam ad hunc actum dilectionis antecedenter; nihil autem necessitas duplici modo explicatur. Primo, ut gratia habitualis prærequiratur tanquam prævia dispositio necessaria, ut homo

in hoc statu sit capax talis amoris; quia homo in peccato existens ac permanens est incapax illius; sed in hoc statu non potest esse sine gratia aut peccato; ergo nisi præcedat gratia et tollat peccatum, impossibile est habere talem actum. Consequentia patet ex dictis in primo puncto, quia hic actus nec sufficit ad tollendum peccatum, neque proxime ad gratiam disponit; si ergo homo existens in peccato illum actum eliciat, manebunt simul dilectio et peccatum. Quod autem hoc repugnet, patet, quia alias talis homo simul esset aversus et conversus ad Deum; item esset conversus simul ad Deum, et ad creaturam ut ad ultimum finem. Nam peccator diligit creaturam ut ultimum finem, et qui diligit Deum super omnia, eum etiam diligit ut ultimum finem. Hoc autem repugnat; tum quia nulla esse potest conventio lucis ad tenebras, Christi ad Belial; tum etiam quia non potest homo simul habere duos fines ultimos diversos, nedum repugnantes, juxta doctrinam D. Thom. 1. 2, quæst. 1, art. 5.

6. *Prædictus explicandi modus impugnatur.* — *Primo.* — Hæc vero ratio, ut jam supra tetigi, non probat intentum, quia peccatum originale vel habituale, et hic actus amoris naturalis non habent inter se formalem repugnantiam. Quod probo, primo, quia anima separata pueri decedentis sine remedio peccati originalis potest diligerere Deum, ut auctorem naturæ, super omnia, et tamen est in peccato originali, quod post hanc vitam non tollitur, maxime per actum mere naturalem; ergo ibi manent simul peccatum originale et dilectio actualis, atque ita in illo exemplo manifeste deficit discursus illius rationis. Probatur ergo major, primo ex D. Thom. in 2, distinct. 33, quæst. 2, artic. 2, ad 5, ubi ait pueros decedentes sine baptismo, quamvis sint separati a Deo quantum ad conjunctionem gloriæ (adde etiam gratiæ), non tamen esse penitus separatos, quia sunt conjuncti per participationem naturalium honorum. *Et ita* (inquit) *de illo gaudere poterunt naturali cognitione et dilectione.* Unde plane concedit quod in argumento sumpserat, illos pueros, sicut naturalem cognitionem Dei habebunt, ita posse Deum naturaliter diligerere, ubi licet non addat particulam, super omnia, tamen loquitur de tota dilectione Dei per se possibili per vires naturæ. Et ita intellexit et secutus est D. Thomam Soto, libr. 1 de Natur. et grat., c. 14, et probat optima ratione, quia naturalis ratio eo inclinatur, et ibi cessat impedimentum ponderis

carnis, quam rationem nos statim urgebimus; additque permultos tenere illam sententiam, quam etiam sequitur Medina dicto artic. 3, in 4 conclus., de dilectione naturali, ubi etiam ita intelligit D. Thomam.

7. *Progreditur proxima impugnatio.* — Ratione etiam tacta videtur convinci, quia hic actus est possibilis per vires intrinsecas voluntatis, quæ in pueris illis integræ manent, et in eis non est inordinata concupiscentia, nec futura est aliqua gravis tentatio, ut suppono; ergo possunt illi pueri integre et adæquate exercere vires sui arbitrii, diligendo Deum, nam sola culpa seu privatio gratiæ non potest impedire usum facultatis naturalis, ut in primo libro late probavi. Et confirmatur, quia puer existens in solo originali post hanc vitam, vel anima ejus potest implere omnia alia præcepta naturalia viribus naturæ propter rationem factam, quod ibi cessant impedimenta concupiscentiæ, et similia hujus vitæ, unde quoad hoc assimilatur ille status statui naturæ integræ gratiæ carentis; ergo potest etiam diligerere Deum super omnia, quia qui potest exequi suis viribus observantiam totius legis naturalis, potest etiam illam absolute et efficaciter proponere, quod solum desiderabamus in homine lapso, ut posset hunc actum dilectionis super omnia elicere.

8. *Impugnatur secundo a priori.* — Secundo, est ratio a priori, quia actus et habitus non opponuntur formaliter, ideoque simul esse possunt circa contraria objecta, ut ex philosophia constat; peccatum autem originale quasi habituale est, sicut et personale, quatenus reatus manet, actu transacto, et ideo actus dilectionis naturalis non opponitur formaliter habituali peccato. Ac proinde ex hac parte non repugnat actum naturalis dilectionis Dei simul esse cum peccato originali, vel alio habituali. Imo etiam de dilectione supernaturali et charitatis diximus in materia de Incarnatione et de Pœnitentia non excludere formaliter culpam habituales, licet per illam expellatur talis culpa, quatenus disponendo proxime ad gratiam, efficaciter impetrat remissionem culpæ. Dilectio autem naturalis non sufficienter disponit ad gratiam et remissionem peccati, ut ostensum est, et ideo neque isto modo repugnat eum habituali peccato. Accedit quod conversio illa, vel aversio originalis vel habitualis peccati, præter privationem gratiæ habitualis, non est aliquid physicum, sed morale, et ideo minorem habet repugnantiam eum actuali conversione con-

ria et physica, ideoque de potentia absoluta non repugnat habitualem culpam simul esse cum actu charitatis, ut in materia de Pœnitentia docui, et infra etiam dicam. De potentia autem ordinaria hoc non habet locum, quando amor Dei est perfectus et charitatis, quia est plena conversio ad Deum, et integra retractatio peccati. Hoc autem non habet directio naturalis, ut satis explicui, et ideo etiam de potentia ordinaria non repugnat tamen dilectionem esse simul cum originali vel habituali peccato.

9. *Objectio.* — *Diluitur.* — Dices, quamvis dilectio non plene convertat voluntatem ad Deum, nec avertat ab omni peccato, saltem convertit sufficienter ad Deum ut finem naturalem, et avertit ab omni peccato contrario regi naturali; ergo saltem sufficiet ut remittatur macula peccati ex ea parte qua avertit hominem a fine naturali, quia non repugnat hominem esse aversum a fine supernaturali, sed non a naturali, nam de originali peccato multi sentiunt, et in quocumque fieri possit locuit Cajetan. 1. 2, q. 113, a. 2. Respondetur, quidquid sit, an de potentia absoluta sit possibilis dimidiata venia seu remissio peccati proad culpam, de lege ordinaria et juxta divinam institutionem certum est non ita remitti culpam peccati. Itemque certum est naturalem actum non esse sufficientem ad tollendam vel minuendam culpam, quia aversio moralis a Deo, ut fine naturali, quando fit seu contrahitur, semper est conjuncta cum aversione a fine supernaturali, et ideo nunquam collitur sine dispositione, vel forma quæ ad finem supernaturalem hominem convertat. Præterquam quod, licet Deus illo modo remitteret aversionem tantum a fine naturali, id non faceret infundendo gratiam nec justificando hominem, et ideo etiam tunc talis dilectio non supponeret gratiam, neque illam necessario conjunctam haberet; ergo multo minus nunc illum prærequirit, quando ille actus non sufficit ad culpam ullo modo tollendam aut minuendam.

10. *Alter modus explicandi secundam opinionem.* — Alio ergo modo dicitur necessario præsupponi gratia ad hujusmodi actum dilectionis, quia est veluti principium seu fundamentum ejus. Non quidem quia gratia vel charitas sit proprium principium aut virtus habens actum eliciens, nam virtus infusa non elicit actum supernaturalem, seu naturalem; sed quia talis dilectio non fit nisi per auxilium gratiæ sanantis; hoc autem auxilium non da-

tur nisi justis, quia non datur nisi ratione ipsius gratiæ habitualis sanantis animam. Nam illi soli debetur, et non est cur gratis detur homini indigno et peccatori, cum actus ille non sit necessarius, imo neque per se ordinatus ad remissionem peccati, vel ad justitiam obtinendam.

11. *Probabilis prædicta opinio, si requirat habitualement gratiam, non ex natura rei, sed Dei lege.* — Ex hac vero ratione seu declaratione imprimis sumo, ex natura rei non esse necessariam gratiam habitualement ad eliciendum hunc actum, quia illa nec per se nec per habitus suos elicit hujusmodi actum; ergo sine illis habitibus potest dari voluntati sufficiens adjutorium ad efficiendum illum actum; hoc autem adjutorium non est per se connexum cum tota habituali gratia, neque ex natura rei illam necessario supponit, hoc enim neque ratione facta probatur, neque ulla occurrit qua possit fieri verisimile. Ergo ad summum relinquitur gratiam habitualement prærequiri ad hunc actum dilectionis ex lege et ordinatione divina, non ex necessaria rerum connexionione, sed quadam morali congruentia. Sicut supra dicebamus, ad non peccandum diu contra legem naturæ, necessariam esse in hoc statu gratiam habitualement, non ex natura rei, sed ex lege divina. Idem ergo erit in presenti, quia dilectio super omnia habet annexam observationem omnium mandatorum, et illi æquiparatur juxta superius dicta.

12. *Assertio prædicta opinio est omnino incerta.* — *Probatur primo.* — *Probatur secundo.* — *Conjectura num. 10 diluitur.* — At per hunc modum dicendi sic expositus probabilis est, sed mihi valde incertus. Primo, quia quod Deus peccatoribus præsertim fidelibus nunquam det sufficiens auxilium ad hujusmodi actum, nisi prius se disponant ad justitiam, pendet ex divina voluntate, quæ vel auctoritate debet nobis innotescere, vel ex effectibus sufficienter colligi. In presenti autem nulla est auctoritas vel testimonium quo de tali divina voluntate constet, nullum enim afferitur, neque ego illud invenio. Neque etiam ex effectibus colligitur, quia multi diligunt Deum qui nesciunt an amore vel odio digni sint, qui etiam ignorant an dilectio illa quam experiuntur, sit naturalis vel supernaturalis, perfecta vel imperfecta; ergo ex effectibus cognoscere non potest an peccator recipiat auxilium ad eliciendum actum naturalem dilectionis Dei, necne; ergo nulla via ostendi potest Deum non dare hoc auxilium, nisi tantum justis. Neque etiam

conjectura, ad id persuadendum adducta, est magni momenti, quia licet hoc auxilium non sit debitum peccatori, potest nihilominus illis gratis donari, sicut multa alia dona et auxilia gratiæ ei conferuntur. Et licet actus naturalis dilectionis non sit necessarius ad conversionem peccatoris, potest tamen esse utilis, quod satis est ut auxilium ei conferatur. Sicut etiam justo non est necessarius hic actus, sufficit enim illi amor charitatis, imo melius ei esset hunc semper exercere : et nihilominus Deus, pro admirabili et varia suæ providentiæ dispositione, interdum tribuit auxilium ad hunc amorem, interdum ad perfectiorem, prout ei placet, vel prout occasiones occurrentium causarum postulant, quibus ipse se accommodat quoad auxilia gratiæ, quantum et quomodo vult. Neque etiam est necessaria illa comparatio inter actum dilectionis et diuturnam observantiam mandatorum, quia hæc consistit in executione, quæ successu temporis et multis actibus fit, ideoque ad illam necessaria est specialis Dei protectio, et perseverantiæ donum, vel integrum, vel magna ex parte, quæ sunt propria filiorum : at vero dilectio consistit in uno actu simplici, qui objective tantum includit observantiam mandatorum, utique in proposito, et ideo ad illum sufficit unum vel aliud auxilium, quod etiam solet peccatoribus communicari. Quapropter probabilius existimo etiam ex hoc capite non necessario præsupponi gratiam habitualement ad hunc actum, ac proinde posse hunc actum inveniri in peccatore, præsertim fideli; quid vero de infideli sentiendum sit, paulo post dicam.

13. *Opinio tertia principalis.* — *Ejus ratio.* — Præter dictas sententias, invenio aliam viam fundandi necessitatem gratiæ habitualis ad diligendum Deum ut auctorem naturæ super omnia, nimirum quia in hoc statu non diligitur Deus etiam ut auctor naturæ per actum naturalem, sed solum per infusum et supernaturalem. Unde quia amor supernaturalis Dei non est nisi amor charitatis, quæ semper est conjuncta gratiæ tanquam radici et principali fonti, ideo talis dilectio nunc semper gratiam prærequirit. Hanc opinionem indicat Conrad., dict. a. 3, in line corporis, ubi notat differentiam inter hominem in hoc statu et in natura integra, quod nunc *sanatus per gratiam non diligit Deum naturaliter, sed gratuito amore, homo autem in natura integra diligit naturaliter, id est, ex natura tantum, exclusa gratia gratum faciente, Deum super om-*

nia. Quæ differentia non videtur posse in alio sensu intelligi. Et videtur illi favere D. Thomas in secundo loco supra allegato, ubi significat hanc dilectionem semper nunc esse secundum modum charitatis. Ratione potest etiam hæc opinio suaderi, quia homo lapsus non resumit vires (ut ita dicam) ad diligendum Deum, nisi mediante fide, quæ est totius justitiæ fundamentum; sed per fidem non movemur ad diligendum Deum, nisi ut objectum supernaturalis amoris; ergo in hoc statu nunquam diligitur Deus super omnia, ut est auctor naturæ, quin eodem actu diligatur ut objectum supernaturale, ac subinde amore charitatis.

14. *Assertio tertia contra proximam opinionem.* — Verumtamen neque ista sententia vera mihi videtur, neque ad mentem D. Thomæ. Ille enim in dicto art. 3, sicut in Angelis et in homine integro, ita etiam in homine lapsu duos actus amoris docet inveniri posse, naturalem scilicet et supernaturalem; differentiam autem in hoc solum constituit, quod in Angelis et homine integro poterat liberum arbitrium cum solo generali concursu elicere talem actum, in statu autem naturæ lapsæ non potest, nisi juvetur, ita vero adjutum possit illum actum ejusdem speciei et naturæ elicere, alias falsum esset posse hominem lapsum elicere talem actum, etiam cum adjutorio Dei. Atque ita intellexerunt et secuti sunt D. Thomam Cajetanus, Soto, Medina, et alii auctores. Et ideam supponunt Theologi antiquiores; sive enim sentiant hunc actum naturalem posse fieri ab homine lapsu per vires liberi arbitrii, sive cum auxilio gratiæ, omnes supponunt posse esse in illo sine modo charitatis, et ejusdem speciei cujus esset in homine puro, ut loquitur divus Thomas, quodlibet. 4, art. 8.

15. *Probatum ratione.* — Et ratione probatur, quia homo lapsus, præter cognitionem fidei potest habere cognitionem naturalem Dei, et ad illam in suo ordine obtinendam, et ad judicium ferendum, quomodo sit diligendus Deus sic cognitus, potest a Deo specialiter juvari, non confundendo naturale judicium cum judicio fidei, neque illi adjungendo peculiarem modum fidei in certitudine, vel aliam similem proprietatem, sed tantum juvando ut in proprio ordine judicium naturale perfectum sit; ergo simili modo potest voluntas in hoc statu sequi intellectum amando Deum solum ut propositum per naturalem cognitionem et judicium, et similiter juvari a Deo ad aman-

dum illud objectum super omnia, prout præcise proponitur, ac subinde dilectione naturali sine elevatione vel confusione cum amore charitatis. Antecedens videtur profecto per se notum, quia ille modus providentiæ non solum non includit repugnantiam, verum etiam non excedit debitum ordinem, et suavitatem providentiæ Dei cum hominibus hujus status. Unde non solum illud intelligimus de potentia absoluta, sed etiam de ordinata; imo credimus hoc auxilium sæpe datum esse a Deo philosophis etiam infidelibus ad naturalem Dei cognitionem verius obtinendam, maxime ad speculativam. Cur ergo non interdum id faciet in practica? Consequentia vero probatur a paritate rationis, et quia nulla probabilis apparet ut hunc modum providentiæ et usum ejus negemus. Alias eadem ratione dici posset Deum non juvare hominem lapsum ad habendum aliquem amorem ipsius Dei in hac vita, nisi ad supernaturalem et infusum, et consequenter quoties aliquem Dei amorem in nobis experimur, certum nobis esset talem amorem esse supernaturalem et charitatis, quod certe incredibile est, et parum consentaneum aliis dogmatibus fidei, præsertim illi quod non possumus esse certi de nostra justitia.

16. *Excluditur unus sensus assertionis tertiæ.* — Quocirca tribus modis intelligere possumus hominem lapsum diligere super omnia Deum ut finem naturalem. Primo, amando unico simplici actu Deum ut auctorem omnium bonorum gratiæ et naturæ. Ubi particula, *ut*, non rationem sub qua tendit actus in tale objectum, sed in quam tendit, demonstrat. Tunc autem ratio auctoris naturæ non est in illo objecto adæquata, sed inadæquata modo nostro intelligendi respectu talis amoris. Nihilominus tamen non potest sic diligi nisi modo supernaturali, quia totum illud objectum supernaturale est, et bonitas illa naturalis non amatur, nisi ut inclusa in una eminentissima bonitate, quæ omnia complectitur. Quapropter de hoc actu verum est esse proprium amorem charitatis, et non posse haberi sine habitu gratiæ vel præexistente, quando ille actus elicitur ab habitu charitatis, vel saltem consequente secundum ordinem naturæ, ut in primo actu, qui non elicitur ab habitu, sed ad illius infusionem dependit. Sed tamen nunc de hoc actu non tractamus.

17. *Excluditur alter sensus.* — Secundo modo potest diligi Deus ut finis naturalis in ratione objecti formalis, quod amatur, ita ut illa practica ratio sit adæquata objecto illius amo-

ris, quia præcise sub ea ratione consideratur et voluntati propouitur. Potest autem sic proponi et considerari per solam fidem, nam sicut hæc veritas, quod Deus sit auctor naturæ, licet possit cognosci ratione naturali, altiori modo cognoscitur et creditur per fidem, ita etiam sine interventu rationis naturalis potest fides proponere voluntati Deum ut finem naturalem tanquam super omnia diligendum; potest ergo etiam a voluntate sic amari. Tunc autem amor ille, si procedat ex conformitate illius ad regulas fidei et prudentiæ infusæ, in se est supernaturalis, et specie distinctus ab actu mere naturali, sicut de aliis etiam actibus moralium virtutum infusarum libro sequenti dicemus. Ideoque ad habitum charitatis pertinet, et ut connaturali modo fiat, illum, et consequenter etiam gratiam prærequirit. Nihilominus tamen ille actus esse potest ante habitum gratiæ ex solo auxilio divino, non tantum ordine naturæ, quod est fere certum, sed etiam duratione temporis, quod est valde probabile, quia ille actus, etiamsi charitatis sit, non est ita perfectus ut sit sufficiens dispositio ad gratiam, quia non perfecte convertit animam ad Deum et ad omnium præceptorum ejus observationem, ut ex supra dictis intelligi potest. Sed de hoc latius in materia de Justificatione, nam etiam nunc non de isto actu tractamus, quem supernaturalem esse supponimus.

18. *Tertius sensus in quo assertio tertiæ procedit.* — Tertio ergo modo diligitur Deus ut auctor naturæ secundum eam præcise rationem, per naturale lumen consideratus tanquam dignus ut diligatur super omnia secundum rectam rationem, sicut diligitur ab Angelo, vel potuit diligi ab homine integro ex puris naturalibus. Et hunc actum dicimus esse posse in homine lapsa a Deo convenienter adjuto, et nihilominus esse ejusdem speciei et substantiæ, cujus esset in natura integra, sicut observatio aliorum præceptorum naturalium est ejusdem speciei, licet fiat cum adjutorio gratiæ. Unde etiam fit talem actum in natura lapsa de se non postulare habitum infusum; imo neque fidem, quantum est ex natura ejus, quia per se non procedit ex fide. Atque ita concludimus habitualement gratiam non esse necessariam ad eliciendum hunc actum in natura lapsa; ostendimus enim hujusmodi necessitatem nulla ratione sufficienti aut fundamento nisi; sine ratione autem non est talis necessitas asserenda. Eo vel maxime quod etiam exemplo et ratione ostendimus inveniri hunc actum sine gratia habituali, sive antecedente,

sive consequente. Et hanc sententiam supponit Cajetan. 1. 2, quæst. 113, art. 2, nam propterea dixit posse hominem esse aversum a Deo ut fine supernaturali, et conversum ad eum ut finem naturæ. Sequitur Medina q. 109, art. 3, circa finem; Soto in 4, dist. 17, q. 2, art. 5, § *Contra hæc*; Vega, quæst. 10 de Justificat., et idem sentit Mars. in 1, quæst. 20, et in 2, quæst. 18; et favet D. Thomas in 2, dist. 33, quæst. 2, art. 2, ad 5, quæsi locum supra num. 6 tractavimus. Et bene exphat Molin. in Concord., quæst. 13, art. 13, d. 19, memb. 6, ratione 6, et disp. 33 et 36.

19. *Ad locum D. Thomæ in contrarium adductum in num. 4.* — Neque contra hanc resolutionem obstant quæ proponebantur; nam imprimis quod D. Thom. dixit art. 3, de homine lapsa, propter corruptionem naturæ, nisi sanetur per gratiam, etsi intelligatur de gratia habituali et de sanitate a culpa, referenda est non solum ad actum dilectionis, sed etiam ad executionem ejus per observantiam diuturnam omnium præceptorum naturalium. Et hoc sine dubio intendit D. Thomas in illa parte rationis suæ. Cum vero concludit de actu dilectionis, non dicit esse necessariam gratiam sanantem, sed *auxilium gratiæ sanantis*, quod certe minus est, et sæpe dari solet ante gratiam ipsam sanantem, ut per illud homo paulatim ad habituales gratias disponatur. Et hac ratione merito ita vocatur, etiamsi antecedat, quia propter illam datur, vel quia per illud incipit debilitas naturæ sanari, et ita communiter appellatur. De hoc ergo auxilio loquitur D. Thomas in conclusione illius art. 3, neque in hoc admittenda est æquiparatio inter singularem actum dilectionis, et diuturnam observantiam mandatorum, ut jam dictum est, et ratio differentiæ est assignata.

20. *Ad locum alterum in eodem num. 4.* — In alio vero loco, artic. 4, ad 3, non loquitur D. Thomas de præcepto dilectionis Dei ut ad puram naturam pertinet, et per actum naturalem impleri potest, sed de præcepto integro dilectionis Dei, prout Deut. 6, et Matth. 22, propositum est, quod ex charitate seu eum modo charitatis impleri debet. Et similiter loquitur de illo præcepto D. Thom. 1. 2, q. 100, art. 10, ubi hac ratione ad 3 dixit præceptum charitatis non impleri sine gratia, quod etiam de habituali verum est. Nunquam tamen dixit D. Thomas præceptum illud, prout nascitur ex pura natura, non posse fieri in natura lapsa per actum naturalem, aut non posse observari sine modo charitatis infusæ. Neque obstat

quod in dicta solut. ad 3, art. 4, cum dixisset præceptum illud secundum, quod ex charitate impletur, non fieri ex solis viribus naturalibus, adjungit: Ut ex supradictis patet, id est, ex dictis in articulo tertio, ut notatur in margine, ubi de puro actu dilectionis naturalis aperte loquitur; non, inquam, hoc obstat, quia fortasse non refert articulum tertium, sed ea, quæ proxime dixit in corpore articuli, ubi docuerat nullum præceptum impleri quoad modum charitatis sine gratia; vel, si referatur articulus tertius, addendum est, in solutione ad 1, ubi dixerat charitatem eminentius diligere Deum quam natura diligit. Nam in corpore articuli nihil dixerat de modo charitatis, sed de solo actu dilectionis naturalis, et ad illum requirit auxilium gratiæ, non propter modum charitatis, sic enim eadem esset ratio in Angelo et in homine integro, sed propter naturæ lapsæ corruptionem. Nisi velimus loqui de modo charitatis, non secundum adæquationem, sed secundum proportionem; quia sicut dilectio charitatis Dei est super omnia simpliciter, ita dilectio naturalis est super omnia in suo ordine. Sic autem ille modus non requirit gratiam ex se, et ex objecto suo, sed tantum per accidens in lapsa natura propter debilitatem ejus, quæ per auxilium sine habitu adjuvari potest.

21. *Assertio quarta in ordine.* — *Auxilium naturale sufficere ad dictum amorem.* — Occurrit autem ulterius inquirendum quale sit hoc auxilium, id est, an sit necessarium auxilium ordinis supernaturalis, vel sufficiat aliquod auxilium naturalis ordinis. Videri enim potest esse necessarium auxilium supernaturalis ordinis, quia non datur nisi mediante fide, quæ est fundamentum totius justitiæ, et omnium quæ ad illam conducunt. Unde per illam etiam impetrantur omnia auxilia quæ in hac vita ad bene vivendum dantur, inter quæ non immerito numerandum est hoc auxilium. Nihilominus dicendum est auxilium, præcise necessarium ad habendum hunc actum in natura lapsa, esse ordinis naturalis. Probat, quia auxilia suapte natura ordinis supernaturalis solum sunt per se necessaria ad actus ejusdem ordinis, ut sunt actus virtutum infusarum et donorum; at vero hic actus dilectionis non est ordinis supernaturalis, neque elicitur a virtute infusa charitatis, ut explicatum est; ergo de se non requirit auxilium ordinis supernaturalis. Aliunde vero ad supplendum defectum ex naturæ corruptione contractum sufficiunt auxilia ordinis naturalis, quibus vel magis illustre-

tur intellectus in naturalibus, vel voluntas in eodem ordine confortetur; ergo. Et declaratur amplius, quia hoc auxilium non postulat quam principium per se necessarium talis actus, quia jam ostensum est voluntatem habere sufficientes vires naturales quibus sit principium proximum et per se hujusmodi actus, nisi ex corruptione naturæ esset impedita. Postulatur ergo hoc auxilium solum ad tollenda impedimenta, vel ad augendam cognitionem naturalem, quatenus practice potest excitare voluntatem, aut ad augendam ipsam inclinationem voluntatis per habitum aliquem per accidens inditum, vel per motionem proportionatam; hæc autem omnia pertinent ad ordinem naturalem, et per providentiam gratuitam ejusdem ordinis fieri possunt; ergo ad hunc effectum auxilium ordinis naturalis sufficiens est.

22. *Ad rationem dubitandi in præcedenti numero.* — Unde ad rationem dubitandi respondetur fundamentum fidei non esse necessarium ad hoc auxilium, ex natura rei. Nam cum hoc auxilium ad effectum mere naturalem ordinetur, id est, ad naturalem dilectionem per se fundatam in cognitione naturali, non est cur ad illam sit necessaria aliqua supernaturalis cognitio, saltem ex natura rei. Unde capite sequenti dicemus posse hoc adjutorium dari homini in puris naturalibus, in quo nulla sit fidei cognitio. An vero in natura lapsa statuerit Deus non dare hoc auxilium infidelibus incertum est, quia pendet ex voluntate Dei, quæ nobis non est revelata, nec per discursum aut effectus potest satis investigari. Conjectura enim facta non probat pendere hoc auxilium a fide, sed probat solum non posse inpetrari sine fide, quod verum est; posset tamen Deus illud gratis dare. Neque ex eo quod infidelis juvetur ad talem actum, et illum eliciat, sequitur aliquod absurdum, quia talis actus nec pars esset justitiæ, nec initium ejus, nec meritum alienjus auxilii supernaturalis ordinis, sed solum sequitur quod talis actus possit esse simul cum peccato habituali, quod judicamus non esse inconveniens, prout ostendimus. Et nihilominus probabile est Deum non dare hoc auxilium hominibus infidelibus, quia in suo ordine est valde perfectum et insigne beneficium, quo infideles in eo stato sunt prorsus indigni, non solum ratione culpæ, sed quia illud est et quasi inutile, quia neque ad felicitatem, neque ad fidem comparandam illis deserviret, unde esset voluti sanctum dare canibus. Quanquam quia rationes divinæ providentiæ

plures sunt, quam nos assequi possimus, satius est hoc ejus dispositioni committere.

23. *Videtur pro prædicto auxilio sufficere spem obtinendi a Deo adjutorium ad servanda præcepta naturalia in futurum.* — Ultimo potest in hoc puncto interrogare aliquis an ad hunc actum sufficiat spes, ut ita dicam, obtinendi auxilium in futurum ad servanda omnia præcepta longo tempore, vel requiratur aliud auxilium quod tunc detur, quando elicitur talis actus dilectionis. Quod enim hoc sufficiat, hoc discursu videtur probabile fieri, quia diximus totam impotentiam habendi hunc actum in natura lapsa per proprias vires, oriri ex impotentia hominis lapsi ad observandam diu totam legem viribus suis. Ponamus ergo hominem credere et sperare fore adjuvandum a Deo ad observationem diuturnam totius legis per specialio rem providentiam et protectionem ordinis naturalis vel supernaturalis, sicut nunc fideles credunt, et posset infidelis, verbi gratia, hæreticus, aut etiam Judæus, idem credere per fidem humanam, et consequenter etiam sperare per fiduciam quamdam tali fidei proportionatam. In homine ergo ita disposito, propositum absolutum et efficax servandi omnia præcepta non est de objecto impossibili, quia id simpliciter possumus, et ideo quando tale adjutorium speratur, objectum merito judicatur et proponitur ut simpliciter possibile; ergo ipsum propositum de tali objecto etiam est possibile per vires naturales voluntatis. Nam quod illa observantia mandatorum fiat possibilis per auxilium, non sufficit ut objectum illud in ordine ad propositum excedat vires voluntatis, quia semper est objectum naturale, et sub ratione alienjus honestatis naturalis proponitur, sicut aliqui peccatores absolute et efficaciter proponunt facere quod tantum cum auxilio demonis facere possunt. Est etiam optimum exemplum de Adamo, qui ratione justitiæ originalis, si in ea perseverasset, legis mandata servare potuisset, et ideo in statu illo integræ naturæ potuit suo arbitrio habere absolutum propositum servandi mandata, quia jam habebat adjutorium sufficiens quo posset illa servare; quamvis id non esset facturus sine adjutorio Dei naturæ non debito. Ipsum enim donum justitiæ sen integritatis naturæ erat donum Dei non debitum naturæ, et erat adjutorium ad servanda mandata. Ergo similiter in proposito, quamvis auxilium ad servanda mandata futurum sit gratuitum, ex suppositione illius facta per fidem et spem, poterit liberum arbitrium tale propositum concii-

pere. Unde ulterius fit ut etiam possit Deum super omnia amare, quia tota difficultas vel impotentia amoris, in difficultate vel impotentia illud propositum concipiendi consistere dicebatur.

24. *Explicatio superioris doctrinæ.* — *Notandum.* — Et declaratur ulterius, nam si suppositio vera sit, et Deus postea conferat adiutorium speratum, poterit amor ille esse efficax, etiam quoad perseverantiam et executionem; ergo eadem ratione potuit esse efficax in proposito, et absoluta voluntate. Nec tamen in eo casu fit amor sine aliquo adiutorio Dei naturæ non debito. Nam adiutorium illud, quod dandum speratur ad implendam totam legem, ut prius oblatum, est quoddam adiutorium ad amorem illum eliciendum, non solum quia excitat voluntatem per modum beneficii promissi, sed etiam quia hic actus dilectionis non requirit auxilium physicum ex parte potentiæ ut eliciatur, quia naturalis est, et de se proportionatus viribus arbitrii, ut supra dictum est, sed indiget auxilio, quod ita in re postea juvet ad executionem amoris, ut, prius apprehensum et ut futurum repræsentatum, reddat objectum amoris possibile, ac subinde amabile amore absoluto et efficaci; unde etiam fides ipsa et fiducia de tali auxilio futuro multum juvat ut voluntas ad talem amorem eliciendum confortetur. Nam hoc adiutorium, ut etiam dixi, non est necessarium ut principium physicum et per se talis actus, sed ut moraliter juvet, tollendo impedimenta et erigendo arbitrium: fides autem illa et fiducia hoc optime præstat, ut per se clarum videtur. Eo vero melius juvabunt, quo fides illa et fiducia certior et firmior fuerit. Ideoque etiam fides et spes Christiana optime possunt ad illum actum juvare, nam saepe actus supernaturales etiam ad naturales juvant. Oportet tamen ut, non obstante illa fide et spe supernaturali, amor feratur in objectum sub limitata ratione naturali, alioqui amor non erit naturalis, de quo loquimur, sed supernaturalis, et præter fidem et spem indigebit proprio principio supernaturali physice adjuvante potentiam ad illum eliciendum, quod ad amorem naturalem non est necessarium, ut dixi. At vero si fides de adiutorio futuro sit tantum humana, ex aliqua probabili ratione, vel humana auctoritate concepta, necesse est etiam ut fiducia sit infirma, et formidans ne credulitas illa falsa sit et postea subsidium speratum desit, et tunc etiam amor consequenter erit minus efficax et absolutus, et de se virtualementem conditionem includens, si

adiutorium non desit, et si vera sit promissio, et ex hac parte amor erit imperfectus, etiamsi aliunde super omnia, et, secundum præsentem dispositionem, de se efficax et absolutus esse videatur.

CAPUT XXXVI.

QUID SENTIENDUM SIT DE POTESTATE HOMINIS IN PURIS NATURALIBUS AD AMANDUM DEUM FINEM NATURÆ SUPER OMNIA ?

1. *Primum punctum hujus capituli, de quo Alvarez, lib. 6, disp. 31, dub. ultim.* — Hæc difficultas, quæ in cap. 32, num. 2, posita fuerat, ex dietis in superioribus est satis expedita; ut tamen melius res ipsa intelligatur, et quædam opinio quæ mihi nova visa est diligenter examinetur, quo breviter tractabo. Primum est an homo creatus in puris naturalibus posset per solas vires liberi arbitrii diligere Deum super omnia. Aliud est, si non potuit viribus arbitrii, an per aliquod speciale Dei adiutorium posset. Circa primum quidam modernus et gravis scriptor de Auxiliis divinæ gratiæ, affirmat potuisse hominem in illo statu ex facultate naturæ pro aliquo brevi tempore producere actum dilectionis Dei super omnia. Dicitque hæc esse aliorum Thomistarum sententiam, nullum tamen in particulari refert. Fundamentum ejus est, quasi a posteriori vel extrinseco signo, quia homo in illo statu haberet præceptum diligendi Deum super omnia, ut est auctor naturæ; ergo posset illud implere, quia præceptum non datur de actu impossibili; tunc autem non posset implere per amicos, hoc est, per vires gratiæ, quia illas non haberet, nec Deus esset paratus ad dandum eas, quia supponimus creasse illum in puris naturalibus, cui statui non solum non debentur vires gratiæ, verum etiam illi repugnant: nam includit carentiam donorum gratiæ, quam particula illa, *in puris*, indicat, ut Prolegomeno quarto visum est; ergo oportet dicere potuisse hominem in illo statu implere suis viribus præceptum diligendi Deum super omnia, saltem per unum vel alium actum, vel tempore brevi. Quia vero idem auctor, in eadem disputatione, negaverat hominem lapsum posse habere suis viribus similem actum, coactus est dicere naturales vires debiliores esse in homine lapso quam essent in puris naturalibus. Et ita ratio a priori hujus sententiæ erit, quia in puris naturalibus humana natura non esset vulnerata, et ideo haberet naturales vires

sufficientes ad eliciendum quemcumque actum sibi connaturalem, et consentaneum dictamini naturalis rationis et inclinationi naturali ipsius voluntatis; in natura autem lapsa non semper hoc potest, quia est vulnerata. Potestque pro hac sententia allegari D. Thomas, quodlibeto primo, articulo octavo, nam ibi expresse tam de homine in puris naturalibus quam de Angelo docet potuisse naturaliter Deum super omnia diligere. Idem habet Abulens. Matthæi decimo-nono, quæst. 177.

2. *Vera dicti puncti resolutio.* — *Medina et alii Thomistæ consentiunt.* — Contrariam sententiam censeo veram in hoc sensu intellectam, quod homo creatus in puris naturalibus non magis posset per solas vires arbitrii diligere super omnia Deum ut finem naturæ, quam nunc possit homo lapsus. Unde, sicut non potest pro brevi tempore aut momento elicere nunc unum actum dilectionis omnino absolutum et efficacem in sensu supra explicato, et sicut nunc potest elicere aliquem actum imperfectum, ita tunc posset, et non perfectius, diligere. Hanc opinionem tradit Medina in introductione ad materiam de gratia in § *Dubitatur ergo*, et in art. 3, § *De dilectione Dei naturali*, quem dictus auctor allegat, sed omittit sumpsisse Medinam hanc opinionem ex Cajetano, ibi, artic. 2; et Soto, lib. 4 de Natur. et grat., cap. 2 et 3, et expresse idem docet Conradus, dicto art. 3, circa finem corporis, versic. *Nota tamen*; ubi ait, *cum dicimus naturam integram posse diligere Deum super omnia, intelligendum id esse non de natura sibi relicta: quia et illa (inquit) esset ad se recurata propter inordinationem sensualitatis naturalem, et propter compositionem naturæ humanæ ex ratione et sensualitate.* In quibus verbis clare sentit ex hac compositione et repugnantia appetituum, ut naturalis esset, seclusa culpa, non minus sequi illam impotentiam diligendi Deum super omnia, quam nunc sequatur ex eadem rebellionem carnis, quæ est pœna peccati.

3. *Imo et ipse D. Thomas.* — Unde tacite inducit Conradus D. Thomam pro hac sententia, quia ratio D. Thomæ æque de illo statu procedit. Et est quidem probabile divum Thomam nihil dixisse de homine in puris naturalibus, quia illum sub homine lapsa comprehendit secundum rationis paritatem. Neque enim credendum est vel illum statum hominis ignorasse, vel incompletam doctrinam tradidisse; comprehendit ergo illum sub altero membro hominis integri, aut lapsi; non

autem sub priori, alioqui, cum, articulo quarto et octavo, dicit hominem integrum potuisse servare totam legem naturæ et vitare omnia peccata illi contraria, idem de homine puro intelligeret, quod absurdissimum est; ergo dicendum est in his quæstionibus, et quoad hos effectus idem sensisse de homine in puris naturalibus quod de homine lapsa. Quod aliter confirmatur, quia si affirmatio est causa adæquata affirmationis, negatio est causa negationis; sed ratio adæquata ob quam homo in statu innocentiae poterat diligere Deum super omnia, et servare omnia mandata, erat naturæ integritas, et debita subordinatio appetituum; ergo carentia hujus integritatis est causa ut non possit homo suis viribus servare omnia præcepta, et diligere Deum super omnia; sed in puris naturalibus homo careret illa integritate; ergo etiam careret illa potestate. Unde in citato quodlibeto, de homine in statu naturæ integræ divus Thomas loquitur, quem considerat separatum a statu gratiæ, et in illo sensu vocat, *purorum naturalium*. Et in eodem sensu loquitur Abulensis.

4. *Accedit ratio destruendi fundamentum oppositum in vim. 1.* — Ratio denique hujus sententiæ est directe contraria fundamento principali alterius sententiæ, nimirum, vires naturales liberi arbitrii ad operandum bonum, non fuisse futuras majores in statu purorum naturalium, quam sint in natura lapsa, vel, quod perinde est, in statu naturæ lapsæ non esse minores quam fuissent in pura natura non integra, quod principium satis, ut opinor, in Prolegomeno quarto ostensum est. Ex illo autem evidenter colligitur non posse hominem suis viribus elicere perfectiorem amorem Dei in uno statu quam in alio, quia æqualis causa potest, si vult, æqualiter operari, nec potest intelligi quod vires sint æquales, non solum physice, sed etiam moraliter et spectatis omnibus quæ operationem possint impedire vel juvare (ita enim loquimur), et quod aliquis effectus sit possibilis per tales vires in uno statu et non in alio; ergo. Et confirmatur præterea, quia tota ratio ob quam non potest nunc homo lapsus diligere Deum super omnia, est, quia non potest longo tempore servare omnia præcepta naturalia; sed homo etiam in puris naturalibus non posset diu servare omnia præcepta naturalia; ergo nec potest Deum simpliciter super omnia diligere absoluto et efficaci actu. Consequentia tenet ex identitate rationis, quam supra ad objectum reduximus, et hæc potest eodem modo applicari. Minor au-

tem certa videtur, si ad præcipuam causam illius impotentia, quæ est caro concupiscens adversus spiritum, respiciamus. Unde quod Paulus ait: *Quis me liberabit a corpore mortis hujus*, etc., suo modo cum proportionem locum haberet in statu puræ naturæ. Et ita minor illa communiter recepta est, eamque non negat, sed potius supponit dictus auctor, dum ait posse hominem in puris naturalibus brevi tempore elicere actum dilectionis super omnia. Dicens enim, *brevi tempore*, indicat longo tempore non potuisse, et consequenter etiam non posse longo tempore servare omnia præcepta: nam profecto, si longo tempore posset servare cætera omnia præcepta simul, eo ipso sine difficultate posset eodem tempore diligere Deum super omnia.

5 *Excusationes præcluduntur.* — Dicetur fortasse ad diligendum Deum super omnia modico tempore, satis esse modico tempore servare omnia præcepta. Sed contra, quia si hoc ita est, etiam in natura lapsa potest homo servare modico tempore omnia præcepta, ut omnes pro comperto habent, quia fieri potest ut modico tempore non occurrant graves tentationes contra præcepta negativa, neque tot occurrant affirmativa, ut sine magno gravamine servari non possint; ergo illo brevi tempore poterit homo lapsus æque Deum diligere, ac homo in puris naturalibus, quod idem auctor negat. Quod si fortasse dicat hominem in utroque statu posse servare omnia præcepta modico tempore, tamen in natura lapsa illud tempus rarius esse et brevius: hoc imprimis gratis dicetur; unde enim hoc sciri potest, aut quomodo potest fundari? Et deinde non potest dici consequenter, nam idem auctor simpliciter negat posse hominem lapsum habere talem amorem per minimum tempus, etiam per instans. Unde sicut in homine lapsa non satis est posse non peccare per breve tempus, ut in illo tempore possit habere perfectum amorem Dei super omnia, quia amor simpliciter et absolute super omnia non sistit in tempore pro quo durat, sed extenditur ad totum futurum tempus per absolutum propositum servandi semper præcepta, quod habere non potest suis viribus qui non potest diu servare omnia præcepta; ita in hoc æqualis ratio de homine in puris naturalibus intercedit.

6. *Fundamentum contrarium in num. 1 retorquetur imprimis in auctorem.* — Argumentum autem sumptum ex præcepto naturali imprimis retorquetur hoc modo. Ponamus hominem in puris naturalibus creatum, prius-

quam ullum actum dilectionis Dei eliciat, peccare mortaliter, verbi gratia, per furtum, certe ille homo propter peccatum non fuit liberatus ab obligatione præcepti naturalis diligendi Deum; imo tunc potest instantius obligari propter offensam commissam; quæro ergo de illo homine post illud peccatum an posset diligere Deum super omnia, necne? Nam consequenter non potest id affirmari, quia si homo lapsus nunc non potest, cur posset ille jam lapsus, cum peccatum ejus de se non minus lædat naturam, quam peccatum originale? Nam quod nunc præcesserit justitia et integritas naturæ, quam abstulit peccatum originis, nihil refert, quia eandem auferret peccatum puri hominis, si in subjecto invenisset, in reliquis vero æque avertit a Deo et maculat animam; ergo incredibile est illum hominem jam lapsum potuisse perfectius diligere Deum suis viribus, quam nunc valeat homo lapsus; ut omittam, rationes a nobis factas de homine lapsa posse ad illum facile applicari. Ratio autem qua movetur idem auctor ad id sentiendum de homine lapsa, scilicet, quia dilectio super omnia repugnat cum peccato mortali, illum etiam cogit ut idem dicat de homine creato in puris naturalibus post lapsum ejus. Si autem ille homo jam lapsus non potest diligere Deum super omnia, jam obligabitur præcepto, quod non potest implere; idem ergo dici poterit de eodem homine ante lapsum. Quod si quis dicat ad præceptum satis fuisse quod in principio esset possibile, quamvis per culpam hominis factum sit impossibile, contra hoc est, quia semper repugnat præceptum obligare ad id quod in presenti est simpliciter impossibile, etiamsi per culpam impotentia successerit, ut obligari non potest ad recitandum qui caret oculis, etiamsi voluntarie et per culpam eos sibi eruerit; ergo vel ille homo jam non manet obligatus tali præcepto, quod incredibile est, vel retinet potestatem servandi illud, si eam prius habuit, quod est per se longe verisimilius, quia solum unum furtum non potuit ab homine auferre potestatem naturalem diligendi Deum, maxime cum posset iterum displicere ipsum furtum, et nullum relinqui habitum, qui boni operationem difficiliorem in futurum reddat.

7. *Responsio in forma ad prædictum fundamentum.* — Ad argumentum ergo imprimis dici posset præceptum naturale diligendi Deum, prout affirmativum est, solum obligare ad elicendum actum dilectionis, juxta mensuram naturalium virium liberi arbitrii, ita ut

homo pro aliquo instanti vel momento faciat quantum possit ad diligendum Deum super omnia, et tunc faceret quidem actum aliquo modo absolutum, licet non omnino neque simpliciter efficacem, sicut de homine lapsa explicuimus, et nihilominus sufficienter implet præceptum, quia facit quod potest, et nihil amplius tenetur. Hanc responsionem attigit Medina dicto artic. 3, in fine, et illam non reprobatur, et mihi videtur in rigore quoad hanc partem sufficiens. Nam quod statim addit Medina, posse illum hominem implere hoc præceptum, diligendo Deum super omnia, cum primum pervenit ad usum rationis, si intelligat de dilectione perfectiori, id est, omnino absoluta et efficaci, sibi ipsi contradicit; non enim haberet homo in puris naturalibus majorem potestatem diligendi Deum in primo instanti usus rationis, quam in reliquis, ut per se clarum est. Si vero loquatur de dilectione imperfecta, eadem est responsio. Quam etiam multi putant etiam in homine lapsa posse aliquando esse necessariam. Nam fieri potest ut omnino ignoret fidem et totum ordinem gratiæ, etiam invincibiliter, et quod, per scientiam et humanam traditionem, veri Dei naturalem cognitionem assecutus sit, et in aliqua opportunitate obligari præcepto naturali diligendi Deum, etiamsi nullum gratiæ auxilium tunc habere supponatur, nec possit ad illam se præparare aut illam inquirere, et nihilominus non obligatur ad impossibile, quia diligendo prout poterit, præcepto satisfaciet. Et hoc insinuavit Bannez 2. 2, quæst. 10, art. 1, ad quoddam 4 argumentum. Si vero consideretur præceptum dilectionis quatenus includit præceptum negativum nunquam committendi aliquid divinæ amicitiae contrarium, sic non tam est præceptum speciale eliciendi actum dilectionis, quam generale inclusum in omnibus præceptis, quorum observantia necessaria est ad perseverandum in dilectione. Et sic incidimus in aliam difficultatem omnibus communem, et supra cap. 28 tractatam, quomodo possit lex naturalis obligare hominem, in puris naturalibus constitutum, tot præceptis, ut non possit naturalibus viribus omnia illa per totum vitæ cursum implere, quam ibi prout potuimus, expedivimus, et ex ibi dictis colligi potest quid in presenti dicendum sit.

8. *Ad secundum punctum hujus capituli positum in num. 1.* — Unde etiam potest facile expediri secundum punctum supra positum, et simul aliter responderi ad difficultatem de præcepto dilectionis. Dicimus enim: licet ho-

mo in puris naturalibus non potuisset solis viribus arbitrii perfecte et efficaciter Deum, finem naturalem, super omnia diligere, nihilominus potuisse id facere cum aliquo adjutorio Dei illi statui proportionato, quod (ut verisimiliter credimus) non fuisset Deus denegaturus, non tam per modum gratiæ quam per modum alicujus naturalis retributionis. Hoc sequitur consequenter ex dictis in capite 28; nam ibi diximus non defuturum tunc auxilium accommodatum ad servandam totam legem naturæ longo tempore. Eadem autem est ratio de dilectione Dei super omnia; imo, eo ipso quod ille homo speraret tale adjutorium ad servanda præcepta, posset absolute id proponere, et consequenter etiam amare, juxta dicta in fine capitis præcedentis. Deinde si Deus juvaret tunc ad servanda omnia præcepta, etiam juvaret ad vincendas graves tentationes concupiscentiæ, quia regulariter non aliter servantur præcepta; cur ergo non etiam juvaret ad sui dilectionem? Præterea, si homo sic conditus et innocens faceret quod in se est, diligendo Deum saltem imperfecte, profecto congruentissimum esset et naturali providentiæ consentaneum, ut Deus aliquod bonum ejusdem ordinis pro tali amore retribuere, et ita absolute fatetur Medina, dicta q. 109, art. 2, circa finem, § penult., et art. 3, circa finem, ad 5. Nullum autem præmium cogitari potest magis proportionatum illi amori, quam adjutorium ad perficiendum et constanter exequendum illum, quia hoc adjutorium per se non est ordinis supernaturalis, ut supra vidimus, neque oporteret dari per fidem, sed per naturalia media, vel dispositiones illi statui proportionatas; quæ omnia maxime procedunt de illo homine priusquam peccaret. Verumtamen etiamsi peccasset et postea converteretur ad Deum, saltem imperfecte et prout posset, pie credi potest non fuisse illi defuturum Deum, vel remittendo offensam, vel juvando ad perfectius diligendum, et se disponendum ad talem remissionem, ut in materia de Pen., disp. 3, sect. 7, notavimus, et notavit Medina dicto a. 2, circa finem.

9. *Progreditur explicatio ejusdem puncti.* — Quamvis ergo concedamus, naturale præceptum de dilectione Dei de se obligare ad absolutum et efficacem amorem Dei super omnia, posset ab homine constituto in puris naturalibus impleri, non per solas vires naturæ, sed cum aliquo adjutorio Dei modo explicato. Neque hoc excedit statum purorum naturalium, vel illum destruit, nam ille status, ut in libro 1

dixi, excluderet ordinationem ad finem supernaturalē, et consequenter etiam omnia dona gratiæ supernaturalis excluderet, non tamen esset aliena ab illo statu ornatissima Dei providentia, qua et reddit convenientia præmia bene operantibus, sicut reddit supplicia peccantibus, et subvenit indigentibus, præsertim facientibus quod in se est, et unicuique creaturæ providet juxta suam capacitatem. Neque enim putandum est in naturali providentia, etiam secluso ordine gratiæ, non fuisse futurum discrimen inter rationalia et irrationalia; nam quod Paulus dixit: *Numquid de bobus cura est Deo*, utique comparatione hominis, verum est, non solum de hominibus per providentiam gratiæ gubernatis, sed etiam de illis sub solo ordine providentiæ naturalis, et ordine ad solum finem naturalem constitutis; quia ad sapientiam et providentiam optimi gubernatoris pertinet, non omnibus eodem modo, sed singulis, juxta uniuscujusque capacitatem, providere. Unde etiam philosophi cognoverunt Deum perfectiori modo habere curam hominum quam brutorum, et inter homines peculiari benevolentia prosequi colentes se et honeste viventes. Igitur intra latitudinem hujus providentiæ contineretur adjutorium illud ad diligendum Deum perfecte intra ordinem naturæ, et ad alia media præstanda, sine quibus naturalis beatitudo obtineri non posset. Quibus consentanea est illa sententia Aristotelis 1 Ethic., capit. 9: *Si aliquid aliud Deorum est munus hominibus, consentaneum est rationi felicitatem ab iis ipsis dari, et eo magis quo cæteris humanis bonis est præstabilius.*

CAPUT XXXVII.

UTRUM SIT ALIQUIS ALIUS ACTUS VIRTUTIS NATURALIS SEU ACQUISITÆ PRÆTER AMOREM DEI, QUI PROPTER DIFFICULTATEM SUAM FIERI NON POSSIT SINE GRATIA IN STATU NATURÆ LAPSÆ ?

1. *Arguitur pro parte negativa ex D. Thoma.*—Hæc quæstio locum non habet in natura integra, nam cum dictum sit in eo statu potuisse hominem suis viribus diligere Deum auctorem naturæ super omnia et potuisse omnia præcepta naturalia servare quovis tempore, et omnia peccata contraria vitare; manifestum est nullum posse assignari opus virtutis naturalis, quod in eo statu fieri non posset viribus liberi arbitrii, quia extrinsecæ difficultates graves seu insuperabiles alienæ erant ab illo statu, difficultas autem intrinseca in nullo actu major reperiri potest, quam in amore Dei super

omnia, et absoluto proposito servandi omnia præcepta. Statum autem purorum naturalium statui naturæ lapsæ quoad hoc æquiparamus, ut satis ostendimus, et ideo de solo statu naturæ lapsæ in hoc puncto tractamus. Ratio ergo dubitandi esse potest, quia D. Thomas singulariter de solo actu dilectionis Dei super omnia dixit, non posse fieri ab hominibus lapsis sine gratia; ergo sensit hoc esse singulare in illa propter specialem difficultatem ejus. Præsertim quia statim in art. 4 et 8 docet singula præcepta naturalia servari posse, seu vitari singula peccata illis contraria, licet non omnia collective, sine gratia, nullumque excipit, sed quasi supponit exceptionem factam de sola dilectione; ergo exceptio firmat regulam in contrarium, ut propter nullum singularem actum sit necessaria gratia. Accedit tandem quod in ipso amore difficillime ostenditur tanta difficultas quæ moralem impossibilitatem inducat; et ratio qua tandem illam ostendimus, in solo amore super omnia locum habet; ergo signum est hanc necessitatem propriam esse illius amoris.

2. *Pars affirmativa variis exemplis suadetur.*—*Primum exemplum de actu pœnitentiæ.*—*Secundum, de actu amandi proximum absolute.*—In contrarium autem est, quia multi et graves auctores extendunt hanc necessitatem ad quæcumque opera virtutis mediocrem difficultatem habentia, quod præsertim indicant Bellarminus, Vega, et alii supra allegati, circa victoriam gravium tentationum: numerarique solent actus sequentes. Primo, actus pœnitentiæ, qui sit perfecta detestatio de peccato, præsertim propter Deum, nam hic actus haberi non potest sine gratia, cum sit quædam contritio; nam etiam attritio et dolor ex timore non potest sine gratia fieri, ut docet Concilium Tridentinum, session. 6, capite septimo, et session. 14, cap. 4; ergo multo minus detestatio ex amore Dei poterit fieri sine gratia. Secundus est actus amoris proximi, quem, ex præcepto naturali, tenemur diligere sicut nos ipsos, quod valde difficile est, quia hic amor includit illa duo præcipua: *Quæcumque vultis ut faciant vobis homines, hoc facite illis*, Matth. 7; et: *Quod tibi non vis, alteri non facias*, Tobiaë 4, in quibus lex fere tota posita est, ut Christus dixit; propter quod dixit Paulus ad Roman. 13: *Qui diligit proximum, legem implevit.* At vero nemo potest implere legem sine gratia; ergo neque hanc dilectionem habere.

3. *Tertium de speciali actu amandi inimicos.*

— Tertius et difficilior actus est dilectio inimicorum: nam cum illam commendaret Christus, Matth. 5, dicit illam non carituram mercede apud Patrem; significans semper esse actum dignum mercede supernaturali, ac subinde ex gratia; unde subjungit: *Si diligatis eos qui vos diligunt, quam mercedem habebitis, nonne et ethnici hoc faciunt?* quasi dicat dilectionem amicorum posse ab ethnicis fieri, quia est accomodata naturæ, dilectionem autem inimicorum adeo esse difficilem, ut per naturam fieri non possit, et ideo in ethnicis et publicanis non inveniri. Unde Hieronymus ibi dixit, *multos imbecillitate sua, non sanctorum viribus, præceptum illud æstimantes putare illud esse impossibile, quia diligere inimicum plus est quam humana natura patiatur.* Quibus ipse virtute respondet, *Christum non impossibilia, sed perfecta præcipere*: quod exemplis Sanctorum confirmat. Unde virtute concedit illud tantum esse possibile per vires sanctorum, quæ sunt vires gratiæ. Amor autem inimicorum moralis et naturalis est, et cadere potest sub præceptum mere naturale.

4. *Quartum de custodia castitatis.*—*Quintum de speciali custodia virginitatis.*—*Sextum de actu profitendi paupertatem.*—*Septimum de profusione vitæ pro non peccando contra legem naturalem.*— Quartum exemplum esse potest de observatione continentiæ, de qua, Sapient. 8, dixit Sapiens: *Scivi, quoniam aliter non possum esse continens, nisi Deus det, et hoc ipsum erat sapientiæ, scire cujus esset hoc donum.* At continentia moralis actus est, nam de continentia castitatis intellexit illum locum Augustinus, lib. de Continent., cap. 17, et epist. 89, quæst. 2, et epist. 95 et 130; ergo aliquis specialis actus moralis est impossibilis sine gratia. Quinto, augetur hæc difficultas in custodia virginitatis, quæ licet non sit sub præcepto, nihilominus est actus moraliter bonus, et ex objecto suo naturalis, et nihilominus haberi non posse sine gratia significavit Paulus, 1 ad Cor. 7, dicens esse donum Dei; et Christus Matth. 19, dicens: *Non omnes capiunt hoc verbum, sed quibus datum est, ut ponderavit Augustinus in lib. de Continent., capite primo, et lib. de Gestis Palæstinae, capite decimo, alias de primo tertio.* Sexto adjungi etiam hic potest professio paupertatis voluntariæ, quæ etiam est actus naturalis et moralis, licet non sit sub præcepto, sed sub consilio, quod ratione naturali cognosci potest, et nihilominus fieri non potest per naturales vires, nam pro-

pter illud dixit Christus, Matth. decimo-nono: *Apud homines impossibile est, apud Deum autem omnia possibilia sunt.* Tandem afferri potest in exemplum actus dandi vitam pro non violando uno præcepto naturali: nam hoc ipsum est consentaneum rationi naturali, ac subinde est actus ex suo genere naturalis, et nihilominus fieri non potest sine auxilio gratiæ, ut videtur indubitatum.

5. *Assertio generalis bipartita.*—*Unde probetur posterior, quæ simpliciter asserenda est.*— In hoc puncto breviter dico aliquos esse posse actus morales et ordinis naturalis qui propter difficultatem suam fieri non possint cum pura et integra honestate morali sine auxilio gratiæ, hanc vero difficultatem semper reduci ad alteram ex duabus supra tractatis, quæ sunt aut difficultas ex gravi tentatione proveniens, aut diuturna perseverantia cum uniformitate bene operandi, vel in executione facta, vel objectiva proposita, ut actu absoluto et efficaci ametur. Si vero neutrum ex his impedimentis interveniat, non erit necessaria gratia ad aliquem singularem actum naturalem et moralem bonum, aliquando, vel saltem pro brevi tempore, faciendum. Priorem partem, de actu difficili altero ex illis duobus modis, probant quæ supra de necessitate gratiæ ad vincendam tentationem gravem, et ad diligendum Deum finem naturæ actu perfecto diximus: et eam confirmant exempla adducta, ut magis statim declarabimus. Posteriorem vero partem suadent priores rationes dubitandi; et præterea quia actus naturalis non est per se impossibilis viribus naturæ, sed ex accidenti, propter impedimenta occurrentia, ut supra ostensum est: hæc autem impedimenta nulla esse possunt, nisi aut tentationes graves ortæ vel adjutæ ab inordinata concupiscentia, aut tanta continuitas et perseverantia bene operandi, ut moraliter excedat vigilantiam et constantiam humanæ diligentiae in corpore mortali et suis viribus relicto, neque alia radix hujus difficultatis hactenus est ratione investigata, aut exemplis ostendi potest. Imo si quis recte consideret, etiam posterior difficultas, quæ est in diuturna boni operatione, provenit quodammodo ex tentationibus occurrentibus, quæ vel affectum vel considerationem ab honestate avertunt; solum est differentia quod prior difficultas provenit ex singulari tentatione gravi, posterior vero potest esse sine hujus modi tentatione gravi, licet non contingat sine successione plurium medicorum, quarum victoria ipsa continuitate

gravis et difficilis redditur. Quæ omnia discurrando per exempla adducta clariora fient.

6. *Discutitur primum exemplum de pœnitentia in num. 2 allatum.*—Primum erat de actu contritionis vel attritionis, quem in substantia esse naturalem, si ex naturali motivo concipiatur, et ideo viribus naturæ sine auxilio gratiæ fieri posse, multi Theologi docuerunt, ut tractavi in 4 tom., disp. 3, section. 6, quorum sententiam defendere et approbare visus est Molina in Concordia, quæst. 14, artic. 13, disp. 14, fere per totam, quem in hac parte acriter moderni impugnaverunt. Verumtamen quia de hoc puncto dixi in citato loco de Pœnitent., section. 7, et quia non habet novam difficultatem ad hunc locum pertinentem, brevissime illud expediam. Primo enim supponimus non esse sermonem de actu pœnitentiæ, qui esse possit sufficiens dispositio ad gratiam, seu (quod perinde est) qui fiat, *sicut oportet* ad justificationem consequendam. Nam de hoc actu certum est esse ita supernaturalem, ut non possit fieri sine auxilio gratiæ; id enim aperte definit Concilium Tridentinum, session. 6, capit. 5, et canon. 3, et session. 14, capit. 4, et probatum est late dicta disp. 3, section. 6. Quod aliqui limitant ad illum actum, qui est sufficiens dispositio ad gratiam extra sacramentum, quæ sola est perfecta contritio. Verumtamen longe verius est etiam actum pœnitentiæ, qui tantum est sufficiens dispositio ad gratiam in sacramento, quam Concilium vocat contritionem imperfectam, et nos vocare possumus attritionem Christianam, haberi non posse ex viribus arbitrii sine speciali Spiritus Sancti auxilio. Id enim multo magis est consentaneum Concilio Tridentino, session. 14, capit. 4, et sequitur ex generali principio, quod nullum opus conducens ad salutem fieri potest sine auxilio gratiæ: et præterea hoc late disputatum est et probatum diet. 4 tom., disput. 5, section. 1 et 2. Quomodo autem hi actus sint supernaturales, et an circa eadem objecta materialia vel formalia possint fieri aliqui actus naturales sine auxilio gratiæ, tractandum est in libro sequenti. Hæc ergo omnia ad præsentem disputationem non referunt, sed præmittenda necessario fuerunt, ne quis nominibus contritionis et attritionis confundatur, et ad damnandas probabiles vel etiam veras opiniones moveatur.

7. *Primum pronuntiatum circa dictum exemplum pœnitentiæ.*—Unde probetur.—In præsentem ergo solum tractandum est de pœnitentia,

seu detestatione peccati, quatenus præcise est contra legem naturæ, et quatenus ex aliquo modo naturali potest displicere: tunc enim tam materiale quam formale objectum naturalis ordinis est. Sic autem communis opinio est dari posse actum naturalem pœnitentiæ sine auxilio gratiæ, ut probavi in dicto tom. 4, d. 3, sect. 7, quia non est major ratio de hoc actu generatim sumpto, ut loquimur, quam de communibus actibus aliarum virtutum acquiratarum: et præter antiquiores Scholasticos, qui fortasse in hoc excesserunt, ex modernis id pro comperto habent Cajetanus, Soto, Cano, et alii, quos citato loco retuli. In hoc autem ordine naturalis pœnitentiæ, distinguuntur quædam perfecta et alia imperfecta. Perfecta erit destestatio absoluta peccati propter Deum summe dilectum; omnis vero alia, ex alio motivo vel alio inferiori modo concepta, erit imperfecta. Priorem vocant aliqui naturalem contritionem seu acquisitam, ut Soto in 4, d. 17, quæst. 2, art. 5, et ita etiam videtur loqui Molina supra. Alii vocant attritionem, ut Scotus et Cajetanus. Sed priores loquuntur per comparisonem ad naturalem pœnitentiam imperfectam, et nomina actuum pœnitentiæ infusæ accommodant cum proportione ad actus pœnitentiæ acquisitæ; posteriores autem generaliter vocant attritionem omnem dolorem peccati, qui non formatur charitate infusa vel habituali, vel actuali; re tamen vera, prout illæ voces nunc significant dispositiones ad gratiam, actus ille nec contritio est, neque attritio, neque ita est vocanda simpliciter, sed cum addito *naturalis* seu *acquisita attritionis*, quamvis, inter doctos ubi de re constat, non sit de vocibus contendendum.

8. *Secundum pronuntiatum.*—De hac ergo pœnitentia perfecta in ordine naturali, dicendum est esse actum naturalem, et per se non excedere vires physicas liberi arbitrii. Hoc facile probatur ex dictis de amore, nam hic actus est effectus illius amoris per se necessarius ut amor sit verus et efficax, si præcessit Dei offensa. Unde sicut intentio et electio finis sunt ejusdem ordinis et virtutis, ita etiam hic dolor de peccato propter amorem Dei est ejusdem ordinis naturalis eum ipso amore, ac prout per se cadit sub naturalem facultatem voluntatis: et quoad hoc vera est communis opinio Theologorum de contritione acquisita, seu naturali, si tantum consideretur in ordine ad principium proximum per se, seu physicum: nam de hoc principio ratio facta convincit.

At vero si sermo sit de possibilitate morali, quæ sit etiam in homine lapsa, sic idem sentientium est de hac pœnitentia quod de amore naturali; nam ut sit in suo ordine perfecta, debet includere propositum nunquam amplius offendendi Deum, ejus mandata violando, et ideo sine auxilio speciali non potest esse magis absoluta et efficax quam ipse amor, sed ad summum haberi potest cum illa conditione, seu limitatione: *Propono vitare peccata, quantum in me est*, etc. Et hoc solum videntur sentire auctores supra citati, præsertim recentiores, ut Medina, Bannez, atque etiam Molina.

9. *Alvarez, l. 6, disp. 52, in probationibus primæ conclusionis immerito in prædictis Molinam impugnat.*—Aliqui vero, qui impugnant Molinam, etiam hujusmodi actum sic limitatum negant fieri posse per vires naturæ, quia impossibile est quin sit efficax ad observanda omnia mandata, et vitandum omne peccatum, saltem pro illo instanti quo talis actus fit, vel pro tempore quo durat ipse, aut virtus ejus. Sed hoc nullum inconueniens est; quis enim negavit unquam posse hominem lapsum, per rationem et liberum arbitrium vitare omne peccatum pro aliquo instanti aut brevi tempore, præsertim quando nulla gravis tentatio ardet? Quicumque enim bene operatur, quamvis sic operatur, non peccat; potest autem homo lapsus interdum bene operari per suam libertatem, et consequenter pro tunc non peccare; quid ergo mirum quod, dum quis dolet de peccato propter Deum naturaliter dilectum, necessario pro tunc non peccet? Nullus ergo negat quin talis dolor sit efficax ad impediendum peccatum, quamdiu ipse durat. Sed quia hæc efficacia est tantum ad instans, vel ad breve tempus, pro quo talis actus vel virtus ejus durare possit, ideo non dicitur simpliciter efficax, neque omnino absolutus, ut satis supra de amore declaratum est.

10. *Tertium pronuntiatum.*—*Suadetur.*—Et hinc a fortiori constat pœnitentiam ex motivo naturali imperfecto vel minus perfecto posse fieri viribus naturalibus. Hoc patet rationibus factis, quia si motivum naturale est, species actus est naturalis, et ex hac parte possibilis physice per vires naturæ: aliunde vero potest esse actus talis, ut in eo propter imperfectionem ejus esset moralis difficultas vel impossibilitas; ergo talis actus erit simpliciter possibilis: et naturæ declaratur, nam potest esse dolor de peccato adulterii, verbi gratia, solum propter turpitudinem quam habet contra rationem naturalem, quod motivum

naturale est, et potest afferri eo tempore quo homo actu non sentiat repugnantiam, nec propensionem ad talem actum; cur ergo non poterit talis actus fieri aliquando per vires liberi arbitrii, sicut potest fieri alius actus moraliter bonus? Neque enim talis actus esset sufficiens dispositio ad gratiam, etiam cum sacramento, quia non esset attritio Christiana, seu ex motivo supernaturali, de qua Concilium loquitur, ut in citato loco explicavi. Idem a fortiori verum est de dolore minus perfecto ex inferiori motivo, ut si quis doleat de peccato propter infamiam, ægritudinem, vel alia damna inde contracta: nam hic dolor, licet ex objecto formali videatur indifferens, potest bene moraliter fieri ex honesto fine, idemque est de similibus.

11. *Limitantur proxime dicta.*—Solum oportet advertere etiam in hoc ordine imperfectæ pœnitentiæ naturalis, posse esse aliquem actum qui sit absolutus et efficax, includatque propositum non violandi amplius legem naturalem; ut hæreticus fide humana credens pœnas inferni, si illas etiam naturaliter odio habeat et fugiat ex vi naturalis amoris quem ad se habet, etiam poterit detestari peccatum ex timore illarum pœnarum, quæ detestatio, si esset efficax, includeret absolutum propositum amplius non peccandi. Hunc autem gradum perfectionis, etiam in illa specie, attingere non potest sine auxilio gratiæ, propter ea quæ supra diximus de amore, non tantum amicitiae, sed etiam concupiscentiæ, eadem enim ratio in præsentem locum habet. Unde tandem concludimus nullum actum pœnitentiæ naturalis esse absolute impossibilem sine viribus gratiæ, nisi in quo eadem difficultas quæ in amore Dei naturali et super omnia invenitur, propter inclusum propositum non violandi amplius legem naturalem.

12. *Expeditur secundum exemplum de amore proximi, in eodem numero 2.*—*De prædicto amore proximi primum pronuntiatum.*—*Secundum pronuntiatum.*—Secundum exemplum erat de amore proximi, quod eadem proportionem expediendum erit. Nam dilectio proximi quadam est supernaturalis, qua tenemur diligere proximum ut consortem ejusdem beatitudinis supernaturalis, quæ dilectio ad multa se extendit quam dilectio mere naturalis, et ideo certum est non posse haberi sine auxilio gratiæ, et de illa maxime loquuntur Scriptura et Patres; illa vero dilectio non pertinet ad præsentem disputationem, quia supernaturalis est, ut in sequentibus dicam. Alia

vero est dilectio proximi ordinis naturalis, quæ proprie præcipitur lege naturali. Quamquam sit controversia an præceptum naturale in rigore obliget ad internum actum dilectionis erga proximum, generatim volendo illi bonum, vel satis sit, quandoenique necessitas occurrerit, benefacere proximo, vel illi non nocere, etc. Quidquid vero sit de præcepto, certum est illum actum dilectionis esse possibilem et honestum. De illo ergo dicimus imprimis actum illum physice possibilem esse per vires liberi arbitrii, quia est in sua entitate et specie naturalis, et elicitur ex motivo humano proportionato rationi naturali. Deinde dico hunc amorem sæpe esse non tantum possibilem, sed etiam facilem naturali facultati. Quod non intelligo de amore impudico, vel alia ex causa irrationabili, sed de amore honesto et rectæ rationi consentaneo, ut patet in amore inter parentes et filios, vel inter fratres aut alios consanguineos, vel de amore inter amicos, de quo etiam Christus loquitur cum dicit etiam ethnicos et publicanos diligere diligentes se, Matth. 5; et similiter dixit Gregorius, hom. 27 in Evang., hujusmodi amorem sponte naturæ impendi. Cum ergo natura juvet, et ratio non repugnet, imo etiam idem dicit, mirum non est quod possit et naturaliter et facile haberi, etiam honeste, quia non semper occurrit occasio vel gravis tentatio quæ ad excessum vel defectum in hoc amore inclinet.

13. *Tertium pronuntiatum, seu restrictio prædictorum.*—Tandem addo aliquando posse hunc amorem esse tam perfectum vel difficilem, ut sine auxilio speciali gratiæ haberi non possit. Hoc probant quæ num. 8 et 10, in simili, de amore Dei naturali indicata sunt. Nam imprimis potest hic amor esse universalis ad proximos, et cum proposito servandi omnia præcepta naturalia ad illos pertinentia; hoc autem propositum efficax et absolutum non potest per vires naturæ fieri; ergo nec amor perfectus illud propositum includens, juxta illud Pauli Roman. 13: *Qui diligit proximum, legem implevit.* Minor probatur, quia non potest homo lapsus suis viribus implere totam legem Decalogi, etiam quoad præcepta secundæ tabulæ præcise et collective sumpta, nam occasiones peccandi sapius in illis occurrunt, et concupiscentia et amor sui illis præcipue repugnat. Unde impossibilitas hujus amoris reducitur ad illam, quæ est in amore Dei, præsertim quia amor integer erga proximum vix potest etiam in ordine naturali servari, vel sine amore Dei, vel saltem sine tanto amore

ad naturalem honestatem propter seipsam ut possit juvare ad vincendas omnes difficultates quæ in amore erga proximum occurrant. In quo etiam considero, in hoc amore sæpe quidem peccari propter defectum, minus diligendo quam ratio postulet, non raro vero etiam peccari per excessum, et ideo propositum honeste et cum debita mensura amandi proximum tantam perfectionem et difficultatem includit ex parte objecti, ut in natura lapsa sine auxilio gratiæ haberi non possit.

14. *Expeditur tertium exemplum in num. 3, ad instar præcedentis.*—Idem dicendum censeo de amore inimicorum, de quo tertium exemplum proponebatur. Nam si sit sermo de amore inimicorum in universali cum dicta perfectione volendi ad inimicum servare omnem dilectionem et beneficentiam quam lex naturalis jubet, hic actus includit fere totam difficultatem explicatam in amore proximi, et addit illam quæ oritur ex inimicitia et appetitu vindictæ; qui appetitus, moraliter loquendo, inducit semper tentationem gravem illi amori contrariam, et ita hæc difficultas ad duo capita supra memorata revocatur. Si vero loquamur de amore hujus vel illius inimici in particulari, tunc considerare oportet et gravitatem inimicitiae, et modum amoris, ut de possibilitate ejus possit ferri judicium. Nam si inimicitia sit levis, id est, in causa minoris momenti fundata, interdum poterit sine magna difficultate propter rationes humanas, sive honestatis, sive commodi, sola libera voluntate deponi: si vero inimicitia sit in gravi injuria fundata, illud erit longe difficilius, et regulariter fieri non potest sine auxilio gratiæ, si fiat propter solam honestatem, quia illa est quædam victoria gravis tentationis, præsertim si amor sit integer et absolutus, nam si esset solum in aliquo particulari et levi beneficio, poterit non reputari gravis victoria, sed modica, quæ interdum haberi potest sine speciali auxilio gratiæ; quæ omnia procedunt de amore inimici ex solo motivo naturali; nam si inimicus ametur propter Deum, jam amor erit supernaturalis, et per se ad ordinem gratiæ pertinens, et in illo etiam ordine, propter circumstantiam inimicitiae, specialius auxilium postulabit: et de hoc amore inimicorum Scriptura et Patres præcipue loquuntur.

15. *Circa quartum exemplum in num. 4 positum, tria expedienda per varia etiam pronuntiatum.*—Primo, de uno vel altero continendi actu.—Quartum exemplum erat de continentia, et in eo potest esse sermo aut de uno vel

altero actu singulari continentiae, aut de perpetua observantia continentiae sine gravi peccato contra castitatem, aut de uno singulari actu propositi absoluti et efficacis servandi perpetuam castitatem. De primo nulla est hic nova difficultas; nam hic est quidam actus moraliter bonus, et sequitur regulam aliorum. Nam si occurrat occasio ejus sine gravi tentatione aut difficultate, fieri poterit talis actus sine speciali auxilio gratiae; si vero adjungatur gravis tentatio, non poterit. Solum est peculiare in illa materia, quod in ea frequentiores solent esse tentationes et graviores propter internum concupiscentiae fomitem.

16. *Secundo, de observantia perpetua.* — *Id tamen efficaciter non probatur loco Sapientiae 8.* — Unde in secundo puncto Augustinus, in locis ibi citatis, aperte sentit non posse continentiam illo modo diu servari sine auxilio gratiae, et idem habet Prosper contra Collator., c. 36, quam sententiam etiam moderni auctores sequuntur, Soto, lib. 1 de Nat. et Grat., cap. 21; Vega, lib. 11 in Trid., cap. 20, et quæst. 12 de Justific.; et Bellarm., lib. 5 de Grat. et lib. arb., cap. 5 et 7. Qui fundantur in loco Sapientiae 8 supra relato. Sed hic locus alias habet expositiones, propter quas non satis probat illam sententiam. Augustinus enim sæpe illum exponit de continentia, non in sola materia castitatis, sed generalius in omni materia ad quam extenditur concupiscentia, quæ in honoribus, in vindicta sumenda, et aliis similibus versatur; unde includit victoriam totius concupiscentiae et fomitis peccati, et observantiam omnium præceptorum naturalium, saltem secundæ tabulæ, ideoque de tali continentia certissimum est *neminem esse continentem, nisi Deus dederit*, quod Sapiens dixit, et de hac continentia exponitur ab Augustino, 10 Confess., cap. 29, sic enim ait: *Da quod jubes. et jube quod vis. Imperas nobis continentiam, et cum scirem (ait quidam) quia nemo potest esse continens nisi Deus det, et hoc ipsum erat Sapientis scire cujus esset hoc donum. Per continentiam quippe colligimur et redigimur in unum, a quo in multa defluximus, minus te amat qui tecum aliquid amat, quod non propter te amat*, ubi aperte exponit de continentia ab omni inordinati amore creaturarum; unde subjungit in c. 30: *Jubes certe ut contineant a concupiscentia carnis, et concupiscentia oculorum, et ambitione sæculi*, quod prosequitur per totum caput 31, et eandem expositionem indicat lib. 4 contra Julian., cap. 3, et lib. 3 de Peccator. merit., cap. 5.

17. *Litteralis sensus loci prædicti.* — Accedit quod si in rigore verba Sapientis ad litteram exponamus, non videtur ibi Sapiens loqui de virtute continentiae, sive speciali, sive generali, sed de dono conservandi et retinendi sapientiam semel adeptam. Continere enim interdum significat idem quod abstinere, seu moderate ac temperate agere, aliquando vero significat idem quod obtinere et compotem fieri rei desideratæ, sicut dicitur Ecclesiast. 6: *Investiga illam (scilicet sapientiam) et manifestabitur tibi, et continens factus, ne derelinquas eam*; et cap. 15: *Qui continens est justitiæ, apprehendat illam.* In hac ergo significatione posteriori videtur loqui Sapiens in alio loco; explicaverat enim quanto desiderio quæreret sapientiam, dicens: *Circuibam quærens ut mihi illam assumerem*; et postea subjungit, *ut sciri quia non possum esse continens*, utique ejusdem sapientiae, nam de castitate vel concupiscentia nullus præcesserat sermo; et verba etiam sequentia hoc declarant: *Et hoc ipsum erat Sapientiae, scire cujus esset hoc donum*, utique sapientiae. De quo item subjungit adiisse Dominum ad petendum illud, petitio autem fuit quæ cap. 9 subjungitur: *Da mihi, Domine, sedium tuarum assistricem sapientiam.* Itaque hic est sine dubio sensus litteralis communiter jam receptus, ut ibi notat Lorin.

18. *Locus alter Ecclesiastici magis litteralis ad institutum.* — Nihilominus tamen sententia ipsa applicata ad donum pudicitiae vera est, et fortasse melius comprobatur ex illa oratione Sapientis, Ecclesiast. 23: *Aufer a me ventris concupiscentias, et concubitus concupiscentiæ ne apprehendant me*, ut illum locum expendit Augustinus, lib. de Gratia et lib. arbit., cap. 16. Et ratio est, quia, ut dicebam, materia illa exposita est tentationibus gravibus externis et internis, et valde familiaribus, diuturnis, ac frequentibus; ergo ita est observatu difficilis, ut sine auxilio gratiae per multum tempus integre servari non possit. Veruntamen hoc maxime locum habet in hominibus non conjugatis, nam qui matrimonium contraxerunt et illo uti facile possunt, jam habent remedium contra concupiscentiam, non tam resistendo illi quam ei sine peccato consentiendo, et ideo in illis fortasse contingere potest ut aliqui possint ex sola honestate naturali castitatem conjugalem conservare. Nihilominus tamen, regulariter et moraliter loquendo, existimo esse necessarium auxilium gratiae ad servandam illibatam castitatem conjugalem, tum corpore, tum etiam mente, quia vix potest contingere

ut in illo etiam statu graves tentationes, saltem ad internum desiderium vel morosam delectationem inclinantes, non occurrant. Et hoc etiam suadent verba Sapientis supra allegata, et verba Pauli ad Corinth. 17: *Unusquisque proprium donum habet ex Deo, unus sic, alius vero sic*, id est, unus in castitate conjugali, alius in virginali, de hoc enim ibi ad litteram loquebatur. Nec recte dici potest ibi donum Dei non significare donum gratiæ, sed vel donum naturæ, vel abstracte quodcumque donum Dei, quia non solet hæc esse phrasis Pauli, neque ita intelligitur a Patribus, sed de dono gratiæ, ut patet ex Augustino, lib. de Grat. et lib. arb., cap. 9, et Prospero contra Collator., cap. 36. Verum est Paulum loqui de castitate, ut a Christianis servatur propter salutem æternam, sub qua ratione est opus pietatis, et ideo manifestum est non fieri sine auxilio gratiæ. Verumtamen difficultas et arduitas ipsius operis suadet, etiam secluso ordine ad vitam æternam, auxilium gratiæ postulare, ut propter puram honestatem naturalem fiat.

19. *Tertio, de absoluto proposito efficacique castitatis. — De quinto exemplo in num. 4.* — Atque ex his facile expeditur quod tertio loco positum est de absoluta voluntate, et proposito servandi perpetuam castitatem. Dicendum est enim tale propositum, si sit in suo ordine perfectum, id est, omnino absolutum et efficax, non posse haberi sine auxilio speciali, quia in illo cum proportionem locum habet ratio facta de amore super omnia, quia in suo objecto includit aliquid moraliter impossibile, ut patet ex proxime dictis. Atque idem cum proportionem dicendum est de virginitate, nam virginitas quædam perfecta castitas est, et non significat unum actum particularem, vel limitatum ad observantiam virginitatis pro aliquo parvo tempore (hoc enim fieri forte potest aliquando sine auxilio speciali), sed includit absolutam virginitatem perpetuam quamdam, quæ nec perseveranter servari potest sine auxilio speciali, neque etiam potest efficaciter proponi sine simili et proportionato adiutorio; et in hoc sensu loquitur Christus, Matth. 19, et Paulus, 1 ad Cor. 7. Et hoc modo quintum exemplum expeditur est.

20. *De sexto exemplo in num. 4.* — Sextum erat de consilio paupertatis, de quo cum eadem proportionem loquendum est. Nam paupertas voluntaria non significat unum vel alium actum particularem et ad breve tempus limitatum, sed includit perpetuitatem et propositum efficax vivendi semper sine proprietate bono-

rum temporalium. Imo perfecta Evangelica paupertas includit obligationem servandi talem paupertatem, quæ res est sine dubio valde ardua et difficilis, et ideo mirum non est quod sine speciali auxilio gratiæ fieri non possit. Hæc autem difficultas reducitur ad illam, quæ est in perseverantia bene operandi in quacumque materia honesta multum repugnante concupiscentiæ, et naturali inclinationi ac humanæ consuetudini; quæ difficultas, per modum unius objecti proposita, reddit actum efficacis intentionis ejus impossibilem moraliter sine auxilio speciali. Est autem hoc longe certius de paupertate, de qua Christus loquebatur Matth. 19, quæ consistit in abrenuntiatione omnium propter Evangelicam perfectionem obtinendam, ad quod sine dubio magnum auxilium gratiæ necessarium est, quia est insignis actus pietatis. Quanquam non recte ad hoc inducantur illa verba Christi: *Apud homines hoc impossibile est, apud Deum autem omniaabilia sunt*, quia Christus non hoc dixit propter observationem paupertatis, sed potius propter divites, de quibus proxime dixerat vix posse salvari, et ideo admirantibus discipulis, dixit illam generalem sententiam, ut specialem gratiæ necessitatem, ad vitandas occasiones peccandi quas divitiæ afferunt, significaret.

21. *De septimo exemplo in fine num. 4.* — Ultima objectio erat de martyrio, (ut ita dicam) naturali, id est, de sustinenda morte pro vitando aliquo peccato contra legem naturæ, de quo actu, si revera fiat propter solam virtutem et honestatem naturalem, videtur mihi non posse fieri sine speciali Dei dono et auxilio, etiamsi propter Dei amorem expresse non fiat; ratio est, quia illa est quædam gravissima tentatio contra bonum virtutis, quæ, ut ostendimus, sine speciali auxilio vinci non potest. Item quia est quædam dilectio, vel Dei, si propter illum expresse fiat, vel saltem honestatis supra omne id quod illi repugnat, etiamsi sit grave malum multumque repugnans naturæ; hic autem amor, præsertim eo ipso tempore quo urget gravis tentatio, excedit vires solius liberi arbitrii, juxta Patrum doctrinam supra comprobata. Dixi autem, si actus fiat propter solam honestatem, nam si adjungatur aliquod malum, vel temporale motivum, ut appetitus honoris vel famæ, aut aliquid hujusmodi, interdum sustineri potest mors per vires arbitrii, nam etiam peccando id interdum fit, quia hæc sensibilia objecta plus movent ad hujusmodi difficultates superandas, quam pura ho-

nestas, ut cum Augustino, in libro de Continentia in superioribus explicuimus.

CAPUT XXXVIII.

UTRUM HOMO LAPSUS, VEL IN PURIS NATURALIBUS
CONSTITUTUS, NATURALES VIRTUTES POSSIT SUIS
VIRIBUS SINE AUXILIO GRATIÆ ACQUIRERE ?

1. *Adam conditus est cum infusis habitibus adeo perfectis, ut nec intensione egerent.* — Omnia, quæ in hoc libro hactenus diximus, ad boni operationem et actuale malum evitandum spectant. Unde superest ut in hoc capite de virtute permanente seu habituali, quæ ex actibus generari solet, pauca dicamus. Neque est quod in præsentī tractemus de homine in natura integra, nam in illo statu de facto homo habuit omnes naturales virtutes per accidens infusas; et ideo per actus et vires arbitrii postea non acquirerentur, non ex defectu arbitrii liberi arbitrii vel actuum ejus, sed quia actus jam tunc procederent ab habitu; et verisimile est tam perfectas fuisse virtutes, ut per actus non ulterius intenderentur. Est item valde probabile illas virtutes, juxta convenientem providentiæ modum, pertinuisse ad donum integritatis naturæ, prout in statu innocentie hominibus datum est. Unde fit consequens, si status ille innocentie duraret, etiam fuissent has virtutes infundendas hominibus qui ex Adamo non peccante nascerentur.

2. *Esto in illo statu nascerentur homines absque eisdem habitibus, suis viribus compararent illis.* — Verumtamen, quocumque modo ponatur homo conditus in natura integra sine habitibus naturalium virtutum per accidens infusis, certum est potuisse talem hominem per vires naturales acquirere habitus illarum virtutum, cum ea perfectione quam intra ordinem naturæ possit habere. Quod addo ad excludendum ordinem charitatis, et vitandam verborum æquivocationem, vel contentionem, de qua statim dicam. Clarum est enim, si habitus virtutum acquisitarum acquirunt aliquam perfectionem, vel aliquod esse virtutis ex conjunctione ad charitatem, non potuisse hominem, etiam in statu naturæ integræ, habere illam perfectionem virtutis suis viribus, quia non poterat per naturales vires charitatem habere. Secluso ergo hoc respectu, et omni alio supernaturali, posset homo integer non habens has virtutes, illas acquirere in suo statu naturæ virtutis perfectæ. Probat, quia hæ virtutes acquiruntur per actus; homo autem in

illo statu posset semper recte operari absque peccato, ut supra dictum est, quam facultatem haberet in quacumque materia virtutis, et pro sua libertate posset illam exercere totis suis viribus; ergo posset per actus suos has virtutes acquirere. Et confirmatur, nam posset homo in eo statu naturales scientias satis perfectas acquirere, ut supra cap. 1 ostendimus; et eadem ratione posset de omnibus agendis prudenter judicare, et ita prudentiam acquirere, juxta dicta in cap. 2; ergo simili modo posset acquirere habitus aliarum virtutum moralium. Imo has virtutes potuisset quodammodo perfectiores acquirere quam scientias; tum quia materiæ scientiarum amplissimæ sunt, unde et veritates scibiles naturaliter ita multiplicantur, ut probabile sit non potuisse ab homine integro in statu viæ exhauriri; materiæ autem virtutum moralium sunt magis limitatæ, et brevi tempore potest homo in omnibus se exercere; tum etiam quia scientiæ multum perficiuntur per extensionem ad varias materias, quia in eis et veritates et media cognoscendi multiplicantur; virtutes autem morales parum augentur propter extensionem ad varias materias intra eandem rationem virtutis, nisi materiæ sint, aut valde dissimiles, aut in difficultate impares, quia in unaquaque virtute ratio motiva honestatis est semper eadem, et ita varietas materiæ valde accidentaria est, ideoque potest esse virtus perfecta, quamvis non in omnibus materiis suis, sed in præcipuis et difficilioribus exercita seu acquisita fuerit: et ita circa statum naturæ integræ nulla superest controversia vel difficultas.

3. *De homine lapsa, vel in puris condito.* — *Prima opinio negans.* — Superest ergo dubium propositum de homine in statu naturæ lapsæ, vel purorum naturalium, hos enim in his effectibus semper æquiparamus. In quo aliqui negant posse ab homine lapsa acquiri aliquam veram virtutem moralem, seu naturalem, idque probant ex Augustino, l. 4 contra Jul., c. 3, ubi ex professo probat non esse in aliquo veras virtutes, etiam morales, nisi justus sit. Unde cum non possit homo esse justus suis viribus naturalibus, plane sequitur non posse acquirere veras virtutes solis naturæ viribus; unde idem Augustinus, lib. 1 Retract., c. 3, retractat quod dixerat l. de Ordine, c. 3: *Philosophus non vera pietate præditos virtutis luce fulsisse, sentiens virtutem sine vera pietate esse non posse.* Adducunt etiam D. Thomam l. 2, quest. 65, a. 2, et 2. 2, quest. 43, a. 7, quibus locis docet sine charitate nullam

esse veram virtutem, etiam moralem, quia nec facit bonum habentem, cum sine charitate sit in peccato, nec facit opus ejus bonum, quia actus sine charitate factus nihil prodest, ut dicitur 1 ad Cor. 13. Imo addunt etiam in ordine ad finem naturalem, actum talis habitus non esse vere bonum et veræ virtutis, quia non potest ordinari ad Deum super omnia dilectum, etiam ut finem naturæ.

4. *Judicium præcedentis opinionis, per distinctionem virtutis moralis Christianæ, vel philosophicæ. — Prima assertio. Virtus moralis Christiana, nec obtinetur nec retinetur absque gratia.* — Sed in his probationibus manifeste committitur æquivocatio, de qua supra dicebam, vel controversia reducitur ad quæstionem solam de modo loquendi. Notum est enim charitatem, more Theologico loquendo, esse formam virtutum etiam acquisitarum, ut virtutes Christianæ (ut sic dicam) efficiantur, et apta principia operum conducentium ad vitam æternam. Unde loquendo in hoc sensu de esse virtutis Christianæ, seu quoad statum meriti, nullus catholicus unquam dixit veras virtutes morales posse acquiri sine gratia; sed quia Pelagius hoc dixit, nam et charitatem ipsam, et omnia principia merendi, putavit esse naturalia, ideo Augustinus in sensu contrario dixit in peccatoribus vel infidelibus non esse veras virtutes, Paulus autem proprius et rigorosius dixit non prodesse. De hoc ergo non est controversia, nam in his virtutibus, prout charitate formatis, oportet duo distinguere. Unum est realis habitus moralis virtutis, qui est qualitas quædam ordinis naturalis independens, in suo esse reali et intrinseco, a charitate, et ex suo objecto essentialiter honestus, atque ita in suo ordine essentialiter virtus acquisita. Aliud est relatio illa vel potius denominatio, quæ illi adjungitur ex conjunctione ad charitatem. Quantum ergo ad hoc secundum, clarum est neque posse obtineri sine auxilio gratiæ, neque posse permanere sine habituali gratia, et charitate, ac proinde virtutes acquisitas non posse secundum hanc rationem virtutis inveniri in homine existente in peccato mortali. Neque de hoc est in re dissensio inter Theologos, licet in eo esse soleat, quod multi negant, denominationem illam, quam virtutes acquisitæ accipiunt ex conjunctione ad charitatem, quidquam referre ad esse virtutis earum, quod fortasse ad modum loquendi tantum pertinet.

5. *Secunda assertio. — Virtus moralis philosophica semel acquisita retinetur, absque speciali*

auxilio. — Punctum ergo præsens est de primo, id est, de virtutibus moralibus acquisitis secundum esse reale et intrinsecum earum. Nam de illis ita spectatis, certissimum est posse manere sine gratia habituali, et charitate. Nam si quis justus habens has virtutes mortaliter peccet, non amittit illas, quantum ad intrinsecum esse earum, ut est constans apud omnes, quia habitus acquisitus non amittitur per unum actum contrarium. Unde necesse est ut etiam maneant in suo esse essentiali specifico, quia hoc esse est inseparabile a quacumque entitate, dum manet. At vero extravitale esse habent illi habitus, quod sint virtutes philosophicæ (ut sic dicam) seu mere naturales, quia secundum illud inclinant ad bonum honestum, ut honestum est, et usus illorum habituum ita est bonus ut nemo possit illis male uti. Unde etiam necessario faciunt bonum habentem in suo ordine et gradu, quia non est de ratione virtutis ut faciat habentem sanctum, aut simpliciter bonum in omni genere, sed ut faciat bonum sua specie et ordine, id est, temperantia facit bonum, id est, temperatum, justitia justum, et sic de aliis. Neque repugnat aliquem esse sic moraliter bonum in habitu, eo tempore quo est injustus et in peccato mortali. Imo etiam potest esse bonus in actu, bene operando ex habitu virtutis, et consentanee ad finem ultimum naturalem, ut in superioribus explicatum est. De virtutibus ergo sic acquisitis est difficultas an possint acquiri sine gratia et sine auxilio gratiæ.

6. *De ejusdem philosophicæ virtutis acquisitione opinio Marsilii bipartita.* — In hoc ergo puncto Marsilius, in 2, quæst. 20, art. 3, concl. 5, sentit has virtutes posse acquiri sine gratia habituali, non vero sine aliqua gratia gratis data. Priorem partem probat, quia gentiles acquisiverunt has virtutes, cum tamen nec gratiam nec fidem habuerint. Antecedens probat testimonio Hieronymi, in epist. ad Demetriad. dicentis: *Multos Philosophorum audivimus et legimus, et vidimus ipsos castos, patientes, benignos, modestos, liberales, abstinentes, justitiæ amatores, non minus quam sapientiæ. Unde, quæso, hominibus a Deo alienis ista quæ Deo placent?* Ab hominibus ergo a Deo alienis, ac subinde gratia ejus carentibus, virtutes istæ acquiruntur. Posteriolem vero partem probat ex principiis supra positis, quod homo lapsus non potest sine auxilio gratiæ resistere tentationibus occurrentibus, nec constanter bene operari, supponit autem

hoc esse necessarium ad acquirendos habitus.

7. *Rejicitur et satisfit probationibus.* — Si autem vera sunt quæ supra diximus de necessitate gratiæ ad non peccandum contra legem naturalem, hæc duo inter se pugnant, saltem de facto, et secundum ordinariam providentiam. Nam hoc modo diximus gratiam habitualement esse necessariam ad constanter bene operandum in moralibus virtutibus, quia licet hoc fieri possit per solum actuale auxilium speciale, illud de facto non datur, nisi hominibus justis et Deo gratis; ergo si ad virtutum habitus acquirendos necessarius est ille modus bene operandi constanter et universaliter, sicut non possunt virtutes sine speciali auxilio acquiri, ita neque sine gratia habituali. Præterea nihil est quod nos cogat ad dicendum gentiles habuisse veras virtutes morales, etiam secundum esse virtutis habitibus intrinsecum; nam testimonium illud quod ex Hieronymo citatur, revera non est Hieronymi, sed Pelagii; supra enim ostendimus epistolam illam esse Pelagii. Potuissetque Marsilius eandem contra secundam partem suæ assertionis allegare: nam post illa verba: *Unde, quæso, hominibus alienis a Deo ista quæ Deo placent?* subjungit: *Unde autem illis bona, nisi de naturæ bono?* Ecce, non Deo specialiter auxilianti, sed naturæ tantum illas virtutes tribuit; unde inferius ait: *Quod si etiam sine Deo homines ostendunt quales a Deo facti sunt, vide quid Christiani facere possint, quorum in melius per Christum vita et natura instructa est, et qui divinæ quoque gratiæ jurantur auxilio.* In quibus verbis totus error Pelagii latet; nam imprimis, cum ait sine Deo ostendisse gentiles quales a Deo facti essent, omne auxilium Dei excludit; imo et omnem Dei concursum negare videtur, sed naturam semel conditam et conservatam per se ita operari. Deinde tantum Christianos sentit juvari a gratia ad virtutes acquirendas. Neque mirum, quia cum non aliam gratiam, nisi doctrinam, promissiones et exempla fateretur, consequenter dixit solos Christianos illa gratia juvari, et illam etiam non ut necessariam ad virtutes acquirendas, sed ut utilem agnoscebat, ideoque sine illo auxilio illas virtutes in philosophis prædicabat et extollebat. Potuisset ergo Marsilius ex his posterioribus verbis super tunc habere prius testimonium; nam licet philosophi aliqui exteriora opera harum virtutum exercere videantur, non inde fit veras virtutes morales habuisse, nam verimiliter est non ex pura intentione virtutis et honestatis, sed

vel ex aliqua humana cupiditate honoris aut gloriæ vanæ, vel propter aliquam temporalem commoditatem ita vixisse. Nam, ut supra ostendimus, moralis operatio undique bona difficilis est, et raro sine gratia habetur; ergo verisimile non est in hominibus impiis illam exterioris vitæ moderationem ex pura intentione virtutis fuisse profectam, prout necessarium esset ad acquirendas veras morales virtutes.

8. *Assertio tertia in ordine, negative respondens titulo.* — *Prima objectio.* — *Secunda objectio.* — *Solutio prima.* — Ex hoc ergo principio recte colligi videtur virtutes etiam morales naturalis ordinis non posse acquiri nisi ex gratiæ auxilio, ita speciali ut non detur nisi justis et gratiam habitualement habentibus. Duo autem possunt huic resolutioni obstare. Unum est, quia diximus has virtutes posse esse simul cum peccato mortali, ac subinde sine gratia habituali; ergo sine illa etiam poterunt acquiri. Aliud est, quia hæc virtutes generantur per actus; sed sine gratia habituali, imo et sine auxilio speciali potest homo facere actus istarum virtutum: ergo potest etiam acquire habitus, vel aliquos, vel etiam omnes, quia omnium virtutum actus possunt per liberum arbitrium fieri. Sed illud prius facile solvitur, nam difficilius isti habitus acquiruntur, quam conserventur; acquiruntur enim per actus, difficultas autem virtutis est in actuali operatione, et ideo, ad illam difficultatem vincendam, est necessarium auxilium gratiæ. Postquam autem habitus est acquisitus, jam non pendet in conservari a præcedentibus actibus, et consequenter neque ab actuali influxu gratiæ, sed solum a generali influxu Dei ut auctoris naturæ. Et ideo postquam homo justus cum Dei auxilio has virtutes acquisivit, quamvis mortaliter peccet, eas retinet, quia Deus propter peccatum non negat generalem influxum ad earum conservationem necessarium. Addendum vero est, ut hæc virtutes in perfectione sua conserventur longo tempore, necessarium esse intra breve tempus ad statum gratiæ redire, et a Deo specialiter adjuvari, quia isti habitus per contrarios actus corrumpuntur, et hi actus in statu peccati, si diuturnus sit, facile multiplicantur, et ideo necesse est ut in eo statu paulatim corrumpantur.

9. *Pro secunda objectione tria distinguuntur in habitu virtutis.* — Ut vero ad posteriorem objectionem respondeamus, tria in habitibus harum virtutum distinguere oportet; primum

est substantia ipsius habitus, seu initium et fundamentum ejus; secundum est status intrinsecus ipsius habitus, qui necessarius est ut nomen virtutis in suo ordine mereatur, qui consistit in intensione sufficiente ex parte subjecti, et simili extensione ex parte materiæ, ut circa totam illam faciem reddat habentem; tertium est status extrinsecus, per ordinem ad alias virtutes ejusdem ordinis. Qui status distinctus quidem est ab illo quem supra dicebamus habere hos habitus per conjunctionem ad charitatem: nam hæc qualiscumque perfectio ad ordinem supernaturalem pertinet; hic autem status, de quo modo loquimur, intra ordinem naturalem acquisitarum virtutum continetur, et in hoc consistit ut una virtus sit cum aliis connexa. Quem statum aliqui putant esse ita necessarium ad denominationem virtutis, ut sine illo censeant non mereri nomen virtutis simpliciter, etiam philosophice ac pure moraliter loquendo, quod sensisse videtur divus Thom. 1. 2, quæst. 65, art. 1. Alii vero id negant, dicuntque solum requiri hunc statum ad extrinsecam perfectionem virtutis. Quæ dissensio fortasse solum est in modo loquendi, et in præsentī parum est necessaria. Nam quod ad rem pertinet, negari non potest quin virtutes connexæ, id est, simul in eodem homine existentes, frequenter sese mutuo juvare possint, ita ut in multis occasionibus quælibet illarum facile et prompte operetur propter alterius consortium, quod non ita facile præstare posset quælibet illarum virtutum, si solitaria esset. Itera cum omnes virtutes morales voluntatis pendeant a prudentia, ratione illius maxime est necessaria hæc connexio, quia iudicium prudentiæ in materia unius virtutis pendet sæpe ex materia alterius virtutis, et ita oportet habere rectum affectum circa utramque ad uniuscujusque electionem dirigendam.

10. *Respondetur jam ad secundam objectionem, et limitatur assertio tertia.* — Loquendo ergo de habitu virtutis primo modo præcise spectato, concludit objectio, posse entitatem habitus (ut sic dicam) acquiri sine speciali auxilio gratiæ. Quia auxilium solum requiri potest ut fiat actus, nam quod actus semel factus faciat habitum, non est opus gratiæ, sed naturæ, quia neque effectio illa est libera, sed necessaria, supposito actu, nec ille effectus transcendit naturalem activitatem actus. At vero ad efficiendum actum moraliter bonum non est necessaria gratia, ut diximus; ergo neque ad acquirendum habitum quoad entitatem et essentiam ejus. Hæc consequentia evi-

dentior est juxta opinionem asserentem per primum actum acquiri habitum; nam si id verum est, etiam infidelis vel peccator faciens unum actum virtutis moralis sine gratia, acquireret habitum ejus, in quo erit essentia et species virtutis. Verumtamen etiam si quis contendat requiri plures actus ad productionem habitus, idem dicendum erit, quia non est verisimile plures actus requiri quam possint per vires naturæ fieri in brevi tempore. Hinc vero solum habemus posse acquiri per vires naturæ habitum virtutis in statu valde imperfecto, in quo habitus a Philosophis vocatur potius dispositio quam habitus, quia est facile amissibilis et ita habet modum dispositionis potius quam habitus. Quod maxime verum est in homine auxilio gratiæ destituto, quia facile multiplicabit contrarios actus quibus illa dispositio obruatur vel deleatur.

11. *Progreditur solutio secundæ objectionis, et probatur assertio tertia juxta statum intrinsecum virtutis.* — Unde dicimus ulterius habitum virtutis naturalis in perfecto statu intrinseco constitutum moraliter acquiri non posse sine auxilio gratiæ. Probatur imprimis, quia ad hunc statum requiritur quod habitus sit valde intensus et radicans, quo modo non acquiritur nisi per frequentiam actuum qui et in intensione crescant, et sine interruptione contrariorum actuum fiant; hoc autem moraliter non contingit in aliqua virtute sine adjutorio gratiæ, propter impedimenta lapsæ naturæ et tentationes occurrentes, ut experientia ipsa docet, et sæpe declaratum est. Similis ratio sumitur ex perfectione extensiva: nam perfecta virtus debet dare promptitudinem in tota sua materia, vel in majori parte ejus, et præsertim in materia ardua et difficili, quæ perfectio habitus acquirenda est per actus; non potest autem liberum arbitrium suis viribus in tota illa materia constanter studiose operari, cum non possit gravem tentationem vincere: ergo neque potest virtutem aliquam in eo statu acquirere sine auxilio gratiæ.

12. *Item juxta statum extrinsecum.* — Et hinc a fortiori concluditur non posse hominem acquirere virtutem aliquam in statu perfecto, secundum rationem extrinsecam provenientem ex connexione virtutum. Probatur primo, quia hic status supponit priorem: ergo si prior non comparatur sine viribus gratiæ, multo minus hic posterior. Deinde hic status postulat acquisitionem omnium virtutum moralium collective, ita ut simul habeantur omnes et singulæ in statu intrinsecæ perfectionis: sed non

est minus impossibile acquirere omnes virtutes simul quam implere integre totam legem naturæ, quia acquisitio omnium virtutum non fit sine magno et diuturno usu bene operandi sine defectu, in materiis omnium virtutum : ergo status ille seu connexio virtutum sine auxiliis gratiæ acquiri non potest. Et in his duobus ultimis punctis erravit Pelagius in dicta epistola ad Demetriad., ubi postquam de Philosophis dixit : *Vidimus castos, patientes, etc.*, subdit : *Cum omnia quæ dixi, vel omnia in uno, vel singula in singulis haberi videamus, cum omnium natura una sit, exemplo suo invicem sibi ostendunt, omnia in omnibus esse posse.* Nam imprimis gratis fingit, aliquem philosophum habuisse omnes virtutes simul, vel singulos habuisse singulas, quia neque unum habuisse unam in statu intrinseco et vero esse virtutis, potest cum fundamento affirmari. Deinde licet ita esset quod aliquis habuisset omnes, vel singuli singulas, immerito hoc tribueretur soli naturæ, quia potuisset Deus alicui vel aliquibus, juxta occultas rationes providentiæ suæ, auxilium ad id præstare, quod ita credendum est, si exemplum admittatur, ut bene Marsilius docuit.

13. *Virtutum naturalium societas ab amore naturali quodammodo elevatur.* — Tandem adverte quod, sicut per conjunctionem ad charitatem infusam censentur virtutes omnes peculiarem statum virtutis acquirere per quemdam respectum ad finem ultimum supernaturalem, ita etiam considerando virtutes acquisitas in ordine ad puram naturam, si conjunctam etiam habeant dilectionem Dei naturalem super omnia, inde censi posse habituras peculiarem statum virtutis moraliter nobiliorem, et diversæ rationis ab eo quem per mutnam connexionem acquirunt. Unde quia homo lapsus, vel in puris naturalibus non potest diligere Deum super omnia suis viribus, inde etiam fit ut non possit acquirere virtutes in hoc statu sic perfecto. Verum est tamen quoad hoc non omnino esse æqualem rationem inter amorem naturalem et charitatem, nam homo virtute charitatis destitutus nullo modo diligit Deum ut finem supernaturalem,

neque amore elicitō, neque innato; homo autem in natura pura spectatus, etiamsi non eliciat amorem super omnia, neque ejus habitum acquirat, nihilominus diligit Deum ut auctorem naturæ super omnia amore innato, id est, naturali pondere voluntatis. Et hoc satis est ut, quaecumque ratione virtutes morales in homine puro simul existant, sive per accidens infusæ, sive cum speciali Dei adjutorio acquisitæ, etiamsi nullus habitus amoris Dei adjungatur, vel actus elicitus supponatur, habeant perfectum statum virtutis, etiam per relationem ad ultimum finem naturalem, quia præterquam quod ipsæmet virtutes naturaliter tendunt ad eundem finem, sicut de earum actibus supra diximus, etiam ipsa voluntas est naturaliter propensa ad referendas omnes illas in eundem finem ultimum. Atque hoc satis est ad dictum statum virtutis, præsertim si talis persona non sit in statu peccati : nam si macula mortalis culpæ interveniat, quodammodo deordinat, et consequenter destruere videtur illum statum virtutis. Quanquam et hoc etiam magis sit secundum moralem considerationem, quam secundum rationem physicam, si per culpam habitus virtutum realiter non minuantur. Est etiam alia differentia inter amorem Dei supernaturalem et naturalem, quod homo viribus suis nullo modo potest diligere super omnia Deum ut supernaturalem finem nec perfecte, nec imperfecte; potest autem diligere super omnia Deum ut finem naturæ, amore etiam elicitō, saltem imperfecto et inefficaci, et aliquam conditionem includente. Ille autem satis est ut quamdiu durat ipse, vel virtus ejus, reliquæ omnes virtutes in eundem finem ultimum referantur. Et ita ex hac parte non est simpliciter necessarium speciale auxilium gratiæ ad hoc quaecumque esse virtutis, seu perfectiorem statum ejus. Quamvis, ut hic status sit magis stabilis et perfectiori modo acquisitus per proprium actum ipsius hominis, illud peculiare auxilium necessarium sit, quod, ad amandum simpliciter ac perfecte super omnia Deum auctorem naturæ, in hoc statu et in puris naturalibus postulatur.

INDEX CAPITUM LIBRI SECUNDI

DE NECESSITATE GRATIÆ AD ACTUS DIVINI ORDINIS ELICIENDOS, SERVANDA SUPERNATURALIA PRÆCEPTA, ET PECCATA ILLIS CONTRARIA VITANDA.

- CAP. I. *Utrum gratia divinæ revelationis, ad Deum in hac vita cognoscendum, sicut ad salutem oportet, fuerit necessaria?*
- CAP. II. *Utrum ad credendum revelatis specialis gratia Dei sit necessaria.*
- CAP. III. *Utrum ad initium fidei sit necessaria gratia?*
- CAP. IV. *An actus fidei sit in se et in substantia supernaturalis, et tractatur prima sententia.*
- CAP. V. *Actum fidei et voluntatem credendi, esse actus quoad substantiam supernaturales.*
- CAP. VI. *Actum fidei non esse tantum supernaturalem in suo fieri, sed in suo etiam esse.*
- CAP. VII. *Actum fidei non esse supernaturalem ex modo accidentali actus, solum extrinsece illum denominante.*
- CAP. VIII. *Actum fidei non esse supernaturalem ex accidentali modo intrinseco, seu illi inhærente; et vera assertio concluditur.*
- CAP. IX. *Fundamentis prioris sententiæ satisfit.*
- CAP. X. *Utrum possit homo assentiri mysteriis supernaturalibus revelatis a Deo, aliquo naturali assensu, sine auxilio speciali gratiæ?*
- CAP. XI. *Utrum fides aliqua, quæ idem motivum credendi, eandemque rationem formalem objecti habeat cum fide infusa, possit haberi ex viribus naturæ sine auxilio gratiæ?*
- CAP. XII. *Utrum ad sperandum, sicut oportet, divinas promissiones, gratiæ auxilium requiratur, et quale, quæ ratione necessarium sit?*
- CAP. XIII. *Utrum ad amandum Deum amore concupiscentiæ, ut est summum bonum, et commodum hominis amantis, sit auxilium gratiæ necessarium?*
- CAP. XIV. *Utrum ad amandum Deum, ut supernaturalem finem, et gratiæ auctorem perfecta dilectione amicitæ, auxilium gratiæ per se, et propter speciem, et excellentiam talis amoris, sit necessarium?*
- CAP. XV. *Utrum ad amandum Deum auctorem gratiæ, amore etiam imperfecto, sit per se necessarium gratiæ supernaturalis auxilium?*
- CAP. XVI. *Utrum ad aliquos actus moralium virtutum sit per se necessaria gratia, eo quod in specie sua supernaturales sint?*
- CAP. XVII. *Utrum præter actum fidei, sint in intellectu speculativo aliqui actus supernaturales, propter quos gratia per se necessaria sit?*
- CAP. XVIII. *Quis sit actus sapientiæ specialiter Spiritui Sancto attributus?*
- CAP. XIX. *Quis sit actus intellectus dono Spiritus Sancti specialiter attributus?*

CAP. XX. *Quis sit actus scientiæ dono Spiritus Sancti specialiter attributus?*

CAP. XXI. *Quinam actus sint fortitudo, pietas, timor, et consilium, qui dono Spiritus Sancti specialiter tribuuntur?*

CAP. XXII. *Utrum præter actus virtutum, et donorum, sint alii actus supernaturales, ad quos sit specialis gratia necessaria, qui beatitudines, vel fructus Spiritus Sancti dicuntur?*

CAP. XXIII. *Utrum ad servanda supernaturalia præcepta, quæ de internis actibus data sunt, vel ad non peccandum contra illa, sit gratia necessaria?*

CAP. XXIV. *Utrum ad servanda præcepta supernaturalia de externis actibus, necessaria sit gratia?*

CAP. XXV. *Utrum hominibus etiam iustis sit necessaria nova gratia, ad exequenda media necessaria vel utilia ad æternam salutem consequendam?*

LIBER SECUNDUS.

DE NECESSITATE GRATIÆ

AD ACTUS DIVINI ORDINIS ELICIENDOS

SERVANDA SUPERNATURALIA PRÆCEPTA, ET PECCATA ILLIS CONTRARIA VITANDA.



PRÆLUDIUM

1. Haecenus dictum est de necessitate gratiæ ad actus ordinis naturalis, quæ tota necessitas ex vulnere peccati originalis orta est, et ideo quasi extrinseca et adventitia reputari potest. Nam licet homo in pura natura eandem gratiæ necessitatem haberet, saltem ad non peccandum et honeste vivendum, nihilominus, secundum præsentem Dei institutionem, necessitas illa sublata fuerat, nisi lapsus naturæ intervenisset. Præter hanc vero necessitatem invenitur alia magis intrinseca, et per se consequens ad quamcumque intellectualem naturam creatam, ut ad beatitudinem naturam superantem per opera illi proportionata tendere possit, quæ opera vocamus actus divini ordinis, de quibus per se primo dantur supernaturalia præcepta: et ad illos est necessaria

gratia creaturæ rationali, non ratione alicujus lapsus vel vulneris naturæ, sed per se propter excellentiam talium actuum, et ideo hæc necessitas tam in Angelis quam in homine in natura integra inventa est. In homine autem creato in puris naturalibus non consideratur, quia licet in illo esset impotentia ad eliciendos illos actus propriis viribus, tamen cum non esset ordinatus ad supernaturalem finem, illis actibus non indigeret, ideoque absolute non esset illi talis gratia necessaria.

2. *Doctrina de necessitate extrinseca eadem pene ad utrosque actus.* — Nunc autem in statu naturæ lapsæ utraque necessitas ad hos actus convenienter eliciendos concurrenit, quia et natura per se est impotens ad efficiendos actus superioris ordinis, et vulnera peccati non tan-

tum bonum usum naturalium virium impediunt, sed multo magis supernaturalium. Veruntamen impedimentum hoc proveniens ex peccato fere ejusdem rationis est in operibus supernaturalibus quæ in naturalibus, et ideo ad hanc indigentiam ac necessitatem facile applicari possunt dicta in superiori libro. Quapropter in hoc libro de intrinseca gratiæ necessitate ad actus superioris ordinis dicemus, et quia hæc necessitas in peculiari natura talium actuum fundatur, ideo quantum generalis doctrina permiserit, illam explicabimus; si qua vero difficultas bene operandi etiam his actibus ex originali peccato accreverit, ob quam major gratia ad illos necessaria sit nunc quam ante peccatum, illam etiam declarabimus.

3. *De quibus præcipue actibus tractatio instituat.* — Suppono vero hos actus, qui per se postulant gratiæ auxilium, præcipue esse intellectus et voluntatis, nam per has potentias homo attingit Deum in se, estque capax ejus ut objecti beatitudinis supernaturalis, et ita illæ potentiae sunt quæ objecta supernaturalia, ut talia sunt, attingere possunt. Ac propterea etiam supernaturalia præcepta per se primo de his actibus dantur; de externis vero non nisi quatenus ab his internis pendent, et ab illis solis, sicut oportet, imperari possunt. Ex quo facile quis intelliget materiam hujus libri conjunctissimam esse cum materia de virtutibus infusis, præsertim de fide, spe et charitate, et ideo non posse tractari, quin attingantur aliqua quæ de illis virtutibus disputari solent. Veruntamen ad hunc locum sola ea pertinent quæ generalia sunt, et ideo quoad fieri possit in illis tantum versabimur, ex his vero quæ sunt propria singularum virtutum ea tantum attingentes, sine quibus generalia explicari non possunt, et dicemus prius de his quæ ad intellectum pertinent, quia prior potentia est, deinde de his quæ ad voluntatem spectant, et obiter de inferioribus potentiis quatenus aliquid gratiæ participare possunt, delibabimus.

CAPUT I.

UTRUM GRATIA DIVINÆ REVELATIONIS, AD DEUM IN HAC VITA COGNOSCENDUM, SICUT AD SALUTEM OPORTET, FUERIT NECESSARIA?

1. *Primum punctum hujus capituli.* — *Secundum.* — Diximus, in superiori libro, divinam revelationem per se non esse necessariam ad veritates naturales cognoscendas, ideoque in homine non requiri necessario ad aliquam

veritatem in particulari, ac definite, licet, ad cognoscendas omnes sine errore vel diminutione, necessaria sit homini, præsertim lapso. Nunc vero de veritatibus altioris ordinis tractamus, et duo inquiruntur quæ in titulo insinuantur: unum est, an sint aliquæ veritates quæ sine revelatione cognosci non possint; aliud est, an illa revelatio et cognitio sit ad salutem necessaria: quia vero utrumque in materia de fide, et in aliis locis Theologiæ ex professo disputatur, ideo in præsentī breviter et per summa capita expeditur.

2. *Pro primo puncto.* — *Prima suppositio.* — Imprimis ergo suppono aliqua divina mysteria hominibus esse ad cognoscendum proposita, quæ sine divina revelatione cognosci non possent. Hoc certissimum est traditurque a Theologis tractantibus de Trinitate, Inarnatione, Eucharistia, Vita æterna, seu Visione beata, et aliis potissimis mysteriis fidei, de quibus nos etiam in suis locis diximus. Nunc ergo breviter probatur primo ex illo Matth. 16: *Beatus es, Simon Barjona, quia caro et sanguis non revelavit tibi, sed Pater meus; et ex Paulo ad Rom. 1: Quod notum est Dei, manifestum est in illis, Deus enim illis manifestavit, utique per creaturas, ut ex contextu constat et omnes exponunt. Significatque Apostolus esse aliud, vel alia in Deo non ita manifesta, sed altiora mysteria, quæ nisi revelentur, cognosci non possunt a creaturis, de quibus idem Paulus, 1 Cor. 2, ait: Sapientiam loquimur in mysterio, quæ abscondita est; et infra: Nobis autem revelavit Deus per Spiritum suum. Spiritus autem omnia scrutatur, etiam profunda Dei.* Ratio autem cur hæc non possint naturaliter ab homine cognosci, est quia imperfecte et per sensus sumit cognitionem. Si vero universaliter de omni creatura intellectuali loquamur, ratio ob quam multa non possunt ab ulla creatura naturaliter cognosci, est quia aliqua mysteria Dei per solos effectus naturales non manifestantur, ut mysterium Trinitatis. Omnis autem creatura vi suæ naturæ solum potest cognoscere Deum, quatenus per effectus naturales investigari potest. Alia vero mysteria quæ supra naturæ ordinem a Deo fiunt, priusquam fiant non possunt cognosci ut futura, nisi per revelationem, quia ex libera Dei voluntate pendent; nec postquam facta sunt, quia neque per se cadunt sub objectum intellectus creati, nec per effectus manifestantur, ut latius de Angelis tractatur 1 part., quæst. 57, art. 5.

3. *Secunda suppositio pro secundo puncto.*

— Secundo, supponendum est cognitionem horum mysteriorum, quæ per solam revelationem notificantur, esse necessariam ad salutem. Hoc etiam est certum, et latius probatur in materia de fide. Nunc breviter colligitur ex illis verbis Christi Joan. 17 : *Hæc est vita æterna, ut cognoscant te solum Deum verum, et quem misisti Jesum Christum.* Ubi in verbo *cognoscant*, subjungendum est non solum in vita futura, sed etiam in præsentia, nam hoc modo ait Christum clarificasse Patrem, et manifestasse ipsius nomen hominibus. Si ergo vita æterna sumatur in rigore pro cœlesti vita, sic cognitio hujus vitæ dicitur esse vita æterna, non formaliter, sed causaliter, quia est radix et origo illius, ut dixit Cyrillus, lib. 11 in Joan., cap. 16, et indicat Augustinus, tract. 105. Si autem ipsamet cognitio hujus vitæ dicitur formaliter vita æterna, intelligitur inchoative, ut ait Euthym. ibi. Et in utroque sensu ostenditur ex illo loco, cognitionem Patris et Filii incarnati, et consequenter etiam Spiritus Sancti, esse tam necessariam in hac vita, ut sine illa neque vita æterna in cœlo obtineri, neque hic prout expedit participari possit.

4. *D. Augustini mens.*— Verum est Augustinum sæpe tam verbum *cognoscant*, quam *vitam æternam*, referre ad visionem Dei claram, ut patet lib. de Spirit. et Litter., cap. 33, et l. 2 de Liber. arbitr., cap. 2, ubi advertit ideo non dixisse Christum, ut credant, sed *ut cognoscant*, quia de altiori cognitione loquebatur. Et in hoc sensu, qui est probabilis, testimonium illud non probat intentum, tamen ibidem fatetur Augustinus unam cognitionem esse præmium alterius, et consequenter cognitionem viæ esse radicem alterius : et Christus, in toto illo capite, satis clare loquitur de cognitione viæ. Sed ulterius hoc confirmant verba Christi Joan. 6 : *Omnis qui audit a Patre et vidit, venit ad me.* Audimus autem a Patre per revelationem divinam, juxta illud quod ibidem Christus allegat : *Erunt omnes docibiles Dei*, ex illo Isai. 54 : *Ponam universos filios tuos docentes a Domino*, utique per Christum et prædicatores ejus, quibus ipse dixit Matth. ult. : *Ite, docele omnes gentes*, hæc enim doctrina quædam revelatio est, ut infra dicam. Ratio vero cur ad salutem sit necessaria cognitio illarum rerum, quæ non nisi per revelationem haberi possunt, est ex ordinatione divinæ providentiæ, habet tamen fundamentum quasi connaturale a fine ad quem natura intellectualis ordinata est. Ille enim est supernaturalis beatitudo, in

qua beati visuri sunt etiam profunda Dei, et ideo oportuit ut in via aliquo modo ea præcognoscerent, et quasi paulatim addicerent. Item quia hæc cognitio talium mysteriorum necessaria ad salutem est cognitio fidei, ut jam dicam : *Fides autem est ex auditu, auditus autem per verbum Christi*, ut dicitur ad Rom. 10. Unde etiam Trident., sess. 6, c. 6, dixit : *Disponuntur ad justitiam divina gratia excitati et adjuti, fidem ex auditu concipientes* : nomine autem auditus et verbi Dei omnis divina revelatio comprehenditur, ut statim explicabo.

5. *Tertia suppositio attinens ad utrumque punctum.*— Tertio igitur suppono id quod proxime dixi, hanc cognitionem viæ, ad salutem necessariam, esse cognitionem fidei ; nam licet possit Deus aliis modis se manifestare hominibus, non solum in patria per speciem, sed etiam in via per scientiam infusam vel per propheticam, tamen hi modi extraordinarii sunt, et ad salutem singulorum non necessarii, et ideo de illis non tractamus ; et quia si ad fidem est necessaria gratia, multo magis ad altiores cognitiones Dei. Quod ergo cognitio fidei ad salutem necessaria sit, de fide est, ex Paul. ad Heb. 10 : *Sine fide impossibile est placere Deo.* Et ad Rom. 10 : *Quomodo invocabunt eum in quem non crediderunt.* Et hoc etiam probant illa verba Christi Matth. ult. : *Qui crediderit et baptizatus fuerit, salvus erit*, significans tam necessariam esse fidem ad salutem, sicut est Baptismus. Ratio est, quia hæc mysteria non possunt cognosci per scientiam naturalem, scientia autem infusa nec debuit nec convenienter potuit omnibus dari, et ideo postulata est cognitio, quæ omnibus viatoribus communis esse possit, et ideo quandiu hic peregrinamur, per fidem ambulamus. Item oportuit intellectum captivari in obsequium Dei et ut credendo se disponat ad videndum, et quodam particulari modo per fidem visionem mereatur, ut latius in propria materia tractatur.

6. *Assertio principaliter intenta, et de fide.*— *Probat auctoritate.*— *Accedit ratio.*— Ex his ergo concluditur ad cognoscendum Deum in via, sicut oportet ad salutem, necessariam esse gratiam divinæ et supernaturalis revelationis. Assertio est de fide, quam tradit Concilium Arausicanum, can. 8, ubi definit, *neminem posse sine revelatione Dei mysterium salutis conquirere.* Et Trident., dicto cap. 6 : *Disponuntur (ait) ad justitiam, fidem ex auditu concipientes* : et infra : *Credentes vera esse, quæ divinitus*

revelata sunt. Sumiturque hæc veritas ex testimoniis sacræ Scripturæ paulo autea allegatis. Item ex illo Matth. 11: *Abcondisti hæc a sapientibus et prudentibus, et revelasti ea parvulis;* et paulo inferius: *Nemo novit Filium nisi Pater, nec Patrem quis novit nisi Filius, et cui Filius voluerit revelare;* et Joan. 1: *Unigenitus qui est in sinu Patris, ipse enarravit;* et capite decimo-quinto: *Vos autem dixi amicos, quia omnia quæ audiivi a Patre meo, nota feci vobis;* et infra: *Si non venissem, et locutus eis fuisset, peccatum non haberent;* et infra: *Spiritus veritatis ille testimonium perhibet de me, et vos testimonium perhibebitis.* His enim omnibus modis divinæ revelationis necessitas declaratur, et sexcenta similia in Scriptura passim occurrunt. Unde neque Pelagius necessitatem hujus beneficii divini negavit; imo illud solum, vel maxime gratiam appellabat, ut ex Augustino, hæres. 88, et epist. 93, et l. 1 de Gratia Christi, cap. 31, et lib. 2, cap. 26, et aliis frequentibus locis constat. Ratio item est ex dictis, quia ad salutem necessarium est cognoscere myteria quæ per rationem naturalem cognosci non possunt: ergo oportet ut cognoscantur per cognitionem divinitus datam; hæc autem cognitio debet esse fidei divinæ, ut ostensum est, et magis infra probabitur, quæ fides nititur in divina revelatione, propter quod dixit Paulus *fidem esse argumentum non apparentium*, ad Hebr. 11; ergo divina revelatio est imprimis necessaria ad prædictam cognitionem.

7. *Objectio proponitur et diluitur.* — Dices: multa credimus de Deo in hac vita, quæ naturali etiam ratione cognoscimus, nam Paulus dixit: *Accedentem ad Deum oportet credere quia est,* etc. Deum autem esse naturaliter cognoscimus; ergo saltem de his non est necessaria revelatio. Respondemus, ad cognoscenda hæc per rationem naturalem, non fuisse per se necessariam revelationem, saltem respectu singulorum; tamen ut cognoscantur per fidem Christianam, eorum revelationem necessariam esse. Quia cognitio fidei præstantior est et certior, et ideo indiget altiori medio. Unde quamvis hæc possint de Deo naturaliter cognosci, tamen quia illa sunt veluti fundamentum eorum quæ supernaturaliter cognoscuntur, ideo necesse fuit illa etiam supernaturali modo cognosci et revelari, quia non potest supernaturalis fides in iudicio et certitudine cognitionis naturalis per se fundari, ut in tractatu de Fide latius declarabitur.

8. *Dubium primum et ejus resolutio.* — Sed

quæret aliquis primo, quid nomine revelationis intelligamus. Respondeo breviter intelligi omnem sufficientem fidei propositionem, sive interius tantum fiat, sive per exteriorem prædicationem. Ut hoc autem magis intelligatur, adverto ad cognitionem fidei duo esse necessaria: unum est apprehensio rerum credendarum, quatenus homini proponuntur ut dicta a Deo, et consequenter ut credibilia ex testimonio divino: aliud est assensio ad res propositas, in quo proprie fides ipsa consistit, juxta illud Augustini: *Credere est cum assensione cogitare*, lib. de Prædest. Sanctor., c. 2. Interdum ergo solet revelationis nomine hoc ipsum iudicium comprehendere, in quo sensu accipi potest quod Christus Dominus Petro dixit Matth. 16: *Caro et sanguis non revelavit tibi, sed Pater meus, qui in cælis est.* Et c. 11: *Cui voluerit Filius revelare.* Hic vero non ita loquimur de revelatione, sed priori modo quatenus ad iudicium fidei necessario præsupponitur; sic enim contingit multas revelari fides qui non credunt, quamvis sine prævia revelatione nemo credat.

9. *Dubium secundum, et dubitandi ratio.* — Secundo, inquire potest an revelatio hoc modo sumpta sit gratia. Et ratio duditandi esse potest, quia Pelagius fatebatur ad fidem esse necessariam gratiam, per gratiam revelationem intelligendo, et tamen in hoc graviter reprehenditur ab Augustino, quod dolose de gratia loqueretur, ut veram gratiam negaret, ut patet ex dicta hæresi 88, et ex toto lib. de Gratia Christi, et ex epist. 106, et lib. 2 de Peccat. merit., c. 11. Et confirmari potest ex Joan. 1, ubi gratia distinguitur a lege: *Lex per Moysen data est, gratia per Christum facta est.* Lex autem doctrinam et revelationem comprehendit, vel illi æquiparatur.

10. *Satisfit præcedenti dubio.* — Dicendum vero est gratiam generatim sumptam recte attribui revelationi fidei, nam omne beneficium non debitum naturæ, et conferens aliquo modo ad vitam æternam, gratia merito dici potest, ut ex superioribus constat; hæc autem revelatio est magnum Dei beneficium, ut per se notum est, et non est debitum naturæ, et est necessarium ad salutem, ut dictum est; ergo est quædam gratia Dei. Quod aperte sumitur ex Conc. Milevit., c. 4, dicente: *Quid dixerit gratiam Dei per Jesum Christum Dominum nostrum propter hoc tantum nos adjuvare, quia per ipsam nobis revelatur quid agere debeamus, et aperitur intelligentia mandatorum Dei, et non etiam quia nos jurat,* etc. *anathema sit. Utrumque*

enim donum Dei est, et scire quid agere debeamus, et diligere ut faciamus. Ergo etiam ipsa revelatio est gratia et donum Dei, et ita explicat Concilium in quo Pelagius erraverit, et inde sumitur, quomodo intelligendus sit Augustinus. Reprehendit enim Pelagium non quia revelationem diceret esse gratiam, sed quia præter illam, nullam gratiam vere adjuvantem et operantem confiteretur. Et ideo, ad tollendam verborum elusionem, solet Augustinus distinguere gratiam a doctrina, loquiturque de gratia stricte pro illa qua juvamus, quæ solet dici gratia inspirationis et adjutorii. Altera vero dici potest gratia revelationis. Et hoc modo etiam lex supernaturaliter data a Deo habet rationem gratiæ et beneficii divini, de quo Paulus ad Rom. 3 loquitur, cum dicit fuisse Dei beneficium Judæis collatum, *quia credita sunt eis eloquia Dei.* Estque hæc doctrina Augustini in expositione mystica Ps. 134, circa illa verba: *Educens nubes ab extremo terra,* ubi per nubes, prædicatores verbi Dei intelligit, per quos Deus mentes excitat, vel ad timorem, vel ad pœnitentiam et gratiam. Et l. 50 Homil., in 23, dicit esse gratiam Dei, non habere suasores ad malum; ergo multo magis habere ad bonum. Et l. 1 de Peccat. merit., c. 22, inter singularia gratiæ beneficii ponit habere prædicatores verbi Dei. Idem docet Greg., 20 Moral., cap. 10, et late Prosper, fere toto lib. de Vocat. gent.

11. *Dubium tertium in quo resolvendo erravit Pelagius.* — Tertio, inquiri potest an hæc revelatio ita sit gratia ut sit etiam gratis data. In hoc enim etiam Semipelagiani errasse videntur, nam hominis meritis tribuebant quod ei revelaretur seu prædicaretur fides, et quoniam sæpe contingit, hominibus nulla priora habentibus merita fidem prædicari, et, quod magis est, etiam baptismum dari, ut aperte patet in infantibus, dicebant, hoc ipsum beneficium conferri propter futura merita prævisa, quia prævidit Deus illos fuisse bene usuarios illo beneficio, ut sumitur ex Prospero et Hilario in epist. ad August., ante l. de Prædestinat. Sanctor., et August. eodem libro. Movebantur autem illi ut Deum defenderent ab acceptione personarum.

12. *Resolutio catholica.* — Vera tamen et certa fides est hoc beneficium esse gratuitum, id est, mere gratis et sine ullo merito datum. Probatur imprimis ex Paulo ad Galat. 4: *Cum a terra placuit ei qui me segregavit ex utero matris mee, et revelaret filium suum in me.* Est ergo hoc beneficium ex solo beneplacito Dei.

De quo etiam Christus, Matth. 11, cum dixisset: *Confiteor tibi, Pater,* usque ad illud: *Et revelasti ea parrulis,* concludit: *Ita, Pater, quoniam sic fuit beneplacitum ante te,* quia non ex hominis merito, sed ex divino ac puro beneplacito tantum bonum confertur. Facit etiam quod, Actor. 14 et 16, gratiæ Dei tribuitur, attendere ad ea quæ dicebantur a Paulo; et quod Isai. 65 dicitur: *Inventus sum a non quærentibus me, et palam apparui iis qui me non interrogabant.* Veritas etiam hæc in illis Conciliis intelligitur definita, et in illis locis a Patribus tradita, ubi statuunt initium fidei et salutis gratis nobis dari, et non ex merito: Arausic., cap. 5; Trident., cap. 5; Augustin., toto l. de Prædestinat. Sanctor., et q. 2 ad Simplic., et aliis locis infra tradendis; Prosper, lib. 1 de Vocat. gent., cap. 23 et 24. Nam licet per initium fidei intelligant vel voluntatem credendi, vel vocationem ad fidem per internam inspirationem, profecto si hoc initium non cadit sub meritum, ante illud nullum est meritum. At prædicatio, seu auditio ac revelatio fidei in hac vocatione includitur, vel ad illam antecedit: ergo multo minus potest cadere sub meritum. Confirmatur, quia si tale meritum antecedere posset, illud non esset ex gratia; nam ante fidem nullum est proprium gratiæ meritum, ut supra tactum est, et infra contra Semipelagianos dicetur; ergo nec esse potest ante revelationem fidei; esset ergo per naturæ vigorem, et multum conduceeret ad salutem vitæ æternæ, quæ a revelatione fidei pendet: hoc autem repugnat Concilio Arausicano, cap. 7 et 8; ergo. Item jam haberet homo aliquid de quo gloriaretur tanquam de non gratis accepto, sed merito proprio sui liberi arbitrii comparato, contra regulam Pauli, 1 Corinth. 4: *Quid habes quod non accepisti?* Item jam sancta aliqua cogitatio esset ex nobis, et non ex divino munere gratuito, contra Arausic., c. 9, de quo multa alia supra retulimus l. 1, cap. 2. Unde ratio a priori est, quia sola natura non potest aliquid supernaturale mereri; ante revelationem autem nihil est, nisi sola natura. Præterquam quod ex ipsis effectibus est hoc fere evidens. Quæ enim ratio ex parte hominum gentilium reddi potest, ob quam iis potius quam illis Evangelium annuntiatur, et aliis citius, aliis tardius? Profecto nulla, cum omnes essent impii et iniqui, et sæpe ad illos prius perveniat prædicatio, qui pejores sunt. Non est ergo hic meritum, sed gratia divina et beneplacitum, ut late probat Prosp., lib. 1 de Vocat. gent., c. 13 et sequent., et l. 2, c. 3 et sequentibus.

13. *Ad Semipelagianos in num. 11 adductos* — Quod vero Semipelagiani dicebant de futuris meritis sub conditione prævisis, multa continent absurda, quæ in discursu materiæ confutanda sunt; nunc duo indicare sufficiet. Prius est, quod Deus præmii vel puniat opera quæ nunquam erunt, solum quia sub conditione prævidentur, quod falsissimum et impiissimum esse convincit Aug., libro de Prædestinat. Sanctor., cap. 12, ex illo Pauli ad Rom. 14: *Omnes stabimus ante tribunal Christi, ut unusquisque referat, prout gessit in corpore, sive bonum, sive malum*: et ratio est evidens, quia quæ nunquam futura sunt, neque possunt homini imputari. Item quia ad gratiam Dei pertinet ut auferat occasionem vel etiam vitam eo loco aut tempore in quo prævidet Deus fuisse hominem peccaturum, si talis occasio occurreret, vel si tali tempore viveret, juxta illud Sap. 4: *Raptus est ne malitia mutaret intellectum ejus*. Denique quia de eodem homine prævidet Deus peccaturum uno tempore, et alio recte operaturum, si vivat; cur ergo potius præmio quam pœna illum afficiet, si neutrum absolute facturum sit? Est ergo evasio erronea et contra omnem rationem. Alius error Semipelagianorum erat, quia etiam posita illa præscientia, falsum asseruisse convincuntur ex verbis Christi, Matt. 11: *Væ tibi, Corozain, væ tibi, Bethsaida, quia si in Tyro et Sidone factæ essent virtutes quæ factæ sunt in vobis, olim in cilicio et cinere pœnitentiam egissent*. Ex hac enim Christi sententia constat prædicatum esse Evangelium cum signis et virtutibus, iis qui non fuerunt credituri, et non esse prædicatum his qui credidissent, si eis prædicaretur, ut notavit Augustinus Enchirid., c. 95, et lib. 2 de Persever., c. 9 et 10; et Prosper ad excerpta Genuen., respons. 8.

CAPUT II.

UTRUM AD CREDENDUM REVELATIS SPECIALIS GRATIA DEI SIT NECESSARIA.

1. *Quid in hoc erraverint Pelagiani et Semipelagiani.* — Error Pelagianorum et Semipelagianorum fuit, fidem non esse donum gratiæ Dei vere adjuvantis ad credendum, inspirando liberam credendi voluntatem; non tamen eodem modo in hoc errarunt. Quod ut intelligatur, sciendum est actum credendi, cum liber sit, duos actus includere. Unus est intellectus, scilicet, assentiri veritati propo-

sitiæ; alius est voluntatis, nimirum velle assentiri. Pelagiani ergo dixerunt utrumque actum posse viribus naturæ fieri, facta sufficienti revelatione et propositione objecti, sine alio divinæ gratiæ adjutorio, pro sola credentis libertate. Et ante Pelagium fuit in illo errore Tinnius, ut Aug. refert lib. 3 de Doctr. Christ., c. 33. Postea vero Semipelagiani dixerunt post revelationem, seu propositionem credibilium factam, in sola libertate positum esse velle credere, sicut velle non credere: ad credendum autem, sicut oportet, necessarium esse novum gratiæ adjutorium. Et in hoc sensu dicebant ad fidei actum esse necessariam gratiam, non vero ad voluntatem credendi. Quamvis aliqui eorum etiam aliquam fidem minus perfectam dicerent esse ex nobis sine gratia, quam per gratiam perfici necesse sit, nisi forte ipsammet voluntatem credendi fidem imperfectam vocarent. Ex quo tandem inferebant hanc gratiam quæ ad recte credendum datur, non mere gratis dari, sed ex merito illius voluntatis credendi, vel illius fidei imperfectæ. Hæc omnia constant ex dictis in Prolegom. 5, et ideo ea latius explicare aut probare non est necessarium; neque etiam illorum errorum fundamenta referre, quia solum movebantur, vel ut fidem liberam esse defenderent, vel ut Deum a personarum acceptione liberarent. De quibus sæpe jam dictum est, et de primo ex professo dicitur, tractando de concordia gratiæ et liberi arbitrii. De secundo vero in materia de prædestinatione late dictum est, in gratuita donatione priorum bonorum pro sola voluntate nullam esse personarum acceptionem.

2. *Quid etiam Luther.* — At vero Lutherani et alii Novatores, cum in sola fide justitiam nostram collocent, facile potuerunt in hoc puncto non errare, agnoscendo fidem esse donum Dei et sine gratiæ auxilio non fieri. Verumtamen nihil certum in hoc dicere possum, et verisimilius credo nihil supernaturale de fide cogitasse præter extrinsecum favorem vel acceptionem; quia voluntatem credendi negant fieri posse a nobis libere, sed vel a solo Deo fieri in nobis, vel per voluntatem Dei nostram necessitari ad volendum credere. Unde nullum aliud auxilium putant esse nobis necessarium ad illam voluntatem propter dictam efficaciam divinæ voluntatis, quam in omnibus actibus humanis requirunt. Unde nihil altius de voluntate credendi vel de ipso actu fidei cogitasse videntur. Eo vel maxime quod cum dicant omnia nostra opera esse peccata, idem necesse est ut de voluntate credendi sen-

unt; quomodo ergo possunt ad talem fidem
rum gratiæ auxilium postulare? Sed funda-
enta hujus erroris in sequentibus tractanda
nt, et ideo illum omittimus.

3. *Prima assertio de fide, et probatur primo*

Scriptura. — Dico ergo primo: ad creden-
um sicut oportet ea quæ divinitus revelantur,
ecessarium est ex parte intellectus speciale
atiæ adjuvatorium, a revelatione seu sufficienti
jecti propositione distinctum. Est de fide,
obaturque primo ex Scriptura. Nam Joan. 6
eit Christus: *Nemo potest venire ad me nisi*
ater meus traxerit eum. Statim vero exponit
id sit venire, dicens: *Sunt quidam ex vobis*
non credunt, credere ergo est venire; quid
tem sit trahi explicat, dicens: Propterea
xi: Nemo potest venire ad me, nisi ei datum
erit a Patre meo: unde inferius subdit: Hoc
opus Dei, ut credatis in ipsum. Diciturque
pecialiter *opus Dei*, propter speciale adjuvo-
um, nam per concursus generalem omnia
nt opera Dei. Atque ad hunc fere modum
pendit hoc testimonium Augustinus, tractu
29 in Joann., et lib. 1 contra duas episto-
s Pelagianor., cap. 19; idem probatur ex
rbis Christi, Joann. 15: *Sine me nihil po-*
tis facere, ubi loquitur Dominus de operibus
uetuosis ad salutem, de quibus statim subdit:
Manet in me et ego in eo, hic fert fructum
ultum, et loquitur de se non tantum ut est
us, sed etiam ut est homo et redemptor,
patet ex illis verbis: *Ego sum vitis vera,*
Pater meus agricola est, ut intelligamus vir-
tem et auxilium gratiæ ab ipsius meritis
oveniens, necessarium esse ad hæc opera,
videri potest in Augustino ibi, tract. 80, et
larario, lib. 9 de Trinit., et sumitur ex Tri-
ntin., cap. 6.

4. *Accedunt loca alia ex Paulo.* — Præterea
e assertio est principaliter intenta a Paulo in
istola ad Romanos, in qua præcipue ostendit
titiam esse ex spiritu fidei, et non ex lege:
de ait cap. 3: *Ex operibus legis non justifi-*
bitur omnis caro coram illo, docens non esse
is doctrinam aut revelationem, nisi accedat
iritus et gratia Christi, quæ est per fidem;
de subjungit: *Justitia autem Dei per fidem*
su Christi: et ideo concludit justitiam ve-
m non esse per legem factorum, sed per le-
m et spiritum fidei, de quo ait c. 12: Uni-
que sicut Deus divisit mensuram fidei. Ex-
e ad Ephes. 2: Salvati estis per fidem, et
non ex vobis, donum enim Dei est, ne quis
rietur; cui comparat illud 1 Cor. 4: Quid
bes quod non accepisti? et c. 7: Misericor-

diam consecutus sum, ut sim fidelis; non dicit
quia sum, sed ut sim, ut intelligatur miseri-
cordia prævenire, ut considerat sæpe Augus-
tinus. Unde ad Phil. 1: Vobis donatum est pro
Christo, non solum ut in eum credatis, etc.;
deinde Actor. 13: *Crediderunt quotquot præor-*
dinati sunt in vitam æternam.

5. *Probatur secundo ex Conciliis, et Pontifi-*
cibus, et Patribus. — Præterea definita est hæc
veritas contra Pelagium in Conciliis, Milevit.,
cap. 4 et 5, generatim de operibus pietatis, et
in Africano, canon. 17 et 18; Arausic., cap. 5
et 6, et Trident., sess. 6, canon. 1, 2 et 3; et
traditur a Cœlestino in epist. 1 ad Episcop.
Galliæ, cap. 10; Leone Papa, ep. 84, alias 86,
et ab Innocent. I, in ep. ad Episcop. Africae,
25 et sequentibus, et apud August. 93. Et de
hæc veritate videri potest Augustinus, ultra ci-
tata loca, in lib. de Spirit. et litter., cap. 31
et sequentibus, et q. 2 ad Simplic., et ep.
90 et sequentibus, et toto lib. de Prædestin.
Sanctor., et de Bono perseverant. in principio,
et cap. 19; et lib. 1 de Grat. Christi, et alia
loca statim referam. Et Fulgentius, lib. de
Incarn. et grat., c. 17 et sequentibus, et lib. 1
ad Moni., cap. 15; et Prosper, lib. 1 de Vocat.
gent., c. 8 et 9, alias 23 et 24, et contra Collat.,
cap. 6, ut alia omittam, quæ vulgaria sunt;
solum proponam optima verba Isidori, lib. 3
Sentent., cap. 10: *Doctrina sine adjurante*
gratia, quamvis infundatur auribus, ad cor
nunquam descendit, foris quidem perstrepat, sed
interius nihil proficit. Tunc autem Dei sermo
infusus auribus ad cordis ultima pervenit,
quando Dei gratia mentem interius, ut intelli-
gat, tangit.

6. *Ut ratione probetur, subditur minus prin-*
cipalis assertio. — Ut autem ratione probe-
tur hæc assertio, statuendum prius est adju-
vatorium Dei non esse necessarium tantum ad
facilius credendum, ut Pelagius et Cœlestius
dicere ausi sunt, sed esse necessarium simpli-
citer ad credendum, ac proinde hanc non esse
necessitatem ad melius esse, quæ potius est
utilitas, sed esse necessitatem simpliciter, quia
sine illo auxilio non solum ægre possumus,
sed potius omnino non possumus credere, si-
cut oportet. Quod eadem fide certum est et in
terminis definitum in prædictis Conciliis, præ-
sertim in Milevitano, c. 3; et Trident., can. 3:
Si quis dixerit, sine præveniente Spiritus San-
cti inspiratione et adjuvatorio, posse hominem cre-
dere sicut oportet, anathema sit. Et idem ha-
bent Pontifices citati. Probantque adducta Scri-
pturæ testimonia. Nam Christus dixit: *Sino*

me nihil potestis facere. Et Paulus: *Quid habes quod non accepisti?* et 2 ad Corinthi. 3: *Non sumus sufficientes,* etc. Non enim poterant clarius nostram impotentiam explicare. De qua late August., toto lib. de Prædest. Sanctior., et lib. 2 contra duas epist. Pelagian., cap. 8, et lib. 1 de Grat. Christi, cap. 29; Prosper et Fulgentius in locis vulgatis.

7. *Alia assertio, etiam de fide.* — Atque hinc etiam constat necessitatem hujus auxilii esse ad singulos actus, ita ut nec minimus actus fidei, si sit fidei Christianæ et sicut oportet, haberi possit ab homine sine hoc gratiæ adjutorio. Hæc etiam propositio æque certa est ac præcedentes, et de operibus pietatis generaliter definita est in Conciliis Palestino et Milevitano, et tradita ab Augustino, epist. 107, et multa alia retuli libro præcedenti, cap. 15, quæ in hunc modum explicavi, et ita confirmant hanc veritatem. Quam etiam colligo in hunc modum ex definitione Concilii Tridentini; statuit enim non posse hominem credere sicut oportet, sine Spiritus Sancti gratia; ergo nullum actum fidei potest homo facere sicut oportet, sine gratia. Nam qui vel unum actum veræ fidei elicit, jam credit, sicut oportet; imo ibi implicite credit omnia, quia ratio credendi universalis est; propter hoc e contrario, qui vel in una parte fidei non credit, nihil vera fide credit. Accedit quod eadem difficultas essentialis, ut sic dicam, est in quolibet actu fidei, et ideo si unus posset fieri viribus naturæ, quilibet fieri posset. Denique eodem modo ibi dicitur neminem posse diligere sicut oportet; unde recte colligitur neque unum actum dilectionis, sicut oportet, posse facere hominem sine gratia, alias sine gratia posset salvari, quia, per unum actum fidei et dilectionis sicut oportet, potest homo salvari.

8. *Affertur jam ratio prioris assertionis principalis.* — Hinc ergo sumenda est ratio principalis assertionis, scilicet, auxilium hoc requiri ex intrinseca natura talis actus, quæ superat naturalem potestatem intellectus humani ad aliquid efficiendum. Unde sit hanc necessitatem non esse ex accidenti (ut sic dicam) vel ex intrinseco impedimento, sed per se, et ex natura rei. Declaratur incipiendo ab hoc ultimo, quia hæc gratia non solum est necessaria ad credendum in statu naturæ lapsæ, sed etiam in statu naturæ integræ; imo non solum in natura humana, sed etiam in Angelica; ergo signum est hanc necessitatem provenire per se et ab intrinseco ex natura talis

actus. Idem colligitur, ex eo quod paulo antea dicebam, hanc necessitatem esse ad singulos actus; ergo signum est esse per se, et non ex accidenti: nam ea quæ sunt per accidens variantur, et interdum deficiunt, ut supra dicebamus de actibus ordinis naturalis. Præterea est ratio a priori, quia actus fidei fundatur per se in sola auctoritate divina obscure revelante, et ad illam reducit omnia principia credendi, tanquam ad rationem formalem, propter quam firmissime et tanquam omnino infallibile creditur quidquid hac fide tenetur; hic autem modus credendi superat naturales vires intellectus, quia proprio lumini commensurantur: ergo per se et ex propria ratione talis actus fieri non potest sine viribus gratiæ. Quæ sit supernaturalitas illius actus, infra dicam. Denique est optima ratio a posteriori, quia per fidem impetramus alia dona gratiæ, juxta illud Jacob. 1: *Postulet in fide nihil hæsitans,* et docet Aug. epist. 103; ergo oportet ut ipsa sit donum gratiæ, nam per dona naturæ non meremur gratiam, ut Concilium Arausicanum definit, et infra trademus. Alias initium salutis esset ex nobis, quod est damnatum, ut dicemus. Similiter per fidem resistimus tentationibus, juxta illud Petri: *Cui resistite sortes in fide;* ergo pertinet ad illam gratiam, per quam nobis datur tentationum victoria. Tandem fides est fundamentum justitiæ, Rom 3, et ad Heb. 11, et exponit Trident., sess. 6, cap. 8: ergo oportet ut sit ejusdem ordinis cum ipsa justitia, ac subinde supernaturalis et ex gratia.

CAPUT III.

UTRUM AD INITIUM FIDEI SIT NECESSARIA GRATIA?

1. *Initium fidei quid et quotuplex.* — *Consule auctorem in tractatu de Fide, disp. 6, sect. 6.* — In superiori capite, Pelagianorum errorem refutavimus; hic contra Semipelagianos breviter agendum est. Et ne de voce initii fidei sit ambiguitas, advertendum est illa voce significari posse quidquid post revelationem fidei, et ultra illam ex necessitate antecedit in intellectu aut voluntate, antequam intellectus proprium assensum fidei eliciat. Hoc autem sic prævium ad assensum fidei duplex cogitari potest, scilicet, voluntas credendi, et interna vocatio et excitatio ad volendum credere, hæc enim duo per se necessaria sunt. Nam quia fidei propositio seu revelatio, cum non sit evidens, intellectui necessitatem non infert, nec

lum omnino determinat, necesse est ut antedat voluntas illum determinans, ut ostendit Thom. 2. 2, quæst. 4, art. 4, quia *fides* (ut dixit Clemens Alex., lib. 5 Stromat., in princ.) *est animæ rationalis libero arbitrio utentis assensio*; cum ergo intellectus liber non sit, sensum determinare libere non potest: ergo a libera voluntate determinandus est. Ante voluntatem autem necesse est ut præcedat sufficiens inductio et præparatio. Præter hæc vero quid aliud interdum antecedit, erit per accidens; utrumque autem illorum potest initium vocari. Nam Concil. Arausican., cap. 5, voluntatem credendi vocat initium fidei. Juxta doctrinam autem Concilii Trident., sess. 6, c. 5, vocatio ad fidem, quæ per internam prævenientem gratiam in nobis fit ante voluntatem credendi, dici etiam potest initium fidei. Nam et Concilium ibi non loquatur specialiter de initio fidei, sed de exordio justificationis, nihilominus cum fides sit justificationis fundamentum, clarum est similem vocationem ad fidem esse etiam fidei exordium. Et ita illud describit Concilium statim c. 6 dicens: *Disponuntur autem ad ipsam justitiam, dum excitati divina gratia et adjuti, fidem ex auditu concipientes, libere moventur in Deum*. Est ergo duplex fidei initium, quorum prius vocare possumus proximum, et aliud remotum; vel cum des partim sit in intellectu, partim in voluntate, unum est principium fidei prout in intellectu consummatur, aliud est initium fidei prout in voluntate inchoatur, et de utroque breviter dicendum est.

2. *Assertio prima de fide. — Credulitatis affectus quid in citato Concilio. — Quid item initium fidei. — Quid etiam augmentum fidei.* — Dico ergo primo: post auditam fidem Evangelii, vel revelationem acceptam, neminem habere posse absolutam voluntatem credendi sicut oportet, seu modo Christiano, nisi per gratiam Dei excitantem et adjuvantem. Assertio, absolute et in terminis sumpta, est de fide, nam definita est a Conc. Araus., can. 5: *Si quis sicut augmentum, ita etiam initium fidei, et augmentumque credulitatis affectum, etc.* In quibus verbis obcurum est quid per augmentum, et unde per initium fidei intelligat; quid autem sit affectus credulitatis non est obcurum, sed clarum. Affectus enim credendi plane idem est cum voluntate credendi; illa enim vox, *affectus*, non significat quamcumque inchoatam et simplicem complacentiam ad rem fidei, sed efficacem affectum, quo (ut statim dñ ad Aug.) *in eum credimus qui justificat impium,*

et ad regenerationem baptismatis pervenimus. Hoc autem non fit nisi per efficacem voluntatem, ut constat; de hac ergo definit esse per inspirationem Spiritus Sancti *corrigenstem voluntatem nostram ab infidelitate ad fidem, ab impietate ad pietatem*. Per initium autem fidei fortasse intellexit Concilium hanc eandem voluntatem, nam cum dicit, *initium fidei, ipsumque credulitatis affectum*, hæc posterior pars non videtur addere tertium membrum, sed explicationem proxime præcedentis; unde in t. 2 Conciliorum, omissa conjunctione *que*, sic legitur: *Initium fidei ipsum credulitatis affectum*, subintelligendo particulam, *id est*, vel aliam similem, quam nonnulli codices habent hoc modo, *initium fidei, hoc est ipsum credulitatis affectum*. Et hunc verborum illorum sensum in principio capitis supposuimus. Quo posito, per augmentum fidei sufficienter intelligimus ipsam fidem, prout est in intellectu; tum ne illa videatur in illa definitione omissa, cum de illa præcipue probationes ibidem afferantur; tum etiam quia opponit augmentum fidei ejus initio, quod in voluntate credendi consistit, et quasi augetur, vel potius completur, quando in intellectu motione sua efficit assensum. Et hac declaratione, tanquam faciliori, et probabiliori, utemur.

3. *Expositio alia prædictorum.* — Potest tamen alia expositio illorum verborum considerari, ut per augmentum fidei intelligatur quod in rigore verba sonant, aliquod comparatæ jam fidei incrementum, et per initium fidei ipsummet actum credendi, prout primum in nobis fit et esse incipit, ac denique per affectum credendi, ipsam voluntatem credendi. Et sic quoad doctrinam quam intendimus nulla est diversitas, sed additio, quia sic expresse definitur, etiam augmentum fidei esse ex Spiritus Sancti inspiratione, quod verissimum est. Et expositio videtur non parum consentanea Augustino, libr. de Prædestinatione Sanctorum, cap. 2. Aliter etiam possent illa duo distinguui, initium fidei et affectus credendi, ut per initium intelligatur vocatio ad fidem, ad quam sequitur voluntas credendi, quæ causa est actus fidei, qui per augmentum fidei significatur juxta primam expositionem. Et hoc modo confirmat ille canon non solum præsentem assertionem, sed etiam sequentem, et aliam, quam capite præcedenti stabilivimus. Et omnibus modis canon ille intentam a nobis veritatem comprobat. Quam Concilium probat tribus Scripture locis. Primus est generalis ad Philip. 4: *Qui cepit in vobis bonum opus, in vobis*

perficiet. Alia vero sunt specialia de fide, scilicet, eodem Philip. 1 : *Vobis donatum est pro Christo, non solum ut in eum credatis,* etc. Et ad Ephes. 2 : *Gratia salvati estis per fidem, donum enim Dei est.* Quæ testimonia, quia de fide simpliciter loquuntur, et fides est voluntaria ac libera, tacite explicantur a Concilio, ut non solum de actu intellectus, sed etiam de voluntate credendi intelligantur, estque expositio conformis Augustino, libr. de Prædest. Sanctor., cap. 2 et 7.

4. *Ratio ejusdem Concilii subobscura exponitur.* — Addit denique Concilium, in fine canonis, rationem subobseuram ab inconvenienti sumptam, dicens : *Qui enim fidem qua in Deum credimus, dicunt esse naturalem, omnes eos qui ab Ecclesia Christi alieni sunt, quodammodo fideles esse definiunt?* Non est enim facile deducere hoc inconveniens ex Semipelagianorum sententia. Cur enim idololatræ erunt aliquo modo fideles, etiamsi fides in nobis esset ex viribus naturæ, quia de facto non est in illis, etiamsi, juxta illum errorem, vires habeant quibus possent credere, si eis prædicaretur Evangelium. Sed videtur illatio intelligenda de his qui extra Ecclesiam in Deum aliquo modo credunt, ut sunt hæretici, Judæi et Pagani; illi enim aliquam naturalem seu acquisitam fidem habent, et ideo si nostra etiam fides naturalis esset, quodammodo illi fideles vel Christiani essent. Quæ ratio tanquam ex abundanti addita est a Concilio tanquam conjectura, et manu ductio quædam, ad significandum fidem Christianorum altioris rationis esse ab omni fide, qua extra Ecclesiam nonnulli credunt in Deum, ac subinde, licet hæc sit voluntaria voluntate naturali, nihilominus voluntatem credendi modo Christiano opus esse divinæ gratiæ.

5. *Refertur interpretamentum quorundam allati canonis.* — Non defuerunt autem qui hanc definitionem de fide viva interpretati fuerint, ita ut non quilibet affectus credendi, sed ille quo aliquis vult credere in Deum super omnia dilectum, ex gratia esse definiatur. Possentque juvari illis verbis : *Corrigentis voluntatem ab infidelitate ad fidem, et ab impietate ad pietatem,* id est, ad sanctitatem. Item inducere possunt verbum illud : *Qui enim fidem qua in Deum credimus, naturalem esse definiunt.* Nam fides qua in Deum credimus est fides viva, seu formata, juxta vulgarem expositionem D. Thomæ; ergo de illa sola loquitur Concilium. Quam quidem sententiam typis mandatam non invenio : audivi autem virum

satis doctum et gravem, illam publice in quadam Academia docuisse, consequenterque dixisse voluntatem credendi, quæ charitatem præcedit, posse sine viribus gratiæ per liberum arbitrium haberi. Quæ sententia valde mihi displicet, quia censeo in hoc canone esse damnatam, et ideo breviter ostendam expositionem illam omnino falsam, et contra verba et mentem Concilii esse.

6. *Rejicitur primo et secundo.* — Primo, quia per illud decretum intendit Concilium damnare errorem Semipelagianorum, qui dixerunt, licet perfecta fides sit ex gratia, initium fidei esse ex nobis, maxime voluntatem credendi, ut constat ex Aug., libr. de Prædest. Sanctor., cap. 2 et sequentibus, et Prospero, et Hilario in epistola ad ipsum; ergo Concilium non loquitur de voluntate charitatis, seu contritionis, sed de illa voluntate, de qua, seu circa quam Semipelagiani errabant. Secundo, idem probatur ex verbis Concilii, quia charitas, quæ informat fidem et facit illam esse vivam, non potest dici initium fidei, sed potius ejus perfectio: neque amor charitatis, quo fides vivit, est affectus ipse credendi, sed est amor Dei super omnia, qui longe diversus affectus est. Unde hic etiam amor seu affectus diligendi Deum non mutat hominem ab infidelitate ad fidem, potest enim fieri hæc mutatio sine infusione charitatis, fit autem per affectum credendi; ergo sermo est de isto affectu, quatenus præcise ad fidem terminatur, per quem transfertur homo ab impietate ad pietatem, id est, a falso cultu ad verum cultum veri Dei, hoc enim proprie illa verba significant.

7. *Rejicitur tertio.* — Tertio, hoc evidentius convincunt verba ejusdem Concilii, in canon. 7 dicentis : *Si quis per naturæ rigorem bonum aliquod, quod ad salutem pertinet vitæ æternæ, cogitare ut expedit, aut eligere, sive salutari, id est, Evangelicæ prædicationi consentire posse confirmat absque illuminatione et inspiratione Spiritus Sancti, qui dat omnibus suavitatem in consentiendo, et credendo veritati, hæretico fallitur spiritu, non intelligens vocem Dei in Evangelio dicentis: Sine me nihil potestis facere. Et illud Apostoli: Non quod idonei sumus cogitare aliquid a nobis, quasi ex nobis, sed sufficientia nostra ex Deo est.* Ubi pondero verbum : *Consentire prædicationi;* nam consentire actus voluntatis est, quem statim ab actu credendi distinguit Concilium, dicens : *Dat suavitatem in consentiendo et credendo;* ille autem consensus non est nisi voluntas credendi, quæ antecedit charitatem, et

ne illa esse potest: infidelis enim consentiendo prædicationi, convertitur ad fidem, si nunc nondum amet super omnia Deum, nec pœnitentiam agat: ergo ad illum etiam consensus requirit gratiam Concilium. Præsertim quia etiam illa voluntas est quædam effectio conferens multum ad vitam æternam, et ita etiam comprehenditur sub prioribus verbis ejusdem Concilii. Idemque sumitur ex can. 25 et aliis generalibus decretis. Et tandem confirmatur ab inconvenienti, quia alias nec secundum se non esset ex gratia, sed tantum ut viva per charitatem; consequens est omnino erroneum, quia etiam fides inforis, ut tempore separatur a justificatione, est donum Dei, ut constat ex Conc. Trid., sess. 6. c. 14, et ex omnibus dictis in præcedenti capite. Sequela vero patet, quia Concilium tridentinum eodem modo requirit gratiam ad fidem et ad initium fidei; ergo vel in utroque loquitur tantum de fide viva, et sequitur inconveniens dictum, vel in utroque loquitur de fide secundum se, etiam ut antecedit justificationem, et sic concluditur quod intendimus.

8. *Quarto, contra idem interpretamentum arguitur pro assertione, ex Tridentino.* — *Arguitur quinto.* — Quarto, veritas ipsa et assertio posita confirmatur ex doctrina Concilii Tridentini, sess. 6, cap. 6, ubi describendo justificationem, inquit: *Moventur autem ad justitiam, dum divina gratia excitati et adjuti, libere moventur in Deum, credendo, etc.*, ubi aperte loquitur de fide, quæ antecedit cæteras dispositiones ad gratiam, etiam remotas et imperfectas, ut sunt timor, etc., et tamen dicitur de hac fide, quatenus libera est, esse ex gratia excitante et adjuvante; est autem fides libera, ratione hujus voluntatis; ergo ad hanc voluntatem requirit gratiam excitantem et adjuvantem. Et juxta illam doctrinam intelligendus est canon 3, ubi ad fidem dicit esse necessariam illuminationem, inspirationem, et adjuvantem gratiam, nam sub fide comprehendit hanc voluntatem, quia loquitur de illa et actus liber et humanus est. Quinto, hoc probant testimonia Scripturæ quibus eadem concilia utuntur, ut videmus, quibus addi potest illud Actor. 16: *Cujus Dominus aperuit auribus, intendere iis quæ dicebantur a Paulo.* Et etiam probant cætera jam adducta, quæ generaliter loquuntur de operibus pietatis: nam ab illi merito comprehenditur hæc voluntas, quia per se multum confert ad salutem et pietatem, et est actus maxime necessarius ad salutem. Unde si homo a se haberet illam volun-

tatem, multum haberet unde gloriari posset; imo initium salutis posset sibi tribuere, quia ab hoc actu illud magna ex parte incipit.

9. *Arguitur sexto ex Patribus.* — Sexto, propter hæc et similia, Augustinus, qui aliquando fuit in illa sententia in quadam expositione epist. ad Rom., proposit. 62, illam sub nomine erroris retractavit 1 *Retractat.*, c. 23; et lib. de Prædest. Sanct., cap. 3, dicens se fuisse aliquando in illo errore. Et in illo libro late hoc persuadet, tum ex variis Scripturæ testimoniis, tum etiam argumentis desumptis ex orationibus, quibus aliis hanc voluntatem credendi petimus, et pro simili voluntate nobis vel aliis data gratias agimus, et, ut in ea perseveremus, postulamus; tum ex eo quia alias si initium fidei seu voluntas credendi esset ex nobis, per illam possemus mereri fidem, et per fidem cætera, et ita simpliciter initium salutis esset ex nobis, et vicissent Semipelagiani, et destrueretur ratio gratiæ, quia jam non gratis, sed ex meritis daretur. Quæ argumenta late prosequitur tum ibi, tum q. 2 ad Simplicianum, et lib. 2 contra duas epist. Pelag., c. 8 et seq.; Prosper, contra Collat., cap. 6, et in epist. citata, et ad excerpta Gennens., dub. 5, et lib. 1 de Vocat. gent., cap. 22, alias 7; Fulgent., de Incarn. et grat., cap. 18, et optime de fide ad Petrum cap. 32; et Petr. Diacon., lib. de Incarn. et grat., cap. 6, in fine.

10. *Ultimo, ex ratione.* — Tandem ratio theologica hujus assertionis eodem modo explicanda est quo id fecimus in præcedenti capite. Nam hæc necessitas non est accidentaria ex difficultatibus vel impedimentis extrinsecis, sed est per se, ut probant omnia adducta. Unde in omni statu intellectualis creaturæ, atque adeo in omnibus et singulis actibus volendi credere, talis necessitas invenitur, quod eodem modo probandum est; ergo provenit hæc necessitas ex supernaturalitate ipsiusmet actus. Hæc autem declarari potest ex ipso actu credendi intellectus, vel quatenus est effectus, vel quatenus est objectum hujus voluntatis. Nam voluntas per hunc affectum efficaciter movet intellectum, et captivat illum in obsequium fidei; illa autem motio intellectus supernaturalis est; ergo et voluntas non potest per solas vires naturæ efficaciter movere intellectum ad operandum supra naturam. Item honestas, quæ invenitur in ipso actu credendi, quam voluntas amat per illum actum suum, supernaturalis est; ergo et ipse affectus est supernaturalis; qualis autem hæc supernaturalis sit, in sequentibus explicabimus.

11. *Scotus sensisse videtur contra assertio- nem.*— Contra hanc vero sententiam sensisse videtur Scotus in 3, d. 25, q. 2, ubi directe contra D. Thomam contendit non esse necessarium in voluntate habitum infusum, qui sit principium voluntatis credendi. Consequenter vero id probat, quia ad credendum non est necessaria voluntas credendi, quæ ex gratia fiat, ac subinde quæ supernaturalis sit, quia ad credendum ex fide infusa, vel nulla voluntas necessaria est, sed sufficit ut voluntas non contradicat; vel, *esto*, inquit, *requiratur motio positiva voluntatis, etiam sufficit voluntas ad sic movendum in puris naturalibus*, per quæ verba non solum habitum, sed etiam principium supernaturale, omneque speciale auxilium excludit. Potestque hæc sententia vulgari objectione suaderi, quia interdum movetur homo ad fidem per voluntatem peccaminosam: talis autem voluntas non potest esse ex gratia: ergo non oportet voluntatem credendi semper esse ex gratia. Minor videtur per se nota, quia mala voluntas non potest esse ex inspiratione divina: *Gratia enim Dei* (ut Aug. lib. de Grat. et lib. arb., c. 15, dixit) *semper est bona, et per hanc fit ut homo sit bonæ voluntatis*. Et ideo etiam lib. 2 contra duas epist. Pelag. dixit: *Cupiditas boni a Deo non esset, nisi bona esset*. Majorem autem propositionem indicat Augustinus, lib. de Catechizand. rudib., c. 17, dum dicit aliquos fieri Christianos propter humanum honorem, vel aliam temporalem cupiditatem, qui actus malus est.

12. *Ad Scotum quid imprimis dicendum.*— Ad Scotum respondemus imprimis, ejus responsionem procedere ex quibusdam fundamentis parum consentaneis veris de gratia principiis; ille enim opinatur fidem infusam supponere fidem acquisitam; imo actum fidei infusæ esse eundem in substantia et entitate, solumque differre in aliquo modo quem actus fidei Christianæ habet ab habitu infuso. Hinc ergo, in citato loco, dixit Scotus ad fidem acquisitam articulorum fidei sufficere voluntatem naturalem moventem intellectum, post illam vero fidem vel non esse necessarium voluntatis actum ad credendum fide infusa, vel esto requiratur, eandem voluntatem ex puris naturalibus elicitam sufficere. Hæc autem doctrina probanda non est, quia sapit Semipelagianum errorem. Unde quidquid sit, an actus fidei infusæ et acquisitæ differant in substantia actus, quod postea videbimus, et an acquisitus ad infusum supponatur, quod ad præsens non refert, et in propria materia tractandum

est, ut certum supponimus ad credendum fide infusa, necessariam esse positivam motionem voluntatis per affectum credendi. Nam hoc aperte supponitur in dicto canone Concilii Arausiacani, dum affectum credendi initium fidei vocat, vel saltem eum numerat ut necessario conjunctum cum actu credendi. Denique idem docet sæpius Augustinus, præsertim de Prædestinat. Sanctor., cap. 5, et in fine quæst. 2, ad Simplician., et tract. 26 in Joann., quem locum late expendit et defendit Prosper ad Excerpta Gennens., cap. 4. Idemque supponit Fulgent., de Incarnat. et grat., cap. 17; Bernard., lib. 5 de Considerat., cap. 6. Hoc ergo posito, certum est illam voluntatem debere esse divinitus inspiratam, ac subinde non posse haberi ex puris naturalibus, ut probatum est. An vero possit Scotus aliquo modo excusari, paulo inferius dicam.

13. *Deinde ad objectionem pro illo quid nonnulli respondeant.*— Ad objectionem vero aliqui putant posse eundem actum ex objecto bonum fieri malum ex relatione ad prævum finem, retenta bonitate quam ex objecto habet. Juxta quam sententiam consequenter dici potest eandem voluntatem credendi, etiam si ex gratia sit, et inde habeat bonitatem sui ordinis, posse accidentaliter male fieri ex relatione ad malum finem. Ego vero sententiam illam in universum falsam esse censeo, maxime vero in actibus supernaturalibus a voluntate elicitis, quos ab omni macula puros esse necesse est, quia revera non possunt ex malo sine imperari, de quo latius in 1. 2, q. 18.

14. *Vera responsio.*— Respondeo ergo negando minorem; nam si voluntas movens ad credendum sit ex motivo humano, non sufficit ad credendum, sicut oportet, nam illud motivum non solum debile est, sed etiam potest inducere ad non credendum; unde aiebat Christus, Joan. 5: *Quomodo potestis credere, qui gloriam invicem accipitis?* vel certe potius inducit ad fingendum quam ad credendum. Unde Augustinus, dicto lib. de Catechizand. rudib., cap. 5: *Qui aliquid* (inquit) *expectando ab hominibus, quibus se aliter placiturum non putat, aut aliquid ab hominibus incommodum evitandō, quorum offensiones aut inimicitias reformidat, vult fieri Christianus, non fieri vult sed potius fingere: fides enim non est salvandi corporis, sed credentis animi*. Unde licet dicto cap. 17, in principio, dicat esse aliquos qui propterea volunt esse Christiani, ut promereantur homines a quibus aliqua temporalia expectant, aut ne offendant

nos timent, paulo inferius indicat eos ir-
dere Christianum nomen, et simulato cor-
e intrare in Ecclesiam. Ileoque eos dis-
nguit ab illis qui, meliore spe, et ex ti-
ore Dei, volunt fieri Christiani, simul ve-
id faciunt, *ut feliciores sint in rebus terre-*
s, quam illi qui non colunt Deum, de qui-
s ait, *meliori spe esse*, quia vere et non fic-
fiunt Christiani, *sed non cum minori peri-*
lo, quia si postea temporalia non conse-
antur, et alios impios videant in temporali
licitate excellere, perturbantur, et facile a
le deficiunt. Hi enim non moventur ad fi-
em primario ex intentione temporalium, sed
antum concomitanter et secundo, et ideo
test in eis esse voluntas bona et supernatu-
lis credendi, conjuncta alteri, vel pravæ, vel
differenti.

15. *Progreditur proxima responsio.* — De-
que accidere etiam potest ut sine fide vera
Christiana velit quis vere et non fide bap-
ri, vel ad summum credendo fide quadam
mana. Et tunc, cum ille non credat sicut
oportet ad salutem, non oportet ut ex vo-
ntate supernaturali et honesta veniat ad
baptismum, et nihilominus vere fiat Christia-
us quoad characterem quia ad hoc suffi-
t quod voluntatem habeat recipiendi bap-
tismum, nam qualiscumque sit illa voluntas, sa-
amentum erit validum. Adde præterea ser-
monem esse de voluntate credendi, quæ deter-
inet intellectum quoad specificationem ac-
s, eumque reducat ab infidelitate ad fidem,
Arausianum Concilium dixit. Nam si lo-
amur de homine jam credente et assuefacto
exercendum actus supernaturales, accidere
test ut ex humano tantum motivo applicetur
considerandum de rebus fidei, et quod tunc
ceat actus veros et supernaturales fidei ex
u et habitu, etiamsi tunc non habeat in vo-
ntate peculiarem actum supernaturalem, et
oc modo posset excusari Scotus in loco supra
tato. Nam aperte loquitur de homine habente
m habitum fidei infusæ, et de illo ait, posito
edibili præsentis, posse per habitum fidei
fusæ credere vel non contradicente volunta-
, vel per naturalem voluntatem applicantem
tellectum ad intelligendum, *dummodo*, in-
nt, *in intellectu sit habitus inclinans intel-*
ctum in illud. Tunc enim illa voluntas non
t proprius affectus credendi, de quo locuti
imus, *sed est generalis voluntas operandi*
reca materiam, quæ jam supponitur credita,
ideo inferioris rationis esse potest.

16. *Secunda assertio.* — Dico secundo, non

solum voluntatem credendi, sed etiam initium
voluntatis esse ex gratia, seu potius esse pecu-
liarem gratiam Dei gratis omnino collatam.
Hæc assertio etiam est contra Semipelagianos,
nam licet forte aliqui eorum sentirent illam
voluntatem credendi esse ex auxilio gratiæ,
semper dicebant præcedere ex parte nostra
aliquod initium illius auxilii, ratione cujus
principii illa voluntas sit in potestate nos-
tra, sive illud principium sit aliquod hu-
manum desiderium, petitio, vel aliquid ejus-
modi, ut ex Augustino, Prospero et Hilario ex
dictis in l. 4 satis constat. Contra hos vero
definita est assertio in can. 5 Concilii Arausi-
cani, si initium de quo ibi est sermo ab actu
et voluntate credendi distinguatur. Quia vero
probabilius videtur ibi Concilium voluntatem
credendi vocasse initium fidei, et consequen-
ter de eo quod præcedit voluntatem illam ibi
nihil dixisse, ideo ulterius ponderandum est
in eodem canone definiunt voluntatem illam
fieri in nobis, *per gratiæ donum, hoc est, per*
inspirationem Spiritus Sancti corrigentem vo-
luntatem nostram, etc. Ergo intelligit Con-
cilium inspirationem illam esse principium
illius voluntatis: illa autem non est ex no-
bis, sed ex Spiritu Sancto. Item dum ait es-
se gratiæ donum, aperte docet non esse ex
ullo merito nostro, quia si ex merito, jam non
est gratia. Et in canon. 6 et 7, evidentius
ostendit gratiam illam, per quam fides vel
affectus ad illam, in nobis gignitur, non dari
nobis propter humanam invocationem, vel
aliquid simile, ac subinde quidquid præcedit,
per se conferens ad talem affectum, ex gratia
esse. Expresse etiam Concilium Tridentinum,
sess. 6, cap. 5, dicit exordium justificationis
sumi ex vocatione divina, loquitur tamen de
tota justificatione, ut a fide incipit, ut patebit
statim ex cap. 6.

17. *Illustratur ampliusque suadetur asser-*
tio. — Præterea declaratur assertio ex re ipsa,
nam hoc initium voluntatis credendi nihil
aliud est nisi gratia vocationis, et non tantum
externæ, sed etiam internæ, per quam et in-
tellectus suadetur, et voluntas paulatim attra-
hitur ut velit, quam interdum vocat Augusti-
nus internam doctrinam, sæpius vero gra-
tiam vocationis, quam ubique plurimum com-
mendat et exaggerat, præsertim dicta quæst. 2
ad Simplician., et lib. de Prædestin. Sanctor.
At vero illa vocatio est ex pura gratia Dei,
imo est ipsa prima gratia auxilians; ergo ini-
tium voluntatis credendi est gratia, et ex gra-
tia seu gratuita voluntate Dei. Quod optime

confirmat August., lib. de Prædestin. Sanctor., cap. 2, et illo 2 Corinth. 3: *Non sumus sufficientes cogitare aliquid ex nobis, quasi ex nobis, aliquid, scilicet, ad salutem conferens; sed principium illius voluntatis est aliqua pia et sancta cogitatio multum saluti proficua, quia credere, inquit, est cum assensione cogitare, et quia nemo credit, nisi prius cogitet esse credendum; ergo illa cogitatio, seu illud principium voluntatis credendi, non est ex nobis, sed ex Dei gratia.* Et in cap. 4 idem confirmat ex illo 4 Corinth. 4: *Quid habes quod non accepisti?* nam illud initium aliquid est, et magni momenti. Nam ante prædictam voluntatem, necesse est habere hoc iudicium, *credendum est, vel, expedit credere;* hoc autem aliquid est, et magni momenti ad negotium salutis: est ergo gratia, seu ex gratia. Item cum voluntas per illum affectum elevetur supra totum ordinem naturæ, necesse est ut præcedat in intellectu illuminatio sufficiens: illa ergo non potest esse ex natura, sed ex gratia. Hic autem incurrebant gravissimæ difficultates de illo iudicio, quale et quomodo sit supernaturale, et ad quam virtutem pertinet: sed hæc pertinent ad materiam de fide. Item occurrebat difficultas, quomodo illud initium sit in potestate hominis, et an detur facienti quod in se est per vires naturæ. Hæc vero in libro 4 explicabitur.

CAPUT IV.

AN ACTUS FIDEI SIT IN SE ET IN SUBSTANTIA SUPERNATURALIS, ET TRACTATUR PRIMA SENTENTIA.

1. *Præsentis quæstionis introductio.* — Non possumus convenienter exponere qualis sit gratia ad actum fidei necessaria, seu qualis et quanta sit hæc necessitas, nisi prius qualis sit supernaturalitas actus fidei declaremus. Et ideo ab hac quæstione initium sumimus. Quæ quidem versari potest de omnibus actibus in se supernaturalibus, quales sunt actus omnium infusarum virtutum, unde posset merito quæstio in genere disputari; habet tamen in singulis generibus seu speciebus peculiarem difficultatem, et ideo commodius visum est speciatim in singulis, prout materia postulaverit, illam tractare. Quia vero fides prima est harum virtutum, circa illam attingemus ea quæ omnibus generalia sunt, et quæ propria fidei esse videbuntur; de cæteris autem brevius, quæ ad singula peculiariter pertinuerint, expediemus.

2. *Prima et vulgaris acceptio actus quoad substantiam et quoad modum.* — Prius autem, ne de nominibus sit controversia (at in hoc puncto specialiter esse solet), explicare oportet quid per substantiam, quid vero per modum actus intelligamus, et consequenter quid sit actus in substantia, vel tantum in modo, distingui. Potest enim per substantiam actus, vel generalis aliqua ratio in tali actu inventa, vel tota species ac entitas actus significari. Priori modo dicere possumus substantiam charitatis esse quod sit amor; posteriori autem modo dicemus substantiam charitatis non in amore tantum, sed in tali specifico ac perfecto amore positam esse. Atque eadem proportionemodus actus dici potest, vel modus essentialis, quia per differentiam specificam genus contrahitur et quasi modificatur, vel modus accidentalis, quia additur entitati actus in sua specie jam plene constituti. Si ergo substantia actus pro genere sumatur, clarum est actus supernaturales non esse in substantia supernaturales, sed ea potius cum actibus naturalibus convenire, nimirum in genere cognitionis, vel assensus, vel amoris, vel spei, vel in alia simili. Etenim si hanc convenientiam non haberent, non possent esse actus elicti a nostris potentiis, quia potentiæ non possunt elevari extra sua objecta saltem universalissima, et consequenter neque ad actus qui sub his generibus non contineantur, ut recte notavit Cajetanus 2. 2, q. 171, art. 2, circa ad 3. Sic autem sumpta substantia actus, dicentur hi actus supernaturales quoad modum, quatenus differentia specifica dicitur modificare genus. Accipi autem vulgo solere actum quoad substantiam, pro actu considerato secundum rationem generalem assensus vel amoris circa tale objectum, notat Molina in Concordia quæst. 14, art. 13, disp. 15, § *Tertium*.

3. *Acceptio altera et hujus loci propria actus quoad substantiam.* — Hic autem non in hoc sensu loquimur, sed illos actus quoad substantiam supernaturales vocamus, in quibus genus cognitionis vel amoris contrahitur essentialiter per differentiam superioris ordinis, id est, quæ ad quemdam rerum gradum ordinem naturalem superantem pertinet, ideoque ad illum elevat ipsos actus. Unde fit ut nec a nostris potentiis, nec ab Angelicis, nec fortasse ab ullo intellectu creabili, per vires naturales elici possint. Tunc autem talis actus totus est supernaturalis quoad substantiam, id est, quoad suam entitatem, quia (ut dixit) differentia specifica elevat genus cognitionis vel

amoris ad supernaturalem ordinem, et ita tota entitas est supernaturalis, quia in re non est distinctio actualis inter genus et differentiam, et indivisibilis entitas non potest esse in diversis ordinibus, naturali et supernaturali. Quod fit ut genus cognitionis vel amoris de se nec naturale sit, nec supernaturale, sed abstrahens, quia contrahi potest per differentiam utriusque ordinis, sicut substantia abstrahit a spirituali et materiali.

4. *Et quoad modum.* — Et hinc facile declaratur quid sit actum esse naturalem quoad substantiam, et supernaturalem quoad modum. Dicitur enim actus naturalis, non prout naturale distinguitur a libero, nam actus etiam ordinis naturalis liberi esse possunt, imo tales esse debent ut sint morales, sed naturale hic a supernaturali distinguitur. Unde tunc actus est in substantia naturalis, quando constituitur essentialiter per specificam differentiam ordinis naturalis; nam inde fit ut actus in tota sua physica entitate et in re ipsa naturalis sit, et consequenter sit aptus elici a naturali potentia per vires naturales ejus. Quoad modum vero esse potest supernaturalis, vel in fieri tantum, quia, scilicet, fit modo præternaturali, seu ab alia causa quam a naturali, seu non servato ordine naturalium causarum, sicut est oculus restitutus cæco miraculose, et homo resuscitatus; vel potest esse effectus supernaturalis quoad modum in facto esse et in termino, videlicet, quando naturali entitati actus additur modus qui non possit nisi supernaturaliter fieri; tunc enim actus tali modo affectus dicitur in se supernaturalis quoad modum, seu in facto esse. Hic autem modus tunc est proprius et realis, quando est intrinsecus actui, et illi in re ipsa quasi adherens accidentaliter, ut est, verbi gratia, intensio actus, vel si quæ alia similis proprietas in his actibus inveniri potest. Præter hunc autem intrinsecum modum, excogitatum est aliud genus modi extrinseci, seu moraliter tantum convenientis actui quasi per extrinsecam denominationem, ut est honestas aliqua vel supernaturalitas per relationem ad finem extrinsecum, vel ratio meriti proveniens tantum ex extrinseca Dei acceptance vel ordinatione; nam si proveniat ex interna dignitate actus, jam illa erit vel substantia, vel realis proprietas, et intrinseca ipsi actui.

5. *Prima sententia de actu Fidei, quod sit in substantia sua naturalis.* — Cajetanus hanc opinionem tribuit Scoto. — Hæc ergo positæ, fuit olim sententia ab scholasticis Theologis

valde recepta, actum fidei Christianæ esse in substantia sua naturalem, ita ut si entitas actus præscindatur ab omni alio modo, possit ab intellectu produci suis viribus naturalibus, et similiter voluntas credendi possit a sola voluntate pro sua libertate fieri, præmissa tantum sufficienti propositione objecti, absque alia illuminatione, inspiratione, aut excitatione gratiæ, præter eam quæ ex tali propositione externa objecti naturaliter potest in interioribus potentiis resultare. Solet hæc sententia Scoto tribui, ex alio universali principio, nimirum, quia creditur in prima quæstione Prologi dixisse nullam esse formam in se supernaturalem secundum entitatem suam. Ita illum intellexit Cajet., 1 part., quæst. 1, art. 4, et tom. 1 Opuscul., tract. 3 de Potentia neutra, quæst. 2, quem aliqui moderni sequuntur. Ex quo universali principio optime sequitur fidei actum, cum sit forma quædam creata, non esse in se et in substantia supernaturalem.

6. *Prædictam opinionem non docuisse Scotum ostenditur.* — *Ex primo capite.* — Verumtamen nec Scotus illud principium universale posuit, nec potest cum doctrina ejus in aliis locis subsistere. Primum patet, quia in illa quæst. 1, in § *Antequam*, vers. *Ad propositum*, solum dicit actum seu formam dupliciter posse dici supernaturalem, scilicet, vel respectu agentis, vel respectu recipientis, et priori respectu fatetur posse esse supernaturalem, quia potest præter cursum naturalium causarum fieri, ac subinde supernaturali modo. Respectu vero recipientis, dicit omnem formam posse dici naturalem, si naturalem potentiam respiciat, quia et potentia naturaliter inclinatur ad quamcunque perfectionem suam, et forma naturaliter perficit ipsam. Et in eodem sensu dicit ibidem in particulari de actu cognoscendi, comparando intellectum possibilem ad notitiam actualem, nullam esse cognitionem supernaturalem intellectui respectu illius, quia omni cognitione perficitur, et ad omnem inclinatur, ac proinde solum esse posse cognitionem supernaturalem respectu agentis. Unde cum fides sit cognitio quædam, idem necesse est de illa sensisse. At vero ex his non sufficienter colligitur, ex sententia Scoti, nullum actum intellectus esse in se supernaturalem, alioqui etiam visio beatifica non esset supernaturalis forma intellectus, quod non solum est in se omnino falsum, sed etiam contra doctrinam ejusdem Scoti in 4, dist. 49, quæst. 11. Deinde etiam habitus fidei infuse

non esset in se et in substantia sua supernaturalis, contra doctrinam ejusdem Scoti in 3, dist. 23, quæst. unica, § *Ad quæstionem*, et dist. 27, quæst. unica, § *De tertio dico*, ubi etiam refert quæ dixerat in 4, dist. 17, q. 2, § *Ad solutionem*, ubi docet dari habitum supernaturalem, per quem homo justus formaliter acceptatur a Deo. Idemque dixit de gratia sanctificante, generatim loquendo, esse scilicet formam supernaturalem et per se infusam, in 2, dist. 27, quæst. unica, § *Ad quæstionem*.

7. *Ex capite secundo.*—Præterea Scotus non negat actum amandi vel cognoscendi, prout oportet ad salutem, esse in se supernaturalem, saltem quoad aliquem modum factum in ipso actu, qui non posset fieri per vires naturæ; nam in loco citato in 4, dist. 17, quæst. 2, § *Ad solutionem*, in fine, dicit habitum infusum non solum dari ad animæ ornatum et pulchritudinem, sed etiam ad efficiendum actum intensiorem quam posset viribus naturæ fieri, et nihilominus de actu sic intenso, comparato ad potentiam recipientem, dicit Scotus (juxta priorem doctrinam in Prologo datam) esse naturalem, quantum ad naturalem inclinationem potentiæ ad ipsum, et quantum ad informationem et perfectionem potentiæ. Igitur ex illa distinctione non potest colligi negasse Scotus omnem formam vel actum in entitate aut intrinseco modo supernaturalem. Quantum ergo ex collatione omnium locorum conjicere possum, Scotus non negat dari posse entitatem aut formam supernaturalem, id est, quæ per causas creatas naturalibus viribus earum fieri non possit, neque sit connaturalis alicui substantiæ creatæ, vel naturali potentiæ ejus; sed, data tali forma, nihilominus de illa docet, potentiam in qua recipitur ad illam naturaliter inclinari, et talem actum naturaliter perficere potentiam, et secundum hunc duplicem respectum quamcumque formam posse dici naturalem, etiamsi in se supernaturalis sit; et hac ratione in 3, dist. 17, quæst. 1, § *Contra primam viam*, negat distinctionem duplicis beatitudinis naturalis et supernaturalis, quia idem finis qui est supernaturalis quoad consecutionem, est naturalis quoad inclinationem humanæ naturæ in ipsum, juxta doctrinam suam de appetitu naturali ad videndum Deum, quam tradit in quæst. prima Prolog., § *Ad primum*, et § *Ad quæstionem*, et in quarta, dist. 59, quæst. 9 et 10.

8. *Quædam apud Scotum minus vera non arguunt negasse entitates supernaturales.*—Quamvis autem illa disputatio de primo illo

respectu naturalis inclinationis ad formas supernaturales non sit hujus loci, credimus tamen falsum esse intellectum naturaliter inclinari ad visionem beatam, vel animam naturaliter inclinari ad gratiam, vel alios habitus supernaturales, quod supra libro primo tetigimus, in materia vero de beatitudine latius probandum est. De alio vero respectu naturaliter perficiendi potentiam, dicendum est, si illud, *naturaliter*, referatur ad ipsam formam, verum esse, quia gratia et omnis forma connaturaliter inclinatur ad subjectum, cujus est proprius actus, et connaturale illi est perficere potentiam in qua recipitur. Neque hoc repugnat supernaturalitati formæ: nam licet ipsa forma in se sit supernaturalis, nihilominus habet propriam essentiam, quæ est natura ejus, et secundum eam potest habere proprietates sibi connaturales, quarum una est informare et naturaliter perficere subjectum. Si vero illud, *naturaliter*, referatur ad potentiam recipientem, sic falsum est naturaliter perfici per talem formam, perficitur enim supernaturaliter, quia illa perfectio non est sibi connaturalis nec naturalis debita, neque ad illam habet potentiam naturalem, sed obedientialem, ut recte Cajetanus dixit. Neque Scotus potest eam negare, cum potentia neutra quam ipse ponit, suo modo, et servata proportione, obedientialis dici possit. Quidquid vero sit de modo loquendi quoad potentiam receptivam, salis in presenti est quod actus sit super vires naturales potentiæ activæ, ut supernaturalis dicatur, quia hic tractamus de viribus gratiæ necessariis ad operandum. Hoc ergo modo non negat Scotus formam seu gratiam in se supernaturalem. Aliter tamen videtur loqui de habitibus gratiæ, aliter de actibus secundis: nam de habitibus sentit esse simpliciter in sua entitate et specie supernaturales, de actibus vero non ita sentit, sed solum quoad intensionem esse supernaturales, ut ex citatis locis constat.

9. *Alii prædictæ sententiæ auctores.*—Eandem sententiam eodem modo tenent Gabriel in 3, distinct. 23, quæst. 2, articulo 1, in fine, et art. 2, conclus. 2, ubi ait fidem infusam non esse necessariam propter substantiam actus fidei, sed propter solam intensionem: firmitatem autem seu certitudinem etiam vult esse naturalem, ac per se dependentem a fide acquisita, tanquam a causa partiali. Refertque in eadem sententiam Ochamum quodlibet. tertio, quæstione 7; et idem de intensione tenet Paludanus in 3, distinct. 23, quæst. 3,

in fine; et idem Almain., quæstione 3. Durandus etiam ibi, quæstione 6, numer. octavo, licet dicat habitum fidei esse infusum, statim addit illum infundi, non quia siue illo non possumus credere verum supernaturale, *sed quia non ita prompte et faciliter, ut determinatum est* (inquit) in 2, videlicet distinct. 17, quæst. 1, ubi num. 7, addit fidei habitum conferre ad firmiter et discrete assentiendum; in quæst. 2, addit modum meriti, et similia habet in 1, distinct. 17, quæst. 2, ad secundum. Semper tamen sentit substantiam actus fidei posse fieri per naturalem facultatem intellectus. Expressius vero in 3, dist. 31, quæst. 4, num. 11, dicit visionem Dei esse supernaturalem essentialiter, et ideo non convenire in genere proximo cum aliquo actu viæ, etiam fidei. In quo aperte docet nullum actum viæ esse supernaturalem quoad substantiam, seu in specie sua, et ita concludit fidem secundum essentiam posse fieri per vires naturales. Solet etiam allegari Major in 2, distinct. 1, quæst. 3. Sed ibi nihil invenio; tamen in 3, distinct. 26, artic. 42, alias 3, id plane significat, dum ait eundem actum fidei posse successive esse verum et falsum, et quando est verus, esse fidei infusæ, et postea esse tantum fidei acquisitæ. Et simili preportione opinatur de actu charitatis quoad bonitatem vel malitiam. Sed de hoc postea. Nam etiam hic possunt allegari omnes qui tenent actum charitatis esse naturalem quoad substantiam, quoniam a fortiori debent idem opinari de fide, quia minus perfecta est quam charitas, sed illos postea suo loco referemus.

40. *Alii auctores.* — Similiter eandem sententiam secuti sunt plures ex antiquioribus Thomistis; nam, præter Paludanum, quem iam retuli, Capreol., in 1, dist. 17, quæst. 1, art. 3, ad argumenta Aureoli contra primam conclusionem, circa finem, et ad argumenta Gregorii contra secundam conclusionem, generaliter sentit habitus infusus non requiri propter substantiam actuum, sed propter modum, quem appellat promptitudinem, delectabilitatem et acceptabilitatem. Expressius hoc docuit Cajetan. 2. 2, quæst. 171, art. 2, circa ad 3, ubi sentit actum fidei sine gratia non fieri *laudabiliter*, unde solum propter hunc modum videtur ponere necessitatem auxilii gratiæ ad credendum. Item 1. 2, quæst. 109, art. 4, sentit omnes actus virtutum infusarum esse naturales quoad substantiam; et de contributione, in tom. 1 Opusculorum, tract. 4, quæst. 1. Eandem sententiam sæpius docuit

Soto, lib. 1 de Natur. et gratia, cap. 22, et lib. 2, cap. 14, in fine, et cap. 16, ad 1 et 2, et in 4, distinct. 17, quæst. 1, art. 1. Soletque attribui hæc S. Thomæ 2. 2, quæst. 171, artic. 2, ad 3. Sed ibi non loquitur in hoc sensu, ut infra videbimus. Dicti ergo auctores conveniunt in hoc, quod actus fidei in substantia sua est naturalis, et ideo, si præcise fiat in sua entitate et esse specifico, possit fieri per solas vires naturales. Sic autem factum aiunt non sufficere ad justitiam, ut sit fundamentum ejus, sed debere perfici aliquo modo supernaturali. In explicando autem illo modo non conveniunt dicti auctores. Scotus enim requirit modum majoris intensionis. Alii augmentum certitudinis. Cajetanus laudabilem, seu aliquam specialem honestatem. Alii requirunt acceptabilitatem, vel acceptationem, ut in dicto Opusculo indicat Cajetanus, ubi etiam solum requirere videtur modum supernaturalem quoad fieri, id est, quod actus fiat ex auxilio speciali, etiamsi in se melior non fiat.

41. *Argumentum primum quod substantia actus fidei sit naturalis.* — Omissa vero hac varietate circa modum supernaturalitatis (quæ vix potest habere aliquod fundamentum, ut paulo post dicam), generalis assertio de substantia hujus actus fundari potest primo, in hoc quod actus fidei non fit a sola gratia, sed fit ab intellectu proprie et vitaliter; actus autem in substantia supernaturalis non potest hoc modo fieri a potentia naturali; ergo oportet dicere entitatem talis actus esse naturalem. Major supponitur, non solum ut certa philosophice ex generali doctrina actuum vitalium, sed etiam ut certa theologice; tum ex Concilio Tridentino, sess. 6, dicente hominem active concurrere ad hos actus; tum quia Scriptura divina passim exigit a nobis fidem tanquam opus a nobis efficiendum. Minor vero probatur, quia naturalis potentia non potest efficere actum supernaturalem in substantia per virtutem connaturalem, quia non potest transcendere ordinem suum. Neque etiam potest id facere per virtutem superadditam, quia alias (ut objicit Scotus) illa virtus non esset habitus, sed potentia, quia daret posse operari. Et ita actus non eliceretur proxime a potentia intellectiva, sed ab altera illi addita, ac subinde actus non esset vitalis, quia non esset proxime elicited a potentia vitali. Quod si quis dicat ipsum intellectum elevari ut immediate influat in talem actum, contra hoc est, quia hæc elevatio ad summum potest sufficere ad instrumentalem effectationem, quæ non sufficit

ad actum vitalem, ut talis est, quia oportet ut proxime procedat a principio intrinseco tanquam a propria et principali virtute agendi. Atque hæc ratio videtur maxime movisse Durandum in dicta dist. 31 tertii, quæst. 4, nam cum de visione beata non fuerit ausus negare esse supernaturalem quoad substantiam, consequenter de illa dicit non fieri ab intellectu, sed a sola essentia divina, *objective*, inquit, *et effective*.

12. *Secundum argumentum a simili, de actu volendi credere.* — Secundo, videtur similis ratio magis urgere in actu voluntatis credendi, vel quocumque alio formaliter libero, quod non habet actus intellectus, qui supposita voluntate necessario sequitur, et ideo in illo posset aliquo modo intelligi quod intellectus elevatus a Deo influat in actum supernaturalem quoad substantiam, quia in actu necessario potest intelligi motio Dei elevantis intellectum ad operandum supernaturaliter per modum instrumenti. In actu vero libero videtur hoc repugnare, quia ad libertatem actus necesse est ut ipsamet voluntas se determinet ad talem actum; huic autem determinationi repugnat præmotio principalis agentis elevantis instrumentum, quia instrumentum sic elevatum non a se, sed ab agente determinatur. Cum ergo voluntas credendi sit libera, ut supponimus, videtur impossibile quod eliciatur a potentia voluntatis, tanquam ab instrumento elevato per motionem gratiæ: ergo voluntas credendi non potest esse in substantia supernaturalis.

13. *Tertium argumentum quod non sint impossibiles actus illi naturales in substantia.* — Tertia ratio principalis est, quia non est impossibile intellectum vel voluntatem elicere circa talia objecta actus quoad substantiam naturales, quibus per divinam gratiam addatur modus aliquis supernaturalis; sed hoc satis est ut sint vera omnia quæ de necessitate gratiæ ad hos actus Concilia docent, et est facilius ad intelligendum et ad defendendum fidem contra omnes errores, et præsertim ad conciliandam gratiam eum libero arbitrio: ergo quamvis daremus esse possibles supernaturales actus quoad substantiam, non est cur asseramus illos esse necessarios ad salutem, vel propter illos esse necessariam gratiam. Major quoad priorem partem probatur; quia objectum fidei, sive ad intellectum, sive ad voluntatem comparatum, est nostris potentiis proportionatum, et sub generali propensione utriusque potentiæ ad unum adæquatum objectum comprehen-

sum: ergo utraque potentia potest circa illud actum naturalem quoad substantiam elicere. Antecedens patet, quia intellectus naturaliter fertur in omne credibile, et tanto magis propendet quanto magis apparet credibile: objectum autem fidei proponitur ut maxime credibile. Nec refert quod proponatur ut credibile ex testimonio Dei, quia hoc non est ultra naturale objectum et inclinationem intellectus, nam ratio naturalis, cognoscens Deum, etiam cognoscit Deum esse fide dignissimum, si aliquid attestetur: ergo ex hac parte potius est major naturalis inclinatio intellectus ad tale credibile. Aliunde vero cum in particulari proponitur objectum credendum, ratio ipsa naturalis judicat, secundum prudentiam, esse valde credibile, dictum esse a Deo id quod proponitur: ergo potest intellectus circa tale objectum naturalem actum elicere quo credat, et hoc esse dictum a Deo, et ideo etiam credat esse verum; hic autem est actus fidei naturalis quoad substantiam.

14. *Probatur deinde de actu voluntatis.* — Idemque argumentum magis urget in voluntate, quia illud objectum, ut credibile et credendum, proponitur tanquam quidpiam honestum et ideo volendum et amandum: voluntas autem naturaliter inclinatur in honestum, et in illud magis quod ut honestius representatur. Acceditque quod illamet honestas regulatur per rationem naturalem; nam, proposito objecto fidei, antequam homo credat, habet dictamen rationis naturalis, honestum esse credere id quod ostenditur adeo credibile, per quod iudicium voluntas illa regulatur et excitatur: ergo potest esse voluntas illa naturalis quoad substantiam, et per vires solas naturales voluntatis elicita.

15. *Quod naturali entitati addi possit modus supernaturalis, ostenditur.* — Quod vero illis actibus possit addi supernaturalis modus per gratiam, probatur ratione communi, quod multa sunt supernaturalia quoad modum, licet in substantia sint naturalia: nam humanitas Christi ens naturale est, et tamen, ut unita Verbo, est supernaturalis quoad modum, et ut existens sub speciebus Eucharistiæ est aliter supernaturalis quoad alium modum, et accidentia Eucharistiæ naturalia sunt, habent tamen supernaturalem modum: cur ergo non idem faciet Deus per gratiam in actibus quoad substantiam naturalibus? Præsertim quia multi modi supernaturales, præter substantiam eorum, a Theologis in his actibus exco- gitati sunt, ut videbimus.

16. *Congruentia.*—*Ostenditur item quod sit facilior.*—Denique quod hic modus sit facilior et aptior ad concordiam gratiæ cum libertate et cum propria efficientia nostrarum potentiarum, duæ priores rationes satis ostendunt; ita enim optime intelligitur voluntatem et intellectum cooperari partialiter coefficiente id quod est naturale in his actibus, Deum autem per gratiam suam supernaturalem modum eis adjungere. Quod denique hoc sufficiat ad fidei doctrinam sustinendam, patet ex illo additamento, *ad credendum, vel volendum, sicut oportet*, quod posuit Concilium Arausicanum, canon. 6, et Concilium Tridentinum, sess. 6, canon. 3; nam per illud verbum nihil aliud significatur, nisi hos actus debere fieri certo quodam modo, ut fiant sicut expedit ad salutem, ut etiam dixit idem Arausicanum, canon. 7. Quod vero ille modus substantialis vel essentialis esse debeat, hoc non dixerunt Concilia; ergo cum accidentalis modus possit sufficere, non est cur de substantiali interpretemur, et doctrinam fidei obscuriorem reddamus. Eo vel maxime quod etiam docent Concilia esse necessariam gratiam, ad servandam totam legem naturæ sicut oportet, id est, sine peccato gravi, et nihilominus ibi actus non sunt supernaturales quoad substantiam, sed quoad modum ratione talis gratiæ. Dicunt etiam initium salutis non esse ex nobis, sed ex gratia, et tamen non oportet illud initium esse supernaturale quoad substantiam; fit enim, ut dicit Concilium Tridentinum, per Spiritus Sancti inspirationem et illuminationem, quæ licet sint naturales quoad substantiam, possunt fieri ex gratia, quatenus præter cursum naturalium causarum possunt specialiter a Deo fieri, interiorius peculiari modo ordinante species intellectus et affectum excitante: ergo idem dici potest de omnibus humanis actibus.

CAPUT V.

ACTUM FIDEI ET VOLUNTATEM CREDENDI, ESSE ACTUS QUOAD SUBSTANTIAM SUPERNATURALES.

1. *Assertio communis et vera.*—*Medina nimis in præsentia, et parum cohærens.*—His non obstantibus, dico actum fidei Christianæ, quo intellectus debita certitudine credit quod Deus revelavit, supernaturalem in substantia esse, ideoque alium similem in entitate specifica fieri non posse per solas vires naturales intellectus. Hæc sententia est communis in Schola Theologorum. Illam indicavit Conrad. 1. 2,

quæst. 109, art. 4, ubi etiam idem sentit Medina. Imo in quæst. 62, art. 2, significat esse dogma fidei: nam dicit esse de fide, hunc actum, et alios duos theologicos spei et charitatis differre in genere naturæ, et secundum substantiam a similibus actibus acquisitis, *ad hunc (inquit) sensum, quod non differunt tantum quoad modum.* Quia de fide est, ut ait, auxilium gratiæ esse necessarium non tantum ad modum credendi, sed etiam ad credendum. Postea vero dicit non esse hæreticum dicere hos actus fidei infusæ et acquisitæ, tantum differre in genere moris, ac proinde non differre in genere naturæ, nam hoc excludit illa particula, *tantum.* Et ita videtur hæc assertio repugnare priori. Nam esse moris tantum est quidam modus accidentaliter actui in esse naturæ, quia actus secundum suam entitatem naturalem potest manere sine tali esse morali; ergo si non est hæreticum dicere actum fidei infusæ et acquisitæ solum differre in esse morali, profecto non est hæreticum dicere tantum differre in modo: ergo non est de fide quod differant in genere naturæ, et secundum substantiam, neque etiam est de fide auxilium gratiæ requiri ad hos actus ratione substantiæ eorum, et non tantum ratione modi: nam Concilia solum dicunt requiri ad credendum sicut oportet. Quo testimonio ipse probat non esse contra fidem dicere, solum requiri auxilium propter esse morale, idem autem dici potest de quocumque esse modali. Imo illud de esse morali habet majus inconveniens in actu fidei, quia esse morale in tali actu non est nisi denominatio extrinseca ab actu voluntatis, et ita assensus intellectus, ut sic, posset fieri sine auxilio, dummodo ponatur auxilium necessarium in voluntate, ut bene moraliter velit talem actum, hoc autem dicere valde absurdum est, ut infra ostendam.

2. *Auctores alii hujus sententiæ.*—Omissis ergo exaggerationibus et censuris, melius dicit in conclus. 4 verisimilius esse, et divinæ Theologiæ magis consentaneum, hos actus differre in esse naturæ, et secundum substantiam. Idem sentit Bannez 2. 2, quæst. 5, art. 2, et quæst. 6, art. 1, et quæst. 24, ubi refert Canum. Idem sentit Viquer. ibi in Institut., cap. 10, § 3, vers. 16; Alvar., disput. 67, ad 4, dicens contrariam sententiam non esse probabilem. Sed (ut dixi) satius est ab his exaggerationibus abstinere. Eandem opinionem sequitur Azor., 1 part. Institut. moral., lib. 3, cap. 24, quæst. 2, nam licet clarius de habitibus loquatur, idem tamen sentit de actibus. Ejusdem

opinionis existimo fuisse Molinam, quamvis soleat in contrarium allegari; nam in Concordia, quæst. 14, art. 13, disput. 15, § *Tertium*, ubi, loquens de his actibus qui conferunt ad vitam æternam vel justitiam, tanquam dispositiones vel merita, cum dixisset Concilia et Patres de illis docuisse non posse fieri sine auxilio gratiæ, subjungit: *Utrum ejusmodi dispositiones rationes formales haberent supernaturales, ut re ipsa habent, an solum supernaturali ope essent elicite, in re vero essent res naturales, neque erat satis cognitum, neque forte in controversiam rocatum.* Ubi adverto particulam illam, *ut re ipsa habent*, nam per illam fatetur hos actus in re ipsa habere rationes formales supernaturales, utique essentielles, nam de aliis non poterat dubitare, cum omnis alia ad modum actus pertineat, et necesse sit actum saltem quoad modum esse supernaturalem. Præterea paulo inferius, in eodem paragrafo, dicit actus quibus hæretici credunt aliquos articulos, solere vocari fidem quoad solam actus substantiam, ut discernatur ab actibus Christianæ fidei; ubi per substantiam actus clare intelligit solam communem rationem credendi tales res, actus vero ipsos semper indicat in sua entitate esse distinctos. Hoc vero evidentius declarat in disput. 7, ubi, tam in titulo quæstionis quam in initio, explicat quid intelligat per actum fidei, quoad substantiam tantum productum, et non qualis ad justificationem est necessarium. De quo actu naturali dicit infra, § *Nostram*, esse tantum opinionem et fidem humanam, et specie distinctam a supernaturali et Christiano assensu, qui per spiritum fidei infusæ elicetur.

3. *Anceps Cajetanus in hac parte.* — *Aperitius alii.* — Præterea Cajetanus 3, quæst. 76, art. 7, § *Ad evidentiam*, in hanc sententiam inclinare videtur, dum dicit naturale et supernaturale esse differentias entis et differentias modi faciendi, et in priore genere ponit charitatem, lumen gloriæ, et similia, *quæ, inquit, differentia a virtutibus naturalibus et aliis, quæ entia naturalia vocamus, penes naturale et supernaturale, quantum ad ipsa entia: sunt enim hæc ex suo genere supernaturalia entia, quia nulli enti possunt fieri connaturalia.* Ubi aliqui putant Cajetanum retractasse sententiam quam de his actibus aliis in locis docuerat. Sed ego valde dubito, nam de charitate habituali et virtutibus per se infusis loquitur, de quibus ipse nunquam dubitavit esse entia supernaturalia; de actibus autem nullam mentionem facit, de quibus contrarium docuit,

non obstante supernaturalitate habituum. Idem vero Cajetan. 2. 2, quæst. 17, art. 3, in principio, reprobat Scoti et Durandi opinionem, dicentem habitum infusum solum dari ad promptius, firmitus, seu perfectius operandum; ipse vero docet habitus infusos dari ut determinent potentiam ad actus supernaturaliter honos, et objecto supernaturali proportionatos. In quibus verbis videtur sentire hos actus esse ex objecto supernaturales, et consequenter in substantia sua et essentiali specie, nam hæc est quæ ab objecto sumitur. Ipse vero non explicat hunc sensum, nec declarat qualis sit illa bonitas supernaturalis, et post illa verba scripsit alia quæ ex quæst. 171 retulimus, et ideo vereor ne hoc etiam loco de aliqua bonitate accidentali, et præter substantiam actus locutus sit. Clarius ergo hanc docet sententiam Richard. in 3, distinct. 23, art. 3, quæst. 1, ubi aperte ait actus virtutum infusarum esse ejusdem ordinis cum illis, cum de habitibus tanquam clarum supponat esse secundum se supernaturalis ordinis, quod ibi specialiter docet de fide. Idem tenet Alens., 3 part., quæst. 64, memb. 2, in corpore, et ad penult., ubi distinguit fidem acquisitam ab infusa tanquam a forma per se supernaturali, et loquitur tam de actu quam de habitu, et similem doctrinam habet eadem 3 part., quæst. 27, memb. 4, art. 2, § 2, quibus in locis ita exponit Damase., lib. 4 de Fide, cap. 11.

4. *Imo et D. Thomas.* — Denique dubitari non potest, quin hæc fuerit sententia D. Thomæ, nam ubique ponit virtutes infusas, tanquam per se postulantes illum modum productionis quem postulant quia sunt supernaturalis ordinis, et ideo semper conatur eis assignare objecta formalia supernaturalia, ut videre licet 1. 2, quæst. 62, art. 1, et quæst. 63, art. 3 et 4, ubi, in solut. ad 3, expresse dicit non esse supernaturales quoad modum, sed secundum se. Est autem manifestum, in doctrina ejusdem D. Thomæ, actus elicitos ab his virtutibus esse ejusdem ordinis eum ipsis: imo ad hoc constituere has virtutes, ut potentias ad similes actus elevent, ut patet ex dicta quæst. 62, art. 1, et in particulari de charitate 2. 2, quæst. 23, art. 2, et quæst. 24, art. 2, de qua plura in sequentibus videbimus. De fide autem sic inquit eadem quæst. 62, art. 3, ad 2: habere fidem et spem de his quæ sunt supra facultatem naturæ humanæ, excedit omnem virtutem homini proportionatam; ubi aperte loquitur de actuali fide, et ideo 2. 2,

quæst. 5, art. 2 et 3, semper distinguit secundum substantiam et speciem ab omni actu dei, qui per vires naturales haberi potest, sive ab homine, sive ab angelo.

5. *Locus quidam ejusdem D. Thomæ afferitur in contrarium. — Exponitur. —* Solum gerit difficultatem quod, 2. 2, quæst. 171, art. 2, ad tertium, dixit donum gratiæ inter-
 um elevare hominem ad aliquid, quod est supra naturam humanam quoad substantiam actus, ut donum prophetiæ, interdum vero solum elevare quoad modum actus, non autem quantum ad substantiam ipsius, et addit: *sicut diligere Deum et cognoscere eum in speculo creaturarum, et ad hoc datur donum gratiæ habituale.* Responderi potest D. Thomam ibi non vocare substantiam actus essentialem entitatem et speciem ejus, sed genus commune cognitionis, vel amoris, juxta notationem positam in principio quarti capituli. Obstat verò hinc objectioni, quia in hoc sensu nulla esset differentia inter fidem et prophetiam, quam D. Thomas ibi assignare intendit, nam etiam prophetia convenit cum naturali cognitione dei in genere cognitionis rerum divinarum, et etiam per prophetiam solum elevabitur intellectus quoad modum cognoscendi, non quoad substantiam. Respondeo addendo non quancumque convenientiam actuum in ratione communi vocasse D. Thomam substantiam actuum, sed illam quæ est in tendentia ad idem objectum materiale secundum eandem communem rationem tendendi, sicut amor naturalis et charitatis tendunt in Deum, et bonum, et fides humana et infusa in Deum, et credibilem. Prophetia autem non ita se habet ad intellectum humanum, sed elevat illum ad cognoscenda futura, quæ antea nullo modo attingebat; et ideo dicit D. Thomas elevare illum quoad actus substantiam, ut statim amplius explicabo.

6. *Cur expositio pro D. Thoma in gratiam primæ opinionis auctorum aliorum non adducatur. —* Interrogari enim potest cur non simili modo exponamus scholasticos antiquos, quos pro præcedenti opinione citavimus? Respondeo: ita aliqui conantur eos interpretari, sed frustra; est enim longe diversa ratio. Nam D. Thomas sæpe aliis in locis, et ubi ex proposito rem tractavit, satis suam sententiam explicuit, declarando supernaturalitatem horum actuum ex objectis, et ex comparatione ad actus naturales similes et circa easdem res materiales, et ex modo productionis eorum, et propter illos ponendo habitus per se infusos

ejusdem rationis, seu ordinis. Solumque in illo loco, et per occasionem illo modo loquendi usus est, ut rationem redderet cur ad prophetandum non detur habitus, et detur ad credendum. Et illam tribuit, quia prophetia elevat intellectum quoad substantiam actus, non autem fides. Quæ ratio non esset bona si intelligeretur in sensu quo nunc loquimur, nam potius in hoc sensu inferendum esset ad prophetiam dari habitum supernaturalem, potius quam ad fidem, quia magis necessarius est habitus ad actum supernaturalem in sua entitate, quam ad actum supernaturalem tantum in modo. Non loquitur ergo D. Thomas in hoc sensu. Sed consideravit prophetiam esse de rebus quæ nullo modo cadunt sub cognitionem humanam, et ideo cognitionem illarum supernaturalem seu propheticam, non esse necessariam ad ordinarium cursum vitæ et actionum humanarum, ideoque non communicari per modum habitus, sed trausenter, juxta occurrentes opportunitates; objectum autem fidei et amoris, quod principaliter est Deus, cadit aliquo modo sub cognitionem humanam, estque maxime necessarium ad convenientem et ordinariam directionem vitæ et actionum humanarum, et ideo ad operandum supernaturaliter circa talem materiam elevantur potentiæ per habitus; hoc ergo est, quod D. Thomas explicare voluit per illa verba, *quoad substantiam, vel quoad modum.* Alii vero scholastici, non obiter sed ex professo rem tractantes, et non solum sub illo termino quoad substantiam vel modum, sed etiam sub nomine speciei et essentiæ, dicunt esse hos actus naturales, vel posse produci per vires naturæ, vel non differre ab actibus acquisitis, nisi in modo, assignando semper aliquem modum accidentalem, et ideo non possunt ad meliorem sensum trahi.

7. *Prima ratio pro assertione posita. —* Nostra autem assertio, quia supernaturalis est, probanda est supernaturalibus mediis, et quia non est expresse definita, ex principiis revelatis colligenda est. Primum ergo principium sit, quod Christianæ fidei habitus fidelibus infunditur, ut nunc suppono ex his quæ in sexto libro dicemus, ubi de virtutibus infusis ostendam esse in entitate sua supernaturales, et specie diversas ab omnibus virtutibus acquisitis, id enim in presenti probare non est necesse, quia Scotus, Durandus, Cajetanus et alii qui de actibus hoc negant, de habitibus negare non sunt ausi. Ex hoc ergo principio sic colligimus: habitus non datur nisi propter actus;

ergo si habitus est in substantia supernaturalis, actus ejusdem substantiæ esse necesse est. Probatur consequentia; tum quia principium servat proportionem cum effectu, et e converso; tum etiam quia alias habitus acquisitus sufficere posset ad ejusdem ordinis actum.

8. *Erasio ex Scoto.*— *Rejicitur primo.*— Responderi potest ex Scoto in 1, distinet. 27, quæst. 2, et in 3, dist. 23, habitum infusum non poni propter efficientiam, sed propter convenientem dispositionem subjecti, ut actus ejus sint acceptabiles, vel proportionati ad vitam æternam. Sed hoc imprimis est contra ipsam rationem habitus seu virtutis; deinde si illud intelligatur de dispositione morali, quæ consistat in dignitate personæ, ad illam sufficeret unicus habitus infusus, nimirum gratia sanctificans, quæ constituit hominem participem divinæ naturæ, et dignum æterna beatitudine; ergo ad dignificandam personam non erant alii habitus virtutum necessarii. Neque etiam intelligi potest quomodo habitus dignificet moraliter actum intellectus, si non reddit illum meliorem in ratione cognitionis, nam in ratione actus moralis et humani totam dignitatem accipit ab actu voluntatis. Si vero dictum illud intelligitur de dispositione physica, ita ut ratione illius actus sit in se melior, intelligi non potest quomodo habitus ita disponat potentiam, nisi dando illi aliquam virtutem agendi. Et ita tandem concludit Scotus, dicens, ut actus sit acceptabilis, non satis esse deorem personæ operantis, nisi actus sit in se melior ratione inditæ virtutis aliquid conferentis ad efficientiam actus.

9. *Secunda ratio.*— Atque hoc maxime confirmatur ex illo principio fidei, quod, ad hunc actum fidei et alijs theologicos efficiendum, est necessarium aliquod principium supernaturale, dans vires potentiæ ad eliciendum hujusmodi actum, quia intellectus de se est impotens ad hujusmodi assensum fidei salutarem, ut in capite 2 ostensum est. Nam hinc concluditur habitum infundi tanquam principium activum talis actus fidei, ut est fides Christiana, et sufficiens fundamentum salutis. Quando enim deest habitus, hoc principium datur per aliquod auxilium vel specialem influxum Dei (si verum est, interdum fieri hunc actum, non concurrente habitu, quod postea videbimus). Illud porro auxilium est a Deo, ut assistente, seu est principium transiens, habitus vero datur loco illius, ut sit principium permanens, et magis connaturale ipsi actui; ergo necesse est dicere actum esse ejusdem

ordinis, et supernaturalitatis cum habitu; ergo sicut entitas habitus tota est supernaturalis in substantia sua, ita etiam entitas actus. Accedit, quod si entitas actus in substantia est naturalis, et modus tantum esset supernaturalis, consequens esset ut homo solus faciat actum quoad substantiam, et gratia, sive sit auxilii, sive habitus (quoad hoc enim eadem est utriusque ratio), faciat solum modum supernaturalem in actu, si tamen aliquid in illo sit, nam si nihil ei addat, nullam profecto efficientiam poterit habere gratia.

10. *Progreditur superior ratio.*— Probatur ergo assumptum, quia vel auxilium gratiæ aut habitus efficit substantiam actus fidei, vel in illam non influit. Si dicatur primum, plane sequitur quod intendimus, actum illum esse supernaturalem quoad substantiam, nam ideo fit a gratia, quia non potest fieri per vires naturales potentiæ, et consequenter non est naturalis illi. Assumptum patet, quia eo modo quo gratia concurret ad illum actum, concurret ut principium necessarium, ita enim Concilia definiunt, contra Pelagium, gratiam dari, non ut homo possit facilius credere, sed ut absolute possit credere; ergo si gratia datur propter substantiam actus, profecto talis est illa entitas, ut simpliciter non possit fieri per vires naturales, et hoc vocamus esse supernaturale quoad substantiam. Si autem habitus, vel auxilium non concurret effective ad substantiam actus, plane sequitur actum fidei Christianæ quoad totam substantiam suam fieri per solas vires voluntatis; hoc autem videtur absurdum, et parum consentaneum definitionibus Conciliorum: nam talis actus ex vi suæ substantiæ est motus fidei in Deum, et convertit hominem ab infidelitate ad veritatem fidei: hæc autem, et similia, dicunt Concilia non posse fieri sine viribus gratiæ. Et hoc incommodum ex sequentibus magis patebit.

CAPUT VI.

ACTUM FIDEI NON ESSE TANTUM SUPERNATURALEM IN FIERI, SED IN FACTO ESSE.

1. *An primus modus supernaturalitatis sit verus? — Opinio affirmans.*— Ut plenius ostendamus hos actus esse in sua substantia supernaturales, neque posse recte explicari necessitatem et efficientiam gratiæ per solum modum supernaturalem, discurrendum est per varios modos positos supra cap. 4, num. 4, in

ibus, juxta diversas opiniones, hoc esse supernaturale assensus fidei positum est. Prius est, ut modus supernaturalis consistat tantum in fieri talis actus, seu in causis ad eum concurrentibus, non in aliqua proprietate addita ipsi actui in facto esse. Supponitur enim, ex philosophia, hos actus esse qualitates, ideoque in eis considerari posse et qualitatem factam, et modum quo fit. Sicut ergo in illuminatione cæci nati, visus ei restitutus non est supernaturalis qualitas, neque se recipit aliquem modum supernaturalem in facto esse, sed tantum modus effectus supernaturalis, quia est præter ordinem naturalium causarum, ita in præsentibus dicitur hæc opinio, actum fidei in se non fieri meliorem per gratiam quam per naturam fieri potest, sed tantum fieri supernaturali modo, et de supernaturalem denominari. Et hic modus dicendi videtur sumi ex Cajetano in dicto consilio, qui specialiter loquitur de amore dei super omnia, et de contritione, sed a foriori idem procedit in fide et aliis.

2. *Rejicitur proxima opinio imprimis ab auctore.* — Hæc autem sententia nullo modo admittenda est; quis enim audeat dicere actum perfectum actum fidei fieri posse per vires naturæ, sicut fit per gratiam? Et tamen idem patet sequitur ex illa sententia, ut patet ex eodem exemplo adducto: nam tam perfectus actus potest fieri per naturam, sicut restituitur per miraculum; imo fieri potest ut idem homo restituatur, qui fuerat perditus, sicut Lazarus resuscitatus non habuit perfectius esse hominis per resurrectionem quam antea haberet. Item superiori libro dictum est sæpe actum virtutis acquisitæ, verbi gratia, electionis, fieri ex speciali auxilio gratiæ; subditur ergo ratione actus ille poterit dici supernaturalis in fieri, non in facto esse, et ideo talis actus in se non est perfectior quam fieri possit per vires naturæ, si natura integra esset, vel sine impedimentis. Ita ergo in præsentibus, si actus fidei in se non est excellentior, sed tota supernaturalitas est in modo effectus, potest esse neque perfectus factus per vires naturæ, si ablati impedimentis liberum arbitrium naturæ operari quantum potest. Consequens autem est valde absurdum, nam inde sequitur posse hominem tam bona, pia ac firma voluntate velle credere omnes veritates fidei, tam certo et infallibili assensu illis assentiri per vires sui liberi arbitrii, sicut alius credit per auxilium gratiæ. Item sequitur posse per sola vires arbitrii diligere Deum super

omnia, etiam ut finem supernaturalem, saltem in natura integra; quæ profecto Pelagiana sunt.

3. *Absurdum aliud.* — *Cajetani opinio impugnatur.* — Tandem sequitur fidem, vel dilectionem sic conceptam ex viribus naturæ, esse sufficiens justitiæ fundamentum ex parte fidei, et sufficientem dispositionem ad gratiam ex parte dilectionis, quod etiam Pelagianum est. Sequela vero patet, quia Scriptura promittit justitiam et remissionem peccati credenti, et diligenti super omnia, seu ex toto corde; ille autem sic credit et diligit, quandoquidem tam bene credit et diligit, sicut is qui ex auxilio gratiæ credit vel diligit. Respondet Cajetanus illos actus non acceptari nisi fiant ex gratia. Sed hoc est quod dicimus repugnare Scripturis, si actus in se sunt æquales. Quia Deus non promittit gratiam suam, nisi credenti et amanti perfecte; quod si, ut opus acceptetur, requiritur gratia, non est nisi quia, ut perfecte fiat, necessaria est gratia. Nam profecto si tam perfectam fidem haberet unus homo viribus suis, quam alius ex auxilio gratiæ, alienum a ratione et justa providentia esset acceptare fidem credentis ex auxilio, et non credentis ex propriis viribus, cum iste æquale bonum faciat, et alioqui plus de suo conferre videatur, sine auxilio alterius operans. Unde etiam illud consequens repugnare videtur Conciliis definitibus contra Pelagianum, et ejus reliquias, non posse hominem credere suis viribus sicut oportet: nam illud, *sicut oportet*, ad qualitatem, vel perfectionem ipsius actus referendum est, non ad principium a quo fit actus; tum quia alias esset petitio principii, seu identica repetitio et inutilis definitio; nam sensus illius particulæ, *sicut oportet*, esset, id est, modo supernaturali in fieri. Unde perinde esset ac si diceretur esse necessariam gratiam ad credendum ex gratia, vel e contrario non posse actum fieri ex gratia sine gratia, quod profecto ridiculum est; tum etiam, quia illa particula videtur addita contra Semipelagianos, dicentes actus naturales esse meritorios gratiæ, vel dispositiones ad illam, et ideo Concilia dicunt actus hos non posse fieri per vires naturæ, sicut oportet, ut gratiam mereantur, vel ad illam disponant; hoc autem habent actus ex eo quod talis qualitatis vel perfectionis sunt; idem ergo significat, *sicut oportet*, ac dicere, cum ea perfectione actus, que necessaria est ad dictos gratiæ effectus. Atque ita in fide assensum esse sicut oportet, nihil aliud est quam esse ita in

divino testimonio fundatum, ut sit omnino certus et infallibilis, et habens alias perfectiones quas in sequenti capite explicabimus; ergo si has potest habere per vires naturæ, per illas fieri potest sicut oportet, contra Concilia.

4. *Deinde ratione confutatur eadem opinio.* — Præterea occurrit alia ratio consideranda contra illam sententiam. Quodcumque enim entitas naturalis modo supernaturali fit, semper habet alium modum quo connaturaliter fiat, qui modus illi per se convenit, supernaturalis autem productio est illi quasi accidentaria. Et ideo si Deus infundat virtutes quæ possunt per actus naturales acquiri, vocantur a Theologis infusæ per accidens, quia alter modus naturalis productionis eis per se convenit. Habitus autem gratiæ dicitur infusus per se, quia illa qualitas natura sua postulat illum modum productionis, et ita est connaturalis illi, seu respectu illius, quamvis respectu subjecti sit supernaturalis, quia talis forma non est illi debita, neque illam connaturaliter postulat. Productio vero animæ rationalis, licet a solo Deo fiat, ultra virtutem effectricem causarum creatarum, nihilominus non est supernaturalis, quia ille modus productionis est connaturalis tali formæ, neque alium postulat, neque etiam respectu subjecti est supernaturalis, quia materia naturaliter est capax, et appetit talem formam, et, supposita tali dispositione, illi connaturaliter debetur. Jam ergo si actus fidei quoad substantiam totam est naturalis, et solum denominatur supernaturalis, quia supernaturali modo fit, profecto habet alium modum productionis magis per se illi convenientem; illa autem erit productio per vires naturales liberi arbitrii; ac subinde sequitur illum actum solum esse per accidens infusum, non per se, ut patet ex declaratione facta. Hoc autem alienum profecto est a modo quo Scriptura loquitur de fide, spe et charitate, non dicens fieri in nobis, nisi per infusionem Spiritus Sancti: loquitur autem Scriptura præcipue de actibus, quamvis, etiamsi de habitibus loquatur, statim redit argumentum supra factum, quod si habitus sunt per se infusi, etiam actus, servata solum necessaria differentia: nam actus, quia vitalis, non fit sine cooperatione potentiæ; habitus vero, quia non vitaliter fit, a solo Deo infunditur.

5. *Procedit ulterius ratio.* — Accedit quod si actus fidei solum illo modo est supernaturalis, non aliter esset ad illum necessaria gratia, quam ad actus ordinis naturalis: conse-

quens est falsum; ergo. Sequela probatur, quia etiam ad actum naturalem virtutis acquisitæ est interdum necessaria gratia ratione solius effecttionis, non ut actus in se perfectior evadat, quam posset fieri per vires naturæ, ablatis impedimentis. Patet in dilectione super omnia Dei auctoris naturæ, et in actu castitatis contra gravem tentationem urgentem: tunc enim actus ille etiam est supernaturalis quoad modum in fieri; est ergo æquiparatio. Falsitas autem consequentis patet; sic enim necessitas gratiæ ad credendum vel amandum sicut oportet, non esset per se, sed per accidens, quia natura talis actus non illum modum postulat, sed potius magis connaturaliter fieret per vires naturæ, quod profecto est per se incredibile; cur enim Deus postularet illum extraordinarium et quasi miraculosum modum efficiendi talem actum, si cum tota perfectione requisita ex parte actus posset alio modo connaturali fieri per vires naturæ? Necessè est ergo fateri, quod Concilia et Patres aperte docent, hanc gratiæ necessitatem provenire ex impotentia hominis ad faciendum talem actum.

6. *Et dilemmate urgetur.* — *Ejus membrum primum.* — *Secundum.* — Vel ergo hæc impotentia est physica ex defectu virtutis activæ in ipsis potentiis intellectus vel voluntatis, et sic necessitas est simpliciter, et per se, et ad singulos actus, et in omni statu; inde vero optime infertur actum esse supernaturalem quoad substantiam, quia est supra vires physicas et naturales potentiarum. Vel illa necessitas est tantum moralis, et per accidens ex impedimentis, et sic plane sequitur non magis esse supernaturalem actum fidei quam actum castitatis, qui fit urgente tentatione gravi, nec magis esse necessariam gratiam ad unum quam ad alterum. Quod nullo modo videtur admittendum: nam inde ulterius sequeretur actum fidei vel charitatis posse fieri sine auxilio gratiæ in natura integra, vel Angelica, quia in illis non essent impedimenta vel difficultates extrinsecæ, et aliunde dicuntur actus illi non excedere vires per se ac physice requisitas ex parte potentiarum. Sicut ergo ob hanc rationem dicimus actum amoris naturalis posse esse in illo statu per vires naturæ, ita dicendum erit de actu charitatis aut fidei, nam æquiparantur juxta illam sententiam, ut ostensum est.

7. *Progreditur adhuc proximum membrum.* — Unde ulterius sequeretur, in natura etiam

ipsa posse actum fidei Christianæ haberi sine virtutibus gratiæ, saltem quando, proposito sufficienter articulo fidei, nulla difficultas extrinseca in credendo occurrit, præter rei propositæ excellentiam et supernaturalitatem materiam (ut sic dicam), seu in esse entis, nam in se credibilis ex quocumque motivo dicitur esse objectum proportionatum viribus naturalibus; ergo nihil tunc obstabit quominus per eas solas credi possit. Quod si quis contendat hoc ipsum esse necessariam gratiam, ut obiectum sine aliis difficultatibus proponatur, ad minimum id poterit defendi de gratia extrinsece providentiæ aut protectionis, non vero de gratia internæ inspirationis et illuminationis, de qua Concilia loquuntur; nam sufficiet illa exterior excitatio et illuminatio, quæ ex vi externæ prædicationis causatur, quam etiam Pelagius ponebat.

8. *Etasio ex discrimine quodam.* — Potest pro aliquis inter actum fidei et actum moralium ordinis naturæ, quatenus ex gratia fiunt, discrimen constituere, distinguendo prius duos, quæ intrinsece in his actibus reperiuntur, scilicet, qualitas facta, et actio qua per se fit; et attendendo qualitatem in utroque actu omnino naturalem esse sine additione alicujus perfectionis, vel modi in ea facti; nihilominus tamen in actu fidei, vel alterius virtutis theologicæ, actionem illam, qua intrinsece fit, fieri modo supernaturali et per se oriri ex aliquo principio activo supernaturali; imo in hoc ipso consistere modum illum; actum vero naturalem virtutis moralis, non solum in se naturalem esse, sed etiam intrinsece fieri per actionem esse naturalem, quæ per se sit a solo principio naturali. Atque hac ratione gratiam magis extrinsece et per se requiri ad actum fidei, quam ad alium actum, nam ad hunc solum requiritur gratia, ut moraliter excitans et adjuvans et tollens impedimenta, vel contra illa morales vires præbens: ad actum vero fidei factum magis intrinsece et physice necessaria est.

9. *Refellitur.* — Sed hæc differentia, licet vere sit propter supernaturalitatem actus fidei in substantia ejus, tamen hæc sublata, contra illam sententiam, frustra et non consentanter fingitur talis differentia. Cur enim una actio intrinseca est magis supernaturalis quam alia, si terminus unius tam est naturalis, quam alterius? Nam quod unus terminus sit perfectior alio in illo ordine, non satis est, nisi etiam una actio possit esse perfectior alia eodem ordine. Item si actus fidei in esse

qualitatis est mere naturalis, in intellectu est virtus naturalis sufficiens ad illam eliciendam; ergo etiam est naturalis via, seu actio per quam fit; ergo frustra et gratis fingitur alia actio superioris ordinis, et per se pendens a principio supernaturali. Multoque impossibilius est rationem reddere, cur talis actio sit necessaria; nam si id tribuatur extrinsece ordinationi Dei ita volentis, jam hoc impugnatum est, et sicut in uno actu fingitur, ita etiam potest fingi in alio, semperque differentia est prorsus voluntaria.

CAPUT VII.

ACTUM FIDEI NON ESSE SUPERNATURALEM EX MODO ACCIDENTALI ACTUS, SOLUM EXTRINSECE ILLUM DENOMINANTE.

1. *Discutitur alter modus supernaturalitatis ex adductis in cap. 4, num. 4. — Prima opinio constituens illum in ratione meriti.* — In hoc capite tractabuntur variæ sententiæ statuente supernaturalitatem actus in aliqua extrinseca denominatione. Quem modum imprimis in sola ratione meriti posuit Durandus supra, et sequitur Gabriel, qui in hoc magis loquitur de amore quam de fide. Et in idem fere inclinatur aliquando Cajetanus in dicto Quodlibet., dum ait contritionem informem et acquisitam, quæ secundum ipsum potest tempore antecedere charitatem, per solam infusionem habitus charitatis fieri contritionem perfectam, quamvis ex hac infusione solum redundet in talem actum denominatio extrinseca a dignitate personæ desumpta. Imo de ipso actu sentit eundem qui tempore præcessit gratiam habituales, fieri ultimam dispositionem ad illam, solum quia Deus per gratuitam dilectionem dignatur uti nostra acquisita contritione ad suum proprium opus, quod est charitas habitualis. Et hanc Dei dilectionem vocat etiam gratuitam Dei motionem, quamvis non immutet intrinsece ipsum actum naturalem. Unde si per illam motionem intelligat quod illemet actus incipiat esse vel conservari per aliquod auxilium speciale, coincidit eum sententia præcedenti capite jam impugnata. Si vero intelligat solam acceptationem per gratuitam dilectionem Dei, quod magis indicat, sic coincidit eum præcedenti sententia. Nam, ut illa sit universalis, debet intelligi non de solo merito de condigno, alioqui solum haberet locum in his actibus, prout tempore vel natura subequantur infusionem habituum, non vero ut

præcedunt, quia ut sic non sunt meritorii de condigno, quamvis supernaturales sint; intelligi ergo debet de quocumque merito, sive de condigno, sive de congruo, sive impetrativo, sive (ut ita dicam) dispositivo, id est, quod sit dispositio proxima vel remota ad justitiam.

2. *Primus sensus prædicti meriti rejicitur.*

— Hæc autem sententia vel repugnat assertioni capituli 5, vel omnino falsa est; tribus enim modis intelligi potest differre actum meritorium a non meritorio. Primo, ex parte ipsorum actuum, quia unus per se spectatus est dignus tali præmio, et proportionatus illi, non vero alius. Et sic verum quidem est actum de se meritorium supernaturalis præmii quocumque modo differre a non meritorio, tanquam supernaturalem a naturali; nam hæc differentia posterior est ratio prioris, licet per illam a posteriori declaretur. Illa enim differentia versari non potest inter actus intrinsecè omnino similes, necessarium est enim ut actus ille, qui, per se spectatus, est meritorius, sit in se dignior et nobilior, et consequenter ut ratione suæ substantiæ, vel alicujus modi intrinseci fundet illam rationem meriti vel dispositionis. Non potest ergo illa sententia intelligi de hoc modo meriti; quia modus ille supponit intrinsecam differentiam inter actus, in conditione gratuita et supernaturali, quæ in uno est, et non in alio, et ideo illum reddit proportionatum ad meritum, et non alium. Et hanc differentiam nos dicimus esse fundatam in substantia actus supernaturalis, vel, si consistit in modo, assignandus est alius præter meritum, qui sit intrinsecus actui; hæc ergo expositio non congruit illi opinioni, quia involvit repugnantiam cum illa.

3. *Sensus alter illius meriti excluditur primo. — Evasio. —* Secundo ergo modo potest differre actus meritorius a non meritorio ex parte personæ operantis, quia una est sancta, et in statu gratiæ, alia vero in statu peccati et inimicitiae Dei. Et hæc etiam differentia non sufficit ad explicandam supernaturalitatem istorum actuum. Primo quia non est universalis, habet enim locum in merito de condigno, non vero in merito de congruo, quia hoc posterius potest esse etiam sine habituali gratia, juxta sententiam Augustini, epist. 103, et de Prædestin. Sanct., cap. 5, quam infra suo loco tractabimus. Responderi potest, quamvis meritum de congruo possit esse sine gratia sanctificante, non tamen sine aliquo habitu infuso, saltem fidei. Quia fides est quæ impetrat cætera, et ita si quod meritum impetratorium,

seu de congruo, antecedit charitatem, in fide maxime fundatur. Ut autem actus fidei hanc vim habeat, oportet ut sit quasi firmatus per habitum infusum fidei, per quem persona sit quasi permanenter, et (ut sic dicam) connaturaliter fidelis. Et ita Durandus 2, dist. 28, quæst. 2, etiam habitum fidei dicit infundere propter modum meriti. Imo Cajetan. 2. 2, quæst. 171, art. 2, ad 3, ait ad actum fidei requiri habitum infusum, ut laudabiliter habeatur.

4. *Proxima evasio improbatur multifariam.*

— Sed hoc profecto gratis dicitur et sine fundamento, nam si habitus fidei infusæ nihil influit in actum physice et realiter, nullo modo reddit illum magis laudabilem vel acceptabilem, quia nec physice reddit illum meliorem, nec moraliter, quia non est circumstantia ejus, nec per se constituit personam in statu in quo possit conferre actui congruitatem ad meritum, cum, non obstante habitu fidei, peccator sit inimicus Dei. Unde argumentor secundo: nam ea vis impetrandi quæ est in fide, non est propter ipsum actum fidei infusæ secundum suam essentialem rationem et conditionem spectatum, ut aperte sentit Augustinus locis citatis: ergo non fit sic meritorius per conjunctionem ad habitum. Tertio, primus actus fidei in eo qui ante baptismum ad fidem convertitur, non est elicited ab habitu, juxta probabiliorē sententiam infra tractandam, et tamen, ut fit prius natura, vel, ut aliqui volunt, etiam tempore, est impetratorius etiam ipsius habitus fidei, ad quem disponit proxime, ut est probabilius; ergo hoc meritum non fundatur in habitu, sed in ipso actu, ut procedit a divino auxilio. Ac proinde non differt actus fidei in esse meriti impetratorii a naturali actu fidei, ex sola conditione habituali personæ operantis, sed ex aliqua reali proprietate quam tale meritum supponit in actu, propter quam est necessarium auxilium ad talem actum, et propter ejus defectum actus naturalis fidei non est sic meritorius, nec est dispositio ad infusionem habitus.

5. *Excluditur secundo prædictus sensus. —* Secundo, principaliter est illa differentia insufficientis ad explicandam supernaturalitatem actus fidei, quia juxta illam non esset necessarium auxilium gratiæ actuale ad faciendum actum fidei, neque etiam ad constituendum illum in esse meriti. Consequens est aperte contra Scripturam, Concilia et Patres; ergo. Sequela patet, quia illud meritum non est aliquid reale in actu, nec supponit in illo aliquid

quod non possit fieri viribus naturæ; si enim credenti per vires naturæ Deus infundat habitum fidei vel gratiæ, eo ipso fit ille actus meritorius de congruo, vel de condigno; ergo nullum actuale auxilium gratiæ est necessarium ad credendum, etiam meritorie, sed solum quod homo credat suis viribus, et Deus infundat vel jam infuderit habitum. Sicut, in opinione eorum qui dicunt actum virtutum acquisitarum in homine justo esse meritorium de condigno, licet nullo alio modo supernaturali fiat, nullum actuale auxilium requiritur ad tale meritum, sed tantum status gratiæ. Inæqualitas autem consequentis satis constat ex vulgaribus testimoniis: *Non sumus sufficientes cogitare aliquid ex nobis, quasi ex nobis, sed sufficientia nostra ex Deo est*; ubi licet sit sermo de cogitatione pia et salutari, tamen ad illam dicitur homo insufficientis, non solum ut per eam mereatur, sed etiam ut eam faciat, iuxta illud: *Sine me nihil potestis facere*; et hac ratione dicitur Deus aperire cor ad credendum. Et hoc convincunt alia testimonia cap. 1 adducta, et plura similia afferemus infra, de auxiliis gratiæ et de merito tractantes. Sic ergo modus meriti non satis est ad supernaturalitatem actus fidei, vel cujuscumque virtutis infusæ.

6. *Tertius sensus prædicti meriti.* — *Expugnatur primo.* — Tertio ergo modo intelligi potest hoc meritum per solam acceptationem extrinsecam Dei, ita ut actus fidei naturalis, et Christianus solum differant, quia Deus non acceptat priorem, posteriorem autem acceptavit, fidesque Christiana solum addat supra fidem naturalem quod Deus illam acceptaverit. Quod si inquiras cur acceptaverit unum actum, licet naturalem, eumque acceptando, in esse fidei Christianæ illum constituerit, non vero alium similem, respondent id esse ex beneplacito Dei, quia in actibus potest nulla esse inæqualitas. Et hunc sententiæ modum indicat valde Durandus, et de dispositione ultima ad gratiam idem videtur sentire Cajetanus. Utrumque autem continet doctrinam omnino vitandam, et contra illam maxime urget ratio proxime facta, quod tota operatio, ut est necessaria ad meritum vel de condigno vel de congruo, vel ut sit dispositio ad gratiam et remissionem peccati, non sufficiens per solas vires naturæ: et tota gratia consistit in liberalitate Dei extrinsecæ acceptanti. Hoc autem repugnat Scripturæ et definitionibus Conciliorum, ut dixi. Describit etiam veram rationem meriti, repugnat

que Concilio Tridentino, quod ad meritum requirit actualem gratiæ influxum, sess. 6, cap. 16, ut suo loco videbimus.

7. *Expugnatur tertio.* — Præterea per illum dicendi modum non receditur a Pelagio, qui (ut supra vidimus) etiam admittebat extrinsecam gratiam Dei acceptantis nostram poenitentiam quoad remissionem peccatorum; damnatur autem, quia dicebat ipsum actum, sufficientem ut acceptetur, nostris viribus fieri. Item necessario inciditur in errorem Semipelagianorum, quia, licet nostra salus dicatur consummari per acceptationem, necessario inchoabitur a nobis facientibus ipsos actus, quantum necesse est, ut acceptentur a Deo. Quod evidentius sequitur, si hæc acceptatio sit ex lege certa: si vero dicatur fieri pro arbitrio Dei, et uni concedi, alteri vero æque operanti non concedi, per hoc non evitatur quin is cui fit talis gratia acceptationis inchoet salutem suam, quia revera ille actus acceptatur propter bonitatem quam habet; et aliunde sequuntur absurda gravissima, et præcipuum est quod illa inæqualitas repugnat regulis Scripturæ dicentis, unumquemque referre prout gessit, et Deum unicuique reddere secundum opera sua. Ergo per solam rationem meriti non satis explicatur supernaturalitas istorum actuum, nisi forte a posteriori, in quantum in ipsis actibus supponit aliquam proprietatem realem fundantem meritum ex parte actus, et de ista conditione inquirimus quid sit, si non est substantia actus.

8. *Contincitur ex rationibus factis quibus alius modus extrinsecæ supernaturalitatis.* — *Effugium.* — Atque hæc quæ contra has sententias diximus universaliter procedunt, et convincunt contra quemcumque alium modum extrinsecum qui in talibus actibus consideretur aut fingatur. Nam illud principium, quod ad hos actus necessaria est gratia efficiens cum nostris potentiis actus ipsos, concludit universaliter aliquid debere fieri et esse in ipso actu, quod non possit viribus naturæ fieri, possit autem fieri viribus gratiæ, et ideo supernaturalitatem actus non consistere in denominatione ab extrinseco favore, vel gratia, sed in reali proprietate ipsius actus. Imo ex eodem principio colligitur necessarium esse actum supernaturalem ab homine fieri, etiam quoad ipsam supernaturalitatem, cooperantibus nostris potentiis cum auxiliis gratiæ. Probatur ex eodem principio, quia ideo ad actus requiritur principium efficiens supernaturale et gratia, quia homo non potest operari actum,

sicut oportet; ergo cum auxilio gratiæ operatur illum, sicut oportet; ergo ille actus, etiam ut talis est qualis esse oportet, ac subinde ut supernaturalis, est a nobis cum auxilio. Dices, ad credendum sicut oportet esse necessarium auxilium, non quia intellectus noster efficiat in actu illam conditionem quam particula, *sicut oportet*, indicat, sed quia intellectus facit actum, et gratia facit ut sit *sicut oportet*.

9. *Destruitur.* — Sed contra hoc sunt imprimis locutiones Patrum dicentium in his actibus supernaturalibus, qui libere a nobis fiunt, totum esse a Deo, et totum a nobis, nec Deum operari in tali actu aliquid sine nobis, nec nos sine Deo. Deinde obstat quia alias actus, ut supernaturalis, non esset liber, quia non fit libere, nisi quod fit active a nobis; ergo si id quod est supernaturale in actu non fit a nobis, non est pendens a libertate nostra; ergo neque actus ut supernaturalis libere fit: consequens videtur absurdum, quia talis actus non est meritorius, nec dispositio ad gratiam, nec medium proportionatum ad vitam æternam, nisi ut supernaturalis; ergo, si ut talis non est a nobis nec pendet ex libertate nostra, etiam ut meritorius, vel ut dispositio, non erit a nobis. Dices supernaturalitatem actus esse nobis liberam non immediate, sed mediate, quatenus a nobis pendet substantia liberi actus cui Deus adjungit supernaturalem modum. Sed ex hoc inciditur in alia incommoda. Nam si lex illa sit infallibilis, ut Deus addat supernaturalitatem operi mere naturali, incidimus in inconveniens illatum, quod principium salutis in actibus liberis sit a nobis, solis viribus naturæ operantibus, et merentibus ut Deus addat supernaturalitatem actui. Si vero non est infallibilis lex, jam non est supernaturalitas actus in libertate nostra, quia, etiam posito nostro actu, pendet ex sola libertate Dei, nec erit in potestate nostra conari ad actum supernaturalem, nec illum facere sicut oportet ad salutem, sed hoc pendebit ex sola liberalitate Dei, etiam supposita tota cooperatione nostra post prævenientem gratiam. Necesse est ergo fateri totum id quod est supernaturale in actu libero, esse a nobis cum Deo cooperantibus, ac subinde non posse esse modum extrinsecum in actu.

10. *Secunda opinio constituens modum supernaturalitatis extrinsecæ in ratione honestatis.* — *Impugnatur primo in actu fidei.* — *Confirmatur impugnatio.* — Unde etiam facile excluditur aliorum opinio, qui dixerunt

supernaturalitatem actus consistere in esse quodam morali virtutis seu honestatis supernaturalis, quod dicunt non pertinere ad substantiam actus, sed esse modum ejus, sine quo potest interdum tota substantia actus fieri, ac proinde ut sic fieri posse sine gratia, quia est mere naturalis, licet cum tali esse virtutis non possit fieri sine gratia, quia ut sic est supernaturalis. Quam sententiam refert Medina 1. 2, quæst. 62, ubi supra, et licet illam non approbet, minus improbabilem quam cæteras censet. Sed imprimis non potest hæc opinio ad actum fidei prout est in intellectu applicari: nam actus ille præcise spectatus non est actus virtutis moralis, sed intellectualis, cujus perfectio seu esse virtutis intrinsecum est, et inseparabile ab actu, quia consistit in infallibili certitudine et veritate, quam habet ex vi objecti formalis, a quo sumitur substantialis et intrinseca species actus. At vero assensus fidei sub ea ratione intellectualis virtutis est assensus supernaturalis, ut supra ostensum est; ergo ejus supernaturalitas non potest consistere in illo esse morali accidentali. Confirmatur, quia si in assensu fidei, præter rationem intellectualis virtutis, consideremus honestatem moralem, hæc dupliciter potest in eo considerari, scilicet, vel objective, vel denominative, et quasi formaliter. Priori modo illa honestas est intrinseca et inseparabilis ab actu fidei, nam ex eo ipso quod est actus virtutis intellectualis talis ordinis, habet quod sit honeste appetibilis, unde illa honestas vel est ipsa substantia actus, vel ad summum distingui potest ratione, eo modo quo transcendentalis bonitas distinguitur ab ente, unde necesse est ut sit ejusdem ordinis cum ipsa substantia actus. Posteriori autem modo, in actu intellectus est per denominationem ab actu voluntatis, et de hoc esse morali judicandum est ex actu a quo sumitur illa denominatio: et ita verum est in actu fidei etiam illud esse morale esse supernaturale, quia provenit a voluntate credendi, quæ supernaturalis est. Nihilominus tamen non potest in illo esse consistere proprie supernaturalitas assensus fidei, ut intellectualis est, quia non potest hæc supernaturalitas consistere in denominatione extrinseca, ut generaliter probatum est. Alias etiam actus fidei humanæ imperatus ab aliqua voluntate supernaturali, esset tam supernaturalis, sicut assensus fidei infusæ, quod falsum esse constat.

11. *Impugnatur secundo in actu volendi credere.* — *Procedit impugnatio.* — Deinde non po-

est illa opinio ad fidem quoad voluntatem credendi accommodari. Duobus enim modis contingit actum voluntatis esse actum honestum et virtutis, scilicet, ex objecto intrinseco, vel ex relatione ad extrinsecum finem honestum. Prior honestas ex objecto non est modus accidentalis in actu interiori voluntatis, sed est differentia essentialis et specifica illius. Quamvis enim moralitas, prout dicit denominationem libertatis, non sit essentialis actui quoad ius specificam entitatem, tamen ratio virtutis et tendentia in objectum honestum, ut tale est, est differentia essentialis et constitutiva talis entitatis, ut suppono ex 1. 2, quæst. 18. Et declarari potest in actu charitatis Dei, nam ex proprio objecto intrinseco honestus et studiosus est. Unde eadem charitas est in via et in patria, et eandem honestatem habet, licet in via libere exerceatur, et in patria necessario. Constat autem ex supra dictis, voluntatem credendi esse honestam ex objecto intrinseco, etiamsi per aliam imperantem voluntatem ad extrinsecum finem non ordinetur. Ergo si est supernaturalis, ut revera est, ratione hujus honestatis, plane in specie sua essentiali, et non tantum in modo accidentali supernaturalis est. Quod si ultra hanc honestatem, ponamus addi aliam ex intentione finis extrinseci, aut finis ille est naturalis, et sic erit impertinens, quia ex tali relatione non redundabit in actum aliquod esse supernaturale, etiam per denominationem extrinsecam; si vero finis extrinsecus est supernaturalis, sic quidem intentio ejus erit actus supernaturalis in specie sua, quia illa intentio habet pro objecto suo immediato talem finem, et ita erit actus charitatis vel spei, aut alius similis, et ita erit per se necessaria gratia operans et cooperans ad talem actum, ratione substantiæ ejus et modi intrinseci dantis propriam speciem illi entitati. Species autem accidentaria, seu denominatio, quæ potest inde redundare in voluntatem credendi, quatenus a tali intentione imperatur, est quidem modus supernaturalis accidentalis et extrinsecus illi voluntati; sed non ab illo habet propriam supernaturalitatem, propter quam, gratiam sui effectivam tanquam principium proximum requirit. Et hic discursus applicari potest ad omnes actus voluntatis, qui per se sunt supernaturales et infusi, quia non possunt illam supernaturalitatem habere a fine extrinseco, nam etiam actibus virtutum acquisitarum communicari potest, sed oportet ut ex objectis suis illam habeant, ideoque non potest esse

denominatio extrinseca, sed intrinseca et specifica honestas, quæ ex objecto sumitur, ac propterea substantialis et essentialis actui esse debet.

12. — *Tertia opinio de modo supernaturalitatis extrinsecæ.* — Tandem hinc facile refelli potest alius modus gratiæ vel supernaturalitatis, qui in his actibus excogitari potest, nimirum, quia procedunt a cogitatione congrua cum ordine ad finem supernaturalem. Quem modum a nemine assertum vel insinuatam invenio, quoad fidei assensum: quoad voluntatem autem credendi, insinuat illum P. Vazq., disput. 186, num. 20, § *Valeant*, ubi, licet loquatur sub disjunctione, dicens: *Sive asseramus esse supernaturalem quoad substantiam, sive acquisitum*, etc., satis vero indicat hunc posteriorem modum esse sufficientem, et illo supposito ait ad illum requiri gratiam congruæ cogitationis, eo modo quo ad alios actus bonos virtutum acquisitarum illam exigit. Unde, in disput. 187, de solo assensu fidei dicit esse supernaturalem in substantia.

13. *Impugnatur.* — Hæc tamen sententia facile ex principiis positis refutatur. Quia si illi actus tantum vocarentur supernaturales, quia haberi non possunt sine cogitatione congrua, solum essent supernaturales quoad fieri, non quoad esse intrinsecum ipsorum, quod generaliter refutatum est. Et de assensu intellectus dici nullo modo potest, alias habitum per se infusum non postularet; est autem eadem ratio de voluntate credendi, quia debet esse ejusdem ordinis, et ad illam in Concilio Arausicano æque gratia postulatur. Item quia, ut supra ostendi, illa cogitatio non est verum gratiæ auxilium; imo nec propria gratia; tum quia alias non esset magis supernaturalis in ea sententia voluntas credendi quam voluntas temperate comedendi; tum etiam quia alias eadem ratione dici posset assensum ipsum fidei non aliter esse supernaturalem, quam ratione illius cogitationis congruæ, et voluntatis, a qua assensus imperatur. Unde etiam fieret, voluntatem credendi res fidei ex auctoritate parentum, vel traditione humana, si honesta sit, ut facile esse potest, non solum in catholico, sed etiam in hæretico quoad articulos quos retinet, esse æque ex gratia, ac subinde æque supernaturalem ac voluntatem credendi fide Christiana, quia etiam illa erit ex cogitatione congrua.

14. *Augetur impugnatio.* — Imo addo non satis esse quod illa cogitatio congrua sit ex revelatione, vel prædicatione verbi Dei super-

naturalis concepta, si alioqui sit solis naturæ viribus formata, media talium objectorum propositione, quia tota illa cogitatio non transcendit rationem extrinsecæ revelationis et doctrinæ, et non est propria gratia excitans, quæ necessaria est ad voluntatem credendi. Unde concludo non minus esse actum supernaturalis ordinis voluntatem credendi, quam ipsum assensum credendi, quia omnes rationes factæ æque in utroque procedunt, ideoque in utroque est necessarium ut illud quo constituitur in esse actus supernaturalis, sit aliquid intrinsecum et reale, verè et physice constituens, seu perficiens talem actum.

CAPUT VIII.

ACTUM FIDEI NON ESSE SUPERNATURALEM EX ACCIDENTALI MODO INTRINSECO, SEU ILLI INHÆRENTE, ET VERA ASSERTIO CONCLUDITUR.

1. *Prima opinio explicans dictam supernaturalitatem.—Rejicitur.*—Superest videndum an esse supernaturale talis actus sit aliquis modus realis, extra speciem substantialem actus, eumque intrinsece afficiens. Nam hoc etiam a multis tentatum est, variis tamen viis, quia in nulla satis probabilis ratio inventa est. Primo ergo dixit Scotus, quem Gabriel, Paludanus et alii sunt secuti, hunc modum esse intensionem fortasse majorem quam homo possit suis viribus efficere in tali actu, ut significat Scotus. Sed non potest subsistere, primo, quia in actibus necessariis ad salutem, nulla certa intensio est necessaria, sed actus quantumvis remissus sufficit, dummodo infusus sit, sicut de contritione alibi ostendi, et est eadem ratio de cæteris. Et de habituali gratia infusa est res notissima, eadem autem ratio est de dispositione ad illam; at vero modus ille quem significant Concilia, quando dicunt, *sicut oportet*, est necessarius ad salutem; ergo non est intensio. Præterea intensio actus est ejusdem ordinis cum actu, quod in omni qualitate verum est: ergo si substantia actus est naturalis, etiam intensio naturalis est: ergo sicut ad substantiam actus non est necessaria gratia, ita etiam nec ad illum modum erit. Quod si quis dicat illam intensionem esse majorem quam ille actus natura sua postulet, hoc imprimis voluntarium est, et præterea per majorem conatum naturalem cum majori concursu ordinis naturæ posset talis intensio fieri; habitus autem supernaturalis parum aut nihil

deserviret ad illam intensionem: ergo supernaturalitas actus non consistit in illa intensione.

2. *Secunda opinio aliter explicans.—Rejicitur.*—Huic similis erit modus durationis, si quis fingat, ad credendum sicut oportet, non satis esse elicere actum, sed etiam durare vel perseverare in illo, et hanc durationem non posse viribus naturæ fieri, ideoque ad illam esse necessariam gratiam, et actum cum tali modo supernaturalem censerit. Similem enim opinionem habuit Scotus de actu contritionis; videtur autem esse eadem ratio de reliquis. Verumtamen, sicut in contritione falsa est illa opinio, ita etiam in fide, et in quolibet actu virtutis infusæ, potestque facile argumentis proxime factis impugnari. Primo, quia duratio actus non est necessaria ad salutem, neque ad justificationem, ut de contritione late suo loco ostendi, quia vel actus, cum primum fit, est sicut oportet ad salutem, et tunc statim habet effectum suum, vel justificationis, vel meriti augmenti gratiæ, vel gloriæ. Si vero actus, in instanti quo fit, non est sicut oportet, etiamsi per annum duret, nunquam erit sicut oportet, nisi in se melior fiat, quia ratione solius durationis non fit melior, nec convertit animam melius in Deum. Et præterea hic magis urget secunda ratio supra facta, quia duratio est tam naturalis, sicut substantia actus; imo in re nihil addit actui, sed solum dicit perseverantiam seu conservationem ejusdem entitatis. Unde ex hac parte nullum augmentum in virtute activa requirit, sed solam perseverantiam ejusdem virtutis. Hæc autem perseverantia non fingitur diuturna multiplicando actus, et vincendo difficultates longo tempore occurrentes; hoc enim neque in ipsa contritione cogitatum est, nec potest in ullo actu cogitari, quia quæstio de perseverantia illo modo sumpta, est longe diversa, et non est de bono actu, sed de plurium multiplicatione, et de victoria contra varias tentationes insurgentes, de qua re nunc non tractatur, sed de singulis actibus, et de uniuscujusque duratione, seu continuatione per aliquod tempus; ideoque qui talem durationem requirunt, non dicunt esse longi temporis, sed alicujus brevis morulæ, quæ non potest actui tantam addere difficultatem, ut propter illam sit necessarium auxilium speciale gratiæ ad singulos actus, ut illud Concilia postulant.

3. *Tertia opinio.—Rejicitur.*—Alii ergo dixerunt illum modum esse facilitatem actus, nam ad hunc modum solet dari habitus, et

gratia vel est habitus, vel aliqua motio sup-
 plens activitatem ejus. Ita dixit Durandus
 agens de fide, in 3, distinct. 23, quæst. 6, alibi
 vero alios modos addit. Capreolus etiam dixit
 habitum infusum requiri propter promptitu-
 dinem, quod fere idem est. Hæc vero opinio,
 si exclusive et præcise intelligat solam facili-
 tatem esse modum propter quem gratiæ ope-
 ratio ad hos actus necessaria est, omnino re-
 jicienda est: nam et in Theologia et in Phi-
 losophia continet errorem. Primum patet,
 quia Pelagius etiam admittebat gratiam ad
 facilius operandum, et nihilominus ab Augus-
 tino et Conciliis damnatus est, quia Christus
 non dixit: *Sine me difficilius potestis facere,*
sed nihil potestis facere, et Paulus: *Non sumus*
sufficientes; ergo gratia non solum dat facili-
 tatem operandi, sed etiam potestatem. Et hanc
 differentiam agnoscunt communiter Theologi
 inter habitus acquisitos et infusos, quod prio-
 res dant tantum facilitatem, posteriores vero
 dant etiam potestatem. Error autem philoso-
 phicus declarat magis hunc, quem theologi-
 cum vocamus; consistit autem in hoc, quod
 illa opinio supponit facilitatem actus esse ali-
 quem modum realem et absolutum intrinse-
 cum ipsi actui, quod profecto intelligi non
 potest, quia in his actibus immanentibus, qui
 in instanti fiunt, facilitas non consistit in ma-
 jori velocitate, sed in hoc solum quod cum
 paucioribus impedimentis, vel cum majori
 virtute activa fit actus, et hoc modo habitus
 acquisitus dat facilitatem, quia supponit suffi-
 cientem potestatem ad actum, et auget illam
 addendo activitatem ejusdem ordinis: gratia
 vero non supponit sufficientem potestatem ad
 actum fidei, sed dat illam, et ideo non auget
 virtutem activam naturalem, sed elevat illam.
 Idem ergo facit auxilium gratiæ, quando sup-
 plet vicem habitus. Ergo modus actus propter
 quem datur tale auxilium, non est ut facilius
 fiat, sed est aliquis alius, ad quem faciendum
 est simpliciter necessarium gratiæ auxilium.
 Accedit tandem quod, si actus in se est natu-
 ralis, etiam facilitas ejus ad ordinem natura-
 lem pertinebit, et ita posset illa facilitas per
 frequentes actus naturales comparari, et sic
 non esset gratia simpliciter et per se neces-
 saria, etiam ad illam facilitatem, nec etiam ha-
 bitus infusus erit necessarius, quia habitus ac-
 quisitus ad facilitatem sufficit. Nec refert quod
 primi actus cum aliqua difficultate fiant: nam
 etiam nunc, licet cum gratiæ auxilio fiant, non
 sine magna difficultate acerbissime fiunt.

4. Quarta opinio. — Impugnatur primo in

actu intellectus. — Tandem dici potest hunc
 modum non esse ejusdem rationis in omnibus
 actibus, sed in quocumque reperiri juxta capa-
 citatem ejus, et ita in fide esse magnam quam-
 dam certitudinem, in dilectione vero quod sit
 super omnia, et sic de aliis. Et sic de fide sen-
 tit etiam Durandus in 2, dist. 28, quæst. 1;
 Gabr. in 2, dist. 23; Capreol. et Hispalens. 3,
 distinct. 24, qui etiam cum Durando addunt
 modum discrete assentiendi, id est, recte dis-
 cernendi inter veritates credendas, et errores.
 Verumtamen quod ad fidem pertinet, hic mo-
 dus aut accidentaliter esse non potest, sed essen-
 tialis, aut ad rem declarandam nihil deservit.
 Probatur primo de certitudine: nam vel est
 sermo de sola certitudine ex parte subjecti
 voluntarie adhærentis tali assensui, et hæc
 certitudo de se supernaturalis non est, nisi
 supponat aliam meliorem, nam ut supra de-
 claratum est, hæreticus habet illam certitu-
 dinem in articulis quos credit, pro quibus
 etiam mori paratus est: imo etiam interdum
 in suis erroribus habet similem pertinaciam.
 Oportet ergo ut sit sermo de certitudine,
 quam actus ex se habet ratione motivi, in quo
 fundatur; talis autem certitudo essentialis est
 et inseparabilis a tali actu, quia fundatur in
 primario et formali objecto ejus. Idem plane
 est de modo discrete assentiendi. Nam illa
 discretio, prout intelligitur in ipsomet actu as-
 sentiendi per fidem, non aliter convenit illi,
 nisi ratione objecti formalis, quod est prima
 veritas, propter quam non potest illi assensui
 subesse falsum, in quo consistit, quod ille ac-
 tus sit semper ab omni errore discretus. Si
 autem intelligatur illa discretio antecedens ad
 assensum, illa non est modus intrinsecus ipsius
 fidei, sed provenit vel ex voluntate credendi,
 quæ, si sit sicut oportet, id est supernaturalis,
 et ex auxilio ac directione Spiritus Sancti,
 semper recte eligit objectum sufficienter pro-
 positum sub divino testimonio, et ideo semper
 eligit veram fidem, vel certe pertinet ad illam
 prudentiam, et discretionem, quæ antecedit
 voluntatem credendi, et dirigit illam, ne erro-
 rem pro veritate eligat: quod judicium sem-
 per est etiam supernaturale ratione alicujus
 illuminationis et inspirationis divini et natu-
 ralis ordinis, ut ex definitione Concilii Arau-
 sicani supra relata colligitur, et ex frequen-
 tibus locis Augustini, præsertim libr. 1 de
 Grat. Christi, cap. 24, et lib. 1 contra duas
 Epist. Pelagian., cap. 34 et 35, et tract. in 6
 cap. Joan., ubi sic ait: *Hæc si ab hominibus*
audierunt, tamen quod intelligunt, intus datur,

intus coruscat, intus revelatur. Et similia habet Prosper, lib. 1 de Vocat. gent., cap. 2.

5. *Concluditur veritas contra modum quemcumque accidentalem, etc.* — Relinquitur ergo nullum esse modum accidentalem in actu fidei, quo possit in esse supernaturali primo constitui, ac proinde esse supernaturalem per suam primam et essentialem entitatem. Idemque probatum manet de voluntate credendi, idemque ob easdem rationes infra dicemus de actibus spei et charitatis. Et ratio omnium est, quia formalia motiva, in quibus hi actus nituntur, superant ordinem naturæ et vires naturales liberi arbitrii, ut cap. 6 late explicavimus.

6. *Primum corollarium ex dicta veritate.* — Atque ex hac veritate sic demonstrata colligitur primum qualis sit necessitas gratiæ, est enim necessitas per se, et non tantum per accidens. Quæ verba nota esse possunt ex dictis in præcedenti libro. Ibi enim diximus necessitatem auxilii gratiæ ad actus ordinis naturalis, esse quasi accidentariam ex defectu naturæ lapsæ, seu ex rebellionem concupiscentiæ, et aliis difficultatibus quæ ad corpus corruptibile consequuntur : in his autem actibus non est hujusmodi, sed per se est necessaria gratia, quia liberum arbitrium creatum per se est impotens ad hos actus, et ita necessitas gratiæ fundatur in intrinseca substantia et natura talium actuum. Ideoque invenitur in omni statu et in omni natura creata, ut ex dictis satis constat.

7. *Secundum corollarium.* — Secundo, infertur gratiam requiri ad hos actus ut principium per se et physicum illorum, in quo etiam est magna differentia inter hos actus et naturales. Nam ad naturales gratia solum juvat moraliter, illuminando intellectum, et excitando affectum, et tollendo impedimenta; ad hos autem actus majus adjutorium necessarium est. Ratio autem est clara ex dictis, quia ad actus naturales habent potentiæ efficientes vires físicas, ad hos autem actus minime, et ideo indigent superiori principio elevante illas, et dante vires ad eos eliciendos, etiam per se et physice. Unde necesse est ut ad hos actus Deus per se concurrat, non tantum ut prima causa agens per concursum generalem, sed etiam ut causa particularis et principalis, vel immediate, vel saltem infundendo aliquod principium proximum per se et physicum talium actuum simul cum intellectu vel voluntate, ut infra tractando de auxiliis latius dicetur. Per hoc autem

non excluditur concursus etiam Dei ut primæ causæ ordinis etiam supernaturalis, quia hic semper est necessarius propter dependentiam essentialem omnis entitatis creatæ a Deo, ut dicitur libro 5. Denique non etiam excluduntur morales concursus gratiæ per illuminationem et inspirationem supernaturalis ordinis, nam hic modus adjutorii gratiæ necessarius est, ut definiunt Concilia, et fundatur etiam in supernaturali substantia talium actuum, quia non potest intellectus noster aut voluntas ad illos conari, nisi per hujusmodi auxilia divina excitetur, ut tradunt Concilia, præsertim Concilium Trident., sess. 6, canon. 3, et inferius tractando de auxiliis latius explicandum est. An vero gratia habitualis semper debeat præcedere, saltem ordine naturæ, ad hujusmodi actus, postea disputabitur. Nunc quod ad fidei actum pertinet, certum est gratiam habitualement sanctificantem non esse necessariam, quia fidei actus potest esse in peccatore; de habitu autem fidei simul cum aliis, infra suo loco generaliter dicendum.

8. *Tertium corollarium.* — *Probatur positum corollarium.* — Tandem ex hac solutione colligimus non posse eundem actum numero esse acquisitum et infusum, vel simul, vel successive, cujus oppositum sentiunt omnes fere auctores, qui putant actum infusum esse naturalem quoad substantiam, præsertim Gabriel et Ochamus. Qui loquentes de actu fidei dicunt eundem actum simul esse fidei infusæ et acquisitæ, eumque prius esse posse solius fidei acquisitæ, seu mere naturalem et non infusum. Loquunturque consequenter, quia potest esse substantia actus sine modo accidentali, unde fit etiam ut possit esse simul naturalis et infusus, quia potest habere substantiam cum modo; non tamen dicere possunt dari actum pure infusum, quia non potest esse modus accidentalis sine substantia, et aperte Gabriel explicat non posse esse fidem infusam sine acquisita. Eademque sententia sumitur ex Scoto, et Cajetano, loquente de contritione. At in nostra sententia hoc ultimum non solum contingere potest, sed etiam est necessarium in actibus per se infusis, nam in illis substantia eorum, et prima ac essentialis species est supernaturalis, et ideo omnis etiam modus qui ad illam sequitur, est supernaturalis, et ita totus est tantum supernaturalis. Duo autem prima sunt impossibilia, ut in corollario diximus. De primo patet, quia non potest eadem entitas simul esse in duabus speciebus substantialibus; sed fides acquisita

essentialiter est in tali specie entis pertinentis ad ordinem naturæ; fides autem infusa essentialiter est in altiori specie et ordine rerum; ergo non potest simul idem actus numero quoad entitatem simul esse in utraque specie. Unde fingi non potest quod intellectus simul et uno actu assentiatur eidem veritati, ex motivo fidei infusæ et acquisitæ, quia non potest idem actus accipere ex illis motivis duas species æque primas, quia hoc repugnat, ut dictum est, nec unam essentialem et alteram accidentalem; tum quia non est major ratio de una quam de altera; tum etiam quia utrumque motivum sufficit constituere suam speciem entis.

9. *Progreditur probatio.* — Et eadem ratione non possunt quasi conjungi simul ad dandam unam speciem actui, quia sunt objecta primo diversa et distincti ordinis, et non junguntur ad constituendum unum formale objectum, a quo possit una species actus sumi. Nec etiam potest una simplex entitas simul esse naturalis et supernaturalis in specie substantiali. Vel ergo illa species est naturalis, et sic supernaturale motivum, ut tale est, nihil illi confert, vel est supernaturalis, et tunc naturale motivum illam non attingit, nec supernaturalis fides a tali motivo potest per se pendere; nullo ergo modo potest simul idem actus esse in utraque specie acquisitæ, et infusæ fidei, seu virtutis. Et eadem ratione nec successive potest id contingere in actibus per se infusis, quia, mutata specie essentiali et substantiali, mutatur tota entitas actus. Item quia si idem actus posset transire a naturali in supernaturalem, vel e contra, oporteret aliquam entitatem substerni utrique rationi; ergo illæ rationes essent accidentales actui, quod est contra hypothesin, quia statuimus actus per se infusos substantialiter esse supernaturales. Et præterea de illa entitate substrata inquiremus, in qua specie sit, et unde illam sumat, seu ex quo objecto, et an sit naturalis, vel supernaturalis; nihil enim in his omnibus potest dici probabiliter: est ergo impossibilis talis entitas actus, quæ successive fiat naturalis et per se infusa.

CAPUT IX.

FUNDAMENTIS PRIORIS SENTENTIÆ SATISFIT.

1. *Ad primum argumentum in cap. 4, num. 11.* — Superest ut argumentis prioris sententiæ in cap. 4, a num. 11, positæ respon-

deamus. Primum erat, quia repugnat actum esse vitalem, et esse quoad substantiam supernaturalem. De quo puncto multa dixi in 1 part., tract. 2, lib. 2, cap. 8, tractando de visione. De qua dubitari non potest quin sit actus quoad substantiam supernaturalis: hoc enim nec illi Theologi, qui de actibus viæ aliter sentiunt, negare ausi sunt, ut supra ex Durando retuli, et videre licet in Cajetan. 2. 2, q. 17, art. 1, ad 3; et Soto, in 4, dist. 49, q. 2, art. 2, conclus. 5; et sententia Theologorum docet visionem illam ita esse in se supernaturalem, ut nulli intellectui creato possit esse connaturalis. Et nihilominus visio illa actus vitalis est, cum constituat beatum videntem, et cum in illa consistat vita æterna, juxta verbum Christi: *Hæc est autem vita æterna, ut cognoscant te solum Deum verum.* Non ergo repugnat actui vitali esse in substantia supernaturalem. Unde etiam non repugnat hujusmodi actum elici a potentia vitali: nam etiam illa visio ab intellectu elicitur, ut contra Durandum et nonnullos alios, cum D. Thoma et aliis gravioribus Theologis eodem loco docui, quia influxus activus potentiæ vitalis est de intrinseca ratione actus vitalis, ut vitalis est, et omnino necessarius ut formalem effectum suum tribuat potentiæ vitali. Sicut ergo in illa visione possunt illa duo conjungi, ita etiam poterunt in actu fidei vel amoris viæ. Idemque argumentum fieri potest de actu prophetiæ, de quo D. Thom. 2. 2, quæst. 171, artic. 2, ad 3, dixit esse supernaturalem quoad substantiam, manifestum tamen est esse actum vitalem. Idemque est de actu scientiæ infusæ animæ Christi, nam ab illo vitaliter fiebat, licet esset alterius rationis a scientia acquisita, ac subinde in sua entitate supernaturalis respectu animæ Christi, ut suppono ex doctrina divi Thomæ, 3, quæst. 9, art. 2 et 3, præsertim ad 2 et 3, juncta tota quæst. 11.

2. *Data solutionis ratio.* — Ratio vero est, quia nulla est implicatio contradictionis, quod potentia naturalis elevetur ad agendum ultra vires suas naturales divina virtute, et servato modo agendi, quem ratio vitalis actus requirit; ita ut quamvis supernaturaliter agat, nihilominus in intrinseco modo agendi servetur proportio, juxta naturalem conditionem talis potentiæ; sive potentiæ nostræ habeant inchoatam virtutem naturalem ad influendum in hos actus per modum principii proximi principalis, saltem partialis, sive influant per potentiam obedientialem per

modum instrumenti a Deo elevati, de quibus modis aliqua in citato loco dixi, et plura in tomo primo 3 part., disput. 31, sect. 6, ad 4, et alia dicam inferius tractando de habituali gratia. Nunc vero satis est quod tam priori quam posteriori modo possit elici actus vitalis, nihil enim repugnat vitaliter influere et instrumentaliter, quia potest facultas elevari juxta modum agendi naturæ illius proportionatum. Neque oppositum aliqua ratione in argumento probatur, vel ex ratione actus vitalis inferri potest, quia licet potentia ut instrumentum elevetur, semper agit ut principium internum et immanens, seu intra se agens cum capacitate, ut in se recipiat formalem effectum talis actus, qui vitalis est.

3. *Ad incommodum in eodem argumento illatum.* — Quod vero in eodem argumento tanquam inconveniens inferebatur, quod virtutes infusæ non essent habitus, sed potentiæ, nullius est momenti, nam, ut infra dicemus, nec sunt puri habitus, nec puræ potentiæ, sed utramque rationem eminenti modo participant. Sunt enim habitus, quatenus supponunt potentiam, quæ est proximum principium operationis, et illam informant, et ad operandum adjuvant, nec possunt sine illius influxu operari: sunt vero potentiæ aliquo modo, quatenus non dant solam facilitatem operandi, sicut puri habitus, sed etiam dant vel complent potestatem. Non possunt autem dici simpliciter potentiæ, quia non sunt totum principium proximum agendi, quia necesse est ut ipsæ potentiæ animæ immediate influant in actum, alioqui actio non esset vitalis. Vocantur autem simpliciter habitus, ut distinguantur a propriis potentiis, quibus superadduntur, et quia sine potentiis nihil agere possunt; potentiæ autem absolute agere possunt sine tali habitu, si Deus per aliquod auxilium vicem ejus suppleat, ut lib. 4 latius dicemus.

4. *Ex data solutione confirmatur vera sententia.* — Et ex solutione hujus argumenti potest confirmari nostra sententia: nam actus supernaturales, qui a nobis in via postulantur, sunt dispositiones ad ultimam et consummatam perfectionem animæ, et quasi motus quidam ad ultimum terminum, qui in visione beata consistit. At visio beata in substantia et entitate sua est ordinis divini et supernaturalis, ut dictum est: ergo etiam actus supernaturales viæ, per se ordinati ad illum terminum, esse debent ejusdem ordinis cum illo, ac proinde quoad substantiam supernaturales. Probatur consequentia, quia media debent

esse proportionata fini, et dispositiones formæ. Qua ratione solent Theologi probare habitus infusos esse in se supernaturales, ut videri potest in Durando in 3, distinct. 23, quæst. 5, et num. 5, quæst. 6, num. 8; multo autem magis procedit de actibus, quia per illos immediatius, et quodammodo perfectius ordinamur ad beatitudinem supernaturalem, et ad comparandam Dei gratiam, quam per habitus. Eo vel maxime quod, ut supra dicebamus, habitus sunt propter actus, et per illos ordinant et ducunt hominem ad finem supernaturalem; ergo si illi infunduntur supernaturales, ut proportionentur fini, actus etiam esse debent simili modo supernaturales, quia etiam ipse finis magis in actu quam in habitu consistit, et potest simul esse supernaturalis et vitalis: idem ergo de actibus viæ censendum est.

5. *Ad secundum argumentum in eodem cap. 4, num. 12.* — Superest respondendum ad aliam conditionem libertatis, quæ videtur repugnare cum supernaturalitate actus quoad substantiam, in qua secundum argumentum fundabatur. Et imprimis contra hoc sumere possumus argumentum ex actu charitatis patriæ, qui ejusdem substantiæ et speciei est cum actu charitatis viæ, juxta magis probabilem et receptam sententiam, et consentaneam verbis Pauli, 1 ad Corinth. 13: *Charitas nunquam excidit.* Idem ergo charitatis actus, qui in patria est supernaturalis et necessarius, potest in via esse supernaturalis et liber; ergo libertas non repugnat cum supernaturalitate actus. Accedit quod si ratio illa aliquid valeret, non solum probaret actum non posse esse supernaturalem quoad substantiam, verum etiam nec quoad modum intrinsecum, qui a voluntate ut libera pendeat et fiat, ac proinde actum non esse supernaturalem per aliquid liberum et elicitedum a nobis, sed per modum extrinsecum, vel a solo Deo additum, quod absurdissimum est, ut ostendimus; ergo in omni sententia probabili necessarium est confiteri actum supernaturalem moralem et humanum esse liberum, etiam quoad esse supernaturale talis actus, quidquid illud sit. Hoc ergo nos dicimus de substantia actus, etiamsi supernaturalis sit. Ratio vero eadem fere est quæ de actu vitali, quia Deus elevat unamquamque potentiam modo illi accommodato. Et declarari potest, quia libertas consistit in potestate agendi et non agendi, vel etiam in potestate agendi unum aut oppositum ejus. In his vero actibus, licet voluntas

non habeat potestatem agendi illos, nisi elevata, nihilominus de se habet potestatem non efficiendi illos, vel efficiendi alios dissimiles et repugnantes; Deus autem ita movet, et elevat potentiam ad agendos hos actus supernaturales, ut non auferat innatam potestatem ad non agendum illos, vel ad efficiendum repugnantes; ideoque, non obstante elevatione, manet integra libertas, et dominium voluntatis circa influxum quem præbet ad hujusmodi actus, ut latius inferius dicemus tractando de habitibus et de auxiliis, et concursu eorum cum libero arbitrio.

6. *Ad tertium argumentum in num. 13.* — Ad tertium, ex probationibus assertionis patet responsio. Duo enim principia in illo argumento sumuntur: unum est, possibile esse actum esse naturalem quoad substantiam, et supernaturalem quoad modum; aliud est, hoc sufficere ad veritatem omnium locutionum Conciliorum et Patrum, de necessitate gratiæ ad hos actus efficiendos. Primum autem ex his principiis distinguendum est: nam potest intelligi vel de modo solum in fieri, vel de modo addito actui in facto esse: priori modo, fatemur posse actum naturalem esse supernaturalem quoad modum, id est, posse supernaturaliter fieri, sicut potest habitus naturalis fieri modo supernaturali, id est, per infusionem, quamvis in termino seu in facto esse nullum modum supernaturalem recipiat. Si ergo prior illa propositio de hoc modo intelligatur, sic negatur aliud principium: nam hic modus non sufficit ad omnia, quæ de his actibus Scriptura et Concilia docent, explicanda, ut late probatum est, quia cum Scriptura et Concilia docent Deum infundere fidem, charitatem, etc., præcipue loquuntur de actibus, et licet intelligantur de habitibus, consequenter etiam comprehenduntur actus propter quos dantur habitus. Dum autem dicuntur *infundi*, intellectum a Theologis et ab universa Ecclesia est, illum esse modum productionis connaturalem et necessarium in his actibus et habitibus, propter eorum excellentiam et perfectionem, et ideo dici solent *per se*, et non tantum *per accidens* infusi. Igitur non sunt supernaturales propter solum modum quo fiunt, sed potius, quia ipsi supernaturales sunt, ideo supernaturali modo fiunt.

7. *Pergit solutio proxima.* — Si autem prior propositio intelligatur de modo addito actui in termino, et in facto esse, iterum subdividui potest juxta superius tractata. Nam vel est sermo de modo extrinseco, quem moralem vo-

care possumus, cum revera solum consistat in aliqua extrinseca denominatione seu relatione rationis, vel de modo intrinseco et physico, atque in re ipsa addito et conjuncto actui. In priori sensu, gratis damus posse actum naturalem aliquo modo supernaturali extrinsece affici seu denominari. In hoc vero sensu, negamus posteriorem propositionem, quia hic modus non sufficit ad propriam excellentiam horum actuum, quam Ecclesia docet, et Scriptura satis indicat, ut longo discursu probatum est. Et præcipue, quia vel ad illum modum non essent necessaria auxilia gratiæ, quæ vires præbeant ad agendum, quia illa denominatio non fit ab ipso homine operante: vel si contingat unum actum naturalem voluntatis imperari vel referri, et consequenter denominari ab alio actu supernaturali ejusdem voluntatis, tunc supernaturalitas tota est in actu imperante seu dominante, et ad illum sunt per se necessariae supernaturales vires et auxilia, ideoque esse supernaturale illius non potest in sola denominatione extrinseca consistere.

8. *Absolvitur prædicta solutio.* — *Exempla optima.* — In posteriori autem sensu de modo intrinseco et reali, negamus illam priorem propositionem; non enim potest intelligi modus intrinsecus, et realis, et supernaturalis, accidentaliter adjunctus actui naturali, ratione cujus vires gratiæ postulentur, et qui ad salutem sit necessarius, quod etiam late probatum est; quia modus majoris intensionis, vel alius similis, si fortasse cogitetur, et sive possibilis sit, sive non sit, certum est ad salutem non requiri, et ideo propter illum vires gratiæ non requiri. Necesse est ergo ut propter substantiam talium actuum virtus gratiæ necessaria sit, et hoc est esse supernaturales quoad substantiam. Et ideo etiam non sufficit modus majoris facilitatis aut promptitudinis, vel similis, quia et omnes isti vel consistunt tantum in fieri, vel sunt extrinseci, et, quod caput est, Concilia expresse declarant gratiam non tantum propter talem modum esse necessariam. Et ita facile responderi potest ad exempla de modis supernaturalibus unionis hypostaticæ, vel Christi et accidentium in Eucharistia, nam illi, juxta modum entitatis quam habent, sunt in sua substantia supernaturales, et adduntur rebus naturalibus ex speciali operatione, et institutione divina. Ad aliam vero partem, qua probatur objectum fidei esse naturale, et viribus naturæ accommodatum, respondemus negando assumptum. Nam omnia illa quæ in

argumento adduntur, solum probant de propositione et applicatione illius objecti, quæ fit modo naturali, quamvis non sine directione Spiritus Sancti interius mentem gubernantis. Sub illa vero propositione applicantur motiva credendi, et volendi credere omnino supernaturalia, ut dictum est, et in cap. 10 magis explicabitur.

CAPUT X.

UTRUM POSSIT HOMO ASSENTIRI MYSTERIIS SUPERNATURALIBUS REVELATIS A DEO, ALIQUO NATURALI ASSENSU SINE AUXILIO SPECIALI GRATIÆ.

1. *Prima ratio pro negante parte.* — *Secunda ratio.* — Ratio dubitandi esse potest, quia mysteria fidei totam naturæ facultatem excedunt; ergo nemo potest sola facultate naturali illis assensum præbere. Probatur consequentia, quia non potest potentia, virtute sua naturali, attingere rem superioris ordinis, nisi elevetur a superiori agente, alias naturaliter tenderet extra objectum suum naturale, et extra spheram suæ activitatis ageret. Secundo, unus ex erroribus Pelagii fuit, sufficienter propositis mysteriis fidei, factisque credibilibus per Evangelicam prædicationem, hominem sua libertate posse illis assentiri sine speciali auxilio gratiæ. Quem errorem Augustinus sæpissime detestatur, epistol. 106, et lib. 3 de Doct. Christ., cap. 33, et lib. de Grat. Christi. Imo, cum ipse aliquando in eo errore fuisset, illum retractavit lib. 1 Retract., cap. 23, et latius lib. de Præd. Sanct., cap. 3; ergo ad hunc errorem pertinet quæcumque fidem naturalem supernaturalium mysteriorum admittere, ad quam gratia revelationis necessaria sit, et nulla alia. Quod si quis dicat Pelagium fuisse locutum de fide perfecta, fidem vero acquisitam fore semper imperfectam, et ideo, licet concedatur naturæ absque auxilio gratiæ, non pertinere ad errorem Pelagii:

2. *Tertia ratio.* — *Quarta.* — Contra hoc instatur tertio, quia Semipelagiani ita distinxerunt fidem imperfectam et perfectam, et dixerunt imperfectam esse ex nobis, perfectam vero ex gratia, ut constat ut supra dictis, Prolegomen. 5, explicando sententiam Cassiani et Faustii. Et nihilominus illa etiam sententia damnata est, eo quod diceret fidem imperfectam esse ex nobis, et illam ex professo impugnat Augustinus toto libro de Præd. Sanct., ut

alia loca omittam; et Prosper ac Hilarius, in epist. ad Augustinum, eundem notant errorem, eumque impugnat Prosper toto libro contra Collat. et aliis locis sæpe citatis, et Fulgentius, de Incarnat. et grat., cap. 17 et seq.; ergo admitti non potest ulla fides naturalis, quantumvis imperfecta, istorum mysteriorum. Ac tandem, argumentor quarto, deducendo ad errorem Massiliensium; nam si homo posset aliquam fidem adhibere mysteriis revelatis a Deo, per illam fidem mereretur fidei augmentum et perfectionem, et sic nulla fides esset donum gratiæ, non quidem prior, sive imperfecta, quia fit sine auxilio gratiæ, nec etiam posterior, id est perfecta, quia datur ex merito prioris fidei, et sic jam non est gratia. Consequens autem est contra dicta in cap. 2 et 3, et contra definitionem Conciliorum Arausiacani et Tridentini; ergo. Sequela probatur ex sententia Augustini, lib. de Prædest. Sanct., cap. 2, dicentis: *Quis dicat eum qui jam cepit credere, ab illo in quem credit nihil mereri?* Item quia ille facit quod in se est circa sibi revelata: ergo meretur juvari a Deo, ut fidem, sicut oportet, perficiat.

3. *Prima assertio communis, quod detur aliqua fides naturalis de revelatis.* — In hoc puncto aliquid est inter Theologos communiter receptum, et aliquid in controversiam nunc a modernis vertitur. Primum est, circa mysteria fidei revelata posse dari aliquem assensum fidei acquisitæ solis naturæ viribus; et consequenter posse esse aliquam voluntatem credendi illi fidei proportionatam, ac subinde acquisitam et elicitam sine speciali auxilio gratiæ. Ita docet D. Thom. 2. 2, quæst. 5, art. 3, et ibi omnes expositores. Theologi etiam antiqui superiori capite allegati, tam illi qui putant actum fidei Christianæ esse naturalem quoad substantiam, ut Capreol. in 3, dist. 24, quæst. unie., ad argumenta Scoti contra secundam conclus.; item Scotus, Gabr., Durand., Almain. et alii in 3, distinct. 23; Cajet. 1. 2, quæst. 109, artic. 1 et 4; Soto, lib. 2 de Nat. et grat., cap. 8, 14, et aliis locis sæpe allegatis, quam illi qui tenent fidem infusam esse assensum supernaturalem quoad substantiam, ut Alens., Richard., atque etiam D. Thomas, et idem docent moderni, Medin. et alii supra allegati; et Bannez 2. 2, quæst. 5, artic. 2, et quæst. 6, artic. 1; et Azor., tom. 1, lib. 3, cap. 24, quæst. 2, et optime Bellarm., lib. 6 de Grat. et liber. arbitr., cap. 3, in generali responsione ad objectiones.

4. *Probatur primo de fide necessaria de-*

monum. — Potestque hoc probari primo, ex illo Jacob.: *Dæmones credunt et contremiscunt*, constat enim dæmoniorum fidem non haberi viribus gratiæ, quæ illis non dantur. Verum est illam fidem non voluntariam esse, sed necessariam, ac subinde procedere ex aliquibus principiis evidentibus, partim ex naturali lumine, partim experientia, quæ reducitur ad evidentiam in attestante, quam posse habere Angelos, de rebus fidei, communis opinio fert, quamvis quæstio fere de nomine sit, an illa dicenda sit fides, necne: Jacobus autem absolute ita illam appellat, nam credere non fit nisi per actum fidei. Homines vero raro possunt ad illam evidentiam pervenire; quod si aliqui, ut Apostoli, vel alii qui miracula conspiceret et ponderare potuerunt, illam assecuti sunt, credo non potuisse illam acquirere sine Spiritus Sancti auxilio, præparante voluntatem eorum, ut pie susciperent quæ dicebantur, et ut vim motivorum et miraculorum ponderare et penetrare possent; ideoque ille modus fidei, quamvis naturalis quoad substantiam sit, non potest (ut opinor) obtineri ab homine lapsa, vel in pura natura constituto, sine speciali Dei adjutorio. In quo non est homo dæmonibus comparandus, nam dæmones facillime cognoscunt virtutes signorum, etiam evidenter, et ex illis possunt evidenter cognoscere Deum esse qui per hominem loquitur, quod hominibus longe difficilius est, et ex multa circumspeditione et affectione pendet, quæ non potest in re tam difficili, et aliena a sensibus et affectibus humanis moraliter loquendo, solis viribus propriis adhiberi.

5. *Probatum secundo de fide libera hominum.* — *Confirmatur ratione.* — Nihilominus tamen alia fides voluntaria et libera ex humano discursu et libera voluntate haberi facile potest. Id constat exemplo in hæretico, qui aliqua mysteria credit, et non fide infusa, quia illam non habet; nec etiam auxilio speciali gratiæ, quia credit humano, et non divino motivo, et quia gratis diceremus dari eis speciale auxilium gratiæ ad quandam fidem, quæ nihil illis ad salutem proderet. Idem dici potest de Judæis, nam etiam illi aliquas veritates fidei credunt ex suorum majorum traditione, ut, vetus testamentum esse verbum Dei, et esse vera quæ in illo continentur; hoc enim credunt, licet in particulari in illarum interpretatione errent. Imo et Christiani, non semper dum credunt, actus supernaturales et infusos exercent, sed sæpe duci possunt ex testimonio parentum, vel humana quadam consuetudine.

Ratio vero non est alia, nisi quia hæc veritates fidei revera non asseruntur tantum testimonio divino, sed etiam humano, et ita potest homo pro sua imperfectione et libertate duci ex testimonio humano, et tunc actus est naturalis et facilis, quantumvis materiale objectum altissimum sit, et hoc confirmant exempla gentilium, qui ex traditione parentum portenta quædam credunt, in quibus plus difficultatis est quam in veritatibus fidei, quia interdum convinci possunt esse falsa, et contraria rationi, quod de veritatibus fidei ostendi non potest.

6. *Item de actu volendi credere.* — Et hinc etiam constat voluntatem sic credendi non esse supernaturalem, neque ad illam esse necessariam gratiam, quia est mere naturalis, et in ea potest non esse difficultas, ex quadam consuetudine, vel licet sit aliqua, affectus ad proprium discursum, et iudicium interdum sufficit ad illam vincendam, ut in hæretico est manifestum. Solum illi auctores qui omnem occasionem, vel cogitationem congruam cognoscendi aliquod verum, vel volendi aliquod bonum, gratiæ auxilium appellant, dicunt consequenter hanc voluntatem credendi aliquid fidei, etiam humano modo, si honesta sit, non posse haberi sine auxilio gratiæ, neque ipsum assensum talis fidei, quatenus est de objecto vero, esse sine simili gratiæ adjutorio. Verumtamen hoc generatim supra satis rejectum est, et in particulari de illa fide manifestum est, solum supponere gratiam doctrinæ et revelationis, quæ non est proprium gratiæ adjutorium, quod inquirimus. Accedit quod illa occasio audiendi res fidei, et iudicandi de credibilitate earum, et cogitandi de illa ita congrue ut inducatur voluntas ad volendum sic credere, hoc totum potest provenire ex generali providentia gratiæ, et non ex peculiari intentione salutis ejus qui sic credit. Nam fieri potest ut talis fides non solum nihil proficiat sic credenti ad salutem, verum potius sit illi occasio majoris damnationis; ergo talis cogitatio congrua, nec per se habet rationem gratiæ, nec ex intentione Dei dantis illam per generalem concursum et providentiam, illam rationem participat. Ad hanc ergo fidem et voluntatem sic credendi, per se nulla gratia necessaria est.

7. *Prædicta fides naturalis specie differt a Christiana.* — Hoc posito, inquirendum superest qualis et quanta esse possit hæc fides sine auxilio gratiæ acquisita. In quo nos supponimus illam esse specie diversam a fide Chris-

tiana ad salutem necessaria. Nam licet ex antiquis Theologis pauci hoc senserint, nihilominus verissimum est, et his temporibus communiter receptum, et inter alios id asseruit Molina, in Concord., quæst. 14, art. 13, disput. 7, § *Nostram*, in fine, sequiturque evidenter ex dictis capitibus præcedentibus: nam actus fidei Christianæ est supernaturalis in substantia, id est, est essentialiter supernaturalis in sua specie; hæc autem fides, de qua modo loquimur, est mere acquisita, et quoad substantiam suam est naturalis, fierique potest per vires naturæ: ergo differunt specie. Item habitus illis correspondentes specie differunt, nam unus est per se infusus, et alter acquisitus: ergo et actus eorum.

8. *Excellentiores sunt proprietates fidei Christianæ, quam humanæ.* — *Proprietates fidei Christianæ.* — Atque hinc sequitur omnes proprietates fidei, altiori et excellentiori modo inveniri in actu fidei Christianæ, quam hujus acquisitæ. Probatur, quia hæ proprietates vel sunt essentielles, vel sequuntur speciem et essentiam rei: sed species et essentia fidei altior et excellentior est in fide infusa: ergo et proprietates sive essentielles fidei, sive consequentes illam, intrinsece sunt excellentiores in fide infusa quam in hac acquisita. Hæ autem proprietates esse videntur *certitudo, infallibilitas, pietas, firmitas, et universalitas*. Certitudo ad intellectum pertinet assentientem sine ulla formidine partis oppositæ, quam certitudinem maxime postulat Christiana fides. Infallibilitas est radix certitudinis, et respicit objectum, ita verum, ut deficere non possit, neque assensus possit non esse illi conformis, quod est infallibiliter verum, et hanc proprietatem perfectissime habet fides Christiana ex prima veritate, cui credit. Pietas pertinet ad voluntatem subjicientem intellectum Deo, etiam in his rebus quæ humanam rationem superant, et in quodam credendi modo plane divino, ut paulo post explicabo. Et inde oritur firmitas, quatenus ad voluntatem, omni rationi et omni contrariæ opinioni fidem præferentem, spectat. Universalitas pertinet ad materiale objectum fidei: nam vera et Christiana fides omnia credit, si sufficienter proponantur, quæ omnia ex materia de fide supponimus quoad fidem infusam. Nunc explicandum est quomodo fides acquisita possit vel non possit has proprietates in illo gradu attingere, et ita declarabitur simul, qualis et quanta esse possit.

9. *An hæc fides naturalis possit esse certa?* — *Prima opinio affirmans.* — Primo ergo in-

quirimus an hæc fides possit esse certa, id est, an homo sine auxilio gratiæ possit credere res revelatas assensu certo. Aliqui affirmant illum assensum posse esse certum ex parte credentis, præsertim Scot., in 3, dist. 23, ubi indicat non minus certum esse posse, quam sit assensus fidei infusæ, quia qui sic credit, ita firmiter adhæret, ut non dubitet nec dubitare possit, stante fide, licet illam mutare possit; non est autem major certitudo in fide infusa, nam etiam desereri potest, licet dum est, non permittat dubitare. Quod argumentum tam efficax illi visum est, ut concludat: *Et si velitis dicere fidem infusam requiri propter aliquam majorem certitudinem, solvatis argumentum factum.* Aliqui etiam tribuunt hanc opinionem Molinæ in Concordia, disput. 7; sed ibi nihil hujusmodi affirmat: imo in § *Nostram*, in fine, concludit hunc assensum non esse *nisi opinionem fidemve humanam*.

10. *Secunda opinio vera.* — *Certitudo duplex.* — *Duplex naturalis fides.* — Mihi ergo videtur non repugnare quin assensus hujus fidei acquisitus certus sit, licet non æque ac assensus fidei infusæ; ut utrumque probemus, distinguamus duplicem certitudinem; unam per se convenientem actui, seu quam actus postulat ex vi sui objecti formalis, qualis est certitudo scientiæ ex vi mediæ demonstrativi: alteram accidentariam ex adhæsione ac voluntate assentientis, qualis est interdum in aliquo ita suæ opinioni adhærente, ut illam evidentem esse denuntiet, eique sine ulla formidine assentiatur. Distinguere oportet duplicem fidem naturalem mysteriorum fidei; unam obscuram simpliciter, ac subinde voluntariam et liberam, aliam evidentem in testificante, qualis est in dæmonibus, et potest esse in homine, ut declaravi. Prior nunquam est certa ex parte objecti, quia, ut ostendam capite sequenti, reducitur ultimate in fidem humanam et acquisitam, quæ nunquam est certa ex parte objecti, cum non fundetur in medio infallibili. Aliquando vero potest talis fides esse certa ex voluntaria adhæsione credentis, ut esse solet in hæretico dante vitam pro aliqua veritate catholica, quam retinet. Nunquam tamen illa certitudo æquabitur certitudini fidei infusæ, quia in fide infusa invenitur certitudo per se, et ex vi objecti, quia inuitur Deo, qui nec falli nec fallere potest. Et inde fit ut de se potentior sit ad firmandam mentem et animum in assensu talis veritatis, ita ut difficilius ab eo removeatur. Nam licet dicat hæreticus se credere, quia Deus dicit, revera non in eo

innititur, sed in sua privata opinione, ut infra declarabo.

11. *Certitudo fidei acquisitæ minor est certitudine fidei infusæ.*—At vero si assensus fidei acquisitæ sit evidens in testificante, potest esse certus per se, et ex vi objecti formalis, seu mediæ, quia suo modo innititur medio evidenti, evidentia autem per se infert certitudinem. Et hoc modo est certa fides dæmonum. Et in hominibus doctis in rebus et motivis Christianæ fidei, fieri potest ut tam evidens illis sit, has res, quas fides proponit, esse a Deo revelatas, sicut est evidens Romam esse. Unde si ex vi illius evidentiae, quæ in substantia naturalis est, assentiantur per proprium discursum rebus fidei, habere poterunt assensum certum, tametsi naturalem et acquisitum, in eo saltem gradu in quo certo credimus Romam esse, et similia. Quamvis homines, ut dixi, non perveniant in hoc statu ad illam evidentiam sine juvamine gratiæ, non quia actus in se sit supernaturalis, sed quia est adeo difficilis propter multa quæ ad illum necessaria sunt, ut sine aliquo adiutorio Dei, et ipsius fidei infusæ, non possit difficultas illa superari. Et nihilominus hæc etiam certitudo, quamvis ex evidentia nascatur, nunquam erit æqualis certitudini fidei infusæ, per se de utraque loquendo. Quia talis evidentia semper nititur in aliqua humana experientia circa objecta creata et per media creata, in qua evidentia tota certitudo illius fidei fundatur. Certitudo autem fidei infusæ nititur in Deo ipso, et in verbo ejus per se et propter se credito, quæ multo major est. Item hac ratione certitudo fidei major est quam certitudo scientiæ naturalis, ut in proprio tractatu ostendetur; ergo nunquam certitudo fidei acquisitæ, quantumvis evidens, potest pervenire ad certitudinem fidei infusæ. De certitudine autem ex parte credentis non est curandum, quia illa extrinseca est, et per accidens, unde non mutat naturam actus, nec cadit sub scientiam. Satis ergo est quod, secundum rectam prudentiam, etiam adhæsiō ex parte credentis debet esse major, quando fide infusa credit, quia habet majorem causam et rationem infallibilitatis.

12. *Scoti argumentum in num. 9 dissolvitur.*—Neque contra hoc obstat argumentum Scoti, tum quia falsum assumit, si generaliter intelligat fidem acquisitam nullam secum admittere dubitationem, quia etiam timor falsitatis, ac deceptionis formido potest simul esse cum fide acquisita, saltem quando non est aliquo modo evidens; illa autem formido ge-

nus quoddam dubitationis est, quam fides infusa secum non admittit, saltem cum deliberatione et consensu: fides autem quam habet hæreticus, posset illam admittere; imo necessario sequeretur ex modo credendi ejus, si constanter sentire et loqui vellet, cum suo arbitrio unum ex revelatis credat, et non aliud, et ita de utroque potest æque formidare. Deinde etiam si loquamur de fide acquisita, in qua hoc iudicium, *Deus hæc revelavit*, seu *dixit*, sit evidens ex signis et testimoniis humanis, et de illa fateamur, excludere omnem dubitationem et formidinem, non inde sequitur non posse fidem infusam esse certiolem, quia causa certitudinis ejus major est, majusque absurdum sequeretur, si illi posset subesse falsum, quam si alteri fidei acquisitæ subesset; nam hinc solum sequitur potuisse hominem decipi in eo quod videbatur humano modo evidens, illinc vero sequeretur Deum esse testem falsum, quod longe impossibilius est.

13. *An hæc fides naturalis sit infallibilis?*—*Prima sententia negans.*—*Vera resolutio.*—*Hæc fides est materialiter infallibilis.*—Ex his facile definiri potest quid de infallibilitate dicendum sit. Aliqui enim simpliciter negant actum fidei acquisitæ de mysteriis revelatis esse infallibilem, quia nullus assensus est infallibilis, nisi sit evidens per lumen primorum principiorum aut scientiæ, vel sit elicited per lumen supernaturale fidei aut prophetiæ; neutrum autem horum habet fides hæc acquisita: ergo. Sed distinctione opus est. Actum enim esse infallibilem, nihil aliud est quam actum non posse esse falsum, ut vox ipsa præ se fert. Hoc autem dupliciter contingit, utique materialiter aut formaliter, id est, vel ex vi propositionis creditæ per se spectatæ, quæ necessariam habet veritatem, vel ex vi motivi et rationis credendi, quando talis est ut cadere non possit, nisi in rem veram. Fides ergo mysteriorum revelatorum a Deo, est priori modo infallibilis ratione materiæ in quam cadit; talis enim assensus, materialiter, seu entitative et individue sumptus, non versatur nec terminari potest ad aliam propositionem; nam eo ipso quod materia mutaretur, jam esset alius assensus, et alius actus, ac denique non esset fides acquisita mysteriorum supernaturalium. Actus autem terminatus ad hanc materiam seu propositionem non potest esse falsus, ut per se constat, quia est conformis propositioni necessario veræ; ergo materialiter est infallibilis. Confirmatur, quia per talem fidem acquisitam, regulariter creditur Deum

revelasse talem propositionem, ut capite sequenti magis explicabo, et ex vi talis fidei acquisitæ de ipsa revelatione creduntur reliqua esse vera; ergo creduntur ut infallibilia, quia quod a Deo revelatum est necessario verum est, et in hoc sensu dicitur infallibile; ergo et talis fides est infallibilis, saltem ex materiali objecto.

14. *Hæc fides formaliter est fallibilis.* — Aliter vero loquendum est de infallibilitate formali, in qua est etiam constituenda differentia inter fidem acquisitam dæmonum, et hominum ordinario modo credentium, seu inter fidem coactam, seu non liberam ratione alicujus evidentiae, et liberam propter inevidentiam et obscuritatem. Nam hæc posterior fides (de qua præcipue hic loquimur, quia illa est in communi usu, et quia de illa fuit controversia cum Pelagianis) sine dubio est fallibilis ex vi objecti formalis. Nam ultimate tandem resolvitur in humanam auctoritatem, quæ fallibilis est. Probat, quia illa fides non transcendit perfectionem opinionis et fidei humanæ, ut D. Thomas recte docet, secunda secundæ, quæst. 5, artic. 3; et Molin. supra expresse, et omnes qui recte sentiunt; at fides humana et opinio ex vi formalis rationis suæ fallibilis est, licet materialiter contingat aliquam opinionem de aliqua veritate esse infallibilem ratione materiæ. Sic ergo est in præsentia. Unde contingere potest fidem aliquam ejusdem speciei cum hæc fide acquisita rerum fidei esse falsam, ut, in hæretico credente Deum esse Trinum, et Spiritum Sanctum non procedere a Filio, unus assensus est verus, et infallibilis materialiter, et alter est falsus, et tamen esse possunt ejusdem speciei in tali homine, nam utrumque credit, quia sibi videtur esse revelatum a Deo: et ita actus in essentia sunt ejusdem speciei, quæ non a materiali objecto, sed a motivo sumitur, et nihilominus unus est falsus, et alius verus; ergo uterque est de se fallibilis ex vi suæ naturæ et rationis formalis, licet quasi per accidens seu materialiter, aut in individuo, contingat talem actum cadere super materiam veram et necessariam, et alium super impossibilem. Atque hæc est potissima differentia quoad infallibilitatem inter fidem infusam et acquisitam, etiamsi sint ejusdem objecti materialis.

15. *Hæc fides evidens in attestante, etiam formaliter est infallibilis.* — Solvitur fundamentum negantis sententiæ in num. 12. — At vero si assensus fidei acquisitus fuerit evidens in attestante, ita ut vere necessitet intellec-

tum, vel simpliciter, vel morali modo, talis actus est infallibilis etiam ex vi medii sui, ac subinde ex objecto formali, quia etiam ille assensus procedit ex principiis evidentibus, quæ sunt: *Quod Deus dicit est infallibile, et, Deus hoc dicit.* Nam primum est notum scientia naturali, secundum autem supponitur cognosci evidenter ex signis experimento cognitissimis, juvante etiam discursu rationis in nobis, et in Angelis efficacia sui luminis naturalis. Ergo assensus in illis principiis fundatus est infallibilis, quatenus nititur medio evidenti; ergo non tantum ex materiali objecto, sed etiam ex formali, seu ex medio cognoscendi est infallibilis. Unde non procedit contra hanc partem fundamentum prioris sententiæ. Quia vel hæc fides, quatenus est evidens, potest dici suo modo scientia a posteriori, seu potius per medium extrinsecum: vel si ita vocetur fides, ut omnino negetur esse scientia, respondemus, sumpta scientia in illo rigore, falsum esse illum tantum assensum esse infallibilem, qui vel est scientificus, vel ex principiis scientiæ propriæ procedit: satis est enim quod procedat ex principiis evidentibus quocumque modo, cum evidenti illatione. Unde juxta gradum evidentiae principiorum, erit etiam gradus infallibilitatis fidei. Nam assensus hujus propositionis, *Roma est*, moraliter est infallibilis, non metaphysice, quia principium in quo nititur, scilicet: *Quod tot homines tanto et tam diuturno consensu, ut testes oculati affirmant non potest esse falsum*, hoc (inquam) principium moraliter verum est et evidens, non metaphysice; at principium: *Quod Deus dicit est verum*, est evidens simpliciter, et in se prorsus necessarium et infallibile; unde si altera propositio, scilicet, *Deum esse qui hoc testificatur*, fiat etiam simpliciter evidens, ut fieri potest saltem quadam naturali evidentiâ, simili modo fides inde genita erit evidens et infallibilis: et nihilominus nunquam perveniet ad infallibilitatem fidei infusæ et assensus ejus; quia hæc, ex parte formalis objecti sui, nititur in sola veritate Dei dicentis totum id quod creditur, quæ veritas Dei infallibilior est omni evidentiâ, et lumine naturali, quia multo magis illi repugnat falsitas, quam omnibus illis signis et motivis creatis, in quibus evidentiâ illa in testificante fundari potest, ut latius in propria materia dicendum est.

16. *Pietas assensum fidei inevidentem sequitur, non vero evidentem.* — *Fidem acquisitam obscuram per accidens tantum pietas sequitur.* — Tertia proprietas dicebatur esse

pietas, quæ proprie convenit fidei, ut voluntaria est, ideoque fides naturalis, ad quam intellectus per aliquam evidentiam cogitur, hanc proprietatem non participat. Sumitur ex doctrina D. Thomæ 2. 2, quæst. 5, artic. 2, in corpore, et ad secundum, ubi ait *fidem, quæ est donum gratiæ, inclinare hominem ad credendum secundum aliquem affectum boni, etiamsi sit informis*. Quod secus esse dicit in fide dæmonum: nam illi, vel inviti credunt, et contremiscunt, et ideo fides illa nullo modo ex pietate procedit. Et licet interdum in viatore fides evidens in attestante, quæ supposita principiorum evidentia est necessaria, possit esse non coacta, sed appetitui conformis, ac subinde voluntaria objective, seu volita, non tamen est voluntaria causaliter, id est, a voluntate determinante intellectum ad speciem actus, et ideo non est fides pia, seu ex pia affectione procedens. Quamvis usus illius, si sit liber quoad exercitium, possit ex pia voluntate procedere, quod accidentarium est, et invenitur etiam in scientia. Præterea fides acquisita supernaturalium misteriorum, quando est obscura, licet voluntaria sit, per se tamen non habet quod sit pia, sed potest ex prava voluntate procedere, ut in Judæo credenti mundi creationem manifestum est, id enim credit pertinaci voluntate, qua etiam credit venturum adhuc Messiam; et idem est de hæretico, qui id credit quod vult, proprio iudicio confisus, et ideo licet contingat verum aliquod credere, non bene nec pie credit. Denique licet contingeret aliquem credere quæ prædicantur, ex quadam naturali prudentia, quia fiunt probabilia ex testimoniis humanis, quia videtur esse rationi consentaneum illa credere, adhuc illa fides non est pia eo modo quo fides Christiana esse debet pia, quia per illam voluntatem non captivatur intellectus in obsequium fidei, nec subicitur Deo, sed ad summum rectæ rationi et humanæ prudentiæ. Et hac ratione diximus fidem naturalem differre ab infusa, non solum in assensu, sed etiam in voluntate assentiendi, quæ longe altioris rationis est in fide infusa.

17. *Firmitas voluntatis, qua naturalis fides a Christiana superatur*. — Et hinc etiam intelligitur quo sensu quarta proprietas, quæ dicebatur esse firmitas, singulariter in fide infusa inveniatur. Firmitas enim sæpius refertur ad intellectum, et sic non differt a certitudine, neque aliud de illa dicere oportet. Aliter vero pertinet ad voluntatem, et ita ibi sumitur, significatque magnam quandam adhesionem

voluntatis ad fidem. Et in hac etiam proprietate excedit fides infusa acquisitam ad eum modum, quo amor super omnia excedit inferiorem amorem; nam qui animo Christiano credit, vult credere supra omne credibile, et ita est affectus ad eam fidem, ut paratus sit propter nullam rem mundi illam relinquere; qui autem credit fide naturali et acquisita, non est sic affectus ex vi voluntatis naturalis credendi; tum quia credit tantum ex humano testimonio, quod de se non potest ita ad se trahere voluntatem; tum etiam quia naturalis facultas non sufficit ad movendum ita intellectum ex sola pietate et subiectione ad Deum, imo nec ex sola honestate, quæ in tali fide spectari potest. Nam si interdum aliqua similis constantia et firmitas in hæretico invenitur circa suum errorem, ideo est, quia tali credulitati adjungitur vana aliqua ostentatio, aut honor, vel commoditas, quæ ad illam pertinaciam juvat. Nam in hominibus qui a sensibilibus et temporalibus magis moventur, potentiora sunt illa inferiora motiva ad movendam voluntatem, quam mere spiritualia, ut ex Augustino, libro de Continent., in superiori libro diximus.

18. *Proprium est fidei infusæ, quod sit universalis*. — Ultima denique proprietas veræ fidei infusæ, est ut sit universalis, id est, ut credat omnia quæ sufficienter proponuntur ut a Deo revelata, quia cum formalis ratio fidei eadem sit in omnibus credibilibus, non potest intellectus firmiter adhærere uni, et non alteri, ideoque ut fides sit qualis oportet ad salutem, esse debet universalis. Et hinc est ut per unum actum contrarium tota fides infusa amittatur. Hinc etiam est ut, quia nunc secundum ordinariam legem fides nobis per Ecclesiam sufficienter proponitur, non possit esse fides supernaturalis, nisi quæ est Catholica, id est, universalis quoad omnia quæ Catholica Ecclesia credenda proponit.

19. *Objectio*. — Dices: fieri potest ut alicui tantum proponatur unum mysterium fidei, et illud credat vera et supernaturali fide; ergo non est de ratione talis assensus, ut sit universalis. Alias non posset quis salvari sine fide omnium articulorum fidei, quod falsum est, quia, licet aliquem ignoret invincibiliter, imo licet ex eadem ignorantia circa aliquem erret, poterit salvari per veram fidem unius, si ex parte voluntatis bene etiam disponatur. Respondetur non oportere fidem esse universalem actualiter, sed virtute et maxime in animi præparatione, quod alias dicitur, non oportere

ut sit explicite universalis, sed satis esse implicite, et hoc esse necessarium; tum ex parte rationis formalis credendi, quæ est divina veritas, cui credendum est tanquam infallibili testimonio, in quo modo credendi virtute creditur esse verum quidquid Deus dixit, etiamsi credens ea ignoret; tum etiam est necessarius ex parte affectus credendi, qui talis esse debet, ad id quod credendum proponitur sufficienter, ut paratus sit ad credendum omnia quæ sufficienter etiam fuerint proposita, ut a Deo dicta, et hoc modo fides eujuseumque rustici est universalis, quia credit ex animo, quo paratus est credere quidquid Ecclesia proposuerit. Ab hac autem universalitate deficit imprimis fides humana aliquorum mysteriorum, quæ in hæretico vel Judæo manet, quæ nec actu est universalis, nec virtute, cum alia similiter proposita non credant.

20. *Dubium.*— *Licet prædictam proprietatem non habeat fides acquisita ex vi rationis formalis credendi, utrum ex voluntate illam possit habere? — Vera resolutio negativa.* — Dubitari autem potest an possit aliquando fides acquisita esse universalis ex voluntate credentis, esto non sit talis ex vi rationis formalis credendi. Videtur enim hoc repugnare, nam omnia revelata possunt fide humana credi, et tota illa fides est mere naturalis; ergo pro voluntate credentis. Nihilominus verisimilius est id non posse sola industria humana sine auxilio gratiæ fieri; quia sicut in moralibus homo potest unum vel aliud præceptum implere, non tamen collectionem omnium, licet per actus naturales implenda sit, vel sicut potest unam vel aliam, et plures veritates naturales sine errore cognoscere, non tamen omnes; ita majori ratione, licet possit unum, vel aliud mysterium fidei credere modo imperfecto et naturali, non tamen omnia collective, etiam successive, et per actus multiplicatos, quia longe difficilius est in his omnibus non errare, quam in scientiis. Quæ ratio præcipue habet locum in fide acquisita libera, quæ pendet ex conjecturis et signis incertis, et ex proprio discursu, tanquam ex propria ratione assentiendi, et præterea ex affectu voluntatis liberæ ac variabilis. Verumtamen etiam habet locum in fide acquisita evidente, si forte ab homine circa hæc mysteria comparari potest, quia illa etiam per se est valde difficilis circa singula, pendetque ex magna diligentia, intelligentia, discursu, et requirit etiam affectum, saltem non repugnantem, nec male affectum.

21. *Ecasis.* — *Non admittitur in fide humana.* — Dices posse hoc fieri reducendo omnia credenda ad unum primum creditum, ex quo necessario alia deducantur. Tunc enim si intellectus convincatur, et necessitetur ad credendum primum, saltem fide acquisita, fieri potest ut inde reliqua omnia sine errore credat. Quod maxime continget, si quis in illo modo credat Ecclesiam regi ab Spiritu Sancto, ideoque non posse errare in his quæ proponit: quia, hoc posito, evidenter constare potest au reliqua proponantur ab Ecclesia necne, saltem quadam morali et humana evidentia, quæ satis esse potest, ut eadem fide acquisita possit quis credere omnia revelata sine ullo errore. Verumtamen etiam hic modus non est admodum verisimilis: quia prius fundamentum vix aut nec vix quidem potest ita evidenter ostendi, ut de necessitate credatur fide humana. Nam illa evidentia solum potest esse in aliquo attestante infallibili, qui est solus Deus; difficile autem est evidenter ostendere Deum dixisse Ecclesiam non posse decipi, vel decipere in rebus fidei: nam licet evidenter ostendatur hoc esse credibile, non tamen ita esse. Præterquam quod non est evidens, quæ et qualis sit hæc Ecclesia, nec quando, aut per quos ita loquatur, ut decipere non possit; sed hæc omnia fide tenentur, et solum fiunt credibilia per conjecturas et signa, et per humanum discursum aut auctoritatem. Itaque quocumque modo ponatur fides acquisita mysteriorum fidei, non credo esse posse integram et sine mixtione errorum, sine aliquo auxilio speciali. Loquor autem de fide humana, quia in Angelis et dæmonibus est ista fides acquisita sine errore speulativo contra fidem, quia in eis est facilis evidentia hæc, ut dixi.

22. *Quomodo universalitas fidem infusam ab acquisita distinguat.* — Hinc ergo in hominibus universalitas et sinceritas veræ fidei signum magnum est supernaturalis fidei, sicut e contrario in hæretico partialis credulitas (ut sic dicam) est signum fidei acquisitæ, quæ sine auxilio gratiæ haberi possit. Addo vero in homine fidei non esse sufficiens hoc universalitatis signum ad distinguendum actum fidei infusæ et acquisitæ. Nam in homine Catholico dari potest fides acquisita universalis omnium, quæ ab eodem creduntur per fidem infusam. Quod patet, quia circa illa omnia quæ credit, potest sæpe exercere actus naturales fidei acquisitæ, quia hoc pendet ab ejus libertate et actuali consideratione, et in eo ablata est dif-

ficultas per conjunctionem fidei divinæ. Potest experientia ostendi, nam licet aliquis, qui diu fuit Catholicus, fiat hæreticus, adhuc retinet facilitatem et promptitudinem credendi ea in quibus non errat; imo etiam ad ea quæ per novum errorem negat, sentit propensionem et inclinationem ex antiquo habitu relictam: ergo signum est cum habitu fidei infusæ habuisse acquisitum, utique per actus naturales fidei, quos vicissim et fortasse frequentius cum supernaturalibus prius, cum esset catholicus, efficiebat. Non ergo repugnat fidem acquisitam circa mysteria fidei esse universalem in aliquo credente.

23. *Universalis fides acquisita in catholico tantum esse potest.* — *Non tamen in catechumeno.* — Existimo tamen probabilissimum esse non inveniri hanc fidem universalem acquisitam, nisi in his, qui fidem catholicam profitentur. Quia, sine fide supernaturali, verisimilimum est in nullo inveniri fidem acquisitam universalem articuloꝝ fidei. Quia, ut dixi, hæc non potest sine speciali auxilio adjuvante acquiri pura, et ab omni errore immunis. Non est autem cur credamus hoc auxilium dari homini non credenti eadem mysteria, sicut oportet. Unde licet fortasse in his qui denuo ad fidem convertuntur, interdum contingat incipere credendo aliquam veritatem sibi propositam humana fide, et ex auctoritate prædicantis, nihilominus non existimo talem fidem acquisitam antecedere circa totam materiam fidei, priusquam elevantur homo, et erigatur ejus affectus ad credendum quæ proposita sunt, sicut oportet ad salutem. Quia neque illa fides acquisita ut prævia ad infusam, necessaria est ad introductionem fidei, non solum circa totam materiam ejus, verum etiam neque circa aliquem articulum, ut in tractatu de Fide dicam; neque est cur tantum gratiæ auxilium detur ad fidem imperfectam, et de se insufficientem ad salutem. At vero his qui jam credunt fide catholica, propter supernaturalem fidem quæ in eis supponitur, facillimum est simul credere fide humana omnia quæ revelata sunt.

24. *Universalitas fidei acquisitæ ab infusa moraliter derivatur.* — Unde ipsa divina fides, licet non sit principium per se fidei humanæ ejusdem veritatis, est nihilominus morale adiutorium, quo facillime altera fides potest etiam esse universalis. Sic etiam fides juvat ad inveniendas rationes et conjecturas quibus veritate fidei credibiliores fiant, propter quas potest homo rebus etiam ipsis assentire, si ve-

lit, assensu utique naturali, et fidei cujusdam, vel opinionis humanæ, quæ interdum ad quamdam moralem evidentiam pervenire potest. Sic ergo ipsa fides divina dici potest speciale auxilium ad alteram fidem universaliter et perfecte in suo ordine consequendam et exercendam, quia et per se erigit et confortat intellectum, et excitat voluntatem, ut intellectum moveat ad inquirenda motiva, quæ humano etiam modo fidem persuadeant. Et præterea a Deo impetrat auxilium quo id possit melius efficere. Quamvis autem hoc ita sit, nihilominus semper differentia magna servatur inter universalitatem fidei infusæ et acquisitæ, nam in priori est per se, in ista est accidentaria, et contingens ex quodam credentis libero usu. Unde prior fides non potest incipere aut conservari sine sua universalitate formali vel virtuali, ut explicavimus; posterior autem et incipere et conservari potest sine universalitate formali, ut patet in hæretico, et sine virtuali, quia illam non habet ex vi objecti, nam si illam haberet, nunquam esse posset dimidiata fides. Atque hinc etiam est ut ad fidem Christianam, propter universalitatem ejus, sit intrinsece necessaria gratia tanquam principium per se ejus; ad fidem autem acquisitam etiam universalem non ita necessaria sit, sed solum per modum moralis causæ tollentis impedimenta, et manucentis mentem intra latitudinem discursus naturalis.

25. *Quid inter utramque fidem intersit.* — *Satisfit primæ rationi propositæ in numero primo.* — *Fit satis secundæ rationi in eodem numero propositæ.* — Ex quibus omnibus satis constat fidem acquisitam, etiamsi sit de rebus revelatis, longe diversæ naturæ esse a fide infusa, multumque a perfectione ejus deficere, ideoque mirum non esse quin aliqui actus ejus possint fieri sine gratia. Unde etiam facile responderi potest ad rationes in principio positas. Ad primam dicitur, quantumvis res in se sint supernaturales, et excedentes humanam naturam, si solum credantur, ut testificatæ humano testimonio, non attingi secundum rationem supernaturalem, sed secundum rationem communem quibuscumque rebus, quatenus per homines referri ac affirmari possunt. Et ideo dum intellectus hæc credit per fidem acquisitam, non fertur extra objectum suum, quia objectum materiale fidei humanæ est quidquid ab homine affirmari potest, sive naturale sit, sive supernaturale, et eadem ratione non agit tunc intellectus extra

sphæram activitatis suæ, quia quælibet humana fides sub sphæra naturali continetur. Ad secundum, dicitur errasse Pelagium, quia loquens de Christiana fide, prout ad salutem necessaria est et ex parte sua sufficit, dixit viribus solius naturæ exhiberi posse, supposita tantum revelatione, seu propositione sufficiente. Fides autem acquisita non est qualis esse debet ad salutem, et, sive illa præcedat, sive non, semper est necessaria propria fides infusa, de qua Scriptura, Concilia et Sancti loquuntur, ut sæpe diximus; de fide autem acquisita nec affirmant aliquid, nec negant, quia nihil ad doctrinam necessariam fidei et saluti animarum pertinebat. In hoc ergo sensu admittimus responsum in argumento datum per distinctionem fidei in perfectam et imperfectam.

26. *Solvitur tertia in num. 2. — Fit satis ultimæ.* — Ad replicam autem, seu tertium argumentum ex errore Semipelagianorum, et definitione Concilii Arausicani, respondemus longe diversam fuisse sententiam Massiliensium. Quia illi loquebantur de fide, quæ, licet esset imperfecta, esset tamen initium quoddam et inchoatio veræ ac supernaturalis fidei, sive illud initium ponerent in voluntate credendi, eamque vocarent imperfectam fidem, sive in assensu aliquo intellectus, qui esset quidem verus assensus conferens ad salutem, indigens tamen aliqua majori perfectione, quam ipsamet inchoata fides posset impetrare seu mereri; et hoc est quod damnant Arausicanum Concilium et Patres. At vero fides acquisita ita est imperfecta ex natura et specie sua, ut non solum sit infra fidem infusam, sed etiam extra omne initium et inchoationem ejus; quia nec includit voluntatem credendam et salutarem, quam fides Christiana requirit, neque est inchoatio vel quasi fundamentum Christianæ fidei. Et ideo talis fides acquisita nullo modo impetrat vel meretur infusam, neque est salutis initium. Unde Arausicanum Concilium, cap. 6, sic definit: *Si quis dixerit sine gratia Dei credentibus, etc., misericordiam Dei conferri, non autem ut credamus, etc., sicut oportet, per infusionem Spiritus Sancti fieri confitetur, resistit Apostolo, etc.* Ubi addendo illam particulam, *sicut oportet*, indicavit de alio modo fidei, quæ non sit sicut oportet, an esse possit sine gratia, nihil ad doctrinam fidei referre, dummodo naturalis fides non credatur esse meritum, aut ratio obtinendi gratiam Spiritus Sancti ad perfectam fidem. Et ita patet responsio ad quartum;

negamus enim sequelam, id est, hanc fidem acquisitam esse posse meritum infusæ, vel gratiæ ad illam, quia illa est valde imperfecta, et omnino naturalis ordinis; in quibus actibus nullum est meritum gratiæ; neque facienti quod potest per vires naturæ, datur gratia ratione talis actus, ut infra suo loco latius dicitur. Augustinus autem loquitur de fide vera et Christiana, licet inchoata tantum, ut capite sequenti explicabo.

CAPUT XI.

UTRUM FIDES ALIQUA, QUÆ IDEM MOTIVUM CREDENDI, EAMDEMQUE RATIONEM FORMALEM OBJECTI HABEAT CUM FIDE INFUSA, POSSIT HABERI EX VIRIBUS NATURÆ, SINE AUXILIO GRATIÆ?

1. *Recentiorum opinio.* — Hæc quæstio valde necessaria est ad intelligendum quantæ sint vires liberi arbitrii ad operandum circa supernaturalia objecta, quæque sit propria differentia inter actus infusos et acquisitos, qui in eadem materia versantur. Unde ex se quæstio communis est omnibus actibus infusis, soletque sub his generalibus verbis tractari, an actus in sua substantia supernaturalis, et actus naturalis possint versari non solum circa idem materiale objectum, sed etiam circa idem formale. Nos autem nunc de fide agimus, postea de cæteris dicemus, prout specialis ratio aliarum virtutum postulaverit, ita enim fiet ut melius difficultates singulæ expendantur. Aliqui ergo ex modernis Theologis, non contenti his quæ in capite præcedenti dicta sunt, contendunt posse hominem assentiri rebus revelatis sufficienter propositis, per vires suas, sine auxilio gratiæ, sub eadem ratione formali objecti, et ex eodem motivo ex quo credimus per gratiam et per Christianam fidem. Et nihilominus, ut salvent definitiones fidei contra Pelagianos et Semipelagianos, dicunt illam fidem quæ habetur per vires naturæ, non esse *sicut oportet* ad salutem vel ad initium salutis, solum quia in entitate sua est ordinis naturalis, et imperfecta, comparatione alterius fidei supernaturalis. Unde sic opinantes non recedunt a sententia quam cap. 4 docuimus, sed addunt circa idem objectum materiale et formale posse versari actus specie et substantia differentes, non ex objectis, sed ex modo tendendi in illud, nobiliori et altiori, vel inferiori et ignobiliori; et hac ratione dari, circa idem objec-

tum, actum in substantia supernaturalem, et actum naturalem, specie et entitate omnino diversos.

2. *Primum principium quo recens fulcitur opinio.* — Fundamentum hujus sententiæ sumitur ex duobus principiis. Unum est, esse possibile actus diversos in specie versari circa idem objectum formale, non tantum quoad rationem formalem quæ in illo attingitur (de hoc enim nulla esset controversia), sed etiam de ratione sub qua attingitur. Probatur, quia formale objectum, licet sæpe distinguat actus, sitque ad id sufficiens quando intervenit, non est tamen adæquata ratio distinguendi actus, nec simpliciter necessaria, quia possunt distinguui ex modo diverso tendendi ad idem et ex eodem motivo. Id patet in motibus, non enim semper distinguuntur ex terminis, sed interdum ex modo tendendi, ut de circulari et recto tradit Aristoteles, 3^o Physic., cap. 3, text. 33. Item in actibus voluntatis; circa idem bonum, amor, desiderium et delectatio, seu voluntas simplex, intentio et fruitio specie distinguuntur ex modo tendendi, juxta doctrinam D. Thomæ 1. 2, quæst. 12, artic. 1, ad 4. Item voluntas et appetitus sensitivus interdum tendunt in idem objectum sub eadem ratione delectabilis, et nihilominus eliciunt actus specie diversos, non propter diversitatem cognitionum, nam cognitio est conditio objecti, non ratio, sed propter diversitatem potentiarum. Item in duobus Angelis specie diversis, amores naturales Dei in ipsum sub eadem ratione bonitatis tendunt, et nihilominus amores illi distinguuntur specie ex modo amandi simpliciori, vel (ut ita dicam) spiritualiori in sua entitate: ergo non repugnat actus specie distinguui circa idem objectum formale. Neque reddi potest ratio sufficiens cur hoc repugnet, cum actus ex multis principiis pendeat, præsertim ex potentia, a qua, propter nobilitatem suam, potest nobiliorem et entiam et speciem accipere, etiam si in idem objectum tendat.

3. *Rationis applicatio et declaratio.* — Sic ergo in præserti non repugnabit circa idem objectum formale fidei, quod est veritas prima revelans, dari assensum specie diversos, unum naturalem, alium vero supernaturalem ex modo nobiliori tendendi, et ex principio superioris ordinis a quo procedit. Declaratur que ulterius in hunc modum, quia inter assensum et rationem assentiendi non requiritur hæc proportio, ut si actus est naturalis, ratio assentiendi etiam sit naturalis,

et similiter, si actus est supernaturalis, ratio assentiendi sit supernaturalis; ergo potest esse actus naturalis ex motivo supernaturali, et e contrario: ergo eadem ratione poterunt esse actus supernaturalis et naturalis fidei sub eodem motivo supernaturali. Antecedens probatur, quia cognitio per se infusa hujus principii, *Totum est majus sua parte*, nititur in intrinseca connexionem terminorum, in qua etiam nititur naturale iudicium ejusdem principii: et scientia quam Deus habet de veritate hac naturali, *Petrus peccabit*, supernaturalis est, et solum ex parte objecti fundatur in veritate ipsa, quæ naturalis est; e contrario vero voluntas nostra actu naturali potest diligere Deum trinum et unum propter bonitatem tam mirabili modo communicabilem, quæ ratio supernaturalis est, quam altiori modo potest diligere charitas infusa; ergo.

4. *Secundum principium et fundamentum.* — Aliud principium est, sæpe non esse possibile inter actum naturalem et supernaturalem circa eandem materiam, assignare diversitatem ex objecto formali. Hoc præcipue patere potest in actibus amoris, quibus amatur Deus propter seipsum: nam utriusque amoris formale objectum, seu ratio propter quam et sub qua amatur Deus, est bonitas Dei, prout in se est; hæc autem est una et simplicissima, et specialiter hoc declarat ratio proxime facta de dilectione Dei, ut trinus est. Deinde vero in fide idem ostenditur. Nam hæreticus credit multa mysteria, quia prima veritas illa revelavit, hoc enim profitetur, et expresse vult, unde non potest in hoc falli; hæc autem ratio est quam fides Christiana respicit, et quæ sufficit ad actum fidei supernaturalis, evidentiusque invenitur illud idem motivum credendi in fide dæmonum, illi enim coacti credunt Deum esse trinum, quia evidens illis est Deum hoc dixisse, ut docet D. Thom. 2. 2, quæst. 5, art. 2. Unde in assensu illo immediate ducuntur auctoritate Dei, et illa sola premuntur: ergo assentiuntur sub eadem ratione sub qua fidelis eundem articulum credit. Nec refert quod, ad iudicandum Deum illa dicere, ducantur signis naturaliter cognitis, quia hoc non obstat quominus ad assensum rerum dictarum sola auctoritate Dei moveantur, quia non per se illis assentiuntur, sed quatenus attestata a Deo sunt.

5. *Stabilitur alia ratione.* — Tertio, add potest ratio, quia si, proposita sufficienter fide cum omni interna illuminatione et excitatio-

ne ad supernaturalem actum volendi et credendi, fingamus Deum negare concursum adjuvantem concomitanter ad supernaturalem actum, dare autem concursum ad naturali modo volendum, tunc voluntas eliciet actum naturalem, et non nisi ob eandem bonitatem sibi propositam, quia tunc non habet aliud objectum: ergo voluntas illa naturalis habet idem objectum formale, quod haberet si Deus vellet supernaturaliter concurrere. Idemque argumentum procedit de assensu intellectus: ino eadem ratione, si Deus vellet concurrere supernaturaliter cum voluntate, et intellectui non daret supernaturalem concursum, sed naturalem, ut facere potest, tunc voluntas credendi esset supernaturalis, et assensus esset naturalis, cum tamen voluntas illa moveat intellectum ad credendum supernaturali motivo. Et eadem ratione posset Deus e contrario dare concursum supernaturalem intellectui, et non voluntati, et tunc assensus intellectus esset supernaturalis, voluntatis autem naturalis, quamvis esset sub motivo supernaturali. Quæ ratio confirmat quod in priori puncto in ultima ratione dicebam, non esse necessarium ut servetur proportio naturalis vel supernaturalis, inter entitatem actus et motivum.

6. *Probatur quarto.*—Quarto, principaliter suaderi solet hæc sententia, quia si non possent fides acquisita et infusa habere idem formale objectum, posset homo experiri, et evidenter cognoscere quando eliciat actum fidei acquisitæ, quando vero infusæ; consequens est falsum, et ex eo potest sequi aliud absurdum; ergo. Sequela patet, quia intellectus non potest ignorare qua ratione moveatur ad credendum; nam hoc maxime nosse oportet, ut credere possit; ergo si assensus acquisitus et infusus non possunt distingui, nisi propter diversas rationes credendi, poterit quis, præsertim si cum reflexione attendat, experiri an fide naturali vel altiori credat. Falsitas autem consequentis primo videtur manifesta per experientiam, nullus enim potest vere affirmare se experiri suum actum esse supernaturalem. Secundo, hæreticus credens articulum Trinitatis omnino putat se credere illud fide infusa, et plane fallitur. Tertio, alias etiam posset quis evidenter experiri se diligere Deum vero actu charitatis, quia etiam non ignorat intellectus quod objectum, quamque rationem amandi illud proponat voluntati. Unde ulterius infertur posse hominem experimento cognoscere se esse justum, quod

quam sit absurdum postea suo loco videbimus.

7. *Auctoritas quæ huic sententiæ patrocinatur.*—His rationibus addi solet multorum Theologorum auctoritas. Et imprimis allegantur omnes Doctores qui censent actus fidei et aliarum virtutum infusarum esse naturales in substantia, Scotus, Gabr., Durand., Major, Almain. et Cajetanus. Verumtamen hi auctores ad hoc solum possunt adduci, quod in objectis horum actuum unam tantum rationem objectivam agnovisse videntur, eamque naturalem; hac enim ratione tantum unam speciem essentialem, eamque naturalem in illis actibus cognoverunt, illosque solum ex modis accidentalibus distinxerunt. Aliunde vero possunt contra dictam sententiam allegari, quatenus supponere videntur actum supernaturalem non posse in substantia distinguere a naturali, nisi in objectis sit distinctio propter quam necesse sit illos duos ordines actuum distinguere. Sed fortasse non id supponunt, nec illa ratione moventur, nam habitus infusos, saltem fidei, spei et charitatis, fatentur esse specie diversos ab habitibus acquisitis, cum tamen utrosque cogantur fateri, sub eadem ratione formali operari, quia non aliam rationem operandi in objectis illorum habituum, sicut neque in eorum actibus agnoscunt. Et ita in charitate aperte declarat Scot., in 3, dist. 27, ad 4 principale. Unde sicut in habitibus hanc distinctionem admittunt circa idem objectum formale, ita fateri coguntur eandem esse possibilem in actibus, licet propter alias conjecturas vel considerationes illam de facto negent in actibus; cum tamen, supposita possibilitate, revera magis consequenter magisque probabiliter etiam in actibus de facto admittatur. Denique Scotus, in 3, distinct. 35, quæst. 2, in ultimis verbis, probabile existimat fidem non habere unitatem ex objecto, sed ex se, et consequenter nec speciem nec supernaturalitatem; ergo eadem ratione idem dicere posset et deberet de actu fidei. Præterea, Quodlib. 14, a. 1, lubrice loquitur, in eandem tamen sententiam inclinat. Quam tenet etiam Aragon. 2. 2, q. 1, art. 1, § *Sed ex hoc*. Et solet tribui Molinæ in Concord., q. 14, art. 13, disp. 7, quia in principio dicit, postquam proposita est et explicata fides, et argumenta quibus persuadetur Deum eam revelasse, satis sunt intellecta, posse hominem actu naturali quoad substantiam assentiri rebus propositis, *tanquam a Deo revelatis*: unde a fortiori diceret talem assen-

sum oriri ex naturali voluntate credendi; et in disput. 14, videtur idem sentire de amore et contritione, de quibus inferius dicemus.

8. *Vera sententia docet fidem acquisitam non attingere Deum eodem motivo, quo infusa.* — Contrariam sententiam judico omnino veram, nimirum, ita esse distinguendam fidem acquisitam circa mysteria fidei a fide infusa, ut nunquam possit intellectus suis viribus vel actu naturali attingere veritatem revelatam, vel illi assentiri sub eadem omnino ratione sub qua illam attingit fides infusa. Ita sentiunt moderni omnes qui hoc punctum attigerunt; Medina 1. 2, quæst. 62, art. 2; Bannez 2. 2, quæst. 5, art. 2, quæst. 6, art. 1, et quæst. 24, a. 2; Viguer., in Instit., c. 10, § 3, vers. 16; Azor., lib. 3 Instit. Moral., cap. 24, quæst. 2. Idem sentit Soto, libro 2 de Natur. et grat., cap. 7, negans hæreticum assentiri propter rationem formalem objecti fidei; et Vega, libro 9 in Trident., cap. 3, declarans rationem formalem objecti fidei, et dicens omnia, quæ sub illa ratione creduntur, eodem habitu credi. Idem docuerat Capreol. in 3, dist. 24, quæst. 1, artic. 3, ad argumenta Scoti contra secundam conclusionem, et sumitur ex Bonaventura, in 3, dist. 23, art. 2, quæst. 2, quatenus distinguit fidem acquisitam et infusam earundem rerum per rationes formales credendi. Quod etiam tenet ibi Richard., artic. 7, quæst. 2; Alens., 3 p., quæst. 64, art. 2, et communiter Doctores scribentes de fide. Præcipue vero D. Thom. 2. 2, quæst. 1, art. 1, et quæst. 5, art. 2 et art. 3, præsertim ad 1; et in 3, distinct. 24, art. 1, quæst. 1, et aliis innumeris locis, ubi rationes essentielles fidei infusæ, tam quoad actum quam quoad habitum ponit in ratione formali cui innititur, quam dicit esse primam veritatem revelantem, semperque distinguit hunc assensum fidei Christianæ, ab omni alia fide circa easdem veritates, ex hoc objecto formali, negatque fidem vel dæmonum vel hæreticorum, in his quæ credunt, in hac ratione formali objecti fundari. Nec certe Molina a divo Thoma discrepat, nam in eadem disput. 7, § *Nostram*, declarat illam fidem acquisitam, quæ potest haberi de veritatibus fidei, esse assensum mere opinativum, et fidem humanam; sentit ergo non fundari in divina auctoritate tanquam in unico et proprio motivo. Infra vero declarat ideo dixisse hæreticum aliquos articulos revelatos a Deo credere esse veros, quia illi persuasit esse revelatos a Deo. Quæ omnia licet vera sint, non ideo affirmat Molina habere hæreticum idem objec-

tum formale in credendo articulum fidei, quod habet catholicus, ut ex sequenti discursu patebit.

9. *Duplex modus credendi revelata.* — Ut ergo assertionem probemus, et sine æquivocatione procedamus, declarare oportet quid sit credi aliquid ut dictum, vel quia dictum a Deo. Duobus enim modis id potest intelligi. Primo, ut solum testimonium et auctoritas Dei sit tota ratio credendi, et res dictas, et quidquid ad illas credendas simul credere seu cognoscere necesse est, nimirum Deum eas dixisse, et in his quæ dicit, nec falli nec fallere posse, ita ut totum hoc eadem fide teneatur. Secundo, potest aliquis credere revelata, quia Deus illa revelavit, credendo quod illa revelaverit, non ex ipsa revelatione, sed ex suo arbitrio, suis conjecturis, vel humanis testimoniis. Prior modus est fidei infusæ, et in illo sola divina auctoritas est tota ratio credendi, et ad illam formaliter fit ultima resolutio fidei. Et hoc modo dicimus non posse intellectum, per vires et actus naturales, credere quia Deus dicit, neque sub ea ratione formali, sub qua credit fides infusa. Posterior vero credendi modus est humanus, et revera in eo non servatur eadem ratio formalis objecti, ut respondendo ad argumenta dicam. Hoc posito, duobus modis potest probari assertio; primo per media theologica, quæ apud me fortiora sunt; secundo per discursum metaphysicum, seu philosophicum.

10. *Primum argumentum ex Paulo.* — *Perpenduntur duo in testimonio.* — Argumentor ergo primo testimonio Pauli, 1 ad Thessal. 2, dicentis: *Gratias agimus Deo sine intermissione, quia cum accepissetis a nobis verbum auditus Dei, accepistis illud non ut verbum hominum, sed ut est vere verbum Dei, qui operatur in vobis, qui credidistis.* In quo testimonio duo expendo; unum est, accipere verbum ut verbum Dei, nihil aliud esse quam dare illi fidem ex solo Dei testimonio in illo sistendo, et non reducendo illud ad humanas rationes, jam enim acciperetur ut verbum hominum, et tamen hoc dicit Paulus esse opus Dei in illis operantis, utique per gratiam, pro qua Paulus agit gratias sine intermissione, declarans esse opus gratiæ, ut optime ponderat Augustinus libro de Prædestinatione Sanctorum, cap. 19. Aliud expendendum est, Paulum simpliciter dixisse accipere verbum Dei, ut Dei, esse opus Dei, significans semper esse tale, quia ubi ipse non distinxit, non licet nobis excipere; ergo accipere verbum Dei ut

verbum ejus, nunquam est naturale, sed semper est opus gratiæ; ergo et formaliter credere ex testimonio Dei, in illo sistendo, nunquam est naturale, quia quicumque ita credit, accipit verbum Dei, ut verbum Dei.

11. *Secundum ex aliis Scripturæ testimoniis.* — Secundo argumentor ex illis generalibus testimoniis: *Non sumus sufficientes cogitare aliquid ex nobis*, etc., id est, nostris solis viribus; et illud: *Sine me nihil potestis facere*, et similia. Nam qui, audito verbo Dei, ita de illo cogitare suis viribus potest, ut illud credat omnino, quia est verbum Dei, sine dubio ex se habet cogitationem valde perfectam, et de se aptissimam ad salutem. Atque in hunc fere modum expendit hunc locum Augustinus, de Prædestinatione Sanctorum, cap. 2. Quia si non sumus sufficientes cogitare aliquid ex nobis, quasi ex nobis, profecto nec sumus sufficientes credere aliquid ex nobismetipsis. Item explicantur illa verba de cogitatione pia, et conducente ad salutem; at profecto ex magna pietate creditur quidquid ex sola Dei revelatione et testificatione, præsertim obscura, creditur. In quo etiam considero Pelagium propterea damnatum esse simpliciter, quia dixit, proposito verbo Dei, posse hominem credere Deo dicenti, sola sua libertate, ut constat ex Aug., epist. 103 et 106, et ex Conciliis sæpe citatis; at vero si homo posset sua libertate et potestate credere omnia revelata, nixus sola Dei auctoritate, sententia Pelagii non fuisset simpliciter falsa, sed potius vera; non ergo fuisset absolute damnanda, sed explicari debuisset, illam fidem per naturalem entitatem actus non esse sufficientem, sed requiri supernaturalem actus entitatem, quod Concilia non faciunt, sed absolute damnant assertionem talis fidei naturalis.

12. *Erasio præcluditur. — Confirmatur. — Responsio non admittitur.* — Dices non damnare simpliciter, sed cum illo addito, *sicut oportet*. Respondeo primo, etiam damnare simpliciter, loquendo de fide in Deum, seu de hoc, *credere Deo*. Hoc enim intendit Conc. Trident., cap. 6, cum inquit: *Disponuntur ad ipsam justitiam, dum excitati divina gratia, et adjuti, fidem ex auditu concipientes, libere moventur in Deum, credentes vera esse quæ a Deo revelata sunt*. Per quæ verba plane declarat, quid in fide sit, credere *sicut oportet*, utique, revelata esse vera, quia revelata sunt a Deo, in ipsum tendendo per talem fidem, tanquam in auctorem fidei, et unicam rationem ejus. Et Concilium Arausianum, can. 3,

in ultimis verbis supra tractatis, damnat dicentes *fidem illam, qua in Deum credimus, esse naturalem*, ubi non addit, *sicut oportet*, quia in illa particula, *in Deum*, continebatur, quæ non potest habere alium sensum nisi quem in verbis Concilii Tridentini explicimus. Et canone 25 de charitate, ait non posse liberum arbitrium solum *aut diligere Deum, sicut oportet, aut credere in Deum*, ubi non repetit particulam, *sicut oportet*, quia intelligitur inclusa in illo, *credere in Deum*. Igitur quoties assensus fidei in Deo solo nititur, est sicut oportet, et non potest esse nisi actus proprius gratiæ, ac subinde supernaturalis. Confirmatur et declaratur, quia si homo potest credere Deo ex divina tantum auctoritate, potest sua virtute credere summa certitudine et infallibilitate; ergo, quantum ad mores pertinet, jam habet perfectissimam fidem, nam distinctio quasi materialis in entitate naturali vel supernaturali parum ad mores refert, si adhesio ad objectum eadem est, et ad bene operandum æque conducere potest. Respondent aliqui actum fidei naturalem semper esse minus certum, etiamsi in puro Dei testimonio nitatur. Sed hoc profecto non consequenter dicitur. Nam si est sermo de certitudine objectiva, idem Dei testimonium, si in illo pure sistitur, æque certum et infallibile est: si vero sit sermo de certitudine ex parte subjecti, illa et est extrinseca, et quasi per accidens, et in actu naturali major esse potest.

13. *Tertium ex ratione.* — Præterea argumentor ratione in hunc modum. Si ratio formalis objecti fidei talis est, ut liberum arbitrium suis solis naturalibus viribus possit actum absolutum et efficacem propter illam elicere, ergo tale objectum, seu ratio operandi non est de se supernaturalis, sed potius naturalis. Consequens est falsum: ergo. Sequela patet, quia in præsentī illud maxime dicitur supernaturale, quod superat naturales vires liberi arbitrii: sic enim dicitur habitus infusus supernaturalis, quia per actus liberi arbitrii acquiri non potest, et actus supernaturalis, quia per vires arbitrii fieri non potest: ergo similiter objectum erit supernaturale, quod, ut tale est, viribus naturalibus attingi non potest; ergo e contrario motivum formale, quod viribus naturæ attingi potest, supernaturale non est. Consequens autem nec a Doctoribus contrariæ sententiæ conceditur, quos ego viderim, nec videtur posse secure concedi, quia destruit fundamentum necessitatis gratiæ ordinis supernaturalis. Nam si

formale illud motivum naturale est, profecto ad eliciendum actum illi objecto et motivo proportionatum, quantum ipsum postulat, non erit necessarius habitus supernaturalis nec gratia, falsumque est hos actus supernaturales versari circa objecta supernaturalia, vel excedentia vires naturales hominis, quod tamen est expresse contra communem sensum, præcipue divi Thomæ 1. 2, quæst. 109, art. 3, ad 1 et 3, et quæstione 62, articulo 1, et quæst. 63, artic. 3, et alibi sæpe, et communiter Theologi ita loquuntur.

14. *Effugium. — Rejicitur.* — Responderi potest motivum illud esse attingibile, et actu naturali et actu supernaturali, et priori modo esse objectum naturale, posteriori vero esse supernaturale. Juxta quam distinctionem aliqui etiam dicunt distingui illos actus naturales et supernaturales, ex rationibus formalibus sub quibus attingunt objecta, illas vero rationes non esse distincta motiva, sed esse distinctas attingibilitates ejusdem motivi. Nam in fide veritas Dei in dicendo, ut attingibilis per assensum naturalem, est ratio objectiva sub qua fidei acquisitæ; ut vero attingibilis superiori modo est objectum formale assensus fidei supernaturalis. Hæc vero responsio, si attente consideretur, supponit distinctionem in actibus, et ab illis sumit rationes sub quibus attingitur objectum potius quam e converso, ut inferius in simili explicabo. Unde in re non dicit aliquid distinctum a priori sententia, sed idem alio modo. Supponit enim assensus propter idem motivum esse posse distinctos ex se, seu ex modo tendendi inferioris vel altioris ordinis, et inde considerat duas attingibilitates in objecto ratione distinctas, quæ revera non sunt nisi denominationes extrinsecæ ab actibus desumptæ: nam illa duplex attingibilitas nihil vel absolutum, vel respectivum secundum rem addit illo motivo, sed tantum relationes rationis fundatas in denominationibus extrinsecis sumptis a duobus actibus, qui possunt elici ex tali motivo.

15. *Amplius impugnatur.* — Quocirca verbi illis eluditur potius quam solvitur ratio facta: tum quia motivum esse supernaturale, non est denominatio extrinseca, sed est excellentia motivi superantis vires naturales intellectus creati, ideoque si intellectus creatus potest sua viribus absolute velle, vel assentiri ex tali motivo specifico, secundum ultimam ac propriam rationem suam spectato, tale motivum non potest dici supernaturale, sed naturale: tum etiam quia, juxta illam sen-

tentiam, nullum est tam naturale motivum, quod non possit attingi per actum supernaturalem, quoad substantiam, si Deus velit illum infundere; ut, verbi gratia, Christus, per scientiam per se infusam, et per acquisitam, cognoscit hominem esse risibilem, ex hoc medio et motivo quod est rationalis, et ita habet assensum naturalem et supernaturalem ex eodem motivo, et nihilominus motivum est naturale, quia viribus naturæ sufficienter attingitur; ergo si tale est etiam motivum fidei divinæ, illud de se naturale est, licet fortasse Deus dare possit homini actum supernaturalem propter idem motivum.

16. *Alia evadendi via.* — Dicitur forte argumentum concludere illud motivum non esse absolute supernaturale, comparatum ad vires naturales intellectus, et supposita applicatione vel propositione talis motivi; dici vero supernaturale, quia applicatio vel propositio talis motivi est supernaturalis, id est, non debita capacitati naturali hominis, sed ex extrinseca Dei ordinatione gratis concessa. Quod etiam suaderi potest, quia Deum esse primam veritatem, quædam veritas naturalis est; Deum item, si quid testificetur, dignum esse fide certa, quia mentiri non potest, objectum est naturaliter notum: solum ergo est supernaturale quod aliquid revelet et attestetur, præsertim de his quæ per rationem naturalem cognosci non possunt. Hæc autem revelatio seu attestatio solum est veluti applicatio illius motivi; ergo illud de se naturale est, solumque supponit applicationem seu revelationem supernaturalem, ideoque, tali facta propositione, posse hominem viribus suis propter illud motivum plene et cum omni determinatione assentiri, licet perfectius id faciat, si a Deo moveatur ad altiori modo assentiendum.

17. *Hæc responsio multum accedit ad Pelagii errorem.* — Sed cavendam censeo responsionem hanc, nam multum accedit ad errorem Pelagii, quod, facta revelatione, possit homo credere viribus suis, ut paulo antea dixi. Quia si motivum illud est naturale in ordine ad vires naturales nostri intellectus, fides naturalis est illi satis proportionata, et non est cur non sit sufficiens in suo genere ad salutem, cum Deo soli tanquam attestanti nitatur. Nec poterit fides illa dici humana, sed divina, cum in Deo solo fundetur, et illi subiciat intellectum, nec erit ad illam necessaria gratia, nisi ex parte revelationis, quam Pelagius non negabat. Dicere autem majorem gratiam seu adjuvantem solum requiri ut

assensus in genere entis sit perfectior, licet ex vi objecti non esset necessarius, multum accedit ad id quod Pelagius dicebat, gratiam requiri tantum ad facilius. Item videtur fuga solum inventa ad eludenda testimonia Conciliorum et Patrum. Ac denique videtur illa perfectio entitativa valde materialis, et ad mores nihil referens, si actus viribus naturæ elicited in Deo solo, ut ratione assentiendi, fundetur, nam inde habebit omnes proprietates fidei supra positas, quod ad mores sufficit.

18. *Impugnatio ab absurdo.* — Secundo, possumus ab inconvenienti argumentari, quia si ex eodem motivo et ratione formali objecti sequi potest actus naturalis et supernaturalis, nunquam erit in potestate hominis elicere supernaturalem actum, neque ad illum conari, quantum in se est, etiam conando operari ex perfectissimo motivo sibi proposito: consequens est falsum; ergo. Sequelam declaro, quia, supposito objecto credibili sub tali ratione divina, tantum est in potestate hominis libere determinari ad credendum sub illa ratione; quod autem actus prodeat supernaturalis vel naturalis, non est in potestate hominis, si ex vi illius objecti formalis non determinatur; ergo quod actus sit naturalis vel supernaturalis, pendebit ex sola Dei voluntate determinantis concursum, vel auxilium suum ad talem vel talem entitatem actus. Exemplo res declaratur, quia intellectus hic et nunc circa idem objectum potest actus fidei numero distinctos elicere, non est vero in potestate voluntatis libere se determinare ad hunc actum numero potius quam ad illum, sed vel naturaliter determinanda est ab objecto et circumstantiis, vel id pendet ex libero decreto Dei determinantis suum concursum ad talem individuum actum intra illam speciem; ergo similiter si motivum et ratio volendi vel credendi non determinat potentiam ad talem entitatem vel speciem actus, non erit in potestate voluntatis illam determinare, sed solum pendebit ex voluntate Dei.

19. *Exemplo ris argumenti explicatur.* — *Confirmatur.* — Quod autem hoc consequens admittendum non sit, probatur primo, quia nunquam esset in potestate hominis salvari etiam posita quaecumque gratia præveniente, et cum illa faciendo quod in se est, quod dici non potest, ut per se constat. Sequela probatur, quia necessarium est ad salutem supernaturales actus elicere, ut supra ostensum est; sed non est in potestate hominis libere conari ad operandum ex tali motivo, quod

determinet ad actum supernaturalem, juxta illam sententiam; ergo nec salus est in potestate hominis. Et declaratur practice: ponamus enim duos homines sufficienter excitatos ad credendum, quia Deus dicit; si ergo ex illo motivo sequi potest actus naturalis et supernaturalis, contingere etiam potest quod uterque credat, unus tantum per actum supernaturalem, et consequenter sufficienter ad salutem, alter vero per actum naturalem, et insufficienter. Ponamus ergo ita fieri, nam possibili posito in esse, non sequitur inconveniens; peto ergo rationem ex parte talium hominum, ob quam unus elicit actum tantum naturalem, et alius supernaturalem. Certe nulla reddi potest, quia uterque voluit efficaciter credere, quia Deus dicit, et amplius non fuit in ejus potestate: pendebit ergo totum ex eo quod Deus voluit dare auxilium concomitans supernaturale huic, et non illi, atque ita unus damnabitur, cum ex parte sui nihil minus fecerit, quod profecto absurdissimum est. Et confirmo, nam si hoc verum est, profecto non potuit homini præcipi ut habeat actum supernaturalem, sicut non potest præcipi ut habeat hunc actum numero, potius quam illum, quia hoc non pendet ex determinatione ejus. Solum ergo præcipitur homini ut credat Deo, vel quia Deus dicit: ergo si hoc facit, sive faciat actu naturali, sive supernaturali, implet præceptum: ergo jam non esset actus supernaturalis necessarius ad salutem, quia actus necessarius ad salutem sub præceptum cadit: ergo per solos actus naturales potest homo salvari.

20. *Evasio.* — *Oclusio.* — Propter hæc dicere potest aliquis, quamvis uterque actus sit possibilis, tamen de facto Deum decrevisse non cooperari cum homine ad operandum ex tali motivo, nisi supernaturali auxilio, et illud semper offerre, atque ita semper esse in hominis potestate supernaturalem actum elicere, et consequenter casum illum propositum de duobus hominibus æqualiter præventis non esse admittendum de lege, quamvis absolute sit possibile. Sed hoc imprimis alienum est a sensu et doctrina Patrum et Conciliorum, juxta quam non est necessaria gratia, quia Deus ita decrevit, sed quia propter humanam impotentiam ad talia opera est intrinsece necessaria, nimirum, quia opera ipsa, et objecta illorum excellentioris ordinis sunt, quam natura. Deinde illa lex non esset consentanea naturis rerum, quia si natura habeat sufficiens principium ad operandum, juxta exi-

gentiam objecti, ergo illum operandi modum negare, et statuere non concurrere, nisi altiori modo, esset præter naturæ debitum, et quodammodo monstrosus. Præterea quia, ut supra arguebam, tale motivum non esset supernaturale, sed naturale, quandoquidem natura de se apta est ad operandum ex illo: ergo elevatio ad operandum supernaturaliter tantum ex illo motivo, negando concursus ad actum naturalem, esset providentia omnino voluntaria, et extra ordinem rerum. Sicut si Deus statueret non concurrere cum homine ad credendum ex motivo humano, nisi per actum supernaturalem quoad substantiam, profecto esset providentia quasi violenta et miraculosa, etiamsi esset possibilis.

21. *Ultima replica.* — *Fuga alia præcluditur.* — Denique, si vera est lex hæc ordinaria, saltem de facto verum est nunquam fieri actum fidei ex tali motivo, nisi supernaturalem, saltem quia Deus ad alium non concurrat, facta sufficienti objecti propositione; at contraria opinio supponit oppositum, et ex actibus quos experimur, conatur ostendere talem actum naturalem ex illo motivo esse possibilem: ergo non potest cum illa opinione constare responsio, sed illam potius enervat, et evertit præcipuum fundamentum ejus. Nam si de facto nunquam ex tali motivo fit, nisi assensus supernaturalis, non est ex arbitraria Dei providentia, sed quia tale objectum et motivum talem actum requirit. Quod si quis forte dicat potius semper fieri utrumque actum, hoc etiam facile impugnatur; tum quia est superfluum; tum etiam quia est contra experientiam, quantum a nobis cognosci vel conjectari potest: tum denique quia tunc naturalis actus tanquam facilior et naturæ magis consentaneus ordine naturæ præcederet, et pararet viam ad alium, procedendo ab imperfecto ad perfectum ordine generationis, et ita facile incidemus in Semipelagianum errorem; sequeretur enim Deum donare homini potentiam ad supernaturalem assensum, quia jam facit quod in se est, credendo vere et proprie Deo, propter Deum, totis viribus suis, quod in Concilio Arausicano damnatum est.

22. *Ultimum ex Metaphysica petitum* — *Confirmatur.* — Ultimo argumentari possumus philosophice ex illo principio Aristotelis: habitus ex actibus, et actus ex objectis species sumere. Ex quo sic argumentor, nam eadem potentia circa idem objectum materiale ex eodem motivo seu objecto formali non potest habere actus specie distinctos; ostensum est au-

tem actus supernaturales specie et substantia distingui ab omnibus actibus naturalibus; ergo non possunt actus naturales versari circa eadem materias, ex eisdem motivis quibus specificantur actus supernaturales. Major probatur ex principio posito, quod actus sumunt speciem ex objecto; ergo et distinctionem specificam, et non ex objecto materiali, quia supponimus in illo convenire; ergo ex formali. Confirmatur, quia non possunt habere aliquod aliud formale principium distinctionis substantialis et essentialis. Dico autem principium formale, quia quod quidam asserunt, distingui, quod unus est ab auxilio supernaturali, et non alius, non declarat formale principium distinguendi, sed solum principium efficiens, quod supponit diversitatem essentialem in ipsis actibus secundum se spectatis; ideo enim unus illorum postulat principium effectivum distinctum, et altioris rationis, quia secundum naturam et speciem suam est altioris ordinis; ergo oportet assignare formale principium, a quo talem speciem habeat; hoc autem nullum est, nisi formale objectum.

23. *Solutio impugnatur.* — *Inductione res confirmatur.* — Respondent aliqui actus illos per suas entitates formaliter et essentialiter distingui, neque oportere aliud formale distinctivum quærere ex parte objecti. Sed hoc nihil aliud est quam evertere principium illud de distinctione actuum ex objectis, et totam Philosophiam, quæ docet motus, et omnia quæ habitudinem ad aliud essentialiter includunt, sive prædicamentalem, sive transcendentalem, habere speciem et consequenter distinctionem a terminis vel objectis quæ respiciunt, nam inde habent aliquo modo suum esse, et consequenter etiam distinctionem. Quamvis ergo verum sit actus intrinsece distingui formaliter se ipsis, seu suis differentiis constitutivis, tamen quia hæc differentiæ includunt habitudinem ad objecta, et illis accommodantur, ideo ex objectis etiam recipiunt distinctionem. Et inductione ostendi potest, nam etiam actus fidei supernaturalis distinguitur a fide humana in auctoritate in qua nititur, quæ pertinet ad objectum ejus, et a scientia, quia est per medium extrinsecum, quod etiam pertinet ad rationem objecti; ergo sine aliqua distinctione in objecto formali non potest intelligi essentialis distinctio in actibus, præsertim ejusdem potentiæ et ejusdem objecti materialis.

24. *Responsio alia impugnatur.* — *Fit satis argumentis oppositæ sententiæ.* — Quo argu-

mento aliqui convicti fatentur necessariam esse distinctionem in ratione formali objecti, sub qua objectum attingitur; dicunt tamen hanc desumi sæpe ex habitudine ad lumen vel principium agendi. Et ita in proposito dicunt actus fidei naturalis et supernaturalis esse posse de hac veritate, *Deus est trinus*, ut dicta a Deo; nihilominus tamen differre in rationibus sub quibus, quia respectu supernaturalis actus, ratio sub qua est auctoritas Dei, ut est sub lumine infuso; eadem vero auctoritas, ut est sub lumine naturali, est ratio formalis sub qua naturalis fidei. Sed qui sic respondent, non advertunt se supponere distinctionem in actibus, ut illam declarent in objectis, atque ita distinguere objecta potius per actus, quam actus per objecta. Probatur assumptum, quia auctoritas divina, ut manifesta, vel conjuncta diverso lumini, supponit distinctionem in luminibus; vel igitur est sermo de lumine actuali, et illud non est nisi actus ipse credendi; ergo supponit distinctionem in actibus; vel est sermo de lumine habituali, et sic supponit distinctionem habituum; ergo et actuum, quia habitus per actus a priori distinguuntur; ergo non potest commode salvari illa distinctio actuum, nisi supponendo in objectis formalibus secundum se aliquam distinctionem. Contra hunc verum discursum procedunt argumenta prioris sententiæ, quæ pure philosophica sunt, et ideo, licet majorem difficultatem haberent, in re theologica et quæ multum propendet ad dogmata fidei, minoris momenti censenda essent quam ut possent prudentem Theologum a plana et regia via deflectere. Respondendo ergo ad fundamenta contrariæ sententiæ, et hic discursus declarabitur magis, et objectiones quæ contra illum fieri possunt, obiter solventur.

25. *Ad primum.* — Ad primum ergo fundamentum, quod actus specie distincti possunt versari circa eandem materiam, ex eodem motivo, respondetur imprimis id admittendo in potentiis specie diversis. Rationem autem aliqui reddunt ex parte objectorum, diversas attingibilitates (ut vocant) in eis considerando, quas dicunt esse diversas rationes formales, sub quibus tales potentiæ in sua objecta tendunt. Sed revera illæ attingibilitates tantum sunt extrinsecæ denominationes ab actibus, vel potentiis desumptæ, et ita (ut supra dicebam) earum distinctionem supponunt, ideoque non possunt esse primariæ rationes a quibus actuum vel potentiarum distinctio sumatur. Potentiæ igitur, si a subjectis distinctis

fluant, ab illis possunt habere distinctionem quasi genericam, quia habent modum diversum tendendi in objecta; si vero ab eadem forma dimanent, necesse est distinguere in objectis adæquatis, vel quia omnino condistincta sunt, vel quia objectum uni potentiæ adæquatum sub adæquato alterius continetur. Atque ita semper potentia superior vel immaterialior videtur attingere objectum sub ratione universaliori, ut videre licet in sensibus internis et externis, et in intellectu respectu illorum, et in appetitu superiori et inferiori, et in intellectibus etiam Angelicis, quatenus diversis speciebus intelligibilibus informantur.

26. *Quando possint actus specie diversi habere idem motivum.* — Sic ergo non repugnat actus specie diversos, propter diversitatem potentiarum, ferri in idem materiale objectum propter idem motivum, quia habent majorem distinctionem quasi genericam ex aliis principiis, et ita specifica differentia, quam unusquisque actus sumit ab illo objecto (ut sic dicam), accommodatur suo generi, et proprie causat distinctionem ab aliis actibus ejusdem potentiæ; illæ vero duæ differentiæ constituentes actus diversarum potentiarum in ordine ad idem objectum et motivum, inter se distinguuntur, vel ex modo tendendi in quo accommodantur generibus diversis, quæ contrahunt et determinant; vel quia illudmet motivum respiciunt ex vi rationis objectivæ, seu potentiæ magis vel minus universalis. Et hoc probant exempla de cognitione sensus et intellectus, vel de affectu voluntatis et appetitus ad idem bonum delectabile, et de actibus Angelorum specie distinctorum.

27. *Motus circularis et rectus non distinguuntur specie.* — At vero in actibus unius et ejusdem potentiæ, non facile inveniuntur actus specie distincti attingentes idem objectum sub eodem omnino motivo. Et imprimis id non probant exempla in fundamento adducta. Nam in exemplo physico de motu circulari et recto, non est propria distinctio specifica essentialis in ratione motus, sed solum distinguuntur in modo figuræ, sicut linea recta, et circularis, vel distinguuntur in ratione motus naturalis, sicut motus sursum, et deorsum. In exemplo autem magis theologico, vel potius morali de voluntate, simplici intentione et delectatione, in ipso motivo aliqua diversitas invenitur. Nam bonitas finis per se et absolute spectata movet ad simplicem amorem et unionem. Ad intentionem autem movet idem finis ut acquirendus, et ideo licet in ipso semper sit

eadem bonitas, tamen ad intentionem non movet, nisi quatenus etiam ipsa consecutio talis objecti simul apprehenditur ut bona, et movet ad sui dilectionem seu intentionem. Et simili proportionem ad fruitionem movet finis non utcumque, sed ut præsens, seu possessus, et sic non solum ipse, sed etiam possessio vel præsens ejus apprehenditur ut bona, et ita delectat. Et ad hunc modum possunt etiam esse actus ejusdem potentiae distincti specie, licet in idem objectum tendere videantur, quia in eis etiam potest inveniri aliqua diversitas in motivo. Ut amor Dei, et proximi propter Deum, etiamsi in eadem infinita seu increata bonitate Dei fundetur, nihilominus quia illa bonitas aliter Deum afficit, aliter proximum, habet distinctam rationem motivi. Idem invenitur in intentione, electione, et aliis similibus. Et in assensibus intellectus nostri, quoties invenitur specifica diversitas in actibus, invenietur aliqua diversitas in motivo assentiendi, quia vel est ipsa veritas in se per connexionem immediatam terminorum, vel est medium aliquod per quod veritas mediata cognoscitur. Unde licet contingat eandem veritatem in se immediatam, per medium etiam cognosci alio genere assensus, etiam in illis invenitur diversitas in motivo. Neque tamen nego, etiam in actibus vel habitibus ejusdem potentiae, posse esse aliquam distinctionem quasi genericam, vel universaliorum ex modo tendendi, sed assero, cum pervenitur ad specificam diversitatem, semper inveniri aliquam distinctionem in ratione formali, seu medio aut motivo attingendi objectum, ut etiam in *Metaphysica* dixi.

28. *Solutio primi argumenti num. 2 propositi.* — *Obiectio.* — Ex his ergo responsum est ad primum fundamentum, quia assensus fidei infusæ et acquisitæ ejusdem objecti, et sunt actus ejusdem potentiae, et eodem modo tendunt, quia etiam assensus fidei infusæ fit modo humano, et ideo nisi distinguantur in motivis et objectis formalibus, non possunt essentialem distinctionem habere. Sed contra hoc objici potest apparenter, quia lumen fidei infusæ et naturale lumen intellectus sunt quasi potentiae intellectivæ genere diversæ, quia lumen fidei ita est habitus, ut det etiam novam potentiam intelligendi specie diversam, et ad altiorem ordinem pertinentem; ergo ex hac parte possunt ab his duobus principibus prodire assensus plus quam specie et quasi genere diversi, etiam si circa idem objectum ex eadem ratione assentiendi versentur. Nam in illis

invenietur distinctio, tum ex parte potentiarum, tum etiam ex parte modi. Quia licet uterque quoad aliquid fiat modo humano, scilicet, quoad compositionem et apprehensionem per species acquisitas, etc., nihilominus ipse assensus fit modo longe diverso quoad entitatem et perfectionem actus: sicut in duobus Angelis assensus naturales ejusdem veritatis per se notæ, vel in eodem medio fundatæ, licet conveniant in modo generali intelligendi Angelico, et sine compositione, vel discursu, nihilominus differunt specie ex modo subtiliori, et spiritualiori intelligendi: sic ergo in præsentem dici potest.

29. *Solutio.* — Hæc autem replica haberet quidem locum, si motivum talium assensuum seu actuum fidei esset ordinis naturalis, non vero procedit, quando motivum actus supernaturalis est, ut in præsentem esse ostendimus. Quia licet multiplicatio principiorum cognoscendi vel volendi eandem rem propter idem motivum in eadem potentia, quando unum naturale est, et aliud supernaturalis, non videatur repugnare, nihilominus si unus talium actuum naturalis sit, et alius supernaturalis, necessarium est ut motivum utriusque actus naturale sit, quia actus naturalis et factus per solas vires naturæ, non potest fieri, nisi ex motivo naturali eisdem naturalibus viribus proportionato. Unde licet possit Deus supernaturalis lumen vel scientiam infundere, per quam veritas aliqua naturalis ex motivo naturali altiori modo cognoscatur quoad entitatem actus, quam per vires naturæ possit cognosci, nihilominus e contrario fieri non potest ut intellectus humanus per vires solas naturales assentiatur ex motivo supernaturali, quatenus tale est, eodem modo quod id facit per vires gratiæ, quantum ad rationem assentiendi, interveniente tantum differentia in modo tendendi quoad entitates assensuum. Quia si motivum supernaturalis est, implicat contradictionem, ut per vires naturales solas attingatur, quia si intellectus solis suis viribus operatur, non intervenit ibi specialis Dei operatio; ergo non potest assensus fundari in solo motivo superante vires naturæ. Non potest enim Deus facere, ut sine suo adiutorio natura operetur ex motivo sibi non proportionato.

30. *Ex motivo supernaturali elici nequit actus naturalis.* — Itaque, loquendo de absoluta Dei potentia, non fundatur assertio in hoc quod distinctio et multiplicatio plurium actuum specie distinctorum sit omnino impossibilis in eadem potentia circa idem formale

objectum, seu ex eadem ratione assentiendi. Nam hoc modo distinguuntur fortasse, in anima Christi, aut beati, plures actus scientiæ naturalis et supernaturalis, seu per se et per accidens infusæ, prout versantur circa naturalia objecta, et motiva. Sed fundatur in hoc quod motivum Christianæ fidei est supernaturale, et ideo circa illudmet non possunt multiplicari actus naturales. Sicut etiam in scientia infusa per se et per accidens, fieri non potest ut circa veritates supernaturales cognoscendas per media supernaturalia distinguantur actus utriusque scientiæ, quia scientia naturalis, seu per accidens infusa, non potest tale objectum attingere. Sic ergo discursus factus non fundatur tantum in principio solo philosophico de distinctione actuum per objecta, sed adjuncto principio credito, quod ratio assentiendi, seu motivum credendi fide Christiana est supernaturale, ut a nobis probatum est. Nam profecto, si dicamus posse hominem sine gratia credere ex illo puro motivo, et cum omni perfectione quam ex vi illius habet quilibet actus in illo tantum fundatus, nimium tribuitur viribus naturæ, et plus quam locutiones Scripturæ, Conciliorum et Patrum permittant.

31. *Solutio secundi argumenti num. 4 propositi.* — Unde ad secundum principium, seu fundamentum prioris sententiæ, negamus, in objectis formalibus talium actuum, etiamsi circa eandem materiam versentur, non posse inveniri sufficientem distinctionem. Quæ fortasse in actu amoris obscurior est, sed illam in sequentibus capitibus investigabimus. Nunc vero in assensu fidei videtur nobis res perspicua, et ad excellentiam fidei Christianæ maxime spectans. Ut enim fateamur tam dæmones quam hæreticos proxime credere multa, quia a Deo dicta sunt, longe vero aliter in divino testimonio ac veritate nituntur, quam is qui fide Christiana credit. Nam dæmon, vel hæreticus ita credit Deo dicenti, ut tamen Deum dicere non credat, eadem fide aut ex eodem testimonio Dei, sed vel ex signis cogentibus, vel ex conjecturis humanis proprio discursu et iudicio regulatis: fidelis autem, et res dictas, et Deum dicere, et Deum non falli, nec fallere, et quidquid ad credendum ex parte formalis objecti et motivi necessarium est, eadem fide, sola veritate et auctoritate Dei nixus credit. Unde fit ut ratio credendi res etiam divinas in acquisita seu naturali fide, non sit purum verbum seu testimonium Dei, sed mixtum (ut sic dicam) cum humanis conjecturis, vel signis, vel cum aliquo testimonio

humano, ideoque licet tunc concurrat testimonium Dei, non tamen ut motivum supernaturale est, sed prout esse potest aliquo naturali modo cognitum. Nam talis fides semper nititur medio syllogistico formali, vel virtuali, quod medium, licet proxime videatur includere Dei auctoritatem, tandem resolvitur in naturale lumen, vel conjecturas per illud cognitæ, vel evidenter, vel per aliquam auctoritatem et fidem humanam, tum de testificante, tum de eius auctoritate. Sicut in fide humana ex auctoritate Augustini, assensus rei dictæ revera non fundatur in puro testimonio Augustini, sed simul in aliis rationibus et mediis, per quæ mihi fit credibile vel notum, et Augustinum hoc dixisse, et ipsum esse tali vel tanta fide dignum.

32. *Discrimen inter motum fidei infusæ et acquisitæ.* — Idem ergo est in fide mere naturali, qua creditur aliquid, quia dictum est a Deo, nam illa supponit talem æstimationem de Deo, qua credatur semper loqui verum, quæ æstimatio a dæmone, verbi gratia, vel alio naturaliter tantum credente, non fundatur in veritate Dei hoc ipsum de se revelantis, sed in lumine naturali quo id cognoscitur. Deinde etiam supponit illa fides aliam, quod Deus dixerit, et hæc est mere acquisita per aliquam signorum evidentiam, vel probabilitatem vehementem simul cum aliqua traditione humana. Ac tandem ex his omnibus virtute componitur ratio, seu motivum assentiendi naturaliter rebus a Deo dictis, et ideo in illa fide nulla est supernaturalitas, neque in substantia actus, neque in modo, quia intellectus mero discursu naturali ducitur et solum juxta mensuram suarum virium præbet assensum, vel necessarium, vel liberum ex naturali etiam seu humano affectu. At vero assensus fidei pure fundatur in Dei testimonio, suscipiendo verbum ejus non ut verbum hominum, sed ut est vere verbum Dei; hoc ipsum, nimirum, esse verbum Dei, eadem fide suscipiendo et discernendo, et veracitatem ipsius Dei eadem fide credendo, et ita est magna diversitas in objecto formali, quam alii auctores non intellexerunt, quia putarunt, nostram fidem infusam per se pendere a fide acquisita tanquam a causa partiali, ut Gabriel cum Ocham. clarius explicavit. Sed revera decepti sunt, nam si id verum esset, non esset certior fides infusa quam acquisita, a qua per se pendet. At, juxta nostram sententiam, ex prædicta diversitate in objecto formali oritur differentia in certitudine intrinseca et essentiali, quæ in fide Christiana est longe altius rationis, ut late explicatum est.

33. *Diversa ratio objectiva est in voluntate credendi hæretici et catholici.*— Et hinc etiam facile intelligitur quomodo in voluntate credendi, quæ est in hæretico vel in catholico, conveniatur diversa ratio objectiva: nam respectu voluntatis fidelis, motivum est honestas quædam supernaturalis, quæ in illo objectocerni potest, quatenus ad credendum proponitur ex sola Dei auctoritate, illi omnino intellectum subjiciendo et captivando. Voluntas autem quæ est in hæretico potest sæpe non esse honesta, nam eodem modo credit suos errores, et veritates quæ ex fide sibi eligit, unde potest in utrisque eadem voluntate et motivo duci, quæ voluntas plane est temeraria, vel certe, licet contingat velle credere aliquod mysterium fidei, quia prudenter judicat esse credibilius quam contrarium, in hoc ipso non nisi humana ratione ducitur, ac subinde ex quadam naturali et morali honestate, quavis in quacumque fide humana et prudenti inveniri potest, movetur.

34. *Solutio tertii argumenti, in num. 5 propositi.*— Tertium argumentum procedit ex hypothesi, si, facta propositione objecti fidei cum tota prævia gratia, Deus negaret auxilium adjuvans physice, seu concursum supernaturalem ad actum fidei, non vero generalem, quia tunc intellectus posset assentiri cum solo concursu generali, et ex eodem motivo, quia non habet aliud. Respondetur, tunc quidem intellectum, vel potentiam illam, cui negatur concursus supernaturalis, et non negatur generalis concursus ordinis naturæ, posse quidem elicere actum aliquem, illum tamen futurum esse naturalem, ex motivo naturali diverso a motivo Christianæ fidei. Quia licet objectum sit propositum sub ratione supernaturali, semper etiam adjungitur ratio naturalis sufficiens ad assentiendum vel volendum naturaliter, et tunc potentia secundum naturalem vim operatur, quia per actualem motionem superiorem non amplius elevatur. Solet similis casus proponi de vidente Deum, si Deus negaret illi supernaturalem habitum charitatis, et auxilium ad proprium actum charitatis, et queritur quomodo amaret illa voluntas, diciturque amaturam, quantum potest per vires naturæ, tendendo in Deum sub aliqua ratione naturali, quæ in illo objecto etiam per visionem reluctet. Sic ergo in casu nostro de actu credendi dicimus, quia fidei objectum, dum proponitur ut credendum ex auctoritate Dei, semper sit etiam credibile per rationes humanas manducentes hominem ut elevari

possit ad credendum altiori modo. Quod adeo necessarium est, ut propterea dixerint aliqui Theologi necessarium esse ut fides acquisita infusam antecedit, quod, licet non sit verum de fide ejusdem veritatis creditæ, est nihilominus probabile de aliquo judicio credibilitatis ejus. Hinc ergo facile fieri posset, in eo casu, ut intellectus destitutus superiori auxilio, fidei assensum præberet veritati propositæ, non tamen ex motivo fidei supernaturalis, quia non ex pura Dei auctoritate, sed ex motivis et rationibus humanis sub quibus illa proponitur et cum quibus illa conjungitur, quando assensus est mere humanus et acquisitus, ut in præcedenti remissione explicatum est; et idem cum proportionem de voluntate credendi dicendum est.

35. *Vera solutio quarti argumenti in num. 6 propositi.*— Quartum argumentum sumebatur ab incommodo, quod aliquis esset certus de sua fide, quod sit infusa et sicut oportet. Quod aliqui non reputant inconveniens, et ideo facile sequelam admittunt, constituuntque discrimen inter actus intellectus et voluntatis; nam intellectus, inquiunt, clare intuetur rationem, ob quam movetur ad assentiendum, non tamen ita clare cognoscit rationem et motivum ex quo voluntas operatur, et ideo potest homo certo cognoscere se credere sicut oportet, et fide supernaturali, licet non possit ita certo cognoscere se amare sicut oportet, et consequenter nec certo cognoscit se esse justum. Sed hi auctores non advertunt fidem pendere a voluntate, et ideo non posse nobis esse magis notam qualitatem (ut sic dicam), seu supernaturale motivum assensus intellectus, quam sit nota supernaturalis species illius piæ affectionis seu voluntatis, qua determinamur ad credendum; illa autem volitio non est nobis notior quam alii actus voluntatis; ergo neque ipsa fides. Et ideo simpliciter respondeo negando sequelam, quia, cum in his actibus semper concurrant aliquo modo et naturalia et supernaturalia motiva, ut dixi, nunquam homo satis evidenter discernit an ex pura supernaturali ratione moveatur et operetur, et hoc est satis ut nunquam possit omnino esse certus de fide vel operatione sua, quamvis de illa magnas possit habere conjecturas. De qua re ex professo versus finem hujus materiæ dicendum est.

CAPUT XII.

UTRUM AD SPERANDUM, SICUT OPORTET, DIVINAS PROMISSIONES, GRATIÆ AUXILIUM REQUIRATUR, ET QUALE QUAVE RATIONE NECESSARIUM SIT?

1. *Supernaturales voluntatis actus alii theologici, alii morales.* — Diximus de necessitate gratiæ ad actum supernaturalem intellectus, dicendum superest de ejusdem gratiæ necessitate ad actus voluntatis, qui possunt in duos ordines distingui, scilicet, in theologicos et morales. Theologici dicuntur illi quibus voluntas immediate unitur Deo, attingendo illum, ut aiunt, tanquam objectum *quod*. In alio vero ordine constituimus actus virtutum moralium, qui proxime versantur circa materias creatas, et vel non comprehendunt Deum in objecto suo, vel si aliquo modo attingunt, solum est tanquam objectum *cui*, ut dici solet. De prioribus actibus est certior doctrina, et ideo de illis prius dicemus, dicturi postea de cæteris in capitibus sequentibus. Præterea, supponendum est duos esse præcipuos actus theologicos ad voluntatem pertinentes: nam virtutes theologicæ sunt tres, et una earum ad intellectum pertinet, nempe fides, de cujus actu jam dictum est: duæ vero ad voluntatem spectant, nimirum spes et charitas, de quarum actibus suo ordine dicemus.

2. *Supponitur spes theologiam esse actum voluntatis.* — Supponimus itaque spes esse actum voluntatis, ut est communior sententia Theologorum, licet aliqui dubitaverint, quia spes nihil aliud est quam fiducia; fiducia autem actus intellectus esse videtur, quia nihil aliud est quam firma credulitas in verbo seu promissione alterius. Sed non potest de veritate communis sententiæ dubitari, nisi quis velit duas tantum theologicas virtutes admittere, quod Paulo, 4 Corint. 13, et communi sensui Ecclesiæ repugnat. Sequela vero patet, quia fiducia, prout intellectui tribuitur, non potest a fide distingui; ergo si illamet est spes, fides et spes non distinguuntur, et ita tria illa, quæ Paulus dixit nunc manere, non erunt nisi duo. Necesse est ergo ut spes formaliter ad voluntatem pertineat, ut sic a fide distinguatur: a charitate autem nunc supponimus distingui, quia spes ad amorem concupiscentiæ, charitas ad amorem amicitiae ejusdem Dei pertinent, ut videbimus, et latius in disputationibus de his virtutibus disseritur, et

videri potest D. Thom. 1. 2, quæst. 62, a. 3; et 2. 2, q. 17 et 23. Neque est verum fiduciam esse firmum assensum; sed est motus efficax appetitus in tali assensu fundatus.

3. *Quid Pelagius de spe senserit.* — Circa spem igitur non invenio ab Augustino vel aliis Patribus relatum aliquem Pelagii errorem specialem; cum autem circa fidem et dilectionem erraverit, eas viribus naturæ et liberi arbitrii adscribendo, non est dubium quin de spe idem senserit. Nam spes proxime generatur ex fide, et in illa maxime fundatur, et minus perfecta est quam charitas, teste Paulo, 1 Cor. 13; qui ergo fidem et charitatem naturales esse credit, non potuit aliquid altius de spe cogitare. Eo vel maxime quod Pelagius necessitatem auxilii divini specialis negabat, et ita totam fiduciam in se et in suo libero arbitrio collocabat, de quo sæpe ab Augustino reprehenditur; ergo non solum supernaturalem spem, sed etiam omne fundamentum ejus penitus abstulit. Quocirca, sicut ad fidem solum prærequirebat Pelagius divinam revelationem et doctrinam, qua proposita dicebat posse hominem suo arbitrio velle credere et credere; ita ad spem postulare ad summum potuit divinas promissiones homini revelatas, et ab illo naturaliter creditas, ut possit etiam suo arbitrio de fidelitate promittentis fidere, et promissa sperare.

4. *Dubium.* — In hoc vero errore dubitari potest an error in fide sit, quia non videtur tam clarius in spe, sicut in fide, neque militare eadem ratio. Nam fides, ut includit voluntatem credendi, non supponit aliam priorem fidem, vel supernaturalem operationem propriam, per quam possit ad credendum confortari; spes autem supponit fidem, per quam videtur voluntas sufficientes vires accipere ad appetendum et sperandum suis viribus, sine novo auxilio gratiæ. Quia homo naturaliter sibi amat omne bonum quod judicat sibi esse conveniens, et consequenter illud etiam naturaliter sibi desiderat; ergo postquam sibi persuasit, et firmiter credidit talis boni consecutionem sibi esse possibilem, illam potest efficaciter intendere, et bonum illud eisdem naturæ viribus sperare. Quod enim possibilitas illius boni et veritas promissionis supernaturaliter credatur, non obstat quominus actus spei in se possit esse naturalis, quia cognitio non concurrat ad actum voluntatis, nisi ut conditio necessaria applicans objectum, et ideo non refert quod ipsa supernaturalis sit, si objectum propositum est naturaliter amabile. Nec etiam ob-

stat quod bonum promissum supernaturale sit, vel supernaturaliter sit conferendum, quia inde solum fit ut ad consecutionem vel executionem talis boni sit necessarium supernaturale auxilium, non vero ad sperandum illud, supposita fide, qua creditur illud auxilium non defuturum, quia jam bonum illud proponitur ut conveniens, et simpliciter possibile, sub qua ratione est naturaliter appetibile, et consequenter etiam sperari poterit.

5. *Ad sperandum sicut oportet ad salutem auxilium gratiæ requiritur.* — *Probatur primo ex Scriptura.* — Nihilominus de fide certum est, ad sperandum sicut oportet ad justitiam et salutem consequendam, necessarium esse supernaturale Dei auxilium. Probatur primo ex Scriptura. Nam 1 Cor. 13 : *Manent* (inquit Paulus) *tria hæc, fides, spes et charitas*, ubi, eas specialiter et quasi æqualiter numerando, satis aperte ostendit in hoc convenire, quod omnes sunt ejusdem ordinis, licet in eo una sit altera perfectior. Unde Augustinus, serm. 29 de Verbis Apostoli : *Hæc tria* (inquit) *aliquantum sunt diversa, sed omnia sunt Dei dona.* Idque probat dictis verbis Apostoli, et de spe in particulari id confirmat ex illo Psal. 118 : *Memor esto verbi tui sermo tuo, in quo mihi spem dedisti.* Inde enim colligit spem esse Dei donum, sicut est fides. Est etiam optimum testimonium Pauli ad Rom. 5 : *Per quem* (id est Christum) *habemus accessum per fidem in gratiam istam, in qua stamus et gloriamur in spe gloriæ filiorum Dei ;* ubi inter dona filiorum Dei, quæ per Christum accipimus, spem ponit ; et cap. 15 : *Ut per patientiam et consolationem Scripturarum spem habeamus*, et subdit statim : *Deus autem patientiæ et solatii det vobis id ipsum sapere*, significans Deum esse hujusmodi doni auctorem. Unde etiam 1 Thess. 5 : *Galeam* (inquit) *spem salutis assumite*, quam cum fide etiam et charitate ibi conjungit, et per Christum dari statim declarat.

6. *Alia Scripturæ testimonia afferuntur.* — Unde et Petrus, epist. 2, cap. 1 : *Secundum misericordiam suam* (inquit de Christo Domino) *regeneravit nos in spem vitæ.* In quibus verbis licet spes possit pro objecto seu materia quæ speratur sumi, tamen de spe quæ nobis per baptismum infunditur intellexisse videtur Augustinus, lib. 1 de Peccator. meritis et remission., cap. 37, dicens : *Regeneravit nos in spem vitæ æternæ*, et connotant ea quæ inferius Petrus subdit : *Perfecti sperate in eam quæ offertur vobis gratiam ;* et infra : *Dedit ei, id est Christo, gloriam, ut fides vestra et spes*

esset in Deo, quo loco notari potest et distinctio spei a fide, et quod utraque dicitur in Deo fundata tanquam divina quædam et superioris ordinis virtus. Deinde hoc etiam convincunt illa testimonia, in quibus spei tribuitur vel sanctificatio et remissio peccatorum, ut 1 Joan. 3 : *Omnis qui habet hanc spem in eo sanctificat se*, vel salus æterna, ut ad Rom. 8 : *Spe salvi facti sumus ;* ex his enim et similibus locis, aperte colligitur, spem esse dispositionem ad gratiam, et necessariam ad salutem æternam, et consequenter non posse fieri sine gratia, quia nullus actus per se ad pietatem conferens potest sine gratia haberi, ut in 1 libro satis ostensum est. Idemque probatur ex illo Psal. 90 : *Quoniam in me speravit, liberabo eum.* Nam spes est ratio impetrandi Dei protectionem, unde necesse est esse donum gratiæ Dei. Unde Bernardus, serm. 3 de Annuntiat. : *Sola*, inquit, *spes apud te miserationis bonum obtinet, neque oleum misericordiæ, nisi in vase fiduciæ ponis.*

7. *Probatur ex Concilio Tridentino.* — Secundo, expresse est hoc definitum in Concilio Tridentino, sess. 6, can. 3, ubi dicit *neminem sine prævenienti Spiritus Sancti inspiratione et ejus adjutorio, posse credere, sperare, etc., sicut oportet.* Ubi certum est non loqui Concilium de illis actibus quasi collective, sed divisive seu distributive, et ideo sub disjunctione *aut*, illos recenset, ut in materia de Pœnitentia notavi. Et ideo cap. 6, inter dispositiones ad justificationem spem enumerat, ex illo Matth. 19 : *Confide, fili, remittuntur tibi peccata tua ;* et in cap. 17, dicit : *In ipsa justificatione hæc tria simul infusa accipit homo per Jesum Christum cui inseritur, fidem, spem et charitatem*, ubi sive de actibus loquatur, sive de habitibus, æque probat intentum, quia dum dicit, spem esse infusam per Christum, docet esse donum gratiæ quam Christus nobis meruit ; quod si de actu dicitur, id est quod intendimus ; si vero de habitu, etiam habitus est propter actus, et ejusdem sunt ordinis, ut supra argumentati sumus. Ex Patribus sufficiunt quæ obiter adduximus, quia res est fere sine controversia, et quia semper ponunt spem inter ea quæ sunt maxime necessaria ad supernaturalem justitiam, ut videri potest in Chrysostomo, homil. de Fide, lege et Spiritu Sancto, dicente : *Necesse est ut præcedat vitam nostram spes in Christum, quæ postea pascenda est bonis operibus.* Et plura videri possunt in Bernardo, serm. 7 et 9 in Psalm. *Qui habitat.*

8. *Probatur tertio ratione.* — Ratione theo-

logicæ confirmantes hanc veritatem insinuatæ jam sunt; illæ vero præcipue sunt a posteriori et ab effectu, videlicet, quia actus spei, est dispositio ad justitiam et ad remissionem peccati: item quia in suo ordine est fundamentum meriti, et impetrationis ac pœnitentiæ, juxta illud Ambrosii, libro primo de Pœnitent., cap. 4: *Nemo potest agere pœnitentiam, nisi qui speraverit indulgentiam.* Et quia æquiparatur aliis Dei donis, ut de fide et charitate visum est, et de timore dicitur Psal. 146: *Bene placitum est Domino super timentes eum, et in eis qui sperant super misericordia ejus.* A priori vero reddenda est ratio ex supernaturalitate actus spei; non est enim necessaria gratia ad hunc actum propter difficultatem extrinsecam, seu accidentariam, sed propter excellentiam ejus, et supernaturalitatem quam requirit, ut habeatur *sicut oportet*, utique ad salutem et justitiam, ut Concilium Tridentinum dixit: et ideo non tantum in natura lapsa, sed etiam in integra erat necessaria ad sperandum, non minus quam ad credendum vel amandum. Ut ergo hæc ratio et necessitas gratiæ ad hunc actum magis explicetur, ea quæ de fidei actu diximus cum proportionem ad spem applicanda sunt.

9. *Spei actus, in sua specie et substantia, est supernaturalis.*—Dico ergo secundo: actus spei in sua substantia et specie est supernaturalis. In hac assertionem est eadem controversia et opinionum diversitas, quæ de fide tractata est, ut videri potest in Scoto, Durando, Gabriele, et aliis, in 3, d. 26. Conclusio tamen posita plane traditur a D. Thoma 1. 2, q. 62, art. 3, et 2. 2, q. 17, art. 1 et 6, quem ita intelligunt et sequuntur recentiores Theologi communiter. Eisdemque rationibus probanda est quibus de fide hoc probavimus, scilicet, quia habitus spei est per se infusus, et actus ejus est ejusdem ordinis, sive sit elicitus ab illo, sive proxime disponat ad illum: unde per se etiam est infusus, quod non convenit nisi formæ, in specie et substantia supernaturali. Item quia actus spei, qualis ad salutem postulatur, superat vires naturales voluntatis, non ratione extrinsecæ; ergo intrinsecæ; ergo ratione substantiæ suæ. Et hic habet locum discursus supra factus, quod hæc supernaturalitas, et tanta necessitas gratiæ, quanta in hoc actu invenitur, non potest salvari per modum supernaturalem, ut inductione supra facta ostendi potest, nam eodem modo potest hic facile applicari.

10. *Germana ratio hujus assertionis.* — Ex

propriis vero ratio reddenda est, ex objecto formali actus spei, quem declarat D. Th. 1. 2, q. 62, art. 3, dicens *esse motum intentionis tendentis in finem supernaturalem, sicut in id quod est possibile consequi per auxilium Dei*, ut addit et declarat 2. 2, q. 17, art. 1; hoc autem objectum est maxime supernaturale; ergo et species essentialis, quam actus spei ab illo objecto sumit, est per se supernaturalis. Consequentia probari facile potest ex dictis capite præcedenti. Major item supponitur ex tractatu de Spe, et ex D. Thomæ auctoritate. Minor autem declaratur; nam spes, cum sit actus voluntatis per modum prosecutionis, habet pro objecto bonum, et quia tendit ad obtinendum illud, est de bono absenti et nondum consecuto, *nam quod videt quis, quid sperat?* ut ait Paulus ad Rom. 8, et ex speciali ratione sua postulat spes, ut illud bonum quod sperat, sit arduum ac difficile, ut ex 1. 2, q. 40, art. 1 suppono. Si ergo in illo objecto spei Christianæ ratio boni consideretur, supernaturalis omnino est, nam et visio clara Dei, in qua supernaturalis beatitudo consistit, et Deus ut objectum ejus, id est, prout clare, et sicut in se est, visibilis est, excedit proportionem et naturales vires humanæ naturæ; imo et naturalem inclinationem ejus; ergo etiam in ratione boni sperandi et efficaciter intendendi, est objectum excedens vires humanæ naturæ.

11. *Confirmatur ex ratione absentis objecti.* — *Confirmatur secundo ex ratione arduitatis.* — Deinde etiam absentia talis objecti, si attente consideretur, excedit quodammodo proportionem naturalis spei. Nam absentia non supponitur in objecto sperando tanquam bonum appetendum, sed potius tanquam aliquid incommodi, quod expectatur auferendum, quando completa fuerit spes, et ideo ejusdem ordinis est ex suo modo absentia boni sperati, cujus est præsentia ejusdem boni sperati: præsentia autem summi boni per spem Christianam sperati, est supernaturalis; ergo et absentia illius suo modo supernaturalis est: nam privatio ad habitum reducit. Unde illa absentia, sola ratione naturali spectata, non apprehenderetur per modum privationis, sed puræ negationis, et ideo nec judicaretur malum aliquod vel incommodum, ad quod repellendum per spem esset tendendum, et hoc sensu dicimus etiam absentiam illius boni, ut est conditio seu circumstantia objecti sperandi, non pertinere ad ordinem naturæ. Denique arduitas etiam illius boni vires natu-

ales hominis excedit, quia intrinsece ac primario nascitur ex supernaturalitate et excellentia, tum ipsius objecti et finis ultimi consequendi, tum etiam mediorum per quæ est comparandum. Ergo tale objectum est simpliciter supernaturale respectu virium naturalium liberi arbitrii; ergo etiam spes tali objecto proportionata est in sua essentia supernaturalis. Cui etiam accedit in natura lapsa arduitas, quæ ex naturæ corruptione et concupiscentiæ inordinatione oritur, quæ, si attente pensetur, adeo arduum et difficile reddit objectum illud, ut ratione illius non possit efficaciter intendi per solas vires liberi arbitrii, ut mox explicabo. Et hic discursus magis in sequenti capite roborabitur.

12. *Corollarium: gratiæ auxilium etiam requiritur ut physicum principium spei.* — *Argumentum solvitur in num. 4 propositum.* — Atque hinc sequitur gratiæ auxilium esse per se necessarium ad actum spei, non solum ut moraliter excitans, alliciens et adjuvans, sed etiam ut dans voluntati aliquod supernaturale principium, physice adjuvans illam ad talem actum efficiendum, sicut de fide diximus. Est enim eadem ratio, supposito fundamento quod talis actus sit in se supernaturalis: unde quæ in hoc puncto de fide diximus, sunt hic eum proportionem applicanda. Neque contra hoc obstat ratio dubitandi in principio posita. Ut enim omittam, dubitari posse an diversa propositio objecti appetendi vel sperandi, naturalis vel supernaturalis, sufficiat ad similem distinctionem actuum voluntatis, de quo puncto alibi dicam; in præsentī, jam ostendimus, in objecto quod per fidem sperandum proponitur, non solum cognitionem seu applicationem objecti, sed etiam objectum ipsum esse supernaturale, tam quoad fundamentum spei, quam quoad bonum speratum.

13. *Progreditur solutio.* — Fundamentum enim Christianæ spei est ipsum verbum Dei, juxta illud Psalm. 118: *Memor esto verbi tui sermo tuo, in quo mihi spem dedisti.* Quod verbum, licet per fidem credatur, nihilominus, ut voluntas erigatur ad sperandum, solum in Dei verbo, promissione, potestate ac voluntate nixa, indiget speciali auxilio et elevatione Dei. Sicut ergo fides supernaturalis est, quia soli Deo adhibetur, ita spes excedit vires naturales, quia in Deo supernaturaliter promittente fundatur. Et ideo Petrus æqualiter dixit: *Ut fides vestra, et spes sit in Deo.* Et hac ratione utitur D. Thom. in 2. 2, quæst. 17. Adde vero in 1. 2, quæst. 63, art. 2, ad 2,

etiam spem excedere virtutem naturæ proportionatam ex parte objecti, seu boni quod speratur, quia nimirum est quoddam summum bonum excedens naturalem facultatem et capacitatem humanam. In quem sensum exponit Bernardus, serm. 9 in Psalm. *Qui habitat, illa verba: Quoniam tu es, Domine, spes mea, altissimum posuisti refugium tuum, dicens: Forte aliquid amplius sonat et sublimius, quod, videlicet, non modo in eo sperat, sed eum. Convenientius siquidem spes nostra dicetur quod speramus, quam in quo speramus.* Additque inferius utrumque indicatum esse a Jeremia, Thren. 3, dicente: *Bonus est Dominus sperantibus in se, animæ quærenti illum.* Utroque ergo titulo spes Christiana supernaturalis est, quod et in solo Deo sperat, et solum Deum ut supernaturalis beatitudinis objectum sperat, nam si aliquid aliud sperat, totum est in ipso et propter ipsum. Nec refert quod fides hoc objectum proponendo præcedat. Nam totum hoc tenet se ex parte objecti, quod superat naturales vires voluntatis, quas non præbet fides sola, et ideo necessaria est specialis gratia quæ, ad eliciendum spei actum, voluntatem juvet.

14. *An possit dari sine gratia spes naturalis de bonis a Deo promissis.* — *Vera resolutio affirmans.* — Tandem potest in hoc capite interrogari quod supra de fide tractatum est, an possit voluntas nostra, solis naturalibus viribus, aliquem actum spei naturalis et acquisitæ de bonis a Deo promissis elicere. Sed de hoc non oportet novam texere disputationem, eadem enim est resolutio et eodem modo explicanda. Primo igitur, proposita per fidem beatitudine a Deo promissa, poterit voluntas naturali affectu ad illam ferri, eamque aliquantulum sperare. Ita docuit Molina in Concordia, q. 14, art. 13, disp. 13, in quo ab aliquibus ejus doctrina notata est, sed immerito, quia non est major ratio de fide quam de spe; imo, supposita fide, videtur facilius spem aliquam naturalem posse concipere, ut ratio in principio hujus capituli facta ostendit. Et ita Scot. in 3, dist. 26, ad tertium, eodem modo de spe opinatur quo de fide; et idem habet ibi Durandus, questione prima, numero sexto; et Gabriel ibi, articulo primo; et Cajetanus 2. 2, questione 17, articulo quinto, in principio, expresse ponit habitum spei acquisitæ; addit vero, et recte, illum non sufficere ad eliciendum actum proportionatum supernaturali objecto, sed alium imperfectum et acquisitum. Denique Soto, et alii qui censent actus omnes

supernaturales esse naturales quoad substantiam, consequenter coguntur ponere aliquem actum spei, qui possit fieri viribus naturæ. Potest etiam probari inductione. Nam Judæi aliquam spem habent consequendi beatitudinem, quæ sine dubio supernaturalis non est, nec per auxilium gratiæ fit. Idem est certius de hæreticis, qui supernaturales promissiones expressius credunt. Unde constat non solum posse concipi spem aliquam, supposita fide infusa promissionum, sed etiam supposita fide acquisita, hanc enim solam habent hæretici. Imo sæpe habent firmam quamdam et temerariam fiduciam, in sola falsa fide suorum errorum fundata, ut de hæreticis hujus temporis dixit Concilium Tridentinum, sessione sexta, c. 9.

15. *In quibus spes hæc acquisita ab infusa distinguatur.* — Secundo vero addendum est hanc spem acquisitam, sicut specie et substantia longe diversa est ab spe infusa, ita etiam objecto et motivo, modo ac perfectione sperandi. Hæc omnia fere eodem modo explicanda sunt in spe ac in fide. Nam imprimis etiamsi bonum speratum in se supernaturale sit, spes acquisita non tendit in illud, ut supernaturale est, sed solum sub generali ratione commodi, et convenientis naturæ, quia ille actus non procedit, nisi naturali appetitui voluntatis commensuratus; appetitus autem naturalis sistit in bono proportionato et convenienti naturæ. Deinde licet illud bonum speretur a Deo, non tamen ut ab auctore gratiæ, vel supernaturali, nec firmiter innitendo promissioni ejus, sicut oportet. Sperare enim a Deo aliquod bonum vel præmium, si absolute sumatur, non excedit naturales vires rationis aut voluntatis humanæ. Qui enim per rationem naturalem cognoverit Deum habere providentiam rerum humanarum, et præmium aliquod pro bonis operibus esse redditurum, et pœnam pro malis, potest sperare a Deo aliquod præmium honestæ vitæ, sicut potest etiam naturaliter pœnam timere. Illa autem spes solum est in Deo ut auctore naturæ, et non tam fundatur in promissione ejus quam in sapientia, prudentia, justitia vel bonitate ejus.

16. *Declaratur amplius.* — Qui autem fide humana credit Deum præmium supernaturale pro meritis, et auxilia ad bene operandum, et gratiam ad remissionem peccatorum obtinendam promisisse; quamvis possit hæc sperare humana et acquisita spe, nihilominus sicut non amat illa bona, ut supernaturalia sunt, ita nec tendit ad illa, ut supernatura-

liter possibile, sed ut possibile simpliciter et confuse, quasi præsciendo a modo quo sunt possibile, quia vires naturæ non ultra extenduntur. Imo, licet quis per fidem infusam credat objectum sperandum esse possibile per virtutem divinam superantem ordinem naturæ; nihilominus si solo naturali affectu voluntas in illud objectum sic propositum feratur, non nititur in Deo ut auctore supernaturali, sed tantum ut est causa a qua habet tale objectum, ut sit possibile, et similiter non fundatur in promissione ejus, ut movere potest ex sola Dei auctoritate ad fidendum in illa, sed quatenus, adjunctis humanis conjecturis, constituit illud objectum in ratione futuri, vel absolute, vel sub conditione aliqua. Unde fit ut talis spes nunquam sit tam certa, et firma, quantum esse debet Christiana spes, quia vel non supponit certitudinem fidei in intellectu, a qua debet spes suam certitudinem et firmitatem mutuari, vel quia licet in homine fidei illa certitudo supponatur in intellectu, voluntas naturaliter sperando illi fidei non conformatur adæquate, sed tantum secundum quamdam communem rationem fidei in illa fundatur. Unde verisimilius est etiam hominem fidelem, eo tempore quo tantum humano modo sperat, non uti actu fide infusa ad judicandum de bonis sperandis, sed humano etiam modo illa considerare et credere. Denique ex alio etiam capite deficit omnis spes acquisita a perfectione infusæ, quia licet esse possit absoluta et efficax circa aliquod particulare bonum, non tamen circa omnia, et præsertim circa supernaturalem beatitudinem consequendam, et circa Deum, ut est objectum ejus, ut in sequenti capite commodius explicabo.

CAPUT XIII.

UTRUM AD AMANDUM DEUM AMORE CONUPISCENTIÆ, UT EST SUMMUM BONUM ET COMMODUM HOMINIS AMANTIS, SIT AUXILIUM GRATIÆ NECESSARIUM?

1. *Prima sententia.* — *Secunda sententia asserens amorem concupiscentiæ Dei, ut objectum beatitudinis, esse naturalem.* — Hoc dubium non invenio ab Scholasticis peculiariter motum, sed communiter idem judicare videntur de hoc amore quod de spe, quia vel unum actum cum alio confundunt, ut Major in 3, d. 26, et alii; vel quia sentiunt spem oriri ex amore concupiscentiæ, ut D. Thomas, Scotus, et alii infra referendi. Nihilominus tamen quidam

gravis auctor modernus, distinguendo amorem concupiscentiæ Dei ab spe, et amore charitatis ejusdem Dei, et bene sentiendo, actum spei sicut et charitatis, esse supernaturales in substantia, de amore concupiscentiæ Dei, etiam ut est bonum supernaturaliter beatificans hominem, dicit esse actum naturalem et acquisitum, ad quem non indiget voluntas habitu infuso. Cujus sententiæ hæc fundamenta ex auctore tantum elicio.

2. *Primum fundamentum.* — Primum est, quia amor ille concupiscentiæ Dei est amor amicitiae, seu benevolentiae hominis ad seipsum; sed amor sui est naturalis; ergo etiam ille amor concupiscentiæ Dei naturalis est. Major constat ex illa doctrina vulgari, quod amare, teste Aristotele, est velle alicui bonum; ideoque in amore duo distinguenda esse, scilicet, bonum quod volo, et personam cui volo, et respectu boni amati dicitur amor concupiscentiæ, respectu vero personæ cui amatur dicitur amicitiae. Unde sub hac ratione amor amicitiae et concupiscentiæ non sunt duo actus vel duo amores, sed idem amor secundum duos respectus, quamvis in alio sensu amor amicitiae et concupiscentiæ re ipsa distingui soleant respectu ejusdem personæ; nam si illam amem ut cui bonum volo, est amicitia; si vero eandem diligam mihi ut bonum meum, est amor concupiscentiæ ejusdem personæ, licet respectu mei, cui illud bonum volo, sit amicitia, vel, proprius loquendo, benevolentia. Hoc ergo modo in præsentia, amor qui est concupiscentiæ ad Deum, est amicitiae ad seipsum. Constat autem amorem sui esse maxime naturalem, quia oritur ex naturali complacentia, quam unusquisque habet ad seipsum, quæ maxime naturalis est; ergo. Confirmatur, quia amor Dei distinguitur ab omnibus in naturalem et supernaturalem; sed amor supernaturalis ad Deum, est amor amicitiae, quia est amor charitatis, nec potest amicitia ad Deum esse naturalis; ergo per amorem naturalem intelligendus est amor concupiscentiæ.

3. *Secundum fundamentum.* — Secundum principale fundamentum esse potest, quia si amor concupiscentiæ ad Deum esset supernaturalis, postularet virtutem infusam a qua eliceretur, nam eadem esset ratio de illo actu quæ de cæteris; nulla autem talis virtus nobis infunditur. Quia si aliqua esset, profecto esset theologalis, quia immediate attingeret Deum, amando illum nobis; non est autem fides, ut per se constat, nec charitas, quia amor ami-

citiae Dei distinguitur specie, et quasi genere, ab amore concupiscentiæ; nec est spes; ergo vel est quarta virtus theologalis, quod repugnat Paulo, 1 Cor. 13, dicenti: *Nunc autem manent tria hæc*, etc., vel nulla est talis virtus infusa, et consequenter nec actus ejus supernaturalis est.

4. *Probatur tertia minoris pars, quod hic amor ab spe infusa non possit procedere.* — *Primo.* — *Secundo.* — *Tertio.* — *Quarto.* — Superest solum probandum illam virtutem non esse spem. Quod probatur primo, quia amor et spes sunt actus omnino distincti. Secundo, quia in actu spei est specialis difficultas, ratione cujus necessaria est virtus spei, quæ difficultas in amore concupiscentiæ non reperitur. Nam spes respicit beatitudinem, ut est bonum arduum consequendum virtute divina, et ita non habet quod sit supernaturalis ex eo quod speratur, sed ex eo a quo speratur, scilicet, a Deo supernaturaliter operante. Quæ ratio cessat in amore, quia amor non versatur circa Deum, ut ab ipso futura est consecutio beatitudinis vel alicujus boni, sed præcise ut circa rem concupitam nobis convenientem, quod maxime naturale est, et in tali actu nec invenitur formalis ratio habitus spei, nec ulla ratio ob quam sit supernaturalis. Tertio, quia amor concupiscentiæ in beatitudine permanebit, et tamen ibi non erit habitus spei a quo elici possit. Quarto, quia si amor concupiscentiæ esset actus elicited a virtute spei, per contrarium actum, verbi gratia, per odium, vel nolitionem absolutam supernaturalis beatitudinis, amitteretur virtus spei, quia virtus infusa per unum actum contrarium amittitur: consequens autem est falsum, quia cum illo odio vel nolitione stat non desperare de beatitudinis consecutione, et spes juxta communem sententiam solum per desperationem perditur.

5. *Hunc tamen actum sine gratia fieri non posse concedit Vasquez.* — Denique dictus auctor, ne videatur nimium tribuere libero arbitrio, addit, licet hic actus amoris in se et substantia sua naturalis sit, nihilominus non fieri sine gratia movente. Quæ autem sit hæc gratia movens, vel qua ratione dicatur esse necessaria ad actum alioqui naturalem, dictus auctor non declarat. Videtur autem juxta sua principia per gratiam moventem intelligere cogitationem congruam naturalem ejusdem ordinis cum ipso amore, quamvis revelationem et doctrinam supponat. Ratio autem illius necessitatis erit, quia ille actus amoris de se bo-

nus est, ideoque fieri non potest sine cogitatione congrua et honesta, sic enim de aliis actibus bonis et naturalibus citatus auctor censet, neque in præsentem majorem vel specialem rationem gratiæ declarat. Bannez 2. 2, quæst. 17, art. 8, in assertionem convenit, dicens hunc amorem esse naturalem, licet spes in illo fundata sit ab speciali auxilio: unde sentit amorem non esse ab speciali gratiæ auxilio.

6. *Vera assertio.* — Nihilominus dicendum censeo amorem concupiscentiæ Dei, ut est supremum bonum nostrum in ratione objecti beatifici, esse actum per se infusum, et ejusdem ordinis cum aliis actibus virtutum theologiarum. Hæc videtur esse communis sententia Theologorum quam imprimis sumo ex D. Thom. 2. 2, q. 17, art. 8, ubi, posita distinctione duplicis amoris Dei, amicitiae et concupiscentiæ, dicit: *Prior pertinet ad charitatem, sed spes pertinet ad secundum amorem, quia ille, qui sperat, aliquid sibi obtinere intendit.* Et in solutione ad 2, dicit spem provenire ex amore concupiscentiæ; ergo plane sentit amorem hunc esse ejusdem ordinis cum spe; tum quia non potest actus infusus per se provenire ex habitu naturali et acquisito, nec amor naturalis esse potest principium spei supernaturalis. Unde nulla convenienti ratione dici potest spes infusa ad amorem acquisitum seu naturalem pertinere. Similem doctrinam habet D. Thomas, quæst. de Spe, seu 4 de Virtutibus, art. 3, in corpore, et in pluribus argumentorum solutionibus. Quæ loca cum multis aliis congerit Capr. in 3, d. 26, a. 3, ad 1 et 2, ubi idem sentit de amore concupiscentiæ Dei quod de spe. Et eodem modo loquuntur ibi Theologi; omnes enim docent spem ad amorem concupiscentiæ pertinere. Imo aliqui dicunt esse ipsum amorem concupiscentiæ Dei, ut Major, in 3, d. 26, quæst. 2, et post questionem secundam, in dubio illi adjuncto: nec dissentit Gabriel ibi. Unde necesse est ut isti dicant amorem concupiscentiæ esse infusum, cum id non possint de spe negare, et eundem actum esse sentiant. Cæteri vero qui illos distinguunt, saltem dicunt spem ad amorem concupiscentiæ pertinere, vel in illo fundari, in quo etiam ejusdem ordinis esse supponunt.

7. *Probatur primo a simili de gaudio beatifico.* — Simili modo, Theologi in 4, dist. 49, gaudium seu fruitionem de præsentia seu possessione Dei per visionem beatificam, ejusdem ordinis esse censent cum ipsa visione supernaturali. Unde aliqui putant esse etiam de

essentia illius beatitudinis, ut Richardus ibi, art. 1, quæst. 6; et in solut. ad 4, addit etiam ipsum amorem concupiscentiæ Dei esse de essentia illius beatitudinis, quam fuisse aliorum opinionem refert ibi Bassol., quæst. 2, art. 3, quam ille omnino non rejicit. Alii vero omnes saltem censent gaudium illud esse proprietatem intrinsece consequentem illam beatitudinem, et necessariam ad perfectionem et statum quasi intrinsecum ejus, sicut loquitur D. Thomas 1. 2, quæst. 4, art. 1, et ibi expositores, et alii Theologi in 4, d. 29, sive utantur nomine delectationis aut gaudii, sive fruitionis, et tamen omnes etiam dicunt illud gaudium pertinere ad amorem concupiscentiæ, quem propterea censent esse etiam necessarium in illa beatitudine, sive sit idem cum gaudio, sive proxima causa ejus. Unde etiam supponunt esse infusum et ejusdem ordinis cum ipsa supernaturali beatitudine. Specialiter vero hanc sententiam docuit Medin. 1. 2, quæst. 62, art. 4, in ultimo dub., § *Denique*, ubi dicit hunc amorem ex divino auxilio procedere, sicut pia affectio voluntatis est donum Dei.

8. *Probatur secundo a priori.* — *Evasio non satisfacit.* — Ratio a priori hujus veritatis est, quia objectum hujus amoris etiam est supernaturale, et ut tale amatur illo amore; ergo ut amor ille proportionatus sit, et perfectus intra suum genus, oportet ut sit supernaturalis, et ejusdem ordinis cum supernaturali beatitudine, ac proinde per se infusus. Major patet, quia objectum illius amoris est Deus, ut est beatitudo hominis objectiva, respectu illius beatitudinis formalis, quæ in clara Dei visione consistit; ergo sicut visio ipsa est supernaturalis, ita etiam Deus, ut objectum ejus, est objectum supernaturale. Respondent aliqui esse objectum supernaturale respectu visionis, non vero respectu amoris concupiscentiæ. Sed hoc non recte dicitur; tum quia etiam ipsa visio est formalis perfectio supernaturalis hominis; ergo si respectu visionis est Deus supernaturale objectum, etiam ut est summum hominis bonum, est supernaturale bonum ejusdem hominis; ergo etiam respectu amoris concupiscentiæ est objectum supernaturale, quia est objectum quatenus est bonum, et conveniens amanti; ergo si, ut bonum illius, est supernaturale, et ipsa ratio, ob quam est illi conveniens, est etiam supernaturalis, quia visionem claram involvit, etiam in ratione objecti amabilis est supernaturale. Tum etiam quia ipsa visio beata, eo ipso quod est super-

naturalis in se, ut in consecutione seu effectione sua, etiam est supernaturalis in ratione objecti appetibilis, et ideo fieri non potest ut naturalis appetitus in illam feratur, ut probabilior opinio Theologorum fert.

9. *Objectio.* — *Dilutio.* — Dices id esse verum de appetitu innato et metaphorico, non vero de appetitu elicitio; nam posita cognitione talis visionis, et persuasione quod sit possibilis, homo naturaliter illam potest appetere et desiderare, et ita in ratione appetibilis ipsa est objectum naturale. Respondeo ideo additam esse in nostra ratione minorem propositionem, in qua subsumitur sermonem esse de amore perfecto in suo ordine, et proportionato tali objecto, ut supernaturale est. Nam licet forte beatitudo illa, vel visio Dei proposita homini, naturali actu elicitio possit ab illo aliquo modo appeti, non tamen amore absoluto, efficaci et perfecto, sed ad summum simpliciter quodam affectu et desiderio, quia non potest ille amor esse talis per vires naturæ, ut moveat hominem efficaciter ad quærendum illud bonum, cum per naturales vires quæri non possit. Unde etiam fit ut ille naturalis appetitus elicitio, licet materialiter tendat in visionem beatam, non tamen illam ut supernaturalem attingat, sed sub quadam communi ratione boni et commodi proprii, quasi confundendo illam cum beatitudine in communi, quia non potest naturalis appetitus suis viribus altius assurgere. At vero amor de quo in præsentem loquimur, esse debet amor proportionatus illi objecto ut supernaturali bono summo per fidem cognito, et sub illa ratione specifica et propria illud attingens. Quia licet non sit necesse supernaturalitatem talis beatitudinis quasi formaliter et in actu signato considerare, oportet tamen excellentiam illius beatitudinis ita apprehendere, ut virtute saltem, et quasi in actu exercito, secundum propriam rationem, qua supernaturalis est, consideretur, et amanda voluntati proponatur. Ac deinde loquimur præcipue de amore perfecto in suo ordine, hoc est, absoluto et efficaci, qui virtute includat propositum servandi omnia necessaria ad illum amorem, quod valde excedit vires naturales voluntatis, ut mox explicabimus; ergo Deus, ut sic amabilis, est objectum superioris ordinis, et amor illi proportionatus est ejusdem ordinis, et infusus.

10. *Probatum tertio variis rationibus a posteriori.* — *Prima.* — A posteriori vero potest hæc ratio et assertio variis modis confirmari ex his quæ, referendo Theologo, attigimus.

Primo, quia hic amor, si sit efficax et perfectus, generat et inducit spem; et e contrario spes intrinsece supponit hunc amorem, quia non speratur nisi quod amatur, sicut non timetur nisi quod fugitur, seu odio habetur. Sed amor mere acquisitus et naturalis non potest erigere animum ad motum spei perfectum et infusum, quia illa est dependentia essentialis, et per se, et ideo debet servari proportio inter actus. Sicut naturalis motus intentionis alicujus finis non potest movere ad supernaturalem electionem mediorum, et assensus naturalis alicujus principii non potest generare assensum fidei infusæ, et sic de aliis. Optimeque confirmatur ex dictis de voluntate credendi, quam esse supernaturalem et infusam supra, ex doctrina Conciliorum ostendimus, et inter alias reddimus rationem, quia naturalis voluntas non posset movere intellectum ad assensum supernaturalem; ergo similiter in præsentem, cum spes per se supponat amorem concupiscentiæ boni sperati, et ab illo procedat, non potest amor ille esse mere naturalis et acquisitus, nam talis amor nullo modo potest ad spem infusam et supernaturalem sufficientem movere.

11. *Secunda.* — Secundo, hic amor Dei, licet non sit tam perfectus, sicut amor amicitiae, et comparatione illius non sit ita super omnia sicut est ille, nihilominus est super omnia concupiscibilia, quia in eo genere est ultimum et maximum bonum, ut dixit D. Thom. in 4, d. 49, q. 1, a. 2, quæstiunc. 4, ad 3; et Bonav., in 3, d. 26, art. 2, q. 3, et in superiori libro, tractando de amore Dei, c. 25 et 26 in fine, ostendi, etiam amorem concupiscentiæ Dei esse super omnia, et includere virtute observantiam omnium quæ ad consequendam beatitudinem necessaria sunt; ergo talis amor est supra vires naturales voluntatis. Simili enim ratione, in præcedenti libro, c. 25 et 26, conclusimus non posse hominem in natura lapsa diligere super omnia, etiam amore concupiscentiæ perfecto, Deum ut auctorem naturæ, sine auxilio gratiæ, quia talis amor etiam virtute includit observantiam omnium præceptorum naturalium. In præsentem autem hic amor includit virtute observantiam omnium præceptorum, etiam supernaturalium, nam sine illa non potest hic amor esse absolutus et perfectus. Cum enim hic amor uniat hominem Deo ut objecto suæ ultimæ et supernaturalis felicitatis, si absolutus et perfectus sit, necesse est ut virtute includat affectum ad media etiam supernaturalia, vel ejusdemque ordinis sint.

Ergo ad talem actum non solum est necessarium auxilium gratiæ, sed etiam actus ipse est per se supernaturalis ordinis gratiæ, cum per se ad supernaturalia objecta et præcepta se extendat.

12. *Tertia, ab exemplo de gaudio.* — Tertio, sumitur optimum argumentum a gaudio ad amorem. Nam gaudium de Deo duplex est, sicut et amor: unum, quo gaudemus de bonis, vel quæ Deus in se habet, vel quæ ad illius honorem quovis modo pertinent. Et hoc est gaudium amicitiae, quod a charitate manat, et sine ulla dubitatione supernaturalis est et per se infusus. Aliud est gaudium de Deo, ut est bonum nostrum, et a nobis aliquo modo possessum, quod erit perfectum in patria, et in via potest esse inchoatum; et hoc gaudium ad amorem concupiscentiæ pertinet, quia est de bono proprio. Hinc ergo sumitur ratio, nam hoc etiam gaudium in Deo et de Deo est ordinis supernaturalis; ergo etiam ipse amor concupiscentiæ Dei supernaturalis est. Consequentia est evidens, quia in hoc gaudio multo magis possunt procedere rationes sententiæ contrariæ quam in amore; quia etiam pertinet ad amorem sui, cum sit de proprio commodo, et in eo cessare videtur difficultas et arduitas quæ est in spe, et alioqui non habet objectum magis supernaturale quam amor concupiscentiæ ejusdem Dei. Quod vero ad antecedens spectat, de gaudio et fruitione patriæ id profecto sentiunt omnes Theologi supra allegati et de beatitudine scribentes; supponunt enim gaudium illud, quod naturaliter, id est, necessario et connaturaliter sequitur ex visione et amore Dei, esse supernaturale, et ejusdem ordinis cum ipsa visione. Et nihilominus explicant gaudium illud non solum esse amicitiae de bonis in se, sed etiam concupiscentiæ de propria commoditate et perfectione. Hæc vero duo gaudia esse distincta, et ex diversis principiis manare, discrete docet D. Thom. 2. 2, quæst. 28, art. 1, ad 3; et 1. 2, quæst. 4, art. 2 et 3, explicans delectationem beatorum, potissime loquitur de delectatione quam habent ex eo quod Deum ipsum possideant et clare videant, quæ est delectatio proprii commodi, ac subinde ex amore concupiscentiæ Dei proveniens. Quod autem ad gaudium viæ spectat, D. Thomas, in dicta solutione ad 3, illud tribuit spei. Affirmaverat enim gaudium esse effectum charitatis, in contrariumque objecerat verba Pauli ad Rom. 12: *Spe gaudentes*, et respondet duplex esse gaudium, unum de bonis Dei in se, et hoc esse charitatis effectum;

aliud de bono divino, prout a nobis participatur, et hoc dicit procedere ex spe, per quam speramus divini boni fruitionem. Ergo utrumque gaudium sentit esse infusum, et proportionatum virtuti infusæ a qua procedit, et ad hoc gaudium nos excitat Christus Matth. 6 dicens: *Gaudete et exultate, quoniam merces vestra copiosa est in cælis.*

13. *Quarta, ab exemplo de timore gehennæ.* — Quarto, non minus efficax argumentum ex æquiparatione spei ad timorem gehennæ vel amissionis beatitudinis sumi potest. Timor enim inferni seu amittendi supernaturalem beatitudinem, actus est supernaturalis ordinis; ergo etiam amor illius beatitudinis, seu Dei, ut est summum bonum nostrum, est actus ejusdem ordinis, et infusus. Antecedens sumitur ex Concil. Trid., sess. 6, c. 6, ubi, inter dispositiones ad justificationem, numerat timorem divinæ justitiæ, quo peccatores utiliter concutiuntur per divinæ gratiæ auxilium; et ex sess. 14, cap. 4, ubi docet attritionem ex metu gehennæ conceptam, Dei donum esse, et ex Spiritus Sancti impulsu, et hominem ad remissionem peccati obtinendam præparare, vel remote extra sacramentum, vel proxime respectu sacramenti penitentiae. Ubi Concilium directe docet attritionem ipsam, quæ est talis dolor de peccatis, esse Dei donum, et ex Spiritus Sancti impulsu, utique infuso et supernaturali; nam juxta usum Conciliorum hoc significant illa verba, *Dei donum, et Spiritus Sancti impulsus.* Unde consequenter et a fortiori tradit timorem gehennæ, qui est principium talis doloris, esse similiter Dei donum, et ex Spiritus Sancti impulsu, sicut in priori loco jam significaverat; sentit ergo illum timorem, actum infusum et supernaturalis ordinis esse. Consequentia vero probatur, quia timor gehennæ, ut est infusus et supernaturalis, præcipue nititur in amorem ejusdem beatitudinis supernaturalis; *illud enim timet homo amittere, quod amat*, ut dixit D. Thom. 2. 2, quæst. 19, art. 3, ex August., lib. 83 Quæst., in 33; unde quatenus ille timor est de malo proprio, ad amorem concupiscentiæ contrarii boni pertinet, et in illo fundatur, ac proinde sub hac ratione pertinet ad amorem sui, ut docet idem D. Thom., d. q. 19, art. 6, et notavit Bonav. in 3, d. 29, art. 2, q. 3, ad 4. Ergo si hoc non obstat quominus hic timor infusus sit, multo magis amor ex quo nascitur erit infusus. Patet consequentia; tum quia propter quod unumquodque tale, et illud magis; tum etiam quia ille amor est

quasi proprium et connaturale principium talis timoris, non potest autem effectus excellentioris ordinis esse quam causa. Unde recte dixit D. Thom. dicto art. 6, *eiusdem rationis esse quod homo cupiat proprium bonum, et quod timeat eo privari.*

14. *Ultima ex ratione meriti.*—Ultimo, argumentari possumus ex effectu meriti, nam hic amor est sufficiens principium meriti, vel de condigno, si sit in persona grata, vel saltem de congruo, si sit in peccatore; ergo signum est objectum et motivum illius actus esse supernaturale, ac subinde actum ipsum esse infusum et supernaturalis ordinis. Consequentia probatur, quia ut actus sit meritorius supernaturalis præmii seu mercedis, necesse est ut ex motivo aliquo vel fine supernaturali fiat, vel imperetur, ut in libro ultimo hujus materiæ ostendemus, et nunc breviter intelligi potest ex illa sententia libri de Ecclesiastic. dogmat., c. 64: *Melior est continentia (utique quam nuptiæ), sed non sibi sufficit ad beatitudinem si pro solo amore pudicitiae retinetur, sed si et cum affectu, causa vacandi Domino, eligatur.* Eademque ratio est de aliis humanis actibus, ut dixit D. Thomas in 3, distinct. 26, quæst. 2, artic. 1, ad 5. Qui tamen, si fiant ex amore mercenario (ut sic dicam) beatitudinis æternæ, et propter illam comparandam, meritorii erunt; signum ergo est amorem illum et finem supernaturalem esse. Assumptum probatur ex illo Psalm. 118: *Inclinari cor meum ad faciendas justificationes tuas, propter retributionem.* Quod maxime intelligendum est de retributione æterna. Nam pro hac retributione laborantes mercenarii laudantur, ut dixit D. Thom., 1 Cor. 3, lect. 2, in principio, ponderans verba filii prodigi: *Quanti mercenarii in domo patris mei abundant panibus, etc.,* Luc. 13, quæ facto pater probavit. Et evidentiùs id colligitur ex parabola vineæ, Matth. 20. Imo de Moyse id laudavit Paulus, cum de illo dixit ad Heb. 11: *Aspicebat enim in remunerationem;* et Christus Dominus, Matth. 5, hoc etiam motivo nos allicit ad ferendas hujus vitæ tribulationes, dicens: *Gaudete et exultate, quoniam merces vestra copiosa est in caelis.* Ergo signum est illud motivum et honestissimum esse, et supernaturale, ac divinum, et ad meritum ejusdem mercedis sufficiens, si alioqui persona sit grata Deo; si vero sit in peccato, erit aliqualis dispositio, et impetratorium meritum. Nam si dolor de peccato ex timore inferni est dispositio ad gratiam, quomodo dolor de peccato ex amore beatitudinis,

etiãsi mercenario seu concupiscentiæ, non erit melior dispositio, licet imperfecta respectu contritionis perfectæ? Et similiter eleemosyna facta a peccatore intuitu obtinendi a Deo auxilium ad vitam mutandam, etiãsi faciat illam ex timore Dei, erit aliquale meritum divinæ misericordiæ et auxilii: ergo idem erit si fiat ex amore propriæ felicitatis supernaturalis: hic ergo amor supernaturalis est, et per se ad ordinem gratiæ spectans.

15. *Concluditur hunc actum esse in specie supernaturalem.*—Ex quibus omnibus concludimus amorem hunc esse in specie ac entitate sua supernaturalem, sicut est actus spei, hoc enim necessarium est ut sit actus ordinis supernaturalis, et per se infusus; imo hæc verba idem aliter et aliter significant ad eandem rem melius explicandam. Unde idem probant omnes rationes adductæ, tam ex objecto quam ex effectibus hujus amoris, et ex aliis conjecturis. Ac denique hinc concluditur ad hunc actum necessarium esse gratiæ auxilium, non per accidens, propter aliquam difficultatem extrinsecus advenientem, sed per se, propter dignitatem actus et objecti ejus, sicut in spe explicatum est; neque est necessaria alia probatio, quia consecutio est per se manifesta. Unde facile rejicitur quod de cogitatione congrua dicebatur, quia satis in libro 1 ostensum est cogitationem naturalem, ex eo solum quod sit congrua in ordine ad naturalem actionem, non esse gratiam proprie dictam, multoque minus esse auxilium gratiæ, et ideo perinde est dicere ad hunc amorem solum requiri gratiam consistentem in cogitatione congrua naturali, ac dicere nullam gratiam esse ad illum actum necessariam, quod quam sit falsum constat ex dictis.

16. *Ad primum fundamentum Vasquez in num. 2.*—Ad primum ergo fundamentum contrariæ sententiæ, concedimus hunc amorem concupiscentiæ Dei, seu beatitudinis, esse amorem benevolentiae sui ipsius; dicimus autem amorem sui in homine non solum posse esse honestum, sed etiam supernaturalem, et hujusmodi esse benevolentiam illam qua mihi volo Deum, ut felicitatis supernaturalis objectum est. Sicut mater, cum efficaciter desiderat filio æternam felicitatem, supernaturaliter movetur, quia licet illud desiderium sit ex amore concupiscentiæ ad felicitatem æternam, et ex benevolentia ad filium, nihilominus illa benevolentia supernaturalis est, quia est de objecto et supernaturali motivo, a quo species actus sumitur. Sic ergo in presenti, amor quo

sibi aliquis vult tantum ac tale bonum, licet sit amor benevolentiae sui, supernaturalis est, quia non est potens natura ad se diligendum tam perfecto amore, et quia species amoris non sumitur ex persona cui bonum diligitur, sed ex bono quod illi concupiscitur.

17. *Explicatur probatio dupliciter atque rejicitur in primo sensu.*—Ad probationem autem quæ ibi insinuabatur, quia ille amor provenit ex complacentia sui, respondeo varios sensus posse habere verba illa, ideoque distinctione opus esse. Aut enim est sensus illam complacentiam sui esse actum naturalem amoris ad seipsum, quo aliquis sibi complacet in bono suæ naturæ, distinctum ab illo actu quo sibi amat Deum, et priorem illo, et ab isto actu procedere dictum Dei amorem: et in hoc sensu falsa est propositio, quia talis complacentia sui non necessario præcedit omnem amorem concupiscentiæ, qui ad amantem per modum benevolentiae terminatur; ergo non est cur fingamus præcedere amorem concupiscentiæ Dei. Consequentia per se clara est, donec specialis ratio differentiae assignetur, quod arbitrator fieri non posse. Antecedens autem probatur inductione; nam amor, quo quis sibi concupiscit sanitatem, concupiscentiæ est respectu sanitatis, et benevolentiae ad se: ille autem amor non supponit aliam complacentiam sui, sed ipsemet est quædam complacentia, vel in sanitate, ut sibi conveniente, vel in se, ut sanitate affecto. Idem est in amore illius amicitiae, vel ob utilitatem, vel ob voluptatem; in utraque enim diligitur amicus amore concupiscentiæ, nam ipse amans sibi vult amicum, et ita se per benevolentiam eodem actu amat, et tamen ille amor non supponit aliam complacentiam sui, ut potest eodem modo declarari, et videtur usu ipso notum. Unde neque Aristoteles, neque alius auctor talem actum priorem necessarium esse dixit. Idemque est de amore naturali, quo possumus nobis diligere Deum ut creatorem, conservatorem, vel finem nostrum, in bonum nostrum, et naturæ proportionatum.

18. *Ostenditur a priori.*—*Amor benevolentiae et concupiscentiæ conjungitur.*—Ratio autem generalis est, quia omnis complacentia sui, si est verus actus amoris benevolentiae ipsiusmet amantis, necessario esse debet amor concupiscentiæ alicujus boni quod quis sibi velit, quia amare aliquem est velle illi bonum, teste Aristotele, 2 Rhetor., cap. 4, et ideo in omni amore est aliquid amatum amore concupiscentiæ, et aliquid amore benevolentiae

seu amicitiae, ut est communis doctrina cum D. Thoma 1. 2, quæst. 26, art. 4, licet hæc interdum re distinguantur, ut in exemplis adductis constat, interdum ratione, ut patet in amore Dei propter intrinsecam bonitatem quam in se habet. Si ergo amor concupiscentiæ Dei supponit alium actum complacentiæ sui, qui sit verus amor sui, necesse est in illo declarare quodnam sit bonum quod homo sibi vult, et in quo sibi complacet: nam vel illud est bonum supernaturale, et ita de illa etiam dicetur supponere aliam complacentiam sui, et sic procedetur sine termino: nam si in illo sistatur, quia supernaturalis amor est, talem esse nos dicimus amorem concupiscentiæ Dei, ut auctor est gratiæ et finis supernaturalis, et ideo esse primum in illo ordine, quia est facilius et minus perfectus, et nulla est ratio cur supponat alium. Vel bonum illud est naturale, et illud solum cogitari potest, quod sit ipsa naturalis perfectio animæ et potentiarum ejus, quia omne aliud bonum naturale est impertinens ad fundandum amorem Dei; hoc autem videtur necessario supponi, ut natura capax sit altioris et excellentioris boni, quod est Deus. Verumtamen, licet hoc bonum naturæ necessario supponatur ut fundamentum gratiæ, positque homo in illo complacere amore naturali, priusquam sibi amet Deum, nihilominus nec ille amor naturalis per proprium actum elicitedum necessarius est ut homo possit Deum sibi amare, neque, etiamsi contingat illum amorem sui prius haberi, ex illo sequi potest amor Dei ut supernaturale bonum est, cum sub ea ratione habeat necessariam connexionem cum bono naturæ. Est ergo ille amor impertinens, et interdum impedire potest amorem altiorem Dei, si inordinatus sit, et homo nimis complacere in seipso: aliquando vero potest remote et quasi per occasionem juvare, quatenus ex illo amore naturali sui, moderato et recto, potest quis allici ad majorem suæ naturæ perfectionem generatim et in universali. Quæ affectio licet non sufficiat, ut possit natura per se assurgere ad amandum sibi Deum sicut oportet, quodammodo vero reddit illam magis capacem ut facilius elevari possit. Loquendo ergo absolute et simpliciter, hic amor concupiscentiæ Dei primus est in suo ordine, nullumque alium amorem elicitedum supponit, vel necessarium, ut ipse eliciatur, vel a quo ipse necessario fiat, et ita propositio illa in dicto sensu falsa est vel impertinens.

19. *Probatio in secundo sensu admittitur, non tamen rem conficit.*—Si autem in illa

propositione esset sermo, non de complacentia elicitæ, sed metaphorica, id est, de appetitu innato quo unusquisque ad bonum suum naturaliter propensus est, sic verum esset hanc complacentiam vel dilectionem sui supponi ad omnem amorem concupiscentiæ cujuscumque boni, quod homo per proprium actum elicatum appetit; quia appetitus elicatus supponit naturalem seu metaphoricum, sicut operatio supponit naturam. Hinc tamen non sequitur omnem amorem sui elicatum esse actum naturalem, si per illum aliquis sibi velit bonum supernaturale, quia prior ille amor naturalis, metaphoricus, et per impulsum naturalem, non extenditur ad appetendum illo modo bonum supernaturale, qua tale est, et ideo amor elicatus talis boni non proficiscitur ex priori appetitu innato tanquam a proprio principio, ac proinde non est ejusdem ordinis cum illo, licet supponat illum tanquam fundamentum remotum eo modo quo gratia supponit naturam, vel quo inclinatio ad particulare bonum supponit propensionem ad communem rationem boni in bono particulari inclusam.

20. *Ad confirmationem in eodem num. 2.* — Ad confirmationem illi primo fundamento additam, respondemus, ex supra dictis, amorem Dei non distingui in amorem naturalem et supernaturalem, propter amorem concupiscentiæ et amicitæ, nam illa divisio prior est, et in utroque amore locum habet. Nam in libro præcedenti ostendimus dari amorem amicitæ seu benevolentæ Dei naturalem, et capite sequenti ostendemus dari etiam supernaturalem. De concupiscentia vero clarius est posse hominem naturaliter sibi diligere Deum ut bonum sibi necessarium, tam ut sit et vivat, quam ut bene sit et beate intra ordinem naturæ vivat; quamvis hunc etiam amorem non possit homo in natura lapsa habere perfectum sine aliquo Dei auxilio, ut superiori libro ostendimus. Ultra hunc vero amorem datur, in homine ad supernaturalem finem elevato, consideratio Dei, ut finis supernaturalis est, et ut auctor supernaturalium donorum, et huic statui dicimus correspondere alium excellentiorem amorem concupiscentiæ Dei supernaturalem, et objecto suo proportionatum. Hic enim amor, licet per comparisonem ad amorem charitatis dici soleat imperfectus, in se et specie sua ac gradu est valde perfectus, cum virtute includat intentionem efficacem consequendi salutem et æternam vitam, quæ valde supernaturalis est.

21. *Ad secundum fundamentum in num. 3*

quorundam solutio. — Rejicitur. — Diluitur confirmatio. — In secundo principali argumento, petebatur a quo principio supernaturali vel a qua virtute infusa hic actus producat. Ad quod potest quispiam respondere non esse necessarium ut procedat ab aliquo habitu infuso, vel principio permanente, sed satis esse quod procedat ab auxilio Dei moventis supernaturaliter. Quod aliqui ita confirmant; nam hic amor concupiscentiæ Dei continetur sub communi ratione desiderii proprii commodi; sed ad hoc desiderium nullus habitus est necessarius; ergo nec ad illum amorem oportet dari habitum, etiamsi supernaturalis sit. Sed hæc responsio admitti non potest, quia licet actus supernaturalis per auxilium solum possit interdum fieri, non tamen connaturali modo, nec per principium intrinsecum, quæ est unica ratio (seclusa auctoritate) ad ponendos alios habitus infusos operativos; non est autem minor ratio in hoc actu quam in cæteris. Quia (ut dicebam) licet hic amor imperfectus sit comparatione amoris charitatis, nihilominus in suo genere est valde perfectus et supernaturalis, et ad proficiendum in sanctitate utilis; imo juxta humanam fragilitatem necessarius. Cum ergo voluntas ex se sit improporcionata ad hunc amorem, cur per habitum infusum non disponetur, et fiet principium aptum ad illum eliciendum? Nec confirmatio quidquam in contrarium suadet; quia licet amor proprii commodi possit abstrahi secundum rationem communem a commo naturali et supernaturali, et, ex ea parte qua illa ratio communis in naturali commo invenitur, possit esse naturalis, et fortasse ad illum non sit necessarius habitus, nihilominus quando elevatur ad supernaturale bonum, quatenus tale est, diligendum, jam affectus est supernaturalis, et ideo ad illum necessarius est ejusdem ordinis habitus.

22. *Altera solutio.* — Aliter responderi potest, hunc amorem elici ab habitu charitatis. Quam sententiam indicat Bonaventura, in 3, dist. 27, art. 2, quæst. 2, ubi dicit ad affectum charitatis spectare, non tantum amare Deum amore amicitæ, sed etiam concupiscentiæ; quia frui est amore inhaerere, et constat quod frui Deo, est per charitatem. Unde concludit posse amorem charitatis esse mercenarium mercede æterna, id est, operari propter mercedem æternam esse actum charitatis. Et potest hoc suaderi, quia charitas ex charitate amatur, teste divo Thoma 2. 2, quæst. 25, art. 2; sed amare charitatem, est amor concu-

πισcentiæ, quia charitas est perfectio amantis; et ita amare charitatem sibi, est amare bonum suum; ergo amor concupiscentiæ in spiritualibus bonis est amor charitatis; ergo multo magis amor beatitudinis supernaturalis et ipsius Dei ut objecti beatifici.

23. *Expenditur et rejicitur.* — Sed hæc sententia, licet in aliquo sensu vera esse possit, non tamen sufficit ad satisfaciendum difficultati propositæ. Duobus enim modis potest quis amare sibi beatitudinem: uno modo in suum commodum, seu ut est bonum sibi, ita ut hæc sit proxima ratio amandi tale bonum, et hic est proprius amor concupiscentiæ, specie distinctus ab amore charitatis. Alio modo potest quis amare sibi beatitudinem immediate et proxime propter gloriam Dei, et ut illum tanquam amicum præsentem habeat, et gaudeat de bonis ejus. Et hic amor, licet materialiter (ut ita dicam) possit denominari concupiscentiæ, respectu boni beatitudinis, quod quis sibi amat, formaliter vero et quoad motivum est amor amicitiae. De hoc ergo posteriori amore amicitiae recte dicitur esse actum charitatis, quia ex formali motivo ejus elicitur, et tale erat desiderium Pauli ad Philipp. 1, desiderantis dissolvi, et esse cum Christo. Hic vero non de hoc amore concupiscentiæ tractamus, sed de priori amore, qui non tantum materialiter, sed etiam ex motivo formali sit concupiscentia. Ille ergo amor nullo modo potest esse elicitus a charitate, cum non habeatur ex ejus motivo, nec ad amicitiam Dei pertineat. Et ob eandem rationem amor mercenarius non est elicitus a charitate, quia est formalis concupiscentia, et ideo operari intuitu retributionis æternæ, ad spem potius quam ad charitatem pertinet, ut attigi tom. 4 de Pœn., d. 5, sect. 2, in fine. Et simili modo distinguenda est duplex fruitio divina seu beatifica; quædam est gaudium de bonis Dei, ut sunt perfectiones ejus in se, et hoc gaudium est fruitio charitatis. Alia est fruitio de beatitudine, de qua beatus tanquam de propria perfectione gaudet, et hæc non est charitatis, sed alterius virtutis, nam ad amorem concupiscentiæ pertinet, ut docet D. Thomas 2. 2, quæst. 28, art. 1, ad 3; et Scot. 3, dist. 34, quæst. unica, § *His suppositis*, versic. *De donis*, in fine vers.

24. *Vera solutio.* — *Amor concupiscentiæ supernaturalis ab habitu spei elicitur.* — Respondeo igitur hunc amorem concupiscentiæ de quo tractamus, esse elicitum ab eadem virtute, a qua elicitur actus spei supernaturalis. Ita dixi in 1 t. 3 part., q. 7, art. 4. Et proba-

tur, quia ille amor est actus theologicus (ut sic dicam), id est, attingens Deum, ut objectum *Quod et Quo*; ergo ad aliquam virtutem theologiam pertinet; sed non ad fidem, ut per se patet; neque ad charitatem, ut dictum est; ergo ad spem: nam fingere quartam virtutem theologiam valde temerarium esset. Secundo, nam spes ex amore concupiscentiæ nascitur, ut dictum est; ergo uterque actus ex eodem habitu profluit, quia non potest habitus dare facultatem et facilitatem operandi posteriorem actum, nisi eam ad priorem conferat, et e converso dando facultatem ad actum priorem, qui est radix alterius, consequenter illam ad actum consequentem præbet. Et hinc etiam est ut spe etiam gaudeamus, quia hoc gaudium ex spe nascitur, ut supra dictum est cum D. Thom., diet. q. 28, art. 1, ad 3. Ex quo loco optime colligitur nostra sententia: nam sine dubio eadem est ratio in amore quæ est in gaudio. Potestque confirmari ex aliis quæ in citato loco 3 partis adduxi.

25. *Solvuntur argumenta in num. 4 adducta.* — *Primum.* — *Secundum.* — *Tertium.* — *Quartum.* — Neque contra hoc obstant rationes in principio positæ. Ad primam enim respondetur, licet amor et spes sint actus specie distincti, esse ita subordinatos inter se in ordine ad idem formale objectum, ut ad eundem habitum pertineant, sicut de amore et gaudio constat. Ad secundam respondetur, primo, esto in actu amoris non sit omnis difficultas quæ est in actu spei, nihilominus reperiri difficultatem, quæ nascitur ex supernaturalitate actus, quæ sufficit ut ad illum sit necessaria virtus infusa, et aliunde convenire cum spe in habitudine ad idem bonum sub eadem ratione boni, et hoc satis esse ut ad eundem habitum pertineant, licet in modo tendendi differant. Secundo, addimus difficultatem illam, quæ in spe cernitur ex eo quod sperat bonum per auxilium Dei, suo etiam modo participari ab amore concupiscentiæ, quia tendit in illud bonum, ut sibi possibile, alioqui non posset esse amor efficax et perfectus: non potest autem bonum illud recte existimari possibile, nisi in ordine ad potentiam et benevolentiam Dei. Ad tertiam, dico habitum spei non manere in patria formaliter sub ratione spei, id est, ut sit principium sperandi beatitudinem possessam, manere autem ut sit principium amandi hoc amore, et fruendi gaudio illi proportionato: nam hi actus honestissimi sunt, et illi statui non repugnant, et principium connaturale postulant. Ad quartam, quod spes

amitteretur per odium vel nolitionem beatitudinis, primo negari potest sequela, quia non est necesse spem amitti per quemlibet actum contrarium; non enim destruitur per præsumptionem. Secundo vero dico satis probabile esse, per tale odium vel nolitionem beatitudinis, fore spem destruendam, quia et hominem reddit incapacem ad sperandum, et virtute includit desperationem, aut vix potest ab illa separari, quia per illud odium voluntas totaliter recedit a Deo, ut sibi bono, et consequenter desperat tendere in ipsum. Sed hoc in propria materia ex professo tractandum est: nam in præsentī parum refert quod ille habitus, qui est spes, per hunc vel illum actum amittatur.

CAPUT XIV.

UTRUM AD AMANDUM DEUM, UT SUPERNATURALEM FINEM ET GRATIÆ AUCTOREM, PERFECTA DILECTIONE AMICITIÆ, AUXILIUM GRATIÆ PER SE, ET PROPTER SPECIEM ET EXCELLENTIAM TALIS AMORIS, SIT NECESSARIUM?

1. *In quo consistat difficultas.* — *Probatur primo.* — *Secundo.* — *Tertio.* — *Secunda difficultas.* — Quamvis resolutio hujus quæstionis ex dictis in præcedenti clara videatur, nihilominus ad complementum materiæ tractanda est, et ut nonnulla ratio dubitandi quæ adhuc superest dissolvatur. Est autem difficultas, quia supra dictum est posse hominem viribus naturæ non impedite, seu non lapsæ, diligere Deum auctorem naturæ amore amicitiae, seu volendo illi summam bonitatem propter ipsum; ergo etiam ut auctor gratiæ potest sic amari per easdem naturæ vires, per se loquendo, et quantum est ex natura talis actus. Probatur consequentia, primo, quia objectum quo magis bonum representatur, eo magis attrahit voluntatem, et consequenter facilius amatur: Deus autem, ut auctor gratiæ, vel non sub minori ratione boni proponitur, vel certe quodammodo sub majori, nostro modo apprehendendi, quia ejus bonitas proponitur, ut pluribus et majoribus beneficiis manifestata, quam dum apprehenditur solum ut auctor naturæ; ergo voluntas facilius poterit illum naturaliter diligere propter seipsum sub illa excellentiori ratione propositum, quam inferiori. Secundo, quia motivum amandi Deum, uno vel alio modo representatum, idem revera est, et modi illi sunt accidentarii respectu substantiæ amoris; ergo amore etiam erunt ejus-

dem naturæ et substantiæ; ergo si unus est naturalis, etiam alter. Tertio, potest hoc declarari, quia videns Deum clare, etiamsi illi denegetur auxilium ad amandum illum supernaturaliter, si detur ei generalis concursus, diligit Deum amore naturali propter bonitatem ipsius, prout in se est, quia ita illum videt; ergo amabit ex eodem motivo ex quo diligeret cum auxilio supernaturali; ergo eodem actu secundum substantiam; ergo per se ad talem actum non est necessarium gratiæ auxilium. Unde oritur alia difficultas, quia si ad talem amorem esset necessarium auxilium gratiæ propter motivum sub quo objectum amatur, ad quemlibet actum charitatis, quamvis imperfectum, esset gratia necessaria: consequens est falsum, quia talis amor esse potest in peccatore, et magna facilitate concipitur; ergo.

2. *Catholica assertio prima.* — *Deus ut auctor gratiæ sine gratia super omnia non potest amari amore amicitiae.* — Nihilominus veritas catholica imprimis est, non posse hominem lapsum diligere super omnia Deum auctorem gratiæ et salutis, amore amicitiae, et propter seipsum, sine supernaturali auxilio gratiæ. Probatur, quia talis amor est illius charitatis de qua dixit Paulus Rom. 5: *Diffundi in cordibus nostris per Spiritum Sanctum*; et ad Galat. quinto: *In Christo Jesu neque circumcisio aliquid valet, neque præputium, sed fides, quæ per charitatem operatur.* Et infra, inter fructus Spiritus primum locum tribuit charitati, dicens: *Fructus autem Spiritus est charitas*, de quo fructu intelligitur maxime illa Christi sententia, Joann. decimo-quinto: *Sicut palmes non potest ferre fructum a semetipso, nisi manserit in vite, sic nec vos, nisi in me manseritis.* Quanquam enim nomine fructuum recte ibi intelligantur opera Deo placita, et apud ipsum meritoria, ut Augustin. ibi, tract. 81, Chrysostom., hom. 75, et Cyrill., l. 10, c. 14, notarunt: tamen quia, inter opera quæ ex fide procedunt, excellentius est charitas, juxta illud 1 Corinth. 12: *Excellentiorem etiam vobis demonstro*, ideo ille fructus de quo loquitur Christus, maxime intelligitur esse charitas, sine qua cætera nullius fructus esse possunt, et quæ est radix omnium bonorum fructuum, et major cæteris, teste eodem Paulo 1 Corinth. 12, ut recte ponderavit Augustinus, tract. 32 in Joann., in fine. Denique ob hanc causam dixit Joann., 1 epistol., c. 4, charitatem esse ex Deo, ut egregie ponderat Augustinus, lib. 4 de Gratia Christi, cap. 21.

3. *Probatur primo a Summis Pontificibus. — Item a Conciliis.* — Habetur etiam hæc veritas ex traditione Pontificum, Conciliorum et Patrum. Ex Pontificibus, præcipui sunt Innocentius et Cœlestinus in epistolis sæpe allegatis, præter illa quæ generatim contra Pelagianos ex aliis Pontificibus, Prolegom. 6, c. 4, retulimus. Ex Conciliis, Milevitanum, c. 4, sic inquit: *Cum dicat Apostolus: Scientia inflat, charitas vero ædificat, valde impium est ut credamus ad eam quæ inflat nos habere gratiam Christi, et ad eam quæ ædificat, non habere. Cum utrumque sit Dei donum, et scire quid facere debeamus, et diligere ut faciamus, ut ædificante charitate, scientia non possit inflare.* Quæ sententia sumpta videtur ex Augustino, libro de Gratia Christi, cap. 26, et lib. 4 contra duas epistolas Pelagianorum, cap. 5. Concilium etiam Arausicanum, in omnibus fere suis decretis, hanc veritatem in generalibus definitionibus tradit, specialiter vero in cap. 25, ex quo aliqua verba in sequenti capite ponderabimus. Expressius vero quam cætera, Concilium Trident., sess. 6, c. 3, definivit neminem posse diligere Deum sicut oportet, sine præveniente Spiritus Sancti inspiratione ejusque adjutorio; nullus enim amor magis esse potest sicut oportet, quam ille qui tendit in Deum, ut supernaturalis beatitudinis objectum, propter seipsum, et perfecte, ac super omnia. Ex Patribus autem præcipue videndus est Augustinus in locis allegatis, et aliis generaliter allatis in lib. 1, pro necessitate gratiæ ad bene operandum; nam in eis omnibus præcipue loquitur de charitate, imo ab illa censet mereri omnia opera honesta nomen bonorum operum in sensu ibidem explicato. Et simili modo dicit, libro vigesimo-primo de Civitate, capite decimo-sexto, tunc vitia vere vinci, cum Dei amore vincuntur: *Quem (ait) nisi Deus ipse non donat, nec aliter nisi per mediatorem Dei et hominum, hominem Jesum Christum.* Et ita ubique constanter docet charitatem esse in nobis donum supernaturaliter infusum. Et hinc tandem celebrem illam sententiam protulit in epist. 107: *Liberum arbitrium ad diligendum Deum primi peccati granditate perdidimus, quia nimirum illud donum amisimus, quo Deum sicut oportet diligere poteramus, et auxilio necessario ad diligendum indigni facti sumus*

4. *Probatur rationibus.* — Rationes ex generalibus principiis facile sumi possunt, et ad charitatem a fortiori applicari, quia dilectio præeminet, teste Paulo 1 ad Corinth. 13. Si

ergo ad fidem, et ad voluntatem credendi, et ad spem, et ad amorem concupiscentiæ est necessaria gratia, multo magis ad diligendum ex charitate perfecta. Secundo, quia ad opera pietatis est necessaria gratia; at dilectio Dei, ut finis supernaturalis, est magnum pietatis opus; unde Augustinus dixit, epist. 29, Deum maxime coli charitate; et tract. 102 in Joann., in fine: *Amorem (inquit) pium, quo colimus Deum, fecit Deus, et vidit quia bonum est, ideo amavit ipse quod fecit.* Tertio, quia ad implendam totam legem necessaria est gratia, ut supra ostensum est; dilectio autem est plenitudo legis, Roman. 13. Et similiter applicari possunt rationes de necessitate orationis ad diligendum sicut oportet, et de gratiarum actione pro tali dilectione, et similes, quæ non ostendunt propriam rationem gratiæ ad hunc actum requisitæ, nec modum supernaturalitatis ejus, sed communem quamdam necessitatem, quæ in naturalem etiam Dei amorem cadit, ut supra vidimus.

5. *Utrum gratia sit necessaria ad hunc actum, eo quod in specie sit supernaturalis? — Prima opinio negans.* — Ut ergo propriam rationem et radicem hujus necessitatis explicemus, inquirendum superest de hoc actu, an gratia sit ad illum necessaria ob substantiam ejus, vel ratione alienius modi supernaturalis, et consequenter an sit per se necessaria ob naturam talis actus, vel quasi per accidens ob talem statum, vel conditionem personæ operantis. Nam antiqui Theologi, qui de fide et spe sentiunt, non esse actus supernaturales in substantia, ita sentiunt in 1, dist. 17; Scotus, Durandus, Paludanus, et Capreolus, quæst. 1, art. 3, ad argumentum Aureoli contra primam conclusionem, et ad argumenta Gregorii contra secundam. Idem habet Palud. in 3, dist. 23, quæst. 3, in fine; Major, dicta d. 26, quæst. 3, alias 2; Gabr., dist. 27, quæst. unica, art. 3, dub. 2; et ibid. Almain., quæst. 1, et tract. 2 Moral., cap. 9; Adam. in 1, dist. 1, quæst. 10, ad 1; contra 1 concl.; Cajet., tom. 1 Opusc., tract. 4, quæst. 1, et 2. 2, quæst. 171, art. 2, ad 3; et Soto in 4, dist. 17, quæst. 1, art. 5, et lib. 1 de Natur. et Grat., cap. 22, et lib. 2, cap. 14 et 16. Qui non afferunt nova fundamenta pro hoc actu, et omnia reducuntur ad ea quæ in principio posita sunt, et quæ in cap. 4 jam sunt soluta. Modi etiam explicandi supernaturalitatem hujus actus iidem sunt qui superius etiam sunt tractati. Nam Scotus illam ponit in intensione, quem imitatur Paludanus. Alii vero frequentius ponunt illam in ratione

meriti, et acceptabilitate vel acceptatione, ut Durandus, Gabriel et Cajetanus.

6. *Assertio secunda affirmans.* — *Probatur ratione et auctoritate.* — Nihilominus omnino iudicandum secundo est, auxilium gratiæ esse necessarium ad hunc actum amoris per se, et ex natura talis actus, quia nimirum in essentia et specie sua supernaturalis est. Hæc est sententia D. Thomæ, et omnium auctorum quos pro nostra sententia cap. 4 allegavi; et eisdem rationibus probanda est, nihil enim addendum hic occurrit. Nam a fortiori sequitur hæc assertio ex præcedentibus. Nam perfectior est actus charitatis Dei, quam spei vel fidei; ergo si illi ratione suarum specierum sunt supernaturales, multo magis charitatis. Declaratur præterea auctoritate Patrum, et ratione a posteriori inde sumpta; nam hic actus supernaturalis est, etiam in Angelis, ut expresse testatur Augustinus, libro 12 de Civitat., cap. 9, dicens *Deum Angelos cum bona voluntate, id est, cum amore casto, quo illi adhærent, creasse, simul in eis, et condens naturam, et largiens gratiam.* Et Gregorius, lib. 32 Moral., cap. 18, alias 25, de Lucifero exponit verba illa Ezech. 28: *Foramina tua in die qua creatus es præparata sunt; dicens: Hujus lateribus in die conditionis suæ foramina præparata sunt, quia, videlicet, capax charitatis conditus est. Si enim charitatis auro sese penetrabilem præbuisset, sanctis Angelis sociatus in ornamento regio lapis fixus maneret.* Et infra, eidem Lucifero applicans verba illa: *In medio lapidum ignitorum perfectus ambulasti, addit: Quia inter Angelorum corda charitatis igne succensa, clarus gloria conditionis extitit.* Eisdem sentiunt omnes Patres, qui docent Angelos per Spiritum Sanctum fuisse in sua conditione sanctificatos; nam sanctificatio per directionem maxime fit. Simili modo hic actus supernaturalis fuit in homine in natura integra, et ad illum gratia indiguit; nam etiam ille sanctificatus fuit per gratiam, ac proinde per charitatem, etiam supernaturalem, ut supra Proleg. 4 ostendimus. Denique etiam in beatitudine est actus omnino supernaturalis, et connaturalis visioni, ut nunc suppono. Ergo signum evidens est hunc actum non esse supra vires nature propter rebellionem concupiscentiæ, aut propter alias difficultates amoris Dei repugnantes in natura lapsa, sed quia ex natura sua excolit vires creatæ voluntatis.

7. *Hic conclusio evidentior ex eo quod sit essentialis supernaturalitas accidentalis.* — Consequentia quidem per se satis apparet evi-

dens. Potest autem evidentior fieri discursu supra facto, qui non minus in hoc actu quam in actu fidei convincit, non posse assignari modum accidentalem, per quem in esse supernaturalis constituatur, ideoque necessario iudicandum esse talem ex vi suæ substantiæ. Antecedens patebit facile applicando inductionem supra factam, quia ille modus non potest esse dependentia tantum in fieri ab auxilio supernaturali, seu gratiæ, quia si hæc dependentia est connaturalis actui, id est, ob perfectionem talis actus necessaria, hoc ipsum indicat in ipso actu entitatem supernaturalem; si vero est extraordinaria, et præter naturam talis actus, vel erit necessaria solum per accidens propter extrinseca impedimenta, qualia in solo homine non integro reperiuntur, vel est gratis et sine fundamento constitutus talis modus auxilii vel productionis, multoque minus dici potest tale auxilium esse simpliciter necessarium ad talem actum ex defectu virium liberi arbitrii. Nec etiam potest ille modus esse extrinsecus, seu per extrinsecam denominationem, nec consistere in tali esse meriti quod non fundetur in nobilitate ipsius actus, neque in aliqua specie bonitatis moralis accidentaria et extrinseca. Maxime cum hic actus charitatis inter omnes per se et essentialiter sit moraliter bonus, id est, honestissimus ex vi sui objecti, ideoque si propter talem bonitatem supernaturalis est, per suam utique substantiam et essentialem speciem est supernaturalis. Neque etiam potest ille modus esse intrinsecus et physicus, seu realis, simulque accidentalis ipsi actui; nam hic nullus est in actu, nisi intentio, et hæc nec per se est necessaria in aliquo certo gradu ad verum actum charitatis; nec est alterius ordinis a substantia ipsius actus; ergo non per modum accidentalem, sed per substantiam suam est talis actus supernaturalis.

8. *Aliquorum solutio.* — *Refellitur.* — Dicunt vero aliqui hunc amorem benevolentiae Dei esse supernaturalem ex modo, quia scilicet ita tendit in Deum, ut sistat in ipso, volendo illi bonum propter se, quod putant esse supra conditionem naturæ. Sed hoc in superiori libro improbatum est, et licet esset verum, jam ille modus esset substantialis, pertineretque ad differentiam specificam et essentialem constituentem talem actum in sua substantia, et distinguentem illum ab amore concupiscentiæ ejusdem objecti, et ita non esset contra præcedentem assertionem. Nam et nos fatebimur illum modum esse essentialem tali actui, non

vero esse specificum, sed genericum, vel communem, quia convenit omni amori benevolentiae Dei, qui tamen etiam potest esse naturalis, ut supra probavimus. Alii denique aiunt hunc actum esse supernaturalem ex modo, quia est super omnia. Idem vero cum proportionem respondendum est. Nam hic modus *super omnia*, accidentaliter esse potest et essentialiter, et priori modo non est supernaturalis, sed tantum posteriori modo, et ita non est extra substantiam.

9. *Amor super omnia, primo, potest esse ex libera adhæsione voluntatis. — Secundo, ex ratione motiva. — Hoc secundo modo est supernaturalis.* — Potest enim quis diligere aliquid non ex vi motivi aut rationis diligendi, sed solum quia ex libertate sua vult adhærere huic rei potius quam aliis, et sic homo potest se super omnia diligere, vel aliam creaturam, et ille modus est accidentaliter, nam solum consistit in majori adhæsione ex parte operantis, seu in terminatione ad objectum cum comparatione formali vel virtuali ad aliud, non ex vi objecti, sed ex vi liberæ affectionis. Alio autem modo potest amor esse super omnia ex vi motivi et excellentiæ objecti, et rationis diligendi illud, et sic est super omnia absolutus et efficax amor charitatis Dei, idque habet ex vi suæ perfectionis essentialis. Verumtamen hic etiam modus non est specificus: nam convenire potest amori naturali intra suam latitudinem. Quia vero, ut supra dixi, illa perfectio convenit naturali amori limitate, et secundum quid, ideo ille modus, ut convenit amori charitatis, est simpliciter talis, et sic est supernaturalis, et intime ac essentialiter illi conveniens. Quod a posteriori declaratur, quia ex vi sua, virtute includit observantiam omnium præceptorum, non tantum naturalium, sed etiam supernaturalium, et non tantum virtutum moralium, sed etiam aliarum theologalium, quas propterea charitas suo modo perficit; voluntas autem absoluta implendi omnia talia præcepta supernaturalis est, non solum propter impedimenta naturæ lapsæ, sed per se, quia impletio talium præceptorum supernaturalium excedit vires liberi arbitrii, non solum quoad collectionem, sed etiam quoad singula; ergo.

10. *Probatur ultimo a priori. — Variæ opiniones refelluntur.* — Ultimo addenda est ratio a priori, quæ sumenda est, ut supra dixi, ex motivo et objecto formali diligendi, simulque solvenda est præcipua difficultas, propter quam hoc dubium motum est. Quæ consistit in dis-

tinguendis motivis amoris naturalis et supernaturalis Dei propter seipsum, et ex sola amicitia seu benevolentia Dei, quod multi tam difficile aut impossibile reputant, ut propterea quidam eorum negent dari aliquam naturalem dilectionem Dei ex pura benevolentia: alii vero concedentes illam, negant posse distinguere specie ab amore charitatis: alii denique, distinctionem admittentes, negant illam sumendam esse ex objectis seu motivis diligendi, sed ex principiis, vel ex sola entitatum varia perfectione. Quas opiniones jam improbavimus, primam in præcedenti libro, secundam in hoc capite, tertiam vero in cap. 6, nam ibi dicta de fide ad amorem facile applicantur. Quia si voluntas potest viribus suis, seclusis impedimentis, diligere Deum ex eodem motivo, quo charitas illum amat, in natura integra et in Angelo fuisset ille amor: hoc autem incredibile est, multumque repugnat doctrinæ Conciliorum et Patrum; tum quia ille amor, qualiscumque esset in entitate, esset super omnia, et esset absolutus et efficax, et perfecte uniret amantem amato, quantum ad effectum ergo esset opus pietatis: nam totam animam ad Deum, ut supernaturalem finem, converteret: hæc autem concedere libero arbitrio creato, suis viribus, et in quocumque statu, nimium est, et sententiis Patrum et Conciliorum, imo et Scripturarum plane contrarium, ut ex hic allegatis et ex dictis in libro superiori de necessitate gratiæ ad opera pietatis satis constat, et in sequenti capite aliqua addemus. Præterquam quod, ut supra argumentabar, si talis amor est in potestate nudi liberi arbitrii, quomodo non est in ejus potestate se disponere ad remissionem peccati, etiam ut est contra Deum supernaturalem finem; vel ad quid postulatur actus melioris entitatis, cum ad omnes effectus morales ille sufficiat, ut alia quæ supra dixi nunc omittam?

11. *Alia opinio. — Sola diversa cognitio ad hanc distinctionem non sufficit.* — Alii ergo, ut hanc distinctionem ex objectis assignent, dicunt amorem naturalem tendere in Deum ut cognitum per rationem naturalem, charitatem vero tendere in ipsum ut cognitum per fidem. Ita insinuat Alens., 2 part., quæst. 91, art. 1, ad 7. Hæc autem differentia per se sola non sufficit, nisi aliquid addatur ex parte objecti ad diligendum propositi, vel rationis formalis diligendi illud. Nam cognitio per se tantum est conditio requisita in objecto, ut possit movere affectum, quia per cognitionem applicatur. Unde sola diversitas cognitionis,

si alioqui objectum propositum idem omnino sit, et sub eadem ratione diligendum proponatur, non sufficit ad distinguendos actus voluntatis, quæ applicatio objecti solum per accidens concurrat ad amorem; ergo distinctio illius non potest efficere diversitatem in actibus amoris. Sicut actus amoris Dei in via et in patria ejusdem rationis est, etiamsi per cognitiones specie diversas applicetur. Et confirmatur, quia circa Deum consideratum per fidem, solum ut creatorem, potest voluntas operari solo affectu naturali, eum diligendo vel colendo, quia illud bonum cognitum naturale est, et modus cognitionis supernaturalis non potest naturam impedire, quominus in suum objectum feratur, prætermissa modo cognitionis, circa quem nullo modo versatur.

12. *Prima aliquorum solutio.* — Respondent vero aliqui, ex illis diversis cognitionibus resultare in objecto diversas rationes formales, sub quibus terminet duos amores distinctos, naturalem et supernaturalem, etiamsi eadem res et ex eodem motivo bonitatis amanda proponatur. Nam idem bonum illis diversis modis propositum, est aptum terminare diversos amores; hæc autem aptitudo ad terminandum actum, est ratio sub qua objectum terminat actum: in eodem autem Deo summe bono, ut representato per fidem, alia est aptitudo ad terminandum amorem, ab ea quæ in eodem Deo ut cognito per naturale lumen est, ad terminandum proportionatum amorem. Quia etiam e converso amor supernaturalis natura sua ex propria ratione exigit cognitionem supernaturalem et per inferiorem non excitatur, e converso vero amor naturalis contentus est cognitione naturali, cui commensuratur.

13. *Rejicitur.* — *Cur ad amorem supernaturalem supernaturalis cognitio requiratur.* — Sed hoc etiam non satis rem declarat. Nam eadem est in objecto bono aptitudo ad terminandum affectum, quæ est ad movendum et attrahendum illum: fertur enim affectus in eam objecti bonitatem quæ ipsum movet: sed aptitudo ad movendum affectum non est bonitas sic vel sic cognita, sed est bonitas ipsa, prout in se talis vel talis est: ergo eadem est aptitudo ex parte objecti ad terminandum amorem, ac subinde ubi fuerit eadem ratio motiva objecti amabili, etiam erit unica aptitudo ad terminandum amorem. Unde fit ut si in Deo cognito per fidem vel rationem, non distinguatur duplex ratio motiva ad suum amorem, non possunt etiam recte distinguere aptitu-

dines ad terminandum amorem. Et ita in objecto amabili, ratio *sub qua* non est alia a ratione motiva, propter quam proxime et adæquate objectum amatur, vel amari potest. Neque obstat quod amor supernaturalis natura sua postulet præviam cognitionem supernaturalem, quia hæc imprimis postulatur, ut sit proportio connaturalis inter actus et principia eorum, non vero ut inde sumenda sit species vel genus amoris. Deinde per se requiritur supernaturalis cognitio, ut in objecto possit ostendere aliquam superiorem rationem diligendi, quam ratio naturalis non assequitur. Nihilominus tamen, quia fides etiam naturalia motiva contemplari potest, non repugnabit ex illis moveri naturalem affectum, etiamsi per fidem considerentur. Confirmatur, quia alias simili modo amor naturalis Dei, ut cogniti per scientiam, vel per fidem ac traditionem humanam, posset specie distingui, si dicatur Deum, ut cognitum per scientiam vel per fidem, habere diversas aptitudines ad terminandum amorem, quæ sufficiunt ad diversas rationes, sub quibus objectum illud terminat amores: hoc autem non est verisimile, quia illa diversitas cognitionis est valde accidentaria ad amores. Et alia multa similia facile inferri possunt, si modus ille distinguendi affectus admittatur.

14. *Secunda solutio Alensis.* — *Impugnatur primo.* — Addunt ergo alii, et indicat Alensis supra, ideo dilectionem quæ sequitur fidem, et quæ habetur ex cognitione naturali, esse diversas, quia hæc tendit in Deum ut unum, illa vero ut trinum et unum. Quod si objiciatur, ad amorem accidentarium esse quod Deus consideretur tantum ut unus, vel etiam ut trinus, quia semper amatur ratione suæ bonitatis, quæ semper est una, et illi convenit per se, ut est unus, respondebitur eandem bonitatem apprehensam ut communicabilem realiter tribus personis, sub quadam eminentiori ratione bonitatis apprehendi, quam si ut limitata ad unam personam apprehendatur, ideoque excellentiori modo amari priori modo spectatam, quam posteriori. Sed nihilominus non potest esse hæc propria et adæquata ratio distinguendi hos amores; quia priusquam Trinitatis mysterium communi fidelium plebi communicaretur seu revelaretur, omnes justi diligebant Deum vero actu charitatis, qui tamen communiter non apprehendebant Dei bonitatem, ut communicabilem tribus personis. Et nunc etiam simplex fidelis non habet explicitam cognitionem Trinitatis

per ignorantiam invincibilem, poterit Deum ex infusa charitate diligere.

15. *Impugnatur secundo.* — Præterea, hi etiam qui Trinitatem norunt et habitu credunt, possunt ex sola consideratione Dei, ut est unus, eum ex charitate super omnia diligere : ergo non potest illa esse adæquata ratio objectiva illius amoris. Imo nec sufficiens videtur, quia hæreticus alias credens Deum esse trinum et unum, potest illum diligere amore naturali, et non charitatis. Verum est tamen non diligere illum super omnia, neque propter singularem illam excellentiam, et ideo quoad hanc posteriorem partem defendi posset, bonitatem Dei spectatam cum illa excellentia, qua est communis realiter tribus personis, et quatenus movet ad amandum propter se non solum Deum, ut Deus est, sed etiam Patrem, ut Pater est, et secundum propriam et personalem perfectionem ejus, et similiter Filium et Spiritum Sanctum, illam (inquam) bonitatem, si pure et eum debita proportione ametur, propter talem bonitatis excellentiam, non posse actu naturali amari, ac proinde esse sufficientem rationem specificandi amorem per se infusum et supernaturalem. Nihilominus tamen quoad priorem partem ratio facta concludit non esse necessariam considerationem hanc illius bonitatis ad amorem supernaturalem : poterit tamen fortasse eum aliqua proportione, ut jam explicabo, applicari.

16. *Vera et communis ratio hujus distinctionis.* — Dicitur ergo aliter, per fidem cognosci Deum ut majorem benefactorem nostrum quam per solam rationem naturalem, quia per fidem plura beneficia cognoscimus nobis a Deo provenire quam per lumen naturale, et inde diversum amorem erga Deum oriri. Neque multum ab hac ratione discrepat communis modus distinguendi Deum ut finem naturalem vel supernaturalem, seu ut auctorem naturæ, vel gratiæ, et quod sub his rationibus diligatur amore naturali vel infuso, qui ex illis rationibus sufficienter distinguuntur specie, quia licet bonitas Dei in se sit eadem, apprehenditur sub diversis titulis seu gradibus bonitatis, et sub communicationibus diversarum rationum, quas nobiscum habet in bonis suis, quæ communicationes solent esse sufficientes ad distinguendas amicitias. Quam rationem distinguendi hos amores, et eorum objecta videntur seculi antiqui auctores, licet variis modis aut verbis illam explicent. Nam D. Thom. 1. 2, quæst. 109, artic. 3 ad 1, sic

inquit : *Charitas diligit Deum super omnia eminentius quam natura. Natura enim diligit Deum super omnia, prout est principium et finis naturalis boni ; charitas autem secundum quod est objectum beatitudinis, et secundum quod homo habet spiritualem quamdam societatem cum Deo.* Et idem in substantia dicit 2. 2, quæst. 23, art. 4, ubi Cajetanus id explicat, et Capreolus in 3, distinct. 27, q. 1, concl. 2, et in illius defensione alia loca et testimonia D. Thomæ congerit ; et Hispalens. ibi, quæst. 1, artic. 3. Eandem doctrinam tradiderunt Altisiod., lib. 2, tract. 1, c. 4, licet aliter explicet, dicens amorem Dei esse naturalem, quando excitatur ex effectibus Dei naturalibus, gratuitum vero, quando per altiora media bonitas Dei repræsentatur ; idem fere, licet magis explicatum, habet Alens., 2 part., quæst. 31, membr. 3, et in idem redeunt quæ latius docet quæst. 91, membr. 1, artic. 1, et optime Richard. 2, distinct. 3, art. 7, quæst. 1, ad 1.

17. *Objectio Scoti.* — Sed contra hunc modum explicandi objectum formale charitatis argumentatur imprimis Scot., in 3, distinct. 27, § *Contra primam.* Quia amare Deum ut objectum beatificum, est amare Deum non propter se, sed ipsi amanti ; ergo ut sic est objectum amoris concupiscentiæ, non charitatis. Antecedens patet, quia cum dicitur Deus, ut objectum beatificum, non additur Deo, nisi respectu ad nos, quatenus potest nos tam excellenti modo beatificare, quod pertinet ad bonum nostrum, et consequenter ad amorem concupiscentiæ. Eademque objectio fieri potest, si distinguatur Deus ut finis naturalis vel supernaturalis, quia idem est esse objectum beatificum, quod esse finem supernaturalem. Item si distinguatur ut auctor gratiæ, vel naturæ, quia secundum hos etiam respectus consideratur ut bonum nostrum. Denique idem est si consideretur per respectum ad hæc vel illa beneficia, vel hanc aut illam bonorum communicationem. Nam si amatur Deus in ordine ad talia beneficia, est amor concupiscentiæ ; si vero propter talia beneficia jam accepta, erit amor gratitudinis. Amor autem amicitiae seu charitatis abstrahit a beneficiis, et fertur in Deum propter se : ergo respectu hujus amoris, nihil refert quod cognoscatur Deus ut conferens hæc vel illa beneficia, nec quod per hæc vel illa media cognoscatur, quia semper est eadem bonitas quæ per illa media cognoscitur, et a qua omnia illa beneficia proveniunt, quæ bonitas propter se placet et amatur.

18. *Solvitur objectio, et communis sententia explicatur.* — Respondetur nihilominus sensum illorum verborum D. Thomæ et aliorum auctorum non esse, per charitatem amari Deum ut objectum beatificans formaliter, id est, sub illo respectu et motivo, ut nos beatificet, nec amari ut auctorem gratiæ, quia ametur ut nobis conferat gratiam, contra quem sensum objectio Scoti procedit. Sed sensus est, bonitatem Dei, spectatam ut supernaturaliter communicabilem hominibus per gratiam et per gloriam, sub quadam excellentiori ratione bonitatis apprehendi, quæ ad amorem sui et propter se ac super omnia movet, qui amor inde habet speciem excellentioris ordinis, ac vires naturæ superantis. Et sic etiam quo Deus nobis altiora beneficia contulit, eo bonitas ejus mirabilior, et quodammodo major nostro concipiendi modo apparet, ac proinde diligibilior, seu altiori modo diligibilis, non quia propter beneficia diligatur, sed quia per beneficia manifestatur ipsa absoluta Dei bonitas, ut altior et potentior. Et sic etiam specialiter ex beneficio incarnationis eadem Dei bonitas excellentius innotuit, et singulariter communicabilis apparuit, ut proinde tanquam excedens ordinem naturæ merito concipiatur. Hæc ergo diversitas sufficit ut Dei bonitas, licet in se una et simplicissima sit, sub ratione duplicis motivi distinguatur, quæ ad amorem supernaturalem a naturali distinguendum sufficiat.

19. *Et declaratur amplius.* — Quod etiam potest in hunc modum explicari ex D. Thom., 1 part., quæst. 60, art. 5, ad 4, et Richardo, loco allegato: nam bonitas Dei præcise spectata, ut auctoris naturæ, habet cum natura vinculum quoddam naturale, et quasi necessariam connexionem, ratione essentialis dependentiæ quam habet natura a Deo auctore suo, tum in ratione primi principii, tum in ratione ultimi finis proportionati naturæ. Et ideo bonitas Dei sic considerata, licet alioqui in se sit infinita, et longe altioris ordinis ab omni creata natura, nihilominus, in ratione objecti, est naturalis ratio amandi, et Deus ipse est objectum naturale, quia naturali impetu tendit voluntas in Deum sic spectatum. At vero eadem Dei bonitas, spectata ut communicabile per gratiam, et Deus ipse ut auctor gratiæ et supernaturalium donorum, non habet naturale vinculum cum naturali natura, quia natura, ut sit et omnem naturalem perfectionem habent, non pendet a Deo, ut auctore gratiæ. Nam si per impossibile Deus non

posset naturam supernaturaliter perficere, sufficienter posset natura ab illo essentialiter pendere, sicut illum philosophi cogitaverunt. Et hinc fit ut natura non feratur naturali pondere in Deum sub illa altiori ratione cogitatum, ac proinde non diligat illum amore altiori, sed naturali. Et ita responsum est ad Scoti objectionem, et ad omnia quæ in illa addebantur, procedunt enim ex sola verborum æquivocatione, ut late notavit Capreolus, loco allegato.

20. *Solvitur dubitandi ratio in num. 1. — Diluitur prima ejus probatio ibidem.* — Hinc etiam facile patet responsio ad rationem dubitandi in principio propositam; quamvis enim possit Deus per se diligere aliquo amore naturali, non inde fit sub quacumque ratione posse similiter naturali amore diligere. Et ad primam probationem in contrarium factam, quod voluntas eo vehementius fertur in bonum, quo majus et excellentius ei proponitur, respondeamus hoc esse verum intra latitudinem objecti proportionati, et habentis naturale aliquod vinculum cum ipsa natura. Quod necessarium est, præsertim in amore absoluto, et benevolentiam alterius, et maxime si sit super omnia. Quia licet sit amor alterius propter ipsum, debet fundari in aliqua unitate cum amante, non tanquam in ratione amandi, sed tanquam in conditione et dispositione necessario prærequisita ex parte amantis ad omnem amorem, ut docet D. Thom., 1 part., q. 60, art. 5, ad 2; consentaneæ ad illud Aristotelis, 8 Ethicor., cap. 2: *Amabile bonum, unicuique autem proprium*, cujus sensus, ut supra dixi, non est omne bonum naturaliter amari ut bonum diligentis, alioqui destrueretur naturalis amor amicitiam simpliciter, quod est contra ipsum Aristotelem. Sed sensus est neminem velle bonum, nisi vel sibi, vel ei quem unum secum aliquo modo recognoscit. Et inde etiam fit ut juxta varias rationes unitatis, vel societatis, seu conjunctionis, diversi etiam sint amores, ut luculenter exposuit D. Thom., quæst. 2 de Virtutibus, seu unic. de Charit., art. 2; et ideo ex diversa unione quam habet nostra natura cum Deo, ratione solius dependentiæ naturalis, vel ratione communicationis in gratia et beatitudine supernaturali, optime colliguntur diversæ species amicitiam et dilectionis ad Deum, non tanquam ex formali distinctivo, sic enim sumitur distinctio ex objecto, modo declarato, sed tanquam ex fundamento, vel conditione ad amorem amicitiam necessaria. Quia non potest natura se exten-

dere suis viribus ad diligendum sine fundamento alicujus conjunctionis, vel dependentiæ naturalis, et e contrario ubi fundamentum unitatis est diversi ordinis, etiam amor est diversus, sicut in simili tradit de Virtutibus politicis Aristoteles, 3 Polit., cap. 3.

21. *Ad secundam probationem in eodem num. 1.* — Ad secundam probationem satis responsum ac declaratum est, quomodo eadem bonitas, sub diversis rationibus concepta, esse possit motivum multiplex et sufficiens ad distinguendum amorem infusum a naturali. Nam ipsa bonitas Dei secundum se spectata, licet sit altior et excellentior quam omnis natura creata, non est absolute supernaturalis. Quia comparata ad Deum est illi connaturalis; comparata vero ad hominem in ratione objecti diligibilis, est naturalis homini, ut habenti naturalem quamdam connexionem cum Deo, vel propter quamdam similitudinem ad illam, quia naturaliter est ad imaginem et similitudinem Dei, vel multo magis propter essentialem dependentiam a Deo. Ideoque bonitas Dei sic spectata censetur contenta intra ordinem naturæ, et esse objectum naturaliter diligibile; ut vero est communicabilis homini, aliis modis superantibus ordinem naturæ, est supernaturalis quoad connexionem cum natura creata, et consequenter est etiam objectum excedens inclinationem et vires naturæ. Et ideo fieri non potest ut amor naturalis sit æqualis in adhæsione ad Deum secundum apprehensionem cum supernaturali, ut etiam ex his quæ capite 6 adduximus satis comprobatur. Et hinc etiam oriuntur effectus qui a posteriori ostendunt horum amorum diversitatem. Nam amor charitatis virtute complectitur observantiam omnium præceptorum, non tantum naturalium, sed etiam supernaturalium, quod non habet naturalis amor Dei, solum enim extenditur ad observandam Dei voluntatem, quatenus per rationem naturalem manifestatur. Item amor infusus fortior multo est ad resistendum temptationibus quam naturalis, licet interdum esse possit tam acerba tentatio, ut cum solo communi auxilio gratiæ non possit quis in amore perseverare sine majori auxilio, juxta ea quæ de victoria temptationum libro 1 diximus, quæ in præsentī, servata proportione, applicanda sunt. Denique amor Dei ex charitate de se ad perfectiorem usum virtutum, et ad plura propter Deum operandum inclinatur, quam naturalis amor Dei, ut ex discursu Pauli 1 Corinth. 13 colligitur. Quæ omnia proveniunt ex illa altiori

consideratione bonitatis Dei, sub qua charitatem excitat et specificat.

22. *Instantia. — Dissolvitur.* — Sed instant aliqui, quia homines simplices et rudes nesciunt has rationes discernere in bonitate Dei, et nihilominus illum diligunt ex perfecto amore charitatis, etiamsi bonitatem ejus vel simpliciter et absolute considerent, vel etiamsi sub ratione creatoris vel omnipotentis, aut alia simili naturali ratione illum contemplantur. Respondetur: si hi rudes et simplices ex pura ratione procedant, sine dubio non diligunt Deum sicut oportet, etiamsi per benevolentiam et propter ipsum, eum diligere videantur. Si autem procedant ex fide, quamvis nesciant illas rationes nostro speculativo modo distinguere, nihilominus in usu ipso et exercitio apprehendunt Deum, ut bonum quoddam excellentioris ordinis, et hoc satis est ut per gratiam ad supernaturalem amorem eleventur. Simile enim argumentum fieri potest de fide et modo credendi sicut oportet, quia simplices non discernunt quomodo nitantur primæ veritati in credendo, et nihilominus vere credunt sicut oportet, confuso et simplici modo apprehendendo hanc doctrinam ut divinam et a Deo traditam, et illi simpliciter propter Deum assentiendo. Et fere in omnibus operibus infusarum virtutum est hæc doctrina necessaria.

23. *Satisfit tertiæ probationi in eodem num. 1.* — Ad tertiam probationem, ex fide illo casu de vidente Deum, et non habente supernaturale auxilium ad amandum, habente tamen paratum generalem concursum, respondeo in eo casu hominem illum dilecturum esse Deum super omnia, non tamen amore charitatis, sed naturali. Unde si homo ille simul cum visione Dei haberet naturalem scientiam et cognitionem Dei sufficientem ad amandum ipsum super omnia, ille homo non haberet duos actus amoris Dei, sed unum, fortasse accidentaliter magis perfectum, quia forte ratione visionis voluntas operaretur toto conatu et intentione, facilius quam sine illa. Vel saltem amor ille qui, seclusa visione, non esset necessarius quoad exercitium, ratione visionis necessario exerceretur, nunquam tamen ascenderet ad nobiliorem speciem ex defectu virium potentiæ naturalis. Et ob eandem causam, etiamsi homo ille non haberet aliam cognitionem Dei præter visionem, etiam amaret Deum toto conatu naturali, eundem tamen actum amoris eliceret, quia solum amaret Deum ut bonum quoddam connaturale sibi, a quo scilicet sua natura essentialiter manat et pendet.

Quia licet sic intuens Deum, in illo videat excellentiam illius bonitatis, ut tribus personis communicatam, vel fortasse etiam ut communicabilem hominibus per gratiam altioribus modis quam per naturam; nihilominus non diligit eum in illo casu sub illa excellenti ratione, sed tantum modo suæ naturæ accommodato, et ipsamet excellentiam illius bonitatis quasi naturaliter amaret, quatenus est unum cum ipso Deo, a quo hominis natura essentialiter pendet, quia non potest facultas voluntatis per se altius elevari, ut declaratum est. Altera difficultas in fine argumentorum proposita, in capite sequenti tractabitur.

CAPUT XV.

UTRUM AD AMANDUM DEUM AUCTOREM GRATIÆ AMORE ETIAM IMPERFECTO, SIT PER SE NECESSARIUM GRATIÆ SUPERNATURALIS AUXILIUM?

1. *Primum dubium.* — *Resolutio* — *Deus auctor gratiæ potest naturali amore diligi.* — Duo dubia in hoc titulo insinuantur. Unum est, utrum Deus, ut auctor gratiæ, vel, quod perinde est, ut objectum beatificum, possit amari aliquo amore naturali sine speciali auxilio gratiæ? Et de hoc nihil novi superest dicendum, ideoque propter dubium in hoc sensu propositum, caput hoc non institueremus. Ita enim illud definiendum est, sicut in capite 5 de actu fidei traditum est, nimirum, posse voluntatem nostram aliquo amore naturali ferri in Deum trinum et unum, auctorem gratiæ, etc. Probatur, quia omnes illi qui habent notitiam aliquam et credulitatem aliquorum supernaturalium mysteriorum nostræ fidei, ad Deum pertinentium, quamvis Catholicam et infusam fidem non habeant, possunt aliquo modo diligere Deum ita sibi propositum, verbi gratia, trinum et unum, glorificatorem et sanctificatorem hominum, ut notum est in hæreticis, et ex parte in Judæis, quatenus aliqua supernaturalia credunt. At isti, sicut non credunt fidem supernaturali, ita nec diligunt amore supernaturali, seu charitatis, neque perfecto, neque imperfecto; sive hoc sit, quia ex natura sua amor charitatis necessario supponat fidem infusam, sive quia saltem ex lege Dei nemini datur auxilium supernaturale ad amandum, nisi prius credat, sicut oportet, que amanda sunt, ut significavit Concilium Trident., sess. 6, cap. 6. Altero enim ex hiis modis necessario supponi debet fides ante amorem supernaturalem voluntatis, ut latius

probandum est in materia de fide, ubi hac ratione inter alias ostendemus fidei actum esse adultis ad salutem necessarium. Ergo cum hæretici et Judæi fidem infusam non habeant, ille amor non potest in eis esse charitatis, sed erit vel naturalis concupiscentiæ, vel etiam si sit benevolentia, erit ex sola complacentia naturali in tali objecto. Unde juxta doctrinam traditam talis amor non erit ex motivo supernaturali; sed solum, circa illud bonum, quod in Deo sic proposito supernaturale apparet, ex naturali propensione ad Deum, ut est auctor naturæ, a quo ipsemet necessario pendet, materialiter versabitur, ut in sequenti puncto magis explicabitur; nam in hoc nihil novi addendum occurrit.

2. *Secundum dubium in titulo capitis intentum.* — *Alia quæstio de supernaturalitate talis actus supponitur.* — Aliud ergo punctum et proprie intentum est, an ad omnem amorem Dei ex proprio motivo charitatis, id est, propter honorem Dei, ut objectum beatificum, necessaria sit gratia, etiamsi amor ille in suo ordine imperfectus sit. Quod pendet ex alia quæstione, scilicet, an ille amor in sua entitate naturalis vel supernaturalis sit. Nam profecto, si est naturalis, non solum haberi poterit sine auxilio supernaturalis ordinis, verum etiam aliquando sine quolibet speciali auxilio gratiæ. Quia imperfectus amor esse potest cum peccato, non solum habituali, sed etiam actuali, sicut possunt esse simul absolutum velle, et conditionatum nolle ejusdem objecti, id est, Volo, et Nollem; nam sic homo, cum peccat, absolute vult id in quo seipsum offendere Deum, doletque quod illi actui conjuncta sit aversio a Deo. In tali ergo amore non est magna illa difficultas extrinseca, que provenire solet ex victoria tentationum, et ex absoluto proposito non offendendi Deum, vel placendi illi in omnibus; ergo ex hac parte non est necessaria gratia specialis ordinis naturalis ad illum actum. Unde si aliunde actus ille in sua entitate naturalis sit, non erit ad illud necessarium auxilium supernaturalis ordinis; ergo nullum auxilium gratiæ erit simpliciter necessarium ad talem actum. Tota ergo quæstio ad entitatem actus revocatur, sitne supernaturalis ordinis, vel naturalis.

3. *Pars negans illum actum esse supernaturalem.* — *Probatur primo.* — *Secundo.* — *Tertio.* — Quod ergo amor ille supernaturalis non sit, probari potest primo, quia ille amor non est sicut oportet ad justitiam obtinendam; ergo ad illum non est per se ne intrinsece neces-

saria gratia; ergo non est super omnia, nec ex toto corde, et tota anima. Consequentia vero prima probatur, quia Concilia solum requirunt illud genus gratiæ ad amandum, quando amor est sicut oportet; altera item illatio nota est, quia ille modus necessitatis gratiæ solum invenitur in actibus supernaturalibus in substantia et entitate sua, ut supra probatum est. Secundo, argumentari possumus, quia ille amor potest esse in peccatore, ut probatum est, etiam de peccante actu; est autem id multo certius de peccatore in habitu; ergo talis amor non est in specie sua amor charitatis, quia in peccatore nulla est charitas infusa, nec perfecta, nec imperfecta, sicut in hæretico nulla est fides infusa, nec perfecta, nec imperfecta; ergo ille amor in se non est supernaturalis, nec infusus. Quia nulla est virtus infusa ad quam pertineat; non enim ad spem, cum sit amor benevolentiae, ut supponitur, nec ad charitatem, ut probatum est; nulla est autem alia virtus infusa quæ Deum ipsum diligendo attingat. Tertium argumentum sit, quia fidelis peccator non aliter diligit Deum hoc imperfecto amore, quam hæreticus possit illum diligere; sed in hæretico ille actus non est supernaturalis, nec charitatis: ergo nec in fidei. Et hanc sententiam aliqui moderni veram esse existimant.

4. *Assertio vera affirmans.* — *Probatur primo ex Scriptura.* — Nihilominus dicendum imprimis censeo omnem amorem Dei, ut objecti beatifici, id est, propter bonitatem in illo sic concepto spectatam, esse amorem per se infusum, et in sua specie et substantia supernaturalem, ac proinde esse actum charitatis. Hanc assertionem optime confirmat Bellarm., lib. 6 de Grat. et liber. arbitr., cap. 7, et eandem supponit lib. de Pœnitent., cap. 14, ad 5 et 6 objectionem. Et similiter Vega, lib. 6 in Trident., cap. 28, aperte supponit posse esse dilectionem supernaturalem, quæ non fiat nisi per illuminationem et inspirationem Spiritus Sancti, et non sit super omnia. Est denique assertio consentanea Scripturis, easque exponenti Augustino, et Conciliis quæ illius doctrinam mutuata sunt. Augustinus, lib. de Gratia et liber. arbitr., cap. 17, loquens de Petro, quando in nocte cœnæ dixit: *Si oportuerit me mori tecum, non te negabo*, dicit habuisse tunc parvam charitatem, id est, imperfectum amorem, quem proinde negat potuisse haberi sine gratia. Ubi licet dubitari possit quo sensu appellaverit parvam charitatem Petri, an, scilicet, quia tunc non erat super omnia, vel quia

erat remissa, ac proinde non satis firma et constans, nihilominus satis significat quemcumque talem amorem, etiam minimum, esse ex charitate, et infusum a Spiritu Sancto. Unde in cap. 48, ponderans verba Joann. 1 canonic., cap. 4: *Diligamus invicem, quia charitas ex Deo est: Sine fructu*, ait, *admoneretur* (utique homo) *perfecte diligere, nisi prius acciperet aliquid dilectionis, ut addi sibi quæreret, unde quod jubebatur impletet*. Sentiens omnem inchoationem dilectionis Christianæ esse donum Dei. Quod clare etiam docuit libro secundo contra duas Epistolas Pelagianorum, cap. 9, ubi dicit initium charitatis esse ex gratia; et licet per *initium* possit intelligi quodlibet opus honestum propter Deum factum, quo homo incipit ad charitatem disponi, a fortiori inde potest sumi argumentum, quia inter illa opera potest quilibet actus charitatis, licet imperfectus, computari; specialiter vero loquitur Augustinus de initio charitatis, de qua dixit Joannes: *Charitas ex Deo est. Nec initium* (ait) *ex vobis et perfectio ejus ex Deo, sed si charitas ex Deo, tota nobis ex Deo est*. Et consequenter probat quodcumque charitatis initium esse ex præveniente gratia; omnis autem amor Dei, ut finis supernaturalis, licet sit imperfectus, revera est quoddam charitatis initium. Unde sicut Augustinus induxit illa verba Joannis ad hanc veritatem confirmandam, ita possunt induci reliqua, quæ dicunt charitatem infundi nobis a Deo, quia non tantum de perfecta, sed de tota charitate intelligenda sunt.

5. *Probatur secundo ex Concilio Arausicano.* — Secundo, potest simile argumentum sumi ex Concilio Arausicano, cap. 25, dicente: *Neminem posse operari sine gratia, propter Deum, quod bonum est*, utique ut finem supernaturalem. Nam omnis amor benevolentiae Dei, licet imperfectus, est bonus et propter Deum, nam in ipso sistit, et propter bonitatem ejus illum amat. Idem confirmatur ex eodem Concilio dicente ibidem: *Prorsus donum Dei est diligere Deum*; ergo omnis dilectio Dei, ut finis supernaturalis, est donum gratiæ. Præterea omnis talis dilectio est opus pietatis, et de se ac ex genere suo fructifera est ad salutem. Unde si sit in homine grato, per seipsam est meritoria, et de condigno vitæ æternæ, quod esse non potest sine actuali influxu gratiæ, juxta mentem Concilii Trident., sess. 6, c. 16. Si vero sit in homine peccatore, aliquo modo disponit illum, saltem remote, ad justitiam, multo melius quam opera moralia. Dictum est

autem supra ex doctrina Patrum, ad omne opus pietatis, et conferens ad salutem æternam, qua tale est, omnino ac per se gratiam esse necessariam: ergo.

5. *Probatur tertio ratione.* — Ratio denique est, quia talis actus est ex motivo supernaturali, et hoc satis est ut sit supernaturalis, etiamsi in illo ordine maximam perfectionem non habeat. Quia non est necesse ut omnes actus alienius ordinis sint in eo summe perfecti, ut per se notum videtur, et ex cæteris virtutibus et earum actibus ostendi potest; quia non solum voluntas efficax temperate comedendi, sed etiam bonus affectus simplex ad honestatem temperantiæ, et desiderium, licet imperfectum et inefficax, temperate vivendi, est ex virtute temperantiæ, quia participat honestatem ejusdem speciei, licet imperfecto modo. Idem ergo cum proportione est in affectibus charitatis; omnes enim ad eundem ordinem amoris pertinent, et sunt veluti scintillæ ejusdem ignis, licet nondum perfectum ignem accendant.

7. *Resolutio secundi dubii in num. 2 positi.* — *Auxilium gratiæ ad hujus actus entitatem per se est necessarium.* — Atque hinc colligitur ad quemcumque actum hujus amoris, licet imperfectum, esse necessarium gratiæ auxilium, non solum per accidens, propter difficultates corporis, vel concupiscentiæ, vel aliarum tentationum, sed per se, propter entitatem actus. Probatur ex proxime dictis, quia isti actus sunt ejusdem ordinis cum perfecto amore charitatis; ergo in sua entitate et substantia sunt supernaturales; ergo liberum arbitrium natura sua est impotens ad illos efficiendos, etiamsi nulla alia difficultas occurrat; ergo per se indiget auxilio gratiæ, ut illos possit efficere. Item ad opus pietatis, quod ex se et ex vi sui objecti tale est, et ad gratiam aliquo modo disponit, per se et intrinsece est necessarium gratiæ auxilium, ut fieri possit; talis autem est ille actus; nam per se et natura sua tendit in Deum finem supernaturalem, et in illo genere honestatem habet; ergo. Major declaratur ex supra dictis, quia dupliciter potest opus esse pietatis, et conducere ad vitam æternam. Primum, non ex se, sed ex sola relatione, seu imperio alterius actus superioris ordinis, quomodo opera virtutum acquiritarum possunt pie fieri, et sic conferre ad vitam æternam, licet ex se et nude sumpta opera proprie pietatis non sint, ut supra libro 4 est explicatum, et ad hæc opera per se spectata non est necessarium per se auxilium gratiæ, sed solum ob difficultates occurrentes. Quando

autem pie fiunt, est per se necessarium superius auxilium ad actum imperantem, a quo habet actus imperatus, ut actus pietatis sit. Alio modo potest esse actus pietatis ex se et ex vi sui objecti et entitatis, et qui talis est, eo ipso per se requirit supernaturale auxilium, quia non habet quod sit opus pietatis ex imperio alterius actus, sed per se et solitarie factus talis est, et ideo nunquam fieri potest sine auxilio; hoc ergo modo est necessaria gratia ad amorem etiam imperfectum, si ex motivo supernaturali fiat.

8. *Differentia inter amorem super omnia, et quemcumque alium ejusdem ordinis non super omnia.* — Potest autem in hoc constitui differentia inter amorem charitatis super omnia, et quemcumque alium amorem non super omnia ejusdem ordinis, quod amor super omnia non habetur sine Spiritu Sancto inhabitante per gratiam habituales, alius vero quilibet haberi potest sine gratia habituali per motionem Spiritus Sancti. Quæ tamen differentia sano modo intelligenda est. Nam si loquamur de gratia efficiente, seu eliciente amorem, sicut illa non est simpliciter necessaria ad eliciendum amorem imperfectum, seu non super omnia, ita etiam non est simpliciter necessaria per modum principii ad eliciendum amorem super omnia. Nam cum primum incipit homo diligere Deum super omnia, ut a peccato exeat, amor ille primus non elicitur ab habitu, ut indicatur a Concilio Trident., sess. 6, cap. 6, et infra probabimus. Et e converso, sicut post comparatum infusum habitum dilectio super omnia ab illo elicitur, ita etiam affectus alii minus perfecti, dummodo ejusdem ordinis sint, per eundem habitum fiunt, quia sub eadem ratione objecti fiunt, comprehendunturque sub tota latitudine illius, et ita etiam conaturali modo fiunt. Differentia ergo solum est, quod amor super omnia semper requirit gratiam habituales, vel antecedentem, vel saltem consequentem ordine naturæ, simul autem tempore, quia amor super omnia est ultima dispositio ad habitum charitatis, ut infra dicemus; at vero amor imperfectus potest etiam tempore præcedere habitum charitatis et gratiæ; imo frequentius ita contingit.

9. *Ad primum fundamentum in num. 3.* — *Ad secundum ibid.* — *Ad tertium in eodem n. 3.* — Ad primum ergo fundamentum positum in particula, *sicut oportet*, quam addunt Concilia, respondetur hunc etiam amorem esse sicut oportet, non quidem ad obtinendam statim

perfectam justificationem et remissionem peccatorum, sed ad inchoandam aliquo modo justificationem, disponendo remote ad illam, vel aliquod majus auxilium impetrando, et hoc satis esse ut actus gratiæ et supernaturalis sit. Imo Vega supra existimat Concilium abstinuisse a verbo, *super omnia*, ut omnem dilectionem infusam comprehenderet. Adde Concilium Arausicanum, c. 7, latius posuisse illam particulam, *ut expedit*, utique ad faciendum aliquid quod ad salutem pertinet vitæ æternæ, et cap. 25 duas apposuisse, scilicet, *diligere sicut oportet, et operari propter Deum*, et prius dixerat, *prorsus Dei donum esse diligere Deum*. Complectitur ergo omnem amorem Dei ut finis supernaturalis, nam omnis ille de se aliquo modo confert ad salutem. Ad secundum, jam dictum est posse peccatorem hunc imperfectum amorem Dei ex auxilio et motione Spiritus Sancti concipere, neque est inconveniens, imo consentaneum providentiæ divinæ gratiæ, ut interdum peccator inflammetur ad hos affectus, ut paulatim ab imperfecto ad perfectum procedat. Neque propterea dicendum est peccatorem posse charitatem habere, quia charitas absolute dicta, vel significat habitum, vel absolutam conversionem animæ in Deum gratiæ auctorem per amorem perfectum. Potest autem dici peccator habere interdum quamdam inchoationem vel initium charitatis per Spiritus Sancti motionem, ut Augustinus loquitur. Ad tertium respondetur negando assumptum: nam is qui fidem infusam habet, potest interdum, non ab illa, sed ab aliqua cogitatione naturali, vel humana fide excitari ad aliquem Dei amorem, et tunc non aliter amabit Deum quam hæreticus, vel alius infidelis habens similem de Deo cogitationem; et nihilominus, si fide sua utatur, et per illam excitetur ad cogitandum altiori modo de bonitate, tunc etiamsi prodeat in actum imperfecti amoris, amabit altiori et nobiliori modo quam infidelis, ut satis explicatum est.

CAPUT XVI.

UTRUM AD ALIQUOS ACTUS MORALIUM VIRTUTUM SIT PER SE NECESSARIA GRATIA, EO QUOD IN SPECIE SUA SUPERNATURALES SINT?

1. Statui in hoc tractatu omnia, quæ ad divinam gratiam nobis inhærentem spectant, complecti; tum quia omnia sub illius objecto comprehenduntur, ideoque nec exacte cognoscitur neque exhauritur si aliqua omittantur;

tum quia, cum hæc omnia sint inter se connexa, et ex eisdem principiis pendeant, vel non satis explicari possunt, cum disputatione sejuunguntur, vel eadem sæpius repetere necessarium est. Ob hanc ergo causam, totam generalem doctrinam de habitibus et virtutibus infusis in discursu hujus operis tradere deerevi, et quia habitus per actus cognoscuntur, ideo sicut de necessitate gratiæ ad actus theologicos hætenus diximus, consequenter dicendum sequitur de ejusdem gratiæ ad morales actus necessitate. Quamvis enim in primo libro de actibus acquisitis satis dictum sit, hic videndum est an, in materiis moralibus earumdem virtutum, exerceantur a justis vel fidelibus aliqui actus per se infusi et supernaturales, ad quos sit necessaria gratia, non tantum ex accidenti, propter impedimenta lapsæ naturæ, sed per se propter naturam et speciem talium actuum.

2. *Ratio dubitandi ostenditur primo. — Secundo. — Tertio.* — Ratio ergo dubitandi esse potest, quia materia horum actuum et honestas illorum mere naturalis est; ergo etiam ipsi actus sunt naturales; ergo non est per se necessaria gratia ad illos, et ad singulos illorum. Probatur prior illatio, in qua est difficultas, quia non potest circa eandem materiam excogitari species actus nobilioris rationis et ordinis, ad quam totam per se sit necessaria gratia, quia illa species deberet sumi ex aliquo objecto supernaturali, ibi autem nullum est. Secundo argumentor, quia si esset necessaria gratia ad hos actus, maxime ut fiant meritorie, et propter supernaturalem finem; sed ad hoc non est necessaria specialis gratia, præter eam quæ ad fidem et charitatem datur; ergo propter ipsos actus non est per se necessaria. Probatur minor, quia supposita gratia sanctificante personam, per fidem charitate operantem referuntur hi actus ad finem supernaturalem, et ita fiunt meritorie: ergo non est necessaria propria gratia propter speciem seu entitatem talium actuum. Tertio, Concilium Tridentinum, sess. 6, canon. 3, specialiter de actu fidei, spei, charitatis, poenitentiae, definit ad illos esse necessariam gratiam; ergo quamvis de aliis non neget, tacendo significat illam necessitatem non ultra extendi, vel certe nos non tenemur aliam admittere: illa enim gratia quæ ad illos actus datur, est sufficiens ad justitiam, et consequenter ad salutem; ergo non est necesse gratiæ necessitatem, quæ sit per se et ex natura ipsorum actuum, ad alios extendere.

3. *Ostenditur quarto. — Quinto.* — Quarto ac præcipue argumentor, quia prudentia, quæ dicitur de agendis in materiis moralibus, non elicit supernaturale iudicium, sed naturale; ergo electio moralis illi respondens naturalis est; quia prudentia est regula et astringa virtutum moralium, et ideo ejuſdem ordinis sunt; ergo non est necessaria per se gratia ad tales actus, cum naturales sint. Primum anteedens patet, quia iudicium prudentiæ est practicum, et in particulari fertur perspectis omnibus circumstantiis, unde semper pendet ex humanis conjecturis: quapropter licet sæpe fundetur in aliquo principio universali supernaturali, nihilominus semper applicatur ad opus media propositione aliqua naturaliter cognita, ut, verbi gratia, quod hic et nunc occurrat materia talis virtutis; ergo semper iudicium prudentiæ erit naturale, quia sequitur debiliorem partem, sicut iudicium theologicum naturale est, licet ex præmissa de fide cum alia naturaliter cognita eliciatur. Ultimo confirmatur, quia si darentur tales actus supernaturales virtutum moralium, possent esse in homine existente in peccato mortali, quia status peccati non impedit quominus aliquis possit in materia morali recte operari secundum omnem honestatem quæ in materia illa reperitur; consequens autem videtur falsum, alias omnes virtutes morales infusæ essent in peccatore, quia ubi est actus potest esse habitus: hæc enim ratione manent in peccatore fides et spes: consequens autem non admittitur; ergo.

4. *Negativæ partis auctores.* — De hoc puncto pauca invenio a Theologis in propriis terminis dicta, quia non de actibus, sed de habitibus virtutum moralium quæſtionem movent, an sint aliqui per se infusi, necne? Qui autem negant virtutes morales per se infusas, consequenter negare coguntur actus talium virtutum per se etiam infusos, seu supernaturales, quia si homo posset elicere morales actus in substantia supernaturales, non negaremus illi habitus ejuſdem ordinis, quibus fieret intrinsece potens ad tales actus efficiendos; ergo e converso qui negant habitus, plane non cognoverunt tales actus. Atque ita possunt pro hac sententia allegari Henricus, Scotus, Durandus, Argentinus, Marilius, Gabriel et Ocham, quos in quæſtione de habitibus in sequenti libro referemus. Deinde etiam possunt pro hac sententia allegari qui negant theologales actus supernaturales quoad substantiam, quia multo altius et magis supra naturam est objectum

theologorum actuum quam moralium; ergo si theologales actus non sunt supernaturales, multo minus actus morales.

5. *Vera resolutio affirmativa.* — Nihilominus dicendum est in materiis virtutum moralium exerceri posse ab homine Christiano actus honestos supernaturales in sua substantia et specie, ita ut ad illos et singulos illorum sit necessaria gratia per se, non tantum propter impedimenta, vel difficultates extrinsecas, ac subinde non tantum in natura lapsa, sed etiam in integra illa necessitas inventa sit. Pro hac sententia allegari possunt omnes qui ponunt morales virtutes infusas per se, quos libro sequenti referemus. Verumtamen, quamvis consequentia evidens sit, nostra sententia, multi tamen Doctores, negantes theologicos actus supernaturales quoad substantiam, admittunt habitus theologicos per se infusos; ergo e contrario, ex eo quod virtutes morales per se infusas agnoscant, non sequitur agnovisse actus morales in substantia supernaturales, cum id non declarent. Et ita Gabr. in 3, distinct. 33, art. 3, dub. 2, et Ocham, in 3, quæst. 12, art. 4, dub. 5, admiserunt virtutes morales per se infusas, licet actus supernaturales quoad substantiam, etiam theologales, negaverint. Et similiter Cajetanus, qui alias negat actum etiam charitatis quoad substantiam, admittit virtutes infusas morales 1. 2, quæst. 63, art. 3, quamvis, in probatione illius opinionis de habitibus, videatur, vel invitus, similes actus agnoscere, ut statim dicam. Ex modernis vero tenuit hanc sententiam Valentia, 2 part., disp. 5, quæst. 6, punct. 4. Et expressius Vasq., disput. 86, cap. 2. Estque aperta sententia D. Thomæ 1. 2, quæst. 63, art. 4, et quæst. 1 de Virtutibus in communi, art. 10, præsertim ad 8, 9 et 10.

6. *Prima ratio.* — Ratione potest hæc sententia probari, primo ex habitibus, quia dantur homini iusto virtutes morales per se infusæ; ergo dantur propter actus supernaturalis ordinis, qui non possunt esse tales ratione alicujus modi accidentaliter, quia nullus fingi potest propter quem eliciendum sit necessaria virtus per se infusa, ut manifeste probant omnia adducta cap. 4, quæ hic cum proportionem applicari possunt; ergo etiam dantur actus virtutum moralium ordinis supernaturalis secundum speciem suas. Consequentia, ut dixi, est evidens, et ibi est satis probata. Nihilominus tamen in præſenti non est ratio efficax, nisi ex suppositione, quia antecedens quod supponitur, hic non est tam certum,

sicut in virtutibus theologicis, nec potest ita auctoritate persuaderi : utendo autem solo discursu et ratione, potius probandum est dari habitus ex actibus quam e converso, quia habitus propter actus dantur, et ideo potius ab actibus ad habitus procedendum est.

7. *Secunda ratio ex inductione.* — *Probat de gratitudine — De Religione. — De Pœnitentia. — De obedientia.* — Secundo, probari potest assertio inductione, distinguendo in duos ordines virtutes morales. Quædam enim sunt quæ Deum respiciunt, saltem ut objectum *Cui*, quod non proxime et immediate, sed per medium aliquod attingunt, ut sunt Religio, Pœnitentia, vel Justitia, si quæ est ad Deum specialis, etc. Aliæ vero sunt quæ circa materias creatas omnino versantur. Et de prioribus videtur, et per se verisimilius et ad probandum facilius, in materiis illarum virtutum dari actus quoad substantiam supernaturales, quia sunt virtutibus theologicis propinquiores, et cum proportione attingere possunt Deum sub rationibus excellentioribus quam natura possit. Quamvis autem Deus non sit tam proximum objectum harum virtutum moralium, sicut est theologalium, nihilominus etiam concurret in ratione objecti suo modo ad specificationem talium actuum : ergo cum Deus, in ratione objecti *cui*, possit etiam attingi sub rationibus supernaturalibus, etiam poterit attingi per actus quoad substantiam supernaturales. Item in ipsis actibus vel rebus per quos hæc virtutes attingunt Deum, possunt rationes supernaturales intervenire, ut inductione quadam ostendi potest. Nam gratitudo ad Deum, vel religio gratias agit Deo propter beneficia supernaturalia, et quia altiori modo et per nobiliorem communicationem sua bona in nos effundit, quam per naturalia beneficia, et similiter eadem religio orat Deum modo superiori, et per actus supernaturales, ut ostendi in secundo tomo de Relig., tract. 1, libro 1, cap. 25, et in universum de toto cultu religionis, tom. 1 de Relig., tract. 1, lib. 2, cap. 1. Et certe qui consideraverit excellentiam sacrificii hujus religionis, facile intelliget non posse oblationem ejus, sicut oportet, per voluntatem mere naturalem fieri. Item in cultu Sanctorum, Reliquiarum, etc., inveniuntur rationes supernaturales, quæ non nisi per supernaturale lumen regulari, et per gratiam exerceri possunt. In virtute etiam pœnitentiæ, ut est quædam justitia ad Deum, invenitur voluntas satisfaciendi Deo pro offensa, cum tamen satisfactio supernaturalis sit, et

ratio offensæ divinæ sit suo modo supernaturalis. Quia vel illa ratio injuriæ divinæ, quæ est in peccato, omnino non cadit sub cognitionem naturalem, vel non eo modo, neque in eo gradu quo per fidem creditur, ut latius tractavi in tom. 4 tertiæ part., disp. 3, sect. 6, præsertim in fine. Ubi hanc voluntatem satisfaciendi Deo cum voluntate credendi æquiparavi, quia revera in utraque militat eadem ratio; nam utraque moralis est, et utraque solum attingit Deum ut objectum *cui*, et utraque movet ad aliquid supernaturale præstandum. Denique etiam actus obedientiæ ad Deum prout ab homine Christiano concipitur, supernaturalem habet materiam, nam vult obedire Deo, etiam supernaturalia præcipienti, quod excedit naturales vires, quia conformitas illa ad supernaturale præceptum, et debitum quod inde nascitur, altioris ordinis est; in materia ergo harum virtutum, et in objectis earum facile cernitur supernaturalitas sufficiens ad dandam actibus speciem altioris ordinis.

8. *Ostenditur præterea de prudentia.* — Hinc vero fieri potest conjectura de aliis virtutibus, nam imprimis necessarius erit actus infusus prudentiæ, qua prædicti actus dirigantur. Nam judicium practicum, quod præceptum supernaturale servandum sit, non potest esse acquisitum, sed infusum, idemque est de judicio quod orandum sit, vel sacrificandum Deo tali modo, et aliis similibus. Hæc autem ipsa prudentia infusa, quæ in materiis harum virtutum ita judicat, potest etiam in materiis aliarum virtutum idem facere, de illisque ex rationibus superioribus ita judicare, ut actus voluntatis qui ad illam proportionem servant supernaturales sint, ut maxime cernitur in actu martyrii, in custodia virginitatis, et in corporis mortificatione propter spiritualem animæ profectum, et similibus. Et hanc prudentiam videtur vocare Paulus, ad Rom. 8, *prudentiam spiritus*, et de his, qui illa gubernantur, ait *non secundum carnem ambulare, sed secundum spiritum*, id est, secundum motionem gratiæ et Spiritus Sancti, unde adjungit *prudentiam spiritus esse vitam et pacem*. Quæ omnia indicant actus ejus esse supernaturales, et per se ad salutem æternam pertinentes.

9. *Tertia ratio a priori.* — Tertio, hoc magis declarabitur et confirmabitur ratione universali, et a priori, quia actus virtutum moralium non distinguuntur ex solis materiis, sed proprie et formaliter ex motivis et rationibus operandi circa talem materiam : sed in

his materiis dantur motiva sufficientia ad distinguendos actus supernaturales a naturalibus etiam secundum species et substantias eorum; ergo dari possunt tales actus moralium virtutum, qui ex objectis supernaturales sint. Major propositio constat primo ex generali ratione objecti specificantis actum, quod non debet esse tantum materiale, ut in capite 6 vidimus. Hoc enim maxime habet verum in virtutibus moralibus. Nam, ut dixit Aristoteles, 2 Ethicor., cap. quarto, ad operandum studiose, non satis est facere quod honestum est, sed oportet operari quia honestum est: honestas ergo est objectum formale specificans. Unde ubi fuerit diversa honestas objectiva, erit etiam distincta virtus. Sic enim idem Aristoteles, 3 Ethicor., cap. 8, veram ab apparenti fortitudine distinguit ex motivo, etiamsi materia eadem sit, et in 3 Politicor., cap. 3, eodem modo distinguit virtutem boni viri vel boni civis. Ac denique nulla alia ratio apta ad distinguendum actus voluntatis circa eandem materiam moralem excogitari potest, cum tamen certum sit posse esse distinctos, vel ut virtutis et vitii, vel ut diversarum virtutum.

10. *Pergit ratio, et probatur minor.*— Probatur ergo et explicatur minor propositio, nimirum in materiis moralibus posse inveniri motivum ordinis supernaturalis sufficiens ad distinguendum supernaturalem actum a naturali. Quia honestas objectiva in materiis moralibus sumitur ex conformitate ad regulam rectæ rationis, vel (ut alii loquuntur) ex conformitate ad ipsam naturam rationalem, ut rationalis est, quod fere in idem redit, quia semper intervenire debet regula rationis. Natura autem rationalis spectari potest, et secundum se, et nule sumpta, vel ut elevata per gratiam; ergo in his eisdem materiis moralibus duplex conformitas intelligi potest et debet, et similiter duplex regula. Una est conformitas ad naturam rationalem secundum se, quæ per puram rationem naturalem regulatur. Alia est conformitas ad naturam gratiæ, quæ regulatur per lumen divinum et supernaturalem rationem; ergo ex his resultant duæ honestates diversarum rationum, quæ possunt esse motiva operandi actus specie diversos. Declarari hoc potest ex verbis Christi, Matth. 10: *Qui recipit discipulum in nomine discipuli, vel Prophetam in nomine Prophetæ, mercedem discipuli vel Prophetæ accipiet*: illi enim insinuatur opta illud quod materialiter videtur esse misericordiæ, si fiat homini solum quia homo est, esse ordinis naturalis: si vero fiat

quia fidelis est, et civis Sanctorum ac domesticus Dei, esse misericordiæ superioris ordinis. Sic etiam dicebat Petrus, 1 canonic., cap. 4: *Nemo patiatur ut maledicus, si autem ut Christianus, glorificet Deum in isto nomine.* Hic ergo respectus ad nobiliorem statum filiorum Dei elevat actum ultra speciem virtutum acquisitarum. Et sic potest intelligi quod Paulus, ad Galat. 5, inter fructus spiritus numerat patientiam, mansuetudinem, ac alios actus morales; quando enim isti fiunt non mere naturaliter, sed spiritualiter, habent altiolem rationem virtutis: fiunt autem spiritualiter, quando in eis consideratur conformitas ad gratiam ac veram sanctitatem, et ideo per superiores fidei regulas mensurantur.

11. *Illustratur ratio amplius.*— Potestque hæc ratio amplius declarari et confirmari, quia velle aliquid quia est conforme naturæ sensitivæ, ut sic, vel quia est conforme naturæ rationali, efficiunt actus diversarum rationum; ergo multo magis id efficiet conformitas ad naturam rationalem, ut sic, vel ad gratiam, ut talis est, seu ad divinam et supernaturalem rationem; ergo differunt tales actus, quia unus est naturalis, et alius supernaturalis. Consequentia prima clara videtur ex paritate rationis, et quia magis distat esse gratiæ ab esse naturali rationali, quam esse rationale a sensitivo. Altera vero consequentia, quæ in principali ratione etiam facta est, probatur, quia actus ex suo termino speciem sumit; terminus autem ille supernaturalis est, unde non nisi per supernaturalem rationem cognosci, nedum regulari potest; ergo etiam motiva talium actuum supernaturalia sunt; ergo et actus ipsi, juxta doctrinam capite 6 datam. Et hujus etiam argumentum est, quia sæpe medium virtutis moralis magis diversum est, comparatum ad gratiam, quam ad solam naturam, et sæpe vel abstinentia nimia, vel austeritas, et similia, judicata per puram rationem naturalem, medium rationis excedere videri possunt; quæ in ordine ad gratiam continent honestissimam mediocritatem, cujus regula supernaturalis ratio esse potest.

12. *Necessaria est per se gratia ad hujusmodi actus.*— Atque hinc ulterius colligitur ad hos actus morales superioris ordinis necessariam esse gratiam, non ex accidenti, sed ex natura illorum, requirique ad omnes et singulos, et non solum in statu naturæ lapsæ, sed etiam integræ. Hoc manifestum est ex dictis de actibus theologicis. Nam est eadem ratio, quia gratia non est necessaria propter solam

speciem vel nobilitatem actus theologicæ, sed simpliciter propter genus actus supernaturalis quoad substantiam, ut nomen ipsum præ se fert, superat enim ex vi suæ entitatis vires naturæ; ergo hic defectus virium ad tales actus est naturalis voluntati secundum se spectatæ in omni statu, et respectu cujuscumque actus talis ordinis eundem habet defectum; ac proinde auxilio gratiæ indiget. Et juxta hunc modum distinguendi hos actus infusos ab acquisitis et objectis eorum, processit manifeste divus Thomas 1. 2, quæst. 63, articulo quarto, et dicta quæstione prima de Virtut., art. 10, præsertim ad 8.

13. *Solutio primi argumenti in num. 2. — Solutio secundi ibid.* — Ad primum fundamentum contrariæ sententiæ constat responsio ex dictis; nam licet materia moralis sit eadem in actu supernaturali et naturali, nihilominus motivum et ratio est diversa, et illa eadem materia est capax motivi, seu honestatis supernaturalis, qualis a nobis explicata est, et hoc sufficit ut actus sit supernaturalis, et specie distinctus ab acquisito, seu naturali. Ad secundum respondemus imprimis nos non ponere hos actus supernaturales propter solam relationem ad ultimum finem supernaturalem. Scimus enim etiam naturales actus posse referri ad illum finem ex libera intentione operantis, et tunc non accipere ab illo fine substantialem speciem, sed accidentalem, per extrinsecam relationem, seu denominationem. Ponimus ergo hos actus propter intrinsecum objectum formale supernaturale, a quo accipit actus virtutis substantialem speciem. Atque ita respondet D. Thom., d. a. 4, ad 1, et in d. a. 10, ad 9 et 10, qui recte hinc colligit actum infusum habere proportionem ad ultimum finem supernaturalem, et aliter referri in illum quam acquisitum. Potestque ita explicari; nam actus moralis supernaturalis natura sua tendit in finem ultimum supernaturalem, et ad illum disponit, etiamsi ab operante non referatur; actus autem naturalis non ita tendit, nisi ab extrinseco quasi elevetur et ordinetur. Simili modo dicimus hos actus non poni propter rationem meriti; tum quia actus naturales possunt esse meritorii, saltem extrinsecus elevati; tum etiam quia, ut supra diximus, solus modus meriti non est satis ad explicandam supernaturalitatem actuum. Ponimus ergo illos propter intrinsecam specificationem supernaturalem quam habent, ut explicatum est. Inde vero etiam ad rationem meriti habent majorem proportionem; nam si sint in homine

grato, ex se et absque alia relatione, sunt perfecte meritorii; naturales autem semper indigent extrinseca relatione formali vel virtuali, ut infra suo loco latius explicabimus.

14. *Solvitur tertium argumentum in eodem num. 2.* — Ad tertium respondemus nos hic non agere de necessitate præcepti aut medii talium actuum ad salutem, sed de necessitate gratiæ ad ipsos actus, quæ necessitas potest optime a priori separari. Nam gratia necessaria est non solum ad actus præceptos, sed etiam ad actus consilii, si supernaturales sint, et ideo, quidquid sit de præcepto operandi aliquando hos actus, ut fiant sicut fieri possunt, gratia erit ad illos necessaria. Non est autem improbabile aliquando posse intervenire hanc obligationem, ut in actu martyrii, vel simili. Unde nihil ad rem facit, quod ex Concilio Tridentino adducitur, quia Concilium tradidit doctrinam certam, rem autem inter Theologos controversam noluit definire, illam tamen non exclusit; tum etiam quia ibi numeravit actus necessarios ad justificationem, de qua ibi tractabat; isti autem actus non sunt necessarii ad justificationem. Postea vero, in capite 16, generaliter dixit influxum gratiæ Christi esse necessarium ad fructus justitiæ, ad quos isti actus pertinent; quomodo autem ille influxus sit necessarius non declaravit, quia non pertinet ad dogmata fidei.

15. *Ad quartum argumentum in num. 3.* — In quarto principali argumento, petitur quomodo judicium prudentiæ infusæ possit esse supernaturale, cum pendeat ex conjecturis, et circumstantiis sensu vel alias naturaliter cognitis, et hujus occasione tangitur similis difficultas de assensu theologico. Sed hoc postulat longiorem disputationem ad alia loca pertinentem. Dico ergo breviter judicium prudentiæ infusæ, licet requirat cognitionem circumstantiarum particularium ut conditionem necessariam, non tamen per se fundari in illa tanquam in propria ratione assentiendi, sed in divino lumine, seu revelatione applicata ad talem materiam, mediante illa cognitione. Sicut etiam assensus fidei requirit sufficientem propositionem objecti naturaliter cognitam, non tamen in illa per se fundatur. Solum est differentia, quia revelatio fidei immediatus applicatur ad suam materiam, quam ad materiam prudentiæ. Atque idem dicere soleo de assensu theologico, si in suo ordine perfectus sit, id est, si habeat certitudinem majorem quam sit certitudo assensus naturalis, ex quo ille deducitur; nam certitudo major superna-

turalis est et ideo non potest per se fundari in assensu naturali. Sed de hoc latius in tractatu de Fide.

16. *Ad ultimum argumentum in eodem n. 3.* — In ultima confirmatione, petitur an hi actus virtutum moralium supernaturales possint esse in homine peccatore, et consequenter an gratia habitualis sit necessaria ad illos eliciendos. Aliqui affirmant hos actus essentialiter pendere ex dilectione Dei super omnia, ut finis supernaturalis est, quia ex relatione ad illum finem distinguuntur ab actibus naturalibus. Unde concludunt non posse esse in homine peccatore, nec sine gratia habituali. Potestque hoc suaderi, quia alias virtutes infusæ morales possent esse et permanere in homine, amissa gratia habituali, quia ubi sunt actus, possunt esse habitus, hoc autem communiter non conceditur.

17. *Vera resolutio.* — *Hi actus possunt in peccatore reperiri.* — Contrariam vero sententiam censeo veram. Nam illa dependentia essentialis horum actuum a dilectione charitatis Dei super omnia gratis excogitata est. Quia hi actus nec pendent ab actuali dilectione quæ tunc esse debeat, quando isti actus fiunt, ut est per se notum: vix enim possunt fieri tot actus, vel certe requirunt magnam perfectionem in operante, quæ ad tales actus necessaria non est. Neque etiam pendent ab actu præterito dilectionis virtualiter nunc influente, primo, quia ille influxus solum potest esse accidentaliter, ut supra dicebam; non est ergo simpliciter necessarius. Secundo, quia contingere potest ut aliquis sit in gratia, et nunquam prius habuerit dilectionem Dei super omnia, ut in parvulo baptizato veniente [ad usum rationis, et peccatore justificato per solam attritionem cum sacramento; ille autem potest exercere actus istos, quia etiam habitus habet, et nulla repugnantia cogitari potest; ergo naturalis relatio fundata in præcedenti dilectione super omnia non est simpliciter necessaria. Sola vero relatio habitualis ad summum potest requiri ad meritum, non vero ad substantiam actus, quia non est proprie relatio actus, sed potius personæ; ergo, quoad substantiam actus, poterit talis actus esse in peccatore, licet in illo non sit meritorius. Cum autem tales actus in sua substantia sint supernaturales et honesti, etiam in peccatore tales erunt. Tertio, licet daremus esse necessariam aliquam relationem operantis ad ultimum finem et beatitudinem supernaturalem, potest hæc fieri per virtutem spei quam pecca-

tor habet, nam hoc modo etiam peccator orare potest, vel eleemosynam facere, ut aliquo modo præparet sibi viam ad beatitudinem; ergo hoc modo non obstat quominus peccator habere possit supernaturales actus morales.

18. *Progreditur tradita solutio.* — Igitur veritas est ad substantiam horum actuum non esse necessariam relationem operantis in ordine ad ultimum finem, sed sufficere ut actus fiant ex intrinseco motivo, et objecto formali talium virtutum. Nam ab illo habet actus suam substantiam et speciem, et tunc ipsemet natura sua tendit in talem finem, ut explicatum in superioribus est. Potest autem peccator moveri ad hos actus eliciendos ex intrinseco motivo supernaturali, quia habet fidem et supernaturalem regulam; ergo potest ex illa moveri ad operandum. Atque hoc modo potest peccator habere attritionem supernaturalem, potest etiam habere voluntatem moriendi pro fide priusquam justificetur, et sic de aliis. Igitur, per se loquendo, gratia habitualis non est necessaria ad eliciendos hos actus, sed actuale auxilium potest sufficere, quod non negat Deus peccatori, si ipse velit quod in se est facere per propria auxilia. An vero, hoc non obstante, hæc virtutes morales sint per se connexæ cum gratia sanctificante, et ab illa nunquam separentur, dicemus postea. Nunc solum dicimus non esse necessarium ut Deus statim infundat habitum virtutis peccatori elicienti unum vel alium actum ejus, quia nec ibi interveit meritum de condigno, neque aliqua lex vel promissio de hoc extat.

CAPUT XVII.

UTRUM PRÆTER ACTUM FIDEI SINT IN INTELLECTU SPECULATIVO ALIQUI ACTUS SUPERNATURALES, PROPTER QUOS GRATIA PER SE NECESSARIA SIT?

1. *De Spiritus Sancti donis agendum.* — Diximus de necessitate gratiæ ad proprios actus virtutum theologalium et moralium divini ordinis; nunc superest dicendum de quibusdam actibus qui, per antonomasiam, dona Spiritus Sancti dicuntur. Quamvis enim omnia bona quæ nobis a Deo communicantur, quantum ab amore ipsius procedunt, qui Spiritui Sancto appropriatur, possint late vocari Spiritus Sancti dona, et specialius ea quæ ad gratiam pertinent et ad salutem æternam conducunt; specialissime vero appropriatum est a Theologis hoc nomen quibusdam superna-

turalibus perfectionibus quæ justis a Spiritu Sancto dantur, de quibus tractat generatim D. Thom. 1. 2, quæst. 68, et speciatim 2. 2, in tractatibus de singulis virtutibus, quibus dona annectuntur : alii vero Theologi in 3, distinct. 34 et 34, qui præcipue tractant de habitibus, et per occasionem aliquid attingunt de actibus ; nobis autem visum est (sicut de virtutibus moralibus dixi), ad complementum hujus libri, qui est de necessitate gratiæ ad actus supernaturales, oportere de his actibus hoc loco sermonem habere, et per illorum cognitionem ad ea quæ de habitibus dicenda sunt viam parare.

2. *Colliguntur Spiritus Sancti dona ex Scriptura.* — Prius autem scire oportet disputationem hanc de actibus donorum fundatam esse a Theologis in loco Isai. 11 : *Requiescet super illum spiritus Domini, spiritus sapientiæ et intellectus, spiritus consilii et fortitudinis, spiritus scientiæ et pietatis, et replebit eum spiritus timoris Domini.* In quibus numerantur septem speciales perfectiones ad actus intellectus et voluntatis pertinentes. Nam primum illud membrum : *Requiescet super illum spiritus Domini*, non continet specialem effectum, sed quasi genus ad cætera dona, quæ sunt quasi species. Sic Tertul., lib. 5 contra Marcion., cap. 8 : *Requiescet (inquit) super illum spiritus Domini. Dehinc species ejus enumerat, spiritus sapientiæ, etc.* Videtur autem ibi nominari effectus sub nomine causæ, ut donum a Spiritu Sancto procedens spiritus Domini vocetur. Unde Nazianzenus, orat. 43 in Sanct. Pentecost., hunc attingens locum : *Isaias (inquit), ut opinor, spiritus operationem spiritum appellare solet.* Vel certe ipse spiritus Domini a suis effectibus et donis multipliciter denominatur, ut Hieronym., Cyrillus et Origenes ibi exponunt : idemque spiritus Domini dicitur requiescere in eo cui confert dona sua ; vel certe ipsa dona, seu effectus spiritus appellantur a Propheta spiritus, ut denotetur fieri in nobis per motionem Spiritus Sancti adeo singularem et excellentem, ut per antonomosiam spiritus Domini vocentur.

3. *De Christo Domino loquitur Propheta.* — *Ad alios tamen homines extenditur.* — Notandum præterea est ad litteram solum de Christo Prophetam loqui, et in illo prædicare requieturum Spiritum Sanctum cum his donis suis, quod manifestum est ex contextu : *Egredietur virga de radice Jesse, et flos de radice ejus ascendet.* Per virgam enim Virginem, et per

florem Christum Sancti intelligunt, Hieronymus et Cyrillus ibi, Augustinus, lib. 3 de Symbolo ad Catechum., cap. 4. Subjungitur autem : *Et requiescet super eum spiritus Domini* ; igitur super florem Christum, ut iidem Patres exponunt, spiritus cum donis suis requiescet, ut etiam optime Bernard., serm. 2 de Annuntiat., Cyprian., lib. ad Quir., c. 11. Nihilominus tamen verba illa ad cæteros justos iidem Patres extendunt, vel quia Christus non sibi soli, sed nobis etiam illa accepit, vel quia de plenitudine ejus omnes accepimus ; in Christo enim fuerunt illa dona cum plenitudine tanquam in exemplari. Et hoc sentit Chrysostomus in Psalm. 44, ubi eundem Isaiæ locum de Christo tractans, ait : *Nos de plenitudine ejus accepimus* ; et infra : *Sed illic quidem est integra et universa gratia, in hominibus autem parum quid, et gutta ex illa gratia.* Augustinus etiam, serm. 199 de Tempore, cap. ult., dicit nos repleti septiformi spiritu, sicut Isaias prophetaverat, et prædicta verba subjungit. Item serm. 17 de Sanctis, 1 de Annuntiat., dicit Isaiam ibi *septem illa notissima dona spiritualia commendare*, quæ nobis cum Christo communia esse intelligit. Addit vero Christo, tanquam magistro et doctori attribui, incipiendo a sapientia, descendendo usque ad timorem, id est, humilitatem, in nobis vero debere a timore incipere, ut ad sapientiam perveniat. Quem discursum latius prosequitur lib. 2 de Doctrin. Christ., cap. 7, et lib. 1 de Sermon. Domini in monte, cap. 4 ; et fusius Ambros., Apocal. 4, vel alius sub ejus nomine.

4. *Idem docent alii Patres.* — Simili modo Hieronymus, in Isaiam, hæc septem dona intelligit prædicta esse futura in Christo tanquam in capite, ut intelligamus quod, *absque Christo, nec sapiens quis esse potest, nec intelligens, nec consiliarius, nec fortis, nec eruditus, nec pius, nec plenus timoris Dei.* Et Cyrillus, lib. 2 in Isaiam, parum a principio, eadem verba explicans, ait Spiritum Sanctum insedissee in Christo, *velut in ipso primo, et quasi in primitiis generis, posterioribus ut in nobis deinceps conquiesceret ac maneret, ac in credentium mentibus cum voluptate habitaret.* Ambrosius etiam Psalm. 118, serm. 5, in illa verba, *Initium sapientiæ timor Domini*, in nobis septem illos effectus Spiritus declarat ; et lib. 3 de Sacram., cap. 2, dicit omnibus baptizatis infundi Spiritum, *cum omnibus his virtutibus.* Gregorius vero, lib. 4 Moral., cap. 12, alias 28, dicit per conceptionem bonæ cogita-

tionis illas septem virtutes in nobis oriri, quas Isaias numerat, quas etiam ibi a virtutibus theologis distinguit. Et homilia 29 in Ezechielem, dicit nobis aditum ad coeleste regnum aperiri per *septiformem gratiam, quam Isaias in ipso nostro capite, vel in ejus corpore enumerat*. Et optime Cyprianus, libro de Cardin. Christi operibus, capite de Unct. Chrism. : *Ex hujus (id est, Spiritus Sancti) unctionis beneficio, et sapientia nobis et intellectus divinitus datur, et consilium, et fortitudo cœlitus illabitur, scientia, et pietas, et timor spirationibus supernis infunditur*. Et alios Patres retuli, 1 tom., in 3 part., disput. 20, sect. 1. Hinc ergo omnes scholastici infra allegandi conveniunt, verba illa ita fuisse de Christo quasi per antonomasiam dicta, ut suo modo et per participationem ad omnes justos pertineant, nam in eis etiam Spiritus Sanctus donum sapientiæ et cætera operatur.

5. *Expenduntur aliqui Patres contrarium opinantes.* — Unus Origenes, hom. 6 in Num., de solo Christo verba illa interpretatur, ita ut reliquos etiam Prophetas et Sanctos excludat, quia licet de aliis dicatur quod requievit in illis spiritus Dei, nihilominus *supra nullum alium, spiritum Dei requieverisse septemplex hac virtute describitur*. Quod latius prosequitur hom. 3 in Isai. Ad hanc sententiam videtur accedere Tertull., lib. contra Judæos, cap. 9, ubi post verba Isaiæ subjungit : *Neque enim ulli hominum universitas spiritualium documentorum competeat, nisi in Christum*. Quod repetit lib. 3 contra Marcion., cap. 17. Verumtamen non videntur Origenes et Tertullianus locuti in sensu aliis Patribus contrario, sed Origenes præcipue facit vim in verbo *Requievit*, conferendo illud cum verbo *manendi*, quo dictum fuit Joanni Baptistæ : *Super quem videris Spiritum Sanctum descendantem, et manentem*, Joan. 1. Nam illis verbis significatum esse dicit in nullo ita requieverisse et mansisse spiritum Domini, sicut in Christo, quia ab initio conceptionis, et semper sine interruptione in summa perfectione in illo requievit. Unde etiam volunt in nullo fuisse dona Spiritus cum illa plenitudine et perfectione quæ fuit in Christo; non tamen negant eadem septem dona aliis justis per Christum, et juxta uniuscujusque mensuram communicari.

6. *Assertio* — *Hæc dona sine gratia non perfectivæ.* — De his ergo donis, cum certum sit in actibus primo consistere vel per actus exerceri, certum etiam est esse actus gratiæ spe-

cialis, et non posse sine auxilio gratiæ perfici eo modo quo per Prophetam prædicuntur, et virtute promittuntur. Ita sentiunt omnes allegati Patres, et in eo etiam Theologi conveniunt : nam a Propheta satis aperte significatur; tum quia vocando hæc dona spiritus Domini, aut ab eis denominando spiritum Domini, satis indicat non inveniri in nobis perfectiones illas, nisi ex peculiari influxu et operatione Spiritu Sancti; tum etiam quia prius de Christo dixit Propheta : *Egredietur de radice Jesse*, et addit : *Et requiescet super eum spiritus Domini*, ut explicaret hæc dona divinitus fuisse addenda Christo in humanitate ejus ultra omnem perfectionem ejus, ut pura quædam natura et creatura existit; multo ergo magis in nobis per illa verba significantur dona superantia naturam. Hoc ergo supposito, superest inquirendum quales sint isti actus donorum, an scilicet sint in sua substantia supernaturales, et an sint distincti ab actibus virtutum, de quibus hactenus tractavimus. Quoniam vero ex illis actibus quatuor ad intellectum pertinent, scilicet sapientia, intellectus, scientia et consilium, et tres ad voluntatem, fortitudo, pietas et timor, in quibus distinctæ sunt difficultates, et modi explicandi rationes eorum longe diversi, ideo in hoc capite de tribus intellectualibus donis, quæ magis ad speculativam partem intellectus pertinent, in capite vero 18 de aliis donis moralibus seu ad affectum pertinentibus dicemus, et inde tandem patebit quid de consilio sentiendum sit.

7. *Prima opinio negans distingui a virtutibus.* — *Ejus fundamentum.* — Multi ergo ex antiquis Theologis, loquentes generaliter de donis, docuerunt non esse distincta a virtutibus, sed ad illas reduci, seu esse idem cum illis respective, et servata proportione. Ita censuit Scot. in 3, d. 34, q. unic. § *Ad istam questionem*, et ibi Galr., art. 2; Major ibidem, quest. 1; et ibi Palac., disp. unic.; Guliel. Paris., libr. de Virtutib., fol. 73, col. 1. Citari etiam solet Altisiod., l. 3 Summæ, tract. 11, cap. 4 et sequentibus; ille vero, licet quoad virtutes morales hanc doceat sententiam, quoad dona intellectus aliter sentit, ut infra videbimus. Et eodem modo opinatur Gerson., Ab tra. 28, lit. E, in tract. de Donis Spiritus Sancti. Eandemque sequuntur sententiam aliqui ex novis interpretibus D. Thom., ad 1. 2, quest. 68. Fundamentum hujus sententiæ est, quia nulla potest ratio sufficiens distinctionis specificæ inter actus virtutum et donorum as-

signari, et non sunt multiplicandi actus sine causa sufficiente ac necessitate. Antecedens de actibus qui ad intellectum spectant ita suadet. Quia omnis actus intellectus consistit in apprehensione vel iudicio, sub iudicio includendo non solo speculativum, sed etiam practicum, quod interdum imperium appellatur (nam revera imperium, ut a iudicio distinctum, non est actus distinctus a iudicio practice practico, nisi per modum locutionis, ut aliis locis ostendi.) Verumtamen ut ab illa quæstione abstrahamus, si talis actus datur, sub iudicio nunc illum comprehendimus. Actus autem supernaturalis non potest in sola apprehensione consistere, quia in hac vita, secundum legem ordinariam, omnis cognitio intellectualis, quantum ad apprehensionem, fit per species acquiras, et ita in substantia est actus naturalis, et solum quoad modum potest interdum perfectius, vel velocius, aut distinctius fieri, quam fortasse naturalibus viribus posset. Unde non est verisimile illos actus qui ab Isaia numerantur, vel aliquem ex illis, in sola apprehensione consistere; quia sola apprehensio est actus valde imperfectus; Propheta autem illos spiritus tanquam eximia Spiritus Sancti opera enumerat. Oportet ergo ut quilibet illorum actuum sit aliquod intellectuale iudicium. Unde etiam oportet esse certum et firmum, quia iudicium tantum opinativum et valde imperfectum est, et non potest esse ex propria et specialissima motione Spiritus Sancti, cum illi possit subesse falsum, et præterea non potest, cum proprietate, intellectus, sapientia aut scientia vocari. Deinde tale iudicium certum non potest esse evidens in nobis viatoribus, alioqui esset propria scientia, et consequenter esset per se infusa, quia supponitur esse supernaturalis actus, et de rebus captum humanum superantibus; talis autem scientia non infunditur omnibus iustis: imo nulli datur ex lege ordinaria, sed alieni forte ex privilegio; ergo tale iudicium non potest esse nisi certum et obscurum; ergo non potest esse nisi vel actus fidei, vel actus manans a fide, ut est assensus certus theologicus, vel assensus prudentiæ infusæ.

8. *Ad quas virtutes dona intellectus pertineant in hac sententia. — Scoti mens et opinio de sapientia. — Intellectus et scientia ex Scoto quid sit. — Quid item consilium. — Ex hoc ergo disensu videtur concludi actus illos intellectus, sapientiæ, scientiæ et consilii non esse distinctos ab actibus virtutum infusarum. Quomodo autem ad illos pertineant, non eo-*

dem modo a dictis auctoribus explicatur. Scotus enim putat sapientiam, de qua Isaia est locutus, non esse actum intellectus, sed voluntatis, nempe actum charitatis, qui sapientia vocatur, quatenus dat scientiæ et fidei saporem, a quo scientia sapientia nominatur, tanquam sapida scientia. Confirmat, quia ubicumque Scriptura loquitur de sapientia, ut de dono proprio justorum, per sapientiam intelligit charitatem. Citat Scotus verba Sapientis, Proverb. 14: *Beatus vir qui in sapientia morabitur.* Addi possunt illa Sapient. 1: *Neminem diligit Deus, nisi eum qui cum sapientia inhabitat.* Quæ duæ sententiæ videntur æquivalere illis duabus Joan., 1 canon., c. 4: *Qui non diligit, non novit Deum, quoniam Deus charitas est; et: Qui manet in charitate, in Deo manet, et Deus in eo.* Unde Lactantius, lib. 4 de Sapientia, cap. 3 et 4, ait, sine virtute, id est, charitate, nullam esse veram sapientiam. Et Bernardus, in dicto sermone de Septem donis, sapientiam opponit malitiæ, unde videtur, per illam, charitatem intelligere. Expressius vero Augustinus, in Epistol. 120 de Grat. novi testam., cap. 20, ait: *Sapientia est charitas Dei, nec diffunditur in cordibus nostris nisi per Spiritum Sanctum, qui datus est nobis.* Addit autem Scotus per intellectum et scientiam, fidem significari, vocarique intellectum, quatenus est simplex assensus articulorum fidei, scientiam vero, quatenus explicite ad omnes fidei veritates extenditur. Et hinc ulterius sub sapientia comprehendit spem, quia *sapit* (inquit) *mihi Deus in se, et ut mihi bonum,* et priori modo sapientia est charitas, posteriori spes. Coactus autem fuit Scotus has duas virtutes theologales sub sapientia comprehendere, quia sub illis verbis Isaia non nisi septem virtutes, tres theologales et quatuor cardinales contineri censet. Et cum unam fidem duobus nominibus intellectus et scientiæ significari dixisset, unam sapientiam charitatem et spem intelligere compulsus est. Nam consilium dicit esse prudentiam, et alias tres voces tribus moralibus virtutibus appetitivis accommodat, ut postea videbimus. Et hanc sententiam in omnibus sequitur ibi Gabriel, notab. 4, et Palacios supra. Major vero sapientiam, scientiam et intellectum ponit in intellectu speculativo, et dicit non differre a virtutibus intellectualibus, earum tamen rationes non amplius explicat.

9. *Vera sententia affirmans. — Ejus fundamentum. — Nihilominus communior sententia Theologorum hæc dona a virtutibus dis-*

inguit, ut videre licet in D. Thom. 1. 2, q. 68 generatim, et 2. 2, speciatim in variis locis infra referendis. Eumque illis locis ejus discipuli sequuntur. Idem habet D. Thom. in 3, distinct. 34; et ibi Capreol., quæst. unic.; Hispal., quæst. 1, art. 3; et ibidem Bonavent., art. 1, q. 2, a. 2, licet obscure et cunctanter, sicut et Durand., quæst. 1 et 2. Richardus vero, quæst. 1, illam sequitur, et dicit esse communem; et late ibi Albert., et distinct. 35, specialiter de donis intellectus; tenent etiam Henric., Quodlibet. 4, quæst. 23; Anton., 4 part. tit. 10, cap. 1 et 2; Abulens., Matth. 5, quæst. 31; et ex modernis Azor., tom. 1, lib. 3, cap. 30, quæst. 5; Valent., 2. part., disput. 5; Aragon. et Banez, 2. 2, quæst. 8. Fundamentum autem præcipuum hujus sententiæ est, quia Scriptura loquitur de his donis tanquam de septem actibus propriis Spiritus Sancti, et ideo vocat illos spiritus, ut D. Thomas ponderat, vel certe ipsum Spiritum Sanctum specialiter ab illis denominat; ergo significat esse distinctos ab actibus virtutum: ergo magis consentaneum est Scripturæ, ac proinde probabilius, hos esse actus distinctos. Modus autem distinguendi hos actus ab actibus virtutum, varius est apud citatos Theologos, quos magna ex parte refert divus Thomas, dicta quæst. 68, artic. 1, eosque refellit; ac tandem concludit hos actus differre ab actibus virtutum, quia sunt peculiari et specialiori modo ex motione Spiritus Sancti. Quis autem sit iste modus, ibi non explicat, nec satis potest in generali declarari, nisi ad singula dona descendendo, quod capitibus sequentibus fiet. Nunc specialiter de actibus intellectus speculativi ostendendum est non posse convenienter virtutibus attribui, et imprimis supponimus, ut per se notum, hos actus non pertinere ad virtutes morales, ex quibus tres pertinent ad affectum, quarta ad practicum intellectum; solum ergo de theologalibus videndum est.

10. *Inductione probatur vera sententia.* — *Sapientia non est formaliter charitas.* — Et primo de charitate omnes pro comperto habent, intellectum ac scientiam ad illam non spectare; probemus ergo etiam sapientiam non esse formaliter ac proprie ipsam charitatem. Quia sapientia, proprie sumpta, perfectio est intellectus et rationis, ut inter philosophos manifestum est, et in non Ecclesiæ etiam est certum. Unde est illud Augustini, serm. 3 de Tempor.: *Anima vivit, ratio sapit, nam sapientia ad rationem pertinet, et ratio sola ipsam sapientiam suscipit.* Et quamvis in non

Scripturæ vox illa multiplicem significationem habere videatur, et interdum videatur attribui voluntati, ut Job. 28: *Ecce timor Domini ipsa est sapientia*, vel, ut ex græco alii legunt: *Pietas ipsa est sapientia*, nihilominus proprie, et in rigore, sumitur pro aliquo dono intellectus, ut 3 Reg., 3, Salomon a Deo postulavit *cor docile, ut judicare posset populum*, et discernere inter bonum et malum, et tamen dixit illi Deus: *Quia postulasti tibi sapientiam*, etc.; et Baruch 3: *Viam sapientiæ nescierunt, neque commemorati sunt semitas ejus*; et infra: *Quia non habuerunt sapientiam, interierunt propter suam insipientiam*, ubi sapientia insipientiæ opponitur; hæc autem est error intellectus; sapientia ergo est vera Dei cognitio, vel *via disciplinæ*, ut ibidem dicitur.

11. *Probatur amplius ex aliis locis.* — Denique est optimus locus Sapient. 7: *Optavi, et datus est mihi sensus; invocavi, et venit in me spiritus sapientiæ*, ubi quod in priori parte *sensum* vocaverat, in posteriori *spiritum sapientiæ* appellat; sensus autem pro intelligentia ponitur: ergo et sapientia. Præterea sive dicamus auctorem illius libri esse Salomonem, ut multi probabilissime putant, sive compositum esse ex sententiis Salomonis, ut alii etiam credunt, certum est in his verbis alludere ad orationem ab ipso factam 3 Regum, 3, ubi sapientiam intellectualem postulavit, ut vidimus, ilque evidentius colligitur ex toto cap. 9 ejusdem libri. Unde cum paulo post, in 7, de eadem Sapientia diceret: *Et præposui illam regnis*, et cætera, quæ in ejus æstimationem exaggerat, concludit: *Et proposui pro luce habere illam, quoniam inextinguibile est lumen illius.* Lux autem et lumen ad intellectum pertinent, ut per se notum est. Et additur postea: *Venerunt mihi omnia bona pariter cum illa, et innumerabilis honestas per manus illius, et latus sum in omnibus, quia antecedebat me ista sapientia*, etc. Per quæ verba declarantur alia loca in quibus perfectiones affectus tribuuntur sapientiæ, vel sapientiæ nomine appellantur, locutione causali, non formali, quia divina sapientia, tanquam lux antecedens, et charitatem inducit, et bonorum omnium mater est. Nam ut infra ibidem dicitur: *Qui thesauro sapientiæ bene usi sunt, participes facti sunt amicitia Dei, propter disciplinam dñi commendati.* Ubi et sapientia ab amicitia Dei distinguitur, et hæc per illam acquiri dicitur, et cætera etiam dona sanctitati, quasi fructus disciplinæ sapientiæ esse dicuntur. Et de

hac sapientia Dei et justorum, vel Ecclesiæ, sæpe loquitur Paulus, eam ad intellectum et cognitionem referens, ut videri potest 1 Corinth., 1 et 2, et sæpe alias. Denique a contrario id confirmari potest, quia stultitia et error imperfectiones sunt intellectus; ait autem Gregorius, lib. 2 Moral., cap. 26, alias 36, sapientiam dari ut stultitiam depellat: ergo.

12. *Explicantur Scripturæ loca in contrarium adducta.* — Neque obstant alia testimonia in contrarium: nam intelliguntur causaliter, quatenus charitas causat sapientiam, vel ab illa causatur. Maxime vero ita loquitur Augustinus, ita enim dicit charitatem esse sapientiam, sicut scriptum est in libro Job 28: *Pietas ipsa est sapientia. Porro (ait Augustinus) pietas cultus Dei est, nec colitur nisi amando: summa ergo sapientia est in illo præcepto: Diliges Dominum Deum tuum. Ac per hoc sapientia est charitas Dei. Per hoc, ait, id est, quia vera sapientia ad charitatem inducit et charitas sapientiam fovet. Probant etiam dicta testimonia mentis intelligentiam non habere statum, nec mereri nomen sapientiæ, nisi cum vero Dei cultu et amore juncta sit. Vel etiam suadent esse aliquem spiritum sapientiæ, qui non nisi diligentibus Deum tribuitur: non vero quod ipsa sapientia sit formalis amor. Unde nihil refert quod sapientia a sapere denominetur, quem saporem efficit delectatio charitatis vel spei, quia aliud est unde nomen imponitur ad significandum, aliud quod significat, ut est vulgare. Sic enim licet nomen sapientiæ fortasse ab illo sapore spirituali sumptum sit, fortasse tanquam ab effectu perfectæ sapientiæ, nihilominus res significata per illud nomen, perfectio est intellectus, quæ vel spem et charitatem gignit, vel ab illis gignitur, non tamen est formaliter spes aut charitas. Nec in Patribus invenietur unquam nomen sapientiæ, secundum propriam rationem ejus, his virtutibus attributum.*

13. *Probabiliter sapientiam ad fidem recocare posset Scotus.* — Quocirca, sicut Scotus intellectum et scientiam vocat fidem, ut nullum sit in intellectu supernaturale donum præter fidem, ita posset et fortasse verisimilius dicere eandem fidem sapientiam vocari: nam sicut ipse vocat fidem, intellectum et scientiam, secundum diversas rationes vel conceptus inadæquatos illas voces uni fidei accommodando, ita posset eandem fidem sapientiam vocare, rationes illas aliter interpretando. Nam eadem cognitio nomen fidei

sortitur quasi ex objecto formali, quatenus est assensus in auctoritate Dei dicentis fundatus; alias ergo tres denominationes potest sumere ex materia, vel ex modo operandi, vel ex effectibus. Dicitur enim intellectus, quatenus est simplex intelligentia divinorum, illis præbendo assensum sine discursu, quasi primis principiis sub divino lumine. Vocabitur autem sapientia, quatenus Deus ipsum ejusque attributa contemplatur cum aliquo discursu formali vel virtuali, per rationes proprias et supremas veritates divinas cognoscendo, verbi gratia, Deum, quia est purissimus actus, esse immutabilem, et infinitum, ac omnipotentem, ac summe perfectum. Et hinc etiam illum considerat ut summe amabilem, colendum, etc. Scientia vero dicitur quatenus veritates etiam creatas et revelatas amplectitur, et ex illis ad Deum ascendit, et ex illis judicat esse etiam colendum, etc., vel e converso, quatenus in ipsis mysteriis ad humanitatem Christi, vel alia mysteria creata pertinentibus versatur, et in eis unam veritatem ex alia intelligit, ut Christum habere voluntatem humanam, quia est homo, vel quid simile. Sic enim non est novum eandem rem diversis nominibus propter diversas considerationes appellare, ut intellectus vocatur ratio superior, et inferior, et memoria, etc.

14. *Vera sententia hæc tria dona a fide distinguit.* — *Probatur primo.* — Sed nihilominus multo verisimilius videtur nullum ex donis cum fide confundi, seu esse eundem actum cum illa. Primo quidem, quia illa dona Christo primitus attributa sunt, qui non habuit fidem: illa etiam in Angelis sanctis inveniri tradit Ambrosius, lib. 1 de Spiritu Sancto, capit. 20. Unde etiam communiter docent Theologi hæc dona in beatis manere, cum Magistr., in 3, distinct. 34. Video responderi posse in Christo spiritum sapientiæ, scientiæ et intellectus non fuisse actus distinctos ab actibus scientiæ beatæ, vel potius infusæ, quatenus per illa lumina judicat de rebus divinis, tanquam de principiis, et tanquam de conclusionibus, vel per altiores, vel per inferiores causas, aut media; in nobis autem hæc inveniri inferiori modo et ratione, ac subinde per fidem. Quia non oportet ut illi actus numerati ab Isaia, inveniantur in nobis et in Christo, secundum eandem rationem, id est, ejusdem speciei essentialis, sed satis est quod sint secundum aliquam participationem, ratione cujus eadem nomina sortiantur. Quia patres supra citati, de his perfectionibus loquentes,

dicunt fuisse in Christo secundum plenitudinem, in nobis vero secundum quamdam inferiorem participationem. Et juxta hunc modum consequenter dicitur, hæc dona, secundum rationes generales sapientiæ, etc., futura esse in beatis, commutata vero in alia perfectioris et altioris rationis illi statui magis proportionata. Quæ quidem responsio non potest evidenter impugnari; re tamen vera Theologi non sunt in illo sensu locuti, quando dixerunt actus illos donorum manere in patria, nec Patres illa tribuunt Christo ratione scientiæ beatæ aut infusæ, sed tanquam diversas perfectiones eas numerant, ut dixi etiam in dicto loco tertiæ partis, et ideo cum possint aliter illa dona intelligi, ut mox videbimus, et id ad majorem gratiæ perfectionem et amplitudinem pertineat, non est cur hos actus cum actu fidei confundamus.

15. *Probatur secundo.*—Accedit quod hæc dona censentur esse propria justorum; ergo non manent in peccatoribus, etiamsi in eis maneat fides; sunt ergo actus distincti. Item in Scriptura semper innuitur distinctio istorum actuum, tam inter se quam a fide. Nam Salomon jam fidem habebat cum invocavit, et datus est illi spiritus sapientiæ. Et simili modo David orabat: *Da mihi intellectum*, Ps. 128; et de justo dicitur Ecclesiastic. 15: *Cibabit illum pane vitæ et intellectus, et aqua sapientiæ salutaris potabit illum*; et infra: *Implebit illum spiritu sapientiæ et intellectus*. Et cap. 39 de justo dicitur: *Si enim Dominus magnus voluerit, spiritu intelligentiæ replebit illum*. Et Eccles. 24, de primis parentibus: *Creavit illis scientiam spiritus*. Quæ omnia, et similia multa quæ de his donis seu perfectionibus in Scripturis leguntur, non est verisimile propter solam fidem vel ejus augmentum fuisse dicta. Præterquam quod illa ratio distinguendi in actu fidei illas denominationes est voluntaria, et non satis constans. Quia fides non solum ita denominatur in ordine ad rationem credendi, sed etiam in ordine ad rem creditam. Et in ordine ad illam distingui solet fides ab intelligentia non solum nomine, sed etiam perfectione. Unde illud Isai. 7, juxta Septuaginta: *Si non credideritis, non intelligetis*; et in pura fide non est cognitio per causas altiores vel inferiores, sed simplex assensus per Dei auctoritatem. Oportet ergo hæc perfectiones intellectus, sapientiæ et scientiæ, aliquos actus esse a fide distinctos, ac subinde ex hac parte dari actus aliquos intellectus supernaturales, distinctos a fide, qui sine auxilio gratiæ haberi non pos-

sunt. Quales autem sint, et quomodo a fide et inter se distinguantur, in sequentibus capitibus exponetur.

CAPUT XVIII.

QUIS SIT ACTUS SAPIENTIÆ SPECIALITER SPIRITUI SANCTO ATTRIBUTUS?

1. *Non procedit quæstio de sapientia extraordinario modo collata.*—*Nec de prophetia.*—Suppono non esse sermonem de extraordinario modo scientiæ et sapientiæ per se infusæ, quam Deus potest conferre de veritatibus ipsis divinis et supernaturalibus, vel etiam de naturalibus et futuris, etc., prout illas contulit plene animæ Christi, et ex parte dedit Salomoni, et forte aliis ex privilegio. Hæc enim scientia non spectat ad ordinem gratiæ gratum facientis, de qua nunc tractamus. Et eadem ratione hic non agitur de actu prophetiæ, quia spectat ad gratias gratis datas, et de distinctione illius a fide alibi dicendum est. Agimus de his actibus prout communi lege censentur dari fidelibus vitam gratiæ habentibus. Inter quos Isaias primo loco posuit sapientiam, et ideo ab illa initium sumemus.

2. *Sapientiæ explicatio ex D. Thoma.*—*Non sufficit.*—Primo igitur de actu sapientiæ varie loquitur D. Thomas; nam 1. 2, quæst. 68, artic. 4, absolute dixit donum sapientiæ dari ut perficiat intellectum speculativum in judicando ex motione peculiari Spiritus Sancti. Juxta quam sententiam, actus sapientiæ nihil aliud est quam judicium intellectus speculativi ex divino instinctu immisum. Hæc autem declaratio procul dubio non sufficit, primo, quia totum id convenit actui fidei: nam est actus intellectus speculativi quoad judicium de rebus propositis ut revelatis a Deo, et elicitus ex peculiari Spiritus Sancti motione et instinctu, ut late in præcedenti libro ostensum est. Secundo, multo magis id convenit actui intellectuali prophetiæ, nam est judicium de veritate speculativa ex singulari motione divina, ut constat. Tertio, actus etiam scientiæ infusæ in Christo, est judicium speculativum ex motione Spiritus Sancti, non enim potest aliter fieri, cum sit supernaturalis, et tamen distinguitur a dono sapientiæ, etiam in ipso Christo. Quarto, juxta illam doctrinam, omne judicium speculativum ab Spiritu Sancto immisum intellectui, erit donum sapientiæ seu actus ejus: consequens nulla ratione videtur admittendum, alias judicium de rebus creatis et inferioris ordinis, seu non pertinentibus

ad salutem, pertinebit ad unum ex propriis donis Spiritus Sancti, ut verbi gratia, quod astra sint paria vel imparia, a Spiritu Sancto inditum, vel quid simile; consequens autem est plane contra mentem Scripturæ et Sanctorum de donis Spiritus Sancti loquentium. Ad hæc vero generatim responderi potest D. Thomam in illo loco non intendisse exacte definire aut declarare propriam rationem doni sapientiæ, sed tantum communi quadam ratione illud explicare, quantum ad distinguendum illud a cæteris donis sufficeret, et hoc per illa verba sufficienter præstitisse, integram et specificam rationem doni sapientiæ in proprium locum explicandam reservando.

3. *Approbaturs responsio.* — *Obiectio.* — Quæ quidem responsio satisfacit objectionibus propositis, nam illis concedit quod intendunt, nimirum in illa explicatione non contineri adæquatam descriptionem doni sapientiæ, et ideo mirum non esse quod illæ proprietates in aliis actibus inveniri possint. Sed tunc superest explicandum quo peculiari modo sapientiæ donum iudicium speculativi intellectus perficiat, ut in hoc distinguatur ab aliis virtutibus supernaturalibus, quæ speculativum etiam intellectum in iudicando perficiunt. Et præterea insurgit nova obiectio, quia etiam per illam doctrinam non sufficienter distinguitur donum sapientiæ a dono scientiæ. Nam etiam donum scientiæ principaliter perficit intellectum speculativum, ut docet idem divus Thomas, 2. 2, quæst. 8, art. 6, et quæst. 9, art. 3, et perficit quoad iudicium, ut in dicto art. 6, quæst. 8, et in artic. 1, quæstione 19, dicit; ergo in hoc non distinguitur a dono sapientiæ. Nec etiam in hoc quod scientiæ donum non tantum est speculativum, sed etiam practicum, ut ibidem ait divus Thomas, nam idem de dono sapientiæ docet 2. 2, q. 43, art. 3; ergo ex priori doctrina data in 1. 2, non satis distinguitur sapientia a scientia, etiam in illo generali et perfunctorio modo.

4. *Solutio.* — Ad hanc vero postremam objectionem, respondeo divum Thomam intasse sententiam quoad donum scientiæ; nam 1. 2 processit supponendo donum scientiæ esse pure practicum, et ex illa hypothesis sufficienter distinxit ibi hæc dona. Postea vero docuit etiam donum scientiæ esse principaliter speculativum, et secundario practicum, qua sententia supposita, ingenue fateor priorem rationem distinguendi non esse sufficientem nec posse subsistere. Verumtamen de distinctione sapientiæ a scientia et intellectu, dicemus trac-

tando quid illa sit, quia distinctio supponit cognitionem extremorum; nunc declarandum est quid ipsa sapientia sit, et præcipue quomodo a fide distinguatur, vel in materia, vel in modo operandi circa talem materiam. Et consequenter etiam exponemus quomodo a Theologia differat, nam Theologia etiam est virtus intellectualis, et sapientia esse censetur. Omissis autem variis modis explicandi hoc donum, ut ad intellectum pertinet, duos præcipue expendemus.

5. *Opinio prima de quidditate sapientiæ, ejusque distinctione a fide.* — Primus modus explicandi hunc actum sapientiæ esse potest distinguendo in fide ipsa principia fidei, et conclusiones quæ ex illis deducuntur, ex quibus conclusionibus quædam sunt omnino supernaturales et divinæ, aliæ sunt inferioris ordinis. Sapientia itaque non versatur circa principia fidei, iudicando de illis, quia hoc est munus fidei; versatur ergo circa conclusiones deductas ex principiis fidei, non quascumque, sed maxime divinas et supernaturales. Quia sapientia per causam altissimam iudicat, teste Aristotele, 1 Metaph., c. 2, et ita sapientia simpliciter, iudicat per primam causam simpliciter, quæ est Deus: et ut sit sapientia divina, debet etiam iudicare de divinis rebus, juxta doctrinam Augustini, l. 12 de Trinit., c. 19, et ut sit sapientia supernaturalis debet esse non per studium humanum, sed modo supernaturali a Spiritu Sancto descendens, ut ait divus Thomas dicta quæst. 45, art. 1, ad 2, ubi etiam addit sapientiam differre a fide: *Nam fides assentit veritati divinæ secundum seipsam, sed iudicium, quod est secundum veritatem divinam, pertinet ad donum sapientiæ.* Non enim videtur posse intelligi quid sit *iudicium secundum veritatem divinam*, nisi iudicium de veritate aliqua deducta ex ipsa veritate divina immediate revelante priorem veritatem, ex qua alia deducitur.

6. *Impugnatur, quia sapientiam cum Theologia confundit.* — *Solutio.* — *Rejicitur.* — Hæc vero explicatio, præter difficultates quas necesse est pati in explicanda distinctione hujus doni a dono scientiæ et intellectus, de quibus statim dicemus, licet sufficienter distinguat sapientiam a fide, non potest distinguere donum sapientiæ a Theologia, ad quam pertinet iudicare de conclusionibus divinis quæ ex principiis fidei eliciuntur, et ideo etiam est et vocatur sapientia. Quod si quis distinctionem constituere velit in hoc quod Theologia acquiritur per studium humanum, donum

autem sapientiæ per infusionem et motionem Spiritus Sancti, contra hoc est, quia hæc differentia non potest esse in substantia actus, nec in ejus certitudine, sed solum in accidentaliter modo, et ita sapientiæ donum solum erit per accidens infusum. Probatur assumptum, quia actus doni sapientiæ sic explicatus non fit a nobis sine discursu, nam est deductio conclusionis ex principio fidei, quod humano modo non fit sine discursu. Neque est verisimile Spiritum Sanctum per donum sapientiæ elevare hominem ad judicandum de conclusionibus ex principiis sine discursu. Oporteret enim eodem actu judicare de conclusione in ipso principio; hic autem contrarium supponitur, nimirum, judicium de principio esse alterius rationis et altioris virtutis, quam judicium conclusionis: nam illud est fidei virtutis theologicæ, hoc vero sapientiæ. Fit ergo judicium doni sapientiæ per theologicum discursum; ergo non est unde in substantia differat a iudicio nostræ Theologiæ acquisitæ, quia utrumque iudicium nititur in eodem medio, et revelatione fidei applicata ad conclusionem mediante discursu. Solum ergo differre poterunt in modo, si Spiritus Sanctus speciali auxilio favcat ad velocius vel melius faciendum discursum, quod est accidentarium, quia semper ille discursus est naturalis, et in lumine naturali fundatur quoad illationem.

7. *Altera solutio.* — Dicit forte aliquis, assensum theologicum, si debito modo fiat, esse supernaturalem quoad substantiam, quatenus est certior ipsa naturali scientia, et ideo non esse inconveniens quod donum sapientiæ sit actus ejusdem rationis, quia nihilominus erit per se infusus et supernaturalis, pertinebitque ad donum solum propter specialem modum obtinendi illud iudicium ex peculiari motione Spiritus Sancti.

8. *Oppugnatur primo.* — Sed contra hoc obstat primo, quia, juxta illam sententiam, etiam fatendum est habitum Theologiæ esse per se infusum, et supernaturalem in substantia, quia est ejusdem ordinis cum suo actu. Unde consequitur habituale donum sapientiæ non differre in substantia ab habitu proprio Theologiæ, quia actus non differunt in substantia, et modus ille supernaturalis non cernitur in habitu, sed in actu, nec modus ille procedit per se ab habitu, sed tantum ab actuali auxilio Spiritus Sancti. Sicut eadem temperantia acquisita est quæ ex honestate naturali servat castitatem tempore tentationis,

et extra illam, licet tempore tentationis id faciat ex auxilio gratuito, et non urgente tentatione possit id facere absque auxilio: nam quando auxilium non datur propter speciem actus, sed propter modum accidentarium, tunc actus ab eodem habitu procedit: ergo fatendum erit habitum Theologiæ infundi omnibus justis, licet simplices illo utantur raro, et ex speciali instinctu, et motione Spiritus Sancti quoad modum discursus, sapientes vero vel addiscentes illo uti possint studio humano, et ideo frequentius illo utantur.

9. *Oppugnatur secundo.* — Item sequitur donum sapientiæ de se manere posse sine charitate, sicut Theologia manet sine illa: nam fidelis peccator potest elicere conclusiones ex principiis fidei, et de illis iudicium ferre. Quod si quis dicat posse quidem hoc fieri modo et studio humano, non vero ex motione Spiritus Sancti, falsum hoc est, loquendo per se, et ex vi et indigentia talium actuum: nam si Spiritus Sanctus nolit dare hanc motionem nisi justis, hoc extrinsecum et accidentarium est, et gratis dicitur, unde enim constat de Spiritu Sancti voluntate? Sæpe enim solet juvare peccatorem ad recte ratiocinandum et iudicandum ex principiis fidei, vel propter utilitatem communem, vel etiam propter aliquod bonum recipientis; et præterea, cum habitus respondens his actibus per se tantum pendeat ex fide, sicut Deus non aufert fidem propter peccatum, nec aufert talem habitum, sicut de facto non aufert a Theologo sapiente habitum Theologiæ propter peccatum quod non sit contra fidem, sive habitus Theologiæ in se naturalis, sive supernaturalis esse censeatur.

10. *Oppugnatur tertio.* — *Impugnatur quarto.* — Denique, ex illa sententia sequitur donum sapientiæ esse æque obscurum ac fidem, quia iudicium ejus essentialiter pendet ex iudicio fidei, et consequenter sequitur donum sapientiæ non manere in patria, contra D. Thomam et Theologos communiter, sicut Theologia hic acquisita non manet eadem numero vel specie in patria, quia Theologia viæ tam essentialiter est obscura, et nititur testimonio Dei, sicut fides, licet non tam immediate. Scio de Theologia respondere aliquos, Theologiam secundum se spectatam non esse obscuram, sed hoc illi accedere, et ideo manere posse cum evidentia principiorum, idemque dici posset de hoc dono sapientiæ. Sed hæc dicuntur vere de Theologia vel sapientia in genere, non tamen de hac Theologia in specie, quæ generatur ex

principiis tantum creditis, illa enim diversa est in specie a Theologia evidente, et tam essentialiter nititur testimonio, sicut fides, unde trahitur, et ideo non potest esse sine illa. Idemque erit de iudicio sapientiæ, si deductum est per discursum ex iudicio fidei, et consequenter tale donum non manebit idem numero vel specie in patria, sed aliud excellentius loco illius. Hæc incommoda occurrunt in hoc modo explicandi actum hujus doni, quæ si aliquis devoraverit, vel tolerabilia visa fuerint, poterit illum probabiliter defendere. Ego autem illum non probo; quia non est consentaneus doctrinæ D. Thomæ et Theologorum, ut illationes factæ ostendunt, quæ revera singulares sunt, et non possunt facile concedi. Et præterea, quia sapientia sic explicata non est necessaria ad justitiam, neque admodum utilis, et ideo non est cur inter dona Spiritus Sancti numeretur, et omnibus justis tribuatur: nam prout esse potest utilis ad commune bonum Ecclesiæ, potius ad gratias gratis datas pertinebit.

11. *Secunda opinio.* — *Difficultas contra hanc opinionem.* — Secundus ergo modus explicandi actum hujus doni est, ut immediate versetur circa ipsa dogmata fidei, ea præsertim quæ ad Deum ipsum pertinent, et in hoc cum fide conveniat, differat autem in actu quem circa illam materiam exerceat. Quam diversitatem D. Thomas, dicta quæst. 45, art. 1, ad 2, his solis verbis explicuit: *Sapientiæ donum differt a fide, nam fides assentit veritati divinæ secundum seipsam, sed iudicium, quod est secundum veritatem divinam, pertinet ad donum sapientiæ.* Quæ verba sine dubio sunt valde obscura. Quid est enim assentire secundum veritatem divinam, nisi propter veritatem divinam assentire? Hoc autem facit fides credendo primæ veritati; ergo assentit secundum veritatem divinam; ergo in hoc non differt a sapientia. Vel e converso, si sapientia iudicat secundum veritatem divinam, eadem veritas divina est illi ratio iudicandi: ergo etiam ipsa assentit veritati divinæ. Denique vel D. Thomas loquitur de veritate divina tantum ut de re cognita, et sic non est differentia, quia de eadem veritate iudicant fides et sapientia: vel loquitur de veritate divina, ut ratione assentiendi, et sic idem est assentire divinæ veritati, vel iudicare secundum ipsam; vel fidei attribuit primam veritatem, ut rationem assentiendi, et sapientiæ solum, ut rem cognitam, et tunc oportet exponere sub qua ratione donum sapientiæ versetur circa veri-

tatem divinam, cum illius non habeat maiorem evidentiam, nec perfectiorem cognitorem quam fides, imo neque æque perfectam.

12. *Cajetani distinctio et solutio.* — *Confirmatur exemplo.* — Cajetanus ibi hac difficultate oppressus distinctionem excogitavit inter assensum et iudicium, dicitque donum sapientiæ et fidem non differere in materia, nec in ratione assensus, sed in actu; quia fides assentit veritati divinæ, sed non iudicat, sapientia vero iudicat. Differentiam autem inter assensum et iudicium in hoc constituit, quod assensus est sola determinatio ad alteram partem contradictionis, iudicium vero est *determinatio rei, ut est, vel esse debet.* Quæ duo dicit sese quidem mutuo inferre, formaliter autem differre, et assensum priorem esse iudicio secundum naturam. Quod declarat exemplo, quia in quæstione, verbi gratia, de conceptione Virginis sine peccato, qui ignorat quæ pars contradictionis vera sit, abstinet a iudicio, et nihilominus determinando se ad unam partem, credit illam. Postea vero addit Cajetanus etiam fidem iudicare secundum causas altissimas, non tamen cum tanta perfectione, quin egeat iudicio sapientiæ, de quo etiam ait non esse alium actum a iudicio fidei, sed eundem alio modo, scilicet, ex instinctu Spiritus Sancti.

13. *Distinctio Cajetani exploditur, et ostenditur assensum et iudicium idem esse.* — Ego vero intelligere non valeo differentiam inter assensum et iudicium. Et imprimis illa distinctio non habet fundamentum in D. Thoma, nunquam enim illam insinuavit, sicut nec alii Theologi vel philosophi. Deinde si non sit æquivocatio in verbis, non potest actus intellectus, circa aliquam materiam sub aliqua ratione esse assensus, quin formaliter et essentialiter sit iudicium, et e converso. Dico autem, *si non sit abusus, et æquivocatio in vocibus.* Nam si nomen iudicii restringatur ad iudicium de re per medium intrinsecum, vel per effectum, assensus vero latius sumatur pro quacumque determinatione intellectus, sic distingui poterunt aliquo modo, tamen ille est voluntarius usus vocum. Et adhuc illo modo non poterunt distingui nisi ut genus et species, quia iudicium erit perfectior assensus secundum illam conditionem; non potest tamen negari quin iudicium essentialiter sit determinatio intellectus ad id quod iudicat, et consequenter non potest esse iudicium, quin sit assensus. Re tamen vera etiam omnis assensus est iudicium, neque illa distinctio vo-

cis *judicium* habet fundamentum in usu, neque in aliqua impositione, de qua constet. Unde supponunt omnes *judicium* intellectus posse esse evidens et inevidens, certum et incertum, et per medium intrinsecum et extrinsecum, quod est evidens ex usu illius vocis, tam inter philosophos et Theologos, quam in communi vulgo. Sic enim dicimus vel leviter vel temere *judicare* de aliquo, qui facile credit aut assentit illum peccare vel prava intentione operari : hæreticus etiam dicitur de rebus fidei *judicare* esse falsas, cum solum humana fide ducatur. Item dicimur *judicare* inter opiniones, quando alteri assentimus, etiamsi evidentiam vel claritatem non habeamus, et sive medio intrinseco, sive extrinseco utamur.

14. *Impugnatur amplius Cajetanus. — Cajetani exemplum refellitur.* — Stante ergo hoc usu vocis, est evidens non esse differentiam inter assensum et *judicium*. Nam, ut ostendi, *judicium* veritatis intrinsece et essentialiter est assensus, quia est determinatio ad alteram partem contradictionis, et e contrario omnis assensus est *judicium*, quia est determinatio rei, ut est vel esse debet. Nam qui credit Deum esse trinum et unum, determinat in mente ita esse ; et qui credit Deum esse hominem, determinat ita esse debere. Item non potest intellectus determinari ad assentiendum alicui veritati, nisi *judicando* illam esse veritatem ; quomodo enim determinatur, si non *judicat* de eo ad quod se determinat. Unde impossibile est determinationem esse priorem *judicio*, vel e converso. Nec exemplum Cajetani aliquid confert, nam qui ignorat an Beata Virgo fuerit concepta in peccato, necne, quando ad neutram partem se determinat, est propriissime ignorans, seu dubitans negative : quando vero ad alteram partem se determinat, quamvis habeat ignorantiam veritatis in se, et oppositam scientiæ, seu evidentæ, aut fidei divinæ, tamen, eo ipso quod se determinat ad alteram partem, *judicat* illam esse probabiliorē, aut veram cum formidine, et quoad hoc putat se jam non ignorare, sed aliquo modo rem illam cognoscere.

15. Ad hominem item posuimus contra Cajetanum convincere, in præsentī etiam materia non habere locum distinctionem illam. Quia ipse Cajetanus latetur peccatorem sine dono Spiritus Sancti percipere divina, utique illi assentiendo, et *judicare* etiam cavendum esse ab idololatria secundum altissimas causas, et hoc *judicium* dicit esse actum fidei, et recte, quia creditur certitudine fidei, et quia

Deus ita revelavit : est ergo ille etiam assensus fidei ; ergo similiter quilibet assensus fidei, de quacumque veritate revelata, est *judicium* de illa secundum altissimas causas divinæ veritatis : ergo etiam actus sapientiæ eodem modo quo est *judicium*, est etiam assensus. Quod autem Cajetanus in fine subjungit, actum fidei et doni esse eundem, solumque differre in modo, quia hic procedit ex instinctu Spiritus Sancti, destruit doctrinam D. Thomæ de donis ; quia actus fidei non potest altiori modo procedere ab Spiritu Sancto per instinctum doni, quam per inspirationem ipsius fidei, licet in hac inspiratione possit esse latitudo, et una possit esse major vel efficacior, vel cum majori intensione, qui modus accidentarius est. Item ille modus non est in ipso actu, sed in causa actus, scilicet, in præveniente auxilio majori vel minori, quo non obstante actus non est in se melior essentialiter ; accidentalis autem differentia, et parum refert, quia tota illa latitudo perfectionis continetur sub virtute fidei, et sæpe poterit non intercedere ex libertate hominis, minus cooperantis quam cum majori auxilio possit.

16. *Vera assertio de convenientia, et differentia fidei et sapientiæ.* — Dico ergo fidem et sapientiam convenire tam in ratione *judicii* quam assensus, differre tamen, quia fides *judicat* simpliciter esse verum quod revelatum est, et quia revelatum est. Sapientia vero, ut hic sumitur, non *judicat* de veritate ipsa revelata, quod vera vel falsa sit, sed *judicat* de rebus divinis, quatenus convenientiam habent, et dignæ sunt ut amentur vel credantur. Sicut in mysterio Incarnationis, verbi gratia, aliud est ita esse, aliud esse convenientis, et decens divinam bonitatem, et sapientiam, etc. Primum ergo *judicatur* per fidem, secundum per donum sapientiæ, quando ex peculiari instinctu et motione Spiritus Sancti habetur tale *judicium*, et hoc sensu ait D. Thomas, supra citatus, sapientiam *judicare* inhærendum esse rebus divinis. Et ita sunt priora verba intelligenda : nam *judicium* fidei supponitur, et est quasi directum, sapientiæ vero quasi reflectitur in rem divinam creditam, et attentius illam contempletur ac ponderat, ac tandem *judicat* adhærendum esse illi, tanquam dignissime fide vel dilectione.

17. *Solvitur instantia.* — Dices etiam fidem *judicare* res fidei esse dignas assensione, et mysteria supernaturalia esse convenientia, etc. Respondetur fidem non habere directe hæc *judicia*, et quando illa habet, solum esse sub

ea ratione, qua ut dicta a Deo proponuntur. Sapientia vero de his judicat ex contemplatione ipsarum rerum revelatarum per fidem, quasi intuendo in illis, vel ex earum effectibus, rationes convenientiæ, vel amabilitatis, aut aliarum proprietatum, de quibus judicat. Et isto modo solet contemplatio sapientiæ attribui, ut est apud Augustinum, 12 de Trinit., cap. 4. Sic etiam D. Thomas, dicta quæst. 45, art. 2, dixit hoc iudicium sapientiæ esse secundum quamdam connaturalitatem ad amorem. Supponit enim hoc donum amorem divinum : amor autem, ut dixit Dionysius, cap. 4 de Divin. nominibus, transfert amantem in amatum per singularem unionem, et inde facile oritur iudicium de rebus divinis per quamdam connaturalitatem ad illas. Sicque dixit Augustinus, lib. 8 de Trinit., cap. 9 : *Quando flagrantius Deum diligimus, tanto certius sereniusque videmus.* Nam qui amat, magis attendit et considerat ea quæ amat, et facilius illi placent. Quod confirmant Christi verba Joan. 7 : *Si quis voluerit voluntatem ejus facere, cognoscat de doctrina utrum a Deo sit.* Et inde nascitur effectus ille a quo hic actus sapientiæ nomen accepit, nam ea quæ amantur, cum suavitate et dulcedine cogitantur.

18. Et hinc etiam intelligitur hunc actum sapientiæ non ita tribui intellectui speculativo, quin circa practicas etiam veritates versetur, sed dicitur esse perfectio speculativæ partis, vel quia in illa principaliter versatur, vel quia etiam de practicis in generali et modo speculativo judicat, ut D. Thomas. dicta quæst. 45, art. 3, docuit. Atque ita etiam explicuit hoc sapientiæ donum Albert. in 3, distinct. 35, art. 1, ad 1, dicens sapientiam esse quoddam lumen divinorum, sub quo videntur et gustantur divina per experimentum. Et similiter dicit Richard. ibi, artic. 2, quæst. 1, actum sapientiæ esse contemplari Deum ex dilectione, cum quadam experimentalis suavitate in affectu. Atque hæc sententia satis pia et probabilis est, et juxta illam facile distinguitur actus sapientiæ ab actu fidei, quia sapientia non est credulitas veritatis, sed supponit illam, et consistit veluti in quadam scientia experimentalis veritatis creditæ.

19. *Quomodo hic actus in se supernaturalis sit.* — *Resolutio.* — Semper tamen relinquitur difficultas, quomodo talis actus possit esse supernaturalis quoad substantiam, cum videatur in medio quodam naturaliter cognito niti ; illa enim experientia amoris et bonitatis Dei

naturalis est : unde nunquam potest esse tanta ut faciat evidentiam veritatis cognitæ. Dicendum vero est, experimentum illud plus esse quam naturale, quia est per effectus supernaturales, et ex peculiari operatione Spiritus Sancti conferentis quemdam peculiarem sensum spiritualem illorum effectuum, et affectuum internorum, qui per solum naturale lumen apprehendi non posset. Et licet inde non cognoscatur evidenter veritas rerum divinarum quæ per fidem revelantur, evidenter nihilominus judicantur et reputantur consentaneæ divinæ bonitati, et quadam peculiari certitudine causata etiam ex motione Spiritus Sancti mens illis adhæret, et fide ac amore dignas reputat, et ita talis actus in sua substantia et modo supernaturalis est, et sine Spiritus Sancti specialissimo auxilio non obtinetur.

CAPUT XIX.

QUIS SIT ACTUS INTELLECTUS DONO SPIRITUS SANCTI SPECIALITER ATTRIBUTUS ?

1. *Doctrina sancti Thomæ.* — *Prima difficultas contra doctrinam D. Thomæ.* — Secundo, explicandus est actus intellectus quem Isaias secundo loco numeravit, de quo etiam divus Thomas in diversis locis videtur varie loqui. Nam 1. 2, quæst. 8, artic. 4, sentit actum intellectus non pervenire ad iudicium, sed sistere in apprehensione supernaturalium veritatum ad intellectum speculativum pertinentium, ut de illis iudicet sapientia, quia in hoc tantum distinguit hunc actum ab actu sapientiæ : a scientia vero et consilio illum distinguit, quia istorum duorum munera ibi tribuit intellectui practico. Hæc autem doctrina patitur difficultates. Una est, quia difficile est realiter distinguere apprehensionem a iudicio in supernaturali cognitione ejusdem veritatis. Quia vel per apprehensionem illam cognoscitur veritas rei apprehensæ, id est, ita esse sicut apprehenditur, vel sistitur in sola compositione, sine cognitione an ita sit vel non sit, sicut modo apprehendo astra esse paria, ignorando an ita sit. Si primum dicatur, illa apprehensio est iudicium ; quid enim est iudicare, nisi mente definire ita esse, et veritati assentire ? At ille qui apprehendendo propositionem cognoscit esse veram, jam assentit illi, et mente definit ita esse ; ergo si intellectus, ut est donum, apprehendit cognoscendo, iudicat : ergo non potest in hoc distingui ab actu sa-

pietiae. Si vero dicatur secundum, scilicet, per actum illum apprehendendi, non cognosci veritatem rei apprehensae, profecto imperfectissimus est talis actus, et non est cur sit supernaturalis, maxime cum non fiat per species per se infusas, sed per acquisite per visum vel auditum.

2. *Secunda difficultas.* — *Tertia.* — Et praeterea est supervacaneus talis actus, quia ipsa sapientia non potest judicare, nisi, per ipsummet actum quo judicat, apprehendat rem de qua judicat : ergo superfluum est ponere praeviam apprehensionem puram, et peculiarem Spiritus Sancti gratiam ad illum actum postulare. Consequentia clara est ; antecedens probatur, quia homo in hac vita non judicat nisi componendo et dividendo, vel syllogistice concludendo : non potest autem componere, nisi apprehendendo terminos, et illos ordinando, et conjungendo per actum, quo cognoscat eos vere conjungi vel disjungi : ergo dum sapientia judicat, componit et apprehendit. Denique altius est iudicium fidei quam sapientiae ; at vero iudicium fidei non fit sine intima compositione et apprehensione : ergo nec iudicium sapientiae aliter fit. Ideoque licet ante iudicium fidei praecedat cogitatio, et consequenter apprehensio rei credendae, nondum cognoscendo veritatem, seu an ita sit sicut apprehenditur, nihilominus illa apprehensio, quae antecedit, non est specialis actus supernaturalis, nec propter illum ponitur speciale donum, vel auxilium Spiritus Sancti, distinctum ab ipsa fide, et auxiliis ad illam necessariis : ergo nec iudicium sapientiae tale donum praerequirat. Videntur ergo haec argumenta convincere actum intellectus, si supernaturalis sit, et versetur circa res divinas et supernaturales, necessario consistere in aliquo iudicio. Sic autem difficillimum est illum ab actu fidei et sapientiae distinguere, quia non potest esse iudicium de veritate per se nota viatori, quia haec cognitio non datur in via de veritatibus divinis : ergo vel est ex testimonio divino, et sic non distinguitur a fide ; vel est ex alio medio, ut ex effectibus vel congruentiis, et sic non potest distingui a sapientia, aut explicare oportet quod sit ejus motivum, et quae sit veritas de qua fert iudicium.

3. *D. Thomas dono intellectus aliquod iudicium attribuit.* — Nihilominus D. Thomas vel non pertinet in priori sententia, vel aliter illam explicuit, praebendo intellectui aliquam veram cognitionem et iudicium, 2. 2, q. 8,

art. 1, ubi in corpore concludit intellectum esse *quoddam supernaturale lumen, quo potentia penetrat et cognoscit quae per lumen naturale cognoscere non valet* : penetrare autem et cognoscere, non est pure apprehendere absque iudicio ; et solutione ad 3, dicit intellectum indicare quamdam excellentiam cognitionis penetrandi in intima. Et in solutione ad 1 et 2, comparando hunc intellectum quasi divinum cum naturali intellectu principiorum, videtur aperte sentire, sicut intellectus principiorum est iudicativus principiorum naturalium, ita intellectus donum, principiorum supernaturalium. Praeterea in articulo 2, intellectui tribuit illustrationem mentis in Scripturarum intelligentia, et de illo exponit verba Luc., ult. : *Dedit illis sensum, ut intelligerent Scripturas.* Intelligere autem Scripturas non fit sola apprehensione sine iudicio, ut per se notum est. Et in corpore ejusdem articuli tribuit intellectui quod per illum homo intelligit fidei veritates, saltem quoad hoc, *ut cognoscat quae exterius apparent illi contraria, non esse vere contraria, neque propter illa esse a veritate fidei recedendum* : hoc autem sine magno iudicio non fit ; ergo munus intellectus praecipue versatur in iudicando de his quae apprehendit. Item in articulo tertio tribuit huic intellectui non solum speculativam cognitionem, sed etiam practicam, quia cognoscit humanos actus secundum quod per legem aeternam, seu per rationem aeternam regulantur ; practica autem cognitio regulativa operationis iudicativa est. Denique in articulo quinto dicit ad donum intellectus pertinere rectam aestimationem de ultimo fine ; recta autem aestimatio iudicium mentis est : ergo etiam pertinet ad intellectum iudicare.

4. *Vera assertio : donum intellectus etiam iudicium includit.* — *Probatum rationibus num. 1, 2 et 3 factis.* — *D. Thomas exponitur.* — In hoc puncto mihi imprimis videtur ponendum esse actum intellectus non in sola apprehensione terminorum vel propositionum, sine ulla cognitione et iudicio aliquo de re apprehensa, sed in tali apprehensione quae aliquid penetret, percipiat et consequenter iudicet. Hoc quoad rem ipsam apud me convincunt rationes priori loco factae ; quoad mentem vero divi Thomae idem probant loca posteriori loco adducta. Neque existimo aliud intellexisse in 1. 2, cum dixit, *ad apprehensionem veritatis perfici mentem per donum intellectus*, quia hoc idem dixit 2. 2 ; nam quae 8, artic. 1, dixit, *per hoc lumen intellectus reddi*

hominem bene mobilem a Spiritu Sancto ad apprehendendam veritatem circa fidem. Et nihilominus ad 3, *ibid.*, ait quod *intellectus importat quamdam perceptionem veritatis.* Idemque habet in quæst. 45, artic. 2, ad 3, ubi tribuit intellectui *percipere veritates divinas* (ita enim legendum est, non *præcipere*, ut habent aliqui mendosi codices). Idem ergo D. Thomas intelligit in præsentī per apprehendendi et percipiendi verba, seu per apprehensionem et perceptionem : at perceptio veritatis aliquam cognitionem et iudicium requirit, ut constat. Imo in dicta quæst. 8, art. 6, addit intellectus munus esse penetrare et capere credenda ; quis autem dicat penetrare et capere, nihil aliud esse quam propositionem concipere.

5. *Natura doni intellectus exponitur.* — In explicando ergo hoc munere consistit intelligentia hujus actus, et distinctionis ejus a fide et sapientia. Potest autem in hunc modum exponi ; quia quoties aliquid credendum est ex auctoritate loquentis vel scribentis, imprimis necesse est concipere quo sensu loquatur, et quid dicat, ut postea qui audit iudicet de his quæ dicuntur et fidem adhibeat, vel non adhibeat. Unde in doctrina etiam acquisita, diversum studium adhibendum est ad intelligendum et penetrandum an Augustinus, verbi gratia, hoc vel illo sensu locutus fuerit, aliud ad iudicandum an id quod dixit verum sit. Quia ergo in hac vita divinas veritates non in se videmus, sed auditu recipimus, vel scripto legimus, ut eas credamus, illa etiam duo necessaria sunt. Et quia res illæ excedunt captum nostrum, et modus ipse proponendi illas obscurus est et latens, nam et res ipsæ, cum sint maxime spirituales, superant sensibilia phantasmata, et verba sæpe sunt ambigua, ideo indigemus singulari magisterio Spiritus Sancti, non solum ut credamus, sed etiam ut res illas addiscamus et penetremus, ut loquitur D. Thomas.

6. *Intellectus donum iudicat de mente revelantis.* — Atque ita constat in hoc actu intervenire iudicium aliquod, non de veritate rei dictæ, sed de sensu loquentis, et fortasse etiam de credibilitate rei dictæ : sicut in exemplo posito, quando legendo et investigando cognoscimus quæ fuerit sententia Augustini vel D. Thomæ in aliquo puncto, iudicamus profecto hanc vel illam fuisse mentem ejus, licet nondum iudicemus an sententia illa vera vel falsa sit. Ita ergo in præsentī per intellectum penetramus veritates fidei solum quoad

sensum loquentis, ideoque iudicamus hoc esse quod dicitur. Hoc ergo iudicium includit actum intellectus, quod est donum, et in illo sistit, nam iudicare de veritate dicta jam pertinet ad fidem, et ita patet distinctio intellectus a fide. A sapientia vero distinguitur, quia sapientia non investigat sensum loquentis, nec de illo iudicat, sed illud jam supponit, sicut etiam supponit fidem de tali mysterio, aliud vero iudicium profert de rebus ipsis divinis jam creditis et amatis, scilicet, quod revera sint dignæ Deo, et ut æstimentur tales, quales dicuntur et creduntur, ex proprio quodam motivo, quod sumitur ex connaturalitate ad affectum bene dispositum per charitatem, et ex effectibus divinis quæ inde nascuntur et experimento cognoscuntur, ut declaravimus.

7. *Objectio. — Solutio. — Quid de actu dicendum.* — Dices : ergo donum intellectus antecedit fidem, quia recta conceptio credendorum præcedere debet, ut quis possit credere ; consequens est falsum, quia Isai. 7 dicitur : *Nisi credideritis, non intelligetis*, juxta Septuaginta ; et D. Thomas, supra, docet intellectum non solum supponere fidem secundum se, sed etiam charitate formatam. Respondeo aliud esse loqui de habitibus, aliud de actibus. De habitu ergo intellectus simpliciter verum est supponere fidem, imo et gratiam, ut videbimus libro sequenti. De actu vero distinguendum est. Nam potest esse hic actus intellectus Spiritus Sancti solum imperfectus, et quasi inchoatus, vel perfectus et consummatus quoad omnia quæ ad illum pertinere possunt. Priori modo concedo aliquem actum intellectus supponi ad actum fidei infusæ, quia cum homo primo ad fidem vocatur et inducitur, priusquam credat, oportet ut interius juvetur a Spiritu Sancto ad concipiendas, sicut oportet, res fidei sibi propositas, juxta illud Joan. 6 : *Omnis qui audivit a Patre, et discit, venit ad me*, utique credendo ; prius ergo debet audire, et interius a Patre discere, ut exponit Augustinus. Unde de obduratis et excæcatis dicitur Isai. 6. et Matth. 13 : *Auditu audietis, et non intelligetis*, ut in sequentibus latius dicendum est.

8. *Fidem supponit actus perfectus hujus doni.* — At vero intellectus perfectus, prout maxime ponitur donum Spiritus Sancti, supponit fidem, imo et charitatem : et sic possunt optime intelligi verba Isaiaë citata, et illud Psalm. 110 : *Intellectus bonus omnibus facientibus eum.* Et ita pertinet ad hunc intellectum quid-

quid acuminis (ut sic dicam) supernaturalis intelligentiæ in concipiendis rebus fidei interuenire potest. Nam ad hunc intellectum pertinet illustrior et explicatior conceptio divinatum rerum, quas fides revelat. Item varii modi explicandi mysteria per plures similitudines, vel exempla : item huc etiam spectare potest penetratio et inuentio plurium rationum, quæ res fidei illustrent, et magis intelligibiles reddant. Item hinc provenire etiam potest vera intelligentia locorum Scripturæ, in quibus veritates fidei continentur. Nam licet, ut dixi, credere veritatem dictam ibi scriptam sit opus fidei, nihilominus intelligere quid ibi dicatur potest esse hujus doni, ut significat divus Thomas ita exponens verba Luc. ultim. : *Et aperuit illis sensum, ut intelligerent Scripturas*; et ita etiam possunt intelligi verba Christi ad discipulos, Matth. 13 : *Adhuc et vos sine intellectu estis*. Unde etiam ad hoc donum pertinere potest ut res fidei non appareant impossibiles, nec rationi repugnantes tanquam contrariæ, licet sint supra rationem : et hoc modo ait D. Thomas, supra, hujus intellectus esse ita penetrare res fidei, ut homo intelligat ea, quæ exterius apparent contraria, non sufficere ut ea non credat, nec propter illa esse recedendum a fide.

9. *Difficultas alia bipartita.* — *Suadetur prima pars.* — Sed adhuc superest difficultas, quia omnia hæc munera, vel per quamdam reflexionem, ut sic dicam, ad fidem pertinent, et sunt actus fidei; vel quocumque alio modo fiant, sunt opera quæ discursu et naturali ingenio fieri possunt, et fere magis consistunt in conjectura humana quam in certo iudicio, et ideo non possunt ad supernaturalem cognitionem et iudicium pertinere. Explicatur prior pars, quia omnia illa de quibus intellectus iudicat, possunt et debent credi ex auctoritate divina, si sub illa proponantur, ut possunt. Nam fides non tantum revelat, verbi gratia, Deum esse hominem, sed etiam revelat quomodo in Scriptura dicatur : *Verbum caro factum est*, et quo sensu dicatur homo Deus, et similia : utrumque ergo iudicatur et creditur ex testimonio Dei. Item sicut ex testimonio Dei credimus res revelatas, ita etiam iudicamus illas non esse impossibiles, nec ab illis esse recedendum propter exteriora contraria, etc. Si ergo iudicium de his omnibus nitatur in auctoritate divina, quantumvis cum perfecta rerum conceptione vel penetratione, tamen erit actus fidei magis vel minus per-

fectus, et ex majori, vel minori auxilio procedens. Ipse ergo actus fidei, qui secundum suam substantiam talis denominatur, prout perfectiori modo concipitur, dicetur intellectus. Et ita illud Isai. 7 : *Nisi credideritis, non intelligetis*, perinde dictum esse censebitur, ac si diceret, nisi simpliciter et quasi inchoando fidem credideritis, illustriorem et magis penetrantem fidem non assequemini.

10. *Suadetur secunda pars.* — Altera pars declaratur, quia illa omnia, si non fiant cum certitudine fidei, necesse est iudicari tantum ex rationibus et motivis humanis, et consequenter non pertinebunt ad supernaturale donum, nec fient per actus supernaturales quoad substantiam, sed ad summum quoad modum. Probatur discurrendo per actus insinuos, nam imprimis concipere verba vel signa sub quibus fides proponitur, in eo sensu in quo dicuntur, iudicando illum esse verum sensum, si non fiat ex lumine fidei, solum esse potest per discursum humanum et conjecturas, vel humana testimonia. Sicut in iudicando de sensu Scripturæ, verbi gratia, quod illa verba : *Hoc est corpus meum*, proprie significant illud esse verum Christi corpus ibi realiter existens, solum potest haberi, aut per certitudinem fidei, aut per conjecturas et auctoritates humanas, neque apparet quo alio modo possit per donum intellectus de vero illo sensu iudicari. Idemque est eadem ratione de quibuscumque verbis, sive scriptis, sive ore prolatis, et de quibusvis signis, parabolis, figuris, aut prophetiis obscuris, sub quibus doctrina fidei proponatur. Præterea expressior vel clarior conceptio fidei, si formaliter includat cognitionem veritatis rei conceptæ, sine certitudine fidei, facile esse potest ex acuminis humani ingenii, et ex majori industria et studio; quod si Spiritus Sanctus suppleat vires ingenii, et laboris humani, nihilominus cognitio illa non potest esse nisi ex motivo humano, ac proinde naturalis. Et simili modo, si cognoscantur plura mysteria in eisdem veritatibus, non potest esse nisi cognoscendo plures conclusiones in revelatis contentas ex vi discursus humani, nam si fiat altiori modo, iam erit cognitio fidei. Rationes etiam, similitudines, vel exempla quæ inducuntur ad fidem explicandam vel suadendam, non transcendunt de se naturalem cognitionem; quod si ex divina inspiratione offerantur, erit opus supernaturale in modo, non in substantia. Denique iudicium de possibilitate rerum fidei, si non sit ab ipsa fide, et cum eadem certitudine, solum esse

potest per motiva humana, et solvendo argumenta in contrarium objecta, quod non transcendit humanam industriam quoad substantiam operis, si fides ipsa majorem certitudinem non præbeat.

11. *Solutio propositæ difficultatis.* — Respondeo naturale quidem lumen intellectus, fide illustratum et adjutum, multa posse facere circa veritates revelatas valde similia his muneribus quæ dono intellectus tribuuntur, et ideo non esse evidens dari tale donum omnino supernaturale a fide distinctum, neque etiam esse certum, quia non est satis aperte revelatum : nihilominus dico certum videri non sufficere ingenium humanum, etiam fide præditum, ad præstanda per solum naturale lumen illa omnia quæ circa veritates fidei concipiendas, confirmandas et explicandas, a credentibus fiunt, sed necessarium sæpe esse peculiare et supernaturale Spiritus Sancti auxilium, et hoc modo actus illos esse donum intellectus supernaturalis, sive illi actus sint in substantia naturales, sive non sint, satis enim est quod fiant speciali Spiritus Sancti instinctu. Adde vero jam esse probabilius, et Scripturis ac Sanctis conformius, hæc munera, quatenus ad donum Spiritus Sancti pertinent, fieri per actus in se et substantia supernaturales. Primo, quia quoad subtilitatem penetrandi supernaturalia mysteria, et inveniendi et applicandi rationes et exempla quibus illa confirmant, excedunt vires ingenii humani. Et hoc non leviter potest experimento confirmari : nam videmus interdum personas simplices et indoctas altius concipere et explicare mysteria fidei, quam soleant sapientes id facere. Deinde, quod attinet ad certitudinem cognitionis, in qua præcipue versatur difficultas, dico hanc cognitionem intellectus esse certam, non proprie ex motivo fidei, nec cum æqualitate ad certitudinem ejus, sed ex aliis motivis et rationibus, adjuncto modo concipiendi et assequendi illa motiva ex instinctu Spiritus Sancti cum tanta claritate et adhæsiōne ex eodem instinctu, ut quasi per reflexionem fiat quædam experimentalis evidentia, quod ibi interveniat Spiritus Sancti instinctus et operatio. Qui modus cognitionis et certitudinis plane est in se et substantia sua supernaturalis, et potest facile in his donis intervenire, nulla enim est repugnancia, et ad multa opera, quæ ex Spiritus Sancti instinctu fieri videbimus, est plane necessarius, ut ex sequentibus magis constabit.

CAPUT XX.

QUIS SIT ACTUS SCIENTIÆ DONO SPIRITUS SANCTI SPECIALITER ATTRIBUTUS?

1. *Donum hoc consistit in judicio.* — De hoc actu imprimis est certum, constituendum esse in aliquo judicio et vera cognitione intellectuali, et non in sola apprehensione, quæ judicium non includat. Hoc tradit D. Thomas, tam in 1. 2, q. 68, art. 4, quam in 2. 2, q. 9. Et suadetur primo ex dictis de intellectu, c. 19, num. 1 et 2, quia sola apprehensio est actus nimis imperfectus, ut inter dona Spiritus Sancti numeretur. Secundo, ex proprietate ipsius vocis *scientia*, significat enim cognitionem judicativam et certam, imo et evidentem, si in rigore sumatur. Tertio, quia etiamsi in rigore loquamur de apprehensione et inventione intellectuali, quæ fit cum judicio et cognitione, ut de intellectu diximus, sic etiam donum intellectus sufficiens est ad operandum illo modo ex instinctu Spiritus Sancti in tota materia fidei, ut recte notavit Cajetanus 2. 2, quæst. 8, art. 1. Et ratio reddi potest, quia tota materia fidei est ejusdem rationis quoad hanc partem, nam ut substat regulis divinis et supernaturalibus, est satis elevata; modus autem operandi, in intellectu explicatus, est idem quoad penetrationem et inventionem ex instinctu Spiritus Sancti in tota illa materia. Unde etiam intulit D. Thomas, dicta quæst. 8, art. 3, intellectum non versari tantum in materia speculativa, sed etiam in practica : ergo superfluum esset ponere donum scientiæ ad similia munera.

2. *Scientia est speculativa, licet aliquo modo practica.* — Deinde supponendum est hunc actum non esse mere practicum, sed speculativum potius, licet possit esse aliquo modo practicum, scilicet ex parte materiæ operabilis, licet ex modo semper speculative fiat. in quo cum intellectu et sapientia, imo et cum fide convenit, differt autem a prudentia. In hoc puncto habuit diversam sententiam D. Thomas 1. 2, quæst. 68, art. 4; censuit enim ibi scientiam, quæ est donum, esse judicium omnino practicum de agendis ex instinctu Spiritus Sancti, quod solet etiam morale imperium vocari, et in hoc distinxit scientiam a sapientia et intellectu; a consilio autem illam distinxit, quia ad consilium pertinet tantum inventio in eadem materia practica, in qua scientia judicat. Potestque suaderi hæc sententia, quia intellectus et sapientia videntur

efficienter perficere intellectum quoad omnes actus, tam in materia speculabili quam in materia operabili, prout inter illa potest intellectus speculativo modo versari; ergo non potest scientia in ea materia ab illis distingui: ergo debet ad materiam practicam et modum dicendi practicum referri. Favetque Augustinus, lib. 12 de Trinit., c. 12, ubi scientiam circa actionem, sapientiam vero circa contemplationem versari sentit. Loquitur autem de scientia humana et naturali, non de illa quæ specialiter est a Spiritu Sancto; per quamdam autem proportionem videtur posse commodari. Consilium autem, et ex vi vocis significat inquisitionem et inventionem, et non potest in materia et modo pratico aliter scientia distingui. Accedit quod in ipsa enumeratione donorum apud Isaiam, scientia potitur inter dona pertinentia ad voluntatem, nunquam illam dirigens, quod pertinet ad iudicium practicum.

3. *Hanc opinionem retractavit D. Thomas, nostram amplexus est.*—*Vera sententia protrahitur.*—Nihilominus idem D. Thomas in illa sententia non permansit, sed illam expresse retractavit 2. 2, quæst. 8, art. 6, et quæst. 9, art. 3, dicens scientiam principaliter esse speculativam, licet extendatur ad materiam etiam practicam, et in hoc cum intellectu et sapientia convenire. Unde illi non tribuit iudicium agendis in particulari, quod dicitur practice practicum, vel imperium, vel applicatio scientiæ ad opus: nam hoc totum ad consilium spectat. Unde in quæst. 52, art. 1 et 2, docet numerum consilii respondere prudentiæ, et includere in suo ordine actum prudentiæ, qui est præcipere, seu practice iudicare, quamvis non ab illo denominetur, ut consistere potius in consilio a Spiritu Sancto recepto, quam in proprio iudicio significetur. Et hæc sententia verisimilior tenenda est, tum quia propria scientia, secundum communem usum, longe distat a prudentia et a iudicio pratico, quod per modum prudentiæ fertur; scientia enim per se intendit in veritatis cognitionem, prudentia vero magis tendit in operationem; tum etiam quia in materia fidei, tam circa principia speculativa quam circa moralia, quæ practica dicuntur, est necessarium aliud genus iudicii et cognitionis, præter intellectum et sapientiam, ut statim explicabimus, quod non potest esse nisi scientia; tum denique quia in hoc consilio non videtur necessaria propria inquisitio et consultatio ipsius hominis, quia iudicium prudentiale, quod est donum, deter-

minate recipitur ex impulsu Spiritus Sancti, ut mox dicemus. Igitur scientia, quæ inter dona recensetur, nec est iudicium practice practicum, imo in hoc differt a consilio, neque est mera apprehensio, sed est cognitio iudicativa et speculativa, et in hoc cum sapientia et intellectu convenit.

4. *Quomodo scientia a fide et sapientia distinguatur.*—*Prima opinio.*—*Impugnatur.*—Difficultas ergo superest, quomodo scientia ab his et a fide distinguatur. Et rationes dubitandi sunt fere eadem quæ de sapientia et intellectu factæ sunt. Potest ergo scientia distingui a fide, quia fides versatur circa veritates per se et immediate revelatas, scientia vero circa conclusiones ex illis principiis elicitas; a sapientia vero distinguetur, quia sapientia versatur circa conclusiones divinas et supremi ordinis; scientia vero circa conclusiones et veritates de rebus creatis, vel humanis, juxta doctrinam Augustini, libr. 13 de Trinit., c. 19: *Sapientia divinis et æternis, scientia humanis et temporalibus attributa est rebus.* Verumtamen hic dicendi modus habet difficultates omnes supra tactas de sapientia illo modo explicata: unde si in sapientia non admittitur, multo minus in scientia probari potest. Et propterea est nova difficultas, quia hoc modo sapientia et scientia quoad actus non formaliter, sed materialiter tantum different, quia ex eisdem principiis, et eodem modo in diversis rebus versantur, quod materiale est: nam formalitas actus sumitur ex motivo et modo operandi. Non different ergo essentialiter, sed accidentaliter, vel (ut ita dicam) individualiter, et consequenter si hæc dona sunt habitus, non erunt habitus re distincti, sed ratione per conceptus inadæquatos. Sicut actus fidei, licet in diversis materiis creatis versentur, ejusdem speciei sunt, et ab eodem habitu manant. Hoc autem cum in aliis donis non inveniatur, neque in his admittendum videtur.

5. *Vera ratio distinctionis scientiæ a fide.*—*Ratio distinctionis scientiæ a sapientia.*—*Confirmatur.*—In modo igitur distinguendi scientiam a fide, eadem ratio tenenda est quæ in distinctione inter sapientiam et fidem observata est. Scientia enim non præbet assensum veritati revelatæ, iudicando ita esse sicut revelatum est, seu credendo veram esse quia a Deo dicta est, sed iudicat de convenientia veritatis revelatæ, vel respectu Dei, vel respectu nostri, vel respectu ipsius fidei, quatenus iudicatur digna fide; vel respectu amoris, quatenus amabili reputatur. Unde in hoc suo ju-

dicio non fundatur immediate in revelatione, sed in aliis motivis vel experimentis, ut dicemus; et ita differt a fide. Ab intellectu item differt eodem modo quo sapientia, quia ad diversos fines proxime ordinantur, et juxta illos, diversos actus efficiunt. Intellectus enim insistit in penetratione et perfecta conceptione veritatis fidei, ut explicui. Sapientia vero, sicut et scientia, in ipsa doctrina fidei jam perfecte concepta et ordinata, novas rationes convenientiæ contemplatur, ut dixi. Inter se vero differunt, quod sapientia judicat in materia supernaturali de convenientia ejus per æternas et divinas rationes, ad Deum ipsum et attributa ejus ac honorem ipsius pertinentes. Scientia vero per rationes inferiores, et creatas vel humanas de eisdem rebus judicium profert. Ut, verbi gratia, scientia judicat peccatorum permissionem fuisse convenientem ad servandam libertatem, et ad universi complementum. Sapientia vero judicat id fuisse conveniens ad ostensionem divinæ justitiæ et sapientiæ, quæ novit ex malis bona facere. Item scientia judicat paucos salvari propter propensionem hominis ad peccandum, et difficultatem virtutis; sapientia vero fieri judicat ad ostensionem gratiæ Dei et pleni domini voluntatis ejus, etc. Confirmari hoc potest, quia ita solent apud philosophos sumi nomina scientiæ et sapientiæ, et in hoc distingui, quod sapientia est sub rationibus æternis, et scientia sub temporalibus. Sic enim Aristoteles, l. 1 Metaph., c. 2, dicit sapientiam primas causas considerare et ex illis judicare. Et 6 Ethicor., c. 3 et 6, sapientiam distinguit a scientia tanquam convenientem cum illa in genere scientiæ, et habentem in eo excellentiam quamdam, ex eo quod circa res altissimas, et circa ipsa etiam principia perfectissimo modo versetur. Ergo non immerito creditur etiam Scripturam, in enumerandis Spiritus Sancti donis, imo etiam regulariter in usu illarum vocum, quando illas inter se distinguit, hoc discrimen observasse. Nam etiam Spiritus Sanctus, in sermonibus, captui hominum et usui communi vocum sese accommodat.

6. *Explicatur amplius distinctio.* — Recite igitur actus sapientiæ et scientiæ peculiariter Spiritui Sancto attributi intelliguntur convenire inter se, in modo quo circa mysteria fidei versantur, differre autem quia sapientia modo altiori et per rationes longe superiores munus suum quam scientia exerceat. Et hoc modo intelligenda est doctrina quam sæpe Augustinus inter sapientiam et scientiam

tradit, quod sapientia circa divina et æterna, scientia circa humana et temporalia versatur. Nam de sapientia et scientia naturali ita loquitur, lib. 12 de Trinit., cap. 12, et vocat scientiam actionis, id est, quæ ad vitæ hujus actiones deservit. In dicto autem lib. 13, cap. 19, agens de cognitione supernaturalium mysteriorum, dicit: *Quæ pro nobis Verbum caro factum temporaliter et localiter gessit et pertulit, ad scientiam pertinere, non ad sapientiam spectare.* Et lib. 14, cap. 1, declarans descriptionem vulgarem sapientiæ, quod sit *divinarum humanarumque rerum scientia*, ait: *Secundum distinctionem qua dixit Apostolus: Alii datur sermo sapientiæ, alii sermo scientiæ, ista definitio dividenda est, ut rerum divinarum scientia proprie sapientia nuncupetur, humanarum autem proprie scientiæ nomen obtineat.*

7. *Hæc distinctio formaliter est intelligenda, non materialiter.* — Existimo autem hanc distinctionem formaliter magis quam materialiter esse intelligendam, nam etiamsi cognitio sit divinarum rerum, si per inferiores et creatas rationes cognoscantur, vel elucidentur, scientia est: et e converso, etiamsi res creditæ humanæ sint, si per rationes superiores cognoscantur, erit sapientia. Additque ibidem Augustinus per scientiam, fidem saluberrimam, quæ ad veram beatitudinem ducit, gigni, nutrirî, defendi ac roborari. Quod ille de acquisita scientia tradit, potest tamen cum proportione de dono scientiæ intelligi. Nam etiam potest hoc munus suo peculiari modo circa mysteria fidei æterna et increata præstare, et e converso sapientia potest de mysteriis, seu rebus temporalibus, ut sunt opera et passio Christi Domini, suo modo judicare, et ita possunt in materia convenire, et nihilominus ex ratione et medio judicandi distingui. Hinc vero etiam fit ut sapientia principalius et magis ex instituto res divinas et supremas consideret, quam scientia. Unde D. Thomas, quasi utrumque conjungens 2. 2, quæst. 45, art. 1, de sapientia dixit ad eam pertinere causam altissimam, et per eam de aliis certissime judicare, et secundum eam omnia ordinare. Et ita etiam intelligendum est quod ait, q. 8, art. 6, ad sapientiam et scientiam pertinere judicium rectum, quo homo judicat rebus fidei esse inhærendum, et ab earum oppositis esse recedendum; hoc vero judicium, quantum ad res creatas, pertinere ad donum scientiæ; quantum vero ad res divinas, ad donum sapientiæ spectare. Intelligendum enim hoc

uto per se primo ac principaliter, consequenter vero posse utrumque donum extendi ad omnia sub ratione propria, quantum illa apax fuerit. Et ita tandem explicuit idem D. Thomas 2. 2, quæst. 9, art. 2, ad 3.

8. *Discrimen aliud inter scientiam et sapientiam.* — Quibus addi tandem potest differre sapientiam a scientia, quia sapientia peculiariter fundatur in quadam spirituali experientia ex connaturalitate ad charitatem Dei : scientia vero non ita fundatur in charitate, sed in aliis inferioribus rationibus. Unde omnes rationes fundatæ in Dei bonitate et dilectione ipsius secundum se, vel ad ejus gloriam et manifestationem attributorum ejus pertinentes, quæ disponunt intellectum ad adhærendum mysteriis divinis ac revelatis, pertinent ad sapientiam : quæ vero spectant ad hominis felicitatem vel salutem, etiam supernaturalem, pertinent ad scientiam, præsertim si procedant ex affectu ad proprium commolum. Nam inde etiam potest homo bene disponi ad iudicium hujus scientiæ. Ideoque non immerito dici potest quod, sicut sapientia fundatur in charitate Dei, ita scientia, ut sit perfecta in hoc genere, fundari debet in affectu bene disposito ad salutem et felicitatem supernaturalem, ut bonum proprium hominis est, quem affectum in superioribus diximus ad habitum spei pertinere. Unde non improbabiler dici potest, sicut sapientia annectitur charitati, et intellectus fidei, ita scientiam annecti virtuti spei, et habere connaturalitatem quamdam cum amore concupiscentiæ Dei, quatenus in illo fundari possunt præcipuæ rationes inferioris ordinis ad hanc scientiam pertinentes.

9. *Quomodo hæc tria dona a consilio distinguantur.* — Ultimo ex dictis explicata in genere manet distinctio horum trium actuum ab actu consilii, quia illi tres speculativi sunt, vel in materia, vel in modo universali : consilium vero est actus omnino practicus, et per applicationem ad particularia cum circumstantiis hic et nunc determinatis : in quo etiam differt ab actu fidei, sicut de prudentia dictum est. Nondum tamen explicata est specifica ratio hujus consilii, in qua differat a iudicio prudentiæ, non tantum acquisita, sed etiam infusa. Hoc vero explicari recte non potest sine aliis actibus moralium donorum ad affectum pertinentium, et ideo in sequenti capite explicatio hujus actus continuabitur.

CAPUT XXI.

QUINAM ACTUS SINT FORTITUDO, PIETAS, TIMOR ET CONSILIUM, QUI DONO SPIRITUS SANCTI SPECIALITER TRIBUUNTUR?

1. *Prima opinio non distinguens hæc dona a virtutibus.* — *Probatur primo inductione.* — Auctores qui negant dona distingui a virtutibus secundum rem, sed tantum secundum denominationem vel aliquam accidentalem perfectionem, multo facilius de his actibus moralibus idem testantur. Nam si nomina attendamus, *fortitudo* quædam virtus moralis est. *Pietas* ibi significat religiosum cultum erga Deum, et ita idem est quod religio, quæ altera virtus moralis est. *Timor* vero variis modis explicatur, nullus autem assignatur qui non sit alicujus virtutis actus. Hieronymus enim explicat esse timorem Dei servilem, rectum scilicet, et moderatum, id est, timorem Dei, prout justas pœnas minatur. Unde significat non esse prædictum de Christo propter ipsum, sed propter membra ejus. Et idem sentit Gregorius, hom. 49 in Ezech., dicens hunc timorem esse quem charitas excludit. Et de eodem videtur exponere August., lib. 2 de Doctr. Christi., cap. 7. Alii vero exponunt de timore filiali, quem esse actum a charitate elicatum, et ipse D. Thomas et fere omnes fatentur, et de utroque dixi in materia de Pœnitentia et de Incarnatione. Alii de timore reverentiali hunc actum exponunt : nam hic est proprius qui in Christo fuit, de quo, ut dixi, Propheta loquitur, hic autem timor est actus humilitatis, ut infra dicam. Alii denique timorem illum generaliter accipiunt, prout solet per timorem Dei perfecta justitia et obedientia ad Deum significari. Sic enim hominem servantem perfecte Dei legem, timentem Deum appellare solemus ; estque modus loquendi Scripturæ satis communis. Et insinuat Cyrillus, lib. 2 in Isaiam, dicens de Christo : *Quod autem non particularem ei gratiam addiderit, etc., planum facit Propheta dicens : Et complebit cum spiritus timoris Domini.* Hæc ergo tria dona voluntatis recte ad alias virtutes morales seu voluntatis reducuntur, et consequenter nomine consilii intelligitur prudentia ; non oportet ergo multiplicare vel distinguere sine fundamento hos actus ab actibus virtutum infusarum.

2. *Probatur secundo ex Patribus.* — Unde Patres cap. 12 allegati, præsertim Ambrosius,

hæc dona virtutes vocant; ita enim de illis loquuntur, ut distinctionem inter illa et virtutes non videantur agnoscere. Hieronymus enim, in Isaiam, ait Spiritum Sanctum illis nominibus nuncupari, *quia cunctarum virtutum fons sit*. Cyrillus, *in hoc flore* (ait) *quieturum Spiritum multis virtutibus pollentem*. Ambrosius, libro primo de Spiritu Sancto, ait esse virtutes spirituales, et illo numero significari plenitudinem virtutum. Et in hoc sensu videtur dicere Augustinus lib. 2 Quæstionum Evangelicarum, q. 8, septem spiritus malos opponi *septem spiritualibus virtutibus*. Imo et Gregorius ita loquitur lib. 4 Moral., cap. 28.

3. *Probatur tertio ratione. — Confirmatur primo. — Confirmatur secundo.* — Ratione idem suadere possumus, quia nisi distinguantur motiva, non possunt distingui actus virtutum, ut supra visum est: hic autem non possunt motiva distingui, quia Religio, verbi gratia, semper colit Deum propter suam excellentiam singularem, vel naturalem, vel supernaturalem, nostro intelligendi et loquendi modo; tantum ergo esse potest vel acquisita, vel infusa; non enim videntur posse distingui ut magis vel minus supernaturale, quia hæc differentia accidentaria est. Unde quod actus fiat ex motione Spiritus Sancti majori vel minori, aut ordinaria, vel extraordinaria, sola distinctio accidentaliter videtur. Nam omnibus his modis possunt fieri actus virtutum infusarum magis vel minus perfecti, et virtus quælibet moralis inclinatur ad omnem honestatem suæ materiæ proportionatam, sive per rationem, sive per Spiritus Sancti specialem instinctum ostendatur. Confirmatur primo, quia actus donorum solum distinguuntur eo modo quo Aristoteles, 7 Ethicor., c. 1, distinguit actum virtutis communis ab actu virtutis heroicæ; vel sicut in 7 Ethicor., ad Eudem., refert actus virtutum qui fiunt ex propria consultatione, vel qui fiunt ex aliquo superiori instinctu. His enim exemplis utuntur auctores ad explicandos hos actus; sed vel actus virtutis communis et heroicæ, vel facti ex instinctu Dei auctoris naturæ, vel communi modo, non distinguuntur essentialiter perfectione, ut constat; ergo. Confirmatur secundo, quia si in materia virtutum moralium distinguerentur actus donorum ab actibus virtutum, cur non idem fieret in virtutibus theologicis? In his autem non fit talis distinctio secundum omnes: ergo nec in illis fieri debet. Simile argumentum fieri potest de actibus octo beatitudinum quas, Matth. 5, Christus enumerat.

Nulla enim major ratio occurrit cur septem actus enumerati ab Isaiâ censeantur distincti ab omnibus virtutibus, quam beatitudines vel fructus: sed hi non sunt actus distincti ab actibus virtutum ex omnium sententia; ergo nec illi distinguendi sunt.

4. *Vera sententia distinguens hæc dona a virtutibus. — Probatur primo quoad virtutes acquisitas.* — Nihilominus contrariam sententiam graviores Theologi amplectuntur, divus Thomas, Bonaventura, Albertus, Richardus, et alii cap. 12 allegati. Estque satis consentanea Patribus, præsertim Gregorio, lib. 2 Moral., cap. 26, alias 36, et aliis locis supra citatis. Magisque spiritualem et internam perfectionem, et Spiritus Sancti in nos operationem commendat et declarat, ac denique potest optima ratione declarari ac suaderi, ideoque a nobis ut probabilior defenditur. Et imprimis dubitandum non est quin hæc dona distinguantur a virtutibus moralibus acquisitis, in quo certe prior opinio Scoti et Gabrielis magnam vim facit Scripturis et Patribus. Sentiant enim hæc dona infundi omnibus justis, quod non esset verum, si essent tantum ipsæ virtutes acquisitæ. Ergo aperte numerant hæc dona inter gratias maxime supernaturales, et a Spiritu sancto specialiter infusas. Imo inde per antonomasiam dicta sunt dona, ut esse a Spiritu Sancto singulariter infusa significarentur; nam solet nomen doni in Scriptura perfectionibus per se infusis specialiter, et omnibus illis generaliter attribui. Sic enim fides dicitur Dei donum, ad Ephes. 1, et in hac significatione videtur accipi Jacobi 1, cum dicitur: *Omne datum optimum, et omne donum perfectum desursum est*, etc. Eodemque modo Augustinus, 13 de Trin., cap. 18, dicit inter dona Dei maximum esse charitatem. Ac denique sic accipit nomen doni Concilium Trident., sess. 6, cap. 7, cum dicit justificationem fieri per voluntariam susceptionem gratiæ et donorum. Sanctus Thomas etiam ad hoc considerat hæc dona vocari spiritus ab Isaiâ, ut significaretur dari ex speciali inspiratione Spiritus Sancti. Et licet verum sit Isaiam non tam actus ipsos vocare spiritus, quam ipsum Spiritum Sanctum ab his effectibus appellasse spiritum consilii, fortitudinis, etc., unde ab Ecclesia septiformis spiritus appellatur, nihilominus non minus efficaciter inde ostenditur esse hos peculiare effectus Spiritus Sancti, cum ab ipsis singulariter nominentur, ac proinde esse actus per se infusos ac supernaturales. Sic ergo horum donorum distinctio a virtuti-

ous moralibus acquisitis satis fundata est auctoritate. Unde si hæc dona non distinguuntur a virtutibus infusis, qua ratione supra probavimus distinctionem virtutum infusarum ab acquisitis, eorum distinctio ab eisdem virtutibus acquisitis probanda est: si autem etiam ab infusis virtutibus distinguuntur dona, a fortiori ab acquisitis distinguuntur.

5. *Probatur secundo quoad virtutes infusas.* — Quod ergo actus donorum moralium sint distincti specie ab actibus virtutum moralium infusarum, non potest melius explicari quam ratione D. Thomæ. Quia actus morales distinguuntur ex diversis motivis, et motiva ipsa per conformitatem ad diversas regulas operandi, sicque distinximus motiva virtutum moralium acquisitarum et infusarum, quia illa sumuntur per conformitatem ad naturalem rationem et regulam ordinis naturalis, hæc vero per conformitatem ad regulam fidei et regulas supernaturales. Sed ultra has regulas datur alia superior, quæ est motio Spiritus Sancti: ergo per conformitatem ad illam sumitur speciale motivum, in quo peculiaris ratio honestatis invenitur, per quam possunt optime actus donorum ab actibus virtutum distingui. Ergo ita distinguendi sunt, ut homo per dona gratiæ omnibus modis perficiatur. Minor explicatur, quia in actibus virtutum etiam infusarum homo se movet juxta regulas rationis, in his vero actibus movetur per conformitatem ad instinctum Spiritus Sancti, quæ est regula longe diversa, et sæpe ab aliis regulis rationis discordat, ut discurrendo per singulos actus, et respondendo in contrarium objectis magis elucidabitur. Posset tamen confirmari juxta sententiam supra tractatam, quæ dicebat ad distinguendos actus supernaturales a naturalibus non oportere in objectis invenire diversitatem, sed ex modo tendendi, et nobiliori modo operandi ex parte potentiæ seu principiorum ejus posse distingui. Hæc enim sententia (ut dixi) potest habere locum, quando motivum operandi proportionatum fuerit utrique actui, et virtuti inferiori, ac superiori, a quibus procedunt: quod in actu naturali et supernaturali locum non habet, ut ibidem ostendi. In præsentem autem optime potest inveniri, etiamsi alia ratio distinguendi hos actus nobis deesset. Quia motivum operandi in his actibus est supernaturale, et ideo licet daremus non esse proportionatum virtutibus infusis moralibus, nihilominus poterit Spiritus Sanctus movere hominem ad operandum ex eodem motivo, seu ob eandem honestatem fortitudinis

vel temperantiæ altiori modo, et ex peculiari instinctu suo. Multo vero melius et facilius hoc intelligitur, considerando, ex illo peculiari modo motionis et instinctus Spiritus Sancti, diversum motivum, distinctamque operandi rationem resultare, ut dictum est.

6. *De actu consilii.*—*Quo pacto donum consilii a prudentia distinguatur.* — Explicaturque melius declarando prædictos actus ab Isaia numeratos, qui primo loco posuit consilium, sub qua voce practicum judicium ad operandum movens indicatum est, quia est tale ut non tam consilio proprio operantis, quam Spiritus Sancti moventis feratur. Unde respondet quidem prudentiæ, et in eadem materia versatur, longe vero aliter in ea judicat. Nam prudentia naturalis per proprium hominis discursum applicat generalia principia naturalia ad particularem actum, vel occasionem operandi, et juxta illa judicat quid agendum sit. Et simili modo procedit infusa prudentia ex principiis ac regulis revelatis. At vero hoc consilium Spiritus Sancti convenit quidem cum judicio prudentiæ in modo practice judicandi, in quo differt ab aliis tribus donis intellectus: differt tamen ab aliis judiciis practice practiceis, in regula et principio cui nititur, quia fundatur solum in instinctu Spiritus Sancti, qui sæpe est præter ordinarias regulas, tam supernaturales quam naturales, et licet interdum esse possit illis conformis, homo qui sic movetur non alias regulas attendit, nec discursu quasi proprio movetur, sed agitur potius quam agat.

7. *Hoc consilii donum in hominibus reperiri ostenditur.* — *Confirmatur exemplis.* — Et quidem hunc operandi et judicandi modum posse in hominibus justis inveniri, manifestum est, quia Spiritus Sanctus, qui supremus Dominus est nostræ voluntatis, non obstringitur legibus vel naturæ vel gratiæ, estque omnipotens ad movendas hominum mentes, quo voluerit et prout voluerit. Sæpe autem uti hoc dominio et potestate supponit Innocent. III, in c. *Licet de Regul.*, ubi motionem hanc per instinctum Spiritus Sancti vocat *legem privatam*, quam sæpe publicæ legi derogare dicit. Sumpsitque ex Urbano II, in c. *Duae sunt*, 19, q. 1. Potestque nonnullis exemplis, partim ex Scriptura, partim ex historiis Martyrum desumptis, ostendi. Nam imprimis Samson, qui se cum Philistæis occidit, *non aliter excusatur, nisi quia Spiritus latenter hoc jusserat, qui per illum miracula faciebat*, ut ait Augustinus, 1 de Civit., cap. 21. Idemque sentit Ambro-

sins, lib. 1 de Offic., cap. 4, de Eleazaro, qui sub elephante ingressus, ut illum et hostes interimeret, *suo triumpho sepultus est*; eandemque rationem reddit D. Thom. 2. 2, q. 64, art. 5, ad 4, de quibusdam feminis quæ tempore persecutionis seipsas occiderunt, quarum memoriam Ecclesia celebrat. Nam licet de his majori cum formidine loquatur Augustinus, dicto lib. 1 de Civit., c. 26, nihilominus ubi constiterit Ecclesiam universam talium Sanctorum festum celebrare, dubitandum non est quin idem Spiritus Sanctus, qui Sanctas Martyres movit, de earundem honesta et sancta fortitudine Ecclesiam instruxerit, ut sentit idem D. Thom. 2. 2, quæst. 124, artic. 1, ad 2. Et ita de Pelagia Virgine, quæ cum sociabus in flumen se projecit, ut virginitatem suam ab hostium injuriis custodiret, incunctanter sentit Ambros., lib. 3 de Virginitate, ante medium. Et simili modo Dionysius Alexandrinus, apud Euseb., lib. 6 Historiæ, cap. 34, de Apollonia loquitur, quæ, cum carnifices ei minarentur, se eam vivam crematuros, nisi verba impietatis cum eis proferret, paululum temporis ad deliberandum precata, et dimissa ex eorum manibus, insiliit in rogam, ibique assumpta est; et ita universalis Ecclesia die nono februarii ejus festivitatem celebrat.

8. *Concluditur doctrina ex prædictis exemplis.* — His ergo et similibus exemplis, manifestum fit interdum fieri virtute et instinctu Spiritus Sancti, ut homo interius judicet practice aliquid esse faciendum, quod secundum communes leges divinas non esset faciendum, et nihilominus tale judicium practice verum ac rectum sit; non enim potest esse judicium a Spiritu Sancto, quod hujusmodi non sit. Tale ergo judicium dicimus esse distinctum a judicio prudentiæ infusæ, quia non nititur principiis ejus, neque medio, aut discursu humano, sed altiori motivo fundatur, nimirum, quia motio Spiritus Sancti est supra omnem legem. An vero distinctio hæc sit specifica necne, statim dicam. Ut autem tale judicium sit rectum, oportet ut homini sic moto certo constet Spiritum Sanctum esse qui movet et instigando præcipit. Unde optime Augustinus, dicto lib. 1 de Civit., cap. 26: *Qui audit, inquit, non licere se occidere, faciat, si jussit cujus non licet jussa contemnere. Tantummodo videat utrum divina jussio nullo nutet incerto.* Judicium enim practice, quod est regula honestæ operationis, debet ita esse certum, ut practice dubitationem excludat: hic autem major requiritur certitudo quæ formidinem tollat. Nam

cum sæpe tale judicium sit præter generales regulas et leges, ut ab his licite discordari possit, oportet ut de Spiritu Sancti instinctu sine ulla formidine constet. Ideoque difficillimum est tale judicium, et quidam extraordinarius gratiæ modus ad illud necessarius est. Quem licet nos satis explicare non possimus, tamen Spiritui Sancto difficile non est mentem hominis ita movere, ut nullum ei relinquat ambigendi locum, quin sit ipse qui movet.

9. *Donum consilii in omni virtute moralis dari potest.* — Hunc ergo actum dicimus esse speciale donum Spiritus Sancti practice et intellectuale, quod respondet prudentiæ, et consilium nominatur, quia consilium quod in eo intervenit, ut dixi, magis est ab Spiritu Sancto quam ab homine, versarique potest in omni materia virtutis moralis, ut in materia religionis aliqui putant votum Jephthæ et executionem ejus, Judic. 11, fuisse ab hac motione Spiritus Sancti, quod licet necessarium non sit, ut alibi dixi, non est tamen dubium quin esse potuerit. Idemque dicendum est in materia justitiæ de judicio Salomonis, 3 Reg. 3; est enim animadvertendum quod, licet modus hic operandi evidentius cognoscatur in materia quæ alias esset illicita, non interveniente speciali instinctu Spiritus Sancti, quia in illa est maxime necessarium hoc donum, nihilominus ad illam non limitatur; potest enim Spiritus Sanctus in quacumque materia prævenire hominis discursum, eique singulari modo tale judicium infundere, et ita in Salomone contingere potuit.

10. *De actu fortitudinis doni.* — *Convenientia virtutis et doni fortitudinis.* — *Dubium.* — *Prima opinio affirmans.* — *Probatum.* — *Confirmatum.* — Atque hinc facile explicantur dona ad voluntatem spectantia. Et imprimis donum fortitudinis ab adæquata materia denominatum est, in qua convenit cum virtute fortitudinis, quæ circa pericula, præcipue mortis, sustinenda et aggredienda versatur. Idem enim præstat actus fortitudinis, qui est ex dono, ut patet in exemplis adductis de Samson, et aliis. Quæri autem potest an hic actus, quando fit ex dono, fiat etiam ex virtute infusa. Quidam affirmant, juxta quorum sententiam actus doni fortitudinis non differt substantia et specie ab actu virtutis infusæ, sed tantum denominatione et principio; idem enim actus, ut fit ex instinctu Spiritus Sancti, dicitur donum; ut fit a virtute, dicitur virtus. Potestque hoc suaderi, quia licet homo ex in-

instinctu Spiritus Sancti moveatur ad se occidendum, tamen supposito illo instinctu seu inspiratione, et objectum illud sub eadem ratione honestatis repræsentatur, quia supposito novo præcepto Spiritus Sancti per talem impulsus manifestato, jam in illa materia medium fortitudinis innititur. Sicut medium temperantiæ inventum in jejuniis ecclesiastico, licet ex præcepto humano proveniat, nihilominus, supposito præcepto, ad eandem virtutem temperantiæ spectat. Et potest confirmari: nam quando Deus præcepit Abrahamæ sacrificare filium, licet id non esset licitum nisi ex peculiari præcepto Dei, nihilominus, supposito præcepto, eadem virtus obedientiæ eademque virtus religionis ad illum actum eliciendum concurrebant. Item quæ revelantur a Deo privata revelatione eadem fide creduntur, qua creduntur cætera catholica dogmata, quia ratio assentiendi est ejusdem ordinis; ergo similiter in præsentibus actus fortitudinis, licet sit ex speciali instinctu Spiritus Sancti, elicitur ab eadem virtute fortitudinis, quia honestas fortitudinis eadem est, facta illa suppositione.

11. *Censura primæ opinionis. — Secunda et vera sententia negans. — Consilium specie a prudentia distinguitur.* — Hæc sententia est absolute probabilis, non tamen videtur mihi posse consequenter defendi, si teneamus habitus donorum esse distinctos a virtutibus infusis moralibus, ut iidem auctores cum D. Thoma tenent. Ad quid enim est necessarius specialis habitus doni fortitudinis, si actus semper elicitur a virtute infusa fortitudinis? Supervacaneum est enim circa eundem actum habitus multiplicare. Imo vix poterit intelligi distinctio inter habitus, si ad eosdem actus efficiendos, et consequenter ad eadem objecta et sub eisdem motivis ordinantur. Supposita ergo sententia de distinctione donorum a virtutibus, quam cum S. Thoma defendimus, dicendum est actum fortitudinis, prout ad donum spectat, esse in specie et substantia sua distinctum ab actu virtutis infusæ, et consequenter non elici a propria virtute morali, sed ab altiori principio. Idemque dicendum est de actu doni consilii, esse nimirum distinctum ab actu virtutis prudentiæ, quæ sæpe non potest per se judicare in tali materia et occasione aggredi mortem esse actum fortitudinis. Idemque cum proportionem est de cæteris donis voluntatis. Et ratio est, quia motivum judicandi vel appetendi in tali opportunitate minuitur per conformitatem ad altiore regulam,

quam sit ordinaria regula rationis, sive naturalis, sive infusa, nimirum ad specialem rationem et instinctum Spiritus Sancti. Nam veritas practica vel honestas moralis, quæ inde resultat, non minus differt a motivo virtutis infusæ, quam hoc differt a motivo virtutis acquisitæ. Igitur non minus distinguitur actus doni ab actu virtutis infusæ, quam hic distinguitur ab actu virtutis acquisitæ.

12. *Solvitur ratio primæ opinionis in n. 10. — Ad confirmationem, ibid. — Ad exemplum ibi positum.* — Ad objectionem ergo in contrarium negamus esse idem motivum, etiam posita motione vel præcepto Spiritus Sancti, quia ratio operandi proxima, seu motivum formale talis actus non est ratio præcepti, alioqui esset ille actus formalis obedientiæ, non fortitudinis. Motivum ergo proximum est honestas, quæ in tali materia resultat, posita ejusmodi Spiritus Sancti motione, seu instinctu. Neque tunc medium in tali materia est omnino idem cum medio virtutis, quia sumitur per comparisonem ad diversa extrema. Cujus signum est, quia sæpe in tali materia recte judicatur medium per comparisonem ad talem regulam, quod alias in comparisonem ad ordinarias regulas non esset medium, sed extremum. Et ideo non est simile exemplum de medio consurgente ex lege publica positiva, humana vel divina; tum quia virtute per se respiciunt honestatem insurgentem ex conformitate ad legem publicam, sive sit naturalis, sive positiva; tum etiam quia leges positivæ, quando aliquid præcipiunt faciendum, supponunt in tali materia medium alicujus virtutis, et solum addunt necessitatem observandi illud. At vero motio Spiritus Sancti per se non supponit proprium virtutis medium, sed quasi novum medium constituit. Ad confirmationem sumptam ex præcepto imposito Abrahamæ de filio sacrificando, respondeo actum illum, si præcise consideretur in ordine ad obedientiam vel cultum Dei, sic non habuisse aliquid proprium ratione ejus ad donum pertinere, quia ratio obediendi Deo ipsumque colendi eadem erat in illo actu, quæ solet esse in virtute obedientiæ vel patriæ, nec respectu illarum virtutum habebat aliquid superans communes regulas virtutis. At vero respectu filii videbatur esse contra justitiam vel paternam pietatem, et ut sic potuit ad donum pietatis pertinere, quia ut sic erat ex peculiari instinctu, vel expressa revelatione Spiritus Sancti contra communes regulas justitiæ et pietatis. Ad aliud denique exemplum de fide, licet non

desint qui antecedens negent, illo concesso, negatur consequentia, quia in fide semper est idem motivum assentiendi; modus autem propositionis, publicus aut privatus, internus aut externus, accidentarius est. In actu vero fortitudinis, ratio honestatis quæ per conformitatem ad diversam regulam sumitur diversa est.

13. *De actu pietatis doni. — Prima opinio confundens donum pietatis cum timore. — Secunda et vera sententia distinguens.*—Circadonum pietatis, imprimis advertendum est, in originali hebraico, in dicto loco Isaïæ 41, idem haberi nomen, quo pietas et timor significantur. Unde aliqui, nimium addicti hebraicæ veritati, dicunt ab Isaïa sex tantum numerari dona, seu actus divini Spiritus. Et pro dono pietatis ponunt donum timoris, videlicet, spiritus scientiæ et timoris, et in sequentibus verbis idem repetunt, aliter tamen verba illa legunt quam in vulgata habeantur. Nam ubi nos legimus: *Et replebit illum spiritus timoris Domini*, Vatablus vertit: *Et faciet eum spirare timore Domini*; Pagninus: *Et odorari faciet eum omnes in timore Domini*. Et hos sequitur Adamus ibi dicens in hebræo idem esse vocabulum significans timorem Domini, et ita ex hoc loco sex tantum, et non septem colligi dona Spiritus Sancti. Nihilominus tamen Septuaginta interpretes in sexto loco ponunt nomen εὐσεβείας, quod pietatem significat, et in septimo nomen φόβου, quod significat timorem, et ita etiam vertit Hieronymus, et hanc versionem et sententiam Patres omnes supra citati receperunt, et universalis Ecclesiæ consensus probavit: quare nullo modo licet ab hac sententia recedere, neque distinctionem inter illa duo ultima dona negare. Unde vel credendum est in primitiva Scriptura, qua usi fuerunt Septuaginta, sexto loco fuisse positum nomen significans pietatem, vel (quod verisimilius est) idem nomen habuisse utramque significationem, et ex traditione vel ejusdem Spiritus Sancti inspiratione intellectum esse, in priori loco significare pietatem, in posteriori vero timorem.

14. *Pietatis varia acceptio. — Vera acceptio pietatis hoc in loco. —* Hoc vero constituto, etiam nomen ipsum pietatis æquivoecum est. Interdum enim significat pietatem erga proximos et indigentes, quæ proprie est misericordia, in quo sensu videtur hunc actum interpretari Gregorius, homil. 19 in Ezechielem. Aliter pietas proprie significat cultum seu observantiam ad parentes, consanguineos et

patriam; in qua significatione sumitur a philosophis et theologis, ut est apud D. Thom. 2. 2, quæst. 101. In præsentī vero sumitur pro pietate erga Deum, quæ eadem est cum religione, nam hoc frequentius significat vox græca εὐσεβεία, juxta doctrinam Augustini, libro 12 de Trinit., cap. 1, et lib. 14, cap. 1. Unde Tertullianus, cum in aliis locis supra citatis nomen pietatis ibi ponat, in lib. 5 contra Marcion., c. 8, legit: *Et spiritus agnitionis*, id est scientiæ, *et religionis*, pro pietatis. Et ita etiam intelligit illum locum D. Thomas 2. 2, quæst. 121, art. 1, ubi ait pietatem proprie significare honorem et cultum parentum, et quia Deus singulari modo Pater noster factus est per Christum, ideo per Spiritum Christi nobis donari speciale donum pietatis ad Deum, ut Patrem. Additque in solutione ad 3, per virtutem religionis exhibere nos cultum Deo, ut creatori, per donum autem pietatis exhibere nos cultum Deo, ut Patri.

15. *Religionis acquisitæ et infusæ cultus.*—Advertendum est autem, licet religio acquisita colat Deum tantum ut creatorem et naturalem benefactorem, nihilominus religionem infusam etiam colere Deum ut Patrem, ex illo filiali affectu quem in nobis generat singularis adoptio per gratiam, juxta illud ad Roman. 8: *Accepistis spiritum filiorum, in quo clamamus: Abba, pater*. Nam hic cultus debitus est Deo, ut Patri, secundum ordinariam regulam et legem gratiæ, seu secundum rectam rationem fide illuminatam, et ideo sine dubio pertinet ordinarie ad virtutem religionis infusam. In hoc ergo non satis distinguitur hoc donum a religionis virtute infusa, sed oportet adjungere quod ibi D. Thomas in corpore articuli posuit: *Pietatem ad Deum, ut Patrem, quatenus interdum fit per peculiarem instinctum Spiritus Sancti, ad donum pertinere*.

16. *Hoc donum pietatis circa totam justitiæ materiam versatur.*—Denique addendum est ex eodem D. Thom. 1. 2, q. 68, art. 4, pietatem hoc modo sumptam non esse adæquatam actum istius doni, sed per synecdochem nomine præcipuæ partis fuisse comprehensam totam justitiæ materiam, seu omnem actionem quæ est ad alterum, quatenus per instinctum Spiritus Sancti singulariter perfici, et propria ejus motione fieri potest. Et sic etiam divus Thom. 2. 2, q. 121, art. 1, ad 3, ait sub hoc dono comprehendi etiam pietatem erga Sanctos, et parentes, et alios homines, quatenus ad Deum pertinent, utique prout ista omnia fieri possunt ex speciali motione Spiritus

Sancti; alioqui enim etiam illa officia, ut ordinario modo præstari possunt, ad pietatem infusam, dulciam, observantiam et misericordiam pertinent.

17. *Pia voluntas ad fidem, non ad pietatem spectat.* — Denique huic dono pietatis tribuit Augustinus debitam reverentiam ad Scripturas, non contradicendo illis, sive intelligantur, sive non capiantur, ut lib. 2 de Doctrin. Christian., c. 7, et l. 1 de Serm. Domin. in monte, cap. 4. Sed hoc proprie et ordinarie pertinet ad virtutem fidei, et ad virtutem elicentem pium affectum credendi, quam solemus etiam piam voluntatis affectionem appellare. Solum ergo poterit ad hoc donum actus ille spectare, quatenus est specialis reverentia ad Deum et res divinas, ex instinctu Spiritus Sancti concepta, quæ etiam disponit hominem ad suscipiendas Scripturas cum debita pietate et subiectione, et consequenter sine spiritu contradictionis. Et quamvis Augustinus hunc actum specialiter explicaverit, quia fortasse instituto illius magis inserviebat, non propterea alios exclusit: pertinet ergo ad hoc donum tota materia, seu actio ad alterum, quatenus sub instinctum Spiritus Sancti cadere potest, ut explicatum est.

18. *De actu timoris, ut est donum Spiritus Sancti.* — *Hoc donum est reverentialis timor, et a cæteris donis distinctum.* — Circa hoc donum, ex quatuor expositionibus quas in principio capituli, n. 1, recensuimus, illam maxime probamus, quæ de timore reverentiali hoc donum intelligit. Nam imprimis longe probabilius est esse specialem actum a cæteris distinctum, alias timor non esset speciale donum, sed quasi collectio cæterorum, vel totius sanctitatis et obedientiæ ad Deum, ut dicebat quarta expositio, quam in hoc non probamus, quia repugnat communi sensui Patrum et Ecclesiæ, colligentium ex illo loco septem dona Spiritus Sancti. Si enim timor non est speciale donum, profecto non sunt septem. Item si alia sunt speciales actus, cur non hoc?

19. *Sanctus est hic timor.* — *Nullus timor mali pœnæ ad hoc donum pertinet.* — *Probatur de timore humano.* — De hoc ergo actu certum est hunc timorem debere esse sanctum et bonum, quia Spiritus Sanctus non potest esse auctor timoris pravi. Unde timorem mundanum non pertinere ad hoc donum, certum est, quia ille de se malus est, et ideo inter dona Dei non computatur, ut dixit Augustinus, lib. de Grat. et liber. arbitr., cap. 18. Imo nullus timor mali pœnæ, vel nocenti, quod vel ab

hominibus vel a causis naturalibus provenire potest, ad hoc donum spectat, quia si sit nimius, et cum conditione servili, videlicet quia, si non timeretur pœna, non vitaretur culpa, est etiam malus et mundanus: si vero sit intra gradum suum moderatus, vel erit indifferens, vel ad summum honestus intra ordinem naturalem.

20. *Probatur deinde de timore divino servili.* — Præterea timor etiam Dei, si servilis sit, non est hujus doni actus, quia si includat conditionem servilem, etiam est pravus. Et quamvis sit cum debita moderatione seu appropriatione, licet sit bonus, et a Spiritu Sancto, non tamen est speciale donum, unum scilicet ex septem quæ ab Isaia numerantur, juxta sententiam D. Thom. 2. 2, quæst. 109, art. 9; tum quia, licet sit bonus, est imperfectus, et non fuit proprie in Christo; tum etiam quia pertinet magis ad peccatores. Quamvis enim in justis etiam esse possit, tamen ex imperfectione aliqua, nam perfecta charitas foras mittit hunc timorem; et ideo etiam sine charitate esse potest, ut ait Augustinus, lib. de Natur. et Grat., cap. 57; dona autem Spiritus Sancti sunt propria justorum; tum etiam quia hic timor est actus proprius spei, ut recte supra objiciebatur: cum autem spes sit theologalis virtus, non indiget dono quod in sua materia altiori modo operetur, quia virtutes theologice optimo modo in sua materia operantur, ut paulo post dicemus.

21. *Late dicitur Spiritus Sancti donum servilis timoris.* — Unde si aliquando timor servilis dicitur esse donum Spiritus Sancti, vel late sumitur donum pro omni opere facto ex gratia Spiritus Sancti, ut loquitur Alens., 3 part., quæst. 66, memb. 2, vel intelligendum est potius causaliter quam formaliter, quia hic timor solet maxime cohibere inordinatam concupiscentiam delectabilium, juxta illud Proverb. 16: *In timore Domini declinat omnis a malo*; et illud Psalm. 118: *Confige timore tuo carnes meas*. Et ita declarat hoc donum D. Thom. 1. 2, q. 68, art. 4. At vero 2. 2, q. 19, art. 9, dicit hunc timorem esse filialem timorem, sub quo initialem comprehendit, quia hi timores substantialiter non distinguuntur, sed secundum statum magis vel minus perfectum, et ita etiam timor, qui est donum Spiritus Sancti, prout magis vel minus perfectus, dicetur initialis vel filialis. Et idem sentit Richard., in 3, d. 34, art. 2, quæst. 2. Nihilominus tamen existimo hunc timorem non aliter esse donum Spiritus Sancti

ti, quam sit charitas, quia timor castus qui filialem et initialem comprehendit, est actus elicited a charitate, ut ex doctrina ejusdem divi Thomæ et communi suppono, ideoque sicut amor charitatis non est ex speciali dono a charitate distincto, ita neque hic timor.

22. *Donum hoc in timore reverentiali consistit.* — Quapropter probabilius videtur donum hoc intelligendum esse de timore reverentiali. Hunc enim merito a cæteris distinguit Alens. 3, quæst. 66, memb. 1, dicitque non consistere in fuga mali, sed esse timorem reverentiæ magnitudinis divinæ Majestatis, et 2 p., quæst. 156, memb. 2, art. 1, alias quæst. 17, memb. 1, dicit esse *resilitionem*, id est, affectum resiliendi *a divina Majestate, consideratione propriæ parvitatæ*, et hunc esse timorem sanctum, qui manet in beatis; illo enim coram Deo humiliantur, ut de sanctis Angelis idem auctor dicit, 2 p., quæst. 101, alias 118, memb. 3, art. 7. Unde intelligimus hunc timorem esse actum humilitatis, ut etiam sensit Richard. supra, quæst. 4, et Scotus supra, dicens hunc timorem esse speciem temperantiæ, quia est idem quod humilitas. Et hæc etiam ratione dixit Altisiod. supra, c. 1, q. 3, ad temperantiam reduci hoc timoris donum; humilitas enim præcipua pars temperantiæ est, et ideo sub nomine præcipuæ partis tota temperantia intellecta est, sicut de pietate respectu justitiæ diximus. Estque hæc sententia consentanea Augustino, l. 1 de Serm. Domin. in monte, cap. 4, dicenti: *Timor Dei congruit humilibus, de quibus etiam dicitur: Beati pauperes spiritu, id est, non inflati, non superbi, de quibus etiam dicit Apostolus: Noli altum sapere, sed time.* Et serm. 17 de Sanctis, c. 1, in eodem sensu dicit oportere incipere ab hoc timore, *tamquam a convalle plorationis. Per convallem autem, ait, humilitas significatur. Quis est autem humilis, nisi timens Deum?* Sic etiam D. Gregor., lib. 2 Moral., c. 26, alias 36, timorem hunc superbiæ opponit. Per timorem ergo illum humilitas significata est, et sub humilitate tota temperantia intellecta, utique quoad materiam, sicut de justitia diximus. Nam in omni materia moralium virtutum dona possunt operari altiori modo, ut declaratum est.

23. *Satisfit rationi adductæ.* — *Respondetur ad auctoritates Patrum in num. 2.* — Et per hæc responsum est ad primam rationem dubitandi in principio positam. Probat enim hæc quatuor dona reduci ad quatuor cardinales virtutes quoad materiam, non vero quoad essen-

tiam, propter diversam rationem et modum operandi. Ad Patres autem respondemus hæc nomina virtutum et donorum in aliqua significatione generalia esse, quia et omnes actus honesti possunt dici dona, quatenus a Deo donantur, et hoc modo confunduntur interdum hæc voces, licet inter ipsos actus sit distinctio, ad quam significandam accommodatæ sunt illæ voces sub specialibus significationibus, ut latius infra dicemus, tractando de habitibus. Et ita Ambros., lib. 1 de Spirit. Sanct., cap. 20, cum dixisset septem illis nominibus significari plenitudines virtutum, subjungit: *Unum est ergo flumen, sed multi spiritualium donorum meatus.* Clarius vero dixit Gregor., 35 Moral., cap. 7, *per dona juxari virtutes.*

24. *Ad primam confirmationem in num. 3.* — Ad primam confirmationem, fatemur illa exempla non tam probationis, quam explicationis et manuductionis gratia esse adducta. Nec enim D. Thomas existimavit Aristotelem cognovisse dona Spiritus Sancti, vel aliquid omnino simile: sed illis exemplis usus est, ut intelligeremus posse aliquid excellentius non tantum accidentaliter, sed etiam essentialiter diversum, in nobis fieri ex altiori instinctu et motione Spiritus Sancti: quod non solum sit proprium ejus in hoc quod excitat hominem, præveniendo ejus voluntatem, sed etiam in hoc quod movet ad operandum ex quadam altiori ratione, communes operandi regulas superante.

25. *Ad secundam confirmationem ibid.* — *Ad aliam partem rationis.* — Ad secundam confirmationem, quod attinet ad virtutem theologiam, respondet D. Thomas 1. 2, quæst. 68, art. 4 ad 3, et art. 8, dona supponere unionem ad Spiritum, quam faciunt theologales virtutes, et ideo has virtutes supponi ad dona, ut radices et regulas illorum, ideoque et esse perfectiores quibuscumque donis, et non esse necessaria dona quæ theologicos actus efficiant: deberent enim perfectiori modo fieri per talia dona, quam per ipsas virtutes theologicas, quod esse non potest. Quia virtutes theologice, tam ex parte objectorum materialium, quam ex ratione formalis attingendi illa, habent supremam excellentiam, ita ut non possit Deus sub altiori ratione amari, quam per charitatem ametur, et sic de cæteris. Nam omnes immediate nituntur ipsi Deo tanquam objecto et tanquam regulæ, et tanquam principali efficienti. Unde in materia virtutum non invenitur excellentior modus operandi, quam sit theologalium virtutum, quod non ita

est in virtutibus moralibus, ut explicatum est. Ad aliam illius argumenti partem in sequenti capite respondebimus.

CAPUT XXII.

UTRUM PRÆTER ACTUS VIRTUTUM ET DONORUM SINT ALII ACTUS SUPERNATURALES, AD QUOS SIT SPECIALIS GRATIA NECESSARIA, QUI BEATITUDES VEL FRUCTUS SPIRITUS SANCTI DICUNTUR ?

1. *Beatitudines quid significant. — Opinio beatitudines a donis et virtutibus distinguens. — Vera sententia tripartita. — Probatur prima pars, quod beatitudines sint actus honesti.* — In hoc capite breviter comprehendemus quæ de beatitudinibus et fructibus Spiritus Sancti Theologi disputant in 3, d. 35, et copiosius D. Thom. 1. 2, quæst. 69 et 70, quæ ad complementum hujus materiæ visa sunt necessaria; tum ut solvamus argumentum in fine capituli præcedentis relictum; tum ut omnia, quæ de supernaturalibus actibus et gratia ad illos necessaria desiderari possunt, complectamur. Quod ergo ad beatitudines spectat, hoc nomine significantur illi actus quibus homines beatos fieri Christus docuit, Matth. 5, in initio suæ prædicationis, dicens: *Beati pauperes spiritu*, etc. De quibus non defuerunt Theologi qui dixerint beatitudines esse actus distinctos a donis et virtutibus. Ita significat Albert. in 3, d. 34, art. 2, quæst. 3; Henric., Quodlib. 4, quæst. 23; Gerson., tract. de Beatitud., alphab. 28, litter. G. Verumtamen non videntur loqui de distinctione essentiali, sed de accidentali: nam beatitudines esse volunt virtutes in statu perfecto, seu prout actus heroicos eliciunt, ut explicuit Gabriel in 3, d. 34, concius. ult. Igitur, generatim loquendo, dico beatitudines quidem esse bonos et optimos actus, et adeo excellentes, ut non possint sine gratia speciali fieri, non tamen esse distinctos ab actibus virtutum et donorum, sed sub illis comprehendendi. Prima pars certa est in fide, et ipsius Christi auctoritate satis comprobatur: ipse enim non solum laudavit et commendavit hos actus, sed in eis etiam beatitudinem posuit, non quia in eis formaliter beatitudo consistat, sed quia per illos vera beatitudo comparatur; at beatitudo vera non nisi per actus bonos et honestos obducitur: ergo. Et explicando singulos actus aperte constabit. Unde obiter intelligitur quomodo cum beatitudo una sit, Christus octo beatitudines numeret; nam licet beatitudo formalis seu in termino sit una, via

tamen ad beatitudinem vel est multiplex, vel plures actus comprehendit, qui causaliter vel dispositive beatitudines nominantur, quia ad veram beatitudinem disponunt ac perducunt.

2. *Probatur secunda pars, quod ad beatitudines gratia requiratur. — Probatur tertia pars, quod non sint a virtutibus et donis distinctæ.* — Et hinc facile probatur secunda pars, quam etiam de fide certam esse judico, nimirum, hos actus esse supernaturales, et sine gratia Dei fieri non posse, quia beatitudo, a Christo prædicata et promissa, supernaturalis est, et ad illam non nisi per actus divinæ gratiæ tenditur; sed per hos actus qui beatitudines dicuntur, ad veram beatitudinem Christianam tenditur; nam per hos actus homines ad illam consequendam optime disponuntur; sunt ergo tales actus, qui sine gratia Dei fieri non possunt. Et hoc etiam aperte convincitur ex regula supra demonstrata, quod nullus actus conducens ad vitam æternam potest sine gratia Dei fieri; nam omnes isti actus valde conducunt ad vitam æternam, ut ex testimonio Christi constat, et in singulis statim declarabitur. Denique ultima pars, quod illi actus non sint alterius ordinis a virtutibus et donis, ab omnibus Theologis recepta est. Et probatur, quia illa distinctio nec in Scriptura, nec in Patribus significatur, nec est necessaria, cum illa omnia quæ a Christo beatificantur, fieri non possint, nisi vel secundum ordinarias regulas fidei, id est, secundum rectam et perfectam rationem fide illustratam, vel secundum instinctum et specialem motionem Spiritus Sancti. Qua ratione usus est D. Thomas dicta q. 69, art. 1, præcipue ad 2, ubi auctoritate Augustini idem confirmat. Sed hæc omnia magis illustrabuntur breviter per singulas beatitudines discurrendo.

3. *Prima beatitudo exponitur. — Primo de humilitate.* — Prima beatitudo est paupertas spiritus, *Beati pauperes spiritu*, etc., quæ tribus modis exponitur. Primo, ut per paupertatem spiritus vera et interna humilitas intelligatur, nam ita solet paupertas in Scriptura sumi, et ita exponit Nyssen. in lib. de Beatitudinibus, et Hieronymus ac Cyrillus in id. Isai. ult.: *Ad quem respiciam, nisi ad pauperulum et contritum spiritu?* Ubi Cyrillus legit *nisi ad humilem*; Hieronymus vero, per *pauperulum*, humilem intelligit, et subjungit: *De quo dictum est in Evangelio: Beati pauperes spiritu.* Et eodem modo exponit Matth. 5, addens hoc esse quod Psal. 33 scriptum est: *Et humiles spiritu salvabit. Et ideo*

(inquit) *adjunxit spiritu, ut humilitatem intelligeres*. Et tandem ait hos esse pauperes, de quibus Isai. 61 prædictum est: *Evangelizare pauperibus misit me*. Et eandem expositionem habet Chrysostomus, homil. 15 in Matth.; Hilarius, canon. 4; Augustinus, late libro 1 de Sermon. Domini in monte, cap. quarto. Et ita dicit hanc primam beatitudinem respondere septimo dono timoris, quod nos etiam de humilitate exposuimus.

4. *Exponitur secundo de interno divitiarum contemptu*. — Secundo, exponitur de spirituali contemptu divitiarum et rerum omnium temporalium, etiamsi re ipsa non relinquuntur. Unde ideo creditur additam esse illam particulam *spiritu*, ut non solum intelligantur beatificari pauperes, qui re ipsa divitiis carent, sed etiam illi qui, licet divites actu seu re ipsa sint, animo tamen parati sunt omnia relinquere quando oportuerit, propter regnum cœlorum. A qua expositione non longe abest Hilarius. Nam licet de humilitate exponat, statim illam declarat per affectum, quo nihil tanquam nostrum possideamus, sed ex Dei dono, ut ea tanquam communia possideamus, nec temporalium rerum cupiditate corrumpamur, sed exemplo Dei omnia omnibus communicare parati simus. Idemque insinuat Ambrosius, lib. 5 in Luc., cum ait: *Primam benedictionem hanc uterque Evangelista posuit, ordine enim prima est parens quædam, generatioque virtutum, quia qui contempserit secularia, ipse merebitur sempiterna: nec potest quisquam meritum regni cœlestis adipisci, qui, mundi cupiditate pressus, emergendi non habet facultatem*. Ubi rationem etiam expositionis indicat. Nam Christus non videtur initium prædicationis suæ ab statu perfectionis sumpsisse, sed ab illa paupertate quæ omnibus necessaria est; hæc autem est paupertas spiritus quoad moderationem affectus divitiarum, in sensu declarato.

5. *Declaratur tertio de evangelica paupertate*. — Nihilominus est tertia expositio, quæ de vera paupertate evangelica hanc beatitudinem exponit, quæ ideo dicitur esse *spiritus*, quia non debet esse coacta, vel tantum a fortuna, sed voluntaria, aut etiam quia debet proficisci ex spiritu perfectionis, tanquam dispositione necessaria ad illam, juxta illud Matth. 19: *Si vis perfectus esse, etc.* Et hanc etiam expositionem Hieronymus adjungit et cum humilitate conjungit; quia est optima dispositio ad illam, vel quia sine illa haberi non potest. Unde recte dixit Cyprianus, vel

auctor libri de Duodecim abusivis gradibus, cap. 8, unum gradum abusivis esse pauperem superbum, ubi hæc etiam expositio ponitur, et merito dicitur promitti regnum cœlorum his qui omnia temporalia despiciunt. Et hinc est ut aliquando Patres omnes has expositiones involvant, ut videre licet in Hieronymo supra, et latius in Leone Papa, sermon. de Omnibus Sanctis, ubi prius paupertatem spiritus dicit esse humilitatem, quæ maxime solet esse in pauperibus, id est, carentibus temporalibus bonis, licet etiam esse possit in divitibus, *si sint proposito pauperes, licet impares censu*. Unde subjungit: *Beata illa paupertas quæ rerum temporalium amore non capitur, etc.* Postea vero dicit hujus magnanimæ paupertatis exemplum nobis Apostolos tribuisse, omnia relinquendo.

6. *Omnes hæc explicationes subsistere possunt*. — *Tertia tamen litteralis videtur*. — *Concluditur paupertatem a virtutibus, vel donis non distinguere*. — Neque est incredibile Christum Dominum sub eisdem verbis hæc omnia comprehendisse, propter eorum connexionem et propter divini sui sermonis eminentiam. Unde D. Thom. 2. 2, quæst. 19, art. 2, dixit paupertatem spiritus includere *inanitionem inflati et superbi spiritus, cum abjectione rerum temporalium ex instinctu Spiritus Sancti*. Nihilominus tamen certius videtur per se, ac præcipue, paupertatem excludentem temporales divitias Christum beatificasse, non quamcumque, sed voluntariam, neque hanc etiam omnem (nam, ut alibi dixit Hieronymus, etiam Socrates et alii philosophi divitias contempserunt, et non propterea fuerunt beati), sed illam quæ spirituali modo assumitur, utique propter spiritualem perfectionem assequendam. Quod maxime fit quando ex vera animi humilitate et rerum temporalium contemptu divitiæ relinquuntur. Hinc vero fit consequenter, ut qui aliquo modo hanc participant paupertatem, cum proportionem præmium illius beatitudinis consequantur, et ideo etiam divites qui parati sunt divitias elargiri vel distribuere sicut oportet, vel, si ad Dei gloriam et propriam salutem necessarium sit, omnino etiam relinquere, ab illa paupertate non excluduntur. Denique, quocumque ex dietis modis paupertas illa accipiatur, constat actum illum voluntarie renuntiandi omnia, solum esse posse vel ex aliqua virtute, vel ex dono Spiritus Sancti. Nam si consideretur paupertas solum quoad carentiam vel privationem rerum temporalium, sic non est per se appe-

tibilis, neque bona, ut dixit D. Thomas, 3 contra gent., cap. 133, sed, juxta motivum, seu finem, et modum ejus, habet quod sit honesta. Unde si abdicatio rerum fiat propter subventionem pauperum, erit opus misericordiæ; si vero Deo consecretur, erit opus religionis; si propter vitandum periculum peccandi, erit opus charitatis, vel pœnitentiæ, aut castitatis, seu illius virtutis cui tale peccatum opponitur. Et ita semper participat honestatem alicujus virtutis. Quod si altiori instinctu Spiritus Sancti appetatur, erit ex dono Spiritus Sancti accommodato tali motivo, puta pietatis, aut timoris, seu humilitatis. Et hæc sufficiunt de hac beatitudine. De promissione autem illi facta nihil dicere oportet, quia per se satis patet.

7. *Exponitur secunda beatitudo. — Prima sententia. — Secunda et vera sententia.* — Secunda beatitudo est, *Beati miles*, quam aliqui de humilitate exponunt, quia nemo potest esse mitis, nisi humilis sit. Unde Christus, Matth. 11, dicebat: *Discite a me quia mitis sum et humilis corde.* Eodemque modo illa conjungit Cypr., l. 3 ad Quirin., cap. 5. Sed licet illa duo valde conjuncta sint, diversæ virtutes sunt: aliud enim est mansuetudo, aliud humilitas; mites enim dicuntur qui sunt mansueti et lenes, non proprie ac formaliter qui sunt humiles. Unde non oportet verba extra propriam significationem transferre. Imo licet illa sint moraliter conjuncta, posset aliquis animo et mente esse humilis, quæ virtus magis spiritualis est, et non esse mitis, quia non habet passionem iræ satis moderatam. Longe aliter Basilius, in Regul. brevioribus interrogat., 191: *Quis est (inquit) mitis?* et respondet: *Qui in judiciis earum rerum quæ Deo placent, idem usque stabilis perseverat.* Ubi describit mitem per quemdam effectum ejus, qui est placido et quieto animo accipere omnia quæ per divinam providentiam homini eveniunt, etiamsi propriis commodis contraria videantur. Augustinus vero, lib. 4 de Sermon. Domini in monte, cap. 4, ait cum esse mitem qui cum pietate suscipit Scripturas, easque non resistit; et infra dicit mitibus promitti, ut hereditate possideant terram, *tamquam testamentum patris cum pietate querentibus.* Sed hoc etiam ad remotum quemdam mansuetudinis effectum spectat, et magis allegoricum videtur quam litterale.

8. *Mansuetudinis vera ratio.* — Proprie ergo mansuetudo est virtus quæ passionem iræ moderatur, ut tradit D. Thom. 2. 2,

quæst. 157. Et de hac optime et propriissime Christi verba intelligit Ambrosius, lib. 5 in Lucam, et D. Thom. 1. 2, quæst. 69, art. 3. Atque ita illos Christus mites appellavit, qui passionem iræ ita habent rationi subjectam, ut non facile, nec inordinate, ejus impetu et affectu moveantur. Unde si sub hac tantum ratione hic actus consideretur, ad virtutem quamdam moralem et acquisitam pertinet. Si autem illa iræ moderatio fiat cum majori et supernaturali perfectione, poterit pertinere ad virtutem infusam, vel ad donum illi correspondens, applicando ad illam materiam motiva in superioribus explicata. Gregorius autem Nyssenus, in suo tractatu de beatitudinibus, non solum ad iræ, sed etiam ad omnium intemperantium affectuum moderationem hæc verba referre videtur; nam sub mitibus omnes illos complectitur qui animum pacatum, et omnibus concupiscentiarum perturbationibus vacuum possident. Quod etiam per translationem quamdam seu extensionem dictum est, proprietates autem verborum Christi est quam exposuimus.

9. *Quæ terræ mansuetudinis præmium promittatur? — Opiniones variæ referuntur. — Vera expositio litteralis.* — De promissione autem huic beatitudini facta, dubitari solet an intelligenda sit de terra hujus mundi, vel de terra viventium, seu cœlesti patria, quæ licet in se cœlum sit, beatis est quasi terra quam calcant et inhabitant; varie namque a Patribus exponitur. Nam priori modo exponit Chrysostomus, homil. 45 in Matth.; posteriori autem modo Hieronymus ibi, et Nazianzenus supra, et auctor Imperfecti, homil. 49. Ubi etiam de terra proprii corporis intelligi posse dicit et insinuat Hilarius, dicto can. 4; et sequitur Bernardus sermo 1 de omnibus Sanctis. Augustinus autem, l. 4 de Sermon. Domini in monte, cap. 4, licet per terram intelligat cœlestem patriam, nihilominus per possessionem ejus intelligit non quæ futura est in alia vita, sed quæ in hac potest per quamdam animi quietem et firmam spem obtineri. Quæ omnia pie dicta sunt et facile sustineri possunt. Probabile enim est valde Christum ad litteram intellexisse mites etiam in hoc mundo possidere terram, non quia illis promittantur regna vel divitiæ terrenæ, sed quia etiam in hoc mundo cum pace et quiete vivunt; nihilominus tamen in hoc subintellectum esse eos futuros esse hæredes et possessores terræ viventium, et hic quodammodo incipere illam possidere, ut acute Augustinus dixit.

10. *Exponitur tertia beatitudo.* — *De quo luctu Christus loquatur variæ expositiones.* — Tertia beatitudo est, *Beati qui lugent.* Non explicuit autem Christus Dominus eujusnam rei vel objecti futurus sit ille luctus, ut beatificari merito possit. Quia luctus per se indifferens est, et aliquis potest esse laudabilis, aliquis vituperabilis. Nam ut Paulus ait 2 Corinthi 7 : *Sæculi tristitia mortem operatur, quæ autem secundum Deum est, salutem stabilem operatur.* Certum est autem Christum locutum esse de luctu laudabili. Unde Chrysostomus de lugentibus propria peccata locum exponit. Quæ fuit etiam sententia Hilarii dicto can. 4 ; et Ambrosii, dicto lib. 5 in Lucam ; et Cypriani, epist. 52 ad Antonian. circa finem ; et Bernardi, supra. Hieronymus autem in Matth. etiam de lugentibus aliena peccata illum intelligit, sicut Samuel luxit Saulem, 1 Reg. 15 ; et Paulus fornicariam, 2 Cor. 12 ; vel sicut Christus, Luc. 19, flevit super Jerusalem, non tam propter futurum ejus excidium, quam propter causam ejus, quæ erant peccata. Leo autem Papa, dicto sermone, utrumque conjungit, dicens : *Religiosa tristitia aut alienum peccatum deflet, aut proprium.* Et auctor Imperfecti, homil. 9, utrosque dicit esse beatos, et qui propria, et qui aliena deflent peccata, sed beatiores qui aliena, quia supponuntur non habere propria quæ defleant. Quod intellige ex genere actus : nam prior ad statum imperfectorum, posterior ad statum perfectorum spectat ; unde ille pœnitentiæ actus est, hic charitatis.

11. *Expositiones aliæ.* — *Probabilis expositio.* — *Hanc tertiam beatitudinem a virtutibus vel donis non distingui.* — At vero Gregorius Nyssenus supra, hac expositione de luctu peccatorum rejecta, luctum hunc intelligit oriri debere ex misera conditione hujus vitæ, in quam per peccatum primi parentis incidimus. Alii vero per lugentes, intelligunt justos qui, oppressi in hoc sæculo, quia virtutem sectantur, quasi naturali sensu naturæ lugent et contristantur, juxta illa Christi verba, Joan. 16 : *Plorabitis et flebitis vos,* etc. Ita exponit Cyprian., l. 3 ad Quirin., c. 6. Et est satis probabilis expositio, quia, juxta Christi doctrinam, beatitudo hujus vitæ in ferenda ejus cruce posita est ; crux autem non potest diu ferri sine gemitu et dolore, nam et Christus illam non ascendit sine sudore sanguinis, præ nimia tristitia ; fit autem suavis consolatione divina, ut eleganter prosequitur Bernardus, serm. 1 de sancto Andrea. Neque multum ab hac sententia differt expositio D. Thomæ 1. 2,

q. 69, a. 3, quæ mihi maxime probatur. Nam per lugentes intelligit justos, qui in vincendis et mortificandis propriis concupiscentiis laborant, quod non fit sine luctu et gemitu. Sicut enim mites beatificantur, quia iram domant, ita etiam isti, quia concupiscentias vincunt, etiamsi lugere oporteat. Et hanc expositionem indicavit Augustinus, lib. 1 de Serm. Domini in monte, cap. 2. Nam hos lugentes intelligit esse viros imperfectos, licet justos, qui, in principio conversionis suæ, non sine tristitia relinquunt quæ amabant vel concupiscebant. *Donec* (inquit) *in illis fiat amor æternorum*, utique perfectus. Sic autem intellecta hæc beatitudine, non in actu unius vel alterius virtutis, sed in collectione et exercitio plurium consistit, juxta varietatem concupiscentiarum et affectuum, quod multis aliis beatitudinibus commune est, ut dicemus. Quocumque tamen ex dictis modis hic actus vel affectus explicetur, constat non esse ex aliquo peculiari principio distincto a virtutibus moralibus, vel acquisitis, vel infusis, et interdum esse posse ex dono, præcipue fortitudinis et timoris, si superiori modo fiat.

12. *Expenditur quarta beatitudo.* — *De justitia sanctificante probabilis exponitur.* — Quarta beatitudo est, *Beati qui esuriunt, et sitiunt justitiam*, ubi ponitur justitia ut objectum illius famis et sitis, ac subinde non loquitur Christus de fame et siti corporali, sed spirituali, et ferventi desiderio justitiæ, ut omnes communiter interpretantur. Per justitiam autem, licet Chrysostomus et quidam alii particularem justitiam intelligant, verisimilius est Christum de justitia universali, quæ hominem facit justum et sanctum, fuisse locutum ; sicut etiam infra, cum dixit *beatos esse qui patiuntur propter justitiam.* Unde constat hanc famem et sitim vel non significare peculiarem actum unius virtutis, sed quasi collectionem actuum et affectuum omnium virtutum : completur enim hæc fames et sitis ex variis affectibus religionis, pœnitentiæ, misericordiæ, et cæterarum virtutum, quibus homo appetit et sitit justitiam, non uno momento totam, sed discursu temporis diversarum virtutum frequentia desideria exercendo, in quibus etiam includitur fames et sitis justitiæ particularis virtutis, ut per se patet ; vel certe haberi potest fames illa unico actu in suo esse peculiari, in objecto vero universali, qualis est vel actus charitatis, quo vult homo in omnibus placere Deo, vel obedientiæ, quo voluntatis Dei explendæ in om-

nibus perpetuam famem et sitim habet, vel actus devotionis ad religionem pertinens, quo Dei gloriam et honorem in omnibus appetit, vel etiam potest esse actus spei, quo quis intendit propriam sanctificationem in omnibus quærere, eamque ut maximum bonum suum vehementer appetit.

13. *Hæc beatitudo ad virtutes vel dona pertinet.* — Et ita manifestum est, propter hanc beatitudinem, non esse necessarium excogitare actum aliquem qui ad virtutes vel dona non pertineat. Solum superest advertendum, Lucam, c. 6, hanc beatitudinem secundo loco posuisse his verbis: *Beati qui nunc esuritis, quia saturabimini*, ubi objectum illius esuriei subicit, et videtur loqui de fame corporali, et beatos dicere eos qui in hac vita esuriunt, id est, qui penuriam et indigentiam temporalium honorum patiuntur, vel qui ab omnibus deliciis corporis abstinent, utique propter Deum et justitiam. Dicendum autem est non esse inconueniens in illis locis famem in diverso sensu accipi, quia Lucas non refert eundem Christi sermonem quem Matthæus; nam Matthæus refert sermonem Domini in monte ad discipulos suos, et in initio prædicationis suæ, Lucas autem refert alium sermonem Domini in loco campestri ad turbas, et post aliquod tempus, et progressum prædicationis suæ. Vel etiam dici potest utraque verba posse ad eundem sensum facile trahi, quia non beatificantur qui corporalem famem patiuntur, nisi quatenus illam propter justitiam sustinent, et ita sub illa voce etiam intelligitur fames justitiæ, ideoque eadem saturitas justitiæ utroque loco promittitur.

14. *Expeditur quinta beatitudo.* — Quinta beatitudo est, *Beati misericordes*, etc., quæ nulla fere declaratione indiget. Nam verba illa cum indefinita sint, de quibuscunque actibus misericordiæ, vel beneficentiæ, ac dilectionis erga proxima intelligi debent, sive sint corporales, sive spirituales, sive fiant conferendo aliquod bonum, sive remittendo mala et injurias. Sunt enim verba Christi generalia, et omnes homines omnesque modos miserendi includunt: et præmium hujus beatitudinis omnibus his actionibus commune est, ideoque et elemosinæ promissa est peccatorum remissio, et de illo qui noluit debitum remittere dixit Christus: *Nam oportuit et te misereri conversi tui, sicut et ego tui miseratus sum?* Matth. 18. Totum autem hoc miserendi genus partim ad charitatem pertinet, partim ad virtutem moralem misericordiæ satis notam, in

cujus materia potest interdum donum pietatis vel timoris operari. Actus vero alterius generis vel principii nullo fundamento ibi cogitari potest.

15. *Explicatur sexta beatitudo.* — *In quo munditia cordis consistat.* — Sexta beatitudo est, *Beati mundo corde*, in qua solum adnotare oportet munditiam cordis non unum vel alium actum, sed usum et perfectionem omnium virtutum postulare: imo tantam honestorum actuum frequentiam requirit, ut perfectum quemdam virtutis statum introduxerint. Consistit enim cordis munditia imprimis in carentia omnis culpæ coram Deo, quæ non uno actu comparatur, sed observatione omnium mandatorum et perfecta remissione præcedentium peccatorum. Deinde non solum carentiam omnis culpæ, verum etiam immoderatorum affectuum et motuum, qui ad culpam inclinant, victoriam, et animi mortificationem videtur hæc munditia postulare et includere: quia nisi cor sit ita mundum, non est aptum ad videndum Deum, sicut hic mundis corde promittitur.

16. *Objectio.* — *Solutio.* Dices hanc munditiam cordis non posse in hac vita comparari, Christum autem eos beatificare qui in hac vita mundum cor habent. Respondeo, sicut dilectio Dei perfecta, quæ omnem defectum excludat, in hac vita obtineri non potest, proponitur autem ut intendenda et procuranda, inchoando illam in hac vita quoad fieri poterit, ita etiam munditiam cordis non præcipi, nec postulari in hac vita cum ea perfectione quam habebit in patria, sed tamen proponi ut ad eam tendamus, eamque in hac vita inchoemus, quoad fieri possit. Sic ergo dicuntur mundi corde qui ab omni malitia abstinent, et omnem pravum motum vitare student, quoad possunt, cum divino auxilio. Hoc autem fit per actus virtutum et donorum, eorumque continuo ac perseveranti usu. Quod si hæc munditia uni actui tribuenda est, maxime divine dilectioni et intentioni rectæ placendi Deo in omnibus; nam ut Christus Dominus dixit: *Si oculus tuus fuerit simplex, totum corpus tuum lucidum erit*, Matth. 6. Item autem est mundum cor quod simplex oculus, ut Augustinus dixit dicto lib. 1 de Serm. Domini in monte, cap. 2.

17. *Expeditur septima beatitudo, primo.* — *Expeditur secundo.* — Septima beatitudo est, *Beati pacifici*, etc., quæ duobus modis exponitur. Primo, juxta rigorem et proprietatem verbi pacificandi, quod idem significat ac pa-

cem facere : sic ergo pacifici dicuntur qui non solum pacem cum omnibus habent, sed etiam discordantes conciliant, et inimicitias inter proximos auferunt : vel etiam majori et perfectiori ratione dicuntur pacifici, qui homines Deo reconciliari student, quibus merito participatio filiationis Dei promittitur, quia filius Dei naturalis ad hoc præcipue venit in terram, ut in illo pacem habeamus, sicut ipse dixit Joan. 16 ; et ideo illo nascente, statim mundo prædicata est, quia per illum erat consummanda : *Pacificans per suum sanguinem quæ in cælis et in terra sunt*, ut dicitur ad Col. 1. Estque hæc expositio valde probabilis, et juxta illam actus hujus beatitudinis, actus charitatis est : nam charitas est quæ homines cum Deo et inter se unit. Unde pax inter effectus seu actus charitatis numeratur a divo Thoma 2. 2, q. 29, art. 3 ; ergo procurare hanc pacem officium est charitatis. Alio modo exponitur hæc beatitudo de interna pace hominis respectu Dei et proximorum, atque etiam in seipso inter proprios appetitus inferiorem et superiorem, et in unoquoque illorum secundum varios ejus affectus. Et hanc expositionem tradidit Augustinus, dicto lib. 1, cap. 2 et 4 ; docet enim has beatitudines gradatim procedere ab imperfecto ad perfectum statum, quem sentit in hac beatitudine intrinsece consummari, nam octava perfectionem supponit et ostendit. Unde ait : *In pace perfectio est, ubi nihil repugnat, et ideo filii Dei pacifici, quia in istis nihil repugnat Deo, et concludit : Hæc est vita perfecta, consummatique sapientis.* Juxta quam expositionem pax hæc non est unius virtutis actus, sed omnium virtutum et donorum effectus, qui homines in animi quiete, et quasi immutabilitate similes Deo facit, et ideo merito isti sic pacifici filiorum Dei nomen singulariter nanciscuntur.

18. *Expenditur octava beatitudo.* — Octava beatitudo est, *Beati qui persecutionem patiuntur propter justitiam*, de qua Augustinus, dicto c. 4, ait redire ad caput, hominemque perfectum declarare. Et D. Thom. 1. 2, q. 69, art. 3, ad 5, dicit non addere præcedentibus novam hominis perfectionem, sed confirmare et ostendere firmitatem et stabilitatem animi purgati, illuminati et pacificati per septem præcedentes beatitudines septemque dona Spiritus Sancti, quæ illis mutato ordine correspondent, ut Augustinus late prosequitur.

19. *Patientia hic fortitudo et perseverantia intelliguntur.* — Sed in hoc duo addere oportet : unum est, in hac ultima beatitudine speciali-

ter exerceri actum patientiæ et fortitudinis, qui in tolerandis laboribus et persecutionibus propter fidem et religionem exercetur, et in martyrio potissimum consummatur, qui actus in superioribus beatitudinibus satis explicatus non fuerat. Imo ad hanc beatitudinem pertinere etiam existimo perseverantiæ donum, quod maxime facit hominem beatum. Nam *qui perseveraverit usque in finem, hic salvus erit* : hoc autem sine tolerantia persecutionum in hac vita nemini forte vel rarissime contingit, et ideo merito donum perseverantiæ in hac ultima beatitudine comprehendere intelligimus. Perseverantia autem hæc non est specialis actus virtutis, sed quædam mandatorum integra observatio usque ad finem vitæ, quæ per actus diversarum virtutum in discursu vitæ fit, licet in alia significatione perseverantia ponatur esse specialis virtus a D. Thom. 2. 2, q. 137 ; tamen etiam illa multum juvare potest ad hoc perseverantiæ donum, et ad hanc beatitudinem, licet illa non sufficiat.

20. *Hæc beatitudo perfectionem non supponit, sed aliquando causat.* — Alterum advertendum est, licet prædicti Patres dicant hanc octavam beatitudinem ostendere perfectionem ejus, qui persecutionem propter justitiam constanter sustinet, nihilominus sæpe per divinam gratiam fieri et factum esse, ut homines antea imperfecti, imo et peccatores, ad hanc beatitudinem assumantur, et in illius actu seu exercitio virtutes cæteras summam expleant, ut in innumeris martyribus visum est. Tunc ergo tribulatio non clarificat perfectionem in eo qui patitur præexistentem, sed ostendit efficaciam gratiæ Dei, et est occasio subito ascendendi ad eximium quemdam sanctitatis et beatitudinis gradum : tum ob ferventem fidei et charitatis actum, cum usu aliarum moralium virtutum fortitudinis, patientiæ, etc. ; tum propter singulare martyrii privilegium, et Christi promissionem : *Qui confitebitur me coram hominibus, confitebor et ego eum coram Patre meo*, Matth. 7. Et fortasse ratione illius promissionis, cælorum regnum eorum qui sic patiuntur esse dicitur.

21. *De numero harum beatitudinum.* — Ex his ergo omnibus satis evidenter patet beatitudines has non esse actus qui ad virtutes vel dona non pertineant. Quod vero ad earum numerum attinet, necesse non est illum ita præcise et exacte intelligere, ac si non posset Christus plures numerare, si voluisset. Nam Luc. 5 has octo ad quatuor reduxit, quæ virtute alias continent, ut ubi notat Ambrosius.

Probabile est enim duos illos Evangelistas diversas conciones referre, et Christum in una plenius de beatitudinibus discipulos instruxisse, in altera vero ad turbas, ad pauciores vel magis necessarias, vel turbæ magis accommodatas, illas reduxisse. Ita ergo in priori concione potuit octo distinguere, non quia plures numerare non potuerit, sed vel quia illæ sufficere visæ sunt, et virtute totam perfectionem continent, vel certe quia ex his facile erat intelligere alias quæ cogitari possunt. Sic enim est mos Scripturæ aliqua exprimere, non ut excludantur alia similia, sed ut ex illis deducantur, ut mox de fructibus dicemus, et generatim tradit Hieron., Sophon. 1; Aug. de Fide et oper., c. 13; Orig., tract. 23 in Matth. Et ita sunt accipiendæ rationes hujus numeri, quas D. Thomas et alii tradunt, ut declarent in his beatitudinibus viam salutis et perfectionis sufficientissime contineri. Aliæ vero rationes mysticæ hujus numeri, in Patribus citatis et Evangeliorum expositoribus videri possunt.

22. *In his beatitudinibus actus et præmium reperitur.* — Ulterius tamen adverto in his beatitudinibus aliquid poni, quod est actus virtutis, de quo omnia dicta procedunt, aliquid vero adjungi ut præmium virtutis, quod non est necesse ad virtutis alicujus actum pertinere. Imo inter hæc præmia multa sunt, quæ non videntur proprium hominis actum significare, ut possidere terram, misericordiam consequi, filium Dei vocari, consolari, saturari. Imo inter omnia præmia unum tantum est, quod expresse actum hominis significet, scilicet, visio Dei, quæ mundis corde promittitur. Veruntamen dicendum est merito quidem poni beatitudines has in actibus, vel per eos expressius declarari, quia ad præsentem vitam pertinent, et ideo fieri debent in nobis, non sine nobis moraliter cooperantibus. Præmia vero ex genere suo, quia ab alio conferuntur nobis, non ita necesse est, vel in actibus consistere, vel per actus significari, nam et habituum perfectio, et occasiones bene operandi, et alia auxilia specialia conferuntur a Deo ut præmia virtutum, quæ vel nullo modo fiunt per actus nostros, vel non fiunt per actus liberos et morales, sed a Deo immittos, ut sunt spirituales consolationes et prævenientia auxilia.

23. *In patria unum est præmium.* — Nihilominus tamen adhibere oportet, ex Augustino et divo Thoma, illa præmia beatitudinum posse referri vel ad vitam futuram, vel ad præsentem. Si de futura intelligantur, omnia

sunt unum præmium, licet diversis vocibus et respectibus significetur. Quod quidem præmium est visio Dei, ut in sexta beatitudine formali appellatione nominatur; eadem vero dicitur regnum cœlorum in prima et octava beatitudine, quia virtute continet omnia bona quæ in illo regno existunt, cum sit ipsius summi boni consecutio. Unde fit etiam ut per illam beati possideant terram viventium, et consolentur, saturentur, misericordiam summam obtineant, et statum perpetuum ac nomen filiorum Dei consequantur. Illud autem præmium, quia in hac vita non obtinetur, non fit in nobis per virtutes hujus vitæ: in alia vero per quamdam virtutem intellectualem illis correspondentem, scilicet, lumen gloriæ, et divino potius quam humano modo fiet.

24. *Harum beatitudinum præmia in hac vita.* — At vero si præmia illa in hac vita conferantur, quædam intelligi possunt ratione habitualis gratiæ et sanctitatis, ut fieri filios Dei, et per remissionem peccatorum misericordiam consequi: alia propter peculiarem perfectionem ejusdem sanctitatis, tam habitualis quam actualis, ut saturari justitia, possidere regnum cœlorum, quod intra nos est, et per quamdam antonomasiam vocari filios Dei. Quædam item consistere possunt in peculiari aliquo favore et gratia Dei, etiam sine morali actu nostro, ut est consolari et possidere terram. Denique aliquod etiam præmium esse potest actus ipsius hominis, ut est visio Dei, per quam in hac vita significatur contemplatio Dei, vel intelligentia mysteriorum ejus, quæ per fidem et dona intellectualia Spiritus Sancti, comitante charitate, in hac vita comparatur. Et ita quidquid est in his præmiis, quod ad actum hominis pertineat, inter actus virtutum et donorum invenitur. Atque hæc de his actibus præsentis instituto sufficiunt: nam reliqua, quæ ad beatitudinum cum donis collationem pertinent, difficultatem scholasticam non habent, satisque a D. Thoma explicantur, tum in generali, in 1. 2, quæst. 69, articulo 2 et 4, tum in particulari, in secunda secundæ, agente fere de singulis virtutibus.

25. *De fructibus Spiritus Sancti.* — *Utrum hi fructus sint actus vel habitus? — Vera resolutio, esse actus.* — Ultimo dicendum est de fructibus, de quibus disputant Theologi occasione verborum Pauli ad Gal. 5: *Fructus autem Spiritus sunt charitas, etc.* Et imprimis quærentur an sint habitus vel actus: nam quidam eos vocant habitus et virtutes, ut Albertus et Gabriel supra. Alii actus esse dicunt, ut

D. Thomas 1. 2, quæst. 70. Verumtamen non est dubium quin Paulus nomine fructuum opera et actus significaverit. Quod patet imprimis ex contextu; prius enim dixerat carnem et spiritum sibi ipsi adversari; postea vero declarat hanc pugnam esse in actibus et operibus utriusque partis, et ad illam explicandam prius opera carnis recenset, quibus fructus Spiritus opponit; opera autem carnis non sunt habitus, sed actus: fructus ergo Spiritus etiam sunt opera quæ virtute Spiritus in nobis fiunt, cum contra concupiscentias pugnamus. Deinde idem probatur ex vocis metaphora. Fructus enim (ut recte ait D. Thomas) est ultimus effectus qui ex arbore cum utilitate et voluptate percipitur: inde ergo id quod est ultimum in effectibus Spiritus, quodque cum suavitate et utilitate perficitur, est actus ultimus, seu virtutum opera: hæc ergo significavit Paulus nomine fructus. Sicut Christus dixit Matth. 12: *Omnis arbor bona bonos fructus facit*. Item: *Ex fructibus eorum cognoscetis eos*. Opposuit autem Paulus fructus operibus carnis, quia hæc opera nullum fructum afferunt. Unde ipse ad Rom. 6 peccatores interrogat: *Quem fructum habuistis in his in quibus nunc erubescitis?* Opera autem Spiritus magnum fructum afferunt; unde subdit ibidem Apostolus: *Nunc vero liberati a peccato habetis fructum vestrum in sanctificatione*. Et hinc usus Theologorum obtinuit ut opera bona quæ ab homine justificato fiunt, fructus justitiæ appellentur. Per quam etiam metaphoram significatum est opera carnis esse nostra, opera autem Spiritus esse fructus inhabitantis in nobis Spiritus, vel moventis. Sunt ergo fructus Spiritus actiones honestæ quæ in nobis et a nobis per afflatum Spiritus Sancti fiunt. Nemo autem negat his operibus habitus correspondere, et ita quoad hanc partem nulla superest de re, sed tantum de vocabulo, contentio.

26. — *Utrum hi fructus a virtutibus et donis distinguantur.* — *Opinio affirmans.* — *Vera sententia negans.* — Deinde vero sequitur inquirendum an hi, qui dicuntur fructus Spiritus, sint tales actus, ut quasi novum gradum seu ordinem actuum constituent, distinctum ab actibus virtutum et donorum. Nam Albertus supra indicat fructus esse virtutes distinctas a communibus virtutibus et donis. Verumtamen certissimum est fructus esse eodem actus virtutum vel donorum, quos Paulus per metaphoram dictam fructus appellavit. Ita docent D. Thomas et omnes. Constatque

ex dictis supra de beatitudinibus: nam ratio ibi facta efficaciter idem probat de fructibus; nulla enim ratio cogitari potest ad novum ordinem actuum constituendum, propter quos novi habitus excogitandi sint. Nam quod Albertus ait, fructum significare actum, ut reficit et delectat possessorem secundum spiritualem gustum, non obstat, nam hoc etiam habent actus virtutum et donorum ex genere suo, magis vero vel minus id præstant, juxta gradum suum, et juxta dispositionem operantis. Hinc vero D. Thomas 2. 2, quæst. 157, art. 2, ad 3, dixit beatitudines esse actus virtutum, fructus vero esse delectationes de actibus virtutum. Sed hoc intelligendum est sano modo, nam revera isti actus virtutum sunt propriissimi fructus, et fortasse meliores et utiliores quam delectationes quæ ex illis resultant. Solum ergo quoad metaphoram videntur virtutum actus nomine fructuum significari, quatenus suavitatem secum afferunt; et quia hoc maxime habent in statu virtutis perfectæ, ideo maxime videntur actus perfecti fructus appellari; absolute vero omnes actus justitiæ fructus dici possunt.

27. *Probatur secundo inductione.* — Tandem hoc probatur ex numeratione Pauli, nam charitatem ponit ut primum fructum Spiritus Sancti, per quam certe non intelligit nisi (ut solet) divinum amorem, qui nobis infunditur per Spiritum Sanctum qui datur nobis, et illi adjungit gaudium et pacem, qui sunt actus et effectus ejus. Postea vero ponit fructus virtutum moralium, ut, respectu proximorum, *bonitatem*, id est, beneficentiam, seu liberalitatem, quam etiam vocat *benignitatem*, et *fidem*, utique moralem, sub qua totum fructum justitiæ complectitur. Respectu vero sui, ponit in primis, quoad mala ferenda, *patientiam*, loco fortitudinis, seu totum fructum fortitudinis sub illa complectens, cui adjungit *longanimitatem*, per quam animi constantiam et lenitatem in diuturnis et acerbis malis sustinendis significat. Et his etiam deservit *mansuetudo*, quæ iram moderatur, et ad malorum tolerantiam juvare solet. Quoad operanda bona et frændas concupiscentias (quod est temperantiæ munus), ponit *modestiam*, *continentiam* et *castitatem*. Et ita omnes hi fructus ad charitatem et tres virtutes morales appetitus pertinent.

28. *Cur fidem, spem et prudentiam inter fructus Apostolus non ponat?* — Fidem autem, spem et prudentiam omisit Paulus, vel quia non assumpsit provinciam numerandi omnes

fructus, vel omnes actus virtutum, sed eos qui operibus carnis frequentius et clarius adversantur, vel quia fides et prudentia non fructificant, nisi media voluntate, spes autem non videtur tam proprie significari per metaphoram fructus. Vel certe fides, quam Paulus narrat, potest ad fidem theologiam referri, ut D. Thomas etiam docet, et sub longanimitate potest intelligi spes, ut Gabriel exponit, qui etiam sub modestia prudentiam comprehendit : sed est dura et metaphorica expositio, meliusque dicetur virtute comprehendere sub omnibus moralibus fructibus, quia sine prudentia nulli sunt. Atque hæc sufficiunt de numero fructuum, quia (ut dixi) non oportet cogitare tot esse numeratos, quia tot sint, et non plures, vel quia in illo numero singulare aliquod mysterium inveniatur : sed quia illi utiles et sufficientes visi sunt ad oppositionem inter spiritum et carnem explicandam. Atque hæc videntur sufficere præsentis instituto, nam de his singulis inquirere quid sint et quomodo inter se distinguantur, integrum tractatum de Virtutibus in particulari postulabat.

CAPUT XXIII.

UTRUM AD SERVANDA SUPERNATURALIA PRÆCEPTA, QUÆ DE INTERNIS ACTIBUS DATA SUNT, VEL AD NON PECCANDUM CONTRA ILLA, SIT GRATIA NECESSARIA ?

1. *In quo sensu quaestio excitetur.* — Haec dictum est de necessitate gratiæ ad efficiendos supernaturales actus, abstrahendo a ratione præcepti ; nunc superest breviter dicendum de observantia præceptorum supernaturalium, et quoniam de interioribus et exterioribus actibus dantur, de quibus diversa est ratio, ideo de illis sigillatim dicemus. Potest deinde tractari quaestio vel de tota collectione supernaturalium præceptorum, vel etiam de singulis pro quocumque tempore obligantibus ; nos autem hunc posteriorem sensum intendimus. Nam in priori a fortiori definita est quaestio ex his quæ de observatione præceptorum naturalium superiori libro diximus ; præterquam quod ex definitione quaestio in posteriori sensu, in priori etiam resoluta manebat, ut in fine capiti uno verbo expedirent.

2. *Error Pelagii refellitur.* — In hoc ergo puncto iterum occurrit error Pelagii, qui indistincte inseruit omnia et singula præcepta posse sine gratia impleri, ut copiose in prole-

gomeno tertio dictum est. Ut autem in hoc puncto distinctius procedamus, et in illo error Pelagii melius intelligatur, adverto duobus modis posse præceptum aliquod dici supernaturale, scilicet, vel quia datur de actu supernaturali, vel quia præter ordinem naturæ datur. Quod potest contingere duobus modis, scilicet, vel quia datur ex aliqua suppositione supernaturali, vel quia est positivum, immediate a Deo ipso positum, ex sola sua libera voluntate nobis revelata. Priori modo potest dici præceptum supernaturale quoad substantiam, posteriori autem quoad modum. Qui modus magis in præceptis de actibus externis quam de internis locum habet, ut capite sequenti dicam. Ex his autem duobus modis præceptorum supernaturalium Pelagius certe non admitteret priorem ; quia supernaturales actus non agnovit ; ablata autem materia auferitur præceptum. Quocirca non videtur composuisse (ut sic dicam) tale supernaturale præceptum cum observatione illius per solas vires liberi arbitrii, quia fuisset hæc aperta contradictio, nimirum, admittere verum supernaturale præceptum ex parte actus, et nihilominus dicere posse per vires naturales servari. Sed erravit negando data esse vel dari posse hominibus talia præcepta supernaturalia ; fortasse enim credidit non posse dari præcepta de talibus actibus ; vel quia nullo modo possunt a nobis fieri, vel quia non possent esse liberi. Admisit autem Pelagius præcepta supernaturalia posteriori modo, illa tamen dicebat posse impleri per vires naturæ ; ut, verbi gratia, præceptum fidei dici potest supernaturale, quia supponit revelationem supernaturalem, qua posita resultat obligatio credendi ; nihilominus tamen aiebat hanc obligationem solum esse de fide quadam naturali, quam homo potest per vires liberi arbitrii adhibere, et ita dicebat hoc præceptum posse impleri per vires naturæ. Et idem diceret de præcepto charitatis et spei, quæ maxime de actibus internis dantur. Et in hoc etiam ducebatur Pelagius illo fundamento, quod Deus non præcipit impossibilia, et ideo licet hæc præcepta sint quoad modum supernaturalia, quia aliquid supra naturam supponunt, nihilominus de illa materia solum potest dari præceptum, quod per liberum arbitrium possit impleri.

3. *Secunda opinio docens hoc præceptum quoad substantiam sine gratia impleri.* — Secundo, referenda est aliquorum theologorum opinio, qui, supposita distinctione duplicis observantiae supernaturalis præcepti, quoad subs-

tantiam et quoad modum, dicunt supernaturale præceptum quoad suam substantiam posse impleri per vires liberi arbitrii, absque auxilio gratiæ, non tamen posse impleri quoad modum. Ita docet Cajet. 1. 2, quæst. 109, art. 4, ubi etiam D. Thomas videtur idem docere de homine in statu naturæ integræ, licet in statu naturæ corruptæ id non admittat. Sed D. Thomas in alio sensu longe diverso locutus est, ut postea declarabo. Cajetanus itaque in omnibus præceptis etiam fidei, spei et charitatis distinctionem illam locum habere vult. Unde videtur fundari in hoc, quod actus præcepti per has leges non sunt quoad substantiam supernaturales, sed tantum quoad modum. Nam hinc sequitur actus mandatos his præceptis posse fieri sine gratia quoad substantiam eorum, licet quoad modum supernaturalem non possint sine gratia fieri; ergo eadem ratione possunt impleri præcepta illa quoad substantiam sine gratia, licet non quoad modum.

4. *Alia Cajetani distinctio de observatione et non transgressione.* — Aliam etiam distinctionem adhibet idem Cajetanus eadem quæstione, articulo octavo, inter observare vel non transgredi præceptum, dicitque non posse hominem implere præcepta hujusmodi sine gratia, utique quoad modum eorum; posse autem non transgredi illa, id est, non peccare contra illa, per solas vires liberi arbitrii sine gratia. Ratio hujus posterioris partis (nam de prima nullum est dubium, ut dicemus) est, quia si homo caret viribus et auxiliis gratiæ, non potest implere supernaturalia præcepta: ergo eo ipso non potest contra illa peccare, quia nemo potest peccare in eo quod vitare non potest; ergo non eget gratia ad non peccandum contra talia præcepta: imo ex carentia præcepti necessario sequitur non violatio præcepti. Confirmat hoc tacite Cajetanus ex doctrina D. Thomæ in illo articulo. Docet enim ibi Doctor Sanctus potuisse hominem in statu integræ naturæ non transgredi, nec peccare contra quæcumque præcepta, etiamsi gratia careret, nihilque distinguit inter præcepta supernaturalia et naturalia: ergo supponit ad non peccandum contra supernaturalia præcepta, non esse necessariam gratiam.

5. *Tertia opinio distinguens inter præcepta affirmativa et negativa.* — *Probat.* — Alii denique distinguunt inter præcepta affirmativa et negativa, dicuntque, ad servanda vel non violanda affirmativa præcepta supernaturalia, esse gratiam necessariam; ad imple-

dum autem vel non transgrediendum præceptum negativum, non esse gratiam necessariam. Ratio hujus partis est, quia præceptum negativum servatur per solam omissionem, quæ in negatione vel privatione consistit, sola autem carentia actus sine gratia haberi potest. Tum quia non est aliquid supernaturale, quia actus prohibitus per negativum præceptum non est bonus, sed malus, et ideo est maxime naturalis, et proprius liberi arbitrii defectibilis: ergo multo magis carentia talis actus est naturalis: ergo potest per liberum arbitrium haberi. Tum etiam quia ommissio consistit in non agendo; ad non agendum autem non est necessarium auxilium Dei, quia auxilium est ad aliquid agendum, ergo.

6. *Confirmatur ex Rubionis dicto.* — Imo ob hanc rationem dixit Gulielmus de Rubione, neque generalem Dei concursus esse necessarium ad servandum præceptum negativum, quodeumque illud sit, quia concursus est necessarius ad agendum, non ad non agendum. Quod si quis dicat, licet non agere non requirat auxilium, vel concursus, tamen velle non agere non fieri sine Deo, et hoc esse necessarium ad servandum præceptum negativum: contra hoc est, tum quod voluntas potest suspendere actum pro sua libertate sine actu positivo volendi, et hoc satis est ad non peccandum contra præceptum negativum; tum quia etiamsi esset necessaria illa voluntas, non esset ad illam necessaria gratia, quia est de objecto possibili per solas vires liberi arbitrii; ergo potest haberi per easdem vires. Et patet a fortiori, nam etiam ommissio actus supernaturalis potest esse voluntaria positive per voluntatem mere naturalem factam per solas vires liberi arbitrii cum concursu generali; ergo multo magis voluntas non agendi quemcumque actum naturalem haberi poterit naturaliter per solas vires voluntatis.

7. *Assertio prima de fide.* — *Ad implendum hoc præceptum de interno actu opus est gratia.* — Nihilominus dico primo: ad implendum quodeumque præceptum supernaturale de interno actu, est necessaria divina gratia. Hanc assertionem absolute positam, censeo esse certam, secundum doctrinam fidei, quod sic declaro. Nam in illa supponimus dari aliqua præcepta de actibus internis simpliciter supernaturalia, quod secundum fidem negari non potest, ut in libro ultimo de Legibus tractando de lege gratiæ late ostensum est, et nunc breviter patet. Nam diligere Deum actus internus est, et si sit super omnia ex toto corde, ac de-

nique prout ad salutem necessarium est, supernaturalis est, ut supra est de fide ostensum: sed de hoc actu est datum præceptum in Scriptura expressum, ut constat; ergo. Idem argumentum de præcepto fidei et spei fieri potest; nam in actibus internis consistunt, et prout necessarii sunt ad salutem, supernaturales sunt, et sine gratia fieri non possunt. At de illis, ut ad salutem sunt necessarii, data sunt præcepta divina, ut est etiam in fide per se notum; ergo talia præcepta data sunt de illis actibus, ut supernaturales sunt; ergo talia præcepta sunt supernaturalia simpliciter, id est, ex parte materie et rei quam præcipiunt. Hinc ergo concluditur assertio, quia præceptum affirmativum non servatur, nisi fiat id quod præceptum est: ergo talia præcepta non servantur, nisi fiant illi actus, ut supernaturales sunt, quia ut sic præcipiuntur: at vero actus supernaturalis, quatenus supernaturalis est, non potest fieri sine gratia: ergo, absolute loquendo, non possunt talia præcepta servari sine gratia.

8. *Quodlibet præceptum et quilibet ejus actus eget gratia Dei.* — Atque hæc ratio concludit non solum de collectione talium præceptorum, sed etiam de singulis, neque solum de singulis præceptis secundum totam uniuscujusque latitudinem, sed etiam secundum quamlibet partem ejus, id est, quoad singulos actus ejus. Primum patet, quia non sola collectio illorum præceptorum superat vires naturæ, sed etiam unumquodque, quia unumquodque datur de suo actu, ut supernaturalis est, ut ratio facta ostendit, quia datur de illo prout fieri debet sicut ad salutem oportet. Et inde concluditur altera pars, nam sub præcepto fidei, verbi gratia, continetur præceptum credendi omnia et singula mysteria revelata, et ad credendum proposita. Unde non tantum præcipitur unus actus credendi, sed etiam multitudo actuum, qui ad varia mysteria terminantur, ut ad credendum Deum esse Trinum et Unum, et Christum esse Deum, hominem, etc. Dicimus ergo non solum esse necessariam gratiam ad credendum hæc omnia, non erranda, nec dubitanda de aliquo, quando sunt sufficienter proposita, sed etiam esse necessariam ad implendum illud præceptum circa singulos actus, vel etiam circa unum mysterium, si illud tantum proponatur. Probatur eadem ratio, quia illud præceptum in singulis suis partibus vel actibus est supernaturalis; ergo non in totum, non ex parte impleri potest, sine gratia. Idem argumentum

fieri potest de spe, ut circa Deum vel res alias versari potest, et de præcepto charitatis, ut Deum et proximum comprehendit. Confirmarique potest ex quodam principio fidei supra posito, gratiam esse necessariam ad singulos actus bonos, et ad vitam æternam de se conferentes: nam quilibet actus observandi præceptum aliquod supernaturale, est actus pietatis, et de se conferens ad salutem æternam: ergo ad illum præstandum est gratia necessaria.

9. Unde ad hoc confirmandum afferri possunt ordinaria testimonia, quibus defuitur non posse nos complere divina mandata sine gratia, ut traditur in Concilio Milevitano, cap. 5. Id enim maxime verum habet de mandatis supernaturalibus, et in universum de omni observatione quæ confert ad vitam æternam: qualis per se et ex suo genere est obedientia cujuscumque præcepti supernaturalis, etiam in singulis actibus præceptis, juxta doctrinam Concilii Araus., c. 9, 20 et 25; Cœlestini, ep. 1 ad Episc. Gallie, cap. 8 et 9; Augustini, de Natur. et grat., c. 26; de Grat. et lib. arb., c. 18 et 28; lib. 2 de Peccator. Merit., c. 5; de Spir. et litter., cap. 14, et lib. 4 de Gratia Christi, c. 15.

10. *Actus aptus ad præceptum adimplendum gratiam postulat.* — Potestque hæc assertio extendi non solum ad actum quo in effectu impletur præceptum, sed etiam quo aptum est impleri, quantum est ex vi actus. Præceptum enim affirmativum non obligat semper, sed pro temporibus definitis vel necessariis, ideoque actus ejus, licet possit quolibet tempore exerceri, per illum tamen non proprie impletur præceptum, nisi quando fit eo tempore pro quo obligat præceptum; nihilominus tamen, quia actus, etiam extra illam occasionem factus, est ejusdem rationis, et de se aptus ad implendum supernaturale præceptum, si eo tempore obligaret, ideo ad omnes similes actus talis præcepti est gratia necessaria. Et simili modo, quamvis homo non teneatur explicite credere omnia quæ revelata sunt, vel quoad actualem cognitionem et usum seu exercitium, vel quoad supernaturalem modum credendi, sed ad salutem satis sit supernaturaliter credere et explicite ea quæ ut sic credenda proponuntur et præcepta sunt, nihilominus si quis voluntarie exercere velit fidem circa alias materias, ut id faciat per actum de se sufficientem ad implendum supernaturale præceptum, si datum esset de tali materia, necessaria est gratia propter rationem factam.

11. *Assertio secunda.* — *Ad servanda hæc præcepta et quoad modum et quoad substantiam, requiritur gratia.* — Secundo, dicendum est non solum esse necessariam gratiam ad servanda hæc præcepta quoad modum operum, sed etiam quoad substantiam eorum. Assertio hæc in sententia nostra, quod actus isti de quibus dantur hæc præcepta supernaturales quoad substantiam sint, per se evidens est. Quia actus isti quoad substantiam suam non possunt fieri sine gratia, eum substantia ipsa supernaturalis sit; sed præcepta hæc dantur de his actibus: ergo non possunt quoad substantiam impleri sine gratia. Patet consequentia, quia tunc præceptum quoad substantiam impletur, quando actus præceptus quoad substantiam fit. Verumtamen, abstrahendo etiam ab illa opinione, procedit et omnino vera est assertio posita. Quia licet actus ipsi, secundum se spectati, essent quoad substantiam naturales, et supernaturales quoad modum, nihilominus relati ad præceptum, modus ille est de substantia talis præcepti; quia præcipit actum sub tali modo, ut probatum est, quia præcipit actum, ut necessarium ad salutem, ac proinde ut fieri oportet ad justitiam; ut sic autem necessario modum illum requirit. Ergo substantialis materia illius præcepti includit modum illum: ergo qui non facit actum tali modo, non implet substantiam præcepti. At vero ut fiat actus sub tali modo, necessaria est gratia. Ergo ad implendum tale præceptum necessaria est gratia.

12. *Impugnatur primo Cajetanus in num. 3 citatus.* — Quocirca si Cajetanus, asserens posse impleri hæc præcepta quoad substantiam tantum sine gratia, id dixit quia credidit modum illum supernaturalem non solum esse extra substantiam actus, sed etiam non cadere sub præceptum, vel quia pendet ex solo Deo, vel quia solum requiritur ad fructum operis, non vero ad observationem præcepti; si (inquam) Cajetanus ita sensit, et supponit unum falsum et supra improbatum, et addit aliud multo magis falsum, quia certissimum est præcipi nobis actus supernaturales, ut supernaturales sunt: ergo præcipitur modus supernaturalis, sive ille sit de substantia actus, sive non. Antecedens patet; tum ratione facta, quia præcipiuntur nobis hi actus quatenus ad salutem necessarii sunt; tum etiam inductione, quia præcipitur nobis dilectio charitatis super omnia, et fides Christiana, et Catholica, etc.

13. *Impugnatur secundo.* — Si vero Cajetanus, supposita priori sententia, quod modus sit extra substantiam operis, solum dicere voluit

posse fieri actus præceptos quoad substantiam operum sine gratia, sic immerito et valde improprie dicit per illos actus servari præcepta quoad substantiam, quidquid sit de effectione actus. Nam qui facit actum quo non implet præceptum, non potest dici facere præceptum quoad substantiam operis, ut qui exterius orat sine attentione, non implet præceptum orandi, etiam quoad substantiam ejus, quia in illo præcepto substantialiter includitur attentio, etiam si illa non sit de substantia externæ orationis. Unde D. Thomas, quoties illa distinctione utitur, loquitur de modo qui non solum non sit de essentia actus, sed etiam non cadat sub præceptum, qualis est modus operandi ex charitate, ut videre licet in dicta quæst. 109, art. 4, ubi aperte supponit eum qui implet præceptum, saltem quoad substantiam ejus, non peccare contra illud. Et idem aperte docet eadem 1. 2, quæst. 100, art. 8 et 9.

14. *Impugnatur tertio idem Cajetanus.* — Præterea, ultra improprium loquendi modum, falsum esse existimo dicere posse hominem lapsus solis viribus liberi arbitrii facere omnia quæ supernaturaliter præcepta sunt, etiam sine modo supernaturali, vel (ut sic dicam) quoad materiam substantiam actuum, qualiscumque illa esse fingatur. Nam licet ad credendum, naturali et acquisita fide, aliqua revelata, non sit gratia necessaria, ad credendum tamen omnia quæ revelata sunt sine errore, non sufficit homo destitutus omni auxilio gratiæ, quocumque modo illa omnia credantur, ut supra ostendi. Eademque ratio est de omnibus præceptis spei, et multo magis charitatis, quia eo etiam modo quo hæc possunt per actus acquisitos fieri, major difficultas est in illis omnibus exequendis, quam in servandis præceptis mere naturalibus. Si ergo hæc omnia non possunt fieri sine gratia, multo minus illa, ut jam iterum in superioribus dixi. Igitur servare præceptum supernaturale sine gratia nullo modo contingit, neque in toto, neque in parte; facere autem aliquem actum similem actui præcepto, vel in materia, vel in genere actus, contingere quidem potest in una vel alia parte materiæ supernaturalium præceptorum alienius virtutis, non tamen in tota collectione, ut ostensum est.

15. *Tertia assertio.* — *Ad vitandam culpam contra præceptum supernaturale affirmativum, gratia requiritur.* — Dico tertio: non solum non potest impleri affirmativum præceptum supernaturale sine gratia, verum etiam nec vitari culpa illi contraria, si revera præceptum

obliget. Hæc assertio est expressa D. Thom. 1. 2, q. 63, art. 2, ad 2, ubi ait non posse hominem sine gratia vitare peccata quæ directe opponuntur virtutibus theologicis. Et quoad peccata contraria præceptis affirmativis, est profecto evidens ex dictis, nec potuit ab ea dissentire Cajetanus, nisi in modo loquendi. Probatur, quia pro tempore pro quo præceptum affirmativum obligat, non potest peccatum contra illud vitari, nisi faciendo actum præceptum : sed hic actus non potest fieri sine gratia ; ergo neque peccatum contra tale præceptum obligans potest vitari sine gratia. Major patet, quia peccatum contra præceptum non vitatur nisi faciendo quod præceptum jubet. Item facere quod præceptum jubet, vel non facere, immediate opponuntur ; ergo etiam observatio et transgressio præcepti sunt immediate opposita, quia transgressio hæc in sola omissione consummatur : ergo gratia quæ requiritur ad observandum præceptum, etiam ad non transgrediendum illud necessaria est. Denique Concilia et Patres nihil inter hæc distinguunt, sed pari modo ad non peccandum contra præceptum, et ad implendum illud gratiam requirunt.

16. — *Limitatur et explicatur assertio.* — Dixi autem, *Si revera præceptum obliget*, quia pro eo tempore pro quo præceptum non obligat, poterit quis non peccare contra illud sine speciali gratiæ auxilio, quia tunc ad non peccandum nihil oportet facere. Pro tunc vero non impletur proprie præceptum, etiamsi actus ejus fiat, et ideo licet necessaria sit gratia ad illum actum, non est propter præcepti obligationem, sed quia actus ex se illam requirit, etiamsi non præciperetur. Loquendum ergo est de non transgressione præcepti pro illo tempore pro quo obligat. Et eadem ratione auferenda est omnis excusatio obligationis, quia si intercedat excusatio, eo ipso non peccatur, imo neque pro tunc peccari potest contra tale præceptum, et ideo tunc non erit necessaria gratia ad non peccandum contra illud. Si enim homo invincibiliter ignoret præceptum, vel naturaliter non advertat, vel dormiat, aut alio simili modo sit impotens ad præceptum implendum, jam pro tunc cessat obligatio ejus ; cessante autem obligatione, cessat possibilitas peccandi.

17. *Quo sensu verum dicat Cajetanus in sent. 4. ad 2. — Et similis est casus in quo Cajetanus finxit posse hominem vitare peccatum sine gratia, si denegatur illi gratia necessaria ad faciendum actum præceptum ; tunc*

enim consequenter etiam cessat obligatio præcepti, quia non potest esse de re impossibili, manente impossibilitate. Doctrina vero Conciliorum et moralis supponit hominem habere omnia requisita ut possit obligari præcepto, et quod actu obligetur sine excusatione, ac denique quod sit moraliter potens operari et non operari actum præceptum. Et ita manifestum est non dari medium inter servare vel transgredi affirmativum præceptum, ideoque gratiam necessariam ad implendum præceptum, esse æque necessariam ad non peccandum contra illud. Adde vero quod, licet supposita impotentia vel alia excusatione, non sit alia gratia necessaria ad non peccandum contra tale præceptum, interdum potest esse speciale beneficium, quod talis occasio impotentiae vel excusationis occurrat, ut quod homo non advertat, vel dormiat, quia fortasse si adverteret, præceptum non impletet. Cumque Deus bene hoc præsciat, potest esse speciale beneficium providentiæ divinæ, non advertere, vel quid simile, juxta illud cum proportionem applicandum : *Raptus est, ne malitia mutaret intellectum ejus*, Sap. 4.

18. *Quarta assertio.* — *Ad servandum præceptum negativum necessaria est gratia.* — Dico quarto : non solum ad servandum affirmativum præceptum supernaturale, sed etiam ad servandum negativum, eo modo quo esse potest supernaturale circa actus internos, et ut tale servari, necessarium est gratiæ auxilium. Declaratur imprimis assertio : nam duobus modis intelligi potest imponi negativum præceptum. Primo per se, propter solam exclusionem actus pravi, sicut prohibetur fornicatio. Secundo, potest præceptum negativum poni ut consequens seu concomitans præceptum affirmativum ; sic enim præcipimur non dissentire rebus fidei, illo eodem præcepto quo præcipimur illas credere, quia ille dissensus magis repugnat illi affirmativo præcepto quam carentia assensus. Unde idem præceptum affirmativum quod obligat ad aliquid agendum, non pro semper, sed certis occasionibus et temporibus, obligat pro semper ad non habendum actum contrarium ; ut præceptum confitendi aliquam fidem obligat ut nunquam illam negemus, et præceptum amandi suis temporibus proximum obligat pro semper ut odio non habeatur. In præceptis autem de quibus tunc agimus, scilicet, quæ de actibus mere internis dantur, non inveniuntur supernaturalia præcepta pure negativa, propter rationem supra factam, quod negatio actus, ut sic, non est su-

pernaturalis. Item quia carentia actus supernaturalis non præcipitur per se, sed potius prohibetur, quæ prohibitio in affirmationem revolvitur, quia negatio negationis affirmatio est: carentia vero actus naturalis per naturale præceptum præcipitur, sive per se, sive oppositum actum præcipiendo. Solum ergo inveniri possunt præcepta negativa supernaturalia, ut annexa præceptis affirmativis, ut exemplis jam declaratum est.

19. *Peccatum contra præceptum supernaturale, virtuti etiam naturali opponitur. — Dupliciter potest caveri actus contrarius supernaturali præcepto. — Primo. — Quo sensu vera sit ultima opinio in num. 5. relata. —* Uterius vero est considerandum nullum esse actum pravum ita oppositum actui præcepto supernaturali, ut non sit etiam oppositus alicui actui naturali. Ut, verbi gratia, dissensus in materia fidei divinæ non solum opponitur fidei supernaturali, sed etiam fidei acquisitæ, quæ in illa materia versari potest: et odium proximi, quod opponitur supernaturali amori, etiam opponitur naturali, et sic de cæteris. Ratio autem est, quia nulla est materia actuum supernaturalium, in qua naturales actus, aliquo modo similes in substantia seu objecto naturali, non possint sub inferiori aliqua ratione versari; motus vero contrarius, cum ordinis naturalis sit, quia adæquate et per se primo opponitur contrario actui naturali, consequenter vero etiam opponitur supernaturali propter generalem rationem tendentiæ ad tale objectum, quam includit. Hinc ergo fit ut actus contrarius supernaturali actui præcepto, qui per illud præceptum consequenti ratione prohibetur, dupliciter possit caveri. Primo, secundum se et absolute spectatus; alio modo ut repugnans tali supernaturali actui præcepto. Priori modo sine dubio potest caveri pro sola libertate naturali, ut probat ratio supra facta in ultima distinctione seu opinione quam retuli. Nam illa carentia est per se opposita actui naturali, et ita odium proximi potest caveri per rationem naturalem, et negatio hujus articuli, Christus est Deus, potest vitari ex vi naturalis discursus, si quis ex illo fide humana persuadetur Christum esse Deum. In his vero et similibus casibus non implet quis, formaliter et proprie loquendo, præceptum aliquod supernaturale, sed materialiter tantum dicitur illud implere, quatenus non violat affirmativum, in quo negativum illud virtute continetur.

20 *Secundo modo sine gratia non cavetur.*

— Alio ergo modo potest quis cavere illum actum, eo quod repugnat supernaturali actui præcepto, et hoc modo vere ac formaliter dici potest servare aliqua ex parte præceptum supernaturale. Et sic dicimus non posse id facere sine gratia, quia non potest intelligi quod illo modo et intentione caveat illum actum, nisi per positivum actum voluntatis, quo respiciat illud motivum: actus autem ille supernaturalis est, quia est ex motivo fidei, et reducit ad voluntatem credendi, quæ sine gratia haberi non potest. Et hac ratione, quotiescumque occurrit tentatio ad habendum assensum fidei contrarium, vel dubitationem de certitudine illius, necessarium est auxilium gratiæ non solum ad positive credendum, sed etiam ad abstinendum deliberate a quocumque motu contrario, quia id non fit sine pia affectione ad fidem, seu (quod idem est), non fit sine voluntate positiva permanendi in fide Christiana, seu vitandi contrarios motus, ne ab illa recedatur. In quibus casibus etiam accedit difficultas ex parte tentationis, ad quam superandam etiam ex ea parte est moraliter necessaria gratia, quia in tali materia semper erit tentatio gravis et periculosa, nisi homo per gratiam illuminetur, et juvetur. Verumtamen licet interdum non sit adeo gravis, ut vincatur illo modo et cum illo respectu ad fidem, ne aliquo modo violetur, est gratia necessaria. Si autem quis absteat ab actu fidei contrario solum ductus rationibus et motivis humanis, poterit quidem interdum abstinere per vires liberi arbitrii a tali actu; tamen si tentatio gravis urgeat, vel diu in illo conflictu persistendum sit, etiam ad id constanter cavendum sine gratia non sufficiet, juxta dicta superiori libro de pugna tentationum. Et hæc quæ, gratia exempli, in præcepto fidei declaravimus, possunt eadem proportionem ad præcepta spei et charitatis applicari.

21. *Respondetur ad argumentum in num. 2. — Ad primum fundamentum Cajetani in n. 2. — Ad aliud fundamentum in num. 4. — Ad rationem ultimæ sententiæ in num. 5. —* Atque ex his aliarum sententiarum fundamenta soluta relinquuntur. Principium enim illud toties a Pelagio repetitum, Deum non jubere impossibilia, licet absolute sit verissimum, nihil ad rem facit, nam quæ apud homines sunt impossibilia, apud Deum possible sunt. Ideoque recte dantur præcepta supernaturalia, quia quod per solam naturam fieri non potest, per gratiam potest impleri. Ad fundamenta autem Cajetani, quod ad priorem distinctio-

nem de modo et substantia actus pertinet, jam responsum est, in actibus præceptorum, de quibus loquimur. modum in substantia contineri, et deinde dictum est, quomodocumque modus ille ad actum comparetur, semper esse de substantia præcepti, ideoque nullo modo impleri posse præceptum sine illo modo, qui sine gratia esse non potest. Ad fundamentum autem alterius distinctionis, dictum est casum illum quem Cajetanus fingit, in quo nec præceptum impleretur, neque contra illud peccatur, talem esse, ut in eo non sit præceptum. Ablato autem præcepto, quid mirum est quod nec servetur nec violetur? Quid autem D. Thomas ibi allegatus de homine in statu naturæ integræ senserit, statim dicam. Ad rationem vero ultimæ opinionis, negamus præcepta negativa, prout in hac materia esse possunt, impleri proprie per solam materialem negationem actus (ut sic dicam). Jam enim ostendi quomodo necessaria sit positiva voluntas non agendi aliquid repugnans præcepto supernaturali, quod, ut de actu interiori datur, per se affirmativum est, non negativum, nisi consecutione quadam, ut satis explicui.

22. *Primum corollarium.*—*Necessitas gratiæ ad naturam hujus præcepti per se oritur.*—Unde primo ex dictis colligitur necessitatem gratiæ ad servanda hæc præcepta, non oriri per accidens ex statu naturæ lapsæ, vel ex repugnantia appetituum, sed per se ex natura talis præcepti et materiæ ejus, quia superat vires naturales liberi arbitrii, per se et secundum suam intrinsecam naturam spectati. Et hinc fit hanc gratiam esse necessariam, non solum ad collectionem præceptorum, sed etiam ad singula. Fit etiam ut non tantum sit necessaria gratia urgente tentatione, vel alia extrinseca difficultate occurrente, sed in quacumque opportunitate vel dispositione. Denique fit ut non sit tantum necessaria homini lapsò, sed etiam in statu integro, sicut supra de singulis actibus inferius dictum est.

23. *Explicatur D. Thomas in n. 3 citatus.*—Quod autem D. Thomas ait, art. 4, in statu naturæ integræ potuisse hominem implere præcepta quoad substantiam, licet non quoad modum, intelligendum est de præceptis legis naturalis. Nam de illis præcipue quæstionem moverat, de præceptis enim virtutum theologiarum, quibus potissime actus interni super naturales præscribuntur, non movit quæstionem, quia revera ex dictis in articulo 2 definita erat. Ibi enim dixerat in nullo statu posse hominem efficere sine gratia opus excedens

suam naturam, quale est opus virtutis infusæ; hoc autem non minus procedit quando illud bonum præceptum est, quam cum non est præceptum, et ideo in articulo 4 solum de præceptis legis naturalis quæstionem movet. Unde cum in argumento 3 objecisset de actu amoris super omnia, qui videtur præcipi lege naturæ, respondet, in solutione ad 3, illum amorem, prout ex charitate impletur, excedere vires naturæ, ac si diceret, sic non pertinere ad naturalem legem, et ideo neque pertinere ad illam quæstionem, neque in illo distinguere modum a substantia, quod æque dici potuit de actu fidei et spei, prout pertinent ad virtutes infusas. Cum vero in articulo 8 dicit potuisse hominem in statu naturæ integræ sine gratia habituali vitare omnia peccata, in eodem sensu intelligendus est. Supponit enim in illo statu non fuisse habiturum hominem alia præcepta, nisi quæ sunt naturæ proportionata. Ex quo recte sequitur quod tunc posset vitare omnia peccata, quia tunc in illo non essent peccata, nisi contra legem naturæ. Unde pro ratione subjungit: *Quia peccare nihil aliud est quam recedere ab eo quod est secundum naturam, quod vitare homo in statu integræ nature posset.* Vel certe si fingamus hominem in statu integræ naturæ sine gratia habituali, et nihilominus habentem præcepta supernaturalia de actibus internis supernaturalibus, tunc etiam posset vitare omnia peccata sine gratia habituali, non vero sine gratia auxiliante ad servanda talia præcepta, ut ex dictis satis patet.

24. *Secundum corollarium.*—*Gratia adjuvans est per se necessaria et sufficiens.*—Secundo, ex dictis colligitur quænam gratia necessaria sit ad hunc effectum servandi præcepta supernaturalia, et vitandi contraria peccata. Dicendum est enim per se necessariam esse gratiam auxiliantem, quæ det vires operandi actum sic præceptum; et hanc esse sufficientem, quia dat potestatem ad singulos actus. Unde fit ut sine gratia habituali possit peccator implere præceptum fidei et spei. Imo etiam præceptum dilectionis et perfectæ contritionis implere potest cum auxilio Dei, sine habitu cooperante, quanquam simpliciter id non faciat sine habitu charitatis et gratiæ, saltem consequente ordine nature in eodem instanti temporis, ut in materia de Justificatione dicemus.

25. *Non tamen semper hæc præcepta sine habituali gratia servantur.*—Atque hinc fit ut, licet semel aut iterum hæc præcepta impleantur

tur sine habituali gratia cooperante, simpliciter autem et absolute non servantur in omnibus temporibus et in actibus suis sine gratia habituali ejusque influxu, quod potest respective intelligi in præceptis fidei, spei et charitatis, quoad habitus ad quos talia præcepta pertinent, vel simpliciter de tota collectione præceptorum, ad charitatem seu gratiam sanctificantem comparata. Et utroque modo verum est. Nam licet in prima conversione ad fidem homo impleat præceptum fidei per solum auxilium gratiæ, statim illi infunditur habitus fidei, quo postea uti possit ad implendum illud præceptum, quoties occasio occurrerit: et idem est cum proportione de spe. Et similiter in charitate, licet prima conversio ad Deum perfecta, qua impletur præceptum dilectionis, possit esse ex solo auxilio, nihilominus per illam statim infunditur habitus charitatis. Ulterius vero, ut homo possit ista omnia præcepta semper et in omni occasione constanter servare, necessaria est gratia sanctificans, quia supra diximus hanc gratiam esse necessariam ad servandam totam legem naturalem: ergo multo magis ad supernaturalem: tum quia nemo servat totam legem supernaturalem, præsertim charitatis, quin servet etiam totam legem naturæ; tum etiam quia qui servat omnia præcepta virtutum theologalium, sine dubio salvatur, quia diligit Deum super omnia, et simpliciter servat mandata: nemo autem salvatur sine gratia habituali: ergo neque implet præcepta sine illa gratia: quæ tamen non solum est necessaria ex ordinatione divina quasi extrinseca, sed etiam ex intrinseca connexionione quam habet cum charitate, ut satis ex dictis constat.

CAPUT XXIV.

UTRUM AD SERVANDA PRÆCEPTA SUPERNATURALIA DE EXTERNIS ACTIBUS NECESSARIA SIT GRATIA?

1. *Peculiaris difficultas de his actibus.* — *Cajetani sententia.* — Distinguimus quæstionem hanc a præcedente, quia actus externi non sunt supernaturales, sicut interni: hi enim sunt in substantia supernaturales, illi vero in se et in sua entitate supernaturales non sunt, solumque causaliter, seu moraliter possunt supernaturales dici, quatenus ab actibus internis supernaturalibus procedunt. Sicut enim actus externus in se ac formaliter non est liber nec bonus moraliter, nisi per denominationem ab interno, ita actus externus

in ratione actus virtutis non est supernaturalis, nisi quatenus interno actui supernaturali conjungitur, et ab illo quasi informatur. Dixi autem in ratione actus virtutis, quia in ratione Sacramenti alium modum supernaturalitatis habere potest externus actus; illam vero non habet a nobis, sed ab institutione divina; nobis autem non præcipitur, nisi quatenus humanus actus est, et a nostra voluntate pendet, et ut sic etiam habet quod sit supernaturalis actus per conjunctionem ad aliquem interiorum actum, ut mox explicabimus. Atque hinc fit ut in his præceptis de actibus externis optime locum habeat distinctio illa Cajetani de observatione præcepti quoad substantiam, vel quoad modum, quia in externis actibus modus supernaturalis est extra substantiam actus, ut ex dictis patet, et similiter esse potest extra substantiam præcepti, ut jam explicabimus.

2. *Assertio prima.* — *Hæc præcepta non quoad substantiam, sed quoad modum tantum gratia indigent.* — *Tripliciter dari potest præceptum supernaturale de actu externo.* — *Primus modus.* — Dico ergo primo: præcepta supernaturalia de actibus externis interdum possunt quoad substantiam impleri sine auxilio gratiæ, non vero quoad supernaturalem modum quem habere possunt ab operante. Ratio utriusque partis facilis est. Prioris quidem, quia supernaturalitas non est intrinseca externo actui præcepto, et interdum non præcipitur per ipsummet præceptum supernaturale: ergo tunc actus, quantum ad totum id quod exterius præcipitur, potest fieri per vires naturæ sine gratia, et tunc implebitur tale præceptum quoad substantiam. Alterius vero partis ratio est, quia non potest homo facere actum ut supernaturalem sine auxilio gratiæ: aliqua vero sunt præcepta de his actibus, quæ dantur de modo supernaturali illorum; ergo. Vis hujus rationis ostendetur descendendo ad hos actus in particulari. Tribus enim modis (quantum nunc occurrit) potest esse supernaturale præceptum de actu externo. Primo solum ex modo quo imponitur, utique quia et est a Deo ipso impositum ultra totam legem naturæ, et per revelationem propositum ut fide credatur et suscipiatur, quamvis in re præcepta nihil supernaturalitatis inveniatur, neque ex vi talis præcepti exigatur. Exemplum esse potest in præcepto dato Adæ non comedendi de ligno scientiæ boni et mali. Nam si respiciamus totum id quod exterius præcipiebat, solum erat omissio cujusdam corporalis actus, abstinentia scilicet ab esu

cibi sensibilis, quæ naturali voluntate et arbitrio observari facile poterat. Et licet fides infusa talis præcepti, et voluntas servandi illud ex motivo aliquo supernaturali non possent sine gratia haberi, nihilominus præceptum illud præcise spectatum non obligat ad modum illum operandi, sed solum ad exteriorem abstinentionem sensibilem, quæ naturalis erat, et servari poterat ex naturali voluntate, vel bona moraliter ex sola ratione temperantiæ naturalis, vel etiam per voluntatem aliquam peccaminosam, ut ex vana gloria vel timore pure humano. Quocumque autem modo fieret, sufficeret ad faciendum totum id quod præcepto illo erat mandatum, quod est servare præceptum quoad substantiam. Nam licet fortasse in modo abstinendi peccaretur, peccatum illud non esset contra tale præceptum, sed contra alias virtutes, ut contra humilitatem, vel similes. Quia, ut dixi, præceptum non obligabat ad hos modos, sed ad solam substantiam actus. Similia exempla sumi facile possunt ex lege veteri, quæ divina erat positiva, et ut sic supernaturalis, præcipiebat autem multos externos actus, qui quoad solam substantiam præcepti poterant fieri sine ullo modo supernaturali, ideoque non semper ad talia præcepta implenda erat necessaria gratia, licet sine illa fieri non possent fructuose, seu sicut ad salutem oportebat.

3. *Secundus modus.* — Secundo modo potest præceptum de exteriori actu esse naturale ex parte materiæ, quia præcipit actum externum, qui ab interno supernaturali intrinsece pendet, tuncque clarum est, non posse tale præceptum impleri sine gratia, vel mediate (ut sic dicam), quia actus a quo pendet non potest sine gratia fieri, vel quia actus exterior et interior censentur unus moraliter, et ideo gratia, requirita ad internum actum imperantem vel dirigentem, est necessaria ad actum externum. Et hoc recte confirmatur ex Concilio Arausico, II, can. 11, dicente: *Nemo Domino recte voterit, nisi ab illo acceperit.* Nam sive sit sermo de emissionem voti, sive de illius observatione, licet sit actus externus, non fit nisi ex directione fidei et imperio Religionis Christianæ; et ideo si recte et fructuose fiat, non fit sine gratia. Simile est de oratione seu petitione, etiam externa et debito modo facta, ut ex eodem Concilio, can. 3 et 6 sumitur. Item hac ratione, ad implendum præceptum confitendi fidem, est gratia necessaria saltem ratione fidei internæ, a qua debet talis confessio procedere. Nam si quis fide confitea-

tur fidem, licet exterius appareat implere præceptum, apud Deum non implet. Quod si præceptum urgeat tempore persecutionis, vel tentationis magnæ, tunc erit gratia necessaria non solum propter supernaturalitatem actus, sed etiam alio titulo ob extrinsecam difficultatem. Quæ necessitas potest sæpe inveniri in præceptis etiam naturalibus de actibus externis, juxta dicta in libro præcedenti. Denique inveniri potest hæc necessitas in vera adoratione externa et in cæteris actibus religionis, in quibus specialem difficultatem habent præcepta Sacramentorum, et ideo pauca de illis addenda sunt.

4. *Tertius modus præcepti, qui legis gratiæ Sacramentis inest.*—Tertio igitur modo, potest esse præceptum naturale de externo actu, quia ipse actus etiam præter præceptum habet in se aliquam supernaturalitatem, saltem ex institutione divina, qui modus supernaturalitatis proprius est Sacramentorum novæ legis, quatenus gratiam in se continent quam significant, et efficere possunt ut instrumenta divina. Hæc enim ratio, sive moralis sive physica sit, modus quidam supernaturalis est qui in actu supponitur ex institutione, quæ diversa est a præcepto, et ad illud supponitur; ideo enim talis actus præcipitur, quia per institutionem factus est sanctus et gratiæ operativus. De his ergo actibus videri potest non posse observari eorum præcepta sine gratia, quia tales actus supponuntur naturales ad ipsa præcepta, et per illa præcipiuntur non tantum quoad materialem substantiam, sed etiam quoad modum supernaturalem, quia præcipiuntur ut talia Sacramenta sunt: ergo modus ille supernaturalis cadit sub præceptum, ac proinde pertinet ad substantiam ejus juxta supra dicta: ergo licet actus ipsi quoad materialem substantiam seu entitatem possint sine gratia fieri, nihilominus præceptum quoad substantiam non potest fieri sine gratia.

5. *Pro explicanda nostra sententia variae quæstiones et conclusiones proponuntur.*—Sed nihilominus in his etiam actibus procedit conclusio, de qua late videri potest Vega, quæst. 13 de Justificat. Nos autem, ut rem totam breviter comprehendamus, imprimis distinguimus in his actibus præcepta ministrandi vel conficiendi Sacramenta a præceptis recipiendi. Distinguimus præterea duplicem præcepti modum supra innotatum. Unum præceptum dici potest de exercitio actus absolute, ut est præceptum ministrandi vel recipiendi Sacra-

mentum : aliud est de modo seu quasi specificatione actus, ut est præceptum digne ministrandi vel recipiendi Sacramentum, quæ dignitas aliquid supernaturale includit, ut dicemus. Ex quibus primum præceptum affirmativum et absolutum est ; alterum vero per negativum præceptum interdum explicatur, scilicet, non ministrandi indigne, vel per affirmativum hypotheticum, scilicet, si feceris, fac digne. Denique distingui potest de gratia, vel habituali sanctificante, vel solum auxiliante. Item de gratia antecedente tempore vel natura ad actus, vel de gratia consequente, seu comparata per actum.

6. *Prima conclusio.* — *Ad absolutam administrationem Sacramenti gratia habitualis non requiritur.* — De præceptis ergo pertinentibus ad ministerium Sacramentorum, dico imprimis obligationem absolutam ministrandi seu efficiendi Sacramentum posse impleri sine gratia habituali ; imo et sine fide. Probat, quia Sacramenta a pravis ministris data vel facta valida sunt, ut est dogma fidei, de quo latius egimus in 3 p., tom. 3, disputat. 13, sectione 4 ; quoties autem Sacramentum validum est, impletur sufficienter obligatio absoluta ministrandi Sacramentum, quia fit quod præcipitur. Deinde possunt talia præcepta impleri sine auxilio quod ad ordinem gratiæ gratum facientis pertineat, quamvis sæpe non fiat sine auxilio spectante ad ordinem gratiæ gratis datæ. Hoc intendit Cajetanus 1. 2, quæstion. 109, articul. 4, dicens ad implenda de Sacramentis conferendis præcepta, non requiri gratiam pertinentem ad operationem virtutis, sed pertinentem ad operationem alicujus superioris facultatis, quæ non facit hominem bonum, sed facit potentem. In qua distinctione non intendit Cajetanus negare actum ministrandi Sacramenta esse actum virtutis ex suo genere, cum per se satis notum sit esse actum religionis, et possit etiam esse professio quædam fidei, et officium charitatis. Sed mens ejus fuit, ex vi præcepti ministrandi Sacramentum, præcise et absolute spectati, non præcipi actum virtutis, ut talis est, sed actum potestatis supernaturalis. Quod verissimum est, quia Sacramentum, ut Sacramentum, non potest fieri sine potestate supernaturali, potest autem fieri sine actu honesto et virtutis, quia licet ministratio Sacramenti de se sit materia religionis, potest a ministrante fieri irreligiose et sacrilege, et nihilominus valide, ut est certissimum. Hinc ergo dicimus præceptum jubens illud ministerium posse

impleri sine auxilio sanctificantis gratiæ, quia potest impleri per actum pravam, qui ex tali auxilio fieri non potest, ut per se patet. Addimus vero requiri auxilium potestati supernaturali debitum ; quia sine proportionato concursu vel auxilio nulla potentia operatur. Et hoc auxilium dicimus pertinere ad ordinem gratiæ gratis datæ, respectu ministrantis, quia non ordinatur ad sanctificationem ejus cui datur, sed ad bonum commune.

7. *Hoc auxilium ad effectum supernaturalem, non ad sensibilem requiritur.* — *Probat, primo quoad effectum sensibilem.* — Advertimus autem hoc auxilium maxime requiri ad efficiendum supernaturalem aliquem effectum gratiæ per Sacramentum : nam ad solam sensibilem effectum Sacramenti neque hoc auxilium necessarium est, ut patet in contrahentibus matrimonium peccando mortaliter, et similibus. Et ratio est, quia Sacramentum, etiam ut Sacramentum, non fit per actionem physicam supernaturalem, sed per solam sensibilem, supposita institutione. Et quamvis verum sit, ad implendum tale præceptum, necessariam esse intentionem faciendi Sacramentum, quia sine illa non fit, et consequenter sine illa non impletur præceptum, hoc non obstat, quia illa intentio haberi potest interdum sine speciali auxilio gratiæ, cum possit haberi sine fide, ut patet in infideli baptizante valide infantem, et in Sacerdote hæretico rite consecrante. Ratio vero est, quia ille actus non semper est supernaturalis, quia potest sufficere intentio faciendi quod Christus fecit, vel quod Christiani faciunt, vel quid simile, ut statim iterum dicemus. Item licet quædam Sacramenta necessario postulent in ministro characterem ordinis, qui potest inter dona gratiæ computari, non tamen pertinet proprie ad gratiam virtutum, et sanctificantem, sed ad potestatem quamdam supernaturalem, ut dixit Cajetanus, et reducit ad ordinem gratiæ gratis datæ, ut nos diximus. Præter characterem autem qui est quasi habituale donum, seu potentia ad effectum Sacramenti, non requiritur peculiare auxilium gratiæ, quia circa Sacramentum ipsum non operatur character per modum potentiæ physicæ, sed moralis tantum, et sine speciali actione supernaturali, ut dixi.

8. *Probat, secundo quoad effectus supernaturales.* — At vero ad efficiendam gratiam quæ est effectus Sacramenti, vel ad consecrationem Eucharistiæ, vel imprimendum characterem, necessarium est speciale auxilium supernaturale, quia illi effectus sunt superna-

turales. et per actiones ejusdem ordinis fiunt. Hoc autem auxilium nihil aliud est quam elevatio ipsiusmet Sacramenti, seu verborum et actionum ministri ad efficiendos illos effectus, quia non aliter concurret minister ad efficiendos illos, ut nunc suppono. Ideoque sive minister in ipsa effectione Sacramenti bene moraliter operetur, sive male, Deus utitur ejus materiali actione ad benefaciendum alteri. Et hac ratione diximus elevationem illam seu auxilium non pertinere ad gratiam sanctificantem respectu ministrantis, sed reduci ad ordinem gratiæ gratis datæ: neque enim datur ad implendum præceptum, sed ut promissio Dei impleatur.

9. *Ad digne ministranda Sacramenta saltem ex officio, gratia requiritur.* — Addendum denique est ad implendum præceptum ministrandi digne Sacramentum, necessariam esse gratiam in eo saltem, qui Sacramentum ex officio administrat. Ratio breviter est, quia, ut Sacramentum digne ministretur, debet sancte ministrari, et ideo necessaria est gratia saltem habitualis in eo qui Sacramentum ministrat. Unde si præcedat conscientia peccati mortalis, necessaria erit actualis gratia, qua se ad digne ministrandum disponat. Sed hæc in tertio tomo tertiæ partis latius tractata sunt.

10. *Secunda conclusio. — Præceptum receptionis Sacramenti adimpleri potest sine gratia.* — De præceptis ad Sacramentorum receptionem pertinentibus, manifestum etiam est posse sine gratia quoad substantiam impleri, quod ita breviter declaratur. Nam duobus modis potest quis recipere Sacramentum, scilicet, vel peccando in ipsa receptione mortaliter, vel non peccando. Quando priori modo recipit Sacramentum tempore quo tenetur, si recipiat valide, implet præceptum, quia facit quod jubetur. Dico autem, si recipiat valide, quia si ex modo recipiendi Sacramentum fiat nullum, manifestum est non impleri præceptum, quia non fit quod præcipitur. Et hac ratione, in Sacramento penitentiae, nunquam potest impleri præceptum peccando mortaliter in ipsa confessione, seu in receptione Sacramenti, quia talis dispositio et confessio est contra substantiam Sacramenti, ut in 4 tomo 3 partis contra Scotum et alios ostendi. At vero ubi substantia Sacramenti potest consistere sine effectu et sine recta recipientis dispositione, nihil vetat impleri præceptum, recipiendo Sacramentum sine gratia. Dices: sacramentum ipsum est quid supernaturale; quomodo ergo potest recipi sine aliquo auxilio supernaturali?

Respondeo sacramentum esse quidem supernaturale, quia supernaturaliter impositum est ad significandum et efficiendum; hoc autem non habet a recipiente, sed quasi per denominationem extrinsecam quoad institutionem, vel per elevationem Dei quoad efficientiam. Et ideo recipi potest sine auxilio gratiæ, si non digne recipiatur. Imo ipsum etiam Sacramentum Eucharistiæ, quod est in se res valde supernaturalis, potest tantum Sacramentaliter recipi sine actu supernaturali, vel gratiæ.

11. *Declaratur secundo inductione, imprimis in Baptismo.* — Declaratur tandem assertio brevi inductione. Nam in Baptismo facile potest adultus implere præceptum, illud Sacramentum recipiendo scienter in peccato, si vere velit baptizari, et rite baptizetur; nam id satis est ut Sacramentum sit validum, et consequenter ut Baptismi præceptum impleatur: cujus signum etiam est, quia non tenetur quis amplius præceptum illud implere. Tunc ergo impletur præceptum sine gratia, quia nec habitualis adest, cum per peccatum impediatur, nec actualis est semper necessaria propter solum Baptismum, quia et potest præcedere sola humana et acquisita fides, et voluntas seu intentio Baptismi interdum potest esse naturalis, imo et propter humanum finem haberi, et nihilominus sufficit ad Baptismum, et præceptum implendum. Neque obstat quod Arausicanum Concilium, canon. 8, dicit neminem posse venire ad Baptismum sine gratia: nam loquitur de illo qui venit digne, ut saltem ex vera fide, quæ sine gratia haberi non potest. Hoc enim ibi principaliter Concilium agebat. Atque hæc doctrina locum habet in aliorum Sacramentorum receptione extra penitentiam.

12. *Impugnatur Adrianus dicens per actum malum non impleri præceptum.* — Adrianus vero, in 4, quæst. 5, dub. 4, negat hanc assertionem, quia putat non posse impleri præceptum per actum malum. Sed hoc fundamentum incredibile est, quia, licet peccando non possit quis implere omnia præcepta, quia si peccat aliquod præceptum violat, nihilominus potest unum præceptum implere, licet aliud transgrediatur, ut dixi lib. 2 de Legibus, cap. 10, et de præceptis Sacramentorum specialiter dixi in suis materiis. Et docet etiam contra Adrianum Soto, in 4, distinct. 18, q. 3, ad 2. Dicit tamen ibi, qui sciens recipit Sacramentum Eucharistiæ indigne, non implere præceptum. Medina vero l. 2, quæst. 109, artic. 4, dub. 3, conclus. 3, dicit illum implere

præceptum Ecclesiæ, non vero divinum. Mihi autem videtur utrumque implere, quatenus datur de receptione Sacramenti: sic enim loquimur. Nam sicut de activa collatione Sacramenti, ita in receptione duo præcepta distinguenda sunt, unum præcise recipiendi Sacramentum, aliud digne sumendi, et consequenter præmittendi necessariam dispositionem ad dignam receptionem: ut in Eucharistia est præmittere confessionem, si conscientia mortalis peccati præcedat. Hæc ergo duo præcepta distincta sunt, et potest unum sine alio impleri. Sic ergo qui indigne communicat sciens, non implet posterius præceptum; implet tamen prius, quia vere recipit Sacramentum moraliter et humano modo, et hoc tantum præcipitur ex vi illius præcepti. Et quoad ecclesiasticum præceptum patet, quia nec tenetur amplius eo anno communicare, nec incurrit censuram non communicantibus impositam. De divino autem patet, quia si quis in articulo mortis viaticum indigne recipit, non tenetur iterum ante mortem recipere, sed pœnitentiam agere, et confiteri peccatum indignæ assumptionis, et tunc fortasse recipit etiam effectum Eucharistiæ, recedente fictione; de quo alias.

13. *Tertia conclusio.* — *Ad recipiendum digne Sacramentum necessaria est gratia.* — *Hæc gratia non eodem modo in omnibus datur.* — Ultimo ergo dicendum est, ad implendum præceptum digne recipiendi Sacramentum, necessariam esse gratiam. Hoc certum est, quia sine gratia non recipitur digne Sacramentum. Hæc autem gratia non eadem, neque eodem modo in omnibus necessaria est. In Baptismo enim et pœnitentia necessaria est gratia auxilians, qua homo se digne disponat ad recipiendum Sacramentum. Gratia vero habitualis non prærequiritur, quia non tenetur quis accedere contritus ad illa Sacramenta. Quia vero tenetur accedere sufficienter dispositus, ideo non impletur tale præceptum sine habituali gratia, saltem consequente ordine naturæ receptionem Sacramenti. Nam licet possit contingere aliquem, propter invincibilem ignorantiam, recipere verum Sacramentum, et non effectum ejus, tunc quamvis a peccato excusetur, et a transgressione præcepti, re tamen vera non implet præceptum, sed tantum in conscientia erronea: quod si illa vocetur observatio præcepti, fatemur illo modo posse servari sine habituali gratia. Durandus autem in 2, distinct. 28, quæst. 3, num. 12, et q. 4, numer. 6, existimavit, interveniente ignoran-

tia invincibili, semper hominem justificari per Sacramentum, et ideo non dari statum medium, in quo homo excusetur a transgressione præcepti, et gratiam non recipiat per Sacramentum. Sed hoc necessarium non est, quia potest consistere illa ignorantia cum defectu dispositionis sufficientis ad effectum Sacramenti, ut in proprio loco latius dictum est.

14. *Habitualis gratia per se petitur ad Sacramenta vivorum digne recipienda; non tamen requiritur gratia actualis.* — At vero in aliis Sacramentis, quæ dicuntur vivorum, per se requiritur gratia habitualis antecedens receptionem Sacramenti, ut digne recipiatur Sacramentum, quod nunc suppono, et ideo per se non impletur tale præceptum sine tali gratia. Dico autem per se, quia per ignorantiam potest quis excusari, sicut de aliis dixi. Præter gratiam vero habitualement, non videtur gratia actualis semper et in omni casu necessaria, quia actualis dispositio supernaturalis non est per se necessaria ad dignam susceptionem Sacramenti, nam satis est accedere sine obice, quomodo accedit qui est in statu gratiæ, etiamsi ex quadam consuetudine, sine supernaturali consideratione, sola naturali voluntate, et (ut ita dicam) materiali ad recipiendum Sacramentum accedat. Hic tamen modus imperfectissimus est; ordinarie enim non acceditur ad Sacramentum sine actu fidei, et aliqua supernaturali dispositione voluntatis, et ad hoc est necessaria actualis gratia. Si vero contingat hominem ante susceptionem Sacramenti habere conscientiam peccati mortalis, tunc tenetur se disponere ad gratiam, et ideo indiget omnino auxilio gratiæ, quo se disponat, juxta doctrinam Concilii Tridentini, sess. sexta et decima-quarta; ergo eodem auxilio gratiæ indiget, ut præceptum digne recipiendi sacramentum impleat, nisi forte per ignorantiam excusetur: et tunc vel non implet præceptum, vel tantum secundum quid, in ordine ad conscientiam propriam, ut jam declaravi.

CAPUT XXV.

UTRUM HOMINIBUS ETIAM JUSTIS SIT NECESSARIA NOVA GRATIA AD EXEQUENDA MEDIA NECESSARIA VEL UTILIA AD ÆTERNAM SALUTEM CONSEQUENDAM?

1. *Assertio generalis.* — Hanc quæstionem sub hoc titulo propono, ut multas complectar quas de necessitate gratiæ divus Thomas in initio hujus materiæ tractavit 1. 2, quæstione

109, per plures articulos : illas enim neque in hoc loco omnino prætermittere possumus, neque etiam omnes possunt exacte et pro dignitate nunc discuti et tractari, quia methodus et ratio doctrinæ multum inverteretur, et ideo, ut notitia earum in summa habeatur, hic eas explicabimus, integram disputationem in sequentes libros remittendo, ita ut repetitio caveatur. Sit ergo imprimis generalis assertio: Ad exequenda omnia et singula media necessaria ad salutem, ut talia sunt, aliquod gratiæ auxilium est necessarium. Hæc assertio absolute sumpta certissima est ; sequitur enim ex illo principio superiori libro satis demonstrato, quod liberum arbitrium nihil potest per se et sine auxilio facere, quod ad salutem æternam consequendam conferat, juxta verbum Christi Joann. 15: *Sine me nihil potestis facere*. Ut autem in particulari confirmetur, et qualis sit hæc gratia explicetur, adverte, inter media quæ ad salutem conferunt, quædam esse ad removendum peccatum, alia ad perficiendum bonum. Et inter priora, quædam sunt contra peccata prius commissa, ut tollantur, alia contra futura, ut non committantur.

2. *Prima conclusio.*— *Ad remissionem peccati in adulto gratia necessaria est.* — *Probatum ratione.* — Ad media igitur remissionem peccatorum impetrantia pertinet potissimum illa quæstio, quam Doctor sanctus in artic. 7 illius quæstionis tractat, an possit homo resurgere a peccato sine gratia ; idem enim est a peccato resurgere, quod veniam ejus obtinere: quam divus Thomas proprie tractat de peccato mortali, nam per illud solum anima moritur spiritualiter, et ideo ab illo solo dicitur proprium resurgere. Resolutio ergo catholica in duabus assertionibus consistit. Prima est, ad remissionem peccati obtinendam, necessarium esse gratiæ auxilium. Quæ assertio solum in adultis locum habet, nam parvuli non sunt capaces auxiliorum gratiæ. Et ita definitur in Trident., sess. 6, et 14 fere per totam. Ratio vero est, quia adultus non consequitur remissionem peccati sine propria dispositione ; non potest autem disponi nisi per auxilium gratiæ, ut ex eodem Concilio, et ex omnibus quæ de necessitate gratiæ ad actus supernaturales et pietatis dicta sunt, satis patet. Atque hæc assertio tam Pelagianæ quam Lutheranæ refellit ; illos, quia dicebant posse hominem suis viribus se ad remissionem peccatorum disponere, imo et illam mereri ; hos, quia negant debere hominem, imo etiam posse se, ad remissionem peccatorum obtinendam, etiam cum

gratia Dei disponere. Contra utrosque vero ex professo infra disputandum est, tractando de justificatione, et causis justitiæ.

3. *Secunda conclusio.*— *Ipsa peccati remissio est gratia, et per veram gratiam fit.* — Altera assertio est, ipsam remissionem peccatorum esse gratiam Dei, et per veram gratiam Dei et justitiam in nobis infusam fieri. Utraque pars de fide est, sumiturque ex Paulo ad Roman. 5, et definitur in Tridentin., sess. 5, c. 5, et sess. 6 et 14 ; et infra lib. 7, qui erit de formali effectu inhærentis justitiæ, et de formali causa remissionis peccatorum, ex professo probanda est. Priorque pars est contra Pelagianos, quia licet gratiam remissionis peccatorum voce non negarent, re tamen vera destruebant in illa rationem gratiæ, dum ex meritis solius liberi arbitrii conferri dicebant, ut Prolegom. 5 latius retuli ex Augustino, epist. 95 et 105, et damnatur in Trident., sess. 5, can. 3, et sess. 6, c. 1, et in aliis antiquioribus sæpe allegatis. Posterior vero pars est contra Lutheranos, qui dicunt per gratiam non dari nobis veram remissionem peccatorum. Quia cum negent remissionem peccatorum fieri per gratiam nobis inhærentem, consequenter addunt non fieri in nobis, per gratiam, destructionem et ablationem peccati, sed solam non imputationem, contra quos nunc sufficit sententia Pauli ad Ephes. 4 : *In quo habemus remissionem peccatorum secundum divitias gratiæ ejus ;* et cap. 4 : *Renovamini, etc., in justitia et sanctitate veritatis ;* et c. 5 : *Christus dilexit Ecclesiam, et semetipsum tradidit pro ea, ut illam sanctificaret, mundans lavacro aquæ, etc.* Et ita illum errorem ex professo damnat Concilium Tridentinum sessione sexta, ut latius in dicto libro videbimus.

4. *Tertia conclusio.*— *Peccatum etiam veniale per gratiam remittitur.*— Posset denique ista quæstio et resolutio ad remissionem peccatorum venialium extendi. Sed de hoc puncto in præsentem nihil amplius dicam, quia illud ex professo tractavi t. 1 tertiæ partis, disp. 4, sect. 11, et t. 4, disp. 11, per totam. Veritas ergo est, peccatum veniale non remitti sine aliqua gratia. Nam vel est in homine peccatore, vel in justo. In priori statu est conjunctum cum peccato mortali, sine ejus remissione remitti non potest, et ideo non remittitur sine infusione gratiæ habitualis, nec sine dispositione ad illam necessaria, quæ etiam ex gratia esse debet ; imo oportet ut talis dispositio etiam peccato veniali aliquo modo opponatur, ut ratione illius condonetur. In al-

tero vero statu, cum peccatum veniale sit in persona grata, ipsamet gratia habitualis confert ad talis peccati remissionem. Nam hæc potest fieri ex opere operantis, et tunc gratia hæc concurret per modum principii, et præterea necessarium est auxilium ad faciendum opus ratione cujus tale peccatum remittatur. Si vero remissio fiat ex opere operato, tunc gratia necessaria est, saltem per modum dispositionis. Et ita semper est aliqua gratia necessaria ad hunc effectum. Quia etiam venialis peccati remissio ad vitam æternam confert, et quia tanta est Dei excellentia et majestas, ut non possit homo suis viribus etiam pro levissima offensa satisfacere. Atque ita hæc doctrina et Scripturæ et Patribus magis consentanea est, ut citatis locis ostendi.

5. *De mediis quæ a futuris peccatis præservant.* — Ad media quæ præservant a futuris peccatis, vel ad illa non committenda juvant, pertinent quæstiones quas D. Thomas, dicta quæst. 109, art. 8, 9 et 10, proponit. Prima est generalis, an possit homo peccatum vitare sine gratia, quam in hoc libro, et in præcedenti satis superque discussimus. Secunda est magis specialis, an homo jam justificatus et constitutus in statu gratiæ, indigeat nova gratia ad vitandum in posterum peccata. In qua duo ut clara supponuntur: unum est, hominem justificatum non indigere nova gratia habituali ad vitanda peccata; tum quia eadem virtus quæ est principium operandi bonum, est principium ad resistendum contrariis; tum etiam quia gratia habitualis, quæ justis infunditur, est in suo genere perfecta, et operativa omnis boni, ut in superioribus visum est, unde superfluum est aliam exigere, alias in infinitum procedi posset. Imo nec intensio præexistentium habituum gratiæ est necessaria ad hunc effectum, quia gratia per se, et ex vi suæ perfectionis essentialis, est potens ad operandum actus honestos quibus resistatur peccatis, ideoque intensio ejus non est necessaria ad hunc effectum, licet multum conferre possit. Secundum est, hominem justum indigere generali concursu Dei, et communibus auxiliis ad generalem providentiam gratiæ et supernaturalem pertinentibus, ut peccatis possit resistere. Patet, quia non resistitur malis nisi operando bonum; ad operandum autem quodcumque bonum, præter potentiam, est necessaria motio Dei actualis, propter essentialem dependentiam causarum secundarum a prima, ut in libro quinto late dicendum est.

6. *Quarta conclusio.* — *Ad singula peccata*

vitanda, actuale auxilium generalis gratiæ sufficit. — His ergo positis, potest quæstio proposita moveri vel de singulis peccatis, vel de omnium collectione. Et in priori sensu, certum est non indigere justum nova gratia actuali ad singula peccata vitanda, præter illam quæ ad generalem providentiam gratiæ spectat. Probat, quia peccatum vitatur operando bonum; potest autem peccator multa bona sigillatim operari cum communi auxilio gratiæ; ergo multo magis justus. Denique ex dictis in superioribus de observatione singulorum præceptorum, sive naturalium, sive supernaturalium, est hoc manifestum, quia servando mandata, peccata vitantur; possunt autem singula præcepta quoad singulares actus per commune auxilium servari, ut visum est; ergo. Atque hæc veritas, licet sub his terminis non explicetur a Patribus, ex doctrina eorum aperte sumitur, et ex Trident. sess. 6, c. 11 et 13, et canon. 18 et 22. Explicabiturque magis inferius tractando de auxiliis gratiæ, eorumque necessitate post justificationem. De errore autem Lutheri, qui negat justos posse vitare aliquod peccatum etiam per gratiam, dicemus infra in lib. 10, cap. 4. Videatur Bellarmin., lib. 4 de Justificat., cap. 15; Valent., tomo 2, disput. 8, quæst. 1, punct. 8, § 8; Staplet., libro sexto de Justificat.; Vega, libro 11 et 12 in Trident.

7. *Quinta conclusio.* — *Homo lapsus, sanatus per gratiam, indiget gratia ad vitandum diu omnia peccata.* — At vero in posteriori sensu dicendum est hominem lapsum, etiam sanatum per gratiam sanctificantem, indigere speciali gratiæ auxilio ad vitanda omnia peccata longo tempore. Hæc assertio est certa. Potest autem intelligi de peccatis mortalibus tantum, et sic traditur a Patribus, ubicumque docent non posse justum perseverare in accepta justitia sine speciali dono et auxilio gratiæ, ut potissimum tradit Augustinus, lib. de Dono persever., per totum, ubi refert Cyprianum et alios; idem serm. 11 de Verb. Apost.; et Hieronym., lib. 3 contra Pelagian.; Tridentin., dicta sess. 6, c. 13, et canon. 22. Et hoc attigimus præcedenti libro, cap. 26, ubi ostendimus hæc necessitatem oriri ex infirmitate naturæ lapsæ, quam non aufert omnino gratia habitualis, licet culpam delet. Neque in præsentis loco plura de hoc puncto dicimus, quia de dono perseverantiæ infra lib. 10 ex professo tractandum est. Et ibi impugnavimus Pelagium dicentem gratiam tollere commissa, non vero juvare ad vitanda sequen-

tia, ut referunt Patres Africani in epistolis ad Innocentium, et damnatur in Concilio Milevitano, cap. 3. Quamvis autem hoc donum perseverandi, vel cavendi omnia peccata longo tempore, magnum et speciale sit, non est tamen extra legem ordinariam gratiæ; multis enim conceditur, et per orationes et alia media a Deo præstituta obtineri potest, quia Deus non deserit justum, nisi deseratur ab ipso, ut Concilium Tridentinum locis citatis docet. Ideoque licet non omnes justis recipiant hoc auxilium, omnes possunt accipere, quantum est ex parte Dei, ut idem Concilium tradit, et ex illo principio sequitur, latiusque infra in libro 10 de Perseverantia dicitur. At vero si sermo sit de peccatis venialibus vitandis, multo major gratia necessaria est justis ut diu non cadant leviter; neque sine speciali privilegio talis gratia alicui conceditur. Quomodo autem hoc intelligendum sit, in eodem tractatu de perseverantiæ dono commodius dicitur. Ideoque hæc de necessitate gratiæ ad vitanda peccata hoc loco sufficiunt.

8. *Tria mediorem genera ad salutem promovendam.* — Superest dicendum de mediis quæ gratiam ipsam seu salutem promovent, quæ possunt in tria membra distingui: quædam conferunt seu disponunt ad primam gratiam consequendam, quædam ad illam augendam, quædam denique ad illam perpetuo conservandam. De primis, divus Thomas, in dicta quæst. 109, art. 6, quæstionem movet, an possit homo se ad gratiam præparare sine gratia? Circa quam hic solum advertendum est duplicem esse primam gratiam, scilicet actua-lem et habitualem, seu auxiliantem et formaliter sanctificantem. Et de utraque potest tractari illa quæstio, et in priori sensu cum Semipelagianis disputatur, qui dicebant posse hominem per liberum arbitrium se disponere ad consequendum initium gratiæ, et damnati sunt in Concilio Arausicano. Et de hoc puncto dicendum est infra libro quinto, ubi de auxilio sufficiente dicturi sumus. In posteriori vero sensu coincidit cum illa quæstione, an possit homo sine gratia se sufficienter disponere ad remissionem peccati mortalis, quia hoc peccatum non remittitur nisi per infusionem primæ gratiæ sanctificantis. Et licet hæc quæstio definita jam sit in his quæ de necessitate gratiæ ad actus supernaturales diximus, quia hæc præparatio non fit nisi per hos actus, nihilominus hoc ipsum, id est, præparationem hanc in actibus supernaturalibus positam esse, infra tractando de justificatione ex professo dicen-

dum est. Nunc sufficiat definitio Concilii Milevitani et Tridentini, sess. 6, canon. 3 et sequentibus. Et generalis ratio est, quia, ad formam supernaturalem, præparatio etiam seu dispositio supernaturalis esse debet.

9. *De augmento gratiæ.* — *Ad promerendum gratiæ augmentum gratia requiritur.* — Ad media promoventia ad salutem quoad augmentum ejus, pertinet quæstio quam D. Thomas, in dicta quæst. 109, art. 5, tractat. Nam licet ibi solum de vita æterna quærat an possit homo eam sine gratia mereri, nihilominus eadem quæstio est de augmento gratiæ, quatenus per meritum comparari potest. Et quia merita per bona opera fiunt, ideo huc etiam spectat quæstio quam idem sanctus Doctor movet, art. 9, quantum ad eam partem, an justus auxilio gratiæ ad bene operandum indigeat? Utraque autem quæstio, quantum huic loco necessaria est, jam est definita. Nam ostensum est, præcedenti libro, omnia quæ Concilia et Patres tradunt de necessitate gratiæ ad bene operandum, de opere meritorio salutis præsertim intelligi. Et hic proxime explicuimus quomodo auxilio indigeat justus ad vitandum malum, et consequenter ad faciendum bonum. Cætera vero quæ ad meritum spectant, in ultimo libro hujus operis tractanda sunt. Quapropter solum hic superest advertendum hoc augmentum salutis dupliciter in nobis fieri, scilicet, ex opere operantis, et ex opere operato. Priori modo fit per opera virtutis, quæ aliquo modo supernaturalia esse debent, ut hunc effectum habere possint, ideoque ut talia media sunt, non possunt fieri sine gratia. Posteriori modo fit per Sacramenta, quæ in se gratiæ quædam sunt, et ut digne et fructuose suscipiantur, gratiæ auxilium facit, ut capite præcedenti explicatum est, ideoque etiam ad hæc media est necessaria gratia.

10. *Ad gratiæ conservationem gratia opus est.* — Denique, ad media quibus gratia conservatur pertinet quæstio quam idem Doctor sanctus tractat eadem quæstione, artic. 10, an justus indigeat gratia ad perseverandum? Quæ non est distincta a præcedentibus. Nam in gratia perseveratur removendo contraria, id est, cavendo peccata; et hoc solum ex parte hominis requiritur; et sine auxilio gratiæ non fit, quia includit observantiam tam naturalium, quam supernaturalium præceptorum, de quibus omnibus jam dictum est. At vero ex parte Dei requiritur actio continue gratiam inferens et conservans.

Quæ actio nihil aliud est nisi perpetua duratio ejusdem actionis, qua Deus gratiam produxit. Unde sicut infusio fuit gratia, ita perpetua conservatio est quædam gratia, licet non distincta, sed eadem continuata ex vi illius legis,

quod Deus neminem deserit, nisi prius deseratur ab ipso. Neque aliud de his mediis hic superest dicendum; nam fusioem disputationem de perseverantiæ munere infra daturi sumus, ut sæpe promisi.

FINIS LIBRI SECUNDI.



INDEX

LOCORUM SACRÆ SCRIPTURÆ

QUÆ IN HOC VOLUMINE EXPLICANTUR.

GENES.

CAP. II, v. 17. *In quacumque die comederis ex eo, morte morieris.* Proleg. 4, cap. 9, num. 9.

CAP. VI, v. 21. *Omnia quippe caro corruperat viam suam.* Lib. 1, cap. 3, num. 10.

PRIMUS REGUM.

CAP. VII, v. 3. *Præparate corda vestra Domino.* Prolegom. 5, cap. 6, num. 11.

CAP. XXIII, v. 11. *Si tradiderint me viri Ceilæ in manus ejus, etc.* Proleg. 2, cap. 2, num. 8.

SECUNDUS REGUM.

CAP. II, v. 6. *Retribuet vobis Dominus misericordiam et veritatem, sed ego reddam gratiam.* Proleg. 3, cap. 1, num. 5.

QUARTUS REGUM.

CAP. XIII, v. 19. *Si percussisses quinquies aut sexies, sive septies, percussisses Syriam usque ad consumptionem.* Proleg. 2, cap. 8, num. 22.

ESTHER.

CAP. XIII, v. 9. *Nemo est qui possit resistere voluntati tuæ.* Proleg. 1, cap. 5, num. 9.

PSALM.

Ps. IV, v. 7. *Signatum est super nos lumen vultus tui, Domine.* Lib. 1, cap. 2, num. 5.

Ps. XIII, v. 1. *Non est qui faciat bonum, non est usque ad unum.* Lib. 1, cap. 3, num. 10.

Ps. LXXX, v. 14. *Si populus meus audisset me, Israël si in eis meis ambulasset, pro nihilo forsitan inimicos eorum humiliassem.* Proleg. 2, cap. 8, n. 21.

Ps. CXVIII, v. 105. *Lucerna pedibus meis verbum tuum.* Proleg. 3, cap. 3, num. 14.

Ps. CXXXIV, v. 6. *Omnia, quæcumque voluit, Dominus fecit.* Proleg. 2, cap. 5, num. 9.

PROVERBIA.

CAP. VIII, v. 70. *Præparatur voluntas a Domino juxta 70.* Proleg. 5, cap. 6, num. 11.

CAP. XVI, v. 1. *Homini est animam præparare, et homini gubernare linguam.* Prolegom. 3, cap. 5, num. 7.

CAP. XXI, v. 1. *Cor regis in manu Dei est, et quocumque voluerit, vertet illud.* Prolegom. 1, cap. 5, num. 9.

SAPIENTIA.

CAP. I, v. 13. *Deus mortem non fecit.* Proleg. 4, cap. 3, num. 3.

CAP. VII, v. 7. *Propter hoc optavi, et datus est mihi sermo.* Prolegom. 6, cap. 7, in Lib. Augustini, cap. 2.

CAP. XVI, v. 25. *Propter hoc omnium nutriei gratia*

deserviebat. Proleg. 3, cap. 2, num. 2 et 6, et cap. 3, num. 5.

ECCLESIASTICUS.

CAP. XXXI, v. 10. *Qui potuit facere mala, et non fecit.* Proleg. 1, cap. 2, num. 1.

ISAIAS.

CAP. IX, v. 6. *Parvulus natus est nobis, et filius datus est nobis.* Proleg. 3, cap. 3, num. 15.

CAP. XI, v. 2. *Requiescet super eum spiritus Domini, spiritus sapientiæ et intellectus, etc.* Lib. 2, cap. 17, a num. 2.

JEREMIAS.

CAP. XXXVIII, v. 17. *Si profectus exieris ad principes Regis Babylonis, vivet anima tua.* Proleg. 2, cap. 2, num. 17, et cap. 8, num. 21 et 24.

OSÆAS.

CAP. XIII, v. 14. *Morsus tuus ero inferne.* Proleg. 6, cap. 5, num. 4.

ZACHARIAS.

CAP. I, v. 3. *Convertimini ad me.* Proleg. 1, cap. 2, num. 1.

MATTHÆUS.

CAP. V, v. 3. *Beati pauperes spiritu, quoniam ipsorum est regnum cætorum.* Lib. 2, cap. 22, a num. 3.

CAP. V, v. 4. *Beati mites, quoniam, etc.* Lib. 2, cap. 22, num. 7.

CAP. V, v. 5. *Beati qui lugent, quoniam ipsi consolabuntur.* Ibidem, a num. 10.

CAP. V, v. 6. *Beati qui esuriunt et sitiunt justitiam, etc.* Ibidem, a num. 12.

CAP. V, v. 7. *Beati misericordes, quoniam ipsi misericordiam consequentur.* Lib. 2, cap. 22, num. 14.

CAP. V, v. 8. *Beati mundo corde, quoniam ipsi Deum videbunt.* Ibid., a num. 15.

CAP. V, v. 9. *Beati pacifici, quoniam filii Dei vocabuntur.* Ibid., a num. 17.

CAP. V, v. 10. *Beati qui persecutionem patiuntur propter justitiam, etc.* Lib. 2, cap. 22, a num. 18.

CAP. VII, v. 18. *Non potest arbor bona malos fructus facere.* Lib. 1, cap. 4, num. 18.

CAP. XIV, v. 41. *Qui recipit discipulum in nomine discipuli, etc., vel Prophetam in nomine Prophetæ, mercedem discipuli vel prophetæ accipiet.* Lib. 2, cap. 16, num. 10.

CAP. XI, v. 21. *Si in Tyro et Sidone factæ essent virtutes quæ factæ sunt in te.* Proleg. 2, cap. 5, num. 2 et 3, et cap. 2, num. 1.

JOANNES.

CAP. II, v. 16. *Sic Deus dilexit mundum, etc.* Proleg. 3, cap. 3, num. 5 et 15.

- CAP. VI, v. 44. *Nemo potest venire ad me, nisi Pater meus traxerit eum.* Lib. 2, cap. 2, num. 3.
- CAP. X, v. 10. *Ego veni, ut vitam habeant, et abundantius habeant.* Proleg. 4, cap. 5, num. 2.
- CAP. XIV, v. 23. *Ad eum veniemus, et mansiorem apud eum faciemus.* Proleg. 3, cap. 4, num. 4.
- CAP. XV, v. 1. *Ego sum vitis vera, et Pater meus agricola est.* Lib. 2, cap. 2, num. 3.
- CAP. XV, v. 13. *Majorem hac dilectionem nemo habet, etc.* Lib. 1, cap. 5, num. 12.
- CAP. XVII, v. 3. *Hæc est vita æterna, ut cognoscant te solum Deum verum, et quem misisti Jesum Christum.* Lib. 2, cap. 1, num. 3 et 4.

ACTA APOSTOLORUM.

- CAP. II, v. 11. *Audivimus eos loquentes nostris linguis.* Proleg. 3, cap. 5, num. 49 et 51.
- CAP. II, v. 41. *Et appositæ sunt in die illa animæ circiter tria millia.* Ibidem.

AD ROMANOS.

- CAP. II, v. 14. *Gentes, quæ legem non habent, naturaliter ea quæ legis sunt faciunt.* Lib. 1, cap. 8, a num. 13 latissime.
- CAP. IV, v. 2. *Si Abraham ex operibus justificatus est, habet gloriam, sed non apud Deum.* Lib. 1, cap. 9, num. 42.
- CAP. V, v. 5. *Charitas Dei diffusa est in cordibus nostris, etc.* Proleg. 3, cap. 3, num. 4 et 8.
- CAP. VIII, v. 14. *Quicumque spiritu Dei aguntur, hi sunt filii Dei.* Proleg. 6, in lib. August., cap. 2.
- CAP. XIV, v. 23. *Omne quod non est ex fide, peccatum est.* Lib. 1, cap. 6, num. 16.

I AD CORINTHI.

- CAP. VI, v. 17. *Qui adhæret Deo, unus spiritus est.* Proleg. 3, cap. 3, num. 12.
- CAP. VII, v. 25. *Misericordia consecutus sum, ut sim fidelis.* Lib. 2, cap. 2, num. 4.
- CAP. XII, v. 8. *Alii per spiritum datur sermo sapientiæ, alii sermo scientiæ secundum eundem spiritum, alii fides, etc.* Proleg. 3, cap. 5, per totum.
- CAP. XII, v. 28. *Exinde gratias curationum, opitulationes, gubernationes, etc.* Prolegom. 3, capit. 5, num. 66.
- CAP. XII, v. 31. *Adhuc excellentiorem viam vobis demonstro.* Proleg. 3, cap. 4, num. 18.
- CAP. XV, v. 9. *Non sum dignus vocari Apostolus, quia persecutus sum Ecclesiam Dei, sed gratia Dei sum id quod sum.* Proleg. 6, in lib. August., cap. 11.
- CAP. XV, v. 10. *Plus omnibus illis laboravi, non autem ego, sed gratia Dei mecum.* Ibid., et cap. 12.

AD GALATAS.

- CAP. IV, v. 22. *Abraham duos filios habuit, unum de ancilla, alterum de libera, quæ sunt per allegoriam dicta.* Proleg. 6, in lib. August., cap. 5.

AD EPHESIOS.

- CAP. I, v. 11. *Operatur omnia secundum consilium voluntatis suæ.* Proleg. 1, cap. 2, num. 1.

AD PHILIPPENSES.

- CAP. III, v. 12. *Non quod jam acceperim, aut perfectus sim, sequor autem si quomodo comprehendam.* Prolegom. 3, cap. 6, num. 7.

AD COLOSSENSES.

- CAP. III, v. 16. *In gratia cantantes in cordibus vestris Deo.* Proleg. 3, cap. 1, num. 5.

I AD THESSALONICENSES.

- CAP. II, v. 13. *Gratias agimus Deo sine intermissione quia cum accepissetis a nobis verbum auditus Dei, accepistis illud non ut verbum hominum, sed ut verbum Dei.* Lib. 2, cap. 11, num. 10.

I AD TIMOTHEUM.

- CAP. IV, v. 14. *Noli negligere gratiam Dei, quæ in te est, quæ data est tibi per prophetiam cum impositione manuum presbyterii.* Proleg. 3, cap. 5, num. 60.

II AD EUMDEM.

- CAP. IV, v. 7. *Bonum certamen certavi, cursum consummavi, etc.* Prolegom. 6, in lib. Augustini cap. 11.

I PETRI.

- CAP. I, v. 3. *Qui secundum misericordiam suam reneravit nos in spem vivam.* Lib. 2, capit. 12 num. 6.
- CAP. I, v. 21. *Dedit ei gloriam, ut fides vestra, et spes esset in Deo.* Ibid.
- CAP. IV, v. 15. *Nemo patiat ut maledictus, si autem ut Christianus glorificet Deum in isto nomine.* Lib. 2, cap. 16, num. 10.

II EJUSDEM.

- CAP. I, v. 4. *Magna et pretiosa nobis promissa donavit.* Proleg. 3, cap. 4, num. 18.
- CAP. I, v. 10. *Salutate ut per bona opera certam faciat vocationem vestram.* Proleg. 1, cap. 2, num. 1.


I JOANNIS.

- CAP. IV, v. 1. *Probate spiritus an ex Deo sint?* Prolegom. 3, cap. 5, num. 36.



INDEX CONCILIORUM

QUÆ IN HOC VOLUMINE ALLEGANTUR.



MILEVITANUM.

CAN. IV. *Si quis dixerit gratiam Dei per Jesum Christum propter hoc tantum nos adjuvare, quia per ipsam nobis revelatur quid agere, etc., usque ad illa verba: Utrumque enim donum Dei est.* Lib. 2, cap. 1, num. 10.

ARAUSICANUM II.

CAN. V. *Si quis sicut augmentum, sic etiam initium fidei, ipsumque credulitatis affectum, etc.* Lib. 2, cap. 3, num. 2 et 3.

CAN. VII. *Si quis per naturæ vigorem bonum aliquod, quod ad salutem pertinet, etc., Evangelicæ prædica-*

tioni consentire posse confirmat, etc. Lib. 2, cap. 3, num. 7.

TRIDENTINUM.

SESS. VI, CAN. VI. *Disponuntur autem ad ipsam justitiam, dum excitati divina gratia, et adjuti, fidem ex auditu concipientes, etc. Credentes vera esse, etc.* Lib. 2, cap. 11, num. 12, et cap. 3, num. 8.

SESS. VI, CAN. VII. *In ipsa justificatione, hæc tria simul infusa accipit homo: fidem, spem, et charitatem.* Lib. 2, cap. 12, num. 7.

SESS. VI, CAN. III. *Si quis dixerit sine præveniente Spiritus Sancti inspiratione hominem credere, sperare, diligere, aut pœnitere, sicut oportet, etc.* Lib. 2, cap. 12, num. 7.



INDEX RERUM

QUÆ IN HOC VOLUMINE CONTINENTUR.

A

ABEL.

1. Abel nunquam peccasse scripsit Pelagius, Proleg. 6, in lib. August., cap. 7, ad finem.

ACTUS.

1. Actus voluntatis proxime per respectum ad illam, non vero ad objectum indifferens liber denominatur, Prolegom. 1, cap. 4, num. 15 et 16.
2. Actus de se aptus libere fieri, necessarius esse potest, vel per mutationem factam in intellectu, vel voluntate, Prolegom. 1, cap. 5, a num. 21, usque ad 23.
3. Actus gratiæ excitantis necessarii sunt, non liberi, Prolegom. 1, cap. 6, num. 3.
4. Actus hominis nec liber, nec vitalis est respectu voluntatis divinæ, sed tantum per respectum ad propriam voluntatem, *ibid.*, num. 17.
5. Actus non potest prævideri absolute futurus, nisi potentia ad illum simpliciter supponatur, Proleg. 2, cap. 1, num. 6.
6. In actibus voluntatis et intellectus divini non invenitur prioritas et posterioritas rationis, nisi sumatur ex objectis, Proleg. 2, cap. 8, num. 11.
7. De actibus bonis habet Deus absolutum affectum complacentiæ subsequentem, Prolegom. 2, cap. 8, num. 19.
8. Actus voluntatis creatæ non cognoscitur illative ex vi concursus divini, sed in se, *ibidem*, capit. 9, num. 17.
9. Actus bonus latius patet quam actus præceptus, lib. 1, cap. 8, num. 4.
10. Actus indifferentes in individuo non dantur, lib. 1, cap. 9, num. 46, et cap. 19, num. 10.
11. Actus voluntatis dupliciter honestatem alicujus virtutis sortiri potest, et quomodo, lib. 2, cap. 7, num. 11.
12. Actus meritorii a non meritorio triplex differentia, lib. 2, cap. 7, num. 2.
13. Actuum distinctio specifica desumitur a motivis seu objectis formalibus, lib. 2, cap. 11, num. 22. Non distinguuntur primario penes rationem (sub qua) diversam, *ibid.*, num. 25.
14. Actus specie diversi possunt ferri in idem motivum specie, si a potentiis specie distinctis eliciantur, *ibid.*, num. 26.
15. Distinctio specifica actuum voluntatis, intentionis, scilicet, et dilectionis ejusdem objecti, unde desumatur, lib. 2, cap. 11, num. 27.
16. Actus bonus et malus creatæ voluntatis diversimode se habent ad Deum, ut ad causam, lib. 1, cap. 22, num. 1.

ACTUS NATURALIS.

1. Actus naturalis moraliter bonus est meritorius præmii ordinis naturalis, lib. 1, cap. 20, num. 22. Est interdum effectus prædestinationis, *ibidem*, num. 23.
 2. Actus efficax circa observantiam totius legis, etiam naturalis, dari nequit per solas vires naturales, etiam ad breve tempus in statu naturæ lapsæ, lib. 1, cap. 34, num. 7.
 3. An actus aliquis virtutis naturalis præter amorem Dei super omnia exerceri queat sine gratia in statu naturæ lapsæ, lib. 1, cap. 37, a num. 1.
- #### ACTUS SUPERNATURALIS, SEU VIRTUTIS PER SE INFUSÆ.
1. Actus bonos, maxime supernaturales potest Deus prædefinire, antequam absolute præsciat esse futuros, Prolegom. 2, cap. 5, num. 17.
 2. Actus ex objecto bonus, præsertim supernaturalis, malus fieri nequit, etiam ex fine extrinseco, lib. 2, cap. 3, num. 13.
 3. Quid sit actum quoad substantiam esse supernaturalem: Quid esse supernaturalem tantum quoad modum? lib. 2, cap. 4, num. 2. Quid item sit actum esse naturalem quoad substantiam, et quoad modum tantum supernaturalem? *ibid.*, num. 4.
 4. Actus habitum supernaturalem requirens, ut potentia eliciatur, supernaturalis est in entitate, lib. 2, cap. 5, num. 7.
 5. Ad actus supernaturales concurrat per se et physice auxilium divinæ gratiæ, libro 2, capite 8, numer. 7.
 6. Non repugnat actum vitalem esse quoad substantiam supernaturalem, lib. 2, cap. 9, num. 1.
 7. Actus supernaturalitas quoad substantiam non tollit, quominus possit esse liber, *ibid.*, num. 5.
 8. Actus supernaturales voluntatis, quidam Theologici, alii morales; et quæ utrorumque ratio, lib. 1, cap. 12, num. 1.
 9. Actus supernaturalis nunquam elici potest ex motivo naturali. E contra, objectum naturale naturalem et supernaturalem actum terminare potest, lib. 2, cap. 11, num. 29 et 30.
 10. Actus virtutum moralium in sua substantia supernaturales exerceri posse ab homine, ad eosque supernaturale gratiæ auxilium esse necessarium, vera docet sententiâ, lib. 2, cap. 16, num. 5.
 11. Actus externi non sunt supernaturales in entitate, sed tantum causaliter, seu moraliter tales dici possunt, lib. 2, cap. 24, num. 1.
 12. Idem numero actus simul infusus per se, et acquisitus esse nequit, imo nec successive, lib. 2, cap. 8, num. 8.
 13. Actus per se infusi virtutum moralium possunt exerceri a peccatore, lib. 2, cap. 16, num. 17.

ADAM.

- Adam et Eva in statu naturæ integræ a Deo con-
liti sunt, Proleg. 4, cap. 2, num. 4.
Adam et ejus posteros ob lapsum illius omnibus
privilegiis justitiæ originalis fuisse privatos de fide
est, Proleg. 4, cap. 6, num. 4.
Peccatum originis non Adam, sed posteros ejus fi-
le privavit, Prolegom. 4, cap. 6, num. 5.
Adam non contraxisse pœnam mortis propter pec-
catum, neque alios defectus homini connaturales
sensit Pelagius, Proleg. 5, cap. 2, num. 3, et Proleg.
5, cap. 7, in lib. Augustini, cap. 8.
Adam, Vide uomo.

AMABILE.

- Amabile bonum, unicuique autem proprium, quid
significet? lib. 1, cap. 30, num. 16.
Amabilia ad alterum procedunt ex amabilibus ad
se, quomodo intelligendum? libro 1, capite 34,
numer. 17.

AMBROSICUS.

- D. Ambrosius ante exortam hæresim Pelagii Ca-
tholicam de Gratia sententiam tenuit, Proleg. 6,
cap. 6, num. 5.

AMICITIA.

- Amicitia quid requirat? lib. 1, cap. 30, num. 15.
Amicitia propria non potuit esse inter Deum et ho-
minem in puris naturalibus, libro 1, capite 30,
num. 15.

AMOR.

- Amor in patria necessarius est, non tamen liber,
Prolegom. 1, cap. 1, num. 15.
Amor Dei in perfectum et imperfectum dividitur,
lib. 1, cap. 29, num. 2. Utrumque membrum expli-
catur, ibidem.
Amor Dei ut auctoris naturæ naturaliter haberi
potest etiam in statu naturæ lapsæ, lib. 1, cap. 29,
a num. 13.
Amor aliquis benevolentiae erga Deum potest esse
naturalis, lib. 1, cap. 30, num. 6. In statu naturæ
integræ dari potuit perfectus sine speciali auxilio,
ibidem, num. 11. Et aliquando in statu naturæ lapsæ
valtem imperfectus, ibidem.
Amor propter beneficia futura est concupiscentiæ;
ut propter beneficia præterita est benevolentiae,
lib. 1, cap. 30, num. 16.
Amor naturalis benevolentiae erga Deum non in-
cludit observantiam omnium præceptorum, lib. 1,
cap. 30, num. 12 et 14. Potest aliquando esse cum
peccato mortali actuali, lib. 1, cap. 31, num. 12.
Amor Dei naturalis et supernaturalis, an pos-
sint esse eadem speciei? lib. 1, cap. 34, num. 17
et 18.
Amor naturalis benevolentiae erga Deum non re-
paritur et ut amor Dei super omnia, lib. 1, cap.
34, num. 19.
Amor Dei super omnia potest esse naturalis, etiam
secundum substantiam, lib. 1, cap. 31, num. 5. Quoniam
17 ibidem, a num. 9.
Quis sit amor Dei affectivus et obedientialis,
lib. 1, cap. 31, num. 12.
Amor Dei naturalis super omnia potuit dari in
origo sine gratia auxilio, et in homine in natu-
ra integra, lib. 1, cap. 1, num. 16. Utrum ab ange-

lo, etiam reprobato eliciatur necessario, inquiritur,
ibidem.

12. Amor concupiscentiæ quomodo possit esse super
omnia, lib. 1, cap. 31, a num. 19.
13. Amor naturalis Dei super omnia non est proxi-
ma dispositio ad gratiam sanctificantem, ibidem,
num. 25.
14. Amor efficax naturalis Dei super omnia dari ne-
quit in homine lapsa, sine auxilio gratiæ, lib. 1,
cap. 32, 33 et 34, latissime.
15. Amor Dei super omnia multis modis potest esse
imperfectus, lib. 1, cap. 34, num. 3.
16. Quis sit amor Dei super omnia in affectu, vel in
effectu? ibidem, num. 7.
17. Amor efficax et observationis totius legis natu-
ralis, quidnam sit? lib. 1, cap. 34, num. 16.
18. Amor Dei ut auctoris naturæ super omnia dari
nequit etiam ad breve tempus in statu naturæ la-
psæ, sine gratiæ auxilio, lib. 1, cap. 34, num. 17.
Sive sit amor benevolentiae, sive etiam concupiscen-
tiæ, ibidem, num. 26. An dari nequeat in primo rati-
onis instanti? ibid., num. 22.
19. Ad naturalem amorem Dei super omnia non re-
quiritur gratia habitualis, etiam in homine lapsa,
lib. 1, cap. 31, num. 11. Neque etiam fides, aut auxi-
lium ordinis supernaturalis, ibidem, num. 21. Amor
naturalis proximi moraliter honestus, an dari
queat sine gratia? lib. 1, cap. 31, a num. 12.
20. Amor benevolentiae alicujus personæ semper ha-
bet conjunctum amorem concupiscentiæ boni, quod
illi amatur, lib. 2, cap. 13, num. 18.
21. Amor concupiscentiæ etiam in naturalem et su-
pernaturalem dividitur, ibidem, num. 20.
22. Amor Dei dupliciter esse potest super omnia, ac-
cidentaliter, scilicet, et essentialiter, lib. 2, cap. 14,
num. 9. Utriusque natura explicatur, ibidem.
23. Deus etiam ut Trinus, et Unus, et ut auctor gra-
tiæ, amore naturali acquisito diligi potest, lib. 2,
cap. 15, num. 1.

AMOR SUPERNATURALIS.

1. Amor concupiscentiæ Dei, ut est objectum nostræ
beatitudinis supernaturalis, est actus per se infu-
sus, et ejusdem ordinis cum actibus cujusque
alterius virtutis Theologicæ, lib. 2, capit. 13, a
num. 6.
2. Amor concupiscentiæ beatitudinis æternæ ab ho-
mine in statu gratiæ elicitus est meritorius ejusdem
beatitudinis, lib. 2, cap. 13, num. 14.
3. Amor concupiscentiæ supernaturalis ab habitu
spei Theologicæ elicitur, ibidem, num. 24. Idem
habitus ad amorem concupiscentiæ, et spem super-
naturaliter inclinatur, ibidem.
4. Amore amicitie seu charitatis super omnia Deus
ut auctor gratiæ amari nequit ab homine, sine su-
pernaturali gratiæ auxilio, lib. 2, capit. 14,
num. 2.
5. Sola diversitas cognitionum non distinguit specie
amorem Dei super omnia supernaturalem, a natu-
rali, sed diversitas objectiva, lib. 2, cap. 14, a
num. 11. Qualis sit hæc diversitas, explicatur,
ibidem, a num. 16.
6. Videtur Deum, et ex hypothesis non habens auxi-
lium ad diligendum illum amore supernaturali
charitatis, amore naturali tantum super omnia il-
lum amari, et ex motivo naturali, lib. 1, cap. 14,
num. 21.
7. Quilibet amor Dei, ut objecti beatifici, et propter

- bonitatem illius, ut sic conceptam, est in substantia supernaturalis, et affectus charitatis per se infusæ, lib. 2, cap. 14, num. 4.
- Ad hujusmodi amorem etiam imperfectum supernaturale gratiæ auxilium est necessarium, ibidem, num. 7.
 - Differentia inter amorem charitatis super omnia, et quemcumque alium ejusdem ordinis non super omnia assignatur, lib. 2, cap. 15, num. 8.
 - Amor Dei super omnia supernaturalis includit observantiam omnium præceptorum naturalium et supernaturalium, lib. 1, cap. 31, num. 14.

ANGELUS.

- Angeli non habuerunt originalem justitiam, Proleg. 4, cap. 5, num. 4. Eorum peccatum non originale, sed personale fuit, ibid., cap. 6, num. 2.
- Angeli naturali dilectione an diligant Deum plus quam se? lib. 1, cap. 34, num. 14. An Deum super omnia naturali amore possint diligere sine gratiæ auxilio, lib. 1, cap. 31, num. 16.
- Angeli tam boni quam mali, viribus naturæ habere possunt evidentiam in attestante mysteriorum fidei, lib. 2, cap. 10, num. 4 et 15.
- Angelus in primo suæ creationis instanti an peccare posset? lib. 1, cap. 13, num. 9.
- Angelicus intellectus a solo Deo immediate moveri potest extrinsece, lib. 1, cap. 13, num. 9.

ANIMA.

- Animæ rationalis creatio cur non dicatur supernaturalis? lib. 2, cap. 6, num. 4.

APPETITUS.

- Appetitus sensitivus quibus modis frænari possit, Prolegom. 4, cap. 2, num. 11.

APOSTOLATUS, ET APOSTOLICA SEDES.

- Apostolatus est donum gratuitum et gratia gratis data, Prolegom. 3, cap. 5, num. 66.
- Apostolicæ Sedis judicium sine generali Concilio ad damnandas hæreses supremam habet auctoritatem, Prolegom. 6, cap. 1, num. 6.

ASSENSUS.

- Inter assensum et judicium nulla est differentia, lib. 2, cap. 18, num. 3.

ASSISTENTIA.

- Assistentia Spiritus Sancti respectu Summi Pontificis et Concilii legitimi generalis est gratia gratis data, Prolegom. 3, cap. 5, num. 65.

ATTRITIO.

- Attritio vel contritio naturalis, an dari queat sine gratia? lib. 1, cap. 37, a num. 6.

AUCTOR.

- Auctor operis imperfecti in Matth. cum Semipelagianis non sentit, Proleg. 5, cap. 5, num. 17.

AUGUSTINUS.

- Augustinus non censet omnia infidelium opera esse peccata, lib. 1, cap. 7, a num. 7.
- Augustini liber de Gestis in Concilio Palæstino contra Pelagium denuo inventus, ab auctore in hoc loco insertus, et magna ex parte explicatus, illius

esse opus genuinum, approbatur, Prolegom. 6, cap. 7.

- Quanta sit D. Augustini auctoritas in doctrina et dogmatis divinæ gratiæ, Proleg. 6, cap. 6, num. 15. Varia ejusdem Augustini encomia, ibidem, a num. 13, juncto 11. Illius doctrina de Gratia an sit de fide? ibidem, num. 16.

AUXILIUM.

- Auxilium efficax physice prædeterminans non est admittendum, Prolegom. 1, cap. 6, num. 28.
- Auxilium efficax per vocationem congruam datum libertatem non aufert, nec ad suppositionem antecedentem pertinet, ibidem.
- Auxilium gratiæ concurret per se et physice ad actus supernaturales, ad naturales tantum moraliter, lib. 2, cap. 8, num. 7.
- Ad credendum omnia et singula media necessaria ad salutem, est necessarium aliquod auxilium gratiæ, lib. 2, cap. 25, num. 1.
- Ad amorem Dei super omnia naturalem non requiritur auxilium ordinis supernaturalis, lib. 1, cap. 31, num. 11.
- Speciale gratiæ auxilium ad Theologiam discendam requiritur, Prolegom. 3, cap. 5, num. 8.

B

BAIUS.

- Baii error asserentis gravem tentationem necessitare voluntatem ad peccandum, lib. 2, cap. num. 21 et 22.
- Baii errores latissime referuntur, Proleg. 6, cap. 2. An omnes illius propositiones sint damnatæ? ibid., num. 9. Contra eundem Bulla Pii V et Gregor. XIII, ibid. Censura utriusque, et quas propositiones comprehendat? ibidem, a num. 8.
- Baius non est inter hæreticos recensendus, Proleg. 5, cap. 7, num. 11.

BEATITUDO.

- Beatitudinem supernaturalem, An cognoverit Pelagius? Prolegom. 5, cap. 3, a numer. 1. Naturalem cognovit, ibidem, num. 3.
- Beatitudo æterna, propter quam homo creatus est, non est naturalis finis illius, Prolegom. 4, cap. 1, num. 8 et 9.

BEATITUDINES VIE.

- Beatitudines significant actus quibus homines beatos fieri Christus docuit Matth. 5, lib. 2, cap. 22, num. 1. Quare hi actus dicantur beatitudines? ibidem.
- Hi actus non solum sunt honesti, sed ita heroici et excellentes, ut absque speciali gratia fieri nequeant, lib. 2, cap. 22, num. 1.
- Beatitudines actuales non distinguuntur ab actibus virtutum et donorum, sed sub illis comprehenduntur, lib. 2, cap. 22, num. 1. Sunt supernaturales in sua substantia, ibid., num. 2. Sintne plures quam octo expenditur, lib. 2, cap. 2, num. 21.
- Vide Beatitudines in particulari suis locis.

BONIFACIUS.

- Bonifacius, Romanus Pontifex, Augustini opera Pelagianis restitit, Prolegom. 6, cap. 1, num. 6.

FONTUS.

Actus bonus latius patet quam actus præceptus, ib. 1, cap. 8, num. 4.

Actus bonus dupliciter honestatem alienius virtutis sortiri potest, et quomodo? libro 1, capit. 7, numer. 11.

Actus bonus et malus creatæ voluntatis diversimode se habent ad Deum, ut ad causam, libr. 1, cap. 22, num. 1.

Actus ex objecto bonus, præsertim supernaturalis, malus fieri nequit, etiam ex line extrinseco, ib. 2, cap. 3, num. 13.

C

CARENTIA.

Carentia donorum et auxiliorum specialium est privatio et vulnus in statu naturæ lapsæ, non ita in iuris naturalibus, lib. 1 cap. 1, num. 7.

CASSIANUS.

Cassianum Semipelagianum fuisse ostenditur, Prolegom. 5, cap. 5, num. 7.

CALVINUS ET KEMNICIUS.

Calvini et Kemnicii error libertatem negantium post peccatum Adæ, Proleg. 5, cap. 7, n. 4 et 5.

CAUSA.

Causas Deus ab operatione impedire nequit positis ad agendum requisitis per solam suam voluntatem extrinsecam, Prolegom. 1, cap. 5, num. 18.

Causæ liberæ ut influxum suum suspendant, Dei concursus non est necessarius, ibid., num. 19.

Causalis hæc (Ideo res futuræ sunt quia Deus præscit futuras) falsa est de scientia visionis, Prolegom. 1, cap. 10, num. 26. Illative tamen vera est, ibidem, num. 23 et 33.

CŒLESTINES.

Cœlestini, Romani Pontificis, labor et auctoritas pro doctrina Catholica de Gratia tuenda, Proleg. 1, cap. 1, num. 7. Ejus Epistolæ ad Galliæ Episcopos quanta auctoritas, ibidem, a num. 8. Assertiones ipsius Epistolæ, ibidem, num. 12.

CŒLESTIUS.

Cœlestii errores recensentur, Prolegom. 5, cap. 7, n. lib. Augustini, a cap. 10.

CERTITUDO.

Certitudo duplex, que est in actu intellectus: una essentialis, seu objectiva: altera accidentalis, seu ex parte subiecti, lib. 2 cap. 10, num. 10.

Certitudo. Vide FIDES DIVINA ET ACQUISITA.

Certitudo fidei acquisitæ, quamvis perfectissima, inferior est certitudini fidei infusæ, lib. 2, cap. 10, num. 11.

CESARIUS ARELATENSIS.

Cesarinus Arelatensis librum de Gratia et libero arbitrio scripsit. Ejus doctrina et sanctitas latissime, Prolegom. 6, cap. 6, num. 24. Quo tempore hæretus est controversa, ibidem.

CHARACTER.

Character Baptismi ad gratiam sanctificantem re-

ducitur, Prolegom. 3, cap. 5, num. 64. Idem dicendum de character Confirmationis, ibid. Character vero Ordinis potius est gratia gratis data, ibid.

CHARITAS.

1. Charitas apud Augustinum multipliciter accipitur, lib. 2. cap. 5, a num. 2.
2. Charitas eadem est in via et in patria, lib. 2, cap. 7, num. 11, et cap. 9, num. 5. Utrobique eadem illius honestas intrinseca, cap. 7, num. 11.
3. Ex hypothesi quod videnti Deum negaretur concursus ad amandum per charitatem infusam, actum amoris non eliceret ex tali motivo supernaturalem, lib. 2, cap. 11, num. 34. Amaret tamen charitate naturali ex naturali motivo, ibidem. Vide AMOR, præsertim supernaturalis.

CHRISTUS.

1. Christus Dominus præscivit certo et infallibiliter quid Tyrii et Sidonii essent facturi, si illis fides ut Judæis proponeretur, Proleg. 2, cap. 2, a numer. 4.
2. Christus Dominus est quædam gratia externa, Proleg. 3, cap. 3, num. 15. Christus Dominus habuit prophetiam habitalem, Proleg. 3, cap. 5, num. 25. Christus Dominus obtinuit integræ naturæ statum, Proleg. 4, cap. 2, num. 4. Non tamen omnia privilegia status innocentie, ibidem, cap. 3, num. 8.
3. Christus Dominus non solum meruit nobis gratiam sanctificantem, sed etiam gratis datas, lib. 1, cap. 1, a num. 15. Multa nobis meruit præter illa propter quæ mortuus est, lib. 1, cap. 1, num. 22. Per mortem meruit exaltationem sui nominis, et alia propter quæ mortuus non est, ibid. Utrum nobis meruerit dona naturæ, an solius gratiæ? lib. 1, cap. 16, num. 5, et cap. 18, num. 7.
4. Christum Dominum solum pro his qui salvantur mortuum fuisse, damnatum est Concilio Valentino, Proleg. 6, cap. 5, num. 4.

CYPRIANUS.

1. Cyprianus ante exortam hæresim Pelagii, Catholicam de Gratia sententiam docuit, Prolegom. 6, cap. 6, num. 4.

COACTIO.

1. Coactio duplex est, absoluta una, secundum quid altera, Prolegom. 1, cap. 1, num. 6.

COGITATIO.

1. Cogitatio congrua quid addat cogitationi sufficienti? lib. 1, cap. 2, num. 13.
2. Cogitatio congrua quænam sit? lib. 1, cap. 11, num. 5. Sitne majus beneficium quam sufficiens seu incongrua? lib. 1, cap. 12, a num. 7.
3. Cogitatio congrua non semper excedit incongruam quoad entitatem physicam, ibidem, num. 12.
4. Cogitatio sufficiens est necessaria ad omnem actum voluntatis necessitate antecedente: congrua vero necessitate consequente, lib. 1, cap. 12, n. 20.
5. Cogitatio congrua infert actum infallibiliter, ibid., num. 21.
6. Cogitatio sufficiens vel congrua ad actum bonum moraliter non est gratiæ donum, lib. 1, cap. 13, n. 3. Etiam in homine lapsæ, ut sic, libro 1, capit. 15, numer. 8.
7. Cogitationem primam supernaturalem nulla antecedit gratia supernaturalis, neque illius meritum, lib. 1, cap. 17, num. 12.

8. Cogitatio potest esse congrua ex solo bono libertatis usu, lib. 1, cap. 29, num. 11.
9. Utrum gratia sit necessaria ad omnem cogitationem moralem honestam, lib. 1, cap. 2, num. 5, et a num. 10, usque ad 15.
10. Privatio cogitationis congruæ ad operandum honeste naturaliter, de facto non est pœna originalis peccati, Prolegom. 4, cap. 9, num. 7 et 8.

COGNITIO ET COGNOSCERE.

1. Cognitio duplex est, alia practica, alia speculativa, lib. 1, cap. 1, num. 1.
2. Cognitio mysteriorum supernaturalium quæ revelantur, necessaria est ad salutem, lib. 2, cap. 1, num. 3.
3. Cognoscere aliquod verum est aliquando difficilius quam operari aliquod bonum, lib. 1, cap. 10, num. 9.
4. Quomodo effectus contingens a nobis cognosci possit. Vide EFFECTUS, num. 2 et 3.
5. Ad veritates naturales cognoscendas quæ gratia requiratur. Vide num. 29, 30 et 31.
6. Quomodo cognitio intellectus ad actus voluntatis concurrat. Vide VOLUNTAS, num. 3.

CONCILIIUM.

1. Concilium Arausicanum secundum quo tempore celebratum, Prolegom. 6, cap. 1, a num. 16 usque ad 19. Et contra quos errores, ibidem, et cap. 5, a num. 1. Fuit provinciale, sed infallibilem facit lidem, et cur? ibid.
2. Concilium Diospolitenum contra Pelagium et ejus acta, Prolegom. 6, cap. 3, per totum. Orosius an ibi interfuerit, ibid., a num. 2. Cur Pelagius in eo absolutus? ibid., num. 6 et 8.
3. De Conciliis Africanis et Ephesino contra Pelagium, Proleg. 6, cap. 4, per totum. Ubi de eorum auctoritate et decretis, et quo tempore celebrata fuerint.
4. Primum Concilium Milevitanum quo tempore celebratum, Prolegom. 6, cap. 4, num. 4.
5. Duplex fuit Concilium Milevitanum: diversitas utriusque ostenditur: neutrum fuit generale, ibid., a num. 7. Quæ et qualia decreta in utroque fuerint facta circa materiam de gratia, ibid., a num. 9.
6. Primum Concilium Carthaginense ante Diospolitenum fuit celebratum contra doctrinam Cœlestii, Prolegom. 6, cap. 4, num. 1.
7. In secundo Concilio Carthaginensi Cœlestius est anathematizatus, ibidem, numer. 2. Quo tempore utrumque celebratum; et cur, ibid., num. 3.
8. Concilium Ephesinum quo tempore coactum, Prolegom. 6, cap. 4, num. 16. In eo Pelagii doctrina est damnata, ibidem.
9. Concilium Valentinum quo tempore et contra quos errores in Gallia fuerit congregatum, Proleg. 6, cap. 5, num. 2.
10. Concilium Moguntinum paulo ante Valentinum celebratum, et qua occasione? Prolegom. 6, cap. 5, num. 3. Moguntinum item ultimum quo tempore, et contra quos? ibidem, numer. 8. Fuit paulo post Tridentinum, ibidem.
11. Concilium Senonense Pelagium ejusque reliquias et Lutherum damnat, Proleg. 6, cap. 5, num. 5. Quo tempore coactum, ibidem, Provinciale fuit, ibidem. Quanta auctoritas illius, ibidem.
12. Tridentini doctrina laudatur; illius decreta et canones de Gratia continent omnem doctrinam

antecedentium Conciliorum, optimo ordine et dispositione, ibidem, num. 10. Omnium hæreticorum contra gratiam damnat errores, ibidem.

CONCUPISCENTIA.

1. Concupiscentiæ amor. Vide AMOR, numer. 5, 12, 18 et 21.

CONFESSIO.

1. Ad confessionem fidei quæ gratia requiratur, lib. 2, cap. 3, 5, num. 3.
2. Vide PRÆCEPTUM, num. 26.

CONCURSUS.

1. Concursus Dei concomitans cum humana voluntate libertatem non tollit, Prolegom. 1, cap. 3, num. 16. Ab æternitate illum Deus habet præparatum, quasi sub conditione, si creata voluntas operari voluerit, ibidem, num. 16.
2. Concursum generalem Dei ad humanas actiones an negaverit Pelagius, Proleg. 5, cap. 4, per totum.

CONFORMITAS.

1. Conformitas duplex ad rationem in actibus virtutum reperiri potest, lib. 2, cap. 16, num. 10. Una ad rationem naturalem secundum se, altera ad rationem elevatam per gratiam, ibidem.

CONSERVATIO.

1. Ad gratiæ conservationem gratia opus est, et qualis, lib. 2, cap. 25, num. 10.
2. Præceptum conservandi justitiam originalem. Vide PRÆCEPTUM, num. 2.

CONSILIIUM.

1. Consilii donum dari in hominibus justis ostenditur, lib. 1, cap. 21, num. 7.
2. Donum consilii actuale quo pacto ab actu prudentiæ infusæ distinguatur, lib. 2, capit. 21, numer. 6 et 11.
3. Hoc donum consilii in materia omnium virtutum moralium exerceri potest, ibidem, num. 9.

CONTINENTIA.

1. Continentia vel castitas perpetua, moraliter tantum honesta, dari potest sine gratiæ auxilio? lib. 1, cap. 37, a num. 15.

CONTINGENS ET CONTINGENTIA.

1. Vide FUTURUM CONTINGENS.

CONTRITIO.

1. Contritio naturalis an dari queat sine gratiæ auxilio? lib. 1, cap. 37, num. 6.

CORNELIUS.

1. An fuerit in gratia quando ei Angelus apparuit? lib. 1, cap. 4, num. 9.

CREATIO ET CREATURA.

1. Creatio animæ rationalis, cur non dicatur supernaturalis? lib. 2, cap. 6, num. 4.
2. Gratia non fit per creationem, Prolegom. 3, cap. 2, num. 2.
3. Creatura intellectualis nulla unquam in puris naturalibus condita fuit, nec de lege ordinaria condita potest, Prolegom. 4, cap. 1, num. 13.

D

DAMNATUS.

Damnati nihil boni operantur, libro 1, capit. 11, numer. 11.

DECRETUM.

Decretum Dei efficax omnino requiritur ut voluntas creata necessitetur. Proleg. 1, cap. 5, n. 11.

Per hoc solum decretum divinam omnipotentiam Deus ad operandum applicat, ibid. Quomodo prædictum decretum creatam voluntatem necessitet, et quid in illa operetur, ibidem, a num. 11, usque ad 14.

Decretum efficax, duplex in Deo, alterum intentionis, executionis alterum, Prolegom. 1, cap. 5, num. 13. Prius ad necessitandam voluntatem creatam non sufficit; posterius satis est, ibidem.

Decretum Dei conditionatum quibus modis dici queat, Prolegom. 2, cap. 8, num. 2 et 3.

Deus ante decretum liberum prius ratione intelligitur a nobis indeterminatus, ibidem.

Ex decreto libero Dei non semper resultat physica mutatio in re voluta, ibidem, num. 4.

Deus potest cognoscere sua decreta, ut sub conditione futura, Proleg. 1, cap. 8, n. 5. Effectus a solo Deo pendentes, vel etiam a causis necessariis in hoc decreto cognosci possunt, ibid., num. 6. Quid dicendum de effectibus liberis, ibidem., num. 7.

Deum non habere decreta conditionata circa omnia possibilis probatur, Prolegom. 2, cap. 8, a num. 9. Circa res absolute futuras non sunt admittenda in Deo decreta conditionata, ibidem, num. 14.

Decretum generale et conditionale de concurrento cum voluntate explicatur, Prolegom. 2, cap. 8, num. 16 et 19. Præter illud non est necessarium aliud decretum particulare absolutum, ibid., num. 17 et 18.

Respectu actuum malorum dari nequeunt decreta absoluta et prædefinitiva; imo neque respectu bonorum si efficaciter sint prædeterminativa, Prolegom. 2, cap. 9, num. 8.

DEUS.

Deum esse naturaliter cognoscimus, lib. 2, cap. 1, num. 7.

Deus non prædefinit actiones malas, neque quoad materiale earum, Prolegom. 2, cap. 5, num. 5.

Deus non aliter rem postquam est quam antea, cognoscit, Prolegom. 2, cap. 7, num. 19.

Deum expectare voluntatem hominis ut se præparet viribus suis ad fidem vel gratiam, falso putarunt Semipelagiani, Prolegom. 5, cap. 6, numer. 10 et 11. Quam gratiam liberi arbitrii recto usui a Deo tribui conerint, ibidem, a num. 12, late.

Deum non operari ut velimus, nisi quantum in se est, communi fuit Pelagii et Semipelagianorum doctrina, Prolegom. 5, cap. 6, num. 26.

Deum nolle omnes homines salvos fieri voluntate, scilicet, efficaci vero asseruit Augustinus, Proleg. 6, cap. 5, num. 3. De omni tamen voluntate, heretica propositio est, ibidem.

DISCRETIO.

Discretio spirituum in quo consistat, Prolegom. 3, cap. 5, a num. 36.

Discretionis spirituum quamnam sit propria materia, ibidem, num. 1.

3. Discretionis spirituum iudicium an sit evidens, certum et infallibile, Prolegom. 2, capit. 5, a num. 42.

4. Discretio spirituum erga alios securius quam erga seipsum versatur, Proleg. 3, cap. 5, num. 44.

5. Discretionis spirituum gratia non est habitualis, ibidem, num. 46. Regulariter solum tribuitur viris spiritualibus.

DISPOSITIO.

1. Dispositio proxima ad gratiam sanctificantem nullus actus naturæ viribus factus poterit esse, lib. 1, cap. 35, a num. 2, et cap. 31, num. 25.

2. Ad primam gratiam auxiliantem non potest homo se disponere, lib. 2, cap. 25, num. 8. Nec ad primam gratiam sanctificantem dispositione supernaturali, ibidem.

DISTINCTIO.

1. Distinctio specifica actuum unde desumenda, lib. 2, cap. 11, num. 13. In voluntatis actibus quomodo ab objecto formali desumatur, ibidem, num. 27. Vide actus, num. 13, 14 et 15.

DIVITES.

1. Divites baptizatos, nisi omnibus renuntiaverint, salvari non posse, commentus est Cælestius, Prolegom. 6, cap. 7, in lib. August., cap. 20.

DONUM.

1. Donum naturale supernaturali modo non datur, nisi propter spirituale bonum recipientis, vel aliorum, Prolegom. 3, cap. 4, num. 3.

2. Donum linguarum explicatur, Prolegom. 3, cap. 5, a num. 47. Ejus ratio consistit in facultate divinitus data ad loquendum variis linguis antea ignoratis, ibidem, num. 52. An sit habituale? ibid., num. 54. Non fuit commune fidelibus in primitiva Ecclesia, ibidem.

3. Donum scientiarum confertur propter commune Ecclesiæ bonum, lib. 1, cap. 1, num. 17.

DONUM SPIRITUS SANCTI.

1. Donum Spiritus Sancti cur ipsius spiritus nomen sortiat? lib. 2, cap. 17, num. 2.

2. Septem Spiritus Sancti dona, etsi in Christo præcipue et copiosius descenderint, aliis etiam justis comunicantur, lib. 2, cap. 17, a num. 3. Ad illorum actus speciale gratiæ auxilium est necessarium, ibidem, num. 6.

3. Spiritus Sancti dona in actu ab actibus sive Theologicalium sive moralium virtutum per se infusarum distinguuntur, lib. 2, cap. 17, num. 9, et cap. 21, num. 4. A fortiori distinguuntur ab actibus virtutum acquisitarum, ibidem.

4. Donum Spiritus Sancti late sumptum comprehendit omnes actus honestos, et habitus presse certos actus, et habitus a Spiritu Sancto speciatim infusos, lib. 2, cap. 21, num. 24.

5. Cur non dentur Spiritus Sancti dona in materia virtutum Theologicalium, lib. 2, cap. 21, num. 25.

E

ECCLESIA.

1. Ecclesiam in terra esse sine macula et ruga scripsit Pelagius, Proleg. 6, cap. 7, in libro Augustini, cap. 9.

EFFECTUS.

1. Effectus formalis neque impeditur neque variatur eadem forma subjectum informantem, Prolegom. 4, cap. 5, num. 2.
2. Effectus mere naturalis contingens potest cognosci positus requisitis et sublatis impedimentis, Proleg. 2, cap. 7, num. 16. Secus de effectibus libere contingentibus, ibidem, num. 17.
3. Effectus a solo Deo pendens vel etiam a causis necessariis in divino decreto cognosci potest, Proleg. 2, cap. 8, num. 6.

ELECTIO.

1. Electio medii necessarii, si intentio finis libera sit, libertatem non tollit, Proleg. 1, cap. 1, num. 2.

EPUREM.

1. S. Ephrem ante Pelagium scribens multa de divina gratia docuit, quæ definitionibus Ecclesiæ postea editis mire consentiunt, Proleg. 6, cap. 6, n. 9.

EPISTOLA.

1. Epistola Augustini ad Pelagium, et ejus expositio, Proleg. 6, cap. 7, in lib. August., cap. 18 et 19.
2. Epistolæ Cœlestini ad Galliæ Episcopos quanta auctoritas, Prolegom. 6, cap. 1, a num. 8. Ejusdem Epistolæ asserciones, ibid., num. 12.

ERROR.

1. Errores Judæorum de gratia Christi, Prolegom. 5, cap. 1, per totum.
2. Errores Pelagii. Vide GRATIA, præcipue in verbo, numer. 22, 26, 28.
3. Errores Baii. Vide BAIUS.
4. Errores hæreticorum circa bona opera moralia, lib. 1, cap. 4, a num. 2.
5. Per peccatum originale nullus error in intellectum transfunditur, sed solum ignorantia, Prolegom. 4, cap. 6, num. 13.
6. Status innocentiae vel naturæ integræ ex gratuito privilegio esset expers erroris, libro 1, capit. 1, num. 3.
7. Error. Vide VOLUNTAS, num. 23.

EVA.

1. Eva, statim ac peccavit, amisit justitiam originalem et naturæ integritatem, Prolegom. 4, cap. 6, num. 11.
2. Eva et Adam in statu naturæ integræ conditi sunt, Prolegom. 4, cap. 3, num. 4.

EVIDENTIA.

1. Evidentia. Vide FIDES, num. 12, 14 et 15.
2. Evidentia in attestante mysteriorum fidei viribus naturæ in Angelis etiam malis dari potest, libr. 2, cap. 10, num. 4 et 15.
3. Homines in hac vita non posse habere evidentiam in attestante mysteriorum fidei, sine gratiæ auxilio, est probabilius, lib. 2, cap. 10, num. 4.
4. Evidentia. Vide PROPHECIA, num. 5 et 6.

EUCCHARISTIA.

1. Eucharistia. Vide PRÆCEPTUM, num. 28.

F

FACILITAS.

1. Facilitas quæ visitur in potentia quando elicit actum, quid sit? lib. 2, cap. 8, num. 3.

FAUSTUS.

1. Faustus, Rhegiensis Episcopus, Semipelagianismi fautor et doctor habitus, Prolegom. 5, cap. 5, num. 21 et 23.

FIDES.

1. Fidei cognitio duo requirit, lib. 2, cap. 1, n. 8.
2. Fides non est simpliciter necessaria ad opera moraliter bona, lib. 1, cap. 6, num. 6.
3. Fidem non esse donum gratiæ Dei adjuvantis ad credendum Pelagiani et Semipelagiani asserunt, lib. 2, cap. 2, num. 1, et Proleg. 5, cap. 2, num. 11, et cap. 5, num. 5. Diverso tamen modo utriusque errant, lib. 2, cap. 2, num. 1.
4. Fides duos includit actus, intellectus unum, alterum voluntatis, ibidem. Secundum se est donum gratiæ gratum facientis. Proleg. 3, cap. 4, n. 5.
5. Ad credendum, sicut oportet fide divina per actum intellectus necessarium simpliciter est ex parte ipsius speciale gratiæ auxilium, lib. 2, cap. 2, num. 3 et 6. Et hoc ad quemcumque actum fidei divinæ, ibidem, num. 7. Et in quocumque naturæ statu, num. 8.
6. Fidei initium quid et quotuplex, libro 2, capit. 3, num. 1.
7. Fidei infusæ actus quo intellectus credit revelatis, non est supernaturalis tantum in fieri, lib. 2, cap. 6, per totum. Neque ex denominatione, vel modo tali actui extrinseco, ibid., cap. 7, per totum. Neque ex modo intrinseco, accidentario tamen, seu inherenti, cap. 8, per totum. Sed est supernaturalis in sua substantia et essentia, ibid., cap. 5, a num. 1, et cap. 2, num. 8.
8. Fidei actus infusus aut alius ejusdem speciei per vires naturæ fieri nequit: lib. 2, cap. 5, a num. 1. Potest tamen viribus naturæ dari fides aliqua acquisita, ibid., cap. 10, num. 3 et 5. Quæ et qualis sit hæc fides, ibidem, a num. 7.
9. Fidei Christianæ proprietates excellentiores sunt quam cujusque humanæ, lib. 2, cap. 10, num. 8. Quædam fidei proprietas est firmitas: et quid sit, ibid., num. 17. Major est in divina quam in humana fide, ibidem.
10. Fides quam Apostolus inter gratias gratis datas numerat, in quo consistat? Prolegom. 3, cap. 5, a num. 9, usque ad 14.
11. Fidem inchoatam acquiri per naturalem voluntatem credendi senserunt Semipelagiani, Proleg. 5, cap. 5, num. 13.
12. Fides naturalis seu acquisita mysteriorum fidei duplex esse potest, lib. 2, cap. 10, num. 10. Una ex terminis obscura, et altera evidens in attestante, ibidem.
13. Fides humana obscura et voluntaria non potest esse certa ex parte objecti, sed ut plurimum ex parte subjecti, ibidem.
14. Fides acquisita habens evidentiam attestantis potest esse certa certitudine objectiva seu essentiali, lib. 2, cap. 10, num. 11. Hæc autem certitudo etiam fidei acquisitæ in hominibus dari nequit, sine gratiæ auxilio, ibid.
15. Fides acquisita, quantumvis perfecta, semper inferior est in certitudine fidei infusæ, lib. 2, cap. 10, num. 11.
16. Fides infusa non patitur secum dubitationem liberam, seu deliberatam de eodem objecto, ibidem, num. 12. Nec item fides acquisita cum evidentia in attestante, ibidem. Aliter fides acquisita obscura et inevidens, ibid.

7. Fides acquisita mysteriorum fidei infallibilis est ratione materiæ, seu ex materiali objecto, lib. 2, cap. 10, num. 13. Libera tamen et obscura fallibilis est formaliter, seu ex objecto formali, ibidem, num. 14.
8. Fides acquisita hæretici etiam falsa est ejusdem speciei cum fide acquisita Catholici, quæ materialiter tantum est vera, ibidem.
9. Objectum fidei humanæ etiam res supernaturales ingrediuntur, et quomodo? lib. 2, c. 10, n. 25.
10. Fidem acquisitam naturalem nunquam posse attingere Deum eodem motivo quo infusa attingit, longe verior est sententia, ibid., cap. 11, n. 8.
11. Fides impetrat et meretur donum gratiæ divinæ, lib. 2, cap. 2, num. 8.
12. Discrimen inter motivum fidei infusæ et acquisitæ hæretici vel dæmonis, lib. 2, cap. 11, num. 31 et 32.
13. Ex hypothesi quod, facta propositione objecti et motivi fidei Deus negaret intellectui concursum supernaturalem, non eliceret tunc actum fidei infusæ, ibid., cap. 11, num. 34. Eliceret tamen actum fidei acquisitæ ex alio motivo humano, quod divinum communiter comitatur, ibidem.
14. Fidei confessio. Vide CONFESSIO.

FIDUCIA.

Fiducia non ad intellectum sed ad voluntatem per se formaliter spectat, lib. 2, 12, num. 2.

FINIS.

- Finis hominis naturalis et supernaturalis, lib. 1, in Praelud, numer. 3.
- Finis dat speciem actui, et bonitatem vel malitiam in moralibus, lib. 1, cap. 6, num. 5.
- Duplex finis ultimus quoad appetitionem repugnat. Implicat item quod finis, supernaturalis quoad consecutionem, sit naturalis quoad appetitionem, Prolegom. 4, cap. 1, num. 8.

FOMES.

Fomitibus difficultas quomodo per habitus infusos minuatur, lib. 1, cap. 10, num. 7.

FORTITUDO.

Fortitudinis donum actuale specie distinguitur ab actu fortitudinis infusæ, lib. 2, cap. 21, n. 11.

FRUCTUS.

Fructus Spiritus Sancti, actus et opera virtutum præsertim significant, lib. 2, cap. 22, num. 25. Virtutum et donorum actibus in eodem materis non distinguuntur, ibid., num. 26. Cur eadem, spes et prudentiam inter fructus Spiritus Sancti Apostolus non numeret, ad Galatas 5, ibidem, num. 28.

FULGENTIUS.

De Fulgentii opera recensentur, Proleg. 6, cap. 6, num. 25. Ejus doctrina de gratia contra Scimpelagianos magnopere laudatur, ibid. Hæc maxima auctoritas post Augustinum et Prosperum, ibid.

FUTURUM CONTINGENS.

Futurorum prædictio non est ratio vel causa quod res futura sit, Proleg. 1, cap. 6, num. 28.

Futura contingens per additionem conditionum Deo infallibiliter cognoscitur, Prolegom. 3, cap. 1, num. 6. Idque ante omnino esse voluntatis decretum,

- ibidem. Hanc sententiam societatis Patres semper docuerunt, ibidem, num. 7.
3. Rem esse in causa, non est esse futuram, Proleg. 2, cap. 7, num. 4. Denominatio futuri non solum desumitur ex efficaci voluntate Dei, ibid., num. 5.
4. Rem esse futuram formaliter consistit in transitu rei ab esse quod habet in causa, ad illud quod in se habitura est, Prolegom. 2, cap. 7, num. 7.
5. Contingentia quid addat futuritioni? ibid., num. 9. Quæ indifferentia sit de ratione futuri contingentis, ibidem, num. 10.
6. Circa determinatam veritatem futurorum contingentium erravit Aristoteles, Prolegom. 2, cap. 7, num. 11, 12 et 13. Veritas futurorum contingentium non desumitur ex determinatione causæ in actu primo constitutæ, ibidem, num. 14.
7. Contingentia effectus futuri in causa necessaria invenitur passive in libera active, intrinsece, Prolegom. 2, cap. 7, num. 15.
8. Futura libera habent determinationem suæ veritatis in causa prout libere determinabitur in actu secundo, Prolegom. 2, cap. 7, num. 18.
9. Futura conditionata non sunt vera in vi illationis ex causa, neque in illa cognosci possunt infallibiliter, ibid., num. 20. Habent determinatam veritatem, num. 21. Quo sensu illam habeant, num. 24.
10. Futura neque absoluta, neque determinata pendunt ex voluntate Dei prædeterminante, Prolegom. 2, cap. 9, num. 7.
11. Ex eo quod Deus cognoscat conditionata indeterminate vera ante decretum suæ voluntatis, non sequitur illa cognoscere ut necessaria, vel futura ex causa extrinseca prædeterminante voluntatem, Prolegom. 2, cap. 9, num. 10.
12. Effectus mere naturalis contingens potest cognosci in causa positus requisitis, et sublatis impedimentis, Proleg. 2, cap. 7, num. 16. Secus de effectibus libere contingentibus, num. 17.
13. Actus non potest prævideri absolute futurus, nisi potentia ad illum simpliciter supponatur, Proleg. 2, cap. 1, num. 6.
14. Causalis hæc, ideo res futuræ sunt, quia Deus præscit futuras, falsa est de scientia visioni, Proleg. 2, cap. 10, num. 26. Illative tamen vera est, ibidem, num. 23 et 33.

G

GAUDIUM.

1. Gaudium de Deo duplex: amicitia, scilicet, et concupiscentia, lib. 2, cap. 13, num. 12. Utriusque ratio explicatur, ibidem.

GELASIUS.

1. Gelasii Romani Pontificis pro tuenda Gratia studium et scripta, Proleg. 6, cap. 1, num. 22.

GENNADIUS.

1. Gennadius temere dixit Cassianum a Sancto Prospero fuisse infamatum, Proleg. 5, cap. 5, num. 14. An fuerit Scimpelagianus, non liquet, Catholicus tamen obiit, ibidem, num. 33.

GENTES.

1. Gentes aliquando morale bonum operantur, ex sola ordinaria providentia, lib. 1, cap. 3, n. 41.

GOTHESCALCUS.

1. Gothescalcus hæresis prædestinatorum auctor, Prolegom. 6, cap. 5, num. 3.

GRATIA.

1. Gratia est principium internum operationum ad quas juvat. In præmio totius operis, num. 2.
 2. Gratia etymologia, Proleg. 3, cap. 1, n. 2 et 3.
 3. Gratia excitantis motus libertatis sunt expertes, Prolegom. 1, cap. 6, num. 3.
 4. Gratia solum significat dona supernaturalia vel quoad substantiam, vel quoad modum, Proleg. 3, cap. 2, num. 3 et 7.
 5. Omnis gratia Dei est gratia Christi, ibidem, a num. 9.
 6. Gratia increata, quæ dicatur, Prolegom. 3, cap. 3, a num. 2. Omnis creata datur in tempore, ibidem, num. 6. Increata non omnis communicatur in tempore, num. 7. Gratia nomine simpliciter venit temporalis, cap. 3, num. 9. Et gratia gratum faciens, Prolegom. 3, cap. 6, num. 1.
 7. Gratia divisio in internam et externam, Proleg. 3, cap. 6, num. 10 et 11.
 8. Gratia gratis data et gratum faciens late exponitur, Proleg. 3, cap. 4, per totum. Gratia gratis datæ communes sunt peccatoribus et justis, ibid., num. 8 et 9. Gratia gratum faciens includit omnia dona gratia, quæ homini ad propriam sanctificationem conferuntur, ibidem, num. 15.
 9. Gratia gratum faciens, quo sensu sit nobilior gratis datis, Prolegom. 3, cap. 4, num. 19.
 10. Gratia sanitarum et operatio virtutum quid, et utrum distinguantur? Proleg. 3, cap. 5, a num. 15. De numero et quidditate harum gratiarum, ibid., per totum caput.
 11. Gratia gratis datæ plures possunt numerari quam novem, nec omnes inter se necessario differunt, Prolegom. 3, cap. 5, num. 63 et 64.
 12. Gratia non fit per creationem, Proleg. 3, cap. 6, num. 2.
 13. Gratia nomine actualem et habitualem sæpe Patres intelligunt, ibidem, num. 3 et 6.
 14. Gratia sanctificantis divisio in gratiam viæ et patriæ, Prolegom. 3, cap. 6, num. 7. Gratia patriæ est perfectior gratia viæ in suo esse, non tamen in ratione gratia, ibidem.
 15. Gratia viæ dividitur in eam quæ est in essentia animæ; et in eam quæ residet in potentiis, ibid., num. 3.
 16. Gratia actualis sanctificans sunt actus supernaturales, et Dei concursus ad illos requisitus, Proleg. 3, cap. 6, num. 9. Triplex illius divisio, num. 10. Varia illius nomina explicantur, num. 11.
 17. Gratia præoperans coincidit cum operante, Proleg. 3, cap. 6, num. 13. Gratia prædeterminantis nomen inusitatum et ambiguum, ibidem. Præparantis et prædefinientis gratia vox ambigua et generalis, ibid., num. 14.
 18. Gratia a iustitia originali distinguitur, Proleg. 4, cap. 5, num. 2 et 5. Nec ex se est physicum et connaturale principium iustitiæ originalis, ibidem, num. 4. Probabile tamen est esse connaturale principium habituum supernaturalium, ibidem.
 19. Iustitia originalis quo sensu gratiam includat, Prolegom. 4, cap. 5, num. 6. Quo sensu dici possit gratia, ibid., num. 7.
 20. Gratia adjuvans ad bene operandum moraliter non est necessario conjuncta cum statu originalis iustitiæ, ibid., num. 10.
 21. Gratia dona revocantur ad actus, habitus et auxilia, Proleg. 5, cap. 2, num. 13.
 22. Gratia nomine solum legem, liberum arbitrium, revelationem et doctrinam intelligit Pelagius, Prolegom. 5, cap. 2, num. 3 et 10. Gratiam adoptionis agnovit in parvulis, non tamen in adultis, n. 5.
 — Gratia solum tribuebat vim facilitandi ad observantiam legis divinæ, ibid., num. 7. Gratiam, quæ dat bene posse operari semper negavit, Proleg. 5, cap. 3, num. 7. Solum admisit gratiam quæ juvet possibilitatem voluntatis atque operis, ibid., n. 11. Gratiam internam non agnovit, neque excitantem, ibidem, a num. 13 usque ad 15. Efficacem omnino negavit, num. 19.
 23. Gratiam Dei secundum merita hominum docuerunt Semipelagiani, Proleg. 5, cap. 6, num. 1. Eorum error explicatur per totum caput. Quid de gratia præveniente? num. 10. Quid de gratia adiutorio quoad sufficientiam et efficaciam, ibidem, a numer. 24.
 24. Gratia initiali nomine quid intelligat Prosper, Proleg. 5, cap. 6, num. 22 et 28.
 25. Gratia generalis nomine quid intelligant Semipelagiani: quid item nomine specialis? ibidem, num. 31 et 32.
 26. Gratia nomine tam Pelagius quam Semipelagiani æquivoce usi, Proleg. 5, cap. 6, num. 44.
 27. Gratiam adjuvantem negavit Calvinus, Proleg. 5, cap. 7, num. 9.
 — Gratiam quibus in locis Scriptura commendat, Proleg. 6, cap. 1, num. 1. Gratiam dari ad singulos actus, Proleg. 6, cap. 7, in lib. August., cap. 11.
 28. Gratiarum diversitatem a Paulo expressam negavit Pelagius, ibidem.
 29. Gratia quot modis necessaria, lib. 1, in Prælod., num. 1 et 2. Utrum necessaria sit ad omnes veritates cognoscendas, lib. 1, cap. 1, a num. 1.
 30. Gratia specialis etiam in statu naturæ lapsæ, vel in puris naturalibus non est necessaria ad cognoscendas veritates naturales divisive sumptas, lib. 1, cap. 1, n. 5 et 6. Est tamen necessaria ad cognoscendas omnes veritates naturales collective, præsertim sine admixtione erroris, ibid., num. 8.
 31. Specialis gratia ad veritates etiam naturales cognoscendas non solum est gratia Dei, sed etiam Christi, de facto: de possibili tamen esse aliter potest, lib. 1, cap. 1, num. 15. Gratia omnis in statu innocentia daretur propter merita Christi, ibid.
 32. Utrum gratia sit necessaria ad omnem cogitationem moralem honestam? lib. 1, cap. 2, num. 5, 10, 13, 14 et 15.
 33. Gratia aliqua est sufficiens ut homo lapsus faciat aliqua opera sine ulla malitia, lib. 1, cap. 3, n. 4.
 34. Gratia habitualis vel charitas non requiritur ad omne opus bonum, lib. 1, cap. 4, num. 16. Gratia nulla infusa per modum habitus est necessaria ad honestam operationem, ibid.
 35. Necessitas gratia ad opera supernaturalia intrinseca dicitur: ad naturalia extrinseca, et cur? lib. 2, in Prælod., num. 1. Intrinseca tam in Angelis quam in homine, etiam in statu naturæ integræ reperitur, ibidem.
 36. Homini in statu naturæ lapsæ utraque gratia necessaria, lib. 2, in Prælod., num. 1. Præsertim ad actus voluntatis et intellectus supernaturales, ibid., num. 3. Et quomodo, lib. 2, cap. 8, num. 6. Homo

tam in statu naturæ integræ. quam in statu originalis justitiæ posset esse sine gratia sanctificante, Proleg. 4, cap. 3, num. 10.

37. Justus non indiget nova gratia habituali, imo nec præexistentis augmento ad non peccandum, lib. 1, cap. 25, n. 5. Nec actuali ad singula peccata vitanda, præter illam quæ ad generalem providentiam spectat, ibid., num. 6.

38. Homo lapsus etiam sanatus per gratiam sanctificantem, indiget speciali gratia ad vitanda omnia peccata longo tempore, lib. 2, cap. 25, num. 7.

39. Ad gratiæ conservationem gratia opus est, et qualis? ibid., num. 10.

40. Ad primam gratiam auxiliantem non potest homo se disponere, lib. 2, cap. 25, num. 8. Nec ad primam gratiam sanctificantem, sine dispositione supernaturali, ibidem.

41. Gratiæ necessitas ad actum amoris Dei naturalem. Vide AMOR, num. 11, 14, 18 et 19.

42. Gratiæ necessitas ad actus fidei. Vide FIDES, num. 2, 3, 5 et 8. Et VOLUNTAS, num. 11.

43. Quomodo revelatio gratia dicatur. Vide REVELATIO, num. 1 et 8.

44. Gratiæ necessitas ut homo bene moraliter operetur. Vide HOMO, a num. 19. Vide OPERATIO latissime.

45. Gratiæ necessitas ad amandum inimicos, libr. 1, cap. 37, num. 14.

46. Gratiæ necessitas ad martyrium. Vide MARTYRIUM.

47. Gratiæ necessitas ad servanda præcepta. Vide PRÆCEPTUM, a num. 12, latissime.

48. Gratiæ necessitas ad efficiendum et recipiendum Sacramentum. Vide PRÆCEPTUM, a num. 24.

49. Gratiæ necessitas ad remissionem peccati. Vide REMISSIO.

50. Gratiæ necessitas ad vincendas tentationes. Vide TENTATIO.

GRATITUDO.

1. Gratiitudo Deo non convenit, Prolegom. 3, cap. 2, num. 6 et 7.

2. Gratiitudo hominis est gratia Dei, ibid., n. 8.

GUBERNATIO.

1. Gubernationis nomine Paulus quid intelligat? Prolegom. 3, cap. 5, num. 66.

H

HABITUS.

1. Habitus supernaturalis receptio in anima remote libera dicitur, Proleg. 1, cap. 2, num. 6.

2. Habitus charitatis in patria necessario ordinatur ad suos actus, Prolegom. 1, cap. 3, num. 3. Ad illos potentiam quasi necessitat, ibidem. Non desineret, quamvis Deus cum voluntate non concurreret, ibidem.

3. Habitus tam naturalibus quam supernaturalibus voluntas unatur pro sua libertate, Proleg. 1, cap. 5, num. 8.

4. Habitus malos Deus non potest infundere, Proleg. 4, cap. 8, num. 11.

5. Habitus supernaturales originalem justitiam homini conferre non poterant, Proleg. 4, cap. 5, n. 2.

6. Habitus infusi quomodo remanet foris? difficultatem, lib. 1, cap. 19, num. 7.

7. Habitus acquisiti non amittuntur per unam actum contrarium, lib. 1, cap. 33, num. 5.

8. Differentia inter habitus infusos et acquisitos assignatur, lib. 2, cap. 8, num. 3. Infusi ad quam qualitalis speciem spectent, lib. 2, cap. 9, num. 3.

HERETICUS ET HERESIS.

1. Hæresis Pelagianæ initium et progressus, Proleg. 5, cap. 2, a num. 1.

2. Hæreticorum errores circa bona opera moralia, lib. 1, cap. 4, a num. 2.

HIERONYMUS.

1. D. Hieronymi encomia. Proleg. 6, cap. 6, a num. 11. Accuratissime contra Pelagium scripsit, ibidem. Quanta ejus auctoritas ad confutandas hæreses, ibidem.

HILARIUS.

1. An duo extiterint Hilarii tempore S. Augustini, Prolegom. 6, cap. 6, num. 21.

HOMO.

1. Homo potest a Deo creari in statu puræ naturæ sine peccato; imo sine illo futurus erat, si immediate a Deo crearetur, Prolegom. 4, cap. 1, num. 4 et 17.

2. Homo non potest connaturali modo creari nisi propter aliquam beatitudinem, Proleg. 4, cap. 1, num. 6 et 19. Non habet naturalem appetitum innatum ad visionem Dei, ibid., num. 21. Opinio contraria refertur, num. 6.

3. Homo potuit a Deo condi extra statum naturæ integræ, Proleg. 4, cap. 2, num. 5.

4. Utrum homo in statu naturæ integræ legem naturalem servare posset? ibid., num. 6 et 13. Connaturale ei non est donum speciale integritatis naturæ, ibid., num. 8 et 13.

5. Homo in statu puræ naturæ quomodo posset naturalem beatitudinem assequi, ibid., num. 25.

6. An homo proxime creatus a Deo in quolibet statu dici possit creatus in originali innocentia? Proleg. 4, cap. 3, num. 2.

7. Homini primo quid Deus contulerit? ibid., a num. 3; in statu puræ naturæ, licet non peccaret, naturaliter moreretur, ibid., num. 7.

8. Homo in solo statu naturæ integræ posset prius venialiter peccare quam mortaliter, non ita in statu originalis justitiæ, Proleg. 4, cap. 3, num. 10, juncto 4. Tam in statu naturæ integræ, quam in statu originalis justitiæ posset esse sine gratia sanctificante, ibidem., num. 10.

9. Homo de facto semper ordinatus fuit ad finem supernaturalem per sufficientia media a Deo præparata, Proleg. 4, cap. 4, n. 1 et 2. Neque in statu integræ, neque puræ naturæ haberet vires ad actus supernaturales eliciendos, num. 8.

10. Homo solum a mortali culpa lapsus denominatur, et in statu naturæ lapsæ constituitur, Prolegom. 4, cap. 6, num. 1.

11. Quo sensu dicitur homo a Patribus imaginem Dei perdidisse per peccatum, Proleg. 4, cap. 7, a num. 9. In statu naturæ lapsæ non est debitor ab extrinseco, quam esset in statu puræ naturæ, Proleg. 4, cap. 9, num. 4. In naturalibus fuisse vulneratum, quo sensu verum, Prolegom. 4, cap. 8, num. 19.

12. Unde homini proveniat difficultas bene operandi in statu naturæ lapsæ, ibid., num. 14.

13. Homo ex vi peccati originalis non nascitur in termino damnationis, sed in via ad illam, Proleg. 4, cap. 9, num. 8 et 10.

14. Hominem lapsum ante gratiam non esse liberum ad non peccandum, quo sensu verum, Prolegom. 4, cap. 9, num. 13.
15. Homo servus diaboli quibus modis sit factus, ibid., num. 16 et 17. An in statu puræ naturæ minus tentaretur? ibid., n. 17, et lib. 1, cap. 23, n. 25.
16. Hominem lapsum nullum opus absolute bonum posse per gratiam facere asserunt Lutherani, Proleg. 5, cap. 7, num. 10.
17. Homo existens in peccato mortali potest habere multos actus bonos, lib. 1, cap. 4, num. 6.
18. Hominem in hac vita non posse habere evidentiam in attestante mysteriorum fidei sine gratiæ auxilio est probabilius, lib. 2, cap. 10, num. 4.
19. Homo lapsus potest aliquando bene moraliter operari, sine speciali auxilio gratiæ, lib. 1, cap. 8, num. 4. Non potest naturaliter diu vivere sine peccato mortali contra legem naturalem, lib. 1, cap. 24, num. 36. In natura integra posset diu servare totam legem naturalem sine speciali gratia, lib. 1, cap. 24, num. 6.
20. Homo lapsus non potest diu sine gratia servare totam legem naturalem absque mortali culpa, lib. 1, cap. 26, num. 4. Oppositum est temerarium, ibid., num. 12.
21. Requiritur gratia habitualis, an sufficiat actualis et supernaturalis quoad modum ad servandam diu totam legem naturalem sine peccato mortali? lib. 1, cap. 27, a num. 1. Talis gratia de lege ordinaria datur fidelibus tantum iisque justificatis, ibid., a num. 15.
22. Homo in pura natura non posset sine gravi lapsu servare diu totam legem naturalem absque peculiari Dei auxilio, lib. 1, cap. 28, num. 4.
—Nec esset ad hoc potentior, quam in statu naturæ lapsæ, ibid., num. 8.
23. Homo in puris naturalibus haberet peculiarem aliquam Dei providentiam ad servandam totam legem naturalem si vellet, ibid., a num. 9.
24. Homo lapsus tripliciter potest amare Deum super omnia ut finem naturalem, libro 1, capit. 35, num. 16.
25. Homo in puris naturalibus non posset per vires naturæ diligere Deum super omnia etiam ut finem naturalem, lib. 1, cap. 36, num. 2. Nec etiam ad breve tempus, ibid. Posset tamen cum aliquo Dei auxilio, ibid., num. 8.
26. Possitne homo lapsus, vel in puris naturalibus naturales virtutes acquirere sine gratiæ auxilio? lib. 1, cap. 38, per totum fere. An in natura integra posset perfecte acquirere virtutes naturales? lib. 1, cap. 38, num. 2. Utrum in statu naturæ lapsæ, ibid., num. 3.
27. Homo sine charitate nec amore elicito nec innato diligit Deum ut finem supernaturalem, ibid., n. 13. Diligit tamen ut finem naturalem, ibid.
28. Homo. Vide GRATIA.

HORMISDAS.

1. Hormisdæ Pontificis Romani pro Gratia et Augustino tuendo sollicitudo et auctoritas, Proleg. 6, cap. 1, num. 23.

I

IGNORANTIA.

1. Ignorantia. Vide VULGUS.
2. Ignorantia. Vide STATUS, num. 16.

IMAGO.

1. Quo sensu dicatur homo a Patribus imaginem Dei perdidisse per peccatum, Prolegom. 4, capit. 7, a num. 9.

IMPERIUM.

1. Imperium in intellectu non distinguitur a iudicio practico, lib. 1, cap. 2, num. 10.
2. Imperium an requiratur ad primum actum voluntatis, ibid., num. 11.

INDIFFERENTIÆ ET INDIFFERENS.

1. Actus indifferens in individuo non datur, lib. 1, cap. 9, num. 46, et cap. 19, num. 10.
2. Indifferentia ad libertatem. Vide LIBERTAS. Vide POTENTIA.

INFALLIBILE ET INFALLIBILITAS.

1. Quid sit infallibilitas actus, lib. 2, c. 10, n. 13.
2. Infallibilitas actus duplex, materialis, scilicet, et formalis, ibidem. Quæ et qualis sit utraque, ibidem.
3. Infallibile. Vide FIDES.

INFANS.

1. Infantes qui in originali decedunt, possunt habere honestas operationes, Proleg. 4, cap. 9, num. 7. Non sunt obstinati in malo, lib. 1, c. 15, n. 10.
2. Infantium libertas. Vide LIBERTAS, num. 10.

INFIDELES.

1. Infideles possunt interdum bene operari, lib. 1, cap. 6, num. 6. Etiam sine veri Dei cognitione, ibidem, num. 8.

INITIUM.

1. Initium salutis ex nobis esse docuerunt Semipelagiani, Proleg. 5, cap. 6, num. 6.

INIMICUS.

1. Inimicorum dilectio moraliter bona an dari possit sine gratiæ auxilio, lib. 1, cap. 37, num. 14.

INNOCENTIUS.

1. Innocentius primus damnavit primo Pelagianam hæresim, Prolegom. 6, cap. 1, num. 2. Ut fidei definitio accipienda est illius doctrina de gratia, ibid., num. 3.

INTELLECTUS.

1. Intellectus non est formaliter liber, Prolegom. 1, cap. 3, num. 6 et 7.
2. Intellectus potest moveri sine pravâ motione voluntatis, non tamen e contra, lib. 1, c. 11, n. 4.
3. Intellectus Angelicus a solo Deo immediate moveri potest extrinsece, lib. 1, cap. 13, num. 9.

INTELLECTUS UT EST DONUM SPIRITUS SANCTI.

1. Intellectus ut donum actuale non est pura apprehensio, sed aliquod iudicium includit, lib. 2, c. 19, num. 4. Quænam sit ejus natura, et munus, ibid., num. 5. Quomodo distinguatur a dono sapientiæ, an præcedat vel sequatur fidem infusam, ibidem, num. 7 et 8. Esse hoc donum actum in sua substantia supernaturalem probabilius, ibid., n. 11.

INTERPRETATIO ET INTERPRES.

1. Interpretatio sermonum, quænam gratia, Proleg.

3, cap. 5, a num. 55. Quomodo differat a dono linguarum? *ibid.*, num. 59. Sæpe conceditur prædicatoribus infidelium conversionem procurantibus, *ibid.* Septuaginta item interpretibus et vulgato concessam aliqui credunt, *ibid.*

Quod donum interpretandi concessum creditur D. Bernardo et aliis Ecclesiæ Doctoribus, *ibidem*, num. 61.

J

JOANNES.

Joannis quarti, Pontificis Romani, de Gratia doctrina contra Pelagianum, Proleg. 6, c. 1, n. 15.

Joannes, Constantinopolitanus Patriarcha, Pelagii sectator, a D. Gregorio detectus et expugnatus, *ibidem*.

JURISDICTIO.

Jurisdictio in foro interno pertinet ad gratias gratis datas, Prolegom. 3, cap. 5, num. 60.

JUSTITIA ET JUSTUS.

Justitia originalis. Vide GRATIA, num. 18, 19, 20, et HABITUS, num. 4.

Præceptum conservandi justitiam originalem. Vide PRÆCEPTUM, num. 2.

Justus. Vide GRATIA, num. 37, 38, 39.

JUSTITIA PROUT EST QUARTA BEATITUDO.

Justitiæ fames et sitis ponitur quarta beatitudo a Christo Domino Matthæi, 5, lib. 2, c. 22, n. 12.

Hæc justitia non est tantum specialis virtus moralis ad alterum, sed collectio actuum vel affectuum omnium virtutum quibus homo appetit justificari, vel in sanctitate crescere, *ibidem*.

Hæc justitia non distinguitur ab actibus donorum et virtutum circa eandem materiam, *ibidem*.

L

LEX.

Legem sic mittere ad regnum quemadmodum Evangelium asseruit Cælestius, Proleg. 6, cap. 7, in lib. August., cap. 8.

Legem a fide quomodo distinguat Paulus, Proleg. 5, cap. 1, num. 4.

Lex naturalis non potest tota servari sine gratia, lib. 1, cap. 14, num. 7.

Lex. Vide HOMO, num. 19 et 20.

LEO.

Leo Magnus, Pontifex Romanus, Pelagii hæresim penitus extinxit, Proleg. 6, cap. 1, num. 14, 15 et 19. Ejus canonice ab Hormida relati, num. 24.

Leo non nisi de gratia professio et doctrina, *ibid.*, num. 25.

LIBERTAS ET LIBERUM.

Libertas quodlibet sit, et quæ propria, Proleg. 4, cap. 1, num. 3.

Libertas a sola coactione carentiam violentiæ tantum respicit, Prolegom. 4, cap. 1, num. 5.

Libertatem a necessitate in homine dari de fide est, Prolegom. 4, cap. 3, num. 4.

Libertas potentia quæ necessitas repugnet, Proleg. 4, cap. 1, num. 9. Libertas actus tollitur si potentia

ab intrinseco, vel extrinseco necessitatem patiat, *ibidem*.

5. Libertas formalis potentiam activam vendicat, Prolegom. 1, cap. 2, num. 2.

6. Libertas creata primario internos actus, et his mediantibus externas actiones respicit, *ibidem*, num. 7. Divina vero primario externas actiones respicit, *ibidem*.

7. Libertatis distinctio quoad speciem et exercitium: et in quo utraque consistat, *ibidem*.

8. Libertas proxima completam virtutem activam necessario exigit, Proleg. 1, cap. 2, num. 10. Libertas in actu primo potest esse proxima vel remota, *ibidem*, a num. 13.

9. Libertas proxima includit omnia requisita tam ex parte Dei, quam aliarum causarum, *ibidem*, cap. 3, num. 12. Libertatem non destruit actualis Dei concursus cum voluntate creata, *ibid.*, num. 16.

10. Prædestinatio, seu præscientia actuum bonorum libertatem operantis non evertunt, Prolegom. 4, cap. 6, num. 2.

—Pueri vel amentes libertatem non habent, etsi potentiam de se liberam habeant, Proleg. 4, cap. 2, num. 14.

11. Libertatem omnino destruit motio antecedens, Proleg. 4, cap. 3, num. 15.

12. Libertati aliqua suppositio seu necessitas officit: non tamen omnis, Proleg. 4, cap. 6, n. 2 et 3.

13. Libertas formalis non consistit in judicio rationis indifferente, talique judicio stante voluntas necessitari a Deo potest. Proleg. 4, cap. 6, num. 32.

14. Libertatis vires debilitatæ per peccatum originale, Proleg. 4, cap. 7, n. 1. Non tamen amissam esse libertatem de fide constat, *ibid.*, num. 3 et 4.

15. Libertas non est donum gratuitum, sed proprietas naturæ, Proleg. 4, cap. 7, num. 2.

16. Libertas radicalis et formalis quomodo læsæ in homine in statu naturæ lapsæ, *ibidem*, capit. 8, numer. 15.

17. Agi seu moveri a Deo non tollit indifferentiam libertatis. Proleg. 6, cap. 7, in lib. Augustini, c. 2, in adnotatione *ἡευβρεῖν*.

18. Lutheri error circa libertatem, Proleg. 5, cap. 7, num. 3.

19. Calvinii et Kemnicii error libertatem negantium post peccatum Adæ, Proleg. 1, c. 7, n. 4 et 5.

20. Libertas. Vide POTESTAS.

21. Libertas in actus. Vide ACTUS, numer. 2, 3 et 4. Vide CONCURSUS. Vide ELECTIO.

22. Actus supernaturalis quoad substantiam non tollit quominus sit liber, lib. 2, cap. 9, num. 5.

23. Causæ liberæ, ut influxum suspendant, Dei concursu non indigent, Proleg. 1, cap. 5, n. 19.

24. Hominem lapsam ante gratiam non esse liberum ad non peccandum quo sensu verum sit, Proleg. 4, cap. 9, num. 13.

25. Intellectus non est formaliter liber, Prolegom. 4, cap. 3, num. 6 et 7.

26. Libertas. Vide POTENTIA, a num. 1.

LIBERUM ARBITRIUM.

1. Liberum arbitrium hominis ante gratiam non esse liberum, quo sensu dicant Patres, Prolegom. 4, cap. 7, num. 11.

2. Liberi arbitri vires quoad perfectionem, quam in actu puræ naturæ haberent, non fuerunt diminuatæ in natura lapsa ex vi originalis peccati, Proleg. 4, cap. 8, a num. 5.

3. Liberi arbitrii bono usui gratiæ meritum tribuebant Semipelagiani, Proleg. 4, cap. 6, num. 4.
4. Liberum arbitrium qui negaverint, ib., n. 2.
5. Liberum arbitrium quo sensu dicatur non valere ex se nisi ad malum, lib. 1, cap. 21, a num. 1.
6. Semipelagianorum error circa liberum arbitrium, Proleg. 5, cap. 6, a num. 10.

LUCTUS.

1. Luctus est tertia beatitudo juxta illud Matth. 5: *Beati qui lugent*, lib. 2, cap. 2, a num. 10.
2. De quo luctu Christus loquatur, ibidem. Et in quo consistat hæc beatitudo multiplex expositio et sententia, ibid. Verior, quæ illam in exercitio mortificationis seu in certamine pro virtute contra passiones collocat, ibid., num. 11.
3. Hæc beatitudo luctus non distinguitur a donis et virtutibus per se infusis, ibid. Nec item consistit in actu aliquo unius tantum, sed in collectione multarum, ibid.

LUMEN GLORIÆ.

1. Lumen gloriæ necessario ad suos actus ordinatur, Proleg. 1, cap. 1, num. 5. Ad illos potentiam, quasi necessitat, ibid. Si Deus cum potentia non concurreret, non propterea esse desineret, ibid.

LUTHERUS ET LUTHERANI.

1. Lutherus, Calvinus, et eorum sequaces hæresim prædestinatorum innovarunt; eorum errores et fundamenta, Proleg. 4, cap. 7, per totum.
2. Lutheri et Calvini errores Leo decimus, Paulus tertius et Pius quartus damnaverunt, Prolegom. 6, cap. 1, num. 26.
3. Lutherani et Pelagiani conveniunt in libertate tollenda, Proleg. 5, cap. 7, num. 1.
4. Molliores Lutherani de libertate circa bona vel mala opera quid sentiant, Prolegom. 5, capit. 7, numer. 6.

M

MANSUETUDO.

1. Mansuetudo in quo consistat, ut est secunda beatitudo, lib. 2, cap. 22, a num. 7.
2. Quænam sit terræ possessio, quæ promittitur in mansuetudinis præmium, ibid., num. 9.

MAXENTIUS.

1. Quis fuerit, et quid scripserit? Prolegom. 6, cap. 6, num. 26.

MARIA.

1. Vide BEATA VIRGO.

MARTYRIUM.

1. Martyrium propter legem naturalem, an dari queat, sine gratiæ auxilio, lib. 1, c. 27, n. 21.

MASSILIENSES.

1. Massilienses auctores fuere erroris Semipelagianorum, Proleg. 5, cap. 5, num. 5.

MEDIUM.

1. Ad exequenda omnia et singula media necessaria ad salutem est necessarium aliquod auxilium gratiæ, lib. 2, cap. 25, num. 1.

MERITUM ET MERERI.

1. Actus meritorii a non meritorio triplex differentia, lib. 2, cap. 7, num. 2.

2. Actus naturalis moraliter bonus est meritorius præmii ordinis naturalis, lib. 1, c. 20, n. 22.
3. Mereri non possumus de congruo primam gratiam internam vel fidem per bonum opus morale, lib. 1, cap. 17, num. 11.
4. Meritum humanum necessario præcedere gratiam an putaverint Semipelagiani? Proleg. 5, capit. 6, a num. 26. Propter meritum humanum gratiam infallibiliter tribui an senserint? a num. 33. Meritum de congruo an de condigno respectu gratiæ agnoverint? a num. 37. Cum merito humano quomodo rationem gratiæ conciliarent, a num. 40. Pelagii error de merito, vide PELAGIUS, num. 4.
5. Cogitationem primam supernaturalem meritum non præcedit, lib. 1, cap. 17, num. 12.
6. Fides impetrat et meretur donum gratiæ diviniæ, lib. 2, cap. 2, num. 8.
7. Meritum Christi. Vide CHRISTUS.

MIRACULUM.

1. Miracula an possint peccatores patrare? Proleg. 3, cap. 4, num. 11.
2. Quomodo miracula sint signa sanctitatis? ibidem, et num. 12.

MISERICORDIA.

1. Misericordia quinta beatitudo, libr. 2, capit. 22, num. 14.
2. In qua latitudine usurpetur hic misericordia, ibid. Non distinguitur a virtutibus et donis circa eandem materiam, ibid.

MOTIO ET MOTUS.

1. Quid requiratur ut motio ordinis naturalis inter auxilia gratiæ computetur, Prolegom. 3, capit. 6, num. 16.
2. Motionem internam prævenientem repugnare libertati putavit Pelagius, Proleg. 5, cap. 2, num. 7.
3. Motionem efficacem necessitare voluntatem, et semper ad illius actus requiri putavit Lutherus, Proleg. 5, cap. 7, num. 2, et Calvinus, num. 4.
4. Motio physica, seu determinatio voluntatis tollit libertatem, lib. 1, cap. 9, num. 4.
5. Motus voluntatis primo primi libertatis sunt expertes, Proleg. 1, cap. 6, num. 3.
6. Motus circularis et rectus non distinguitur specie, lib. 2, cap. 11, num. 27.
7. Motio. Vide POTENTIA, num. 5 et 6.

MUNDITIA CORDIS.

1. Munditia cordis sexta beatitudo, libr. 2, capit. 22, num. 15. In quo consistat illius ratio, ibidem.
2. Hæc cordis munditia a donis et virtutibus elicitur, ibid.

MUNDUS.

1. Mundus hostis animæ quo sensu dicatur? Proleg. 4, cap. 9, num. 14.

N

NATURALE.

1. Naturalia in homine post peccatum manserunt integra, tam ex parte hominis quam ex parte diviniæ providentiæ, Prolegom. 4, cap. 9, num. 6.
2. In naturalibus fuisse hominem vulneratum, quo sensu verum, ibid., cap. 8, num. 19.

Quomodo peccatum minuat naturalia. Vide **PECCATUM**, a num. 2.

NAZIANZENSUS.

Nazianzenus ante exortam Pelagii hæresim catholicam de Gratia doctrinam docuit, Proleg. 6, cap. 6, num. 6 et 7.

NECESSITAS.

Necessitas duplex, una ab intrinseco, altera ab extrinseco, Proleg. 1, cap. 4, num. 16. Priorem non patitur voluntas cum a Deo necessitatur, posteriorem maxime, ibid.

Necessitas absoluta, quæ? ibid., num. 17.

Necessitas, quam voluntas a Deo pati potest, violentia aliquo modo dicitur, ibidem, num. 20.

Necessitas orta a qualitate divinitus impressa, ab illa non formaliter, sed effective tantum provenit, Proleg. 1, cap. 5, num. 9.

Necessitatis distinctio in sensu composito et diviso optima, si bene explicetur, Proleg. 1, c. 6, n. 4.

Necessitas antecedens et consequens, seu concomitans, lib. 1, cap. 12, num. 20.

Necessitas inducta per actualem usum libertatis libertatem non tollit, Prolegom. 1, cap. 6, num. 10 et 22.

Necessitas consequens respectu voluntatis divinæ antecedens esse potest respectu creatæ, ibidem, num. 16.

Gravem tentationem necessitare voluntatem ad peccandum, erravit Baius, lib. 1, c. 24, a n. 21.

Ad necessitandam voluntatem quod decretum Dei requiratur. Vide **DECRETUM**, a numero uno. Vide **QUALITAS**.

Necessitas gratiæ. Vide **GRATIA** latissime.

O

OBEDIENTIA.

Obedientiæ virtutis actus in homine fidei sæpe est in entitate supernaturalis, lib. 2, cap. 16, n. 7.

OCCASIO.

Occasionibus tunc operandi a Deo præparatæ, et ablatio occasionum peccandi inter gratias externas receduntur, Proleg. 3, cap. 3, num. 15.

Occasionibus bene operandi providere, et impedienda auferre Deum ex meritis asserunt Semipelagiani, Proleg. quinto, capite sexto, num. 18.

OMNINO.

Omnia pura perfecte voluntaria sine actu positivo dari possunt, lib. 1, cap. 26, num. 41.

OPERATIO ET OPLUS.

Operatio moralis undique bona raro sine gratia receditur, lib. 1, cap. 38, num. 7.

Operatio virtutum permanentis fuit in Apostolis dependens a motione Spiritus Sancti, Proleg. 3, cap. 5, num. 19.

Operatio bona moraliter dari potest per solas vias nature in homine lapsæ, lib. 1, c. 19, n. 8.

Opus bonum morale non requirit auxilium supernaturalis operantis, lib. 1, cap. 3, n. 2.

Opus bonum morale dicitur modo ordinari potest ad finem supernaturalem, lib. 1, cap. 15, n. 2. Non

potest tamen ita ab operante ordinari sine supernaturali gratia, ibid., num. 3.

6. Opus bonum morale ut precise fiat ab homine ordinato ad supernaturalem finem non indiget supernaturali gratia, lib. 1, cap. 15, num. 4.

7. Opera moralia omnia ad actus intellectus et voluntatis revocantur, lib. 1, in Prælud., num. 3.

8. Quæ gratia ad bene operandum requiratur. Vide **GRATIA** latissime. Vide **HOMO**, num. 12, 16 et 19.

9. Operatio infantium. Vide **INFANS**.

10. Operatio infidelium. Vide **INFIDELIS**.

11. In statu naturæ lapsæ nihil homines posse operari quod peccatum non sit, hæreticum dogma, lib. 1, cap. 3, num. 2.

OPINIO.

1. Opinio sive conjectura in Deum non cadit, Proleg. 2, cap. 2, num. 13.

OPITULATIO.

1. Opitulationis nomine quid intelligat Paulus? Proleg. 3, cap. 5, num. 66.

OPTATUS.

1. Optatus Milevitanus quo sensu dixerit: Velle et currere nostrum esse? Proleg. 6, num. 8.

ORATIO.

1. Orationis necessitatem ad vincendas tentationes etiam gravissimas negavit Pelagius, Prolegom. 5, cap. 2, num. 7.

2. Orationem quo sensu admiserit Pelagius, Proleg. 5, cap. 3, num. 18.

3. Orationibus humanis gratiam merere asseruerunt Semipelagiani, Proleg. 5, cap. 5, num. 1.

4. Oratio pro actibus moraliter tantum bonis valde imperfecta est, lib. 1, cap. 22, num. 7.

OROSIUS.

1. Abfuit Concilio Palæstino, Prolegom. 6, cap. 3, a num. 2. Adfuit tamen alii Hierosolymis celebrato, ibid., num. 3.

2. Orosii auctoritas in doctrina de Gratia contra Pelagianos, Proleg. 6, cap. 6, num. 20.

P

PACIFICI.

1. Pacificorum septima beatitudo est, libr. 2, cap. 22, num. 17.

2. In quo consistat, duplex æque probabilis opinio, ibid. Prima ait consistere in eo quod pacem faciat inter discordes, ibid. In hoc sensu hæc beatitudo a charitate elicitur, ibid. Secunda asserit consistere in interna pace hominis ad Deum et ad proximum, et ejusdem ad suos appetitus, ibid. In hoc sensu hæc beatitudo non est unius virtutis aut domi actus, sed multorum, ibidem.

PENITENTIA.

1. Per penitentiam non ex gratia, sed ex meritis veniam obtineri docebat Pelagius, Proleg. 3, cap. 2, num. 11.

2. Habitu virtutis penitentis in homine fidei est in entitate supernaturali, lib. 2, cap. 16, num. 7.

3. Penitentia. Vide **PECCATOR**, num. 1.

PATRES.

1. Quinam Patres veram doctrinam de Gratia traderint et contrarios errores confutaverint, Proleg. 6, cap. 6, per totum
2. Patres Pelagio antiquiores nec illi favent, nec Augustino adversantur, Proleg. 6, cap. 6, num. 4.

PAULUS.

1. Pauli Apostoli excellentia, Prolegom. 6, cap. 7, in lib. Augustini, cap. 10. Magnus Gratiae præceptor, confessor et prædicator, ibid.
2. Paulus. Vide PETRUS, num. 1.

PAUPERTAS.

1. Paupertas voluntaria an dari possit sine auxilio gratiæ, lib. 2, cap. 27, num. 20.
2. In quo consistat paupertas prima beatitudo, varie exponitur, lib. 2, cap. 22, a num. 3. Præcipue consistere in voluntaria divitiarum carentia probabilis est, ibid., num. 6.
3. Hæc beatitudo a virtutibus per se infusis, vel donis Spiritus Sancti circa eandem materiam non distinguitur, ibid.

PECCATOR ET PECCATUM.

1. Peccator non tenetur ex præcepto, statim ac peccat, agere poenitentiam, lib. 1, cap. 27, num. 33. In peccato potest exercere multos actus bonos, lib. 1, cap. 4, num. 6.
2. Peccatum non minuit mere naturale per se et intrinsece, Proleg. 4, cap. 6, num. 6.
3. Peccatum actuale quomodo minuatur bonum naturæ, Proleg. 4, cap. 8, num. 12 et 21.
4. Peccatum puræ omissionis non minuit bonum naturæ, ibid.
5. Peccati macula vel reatus non minuit physicas vires operandi, Proleg. 4, cap. 8, num. 13.
6. Peccati poena pendet ex lege Dei, Proleg. 4, cap. 9, num. 6.
7. Peccatum veniale non constituit hominem in statu naturæ lapsæ, Proleg. 4, cap. 6, num. 1.
8. Peccatorum venia dimidiata quoad culpam nunquam datur, lib. 1, cap. 35, num. 6.
9. Non posse esse sine peccato, nisi qui legis scientiam habuerit, Proleg. 6, cap. 7, in lib. Augustini, cap. 1.
10. Peccatum mortale actuale aliquando potest esse cum amore benevolentiae Dei naturali, lib. 1, cap. 31, num. 12.
11. Homo in statu naturæ integræ posset prius venialiter peccare quam mortaliter. Non ita in statu originalis iustitiæ, Proleg. 4, cap. 4, num. 10.
12. Homo non potest naturaliter diu vivere sine peccato mortali contra legem naturalem, lib. 1, c. 24, num. 36
13. Gratiae necessitas ad non peccandum. Vide GRATIA, num. 37 et 38.
14. Non omnes poenas quas mortales patiuntur, esse peccati originalis aut actualis supplicia, Proleg. 6, cap. 2, num. 16.
15. Peccatum. Vide REMISSIO PECCATI.
16. Peccatum Angelorum. Vide ANGELUS, n. 1 et 4.
17. Peccatum contra præceptum supernaturale virtuti etiam supernaturali opponitur, lib. 2, cap. 23, num. 19.

PECCATUM ORIGINALE.

1. Peccatum originale est mera privatio. Consistit in sola aversione a Deo, Proleg. 4, cap. 8, n. 12.

2. Per peccatum originale nullus error in intellectum transfunditur, sed sola ignorantia, 1. Prolegom. 4, cap. 6, num. 14. Quid per illud voluntati et appetitui ablatum, ibid.
3. Peccatum originale nullum actum humanum includit, Proleg. 4, cap. 6, num. 17 et 18.
4. Peccatum originale non avertere hominem a Deo, ut est finis naturalis, probabile est, Proleg. 4, cap. 6, num. 21.
5. Peccatum originale negavit Pelagius, Prolegom. 5, cap. 3, num. 3.
6. Peccatum originale non meruit carentiam naturalis concursus Dei nec immutationem generalis providentiæ, lib. 1, cap. 15, num. 9. Nec obstinationem in peccatis, ibid.
7. Puer decedens cum peccato originali potest amare Deum super omnia ut auctorem naturæ, lib. 1, cap. 35, num. 7.
8. Peccatum originale. Vide NOMO, num. 13, et ADAM, num. 2 et 3.
9. Peccatum originale quo pacto libertatis vires minuerit. Vide LIBERTAS, num. 14.
10. Peccatum originale. Vide PRIVATIO.

PELAGIUS.

1. Pelagiana hæresis quo tempore cœperit, quamdiu quieverit in Ecclesia, proleg. 5, cap. 2, a num. 1, et proleg. 6, cap. 1, num. 25. Quando iterum pululaverit, ibidem, num. 26.
2. Pelagianorum in Catholicos furor, et cædes per illos facta, prolegom. 6, capit. 7, in lib. Augustini, cap. ult., in fine.
3. Pelagius non negavit gratiam revelationis mysteriorum fidei esse necessariam, lib. 2, c. 1, n. 6.
4. Pelagii error asserentis principia merendi esse naturalia, lib. 1, cap. 38, num. 4.
5. Pelagii errores in doctrina de Gratia. Vide GRATIA, num. 22, 26 et 28.

PERMISSIO.

1. In permissione Dei non potest cognosci peccatum futurum, proleg. 2, cap. 5, num. 7.

PERSEVERANTIA.

1. Perseverantiæ donum ad tolerantiae beatitudinem pertinet, lib. 2, cap. 22, num. 19. Non est specialis virtutis actus, sed mandatorum integra observatio, ibidem.

PETRUS.

1. Divus Petrus et Paulus quali interprete usi fuerint, cum habuerint donum interpretationis, prolegom. 3, cap. 5, num. 61.
2. Petrus Diaconus opus de Incarnatione et Gratia scripsit, ubi Semipelagianos ad finem acriter impugnat, prolegom. 6, capit. 6, num. 26. Episcopos Africanos ad scribendum excitavit, ibid.

PIETAS.

1. Pietatis multiplex significatio, lib. 2, cap. 21, n. 14. Quid significet pietas, quando usurpatur pro Spiritus Sancti dono, ibid.
2. Donum pietatis actuale quomodo distinguatur ab actu religionis per se infusæ, lib. 2, cap. 21, num. 15 et 16.
3. Donum pietatis versatur non solum circa materiam religionis, sed etiam iustitiæ, et circa Sanctorum cultum ac parentum. Imo circa totam materiam virtutum ad alterum, lib. 2, c. 21, n. 16 et 17.

. Piæ affectionis habitus ad quam virtutem spectet? lib. 2, cap. 21, num. 17.

PONTIFEX.

. Pontifex. Vide ASSISTENTIA.

POTENTIA.

. Potentia libera quas condiciones requirat, proleg. 1, cap. 3, num. 2 et 7.

. Potentia pure passiva libera esse nequit, proleg. 1, cap. 2, num. 8. Nunquam se in actum potest reducere, ibidem. Necessario patitur, vel absolute, vel ex suppositione, si agens præsens sit, ibidem.

. Potentia libera indifferentiam postulat ad agendum vel non agendum, proleg. 1, cap. 2, num. 8 et 9.

. Potentia non libera in actu primo nec divinitus actus liberos potest elicere, prolegom. 1, cap. 4, num. 21. Potest tamen formaliter libera actus necessarios, tam naturaliter quam divinitus exercere, ibidem, num. 21 et 22.

. Potentia loco motiva non habet vim suspendendi suos actus, prolegomen. 1, cap. 5, num. 26. Non potest exercere suam actionem, nisi per appetitum moveatur, ibidem.

. Potentiarum motio per sympathiam exigit radicacionem illarum in eadem natura, prolegomen. 1, cap. 5, num. 27.

. Eadem potentia potest esse simul virtus ad plures actus inter se oppositos, licet illos simul habere non possit, prolegomen 1, cap. 6, num. 5. Eam non amittit cum aliquem illorum actum elicit, ibid.

. Potentiæ unde sumant suam distinctionem specificam, lib. 2, cap. 21, num. 25.

POTESTAS.

. Potestas remota voluntatis ad faciendum actum, posita suppositione antecedente, non est sufficiens ut libertas salvetur, prolegom. 1, cap. 6, num. 32.

PRÆCEPTUM.

. Præcepta Dei homini in hoc statu imposita, esse illi impossibilia censet Calvinus, prolegom. 5, c. 7, num. 11.

. Præceptum conservandi justitiam originalem non fuit distinctum ab aliis præceptis, etiam in Adamo, lib. 1, cap. 3, num. 11.

. Præceptum non potest esse de re impossibili, ibid.

. Præceptum operandi semper fructuose non invenitur, lib. 1, cap. 7, num. 12.

. Præcepta omnia legis naturæ, etiam quoad substantiam, servari non possunt naturaliter, lib. 1, cap. 8, num. 43.

. Potest tamen unum vel aliud præceptum, etiam quoad honestas circumstantias, ibidem.

. Præceptum amandi Deum super omnia, ut auctoritate naturæ, est naturale, lib. 1, capite 31, num. 7. Ab illo non existerentur homo et Angelus, etiam in pura natura crearentur, ibid., num. 8.

. Præcepta Decalogi continent legem more naturalium, etiam per comparacionem ad param naturam rationalem, lib. 1, cap. 31, num. 8.

. Præceptum amandi Deum super omnia, si non daretur, naturam foret potestatem morale præsertim contra proximum, ibidem.

. Præceptum dupliciter dici potest supernaturale, lib. 2, cap. 23, num. 2.

11. Dari hominibus præcepta supernaturalia de actibus supernaturalibus quoad substantiam negavit Pelagius, ibidem.

12. Ad implendum quodcumque præceptum supernaturale de interno actu, est necessaria gratia, lib. 2, cap. 23, num. 7 et 22.

13. Non solum ad observantiam cujusque præcepti in tota sua latitudine, sed etiam ad observantiam illius in quolibet actu supernaturali interno, necessaria est gratia, lib. 2, cap. 23, num. 8.

14. Neque solum gratia est necessaria ad omnem actum supernaturalem implentem præceptum, sed ad omnem actum, ut impleat; et hoc tam ad substantiam quam ad modum actus, ibid., n. 10 et 11.

15. Ad vitandam culpam contra præceptum supernaturale affirmativum, vel etiam negativum de re supernaturali, gratia est necessaria, lib. 2, cap. 23, num. 18.

16. Præcepta supernaturalia pure negativa non dantur de actibus internis, lib. 2, cap. 23, num. 18.

17. Peccatum contra præceptum supernaturale, virtuti etiam naturali opponitur, ibidem, num. 19.

18. Dupliciter caveri potest actus contrarius supernaturali præcepto, lib. 2, cap. 23, num. 19.

19. Ad observanda præcepta supernaturalia, gratia auxilians seu adjuvans est per se necessaria et sufficiens, lib. 2, cap. 23, num. 24. Non tamen semper sine habituali gratia servantur, ibidem, num. 25.

20. Præcepta supernaturalia de actibus externis possunt interdum quoad substantiam impleri, sine auxilio gratiæ, lib. 2, cap. 24, num. 2. Non vero quoad supernaturalem modum quem habere possunt ex operante, ibidem.

21. Quibus modis possit esse præceptum de actu externo, ibidem, num. 3.

22. Præceptum Adamo in Paradiso impositum non comedendi de ligno vetito, erat supernaturale tantum quoad modum, lib. 2, c. 24, num. 3. Ad illius substantiam non erat necessaria gratia, ibidem. —Præcise spectatum non obligabat quoad modum, ibidem.

23. Ad præceptum de exteriori actu, cujus observatio pendet per se ab interiori supernaturali, est necessaria gratia, lib. 2, cap. 24, num. 4.

24. Præceptum absolute administrandi seu efficiendi sacramentum potest sine gratia habituali, imo sine fide impleri, lib. 2, cap. 24, num. 6. Quamvis sæpe non fiat sine aliquo auxilio spectante ad ordinem gratiæ gratis datæ, ibidem.

25. Ad implendum præceptum ministrandi digne sacramentum necessaria est gratia, saltem habitualis, lib. 2, cap. 24, num. 9.

26. Præceptum recipiendi sacramentum potest impleri sæpe sine gratia, et cum peccato. In penitentia tamen sacramento, nunquam, lib. 2, cap. 24, num. 10.

27. Præceptum sumendi Eucharistiam divinum et Ecclesiasticum, sine gratia et cum peccato impleri potest, lib. 2, cap. 24, num. 12.

28. Ad implendum præceptum recipiendi digne sacramentum, necessaria est gratia, lib. 2, cap. 24, num. 13.

29. Ad implendum præceptum recipiendi digne sacramenta mortuorum, gratia habitualis non requiritur, sed tantum auxilians, lib. 2, cap. 24, n. 13.

—Habituali vero per se requiritur ad sacramenta vivorum, ibidem.

30. Amor naturalis benevolentia Dei non includit

observantiam omnium præceptorum, lib. 1, c. 30, num. 12 et 14.

PRÆDEFINITIO.

1. Prædefiniatne Deus singulos actus morales? lib. 1, cap. 14, num. 3.
2. Deus prædefinire potest actus bonos, maxime supernaturales, antequam absolute præsciat esse futuros, prolegom. 2, cap. 5, num. 17.
3. Prædefinitio actuum bonorum libertatem operantis non evertit, prolegom. 1, cap. 6, num. 2.
4. Deus non prædefinit actiones malas, neque quoad materiale carum, prolegom. 2, cap. 5, num. 5.
5. Vide DECRETUM, num. 10.

PRÆDICATIO.

1. Prædicatio fidei est gratia externa, prolegom. 3, cap. 3, num. 14.

PRÆMIUM.

1. Præmium futurum Beatitudinum in altera vita, licet nomine sit multiplex, in re est unum, visio scilicet beata, lib. 2, cap. 22, num. 23. Quæ, et qualia sint præmia Beatitudinum in hac vita, ibid., num. 24.

PRÆSCIENTIA.

1. Præscientia futurorum contingentium ponit in objecto scientiæ liberam Dei voluntatem; non tamen in Deo decretum aliquod liberum supponit, prolegomen. 2, cap. 1, num. 6.
2. Præscientia proprie dicit ordinem ad rem in tempore futuram, proleg. 2, cap. 4, num. 2.
3. Præscientia Dei sive prophetia ad suppositionem consequentem pertinent, proleg. 5, c. 6, num. 28.
4. Præscientia Dei nec ad materiale peccati voluntatem cogit, prolegomen. 2, cap. 10, num. 9 et 10.
5. Præscientia. Vide SCIENTIA.
6. Præscientia, vide DECRETUM et FUTURUM CONTINGENS.

PRIVATIO.

1. Privatio cogitationis congruæ ad operandum honeste naturaliter, de facto non est pœna originalis peccati, prolegom. 4, cap. 5, num. 7 et 8.

PROPHETA, PROPHETIA ET PROPHETICUM.

1. Prophetam nullum, excepto Christo Domino, uti potuisse ad libitum prophetiæ dono, de fide est, prolegomen. 3, cap. 5, num. 26.
2. Propheta quomodo post actualem revelationem recordetur, et assentiatur rei revelate, prolegom. 3, cap. 5, num. 34 et 35.
3. Prophetia quid includat, prolegomen. 3, cap. 4, num. 10. Probabile est esse cognitionem evidentem, ibidem. Requirit apprehensionem rei cognoscendæ, et iudicium de veritate rei apprehensæ, ibidem, num. 22.
—Non est habitus, num. 23.
4. Propheticum lumen esse aliquid permanens, probabile est, prolegomen. 3, cap. 5, num. 28 et 39.
5. Propheticus assensus evidens et obscurus esse potest, prolegomen. 3, cap. 5, num. 29.
—Assensus obscurus non differt specie ab assensu fidei; evidens vero differt, ibidem.
6. Evidens assensus propheticus si detur, illius lumen non esse permanens, probabilius est, prolegomen. 3, cap. 5, num. 30.

PROPOSITUM.

1. Propositum vitandi omnia venialia, quale sit? lib. 1, cap. 34, num. 21.

PROSPER.

1. Opera sancti Prosperi recensentur, proleg. 6, c. 6, num. 22. Ejus auctoritas in libris de Gratia contra Semipelagianos maxima post Augustinum, ibidem num. 23. Fidelissimus Augustini defensor, ibidem. Ejus doctrina et labores pro Ecclesia referuntur et commendantur, ibidem.

PRUDENTIA.

1. Prudentiæ actus nonnunquam in homine fideli supernaturalis est in entitate, lib. 2, cap. 16, num. 8. Quomodo evadat supernaturalis, cum in conjecturis naturalibus fundetur? ibidem, num. 15.

PUER.

1. Puer, vide LIBERTAS, num. 10.
1. Puer, vide INFANS.

Q

QUALITAS.

1. Qualitas qua Deus voluntatem necessitet, possibilis est, prolegomen. 1, cap. 5, num. 3. Forte spiritualis, permanens, vel transiens pro arbitrio Dei illam efficientis, ibidem. Nullo modo intrinsicam potentiæ vim minueret; vinceret tamen, ibid., n. 7 et 8.
2. Qualitas hæc formaliter non effective voluntatem immutaret, ibidem, num. 9.
—Determinaret intrinsicè voluntatem in actu primo, prolegomen. 1, cap. 5, num. 9.
3. Et si impossibilis talis qualitas foret, adhuc Deus voluntatem necessitare posset, ibidem, num. 10.
4. Qualitas morbida in homine lapsa vana est et impossibilis, prolegom. 4, cap. 8, num. 11 et 16.

R

REDEMPTOR ET REDEMPITIO.

1. Redemptio nostra potest dici externa gratia, prolegomen. 3, cap. 3, num. 15.
2. Redemptoris et sanctificatoris nomen, in quo differat. In præm. operis, num. 3.

REGNUM.

1. Regnum cœlorum et vitam æternam falso distinguit Pelagius, prolegom. 5, cap. 3, num. 3.
2. Regnum cœlorum etiam in veteri Testamento promissum, quo sensu dixerit Pelagius, prolegom. 6, cap. 7, in libr. Augustin. cap. 6, adnotat. margin.

REGULA.

1. Regula ad exponendos Patres, dum de Gratia loquuntur, contra Pelagium, proleg. 5, cap. 4, n. 10.

REMISSIO.

1. Remissio peccatorum pertinet ad gratiam sanctificantem, prolegom. 3, cap. 6, num. 4.
2. Remissionem peccatorum sub nomine gratiæ agnovit Pelagius, prolegomen. 5, cap. 5, num. 11.
3. Remissionem peccatorum immediate obtineri peccatorem penitentiam crediderunt Semipelagiani.

et expresse Cassianus, proleg. 5, c. 6, n. 14 et 17. Remissio peccati mortalis de se est opus non naturale, lib. 1, cap. 11, num. 11. Ad remissionem peccati obtinendam, requiritur in adulto auxilium gratiæ, lib. 2, cap. 25, num. 2. Ipsa remissio peccatorum est gratia, et per infusionem gratiæ fit, ibid., 3. Peccati venialis remissio non fit sine aliqua gratia, ibidem.

REVELATIO, ET REVELATUM.

Revelationem nomine gratiæ agnovit Pelagius, prolegom. 5, cap. 3, num. 16; et lib. 2, cap. 5, num. 6. Quomodo fiat revelatio? prolegomen. 3, cap. 5, num. 23, 29 et 34. Revelationes mere internæ, maxime ad communem fidem spectantes, raræ post Christi adventum, proleg. 5, cap. 3, num. 16. Revelationem, legem ac prædicationem dari propter meritum humanum, et propter demeritum negari crediderunt Semipelagiani, prolegomen. 5, cap. 6, num. 24. Aliqua esse mysteria quæ absque revelatione cognosci nequeunt ostenditur, lib. 2, cap. 1, num. 2. Revelatio divina viatori necessaria est a cognoscendo Deum sicut oportet, lib. 2, cap. 2, num. 6. Quænam revelatio sit necessaria ad hujusmodi cognitionem, lib. 2, cap. 1, num. 8. Revelatio divina generatim gratia dici debet, lib. 2, cap. 1, num. 10. Ad cognoscenda objecta etiam naturalia, fide divina, divina revelatio requiritur, lib. 2, c. 1, n. 27. Hæc revelatio non confertur a Deo ex meritis, sed mere gratis, lib. 2, cap. 1, num. 12. Duplex modus credendi revelata a Deo. Unus dei infusæ, acquisitæ alter, lib. 2, c. 11, num. 4.

S

SACRAMENTUM.

Sacramenta sunt quædam gratiæ, prolegomen. 3, cap. 3, num. 15. Sacramentum, vide PRÆCEPTUM, a numero 24.

SAPIENTIA.

Sapientiæ donum non est formaliter charitas, vel spes, lib. 2, cap. 17, num. 20. Neque est idem cum fide, ibid., num. 14. In quo consistat donum sapientiæ; in quo differat a fide, lib. 2, cap. 18, num. 16. Sapientia, vide SERMO.

SCIENTIA DEI.

Scientia increata Dei in Christo, per sympathiam voluntatem Christi creatam excitare nequit prolegomen. 1, cap. 4, num. 27. Scientia Dei ad suppositionem consequentem pertinet, non ad antecedentem, proleg. 1, c. 6, n. 28. Scientia conditionata sive media futurorum contingentium in Deo asserenda, prolegomen. 2, cap. 1, num. 6, et cap. 7, a num. 22. Per hanc certo cognoscit Deus quod evenitum est, prius ratione quam aliquid libere decernat, proleg. 2, c. 1, n. 6. Quæ scientiam conditionatam in Deo ex Scripturis ostendat, prolegomen. 2, cap. 2, per totum. Adhuc a fide non est dari talis scientiam, ibid., num. 19. Ex Augustino et aliis Patribus confirmatur dari

scientiam conditionatam in Deo, prolegomen. 2, cap. 3, per totum. Ad quid necessaria sit in Deo, ibid., num. 13. Supponitur a fidelibus, dum Deum orant, ibid., num. 15. 6. Scientia conditionata in quo differat ab absoluta, proleg. 2, cap. 4, num. 7. Necessario comprehendit in suo objecto adæquato decretum Dei, ibid., et cap. 9, num. 4. 7. Per scientiam conditionatam quomodo cognoscatur peccatum, prolegomen. 2, cap. 4, num. 10. 8. Scientiam conditionatam dari ante decretum liberum, nec in illo fundari, prolegomen. 2, cap. 5, per totum. 9. Scientiam conditionatam supponit et indicat D. Thomas, prolegomen. 2, cap. 6, num. 6. Ad scientiam simplicis intelligentiæ pertinet, ibid., num. 7. 10. Scientia Dei quo sensu libera dicatur, proleg. 2, cap. 6, num. 8. 11. Quæ decreta conditionata admittenda sint in Deo respectu futurorum conditionatorum, proleg. 2, cap. 5, num. 20. 12. Per scientiam simplicis intelligentiæ prius Deus se voluntarie posse creare mundum præscivit, quam libere decerneret illum creare, prolegomen. 2, cap. 1, num. 6. 13. Scientia absoluta terminatur ad effectum secundum actualem ejus existentiam, et supponit in Deo actuale decretum; conditionata non ita. proleg. 5, cap. 9, num. 8. 14. Scientia visionis non est causa rerum, proleg. 2, cap. 10, a num. 5. 15. Scientia qualem influxum habeat ad extra, prolegomen. 2, cap. 10, num. 15. 16. Scientia simplicis intelligentiæ applicata per voluntatem causat res ad extra, prolegomen. 2, c. 10, num. 17 et 18. 17. Scientia approbationis addit supra scientiam voluntatis affectum, ibid. 18. Scientia visionis speculativa simplicis intelligentiæ practica est, proleg. 2, cap. 10, a num. 31 et num. 21. 19. Scire actualiter pertinet ad perfectionem simpliciter; vel tamen actu objectum creatum non pertinet ad perfectionem Dei, sed posse illud velle, proleg. 2, cap. 8, num. 4 et 10. 20. Scientia. Vide DECRETUM, vide FUTURUM CONTINGENS, vide CAUSA, num. 3, vide PRÆSCIENTIA.

SCIENTIA SPIRITUS SANCTI DONUM.

1. Scientiæ donum actuale in aliquo mentis iudicio consistere certum est, libro 3, cap. 20, num. 1. Speculativum potius dicendum quam practicum, ibidem, num. 2. Aliquo tamen modo practicum dici potest, ibid. 2. In quo scientiæ donum consistat, amplius explicatur, libro 2, cap. 20, num. 3. A fide, sapientia et consilio quomodo distinguuntur, ibid., a num. 4. 3. Donum scientiarum confertur propter commune Ecclesie bonum, lib. 1, cap. 1, num. 17. 4. Scientia, vide SERMO.

SEMIPELAGIANI.

1. Semipelagianorum error, ejus occasio, auctores et sectatores, proleg. 5, cap. 5, per totum. 2. Semipelagiani hominum meritis prævisis tribuebant quod eis revelaretur seu prædicaretur fides, lib. 2, cap. 1, num. 11. Impugnatur, ibidem n. 13.

3. Semipelagianorum errores de merito, vide MERITUM, NUM. 4, et ORATIO, NUM. 3.

SENeca PELAGIANUS.

1. Senecæ eujusdam errores a Pelagio hausti, prol. 6, cap. 6, num. 22.

SERMO.

1. Quid sit sermo sapientiæ et scientiæ, prol. 3, cap. 5, a num. 2.

SEVERINUS ET SEVERUS.

1. Severinus in Scotia Pelagii hæresim extinctam suscitavit, prol. 6, cap. 1, num. 23.
2. Severus Sulpitius an Semipelagianorum errore sit deceptus incertum; Catholicum obiisse constat, proleg. 5, cap. 5, a num. 33.

SIXTUS ROMANUS.

1. Sixtus, Pontifex Romanus, ante Pontificatum et in illo Pelagianorum accerrimus hostis, proleg. 6, cap. 1, num. 13. Quinam liberi ei falso ascripti, ibid.

SPES.

1. Spes est donum gratiæ gratum facientis, prol. 3, cap. 4, num. 15.
2. Spem theologicam actualem esse actum voluntatis vera sententia docet, lib. 2, cap. 12, num. 2. Quid de spe senserit Pelagius? ibidem, num. 3.
3. Spei actus ad salutem necessarius absque supernaturali gratiæ auxilio dari nequit, ibid., num. 5. In sua substantia et specie est supernaturalis, ibid., num. 9. Illius objectum explicatur, ibidem, num. 10.
4. Quomodo concurrat ex parte objecti spei, absentia boni sperati, lib. 2, cap. 12, num. 11.
5. Voluntas spe naturali potest tendere in beatitudinem per actum fidei infusæ vel acquisitæ cognitæ, lib. 2, cap. 12, num. 14.
6. Hæc spes specie distinguitur a supernaturali infusa, unde sumit hanc distinctionem, ibid., num. 15.
7. Spes alicujus boni necessario supponit amorem concupiscentiæ ejusdem, in eodem ordine, lib. 2, cap. 13, num. 12.
8. Spei habitus non manet in patria formaliter sub ratione et denominatione spei; sed ut habitus, seu principium amandi et fruendi beatitudine, lib. 2, cap. 13, num. 25.
9. Amittaturne spes per odium vel nolitionem beatitudinis, in utramque partem discutitur, ibidem. Non amittitur per præsumptionem, ibidem.
10. Spes supernaturalis et amor concupiscentiæ ab eodem habitu eliciuntur, lib. 2, cap. 13, num. 24.

STATUS.

1. Status variæ acceptiones, prolegomen. 4, cap. 1, num. 1. Status nomen beatitudini præcipue convenit, ibid., num. 2.
2. Status puræ naturæ quid includat, prolegomen. 4, cap. 1, num. 3. In quo consistat illius ratio, prolegomen. 4, cap. 2, num. 3, distinctus est ab statu integræ naturæ, ibid., num. 2.
3. Status innocentiae et justitiæ originalis idem est, proleg. 4, cap. 3, num. 1.
4. Status innocentiae quid addat ultra puræ et integræ naturæ statum, proleg. 4, cap. 3, per totum.

5. Status innocentiae quibus modis accipiatur, prolegomen. 4, cap. 3, num. 2. Excellentia hujus status expenditur, ibid., a num. 3.
6. Status naturæ integræ vel originalis justitiæ ex se non ordinat hominem ultra naturalem finem, prolegomen. 4, cap. 4, num. 4, juncto, cap. 3, num. 3.
7. Status integræ naturæ distinctus et separabilis est ab statu gratiæ, ibidem, num. 5. Status gratiæ et naturæ integræ nunquam de facto fuerunt separati, ibid., num. 6.
8. Status gratiæ secundum legem ordinariam est veluti fundamentum status innocentiae, prolegomen. 4, cap. 5, num. 3, et cap. 6, num. 9. Status innocentiae addit aliquam perfectionem a gratia distinctam, ibid., num. 2 et 5.
9. Status naturæ lapsæ inveniri potest in homine in quolibet statu condito, prolegomen. 4, cap. 6, num. 2. Per culpam moralem contrahitur, ibid., num. 1.
10. Status naturæ lapsæ non semper includit statum peccati, sed defectum integritatis naturæ ex culpa contractum, proleg. 4, cap. 6, num. 3. Status naturæ lapsæ comparatur cum reliquis, ibidem, a num. 6.
11. Status naturæ integræ, seclusa innocentia de potentia absoluta, comparabilis est cum statu naturæ lapsæ, proleg. 4, cap. 6, num. 8: secus tamen de potentia ordinaria, ibidem, num. 9.
12. Status puræ naturæ, excepto peccato, non differt ab statu naturæ lapsæ, proleg. 4, cap. 8, num. 14 et 15.
13. In statu puræ naturæ non diceretur homo vulneratus neque nudatus; secus in statu naturæ lapsæ, ibid., num. 20.
14. An plures in statu puræ naturæ mali forent, quam in statu naturæ lapsæ sunt, proleg. 4, cap. 9, num. 14 et 15.
15. Status innocentiae vel naturæ integræ ex gratuito privilegio esset expers erroris, lib. 1, cap. 1, num. 4. Utrum omnes naturales veritates collective attingeret, incertum. Pars negans verisimilior, ibid.
16. Status innocentiae nullam admitteret ignorantiam, lib. 1, cap. 1, num. 17.
17. In statu naturæ lapsæ nihil homines posse operari quod peccatum non sit, hæreticum dogma, lib. 1, cap. 3, num. 2.
18. Status naturæ lapsæ et puræ naturæ duplex differentia, lib. 1, cap. 28, num. 4, et 5.
19. Status naturæ integræ haberet omnes naturales virtutes per accidens infusas, lib. 1, cap. 38, n. 1. Propterea tunc non acquirerentur, ibid.
20. Status. Vide ADAM, NUM. 2. Vide ACTUS NATURALIS, NUM. 2 et 3.

SUPERNATURALITAS.

1. Supernaturalitas. Vide ACTUS SUPERNATURALIS. Vide FIDES.

T

TEMASIIUS.

1. Temasii et Jacobi ad Augustinum epistola, in ejus lib., cap. 16.

TENTATIO.

1. Tentationes a nobis avertere Deum in retributionem boni usus arbitrii, credebant Semipelagiani, prolegomen. 5, cap. 6, num. 18.

. Tentatio non mutat speciem aut motivum actus, lib. 1, cap. 22, num. 12.

. Tentatio quænam gravis aut levis dicatur, lib. 1, cap. 23, num. 2. Tentatio eadem potest uni esse gravis, alteri levis, ibidem. Tentationum genera tria, ibid., num. 3. Tentatio variis modis vinci potest, ibid., num. 4.

. Tentationes omnes vinci posse sine Dei auxilio, error fuit Pelagii, lib. 1, cap. 23, num. 7.

. Tentatio quælibet levis in particulari secundum se sine peculiariter Dei auxilio vinci potest, lib. 2, c. 23, num. 13.

. Tentatio quælibet gravis vinci nequit sine speciali Dei auxilio, lib. 1, cap. 24, num. 8. Non requiritur tamen gratia sanctificans, ibid., num. 16.

. Tentatio levis non obligat hominem ex præcepto ad orandum; obligat vero gravis, juxta multorum sententiam, lib. 1, cap. 24, num. 19.

. Gravem tentationem necessitare voluntatem ad peccandum, erravit Baius, lib. 1, cap. 23, num. 1 et 2.

. Ad vincendam tentationem gravem quænam gratia requiratur, ibid., num. 20.

0. Ad vincendam gravem tentationem necessitas gratiæ provenit ex impotentia non physica sed morali liberi arbitrii in statu naturæ lapsæ, lib. 1, cap. 24, num. 28.

1. Tentatio gravis requirit temporis moram, lib. 1, cap. 24, num. 34.

2. Tentatio etiam contra præceptum negativum an vinci possit sine positivo actu voluntatis, lib. 1, cap. 24, num. 41.

TESTAMENTUM.

. Novi Testamenti excellentia, in lib. Augustini, c. 5, ad fidem.

THEOLOGIA.

. Theologia comparatur sine speciali auxilio gratiæ, prolegom. 3, cap. 5, num. 8.

D. THOMAS.

. D. Thomæ pro tuenda gratia labor. Ejus Encomium, prolegom. 6, cap. 6, num. 28.

TIMOR.

. Timoris multiplex acceptatio, lib. 2, cap. 22, n. 1.

. Timor gehennæ vel amittendi supernaturalem beatitudinem, est actus supernaturalis, lib. 3, cap. 13, num. 13.

. Timor donum Spiritus Sancti actuale, significat timorem reverentialem divini Majestatis, lib. 2, cap. 21, num. 18 et 22. Ut sic est donum a cæteris distinctum, ibid.

. In beatis manet, ibidem, num. 22.

. In materia humilitatis ac temperantiæ versatur, ibidem.

. Timor Dei servilis non est donum Spiritus Sancti actus, lib. 2, cap. 11, num. 20. Si quando timor Dei servilis etiam honestus dicitur donum Spiritus Sancti, tunc sumitur in lata significatione donum, vel cautè, ibid., num. 21.

. Actualis timor beatus et initialis non est donum Spiritus Sancti, neque ab speciali habitu donum timoris elicetur, sed a virtute charitatis, lib. 2, c. 21, num. 21.

. Timor beatus et initialis solum differunt tanquam perfectum et imperfectum in eadem specie, ibidem.

TOLERANTIA PERSECUTIONUM.

1. Tolerantia persecutionum propter justitiam, octava beatitudo est, lib. 2, cap. 22, num. 18. In quibus virtutum actibus consistat, ibidem, num. 19.

TRINITAS.

1. Trinitas est vera gratia increata, prolegomen. 3, cap. 3, num. 4.

U

UNIO.

1. Unio hypostatica an gratia dici possit? proleg. 3, cap. 2, num. 11.

V

VERBUM.

1. Personalitas divini Verbi naturæ humanæ unita gratia dici potest, prolegom. 3, cap. 3, num. 3.

VERITAS.

1. Veritas divina quomodo sit ratio cognoscendi omnes veritates extra se, proleg. 2, cap. 9, num. 9.
2. Veritas creata nulla datur absque voluntate Dei, ibid., num. 8.
3. Utrum, et quomodo gratia necessaria sit ad omnes veritates cognoscendas, lib. 1, cap. 1, a n. 1, latissime.

VINCENTIUS.

1. Vincentius Lyrinensis inter Semipelagianos immerito censetur, prolegomen. 5, cap. 5, num. 18.

VIOLENTUM.

1. Violentum quid sit, et in quo a coacto distinguatur, proleg. 1, cap. 1, num. 4.

VIRGINITAS.

1. Virginitas matrimonio potior est, in lib. Augustini, cap. 10.

2. Virginitas moraliter honesta, an dari queat sine gratiæ auxilio? libro 1, cap. 37, num. 19.

BEATA VIRGO.

1. Beata Virgo, a peccato originali præservata, gratiam simul cum natura adeptæ est, prolegom. 4, cap. 1, num. 13. In statu naturæ integræ concepta, proleg. 4, cap. 2, num. 4.

2. Hæc integritas personalis non originalis fuit, proleg. 4, cap. 3, num. 1. Licet haberit integritatem naturæ, non habuit omnia privilegia status innocentie, ibid., num. 16.

3. Beatam Virginem peccatum actuale non commisisse Ecclesia tenet, proleg. 6, cap. 2, num. 16.

VIRTUS.

1. Virtutes omnes possunt ex charitate diligi, lib. 1, cap. 5, num. 15.

2. Virtutes morales quo pacto non dentur sine charitate, lib. 1, cap. 38, num. 4.

3. Virtutes morales in gradu perfecto acquiri nequeunt sine gratiæ auxilio, ibidem, num. 8 et 11. Nec etiam omnes simul sine gratia acquiri possunt, lib. 1, cap. 38, num. 12.

4. Virtutes connexæ in eodem subjecto facilius operantur, *ibidem*, num. 9.
5. Status naturæ integræ haberet omnes naturales virtutes per accidens infusas, lib. 1, cap. 38, n. 1.
6. Virtutes infusæ ad quam speciem qualitalis spectent, lib. 2, cap. 9, num. 3.
7. Virtutes nobiliores quam theologicæ dari nequeunt, lib. 2, cap. 21, num. 25.

VITA, ET VITALIS.

1. Vitam æternam esse homini et Angelo connaturalem, ex vi solius naturæ et operationum ab illa precedentium sentit Baius, proleg. 6, cap. 2, n. 5.
2. Non repugnat actum vitalem esse quoad substantiam, supernaturalem, lib. 2, cap. 9, num. 1.
3. Vitalis an auctor extiterit hæresis Semipelagianorum, proleg. 5, cap. 5, num. 5.

VITIUM.

1. Vitium omne non est omni virtuti contrarium, lib. 1, cap. 7, num. 14.

VOCATIO.

1. Vocatio est prima gratia, proleg. 3, cap. 6, num. 12. Variis nominibus significatur, *ibidem*.
2. Vocationis nomine quid Faustus Semipelagianus intelligat, proleg. 5, cap. 5, num. 31.
3. Vocationis congruitatem in quo constituent Patres? proleg. 2, cap. 5, num. 16.
4. Quid si vocatio divina? libro 2, cap. 3, num. 17.

VOLUNTAS ET VOLUNTARIUM.

1. Voluntas necessitatem non coactionem pati potest, proleg. 1, cap. 1, num. 5.
2. Voluntas qua potentia passiva, non est libera, proleg. 1, cap. 2, num. 4.
3. Voluntas est causa completa et proxima suorum actuum, proleg. 1, cap. 2, num. 11. Si cognitio intellectus in actus voluntatis influat effective, proxime et complete, libera non dicitur, nisi post cognitionem, *ibid.*
4. Voluntas non est proxime et simpliciter libera ad actus supernaturales; fit tamen talis per habitus infusos, vel auxilium supernaturale, lib. 1, cap. 2, num. 11.
5. Voluntas in actu primo cum omnibus ad agendum requisitis libera adhuc est, proleg., 1, cap. 2, n. 15, et cap. 3, num. 4.
6. Voluntas Dei ad concurrendum cum creata est conditionata, proleg. 1, cap. 3, num. 16.
7. Voluntas etiam naturaliter sæpe necessario operatur, proleg. 1, cap. 4, n. 1. A nulla causa creata proposito objecto indifferenter cum pleno rationis usu necessitari potest, *ibid.*
8. Voluntas ad actus elicitos absolute cogi non potest a Deo, proleg. 2, cap. 4, num. 1 et 20. Potest tamen necessitari quoad speciem et exercitium, etiam stante iudicio de objecto indifferente, *ibid.*, a num. 9. Hæc necessitas a Patribus coactio et violentia interdum dicitur, *ibid.*, num. 20. Hæc necessitas induci potest a Deo per qualitatem impressam ab actu distinctam, proleg. 1, cap. 5, a num. 1. Hæc qualitas permanens vel transiens esse potest, *ibid.*, num. 5.
9. Voluntas solum a Deo, vel a seipsa effective mutari potest, proleg. 1, cap. 5, num. 8.

10. Voluntas nulla indita qualitate a Deo immediate necessitari valet, proleg. 1, cap. 5, num. 9. Non per solam voluntatem ipsius Dei, *ibidem*, a num. 14. Non per eundem concursum, quo libere operaretur, *ibidem*, a num. 13. Sed per alium alterius rationis, *ibid.*, num. 20.
11. Voluntas creata ad suum actum suspendendum non indiget Dei concursu, proleg. 1, cap. 3, num. 19 et 25.
12. Voluntas creata necessitari nequit, nisi impediatur potestas ad suspendendum suos actus, proleg. 1, cap. 5, num. 26. Potens simul est ad actus appositos eliciendos, illos tamen simul elicere non valet, *ibid.*
19. Voluntas in eodem instanti quo elicit actum, illo carere nequit, proleg. 1, cap. 6, num. 10.
14. Voluntas divina est prima radix effectuum liberorum, proleg. 1, cap. 6, num. 30. Non solum voluit ut causæ liberæ actus exercerent, sed etiam ut libere id facerent, *ibid.*
15. In quam partem hic et nunc positus omnibus ad agendum requisitis, voluntas sit inclinatura, Deus ab æterno præscivit, proleg. 2, cap. 1, num. 6.
16. Voluntatem natura sua non esse determinatam ad malum, de fide est, proleg. 2, cap. 5, num. 8, et prolegom. 5, cap. 7, a num. 2.
17. Voluntas divina dandi gratiam disposito distincta est a voluntate dandi auxilium, proleg. 2, cap. 8, num. 4.
18. Voluntatem hominis esse potentiam pure passivam asserit Lutherus, proleg. 3, cap. 7, num. 3.
19. Voluntas regulariter non cadit, nisi præcedente defectu in intellectu practico, lib. 1, cap. 2, n. 14.
20. Voluntas creata non indiget physica prædeterminatione ad actus liberos, lib. 1, cap. 9, num. 3.
21. Voluntas cum generali concursu naturali potest bene moraliter operari, lib. 1, cap. 9, num. 5.
22. Voluntatis motio potest esse per modum habitus vel qualitalis transeuntis, lib. 1, cap. 9, num. 7.
23. Voluntas, positus aequalibus bonis et aequaliter consideratis, potest quodlibet libere eligere, lib. 1, cap. 12, num. 15.
24. Delicere possit voluntas, quin præcedat error in intellectu, lib. 1, cap. 12, num. 18 et 19.
25. Voluntas non obedit intellectui despotice, sed politice, lib. 1, cap. 12, num. 19.
26. Voluntatem credendi, sicut oportet, nullus habere potest sine supernaturali gratia Dei excitante et adjuvante, lib. 2, cap. 3, num. 2 et 10.
27. Voluntas credendi a qua fides divina procedit, prava esse nequit, neque ob extrinsecum finem malum haberi potest, lib. 2, cap. 3, num. 14.
28. Non solum voluntas credendi, sed initium ejus est specialis gratia Dei, lib. 2, cap. 3, num. 16.
29. Viribus naturæ potest dari aliqua voluntas credendi, et quænam illa sit, lib. 2, cap. 10, n. 3 et 6.
30. Voluntas credendi Catholici habet diversam rationem objectivam a voluntate credendi hæretici, lib. 2, cap. 11, num. 35.
31. Voluntatis actus. Vide ACTUS, num. 2 et 3.
32. Voluntas. Vide CONCURSUS.
33. Voluntarium quid sit, proleg. 1, cap. 1, num. 5.

VULNUS.

1. Vulnus ignorantie quid abstulerit? lib. 1, cap. 1, num. 19.
2. Vulnus ignorantie plus læsit intellectum practicum quam speculativum, lib. 1, cap. 2, num. 14.

Carentia donorum et auxiliorum specialium est privatio et vulnus in statu naturæ lapsæ. non ita in puris naturalibus, lib. 1, cap. 1, num. 7.

Quo sensu verum sit hominem fuisse in naturalibus vulneratum, prolegom. 4, cap. 8, num. 19.

In statu puræ naturæ non diceretur homo vulneratus, neque nudatus: secus in statu naturæ lapsæ, prol. 4, cap. 8, num. 20.

Z

ZOSIMUS.

1. Zosimus, Romanus Pontifex, Pelagii et Cœlestii errores secundo damnavit, proleg. 6, cap. 1, num. 4. Cum Innocentio concinit in doctrina de Gratia, ibidem, num. 5.





es ed)
2307

INSTITUTE OF MEDIEVAL STUDIES
71 ELMESBY PLACE
TORONTO 5, CANADA.

2967

